


# Kàddug Yàlla gi



Wolof Bible 2020 revision.

**Kàddug Yàlla gi**  
**Wolof Bible 2020 revision.**  
**La bible en wolof; revision 2020**

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2020-07-22

---

PDF generated using Haiola and XeLaTeX on 11 Nov 2022 from source files dated 23 Jul 2020

eb088fb7-76e3-5c5f-ab35-a0da6cd8fd40

## Contents

Njàlbéen ga . . . . .	1	1.Timote . . . . .	905
Mucc ga . . . . .	52	2.Timote . . . . .	909
Sarxalkat yi . . . . .	97	Tit . . . . .	912
Màndin ma . . . . .	129	Filemon . . . . .	914
Baamtug Yoon wi . . . . .	174	Yawut ya . . . . .	915
Ruut . . . . .	211	Yanqóoba . . . . .	927
1.Samiyel . . . . .	215	1.Piyeer . . . . .	931
2.Samiyel . . . . .	247	2.Piyeer . . . . .	936
1.Buur ya . . . . .	275	Yudd . . . . .	939
2.Buur ya . . . . .	307	Peeñu ma . . . . .	941
Esra . . . . .	338		
Neyemi . . . . .	349		
Esteer . . . . .	365		
Ayóoba . . . . .	373		
Sabóor . . . . .	401		
Kàddu yu Xelu . . . . .	475		
Kàdduy Waare . . . . .	502		
Ngën-gi-woy . . . . .	511		
Esayi . . . . .	517		
Yeremi . . . . .	576		
Jooytu . . . . .	637		
Esekiyel . . . . .	644		
Dañeel . . . . .	698		
Ose . . . . .	713		
Yowel . . . . .	722		
Amos . . . . .	726		
Abdiyas . . . . .	734		
Yunus . . . . .	736		
Mise . . . . .	738		
Nawum . . . . .	744		
Abakug . . . . .	747		
Cefaña . . . . .	750		
Ase . . . . .	753		
Sàkkaryaa . . . . .	756		
Malasi . . . . .	767		
Luug . . . . .	771		
Jëf ya . . . . .	806		
Room . . . . .	840		
1.Korent . . . . .	856		
2.Korent . . . . .	871		
Galasi . . . . .	881		
Efes . . . . .	887		
Filib . . . . .	892		
Kolos . . . . .	896		
1.Tesalonig . . . . .	900		
2.Tesalonig . . . . .	903		

## Njàlbéen ga di xaaj bi jëkk ci Tawreetu Musaa Ubbite gi

*Njàlbéen ga* mooy téere bi jëkk ci Tawreet. Yonent Yàlla Musaa moo bind Tawreet, juróomi téere yi jiitu ci Mbind mu sell mi.

Téereb *Njàlbéen ga* moo tēnk ndoortel lépp lu Yàlla sàkk, muy asamaan ak suuf ak gāncax geek rab yi, ba ci nit; lépp di lu baax.

Téere bii nag wone na ni àddina mujj mel, ndax ñaawtéefi nit, yi law ba sunu jonni Yàllay tey. Gis nanu ci *Njàlbéen ga* ne ca Aadama ak Awa la nit dale déggadil Yàlla, di wuta moom boppam tey fippu, te loolu mooy bàkkaaram. Mu jural ko lu bon, jural ko coonob àddina bu tar, tey gēna tar, soreele kook Yàlla. Booba la dee tàmbali ci àddina. Nekkinu nit mujj na naqari lool, nekkinu suuf it noonu, wuuteek ba Yàlla di sàkk lépp, ba mu baax.

Nu gis ne *Njàlbéen ga* dafa lëkkloo ak mboolem yeneen wàll yi ci des, lépp di benn xibaar buy dégtal nit alkāndeem, gi sababoo ci bàkkaaram, te di ko xamal mbaaxu Yàlla ñeel képp kuy doom Aadama. Waaye xibaar la it buy yégle àtteb Yàlla, ñeel ñi xalab aw yiwam.

Pexe mi Yàlla lalal nit ngir texeem te misaalon ko xaat ci *Njàlbéen ga* ci saar 3, aaya 15 (3.15), mu ngi sottee ci musalkat bi wara ñew.

Téereb *Njàlbéen ga* nag làqul matadig nitoo nit, te yonenti Yàlla yi sax mucçuñu ci bàkkaar. Looloo tax du kenn ci yonent yi ku manona sottal li Yàlla tēralal doom Aadama, ngir mu mucc ci noteelu bàkkaar, mucc ci sànkute gi bàkkaar jur, ba jot ci yiwu Yàlla wi koy texeel.

Bu loolu weese, téereb *Njàlbéen ga* leeral na ci saar 12, aaya 3 (12.3) ne, la Yàlla digoon Ibraayma, maami aji gēm ñi, dig ko doomam Isaaxa ak sētam, Yanqóoba, moom Isaaxa ak askanam ñoo ko jëkkoona jago. Waaye dige la bu jaare

ca ñoom, doon barke, ñeel xeeti àddina yépp.

Ibraayma wone na nu nit wara taxawe, ba jot ci digeb Yàlla. Ngēm gu dēggu ak koolute gu wēr ci Yàlla. Ngēm googu ak koolute googu ci Yàllaak kàddoom moo mana tax nit ku nekk mana jot ci barke bi Yàlla dig Ibraayma, doonte kenn yelloowu ko.

Ci Tēnk:

1:1-2:25 Lu jēm ci càkkuteefu asamaan ak suuf

3:1-3:24 Lu jēm ci bàkkaar nit ak njeexitalam

4:1-8:22 Lu jēm ci askanu Kayin ak Set ba ca mbēnn ma

9:1-11:9 Gannaaw mbēnn ma ba ca taaxum Babel

11:10-50:26 Lu jēm ci Ibraayma ak Isaaxa ak Yanqóoba ba ci Yuusufa

*Yàlla sàkk na àddina, fal ci nit*

<sup>1</sup> Ca njàlbéen ga Yàlla sàkk na asamaan ak suuf. <sup>2</sup> Suuf nag daa maase woon te wéet, lëndēm muur ndox mu xóot mi, lale ca kaw, Noowug Yàlla di wēr, tiim ndox mi.

<sup>3</sup> Ba loolu amee Yàlla ne: «Na leer nekk,» leer daldi am. <sup>4</sup> Yàlla gis ne leer gi lu baax la, mu xàjjale leer ak lëndēm. <sup>5</sup> Yàlla tudde leer gi bëccëg, lëndēm gi guddi. Ngoon jot, suba dugg, muy bés ba jëkk.

<sup>6</sup> Yàlla ne: «Na aw dénd dox diggante ndox yi, ngir xàjjale leen, yii fii, yii fale.»

<sup>7</sup> Yàlla nag sàkk dénd wi, xàjjalee ko ndox yi féete dénd wi suuf ak yi ko féete kaw. Mu daldi nekk noona. <sup>8</sup> Yàlla tudde dénd wi asamaan. Ngoon jot, suba dugg, muy bés sub ñaareel ba.

<sup>9</sup> Yàlla ne: «Na ndox, mi asamaan tiim, gëndoo benn bérab, ba joor gu wow feeñ.» Mu daldi nekk noona. <sup>10</sup> Yàlla tudde joor gu wow gi suuf, ndox mi gëndoo, mu tudde ko géej. Yàlla gis ne baax na.

<sup>11</sup> Yàlla ne: «Na suuf sax ñax, muy gāncax gu ànd ak jiwoom, ak garab yuy meññ tey jur seeni jiwu, lu ci nekk ak wirgoom ci kaw suuf.» Mu daldi nekk noona. <sup>12</sup> Suuf nag sax ñax, muy gāncax gu ànd ak wirgoy jiwoom, ak garab yuy

meññ tey jur seeni wirgoy jiwu. Yàlla gis ne baax na. <sup>13</sup> Ngoon jot, suba dugg, muy bésusb ñetteel ba.

<sup>14</sup> Yàlla ne: «Na am ay leer ci asamaan, ngir xàjjale guddi ak bëccëg, te doon ay tegtal, yuy ràññle jamono yi, tey takk bés yi ak at yi. <sup>15</sup> Nañu nekk ay leer ci asamaan si, di leeral suuf.» Mu daldi nekk noona. <sup>16</sup> Yàlla sàkk ñaari leer yu mag, gi gëna mag yilif bëccëg, gi gëna ndaw yilif guddi; mu sàkk it biddiwi yi. <sup>17</sup> Yàlla nag teg leen ci asamaan, di ca leeral suuf, <sup>18</sup> ñuy yore guddi ak bëccëg, tey xàjjale lëndëm ak leer. Yàlla gis ne baax na. <sup>19</sup> Ngoon jot, suba dugg, muy bésusb ñeenteel ba.

<sup>20</sup> Ba loolu amee Yàlla ne: «Na ndox fees ak ay ndiiraani xeeti bindeef, te ay picc tiim suuf, di naaw ci asamaan.» <sup>21</sup> Ci biir loolu Yàlla bind rabi géej yu mag yi ak mboolem mbindeef muy féey tey ramm-rammi ci ndox mi, mu ci nekk ak wirgoom, teg ca lépp luy boroomi laaf, lu ci nekk ak wirgoom. Yàlla gis ne baax na. <sup>22</sup> Ba mu ko defee Yàlla barkeel leen, daldi ne: «Giirleen te bare, ba fees ndoxi géej.» Mu neeti: «Na picc yi bare ci kaw suuf.» <sup>23</sup> Ngoon jot, suba dugg, muy bésusb juróomeel ba.

<sup>24</sup> Yàlla ne: «Na suuf génne ay bindeef, mu ci nekk ak wirgoom: ag jur, luy raam aki rabi àll, lu ci nekk ak wirgoom.» Mu daldi nekk noona. <sup>25</sup> Yàlla dafa bind rabi àll yi, lu ci nekk ak wirgoom, jur gu ci nekk ak wirgoom, ak lépp luy raam ci kaw suuf, lu ci nekk ak wirgoom. Yàlla nag gis ne baax na.

<sup>26</sup> Yàlla ne: «Nanu bind nit ci sunu melokaan, mu nirook nun, te na yilif jëni géej ak picci asamaan ak jur gépp ak suuf sépp ak lépp lu ciy raam.»

<sup>27</sup> Yàlla dafa bind nit ci takkndeeram; ci takkndeeru boppam la Yàlla bind nit, góor ak jigéen la bind.

<sup>28</sup> Yàlla barkeel leen ne leen: «Giirleen te bare, ba fees àddina, di ko saytu; te it yilifleen jëni géej ak picci asamaan ak mboolem mbindeef muy yëngu ci kaw suuf.»

<sup>29</sup> Yàlla ne: «Xool-leen, jox naa leen gépp gàncax gu ànd ak jiwoom ci kaw

suuf sépp ak gépp garab guy meññ tey jur jiwoom, muy seen dund. <sup>30</sup> Naka rabi àll yépp it, ñook picci asamaan yépp ak lépp luy raam ci kaw suuf, te di boroom bakkan, jox naa leen lépp luy ñax mu tooy, ñoom itam, muy seen lekk.» Mu daldi nekk noona.

<sup>31</sup> Yàlla nag gis li mu def lépp, fekk lépp baax lool. Ngoon jot, suba dugg, muy bésusb juróom benneel ba.

## 2

<sup>1</sup> Ci kaw loolu asamaan ak suuf ak li ñu ëmb lépp mat. <sup>2</sup> Bésusb juróom ñaareel ba fekk na Yàlla matal liggéeyam. Mu dal-lu nag ca bésusb juróom ñaareel ba, gannaaw ba mu liggéeyee loolu lépp. <sup>3</sup> Yàlla daldi barkeel bésusb juróom ñaareel ba, def ko bés bu sell, ndax da caa dal-lu woon gannaaw liggéey, ba mu sàkke lépp.

### Cosaanal asamaan ak suuf (Saar 2.4—4.26)

#### *Yàlla dugal na nit Àjjana, jox ko ndigal*

<sup>4</sup> Liy cosaanal asamaan ak suuf, ba ñu leen di sàkk, mooy lii. Bés ba Aji Sax ji Yàlla sàkkee suuf ak asamaan, <sup>5</sup> genn garab nekkagul woon ci kaw suuf, te genn gàncax saxagul; ndaxte booba Yàlla Aji Sax ji tawagul, te nit kuy bey amagul. <sup>6</sup> Ci biir loolu mbënn di balle ci suuf, di tooyal fépp. <sup>7</sup> Yàlla Aji Sax ji nag móol nit ci pëndu suuf, sol ngelawal dund ci paxi bakkanam, nit daldi doon boroom bakkan.

<sup>8</sup> Naka noona Yàlla Aji Sax ji jëmbat tool ca biir Àjjana fa féete penku ba, tàbbal ca nit ka mu bind. <sup>9</sup> Yàlla Aji Sax ji nag saxal ci suuf lépp luy garab gu meññeef ma rafet te neexa lekk; mu def it garab gay taxa dund ca digg tool ba, moom ak garab gay taxa xam lu baax ak lu bon.

<sup>10</sup> Amoon na dex guy balle Àjjana, di suuxat tool ba, dale fa nag, séddlikoo, def ñeenti wal. <sup>11</sup> Turu menn wal ma di dexu Pison, moo wër réewum Awila mépp. Wurus a nga woon ca réew mooma, <sup>12</sup> di wurusu ngalam; te it ndàbb lu neex xet a nga fa woon ak per yu jafe yu ñuy wax onigsë. <sup>13</sup> Ñaareelu dex ga di Giyon, wër

réewu Kuus mépp; <sup>14</sup> turu ñetteelu dex ga di Tiigar, féete réewum Asiri penku; ñeenteelu dex ga di Efraat.

<sup>15</sup> Yàlla Aji Sax ji nag jël nit ki, tàbbal ko biir toolub Àjjana, mu di ko bey ak a sàmm. <sup>16</sup> Yàlla Aji Sax ji sant nit ki, ne ko: «Man ngaa lekk ci mboolem garabi tool bi, <sup>17</sup> waaye bul lekk ci garab giy taxa xam lu baax ak lu bon, ndaxte bés boo ci lekkee kat, li wér mooy fa ngay doxe dee.»

<sup>18</sup> Yàlla Aji Sax ji daldi ne: «Wéet baaxul ci nit, kon dinaa ko bindal ku koy jàpple te jekk ci doon wéttalam.» <sup>19</sup> Loolu fekk na Yàlla Aji Sax ji sàkk ci suuf nja-àll yépp ak njanaaw yépp, daldi leen indil nit, di seet nu leen nit di tudde; te tur wu mu leen jox, muy moom. <sup>20</sup> Ba mu ko defee nit kooku, di Aadama, tudd jur gépp ak picc yépp ak rabi àll yépp, waaye fekku ca ku koy jàpple te jekk ci doon wéttalam.

<sup>21</sup> Bi loolu amee Yàlla Aji Sax ji nelawloo Aadama nelaw yu xóot. Ba muy nelaw nag, mu rocci genn ciy faaram, fatte pax ma aw suux. <sup>22</sup> Yàlla Aji Sax ji bind jigéen ci faar, gi mu jële ci Aadama, indil ko ko. <sup>23</sup> Aadama ne tonet, daldi ne: «Waaw kay nag, kii moo bokk ci samay yax ak sama suux!

Dees na ko tudde jigéen, ndaxte ci góor lees ko jële\*.»

<sup>24</sup> Looloo tax góor di bàyyikoo ci ndeyam ak baayam, ànd ak soxnaam, ñuy wenn suux.

<sup>25</sup> Ku góor ki ak soxnaam, ñoom ñaar ñépp, yaramu neen lañu defoon, te amuñu ci woon genn kersa.

### 3

#### *Yàlla dàq na nit Àjjana*

<sup>1</sup> Jaan nag moo gènoona muus ci rabi àll, yi Yàlla Aji Sax ji sàkk yépp. Jaan ja moo ne jigéen ja: «Ndax wóor na ne Yàllaa ne: “Buleen lekk ci doomi genn garabu tool bi?”» <sup>2</sup> Jigéen ja wax jaan ja, ne ko: «Man nanoo lekk ci doomi garabi tool bi kay. <sup>3</sup> Waaye garab gi ci digg tool bi la Yàlla ne: “Buleen ci lekk, buleen ko laal sax, lu ko moy ngeen dee.”» <sup>4</sup> Jaan

ja ne jigéen ja: «Déedéet, dungeen dee! <sup>5</sup> Waaye Yàlla xam na ne bés bu ngeen ci lekkee, seeni bët dina ubbiku, ngeen mel ni Yàlla, xam lu baax ak lu bon.»

<sup>6</sup> Jigéen ja dafa gis ne garab gi rafet na, niru na lu neex, te mata bëgg ci kuy wuta am xel, mu witt ci doom yi, lekk; jox ci jëkkëram, ji mu àndal, moom it mu lekk. <sup>7</sup> Seenii bët daldi ubbiku, ñu xam ne yaramu neen lañu def. Ba mu ko defee ñu ràbb xobi garabu figg, gemboo.

<sup>8</sup> Gannaaw loolu ñu dégg tànk Yàlla Aji Sax ji, muy doxantu ca tool ba, fekk ker gi sedd, ñu daldi fexee làqu Yàlla Aji Sax ji ci biir garabi tool bi. <sup>9</sup> Yàlla Aji Sax ji nag ne Aadama: «Ana nga?» <sup>10</sup> Mu ne ko: «Damaa dégg say tànk ci tool bi, tiit, ndax yaramu neen laa def, ma daldi làqu.» <sup>11</sup> Yàlla Aji Sax ji ne ko: «Ku la xamal ne dangaa def yaramu neen? Mbaa du dangaa lekk ca garab, ga ma la aaye, waay?» <sup>12</sup> Aadama ne ko: «Jigéen, ji nga ma booleel de, moo ma jox ci garab gi, ma lekk.» <sup>13</sup> Yàlla Aji Sax ji ne jigéen ja: «Yaw, li nga def nii mooy lan?» Jigéen ja ne ko: «Aa, jaan de moo ma nax, ba ma lekk ci.»

<sup>14</sup> Yàlla Aji Sax ji nag ne jaan ja: «Gannaaw def nga loolu, yaw rekk yaay alku ci rabi kër yépp ak rabi àll yépp; dinga watatu, di lekk pënd sa giiru dund gépp.

<sup>15</sup> Dinaa def mbañeel sa digganteek jigéen ji, ba dëddale sa xeet ak xeetam, muy toj sa bopp, nga di ko màtt ci téstën.»

<sup>16</sup> Yàlla teg ca ne jigéen ja: «Dinaa taral sa metitu mat, ci metit ngay wasin. Sa bëgg-bëggu bakkan dina la xiir ci sa jëkkër, te moo lay teg tànk.»

<sup>17</sup> Mu tegaat ca ne Aadama: «Gannaaw dégg nga sa waxu soxna, ba lekk ci garab gi ma la aaye, dinaa rëbb suuf ndax yaw;

\* **2:23** 2.23 Ni ñuy wooye góor ak ni ñuy wooye jigéen dañoo jegeyoo ci làkku ebrë.

coono bu metti nga ciy dunde sa giiru dund gépp.

<sup>18</sup> Suuf dina la meññalal ay dég aki dagg, doo lekk te beyoo,

<sup>19</sup> saw ñaq ngay dunde, ba kera ngay dellu ci suuf, si ma la jële; ndaxte pënd nga, te dinga dellu di pënd.»

<sup>20</sup> Aadama nag tudde soxnaam Awa (mu firi Dund), ndax mooy ndeyu képp kuy dund. <sup>21</sup> Gannaaw gi Yàlla Aji Sax ji sàkkal Aadama ak soxnaam ay yérey der, wodde leen. <sup>22</sup> Yàlla Aji Sax ji daldi ne: «Léegi nit mel na ni nun, xam lu baax ak lu bon. Kon nag bumu tàllal loxoom, di witt ci doomi garab giy taxa dund, di lekk, bay dund fàww.»

<sup>23</sup> Ba loolu amee Yàlla Aji Sax ji génne ko toolub Àjjana, muy bey suuf, si ñu ko sàkke. <sup>24</sup> Da koo dàq, ba noppi teg ca penkub toolu Àjjana ba ay malaakay serub\*, boole ca saamar buy xuyy-xuyyi, tey dem ak a dikk, di wattu yoon, wa jëm ca garab gay taxa dund.

## 4

### *Kayin rey na Abel*

<sup>1</sup> Gannaaw loolu Aadama dëkkoo na soxnaam Awa, mu ëmb, am Kayin, mu ne: «Am naa doom ju góor ci ndimbalu Aji Sax ji\*.» <sup>2</sup> Awa teg ca rakkam, Abel. Abel di sàmm, Kayin di bey†.

<sup>3</sup> Ñu dem ba mu yàgg, Kayin sàkk ci mbeyam, jébbal ko Aji Sax ji, màggale ko ko. <sup>4</sup> Abel moom jébbal ko nebbonu jur, ga jékka juddu ca géttam. Aji Sax ji nangul Abel, <sup>5</sup> te nangulul Kayin. Kayin nag mer lool, ba ne fóññ.

<sup>6</sup> Aji Sax ji ne Kayin: «Lu la taxa mer, ba ne fóññ nii? <sup>7</sup> Soo defee lu baax, dees na la nangul; soo deful lu baax, bàkkaar a ngi lay yeeru ci sa bunt, di la tërook a wut, waaye yaa ko wara man.»

<sup>8</sup> Ci kaw loolu Kayin séq ak rakkam Abel wax. Ba mu ko defee ñu dem ca àll ba, Kayin dal ci kaw Abel, bóom ko. <sup>9</sup> Aji

Sax ji ne Kayin: «Ana sa rakk Abel?» Mu ne ko: «Gisuma ko de; xanaa maa wara sàmm sama rakk?» <sup>10</sup> Yàlla ne ko: «Loo def? Sa deretu rakk jaa ngi yuuxoo ci suuf, ma di ci dégg. <sup>11</sup> Léegi dinga alku, ba suuf dummóoyu la, moom mi ubbi gémmiñam, naan sa deretu rakk, ji nga tuur. <sup>12</sup> Boo beyee, dootu nangu. Dinga dëkke dan-dan, di wëreelu ci àddina.»

<sup>13</sup> Teewul Kayin wax Aji Sax ji ne ko: «Sama mbugal diis na lool, ba àttanuma ko! <sup>14</sup> Ndegam tey jii danga maa dàq, xañ ma sa jataay, dinaa dëkke dan-dan, di wëreelu ci kaw suuf, te kon ku ma gis rey ma.» <sup>15</sup> Aji Sax ji ne ko: «Kon nag ku la rey, yaw Kayin, dina jot juróom ñaari yoon lu ko raw.» Ba loolu amee mu sàkkal Kayin màndarga, ba ku ko gis du ko rey. <sup>16</sup> Kayin daldi bàyyikoo ca Aji Sax ji, dem dëkki réewu Nódd‡, fa féete Àjjana penku.

### *Askanu Kayin*

<sup>17</sup> Gannaaw loolu Kayin dëkkoo na soxnaam, mu ëmb, am Enog. Ci biir loolu Kayin sanc ab dëkk, dippee ko doomam ju góor Enog. <sup>18</sup> Enog jur Iraat; Iraat jur Mexuyayel; Mexuyayel jur Metusayel; Metusayel jur Lemeg. <sup>19</sup> Lemeg nag jël ñaari jabar, aawo bi tudd Ada, ñaareel bi di Silla. <sup>20</sup> Ada taawloo Yabal, miy cosaanu sàmm yiy màngaan, <sup>21</sup> teg ca Yubal, miy cosaanu ñi mane xalam ak toxoro. <sup>22</sup> Silla moom jur Tubal Kayin miy tegg lépp luy jumtukaayu xàñar ak weñ. Tubal Kayin am na jigéen bu tudd Naama.

<sup>23</sup> Lemeg nag ne ay soxnaam: «Dégluleen maa, yeen soxnay Lemeg, teeyluleen maa, yeen Ada ak Silla. Nit a ma gaañ, ma bóom, goneg jàmbaar dóor ma, ma faat.

<sup>24</sup> Kayin kay, lees di feyul juróom ñaari yoon, ne, bu dee Lemeg mii, muy juróom ñaar fukki yoon ak juróom ñaar.»

<sup>25</sup> Bi loolu wéyee Aadama dëkkoo soxnaam, mu am doom ju góor; tudde ko Set (mu firi May), ndax da ne: «Yàlla may

\* **3:24** 3.24 serub: serub yi ay bindeef lañu yu teew fa Yàlla.

\* **4:1** 4.1 Awa mu ngi dendle turu taawam

Kayin ak baatu ebrë biy tekki «am». † **4:2** 4.2 Kayin, Abel: am na ñu leen gëna xam ci turi Xabiil ak Abiil.

‡ **4:16** 4.16 Nódd baatu ebrë la buy tekki «ku dëkkul fenn».

na ma weneen askan, mu wuutu Abel, mi Kayin rey.» <sup>26</sup> Set it, am doom ju góor, tudde ko Enos. Fan yooya lañu tàmbalee tudd Aji Sax ji, di ko wormaal.

## **Askanu Aadama, ba ci Nóoyin**

### 5

*(Saar 5.1—6.8)*

<sup>1</sup> Ni téere indee askanu Aadama nii la. Ba Yàlla di sàkk nit, da koo bind ci melokaanam, <sup>2</sup> góor ak jigéen la sàkk, barkeel leen, tudde leen Nit, keroog ba mu leen sàkkee.

<sup>3</sup> Aadama dund téeméeri at ak fanweer (130), jur doom ju góor, mu bindoo melokaanam te nirook moom. Mu tudde ko Set. <sup>4</sup> Set juddu na, Aadama dundaat juróom ñetti téeméeri at (800), amaat ay doom yu góor ak yu jigéen. <sup>5</sup> Kon Aadama dund na juróom ñeenti téeméeri at ak fanweer (930), doora faatu.

<sup>6</sup> Set moomee am na téeméeri at ak juróom (105), doora jur Enos. <sup>7</sup> Enos juddu na, Set dundaat juróom ñetti téeméeri at ak juróom ñaar (807), amaat doom yu góor ak yu jigéen. <sup>8</sup> Kon Set dund na juróom ñeenti téeméeri at ak fukk ak ñaar (912), doora faatu.

<sup>9</sup> Enos nag am na juróom ñeent fukki at (90), doora jur Kenan. <sup>10</sup> Kenan juddu na, Enos dundaat juróom ñetti téeméeri at ak fukk ak juróom (815), amaat doom yu góor ak yu jigéen. <sup>11</sup> Kon Enos dund na juróom ñeenti téeméeri at ak juróom (905), doora faatu.

<sup>12</sup> Kenan moomee am na juróom ñaar fukki at (70), doora jur Malaleel. <sup>13</sup> Malaleel juddu na, Kenan dundaat juróom ñetti téeméeri at ak ñeent fukk (840), amaat ay doom yu góor ak yu jigéen. <sup>14</sup> Kon Kenan dund na juróom ñeenti téeméeri at ak fukk (910), doora faatu.

<sup>15</sup> Malaleel nag am na juróom benn fukki at ak juróom (65), doora jur Yeredd. <sup>16</sup> Yeredd juddu na, Malaleel dundaat juróom ñetti téeméeri at ak fanweer (830), amaat ay doom yu góor ak yu jigéen. <sup>17</sup> Kon Malaleel dund na juróom

ñetti téeméeri at ak juróom ñeent fukk ak juróom (895), doora faatu.

<sup>18</sup> Yeredd moomee am na téeméeri at ak juróom benn fukk ak ñaar (162), doora jur Enog. <sup>19</sup> Enog juddu na, Yeredd dundaat juróom ñetti téeméeri at (800), amaat ay doom yu góor ak yu jigéen. <sup>20</sup> Kon Yeredd dund na juróom ñeenti téeméeri at ak juróom benn fukk ak ñaar (962), doora faatu.

<sup>21</sup> Enog moomee, am na juróom benn fukki at ak juróom (65), doora jur Matusalem. <sup>22</sup> Matusalem juddu na, ba noppi Enog topp Yàlla ñetti téeméeri at (300), amaat ay doom yu góor ak yu jigéen. <sup>23</sup> Kon Enog dund na ñetti téeméeri at ak juróom benn fukk ak juróom (365). <sup>24</sup> Enog dafa topp Yàlla, ba jekki-jekki giseesatu ko, ndaxte Yàllaa ko yéegé fa moom.

<sup>25</sup> Matusalem moomee am na téeméeri at ak juróom ñett fukk ak juróom ñaar (187), doora jur Lemeg. <sup>26</sup> Lemeg juddu na, Matusalem dundaat juróom ñaar téeméeri at ak juróom ñett fukk ak ñaar (782), amaat ay doom yu góor ak yu jigéen. <sup>27</sup> Kon Matusalem dund na juróom ñeenti téeméeri at ak juróom benn fukk ak juróom ñeent (969), doora faatu.

<sup>28</sup> Lemeg nag am na téeméeri at ak juróom ñett fukk ak ñaar (182), doora jur doom ju góor. <sup>29</sup> Mu tudde ko Nóoyin (mu firi Noflaay) ndax dafa ne: «Kii moo nuy taxa noyyiwaat, noppal nu ci liggéey yu metti ak coonoy mbeyu suuf, si Aji Sax ji rèbb.» <sup>30</sup> Nóoyin juddu na, Lemeg dundaat juróomi téeméeri at ak juróom ñeent fukk ak juróom (595), amaat ay doom yu góor ak yu jigéen. <sup>31</sup> Kon Lemeg dund na juróom ñaar téeméeri at ak juróom ñaar fukk ak juróom ñaar (777), doora faatu.

<sup>32</sup> Nóoyin moomee am na juróomi téeméeri at (500), doora jur Sem ak Xam ak Yafet.

### 6

*Yàlla fas na yéene tas àddina ndax mbonu nit*



<sup>1</sup> Bi nga xamee ne nit ñi tàmbali nañoo fulandiwu ci kaw suuf, te am ay doom yu jigéen, <sup>2</sup> ay goney Yàlla ñoo gis jigéen ñeek seen taar, ñuy jël ñi ñu bëgg ci ñoom, def leeni jabar. <sup>3</sup> Aji Sax ji daldi wax ne: «Manumaa bàyyi nit, muy wéyee dunde noo, gi ma ko may, ndax nit du dara lu dul suuxi neen, kon dinaa leen àppal diirub téeméeri at ak ñaar fukk (120).»

<sup>4</sup> Ca jamono yooya ak itam gannaaw ba goney Yàlla yooyu àndeek jigéeni àddina, ba am ca ay doom, aw xeetu ponkal wu ñuy wax Neflim moo nekkoon ci àddina. Ñooy ponkal ya woon te doonoon góor ñu amoon tur.

<sup>5</sup> Aji Sax ji dafa gis ne mbonu nit màgg na lool ci biir àddina, te fu mu mana tollu, lu bon rekk lay xinte ci xolam. <sup>6</sup> Aji Sax ji nag am tiis ci xolam, ba mititlu li mu doon sàkk nit ci kaw suuf. <sup>7</sup> Aji Sax ji daldi ne: «Dinaa far ci kaw suuf doom aadama yi ma sàkk, nit ak jur, luy raam ak luy naaw, ndax mititlu naa li ma leen sàkk.»

<sup>8</sup> Waaye fekk na Aji Sax ji xool Nóoyin bëti yërmande.

## Askanu Nóoyin

(Saar 6.9—9.29)

<sup>9</sup> Askanu Nóoyin mooy lii. Nóoyin nit ku jub la woon, di ku mat ci biir nit ñi mu bokkal jamono, te di ku topp Yàlla.

<sup>10</sup> Nóoyin nag amoon na ñetti doom yu góor: seeni tur di Sem, Xam ak Yafet.

<sup>11</sup> Booba fekk na àddina yàqu, te fees ak ay, Yàlla teg ci bëtam. <sup>12</sup> Yàlla gis ne àddina yàqu na, ndaxte jëfi ñépp a bokk ñaaw fi kaw suuf.

<sup>13</sup> Ba mu ko defee Yàlla ne Nóoyin: «Dogal naa ne dinaa boole faat mboolem boroom bakkan, ndaxte ayu nit dajal na kaw suuf. Dinaa leen boole ak li ci àddina, faagaagal.

<sup>14</sup> «Yaw nag wutal dénku sippar, yettal ci sa bopp gaal gu mag; nga sàkk ci ay néeg, te diw ko koltaar biir ak biti. <sup>15</sup> Ni nga koy defare nii la. Na guddaayu gaal gi di ñetti téeméeri xasab, yaatuwaay bi di juróom fukki xasab, taxawaay bi di fanweeri xasab. <sup>16</sup> Yettal mbaar, mu ko tiim, te nga àggle gaal gi, bàyyi lu tollook

xasab diggante kéméj yi ak mbaar mi. Sàkkal ko bunt ci wet gi, te séddale ko ñetti néeg yu tegloo, benn ci suuf, benn ci digg bi ak benn ci kaw.

<sup>17</sup> «Maa ngi nii di indi mbënnu ndox ci kaw suuf, mu far lépp luy dund lu asamaan tiim; te lépp lu nekk ci kaw suuf dina dee. <sup>18</sup> Waaye dinaa fas kóllère ak yaw, nga dugg ci gaal gi, yaak say doom ak sa soxna ak say soxnay doom. <sup>19</sup> Te xeeti rab yépp nanga ci dugal ñaar ci gaal gi, wu ci nekk, nga def ko góor ak jigéen; su ko defee ngeen ànd mucc. <sup>20</sup> Xeetu picc wu ci nekk ak xeetu bàyyima wu ci nekk ak wépp xeetu rab wuy raam ci suuf, dina def ñaar, ñëw ci yaw, ba raw. <sup>21</sup> Sàkkal ci bépp xeetu dund, denc, ngeen bokk dunde.»

<sup>22</sup> Noonu la Nóoyin def. Lépp lu ko Yàlla sant, def na ko.

## 7

### Yàlla musal na Nóoyin ci mbënn mi

<sup>1</sup> Gannaaw ba loolu amee Aji Sax ji dafa wax Nóoyin ne ko: «Duggal ci gaal gu mag gi, yaak sa njaboot gépp, ndaxte niti jamono jii, yaw rekk laa ci gis, nga jub ni ma ko bëgge. <sup>2</sup> Xeeti rab yu set\* yépp yóbbaaale ci juróom ñaar yu góor ak juróom ñaar yu jigéen, ak ñaar ci xeeti rab yi setul, te ñuy góor ak jigéen. <sup>3</sup> Te it xeetu picc mu nekk yóbbaaale ci juróom ñaar yu góor ak juróom ñaar yu jigéen, ngir seen xeet baña fey ci kaw suuf. <sup>4</sup> Ndax kat li feek juróom ñaari fan dinaa wàcce taw ci kaw suuf diiru ñeent fukki guddi ak ñeent fukki bëccëg, ba far ci àddina mboolem mbindeef mu ma sàkk.» <sup>5</sup> Nóoyin daldi def la ko Aji Sax ji sant lépp.

<sup>6</sup> Bi mbënn miy ñëw ci àddina, booba fekk na Nóoyin am juróom benni téeméeri at. <sup>7</sup> Nóoyin dugg na ca gaal ga, ànd ak ay doomam ak soxnaam ak soxnay doomam ya, ngir mucc ca ndoxu mbënn ma. <sup>8</sup> Rab yu set yi ak yi setul ak picc yi ak yiy raam <sup>9</sup> ànd nañu ak Nóoyin, dugg ca gaal ga, def ñaar-ñaar, góor ak jigéen, ni ko Yàlla sante Nóoyin. <sup>10</sup> Ba juróom ñaari

\* 7:2 7.2 rab yi set ñoo di rab, yi Yàlla nangu, ñu sarxal ko.

fan wéyee nag, ndoxu mbënn ma agsi ci kaw suuf.

<sup>11</sup> At ma Nóoyin amee juróom benni téeméeri at, ca fukki fan ya ak juróom ñaar ca ñaareelu weer wa, kera la bëti ndox ya ne jàyy, jóge xóotey géej, bunti ndoxi asamaan ne kulbét, mu ne yureet, <sup>12</sup> taw biy sottiku ci suuf diiru ñeent fukki guddi ak ñeent fukki bëccëg.

<sup>13</sup> Keroog bés boobu la Nóoyin ànd aki doomam yu góor, Sem ak Xam ak Yafet, ak soxnaam ak ñetti soxnay doomam yooyu, ñu dugg ca gaal ga, <sup>14</sup> àndandook rabu àll yépp, lu ci nekk ak wirgoom, ak jur gépp, lu ci nekk ak wirgoom, ak lépp luy raam ci kaw suuf, lu ci nekk ak wirgoom, ak lépp luy naaw, lu ci nekk ak wirgoom, muy picc mbaa boroomi laaf. <sup>15</sup> Lépp luy boroom bakkan def na ñaar-ñaar, ànd ak Nóoyin, dugg ca gaal ga, <sup>16</sup> mboolem xeetu mbindeef rekk, di góor ak jigéen, ni ko ko Yàlla sante. Ci kaw loolu Aji Sax ji ne ràpp buntu gaal gi, gannaaw bi Nóoyin duggee.

<sup>17</sup> Mbënn ma nag di wal ci àddina diiru ñeent fukki fan. Ndox ya di yokku, gaal gay jóg, ba tëmb, tiim suuf lu sore. <sup>18</sup> Ma ngay gën di yokku, tey baawaan ci kaw suuf, ba gaal ga tëmb, di dem ca kaw ndox ma. <sup>19</sup> Ndox ma di walangaan, ba mëdd tund yu kawe ya fépp fu asamaan tiim. <sup>20</sup> Muy yokku, di yokku, ba gëna kawe tund ya lu mat fukki xasab ak juróom.

<sup>21</sup> Mboolem mbindeef mu daan dox ci kaw suuf dee na ca. Picc yi ak jur gi ak rabi àll yi ak lépp luy raam ci kaw suuf dee na, ñoom ak nit ñépp. <sup>22</sup> Mboolem mbindeef muy boroom bakkan ci kaw suuf a bokk dee. <sup>23</sup> Luy dund ci àddina daldi sànkú, ba nit ak jur ak luy raam ak luy naaw— lépp la Aji Sax ji raafal ci àddina. Nóoyin rekk a des, moom ak ña àndoon ak moom ca gaal ga.

<sup>24</sup> Ndox mi nag di wal-wali ci kaw suuf diirub téeméeri fan ak juróom fukk.

## 8

### *Nóoyin génn na gaal gu mag ga*

<sup>1</sup> Ci biir loolu Yàlla xalaat na Nóoyin ak li mu nekkal ci gaal gi, di rabi àll yi

ak jur gi. Yàlla daldi yebal ngelaw, mu wal kaw suuf, ba ndox yi wàcc. <sup>2</sup> Bëti ndox ya ca xóote ya dafa taxaw, bunti ndoxi asamaan tëju, taw bi dal. <sup>3</sup> Ci kaw loolu ndox mi taa ci suuf di wàññiku. Bi téeméeri fan yi ak juróom fukk matee nag, ndox ma gëna néew. <sup>4</sup> Ba juróom ñaareelu weer wa amee fukki fan ak juróom ñaar, gaal gaa nga teereji tundi Araraat. <sup>5</sup> Ndox may wàññiku rekk ba ca fukkeelu weer wa. Keroog ba fukkeelu weer wa teroo, ca la njobbaxtali tund ya tàmbalee feeñ.

<sup>6</sup> Teg nañu ca ñeent fukki fan, Nóoyin doora ubbi poroxndoll, ba mu sàkkaloon gaal ga, <sup>7</sup> daldi yebal ab baaxoñ, muy naaw, di dem ak a dikk, ba ndox mi fendi ci kaw suuf. <sup>8</sup> Mu teg ca yebal pitax, ba xam ndax ndox mi ci suuf fer na. <sup>9</sup> Teewul pitax ma gisul fenn fu mu tag, ndax ndox mi muur na suuf sépp. Mu délsi nag fa moom ca gaal ga. Nóoyin tàllal loxoom, jàpp ko dugal ci biir fi wetam. <sup>10</sup> Négandiku na juróom ñaari fan, doora yebalaat pitax ma. <sup>11</sup> Ba mu délsee ca ngoon, indaalewul lu moy xobu oliw wu tooy wu keppe ca sàll wa. Nóoyin xam ne ndox mi taa woon ci suuf, fer na. <sup>12</sup> Mu négati juróom ñaari fan, bàyyiwaat pitax ma. Boobu yoon nag délsiwaatul ca moom.

<sup>13</sup> At ma Nóoyin amee juróom benni téeméeri at ak benn, keroog benn fanu weer wa jëkk, ndox ma taa woon ca suuf daldi fendi. Nóoyin ubbi kubeer ga, xool, ba gis ne kaw suuf sépp wow na. <sup>14</sup> Keroog ñaar fukki fan ak juróom ñaar ca ñaareelu weer wa, ca la suuf si doora wow konj.

<sup>15</sup> Ba loolu amee Yàlla ne Nóoyin: <sup>16</sup> «Génnal gaal gi, yaak sa soxna ak say doom ak say soxnay doom. <sup>17</sup> Génnewaaleel lépp luy xeetu mbindeef mu ngeen àndal: picc yi ak bàyyima yi ak luy raam, ñu fulandiwu ci kaw suuf, daldi giir te bare.» <sup>18</sup> Nóoyin daldi génn, moom aki doomam ak soxnaam ak soxnay doomam ya. <sup>19</sup> Rabi àll yi ak luy raam ak luy naaw ak luy dox ci kaw suuf — lépp génne ca gaal ga, lu ci nekk ak wirgoom.

<sup>20</sup> Naka la Nóoyin génn, daldi sàkkal Aji Sax ji sarxalukaay, mąggale ko ko. Mu sàkk nag ci mboolem rab wu set ak mboolem picc mu set, jébbal Yàlla ca sarxalukaay ba, muy saraxu rendidóomal. <sup>21</sup> Ci kaw loolu xetug jàmm gillee ca sarax sa, yéeg fa Aji Sax ja. Booba la wax ci xolam ne: «Dootuma rēbb suuf muk ndax nit, doonte ba muy ndaw lay dale xinte lu ñaaw ci xolam. Dootuma boole fàdd muk lépp luy dund, nii ma ko defe.

<sup>22</sup> Li feek suuf di suuf, dootu jiwooy dakk mbaa ngóob, te du sedd aku tangoor, du nawet it mbaa noor, mbaa guddeek bëccëg.»

## 9

### *Yàlla fas na kóllère ak Nóoyin*

<sup>1</sup> Ci kaw loolu Yàlla barkeel Nóoyin aki doomam ne leen: «Giirleen te bare, ba fees àddina. <sup>2</sup> Mboolem rabi àll yi ak njanaawi asamaan ak ndëgmeent yi ci suuf, ak jëni géeg yépp, dinañu leen ragal lool. Teg naa leen ci seeni loxo. <sup>3</sup> Man ngeena dunde boroom bakkan yooyu yépp. Jagleel naa leen bindeef yooyu yépp, ni ma leen jagleele woon gancax.

<sup>4</sup> «Waaye buleen lekk yàpp wu ànd ak deret, ndaxte dund a ngi ci deret. <sup>5</sup> Seen dundu nit itam, mu ngi ci seen deret, kon kat, képp ku tuur seen deret dinaa ko ko topp. Te it mala mu ci rey nit dinaa ko ko topp, ni may toppe nit. Dinaa topp ku nekk deretu moroomam.

<sup>6</sup> Ku tuur deretu nit, na nit tuur deretam, ngir melokaanu boppam la Yàlla sàkke nit.

<sup>7</sup> Yeen nag, giirleen te bare, fulandiwu ci kaw suuf te fees ko.»

<sup>8</sup> Yàlla nag wax Nóoyin ak doomam, yi mu àndal, ne leen: <sup>9</sup> «Bés niki tey fasal naa sama bopp kóllère sama diggante ak yeen ak seen askan, <sup>10</sup> fas ko it sama diggante ak mboolem mbindeef mu ngeen àndal, muy picc akug jur mbaa rabi àll—lépp daal lu génnandoo ak yeen ci gaal gi,

di lépp luy dund ci kaw suuf. <sup>11</sup> Ni may faseek yeen kóllère nii la:

Deesatul boole bindeef yépp, faat ci mbënn muk.

Du menn mbënn mu deeti faagaagal àddina.»

<sup>12</sup> Yàlla neeti: «Kóllère gi may fas ak yeen ak mboolem mbindeef mu ànd ak yeen, day sax ba fàww te liy màndargaam mooy lii: <sup>13</sup> def naa sama xon ci niir yi, muy màndargaal kóllère, gi dox sama diggante ak àddina.

<sup>14</sup> «Saa su ma dajalee niir yi ci jaww ji, ba xon gi feeñ ci niir yi, <sup>15</sup> damay daldi xalaataat kóllère, gi ma fas sama digganteek yeen ak mboolem xeeti bindeef, su ko defee ndox dootu sabab mbënn muy faagaagal lépp luy dund. <sup>16</sup> Xon gi day nekk ci biir niir yi, ma di ko gis, di xalaat kóllère, gi ma fas fàww, sama diggante, man Yàlla, ak mboolem xeetu mbindeef mu nekk ci kaw suuf.»

<sup>17</sup> Ci kaw loolu Yàlla ne Nóoyin: «Loolu mooy màndargaal sama kóllère, gi ma fas ak mboolem mbindeef mu nekk ci kaw suuf.»

### *Mbirum Nóoyin ma aki doomam*

<sup>18</sup> Doomi Nóoyin yu góor, yi géenne ci gaal gi, ñooy: Sem, Xam ak Yafet; Xam mooy baayu Kanaan. <sup>19</sup> Nnooñu ñooy ñetti doomi Nóoyin yu góor, te ci ñoom la àddina sépp soqikoo.

<sup>20</sup> Nóoyin ab beykat la woon. Mu nekk nag ci njëmbatum reseñ. <sup>21</sup> Mu am bés mu naan biiñ, ba màndi, tēdd ci xaymaam, daldi sàgganu.

<sup>22</sup> Ba loolu amee Xam, baayu Kanaan, gis céri baayam, génn waxi ko Sem ak Yafet ca biti. <sup>23</sup> Sem ak Yafet ànd, jël malaan, teg ko ci seeni mbagg, doxe gannaaw ba agsi, doora sàng seen céri baay. Dañoo dummóoyu, ba gisuñu seen céri baay.

<sup>24</sup> Màndite ma giif, Nóoyin yewwu, daldi yég ni xale bi def ak moom. <sup>25</sup> Ba mu ko defee mu ne:

«Yal na Kanaan torox, bay jaamu jaami doomi ndeyam.»

<sup>26</sup> Mu dellu ne:

«Cant ñeel na Aji Sax ji, Yàllay Sem, yal na Kanaan dib jaamam.

27 Yal na Yàlla lawal askanu Yafet, dëël ko ci xaymay Sem, te Kanaan di seen jaam.»

28 Gannaaw ba mbënn ma wéyee, Nóoyin dundaat na ñetti téeméeri at ak juróom fukk (350). 29 Nóoyin dund na juróom ñeenti téeméeri at ak juróom fukk (950), doora faatu.

## Askanu doomi Nóoyin

### 10

(Saar 10.1—11.9)

*Xeet yi sosoo ci doomi Nóoyin*

1 Askanu doomi Nóoyin mooy lii. Gannaaw ba mbënn ma wéyee, Sem ak Xam ak Yafet am nañu ay doom.

*Li jëm ci askanu Yafet*

2 Doomi Yafet yu góor ñii la: Gomeer ak Magog ak Madéy ak Yawaan ak Tubal ak Meseg ak Tiraas. 3 Doomi Gomeer yu góor di Askenas, Rifaat ak Togarma. 4 Doomi Yawaan yu góor di Elisa ak Tarsis ak Kitim ak Dodanim. 5 Ñi sosoo ci ñoom ñoo law ca wàllaa géej, meññ nag ay xeet ci seeni suuf, xeet wu ci nekk ak làkkam, def it ay làng ci seen biiri xeet.

*Li jëm ci askanu Xam*

6 Doomi Xam yu góor ñoo di ñii: Kuus ak Misrayim ak Puut ak Kanaan. 7 Doomi Kuus yu góor di Seba ak Awila ak Sabta ak Raama ak Sabteka. Doomi Raama yu góor di Saba ak Dedan.

8 Kuus moom itam jur Namróot, ki jëkk di jambaar ju siiw ci kaw suuf, 9 mu doonoon rëbbkat bu maga mag. Looloo waral ñu naan: «Mbete Namróot, rëbbkat bu maga mag ba.» 10 Dëkk yiy péeyi nguuram ñoo di: Babel ak Ereg ak Akàdd ak Kalne, gi ci réewu Sineyaar. 11-12 Ca réew mooma la Namróot jóge dem Asur, sanc dëkk bu mag boobee di Niniw, ak dëkk yooyee di Reyobot Ir ak Kala, ba Resen, gi ci diggante Niniw ak Kala.

13 Misrayim nag mooy maami Luddeen ñi ak Anameen ñi ak Leyabeen ñi ak Naftuyeen ñi 14 ak Pataruseen ñi ak Kasluyeen, ñooñee waa Filisti bàyyikoo ca seen réew; ak it Kaftoreen ñi.

15 Kanaan moo taawloo Sidon, teg ca Ett, 16 te mooy maami Yebuseen ñi ak Amoreen ñi ak Girgaseen ñi 17 ak Eween ñi ak Arkeen ñi ak Sineen ñi, 18 ak Arwàddeen ñi ak Semareen ñi ak Amateen ñi. La ca tegu làngi Kanaan tasaaroo. 19 Kemu suufas Kanaaneen ña, mu ngi tàmbalee Sidon, jaar weti Gerar, dem ba Gasa, wuti Sodom ak Gomor ak Atma ak Ceboyim, daldi teeri Lesa.

20 Ñooñu ñooy askani Xam, askan wu ci nekk ak làngam ak làkkam, di ay xeet ci seeni réew.

*Li jëm ci askanu Sem*

21 Sem, miy magu Yafet, jur na moom itam ay doom yu góor. Mooy maami Eber ak askanam. 22 Doomi Sem yu góor ñii la: Elam ak Asur ak Arpagsàdd ak Ludd ak Aram. 23 Góor ñi Aram jur ñii la: Uus ak Xuul ak Geter ak Maas. 24 Arpagsàdd jur Sela, Sela jur Eber; 25 Eber moom, jur ñaari doom yu góor, kenn ki tudd Peleg (mu firi Séddlikoo), ndaxte ci jamonoom àddina dafa séddlikoo woon. Rakku Peleg mooy Yogtaan.

26 Yogtaan a jur Alamodàdd ak Selef ak Asarmawet ak Yera 27 ak Adoram ak Usal ak Digla 28 ak Obal ak Abimayel ak Saba 29 ak Ofir ak Awila ak Yobab. Ñooñu ñépp di doomi Yogtaan yu góor. 30 Ña nga dëkkoon ca wàllu Mesa, ga wuti Sefar, di diiwaanu tund ya ca penku.

31 Ñooñoo askanoo ci Sem, askan wu ci nekk ak làngam ak làkkam, di ay xeet ci seeni réew.

32 Làngi doomi Nóoyin yu góor a ngoogu, làng gu nekk ak askanam, ñu diy xeet. Ci ñoom la xeet yépp jóge tasaaroo ci kaw suuf, gannaaw ba mbënn ma wéyee.

### 11

*Yàlla safaan na làkku àddina, mu jaxasoo*

1 Ca ndoorte la nag waa àddina sépp a bokkoon wenn làkk, seeni wax di benn. 2 Bi nit ñi toxoo, jëm penku, dañoo gis ag joor ci réewu Sineyaar, ñu sanc fa. 3 Ñu ne: «Ayca nu defar ay móol yu ñu lakk cib taal, ba mu ñor.» Ci kaw loolu ñu

def móol ya doji tabax, taqalee ko koltaar; <sup>4</sup> daldi ne: «Ayca nu tabax ab dëkk bu taax ma bëtt asamaan; kon dinanu am woy, te dunu tasaaroo ci kaw suuf.»

<sup>5</sup> Ba ñu noppee Aji Sax ji wàcc, xoolsi dëkk bi ak taax, mi doom aadama yi tabax. <sup>6</sup> Aji Sax ji da ne: «Su ñu tàmbalee nii, di menn mbooloo te bokk wenn làkk, kon dara dootu leen të. <sup>7</sup> Ayca nu wàcc, safaan seen làkk, ba dootuñu déggoo.»

<sup>8</sup> Ba loolu amee Aji Sax ji jële leen foofa, tasaare leen ci kaw suuf sépp, ñu yemale fa dëkk ba ñu doon tabax. <sup>9</sup> Looloo tax ñu tudde dëkk ba Babel (mu firi Safaan), ndax foofa la Aji Sax ji safaane làkku àddina sépp, mu jaxasoo, te fa la leen tasaaree ci kaw suuf sépp.

## Askanu Sem, maamu Ibraam

(Saar 11.10-26)

<sup>10</sup> Askanu Sem mooy lii. Sem am na téeméeri at, doora jur Arpagsàdd, fekk na mbënn ma wees, ba mu am ñaari at. <sup>11</sup> Arpagsàdd juddu na, Sem dundaat juróomi téeméeri at (500), juraat ay doom yu góor ak yu jigéen.

<sup>12</sup> Arpagsàdd am fanweeri at ak juróom, jur Sela. <sup>13</sup> Sela juddu na, Arpagsàdd dundaat ñeenti téeméeri at ak ñett (403), juraat ay doom yu góor ak yu jigéen.

<sup>14</sup> Sela am fanweeri at, jur Eber. <sup>15</sup> Eber juddu na, Sela dundaat ñeenti téeméeri at ak ñett (403), juraat ay doom yu góor ak yu jigéen.

<sup>16</sup> Eber am fanweeri at ak ñeent, jur Peleg. <sup>17</sup> Peleg juddu na, Eber dundaat ñeenti téeméeri at ak fanweer (430), juraat ay doom yu góor ak yu jigéen.

<sup>18</sup> Peleg am fanweeri at, jur Rew. <sup>19</sup> Rew juddu na, Peleg dundaat ñaar téeméeri at ak juróom ñeent (209), juraat ay doom yu góor ak yu jigéen.

<sup>20</sup> Rew am fanweeri at ak ñaar, jur Serug. <sup>21</sup> Serug juddu na, Rew dundaat ñaar téeméeri at ak juróom ñaar (207), juraat ay doom yu góor ak yu jigéen.

<sup>22</sup> Serug am fanweeri at, jur Naxor. <sup>23</sup> Naxor juddu na, Serug dundaat ñaar téeméeri at, juraat ay doom yu góor ak yu jigéen.

<sup>24</sup> Naxor am ñaar fukki at ak juróom ñeent, jur Teraa. <sup>25</sup> Teraa gane na àddina, Naxor dundaat téeméeri at ak fukk ak juróom ñeent (119), juraat ay doom yu góor ak yu jigéen.

<sup>26</sup> Gannaaw ba Teraa amee juróom ñaar fukki at, am na Ibraam ak Naxor ak Aran.

## Askanu Teraa, baayu Ibraam

(Saar 11.27—25.11)

<sup>27</sup> Askanu Teraa mooy lii. Teraa mooy baayu Ibraam\* ak Naxor ak Aran. Aran mooy baayu Lóot. <sup>28</sup> Gannaaw loolu Aran faatu na lujiitu faatug baayam Teraa, ca réew ma mu juddoo, di Ur†, dëkku Kaldeen ña. <sup>29</sup> Ibraam ak Naxor jël nañu ay soxna; soxnas Ibraam tudd Sarayi, soxnas Naxor di Milka. Milka moomu, moom ak rakkam ju jigéen Yiska, Aran ay seen baay. <sup>30</sup> Sarayi moomu masuloona am doom te it manu ko woona am.

<sup>31</sup> Mu am bés Teraa ànd ak doomam Ibraam ak sëtam Lóot, mi Aran di baayam, ak Sarayi, soxnas Ibraam. Ñu bokk jóge Ur gu Kaldeen ña, jëm réewu Kanaan. Ba ñu demee ba Karan, daldi fay sanc. <sup>32</sup> Teraa dund na ñaar téeméeri at ak juróom (205), doora génn àddina, ñu denc ko Karan.

## 12

*Yàlla sant na Ibraam, mu gàddaay*

<sup>1</sup> Aji Sax ji moo waxoon Ibraam, ne ko: «Jógeel sam réew, jóge ci say bokk ak sa kër baay, te nga dem ca réew mi ma lay won,

<sup>2</sup> ma def la ngay cosaanal xeet wu yaa, barkeel la, mággal sa tur, ngay buntu barke;

<sup>3</sup> ku la ñaanal barke, ma barkeel, ku la móolu it, ma alag, te xeeti àddina sépp, ci yaw lañuy barkeele.»

\* **11:27** 11.27 Ibraam mii: Yàlla dina ko mujja tudde Ibraayma. Seetal ci 17.5. † **11:28** 11.28 Ur: dëkk bu yàggoon la, te bokkoon ci réew, mi ñu tudde Iraag léegi.

<sup>4</sup> Ibraam daldi dem, na ko ko Aji Sax ji waxe woon, Lóot topp ca. Ba Ibraam di jóge Karan, booba am na juróom ñaar fukki at ak juróom (75). <sup>5</sup> Ibraam ànd ak soxnaam Sarayi ak Lóot, mi muy baay bu ndaw ci moom. Mu yóbbaaale nag alal, ja mu dajale jépp, ak jaam, ya mu jënde Karan. Ñu jóge fa, jublu réewu Kanaan.

<sup>6</sup> Ba ñu agsee Kanaan, Ibraam dafa jàll ca biir réew ma, ba àgg bérab bu sell, ba féete ak Sikem, ca garab\* gu mag, ga ñuy wooye More. Booba fekk na waa Kanaan a nga woon ca réew ma. <sup>7</sup> Ci kaw loolu Aji Sax ji feeñu Ibraam ne ko: «Sa askan wi soqikoo ci yaw laay jox réew mii.» Ibraam nag daldi tabaxal Aji Sax, ji ko feeñu, ab sarxalukaay.

<sup>8</sup> Gannaaw loolu mu jóge fa, jëm tund, wi féete Betel penku, samp fa xaymaam; Betel féete ko sowu, Ayi féete ko penku. Foofa itam Ibraam tabaxal na fa Aji Sax ji sarxalukaay, tudd fa Aji Sax ji, wormaal ko. <sup>9</sup> Ibraam bàyyikooti fa, aw yoonam, jublu àllub Negew†.

### *Ibraam dem na réewum Misra*

<sup>10</sup> Ca jamono jooja xiif a amoon ca réew ma, ba tax Ibraam dem réewum Misra, toogi fa, ndax xiif bu metti la woon. <sup>11</sup> Naka lay jub Misra, daldi ne soxnaam Sarayi: «Déglu ma, xam naa ne ku rafet nga. <sup>12</sup> Bu la waa Misra gisee, dinañu ne sama soxna nga. Te dinañu ma rey, nga des. <sup>13</sup> Kon nag ngalla waxal ne sama jigéen nga, ba tax ma am jàmm; su ko defee dees na ma bàyyi, ma dund, te di la ko gèreme.»

<sup>14</sup> Ba Ibraam àggee Misra, waa Misra gis ne jigéen ji mu àndal rafet na lool. <sup>15</sup> Jaraafi Firawna itam gis ko, di ko kañ ca Firawna ndax taar ba, ñu daldi ko yóbbu ca kër Firawna. <sup>16</sup> Firawna nag topptoo Ibraam bu baax ndax moom, ñu may ko ay gàtt ak ay nag, ay mbaam yu góor, ak ay jaam yu góor ak yu jigéen, ak ay mbaam yu jigéen aki giléem.

\* **12:6** 12.6 Xeeetu garab la gu ñuy wax terebent. † **12:9** 12.9 àllub Negew: mu nga féete Kanaan bëj-saalum, nekk ca yoonu Misra. Li muy tekki mooy «wowaay». \* **13:10** 13.10 Tool booba mooy Àjjana, fa Yàlla jëkkoon

<sup>17</sup> Teewul Aji Sax ji wàcce ca Firawna ak waa kërám jàngoro yu metti ndax Sarayi, soxnas Ibraam. <sup>18</sup> Firawna woolu Ibraam ne ko: «Li nga ma def nag? Lu tax waxoo ma ne kii sa soxna la? <sup>19</sup> Lu tax nga ne sa jigéen la, ba tax ma jël ko, bëgg koo def sama jabar? Ayca, sa jabar a ngoog, fabal te ne mott!» <sup>20</sup> Naka la Firawna wax loolu ba noppi, daldi sant ay dagam, ñu génne Ibraam réew ma, moom ak soxnaam ak alalam jépp.

## 13

### *Ibraam ak Lóot teqlikoo nañu*

<sup>1</sup> Bi loolu amee Ibraam dafa jóge Misra, moom ak soxnaam, yóbbaaale alalam jépp, daldi dem ca àllub Negew, Lóot topp ca. <sup>2</sup> Ibraam nag amoon alal ju bare diggante jur, xalis ak wurus. <sup>3</sup> Gannaaw loolu mu awati yoonam, jóge àllub Negew, jëm dëkk ba ñu naa Betel, dem ba àgg ca bérab, ba mu jëkkoon samp xaymaam, ci diggante Betel ak Ayi, <sup>4</sup> fa mu tabaxoon ab sarxalukaay. Ibraam nag tudd fa Aji Sax ji, wormaal ko.

<sup>5</sup> Ci biir loolu Lóot, mi mu àndal, moom it yor jur gu gudd ak gu gàtt aki xayma, <sup>6</sup> ba tax xajatuñu ca réew ma, ndax seen alal dafa bare, ba manatuñu faa bokk dëkk. <sup>7</sup> Loolu tax sàmmi Ibraam ak sàmmi Lóot di jote. Rax ci dolli Kanaaneen ñi ak Periseen ñi ña nga woon ca réew ma.

<sup>8</sup> Ba loolu amee Ibraam da ne Lóot: «Waay waay, bu xuloo am sama digganteek yaw mbaa say sàmm ak samay sàmm. Xanaa dunuy bokk nag? <sup>9</sup> Xanaa àll bi newul yàmblan ngay gis? Nan teqlikoo, kay; boo demee càmmoñ, ma dem ndijoor; boo demee ndijoor, ma dem càmmoñ.»

<sup>10</sup> Ba mu waxee ba noppi, Lóot dafa xool, gis joor, gi wër dexu Yurdan gépp, màndi ndox. Ndax laata Aji Sax jiy tas dëkk yu ñuy wax Sodom ak Gomor, àll bi jëm Sowar dafa naatoon, ni réewum Misra naate, ba faf mel ni toolub Aji Sax ja\*. <sup>11</sup> Ba mu ko defee Lóot tànn

\* **12:6** 12.6 Xeeetu garab la gu ñuy wax terebent. † **12:9** 12.9 àllub Negew: mu nga féete Kanaan bëj-saalum, nekk ca yoonu Misra. Li muy tekki mooy «wowaay». \* **13:10** 13.10 Tool booba mooy Àjjana, fa Yàlla jëkkoon

jooru Yurdan gépp, daldi toxu jëm penku. Noonu lañu teqlikoo. <sup>12</sup> Ibraam dëkke réewu Kanaan, Lóot sance dëkk ya ca jooru Yurdan, daldi toxal xaymaam, samp ko Sodom. <sup>13</sup> Waaye waa Sodom ñu bon lañu woon, te mana moy Aji Sax ji lool.

### *Digeb Aji Sax ja ak Ibraam*

<sup>14</sup> Gannaaw ba Lóot teqlikook Ibraam, Aji Sax ji wax na Ibraam ne ko: «Téenal foofu nga taxaw, te séenu bëj-gànnar ak bëj-saalum ak penkook sowu, <sup>15</sup> ndaxte réew, mi ngay gis mépp, yaw laa koy may ba fàww, yaak askan wi soqikoo ci yaw. <sup>16</sup> Dinaa leen yokk, ba ñu tollu ni feppi suuf, ba feppi suuf gëna neexa waññ sa askan. <sup>17</sup> Jógal wër réew mi mépp, ba mu daj, ndax yaw laa koy may.»

<sup>18</sup> Ba mu ko defee Ibraam sempi xaymaam, ñëw dal Ebron ca garab yu mag ya ca toolub Mamre, daldi fay tabaxal Aji Sax ji sarxalukaay.

## 14

### *Ibraam wallu na Lóot*

<sup>1</sup> Ca jamonoy Amrafel buurub Sineyaar, ak Aryog buurub Elasaar, Kedorlamer buurub Elam, ak Tidal buurub Goyim, <sup>2</sup> ànd nañu, dal ci kaw ñoom Bera buurub Sodom, ak Birsaa buurub Gomor, ak Sineyab buurub Atma, ak Semeber buurub Ceboyim, ak it buuru dëkk ba ñuy wax Bela, mooy Sowar ba tey. <sup>3</sup> Nnoño boooloo woon ca xuru Sidim, mooy géeku Xorom gi léegi. <sup>4</sup> Fekk na diiru fukki at ak ñaar Kedorlamer moo leen yilifoon, teewul ca fukkeelu at ma ak ñett ñu fippu.

<sup>5</sup> Ca déwén sa Kedorlamer ak buur ya faroon ak moom, dem dàq Refayeen ña ca Àsterot Karnayim, ak Suseen ña ca Am, ak Emeen ña ca jooru Kiryaatayim, <sup>6</sup> ak Oreen ña ca seen tund wa ñuy wax Seyir. Da leena dàq ba ca garabu Paran gu mag ga ca wetu màndiñ ma. <sup>7</sup> Ñu jóge fa nag, waññiku, dem En Mispas, di Kades ba tey, daldi teg mboolem réewum Amalegeen ña tànk, boole ca song Amoreen ña dëkk Asason Tamar.

<sup>8</sup> Ci kaw loolu buurub Sodom génn, mook buurub Gomor ak buurub Atma ak buurub Ceboyim ak buuru Bela, di Sowar ba tey, ñoom ñépp daldi làng, nara xare ca xuru Sidim, <sup>9</sup> di sot ñoom Kedorlamer buurub Elam, ak Tidal buurub Goyim, ak Amrafel buurub Sineyaar, ak Aryog buurub Elasaar. Ñeenti buur di xareek juróom.

<sup>10</sup> Waaye xuru Sidim woowu dafa feesoon dell aki pax aki kàmbi koltaar. Ba mu ko defee buuri Sodom ak Gomor di daw, far daanu ca kàmb ya. Ña ca des daw ba ca tund ya. <sup>11</sup> Ña leen dàq nag, jël alalu Sodom ak Gomor yépp, nanguwaale seen dund bépp boole ca, daldi dem seen yoon. <sup>12</sup> Booba lañu yóbbu Lóot ma dëkk Sodom, te Ibraam di baayam bu ndaw. Ci biir loolu ñu yóbbaaale li mu amoon lépp, dem.

<sup>13</sup> Ba loolu xewee, kenn ci ñi ñu jàppoon récc, ñëw ci Ibraam miy ab Ebré, wax ko ko. Fekk na mu dëkk ca wetu garab yu mag ya woon ca toolub Mamre, ma dib Amoreen, di mbokk mu jege ci Eskol ak Aner, ñoom ñi doon wóllérey Ibraam.

<sup>14</sup> Ba Ibraam dégge ne jàpp nañu Lóot ma muy baayam bu ndaw, fa saa sa daa dajale dagam, yi juddoo këram te tollu ci ñetti téeméer ak fukk ak juróom ñett (318), ñu dàq buur ya ba dëkk ba ñuy wax Dan. <sup>15</sup> Ibraam dafa xàjjale mboooloom, dal ci kaw buur ya guddi, dàq leen, topp ci ñoom ba Koba, ca bëj-gànnaru Damaas. <sup>16</sup> Ibraam nag délloosi alal ja jépp, nangu Lóot, mook alalam, ak jigéen ña ak ñeneen, ña ñu jàppoon.

### *Melkisedeg ñaanal na Ibraam barke*

<sup>17</sup> Gannaaw ba Ibraam dàqee Kedorlamer ak buur ya àndoon ak moom, ba délsi, buurub Sodom dafa génn, gatandu ko ca xur wa ñuy wax Sawe, ñu di ko wooye xuru Buur ba tey. <sup>18</sup> Ci kaw loolu Melkisedeg\* buurub Salem, mi doon sarxalkatu Yàlla Aji Kawe ji, daldi ñëw, indi mburu ak biiñ. <sup>19</sup> Mu ñaanal Ibraam ne ko:

\* **14:18** 14.18 Melkisedeg mu ngi tekki «buuru njubte».

«Yaw Ibraam, Yàlla na la Yàlla Aji Kawe ji barkeel, moom mi sàkk asamaan ak suuf!  
<sup>20</sup> Waaye jaaraamaa Yàlla Aji Kawe ji, moom mi la dumaal say noon!»  
 Ba loolu amee Ibraam sàkk fukkeelu la mu lèl lépp, jox ko.

<sup>21</sup> Gannaaw loolu buurub Sodom wax Ibraam ne ko: «Jox ma nit, ñi nga jàpp, te nga fab alal ji.» <sup>22</sup> Ibraam nag wax buurub Sodom ne ko: «Man yékkati naa sama loxo, Yàlla Aji Sax ju Kawe ji seede, moom mi sàkk asamaan ak suuf, <sup>23</sup> nee naa: duma jël ci yaw dara, du puso, bi gëna tuut sax, su ko defee doo mana wax ne yaa ma taxa am alal. <sup>24</sup> Duma jël dara, lu wees li sama nit ñi lekk ba noppi ak sama wàllu farandoo yi, di Aner ak Eskol ak Mamre, ñoom it, nañu jot seen wàll.»

## 15

### *Yàlla fas na ak Ibraam kóllère*

<sup>1</sup> Gannaaw ba loolu wéyee kàddug Aji Sax ji dikke na Ibraam wax jii ci peeñu, mu ne ko: «Yaw Ibraam, bul ragal dara; man maay sa kiiraay, te sa yool dina màgg lool.» <sup>2</sup> Ibraam ne ko: «Boroom bi, yaw Aji Sax ji, ana loo may may nag? Man awma doom sax, te ki wara donn sama alal moo di Elyeser, miy waa Damaas.» <sup>3</sup> Ibraam teg ca ne: «Mayoo ma giir, te it jaam bu juddoo sama kër moo may donn.»

<sup>4</sup> Kàddug Aji Sax ji nag dikkal ko, ne ko: «Du moom moo lay donn, waaye ku sosoo ci sa geño moo lay donn.» <sup>5</sup> Loolu wees Aji Sax ji yóbbu ko ci biti ne ko: «Xoolal asamaan, te waññ biddiiw yi, ndegam man nga ko.» Mu dellu ne ko: «Noonu la sa askan di tollu.» <sup>6</sup> Ibraam nag gëm na Aji Sax ji, ba tax Aji Sax ji waññal ko ngëmam ag njub.

<sup>7</sup> Gannaaw loolu Aji Sax ji wax ko ne ko: «Man maay Aji Sax, ji la génnee Ur, ga ca Kaldeen ña, ngir may la réew mii, nga moom ko.» <sup>8</sup> Ibraam ne ko: «Yaw Aji Sax ji sama Boroom, nan la may wóore ne maa koy moom?» <sup>9</sup> Aji Sax ji ne ko: «Jëlal wëlluw ñetti at ak bëyu ñetti at ak kuuyu

ñetti at, boole ci pitaxu àll ak xati mu ndaw.» <sup>10</sup> Ibraam boole yooyu yépp, rey, lu ci nekk mu dagg ko ci digg bi, dog bu nekk janook moroom ma, waaye daggul picc ya. <sup>11</sup> Ba mu ko defee ay tan jóge ca, dal ca kaw yàpp wa, Ibraam nag dàq leen.

<sup>12</sup> Ba jant bay so, ngëmment lu réy a ko jàpp, tiitaange lu mag, ànd ak lëndëm gu ne këruus, ne milib ci kawam. <sup>13</sup> Aji Sax ji wax Ibraam ne ko: «Déglul bu baax li ma lay wax: sa askan dinañu nekk ay doxandéem ci réew mu ñu moomul, ñu def leeni jaam, sonal leen diiru ñeenti téeméeri at. <sup>14</sup> Waaye waa réew moomu leen di def ay jaam, dinaa leen àtte. Gannaaw loolu sa askan dina ca génn, ànd ak alal ju bare. <sup>15</sup> Yaw nag dinga gudd fan lool, doora nelaw, ñu denc la, nga fekki say maam ci jàmm. <sup>16</sup> Say sët-sétaat ay délsi fii bu seen jamono jotee, ndaxte bàkkaaruu Amoreen ñi\* jéggeegul dayo.»

<sup>17</sup> Ba jant sowee, ba guddi jot, njaq luy saxar, ànd ak jum buy tàkk, daldi jaar ci diggante dogi yàpp yooyu. <sup>18</sup> Keroog Aji Sax ji fas na kóllère digganteem ak Ibraam, ne ko: «Askan wi soqikoo ci yaw laa jox réew mii dale ci dexu Misra, ba ca dex gu mag googee di Efraat, <sup>19</sup> mooy réewu Keneen ñi ak Keniseen ñi ak Kadmoneen ñi <sup>20</sup> ak Etteen ñi ak Periseen ñi ak Refayeen ñi, <sup>21</sup> boole ci réewum Amoreen ñi ak Kanaaneen ñi ak Gírgaseen ñi ak Yebuseen ñi.»

## 16

### *Ismayla juddu na*

<sup>1</sup> Sarayi amul woon doom ak boroom këram Ibraam. Waaye fekk na mu am jaam bu juddoo Misra te tudd Ajara. <sup>2</sup> Sarayi ne Ibraam: «Li am mooy Aji Sax ji deful ma am doom. Kon ngalla waay, dëkkool sama jaam bi, ndax Yàlla def, mu amal ma doom ju góor.» Ibraam nag dégg la Sarayi wax. <sup>3</sup> Looloo ngi am, gannaaw ba Ibraam dëkke fukki at ca réewu Kanaan. Sarayi daldi jël Ajara, jaamam bi juddoo Misra, jox ko jëkkëram Ibraam, ngir mu dëkkoo ko. <sup>4</sup> Loolu wees Ibraam

\* **15:16** 15.16 Amoreen ñi: ñoo jëkkoona moom réewu Kanaan.



dëkkoo Ajara, mu daldi ëmb. Ajara yég ne ëmb na, indi nag yabeel digganteem ak sangam Sarayi.

<sup>5</sup> Sarayi nag wax Ibraam ne ko: «Tooñ gi ma Ajara di tooñ, yaa ma ko yóbbé! Maa la jox sama jaam, ngir nga dëkkoo ko, naam, waaye moom, naka la yég ne ëmb na rekk, daldi indi yabeel sama digganteem moom. Kon yal na ma Aji Sax ji àtteek yaw!» <sup>6</sup> Ibraam wax Sarayi ne ko: «Sa jaam a ngoog ci say loxo, def ko lu la neex.» Sarayi nag di torxal Ajara, ba mu daw, ba soreek moom.

<sup>7</sup> Ba mu dawee, malaakam Aji Sax ja gis ko fu dend akub bëtu ndox ca màndiŋ ma, mooy bëtu ndox, ba ca yoonu Sur. <sup>8</sup> Mu ne ko: «Yaw Ajara, jaamu Sarayi bi, foo bàyyikoo nii? Ak foo jëm?» Mu ne ko: «Damay daw ba fu soreek sama sang Sarayi.»

<sup>9</sup> Malaakam Aji Sax ja ne ko: «Dellul ca sa sang, te nga yem ciy loxoom.» <sup>10</sup> Mu teg ca ne ko: «Dinaa yokk sa askan lool, ba kenn du leen mana waññ,» <sup>11</sup> tegaat ca ne ko:

«Léegi jigéenu wérul nga, te dinga am doom ju góor;

nanga ko tudde Ismayla (mu firi Yàlla dégg na),

ndax Aji Sax ji yég na sa naqar.

<sup>12</sup> Ismaylaay tiiñe, ni mbaamu àll mu deesul not,

di noonoo ñépp, ñépp noonoo ko.

Mooy sanc fu muy jàkkaarlook bokkam yépp.»

<sup>13</sup> Ajara nag tudde Aji Sax ji wax ak moom, Ata El Roy (mu firi Yaa di Yàlla jiy gis), ndaxte da ne: «Moo man! Moona gis naa Yàlla, moom it mu gisal ma boppam de!» <sup>14</sup> Loolu moo tax ñu tudde teen booba teenu Laxay Roy (mu firi teenu Aji Dund ji may gis); mu nga nekk diggante Kades ak Beret.

<sup>15</sup> Ba loolu weesee Ajara amal Ibraam doom ju góor. Ibraam tudde doom ji Ismayla. <sup>16</sup> Ba Ajaray am Ismayla, Ibraam a ngi tollu woon ci juróom ñett fukki at ak juróom benn (86).

## 17

### *Yàlla soppi na turu Ibraam*

<sup>1</sup> Ba Ibraam amee juróom ñeent fukki at ak juróom ñeent (99), am na bés Aji Sax ji feeñu ko ne ko: «Man maay Yàlla Aji Man ji. Topp ma te mat sëkk. <sup>2</sup> Dinaa feddli sama kóllère ak yaw, yokk la bu baax.»

<sup>3</sup> Ibraam dégg loola, daldi sujjóot. Yàlla wax ak moom ne ko: <sup>4</sup> «Man ci sama wàllu bopp, kóllère gi ma fas ak yaw mooy lii. Dinga nekk maamu xeet yu baree bare. <sup>5</sup> Te tuddatuloo Ibraam; léegi yaa di Ibraayma (mu firi Maamu ñu bare), ndax maa la def ngay maamu xeet yu baree bare. <sup>6</sup> Dinaa la defal njaboot gu ne xas, ay xeet sosoo ci yaw, ba ay buur soqikoo ci yaw. <sup>7</sup> Te dinaa feddli sama kóllère, gi ci sama diggante ak yaw, yaak sa askan, muy kóllère guy sax maasoo maas ba fàww. Maay doon sa Yàlla, yaak sa askan. <sup>8</sup> Te réew mi nga doon ab doxandéem léegi, muy réewu Kanaan mépp, jox naa la ko, yaak sa askan, ngeen moom ko fàww. Te dinaa doon seen Yàlla.»

### *Xaraf màndargaal na kóllèreg Yàlla*

<sup>9</sup> Gannaaw loolu Yàlla waxaat na Ibraayma ne ko: «Yaw nag, sàmmal sama kóllère, yaak sa askan ak say sèt ak say sètaat. <sup>10</sup> Kóllère gi ma fas ak yaw, te nga war koo sàmm, yaak sa askan, li mu laaj mooy lii: góor gu nekk ci yeen, war naa xaraf. <sup>11</sup> Xaraf mooy màndargaal kóllère googu ma fas ak yeen. <sup>12</sup> Xale bu góor, bu amee juróom ñetti fan war naa xaraf. Képp kuy góor ci seen maasoo maas, war naa xaraf, ba ci jaam bu juddoo sa kër, mbaa ku ñu jënd ci sa xalis, ak bépp doomu doxandéem boo jurul. <sup>13</sup> Jaam bu juddoo sa kër ak boo jënd, ñoom ñaar ñépp, dees leen wara xarfal. Xaraf ay màndargaal sama kóllère ci seen yaram, muy kóllère gu sax fàww. <sup>14</sup> Góor gu xariful, ndax nanguwula xaraf, dees na ko dagge ci biir xeetam, ndax sàmmul sama kóllère.»

<sup>15</sup> Ba loolu weesee Yàlla waxaat na Ibraayma, ne ko: «Sa soxna tuddatul

\* 17:15 17.15 Sarayi, Saarata neexoo na ak baatu ebré biy tekki «lingeer, doomu buur».

Sarayi; léegi moo di Saarata\*. <sup>16</sup> Dinaa ko barkeel, may la ak moom doom ju góor; dinaa ko barkeel moos, ba mu jaboote xeet yu bare, te ay buuri xeet sax dinañu soqikoo ci moom.»

<sup>17</sup> Bi Ibraayma déggee loolu, daa sujjóot, ree. Booba ma nga naan ci xelam: «Góoru téeméeri at, ndax dina mana am doom waay? Te Saarata, mi am juróom ñeent fukki at (90) sax, manati naa am doom a?» <sup>18</sup> Ibraayma ne Yàlla: «Moo, tee ngaa saxal Ismayla rekk te ànd ak moom?»

<sup>19</sup> Yàlla ne ko: «Waaw, waaye du tere sa soxna Saarata amal la doom ju góor, nga tudde ko nag Isaaxa. Dinaa fas ak moom sama kóllère, mu wéy ba ciy sètam ba fàww. <sup>20</sup> Bu dee ci wàllu Ismayla, nangul naa la ba tey. Ndax kat dinaa ko barkeel, jox ko njaboot gu yaa, yokk ko bu baax. Dina jur fukki kilifa ak ñaar yu mag, te dinaa ko defal mu sos xeet wu yaa. <sup>21</sup> Waaye sama kóllère nag, Isaaxa laa koy fasool, moom Isaaxa, mi Saarata di am, nēgēni déwén.» <sup>22</sup> Loola la Yàlla wax Ibraayma, daldi fay bàyyikoo.

<sup>23</sup> Ba loolu amee Ibraayma boole doomam Ismayla, ak jaam, yi juddoo kēram yépp, ak ñi mu jēndoon ci xalisam ñépp, góori waa kēram ñépp, xarfal leen ca bés ba, muy la ko Yàlla waxoon. <sup>24</sup> Ibraayma amoon na juróom ñeent fukki at ak juróom ñeent (99), bi muy xaraf; <sup>25</sup> doomam Ismayla am fukki at ak ñett, bi ñu koy xarfal. <sup>26</sup> Bés sub keroog la Ibraayma xaraf, moom ak doomam Ismayla <sup>27</sup> ak mboolem góori kēram, muy jaam ya fa juddoo mbaa ñu mu jēnd ci ay doxandéem, ñoom ñépp a ànd ak moom xaraf.

## 18

### *Ibraayma ak ganam ña*

<sup>1</sup> Am na bés, Aji Sax ji feeñu Ibraayma ca garabi Mamre yu mag ya. Booba ma nga toogoon ca buntu xaymaam digg njolloor. <sup>2</sup> Naka la siggi, gis ñetti nit, ñu ne jimeet ci kanamam. Ibraayma gaawtu, gatandu leen, sujjóotal leen. <sup>3</sup> Mu daldi ne: «Sang bi, siyaare naa la. Ngalla waay,

bu ma romb. <sup>4</sup> Xaarleen, ñu indil leen tuuti ndox, ngeen jàngu te nopplu ci ker garab gi. <sup>5</sup> Maa ngi leen di indil dogu mburu mu ngeen dēgērloo, ba mana topp seen yoon, gannaaw nangu ngeena toóg, ma siyaare leen.» Ñu ne ko: «Waaw, baax na.»

<sup>6</sup> Ibraayma daldi gaaw, dugg biir xayma ba, ne Saarata: «Gaawal, jël ñetti ndabi sunguf su mucc ayib, not ko, def ko mburu yu ndaw.» <sup>7</sup> Ibraayma nag daw ca gétt ga, sàkk fa sèllu wu duuf te baax, ñew jox ko jaamam, mu gaaw togg ko. <sup>8</sup> Ibraayma taajal leen ndawal, la ñu togg, ba mu sotti, indaaleel leen soow ak meew mu bees. Ma nga taxaw ca seen wet ca ker garab ga, ñuy lekk.

<sup>9</sup> Ñu daldi ko laaj ne ko: «Ana sa soxna Saarata?» Mu ne leen: «Mu ngi ci biir.» <sup>10</sup> Kooka ne ko: «Nēgēni sii déwén déy laay délsi, te sa soxna Saarata dina am doom ju góor moos.» Bi muy wax loolu, Saarataa ngi ci buntu xayma bi ci gannaawam, di déglu. <sup>11</sup> Booba fekk na Ibraayma ak Saarata doon mag, ba mǎggat lool sax, te Saarata weesoon na njurum doom. <sup>12</sup> Ci kaw loolu Saarata ree ci suuf, daldi ne: «Man mu ñor xomm mii, ndax man naa amati boobu bānneex, te sama boroom kēr it di mag?» <sup>13</sup> Aji Sax ji daldi wax Ibraayma ne ko: «Lu Saarata di ree, te naan: “Man mu mǎggat mii, deeti naa am doom moos?” <sup>14</sup> Ana lu tē Aji Sax ji? Bu ñu ca àggee nēgēni déwén déy, dinaa fi délsiwaat, te Saarata dina am doom ju góor.» <sup>15</sup> Saarata dégg loolu, daldi tiit, miim ko ne: «Reetaanuma de.» Teewul Aji Sax ji ne ko: «Ree nga kay!»

### *Ibraayma tinul na waa Sodom*

<sup>16</sup> Gannaaw loolu gan ña jóge foofa, tiim Sodom, di ko séentu. Ibraayma ànd ak ñoom, di leen gunge. <sup>17</sup> Booba Aji Sax jaa ngi wax naan: «Xanaa duma nēbb Ibraayma li ma nar? <sup>18</sup> Ndax kat Ibraayma dina sos xeet wu mag te am doole, te xeeti àddina yépp ci moom lañuy barkeele. <sup>19</sup> Moo tax ma tànn ko, ngir mu sant ay doomam ak waa kēram, ñuy déggal Aji Sax ji, di jēfe yoon ak njub. Noonu laay defale Ibraayma li ma

ko digoon.» <sup>20</sup> Aji Sax ji nag àddu ne: «Bàkkaari Sodom ak Gomor bare na lool, ba may dégg yuux, yi sababoo ci seen moy. <sup>21</sup> Dinaa wàcc, seede ko, ba mu wóor ne ñoo def lépp li sabab yuux yi, am déet.»

<sup>22</sup> Gan ña nag dem, jublu Sodom, Ibraayma moom taxaw ba tey fi kanam Aji Sax ji. <sup>23</sup> Naka la Ibraayma jegeñsi, ne ko: «Mbaa doo boole ku jub ak ku jubadi, rey leen? <sup>24</sup> Su juróom fukk rekk jubee ca dëkk bi, mbaa doo tas dëkk bi ba tey, tee nga leena jéggal rekk ngir juróom fukk ñu jub ña ca nekk? <sup>25</sup> Rikk bul yemale ku jub ak ku jubadi, ba boole leen rey, loolu jomb na la moos! Yaw miy àtte àddina sépp kay, lu jub rekk ngay def!» <sup>26</sup> Aji Sax ji ne ko: «Su ma gisee ci Sodom juróom fukk ñu jub, dinaa jéggal waa dëkk bi yépp ngir ñoom.»

<sup>27</sup> Ibraayma dellu ne: «Ma ñemee wax ak yaw, Boroom bi, te дума dara ba dara booloo jeex. <sup>28</sup> Waaye juróom fukk ñooñu jub, su yésee juróom rekk nag? Mbaa doo tas dëkk bi ndax juróom ñi ci yées?» Aji Sax ji ne ko: «Su ma fa gisee ñeent fukk ak juróom ñu jub, дума ko tas.» <sup>29</sup> Ibraayma dellu wax ne: «Su fa ñeent fukk ñu jub rekk amee nag?» Aji Sax ji ne ko: «Duma def dara ngir ñeent fukk ñooñu.»

<sup>30</sup> Ibraayma dellooti ne: «Rikk Boroom bi, bu ma mere. Dinaa ci teg lii. Su fa fanweer ñu jub rekk amee nag?» Aji Sax ji ne ko: «Su fa fanweer ñu jub amee, kon дума def dara.»

<sup>31</sup> Ibraayma neeti: «Léegi ma ñemeeti wax ak yaw boog, Boroom bi! Su ñu doon ñaar fukk rekk nag?» Aji Sax ji ne ko: «Kon дума ko tas ngir ñaar fukk ñooñu.»

<sup>32</sup> Ibraayma dellu neeti: «Ngalla Boroom bi, bul mer, ma wax bii yoon rekk te noppi. Léegi su ñu dee fukk donñ nag?» Aji Sax ji ne ko: «Kon дума tas dëkk bi, ndax fukk ñooñu jub.»

<sup>33</sup> Loolu la Aji Sax ji wax ak Ibraayma, daldi dëddu. Ibraayma it ñibbi këram.

## 19

### *Bàkkaari waa Sodom*

<sup>1</sup> Ba loolu amee ñaari malaaka ya dikk Sodom ca ngoon, fekk Lóot toog ca buntu dëkk ba\*. Lóot séen leen, jóg gatandu leen, daldi leen sujjóotal, ne leen: <sup>2</sup> «Dégluleen ma, ngalla sang yi, siyaare naa leen, tee ngeena dal ak man, su ko defee ngeen jangu, fanaan ba suba, ngeen xëy topp seen yoon?» Ñu ne ko: «Bàyyil, nu fanaan ci mbedd mi.» <sup>3</sup> Lóot nag soññ leen, ba ñu dal këram, mu ganale leen. Lóot da leena berndeel, lakkal leen mburu mu amul lawiir, ñu lekk.

<sup>4</sup> Teewul bala ñoo tëdd, góori Sodom, mag ak ndaw, daldi jóge gox bu nekk, ñëw yéew kër ga. <sup>5</sup> Ñu daldi woo Lóot ne ko: «Ana góor ñi fi ñëw tey ci guddi? Génneel nu leen fii, ndax nu mana àgg ci ñoom.» <sup>6</sup> Lóot génn, fekk leen ca buntu kër ga ca biti, daldi tëj bunt ba. <sup>7</sup> Mu ne leen: «Bokk yi, ngalla buleen def lu bon loolu waay! <sup>8</sup> Dégluleen, ma wax leen; man, am naa ñaari doom yu jigéen, te xamuñu góor. Mayleen ma, ma yót leen leen, ngeen def leen lu leen neex. Rikk buleen def góor ñii dara, ndaxte samay gan lañu.» <sup>9</sup> Ñu ne ko: «Toppal fale!» te naan: «Waay! Waa jii dal ci sunu dëkk bi rekk, bëgg di fi àtte! Léegi nag dinanu la def lu raw li nu bëggoona def say gan.» Ñu song Lóot, ba nara dàjji bunt ba. <sup>10</sup> Teewul gan ña yoor seeni loxo, ñoddi Lóot ba ci biir, tëj bunt ba. <sup>11</sup> Ba loolu amee ñu gumbaal nit ña nekkoon ca buntu kër ga, mag ak ndaw, ñuy làmbatu bunt ba, ba sonn, bàyyi.

### *Lóot génn na Sodom*

<sup>12</sup> Ba loolu wéyee gan ña wax Lóot ne ko: «Boo amee mbokk ci dëkk bi, muy sa doom ju góor mbaa ju jigéen, mbaa kuy denc sa doom— koo fi am, génne ko fi, <sup>13</sup> ndax dinanu ko tas de. Aji Sax ji dégg na jooytu yu réy, yi niti dëkk bi sabab, ba tax mu yónni nu, ngir nu tas-si ko.» <sup>14</sup> Lóot daldi génn, wax ak goroom, ya naroon takk ay doomam yu jigéen,

\* **19:1** 19.1 ca buntu dëkk ba la pénc ma nekkoon, booy duggsi.

ne leen: «Gaawleen gaaw, génn dëkk bi, ndaxte Aji Sax ji dina ko tas.» Teewul ñu defe ne day kaf.

<sup>15</sup> Fajar a ngay xar, malaaka ya fuug Lóot ne ko: «Gaawal gaaw, ànd ak sa soxna ak sa ñaari doomam yu jigéen yii, ba bu Yàlla tasee dëkk bi, dungeen sànkú.»

<sup>16</sup> Lóot di tendeeƴal, gan ña jàpp ci loxo bi, booleek soxnaam ak ñaari doomam géenne, làq leen ca gannaaw dëkk ba, ndax yërmande ju Aji Sax ji am ci Lóot.

<sup>17</sup> Ba ñu leen géennee, kenn ci ñoom ne Lóot: «Dawal sa xélu bakkan, bul geestu, bul taxaw fenn ci joor gi. Dawal ca tund ya, bala ngaa dee.»

<sup>18</sup> Lóot nag ne ko: «Déet, sang bi! <sup>19</sup> Defal nga ma yiw, yërëm ma lool, ba musal ma. Waaye bala maa daw, ba àgg ca tund ya, musiba mii man naa dal ci sama kaw, ma dee.

<sup>20</sup> Gisuloo dëkk bale; jege na, te dëkk bu tuut la, am déet? Ma daw, làquji fa boog, ba mucc?»

<sup>21</sup> Malaaka ma ne ko: «Waaw baax na ba tey, duma tas dëkk boobu ngay wax. <sup>22</sup> Nanga gaaw nag, làquji fa, ndax duma mana def dara te àgguloo ca.» Loolu moo tax ñu tudde dëkk boobu Sowar (mu firi Bu tuut).

### *Yàlla tas na dëkk yooyu di Sodom ak Gomor*

<sup>23</sup> Ba jant bay fenk, Lóot dugg na Sowar. <sup>24</sup> Aji Sax ji nag yuree ca asamaan tamarax buy tàkk, muy taw ci kaw Sodom ak Gomor, na ko Aji Sax ji dogale. <sup>25</sup> Mu daldi tas mboolem dëkki joor ga, boole ca nit ña ak gàncax gépp. <sup>26</sup> Ci kaw loolu soxnas Lóot ne gees, jëmm ja far soppliku xorom.

<sup>27</sup> Ca èllëg sa Ibraayma dafa teela jóg, dem fa mu taxawoon jàkkaarlook Aji Sax ji. <sup>28</sup> Naka la séentu Sodom ak Gomor ak joor ga ba fa mu yem, gis nag saxar suy gillee ci suuf, mel ni saxaru taaluu ban.

<sup>29</sup> Ndaxam bi Yàllay tas dëkki joor ga, xalaat na Ibraayma, ba musal Lóot ca dogalam boobee, keroog ba mu tasee dëkk, ya Lóot daloon.

### *Mbirum Lóot ak doomam yu jigéen ya*

<sup>30</sup> Gannaaw loolu Lóot dafa ragala dëkk Sowar, ba toxoo fa, ànd ak ñaari doomam yu jigéen, sancii ca tund ya. Mu dëkk ci

xuntim xeer, moom ak ñaari doomam yu jigéen.

<sup>31</sup> Mu am bés, taaw bi wax rakk ji, ne ko: «Sunu baay a ngii màggat, te fii fépp amul góor gu nu mana séqal ci wàllu séy, ni ko waa àddina yépp baaxoo defe.

<sup>32</sup> Kon nanu def nii: danuy nàndal sunu baay biiñ, tédđ ak moom, ngir sunu xeetu baay du fey.»

<sup>33</sup> Ca guddi ga ñu nàndal seen baay biiñ, taaw ba dugg, tédđ ak baayam, te Lóot yéguul ba fa doom jay tédđ ak ba muy jóg.

<sup>34</sup> Ca èllëg sa taaw ba wax rakk ji, ne ko: «Man tédđ naa ak sama baay biig; guddig tey it, danu koy nàndalaat biiñ, su ko defee nga dugg tédđ ak moom, ndax sunu xeetu baay du fey.»

<sup>35</sup> Guddi jot, ñu nàndalaat seen baay biiñ, rakk ja dem tédđ ak baayam, te Lóot yéguul ba fa doom jay tédđ ak ba muy jóg.

<sup>36</sup> Noonu la ñaari doomi Lóot def ak seen baay, daldi cay doxe ëmb.

<sup>37</sup> Taaw ba am ca doom ju góor, tudde ko Mowab (mu firi Jóge ci baay). Mowab moo sos Mowabeen ñi. <sup>38</sup> Rakk ja moom it am doom ju góor, tudde ko Ben Aami (mu firi Sama doomu mbokk). Ben Aami moo sos Amoneen, ñi fi nekk ba tey.

## 20

### *Lu jëm ci Ibraayma ak Abimeleg*

<sup>1</sup> Ba loolu amee Ibraayma dafa jóge fa mu nekkoon, jublu àllub Negew, sancii diggante Kades ak Sur, ba noppi ganeji ay fan ca dëkk ba ñu naa Gerar.

<sup>2</sup> Ba Ibraayma àggee nag, da ne soxnaam Saarata ab jigéenam la. Abimeleg buurub Gerar daldi yónnee jëlsi Saarata. <sup>3</sup> Teewul genn guddi Yàlla feeñu Abimeleg ci gént ne ko: «Yaw dee nga ba noppi, ndax jigéen, ji nga nangu, soxnas jaambur la.»

<sup>4</sup> Loolu fekkul Abimeleg dëkkoo Saarata. Mu wax Yàlla ne ko: «Sama Boroom, mbaa doo bóom réew mi ci mbir mu ñu doonul dara?

<sup>5</sup> Du góor gi da maa waxoon ne kii jigéenam la? Du jigéen ji it da maa waxoon ne kooku càmmiñam la? Fexewuma dara lu ñaaw te di ko tey de!»

<sup>6</sup> Yàlla ne ko ca gént ga: «Waaw, xam naa ne li nga def du sa teyeef. Moo tax man it mayuma la nga laal ko, di ma tooñ.

<sup>7</sup> Léegi nag dellool góor gi soxnaam, ab yonent la de, te dina la ñaanal, nga raw. Waaye soo ko deful, na la bir ne dinga dee, yaak sa waa kër yépp.»

<sup>8</sup> Abimeleg jóg suba teel, woolu dagam yépp, nettali leen loolu lépp, ñu tiit lool. <sup>9</sup> Gannaaw loolu Abimeleg woolu Ibraayma ne ko: «Li nga nu def nag? Ndax dama laa tooñ, ba nga yóbbe ma tooñ gu réye nii, man ak sama réew mi mépp? Lii nga ma def de, waroo ko woona def.» <sup>10</sup> Abimeleg teg ca ne ko: «Te li nga def sax, lu la ci xiir?» <sup>11</sup> Ibraayma ne ko: «Da di dama noon, amul kenn ci réew mii ku ragal Yàlla, te dees na ma rey ndax sama soxna. <sup>12</sup> Te moona dëgg la sax, sama jigéen a, ndaxte danoo bokk baay te bokkunu yaay, ma jël ko. <sup>13</sup> Te bés, ba ma Yàlla génnee sama kër baay, may wèndeelu, dama koo waxoon ne ko: “Déglul, li ngay def soo ma béggee xettli, mooy lii: fépp fu nu dem, nanga wax ne sa càmmiñ laa.”»

<sup>14</sup> Ba mu waxee ba noppi, Abimeleg jël ay xar aki nag ak ay jaam yu góor ak yu jigéen, jox ko Ibraayma, daldi ko delloo soxnaam Saarata. <sup>15</sup> Abimeleg ne ko: «Sama réew mépp a ngi noonu, dëkkal fu la neex.» <sup>16</sup> Gannaaw loolu wax na Saarata ne ko: «Déglu ma fii, jox naa sa càmmiñ limu junniy dogi xaaalis\*. Loolu dama koo def, ngir setal sa der ci kanam ñi nga dëkkal ñépp. Léegi nag ñépp xam nañu ne set nga wecc.»

<sup>17-18</sup> Fekk na Aji Sax ji um jigéeni waa kër Abimeleg, ba kenn du ci am doom, du soxnaam, du ay jaamam, te li ko waral di Saarata soxnas Ibraayma. Ibraayma nag ñaan Yàlla; Yàlla def ñu wér, ba mana am doom.

## 21

### *Juddub Isaaxa*

<sup>1</sup> Gannaaw loolu Aji Sax ji yéwéne na Saarata, ni mu ko waxe woon, defal ko li mu ko digoon. <sup>2</sup> Saarata ëmb, amal Ibraayma doom ju góor ci jamono, ji ko Yàlla waxoon, te fekk góor gi di màggat.

\* **20:16** 20.16 junniy dogi xaaalis tollu woon na ci fukki kiloy xaaalis ak benn. «ree» ci làkku ebrë.

<sup>3</sup> Ibraayma tudde doomu Saarata jaak moom, Isaaxa. <sup>4</sup> Ba bés ba délsee, Ibraayma xarfal doomam Isaaxa, ni ko ko Yàlla digale woon.

<sup>5</sup> Ba Isaaxa di juddu, booba Ibraaymaa ngi woon ci téeméeri atom. <sup>6</sup> Saarata ne: «Yàllaaka maa bégal, may ree, ànd ak ku yég, nuy ree\*.»

<sup>7</sup> Mu neeti:

«Éy, ku noon Ibraayma, Saarataa ngay nàmpal!

Teewul ma jural ko góor, te muy mag.»

### *Saarata jote na ak Ismayla ak Ajara*

<sup>8</sup> Ba loolu amee doom ja màgg, ba bés, ba ñu ko feralee. Keroog Ibraayma def na bernde ju mag. <sup>9</sup> Saarata nag gis doomu Ajaram Misra, jaak Ibraayma, muy kókkalee. <sup>10</sup> Saarata ne Ibraayma: «Dàqal jaam bii, mook doomam, ndax doomu jaam bii du bokk ak sama doom ndono.» <sup>11</sup> Loolu Saarata wax naqari Ibraayma lool ndax li Ismayla di doomam, moom it. <sup>12</sup> Teewul Yàlla ne Ibraayma: «Bu la dara naqari ci xale bu góor bii, mook sa jaam bi. Defalal Saarata li mu la wax rekk, ndax ci Isaaxa lees di tudde saw askan. <sup>13</sup> Doomu jaam bi it, dinaa ci lawale aw xeet nag, ndaxte yaa ko jur.»

<sup>14</sup> Ca èllëg sa Ibraayma jóg suba teel, sàkk mburu, booleek mbuusu ndox, jox Ajara, mu gàddu. Mu daldi ko dénk Ismayla, yebal ko, mu dem. Ci kaw loolu muy wèndeelu ca màndiñu Beerseba. <sup>15</sup> Ba ñu demee, ba ndox ma jeex, Ajara daa bàyyi xale bu góor bi ci taatu ngarab su ndaw, <sup>16</sup> dox, ba dând ko lu tollook saanu fitt, toog nag jàkkaarlook moom te naa ci xelam: «Duma fekke mukk sama deewu doom.» Naka la toog foofa janook moom, ne yikkét jooy.

<sup>17</sup> Ba mu ko defee Yàlla dëgg baatu xale bu góor ba. Malaakam Yàlla ma àddoo asamaan, ne Ajara: «Ajara, lan la? Bul ragal dara, ndaxte Yàlla dëgg na sa baatu doom ci diggante bii mu tollu. <sup>18</sup> Demal yékkati ko, may ko loxo, mu jóg. Dinaa def mu law, ba doon xeet wu yaa.»

\* **21:6** 21.6 Isaaxa mu ngi tekki

19 Ci kaw loolu Yàlla muri ay bëtam, mu gis ab seyaan, daldi cay dem, duy mbuusam, ba mu fees, jox ca doomam, mu naan. 20 Yàlla nag ànd ak Ismayla, muy màgg, dëkk ca màndiŋ ma, di fittkat. 21 Ca àllub Paran la dëkkoon, yaayam wutali ko soxna ca réewum Misra.

### *Ibraayma waatoo na ak Abimeleg*

22 Jamono yooyu Abimeleg àndoon na ak Pikol kilifay xarekatam, dem ci Ibraayma ne ko: «Gis naa ne Yàlla ànd na ak yaw, di àntal li ngay def lépp. 23 Léegi nag waatal ma fii ci Yàlla ne doo ma wor mukk, man ak samay doom, ba ci samay sët. Waatal ma ne noonee ma rafetoo woon ak yaw, ni ngay rafetoo ak man, maak waa réew, mi nga dal.» 24 Ibraayma ne ko: «Waat naa ko.»

25 Ci kaw loolu Ibraayma tawat Abimeleg teen bu surgay Abimeleg nangu woon ci moom, aakimoo ko. 26 Abimeleg nag ne ko: «Xawma ku la def jooju jëf de, ndax yaw waxoo ma ci dara; guléet ma dégg ko tey.»

27 Ba loolu amee Ibraayma jël ay gàtt aki nag, may ko Abimeleg, ñu fasoo kóllère ñoom ñaar. 28 Fekk na Ibraayma ber juróom ñaari xar yu jigéen. 29 Abimeleg nag ne Ibraayma: «Lu tax nga ber juróom ñaari xar yooyu?» 30 Ibraayma ne ko: «Jëlal xar yii ci sama loxo, muy firnde ne man maa gas teen bii.» 31 Looloo tax ñu tudde teen boobu Beerseba (mu firi Teenu waat ga)†, ndaxte fa lañu waatoo woon ñoom ñaar. 32 Naka lañu fasoo kóllère ca Beerseba, Abimeleg jóg ànd ak Pikol kilifay xarekatam, ñu ñibbi réewu Filisti.

33 Ibraayma nag jëmbat na garabu tamaris foofa ca Beerseba, tudd fa Yàlla Aji Sax ji, ji nekk ba fàww. 34 Ibraayma gane na réewu Filisti lu yàgg.

## 22

### *Yàlla nattu na Ibraayma*

1 Gannaaw loolu am na bés Yàlla di nattu Ibraayma ne ko: «Ibraayma!» Mu ne ko: «Naam.» 2 Yàlla ne ko: «Ngalla jëlal sa jenn doom jii di Isaaxa, muy koo

bëgg, nga dem ca réewu Morya ca tund wa ma lay wax, joxe ko fa, mu nekk saraxu rendi-dóomal.»

3 Ibraayma nag teela xëy, takk mbaamam, ànd ak ñaari surgaam ak doomam Isaaxa, daldi xar matt, mi muy lakke sarax bi. Ma nga jëm fa ko Yàlla wax. 4 Ca gannaaw ëllëg sa, Ibraayma daa dawal bëtam, séen bérab ba fu sore. 5 Mu ne surga ya: «Négleen fii, mbaam mi taxaw. Man ak xale bi nu dem ba fale, màggali Yàlla te ñëw.»

6 Ba loolu amee Ibraayma jël mattum saraxu rendi-dóomal ba, yen ko doomam Isaaxa; moom mu njàbb la muy taale ak paaka ba ci loxoom, ñu ànd ñoom ñaar. 7 Isaaxa ne baayam Ibraayma: «Baay!» Mu ne ko: «Naam, doom sama.» Isaaxa ne ko: «Sawara saa ngi, matt maa ngi, waaye ana gàtt, bi nuy sarxal?» 8 Ibraayma ne ko: «Yàlla moom ci boppam dina dikk ak gàtt bi nuy def sarax, doom,» ñu daldi ànd dem, ñoom ñaar.

9 Ba ñu àggee fa ko Yàlla wax, Ibraayma sàkk fa ab sarxalukaay, teg ca matt ma, yeew Isaaxa doomam, teg ko ca kaw matt ma ca sarxalukaay ba. 10 Ibraaymaa nga tàllal loxoom, njëb paaka, ba muy rendee doom ja. 11 Teewul malaakam Aji Sax ja àddoo asamaan, ne ko: «Ibraayma! Ibraayma!» Mu ne ko: «Áa!» 12 Malaaka ma ne ko: «Bu sa loxo laal xale bi; bu ko def dara, ndaxte léegi xam naa ne ragal nga Yàlla, ndax gántaloo ma sa jenn doom ji.» 13 Naka la Ibraayma siggi rekk, yem ci menn kuuyum xar mu béjjén ya lonke ci as ngarab. Ibraayma dem, jël kuuy ma, rendi, mu wuutu doom ja, di ab saraxu rendi-dóomal. 14 Ibraayma nag tudde bérab boobu Yawe Yire (mu firi Aji Sax ji dina dikk). Moo tax ñuy wax ba tey, naan: «Aji Sax jaa ngay dikke ca tundam.»

15 Ci kaw loolu malaakam Yàlla ma dellu àddoo asamaan ne Ibraayma: 16 «Déglul lii Aji Sax ji wax: “Giñ naa ci man mii, gannaaw yaa def lii, te gántaloo ma sa jenn doom ji, 17 maa lay barkeela barkeel, fula ful saw askan ni biddiwi

† 21:31 21.31 Beerseba man naa tekki «teenu juróom ñaar» ba tey.

asamaan, mbaa feppi suufi géej. Sa askan dina teg ay bañam tànk, <sup>18</sup> te xeeti àddina sépp ci saw askan lañuy barkeele, ndax déggal nga ma.»

<sup>19</sup> Ba loolu wéyee Ibraayma waññiku, fekki surga ya, ñu daldi ànd ñoom ñépp, jëm Beerseba, ndax fa la Ibraayma dëkkoon.

### *Askanu Naxor*

<sup>20</sup> Gannaaw gi, dañoo yégal Ibraayma ne ko: «Milka kat am na ay doom moom it, moom ak sa mag Naxor. <sup>21</sup> Uus lañu taawloo, teg ca Bus, teg ca Kemwel, miy baayu Aram, <sup>22</sup> teg ca Keset ak Aso ak Pildas ak Yidlaf ak Betuwel.» <sup>23</sup> Betuwel ay baayu Rebeka. Nooñu ñooy juróom ñetti doom yu góor, yi Milka am ak magu Ibraayma, Naxor. <sup>24</sup> Rewma it nekaaleem la woon, doom ya mu ca am di Teba ak Gaxam ak Texas ak Maaka.

## 23

### *Ibraayma jënd na suuf ca Kanaan*

<sup>1</sup> Saarata dund na, ba am téeméeri at ak ñaar fukk ak juróom ñaar (127), <sup>2</sup> doora faatu ca Kiryaat Arba, mooy Ebron, ca réewu Kanaan. Ibraayma nag dëj Saarata, jooy ko lool.

<sup>3</sup> Gannaaw loolu Ibraayma bàyyi fa néew ba, dem ca Etteen ña\*, ne leen: <sup>4</sup> «Dama di doxandéem ci seen biir, tey gan; moo tax ma di leen ñaan, ngeen sédd ma bàmmeel† bu ma suul sama néew, ba mu làqu ma.» <sup>5</sup> Kenn ci Etteen ñi wax Ibraayma ne ko: <sup>6</sup> «Déglul rekk, kilifa gi. Kilifa gu mag nga ci sunu biir. Dangay tànn ci sunuy bàmmeel, bi la neex, suul fa néew bi; kenn ci nun du la tere, nga suul sa néew ci bàmmeelam.»

<sup>7</sup> Naka la Ibraayma dégg loolu, daldi jóg sujjóotal waa réew ma, maanaam Etteen ña. <sup>8</sup> Mu ne leen: «Gannaaw nangu ngeen, ma suul fi sama néew, ba mu làqu ma, dégluleen, ma wax leen li ngeen may ñaanal Efron doomu Sowar. <sup>9</sup> Damaa bëgg, mu bàyyee ma xuntim xeer, mi ñuy

wax Magpela te muy boroom. Mu ngi ci catu toolam. Na ma ko jaay lu mat njégam sèkk, dinaa ko jënd, muy sama bàmmeel ci seen biir.»

<sup>10</sup> Booba Efron a ngi teew ci biir Etteen ñi. Efron, miy Etteen nag, wax ak Ibraayma ci kanam bokkam yi séq pénc mi, ne ko: <sup>11</sup> «Déglul, ma wax la, kilifa gi, fabal tool bi, booleek xuntim xeer, mi ci nekk far. Maa la ko jox ci sama kanami bokk; jëlal, denc fa sa néew.»

<sup>12</sup> Ba mu ko defee Ibraayma sujjóotal waa réew ma, <sup>13</sup> daldi wax Efron ci seen kanam ne ko: «Ngalla déglu ma, dama lay jox njégu tool bi, nga jël rekk, ndax ma man faa suul sama néew.» <sup>14</sup> Efron wax Ibraayma ne ko: <sup>15</sup> «Déglu ma, kilifa gi, suuf suy jar ñeenti téeméeri dogi xaalis donj† du dara ci sama diggante ak yaw; tee nga faa denc sa néew rekk?» <sup>16</sup> Ibraayma dégg li ko Efron wax, daldi waññal Efron limu xaalis, bi mu wax ci kanam Etteen ñi, maanaam ñeenti téeméeri dogi xaalis yu dèppook nattu jaaykat ya.

<sup>17-18</sup> Noonu la Ibraayma jënde toolub Efron ba nekk ca Magpela te janook Mamre, muy moomeelam. Dafa jënd tool ba bépp, jëndaale xuntim xeer ma ca biir, ak garab ya ca sax yépp, ba fa tool ba yem. Mboolem Etteen ña séqoon pénc ma, seede nañu ne Ibraayma moo ko moom. <sup>19</sup> Ibraayma daldi suul soxnaam Saarata ca xuntim xeer ma ca biir toolub Magpela, booba janook Mamre, di Ebron léegi, ca réewu Kanaan. <sup>20</sup> Nii la Etteen ña dogalale Ibraayma njaayum tool ba ak xunti ma ca nekk, mu def ko bàmmeel.

## 24

### *Isaaxa jël na Rebeka soxna*

<sup>1</sup> Ibraayma guddoon na fan, ba màggat lool, te Aji Sax ji barkeel ko ci lépp.

<sup>2</sup> Mu am bés Ibraayma wax surgaam, bi gëna yàgg ci këràm, tey saytu alalam jépp, ne ko: «Dugalal sa loxo ci sama

\* **23:3** 23.3 Etteen ña: ñooñoo nga bokk ci askanu Ett. Ñoo moomoon diiwaanu Ebron ca jooja jamono. † **23:4** 23.4 bàmmeel: booba nit ñi dañoo taamu di denc seeni néew ci ay xuntiy xeer, mu di ay bàmmeel yu ñu bare mana bokk. † **23:15** 23.15 Loolu tollu woon na ci juróomi kiloy xaalis. \* **24:2** 24.2 dugal loxo ci suufu lupp mooy li bànni Israyil daan dogale ngiñ.

suufu lupp\*,<sup>3</sup> ma giñloo la ci Aji Sax jiy Yállay asamaan ak suuf ne doo jëlal sama doom soxna ci biir jigéeni waa Kanaan, gi ma dëkk ci seen biir.<sup>4</sup> Waaye dinga dem sama réew, ma ma cosaano, jëlal fa sama doom Isaaxa soxna.»

<sup>5</sup> Surga ba ne ko: «Su ndaw sa nanguwula ànd ak man ci réew mii nag? Ndax kon damaa wara yóbbu sa doom ba ca réew ma nga jóge?»<sup>6</sup> Ibraayma itam ne ko: «Bu fa yóbbu sama doom muk. <sup>7</sup> Aji Sax ji, Yállay asamaan, moom mi ma jële sama kër baay ak fa ma juddoo, te wax ak man, giñal ma ne ma, dina jox sama askan réew mii, moom ci boppam dina yebal malaakaam, mu jiitu la. Foofa ngay jëlale sama doom soxna. <sup>8</sup> Su la ndaw si buggula topp, kon wàccoo nga ak man. Waaye rikk bul yóbbu sama doom foofa.»<sup>9</sup> Surga ba dugal loxoom ca suufu loppu Ibraayma sangam ba, daldi giñ ca loola.

<sup>10</sup> Ba loolu amee surga ba jële fukki giléem ca giléemi sangam, dem, yóbbaaale li gën ci mboolem xeeti alalu sangam. Ma nga jëm réewu Mesopotami, ga Naxor dëkk. <sup>11</sup> Ba muy jub dëkk ba, daa yésal giléem ya fu dend akub seyaan waxtuw ngoon, fekk jigéen ñay génn di rootsi. <sup>12</sup> Mu daldi ne: «Yaw Aji Sax ji, sama Yállay sang Ibraayma, ngalla nangul ma tey jii te laaye biir sama sang Ibraayma. <sup>13</sup> Maa ngi nii taxaw ci bētu ndox mi, janqi dëkk bi di rootsi. <sup>14</sup> Janq bu ma wax ne ko: “Doo yenniku sa njaq, may ma, ma naan,” mu ne ma: “Naanal ba noppi, ma wëggal la say giléem,” na kooka di ki nga jagleel sa jaam Isaaxa. Noonu laay xame ne laaye nga biir sama sang.»

<sup>15</sup> Laata muy ñaan ba noppi sax, gis na Rebeka gàddu njaqam, di ñew. Rebeka moomu di doomu Betuwel te di sētu Milka ak Naxor, miy magu Ibraayma. <sup>16</sup> Ndaw su taaru la woon, di ab janq bu séyagul. Naka la wàcc ba ca seyaan ba, duy njaqam, yéegaat. <sup>17</sup> Surga ba daw, daje ak moom ne ko: «Doo ma may tuuti ci sa njaq li, ma naan.» <sup>18</sup> Mu ne ko: «Ahakay, sang bi,» daldi gaaw, yenniku njaq la, may ko mu naan. <sup>19</sup> Ba ko ndaw si mayee, mu naan ba noppi, da ne ko:

«Xaaral, ma wëggal la giléem yi, ñu naan ba noppi.»<sup>20</sup> Mu daldi gaaw, sotti njaq la ca mbalka ma, dawaat rootali giléem yi ca seyaan ba. <sup>21</sup> Waa ja ne ko jàkk, ne tekk, di seet, ba xam ndax Aji Sax ji àntal na yoonam am déet.

<sup>22</sup> Ba giléem ya naanee ba sotal, waa ji jël jaarob bakkan bu wurus bu tollook juróom benni garaam, ak ñaari lami wurus yu tollu ci téeméeri garaam, takkal ko. <sup>23</sup> Mu ne ko: «Wax ma, kan moo la jur?» Ak itam: «Ndax man nanoo dal sa kër baay?» <sup>24</sup> Mu ne ko: «Betuwel a ma jur, doomu Naxor ak Milka,» <sup>25</sup> teg ca ne ko: «Waawaaw, ñax maak ngoon maa nga fa, ne gänñ, te it manees na faa dal.» <sup>26</sup> Waa ji nag sujjóot, sant Aji Sax ji, <sup>27</sup> daldi ne: «Cant ñeel na Aji Sax ji, sama Yállay sang, Ibraayma, moom mi masula noppee laaye biir sama sang, te masu koo ñàkke worma. Man it, Aji Sax ji wommat na ma ba sama kër bokki sang!»

<sup>28</sup> Janq bi nag daw dem, nettali waa kër yaayam la xew lépp. <sup>29</sup> Rebeka amoon na càmmiñ lu tudd Laban. Laban daldi gaawtu génn, fekki waa ja ca seyaan ba. <sup>30</sup> Booba gis na jaaro ba ak lam, ya ca loxol jigéenam Rebeka, te dégg na jigéenam di nettali la ko waa ja wax. Loolu tax mu dem ca waa ja, fekk ko ca giléem ya ca seyaan ba. <sup>31</sup> Mu ne ko: «Yaw mi Aji Sax ji barkeel, agsil boog! Looy toog ci àll bi; waajalal naa la ab dal, te giléem yi am nañu fu ñu nekk.» <sup>32</sup> Waa ja daldi àgg ca kër ga, ñu sippi giléem ya, may leen ñax ak ngoon, may waa ja ndox, mu jàngu, moom ak ñi mu àndal, <sup>33</sup> ba noppi ñu taajal ko lu mu lekk. Mu ne: «Déédéet, дума lekk muk kay, te waxuma li ma taxa jóg.» Laban ne ko: «Kon nag waxal.»

<sup>34</sup> Mu ne: «Man surgab Ibraayma laa. <sup>35</sup> Aji Sax ji dafa barkeel sama sang lool, ba muy boroom daraja. May na ko jur gu gàtt ak gu gudd, xalis ak wurus ak ay surga yu góor ak yu jigéen ak ay giléem aki mbaam. <sup>36</sup> Sama soxnas sang Saarata nag dem na ba màggat, doora amal sama sang doom ju góor. Doomam jooju la jox li mu moom lépp. <sup>37</sup> Sama sang nag giñloo ma ne: “Bul jëlal muk sama doom soxna



ci biir jigéeni waa réewu Kanaan, gi ma dëkk. <sup>38</sup> Waaye demal ca sama kër baay, ca samay bokk, nga jëlal fa sama doom soxna.” <sup>39</sup> Ma ne sama sang: “Bu ndaw sa nanguwula ànd ak man nag?” <sup>40</sup> Mu ne ma: “Aji Sax, ji ma topp, dina yónni malaakaam, mu ànd ak yaw, ba àntalal la sa yoon, nga jëlal sama doom soxna ca sama kër baay, ca sama biiri bokk. <sup>41</sup> Boo demee ba ca samay bokk, wàcc nga, ndax bu ñu la mayul soxna, wàccoo nga ak man.” <sup>42</sup> Ba ma agsee tey jii ca seyaan ba, damaa wax ne: “Aji Sax ji, sama Yállay sang Ibraayma, ndegam nar ngaa àntal yoon wi may dox, ngalla may ma lii: <sup>43</sup> maa ngii taxaw ci seyaan bi; janq bay ñew rootsi, ma ne ko: ‘Doo ma may tuuti ci sa njaq li, ma naan,’ <sup>44</sup> mu ne ma: ‘Naanal ba noppi, ma wëggal la say giléem,’ kooku na di soxna, si Aji Sax ji jagleel sama doomu sang.”

<sup>45</sup> «Bala maa ñaan ba noppi, Rebeka ne jimeet, gaddu njaqam, wàcc ca seyaan ba, di root. Ma ne ko: “May ma, ma naan.” <sup>46</sup> Mu gaaw yenniku njaq li, daldi ne ma: “Naanal ba noppi ma wëggal la say giléem.” Ma naan ba noppi, mu wëggal ma giléem yi. <sup>47</sup> Ma laaj ko ne ko: “Kan moo la jur?” Mu ne: “Betuwel, doomu Naxor ak Milka.”

«Ca laa ko takkal jaaro bi ci bakkanam, ak lam yi ciy loxoom. <sup>48</sup> Ba mu ko defee ma sujjóotal Aji Sax ji, sant Aji Sax jiy sama Yállay sang Ibraayma, ndax jubal na sama yoon, ba ma jëlal doomam soxna ciy bokkam. <sup>49</sup> Léegi nag ndegam nar ngeena rafetoo ak sama sang tey sàmm kòllère, xamal-leen ma ko, ba mu leer. Su ngeen ko narul it, waxleen ma, ma xam nu may def.»

<sup>50</sup> Laban ak Betuwel ne ko: «Mbir moomu de ci Aji Sax ji la jóge, te amunu ci dara lu nuy wax. <sup>51</sup> Rebekaa ngoogu, jëlal te dem, muy sa soxnas doomu sang, ni la ko Aji Sax ji tegtale.» <sup>52</sup> Naka la surgab Ibraayma dégg yooyu kàddu, daldi sujjóotal Aji Sax ji.

<sup>53</sup> Surga ba nag génne ay gànjarì xaaalis ak yu wurus booleek ay yère, jox Rebeka. Càmmiñ la ak yaay ja itam, mu may leen

alal ju takku. <sup>54</sup> Ba loolu weese mu doora lekk, daldi naan, moom ak ñi mu àndal. Ñu fanaan fa keroog.

Ba ñu yewwoo ca èllëg sa, surga ba ne: «Bàyyileen ma nag, ma dellu ca sama sang.» <sup>55</sup> Càmmiñal ndaw sa ak yaay ja daldi ne ko: «Xanaa kay janq bi dina toogaat ak nun ab diir boog, maanaam fii ak sibbir, doora dem.» <sup>56</sup> Mu ne leen: «Gannaaw Aji Sax ji àntal na sama yoon, tee ngeen ma baña yeexal, te bàyyi ma rekk, ma dellu ca sama sang?» <sup>57</sup> Ñu ne ko: «Kon nag nanu woo janq bi, laaj ko moom ci boppam.» <sup>58</sup> Ci kaw loolu ñu woo Rebeka, ne ko: «Ndax dangay ànd ak waa ji léegi?» Mu ne: «Waaw.» <sup>59</sup> Ba loolu amee càmmiñ ya bàyyi seen jigéen Rebeka, moom ak surga, bi ko yar te daan ko nàmpal, ñu ànd ak surgab Ibraayma ak ñi ko topp, ñu dem. <sup>60</sup> Ña ngay ñaanal Rebeka, mu barkeel, te naan: «Éy jigéen sunu! Giiral, ba sos ay junniy junni,

te sa askan teg ay bañam tànk.»

<sup>61</sup> Gannaaw loolu Rebeka ànd ak xale yu jigéen, yiy jaamam, ñu war ay giléem, topp waa ja. Surga ba daldi dem, yóbbu Rebeka.

<sup>62</sup> Loolu fekk na Isaaxa dëkk ca àllub Negew. Mu demoon nag teenu Laxay Roy, ba ñibbsi. <sup>63</sup> Genn ngoon Isaaxa génn, di doxantu ca àll ba. Naka la ne sigget xool, séen giléem yuy ñew. <sup>64</sup> Rebeka it ne sigget, gis Isaaxa. Mu ne cëpp nag, wàcc giléem ga, <sup>65</sup> daldi ne surga ba: «Waa jee ci àll biy ñew, jëm ci nun, kan a?» Surga ba ne ko: «Sama sang la de.» Rebeka daldi jël muuraay ba, muuroo. <sup>66</sup> Surga ba nag nettali Isaaxa li mu def lépp. <sup>67</sup> Ba loolu wéyee Isaaxa yóbbu Rebeka ca xaymab yaayam Saarata, muy soxnaam, di ku mu bëgg, te di ko muñe yaayam, ndax fekk na mu faatu.

## 25

### *Ibraayma nelaw na*

<sup>1</sup> Ibraayma jëlaat na soxna su tudd Keturah, <sup>2</sup> am ca Simran ak Yogsan ak Medan ak Majan ak Yisbag ak Suwa. <sup>3</sup> Yogsan jur Saba ak Dedan. Askani Dedan ñooy

Asureen ñi, Letuseen ñi ak Lewumeen ñi.  
<sup>4</sup> Doomi Majan di Efa ak Efer ak Anog ak Abida ak Elda. Ñooñu ñépp xetu Ketura lañu.

<sup>5</sup> Ibraayma nag donale Isaaxa lépp lu mu moom. <sup>6</sup> Doom yu góor, ya mu am aki nekkaaleem, mu may leen alal ca ba muy dund, ba noppi yebal leen penku, ñu sancu ca réewu penku, ba sore doomam Isaaxa\*.

<sup>7</sup> Ati Ibraayma téeméer la ak juróom ñaar fukk ak juróom (175). <sup>8</sup> Ba loolu weese la bakkanu Ibraayma rot, mu nelaw, fekki ay maamam, gannaaw ba mu guddee fan, ba màggat lool te barkeel. <sup>9</sup> Isaaxa ak Ismayla, doomam yu góor ya, rob ko ca xuntim xeer ma ca Magpela te jàkkaarloo ak Mamre, ca toolub Efron doomu Sowar, Etteen ba. <sup>10</sup> Tool ba Ibraayma jëndoon ca Etteen ña, foofa lañu denc Ibraayma ak soxnaam Saarata. <sup>11</sup> Gannaaw ba Ibraayma nelawee, Yàlla barkeel na doomam Isaaxa. Isaaxaa ngi dèkkoon ca wetu teenu Laxay Roy.

## Askanu Ismayla

(Saar 25.12-18)

<sup>12</sup> Ismayla moomee nag, doomu Ibraayma jaak Ajaram Misra, ma doon jaamub Saarata, askanam mooy lii. <sup>13</sup> Turi doomi Ismayla yu góor yaa di: Nebayot, taawub Ismayla, ña ca topp di Kedar ak Adabeel ak Mibsam <sup>14</sup> ak Misma ak Duuma ak Maasa <sup>15</sup> ak Adàdd ak Tema ak Yetur ak Nafis ak Kedama. <sup>16</sup> Ñooñu ñooy doomi Ismayla yu góor, seeni tur a ngoog, ñuy fukki garmi ak ñaar yu jiite seeni mbooloo ci seeni sanc ak seeni dal. <sup>17</sup> Ati Ismayla téeméer la ak fanweer ak juróom ñaar (137). Gannaaw loolu la nelaw, fekki ay maamam.

<sup>18</sup> Ña nga dèkkoon diggante ba dale Awila ba Sur ga jàkkaarlook Misra, booy jëm Asur. Noonu la fa askanu Ismayla sance, jàkkaarlook doomi baayam yépp.

## Askanu Isaaxa doomu Ibraayma

(Saar 25.19—35.29)

<sup>19</sup> Isaaxa doomu Ibraayma ju góor ja, askanam mooy lii. Ibraaymaa jur Isaaxa. <sup>20</sup> Isaaxa am ñeent fukki at, jël Rebeka doomu Betuwel, Arameen, bi dèkke diiwaanu Padan Aram, dib jigéenu Laban, Arameen ba. <sup>21</sup> Gannaaw ga soxnas Isaaxa amul doom, Isaaxa dagaanal ko Aji Sax ji, mu nangul ko, soxna si daldi ëmb. <sup>22</sup> Doom yi nag di buuxante ci biiram, ba mu naan: «Ndegam nii la kay, jaru ko woon!» Ci kaw loolu soxna si dem, diis ko Aji Sax ji.

<sup>23</sup> Aji Sax ji ne ko:

«Ñaari giir nga ëmb,  
 nara am ñaari xeet yuy xaajaloo,  
 wenn wi mooy ëpp doole wi ci des,  
 te mag ji mooy surgawu rakk ji†.»

<sup>24</sup> Ba mu demee ba wara mucc, amul lu moy ay seex. <sup>25</sup> Naka noona ka jékka gane àddina xonq, yaram wi sèq lipp, mel ni mbubbum der mu ne sàyy aki kawaram, ñu tudde ko Esawu (mu firi Ku jëxëm). <sup>26</sup> Gannaaw ga ka ca des topp ca, loxo ba jàpp ca téstënu Esawu. Ñu tudde ko Yanqóoba (mu firi Jàpp ci téstën)‡. Ba leen Rebeka di am, fekk na Isaaxa am juróom benn fukki at.

*Esawu sàggane na céram*

<sup>27</sup> Ba mu ko defee gone ya di màgg, Esawu di rëbbkat bu ñaw, di ku bëgg àll; Yanqóoba moom di nit ku gátteñlu§ te bëggoon toogaayu kër. <sup>28</sup> Isaaxa nag am cofeel ci Esawu ndax li muy lekk ci am rëbbam, te Rebeka moom gëna sopp Yanqóoba.

<sup>29</sup> Mu am bés Yanqóoba di togg ndambel ñebbe ju xonq, yemook Esawu jóge ca tool ya, xiif ba ne ñedd. <sup>30</sup> Mu ne Yanqóoba: «Gaawe ma ci ndambe lee waay, ba ma duy sama biir ci sa ndambe lu xonq loolu, ndax xiif a ngi may rey.» Loolu moo tax ñu tudde Esawu, Edom (mu firi Xonqe). <sup>31</sup> Yanqóoba ne ko: «Danga ma koy jékka wecci sa

\* **25:6** 25.6 Ca yooya jamono, nit manoon naa am ay soxna yu am cér bu mat sèkk, ak yeneen soxna, yu gëna néewle sañ-sañ, ñoom ak seeni doom. † **25:23** 25.23 Ci bànni Israyil, seex, bi jékka juddu, moo mag ki mujja juddu. ‡ **25:26** 25.26 Jàpp ci téstën mu ngi tekki ci waxin «suufu nit, ba am loo nangu ci moom». § **25:27** 25.27 gátteñlu gi ci Yanqóoba moo waraloon xamul dara ci rëbb.

céru ndono bi nga yeyoo ndax li ngay taaw\*.» <sup>32</sup> Esawu ne: «Man miy waaja dee ak xiif, ana lu ma céru taaw di jariñ?» <sup>33</sup> Yanqóoba ne ko: «Giñal ma jëkk.» Esawu giñal ko ko, mu jaay Yanqóoba ndono, li mu yeyoo ndax li muy taaw. <sup>34</sup> Yanqóoba jox Esawu mburu ak ndambe, mu lekk, naan, daldi jóg dem yoonam. Noonu la Esawu sàgganee céru taaw, bi mu yeyoo.

## 26

### *Isaaxa nëbbu na waa Gerar ngir mucc*

<sup>1</sup> Ba loolu wéyee xiif am ca réew ma, muy xiif bu wuute ak ba woon ca jamonoy Ibraayma; Isaaxa nag dem Gerar ca Abimeleg, buurub waa Filisti.

<sup>2</sup> Foofa Aji Sax ji feeñu ko fa ne ko: «Bul dem Misra, waaye nanga toog ci réew mi ma lay wax. <sup>3</sup> Dalal ci réew mii; dinaa ànd ak yaw, barkeel la. Yaak sa askan laay jox suuf sii sépp, te dinaa sàmm li ma giñaloon sa baay Ibraayma. <sup>4</sup> Dinaa ful sa askan ni biddiwi asamaan, dinaa jox sa askan suuf sii sépp, te it ci saw askan la xeeti àddina sépp di barkeele, <sup>5</sup> ndax Ibraayma déggal na ma, dénkoo na sama ndénkaane, ak samay santaane, ak sama dogali yoon, ak samay yoon.»

<sup>6</sup> Isaaxa nag toog Gerar. <sup>7</sup> Góori foofa laaj ko ndaw si mu àndal, lu mu doon ci moom, mu ne: «Sama jigéen la.» Dafa bañoona wax ne soxnaam la, ngir ragal waa foofa rey ko ndax taaru Rebeka. <sup>8</sup> Ba ñu fa toogee ba mu yàgg, mu am bés Abimeleg, buurub waa Filisti tollu ci palanteeram, gis leen, fekk yóo Isaaxaa ngay raay soxnaam Rebeka. <sup>9</sup> Abimeleg woolu Isaaxa ne ko: «Kii kay ndeke sa soxna la! Noo mana waxe ne sa jigéen la?» Isaaxa ne ko: «Damaa waxe noonu, ngir ñu bañ maa rey ndax moom.» <sup>10</sup> Abimeleg ne ko: «Li nga nu def nag? Xaw tuuti kenn ci nit ñi tédde sa soxna, te kon nga yóbbe nu tooñ.» <sup>11</sup> Abimeleg daldi fay doxe àrtu waa réewam mépp ne leen: «Ku laal waa jii walla soxnaam, dees na ko rey.»

### *Isaaxa fas na kóllère ak Abimeleg*

<sup>12</sup> Gannaaw loolu Isaaxa bey ca réew ma, góob ca at ma lu tollook téeméeri yoon la mu ji woon, ndax Aji Sax ji da koo barkeel. <sup>13</sup> Alalam di yokku, muy gëna barele, ba mujj am doole lool, <sup>14</sup> am géttu jur gu gudd ak gu gàtt, ak ay surga yu bare, ba tax waa Filisti iñaane ko, <sup>15</sup> bay sakk ak a sèkk mboolem teen, yi surgay baayam Ibraayma gasoon ca jamonoom. <sup>16</sup> Abimeleg daldi ne Isaaxa: «Demal, ba sore nu, ndax danga noo èpp doole lool.» <sup>17</sup> Isaaxa jóge foofa, dali ca xuru Gerar, sanc fa.

<sup>18</sup> Ba loolu weesee Isaaxa sikkli teen, yi ñu gasoon ca jamonoy baayam Ibraayma, te waa Filisti sakkoon leen gannaaw ba Ibraayma nelawee. Ca la tudde teen yi tur, ya leen baayam tudde woon. <sup>19</sup> Surgay Isaaxa gasaat ca xur wa, jot ndox mu neex. <sup>20</sup> Teewul sàmmi Gerar di sowook sàmmi Isaaxa naan: «Nun noo moom ndox mi.» Mu tudde teen ba Eseg (mu firi Coow), ndax li ñu soowoo ak moom. <sup>21</sup> Ñu gasaat ab teen, xuloo amati ca, mu tudde ko Sitna (mu firi Xuloo). <sup>22</sup> Mu jóge foofa, gasati teen, jàmm ne ñoyy, mu tudde ko Reyobot (mu firi Fu yaatu), ndax da ne: «Léegi Aji Sax ji yaatal na nu, te dinanu woomle ci réew mi.»

<sup>23</sup> Ba mu fa jógee, dafa dellu Beerseba. <sup>24</sup> Guddi googu Aji Sax ji feeñu ko ne ko: «Maay Yállay Ibraayma sa baay; bul ragal dara, ndax maa ngi ànd ak yaw. Dinaa la barkeel, ful sa askan ndax sama jaam Ibraayma.» <sup>25</sup> Isaaxa nag sàkk fa sarxalukaay, tudd fa Aji Sax ji, wormaal ko, ba noppi samp fa xaymaam. Te itam ay surgaam bènn nañu fa ab teen.

<sup>26</sup> Ci diggante boobu Abimeleg dafa jóge Gerar, dem fekki ko, ànd ak Awusat, ma doon wóllèreem, ak Pikol, njiital xarekatam. <sup>27</sup> Isaaxa ne leen: «Lu waral ngeen fekkisi ma fii, gannaaw dangeen maa bañ, ba dàq ma?» <sup>28</sup> Ñu ne ko: «Gis nanu bu baax ne Aji Sax ji ànd na ak yaw; moo tax nu ne ayca nu waatoo ci sunu digganteek yaw te fasanteek yaw kóllère.

\* 25:31 25.31 Ci bànni Israyil, taaw mooy mujj doon kilifag kër, te mooy èpple ay rakkam ab cér ci ndono.

29 Su ko defee doo nu def dara lu bon, gannaaw defunu la dara lu bon, xanaa lu baax rekk, ba yebal la, nga dem ci jàmm. Kon léegi yal na la Aji Sax ji barkeel.»

30 Isaaxa nag berndeel leen, ñu bokk lekk, ba noppi naan. 31 Ca ëllëg sa, ñu xëy suba teel, daldi waatoo, Isaaxa door leena yiwi, ñu dem ci jàmm.

32 Ca bés booba ay surgay Isaaxa ñëw nañu, di ko wax lu jëm ci teen, ba ñu doon gas, ne ko: «Gis nanu ndox.» 33 Isaaxa tudde teen ba Siba (mu firi Waatoo), moo tax turu dëkk ba, ba fii nu tollu, di Beerseba (mu firi Teenu waat ga).

### *Esawu jël na ay soxna*

34 Esawu am na ñeent fukki at, jël na soxna ku ñuy wax Yudit, muy doomu Beeri, miy Etteen, jëlaat Basmat doomu Elon, miy Etteen. 35 Jigéen ñooñu mu jël nag di naqar wu réy ci Isaaxa ak Rebeka.

## 27

### *Yanqóoba jëkk na Esawu ci ñaanam*

1 Ba Isaaxa mąggatee, te bët yi naqari, ba gisatul, am na bés mu woo taawam Esawu ne ko: «Doom.» Mu ne ko: «Naam.» 2 Isaaxa ne ko: «Déglul, ma wax la. Mąggat naa te xawma sama bésu dee. 3 Kon léegi jëlal say gannaay: say fitt ak sa xala, nga dem ca àll ba, rëbbali ma. 4 Toggal ma ko, ba mu neex, ni ma ko bégge, indil ma, ma lekk, ndax ma ñaanal la lu ma tibbe ci sama xol, bala may dëddu.» 5 Fekk na Rebekaa ngi déglu, ba Isaaxay wax ak doomam Esawu. Esawu daldi dem ca àll ba, rëbbi lu mu toggsi.

6 Rebeka moom ne doomam Yanqóoba: «Dégg naa sa baay wax sa mag Esawu ne ko: 7 «Demal rëbbi, indil ma, toggal ma ko lu neex, ma lekk, ba ñaanal la, Aji Sax ji seede, bala may dëddu.» 8 Kon nag doom, defal lii ma lay wax. 9 Demal ca gétt ga, nga jàpp ñaari tef yu duuf, ma defaral ko sa baay, ba mu neex, ni mu ko bégge, 10 nga yóbbul ko, ngir mu ñaanal la, bala moo dee.»

11 Yanqóoba ne yaayam: «Waaw, waaye sama mag Esawu dafa jëxëm, te man sama yaram rattax. 12 Xëy na

sama baay làmbatu ma de, te kon dina ne njublanj laa. Su ko defee ay móolu laay yóbbe sama bopp, waaye du barkeb ñaan.» 13 Yaayam ne ko: «Bu la móoloo, Yàlla na ma topp, doom. Defal li ma la wax rekk te dem indil ma gàtt yi.»

14 Yanqóoba dem, jël gàtt yi, indil yaayam, mu defar ba mu neex, ni ko baayam bégge. 15 Rebeka daldi seet ca dencam la gën ca yérey Esawu taaw ba, solal Yanqóoba doomam ju ndaw. 16 Ba mu noppee, daa sàkk ca deri gàtt ya, sànge loxo ya ak fi rattax ci doq gi, 17 doora boole mburu ma ak ñam wa mu togg, jox doomam Yanqóoba.

18 Mu dikk ci baayam, ne ko: «Baay.» Mu ne ko: «Naam doom, kooku?» 19 Yanqóoba ne baayam: «Mana Esawu sa taaw. Def naa li nga ma wax. Jógal toog te lekk ci li ma la rëbbal, ndax nga ñaanal ma ci sa xol.» 20 Isaaxa ne doomam: «Moo doom! Noo def, ba gaawa jàpp nii?» Yanqóoba ne ko: «Aji Sax jiy sa Yàlla, moo ma ko jagleel.»

21 Isaaxa ne Yanqóoba: «Jegesil, ma làmb la, ba mu wóor ma ne sama doom Esawoo.» 22 Yanqóoba nag jegesi, baayam Isaaxa làmbatu ko ne: «Baat bi de baatu Yanqóobaa, waaye loxo yi, loxoy Esawoo.» 23 Xàmmiwu ko, ndax li loxo yi jëxëm ni yuy magam Esawu, ba tax mu ñaanal ko. 24 Isaaxa laaj ko ne ko: «Mbaa wóor na ne yaw ay Esawu?» Mu ne ko: «Waawaaw.» 25 Isaaxa ne ko: «Jottli ma fii ma lekk ci sam rëbb, doom, ba ñaanal la ci sama xol.» Yanqóoba jottli Isaaxa ndab li, mu lekk, daldi koy may biiñ, mu naan. 26 Isaaxa ne ko: «Kaay fii, foon ma, doom.» 27 Yanqóoba jegesi, foon ko, xetu yére yi mu sol xeeñ Isaaxa, mu door koo ñaanal ne ko:

«Sama xetu doom kay xetug tool la, bu Aji Sax ji barkeel.

28 Yal na la Yàlla may layub asamaan ak ngëneeli suuf, pepp ne gàññ, biiñ walangaan.

29 Yal na la ay giir nangul,

ay réew di la sujjóotal,

nga yilif say bokk,

te say doomi ndey di la sujjóotal.

Ku la móolooy alku,  
te ku la ñaanal barkeel.»

<sup>30</sup> Naka la Isaaxa noppee ñaanal Yanqóoba, ba mu won baayam Isaaxa gannaaw rekk, Esawu, mag ji, rëbbi ba ñëw, ne jalañ. <sup>31</sup> Mu togg moom it, ba mu neex, indil baayam. Mu ne ko: «Jógal baay, lekk ci sa rëbbum doom, ndax nga ñaanal ma ci sa xol.» <sup>32</sup> Baayam Isaaxa ne ko: «Kooku?» Mu ne ko: «Mana sa taaw Esawu.» <sup>33</sup> Isaaxaa ngay lox, bay rag-ragi, daldi ne ko: «Kan? Ana ku rëbbi woon nag, indil ma, ba ma lekk ba noppi? Ñaanal naa ko bala ngaa ñëw. Te dina barkeel moos.»

<sup>34</sup> Esawu dégg li baayam wax rekk, yuuxu yuux gu réy ndax naqar. Mu ne baayam: «Ngalla baay, ñaanal ma, man itam.» <sup>35</sup> Isaaxa ne ko: «Sa rakk ñëw na, nax ma, ba yóbbu sa ñaan.» <sup>36</sup> Esawu ne: «Moom kay moo yey tudd Yanqóoba, ndax suufu na ma ñaari yoon. Sama céru taaw la jékka nangu, tey mu nangooti sama ñaanu baay.» Mu teg ca ne: «Ndax desalaloo ma ag ñaan?» <sup>37</sup> Isaaxa ne Esawu: «Mbaa am naa lu ma la ñaanalati, doom? Ndax kat xas naa koo def, muy sa kilifa, te bokkam yépp laa def ñuy surgaam, te pepp ak biiñ laa ko woomale it, ba mu ne gáññ.» <sup>38</sup> Esawu ne baayam: «Baay, xanaa genn ñaan rekk nga am? Ngalla baay, ñaanal ma, man itam!» Ca la Esawu ne yikkét jooy. <sup>39</sup> Baayam Isaaxa ne ko:

«Déglul, ma wax la,  
dinga dëkk fu sore ngëneeli suuf,  
mbaa fu la layub asamaan tiime.  
<sup>40</sup> Sa saamar ngay dunde,  
sa rakk di la yilif.  
Waaye bés a ngi ñëw yaay sigiñu,  
ba yenniku notaangeem.»

### *Yanqóoba dem na ca nijaayam*

<sup>41</sup> Esawu nag bañ Yanqóoba ndax barke ba ko baayam ñaanal. Ma ngay wax ca xolam naan: «Balaa yàgg ñu dëj sama baay, te bu boobaa dinaa rey sama rakk Yanqóoba.» <sup>42</sup> Naka lañu nettali Rebeka la taawam Esawu wax, mu woolu Yanqóoba, doomam ju ndaw ja, ne ko:

«Sa mag a ngi fexee feyu, di la wuta rey. <sup>43</sup> Kon doom, defal lii ma lay wax, demal làquji fa sama càmmiñ Laban ca Karan, <sup>44</sup> nga toog fa moom ay fan, ba kera sa meru mag giif. <sup>45</sup> Bu sa meru mag giiffee, ba mu fàtte li nga ko def, dinaa yónnee, ñu jëlsi la. Duma seetaan muk, ba boole leen ñàkk, yeen ñaar ñépp, ci benn bés\*!»

<sup>46</sup> Gannaaw gi Rebeka ne Isaaxa: «Àddina soof na ma ndax jigéeni Etteen ñi. Yanqóoba de, bu jëlee ci jigéeni réew mi di Etteen ñu mel ni ñii, sama dund gi, dee a koy gën!»

## 28

<sup>1</sup> Ci kaw loolu Isaaxa woo Yanqóoba, ñaanal ko, jox ko ndigal lii ne ko: «Bul jël ci jigéeni Kanaan, <sup>2</sup> waaye demal Padan Aram ca sa kër maam-góor, ji jur sa yaay, nga jël fa jabar ca sa doomi nijaay Laban. <sup>3</sup> Yal na la Yàlla Aji Man ji barkeel, nga jaboot lool te sa giir yokku, ba sos ay mboolooy askan. <sup>4</sup> Yal na la barkeb Ibraayma dal, yaak askan wi soqikoo ci yaw, ba nga moom réew mii ngay doxandéem tey, te Yàlla mayoon ko Ibraayma.» <sup>5</sup> Isaaxa daldi yebal Yanqóoba, mu dem Padan Aram ca Laban doomu Betuwel, Arameen bay càmmiñu Rebeka, miy yaayu Yanqóoba ak Esawu.

### *Esawu jël na keneen soxna*

<sup>6</sup> Esawu nag yég ne Isaaxa ñaanal na Yanqóoba, ba noppi yebal ko Padan Aram, ngir mu jël fa soxna. Te it ba mu koy ñaanal, digal na ko ne ko, bumu jël ca jigéeni Kanaaneen ña. <sup>7</sup> Mu yég ne Yanqóoba déggal na baayam ak yaayam, ba dem Padan Aram. <sup>8</sup> Loolu won Esawu ne jigéeni Kanaan neexuñu baayam. <sup>9</sup> Ba mu ko defee Esawu dem ca xeetu Ismayla, jël fa Maalat doomu Ismayla, miy doomu Ibraayma, te di jigéenu Nebayot, mu bokk ciy soxnaam.

### *Yanqóoba sàrtoo na ak Yàlla*

<sup>10</sup> Ba loolu wéyee Yanqóoba gënn Beerseba, wuti Karan. <sup>11</sup> Naka la dem, ba

\* **27:45** 27.45 Dañooy yaakaar ne bu Yanqóoba dawulooñ, Esawu dina ko rey, te kon dees na ko feyul, daldi rey Esawu.

àgg fu ko jant bi sowe, daldi fay fanaan. Mu jël ca doj ya fa ne woon, gegenoo.

<sup>12</sup> Guddi googu Yanqóoba dafa gént, gis raas bu sampu ci suuf, te cat la sar asamaan, malaakay Yàlla yi di ci yéeg ak a wàcc. <sup>13</sup> Ndeke Aji Sax jaa nga tollu ca wetam. Mu wax ak moom ne ko: «Maay Aji Sax ji, di sa Yàllay maam Ibraayma te di Yàllay Isaaxa. Suuf si nga tédd dinaa la ko jox, yaak sa askan. <sup>14</sup> Saw askan dina ne gãññ ni suuf. Dinga law penku ak sowu, ndijoor ak càmmoñ. Ci yaw ak saw askan la giir yi ci kaw suuf yépp di barkeele. <sup>15</sup> Maa ngi nii ànd ak yaw, di la sàmm fépp foo jëm, te itam dinaa la délloosi ci réew mii. Duma la bàyyi muk, waaye dinaa def li ma la wax lépp.»

<sup>16</sup> Ci kaw loolu Yanqóoba yewwu ne: «Ndekete Aji Sax ji mu ngi ci bérab bii, te xawma ko woon.» <sup>17</sup> Ma nga tiit nag te naan: «Bérab beeka raglu! Fii kay du fenn, fu dul kër Yàlla; te mooy buntu asamaan.»

<sup>18</sup> Ca suba teel Yanqóoba jóg, jël doj, wi mu gegenoo woon, samp fa, muy xàmmikaay, ba noppi sotti ci ag diw, sellale ko. <sup>19</sup> Ca la tudde bérab ba Betel\*, waaye ca njàlbéen Lus la dëkk ba tuddoon. <sup>20</sup> Gannaaw loolu Yanqóoba dogu na ne: «Su Yàlla àndee ak man, di ma sàmm ci yoon wi may aw, di ma jox lu ma lekk ak lu ma sol, <sup>21</sup> ba kera may dellu sama kër baay ci jàmm, su boobaa, Aji Sax ji dina doon sama Yàlla. <sup>22</sup> Doj wii ma samp, muy xàmmikaay, mooy doon kër Yàlla, te lépp lu mu ma wërségal, dinaa ko génneel fukkeel ba moos.»

## 29

### *Yanqóoba daje na ak Rasel*

<sup>1</sup> Ba loolu xewee, Yanqóoba awaat yoonam, ba agsi réewum waa penku. <sup>2</sup> Mu yem foofa ca ab teen ca àll ba, ñetti gétti gàtt goor ca wet ga, ndax ca booba teen lañu doon wégge gétt ya, waaye doj wu réy moo uboon teen ba. <sup>3</sup> Bu gétt yépp dajaloo foofa, sàmm yi doora àndandoo bérar doj wa, mu moy buntu teen ba, ñu

wégg, ba noppi delloo doj wa, mu ubaat teen ba.

<sup>4</sup> Yanqóoba ne leen: «Bokki fan?» Ñu ne ko: «Karan.» <sup>5</sup> Mu ne leen: «Ndax xam ngeen Laban doomu Naxor?» Ñu ne ko: «Xam nanu ko kay.» <sup>6</sup> Mu dellu laaj leen ne leen: «Mbaa mu ngi ci jàmm?» Ñu ne ko: «Jàmm rekk kay. Xoolal ndaw see di ñëw, mook gàtt yi, mooy doomam Rasel.» <sup>7</sup> Yanqóoba ne leen: «Jant bi demagul fenn, ba ngeen di dajale jur gi. Wéggleen gàtt yi, sàmmi leen kay!» <sup>8</sup> Ñu ne ko: «Dunu ko man mbete gétt yépp daje, nu bérar doj wi, ubbi teen bi, doora wégg gàtt yi.»

<sup>9</sup> Na muy wax ak ñoom nag, Rasel agsi, indaale gàtti baayam, ndaxte sàmm la woon. <sup>10</sup> Ba Yanqóoba gisee Rasel, doomu nijaayam Laban, moom ak gàtti nijaayam ya, dafa daagu ba ca teen ba, bérar doj wa ko ub, daldi wégg gàtti Laban. <sup>11</sup> Ba loolu amee Yanqóoba foon Rasel, ne yikkét jooy. <sup>12</sup> Ca la Yanqóoba wax Rasel ne ko: «Maak sa baay a bokk, ndax maay sa doomu bàjjan Rebeka.» Rasel daw, yégal ko baayam.

<sup>13</sup> Ba Laban dégge ne jarbaatam Yanqóoba ñëw na, dafa daw gatandu ko, taf ko ci boppam, foon ko, yóbbu ko kër ga. Ba Yanqóoba nettalee Laban lépp, <sup>14</sup> Laban da ne ko: «Yaw kay sama jarbaat nga lenqe!» Yanqóoba toog na fa ak moom lu mat weer. <sup>15</sup> Gannaaw loolu Laban ne Yanqóoba: «Li ngay sama mbokk kat, taxul nga war maa liggéeyal ci neen. Wax ma lan mooy sa peyoor.»

<sup>16</sup> Laban nag amoon na ñaari doom yu jigéen, taaw ba di Leya, rakk ja di Rasel. <sup>17</sup> Leya di ku bêt ya yànjuloon, te Rasel nekkoon ku jekk te neexa xool, <sup>18</sup> Yanqóoba bëgg Rasel lool, ba ne Laban: «Dinaa la liggéeyal juróom ñaari at ngir Rasel sa doom ju ndaw ji.» <sup>19</sup> Laban ne ko: «Ma may la ko de moo ma gènal may ko keneen. Kon toogal ci man.» <sup>20</sup> Ci kaw loolu Yanqóoba liggéeyal Laban diiru juróom ñaari at ngir Rasel, te mu mel ni ay fan rekk ci moom ndax mbéggeel, gi mu am ci Rasel.

\* **28:19** 28.19 Betel mu ngi tekki «kër Yàlla».

<sup>21</sup> Loolu wéy, Yanqóoba ne Laban: «Jox ma sama jabar, ma séetal ko, ndax àpp bi jot na.» <sup>22</sup> Laban nangu, daldi togglu ay reer, woo ca waa gox ba bépp. <sup>23</sup> Timis jot Laban jël doomam Leya, jébbal ko Yanqóoba, mu dëkkoo ko. <sup>24</sup> Ci biir loolu Laban jël jaamam bu jigéen bu ñuy wax Silpa, may ko doomam Leya, mu dib jaamam.

<sup>25</sup> Ba bët setee, Yanqóoba fekk muy Leya. Mu ne Laban: «Waaw, li nga ma def nag? Du Rasel a taxoon ma liggéeyal la? Lu tax nga wor ma?» <sup>26</sup> Laban ne ko: «Rakk jékka séy taaw daal, du aada fii. <sup>27</sup> Séetul ak kii, ba ayu bésam mat, ma door laa jox ki ci des, soo ma dee liggéeyaatal diiru juróom ñaari at.» <sup>28</sup> Yanqóoba nangu, daldi séetu ak Leya ayu bés, ba noppi Laban jébbal ko doomam Rasel. <sup>29</sup> Booba la Laban may Rasel jaamam bu jigéen bu ñuy wax Bilaa, mu dib jaamam. <sup>30</sup> Yanqóoba nag dëkkoo Rasel, mi mu gënoona bëgg Leya. Ci kaw loolu mu liggéeyaatal Laban juróom ñaari at.

### *Lu jëm ci njabootu Yanqóoba*

<sup>31</sup> Ba Aji Sax ji gisee ne Leya fonkeesu ko, mu may ko, mu taawlu, te Rasel moom manula am doom. <sup>32</sup> Ba Leya ëmbee, am doom ju góor, da koo tudde Ruben (mu firi Gisleen, doom ju góor a ngi), ndaxte Leya da ne: «Aji Sax ji gis na sama toroxte. Léegi sama jëkkër dina ma bëgg.» <sup>33</sup> Mu dellu ëmb, am doom ju góor. Mu ne: «Aji Sax ji yég na ne fonkeesu ma, looloo tax mu mayaata ma doom jii.» Mu tudde ko Simeyon (mu firi Kiy dégg). <sup>34</sup> Mu delluwaat ëmb, am doom ju góor, ba noppi waxaat ne: «Bii yoon sama jëkkër dina am cofeel ci man, ndax jural naa ko ñetti doom yu góor,» loolu tax mu tudde ko Lewi (mu firi Boroom cofeel). <sup>35</sup> Mu dellooti ëmb, am doom ju góor daldi ne: «Bii yoon dinaa sant Aji Sax ji,» loolu tax mu tudde ko Yuda (mu firi Cant). Gannaaw loolu njuram taxaw.

## 30

<sup>1</sup> Ba Rasel gisee ne amalul Yanqóoba doom, dafa ñee magam, ba tax mu wax Yanqóoba ne ko: «Nanu am ay doom, mbaa ma dee.» <sup>2</sup> Yanqóoba mere ca Rasel ne ko: «Ndax maay Yàlla, mi la teree am doom?» <sup>3</sup> Mu ne ko: «Xoolal, sama jaam Bilaa ngii; dëkkoo ko, ndax mu amal ma doom, ba jabootal ma.» <sup>4</sup> Ci kaw loolu mu may ko jaamam Bilaa, muy soxnaam. Yanqóoba dëkkoo Bilaa, <sup>5</sup> mu ëmb, amal Yanqóoba doom ju góor. <sup>6</sup> Bi loolu amee Rasel ne: «Yàlla àtte na ma; dégg na sama ñaan, ba may ma doom.» Mu tudde ko nag Dan (mu firi Kiy àtte). <sup>7</sup> Gannaaw ga Bilaa, jaamub Rasel, ëmbaat, dellu amal Yanqóoba doom ju góor. <sup>8</sup> Rasel ne: «Bère naa ak sama mag bère bu réy, ba daan,» daldi ko tudde Neftali (mu firi Kiy bère).

<sup>9</sup> Leya moom it xam ne taxawaayam yàgg na, mu fab jaamam Silpa, may ko Yanqóoba. <sup>10</sup> Bi loolu amee Silpa, jaamub Leya, amal Yanqóoba doom ju góor. <sup>11</sup> Leya ne: «Ndaw wërsëg wu réy!» daldi ko tudde Gàdd (mu firi Wërsëg). <sup>12</sup> Silpa jaamub Leya dellu, amal Yanqóoba doom ju góor. <sup>13</sup> Leya ne: «Éey waay, maaka bég! Jeeg ji dinañu ma wooye boroom mbégte mi.» Mu tudde ko nag Aser (mu firi Boroom mbégte).

<sup>14</sup> Mu am bés ñuy góob bele, Ruben dem tool, sàkke ca gàncax gu ñu naan màndaragoor\*, indil ko yaayam Leya. Rasel ne Leya: «Ngalla may ma ci màndaragoor ji la sa doom indil.» <sup>15</sup> Teewul mu ne ko: «Ndax nangu sama jëkkër rekk doyu la, ba nga bëgg cee boole màndaragoor ji ma sama doom indil?» Rasel ne ko: «Kon jox ma ci màndaragoor ji sa doom indi, ma wecci la ko sama ayu tey boog.»

<sup>16</sup> Yanqóobaa ngay jóge tool ca ngoon, Leya génn, gatandu ko, ne ko: «Fi man nga wara aye tey, ndaxte jënde naa ay gi màndaragoor ji sama doom indi.» Yanqóoba daldi féete ca moom guddi googu. <sup>17</sup> Yàlla nangul Leya, mu ëmb, am

\* **30:14** 30.14 màndaragoor gàncax la gu ñu yaakaar ne day giiral jigéen.

ak Yanqóoba seen juróomeelu doom ju góor. <sup>18</sup> Leya neeti: «Yàlla da maa fey, ndax maa may sama jèkkèr sama jaam.» Mu tudde ko Isaakar (mu firi Boroom pey). <sup>19</sup> Gannaaw gi Leya ëmbaat, am ak Yanqóoba seen juróom benneelu doom ju góor. <sup>20</sup> Booba la ne: «Yàlla defal na ma teraanga ju réy. Bii yoon sama jèkkèr dina ma teral, ndax amal naa ko juróom benni doom yu góor.» Moo tax mu tudde ko Sabulon (mu firi Teraanga). <sup>21</sup> Gannaaw ga mu am doom ju jigéen, tudde ko Diina.

<sup>22</sup> Ba loolu amee Yàlla geestu Rasel, nangul ko, may ko doom. <sup>23</sup> Mu ëmb, am doom ju góor, daldi ne: «Yàlla teggil na ma gâce.» <sup>24</sup> Moo tax mu tudde ko Yuusufa (mu firi Yal na dolli), ndax dafa ne: «Yal na ma Aji Sax ji dollil doom ju góor.»

### *Yanqóoba woomle na*

<sup>25</sup> Ba Rasel amee doom ci Yuusufa, Yanqóoba da ne Laban: «Yiwi ma boog, ma dellu sama réew ca sama kër. <sup>26</sup> Su ko defee nga jox ma samay doom ak sama jabar yi taxoon ma di la liggéeyal, te bàyyi ma, ma dem, ndax yaw ci sa bopp xam nga li ma la liggéeyal.» <sup>27</sup> Laban ne ko: «Ngalla waay, déglu ma, ngir sama ngisaane won na ma ne Aji Sax ji barkeel na ma ndax yaw. <sup>28</sup> Wax ma loo may feyeeku rekk, dinaa la ko fey.» <sup>29</sup> Yanqóoba ne ko: «Yaw ci sa bopp xam nga ni ma la liggéeyale ak ni sa gétt mujj mel ndax man; <sup>30</sup> ndaxte lu néew nga amoon laata may ñëw, te yokku na, ba bare lool, ngir Aji Sax ji da laa barkeel ndax man. Waaye léegi nag, liggéeyal sama waa kër bopp jot na xanaa?» <sup>31</sup> Laban dellu ne ko: «Dama ne, ñaata laa lay fey?» Yanqóoba ne ko: «Doo ma jox dara. Boo nangoo lii ma lay wax, dinaa sàmmaat say gàtt, wattu ko. <sup>32</sup> Damay seet tey jii ci biir jur gu gàtt gépp, génne ci xar yu ñuul yépp†, ak bëy, yi todde ak yi tippante yépp, ñu doon sama peyoor‡. <sup>33</sup> Èllëg aki sibbir booy

seetsi sama peyoor, sama njubtee may layool: lépp lu toddewul te tippantewul ci biir bëy yi ak lu ñuulul ci mburt yi, boo ko gisee ci man, càcc la.» <sup>34</sup> Laban ne: «Waaw, kon baax na.»

<sup>35</sup> Ca bés booba Laban dafa ber sikket, yi seereer te todde, ak bëy, yi tippante te todde, maanaam yi rax, ak xari menn melo yu ñuul yi, daldi leen dénk ay doomam. <sup>36</sup> Gannaaw loolu mu doxale digganteem ak Yanqóoba doxu ñetti fan. Yanqóoba nag di sàm li des ci gàtti Laban.

<sup>37</sup> Ci kaw loolu Yanqóoba tànn ñetti garab yu ñuy wax pèpalyee, gerte-tubaab ak palataan, gor ci bant yu tooy, xànc-xàncee ko, ba mu defi rédd yu weex. <sup>38</sup> Mu yeb bant, ya mu xànc-xàncee, ca naanukaay ya, mu janook jur ga, ca mbalka ya jur gay naane, ndax fa la jur ga daan tèboo. <sup>39</sup> Loolu tax bëy yay tèbu ca wetu car ya, di jur doom yu seereer, yu tippante ak yu todde. <sup>40</sup> Xar ya, Yanqóoba da leena ber, tey fexe ñuy janook lépp lu seereer ak lu ñuul ci biir juru Laban. Noonu la sàkke juru boppam, bañ koo boole ak juru Laban. <sup>41</sup> Saa yu jur gi èpp doole dee tèbu, Yanqóoba yeb car yi ci naanukaay yi, tiimale ci jur gi, ngir bu ñuy tèbu, ne ci jàkk. <sup>42</sup> Bu jur gu xiibon gi dee tèbu, mu bañ leena tegal dara. Muy def noonu ba jur gi xiibon, di gu Laban, gi am doole, di gu Yanqóoba. <sup>43</sup> Waa ji mujj na barele lool, am gàtt yu ne gàññ ak ay jaam yu góor ak yu jigéen ak ay giléem aki mbaam-sëf.

## 31

### *Yanqóoba toxu na, jëm Kanaan*

<sup>1</sup> Ba loolu amee mu am bés Yanqóoba dégg doomi Laban ya naan, Yanqóoba nangu na li seen baay amoon lépp, te ci seen alalu baay la sàkkoo alalam jooju jépp. <sup>2</sup> Naka la Yanqóoba gis kanamu Laban, daldi xam ne melatul, na mu meloon ci moom. <sup>3</sup> Aji Sax ji wax Yanqóoba ne ko: «Dellul ca sa réewu maam ya, ca say bokk. Dinaa ànd ak yaw.»

† 30:32 30.32 Ca yooyu jamono xar yi dañu daan faral di weex, bëy yi farala ñuul te dañu rax. ‡ 30:32 30.32 Fii dañoo topp téereb kàddug Yàlla gi ni ñu ko tekkee ci làmmiñu greg, te ci booba téere melow todde ak tippante bëy yi rekk a ko féetewoo.



<sup>4</sup> Yanqóoba woolu Rasel ak Leya ca tool ya, fa gättam ya nekk. <sup>5</sup> Mu ne leen: «Gis naa seen kanamu baay. Xam naa ne melatul na mu meloon ci man. Waaye sama Yállay baay ay ànd ak man. <sup>6</sup> Yeen ci seen bopp xam ngeen ne liggéeyal naa seen baay sama kem kàttan. <sup>7</sup> Teewul seen baay wor ma, soppo sama peyoor fukki yoon ak juróom, waaye Yàlla see-taanu ko, mu di ma lor. <sup>8</sup> Bu nee: “Yi tippanteey sa peyoor,” jur gépp jur lu tippante; mbaa mu ne: “Yi seereer ay sa peyoor,” jur gépp jur lu seereer. <sup>9</sup> Nii la Yàlla nangoo seen juru baay, jox ma.

<sup>10</sup> «Ba ñu demee ba jur giy wara tëbu, damaa jeneer sikket yiy tëb bëy yi yépp di lu seereer ak lu tippante mbaa ñu raxe. <sup>11</sup> Ca la ma malaakam Yàlla ma wax ci biir gént gi ne ma: “Yanqóoba,” ma ne ko: “Naam.” <sup>12</sup> Mu ne ma: “Siggil, xool sikket yiy tëb bëy yi yépp, yii dañoo seereer, yee todde, yi ci des tippante, ndaxte gis naa li la Laban di def lépp. <sup>13</sup> Maay Yàlla, ja la feeñu woon Betel, fa nga samp doj, sotti ci diw, sellale ko, te dogu woon fa ci man. Léegi nag jógal, génn réew mii, dellu ca réew, ma nga juddoo.”»

<sup>14</sup> Rasel ak Leya ne ko: «Ndax amati nanu benn cér walla ndono sunu kër baay? <sup>15</sup> Doonunu lu moy ay doxandéem ci moom de! Nde da noo jaay, lekk sunu njég, ba mu jeex tàkk. <sup>16</sup> Te mboolem alal, ji Yàlla nangoo ci sunu baay, noo ko moom, nun ak sunuy doom. Kon nag léegi lu la Yàlla wax rekk, def ko.»

<sup>17</sup> Yanqóoba daldi dajale ay doomam ak ay soxnaam, waral leen giléem, <sup>18</sup> ñu ànd tegu ca yoon wa, yóbbaaale géttam gépp ak mboolem alal ju mu liggéey. Mooy gétt, ga mu sàkkoo Padan Aram. Ña ngay ñibbi kër baayam Isaaxa ca réewu Kanaan.

<sup>19</sup> Fekk na Laban dem wati ay xaram\*. Ci biir loolu Rasel sàcc gällaaji kër yu baayam. <sup>20</sup> Noonu la Yanqóoba nēbboo Laban, Arameen ba, bañ koo yégal ne day dem. <sup>21</sup> Ba mu demee, dafa yóbbaaale la mu amoon lépp, jóge fa, jàll dexu Efraat, wuti tundi Galàdd.

### *Laban dabi na Yanqóoba*

<sup>22</sup> Yanqóoba daw na, ba mu am ñetti fan, ñu soog koo yégal Laban. <sup>23</sup> Mu ànd nag ak ay bokkam, topp ko juróom ñaari fan, door koo dab ca tundi Galàdd. <sup>24</sup> Ci kaw loolu Yàlla feeñu Laban, Arameen ba, ci géntu guddi ne ko: «Moytula wax Yanqóoba lenn lu koy gaar.» <sup>25</sup> Ba Laban dabee Yanqóoba, dafa fekk mu samp xaymaam ca tund wa. Laban it samp bosam ca kaw tundi Galàdd, moom aki bokkam.

<sup>26</sup> Laban ne Yanqóoba: «Looy def nii, yaw, di ma nēbbuy daw, yóbbaaale sama doom yu jigéen, ñu mel ni ñu ñu lēle xare? <sup>27</sup> Lu waral nga di ma nēbbuy daw te bañ maa tàggu? Nde konoon jombul ma yiwi la ci xol bu sedd, bu ànd aki woy, boole ci xalam aki sabar. <sup>28</sup> Mayoo ma sax, ma foon samay sēt ak samay doom yu jigéen, tàggtok ñoom; yēfi dof de nga def nii! <sup>29</sup> Manoon naa laa def lu bon, waaye sa Yállay baay da maa feeñu biig ne ma: “Moytula wax Yanqóoba lenn lu koy gaar.” <sup>30</sup> Bu la neexee, nga namm sa kër baay, ba dogu caa dem, waaye lu tax nga sàcc sama gällaaji kër, teg ci?»

<sup>31</sup> Yanqóoba tontu Laban ne ko: «Xanaa ragaloon rekk ne jombul dinga téye say doom yu jigéen. <sup>32</sup> Waaye képp koo gis mu yor sa gällaaji kër, boo yeboo reyal. Seetal fii ci sunu kanami bokk lépp lu ma fi yor, loo ci moom fabal, yóbbu.» Booba Yanqóoba xamul woon ne Rasel a ko jël. <sup>33</sup> Laban dugg ci xaymab Yanqóoba, teg ca xaymab Leya ak yosi ñaari jaamam yu jigéen ya, te gisul dara. Mu génne xaymab Leya, dugg ci bu Rasel.

<sup>34</sup> Fekk na Rasel fab gällaaji kër ya, làq ca ron tegu giléem ga, toog ca. Laban tëcc, tëcc ca biir xayma ba, gisul dara. <sup>35</sup> Rasel wax baayam ne ko: «Baay, baal ma de, damaa manula jóg ci sa kanam, ndaxte damaa ànd ak mbaax.» Laban seet na fu ne, waaye gisul gällaaji kër am ya.

<sup>36</sup> Yanqóoba mer lool, daldi gëdd Laban ne ko: «Ndax damaa tooñ walla damaa moy, ba nga sambal ma, di ma topp nii?

\* **31:19** 31.19 Xari waa penku dañuy bare kawar gu ñuy wat ak a ècc, di ci defar ag wëñ.

<sup>37</sup> Bi nga jéexee sama yëf yépp ba noppi, ana loo gis lu bokk ci sa yëfi kër? Teg ko fi ci sama kanami bokk ak say bokk, ñu àtte nu. <sup>38</sup> Xanaa du ñaar fukki at a ngii ma nekk ak yaw? Say xar ak say bëy ëmbuñu sax, mu yàqu, te masumaa lekk sa kuuyi gétt. <sup>39</sup> Jur gu rab fàdd sax ma féetewoo, waaye masuma la koo indil. Mboolem lu ñu sàcc guddi ak lu ñu sàcc bëccëg, danga ma ko daa feyu. <sup>40</sup> Naaj wi laa daan yendoo yenu bëccëg, di fanaanoo sedd guddi, mu xaw maa rey, ba дума гëmm bët. <sup>41</sup> Ñaar fukki at a ngii, ma di la jaamu ci kër gi, liggéeyal naa la fukki at ak ñeent ngir sa ñaari doom yu jigéen ñii, teg ci juróom benni at yu ma la sàmmal say gàtt, nga soppo sama peyoor fukki yoon ak juróom. <sup>42</sup> Su dul woon ak sama Yállay baay, ji ànd ak man, di Yállay Ibraayma, ji Isaaxa wormaalon, konoon nga dàq ma tey, ma dem loxoy neen. Waaye sama toskare ak sama àqu ñaq la Yàlla gis, ba tax mu àtte ma ak yaw biig.»

<sup>43</sup> Ba mu ko waxee loolu, Laban ne ko: «Jigéen ñii samay doom lañu, xale yii di samay sët, te gétt gii sama gétt a; lu fi nekk maa ko moom. Ñii di sama doom yu jigéen, nu ma leen di def tey, ñoom ak seeni doom? <sup>44</sup> Léegi ñëwal rekk, ñu fasante kóllère maak yaw, te seede dox sunu diggante maak yaw.» <sup>45</sup> Ba loolu amee Yanqóoba jël aw doj, samp ko, muy doju xàmmikaay. <sup>46</sup> Yanqóoba ne ay bokkam: «Forleen ay doj.» Ñu for ay doj, def ko ab jal, daldi lekk foofa ca wetu jal ba. <sup>47</sup> Laban tudde bérab ba Yegar Saaduta; Yanqóoba tudde ko Galet†.

<sup>48</sup> Booba la Laban ne: «Jal bii tey, mooy sunu seede sama diggante ak yaw.» Moo tax ñu tudde ko Galet (mu firi Jalub seede). <sup>49</sup> Ñu di ko tudde itam Mispa (mu firi Tatay wattukaay), ndax Laban da ne: «Yal na Aji Sax ji wattu sunu diggante, keroog bu ñu sooree. <sup>50</sup> Soo soxoree samay doom yu jigéen, mbaa nga takk yeneen jabar, bu fa kenn nekkul sax, moytul, ndax Yàllaa nuy seede.» <sup>51</sup> Laban

neeti Yanqóoba: «Xoolal ci jal bii ak doju xàmmikaay, wi ci sama digganteek yaw. <sup>52</sup> Jal bi seede la, doj wi di seede ne дума jéggi jal bi, jublu ci yaw, te yaw itam doo jéggi jal bi mbaa doj wi, jublu ci man, te naraluloo ma jàmm. <sup>53</sup> Yállay Ibraayma ak Yállay Naxor, ñoom ñooñee di seen Yállay baay, yal nañu àtte sunu diggante.» Yanqóoba daldi giñ ci Yàlla, ji baayam Isaaxa wormaalon. <sup>54</sup> Gannaaw loolu Yanqóoba sàkk sarax ca kaw tund wa, woo ay bokkam, ñu bokk lekk. Ba ñu lekkee ba noppi, fanaan ca tund wa.

## 32

<sup>1</sup> Ca ëllëg sa, Laban xëy suba teel, tàggoo aki sëtam ak doomam yu jigéen ya, ñaanal leen, ba noppi waññiku ñibbi.

<sup>2</sup> Yanqóoba moom topp yoonam. Ci kaw loolu ay malaakay Yàlla feeñu ko.

<sup>3</sup> Ba leen Yanqóoba gisee, da ne dalub Yàllaa ngii, ba tax mu tudde bérab ba Maanayim (mu firi Ñaari dal).

### *Yanqóoba ragal naa daje ak Esawu*

<sup>4</sup> Ba loolu amee Yanqóoba dafa yónni ay ndaw, ñu jiitu ko ca magam Esawu, ca réewu Seyir, di diiwaanu Edom. <sup>5</sup> Mu sant leen ne leen: «Bu ngeen demee ca sama sang Esawu, neleen ko: Sa surga Yanqóoba nee na: “Maa nga woon ca kër Laban bu yàgg ba tey, <sup>6</sup> ma doora ñëw, ànd ak ay nag ak ay mbaam ak ay gàtt ak ay jaam yu góor ak yu jigéen; may yónnee ci yaw, di la siyaare tey sàkku nga dalal ma jàmm.”» <sup>7</sup> Ndaw ya daldi dem ba délsi ca Yanqóoba, ne ko: «Dem nanu ca sa mag Esawu, waaye moom ci boppam mu ngi ci yoon wi di ñëw, fekkxi la fi, te ma nga ànd ak ñeenti téeméeri góor.»

<sup>8</sup> Yanqóoba dégg loolu, tiit lool te ànd ak njàqare, ba tax mu séddale mbooloo, ma mu àndal, gàtt ya ak jur gu gudd ga ak giléem ya itam, mu xaaj leen ñaar.

<sup>9</sup> Booba mu ngi naan, bu Esawu songee benn dal bi, dal bi ci des mana raw.

<sup>10</sup> Ci kaw loolu Yanqóoba ñaan Yàlla, ne ko: «Yaw Aji Sax ji, sama Yállay maam

† 31:47 31.47 Galet bokk na lu mu tekki ak Yegar Saaduta ci làkku Arameen ña.

Ibraayma, di sama Yàllay baay Isaaxa itam, yaa ma ne woon: “Dellul réew ma nga cosaano, ca say bokk; dinaa la baaxe.”<sup>11</sup> Yelloowuma lu gëna tuuti ci sa ngor ak sa worma, gi nga ma won, man sa jaam. Aw yet donj laa nàbboon, ba ma jàllee dexu Yurdan, te yokku naa tey, ba doon ñaari kurél.<sup>12</sup> Maa ngi lay ñaan, nga musal ma ci sama loxol mag Esawu, ndaxte ragal naa, mu ñëw bóom ma, bóomaale jigéen ñi ak seeni doom.<sup>13</sup> Te yaw yaa ma ne: “Dinaa la baaxe moos, yokk saw askan, ba mu tollu ni suufas géej, si kenn manula lim ndax bare.”»

<sup>14</sup> Yanqóoba fanaan na fa guddig keroog, doora sàkk ca alalam, sédd magam Esawu,<sup>15</sup> lépp di ñaar téeméeri bëy ak ñaar fukki sikket ak ñaar téeméeri xar ak ñaar fukki kuuy<sup>16</sup> ak fanweeri giléem yu seeni doom di nàmp, ak ñeent fukki nag ak fukki yëkk ak ñaar fukki mbaam ak fukki mbaam yu góor.

<sup>17</sup> Dafa ber gétt yi, gu ci nekk mu jox ay surgaam, ne leen: «Jiituleen ma, te na gétt yi dândante.»<sup>18</sup> Ci biir loolu mu sant ki jiitu, ne ko: «Boo dajeeek sama mag, mu laaj la ne la: “Kuy sa njaatige?” ak “Ku moom li nga jiital?” ak “Foo jëm?”<sup>19</sup> nee ko: “Lii de sang bi, lu la Yanqóoba may la, di la ko siyaaree, yaw Esawu, te moom ci boppam mu ngi topp ci sunu gannaaw.”»

<sup>20</sup> Ndigal loolu la joxaat ñaareelu surga ba ak ñetteel ba ak mboolem ña topp ca gétt ya, ku ci nekk mu wax ko ne ko loolu lay wax Esawu, bu ko gisee,<sup>21</sup> tegati ca ne ko: «Te nee ko itam: “Sa surga Yanqóobaa ngi topp ci sunu gannaaw.”» Booba Yanqóobaa ngi naa ci xelam: «Bu ma jiitalee li ma ko may, neexale ko ko, bala maa janook moom, jombul mu dalal ma jàmm.»<sup>22</sup> Neexal ba da koo jiitu, moom mu fanaan guddig keroog ca dal ba.

### *Lu jëm ci bëreb Yanqóoba ba*

<sup>23</sup> Gannaaw loolu Yanqóoba jóg ca guddi ga, ànd ak ñaari soxnaam, ñaari jaamam yu jigéen ak fukki doomam yu

góor ak benn, daldi jàll dexu Yabog.<sup>24</sup> Yanqóoba da leena jàllale, jàllewaale alalam jépp itam.<sup>25</sup> Mu des fa nag moom donj.

Kera la genn góor fanaana bëre ak moom, ba bët set.<sup>26</sup> Ba nit ka xamee ne manalu ko dara, dafa dóor Yanqóoba ci mooco, mooco mi summikoo ca bëre ba.

<sup>27</sup> Nit ka ne ko: «Bàyyi ma, ma dem, ndax bët a ngi bégga set.» Teewul Yanqóoba ne ko: «Duma la bàyyi, nga dem, li feek ñaanaloo ma.»<sup>28</sup> Nit ka ne ko: «Na nga tudd?» Mu ne ko: «Yanqóoba.»<sup>29</sup> Nit ka ne ko: «Tuddat-uloon Yanqóoba, léegi Israyil nga tudd, ndaxte bëre nga ak nit, bëre ak Yàlla, ba génn ci ak jàmm\*.»<sup>30</sup> Yanqóoba ne ko: «Waaw, yaw nag noo tudd?» Mu wax ko ne ko: «Loo may laaje sama tur?» ba noppi barkeel ko foofa.

<sup>31</sup> Ci kaw loolu Yanqóoba tudde bérab ba Peniyel (mu firi Xar-kanamu Yàlla), ndaxte da ne: «Ne naa Yàlla jàkk, te maa ngi dund ba tey.»

<sup>32</sup> Ba jant bay fenk, Yanqóobaa ngi soox tànk bi, di bàyyikoo Penuwel†.<sup>33</sup> Looloo tax ba tey jii bànni Israyil duñu lekk suux, wi jàpp ci tenqob mooco, ndax li moocob Yanqóoba summikoo woon ca suuxu tenqo ba.

## 33

### *Yanqóoba ak Esawu daje nañu ci jàmm*

<sup>1</sup> Gannaaw loolu Yanqóoba séen Esawu di ñëw, ànd ak ñeenti téeméeri góor, mu séddale xale yi, diggante Leya, Rasel ak ñaari jaam ya.<sup>2</sup> Dafa jiital jaam ya ak seeni doom, tofal ca Leya ak ay doomam, Rasel ak Yuusufa féete gannaaw.<sup>3</sup> Moom ci boppam nag, mu jiitu leen, wutali magam, di dox tey sujjóot, ba muy juróom ñaari yoon.<sup>4</sup> Teewul Esawu daw gatandu ko, taf ko ci boppam, langaamu ko, di ko foon. Ñu daldi jooy!

<sup>5</sup> Naka la Esawu siggi, gis jigéen ñi ak xale yi, mu ne: «Ñii ànd ak yaw ñooy ñan?» Yanqóoba ne ko: «Xanaa njaboot,

\* **32:29** 32.29 Ñaari kàdduy ebrë yu taqoo ñoo sos baatu Israyil. Li jiitu ci baat bi mu ngi tekki «bëre». Li ci topp di tekki «Yàlla». † **32:32** 32.32 Penuwel mooy Peniyel ba tey.

gi ma Yàlla baaxe, sang bi.» <sup>6</sup> Jaam ya ak seeni doom daldi jegesi, sujjóotal ko. <sup>7</sup> Leya it topp ca, moom aki doomam, jegesi ñoom itam, sujjóot. Yuusufa ak Rasel doora jegesi sujjóot.

<sup>8</sup> Esawu ne ko: «Waaw, dal bu réy bii ma dajeel, loo ci namm?» Yanqóoba ne ko: «Xanaa di sàkku nga dalal ma jàmm rekk, sang bi.» <sup>9</sup> Esawu ne ko: «Am naa ba biibal, sama rakk, fabal sa alal.» <sup>10</sup> Yanqóoba ne ko: «Ngalla waay déet, dimbali ma rekk te jël li ma la may. Ndaxte bi ma nee jàkk ci sa kanam, gis naa ni nga ma laaye biir, ba mu mel ni Yàllaa ma geestoo yërmandeem. <sup>11</sup> Kon jëlal lii ma la may, ndax Yàlla baaxe na ma, ba ma barele.» Mu tinu ko, ba Esawu mujj nangu.

<sup>12</sup> Gannaaw loolu Esawu ne: «Tee noo ànd dem boog, ma jiitu la?» <sup>13</sup> Yanqóoba ne ko: «Sang bi, xam nga, xale yi dañoo néew doole, te it gàtt yi ak nag yiy nàmpal laay xalaat. Su nu leen séqatalee benn bés rekk, gàtt yépp dee. <sup>14</sup> Jiitu ma rekk, sang bi, man ma topp ndànk ci wewu jur gi, jiital leen, te baña raw xale yi, ba kera ma lay fekkisi Seyir.» <sup>15</sup> Esawu ne ko: «Xaaral ma bàyyee la ñenn ci góor, ñi ma àndal.» Yanqóoba ne ko: «Matu ko. Boobu teraanga épp na, sang bi. Jàmm ji nga ma dalal rekk doy na.» <sup>16</sup> Booba la Esawu dellu, jubal yoonu Seyir.

<sup>17</sup> Yanqóoba moom jubal gox bu ñu naan Sukkóot, tabax fa kër, mbaaral géttam, moo tax ñu tudde bérab boobu Sukkóot (mu firi Ay mbaar). <sup>18</sup> Gannaaw ga Yanqóoba agsi Sikem, ga ca réewu Kanaan, ci jàmm. Fekk na mu bàyyikoo Padan Aram, ba dal fa jàkkaarlook dëkk ba. <sup>19</sup> Booba la jënde ci doomi Amor, baayu Sikem, pàkk, ba mu sampoon xay-maam, ci téeméeri kesita\*. <sup>20</sup> Mu daldi fay sàkk sarxalukaay, tudde ko El Elowe Israyil (mu firi Yàllay Israyil mooy Yàlla).

## 34

### *Tooñ nañu Diina doomu Yanqóoba*

<sup>1</sup> Am na bés Diina, ku jigéen ki Leya amal Yanqóoba, génn di seeti moroom ya

ca dëkk ba. <sup>2</sup> Ci kaw loolu Sikem doomu Amor, miy Eween te di kilifa ca dëkk ba, daldi koy gis, jàpp ko, tédde ko, torxal ko. <sup>3</sup> Teewul Sikem xemmoon na Diina doomu Yanqóoba lool te bëgg ko, ba tax mu di ko naxtaan. <sup>4</sup> Loolu waral mu ne baayam Amor: «Ñaanal ma janq bi jabar.»

<sup>5</sup> Yanqóoba nag dégg ne Sikem torxal na Diina, doomam ju jigéen, fekk booba doomam yu góor yaa nga woon ca àll ba, fa jur ga nekk. Yanqóoba ne cell, ba ñu ñibbsi. <sup>6</sup> Ci diggante boobu Amor, baayu Sikem, ñew ci Yanqóoba, ngir gise ak moom. <sup>7</sup> Ca la doomi Yanqóoba agsi, jóge ca tool ya. Ba ñu déggee la xew, dañoo am naqar wu réy, mer lool ndax gâce, ga Sikem teg waa Israyil, ba mu téddee doomu Yanqóoba ja, te loolu di lu defuwul.

<sup>8</sup> Amor wax ak ñoom ne leen: «Sama doom Sikem dafa bëgg seen jigéen ci xolam. Dama leen di ñaan, ngeen may ko ko jabar. <sup>9</sup> Tee noo séyante, ngeen may nu seeni janq, te jël ci sunuy janq? <sup>10</sup> Su ko defee ngeen dëkk ak nun te réew mi di seen réew. Man ngeen fee sanc, dem fu leen neex, sàkku fi alal.» <sup>11</sup> Sikem it wax ak baayu Diina ak càmmiñ ya ne leen: «Su ngeen ma nangulee, lépp lu ngeen ma wax dinaa ko joxe. <sup>12</sup> Limal-leen ma warugar yi ak nu mu mana tollu, boole ci may gi; dinaa joxe lu ngeen ma sas; mayleen ma janq bi rekk.»

<sup>13</sup> Waaye doomi Yanqóoba ya, ay nax lañu tontoo Sikem ak baayam Amor, ndax li Sikem torxal seen jigéen Diina. <sup>14</sup> Dañu ne leen: «Manunu loolu, ndax may sunu jigéen góor gu xaraf, loolu gâce la ci nun. <sup>15</sup> Dunu leen mana nangul mbete ngeen melee ni nun ci kaw seeni góor ñépp xaraf. <sup>16</sup> Su ko defee dinanu leen may sunuy janq, te dinanu jël ci seeni janq, dëkk ak yeen, nuy ay bokk. <sup>17</sup> Waaye su ngeen nu déggalul, ba xarafuleen, danuy jël sunu jigéen, dem.»

<sup>18</sup> Seen wax jooju neex Amor ak Sikem doomu Amor. <sup>19</sup> Xale bu góor bi daldi gaawtu def li ñu ko sant ndax mbëggeelam ca doomu Yanqóoba.

\* 33:19 33.19 kesita xalisu réew ma la woon.

Booba Sikem lañu gënoona weg ca waa kër baayam yépp. <sup>20</sup> Amor nag ànd ak doomam Sikem, dem ba ca pénc ma, wax ak waa dëkk ba ne leen: <sup>21</sup> «Ñii sunuy am-di-jàmm lañu, te gannaaw réew maa ngi ne yàmblañ, bàyyileen leen, ñu sanc te dem fu leen neex. Man nanoo jël seen doomi janq te di leen may sunuy doom. <sup>22</sup> Waaye li ci nekk mooy, seeni góor duñu nangoo dëkk ak nun, nuy ay bokk, ndare sunu góor ñépp xaraf ni ñoom. <sup>23</sup> Bu nu leen nangulee, ba ñu dëkk ci sunu biir, kon seeni jur ak seen alal ak seen mala yépp, ndax du nooy doon boroom?» <sup>24</sup> Ba mu ko defee mboolem góori dëkk ba déggal Amor ak doomam Sikem, ba ñoom ñépp xaraf.

<sup>25</sup> Ca gannaaw ëllëg sa ñu ànd ak metit, ñaari doomi Yanqóoba ya, Simeyon ak Lewi, càmmiñi Diina, jël seeni saamar, dugg ca dëkk ba, bett leen, rey góor ñépp. <sup>26</sup> Ca lañu leel ñawkay saamar Amor ak doomam Sikem, ñu dee, ñu jële Diina kër Sikem, ànd ak moom, dem. <sup>27</sup> La ca tegu doomi Yanqóoba ya ca des futti néew ya, lëlaale dëkk ba, ndax li ñu torxal seen jigéen. <sup>28</sup> Ñu daldi jël seen jur gu gàtt ak gu gudd, seeni mbaam ak mboolem la ca biir dëkk ba ak la ko wër. <sup>29</sup> Noonu lañu jële seen alal jépp ak seeni doom ak seeni jabar, boole ca lël mboolem lu nekkoon ca biir kër ya.

<sup>30</sup> Yanqóoba nag wax ak Simeyon ak Lewi ne leen: «Indil ngeen ma musiba, ndax dingeen tax waa réew mépp sib ma, muy Kanaaneen ñi, di Periseen ñi. Te itam awma lu dul góor ñu néew, te bu ñu boolo dal ci sama kaw, dañu may booleek sama waa kër faagaagal.» <sup>31</sup> Ñu ne ko: «Danuy seetaan sunu jigéen daal, ñu di ko def ab gànc?»

## 35

### *Yanqóoba sanc na Betel*

<sup>1</sup> Ba loolu wéyee Yàlla ne Yanqóoba: «Jógal dem Betel, toog fa te nga sàkkal fa sarxalukaay Yàlla, ji la feeñu, ba ngay daw sa mag Esawu.» <sup>2</sup> Yanqóoba

wax ak waa këram ak ñi ànd ak moom ñépp ne leen: «Jëleleen ci seen biir tuuri doxandéem yi, te ngeen sangu-set te solu. <sup>3</sup> Danuy dem Betel, ma sàkkal fa sarxalukaay Yàlla, ji ma wallu, ba ma nekkee ci njàqare, te ànd ak man fépp fu ma jaar.» <sup>4</sup> Ñu daldi jox Yanqóoba mboolem tuuri doxandéem, yi ñu yor, ak seen jaaroy nopp, Yanqóoba boole suul ca taatu garab\* gu mag ga nekkoon ca wetu dëkk, ba ñu naan Sikem. <sup>5</sup> Gannaaw loolu ñu sàqi, Yàlla nag wàcce tiitaange lu réy ca kaw dëkk, ya leen wër, ba taluñoo dabi doomi Yanqóoba ya.

<sup>6</sup> Ba mu ko defee Yanqóoba ak ñi mu àndal ñépp agsi Lus, di Betel ba tey, foofa ca réewu Kanaan. <sup>7</sup> Mu sàkk fa nag sarxalukaay, tudde bérab ba El Betel, ndax foofa la ko Yàlla feeñoo, bi muy daw magam. <sup>8</sup> Foofa itam la Debora, ma daa nàmpal Rebeka, faatoo, ñu suul ko ca taatu garab gu mag ga ca wetu Betel. Ñu tudde garab ga Alon Bakut (mu firi Garabu jooyoo).

<sup>9</sup> Ba Yanqóoba jógee Padan Aram, Yàlla feeñuwaat na ko, barkeel ko <sup>10</sup> ne ko:

«Yaa di Yanqóoba,  
waaye deesatu la wooye Yanqóoba;  
léegi yaa di Israyil.»

Mu tudde ko nag Israyil. <sup>11</sup> Yàlla neeti ko: «Man maay Yàlla Aji Man ji. Giiral te yokku, ba aw askan ak mboolooy askan sosoo ci yaw, te ay buur askanoo ci sa geño. <sup>12</sup> Réew, mi ma sédd Ibraayma ak Isaaxa, yaw laa koy sédd, yaak askan wi soqikoo ci yaw.»

<sup>13</sup> Naka la Yàlla wax ak Yanqóoba loolu, daldi teqlikoo ak moom. <sup>14</sup> Yanqóoba samp doju xàmmikaay ca bérab, ba Yàlla waxe ak moom, tuural ko fa biiñ, sotti fa diw, sellale. <sup>15</sup> Yanqóoba ma nga tudde bérab, ba Yàlla waxeek moom, Betel†.

### *Beñamin juddu na, Rasel faatu*

<sup>16</sup> Ba loolu wéyee ñu jóge Betel, dem bay bégga jub Efrata. Rasel tollu ciw mat, te mat wi metti. <sup>17</sup> Ba mu demee ba mat wa géna metti, rewlikat ba ne ko: «Muñal nag, ndax góor laati de!» <sup>18</sup> Booba Rasel a

\* 35:4 35.4 Xeeetu garab la gu ñuy wax terebent. † 35:15 35.15 Seetal ci 28.19.

ngi waaja faatu. Terewul bala bakkanam a rot tudde na xale bi Benoni (mu firi Sama doomu coono). Teewul baay bi tudde ko Beñamin (mu firi Sama doomu njiglaay)‡.

<sup>19</sup> Ci kaw loolu Rasel faatu, ñu denc ko ca yoonu Efrata, ga ñuy wax Betleyem ba tey. <sup>20</sup> Yanqóoba nag samp aw doj ca bàmmeel ba, te mooy xàmmikaayu bàmmeelu Rasel ba tey jii. <sup>21</sup> Ba mu ko defee Israyil jóge fa, samp xaymaam ca gannaaw Migdal Eder.

### *Doomi Yanqóoba ya*

<sup>22</sup> Ba Israyil dëkke ca réew ma, am na bés Ruben dem téd ak Bilaa, nekkaaleb baayam; Israyil yég ko.

Doomi Yanqóoba§ yu góor fukk lañu ak ñaar. <sup>23</sup> Doomi Leya ñooy: Ruben, taawub Yanqóoba, ak Simeyon ak Lewi ak Yuda ak Isaakar ak Sabulon. <sup>24</sup> Doomi Rasel di Yuusufa ak Beñamin. <sup>25</sup> Doomi Bilaa, jaamub Rasel, di Dan ak Neftali. <sup>26</sup> Doomi Silpa, jaamub Leya, di Gàdd ak Aser. Ñooñooy doomi Yanqóoba, te mu am leen ca Padan Aram.

### *Isaaxa nelaw na*

<sup>27</sup> Yanqóoba dellu na kër baayam Isaaxa fa Mamre, ca Kiryaat Arba, gay Ebron ba tey, fa Ibraayma ak Isaaxa daloon. <sup>28</sup> Isaaxa dund na téeméeri at ak juróom ñett fukk (180). <sup>29</sup> Foofa la bakkanam rote, mu faatu, fekki ay maamam, gannaaw ba mu màggatee, ba ñor xomm. Ba loolu amee ay doomam Esawu ak Yanqóoba rob ko.

## **Askanu Esawu**

### **36**

#### *(Saar 36.1-43)*

<sup>1</sup> Askanu Esawu, mi ñuy wax Edom, mooy lii.

<sup>2</sup> Esawu jël na janqi Kanaaneen jabar. Ñooño di: Ada doomu Elon, Etteen ba, ak Olibama doomu Ana, miy doomu Sibeyon, Eween ba, <sup>3</sup> ak Basmat doomu Ismayla, di jigéenub Nebayot. <sup>4</sup> Ada am ak Esawu Elifas; Basmat am ca Rewel. <sup>5</sup> Olibama am ca Yewus, Yalam ak Kora.

Ñooñu ñooy doomi Esawu, te mu am leen ca réewu Kanaan.

<sup>6</sup> Ba loolu amee Esawu ànd aki soxnaam, aki doomam yu góor ak yu jigéen, ak waa këram ñépp, jiital géttam ak juram gépp, yóbbaaale mboolem alal ju mu amoon ca réewu Kanaan, daldi sancimeenen réew ngir sore rakkam Yanqóoba.

<sup>7</sup> Li ko waral mooy, seen alal dafa bare woon lool, ba manuño dëkk ñoom ñaar, te réew, mi ñu daloon, àttanu leen ndax seen gétt yu bare. <sup>8</sup> Esawu nag dëkk ca tundu Seyir: Esawu moomu mooy Edom.

<sup>9</sup> Askanu Esawu, di maami Edomeen ña ca tundi Seyir, mooy lii.

<sup>10</sup> Doomi Esawu yu góor ñooy: Elifas, mi mu am ak soxnaam Ada ak Rewel, mi mu am ak Basmat. <sup>11</sup> Doomi Elifas yu góor yi di: Teman ak Omar ak Sefo ak Gatam ak Kenas. <sup>12</sup> Timna it nekkaaleb Elifas. Mu am caak moom Amaleg. Ñooño xetoo ci Ada, soxnas Esawu. <sup>13</sup> Doomi Rewel yu góor yi ñoo di: Naxat ak Sera ak Saama ak Misa. Ñooño xetoo ca Basmat, soxnas Esawu. <sup>14</sup> Soxnas Esawu, si ñu naa Olibama, tey doomu Ana miy doomu Sibeyon, moo am ak Esawu doom yu góor yii: Yewus, Yalam ak Kora.

<sup>15</sup> Làngi doomi Esawu yu góor nag, ñooy ñii. Ñi askanoo ci Elifas taawub Esawu, ñuy Teman ak Omar ak Sefo ak Kenas <sup>16</sup> ak Kora ak Gatam ak Amaleg, ku ci nekk ak làngam. Làngi Elifas, ya ca réewum Edom a ngi noonu; ñooy sèti Ada. <sup>17</sup> Ñi askanoo ci Rewel doomu Esawu, ñooy Naxat ak Sera ak Saama ak Misa, ku ci nekk ak làngam. Làngi Rewel, ya ca réewum Edom a ngi noonu; ñooy sèti Basmat, soxnas Esawu. <sup>18</sup> Ñi xetoo ci Olibama soxnas Esawu, ñooy Yewus, Yalam ak Kora, ku ci nekk ak làngam. Ñooñooy làngi Olibama, soxnas Esawu siy doomu Ana. <sup>19</sup> Ñooñooy doomi Esawu, mi ñuy wax Edom, ñooñooy doomam yu góor, ñook seeni làng.

### *Lu jëm ci askanu Seyir*

<sup>20</sup> Doomi Seyir, ya bokk ca waa Or te sancoon ca réew ma, ñooy Lotan ak Sobal

‡ **35:18** 35.18 Beñamin mu ngi jóge ci ben yamin, di tekki «doomu ndijoor», waaye li tur wiy wund mooy «doomu njiglaay». § **35:22** 35.22 Yanqóoba mooy Israyil.

ak Sibeyon ak Ana <sup>21</sup> ak Dison ak Eser ak Disan. Ñooñooy làngi waa Or, di sėti Seyir ya ca réewum Edom. <sup>22</sup> Doomi Lotan yu góor ya nag ñooy Ori ak Emam. Jigéenub Lotan di Timna. <sup>23</sup> Doomi Sobal yu góor ya di Alwan ak Manaak ak Ebal ak Sefo ak Onam. <sup>24</sup> Doomi Sibeyon yu góor di Aya ak Ana. Te Ana moomu moo feeñal bėti ndox yu tàng ya ca màndiñ ma, ba muy sàmm mbaami baayam Sibeyon. <sup>25</sup> Doomi Ana ñooy Dison ak Olibama, doomam ju jigéen. <sup>26</sup> Doomi Dison di Emdan ak Esban ak Yitran ak Keran. <sup>27</sup> Doomi Eser di Bilan, Saawan ak Akan. <sup>28</sup> Doomi Disan di Uus ak Aran.

### *Lu jëm ci buur ya jékka falu ca Edom*

<sup>29</sup> Làngi waa Or ñooy ñi askanoo ci Lotan ak Sobal ak Sibeyon ak Ana <sup>30</sup> ak Dison ak Eser ak Disan, ku ci nekk ak làngam. Ñooñooy làngi waa Or, na ñu xàjjalikoo kenn-kenn ca réewu Seyir.

<sup>31</sup> Buur, yi falu ca réewum Edom, lu jiitu kenn ci waa Israyil di fa falu, ñooy ñii. <sup>32</sup> Bela doomu Beyor falu na ca Edom. Dinaba moo doon péeyam. <sup>33</sup> Ba Bela faatoo, Yobab doomu Sera, ma dëkk Boccra, wuutu ko. <sup>34</sup> Ba Yobab faatoo, Usam mu diiwaanu waa Teman wuutu ko. <sup>35</sup> Ba Usam faatoo, Adàdd, ma dàqoon waa Majan ca réewu Mowab, tey doomu Bedàdd, moo falu, wuutu ko. Awit a doon péeyam. <sup>36</sup> Ba Adàdd faatoo, Samla, ma dëkk Masreka, falu, wuutu ko. <sup>37</sup> Ba Samla faatoo, Sawul ma woon ca Reyobot Efraat, falu, wuutu ko. <sup>38</sup> Ba Sawul faatoo, Baal Anan doomu Agbor falu, wuutu ko. <sup>39</sup> Ba Baal Anan doomu Agbor faatoo, Adar falu, wuutu ko. Pawu moo doon péeyam, soxnaam di Metabeel, mi Mataredd doomu Me Saab di yaayam.

<sup>40</sup> Làng yi sosoo ci Esawu nag, làng gu ci nekk ak turam ak njaboot, ya mu ëmb, ak gox, ba mu dëkke, ñoo di ñii: ñi askanoo ci Timna ak Alwa ak Yetet <sup>41</sup> ak Olibama ak Ela ak Pinon <sup>42</sup> ak Kenas ak Teman ak Mibsar <sup>43</sup> ak Magdiyel ak Iram, ku ci nekk ak làngam. Ñooñu ñooy làngi Edom, ma ñu naa Esawu, moom ma giir Edomeen ñi, làng gu ci nekk ak gox, ba nga dëkke te moom ko.

## **Askanu Yanqóoba**

## **37**

(Saar 37.1—50.26)

### *Yuusufa gént na lu yéeme*

<sup>1</sup> Yanqóoba ma nga dëkkoon réewu Kanaan, fa baayam daloon.

<sup>2</sup> Askanu Yanqóoba mooy lii.

Yuusufa tollu na ci waxambaane, am fukki at ak juróom ñaar, di sàmmle jur gi doomi baayam, yi nga xam ne soxnay baayam Bilaa ak Silpa ñoo leen jur. Yuusufa nag di leen boole ak seen baay. <sup>3</sup> Booba Yanqóoba, Yuusufa la gëna bëgg ci ay doomam, ndax li mu màggat door koo am. Mu ràbblul ko mbubb mu yànj. <sup>4</sup> Mag ya nag gis ne Yuusufa la seen baay gëna bëgg ci ay doomam. Loolu tax ñu bañ ko, ba manuñoó séq ak moom kàddu gu rafet.

<sup>5</sup> Mu am bés Yuusufa gént, nettali ko ay magam, ba tax ñu gënati koo bañ.

<sup>6</sup> Da ne leen: «Dégluleen li ma gént. <sup>7</sup> Danoo nekk ca tool ya, di góob. Ba nu takkee, sama takk jekki-jekki ne sàtt, taxaw, seen takk wër sama takk, di ko sujjóotal.» <sup>8</sup> Mag ya ne ko: «Dangaa nara falu ci sunu kaw? Danga noo nara jiite?» Ñu gënati koo bañ nag ndax géntam ya ak la mu leen ca wax.

<sup>9</sup> Gannaaw gi geneen gént dikkal ko, mu nettali ko ay magam ne leen: «Dégluleen, géntaat naa. Gis naa jant bi ak weer wi ak fukki biddiww ak benn di ma sujjóotal.» <sup>10</sup> Ba mu ko nettalee ay magam, ba nettali ko baayam, baayam da koo soow ne ko: «Yaw, li nga gént, lu mu doon? Xanaa du maak sa yaay ak say mag noo lay sujjóotal?» <sup>11</sup> Mag ya nag iñaane ko. Teewul baayam moom bàyyi xel ci mbir moomu.

<sup>12</sup> Mu am bés ay magam dem dëkk ba ñuy wax Sikem, sàmmi seen juru baay.

<sup>13</sup> Israyil ne Yuusufa: «Xam nga ne say mag sàmmi nañu Sikem. Kaay, ma yónni la ci ñoom.» Yuusufa ne ko: «Waaw.»

<sup>14</sup> Yanqóoba ne ko: «Demal seeti say mag, ba xam ndax ñu ngi ci jàmm, ñoom ak jur ga, te nga ñëw, wax ma.» Mu yebal ko, mu jóge xuru Ebron, jubal Sikem.

<sup>15</sup> Naka la jenn waay dajeek moom foofa, fekk muy wëreelu ca àll ba. Waa ja ne ko: «Looy seet?» <sup>16</sup> Yuusufa ne ko:

«Samay mag laay seet. Xamoo fu ñu tollu, di sàmm?» <sup>17</sup> Waa ja ne ko: «Jóge nañu fii de, ndax dégg naa ñu naan: “Nanu dem Dotan.”» Yuusufa toppi magam ya ba Dotan, fekk leen fa.

<sup>18</sup> Naka la ko mag ya séen fu sore, daldi mànkoo bala moo agsi, ci pexem rey ko.

<sup>19</sup> Ña nga naan: «Boroom gént gaa ngee di ñëw! <sup>20</sup> Nanu ko rey gaaw, sànni ko ca kàmb yee\*, su ko defee danu naan, rabu àll a ko fàdd. Nu seet ba xam fu muy mujj aki géntam?»

<sup>21</sup> Ruben nag dégg ca, di ko fexee xettli. Mu ne leen: «Bunu ko rey.»

<sup>22</sup> Ruben teg ca ne leen: «Buleen tuur deret. Sànnileen ko ca kàmb gee ca àll ba, waaye bu ko loxo dal.» Booba ma ngay wut nu mu xettlee Yuusufa ci ñoom, ba delloo ko baayam.

<sup>23</sup> Ba Yuusufa agsee ca magam ya, dañoo futti mbubbam, mooy mbubb mu yànj, ma mu soloon. <sup>24</sup> Ñu jàpp ko, tàbbal ca biir kàmb ga, fekk mu déy, ba wow konj. <sup>25</sup> Loolu wees ñu toog, di lekk. Nes tuut ñu siggi, séen am njëggum giléem, muy ay Ismayleen, yu sêf cuuraayu ndàbb ak diwu yaram ak cuuraayu xas†, jële ko réewu Galàdd, jëme Misra. <sup>26</sup> Yuda ne doomi baayam ya: «Bu nu reye sunu rakk jii, nëbb deret ji, lu nu ciy jële? <sup>27</sup> Tee nu koo jaay Ismayleen ñi, te bañ koo sàkkal peXe nun ci sunu bopp? Ndax kat sunu rakk a, di sunu deret.» Doomi baay ya déggal ko. <sup>28</sup> Julay Majan ya nag jaare fa, ñu yóotu Yuusufa, génne ko kàmb ga, jaay ko Ismayleen ña ci ñaar fukki dogi xalis. Ñu yóbbu Yuusufa Misra.

<sup>29</sup> Ba mu ko defee Ruben dellu ca kàmb ga, gis ne Yuusufa nekkatul ca biir, mu mititlu ko, ba xotti ay yéreem. <sup>30</sup> Ba loolu amee mu jóge ca, dem ca ay rakkam ne leen: «Xale ba nekkatu fa de! Te man xawma nu may def léegi.» <sup>31</sup> Ñu jël nag mbubbu Yuusufa, rendi ab sikket, taqal mbubb ma ca deret ja. <sup>32</sup> Gannaaw loolu ñu yóti seen baay mbubb ma, ne ko:

«Lii lanu gis de, xoolal bu baax ndax du sa mbubbu doom?» <sup>33</sup> Yanqóoba xàmmi ko, daldi ne: «Sama mbubbu doom a moos! Éey waay, rabu àll kay moo dag-gate Yuusufa, yàpp ko!» <sup>34</sup> Ci kaw loolu Yanqóoba mititlu ko, ba xotti ay yéreem, taraxlaayoo ab saaku, di jooy doomam ay fan. <sup>35</sup> Doomam yépp, góor ak jigéen ñëw, di ko dëfal, te noppiwul, xanaa naan: «Damay jooy, ba dem njaniiw, fekki sama doom.» Baayam di ko jooy, <sup>36</sup> fekk waa Majan yóbbu nañu ko Misra, jaay ko Potifaar, jawriñu Firawna mi jiite ay dagam.

## 38

### *Lu jëm ci Yuda ak Tamar ak seen askan*

<sup>1</sup> Ca jamono yooyu Yuda dafa teqlikoo ak ay doomi baayam, dal ca waa ju dëkk Adulam te tudd Ira. <sup>2</sup> Foofa nag Yuda gis fa senn as ndaw, su doon doomu Kanaaneen bu tudd Suwa, mu jël ko soxna. <sup>3</sup> Mu ëmb, am doom ju góor, tudde ko Er. <sup>4</sup> Mu dellu ëmb, am doom ju góor, tudde ko Onan. <sup>5</sup> Mu amati doom ju góor, tudde ko Sela. Ba Sela di juddu, ca Kesib la fekk Yuda.

<sup>6</sup> Gannaaw gi Yuda jëlal taawam Er jabar ju tudd Tamar. <sup>7</sup> Er, taawub Yuda boobe, doonoon ku Aji Sax ji seede coxoram; Aji Sax ji nag rey ko. <sup>8</sup> Yuda ne Onan: «Demal ci sa jabaru mag, donn ko, ndax nga giiral sa mag aw askan.» <sup>9</sup> Teewul Onan xam ne du doon askan wu muy moom, ba tax saa yuy dëkkoo jabaru magam, bay wara àgg rekk, tuur wasal wi ci suuf, ngir baña giiral magam\*. <sup>10</sup> Aji Sax ji ñaawlu li muy def, ba tax mu faat ko, moom itam. <sup>11</sup> Yuda daldi wax Tamar jabaru doomam ne ko: «Demal sa kër baay, ténjeji fa, ba sama doom Sela màgg.» Booba Yuda dafa ragal Sela faatu moom itam ni ay magam. Tamar nag dem, toog kër baayam.

<sup>12</sup> Ba ñu demee ba mu yàgg, doomu Suwa, soxnas Yuda faatu. Ba dëj ba wéyee, Yuda dem fekki watkati xaram ca

\* **37:20** 37.20 kàmb yooyu loxo lañu ko daan yette ca màndiñ ma, di ca denc ndox. † **37:25** 37.25 cuuraay yooyu gom la woon ak boom ak miir. \* **38:9** 38.9 Ci yooyu jamono, ku donn sa jabaru mag ci bànni Israyil, doom joo ca am, du bokk ci yaw waaye dañu koy féetele sa mag ji faatu.



Timna. Ira, xaritam bi dëkk Adulam a nga ànd ak moom. <sup>13</sup> Ñu yégal Tamar ne ko: «Sa goroo ngii jëm Timna, di wati ay xaram.» <sup>14</sup> Ba loolu amee mu summi yérey jëtun ya, muuru, sàngu, toog ca selebe yoon wa jëm Enayim ca yoonu Timna, ndax booba gis na ne Sela màgg na te mayuñu ko ko, muy jabaram. <sup>15</sup> Yuda gis ko, yaakaar ne gànc la, ndax li mu muuru†. <sup>16</sup> Mu jàdd, ñëw ba ca moom, ne ko: «May ma, ma ànd ak yaw.» Fekk na xamul woon ne goroom la. Mu ne ko: «Loo may fey, ngir ànd ak man?» <sup>17</sup> Mu ne ko: «Dinaa jël bëy wu ndaw ca sama gétt, yónnee la.» Mu ne ko: «Jox ma lenn looy tayle, ba kera ngay yónnee.» <sup>18</sup> Mu ne ko: «Lu ma lay tayle?» Ndaw si ne ko: «Xanaa sa jaarob màndargaal, ak buum, gi mu àndal ak yet, wi ci sa loxo.» Mu jox ko nag, ba noppi ànd ak moom. Fa la doxe ëmb. <sup>19</sup> Ndaw sa dem yoonam, dindi muuraay ba, solaat yérey jëtun ya.

<sup>20</sup> Ba loolu wéyee Yuda yebal xaritam, ba dëkk Adulam, mu yóti ndaw sa bëy wu ndaw wa, ba mana jootaat la mu tayle woon ca ndaw sa. Xarit ba nag gisu ko. <sup>21</sup> Mu laaj waa gox ba, ne leen: «Ana gànc biy toog Enayim ci yoon wi?» Ñu ne ko: «Fii de ab gànc nekku fi.» <sup>22</sup> Mu dellu ca Yuda ne ko: «Gisuma ko de, te it waa gox ba nee nañu, foofa gànc nekku fa.» <sup>23</sup> Yuda ne ko: «Nanu ko ko wacce, mu jël, lu ko moy ñu ree nu, gannaaw maa ngi nii yónnee bëy wu ndaw wii, te yaw gisoo ko kay.»

<sup>24</sup> Ba ñu ca tegee lu tollook ñetti weer, ñu xamal Yuda ne ko, Tamar goroom ba, da doon jaay boppam, ba jaare ca ëmb. Yuda ne: «Nañu ko yóbbu, lakk ko, ba mu dee.» <sup>25</sup> Naka lañu koy yóbbu, mu yóbbante goroom ba ay kàddu. Da koo wax ne ko: «Ki moom lii moo ma ëmbal.» Mu teg ca ne ko: «Xoolal bu baax te wax ma ku moom jaarob màndargaal, bi ànd ak buum gi, ak yet wi.» <sup>26</sup> Yuda xàmmi yëf ya nag, ne: «Moo ma gëna nekk ci dëgg de, gannaaw mayuma ko sama

doom Sela.» Gannaaw ba loolu wéyee, àndatul ak moom.

<sup>27</sup> Tamar dem, ba wara wasin, ndekete ay seex la ëmb. <sup>28</sup> Ba muy mucc, kenn ca doom ya daa tàllal loxo ba, rewlikat ba jàpp ca, takk ca wëñ gu xonq curr. Mu ne: «Kii moo jëkka génn.» <sup>29</sup> Naka la delloo loxoom, seexam juddu, mu ne ko: «Yaw foo bëtte, ba génn?» Ñu daldi ko tudde Peres (mu firi Bëtt). <sup>30</sup> Nes tuut seex, bi wëñ gi takke ci loxo li, door caa topp, ñu tudde ko Sera.

## 39

### *Jaay nañu Yuusufa jawriñu Firawna*

<sup>1</sup> Ba ñu yóbbu Yuusufa Misra, Potifaar, jawriñu Firawna\*, ma jiite ay dagam, da koo jënd ca Ismayleen, ña ko fa indi.

<sup>2</sup> Ci kaw loolu Aji Sax ji ànd ak Yuusufa, may ko ndam, mu dëkk ca kër sangub waa Misraam ba. <sup>3</sup> Sang ba nag gis ne Aji Sax jaa ngi ànd ak Yuusufa, di ko may ndam ci lépp lu mu sabablu. <sup>4</sup> Sang ba am cofeel ci Yuusufa, def ko fara biir këram, dénk ko saytub kër ga, ba teg ciy loxoom lépp lu mu moom. <sup>5</sup> Boobee waayi Misra ja déncee Yuusufa këram ak lépp lu mu moom, mu di ko saytu, ca la Aji Sax ji dale barkeel këram, barkeelaale mboolem lu mu moom, kër ak tool. <sup>6</sup> Mu daldi bàyyi lépp ci loxol Yuusufa, te li mu fa nekk tax ba topptootul dara ciy mbiram, lu moy li muy lekk rekk. Booba Yuusufa ku jekkoon bind la te góorayiw.

### *Soxnas Potifaar fexeel na Yuusufa*

<sup>7</sup> Mu am bés nag soxnas sangub Yuusufa ba xemmem Yuusufa, daldi ne ko: «Kaay téd ak man.» <sup>8</sup> Teewul Yuusufa bañ, ne soxnas sang ba: «Déglul, sama sang da maa jébbal lépp, ba topptootul dara ci kër gi. <sup>9</sup> Èpplewu ma sañ-sañ ci biir kër gi, te aayewu ma lenn xanaa yaw, ndax soxnaam nga. Kon léegi nu may mana defe ñaawtéef wu réy wu ni tollu, di moy Yàlla?» <sup>10</sup> Ba loolu amee bés bu Yàlla sàkk mu di ko wax Yuusufa, te

† 38:15 38.15 Ci yooyu jamono gànc yi daan nañu leen xàmme seen muuraay. \* 39:1 39.1 Firawna tur la, wu buuri Misra daan tudd. Firawna mii wuute na ak Firawna, mi bokkoon ak Musaa jamono.

dégluwu ko, wéetul ak moom sax, bay tédđ ak moom.

<sup>11</sup> Mu am bés Yuusufa dugg ca kër ga, di def liggéeyam, te kenn ci surga yu góor ya nekku fa. <sup>12</sup> Ndaw si jàpp ci mbubb mi, ne ko: «Kaay tédđ ak man.» Yuusufa nag wacc mbubb ma cay loxoom, daw génn kër ga. <sup>13</sup> Ndaw si gis mbubb, mi mu ko wacce, ba daw génn, <sup>14</sup> mu woo surgay kër ga, ne leen: «Xool-leen, Ebrë, sii sama jëkkër indi ci kër gi, mu di nu yab. Dafa ñëw, bëgg maa tédde, ma yuuxu ca kaw. <sup>15</sup> Naka laa yuuxu ca kaw, mu wacce ma mbubbam, daw génn.» <sup>16</sup> Ba mu ko defee ndaw si denc mbubb ma, ba sangub Yuusufa ba ñibbsi, <sup>17</sup> mu nettalee ko ko noonu ne ko: «Jaamu ebrë, bi nga indi ci kër gi de, da maa fekksi, di ma sàkku. <sup>18</sup> Naka laa yuuxu ca kaw, mu daw génn, wacce ma mbubbam.»

### *Těj nañu Yuusufa kaso*

<sup>19</sup> Sang bi dégg li ko soxnaam wax ne moom la ko jaamam def, mu mer lool, <sup>20</sup> ba jàpp Yuusufa, těj ko kaso, ba ñuy denc ñi buur jàpp. Yuusufa nekk foofa ca kaso ba.

<sup>21</sup> Teewul Aji Sax ji ànd ak Yuusufa, laaye ko biir, daldi xiir wattukatú kaso ba ca moom, mu yéwéne ko. <sup>22</sup> Ci kaw loolu mu may Yuusufa, mu yilif ñi ñu těj ñépp, te mboolem lu ñu fay def, mu di ko jiite. <sup>23</sup> Wattukat ba seetatuloon dara lu Yuusufa jiite, ndax Aji Sax jee ànd ak moom, te lu mu sabablu, Aji Sax ji may ko ca ndam.

## 40

### *Yuusufa firi na ñaari gént*

<sup>1</sup> Ba loolu wéyee kiy topptoo naani buuru Misra ak lakk-katu mburoom dañoo tooñ buuru Misra, seen sang. <sup>2</sup> Firawna nag mere lool ñaari jawriñ yooya, kenn ka di kilifay ñay topptoo naani buur, ka ca des di kilifay lakk-kati mburu ya, <sup>3</sup> ba tax mu těj leen ca kër kilifag wattukat ba, ca kaso, ba ñu těj Yuusufa. <sup>4</sup> Kilifag wattukat ya teg leen ca loxol Yuusufa, mu di leen topptoo.

Ba ñu nekkee ab diir ca kaso ba, <sup>5</sup> jawriñi buuru Misra, ya ñu těj, muy

ñaar ña féetewoo naani buur ak mburoom, dañoo géntandoo ci genn guddi, gént gu ci nekk ak li muy firi. <sup>6</sup> Yuusufa xëy, fekk leen ñu jaaxle. <sup>7</sup> Mu laaj jawriñi Firawna, yooyee ñu tējandoo woon ak moom ca kër sangam, ne leen: «Lu leen tax ne yogg tey?» <sup>8</sup> Ñu ne ko: «Ay gént daal a nu dikkal, te amunu ku nu koy firil.» Yuusufa ne leen: «Xanaa du Yállaa moom piri? Nettalileen ma seeni gént rekk kay.»

<sup>9</sup> Jawriñ bay topptoo naanu buur daldi nettali géntam Yuusufa, ne ko: «Ci gént gi, garabu reseñ laa gis ci sama kanam, <sup>10</sup> mu def ñetti car. Naka la focci rekk, gaawa tóor, cëgg ya meññ reseñ ju ñor. <sup>11</sup> Maa ngi téye nii kaasu Firawna ci sama loxo, jël reseñ ji nag, nal ko ci kaasu Firawna, ba noppi teg kaas bi ci loxol Firawna.»

<sup>12</sup> Yuusufa ne ko: «Piri mi mooy lii. Ñetti car yi, ñetti fan la. <sup>13</sup> Fii ak ñetti fan Firawna dina la siggil, delloo la sa liggéey, ngay teg kaasu Firawna ci loxoom, ni nga ko daa defe naka jekk, ba nga yoree naanam. <sup>14</sup> Waaye ngalla boo delloo ca sa teraanga, nanga ma geestu te dimbali ma, waxal ma Firawna lu jëm ci man, ba man maa génne fii. <sup>15</sup> Ndax man kat dañu maa sàcce ca réewum Ebrë ya, te fii itam, defuma fi lu tax, ñu war maa těj.»

<sup>16</sup> Kilifag lakk-kati mburu ya nag gis ne piri mi neex na, mu ne Yuusufa: «Man it sama gént gi, xam nga lu ma ci gis? Ñetti pañey mburu mu weex laa yenu, <sup>17</sup> ba féete kaw a nga yeb mboolem xeeti mburu yu ñuy lakkal Firawna, picc yaa nga koy for ca pañe, ba ma yenu.»

<sup>18</sup> Yuusufa ne ko: «Piri mi mooy: ñetti pañe yi, ñetti fan la. <sup>19</sup> Fii ak ñetti fan Firawna dina la siggil, ba noppi wékk la ci bant, picc yi ñëw, di for sa suux.»

<sup>20</sup> Ñu teg ca ñetti fan, Firawna di màggal bésu juddoom, dajale jawriñam yépp, di leen berndeel, daldi cay seppée kilifa gay topptoo ay naanam, ak kilifag lakk-kati mburu ya, siggil leen. <sup>21</sup> Mu delloo nag kilifa gay topptoo ay naanam ca liggéeyam, mu teg kaas ba ca loxol Firawna. <sup>22</sup> Kilifag lakk-kati mburu ya

moom, da koo wékk ci bant, na leen ko Yuusufa firile woon.

<sup>23</sup> Waaye kilifa, ga yore naani Firawna, xalaatul sax Yuusufa, da koo fàtte.

## 41

### *Firawna gént na*

<sup>1</sup> Ñaari ati lëmm wees na gannaaw loolu, gént dikkal Firawna, mu jeneer taxaw ca wetu dexu Niil. <sup>2</sup> Mu gis juróom ñaari nag yu rafet te suur génne ca dex ga, di for baraxi tàkk ga. <sup>3</sup> Mu dellu gis juróom ñaari nag yu ñaaw te yooy topp ca ñoom, génne ca dex ga, làng ak ñoom ca tàkk ga. <sup>4</sup> Nag yu ñaaw ya te yooy daldi lekk juróom ñaari nag yu rafet ya te suur. Firawna yewwu, <sup>5</sup> ba noppi nelawaat, dellu gént, gis juróom ñaari gub\* yu nangu te baax sax ci benn gattax. <sup>6</sup> Gannaaw ga juróom ñaari gub yu gooy yu ngelaw li lakk sax, tegu ca ya jiitu. <sup>7</sup> Ca la gub yu gooy ya wonn juróom ñaari gub yu nangu ya te baax. Gannaaw loolu Firawna yewwu, xam ne gént la woon.

<sup>8</sup> Ba bët setee, Firawna jaaxle lool, ba woolu jibar ya ak boroom xam-xami Misra yépp, nettali leen la mu gént, te kenn manu koo firil Firawna.

<sup>9</sup> Ba loolu amee kilifa gay topptoo naani Firawna ne ko: «Man de tooñ naa te dinaa la ko wax tey. <sup>10</sup> Sang bi, ba nga nu meree, yaw Firawna, ba tēj ma kaso ca kër njiitu dag ya, man ak kilifag lakk-kati mburu ya, <sup>11</sup> genn guddi danoo géntandoo, man ak moom, gént gu ci nekk ak la muy firi. <sup>12</sup> Fekk amoon na waxambaanew ebrë wu fa nekkoon ak nun, te doonoon jaamub njiital dag ya. Nu nettali ko sunuy gént, mu firil nu ko, wax nu ku nekk la sa gént di tekki. <sup>13</sup> Te na mu nu ko firile woon, na la ame: delloo nañu ma sama liggéey, ka ca des ñu wékk ko ci bant.»

### *Yuusufa firi na génti Firawna*

<sup>14</sup> Ba Firawna déggee loolu, dafa woolu Yuusufa. Ñu gaaw tijji ko, mu watu, solu, doora wuyji Firawna. <sup>15</sup> Firawna ne Yuusufa: «Damaa gént, te kenn manu koo firi, te ma dégg ñuy wax ci yaw naan,

gént goo dégg rekk, xam ko, ba man koo firi.» <sup>16</sup> Yuusufa ne ko: «Du ci man de, waaye Yàlla mooy baaxe Firawna pirim jàmm.»

<sup>17</sup> Firawna ne Yuusufa: «Damaa gént, taxaw ci tàkkal dexu Niil, <sup>18</sup> ma gis juróom ñaari nag yu suur te rafet génne ca dex ga, di for baraxu tàkk ga. <sup>19</sup> Ma dellu gis yeneen juróom ñaari nag yu ràgg, ñaaw te yooy génne ca dex ga, topp ci ñoom, di yu ñaaw, ba masumaa gis lu ni mel ci Misra. <sup>20</sup> Noonu yu yooy ya te ñaaw daldi lekk juróom ñaari nag, ya jëkkoona feeñ te suur. <sup>21</sup> Waaye bi ñu leen lekkee ba noppi, itam dafa mel ni lekkuñu leen, ndax terewuleena mel na woon. Booba laa yewwu, <sup>22</sup> ba noppi dellu gént, gis juróom ñaari gub yu fees te baax sax ci benn gattax. <sup>23</sup> Gannaaw ga ma gis juróom ñaari gub yu gooy yu ngelaw li lakk, sax tegu ca ya jiitu. <sup>24</sup> Gub yu gooy ya nag wonn juróom ñaari gub yu baax ya. Nettali naa ko samay jibar, waaye kenn ci ñoom manu ma koo firil.»

<sup>25</sup> Yuusufa ne Firawna: «Sa ñaari gént yi de, sang bi, ñoo bokk piri. Sang bi, Yàlla da laa xamal li muy def èllëg. <sup>26</sup> Juróom ñaari nag yu baax yi, juróom ñaari at la. Te it juróom ñaari gub yu baax yi, juróom ñaari at la. Muy genn gént gi. <sup>27</sup> Te itam juróom ñaari nag yu yooy, yi ci topp te ñaaw, juróom ñaari at la. Naka noonu juróom ñaari gub yu gooy, yi ngelaw li lakk, juróom ñaari ati xiif lay firi. <sup>28</sup> Mooy li ma la wax rekk, sang bu tedd bi: li Yàlla di defi èllëg la la won. <sup>29</sup> Nu ngi dëgmal juróom ñaari ati naataange yu réy ci mboolem réewum Misra. <sup>30</sup> Te juróom ñaari ati xiif a ciy topp, ba ñu fàtte naataange gu réy ga amoon réewum Misra. Xiif ba cay topp dina yaq réew mi. <sup>31</sup> Xiif bi dina tax lenn luy nirook naataange dootu des ci réew mi, ndax dina metti lool. <sup>32</sup> Te nag, sang bi, gannaaw gént nga ko ñaari yoon, kon Yàlla dogal na mbir mi, te dina ko amal balaa yàgg.»

<sup>33</sup> Yuusufa teg ca ne Firawna: «Kon léegi sang bi, wutal nit ku muus te rafet

\* **41:5** 41.5 gub yi ñuy wax fii, bele la woon.

xel, jiital ko ci réewum Misra. <sup>34</sup> Te itam sang bi, dangay fal ay ndaw ci réew mi, ñuy sàkku juróomi natt yu ne benn ci mboolem lu ñu góobe réewum Misra diiru juróom ñaari ati naataange yiy ñew. <sup>35</sup> Ñoom nañu dajale mboolem dundi at yu baax yi, te boole pepp mi ci sa ndigalu bopp, yaw Firawna, muy dund bu ñuy denc ci dëkk yi. <sup>36</sup> Dund boobooy doon sàqu réew mi diiru juróom ñaari ati xiif yiy dal ci réewum Misra; su ko defee waa réew mi duñu loru ci xiif bi.»

### *Firawna fal na Yuusufa, mu jiite Misra gépp*

<sup>37</sup> PeXe moomu nag doon lu Firawna aki jawriñam yépp njort ne baax na. <sup>38</sup> Firawna daldi ne jawriñ ya: «Ndax masees naa gis ku mel ni kii a waay, nit ku Yàlla sol Noowug boppam?» <sup>39</sup> Firawna wax ak Yuusufa ne ko: «Ndegam Yàlla xamal na la lii lépp kay, leer na ne amul kenn ku muus te rafet xel ni yaw. <sup>40</sup> Kon dinaa la may, nga jiite kër buur, te waa réew mépp ci sa waaw lañuy wéy; jal bi ma toog donj laa lay sute.»

<sup>41</sup> Gannaaw loolu Firawna neeti Yuusufa: «Bés niki tey, dénk naa la réewum Misra gépp» <sup>42</sup> Ba loolu amee Firawna tekkee jaarob màndargaal ba ca loxoom, takkal ko Yuusufa, solal ko yérey tànnéef, takkal ko caqu wurus, <sup>43</sup> ba noppi waral ko watiiru ku sès rëkk ci moom Firawna, te fu mu ware ñu jiitu ko, di yéene naan: «Sujjóotleen†!» Noonu la ko Firawna fale, mu yilif Misra gépp.

<sup>44</sup> Ci kaw loolu Firawna ne Yuusufa: «Man maay Firawna, waaye gannaaw-si-tey mboolem waa réewum Misra, kenn du ci sañatee yékkati loxo mbaa muy séqi jéego, te àndoo ci.» <sup>45</sup> Firawna nag tudde Yuusufa Safnat Paneya, may ko jabar Asnat doomu Potifera ma doon sarxalkat ca dëkk ba ñuy wax On‡. Yuusufa doxe ca tegoo kilifteefu Misra gépp. <sup>46</sup> Ba Yuusufay tàmbalee liggéeyal Firawna buuru Misra, mu ngi tollu ci fanweeri at. Yuusufa daldi bàyyikoo ca Firawna, wër réew ma mépp.

<sup>47</sup> Diiru juróom ñaari ati naataange ya suuf sa nangu, ba meñneef ma tuuru. <sup>48</sup> Mu dajale mboolem dundub réewum Misra diiru juróom ñaari at yooyee, dëkk bu nekk mu denc fa dund, ba jóge ca tool ya ko wër. <sup>49</sup> Fa la Yuusufa jaare dajale pepp, mu ne gànñ, ni suufas géej, ba tàyyeeti koo waññ, ndax mujj na wees ab lim.

<sup>50</sup> Laata ati xiif yay agsi, Yuusufa am na ñaari doom yu góor ak Asnat doomu Potifera, kilifag diine, ga ca On. <sup>51</sup> Yuusufa tudde taaw ba Manase (mu firi Ki ma taxa fàtte), ndaxte da ne: «Li ma sonn ak li ma sore sama kër baay lépp, Yàlla fàtteloo na ma ko.» <sup>52</sup> Doomam ja ca topp mu tudde ko Efrayim (mu firi Giir), ndaxte da ne: «Yàllaa ma giiral ca réew, ma ma sonne.»

<sup>53</sup> Ci kaw loolu juróom ñaari ati naataange ya jeex ca réewum Misra, <sup>54</sup> juróom ñaari ati xiif ya tàmbali, na ko Yuusufa waxe woon. Réew yépp nag nekk ci xiif, waaye amul fu ñàkk dund ca Misra.

<sup>55</sup> Ba waa Misra xiiffee, dañoo dem jooytuji dund ca Firawna. Mu wax ak ñépp ne leen: «Demleen ca Yuusufa; lu mu leen wax, defleen ko.» <sup>56</sup> Ba ñu demee, ba metitu xiif bi dajal réew mépp, Yuusufa dafa ubbi denc yépp, di jaay pepp mi waa Misra, <sup>57</sup> ba nit ñiy jóge fu nekk ci àddina, di wutsi njël ci Yuusufa ndax xiif bu mettee fépp ca àddina.

## 42

### *Magi Yuusufa ya dem nañu Misra*

<sup>1</sup> Ba Yanqóoba yégee ne pepp am na Misra, daa wax ay doomam yu góor, ne leen: «Lu ngeen di toog, di xoolante rekk?» <sup>2</sup> Mu ne leen: «Dégg naa ne pepp am na ca Misra. Demleen jëndali nu ca, ndax nu mana dund, ba xiif bañ noo rey kay!»

<sup>3</sup> Ci kaw loolu fukki magi Yuusufa ya dem Misra, jëndi pepp. <sup>4</sup> Waaye Yanqóoba yebalul Beñamin, rakku Yuusufa, ndax dafa ragal ne musiba man na koo dab. <sup>5</sup> Doomi Israyil ñew nag ci biir

† **41:43** 41.43 Baat bi ñu tekkee sujjóotleen man naa tekki itam «moytuleen» walla «xàll-leen yoon wi». ‡ **41:45** 41.45 On moo doon péeyu diiney ñiy jaamu jant ca Misra.

ñiy jëndsi pepp, ndax xiif bi lawoon na ba Kanaan. <sup>6</sup> Fekk booba Yuusufa mooy dogal ca réew ma, di jaay pepp waa réew mépp. Magi Yuusufa ya ñëw, sujjóotal Yuusufa.

### *Yuusufa xupp na magam ya*

<sup>7</sup> Naka la Yuusufa gis magam ya, xàmmi leen, te mel ni ku leen xamul, di wax ak ñoom kàddu yu dëgër ne leen: «Fu ngeen jóge?» Ñu ne ko: «Réewu Kanaan lañu jóge, di jëndsi ab dund.» <sup>8</sup> Yuusufa xàmmi na ay magam, waaye ñoom xàmmiwuñu ko. <sup>9</sup> Xelum Yuusufa ne yarr ca la mu géntoon ca ñoom, daldi ne leen: «Yeen ay yëddukat ngeen, yuy nemmikusi mbóoti réew mi.» <sup>10</sup> Ñu ne ko: «Mukk sang bi, danu lay siyaare, di wutsi ab dund rekk, <sup>11</sup> te nun ñépp a bokk baay, di nit ñu maandu; nun kay, sang bi, dunu ay yëddukat.» <sup>12</sup> Mu ne leen: «Ahakay, nemmikusi mbóoti réew mi moo leen taxa jóg.» <sup>13</sup> Ñu ne ko: «Nun ñii di la siyaare de, fukki góor ak ñaar lanu woon, bokk sunu baay, ba ca Kanaan. Ka ca gën di xalee nga ca sunu baay, te ka ca des nekkatul.» <sup>14</sup> Yuusufa ne leen: «Li ma leen wax moo am, ay yëddukat donj ngeen. <sup>15</sup> Waaye nii laa leen di seetloo: bu seen rakk ñëwul, ak bakkanu Firawna, dungeen fi jóge. <sup>16</sup> Na kenn ci yeen jëli seen rakk, ñu tëj ñi ci des te topp seen wax, ba xam ndax yeena ngi ci dëgg. Su dul dëgg, giñ naa ci Firawna ne ay yëddukat donj ngeen.» <sup>17</sup> Mu tëj leen ñetti fan.

<sup>18</sup> Ca gannaaw ëllëg sa Yuusufa ne leen: «Bu ngeen defee lii may wax, dingeen dund, ndax man ragal naa Yàlla. <sup>19</sup> Ndegam ñu maandu ngeen, na leen kenn ci seen doomi baay wuutu fii, ñi ci des dem yóbbul pepp seen waa kër, yi nekk ci xiif. <sup>20</sup> Waaye nangeen ma indil seen rakk, ba ma xam ne li ngeen wax dëgg la; su ko defee dungeen dee.» Ñu daldi ne: «Waaw,» <sup>21</sup> te naa ci seen biir: «Céy su nu yégoon, sunu àqu rakk a nu topp nii, ndax danu koo seetaanoon, mu nekk ci njàqarey xol, di nu tinu, te faalewunu ko; looloo waral sunu njàqarey tey jii.» <sup>22</sup> Ruben nag

àddu ne leen: «Ndax newuma leen woon: “Buleen gàddu bakkanu xale bi,” waaye faalewuleen ma; tey rekk la nu Yàlla doon xaare bakkanam, bi nu gàddu.» <sup>23</sup> Ba ñuy wax loolu, foogoon nañu ne Yuusufa déggul seen làkk, ndax làppto, ba doxoon seen diggante, di tekki.

<sup>24</sup> Ci biir loolu mu dummóoyu leen, di jooy.

### *Doomi Yanqóoba ya dellu nañu Kanaan*

Ba mu jooyee ba noppi, walbatiku, wax ak ñoom, doora jël Simeyon, jéng ko ci seen kanam.

<sup>25</sup> Gannaaw loolu Yuusufa joxe ndigal, ñu sol seeni saaku pepp, te ku nekk ca ñoom, ñu yebal ko xaaalisam ca saakoom, ba noppi mayaale leen lu ñu lekk ca yoon wa. Ñu defal leen noonu. <sup>26</sup> Ba mu ko defee ñu sëf seeni mbaam pepp ma, daldi fay bàyyikoo.

<sup>27</sup> Fa ñu dal ca guddi, kenn ci ñoom bégga xont mbaamam, ubbi saakoom rekk, ne pemm ci xaaalisam. <sup>28</sup> Mu ne doomi baay ya: «Delloo nañu ma sama xaaalis, mu ngi nii ci sama saaku.» Seen fit ne tërit, ñuy rag-ragi, ku ne xool sa moroom, naan: «Lu nu Yàlla nattoo nii?»

<sup>29</sup> Ba ñu yeggee ca seen baay Yanqóoba ca réewu Kanaan, daldi koy nettali li leen dal lépp, ne ko: <sup>30</sup> «Waa ja yilif réew ma dafa noo résëti, foog ne danuy yëddusi réew ma. <sup>31</sup> Nu ne ko: “Nun ay nit ñu maandu lanu, dunu ay yëddukat; <sup>32</sup> fukki góor ak ñaar lanu woon yu bokk sunu baay, waaye kenn ka nekkatul, te ka gën di xalee nga fa sunu baay, ba ca réewu Kanaan.” <sup>33</sup> Waa ja yilif réew ma ne nu: “Ni may xame ne ñu maandu ngeen, nii la: dangeen may bàyyeek kenn ci yeen, te dem yóbbul dund seen waa kër, yi nekk ci xiif; <sup>34</sup> su ko defee ngeen indil ma seen rakk ju ndaw, kon dinaa xam ne dungeen ay yëddukat waaye nit ñu maandu ngeen, te dinaa leen delloo seen mbokk, ngeen mana dem fu leen neex ci réew mi.”»

<sup>35</sup> Naka la ku nekk sotti saakoom, ne jàkk ca mbuusu xaaalisam. Ba ñu gisee mbuusi xaaalis ya, ñoom ak seen baay, dañoo tiit. <sup>36</sup> Seen baay Yanqóoba ne leen: «Xañ ngeen ma ay doom: Yuusufa

nekkatul, Simeyon nekkatul, léegi ngeen bégga jël Beñamin, yóbbu. Loolu lépp ci sama kaw; ngalla man!» <sup>37</sup> Ruben wax ak baayam ne ko: «Su ma la ko délloosilul, boo yeboo reyal sama ñaari doom yu góor yi. Tegal Beñamin ci sama loxo rekk, man dinaa la ko délloosil.» <sup>38</sup> Ci kaw loolu Yanqóoba ne: «Sama doom daal, du ànd ak yeen, ndax magam faatu na, te moom rekk a des. Su ko musiba dabee ci yoon wi ngeen jëm, dingeen ma yóbbe naqar wu may jàpp, ba kera may ànd ak sama bijjaaw, tàbbi njaniiw.»

## 43

### *Magi Yuusufa ya yóbbu nañu Beñamin*

<sup>1</sup> Gannaaw loolu xiif bi metti ca réew ma. <sup>2</sup> Ba ñu lekkee pepp mi ñu jële woon Misra, ba mu jeex, seen baay ne leen: «Delluleen, wutali nu dund.» <sup>3</sup> Yuda ne ko: «Waa ja da noo àrtu woon de, wax na nu ne nu: “Dootuleen jækkaarlook man te ànduleen ak seen rakk.” <sup>4</sup> Boo bàyyee sunu rakk, mu ànd ak nun nag, dinanu dem jëndali la dund. <sup>5</sup> Waaye boo ko bàyyiwul kat, dunu dem, ndax waa ja waxoon na nu ne nu: “Dungeen jækkaarlook man te seen rakk àndul ak yeen.”» <sup>6</sup> Israyil ne leen: «Ana lu waral ngeen di ma lor, naan waa ja am ngeen jeneen rakk?» <sup>7</sup> Ñu ne ko: «Waa ja kat da nu doon laaj ak a laajaat ci nun ak sunuy bokk, ba naa nu ndax sunu baay mu ngi dund ba tey, ak ndax am nanu rakk. Nun itam nu wax ko li mu nu laaj. Géntunu woon moos ne dina nu sant, nu indil ko sunu rakk!»

<sup>8</sup> La ca tegu Yuda ne Israyil: «Baay, tegal ngóor si ci sama loxo, nu daldi dem, ndax nu dund, baña dee, nook yaw ak sunuy doom. <sup>9</sup> Dige naa sama bakkan; boo yeboo laaj ma ko. Bu ma la ko délloosilul, ba teg ko fi sa kanam, maa lay tooñ sama giiru dund. <sup>10</sup> Bu nu yeexuloon ba léegi, manoon nanoo dem ba délsi ñaari yoon sax.»

<sup>11</sup> Seen baay Israyil nag ne leen: «Ndegam manula ñàkk, dangeen di def nii: sàkkleen ci ngëneeli réew mi, yeb ci

seeni saaku, yóbbul waa ja lu mel ni tuuti diwu yaram ak lem ak cuuraayu xas ak cuuraayu ndàbb ak ay xeeti saal\* . <sup>12</sup> Te ngeen yóbbaaale ci xalis lu tollook ñaar-cay la ngeen jënde woon, ngir feyaale loola, ndax jombul njuumte la woon. <sup>13</sup> Su ko defee ngeen ànd ak seen rakk, fabu dellu ca waa ja. <sup>14</sup> Yal na Yàlla Aji Man ji def waa ja yërëm leen, ba bàyyi seen doomu baay ba, moom ak Beñamin itam. Man nag, su ma naree ñàkk ay doom—aa! Naa leen ñàkk rekk.»

### *Magi Yuusufa ya dellu nañu Misra*

<sup>15</sup> Gaa ña jël nañu sarica booba, yóbbaaale nañu it ñaar-cay xalis ba, daldi ànd ak Beñamin, ñu dem Misra, teewi ca kanam Yuusufa. <sup>16</sup> Ba Yuusufa gisee Beñamin ànd ak ñoom, dafa wax fara biir këram, ne ko: «Yóbbul gaa ñi ca kër ga, te nga rey gàtt, defar ko, ndax maak ñoom nooy bokk añ tey.» <sup>17</sup> Waa ja def la ko Yuusufa wax, yóbbu gaa ña kër Yuusufa. <sup>18</sup> Ñu am nag tiitaange ndax li ñu leen yóbbu kër Yuusufa. Na ngay xalaat naan: «Boo demee, xalis bi ñu yeboon ci sunuy saaku yoon wu jëkk wa, moom lañu bégga taafantoo, dugal nu fii, ba song nu, jàpp nu jaam, nangu sunuy mbaam, boole ci.»

<sup>19</sup> Ba ñu demee ba ca buntu kër Yuusufa, wax nañu ak fara biir këram. <sup>20</sup> Ñu ne ko: «Sang bi baal nu, nun de ñëwoon nanu fi lu jiitu ngir jëndsi dund, <sup>21</sup> waaye ba nu dalee ca yoon wa, danoo ubbi sunuy saaku, ku nekk ci nun fekk xalisam ca kaw, mu tollu na mu tollu woon, te indiwaat nanu ko. <sup>22</sup> Te it indaale nanu xalis bu nu jënde dund. Waaye xamunu ku delloo xalis ba ci sunuy saaku.» <sup>23</sup> Mu ne leen: «Jàmm rekk la; buleen tiit, seen Yàlla, jiy seen Yállay baay, moo leen defal alal ci seeni saaku. Seen xalis jot naa ci.» Ci kaw loolu mu génne Simeyon, indil leen ko.

<sup>24</sup> Waa ja dugal leen kër Yuusufa, may leen ndox ñu jàngu, ba noppi xont seeni mbaam. <sup>25</sup> Ba mu ko defee ñu yebbi seeni sarica, bala Yuusufaa agsi ca digg bëccëg, ndaxte dégg nañu ne foofa lañuy aña.

\* **43:11** 43.11 ay xeeti saal lañu, yu ñuy wax pistaas ak amànd.

<sup>26</sup> Ba Yuusufa wàccsee, ñu jébbal ko foofa ca biir kër ga sarica, ba ñu ko indaaleel, daldi koy sujjóotal. <sup>27</sup> Mu nuyoo ak ñoom, ba noppi laaj leen ne leen: «Seen baay bu màggat, ba ngeen doon wax, mbaa mu ngi dund? Mbaa mu ngi ci jàmm?» <sup>28</sup> Ñu ne ko: «Sunu baay mu ngi dund, sang bi, te mu ngi ci jàmm.» Ña nga koy sukkal tey sujjóotati.

<sup>29</sup> Naka la Yuusufa ne gees, gis Beñamin rakku doomu ndeyam ja. Mu laaj leen ne leen: «Ndax kii mooy seen rakk, ji ngeen ma doon wax?» La ca tegu mu ne rakkam ja: «Sama ngóor si, yal na la Yàlla defal yiw waay!» <sup>30</sup> Ci kaw loolu Yuusufa gaaw génn ndax yaram wu daw, te manatula téye ay rongooñam ndax rakkam ja, mu dugg néegu biiram, di jooy. <sup>31</sup> Ba mu noppee, sèlmu, génn, doora ànd ak sagoom, daldi joxe ndigal, ne: «Taajleen añ bi.» <sup>32</sup> Loolu wees ñu may Yuusufa moom rekk; ber doomi baayam ya. Waa Misra ña fa doon lekke it, ñu beral leen seen ndab, ngir waa Misra daawuñu bokk ak Ebrë yi lekk, ndax mbañ la fa woon. <sup>33</sup> Ña nga toog, na mu leen ko sante, taaw ba fegge wet, ni ko ko céru taaw maye, ñu sèsaloo, na ñu toppantee ciy at, ba ca caat ma. Gaa ñaa nga yéemu, di xoolante. <sup>34</sup> Mu sàkkal leen ca ndabam, te Beñamin èpple ku ci nekk juróomi yoon. Ñu bokk nag naana naan, ba seen xol sedd.

## 44

### *Yuusufa nattu na ay magam*

<sup>1</sup> Ba loolu wéyee mu sant fara biir këram, ne ko: «Solal seeni saaku pepp lu ñu mana àttan, te nga delloo ku nekk xaaalisam, tegal ko ko ca buntu saakoom. <sup>2</sup> Waaye sama kaasu xaaalis boobee, yebal ko ki gën di xale ci saakoom, boole ko ak xaaalisu peppam.» Mu def la Yuusufa wax. <sup>3</sup> Ca èllëg sa, ba jant bay fenk, yiwi nañu gaa ña, ñu sëf seeni mbaam, dem. <sup>4</sup> Naka lañu génn dëkk ba, te soreeguñu sax, Yuusufa sant fara biir këram, ne ko: «Gaawal dab gaa ña, te boo leen dabee, wax leen ne leen: “Lu tax ñu ji leen njekk, ngeen feye ngoreedi? <sup>5</sup> Ndax li ngeen

jël du sama kaasu sang, bi muy naane, rawatina di ko gisaanee? Lu ñaaw ngeen def nii!”»

<sup>6</sup> Mu daldi leen dab, wax leen loolu. <sup>7</sup> Ñu ne ko: «Kilifa gi, looy wax nii? Nun de, sang bi, jomb nanu loolu! <sup>8</sup> Xaaalis bi nu fekkoon ci sunu bunti saaku sax, danoo àndaat ak moom, jóge ba Kanaan, délloosil la ko, kon nan lanu mana sàcce sa kër sang xaaalis mbaa wurus? <sup>9</sup> Ngalla kilifa gi, yaay sunu sang; koo ko fekke ci nun rekk, boo yeboo reyal, ñi des ci nun doxe fa, di say jaam.» <sup>10</sup> Mu ne leen: «Li ngeen wax yoon la sax, waaye na ki ma ko fekke donj di sama jaam, su ko defee ñi ci des wàcc.»

<sup>11</sup> Ñu gaaw nag, wàcce seeni saaku ci suuf, ku nekk ubbi saakoom. <sup>12</sup> Ma ngay seet, tàmbalee ca taaw ba, ba ca caat ma, doora fekk kaas ba ca saaku Beñamin. <sup>13</sup> Ba loolu amee dañoo torox, ba xotti seeni yére, ku nekk sèfaat mbaamam, ñu dellu ca dëkk ba.

### *Yuda tinul na Beñamin ca Yuusufa*

<sup>14</sup> Yuda aki doomi baayam nag délsi kër Yuusufa, fekk demagul. Ñu daldi ne nërëm, dëpp seen jë fi suuf. <sup>15</sup> Yuusufa ne leen: «Li ngeen def nag? Xanaa xamuleen ne nit ku mel ni man day gisaane?» <sup>16</sup> Yuda ne: «Sang bi, lu nuy waxati? Lu nu mana lay, ba setal sunu bopp? Yàllaa nu feeñal, sang bi. Nanu bokk nun ñépp di say jaam, yem ci kepp ak ki ñu fekk kaas bi ci loxoom.» <sup>17</sup> Mu ne leen: «Jomb naa loolu. Ki ñu fekk kaas bi ci loxoom mooy doon sama jaam; ñi ci des dellu ca seen baay ci jàmm.»

<sup>18</sup> Yuda jegesi ne ko: «Ngalla sang bi, ma ñeme laa diis lenn rekk, te sa xol baña tàng ci man, doonte yaak Firawnaa tolloo. <sup>19</sup> Sang bi, danga noo laajoon ne nu: “Ndax am ngeen baay walla rakk?” <sup>20</sup> Ba mu ko defee nu ne la: “Am nanu baay bu màggat. Sunu rakk, ji mu jur te fekk ko di màggat nag, moo ci gën di ndaw. Magam dafa dee, mu des moom donj ci ndeyam, baayam sopp ko lool.” <sup>21</sup> Nga waxoon nu ne nu: “Indil-leen ma ko, ngir ma gisal ko sama bopp.” <sup>22</sup> Ci kaw loolu, sang bi, nu wax la ne: “Xale bu góor bi

manula tàggook baayam. Bu tàggoo ak moom, kon baayam dina dee.”<sup>23</sup> Nga wax nu ne nu: “Bu seen rakk àndul ak yeen, dungeen jàkkaarlook man.”<sup>24</sup> Booba lanu dem ca sunu baay, ba lay siyaare, daldi koy jottli say kàddu.

<sup>25</sup> «Ba nu demee ba mu yàgg, sunu baay ne: “Delluleen, jëndali nu tuuti dund.”<sup>26</sup> Teewul nu ne: “Dunu mana dem te sunu rakk àndul ak nun, ndaxte bu nu àndul ak moom, dunu gis kilifa ga.”<sup>27</sup> Sunu baay, ba lay siyaare, ne nu: “Xam ngeen ne damaa amul ak sama soxna lu dul ñaari doom.”<sup>28</sup> Kenn ki dem, wacc ma, ma ne moom kay, aw rabu àll a ko daggate! Gisaatuma ko ba tey jii.”<sup>29</sup> Te bu ngeen ma fi jëlalee kii itam, ba musiba dab ko, dingeen ma yóbbe naqar wu may jàpp, ba kera may ànd ak sama bijjaaw, tàbbi njaniiw.”

<sup>30</sup> «Léegi nag, bu ma ñibbee ca sama baay, ba lay siyaare, te àndunook xale bii muy noyyee,<sup>31</sup> bu gisul xale bu góor bi ànd ak nun ñibbsi— aa! Kon de dina dee, te dinanu yóbbe sunu baay naqar, wu koy topp, ba kera muy ànd ak bijjaawam, tàbbi njaniiw.”<sup>32</sup> Gannaaw loolu it xasoon naa dige sama bakkan, ndax damaa waxoon ne: “Bu ma la ko délloosilul, maa koy gálloo ba kera may dee.”<sup>33</sup> Kon ngalla sang bi, bàyyi ma man ma des fi di sa jaam, wuutu xale bi, te moom mu dellu ànd aki magam ñibbi.”<sup>34</sup> Ndax xawma nan laay delloo ca sama baay te ànduma ak xale bi. Yàlla buma fেকে নজেকার, লি চিয় দাল sama baay!»

## 45

### *Yuusufa xàmmiku na ay magam*

<sup>1</sup> Ba loolu amee Yuusufa manatula téye boppam, te surgaam yépp a nga teew. Mu daldi àddu ne: «Xiddileen ma, yeen ñépp!»<sup>2</sup> Ñépp dem, ba benn jaambur nekku fa, ba Yuusufa di xàmmiku ay bokkam.<sup>3</sup> Mu ne yikkét, jooy jooy yu metti, waa Misra di ca dégg, ba ca kër Firawna sax.

<sup>3</sup> Yuusufa nag ne magam ya: «Man mii maay Yuusufa! Mbaa sama baay a ngi dund?» Magam ya nag manuñu

koo tontu, ndax booba njàqare jàpp na leen.<sup>4</sup> Yuusufa dellu ne ay magam: «Jegeñsileen.» Ñu jegeñsi. Mu ne leen: «Man maay Yuusufa, seen rakk, ji ngeen jaayoon, ñu indi ma Misra.»<sup>5</sup> Waaye buleen jaaxle tey, mbaa ngeen di sikk seen bopp ndax li ngeen ma jaay, ñu indi ma fi. Rawale ay bakkan moo tax Yàlla yebal ma fi, ma jiiusi leen.<sup>6</sup> Ñaari at a ngii xiif baa ngi ci réew mi, te fii ak juróomi at ci kanam, kenn du bey, kenn du góob.<sup>7</sup> Yàlla da maa yebal, ma jiiusi leen, ba rawale seen bakkan, dikke leen xettal gu mag, ba seen askan baña fey.<sup>8</sup> Kon nag du yeena ma yebal fii, waaye Yàllaa. Te moo ma jagleel, ma doon cëslaayal Firawna, mel ni baay ci moom, jiiite kërám gépp, boole ci yilif mboolem réewum Misra.

<sup>9</sup> «Gaawleen dellu ci sama baay te ne ko: “Sa doom Yuusufa nee na: Yàlla fal na ma kilifag Misra gépp; ñëwal fi man, nu mu gëna gaawe.”<sup>10</sup> Su ko defee nga dëkksi diiwaanu Gosen, nekk ci sama wet, yaak say doom ak say sët ak say gàtt ak say gétt ak mboolem loo moom,<sup>11</sup> ndaxte des na juróomi ati xiif. Waaye dinaa la fi yore, ba doo ñàkk dara, yaak sa waa kër ak mboolem lu bokk ci yaw.”<sup>12</sup> Yeena gisal seen bopp, yeen ak sama rakk Beñamin, ne man Yuusufa mii, maay wax ak yeen.<sup>13</sup> Nettalileen sama baay ndam li ma am ci Misra ak li ngeen gis lépp, te ngeen indi sama baay, nu mu gëna gaawe.»<sup>14</sup> Mu laxasu Beñamin rakkam, daldi jooy, Beñamin it laxasu ko, jooy.<sup>15</sup> Magam ña itam, mu foon leen tey jooy. Booba la magi Yuusufa ya doora wax ak moom.

### *Firawna woo na Yanqóoba Misra*

<sup>16</sup> Ba xibaar ba àggee kër Firawna, ñu naan magi Yuusufa ñëw nañu, doonoon na lu neex Firawna, moom aki dagam.<sup>17</sup> Firawna ne Yuusufa: «Waxal say mag, ne leen: “Ni ngeen di def mooy nii: sëfleem seeni mbaam te dem réewu Kanaan,<sup>18</sup> jëli seen baay ak seeni njaboot, ngeen ñëw fi sama wet. Dinaa leen jox suuf si gën ci réewum Misra, ngeen di lekk li fi gëna duuf.”»<sup>19</sup> Firawna dellu ne Yuusufa: «Am nga ndigal itam ci wax



leen ne leen: “Ni ngeen koy defe nii la: dangeen di jële ay watiir ci réew mi, dem yeb ci seeni doom ak seeni soxna, te ànd ak seen baay, ngeen ñëw. <sup>20</sup> Te buleen réccu alal, ji ngeen di bàyyi seen gannaaw, ndax li gën ci réewum Misra yeena koy moom.”»

<sup>21</sup> Ba loolu amee doomi Israyil def noona. Yuusufa jox leen ay watiir ci ndigalu Firawna, ak lu ñu lekk ca yoon wa, <sup>22</sup> mayaale leen ku ne mbubb mu rafet. Waaye Beñamin moom, ñetti téeméeri dogi xaalis la ko may, tegal ko ca juróomi mbubb yu rafet. <sup>23</sup> Baayam nag, mu yóbbante ko fukki mbaam yu góor yu sêf lay tànnéef ca Misra, ak fukki mbaam yu jigéen yu sêf pepp ak mburu, tegal ko ca lu mu dunde ca yoon wa, buy ñëw. <sup>24</sup> Gannaaw loolu mu yiwi ay magam ne leen: «Ngalla buleen xuloo ci yoon wi.» Ñu daldi dem.

<sup>25</sup> Booba lañu bàyyikoo Misra, dellu réewu Kanaan ca seen baay Yanqóoba. <sup>26</sup> Ñu wax ko ne ko: «Ndekete Yuusufaa ngi dund! te sax mooy kilifag réewum Misra gépp.» Ba Yanqóoba déggee loolu, yaramam dafa dee goyy ca saa sa, ndaxte gëmu leen. <sup>27</sup> Waaye ba ñu nettalee seen baay Yanqóoba li Yuusufa wax lépp, te mu gis watiir, yi Yuusufa yónnee, ngir jëlsi ko, ca la xelam délsi. <sup>28</sup> Israyil daldi ne: «Moom kay na dund rekk! Sama doom Yuusufaa ngi dund. Man kay dinaa dem ba gis ko, bala ma fee jóge.»

## 46

### *Yanqóoba dem na Misra*

<sup>1</sup> Israyil nag dem, yóbbaaale mboolem lu bokk ci moom. Ba mu agsee Beerseba, dafa sarxal Yàllay baayam Isaaxa. <sup>2</sup> Yàlla wax ak Israyil foofa ca guddi ci biir gént ne ko: «Yanqóoba, Yanqóoba!» Israyil ne ko: «Naam.» <sup>3</sup> Yàlla ne ko: «Man maay Yàlla, di sa Yàllay baay. Bul ragala dem Misra, ndaxte askan wu réy laa fay sose ci yaw. <sup>4</sup> Man ci sama bopp maay ànd ak yaw Misra, te na la wóor ne dinaa la délloosi, te it Yuusufa moo lay doggali.»

<sup>5</sup> Ba loolu amee Yanqóoba jóge Beerseba; doomi Israyil boole seen baay

ak seeni doom ak seeni soxna, yeb leen ci watiir, yi Firawna yónnee woon, ngir yóbbu leen. <sup>6</sup> Ña nga jiital seeni jur, daldi yóbbaaale seen alal, ja ñu ame réewu Kanaan. Noonu la Yanqóoba deme Misra ànd ak njabootam gépp, <sup>7</sup> yóbbaaale doomam yu góor ya ak sëtam yu góor ya ak doomam yu jigéen ya it, ñook sëtam yu jigéen ya, ak mboolem ña askanoo ca moom.

### *Njabootu Yanqóoba, gi ñëw Misra*

<sup>8</sup> Waa kër Israyil, yi ñëw Misra te di Yanqóoba aki doomam, seeni tur a di:

Ruben, taawub Yanqóoba. <sup>9</sup> Doomi Ruben yu góor di Anog ak Palu ak Esron ak Karmi. <sup>10</sup> Doomi Simeyon yu góor di Yemuwel ak Yamin ak Owàdd ak Yakin ak Sowar ak Sawul, mi ndeyam di Kanaaneen. <sup>11</sup> Doomi Lewi yu góor di Gerson, Keyat ak Merari. <sup>12</sup> Doomi Yuda yu góor di Er ak Onan ak Sela ak Peres ak Sera, te Er ak Onan faatu ca réewu Kanaan. Doomi Peres yu góor di Esron ak Amul. <sup>13</sup> Doomi Isaakar yu góor di Tola ak Puwa ak Yasub ak Simron. <sup>14</sup> Doomi Sabulon yu góor di Seredd, Elon ak Yaleel. <sup>15</sup> Góor ñooño xetoo ci Leya, te askanoo ci Yanqóoba ca Padan Aram, gannaaw Diina miy doomam ju jigéen. Boo boolee doomam yépp, góor ak jigéen, ñuy fanweer ak ñett.

<sup>16</sup> Doomi Gàdd yu góor ñoo di Cefon ak Agi ak Suni ak Esbon ak Eri ak Arodi ak Areli. <sup>17</sup> Doomi Aser yu góor di Imna ak Yiswa ak Iswi ak Berya, Sera di seen jigéen. Doomi Berya yu góor di Eber ak Malkiyel. <sup>18</sup> Góor ñooño xetoo ci Silpa, mi Laban may Leya, doomam ju jigéen, te ñu askanoo ci Yanqóoba, ñuy fukki bakkan ak juróom benn.

<sup>19</sup> Doom yu góor yi Rasel, soxnas Yanqóoba, am nag ñoo di Yuusufa ak Beñamin. <sup>20</sup> Yuusufa itam am Manase ak Efrayim ca réewum Misra, seen yaay di Asnat doomu Potifera, may njiitu diine ca dëkk ba ñu naan On. <sup>21</sup> Doomi Beñamin yu góor ñoo di Bela ak Beker ak Asbel ak Gera ak Naaman ak Eyi ak Ros ak Muppim ak Uppim ak Àrd. <sup>22</sup> Góor ñooño xetoo

ci Rasel, te askanoo ci Yanqóoba, ñépp di fukki bakkan ak ñeent.

<sup>23</sup> Doomu Dan ju góor di Usim. <sup>24</sup> Doomi Neftali yu góor di Yáceel ak Gunni ak Yeccer ak Silem. <sup>25</sup> Góor ñooño xetoo ci Bilaa, mi Laban may doomam Rasel, te ñu askanoo ci Yanqóoba, ñoom ñépp di juróom ñaari bakkan.

<sup>26</sup> Mboolem ñi ànd ak Yanqóoba, ñew Misra, muy ñi mu giir, te limaalesul soxnay doomi Yanqóoba ya, tollu nañu ci juróom benn fukki bakkan ak juróom benn. <sup>27</sup> Doomi Yuusufa yu góor, ya mu am Misra, tollu ci ñaar. Kon mboolem ña dem Misra te di waa kër Yanqóoba, tollu nañu ci juróom ñaar fukk.

### *Yanqóoba gis na Yuusufa*

<sup>28</sup> Yanqóoba dafa yebal Yuda, mu ànd ak Yuusufa, jiituji ko diiwaanu Gosen, Yanqóoba fekki leen fa. Ñu daldi agsi Gosen. <sup>29</sup> Yuusufa nag waajal waruwaayam, dajeji ak baayam Israyil ca Gosen. Ba Yuusufa àggee ba ca moom, da koo laxasu, ne ñàpp ci kawam, jooy lu yàgg. <sup>30</sup> Israyil ne Yuusufa: «Léegi de, bu ma yeboo dee, gannaaw gisaat naa la, ngay dund.»

<sup>31</sup> Ba mu ko defee Yuusufa wax ak doomi baayam ya ak waa kër baayam ne leen: «Maa ngi dellu yégali Firawna ne ko: “Samay bokk ak sama waa kër baay, ña nekkoon ca réewu Kanaan, ñew nañu fi man. <sup>32</sup> Dafa di seeni góor ay sàmm lañu, ag jur lañu masa yar, te indaale nañu seen jur gu gàtt ak gu gudd ak mboolem lu ñu moom.” <sup>33</sup> Kon bu leen Firawna wooyee, ne leen: <sup>34</sup> “Lan mooy seen liggéey?” ngeen ne ko: “Nun de sang bi, ag jur lanu masa yar, ba nuy gone ba tey, te noonu la ko sunuy maam daan defe.” Su boobaa, ngeen mana féetewoo diiwaanu Gosen, ndaxte waa Misra dañuy xof sàmm.»

## 47

### *Yuusufa nuyole na ay bokkam Firawna*

<sup>1</sup> Yuusufa daa dem ca Firawna, wax ko ne ko: «Sama baay ak samay bokk, jóge nañu Kanaan, ànd ak seen jur gu gàtt ak gu gudd ak mboolem lu ñu moom. Ña

nga léegi ca diiwaanu Gosen.» <sup>2</sup> Fekk na Yuusufa tànn juróom ciy doomi baayam. Mu nuyole leen ak Firawna. <sup>3</sup> Firawna laaj doomi baay ya, ne leen: «Lan mooy seen liggéey?» Ñu ne ko: «Nun de sang bi, ay sàmm lanu naka jekk ca sunuy maam ba tey.» <sup>4</sup> Ñu teg ca ne ko: «Danoo ñew ngir dal ci réew mi, ndaxte amalatu sunu jur parlu, te xiif bi metti na ca réewu Kanaan. Moo tax sang bi, nu di la ñaan, nga may nu, nu dal foofa ca diiwaanu Gosen.» <sup>5</sup> Firawna wax ak Yuusufa ne ko: «Gannaaw sa baay ak say bokk ñew nañu fi yaw, <sup>6</sup> réewum Misra a ngii ci sa kanam. Seetal fi gën ci réew mi, nga jox sa baay ak say bokk, ñu sanc. Bàyyi leen, ñu sanc Gosen, te bu ci amee ñu xareñ ci ñoom, nga dénk leen samay gétt.»

<sup>7</sup> Gannaaw loolu Yuusufa ànd ak baayam ba fa Firawna, nuyole ko ak moom. Yanqóoba nuyu Firawna. <sup>8</sup> Firawna laaj Yanqóoba ne ko: «Aa, góor gi, xanaa war ngaa doon mag de!» <sup>9</sup> Yanqóoba wax Firawna ne ko: «Samay ati mǎngaan, ba ma ganee àddina ba tey de, mu ngi tollu ci téeméer ak fanweer, muy at yu gàtt te naqari, te it demuma bay tolloo ay at ak samay maam, ba ñuy mǎngaan ci àddina.» <sup>10</sup> Ba mu ko defee Yanqóoba ñaanal Firawna, bàyyikoo fa, daldi dem.

<sup>11</sup> Yuusufa nag dalal baayam aki bokkam, dogal leen suuf sa gën ca réewum Misra ca diiwaanu Ramses, ni ko ko Firawna sante woon. <sup>12</sup> Ba loolu amee Yuusufa di dundal baayam aki bokkam, ak mboolem waa kër baayam, boole ca ña bootu ca ñoom.

### *Lu jëm ci saytub Yuusufa ca xiif ba*

<sup>13</sup> Ab dund amuloon fenn ca réew ma mépp, ndax xiif bu metti lool. Waa réewum Misra ak réewu Kanaan jeex tàkk ndax xiif ba. <sup>14</sup> Yuusufa nag dajalee ca pepp, ma mu jaay waa Misra ak waa Kanaan, mboolem xalisu ñaari réew ya, yóbbu nag xalis ba kër Firawna. <sup>15</sup> Ba ñu demee, ba xalis amatul ca Misra ak ca Kanaan, waa Misra gépp ñew fa Yuusufa ne ko: «Jox nu ab dund kay! Mbaa du danga nuy seetaan, nuy dee? Ndax xalis amatul.» <sup>16</sup> Yuusufa ne leen: «Indileen

seeni jur, ma wecci leen ko dund, ndegam amatuleen xaaalis.» <sup>17</sup> Gannaaw loolu ñu indil Yuusufa seeni jur, Yuusufa jox leen ko pepp, wecci leen ko seeni fas ak seeni gétti jur gu gàtt ak gu gudd ak seeni mbaam. At mooma jox na leen ab dund, mu wecci seen gétt gépp. <sup>18</sup> Ba at ma jeexee, ñu ñëwaat ca moom ca déwén sa ne ko: «Sang bi, dunu la nëbb ne amatunu dara, ndax xaaalis bi jeex na, te jur gaa ngi ci yaw, dara nekkatu fi lu nu la mana jox lu moy sunuy jëmm ak sunuy tool. <sup>19</sup> Mbaa du danga nuy seetaan, nu bokk sànkú ci sa kanam, nook sunu suuf? Ngalla boole nu jënde ab dund, nun ak sunuy suuf. Su ko defee nuy moomeeli Firawna, nun ak sunuy suuf. Te nga jox nu pepp mu nu dunde, lu ko moy kat nun dinanu dee, suuf si it dina booy.»

<sup>20</sup> Yuusufa nag jëndal Firawna suufas Misra gépp, ngir waa Misra ya jaay ku ci nekk sa tool ndax xiif, ba leen jüital, ba Firawna mujj moom suuf si. <sup>21</sup> Waa réew ma ñoom, Yuusufa da leena def ay jaam ca Misra, gii wet ba gaa. <sup>22</sup> Bàyyiwul lu moy suufu njiiti diine ya, ndax Firawna jotoon na leena dogal ay cér, jagleel leen. Moo tax jaayuñu seeni suuf.

<sup>23</sup> Yuusufa ne waa réew ma: «Léegi gannaaw jënd naa leen, ba Firawna moom leen, yeen ak seeni suuf, jiwoo ngii, demleen jiyi. <sup>24</sup> Bu nu àggee ci ngóob, juróom yu ngeen am dingeen ci jox Firawna benn, te féetewoo ñeenti cér yi des. Su ko defee ngeen génne ci jiwuy tool yi, li ci des ngeen dunde, yeen ak seen waa kër ak seeni doom.» <sup>25</sup> Ñu ne ko: «Sang bi, rawale nga nu! Te gannaaw laaye nga nu biir, nangu nanoo doon jaami Firawna.» <sup>26</sup> Noonu la Yuusufa tërale loola, def ko dogalu yoon ca suufu Misra, te loolooy wéy ba tey jii: juróomi céri meñneef mu ne, Firawnaay moom benn ba. Waaye suufi njiiti diine ya ca bokkul, Firawna amu ca dara.

### *Lu jëm ci ati Yanqóoba yu mujj ya*

<sup>27</sup> Bànni Israyil sanc nañu réewum Misra ca diiwaanu Gosen. Am nañu fa alal, giir fa, ba yokku lool.

\* 47:29 47.29 Seetal ci 24.2-3.

<sup>28</sup> Yanqóoba nag nekk na fukki at ak juróom ñaar ca réewum Misra, ay atam yépp tollu ci téeméer ak ñeent fukk ak juróom ñaar (147). <sup>29</sup> Ba nga xamee ne àppu Israyil a ngay bégga mat, dafa woolu doomam Yuusufa ne ko: «Ngalla waay dugalal sa loxo, mu ron sama lupp\*, muy ngiñ ci yaw ne dinga jëflanteek man ci ngor ak worma: rikk, bu ma denc Misra. <sup>30</sup> Bés bu ma fekkijee samay maam, nanga ma jële Misra, denci ma ca seen xuntim bàmmeel.» Yuusufa ne ko: «Dinaa la defal li nga wax.» <sup>31</sup> Mu ne ko: «Giñal ma ko.» Yuusufa giñ ko, Israyil doora am jàmm, daldi wéeru ca bopp lal ba.

## 48

### *Israyil ñaanal na Efrayim ak Manase*

<sup>1</sup> Ba loolu wéyee ñu ne Yuusufa baayam dafa tawat, mu ànd ak ñaari doomam Manase ak Efrayim, seeti ko. <sup>2</sup> Ba ñu yégalee Yanqóoba ne doomam Yuusufaa koy seetsi, Israyil dafa dëgër lu, toog ca lal ba.

<sup>3</sup> Yanqóoba ne Yuusufa: «Yàlla Buur bi feeñu woon na ma ca Lus ca réewu Kanaan, barkeel ma, <sup>4</sup> te wax na ma ne ma: “Dinaa la giiral, fulandi la, def la nga sos mbooloom xeet, te réew mii laay may ñi askanoo ci yaw, ñu moom ko fàww.” <sup>5</sup> Léegi nag sa ñaari doom, yi nga am Misra, laata ma di la fekksi Misra, maa leen séddoo. Maay séddoo Efrayim ak Manase, ñuy samay doom, ni ma jure Ruben ak Simeyon. <sup>6</sup> Waaye doom, yi nga am seen gannaaw yaa leen di féetewoo, ñuy wuyoo seen turi mag ci wàllu ndono. <sup>7</sup> Li tax ma def loolu mooy, bi ma jógee Padan di ñibbi, Rasel dafa faatu ca yoon wa ci sama kanam, ba nuy tollu ca réewu Kanaan, booba nu ngay dem, bay jub Efrata. Ma suul ko foofa, ca yoonu Efrata.» Efrata mooy Betleyem tey.

<sup>8</sup> Ci kaw loolu Israyil gis doomi Yuusufa ya. Mu ne: «Ñii ñooy ñan?» <sup>9</sup> Yuusufa ne baayam: «Ñii ñooy sama doom, yi ma Yàlla jox fii.» Baayam ne ko: «Nañu

jegesi, ma ñaanal leen.» <sup>10</sup> Booba bëti Israyil dafa lëndëm, ba gisatul ndax li muy mag. Yuusufa jegeñal leen seen maam, mu foon leen, taf leen ci boppam. <sup>11</sup> Israyil nag ne Yuusufa: «Yaakaaruma la wona gisati, ndeke Yàlla dina ma may lu raw gis la, ndax gis naa say doom.»

<sup>12</sup> Ca la leen Yuusufa waccee fi ñu uufu ci seen maam, daldi dëpp jëem ci suuf, <sup>13</sup> ba noppi Yuusufa taxawal leen ñoom ñaar, ñu séq ko janook Israyil, loxol ndijooram jàpp ci Efrayim, mu féete ak càmmoñu Israyil, loxol càmmoñam jàpp ci Manase, mu féete ak ndijooru Israyil. Ñu ànd jegesi, <sup>14</sup> Israyil nag jállawle ay loxoom, tàllal ndijooram, teg ko ca kaw boppu Efrayim, mi gën di ndaw; càmmoñam tege ca boppu Manase, doonte mooy taaw. <sup>15</sup> Ma ngay ñaanal Yuusufa. Mu ne:  
«Yàlla ji samay waajur Ibraayma ak  
Isaaxa toppoon,  
moom Yàlla, ji ma sàmm, ba ma juddoo  
ba tey jii,

<sup>16</sup> malaaka mi ma jot ci bépp loraange—  
yal na barkeel xale yi,  
ba ñu saxal sama tur  
ak samay turi waajur, Ibraayma ak  
Isaaxa,  
te giir, ba ne gànñ ci kaw suuf.»

<sup>17</sup> Ba Yuusufa gisee ne baayam ca boppu Efrayim la teg loxol ndijooram, mu naqari ko, mu daldi jàpp loxol baayam, bëgg koo jële ca boppu Efrayim, teg ko ca boppu Manase. <sup>18</sup> Yuusufa ne baayam: «Déet, baay, ndax kii mooy taaw, tegal sa ndijoor ci boppam.» <sup>19</sup> Teewul baayam lank, ne ko: «Xam naa ko, doom, xam naa ko. Moom itam dina doon aw xeet tey doon ku magg, waaye rakkam a koy sut, te askanam dina law, ba di ay xeet.» <sup>20</sup> Gannaaw loolu mu ñaanal leen keroog ne leen: «Yal na Israyil di ñaane seeni tur naan: “Yal na la Yàlla def ni Efrayim ak Manase.”» Noonu la jiitale Efrayim, door caa teg Manase.

<sup>21</sup> Ba mu ko defee Israyil ne Yuusufa: «Léegi man dinaa dee, waaye Yàlla dina ànd ak yeen, ba delloo leen ca seen réewu

maam. <sup>22</sup> Man nag dinaa la may cér booy ëpple say doomi baay, muy suuf su ma nangoo sama saamar ak sama fitt ca Amoreen ña.»

## 49

### *Yanqóoba tàggoon na*

<sup>1</sup> Gannaaw loolu Yanqóoba woo ay doomam ne leen:

«Bokkleen daje, ma xamal leen li leen di dikkal ëllëg.

<sup>2</sup> Dajeleen te déglu ma, man Yanqóoba seen baay;  
teewluleen seen baay Israyil.

<sup>3</sup> «Ruben, yaw mi ma taawloo,  
nga sosoo sama digg doole, sama ndoortel  
kàttan,  
yaa jëkke sut moos ci teraanga ak doole.

<sup>4</sup> Yaa toogadi it ni ndox muy wal-wali,  
doo mujje sut,  
nde yaa tēdd sa lalu baay,  
ba teddadi, kera ba nga ca tēddee.

<sup>5</sup> «Simeyon ak Lewi ñoo duye yene,  
ñoooy nas pexey ay.

<sup>6</sup> Yàlla bu sama xol ànd ci seeni pexe,  
mbaa sama xel di nangu seeni diisoo,  
ndax fu ñu mere, xal faa bóome,  
te làggal ay yëkk lañuy foye.

<sup>7</sup> Mbas ma seen xadar, gu tar,  
ak seen mer, mi dul meddi.  
Maa leen di wasaare ci kër Yanqóoba,  
tasaare leen ci Israyil.

<sup>8</sup> «Yaw Yuda, mi say doomi baay di taggeji,  
ngay sēqi sa ndoddi noon, sēgal leen,  
sa doomi baay a lay sujjóotal.

<sup>9</sup> Yuda yaa di gaynde gu ndaw, doom,  
doora jóge nii ci pàdd,  
tey yuug ak a goor ni gayndeg sibi.  
Yaa di gaynde gu deesul yee.

<sup>10</sup> Nguur gi du jóge ci loxol Yuda,  
te yetu buur ay wéye sampe ciy tãnkam,  
li feek boroom\* di ñëw,  
ba xeet yi déggal ko.

<sup>11</sup> Mooy yeew mbaamam cig reseñ,  
cumbur ma féeteek car, ba ca gën;  
muy fóote ay yéreem biiñ,

\* **49:10** 49.10 Baat bi ñu tekkee boroom fii, bare na nu ñu koy tekkee.

di sumb mbubbam ci ndoxum reseñ.  
 12 Bèt yaa ngay nes-nesi ndax biiñ,  
 beñ ya weex furr ndax um soow.

13 «Sabulon ay dëkke tefesi géej,  
 di teerub gaal yi,  
 am réewam digalook Sidon.

14 «Isaakar mbaam ngonk la,  
 muy goor diggante ñaari sēf.  
 15 Bu gisee ni mbaaram neexe,  
 ak ni réew mi naate,  
 day waaf, gàddu ngaaxam,  
 daldi féetewoo coonob njaam.

16 «Dan ay àtteji xeetam,  
 ni ko giiri Israyil baaxoo.  
 17 Waaye Dan ay jaan ju dog aw yoon,  
 mbaa céebi ciw ñall,  
 mooy màtt t ànki fas,  
 gawar jullootu.

18 «Céy Aji Sax ji, maa ngi séentu sa xettal!

19 «Gàdd la gàngoor di gaw,  
 mu téqtal leen, ba daan.

20 «Aser ay boroom dund bu duun,  
 mooy maye ngéneeli ñami buur.

21 «Neftalee di kéwél gu fëx,  
 te mooy jur doom yu taaru.

22 «Yuusufaay bàngaasu garab,  
 garab guy meññ, feggook bētu ndox,  
 car yaa nga law, tiim digu tool ba.

23 Ay fittkat a ko tonjal,  
 di ko song ak a fitt.

24 Teewul xalaam ga di wéye dan,  
 te la loxo yay dëgërloo mooy  
 loxoy Jàmbaar ju Yanqóoba,  
 kookooy Sàmm bi, Doju cēslaayal Israyil,  
 25 mooy sa Yàllay baay, ji lay wallu,  
 mooy Aji Man ji lay barkeele  
 ca barkey asamaan, ya fa kaw,  
 ak barke ya ne leww ca suuf xóote ya,  
 teg ca barkeb njur ak nàmpal.

26 Sa ñaani baay ya romb  
 xéewali tund, ya sax fàww,

rombati ngéneeli jànji cosaan ya,  
 yal na dal ci boppu Yuusufa,  
 ca kaw ndaal boppam, moom sangub  
 doomi baayam ya.

27 «Beñamin ay till guy yeeroo,  
 di xéye yàpp rébbam,  
 tey gonloo séddale am lëlam.»

28 Ñooñu ñoo sos mboolem giiri Israyil,  
 ñu tollu ci fukk ak ñaar, te loolu la leen  
 seen baay wax, ba mu leen di tàggu. Ku  
 ci nekk mu tàgguo ko kàdduy tàggtoo, ya  
 war ca moom.

### *Yanqóoba nelaw na*

29 Gannaaw loolu da leena dénk ne  
 leen: «Maa ngi waaja fekki samay maam;  
 dencleen ma fa samay maam ca xuntim  
 bàmmeele ba ca toolub Efron, Etteen ba.  
 30 Mooy xuntim bàmmeele ba ca biir tool,  
 ba ca Magpela, te jàkkaarloo ak Mamre  
 ca réewu Kanaan, di tool, ba Ibraayma  
 jëndoon ca Efron, Etteen ba, ngir def ko  
 bàmmeele. 31 Foofa lañu denc Ibraayma  
 ak soxnaam Saarata, te foofa lañu denc  
 Isaaxa ak soxnaam Rebeka, te fa laa denc  
 Leya it. 32 Tool ba ak xuntim bàmmeele ba  
 ca nekk, ña nga ko jënde ca Etteen ña.»

33 Naka la Yanqóoba dénk doomam yu  
 góor ya noona, daldi delloo ay t ànkam  
 ca lal ba, bakkan ba rot, mu fekki ay  
 maamam.

## 50

### *Yuusufa rob na Yanqóoba réewu Kanaan*

1 Ba mu ko defee Yuusufa daanu ci kaw  
 baayam. Ma ngay jooy te di ko foon.

2 Ba loolu weesee Yuusufa jox ay fajkatam  
 ndigal, ñu waajal baayam. Fajkat ya  
 waajal Israyil\*. 3 Waaj ma am na ñeent  
 fukki fan, ndaxte loolooy waajal bu mat  
 sèkk cib néew. Waa Misra nag dëjal ko  
 juróom ñaar fukki fan.

4 Ba dëj ba weesee, Yuusufa dafa wax ak  
 waa kër Firawna, ñaan leen ñu dimbali  
 ko, waxal ko Firawna ne ko, 5 baayam  
 da ne woon, mu ngi waaja dee, waaye  
 bàmmeele ba mu yettalon boppam ca

\* 50:2 50.2 Fajkati waa Misra ndàbb lañu daan waajale néew, ba du yàqu.

xunti ma ca réewu Kanaan, na ko giñal ne dina ko denc foofa. Mu ne kon, na ko Firawna may, mu robi baayam, ni mu ko ko giñloo woon, te délsi. <sup>6</sup> Firawna may ko, mu robi baayam, na mu ko ko giñloo woon.

<sup>7</sup> Yuusufaa ngay dem robi baayam, moom ak mboolem jawriñi Firawna ak magi këram ak mboolem kàngami Misra.

<sup>8</sup> Ña nga ànd ak waa kër Yuusufa gépp ak ay doomi baayam ak waa kër baayam, bàyyiwuñu diiwaanu Gosen lu moy xale ya ak gàtt ya ak jur gu gudd ga, <sup>9</sup> ay watiir aki gawar topp ca, ñu def gàngoor gu réy.

<sup>10</sup> Ba ñu agsee ca dàggay Ataata, ja ca wàllaa dexu Yurdan, dañu koo jooy jooy yu réy te metti. Yuusufa dëjal fa baayam diiru juróom ñaari fan. <sup>11</sup> Waa réewu Kanaan, gis dëj ba ca dàggay Ataata, naan: «Dëju waa Misra bii aka réy!» Moo tax ñu tudde bérab booba ca wàllaa dexu Yurdan, Abel Misra (mu firi Dëju waa Misra).

<sup>12</sup> Dooimi Yanqóoba nag def la leen seen baay dénkoon, <sup>13</sup> yóbbu ko ca réewu Kanaan, daldi koy rob ca xunti ma ca toolub Magpela, te Ibraayma jëndoon ko ca Efron, Etteen ba, ngir def ko bàmmeele. Mooy tool, ba jàkkaarloo ak Mamre. <sup>14</sup> Ba Yuusufa dencee baayam ba noppi, dafa dellu Misra, moom ak doomi baayam ya ak mboolem, ña mu àndaloon ca robu baayam.

### *Magi Yuusufa yaa ngi jéggalu*

<sup>15</sup> Magi Yuusufa ya xam nañu ne seen baay nelaw na. Ña ngay wax ca seen biir naan: «Waaw, mbaa Yuusufa dencalu nu mer, nar noo fey sunu bor ndax lu bon li nu ko ji woon lépp?» <sup>16</sup> Boobu lañu yóbbante Yuusufa kàddu yii, di ko wax ne ko: «Sa baay dafa noo dénkoon, bala moo nelaw, ne nu: <sup>17</sup> Waxleen Yuusufa ne ko, sa baay nee: “Say mag def nañu la lu bon moos, waaye ngalla baal leen seeni tooñ ak àq, ji ñu la ameel.” Kon rikk waay, baal nu àq, ndax nun nook sa baay a bokk jenn Yàlla ju nuy jaamu.» Ba ñu waxee Yuusufa loolu, mu daldi jooy.

<sup>18</sup> Ci kaw loolu magam ya ñëwal seen bopp ba ca moom, sujjóotal ko ne ko:

«Sang bi, nu ngi nii, di la siyaare.»

<sup>19</sup> Yuusufa nag ne leen: «Buleen am dara lu ngeen di ragal. Xanaa maay Yàlla?

<sup>20</sup> Dëgg la, fexeel ngeen ma lu bon, waaye Yàllaa ko walbati, def ko lu baax, ba dogal li am tey jii, muy bakkan yu bare yi mucc.

<sup>21</sup> Kon nag buleen tiit, dinaa leen yor, yeen ak seeni doom.» Yooyu kàddu la dalale seen xol, ba ñu am jàmm.

### *Yuusufa nelaw na*

<sup>22</sup> Yuusufa dëkk na Misra, moom ak waa kër baayam ñépp, ba tollu ci téeméeri atam ak fukk, <sup>23</sup> te gis na doomi Efrayim, ba gis sëti Efrayim sax; rax ca dolli doomi Makir, mi Manase jur, fa kanamam lañu juddoo.

<sup>24</sup> Mu am bés Yuusufa ne ay bokkam: «Sama waxtu jege na, waaye Yàlla moo leen di jëlsi moos, ba jële leen ci réew mii, yóbbu leen ca réew ma mu dige woon, ba giñal ko Ibraayma, Isaaxa ak Yanqóoba.»

<sup>25</sup> Booba la Yuusufa wax doomi Israyil, ne leen: «Giñal-leen ma ne bés bu leen Yàlla jëlsee, dingeen yóbbaaale samay yax, waaye dungeen ma fi bàyyi.»

<sup>26</sup> Gannaaw loolu Yuusufa nelaw ci téeméeri atam ak fukk. Ñu waajal néew ba, ba du yàqu, daldi koy yeb cib tàdd, denc ko foofa ca Misra.

## Muccug bànni Israyil di ñaareelu xaaju Tawreetu Musaa Ubbite gi

Ñaareelu xaaju Tawreet bii moo wéyal jaar-jaari bànni Israyil, jële ko fa ko téere bu jëkk ba, téereb Njàlbéen ga bàyyi woon. Fi téere bi jële aw turam, Mucc gi, mooy xew-xew bi ci gëna fés, di mucc gi Yàlla musal bànni Israyil, ca mbugal mu mujj ma mu wàcce woon fa Misra, mbugal ma Yàlla doge seen buumi njaam, ba génne leen fa.

Yàlla moo jox bànni Israyil ndigali yoon wi ca tundu Sinayi, Musaa jottli ko, muy li lal kóllère gi mu fas, moom Yàlla ak bànni Israyil. Yàlla nag musal leen, ba ñu tala séq ak moom digganteb kóllère. Ndigali yoon wi moo xamal mbooloom bànni Israyil nan lañuy sàmme seen digganteek moom. Yàlla moo bëggoon bànni Israyil doon ñoñam, ndax ci ñoom la nammoona amal digeem baak seen maam Ibraayma. Dige ba mooy xeeti àddina sépp, ci askanu Ibraayma lañuy barkeele.

Mujj téere bi kéemaan gu réy la. Mooy gannaaw ba ñu sampee jaamookaay ba, na ko Yàlla santaanee, ba Yàlla feesale ag leeram xaymab jaamookaay ba, ngir wone ne moo fa teew.

Ci Tënk:

Saar 1—18 Yàlla yiwi na bànni Israyil, génne leen Misra.

Saar 19—24 Yàlla fasante na kóllère ak bànni Israyil.

Saar 25—40 Yàlla sant na Musaa, mu defarlu xaymab jaamookaay.

### *Bànni Israyil dem na réewum Misra*

<sup>1</sup> Góor ñi seen baay di Yanqóoba, mi ñu dippee Israyil, ñu àndoon ak moom, dem Misra, te ku nekk yóbbaaale waa kèram, seeni tur a di: <sup>2</sup> Ruben ak Simeyon ak

Lewi ak Yuda <sup>3</sup> ak Isaakar ak Sabulon, ak itam Beñamin; <sup>4</sup> ak Dan ak Neftali ak Gàdd ak Aser. <sup>5</sup> Góor ñi soqikoo ci Yanqóoba ñépp juróom ñaar fukk lañu (70), bu ñu ci boolee doomam, ji ñuy wax Yuusufa, moom ma ñu fekk Misra. <sup>6</sup> Gannaaw ga Yuusufaaki doomi baayam yu góor yépp nelaw, ñook maas googu gépp. <sup>7</sup> Bànni Israyil nag giir fa, law, di fulandiwu, ba yokku lool, fees réew ma.

### *Firawna not na bànni Israyil*

<sup>8</sup> Ñu dem ba jëmme jamono, beneen buur bu xamul Yuusufa falu ca Misra. <sup>9</sup> Mu wax ak waa réewam, ne leen: «Giirug bànni Israyil kat ñu ngi nuy gëna bare, ba épp nu doole. <sup>10</sup> Nanu ci sàkk pexe, ngir ñu bañatee yokku. Lu ko moy bu xare amee, man nañoo far ak sunuy noon, xeex ak nun, ba génn réew mi.»

<sup>11</sup> Ba loolu amee ñu fal ay nit ñu leen di ga ca seeni sas, di leen ca fitnaal lool. Noonu la bànni Israyil tabaxale Firawna\* buuru Misra† dëkk, ya ñu naa Pitom ak Ramses, mu def ko ay dencukaayi dund. <sup>12</sup> Terewul lu ñu leen gëna fitnaal, ñuy gën di fulandiwu, yokku, ba waa Misra am njàqare ca bànni Israyil.

<sup>13</sup> Waa Misra dañoo mujj di jaamloo bànni Israyil bu metti, <sup>14</sup> yen leen toskarey àddina ndax liggéey yu metti. Ñuy móol ban, di tabax, waa Misra teg ca sêf leen mboolem liggéeyu tool ya. Néegoon nañu ca ñoom lool ca mboolem liggéeyu njaam bu ñu leen sas.

<sup>15</sup> Firawna buuru Misra teg ca wax ak rewlikati Ebrë ya‡, te kenn ka tuddoon Sifra, ka ca des di Puwa. <sup>16</sup> Mu ne leen: «Bu ngeen dee rewli jigéeni Ebrë yi, nangeen xool lu xale bi doon. Su dee góor, reyleen, su dee jigéen, bàyyileen, mu dund.» <sup>17</sup> Teewul rewlikat ya ragal Yàlla, ba defuñu la leen buur ba sant; xanaa ñu bàyyi liir yu góor ya, ñu dund.

<sup>18</sup> Buuru Misra woolu rewlikat ya, ne leen: «Ana lu tax ngeen def lii, di bàyyi liir yu góor yi, ñu dund?» <sup>19</sup> Rewlikat ya ne ko: «Li tax kay mooy, jigéeni

\* **1:11** 1.11 Firawna turu pal la, ñeel bépp buuri Misra. † **1:11** 1.11 Misra mooy réew mi ñuy wax Esibtë ba tey. ‡ **1:15** 1.15 Ebrë tur la wu niti jamono jooja daan wooye xeet, ya bànni Israyil bokk.

Ebrë yi dañoo niroowul ak jigéeni waa Misra; ndax dañoo njaxlaf, ba bu rewlikat yiy laata agsi, fekk ñu mucc ba noppi.»  
<sup>20</sup> Bànni Israyil nag di fulandiwu, gëna yokku, Yàlla defal rewlikat ya aw yiw,  
<sup>21</sup> may leen giir ndax seenug ragal Yàlla.  
<sup>22</sup> Gannaaw loolu Firawna sant waa réew ma yépp, ne leen: «Mboolem doom ju juddu ci Ebrë yi, di góor, sànnileen ca dex ga, waaye lu ciy jigéen, bàyyileen, mu dund.»

## 2

### *Musaa gane na àddina*

<sup>1</sup> Jenn waay ju bokk ci giirug Lewi nag moo jëloon janq bu mu bokkal giir.  
<sup>2</sup> Ndaw sa ëmb, ba mujj am doom ju góor\*. Ba mu gisee taar, ba liir ba àndal, nèbb na ko lu mat ñetti weer. <sup>3</sup> Mu dem nag, ba manatu koo nèbb. Mu wut pañe bu ñu ràbbe barax, fatte ko godoron ak ndàbb, yeb ca liir ba, daldi dem, teg ko ca biir barax, ba ca tàkkal dex, ga ñu naan Niil. <sup>4</sup> Xale bu jigéen bay magu liir ba ma nga taxaw fu soreyaatoo ak liir ba, di xool, ba xam nu muy mujje.

<sup>5</sup> Ba mu ko defee doomu Firawna ju jigéen dikk, di sangusi ca dexu Niil ga, surgaam yu jigéen yay doxantu ca tàkk ga. Ba loolu amee mu séen pañe ba ca biir barax ba, daldi yónni jaamam, mu yót ko ko. <sup>6</sup> Naka la ko ne ubbet, yem ca xale ba, muy liir bu góor, xale bay jooy, yaram wa daw, mu ne: «Kii de ndeysaan, ci doomi Ebrë yi la!» <sup>7</sup> Magu liir ba daldi wax doomu Firawna ja, ne ko: «Ndax ma dem wutali la ku koy nàmpal ci Ebrë yi?» <sup>8</sup> Doomu Firawna ne ko: «Waaw, demal.» Xale ba dem, indil ko yaayu liir ba. <sup>9</sup> Doomu Firawna ne ko: «Yóbbul xale bii te nàmpalal ma ko, maa lay fey.» Ndaw sa jël liir ba, di ko nàmpal. <sup>10</sup> Ba xale ba mággee, mu yót ko doomu Firawna, mu def ko muy doomam, tudde ko Musaa (mu firi Ki ñu génne), ndax la mu ko génnee ca ndox ma†.

### *Musaa gàddaayi na réewum Majan*

\* **2:2** 2.2 Seetal ci *Mucc ga* 6.20. † **2:10** 2.10 Mose baatu làkku Misra la bu neexoo ak masa, di baat biy tekki «génne» ci làkku ebrë. ‡ **2:18** 2.18 Ruwel mooy Yетро ba tey.

<sup>11</sup> Ba ñu demee ba Musaa màgg, dafa am bés, mu seeti bokkam ya, gis leen ca liggéey yu metti, ya ñu leen sas. Mu gis jenn waayu Misra di dóor kenn ca bokki Ebrë ya. <sup>12</sup> Musaa geestu wet gu nekk, gisul kenn, mu rey waa Misra ja, daldi gas, suul ko.

<sup>13</sup> Ca èllëg sa mu dellu génn, yem ci ñaari Ebrë yuy xeex. Musaa wax ak ka tooñ, ne ko: «Lu tax ngay dóor sa moroom mii?» <sup>14</sup> Waa ja ne ko: «Ku la def sunu njiit mbaa sunu àttekat? Xanaa danga maa nara rey, na nga reye woon waa Misra ja?» Musaa nag tiit, naan ca xelam: «Ndeke mbir mi kay siiw na.»

<sup>15</sup> Ba loolu amee Firawna dégg mbir ma, di wuta reylu Musaa. Musaa daw, ba sore Firawna, dem dali ca réewu Majan, fu dend ak ab teen. <sup>16</sup> Yетро, sarxalkatu Majan ba nag, amoon na juróom ñaari doom yu jigéen. Ñu ñëw di rootsi, di duy mbalka, ya ñuy wëgge seen juru baay. <sup>17</sup> Ay sàmm agsi, dàq leen. Musaa wallu jigéen ña, wëggal leen seen jur.

<sup>18</sup> Ba ñu delloo ca seen baay Ruwel‡, mu laaj leen ne leen: «Lu tax ngeen teela ñibbsi tey?» <sup>19</sup> Ñu ne ko: «Ab waa Misra daal, moo nu xettli ca sàmm ya; rootal na nu sax, ba wëgg jur gi.» <sup>20</sup> Ruwel ne leen: «Ana waa ja? Lu tax ngeen bàyyi ko fa? Wooyileen ko, mu aansi kay!»

<sup>21</sup> Musaa far dal ca kër waa ja. Mu mujj ko may doomam ju ñuy wax Sipora. <sup>22</sup> Mu am doom ju góor, Musaa tudde ko Gersom (mu firi Doxandéem fii), ndaxte dafa ne: «Doxandéem laa fii.»

### *Yàlla ñeewante na bànni Israyil*

<sup>23</sup> Ba ñu demee ba mu yàgg, Firawna buuru Misra dee. Fekk na bànni Israyil a ngay binni rekk ndax seen njaam ga. Ñuy woote wall, ba seen jooy, ya sababoo ca seen toroxteg njaam ga, àgg fa Yàlla. <sup>24</sup> Booba Yàllaa ngay dégg seeni yuux, te fàttewul kóllère ga mu fasoon ak Ibraayma ak Isaaxa ak Yanqóoba. <sup>25</sup> Yàlla nag geesu bànni Israyil, ñeewante leen.



### 3

#### *Aji Sax ji yónni na Musaa*

<sup>1</sup> Léegi Musaa ngay sàmm gàtti goroom Yетро, sarxalkatu Majan ba. Mu yóbbu jur ga fu sore ca màndiŋ ma, daldi agsi ca suufu tundu Yàlla wa\* ca Oreb.

<sup>2</sup> Malaakam Aji Sax ja feeño ko foofa, melow sawara wuy tàkk, jafal fa ab gajj. Musaa xoolaat, ndeke gajj ba bépp jàpp na, ba ne jippét, waaye lakkul. <sup>3</sup> Musaa ne: «Mbir mu yéeme mii daal, naa jàdd xool ko, ba xam lu tax gajj bi lakkul.»

<sup>4</sup> Ba Aji Sax ji Yàlla gisee Musaa jàdd, di xoolsi, ca gajj ba la àddoo, ne ko: «Musaa, Musaa!» Mu ne ko: «Maa ngi.»

<sup>5</sup> Yàlla ne ko: «Bul jegesi, summil say dàll, ndax fii nga taxaw suuf su sell la.» <sup>6</sup> Mu teg ca ne: «Man maay sa Yàllay baay, di Yàllay Ibraayma, di Yàllay Isaaxa te di Yàllay Yanqóoba.» Ca la Musaa nèbb kanam ga, ndax ragala xool Yàlla.

<sup>7</sup> Aji Sax ji tegaat ca ne ko: «Gis naa bu baax fitna, ji sama ñoñ nekke Misra. Dégg naa itam seen jooy ndax kilifay saskat, yi leen di gétèn ci liggéey, te ñeewante naa leen ngir seen coono.

<sup>8</sup> Damaa wàcc, xettlisi leen ci waa Misra; génne leen réew moomu, ba yóbbu leen réew mu baax te yaatu, réew mu meew maak lem ja tuuroo, foofa ca diiwaanu Kanaaneen ña ak Etteen ña ak Amoreen ña ak Periseen ña ak Eween ña ak Yebuseen ña. <sup>9</sup> Yuux, yi bànni Israyil nekke nii, agsi na ba ci man, te gis naa it ni leen waa Misra di note. <sup>10</sup> Kon nag kaay, ma yónni la ca Firawna. Demal yiwiji bànni Israyil, sama ñoñ, ñu génn Misra.»

#### *Musaa di leewaayu, Yàlla di ko ñaax*

<sup>11</sup> Musaa ne Yàlla: «Waaw, waaye man tekkiwuma dara, bay dem ca Firawna, di génne bànni Israyil Misra.» <sup>12</sup> Mu ne ko: «Man déy, maay ànd ak yaw, te boo génnee mbooloo ma Misra, dingeen ma jaamusi ci tund wii. Loolooy firndeel ne, maa la yónni.»

<sup>13</sup> Musaa ne Yàlla: «Su ma demee ca bànni Israyil, ne leen seen Yàllay maam ya moo ma yónni ca ñoom bànni Israyil

de, dinañu ma laaj nu mu tudd. Lu ma leen di wax nag?» <sup>14</sup> Yàlla ne Musaa: «Maay Ki nekk. Kon waxal bànni Israyil ne leen: “Aji Nekk ji moo ma yónni ci yeen.”» <sup>15</sup> Yàlla dellu ne Musaa: «Dangay wax bànni Israyil, ne leen: “Aji Sax ji, seen Yàllay maam ya, di Yàllay Ibraayma, di Yàllay Isaaxa te di Yàllay Yanqóoba, moo ma yónni ci yeen.” Aji Sax jee di sama tur wu sax dàkk, ñu di ma ko fàttlikoo ba fàww. <sup>16</sup> Demal woo magi Israyil, ñu daje, nga ne leen: “Aji Sax ji, seen Yàllay maam ya, di Yàllay Ibraayma ak Isaaxa ak Yanqóoba, moo ma feeñu, ne ma: ‘Gis naa leen, te yég naa li ñu leen di teg ci Misra. <sup>17</sup> Dogu naa leena jële ci seen notaange gii ngeen nekke ci Misra, yóbbu leen ca réewum Kanaaneen ña ak Etteen ña ak Amoreen ña ak Periseen ña ak Eween ña ak Yebuseen ña, réew mu meew maak lem ja tuuroo.’ ”

<sup>18</sup> «Magi Israyil dinañu la déggal, su ko defee nga ànd ak ñoom, dem ca buuru Misra. Waxleen ko ne ko: “Aji Sax ji Yàllay Ebrè yi moo nu feeñu. Kon nag ngalla may nu, nu dem topp màndiŋ mi lu mat doxub ñetti fan, ngir rendili sunu Yàlla Aji Sax ji ay sarax.” <sup>19</sup> Waaye man xam naa ne buuru Misra du leen bàyyi, ngeen dem, mbete mu taseek doole ju ko tiiñ. <sup>20</sup> Moo tax maay xàcci sama loxo, ba dumaa waa Misra ay mbugali mbugal yu kéemaane yu may def ci seen biir. Su ko defee dina leen bàyyi, ngeen dem. <sup>21</sup> Maay dogal sax waa Misra yéwéne mbooloo mii, ba keroog bu ngeen di dem, dungeen deme loxoy neen. <sup>22</sup> Képp kuy jigéen ci bànni Israyil, na laaj dëkkandoom, laajaale ku dëkk ak dëkkandoom, ay gànjari xalis, ak gànjari wurus, ak yére yu ngeen di solal seen doom yu góor ak yu jigéen, ba waa Misra ne dunŋ.»

### 4

#### *Yàlla jox na Musaa ay firnde*

<sup>1</sup> Gannaaw loolu Musaa dellu wax Aji Sax ji ne ko: «Waaw, su ñu ma dégluwul te gëmuñu ma, xanaa ne ma: “Aji Sax ji

\* 3:1 3.1 tundu Yàlla wa: tund woowu, li tax ñu tudde ko tundu Yàlla, Yàlla dafa feeño ca kawam.

feeñuwu la” nag?» <sup>2</sup> Aji Sax ji ne ko: «Li ci sa loxo lu mu doon?» Mu ne ko: «Aw yet.» <sup>3</sup> Aji Sax ji ne ko: «Sànni ko ci suuf.» Mu sànni yet wa ca suuf, mu soppiku jaan. Musaa dellu gannaaw. <sup>4</sup> Aji Sax ji ne ko: «Tàllalal sa loxo, jàpp ci geen gi.» Musaa tàllal loxo ba, ne nikk jaan ja, mu dellu di aw yet ca loxoom. <sup>5</sup> Aji Sax ji ne ko: «Loolu ngay def, ngir ñu gëm ne Aji Sax ji seen Yàllay maam ya, di Yàllay Ibraayma, di Yàllay Isaaxa te di Yàllay Yanqóoba, moo la feeñu ci lu wér.»

<sup>6</sup> Aji Sax ji dellooti ne ko: «Léegi dugalal sa loxo, teg ko ci sa dënn.» Musaa dugal loxoom, teg ko ca dënnam; ba mu ko génnee, mu defi àkk, xobbiku. <sup>7</sup> Aji Sax ji ne ko: «Dellool sa loxo ci sa dënn.» Musaa delloo loxo ba ca dënn ba, génnewaat ko, mu dellu mel ni yaramam. <sup>8</sup> Mu ne ko: «Bu ñu la gëmul mbaa ñu baña seet ci firnde ju jëkk ji, dinañu gëm ndax firnde ji ci topp. <sup>9</sup> Waaye su lenn ci ñaari firnde yi taxul ñu gëm, te déggaluñu la, nanga tanqe ndox ci dexu Niil gi, tuur ko ci suuf su wow si, su ko defee ndox, ma nga tanqe ca dex ga, day soppiku deret ci suuf si.»

### *Yàlla def na Aaróona bëkk-néegu Musaa*

<sup>10</sup> Musaa nag ne Aji Sax ji: «Da di, Boroom bi, man naka jekk duma nitu waxkat, du démb, du tey jii ngay wax ak man. Dama di ku leeb, Sang bi, te tëlee wax.» <sup>11</sup> Aji Sax ji ne ko: «Ku sàkkal nit gëmmiñ? Kan mooy luuwal, di tēxal, di gisal mbaa muy gumbaal? Xanaa du man Aji Sax ji? <sup>12</sup> Demal rekk, man maay ànd ak yaw booy wax, di la xamal li ngay wax.» <sup>13</sup> Teewul Musaa ne ko: «Ngalla waay, yónnil keneen ku la soob rekk, sama Boroom.» <sup>14</sup> Aji Sax ji nag mer ba fees ndax Musaa. Mu ne ko: «Sa mag Aaróona, Leween bi, da fee nekkul? Moom, xam naa ne ku mana wax la. Mu ngi lay gatandusi sax, te bu la gisee, bég. <sup>15</sup> Nanga wax ak moom, digal ko li mu wara wax. Man maay ànd ak yeen, yaak moom, saa yu ngeen dee wax, te maa leen di xamal, yeen ñaar, li ngeen wara def.

<sup>16</sup> Na lay waxal ak mbooloo mi; su ko defee sa kàddu di kàddoom, te yaw nga mel ci moom ni Yàlla. <sup>17</sup> Yóbbaaaleel yet wii nag, ndax ci ngay defe firnde yi.»

### *Musaa dellu na Misra*

<sup>18</sup> Musaa nag dellu ca goroom Yetro, ne ko: «May ma, ma dellu Misra, seeti samay bokk, ba xam nu ñu def.» Yetro ne ko: «Demal ak jàmm.» <sup>19</sup> Ci biir loolu Aji Sax ji wax ak Musaa ca Majan, ne ko: «Dellul Misra, ndaxte ña la doon wuta rey ñépp dee nañu.» <sup>20</sup> Musaa ànd ak soxnaam ak doomam yu góor, waral leen mbaam. Ma ngay dellu Misra, jàpp yetu Yàlla wa\* ca loxo ba, yóbbaaale. <sup>21</sup> Aji Sax ji ne ko: «Keroog boo delloo Misra, nanga taxaw temm, te def ca kanam Firawna kéemaan, yi ma teg ci sa loxo yépp. Man maay dëgéral boppam, mu tē ba du bàyyi mbooloo mi, ñu dem. <sup>22</sup> Su ko defee nga wax Firawna, ne ko: “Aji Sax ji dafa wax ne: ‘Israyil mooy sama taaw bu góor. <sup>23</sup> Te wax naa la ne la, nga bàyyi sama doom, ndax mu man maa jaamu, nga bañ. Kon nag dinaa rey sa taaw bu góor.’ ”»

<sup>24</sup> Ba ñu lalee panaan ca yoon wa, Aji Sax ji dafa dogale Musaa, nar koo rey. <sup>25</sup> Soxnaam Sipora jël paaka bu ñu yette doj, dog mbuñukam doomam, laalale ko ca tãnkam, ne ko: «Jëkkër ju ñuy jote deret de laa am.» <sup>26</sup> Ba loolu amee Aji Sax ji bàyyi Musaa. Ba Sipora di wax lu jëm ci jëkkër ju ñuy jote deret, aaday xarfal gaa taxoon.

<sup>27</sup> Ci biir loolu Aji Sax ji wax Aaróona ne ko: «Demal gatanduji Musaa ca màndinj ma.» Aaróona dem seeti ko ca tundu Yàlla wa, fekk ko fa, taf ko ca kawam. <sup>28</sup> Musaa xamal ko la ko Aji Sax ji dénk lépp, ak mboolem firnde, ya mu ko sant mu def ko.

<sup>29</sup> Ci kaw loolu Musaa ak Aaróona agsi Misra. Ñu woo magi bànni Israyil yépp, ñu daje. <sup>30</sup> Aaróona jottli leen kàddu ya Aji Sax ji wax Musaa yépp, ba noppi Musaa wone firnde ya ca kanam mbooloo ma, <sup>31</sup> ba mbooloo ma gëm. Ba magi Israyil dégge ne Aji Sax ji nemmiku na

\* 4:20 4.20 yetu Yàlla wa mooy yetu Musaa, wa Yàlla defe kéemaan ya.

bànni Israyil te gis na notaange, gi ñu nekke, dañoo sujjóot, màggal Aji Sax ji.

## 5

### *Musaa ak Aaróona seeti nañu Firawna*

<sup>1</sup> Gannaaw loolu Musaa ak Aaróona dem ca Firawna, ne ko: «Aji Sax ji Yàllay Israyil dafa wax ne: “Bàyyil sama ñoñ, ñu dem màggali ma ca màndiñ ma.”»

<sup>2</sup> Firawna ne: «Kan mooy Aji Sax ji, ba ma di ko déggal, di bàyyi Israyil, ñuy dem? Xawma sax kuy Aji Sax ji, waxumalaa may bàyyi Israyil, ñuy dem.»

<sup>3</sup> Ñu ne ko: «Sunu Yàlla, nun Ebrë yi, moo nu feeñu. Ngalla may nu, nu dem topp màndiñ mi lu mat doxub ñetti fan, ngir rendili sunu Yàlla Aji Sax ji sarax, lu ko moy mu dumaa nu jàngoro mbaa ab xare.»

<sup>4</sup> Buuru Misra ne leen: «Yeen Musaa ak Aaróona, lu waral ngeen di jële mbooloo mi ci seeni liggéey? Laggleen ca seeni sas waay!» <sup>5</sup> Firawna dellu ne: «Baadoolo yi ne xas tey ci réew mi, ngeen nar leena dëdduloo seeni sas!»

### *Firawna yokk na liggéeyu bànni Israyil*

<sup>6</sup> Keroog ca bés ba la Firawna sant saskati liggéey yaak farbay ngàllo, ga jiite jaam ya, ne leen: <sup>7</sup> «Buleen defati na woon, di jox mbooloo mi boob mu ñuy móole. Gannaaw-si-tey nañu dem wutal seen bopp boob. <sup>8</sup> Waaye sasleen leen limu móol, ya ñu daan móol naka jekk. Buleen ko wàññi, ndax ay yaafus lañu; moo leen tax di dee-deeluy waxeey naan: “May nu, nu dem rendili sunu Yàlla sarax!” <sup>9</sup> Nañu leen yen liggéey bu gëna metti, te ñu dëkke ko, ba duñu tala déglu ay feni neen.»

<sup>10</sup> Ba mu ko defee saskati liggéey ya ak farbay ngàllo ga génn, wax ak mbooloo ma, ne leen: «Firawna nee na, du moo leen di jox boob. <sup>11</sup> Yeena wara wutal seen bopp boob ak fu ngeen ko mana ame, te du tax lenn teggiku ci seen liggéey.» <sup>12</sup> Fa la mbooloo ma tasaaroo ca biir réewum Misra, di wut boob. <sup>13</sup> Saskati liggéey ya nag di leen soññ, naan leen: «Matal-leen seen sasu bëccëg bu nekk, ni ngeen ko daan matale, ba boob amee.» <sup>14</sup> Ñuy dóor

farbay ngàllo, ga bokk ca bànni Israyil, te saskati liggéey yu Firawna fal leen ngir ñuy jiite bànni Israyil ca liggéey ba. Na nga leen naan: «Lu waral démb ak tey yépp mataluleen limu móol, yi ñu leen sas, te ngeen daan ko matal?»

<sup>15</sup> Booba la farbay ngàllog Israyil, dem jooytuji ca Firawna, ne ko: «Sang bi, lu tax nga def nu nii? <sup>16</sup> Du menn boob mu ñu nu joxati, te teewul ñu di nu sant nuy móol, di nu ci dóor. Te kat sang bi, sa waa réew a tooñ.» <sup>17</sup> Firawna ne leen: «Yaafus yi ngeen doon! Yaafus a leen tax di wax naan: “May nu, nu dem rendili Aji Sax ji sarax.” <sup>18</sup> Neleen mott, liggéeyi! Du menn boob mu ñu leen di jox. Te du tee ngeen matal seen limu móol.» <sup>19</sup> Farbay ngàllo, ga bokk ca bànni Israyil nag xam ne dal nañu aw sas, ndax la ñu leen ne duñu wàññi lenn ca limu móol, ya leen war bés bu nekk.

<sup>20</sup> Ba loolu amee ñu bàyyikoo ca Firawna, daldi yem ca Musaak Aaróona, fa ñu leen doon xaar. <sup>21</sup> Farba ya ne leen: «Yal na leen Aji Sax ji gis ba mbugal leen, ndax tax ngeen Firawnaaki dagam jéppi nu, te mel na ni yeena teg ci seeni loxo saamar, bi ñu nuy reye.»

<sup>22</sup> Musaa dégg loolu, dellu ci Aji Sax ji, ne ko: «Éey Boroom bi, loraange gi nga yóbbe mbooloo mii nag? Loo ma doon yónnee? <sup>23</sup> Ba ma demee ca Firawna, di wax ci sa tur ba tey, mu ngi lor bànni Israyil, sa ñoñ, te xettliwoo leen sax!»

## 6

<sup>1</sup> Aji Sax ji wax Musaa ne ko: «Dinga gis léegi ni may def Firawna: loxo bu ko épp dooleey tax mu bàyyi leen ñu dem. Bir na ne, loxo bu ko épp doole mooy tax mu dàq leen réewam.»

### *Yàlla dellu na yónni Musaa*

<sup>2</sup> Yàlla dellu wax Musaa ne ko: «Man maay Aji Sax ji. <sup>3</sup> Yàlla Aji Man ji, mooy ni ma feeñoo woon Ibraayma, te ni laa feeñoo Isaaxa ak Yanqóoba it, waaye sama tur, Aji Sax ji, leeraluma leen ko woon. <sup>4</sup> Te itam damaa fasoon ak ñoom kóllëre, ngir jox leen réewum Kanaan, réew ma ñu nekkoon ay doxandéem.

<sup>5</sup> Maa déggal sama bopp yuuxi bànni Israyil, gi waa Misra def ay jaam, te fàttewuma sama kóllère ga. <sup>6</sup> Kon nag waxal bànni Israyil ne leen: Man maay Aji Sax ji. Maa leen di sippil, yeen bànni Israyil, li leen waa Misra sēf, te maa leen di teggil njaam, gi ñu leen teg. Maay tàllal sama loxo, dogal mbugal yu kéemaane, ba goreel leen. <sup>7</sup> Maa leen di def sama ñoñ, di seen Yàlla. Dingen xam ne man Aji Sax ji maay seen Yàlla, ji leen di teggil sas, yi leen waa Misra teg. <sup>8</sup> Maa leen di yóbbu ba ngeen dugg réew ma ma giñoon ne maa koy jox Ibraayma ak Isaaxa ak Yanqóoba, te maa leen koy moomale, man Aji Sax ji.»

<sup>9</sup> Ba Musaa waxee loolu bànni Israyil, dégluwuñu ko sax ndax xol bu jeex ak njaam gu metti.

<sup>10</sup> Aji Sax ji wax Musaa ne ko: <sup>11</sup> «Demal wax Firawna buuru Misra, mu bàyyi bànni Israyil, ñu génn réewam.» <sup>12</sup> Musaa tinu Aji Sax ji ne ko: «Waaw, ndegam bànni Israyil sax nanguwuñu maa déglu, nu ma Firawna di déggale, man mii tëlee wax?» <sup>13</sup> Aji Sax ji nag wax ak Musaa ak Aaróona, jox leen ay ndigal ci mbirum bànni Israyil ak Firawna buuru Misra, ngir ñu yiwi bànni Israyil, ba ñu génn Misra.

### *Lu jëm ci cosaanu Musaa ak Aaróona*

<sup>14</sup> Bànni Israyil ya yilifoon seen kër baay, ñoo di:

Góor ña Ruben, taawu Israyil, jur: Anog ak Palu ak Ebron ak Karmi. Ñooñoos sos làngi Ruben.

<sup>15</sup> Doomi Simeyon yu góor di Yemuwel ak Yamin ak Owàdd ak Yakin ak Sowar ak Sawul, mi ndeyam dib Kanaaneen. Ñooñoos sos làngi Simeyon.

<sup>16</sup> Doomi Lewi yu góor ñoo di Gerson ak Keyat ak Merari, ku nekk ak askanam. At ya Lewi dund, téeméer la ak fanweer ak juróom ñaar (137).

<sup>17</sup> Doomi Gerson yu góor ñoo di Libni ak Simey, ñook seeni làng.

<sup>18</sup> Doomi Keyat yu góor ñoo di Amram ak Isar ak Ebron ak Usyel; te at ya Keyat

dund, téeméer la ak fanweer ak ñett (133).

<sup>19</sup> Doomi Merari yu góor ñoo di Maali ak Musi.

Ñooñoos sos làngi Lewi ak seeni giir.

<sup>20</sup> Amram moo jël bàjjanam Yokebedd soxna\*, kooku am ak moom Aaróona ak Musaa. At, ya Amram dund, téeméer la ak fanweer ak juróom ñaar (137).

<sup>21</sup> Doomi Isar yu góor ñoo di Kore ak Nefeg ak Sikkri.

<sup>22</sup> Doomi Usyel yu góor di Mikayel ak Elsafan ak Sitiri.

<sup>23</sup> Aaróona moo jël Eliseba doomu Aminadab, jigéenub Nason. Kooku am ak moom Nadab ak Abiyu ak Elasar ak Itamar.

<sup>24</sup> Doomi Kore yu góor ñoo di Asir ak Elkana ak Abiyasaf. Ñooñoos sos làngi Kore.

<sup>25</sup> Elasar doomu Aaróona moom, moo jël soxna kenn ca doomi Putiyel, kooku am ak moom Fineyas.

Ñooñoos yilif seeni kër baay ca Leween ña, ku nekk sos làngam. <sup>26</sup> Aaróona moomu nag, mook Musaa, la Aji Sax ji wax, ne leen: «Génneleen bànni Israyil Misra, kurél ci kaw kurél.» <sup>27</sup> Ñoom ñooñu ñoo wax ak Firawna buuru Misra, ngir génne bànni Israyil Misra; du keneen ku dul Musaa ak Aaróona.

### *Yàlla feddli na digeem baak Musaa*

<sup>28</sup> Keroog ba Aji Sax ji waxee ak Musaa ca réewum Misra, <sup>29</sup> da koo wax, ne ko: «Man maay Aji Sax ji. Nanga wax Firawna buuru Misra, li ma lay wax lépp.» <sup>30</sup> Teewul Musaa tinu Aji Sax ji, ne ko: «Waaw, waaye man, damaa tëlee wax. Mbaa Firawna dina ma déggal yee?»

## 7

<sup>1</sup> Aji Sax ji ne Musaa: «Dama ne, def naa nga féete Firawna fi ko Yàlla féete, sa mag Aaróona di sa yonent. <sup>2</sup> Su ko defee yaw nga wax ko li ma la sant lépp, sa mag Aaróona wax ko Firawna, ngir mu bàyyi bànni Israyil, ñu génn réewam. <sup>3</sup> Waaye man maay dégèral boppu Firawna, ba

\* **6:20** 6.20 Séy bu ni jeege mujj nañu ko tere bànni Israyil. Waaye jamonoy waajuri Musaa, séy bu jeege noonu aada la fa woon.

fulandi samay firnde ak samay kéemaan ci biir réewum Misra. <sup>4</sup> Firawna du leen déggal. Su ko defee nag maay tàllal sama loxo, tiimale Misra, te maay dogal mbugal yu kéemaane, ba goreel bànni Israyil, sama ñoñ, ñu génñ Misra, kurél ci kaw kurél. <sup>5</sup> Keroog bu ma tàllalee sama loxo, tiimale ko Misra, ba génnee bànni Israyil ca seen biir, waa Misra dinañu xam ne maay Aji Sax ji.»

<sup>6</sup> La Aji Sax ji santoon Musaa ak Aaróona, noonu rekk lañu ko defe. <sup>7</sup> Musaa nga tollu woon ci juróom ñett fukki at (80); Aaróona moom am juróom ñett fukki at ak ñett (83); ca jamono, ya ñuy wax ak Firawna.

### *Firawna gantu na*

<sup>8</sup> Aji Sax ji dafa wax Musaa ak Aaróona ne leen: <sup>9</sup> «Bu leen Firawna waxee ne leen: “Defleen seeni kéemaan boog!” danga naan Aaróona: “Jëlal yet wi, sànni ci suuf ci kanam Firawna.” Su ko defee yet wi dina soppliku jaan.»

<sup>10</sup> Ci kaw loolu Musaa ak Aaróona àgg ba ca Firawna. Ñu def la leen Aji Sax ji santoon. Aaróona jël yetam, sànni ca suuf ca kanam Firawnaaki dagam; yet wa soppliku jaan. <sup>11</sup> Ba mu ko defee Firawna moom itam woo boroom xam-xam yaak jibar ya. Ñeengokati Misra ya ñoom it fexe ca seeni xargafuufa, ba def lu mel noona. <sup>12</sup> Ku nekk ca ñoom sànni yetam, mu soppliku jaan, yetu Aaróona nag wonn seeni yet\*. <sup>13</sup> Terewul Firawna tē, faalewu leen, muy la Aji Sax ji waxoon.

### *Yar bu jëkk ba: ndox mu soppliku deret*

<sup>14</sup> Gannaaw loolu Aji Sax ji wax na Musaa ne ko: «Firawna daa dēgēr bopp. Bañ naa bàyyi mbooloo mi, ñu dem. <sup>15</sup> Dangay teela xēy ca Firawna èllēg, buy génñ jēm ca ndox ma, nga dogale ko ca tàkkal dexu Niil, te yóbbaaale yet, wa soppliku woon jaan. <sup>16</sup> Wax ko ne ko: “Aji Sax ji Yállay Ebrē yi, moo ma yónni ci yaw. Mu di la wax, ne la: ‘Bàyyil sama ñoñ, ñu jaamuji ma ca màndiñ ma.’ Yaw nag booba ba tey yaa ngi tanqamlu. <sup>17</sup> Aji Sax ji dafa wax ne: ‘Ni ngay xame ne man

maay Aji Sax ji nii la: Dama ne, dinaa dóor ci ndoxum Niil mi yet, wi ci sama loxo, ndox mi soppliku deret; <sup>18</sup> su ko defee jën yi ci dex gi dee, dexu Niil gi mujj xasaw, ba waa Misra dootuñu mana naan ci ndoxum Niil.’ »»

<sup>19</sup> Ci kaw loolu Aji Sax ji ne Musaa: «Waxal Aaróona ne ko: “Jëlal saw yet, te tàllal sa loxo tiimale ko ndoxi Misra, muy seeni dex ak seen yooni ndox ak seeni déeg ak fépp fu ndox taa, mu ànd soppliku deret.” Deret ja dina daj Misra gépp, ba ca këll yaak njaq ya.» <sup>20</sup> Musaa ak Aaróona def loolu lépp, na leen ko Aji Sax ji sante. Naka la ne xaas yet wa, ne ko tàrr ca ndoxum Niil ma, ca kanam Firawnaaki dagam, ndoxum Niil ma mépp di deret, <sup>21</sup> jën ya ca dexu Niil ga dee, dexu Niil ga xasaw, ba waa Misra manatuñoo caa naan. Misra gépp di deret. <sup>22</sup> Ñeengokati Misra itam fexe ca seeni xargafuufa, ba def lu mel noona. Firawna tē rekk, tanqamlu Musaa ak Aaróona, muy la Aji Sax ji waxoon. <sup>23</sup> Ba loolu amee Firawna ne wërēñ, dellu këram, te bàyyiwul xel ca mbir ma. <sup>24</sup> Waa Misra gépp di gas la wër dexu Niil, ngir am ndoxum naan, ndax manuñu woona naan ca dex ga.

### *Yarub ñaareel ba: mbott yu daj réew ma*

<sup>25</sup> Ba Aji Sax ji dalee ca kaw dexu Niil, ba ñu teg ca juróom ñaari fan, <sup>26</sup> Aji Sax ji da ne Musaa: «Demal ca Firawna, ne ko: “Aji Sax ji dafa wax ne: Bàyyil sama ñoñ, ñu dem jaamuji ma. <sup>27</sup> Soo leen bañee bàyyi, ñu dem kat, maa leen di mbugale ay mbott yu daj sam réew. <sup>28</sup> Dexu Niil gi day ramm-rammeeki mbott, te dinañu ñēw, duggsi sa biir kër, ak sa néegu biir, ak sa kaw lal, ak sa këri dag, ak sa waa réew, ba ca lakkukaay yaak notukaayi mburu ya. <sup>29</sup> Mbott yi dinañu yéeg ci sa kaw, yéeg ci kaw waa réew mi, ak sa dag yépp.”»

## 8

<sup>1</sup> Ba loolu weesee Aji Sax ji ne Musaa: «Waxal Aaróona, ne ko mu ñàbb yet wi, tàllal loxoom, tiimale ko dex yi, ak yooni

\* **7:12** 7.12 Manees naa jàpp ne jaan, ja yetu Aaróona soppliku woon, moo wonn jaan, ya seen yet soppliku.

ndox yeek déeg yi, ngir indi mbott yi ci biir réewum Misra.» <sup>2</sup> Aaróona tàllal loxoom, mu tiim ndoxi Misra, mbott ya jóg, lal réewum Misra. <sup>3</sup> Ñeengokat ya it fexe ca seeni xargafuufa, ba indi ay mbott ca réewum Misra.

<sup>4</sup> Ba mu ko defee Firawna woo Musaak Aaróona, ne leen: «Ñaanleen Aji Sax ji, ngir mu teqale nook mbott yi, man ak sama waa réew. Kon dinaa bàyyi mbooloo mi, ñu dem rendili Aji Sax ji sarax.» <sup>5</sup> Musaa ne Firawna: «Saa yu la neexee rekk, sang bi. Wax ma kañ laa lay ñaanal, yaw ak say dag ak sa waa réew, ngir jële fi mbott yi, ñu tàggook yeen, génn seeni kër, ca dexu Niil ga donj lañuy des.» <sup>6</sup> Mu ne ko: «Nay èllég.» Musaa ne ko: «Baax na, ndax nga xam ne sunu Yàlla Aji Sax ji amul moroom. <sup>7</sup> Mbott yi dinañu jóge sa kër, teqlikook yeen, yaak say dag ak sa waa réew, ca dexu Niil ga donj lañuy des.» <sup>8</sup> Musaa ak Aaróona nag jóge ca Firawna, Musaa tinu Aji Sax ji ca mbirum mbott ya mu yare Firawna. <sup>9</sup> Aji Sax ji def la ko Musaa ñaan, mbott ya dee, ba jeex ca kër yaak ca ètt yaak tool ya. <sup>10</sup> Ñu jal koo jal, ba xet ga ubale ca réew ma. <sup>11</sup> Teewul, ba Firawna gisee ca mbir ma tan, daa wéye të, tanqam lu leen, muy la Aji Sax ji waxoon.

### *Yarub ñetteel ba: rayentaan yu daj réew ma*

<sup>12</sup> Ba loolu amee Aji Sax ji ne Musaa: «Waxal Aaróona ne ko mu tàllal yetam, dóor ci pëndub suuf si, mu doon ay rayentaan\* ci réewum Misra gépp.» <sup>13</sup> Ñu def loola, Aaróona tàllal loxoom, ba mu ñàbbe yet wa, dóor ca pënd ba, mu doon ay rayentaan yu song nit ak rab; pëndu suuf sépp a defi rayentaan ca réewum Misra gépp. <sup>14</sup> Ñeengokat ya fexe ca seeni xargafuufa, nu ñu defe ay rayentaan, waaye manuñu. Rayentaan ya nag song nit ñaak rab ya. <sup>15</sup> Ñeengokat ya ne Firawna: «Lii de Yàlla rekk a ko man!» Teewul Firawna wéye të rekk, tanqam lu leen, muy la Aji Sax ji waxoon.

\* **8:12** 8.12 rayentaan: li ñuy wax rayentaan fii, kenn xamul lan la dëgg. Waaye luy naaw lu tuut la, di same aka mätte.

### *Yarub ñeenteel ba: weñ yuy mätte*

<sup>16</sup> Aji Sax ji waxati Musaa, ne ko: «Tee-lala xëy èllég ca Firawna, buy génn jëm ca ndox ma, nga wax ko ne ko: “Aji Sax ji dafa wax ne: ‘Bàyyil sama ñoñ, ñu dem jaamuji ma. <sup>17</sup> Ndaxte soo bàyyiwul sama ñoñ, ñu dem kat, dinaa yuri ay ndiiraani weñ yuy mätte ci seen kaw, yaak say dag ak sa waa réew, te dinañu àgg ci sa biir kër. Këri waa Misra dina fees ak weñ yuy mätte, ba suuf, si ñu taxaw sax, weñ yee koy muur. <sup>18</sup> Waaye bu keroogee dinaa ci musal diiwaanu Gosen, ga sama ñoñ dëkke, ba ay weñ du fa same, ndax nga xam ne, man Aji Sax ji maa ngi ci digg réew mii, <sup>19</sup> te maay musal sama ñoñ ci musiba moomuy dal saw askan. Èllég firnde jooju dina am.’ ”» <sup>20</sup> Aji Sax ji def loola, weñ yi def ndiiraan yu réy, song kër Firawna ak kër dagam ya, dajal réewum Misra, ba réew ma yàqu ndax ndiiraani weñ ya.

<sup>21</sup> Firawna daldi woolu Musaak Aaróona, ne leen: «Demleen rendili seen Yàlla sarax, te nay ci biir réew mi nag.» <sup>22</sup> Musaa ne ko: «Loolu du yoon, ndax li nuy rendil sunu Yàlla Aji Sax ji, waa Misra dañu koy xof. Te bu nu sarxalee lenn lu waa Misra xof, ñuy gis, dinañu nu dóor ay doj, ba nu dee. <sup>23</sup> Kon kay danoo wara génn, topp màndinj mi lu mat doxub ñetti fan, rendili fa sunu Yàlla Aji Sax ji sarax, ni mu nu ko sante.» <sup>24</sup> Firawna àddu ne: «Dinaa leen may, ngeen dem ca màndinj ma, rendili seen Yàlla Aji Sax ji sarax, waaye buleen sore lool. Ñaanal-leen ma nag.» <sup>25</sup> Musaa ne ko: «Bu ma bàyyikoo ci yaw rekk Firawna, dinaa tinu Aji Sax ji, ngir èllég ndiiraani weñ yi teqlikook yaw, ak say dag ak sa waa réew, waaye kat Firawna, bu nu naxati, di baña bàyyi mbooloo mi, ñu rendili Aji Sax ji sarax.»

<sup>26</sup> Musaa bàyyikoo fa Firawna, daldi tinu Aji Sax ji. <sup>27</sup> Aji Sax ji defal Musaa la mu ñaan, jële ndiiraani weñ ya ca Firawnaaki dagam ak waa réewam, ba weñ desatu fa. <sup>28</sup> Teewul Firawna të rekk, baña bàyyi mbooloo ma, ñu dem.

## 9

*Yarub juróomeel ba: Deewug jur ga*

<sup>1</sup> Ba loolu wéyee Aji Sax ji da ne Musaa: «Demal ca Firawna, nga ne ko: Aji Sax ji Yállay Ebré yi dafa wax ne: “Bàyyil sama ñoñ, ñu dem màggali ma. <sup>2-3</sup> Ndax boo leen bañee bàyyi kat, xanaa di leen téye ba tey, loxol Aji Sax ji dina dal ci sa kaw jur gi ci tool yi, muy fas ak mbaam ak giléem, jur gu gudd ak gu gàtt, te jàngoro ju aaytal lool lay doon. <sup>4</sup> Waaye man Aji Sax ji maay ràññatle juru bànni Israyil ak juru waa Misra, ba lenn du dee ci mboolem lu bànni Israyil moom.”»

<sup>5</sup> Aji Sax ji nag jàpp na bés, nee na: «Èllëg maay def loolu ci réew mi.» <sup>6</sup> Ca èllëg sa Aji Sax ji def ko: jurug waa Misra gépp dee, te jurug bànni Israyil, lenn deewu ca. <sup>7</sup> Ba Firawna yónnee, ba nemmiku mbir ma, xam na ne lenn deewul ca juru bànni Israyil. Teewul mu të ticc ba tey, baña bàyyi mbooloo ma, ñu dem.

*Yarub juróom benneel ba: Taab ya*

<sup>8</sup> Ba loolu amee Aji Sax ji wax Musaa ak Aaróona ne leen: «Tibbleen seeni loxo dóomu puuru ban, ba mu fees, Musaa xalab mu jëm asamaan, Firawna di ci gis. <sup>9</sup> Su ko defee dóom bi doon pënd bu sew ci kaw réewum Misra gépp, daldi def ay taab yuy sotti dëtt ci réewum Misra gépp, nit ak mala.» <sup>10</sup> Ñu sàkk dóomu-taal, àgg ca kanam Firawna, Musaa xalab dóom ba, mu jëm asamaan, dóom ba def ay taab yuy sotti dëtt ca nit ñaak mala ya. <sup>11</sup> Ci kaw loolu ñeengokat ya taluño janook Musaa ndax ay taab, ñoom ak waa Misra gépp. <sup>12</sup> Teewul Aji Sax ji dëgëral boppu Firawna, mu të, tanqam lu leen, muy la Aji Sax ji waxoon Musaa.

*Yarub juróom ñaareel ba: Tawub yuur ba*

<sup>13</sup> Aji Sax ji waxati Musaa ne ko: «Tee-lala xéy ca Firawna èllëg, nga wax ko ne ko: “Aji Sax ji, Yállay Ebré yi, dafa wax ne: ‘Bàyyil sama ñoñ, ñu dem màggali ma. <sup>14</sup> Ndax kat bii yoon maa ngii di yebal sama mbugal yépp ci yaw ci sa

bopp, ak say dag ak sa waa réew, ngir nga xam ne awma moroom ci àddina wërngal këpp. <sup>15</sup> Nègëni tey doon naa xàcci sama loxo xaat, dumaa leen mbas mu leen di fare ci kaw suuf, yaw yaak sa waa réew. <sup>16</sup> Waaye maa la musal, te li ma ci jublu moo di won la sama doole, ba sama riirum tur dajal àddina. <sup>17</sup> Ndaxam yaa ngi réy-réylu ci sama kaw ñoñ ba tey, bañ leena bàyyi, ñu dem. <sup>18</sup> Te kat nègëni èllëg dinaa taw yuur\* bu réy, bu masula am Misra, ba mu sosoo ba tey jii. <sup>19</sup> Kon nag sa jur ak mboolem loo am, te mu nekk ci biti, booleel fat fu wóor, ndax lu nekk ci biti te fateesu ko, su tawtee dee, muy nit mbaa mala.’ ”» <sup>20</sup> Ba mu ko defee ña ragal kàddug Aji Sax ji ca dagi Firawna fat seeni jaam ak seeni jur fu wóor. <sup>21</sup> Ña faalewul kàddug Aji Sax ji, ñoom, wacc seeni jaam ak seeni jur ca biti.

<sup>22</sup> Aji Sax ji ne Musaa: «Yékkatil sa loxo ca kaw, mu jublu asamaan, ngir tawub yuur bi dal ci réewum Misra mépp, nit ak mala, ba ci lépp luy gancax ci réewum Misra.» <sup>23</sup> Musaa ne yékkét yet wa, mu jublu asamaan, Aji Sax ji yebal dënu baak tawub yuur ba, sawara wa ne yureet fi suuf, ànd ak tawub yuur, ba Aji Sax ji sóob ca réewum Misra. <sup>24</sup> Tawub yuur ba réy lool, ànd ak sawara, wa jaxasook yuur ba, di xuyy-xuyyi, muy guléet ca cosaanu réewum Misra ba bés sub keroog. <sup>25</sup> Tawub yuur ba dal ca mboolem réewum Misra, daaneel lépp lu ne woon ca biti, nit ak mala, daaneel gancax gépp, dammat garab ya ca àll ba yépp. <sup>26</sup> Diiwaanu Gosen, ga bànni Israyil dëkkoon donj, moo mucc ca tawub yuur ba.

<sup>27</sup> Firawna nag yónnee, woolu Musaak Aaróona. Mu wax leen ne leen: «Bii yoon de, maa tooñ. Aji Sax ji moo nekk ci dëgg, te maak sama waa réew ñoo sikk. <sup>28</sup> Tinuleen Aji Sax ji, ndax dënu yu màgg yeek tawub yuur bi dakk. Dinaa leen bàyyi, ngeen dem. Deesu leen fi téyeeti.» <sup>29</sup> Musaa ne ko: «Bu may génn dëkk bi rekk, di tàllal Aji Sax ji samay loxo, dënu yi dakk, tawub yuur bi siwet, ngir

\* **9:18** 9.18 tawub yuur: ndoxum taw la, mu sedd, ba defi donj.

nga xam ne àddina, Aji Sax jeey boroom. <sup>30</sup> Waaye xam naa ne, loolu du tax ba tey, nga ragal Yàlla Aji Sax ji, yaw, yaak say dag.»

<sup>31</sup> Fekk na gàncax ga ñuy defare wëñu lëe yàqu na, mook peppum lors ba, ndax lors baa nga tollu woon ci waaja focci, gàncax ga ñuy defare lëe di tóor. <sup>32</sup> Waaye xeeti peppi bele ya, lenn yàquwu ca, ndax yooyooy mujja ñor.

<sup>33</sup> Naka la Musaa bàyyikoo ca Firawna, ba génn dëkk ba rekk, daldi tàllal Aji Sax ji ay loxoom. Dënu yaak tawub yuur ba ne tekk, taw ba siwet. <sup>34</sup> Ba mu ko defee Firawna gis ne tawub yuur baak dënu ya dakk na, mu tēeti ticc, mooki dagam, dellu cig tooñam. <sup>35</sup> Firawna të rekk, baña bàyyi bànni Israyil, ñu dem, muy la Aji Sax ji waxoon, Musaa jottli.

## 10

### *Yarub juróom ñetteel ba: Njéeréer ya*

<sup>1</sup> Ba loolu weesee Aji Sax ji dafa wax Musaa ne ko: «Demal ca Firawna. Maa dëgéral boppam, mooki dagam, ngir jéfe samay firnde fi seen biir. <sup>2</sup> Su ko defee ngeen mana nettali seeni doom ak seeni sët ni ma torxale waa Misra, ak sama firnde, yi ma def fi seen biir, ndax ngeen xam ne man maay Aji Sax ji.»

<sup>3</sup> Musaa ak Aaróona nag dem ca Firawna, wax ko ne ko: «Aji Sax ji Yàllay Ebrë yi dafa wax ne: “Siide nga maa nangul daal? Waaw, foo àpp sa ngàntal ak man? Bàyyil sama ñoñ, ñu dem màggali ma. <sup>4</sup> Soo bañee bàyyi sama ñoñ, ñu dem kat, èllëg dinaa wacce ay njéeréer ci sam réew. <sup>5</sup> Dinañu lal dëndu réew mi, ba kenn dootu gis suuf. Dinañu lekk lu fi tawub yuur bi ba woon, te garab yi ci seeni tool yépp lañuy lekk. <sup>6</sup> Te itam dinañu fees say biir kër ak sa kəri dag yépp ak kəri waa Misra gépp, muy mbir mu say maam ak say mamaat masula gis, ba ñu ganee àddina ba bésuub tey jii.”»

Ba loolu amee Musaa walbatiku, bàyyikoo ca Firawna. <sup>7</sup> Dagi Firawna ya wax Firawna ne ko: «Lu nuy seetaanati, waa jii di nu yóbbe aw ay? Bàyyil bànni Israyil ñii kay, ñu màggali seen Yàlla Aji

Sax ji! Xanaa yéguloo ne Misra tas na?» <sup>8</sup> Ñu délloosi nag Musaak Aaróona ca Firawna, mu ne leen: «Demleen màggali seen Yàlla Aji Sax ji! Waaw, ñiy dem sax, ñan la?» <sup>9</sup> Musaa ne ko: «Nun ñépp ay dem kay, mag ak ndaw; danuy dem, ànd ak sunuy doom, góor ak jigéen, ak sunuy jur, gu gudd ak gu gàtt, ndax màggalug Aji Sax ji la ci nun.»

<sup>10</sup> Firawna ne leen: «Ãa, yal na leen Aji Sax ji saxoo taxawu walla, ndegam maa leen di bàyyi moos, ngeen dem, yóbbaale seen njaboot! Xam ngeen ne naruleen njub de. <sup>11</sup> Mukk laa wax! Du dangeen di màggal Aji Sax ji? Demleen boog, yeen ñiy góor!»

Ba loolu amee ñu dàq leen, ñu jóge ca Firawna, <sup>12</sup> Aji Sax ji ne Musaa: «Tàllalal sa loxo, mu tiim réewum Misra, ngir njéeréer yi ñëw, song réewum Misra, ba lekk gàncax gi ci réew mi, lekk lépp lu fi tawub yuur bi bàyyi woon.»

<sup>13</sup> Ba mu ko defee Musaa tàllal yetam, mu tiim réewum Misra, Aji Sax ji yékkati ngelaw ca réew ma, mu jóge penku, yendoo gelaw, fanaanoo ko. Bët set, ngelawal penku la indi njéeréer ya. <sup>14</sup> Njéeréer ya song réewum Misra mépp, sam dëndu Misra wépp, ba mu fatt taraj. Lu ni tollu masula am, te dootu amati. <sup>15</sup> Njéeréer ya daa muur suuf sa sépp, ba giseesu ko. Suuf sa ñuul kukk. Njéeréer ya lekk lépp luy gàncax mbaa meññeefi garab gu tawub yuur ba jotuloona yàq, ba lenn lu naat desatul, du xobi garab, du gàncax, ca mboolem réewum Misra.

<sup>16</sup> Firawna nag gaaw woolu Musaak Aaróona, ne leen: «Tooñ naa seen Yàlla Aji Sax ji, tooñ leen. <sup>17</sup> Baal ma àq bii yoon rekk, te ngeen ñaanal ma seen Yàlla Aji Sax ji, ngir mu teggil ma rekk, wii ay wu rey.» <sup>18</sup> Musaa bàyyikoo ca Firawna, tinu Aji Sax ji. <sup>19</sup> Aji Sax ji walbati ngelaw la, mu jóge sowu, am doole lool, daldi féel njéeréer ya, sànni ca géēju Barax ya, ba luy niru njéeréer desatul ca dëndu Misra. <sup>20</sup> Teewul Aji Sax ji dëgéral boppu Firawna, mu të rekk, baña bàyyi bànni Israyil ñu dem.



*Yarub juróom ñeenteel ba: Lëndëm gu tar ga*

<sup>21</sup> Gannaaw loolu Aji Sax ji ne Musaa: «Tállalal sa loxo, mu jublu asamaan, lëndëm wàcc ci kaw réewum Misra, lëndëm gu nit mana daj, ndax fatt.»

<sup>22</sup> Musaa tàllal loxoom, mu jublu asamaan, lëndëm gu fatt wàcc ca kaw réewum Misra gépp, diiru ñetti fan.

<sup>23</sup> Kenn gisul sa moroom, kenn manula jóge fa nga nekk, diiru ñetti fan. Teewul kəri bànni Israyil gépp di leer.

<sup>24</sup> Firawna nag woolu Musaa, ne ko: «Demleen màggali Aji Sax ji. Seen jur gu gudd ak gu gàtt rekk a fiy des, seeni doom sax man nañoo ànd ak yeen.» <sup>25</sup> Musaa ne ko: «Danga noo wara bàyyee lu nuy sarxalal sunu Yàlla, Aji Sax ji, ak yu ñu koy defal saraxu rendi-dóomal. <sup>26</sup> Sunuy gétt dina nu topp moos, luy nirook we sax du des gannaaw, ndax ci lanuy tanne lu nuy màggale sunu Yàlla Aji Sax ji, te itam li feek nuy àgg foofa, manunoo xam lan lanu ciy def sarax, màggale Aji Sax ji.» <sup>27</sup> Teewul Aji Sax ji dègèral boppu Firawna, mu të rekk, bañ leena bàyyi ñu dem. <sup>28</sup> Firawna nag ne Musaa: «Neel mott! Bul fexe ba taxawati sama kanam! Ndax bés boo jàkkaarlooteek man, kera ngay dee.» <sup>29</sup> Musaa ne ko: «Noonu la sax de. Duma jàkkaarlooteek yaw moos!»

## 11

*Yàlla waaj na yar bu mujj ba*

<sup>1</sup> Ba loolu wéyee Aji Sax ji waxati Musaa ne ko: «Benn yarub mujjantal laay dellu wàcce ci kaw Firawna ak waa Misra. Su ko defee du leen bàyyi ngeen dem, yem ca. Da leen fiy far dàqe, ba fàww. <sup>2</sup> Te neel mbooloo mi, góor gu nekk ak jigéen ju nekk ci ñoom, na sàkkoo ci dèkkandoob waa Misraam, ay gànjari xaalis ak wurus.» <sup>3</sup> Ci biir loolu Aji Sax ji def waa Misra yéwéne leen. Musaa sax ci boppam ku ñu naw la woon ca réewum Misra, ca dagi Firawna ya, ba ca baadoolo ya.

<sup>4</sup> Musaa daldi wax Firawna ne ko: «Aji Sax ji dafa wax ne: “Bu guddi gi xaajee, maay wër Misra gépp, <sup>5</sup> te lépp luy taaw

bu góor ci réewum Misra, dina dee, dale ko ci taaw bu góoru Firawna, mi toog ci jal bi, ba ci taaw bu góoru jaam bu jigéen bu fheetewoo wol, boole ci luy taaw bu góor ci jur gépp. <sup>6</sup> Dees na dégg yuux yu réy jibe Misra gépp, lu masula am, te dootu am muk. <sup>7</sup> Waaye fépp fu bànni Israyil dèkke, dara du fa wókk nit ak mala.” Su boobaa dingeen xam ne, Aji Sax jee ràññatle waa Misra ak bànni Israyil. <sup>8</sup> Bu loolu amee mboolom sa dag yii dinañu ma sujjóotalsi te naan ma: “Demal, yaak mbooloo, mi la topp yépp!” Su ko defee ma doora dem.» Musaa nag won Firawna gannaaw, mer ba, fees. <sup>9</sup> Fekk na Aji Sax ji wax Musaa ne ko: «Li waral Firawna du leen déglu, mooy sama kéemaan yi wara fulandiwu ci réewum Misra.» <sup>10</sup> Musaa ak Aaróona def nañu yooyu kéemaan yépp ca kanam Firawna, waaye fekk na Aji Sax ji dègèral boppu Firawna, ba mu të, baña bàyyi bànni Israyil, ñu génn réew ma.

## 12

*Lu jëm ci bés sub Mucc ba*

<sup>1</sup> Aji Sax ji wax na ak Musaa ak Aaróona ca réewum Misra, ne leen: <sup>2</sup> «Weer wii mooy doon ci yeen wi jiiitu ci weer yi, te na doon ci yeen weer, wi jëkk ci at mi. <sup>3</sup> Waxleen ak mbooloom Israyil mépp ne leen, bés sub fukkeel ba ci weer wii, na ku nekk jèlal njabootam ab gàtt, kër gu nekk ak gàttam. <sup>4</sup> Waaye su dee gàtt bu épp waa kër ga, dañu koy bokk ak kër, gi leen gèna jege, te nañu seet nu nit ña tollu, doora tànn gàtt bu dèppook la ñu mana lekk. <sup>5</sup> Gàtt ba bumu am sikk te na di kuuyu menn at. Man naa doon xar mbaa sikket. <sup>6</sup> Dangeen koy denc ba fukkeelu bés ba ak ñeent ci weer wii. Bu bés baa ci diggante ngoon ak jant bu so, na mbooloom Israyil mépp bokk rendi seeni gàtt. <sup>7</sup> Su ko defee ñu sàkk ca deret ja, taqal ca buntu kër, ga ñu ko nara lekke, taqal ca ñaari jèni bunt ba ak njèl bunt ba ca kaw. <sup>8</sup> Dañuy lakk yàpp wa cib taal, lekk ko guddig keroog, boole kook mburu mu amul lawiir ak xob yu wex. <sup>9</sup> Nañu ko wàjj, mu ne ñumm, bopp bi ak tànk yi ak yérey biir yi. Buleen ci lekk dara

lu ñorul, mbaa lu ñu baxal. <sup>10</sup> Buleen ci wacc dara mu fanaan, te lépp lu ci des bu bët setee, lakkleen ba mu jeex tàkk. <sup>11</sup> Ni ngeen koy lekk nag, nii la: bu ngeen koy lekk, dangeen di takku, sol seeni dàll, ñàbb seen yet, te ngeen lekk ko ci lu gaaw. Loolu gàttu saraxu bésu Mucc ba lay doon, ñeel Aji Sax ji.

<sup>12</sup> «Guddig keroog maay wër réewum Misra te maay fàdd lépp luy taaw bu góor ci réewum Misra, nit ak mala, te itam maay mbugal mboolem tuuri Misra. Man maay Aji Sax ji. <sup>13</sup> Deret ji ci kër, yi ngeen dëkke nag, mooy doon seen xàmmikaay, ba tax bu ma gisee deret ji, musal leen. Su ko defee bu may dal ci kaw réewum Misra, menn musiba du leen lor.

<sup>14</sup> «Bésu keroog bésu pàttliku lay doon ci yeen, ngeen war koo màggal ngir Aji Sax ji, muy dogal bu leen war fàww, yeen ak seen askan.

### *Lu jëm ci ayu bésu Mburu mu amul lawiir*

<sup>15</sup> «Diiru juróom ñaari fan ngeen di lekk mburu mu amul lawiir; te bés bu jëkk bi ci boppam nangeen jële seeni kër luy lawiir, ndaxte képp ku ci lekk mburu mu am lawiir, li ko dale bés bu jëkk bi, ba kera bésu juróom ñaareel ba, dees na ko dagge ci askanu Israyil. <sup>16</sup> Bés bu jëkk bi nangeen ci amal ndaje mu sell. Juróom ñaareelu bés ba itam nangeen ca amal ndaje mu sell; deesul liggéey lenn ci yooyu bés, lu moy ngeen togg ñam wu ñépp lekk. Loolu donj lees ciy mana def.

<sup>17</sup> «Nangeen wormaal ayu bésu Mburu mu amul lawiir, ndaxte ci bés boobu tembe laa leen génnee réewum Misra, kurél ci kaw kurél. Kon nag nangeen wormaal bés bii, muy dogal bu leen war fàww, yeen ak seen askan. <sup>18</sup> Li ko dale ngoonu fukki fan ak ñeent ci weer wu jëkk wi, ba ca ngoonu ñaar fukki fan ak benn ci weer woowu, nangeen ci lekk mburu mu amul lawiir. <sup>19</sup> Diiru juróom ñaari fan, bu dara ci lawiir am fenn ci seeni kër, ndax képp ku lekk lu am lawiir, dees na ko dagge ci askanu Israyil, muy doxandéem mbaa doomu réew mi.

<sup>20</sup> Buleen ci lekk lenn lu am lawiir, te fépp fu ngeen dal, na mburu mu ngeen mana lekk di mu amul lawiir.»

### *Waajal nañu bésu Mucc ba*

<sup>21</sup> Ba loolu amee Musaa woo magi Israyil ñépp, ne leen: «Demleen tànnali seeni njaboot ay gàtt, te ngeen rendi gàtt yooyu, def ko saraxu bésu Mucc bi.

<sup>22</sup> Dangeen di jël ab takku cari isob\*, capp ci deret ji ci ndab li, diw ci seen njëël bunt ak seen ñaari jëni bunt, te bu kenn ci yeen wees buntu këram ba bët set. <sup>23</sup> Su ko defee, bu Aji Sax jiy wër ci biir réew mi, di fàdd waa Misra, ba gis deret ji taq ci seen njëël bunt ak seen ñaari jëni bunt, day teggi bunt ba, te du bàyyi malaakam reykati bi, mu dugg seeni kër, di fàdde.

<sup>24</sup> «Nangeen sàmmonteek loolu, muy dogal bu leen war fàww, yeen ak seen askan. <sup>25</sup> Keroog bu ngeen duggee nag ca réew ma leen Aji Sax ji jox na mu leen ko dige woon, nangeen sàmmonteek jooju aada. <sup>26</sup> Te bu leen seeni doom laajee ne leen: “Lu aada jii di wund?” <sup>27</sup> waxleen leen ne leen: “Loolu sarax la ñeel Aji Sax ji ngir bésu Mucc ba, ndax la mu teggi woon këri bànni Israyil ca Misra, kera ba muy fàdd waa Misra te musal ca sunuy kër.”»

Ba mu waxee loolu ba noppi, mbooloo ma sujjóot, màggal Yàlla. <sup>28</sup> La Aji Sax ji santoon Musaa ak Aaróona, noonu rekk la ko bànni Israyil defe.

### *Yarub fukkeel ba, di deewu taaw ya*

<sup>29</sup> Ca xaaju guddi la Aji Sax ji fàdd mboolem taawi réewum Misra yu góor, dale ko ca taaw bu góor bu Firawna, ma toog ca jal ba, ba ca taaw yu góor yu nit ña ñu tëj kaso, boole ca lépp luy taaw bu góor ca jur ga. <sup>30</sup> Firawna nag jóg ca guddi ga, moom ak dagam yépp ak waa Misra gépp, yuux gu réy jibe ca Misra, ndax këroo kër, du genn gu nit deewul.

<sup>31</sup> Ba loolu amee Firawna woolu Musaak Aaróona ca guddi googu, ne leen: «Ayca! Mott! Soreleen sama waa réew, yeen ak seeni bokk! Laggleen, jaamuji Aji Sax ji, li ngeen bëgg. <sup>32</sup> Te itam

\* 12:22 12.22 isob as ngarab la su car ba sèq, ba ñu man koo diwe.

yóbbaaaleleen seen juroo jur, gu gudd ak gu gàtt, li ngeen bëgg rekk, te ne mott! Waaye ñaanaaleleen ma seen Yàlla nag, mu barkeel ma.»

### *Bànni Israyil gàddaay na*

<sup>33</sup> Ba mu ko defee waa Misra soññ bànni Israyil, ngir ñu gaaw génñ réew ma, ndax booba ña nga naan: «Nun ñépp ay dee!»

<sup>34</sup> Loolu tax mbooloom Israyil roñ seen xiiwi sunguf yu amagul lawiir. Ñu ëmb seen ndabi notukaay ca seeni malaan, gàddu. <sup>35</sup> Fekk na bànni Israyil def la leen Musaa santoon ca waa Misra. Sàkku nañu ca ñoom ay gànjari xalis ak wurus aki yére. <sup>36</sup> Aji Sax ji nag def waa Misra nangul bànni Israyil, ba jox leen la ñu sàkku; noonu lañu futtee waa Misra.

<sup>37</sup> Ci kaw loolu bànni Israyil jóge dëkk ba ñuy wax Ramses, jëm Sukkóot. Ña nga tollu ci juróom benni téeméeri junniy góor (600 000) te limaaleesul jigéen ñaak xale ya. <sup>38</sup> Amoon na it mbooloom nit ñu ànd ak ñoom, te di askan yu raxe, ak jur gu bare, gu gudd ak gu gàtt. <sup>39</sup> Ñu daldi lakk mburu mu tàppandaar ca xiiw wu amul lawiir, wa ñu jële Misra. La taxoon xiiw wa ñàkk lawiir mooy dañu leena dàqe Misra, ba taluñu wona fàggu lu ñu lekk.

<sup>40</sup> Diir ba bànni Israyil nekk Misra tollu na ci ñeenti téeméeri at ak fanweer (430).

<sup>41</sup> Keroog ca bés, ba ñeenti téeméeri at ya ak fanweer matee sèkk, ca la ñoñi Aji Sax ji génñ réewum Misra, kurél ci kaw kurél. <sup>42</sup> Guddig keroog guddig teewlu la, ñeel Aji Sax ji, ngir moo leen ca génne réewum Misra, moo tax guddi googu di gu ñu jagleel Aji Sax ji, bànni Israyil gépp war cee fanaanee teewlu, ñeel Aji Sax ji, ba fàww.

### *Ay dogali Aji Sax jaa ngii, ñeel bésu Mucc ba*

<sup>43</sup> Gannaaw loolu Aji Sax ji dafa wax ak Musaa ak Aaróona, ne leen: «Li ma dogal ci saraxu bésu Mucc bi mooy lii: Benn doxandéem du ci lekk. <sup>44</sup> Waaye bépp jaam bu ñu jënd te mu xasa xaraf, man na cee lekk. <sup>45</sup> Benn màngaan mbaa liggéeykat bu ñu bind it du ci lekk.

<sup>46</sup> Genn kër lees koy lekke: bu lenn ci

yàpp wi génñ kër gi, te deesu ci damm benn yax sax. <sup>47</sup> Mboolem ku bokk ci bànni Israyil, na def sarax bi. <sup>48</sup> Su fekke ne ab doxandéem bu ngeen dëkkal dafa bëgga wormaal màggalu bésu Mucc bi ngir Aji Sax ji, xaraf war na ko, te war na gépp góor gu bootu ci moom; su loolu amee, dees na ko may, mu def ko, ndax kon day mel ni doomu réew mi. Waaye kenn ku xarafu du ci lekk. <sup>49</sup> Dogal bi benn lay doon, doomu réew mi ak doxandéem bi dëkk ci seen biir, bokk ci yem kepp.»

<sup>50</sup> La Aji Sax ji santoon Musaak Aaróona, noonu rekk la ko bànni Israyil defe.

<sup>51</sup> Bésu keroog boobe la Aji Sax ji yiwi bànni Israyil, ñu def kurél ci kaw kurél, génñ réewum Misra.

## 13

### *Lu jëm ci aada, yi ñuy baaxantale*

<sup>1</sup> Aji Sax ji waxaat Musaa, ne ko: <sup>2</sup> «Nanga ma sédde bépp taaw bu góor, nit ak mala, lépp lu jékka juddu ci bànni Israyil, maa moom.» <sup>3</sup> Musaa ne mbooloo ma: «Fàttlikuleen bésu tey jii ngeen génne Misra, kërug njaam gi, ak ni leen Aji Sax ji yiwee dooley loxoom. Bu ci kenn lekk mburu mu am lawiir. <sup>4</sup> Yeena ngii tey di dem seen yoon ci weeru Abiib. <sup>5</sup> Kon keroog bu leen Aji Sax ji yóbbu réewum Kanaaneen ña ak Etteen ña ak Amoreen ña ak Eween ña ak Yebuseen ña, fa mu giñaloon seeni maam, ne dina leen ko jox, réew mu meew maak lem ja tuuroo, nangeen wormaal màggal gi ci wii weer te ngeen di ko defe nii.

<sup>6</sup> «Diiru juróom ñaari fan ngeen di lekk mburu mu amul lawiir, te na bésu juróom ñaareel ba di bésu màggalug Aji Sax ji. <sup>7</sup> Mburu mu amul lawiir ngeen di lekk diiru juróom ñaari fan; te it bu lenn lu am lawiir mbaa lawiir sax am fenn ci seen biir réew. <sup>8</sup> Bu keroogee na ku nekk xamal doomam, ne ko: “La ma Aji Sax ji defaloon, ba ma génnee Misra, moo waral lii tey.”

<sup>9</sup> «Na màggal googu di pàttliku ci yeen. Na mel ni màndarga mu nekk ci seen loxo ak seen jë. Su ko defee ngeen

saxoo jàngle yoonu Aji Sax ji, ndax ci dooley loxoom la leen Aji Sax ji génnee Misra. <sup>10</sup> Nangeen sàmmonteeek bii dogal ci bésam, at mu nekk.

<sup>11</sup> «Bu leen Aji Sax ji yóbbu nag réewum Kanaaneen ña, noonee mu leen ko giñale woon, yeen ak seeni maam, ba jox leen ko, <sup>12</sup> nangeen sédde Aji Sax ji lépp lu jékka juddu, rendil ko ko: lépp luy góor lu seen jur taawloo, Aji Sax jee boroom. <sup>13</sup> Waaye lépp lu mbaam-séf taawloo, nangeen ko jote kuuyum xar, mu wutu ko. Bu ngeen ko jotul, nangeen damm loos wi. Te itam jotleen képp kuy taaw bu góor ci seeni doom. <sup>14</sup> Su ko defee, bu leen seen doom laajee èllég, ne leen: “Lii lu muy tekki?” ngeen wax ko ne ko: “Dooley loxol Aji Sax jee nu génnee Misra, kërug njaam ga. <sup>15</sup> Ba Firawna tëwee, bañ noo bàyyi, nu dem, Aji Sax jee rey mboolem lu doon taaw bu góor ca réewum Misra, taawu nit ba ci taawu mala. Looloo waral nuy rendil Aji Sax ji mépp mala mu jékka juddu, di góor, sunu bépp taaw bu góor it, ñu war koo jote sarax su nu koy rendil.” <sup>16</sup> Na yooyu sarax mel ni màndarga mu nekk ci seen loxo ak seen jë, di leen fàttli ni nu Aji Sax ji génnee Misra ci dooley loxoom.»

### *Aji Sax ji jiite na mbooloo ma*

<sup>17</sup> Firawna bàyyi na mbooloo ma, ñu dem, waaye Yàlla jaaralewu leen ca yoon, wa jëm réewu Filisti, doonte moo génoona gàtt. Booba Yàlla dafa xam ne, su mbooloo ma sóoboo ci ay xare ci woowu yoon, dañuy yoqi, bay xalaata dëpp, dellu Misra. <sup>18</sup> Moo tax Yàlla wiiriloo mbooloo ma, ñu jaare ca màndin ma, jëm ca géēju Barax ya. Ba mu ko defee bànni Israyil fagaru ba jekk, daldi génn Misra.

<sup>19</sup> Musaa nag yóbbu yaxi Yuus-ufa, ma giñloo woon bànni Israyil, ne leen: «Yàlla dina leen geesu moos, te bu keroogee nangeen fi jële samay yax, yóbbu.»

<sup>20</sup> Ñu bàyyikoo Sukkóot, dal Etam ca wetu màndin ma. <sup>21</sup> Bu bëccégee nag Aji

Sax ji nekk ci seen kanam ci biir taxaaru niir, di leen jiite ca yoon wa, te bu guddee mu nekk ci biir taxaaru sawara, di leen leeral, ba ñu mana dem guddi ak bëccég.

<sup>22</sup> Du bëccég bu niir wa jóge ca kanam mbooloo ma, te du guddi it gu sawara wa masa wuute.

## 14

### *Firawna dabi na bànni Israyil*

<sup>1</sup> Aji Sax ji waxati Musaa, ne ko: <sup>2</sup> «Waxal bànni Israyil, ne leen ñu walbatiku dali fa jàkkaarlook Pi Axiroot, ca diggante Migadol ak géēju Barax ya. Dal-leen foofa jàkkaarlook Baal Cefon ca tefes ga. <sup>3</sup> Su ko defee Firawna da naan: “Bànni Israyil de dañoo réer ci àll bi, ba faf keppu ci màndin mi.” <sup>4</sup> Gannaaw loolu maay dëgéral boppu Firawna, mu topp leen, ba ma jaare ca siiwal sama ndam, ndax maay daan Firawnaaki xarekatam yépp, te waa Misra dinañu xam ne, man maay Aji Sax ji.» Musaa jottli leen ko, ñu def noona.

<sup>5</sup> Ba ñu yégalee Firawna buuru Misra, ne mbooloo ma daw na, mooki dagam dañoo soppi xalaat ca mbirum bànni Israyil. Ñu ne: «Waaw nun, li nu def nag? Ana luy ndeyi yiwi bànni Israyil, ba dootuñu nu surgawu?» <sup>6</sup> Firawna takklu watiiru xareem, ànd aki jambaaram.

<sup>7</sup> Mboolem watiiri xarey Misra la yóbbu, jiital juróom benni téeméer, ya ca gën, bu ci nekk yeb ay kilifay xarekat\*. <sup>8</sup> Aji Sax jee dëgéral boppu Firawna buuru Misra, mu toppi bànni Israyil, fekk bànni Israyil ñoom, ña ngay génn réew ma ci seen teeyu bakkan. <sup>9</sup> Waa Misra topp leen, ñook fasi Firawna yépp, ak watiiri xareem ak dawalkatam yaak xarekatam ya, ba dab leen fa ñu dal ca tefesu géēju Barax ya, fa jàkkaarlook Baal Cefon ca wetu Pi Axiroot.

<sup>10</sup> Firawnaa ngay jubsii, bànni Israyil séentu, yemuñu ci ñu moy waa Misra, ñu dikk, jubsii leen. Tiitaange lu réy jàpp bànni Israyil. Ñu woo Aji Sax ji wall. <sup>11</sup> Ci biir loolu ñu ne Musaa: «Xanaa Misra

\* **14:7** 14.7 kilifay xarekat: watiiru xare yi ñaar la daan yeb, kiy dawal ak kiy fitt, waaye bii yoon Firawna da caa tofal njiitu xarekat, mu ñetteel leen.

dafa amul ay sĕg, ba nga di nu indi ci màndiŋ mi, nu deesi fi? Loo nu doon gĕnnee Misra? <sup>12</sup> Xanaa du lii lanu la waxoon ca Misra? Noon nanu la, nga bàyyi nu, nu surgawu waa Misra, ndax surgawu waa Misra moo nu gĕnal nu dee ci màndiŋ mi!»

<sup>13</sup> Musaa nag ne mbooloo ma: «Buleen tiit, neleen tekk te xool li Aji Sax jiy def, ba xettli leen tey jii. Ndax kat waa Misra yii ngeen di gis nii tey, dootuleen leen gis muk. <sup>14</sup> Aji Sax ji moo leen di xeexal, yeen kay neleen tekk rekk.»

### *Yàlla xàll na gééj ga*

<sup>15</sup> Ci kaw loolu Aji Sax ji wax Musaa ne ko: «Loo may wooye wall? Waxal bànni Israyil, ne leen ñu dem rekk, <sup>16</sup> te yaw nanga yékkati saw yet, tàllal sa loxo mu tiim gééj gi, ba xàll ko, ndax bànni Israyil mana dox ci suuf su wow, jàll gééj gi. <sup>17</sup> Man nag maay dĕgĕral boppu waa Misra, ba ñu dugg, topp leen. Su ko defee ma siiwal sama ndam, ndax dinaa yar Firawnaaki xarekatam yépp, boole ci watiiri xareem aki gawaram. <sup>18</sup> Bu ma dumaa Firawna, boole kooki watiiram aki gawaram, ba doxe fa siiwal sama ndam, waa Misra dinañu xam ne man maay Aji Sax ji.»

<sup>19</sup> Ci kaw loolu malaakam Yàlla, ma féete woon xarekati Israyil kanam naka jekk te di leen jiite, daldi toxu, féete leen gannaaw. Niir, wa leen jiitu woon it walbatiku, taxaw ca seen gannaaw, <sup>20</sup> dox diggante dalu waa Misra ak dalu bànni Israyil. Niir waa nga lëndĕme genn wet, wet ga ca des di leer ca guddi ga, ba tax guddi ga gépp benn dal manula fekki moroom ma.

<sup>21</sup> Gannaaw ga Musaa tàllal loxoom, mu tiim gééj ga, Aji Sax ji yebal ngelawal penku lu réy guddi ga gépp, jañaxe ko gééj ga, ndox ya xàjjalikoo, ba suuf su wow feeñ. <sup>22</sup> Bànni Israyil nag dugg ca biir gééj ga, di dox ci kaw suuf su wow, ndox ya ne sàtt, ñagal leen ndijoor ak càmmoñ.

<sup>23</sup> Ba mu ko defee waa Misra daw topp ca ñoom, fasi Firawna ak watiiri xareem aki gawaram ànd, ñoom ñépp ne yentam ca biir gééj ga. <sup>24</sup> Ba njĕl jotee Aji Sax ji

dafa tollu ci biir taxaaru sawara wu ànd aku niir, di xool xarekati Misra, tiital leen, ñu fĕlxoo. <sup>25</sup> Mu boole ca téye mbegey watiir ya, ba neexatuñoo dawal. Waa Misra ne: «Nan daw gaaw, ba rĕcc bànni Israyil, ndax kat Aji Sax ji moo leen di xeexal, te moo dal ci sunu kaw!»

<sup>26</sup> Aji Sax ji nag wax Musaa ne ko: «Tàllalal sa loxo, mu tiim gééj gi, ndax ndox mi délsi, ba sottiku ci kaw waa Misra, ñook seen watiiri xare ak seeni gawar.» <sup>27</sup> Musaa tàllal loxoom, mu tiim gééj ga. Ba bĕt di set gééj ga dellu na, mel na mu meloon. Waa Misra di daw, gééj ga wal, dogale leen, Aji Sax ji fĕl leen, ñu ne ca menteñ. <sup>28</sup> Ndox ma daa délsi, boole mèdd watiiri xare yaak gawar ya, mboolem xarekati Firawna, ya leen toppoon ca biir gééj ga rekk. Kenn rĕccul. <sup>29</sup> Waaye bànni Israyil ñoom, ci suuf su wow lañu jaare ca digg gééj ga, jàll, ndox ya ne sàtt, ñagal leen ndijoor ak càmmoñ.

<sup>30</sup> Noona la Aji Sax ji xettlee bànni Israyil bĕsub keroog ca waa Misra, ñu gis néewi waa Misra ya ne wetar ca tefes ga. <sup>31</sup> Ba Israyil gisee na Aji Sax ji jowe loxoom bu baax ca xareem baak waa Misra, dañu daldi ragal Aji Sax ji, teg ca am kóolute ci Aji Sax ji ak ci Musaa, jaamam ba.

## 15

### *Woyu Musaa waak bànni Israyil*

<sup>1</sup> Ba loolu amee nag Musaa ak bànni Israyil woy Aji Sax ji, màggal ko. Ña nga naan:

«Ma woy Aji Sax ji, ngir ndamam li kawee kawe.

Fas ak gawaram la fab, xalab gééj.

<sup>2</sup> Sama doole, sama kaaraange, Ki Sax a; te mooy sama wall tey.

Mooy sama Yàlla, ji may tagge, sama Yàllay maam, ji may joobe.

<sup>3</sup> «Aji Sax ji jambaari xare ji, Aji Sax jeey turam!

<sup>4</sup> Watiiri Firawnaaki xarekatam la fab sànni gééj;

ñeyi xareem ya labandoo ca gééju Barax ya,

<sup>5</sup> xóote ya boole sàng,  
ñu ne ca biir menteñ niw doj.

<sup>6</sup> «Aji Sax ji, sa kàttanu ndijoor a yéeme!  
Aji Sax ji, sa ndijoor a ne noon ba rajax.

<sup>7</sup> Sa màggaay gu yéemee nërmeel say  
noon.

Yaa yebal sa mer, mu ne jippét,  
xoyom leen ni boob.

<sup>8</sup> Nga wal sag noo, ndox ya tegloo,  
wal ma ne sàtt, jaloo jalu,  
ndoxi xóotey géej way deen!

<sup>9</sup> «Noon baa nga naa: “Maay dàqe, dabe,  
lèl alal ja, séddale  
séddu, ba xol sedd,  
ne saamar boset,  
teg leen loxo.”

<sup>10</sup> Waaye sa ngelaw nga wal,  
géej mëdd leen,  
ñu diigandoo ni beteex biir géej  
mbàmbulaan!

<sup>11</sup> «Ana kuy sa moroom ci tuur yi, yaw Aji  
Sax ji?

Kuy sa dend, yaak sa sellaay bu yéeme,  
sa yànjaay bu raglook sa jëf yu  
yéeme?

<sup>12</sup> Yaa tàllal sa ndijoor,  
suuf wonn leen.

<sup>13</sup> «Sa ngor nga jiitee mbooloo, mi nga jot,  
te sa kàttan nga leen di yóbboo ca sa kër  
gu sell.

<sup>14</sup> Jaambur ñay dégg, di rag-ragi,  
tiitaange ne taral waa Filisti,

<sup>15</sup> kilifay waa Edom jàq,  
njiiti Mowab di kat-kati,  
mboolem waa Kanaan tiit, ne yasar;

<sup>16</sup> tiitaangeek njàqaree ne milib ca seen  
kaw.

Sa kàttan a tax ñu mel niw doj, ne yàcc,  
ba kera sa ñoñ jàll, Aji Sax ji,  
ba kera askan wa nga goreel, jàll,

<sup>17</sup> te yaa leen di sampi ca sa tund wa nga  
séddoo,

fa nga waajal sa dëkkuwaay, Aji Sax ji,  
bérab bu sell ba nga sàkke sa loxol bopp,  
Boroom bi.

<sup>18</sup> Aji Sax jeey Buur, tey ak èllëg ba fàww.»

<sup>19</sup> Ci kaw loolu fasi Firawna ànd ak  
watiiri xareem aki gawaram, tàbbi géej,  
Aji Sax ji delloo ndoxi géej ga ca seen kaw,  
bànni Israyil ñoom, jaare joor gu wow ca  
digg géej ga.

### *Maryaama woy na*

<sup>20</sup> Yonent Yàlla Maryaama, jigéenub  
Aaróona nag nàbb tabala, jigéen ñépp  
topp ko, génn di fecc, tabala ya jiin.

<sup>21</sup> Maryaama nga leen di débbeel, naa:  
«Woyleen Aji Sax ji, ngir ndamam li  
kawee kawee.

Fas ak gawaram la fab, xalab géej.»

### *Lu jëm ci ndox mu wex ma*

<sup>22</sup> Gannaaw loolu Musaa jële bànni  
Israyil géēju Barax ya, ñu wéy, wuti  
màndiñ, ma ñuy wax Sur. Dox nañu ñetti  
fan ca màndiñ ma, gisuñu ndox. <sup>23</sup> Ñu  
dem, ba àgg fu ñu naan Maara, waaye  
manuñoo naan ca ndoxum Maara, ndax  
wex. Looloo waral ñu tudde bérab ba  
Maara (mu firi Fu wex). <sup>24</sup> Mbooloo ma  
nag di diiñat Musaa, naan: «Ana ndox mu  
nuy naan nag?» <sup>25</sup> Musaa woo Aji Sax ji  
wall, Aji Sax ji won ko dammitu bant, mu  
sànni ko ca ndox ma, ndox ma neex.

Foofa la Aji Sax ji dogalal bànni Israyil  
ay sàrti yoon ak ndigal, te fa la leen nattoo  
itam. <sup>26</sup> Da ne leen: «Bu ngeen farloo ci  
déggal seen Yàlla Aji Sax ji, di def li mu  
rafetlu, di teewlu tey jëfe ay santaaneem,  
di sàmm bépp dogali yoonam, su boobaa  
duma leen teg lenn ci jàngoro, yi ma  
tegoon waa Misra, ndax man maay Aji  
Sax, ji leen di wérloo.»

<sup>27</sup> Ci kaw loolu ñu dem ba Elim, fekk fa  
fukki bëti ndox ak ñaar, ak juróom ñaar  
fukki garabi tàndarma. Ñu dal foofa ca  
wetu ndox ma.

## 16

### *Aji Sax ji leel na bànni Israyil*

<sup>1</sup> Gannaaw gi mbooloom bànni Israyil  
gépp bàyyikoo fa Elim, dem, ba keroog  
fukki fan ak juróom, ca weer wa topp  
ca wa ñu génne réewum Misra, ñu  
doora agsi màndiñu Ciin diggante Elim  
ak Sinayi\*. <sup>2</sup> Mbooloom bànni Israyil

\* **16:1** 16.1 Sinayi mooy Oreb ba tey.

gépp nag di diinjat Musaa ak Aaróona ca màndin ma. <sup>3</sup> Ña nga naa leen: «Céy ngalla nun, su nu sañoon dee, Yàlla moom nu ca réewum Misra, fa nu daan uufe cini yàpp, ñam wa ne gǎññ, nu suur këll. Yeena nu indi ba ci màndin mii, ngeen nara xiifloo mbooloo mii mépp, ba ñu dee.»

<sup>4</sup> Ba loolu amee Aji Sax ji wax Musaa ne ko: «Maa ngi nii di tawal bànni Israyil ñam wu jóge asamaan, te na mbooloo mi dem bés bu set, fori njëlu bés ak bés. Ma nattu leen ci, ba xam ndax dinañu doxe sama ndigalu yoon am déet. <sup>5</sup> Waaye bu ñu demee ba bésub juróom benneel ba, ba togg la ñu ca indi, day tollook ñaar-cay dayo ba ñuy for bés bu set.»

<sup>6</sup> Musaa ak Aaróona nag xamal bànni Israyil ne leen: «Bu ngoonee dingeen xam ne, Aji Sax ji moo leen génne réewum Misra, <sup>7</sup> te bu bët setee dingeen gis manoorey Aji Sax ji, ndaxte dégg na ngeen di diinjat Aji Sax ji, ndax nun kat tekkiwunu dara, ba ngeen di nu diinjat.»

<sup>8</sup> Musaa teg ca ne: «Moo tax Aji Sax ji dina leen jox yàpp wu ngeen lekk ngoon, te bu bët setee mu jox leen ñam wu leen reggal, ndax Aji Sax jee dégg ngeen di ko diinjat. Nun lu nu ci? Du nun ngeen di diinjat waaye yeen ak Aji Sax ji la.»

<sup>9</sup> Ba loolu wéyee Musaa ne Aaróona: «Waxal mbooloom bànni Israyil gépp, ne leen ñu dem ba ca kanam Aji Sax ji, ndaxte dégg na seeni diinjat.» <sup>10</sup> Naka la Aaróona di wax ak mbooloom Israyil mépp, ñu jekki ne gees ca màndin ma, daldi yem ci aw niir, leeru Aji Sax ji di ca feeñ. <sup>11</sup> Aji Sax ji wax Musaa ne ko: <sup>12</sup> «Dégg naa diinjati bànni Israyil. Wax leen ne leen, diggante ngoon ak jant bu so, dinañu lekk yàpp, te bu bët setee ñu lekk aw ñam, ba regg, ndax ñu xam ne man Aji Sax ji, maay seen Yàlla.»

### *Aji Sax ji wàcce na mànn aki picc*

<sup>13</sup> Ba ngoon jotee ay picci përentaan† dikk, fees dal ba. Ba bët setee lay bay wàcc ca dal ba. <sup>14</sup> Naka la lay ba bàcc,

ñu jekki gis lu sew lale ca màndin ma, def fepp yu sew ca biir, te mel ni tawub yuur, tege ca suuf. <sup>15</sup> Bànni Israyil gis ko, di wax ca seen biir naan: «Lii lu mu?» ndax xamuñu woon lu mu doon. Musaa ne leen: «Lii mooy ñam wi leen Aji Sax ji jox, ngeen lekk. <sup>16</sup> Aji Sax ji dafa santaane ne: “Na ku nekk for lu mat njëlam, bopp bu ne andaar‡, te mu natt ko ci limu nit, ñi mu bokkal xayma.”» <sup>17</sup> Bànni Israyil def noona, ñii for lu bare, ñee lu néew. <sup>18</sup> Waaye ba ñu ko nattee ci andaar, ña sàkkoon lu bare amuñu lu ëpp, te ña sàkkoon lu néew yéeslewuñu. La ñu for dafa tolloo tembe ak seen njël. <sup>19</sup> Musaa ne leen: «Bu ci kenn wacc dara, mu fanaan.» <sup>20</sup> Waaye dégluwuñu Musaa, am na ñenn ca ñoom ñu ca wǎññi, fanaanal, mu def ay sax, xasaw xunn. Musaa nag mere leen.

<sup>21</sup> Suba su ñu xëyaan nag, ku nekk for ca njëlam, ndax bu naaj wa tàngaan, mu seey.

### *Aji Sax ji santaane na bésub Noflaay*

<sup>22</sup> Ba bésub juróom benneel ba jotee, dañoo for lu mat ñaari njël, ku nekk am ñaari andaar, njiiti mbooloo ma nag dem yeggeji ko Musaa, <sup>23</sup> mu ne leen: «Loolu la Aji Sax ji wax, te li muy tekki mooy: ëllëg bésub dal-lu la, di bésub Noflaay bu sell ñeel Aji Sax ji. Lakkleen li ngeen di lakk, baxal li ngeen di baxal, te lu ci des, ngeen denc ba suba.» <sup>24</sup> Ba ñu dencee la ca des ba ca ëllëg sa, na ko Musaa santaanee, xasawul, saxewul. <sup>25</sup> Musaa wax leen ne leen: «Lakkleen li des tey, ndax tey jii bésub Noflaay la, ñeel Aji Sax ji, te dungeen ko gis tey ci àll bi. <sup>26</sup> Juróom benni fan ngeen koy for, waaye bésub juróom ñaareel bay bésub Noflaay, kenn du ko gis.»

<sup>27</sup> Terewul mu am ñu fori ca bésub juróom ñaareel ba, waaye gisuñu dara. <sup>28</sup> Ca la Aji Sax ji wax Musaa ne ko: «Waaw yeen nag, dungeen ma noppee gántalal samay santaaneek samay ndigali yoon muk? <sup>29</sup> Nangeen xam xéll ne, man Aji Sax ji, maa leen may bésub Noflaay

† **16:13** 16.13 picci përentaan: xeetu picc la, muy nirook naat te gën koo tuuti. ‡ **16:16** 16.16 andaar: moom lañu tekkee omer ci ebrë, te muy natt buy tollu ci ñaari liitar.

ngir ngeen nopplu, te looloo tax ma may leen dundub ñaari fan ci bésuub juróom benneel bi. Kon nag bésuub juróom ñaareel ba, na ku nekk toog fi mu nekk, bu ci kenn génnati fi mu dëkk.»<sup>30</sup> Ba loolu amee bànni Israyil di nopplu bésuub juróom ñaareel ba.

### *Mànn ma jar naa fàttliku*

<sup>31</sup> Waa kër Israyil nag tudde ñam wa mànn (mu firi Lii lu mu?). Dafa meloon ni pepp, mi ñuy wax koryanda, te weex, di saf lu mel ni nàkk bu ànd ak lem.<sup>32</sup> Ci biir loolu Musaa ne: «Aji Sax ji dafa santaane ne: «Sàkkleen ci andaar, denc ngir seeni sèt ak seeni sètaat. Su ko defee ñu gis ñam, wi ma leen daan leel ca màndiŋ ma, gannaaw ba ma leen génnée réewum Misra.»»

<sup>33</sup> Musaa wax Aaróona ne ko: «Fabal ndab, def ci andaar man, teg ko fi kanam Aji Sax ji, dencal ko seeni sèt ak seeni sètaat.»

<sup>34</sup> La Aji Sax ji santoon Musaa la Aaróona def, daldi koy teg ca kanam gaal gay def àlluway kóllère gaŝ, ñu denc ko fa.<sup>35</sup> Bànni Israyil dunde nañu mànn diiru ñeent fukki at, ba kera ñu agsee réew mu ay nit dëkke, gannaaw ba ñu jéggee kemu réewum Kanaan.

<sup>36</sup> Ñu jàpp ne andaar, boo ci amee fukk, mooy benn efa\*.

## 17

### *Ndox balle na ciw doj*

<sup>1</sup> Gannaaw loolu mbooloom bànni Israyil gépp bàyyikoo màndiŋu Ciin, di dox ak a taxaw, ci ndigalal Aji Sax ji. Ñu dem ba Refidim, dal fa. Foofa nag mbooloo ma amuñu woon ndox mu ñu naan.<sup>2</sup> Ñu jote faak Musaa, naan ko: «Joxleen nu nag ndox mu nu naan!» Musaa ne leen: «Ana lu ngeen joteek man? Aji Sax ji ngeen di seetlu nag?»<sup>3</sup> Mbooloo ma mar na fa, bay xultu ci kaw Musaa, naan: «Loo nu doon jële Misra nag, xanaa du boole nu rey ndax mar, nook sunuy doom ak sunuy gétt?»<sup>4</sup> Ba mu ko defee Musaa

woo Aji Sax ji wall, ne ko: «Nu may def ak mbooloo mii? Des na tuuti de, ñu dóor ma ay doj, ba ma dee.»<sup>5</sup> Aji Sax ji ne Musaa «Ándal ak ñenn ci magi Israyil, nga jaar ci kanam mbooloo mi, yóbbaaale yet, wa nga dóoroon ca dexu Niil ga. Nàbb ko ci sa loxo te dem.<sup>6</sup> Man dinaa taxaw ci sa kanam ci doj woowu ca tundu Oreb. Dóoral ci doj wi, su ko defee ndox dina ci géenne, mbooloo mi naan.» Musaa def noona ca kanam magi Israyil ña.<sup>7</sup> Bérab boobu la Musaa wooye Maasa (mu firi Nattu). Mu wooye ko itam Meriba (mu firi ab Jote), ndax joteb bànni Israyil ba fa amoon, ak na ñu fa nattoo Aji Sax ji, naan: «Moo Aji Sax ji ndax mu ngi ci sunu biir, am déet?»

### *Amalegeen ña xare nañook Israyil*

<sup>8</sup> Ba loolu weese Amalegeen ña dikk, xareek bànni Israyil ca Refidim.<sup>9</sup> Musaa ne Yosuwe\*: «Tànnal nu ay xarekat te nga dem xeex ak Amaleg. Èllég dinaa taxaw ca kaw tund wa, nàbb yetu Yàlla wi ci sama loxo.»<sup>10</sup> Yosuwe def la ko Musaa wax, di xeex ak Amaleg. Musaa ak Aaróona ak Ur nag ànd yéeg ba ca kaw tund wa.<sup>11</sup> Ci kaw loolu saa yu Musaa yékkatee loxoom, Israyil man, saa yu wàccee loxo ba, Amaleg man.<sup>12</sup> Musaa nag mujj sonn ndax loxo yu toqi; ñu jël aw doj, tegal ko, mu toog ca, Aaróona ak Ur séq ko, ku ci nekk taawu benn loxo, loxoom ya ne sàtt taxaw, ba jant so.<sup>13</sup> Ba mu ko defee Yosuwe duma Amaleg ak mbooloom, leel leen ñawkay saamar.

<sup>14</sup> Ba loolu amee Aji Sax ji wax Musaa ne ko: «Bindal lii xew cib téere, muy pàttli, te nga xamal Yosuwe ne ko, raafal laay def askanu Amaleg, ba ñu jeex tàkk, ba deesatu leen fàttliku fu asamaan tiim.»<sup>15</sup> Musaa nag sàkk fa sarxalukaay, tudde ko tur wuy tekki «Aji Sax jeey sama raaya».<sup>16</sup> Booba la wax ne, gannaaw loxoo ñemee xàcci, jëm ci ngànguney Aji Sax ji†, Aji Sax ji dootu noppee xareek Amaleg ba fàww.

§ 16:34 16.34 Seetal ci 25.10-12. \* 16:36 16.36 efa ab natt la woon, bu wara tollook ñeent fukki liitar ak juróom. \* 17:9 17.9 Yosuwe: seetal ci 33.11. † 17:16 17.16 Manees na koo tekkee nii it: raayay Aji Sax ji,



## 18

### *Gorob Musaa yedd na Musaa*

<sup>1</sup> Yettro sarxalkatu réewum Majan ba, baayu soxnas Musaa, dafa dégg mboolem la Yàlla defal Musaa ak bànni Israyil ñoñam ak ni Aji Sax ji génnee Israyil Misra. <sup>2</sup> Ci kaw loolu Yettro gorob Musaa, ànd ak Sipora soxnas Musaa, sa Musaa yebaloon ca kër baayam, <sup>3</sup> boole kook ñaari doomi Musaa yu góor ya, kenn ka di Gersom (mu firi Doxandéem fii), ndaxte Musaa da ne woon: «Doxandéem laa fii.» <sup>4</sup> Ka ca des mu tudde ko Elyeser (mu firi Yàlla dimbali na ma), ndax da ne woon: «Sama Yállay baay mooy sama ndimbal te moo ma musal ci saamaru Firawna.» <sup>5</sup> Yettro, gorob Musaa nag yóbbul Musaa soxnaam aki doomam ba ca màndiŋ ma, fa Musaa dal ca kaw tundu Yàlla wa. <sup>6</sup> Mu yónnee ca Musaa, ne ko: «Man Yettro, sa goro, maa ñew fi yaw, ànd ak sa soxna ak sa ñaari doom yu góor.» <sup>7</sup> Musaa génn gatandu ko, sujjóotal ko, foon ko; ñu jàmmante ba noppi, doora dugg ca xayma ba.

<sup>8</sup> Musaa nag nettali goroom mboolem li Aji Sax ji def Firawna ak waa Misra ndax Israyil, ak jafe-jafe, ya leen dab ca yoon wa yépp, ak na leen ca Aji Sax ji xettlee. <sup>9</sup> Yettro bég lool ca la Aji Sax ji def lépp, ba baaxe Israyil, xettli leen ca noteelu waa Misra. <sup>10</sup> Yettro nag ne: «Cant ñeel na Aji Sax, ji leen xettli ci notaangey waa Misra ak notaangey Firawna, xettliwaale mbooloo mi ci notaangey waa Misra. <sup>11</sup> Léegi nag xam naa ne, Aji Sax jee sut mboolem tuur yi, ndax la mu def, ba leen waa Misra torxalee.» <sup>12</sup> Yettro, gorob Musaa, daldi sàkk saraxu rendidóomal ak yeneen sarax, jagleel ko Yàlla. Aaróona ak magi Israyil ñépp dikk, ñu bokk lekk ñook gorob Musaa fa kanam Yàlla.

<sup>13</sup> Ca èllég sa Musaa toog, di àtte mbooloo ma, ñu wër Musaa suba ba ngoon. <sup>14</sup> Gorob Musaa gis mboolem la Musaa di defal mbooloo ma. Mu ne ko: «Waaw, ni ngay jéflanteek nit ñi nag? Lu tax ngay toog, di àtte yaw rekk, mbooloo mépp wër la, suba ba ngoon?» <sup>15</sup> Musaa ne goroom: «Li ko waral mooy nit ñi

dañuy dikk, di laaj li dèppook àttey Yàlla. <sup>16</sup> Bu ñu jotee, dañuy ñew diis ma ko, su ko defee ma àtte leen ci mbir mi leen jotale, ba noppi xamal leen santaaney Yàlla ak ndigali yoonam.» <sup>17</sup> Goro ba ne ko: «Ni ngay doxale gënul. <sup>18</sup> Dangay dàjji sa bopp doŋŋ, dàjji mbooloo mi, ndax yen bee diis, ba èpp ci sa kaw; doo ko àttan yaw rekk. <sup>19</sup> Déglu ma fii, ma digal la, tey ñaan Yàlla ànd ceek yaw. Danga fee toogal mbooloo mi ci kanam Yàlla, di diis Yàlla jotey nit ñi, <sup>20</sup> di leen xamal ay santaane aki ndigali yoon, di leen won fi ñu wara jaare ak li ñu wara def. <sup>21</sup> Kon nag dangay tànn ci biir mbooloo mi mépp ay góor ñu mat, ñu ragal Yàlla te dèggu, boole ci sib alalu ger. Su ko defee nga tabb leen, ñu yilif ay kurél yu mat junniy nit ak yu tollu ci téeméeri nit, ba ci juróom fukki nit mbaa fukki nit. <sup>22</sup> Nga bàyyi leen nag, ñuy àtteel mbooloo mi bés bu nekk seeni jote. Su ko defee, mboolem réeroo bu mag, ñu indil la ko; mboolem réeroo bu sew nag, ñoom ñu àtteel ko seen bopp. Noonu ngay woyofale sab yen, ñu jàpple la ci. <sup>23</sup> Boo defee noonu, te Yàlla ànd ci, dinga ko mana dékku, mbooloo mii mépp it mana dellook jàmm ca seeni kër.»

<sup>24</sup> Musaa nag topp ndigalu goroom, daldi def mboolem la mu ko wax. <sup>25</sup> Mu seet ca bànni Israyil gépp, tànn ca góor ñu mat, fal leen, ñu yilif mbooloo ma: ñii jiite kuréli junniy nit; ñii, téeméer; ñii, juróom fukk; ñii fukk. <sup>26</sup> Ñuy àtte nag mbooloo ma saa su nekk. Su dee mbir mu lëj, ñu indil Musaa; mboolem mbir yu sew-sewaan ya, ñoom ñu àtte ko. <sup>27</sup> Ba loolu weesee Musaa tàggtok goroom, mu dellu réewam.

## 19

### *Yàlla xamle na kóllëreem*

<sup>1</sup> Keroog benn fan ca ñetteelu weer wa, gannaaw ba ñu génnee Misra, ca lañu agsi màndiŋu Sinayi. <sup>2</sup> Fekk na ñu bàyyikoo Refidim, doora duggsi màndiŋu Sinayi, daldi dal ca màndiŋ ma. Israyil a nga daloon foofa janook tund wa.

<sup>3</sup> Ba loolu amee Musaa yéeg, jëm ca Yàlla. Aji Sax ji jaar ci turu Musaa foofa ca kaw, ne ko: «Nanga wax ak waa kër Yanqóoba te nanga ma siiwtaaneel ci bànni Israyil googu, lii ma lay wax: <sup>4</sup> «Yeena gisal seen bopp ni ma def waa Misra, te yeen, ma boot leen, ni jaxaay di fireey laafam, boot ay doomam, ba ngeen jegesi ma fii. <sup>5</sup> Léegi nag su ngeen ma déggalee bu baax, di sàmm sama kóllère ak yeen, yeenay doon sama moomeelu bopp ci mboolem askan yi. Dëgg la, àddina wërngal këpp maay Boroom, <sup>6</sup> waaye yeenay doon nguuru sarxalkati Yàlla, te di xeet wu sell.» Kàddu yooyu ngay wax bànni Israyil.»

<sup>7</sup> Musaa dellu, woolu magi mbooloo ma. Mu jottli leen mboolem wax jooju ko Aji Sax ji dénk. <sup>8</sup> Mbooloo ma mépp bokk benn baat, àddu ne: «Li Aji Sax ji wax lépp dinanu ko def.» Ci kaw loolu Musaa dem yegge Aji Sax ji tontal mbooloo ma.

<sup>9</sup> Aji Sax ji wax Musaa ne ko: «Ma ne, dinaa yiiroo niir wu fatt, dikk ba agsi fi yaw, ngir bu may wax ak yaw, mbooloo mi di ci dégg, ndax ñu wóolu la ba fàww.» Ba loolu amee Musaa baamtul Aji Sax ji tontal mbooloo ma.

### *Yàlla wàcc na ca kaw tundu Sinayi*

<sup>10</sup> Gannaaw loolu Aji Sax ji waxaat Musaa ne ko: «Dellul ca mbooloo ma, te nanga leen sell-luloo tey ak èllëg. Nañu fóot seeni yére, <sup>11</sup> te waajal gannaaw-èllëg, ndax gannaaw-èllëg man Aji Sax ji maay wàcc ci kaw tundu Sinayi ci kanam mbooloo mépp. <sup>12</sup> Sàkkalal mbooloo mi ag kemu fi wër tund wi, te nga wax leen ne leen: «Moytuleena yéeg ci kaw tund wi, mbaa ngeen di laal tund wi fenn. Képp ku laal tund wi, dees na ko rey. <sup>13</sup> Bu loxo laal kooka, waaye nañu ko dóor ay doj ba mu dee, mbaa ñu jam ko. Su dee nit, su dee mala, bumu dundati.» Bu liit gi jibee donḡ nag lañuy doora mana dem ba ca tund wa.»

<sup>14</sup> Ba loolu amee Musaa wàcc tund wa, dellu ca mbooloo ma. Mu sell-luloo leen, ñu fóot seeni yére, <sup>15</sup> ba noppi, mu wax leen ne leen: «Waajal-leen gannaaw-èllëg, te li feek booba, buleen fi ànd ak jigéen.»

<sup>16</sup> Keroog ca gannaaw-èllëg sa, naka la njël jot, muy dënook a melax, ànd akaw niir wu fatt ca kaw tund wa, ak coowal liit gu xumb. Waa dal ba bépp a nga tiit, bay lox. <sup>17</sup> Musaa daldi jiite mbooloo ma, ñu génn dal ba, ngir dajejeek Yàlla. Ñu dem ba ca suufu tund wa, taxaw fa. <sup>18</sup> Fekk na tundu Sinayi wa wépp di sël-sëleeku saxar, ndax Aji Sax ja fa wàcc ci biir sawara. Saxar saa ngay gilli ni saxaru puuru ban, tund wépp di yëngook doole, <sup>19</sup> liit ga gëna jolli. Musaa ngay wax, Yàlla di ko tontoo kàddug dënu. <sup>20</sup> Ba mu ko defee Aji Sax ji wàcc ca tundu Sinayi wa, ca njobbaxtal tund wa. Aji Sax ji nag woo Musaa foofa, ca njobbaxtal ga, Musaa dellu yéeg. <sup>21</sup> Aji Sax ji ne ko: «Wàccal, àrtu mbooloo mi, ndax ñu baña bëtt, di ma deñsi kumpa; lu ko moy ñu bare ci ñoom dinañu dee. <sup>22</sup> Te it sarxalkat, yi may jege, man Aji Sax ji, dañoo wara sellal, bala may dal ci seen kaw.» <sup>23</sup> Musaa wax Aji Sax ji ne ko: «Mbooloo mi kat manuñoo yéeg tundu Sinayi, ndax yaw ci sa bopp àrtu nga nu, ne nu, nu sàkk ag kemu fi wër tund wi, te nu xam ne tund wu sell la.» <sup>24</sup> Aji Sax ji ne ko: «Wàccal te délsi, ànd ak Aaróona. Waaye muy sarxalkat yi, di mbooloo mi, bu kenn bëtt, jëm ci man Aji Sax ji, lu ko moy ma dal ci seen kaw.» <sup>25</sup> Ba loolu amee Musaa wàcc, fekki mbooloo ma, wax ak ñoom.

## 20

### *Kóllère gi laaj na ay sàrt*

<sup>1</sup> Yàlla wax na bànni Israyil kàddu yii yépp, ne leen: <sup>2</sup> «Man Aji Sax ji, maa di seen Yàlla, ji leen génne réewum Misra, kërug njaam ga.

<sup>3</sup> «Buleen am yeneen yàlla ci sama kanam.

<sup>4</sup> «Buleen sàkkal seen bopp tuur muy jëmmal lenn lu nekk ci kaw asamaan, mbaa ci kaw suuf, mbaa lu nekk ci ndox mu suuf tiim. <sup>5</sup> Buleen ci sujjóotal lenn, buleen ci jaamu lenn, ndax man seen Yàlla Aji Sax ji, Yàlla ju fir laa. Maay topp doom tooñu waajur, ba ca seen maasi sët, ba ca maasug sètaati nit ñi ma bañ.

<sup>6</sup> Waaye maay baaxe ñi ma sopp, di sàmm

samay santaane, ba ci junniy maas ya leen di wuutuji.

<sup>7</sup> «Buleen tudd seen turu Yàlla Aji Sax ji ci neen, ndax Aji Sax ji du ñakka topp kuy tudd aw turam ci neen.

<sup>8</sup> «Deeleen baaxantal bésub Noflaay, ngir sellal ko. <sup>9</sup> Juróom benni fan ngeen wara liggéey, def ci seen soxla yépp. <sup>10</sup> Waaye bésub juróom ñaareel ba, Noflaay lay doon, ñeel seen Yàlla Aji Sax ji. Buleen ci liggéey lenn; du yeen, du seen doom ju góor ak ju jigéen, du seen jaam bu góor ak bu jigéen, du seenug jur, te du seen gan gu nekk ci seen biir dëkk. <sup>11</sup> Ndax man Aji Sax ji, juróom benni fan laa sàkk asamaan ak suuf ak géej ak mboolem li ci biir, bésub juróom ñaareel ba, ma dal-lu. Moo tax man Aji Sax ji ma barkeel bésub Noflaay, sellal ko.

<sup>12</sup> «Teral-leen seen ndey ak seen baay, ndax ngeen gudd fan ca suuf sa leen seen Yàlla Aji Sax ji jox.

<sup>13</sup> «Buleen bóome.

<sup>14</sup> «Buleen jaaloo.

<sup>15</sup> «Buleen sàcc.

<sup>16</sup> «Buleen seedeel seen moroom lu dul dëgg.

<sup>17</sup> «Buleen xemmem seen lennu moroom: du këram, du jabaram, du jaamam bu góor, du jaamam bu jigéen, du nagam, du mbaamam.»

### *Mbooloo ma dagaan na ab jottlikat*

<sup>18</sup> Mbooloo mépp a nga teew, ba muy dënook a melax, ànd ak coowal liit gaak tund way saxar. Ñu gis loolu, di katkati, dànd fu sore. <sup>19</sup> Ci kaw loolu ñu ne Musaa: «Yaw, waxal ak nun, nu dëgg, waaye bu Yàlla ci boppam wax ak nun, lu ko moy nu dee.»

<sup>20</sup> Musaa ne mbooloo ma: «Buleen ragal, ndax nattu leen moo tax Yàlla ñëw, ngir ngeen ragal ko, ba dungeen moy.»

<sup>21</sup> Noonu la mbooloo ma taxawe, dànd tund wa. Mennam Musaa moo jegeji niir wu fatt, wa Yàlla nekkoon.

## **Téereb kóllère gi**

### *Ay dogal a ngi, yu jëm ci ab sarxalukaay*

<sup>22</sup> Aji Sax ji waxati Musaa ne ko: «Li ngay wax bànni Israyil mooy lii: “Yeena ko gisal seen bopp. Ca asamaan sax

laa àddoo, wax ak yeen. <sup>23</sup> Buleen sàkkal seen bopp ay tuuri xaalis, mbaa ay tuuri wurus, di ma bokkaale, bumu am mukk. <sup>24</sup> Sarxalukaay bu ñu defare suuf ngeen may sàkkal, di ci sarxal seeni gàtt ak seeni nag, muy seen saraxu rendi-dóomal, mbaa seen saraxi cant ci biir jàmm. Sàkkleen ab sarxalukaay ci mboolem bérab bu may fàttlee sama tur, ma dikk fi yeen, barkeel leen. <sup>25</sup> Su ngeen ma dee sàkkal sarxalukaayu xeer, buleen ko defare xeer yu ñu yett, ndaxte bu ngeen ko laalalee ab jumtukaay, teddadil ngeen ko. <sup>26</sup> Buleen yéeg ci ay dëggastal, doora mana àgg ca sama sarxalukaay, ndax loolu day tax ngeen di fa sàgganu.”»

## **21**

<sup>1</sup> Aji Sax ji teg ca ne: «Àttey yoon yii, nanga leen ko jox:

### *Lu jëm ci Ebrë yiy ay jaam*

<sup>2</sup> «Su ngeen jëndee jaam bu góor bu dib Ebrë, na liggéey juróom benni at. Juróom ñaareel ba lay moom boppam te du ameel kenn dara. <sup>3</sup> Su fekke ne ba muy dugg njaam, moom donj la woon, moom donj ay moom boppam; su ko fekke mu am jabar, na jabaram ànd ak moom, ñu moom seen bopp. <sup>4</sup> Su fekke ne sangam a ko may jabar, ndaw si am ak moom ay doom, jabar jeek doomam yu góor mbaa yu jigéen, sang bee leen di moom. Moom ci boppam donj ay moom boppam. <sup>5</sup> Waaye su jaam bi biralee ne: “Maa bëgg sama sang, maak sama jabar ak samay doom, te buggumaa moom sama bopp”, <sup>6</sup> su boobaa na ci sang bi sàkku seede àttekat yi. Su ko defee mu sésal waa ji ci lafu bunt bi mbaa jënu bunt bi. Foofa lay bënne noppu waa ji ab puso, mu daldi doon ab jaamam giiru dundam.

<sup>7</sup> «Su fekke ne góor dafa jaay doomam ju jigéen njaam, deesu ko mana goreel ni bu doon góor. <sup>8</sup> Su ko sangam jëndee, def ko jabar, ba noppi bëggatu ko, na fexe ñu feyal ndaw si ag njotam, waaye amul sañ-sañ jaay ko ay doxandéem, ndax loolu wor la. <sup>9</sup> Su fekke ne da koo jëndal doomam ju góor, na jëfeek moom, na mu dëppook wareefu doom ju

jigéen. <sup>10</sup> Ki jënd as ndaw, def ko jabar nag, su takkee keneen it, warula wàññi la mu warlook jaam ba mu def jabar ci wàllu dund ak koddaay ak dëkkoo. <sup>11</sup> Su ko sang ba matalul ñett yooyii nag, day moom boppam, dem te du fey dara.

### *Lu jëm ci lor sa moroom*

<sup>12</sup> «Ku dóor nit, rey ko, dee rekk mooy àtteem. <sup>13</sup> Su dul woon peXe mu mu la, xanaa mu fekk Yàlla yemale nit ki ciy loxoom, dinaa leen won bérab bu muy daw, làquji fa.

<sup>14</sup> «Waaye nag, su nit fexeelee moroomam, nax ko, ba rey ko, su làqoo woon sama sarxalukaay sax, jàppleen ko, rey.

<sup>15</sup> «Ku dóor baayam mbaa ndeyam, dee rekk mooy àtteem.

<sup>16</sup> «Ku sàcc nit, dee rekk mooy àtteem, moo xam da koo jaay, mbaa ñu fekk ko ci ay loxoom.

<sup>17</sup> «Ku saaga baayam mbaa ndeyam, dee rekk mooy àtteem.

<sup>18</sup> «Su ay nit jàppantee, kenn ki dóor moroom ma loxoom mbaa aw doj, su ca deewul, te ab tēraayam sababoo ca, <sup>19</sup> su ci jógee mana génn ci biti, jàpp ciw yet sax, di dox, deesul daan ki ko dóor, waaye dina dāmp ki mu dóor ngir li mu tēdd liggéeyul, ak li pajam laaj.

<sup>20</sup> «Ku dóor yet jaamam bu góor mbaa bu jigéen, ba mu dee ciy loxoom, dees na ko feyul moos. <sup>21</sup> Waaye su jaam ba dundee ba ca èllég sa, mbaa gannaaw-èllég sa, deesu ko feyul ndaxte moomeelu sangam la.

<sup>22</sup> «Su ay góor dee jàppante, ba kenn ci ñoom dal ci jigéenu wérul, ba liir bi génn, bu ci genn loraange toppul, dees na feyloo moos ki dal ci kawam, ndāmpaay li jëkkër ji laaj, te ña leen di àtte juboo ca limu pey ga.

<sup>23</sup> «Waaye su ci loraange sababoo nag, na bakkan fey bakkan, <sup>24</sup> bēt fey bēt, bēñ fey bēñ, loxo fey loxo; tānk fey tānk, <sup>25</sup> lakk-lakk fey lakk-lakk, tēccu-tēccu fey tēccu-tēccu, góom fey góom.

<sup>26</sup> «Ku dóor ab jaamam bu góor mbaa bu jigéen, ba tuur bētam, na ko goreel ndax bēt ba. <sup>27</sup> Su foqee bēñu jaamam bu

góor mbaa bu jigéen, na ko goreel ndax bēñ ba.

<sup>28</sup> «Su aw nag dañee góor mbaa jigéen, ba rey ko, dóorleen nag wi ay xeer ba mu dee, te buleen lekk yàpp wi, waaye boroom nag wi, yoon toppu ko. <sup>29</sup> Su fekke ne nag wi da daan dañe, ñu yégaloon ko boroom, wattuwu ko, ba nag wi rey góor mbaa jigéen, dóorleen nag wi ay xeer, ba mu dee, te teg ci rey boroom nag wi. <sup>30</sup> Su fekke ne dees koo sas ndāmpaay, na fey lim bu ñu ko mana sas, muy njot-gi-bakkanam. <sup>31</sup> Ba tey itam, su nag wi dañee xale, ba mu dee, muy góor mbaa jigéen, na àtte biy benn rekk ci boroom nag wi. <sup>32</sup> Su nag wi dañee ab jaam ba mu dee, muy góor mbaa jigéen, na boroom nag wi fey boroom jaam bi fanweeri dogi xalis, te nañu dóor nag wi ay xeer, ba mu dee.

<sup>33</sup> «Su fekke ne nit dafa ubbi kàmb gu ube woon, mbaa mu gas kàmb, wacc ko mu ne nàpp, ba nag mbaa mbaam daanu ci, <sup>34</sup> na boroom kàmb gi fey; day delloo boroom mala mi njégu mala mi, daldi féetewoo mala mi ci dee.

<sup>35</sup> «Su nagu nit jamee nagu moroomam, ba mu dee, nañu bokk jaay nag wiy dund, séddoo njég gi, te séddoo nag wi dee.

<sup>36</sup> «Waaye su fekke muy nag wu ñu xam ne da daan dañe, te boroomam ñàkk koo wattu, boroomam day feye nag wi dee aw nag wuy dund, daldi féetewoo wi dee.

<sup>37</sup> «Ku sàcc aw nag mbaa ab gàtt, rey ko mbaa mu jaay ko, na feye wenn nag, juróomi nag; benn gàtt, mu feye ko ñeenti gàtt.

## 22

### *Yoonu Aji Sax ji ñoñal na alalu nit*

<sup>1</sup> «Su fekke dañoo jàpp ab sàcc guddi, muy toj kër jaambur, bu ñu ko dóoree, ba mu dee, deesul topp ki dóor, bakkanu sàcc bi, <sup>2</sup> waaye su jant xasee fenk, dees na ko topp bakkanam.

«Ab sàcc nag, bu ñu ko jàppee, na delloo li mu sàcc rekk. Su fekke amu ko, dees koy jaay njaam, ndax càcc gi.

<sup>3</sup> «Su dee ku sàcc mala, muy nag mbaa mbaam mbaa ab gàtt, te ñu fekk ko ciy loxoom, muy dund, na fey ñaaram.

<sup>4</sup> «Ku wacc sag jur, mu ruur toolub jaambur, ba lekk toolam mbaa tookeeru reseñam, na tànn li gën ci meñneefum toolu boppam mbaa tookeeru reseñam, dàmpe ko boroom tool bi mu lor.

<sup>5</sup> «Su fekke ne daño taal sawara, mu jàpp cib ñag, lakkaale pepp mu jóore, mbaa pepp mu ñor mu ñu góobagul, mbaa mu ñoragul, ka taal sawara wa mooy xala fey li lakk.

<sup>6</sup> «Su nit dénkee moroomam xaalis, mbaa alal, ñu sàcce ko ci kër ki denc, te ñu jàpp sàcc bi, na sàcc bi fey ñaari yoon la mu sàcc. <sup>7</sup> Su ñu ko jàppul nag, na boroom kër gi sàkku seede àttekat yi, te waat ne, du moom ci boppam moo aakimoo alalu moroomam. <sup>8</sup> Saa yu ay nit jotee ci mbirum nag mbaa mbaam mbaa gàtt mbaa yére, mbaa lu réer lu mu doon, ñaar ñi solowoo alal ji, muy mala mbaa leneen, nañu yóbbu mbir mi fi kanam àttekat yi. Ku ci àttekat yi teg tooñ, na fey moroom mi ñaari yoon.

<sup>9</sup> «Su nit dénkee moroomam mbaam mbaa nag mbaa gàtt mbaa mala mu mu mana doon, su jur gi deeyee mbaa mu damm mbaa ñu sàcce ko àll te amul seede, <sup>10</sup> li leen di àtte ngiñ lay doon ci Aji Sax ji. Na ka dencoon mala ma giñ ne jèlu ko. Na boroom mala mi it nangu ngiñ li. Ki dencoon du ko fey dara. <sup>11</sup> Waaye su ñu sàccee mala mi ci kërám, moom mi dencoon mooy delloo boroom. <sup>12</sup> Su fekke ne rabu àll a fàdd mala mi, na indi li ci des, muy firnde. Su boobaa du fey dara. <sup>13</sup> Su nit àbbee juru moroomam, jur ga damm mbaa mu dee fu boroom nekkul, na ki àbboon fey. <sup>14</sup> Waaye su ko boroomam fekke, du laaj muy fey. Su fekke ne dafa bindoon mala mi ci boroom, di ko fey, na boroom fèetewoo njég, ga ñu binde woon mala mi, muy peyam.

### *Yoonu Aji Sax ji rafetal na dundin*

<sup>15</sup> «Su góor naxee ab janq bu kenn joxagul warugar, ba tédde ko, na fey

\* **22:17** 22.17 Seetal ci *Sarxalkat yi* 19.26 ak 31.

warugaram, muy jabaram. <sup>16</sup> Su fekke ne baayam dafa lànk, ne du ko ko may it, du tere mu wara fey ci xaalis lu tollook warugaru janq.

<sup>17</sup> «Ab xèrèmkat bu jigéen, buleen ko bàyyi, mu dund\*.

<sup>18</sup> «Képp ku jaxasoo ak mala, dee rekk mooy àtteem.

<sup>19</sup> «Kuy sarxeel jeneen yàlla ju dul Aji Sax ji moom rekk, dees koy faagaagal.

<sup>20</sup> «Ab doxandéem, buleen ko lor, buleen ko not, ndaxte yeen itam ay doxandéem ngeen woon fa réewum Misra.

<sup>21</sup> «Képp ku dib jètun akub jirim, buleen ko néewal. <sup>22</sup> Bu ngeen leen néewalee déy, bu ñu yuuxoo, woo ma wall, dinaa dégg seen yuux moos. <sup>23</sup> Su boobaa sama mer dina tàng, ma reye leen saamar, seeni jabar diy jètun, seeni doom diy jirim.

<sup>24</sup> «Bu ngeen dee lebal ku bokk ci sama ñoñ, di néew-ji-doole ju ngeen dëkkal, buleen def ni ab leblekat, di ko sas ab tegandaay.

<sup>25</sup> «Su ngeen nangoo mbubbam tayle ci seen dëkkandoo, dellooleen ko ko bala jant a so. <sup>26</sup> Moom donq la am ci yére, di ko sànge yaramam; su ko ñàkkee, lu muy sàngoo ba tédde? Te su ma wooyee wall kat, dinaa ci dégg, ndax man Boroom Yërmande laa.

<sup>27</sup> «Man Yàlla, buleen wax lu ñaaw ci man, te seen kilifag askan, buleen wax lu bon ci moom.

<sup>28</sup> «Li tuuroo ci seen sàq yu fees, ak li wale ci seen nalukaay yu rembat, sama cér la; buleen ko yeexe, te seen taaw yu góor it, man ngeen leen di sédde. <sup>29</sup> Seen jur gu gudd ak gu gàtt itam, naka noonu. Juróom ñaari fan lay nekk ak ndeyam, bésuub juróom ñetteel ba, ngeen jox ma ko. <sup>30</sup> Te itam nit ñu sell ngeen wara doon, ñeel ma, kon nag yàppu mala mu ñu fàdde ci àll bi, buleen ko lekk; sànnileen ko xaj yi.

## 23

### *Àtte laaj na njub ak yërmande*

<sup>1</sup> «Buleen siiwal ay fen; buleen lëngoo ak tooñkat, ngir doon seede b naaféqam.

<sup>2</sup> Buleen seet fi mbooloo gëna baree, ngeen topp leen ci jëf ju bon; te it buleen jeng, di topp mbooloo mu gëna bare ci ab layoo, di leen seedeel lu toxal dëgg.

<sup>3</sup> Néew-doole bi it, buleen ko far cib layoo.

<sup>4</sup> «Su ngeen dajeek seen nagu noon mbaa mbaamam mu réer, fexeleen ba délloosil ko ko.

<sup>5</sup> Su ngeen gisee seen mbaamu noon mu ab sëf daaneel, buleen ko romb; dimbalileen seen noon, yékkatil-leen ko ko.

<sup>6</sup> «Buleen jalgati àqu néew-ji-doole cib layoom. <sup>7</sup> Kàddu gu dëgguwul, soreleen ko, te ku deful dara ak kuy def njekk, buleen ko reylu, ndax nit ku bon, duma ko àtte muk àtteb kuy def njekk. <sup>8</sup> Alali ger nag buleen ko nangu, ndax ger day gumbaal njaccaar, di safaan waxi ku nekk ci dëgg.

<sup>9</sup> «Ab doxandéem, buleen ko not; yeen ci seen bopp, jaar ngeen ci ndoxandéem, ndax ay doxandéem ngeen woon ca réewum Misra.

### *Lu jëm ci bési Noflaay*

<sup>10</sup> «Diiru juróom benni at ngeen di ji seen tool, for li ci meññe; <sup>11</sup> waaye atum juróom ñaareel ma, noppal-leen tool bi, booyal ko; seen néew-dooley askan wi man cee lekk, li ci des, rabi àll yi for ko. Seen toolub reseñ ak seen tóokëru oliw itam, naka noonu.

<sup>12</sup> «Diiru juróom benni fan ngeen di liggéey, waaye bésub juróom ñaareel ba, nopplu leen, ndax seen nag ak seen mbaam mana nopplu, seen surga akub doxandéem it mana astandiku.

<sup>13</sup> «Li ma leen wax lépp sàmmléen ko, te turi yeneen yàlla, buleen ko tudd; bumu jibe sax seen gémmiñ.

### *Lu jëm ci bési màggali Israyil*

<sup>14</sup> «Ñetti yoon cim at ngeen may jagleel màggal. <sup>15</sup> Màggalu Mburu mu amul lawiir, wormaal-leen ko. Diiru juróom ñaari fan ngeen ciy lekk mburu mu amul lawiir ni ma leen ko sante, saa yu jamonoom jotee ci weeru Abiib, ndaxte ci ngeen génn Misra. Te itam buleen taxawe

loxoy neen ci sama kanam. <sup>16</sup> Wormaal-leen màggalu bésu Ngóob mi jékka ñore ci tool, yi ngeen di bey, ak màggalu bésu Farmàngu mi ci ndeetel at mi, gannaaw bu ngeen dajalee seen meññeef ba noppi.

<sup>17</sup> Ñetti yoon cim at la seen góor ñépp di teew fi kanam Boroom bi Aji Sax ji.

<sup>18</sup> «Buleen ma rendil benn sarax, di boole deret jaak lu am lawiir, te nebbonu jur gu ngeen ma sarxal ci sama màggal, bumu fanaan ba bët set.

<sup>19</sup> «Ngëneeli meññeef ma jékka ñore ca seen suuf, moom ngeen di yóbbu seen kër Yàlla Aji Sax ji.

«Ab tef, buleen ko togge soowum yaayam.

### *Yàlla yeb na bànni Israyil*

<sup>20</sup> «Te nag man ci sama bopp, maay yebal malaaka, mu di leen sàmmléen ci yoon wi, ba yóbbu leen bérab ba ma waajal.

<sup>21</sup> Bàyyileen ko xel bu baax, déggal ko te bañ koo merloo, ndax du leen baal seen moy, ngir sama tur la taxawe. <sup>22</sup> Waaye su ngeen ko déggalee ba déggal ko, di jëfe li ma leen wax lépp, su boobaa ma noonoo seeni noon, bañ seeni bañaale.

<sup>23</sup> «Bu leen sama malaaka jiitoo, ba yóbbu leen ca réewum Amoreen ña ak Etteen ña ak Periseen ña ak Kanaaneen ña ak Eween ña ak Yebuseen ña, ba ma faagaagal leen ñoom ñépp, <sup>24</sup> su boobaa buleen sujjóotal muk seeni tuur, di leen jaamu, mbaa ngeen di roy seeni aada, waaye yàqteleen seeni tuur te toj tasar seen tuuri doj, ya fa sampe. <sup>25</sup> Jaamuleen ma, man seen Yàlla Aji Sax ji, ma barkeel seen dugub ak seen ndox, boole ci jële wopp ci seen biir. <sup>26</sup> Su ko defee du kenn ku ëmbam di yàqu, mbaa mu tëlee am doom ci seenum réew, te maay matal sèkk seen limu fan.

<sup>27</sup> «Tiitaange laay yebal, mu jiitu leen. Maay tiital mboolem xeet wu ngeen fekki, te maay def seen noon yépp won leen gannaaw. <sup>28</sup> Maay yebal njàqare lu leen jiitu, dàqal leen Eween ñi ak Kanaaneen ñi ak Etteen ñi. <sup>29</sup> Waaye duma leen dàqandoo ci menn at, lu ko moy réew mi gent, rabi àll yi mujj bare lool ci seen kaw.

<sup>30</sup> Ndànk-ndànk laa leen leen di dàqal, ba kera ngeen di yokku, ba nangu réew mi.

<sup>31</sup> «Maa leen di dogal kemug suuf gu dale géēju Barax yi, ba géēju waa Filisti, daleeti ca màndiŋ ma, ba ca dexu Efraat, ndax maay teg waa réew mi ci seeni loxo, ngeen dàq leen. <sup>32</sup> Buleen wóllëranteek ñoom, buleen wóllëranteek seeni tuur. <sup>33</sup> Buñu dëkke seenum réew, lu ko moy muy seen ndëgg-sërëx; ndax dañu leen di xiir ci moy ma, ba ngeen jaamu seeni tuur.»

## 24

### *Yàlla fasoo na kóllère ak bànni Israyil*

<sup>1</sup> Mu neeti Musaa: «Yéegal ñëw fi Aji Sax ji, yaw ak Aaróona ak Nadab ak Abiyu ak juróom ñaar fukki magi Israyil, te ngeen sujjóote nee, dànd ma. <sup>2</sup> Su ko defee yaw rekk yaay dikk, ba jege ma, man Aji Sax ji, waaye ñi ci des buñu jegesi, te it bu mbooloo mi yéegandoo ak yaw.» <sup>3</sup> Musaa dem, yeggeji mbooloo ma kàdduy Aji Sax ji yépp, ak àttey yoonam yépp. Mbooloo ma mépp bokk benn baat, ne ko: «Li Aji Sax ji wax lépp dinanu ko def.» <sup>4</sup> Ba loolu weese Musaa bind na mboolem kàdduy Aji Sax ji. Mu xëy nag suba teel, daldi sàkk ab sarxalukaay ca suufu tund wa, sampaale fa fukki doj ak ñaar, ñeel fukki giiri Israyil yaak ñaar. <sup>5</sup> Ba mu ko defee mu yebal ay ndawi bànni Israyil, ñooña def ay saraxi rendi-dóomal, boole ci rendi yëkk yu ndaw yu ñu def saraxi cant ci biir jàmm, ñeel Aji Sax ji. <sup>6</sup> Musaa jël genn-wàllu deret ja, sotti ci ay ndab, la des ca deret ja, mu xépp ko ca sarxalukaay ba. <sup>7</sup> Ba loolu amee mu jël téere ba ñu bind kóllère ga, jàngal ko mbooloo ma, ñuy dégg. Mbooloo ma ne ko: «Li Aji Sax ji wax lépp dinanu ko def, ba mu mat sëkk.» <sup>8</sup> Musaa jël deret ja, wis-wisal ca kaw mbooloo ma, ne leen: «Lii nag mooy deret ji Yàlla fase kóllère gi mu séq ak yeen te mu aju ci mboolem kàddoom yii.»

<sup>9</sup> Ba loolu amee Musaa yéeg, ànd ak Aaróona ak Nadab ak Abiyu ak juróom ñaar fukki magi Israyil. <sup>10</sup> Ñu daldi gis

Yàllay bànni Israyil. Lu mel ni dëru per bu safiir a nga lal tànkam ya, mel ni asamaan, ndax na mu sete wecc. <sup>11</sup> Waaye njiiti bànni Israyil ña, loxol Yàlla dalu leen. Ñoo gis Yàlla, te gannaaw loolu lekk nañu, naan nañu.

### *Musaa yéeg na ca tund wa*

<sup>12</sup> Aji Sax ji waxati Musaa ne ko: «Yéegal ba ci man ci kaw tund wi te négandiku fa, ma jox la àlluway xeer yi ak yoon wi, ak santaane yi ma ci bind ngir jàngle ko.» <sup>13</sup> Musaa daldi jóg, mook Yosuwe, bëkk-néegam. Musaa nag yéeg ca tundu Yàlla wa. <sup>14</sup> Fekk na mu wax mag ña ne leen: «Xaarleen nu fi, ba nu délsi. Aaróona ak Ur a ngi nii ak yeen; ku ci am mbir mooy àttelu, demal ci ñoom.»

<sup>15</sup> Ba Musaa yéegee ca kaw tund wa, niir wa daa yiir tund wa, <sup>16</sup> leeru Aji Sax ja dal ca kaw tundu Sinayi, niir wa yiir tund wa diiru juróom benni fan. Bésu juróom ñaareel ba Aji Sax ji àddoo ca digg niir wa, woo Musaa. <sup>17</sup> Melow leeru Aji Sax jaa ngay nirook sawara wuy tàkk ca njobbaxtalu tund wa, bànni Israyil di gis. <sup>18</sup> Musaa yéeg ca kaw tund wa ba tàbbi ca biir niir wa, di wéy. Musaa nekk na ca kaw tund wa ñeent fukki guddi ak ñeent fukki bëccëg.

## Lu jëm ci jaamookaay bi

## 25

<sup>1</sup> Aji Sax ji waxati Musaa ne ko: <sup>2</sup> «Waxal bànni Israyil ne leen, ñu indil ma ab jooxe. Ci képp ku am yéeneem ngeen di nangoo sama jooxe, indil ma ko. <sup>3</sup> Jooxe bi ngeen di nangoo ci ñoom di wurus ak xalis ak xàñjar, <sup>4</sup> ak wëñ gu baxa te laal yolet ak wëñ gu xewar ak gu xonq curr ak wëñu lëe, ak kawari bëy <sup>5</sup> ak deri kuuyu xar yu ñu wulli, sóob ko xonqal, ak deri piipi\* ak banti séng†, <sup>6</sup> ak diwu oliw gu ñuy taaloo, ak ndàbb luy xeeñal diwu pal, di xeeñal cuuraay, <sup>7</sup> ak peri onigsë, ak yeneen per yu ñuy tapp ci xar-sànnim sarxalkat bu mag ba ak kiiraayal dënnam. <sup>8</sup> Na ma bànni Israyil defaral kër gu sell, ndax ma dëkk ci seen

\* 25:5 25.5 piipi rabu géej la, bu der ba nooy te ndox du ko dugg. † 25:5 25.5 séng: am na ñu koy wooye kasiya.

biir. <sup>9</sup> Na lépp dëppoo ak li ma lay won. Muy misaalu xaymab jaamookaay bi, di misaalu mboolem ay juntuukaayam, lépp defeleen ko noonu.

*Lu jëm ci gaal giy def àlluway seede si*

<sup>10</sup> «Defarleen gaalu dénku séng, gud-daayam di ñaari xasab<sup>†</sup> ak genn-wàll, yaatuwaayam di xasab ak genn-wàll; taxawaayam di xasab ak genn-wàll. <sup>11</sup> Nañu ko xoob wurusu ngalam. Biir ak biti lañu koy xoob, sàkkal ko kéméju wurus, gu ko wër. <sup>12</sup> Móolalal gaal gi ñeenti lami wurus yu ñuy takk ci ñeenti tànk yi; ñaari lam, wet gii; ñaar wet gee. <sup>13</sup> Yettlul ay banti njàppuy séng te nga xoob bu ci nekk wurus. <sup>14</sup> Su ko defee nga roof njàppu yi ci lam, yi ci weti gaal gi, ngir ñu di ko yóbboo gaal gi. <sup>15</sup> Ci lami gaal gi la njàppu yiy des te bañ cee jógeeti. <sup>16</sup> Yebal ci gaal gi àlluway seede si ma lay jox.

<sup>17</sup> «Defarlul kubeer gu ñuy amale njotlaay gu wurusu ngalam ngir gaal gi. Na guddaayam di ñaari xasab ak genn-wàll, yaatuwaayam di xasab ak genn-wàll. <sup>18</sup> Tëggul ñaari malaakay serub yu wurus te nga féetale leen ak ñaari cati kubeeru njotlaay ga. <sup>19</sup> Defal cat lii ab serub, cat lee ab serub te nanga móolaale kubeer gi ak serub yi ci ñaari cat yi, ñu ànd di benn. <sup>20</sup> Na serub yi tàllal seeni laaf, jëme kaw te nañu yiire kubeeru njotlaay gi seeni laaf. Nañu janoo, te na seeni kanam jublook kubeeru njotlaay gi. <sup>21</sup> Tegal kubeeru njotlaay gi ci kaw gaal gi, gannaaw boo ci yebee àlluway seede si ma lay jox. <sup>22</sup> Foofa laay dajeek yaw; fa tiim kubeeru njotlaay ga, ca diggante ñaari serub ya ca kaw gaalu seede sa, fa laa lay waxe mboolem lu ma lay sant, ñeel bànni Israyil.

*Lu jëm ci taabalu mburum sarax mi*

<sup>23</sup> «Defarlul taabalu bantu séng, gud-daayam di ñaari xasab, yaatuwaayam di xasab, taxawaayam di xasab ak genn-wàll. <sup>24</sup> Xoob ko wurusu ngalam te defal

ko kéméju wurus gu ko wër. <sup>25</sup> Defal ko pegg bu ko wër bu tollu ci ñeenti baaraam, te sàkkal pegg ba wombu wurus, wërle ko. <sup>26</sup> Defarlul ko ñeenti lami wurus te takk lam ya ca ñeenti wet ya, fa fareek ñeenti tànk ya. <sup>27</sup> Na lam yi den-deek pegg bi, ngir mana téye njàppu, yi ñuy yóbboo taabal ji. <sup>28</sup> Yettlul ay njàppu yu bantu séng, nga xoob njàppu yi wurus, ñu di ko yóbboo taabal ji. <sup>29</sup> Sàkkal ko ay ndabam yu tell aki mbàttoom aki njaqam, ak këllam yi ñuy tuuroo. Te wurusu ngalam ngay def lu ci nekk. <sup>30</sup> Tegal mburum teewal mi ci kaw taabal ji, mu nekk ci sama kanam ba fàww.

*Lu jëm ci tegukaayu làmp bi*

<sup>31</sup> «Defarlul tegukaayu làmp bu wurusu ngalam. Tegukaay ba, dees koy tegg. Na taatu tegukaay ba ak per ba ànd aki kaasam aki kàmbóotam aki mbaram, lépp di benn. <sup>32</sup> Juróom benni car ñooy soqikoo ca wet ya, ñetti car ci gii wet, ñett ca ga ca des. <sup>33</sup> Benn car day am ñetti kaas yu bindoo ni tóor-tóoru garabu amànd§, kaas bu ci nekk ànd ak ay kàmbóotam aki mbaram, car ba ca topp am ñetti kaas yu bindoo ni tóor-tóoru garabu amànd, kaas bu ci nekk ànd aki kàmbóotam aki mbaram, juróom benni car, ya soqikoo ca per ba, daj. <sup>34</sup> Gannaaw loolu peru tegukaayu làmp ba itam day am ñeenti kaas yu bindoo ni tóor-tóoru garabu amànd, ànd ak ay kàmbóotam aki mbaram. <sup>35</sup> Ab kàmbóot ay ronuy yi ñaari car, jàpp ca; beneen kàmbóot ronuy ñaari car ya ca topp, jàpp ca, ab kàmbóot ronuy ñaari car ya mujj, jàpp ca, juróom benni car, ya soqikoo ca peru làmp ba, daj. <sup>36</sup> Kàmbóot ya ak car ya dañuy ànd ak tegukaay ba, di benn, lépp doon lu ñu tégge wenn dogu wurusu ngalam. <sup>37</sup> Defarlul juróom ñaari làmpam. Te na làmp ya tege tegin wuy leeral ca kanam tegukaay ba. <sup>38</sup> Ñiimi feyukaayu làmp yi ak andi làmp yi na doon wurusu ngalam. <sup>39</sup> Fanweeri kiloy wurusu ngalam ak juróom\*, ci lees di

<sup>†</sup> **25:10** 25.10 xasab mooy guddaayu loxo, diggante catu baaraamu digg ak conc. § **25:33** 25.33 garabu amànd xeetoo naak gerte-tubaab. \* **25:39** 25.39 Mu yemook benn nattu diisaay bu ñu daan jëfandikoo, ñu di ko wax talañ.



sàkk tegukaayu làmp bi, ak mboolem li mu àndal. <sup>40</sup> Nanga xool te topp misaal, yi ñu la ciy won ci kaw tund wi.

## 26

### *Lu jëm ci sori xaymab jaamookaay bi*

<sup>1</sup> «Xaymab jaamookaay bi nag, defare ko fukki sori rabali lëe, mu ànd ak wëñ gu baxa te laal yolet ak wëñ gu xewar ak gu xonq curr, te nga ñawaale ca nataali serub. <sup>2</sup> Guddaayu sor bu nekk na doon ñaar fukki xasab ak juróom ñett, yaatuwaay ba di ñeenti xasab, te sor yépp ay tolloo. <sup>3</sup> Yii juróomi sor day taqloo ca guddaay ba, juróomi sor ya ca des taqloo noonu. <sup>4</sup> Ñawlul ay takku yu baxa te laal yolet ca catal sor, ba mujj ca benn taqalante ba, te ñawe ko noonu itam ca catal sor, ba jeexal taqalante ba ca des. <sup>5</sup> Juróom fukki takku ngay def ci catal benn sor bi, ak juróom fukki takku ci catal sor, bi jeexal taqalante bi ci des, te na takku yi yemoo. <sup>6</sup> Su ko defee nga defarlu juróom fukki lonku yu wurus yu ñuy jokkle sor yi, ba jaamookaay bi doon benn.

<sup>7</sup> «Te itam ràbblul ay sori kawari bëy, ngir def ko ñaareelu xayma, muy kiiraay ci kaw jaamookaay bi. Fukk ak benn la sor yiy doon. <sup>8</sup> Guddaayu sor bu nekk di fanweeri xasab, yaatuwaay bi di ñeenti xasab, te fukki sor yeek benn yépp ay tolloo dayo. <sup>9</sup> Taqleel yii juróomi sor, juróom benni sor yi ci des it noonu, te juróom benneelu sor bi, nanga ko lem, fi féeteek kanam xayma bi. <sup>10</sup> Sàkkal juróom fukki takku ci catal sor, bi mujj ci benn taqalante bi, ak juróom fukki takku ci catal sor, bi jeexal taqalante bi ci des. <sup>11</sup> Sàkkal juróom fukki lonku yu xàñar te nga we lonku yi ci takku yi, daldi jokkle ñaari taqalante yi, muy benn xayma. <sup>12</sup> Liy lang te éppe ci sori xayma bi nag, di beneen genn-wàllu sor bi, na lange ci gannaaw jaamookaay bi. <sup>13</sup> Waaye benn xasab bi éppe wet gu nekk ci guddaayu sori xayma bi, na lange ci ñaari weti jaamookaay bi, ngir yiire ko ko. <sup>14</sup> Nanga defarlul xayma bi malaanum

deri kuuy yu ñu sóob xonq, ak meneen malaanum deri piipi muy tege ca kawam.

### *Lu jëm ci kenuy jaamookaay bi*

<sup>15-17</sup> «Sàkkalal jaamookaay bi ay làcci bantu séng yuy sampe. Na làcc wu nekk am ñaari kenu yu ñu lëkklee galan yu ndaw, te nga def làcci jaamookaay bi yépp noonu. Na taxawaayu làcc wu nekk di fukki xasab, yaatuwaay bi di xasab ak genn-wàll. <sup>18</sup> Ci wàllu làcci jaamookaay bi, sësaleel ñaar fukki làcc fi féete bëj-saalum, <sup>19</sup> boole kook ñeent fukki tegukaayi xalis yuy ronu kenuy ñaar fukki làcc yi, ñaari tegukaay ay ronu làcc wi jiitu ngir ñaari kenoom yi muy àndal, ñaari tegu topp ci, ronu wépp làcc wu ci topp, ngir ñaari kenoom yi muy àndal. <sup>20</sup> Geneen wetu jaamookaay gi féete bëj-gànnar itam, na doon ñaar fukki làcc <sup>21</sup> ak seeni ñeent fukki teguy xalis, ñaari tegu ronu làcc wi jiitu, ñaari tegu topp ci, ronu wépp làcc wu ci topp. <sup>22</sup> Gannaawu jaamookaay gi féete sowu, sàkkal ko juróom benni làcc; <sup>23</sup> nga teg ci ñaari làcc ngir colli jaamookaay bi ci gannaaw. <sup>24</sup> Nañu àndando ci suuf te lëkkoo ca kaw ci benn lam kepp. Noonu lañuy bindoo ñoom ñaar; ñooy doon ñaari coll yi. <sup>25</sup> Muy juróom ñetti làcc ak seen teguy xalis, di fukki tegu ak juróom benn, ñaari tegu ronu làcc wi jiitu, ñaari tegu topp ci, ronu wépp làcc wu ci topp.

<sup>26</sup> «Nanga sàkk itam ay galani bantu séng: juróomi galan yuy ànd ak làcc yi ci genn wetu jaamookaay bi, <sup>27</sup> ak juróomi galan ngir làcci wet gi ci des, ak juróomi galan ngir làcc, yi ci gannaaw jaamookaay bi, fi féete sowu. <sup>28</sup> Galanu digg bi, ci digg làcc yi lay nekk, dale ko cat ba cat. <sup>29</sup> Xoobal làcc yi wurus te nga sàkkal làcc wu ci nekk ay lami wurus yuy téye galan yi, te nga xoob galan yi it wurus. <sup>30</sup> Su ko defee nga taxawal jaamookaay bi, ni ñu la ko wone ci kaw tund wi.

### *Lu jëm ci rido bi*

<sup>31</sup> «Sàkkal rido bu ñu ràbbe wëñ gu baxa te laal yolet, ak wëñ gu xewar ak gu xonq curr, ak wëñu lëe, ñu ñawaale ca

nataali serub, <sup>32</sup> te nga wékk ko ci ñeenti jëni séng yu ñu xoob wurus, jën yi ànd ak seen wékkukaayi wurus, te nga móolal jën yi ñeenti teguy xalis. <sup>33</sup> Wewal rido bi ci ron lonku yi, su ko defee nga yóbbu gaalu àlluway seede si foofu ci gannaaw rido bi, rido bi xàjjaleel leen bérab bu sell bi, ak bérab bu sell bee sell. <sup>34</sup> Tegal kubeer ga ñuy amale ag njotlaay ca kaw gaal ga àlluway seede sa dence, ca biir bérab bu sell baa sell. <sup>35</sup> Tegal taabal ja ca biti, ca kanam rido ba, te nga teg tegukaayu làmp ba ca wetu běj-saalumu jaamookaay ba, mu jàkkaarlook taabal ja, taabal ja nag, nga tege ko wetu běj-gànnar.

### *Lu jëm ci kiiraayal buntu xayma bi*

<sup>36</sup> «Sàkkalal buntu xayma bi kiiraay lu ñu ràbbe wëñ gu baxa te laal yolet, ak wëñ gu xewar ak gu xonq curr ak wëñu lëe, muy liggéeyu ràbb bu rafet. <sup>37</sup> Nga sàkkal nag kiiraay li juróomi jëni séng, xoob wu ci nekk wurus, seeni wékkukaay di wurus, te nga móolal jën yi juróomi teguy xàñjar.

## 27

### *Lu jëm ci sarxalukaay bi*

<sup>1</sup> «Nanga defare sarxalukaay bi bantu séng, guddaay bi di juróomi xasab, yaatuwaay bi di juróomi xasab; ab kaare la sarxalukaay biy doon, taxawaayam di ñetti xasab. <sup>2</sup> Defaral ko ay béjjénam ci ñeenti koñ yi ci kaw. Béjjén yi, dees koy liggéeyaaleek sarxalukaay ba, ñu ànd di benn, te nanga xoob sarxalukaay bi xàñjar. <sup>3</sup> Sàkkal ay ndabi tibbukaayu dóomam, ak ay ñiitukaayam, ak ay këllam, ak ay cappukaayam aki andam. Defal jumtukaayam yépp xàñjar. <sup>4</sup> Sàkkal ko caax bu ñu tégge xàñjar te nga sàkkal caaxu xàñjar bi ñeenti nopp ci ñeenti collam. <sup>5</sup> Tegal caax bi, mu ronnu peggu sarxalukaay bi, te dale ci suuf ba ci digg sarxalukaay bi. <sup>6</sup> Sàkkalal sarxalukaay bi ay njàppuy bantu séng, te nga xoob lu ci nekk xàñjar, <sup>7</sup> te nga roof njàppu yi ci nopp yi, su ko defee njàppu yi des ci ñaari weti sarxalukaay bi, ngir bu ñu

koy yóbbu. <sup>8</sup> Pax ngay def sarxalukaay bi ci biir; nga defare ko ay xànq yu tàppandaar. Na ñu la ko wone ca kaw tund wa rekk lañu koy defe.

### *Lu jëm ci èttu jaamookaay bi*

<sup>9</sup> «Nanga sàkkalal jaamookaay bi ab ètt: guddaayu ètt bi ci wetu běj-saalum, téeméeri xasabi sori rabal yu ñu ràbbe wëñu lëe moo koy ub, ci genn wet googu. <sup>10</sup> Jëni jaamookaay bi ñaar fukk lay doon, seen ñaar fukki tegu di xàñjar, wékkukaay yeek galani jën yi di xalis.

<sup>11</sup> «Naka noonu it ci wetu běj-gànnar, guddaay bi di téeméeri xasabi sori rabal, ak seen ñaar fukki jën yu seen ñaar fukki teguy xàñjar ronnu, wékkukaay yeek galani jën yi di xalis.

<sup>12</sup> «Yaatuwaayu ètt bi, fi féete sowu, juróom fukki xasabi sori rabal a koy ub, seeni jën di fukk, seeni tegu di fukk.

<sup>13</sup> «Yaatuwaayu ètt bi, fi féete penku ci kanam, juróom fukki xasab la: <sup>14</sup> fukki xasabi sori rabal ak juróom moo ub ètt bi ci googu wet, seeni jën di ñett, seeni tegu di ñett. <sup>15</sup> Wet gi ci des it, fukki xasabi sori rabal ak juróom, seeni jën di ñett, seeni tegu di ñett. <sup>16</sup> Buntu ètt bi nag, na doon lafu ñaar fukki xasab, wu ñu defare wëñ gu baxa te laal yolet, ak wëñ gu xewar ak gu xonq curr ak wëñu lëe, muy liggéeyu ràbb bu rafet, ay jënam di ñeent, seeni tegu di ñeent.

<sup>17</sup> «Jën ya wër ètt ba yépp, dees koy lëkklee galan yu xalis, wékkukaayi jën yi di xalis, seeni tegu di xàñjar.

<sup>18</sup> «Guddaayu ètt bi téeméeri xasab lay doon, yaatuwaay bi di juróom fukk, taxawaayu wet yi di juróomi xasab, sor yi ñu ràbbe lépp di wëñu lëe, tegu yi di xàñjar. <sup>19</sup> Mboolem jumtukaayi yi ñuy liggéeye ci jaamookaay bi, ba ci mboolem xeri xaymaam, ak mboolem xeri ètt bi, lépp xàñjar lay doon.

## **Lu jëm ci santaane, yi sarxalkat yi sasoo**

### *Lu jëm ci diwu làmp bi*

<sup>20</sup> «Yaw nag, santal bànni Israyil, ñu indil la diwu segalu oliw gu set gu ñuy taaloo, ngir làmp yi dëkke tàkk. <sup>21</sup> Ci

biir xaymab ndaje mi\* la Aaróona ak doomam yu góor di teg làmp yi, ci kanam rido bi làq gaalu àlluway seede si, ñuy fanaanee tàkk ngoon ba bêt set, fi kanam Aji Sax ji. Dogal a ngoogu, war bànni Israyil fàww, ñoom ak seen askan.

## 28

### *Lu jëm ci yérey sarxalkat yi*

<sup>1</sup> «Léegi nag yaw, nanga seppee ci bànni Israyil sa mag Aaróona, ak doomam yu góor, nga woo leen fi yaw, ñu di ma sarxalal: Aaróona ak doomam yu góor, Nadab ak Abiyu ak Elasar ak Itamar. <sup>2</sup> Sàkkalal sa mag Aaróona yérey sellnga ngir daraja, ak teraanga bu sarxalkat wara yelloo. <sup>3</sup> Dangay sant mboolem liggéeykat yu xareñ, yi ma feesal xelum xareñte, ñu defar yérey Aaróona, ngir fal ko, mu di ma sarxalal. <sup>4</sup> Yii yére nag lañu koy defaral: kiiraayal dënn ak ab xar-sànni ak ab fëxya, ak mbubb mu gudd mu ñu ràbb, ak kaala ak laxasaay. Yérey sellnga lañuy defal sa mag Aaróona ak doomam yu góor, ngir ñu di ma sarxalal. <sup>5</sup> Liggéeykat yooyu ñooy jël wëñi wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe ngir liggéeye ko.

### *Lu jëm ci xar-sànni mi*

<sup>6</sup> «Nañu ràbbe xar-sànni mi wëñu wurus, ak wëñ gu baxa te laal yolet, ak wëñ gu xewar ak gu xonq curr ak wëñu lëe, ñu ñawaale ci ay nataal. <sup>7</sup> Ñaari ngàlli mbagg yu ñuy faste la xar-sànni miy am, ñu di leen fastee ci ñaari cat yi. <sup>8</sup> Ngañaay liy tege ci kaw xar-sànni mi, ni xar-sànni mi lañu koy liggéeye, mu ànd ak moom, di benn, di wëñu wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe. <sup>9</sup> Nanga jël ñaari peri onigsë, nga ñaas ci turi doomi Israyil yu góor: <sup>10</sup> yii juróom benni tur ci benn per, juróom benni tur yi ci des ci beneen per bi, tur yi toppante, ni boroom tur yi toppantee ci juddu. <sup>11</sup> Ni ko ab liggéeykat bu farewoo mbindum doj di defe, ni lañuy ñaase turi doomi Israyil yu

góor ci kaw ñaari per yi, mu mel ni ni ñuy ñaase xàmmikaay yi ñuy torloo, te nañu we per yi ci ay ñankukaayi wurus. <sup>12</sup> Tappal ñaari per yi ci kaw ngàlli waggi xar-sànni mi, per yi wuutu bànni Israyil, Aaróona gàddu seeni tur ci kaw ñaari ngàlli waggam, fi kanam Aji Sax ji, ngir saxal ag pàttliku.

<sup>13</sup> «Sàkkal ay ñankukaayi wurus, <sup>14</sup> ak ñaari caqi wurusu ngalam, bu ci nekk nga rawaase ko nig buum, ba noppi nga we caq yu rawaasoo yooyu ci ñankukaay yi.

### *Lu jëm ci kiiraayal dënn bi*

<sup>15</sup> «Nanga sàkk kiiraayal dënn bi ñuy jëfoo cib àtte, ñu liggéeyaale ko ay nataal ni xar-sànni mi, te nañu ko ràbbe wëñu wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe. <sup>16</sup> Ab kaare bu ñu lem lay doon, guddaay bi di ñaraleb baaraamu déy ak digg, yaatuwaay bi di ñaraleb baaraamu déy ak digg. <sup>17</sup> Nanga we ay per ci kaw kiiraayal dënn bi, nga def ko ñeenti làngi per. Làng gi jiiu, peru sarduwan ak peru topaas ak peru eskarbukal moo cay nekk; <sup>18</sup> ñaareelu làng gi di peru emëródd ak peru safiir ak peru jamaa; <sup>19</sup> ñetteelu làng gi di peru yasent ak peru agaas ak peru ametistë; <sup>20</sup> ñeenteelu làng gi di peru kirsolit ak peru onigsë ak peru jàspë, te per bu ci nekk, ñankukaayu wurus lees koy wewe. <sup>21</sup> Per yeek turi doomi Israyil ñooy tolloo ab lim: muy fukk ak ñaar, ni tur yi tollu. Dees ciy ñaas tur yi ni xàmmikaayi torlu, ku nekk ak turam, ba fukki giir yeek ñaar daj. <sup>22</sup> «Nanga sàkkal kiiraayal dënn bi ñaari caqi wurusu ngalam yu ciy tege, te rawaasoo ni ay buum, <sup>23</sup> ak ñaari jaaroy wurus yu ñuy takk ci ñaari cati kiiraayal dënn bi ci kaw, <sup>24</sup> te nga nas ñaari buumi wurus yi ci ñaari jaaroy, yi ci cati kiiraay li. <sup>25</sup> Yeneen ñaari cati buumi wurus yi, nga we leen ci ñaari ñankukaay, yi ci kaw ngàlli waggi xar-sànni mi, ci kanam. <sup>26</sup> Sàkkal ko it ñaari jaaroy wurus yu ñuy we ci ñaari cati suufi kiiraay li, fi féete biir, wet gi tafu ci xar-sànni mi. <sup>27</sup> Nga

\* **27:21** 27.21 xaymab ndaje ma: dees na ko wooye jaamookaay ba, ba tey.

sàkkalaat ko yeneen ñaari jaaroy wurus yooy we ci suufu ngàlli xar-sànni mi, fi féete kanam, dendeek sofu ngàll yi, te tiim ngañaayu xar-sànni mi. <sup>28</sup> Kiiraayal dënn bi, buum gu sew gu baxa te laal yolet, moom lees koy téyee, lëkklee ko jaaroy kiiraay leek jaaroy xar-sànni mi, su ko defee kiiraay li dëkke tiim ngañaay li, ba du teqlikook xar-sànni mi. <sup>29</sup> Aaróona nag nay tegoo turi bànni Israyil ci kaw kiiraayal dënn bi ñuy àttee, tur yi tafu ci xolam, saa yuy dugg ci bérab bu sell bi, ngir saxal pàttliki ba fàww fi kanam Aji Sax ji. <sup>30</sup> Nanga yeb ci biir kiiraayal dënn bi ñuy àttee, jomtukaayi tegtal yooyu di Urim ak Tumim\*, ngir ñu tafu ci xolu Aaróona, saa yuy taxawi fi kanam Aji Sax ji. Noonu la Aaróona di dëkke yóbbaaale ci kaw xolam jomtukaayi àtte yu bànni Israyil, saa suy taxawi fi kanam Aji Sax ji, ba fàww.

### *Lu jëm ci yére yu sell, yi ci des*

<sup>31</sup> «Fëxya bi xar-sànni miy tege, lépp, wëñ gu baxa te laal yolet nga koy liggéeyee ba mu daj. <sup>32</sup> Na baatu fëxya bi nekk ci digg bi, mel ni baatu mbubbam xare, te nañu ko ombe omb bu dëgër ba mu daj, ngir du xottiku. <sup>33</sup> Nanga takk ci ombu fëxya bi ba mu daj, ay doomi gërënaat yu ñu defare wëñ gu baxa te laal yolet, ak wëñ gu xewar ak gu xonq curr, te diggante gërënaat yi, nga doxale ci ay jóolooli yu wurus ba omb bi daj. <sup>34</sup> Ab jóoloolib wurus, ab doomu gërënaat, ab jóoloolib wurus, ab doomu gërënaat, ba ombu fëxya bi daj. <sup>35</sup> Na ko Aaróona sol bu nekkee ci liggéeyu sarxaleem. Su ko defee coowal jóolooli yi di jib, ba buy jàll ci biir bérab bu sell bi, jëm fi kanam Aji Sax ji, mbaa mu di ci génne, du tax mu dee.

<sup>36</sup> «Sàkkal dogu wurusu ngalam wu tell, nga ñaas ci mbind mii ni ñuy ñaase mbindum torlu: “Lu sell a ngii, ñeel Aji Sax ji.” <sup>37</sup> Takke ko buum gu baxa te laal yolet ci kaw kaala gi, mu féete kanam. <sup>38</sup> Na tafu ci jëwu Aaróona, mu gaddoo

ko ay wu tukkee ci lu bànni Israyil moy ci wàllu yëf yu sell yi ñu wara sellal ci seen mboolem sarax yu sell. Na nekk fàww ci jëëm, ndax Aji Sax ji nangul leen.

<sup>39</sup> «Mbubb mu gudd mi nag, nanga ko ràbbe wëñu lëe, kaala gi itam di wëñu lëe. Te laxasaay gi, liggéeyu ràbb bu rafet lay doon. <sup>40</sup> Doomi Aaróona yu góor yi itam, sàkkal leen ay mbubb. Sàkkal leen ay laxasaay, te ay kaala it, sàkkal leen ko ngir daraja ak teraanga bu sarxalkat wara yelloo. <sup>41</sup> Nanga solal yooyii sa mag Aaróona, mook ay doomam yu góor, te nga sotti leen diwu pal† gi, dénk leen seen sas. Noonu nga leen di sédde céru sellnga, ñu di ma sarxalal. <sup>42</sup> Sàkkal leen ay tubéyi njiitlaayi lëe, ñu sange ko seeni cér, dale ko ci ndigg li ba ci lupp yi. <sup>43</sup> Na Aaróona aki doomam jiiitloo loolu, bu ñuy dugg ci xaymab ndaje mi, mbaa ñuy jegeji sarxalukaay bi, ngir liggéey ci bérab bu sell bi, ndax ñu baña yóbbe seen bopp mbugal, muy seen dee. Na Aaróona ak askanam sàrtoo loolu fàww.

## 29

### *Lu jëm ci sarxalkat yeek seen xewu colu*

<sup>1</sup> «Lii nag mooy li nga leen di defal, ngir sédd leen céru sellnga, ngir ñu di ma sarxalal: Dangay jël yëkk wu ndaw ak ñaari kuuy yu amul sikk, <sup>2</sup> ak mburu yu mag yu amul lawiir, ak kàmp yu sew yu amul lawiir yu ñu xiiwaale diw, ak mburu yu tàppandaar yu amul lawiir, ñu wis diw ca kaw, te sungufu bele su mucc ayib ngay defare yooyu. <sup>3</sup> Yebal lépp ci benn pañe te jébbale ko, mook yëkk wu ndaw wi ak ñaari kuuy yi. <sup>4</sup> Yóbbul Aaróona ak doomam yu góor, ba ca bunt xaymab ndaje ma, nga sang leen. <sup>5</sup> Nga jël yére yi nag, solal Aaróona mbubb mu gudd mi, ak fëxyab xar-sànni mi, teg ci xar-sànni mi, tegaat ci kiiraayal dënn bi, daldi koy takkal ngañaay liy tege ci xar-sànni mi. <sup>6</sup> Su ko defee nga kaala ko, takkal ko meeteel gu sell gi, fi kanam kaala gi. <sup>7</sup> Te nga jël diwu pal gi, sotti ko ci kaw

\* **28:30** 28.30 Urim boobu ak Tumim ba, sarxalkat baa ko daan jëfandikoo, ngir xam lu Yàlla namm. Xameesul nag nan lañu ko daa jëfandikoo, waaye jombul mu nirook ab tegoo bant. † **28:41** 28.41 diwu pal: seetal ci 30.22-33.

boppam, diw ko. <sup>8</sup> Bu loolu weese, nga ne doomi Aaróona ñu jegesi, nga solal leen seeni mbubb, <sup>9</sup> kaala leen, te takkal Aaróona ak doomam yu góor ay laxasaay. Su ko defee ñu féetewoo céru sarxalkat, muy dogal bu sax dàkk.

«Noonu ngay sase Aaróona ak doomam yu góor. <sup>10</sup> Nanga yóbbu yékk wu ndaw wi ba ci bunt xaymab ndaje mi, Aaróona aki doomam teg seeni loxo ci kaw boppu yékk wi, <sup>11</sup> nga daldi rendi yékk wi fi kanam Aji Sax ji, fi bunt xaymab ndaje mi. <sup>12</sup> Sàkkal ci deretu yékk wu ndaw wi, nga capp ci sa baaraam, diw ci béjjéni sarxalukaay bi, te nga tuur li des ci deret ji ci suufu sarxalukaay bi. <sup>13</sup> Jèlal mboolem nebbon bi sàng yérey biir yi, ak bàjjo bi ci res wi, ak ñaari dëmbéen yi ànd ak nebbon bi ci kaw dëmbéen yi, nga boole lépp def ko saraxu taal-saxaral ci kaw sarxalukaay bi. <sup>14</sup> Seen saraxu póotum bàkkaar a ngoogu. Li des ci yàppu yékk wi, boole kook der bi, ak sébbriit mi, nga génne ko dal bi, lakk ko.

<sup>15</sup> «Menn kuuy mi, jël ko, Aaróona aki doomam teg seeni loxo ci boppu kuuy mi, <sup>16</sup> ba noppi, nga rendi kuuy mi, jël deret ji, xépp ko ci peggi sarxalukaay bi yépp ba mu daj. <sup>17</sup> Kuuy mi, ay dog nga koy dogat, daldi raxas yérey biir yi ak yeel yi, teg ci kaw dog yi ak bopp bi. <sup>18</sup> Lakkal kuuy mépp ci kaw sarxalukaay bi. Saraxu rendi-dóomal la, ñeel Aji Sax ji, di xeeñ xetug jàmm; saraxu sawara la, ñeel Aji Sax ji.

<sup>19</sup> «Jèlal kuuy mi ci des, Aaróona ak doomam yu góor teg seeni loxo ci boppu kuuy mi. <sup>20</sup> Su ko defee nga rendi kuuy mi, sàkk ci deret ji, taqal ci tabanum noppu ndijooru Aaróona ak tabanum noppu ndijooru doomam yi, te nga taqal ci seen baaraamu déyu ndijoor, ak seen baaraamu tànkú ndijoor bu mag. Boo noppee, nga xépp li des ci deret ji ci peggi sarxalukaay bi yépp ba mu daj. <sup>21</sup> Sàkkal ci deret ji ci sarxalukaay bi, ak ci diwu pal gi, nga wis-wisal ko ci kaw yaramu Aaróona ak ci kawi yéreem, wis-wisal ko ci kaw yarami doomam ak ci seen kawi yére. Su ko defee Aaróona sell, mooki

yéreem, ay doomam it sell, ñook seeni yére.

<sup>22</sup> «Kuuy mi, nanga ci génne li ci duuf: calgeen bi, ak nebbon bi sàng yérey biir yi, ak bàjjo bi ci res wi, ak ñaari dëmbéen yeek nebbon bi ci seen kaw, ak tànkú ndijoor bu kanam bi, ndax kuuyum colug sarxalkat yi la. <sup>23</sup> Pañe biy taaje fi kanam Aji Sax ji te def mburu yu amul lawiir nag, nanga ci sàkke menn mburu mu tàppandaar, ak menn mburu mu ñu xiiwe diwu oliw, ak menn mburu mu gëna sew. <sup>24</sup> Nga boole lépp, teg ko ci loxoy Aaróona aki doomam, ñu def ko saraxu yékkati-jébbale, ñeel Aji Sax ji. <sup>25</sup> Nga daldi koy nangoo ci seeni loxo, lakk ko ci kaw sarxalukaay bi, boole kook saraxu rendi-dóomal bi, muy xeeñ xetug jàmm fi kanam Aji Sax ji. Saraxu sawaraa ngoogu, ñeel Aji Sax ji.

<sup>26</sup> «Nanga jël dënn bi bokk ci kuuyum xewu colug Aaróona, nga def ko saraxu yékkati-jébbale, ñeel Aji Sax ji. Loolu moo cay sa wàll. <sup>27</sup> Nanga ber dënn bi ñu def saraxu yékkati-jébbale, mook tànkú jooxe bi ñu def saraxu yékkati-jébbale, te ñu jooxee ko ci kuuyu colu gi, ñeel Aaróona aki doomam. <sup>28</sup> Aaróona aki sëtam la loolu di doon seen cér bu bànni Israyil di warlook ñoom ba fàww, ndax ab jooxe la; jooxe bu bànni Israyil di génnee ci seen saraxi cant ci biir jàmm, muy seenub jooxe, ñeel Aji Sax ji.

<sup>29</sup> «Yérey Aaróona yu sell yi nag, gannaaw bu dëddoo, dees koy féetale ay doomam, ñu fale leen ko ci seen xewu colug carxal. <sup>30</sup> Diiru juróom ñaari fan, ci la sarxalkat bi koy wuutu ci doomam yu góor, di sol yére yooyu, moom miy dugg ci biir xaymab ndaje mi, ci biir bérab bu sell bi.

<sup>31</sup> «Nanga jël kuuyu xewu colu gi, nga baxal yàpp wi ci bérab bu sell. <sup>32</sup> Aaróona aki doomam ñooy lekk yàppu kuuy mi ci bunt xaymab ndaje mi, boole kook mburu mi ci pañe bi. <sup>33</sup> Ñam yooyu, ña koy lekk mooy ña muy seen saraxu njotlaay, keroog ca seen xewu colu, ga ñu leen tabbe ngir sellal leen. Waaye keneen du ci lekk, ndaxte ñam wu sell la. <sup>34</sup> Bu lenn ci yàppu colu gi mbaa lenn ci mburu mi

fanaanee ba bët set, nañu lakk loola ca fanaan ba mu jeex. Deesu ko lekk, ndaxte ñam wu sell la.

<sup>35</sup> «Noonu ngay def ak Aaróona aki doomam, ni ma la ko sante rekk. Diiru juróom ñaari fan ci nga leen di sas, <sup>36</sup> te aw yëkk ngay def saraxu póotum bàkkaar bés bu nekk, muy seen njotlaay, di njotlaay liy setal sarxalukaay bi. Te itam nanga diw sarxalukaay bi ag diw, sellale ko ko. <sup>37</sup> Diiru juróom ñaari fan ngay defal sarxalukaay bi saraxu njotlaayam, sellale ko ko, ba sarxalukaay bi doon lu sella sell. Lépp lu laal sarxalukaay bi day séddu ci sellaayam.

### *Lu jëm ci sarax yi war bés bu nekk*

<sup>38</sup> «Lii mooy li ngay rendi ci kaw sarxalukaay bi: ñaari kuuyi menn at, bés bu nekk ba fàww. <sup>39</sup> Menn kuuy mi, nga rendi ko ci suba, meneen kuuy mi, diggante ngoon, ba jant di so. <sup>40</sup> Sàkkal ñetti kilo, yemook benn fukkeelu nattub sunguf su mucc ayib su ñu xiiwe liitar ak genn-wàll, yemook xaajaatub natt bi ñuy wax xiin ci diwu segalu oliw, ak saraxu tuurub benn liitaru biiñ ak genn-wàll, yemook xaajaatub xiin. Loolu yépp ànd ak menn kuuy mi. <sup>41</sup> Meneen kuuy mi, nga rendi ko diggante ngoon ak jant bu so, booleeti ko ak saraxu pepp mi ak saraxu tuuru bi, ni woon ci suba, muy xeeñ xetug jàmm, di saraxu sawara, ñeel Aji Sax ji. <sup>42</sup> Saraxu rendi-dóomal lay doon bu sax, te war seen maasoo maas fi bunt xaymab ndaje mi, ci kanam Aji Sax ji. Foofu laay dajeeek yeen, te fa laay waxe ak yaw, <sup>43</sup> Foofa laay dajeeek bànni Israyil, bérab ba doxe fa sell, ndax samag leer. <sup>44</sup> Maay sellal xaymab ndaje mi ak sarxalukaay bi, te Aaróona aki doomam, maa leen di sellal, ngir ñu doon samay sarxalkat. <sup>45</sup> Maay dëkk fi digg bànni Israyil te maay nekk seen Yàlla. <sup>46</sup> Su boobaa bànni Israyil xam ne, man Aji Sax ji maay seen Yàlla, ji leen génnee réewum Misra, ngir dëkk fi seen biir. Man maay seen Yàlla Aji Sax ji.

## 30

### *Lu jëm ci sarxalukaayu cuuraay bi*

<sup>1</sup> «Sàkkal ab sarxalukaay bu ñuy taal cuuraay ci kawam. Bantu séng nga koy defare. <sup>2</sup> Guddaay bi di xasab, yaatuwaay bi di xasab; ab kaare lay doon, taxawaay bi di ñaari xasab, ay béjjenam ànd ak moom di benn bant bi. <sup>3</sup> Xoobal wurusu ngalam kaw gi ak wet yi ba mu daj ak béjjén yi, te nga sàkkal ko kéméju wurus gu ko wër. <sup>4</sup> Ñaari noppi wurus nga koy sàkkal ci ron kéméj gi. Féetaleel nopp yi ci ñaari wetam, ñu jàkkaarloo, di téye banti njàppu, yi ñu koy yóbbu. <sup>5</sup> Defal njàppu yi bantu séng te nga xoob njàppu yi wurus.

<sup>6</sup> «Tegal sarxalukaayu cuuraay bi ci kanam rido, bi làq gaalu àlluway seede si ak kubeeru njotlaay, gi ci kaw gaalu àlluway seede si, foofu may dajeeek yaw. <sup>7</sup> Na fa Aaróona taal cuuraay suba su nekk. Buy topptoo làmp yi lay taal cuuraay lu xeeñ li. <sup>8</sup> Bu Aaróona di taal làmp yi diggante ngoon ak jant bu so itam, na taal cuuraay lu xeeñ li. Cuuraay la su ñuy taal ba fàww, ci seen gépp maas fi kanam Aji Sax ji. <sup>9</sup> Deesu ci sarxalukaay lu ñu diglewul, deesu ci rendi saraxu dóomal, deesu ci def saraxu pepp mbaa saraxu tuuru. <sup>10</sup> Na Aaróona di sàkk ci deretu saraxu póotum bàkkaar bi, taqal ci béjjéni sarxalukaay bi, ngir def ko njotlaayal sarxalukaay bi benn yoon cim at. Benn yoon cim at lañu koy defal njotlaayam ci seen gépp maas. Sarxalukaay bu sella sell la, ñeel Aji Sax ji.»

### *Lu jëm ci njot-gi-bakkan*

<sup>11</sup> Aji Sax ji waxati Musaa ne ko: <sup>12</sup> «Boo tolloo ci taxawal limeefu boppi bànni Israyil, na ku nekk ci ñoom fey Aji Sax ji njot-gi-bakkanam ba nga koy lim, ndax menn musiba bañ leena dikkal ci biir lim bi.

<sup>13</sup> «Lii nag mooy li képp ku ñu bind ci limeef yi wara fey: dogu xalis bu diisaay bi di genn-wàllu siikal, bi ñuy natte ci jaamookaay bi, dayo boobu tollook fukki

\* **30:13** 30.13 gera moo doon natt, ba gënoona tuut ci wàllu diisaay, yemook genn-wàllu garaam.

gera\*, mu dib jooxe, ñeel Aji Sax ji. <sup>14</sup> Képp ku bindu ci limeef bi, te am ñaar fukki at, jëm kaw, na fey jooxe bi, ñeel Aji Sax ji. <sup>15</sup> Ki woomle du fey lu ëpp, ki néewle du fey lu yées genn-wàllu siikal, buy fey jooxeb Aji Sax ji ngir njot-gi-bakkanam. <sup>16</sup> Nanga nangoo xaalisu njot-gi-bakkan bi ci bànni Israyil, te nga fëetale ko liggéeyu xaymab ndaje mi. Loolu pàttliku lay doon, ñeel bànni Israyil fi kanam Aji Sax ji, ngir seen njot-gi-bakkan.»

### *Lu jëm ci mbalkam njàpp mi*

<sup>17</sup> Aji Sax ji waxati Musaa ne ko: <sup>18</sup> «Sàkkal mbalkam njàpp mu xànjari, ak tegub xànjaram ngir ñu di ko jàppe. Teg ko ci diggante xaymab ndaje mi ak sarxalukaay bi, te nga duy ko ndox. <sup>19</sup> Aaróona aki doomam di ci tanq, raxase seeni loxo ak seeni tànk. <sup>20</sup> Bu ñuy duggsi ci xaymab ndaje mi, nañu jàpp, ndax ñu baña dee, nañu jàpp itam, bu ñuy liggéeyi fi sarxalukaay bi, di taal saraxu sawara, ñeel Aji Sax ji. <sup>21</sup> Nañu raxas seeni loxo ak seeni tànk, ndax ñu baña dee. Na loolu di dogal bu sax dàkk, ñeel Aaróona ak askanam ci seen gépp maas.»

### *Lu jëm ci diwu pal gi ñuy sellale*

<sup>22</sup> Aji Sax ji waxati Musaa ne ko: <sup>23</sup> «Yaw nag, tànnal ngën-gi-xeeñal; xeetu ndàbb li ñuy wax miir, bu tooy bi, sàkk ci juróomi kilo, xasum kanel mu xeeñ; ñaari kilo ak genn-wàll, yuuru gattax gu xeeñ; ñaari kilo ak genn-wàll, <sup>24</sup> ak xasum kaas; juróomi kilo, yemook juróomi téeméeri siikal, ci siikalu jaamookaay bi, ak juróom benni liitari diwu oliw, yemook benn natt bi ñuy wax xiin. <sup>25</sup> Loolu ngay def diwu pal gu sell gi, te na doon njafaan lu njafaan-kat waajal ba mu baax. Diwu pal gu sell lay doon.

<sup>26</sup> «Nanga ci diw xaymab ndaje mi, diw ci gaal gi àlluway seede si dence, <sup>27</sup> ak taabal ji aki ndabam, ak tegukaayu làmp bi, ak juntuukaayam yépp, ak sarxalukaayu cuuraay bi. <sup>28</sup> Nanga ci diw itam sarxalukaayu saraxu rendi-dóomal bi, ak ndabam yépp, ak mbalkam njàpp mi akub tegoom. <sup>29</sup> Noonu ngay sellale

yooyii, mu daldi doon lu sella sell. Lépp lu laal yooyii day doon lu sell. <sup>30</sup> Aaróona aki doomam itam, nanga leen diw. Noonu nga leen di sellale, ngir ñu doon samay sarxalkat.

<sup>31</sup> «Nanga wax nag bànni Israyil ne leen: “Googu diw sama diwu pal gu sell lay doon, ci seen gépp maas. <sup>32</sup> Doom aadama ju ko jagoowul, deesu ko ko diw, te buleen njafaan lenn lu ni mel, lu ngeen yemale dayoy xeeñal ya ak dayoy diw gu sell gi. Deesu ko def ci yaramu kenn ku ko jagoowul, te buleen njafaan xeeñal yi ciy dem, ci dayo yu tollook dayoy diw gu sell gi, ngir defar lenn lu ni mel. Lu sell la, lu ngeen wara wormaal sellngaam. <sup>33</sup> Képp ku njafaan lu ni mel, mbaa mu taqal ci yaramu ku ci bokkul, dees koy dagge ci biir bànni Israyil.”»

### *Lu jëm ci cuuraay li*

<sup>34</sup> Aji Sax ji waxati Musaa ne ko: «Wutal nag xeeñal yii: ndàbbu estaagte, ak ndàbbi galbanom, ak xori onigsé yu xeeñ, ak cuuraay-liban lu raxul, te yooyu yépp tolloo dayo. <sup>35</sup> Def ko njafaan lu njafaan-kat waajal ba mu baax, xorom ko, mu set, sell. <sup>36</sup> Sàkk ci, wol ko ba mu mukk, nga teg ko fi kanam gaal gi àlluway seede si dence, fi biir xaymab ndaje mi, fi may dajeek yaw. Loolu lu sella sell la lu ngeen wara wormaal. <sup>37</sup> Waaye cuuraay loolu ngay njafaanlu nag, bu ci njafaanal sa bopp ci dayoy xeeñal yu ni tollu. Lu sell la lu ngeen wara wormaal, ñeel Aji Sax ji. <sup>38</sup> Képp ku defar lenn lu ni mel, ngir di ko xeeño, dees koy dagge ci bànni Israyil.»

## 31

### *Tabb nañu ay liggéeykat yu xareñ*

<sup>1</sup> Aji Sax ji waxati Musaa ne ko: <sup>2</sup> «Gisal, maa woo Besalel ci turam. Besalel, Uri mooy baayam; Uri, Ur Yudeen bi di baayam. <sup>3</sup> Maa ko feesale xelum Yàlla, ak xareñte ak déggini ak xam-xam, ak manoorey bépp xeetu liggéey, <sup>4</sup> ngir muy nas ay liggéeyi wurus ak xalis ak xànjari, <sup>5</sup> di yett per yu muy tapp, di yett bant, di liggéey lu nekk. <sup>6</sup> Maa ngii di ko tofal Oliyab doomu Ayisamaag Daneen bi, te

itam mboolem ñi xarala, may naa leen xelum xarala, ngir ñu ànd def mboolem lii ma la sant: <sup>7</sup> Muy xaymab ndaje mi, ak gaalu àlluway seede si, ak kubeeru saraxu njotlaay gi ci kawam, ak mboolem jumtukaayi xayma bi; <sup>8</sup> taabal ji, ak ndab yi, ak tegukaayu làmpu wurusu ngalam beek yëfam yépp, ak sarxalukaayu cuuraay bi, <sup>9</sup> ak sarxalukaayu rendi-dóomal bi, ak ndabam yépp, ak mbalkam njàpp mi akub tegoom, <sup>10</sup> ak itam yére yu yànj yi, yére yu sell yi ñeel Aaróona sarxalkat bi ak yérey doomam, yi ñuy sol, di sarxale, <sup>11</sup> ak diwu pal gu sell gi, ak cuuraay lu xeeñ li ñeel bérab bu sell bi. Loolu ma la sant lépp, nañu ko defe noonu.»

### *Lu jëm ci solob bésub Noflaay*

<sup>12</sup> Aji Sax ji waxati Musaa ne ko: <sup>13</sup> «Waxal bànni Israyil ne leen: “Fexeleen rekk ba sama bési Noflaay, ngeen di ko wormaal, ndax bésub Noflaay da di firnde sama digganteek yeen ak seen askan, ngir ngeen xam ne man Aji Sax ji maa leen ber, sellal leen. <sup>14</sup> Wormaal-leen bésub Noflaay ndax lu sell la, ñeel leen. Ku ko teddadil, dee rekk mooy àtteem: képp ku ci liggéey, kooku dees na ko dagge ci biiri bokkam. <sup>15</sup> Juróom benni fan lees wara liggéey, waaye bésub Noflaay bay juróom ñaareel ba, bés bu sell la, bésub Noflaay bu mat sèkk, ñeel Aji Sax ji. Képp ku liggéey bésub Noflaay, dee rekk mooy àtteem. <sup>16</sup> Na bànni Israyil wormaal bésub Noflaay, nañu sàmm bésub Noflaay, ñook seen askan. Kóllère la gu sax dàkk. <sup>17</sup> Sama diggante laak bànni Israyil, te firnde la ju sax dàkk, ndax ci juróom benni fan la Aji Sax ji sàkk asamaan ak suuf, bésub juróom ñaareel ba, mu dal-lu, daldi yeeslu.»»

<sup>18</sup> Ba Yàlla noppee wax ak Musaa ca kaw tundu Sinayi, da koo jox ñaari àlluway doj yu mu binde loxol boppam.

## 32

### *Israyil fecci na kóllère*

<sup>1</sup> Ba mbooloo ma gisee Musaa yàgg lool te wàccul tund wa, dañoo songandoo Aaróona, ne ko: «Ayca, sàkkal nu yàlla

ju nu jiite, ndax Musaa mii nu génne réewum Misra kat, xamunu lu ko dal.»

<sup>2</sup> Aaróona ne leen: «Tekkileen boog, indil ma seen jaaroy wurusi nopp, yi ci seeni jabar ak seeni doom, góor ak jigéen.»

<sup>3</sup> Ba loolu amee mbooloo mépp tekki seen jaaroy wurusi nopp, indil Aaróona. <sup>4</sup> Mu nangoo ko ci seeni loxo, liggéey ko ba sàkk ci sèllu wu ñu móol. Ci kaw loolu ñu naan: «Bànni Israyiloo, seen Yàllaa ngii, moo leen génne réewum Misra!»

<sup>5</sup> Aaróona gis la xew, daldi tabax ci kanam sèllu wi ab sarxalukaay. Mu daldi yéene, ne: «Èllëg màggal la, ñeel Aji Sax ji.»

<sup>6</sup> Ca èllëg sa mbooloo ma teela xëy, ñu def ay saraxi rendi-dóomal, ak ay saraxi cant ci biir jàmm. Ba mu ko defee ñu toog, di lekk ak a naan, nes tuut ñu jóg, di mbumbaay.

<sup>7</sup> Aji Sax ji nag waxati Musaa ne ko: «Gaawal wàcc, ndax sa mbooloo, ma nga génne réewum Misra def nañu yàqute.

<sup>8</sup> Jàdd nañu xaat yoon wa ma leen tegoon. Dañoo sàkkal seen bopp sèllu wu ñu móol, di ko sujjóotal ak a sarxalal, naan: “Israyiloo, seen yàllaa ngii, moo leen génne réewum Misra!”»

<sup>9</sup> Aji Sax ji dellu ne Musaa: «Maa gis askan wii, askan wu dëgër bopp a ngii!

<sup>10</sup> Léegi seetaan ma rekk, samam sànj tàkkal leen, ba ma faagaagal leen, te du tee ma def la askan wu mag.» <sup>11</sup> Musaa nag tinu Yàllaam Aji Sax ji ne ko: «Aji Sax ji, ana lu waral sam sànj di tàkkal sa ñoñ ñi nga génne réewum Misra ci sa kàttan gu màgg ak sa dooley loxo? <sup>12</sup> Ana lu jar Misra di wax naan: “Musiba mi mu leen naraloon, ba mu leen di yiwi de, du lenn lu moy rey leen ba ñu jeex ca tund ya, ba fare leen kaw suuf sépp.” Ngalla dëddul sa sawaras sànj te nga fomm musiba mi nga naral sa ñoñ. <sup>13</sup> Bàywil xel Ibraayma ak Isaaxa ak Israyil, sa jaam ñi nga giñaloon ci sa bopp, ne leen: “Maay yokk seen askan ni biddiwi asamaan, te mboolem réew mii ma waxoon, maa koy jox seen askan, ñu moom ko fàww.»» <sup>14</sup> Ba loolu amee Aji Sax ji fomm musiba ma mu waxoon ne dina ko teg ñoñam.

### *Merum Musaa am na njeexital*



15 Ba mu ko defee Musaa walbatiku, wacce ca tund wa, mook ñaari àlluway seede ya ca loxoom, àlluwa yu ñu bind ñaari wet yépp, biir ak biti. 16 Àlluwa ya, liggéeyu Yàllaa, mbind ma di mbindum Yàlla mu ñaase ca kaw àlluwa ya. 17 Ci kaw loolu Yosuwe dégg coowal mbooloo may xaacu. Mu ne Musaa: «Coowal xaree ngoog ca dal ba!» 18 Musaa ne ko: «Coow loolu de du bàkku yu njàmbaar waral, du jooytu yu jéll sabab, woyi mbumbaay daal laa dégg.»

19 Ba Musaa jubee dal ba, ba gis sèllu wa ak pecc ma, mer mu ne jippét tàkk la ko def, mu sànni àlluwa ya mu ñàbboon, mu ne tasar ca suufu tund wa. 20 Ci kaw loolu mu jèl sèllu, wa ñu sàkk, lakk ko, wol ko ba mu mukk, mu suy cim ndox, daldi koy naanloo bànni Israyil.

21 Musaa nag ne Aaróona: «Lan la la mbooloo mii def, ba nga yóbbe leen gii moy gu réy?» 22 Aaróona ne ko: «Sang bi, rikk bul mer, yaw ci sa bopp xam nga ni mbooloo mii yeboo ci mbon. 23 Dañu ma ne: “Sàkkal nu yàlla ju nu jiite, ndax Musaa mii nu génne réewum Misra kat, xamunu lu ko dal.” 24 Ma ne leen: “Ku takk wurus, tekkil, indi!” Ñu jox ma, ma sànni ci sawara wi, sèllu wii génne ci!»

25 Musaa nag gis ni mbooloo mi ràkkaajoo, ndax fekk na Aaróona bay-bayal leen, ba ñu ràkkaaju, ba ku leen doon fexeel man leena ree. 26 Musaa taxaw ca buntu dal ba, ne: «Ku ànd ak Aji Sax ji, fii ci man!» Leween ñépp dikk, yéew ko. 27 Mu ne leen: «Aji Sax ji, Yàllay Israyil dafa wax ne: “Na ku nekk teg saamaram ci luppam, te ngeen wër dal bi bépp buntoo bunt, ba mu daj. Reyleen ñépp; doomu ndey, xarit ak jegeñaale.”» 28 Ba loolu amée Leween ña def la leen Musaa sant. Ni daanu ci bànni Israyil bésu keroog tollu na ci ñetti junniy góor. 29 Musaa nag ne: «Bés niki tey sasoo ngeen Aji Sax ji, gannaaw yeena dal ci kaw doom, dal ci kaw doomu ndey. Kon bésu tey tegoo ngeen barkeb Aji Sax ji.»

### *Musaa tinu na Yàlla*

30 Ca èllég sa Musaa ne mbooloo ma: «Yeen de bàkkaar ngeen bàkkaar bu réy, waaye maa ngi nii di yéeg, jëm ci Aji Sax ji. Jombul ma jotul leen seen bàkkaar.»

31 Ba mu ko defee Musaa dellu ci Aji Sax ji, ne ko: «Éey Aji Sax ji, mbooloo mii de moy nañu la lool, ba ñu sàkkalee seen bopp ay yàllay wurus. 32 Léegi nag, soo leen dee baal seen bàkkaar, aa... Lu ko moy kat, far ma rekk ci téere bi nga bind\*.» 33 Aji Sax ji ne Musaa: «Ki ma moy, kooku donñ laay far ci sama téere. 34 Yaw daal demal rekk, yóbbu mbooloo mi fa ma la waxoon, te sama malaakaa ngii di la jiituji. Waaye keroog sama bésu mbugal, maay mbugal mbooloo mi ndax seen bàkkaar.»

35 Gannaaw gi Aji Sax ji mbugal na mbooloo ma ndax la ñu sàkkloo woon Aaróona aw sèllu.

## 33

### *Yàlla yebal na Musaa*

1 Aji Sax ji waxati Musaa ne ko: «Doxal jóge fii, yaak mbooloo mi nga génne réewum Misra, ngeen dem ca réew ma ma giñaloon Ibraayma ak Isaaxa ak Yanqóoba, ne leen seen askan laa koy jox. 2 Maay yebal malaaka mu jiitu la, te maa fay dàqe Kanaaneen ña ak Amoreen ña ak Etteen ña ak Periseen ña ak Eween ña ak Yebuseen ña, 3 ba ngeen dugg ca réew mooma meew maak lem ja tuuroo. Waaye duma ànd ak yeen, lu ko moy dinaa leen faagaagal ci yoon wi, ndax askan wu dègër bopp ngeen.» 4 Ba mbooloo ma déggee kàddu yu dègër yooyu, dañoo daldi toroxlu, ba kenn takkootul gànjar.

5 Fekk na Aji Sax ji wax Musaa ne ko: «Waxal bànni Israyil ne leen, ñoom askan wu dègër bopp lañu. Su ma àndoon ak ñoom ab diir rekk, dinaa leen faagaagal. Kon nag nañu tàggook seeni gànjar, ba ma seet nu may def ak ñoom.» 6 Bànni Israyil a nga dale teqlikook seeni gànjar ca tundu Oreb.

### *Yàlla feeñ na cib xayma*

\* 32:32 32.32 téere bi ñuy wax fii jombul mooy lim, ya Yàlla bind turi nit ña bokk ca mbooloo ma. Nit ku ñu masa far ca yooyu lim bokkato ca ñoñi Yàlla.

<sup>7</sup> Musaa da daan toxal xayma bi, samp ko fu sorewaatook dal bi, ca biti. Mu di ko wooye xaymab ndaje mi\*. Ku amaan lu muy diis Aji Sax ji, da daan génn dal bi, dem ba ca xaymab ndaje mooma ca biti. <sup>8</sup> Bu Musaa jëmaan ca xayma ba, mbooloo mépp ay daldi taxaw, ku nekk tollu ci sa bunt xayma, di ko seetaan, ba mu dugg ca biir xayma ba. <sup>9</sup> Te bu Musaa duggaan ca xayma ba, taxaaru niir wa day wàcc, ne tekk ca bunt xayma ba, fekk Aji Sax jaa ngay wax ak Musaa. <sup>10</sup> Su ko defee bu mbooloo ma mépp gisee taxaaru niir wa taxaw ca bunt xayma ba, ñoom ñépp ay daldi sujjóot, ku nekk ca sa bunt xayma. <sup>11</sup> Aji Sax ji da daan wax ak Musaa ne ko jàkk, mu ne ko jàkk, ni nit di waxe ak moroomam rekk. Bu ca Musaa jógee, daldi dellu ca dal ba, waaye bëkk-néegu Musaa, ngóor sa Yosuwe doomu Nuun daawul génn biir xayma ba.

### *Musaa layool na bànni Israyil*

<sup>12</sup> Musaa nag ne Aji Sax ji: «Waaw, yaw de yaa ngi ma naa ma yóbbu mbooloo mii, waaye xamaloo ma kan ngay yebal, mu ànd ak man. Yaa ma waxoon it ne ma: “Maa la xam ci saw tur, te it daj nga sama yiw.” <sup>13</sup> Gannaaw daj naa saw yiw nag, rikk xamal ma li nga namm, ba ma xam la. Su ko defee ma man di daj saw yiw. Te ngalla jàppal ne xeet wii kat, ñoo di sa ñoñ.»

<sup>14</sup> Aji Sax ji ne ko: «Man ci sama bopp maay ànd ak yaw te maa lay noppal.»

<sup>15</sup> Musaa ne ko: «Soo demul yaw ci sa bopp kay, bu nu jële fii! <sup>16</sup> Nees di xame ne daj naa saw yiw, maak sa ñoñ, te fekk ànduloo ak nun, ba nu doon, maak sa ñoñ, ñu ràññiku ci biir mboolem xeet yi ci kaw suuf?»

<sup>17</sup> Aji Sax ji ne Musaa: «Loolu nga wax, moom laa lay defal, ndax daj nga samaw yiw, te it maa la xam ci saw tur.»

<sup>18</sup> Musaa teg ca ne ko: «Ngalla may ma nag ma niir sag leer!» <sup>19</sup> Aji Sax ji ne ko: «Dinaa rombale sama gépp mbaax fi sa kanam, tey biralaale turu Aji Sax ji fi sa kanam. Maay baaxe ku ma neex, te maay

ñeewante ku ma neex.» <sup>20</sup> Mu teg ca ne ko: «Doo mana gis sama kanam nag, ndax doom aadama du ma gis ba noppi di dund.» <sup>21</sup> Ci kaw loolu Aji Sax ji ne ko: «Xoolal fii ci sama wet, taxaweel ci kaw doj wi. <sup>22</sup> Bu sama leer di romb, maa lay làq fi xar-xaru doj wi, yiiraale la sama loxo, ba jàll, <sup>23</sup> doora dindi sama loxo, nga gis sama gannaaw, waaye sama kanam, maneesu koo gis.»

## 34

### *Lu jëm ci àlluway doj yu bees yi*

<sup>1</sup> Aji Sax ji waxati Musaa ne ko: «Yettal ñaari àlluway doj yu mel ni yu jëkk ya, ma bind ci kàddu ya woon ca àlluwa yu jëkk, ya nga toj. <sup>2</sup> Nanga waajal èllég, te nga teela yéegsi kaw tundu Sinayi wii, ba teewsi fi man ci njobbaxtalun tund wi. <sup>3</sup> Bu kenn ànd ak yaw, te bu kenn xand fenn kaw tund wi. Jur gi sax bumu forsi ci suufu tund wi, du gu gudd, du gu gàtt.» <sup>4</sup> Musaa nag yett ñaari àlluway doj yu mel ni yu jëkk ya, ba noppi teela xëy, yéegi ca tundu Sinayi, na ko ko Aji Sax ji sante. Ma nga ñàbb ñaari àlluway doj ya.

<sup>5</sup> Aji Sax ji nag wàcc ci biir aw niir, taxaw ak Musaa foofa, daldi biral turam, ne: «Aji Sax ji.» <sup>6</sup> Ci kaw loolu Aji Sax ji romb fa kanam Musaa, di biral naan: «Aji Sax jee, Aji Sax ji, Yàlla jiy yërëm, di yéwéne, mer ma diib, ngor gaak kóllère ga bare. <sup>7</sup> Keey saxal ngor ba ci junniy maas, di bale tooñ ak moy ak bàkkaar, te du ñàkka topp ku tooñ, ag tooñaangeem, xanaa di topp doom tooñu waajur, ba ca sët yaak sètaat ya.» <sup>8</sup> Ba loolu amee Musaa ne gurub fa suuf, sujjóot, <sup>9</sup> ne ko: «Éey Boroom bi, ndegam daj naa saw yiw, rikk àndal ak nun rekk, Boroom bi, ak li mbooloo miy dëgër bopp lépp! Jéggal nu sunu ñaawtéef ak sunu bàkkaar rekk, te nga séddoo nu.»

### *Aji Sax ji yeasal na kóllère gi*

<sup>10</sup> Aji Sax ji ne ko: «Maa ngi nii di fas kóllère ak yeen. Ci sa kanam mbooloo mépp laay def ay jaloore yu kenn masula amal ci àddina sépp, ak ci askan yépp,

\* 33:7 33.7 Gannaaw ga mbooloo ma defar jaamookaay, di ko wooye xaymab ndaje mi ba tey.

te mbooloo, mi nga nekk ci seen biir mépp ay gis jaloorey Aji Sax ji, jaloore ju raglu ji ma lay defal. <sup>11</sup> Bàyyileen xel bu baax li ma leen sant bésuub tey jii. Maa ngii di leen dàqal Amoreen ñi ak Kanaaneen ñi ak Etteen ñi ak Periseen ñi ak Eween ñi ak Yebuseen ñi. <sup>12</sup> Moytuleena wóllèranteek niti réew ma ngeen jëm, bala ñoo doon ndëgg-sërëx ci seen biir. <sup>13</sup> Seeni sarxalukaay kay ngeen di màbb, seen tuuri doj, ngeen rajaxe, seen xer yi ñuy jaamoo Asera tuur mi, ngeen gor, <sup>14</sup> ndax waruleena jaamu jeneen yàlla, ngir Aji Sax ji, turu “Ku fiir ki” lay wuyoo, te Yàlla ju fiir la. <sup>15</sup> Buleen wóllèranteek niti réew ma, lu ko moy dinañu gànctook seeni tuur, rendil seeni tuur ay sarax, woo leen ca, ngeen lekk ca seeni sarax. <sup>16</sup> Te it bu ngeen jëlalee seeni doom jabar ca seen doom yu jigéen, seen jigéen ñooña dinañu gànctook seeni tuur, ba xiir seen doom yu góor ci gànctook seen tuur yooyu.

<sup>17</sup> «Ay tuur yu ñu móole weñ, buleen ko móol.

<sup>18</sup> «Màggalug ayu bésu Mburu mu amul lawiir, wormaal-leen ko. Diiru juróom ñaari fan ngeen ciy lekk mburu mu amul lawiir, ni ma la ko sante bu àppam taxawee ci weeru Abiib, ndaxte weeru Abiib ngeen génne fa Misra.

<sup>19</sup> «Bépp taaw bu góor maay boroom, ba ci lépp lu góor lu jur taawloo, muy nag mbaa gàtt. <sup>20</sup> Waaye lu góor lu mbaam taawloo, joteleen ko ab gàtt, mu wuutu ko. Su ngeen ko jotewul lu ko wuutu, dammleen loos wi. Képp kuy taaw bu góor ci seeni doom it, nangeen ko jot. Te itam bu kenn taxawe loxoy neen fi sama kanam.

<sup>21</sup> «Juróom benni fan nag ngeen di liggéey, waaye bésuub juróom ñaareel ba, dal-luleen. Bu ngeen doon bey, bu ngeen doon góob, dal-luleen.

<sup>22</sup> «Màggalug ayi bési Ngóob, nangeen ko wormaal, bu ngeen di góob gubi bele yi jékka ñor, màggalu bésu Farmàngu mi ci ndeetel at mi itam, màggal-leen ko.

<sup>23</sup> Ñetti yoon cim at la seen góor ñépp di teew fi kanam Boroom bi Aji Sax ji, Yàllay Israyil. <sup>24</sup> Maa leen di dàqal ay xeet, ba

yaatal seen suuf, te diiru ñetti yoon yi ngeen di teewi cim at fi kanam Yàlla Aji Sax ji, kenn du ci wuta nangu seenum réew.

<sup>25</sup> «Buleen rendi sama sarax, di boole deret jeek lu am lawiir, te gàttu saraxu bésuub Mucc, bu ci dara fanaan ba bët set.

<sup>26</sup> «Ngëneeli meñneef mi jékka ñore ci seen suuf, nangeen ko yóbbu seen kër Yàlla Aji Sax ji.

«Buleen togge ab tef soowum yaayam.»

<sup>27</sup> Aji Sax ji teg ca ne ko: «Nanga bind yii santaane, ndax ci kaw santaane yii laa fasook yaw kóllère, yaak bànni Israyil.»

<sup>28</sup> Foofa la Musaa des ak Aji Sax ji diiru ñeent fukki guddi ak ñeent fukki bëccëg te lekkul, naanul. Aji Sax ji nag bind ci àlluwa yi, fukki santaane yi lal kóllère gi.

### *Musaa dellu na dal ba*

<sup>29</sup> Ci kaw loolu Musaa wàcc tundu Sinayi, ñàbb ñaari àlluway seede sa. Naka la Musaa di wacce ca tund wa, deru kanam ga di lèrxat te yégu ko. Booba ñaaroom baak Yàlla moo waral loola. <sup>30</sup> Naka la Aaróona ak bànni Israyil gépp xoolaat Musaa, gisuñu lu moy deru kanam gay lèrxat, ñu daldi koy ragala jege. <sup>31</sup> Musaa nag woo leen, Aaróona ak njiiti mbooloo ma yépp dikk, mu wax ak ñoom. <sup>32</sup> Gannaaw loolu bànni Israyil ga ca des gépp doora jegesi, mu dénk leen mboolem la Aji Sax ji waxoon ak moom ca kaw tundu Sinayi. <sup>33</sup> Musaa wax ak ñoom ba noppi, daldi muuroo kaala, làqe ko kanamam.

<sup>34</sup> Saa yu Musaa teewiwaan fa kanam Aji Sax ji, ngir wax ak moom, day muri kaala gi ba ba muy génne; bu génnee, yegge bànni Israyil la ñu ko sant. <sup>35</sup> Bànni Israyil nag di gis kanamu Musaa ak na deru kanam gay lèrxate. Su ko defee Musaa dellu muuruwaat, làq kanamam, ba ba muy demaat, ngir wax ak Aji Sax ji.

## **Bànni Israyil yékkati na jaamookaay ba**

### **35**

#### *Bésuub Noflaay du bésu liggéey*

<sup>1</sup> Musaa nag dajale mbooloom bànni Israyil mépp. Mu wax leen ne leen: «Lii

mooy li Aji Sax ji santaane, ngir ñu def ko: <sup>2</sup> Juróom benni fan lees di liggéey, waaye bésuub juróom ñaareel ba, seen bésuub Noflaay bu sell bu mat sèkk la, ñeel Aji Sax ji. Képp ku ci liggéey lenn, dees koy rey. <sup>3</sup> Buleen jafal sax sawara fenn ci seeni dèkkuwaay, ci bésuub Noflaay.»

*Ay sarax war na ci jaamookaay bi*

<sup>4</sup> Musaa dellu wax ak mbooloom bànni Israyil mépp ne leen: «Lii mooy li Aji Sax ji santaane.

<sup>5</sup> «Sàkkleen ci seen alal ab jooxe bu ñeel Aji Sax ji. Képp ku am yéeneb xolam, na indi jooxeb Aji Sax ji: wurus ak xalis ak xànjari, <sup>6</sup> ak wëñ gu baxa te laal yolet, ak wëñ gu xewar, ak gu xonq curr, ak wëñu lëe, ak kawari bëy <sup>7</sup> ak deri kuuy yu ñu suub xonq, ak deri piipi, ak banti séng, <sup>8</sup> ak diwu làmp, ak ay xeeñal ngir diwu pal geek cuuraay lu xeeñ li, <sup>9</sup> ak ay peri onigsë ak yeneen per yuy tappe ci xar-sànni meek kiiraayal dënn bi.

<sup>10</sup> «Mboolem ku xareñ ci yeen, na ñew, ngeen def li Aji Sax ji santaane lépp: <sup>11</sup> jaamookaay bi ak xaymaam ak kiiraayam aki keppoom aki làccam, ak galan yeek jën yeek tegu yi, <sup>12</sup> ak gaal geek ay njàppoom ak kubeer gi ñuy amale ag njotlaay, ak rido bi ko làq, <sup>13</sup> ak taabal jeeki njàppoom ak ndabam yépp ak mburum teewal mi, <sup>14</sup> ak tegukaayu làmp bi, aki juntuukaayam aki làmpam ak diwu làmp bi, <sup>15</sup> ak sarxalukaayu cuuraay bi aki njàppoom, ak diwu pal gu sell gi, ak cuuraay lu xeeñ li; ak kiiraayal buntu jaamookaay bi, <sup>16</sup> ak sarxalukaayu rendi-dóomal bi, ak caaxub xànjaram aki njàppoom ak li muy àndal lépp; mbalkam njàpp mi akub tegoom, <sup>17</sup> ak sor yi yéew jaamookaay bi aki jënam aki tegoom, ak lafu buntu ètt bi, <sup>18</sup> ak xeri jaamookaay bi, ak jën yi yéew ètt bi ak seeni buum, <sup>19</sup> ak yére yu yànj yi ñuy liggéeye ci bérab bu sell bi, yére yu sell yu Aaróona, sarxalkat bi, ak yére doomam, yi ñuy sarxalee.»

<sup>20</sup> Ci kaw loolu mbooloom bànni Israyil gépp bàyyikoo fa Musaa. <sup>21</sup> Ba mu ko defee mboolem ña ca am pastéefu xol ak mboolem ña ca seen xel xiir, ñépp

dikk, indi jooxeb Aji Sax ji ngir liggéeyu xaymab ndaje meek bépp liggéey bu mu laaj, ngir itam yére yu sell yi. <sup>22</sup> Góor ak jigéen bokk dikk, mboolem ñi am yéeneb xolam, mboolem ñi bégga indi wurus, defal ko Aji Sax ji saraxu yékkati-jébbale; ñii indi ay lam, ñii jaaroy nopp, ñii jaaroy loxo, ñii ay caq, gànjari wurus yu nekk rekk. <sup>23</sup> Te it mboolem ñi dencoon wëñ gu baxa te laal yolet, ak wëñ gu xewar, ak gu xonq curr ak wëñu lëe, ak kawari bëy mbaa deri xar yu ñu suub xonq, mbaa deri piipi, ñoom ñépp a indi la ñu dencoon. <sup>24</sup> Képp ku namma jooxe xalis mbaa xànjari, jooxeel nga ko Aji Sax ji, te itam képp ku dencoon bantu séng bu jëm ci mboolem liggéeyu sarxal bi, indi nga bant bi. <sup>25</sup> Ci biir loolu jigéen ñu xareñ ñépp ecce seeni loxo, ngir waajal wëñ gu baxa te laal yolet, ak wëñ gu xewar, ak gu xonq curr ak wëñu lëe, ñu boole, indi. <sup>26</sup> Mboolem jigéen ñi ko mane te am yéeneem itam, daldi ècc kawari bëy. <sup>27</sup> Njiit yi nag indi ay peri onigsë ak yeneen per yiy tappe ci xar-sànni meek kiiraayal dënn bi, <sup>28</sup> aki xeeñal, akug diw ngir làmp beek diwu pal geek cuuraay lu xeeñ li. <sup>29</sup> Mboolem bànni Israyil, góor ñeek jigéen ñi am yéeneb indi lu jëm ci liggéey bi Aji Sax ji santaane, Musaa jottli, ñoom ñépp a indil Aji Sax ji ay saraxi yéene.

*Besalel ak Oliyab tàmbali nañu liggéey bi*

<sup>30</sup> Musaa nag ne bànni Israyil: «Gisleen, Aji Sax ji moo woo Besalel ci turam. Besalel, Uri mooy baayam; Uri, Ur Yudeen bi di baayam. <sup>31</sup> Moo ko feesale xelum Yàlla ak xareñte ak déggin ak xam-xam ak manoorey bépp xeetu liggéey, <sup>32</sup> ngir muy nas ay liggéeyi wurus ak xalis ak xànjari, <sup>33</sup> di yett per yu muy tapp, di yett bant, di liggéey lu nekk. <sup>34</sup> Mayu jàngle itam yeb na ko cib dënnam, moom ak Oliyab, Daneen bi, doomu Ayisamaag. <sup>35</sup> Moo leen feesal xareñte, ngir bépp liggéey, ci wàllu yett ak nataal, ak liggéeyu wëñ gu baxa te laal yolet, ak wëñ gu xewar, ak gu xonq curr

ak wëñu lëe. Mane nañu ràbb te itam dañuy sos seen taarali bopp.

### 36

<sup>1</sup> «Kon nag Besalel ak Oliyab ak mboolem ñu xareñ ñi Aji Sax ji may xareñte ak déggin ngir ñu mana jëfe mboolem sas yi jëm ci liggéeyu bérab bu sell bi, ñoom ñépp nañu sottal lépp li Aji Sax ji santaane.»

<sup>2</sup> Ba loolu amee Musaa woo Besalel ak Oliyab ak mboolem ñi xareñ ñi Aji Sax ji xareñal, mboolem ñi am yéney wàllsi ci liggéey bi, ngir sottal ko. <sup>3</sup> Ba mu ko defee ñu nangoo ci Musaa mboolem jooxe bu bànni Israyil indi, ngir sottal liggéeyu bérab bu sell bi. Bànni Israyil nag jàppoo suba gu jot di indil Musaa ay saraxi yéene, <sup>4</sup> ba mboolem liggéeykat yu xareñ yi nekkoon ci mboolem liggéeyu bérab bu sell bi, kenn ku ci nekk bàyyi la nga jàppoon, daldi dikk. <sup>5</sup> Ñu ne Musaa: «Li mbooloo mi indi wees na dayob liggéey bi Aji Sax ji santaane.» <sup>6</sup> Musaa nag yénelu ca dal ba bépp, ñu ne, ñépp, góor ak jigéen, bu ci kenn waajalati ab jooxe, ñeel bérab bu sell bi. Fa la mbooloo ma noppee indi. <sup>7</sup> Booba jumtukaay ya doyoon na sëkk, ba épp sax la ñu cay liggéey lépp.

#### *Defar nañu bérab bu sell ba*

<sup>8</sup> Ba loolu amee mboolem ñu xareñ ñi bokk ci liggéey bi daldi defar jaamookaay bi. Ñu def ko fukki sori rabali lëe, yu ànd ak wëñ gu baxa te laal yolet, ak wëñ gu xewar ak gu xonq curr. Ñu ñawaale ci ay nataali serub. <sup>9</sup> Guddaayu sor bu nekk di ñaar fukki xasab ak juróom ñett, yaatuwaay bi di ñeenti xasab, sor yépp tolloo. <sup>10</sup> Ñu taqle yii juróomi sor, taqle juróomi sor yi ci des. <sup>11</sup> Ci kaw loolu ñu ñaw ay takku yu baxa te laal yolet ci catal sor bi mujj ci benn taqalante bi, sor bi jeexal taqalante bi ci des it, ñu def ko noonu. <sup>12</sup> Juróom fukki takku lañu ñaw ci benn sor bi, ak juróom fukki takku ci catal sor bi jeexal taqalante bi ci des, takku yi yemoo. <sup>13</sup> Ñu defar juróom fukki lonkuy wurus, daldi jokklantee sor yi lonku yi, ba jaamookaay bi di benn.

<sup>14</sup> Ba loolu weese ñu ràbb ay sori kawari bëy, ngir def ko ñaareelu xayma, muy kiiraay ci kaw jaamookaay bi. Fukk ak benn lañu def sor yi. <sup>15</sup> Guddaayu sor bu nekk fanweeri xasab la, yaatuwaay bi di ñeenti xasab, te fukki sor yeek benn yépp a tolloo dayo. <sup>16</sup> Ñu taqle yii juróomi sor, juróom benni sor yi ci des it noonu. <sup>17</sup> Ñu sàkk juróom fukki takku ci catal sor, bi jeexal benn taqalante bi, daldi sàkk juróom fukki takku itam ci catal sor, bi jeexal taqalante bi ci des. <sup>18</sup> Ñu sàkk nag juróom fukki lonkuy xàñar yu ñu jokklantee ñaari taqalante yi, muy benn xayma. <sup>19</sup> Ñu defaral xayma bi malaanum deri kuuy bu ñu sóob xonq, ak meneen malaanum deri piipi muy tege ci kawam.

<sup>20-22</sup> Gannaaw gi ñu sàkkal jaamookaay bi ay làcci bantu séng yu sampe. Làcc wu nekk am ñaari kenu yu ñu lëkklee galan yu ndaw, te noonu lañu def làcci jaamookaay bi yépp. Fukki xasab lañu def taxawaayu làcc wu nekk, def yaatuwaay bi xasab ak genn-wàll. <sup>23</sup> Ci wàllu làcci jaamookaay bi, ñu sésale ñaar fukki làcc fi féete bëj-saalum, <sup>24</sup> boole kook ñeent fukki tegukaayi xaalis yu ronu kenuy ñaar fukki làcc yi, ñaari tegukaay ronu làcc wi jiitu ngir ñaari kenoom yi mu àndal, ñaari tegu topp ci, ronu wépp làcc wu ci topp, ngir ñaari kenoom yi mu àndal. <sup>25</sup> Geneen wetu jaamookaay gi féete bëj-gànnar itam, ñu def ko ñaar fukki làcc, <sup>26</sup> ak seen ñeent fukki teguy xaalis, ñaari tegu ronu làcc wi jiitu, ñaari tegu topp ci, ronu wépp làcc wu ci topp. <sup>27</sup> Gannaaw jaamookaay gi féete sowu, ñu sàkkal ko juróom benni làcc, <sup>28</sup> teg ci ñaari làcc ngir colli jaamookaay bi ci gannaaw, <sup>29</sup> ñu àndandoo di benn ci suuf te lëkkloo ci kaw ci benn lam kepp. Noonu lañu leen def ñoom ñaar, ñuy ñaari coll yi. <sup>30</sup> Muy juróom ñetti làcc ak seeni teguy xaalis; di fukki tegu ak juróom benn, ñaari tegu ronu làcc wu nekk.

<sup>31</sup> Gannaaw loolu ñu sàkk ay galani banti séng, juróomi galan yiy ànd ak làcc, yi ci genn wetu jaamookaay bi, <sup>32</sup> ak juróomi galan ngir làcci wet gi ci des,

ak juróomi galan ngir làcc yi ci gannaaw jaamookaay bi, fi féete sowu. <sup>33</sup> Ñu def galanu digg bi ci digg làcc yi, dale ko cat ba cat. <sup>34</sup> Ci biir loolu ñu xoob làcc yi wurus, sàkkal leen ay lami wurus yuy téye galan yi, daldi xoob galan yi it wurus.

<sup>35</sup> Ñu sàkk itam rido bi, ràbbe ko wëñ gu baxa te laal yolet, ak wëñ gu xewar, ak gu xonq curr ak wëñu lëe, ñawaale ci ay nataali serub. <sup>36</sup> Ñu sàkkal rido bi ñeenti jëni séng yu ñu xoob wurus, jën yi ànd ak wékkukaayi wurus, ñu móolal jën yi ñeenti teguy xalis.

<sup>37</sup> Ñu sàkkal buntu xayma bi kiiraay lu ñu ràbbe wëñ gu baxa te laal yolet, ak wëñ gu xewar, ak gu xonq curr ak wëñu lëe, mu doon liggéeyu ràbb bu rafet, <sup>38</sup> ak juróomi jënam yu ànd ak seeni wékkukaay. Ñu xoob nag wurus boppi jën yi ak seeni galan, juróomi teguy jën yi di xàñar.

## 37

### *Defar nañu gaalu kóllère gi*

<sup>1</sup> Besalel nag defare gaalu kóllère gi dénku séng, guddaay bi di ñaari xasab ak genn-wàll, yaatuwaay bi di xasab ak genn-wàll, taxawaay bi di xasab ak genn-wàll. <sup>2</sup> Mu xoob ko wurusu ngalam biir ak biti, sàkkal ko kéméju wurus gu ko wër. <sup>3</sup> Mu daldi koy móolal ñeenti lami wurus ci ñeenti tànkam, ñaari lam ci genn wet gi, ñaar, wet gi ci des. <sup>4</sup> Mu sàkk nag ay njàppuy bantu séng, xoob bu ci nekk wurus, <sup>5</sup> daldi roof njàppu yi ci lami weti gaal gi, ngir ñu di ko yóbboo gaal gi.

<sup>6</sup> Ci kaw loolu mu sàkk kubeeru saraxu njotlaay gu wurusu ngalam, guddaay bi di ñaari xasab ak genn-wàll, yaatuwaay bi di xasab ak genn-wàll. <sup>7</sup> Mu sàkk itam ñaari malaakay serub yu wurus. Liggéeyu tegg bu jekk la def serub yi ci ñaari cati kubeer gi, <sup>8</sup> cat lii ab serub, cat lee ab serub, mu móolaale serub yi ak ñaari cat yi, serub yi ànd ak kubeer gi, di benn. <sup>9</sup> Serub yaa ngi tàllal seeni laaf, jëme kaw, yiire kubeer gi seeni laaf te janoo, seeni kanam jublook kubeer gi.

### *Defar nañu taabalu mburum teewal mi*

<sup>10</sup> Ci biir loolu Besalel sàkk taabalu bantu séng, guddaay bi di ñaari xasab, yaatuwaay bi di xasab, taxawaay bi di xasab ak genn-wàll. <sup>11</sup> Mu xoob ko wurusu ngalam, defal ko ombu wurus bu ko wër. <sup>12</sup> Mu defal ko it pegg bu ko wër bu tollu ci yaatuwaayu ñeenti baaraam, ba noppi sàkkal pegg bi ombu wurus, wëralee ko ko. <sup>13</sup> Mu móolal taabal ji ñeenti lami wurus, daldi we lam yi ci ñeenti wet yi, fi fareek ñeenti tànk yi, <sup>14</sup> lam yi dendeek pegg bi, di téye njàppu, yi ñuy yóbboo taabal ji. <sup>15</sup> Mu sàkk ay njàppuy bantu séng, xoob ko wurus, ñu di ko yóbboo taabal ji. <sup>16</sup> Ci kaw loolu mu sàkk juntuukaay yiy tege ci taabal ji; ndabam yu tell yeek mbàttu yeek njaq yeek këll, yi ñuy tuural Yàlla, lépp di wurusu ngalam.

### *Defar nañu tegukaayu làmp bi*

<sup>17</sup> Besalel sàkk itam tegukaayu làmp bu wurusu ngalam. Liggéeyu tegg bu jekk la def tegukaayu làmp bi, ak taatu tegukaay bi, ak peru tegukaay bi, ay kaasam aki kàmbóotam aki mbaram, lépp ànd ak tegukaay bi, di benn. <sup>18</sup> Juróom benni car a soqikoo ci weti tegukaayu làmp bi, ñetti car ci gii wet, ñett ci gi ci des. <sup>19</sup> Ñetti kaas yu bindoo ni tóor-tóori garabu amànd ñoo nekk ci benn car bi, kaas bu ci nekk ànd ak ay kàmbóotam aki mbaram, ñetti kaas yu bindoo ni tóor-tóori garabu amànd nekk ci car bi ci topp, kaas bu ci nekk ànd ak ay kàmbóotam aki mbaram, ba juróom benni car, yi soqikoo ci per bi, daj. <sup>20</sup> Peru tegukaayu làmp bi itam am na ñeenti kaas yu bindoo ni tóor-tóori garabu amànd, ànd ak ay kàmbóotam aki mbaram. <sup>21</sup> Ab kàmbóot a ronu ñaari car, jàpp ci, beneen kàmbóot ronu ñaari car yi ci topp, jàpp ci, ab kàmbóot ronu ñaari car yi mujj, jàpp ci, juróom benni car, yi soqikoo ci weti per bi, daj. <sup>22</sup> Kàmbóot yi ak car yi nag ànd ak tegukaay bi, di wenn donju wurusu ngalam wu ñu tegg ba mu jekk. <sup>23</sup> Mu sàkk juróom ñaari làmpam ak ay ñiimi feyukaayam ak ay andam, lépp di wurusu ngalam. <sup>24</sup> Benn talañu wurusu ngalam, yemook fanweeri kilo, ci

la sàkk tegukaayu làmp bi ak mboolem ay jumtukaayam.

*Defar nañu sarxalukaayu cuuraay bi*

<sup>25</sup> Ci kaw loolu Besalel sàkk ci bantu séng sarxalukaayu cuuraay bu kaare, guddaay bi di xasab, yaatuwaay bi di xasab, taxawaay bi di ñaari xasab, ay béjjénam ànd ak moom di benn bant bi. <sup>26</sup> Mu xoob ko wurusu ngalam ci kaw ak ci wet yi, ba mu daj, ak béjjén yi, daldi koy sàkkal wombu wurus bu ko wër. <sup>27</sup> Ñaari noppi wurus la ko sàkkal ci ron kéméj gi, ci ñaari wetam, ñu jàkkaarloo, di téye banti njàppu, yi ñu koy yóbbu. <sup>28</sup> Ci biir loolu mu sàkk ay njàppuy banti séng, xoob lu ci nekk wurus. <sup>29</sup> Mu sàkk nag diwu pal gu sell gi, sàkk cuuraay lu xeeñ li raxul, def ko njafaan lu njafaan-kat waajal ba mu baax.

## 38

*Defar nañu sarxalukaay bi ak mbalkam njàpp mi*

<sup>1</sup> Ba tey Besalel sàkk ci bantu séng sarxalukaayu rendi-dóomal bu kaare, guddaay bi di juróomi xasab, yaatuwaay bi di juróomi xasab, taxawaay bi di ñetti xasab. <sup>2</sup> Mu sàkkal ko ay béjjénam ci ñeenti collam, mu ànd aki béjjénam, di benn. Mu xoob nag lépp xàñjar. <sup>3</sup> Mu sàkk jumtukaayi sarxalukaay bi yépp: ndabi tibbukaayu dóom yi ak ñiitukaay yi ak kèll yi, ak lonkukaayi yàpp yi, ak and yi, jumtukaay yépp di xàñjar. <sup>4</sup> Mu sàkkal sarxalukaay bi caax bu ñu tégge xàñjar, mu ronu peggu sarxalukaay bi, dale ci suuf ba ci digg sarxalukaay bi. <sup>5</sup> Mu daldi koy móolal ñeenti nopp ci ñeenti colli caaxu xàñjar bi, ñuy téye njàppu yi. <sup>6</sup> Mu sàkk njàppuy bantu séng, xoob lu ci nekk xàñjar, <sup>7</sup> daldi roof njàppu yi ci nopp yi ci weti sarxalukaay bi, ngir bu ñu koy yóbbu. Am pax, mu xàñq yu tàppandaar ub, moom la def sarxalukaay bi. <sup>8</sup> Mu sàkk itam mbalkam njàpp mu ànd ak tegoom, di xàñjar ju jóge ci seetuy jigéen\*, ñi doon liggéey ci bunt xaymab ndaje mi.

*Defar nañu èttu jaamookaay bi*

<sup>9</sup> Besalel nag sàkk wurmbalu jaamookaay bi. Wetam, gi fare bëj-saalum di téeméeri xasabi sori rabal yu ñu ràbbe wëñu lëe, <sup>10</sup> seen ñaar fukki jën ànd ak seen ñaar fukki tegu, di xàñjar, lonku yeek galani jën yi di xaalis.

<sup>11</sup> Wetu bëj-gànnar it di téeméeri xasabi sori rabal, seen ñaar fukki jën ànd ak seen ñaar fukki tegu, di xàñjar, lonku yeek galani jën yi di xaalis.

<sup>12</sup> Wetu sowu di juróom fukki xasabi sori rabal, ak seen fukki jën yu ànd ak seen fukki tegu, lonku yeek galani jën yi di xaalis.

<sup>13</sup> Wetu penku bi ci kanam di juróom fukki xasab; <sup>14-15</sup> fukki xasabi sori rabal ak juróom fi làng ak buntu ètt bi ci genn wetam, ak seen ñetti jën yu ànd ak seen ñetti tegu, ak fukki xasabi sori rabal ak juróom, wet gi ci des, ak seen ñetti jën yu ànd ak seen ñetti tegu.

<sup>16</sup> Mboolem sori wurmbalu ètt bi ba mu daj, wëñu lëe la.

<sup>17</sup> Teguy jën yi xàñjar la, wékkukaayi jën yeek ay galanam di xaalis, ñu xoob boppi jën yi xaalis; jëni ètt bi yépp nag, galani xaalis lañu leen lëkklee. <sup>18</sup> Lafu buntu ètt bi, liggéeyu ràbb bu rafet la, bu ñu ràbbe wëñ gu baxa te laal yolet, ak wëñ gu xewar, ak gu xonq curr ak wëñu lëe. Guddaayu laf bi ñaar fukki xasab la, taxawaay bi yemook yaatuwaay bi, di juróomi xasab, tollook sori wurmbalu ètt bi. <sup>19</sup> Jëni lafu bunt bi ñeent la, seen ñeenti tegu di xàñjar, seeni wékkukaay di xaalis, ñu xoob kaw jën yi xaalis, galan yi di xaalis. <sup>20</sup> Mboolem xeri jaamookaay bi ak xeri wurmbalu ètt bi ba mu daj, lépp xàñjar la.

*Lim nañu jumtukaay yi*

<sup>21</sup> Lii nag moo di ténkub dayoy gànjar yi ñu jëfandikoo ci liggéeyu jaamookaay bi, jaamookaay boobu àlluway seede si dence. Ténkees na ko ci ndigalu Musaa, Leween ñi sasoo ténk bi ci njiital Itamar doomu Aaróona sarxalkat bi. <sup>22</sup> Fekk na Yudeen bi Besalel doomu Uri, miy doomu Ur, sotal na mboolem li Aji Sax

\* **38:8** 38.8 seetuy jigéen ñi: booba ay dogi xàñjar lañu daan def seetu.

ji santoon Musaa. <sup>23</sup> Mu àndoon ci ak Daneen bi, doomu Ayisamaag, Oliyab. Mu dib yettkat, dib taaralkat te di liggéeykatu wëñ gu baxa te laal yolet, ak wëñ gu xewar ak gu xonq curr ak wëñu lëe.

<sup>24</sup> Wurus wi dem ci liggéey bi bépp, mboolem liggéeyu bérab bu sell bi, te muy wurus wu ñu def saraxu yékkati-jébbal Yàlla, juróom ñetti téeméeri kilo ak juróom ñaar fukk ak juróom ñaar la (877), ak ñetti téeméeri garaam (300), yemook ñaar fukki talañ ak juróom ñeent, ak juróom ñaar téeméer ak fanweeri (730) siikal ci siikal bi ñu yoonal ci bérab bu sell bi. <sup>25</sup> Xaalis bi tukkee ci limeefu askan wi, ñetti junniy kilo ak fukk ak juróom ñaar (3 017), ak juróom ñaar téeméeri garaam ak juróom fukk (750), yemook téeméeri (100) talañ ak junneek juróom ñaar téeméer ak juróom ñaar fukk ak juróomi (1 775) siikal, ci siikal bi ñu yoonal ci bérab bu sell bi, <sup>26</sup> muy juróomi garaami xaalis bopp bu nekk, yemook genn-wàllu siikal, ci siikal bi ñu yoonal ci bérab bu sell bi, ñeel képp ku bindu ci limeef bi, dale ko ci ñi am ñaar fukki at jëm kaw, ñépp di juróom benni téeméeri junniy góor ak ñetti junneek juróomi téeméer ak juróom fukk (603 550). <sup>27</sup> Ñetti junniy (3 000) kiloy xaalis, di téeméeri talañ, ñeel móolub teguy bérab bu sell bi, ak teguy rido bi. Muy téeméeri tegu ci ñetti junniy kilo, di fanweeri kilo ci benn tegu, muy téeméeri tegu ci téeméeri talañ, benn talañ ci benn tegu. <sup>28</sup> Fukki kilook juróom ñaar yeek juróom ñaar téeméeri garaam yeek juróom fukk (17 kilo 750 garaam) yi ci topp, yemook junneek juróom ñaar téeméer ak juróom ñaar fukk ak juróomi siikali xaalis, ay wékkukaay la ci sàkk ngir jën yi, xoob ci boppi jën yi, sàkk ci galan yi.

<sup>29</sup> Xànjari bi ñu def saraxu yékkati-jébbal Yàlla, ñaari junniy kilo ak téeméer ak ñaar fukk ak ñeent la (2 124), yemook juróom ñaar fukki (70) talañ ak ñaari junneek ñeenti téeméeri (2 400) siikal. <sup>30</sup> Mu sàkk ci teguy buntu xaymab ndaje mi, ak sarxalukaayu xànjari bi, ak caaxub

xànjaram, ak mboolem juntuukaayi sarxalukaay bi, <sup>31</sup> ak teguy wurmbalu ètt bi, ak teguy buntu ètt bi, ak xeri jaamookaay bi yépp, ak xeri wurmbalu ètt bi.

## 39

### *Defar nañu yérey sarxalkat yi*

<sup>1</sup> Wëñ gu baxa gi te laal yolet nag ak wëñ gu xewar gi ak gu xonq gi curr, ci lañu sàkk yére yu yànj yi ñuy liggéeye ci bérab bu sell bi. Ñu daldi defar yére yu sell, yi ñeel Aaróona noonee ko Aji Sax ji sante woon Musaa.

<sup>2</sup> Xar-sànni mi, wëñu wurus lees ko ràbbe, ak wëñ gu baxa te laal yolet, ak wëñ gu xewar, ak gu xonq curr ak wëñu lëe. <sup>3</sup> Ay xobi wurus lañu tègg ba mu jekk, ñu dagg ko ay wëñ yu ñu ràbbaaleek wëñ gu baxa gi te laal yolet, ak wëñ gu xewar gi, ak gu xonq gi curr, ak wëñu lëe gi. Ñu daldi ciy ñawaale ay nataal. <sup>4</sup> Ñaari ngàlli mbagg lañu ko defal, daldi faste wu ci nekk ci ñaari cati xar-sànni mi. <sup>5</sup> Ngañaayu taaral li tege ci kaw, ni xar-sànni mi lees ko defare, liggéeyaale kook moom, ñu ànd di benn. Ñu ràbbe ko wëñu wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe, noonee ko Aji Sax ji sante woon Musaa.

<sup>6</sup> Ci kaw loolu ñu we peri onigsë yi, fege per yi ñankukaayi wurus, daldi ciy ñaas turi doomi Israyil yu góor, noonu ñuy ñaase xàmmikaay yi ñuy torloo. <sup>7</sup> Ñu tapp per yi ci kaw ngàlli waggi xar-sànni mi, per yi nag taxawe taxawaayu bànni Israyil, noonu ko Aji Sax ji sante woon Musaa.

### *Defar nañu kiiraayal dënn bi*

<sup>8</sup> Ñu sàkk kiiraayal dënn bi, liggéeyaale ko ay nataal ni xar-sànni mi, ràbbe ko wëñu wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe. <sup>9</sup> Ab kaare bu ñu lem lañu ko def, guddaay bi, gannaaw bu ñu ko lemee, di ñaraleb baaraamu déy ak digg, yaatuwaay bi di ñaraleb baaraamu déy ak digg. <sup>10</sup> Ñu we nag ay per ci kaw kiiraayal dënn bi, def ko ñeenti làngi per. Làng gi jiitu, peru sarduwan ak peru



topaas ak peru eskarbukal moo ca nekk; <sup>11</sup> ñaareelu làng gi di peru emëródd ak peru safiir ak peru jamaa, <sup>12</sup> ñetteelu làng gi di peru yasent ak peru agaas ak peru ametistë, <sup>13</sup> ñeenteelu làng gi di peru kirsolit ak peru onigsë ak peru jaspë, te per bu ci nekk ñankukaayu wurus lees ko wewe. <sup>14</sup> Per yeek turi doomi Israyil yu góor ñoo tolloo ab lim: muy fukk ak ñaar, ni tur yi tollu. Ñu ñaas ci tur yi ni xammikaayi torlu, ku nekk ak turam, ba fukki giir yeek ñaar daj.

<sup>15</sup> Ci biir loolu ñu sàkkal kiiraayal dënn bi ñaari caqi wurusu ngalam yu ci tege, te rawaasoo ni ay buum. <sup>16</sup> Ñu sàkk itam ñaari ñankukaayi wurus ak ñaari jaaroy wurus yu ñu takk ci ñaari cati kiiraayal dënn bi ci kaw <sup>17</sup> Ñu nas nag ñaari buumi wurus yi ci ñaari jaaro yi ci cati kiiraay li. <sup>18</sup> Yeneen ñaari cati buumi wurus yi, ñu we leen ci ñaari ñankukaay, yi ci kaw ngalli waggi xar-sànni mi, ci kanam. <sup>19</sup> Ñu sàkkal ko itam ñaari jaaroy wurus, yu ñu we ci ñaari cati suufi kiiraay li, fi féete biir, wet gi tafu ci xar-sànni mi. <sup>20</sup> Ñu sàkkalaat kiiraay li yeneen ñaari jaaroy wurus, yu ñu we ci suufu ngalli xar-sànni mi, fi féete kanam, dendeek sofu ngall yi, te tiim ngañaayu xar-sànni mi. <sup>21</sup> Kiiraayal dënn bi, buum gu sew gu baxa te laal yolet, moom lees ko téyee, lëkklee ko jaaroy kiiraay leek jaaroy xar-sànni mi, kiiraay li dëkke tiim ngañaay li, ba du teqlikook xar-sànni mi, noonee ko Aji Sax ji sante woon Musaa.

### *Defar nañu yérey sarxal, yi ci des*

<sup>22</sup> Fëxya bi xar-sànni miy tege, lépp, wëñ gu baxa te laal yolet lees ko ràbbe ba mu daj. <sup>23</sup> Baatu fëxya baa ngi ci digg bi, mel ni baatu mbubbam xare, ñu ombe ko omb bu dëgër, ba mu daj, ngir du xottiku. <sup>24</sup> Ci biir loolu ñu takk ci ombu fëxya bi, ay doomi gërënaat yu ñu defare wëñ gu baxa te laal yolet, ak wëñ gu xewar, ak gu xonq curr, ak wëñu lëe. <sup>25</sup> Ñu def itam ay jóolooliy wurusu ngalam, ba takk jóolooli yi ci diggante doomi gërënaat yi, wërële ko ombu fëxya bi, ba mu daj, jóolooli yi dox diggante doomi gërënaat

yi. <sup>26</sup> Ab jóolooli, ab gërënaat, ab jóolooli, ab gërënaat ba ombu fëxya, bi ñuy sol di sarxal daj, noonee ko Aji Sax ji sante woon Musaa.

<sup>27</sup> Ñu sàkkal nag Aaróona aki doomam mbubb yu gudd yu ñu ràbbe wëñu lëe, <sup>28</sup> ak kaalag lëe, ak mbaxanay lëe, ak tubéyi njiitlaay yu lëe, <sup>29</sup> ak laxasaay giy liggéeyu ràbb bu rafet, bu ñu ràbbe wëñu lëe bu dëgër, ak wëñ gu baxa te laal yolet, ak wëñ gu xewar, ak gu xonq curr, noonee ko Aji Sax ji sante woon Musaa.

<sup>30</sup> Ñu sàkk nag meeteel gu sell gu wurusu ngalam, muy dogu wurus wu tell, ñu ñaas ci kawam mii mbind, ni ñuy ñaase mbindum torlu: «Sell na, ñeel Aji Sax ji». <sup>31</sup> Ñu daldi koy takke buum gu baxa te laal yolet, téyee ko ko ci kaw kaala gi, na ko Aji Sax ji sante woon Musaa.

### *Musaa memmiku na liggéey bi*

<sup>32</sup> Noonu la mboolem liggéeyu màkkaanu xaymab ndaje mi mate. Noonee ko Aji Sax ji sante woon Musaa rekk, ni la ko bànni Israyil defe.

<sup>33</sup> Ba loolu amee ñu indil Musaa jaamookaay bi: xayma bi ak yëfam yépp; lonku yi ak làcc yi ak galan yi ak jën yeek tegu yi, <sup>34</sup> ak kiiraayal deri kuuy yi ñu sóob xonq, ak kiiraayal deri piipi yi, ak kiiraayal xàjjatle bi, <sup>35</sup> ak gaal gi àlluway seede si dence, aki njàppoom, ak kubeeru saraxu njotlaay gi, <sup>36</sup> ak taabal jeek ndabam yépp, ak mburum teewal mi ciy tege, <sup>37</sup> ak tegukaayu làmp bu wurusu ngalam bi aki làmpam, làmp yi sësáloo ba jekk ak mboolemi jumtukaayam, ak diw gi ñuy taaloo, <sup>38</sup> ak sarxalukaay bu wurus bi, ak diwu pal gi, ak curaay lu xeeñ li, ak kiiraayal buntu xayma bi, <sup>39</sup> ak sarxalukaayu xàñar beek caaxub xànjaram, aki njàppoom ak ndabam yépp, ak mbalkam njàpp mi akub tegoom, <sup>40</sup> ak sori wurmbalu ètt bi aki jënam aki tegoom, ak kiiraayal lafu buntu ètt bi, aki buumam aki xeram; mboolem jumtukaay, yi ñuy liggéeye ci màkkaanu xaymab ndaje mi rekk, <sup>41</sup> ak yérey yu yànj yi ñuy liggéeye ci bérab bu sell bi; yérey yu sell yu Aaróona sarxalkat bi, ak yérey doomam yi ñuy sol, di sarxale. <sup>42</sup> Noonee

ko Aji Sax ji sante woon Musaa rekk, ni la bänni Israyil sottale liggéey bi bépp. <sup>43</sup> Musaa nag nemmiku mboolem liggéey bi, ba gis ne sottal nañu ko; noonee ko Aji Sax ji santee woon, ni lañu ko defe. Musaa daldi leen ñaanal.

## 40

### *Samp jaamookaay bi jot na*

<sup>1</sup> Aji Sax ji waxati Musaa ne ko: <sup>2</sup> «Bu keroogee benn fanu weer wi jiitu, nanga samp màkkaanu xaymab ndaje mi. <sup>3</sup> Nanga yeb ci biir, gaal gi àlluway seede si dence, te nga làqe gaal gi rido bi. <sup>4</sup> Dugalal taabal ji te taaj ci li muy àndal; dugalal tegukaayu làmp bi, nga taal ay làmpam, <sup>5</sup> te nga teg sarxalukaayu cuuraay bu wurus bi ci kanam gaal gi àlluway seede si dence, ba noppi nga samp lafu buntu jaamookaay bi.

<sup>6</sup> «Tegal sarxalukaayu rendi-dóomal bi fi kanam buntu màkkaanu xaymab ndaje mi. <sup>7</sup> Tegal mbalkam njàpp mi ci diggante xaymab ndaje mi ak sarxalukaay bi, te nga duy ko ndox. <sup>8</sup> Sampal nag wurmbalu ètt bi bépp, te nga we lafu buntu wurmbal bi.

<sup>9</sup> «Jèlal nag diwu pal gi, nga diw ci jaamookaay bi ak li ci biiram lépp, sellale ko ko, mook yéfam yépp, mu daldi sell. <sup>10</sup> Boo noppee, diwal sarxalukaayu rendi-dóomal bi, mook ndabam yépp, nga sellale ko sarxalukaay bi, sarxalukaay bi daldi sella sell. <sup>11</sup> Nanga diw mbalkam njàpp mi akub tegoom, nga sellale ko ko.

<sup>12</sup> «Indil Aaróona aki doomam ba ci bunt xaymab ndaje mi, nga sang leen ci ndox mi. <sup>13</sup> Nga daldi solal Aaróona yére yu sell yi, diw ko, sellale ko ko, mu doon sama sarxalkat. <sup>14</sup> Su ko defe nga indi ay doomam, solal leen ay mbubb. <sup>15</sup> Nga diw leen, ni nga diwe seen baay, ñu doon samay sarxalkat. Seen diwu googu moo leen sédd sasu carxal bu sax dàkk, maasoo maas.» <sup>16</sup> Musaa nag def loola. Mboolem noonee ko ko Aji Sax ji sante, na la ko defe.

### *Musaa samp na jaamookaay bi*

<sup>17</sup> Keroog at ma topp ca at ma ñu génne Misra, ca benn fanu weer wa jèkk, ca lañu samp jaamookaay ba.

<sup>18</sup> Musaa nag samplu jaamookaay bi: Ñu jiital tegu yi, samp làcc yi, we galan yi, daldi samp jën yi. <sup>19</sup> Ci kaw loolu, ñu firi malaan mi ci kaw jaamookaay bi, daldi lal kiiraay li ci kawam, na ko Aji Sax ji sante woon Musaa.

<sup>20</sup> Gannaaw loolu ñu jël àlluway seede si, yeb ko ci gaal gi, ba noppi roof njàppu yi ci gaal gi. Ñu daldi teg kubeeru saraxu njotlaay gi ci kaw gaal gi. <sup>21</sup> Ba mu ko defe ñu fat gaal gi ci biir bérab bu sell bi, doora firi ridob xàjjatle bi, làqe ko ko, na ko Aji Sax ji sante woon Musaa.

<sup>22</sup> Ba loolu amee ñu dugal taabal ji ci biir xaymab ndaje mi, ci wetu bëj-gànnaru jaamookaay bi, ci kanam rido bi. <sup>23</sup> Ñu daldi teg ci kaw taabal ji, tegin wu jekk, mburu mi fi kanam Aji Sax ji, na ko Aji Sax ji sante woon Musaa.

<sup>24</sup> Ñu dugal nag tegukaayu làmp bi ci biir xaymab ndaje mi, fi janook taabal ji, ci wetu bëj-saalumu jaamookaay bi, <sup>25</sup> daldi taal làmp yi fi kanam Aji Sax ji, na ko Aji Sax ji sante woon Musaa.

<sup>26</sup> Ba mu ko defe ñu dugal sarxalukaayu wurus bi ci biir xaymab ndaje mi, ci kanam rido bi, <sup>27</sup> daldi taal cuuraay lu xeeñ li ci kawam, na ko Aji Sax ji sante woon Musaa.

<sup>28</sup> Ñu samp lafu buntu jaamookaay bi. <sup>29</sup> Sarxalukaayu rendi-dóomal bi nag, ñu teg ko ci bunt màkkaanu xaymab ndaje mi, daldi def ci kawam saraxu rendi-dóomal bi, ak saraxi pepp mi, na ko Aji Sax ji sante woon Musaa.

<sup>30</sup> Ba loolu amee ñu teg mbalkam njàpp mi ci diggante xaymab ndaje mi ak sarxalukaay bi, ba noppi duy ko ndoxum njàpp. <sup>31</sup> Ci la Musaa ak Aaróona aki doomam di raxas seeni loxo ak seeni tànk, <sup>32</sup> ndax bu ñuy dugg ci xaymab ndaje mi, ak bu ñuy jegeji sarxalukaay bi, dañuy jàpp, na ko Aji Sax ji sante woon Musaa.

<sup>33</sup> Gannaaw loolu ñu samp wurmbal bi yéew jaamookaay beek sarxalukaay bi,

daldi samp lafu buntu ätt bi. Noonu la Musaa sottale liggéey bi.

*Leeru Aji Sax ji gane na bérab bu sell bi*

<sup>34</sup> Ba loolu amee niir wa yiir xaymab ndaje ma, leeru Aji Sax ji fees jaamookaay ba, <sup>35</sup> ba Musaa tëlee dugg ca xaymab ndaje ma, ndax niir wa màkkaanoo kaw xayma ba, ak leeru Aji Sax ji fees jaamookaay ba.

<sup>36</sup> Saa yu niir wa yékkatikoo, ba tiim jaamookaay ba nag, bànni Israyil daldi tegu ca seen yooni tukki ya. <sup>37</sup> Waaye bu niir wa yékkatikuwul, duñu dem, ba keroog muy yékkatiku. <sup>38</sup> Ndax booba niiru Aji Sax jaa nga ca kaw jaamookaay ba, ag bëccëg, te sawara waa nga ca biir niir wa, ag guddi, waa kër Israyil gépp di ci gis, seen diiru yooni tukki ya.

## Sasu Sarxalkat yi di ñetteelu xaaju Tawreetu Musaa Ubbite gi

Aaya bi jiitu ci Sasu Sarxalkat yi moo indi na Yàlla àddoo woon ca xaymab ndaje ma, woo Yonent Yàlla Musaa, ngir wax ak moom. Bare na lool fu téere bi joxe ay ndigali yoon aki sàrt yu Yàlla jox Musaa, ngir mu jottli ko bànni Israyil, te dige bi ci Yàlla boole moo di ndigal yooyu ñooy taxa dund képp ku leen jéfe.

Ci gàttal, ci téere bi la Yàlla di xamal bànni Israyil, nan lees di dindee mboolem li gállankoor seenub neexoo ak Yàlla, ak nan lees di jéfe ba xaymab jaamookaay bi doon bérabu ndaje dégg bu ñuy dajee ak Yàlla. Fàww ñiy jooxe ay sarax jooxe sarax yi ni mu ware. Fàww it sarxalkat yi di nit ñu ñu weg, nit ñu seen jéfin tedd, te kenn ku nekk ci askan wi moytu, kem kàttanam, mboolem luy sobeel aw yaram, te moytu di fecci kóllère ci jéfinam ak ci ni muy jaamoo Yàlla. Yàlla miy Ku Sell, di Cofeelu neen, di Ki yor ndund, moo namm ñoñam wàllsi ci sellngay boppam, ngir ñoom itam ñu man di jottlee, ndund ak cofeel. Yéene boobu la Yàlla joxe bànni Israyil santaane bii Almasi ne mooy kenug yoonu Yàlla: “Ni ngeen soppe seen bopp nag, nangeen ko soppe seen moroom.” Aaya 19:18.

Mboolem ndigali yoon yi ci téere bi, li leen taxa jóg mooy yombal nu gëmkat ñi mana neexoo ak Yàlla, ak fépp fu ñu mana bokk, ak jant bu ñu mana yemool. Kon ndigali yoon yii tàyyiwuñu benn yoon di soñne ci mboolem xeeti kàddu, ngir gëmkat bi saxoo bàyyi xel ne neexoo ak Yàlla manula ñàkk, te ci la ag dundamaju.

Ci Tënk:

Saar 1—7 Ay dogal ci mbirum sarax yi

Saar 8—10 Fal nañu sarxalkat yi

Saar 11—15 Sàrtal nañu lu set ak lu setul

Saar 16 Lu jëm ci bésub Njotlaay

Saar 17—26 Ndigal yi jëm ci sellal

Saar 27 Lu jëm ci jagleel Aji Sax ji nit ak  
alal  
**Ay dogal ci mbirum sarax yi**

(Saar 1.1—7.38)

*Lu jëm ci saraxu rendi-dóomal*

<sup>1</sup> Aji Sax ji woo na Musaa, wax ak moom ca xaymab ndaje ma ne ko: <sup>2</sup> «Waxal bànni Israyil ne leen: Bu kenn ci yeen dee sàkkal Aji Sax ji sarax, na indi ag jur, muy gu gudd mbaa gu gàtt.

<sup>3</sup> «Bu saraxam dee saraxu jur gu gudd gu ñuy def rendi-dóomal, na sarxal aw yékk wu amul sikk. Na ko yóbbu ci bunt xaymab ndaje mi ci kanam Aji Sax ji, ngir mu nangul ko ko. <sup>4</sup> Na teg loxoom ci kaw boppu juru saraxu rendi-dóomal bi, ndax ñu nangul ko ko, muy njotlaayam. <sup>5</sup> Na rendi yékk wi ci kanam Aji Sax ji, te doomi Aaróona yu góor yiy sarxalkat yi ñooy indi deret ji, xépp ko ci mboolem weti sarxalukaay bi ci bunt xaymab ndaje mi. <sup>6</sup> Juru saraxu rendi-dóomal bi, na ko boroom sarax bi fees, daggat ko. <sup>7</sup> Doomi Aaróona, sarxalkat bi, dañuy jafal ab taal ci kaw sarxalukaay bi, teg matt mi ci taal bi. <sup>8</sup> Su ko defee doomi Aaróona yu góor, yiy sarxalkat yi, jël dog yi, booleek bopp bi ak nebbon bi, teg ko ci kaw mattum taal bi ci sarxalukaay bi. <sup>9</sup> Nañu raxas yérey biir yi ak yeel yi, sarxalkat bi boole lépp lakk ci kaw sarxalukaay bi. Saraxu rendi-dóomal la, saraxu sawara ngir xetug jàmm, ñeel Aji Sax ji.

<sup>10</sup> «Bu saraxam dee ab gàtt bu ñuy def rendi-dóomal, muy xar mbaa bèy, na sarxal bu góor bu amul sikk. <sup>11</sup> Na rendi sarax si ci kanam Aji Sax ji, fa féete sarxalukaay bi bëj-gànnar. Na doomi Aaróona yu góor yiy sarxalkat yi xépp deret ji ci mboolem weti sarxalukaay bi. <sup>12</sup> Bu ko boroom sarax bi daggatee ba noppi, sarxalkat bi day boole dog yeek bopp bi ak nebbon bi, teg ko ci kaw mattum taal bi ci kaw sarxalukaay bi. <sup>13</sup> Na boroom sarax bi raxas yérey biir yi ak yeel yi, sarxalkat bi boole lépp lakk ci kaw sarxalukaay bi. Saraxu rendi-dóomal la, saraxu sawara ngir xetug jàmm, ñeel Aji Sax ji.

<sup>14</sup> «Bu nit ki dee sarxalal Aji Sax ji njanaaw luy doon rendi-dóomal, na sarxe pitax mbaa xati mu ndaw. <sup>15</sup> Na ko sarxalkat bi yóbbu ca sarxalukaay ba, kutt baat bi, lakk ko ci kaw sarxalukaay bi. Deret ji dees koy siital ci wetu sarxalukaay bi, ba mu jeex. <sup>16</sup> Na indi gag bi ak li ci nekk te wetti ko fa ñuy def dóomu-taal ba, fa féete sarxalukaay bi penku. <sup>17</sup> Sarxalkat bi day jàpp ci laaf yi, xotti te bañ koo teqale, daldi koy lakk ci sarxalukaay bi, ci kaw mattum taal bi. Saraxu rendi-dóomal la, saraxu sawara ngir xetug jàmm, ñeel Aji Sax ji.

## 2

### *Lu jëm ci saraxu pepp*

<sup>1</sup> «Bu nit dee indil Aji Sax ji saraxu pepp, sunguf\* su mucc ayib la saraxam wara doon, mu sotti ci diw, def ci cuuraay, <sup>2</sup> te yót ko doomi Aaróona yu góor yiy sarxalkat yi. Na sarxalkat bi sàkk barci-loxob sunguf su mucc ayib soosu ànd ak diw gi, te boole kook cuuraay li lépp. Na sarxalkat bi def cér boobu saraxu baaxantal, lakk ko ca kaw sarxalukaay ba, muy saraxu sawara ngir xetug jàmm, ñeel Aji Sax ji. <sup>3</sup> Li des ci saraxu pepp mi, Aaróona aki doomam ñoo koy féetewoo, muy cér bu sella sell, bawoo ci saraxi sawara yi ñeel Aji Sax ji.

<sup>4</sup> «Su dee sarxal lu ñu defare pepp, di lu ñu lakk cib taal ba mu ñor, na doon sunguf su mucc ayib, di mburu yu amul lawiir yu ñu xiiwaale diw, mbaa mburu yu sew yu amul lawiir, ñu sotti diw ca kawam. <sup>5</sup> Bu saraxam dee lu ñu defare pepp, lakke ko ci saafukaayu weñ, na doon sunguf su mucc ayib su ñu xiiwaale diw te bumu am lawiir. <sup>6</sup> Na ko dammat te sotti diw ca kaw dog ya. Saraxu pepp la. <sup>7</sup> Bu saraxam dee lu ñu defare pepp, di lu ñu saaf ci cin ba mu ñor, na doon sunguf su mucc ayib su ñu xiiwaale diw.

<sup>8</sup> «Na yóbbul Aji Sax ji saraxu pepp su ñu defar ci tegtal yooyu, yót ko sarxalkat bi, mu yóbbu ko ca sarxalukaay ba. <sup>9</sup> Su ko defee sarxalkat bi génne ci saraxu pepp mi, ab saraxu baaxantal, daldi koy

lakk ci kaw sarxalukaay bi, muy saraxu sawara ngir xetug jàmm ñeel Aji Sax ji.

<sup>10</sup> Li des ci saraxu pepp mi, Aaróona aki doomam ñoo koy féetewoo, muy cér bu sella sell, bawoo ci saraxi sawara yi ñeel Aji Sax ji.

<sup>11</sup> «Du benn saraxu pepp bu ñuy defal Aji Sax ji muy am lawiir, ndax du lenn ci lawiir mbaa lem, lu ñu wara lakk, ngir saraxu sawara su ñeel Aji Sax ji.

<sup>12</sup> Saraxi ndoortel meññeef man naa ànd ak yooyu, waaye du bokk ci sarax su jëm ca sarxalukaay ba, ñu di ko taal, ngir xetug jàmm. <sup>13</sup> Seen mboolem saraxu pepp nangeen ko xorom. Bu seen saraxu pepp ñàkk mukk xorom, ndax mooy màndargaal seen kóllèreek seen Yàlla. Seen sarax yépp ngeen di xorom.

<sup>14</sup> «Bu nit dee indil Aji Sax ji saraxu ndoortel meññeef, na ko indil mbool† mu ñu séndal, def ko sàñqal, muy saraxu ndoortel meññeefam. <sup>15</sup> Na ci sotti diw ak cuuraay. Saraxu pepp la. <sup>16</sup> Na sarxalkat bi lakk lenn ci mbool mu mukk mi ànd ak diw, boole kook cuuraay li lépp, muy saraxu baaxantal, te di saraxu sawara.

## 3

### *Lu jëm ci saraxi cant ci biir jàmm*

<sup>1</sup> «Su fekke ne li nit kiy sarxe saraxu cant la ci biir jàmm, mu di ko jële ci nag wu góor mbaa wu jigéen, na indil Aji Sax ji lu amul sikk. <sup>2</sup> Day teg loxoom ci kaw boppu jur gi muy sarxal, te rendi ko ca bunt xaymab ndaje ma. Doomi Aaróona yu góor yiy sarxalkat yi daldi xépp deret ji ci mboolem weti sarxalukaay bi. <sup>3</sup> Li muy génne ci saraxu cant gi ci biir jàmm, ñu war koo taalal Aji Sax ji mooy nebbon bi sàng yérey biir yi, ak lépp luy nebbon te jàpp ci yérey biir yi, <sup>4</sup> ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te mu di ko booleek dëmbéen yi, génne ko. <sup>5</sup> Na doomi Aaróona yi boole yooyu lakk ci kaw sarxalukaay bi, mu tege ci kaw saraxu rendi-dóomal bi ci kaw mattum taal bi. Saraxu sawara la ngir xetug jàmm ñeel Aji Sax ji.

\* **2:1** 2.1 Sungufu bele lay doon. † **2:14** 2.14 Mboolum bele lay doon mbaa mboolum lors.

<sup>6</sup> «Su fekke ne li nit kiy sarxalal Aji Sax ji saraxu cant la ci biir jàmm, te mu di ko jële ci jur gu gàtt, gu góor mbaa gu jigéen, na sarxal lu amul sikk. <sup>7</sup> Su dee sarxal xar, na ko indil Aji Sax ji <sup>8</sup> te teg loxoom ci boppu xar mi muy sarxe, ñu rendi ko ci bunt xaymab ndaje mi, doomi Aaróona yu góor yi xëpp deret ji ci mboolem weti sarxalukaay bi. <sup>9</sup> Li muy génne ci saraxu cantu biir jàmm bi, muy saraxu sawara ngir xetug jàmm, ñeel Aji Sax ji, mooy nebbon bi, ak calgeen bi yépp, ñu doge ko fa sës ca fàllare ja, ak nebbon bi sàng yérey biir yi, ak lépp luy nebbon te jàpp ci yérey biir yi, <sup>10</sup> ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te mu di ko booleek dëmbéen yi, génne ko. <sup>11</sup> Na sarxalkat bi boole loolu lakk ci kaw sarxalukaay bi, muy ñamu sawara, ñeel Aji Sax ji.

<sup>12</sup> «Bu saraxu nit ki dee bëy, na ko indil Aji Sax ji <sup>13</sup> te teg loxoom ci bopp bi, ñu rendi ko ci bunt xaymab ndaje mi. Na doomi Aaróona yu góor yi xëpp deret ji ci mboolem weti sarxalukaay bi. <sup>14</sup> La mu cay génnee muy saraxu sawara, ñeel Aji Sax ji mooy nebbon bi sàng yérey biir yi yépp, ak lépp luy nebbon te jàpp ci yérey biir yi, <sup>15</sup> ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te mu di ko booleek dëmbéen yi, génne ko. <sup>16</sup> Na sarxalkat bi boole loolu lakk ci kaw sarxalukaay bi, muy ñamu sawara ngir xetug jàmm, ñeel Aji Sax ji. Mboolem luy nebbon, Aji Sax jeej boroom. <sup>17</sup> Dogal a ngii, di lu leen war fàww, ak fépp fu ngeen dëkk: lépp luy nebbon mbaa deret, buleen ko lekk.»

## 4

### *Lu jëm ci sarax su bàkkaar sabab*

<sup>1</sup> Aji Sax ji wax na itam Musaa ne ko: <sup>2</sup> «Waxal bànni Israyil ne leen: Su fekke ne nit ki dafa moy lenn ci santaaney Aji Sax ji, ba def lenn lu warul te du teyeebam, li ci war lii la.

### *Li war sarxalkat bu mag bu bàkkaar*

<sup>3</sup> «Ndegam sarxalkat bi ñu diw, fal ko, moo moy, ba yóbbe mbooloo mi tooñ, na

indil Aji Sax ji yëkk wu ndaw wu amul sikk, muy saraxu póotum bàkkaar ndax bàkkaar ba mu def. <sup>4</sup> Day yóbbu yëkk wi ci bunt xaymab ndaje mi, ci kanam Aji Sax ji, daldi teg loxoom ci boppu yëkk wi, ñu rendi yëkk wi ci kanam Aji Sax ji. <sup>5</sup> Sarxalkat bi ñu diw, fal ko, na sàkk ci deretu yëkk wi, yóbbu ci biir xaymab ndaje mi. <sup>6</sup> Su ko defee sarxalkat bi capp baaraamam ci deret ji, wis-wisal deret ji juróom ñaari yoon fi kanam Aji Sax ji, fa janook ridob bérab bu sell ba. <sup>7</sup> Na sarxalkat bi sàkk ci deret ji, taqal ci béjjéni sarxalukaayu cuuraay lu xeeñ la ca biir xaymab ndaje ma ca kanam Aji Sax ji. Li des ci deretu yëkk wi, na ko tuur ci taatu sarxalukaay bi ñuy lakk saraxu rendi-dóomal, foofa ca bunt xaymab ndaje ma. <sup>8</sup> Na génne lépp luy nebbon ci yëkk wi ñuy sarxal muy póotum bàkkaar: nebbon bi sàng yérey biir yi, ak lépp luy nebbon te jàpp ci yérey biir yi, <sup>9</sup> ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te mu di ko booleek dëmbéen yi, génne ko. <sup>10</sup> Mooy ni ñu koy génnee rekk ci yëkku saraxu cant ci biir jàmm. Sarxalkat bi da koy boole lakk ca kaw sarxalukaayu rendi-dóomal ba. <sup>11</sup> Waaye deru yëkk wi ak yàppam wépp dees koy booleek bopp bi ak yeel yi ak yérey biir yi ak sébbriit mi; <sup>12</sup> mboolem li des ci yëkk wi daal lay génne dal bi, yóbbu ko ci bérab bu mucc sobe, ca jalub dóom ba, daldi taal matt, lakk ko ca, ba mu dib dóom. Foofa dóom ba jale lees koy lakk.

### *Lu jëm ci sarax yi war mbooloo mi*

<sup>13</sup> «Ndegam mbooloom Israyil mépp a moy lenn ci santaaney Aji Sax ji, ba def lenn lu warul te du seen teyeeb, muy seenug tooñ te seetluwuñu ko, <sup>14</sup> bu mbooloo mi nemmikoo moy gi rekk, war nañoo génne ci jur gu gudd gi yëkk wu ndaw wuy doon saraxu póotum bàkkaar, yóbbu ko ca bunt xaymab ndaje ma. <sup>15</sup> Magi mbooloo mi dañuy teg seeni loxo ci boppu yëkk wi, fi kanam Aji Sax ji, ba noppi ñu rendi yëkk wi fi kanam Aji Sax ji. <sup>16</sup> Gannaaw loolu na sarxalkat bi ñu diw, fal ko, sàkk ci deretu yëkk wi,

yóbbu ci biir xaymab ndaje mi. <sup>17</sup> Na capp baaraamam ci deret ji, wis-wisal deret ji juróom ñaari yoon fi kanam Aji Sax ji, foofu ci kanam rido bi. <sup>18</sup> Bu noppee na sàkk ci deret ji, taqal ci béjjéni sarxalukaay bi ci kanam Aji Sax ji, ci biir xaymab ndaje mi. Li des ci deret ji, na ko tuur ca taatu sarxalukaayu rendi-dóomal ba, ca bunt xaymab ndaje ma. <sup>19</sup> Na génne lépp li ciy nebbon, lakk ko ci kaw sarxalukaay bi. <sup>20</sup> Na def ak yëkk woowu na muy def ak yëkk saraxu póotum bàkkaar rekk. Noonu lay def ak moom. Ni la ko sarxalkat biy defale seen njotlaay, ñu am njéggal. <sup>21</sup> Na génne yëkk wi dal bi, taal ko, na muy taale yëkk wi ñu jékka wax. Saraxu póotum bàkkaaru mbooloo mi la.

### *Li war kilifa gu bàkkaar*

<sup>22</sup> «Su fekke ne kilifa moo moy lenn ci santaney Yàllaam Aji Sax ji, ba def lenn lu warul te du teyefam, mu dig tooñam, <sup>23</sup> bu nemmikoo bàkkaar bi mu def rekk, na sarxe sikket bu amul sikk. <sup>24</sup> Day teg loxoom ci boppu sikket bi, rendi ko fa ñuy rendi saraxu rendi-dóomal, fa kanam Aji Sax ji. Saraxu póotum bàkkaar la. <sup>25</sup> Na sarxalkat bi capp baaraamam ci deretu sarax siy póotum bàkkaar, taqal ko ci béjjéni sarxalukaayu rendi-dóomal bi, ba noppi tuur deret ji ci taatu sarxalukaayu rendi-dóomal bi. <sup>26</sup> Na lakk nebbon bi yépp ci kaw sarxalukaay bi, def ko ni nebbonu saraxu cant ci biir jàmm. Noonu la ko sarxalkat biy defale njotlaayal bàkkaaram, mu am njéggal.

### *Li war baadoolo bu bàkkaar*

<sup>27</sup> «Su dee kenn ci baadoolo yee moy lenn ci santaney Aji Sax ji, ba def lenn lu warul te du teyefam, mu dig tooñam, <sup>28</sup> bu nemmikoo bàkkaar bi mu def rekk, na sarxe aw bëy wu jigéen wu amul sikk, ndax bàkkaar bi mu def. <sup>29</sup> Day teg loxoom ci boppu gattu sarax soosu di póotum bàkkaar, rendi ko fa ñuy lakk saraxu rendi-dóomal. <sup>30</sup> Na sarxalkat bi capp baaraamam ci deret ji, taqal ci béjjéni sarxalukaayu rendi-dóomal bi; li des ci deret ji da koy tuur ci taatu sarxalukaay bi. <sup>31</sup> Te it na génne nebbon

bi yépp ni muy génnee nebbonu jur gu ñu def saraxu cant ci biir jàmm. Na ko sarxalkat bi lakkal Aji Sax ji ci kaw sarxalukaay bi, muy xeeñ xetug jàmm. Noonu la ko sarxalkat biy defale njotlaayal bàkkaaram, mu am njéggal.

<sup>32</sup> «Su fekke ne am xar lay sarxe, muy saraxu póotum bàkkaaram, na doon xar mu jigéen, mu amul sikk. <sup>33</sup> Day teg loxoom ci boppu xar moomu di saraxu póotum bàkkaar, rendi ko fa ñuy rendee saraxu rendi-dóomal, muy saraxu póotum bàkkaar. <sup>34</sup> Na sarxalkat bi capp baaraamam ci deretu xar miy saraxu póotum bàkkaar, te taqal ci béjjéni sarxalukaayu rendi-dóomal bi; li des ci deret ji da koy tuur ci taatu sarxalukaay bi. <sup>35</sup> Te itam na génne nebbon bi yépp, ni muy génnee nebbonu xar mu ñuy def saraxu cant ci biir jàmm. Na sarxalkat bi lakk loolu ci kaw sarxalukaay bi, mu dolliku ci saraxu sawara yi ñeel Aji Sax ji. Noonu la sarxalkat biy defale nit ki njotlaayal bàkkaar bi mu def, mu am njéggal.

## 5

### *Ay xeeti bàkkaar a ngi ak li ciy njotlaay*

<sup>1</sup> «Bu nit bàkkaaree ndax lu mu dégg wooteb seede cib àtte, ba noppi baña wax la mu gis mbaa mu xam ko ca mbir ma, dees na ko ko topp.

<sup>2</sup> «Su fekke ne nit ki dafa laal lu sobewu, te seetluwu ko, lu mel ni rab wu daganul te médd, muy rabu àll mbaa ag jur, mbaa luy raam, kon sobewu na, tooñ na. <sup>3</sup> Su fekke ne nit ki dafa laal sobey nit ak su mu mana doon, te teyu ko, ba mu wees, saa yu ko xamee, tooñ na. <sup>4</sup> Su sàgganee it ba giñ ne dina def nàngam, muy lu baax mbaa lu bon, muy mboolem ngiñ lu ko rècc te ba mu koy wax teyu ko, ba mu wees, saa yu ko xamee tooñ na. <sup>5</sup> Ci tooñin yooyu ñu lim war naa wax na mu tooñe. <sup>6</sup> Na indil Aji Sax ji gatt bu jigéen, xar mbaa bëy, muy daanam ndax bàkkaar bi mu def. Saraxu póotum bàkkaar lay doon, sarxalkat bi defal ko ko njotlaayal bàkkaar bi mu def.

### *Lu jëm ci saraxi aji ñàkk*

<sup>7</sup> «Nit ki amul lu mat njégu gàtt, na indil Aji Sax ji ñaari pitax mbaa ñaari xati yu ndaw, muy daanam ndax bàkkaar bi mu def; benn bi di saraxu póotum bàkkaar, bi ci des di sarax rendi-dóomal. <sup>8</sup> Da koy yót sarxalkat bi, kooku jékka rey benn bi, muy saraxu póotum bàkkaar; na kutt baat bi te bumu teqale bopp beek baat bi. <sup>9</sup> Day xépp ci wetu sarxalukaay bi deretu njanaaw liy saraxu póotum bàkkaar. Li des ci deret ji dees koy tuur ci taatu sarxalukaay bi. Saraxu póotum bàkkaar la. <sup>10</sup> Ñaareel bi na ko def saraxu rendi-dóomal, muy li ñu santaane. Noonu la ko sarxalkat biy defale njetlaayal bàkkaar bi mu def, mu am njéggal.

<sup>11</sup> «Su amul lu mat njégu ñaari pitax mbaa ñaari xati yu ndaw, li muy indi, sarxal ko ngir bàkkaar bi mu def, ñetti kiloy sunguf su mucch ayib lay doon, muy saraxu póotum bàkkaar. Du ci def diw, te du ci sotti cuuraay, ndax li mu di saraxu póotum bàkkaar. <sup>12</sup> Da koy yót sarxalkat bi, sarxalkat bi sàkk ci barci-loxo, muy saraxu baaxantal, mu daldi koy lakk ca kaw sarxalukaay bi, mu dolliku ci saraxi sawara yi. Saraxu póotum bàkkaar la. <sup>13</sup> Noonu la ko sarxalkat biy defale njetlaayal bàkkaar, bi mu def te mu bokk ci xeeti bàkkaar yooyu ñu lim. Su ko defee mu am njéggal. Li des ci sarax bi sarxalkat bee koy moom, mu mel ni bu doon saraxu pepp rekk.»

### *Lu jëm ci saraxu peyug tooñ*

<sup>14</sup> Bu loolu weesee, Aji Sax ji wax na Musaa ne ko: <sup>15</sup> «Ku ñàkka wormaal lenn lu ñu sellalal Aji Sax ji te du teyeefam, daan ba ko war, mu di ko indil Aji Sax ji, am kuuy mu amul sikk lay doon, ñuy xayma njégam, dëppale dayob xaaalis baak natt ba ñu yoonal ca bérab bu sell ba. Saraxu peyug tooñ la. <sup>16</sup> La mu sàggane woon ca yooyu ñu sellalal Aji Sax ji da koy fey, ba dolli ci juróomeelu céru njég ga mu fey, jox ko sarxalkat bi. Sarxalkat bi da koy defal kuuy mi

njetlaayam, muy saraxu peyug tooñ, ngir mu am njéggal.

<sup>17</sup> «Su fekke ne nit ki dafa moy lenn ci santaaney Aji Sax ji ci lu warul lu mu def, su ko xamul it, tooñ na, te dees na ko ko topp. <sup>18</sup> Na indi kuuy mu amul sikk, ñu xayma njégam, yót ko sarxalkat bi, muy saraxu peyug tooñ. Na ko ko sarxalkat bi defal njetlaayal bàkkaar bi mu def te xamu ko woon. Su ko defee mu am njéggal. <sup>19</sup> Loolu saraxu peyug tooñ la, ndax kooka kat tooñ na Aji Sax ji.»

<sup>20</sup> Aji Sax ji wax na Musaa ba tey ne ko: <sup>21</sup> «Su nit ñàkke wormaal Aji Sax ji ci waxi fen yu mu wax moroomam, ci alal ju ñu ko tayle mbaa ñu abal ko ko, mbaa muy lu mu jële ci càcc mbaa àq ju mu lekke ci moroomam, <sup>22</sup> mbaa muy lu réer boroom, mu for ko, di ko miim, mbaa mu giñ te du dëgg ci mbir mu mu mana doon, <sup>23</sup> ku bàkkaare noonu ñu ko waxe, tooñ na, te na delloo alal ji mu ame ci càcc, mbaa njublan mbaa tayle bu ñu ko dénkoon, mbaa muy lu réer, mu for ko. <sup>24</sup> Su dee leneen lu ko taxoona giñ te du dëgg itam naka noonu, na ko delloo ba mu mat sèkk, te saa yu ci nekk da cay dolli juróomeelu céru njég ga, jox ko boroom alal ja, keroog ba muy génne saraxu peyug tooñam. <sup>25</sup> Na yóbbul Aji Sax ji li ñu koy daan, muy am kuuy mu amul sikk, ñu xayma njégam, muy saraxas peyug tooñ su muy yót sarxalkat bi. <sup>26</sup> Noonu la ko sarxalkat biy defale njetlaayam fa kanam Aji Sax ji, mu am njéggal ci mboolem lu mu defoon te mu dig tooñam.»

## 6

### **Mbirum santaane yu sarxalkat yi sasoo**

*(Saar 6.1—7.21)*

#### *Lu jëm ci saraxi rendi-dóomal*

<sup>1</sup> Aji Sax ji waxaat Musaa ne ko: <sup>2</sup> «Santal Aaróona ak doomam yu góor, ne leen li ñu dogal ci saraxu rendi-dóomal mooy lii: Ab saraxu rendi-dóomal day fanaan fi ñu koy lakke ci kaw sarxalukaay bi, ba bët set, sawara way wéye tàkk

\* **6:3** 6.3 wëñ gu èccu googu, gàncax gu tudd lëe lañu koy defare.



ca kaw sarxalukaay ba. <sup>3</sup> Sarxalkat bi day sol mbubbam mi ñu ràbbe wëñ gu ëccu\* ba sew ak tubéyi njiitlaayam ji ñu ràbbe wëñ gu ëccu ba sew. Na tonnee ca sarxalukaay ba dóomu saraxu rendi-dóomal bi, daldi teg dóom bi ci wetu sarxalukaay bi. <sup>4</sup> Su ko defee mu summi yéreem yooyu, sol yeneen te génne dóom bi dal bi, yóbbu ko fu mucc sobe. <sup>5</sup> Na sawaras sarxalukaay bi wéye tàkk te du fey. Suba su nekk na ko sarxalkat bi xamb, ba noppi teg ci saraxu rendi-dóomal bi, te na lakk nebboni saraxi cant gi ci biir jàmm. <sup>6</sup> Na sawara wéye tàkk fàww ci kaw sarxalukaay bi, te bumu fey.

### *Lu jëm ci saraxi pepp*

<sup>7</sup> «Li ñu dogal ci saraxi pepp mooy lii: Na ko doomi Aaróona yu góor joxe fa kanam Aji Sax ji ca sarxalukaay ba. <sup>8</sup> Barci-loxob sunguf su mucc ayib ànd ak diwam lees ciy tibbe, boole kook mboolem cuuraay la ca kaw saraxu pepp ma, daldi koy lakkal Aji Sax ji ci kaw sarxalukaay bi, muy xeeñ xetug jàmm, di saraxu baaxantal. <sup>9</sup> La ca des Aaróona aki doomam yu góor ñoo koy lekk, te buñu ci boole lawiir. Nañu ko lekke ci bérab bu sell. Ci biir èttu xaymab ndaje mi lañu koy lekke. <sup>10</sup> Deesu ko lakkaaleek lawiir. Seen cér la bu leen Aji Sax ji sédd ci saraxi sawaraam. Lu sella sell la, mel ni saraxu póotum bàkkaar ak saraxu peyug tooñ. <sup>11</sup> Képp kuy góor ci doomi Aaróona yi man na cee lekk. Seen cér la bu ñu leen sédde ci saraxi sawara yi ñeel Aji Sax ji, te dogalal leen ko fàww. Lépp lu ci laal day doon lu sella sell.»

<sup>12</sup> Aji Sax ji wax na Musaa ba tey ne ko: <sup>13</sup> «Li Aaróona aki doomam yu góor di sarxalal Aji Sax ji, keroog bu ñu koy diw, fal ko, mooy lii: ñetti kiloy sunguf su mucc ayib, tollook saraxu pepp bi ñu saxoo bés bu nekk, te genn-wàll gi di suba, genn-wàll gi ngoon. <sup>14</sup> Saafukaayu weñ lañu koy lakke, xiiwaale ko diw, indi xiiw ba, muy saraxu pepp. Nañu ko def ay dog yu ñuy lakkal Aji Sax ji, muy xeeñ xetug jàmm. <sup>15</sup> Sarxalkat bi ñuy fal ci doomi Aaróona yu góor yi, mu war koo wuutu, da koy def moom itam. Aji Sax ji

moo jagoo sarax boobu fàww, te dañu koy lakk ba mu jeex. <sup>16</sup> Te it mboolem saraxu pepp bu sarxalkat di defal boppam, dees koy lakk ba mu jeex. Deesu ci lekk.»

### *Lu jëm ci sarax su bàkkaar waral*

<sup>17</sup> Aji Sax ji waxati Musaa ne ko: <sup>18</sup> «Waxal Aaróona ak doomam yu góor ne leen: Dogal bi ci saraxu póotum bàkkaar mooy lii: Juru saraxas póotum bàkkaar dañu koy rendi fa ñu wara rendi juru saraxu dóomal, fi kanam Aji Sax ji. Lu sella sell la. <sup>19</sup> Sarxalkat bi koy rendi, muy saraxu póotum bàkkaar da ciy lekk, te fu sell lañu koy lekke, ci biir èttu xaymab ndaje mi. <sup>20</sup> Lépp lu laal ci yàpp wi, day doon lu sell, te bu lenn ci deretu sarax si tisee ci kawi yére, dees koy xaj fa mu tis, ci bérab bu sell. <sup>21</sup> Su fekke ne ndabal xandeer lañu togge woon yàppu sarax sa, nañu ko toj. Bu doon ndabal xàñar, ñu jonj ko, raxas ko. <sup>22</sup> Képp kuy góor ci askanu sarxalkat sañ na cee lekk. Lu sella sell la. <sup>23</sup> Waaye juru saraxas póotum bàkkaar deesu ci lekk lenn te fekk deretam dugg ca biir xaymab ndaje ma, ñu di ca amal ag njotlaay ca biir bérab bu sell ba. Loolu du lu ñuy lekk. Dees koy lakk, ba mu dib dóom.

## 7

### *Lu jëm ci saraxi peyug tooñ*

<sup>1</sup> «Liy dogal bi ci saraxas peyug tooñ mooy lii: Lu sella sell la. <sup>2</sup> Fa ñuy rendee juru saraxu dóomal, fa lañu wara rendee juru saraxas peyug tooñ. Deret ji dees koy xépp ci mboolem weti sarxalukaay bi. <sup>3</sup> Nebbon ji jépp lañuy sarxal: calgeen bi, nebbon bi sàng yérey biir yi, <sup>4</sup> ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te ñu di ko booleek dëmbéen yi, génne ko. <sup>5</sup> Sarxalkat bi da koy boole lakk ci kaw sarxalukaay bi, muy saraxu sawara, ñeel Aji Sax ji, te di saraxu peyug tooñ. <sup>6</sup> Képp kuy góor te bokk ci askanu sarxalkat yi sañ na cee lekk. Bérab bu sell lees koy lekke. Lu sella sell la.

<sup>7</sup> «Li ci saraxu póotum bàkkaar moo nekk ci saraxu peyug tooñ, dogal bi di

benn ci yooyu jaar: sarxalkat bi def gàtt bi njotlaay moo koy moom. <sup>8</sup> Su nit joxee ab saraxu rendi-dóomal, sarxalkat bi mooy féetewoo deru jur gi mu sarxal. <sup>9</sup> Ci biir loolu bépp saraxu pepp mu ñu lakk cib taal, mbaa ñu saaf ko ci cin mbaa ci saafukaayu weñ, sarxalkat bi koy joxe moo koy moom. <sup>10</sup> Waaye weneen xetu saraxu pepp mu mu mana doon, su dee saraxu pepp mu ñuy xiiwaale diw mbaa muy mu wow, doomi Aaróona yu góor yépp a koy moom, ku nekk tollook sa moroom cér.

### *Lu jëm ci saraxi cant ci biir jàmm*

<sup>11</sup> «Li yoon dogal ci saraxu cant ci biir jàmm, te nit sañ koo sarxalal Aji Sax ji mooy lii: <sup>12</sup> Bu ci nit ki jubloo ag njukkal gu muy delloo Aji Sax ji, day boole ci saraxu cant gi ay mburu yu ndaw yu amul lawiir yu ñu xiiwaale diw ak ay mburu yu tàppandaar yu amul lawiir, ñu wis diw ca kaw, ak ay mburu yu ñu lakke sunguf su mucc ayib, xiiwaale ko diw, not ko bu baax. <sup>13</sup> Sarax boobu da ciy dolli mburu yu am lawiir, boole kook saraxu cant googu ci biir jàmm te mu jublu ci njukkal. <sup>14</sup> Nañu jooxeel Aji Sax ji ab cér ci sarax yooyu yépp, muy moomeelu sarxalkat bi xépp deretu juru saraxas cant gi ci biir jàmm ci mboolem weti sarxalukaay bi. <sup>15</sup> Yàppu saraxas cant googu ci biir jàmm te ñu jublu ci njukkal Aji Sax ji, dees koy lekk bés bi ñu ko rendee. Du lenn lees ciy wacc, mu fanaan.

<sup>16</sup> «Su sarax si nit kiy génne dee sarax su ñuy wàccoo ngiñ mbaa saraxu yéene, dees na ko lekk bés bi ko nit ki joxee, te lu ca des ba ca èllëg sa, ñu man koo lekk. <sup>17</sup> Lu des ci yàppu sarax si ba ca gannaaw èllëg sa dees koy lakk, ba mu dib dóom. <sup>18</sup> Waaye kat bu nit lekkee lenn ci yàpp wu ñu def saraxu cant ci biir jàmm te fekk mu am ñetti fan, deesul nangul boroom sarax si te du ko jariñ dara. Lu ñu sib la te ku ca lekk mooy gàddu bàkkaaram. <sup>19</sup> Yàpp wu ci laal lenn lu sobewu it deesu ko lekk. Dees koy lakk. Ci biir loolu yàppu sarax, képp ku set sañ nga cee lekk. <sup>20</sup> Waaye ku sobewu ku lekk ci yàppu jur gu ñu defal Aji Sax ji saraxu cant ci biir

jàmm, kooku nañu ko dagge ci biir bànni Israyil. <sup>21</sup> Sobe su mu mana doon, muy lu jóge ci nit mbaa mala mu daganul mbaa mboolem lu daganul te mata sib, ku ci laal ba noppi, lekk ci lu ñu defal Aji Sax ji saraxu cant ci biir jàmm, kooku dees koo wara dagge ci bànni Israyil.»

### **Lu jëm ci santaane yi war mbooloo mi**

(7.22-38)

<sup>22</sup> Aji Sax ji dellu wax Musaa ne ko: <sup>23</sup> «Waxal bànni Israyil ne leen: Buleen lekk lenn luy nebbonu nag mbaa xar mbaa bëy. <sup>24</sup> Nebbonu jur gu dee mbaa lu rabu àll fàdd, manees na koo jëfandikoo neneen nu mu mana doon, waaye deesu ko lekk muk. <sup>25</sup> Képp ku lekk ci nebbonu jur gu ñu def saraxu sawara, ñeel Aji Sax ji, kooku ko lekk, dees koy dagge ca biir bànni Israyil. <sup>26</sup> Te itam du lenn luy deret lu ngeen di lekke fenn fu ngeen dëkk, mu jóge ci njanaaw mbaa ag jur. <sup>27</sup> Képp ku lekk lenn luy deret, dees na ko dagge ci biir bànni Israyil.»

<sup>28</sup> Aji Sax ji delloti wax Musaa ne ko: <sup>29</sup> «Waxal bànni Israyil ne leen: Képp kuy jox Aji Sax ji saraxu cantam ci biir jàmm na indi cér bi Aji Sax ji séddoo ci saraxu cant googu ci biir jàmm. <sup>30</sup> Ci loxol boppam lay dindée sarax bi ñuy def saraxu sawara, ñeel Aji Sax ji. Day indi nebbon bi, boole kook dënn bi, dënn bi di sarax bu ñuy yékkati, jébbal Aji Sax ji. <sup>31</sup> Sarxalkat bi day lakk nebbon bi ci kaw sarxalukaay bi, waaye dënn bi, Aaróona aki doomam yu góor ñoo ko moom. <sup>32</sup> Tànkub ndijoor bi jóge ci seen saraxi cant ci biir jàmm, dees koy jooxeel sarxalkat bi. <sup>33</sup> Doomu Aaróona ji joxe deretu sarax beek nebbon bi jóge ci saraxu cant gi ci biir jàmm, kookoo jagoo tànkub ndijoor bi, muy céram. <sup>34</sup> Li ko waral mooy, man Aji Sax ji damaa jële ci seen saraxi cant ci biir jàmm, dënn bi ñuy def saraxu yékkati-jébbale, ak tànkub jooxe bi, jox ko Aaróona, sarxalkat bi mook doomam yu góor. Seen cér la ba fàww ci biir bànni Israyil.»

<sup>35</sup> Loolooy céri pal yi Aaróona ak askanam di am ci saraxi sawara yi ñeel

Aji Sax ji, dale ko keroog bu ñu leen teewalee fi kanam Aji Sax ji, ñu doon ay sarxalkat. <sup>36</sup> Loolu la Aji Sax ji santaane ñu jox leen ko. Bés bu ñu leen xasee diw, fal leen, mu daldi doon seen cér ci biir bànni Israyil ak seen askan ba fàww.

<sup>37</sup> Loolu la yoon digle ci wàllu saraxu rendi-dóomal, ak saraxu pepp ak saraxu póotum bàkkaar ak saraxu peyug tooñ ak saraxu xewu colu ak saraxu cant ci biir jàmm. <sup>38</sup> Loolu it la Aji Sax ji dénkoon Musaa ca kaw tundu Sinayi, bés ba mu santee bànni Israyil ca màndiñu Sinayi ñu di ko génneel ay sarax.

## Fal nañu sarxalkat yi

### 8

(Saar 8—10)

*Lu jëm ci xewu colug sarxalkat ya*

<sup>1</sup> Aji Sax ji waxati Musaa ne ko: <sup>2</sup> «Indil Aaróona aki doomam yu góor te indaale yére yi ak diw gi ñuy fale ak yëkk wiy saraxu póotum bàkkaar ak ñaari kuuy yi, boole ca pañeb mburu ya amul lawiir, <sup>3</sup> te nga woo mbooloo mi mépp, ñu daje ci bunt xaymab ndaje mi.»

<sup>4</sup> Musaa def la ko Aji Sax ji sant, mbooloo ma daje ca bunt xaymab ndaje ma. <sup>5</sup> Musaa wax mbooloo ma ne leen: «Lii may waaj la Aji Sax ji santaane woon ñu def ko.»

<sup>6</sup> Ci kaw loolu Musaa indi Aaróona aki doomam yu góor, ñu sangu, <sup>7</sup> solal Aaróona mbubb mu gudd ma, takkal ko laxasaay ga, solal ko fëxya ba, tegal ko ca xar-sànni ma, takkal ko ngañaay la ca kawam, jappe ko ko, mu tafu ca kawam. <sup>8</sup> Mu solal ko nag kiiraayal dënn ba, daldi yeb ca biir kiiraay la juntuukaayi tegtal ya, di Urim ba ak Tumim ba\*, <sup>9</sup> la ca tegu mu tegal ko kaala ga ca bopp ba, takkal ko dogu wurus wu tell wa, mooy meeteel gu sell ga, mu nekk ca kaw kaala ga, féete kanam, muy la Aji Sax ji santoon Musaa.

<sup>10</sup> Ba loolu wéyee Musaa jël diwu pal ga, diw ca jaamookaay baak ya ca biir yépp, sellale ko yooya, <sup>11</sup> ba noppi wis-wisal ca juróom ñaari yoon ca kaw sarxalukaay ba, diwe ko sarxalukaay ba ak mboolem

ay ndabam, boole ca mbalkam njàpp ma, mook ub tegoom ngir yooyu it sell. <sup>12</sup> Mu sotti nag tuuti ci diw gi ñuy fale ci boppu Aaróona, diw ko, sellale ko ko. <sup>13</sup> Ba mu ko defee Musaa indi doomi Aaróona yu góor ya, solal leen mbubb yu gudd, takkal leen ay laxasaay, solal leen mbaxana, muy la Aji Sax ji santoon Musaa.

<sup>14</sup> Musaa teg ca indi yëkku sarax siy póotum bàkkaar, Aaróona aki doomam teg seeni loxo ci kaw boppu yëkku sarax siy póotum bàkkaar, <sup>15</sup> Musaa rendi ko, sàkk ci deret ji, capp ci baaraamam, diw ci ñeenti béjjéni sarxalukaay bi yépp, setale ko sarxalukaay bi. Mu daldi tuur li des ci deret ji ci taatu sarxalukaay bi, sellale ko noonu, muy njotlaayal sarxalukaay bi.

<sup>16</sup> Ba loolu amee mu jël nebbon bi sàng yére yi, ak bàjjo bi ci res wi ak ñaari dëmbéen yi ànd ak seen nebbon, lakk ko ci kaw sarxalukaay bi. <sup>17</sup> Li des ci yëkk wi, di der beek yàpp week sébbriit mi, mu génne ko dal bi, lakk ko ca biti, muy la Aji Sax ji santoon Musaa.

<sup>18</sup> La ca tegu mu indi kuuyu saraxu rendi-dóomal bi, Aaróona ak doomam yu góor teg seeni loxo ca boppu kuuy ma. <sup>19</sup> Musaa rendi ko, xépp deret ji ci mboolem weti sarxalukaay bi, <sup>20</sup> daldi daggat kuuy mi, def ko ay dog, boole bopp beek dog yeek nebbon bi, lakk ko, ba mu dib dóom. <sup>21</sup> Ba loolu weese Musaa boole yére yi, ak yeel yi, raxas, ba noppi lakk kuuy mi yépp ca sarxalukaay ba. Loolu saraxu rendi-dóomal la, ngir xetug jàmm. Saraxu sawara la, ñeel Aji Sax ji, na ko Aji Sax ji sante woon Musaa.

<sup>22</sup> Gannaaw loolu Musaa indi kuuy ma ca des, di kuuyu xewu colu. Aaróona aki doomam teg seeni loxo ci boppu kuuy mi, <sup>23</sup> Musaa rendi ko, sàkk ca deret ja, taqal ca tabanu noppu ndijooru Aaróona, taqal ca baaraamu déyu ndijooram ak baaraamu déyu tànkú ndijooram. <sup>24</sup> Musaa doora indi doomi Aaróona yu góor ya, sàkk ca deret ja, taqal ca seen tabani noppi ndijoor ak seen baaraamu déyu ndijoor ak seen

\* 8:8 8.8 Seetal ci *Mucc ga* 28.30.

baaraamu déyu tànkì ndijoor. La des ca deret ja, Musaa xëpp ko ca mboolem weti sarxalukaay bi. <sup>25</sup> Ba mu ko defee mu génne nebbon bi, muy calgeen bi ak nebbon bi sàng yérey biir yépp ak bàjjo bi ci res wi ak ñaari dëmbéen yi ànd ak seen nebbon, ak tànkub ndijoor bi. <sup>26</sup> Layu bi def mburu yi amul lawiir, taaje fi kanam Aji Sax ji, mu jële ca menn mburu kese mu ndaw ak menn mburu mu ndaw te am diw ak menn mburu mu tàppandaar, boole ko teg ca kaw nebbon ba ak tànkub ndijoor ba. <sup>27</sup> Mu boole yooyu yépp teg ci loxol Aaróona ak loxoy doomam yu góor, ngir ñu def ko sarax bu ñuy yékkati, jébbal Aji Sax ji. <sup>28</sup> Ba loolu amee Musaa nangoo ko ca seeni loxo, teg ko ca kaw saraxu rendi-dóomal ba, lakk ko ca sarxalukaay ba. Loolu saraxas xewu colu la woon, ngir xetug jàmm. Saraxu sawara la, ñeel Aji Sax ji. <sup>29</sup> Musaa daldi jël dënn biy céram ci kuuyu xewu colu gi, yékkati ko, jébbal Aji Sax ji, muy saraxu yékkati-jébbale, di la Aji Sax ji santoon Musaa.

<sup>30</sup> Musaa teg ca sàkk ca diwu pal ga, ak deret ji ci sarxalukaay bi, wis-wisal ko ci kaw yaramu Aaróona ak ca kawi yéreem, wis-wisaale ko ca kaw yarami doomam yu góor ak ca kaw yérey doomam.

<sup>31</sup> Musaa wax ak Aaróona aki doomam yu góor ne leen: «Toggleen yàpp wi ci bunt xaymab ndaje mi te lekk ko foofa, boole kook mburu mi ci layub saraxi xewu colu gi, muy la ma santaane woon ne yaw Aaróona yaak say doom yu góor yeena koy lekk. <sup>32</sup> Li des ci yàpp wi ak mburu mi, lakkleen ko, ba mu dib dóom. <sup>33</sup> Waaye bunt xaymab ndaje mi buleen ko wees diiru juróom ñaari fan, ba bésusb keroog ba seen xewu colu di mat, ndax juróom ñaari fan lay mat. <sup>34</sup> Lépp lu ñu def tey, Aji Sax ji daa santaane ñu def ko, mu daldi matal seen njotlaay. <sup>35</sup> Ci bunt xaymab ndaje mi ngeen di yem guddeek bëccëg diiru juróom ñaari fan, boole ci di dénkoó dénkaaney Aji Sax ji, ndax ngeen baña dee, ndaxte loolu moo di li ñu ma santoon.»

<sup>36</sup> Aaróona ak doomam yu góor nag def lépp lu Aji Sax ji santaane woon, Musaa

jottli.

## 9

### *Liggéeyu sarxalkat yi tàmbali na*

<sup>1</sup> Keroog bésusb juróom ñetteel ba, Musaa woolu na Aaróona ak doomam yu góor, ñook magi Israyil ña. <sup>2</sup> Mu ne Aaróona: «Sàkkal aw sèllu, muy saraxas póotum bàkkaar akum kuuy, muy saraxu rendi-dóomal, te bu ci lenn am sikk, nga boole indil Aji Sax ji. <sup>3</sup> Te nga wax bànni Israyil ne leen ñu jël ab sikket, mu doon saraxu póotum bàkkaar, akaw sèllu akam xar, lu ci nekk am at te mucc sikk, ngir saraxu rendi-dóomal, <sup>4</sup> ak itam aw nag akam kuuy, muy saraxu cant ci biir jàmm, di lu ñuy rendi fi kanam Aji Sax ji. Nañu defaale saraxu pepp mu am diw, ndax tey jii Aji Sax ji dina leen feeñu.»

<sup>5</sup> Ba mu ko defee ñu yóbbu ca bunt xaymab ndaje ma la Musaa santaane woon, mbooloo ma mépp ñëw, taxaw fa kanam Aji Sax ji. <sup>6</sup> Musaa ne: «Lii mooy li Aji Sax ji santaane ne, moom ngeen wara def ngir leeram feeñu leen.» <sup>7</sup> Musaa wax ak Aaróona ne ko: «Dikkal fii ci sarxalukaay bi te joxe sa saraxu póotum bàkkaar ak sa saraxu rendi-dóomal, nga jotoo ko, yaw yaak mbooloo mi, boo noppee joxe saraxu mbooloo mi, jote leen ko, muy li Aji Sax ji santaane.»

<sup>8</sup> Aaróona dikk ba ci sarxalukaay bi, rendi sèllu wi, muy saraxu póotum bàkkaaram. <sup>9</sup> Gannaaw loolu doomi Aaróona yu góor ya indil ko deret ja, mu capp ca baaraamam, taqal ca béjjéni sarxalukaay ba; la des ca deret ja mu tuur ko ca taatu sarxalukaay ba. <sup>10</sup> Aaróona jël nebbon bi jóge ci sarax biy póotum bàkkaar, aki dëmbéenam ak bàjjo bi ci res wi, mu boole ko lakk ci kaw sarxalukaay bi, muy la Aji Sax ji santoon Musaa. <sup>11</sup> Yàpp wi ak der bi, mu génne ko dal ba, lakk ko, ba mu dib dóom. <sup>12</sup> La ca tegu Aaróona rendi juru rendi-dóomal bi. Ba loolu amee doomam yu góor ya jox ko deret ja, mu xëpp ko ci mboolem weti sarxalukaay bi. <sup>13</sup> Ñu jox ko saraxu rendi-dóomal bi ñu def dog yu ànd ak bopp ba, mu boole lakk ca sarxalukaay ba. <sup>14</sup> Loolu

wéy, mu raxas yérey biir yi, ak yeel yi, teg ko ca kaw saraxu rendi-dóomal ba, lakkaale ko ca.

<sup>15</sup> Gannaaw gi Aaróona indi saraxi mbooloo mi, jël sikketu mbooloo miy doon seen saraxu póotum bàkkaar, rendi ko, sarxal ko, na mu sarxale la jiitu. <sup>16</sup> Ci kaw loolu mu indi saraxu rendi-dóomal ba, sarxal ko, na ñu ko diglee. <sup>17</sup> Mu doora indi saraxu pepp mi, sàkk ci ab tib, lakk ko ca kaw sarxalukaay ba, dolli ko ca dóomal suba sa. <sup>18</sup> Mu sooga rendi nag wi ak kuuy mi, defal ko mbooloo mi saraxu cant ci biir jàmm. Doomam yu góor ya jox ko deret ja, mu xëpp ko ca mboolem weti sarxalukaay ba. <sup>19</sup> Waaye lay nebbon ca nag wa ak kuuy ma, di calgeen ba ak nebbon bi sàng yérey biir yi, ak dëmbéen yi ak bàjjo bi ci res wi, <sup>20</sup> nebbon yooyu lañu teg ca kaw dënni nag wa ak kuuy ma, Aaróona lakk ko ca kaw sarxalukaay ba. <sup>21</sup> Ba mu ko defee Aaróona yékkati dënn yaak t ànku ndijoor ba, defal ko Aji Sax ji saraxu yékkati-jébbale, muy la Musaa santaane woon.

<sup>22</sup> Ba Aaróona noppee, yékkati na mbooloo ma ay loxoom, ñaanal leen, doora wàcc. Fekk na mu joxe saraxu póotum bàkkaar ba, ak saraxu rendi-dóomal ba, ak saraxu cant ga ci biir jàmm. <sup>23</sup> Musaa ak Aaróona ànd dugg ca biir xaymab ndaje ma; ba ñu génnee, ñaanal mbooloo ma, leeru Aji Sax ji feeñu mbooloo ma mépp. <sup>24</sup> Ci kaw loolu sawara bawoo fi Aji Sax ji, tàkk ca kaw sarxalukaay ba, xoyom saraxu rendi-dóomal ba ak nebbon ba. Naka la mbooloo ma mépp gis loola, daldi sarxolle, ba noppi dëpp seen jë fa suuf.

## 10

### *Musiba dal na Nadab ak Abiyu*

<sup>1</sup> Ci kaw loolu doomi Aaróona yu góor yi tudd Nadab ak Abiyu jël ku ci nekk ab andam, def cay xal, def ca cuuraay, indil ko Aji Sax ji, muy taal bu dul ndigal te santu leen ko woon. <sup>2</sup> Sawara ne jippét, bawoo fi Aji Sax ji, lakk leen ba ñu dee fa kanam Aji Sax ji. <sup>3</sup> Musaa ne Aaróona: «Lii la Aji Sax ji doon wax ba mu nee:

“Ci biir ñi may jegeñ laay feeñal samag sellaa, te ci kanam mbooloo mi mépp lees may terale.”» Aaróona nga ne cell.

<sup>4</sup> Ba mu ko defee Musaa woolu Mikayel ak Elsafan, góor ñiy doomi Usyel, baayu Aaróona bu ndaw. Mu ne leen: «Kaayleen jële fi seen bokk yii ci bérab bu sell bi, te ngeen génne leen dal bi.» <sup>5</sup> Ñu jàpp ca seeni mbubb, génne leen dal ba, muy la Musaa santaane woon. <sup>6</sup> Musaa wax Aaróona ak doomam yu góor yi tudd Elasar ak Itamar ne leen: «Buleen njañu te buleen ñaawlu di xotti seeni yére, lu ko moy dingeen dee, te merum Yàlla dina dal ci kaw mbooloo mi mépp. Waaye seen bokki bànni Israyil gépp sañ nañoo jooy ñi Aji Sax ji lakk. <sup>7</sup> Bunt xaymab ndaje mi, buleen ko wees, lu ko moy dingeen dee, ndax diwu palu Aji Sax jaa ngi ci seen kaw.» Ñu def la leen Musaa sant.

### *Li war ci sarxalkat*

<sup>8</sup> Aji Sax ji wax Aaróona itam ne ko: <sup>9</sup> «Biiñ mbaa naan guy màndal bu ko kenn ci yeen naan buy duggsi ci biir xaymab ndaje mi, du yaw, du say doom yu góor, lu ko moy dingeen dee. Dogal a ngoogu, di lu leen war fàww, yeen ak seen askan. <sup>10</sup> Dangeen wara mana ràññee lu sell ak lu ñu sellalul, dangeen wara ràññee itam lu set ak lu setul. <sup>11</sup> Nangeen jàngal bànni Israyil mboolem dogal yi leen Aji Sax ji dénk, te Musaa jottli leen ko.»

<sup>12</sup> Ci kaw loolu Musaa wax ak Aaróona ak doomam yu góor yi des, di Elasar ak Itamar, ne leen: «Jël-leen saraxu pepp mi des ci saraxi sawara yi ñeel Aji Sax ji, ngeen lekk ko, bañ cee boole lawiir, ci wetu sarxalukaay bi, ndax lu sella sell la. <sup>13</sup> Lekkleen ko ci bérab bu sell. Sa cér la, yaw ak say doom yu góor, ci saraxi sawara yi ñeel Aji Sax ji. Loolu lañu ma sant. <sup>14</sup> Waaye dënnu saraxu yékkati-jébbale bi ak t ànkub jooxe bi, lekkleen ko ci bérab bu mucc sobe, yaak say doom yu góor ak say doom yu jigéen, ndax seen cér la, ci saraxi canti bànni Israyil ci biir jàmm, nga moom ko yaak say doom. <sup>15</sup> T ànkub jooxe bi ak dënnu saraxu yékkati-jébbale bi, mook nebbon

bi ñuy def saraxu sawara, dees koy boole indi yékkati ko, def ko sarax bu ñuy yékkati, jébbal Aji Sax ji. Yeena moom yooyu, yaak say doom, muy seen cér bu ñu leen dogalal fàww, te di la Aji Sax ji santaane woon.»

<sup>16</sup> Gannaaw loolu Musaa laajte, ba am lu leer ci mbirum sikketu saraxas póotum bàkkaar bi, ndekete lakk nañu ko, ba mu dib dóom. Mu mere ca doomi Aaróona yu góor ya des, di Elasar ak Itamar, ne leen: <sup>17</sup> «Lu waral lekkuleen sarax biy póotum bàkkaar ci bérab bu sell? Lu sella sell la, ñu jox leen ko, ngeen war koo yenniku bàkkaaru mbooloo mi, ba defal leen seen njotlaay fi kanam Aji Sax ji. <sup>18</sup> Gannaaw dugaleesul deret ji ca biir bérab bu sell ba, waroon ngeena lekk sikket bi ci bérab bu sell, muy li ma santaane woon.» <sup>19</sup> Aaróona ne Musaa: «Xoolal rekk tey ni bànni Israyil indile Aji Sax ji seen saraxu póotum bàkkaar ak seen saraxu rendi-dóomal, te teewul lii dal ci sama kaw! Bu ma lekkoon tey ci yàppu saraxas póotum bàkkaar bi, ndax dina neex Aji Sax ji?» <sup>20</sup> Musaa dégg kàddu yooyu, rafetlu ko.

## Sàrtal nañu lu set ak lu setul

### 11

(Saar 11—15)

#### *Lu jëm ci mala mu set ak mu setul*

<sup>1</sup> Aji Sax ji wax na Musaa ak Aaróona ne leen: <sup>2</sup> «Waxleen bànni Israyil ne leen: Boroom bakkan yi ngeen di lekk seen yàpp, ci mboolem mala yiy dox ci suuf moo di yii: <sup>3</sup> Mboolem mala mu we wa xar, séddlikoo ñaar, te muy duññ, moom ngeen di lekk aw yàppam. <sup>4</sup> Yii ñuy lim, buleen ko lekk: mala muy duññ te we wi xarul, mbaa we wi xar te du duññ. Lu mel ni giléem, buleen ko lekk ndax day duññ, waaye we wi xarul. Daganul ci yeen. <sup>5</sup> Daman\* day duññ waaye we wi xarul, kon daganul ci yeen. <sup>6</sup> Lëg day duññ waaye we wi xarul, kon daganul ci yeen. <sup>7</sup> Mbaam-xuux, we wi xar na waaye du duññ, kon daganul ci yeen. <sup>8</sup> Buleen

ci lekk lenn te buleen laal méddam ndax lenn daganu ci, ci yeen.

<sup>9</sup> «Li ngeen mana lekk ci mboolem luy nekk ci ndox mooy lii: Mboolem lu am ay ciiriir aki waasintóor tey nekk ci ndoxum géej mbaa dex, man ngeen koo lekk. <sup>10</sup> Waaye mboolem luy nekk ci géej mbaa dex, di lépp luy ramm-rammi cim ndox mbaa mboolem yeneen bindeef yuy nekk ci ndox, su amul ciiriir aki waasintóor, sibleen ko. <sup>11</sup> Lu ngeen sib lay doon, kon buleen ci lekk yàppu lenn te sibleen méddam. <sup>12</sup> Mboolem luy nekk ci ndox te amul ciiriir ak waasintóor, sibleen ko.

<sup>13-18</sup> «Li ngeen wara sib ci njanaaw yi te deesu ko lekk moo di: jaxaay ak mboolem xeeti tan; ak céeli, bu xonq baak bu ñuul ba, bu mu mana doon, ak mboolem xeeti baaxoñ, ak mboolem xeeti looy, muy looy mu ndaw ak looy muy napp ak looy mu gudd nopp ak looyu màndiñ, ba ci xar-jéjj ak tiwi. Nangeen sib maf itam, ak kirigéej ak mboolem xeeti liccin; <sup>19</sup> ak yébb ak lu xeetook xodd, ak musejubru ak njugub.

<sup>20</sup> «Mboolem gunóor guy naaw tey doxe ñeenti tànk sibleen ko. <sup>21</sup> Li ngeen mana lekk daal ci mboolem gunóor guy naaw tey doxe ñeenti tànk moo di: lépp lu tànk yi ànd aki yeel, mu man caa tēb-tēbe ci suuf. <sup>22</sup> Li ngeen mana lekk ci yooyu moo di: mboolem xeetu njéeréer ak mboolem xeetu salleer ak mboolem xeetu soccet ak yeneen yu ñu xeetool yépp. <sup>23</sup> Waaye mboolem yeneen gunóor yuy naaw tey doxe ñeenti tànk sibleen ko.

<sup>24</sup> «Yii nag da leen di sobeel te képp ku laal lu ci dee dina yendoo sobe ba jant so. <sup>25</sup> Te itam képp ku for lenn lu dee ci yii, na fóot ay yéreem, waaye dina yendoo sobe ba jant so. <sup>26</sup> Mboolem mala mu we wa xar te séddlikoowul ñaar mbaa du duññ daganul ci yeen, ku ci laal lenn it sobewu na. <sup>27</sup> Ba tey lépp luy doxe ndëgguy tànkam ci mboolem boroom ñeenti tànk, daganul ci yeen te ku laal méddam dina yendoo sobe ba jant so. <sup>28</sup> Ku for méddam, na fóot ay yéreem

\* **11:5** 11.5 daman xaw naa nirook njomboor.

te dina yendoo sobe ba jant so. Yooyu daganul ci yeen.

<sup>29</sup> «Bu loolu weese, leneen lu daganul ci yeen ci rab yu sew-sewaan yiy dox ne ñàpp ci suuf, mooy kaña ak janax ak xeeti mbëtt yépp; <sup>30</sup> ak unk ak bar ak sindax buy yéeg, ak sindax buy dox ci suuf, ak kàkkatar. <sup>31</sup> Yooyoo daganul ci yeen ci mboolem rab yu sew-sewaan yiy dox ne ñàpp ci suuf. Képp ku laal lenn lu ci dee dina yendoo sobe ba jant so. <sup>32</sup> Te it lu ci dee ba wadd ci kaw lenn, loola day sobewu, nay ndabal bant, mbaa ndimo, der mbaa ab saaku, mbaa jumtukaay bu mu mana doon. Nañu sóob loola ci ndox te du tee mu yendoo sobe ba jant so, mu doora set. <sup>33</sup> Su fekke ne lenn a dee ci yooyu, wadd ci biir ndabal xandeer, lu woon ca biir sobewu na, te nañu toj ndab la. <sup>34</sup> Ndox mu jóge ci ndab loolu, bu dalee ci ñam wu dagan, ñam woowu dal nay sobewu moom itam; bu doon ag naan gu dagan moo ca nekk it, sobewu na, ak ndab lu naan ga mana nekk. <sup>35</sup> Lépp lu lenn ci yooyu dee, ba dal ca, la mu dal sobewu na. Su dee ab puuru ban mbaa cin, dees koy toj ndax sobewu na te lu setul la ci yeen. <sup>36</sup> Su fekke ne loola dee daa wadd ci biir bētu ndox mbaa kàmb gu def ndox, du tee ndox ma laab, waaye ku laal la dee ca biir sobewu nga. <sup>37</sup> Su la dee waddee ci peppum jiwu, du tee peppum jiwu ma set; <sup>38</sup> waaye su fekke ñu kaas pepp ma te lenn lu dee lu bokk ci yooyu dal ca, pepp ma daganul ci yeen.

<sup>39</sup> «Su mala mu dagan méddée, ku laal médd ma dina yendoo sobe ba jant so. <sup>40</sup> Képp ku lekk ca médd ma, na fóot ay yéreem, te du tee mu yendoo sobe ba jant so. Képp ku for médd ma, na fóot ay yéreem te du tee mu yendoo sobe ba jant so.

<sup>41</sup> «Mboolem bindeef yu sew-sewaan yiy dox ne ñàpp ci suuf, sibleen ko. Deesu ko lekk. <sup>42</sup> Lépp luy watatu, mbaa lu sew di boroom ñeenti tànk, mbaa mu bare ay tànk ci mboolem bindeef yu sew-sewaan yiy dox ne ñàpp ci suuf, waruleen koo lekk, ndax lu ñu wara sib la. <sup>43</sup> Buleen araamal seen bopp ci lenn ci yu sew-sewaan yooyu; buleen ci taq, di ci sobeel

seen bopp, <sup>44</sup> ndaxte man Aji Sax ji maay seen Yàlla. Kon nag sell-luleen te sell ndax man ku Sell laa. Kon buleen sobeel mukk seen bopp ci mboolem bindeef yu sew-sewaan yiy dox ci suuf. <sup>45</sup> Ndaxte kat man Aji Sax ji maay ki leen génne woon réewum Misra, di seen Yàlla. Sell-leen boog, ndax man ku Sell laa.»

<sup>46</sup> Loolu la yoon digle ci wàllu mala ak njanaaw ak bindeef yi nekk ci ndox, ak mboolem bindeef yu sew-sewaan yiy dox ne ñàpp ci suuf. <sup>47</sup> Dina taxa ràññatle lu set ak lu setul. Dina taxa ràññatle boroom bakkan yi dagana lekk ñook boroom bakkan yi daganula lekk.

## 12

### *Li war ci ku wasin*

<sup>1</sup> Bu loolu wéyee Aji Sax ji wax na Musaa ne ko: <sup>2</sup> «Waxal bànni Israyil ne leen: Ku ëmb ba wasin, am doom ju góor, dina sobewu diiru juróom ñaari fan. Day sobewu ni bu tolloo ci fan yi muy gis baax. <sup>3</sup> Bu bés ba délsee, nañu xarfal xale bi. <sup>4</sup> Dina ca teg fanweeri fan ak ñett, ngir setlu ca meret ma. Ci diir booba warula laal lenn lu ñu sellal, mbaa muy dugg fu sell li feek àppu setloom matul. <sup>5</sup> Su amee doom ju jigéen, dina sobewu diiru ñaari ayi bés, mu mel ni ku gis baax. Dina ca teg juróom benn fukki fan ak juróom benn, doora tàggook sobey meret ma.

<sup>6</sup> «Keroog bu àppu setloom matee, bu doom ja dee góor, bu dee jigéen, na dem ca bunt xaymab ndaje ma te yóbbul sarxalkat bi am xar mu am at, muy saraxu rendi-dóomal, ak xati mu ndaw mbaa pitax, mu doon saraxu póotum bàkkaar. <sup>7</sup> Na ko sarxalkat bi sarxal fi kanam Aji Sax ji, def ko njotlaayal wasin-bees wi, mu doora tàggook sobey meret ma.»

Loolu la yoon digle ci wasin-bees, mu am doom ju góor mbaa ju jigéen. <sup>8</sup> «Su fekke ne wasin-bees wi amul njégu xar, na indi ñaari pitax mbaa ñaari xati yu ndaw, benn bi di saraxu rendi-dóomal, bi ci des di saraxu póotum bàkkaar. Sarxalkat bi defal ko ku jigéen ki njotlaayam, mu daldi set.»

## 13

### *Li war ci jàngoroy der*

<sup>1</sup> Aji Sax ji wax na Musaa ak Aaróona ne leen: <sup>2</sup> «Su nit amee ab tērgēn ci yaramam mbaa ab ēr, mbaa ab gàkk bu weex bu mana doon jàngoroy der juy law ci yaramam, nañu ko yóbbu ci Aaróona sarxalkat bi mbaa kenn ciy doomam yu góor yiy sarxalkat yi. <sup>3</sup> Na sarxalkat bi seet gàkk bi ci yaramu nit ki; su fekkee ne kawar gi ci gàkk bi dafa soppiku weex, te mu mel ni lu def pax ci der bi, jàngoroy der juy law la. Bu sarxalkat bi gisee loolu, na biral ne nit ki sobewu na. <sup>4</sup> Waaye su dee ab gàkk bu weex ci yaram wi te melul ni lu def pax ci der bi, taxul itam kawar gi ci nekk soppiku weex, na sarxalkat bi ber nit ki ame gàkk bi diiru juróom ñaari fan. <sup>5</sup> Na ko sarxalkat bi xoolaat bésuub juróom ñaareel ba. Bu sarxalkat bi seetloo ne gàkk bi soppikuwul mbaa mu law ci yaramam, na ko beraat juróom ñaari fan. <sup>6</sup> Na ko sarxalkat bi xoolaat ca bésuub juróom ñaareel ba. Su fekkee gàkk bi di raaf te lawul ci kaw deru yaram wi, na sarxalkat bi biral ne nit ki set na; ab ēr donj la. Day fóot ay yéreem rekk daldi set. <sup>7</sup> Su fekkee ne wóor na ne ēr bi law na ci deru yaramu nit ki, gannaaw ba mu ko wonee sarxalkat bi, ba mu biral ne set na, day dellu ca sarxalkat ba. <sup>8</sup> Su boobaa na ko sarxalkat bi xoolaat ba gis ēr bi law ci deru yaram wi, mu doora biral ne nit ki sobewu na te jàngoroy der juy law la.

<sup>9</sup> «Képp ku ame jàngoroy der juy law, nañu ko yóbbu ca sarxalkat ba. <sup>10</sup> Na ko sarxalkat bi seet. Su dee ab tērgēn bu weex te kawar gi ci nekk soppiku weex, boole ci def góom ca biir, <sup>11</sup> kon jàngoroy der juy law la te xas naa law ci yaram wi. Na sarxalkat bi biral ne nit ki sobewu na. Du jar mu di ko ber ndax taq na sobe ba noppi. <sup>12</sup> Su fekkee ne nag jàngoro ji génn naa génn ci yaramu nit ki, sarxalkat bi gis ko fépp, li ko dale ci bopp bi ba ci tánk yi, <sup>13</sup> na ko sarxalkat bi seet bu baax. Bu gisee ne li génn ci yaramam daj na yaram wi yépp, na biral ne nit ki mu dal set na; gannaaw léppam a soppiku weex, set na. <sup>14</sup> Ba tey bés bu ay góom génnatee

ci yaram wi, nit ki sobewu na. <sup>15</sup> Su sarxalkat bi gisee yaramu nit ki def góom rekk, na biral ne sobewu na. Góom boobu génn ci yaram wi sobe la. Jàngoroy der juy law la. <sup>16</sup> Te it bu góom bi soppikoo weex, na dem ca sarxalkat ba. <sup>17</sup> Na ko sarxalkat bi seet, ba gis ne weexaat na, mu biral ne ki jàngoro ji dal set na te kon it set na.

<sup>18</sup> «Su nit taabee ba wér, <sup>19</sup> ab tērgēn bu weex mbaa gàkk bu weex bu rax xonq feeñ fa taab ba nekkoon, na dem ca sarxalkat ba. <sup>20</sup> Su ko sarxalkat bi seetee ba gis fa taab ba nekkoon mel ni lu def pax, te kawar gi ci nekk soppiku weex, na sarxalkat bi biral ne nit ki sobewu na. Jàngoroy der juy law la, ju juddoo ca taab ba. <sup>21</sup> Waaye su ko sarxalkat bi seetee te gisu ca kawar gu weex, deful pax it te raaf na, na ber nit ki juróom ñaari fan. <sup>22</sup> Su wéree ne jàngoro ji law na ci yaram wi, na sarxalkat bi biral ne nit ki sobewu na. Jàngoroy der juy law la. <sup>23</sup> Su gàkk bi yemee foofu, baña law, légétub taab ba la, te na sarxalkat bi biral ne nit ki set na.

<sup>24</sup> «Su nit lakkee, ab gàkk bu weex mbaa bu weex te rax xonq feeñ ca kaw suux wu xonq wa lakk, <sup>25</sup> na ko sarxalkat bi seet. Su kawar gi ci nekk soppikoo weex te gàkk bi mel ni lu def pax, kon jàngoroy der juy law la, ju juddoo ca lakk-lakk ba. Na sarxalkat bi biral ne nit ki sobewu na, ndax jàngoroy der juy law la. <sup>26</sup> Waaye su ko sarxalkat bi seetee, gisul kawar gu weex ci gàkk bi, deful pax it te raaf na, na ber nit ki juróom ñaari fan. <sup>27</sup> Sarxalkat bi da koy seet ca bésuub juróom ñaareel ba. Su wéree ne jàngoro ji law na ci yaram wi, na biral ne nit ki sobewu na. Jàngoroy der juy law la. <sup>28</sup> Su gàkk bi yemee foofu te lawul ci yaram wi, ab tut la bu juddoo ci lakk-lakk bi. Na sarxalkat bi biral ne nit ki set na, ndax légétub lakk-lakk ba la.

<sup>29</sup> «Su fekkee ne góor mbaa jigéen dafa ame jàngoro ci bopp mbaa ci sikkim, <sup>30</sup> na sarxalkat bi seet fi jàngoro ji nekk. Su melee ni lu def pax ci der bi, kawar gu xall te sew nekk ca, na sarxalkat bi biral ne nit ki sobewu na. Loolu wat-wataan la, di ēr yuy génn ci bopp mbaa sikkim.



<sup>31</sup> Ndegam sarxalkat bi seet na èr wi te niruwul lu def pax, amul it kawar gu ñuul ca biir, day ber nit ki ame èr wi diiru juróom ñaari fan. <sup>32</sup> Sarxalkat bi day seetaat èr wi ca bésub juróom ñaareel ba. Su wat-wataan ji lawul, kawar gu xall nekku ca, te melul ni lu def pax, <sup>33</sup> na nit ki watu waaye du wataale wat-wataan ji. Sarxalkat bi da koy beraat juróom ñaari fan. <sup>34</sup> Na sarxalkat bi seetaat wat-wataan ji ca bésub juróom ñaareel ba. Su wat-wataan ji lawul ci yaram wi te niruwul lu def pax, sarxalkat bi day biral ne nit ki sobewuwul. Nit ki day fóot ay yéreem daldi set. <sup>35</sup> Waaye su wéree ne wat-wataan ji law na ci yaram wi gannaaw ba ñu biralee ne set na, <sup>36</sup> na ko sarxalkat bi dellu seet ba gis ne wat-wataan ji law na ci yaram wi. Su boobaa soxlaatul mu di ca seet kawar gu xall, ndax nit ki sobewu na. <sup>37</sup> Waaye su seetloo ne wat-wataan ji soppikuwul te kawar gu ñuul sax ca, wat-wataan ja wér na, nit ki it set na. Na sarxalkat bi biral ne nit ki set na.

<sup>38</sup> «Su góor mbaa jigéen amee ay gakk-gakk yu weex ci yaram wi, <sup>39</sup> sarxalkat bi seet ko, gakk yooyu ci yaram wi di lu weex, xawa xall, xam rekk la, ju feñ ci yaram wi waaye nit ki set na.

<sup>40</sup> «Góor gu bopp ba amatul kawar dafa leel waaye set na. <sup>41</sup> Bu bopp bi ñakkee kawar fi féeteek kanam gi, jë baa leel waaye set na. <sup>42</sup> Waaye su amee gakk bu weex bu feñ te rax xonq ci leelub ndaal bopp mbaa jë, jàngoroy der la juy màgg tey génn ci leelub ndaal bopp mbaa jë. <sup>43</sup> Sarxalkat bi da koy seet. Ndegam ay tērgēn yu weex te rax xonq a ngi ci leelub ndaal bopp bi mbaa jë bi, mu mel ni jàngoroy der juy law ci yaram wi, <sup>44</sup> nit ki ànd naak jàngoro te taq na sobe. Na sarxalkat bi biral ci lu leer ne nit ki sobewu na ndax jàngoro ji ci bopp bi.

<sup>45</sup> «Ku ànd ak jàngoroy der juy law nag yére yu xottiku lay sol te day njañu\*. Na muur li ko dale ci tuñum kaw mi ba ci sikkim bi, te nay jappoo àddu ca kaw naan: “Setuma de, setuma!” <sup>46</sup> Li feek jàngoro jaa ngi ci moom, day sobewu

te gannaaw daa sobewu, na dëkk moom donj te na dëkkuwaayam génn dal bi.

### *Li war ci këf ku teg liir*

<sup>47</sup> «Su ndimo xuuree, teg aw liir, muy ndimol kawaru gatt gu ñu ècc mbaa yu wēñ gu èccu†, <sup>48</sup> mu tegu ci bàgg mbaa ci poqe, su dee kawar gu èccu, su dee wēñ gu èccu walla der bu ñu wulli walla mboolem lu ñu defare der, <sup>49</sup> su liir wi nētēxee mbaa mu xonq, tege ci yére mbaa der mbaa bàgg mbaa poqe mbaa lu ñu defare der, liir wuy law la. Dees koy won sarxalkat bi. <sup>50</sup> Na sarxalkat bi nemmiku liir wi, ba noppi ber këf ki teg liir wi diiru juróom ñaari fan. <sup>51</sup> Bésub juróom ñaareel ba na seet liir wa. Su liir wa lawee ca kaw këf ka, muy ndimo mbaa bàgg mbaa poqe mbaa der mbaa jomtukaayu der, kon liir wu aaytal la te këf ka sobewu na. <sup>52</sup> Da koy lakk, ndax liir wu aaytal la, muy ndimo mbaa bàgg mbaa poqe mbaa kawaru gatt gu ñu ècc mbaa wēñ gu èccu mbaa lu ñu defare der te liir wa tegu ca. Dees koy lakk, ba mu dib dóom. <sup>53</sup> Waaye kat bu sarxalkat bi seetloo ne liir wi lawul ci këf ki, muy ndimo mbaa bàgg mbaa poqe mbaa jomtukaayu der, <sup>54</sup> na santaane ñu fóot ko, mu daldi koy beraat juróom ñaari fan. <sup>55</sup> Ndegam nag gannaaw ba ñu fóotee këf ka teg liir, sarxalkat bi seet na ko, te liir wi soppiwul melo, bu lawul it setul. Dees koy lakk, ba mu dib dóom, su yàqoo biir ak su yàqoo biti yépp. <sup>56</sup> Su sarxalkat bi gisee gannaaw ba ñu fóotee këf ka ne, liir wi raaf na, na dagg sànni fa tegoon liir ca këf ka, muy ndimo mbaa der mbaa bàgg mbaa poqe. <sup>57</sup> Su liir wa génnaatee ca këf ka, muy ndimo mbaa bàgg mbaa poqe mbaa lu ñu defare der, kon liir wuy màgg la. Këf ka teg liir dees koy lakk, ba mu dib dóom. <sup>58</sup> Ndegam liir wa deñ na, gannaaw ba ñu fóotee këf ka, muy ndimo mbaa bàgg mbaa poqe mbaa lu ñu defare der, dees koy fóotaat, mu doora set.»

<sup>59</sup> Loolu la yoon digle ci liir wuy law wu tegu ci ndimol kawar gu èccu mbaa

\* **13:45** 13.45 Dafa wara ñaawlu ni bu nekkoon ci dēj, ngir àrtu nit ñi ba ñu sore ko, ndax setul. † **13:47** 13.47 wēñ gu èccu: seetal ci 6.3.

lu wëñ gu èccu mbaa bàgg mbaa poqe mbaa lu ñu defare der. Ci digle yooyu lañuy tegu, ba mana biral ne këf ka set na am setul.

## 14

### *Li war ci laabal boroom jàngoroy der*

<sup>1</sup> Aji Sax ji teg na ca ne Musaa: <sup>2</sup> «Li yoon digle ci mbirum nit ku ame jàngoroy der juy law, keroog bés ba ñuy laabal nit ki, mooy lii: Nañu ko yegge sarxalkat bi. <sup>3</sup> Sarxalkat bi day gënn dal bi, bu koy seet. Su nit ki demee ba jàngoroy der ji ko daloon wér, <sup>4</sup> sarxalkat bi day santaane, ñu indil nit kooku ñuy laabal ñaari picc yu dagan tey dund, ak bantu garabu seedar, ak wëñ gu xonq curr, ak caru garabu isob\*. <sup>5</sup> Na sarxalkat bi santaane, ñu rendi menn picc mi, tiimale ko ndabal xandeer lu def ndox mu balle ci bëtü ndox. <sup>6</sup> Picc miy dund da koy booleek bantu seedar bi ak wëñ gu xonq curr gi ak caru isob bi, boole lépp sóob ci deretu picc ma ñu rendi woon tiimale ko ndox mi balle ci bëtü ndox. <sup>7</sup> Bu loolu amee sarxalkat bi wis-wisal juróom ñaari yoon ci kaw ki ñuy laabal, ngir mu tàggook sobey jàngoro ji. Su ko defee sarxalkat bi biral ne set na. Bu noppee na bàyyi picc miy dund mu naaw ca àll ba. <sup>8</sup> Ku ñuy laabal day fóot ay yéreem, watu ba set te sangu, doora set. Gannaaw loolu man naa dugg ci dal bi, waaye na yem ca bunt xaymaam ca biti diiru juróom ñaari fan. <sup>9</sup> Bésüb juróom ñaareel ba na watu ba set, bopp beek sikkim beek yeen yi ak kawar gi ci des yépp lay wat, fóot ay yéreem, sangu, daldi set. <sup>10</sup> Bésüb juróom ñetteel ba na indi ñaari kuuy yu amul sikk, ak menn xar mu jigéen mu am at te amul sikk ak juróom ñeenti kiloy sunguf su mucç ayib su ñu xiiwe diw, muy saraxu pepp. Mu indaale genn-wàllu liitaru diw. <sup>11</sup> Sarxalkat biy laabal nit ki day indi nit ki, mu ànd ak loolu lépp, taxaw fi kanam Aji Sax ji, ci bunt xaymab ndaje mi.

<sup>12</sup> «Sarxalkat bi teg ca jël menn kuuy mi, rendi ko, muy saraxu peyug tooñ,

boole kook genn-wàll liitaru diw ga, def ko sarax bu ñuy yékkati, jébbal Aji Sax ji. <sup>13</sup> Nañu rendi kuuy mi ci bérab bu sell bi, fi ñuy rendee juru saraxu póotum bàkkaar ak saraxu rendi-dóomal, ndax li nekk ci saraxu peyug tooñ moo nekk ci saraxu póotum bàkkaar: sarxalkat bee ko moom; lu sella sell la. <sup>14</sup> Na sarxalkat bi sàkk ci deretu jur giy saraxu peyug tooñ, taqal ko ci tabanu noppu ndijooru nit ki ñuy laabal ak baaraamu déyu ndijooram ak baaraamu déyu tànkü ndijooram. <sup>15</sup> Bu sarxalkat bi noppee, na sàkk ci genn-wàll liitaru diw gi, sotti ko ci biir loxol càmmoñu boppam. <sup>16</sup> Na sarxalkat bi capp baaraamu joxoñu ndijooram ci diw gi ci loxol càmmoñam, daldi wis-wisale diw gi baaraamam, ba mu mat juróom ñaari yoon fi kanam Aji Sax ji. <sup>17</sup> Na sarxalkat bi sàkk ci diw gi des ci loxoom, tooyal ci tabanu noppu ndijooru nit ki ñuy laabal ak baaraamu déyu ndijooram ak baaraamu déyu tànkü ndijooram; nañu ko laalal ci diw gi fa ñu ko jèkkoon taqal ci deretu sarax siy peyug tooñ. <sup>18</sup> Li des ci diw gi ci loxol sarxalkat bi, na ko diw ci boppu nit ki ñuy laabal. Noonu la ko sarxalkat bi defale njotlaayam fi kanam Aji Sax ji. Ba loolu amee sarxalkat bi rendi sarax biy póotum bàkkaar, <sup>19</sup> defal ko ki ñuy laabal njotlaayam ngir mu tàggook sobeem. Te itam na sarxalkat bi rendi saraxu dóomal bi, <sup>20</sup> boole kook saraxu pepp mi, joxe lépp ci kaw sarxalukaay bi, defal ko nit ki njotlaayam, mu set.

<sup>21</sup> «Su fekkee ne nit ki dafa ñàkk ba dooleem matewu ko, na wut menn kuuy, muy saraxu peyug tooñ, di saraxu yékkati-jébbale, ngir njotlaayam, boole kook ñetti kiloy sunguf su mucç ayib, xiiwe ko diw, muy saraxu pepp. Na indaale genn-wàll liitaru diw, <sup>22</sup> ak ñaari pitax mbaa ñaari xati yu ndaw, lu mu ci gëna jekku rekk. Menn mi saraxu póotum bàkkaar la, mi ci des di saraxu rendi-dóomal. <sup>23</sup> Da koy indil sarxalkat bi, ngir mu laabal ko bu bés ba délsee, ca bunt xaymab ndaje ma, fi kanam Aji Sax ji. <sup>24</sup> Sarxalkat bi day jël kuuyu sarax

\* **14:4** 14.4 isob: seetal ci *Mucc ga* 12.22.

siy peyug tooñ ak genn-wàll liitaru diw gi, boole ko, muy sarax bu ñuy yékkati, jébbal Aji Sax ji. <sup>25</sup> Gannaaw gi ñu rendi kuuy miy saraxu peyug tooñ, sarxalkat bi sàkk ci deret ji, taqal ci tabanu noppu ndijooru nit ki ñuy laabal ak baaraamu déyu ndijooram ak baaraamu déyu tànkú ndijooram. <sup>26</sup> Bu sarxalkat bi noppee, na sotti tuuti ci diw gi ci loxol càmmoñu boppam, <sup>27</sup> Baaraamu joxoñu ndijooram lay wis-wisale diw gi ci loxol càmmoñam ba muy juróom ñaari yoon fi kanam Aji Sax ji. <sup>28</sup> Loolu wéy sarxalkat bi wara sàkk ci diw gi ci loxoom, tooyal ca tabanu noppu ndijooru ki ñuy laabal ak baaraamu déyu ndijooram ak baaraamu déyu tànkú ndijooram; na ko def ca bérab boobu mu taaj deretu sarax siy peyug tooñ. <sup>29</sup> Li des ci diw gi ci loxol sarxalkat bi na ko diw ci boppu ki ñuy laabal, defal ko ko njotlaay fi kanam Aji Sax ji. <sup>30</sup> Bu noppee na rendi menn pitax mi mbaa menn xati mu ndaw mi, lu mu ci gëna jekku rekk, <sup>31</sup> menn mi di saraxas peyug tooñ, mi ci des di saraxu rendi-dóomal, te mu boole kook saraxu pepp mi. Noonu la sarxalkat biy defale ki ñuy laabal njotlaayam fi kanam Aji Sax ji.»

<sup>32</sup> Loolu la yoon digle ci mbirum nit ku ànd ak jàngoroy der juy law te dooleem matewul sarax yi ñu koy laabale.

### *Li war ci néeg bu teg liir*

<sup>33</sup> Aji Sax ji wax na Musaa ak Aaróona ne leen: <sup>34</sup> «Bu ngeen demee ca réewu Kanaan ga ma leen jox muy seen moomeel, bu ma tegee liir wuy law ba xuural ab néeg foofa ca seen réewum bopp, <sup>35</sup> boroom néeg bi dafa wara dem ca sarxalkat ba ne ko: “Lu mel ni aw liir laa gis sama néeg.” <sup>36</sup> Su boobaa na sarxalkat bi santaane, ñu génne lépp lu nekk ca néeg ba, bala muy dugg di seet liir wi. Su ko defee du am lenn lu nekk ca néeg ba, lu muy biral ne sobe topp na ko. Gannaaw loolu sarxalkat bi dugg, seet néeg bi. <sup>37</sup> Bu sarxalkat bi seetee liir wi ci miiri néeg bi ca biir, muy ay xóot-xóot yu xawa nētēx, mbaa mu xawa xonq, mel ni lu def pax ci miir bi, <sup>38</sup> na génn néeg

bi te tēj néeg bi diiru juróom ñaari fan. <sup>39</sup> Bésu juróom ñaareel ba na sarxalkat bi délsi seet néeg bi. Bu liir wi lawee ci miiri néeg bi, <sup>40</sup> na sarxalkat bi santaane, ñu teggi doj yi liir wi xuural, boole ko génne dëkk bi, sànni ko fu setul. <sup>41</sup> Na xeetlu biir néeg bi ba mu daj, te pënd ba ñu ca xeete dees koy génne dëkk ba, tuur ko fu setul. <sup>42</sup> Dañoo wara sàkkaat ay doj, wuutale ko doj yooyu te sàkk ban bu bees, raaxe ko néeg bi.

<sup>43</sup> «Su liir wi delloo tegu ci biir néeg bi gannaaw bu ñu teggee doj yi, xeet biir néeg bi, ba raax ko, <sup>44</sup> sarxalkat bi day dikk seet ko. Su liir wi lawee ci néeg bi, liir wu aaytal la wu xuural biir néeg bi, di sobe. <sup>45</sup> Néeg ba dees koy daane, boole doj yaak bant yaak banu raax ba bépp, génne ko dëkk bi, tuur ko fu setul.

<sup>46</sup> «Ku dugg biir néeg bi diiru fan yi mu tēje dina yendoo sobe ba jant so. <sup>47</sup> Ku tēdd ca biir néeg ba war naa fóot ay yéreem te ku fa lekke it war naa fóot ay yéreem.

<sup>48</sup> «Su sarxalkat ba delloo ca néeg ba, seet ko, fekk liir wa lawul ca néeg ba, gannaaw ba ñu ko raaxee, na biral ne néeg bi set na, ndax kon liir wa raaf na. <sup>49</sup> Liy laabal néeg bi moo di mu sàkk ñaari picc ak bantu garabu seedar ak wēñ gu xonq curr ak caru isob†. <sup>50</sup> Day rendi menn picc mi, tiimale ko ndabal xandeer mu def ndox mu balle ci bētu ndox. <sup>51</sup> Bu noppee na jaxase deretu picc mi ñu rendi ak ndox mu balle ci bētu ndox, daldi jël bantu seedar bi ak caru isob bi ak wēñ gi xonq curr ak picc miy dund, boole lépp sóob ca. Su ko defee mu wis-wisal ca juróom ñaari yoon ci néeg bi. <sup>52</sup> Kon li muy laabale néeg bi moo di deretu picc mi ak ndox moomu ak picc miy dund ak bantu seedar bi ak caru isob bi ak wēñ gi xonq curr. <sup>53</sup> Na bàyyi picc miy dund fu génn dëkk ba, mu naaw ca àll ba. Noonu lay defe njotlaayal néeg bi, mu set.»

<sup>54</sup> Loolu la yoon digle ci lépp luy jàngoroy der juy law ak wat-wataan, <sup>55</sup> mbaa liir wu tegu ci ndimo mbaa ci néeg, <sup>56</sup> ak ci wàllu tērgēn itam mbaa mu

† 14:49 14.49 isob: seetal ci *Mucc ga* 12.22.

diy èr mbaa gàkk bu weex; <sup>57</sup> mooy tegtal biy xamle lu set ak lu setul. Loolu la yoon digle ci jàngoroy der juy law mbaa liir.

## 15

### *Lu jëm ci sobey góor*

<sup>1</sup> Aji Sax ji wax na it Musaa ak Aaróona ne leen: <sup>2</sup> «Waxleen ak bànni Israyil ne leen: Góor gu ànd ak jàngoro ju sabab ngóoraam di xelli mbér, kooku sobewu na. <sup>3</sup> Mbér mi muy xelli moo ko sobeel; su ngóora liy xelli mbér mbaa su ko mbér mi fattee, waa ji sobewu na. <sup>4</sup> Lal ba mu tëdd sobewu na, te lépp lu mu toog loola sobewu na. <sup>5</sup> Képp ku laal lalam, na fóot ay yéreem, sangu, te du tee mu yendoo sobe ba jant so. <sup>6</sup> Ku toog ci lenn lu boroom jàngoroy xelli toogoon, na fóot ay yéreem, sangu, te du tee mu yendoo sobe ba jant so. <sup>7</sup> Ku laal boroom jàngoroy xelli war naa fóot ay yéreem, sangu, te du tee mu ànd ak sobe ba jant so. <sup>8</sup> Su ku ànd ak jàngoroy xelli tiflee ku taqul sobe, na kooku fóot ay yéreem, sangu, te du tere mu yendoo sobe ba jant so. <sup>9</sup> Gépp tegu daamar gu boroom jàngoroy xelli waroon, sobewu na. <sup>10</sup> Ku laal lenn lu mu toogoon lu ko féete woon suuf dina yendoo sobe ba jant so, te képp ku yékkati loola na fóot ay yéreem, sangu, te du tere mu yendoo sobe ba jant so. <sup>11</sup> Boroom jàngoroy xelli bu raxasul ay loxoom, ku mu laal, kooku, na fóot ay yéreem, sangu, te du tere mu yendoo sobe ba jant so. <sup>12</sup> Ndabal xandeer lu boroom jàngoroy xelli laal, dees koo wara toj. Su dee mboolem ndabal bant, dees koy raxas.

<sup>13</sup> «Gannaaw loolu bu boroom jàngoroy xelli ji tàggook sobey jàngoro ja, dafa wara waññ juróom ñaari fan ngir setlu, ba noppi fóot ay yéreem, sangoo ndox mu balle ci bētu ndox, doora set. <sup>14</sup> Bésuub juróom ñetteel ba, na wut ñaari pitax mbaa ñaari xati yu ndaw te teewi fi kanam Aji Sax ji ca bunt xaymab ndaje ma, daldi koy jox sarxalkat bi. <sup>15</sup> Sarxalkat bi day rendi yooyu, menn mi di saraxu póotum bàkkaar, mi ci des di saraxu rendi-dóomal. Noonu la ko

sarxalkat biy defale njotlaayam fi kanam Aji Sax ji ndax jàngoroy xelleem jooju.

<sup>16</sup> «Su góor génnee wasal, war naa ragg yaramam wépp, te du tere mu yendoo sobe ba jant so. <sup>17</sup> Lépp luy yére mbaa der bu wasal taq, dees koy fóot te du tere mu yendoo sobe ba jant so. <sup>18</sup> Su dee jigéen ju góor àndal, te wasal génn, nañu sangu, te du tere ñu yendoo sobe ba jant so.

### *Lu jëm ci sobey jigéen*

<sup>19</sup> «Su jigéen gisee mbërëg, sobey mbërëg ma day ànd ak moom juróom ñaari fan te képp ku laal ku jigéen ka dina yendoo sobe ba jant so. <sup>20</sup> Lépp lu mu tëdd te fekk mu gis baax, loola sobewu na te lépp lu mu toog, loola sobewu na. <sup>21</sup> Te it képp ku laal ab lalam, war naa fóot ay yéreem, sangu, te du tere mu yendoo sobe ba jant so. <sup>22</sup> Képp ku laal lenn lu mu toogoon war naa fóot ay yéreem, sangu, te du tee mu yendoo sobe ba jant so. <sup>23</sup> Su toogoon ci lal mbaa leneen lu mu toogoon, ku laal loola dina yendoo sobe ba jant so, <sup>24</sup> te ku ko dëkkoo, ba mbërëg taq ko, kooka sobewu na diiru juróom ñaari fan, te ka ko dëkkoo, lal bu mu tëdd sobewu na.

<sup>25</sup> «Kuy xépp deret ay fan yu bare te du jamonoy baaxam, mbaa mu gis mbërëg mu wees àpp bi mu ko baaxoo gis, kooka sobewu na diiru fan yi muy xépp. Day mel ni bu nekkee ci jamonoy baaxam. <sup>26</sup> Lal bu mu tëdd ci diir bi muy xépp yépp, day mel ni lalam bu ko fekk ci jamonoy baax te lépp lu mu toog day sobewu, ni bu nekkoon ci jamonoy baaxam. <sup>27</sup> Ku laal lenn ci yooyu yëf, kooka sobewu na. War naa fóot ay yéreem, sangu, te du tere mu yendoo sobe ba jant so.

<sup>28</sup> «Bu xéppee ba jeexal, dina waññ juróom ñaari fan, doora tàggook sobe sa. <sup>29</sup> Bésuub juróom ñetteel ba na wut ñaari pitax mbaa ñaari xati yu ndaw, yóbbu ca sarxalkat ba, ca bunt xaymab ndaje ma. <sup>30</sup> Sarxalkat bi day rendi menn mi muy saraxu póotum bàkkaar, mi ci des doon saraxu rendi-dóomal. Su ko defee sarxalkat bi defal ko ko njotlaay fi kanam Aji Sax ji ndax sobey xépp ja.

<sup>31</sup> «Fexeleen ba bànni Israyil di tàggook seeni sobe, lu ko moy dinañu dee ndax seen sobe, ngir dañuy taqal sama màkkaan mi ci seen biir.»

<sup>32</sup> Loolu la yoon digle ci mbiri góor gu ànd ak jàngoroy xelli mbaa mu génne wasal, ba sobewu; <sup>33</sup> ak jigéen ju nekk ci jamonoy baaxam; ci gàttal képp ku taq sobe suy génne ci moom, muy góor mbaa jigéen, ak itam góor gu dèkkoo jigéen ju sobewu.

## Lu jëm ci bésub Njotlaay

### 16

<sup>1</sup> Bu loolu weesee Aji Sax ji wax naak Musaa gannaaw ba ñaari doomi Aaróona yu góor ya deeyee, ba ñu taxawsee fa kanam Aji Sax ji. <sup>2</sup> Aji Sax ji dafa wax Musaa ne ko: «Waxal sa mag Aaróona ne ko du saa yu nekk lay àgg ci biir bérab bu sell bee sell, ci gannaaw rido bi, di janook kubeeru saraxu njotlaay gi ub gaal gi àlluway kóllère gi dence, lu ko moy dina dee, ndax ci niir wi tiim kubeeru gaal gi laay feeñe\*.

<sup>3</sup> «Ni Aaróona di dugge ci biir bérab bu sell bee sell nii la: day indaale aw yëkk wu ndaw ngir ab saraxu póotum bàkkaar, akum kuuy ngir ab saraxu rendi-dóomal. <sup>4</sup> Mbubb mu sell lay sol, mu ñu ràbbe wëñ gu èccu† ba sew ak tubéyi njiitlaay ju ñu ràbbe wëñ gu èccu ba sew. Na takkoo laxasaay gu ñu ràbbe wëñ gu èccu ba sew, te kaalag wëñ gu èccu ba sew lay takk. Yére yu sell a ngoogu; kon nag na sangu bala mu koy sol. <sup>5</sup> Na jële ci mbooloom bànni Israyil ñaari sikket, sikket yuy doon saraxu póotum bàkkaar ak menn kuuyum rendi-dóomal.

<sup>6</sup> «Aaróona day sarxal yëkk wi, muy saraxu póotum bàkkaaram, di njotlaayal boppam, mook waa këram. <sup>7</sup> Gannaaw loolu na Aaróona indi ñaari sikket yi, taxawal fi kanam Aji Sax ji, ci bunt xaymab ndaje mi. <sup>8</sup> Na Aaróona tegal ñaari sikket yi bant, ngir xam bu ñuy rendil Aji Sax ji ak biy doon ngir Asasel‡. <sup>9</sup> Su ko

defee Aaróona indi sikket, bi muurloo, ñu sarxalal ko Aji Sax ji, rendi ko, muy saraxu póotum bàkkaar. <sup>10</sup> Waaye sikket bi muurloo doon sikketu Asasel, dees koy taxawal muy dund fi kanam Aji Sax ji, te ni ñu koy jotoo, mooy dees koy dàq mu dem ca màndinj ma, ngir Asasel.

<sup>11</sup> «Bu Aaróona noppee, na indi yëkku saraxas póotum bàkkaaram, def ko njotlaayam mook waa këram. Na rendi yëkku saraxas póotum bàkkaaram, <sup>12</sup> te na sàkk andu xal bu fees, tibbe ko ca sarxalukaay ba, fi kanam Aji Sax ji, ak ñaari barci-loxoy cuuraay lu mook te xeeñ, boole ko yóbbu ca gannaaw rido ba. <sup>13</sup> Na def cuuraay li ci taal bi, foofa ca kanam Aji Sax ji, saxaru cuuraay si di làq kubeeru saraxu njotlaay gi ub gaalu àlluway seede si, ndax mu baña dee. <sup>14</sup> Na sàkk ci deretu yëkk wi, wis-wisale ko baaraamam ci kaw kubeeru gaal gi, ci wetam gi féete penku, te it na wis-wisale baaraamam deret ji lu mat juróom ñaari yoon ci kanam kubeeru gaal gi. <sup>15</sup> Bu noppee na rendi sikket biy saraxas póotum bàkkaaru mbooloo mi, te yóbbu deret ji ca gannaaw rido ba. Na def deret ji na mu defoon ak deretu yëkk wa, wis-wisal ko ca kaw kubeeru gaal gi ak ci kanam kubeer gi. <sup>16</sup> Mu daldi matale loolu njotlaayal bérab bu sell bee sell, tàggale kook sobey bànni Israyil ak seeni tooñ, ak lu seen bàkkaar mana doon. Noonu lay defal mboollem xaymab ndaje, mi dëkk ci seen biir ci seen biiri sobe. <sup>17</sup> Du kenn ku saña nekk ci biir xaymab ndaje mi, bu Aaróona duggee ci biir bérab bu sell bee sell, di matal ag njotlaay, ba keroog muy gén, gannaaw bu jotoo moom ci boppam, mook waa këram, ba jotaale mbooloom bànni Israyil mépp.

<sup>18</sup> «Bu sottalee, na gén, na gén jëm ca sarxalukaay ba ca kanam Aji Sax ji, ba noppi defal sarxalukaay bi njotlaayal boppam. Day sàkk ci deretu yëkk wi ak ju sikket bi, taqal béjjéni sarxalukaay bi yépp. <sup>19</sup> Te itam day wis-wisale baaraamam

\* **16:2** 16.2 Seetal ci *Mucc ga* 25.17. † **16:4** 16.4 wëñ gu èccu: seetal ci 6.3. ‡ **16:8** 16.8 Asasel: am na ñu ne mi ngi tekki «kasara». Am na ba tey ñu naan rab wu bon la, wu dëkk ci màndinj mi.

deret ji lu mat juróom ñaari yoon ci kaw sarxalukaay bi, setal ko, sellal ko, mu tàgbook sobey bànni Israyil.

<sup>20</sup> «Bu Aaróona matalee njotlaayal bérab bu sell bee sell ak xaymab ndaje ma ak sarxalukaay ba, na indi sikket biy dund. <sup>21</sup> Aaróona day teg ay loxoom ci kaw boppu sikket biy dund te tudd ci kawam mboolem ñaawtéefi bànni Israyil ak seeni tooñ, ak seeni bàkkaar yépp, boole ko yen sikket bi, teg ko ci loxol nit ku ñu yónni, mu dàq ko ca màndinj ma. <sup>22</sup> Sikket bi day yenu seeni ñaawtéef yépp, yóbbaaale ca ndànd-foyfoy ga, ñu wacc ko ca màndinj ma.

<sup>23</sup> «Na Aaróona dellu ca xaymab ndaje ma, summi yére ya ñu ràbbe wëñ gu èccu ba sew, di ya mu soloon bala moo dugg ca bérab bu sell baa sell, te na fa wacc yére ya. <sup>24</sup> Bu loolu weese mu sangoo fu sell, sol yérey boppam, génn, joxeel boppam ab saraxu rendi-dóomal, joxeel mbooloo mi seen saraxu rendi-dóomal ngir njotlaayal boppam ak njotlaayal mbooloo mi. <sup>25</sup> Nebbonu jur giy saraxu póotum bàkkaar, na ko lakk ci kaw sarxalukaay bi.

<sup>26</sup> «Ka wacci woon sikketu Asasel, na fóot ay yéreem, sangu, doora mana duggaat ci dal bi. <sup>27</sup> Muy yëkk wiy saraxu póotum bàkkaar, muy sikket biy saraxu póotum bàkkaar te ñu yóbbu woon seen deret ca biir bérab bu sell baa sell ngir defe ko njotlaay, lépp lañuy génne dal bi. Der yaak yàpp waak sébbriit ma dees koy boole lakk, ba mu dib dóom. <sup>28</sup> Ki ko lakk bu noppee, na fóot ay yéreem, sangu, doora mana duggaat ci dal bi.

<sup>29</sup> «Te itam dogal a ngii, di lu leen war fàww. Bésuub fukki fan ci juróom ñaareelu weeru at mi nangeen ci toroxlu te du lenn lu ngeen ci mana liggéey, du njuddu-ji-réew du doxandéem bi ci seen biir; <sup>30</sup> ndaxte ci bés boobu lañu leen di joxeel njotlaay ngir fóot seen mboolem bàkkaar, ba ngeen set fi kanam Aji Sax ji. <sup>31</sup> Na doon seen bés bu ngeen di nopplu donj, ngeen war cee toroxlu. Dogal la bu sax dàkk.

<sup>32</sup> «Sarxalkat bi ñu fal nag, solal ko, jox ko sañ-sañu sarxalkat bu mag, mu wuutu baayam, na def saraxu njotlaay gi. Na sol yére yu sell yooyu di yi ñu ràbbe wëñ gu èccu ba sew, <sup>33</sup> te it na def njotlaayal bérab bu sell bee sell ak xaymab ndaje mi ak sarxalukaay bi, boole ci defal sarxalkat yi seen njotlaay, ñook mbooloom Israyil mépp.

<sup>34</sup> «Dogal a ngoogu, di lu leen war fàww, te mooy ñuy joxeel bànni Israyil seen njotlaay benn yoon cim at ngir seen bàkkaar yépp.»

Ñu daldi def li Aji Sax ji santoon Musaa.

## Ndigal yi jëm ci sellal

### 17

(Saar 17—26)

#### Li war ci jaamu ak sarxal

<sup>1</sup> Bu loolu wéyee Aji Sax ji wax na Musaa ne ko: <sup>2</sup> «Waxal Aaróona aki doomam yu góor ak bànni Israyil gépp ne leen li Aji Sax ji santaane mooy lii: <sup>3</sup> Képp kuy góor ci waa kër Israyil, bu rendee aw nag mbaa xar mbaa bëy ci biir dal bi, ak fu génn dal bi, <sup>4</sup> te indiwu ko ci bunt xaymab ndaje mi, teewalal ko Aji Sax ji, muy sarax ca bunt jaamookaayu Aji Sax ji, kooku dees na ko topp àqu deret. Dafa tuur deret. Kon dees na ko dagge ci biir bànni Israyil. <sup>5</sup> Su ko defee bànni Israyil dinañu indil Aji Sax ji juri sarax yi ñuy rendi ci àll bi. Dañu koo wara yóbbu ca sarxalkat ba, fi Aji Sax ji, ca bunt xaymab ndaje ma, defal ko Aji Sax ji saraxi cant ci biir jàmm. <sup>6</sup> Sarxalkat bi day xépp deret ji ci sarxalukaayu Aji Sax ji, ci bunt xaymab ndaje mi, ba noppi, lakkal Aji Sax ji nebbon bi, muy xeeñ xetug jàmm. <sup>7</sup> Buñu di sarxalatil tuur, yi ñuy jëmmale sikket, di ko bokkaalee. Na loolu di dogal bu leen war fàww, ñoom ak seen askan. <sup>8</sup> Wax leen boog ne leen: Képp kuy góor, ku bokk ci waa kër Israyil, mbaa mu bokk ci doxandéem yi ci seen biir, buy génne ab saraxu rendi-dóomal mbaa beneen sarax, <sup>9</sup> te indiwu ko ci bunt xaymab ndaje mi, sarxalal ko Aji Sax ji, kooku dees koo wara dagge ci biir bànni Israyil.

<sup>10</sup> «Te it képp ku bokk ci waa kër Israyil mbaa doxandéem yi ci seen biir, bu lekkee lenn luy deret, kooku lekk deret, man Aji Sax ji, dinaa ko noonoo te dinaa ko dagge ci biir bànni Israyil. <sup>11</sup> Ndaxte dundu mbindeef ci deret la nekk, te man maa leen sédde deret, ngeen di ko jotoo seen bakkan ci kaw sarxalukaay bi. Ndax kat bakkanu mbindeef deretam la taxawe. Moo tax deret mana defal nit njotlaayam. <sup>12</sup> Looloo waral ma ne bànni Israyil, bu kenn ci ñoom lekk deret, te doxandéem bi ci seen biir it bumu lekk deret.

<sup>13</sup> «Képp ku bokk ci bànni Israyil mbaa ci doxandéem yi ci seen biir, bu rëbbee ba jàpp mala mbaa njanaaw, mu di lu dagana lekk, na tuur deret ji, suul, <sup>14</sup> ndax dundu mboolem mbindeef mooy deretam. Moo waral, man Aji Sax ji, ma ne bànni Israyil buñu lekk deretu menn mbindeef ngir dundu mboolem mbindeef mooy deretam. Képp ku lekk deret, dees koy dagge ci askan wi.

<sup>15</sup> «Te itam képp ku lekk médd mbaa lu rab fàdd, muy njuddu-ji-réew mbaa doxandéem, na fóot ay yéreem, sangu, te du tere mu yendoo sobe ba jant so, mu doora set. <sup>16</sup> Waaye su fóotul, sanguwul, mooy gàddu bàkkaaram.»

## 18

### *Li warul ci mbirum séy*

<sup>1</sup> Aji Sax ji wax na Musaa ba tey ne ko: <sup>2</sup> «Waxal bànni Israyil ne leen: Man Aji Sax ji maay seen Yàlla. <sup>3</sup> Defini waa réewam Misra ga ngeen dëkkoon, buleen ko roy, te defini waa réewu Kanaan ga ma leen jëme, buleen ko roy te it buleen leen topp ci seeni aada. <sup>4</sup> Samay santaane ngeen wara dégg tey topp samay dogal. Man Aji Sax ji maay seen Yàlla. <sup>5</sup> Nangeen sàmm samay dogal ak samay santaane, ndax ngeen jëfe yooyu moo leen di taxa dund. Man maay Aji Sax ji.

<sup>6</sup> «Bu kenn ci yeen dëkkoo ku mu jegewool lool cig boka. Maay Aji Sax ji.

<sup>7</sup> Bul torxal sa baay, di dëkkoo sa yaay. Sa yaay la, kon bu ko torxal moom it.

<sup>8</sup> «Bul dëkkoo sa soxnas baay, di torxal sa baay.

<sup>9</sup> «Bul dëkkoo sab jigéen, te muy koo bokkal benn baay mbaa koo bokkal jenn ndey, muy ku juddoo ci kër gi mbaa feneen.

<sup>10</sup> «Bul dëkkoo sab sët bu jigéen bu sa doom ju góor jur mbaa sa doom ju jigéen, ndax kon torxal nga sa bopp.

<sup>11</sup> «Bul dëkkoo ku sa soxnas baay am ak sa baay, ndax sab jigéen la.

<sup>12</sup> «Bul dëkkoo sa bàjjan, ndax daa jegewook sa baay lool cig boka.

<sup>13</sup> «Bul dëkkoo sa ndey ju ndaw, ndax daa jegewook sa yaay lool cig boka.

<sup>14</sup> «Bul torxal sa baay bu ndaw di dëkkoo soxnaam. Sa ndey la.

<sup>15</sup> «Bul dëkkoo sa soxnas doom. Sa soxnas doom la. Bu ko dëkkoo muk.

<sup>16</sup> «Bul dëkkoo soxnas koo bokkal benn baay mbaa jenn ndey, nde kon nga torxal sa doomu baay mbaa sa doomu ndey.

<sup>17</sup> «Bul boole dëkkoo jigéen, dëkkoo doom ja mbaa sëtam bu doomam ju góor jur mbaa doomam ju jigéen jur ko, ndax dañoo jegewoo lool cig boka. Loolu ñaawtéef la.

<sup>18</sup> «Bul jël jigéen di séq ak moom séy, muy wujjeek doomu ndeyam mbaa doomu baayam joo jëkka jël, li feek kookoo ngi dund.

<sup>19</sup> «Bul dëkkoo jigéen ju gis baax, ndax daa sobewu.

<sup>20</sup> «Bul ànd ak jabaru jaambur, di sobeel sa bopp.

<sup>21</sup> «Bul jébbal kenn ci say doom tuur mi ñuy wax Moleg, ndax waruloo teddadil sa turu Yàlla. Man maay Aji Sax ji.

<sup>22</sup> «Bu góor tédde góor, ni bu doon jigéen. Lu ñaawa ñaaw la.

<sup>23</sup> «Bu góor tédde menn mala, di sobeel boppam, te bu jigéen jox boppam mala, di ànd ak moom. Loolu yàqute la.

<sup>24</sup> «Buleen sobeel seen bopp ci mboolem defin yooyu, ndax xeet yi ma leen dàqal, noonu lañu daan jëfe, ba sobeel seen bopp. <sup>25</sup> Réew ma sax mujj na daj ak sobe, ma wàcce mbugal ca kaw réew ma, ba mu gëq ay nitam.

<sup>26</sup> «Yeen nag sàmmleen samay dogal ak samay santaane te bu kenn def lenn ci yooyu ñaawtéef, du njuddu-ji-réew, du doxandéem bi ci seen biir, <sup>27</sup> ndax

kat mboolem ñaawtéef yooyu la waa réew ma leen fa jiitu daan def, ba réew ma mujj daj ak sobe. <sup>28</sup> Su ngeen sobeelee réew ma, dinaa leen gëq, na ma gëqe woon xeet ya leen fa jiitu woon. <sup>29</sup> Képp ku def lenn ci yooyu ñaawtéef déy, kooku dees koy dagge ci biir bànni Israyil. <sup>30</sup> Dénkooleen sama ndénkaane ngir baña roy lenn ci aada yu ñaaw yi ñu fi doon topp lu leen jiitu, te buleen sobeel seen bopp ci yooyu. Man Aji Sax ji maay seen Yàlla.»

## 19

### *Lu jëm ci dundin wu sell te jub*

<sup>1</sup> Bu loolu wéyee Aji Sax ji wax na Musaa ne ko: <sup>2</sup> «Waxal mbooloom bànni Israyil gépp ne leen: Ñu sell ngeen wara doon, ngir ku Sell laa, man seen Yàlla Aji Sax ji.

<sup>3</sup> «Na ku nekk weg ndeyam ak baayam te wormaal sama bési Noflaay. Man Aji Sax ji, maay seen Yàlla.

<sup>4</sup> «Buleen walbatiku di jaamu ay yàllantu mbaa ngeen di sàkkal seen bopp ay tuur yu ñu móole weñ. Man Aji Sax ji maay seen Yàlla.

<sup>5</sup> «Bu ngeen dee rendil Aji Sax ji saraxas cant ci biir jàmm, sarxal-leen ko ni mu ware, ndax ñu nangul leen. <sup>6</sup> Ca bés ba ñu ko sarxale lees koy lekk, mbaa ca èllëg sa; lu ca des ba ca gannaaw èllëg sa dees koy lakk, ba mu dib dóom. <sup>7</sup> Bu ñu ci lekkee déy te fekk mu am ñetti fan, day doon lu ñu sib, te deesu ko nangu. <sup>8</sup> Ku ci lekk mooy gaddu bàkkaar bi, ndaxte lu ñu sellalal Aji Sax ji la teddadil, te kooku dees na ko dagge ci biir bànni Israyil.

<sup>9</sup> «Bu ngeen dee góob seen tool, buleen góob ba fa tool ba yem te buleen ca toppaat, di foraatu. <sup>10</sup> Seen tóokëri reseñ it buleen ko witt ñaari yoon te buleen foraatu doom yu wadde ca witt ma. Aji ñàkk akub doxandéem ngeen koy bàyyee. Maay seen Yàlla, man Aji Sax ji.

<sup>11</sup> «Buleen sàcc, buleen fen te buleen di worante.

<sup>12</sup> «Buleen giñe sama tur lu dul dëgg, di teddadil seen turu Yàlla. Maay Aji Sax ji.

<sup>13</sup> «Buleen lekk seen àqu moroom, buleen sàcc. Buleen wacc peyu liggéeykat, muy fanaan ci seeni loxo.

<sup>14</sup> «Buleen saaga ab tëx te buleen fakk-tal silmaxa. Ragal-leen seen Yàlla. Maay Aji Sax ji.

<sup>15</sup> «Buleen safaan dëgg cib àtte. Buleen far néew-ji-doole te buleen far boroom doole. Àtteleen seen moroom ci dëgg. <sup>16</sup> Buleen wër di yàq deru nit ci seen bokki waa réew. Buleen def dara lu mana reylu seen moroom. Maay Aji Sax ji.

<sup>17</sup> «Buleen tong seen mbokk, te àrtuleen seen moroom bu baax bala ngeena bokk ak moom gaddu bàkkaar.

<sup>18</sup> Buleen di feyantook seen mbokkum waa réew te buleen ko dencal mer. Ni ngeen soppe seen bopp nag, nangeen ko soppe seen moroom. Maay Aji Sax ji.

<sup>19</sup> «Te it sama dogali yoon yii nangeen ko sàmm: buleen boole ñaar yu bokkul wirgo ci seenug jur, ñuy jaxasoo; seen tool it buleen ci ji ñaari wirgoy jiwu te buleen sol yére yu ñu ràbbe ñaari xeeti weñ yu bokkul.

<sup>20</sup> «Ku tédde ab jaam bu wara séy ak keneen te fekk jotelesu ko, goreeleesu ko, ndàmpaay war na ca, waaye deesu leen boole rey, ndax li ndaw si dib jaam ba tey.

<sup>21</sup> Waa ji day yóbbu am kuuyu peyug tooñ ca bunt xaymab ndaje ma, muy peyug tooñ, gi muy sarxalal Aji Sax ji. <sup>22</sup> Na ko sarxalkat bi defal kuuy miy saraxas peyug tooñ muy njotlaayam fi kanam Aji Sax ji, ndax bàkkaar bi mu def. Kon dees na ko jéggal bàkkaar bi mu def.

<sup>23</sup> «Bu ngeen duggee ca réew ma, ba jëmbat fa mboolem xeetu garab guy meññ ay doom, nangeen aayal doom ya. Diiru ñetti at ngeen di aayal doom ya. Dungeen ko lekk ci diir boobu. <sup>24</sup> Atum ñeenteel ba doom ya yépp lañuy sellalal Aji Sax ji, te di ko bége ci biir cant. <sup>25</sup> Juróomeelu at ma donj ngeen di saña lekk doom ya. Su ko defee meññeef ma barkeelal leen. Man Aji Sax ji maay seen Yàlla.

<sup>26</sup> «Buleen lekk lu am deret. Buleen di gisaane mbaa ngeen di jibar. <sup>27</sup> Buleen wat seen peggu kawaru bopp te buleen



dagg seen peggu sikkim, <sup>28</sup> mbaa ngeen di dagg seen yaram, di ko mititloo ku dee, te buleen ñaasu fenn ci seen yaram. Maay Aji Sax ji.

<sup>29</sup> «Buleen torxal seen doom ju jigéen, di ko def ab gànc; lu ko moy réew mi sóobu ci gànctu ba ne lijj ci ñaawtéef.

<sup>30</sup> «Samay bési Noflaay nag wormaal-leen ko te sama bérab bu sell teral-leen ko. Maay Aji Sax ji.

<sup>31</sup> «Buleen jublu ci ñiy gisaane nit ñu dee te buleen jublu ci boroom rawaan yiy seet, ndax kon ñu sobeel leen. Man maay seen Yàlla Aji Sax ji.

<sup>32</sup> «Bu boroom bijjaaw teewee, jógleen wormaal ko. Deeleen rus mag te ragal-leen seen Yàlla. Maay Aji Sax ji.

<sup>33</sup> «Bu ab doxandéem daleek yeen ci seenum réew, buleen ko lor. <sup>34</sup> Njuddu-jiréew ji nangeen ko yemaleek doxandéem bi ngeen dëkkal. Soppleen ko ni ngeen soppe seen bopp, ndaxte ay doxandéem ngeen woon ca réewum Misra. Man Aji Sax ji maay seen Yàlla.

<sup>35</sup> «Buleen def njobadi ci lu ñuy natte guddaay mbaa diisaay mbaa lu ñuy sol, sotti. <sup>36</sup> Na seen nattukaayu diisaay jub, doom ya ngeen cay natte jub, te na nattukaayi sol-sotti yi jub. Maay seen Yàlla Aji Sax, ji leen génne réewum Misra.

<sup>37</sup> «Nangeen sàmm sama dogali yoon yépp ak sama santaane yépp te di ko jéfe. Maay Aji Sax ji.»

## 20

### *Lu jëm ci peyug bàkkaar*

<sup>1</sup> Aji Sax ji wax na Musaa ba tey ne ko: <sup>2</sup> «Waxal bànni Israyil ne leen: Muy bànni Israyil muy doxandéem ci Israyil, képp ku ci jël ciy doomam, jébbal tuur mi ñuy wax Moleg, dee rekk mooy àtteem. Na ko waa réew mi dóor ay doj, ba mu dee. <sup>3</sup> Man ci sama bopp dinaa noonoo nit kooku te dinaa ko dagge ci biir bànni Israyil, ndax li mu jël ciy doomam jox Moleg, di sobeel sama bérab bu sell tey teddadil sama tur wu sell. <sup>4</sup> Su fekke ne waa réew mi dañu koo seetaan ba seetaan ko, muy jox Moleg ku bokk ciy doomam te taxul ñu rey ko, <sup>5</sup> man ci sama bopp maay noonoo

nit kooku mook ay bokkam; dinaa dagge nit kooku ci biir bànni Israyil, génne ko, mook mboolem ñi mu àndal topp Moleg di bokkaale. <sup>6</sup> Ku jublu ci ñiy gisaane nit ñu dee mbaa mu jublu ci boroom rawaan yiy seet, topp leen, di ma leen bokkaalee, dinaa ko noonoo moom itam te dinaa ko dagge ci biir bànni Israyil. <sup>7</sup> Sell-luleen te sell, ngir man Aji Sax ji maay seen Yàlla. <sup>8</sup> Nangeen sàmm samay dogali yoon te di ko jéfe. Man Aji Sax ji maay ki leen sellal.

<sup>9</sup> «Képp ku saaga baayam mbaa ndeyam, dee rekk mooy àtteem. Gannaaw baayam la saaga mbaa ndeyam, mooy gàddu bakkanu boppam.

<sup>10</sup> «Góor gu njaaloo, mook jabaru moroomam ji muy njaalool, dee rekk mooy seen àtte.

<sup>11</sup> «Ku dëkkoo sa soxnas baay, sa baay nga torxal. Ñoom ñaar ñépp dee rekk mooy seen àtte, te ñooy gàddu seen bakkanu bopp. <sup>12</sup> Ku dëkkoo sa soxnas doom, mook soxnas doomam ñoom ñaar ñépp dee mooy seen àtte. Jëfu yàqute lañu def, kon ñooy gàddu seen bakkanu bopp.

<sup>13</sup> «Su góor téddee góor ni ñuy téddee jigéen, ñaawtéef lañu def ñoom ñaar. Dee rekk mooy seen àtte, te ñooy gàddu seen bakkanu bopp. <sup>14</sup> Ku boole nit ak ndeyam jël leen jabar, def na lu bona bon. Dees leen di boole taal, lakk leen, moom ak jigéen ña, ndax mbon gu ni mel baña am ci seen biir. <sup>15</sup> Góor gu tédde mala dee rekk mooy àtteem, te mala ma it dees koy rey. <sup>16</sup> Su jigéen jëmee ci mala mu mu doon, ba jaxasook moom, booleleen ku jigéen kaak mala ma, rey. Dee rekk mooy seen àtte, te ñooy gàddu seen bakkanu bopp.

<sup>17</sup> «Su nit jëlee jabar ab jigéenam bu mu bokkal jenn ndey mbaa benn baay, ñu séq lalu séy, loolu gacce la. Nañu leen dagge ci biir bànni Israyil, ñooñuy gis. Gannaaw moo tédde ab jigéenam, na wéetoo aña ñaawtéefam.

<sup>18</sup> «Ku tédde jigéen ju gis baax, torxal na ko, xàwwi na suturaam ci biir pótam te ku jigéen ki itam xàwwi na suturas boppam. Dees leen wara dagge ñoom ñaar ñépp ci biir bànni Israyil.

<sup>19</sup> «Buleen dëkkoo seen yaay ju ndaw mbaa seen bàjjan, ndax kon torxal ngeen ku ngeen jegewool lool cig bokk, te yeen ñaar ñépp ay wéetoo seen aña ñaawtéef.

<sup>20</sup> «Ku dëkkoo soxnas baayam bu ndaw, baayam bu ndaw la torxal. Ñooy wéetoo seen aña ñaawtéef. Duñu am takkndeer ba keroog ñuy dee.

<sup>21</sup> «Bu nit nangoo jabaru ku mu bokkal waajur, loolu gâce la. Torxal na ka mu bokkal waajur te duñu am takkndeer.

<sup>22</sup> «Sàmmeleen sama dogali yoon yépp ak sama santaane yépp te jéfe ko, ngir réew ma ma leen jéme, ngeen dëkki fa, bañ leena gëq. <sup>23</sup> Buleen roy defini xeet wi ma leen di dàqal, ndax yooyu yépp lañu doon def, ba ma sib leen.

<sup>24</sup> Yeen nag ma ne leen yeenay nangu seen réew ñoom, ndax maa leen ko jox, ngeen moom ko, muy réew mu meew maak lem ja tuuroo. Man maay seen Yàlla Aji Sax, ji leen ràññatleek yeneen xeet yi. <sup>25</sup> Kon nangeen ràññee mala mu dagan ak mu daganul, ak itam njanaaw lu dagan ak lu daganul, te baña sobeel seen bopp ndax mala mbaa njanaaw mbaa mboolem bindeef yu sew-sewaan yiy dox ci suuf te ma limal leen ne setul.

<sup>26</sup> «Nangeen ma nekkal ñu sell, ndaxte ku Sell laa, man Aji Sax ji, te dama leena ràññatleek yeneen xeet yi, ngeen di sama ñoñ.

<sup>27</sup> «Góor gu bokk ci yeen mbaa jigéen, di seete nit ñu dee mbaa muy boroom rawaan buy gisaane, dee rekk mooy àtteem. Dees koy dóor ay doj, mu dee, gàddu bakkanu boppam.»

## 21

### *Lu jëm ci sañ-sañ sarxalkat yi*

<sup>1</sup> Gannaaw loolu Aji Sax ji wax na Musaa ne ko: «Waxal sarxalkat yiy doomi Aaróona ne leen: Bu ci kenn sobeel boppam, di laal mbokkam mu dee, <sup>2</sup> su dul ñi ko gëna jege ci wàllu mbokk, muy ndeyam mbaa baayam mbaa doomam ju góor ak doomam ju jigéen, mbaa ku góor ku mu bokkal waajur, <sup>3</sup> mbaa ab jigéenam bu séyagul te bootu ci moom ndax amul jëkkër— ku mu bokkal noonu,

sañ naa sobewu ndax moom. <sup>4</sup> Warula sobeel boppam, di teddadil boppam, ndax kilifa la ciw xeetam.

<sup>5</sup> «Buñu wat fenn ci seen bopp te buñu wat seen peggi sikkim, buñu dagg seen yaram it, di ko mititloo ku dee. <sup>6</sup> Nañu nekkal seen Yàlla ay nit ñu sell, te baña teddadil seen turu Yàlla, ndax saraxi sawar yi ñeel Aji Sax ji, te di seen ñamu Yàlla, ñoo koy joxe. Kon nag dañoo wara sell.

<sup>7</sup> «Ab gànc mbaa ku ñu torxal, tédde ko, ñoom duñu ko jël soxna. Ku jëkkëram baal it duñu ko jël soxna, ndax dañoo sellalal seen bopp seen Yàlla. <sup>8</sup> Te itam nangeen ràññee ne ñu sell lañu, ndax seen ñamu Yàlla, ñoo koy joxe. Nangeen leen jox céru nit ñu sell, ndax ku Sell laa, man Aji Sax ji leen sellal, yeen.

<sup>9</sup> «Su fekke ne doomu sarxalkat da di jigéen juy teddadil boppam, di gànctu, kooku baayam lay torxal. Dees koy taal, lakk ko.

<sup>10</sup> «Sarxalkat, bi gëna màgg ci bokkam yiy sarxalkat, te ñu sotti diw gi ñuy fale ci boppam, sellal ko, muy sol yére yu sell yi, kooku du njañu te du xotti ay yéreem, di ko ñaawloo ku dee. <sup>11</sup> Fu ab néew nekk du fa dem, bu doon ndeyam mbaa baayam sax, du ko taxa sobeel boppam. <sup>12</sup> Du génn èttu bérab bu sell bi, mbaa muy teddadil bérabu Yàllaam bu sell bi, ndax diwu pal gu sell gi ko Yàllaam fale. Maay Aji Sax ji. <sup>13</sup> Sarxalkat bu mag bi, ku xamul góor lay jël soxna. <sup>14</sup> Ku jëkkëram faatu mbaa ku ñu baal mbaa ku ñu torxal, tédde ko, mbaa ab gànc, du ko mana jël soxna. Ab janq bu mu bokkal donq la mana jël soxna. <sup>15</sup> Su ko defee du teddadil aw askanam ci biir bànni Israyil, ndax man Aji Sax ji maa ko sellal.»

### *Liy ngànt ci sarxalkat*

<sup>16</sup> Bu loolu wéyee Aji Sax ji wax na Musaa ne ko: <sup>17</sup> «Waxal Aaróona ne ko: Muy tey muy èllëg ba fàww, góor gu askanoo ci yaw ak maas gu mu mana bokk, su amee sikk du mana agsi ba ci sarxalukaay bi, di joxe ñamu Yàllaam. <sup>18</sup> Du kenn sax ku am sikk kuy agsi ba fii, du gumba, du kuy soox, du ku xar-kanamam am sikk mbaa ku cér yi sutaate.

19 Du it ku tànk bi làggi mbaa loxo bi,  
 20 mbaa ab xuuge mbaa ab tungune; du it  
 ku bétam am sikk mbaa ku ràmm mbaa  
 ku am góom yu sol dètt, mbaa ku ñu tàpp.  
 21 Askanu Aaróona sarxalkat bi, du kenn  
 ku ci am sikk kuy agsi ba fii, di joxe saraxi  
 sawara yi ñeel Aji Sax ji. Sikk si ci moom  
 a tax du mana agsi ba fii, di joxe ñamu  
 Yàllaam. 22 Du tere mu saña lekk ci ñamu  
 Yàllaam, muy ñam wu sell ak wu sella  
 sell. 23 Waaye warula jege rido bi, mbaa  
 muy dem ba ca sarxalukaay ba, ndax sikk  
 si ci moom. Bumu teddadil sama bérab  
 yu sell, ngir man Aji Sax ji maa sellal  
 bérab yooyu.»

24 Musaa jottli na Aaróona aki doomam  
 kàddu yooyu, ñoom ak mboolem bànni  
 Israyil.

## 22

### *Liy tax ñu nangu sarax*

1 Aji Sax ji dellu wax Musaa ne ko:  
 2 «Waxal Aaróona aki doomam yu góor  
 ne leen lii mooy li mana tax ñu sore yu  
 sell, yi ma bànni Israyil sellalal, ngir baña  
 teddadil sama tur wu sell. Maay Aji Sax  
 ji. 3 Wax leen ne leen: Muy tey, muy  
 èllég, ba fàww, képp ku sobewu, di góor  
 gu bokk ci seen askan, bu jegee lenn luy  
 sarax su sell su ma bànni Israyil jagleel,  
 kooku dootu ma liggéeyal. Maay Aji Sax  
 ji. 4 Askanu Aaróona, genn góor gu ci  
 bokk du lekk ci sarax yu sell yi, li feek  
 muy ànd ak jàngoroy der juy law mbaa  
 jàngoroy xelli, ba keroog muy set. Ku  
 ci laal lenn lu laal ab néew ba sobewu,  
 mbaa mu tuur wasal moom ci boppam,  
 5 mbaa mu laal yu sew-sewaan yiy dox  
 ci suuf te di ko sobeel, mbaa mu laal nit  
 ku ko sobeel ak lu sobe sa mana doon,  
 6 dina yendoo sobe sa ba jant so, te du lekk  
 ci sarax yu sell yi ndare du dafa sangu.  
 7 Bu jant sowee nag set na, te man naa  
 lekk ci sarax yu sell yi, ndax ñamam la.  
 8 Lu médd mbaa lu rab fàdd waru koo  
 lekk, mu di ko sobeel. Maay Aji Sax ji.  
 9 Sarxalkat yi dañoo wara dénkoo samay  
 dénkaane bala ñoo gàddu bàkkaar, di  
 dee ndax seenug néewal ci yooyu. Maay  
 Aji Sax ji leen sellal.

10 «Kenn ku bokkul ci waa kër sarxalkat  
 yi du lekk ci sarax yu sell yi. Muy ku dal  
 ak ab sarxalkat, muy ku koy liggéeyal di  
 feyeeku, kenn du ci lekk ci sarax yu sell yi.

11 Waaye su sarxalkat bi jëndee ab jaam  
 ci xalisam, jaam ba man na caa lekk.  
 Jaam bu juddoo ci kër sarxalkat bi it man  
 naa lekk ci ñamam woowu. 12 Doomu  
 sarxalkat, bu séyeek góor gu bokkul ci  
 waa kër sarxalkat yi, jooxe yu sell yi,  
 dootu ci saña lekk. 13 Waaye doomu sarx-  
 alkat bu boroom kèram faatoo mbaa mu  
 tàggook moom te amu ca doom, bu delloo  
 kër baayam na mu fa nekke woon ba  
 muy gone, sañ naa lekk ci ñamu baayam.  
 Waaye kenn ku ci bokkul sañu cee lekk.  
 14 Gannaaw loolu képp ku bokkul ci waa  
 kër sarxalkat yi, bu lekkee ci sarax su sell  
 te du teyeebam, na dolli ca njégu sarax  
 sa juróomeelu céru njég ga, delloo ko  
 sarxalkat bi. 15 Te itam bu sarxalkat yi  
 bàyyi bànni Israyil di teddadil sarax yu  
 sell yi ñu jagleel Aji Sax ji. 16 Buñu leen  
 di bàyyi it ñuy gàddu bàkkaar buy laaj  
 peyug tooñ, ngir lenn lu ñu lekk ci sarax  
 yu sell yooyu. Man Aji Sax ji maa sellal  
 yooyu sarax.»

17 Aji Sax ji waxati Musaa ne ko:  
 18 «Waxal Aaróona aki doomam yu góor  
 ak bànni Israyil gépp ne leen: Képp  
 ku bokk ci waa kër Israyil, mbaa ci  
 doxandéem yi ci Israyil, di joxeel Aji Sax  
 ji ab saraxu rendi-dóomal, muy sarax su  
 ñuy wàccoo ngiñ mbaa saraxu yéene,  
 19 liy tax ñu nangul ko mooy muy jur gu  
 amul sikk, di góor; man naa doon aw  
 yèkk mbaa kuuy mbaa sikket. 20 Lenn lu  
 ci am sikk buleen ko sarxal, ndax deesu  
 leen ko nangul.

21 «Su nit dee joxsi Aji Sax ji aw nag  
 mbaa gàtt, muy saraxu cant ci biir jàmm,  
 mu di ko wàccoo ngiñ mbaa muy saraxu  
 yéene, na doon lu amul sikk, ndax ñu  
 nangul ko. Lenn luy sikk du nekk ci  
 jur gi. 22 Du doon lu gumba, du doon  
 lu làggi, du doon lu kuuñ, du doon lu  
 ami góom, mbaa lu ràmm, mbaa lu xas.  
 Buleen sarxalal Aji Sax ji yu mel noonu.  
 Ab saraxu sawara, buleen ko jële ci lu mel  
 noonu, di ko joxe ci kaw sarxalukaay bi,  
 ñeel Aji Sax ji. 23 Waaye su dee nag mbaa

gàtt bu ab céram ëpp mbaa mu yées, saraxu yéene la mana doon; su dee sarax su ñuy wàccoo ngiñ, deesu ko nangu. <sup>24</sup> Te it jur gu ñu motoxal ngóoraam mbaa ñu toj ko mbaa ñu xuuf ko mbaa ñu dog ko, deesu ko sarxalal Aji Sax ji. Buleen def loolu mukc ci seenum réew. <sup>25</sup> Buleen nangoo lenn lu ni mel ci loxol doxandéem it, di ko jébbal seen Yàlla, muy saraxu ñamam. Deesu leen ko nangul, ndax la matadi ca moom mooy sikk sa.»

<sup>26</sup> Aji Sax ji wax na Musaa itam ne ko: <sup>27</sup> «Barmol mbaa mbote mbaa tef wu doora juddu, na toog ci yaayam juróom ñaari fan; bu xasee am juróom ñetti fan, manees naa nangu mu doon saraxu sawara, ñeel Aji Sax ji. <sup>28</sup> Waaye su dee aw nag mbaa ab gàtt, deesu ko booleek doom ji rendi ci benn bés.

<sup>29</sup> «Bu ngeen dee defal Aji Sax ji saraxu cant, sarxal-leen ko na ñu leen koy nangule. <sup>30</sup> Ci bés bi lees koy lekk, buleen ci fanaanal dara. Maay Aji Sax ji.

<sup>31</sup> «Kon sàmmlen samay santaane te di ko jéfe. Maay Aji Sax ji. <sup>32</sup> Te buleen teddadil sama tur wu sell. Na bànni Israyil wormaal sama sellaa. Maay Aji Sax ji leen sellal, <sup>33</sup> génne leen réewum Misra, di seen Yàlla. Maay Aji Sax ji.»

## 23

### *Lu jëm ci bési màggal yi*

<sup>1</sup> Aji Sax ji dellooti wax Musaa ne ko: <sup>2</sup> «Samay màggal, man Aji Sax ji, dangeen koo wara siiwal, muy ndaje yu sell. Samay màggal yii la.

<sup>3</sup> «Juróom benni fan lees di liggéey, bés sub juróom ñaareel ba bés sub Noflaay donḡ lay doon, di bés sub ndaje mu sell. Du lenn lu ngeen ciy liggéey. Bés sub Noflaay la bu ñuy jagleel Aji Sax ji, ak fépp fu ngeen dëkk.

<sup>4</sup> «Aji Sax ji, deeleen yégle ay màggalam, muy ay ndaje yu sell yu ngeen di wormaal saa yu jotee. Màggal yii la.

*Lu jëm ci bés sub Mucc ak bési Mburu mu amul lawiir*

<sup>5</sup> «Fukki fan ak ñeent ci weer wi jëkk, diggante ngoon ak jant bu so, mooy màggalu bés sub Mucc ba, ñeel Aji Sax ji.

<sup>6</sup> «Fukki fan ak juróom ci weer woowu la ayu bésu Mburu mu amul lawiir di tàmbali, ñeel Aji Sax ji. Diiru juróom ñaari fan mburu mu amul lawiir ngeen wara lekk. <sup>7</sup> Bés bu jëkk bi ndaje mu sell ngeen ciy amal. Mboolem lu ngeen faral di liggéey buleen ko ci liggéey. <sup>8</sup> Defleen ci saraxu sawara, ñeel Aji Sax ji diiru juróom ñaari fan. Bés sub juróom ñaareel ba di bés sub ndaje mu sell. Mboolem lu ngeen faral di liggéey buleen ko ci liggéey.»

### *Lu jëm ci màggalu Ndoortel meñneef*

<sup>9</sup> Su loolu wéyee Aji Sax ji wax na Musaa ne ko: <sup>10</sup> «Waxal bànni Israyil ne leen: Bu ngeen duggee ca réew ma ma leen jox, ba dajale la ngeen jële ca suufam, yóbbuleen ci sarxalkat bi takku peppum lors bi ngeen jëkka góob. <sup>11</sup> Sarxalkat bi day yékkati takk bi, jébbal ko Aji Sax ji, ngir mu nangul leen. Bés bi topp ci bés sub Noflaay bi lay yékkati takk bi, jébbal ko ko. <sup>12</sup> Bés bi ñuy yékkati takk bi, jébbale, nangeen ci sarxal kuuy mu amul sikk, tollu ci menn at, ñu defal ko Aji Sax ji saraxu rendi-dóomal. <sup>13</sup> Saraxu pepp mi muy àndal juróom benni kiloy sunguf su mucc ayib lay doon, ñu xiiwe ko diw, muy saraxu sawara, ñeel Aji Sax ji, ngir xetug jàmm. Sarax si ñuy tuural Aji Sax ji, liitaru biiñ laak genn-wàll. <sup>14</sup> Du mburu, du pepp mu ñu séndal, du pepp mu bees mu ngeen wara lekk, ba keroog bés boobu ngeen di indi seen saraxu Yàlla. Dogal a ngoogu, di lu leen war fàww, yeen ak seen askan, ak fépp fu ngeen dëkk.

### *Lu jëm ci màggalu bésu Ngóob*

<sup>15</sup> «Bés sub Noflaay ba ngeen di indi takku bele biy saraxu yékkati-jébbale, bés ba ca topp ngeen di dale waññ juróom ñaari ayi bés yu mat sëkk. <sup>16</sup> Waññleen ba ca bés ba topp ci juróom ñaareelu bés sub Noflaay ba, muy juróom fukki fan, ngeen indil ca Aji Sax ji saraxu pepp mu bees. <sup>17</sup> Seenii kër ngeen di jële

ñaari mburu yuy doon saraxu yékkati-jébbale, mu ci nekk di lu ñu lakke juróom benni kiloy sunguf su mucc ayib; dees ciy def lawiir, lakkaale ko ko, muy saraxu ndoortel meññeef, ñeel Aji Sax ji. <sup>18</sup> Na mbooloo mi booleek mburu mi juróom ñaari kuuy yu amul sikk te tollu ci menn at, ak yékk ak ñaari kuuy, mu doon saraxu rendi-dóomal, ñeel Aji Sax ji. Na ànd ak saraxu pepp ak sarax si ñuy tuur. Loolu sarax la ngir xetug jàmm, ñeel Aji Sax ji. <sup>19</sup> Te itam ngeen sarxal ab sikket buy doon saraxu pootum bàkkaar ak ñaari xari menn at, muy saraxu cant ci biir jàmm. <sup>20</sup> Sarxalkat bi day yékkati ñaari xar yooyu, boole kook mburum ndoortel meññeef mi, def ko sarax bu ñuy yékkati, jébbal Aji Sax ji. Yooyu sarax di lu sell ñeel Aji Sax ji, sarxalkat bee ko moom. <sup>21</sup> Wooteleen ci bés boobu ndaje mu sell, te lu ngeen faral di liggéey buleen ko ci liggéey. Dogal a ngoogu, di lu leen war fàww, yeen ak seen askan, ak fépp fu ngeen dëkk.

<sup>22</sup> «Bu ngeen dee góob seen tool, buleen góob ba fa tool ba yem te buleen ci toppaat, di foraatu. Aji ñàkk akub doxandéem ngeen koy bàyyee. Maay seen Yàlla Aji Sax ji.»

### *Li ci màggalu bésu Liit ya*

<sup>23</sup> Gannaaw loolu Aji Sax ji wax na Musaa ne ko: <sup>24</sup> «Waxal bànni Israyil ne leen: Bu juróom ñaareelu weer taxawee, bés bi jëkk ci weer wi, na doon seen bés sub Noflaay bu ngeen di amal ndaje mu sell. Deeleen fàttlee bés bi liit yu xumb. <sup>25</sup> Mboolem lu ngeen faral di liggéey buleen ko ci liggéey, waaye nangeen ci indi saraxu sawara, ñeel Aji Sax ji.»

### *Li ci bés sub Njotlaay ba*

<sup>26</sup> Aji Sax ji teg ca wax Musaa ne ko: <sup>27</sup> «Te itam fukki fan ci juróom ñaareelu weer woowu, bés sub Njotlaay ba lay doon. Ndaje mu sell ngeen ciy amal. Nangeen ci toroxlu te indi saraxu sawara, ñeel Aji Sax ji. <sup>28</sup> Du lenn lu ngeen di liggéey ci boobu bés, ndax bés sub Njotlaay la bu ngeen di jotoo fi seen kanam Yàlla, Aji Sax ji. <sup>29</sup> Te kat, képp ku toroxluwul

boobu bés, dees koy dagge ci biir bànni Israyil. <sup>30</sup> Képp ku liggéey lenn ci boobu bés, su boobaa dinaa far kooku ci biir bànni Israyil, sànk ko. <sup>31</sup> Buleen ci liggéey dara. Dogal a ngoogu, di lu leen war fàww, yeen ak seen askan ak fépp fu ngeen dëkk. <sup>32</sup> Seen bés sub Noflaay la bu ngeen di nopplu donj te war cee toroxlu. Li ko dale ci ngoonug juróom ñeenti fan ci weer wi ba ca èllég sa, ba jant so, ci ngeen di wormaal seen bés sub Noflaay.»

### *Li ci màggalu bési Mbaar yi*

<sup>33</sup> Su loolu wéyee Aji Sax ji wax na Musaa ne ko: <sup>34</sup> «Waxal bànni Israyil ne leen: Ñu waññ dale ko ci fukki fan ak juróom ci weeru juróom ñaareel woowu ba mu am juróom ñaari fan. Diir boobu mooy màggalu bési Mbaar yi, ñeel Aji Sax ji. <sup>35</sup> Bés bu jëkk bi bés sub ndaje mu sell la. Mboolem lu ngeen faral di liggéey buleen ko ci liggéey. <sup>36</sup> Diiru juróom ñaari fan ngeen di indi saraxu sawara, ñeel Aji Sax ji. Bés sub juróom ñetteel, ba wara doon seen ndaje mu sell, nangeen ci indi saraxu sawara, ñeel Aji Sax ji. Ndajem mujjantal ba la. Mboolem lu ngeen faral di liggéey buleen ko ci liggéey.

<sup>37</sup> «Yooyoo di màggali Aji Sax ji, yi ñu wara yégle, di ndaje yu sell yu ñuy indi ay saraxi sawara, ñeel Aji Sax ji, muy saraxu rendi-dóomal, ak saraxu pepp, ak yeneen saraxi jur gu ñuy rendi, ak sarax yi ñuy tuural Aji Sax ji, bés bu nekk ak la ca war. <sup>38</sup> Yooyu sarax jotewul dara ak saraxi bési Noflaay yu Aji Sax ji. Jotewul dara it ak yi ngeen di joxeel Aji Sax ji mbaa mboolem sarax yi ngeen di wàccoo ngiñ, ak mboolem saraxi yéene yi ngeen di defal Aji Sax ji.

<sup>39</sup> «Ci biir loolu, fukki fan ak juróom ci juróom ñaareelu weer wi, gannaaw bu ngeen dajalee meññeefum réew mi, amal-leen màggalug Aji Sax ji diiru juróom ñaari fan. Na bés bu jëkk ba di bés sub Noflaay, bés sub juróom ñetteel ba di bés sub Noflaay. <sup>40</sup> Bés bu jëkk ba wittleen doomi garab yu rafet ak cari tiir ak cari garab yu sèq ak cari garab yu ñuy wax sóol, tey saxe tàkkal dex. Nangeen bannexu fi seen kanam Yàlla Aji Sax ji

diiru juróom ñaari fan. <sup>41</sup> Wormaal-leen mággalug Aji Sax jooju, di juróom ñaari fan cim at, te wormaal-leen ko ci juróom ñaareelu weer wi. Dogal a ngoogu, di lu leen war fàww, yeen ak seen askan. <sup>42</sup> Ci ay mbaar ngeen di dëkk diiru juróom ñaari fan yooyu. Mboolem njuddu-ji-réew ci Israyil na ci dëkke mbaar, <sup>43</sup> su ko defee seeni sët xam ne ciy mbaar laa dëkkaloon bànni Israyil, ba ma leen génnee réewum Misra. Maay seen Yàlla Aji Sax ji.»

<sup>44</sup> Noonu la Musaa xamale bànni Israyil bési mággalug Aji Sax ji.

## 24

*Lu jëm ci tegukaayu làmp bi ak mburu yi*

<sup>1</sup> Ba loolu amee Aji Sax ji wax na Musaa ne ko: <sup>2</sup> «Santal bànni Israyil, ñu indil la diwu segalu oliw gu set, ngir leerlu, ñu di ko taale làmp yi guddi gu nekk. <sup>3</sup> Ci kanam rido bi làq gaalu àlluway seede si, ci biir xaymab ndaje mi la Aaróona di teg làmp yi, muy fanaanee tàkk ba bët set, fi kanam Aji Sax ji. Dogal a ngoogu, di lu leen war fàww, yeen ak seen askan. <sup>4</sup> Na teg làmp yi ci kaw tegukaayu làmp ba ñuy tégge wurusu ngalam, muy fanaanee tàkk fi kanam Aji Sax ji.

<sup>5</sup> «Sàkkal sunguf su mucc ayib, lakk ci fukki mburu ak ñaar, mburu mu nekk di juróom benni kiloy sunguf. <sup>6</sup> Tegal mburu yi ci kaw taabalu wurusu ngalam bi, fi kanam Aji Sax ji, te def ko ñaari jal, jal bu ne juróom benni mburu. <sup>7</sup> Jal bu nekk teg ca cuuraay lu raxul, mu wuutu mburu mi, di saraxu baaxantal, te di saraxu sawara, ñeel Aji Sax ji. <sup>8</sup> Bésub Noflaay bu nekk nañu saxoo taaj mburu yooyu fi kanam Aji Sax ji. Loolu sas la bu bànni Israyil di tegoo fàww. <sup>9</sup> Mburu yooyu Aaróona aki doomam yu góor ñoo koy féetewoo, te nañu ko lekke fu sell, ndaxte lu sella sell la, di lu ñu séddoo fàww ci saraxi sawara yi ñeel Aji Sax ji.»

*Li war ci yenn xeeti tooñaange*

<sup>10-11</sup> Ba loolu wéyee amoon na ci biir bànni Israyil jenn waay ju yaayam di doomu Israyil te tuddoon Selomit doomu

Dibbri, Daneen ba. Baayam di waa Misra. Mu am bés xeex jib ci biir dal bi, ci diggante waa jooju ak jenn waayi Israyil ju raxul. Ci biir loolu waa ji yaayam di doomu Israyil wax Yàlla lu ñaaw, tudd ko jaar fu bon. Ñu yóbbu ko ca Musaa. <sup>12</sup> Ñu tēj waa ja, ba xam lu Aji Sax ji namm ci moom.

<sup>13</sup> Ci kaw loolu Aji Sax ji wax Musaa ne ko: <sup>14</sup> «Génneel dal bi ki may wax lu ñaaw, man Yàlla, te na mboolem ku ci dégg teg loxoom ci kaw boppam, ba noppi mbooloo mépp dóor koy doj, ba mu dee. <sup>15</sup> Bànni Israyil nag nangeen leen wax ne leen: Képp ku wax Yàllaam lu ñaaw, jaar fu bon, na wéetoo aŋam. <sup>16</sup> Ku ñàkke kersa turu Aji Sax ji, dee rekk mooy àtteem. Mbooloo mi mépp a ko wara dóor ay doj, ba mu dee. Muy doxandéem muy njuddu-ji-réew, ku ci ñàkke kersa turu Aji Sax ji, dee mooy àtteem.

<sup>17</sup> «Bu loolu weesee képp ku faat bakkanu nit, dee rekk mooy àtteem. <sup>18</sup> Ku faat bakkanu mala, na fey boroom. Bakkan, bakkan a koy fey. <sup>19</sup> Képp ku gaañ moroomam, la mu ko def rekk lañu koy def. <sup>20</sup> Damm-damm, damm-damm a koy fey; bët, bët a koy fey; bëñ it bëñ a koy fey. Ni mu gaañe moroomam rekk, ni lañu koy gaañe.

<sup>21</sup> «Ku rey ag jur na fey boroom, waaye ku rey nit dee mooy àtteem. <sup>22</sup> Na àtte bi di benn ci doxandéem ak njuddu-ji-réew, ndax man Aji Sax ji maay seen Yàlla.»

<sup>23</sup> Ci kaw loolu Musaa wax ko bànni Israyil, ñu génne dal ba waa ja ñàkke Yàlla kersa, dóor ko ay doj, ba mu dee. Kon li bànni Israyil def mooy li Aji Sax ji santoon Musaa rekk.

## 25

*Lu jëm ci atum Noflaay*

<sup>1</sup> Gannaaw loolu Aji Sax ji wax na Musaa ca tundu Sinayi ne ko: <sup>2</sup> «Waxal bànni Israyil ne leen: Bu ngeen duggee ca réew ma ma leen jox, suuf sa ca boppam war naa am àppu noflaayam ngir Aji Sax ji. <sup>3</sup> Diiru juróom benni at ngeen di ji seen tool; juróom benni at yooyu itam ngeen di wollu seen tóokëru reseñ, dajale meññeef

ma. <sup>4</sup> Waaye atum juróom ñaareel ba atum Noflaay la wara doon: suuf sa ca boppam day nopplu donḡ ngir Aji Sax ji. Buleen ci ji seen tool, buleen ci wolle seen toókëru reseñ. <sup>5</sup> La saxe ca seenum ngóob sax, buleen ko góobaat te it reseñ gu ñu wollewuloon buleen ko raasaatu. Atum Noflaay la wara doon: suuf sa ca boppam na nopplu atum lëmm. <sup>6</sup> Waaye lépp luy saxayaay ci atum Noflaay sañ ngeen koo lekk, yeen ak seen jaam yu góor ak yu jigéen, ak seeni surga ak doxandéem bu dal ak yeen. <sup>7</sup> Seen jur it ca la, ba ca rabi àll ya ca seen réew. Mboolem lu suuf sa meññ, manees na koo lekk.

<sup>8</sup> «Gannaaw loolu nangeen waññ ba ci juróom ñaari ati Noflaay, loolu di juróom ñaari at ba muy juróom ñaari yoon. Mu doon seen juróom ñaari ati Noflaay, tollu ci ñeent fukki at ak juróom ñeent. <sup>9</sup> Su boobaa ci fukki fan ca juróom ñaareelu weer wa nangeen wal-lu ag liit fépp. Bésub Njotlaay boobu nangeen wal ag liit ci seenum réew ba mu daj. <sup>10</sup> Te nangeen sellal at ma ca topp di juróom fukkeelu at ma, ngeen yéene ca mboolem waa réew ma ba mu daj, ne ngoreel taxaw na. Seen atum Yiwiku la, ku nekk war cee dellu ca suufu waa këram, ku nekk it wara dellu ca làng ga mu bokk. <sup>11</sup> Seen atum Yiwiku la atum juróom fukkeel boobu di doon. Dungeen ci ji, dungeen ci góobaat lu saxe ca seenum ngóob te dungeen ci wolle ag reseñ, di ko witt. <sup>12</sup> Gannaaw atum Yiwiku la, na doon at mu ngeen sellal. Saxayaayub tool ngeen saña lekk.

<sup>13</sup> «Atum Yiwiku moomu ci ngeen di delloo ku nekk suufam. <sup>14</sup> Bu ngeen di jaay seen waa réew suuf nag mbaa ngeen di jënde suuf ci seen waa réew, buleen di naxante. <sup>15</sup> Limu at yi dox seen digganteek atum Yiwiku ma mujj, na dëppook njég gi ngeen di jënde suuf ci seen waa réew. Limu ati mbey yi dox seen digganteek atum Yiwiku ma ca toppaat it, war naa dëppook njég ga ñu leen jaaye. <sup>16</sup> Lu at yooya gëna bare, njég ga gëna jafe; lu at ya gëna néew, njég ga gëna yomb, ndaxte limu meññeefum suuf sa lees leen koy jaaye. <sup>17</sup> Buleen

di naxante, waaye ragal-leen seen Yàlla, ndax man Aji Sax ji maay seen Yàlla.

<sup>18</sup> «Saxleen ci samay dogal, sàmm samay ndigali yoon, di ko jëfe, ndax ngeen dëkk ak jàmm ci réew mi. <sup>19</sup> Kon suuf si dina nangu, ngeen di lekk ba suur te dëkk fa ci jàmm. <sup>20</sup> Jombul ngeen di wax naan: “Lu nuy lekk nag ci atum juróom ñaareel ba, gannaaw dunu ci ji te dunu ci dajale sunu meññeef?” <sup>21</sup> Waaye dinaa leen yónnee sama barke ca atum juróom benneel ba, suuf si nangul leen meññeefum ñetti at. <sup>22</sup> Bu ngeen tolloo ci ji ci atum juróom ñetteel ba, dina leen fekk ngeen di lekk meññeefum daaw-jéeg, te meññeefum atum juróom ñeenteel ba dina agsi, fekk ngeen di lekk ca mu daaw-jéeg ma.

*Liy sañ-sañ ci mbirum suuf su ñuy jootaat*

<sup>23</sup> «Suuf si deesu ko jaay, mu wel fàww, ndax maay Boroom suuf si, yeen ay doxandéem ngeen fi, yu ma fi dëkkal. <sup>24</sup> Fépp fu bokk ci seenum réew, nangeen fa yoonal sañ-sañu jootaat ca suuf sa.

<sup>25</sup> «Bu sa mbokk demee ba ñakk tax koo jaay ci suufam, mbokkam mi ko gëna jege te am sañ-sañu jootaat suufam, na jëndaat la mbokk ma jaayoon. <sup>26</sup> Ku amul ku ko ko jootaatal te moom ci boppam mu mujj woomle, ba am lu mu ko jootaate, <sup>27</sup> day waññ at ya njaay ma am, delloo ki mu jaayoon ati mbey ya ca kooka dese, daldi mana jootaat ci suufam. <sup>28</sup> Waaye su amul lu mu jëndaate suufam, suuf sa day des ca loxol ka mu jaayoon, ba keroog atum Yiwiku ma délsi. Bu atum Yiwiku ma délsee, sañ naa dellu ca suufam.

<sup>29</sup> «Su dee waa ju jaay ab dëkkuwaay bu nekk ci dëkk bu mag bu ñu tabax tata wëralee ko ko, dina ko saña jootaat li feek njaay mi amul at. Ci diir boobu la ko saña jootaate. <sup>30</sup> Su ñu ko jootatul ba njaay ma am atum lëmm, dëkkuwaay boobu ci biir dëkk bu mag ba ñu wëralee tata day wel fàww, ñeel ka ko jënd, mook ku askanoo ci moom. Du lees di delloo ci atum Yiwiku. <sup>31</sup> Su dee ay dëkkuwaay ci dëkk yu ndaw yu ñu tabaxul tata, wëralee ko ko, dees koy yemaleek alali suuf. Sañees

na koo jootaat te dees koy delloo ci atum Yiwiku.

<sup>32</sup> «Su dee dëkki Leween ñi ak seen dëkkuwaay ya ca biir nag, Leween ñi sañ nañu cee jootaat fàww. <sup>33</sup> Kon alalu Leween manees na koo jootaat —dëkkuwaay lay doon bu ñu jaay ci dëkki Leween ñi— dees koy delloo bu atum Yiwiku dikkee, ndax dëkkuwaay yi ci dëkki Leween ñi, seen alal la ju leen lew fàww ci seen biir bokki bànni Israyil. <sup>34</sup> Waaye suufas parlu yi bokk ci dëkki Leween ñi, deesu ko jaay, ndax ñoo koy moom fàww.

### *Baaxeleen aji ñàkk*

<sup>35</sup> «Bu seen mbokkum bànni Israyil ñàkke ba manatula fey lu mu leen ameel, nangeen ko dimbali, ni bu doon doxandéem mbaa mangan, ndax mu mana dund ci seen biir. <sup>36</sup> Buleen teg lenn lu mu mana doon ci bor bu leen seen mbokk moomu ameel, waaye ragal-leen ci seen Yàlla, ndax mu mana dund ci seen biir. <sup>37</sup> Buleen ko lebal seen xalis, di ca teg lenn, te buleen ko jox dund, di sàkku lu mu ca yokk ngir delloo leen ko. <sup>38</sup> Man Aji Sax ji maay seen Yàlla ji leen génne réewum Misra, jox leen réewu Kanaan, te di seen Yàlla.

### *Liy sañ-sañ ci jootaat nit*

<sup>39</sup> «Bu seen mbokk ñàkke ci seen biir, ba jaay leen boppam, buleen ko jaamloo. <sup>40</sup> Defleen ko ni liggéeykat buy feyeeku mbaa mangan bu ngeen dëkkal. Na leen liggéeyal ba keroog atum Yiwiku ma, <sup>41</sup> mu génn ci seeni loxo, mook ay doomam, daldi dellu ci làngu boppam, fa ay maamam séddoo. <sup>42</sup> Li waral loolu moo di bànni Israyil dañu di sama jaam yi ma génne réewum Misra. Deesu leen jaay njaam. <sup>43</sup> Buleen leen soxore ci biir kilifteef, waaye ragal-leen ci seen Yàlla. <sup>44</sup> Seen jaam yu góor ak seen jaam yu jigéen, nangeen leen jële ci xeet yi leen wër. Ci ñooñu ngeen di jënde ay jaam, góor ak jigéen. <sup>45</sup> Walla ngeen jënde ba tey ci doxandéem yi ci seen biir, mbaa ci njaboot yi doxandéem yi am ci réew mi te ñu nekk ci seen biir. Su ko defee ñu doon seen ngallo. <sup>46</sup> Sañ ngeen leena donale seen doom yi leen di wuutu, ñu

doon seen ngallo seen giiru dund. Ñooñu sañ ngeen leena def ay jaam, waaye su dee ci seen diggante, yeen bànni Israyil, buleen di soxore ci biir kilifteef.

<sup>47</sup> «Su fekkee ne ab doxandéem bu ngeen dëkkal mbaa ab mangan dafa woomle te kenn ci seeni bokk ñàkk, ba jaay boppam doxandéem bi ngeen dëkkal mbaa kenn ku bokk ak doxandéem bi, <sup>48</sup> gannaaw bu jaayee boppam, manees na koo jootaat ba tey. Kenn ciy bokkam sañ na koo jootaat, <sup>49</sup> jaar muy baayam bu ndaw mbaa doomu baayam bu ndaw. Ku mu bokkal làng di mbokkam lenge sax man na koo jootaat, te moom ci boppam man naa woomle ba jootaat boppam. <sup>50</sup> Na bokk ak ka ko jënd waññ, la dale ca at ma mu jaaye boppam, ba ca atum Yiwiku may ñew, muy njégu gorelam, dëppook at yooya. Te it nañu ci seet àqu ñaqu liggéeykat. <sup>51</sup> Su desee ay at, lu at ya gëna baree, njég ga muy jootate boppam gëna sore ci njég, ga ñu ko jënde woon. <sup>52</sup> Te su at yu néew doxee seen digganteek atum Yiwiku ma, na ko waññ te fey lu ni néewe, ngir jootaat boppam. <sup>53</sup> Ab surga lay doon ci njaatigeem at mu nekk, waaye waru koo soxore ci biir kilifteef, ngeen di seetaan. <sup>54</sup> Su fekkee ne jootaatuñu ko ci jotin yooyu sax, war naa moom boppam mooki doomam ca atum Yiwiku ma. <sup>55</sup> Ndax kat man la bànni Israyil di samay jaam. Ñoo di sama jaam ya ma génne réewum Misra; yeen, maay seen Yàlla Aji Sax ji.

## 26

### *Yool yi ci déggal Yàlla*

<sup>1</sup> «Buleen sàkkal seen bopp ay yàllantu, du lenn luy jëmmu tuur mbaa tuuru doj wu ngeen sampal seen bopp, te doj wu ñu ñaas ay nataal it, buleen ko sàkkal bérab ci seen réew, di ko sujjóotal, ndax man Aji Sax ji maay seen Yàlla. <sup>2</sup> Sama bési Noflaay, wormaal-leen ko, te sama bérab bu sell ngeen teral ko. Maay Aji Sax ji.

<sup>3</sup> «Su ngeen dee topp samay dogal, fonk samay santaane te di ko jëfe, <sup>4</sup> kon maa leen di tawal ci waxtoom, suuf si nangu,



garab yi meññ. <sup>5</sup> Dingenen bàcc ba keroog wittum reseñ jot te dingenen witt reseñ ba keroog ji jot. Dingenen lekk seenum pepp ba suur këll te dingenen dëkk ak jàmm ci seenum réew.

<sup>6</sup> «Maay baaxee réew mi jàmm it, ba bu ngeen téddee kenn du leen tiital. Maay jële rab wu aay ci réew mi, te saamar du jóg, dal ci seenum réew. <sup>7</sup> Kon dingenen dàq seeni noon, saamar ba dal, ñu daanu fi seen kanam. <sup>8</sup> Seen juróomi nit ay dàq téeméer, seen téeméeri nit dàq fukki junni. Seeni noon la saamar di dal, ñu daanu fi seen kanam.

<sup>9</sup> «Te itam maa leen di baaxe, giiral leen, yokk leen. Dinaa sàmm sama kóllèreek yeen. <sup>10</sup> Dingenen lekk ngóob mu yàgg, dence lu yàgg, ba far génne mu yàgg ma, wuutal fa mu bees.

<sup>11</sup> «Maay samp sama kër ci seen biir te дума leen sib. <sup>12</sup> Maay ànd ak yeen, di seen Yàlla, ngeen di sama ñoñ. <sup>13</sup> Man Aji Sax ji maay seen Yàlla ji leen génne réewum Misra, ngeen noppee doon seeni jaam; maa dog seen buumi njaam, siggil leen.

### *Mbugal yi ci déggadil Yàlla*

<sup>14</sup> «Waaye bu ngeen ma déggalul te baña jëfe sama santaane yooyu yépp, <sup>15</sup> su ngeen teddadilee samay dogal, dëddu samay ndigal, ba jëfewuleen sama santaane yépp, xanaa di fecci sama kóllèreek yeen, <sup>16</sup> su boobaa li may def ak yeen mooy lii: maay jekki wàcce njàqare ci seen kaw, mu ànd ak woppi ràgg, yaram wu tàng jérr ak bët yu lëndëm, ngeen gën di wopp. Dingenen ji seenum pepp ci neen, ndax seeni noon a koy lekk. <sup>17</sup> Maa leen di noonoo ba seeni noon дума leen, seeni bañ yilif leen. Dingenen daw te kenn dàqu leen.

<sup>18</sup> «Bu loolu taxul ngeen déggal ma, maa leen di mbugal lu ko ëpp juróom ñaari yoon, feye leen ko seeni bàkkaar. <sup>19</sup> Maay sàggi seen sag bu réy. Maay def asamaan si leen tiim ne sereñ nig weñ, suuf si wow konj ni xàñar. <sup>20</sup> Seen doole

dina kasara, ndax suuf si ngeen di bey du leen nangul te garabi réew mi du meññ.

<sup>21</sup> «Su ngeen saxee ci noonoo ma, bañ maa déggal, maay fulaat seen mbugal fukki yoon ak juróom, feye leen ko seeni bàkkaar. <sup>22</sup> Maay xabtal rabi àll yi ci seen kaw, ñu xañ leen seeni doom, seeni gétt ñu tas, seeni nit ñu néewal, ba seeni mbedd ne wëyëñ.

<sup>23</sup> «Su ma leen loolu yaralul ba tey, xanaa ngeen sax ci noonoo ma, <sup>24</sup> su boobaa man itam maa leen di noonoo, te it man ci sama bopp maa leen di mbugalaat lu ko ëpp fukki yoon ak juróom, feye leen ko seeni bàkkaar. <sup>25</sup> Maay dalal saamar ci seen kaw, feye leen ko kóllère gi ngeen fecci. Bu ngeen làqoo ci seeni biir dëkk yu mag sax, maay wàcce mbas ci seen biir, seeni noon jekku leen. <sup>26</sup> Bu ma téyee loxo bi ma leen di leele, fukki jigéen dinañu bokk lakk seen mburum njël ci benn taal donj, natt ko ay somp, séddale, ngeen lekk, te dungenen suur.

<sup>27</sup> «Waaye bu loolu weese te déggaluleen ma, xanaa di ma noonoo ba tey, <sup>28</sup> su boobaa ma gën leena mereeti, noonoo leen, te man ci sama bopp maa leen di mbugalati lu ko ëpp fukki yoon ak juróom, feye leen ko seen bàkkaar. <sup>29</sup> Dingenen yàpp seeni doom yu góor, yàpp seen doom yu jigéen ndax xiif. <sup>30</sup> Dinaa tas seen bérabi jaamookaay\*, toj seeni suurukaay. Seen kasaray tuur yi ne làcc, ma jal ca seeni néew. Maa leen di sib, <sup>31</sup> gental seen dëkk yu mag, tas seen bérab yu sell, te dootuma faale xetug jàmm ca seeni sarax. <sup>32</sup> Maay tas seenum réew, ba seen noon ya ko nangu yéemu ca. <sup>33</sup> Yeen nag maa leen di tasaare ci biir xeet yi, ndax maay génne saamar mbaram, mu dal ci seen kaw. Seenum réew dina wéet, seen dëkk yu mag gent.

<sup>34</sup> «Su boobaa mboolem diir ba suuf di wéet moom lay daboo ati Noflaayam, fekk yeen ngeen nekk ca seen réewu noon ya. Su ko defee suuf si dina nopplu moos, ba daboo ko ati Noflaayam. <sup>35</sup> Mboolem diir

\* **26:30** 26.30 bérabi jaamookaay: ay tund la daan doon mbaa ay bérab yu ñu tànn. Waa Kanaan daan ci jaamu seeni yàllantu, di ca def xeeti jaamu yu jëm ci luy taxa giir; ak lu jëm ci rawaani ñu dee mbaa ñu di ca gànctu, topp seeni tuur ya leen ca doon xiir.

bi suuf siy wéet, moom lay nopploo la mu noppluwuloon, ba leen ay ati Noflaay fekkee ngeen dëkk fa.

<sup>36</sup> «Ñi des ci yeen, dinaa indi njàqare ci seen xol, foofa ngeen nekk ca seen réewu noon ya, ba xob wu ne foy-foy ngeen daw. Dingen xélu ni ku ñuy dàqe saamar, bay daanu, te dàqeesu leen. <sup>37</sup> Dingen fakkastalante di daw, ni ñu ñuy dàqe saamar, te dàqeesu leen, ba dungen mana taxaw ci seen kanami noon. <sup>38</sup> Dingen deeye àll, te seen suufu noon yaa leen di lekk. <sup>39</sup> Ñi des ci yeen dinañu ràgg ca seen réewi noon ndax seeni bàkkaar ak seen bàkkaari maam.

### *Aji Sax ji du fecci kóllèream*

<sup>40</sup> «Su ko defee ñoom dinañu tudd seen bàkkaar ak seen bàkkaaru maam ya, ndax dañu maa wor te dëkke maa noonoo, <sup>41</sup> ba man itam ma noonoo leen, toxal leen seen réewu noon. Bu ñu tuubee seen xol bu dëgër nag, ba matal seen mbugal yi sababoo ci seeni ñaawtéef, <sup>42</sup> su boobaa maay bàyyi xel ci sama kóllère gaak Yanqóoba ak sama kóllère gaak Isaaxa ak sama kóllère gaak Ibraayma, te duma fátte li ma dige ci wàllu réew mi.

<sup>43</sup> «Waaye réew mi dinañu ko gentel, mu daboo ati Noflaayam diir ba ñu ko dëddoo, wéetal ko, te fekk ñoom ñuy fey seen boru tooñ; ndax kat dañoo sofental samay santaane, xalab samay dogal. <sup>44</sup> Ndaxam du tax ma sofental leen ca seen réewu noon, mbaa ma di leen xalab, di leen faagaagal, nde kon ma fecci sama kóllèreek ñoom. Ndax man Aji Sax ji maay seen Yàlla. <sup>45</sup> Maa leen di bàyyil xel ci sama kóllère gaak seen maam ya ma génne réewum Misra, jaambur ñi seede, ngir doon seen Yàlla. Maay Aji Sax ji.»

<sup>46</sup> Looloo di dogal yaak santaane yaak ndigali yoon ya Aji Sax ji téral ca digganteem ak bànni Israyil ca kaw tundu Sinayi, Musaa jottli leen ko.

## 27

### *Lu jëm ci jagleel Aji Sax ji nit ak alal*

<sup>1</sup> Bu loolu weesee Aji Sax ji wax na Musaa ne ko: <sup>2</sup> «Waxal bànni Israyil ne leen: Képp ku dogoo jagleel Aji Sax ji nit\*, man naa wàccook kàddoom ci kaw nii ñu ko xaymaa. <sup>3</sup> Su dee góor gu am ñaar fukki at ba juróom benn fukki at, nanga ko xayma ci juróom fukki dogi xalis, ci xalisu bérab bu sell bi. <sup>4</sup> Su dee jigéen, nanga ko xayma ci fanweeri dogi xalis. <sup>5</sup> Su amee juróomi at ba ñaar fukki at, danga koy xayma ci ñaar fukki dogi xalis, su dee góor, mbaa fukki dogi xalis, su dee jigéen. <sup>6</sup> Su dee ku am weer jàpp juróomi at, nanga ko xayma ci juróomi dogi xalis su dee góor; mbaa ñetti dogi xalis su dee jigéen. <sup>7</sup> Su dee ku am juróom benn fukki at ak lu ko èpp, nanga ko xayma ci fukki dogi xalis ak juróom su dee góor; mbaa fukki dogi xalis su dee jigéen. <sup>8</sup> Su fekkee ne ki dogu woona jagleel nit ki Aji Sax ji da di ku am-amam yées sa xayma, na kooku yóbbu nit ki ba ca sarxalkat ba, sarxalkat bi xaymaal ko nit ki ci lu dèppook am-amam, moom mi dogu woon.

<sup>9</sup> «Su fekkee ne la ñu dogu woona joxe ag jur la gu dagana sarxalal Aji Sax ji, day daldi sell. <sup>10</sup> Deesu ko wecee. Du jur gu baax gu ñu ko mana wuutoo, doonte jur gu bon la, te du jur gu bon gu ñu ko mana wuutoo, te fekk muy gu baax. Ci biir jagleel googu ku xasa wuutoo ag jur moroom ma, jur gu jëkk gaak kuutaay la dañuy bokk doon lu sell. <sup>11</sup> Su fekkee ne la ñu dogu woona joxe mala mu daganul la te daganula sarxalal Aji Sax ji, na nit ki yóbbu jur ga ba ca sarxalkat ba, <sup>12</sup> sarxalkat ba xayma ko. Su baaxee su bonee, lu mu ci dogal mooy wéy. <sup>13</sup> Su ko boroom bëggee jotaat, day fey njég ga, yokk ca xaajub juróomeelu njég ga.

<sup>14</sup> «Su nit jaglelee Aji Sax ji dëkkuwaayam, sellalal ko ko, na sarxalkat bi xayma dëkkuwaay bi. Su baaxee su bonee, lu mu ci dogal mooy wéy. <sup>15</sup> Su fekkee ne ki dogu woona joxe dëkkuwaayam da koo bëgga jotaat, day

\* **27:2** 27.2 Nit man naa jagleel moroomam Yàlla, muy liggéey ca kër Yàlla ga. Aaya yii wone na ne nit ku ñu jagleel moroomam Yàlla, manees na koo yiwi ci kaw ñu feyal ko ab limu xalis.

fey njég ga ñu ko xaymaa, yokk ca xaajub juróomeelam, mu doonaat alalam.

<sup>16</sup> «Su nit jagleele Aji Sax ji suuf su mu moom ci suufas ndonoom, na ñuy xaymaa suuf sa, na dëppook dayob pepp bay mat jiwum suuf sa. Ñetti barigoy peppum lors yu ne juróom fukki dogi xaaalis† a koy wecci. <sup>17</sup> Su fekke ne ci atum Yiwiku la joxe suuf si, xaymab suuf si day mat sèkk ànd ak moom. <sup>18</sup> Waaye su fekke ne gannaaw atum Yiwiku la joxe suuf si, sarxalkat bi da koy nattal njég gi ci at yi dox seen digganteek atum Yiwiku ma ca topp, génne ca at ya wees. <sup>19</sup> Su fekke ne ki dogu woona joxe tool bi da koo bégga jootaat, day fey njég ga ñu ko xaymaa, yokk ca xaajub juróomeelam, mu doonaat alalam. <sup>20</sup> Su jootaatul tool bi, ba ñu jaay tool bi keneen, deesu ko mana jootaat. <sup>21</sup> Bu tool bi yiwikoo ci atum Yiwiku nag, day daldi doon lu ñu sellalal Aji Sax ji, mel ni tool bu ñu aaye, mu doon alalu sarxalkat.

<sup>22</sup> «Su fekke ne nit ki dafa jagleel Aji Sax ji tool bu mu jënd, te donnu ko, <sup>23</sup> sarxalkat bi da koy xaymaal njég gi, méngale kook at yi dox seen digganteek atum Yiwiku may ñew. Na nit ki fey la ñu xayma ca bés ba, xaaalis ba di lu ñuy sellalal Aji Sax ji. <sup>24</sup> Bu atum Yiwiku dikkee, tool bi day dellu ca ka ñu ko jënde woon te mu di alalu ndonoom. <sup>25</sup> Mboolem lu ngeen xayma, na dëppook natt ba ñu yoonal ci bérab bu sell bi, maanaam li ñuy wax siikal te mu tollu ci fukki garaam.

<sup>26</sup> «Waaye kat luy taaw cig jur, Aji Sax jee ko moom jeeg. Du lu kenn di dogoo jagleel Aji Sax ji. Muy barmol, muy mbote, muy tef, Aji Sax jeey boroom. <sup>27</sup> Su dee lu mala mu daganul taawloo, ka ko moomoon man na koo jootaat ndegam fey na njégam, ba dollu ca xaajub juróomeelu njég ga. Bu ñu ko jootaatul, dees koy jaay ci njég gi ñu ko xaymaa. <sup>28</sup> Mboolem lu ñu aayalal Aji Sax ji, lu sella sell la ñeel Aji Sax ji. Lépp lu nit moom, su dee nit mbaa jur mbaa suuf su mu donn, amu

ci lenn lu mu aayalal Aji Sax ji te ñu sañ koo jaay mbaa mu di ko jootaat. <sup>29</sup> Ba tey du kenn nit ku ñu aayalal bakkanam Aji Sax ji, mu wara sànk, ba noppi ñu di ko jootaat. Dees koy rey rekk.

<sup>30</sup> «Bu loolu weese mboolem lu jóge ci suuf, muy pepp mbaa doomi garab, cérub fukkeel ba Aji Sax jeey boroom. Dees koy sellalal Aji Sax ji. <sup>31</sup> Su fekke ne nit ki dafa namma jootaat lenn ca céru fukkeelu meñneefam ma muy génne, day yokk ca njég ga xaajub juróomeelam. <sup>32</sup> Mboolem céru fukkeel bu ñu génnee cig jur, gu gudd gaak gu gätt ga, muy lépp lu sàmm wañne bantam, cérub fukkeel la bu ñuy sellalal Aji Sax ji. <sup>33</sup> Deesu ci seet jur gu baax ak gu bon te deesu ci wuutal lenn. Bu ci nit xasee wuutal lenn, la jëkk ak la ko wuutu lépp day daldi doon lu sell. Deesu ko mana jootaat.»

<sup>34</sup> Yooyu santaane la Aji Sax ji dénkoon Musaa ca tundu Sinayi, ngir mu jottli ko bànni Israyil.

† 27:16 27.16 Benn dogu xaaalis boobu mu ngi tollu woon ci benn siikal, diisaayam di fukki garaam.

**Màndiŋ ma**  
**fa bànni Israyil jaare woon**  
**di ñeenteelu xaaju**  
**Tawreetu Musaa**  
**Ubbite gi**

Téere bii moo tàmbalee ca bés ba bànni Israyil dalee ca taatu tundu Sinayi. Foofu la bànni Israyil jóge jëm màndiŋu Paran, ca bëj-gànnaru réewum dige ba. Fa lañu yebale ay ndaw yu yërnduji réew ma, te délsi wax seen gis-gis ca ña fa dëkke. Ba ñu demee ba délsi, lañu ne ñoom la ñu gis neexul. Loolu nag tax bànni Israyil di nàttable ndax Yàlla man na leena jox suuf sa mu leen sédd. Ci kaw loolu ñuy jàmbat ci kaw Yàlla. Seen ñàkk kóllère googu tax na Yàlla teg leen ab daan, ñuy wèndeelu ca màndiŋ ma, ba maas ga doon jàmbat dee, ba geneen maas wuutu leen. Ñeent fukki at lañu wèndeelu, doora walbatiku dox ndànk, jëm Kanaan. Boobu yoon lañu doora nangoo déggal Yàlla. Gannaaw gi lañu sumb ay xare yu am solo, ba daan, ca penkub dexu Yurdan, doora waaj, ngir jàll ca biir réewum dige, ba ñu nammoona gis bu yàgg. Téere bi wone na ne, ni xolu doom Aadama mel rekk moom la ñoñi Yàlla feeñal ci seen jikko ju toogadi. Saxoowuñu lenn, xanaa ñarale diggante ngëm ak nàttable, cawarte ak xàddi, jëfi ngor ak jëf ju sew. Seen jikko jooju la téere bi wone ne moo leen worale ak Yàlla mi dul soppiku ci kóllèreem, digganteem ak ñoñam, doonte kóllère gi nag, teewu koo yor ab yaram, te ànd ak njobteem. Musaa nag diggante bu xat lañu ko gisal ci téere bi, Aji Sax ji ak ay bokkam séq ko: Musaa moo doon ndawal Yàlla liy jottli ay ndigalam, te amul woon ab dend ci na mu xejjoo woon ak Yàlla, waaye moo taxawoon itam fa kanam Yàlla, taxawal fa askan wu ñàkk kóllère, di ko layal te tàyyiwul.

Ci Tënk:

Saar 1—21 Israyil jànge na ca maam ya jóge woon Misra

Saar 22—25 Céru barke bu sax ñeel na Israyil

Saar 26—36 Israyil dégg na ab artoom balaa dugg Kanaan

**Israyil jànge na ca maam ya**  
**jóge woon Misra**

(Saar 1—21)

*Takk nañu limu bànni Israyil*

<sup>1</sup> Aji Sax ji moo wax ak Musaa ca màndiŋu Sinayi ca biir xaymab ndaje ma, keroog benn fanu ñaareelu weer wu ñaareelu at, ma topp ca gàddaay ga bawoo Misra. Mu ne ko:

<sup>2</sup> «Limleen mbooloom bànni Israyil gépp, na ñu bokke seeni làng ak seen kéri maam. Waññleen góor ñépp, bopp ak bopp, ku nekk ak turam. <sup>3</sup> Li ko dale ñaar fukki at, jëm kaw, mboolem ñi xare war ci Israyil daal, nangeen leen lim, gàngoor ak gàngoor, yaw ak Aaróona. <sup>4</sup> Giir gu ci nekk, àndleen ceek kilifa yi jiite seen kéri maam, ñu jàpple leen ci.

<sup>5</sup> Ñiy wuyoo tur yii nag, ñoo leen ciy taxawu:

Ci wàllu Rubeneen ñi, Elisur doomu Sedeyur.

<sup>6</sup> Wàllu Cimyoneen ñi, Selumyel doomu Surisadaay.

<sup>7</sup> Wàllu Yudeen ñi, Nason doomu Aminadab.

<sup>8</sup> Wàllu Isakareen ñi, Netanel doomu Suwar.

<sup>9</sup> Wàllu Sabuloneen ñi, Elyab doomu Elon.

<sup>10</sup> Ñi ciy askanu Yuusufa ñii la:

Ci wàllu Efraymeen ñi, Elisama doomu Amiyut.

Wàllu Manaseen ñi, Gamalyel doomu Padasur.

<sup>11</sup> Wàllu Beñamineen ñi, Abidan doomu Gidoni.

<sup>12</sup> Wàllu Daneen ñi, Ayeser doomu Amisadaay.

<sup>13</sup> Wàllu Asereen ñi, Pagyel doomu Okkran.

<sup>14</sup> Wàllu Gàddeen ñi, Elyasaf doomu Dewel.

<sup>15</sup> Wàllu Neftaleen ñi, Ayra doomu Enan.»

16 Ñooñu lañu woo ci mbooloo mi, muy ñi jiite seen giiri maam. Ñooy njiiti gàngoori Israyil.

17 Ba loolu amee Musaa ak Aaróona tofloo ñooñu ñu tudd seeni tur, 18 ñu dajale mbooloo ma mépp, keroog ca benn fanu ñaareelu weer wa. La ko dale ca ña am ñaar fukki at, jëm kaw, ñoom ñépp daldi bindu ca limeefu tur ya, ku nekk ak kër maamam, giir ak giir, làng ak làng, bopp ak bopp. 19 Noonee ko Aji Sax ji sante woon Musaa, na la Musaa takke seen lim ca màndiŋu Sinayi.

20 Ñu lim bopp ak bopp, turi sèti Ruben taawub Israyil seen maam\*, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 21 Limub Rubeneen ñi di ñeent fukki junni ak juróom benn ak juróomi téeméer (46 500).

22 Ñu lim bopp ak bopp, turi sèti Simeyon, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 23 Limub Cimyoneen ñi di juróom fukki junneek juróom ñeent ak ñetti téeméer (59 300).

24 Ñu lim turi sèti Gàdd, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 25 Limub Gàddeen ñi di ñeent fukki junneek juróom ak juróom benni téeméer ak juróom fukk (45 650).

26 Ñu lim turi sèti Yuda, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 27 Limub Yudeen ñi di juróom ñaar fukki junneek ñeent, ak juróom benni téeméer (74 600).

28 Ñu lim turi sèti Isaakar, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 29 Limub Isakareen ñi di juróom fukki junneek ñeent ak ñeenti téeméer (54 400).

30 Ñu lim turi sèti Sabulon, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 31 Limub Sabuloneen

ñi di juróom fukki junneek juróom ñaar ak ñeenti téeméer (57 400).

32 Ñu lim turi sèti Yuusufa yi askanoo ci doomam Efrayim, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 33 Limub Efraymeen ñi di ñeent fukki junni ak juróomi téeméer (40 500).

34 Ñu lim turi sèti Yuusufa yi askanoo ci doomam Manase, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 35 Limub Manaseen ñi di fanweeri junneek ñaar ak ñaar téeméer (32 200).

36 Ñu lim turi sèti Beñamin, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 37 Limub Beñamineen ñi di fanweeri junneek juróom ak ñeenti téeméer (35 400). 38 Ñu lim turi sèti Dan, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. 39 Limub Daneen ñi di juróom benn fukki junneek ñaar ak juróom ñaar téeméer (62 700).

40 Ñu lim turi sèti Aser, ku nekk ak làngam ak kër maamam, mboolem góor ñi xare war, te ñu am ñaar fukki at, jëm kaw. 41 Limub Asereen ñi di ñeent fukki junneek benn ak juróomi téeméer (41 500).

42 Ñu lim turi sèti Neftali, ku nekk ak làngu cosaanam ak kër maamam, mboolem ñi xare war, te ñu am ñaar fukki at, jëm kaw. 43 Limub Neftaleen ñi di juróom fukki junneek ñett ak ñeenti téeméer (53 400).

44 Yooyu limeef la Musaa ak Aaróona ténk, ña leen ca jàpple di fukki kilifay Israyil ak ñaar, ku ci nekk taxawal kër maamam. 45 Mboolem bànni Israyil yi xare war, te ñu am ñaar fukki at, jëm kaw, limees na leen, ku ci nekk ak kër maamam. 46 Ña ñu lim ñépp di juróom benn téeméeri junneek ñett ak juróomi téeméer ak juróom fukk (603 550).

*Limaalesul Leween ñi*

\* 1:20 1.20 Israyil mooy Yanqóoba.

<sup>47</sup> Giirug Leween ñi nag ci bànni Israyil lañu bokk, waaye limaaleesu leen ak ñoom. <sup>48</sup> Aji Sax ji moo waxoon Musaa, ne ko: <sup>49</sup> «Giirug Lewi ñoom, bu leen lim, bu leen waññaaleek bànni Israyil. <sup>50</sup> Waaye yaw ci sa bopp nanga sas Leween ñi jaamookaay bi seedes kóllère gi dence, mook la muy àndal lépp, ak mboolem lu ca bokk. Ñooy gàddu jaamookaay bi, ak la muy àndal lépp, di ko topptoo, te it fi wër jaamookaay bi lañuy dal. <sup>51</sup> Bu jaamookaay bi dee dem, Leween ñee koy wékki, bu jaamookaay bi dee dale bérab, Leween ñee koy we. Ku ci bokkul ba laal ci nag, dees koy rey. <sup>52</sup> Bànni Israyil gi ci des, na ku ci nekk topp dalam, ak raayaam ak kurélam. <sup>53</sup> Leween ñi nag nañu dal fi wër jaamookaay bi seedes kóllère gi dence. Su ko defee am sànj du dal ci kaw mbooloom bànni Israyil. Te itam na Leween ñi dénkoo dénkaneey jaamookaay bi seedes kóllère gi dence.»

<sup>54</sup> Bànni Israyil daldi def noonu. Mboolem lu Aji Sax ji santoon Musaa, noonee lañu ko defe.

## 2

### *Lu jëm ci dalinu giir yi*

<sup>1</sup> Ba loolu wéyee Aji Sax ji wax Musaa ak Aaróona, ne leen: <sup>2</sup> «Na bànni Israyil di dal, ku nekk ak raayaam ak xàmmikaayu kër maamam. Fi wër xaymab ndaje mi te dànd ko as lëf, fi lañuy dale:

<sup>3</sup> «Ñay dale ca kanam, fa féete penku, ñooy waa raayab Yuda ak seeni gàngoor, kilifag Yudeen ñi di Nason doomu Aminadab. <sup>4</sup> Ña ñu lim ci gàngooram di juróom ñaar fukki junneek ñeent ak juróom benni téeméer (74 600).

<sup>5</sup> «Ñay dale fa feggook ñoom ñooy giirug Isakareen ñi, kilifag askanu Isaakar di Netanel doomu Suwar. <sup>6</sup> Ña ñu lim ci gàngooram di juróom fukki junneek ñeent ak ñeenti téeméer (54 400).

<sup>7</sup> «Giirug Sabuloneen ñeey feggook ñoom, kilifag askanu Sabulon di Elyab doomu Elon. <sup>8</sup> Ña ñu limal gàngooram

di juróom fukki junneek juróom ñaar ak ñeenti téeméer (57 400).

<sup>9</sup> «Mboolem ña ñu limal dalub Yuda aki gàngooram daldi doon téeméeri junneek juróom ñett fukk ak juróom benn ak ñeenti téeméer (186 400). Bu ñuy dem, ñooñooy dox, jiitu.

<sup>10</sup> «Waa raayab Ruben ñooy dale bëj-saalum, ñook seeni gàngoor, kilifag askanu Ruben di Elisur doomu Sedeyur.

<sup>11</sup> Ña ñu limal gàngooram di ñeent fukki junneek juróom benn ak juróomi téeméer (46 500).

<sup>12</sup> «Ñay dale fa feggook ñoom ñooy giirug Cimyoneen ñi, kilifag askanu Simeyon di Selumyel doomu Surisadaay.

<sup>13</sup> Ña ñu limal gàngooram di juróom fukki junneek juróom ñeent ak ñetti téeméer (59 300).

<sup>14</sup> «Giiru Gàddeen ñeey feggook ñoom, kilifag askanu Gàdd di Elyasaf doomu Rewel. <sup>15</sup> Ña ñu limal gàngooram di ñeent fukki junneek juróom ak juróom benni téeméer ak juróom fukk (45 650).

<sup>16</sup> «Mboolem ña ñu limal dalub Ruben aki gàngooram doon téeméeri junneek juróom fukk ak benn, ak ñeenti téeméer ak juróom fukk (151 450). Bu ñuy dem, ñooñooy doon ñaareelu kurél, dox, topp ca.

<sup>17</sup> «Su ko defee xaymab ndaje mi jóg topp ca, ànd ak Leween ñi koy gàddu, te seen dal nekk ci digg dal yi. Noonee kurél yiy dale daal, ni lañuy jóge dem, ku nekk topp ayam ak raayaam.

<sup>18</sup> «Waa raayab Efrayim ñooy dale wetu sowu, ñook seeni gàngoor, kilifag askanu Efrayim di Elisama doomu Amiyut. <sup>19</sup> Ña ñu limal gàngooram di ñeent fukki junni ak juróomi téeméer (40 500).

<sup>20</sup> «Ñay dale fa feggook ñoom ñooy giirug Manaseen ñi, kilifag askanu Manase di Gamalyel doomu Pedasur. <sup>21</sup> Ña ñu limal gàngooram di fanweeri junneek ñaar ak ñaar téeméer (32 200).

<sup>22</sup> «Giirug Beñamineen ñeey feggook ñoom, kilifag askanu Beñamin di Abidan

doomu Gidoni. <sup>23</sup> Ña ñu limal gàngooram di fanweeri junneek juróom ak ñeenti téeméer (35 400).

<sup>24</sup> «Mboolem ña ñu limal dalub Efrayim aki gàngooram daldi doon téeméeri junneek juróom ñett ak téeméer (108 100). Bu ñuy dem, ñooñoo di ñetteelu kurél, dox topp ca.

<sup>25</sup> «Waa raayab Dan ñooy dale bëj-gànnar, ñook seeni gàngoor, kilifag askanu Dan di Ayeser doomu Amisadaay.

<sup>26</sup> Ña ñu limal gàngooram di juróom benn fukki junneek ñaar ak juróom ñaar téeméer (62 700).

<sup>27</sup> «Ñay dale fa feggook ñoom ñooy giirug Asereen ñi, kilifag askanu Aser di Pagyel doomu Okkran. <sup>28</sup> Ña ñu limal gàngooram di ñeent fukki junneek benn ak juróomi téeméer (41 500).

<sup>29</sup> «Giirug Neftaleen ñeey feggook ñoom, kilifag askanu Neftali di Ayra doomu Enan. <sup>30</sup> Ña ñu limal gàngooram di juróom fukki junneek ñett ak ñeenti téeméer (53 400).

<sup>31</sup> «Mboolem ña ñu limal dalub Dan daldi doon téeméer ak juróom fukki junneek juróom ñaar ak juróom benni téeméer (157 600). Ñooñoooy mujja jóg, topp seeni raaya.»

<sup>32</sup> Ñooñu lañu limal bànni Israyil na ñu bokke seen kèri maam. Mboolem ña ñu limal dal ya ak seeni gàngoor doon juróom benni téeméeri junneek ñett ak juróomi téeméer ak juróom fukk (603 550). <sup>33</sup> Leween ñi nag limaaleesu leen ci bànni Israyil, te noonu la ko Aji Sax ji sante woon Musaa.

<sup>34</sup> Bànni Israyil daldi def noonu. Mboolem noonee ko Aji Sax ji sante woon Musaa, na lañu daan dale, topp seeni raaya, na lañu daan jóge, ku nekk ak làngam ak kër maamam.

### 3

#### *Lu jëm ci sasi Leween ñi*

<sup>1</sup> Ñii ñoo di askani Aaróona ak Musaa, jant ba Aji Sax jiy wax, mook Musaa

\* **3:17** 3.17 Seetal ci *Njàlbéen ga* 46.11.

ca kaw tundu Sinayi. <sup>2</sup> Doomi Aaróona yu góor ñoo di Nadab, taaw ba, ak Abiyu ak Elasar ak Itamar. <sup>3</sup> Turi doomi Aaróona yu góor, sarxalkat yaa ngi noonu; ñu faloon leen, sédd leen céru carxal. <sup>4</sup> Nadab ak Abiyu nag mujj dee fi kanam Aji Sax ji, ba ñu taalalee Aji Sax ji cuuraay lu warul ca màndiŋu Sinayi. Gannaaw amuñu woon doom yu góor, Elasar ak Itamar daldi féetewoo liggéeyu carxal ba, ca seen kanamu baay Aaróona.

<sup>5</sup> Ci kaw loolu Aji Sax ji ne Musaa: <sup>6</sup> «Indil Leween ñi, tegleen ci kilifteefu Aaróona sarxalkat bi, ngir ñu di ko jàpple; <sup>7</sup> ñooy dénkoo ndénkaaneem, di dénkoo dénkaaney mbooloo mépp fi kanam xaymab ndaje mi, ndax ñooy sasoo liggéeyu jaamookaay bi. <sup>8</sup> Ñooy sàmm mboolem jomtukaayi xaymab ndaje mi, ñooy dénkoo dénkaaney bànni Israyil, ndax ñooy sasoo liggéeyu jaamookaay bi. <sup>9</sup> Noonu ngay jële Leween ñi, sédd leen Aaróona ak doomam yu góor. Ñoom ñoo di cér bu mat sèkk bu ñu koy sédde ci bànni Israyil. <sup>10</sup> Aaróona ak doomam yu góor nag ngay tabb ngir ñu sasoo seenug carxal, waaye képp ku ci laal te bokku ci, dees koy rey.» <sup>11</sup> Aji Sax ji waxati Musaa, ne ko: <sup>12</sup> «Man mii nag, maa seppée Leween ñi ci bànni Israyil, maa leen weccoo mboolem taaw bu góor bu jékka juddoo ci ndeyam, ci biir bànni Israyil. Kon nag Leween ñi, sama cér lañuy doon. <sup>13</sup> Ndax lépp luy taaw bu góor, sama cér la. Keroog ba ma fàddee lépp luy taaw bu góor ca réewum Misra, ca laa sellalal sama bopp lépp luy taaw ci Israyil, dale ci nit ba ci jur. Maa leen séddoo. Maay Aji Sax ji.»

#### *Lim nañu Leween ñi ak seeni maam*

<sup>14</sup> Aji Sax ji waxati Musaa ca màndiŋu Sinayi, ne ko: <sup>15</sup> «Limal askanu Leween ñi, ni ñu bokke seen kèri maam ak seeni làng. Mboolem góor ñi am weer, jëm kaw, ngay lim.» <sup>16</sup> Musaa daldi leen lim ci ndigalal Aji Sax ji, na ñu ko ko sante.

<sup>17</sup> Gerson ak Keyat ak Merari ñoo soqikoo ci Lewi.\* <sup>18</sup> Doomi Gerson yu góor

ñoo di Libni ak Simey, ku ci nekk ak làngam. <sup>19</sup> Doomi Keyat yu góor ñoo di Amram ak Isar ak Ebron ak Uysel, ku ci nekk ak làngam. <sup>20</sup> Doomi Merari yu góor ñoo di Maali ak Musi, ku ci nekk ak làngam. Làngi Leween ñaa ngoogu, na ñu bokke seen keri maam.

<sup>21</sup> Ci Gerson la làngu Libneen ñi, ak làngu Simeyeen ñi soqikoo. Làngi Gersonneen ñaa ngoogu. <sup>22</sup> Ña ñu leen limal, ba ñu waññee mboolem góor ña am weer, jëm kaw, juróom ñaari junni ak juróomi téeméer (7 500) lañu. <sup>23</sup> Làngi Gersonneen ña, ca gannaaw jaamookaay ba lañu daan dale, fa féete sowu. <sup>24</sup> Gersonneen ñi, seen kilifag kër maam moo doon Elyasaf doomu Layel.

<sup>25</sup> Askanu Gerson nag, seen sas ci wàllu xaymab ndaje mi, jaamookaay bi la woon ak xayma bi, ak malaan mi koy ub, ak ridob bunt xaymab ndaje mi, <sup>26</sup> ak kiiraayi ètt beek ridob bunt ètt bi wër jaamookaay beek sarxalukaay bi, ak buum yeek mboolem liggéey bu ci war.

<sup>27</sup> Keyat nag, ci moom la làngu Amrameen ñi soqikoo, ak làngu Isareen ñi, ak làngu Ebroneen ñi, ak làngu Usiyleen ñi. Làngi Keyateen ñaa ngoogu. <sup>28</sup> Ba ñu waññee mboolem góor ña ca am weer, jëm kaw, juróom ñetti junni ak juróom benni téeméer (8 600) lañu. Ñoo dénkoo woon dénkaaney bérab bu sell bi. <sup>29</sup> Làngi Keyateen ñi, wet ga féete jaamookaay ba bëj-saalum, fa lañu daan dale. <sup>30</sup> Keyateen ñi, seen kilifag kër maam moo doon Elisafan doomu Uysel.

<sup>31</sup> Seen sas nag moo doon gaal gi, ak taabal ji, ak tegukaayu làmp bi, ak sarxalukaay yi, ak ndabi sarxal ya ñu ca daa jëfandikoo, ak ridob biir bi, ak mboolem liggéey bu ci war. <sup>32</sup> Njiiti Leween ñi nag, seen kilifa gu mag moo doon Elasar doomu Aaróona sarxalkat ba. Moo doon saytu ña dénkoo woon dénkaaney bérab bu sell ba.

<sup>33</sup> Ci Merari la làngu Maaleen ñi ak làngi Museen ñi soqikoo. Làngi Merareen ñaa ngoogu. <sup>34</sup> Ña ñu leen limal, ba ñu waññee mboolem góor ña am

weer, jëm kaw, juróom benni junni ak ñaar téeméer (6 200) lañu. <sup>35</sup> Merareen ñi, seen kilifag kër maam moo doon Suryel doomu Abixayil. Ca wet ga féete jaamookaay ba bëj-gannaar, fa lañu daan dale.

<sup>36</sup> Askanu Merari, seen sas moo doon xànqi jaamookaay bi aki galanam ak jën yi ak tegu yi, ak mboolem jumtukaay ya muy àndal, ak liggéey bu ca war, <sup>37</sup> ak jën yi wër ètt bi, ak seeni tegu, ak seen xeri sampukaay, ak seeni buum.

<sup>38</sup> Ña daan dale nag fa jàkkaarlook jaamookaay bi, ca kanam, janlook xaymab ndaje mi, ca wetu penku, ñoo doon Musaa ak Aaróona ak doomam yu góor. Ñoo dénkoo woon dénkaaney bérab bu sell bi, sasool ko bànni Israyil, te ku ci laal te bokku ci, dees koy rey. <sup>39</sup> Mboolem ña ñu limal Leween ñi, te Musaa ak Aaróona lim leen na ñu bokke seeni làng ci ndigalal Aji Sax ji, ñuy mboolem góor ñi am weer, jëm kaw, ñaar fukki junneek ñaar (22 000) lañu.

#### *Lim nañu taaw yi ngir seen njotlaay*

<sup>40</sup> Aji Sax ji waxaat Musaa, ne ko: «Limal taawi bànni Israyil yu góor yépp, dale ko ci ñi am weer, jëm kaw, nga waññ te bind seeni tur. <sup>41</sup> Su ko defee nga beral ma Leween ñi, man Aji Sax ji, ñu wecci mboolem taawi bànni Israyil gi ci des, juri Leween ñi itam wecci mboolem luy taaw ci juri bànni Israyil gi ci des.» <sup>42</sup> Ci kaw loolu Musaa lim taawi bànni Israyil yépp, na ko ko Aji Sax ji sante. <sup>43</sup> Ba ñu waññee mboolem taaw yu góor ya, bind seeni tur, dale ci ñi am weer, jëm kaw, seenub lim nekk na ñaar fukki junneek ñaar ak ñaar téeméer ak juróom ñaar fukk ak ñett (22 273).

<sup>44</sup> Aji Sax ji waxati Musaa, ne ko: <sup>45</sup> «Beral Leween ñi, ñu wecci mboolem taawi bànni Israyil, juri Leween ñi it wecci seenug jur, ma daldi séddoo Leween ñi, man Aji Sax ji. <sup>46</sup> Njotlaay nag dina war ci ñaar téeméer ak juróom ñaar fukk ak ñetti (273) bopp, yi taawi bànni Israyil éppe Leween ñi. <sup>47</sup> Su ko defee nga sàkku bopp bu ci nekk juróomi siikal; ci

† 3:47 3.47 Ñaar fukki gera tollu na ci juróom fukki garaam.



siikalu bérab bu sell bi nga koy sàkkoo, siikal bu ci nekk wecci ñaar fukki gera†. <sup>48</sup> Nanga jox xalis boobu Aaróona ak doomam yu góor, muy njotlaayal taaw yi ci tegu.» <sup>49</sup> Ba loolu amee Musaa feyeeku xalisu njotlaayal taaw yooyu tegu ca taaw, ya jotoo Leween ña. <sup>50</sup> Xalis ba mu nangoo ca taawi bànni Israyil di junniy siikal ak ñetti téeméer ak juróom benn fukk ak juróom (1 365), ci siikalu bérab bu sell bi, xawa tollu ci fukki kilo ak ñett. <sup>51</sup> Ci kaw loolu Musaa jox xalisu njotlaay ba, Aaróona ak doomam yu góor, ci ndigalal Aji Sax ji, na ko ko Aji Sax ji sante.

## 4

### *Yeneen kuréli Leween a ngi ak seeni sas*

<sup>1</sup> Aji Sax ji waxati Musaa ak Aaróona, ne:

<sup>2</sup> «Leween ñi askanoo ci Keyat, waññleen leen bopp ak bopp, na ñu bokke seeni làng, ak seen kéri maam.

<sup>3</sup> Daleleen ci góor ñi am fanweeri at, ba juróom fukki at, muy mboolem ñi yelloo bokk ci kurél, gi liggéeyu biir xaymab ndaje mi war. <sup>4</sup> Liggéeyu Keyateen ñi ci biir xaymab ndaje mi moo di wàllu jumtukaay yu sell yee sell.

<sup>5</sup> «Bu dal bi dee jóg, na Aaróona ak doomam yu góor dugg, wékki kiiraay li, di ridob biir bi, te ñu muure ko gaalu seedes kóllère gi. <sup>6</sup> Nañu lalaat ca kaw kiiraayal deru piipi, te ñu lalati ca kaw, ndimo lu lépp baxa, doora roof njàppuy gaal gi.

<sup>7</sup> «Taabalu mburum teewal mi, nañu ci lal ndimo lu baxa, teg ci ndab yeek bàttu yeek njaq yeek tax yi ñuy sottee saraxi tuuru, door cee teg mburu moomu dul wuute. <sup>8</sup> Nañu muure yooyu ndimo lu xonq curr, te ñu lalaat ca kaw malaanum deru piipi, doora roof njàppuy taabal ji.

<sup>9</sup> «Su ko defee ñu jël ndimo lu baxa, muure ko tegukaayu làmp bi, aki làmpam aki ñiimam aki andam, ak mboolem ndabi diwam ya ñu cay jéfoo. <sup>10</sup> Nañu boole tegukaayu làmp beek mboolem la muy àndal, ñu èmbe lépp malaanum deru piipi, te teg ko ci kaw tagar bi ñu koy

gàddoo. <sup>11</sup> Sarxalukaayu wurus bi\*, nañu lal ci kawam ndimo lu baxa, lalaat ca kaw malaanum deru piipi, doora roof njàppuy sarxalukaay bi. <sup>12</sup> Nañu jël mboolem jumtukaay yi ñuy liggéeye ci biir bérab bu sell bi, ñu èmbe ko ndimo lu baxa, muure ko malaanum deru piipi, door koo teg ci kaw tagar bi ñu koy gàddoo. <sup>13</sup> Nañu dindi niiniti sarxalukaayu xànjari bi, te ñu lal ci kaw sarxalukaay bi, ndimo lu xonq curr. <sup>14</sup> Nañu teg ca kaw ndimo la mboolem ndab, ya ñuy liggéeye ca sarxalukaay ba: and yeek cappukaayi yàpp yeek ñiitukaay yeek kèll yi; jumtukaayi sarxalukaay bi yépp daal, te ñu lal ca kaw, malaanum deru piipi, doora roof njàppuy sarxalukaay bi.

<sup>15</sup> «Bu dal bi waree jóg, na Aaróona ak doomam yu góor muur yéf yu sell yi, ak mboolem jumtukaayi bérab bu sell bi ba noppi. Gannaaw loolu la askanu Keyat di dikk, ngir gàddu ko. Su ko defee duñu laal dara lu sell, bay dee. Loolu la Keyateen ñi di gàddu ci wàllu xaymab ndaje mi.

<sup>16</sup> «Elasar doomu Aaróona sarxalkat bi nag, ab saytoom moo di diwu làmp bi, ak cuuraay li, ak saraxu pepp bi dul jaas, ak diwu pal gi. Mooy féetewoo jaamookaay bi bépp, ak mboolem li ci biiram, ba ci yéf yu sell yi, aki jumtukaayam.»

<sup>17</sup> Aji Sax ji waxati ba tey ak Musaa ak Aaróona, ne leen: <sup>18</sup> «Buleen yóbbe Keyateen ñeek seeni làng, lu ñu leen di dagge ci biir Leween ñi. <sup>19</sup> Nii ngeen di def ak ñoom, ba bu ñu jegee yéf yu sell yee sell, di dund te duñu ca dee: Aaróona aki doomam ñooy dugg, daldi sédd ku nekk ci ñoom liggéeyam ak la muy gàddu. <sup>20</sup> Bu Keyateen ñi dugg, di xool lu mu gàtt gàtt, yéf yu sell yi. Lu ko moy ñu dee.»

<sup>21</sup> Gannaaw loolu Aji Sax ji wax Musaa, ne ko: <sup>22</sup> «Ñi askanoo ci Gerson itam, nanga leen waññ bopp ak bopp, na ñu bokke seen kéri maam ak seeni làng. <sup>23</sup> Li dale ci góor ñi am fanweeri at, ba juróom fukki at ngay lim, ñuy mboolem ñi liggéeyu xaymab ndaje mi war. <sup>24</sup> Gersoneen ñi nag, lii moo di

\* 4:11 4.11sarxalukaayu wurus bi mooy sarxalukaayu cuuraay bi. Seetal ci *Mucc ga* 30.1-10.

seen cér ci wàllu liggéey bi, ak li ñu wara gàddu: <sup>25</sup> ñooy gàddu kiiraayi jaamookaay bi, ak xaymab ndaje meek malaanam, ak malaanum deru piipi bi ci kaw, ak ridob bunt xaymab ndaje mi; <sup>26</sup> ak sori ètt bi, ak kiiraayal bunt ètt bi wër jaamookaay beek sarxalukaay bi, ak seeni buum ak mboolem jumptukaay ya ñu cay liggéeye. Mboolem lees cay def, ñoo koy liggéey. <sup>27</sup> Mboolem sasu Gersoneen ñi ci mboolem lu ñuy gàddu ak mboolem lu ñuy liggéey, ci ndigalal Aaróona aki doomam lay doon. Ñoo leen di sas mboolem lu ñu wara gàddu. <sup>28</sup> Loolooy cérú Gersoneen ñi, ci wàllu xaymab ndaje mi, te loolu lañu leen dénk, Itamar doomu Aaróona sarxalkat bi di leen ca saytu.

<sup>29</sup> «Ñi askanoo ci Merari itam, na ñu bokke seeni làng ak seen kéri maam, noonu nga leen di lime, <sup>30</sup> dale ko ci ñi am fanweeri at, ba juróom fukki at, ñuy mboolem ñi yelloo bokk ci kurél, gi liggéeyu xaymab ndaje mi war. <sup>31</sup> Lii mooy li ñu sasoo gàddu ci seen mboolem liggéey ci xaymab ndaje mi: xànqi jaamookaay bi aki galanam aki jënam aki tegoom; <sup>32</sup> muy jën yi wër ètt bi, ak seeni tegu ak seeni buum, mboolem seen jumptukaay yu ñu cay liggéeye. Limal-leen leen jumptukaay yi ñu wara gàddu. <sup>33</sup> Loolooy cérú Merareen ñi, ci wàllu xaymab ndaje mi ci njiital sarxalkat bi Itamar doomu Aaróona.»

### *Lim nañu Leween ñi liggéey war*

<sup>34</sup> Ci kaw loolu Musaa ak Aaróona ak kilifag mbooloo ma lim Keyateen ña, na ñu bokke seeni làng ak seen kéri maam. <sup>35</sup> Ñu dale ko ci ñi am fanweeri at, ba juróom fukki at, ñuy mboolem ñi yelloo bokk ci kurél, gi liggéeyu xaymab ndaje mi war. <sup>36</sup> Ña ñu limal seeni làng di ñaari junni ak juróom ñaar téeméer ak juróom fukki góor (2 750). <sup>37</sup> Ñooñu lañu limal làngi Keyateen ñi, ñoom ñépp la liggéeyu xaymab ndaje mi war. Musaa ak Aaróona ñoo leen limoon, na ko Aji Sax ji santaanee, Musaa jottli.

<sup>38</sup> Ña ñu limal Gersoneen ñi, na ñu bokke seeni làng ak seen kéri maam,

<sup>39</sup> dale ko ci ñi am fanweeri at, ba juróom fukki at, mboolem ña yelloo bokk ci kurél, gi liggéeyu xaymab ndaje mi war, <sup>40</sup> te ñu limal leen seeni làng ak seen kéri maam, ñaari junneek juróom benni téeméer ak fanweeri góor lañu (2 630). <sup>41</sup> Ñooñu lañu limal làngi Gersoneen ñi, te ñoom ñépp la liggéeyu xaymab ndaje mi war. Musaa ak Aaróona ñoo leen limoon ci ndigalal Aji Sax ji.

<sup>42</sup> Ña ñu limal làngi Merareen ñi, na ñu bokke seeni làng, ak seen kéri maam, <sup>43</sup> dale ko ci ñi am fanweeri at, ba juróom fukki at, mboolem ña yelloo bokk ci kurél, gi liggéeyu xaymab ndaje mi war, <sup>44</sup> te ñu limal leen seeni làng, ñetti junni ak ñaar téeméeri góor (3 200) lañu. <sup>45</sup> Ñooñu lañu limal làngi Merareen ñi, Musaa ak Aaróona ñoo leen limoon, na ko Aji Sax ji santaanee, Musaa jottli.

<sup>46</sup> Mboolem Leween ña Musaa ak Aaróona, ak kilifay Israyil limoon, na ñu bokke seeni làng, ak seen kéri maam, <sup>47</sup> dale ko ci ñi am fanweeri at, ba juróom fukki at, ñuy mboolem ña yelloo bokk ci kurél, gi liggéeyu xaymab ndaje mi war, <sup>48</sup> seenub lim nekk na juróom ñetti junni ak juróomi téeméer ak juróom ñett fukki góor (8 580). <sup>49</sup> Ci ndigalal Aji Sax ji Musaa jottli, lañu leen lim, ba sas ku ci nekk ab liggéeyam ak la muy gàddu. Na ko Aji Sax ji sante Musaa, na lañu leen lime.

## 5

### *Sàrtal nañu doxalin yiy setal dal bi*

<sup>1</sup> Aji Sax ji waxati Musaa, ne ko: <sup>2</sup> «Santal bànni Israyil ñu génne dal bi képp ku ànd ak jàngoroy der juy law, mbaa jàngoroy xelli, ak képp ku sobeb néew bu mu laal, topp. <sup>3</sup> Muy góor, di jigéen, génneleen leen. Bitib dal bi ngeen leen di génne. Buñu sobeel dali bànni Israyil yi ma màkkaanoo ci seen biir.»

<sup>4</sup> Bànni Israyil def noonu, daldi leen génne dal bi, dàq leen ca biti. Ni ko Aji Sax ji waxe Musaa, noonu lañu ko defe.

<sup>5</sup> Aji Sax ji waxati Musaa, <sup>6</sup> ne ko mu wax bànni Israyil, ne leen: «Muy góor, di jigéen, bu tooñee moroomam, ba fecci

wormay Aji Sax ji, nit kooku tooñ na. <sup>7</sup> Day tuub bàkkaaram, ba noppi fey dayo ba mu ameel ka mu tooñ. Te juróomeelu xaajam la cay teg, jox ko ko. <sup>8</sup> Bu ki ñu tooñ wuutee, te amul mbokk mu koy jotaat, pey ga ñeel na Aji Sax ji, sarxalkat bee koy jagoo, te bokkul ak kuuyum njotlaay, mi sarxalkat biy defale ki tooñ, njotlaayam. <sup>9</sup> Te itam bépp jooxe bu bokk ci mboolem sarax yu sell, yi bànni Israyil indil sarxalkat bi, sarxalkat bee koy moom. <sup>10</sup> Ku nekk ci sarxalkat yi, sa sarax yu sell, yaa ko moom. Ku ci nekk, li ñu la jox, yaay boroom.»

### *Lu jëm ci jigéen ju moy*

<sup>11</sup> Aji Sax ji waxati Musaa, <sup>12</sup> ne mu wax bànni Israyil, ne leen: «Képp ku jabaram moy, fecci ko worma, <sup>13</sup> bu ñu àndee ak ndaw si, te moom miy jëkkëram yégu ko; te ba ndaw say sobeel boppam, fekkeesu ko fa ba di ko seede; <sup>14</sup> ndegam xelum fiiraangee dikkal waa ji, ba mu fiire jabaram, te fekk jabar jaa sobeel boppam ci njaaloo, mbaa muy fiiraange gu dikkal waa ji rekk, mu fiire jabaram, te fekk ndaw si sobeelul boppam ci njaaloo; <sup>15</sup> na waa ji yóbbu jabaram ca sarxalkat ba, te yóbbaleel ko saraxu ñetti kiloy sungufu lors. Du ci sotti diw, du ci def cuuraay, ndax saraxu pepp boobu saraxu fiiraange la, saraxu toppukaay la bu ñuy toppe ñaawtéef.

<sup>16</sup> «Na sarxalkat bi indi ndaw si, taxawal ko fi kanam Aji Sax ji. <sup>17</sup> Su ko defee sarxalkat bi day fab ndabal xandeer, duy ko ndox mu sell mi ñuy setloo, te na sàkk ci suufas jaamookaay bi, def ko ci ndox mi. <sup>18</sup> Bu taxawloo ndaw si fi kanam Aji Sax ji, na muri boppu ndaw si, te teg ciy loxoom, saraxu pepp boobu di toppukaayu ñaawtéef te di saraxu fiiraange. Na fekk sarxalkat bi yore ciy loxoom ndoxum wextan, miy alage. <sup>19</sup> Su ko defee sarxalkat bi waatloo ndaw si, ne ko: “Ndegam góor àndul ak yaw, moyuloo, sobeel sa bopp te fekk la ci buum, muccal ci loraangey ndoxum wextan mii, di alage. <sup>20</sup> Waaye su dee

yaa moy te fekk la ci sa buumu jëkkër, su dee yaa sobeel sa bopp ak geneen góor gu ànd ak yaw te du sa jëkkër nag...” <sup>21</sup> Fii la sarxalkat biy waatloo ndaw si waatu alkànde gi, wax ko ne ko: “...yal na la Aji Sax ji def ku alku ku ñuy móoloo ci sa biir askan. Yal na laxal sa njurukaay, wal sab koll. <sup>22</sup> Yal na ndoxum alkànde mii tàbbi ci say butit, laxal sa njurukaay, wal sab koll.” Su ko defee ndaw si ne: “Amiin, Amiin.”

<sup>23</sup> «Na sarxalkat bi bind kàdduy alkànde yooyu cib taxañu bindukaay, te na raxas mbind mi ci ndoxum wextan mi. <sup>24</sup> Sarxalkat bi day naanloo ndaw si ndoxum wextan, miy alage, ndox miy alage tàbbi ci biiram, man koo wex xàtt. <sup>25</sup> Waaye na jëkka nangoo ci loxol ndaw si, peppum saraxu fiiraange bi, daldi yékkati saraxas pepp mi, jébbale ko fi kanam Aji Sax ji, doora indi sarax bi ci sarxalukaay bi. <sup>26</sup> Na sarxalkat bi sàkk ci saraxu pepp bi, ab n̄eb buy fàttlee, daldi koy lakk ci kaw sarxalukaay bi. Gannaaw loolu mu naanloo ndaw si ndox mi.

<sup>27</sup> «Bu ko xasee naanloo ndox mi, ndegam ndaw see sobeel boppam, wor jëkkëram, ndoxum alkànde mi day tàbbi ci biiram, jural ko wextan, koll bi newi, njurukaayam lax, mu mujj doon ku ñuy móoloo ci biir askanam. <sup>28</sup> Waaye su ndaw si sobeelul boppam, xanaa di ku set, dina mucc, te dina mana am doom.

<sup>29</sup> «Loolooy dogalu yoon ci mbirum fiiraange, bu jigéen moyee, sobeel boppam te fekk buum ci baatam, <sup>30</sup> mbaa jëkkër ju xelum fiiraange dikkal, mu fiire jabaram. Jabar ji lay taxawloo fi kanam Aji Sax ji, sarxalkat bi defal ko mboolem dogalu yoon boobu. <sup>31</sup> Deesul topp jëkkër ji genn tooñ, waaye jabar jeey gàddu ñaawtéefu boppam.»

## 6

### *Lii moo war ku séddoo Aji Sax ji*

<sup>1</sup> Aji Sax ji waxati Musaa, <sup>2</sup> ne ko mu wax bànni Israyil ne leen: «Góor ak jigéen, képp ku ci dogu ba xas xasu doon ab nasireen\*, ngir sédd boppam Aji Sax

\* 6:2 6.2 nasireen: Baat bii jotewul dara ak nasaraan, tur wi ñuy wooye waa sowub jant.

ji, <sup>3</sup> muy biiñ, di ñoll wu mu mana doon, na séddoo di ko moyu. Binegaru biiñ ak binegaru ñoll wu mu mana doon it, du ko naan. Mboolem luy ndoxum reseñ, du ko naan, te reseñ ju tooy ak ju wow it, du ko lekk. <sup>4</sup> Mboolem diiru fani céddoom, mboolem lu jóge ci doomu garabu reseñ, dale ci xoox ba ci der, du ci lekk lenn.

<sup>5</sup> «Kemu fani céddoo yi mu xas ne dina ko nasireenal, saatus watukaay du laal boppam ba keroog fani nasireenal, yi mu séddoo Aji Sax ji matee. Ku sell lay doon te day jañu. <sup>6</sup> Kemu fan yi muy nasireenal, séddoo Aji Sax ji, ab néew, bumu ko jege. <sup>7</sup> Baayam ak ndeyam, mbaa góor mbaa jigéen ju mu bokkal waajur sax, bu deeyee, du sobeel boppam ngir ñoom, ndax moo yenu ci kaw boppam, njañu nasireen gi mu séddoo Yàllaam. <sup>8</sup> Kemu fani céddoom, ku sell lay doon, ñeel Aji Sax ji.

<sup>9</sup> «Su nit jekkee dee ci wetam, ba sobeel njañu céddoom, keroog bés buy setlu ca lay watu, te keroog bés sub juróom ñaareel ba lay watu. <sup>10</sup> Bés ba ca topp, di juróom ñetteel ba, na yóbbu ca sarxalkat ba, ñaari pitax mbaa ñaari xati yu ndaw, ca bunt xaymab ndaje ma. <sup>11</sup> Sarxalkat bi day def menn mi saraxu póotum bàkkaar, mi ci des saraxu rendi-dóomal, mu jote ko boroom céddoo gi, bàkkaaram ba ko néew ba yóbbe. Bés sub keroog lay sellalaat boppam ba yenu woon njañam. <sup>12</sup> Day yeesalal Aji Sax ji nasireenam ga mu ko séddoo woon, kemu fan ya mu xasoon nasireenal. Su ko defee day indi xarum menn at, def ko saraxas peyug tooñ. Fan yi mu jèkkoon nasireenal day neen, ndax nasireen googa moo sobewu.

<sup>13</sup> «Dogalu yoon wi ci ab nasireen nag mooy lii: Bés bi ag céddoom matee, dees koy yóbbu ca bunt xaymab ndaje ma. <sup>14</sup> Sarax si muy sarxalsi Aji Sax ji di menn xarum menn at mu amul sikk, ngir rendi-dóomal, ak menn xarum menn at mu jigéen mu amul sikk, ngir póotum bàkkaar, ak menn kuuy mu amul sikk, ngir saraxas cant ci biir jàmm, <sup>15</sup> ak pañeb mburu yu amul lawiir, yu ñu lakke sunguf su mucce ayib su ñu xiiwaale ag diw, ak mburu yu sew yu amul lawiir yu

ñu wis ag diw, ak saraxi peppam ak saraxi tuuroom ya muy àndal.

<sup>16</sup> «Su ko defee sarxalkat bi boole ko indi fi kanam Aji Sax ji, daldi joxe póotum bàkkaar bi, ak rendi-dóomal bi. <sup>17</sup> Kuuy mi, na ko sarxalkat bi def saraxas cant ci biir jàmm, ñeel Aji Sax ji, boole kook pañeb mburu mi amul lawiir, doora joxe saraxi pepp yeek, saraxi tuuru yi. <sup>18</sup> Su ko defee nasireen bi watu ci bunt xaymab ndaje mi te for kawari céddoom googu, def ko ci taal, bi ci suufu saraxas cantu biir jàmm bi.

<sup>19</sup> «Na sarxalkat bi jël tànkú kanamu kuuy mi, gannaaw bu ñoree, te sàkk ci pañe bi menn mburu mu amul lawiir, ak menn mburu mu ndaw, daldi boole loola teg ci loxol nasireen bi, gannaaw bu watoo ba noppi.

<sup>20</sup> «Na sarxalkat bi jébbale loola, defal ko Aji Sax ji saraxu yékkati-jébbal. Cér yu sell a ngoogu ñeel sarxalkat bi, mu boole kook dènn biy saraxu yékkati-jébbal, ak jooxeb tànkub kanam bi. Gannaaw loolu nasireen bi sañ naa naan biiñ.

<sup>21</sup> «Loolooy wartéef ci ab nasireen bu xas. Loolooy saraxam bi mu warlook Aji Sax ji cig céddoom, te bokkewul ak leneen lu mu ci àttan; waaye kàdduy xas wa mu xasoon daal, na sàmmonteek moom ni ko yoon diglee ci céddoom googu.»

### *Gii ñaan moo war ci askan wi*

<sup>22</sup> Gannaaw loolu Aji Sax ji waxati Musaa, ne: <sup>23</sup> «Waxal Aaróona aki doomam ne leen ni ñuy ñaanale bànni Israyil, nii la; nañu leen wax ne leen:

<sup>24</sup> «“Yal na la Aji Sax ji barkeel, sàmm la.

<sup>25</sup> «“Yal na la Aji Sax ji geesoo leeram, baaxe la.

<sup>26</sup> «“Yal na la Aji Sax ji siggil, jàmmal la.”

<sup>27</sup> Bu ñu tuddalee noonu bànni Israyil sama tur, man, maa leen di barkeel.»

## 7

### *Daloob jaamookaay bi laaj nay sarax*

<sup>1</sup> Keroog ba Musaa sampee jaamookaay bi ba noppi, diw na ko ngir sellal ko, mook mboolem ay jumtukaayam, sarxalukaay beek mboolem ndabam it, mu boole diw,

sellale ko. <sup>2</sup> Ba loolu amee kilifay Israyil yi jiite seeni kër maam dikk. Ñooño doon njiiti giir yi te ñoo doon saytu limeefu nit ñi. <sup>3</sup> Ñu indil Aji Sax ji seen sarax, muy juróom benni watiir ak fukki nag ak ñaar; ñaari kilifa yu nekk, benn watiir; kilifa gu nekk, wenn nag, ñu yóbbu lépp fa kanam jaamookaay ba. <sup>4</sup> Aji Sax ji wax Musaa, <sup>5</sup> ne ko: «Nangul lii, mu jëm ci liggéeyu xaymab ndaje mi, te nga jox ko Leween ñi, ku ci nekk ak li liggéeyam laaj.»

<sup>6</sup> Musaa nangu watiir yaak nag ya, jox Leween ñi. <sup>7</sup> Yii ñaari watiir ak ñeenti nag, mu jox Gersoneen ña, na ko seen liggéey laaje, <sup>8</sup> yee ñeent, mu booleek juróom ñetti nag, jox Merareen ña, na ko seen liggéey laaje, ci njiital sarxalkat ba Itamar doomu Aaróona. <sup>9</sup> Keyateen ña nag, joxu leen, ndax yu sell ya lañu sasoo woona gàddu.

<sup>10</sup> Ci biir loolu kilifa yi indi itam saraxu daloob sarxalukaay bi, keroog bés ba ñu koy diw. Ñu daldi joxe seeni sarax fi kanam sarxalukaay bi. <sup>11</sup> Teewul Aji Sax ji wax Musaa, ne ko: «Kilifa yiy joxesi seen sarax, yi jëm ci daloob sarxalukaay bi, nañu ko def bés bu nekk, kenn.»

<sup>12</sup> Ki joxe saraxam ci bés bu jëkk bi, ñeel giirug Yuda, mooy Nason doomu Aminadab. <sup>13</sup> Ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp bi, <sup>14</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>15</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>16</sup> ak wenn sikket ngir saraxu póotum bàkkaar, <sup>17</sup> ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Nason doomu Aminadab.

<sup>18</sup> Bés sub ñaareel ba, kilifag Isakareen ña, Netanel doomu Suwar moo indi saraxam, <sup>19</sup> sarax ba mu indi di benn ndabu xalis bu diise téeméeri siikal

ak fanweer, di kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>20</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>21</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>22</sup> ak wenn sikket ngir saraxu póotum bàkkaar, <sup>23</sup> ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Netanel doomu Suwar.

<sup>24</sup> Bés sub ñetteel ba, kilifag Sabuloneen ña, Elyab doomu Elon moo aye, <sup>25</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, di juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>26</sup> ak senn mbàttus wurus su fees ak cuuraay te diise fukki siikal, muy téeméeri garaam ak fukk, <sup>27</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>28</sup> ak wenn sikket ngir saraxu póotum bàkkaar, <sup>29</sup> ak saraxas cant ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Elyab doomu Elon.

<sup>30</sup> Bés sub ñeenteel ba kilifag Rubeneen ña, Elisur doomu Sedeyur moo aye, <sup>31</sup> ab saraxam di benn ndabu xalis bu diise téeméeri siikal ak fanweer, di kilook liibar, ak benn këllu xalis bu diise juróom ñaar fukki siikali bérab bu sell bi, di juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>32</sup> ak senn mbàttus wurus su fees ak cuuraay te diise fukki siikal, muy téeméeri garaam ak fukk, <sup>33</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>34</sup> ak wenn sikket ngir saraxu póotum bàkkaar, <sup>35</sup> ak saraxas cant gi ci biir jàmm, di ñaari

yëkk ak juróomi kuuy ak juróomi sikket, ak juróomi xari menn at. Looloo doon saraxu Elisur doomu Sedeyur.

<sup>36</sup> Bésuub juróomeel ba kilifag Cimy-oneen ña, Selumyel doomu Surisadaay moo aye, <sup>37</sup> ab saraxam di benn ndabu xalis bu diise téeméeri siikal ak fanweer, di kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>38</sup> ak senn mbàttus wurus su fees ak cuuraay te diise fukki siikal, muy téeméeri garaam ak fukk, <sup>39</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>40</sup> ak wenn sikket ngir saraxu póotum bàkkaar, <sup>41</sup> ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Selumyel doomu Surisadaay.

<sup>42</sup> Bésuub juróom benneel ba kilifag Gàddeen ña, Elyasaf doomu Dewel moo aye, <sup>43</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>44</sup> ak senn mbàttus wurus su fees ak cuuraay te diise fukki siikal, muy téeméeri garaam ak fukk, <sup>45</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>46</sup> ak wenn sikket ngir saraxu póotum bàkkaar, <sup>47</sup> ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Elyasaf doomu Dewel.

<sup>48</sup> Bésuub juróom ñaareel ba kilifag Efraymeen ña, Elisama doomu Amiyut moo aye, <sup>49</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir

saraxu pepp, <sup>50</sup> ak senn mbàttus wurus su fees ak cuuraay te diise fukki siikal, muy téeméeri garaam ak fukk, <sup>51</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>52</sup> ak wenn sikket ngir saraxu póotum bàkkaar, <sup>53</sup> ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Elisama doomu Amiyut.

<sup>54</sup> Bésuub juróom ñetteel ba kilifag Manaseen ña, Gamalyel doomu Pedasur moo aye, <sup>55</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>56</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>57</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>58</sup> ak wenn sikket ngir saraxu póotum bàkkaar, <sup>59</sup> ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Gamalyel doomu Pedasur.

<sup>60</sup> Bésuub juróom ñeenteel ba kilifag Beñamineen ña, Abidan doomu Gidoni moo aye, <sup>61</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, <sup>62</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>63</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>64</sup> ak wenn sikket ngir saraxu póotum bàkkaar, <sup>65</sup> ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Abidan doomu Gidoni.

<sup>66</sup> Bésuub fukkeel ba kilifag Daneen ña, Ayeser doomu Amisadaay moo aye, <sup>67</sup> ab

saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucce ayib su ñu xiiwaale ag diw, ngir saraxu pepp, <sup>68</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>69</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>70</sup> ak wenn sikket ngir saraxu póotum bàkkaar, <sup>71</sup> ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Ayeser doomu Amisadaay.

<sup>72</sup> Bésuub fukkeel baak benn, kilifag Asereen ña, Pagyel doomu Okkran moo aye, <sup>73</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucce ayib su ñu xiiwaale ag diw, ngir saraxu pepp, <sup>74</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>75</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>76</sup> ak wenn sikket ngir saraxu póotum bàkkaar, <sup>77</sup> ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Pagyel doomu Okkran.

<sup>78</sup> Bésuub fukkeel baak ñaar kilifag Nef-taleen ña, Ayra doomu Enan moo aye, <sup>79</sup> ab saraxam di benn ndabu xalis bu diise téeméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucce ayib su ñu xiiwaale ag diw, ngir saraxu pepp, <sup>80</sup> ak senn mbàttus wurus su fees ak cuuraay te diise fukki siikal, di téeméeri garaam ak fukk, <sup>81</sup> ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, <sup>82</sup> ak wenn sikket ngir saraxu póotum bàkkaar,

<sup>83</sup> ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Ayra doomu Enan.

<sup>84</sup> Loolooy saraxi daloob sarxalukaay ba, ca bés ba ñu koy diw, sellal ko, lépp bawoo ca kilifag Israyil. Ndabi xalis ya fukk laak ñaar, këlli xalis ya di fukk ak ñaar, bàttuy wurus ya di fukk ak ñaar, <sup>85</sup> ndabal xalis lu nekk di téeméeri siikal ak fanweer, di kilook liibar, këll bu nekk di juróom ñaar fukki siikal, di juróom ñetti téeméeri garaam, mboolem xalisu jumtukaay yi di ñaari junniy siikali bérab bu sell bi ak ñeenti téeméer (2 400), di ñaar fukki kilook juróom ñaar ak juróomi téeméeri garaam (27 500).

<sup>86</sup> Fukki bàttuy wurus yi feese cuuraay, mbàttu su ci nekk fukki siikali bérab bu sell bi la, di téeméeri garaam ak fukk (110), mboolem wurusu bàttu yi di téeméeri siikal ak ñaar fukk (120), muy kilo ak ñetti téeméeri garaam (1 300).

<sup>87</sup> Mboolem nagi saraxu rendi-dóomal yi, fukki yëkk yu ndaw ak ñaar la, kuuy yi di fukk ak ñaar, xari menn at yi di fukk ak ñaar, ànd ak seen saraxi pepp, sikketi saraxu póotum bàkkaar bi di fukk ak ñaar. <sup>88</sup> Mboolem nagi saraxu cantu biir jàmm yi, ñaar fukki yëkk yu ndaw ak ñeent la, kuuy yi di juróom benn fukk, sikket yi di juróom benn fukk, xari menn at yi di juróom benn fukk. Loolooy saraxi daloob sarxalukaay ba, gannaaw ba ñu ko diwee, sellal ko.

<sup>89</sup> Bu Musaa duggaan ca biir xaymab ndaje ma, ngir wax ak Aji Sax ji, day dégg baat ba di wax ak moom, bawoo fa tiim kubeeru gaalu seedes kóllère ga, ca diggante ñaari serub ya. Noonu la daan waxeek moom.

## 8

### *Lu jëm ci teginu làmp ya*

<sup>1</sup> Aji Sax ji waxati Musaa ne ko, <sup>2</sup> mu wax Aaróona, ne ko: «Buy teg làmp yi, fa féete tegukaayu làmp ba kanam, fa la juróom ñaari làmp ya wara ni-ite.» <sup>3</sup> Noonu la Aaróona def. Fa féete tegukaay ba kanam, fa la féetale ay làmpam, muy la Aji Sax ji santoon

Musaa. <sup>4</sup> Tegukaayu làmp bi nag, ni ñu ko liggéeye nii la. Wurus lañu ko tégge ba mu jekk, dale ko ci tànk bi, ba ci mbar mi. Noonee ko Aji Sax ji wone woon Musaa, na lañu liggéeye tegukaayu làmp ba.

### *Lu jëm ci cetlug Leween ñi*

<sup>5</sup> Aji Sax ji waxati Musaa ne ko, <sup>6</sup> «Nanga jële Leween ñi ci biir bànni Israyil te nga setluloo leen. <sup>7</sup> Ni ngay def ngir setluloo leen nii la: Danga leen di wis ndoxum setlu, ba noppi ñu wat seen yaram wépp, fóot seeni yére, daldi set. <sup>8</sup> Su ko defee ñu jël aw yëkk wu ndaw, booleek saraxu peppam, di sunguf su mucc ayib su ñu xiiwaale ag diw, ak weneen yëkk wu ndaw wooy jël ngir saraxu póotum bàkkaar. <sup>9</sup> Indil Leween ñi ci kanam xaymab ndaje mi, te nga dajale mbooloom bànni Israyil mépp. <sup>10</sup> Boo indee Leween ñi fi kanam Aji Sax ji, bànni Israyil daldi teg seeni loxo ci kaw Leween ñi. <sup>11</sup> Su ko defee Aaróona taxawal Leween ñi taxawaayu saraxu yékkati-jébbal fi kanam Aji Sax ji, muy sarax bu bawoo ci bànni Israyil, Leween ñi daldi sasoo di liggéey liggéeyu Aji Sax ji. <sup>12</sup> Leween ñi ñoom, nañu teg seeni loxo ci kaw boppi yëkk yi, ñu def wenn wi saraxu póotum bàkkaar, te def wi ci des ab rendi-dóomal, ñeel Aji Sax ji, ngir njotlaayal Leween ñi. <sup>13</sup> Gannaaw loolu ngay taxawal Leween ñi fi kanam Aaróona ak doomam yu góor, daldi leen def saraxu yékkati-jébbal, ñeel Aji Sax ji. <sup>14</sup> Noonu ngay seppee Leween ñi ci biir bànni Israyil, Leween ñi doon sama cér. <sup>15</sup> Gannaaw loolu la Leween ñiy doora dugg ci liggéeyu xaymab ndaje mi. Danga leen di jékka setluloo, ba noppi def leen saraxu yékkati-jébbal. <sup>16</sup> Ñoom déy lañu ma sédda sédd ci biir bànni Israyil, ñu wuutu mboolem luy ubbiteg njur, di taawi mboolem bànni Israyil. Maa leen sédd sama bopp. <sup>17</sup> Ndax man maa séddoo mboolem taaw ci biir bànni Israyil, nit ak mala. Keroog ba ma fáddee mboolem taaw ca réewum Misra, ca laa leen sellalal sama bopp.

<sup>18</sup> «Maa jël Leween ñi, weccikoo leen bépp taaw ci biir bànni Israyil, <sup>19</sup> te itam

maa jukkee Leween ñi ci bànni Israyil, maa leen yékkati, jox leen Aaróona aki doomam, ngir ñu liggéey liggéeyu bànni Israyil ci wàllu xaymab ndaje mi, di defal bànni Israyil seenug njotlaay, ngir bu bànni Israyil jegee bérab bu sell bi it, du tax menn mbas am ci seen biir.»

<sup>20</sup> Ba loolu amee Musaa ak Aaróona ak mbooloom bànni Israyil mépp daldi defal Leween ñi noonu. Mboolem lu Aji Sax ji santoon Musaa ci Leween ñi, noona la ko bànni Israyil defe ak ñoom. <sup>21</sup> Leween ñi setlu, fóot seeni yére, Aaróona def leen ni saraxu yékkati-jébbal, ñeel Aji Sax ji. Mu defal leen nag seen njotlaay ngir setal leen. <sup>22</sup> Gannaaw loolu Leween ñi doora liggéeyi seen liggéey ci wàllu xaymab ndaje mi, ci kilifteefu Aaróona aki doomam. Noonee ko Aji Sax ji sante woon Musaa ci Leween ñi, na lañu def ak ñoom.

<sup>23</sup> Aji Sax ji waxati Musaa, ne: <sup>24</sup> «Lii nag moo war ci Leween ñi: ku ci am ñaar fukki at ak juróom, jëm kaw, yelloo naa bokk ci kurél, gi liggéeyu xaymab ndaje mi war. <sup>25</sup> Waaye ku xasa am juróom fukki at, na gén kurél gi boobu liggéey war, te bumu ca liggéeyati. <sup>26</sup> Sañ naa japple bokki Leweenam ñi dénkaa dénkaneey xaymab ndaje mi, waaye dootu ci liggéey lenn. Noonu ngay def ak Leween ñi, ci seen wàlli dénkaane.»

## 9

### *Lu jëm ci màggalu bésub Mucc*

<sup>1</sup> Aji Sax ji wax na Musaa ca màndiŋu Sinayi, ca seen atum ñaareel, gannaaw ba ñu génnee réewum Misra ca weer wa jëkk. Mu ne ko: <sup>2</sup> «Na bànni Israyil di màggal bésub Mucc ba, saa yu jotee.

<sup>3</sup> «Fukki fan ak ñeent ci weer wii, diggante ngoon ak jant bu so, ci ngeen koy màggal, saa yu jotee. Na mu dëppook mboolem dogali yoonam ak àttey yoonam, nangeen ko màggale noonu.»

<sup>4</sup> Musaa nag sant bànni Israyil ne leen ñu màggal bésub Mucc bi. <sup>5</sup> Ñu daldi màggal bésub Mucc bi ci weer wi jëkk, fukki fanam ak ñeent, diggante ngoon ak jant bu so, ca màndiŋu Sinayi. Noonee



ko Aji Sax ji sante woon Musaa, na la ko bànni Israyil defe.

<sup>6</sup> Ci biir loolu mu am ay nit ñu ab néew tax ñu sobewu, ba manuñoò màggal bésuub Mucc bi bésuub keroog. Ñu dikk ba ci Musaa ak Aaróona ca bés ba. <sup>7</sup> Ñooñu nag ne Musaa: «Nun de, danoo sobewu ndax ab néew, waaye lu nu teree joxesi saraxu Aji Sax ji ci waxtoom, ci digg bànni Israyil?» <sup>8</sup> Musaa ne leen: «Taxawleen, ba ma dégg lu Aji Sax ji di santaane ci seen mbir.»

<sup>9</sup> Aji Sax ji ne Musaa: <sup>10</sup> «Waxal bànni Israyil ne leen, képp ku bokk ci yeen tey, mbaa mu bokk ci seen kuutaay èllég, su sobewoo ndax ab néew, mbaa mu nekk ci yoon wu sore, du tere mu màggal bésuub Mucc bi ngir Aji Sax ji. <sup>11</sup> Waaye ñaareelu weer wa, ca fukki fanam ak ñeent, diggante ngoon ak jant bu so, ca la koy màggal. Mburu mu amul lawiir ak xob yu wex lay booleek gattu sarax bi, lekk ko. <sup>12</sup> Bumu ci wacc dara mu fanaan, te benn yax, bumu ko ci damm. Na mu dèppook mboolem dogali yooni bésuub Mucc, na ko màggale noonu. <sup>13</sup> Ku set nag te nekkul ciw yoon, su ñakkee màggal bésuub Mucc bi, kooku dees koy dagge ciw askanam, ndax saraxu Aji Sax ji mu joxewul ci bésam. Kooku moo gaddu bàkkaaruu boppam.»

<sup>14</sup> «Su dee ab doxandéem bu ngeen dëkkal, sañ naa màggal bésuub Mucc bi ñeel Aji Sax ji. Na mu dèppook mboolem dogali yooni bésuub Mucc, ak àttey yoonam, ni la koy màggale; benn dogal bi lay doon ci yeen, muy doxandéem bi, di njuddu-ji-réew.»

### *Aji Sax ji yiir na xaymab ndaje ma*

<sup>15</sup> Keroog bés ba ñu sampee màkkaan ma, niir wa daa muur màkkaanu xaymab seede sa. Ca ngoon sa lu mel ni sawara tiim màkkaan ma, ba ca èllég sa. <sup>16</sup> Noonu la ko niir wa jàppoo muure, bu guddee mu mel ni sawara. <sup>17</sup> Fu niir wa masa bàyyikoo fa tiim xayma ba, bànni Israyil day fabu topp ko, te fépp fu niir wa masa dale, fa la bànni Israyil di fàkk ab dal. <sup>18</sup> Ci kàddug Aji Sax ji la bànni Israyil daan faboo, ci kàddug Aji Sax ji lañu daan

dale, te mboolem fan ya niir way dal, tiim màkkaan ma, ñoom it dañuy dal. <sup>19</sup> Su niir wa yàggee ca kaw màkkaan ma it, ak lu fan ya bare bare, bànni Israyil a ngay dénkoo dénkaneey Aji Sax ji, waaye duñu dem. <sup>20</sup> Leeg-leegaa fan yu néew la niir way dal-lu fa tiim màkkaan ma. Waaye ci kàddug Aji Sax ji daal, lañuy dale te ci kàddug Aji Sax ji lañuy faboo. <sup>21</sup> Leeg-leegaa it niir wa dal-lu ag ngoon, fanaan, ba bët set, mu sàqi, ñu fabu ànd ak moom. Muy guddi, di bëccég, bu niir wa jógaa, rekk, ñu fabu. <sup>22</sup> Su doon ñaari fan, su doon weer, mbaa ay fani fan la niir wa taxaw tiim màkkaan ma, des fa it, bànni Israyil dañuy dal, waaye duñu dem. Bu jógee rekk lañuy fabu. <sup>23</sup> Ci kàddug Aji Sax ji lañu daa dale, ci kàddug Aji Sax ji lañu daa faboo. Dénkaneey Aji Sax ji daal lañuy dénkoo, ci kàddug Aji Sax, ji Musaa di jottli.

## 10

### *Lu jëm ci liiti xaalis ya*

<sup>1</sup> Aji Sax ji waxati Musaa, ne: <sup>2</sup> «Sàkkulul ñaari liiti xaalis. Lu ñu tégglu ba mu jekk nga koy def. Liit yi ngay wootee am ndaje, di ko yékkatee dal yi. <sup>3</sup> Bu ñu liitee ñaar yépp, mbooloo mépp ay dajesi fi yaw, ci bunt xaymab ndaje mi. <sup>4</sup> Bu ñu liitee benn nag kilifa yi jiite gàngoori Israyil ñooy dajesi fi yaw. <sup>5</sup> Su ñu liitee menn riirum liit mu xumb, dal yi dale penku ñooy fabu. <sup>6</sup> Su ñu liitee riirum liit mu xumb, ñaareel bi yoon, dal yi dale bëj-saalum ñooy fabu. Riirum liit mu xumb mooy tegtale seeni fabu. <sup>7</sup> Bu dee wooteb ndaje nag, dees koy liit waaye du doon riir mu xumb. <sup>8</sup> Na doomi Aaróona sarxalkat yi di wal liit yi, te mu doon dogal bu leen saxal dàkk, ci seen maasoo maas.»

<sup>9</sup> «Bu loolu wéyee, bu ngeen dee xare ci seenum réew, ak noon bu leen songsi, nangeen riiral liit yi riir mu xumb, su boobaa dees na leen bàyyi xel fa seen kanam Yàlla Aji Sax ji, ba wallu leen ak seeni noon. <sup>10</sup> Seen bési mbég itam, muy seen bési màggal, di seen ndoortel weer, nangeen ciy riiral liit yi riir mu xumb, yéenee ko seen saraxi rendi-dóomal, ak

seen saraxi cant ci biir jàmm. Riirum liit yooyu mooy doon seen baaxantal fa seen kanam Yàlla. Maay seen Yàlla, Aji Sax ji.»

### *Bànni Israyil sàqee nañu tundu Sinayi*

<sup>11</sup> Ca ñaareelu at ma, gannaaw ba bànni Israyil génnee Misra, ca ñaareelu weer wa, keroog ñaar fukkeelu fanam, ca la niir wa bàyyikoo fa tiim màkkaanu seedes kóllère ga. <sup>12</sup> Bànni Israyil daldi sumb seen yooni tukki ya, bàyyikoo màndiŋu Sinayi. Ci kaw loolu niir wa daleji ca màndiŋu Paran.

<sup>13</sup> Booba lañu jèkka fabu ci kàddug Aji Sax ji, Musaa jottli. <sup>14</sup> Raayab dalu Yudeen ña moo jèkka jóg, ànd aki gàngooram, njiital gàngooru Yuda di Nason doomu Aminadab, <sup>15</sup> njiital gàngooru Isakareen ña di Netanel doomu Suwar, <sup>16</sup> njiital gàngooru Sabuloneen ña di Elyab doomu Elon.

<sup>17</sup> Ci biir loolu ñu wékki jaamookaay ba, Gersoneen ñaak Merareen ñay gàddu jaamookaay ba daldi dem.

<sup>18</sup> Raayab dalu Rubeneen ña jóg ànd aki gàngooram, topp ca, njiital gàngooru Rubeneen ña di Elisur doomu Sedeyur, <sup>19</sup> njiital gàngooru Cimyoneen ña di Selumyel doomu Surisadaay, <sup>20</sup> njiital gàngooru Gáddeen ña di Elyasaf doomu Dewel.

<sup>21</sup> Gannaaw loolu Keyateen ñay gàddu yéf yu sell ya, ñoo fabu, topp ca. Bala ñoo àgg fa ñuy dalewaat nag, day fekk jaamookaay ba sampewaata.

<sup>22</sup> Ci kaw loolu raayab dalu Efraymeen ña jóg, ànd ak seeni gàngoor, topp ca, njiital gàngooru Efraymeen ña di Elisama doomu Amiyut, <sup>23</sup> njiital gàngooru Manaseen ña di Gamalyel doomu Peadasur, <sup>24</sup> njiital gàngooru Beñamineen ña di Abidan doomu Gidoni.

<sup>25</sup> Ba mu ko defee raayab dalu Daneen ña doora jóg, topp ca gannaaw kurél yépp, ànd aki gàngooram, njiital gàngooru Daneen ña di Ayeser doomu Amisadaay, <sup>26</sup> njiital gàngooru Asereen ña di Pagyel doomu Okkran, <sup>27</sup> njiital gàngooru Neftaleen ña di Ayra doomu Enan.

<sup>28</sup> Noonu la bànni Israyil topplantee, ànd ak seeni gàngoor, tegu ca yoon wa.

### *Bànni Israyil jóge nañu Sinayi*

<sup>29</sup> Ba loolu amee Musaa wax ak Obab doomu Ruwel waa Majan ba, baayu soxnaam, ne ko: «Nu ngi nii jëm fa nu Aji Sax ji wax ne moom lanuy jox. Kaay nu ànd, dem, nu baaxe la, ndax Aji Sax ji moo digee baaxe Israyil.»

<sup>30</sup> Mu ne ko: «Déedéet, duma dem, samam réew kay laa jëm, ca saay bokk.»

<sup>31</sup> Mu ne ko: «Bu nu wacc kay, ndax gannaaw yaa xam fu nu wara dal ci màndiŋ mi, yaa nu wara jiite. <sup>32</sup> Soo àndeek nun déy, xéewal googa nu Aji Sax jiy baaxeji, dinanu la ci baaxe.»

<sup>33</sup> Ci kaw loolu ñu bàyyikoo ca tundu Aji Sax ja, doxe fa doxub ñetti fan. Gaalu kóllèrey Aji Sax jaa nga leen jiitu diiru ñetti fan ña, di leen wutal dal-lukaay. <sup>34</sup> Niiru Aji Sax ji nag di leen yiir bëccëg bu nekk, saa yu ñu bàyyikoo ab dal.

<sup>35</sup> Bu gaal ga jógaan, Musaa da naan: «Jógaloo, Aji Sax ji, say noon fëlfoo, say bañ daw la.»

<sup>36</sup> Bu gaal ga dalee, Musaa ne: «Dikkaloo Aji Sax ji boroom ndiiraani junniy Israyil.»

## 11

### *Bànni Israyil ñaxtu nañu*

<sup>1</sup> Mbooloo ma nag mujj di tawat ab coono fi kanam Aji Sax ji. Aji Sax ji dégg ci, am sànjam tàkk, sawaras Aji Sax ji tàkkal leen, ba xoyom la wër dal ba. <sup>2</sup> Mbooloo ma jooy ko Musaa, Musaa tinu Aji Sax ji, sawara wa fey. <sup>3</sup> Ñu tudde bérab boobu Tabera (mu neexook Tàkkaan), ndax sawaras Aji Sax ji leen fa tàkkal.

<sup>4</sup> Ci biir loolu genn gàngooru njaxasaan mu nekkoon ca seen biir jiital seen bakkan, di ñaf-ñafi, ba tax bànni Israyil itam dellu di jàmbat. Ña nga naan: «Éy ku nuy lelatiw yàpp! <sup>5</sup> Namm nan jën ya nu daa ndawaloo ca Misra, te dikkewu nu tus! Ak yomb jaak xaal jaak pooro baak soble saak laaj ja! <sup>6</sup> Tey jii sunu put

\* 11:6 11.6 Seetal ci *Mucc ga* 16.12-21.

yaa ngi wow koŋŋ, gisunu lenn lu moy mànn\*!»

<sup>7</sup> Mànn ma nag daa meloon ni pepp mi ñuy wax koryanda, te nirook ndàbbu garab gi ñuy wax bedola. <sup>8</sup> Mbooloo ma da daan wër, di ko for, di ko wole doji wolukaay, mbaa ñu di ko dëbb ciy gënn, ba noppi baxal ko ci cin, def ko ay mburu yu cafrikaam mel ni cafkay nàkk yu am niw. <sup>9</sup> Bu layaa ca dal ba ag guddi, mànn ma day wàccaale ak moom.

<sup>10</sup> Ci biir loolu Musaa dégg mbooloo miy ñaxtu, làng ak làng, ku nekk ci sa bunt xayma. Ba loolu amee sànjum Aji Sax ji tàkk jippét, Musaa nag ñaawlu ko.

<sup>11</sup> Ba mu ko defee Musaa ne Aji Sax ji: «Aji Sax ji, loo may mititale, Sang bi? Lu tee nga baaxe ma, xanaa ngay teg sëfub mii mbooloo mépp ci sama kaw?

<sup>12</sup> Xanaa maa ëmb mii mbooloo mépp, am maa leen jur, ba nga di ma leen bootloo fàpp, ni jaboot di boote luy nàmp, jëme leen réew, ma nga giñaloon seeni maam?

<sup>13</sup> Ana fu may jële yàpp wu ma jox mii mbooloo mépp, ba ñuy jooy nii ci sama kaw, naa ma: “Jox nu yàpp wu nu lekk.”?

<sup>14</sup> Manumaa boot mii mbooloo mépp, man doŋŋ, ndax àttanuma ko. <sup>15</sup> Su dee nii ngay def ak man nag, dimbali ma rekk, rey ma ba ma dee, ndax ma baña gis sama toskare.»

#### *Aji Sax ji dig na Musaa ñu ko jàpple*

<sup>16</sup> Ba mu ko defee Aji Sax ji dafa wax Musaa, ne ko: «Dajaleel ma juróom ñaar fukki magi Israyil, ñoo xamal sa bopp ne ñooy magi mbooloo mi, di seeni njiit, nga indi leen ci xaymab ndaje mi, ñu teew faak yaw. <sup>17</sup> Maay wàcc wax ak yaw foofa te maay sàkk ci leer gi ci yaw, def ko ci ñoom, ñu yenule la yenu mbooloo mi, ba dootuloo ko yenu yaw doŋŋ.

<sup>18</sup> «Mbooloo mi nag, ne leen ñu sell-lu ngir ëllëg, te ne leen dinañu yàpp moos, gannaaw ñooy jooy ci kaw Aji Sax ji, naan “Éy ku nuy lelatiw yàpp, nooka neexle woon ca Misra!” Kon nag Aji Sax jee leen di jox yàpp wu ñu lekk. <sup>19</sup> Du benn fan lañuy yàpp, du ñaar, du juróomi fan, du fukk, te du ñaar fukki fan. <sup>20</sup> Weeru lëmm kay lañuy yàpp, ba yàpp wiy génne

ci seen paxi bakkan, ba mujj génnliku leen, gannaaw ñoo xarab Aji Sax ji ci seen biir, di jooy ci kawam, naan: “Moo lu nu taxoona jóge Misra!”»

<sup>21</sup> Ci kaw loolu Musaa ne: «Áa! Juróom benni téeméeri junniy (600 000) góor a ngi ci mbooloo mii ma ne ci seen biir. Yaw nga ne aw yàpp nga leen di jox, ñu yàpp weeru lëmm! <sup>22</sup> Diggante jur gu gudd ak gu gàtt, manees na leen cee rendil lu leen doy a? Am mboollem jëni géej lees leen di dajaleel, mu doy leen?»

<sup>23</sup> Aji Sax ji ne Musaa: «Loxol Aji Sax ji da koo jotewul? Léegi nag dinga gis ndax sama kàddu dina la sottil, am déet!»

#### *Yàlla sol na mag ña ag leeram*

<sup>24</sup> Ci kaw loolu Musaa génn, jottli mbooloo ma kàdduy Aji Sax ji, daldi dajale juróom ñaar fukki góor ñu bokk ca magi mbooloo ma, taxawal leen, ñu wër xayma ba. <sup>25</sup> Aji Sax ji nag wàcc ca biir niir wa, wax ak moom, daldi sàkk ca leer ga ca Musaa, sédd ca juróom ñaar fukki mag ña. Naka la leer ga dal ca seen kaw, ñu tàmbali di wax ay waxyu, benn yoon bu ñu tóllantiwul.

<sup>26</sup> Fekk na ñaari góor a nga desoon ca dal ba, kenn ka di Eldàdd, ka ca des di Medàdd, te teewul leer ga dal ca seen kaw, ndax dees leena limaale woon ca mag ña, doonte demuñu ca xayma ba. Ñoom it ñuy wax ay waxyu ca dal ba.

<sup>27</sup> Ab xale dawé ca, àgge ko Musaa, ne ko: «Eldàdd ak Medàdd déy a ngay wax ay waxyu ca dal ba!» <sup>28</sup> Yosuwe doomu Nuun, ja dale doon bëkk-néegu Musaa cag ndawam, daldi cay àddu, ne: «Sang Musaa, aaye leen!» <sup>29</sup> Musaa ne ko: «Fiiraangee la jàpp ndax man, am? Éy bu niti mbooloom Aji Sax ji mépp doon ay yonent, Aji Sax ji sol leen ag leeram!»

<sup>30</sup> Ba loolu amee Musaa dellu ca dal ba, moom ak magi Israyil ña.

#### *Mbas wàcc na ca Kibbrot Taawa*

<sup>31</sup> Ba loolu amee ngelaw wale ci Aji Sax ji, daldi bàbbee ca géej ga ay picci pèrèntaan, wàcce leen ca dal ba lu tollook doxub benn fan ci gii wet, ak doxub benn fan ca gee, ñu dajal dal ba bépp, jale ci suuf ba xawa mat ñaari xasab.

<sup>32</sup> Ci kaw loolu mbooloo ma taxaw di for, bëccëgub keroog bépp, ak guddi ga gépp, ak bëccëgub ëllëg sa sépp, ba ka gëna néewle, for lu mat fukki barigo. Ñu weer përentaan ya fa wër dal ba. <sup>33</sup> Suux waa nga ca seeni gëñ, sàqameeguñu sax, sànjum Aji Sax ji tàkkal mbooloo ma. Aji Sax ji dumaa mbooloo ma mbas mu metti lool. <sup>34</sup> Moo tax ñu tudde bérab booba Kibbrot Taawa (mu firi Bàmmeeeli ñaf-ñaf), ndax fa lañu denc néewi mbooloo ma doon ñaf-ñafi. <sup>35</sup> Kibbrot Taawa la mbooloo ma bàyyikoo, jëm Aserot. Ñu dal nag ca Aserot.

## 12

### *Maryaama ak Aaróona jote nañook Musaa*

<sup>1</sup> Maryaama ak Aaróona ñoo doon ñańń Musaa, ci ndawas Kuuseen su mu takkoon, te ab Kuuseen it la takkoon.

<sup>2</sup> Ñu ne: «Ndax mennum Musaa donj la Aji Sax jiy waxe ci moom? Xanaa daa waxewul ci nun itam?» Aji Sax ji dégg ca. <sup>3</sup> Góor ga Musaa nag defoon ku woyof lool, ba raw mboolem doom aadama ci kaw suuf. <sup>4</sup> Ci kaw loolu Aji Sax ji jekki wax ak Musaa ak Aaróona ak Maryaama, ne leen: «Dikkleen, yeen ñett, ci xaymab ndaje mi!» Ñu dem, ñoom ñett. <sup>5</sup> Aji Sax ji wàcc ci biir niir wu def aw taxaar. Mu taxaw ca bunt xayma ba, daldi woo Aaróona ak Maryaama, ñu bokk dikk. <sup>6</sup> Mu ne leen: «Dégluleen bu baax samay kàddu: su ngeen feeñlee ab yonentu Aji Sax ji, ci am peeñu laa koy xamale maay kan, te ci gént laay waxeek moom, <sup>7</sup> waaye du Musaa sama jaam bii. Moom mooy ki wóor ci mboolem sama kër gii. <sup>8</sup> Gémmiñ ak gémmiñ laay waxeek moom wax ju leer nańń ju ñu léebul, te jëmmu Aji Sax ji lay gis. Kon lu leen may fitu ñańń Musaa sama jaam bi?» <sup>9</sup> Sànjum Aji Sax ji nag tàkkal leen. Ci kaw loolu mu dem.

<sup>10</sup> Naka la niir wa jóge ca xayma ba, Maryaama jekki ne fureet ak jàngoroy ngaana, weex furr! Aaróona ne Maryaama gees, yem ca ngaana ga. <sup>11</sup> Aaróona ne Musaa: «Ngalla sang

bi, bu nu topp bàkkaar bi nu bàkkaar ndax ñàkk xel! <sup>12</sup> Ngalla bul seetaan kii mel ni ku dee te indaalewul bakkan ba mu juddoo ca ndeyam, xaaju yaram wi lekku!» <sup>13</sup> Musaa nag jooy Aji Sax ji, ne ko: «Yàlla, ngalla wéral ko!»

<sup>14</sup> Aji Sax ji ne Musaa: «Xanaa baayam sax su ko jéppi woon, ba tifi ko ci kanam, muy gâceem diiru juróom ñaari fan? Nañu ko génne dal bi diiru juróom ñaari fan, door koo délloosi ci biir.» <sup>15</sup> Ba loolu amee ñu génne Maryaama dal ba diiru juróom ñaari fan. Mbooloo ma demul, ba keroog ba ñu délloosee Maryaama ca biir dal ba. <sup>16</sup> Gannaaw loolu mbooloo ma bàyyikoo Aserot, ñu dali ca màndiŋu Paran.

## 13

### *Musaa yeble na Kanaan*

<sup>1</sup> Aji Sax ji waxati Musaa, ne: <sup>2</sup> «Yebalal ay ndaw, ñu dem yëri réewum Kanaan, gi may jox bànni Israyil. Kenn ngay yebal ci seen giiri maam yi, giir gu ci nekk, kenn, te ku ci nekk di kilifa ci ñoom.» <sup>3</sup> Ci kaw loolu Musaa yebal ndaw ña ci ndigalal Aji Sax ji, ñu bàyyikoo ca màndiŋu Paran. Ñoom ñépp ay njiiti bànni Israyil lañu woon. <sup>4</sup> Ñooñu ñoo di:

- Samwa doomu Sakuur, ci giirug Rube-  
neen ñi,
- <sup>5</sup> ak Safat doomu Ori, ci giirug Cimy-  
oneen ñi,
- <sup>6</sup> ak Kaleb doomu Yefune, ci giirug  
Yudeen ñi,
- <sup>7</sup> ak Igal doomu Yuusufa, ci giirug  
Isakareen ñi,
- <sup>8</sup> ak Oseyá doomu Nuun, ci giirug  
Efraymeen ñi,
- <sup>9</sup> ak Palti doomu Rafu, ci giirug  
Beñamineen ñi,
- <sup>10</sup> ak Gadyel doomu Sodi, ci giirug  
Sabuloneen ñi,
- <sup>11</sup> ak Gadi doomu Susi, mi taxawal  
làngu Manase ci biir giirug Yu-  
usufeen ñi,
- <sup>12</sup> ak Amyel doomu Gemali, ci giirug  
Daneen ñi,
- <sup>13</sup> ak Setur doomu Mikayel, ci giirug  
Asereen ñi,

<sup>14</sup> ak Nabi doomu Wofsi, ci giirug Nef-taleen ñi,

<sup>15</sup> ak Gewuyel doomu Maki, ci giiru Gàddeen ñi.

<sup>16</sup> Nōoñu la Musaa yónni woon, ngir ñu yëri réew ma. Oseyá doomu Nuun nag, Musaa tudde ko Yosuwe.

<sup>17</sup> Ba leen Musaa yebalee ngir ñu yëri réewum Kanaan, da ne leen: «Negew gii ci bëj-saalum ngeen di jaare, yéegi ca diiwaanu tund ya, <sup>18</sup> ba gis nu réew ma mel: ndax waa réew ma, ñu am doole lañu, am ñu néew doole; ñu néew lañu, am ñu bare; <sup>19</sup> ak ndax réew ma baax na, am baaxul; ak nu seeni dëkk mel: ndax ay dal rekk la, am ay dëkk yu ñu dàbbli la; <sup>20</sup> ak suuf sa: ndax nangu na, am nanguwul; ak itam ndax am nay garab, am déet. Te ngeen góor-góorlu ba sàkkaale ca meññeefi réew ma.» Fan yooyu nag yemook reseñ di meññ ndoortel meññeef.

<sup>21</sup> Ci kaw loolu ndaw ya dem yëri réew ma, dale ko ca màndiŋu Ciin, ba àgg Reyob, ga ca wetu Amat. <sup>22</sup> Ña nga jaare Negew ca bëj-saalum, dem ba Ebron, fa Anageen ña, Ayman ak Sesay ak Talmay, dëkkoon. Ebron googee, tabaxees na ko juróom ñaari at lu jiitu Cowan ga ca Misra. <sup>23</sup> Ñu dem ba ca xuru Eskol, daldi fay dagge ab car bu def benn cëggub reseñ, ñaar ca ñoom gàddoo ko bant, ñu sàkkaale fa gërënaat ak figg. <sup>24</sup> Bérab boobu lañu dippee xuru Eskol, (mu firi xuru Cëgg) ndax cëgg ba fa bànni Israyil dagge woon.

### *Ndaw ya délsi nañu*

<sup>25</sup> Ndaw ya nag ñibbsi, gannaaw ba ñu nemmikoo réew ma lu mat ñeent fukki fan. <sup>26</sup> Ñu dikk ba ci Musaa ak Aaróona, ak mbooloom bànni Israyil gépp, ca màndiŋu Paran, ca Kades. Ñu àgge leen xibaar, ñoom ak mbooloo ma mépp, ba noppi won leen meññeefum réew ma. <sup>27</sup> Ci kaw loolu ñu nettali Musaa, ne: «Dem nanu réew, ma nga nu yebaloon, te it foofa la meew maak lem ja tuuroo! Lii ca meññeef maa. <sup>28</sup> Xanaa kay, kàttan gu askanu réew ma am, péey ya dàbbliku te yaa lool. Te it ponkal yooyu cosaanoo ci Anageen ñi lanu fa

gis. <sup>29</sup> Amalegeen ñaa dëkke bëj-saalumu réew ma, Etteen ñaak Yebuseen ñaak Amoreen ña dëkke diiwaanu tund ya, Kanaaneen ña dëkke wetu géej, feggook dexu Yurdan.»

<sup>30</sup> Ci kaw loolu Kaleb noppiloo mbooloo ma, fekk leen tàmbalee diŋat Musaa. Mu ne leen: «Nooy dem ba demaato, nanguji réew ma, ndax bir na ne noo leen mana duma.»

<sup>31</sup> Ndaw ya àndoon ak moom daldi ne: «Manunoo songi waa réew ma, ndax ñoo nu èpp doole.» <sup>32</sup> Ci biir loolu ñuy baatal ca kanam bànni Israyil, réew ma ñu nemmikuji woon. Ñu naan: «Réew moomee ñu wëri woon ngir nemmiku ko déy, réew la muy faagaagal ay sancaanam, te mboolem askan wa nu fa gis, ay boroom jëmm lañu. <sup>33</sup> Fa lanu gis xetu Nefilim ya, ponkali Anageen ña bokk ca xetu Nefilim ya, nuy niru sunu bopp ay soccet fi seen kanam, di leen ko niru, ñoom it.»

## 14

### *Mbooloo ma bañ naa duggi Kanaan*

<sup>1</sup> Ba loolu amee mbooloo mépp tàmbalee yuuxu. Askan wa daa fanaanee jooy guddig keroog. <sup>2</sup> Bànni Israyil gépp nag di ñaxtu ci kaw Musaa ak Aaróona, mbooloo ma mépp naa leen: «Waay lu nu tee woona dee ca réewum Misra, mbaa sax nu dee ci màndiŋ mii! <sup>3</sup> Ana lu nu Aji Sax jiy indee ci réew mii ñu nara fàddoo saamar, sunuy jabar ak sunuy tuut-tànk doon alalu sèxétoo! Tee noo dellu Misra yee?» <sup>4</sup> Ci kaw loolu ñu naan ca seen biir: «Nan fal njiit te dellu Misra.»

<sup>5</sup> Ba loolu amee Musaa ne gurub, moom ak Aaróona, ñu dëpp seen jë fa suuf, fa kanam mbooloom bànni Israyil ma fa daje mépp. <sup>6</sup> Yosuwe doomu Nuun, ak Kaleb doomu Yefune, ñoom ña bokk ca ña seeti woon réew ma, daldi xotti seeni yére ndaxu tiis. <sup>7</sup> Ñu wax nag mbooloom bànni Israyil mépp, ne leen: «Réew ma nu wëri woon, ba nemmiku ko, réew mu baaxa baax la. <sup>8</sup> Bu nu Aji Sax ji nangulee, moo nuy dugal réew moomu, moo nuy jox réew ma meew maak lem ja tuuroo. <sup>9</sup> Fexeleen rekk ba Aji Sax ji, buleen ko gantal, te yeen nag ngeen baña ragal waa

réew ma, ndax ab lanc donŋ lañu nuy mat. Seen kiiraay dëddu na leen, te Aji Sax jaa ngeek nun. Buleen leen ragal.»

### *Gàntal Aji Sax ji sabab na mbugal*

<sup>10</sup> Ba mu ko defee mbooloo ma mépp ne dañu leen di dóori xeer ba ñu dee. Leeru Aji Sax ji nag feeñ ca xaymab ndaje ma, ci kanam bànni Israyil gépp.

<sup>11</sup> Ba loolu amee Aji Sax ji ne Musaa: «Ba kañ la ma askan wii nara xarab? Ba kañ lañu may gëmadi, ak firnde yi ma def ci seen biir yépp? <sup>12</sup> Maa leen di fàdde mbas, nangu seen cér, ba noppi sose ci yaw askan wu leen ëpp, ëpp leen doole.»

<sup>13</sup> Musaa ne Aji Sax ji: «Kon de, waa Misra ga nga jële mbooloo mii, génnee leen sa doole ca seen biir, dinañu ko dégg, <sup>14</sup> te dinañu ko nettali waa réew mii. Waa réew mii dégg nañu ne yaw Aji Sax ji ci sa bopp yaa nekk ci digg mbooloo mii ngay feeñu bët ak bët, yaw Aji Sax ji, saw niir taxaw, tiim leen, te aw taxaaru niir nga leen di jiitoo bëccëg, jiitoo leen aw taxaaru sawara, guddi. <sup>15</sup> Nga nara boole mbooloo mii mépp, bóom benn yoon? Kon de xeet yi dégg sa jaloore dinañu wax ne: <sup>16</sup> “Ñàkka mana yóbbu mbooloo mii ca réew ma mu leen giñaloon, moo waral Aji Sax ji faagaagal leen ci màndiŋ mi!” <sup>17</sup> Kon nag ngalla Boroom bi, na sa doole màgg rekk, noonee nga noon: <sup>18</sup> “Aji Sax ji! Kiy muñ mer, te bare ngor, di bale tooñ aki moy te du ñàkka topp mukkk doom, tooñu waajuram, ba ca sët yaak sëtaat ya.” <sup>19</sup> Ngalla jéggalal mbooloo mii seenug tooñ ci sag bare ngor, noonee nga leen masa bale, ca Misra ba tey jii.»

<sup>20</sup> Ba loolu amee Aji Sax ji ne: «Jéggal naa leen noonu nga ko waxe. <sup>21</sup> Waaye ndegam maay Kiy Dund, te leeru Aji Sax ji mooy fees àddina sépp, <sup>22</sup> gannaaw mboolem nit ñi gis samag leer, gis firnde yi ma def ci digg Misra ak ci màndiŋ mi, ñoo ma nattu nii fukki yoon, bañ maa déggal, <sup>23</sup> kenn ci ñoom déy du gis réew, mi ma giñaloon seeni maam. Mboolem ñi ma xarab, kenn du ko ci gis. <sup>24</sup> Sama jaam Kaleb nag, gannaaw meneen xel lay wéye, te moo topp sama gannaaw, ba mu mat sëkk, maa koy yóbbu ba ca

réew, ma mu demoon, te aw askanam a koy moom. <sup>25</sup> Gannaaw Amalegeen ñaak Kanaaneen ñaa nga dëkke xur wi nag, bu ëllëgee walbatikuleen, toppaat màndiŋ mi, te jaareji ko géeku Barax ya.»

<sup>26</sup> Aji Sax ji waxati Musaak Aaróona, ne: <sup>27</sup> «Ba kañ la mbooloo mu bon mii di ñaxtu ci sama kaw? Ñaxtu yi bànni Israyil di ñaxtu ci sama kaw, dégg naa ci. <sup>28</sup> Ne leen: Ndegam maay Kiy Dund déy, Kàddug Aji Sax jee, noonu ngeen waxe, may dégg, ni laa leen di def. <sup>29</sup> Ci màndiŋ mii kay la seeni néew di tēdd. Mboolem ñi ñu leen limal, mboolem ñi ñu leen waññal, ñu dale ci ñaar fukki at, jëm kaw te doon ñaxtu ci sama kaw, <sup>30</sup> kenn ku moy Kaleb doomu Yefune ak Yosuwe doomu Nuun, du kenn ku ciy dugg ca réew, ma ma leen giñoon dēel. <sup>31</sup> Seen tuut-tànk, yi ngeen ne alalu sēxētoo lañuy doon, ñoom laay yóbbu, ba ñu xam réew ma ngeen xarab. <sup>32</sup> Waaye yeen, seeni néew ci màndiŋ mii lay tēdd, <sup>33</sup> seeni doom di màngaan ñeent fukki at ci màndiŋ mi, gàddoo ko seen ñàkk worma, yeen ñi leen jur, ba keroog seeni néew tēdd ba jeex ci màndiŋ mi. <sup>34</sup> Limu fan yi ngeen nemmikuji woon réew ma, ñeent fukki fan, benn fan bu ci nekk day wecci menn at, ngeen gàddoo ko seen mbugali bàkkaar, ñeent fukki at, ba ngeen xam li jànkoon teek man di jur. <sup>35</sup> Man Aji Sax ji, maa ko wax. Noonu déy laay def mboolem mbooloo mu bon mii boolo ci sama kaw. Ci màndiŋ mii lañuy raafe, fii lañuy deeye.»

<sup>36</sup> Ndaw ya Musaa yebaloon, ñu nemmikuji réew ma nag, te ñu délsi, di baatal réew ma, ba tax mbooloo mépp di ñaxtu ci kawam, <sup>37</sup> ñooña doon baatal réew ma, am mbas a leen rey fi kanam Aji Sax ji. <sup>38</sup> Mennum Yosuwe doomu Nuun ak mennum Kaleb doomu Yefune donŋ, ñoo mucc ca ndaw yooya nemmikuji woon réew ma.

### *Mbooloo ma gântalati na*

<sup>39</sup> Ba Musaa jottlee bànni Israyil gépp kàddu yooyu, mbooloo ma mititlu nañu ko lool. <sup>40</sup> Ca ëllëg sa ñu teela xëy, yéegi kaw tund ya, te naan: «Nu ngi nii di yéeg,

jëm fa nu Aji Sax ji wax, ndax noo tooñ.»  
<sup>41</sup> Musaa ne leen: «Lii nag? Yeena ngi tebbi waxi Aji Sax ji, waaye loolu de du sotti! <sup>42</sup> Buleen dem, te Aji Sax ji àndul ak yeen. Lu ko moy dingeen daanu ci seen kanami noon. <sup>43</sup> Te kat Amalegeen ñi ak Kanaaneen ñaa ngi fuu ci seen kanam. Yeenay fàddoo saamar donŋ. Gannaaw yeen dëddu Aji Sax ji nag, Aji Sax ji du ànd ak yeen.»

<sup>44</sup> Teewul ñu të ticc, ne dañuy yéegi kaw tund ya, te gaalu kóllërey Aji Sax ji ak Musaa génnuñu dal ba. <sup>45</sup> Ba mu ko defee Amalegeen ña ak Kanaaneen ña dëkke woon diiwaanu tund woowa wàccsi, duma leen, tasaare leen ba ca gox ba ñuy wax Xorma.

## 15

### *Lu jëm ci saraxi pepp ak diw ak biiñ*

<sup>1</sup> Aji Sax ji waxati Musaa, ne: <sup>2</sup> «Waxal bànni Israyil ne leen: Bu ngeen demee ca réew ma ngeen di sanc, réew ma ma leen jox, <sup>3</sup> bu ngeen di defal Aji Sax ji saraxu sawara, muy saraxu rendi-dóomal, mbaa sarax su nit di wàccoo aw xas, mbaa saraxu yéene, mbaa seen saraxi mǎggal, ngir xeeñal xetug jàmm ñeel Aji Sax ji, te muy lu jóge ci jur gu gudd mbaa gu gàtt, defe leen ko nii:

<sup>4</sup> «Kiy sarxal Aji Sax ji ab saraxam, na sarxewaale saraxu pepp bu benn fukkeelu efay sunguf su mucc ayib, di ñetti kilo, su ñu xiiwe ñeenteelu xaajub xiinu diw, di liitar ak genn-wàll, <sup>5</sup> ak biiñ ngir saraxu tuuru, ñeenteelu xaajub xiin, di liitar ak genn-wàll, mu ànd ak saraxu rendi-dóomal mbaa beneen sarax, su dee xar mu ndaw.

<sup>6</sup> «Su dee am kuuy, saraxu pepp bi muy àndal, ñaari fukkeeli efay sunguf su mucc ayib lay doon, di juróom benni kilo, ñu xiiwe ko ñetteelu xaajub xiinu diw, di ñaari liitari diw, <sup>7</sup> ak biiñ ngir saraxu tuuru, ñetteelu xaajub xiin, di ñaari liitar. Na joxe loolu, def ko xetug jàmm, ñeel Aji Sax ji.

<sup>8</sup> «Su dee sarxe jur gu gudd, muy saraxu rendi-dóomal, mbaa sarax bu muy wàccoo aw xas, mbaa saraxu cant

ci biir jàmm, ñeel Aji Sax ji, <sup>9</sup> na sarxewaaleek jur gu gudd gi, ab saraxu pepp bu ñetti fukkeeli efay sunguf su mucc ayib, di juróom ñeenti kilo, ñu xiiwe ko genn-wàllu xiinu diw, di ñetti liitar, <sup>10</sup> ak biiñ bu muy joxewaale, ngir saraxu tuuru, di genn-wàllu xiin, muy ñetti liitar. Loolu saraxu sawara la, di xetug jàmm, ñeel Aji Sax ji.

<sup>11</sup> «Noonu lees di def bu dee saraxu yëkk, mbaa am kuuy, mbaa am xar mu ndaw, mbaa bëy. <sup>12</sup> Nu limu juri sarax yi tollu rekk, ngeen def mu ci nekk noonu, ànd ak lim ba. <sup>13</sup> Mboolem njuddu-jiréew, noonu lay defe sarax yooyii, buy indi saraxu sawara ngir xetug jàmm, ñeel Aji Sax ji.

<sup>14</sup> «Su dee ab doxandéem bu dal ak yeen, mbaa ku nekk ak yeen ci seen maas yiy ñëw, te muy joxe saraxu sawara ngir xetug jàmm, ñeel Aji Sax ji, ni ngeen koy defe rekk la koy defe. <sup>15</sup> Mbooloo mi mépp, dogalu yoon boobu benn la ciy doon, muy yeen, di doxandéem bi. Dogal la buy sax fàww, ñeel seen maasoo maas, te di benn ci yeen ak ci doxandéem bi, fi kanam Aji Sax ji. <sup>16</sup> Wenn yoon wee, di benn àtte bi, ñeel leen, ñeel doxandéem bi dal ak yeen.»

### *Ab jooxe war na ci pepp mu jëkk*

<sup>17</sup> Aji Sax ji waxati Musaa, ne <sup>18</sup> «Waxal bànni Israyil, ne leen, bu ngeen demee ca réew, ma ma leen jëme, <sup>19</sup> bay lekk ca ñamu réew ma, nangeen ci jooxe ab jooxe, ñeel Aji Sax ji; <sup>20</sup> seen notu sunguf bu jëkk, ci ngeen di jooxe menn mburum jooxe. Ni ngeen di sàkke jooxe bu jóge ca dàgga ja rekk, ni ngeen koy jooxee. <sup>21</sup> Seen notu sunguf bu jëkk, ci ngeen di sàkke ab jooxe, ñeel Aji Sax ji, yeen ak seen askan.»

### *Sarax war na ci moy gu dul teyeef*

<sup>22</sup> Su dul ci teyeef ngeen ñàkka jëfe lenn ci mboolem santaane yii Aji Sax ji dénk Musaa, <sup>23</sup> ci mboolem lu leen Aji Sax ji sant, Musaa jottli, dale ko keroog ba Aji Sax ji santaanee loola, ak gannaaw gi, ba ca seen maasoo maas, <sup>24</sup> su dee moy gu dul teyeef, te mbooloo mi yégu ko woon, su boobaa mbooloo mépp ay sarxal aw

yëkk wu ndaw wuy doon rendi-dóomal, ngir xetug jàmm, ñeel Aji Sax ji, ak saraxu peppam, ak saraxu tuuroom, ni ko yoon àttee, ak benn sikket ngir saraxu póotum bàkkaar. <sup>25</sup> Sarxalkat bi day def loolu n jotlaayal mbooloom bànni Israyil gépp, njéggal daldi leen ñeel, gannaaw moy ga dug teyeef, te ñoom it indi nañu seen saraxu sawara, ñeel Aji Sax ji, booleek seen saraxu póotum bàkkaar fi kanam Aji Sax ji, ndax seen moy ga dul teyeef. <sup>26</sup> Njéggal day daldi ñeel mbooloom bànni Israyil gépp, ak bépp doxandéem bu dal ak ñoom, ndax mbooloo mépp lay seen moy gu dul teyeef.

<sup>27</sup> Su dee kenn nit a bàkkaar te du teyeefam, na sarxal aw bëy wu jigéen wu menn at, ngir saraxu póotum bàkkaar. <sup>28</sup> Sarxalkat bi daldi koy def fi kanam Aji Sax ji, n jotlaayal ki moy ci ag ñàkka tey, ca bàkkaaram ba dul teyeef. Loolu la koy jote, njéggal ñeel ko. <sup>29</sup> Muy njuddu-ji-réew ju bokk ci bànni Israyil, di doxandéem bu dal ak ñoom, yoon wi wenn lay doon, ñeel ki moy te du teyeefam.

<sup>30</sup> Nit ki tooñ cig teyeefam nag, muy njuddu-ji-réew, di doxandéem, kooku Aji Sax ji la ñàkke kersa. Nit kooku, dees koy dagge ci biiri bokkam: <sup>31</sup> Gannaaw kàddug Aji Sax ji la teddadil te ndigalam la xëtt, nit kooku dees koy dagg rekk, mu gaddu bàkkaaram.

### *Bésuub Noflaay wormaal la laaj*

<sup>32</sup> Ba bànni Israyil nekkee ca màndiŋ ma, dañoo fekk jenn waay, muy taxan bésuub Noflaay. <sup>33</sup> Ña ko fekk muy taxan, yóbbu ko ba ca Musaa ak Aaróona, ak mbooloo ma mépp. <sup>34</sup> Ba loolu amee ñu teg ko ciy loxo, ndax dogaleesagul woon nees di def ak moom. <sup>35</sup> Ci kaw loolu Aji Sax ji ne Musaa: «Dee rekk mooy àtteb waa ji: dees koy génne dal bi, mbooloo mépp dóor koy xeer, ba mu dee.»

<sup>36</sup> Mbooloo ma mépp daldi koy génne dal bi, dóor koy xeer ba mu dee, na ko Aji Sax ji sante Musaa.

### *Yoon sàrtal na wàllu col*

<sup>37</sup> Aji Sax ji waxati Musaa, ne ko: <sup>38</sup> «Waxal bànni Israyil, ne leen, ci seen maasoo maas, nañu def ay langat ci seen cati mbubb, langat wu ci nekk ñu nas ci buum gu baxa. <sup>39</sup> Mu doon seen langat yu ngeen di xool, di ko fàttlikoo mboolem sanaaney Aji Sax ji, ngir di ko jéfe, te baña topp seen bannexu bakkan ak seeni gët, bay moy. <sup>40</sup> Su ko defee ngeen di bàyyi xel tey jéfe sama sanaaney yépp, daldi doon ñu sell, ñeel seen Yàlla. <sup>41</sup> Man maay Aji Sax ji, seen Yàlla, ji leen génnee réewum Misra ngir doon seen Yàlla. Maay seen Yàlla Aji Sax ji.»

## 16

### *Kore fippu na*

<sup>1</sup> Ku ñuy wax Kore doomu Isar, mi askanoo ci Keyat doomu Lewi, moo àndoon ak ay Rubeneen, ñuy Datan ak Abiram, doomi Elyab, ak Onn doomu Pelet, <sup>2</sup> ñu jógal Musaa, ñook ñaar téeméer ak juróom fukk (250) ci bànni Israyil, diy kilifa ci mbooloo mi, am baat ca pénc ma, te di ñu amu tur. <sup>3</sup> Ci kaw loolu ñu bokk daje fi kaw Musaa ak Aaróona, ne leen: «Doy na sëkk! Mbooloo mi ba mu daj, ñépp a sell, te ci sunu biir la Aji Sax ji nekk. Ana lu ngeen di xoggliku ci kaw mbooloom Aji Sax ji?»

<sup>4</sup> Ba Musaa dégge loolu, da ne gurub, dëpp jë bi fi suuf. <sup>5</sup> Mu wax Kore ak gàngooram gépp, ne: «Bu èllégee, Aji Sax ji mooy xamle kan la séddoo ak kan mooy ki sell, mu jegeñal ko boppam. Ki mu taamu nag, dina ko jegeñal boppam. <sup>6</sup> Dangeen di def nii: jël-leeni and, yaw Kore, yaak sa gàngoor gépp, <sup>7</sup> te ngeen def ciy xal, def ci cuuraay fi kanam Aji Sax ji, èllég. Su ko defee ku Aji Sax ji taamu, kookooy ki sell. Doy na sëkk, yeen Leween ñi!» <sup>8</sup> Musaa teg ca ne Kore: «Yeen Leween ñi, dégluleen nag! <sup>9</sup> Xeeb ngeen daal ber gi leen Yàllay Israyil ber ci mbooloom Israyil, jegeñal leen boppam, ngeen di liggéey liggéeyu màkkaanu Aji Sax ji, di taxaw fi kanam mbooloo mi, di leen jaamul Yàlla? <sup>10</sup> Yaw mu jegeñal la, yaak sa bokki Leween ñépp, ngeen di xëccu céru carxal, boole ci! <sup>11</sup> Kon kay



yaw yaak sa gàngoor gépp, ci kaw Aji Sax ji ngeen bokk daje! Ana kuy Aaróona, ba ngeen di ñaxtu ci kawam?»

<sup>12</sup> Musaa nag woolu Datan ak Abiram, doomi Elyab, ñu ne ko: «Danoo ñewul!  
<sup>13</sup> Dangaa xeeb li nga nu jële réew mu meew maak lem ja tuuroo, ngir reylu nu ci màndiŋ mi, ba tax ngay buur-buur lu ci sunu kaw teg ci? <sup>14</sup> Du réew mu meew maak lem ja tuuroo nga nu yóbbu de, te séddoo nu céri tool mbaa tóokëri reseñ. Mbooloo mii mépp, man nga leena tuur lëndëm? Danoo ñewul!» <sup>15</sup> Ba loolu amee Musaa mer lool. Mu ne Aji Sax ji: «Bul geesu sax seen sarax. Menn mbaam sax, masuma leen koo jëlal te masuma cee tooñ kenn.»

### *Way-fippu ya jot nañu seen añ*

<sup>16</sup> Musaa nag ne Kore: «Yaw, yaak sa gàngoor gépp, ca kanam Aji Sax ji, yaak ñoom ak Aaróona, èllég. <sup>17</sup> Na ku nekk jël ub andam, def ci cuuraay, te na ku ci nekk indib andam fi kanam Aji Sax ji, muy ñaar téeméeri and ak juróom fukk, yaak Aaróona it, ku nekk akub andam.»

<sup>18</sup> Ba mu ko defee ku nekk jël ub andam, def cay xal, teg ca cuuraay. Ñu taxaw ca bunt xaymab ndaje ma, ñook Musaa ak Aaróona. <sup>19</sup> Kore nag dajale gàngoor gépp fa ñoom, ca bunt xaymab ndaje ma. Ci kaw loolu leeru Aji Sax ji feeñu mbooloo ma mépp!

<sup>20</sup> Aji Sax ji wax Musaa ak Aaróona, ne: <sup>21</sup> «Xiddileen mbooloo mii, ma xoyom leen léegi!» <sup>22</sup> Musaa ak Aaróona ne gurub, dëpp seen jë fa suuf, daldi ne: «Éy Yàlla, yaw Yàllay bépp boroom bakkan bu bindoo aw suux, xanaa du kenn ay bàkkaar, nga far sànju ci kaw mbooloom lëmm?»

<sup>23</sup> Ci kaw loolu Aji Sax ji ne Musaa: <sup>24</sup> «Waxal mbooloo mi, ne leen ñu jóge fi wër màkkaani Kore ak Datan ak Abiram.»

<sup>25</sup> Musaa daldi jubal ca Datan ak Abiram, magi Israyil topp ca. <sup>26</sup> Ci biir loolu mu wax ak mbooloo ma, ne leen: «Ngalla dandleen xaymay nit ñu bon ñii, te buleen laal seen lenn, bala ngeen di bu-uboondook mboolom bàkkaari ñii.» <sup>27</sup> Ñu daldi jóge mboolom fa wër màkkaani

Kore ak Datan ak Abiram. Datan ak Abiram ñoom, ña nga génn, taxaw ca seen bunti xayma, ñook seeni jabar ak seeni doom, ak seeni tuut-tànk.

<sup>28</sup> Musaa nag ne: «Lii nag moo leen di xamal ne Aji Sax ji moo ma yebal ngir ma def jëf jii jépp, waaye du sama coobarey bopp: <sup>29</sup> Ndegam ni mboolom doom aadama di deeye, ni la ñii deeye, seen demin di deminu mboolom doom aadama, su boobaa du Aji Sax jee ma yebal. <sup>30</sup> Waaye ndegam Aji Sax ji moo sàkk ba sàkk tey lu masula am, ba suuf ña, mëdd leen, ñook lu bokk ci ñoom, ñu tàbbiwaale bakkan biir njaniiw, su boobaa dingeen xam ne ñoom ñii ñoo xarab Aji Sax ji.» <sup>31</sup> Naka la Musaa di daaneel kàddu yooyu yépp, fa ñu taxaw jekki xar, <sup>32</sup> suuf ña, mëdd leen, ñook seen waa kër, ak mboolom ku bokk ci Kore, ak mboolom alal ja. <sup>33</sup> Ñu daldi tàbbiwaale bakkan biir njaniiw, ñook mboolom lu ñu moom, suuf sàng leen, ñu réer mbooloo ma mërr. <sup>34</sup> Mboolom Israyil dégg seen yuux ya, daldi daw, te naan: «Nan daw bala noo suuf a mëdd!»

<sup>35</sup> Ci kaw loolu sawara moo bawoo fa Aji Sax ji, xoyom ñaar téeméeri nit ak juróom fukk ña indi woon saraxu cuuraay ba.

## 17

### *Andi way-fippu ya firnde la*

<sup>1</sup> Aji Sax ji waxati Musaa, ne: <sup>2</sup> «Waxal Elasar doomu Aaróona, sarxalkat bi, ne ko mu seppee and yi ci lakk gi, ndax lu sell la, te xal yi, na ko tuur fu sore. <sup>3</sup> And yooyii seeni boroom feye seen bakkan seeni bàkkaar, dees koy tégg, ba mu tàlli, xoobe ko sarxalukaay bi. Gannaaw fi kanam Aji Sax ji lañu indi and yi, ba tax mu doon lu sell, na and yi doon firnde, ñeel bànni Israyil.» <sup>4</sup> Ci kaw loolu Elasar sarxalkat bi jël andi xànjari, ya ña dee ca lakk ga indi woon, ñu tégg ko ba mu tàlli, ngir sarxalukaay ba, <sup>5</sup> na ko Aji Sax ji santaanee woon, Musaa jottli. Loolu di fàttli bànni Israyil ne benn jaambur bu bokkul ci askanu Aaróona sañula dikk di taal cuuraay fi kanam Aji Sax ji, lu ko moy

lu mel ni li dal Kore ak gàngooram moo koy dal.

### *Ñaxtu sabab na mbugal*

<sup>6</sup> Ca èllëg sa mbooloom bànni Israyil gépp a doon ñaxtu ci kaw Musaa ak Aaróona, naan: «Yeen yeena reylu ñoñi Aji Sax ji!» <sup>7</sup> Mbooloo maa nga sam Aaróona ak Musaa. Ci biir loolu, ñu ne gees xaymab ndaje ma, gisuñu lu moy niir wa muur ko, leerug Aji Sax ji feeñ.

<sup>8</sup> Ba loolu amee Musaa ak Aaróona dem ba ca kanam xaymab ndaje ma, <sup>9</sup> Aji Sax ji wax Musaa ne: <sup>10</sup> «Jógeleen biir mbooloo mii, ma faagaagal leen léegi!» Ñu ne gurub, dëpp seen jë fa suuf. <sup>11</sup> Musaa ne Aaróona: «Jëlal and bi, nga sàkke ci sarxalukaay bi ay xal, teg ci cuuraay, yóbbu gaaw ca mbooloo ma, ba defal leen ag njotlaay, ndax sànj mi tàkke na ci Aji Sax ji, mbas mi tàmbali na!» <sup>12</sup> Aaróona kër and ba Musaa wax, daw dugg ca biir mbooloo ma. Ndeke mbas ma tàmbali na ca biir mbooloo ma. Mu def ca and ba cuuraay, daldi defal mbooloo ma njotlaay. <sup>13</sup> Naka la taxaw ci diggante ñi dee ak ñiy dund, mbas ma dal. <sup>14</sup> Ña dee ca mbas ma nag doon fukki junneek ñeent ak juróom ñaar téeméer (14 700), te bokkul ak ña dee woon ca mbirum Kore ma. <sup>15</sup> Ba mu ko defee Aaróona dellu ca Musaa, ca bunt xaymab ndaje ma, fekk mbas ma dal.

### *Bant bu wow jebbi na*

<sup>16</sup> Ba loolu amee Aji Sax ji ne Musaa: <sup>17</sup> «Waxal ak bànni Israyil, nga nangoo ci mboolem seen kilifay kër maam, aw yet, na wenn yet bawoo ci kër gu ci nekk, muy fukki yet ak ñaar, yet wu ci nekk, nga bind ci turu boroom. <sup>18</sup> Turu Aaróona itam, nga bind ko ci yetu giirug Lewi, ndax wenn yet lay doon, ñeel kilifag kër gu ci nekk. <sup>19</sup> Nga denc yet yi ca biir xaymab ndaje ma, fa kanam gaalu seedes kóllère ga, fa may dajeek yeen. <sup>20</sup> Su ko defee ki ma taamu, aw yetam dina jebbi, ba ma teqlikoo ak xultuy bànni Israyil, yi ñuy xultu ci seen kaw.»

<sup>21</sup> Musaa àgge ko bànni Israyil, mboolem seen kilifay kër maam jox Musaa aw yet, kilifa gu ci nekk wenn yet,

ñeel kër maamam, muy fukki yet ak ñaar, yetu Aaróona bokk ca. <sup>22</sup> Musaa teg yet ya fa kanam Aji Sax ji, ca biir xaymab seede sa. <sup>23</sup> Ca èllëg sa, naka la Musaa dugg ca xaymab seede sa rekk, daldi fekk yetu Aaróona wu kër Lewi, jebbi; fekk na mu jebbi, ba tóor, ba meññ ay doomi amànd\*. <sup>24</sup> Ba loolu amee Musaa jële yet yépp ci Aji Sax ji, dem ba ca bànni Israyil gépp, ñépp gis, ku nekk jël yetam.

<sup>25</sup> Aji Sax ji waxati Musaa, ne: «Dellool yetu Aaróona fa kanam gaalu seede sa, mu dence fa, di firnde ñeel xeetu fippukat wi, ndax nga dakkal seeni xultu ci sama kaw, ba duñu dee.» <sup>26</sup> Musaa def noonu. Na ko ko Aji Sax ji sante, na la ko defe.

<sup>27</sup> Bànni Israyil nag naan Musaa: «Jexal nan nag, sànkun nan, nun ñépp ay sànkun!» <sup>28</sup> Gannaaw képp ku jege màkkaanu Aji Sax ji donɗ, dangay dee kay, mbaa dunu far jeex tàkk?»

## 18

### *Lu jëm ci sarxalkat yi ak Leween ñi*

<sup>1</sup> Aji Sax ji ne Aaróona: «Yaw, yaak say doom ak sa waa kër maam, yeenay gàddu peyug tooñ ci wàllu bérab bu sell bi, te itam yaw, yaak say doom, yeenay gàddu peyug tooñ ci seen wàllu carxal. <sup>2</sup> Te itam sa bokki Leween ñi, sa giirug baay, jegeñal leen sa bopp, ñu jokku ci yaw, di la jàpple, te yaw yaak say doom, ngeen féete fi kanam xayma ba seedes kóllère ga dence. <sup>3</sup> Ñooy dénkoo sa ndénkaane, ak dénkaneey mboolem xayma bi, waaye jumtukaayi bérab bu sell bi, ak sarxalukaay bi, buñu ko jege, lu ko moy dañuy dee, ñoom ak yeen itam. <sup>4</sup> Nañu jokku ci yaw, te ñu dénkoo ndénkaanel xaymab ndaje mi, ci mboolem liggéeyu xayma bi. Kenn ku ci bokkul nag du leen jege, yeen. <sup>5</sup> Nangeen dénkoo ndénkaanel bérab bu sell bi, ak ndénkaanel sarxalukaay bi, ngir am sànj baña dalati ci kaw bànni Israyil.

<sup>6</sup> «Man mii nag maa seppée seen bokki Leween ñi ci biir bànni Israyil. Yeen lañu leen jagleela jagleel, ñeel Aji Sax ji,

\* 17:23 17.23 amànd: xeetoo naak gerte-tubaab.

ngir ñu liggéey liggéeyu xaymab ndaje mi. <sup>7</sup> Yaw nag yaak say doom, dénkooleen seenug carxal ci mboolem mbiru sarxalukaay bi, ak ca wàllaa ridob biir bi, ngeen di ca liggéey. Seen liggéeyu carxal bi, ab sasu teraanga la, maa leen ko terale. Waaye ku bokkul ci yeen, bu ci laalee, dees koy rey.»

### *Lu jëm ci peyu sarxalkat yi*

<sup>8</sup> Aji Sax ji neeti Aaróona: «Man mii maa la sédd ndénkaaneb samay jooxe; mboolem jooxe yu sell yi bànni Israyil indi, yaw laa ko jagleel, nga jagoo, yaak say doom, ci kaw dogal bu sax dàkk. <sup>9</sup> Lii nag, yaa ko moom, ci mboolem sarax yu sell yee sell, yi mucc sawara: seen bépp sarax, seen bépp saraxu pepp ak seen bépp saraxu póotum bàkkaar, ak seen bépp saraxu peyug tooñ bu ñu ma indil, lu sella sell la, ñeel la, yaak sa doom yu góor. <sup>10</sup> Fu sella sell ngeen koy lekke; képp kuy góor ci yeen, sañ na cee lekk. Lu sell lay doon ci yaw.

<sup>11</sup> «Leneen lu la ñeel moo di jooxe bu jóge ci saraxi nit ñi, di bépp saraxu yékkati-jébbal bu bànni Israyil. Yaw laa ko sédd, yaak sa doom yu góor, ak sa doom yu jigéen, ci kaw dogalu yoon bu sax dàkk. Képp ku set ci sa waa kër, sañ na cee lekk.

<sup>12</sup> «Lépp luy ngéneelu diw gu bees, ak ngéneelu biiñ bu bees, ak pepp mu jékka ñor, mu ñu jox Aji Sax ji, yaw laa ko jox. <sup>13</sup> Njálbéenu meññeef mi ñuy indil Aji Sax ji, ci mboolem lu meññee ci seen suuf, yaa koy moom, te képp ku set ci sa waa kër, sañ na cee lekk. <sup>14</sup> Mboolem lees aayalal Aji Sax ji ci Israyil, yaa koy moom. <sup>15</sup> Lépp luy ubbitey njur bu ñu jagleel Aji Sax ji, ci lépp lu bindoo aw suux, nit ak mala, yaa koy moom. Fexeel rekk ba jotlu taawub nit ki, te taawub mala mu setul it, nanga ko jotlu. <sup>16</sup> Njotu xale bu am lu dale ci weer, àpp ko ci juróomi siikali xalis yu bérab bu sell bi, benn siikal yemook ñaar fukki gera mbaa fukki garaam. <sup>17</sup> Waaye lu nag taawloo, ak lu xar taawloo, ak lu bëy taawloo,

deesu ko jot. Yooyii yu sell la. Deretam ngay xëpp ci sarxalukaay bi, nebbon bi, nga def ko saxar, muy saraxu sawara ngir xetug jàmm, ñeel Aji Sax ji. <sup>18</sup> Aw yàppam, yaa koy moom, ni nga moome dënnu saraxu yékkati-jébbal, ak tànkub kanam bu ndijoor ba. <sup>19</sup> Mboolem jooxe yu sell yi bànni Israyil di jooxeel Aji Sax ji, sédd naa la ko, yaak sa doom yu góor, ak sa doom yu jigéen, ci kaw dogalu yoon bu sax dàkk. Kóllérey xorom\* a ngoogu, du fecciku, xanaa sax dàkk fi kanam Aji Sax ji, ñeel la yaw, yaak saw askan.» <sup>20</sup> Aji Sax ji neeti Aaróona: «Seenum réew nag doo ci am cér, te wàllu suuf, doo ko am ci seen biir. Man maay sa wàll, di sab cér ci biir bànni Israyil.»

### *Lu jëm ci peyug Leween ñi*

<sup>21</sup> Leween ñi ñoom, maa leen jox bépp céru fukkeel bu génne ci Israyil, muy seen cér, ñu yooloo ko seen liggéey bi ñuy liggéey ci xaymab ndaje mi.

<sup>22</sup> Bu bànni Israyil juuxati ci xaymab ndaje mi, di gàddu bàkkaar bu dee di àtteem. <sup>23</sup> Leween ñi ñooy ñiy liggéey liggéeyi xaymab ndaje mi, te lu ñu ca tooñ, ñooy gàddu pey ga, ci kaw dogal bu sax dàkk, ñeel leen, ñook seen askan. Waaye biir bànni Israyil, Leween ñi duñu ci séddu céru suuf, <sup>24</sup> ndax céri fukkeel yi bànni Israyil yékkati, jooxeel ko Aji Sax ji, jox naa ko Leween ñi, muy seen cér. Moo tax ma ne leen, biir bànni Israyil, duñu ci séddu céru suuf.

### *Ab jooxe ñeel na Leween ñi*

<sup>25</sup> Aji Sax waxati Musaa ne: <sup>26</sup> «Leween ñi, wax leen, ne leen bu ñu jëlee ci bànni Israyil seen céri fukkeel yi ma leen jagleel yeen, muy seen cér, nañu ci jooxeel Aji Sax ji, fukkeelub céru fukkeel yooyu. <sup>27</sup> Nañu leen jàppal loolu, yeen Leween ñi, muy seen jooxeb bopp, ni bu doon pepp mu jóge ci seen dàggay bopp, ak biiñ bu bees bu jóge ci seen nalukaay. <sup>28</sup> Su ko defee ngeen jooxe yeen itam, jooxeb Aji Sax ji, ci mboolem seen céri fukkeel yi ngeen jële ci bànni Israyil. Kon

\* **18:19** 18.19 kóllérey xoromwaxin la, day tegtale kóllérey gu yàgg, ba sax dàkk, ndax lu bare luy yàqu, xorom lees ko baaxoo woona dence, ngir mu yàgg.

nangeen jële coocu, jooxeb Aji Sax ji, jox ko Aaróona sarxalkat bi. <sup>29</sup> Lépp lu ñu leen sédd, nangeen ci jooxe jooxeb Aji Sax ji. Mboolem céri ngéneel yooyu, ci ngeen di génne cér bu sell boobu.

<sup>30</sup> «Waxal Leween ñi ne leen gannaaw bu ñu ca génnee céru ngéneel li, li ci des lew na leen, ni bu doon pepp mu jóge ci seen dàggay bopp, ak biiñ bu jóge ci seen nalukaay. <sup>31</sup> Sañ nañu koo lekke fépp, ñoom ak seen waa kër, ndax loolu seen pey la, ñu yooloo ko seen liggéeyu xaymab ndaje mi. <sup>32</sup> Duñu ci gàddu benn bàkkaar, gannaaw bu ñu ci jooxee céru ngéneel li. Waaye jooxe yu sell yu bànni Israyil yooyu, buñu ci teddadil lenn, ba di ci dee.»

## 19

### *Lu jëm ci ndoxum setlu ak setlu gi war*

<sup>1</sup> Aji Sax ji waxati Musaa ak Aaróona, ne: <sup>2</sup> «Lii mooy dogalu yoon bi Aji Sax ji santaane: Neleen bànni Israyil ñu indil leen nag wu jigéen wu xonq, wu mat, mucc sikk, te kenn masu koo takk, <sup>3</sup> ngeen jox ko Elasar sarxalkat bi, ñu génne ko dal bi, te ñu rendi ko fi kanamam. <sup>4</sup> Na Elasar sarxalkat bi capp baaraamam ci deret ji, wis-wisal ko juróom ñaari yoon fi féeteek bunt xaymab ndaje mi. <sup>5</sup> Nañu lakk nag wi ci kanamam. Der bi ak yàpp wi ak deret ji ak sébbriit mi, lépp lañuy lakk. <sup>6</sup> Su ko defee sarxalkat bi sàkk bantu seedar ak caru isob ak ndimo lu xonq curr, boole ko sànni ca sawara wa ñuy lakk nag wa. <sup>7</sup> Gannaaw loolu na sarxalkat bi fóot ay yéreem, sangu, doora mana duggaat ci dal bi, te du ko tee yendoo sobe ba ca ngoon. <sup>8</sup> Kiy lakk nag wi itam, na fóot ay yéreem, sangu, te du ko tee yendoo sobe ba ca ngoon. <sup>9</sup> Na ku set tonni dóomu nag wa, te sotti ko bérab bu set, foofa ca biti. Dóom ba dencub mbooloom bànni Israyil lay doon, ñu di ko waajale ndoxum setlu, ngir saraxu póotum bàkkaar. <sup>10</sup> Ku góor kiy tonni dóomi nag wi itam day fóot ay yéreem, te du tee mu yendoo sobe ba ca ngoon. Na loolu di dogalu yoon bu sax

fàww, ñeel bànni Israyil, ak doxandéem bu dëkk ci seen biir.

<sup>11</sup> «Bu loolu weesee ku laal nit ku dee, ak néew bu mu mana doon, dina sobewu diiru juróom ñaari fan. <sup>12</sup> Na setlu ca ndox moomee ca bésub ñetteel ba, gannaaw ba mu ko laalee, te na setluwaat ca bésub juróom ñaareel ba. Su ko defee mu set. Waaye su setluwul ca bésub ñetteel ba, ak bésub juróom ñaareel ba, du set. <sup>13</sup> Képp ku laal nit ku dee, ak néew bu mu mana doon, bu setluwul, màkkaanu Aji Sax ji la sobeel. Kooku dees koy dagge ci bànni Israyil. Gannaaw ndoxum setlu ma, wiseesu ko ko, sobewu lay wéye.

<sup>14</sup> «Lii la yoon wi tëral: Bu nit deeyee ci biir xayma, képp ku dugg ci biir xayma bi, ak képp ku mu fekk ci xayma bi, day sobewu diiru juróom ñaari fan, <sup>15</sup> te mboolem ndab lu fa ubbiku woon, kubeer it ubu ko woon ràpp, loola ndab sobewu na. <sup>16</sup> Képp ku laal ca àll ba, nit ku ñu bóome saamar, mbaa ku Yàlla moomal boppam, mbaa mu laal yaxi nit ku dee, mbaa mu laal bàmmeel, kooka day sobewu diiru juróom ñaari fan. <sup>17</sup> Nañu sàkkal ki sobewu ca dóomu saraxu póotum bàkkaar ba ñu lakkoon, te ñu sotti ndox muy dund ci ndab, ca kaw dóom ba. <sup>18</sup> Bu loolu wéyee, na ku set jël caru isob, capp ko ca ndox ma, wis-wisal ko ca kaw xayma ba nit deeye, wis ko ca kaw ndab yépp, ak ca kaw nit ña fa nekkoon. Na ko wis itam ci kaw nit ku laal yaxi ku dee, mbaa mu laal ku ñu bóome saamar, mbaa mu laal ku Yàlla moomal boppam, mbaa mu laal bàmmeel. <sup>19</sup> Bésub ñetteel ba nag, ak bésub juróom ñaareel ba, ci la nit ku set di wis-wisal ndox mi ci kaw ki sobewu. Bésub juróom ñaareel ba ca la koy settli. Su ko defee ka sobewu fóot ay yéreem, sangu, bu jant sowee mu daldi set. <sup>20</sup> Képp ku sobewu te setluwul, kooku dees koy dagge ci mbooloo mi, ndax bérabu sellngay Aji Sax ji la sobeel. Gannaaw wiseesu ko ndoxum setlu mi, sobewu na.

<sup>21</sup> «Na leen loolu ñeel ci kaw dogalu yoon bu sax dàkk. Ka doon wis-wisal ndoxum setlu mi nag, na fóot ay yéreem,

te ku laal ci ndoxum setlu mi day yendoo sobe ba ca ngoon. <sup>22</sup> Nit ki sobewu, mboolem lu mu laal day sobewu, te ku laal ca loola it day yendoo sobe ba ca ngoon.»

## 20

### *Diŋjat nañu Musaa ak Aaróona fa Meriba*

<sup>1</sup> Mbooloom bànni Israyil gépp nag àgg ca màndiŋu Ciin, ci biir weer wi jëkk ci at mi\*. Ñu daldi dal ca Kades. Fa la Maryaama faatoo, ñu denc ko foofa.

<sup>2</sup> Ci kaw loolu mbooloo ma dem ba ñàkk ndox. Ñu daje ci kaw Musaa ak Aaróona.

<sup>3</sup> Mbooloo ma di xulook Musaa, naa ko: «Moo lu nu tee wona dee keroog ba sunu bokk ya deeyee fa kanam Aji Sax ji? <sup>4</sup> Ana loo indee mbooloom Aji Sax ji ci màndiŋ mii, nu di fi deesi doŋŋ, nook sunug jur?

<sup>5</sup> Ana loo nu jële woon Misra, di nu indi fu bon fii? Du bérab bu nangu menn jiwu: du figg, du reseñ, du gërenaat, te du siitum ndox mu ñu naan!»

<sup>6</sup> Ba loolu amee Musaa ak Aaróona bàyyikoo ca mbooloo ma, dem ba ca bunt xaymab ndaje ma. Ñu ne gurub, dëpp seen jë fa suuf. Leeru Aji Sax ji nag feeñu leen. <sup>7</sup> Aji Sax ji wax ak Musaa, ne: <sup>8</sup> «Jëlal saw yet, nga dajale mbooloo mi, yaak sa mag Aaróona, ngeen wax ak doj woowu, ñuy gis, mu xelli am ndox. Te nga sottil leen ndox mu jóge ci doj wi, nàndale ko mbooloo mi, ñook seenug jur.»

<sup>9</sup> Ba mu ko defee Musaa jële yet wa fa kanam Aji Sax ji, na mu ko ko sante.

<sup>10</sup> Musaa ak Aaróona nag dajale mbooloo ma fa janook doj wa, Musaa ne leen: «Yeen diŋjatkat yi, dégluleen ma fii! Doj wii, tee nu leen cee génneel am ndox boog?» <sup>11</sup> Ci kaw loolu Musaa yékkati loxoom, dóor yetam ca doj wa ñaari yoon, ndox mu bare wale ca, mbooloo ma daldi naan, ñook seenug jur.

<sup>12</sup> Aji Sax ji nag ne Musaa ak Aaróona: «Gannaaw gëmuleen ma, ngir wormaal sama sellnga fi kanam bànni Israyil, loolu tax na dungeen yóbbu muk mbooloo mii ca réew ma ma leen jox.» <sup>13</sup> Loolooy

walum Meriba, (mu firi Jote ba). Fa la bànni Israyil jote woon ak Aji Sax ji, ba mu biral sellngaam fa seen biir.

### *Edom bañ na*

<sup>14</sup> Gannaaw gi, Musaa moo yebale ay ndaw fa dëkk ba ñuy wax Kades, ñu dem ca buurub Edom, ne ko: «Israyil say bokk dañoo wax ne: Umplewoo mboolem coono bi nu daj. <sup>15</sup> Sunuy maam a demoon Misra; dëkk nanu Misra lu yàgg, waa Misra di nu mitital, na woon ca sunuy maam. <sup>16</sup> Ci biir loolu nu woo Aji Sax ji wall, mu dégg sunu yuux, daldi yebal malaaka, mu génne nu Misra. Léegi nu ngi nii fi Kades, dëkk bi digalook sam réew. <sup>17</sup> Ngalla nag may nu, nu jaare sam réew. Dunu fi jaare benn tool, mbaa ab tóokëru reseñ, dunu fi naane ndoxum benn teen. Mbeddum buur daal lanuy topp, dunu jàdd ndijoor ak càmmoñ, ba keroog nuy génn sam réew.»

<sup>18</sup> Buurub Edom nag ne leen: «Dungeen jaare fi man de, lu ko moy saamar laay génne, dajeek yeen.»

<sup>19</sup> Ndawi bànni Israyil ne ko: «Sél wi rekk lanuy topp, te ndox mu nu naan, nook sunug jur, noo la koy fey. Ñaanunu lenn lu moy doxe sunuy tànk, ba jàll.» <sup>20</sup> Mu ne leen: «Dungeen fi jaare muk!» Ci kaw loolu Edom génn ngir dajeek ñoom, ànd ak gàngoor gu réy, gannaayu ba diis. <sup>21</sup> Noonu la Edom lànke, mayul Israyil mu jaare réewam, ba Israyil mujj teggi.

### *Aaróona nelaw na*

<sup>22</sup> Ci kaw loolu mbooloom bànni Israyil gépp bàyyikoo Kades, ba ca tundu Or.

<sup>23</sup> Aji Sax ji wax ak Musaa ak Aaróona, ca Or, tund wa ca kemu réewum Edom. Mu ne: <sup>24</sup> «Dees na tërali Aaróona fa ay bokkam. Du dugg déy ca réew ma ma jox bànni Israyil, gannaaw yeena gántaloon sama ndigal ca walum Meriba.

<sup>25</sup> Àndal ak Aaróona ak doomam Elasar, nga yéegé leen ca kaw tundu Or. <sup>26</sup> Te nga summi yérey carxal yu Aaróona, solal ko doomam Elasar. Aaróona moom, dees koy tërali ca ay bokkam. Foofa lay deeye.»

\* **20:1** 20.1 Jombul muy seen ñeent fukkeelu at, gannaaw seen wëreelu ba. Seetal ci saar 22-29 ak 33.38.

<sup>27</sup> Ba loolu amee Musaa def la ko Aji Sax ji sant, ñu ànd yéeg kaw tundu Or, mbooloo ma mépp di gis. <sup>28</sup> Musaa summi yérey Aaróona, solal ko doomam Elasar; Aaróona dee foofa ca kaw tund wa, Musaa ak Elasar wàcc tund wa. <sup>29</sup> Mbooloo ma mépp nag xam ne Aaróona dèddu na. Waa kër Israyil gépp a ko jooy diiru fanweeri fan.

## 21

### *Bànni Israyil am na ndam*

<sup>1</sup> Kanaaneen ba, buurub Arat ba dèkke woon Negew, moo dégg ne Israyil a ngay jaare yoonu Atarim, di dikk. Mu xareek Israyil, jàpp ñenn ca ñoom. <sup>2</sup> Ci kaw loolu Israyil xasal Aji Sax ji aw xas, ne ko: «Soo tegee ba teg mbooloo mii ci sunuy loxo déy, dinanu faagaagal seeni dèkk.» <sup>3</sup> Aji Sax ji nangul Israyil, jébbal leen Kanaaneen ña, ñu faagaagal leen, ñook seeni dèkk. Ñu daldi wooye gox ba Xorma (mu firi Lu ñu faagaagal).

### *Lu jëm ci nattub jaan ya*

<sup>4</sup> Ñu bàyyikoo tundu Or, jubal yoonu gééju Barax ya, ngir teggi réewum Edom. Mbooloo ma nag mujj xàddi ca yoon wa. <sup>5</sup> Ña ngay xultu ca kaw Yàlla ak Musaa, naa: «Lu ngeen nu doon jële Misra, ngir nu dee ci màndiŋ mi? Duw ñam, dum ndox, te wii ñamu toskare génnliku nan!» <sup>6</sup> Ba loolu amee Aji Sax ji yebal ay jaani danjar ca biir mbooloo ma, ñu màtt leen, ba ñu bare ci bànni Israyil dee. <sup>7</sup> Mbooloo ma dikk ba ci Musaa, ne ko: «Noo tooñ, ndax noo xultu ci kaw Aji Sax ji, ak ci sa kaw. Tinul nu Aji Sax ji, mu teggil nu jaan yi!» Musaa daldi tinul mbooloo ma. <sup>8</sup> Aji Sax ji ne Musaa: «Defarlul jëmmu jaan ju am danjar, nga wékk ko ci bant. Su ko defee képp ku ñu màtt, boo ca xoolée, muc.» <sup>9</sup> Ci kaw loolu Musaa defarlu jaanu xànjari, wékk ko ci bant, ba képp ku jaan màtt, bu xoolée jaanu xànjari ja, daldi muc.

### *Israyil daan na Siwon ak Og*

<sup>10</sup> Bànni Israyil fabooti, dem ba dali fa ñuy wax Obot, <sup>11</sup> jóge Obot, dali Yee Abarim, ca màndiŋ ma janook Mowab,

ca penku ba. <sup>12</sup> Foofa lañu faboo, dem ba dali ca walum Sereed, <sup>13</sup> bàyyikooti foofa, dem ba dali ca wàllaa dexu Arnon, ga wale ca réewum Amoreen ña te jaare ca màndiŋ ma. Dexu Arnon googa, fa la réewum Mowab digalook Amoreen ñi. <sup>14</sup> Moo tax téereb Xarey Aji Sax ji indi ko, ne:

«Waxeb ga ca Sufa,

xuri Arnon yaak

<sup>15</sup> xur ya bartalu,

jëm néegi Ar, leruji suufas Mowab.»

<sup>16</sup> Fa lañu bàyyikoo, dem Beer, (mu firi ab Teen); teen boobu, fa la Aji Sax ji noon Musaa: «Dajaleel mbooloo mi, ma may leen ndox.» <sup>17</sup> Ca la Israyil woy woy wii: «Teen bile walal, nu woy.

<sup>18</sup> Ay garmee la bënn,

kàngami askan wi gase la yeti buur,  
ak seen banti bopp.»

Ñu jóge màndiŋ ma, dem ba Matana, <sup>19</sup> jóge Matana dem Naxaliyel, jóge Naxaliyel, dem Bamot, <sup>20</sup> jóge Bamot ba ca xur, wa ca àllub Mowab, àkki nag njobbaxtaluu tundu Pisga, wa tiim ndànd-foyfoy ga.

<sup>21</sup> Ba loolu amee Israyil yebal ay ndaw ca Siwon buurub Amoreen ña, ne ko: <sup>22</sup> «May nu, nu jaare sam réew. Dunu fi jàdde benn tool mbaa ab tóokëru reseñ, dunu fi naan ndoxum teen. Mbeddum buur lanuy topp, ba keroog nuy jáll sam réew.» <sup>23</sup> Siwon nag mayul Israyil, ñu jaarem réewam, xanaa mu dajale gàngooram gépp, sàqi, ngir dajeeek Israyil ca màndiŋ ma. Mu dikk ba Yaxacc, song Israyil, <sup>24</sup> Israyil leel ko ñawkay saamar, nangu seenum réew, dale ko Arnon ba Yabog, ba àgg ca Amoneen ña, ndax kemu réewum Amoneen ñaa fegu woon ba jotuwul. <sup>25</sup> Israyil nangu dèkki Amoreen yooyu yépp, daldi sance mboolem seeni dèkk, boole ca Esbon aki dèkk-dèkkaanam.

<sup>26</sup> Esbon moo doon péeyub Siwon buurub Amoreen ña. Kookoo xare woon ak buuru Mowab ba woon, moo nangu ciy loxoom réewam mépp, ba Arnon. <sup>27</sup> Moo tax woykat ya ne:

Ayca ca Esbon, ba tabaxees kooti;  
na dèkkub Siwon jógati.

<sup>28</sup> Lakk gaa nga jóge Esbon, sawaraa bawoo dëkkub Siwon ba, xoyomi Ar ga ca Mowab, gor ñooña tiim dexu Arnon.

<sup>29</sup> Mowabee ngalla yaw!

Sàнку ngeenee, yeen askanu Kemos\*, mi wacc doomam yu góor, ñu daw, doomam yu jigéen doon jaami Siwon buurub Amor.

<sup>30</sup> Noo leen fitt, Esbon ba Dibon rajaxoo, nu rajaxeeti ba Nofa, ba àkki Medeba.

<sup>31</sup> Israyil nag dëkke réewum Amoreen ña. <sup>32</sup> Ba loolu amee Musaa yebal ay ndaw, ñu yëri dëkk ba ñuy wax Yaser. Gannaaw gi bànni Israyil nangu dëkk-dëkkaan ya, daldi fay dàqe Amoreen ña.

<sup>33</sup> Ba mu ko defee ñu walbatiku, awe yoonu Basan, Og buuru Basan ànd ak gàngooram gépp, dajejeek ñoom, song leen xare ca Eddrey. <sup>34</sup> Aji Sax ji ne Musaa: «Bu ko ragal, ndax ci say loxo laa ko teg, mook gàngooram gépp akum réewam, nga def ko na nga defoon Siwon buurub Amoreen ba woon fa Esbon.» <sup>35</sup> Ci kaw loolu ñu jam Og, mooki doomam ak gàngooram gépp, ba desewul kuy dund, ñu daldi nangu réewam.

## Balaam gis na céru barke bi ñeel Israyil

### 22

(Saar 22—25)

#### *Buur Balag woo na Balaam wall*

<sup>1</sup> Bànni Israyil demati ba dali ca joori Mowab ca wàllaa dexu Yurdan, janook Yeriko. <sup>2</sup> Fekk na Balag doomu Sippor gis mboolem la bànni Israyil def Amoreen ña. <sup>3</sup> Mowab nag am tiitaange ju réy ca gàngooru bànni Israyil, ndax bare. Mowab jàq na ba mu gisee bànni Israyil. <sup>4</sup> Ci kaw loolu Mowab giseek magi Majan, ne leen: «Ndiiraan wii kat, ni nag di forem parlu ba mu set, ni lañu nara ñédde li nu wër lépp, ba mu set.»

Jant yooyu Balag doomu Sippor moo doon buuru Mowab. <sup>5</sup> Mu yebal ay ndaw ca Balaam doomu Bewor ngir wooyi ko,

\* 21:29 21.29 Kemos: tuurum Mowabeen ñi la woon.

ca Petor ga Balaam cosaanoo, ca tàkkal dex ga\* ngir ne ko: «Balaam! Gàngoor a ngii jóge Misra. Ñu ngii lal suuf si ba mu daj, te ñoo sanc, janook man màkk. <sup>6</sup> Kon nag dikkal gaaw ñaanal ma yàlla gàngoor gii, ngir ñoo ma èpp doole. Jombul ma duma leen, ba dàq leen réew mi, ndax xam naa ne koo ñaanal, mu barkeel, te koo ñaan-yàlla, mu alku.»

<sup>7</sup> Ci kaw loolu magi Mowab ànd ak magi Majan, dem, yóbbaaale ay weexal. Ba ñu agsee ca Balaam, daldi koy àgge kàdduy Balag. <sup>8</sup> Mu ne leen: «Fanaanleen fii guddig tey. Tont lu ma ci Aji Sax ji sant rekk, dinaa leen ko àgge.» Kàngami Mowab dal ak Balaam.

<sup>9</sup> Yàlla nag dikkal Balaam, ne ko: «Nit ñii fi yaw, ñu mu doon?» <sup>10</sup> Balaam ne Yàlla: «Buuru Mowab Balag doomu Sippor moo yónnee ci man, ne ma: <sup>11</sup> «Balaam, gàngoor a ngii jóge Misra, lal suuf si ba mu daj. Dikkal gaaw móolul ma leen. Jombul ma mana xareek ñoom, ba dàq leen.» <sup>12</sup> Yàlla ne Balaam: «Bul ànd ak ñoom, te bul ñaan-yàlla mbooloo ma, ndax ñooñu ñu barkeel lañu.»

<sup>13</sup> Ba Balaam jógee ca suba sa, da ne kàngami Balag ya: «Delluleen seenum réew, ndax Aji Sax ji bañ na; mayu ma ma ànd ak yeen.» <sup>14</sup> Kàngami Mowab daldi dellu ca Balag, ne ko: «Balaam de bañ naa ànd ak nun.»

<sup>15</sup> Balag dellu yebal kàngam yu gëna bare, te gëna kawé. <sup>16</sup> Ñooña dem ba ca Balaam, ne ko: «Balag doomu Sippor dafa wax ne: “Ngalla, bu la dara teree dikk, wuysi ma. <sup>17</sup> Maa lay teral teraanga ju réya réy. Loo ma wax, ma def. Dikkal rekk, móolul ma gàngoor gii.”» <sup>18</sup> Balaam tontu surgay Balag, ne leen: «Bu ma Balag doon jox kèram ba mu fees ak xalis ak wurus sax, duma mana def lenn lu tuut mbaa lu réy, lu tebbi sama ndigalu Yàlla Aji Sax ji. <sup>19</sup> Waaye yeen it dal-leen fii guddig tey, ba ma xam lu ma Aji Sax jiy waxaat.» <sup>20</sup> Ci kaw loolu Yàlla dikkal Balaam ca guddi ga, ne ko: «Gannaaw woosi la mooy tànkii ñii, àndal ak ñoom. Waaye nag lu ma la wax rekk, def ko.»

\* 22:5 22.5 Mooy dexu Efraat.

*Mbaam yedd na boroom*

<sup>21</sup> Ca èllëg sa Balaam takk mbaamam, ànd ak kàngami Mowab, dem. <sup>22</sup> Ba loolu amee sànjum Yàlla tàkk ndax yoon wa mu sumb. Malaakam Aji Sax ji nag taxaw ca yoon wa, nara jàńkoonte ak moom, moom mu war mbaamam, ànd ak ñaari surgaam. <sup>23</sup> Ci kaw loolu mbaam ma gis malaakam Aji Sax ji taxaw ca digg yoon wa, xàccib saamaram. Mbaam ma ne walbit, wàcc yoon wa, topp àll ba. Balaam dóor mbaam ma, waññi ko ba ca yoon wa. <sup>24</sup> Ba mu ko defee malaakam Aji Sax ji taxawi fu yoon wa def ñall wu sew wu jaare digg tóokëri reseñ, ñaari miir séq ko. <sup>25</sup> Mbaam ma gis malaakam Aji Sax ji, daldi tafu ca miir ba, ba tancaale ca tánkub Balaam. Balaam dellu ko dóor. <sup>26</sup> Malaakam Aji Sax ja dellu jiitu, ba taxawi fu xat, ba maneesula weesalook moom, du ndijoor, du càmmoñ. <sup>27</sup> Mbaam ma gis malaakam Aji Sax ja, daldi ne wàpp goor ca suufu Balaam, xol ba fuddu, mu dóorati mbaam ma yet wa.

<sup>28</sup> Ba loolu amee Aji Sax ji tijji gémmiñu mbaam mi, mu ne Balaam: «Ana lu ma la def, ba ñetti yoon a ngii nga di ma dóor?» <sup>29</sup> Balaam ne mbaam mi: «Yaa may foontoo, su ma yoroon saamar, léegi laa lay rey!» <sup>30</sup> Mu ne ko: «Xanaa du maay sa mbaam mi ngay war bu yàgg ba nga ma moomee, ba tey jii? Dama laa masa def nii?» Mu ne ko: «Déédéet.»

<sup>31</sup> Aji Sax ji nag ubbi bëti Balaam, mu gis malaakam Aji Sax ja, mu taxaw ca yoon wa, xàccib saamaram. Mu ne gurub sukk, dëpp jëem fa suuf. <sup>32</sup> Malaakam Aji Sax ji ne ko: «Lu tax ngay dóor sa mbaam mi ñetti yoon nii? Man mii maa dikk, jàńkoonteeke yaw, ndax yoonu sàńkute laa gis. <sup>33</sup> Mbaam mi moo ma gis, teggi ma ba muy ñetti yoon nii. Bu ma teggiwuloon déy, yaw laay rey; moom, ma ba ko, mu dund.» <sup>34</sup> Balaam ne malaakam Aji Sax ji: «Maa tooñ, ndax xawma woon ne yaa taxaw, dogale ma ci yoon wi. Léegi nag su la yoon wi neexul, ma daldi dëpp.» <sup>35</sup> Malaakam Aji Sax ji ne Balaam: «Àndal ak nit ñi, waaye daal lu ma la

waxloo rekk, wax ko.» Balaam nag ànd ak kàngami Balag, dem.

*Balaam tase na ak Balag*

<sup>36</sup> Ba loolu amee Balag dégg ne Balaam a ngay ñëw, mu gatanduji ko ca dëkku Mowab, ba digalook dexu Arnon, ca catu réew ma. <sup>37</sup> Balag ne Balaam: «Xanaa yeblewuma woon, ba yebleeti, di la woolu? Lu la tee woona ñëw? Am dama laa manula teral?» <sup>38</sup> Balaam ne Balag: «Maa ngii, wuysi la, waaye mbaa sañ naa waxal sama bopp lenn? Kàddu gu ma Yàlla waxloo de, moom laay wax.»

<sup>39</sup> Ci kaw loolu Balaam ànd ak Balag ba Kiryaat Xusot. <sup>40</sup> Balag daldi sarxe ay nag aki xar, sédd ca Balaam ak kàngam ya ko dar. <sup>41</sup> Ca suba sa Balag ànd ak Balaam, yéegge ko ba ca kaw jaamookaay ba ñu dippee Baal, tuur ma, mu tollu fa di séen lenni catu mbooloo ma.

**23***Balaam ñaanal na Israyil*

<sup>1</sup> Ba loolu amee Balaam ne Balag: «Tabaxal ma fii juróom ñaari sarxalukaay, te waajalal ma fi juróom ñaari yëkk yu ndaw, ak juróom ñaari kuuy.»

<sup>2</sup> Balag def na ko Balaam wax, Balag ak Balaam ku ci nekk sarxal wenn yëkk ak menn kuuy ci sarxalukaay bu nekk.

<sup>3</sup> Balaam ne Balag: «Taxawal fii ci sa saraxu rendi-dóomal, ma dem ba nee. Jombul Aji Sax ji dikk, dajeek man. Mbir mu mu ma won, dinaa la ko àgge.» Mu daldi dem ba ca kaw tund wu ndaw wu dara saxul.

<sup>4</sup> Ba loolu amee Yàlla dikk, dajeek Balaam, Balaam ne ko: «Ñaari sarxalukaay yi, yékkati naa leen te sarxalukaay bu ci nekk, sarxal naa ci wenn yëkk ak menn kuuy.» <sup>5</sup> Aji Sax ji nag yeb kàddu ci gémmiñu Balaam, daldi ne ko: «Dellul ca Balag, te nga waxe noonu.»

<sup>6</sup> Balaam dellu ca moom, fekkul lu moy mu taxaw ca saraxu dóomalam, moom ak kàngami Mowab yépp. <sup>7</sup> Balaam yékkati kàddug ñaanam, ne:

«Fa Aram la ma Balag buuru Mowab jële, foofa ca tundi penku ya, ne ma: “Kaay ñaanal ma yàlla Yanqóoba,



Dikkal rëbbal ma Israyil mii.”

<sup>8</sup> Moo nu may móoloo ku Yàlla móoluwul?

Ana nu may rëbbe ku Aji Sax ji rëbbul?

<sup>9</sup> Kaw doj yii laa tollu di leen séen, fi kawte yii laa leen jéere.

Aw askan a ngii, dëkke fu beru, te bokkuñu ak xeet yi.

<sup>10</sup> Ana kuy lim feppi suuf, ba lim askanu Yanqóoba?

Ku mana waññ xaajaatub Israyil gii?

Man de, yal naa dee deewinu aji jub ñii, yal na sama muj mel ni gu askan wii!»

### *Balaam baamu na ñaanam*

<sup>11</sup> Ba loolu amee Balag ne Balaam: «Yaw, li nga ma def nag? Móolu samay noon laa la jële, yaw defoo lenn lu moy ñaanal leen?» <sup>12</sup> Mu ne ko: «Xanaa du kàddu gu Aji Sax ji yeb sama gémmiñ, moom laa wara sàmm, ngir wax ko?»

<sup>13</sup> Balag ne ko: «Kaay rekk, topp ma, ba feneen fooy tollu di leen gis. Seen cat doŋŋ ngay gis nag, waaye doo leen gis ñoom ñépp. Su ko defee nga móolul ma leen foofu.» <sup>14</sup> Mu daldi koy yóbbu ba ca toolub Sofim, ca collu tundu Pisga. Ci kaw loolu mu tabax fa juróom ñaari sarxalukaay, sarxalukaay bu nekk, mu sarxalati fa yëkk wu ndaw akam kuuy.

<sup>15</sup> Balaam ne Balag: «Taxaweel nii ci sa saraxu rendi-dóomal, man ma séentuji nee.»

<sup>16</sup> Ba loolu amee Aji Sax ji dajeek Balaam, daldi yeb kàddu ci gémmiñam, ne ko: «Dellul ca Balag, te nga waxe noonu.» <sup>17</sup> Mu dem ba ca moom, fekku ko lu moy mu taxaw ca wetu saraxu rendi-dóomalam, mook kàngami Mowab. Balag ne ko: «Lu Aji Sax ji wax?»

<sup>18</sup> Balaam daldi yékkati kàddug ñaanam, ne:

«Jógal déglóo, Balag, teewlu maa, doomi Sippor.

<sup>19</sup> Yàlla du nit, bay fen, du doom aadama bay tuub.

Moom wax na lu mu deful a?

Am àddu na lu mu sotalul?

<sup>20</sup> Kàddug barkeel gii laa jot ndigalam, Yàllaa barkeel, duma ko tebbi.

<sup>21</sup> Séeneesul aw ay ci askanu Yanqóoba, giseesul aw naqar ci xeetu Israyil wii.

Seen Yàlla Aji Sax jee ànd ak ñoom, njiinum buur a jibe fa seen biir.

<sup>22</sup> Yàllaa leen jële Misra, féete leen fa ay béjjén féete nagu àll.

<sup>23</sup> Ñeengo jàppul Yanqóoba, gisaane gisul Israyil gii.

Lu jot rekk, àggees ko Yanqóoba: ne ko: «Israyiloo, lii la Yàlla def.»

<sup>24</sup> Wii askan ni gaynde lay jóge, ni gayndeg sibi lay faboo,

du goor te yàppul am pàdd, deret ja tuuru, mu xab.»

<sup>25</sup> Ba loolu amee Balag ne Balaam: «Boo leen móoluwul benn yoon kay, bu leen ñaanal ba doyal boog!» <sup>26</sup> Balaam ne ko: «Xanaa waxuma la woon ne la lépp lu Aji Sax ji wax, loolu laay def?» <sup>27</sup> Balag ne ko: «Kaay rekk, ma yóbbu la feneen. Jombul Yàlla nangu nga móolool ma leen foofu.» <sup>28</sup> Balag yóbbu Balaam ba ca collu tundu Pewor, wa tiim ndànd-foyfoy ga. <sup>29</sup> Balaam ne Balag: «Tabaxal ma fii juróom ñaari sarxalukaay, te nga waa-jalal ma fi juróom ñaari yëkk yu ndaw, ak juróom ñaari kuuy.» <sup>30</sup> Balag def na Balaam wax, ba noppi sarxal aw yëkk wu ndaw akam kuuy ci kaw sarxalukaay bu nekk.

## 24

### *Balaam ñaanalati na Israyil*

<sup>1</sup> Balaam nag gis ne Aji Sax ji la neex mu barkeel Israyil, ba tax sàkkootul ay takk na woon, xanaa mu walbatiku, janook màndiŋ ma. <sup>2</sup> Ci kaw loolu Balaam dawal bëtam, daldi séen Israyil, na ñu dale topp seeni giir, Noowug Yàlla daldi wàcc ca moom. <sup>3</sup> Ba mu ko defee mu yékkati kàddug ñaanam, ne:

«Kàddug Balaam a ngi, doomu Bewor, kàddug waa jiy boroom ngis,

<sup>4</sup> kàddug kiy dégg waxi Yàlla,

Aji Man ji wonem peeñu, mu gis, kiy daanu leer, te ay gëtam muriku.

<sup>5</sup> Yanqóobaa, yaaka yànji xayma! Israyil, laa ne, yaaka taaruy màkkaan!

<sup>6</sup> Ña nga ne màww ni tooli tàndarma, nirooteek tóokèri tàkkal dex,

mbaa garabu alowes gu xeeñ gu Aji Sax ji jëmbat,

mbaa garabi seedar yu saxe wali ndox.

<sup>7</sup> Ndox maay wale cay bagaanam, am jiwoom màndim ndox, buuram nara sut Buur Agag, nguuram jóg ba kawe.

<sup>8</sup> Yàllaay ki ko jële Misra, féete ko fa ay béjjén féete nagu àll. Mooy warax xeet yi ko jógal, dammat leen, jamat leeni fittam.

<sup>9</sup> Israyil a ngi yuug ak a goor ni gaynde, mbete gayndeg sibi, ana ku koy yee? Ku ko ñaanal barke, yaay barkeel; ku ko ñaanal alkànde, yaay alku.»

### *Balaam gis na ëllëgu Israyil*

<sup>10</sup> Ba loolu amee Balag sànju ci kaw Balaam, daldi fenqey loxoom. Ci kaw loolu Balag ne Balaam: «Móolu samay noon laa la wooye woon, yaw defoo lu moy ñaanal leena ñaanal, ba muy ñetti yoon nii! <sup>11</sup> Léegi nag, laggal ñibbi. Noon naa la dinaa la teral bu baax, waaye mu ngoog, Aji Sax jee la xañ teraanga.»

<sup>12</sup> Balaam ne Balag: «Xanaa du sa ndaw yi nga yebaloon ci man sax, waxoon naa leen ne leen, <sup>13</sup> su ma Balag joxoon kërám ba mu fees ak xalis ak wurus sax, duma mana def ci sama coobarey bopp, lenn lu baax mbaa lu bon, lu tebbi ndigalu Yàlla Aji Sax ji? Li Aji Sax ji wax rekk, moom laay wax. <sup>14</sup> Léegi nag maa ngi dellu ca saay bokk, waaye kaay, ma xamal la li xeet wii di def saw xeet, fan yu mujj ya.» <sup>15</sup> Ci kaw loolu mu yékkati kàddug ñaanam, ne:

«Kàddug Balaam a ngi, doomu Bewor, kàddug waa jiy boroom ngis,

<sup>16</sup> kàddug kiy dégg waxi Yàlla, kiy xame ca xam-xamu Aji Kawe ji, Aji Man ji wonem peeñu, mu gis, kiy daanu leer, te ay gëtam muriku.

<sup>17</sup> Maa ngi koy gis, te du tey, Maa ngi koy niir, te jubseegul; biddiww a feqe fa Yanqóoba, yetu nguur a yékkatikoo fa Israyil, daldi toj boppi Mowab,

toj kaanji mboolem askanu Set.

<sup>18</sup> Edom, mu moom; Seyir, noonam, muy boroom;

Israyil def jaloore.

<sup>19</sup> Fa Yanqóoba la buur di bawoo,

dem ñéddi ndesu dëkk ba.»

### *Balaam gis na mujug nooni Israyil*

<sup>20</sup> Ci kaw loolu Balaam geesu réewum Amaleg, dellu yékki kàddug ñaanam, ne: «Amaleg moo sutu xeet, te sàнку lay mujje.»

<sup>21</sup> Mu teg ca geesu réewum Keneen ña, yékkeeti kàddug ñaanam, ne: «Keneen ñee wér ab dëkkuwaay, seenub tàgg a làqoo biir doj.

<sup>22</sup> Waaye réewum Keneen gépp ay xoy-omu,

ba leen Asur di yóbbuji njaam.»

<sup>23</sup> Mu delloti yékki kàddug ñaanam, ne: «Wóoy kuy dund, keroog bu Yàlla dogalee lii?

<sup>24</sup> Ay gaal ay jóge tefesu Kitim, néewalsi doole Asur, néewalsi doole Eber.

Waaye ñoom it dañuy mujj sàнку.»

<sup>25</sup> Ci kaw loolu Balaam ñibbi am réewam, Balag it demu yoonam.

## 25

### *Bànni Israyil bokkaale na ca réewum Mowab*

<sup>1</sup> Ci kaw loolu Israyil dale fa Sitim. Mbooloo ma nag tàmbali di moy ak jigéeni Mowab. <sup>2</sup> Jigéen ña di woo mbooloo ma ca seen saraxi tuur ya, mbooloo ma di lekk ak a sujjóotal seeni tuur. <sup>3</sup> Israyil nag taqook tuur ma ñuy wax Baal Pewor, ba sànjum Aji Sax ji tàkkal Israyil. <sup>4</sup> Aji Sax ji ne Musaa: «Jàppal njiiti mbooloo mi yépp, nga wékk leen ci bant fi kanam Aji Sax ji, bëccëg ndarakàmm, ngir sànjum Aji Sax ji dëddu Israyil.» <sup>5</sup> Musaa ne àttekati Israyil: «Na ku nekk ci yeen rey nitam ñi taqook Baal Pewor.»

<sup>6</sup> Ci biir loolu rekk, jenn waayu bànni Israyil dikk, indaale senn ndawas waa Majan ci biiri bokkam, Musaa ak mbooloom Israyil mépp di gis, fekk ñoom ñuy jooyoo fa bunt xaymab ndaje ma.

<sup>7</sup> Fineyas, doomu Elasar, doomu sarxalkat ba Aaróona, gis loolu, daldi jóge ca mbooloo ma, jël ab xeej. <sup>8</sup> Mu topp waayi Israyil ja ba ca biir néeg ba, daldi leen boole bennub xeej, ñoom ñaar, jam waayi

Israyil ji, ba jamaale ndaw si ci biir. Ba mu ko defee mbas ma jotoona dal ca kaw bànni Israyil daldi dakk. <sup>9</sup> Ña dee ca mbas ma nag di ñaar fukki junneek ñeent (24 000).

<sup>10</sup> Ba loolu weesee Aji Sax ji wax Musaa, ne ko: <sup>11</sup> «Fineyas, doomu Elasar, doomu sarxalkat bi Aaróona, moo moyale Israyil samam sànj, ndax sama fiiraange gi mu ma fiirlee ci seen biir, ba faagaagaluma bànni Israyil ci sama biir fiiraange. <sup>12</sup> Kon nag nee ko: Maa ngii di ko baaxe sama kóllèreg jàmm, <sup>13</sup> mu ñeel ko, mook askan wi koy wuutu, te di kóllèreg carxal gu sax dàkk, ndax moo fiire Yàllaam, ba jot bànni Israyil.»

<sup>14</sup> Waayi bànni Israyil ja ñu jamoon, te boole kook ndawas Majan sa jam, mooy Simri doomu Salu. Kilifag kër maamam la woon ca Cimyoneen ña. <sup>15</sup> Ndawas Majan sa ñu jam di Kosbi. Baayam Sur doonoon kilifag kër maamam ca giirug Majan ga mu bokk.

<sup>16</sup> Ci kaw loolu Aji Sax ji wax Musaa, ne ko: <sup>17</sup> «Noonooleen waa Majan yii, te rey leen, <sup>18</sup> ndax ñoom ñoo leen noonoo woon ba ñu leen woree ca mbirum Pewor ma, ak itam ca mbirum ndaw sa Kosbi, seen mbokk may doomu kilifag Majan ja, te ñu jam ko keroog bésu mbas, ma sababoo ca mbirum Baal Pewor, tuur ma.»

## Israyil dégg na ab artoom balaa dugg Kanaan

(Saar 26—36)

*Ñaareelu limeefu bànni Israyil taxaw na*

<sup>19</sup> Gannaaw ba mbas ma wéyee,

## 26

<sup>1</sup> Aji Sax ji dafa wax Musaa, ak Elasar doomu Aaróona sarxalkat ba, ne leen: <sup>2</sup> «Waññleen mbooloom bànni Israyil gépp, ngeen lim turi góor ñépp, na ñu bokke seen kəri maam, dale ko ci ñi am ñaar fukki at, jëm kaw, mboolem ñi xare war ci bànni Israyil.» <sup>3</sup> Musaa ak Elasar sarxalkat ba wax ak ñoom ca joori Mowab, fa janook Yeriko ca wetu dexu Yurdan; ñu ne leen <sup>4</sup> ñi dale ci ñaar fukki

at, jëm kaw lees di lim, na ko Aji Sax ji sante Musaa. Lii moo di limeefu nit ña soqikoo ci bànni Israyil, ña génne woon Misra:

<sup>5</sup> Ruben moo doon taawub Israyil. Ñi askanoo ci Ruben ñoo di Anog mi sos làngu Anogeen ñi, ak ñoom Palu mi sos làngu Paluween ñi, <sup>6</sup> ak ñoom Esron mi sos làngu Esroneen ñi, ak ñoom Karmi mi sos làngu Karmeen ñi. <sup>7</sup> Làngi Rubeneen ñaa ngoogu, ña ñu leen limal di ñeent fukki junneek ñett ak juróom ñaar téeméer ak fanweer (43 730).

<sup>8</sup> Palu moo meññ Elyab, <sup>9</sup> Elyab meññ Nemwel ak Datan ak Abiram. Datan ak Abiram ñooñii doonooni njiit ca mbooloo ma, ñoo doon diiŋat Musaa ak Aaróona. Ña nga bokkoon ca gàngooru Kore, ba ñuy diiŋat Aji Sax ji, <sup>10</sup> ba suuf sa xar, boole leen ak Kore, wonn, keroog ba gàngoor ga sànkoo, te sawara wa lakk ñaar téeméeri nit ak juróom fukk, ñu daldi doon firnde luy artoo. <sup>11</sup> Doomi Kore ya nag deewuñu ca.

<sup>12</sup> Ñi askanoo ci Simeyon, ñook seeni làng ñoo di ñoom Nemwel mi sos làngu Nemweleen ñi, ak ñoom Yamin mi sos làngu Yamineen ñi, ak ñoom Yakin mi sos làngu Yakineen ñi, <sup>13</sup> ak ñoom Sera mi sos làngu Cerayeen ñi, ak ñoom Sawul mi sos làngu Cawuleen ñi. <sup>14</sup> Làngi Cimyoneen ñaa ngoogu, di ñaar fukki junneek ñaar ak ñaar téeméer (22 200).

<sup>15</sup> Ñi askanoo ci Gàdd, ñook seeni làng ñoo di ñoom Cefon mi sos làngu Cefoneen ñi, ak ñoom Agi mi sos làngu Ageen ñi, ak ñoom Suni mi sos làngu Cuneen ñi, <sup>16</sup> ak ñoom Osni mi sos làngu Osneen ñi, ak ñoom Eri mi sos làngu Ereen ñi, <sup>17</sup> ak ñoom Arodd mi sos làngu Aroddeen ñi, ak ñoom Areli mi sos làngu Areleen ñi. <sup>18</sup> Làngi Gàddeen ñaa ngoogu, ña ñu leen limal di ñeent fukki junneek juróomi téeméer (40 500).

<sup>19</sup> Am na nag doomi Yuda yu ñuy wax Er ak Onan. Waaye Er ak Onan ña ca réewum Kanaan lañu faatoo. <sup>20</sup> Ñi askanoo ci Yuda, ñook seeni làng ñoo di ñoom Sela mi sos làngu Celaneen ñi, ak ñoom Peres mi sos làngu Pereseen ñi, ak ñoom Sera mi sos làngu Cerayeen

ñi. <sup>21</sup> Ñi askanoo ci Peres ñoo di ñoom Esron mi sos làngu Esroneen ñi, ak ñoom Amul mi sos làngu Amuleen ñi. <sup>22</sup> Làngi Yudeen ñaa ngoogu, ña ñu leen limal di juróom ñaar fukki junneek juróom benn ak juróomi téeméer (76 500).

<sup>23</sup> Ñi askanoo ci Isaakar, ñook seeni làng ñoo di Tola mi sos làngu Toleen ñi, ak ñoom Puwa mi sos làngu Puween ñi, <sup>24</sup> ak ñoom Yasub mi sos làngu Yasubeen ñi, ak ñoom Simron mi sos làngu Simroneen ñi. <sup>25</sup> Làngi Isaakar a ngoogu. Ña ñu leen limal di juróom benn fukki junneek ñeent ak ñetti téeméer (64 300).

<sup>26</sup> Ñi askanoo ci Sabulon, ñook seeni làng ñoo di ñoom Seredd mi sos làngu Sereddeen ñi, ak ñoom Elon mi sos làngu Eloneen ñi, ak ñoom Yaleel, mi sos làngu Yaleleen ñi. <sup>27</sup> Làngi Sabuloneen ñaa ngoogu, ña ñu leen limal di juróom benn fukki junni ak juróomi téeméer (60 500).

<sup>28</sup> Ñi askanoo ci Yuusufa nag, ñook seeni làng, ñoo soqikoo ci Manase ak Efrayim. <sup>29</sup> Ñi soqikoo ci Manase ñoo di ñoom Makir mi sos làngu Makireen ñi. Makir moo jur Galàdd. Ci Galàdd la làngu Galàddeen ñi soqikoo. <sup>30</sup> Ñii ñoo askanoo ci Galàdd: Yeser mi sos làngu Yesereen ñi, ak ñoom Eleg mi sos làngu Elegeen ñi, <sup>31</sup> ak Asriyel mi sos làngu Asriyeleen ñi, ak Sikem mi sos làngu Sikemeen ñi, <sup>32</sup> ak Semida mi sos làngu Semideen ñi, ak Efer mi sos làngu Efereen ñi. <sup>33</sup> Selofat doomu Efer nag amuloon doom ju góor, xanaa aw jigéen donŋ. Doomi Selofat yu jigéen di Maala ak Nowa ak Ogla ak Milka ak Tirca. <sup>34</sup> Làngi Manasee ngoogu, ña ñu leen limal di juróom fukki junneek ñaar ak juróom ñaar téeméer (52 700).

<sup>35</sup> Ñii nag ñoo askanoo ci Efrayim, ñook seeni làng: ñoom Sutela mi sos làngu Cuteleen ñi, ak ñoom Beker mi sos làngu Bekereen ñi, ak ñoom Taxan mi sos làngu Taxaneen ñi. <sup>36</sup> Ñii nag, askanu Sutela lañu: ñoom Eran, ak làngu Eraneen ñi mu sos. <sup>37</sup> Làngi Efrayim a ngoogu, ña ñu leen limal di fanweeri junneek ñaar ak juróomi téeméer (32 500).

Ñooño askanoo ci Yuusufa, ñook seeni làng.

<sup>38</sup> Ñi askanoo ci Beñamin, ñook seeni làng ñoo di ñoom Bela mi sos làngu Belayeen ñi, ak ñoom Asbel mi sos làngu Asbeleen ñi, ak ñoom Ayram mi sos làngu Ayrameen ñi, <sup>39</sup> ak ñoom Sufam mi sos làngu Sufameen ñi, ak ñoom Ufam mi sos làngu Ufameen ñi. <sup>40</sup> Askanu Bela wi sosoo ci Àrd ak Naaman ñoo di làngu Àrdeen ñi, ak làngu Naameen ñi sètoo ci Naaman. <sup>41</sup> Ñooño askanoo ci Beñamin, ñook seeni làng, ña ñu leen limal di ñeent fukki junneek juróom ak juróom benni téeméer (45 600).

<sup>42</sup> Ñii nag ñoo askanoo ci Dan, ñook seeni làng: ñoom Suwam ak làngu Cuwameen ñi. Daneen ñaa ngoogu, na ñu lime seeni làng. <sup>43</sup> Mboolem làngi Cuwameen, ña ñu leen limal juróom benn fukki junneek ñeent la, ak ñeenti téeméer (64 400).

<sup>44</sup> Ñi askanoo ci Aser, ñook seeni làng ñoo di ñoom Imna mi sos làngu Imneen ñi, ak ñoom Iswi mi sos làngu Isween ñi, ak ñoom Berya mi sos làngu Beryeen ñi. <sup>45</sup> Waa askanu Berya ñoo di ñoom Eber mi sos làngu Ebereen ñi, ak ñoom Malkiyel mi sos làngu Malkiyeleen ñi. <sup>46</sup> Doomu Aser ju jigéen nag moo di Sera. <sup>47</sup> Làngi Asereen ñaa ngoogu, ña ñu leen limal di juróom fukki junneek ñett ak ñeenti téeméer (53 400).

<sup>48</sup> Ñi askanoo ci Neftali ñook seeni làng ñoo di ñoom Yàcceel, mi sos làngu Yaceleen ñi, ak ñoom Gunni mi sos làngu Guneen ñi, <sup>49</sup> ak ñoom Yeccer mi sos làngu Yeccereen ñi, ak ñoom Silem mi sos làngu Cilmeen ñi. <sup>50</sup> Neftaleen ñaa ngoogu, ñook seeni làng, ña ñu leen limal di ñeent fukki junneek juróom ak ñeenti téeméer (45 400).

<sup>51</sup> Limeefu bànni Israyil a ngoogu, di juróom benni téeméeri junneek benn ak juróom ñaar téeméer ak fanweer (601 730).

### *Lu jëm ci séddaleb réew ma*

<sup>52</sup> Aji Sax ji nag wax Musaa, ne ko: <sup>53</sup> «Ñii lees di séddale réew mi, te na cér yi dëppook limu nit ñi: <sup>54</sup> làng gu gëna mag, na am cér bu gëna mag, làng gu gëna tuut, am cér bu gëna tuut, làng gu ci nekk,

cér bi dëppook ab limam lees koy jox. <sup>55</sup> Ab tegoo bant donŋ lees di séddalee réew mi, te seen limu giiri maam ya ñu bokk, na dëppook seenub cér. <sup>56</sup> Ci kaw tegoo bant lees di dogale céru giir gu ñu bare séq, ak gu ñu néew séq.»

### *Ñaarelu limeefu Leween ñi taxaw na*

<sup>57</sup> Ñii nag lañu limal Leween ñi ak seeni làng: ñoom Gerson mi sos làngu Gersoneen ñi, ak ñoom Keyat mi sos làngu Keyateen ñi, ak ñoom Merari mi sos làngu Merareen ñi. <sup>58</sup> Ñii itam ci làngu Leween lañu: làngu Libneen ñi, ak làngu Ebroneen ñi, ak làngu Maaleen ñi, ak làngu Museen ñi, ak làngu Korayeen ñi. Keyat nag mooy maamu Amram; <sup>59</sup> soxnas Amram di Yokebedd doomu Lewi, ja juddoo Misra. Yokebedd am ak Amram Aaróona ak Musaa ak Maryaama, seenub jigéen. <sup>60</sup> Aaróona moo jur Nadab ak Abiyu ak Elasar ak Itamar. <sup>61</sup> Nadab ak Abiyu ña nga dee keroog ba ñu taalalee Aji Sax ji cuuraay lu warul. <sup>62</sup> Ña ñu limal Leween ñi nag ñaar fukki junneek ñett lañu (23 000), di mboolem góor ña am weer, jëm kaw, te limaaleesu leen ak bànni Israyil ga ca des, ndax joxeesu leen ab cér ci biir bànni Israyil.

### *Tëj nañu limeef ya*

<sup>63</sup> Ñooñu lañu lim ci njiital Musaa ak Elasar sarxalkat ba, ba ñu ténkee limeefu bànni Israyil ca joori Mowab, ga janook Yeriko, ca tàkkal dexu Yurdan. <sup>64</sup> Ñooñu, kenn desul ca seen biir, te bokkoon ca limeefu bànni Israyil, ba Musaak Aaróona sarxalkat ba jëkkoon ténke ca màndiŋu Sinayi. <sup>65</sup> Ndax ci ñoom la Aji Sax ji noon dee rekk lañuy def ba jeex ca màndiŋ ma. Kenn desu ca, ku dul Kaleb doomu Yefune, ak Yosuwe doomu Nuun.

## 27

### *Lu jëm ci jigéen ñi ak seen céri suuf*

<sup>1</sup> Ci kaw loolu ay doomi Selofat yu jigéen jóg. Seen baay Selofat, Efer ay baayam, Efer, Galàdd ay baayam, Galàdd, Makir ay baayam, Makir, Manasey baayam, Manase, Yuusufaay baayam. Jigéen ñooñu ñoo di Maala ak Nowa ak

Ogla ak Milka ak Tirca. <sup>2</sup> Ñoo taxaw fa kanam Musaa, ak Elasar sarxalkat ba, ak njiit ya, ak mbooloo ma mépp, ca bunt xaymab ndaje ma. Ñu ne: <sup>3</sup> «Sunu baay daa dee ca màndiŋ ma. Moom nag bokkuloon ca gàngooru Kore, ga daje woon ci kaw Aji Sax ji, waaye bàkkaaruu boppam a ko rey. Bàyyiwul nag doom ju góor. <sup>4</sup> Waaye lu tax ñu génne sunu turu baay ci làngam gi mu bokk, ndax ñàkk doom ju góor? Joxleen nu sunub cér ci biir wàll wi sunu bokki baay yu góor bokk ak sunu baay kay!»

<sup>5</sup> Ci kaw loolu Musaa jébbal Aji Sax ji, àtteb jigéen ña. <sup>6</sup> Aji Sax ji wax Musaa ne ko: <sup>7</sup> «Li doomi Selofat yi wax dëgg la. Danga leen di jox kay, ab cér ci biir wàll, wi seen baay bokk ak bokkam yu góor. Su ko defee nga féetale leen seen céru suufu baay.

<sup>8</sup> «Te nga wax bànni Israyil, ne leen: “Bu ku góor deeyee te bàyyiwul doom ju góor, doomam ju jigéen ngeen di jox céru suufam. <sup>9</sup> Su amul doom ju jigéen nag, góor ñi mu bokkal waajur ngeen di jox céru suufam. <sup>10</sup> Su amul góor gu mu bokkal waajur, góor ña baayam bokkal waajur, ñoom ngeen di jox céru suufam. <sup>11</sup> Su baayam amul góor gu mu bokkal waajur, mbokkam mu ko gëna jege ci biir làngam, moom ngeen di jox céru suufam. Kookooy donn cér ba. Na loolu di dogalu yoon, ñeel bànni Israyil, noonu ko Aji Sax ji sante Musaa.”»

### *Yosuwe wuutu na Musaa*

<sup>12</sup> Gannaaw loolu Aji Sax ji ne Musaa: «Yéegil ca kaw tundu Abarim wee, nga séentu réew mi ma jox bànni Israyil. <sup>13</sup> Boo ko séentoo ba noppi, yaw itam dees na la térali ca say bokk, ni sa mag Aaróona, <sup>14</sup> gannaaw yeena diŋat sama ndigal ca màndiŋu Ciin, fa mbooloo ma jote woon ak man. Yeena wormaalul sama sellnga ca kanam mbooloo ma, ca ndox ma. Mooy walum Meriba, (mu firi Jote ba), ma woon ca Kades, ca màndiŋu Ciin.»

<sup>15</sup> Musaa nag wax Aji Sax ji, ne ko: <sup>16</sup> «Aji Sax ji, yaw Yàlla mi moom noowi bépp boroomu suux, ngalla tabbal nit ku

jiite mbooloo mi, <sup>17</sup> kuy xareji, jiite leen, délsi, jiite leen, di leen yóbbu, di leen délloosi, ba mbooloom Aji Sax ji baña mel ni xar yu amul sàmm.» <sup>18</sup> Aji Sax ji ne Musaa: «Jëlal Yosuwe doomu Nuun. Nit la ku noowal biir nekk ci moom. Nanga ko teg sa loxo, sase ko noonu. <sup>19</sup> Taxawal ko fi kanam Elasar sarxalkat bi, ci kanam mbooloo mépp, te nga sas ko ci seen kanam, <sup>20</sup> daldi koy sédd lenn ci sa daraja, ngir mbooloom bànni Israyil mépp déggal ko. <sup>21</sup> Ca Elasar sarxalkat bi nag la war di dem, ngir mu di ko seetal fi kanam Aji Sax ji, lu Urim, jumtukaayu tegtal bi, feeñal. Ci ndigalal Elasar nag lañuy génne, te ci ndigalam it lañuy del-lusee, moom Yosuwe, ak mboolem bànni Israyil giy ànd ak moom, mbooloo mépp.»

<sup>22</sup> Ba mu ko defee Musaa def na ko Aji Sax ji sant. Mu ànd ak Yosuwe, taxawal ko fa kanam Elasar sarxalkat bi, ak mbooloo mépp. <sup>23</sup> Musaa nag teg Yosuwe ay loxoom, daldi koy sas, na ko Aji Sax ji santaanee, mu jottli.

## 28

### *Bés bu nekk laaj na ab sarax*

<sup>1</sup> Aji Sax ji waxati Musaa, ne ko: <sup>2</sup> «Santal bànni Israyil ne leen sama sarax, sama ñam wi jëm ci sama saraxi sawara ngir xetug jàmm, ñeel ma, nañu farlu ci di ma ko indil saa yu àppam jotee. <sup>3</sup> Nga waxleen ne leen, lii moo di saraxu sawara bi ñuy indil Aji Sax ji: xar yu góor yu menn at yu mucc sikk, ñaar ci bés bi, muy saraxu rendi-dóomal bi war bés bu nekk. <sup>4</sup> Menn xar mi, ngeen sarxal ko ci suba, ñaareel bi, ngeen sarxal ko diggante ngoon ak jant bu so. <sup>5</sup> Benn fukkeelu efab sunguf su mucc ayib, di ñetti kilo, mooy saraxu pepp bi xar mu nekk di àndal, ñu tooyale ko walaatu xiinu diwu segalu oliw, di liitar ak genn-wàll. <sup>6</sup> Looloo di rendi-dóomal bi war bés bu nekk, na ñu ko dogale woon ca tundu Sinayi, ngir xetug jàmm, muy saraxu sawara, ñeel Aji Sax ji.

<sup>7</sup> «Saraxu tuuram walaatu xiin lay doon, di liitar ak genn-wàll ngir xar mu ci nekk. Ci ètt bu sell bi lees di sotti saraxu tuuru bi, naan gu diis googu, ñeel

Aji Sax ji. <sup>8</sup> Ñaareelu xar mi, sarxal-leen ko diggante ngoon ak jant bu so, mu ànd ak saraxu peppam ak saraxu tuuram niki ci suba, ngeen def ko saraxu sawara ngir xetug jàmm, ñeel Aji Sax ji.

### *Bés sub Noflaay am na saraxam*

<sup>9</sup> «Bés sub Noflaay nag ñaari xari menn at yu mucc sikk lay doon, ak saraxu peppam, biy ñaari fukkeeli efab sunguf su mucc ayib, di juróom benni kilo, ñu tooyale ko ag diw, te mu ànd ak saraxu tuuram. <sup>10</sup> Looloo saraxu rendi-dóomal bés sub Noflaay, ci bés sub Noflaay bu nekk, te bokkewul ak dóomal bi war bés bu nekk, te ànd ak saraxu tuuram.

### *Terutel weer am na saraxam*

<sup>11</sup> «Te itam seen bési Terutel weer, nangeen sarxe ab rendi-dóomal, ñeel Aji Sax ji. Ñaari yëkk yu ndaw, ak menn kuuy, ak juróom ñaari xar yu góor yu menn at, te lu ci nekk mucc sikk, <sup>12</sup> ak ñetti fukkeeli efab sunguf su mucc ayib, di juróom ñeenti kilo, muy saraxu pepp, ñu tooyale ko ag diw, booleek yëkk wu nekk, ak ñaari fukkeeli efab sunguf su mucc ayib, di juróom benni kilo, muy saraxu pepp, ñu tooyale ko ag diw, booleek kuuy mi, <sup>13</sup> ak benn fukkeelu efab sunguf su mucc ayib, di ñetti kilo, muy saraxu pepp, ñu tooyale ko ag diw, booleek xar mu ci nekk. Saraxu rendi-dóomal la, ngir xetug jàmm, di saraxu sawara, ñeel Aji Sax ji.

<sup>14</sup> «Ay saraxi tuuram genn-wàllu xiinu biiñ la, di ñetti liitar ci yëkk wu nekk, ak benn ñetteelub xiin, di ñaari liitar ci kuuy mi, ak walaatu xiin, di liitar ak genn-wàllu biiñ ci xar mu ci nekk. Looloo dóomal weer wi, weer wu ci nekk, ba weeri at mi daj. <sup>15</sup> Ak itam bennub sikket, mook saraxu tuuram ngir saraxu póotum bàkkaar, ñeel Aji Sax ji ci bés sub Terutel weer wi, te bokkewul ak rendi-dóomal bi ñuy sarxe bés bu nekk.

### *Bés sub Mucc am na saraxam*

<sup>16</sup> «Weer wi jëkk ci at mi nag, fukki fanam ak ñeent mooy bés sub Mucc bi, ñeel Aji Sax ji. <sup>17</sup> Èllëg sa, fukki fani weer woowu ak juróom, di màggal; diiru

juróom ñaari fan, mburu mu amul lawiir lees cay lekk. <sup>18</sup> Bés bu jëkk boobu, woote bu sell lees cay amal. Mboolem lees baaxoo liggéey, deesu ko ci liggéey. <sup>19</sup> Nangeen ci def saraxu sawara, mu dib rendi-dóomal, ñeel Aji Sax ji: ñaari yëkk yu ndaw, ak menn kuuy, ak juróom ñaari xari menn at, te ngeen def lépp di lu mucc sikk. <sup>20</sup> Yooyii ànd ak saraxu peppam, di sunguf su mucc ayib, su ñu tooyale ag diw, ñetti fukkeeli efay sunguf, di juróom ñeenti kilo, ciw yëkk, ñaari fukkeeli efay sunguf, di juróom benni kilo, cim kuuy, <sup>21</sup> ak benn fukkeelu efab sunguf, di ñetti kilo, ci mii xar, benn fukkeelu efa, ca mee, ba juróom ñaari xar yi daj, <sup>22</sup> ak benn sikketu póotum bàkkaar ngir seen njotlaay. <sup>23</sup> Te bokkewul ak rendi-dóomal suba si, rendi-dóomal boobu war bés bu nekk. <sup>24</sup> Sarax yu mel noonu ngeen di sarxal ci bés bi, ak seen saraxu tuuru, diiru juróom ñaari fan, muy ñamu saraxu sawara ngir xetug jàmm, ñeel Aji Sax ji. Ci kaw rendi-dóomal bi war bés bu nekk, ci lees koy dolli. <sup>25</sup> Bés sub juróom ñaareel ba, seen bés sub woote bu sell lay doon. Mboolem lees baaxoo liggéey, deesu ko ci liggéey.

### *Ngóob am na saraxam*

<sup>26</sup> «Bés sub ndoortel meññeef ba ngeen di sarxesi saraxu pepp mu bees, ñeel Aji Sax ji, ci seen biir màggalug Ayi bés nag, seen bés sub woote bu sell lay doon. Mboolem lees baaxoo liggéey, deesu ko ci liggéey. <sup>27</sup> Nangeen ci sarxal ab rendi-dóomal, ngir xetug jàmm, ñeel Aji Sax ji: ñaari yëkk yu ndaw, ak menn kuuy, ak juróom ñaari xari menn at. <sup>28</sup> Saraxu peppam di sunguf su mucc ayib, su ñu tooyale ag diw. Ñetti fukkeeli efay sunguf, di juróom ñeenti kilo ci yëkk wu nekk, ak ñaari fukkeeli efa, di juróom benni kilo ci kuuy mi, <sup>29</sup> ak fukkeelub efa, di ñetti kilo, ci mii xar, fukkeelub efa ca mee, ba juróom ñaari xar yi daj, <sup>30</sup> ak bennub sikket ngir seen njotlaay. <sup>31</sup> Sarxeleen loolu, te bumu bokke ak rendi-dóomal bi war bés bu nekk tey ànd ak saraxu peppam. Lu mucc sikk

nag ngeen di def sarax yooyii, te ngeen defaale saraxi tuuram yi ci war.

## 29

### *Bési liit yi laaj na sarax*

<sup>1</sup> «Bu loolu weese, benn fanu weeru juróom ñaareel, seen bésu woote bu sell lay doon. Mboolem lees baaxoo liggéey, deesu ko ci liggéey. Bés la bu ngeen di yéenee ag liit. <sup>2</sup> Sarxal-leen ci ab rendi-dóomal ngir xetug jàmm, ñeel Aji Sax ji: wenn yëkk wu ndaw, ak menn kuuy, ak juróom ñaari xari menn at, te lu ci nekk mucc sikk. <sup>3</sup> Saraxu peppam lay àndal, di sunguf su mucc ayib, su ñu tooyale ag diw; ñetti fukkeeli efay sunguf, di juróom ñeenti kilo ci yëkk wi, ñaari fukkeeli efa, di juróom benni kilo ci kuuy mi, <sup>4</sup> ak benn fukkeelu efab sunguf, di ñetti kilo ci mii xar, benn fukkeelu efa ca mee, ba juróom ñaari xar yi daj, <sup>5</sup> ak benn sikketu póotum bàkkaar, ngir seen njotlaay. <sup>6</sup> Bokkewul ak rendi-dóomal Terutel weer wu nekk, mook saraxu peppam, bokkewul it ak rendi-dóomal bi war bés bu nekk, ak saraxu peppam, ak seen saraxi tuur, ni ko yoon tērale. Dees koy def ngir xetug jàmm, muy saraxu sawara, ñeel Aji Sax ji.

### *Bés sub Njotlaay laaj na sarax*

<sup>7</sup> «Fukki fanu juróom ñaareelu weer woowu it, seen bés sub woote bu sell lay doon, te ngeen toroxlu ci. Mboolem lees baaxoo liggéey, deesu ko ci liggéey. <sup>8</sup> Sarxal-leen ci ab rendi-dóomal, ñeel Aji Sax ji, ngir xetug jàmm: wenn yëkk wu ndaw, ak menn kuuy, ak juróom ñaari xari menn at, te lu mucc sikk ngeen di def lépp. <sup>9</sup> Saraxu peppam lay àndal, di sunguf su mucc ayib su ñu tooyale ag diw; ñetti fukkeeli efay sunguf, di juróom ñeenti kilo ci yëkk wi, ñaari fukkeeli efa, di juróom benni kilo ci kuuy mi, <sup>10</sup> ak benn fukkeelu efab sunguf, di ñetti kilo ci mii xar, benn fukkeelu efa ca mee, ba juróom ñaari xar yi daj, <sup>11</sup> ak benn sikketu póotum bàkkaar, te du bokke ak póotum bàkkaaru njotlaay gi, ak saraxu dóomal bi war bés bu nekk, mook saraxu peppam, ak seen saraxi tuur yi ci war.

*Màggalu Mbaar yi laaj na sarax*

<sup>12</sup> «Fukki fan yaak juróom ci juróom ñaareelu weer woowu itam, seen bésu woote bu sell lay doon. Mboolem lees baaxoo liggéey, deesu ko ci liggéey. Amal-leen ci ag màggal, ñeel Aji Sax ji, diiru juróom ñaari fan, doore ko ca bés ba.

<sup>13</sup> Nangeen ca sarxal ab rendi-dóomal, muy saraxu sawara ngir xetug jàmm, ñeel Aji Sax ji: fukki yëkk yu ndaw ak ñett, ak ñaari kuuy, ak fukk ak ñeenti xari menn at, te lépp mucc sikk. <sup>14</sup> Seen saraxi pepp di sunguf su mucc sikk su ñu tooyale ag diw, ñetti fukkeeli efay sunguf, di juróom ñeenti kilo ci wenn yëkk wu nekk, ba fukki yëkk yeek ñett daj; ñaari kuuy yi, kuuy mu ci nekk, ñaari fukkeeli efay sunguf, di juróom benni kilo, <sup>15</sup> ak benn fukkeelu efay sunguf, di ñetti kilo ci mii xar, benn fukkeelu efa ca mee, ba fukki xar yeek ñeent daj, <sup>16</sup> ak benn sikketu póotum bàkkaar. Bokkewul ak saraxu dóomal bi war bés bu nekk, ak saraxu peppam si muy àndal, ak saraxu tuuram.

<sup>17</sup> «Bésu ñaareel ba: fukki yëkk yu ndaw ak ñaar; ak ñaari kuuy, ak fukk ak ñeenti xari menn at, te lépp mucc sikk. <sup>18</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral. <sup>19</sup> Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak seen saraxi tuur.

<sup>20</sup> «Bésu ñetteel ba: fukki yëkk yu ndaw ak benn, ak ñaari kuuy, ak fukk ak ñeenti xari menn at, te lépp mucc sikk. <sup>21</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral. <sup>22</sup> Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

<sup>23</sup> «Bésu ñeenteel ba: fukki yëkk, ak ñaari kuuy, ak fukk ak ñeenti xari menn at, te lépp mucc sikk. <sup>24</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral. <sup>25</sup> Dees na

ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

<sup>26</sup> «Bésu juróomeel ba: juróom ñeenti yëkk, ak ñaari kuuy, ak fukk ak ñeenti xari menn at, te lépp mucc sikk. <sup>27</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral.

<sup>28</sup> Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

<sup>29</sup> «Bésu juróom benneel ba: juróom ñetti yëkk, ak ñaari kuuy, ak fukki ak ñeenti xari menn at, te lépp mucc sikk.

<sup>30</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral. <sup>31</sup> Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

<sup>32</sup> «Bésu juróom ñaareel ba: juróom ñaari yëkk, ak ñaari kuuy, ak fukk ak ñeenti xari menn at, te lépp mucc sikk.

<sup>33</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral. <sup>34</sup> Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam, ak saraxu tuuram.

<sup>35</sup> «Bésu juróom ñetteel ba seen bésu ndaje lay doon. Mboolem lees baaxoo liggéey, deesu ko ci liggéey.

<sup>36</sup> Nangeen ci sarxal ab rendi-dóomal, muy saraxu sawara ngir xetug jàmm, ñeel Aji Sax ji: wenn yëkk, ak menn kuuy, ak juróom ñaari xari menn at, te lépp mucc sikk. <sup>37</sup> Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon tëral. <sup>38</sup> Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam, ak saraxu tuuram.

<sup>39</sup> «Yooyu sarax ngeen di def, ñeel Aji Sax ji, ci seen bési màggal, te du bokke ak seen sarax yi ngeen xasal seen bopp, ak



seen saraxi yéene, ak seen saraxi dóomali bés bu nekk, ak seen saraxi pepp ak seen saraxi tuur, ak seen saraxi cantí biir jàmm.»

### 30

<sup>1</sup> Ba mu ko defee Musaa àgge bànni Israyil mboolem la ko Aji Sax ji sant.

*Yoon wi sàrtal na lu nit ki xasal boppam*

<sup>2</sup> Ci kaw loolu Musaa wax ak kilifay giiri bànni Israyil, ne leen: «Lii moo di ndigal li Aji Sax ji dénkaane:

<sup>3</sup> «Góor gu xasal Aji Sax ji aw xas, mbaa mu giñ ngir dogu gu mu tegool boppam, bumu tebbi kàddoom. Noonee ko lãmmiñam tudde, na ko ni defe ba mu mat sèkk.

<sup>4</sup> «Te jigéen ju xasal Aji Sax ji aw xas, ngir dogu gu mu dogu, te fekk ko di ndaw ca biir kër baayam ba tey, <sup>5</sup> su baay ba déggee xasu ndaw sa, ak dogu ga mu tegool boppam, te waxu ca doomam dara, su boobaa mboolem xasi ndaw sa day sax, te mboolem dogu gu mu doguloon boppam day sax. <sup>6</sup> Waaye su ko baayam aayee, ca bés ba mu ca déggee, su boobaa mboolem xasi ndaw si, ak mboolem dogu ya mu doguloon boppam, du sax, te Aji Sax jee koy jéggal, ndax baayam aaye woon na ko.

<sup>7</sup> «Su fekkee ne ndaw si dafa am jëkkër gannaaw kàdduy xas yu ko topp, mbaa kàddug rëccle, gu mu tegool boppam, <sup>8</sup> su ko jëkkër ja déggee, te bés ba mu ko déggee, waxu ko ca dara, su boobaa xasi ndaw si day sax, te kàdduy dogu ya mu tegooloon boppam day sax. <sup>9</sup> Waaye su fekkee ne ca bés ba ko jëkkër ja déggee, ca la ko aaye, su boobaa jëkkër ja neenal na xas wa toppoon ndaw si, mbaa kàddug rëccle ga mu tegooloon boppam, te Aji Sax jee koy jéggal.

<sup>10</sup> «Su dee kàddug xas gu jibe ci ku jëkkëram faatu, mbaa ku ñu baal, mboolem lu mu tegooloon boppam day sax.

<sup>11</sup> «Su fekkee ne ci biir kër jëkkëram la nit ki xase, mbaa mu dogul fa boppam ab dogu, ci kaw ngiñ, <sup>12</sup> jëkkër

ji dégg ci, te waxu ko dara, aayewu ko, su boobaa mboolem xasi ndaw si day sax, te mboolem dogu bu ndaw si tegooloon boppam, day sax. <sup>13</sup> Su wéree nag ne jëkkër ji neenal na kàdduy jabaram yooyu, ca bés ba mu ko déggee, su boobaa lépp lu lãmmiñu ndaw si tuddoon, jème ci kàdduy xasam, mbaa kàddu gu mu tegooloon boppam, lenn du ci sax. Jëkkëram a ko neenal, te Aji Sax jee koy jéggal. <sup>14</sup> Mboolem aw xas nag, ak mboolem ngiñ lu ku jigéen ki dogoo, te jublu ci ag toroxlu, jëkkëram moo koy saxal, jëkkëram moo koy neenal. <sup>15</sup> Su jëkkër ji noppee ba noppi, waxu ko dara ca bés ba, ba ca èllég sa, su boobaa mboolem kàdduy xasi jabaram, mbaa mboolem kàdduy dogu yu toppoon jabaram, jëkkër jee ko saxal, ndax moo ko waxul dara ca bés ba mu ko déggee. <sup>16</sup> Ndegam nag jëkkër ji, beneen bés, gannaaw ba mu déggee kàdduy jabaram, la doora àddu ngir neenal wax ja, su boobaa mooy gàddu bàkkaaruu jabaram.»

<sup>17</sup> Yooyu dogali yoon la Aji Sax ji dénkk Musaa, ci diggante nit ak jabaram, ak diggante baay ak doom ju jigéen, ba muy ndaw te nekk kër baayam.

### 31

*Israyil дума на Мажан*

<sup>1</sup> Aji Sax ji waxati Musaa, ne ko: <sup>2</sup> «Fexeel ba feyul bànni Israyil ci waa Majan\*. Gannaaw loolu dees na la yóbbu, téral la fa say bokk.»

<sup>3</sup> Musaa daldi wax ak mbooloo ma, ne leen: «Na ñenn ci yeen gannaayu, waajal xare, te dal ci kaw waa Majan, ba feyul Aji Sax ji. <sup>4</sup> Gii giir, junni, gee giir junni, ba giiri Israyil yépp daj, ngeen yebal leen ñu xareji.»

<sup>5</sup> Ba mu ko defee ñu tãne ca gàngoori Israyil, junniy góor jóge ci giir gu nekk, ñuy fukki junneek ñaari (12 000) xarekat yu gannaayu. <sup>6</sup> Musaa nag yebal leen, junni jóge ci giir gu nekk, ñu xareji. Ñoom ak sarxalkat bi Fineyas doomu Elasar, ñoo xareji, yóbbaaale jumptukaay

\* 31:2 31.2 Seetal ci 25.16-19.

yu sell yaak liiti xare ya. <sup>7</sup> Ñu xareek Majan, na ko Aji Sax ji sante Musaa, ba rey góor ñépp, <sup>8</sup> reyaale buuri Majan, Ewi ak Rekem ak Sur ak Ur ak Reba, juróomi buuri Majan ya. Balaam doomu Bewor it, ñu reye ko saamar.

<sup>9</sup> Ba loolu amee bànni Israyil jàpp jigéeni Majan, ak seeni tuut-tànk, ak seen jur gépp, gu gudd ak gu gàtt, seen alal jépp, ñu sèxètoo ko. <sup>10</sup> Seen dèkk yépp ak seeni dèkkuwaay, ak seen dal yépp, ñu lakk. <sup>11</sup> Ba mu ko defee ñu jël mboolem la ñu sèxètoo, mboolem la ñu ca jàppe, nit ñaak jur ga. <sup>12</sup> Ñu daldi yóbbu ca Musaa ak Elasar sarxalkat ba, ak mboolum bànni Israyil, ña ñu jàppe ca xare ba, ak la ñu ca jàppe, ak la ñu sèxètoo. Ñu indi lépp ca seen dal ba ca joori Mowab, fa janook Yeriko, te dendeek dexu Yurdan.

<sup>13</sup> Ci kaw loolu Musaa ak Elasar sarxalkat ba ànd ak mboolem njiiti mboolum ma, ñu génn dal ba, gatandu leen ca biti. <sup>14</sup> Musaa nag sànju ca kaw kilifay xare ya, muy kilifay kuréli junni yaak kilifay kuréli téeméer, ya jóge xare. <sup>15</sup> Musaa ne leen: «Kon jigéeni Majan ñépp ngeen bàyyi, ñu dund! <sup>16</sup> Xanaa du ñoom ñoo dèdduloo woon bànni Israyil Aji Sax ji, ci ndigalal Balaam, ca mbir ma woon ca Pewor, ba tax mbas ma dikkal mboolum Aji Sax ji? <sup>17</sup> Kon nag reyleen lépp luy góor ci tuut-tànk yi, mboolem lu ciy jigéen ju xam lalú góor it, rey leen, <sup>18</sup> mboolem lu ciy jigéen ju ndaw, te xamul lalú góor, ngeen bàyyi mu dund, ñeel leen.

<sup>19</sup> «Te yeen nag, dal-leen ci biti, buleen dugg ci biir dal bi diiru juróom ñaari fan, mboolem ñi rey ak mboolem ñi laal ku ñu rey. Nangeen setlu bésuub ñetteel ba, ak bésuub juróom ñaareel ba, yeen ak ñi ngeen jàpp. <sup>20</sup> Te itam lépp luy yére, ak bépp jumtukaayu der, ak lépp lees defare kawari bëy, ak bépp jumtukaayu bant, nangeen ko setal.»

<sup>21</sup> Ba mu ko defee Elasar sarxalkat ba wax ak ña xareji woon, ne leen: «Lii moo di dogalu yoon, bi Aji Sax ji dénka Musaa: <sup>22</sup> Luy wurus ak xalis ak xàñjar, ak weñ gu ñuul, ak weñ gu weex, ak beteex, <sup>23</sup> mboolem lu dul lakk, rekk, nangeen

ko laalale sawara, mu set. Ndoxum setlu mi it, warees na koo dellu setale yooyii. Waaye mboolem luy lakk, ci ndoxum setal mi donŋ lees koy dugal, ngir mu set. <sup>24</sup> Bésuub juróom ñaareel ba, fóotleen seeni yére, daldi set. Gannaaw loolu man ngeena duggsi ci dal bi.»

### *Lu jëm ci séddaleb alalu waa Majan*

<sup>25</sup> Aji Sax ji waxati Musaa ne ko: <sup>26</sup> «Yaw ak Elasar sarxalkat bi, ak ñi jiite seeni kër maam ci mboolum mi, waññleen alal ji ñu nangoo xare, nit aku jur. <sup>27</sup> Xaajleen sèxètoo mi ñaar, te ngeen séddale ko diggante xarekat ya xareji woon, ak mboolum mi ci des yépp. <sup>28</sup> Te ngeen sàkkal Aji Sax ji, ci céru xarekat ya xareji woon, ab galag bu yemook benn bopp ci juróomi téeméer (500) yu nekk, ci aw nit, mbaa ay nag, mbaa ay mbaam, mbaa ay gàtt. <sup>29</sup> Ci céru xarekat yi ngeen koy sàkke, jox ko Elasar sarxalkat bi, muy jooxeb Aji Sax ji. <sup>30</sup> Céru bànni Israyil bi ci des, nangeen ci sàkk benn ci juróom fukk yu nekk (50), ci aw nit, mbaa ay nag, mbaa ay mbaam, mbaa ay gàtt, mbaa gépp jur, te ngeen jox ko Leween ñi dénkaoo dénkaaney màkkaanu Aji Sax ji.»

<sup>31</sup> Ba loolu amee Musaa ak Elasar sarxalkat bi defee ko noonee ko Aji Sax ji sante Musaa. <sup>32</sup> La des ca alalu sèxètoo, ja ña xareji woon indaale, gannaaw ba ñu ca génnee yooyu, nii la tollu: gàtt yi, juróom benni téeméeri junneek juróom ñaar fukk ak juróom (675 000); <sup>33</sup> nag yi, juróom ñaar fukki junneek ñaar (72 000); <sup>34</sup> mbaam yi, juróom benn fukki junneek benn (61 000), <sup>35</sup> aw nit, fanweeri junniy jigéen ñu xamul lalú góor (30 000).

<sup>36</sup> Genn-wàll giy céru nit ña xareji woon, nii la tédde: gàtt yi, ñetti téeméeri junneek fanweer ak juróom ñaar ak juróomi téeméer (337 500), <sup>37</sup> galagu Aji Sax ji génne ci gàtt yi, di juróom benni téeméer ak juróom ñaar fukk ak juróom (675); <sup>38</sup> nag yi, fanweeri junneek juróom benn (36 000), galagu Aji Sax ji génne ci, di juróom ñaar fukk ak ñaar (72); <sup>39</sup> mbaam yi, fanweeri junneek juróomi téeméer (30 500), galagu Aji Sax ji génne

ci, di juróom benn fukk ak benn (61);<sup>40</sup> aw nit, fukki junneek juróom benn (16 000), galagu Aji Sax ji génne ci, di fanweeri bopp ak ñaar (32).<sup>41</sup> Ba mu ko defee Musaa jox galag ba Elasar sarxalkat ba, muy jooxeb Aji Sax ji, na ko Aji Sax ji sante Musaa.

<sup>42</sup> Genn-wàll giy céru bànni Israyil, ba Musaa tegale ak cérub ña xareji woon,<sup>43</sup> te muy céru mbooloo ma, ci wàllu gàtt yi, ñetti téeméeri junneek fanweer ak juróom ñaar ak juróomi téeméer (337 500) la; <sup>44</sup> nag yi di fanweeri junneek juróom benn (36 000); <sup>45</sup> mbaam yi, fanweeri junneek juróomi téeméer (30 500); <sup>46</sup> aw nit, fukki junneek juróom benn (16 000). <sup>47</sup> Musaa daldi sàkk ci céru bànni Israyil boobu, benn ci juróom fukk yu nekk. Musaa jox loola Leween ñi dénkoo dénkaneey màkkaanu Aji Sax ji, noonee ko ko Aji Sax ji sante woon.

### *Kilifay xare ya jéfe nañu ngor*

<sup>48</sup> Ba loolu amee njiiti gàngooru xarekat ya, kilifay kuréli junni yaak kilifay kuréli téeméer ya, ñoom ñépp dem ca Musaa. <sup>49</sup> Ñu ne Musaa: «Sang bi, nun de, waññ nanu xarekat yi ci sunu kilifteef, waaye kenn wuutewu ci. <sup>50</sup> Moo tax nu indi jooxeb Aji Sax ji, ku nekk ak la nga muurloo, ci gànjari wurus; lami pèrèg, ak takkub jara, ak jaaroy torlukaay, ak jaaroy nopp, aki caq. Noo ko def sunu njotlaayal bakkan, fi kanam Aji Sax ji.»

<sup>51</sup> Musaa ak Elasar sarxalkat ba nangoo wurus wa ca ñoom, lépp di takkaay yu ñu tëgg. <sup>52</sup> Mboolem wurusu jooxe, wi ñu jooxeel Aji Sax ji, di fukk ak juróom benni junniyi siikal ak juróom ñaar téeméer ak juróom fukk (16 750), yemook barigo ak juróom ñaar fukki kilo (170), te bawoo ci kilifay kuréli junni yaak kilifay kuréli téeméer ya. <sup>53</sup> Xarekati gàngoor ga ñoom, dañoo féetewoo la ñu sèxëtoo. <sup>54</sup> Musaa ak Elasar sarxalkat ba nag jële wurus wa ca kilifay kuréli junni yaak kuréli téeméer ya. Ñu yóbbu ko ca biir xaymab ndaje ma, muy seedeel bànni Israyil fi kanam Aji Sax ji.

## 32

### *Ay giir des na penkub Yurdan*

<sup>1</sup> Jur gu ne gàññ, bare lool, la Rubeneen ñi ak Gàddeen ñi amoon. Ñu xoolaat diiwaanu Yaser ak diiwaanu Galàdd, gisuñu lu moy àll bu neexa yareg jur.

<sup>2</sup> Ba mu ko defee Gàddeen ñaak Rubeneen ña dikk, wax ak Musaa ak Elasar sarxalkat ba, ak kilifay mbooloo ma. Ñu ne leen: <sup>3</sup> «Gox yii di Atarot, ak Dibon, ak Yaser, ak Nimra, ak Esbon, ak Elale, ak Sebam, ak Nebo, ak Bewon, <sup>4</sup> mboolem réew mii Aji Sax ji daan fi kanam mbooloom Israyil de, réew mu neexa yareg jur la, te nun, sang bi, boroomi jur lanu.» <sup>5</sup> Ñu teg ca ne: «Kon nag ngalla sang bi, baaxe nu réew mii, muy sunub cér, te nga bañ noo jàlle dexu Yurdan.»

<sup>6</sup> Musaa ne Gàddeen ñaak Rubeneen ña: «Xanaa seeni bokk duñu xareji, yeen ngeen toog fii? <sup>7</sup> Dangeena nara yoqiloo bànni Israyil, ba tere leena jàlli ca réew, ma leen Aji Sax ji jox? <sup>8</sup> Lu mel nii de, la seeni baay defoon ba ma leen yebalee, ñu jóge Kades Barneya, ngir yèri réew ma. <sup>9</sup> Dañoo dem ba àgg xuru Eskol, ba gis réew ma, doora délsi, di yoqiloo bànni Israyil, ngir ñu baña duggi ca réew, ma leen Aji Sax ji joxoon. <sup>10</sup> Sànjum Aji Sax ji tàng na bésuub keroog, ba mu giñ, ne: <sup>11</sup> “Kenn du gis mukk réew ma ma giñaloon Ibraayma ak Isaaxa ak Yanqóoba, ci góor ñi jóge Misra te am ñaar fukki at, jëm kaw, gannaaw mataluñu kóolute ci man. <sup>12</sup> Xanaa Kaleb doomu Yefune, Keneseen bi, ak Yosuwe doomu Nuun, ndax ñoo matal kóolute ci Aji Sax ji.” <sup>13</sup> Ba loolu amee sànjum Aji Sax ji tàkkal Israyil, mu wërloo leen ca màndiŋ ma diiru ñeent fukki at, ba mboolem maas googa defoon lu Aji Sax ji ñaawlu, ñépp jeex tàkk. <sup>14</sup> Yeen nag defuleen lu moy jóg wuutu seeni baay, njurum bàkkaarkat yi ngeen doon, di xamb sànjum Aji Sax, ji tàkkal bànni Israyil? <sup>15</sup> Su ngeen ko dèddoo it, day dellu wacc bànni Israyil ci màndiŋ mi rekk, ngeen daldi sànklu mii mbooloo mépp.»

<sup>16</sup> Ba loolu weese, ñu dikkaat, ne ko: «Ay gétt lanu bégga sàkk fii ngir sunuy gàtt, aki dèkk ngir sunuy njaboot. <sup>17</sup> Waaye nun kay danuy daldi gannaayu, jiitu bànni Israyil, ba keroog ñu leen yóbboo ca seen suuf. Sunu njaboot a nuy xaare fii, biir dèkk yu tata wër, ngir ñu mucc ci waa réew mi. <sup>18</sup> Dunu dellu muk sunuy kër, ba keroog bànni Israyil di séddu, ku ci nekk jot céru suufam. <sup>19</sup> Waaye nun dunu bokk ak ñoom ab céru suuf ca wàllaa dexu Yurdan, ak la ca topp, ndax day fekk nu jot sunu céru suuf, ci wet gii féete dexu Yurdan penku.»

<sup>20</sup> Musaa ne leen: «Su ngeen ko defee noonu, gannaayu fi kanam Aji Sax ji ngir xareji, <sup>21</sup> su seen mboolem boroomi gannaay jàllee dexu Yurdan fi kanam Aji Sax ji, ba keroog mu dàqee ay noonam, <sup>22</sup> ba réew ma nangul Aji Sax ji, su boobaa déy, sañ ngeena délsi, te wàccoo ngeen ak Aji Sax ji, wàccoo ak bànni Israyil, te su boobaa it réew mii ñeel leen, di seen moomeel fi kanam Aji Sax ji. <sup>23</sup> Waaye su ngeen jéfewul noonu kat, yeena moy Aji Sax ji, te xamleen ne seenug moy dina leen dab. <sup>24</sup> Kon nag sàkkleen ay dèkk ngir seeni njaboot, aki gétt ngir seeni gàtt, waaye li ngeen dige daal, defleen ko.»

<sup>25</sup> Ba loolu amee Gàddeen ñaak Rubeneen ña ne Musaa: «Sang bi, noonu nga ko santaanee, ni lanu koy defe. <sup>26</sup> Sunuy goneek sunuy jabar, ak sunuy gàtt, ak sunu jur gépp fii ci dèkki Galàdd lay des. <sup>27</sup> Waaye nun, mboolem ñi yor ngannaay danuy jàll dex gi fi kanam Aji Sax ji, ngir xareji ni nga ko waxe, sang bi.»

<sup>28</sup> Musaa nag santaane ci seen mbir ca Elasar sarxalkat ba, ak Yosuwe doomu Nuun, ak kilifay bànni Israyil, ya jiite seeni kër maam. <sup>29</sup> Musaa ne leen: «Su Rubeneen ñeek Gàddeen ñi àndeek yeen, ñoom ñépp gannaayu ngir xareji fi kanam Aji Sax ji, ba réew ma nangul leen, nangeen leen jox réewum Galàdd, muy seen moomeel. <sup>30</sup> Waaye su ñu àndul ak yeen, gannaayu jàll, ci seen biir lañuy séddu suuf, ca biir réewum Kanaan.»

<sup>31</sup> Ba loolu amee Gàddeen ña ak Rubeneen ña dellu ne: «Sang bi, li nu Aji Sax

ji wax rekk lanuy def. <sup>32</sup> Nooy gannaayu jàlli réewum Kanaan fi kanam Aji Sax ji, waaye nun, cér bi nuy moom, wàllu dexu Yurdan wii lay doon.»

<sup>33</sup> Musaa nag tudde cér yii, askanu Gàdd, ak askanu Ruben, ak genn-wàllu giirug Manase doomu Yuusufa: nguurug Siwon buurub Amoreen ñi la leen jox, ak nguurug Og buuru Basan, réew ma mépp, boole ca dèkk yu mag ya, ak àll ya ko wër. <sup>34</sup> Ba mu ko defee Gàddeen ña tabax Dibon ak Atarot ak Arower, <sup>35</sup> ak Aterot Sofan, ak Yaser ak Yogbowa, <sup>36</sup> ak Bet Nimra, ak Bet Aran, lépp di dèkk yu tata wër. Ñu sàkkaale ay wurmbal ngir seeni gàtt. <sup>37</sup> Rubeneen ña it tabax Esbon ak Elale ak Kiryaatayim, <sup>38</sup> ak Nebo, ak Baal Mewon, lenn ca turi dèkk ya soppiku, ak Sibma. Ñu tudde dèkk yooyu ñu tabaxaat, seen turi bopp.

<sup>39</sup> Ci kaw loolu ñi askanoo ci Makir doomu Manase, songi bėj-gannaaru Galàdd, nangu ko, dàqe fa Amoreen ña. <sup>40</sup> Ba mu ko defee Musaa jox Galàdd, askanu Makir, ñu dèkke. <sup>41</sup> Ci biir loolu askanu Yayir, mi askanoo ci Manase, dem nanguji yeneen dèkki Galàdd yu ndaw. Ñu tudde leen Awot Yayir. <sup>42</sup> Noba it nanguji Kenat ak dèkk ya ko wër, daldi tudde gox ba boppam, muy Noba.

## 33

### *Limees na yooni tukkiy Israyil*

<sup>1</sup> Lii moo di doxi bànni Israyil, ba ñu génnee réewum Misra, def seeni gàngoor, ca njiital Musaa ak Aaróona.

<sup>2</sup> Musaa moo bind seeni dalukaay ak seen yoon ya ñu jaare, ci ndigalal Aji Sax ji. Lii moo di seeni jaar-jaar, ak seeni dalukaay:

<sup>3</sup> Fa Ramses lañu bàyyikoo, fukki fan ak juróomu weer wi jèkk ci at mi. Keroog bés ba topp ca bés sub Mucc ba, ca la bànni Israyil daagu, génn, waa Misra gépp di gis. <sup>4</sup> Booba waa Misraa ngay rob ña Aji Sax ji fàdd ca ñoom, néewi mboolem seen taaw ya. Aji Sax jee mbugale noonu seen yàlla ya.

<sup>5</sup> Bànni Israyil nag jóge Ramses, dali Sukkóot. <sup>6</sup> Ñu jóge Sukkóot, dali Etam ga ca catu màndiŋ ma. <sup>7</sup> Ba ñu bàyyikoo

Etam, dañoo walbatiku ba Pi Axirot ga janook Baal Cefon, daldi dal fa kanam Migadol. <sup>8</sup> Ñu jóge Pi Axirot, jàll géeg ga, wuti màndiŋ ma. Dox nañu yoonu ñetti fan ca biir màndiŋu Etam, doora dal Maara. <sup>9</sup> Ñu jóge Maara, dem ba Elim, Elim ga ca fukki bëti ndox yaak ñaar, ak juróom ñaar fukki garabi tàndarma ya. Ñu dal foofa. <sup>10</sup> Ba ñu jógee Elim, fa feggook géegu Barax ya la ñu dali. <sup>11</sup> Ñu bawoo géegu Barax ya, dali ca màndiŋu Ciin, <sup>12</sup> bawooti màndiŋu Ciin, dali Dofka, <sup>13</sup> bawooti Dofka, dali Alus. <sup>14</sup> Ba ñu bàyyikoo Alus, Refidim lañu dali. Foofa nag mbooloo ma amuñu fa ndox mu ñu naan. <sup>15</sup> Ñu bàyyikoo Refidim, dali ca màndiŋu Sinayi, <sup>16</sup> bàyyikoo màndiŋu Sinayi, dali Kibbrot Taawa, <sup>17</sup> bàyyikooti Kibbrot Taawa, dali Aserot. <sup>18</sup> Ba ñu jógee Aserot, Ritma lañu dali. <sup>19</sup> Ñu jóge Ritma, dali Rimon Peres, <sup>20</sup> jóge Rimon Peres, dali Libna, <sup>21</sup> jógeeti Libna, dali Risa. <sup>22</sup> Ba ñu bawoo Risa, Keyelata lañu dali. <sup>23</sup> Ñu bawoo Keyelata, dali tundu Sefer, <sup>24</sup> bawoo tundu Sefer, dali Arada, <sup>25</sup> bawooti Arada, dali Makeyelot. <sup>26</sup> Naka lañu bàyyikoo Makeyelot, dali Tayat, <sup>27</sup> bàyyikoo Tayat, dali Tera, <sup>28</sup> bàyyikooti Tera, dali Mitka. <sup>29</sup> Ba ñu jógee Mitka, Asmona lañu dali. <sup>30</sup> Ñu jóge Asmona, dali Moserot; <sup>31</sup> jóge Moserot, dali Bene Yaakan, <sup>32</sup> jógeeti Bene Yaakan, dali Xor Gitgaat. <sup>33</sup> Ba ñu bawoo Xor Gitgaat, Yotbata lañu dali. <sup>34</sup> Ñu bawoo Yotbata, dali Abrona, <sup>35</sup> bawoo Abrona, dali Esiyon Geber, <sup>36</sup> bawooti Esiyon Geber, dali Kades ca màndiŋu Ciin. <sup>37</sup> Ba ñu bàyyikoo Kades, ca tundu Or wa digalook réewum Edom lañu dali.

<sup>38</sup> Ba mu ko defee Aaróona sarxalkat ba yéeg ca kaw tundu Or, ci ndigalal Aji Sax ji. Mu daldi faatu foofa, ca ñeent fukkeelu at ma, gannaaw ba bànni Israyil génnee réewum Misra, yemook benn fanu juróomeelu weeru at ma. <sup>39</sup> Aaróona mu ngi woon ci téeméeri atam, ak ñaar fukk at ñett (123) ba mu faatoo ca kaw tundu Or. <sup>40</sup> Ci kaw loolu Kanaaneen ba, buurub Arat, ba dëkke woon bëj-saalumu réewum

Kanaan, daldi yég ne bànni Israyil a ngay dikk.

<sup>41</sup> Ba ñu jógee tundu Or, Calmona lañu dali. <sup>42</sup> Ñu jóge Calmona, dali Punon, <sup>43</sup> jóge Punon, dali Obot, <sup>44</sup> jógeeti Obot, dali Yee Abarim, ga digalook réewum Mowab. <sup>45</sup> Ba ñu jógee Yee Abarim, Dibon Gàdd lañu dali. <sup>46</sup> Ñu jóge Dibon Gàdd, dali Almon Diblatayim, <sup>47</sup> jógeeti Almon Diblatayim, dali ca tundi Abarim, janook tundu Nebo. <sup>48</sup> Ba ñu bawoo tundi Abarim, ca joori Mowab lañu dali, ca wetu dexu Yurdan, janook Yeriko. <sup>49</sup> Wetu dexu Yurdan, ga ca diggante Bet Yesimot ak Abel Sitim, ca joori Mowab, fa lañu dale.

### *Ndigali xare jib na*

<sup>50</sup> Ba loolu amee Aji Sax ji waxati ak Musaa ca joori Mowab, ca wetu dexu Yurdan, ga janook Yeriko. Mu ne ko: <sup>51</sup> «Waxal bànni Israyil ne leen: Bu ngeen jàllee dexu Yurdan, ba dugg réewum Kanaan, <sup>52</sup> nangeen dàq waa réew mépp, nangeen yàqte seen mboolem tuur yu ñu yett, te seen mboolem jëmm yu ñu móol, yàqteleen ko, seen mboolem bérabi jaamookaay it, tasleen ko. <sup>53</sup> Defleen réew mi moomeel, ngeen dëkke ko, ndax yeen laa jox réew mi, ngir ngeen moom ko. <sup>54</sup> Tegooleen bant réew mi, séddoo ko ci seeni làng. Làng gu gëna mag, na am cér bu gëna mag, làng gu gëna tuut, am cér bu gëna tuut. Fépp fu tegoo bant génneel ag làng, ñooy doon boroom. Ci seen biir giiri maam ngeen di séddu. <sup>55</sup> Waaye su ngeen dàqul waa réew mi, ña ngeen fa bàyyi ñooy mujj diy dég yu leen di luqi, aki dagg yuy cuut seeni wet. Ñoo leen di lëjal witt ca biir réew mooma ngeen sance. <sup>56</sup> Su boobaa nag na ma naroonna def seen noon yooyu, yeen laa koy def.»

## 34

### *Aji Sax ji réddlu na digu réew mi*

<sup>1</sup> Aji Sax ji waxati Musaa, ne ko: <sup>2</sup> «Santal bànni Israyil, nga ne leen bu ngeen duggee réewum Kanaan, lii moo di réew ma ngeen di muurloo, muy seenub

cér. Réewum Kanaan a ngi, ak kemi suufam:

<sup>3</sup> «Seen kemu bëj-saalum a ngay dale màndiŋu Ciin, leri réewum Edom, daleeti ca catal géēju Xorom ga ca penku. <sup>4</sup> Seen kemu daa dënglu, jaare fa féete yéegub Akerabim bëj-saalum, jaare Ciin nag, dem ba bëj-saalumu Kades Barneya, jëm Àccar Adar ba àgg Asmon. <sup>5</sup> Asmon la kem gay jàddaate jubal xuru Misra, doora àkki géej.

<sup>6</sup> «Géej gu mag gi mooy doon seen kemu sowu. Loolooy seen kemu sowu.

<sup>7</sup> «Lii nag mooy seen kemu bëj-gànnar. Ca géej gu mag ga ngeen di rëdde, ba ca tundu Or, <sup>8</sup> rëdde ko fa tundu Or, mu jëm Lebo Amat, jáll ba Cedàdd, <sup>9</sup> wéyeeti fa, jaare Sifron, jëm Àccar Enan. Loolooy seen kemu bëj-gànnar.

<sup>10</sup> «Rëddleen seen kemu penku, mu dale Àccar Enan ba Sefam, <sup>11</sup> kemu ga wàcce Sefam, jëm Ribla, fa féete Ayin penku, wàccati ba leruji dexu Kineret, ca wet ga ko féete penku, <sup>12</sup> kemu ga dellu wàcc ba ca dexu Yurdan, doora àkki géēju Xorom ga. Loolooy doon seenum réew ak kemoom yi ko wër.»

<sup>13</sup> Ba mu ko defee Musaa sant bànni Israyil, ne leen: «Réew moomu ngeen di tegoo bant, séddoo ko, te moom la Aji Sax ji santaane ñu jox ko juróom ñeenti giir yeek genn-wàll, <sup>14</sup> gannaaw giirug Ruben, ak seeni kër maam, ak giiru Gàdd ak seeni kër maam séddu nañu, te genn-wàllu giirug Manase itam jot nañu seen cér ba noppi. <sup>15</sup> Ñaari giir ya, ak genn-wàllu giir googu ñoo séddu suuf ca penkub dexu Yurdan, fa janook Yeriko.»

### *Lim nañu saytukati séddale ba*

<sup>16</sup> Aji Sax ji waxati Musaa, ne ko: <sup>17</sup> «Ñii nag ñoo leen di séddale réew mi: Elasar sarxalkat bi, ak Yosuwe doomu Nuun. <sup>18</sup> Ay njiit ngay jële kenn-kenn, ci giir gu nekk, ngir ñu jàpp ci séddaleb réew mi. <sup>19</sup> Ñooño di: Ci wàllu giirug Yuda, Kaleb doomu Yefune, <sup>20</sup> wàllu giirug Cimyoneen ñi, Samiyel doomu Amiyut, <sup>21</sup> wàllu giirug Beñamin, Elidat doomu Kislón, <sup>22</sup> wàllu giirug Daneen ñi, lenn njiit, di Bukki

doomu Yogli, <sup>23</sup> wàllu Yuusufeen ñi; li féete ak giirug Manaseen ñi, lenn njiit, di Aniyel doomu Efot, <sup>24</sup> li féete ak giirug Efraymeen ñi, lenn njiit, di Kemwel doomu Siftan, <sup>25</sup> ci wàllu giirug Sabuloneen ñi, lenn njiit, di Elisafan doomu Parnag, <sup>26</sup> wàllu giirug Isakareen ñi, lenn njiit, di Paltiyel doomu Asan, <sup>27</sup> wàllu giirug Asereen ñi, lenn njiit, di Awiyyut doomu Selomi, <sup>28</sup> wàllu giirug Neftaleen ñi, lenn njiit, di Pedayel doomu Amiyut.» <sup>29</sup> Ñooño la Aji Sax ji sant ñu séddale bànni Israyil, réewum Kanaan.

## 35

### *Lu jëm ci céri suufi Leween ñi*

<sup>1</sup> Aji Sax ji waxati ak Musaa ca joori Mowab, ca wetu dexu Yurdan, fa jàkkaarlook Yeriko. Mu ne ko: <sup>2</sup> «Santal bànni Israyil ñu sàkkal Leween ñi ci seen céru suuf, ay dëkk yu Leween ñi dëkke. Àllu parlu ya wër dëkk ya it, joxleen ko Leween ñi. <sup>3</sup> Su ko defee dëkk yooyu ñeel leen, ñu dëkke. Seen àlli parlu it ñeel seenug jur, ak seen alal, ak seen mboolem mala. <sup>4</sup> Parluy dëkk yi ngeen di jox Leween ñi, ci miiru dëkk ya lay dale, jëm biti lu day ni junniy xasab, yemook juróomi téeméeri meetar, ci wet gu nekk. <sup>5</sup> Su ko defee ngeen natte ca biti dig-digal bu gudde ñaari junniy xasab, yemook junniy meetar ci wetu penku; ñaari junniy xasab, yemook junniy meetar, wetu bëj-saalum; ñaari junniy xasab, yemook junniy meetar, wetu sowu; ñaari junniy xasab, yemook junniy meetar, wetu bëj-gànnar, dëkk bi nekk ci digg bi. Dig-digal boobu day ñeel Leween ñi, di seen parluy dëkk. <sup>6</sup> Dëkk yi ngeen di jox Leween ñi, ñoo di juróom benni dëkki rawtu, yi ku rey nit mana raweji, ak yeneen ñeent fukki dëkk ak ñaar yu ngeen leen ciy dollil. <sup>7</sup> Kon mboolem dëkk yi ngeen di jox Leween ñi, ñeent fukk ak juróom ñett la, ak seen àlli parlu. <sup>8</sup> Dëkk yi ngeen leen di génneel ci céri suufi bànni Israyil nag, la cay génne ca ña éppele suuf, réyal leen ko, te la cay génne ca ña néewle suuf, ngeen néewal ko. Giir

gu nekk daal, dayob céru suufam si mu séddu, moom lay topp, ngir sàkke ci ay dëkkam, jox Leween ñi.»

### *Lu jëm ci dëkki rawtu yi*

<sup>9</sup> Aji Sax ji waxati Musaa, ne ko: <sup>10</sup> «Waxal bànni Israyil, ne leen bu ñu jàllee dexu Yurdan ba dugg réewum Kanaan, <sup>11</sup> nañu sàkk ay dëkk yuy doon seen dëkki rawtu, ba ku rey nit te du tey-eefam, man faa raweji. <sup>12</sup> Mooy doon seen dëkki rawtu yees di mucce ci mbokkum jotkat buy toppe\*, ba ki rey nit du dee, te taxawagul fa kanam mbooloo mi, ngir ñu àtte ko.

<sup>13</sup> «Kon dëkk yi ngeen di jox Leween ñi, juróom benn a ciy doon seen dëkki rawtu. <sup>14</sup> Ñetti dëkk yu ngeen di joxe ci wàllu dexu Yurdan wii, ak ñetti dëkk yu ngeen di joxe ca réewum Kanaan, lépp di ay dëkki rawtu. <sup>15</sup> Waaye muy bànni Israyil, muy doxandéem, muy gan gu nekk ci seen biir, na juróom benni dëkk yooyu doon seen rawtu yeen ñépp, ba képp ku rey nit te du tey-eefam, man faa raweji.

<sup>16</sup> «Su dee ag weñ la ko dóor, mu dee, moo ko rey, te dee rekk mooy àtteb ki rey. <sup>17</sup> Su dee aw doj wu mana rey la jël, dóor ko ko, mu dee, moo ko rey, te dee rekk mooy àtteb ki rey. <sup>18</sup> Su dee bant bu mana rey la jël, dóor ko ko, mu dee it, moo ko rey, te dee rekk mooy àtteb ki rey. <sup>19</sup> Jotkat biy toppe bakkan ba nag, mooy rey ka rey; fu mu dajeek moom, moo koy rey. <sup>20</sup> Su dee ci biir mbañeel la dale ci kawam, mbaa mu sànni ko aw saan wu mu ko waajal, ba mu dee, <sup>21</sup> mbaa ci biir mbañeel la ko dóore loxoom ba mu dee, su boobaa dee rekk mooy àtteb ka dóore. Moo ko bóom. Jotkat bay toppe bakkan ba nag, bu dajeek ka rey, da koy rey.

<sup>22</sup> «Ndegam nag du caageenu mbañeel, xanaa mu jekki dal ci kawam, mbaa mu sànni ko kër ku mu mana doon, te du lu mu waajoon, <sup>23</sup> mbaa muy doj wu mana rey wu mu waddal ci kaw nit ki, ba nit ki dee, te gisul woon nit ki, te nit ka du woon ab noonam, te fekkul itam muy sàkku loraangey nit ka, <sup>24</sup> su

boobaa la mbooloo may wéyal diggante ki rey, ak jotkat bay toppe, moo di àtte yii ci yoon téral: <sup>25</sup> Mbooloo mi day musal ki rey ci loxol jotkatu bakkanu ka dee, te mbooloo ma da koy delloo ca dëkkub rawtoom ba mu làquji woon. Fa lay toog, ba kera deewug sarxalkat bu mag ba ñu baaxoo fale diw gu sell. <sup>26</sup> Ndegam nag ka rey moo génna gén, ba wees kemu dëkkub rawtoom ba mu làquji woon, <sup>27</sup> ba jotkat bay toppe bakkan fekk ko fu wees kemu dëkkub rawtoom, su boobaa su ko jotkatu bakkan ba reye, du tax mu gaddu bakkan. <sup>28</sup> Ndax kat ci biir dëkkub rawtoom la wara toog, ba kera deewug sarxalkat bu mag bi. Gannaaw bu sarxalkat bu mag bi deeyee nag, ki rey sañ naa dellu fa mu bokk.

<sup>29</sup> «Loolu mooy dogalu yoon bi leen ñeel, yeen ak seen askan, ci seen mboolemi dëkkuwaay.

<sup>30</sup> «Képp ku faat bakkan nag, ci kaw kàddu gu tukkee ci ay seede donj lees ko saña reye, moom ma rey, waaye bennub seede du seedeel nit, ngir ñu teg ko àtteb dee.

<sup>31</sup> «Te it buleen jël benn xalisu njotug bakkanu kenn ku rey nit ku yelloo dee. Kooku dee rekk mooy àtteem. <sup>32</sup> Buleen jël it xalisu njotug nit ku làquji ca dëkkub rawtoom, ngir may ko mu dellu fa mu dëkk, te sarxalkat bu mag bi deewul. <sup>33</sup> Buleen tilimal réew mi ngeen nekk. Deret kat mooy tilimal réew mi, te réew mi deesu ko jote lenn, ci deret ju ñu tuur ci biiram, lu moy deretu ka tuur deret. <sup>34</sup> Buleen sobeel réew mi ngeen dëkk, te man ma màkkaanoo ci biiram, ndax man Aji Sax ji maa màkkaanoo ci biir bànni Israyil.»

## 36

### *Lu jëm ci séyu jigéenu Israyil, ak céru suufam*

<sup>1</sup> Ba loolu wéyee kilifay njaboot yi askanoo ci Yuusufa, te bokk ci làngu Galàdd doomu Makir mi sètoo ci Manase, ñoo dikk. Ñu wax fa kanam Musaa, ak kilifay njabooti bànni Israyil. <sup>2</sup> Ñu ne:

\* 35:12 35.12 Seetal ci *Sarxalkat yi* 24.17-21.

«Sang bi, xam nga Aji Sax ji moo digle woon ñu tegal bant bànni Israyil, séddale leen réew mi. Ci biir loolu, sang bi, ndigal ñeel la, tukkee ci Aji Sax ji, ngir nga jël sunu céru doomu baay Selofat, jox ko ay doomam yu jigéen. <sup>3</sup> Waaye bu ñu séyee ci yeneen giiri bànni Israyil de, seen céru suuf mooy wàññikoo ci sunu céru maam, dolliku ca céru giir ga ñu séyi ca seen biir, te kon cér ba nu tegoo woon bant moo cay wàññikoo. <sup>4</sup> Te it bu atum Yiwiku\* mu bànni Israyil agsee, seen cér day dolliku ca céru giir ga ñu séyi ca seen biir. Te kon it ci sunu céru giiru maam, la seen cér boobu di wàññikoo.»

<sup>5</sup> Ba loolu wéyee, Musaa jox bànni Israyil ndigal, ci ndigalal Aji Sax ji, ne: «Dëgg la giirug Yuusuféen ñi wax. <sup>6</sup> Kàddu gii nag mooy li Aji Sax ji santaane ci doomi Selofat yu jigéen yooyu: Ku leen neex, nañu séy ak moom, na fekk rekk, ka ñuy séyal askanoo ci làng gu bokk ci seen giirug baay. <sup>7</sup> Du benn céru suuf ci biir bànni Israyil, buy jóge ci genn giir, toxu ca geneen, waaye na ku nekk ci bànni Israyil yem kepp ca suufas giiram, ga mu donne cay maamam. <sup>8</sup> Mboolem ku jigéen ku donn suuf ci giiri bànni Israyil, ci biir làng gu bokk ci giirug maamam rekk lay séy, ngir ku nekk ci bànni Israyil mana ñoŋal céru maamam. <sup>9</sup> Su ko defee du benn céru suuf buy jóge ci genn giir, toxu ca geneen, waaye giirug bànni Israyil gu ci nekk day yem kepp ca céru suufam.»

<sup>10</sup> Na ko Aji Sax ji sante Musaa nag, na la ko doomi Selofat yu jigéen defe. <sup>11</sup> Muy Maala, di Tirca, di Ogla, di Milka, di Nowa, doomi Selofat yooyu, ñoom ñépp seen bokki baay lañu séyal. <sup>12</sup> Ca làngi askanu Manase doomu Yuusufa lañu séy, seen céru suuf daldi des ca giir ga seen langu baay bokk.

<sup>13</sup> Loolu mooy santaane yeek àttey yoon yi Aji Sax ji dénkoon bànni Israyil, Musaa jottli leen ko ca joori Mowab, fa feggook dexu Yurdan, te janook Yeriko.

\* **36:4** 36.4 Seetal ci *Sarxalkat yi* 25.8-55.



## Baamtug Yoon wi di juróomeelu xaaju Tawreetu Musaa Ubbite gi

Téereb *Baamtug Yoon wi* moo tēnk ci mbind, yeesalug kóllère gi Yàlla fas ak bànni Israyil, fa tundu Sinayi, gannaaw ba ñu génnee Misra. Ñeent fukki at gannaaw gàddaay ga fekk na mboolem maasug fippukat ga jóge woon Misra, faatu ba jeex. Moo tax yeesalug kóllère ga ngir maas ga ca topp, manul woona ñàkk. Musaa mi doon jottlikatub sàrti kóllère gi moo demoon ba ag dundam desatul lu bare. Kon warteef la woon ci Israyil, mu dogu ne dina déggal kay wuutu Musaa. Ba bànni Israyil nangoo réew ya féete dexu Yurdan penku, dem nañu ba ca tàkkal dex ga, di waaja dugg nanguji réew ma leen Yàlla digoon.

Téere bi dafay sàrtal itam ni bànni Israyil wara dunde ca réew ma ñu leen dig. Yàlla moo leen jot, ñuy céru boppam bu mu sopp. Moo leen jële ca njaam ga ca Misra, ngir jox leen réew ma mu dige woon, ngir sottal digeem baak Ibraayma ak Isaaxa ak Yanqóoba. Cēslaayal sàrtoo gi nag mooy jeneen Yàlla amul ku moy Aji Sax, ji ñu wara déggal ci lépp, te moom donḡ a moom askan wi.

Ki jàng Kàddug Yàlla tey mbaa ki ko jàngoon démb, ñoom ñépp la Baamtug Yoon Wi fàttli ne mbég mi mboolem doom Aadama di sàkku, fi mu nekk dégg du fenn fu moy ci saxoo déggal Yàlla, ak fépp fu mu doon, ndax Yàlla mooy texeel, di goreel.

Ci Tēnk:

1.6—4.43 Musaa fàttli na jaar-jaari Israyil

4.44—26.19 Musaa baamtu na yoon wi

27.1—30.20 Musaa biral na yooni barke ak alkànde

31.1—34.12 Musaa tàggoon na

<sup>1</sup> Lii mooy kàddu yi Musaa wax bànni Israyil gépp, ca wàllaa dexu Yurdan, ca màndiḡ ma, fa joor ga jàkkaarlook Suf,

diggante Paran ak Tofel ak Laban ak Aserot ak Disayab. <sup>2</sup> Fukki fan ak benn mooy dox diggante tundu Oreb ba Kades Barneya, boo ko jaaree yoonu tundu Seyir.

<sup>3</sup> Waaye ñeent fukkeelu atam, gannaaw ba bànni Israyil génnee Misra, keroog benn fan ca fukkeelu weer waak benn, ca la Musaa doora wax bànni Israyil mboolem lu ko Aji Sax ji santoon ca ñoom. <sup>4</sup> Fekk na Musaa дума Siwon, ma toogoon Esbon, di buurub Amoreen ña, дума it ca Eddrey, Og buuru Basan ba toogoon Astarot.

<sup>5</sup> Ca wàllaa dexu Yurdan, ca réewum Mowab la Musaa tàmbalee leeral yoonu Yàlla wii. Mu ne:

### Musaa fàttli na jaar-jaari Israyil

(*Saar 1.6—4.43*)

<sup>6</sup> Sunu Yàlla Aji Sax ji da noo waxoon ca Oreb ne nu: «Seen toogaayub tund wii doy na. <sup>7</sup> Walbatikuleen dem, jàll-leen ca biir diiwaanu tundi Amoreen ña, ak mboolem réew ya mu feggool, ca joor ga, ak tund wa, ak suufu tund ya, ak Negew ca bėj-saalum, ba ca tefes ga, ca réewum Kanaaneen ña, ak Liban, ba ca Efraat, dex gu mag ga. <sup>8</sup> Mu ngoog, maa leen jox réew moomu. Demleen nangu réew mi Aji Sax ji giñaloon seeni maam Ibraayma ak Isaaxa ak Yanqóoba, ñeel leen ñook seen askan wi leen di wuutu.»

<sup>9</sup> Musaa teg ca ne leen: jant yooyu laa leen wax, ne leen: «Duma leen àttan yeen ñépp, man donḡ. <sup>10</sup> Seen Yàlla Aji Sax ji moo leen ful, ba yeena ngii tey, bare ba tollu ni biddiwi asamaan. <sup>11</sup> Yal na leen seen Yàllay maam Aji Sax ji yokkati junniy yoon, te barkeel leen ni mu leen ko waxe! <sup>12</sup> Waaye nu ma leen di àttane man donḡ, ak seen coono, ak seeni lěj-lěj, ak seeni jote? <sup>13</sup> Beral-leen seen bopp ay nit ñu rafet xel, am ug dégg, te di ñu ràññiku ci seeni giir. Su ko defee ma tabb leen, ñuy seeni njiit.» <sup>14</sup> Ba loolu amee ngeen wax ma ne ma: «Loolu nga wax de, xel la.» <sup>15</sup> Ci kaw loolu ma jël seen njiit yu rafet xel yu ràññiku, yi ngeen jukkee ci seeni giir, daldi leen

def seeni njiit, ñii yilif junniy nit, ñii téeméer, ñii juróom fukk, ñii fukk, ñii diy jawriñ ci seeni giir. <sup>16</sup> Jant yooyu laa sant seeni àttekat ne leen: «Deeleen déglu seeni bokk tey àtte dëgg, diggante bànni Israyil ak mbokkam, akub doxandéem. <sup>17</sup> Buleen far-farloo cib àtte, dégluleen ku tuut, ni ngeen di déglu ku mag, te buleen ragal kenn, ndax àtte bi Yàllaay boroom. Bu leen mbir mi éppee loxo nag, ngeen indil ma ko, ma seet ko.» <sup>18</sup> Jant yooyu laa leen sant mboolem lu ngeen wara def.

### *Ndigalu yëri Kanaan jib na*

<sup>19</sup> Gannaaw gi nu bàyyikoo tundu Oreb, jaare mboolem màndiñ mu yaa, mu raglu ma ngeen gis. Nu topp yoonu diiwaanu tundi Amoreen ñi, na nu ko sunu Yàlla Aji Sax ji sante woon, ba àgg Kades Barneya. <sup>20</sup> Ci kaw loolu ma ne leen: «Agsi ngeen fii ci tundu Amoreen ñi nu sunu Yàlla Aji Sax ji di jox. <sup>21</sup> Mu ngoog, seen Yàlla Aji Sax ji moo teg réew mi fi seen kanam. Demleen nangu ko, ni leen ko seen Yàllay maam Aji Sax ji, waxe. Buleen ragal, buleen yoqi.»

<sup>22</sup> Ci kaw loolu ngeen dikk yeen ñépp fi man, ne ma: «Nan yebal aw nit, ñu jiitu nu, yéral nu réew ma, te délsi wax nu yoon wu nuy jaare, ak dëkk yu mag ya nuy duggeji.» <sup>23</sup> Ma rafetlu xel ma, tànn ci yeen fukki góor ak ñaar, giir gu nekk, genn góor. <sup>24</sup> Ñu walbatiku jubal yoonu diiwaanu tund ya, ba àgg xuru Eskol, daldi seet foofa, <sup>25</sup> ba noppi sàkk ca meññeefum réew ma, indaaleel nu. Ñu wax nu nag ne nu: «Réew mu baax la nu sunu Yàlla Aji Sax ji jox.» <sup>26</sup> Teewul bugguleen woona dem, xanaa di gàntal seen ndigalal Yàlla Aji Sax ji. <sup>27</sup> Ngeen di ñurumtoo seen biiri xayma, naan: «Bañ nu kay a tax Aji Sax ji jële nu réewum Misra, teg nu ci loxoy Amoreen ñi, ngir ñu faagaagal nu. <sup>28</sup> Ana fu nu jëm? Te sunu bokk ya demoon yoqiloo nu, ne nu waa réew maa nu épp, sut nu, dëkk ya réy te dàbblikoo ay tata yu àkki asamaan. Rax ci dolli, ay ponkal yu bokk ci askanu Anageen ñi lanu fa gis!»

<sup>29</sup> Ma wax leen yeen ne leen: «Buleen yox-yoxi, buleen leen ragal. <sup>30</sup> Seen Yàlla

Aji Sax ji leen jiitu, moom moo leen di xeexal, noonee mu defoon ak yeen ca Misra, ngeen gis, <sup>31</sup> ca màndiñ ma it, gis ngeen na leen seen Yàlla Aji Sax ji fabe, ni baay di fabe doomam, ci yoon wi ngeen dox wépp, ba agsi bérab bii.» <sup>32</sup> Loolu lépp taxul ngeen am kóolute ci seen Yàlla Aji Sax ji, <sup>33</sup> ki leen daan jiitu ci yoon wi, ngir sàkkal leen fu ngeen di dale; guddi, mu nekk ci biir sawara, di leen niital yoon wu ngeen jaare; bëccëg, mu nekkal leen ci biir aw niir.

<sup>34</sup> Ba Aji Sax ji déggee seeni kàddu, dafa mer ba giñ ne: <sup>35</sup> «Du kenn ci nit ñii, maas gu bon gii, kuy gis réew mu baax mi ma giñaloon seeni maam. <sup>36</sup> Xanaa Kaleb doomu Yefune moo koy gis, te réew ma mu teg tànkam, moom laa koy jox, mook askanam, ndax moo matal kóolute ci Aji Sax ji.» <sup>37</sup> Man itam Aji Sax ji mere na ma ci ndax yeen, ba ne ma: «Yaw itam doo ca dugg. <sup>38</sup> Yosuwe doomu Nuun mi ci sa kilifteef moo cay dugg. Nanga ko ñaax, ndax moom mooy jox Israyil réew ma. <sup>39</sup> Seen tuut-tànk yi ngeen noon dees na leen sèxëtoo, seen doom yii xamagul lu baax ak lu bon, ñooy duggi réew ma. Ñoom laa koy jox, te ñoo koy nangu. <sup>40</sup> Yeen nag walbatikuleen dellu màndiñ ma, topp yoonu géeku Barax ya.»

<sup>41</sup> Ci kaw loolu ngeen wax ma, ne ma: «Noo tooñ Aji Sax ji. Waaye dinanu dem xareji noonee nu ko sunu Yàlla Aji Sax ji sante woon.» Ku nekk ci yeen daldi ràngoo ngànaayam, ngeen defe ne yéegi diiwaanu tund wa dina leen yomb. <sup>42</sup> Aji Sax ji ne ma: «Wax leen ne leen buñu dem, buñu xeexi ndax man Aji Sax ji àndumaak ñoom. Lu ko moy dinañu daanu ci seen kanami noon.» <sup>43</sup> Ma wax leen ko, dégluween, xanaa gàntal ndigalal Aji Sax ji, fétteeral, ba yéegi diiwaanu tund wa. <sup>44</sup> Ba loolu amee Amoreen ña dëkke tund woowa dikk, dajeek yeen, ne leen dann niy yamb, yitte leen fa Seyir, ba Xorma. <sup>45</sup> Ngeen walbatiku, jooy ko Aji Sax ji, Aji Sax ji dégluwu leen, faalewu leen. <sup>46</sup> Gannaaw gi ngeen toog Kades, lu yàgg la ngeen fa toog lépp.

## 2

<sup>1</sup> Ba loolu amee nu walbatiku, dellu màndiŋ ma, topp yoonu géēju Barax ya, na ma ko Aji Sax ji waxe woon. Wër nanu diiwaanu tundu Seyir ay fani fan.

### *Bànni Israyil teggi nañu*

<sup>2</sup> Aji Sax ji wax ma, ne ma: <sup>3</sup> «Seen wërüb tund wii doy na. Walbatikuleen, jublu bëj-gànnar. <sup>4</sup> Mbooloo mi ngay sant ne leen: “Yeena ngi waaja jéggi seen kemu réewum bokki Esaween, ñi dëkke Seyir. Dinañu leen ragal, waaye nangeen moytu bu baax. <sup>5</sup> Buleen xeex ak ñoom, ndax дума leen jox ci seen suuf fu téstèn sax tege, ngir Esaween ñi laa sédd diiwaanu tundu Seyir. <sup>6</sup> Aw ñam, weccikoo leen kook ñoom xalis, door koo lekk; am ndox it, nangeen ko jèndeek ñoom, door koo naan. <sup>7</sup> Ndax yeen kat seen Yàlla Aji Sax ji moo barkeel seen mboolemu ñaq te moo ràññee seen doxub màndiŋ mu yaa mii. Ñeent fukki at a ngii seen Yàlla Aji Sax jaa ngeek yeen, ñakkuleen dara.”» <sup>8</sup> Ba mu ko defee nu romb sunu bokki Esaween ñi dëkke Seyir. Danoo wacc yoonu joor ga, ak Elat ak Esiyon Geber, daldi walbatiku jaareji màndiŋu Mowab.

<sup>9</sup> Ba loolu amee Aji Sax ji ne ma: «Buleen dal ci kaw Mowabeen ñi, di leen song ub xare, ngir дума leen jox benn cér ci seenum réew, ndax askanu Lóot laa sédd réewum Ar.»

<sup>10</sup> Emeen ñaa fa jëkkoonaa dëkk, askan wu am kàttan lañu woon, bare, yegg ca kaw ni Anageen ñi. <sup>11</sup> Ay Refayeen lañu jàppe woon Emeen ñooñu ak Anageen ñi, teewul Mowabeen ñi di leen wooye ay Emeen. <sup>12</sup> Seyir nag la Oreen ña jëkkoonaa dëkk, waaye Esaween ñaa leen fa dàqe, faagaagal leen, wuutu leen, noonu Israyil def rekk ak cérü suufam bi leen Aji Sax ji jox.

<sup>13</sup> Aji Sax ji neeti: «Jàll-leen walum Seredd.» Nu jàll walum Seredd. <sup>14</sup> Diggante ba nu bàyyikoo Kades Barneya, di dox, ba keroog bés ba nu jàllee walum Seredd, fanweeri at ak juróom ñett la. Fekk na mboolem maasu góor ña tollu woon ci xare, ca ndoortel

yoon wa, ñoom ñépp a wuute dal ba, dee ba jeex, na leen ko Aji Sax ji giñale woon. <sup>15</sup> Aji Sax jee leen toppe diisaayu loxoom, wollee leen ci biir dal bi, ba ñu jeex tàkk.

<sup>16</sup> Ba mboolem ña tollu woon ci xare deeyee ba jeex, ba ñoom ñépp wuute ca mbooloo ma, <sup>17</sup> Aji Sax ji wax ma, ne ma: <sup>18</sup> «Yaa ngi waaja jéggi kemu réewum Mowab, ca Ar. <sup>19</sup> Bu ngeen àggee ca Amoneen ña nag, buleen dal ci seen kaw, buleen xeex ak ñoom, ndax дума leen jox benn cér ci réewum Amoneen ñi, ngir askanu Lóot woowu laa ko sédd.» <sup>20</sup> Diiwaan boobu it réewum Refayeen lees ko jàppe woon, te Refayeen ñaa fa jëkkoonaa dëkk. Teewul Amoneen ñi di leen wooye ay Samsumeen, <sup>21</sup> askan wu am kàttan, bare, te yegg ca kaw ni Anageen ñi. Aji Sax jee leen fàkkasal Amoneen ñi, Amoneen ñi dàq leen, sanc, wuutu leen. <sup>22</sup> Mooy na mu defaloon Esaween ña dëkke Seyir rekk, ba mu leen fàkkasalee Oreen ña, Esaween ña dàq leen, sanc, wuutu leen, ba bésüb tey jii. <sup>23</sup> Aween ña dëkke woon dëkk yu ndaw ya dem, ba àkki Gasa nag, Kaftoreen ña bàyyikoo Keret ñoo leen faagaagal, wuutu leen.

### *Israyil nangu na penkub dexu Yurdan*

<sup>24</sup> Aji Sax ji neeti: «Ayca, jàll-leen walum Arnon. Mu ngoog, maa teg ci seen loxo, Siwon Amoreen ba, buurub Esbon, mook réewam. Dal-leen di nangu réew mi, song ko xare. <sup>25</sup> Bés niki tey maa tàmbalee wàcce njàqareek tiitaange ci kaw mboolem askan yi asamaan tiim, ba bu ñu déggee seenum riir, dañuy jaaxle, di lox.»

<sup>26</sup> Ci kaw loolu ma yebal ay ndaw yu bàyyikoo màndiŋu Kedemot, ba ca Siwon buurub Esbon. Ma yóbbante ko kàdduy jàmm, ne ko: <sup>27</sup> «May nu, nu jaare sam réew. Yoon wi rekk lanuy topp; dunu jàdd ndijoor, dunu jàdd càmmoñ. <sup>28</sup> Aw ñam, xalis nga nu koy weccee, nu lekk; am ndox sax, xalis nga nu koy joxe, nu naan. May nu rekk nu dox, ba jàll. <sup>29</sup> Noonu nu Esaween ña dëkke Seyir defaloon, ñook Mowabeen ña dëkke Ar rekk. Su ko defee nu mana jàll dexu

Yurdan, ba àgg ca réew ma nu sunu Yàlla Aji Sax ji jox.»

<sup>30</sup> Siwon buurub Esbon nag nanguwu noo may nu jaare fa moom, ndax booba seen Yàlla Aji Sax ji moo dègèral boppam, wowal xolam, ngir teg ko ci seen loxo niki bésuub tey jii. <sup>31</sup> Aji Sax ji ne ma: «Gis nga, maa ngi nii tàmbalee teg Siwon akum réewam ci seen loxo. Dal-leen di nangum réewam.» <sup>32</sup> Ba mu ko defee Siwon dikk dajeeek nun, mook gàngooram gépp, ngir song nu xare ca Yaxacc. <sup>33</sup> Sunu Yàlla Aji Sax ji daane ko fi sunu kanam, nu duma ko, mook ay doomam, ak gàngooram gépp. <sup>34</sup> Jant yooyu lanu nangu dèkkam yu mag yépp, faagaagal dèkk yu mag yépp: góor ak jigéen, ba ca tuut-tànk ya, bàyyiwunu kuy dund. <sup>35</sup> Xanaa jur ga lanu sèxètoo, ak mboolem alali dèkk ya nu nangu. <sup>36</sup> La ko dale Arower ga tiim walum Arnon, boole ca dèkk ba ca xur wa, ba ca Galàdd, du benn dèkk bu nu të. Foofu fépp la sunu Yàlla Aji Sax ji daane fi sunu kanam. <sup>37</sup> Réewum Amoneen ña donj ngeen jegewul; muy réew ma leru dexu Yabog, ak dèkki tund ya, mboolem daal, fu nu sunu Yàlla Aji Sax ji aaye woon.

### 3

<sup>1</sup> Ba loolu wéyee nu walbatiku, awe yoon wa yéeg jëm Basan. Og buuru Basan nag dikk dajeeek nun, mook gàngooram gépp, ngir song nu xare ca Eddrey. <sup>2</sup> Aji Sax ji ne ma: «Bu ko ragal, ndax ci say loxo laa ko teg, mook gàngooram gépp, akum réewam. Nanga ko def na nga defoon Siwon buurub Amoreen ba woon ca Esbon.» <sup>3</sup> Noonu la sunu Yàlla Aji Sax ji tege Og buuru Basan itam ci sunuy loxo, mook gàngooram gépp, nu duma leen ba desewul kuy dund. <sup>4</sup> Booba lanu nangu mboolemi dèkkam. Amul benn dèkk bu nu nanguwul ci ñoom: juróom benn fukki dèkk, mboolem diiwaanu Argob, ba bokk ca nguug Og ca Basan. <sup>5</sup> Yooyu yépp di dèkk yu dàbblikoo tata yu kawé, ak bunt yu tëje ràpp, te limaalesul dèkk-dèkkaan yu baree bare, yu dara wèrul.

<sup>6</sup> Nu faagaagal leen, na nu defoon ak Siwon buurub Esbon. Dèkk yépp lanu faagaagal: góor ak jigéen ba ca tuut-tànk ya. <sup>7</sup> Mboolem jur gaak alali dèkk ya nag, nu sèxètoo.

<sup>8</sup> Jant yooyu lanu nangoo ci loxol ñaari buuri Amoreen ñooña ca wàllaa dexu Yurdan, réew ma dale ca xuru Arnon, ba ca tundu Ermon. <sup>9</sup> Ermon googu la waa Sidon di wooye Siryon, Amoreen ñi di ko wooye Senir. <sup>10</sup> Mboolem dèkki joor ga lanu nangu, ak mboolem diiwaanu Galàdd, ak mboolem Basan, ba ca Salka ak Eddrey, dèkki nguug Og mu Basan. <sup>11</sup> Mennum Og buuru Basan donj moo muccoon ca ndesu Refayeen ñu ponkale ña. Lalam ba, lalu weñ gu ñuul la. Ma nga noonee ca Raba, dèkkub Amoneen ña. Guddaayu lal ba ci xasabu góor, juróom ñeenti xasab la, di ñeenti meetar ak genn-wàll, yaatuwaay ba, ñeenti xasab, di ñaari meetar.

#### *Séddale nañu penkub Yurdan*

<sup>12</sup> Suuf soosu nu nangu ca jant yooya, te dale ca Arower ga ca xuru Arnon ca bëj-saalum, ak ca bëj-gànnar, genn-wàllu diiwaanu tundi Galàdd, aki dèkkam, maa ko jox Rubeneen ñi, ak Gàddeen ñi. <sup>13</sup> Ndesu Galàdd ak mboolem Basan gu nguug Og, ma jox ko genn-wàllu giirug Manase. Diiwaanu Argob gépp ak Basan googu gépp, lañu daan wooye réewum Refayeen ña. <sup>14</sup> Yayir mi askanoo ci Manase moo nangu mboolem diiwaanu Argob, ba ca kemu réewum Gesureen ña, ak Maakateen ña. Moo tudde boppam Basan googu, ba tax ñu di ko wooye Sanci Yayir ba tey jii. <sup>15</sup> Askanu Makir laa jox diiwaanu Galàdd\*. <sup>16</sup> Rubeneen ñeek Gàddeen ñi laa jox la dale diiwaanu Galàdd ba ca xuru Arnon, diggu xur wa di seen kemu suuf ci genn wet, dexu Yabog di seen kemu ñook Amoneen ña. <sup>17</sup> Fa joor ga feggook dexu Yurdan it di kemu, diggante dexu Kineret ca bëj-gànnar, ak ca bëj-saalumu géēju Xorom ga, ba ba ngay àgg ca suufu tundu Piska, ca penku.

\* **3:15** 3.15 Genn-wàllu diiwaanu Galàdd ba ca bëj-gànnar lay wax. Seetal ci 3.12. † **3:18** 3.18 Ñi wara féetewoo penkub dexu Yurdan la Musaa di waxal fii.

<sup>18</sup> Jant yooyu laa leen sant ne leent†: «Seen Yàlla Aji Sax ji moo leen jox réew mii, ngir ngeen nangu ko. Na xarekat yépp gannaayu, jàll, jiitu seen bokki bànni Israyil. <sup>19</sup> Seeni jabar donḡ, ak seeni doom ak seenug jur, ndax xam naa ne jur gu takku ngeen am, ñooy des ci seen dëkk yi ma leen jox, <sup>20</sup> ba keroog Aji Sax ji noppalee seen bokki bànni Israyil ni yeen, fekk leen nangu, ñoom it, réew ma leen seen Yàlla Aji Sax ji jox, ca wàllaa dexu Yurdan. Su ko defee ku nekk ci yeen saña dellu ca céru suufam ba ma ko jox.»

<sup>21</sup> Yosuwe itam, sant naa ko ci jant yooyu ne ko: «Sa bët moo la may mboolem ni seen Yàlla Aji Sax ji def ak ñaari buur yii. Noonu rekk la Aji Sax jiy def ak mboolem nguur ya nga jëm. <sup>22</sup> Buleen leen ragal, ndax seen Yàlla Aji Sax ji moo leen di xeexal.»

### *Musaa duggul Kanaan*

<sup>23</sup> Jant yooyu laa tinu Aji Sax ji, ne ko: <sup>24</sup> «Éy Boroom bi Aji Sax ji, yaa ma wonagum lenn ci sa màggaay ak sa doole, Sang bi. Ana yàlla ju nekk asamaan, mbaa ci kaw suuf ju mana roy say jëf ak say jaloore? <sup>25</sup> May ma rekk ma jàll, ba gis réew mu baax, ma ca wàllaa dexu Yurdan, tund wu rafet woowu ba ca Liban!» <sup>26</sup> Waaye fekk na Aji Sax ji mere ma lool ndax yeen, ba faalewu ma. Aji Sax ji ne ma: «Na doy. Bu ma waxati lu jëm ci loolu. <sup>27</sup> Yéegal ba ca kaw tundu Pisga, nga dawal sa bët, te séenu réew ma wetu sowu, ba bëj-gannaar, bëj-saalum, ba penku. Xoolal bu baax, nde doo jàll dexu Yurdan gii. <sup>28</sup> Waaye nanga yebal Yosuwe, ñaax ko, jàjj ko, ndax moom mooy jàll, jiite mbooloo mii, te moo leen di jox réew moomu ngay séen.» <sup>29</sup> Ba mu ko defee nu toog ca xur wa, janook Bet Pewor.

## 4

### *Musaa ñaax na bànni Israyil*

<sup>1</sup> Léegi nag yeen waa Israyil, dégluleen dogali yoon yeek àttey yoon yii ma leen di xamal, ngir ngeen di ko jëfe, ndax ngeen dund ba dugg, nanguji réew ma leen Aji

Sax ji seen Yàllay maam, di jox. <sup>2</sup> Buleen yokk dara ci kàddu gi ma leen di dénk, te buleen ci wàññi dara, ndax ngeen sàmm seen sanaaney Yàlla Aji Sax, ji ma leen di dénk. <sup>3</sup> Seen bët moo leen may la Aji Sax ji def ca Baal Pewor. Mboolem ku toppoon tuur ma ñuy wax Baal ca Pewor, seen Yàlla Aji Sax ji moo ko sànce ci seen biir. <sup>4</sup> Waaye yeen ñi noyoon ci seen Yàlla Aji Sax ji, yeen ñépp a ngi dund tey jii.

<sup>5</sup> Mu ngoog, jàngal naa leen ay dogali yoon, aki àttey yoon, na ma ko sama Yàlla Aji Sax ji sante, ngir ngeen war koo jëfe ca biir réew ma ngeen di nanguji. <sup>6</sup> Sàmmooleen koo jëfe, ndax mooy doon seenug rafet xel, ak seenug ràññee fi kanam xeet yi, ba bu ñu dégge mboolem dogali yoon yii, dinañu ne: «Wii askan wu mag rekk a rafet um xel te ràññee!» <sup>7</sup> Ana wan xeet wu mag wu am yàlla ju leen jege ni nu sunu Yàlla Aji Sax jiy jegee saa yu nu ko wooyee wall? <sup>8</sup> Ana xeet wu ko màgge, ba am dogali yoon ak àttey yoon yu jekke ni yoon wii ma joxe fi seen kanam bésub tey?

<sup>9</sup> Waaye wattuleen, wattuleen seen bopp bu baax, bala ngeena fàtte mbir yi ngeen teg seen bët, ba du génn seenum xel seen giiru dund gépp. Te nangeen ko xamal seeni doom ak seeni sët. <sup>10</sup> Bés ba ngeen taxawee fa seen kanam Yàlla Aji Sax ji, fa tundu Oreb, Aji Sax jee ma ne: «Dajaleel ma mbooloo mi, ma dégtal leen samay kàddu, ngir ñu tàggatu ci ragal ma li feek ñuy dund ci kaw suuf, te seeni doom it, ñu tàggat leen ci.» <sup>11</sup> Yeena dikk taxaw ca suufu tund wa, tund wa ne jippét, sawara wa jolli ba ca xolu asamaan, ci biir xàmbaraari guddi gu ne kèruus. <sup>12</sup> Aji Sax ji àddoo ca digg sawara wa, wax ak yeen, ngeen di dégg baat, te jëmm, gisuleen ko, xanaa baat donḡ. <sup>13</sup> Ci kaw loolu mu biralal leen kóllereem gi mu leen sant ngeen sàmm ko, muy fukki sanaaney yi. Mu daldi leen bindal sanaaney yi ci ñaari àlluway doj. <sup>14</sup> Man nag la Aji Sax ji sant ca yooya jant, ne ma xamal leen dogali yoon yeek àttey yoon, yi ngeen wara jëfe ca réew ma ngeen jëm, ngir nanguji ko.

### *Yoon wi aayal na bokkaale*

<sup>15</sup> Nangeen wattu seen bopp bu baax nag ndax keroog ba Aji Sax jiy àddoo ca digg sawara wa, wax ak yeen ca tundu Oreb, gisuleen jenn jëmm. <sup>16</sup> Kon buleen def ug yàqute, di sàkkal seen bopp menn tuur muy jëmmal lenn lu mel ni góor mbaa jigéen, <sup>17</sup> mbaa lu mel ni menn malam suuf, mbaa malam kaw mu mel ni njanaaw, <sup>18</sup> mbaa lu mel ni ndëgmeent, di raam, mbaa lu mel niw jën, nekk ci ndox mu suuf tiim. <sup>19</sup> Buleen séentu asamaan, gis jant bi, mbaa weer wi, mbaa biddiwi yi, ak mboolem leeri asamaan, ba mu xiirtal leen ci di leen sujjóotal ak a jaamu, te seen Yàlla Aji Sax ji féetale yooyii, mboolem xeet yi asamaan tiim. <sup>20</sup> Yeen nag Aji Sax jee leen jël, bellee leen ca Misra, taalu xellikaayu weñ gu ñuul ba, ngir ngeen doon ñoñam ñi mu séddoo niki bésub tey.

<sup>21</sup> Waaye yeena tax Aji Sax ji mere ma ba giñ ne duma jáll dexu Yurdan, te duma dugg ca réew mu baax, ma leen seen Yàlla Aji Sax ji moomale. <sup>22</sup> Man nag ci réew mii laay dee. Du maay jáll dexu Yurdan. Waaye yeen yeenay jáll, ba nanguji réew mu baax moomu. <sup>23</sup> Wattuleen seen bopp ba baña fàtte kóllère gi seen Yàlla Aji Sax ji fas ak yeen, di sàkkal seen bopp tuur muy jëmmal lenn, te seen Yàlla Aji Sax ji aaye leen ko. <sup>24</sup> Seen Yàlla Aji Sax ji kat, mooy sawara wuy xoyome, Yàlla ju fiir la.

<sup>25</sup> Bu ngeen demee ba am ay doom aki sët, fekk leen yàgg ca réew ma, su boobaa su ngeen defee ag yàqute, di sàkk am tuur, ak jëmmu lu mu mana doon, mbaa ngeen def lenn lu seen Yàlla Aji Sax ji ñaawlu, lu koy merloo, <sup>26</sup> maa ngi sàkku asamaan ak suuf seedeel maak yeen bésub tey jii, ne su boobaa yeenay sànkoo sàнку ci lu gaaw, ba wuute ca réew, ma ngeen jáll dexu Yurdan, jëm fa, ngir nanguji ko. Su boobaa dungeen fa yàgge, ndax dees leen di raafal, ba ngeen jeex tàkk. <sup>27</sup> Aji Sax ji moo leen di tasaare ci biir xeet yi, te lu néew la seenu ndes di doon ci biir xeeti jaambur yi leen Aji Sax jiy dàq jëme. <sup>28</sup> Foofa ngeen di jaamoo ay yàlla yu loxoy nit sàkke

bant, mbaa doj, yàlla yu dul gis, du dégg, du lekk, du xeeñtu. <sup>29</sup> Waaye su ngeen fa sàkkoo seen Yàlla Aji Sax ji, dingeen ko daj, ndegam seen léppi xol, ak seen léppi bakkan ngeen ko sàkkoo. <sup>30</sup> Bu leen njàqare dikkalee, fekk mboolem mbir yooyu dab leen, su boobaa dingeen mujj délsi ci seen Yàlla Aji Sax ji te dingeen ko déggal. <sup>31</sup> Ndax seen Yàlla Aji Sax ji Yàllay yërmande la. Du leen wacc, du leen yàqte te du fàtte kóllère, ga mu fasoon ak seeni maam ci kaw ngiñ.

### *Ab jagle ñeel na Israyil*

<sup>32</sup> Seetleem rekk ci janti démb yi leen jiitu, la dale bés ba Yàlla sàkke nit fi kaw suuf, mbaa ngeen seet asamaan, cat ba cat. Ndax lu màgge nii mas naa am? Am masees naa dégg lu ni mel? <sup>33</sup> Ana askan wu masa dégg baatu Yàlla bu jibe ci sawara, ni ngeen ko dégge te dese bakkan? <sup>34</sup> Jan yàlla moo masa fexee dikk foqatil boppam aw xeet, bellee leen ci weneen xeet, ci biiri nattu, aki firnde aki kéemaan ak xare yu mu sottale dooley loxoom, ak kàttanu përegam, ak jëf ju raglu, noonee leen ko seen Yàlla Aji Sax ji defale ca Misra, ngeen teg ci bët? <sup>35</sup> Yeen déy lañu won loolu lépp ngir ngeen xam ne Aji Sax ji donɲ mooy Yàlla, te jeneen yàlla amul, ju dul moom. <sup>36</sup> Fa asamaan la àddoo, dégtal leen baatam, ngir yar leen, ci kaw suuf it la leen wone sawaraam su mag sa, te ay kàddoom ngeen dégg, mu jibe ca digg sawara sa. <sup>37</sup> Sopp seeni maam nag moo tax mu taamu leen, yeen askan wi leen wuutu, génneel leen boppam Misra, ci dooleem ju bare, <sup>38</sup> ngir dàqal leen xeet yu leen sut, ëpp leen doole, ba dugal leen seenum réew, sédd leen ko bés niki tey.

<sup>39</sup> Kon xamleem tey te délloosi ci seen xel, ne Aji Sax ji mooy Yàlla fa kaw asamaan ak fi kaw suuf. Du keneen. <sup>40</sup> Sàmmleem dogali yoonam, ak santaa-neem yi ma leen dén k bés niki tey, ndax ngeen baaxle yeen ak seen doom yi leen di wuutu, te ngeen yàgg ca réew ma leen seen Yàlla Aji Sax ji jox ba fàww.

### *Amal nañu ay rawtu ca penkub Yurdan*

<sup>41</sup> Ba loolu wéyee Musaa ber na ñetti dëkk ca penkub dexu Yurdan, <sup>42</sup> mu diy rawtu ci ku rey moroomu nitam, te reyu ko cig teyeef, wonu ko woon it mbañeel, lu jiitu loola. Kooku sañ naa làquji ci dëkk yooyu benn, ngir rawale bakkanam. <sup>43</sup> Dëkk yooyu ñoo doon Beccer, ga ca màndiñ ma, ca kaw dénd wu tell wa ca kaw tund wa, su dee ab Rubeneen; ak Ramot ga ca Galàdd, su dee ab Gàddeen; ak Golan ga ca diiwaanu Basan, su dee ab Manaseen.

## Musaa baamtu na yoon wi

(Saar 4.44—11.32)

<sup>44</sup> Lii moo di ndigalu yoon wi Musaa biraloon fi kanam bànni Israyil. <sup>45</sup> Lii moo di seedey yoon yi, ak dogali yoon yi, ak àttey yoon yi Musaa dénkoon bànni Israyil, gannaaw ba ñu bàyyikoo Misra, <sup>46</sup> ca wàllaa dexu Yurdan, ca xur wa janook Bet Pewor, ca réewum Siwon buurub Amoreen ba toogoon Esbon, te Musaa ak bànni Israyil дума woon ko, ba ñu génnee Misra. <sup>47</sup> Ñoo nangu am réewam, ak réewum Og buuru Basan, ñaari buuri Amoreen ña moomoon wàllaa dexu Yurdan, ca penku, <sup>48</sup> fa dale ca Arower, ga ca catal walum Arnon, ba ca tundu Siyon\*, ga ñuy wax itam Ermon, <sup>49</sup> boole ca mboolem joorug wàllaa dexu Yurdan, ca penku, ba àgg ca géēju Xorom ga, ca suufu tundu Pisga.

## 5

### Fukki sanaanee ngi

<sup>1</sup> Musaa moo woo bànni Israyil gépp, wax leen ne leen: Yeen, bànni Israyil, dégluleen dogali yoon yi, ak àttey yoon yi may wax, ngeen dégg, tey. Jàngleen ko te farlu koo jéfe. <sup>2</sup> Sunu Yàlla Aji Sax ji moo fasoon kóllère ak nun ca tundu Oreb. <sup>3</sup> Du sunuy maam rekk la Aji Sax ji fasoon kóllère gii ak ñoom; waaye ñook nun ñi fi tey, mboolem nun ñiy dund, ci lanu. <sup>4</sup> Ci biir jàkkaarloo la Aji Sax ji waxe woon ak yeen ca kaw tund wa, àddoo ca digg sawara wa. <sup>5</sup> Maa taxaw diggante Aji Sax jeek yeen, jant yooyu, di leen jottli

kàddug Aji Sax ji, ndax yeena ragaloon sawara wa, ba yéeguleen ca kaw tund wa. Mu ne:

<sup>6</sup> «Man Aji Sax ji maay seen Yàlla, ji leen génne réewum Misra, kërug njaam ga.

<sup>7</sup> «Buleen am yeneen yàlla ci sama kanam.

<sup>8</sup> «Buleen sàkkal seen bopp tuur muy jëmmal lenn lu nekk ci kaw asamaan, mbaa ci kaw suuf, mbaa lu nekk ci ndox mu suuf tiim. <sup>9</sup> Buleen ci sujjóotal lenn, buleen ci jaamu lenn, ndax man seen Yàlla Aji Sax ji, Yàlla ju fir laa. Maay topp doom tooñu waajur, ba ca seen maasi sèt, ba ca maasug sètaati nit ñi ma bañ.

<sup>10</sup> Waaye maay baaxe ñi ma sopp, di sàmm samay santaane, ba ci junniy maas ya leen di wuutuji.

<sup>11</sup> «Buleen tudd seen turu Yàlla Aji Sax ji ci neen, ndax Aji Sax ji du ñàkka topp kuy tudd aw turam ci neen.

<sup>12</sup> «Sàmmleen bésuub Noflaay, ngir selal ko, ni leen ko seen Yàlla Aji Sax ji sante. <sup>13</sup> Juróom benni fan ngeen wara liggéey, def ci seen soxla yépp. <sup>14</sup> Waaye bésuub juróom ñaareel ba, Noflaay lay doon, ñeel seen Yàlla Aji Sax ji. Buleen ci liggéey lenn; du yeen, du seen doom ju góor, ak ju jigéen, du seen jaam bu góor, ak bu jigéen, du seen nag, du seen mbaam, du mboolem seenug jur, du seen gan gu nekk ci seen biir dëkk. Su ko defee seen jaam bu góor, ak seen jaam bu jigéen mana dal-lu ni yeen. <sup>15</sup> Fàttlikuleen ne ay jaam ngeen woon ca réewum Misra. Seen Yàlla Aji Sax ji moo leen fa génnee dooley loxoom, ak kàttanu pèrègam. Moo tax seen Yàlla Aji Sax ji sant leen ngeen wàccoo ak bésuub Noflaay.

<sup>16</sup> «Teral-leen seen baay, ak seen ndey, ni leen ko seen Yàlla Aji Sax ji sante, ndax ngeen gudd fan, ndax it ngeen baaxle ca réew ma leen seen Yàlla Aji Sax ji jox.

<sup>17</sup> «Buleen bóom.

<sup>18</sup> «Buleen jaaloo.

<sup>19</sup> «Buleen sàcc.

<sup>20</sup> «Buleen seedeel seen moroom lu dul dëgg.

<sup>21</sup> «Buleen xédd seen jabaru dëkkandoo, buleen xemmem kèram,

\* **4:48** 4.48 Gii Siyon wuute na ak weneen tur wi ñuy wooye Yerusalem.

mbaa toolam, mbaa jaamam bu góor, mbaa jaamam bu jigéen, mbaa aw nagam, mbaa mbaamam, mbaa mboolem seen alalu dëkkandoo.»

<sup>22</sup> Kàddu yii la Aji Sax ji wax seen ndaje ma mépp, ca tund wa, ba mu àddoo ca digg sawara wa, kàddu gu xumb, ci biir xàmbaar gu lëndëm këruus. Tegaatu ca dara. Mu daldi bind kàddu yi ci ñaari àlluway doj, jox ma. <sup>23</sup> Ba ngeen déggee kàddu gay jibe ca lëndëm ga, tund wa jàpp, di tàkk, yeena dikk, seen mboolem kilifay giir ak seeni mag, ba ci man. <sup>24</sup> Ngeen ne ma: «Sunu Yàlla Aji Sax ji kat, moo nu won darajaam ak màggaayam. Kàddoom lanu dégg, mu jibe ca digg sawara wa. Bésub tey noo gis Yàlla wax ak doom aadama, ba noppi, muy wéye bakkanam! <sup>25</sup> Waaye lu nuy jaayati nag sunu bakkan, doye? Ndax kat, sawara wu réy wii, su nu déggatee sunu kàddug Yàlla Aji Sax ji, da nuy xoyom. <sup>26</sup> Ana ci mboolem boroomu suux, ku ci masa dégg kàddug Yàlla jiy dund, mu jibe ci sawara, nii nu ko dégge, ba noppi di dund? <sup>27</sup> Jegejil yaw te déglu mboolem li sunu Yàlla Aji Sax ji wax. Yaw yaa nuy àgge mboolem li la sunu Yàlla Aji Sax ji wax, nu dégg, jéfe.»

<sup>28</sup> Ci biir loolu Aji Sax ji dégg la ngeen ma wax. Mu ne ma: «Dégg naa li la mbooloo mii wax. Ñoo yey wax yooyu kàddu yépp. <sup>29</sup> Waaye céy bu ñu amoon boobu xol ngir ragal ma, di sàmm sama santaane yépp bés bu nekk, ba tax ñu baaxle, ñoom ak seen askan, ba fàww! <sup>30</sup> Demal, nga ne leen ñu dellu ca seeni xayma. <sup>31</sup> Yaw nag, taxawal fi man, ba ma jox la mboolem santaane bi, dogali yoon yi, ak àttey yoon yi nga leen di jàngal, te ñu war koo jéfe ca réew ma ma leen jox, ngir ñu nangu ko.»

<sup>32</sup> Kon nag sàmmooleen koo jéfe ni leen ko seen Yàlla Aji Sax ji sante. Buleen lajjee ndijoor mbaa càmmoñ. <sup>33</sup> Mboolem yoon wi leen seen Yàlla Aji Sax ji teg, toppleen ko, ndax ngeen dund, baaxle te gudd fan ca réew ma ngeen di moom.

### *Aji Sax ji kenn la*

<sup>1</sup> Lii mooy santaane bi, ak dogali yoon yeek àttey yoon yi seen Yàlla Aji Sax ji santaane ma jàngal leen ko, ngir ngeen di ko jéfe ca réew ma ngeen jàll jëm, ngir nanguji ko, <sup>2</sup> ndax ngeen ragal seen Yàlla Aji Sax ji, di sàmm mboolem dogali yoonam, ak santaaneem, yi ma leen di dénki, yeen ak seeni doom, ak seeni sèt, seen giiru dund, su ko defee ngeen gudd fan. <sup>3</sup> Kon yeen Israyil, dégluleen te sàmmoo jéfe, ndax ngeen baaxle te yokku bu baax, ni leen ko Aji Sax ji seen Yàllay maam waxe, ca réew ma meew maak lem ja tuuroo.

<sup>4</sup> Dégluleen, bànni Israyil, Aji Sax ji sunu Yàlla, Aji Sax ji kenn la. <sup>5</sup> Seen Yàlla Aji Sax ji, soppelen ko seen léppi xol, ak seen léppi bakkan, ak seen léppi doole. <sup>6</sup> Kàddu yii ma leen di dénki bésub tey, na dëkk ci seen xol. <sup>7</sup> Nangeen ko xamal seeni doom, di ko waxe bu ngeen toogee seen biir néeg, ak bu ngeen di dox ciw yoon, ak bu ngeen téddee, ak bu ngeen jógee. <sup>8</sup> Takkleen ko, muy firnde ci seen loxo, te na doon am mbandal ci seen diggantey gët. <sup>9</sup> Te itam bindleen ko ci seen kaw jëni buntu néeg, ak ci seen bunti dëkk.

<sup>10</sup> Bu ngeen demee ba seen Yàlla Aji Sax ji yóbbu leen ca réew ma mu giñaloon seeni maam Ibraayma ak Isaaxa ak Yanqóoba, ne yeen la koy jox, muy dëkk yu mag yu baax yu ngeen tabaxul, <sup>11</sup> kër ya feese mboolem lu baax lu ngeen ko feesaluloon, ak teen yu ngeen gasul, ak garabi reseñ ak oliw yu ngeen jëmbatul; bu ngeen ca lekkee ba regg, <sup>12</sup> wattuleen seen bopp bala ngeena fàtte Aji Sax ji leen génnee réewum Misra, kërug njaam ga. <sup>13</sup> Seen Yàlla Aji Sax ji, ragal-leen ko. Moom ngeen di jaamu, te aw turam ngeen di giñe. <sup>14</sup> Buleen topp yeneen yàlla, ci yàllay xeet yi leen séq. <sup>15</sup> Ndax kat seen Yàlla Aji Sax ji ci seen biir, ku fiir la. Lu ko moy sànjum Aji Sax ji dina tàkk ci seen kaw, te dina leen sànk, ba raafal leen ci kaw suuf. <sup>16</sup> Buleen seetlu seen Yàlla Aji Sax ji, na ngeen ko seetloo woon ca Maasa. <sup>17</sup> Sàmmleena sàmm seen santaaney Yàlla Aji Sax ji, ak seedey



yoanam, ak dogali yoonam, yi mu leen dénk. <sup>18</sup> Jéfeleen njub, ak mbaax gi Aji Sax ji rafetlu. Su ko defee dingeen baaxle, ba dem, nanguji réew mu baax mi Aji Sax ji giñaloon seeni maam, <sup>19</sup> te dingeen fa dàqe seen noon yépp, na ko Aji Sax ji waxe woon.

<sup>20</sup> Bu leen seen doom laajee ëllëg, ne leen: «Ana lu waral seedey yoon yi, ak dogali yoon yeek àttey yoon yi leen sunu Yàlla Aji Sax ji dénk?» <sup>21</sup> Su boobaa waxleen seen doom, ne ko: «Ay jaami Firawna lanu woon ca Misra, waaye Aji Sax jee nu génnee Misra ci dooley loxoom. <sup>22</sup> Aji Sax jee nu defal ay firnde, ak kéemaan yu mag te metti ci kaw Misra ak ci kaw Firawna ak ci kaw waa këram gépp, nu teg ci sunuy gët. <sup>23</sup> Nun nag, moo nu fa jële, ngir indi nu ci réew mi mu giñaloon sunuy maam, ne nun la koy jox. <sup>24</sup> Aji Sax jee nu sant nuy jëfe mboolem dogali yoon yii, te ragal sunu Yàlla Aji Sax ji, ngir nu baaxle bés bu nekk, ngir itam mu sàmm sunu bakkan ni bésub tey jii. <sup>25</sup> Sunu njekk lay doon nag, ndegam sàmmoo nanoo jëfe mboolem santaane bii, fi sunu kanam Yàlla Aji Sax ji, ni mu ko santaanee.»

## 7

### *Dogook yenn xeet yi war na Israyil*

<sup>1</sup> Bu leen seen Yàlla Aji Sax ji yóbboo réew ma ngeen jëm, ngir nanguji ko, moo fay dàqe xeet yu bare fi seen kanam: Etteen ñi ak Girgaseen ñi ak Amoreen ñi ak Kanaaneen ñi ak Periseen ñi ak Eween ñeek Yebuseen ñi; juróom ñaari xeet yu leen ëpp, ëpp leen doole. <sup>2</sup> Bu leen leen seen Yàlla Aji Sax ji jébbalee, ba ngeen duma leen, nangeen leen faagaagal ba ñu jeex tàkk. Buleen fasook ñoom kóllëre, te buleen leen yërëm. <sup>3</sup> Buleen séyanteek ñoom: seen doom ju jigéen, buleen ko may doomu xeet yooyu, jigéenu xeet yooyu it, buleen ko jëlal seen doom ju góor. <sup>4</sup> Ndax dañu may dëddale ak seen doom yu góor, ñu mujj di jaamu yeneen yàlla, ba sànjum Aji Sax ji tàkk ci seen kaw yeen, fàkkas leen ci lu gaaw. <sup>5</sup> Ni ngeen di def ak ñoom kay mooy nii: seeni sarxalukaay, ngeen màbb; seen tuuri doj,

ngeen rajaxe; seen xer yi ñuy jaamoo Asera tuur mi, ngeen gor; seen jëmmei tuur, ngeen lakk. <sup>6</sup> Ndax kat askan wu sell ngeen, ñeel seen Yàlla Aji Sax ji. Yeen la seen Yàlla Aji Sax ji taamu, ngir ngeen doon askan wi mu séddool boppam, ci mboolem askani kaw suuf.

<sup>7</sup> Du seen barewaay bu ngeen ëpplee xeet yépp moo tax Aji Sax ji naw leen, ba taamu leen, nde yeena gëna néew ci xeet yépp. <sup>8</sup> Waaye cofeel gu leen Aji Sax ji sopp, ak sàmm gu mu sàmm ngiñam la mu giñaloon seeni maam, moo tax mu génnee leen dooley loxoom, jote leen ca kërug njaam ga, ak ca loxol Firawna buuru Misra. <sup>9</sup> Xamleen boog ne seen Yàlla Aji Sax ji moom mooy Yàlla; mooy Yàlla ju dëggu jiy sàmm kóllëre ak ngor ñeel soppeem ñiy sàmm ay santaaneem, sët ba sëtaat, ba ci junniy maas. <sup>10</sup> Waaye mooy fey ci saa si ay bañam, ngir sànk leen. Du yeexe bañam, ci saa si la koy fey.

<sup>11</sup> Kon nag sàmmleen santaane bi, muy dogali yoon yi, ak àttey yoon yi ma leen dénk tey, ngir di ko jëfe. <sup>12</sup> Bu ngeen déggalee àttey yoon yii, te sàmmoo koo jëfe, su boobaa seen Yàlla Aji Sax ji dina sàmm diggam ak yeen, kóllëre ak ngor, ga mu giñaloon seeni maam. <sup>13</sup> Moo leen di sopp, barkeel leen, yokk leen, barkeel seen meññeefum njurukaay, ak seen meññeefum suuf; seen pepp ak seen biiñ, ak seenug diw, ak seen doomi jur gu gudd, ak gu gàtt, ca réew ma mu giñaloon seeni maam, ne yeen la koy jox. <sup>14</sup> Su boobaa yeenay gëna barkeel mboolem xeet yi, te du lenn, góor ak jigéen, luy jaasir ci seen biir, ak seen biirug jur. <sup>15</sup> Su boobaa Aji Sax jee leen di xàjjil mboolem wéradi. Mboolem jàngoroy Misra yu bon yu ngeen xamoon, du leen ci teg lenn, te mboolem seeni bañ la koy teg. <sup>16</sup> Fàkkasleen mboolem xeet yi leen seen Yàlla Aji Sax ji jébbal nag. Buleen leen xool bëtü yërmande, buleen jaamu seeni tuur: Lu ko moy muy seenug fiir.

<sup>17</sup> Jombul ngeen di wax ci seen xel naan: «Xeet yii gën noo bare, ana nu nu leen mana dàqe?» <sup>18</sup> Buleen leen

ragal. Fàttlikuleen bu baax ni seen Yàlla Aji Sax ji def Firawna ak Misra gépp, <sup>19</sup> ak mitit yu réy ya ngeen gisal seen bopp, ak firnde yaak kéemaan ya, ak seen dooley loxol Yàlla Aji Sax jeek kàttanam gu réy, ga mu leen génnee. Noonu la seen Yàlla Aji Sax ji di def mboolem xeet yi ngeen ragal. <sup>20</sup> Te itam seen Yàlla Aji Sax ji, am mbas lay yebal ci seen kaw, ba seenu ndes wu leen làqu woon sànkú. <sup>21</sup> Buleen am tiitaange ci ñoom, ndax seen Yàlla Aji Sax ji ci seen biir, Yàlla ju màgg la te raglu. <sup>22</sup> Seen Yàlla Aji Sax jee leen di dàqe fi seen kanam, ndànk-ndànk; dungeen leen mana gaawa jeexal, lu ko moy rabi àll yi mujj ne gàññ ci seen kaw. <sup>23</sup> Seen Yàlla Aji Sax ji moo leen di jébbal xeet yooyu, moo leen di salfaañe salfaañoo gu réy, ba ñu sànkú. <sup>24</sup> Mooy teg seeni buur ci seeni loxo, ngeen far seenu tur fi asamaan tiim. Kenn ci ñoom du leen tè, ba kera ngeen leen sànkee. <sup>25</sup> Seen jëmme tuur yooyu nag, lakkleen leen. Buleen xemmem lenn luy xaalis mbaa wurus ci kaw tuur yi. Buleen ko aakimoo, lu ko moy muy seenug fiir, ndax lu seexluwoo ngoogu ci seen Yàlla Aji Sax ji. <sup>26</sup> Buleen dugal yëf yu seexluwu seen biir néeg, lu ko moy àtteb faagaagal bi war ci yëf yooyu, moo leen di dab, yeen itam. Xofleen koo xof, seexlu koo seexlu, ndax yëf yooyu, faagaagal moo ci war.

## 8

### *Xéewlu, fàtte aay na*

<sup>1</sup> Mboolem santaane bi ma leen dénk bésuub tey nag, sàmmooleen koo jéfe, ndax ngeen dund, yokku, ba dugg nanguji réew ma Aji Sax ji giñaloon seeni maam. <sup>2</sup> Fàttlikuleen mboolem yoon wi leen seen Yàlla Aji Sax ji awale diiru ñeent fukki at yii ci màndiñ mi, teg leen coono, nattu leen ngir xam li ci seen biir xol, xam ndax dingeen wormaal ay santaaneem, am déet. <sup>3</sup> Moo leen teg coono, xiifal leen, leel leen mànn mu ngeen xamul, te seeni maam xamuñu ko woon, ngir xamal leen ne du aw ñam donj la doom aadama di dunde, waaye gépp kàddu gu tukkee ci gëmmeñu Aji Sax ji, dees na ko dunde.

<sup>4</sup> Seeni yére ràppul, seeni tànk newiwul diiru ñeent fukki at yii. <sup>5</sup> Xamleen xéll ne ni baay di yare doomam, ni la leen seen Yàlla Aji Sax ji yare. <sup>6</sup> Kon sàmmleen seen santaaney Yàlla Aji Sax ji, di topp ay yoonam te ragal ko. <sup>7</sup> Ndax seen Yàlla Aji Sax jaa ngi leen di yóbbu réew mu baax; réew mu ami wal, ak bëti ndox, ak ndoxi xóote yu waley xur aki tund, <sup>8</sup> réewum bele ak lors ak reseñ ak figg ak gërënaat, ak diwu oliw, ak lem. <sup>9</sup> Réew ma dungeen fa néewe njël, te dungeen fa ñàkke dara. Réew ma, ay dojam, weñ gu ñuul la, ay tundam, xàñjar ngeen cay gase. <sup>10</sup> Dingeen lekk ba regg, di sante seen Yàlla Aji Sax ji, réew mu baax ma mu leen jox.

<sup>11</sup> Wattuleen seen bopp nag, bala ngeena fàtte seen Yàlla Aji Sax ji, baña sàmm ay santaaneem, ak àttey yoonam, ak dogali yoonam yi ma leen di dénk tey. <sup>12</sup> Su ngeen lekkee ba regg, am kër yu baax yu ngeen tabax dëkke, <sup>13</sup> seen jur gu gudd ak gu gàtt yokku, xaalis ak wurus yokkul leen, seen jépp alal yokku, <sup>14</sup> su boobaa moytuleen daldi xoggliku, fàtte seen Yàlla Aji Sax, ji leen génnee réewum Misra, kërug njaam ga, <sup>15</sup> ki leen wommate biir màndiñ mu yaa mu raglu ma, ak jaani danar yaaki jiiitam, ci biir maral ak ñàkk um ndox. Moo leen xellil ndox mu balle doj wu ne serej. <sup>16</sup> Moo leen leele mànnu màndiñ, ma seeni maam xamuloon, ngir teg leen coono, nattu leen, te mujje baaxe leen. <sup>17</sup> Dingeen wax ci seen xel ne: «Sunu doole ak sunu njàmbaaruu bopp moo nu may jii alal.» <sup>18</sup> Waaye fàttlikuleen ne seen Yàlla Aji Sax ji mooy ki leen may dooley liggéey alal ji, ngir feddi ni mu ko defe tey, kóllereem ga mu giñaloon seeni maam.

<sup>19</sup> Bu ngeen demee ba fàtte lu jëm ci seen Yàlla Aji Sax ji, di topp yeneen yàlla, di leen jaamook a sujjóotal, seedeel naa leen bés niki tey, ne su boobaa déy, dingeen sànkú cànkute gu mat sèkk. <sup>20</sup> Ni xeet yi Aji Sax ji nara sànk fi seen kanam, noonu ngeen di sànkoo ndax ñàkka déggal seen Yàlla Aji Sax ji.

## 9

*Israyil gënul ci xeet yi*

<sup>1</sup> Israyil dégluleen! Yeena ngii tey, di jáll dexu Yurdan ngir dàqi xeet yu leen èpp, èpp leen doole, ngir nangu seen dëkk yu réy, dàbblikoo tata yu àkki asamaan. <sup>2</sup> Askan wu am kàttan, yegg ca kaw, soqikoo ci Anageen, ñi ngeen xam, te dégg ñuy wax ci ñoom, naan: «Ku mana të Anageen ñi?» <sup>3</sup> Waaye xamleen bés niki tey ne seen Yàlla Aji Sax ji mooy kiy jáll jiite leen, di sawara wuy xoyome. Moo leen di fàkkas, mooy ki leen leen di notal, ngeen dàq leen, sànk leen ci lu gaaw, ni leen ko Aji Sax ji waxe woon.

<sup>4</sup> Gannaaw bu leen leen seen Yàlla Aji Sax ji dàqalee nag, buleen wax ci seen xel ne: «Sunu njekk a nu may Aji Sax ji indi nu, ngir nu moom réew mii.» Mbonug xeet yii kay moo waral Aji Sax ji dàqal leen leen. <sup>5</sup> Du seen genn njekk, akug njub gu leen may ngeen nanguji seenum réew. Waaye mbonug xeet yii moo waral seen Yàlla Aji Sax ji dàqal leen leen, ngir sottal kàddu ga mu giñaloon seeni maam Ibraayma ak Isaaxa ak Yanqóoba. <sup>6</sup> Kon na leen bir ne du seenug njekk moos la leen seen Yàlla Aji Sax ji joxe mii réew mu baax, ngir ngeen moom ko ndax, askan wu danñiral ngeen.

*Israyil jaamu na sèlluw wurus*

<sup>7</sup> Fàttlikuleen! Buleen fàtte na ngeen merloo woon seen Yàlla Aji Sax ji ca màndiñ ma. La dale bés ba ngeen bàyyikoo réewum Misra, ba ba ngeen agsee bérab bii, fippu ci kaw Aji Sax ji ngeen masa nekke. <sup>8</sup> Ca tundu Oreb ngeen merloo Aji Sax ji, Aji Sax ji mere leen, ba nar leena faagaagal. <sup>9</sup> Ba ma yéegée ca tund wa, di jéli àlluway doj ya, àlluway kóllère, gi Aji Sax ji fas ak yeen; toog naa ca kaw tund wa ñeent fukki bëccëg ak ñeent fukki guddi. Du ñam wu ma lekk, du ndox mu ma naan. <sup>10</sup> Aji Sax ji jox ma ñaari àlluway doj yu loxol Yàlla bind mboolem kàddu ya leen Aji Sax ji waxoon ca kaw tund wa, ba mu àddoo fa digg sawara wa, keroog bés sub ndaje ma.

<sup>11</sup> Ba ñeent fukki guddi ak ñeent fukki bëccëg matee, Aji Sax ji jox ma ñaari àlluway doj ya, àlluway kóllère ga. <sup>12</sup> Aji Sax ji ne ma: «Jógal wacce fii gaaw, ndax sa bokk ya nga génnee Misra def nañu yàqute. Teggi nañu xaat yoon wa ma leen santoon. Móolal nañu seen bopp jëmmu tuur.»

<sup>13</sup> Aji Sax ji waxati ma, ne ma: «Gis naa ne mbooloo mii kat, ñu dëgër bopp lañu. <sup>14</sup> Bàyyi ma rekk ma faagaagal leen, ba far seen tur fu asamaan tiim, te def la ngay xeet wu èpp wii, èpp ko doole.»

<sup>15</sup> Ba loolu amee ma walbatiku, wacce ca tund wa, maak yaari àlluway kóllère ga ca sama yaari loxo, tund wépp di tàkk. <sup>16</sup> Ma gis ne ndeke moy ngeen seen Yàlla Aji Sax ji, daldi sàkkal seen bopp wëllu wu ñu móol, dëddu xaat yoon wa leen Aji Sax ji santoon. <sup>17</sup> Ci kaw loolu ma ne cas yaari àlluwa ya ca sama yaari loxo, sànni, rajaxe ko, ngeen di gis.

*Musaa tinul na bànni Israyil*

<sup>18</sup> Ba loolu amee ma daanu téd d fa kanam Aji Sax ji, na woon, diiru ñeent fukki bëccëg ak ñeent fukki guddi. Du ñam wu ma lekk, du ndox mu ma naan ndax seen gépp moy gu ngeen moy, di def lu Aji Sax ji ñaawlu, ba merloo ko. <sup>19</sup> Booba am naa tiitaange ci merum Aji Sax ji, ak sànjam mi mu nara sànju ci seen kaw, ngir sànk leen. Teewul Aji Sax ji nangul ma boobu yoon itam. <sup>20</sup> Aaróona nag, Aji Sax ji mere ko lool, nar koo sànk. Ma daldi ñaanalaale Aaróona. <sup>21</sup> Seen bàkkaarukaay boobu ngeen sàkkoon nag, jëmmu wëllu wa, ma jël ko, lakk ko, tojat, wol ba mu mukk, ba doon pënd. Ma daldi sotti pënd ba ca biir yol ga wale kaw tund wa.

<sup>22</sup> Ca Tabera itam, ak ca Maasa, ak ca Kibbrot Taawa, ngeen merlooti fa Aji Sax ji. <sup>23</sup> Ak ba leen Aji Sax ji yebalee fa Kades Barneya, ne leen: «Demleen nanguji réew ma ma leen jox.» Yeena gántal seen kàddug Yàlla Aji Sax ji, gëmuleen ko, déggaluleen kàddoom. <sup>24</sup> Gántal Aji Sax ji ngeen nekke naka jekk, dale ko ca bés ba ma leen xamee.

<sup>25</sup> Maa daanu téd d fa kanam Aji Sax ji diiru ñeent fukki bëccëg yooyu, ak ñeent

fukki guddi ya ma tëdd fa kanamam ndax la Aji Sax ji noon da leen di sànk. <sup>26</sup> Ma ñaan Aji Sax ji, ne ko: «Éy Boroom bi Aji Sax ji, bul sànk sa ñoñ ñi nga séddoo, ñi nga jote sa màggaay, génnee leen Misra ci sa dooley loxo. <sup>27</sup> Ngalla bàyyil xel sa jaam ña, Ibraayma ak Isaaxa ak Yanqóoba. Bul xool ci tēwug mbooloo mii ak seen mbon, ak seenug moy. <sup>28</sup> Lu ko moy kat waa réew ma nga nu jële dinañu ne: “Tële leena yóbbu réew ma mu leen digoon, ak jéppi leen moo tax Aji Sax ji génne leen, ngir rey leen ca màndinj ma.” <sup>29</sup> Nii de ñooy sa ñoñ ñi nga séddoo, ñi nga génnee sa doole ju bare, ci sa kàttanu loxo.»

## 10

<sup>1</sup> Jant yooyu la ma Aji Sax ji wax ne ma: «Yettal ñaari àlluway doj yu mel ni yu jëkk ya, nga yéegsi fi man, ci kaw tund wi. Te nanga sàkk itam gaalu bant. <sup>2</sup> Dinaa bind ci àlluwa yi, kàddu ya woon ca àlluwa yu jëkk, ya nga toj. Su ko defee nga yeb àlluwa yi ci gaal gi.» <sup>3</sup> Ma sàkk gaalu bantu séng, daldi yett ñaari àlluway doj yu mel ni yu jëkk ya. Ci kaw loolu ma yéeg ca kaw tund wa, maak ñaari àlluwa yi ci sama loxo. <sup>4</sup> Aji Sax ji nag bind ca àlluwa ya, la mu jëkkoona bind, muy fukki santaane ya mu leen waxoon ca kaw tund wa, ba mu àddoo fa digg sawara wa, keroog bésuub ndaje ma. Ba loolu amee Aji Sax ji jox ma àlluwa yi. <sup>5</sup> Ma walbatiku, wàcc tund wa, yeb àlluwa ya ca gaal ga ma sàkk, àlluwa ya des ca biir, na ma ko Aji Sax ji waxe woon.

<sup>6</sup> Gannaaw gi bànni Israyil bàyyikoo ca teeni Bene Yaakan, dem ba Mosera. Foofa la Aaróona faatoo, ñu denc ko fa, doomam Elasar doon sarxalkat, wuutu ko. <sup>7</sup> Foofa lañu bàyyikoo dem Gutgoda, bawooti Gutgoda, jáll ba Yotbata, réewum wali ndox ya.

<sup>8</sup> Jant yooyu la Aji Sax ji ber giirug Lewi, ngir ñuy gàddu gaalu kóllèreg Aji Sax ji, di taxaw fi kanam Aji Sax ji, di ko liggéeyal, di taase barke ciw turam, te mooy seen péete ba tey jii. <sup>9</sup> Looloo waral Leween ñi amuñu wàll ci céru suuf su ñuy séddoo ak seeni bokk. Aji Sax ji mooy

seenub cér, ni leen ko seen Yàlla Aji Sax ji waxe woon.

<sup>10</sup> Man nag maa am ca kaw tund wa fan ya ma fa jëkkoona am, muy ñeent fukki bëccëg, ak ñeent fukki guddi. Aji Sax ji dellu ma nangul, boobu yoon itam, ba bëggatu leena sànk. <sup>11</sup> Aji Sax ji ne ma: «Doxal jiite yoonu mbooloo mi, ñu dem nanguji réew, ma ma giñaloon seeni maam, ne ñoom laa koy jox.»

### *Musaa ngi woote déggal Aji Sax ji*

<sup>12</sup> Léegi nag yeen Israyil, ana lu leen seen Yàlla Aji Sax ji laaj, lu moy ngeen ragal seen Yàlla Aji Sax ji, di doxe mboolemi yoonam, sopp ko, di jaamoo seen Yàlla Aji Sax ji seen léppi xol, ak seen léppi bakkan, <sup>13</sup> ngir di sàmm santaaney Aji Sax ji, ak dogali yoonam, yi ma leen dénk bésuub tey ngir seen njariñal bopp? <sup>14</sup> Seen Yàlla Aji Sax ji déy mooy boroom asamaan, ak asamaani asamaan, ak suuf, ak mboolem li ci biiram. <sup>15</sup> Terewul seeni maam donj la Aji Sax ji taqool, ngir sopp leen, te yeen, ñi askanoo ci ñoom la taamu ci biir xeetoo xeet, niki bésuub tey jii. <sup>16</sup> Kon nag nangeen dogoo seen xol te bañatee sajju loos. <sup>17</sup> Ndax kat seen Yàlla Aji Sax ji mooy Yállay yàlla yi, te mooy Sangu sang yi. Mooy Yàlla ju màgg ji, jàmbaare te raglu. Ki gënalewul, jëlul ub ger. <sup>18</sup> Kiy aar jirim akub jëtun, sopp doxandéem, ngir leel ko, wodd ko. <sup>19</sup> Kon soppleen doxandéem, ndax ay doxandéem ngeen woon ca réewum Misra.

<sup>20</sup> Seen Yàlla Aji Sax ji moom ngeen di ragal, te moom ngeen di jaamu. Moom ngeen di noyu, te aw turam ngeen di giñe. <sup>21</sup> Moo yelloo seeni kañ te mooy seen Yàlla, ji leen defal jaloore yeek kawtéef yooyu ngeen gisal seen bopp. <sup>22</sup> Juróom ñaar fukki bakkan la seeni maam doonoon ba ñuy wàccsi Misra. Tey seen Yàlla Aji Sax ji def leen ngeen day ni bididiwi asamaan.

## 11

<sup>1</sup> Soppleen seen Yàlla Aji Sax ji, te ngeen dénkoo ndénkaaneem, ak dogali

yoanam, ak àttey yoonam, aki santaa-neem, bés bu nekk. <sup>2</sup> Xamleen bésuub tey ne seeni doom taxul may wax, ndax ñoom xamuñu, gisuñu seen njànglem Yàlla Aji Sax ji: mäggaayam, ak dooley loxoom, ak kàttanam gu réy, <sup>3</sup> aki firndeem, ak jalooreem ja mu jëf ca digg Misra, ci kaw Firawna buuru Misra ak ci biir réewam mépp, <sup>4</sup> jëfe kook gàngooru Misra, ak seeni fas ak seen watiiri xare, ba mu leen mëddee ca géegu Barax ya, fekk ñu ne leen dann. Aji Sax jee leen sànk ba bésuub tey jii, <sup>5</sup> ak la mu leen def ca màndiñ ma, ba ngeen agsi bérab bii, <sup>6</sup> ak la mu def Datan ak Abiram, doomi Elyab Rubeneen ba, ba suuf ñayee, wonn leen, ñook seen waa kër, ak seeni xayma, ak mboolem luy dund lu leen topp, ci digg Israyil gépp. <sup>7</sup> Seeni gët déy ngeen teg ci mboolem jaloore ju mäg g jooju Aji Sax ji def.

<sup>8</sup> Kon nag sàmmleen mboolem santane bi ma leen di dénk tey, ndax ngeen am doole ba nanguji réew ma ngeen jàll jëm, ngir nanguji ko, <sup>9</sup> ndax itam ngeen gudd fan ca réew ma Aji Sax ji giñoona jox seeni maam, ñook seen askan; réew mu meew maak lem ja tuuroo. <sup>10</sup> Réew mooma ngeen jëm, di ko nanguji, déy, niroowul ak réewum Misra ga ngeen jóge, fa ngeen daan jiwe, ba noppi topp seenum jiwu, di ko suuxate dooley tànk ni mbeyum dër. <sup>11</sup> Réew mooma ngeen jàll jëm, ngir nanguji ko, réewum tund aki xur la, te ndoxum taw lay naan. <sup>12</sup> Réew la mu seen Yàlla Aji Sax ji yég, fu mu tollu seen gëti Yàlla Aji Sax jaa ngi ne ko jàkk, terutel at ba ndeetelam.

<sup>13</sup> Su fekke ne nag sàmm ngeen ba sàmm sama santane yi ma leen dénk tey jii, ngir sopp seen Yàlla Aji Sax ji, di ko jaamoo seen léppi xol, ak seen léppi bakkan, <sup>14</sup> su boobaa, Yàlla nee: «Maa leen di may seen tawub réew, saa yu jotee: lolli réew ma day taw\*, cooroonam taw, ngeen dajale seenum pepp, ak seen biiñ bu bees, ak seen diw gu yees. <sup>15</sup> Su boobaa maay mayem ñax ci seenub àll ngir seenug jur, yeen it ngeen di lekk ba regg.»

<sup>16</sup> Wattuleen seen bopp nag, bala leen seen xel a nax, ngeen lajj, di jaamu yeneen yàlla, di leen sujjóotal, <sup>17</sup> ba sànjum Aji Sax ji tàkkal leen, mu ne ràpp asamaan, taw taxaw, suuf noppee meñnal, ba ngeen gaawa sànkoo ca réew mu baax ma leen Aji Sax jiy jox.

<sup>18</sup> Defleen sama kàddu yii ci seenum xel ak ci seen xol. Takkleen ko, muy firnde ci seen loxo, te na doon am mbandal ci seen diggantey gët. <sup>19</sup> Nangeen ko jàngal seeni doom, di ko waxe bu ngeen toogee seen biir néeg, ak bu ngeen di dox ciw yoon, ak bu ngeen téddee, ak bu ngeen jógee. <sup>20</sup> Te itam bindleen ko ci seen kaw jëni buntu néeg, ak ci seen bunti dëkk, <sup>21</sup> ndax seeni fan, ak seen fani doom, baree ca réew ma Aji Sax ji giñaloon seeni maam, ni kemu fan yi asamaan tiim suuf.

<sup>22</sup> Ndegam déy sàmm ngeen ba sàmm mboolem santane bii ma leen dénk ngir di ko jëfe, ba sopp seen Yàlla Aji Sax ji, di doxe mboolem ay yoonam te ñoy ci moom, <sup>23</sup> su boobaa Aji Sax jee leen di dàqal mboolem xeet yooyu, te yeenay nangu réewi xeet yu leen ëpp, ëpp leen doole. <sup>24</sup> Fépp fu ngeen teg seen tànk, yeena koy moom. La ko dale ca màndiñ ma ba ca Liban, daleeti dexu Efraat ba ca géeg ga ca sowu, lépp seen suuf lay doon. <sup>25</sup> Du kenn kuy taxaw fi seen kanam. Seen Yàlla Aji Sax ji mooy def na mu leen ko waxe woon, ba waa déndu réew mu ngeen teg seen tànk, ñoom ñépp, yeen lañuy tiit, yeen lañuy ragal.

### *Barke ak alkànde dëgmal na*

<sup>26</sup> Maa ngii nag di leen tegal bésuub tey barke ak alkànde. <sup>27</sup> Barkee ngi, ndegam déggal ngeen seen santaney Yàlla Aji Sax, ji ma leen di dénk tey. <sup>28</sup> Alkàndee ngi, ndegam déggaluleen seen santaney Yàlla Aji Sax ji, xanaa wacc yoon wi ma leen di dénk bésuub tey, ngir topp yeneen yàlla yu ngeen xamuloon.

<sup>29</sup> Bu leen seen Yàlla Aji Sax ji yóbboo ca réew ma ngeen jëm, ngir nanguji ko, nangeen tudd barke bi ca kaw tundu Garisim, te ngeen tudd alkànde ji ca kaw

\* **11:14** 11.14 Tawub lolli lu jaadu la ca réewum Israyil, bokkul ak jamonoy lolli ji topp ci nawet fii.

tundu Ebal. <sup>30</sup> Ñaari tund yooyu, ña nga moos ca wàllaa dexu Yurdan, ca wàllaa yoonu sowu ba, ca réewum Kanaaneen, ña dëkke joor ga jàkkaarlook Gilgal, ca weti garabi More yu mag ya. <sup>31</sup> Léegi nag yeena ngi jàlli dexu Yurdan, ngir nanguji réew mi leen seen Yàlla Aji Sax ji jox. Bu ngeen ko nangoo ba dëkk fa nag, <sup>32</sup> sàmmooleena jéfe mboolem dogal yeek àttey yoon yi ma teg fi seen kanam, bésuub tey jii.

## 12 Lu jëm ci sàrti dundin ca réewum dige ba

(Saar 12—26)

*Aji Sax ji mooy taamu bérabam*

<sup>1</sup> Dogal yeek àttey yoon, yi ngeen di sàmmoo jéfe seen giiru dund ca suufas réew, ma leen seen Yàllay maam Aji Sax ji moomale, moo di yii: <sup>2</sup> tasleen tasar mboolem bérab, ya xeet ya ngeen di dàq, di jaamoo seeni tuur; muy kaw tund yu mag ya, di kaw tund yu ndaw ya, di ker garab yu naat ya. <sup>3</sup> Tojleen seeni sarxalukaay, rajaxe seen tuuri doj; seen xer yi ñuy jaamoo Asera tuur mi, ngeen lakk; seen jëmme tuur, ngeen gor, ba far tukkal turi tuur yi ci yooyu bérab. <sup>4</sup> Buleen jaamoo noonu seen Yàlla Aji Sax ji nag. <sup>5</sup> Waaye seetleen bérab bu seen Yàlla Aji Sax ji di taamuji, ci mboolem seeni giir, ngir teg fa turam, dëel ko fa, te ngeen dem foofa. <sup>6</sup> Foofa ngeen di yóbbu seen saraxi dóomal, ak yeneen sarax, ak seen céri fukkeel, ak seenub jooxe, ak seen sarax yu ngeen xas, ak seen saraxi yéene, ak seen saraxi taawug jur gu gudd ak gu gàtt. <sup>7</sup> Foofa ngeen di lekke, yeen ak seeni njaboot fa seen kanam Yàlla Aji Sax ji, ngeen bége fa seen wépp ñaq wu leen seen Yàlla Aji Sax ji barkeelal.

<sup>8</sup> Buleen jéfe mboolem nii nuy jéfe fii tey, lu neex waay rekk, def. <sup>9</sup> Ndax kat àggaguleen ba tey ca dal-lukaay ba, fa leen seen Yàlla Aji Sax ji sédde. <sup>10</sup> Waaye bu ngeen jàllée dexu Yurdan, ba dëkki ca réew ma leen seen Yàlla Aji Sax ji sédde, ba mu noppal leen ci mboolem noon yi leen séq, ngeen dëkke xel mu

dal, <sup>11</sup> su boobaa bérab bu seen Yàlla Aji Sax ji taamu ngir dëel fa turam, foofa ngeen di yóbbu mboolem lu ma leen sant: seen saraxi dóomal, ak yeneen sarax, ak seen céri fukkeel, ak seenub jooxe, ak mboolem ngëneel yu ngeen di def saraxi xas yu ngeen xasoo ak Aji Sax ji. <sup>12</sup> Su ko defee ngeen bége fi seen kanam Yàlla Aji Sax ji, yeen ak seen doom yu góor ak yu jigéen, ak seen jaam yu góor ak yu jigéen, ak Leween ñi ci seen biiri dëkk te amuñu wàll, amuñu céru suuf ci seen biir.

<sup>13</sup> Wattuleen seen bopp bala ngeena joxe seen saraxi dóomal fépp fu ngeen gis, <sup>14</sup> ndax bérab bu Aji Sax ji taamu ci genn ci seen giir yi, foofa ngeen di joxe seen saraxi dóomal, te foofa ngeen di def lépp lu ma leen sant. <sup>15</sup> Teewul saa yu leen soobee, sañ ngeena rendi, lekk ci lépp lu leen seen Yàlla Aji Sax ji barkeele, ak fépp fu ngeen dëkk. Ku sobewu ak ku set yépp sañ na caa lekk, mel ni bu doon kéwél mbaa kooba. <sup>16</sup> Waaye deret ja, buleen ko lekk. Ci suuf ngeen koy tuur nim ndox. <sup>17</sup> Seen céru fukkeelu pepp nag, ak bu biiñ bu bees, ak bu diw gu bees, ak seen taawug jur gu gudd ak gu gàtt, ak seen mboolem saraxi xas yu ngeen xasoo woon, ak seen saraxi yéene, ak ab jooxe bu ngeen sàkke ci seenu ñaq, sañuleen cee lekk lenn ci seen biiri dëkk, <sup>18</sup> ndare ngeen lekke ko fa seen kanam Yàlla Aji Sax ji. Lekkeleen ko fa seen Yàlla Aji Sax ji di taamuji, yeen ak seen doom yu góor, ak yu jigéen, ak seen jaam yu góor ak yu jigéen, ak Leween ñi ci seen biir dëkk. Su ko defee ngeen bége seen wépp ñaq, fi seen kanam Yàlla Aji Sax ji. <sup>19</sup> Wattuleen seen bopp nag, ngir baña sàggane Leween ñi, seen giiru dund ca seen suuf.

<sup>20</sup> Bu seen Yàlla Aji Sax ji yokkee seen suuf noonee mu leen ko waxe woon, te ngeen namma lekk yàpp, saa yu leen neexee sañ ngeena lekk yàpp. <sup>21</sup> Bu fekke ne fi seen Yàlla Aji Sax ji taamoo dëel turam dafa soreek yeen, man ngeena rendi ci seen jur gu gudd mbaa gu gàtt, ga leen Aji Sax ji jox, na ma leen ko waxe woon. Sañ ngeen caa lekke seen biir dëkk lu leen neex. <sup>22</sup> Ni ñuy lekke yàppu

kéwél mbaa kooba rekk ngeen koy lekke. Ku sobewu ak ku set yépp sañ na caa lekk. <sup>23</sup> Moyuleen bu baax rekk ba baña lekk deret ji, ndax deret mooy bakkan te waruleen boole lekk bakkanu jur gi, aku suuxam. <sup>24</sup> Buleen lekk deret ji. Ci suuf ngeen koy tuur nim ndox. <sup>25</sup> Buleen ko lekk muk, su boobaa dingeen baaxle, yeen ak seen doom yi leen di wuutu; ngir su boobaa yeena ngi jëfe li Aji Sax ji rafetlu.

<sup>26</sup> Waaye seen yëf yu ñu sellal, ak seen sarax yi ngeen xasoo, jël-leen ko, yóbbu ca bérab ba Aji Sax ji di taamuji. <sup>27</sup> Te nangeen sarxe seen saraxi rendidóomal, yàpp wi ak deret ji, ci seen kaw sarxalukaayu Yàlla Aji Sax ji. Seen deretu yeneen sarax, tuurleen ko ca seen kaw sarxalukaayu Yàlla Aji Sax ji, yàpp wi ngeen lekk ko.

<sup>28</sup> Sàmmooleena déggal mboolem kàddu yii ma leen di dénk, ngir ngeen baaxle ba fàww, yeen ak seen doom, yi leen di wuutu, ndax kon yeena ngi jëfe lu baax li seen Yàlla Aji Sax ji rafetlu.

<sup>29</sup> Bu leen seen Yàlla Aji Sax ji sànkalee xeet yi ngeen jëm, ngir dàq leen, gannaaw bu ngeen leen dàqee ba dëkke seenum réew, <sup>30</sup> nangeen wattu seen bopp, ba gannaaw bu xeet yooyu sànkoo ci seen kanam, dungeen tàbbi cig fiir, di leen roy, naan: «Ana nu xeet yii di jaamoo seeni tuur, ngir nun it nu def ni ñoom?»

<sup>31</sup> Buleen defe noonu ak seen Yàlla Aji Sax ji, ndax mboolem lu seexluwu lu Aji Sax ji bañ, defal nañu ko seeni tuur. Seen doom yu góor ak yu jigéen sax, lakk nañu leen, defal leen seeni tuur sarax.

## 13

### *Dee mooy àtteb kuy xiirtale ci bokkaale*

<sup>1</sup> Mboolem kàddu gi ma leen dénk nag, sàmmooleen koo jëfe. Buleen ci yokk lenn, buleen ci waññi lenn. <sup>2</sup> Gannaaw loolu su ab yonent feeñee ci seen biir, mbaa boroom gént, bu leen digee firnde mbaa kiraama, <sup>3</sup> ba firnde la mbaa kiraama ga mu leen waxoon dikk, su leen nee: «Nanu topp yeneen yàlla, jaamu leen,» yàlla yu ngeen xamul, <sup>4</sup> buleen

déglu waxu yonent boobu, mbaa boroom gént boobu, ndax seen Yàlla Aji Sax ji moo leen di nattu ngir xam ndax yeena ngi koy soppe seen léppi xol ak seen léppi bakkan. <sup>5</sup> Seen Yàlla Aji Sax ji moom ngeen di topp, moom ngeen di ragal. Ay santaaneem ngeen di sàmm, baatam ngeen di déglu, moom ngeen di jaamu, te ci moom ngeen wara ñoy. <sup>6</sup> Yonent boobu nag mbaa boroom gént boobu, dee mooy àtteem, ndax moo woote ag fippu ci seen kaw Yàlla Aji Sax, ji leen jële ca réewum Misra, jote leen kërug njaam ga. Mu nar leena féle ci yoon wi leen seen Yàlla Aji Sax ji sant ngeen doxe ko. Noonu ngeen di tenqee lu bon ci seen biir.

<sup>7</sup> Seen mbokk mu ngeen bokkal jenn ndey, mbaa seen doom ju góor, mbaa ju jigéen, mbaa seen jabar ju ngeen xejjoo, mbaa seen xaritu benn bakkan, su leen dee xiirtal, naan leen ci kumpa: «Nanu jaamuji yeneen yàlla,» yàlla yu ngeen xamul, du yeen du seeni maam, <sup>8</sup> ci yállay xeet yi leen séq, ñi leen jege, ak ñi leen sore, ci àddina sépp, cat ba cat, <sup>9</sup> su boobaa buleen ko nangul, buleen ko déglu, buleen ko xool bëti yërmande, buleen ko baal, buleen ko nëbbal. <sup>10</sup> Reyleen ko rekk. Yeen ñi mu doon jéema yóbbaaale, na ko seen loxo jékka dal, ngir rey ko, bala cee loxol mbooloo mépp topp. <sup>11</sup> Dóorleen koy doj ba mu dee, ndax moo leen doon fexee soreleek seen Yàlla Aji Sax, ji leen jële réewum Misra, kërug njaam ga. <sup>12</sup> Israyil gépp a koy dégg, daldi ragal ba deesatul def mbon gu ni mel ci seen biir.

<sup>13</sup> Bu ngeen déggee, ci benn dëkk, ci dëkk yi leen seen Yàlla Aji Sax ji jox, ngir ngeen dëkke, ñu ne <sup>14</sup> ay nit ñu tekkiwul dara, te bokk ci yeen, ñoo jóg di waññi seen waa dëkk, naan leen: «Nanu jaamuji yeneen yàlla,» yàlla yu ngeen xamul, <sup>15</sup> su boobaa nangeen gëstu, seet te laajte bu baax, ba dëgg gu wér feeñee ca mbir ma, ne defees na moomu mbir mu jomblu ci seen biir, <sup>16</sup> ngeen daldi jam rekk waa dëkk boobu, leel leen ñawkay saamar, faagaagal dëkk ba, ak mboolem la ca biiram, jur ga it, ngeen leel

leen ñawkay saamar. <sup>17</sup> Mboolem alalu sèxètoo ju jóge ca dèkk ba, dajaleleen ko ca digg pénc ma, te ngeen lakk dèkk ba, booleek cèxètoo ma, def ko dóomal bu mat sèkk, ñeel seen Yàlla Aji Sax ji. Day doon ab gent ba fàww, deesu ko tabaxaat. <sup>18</sup> Bu dara des ci seen loxo, lu bokk ci alal jooju ñu wara faagaagal. Su ko defee Aji Sax ji dèddu sànjam mu tàng, yèrèm leen, ñeewante leen, yokk leen na mu ko giñale woon seeni maam, <sup>19</sup> ndegam yeena ngi dégg seen kàddug Yàlla Aji Sax ji, ngir sàmm mboolem santaaneem yi ma leen di dénk bésuub tey, ngir di jèfe li seen Yàlla Aji Sax ji rafetlu.

## 14

### *Yoon wi sàrtal na jèfin yu set*

<sup>1</sup> Ay doom ngeen, ñeel seen Yàlla Aji Sax ji. Buleen ñaasu, buleen wat seen kawaru bopp fi féeteek jè bi, ngir di ko mititloo ku dee, <sup>2</sup> ndax askan wu sell ngeen, ñeel seen Yàlla Aji Sax ji. Yeen la Aji Sax ji taamu, ngir ngeen doon askan wi mu séddool boppam, ci mboolem askani kaw suuf.

<sup>3</sup> Buleen lekk lenn lu seexluwu. <sup>4</sup> Lii moo di mala yi ngeen di lekk seen suux: nag ak xar ak bëy; <sup>5</sup> ak kooba ak kéwél, ak lu xeetook kooba, ak lu xeetook kéwél, ak bëyu àll, ak bëyu kaw tund. <sup>6</sup> Mboolem mala mu ci we wi xar, séddlikoo jaar, te muy duññ, moom ngeen di lekk aw suuxam. <sup>7</sup> Waaye yii, buleen lekk seen suux: lu ciy duññ donj, te we wi xarul, mbaa lu we wi xar, te duññul. Lu mel ni giléem ak njomboor ak daman, ndax dañuy duññ waaye seen we xarul. Yooyu daganul ci yeen. <sup>8</sup> Mbaam-xuux, moom, we wi xar na waaye du duññ. Kon daganul ci yeen. Aw suuxam, buleen ko lekk, te méddam, buleen ko laal.

<sup>9</sup> Lii nag, sañ ngeen koo lekk, ci mboolem lu dèkke ndox: mboolem lu ci am ciiriir aki waasintóor, sañ ngeen koo lekk. <sup>10</sup> Waaye lu ci amul ciiriir aki waasintóor, buleen ko lekk, ndax daganul ci yeen.

<sup>11</sup> Mboolem njanaaw lu set, sañ ngeen koo lekk. <sup>12</sup> Waaye lii ngeen dul lekk ci njanaaw yi: jaxaay ak tan, ba ca mu ñuul

ma, <sup>13</sup> ak céeli bu xonq, ak céeli bu ñuul, ak maf, ak lu mu xeetool, <sup>14</sup> ak lépp luy baaxoñ ak lu mu xeetool, <sup>15-18</sup> ak bànjóoli ak looy, ak lu mu xeetool, ak kirigéej, ak mboolem xeeti liccin, ak yébb, ak lu xeetook xodd, ak musejubru ak njugub. <sup>19</sup> Mboolem boroomi laaf yu sew-sewaan, daganul ci yeen. Deesu ci lekk lenn, <sup>20</sup> xanaa boroomi laaf yi ci set. Yooyu, sañ ngeen koo lekk.

<sup>21</sup> Buleen lekk lenn lu médd. Jaambur bu dal ak yeen, sañ ngeen koo jox lu médd, mu lekk, mbaa ngeen jaay ko ab doxandéem. Waaye yeen askan wu sell ngeen, ñeel seen Yàlla Aji Sax ji.

Te buleen togg ab tef ci meewum yaayam.

### *Lu jëm ci céri fukkeel*

<sup>22</sup> Fexeleen bay génne benn céru fukkeel ci mboolem lu seeni tool meññ at mu nekk. <sup>23</sup> Seen cérub fukkeelu pepp, ak biiñ bu bees, ak diw gu bees, ak lu seen jur taawloo, muy nag, di gàtt, nangeen ko xéewloo fi seen kanam Yàlla Aji Sax ji, fi bérab bi mu taamoo dèel turam èllég. Su ko defee ngeen tàggatu ci ragal seen Yàlla Aji Sax ji fu ngeen tollu. <sup>24</sup> Su ngeen manula dox yoon wi, ndax seen Yàlla Aji Sax jee leen barkeele meññeef mu bare mu ngeen dul àttan, ci diggante bu sorewaatoo lool ak bérab bi seen Yàlla Aji Sax ji taamoo dèel turam, <sup>25</sup> su boobaa dangeen di wecci cérub fukkeel ba xaalis, jël xaalis ba te dem ba fa seen Yàlla Aji Sax ji taamu. <sup>26</sup> Su ko defee ngeen weccikoo fa xaalis bi lu leen neex, muy nag mbaa gàtt, mbaa biiñ, mbaa geneen naan gu diis, ak lu leen seen bakkan xiir, ngeen xéewloo fa seen kanam Yàlla Aji Sax ji, bannéexoo ko, yeen ak seen njaboot. <sup>27</sup> Leween gi ci seen biir dèkk nag, buleen leen fàtte, ndax amuñu wàll ci seen céru suuf.

<sup>28</sup> Ñetti at yu mat yu nekk, nangeen génne mboolem seen céri fukkeeli meññeef ca at mooma, te ngeen denc ko ca seen biir dèkk, <sup>29</sup> ndax Leween, ñi amul wàll ci seen céru suuf, dikk, ñook doxandéem yi ak jirim yi ak jètun, yi ngeen dèkkal, ngir ñu lekk ba regg.



Su ko defee seen Yàlla Aji Sax ji barkeel mboolem seenu ñaq.

## 15

### *Lu jëm ci njéggalug bor*

<sup>1</sup> Juróom ñaari at yu mat yu nekk, nangeen amal njéggalug bor. <sup>2</sup> Mbirum njéggaleg bor gi, nii lay deme: mboolem ku lebaloon dëkkandoom, bumu ko ca feyeekooti. Na jéggale la mu lebaloon dëkkandoom, mbokkum bànni Israyilam, gannaaw bu ñu biralee njéggaleg bor, ñeel Aji Sax ji. <sup>3</sup> Jaambur bi bokkul ci bànni Israyil, sañ ngeen koo feyeeku, waaye la leen seen mbokkum bànni Israyil ameel, jéggaleleen ko.

<sup>4</sup> Waaye ab ndóol du am ci seen biir, ndax seen Yàlla Aji Sax ji moo leen di barkeel bu baax ca réew ma mu leen di jox, muy seen cér, ngeen jagoo, <sup>5</sup> ndegam déggal ngeen bu baax seen Yàlla Aji Sax ji, di sàmmoo jëfe mboolem santaane bii ma leen di dénk tey. <sup>6</sup> Bu leen seen Yàlla Aji Sax ji barkeele ni mu ko waxe déy, yeenay lebal xeet yu bare, waaye yeen dungeen leb. Te it yeenay yilif xeet yu bare, waaye yeen, deesu leen yilif.

<sup>7</sup> Su amee ci seen biir ab ndóol, di kenn ci seen bokki bànni Israyil, ci benn ci seen dëkki réew, mi leen seen Yàlla Aji Sax ji di jox, buleen dëgër xol, di tëjal seen loxo, seen mbokkum ndóol moomu. <sup>8</sup> Nàddil-leen koo nàddil, abal koo abal dayob soxlaam. <sup>9</sup> Wattuleen seen bopp, bala leena jikko ju sew yóbbe ngeen naan ci seen xel: «Atum juróom ñaareel mi, atum njéggalug bor dëgmal na,» ba tax ngeen saije xef, seen mbokkum ndóol, joxuleen ko dara. Da leen di booleek Aji Sax ji, ngeen gàddu bàkkaar. <sup>10</sup> Nangeen ko joxa jox te bu ngeen koy jox it, bu ci seen xol bon, ndax loolu mooy tax seen Yàlla Aji Sax ji barkeel mboolem seen liggéey, ak mboolem seenu ñaq. <sup>11</sup> Du ñàkk nag ab ndóol ci réew mi. Moo tax ma sant leen ne leen ngeen nàddila nàddil seen mbokkum ndóol, ak seen néew-ji-doole ji ci seenum réew.

### *Sang am na lu ko war ci jaamam*

<sup>12</sup> Su fekke ne seen mbokkum bànni Israyil, góor mbaa jigéen da leena jaay boppam\*, bu leen liggéeyalee juróom benni at, atum juróom ñaareel ma, yi-wileen ko, mu moom boppam. <sup>13</sup> Te bu ngeen ko yiwee, mu moom boppam it, buleen ko yiwee loxoy neen. <sup>14</sup> Sàkkal-leen koo sàkkal ci seeni gàtt, ak seenum pepp, ak seen biiñ. Kemu alal ja leen seen Yàlla Aji Sax ji barkeele, moom ngeen koy jox. <sup>15</sup> Fàttlikuleen ne ay jaam ngeen woon ca réewum Misra, seen Yàlla Aji Sax ji moo leen jot. Moo tax ma sant leen lii tey.

<sup>16</sup> Ndegam nag seen jaam a leen ne: «Duma dem, ba la,» ndax cofeel gu mu am ci yeen ak seen waa kër, te bannexam di nekk ak yeen, <sup>17</sup> su boobaa fableen puso, ngeen sésale noppu jaam bi seen lafu bunt, te ngeen bënne puso bi noppam, ba mu jam ci lafu bunt bi, mu daldi doon seen jaam ba fàww. Seen jaam bu jigéen it, noonu ngeen di def ak moom.

<sup>18</sup> Buleen mititlu lu ngeen yiwi seenub jaam, mu moom boppam, ndax jariñ na leen lu fey ñaari yoon surga buy feyeeku, ci juróom benni at yi mu leen liggéeyal. Te seen Yàlla Aji Sax ji dina leen barkeel ci mboolem lu ngeen def.

### *Li war ci taawug jur*

<sup>19</sup> Mboolem luy taaw ci seen jur gu gudd, ak gu gàtt, te di góor, defal leen ko seen Yàlla Aji Sax ji cér bu sell. Buleen liggéeyloo muk seen yëkk wu dib taaw, te buleen wat seen gàtt bu dib taaw. <sup>20</sup> Fi seen kanam Yàlla Aji Sax ji ngeen ko wara xéewloo at mu jot, yeen ak seen njaboot, fi bérab bi Aji Sax ji taamu. <sup>21</sup> Jur gu ci am sikk nag, muy soox, mbaa mu gumba, mbaa mu am sikk su réy su mu mana doon, buleen ko sarxalal seen Yàlla Aji Sax ji. <sup>22</sup> Ci seen biir dëkk ngeen ko wara xéewloo, te ku sobewu ak ku set yépp man na caa lekk, mel ni bu doon kéwél mbaa kooba. <sup>23</sup> Waaye deretam, buleen ko lekk. Ci suuf ngeen koy sotti nim ndox.

\* 15:12 15.12 Mbaa: su fekke ne dees leena jaay seen mbokkum bànni Israyil.

## 16

*Ñetti yoon lees di màggalsi ci bérab bu sell bi*

<sup>1</sup> Wormaal-leen weeru Abiib, te ngeen amal ci màggalu bésu Mucc, ñeel seen Yàlla Aji Sax ji, ndax ci weeru Abiib la leen seen Yàlla Aji Sax ji génnee Misra, ag guddi. <sup>2</sup> Nangeen ci sarxalal seen Yàlla Aji Sax ji, ab gàtt mbaa aw nag, ci bérab bi Aji Sax ji taamoo dèel turam èllëg. <sup>3</sup> Buleen ko lekkaale lenn lu am lawiir. Daleleen caa lekk, ba diiru juróom ñaari fan, mburu mu amul lawiir, mburum njàqare, ndax ci biir gaawtu ngeen génne woon réewum Misra. Su ko defee ngeen baaxantal seen giiru dund, bés ba ngeen génnee réewum Misra. <sup>4</sup> Bu leen kenn gisal lawiir ci seen tund wépp, diiru juróom ñaari fan, te bu lenn fanaan ci yàppu jur gi ngeen sarxal, diggante ngoonu bés bu jëkk ba, ba ca suba sa.

<sup>5</sup> Juru bésu Mucc bi, dungeen ko mana rendi fenn ci dëkk yi leen seen Yàlla Aji Sax ji jox, <sup>6</sup> fu moy bérab ba seen Yàlla Aji Sax ji taamoo dèel turam. Foofa ngeen di rendi juru bésu Mucc bi ci ngoon bu jant biy so, yemook waxtu wa ngeen bàyyikoo woon Misra. <sup>7</sup> Toggleen ko, te lekk ko ci bérab bi seen Yàlla Aji Sax ji di taamuji, ca suba sa ngeen xëy, dellu ca seeni xayma. <sup>8</sup> Juróom benni fan ngeen di lekk mburu mu amul lawiir, bésu juróom ñaareel di am ndaje, ñeel seen Yàlla Aji Sax ji. Buleen ci liggéey dara.

<sup>9</sup> Juróom ñaari ayi bés nag, ngeen di waññ, te ci ndoortel ngóob ngeen di tàmbalee waññ juróom ñaari ayi bés yi, <sup>10</sup> ngeen doora amal màggalug Ayi bés, ñeel seen Yàlla Aji Sax ji, te saraxu yéene ba ngeen cay joxe di kemu koom ga leen seen Yàlla barkeele. <sup>11</sup> Ngeen daldi bannexu fa seen kanam Yàlla Aji Sax ji, yeen ak seeni doom, góor ak jigéen ak seeni jaam, góor ak jigéen, ak Leween ñi ci seen dëkk, ak doxandéem yeek jirim yeek jëtun ñi ci seen biir, ci bérab bi seen Yàlla Aji Sax ji taamoo dèel turam èllëg. <sup>12</sup> Fàttlikuleen ne ay jaam ngeen woon ca Misra te ngeen sàmmoo jéfe dogali yoon yii.

<sup>13</sup> Màggalu Mbaar yi it nangeen ko wormaal diiru juróom ñaari fan, gannaaw bu ngeen dajalee seenum pepp, ak seen ndoxum reseñ. <sup>14</sup> Ngeen daldi bannexu seenug màggal, yeen ak seeni doom, góor ak jigéen, ak seeni jaam, góor ak jigéen, ak Leween ñeek doxandéem yeek jirim yeek jëtun, ñi ci seen biir dëkk. <sup>15</sup> Juróom ñaari fan ngeen koy màggal ñeel seen Yàlla Aji Sax ji ci bérab bi Aji Sax ji di taamuji, ndax seen Yàlla Aji Sax ji moo leen di barkeelal seen meñnat mépp, ak seen mboolem ñaq, seen mbégte mat sëkk.

<sup>16</sup> Kon ñetti yoon cim at la mboolem seeni góor di teew fi seen kanam Yàlla Aji Sax ji, ci bérab bi muy taamuji: fani màggalu Mburu mu amul lawiir, ak fani màggalug Ayi bés, ak fani màggalu Mbaar yi. Waaye deesul teewe loxoy neen fi kanam Aji Sax ji. <sup>17</sup> Ku nekk, na sarax ba muy indi, di kemu barke ba ko Yàlla jagleel.

*Yoon wi sàrtal na mbirum àtte*

<sup>18</sup> Te itam ay àttekat aki kilifa ngeen di tabb ngir seeni giir, ci mboolem dëkk yi leen seen Yàlla Aji Sax jiy jox, ñuy àtte mbooloo mi àtteb dëgg. <sup>19</sup> Buleen jalgati yoon cib àtte, buleen jeng te buleen nangu alalu ger, ndax ab ger day muur bëti boroom xel, di xañ aji jub dëgg. <sup>20</sup> Dëgg donj ngeen wara topp, ndax ngeen dund, jagoo réew mi leen seen Yàlla Aji Sax ji di jox.

<sup>21</sup> Buleen samp benn xeru bant, bu jóge ci genn garab, ngir di ko jaamoo Asera tuur mi, ci seen wetu sarxalukaay bi ngeen sàkk ngir seen Yàlla Aji Sax ji. <sup>22</sup> Te itam buleen yékkati lenn lu bokk ci doji jaamookaay yooyu seen Yàlla Aji Sax ji bañ.

## 17

<sup>1</sup> Buleen sarxalal seen Yàlla Aji Sax ji, aw nag mbaa ab gàtt bu am sikk, mbaa jenn laago, ndax seen Yàlla Aji Sax ji seexlu na loolu.

<sup>2</sup> Bu nit feeñee ci seen biir, ci benn ci dëkk yi leen seen Yàlla Aji Sax jiy jox, muy góor mbaa jigéen juy def lu seen Yàlla Aji

Sax ji ñaawlu, di fecci kóllëreem, <sup>3</sup> bay jaamuji yeneen yàlla, di leen sujjóotal, mbaa muy sujjóotal jant bi, mbaa weer wi, mbaa mboolem gàngooru asamaan, te santanewuma ci lenn, <sup>4</sup> buñu leen ko yeggee ba ngeen dégg ko, seetleen mbir ma bu baax. Su dee dégg gu wér, ne defees na lu jomblu loolu ci biir Israyil, <sup>5</sup> nangeen génne ba ca buntu dëkk ba, waa ji, mbaa ndaw si def jooju jéf ju bon, te ngeen dóor ay doj, waa jooju mbaa ndaw si, ba mu dee. <sup>6</sup> Kàddug ñaari seede ba ñett nag, ci lees di reye ki ñu wara rey, waaye deesu ko rey ci kàddug benn seede. <sup>7</sup> Loxoy seede yee koy jékka dóor doj ngir rey ko, loxoy mbooloo mépp door koo dóor. Noonu ngeen di tenqee lu bon ci seen biir.

<sup>8</sup> Su leen mbir jafee ba wees leen ci àtteb bakkan bu ñu faat, ak ay jote, ak lo-raangey yaram yu ñu teg nit, ak mboolem dëngoo bu laaj àtte ci seen biir dëkk, dangeen di dem ba ca bérab ba seen Yàlla Aji Sax ji di taamuji, <sup>9</sup> ngeen àgg ca sarxalkat ya, Leween ña, ak àttekat, ba mbir ma yemool jamono, te ngeen sàkku ñu biral leen àtteb mbir ma. <sup>10</sup> Nangeen jéfe nag kàddu ga ñu leen ca wax, ca bérab booba Aji Sax ji taamu, te ngeen sàmmoo koo jéfe mboolem noonee ñu leen ko digale. <sup>11</sup> Kàddug ndigal la ñu leen digal, ak àtte ba ñu leen ci wax, jéfeleen ko. Buleen lajje fenn kàddu ga ñu leen ca wax; du ndijoor, du càmmoñ. <sup>12</sup> Képp ku ci danñiiral, baña déggal sarxalkat ba fa ayee liggéeyal seen Yàlla Aji Sax ji, baña déggal àttekat ba, kooku dees koy rey. Noonu ngeen di tenqee lu bon ci Israyil. <sup>13</sup> Askan wépp a koy dégg, tiit, ba duñu danñiiralati.

### *Ay ndigal ñeel na buur*

<sup>14</sup> Bu ngeen demee nag ca réew ma leen seen Yàlla Aji Sax ji di jox, bu ngeen ko nangoo, dëkke, ba ne: «Nanu fal buur bu nu jiite ni mboolem xeet yi nu séq,» <sup>15</sup> su boobaa fexeleen ba ka ngeen di fal buur, di ka seen Yàlla Aji Sax ji taamu. Ci seen biiri bokk nag ngeen di fal seen buur. Dungeen mana fal buur ab jaambur bu dul seen mbokkum bànni

Israyil. <sup>16</sup> Waaye bu buur bi barey fas, te bumu delloo askan wi Misra, ngir sàkku fas yu bare, te Aji Sax ji waxoon leen ne buleen dellooti woowu yoon. <sup>17</sup> Bumu barey jabar, balaa am xelam di lajj. Xaalis ak wurus it, bumu ko barele lool.

<sup>18</sup> Bu buur bi toogee ci jalub nguuram, na bindlu ngir moom ci boppam, ab sottib téereb yoon wii cib taxañ, ci dégtalub sarxalkat yi, Leween ñi. <sup>19</sup> Na téere boobu ànd ak moom, mu di ci jàng giiru dundam, ndax mu tàggatu ci ragal Yàllaam Aji Sax ji, ngir di sàmm mboolem kàdduy yoon wii, ak dogali yoon yii, ngir di ko jéfe, <sup>20</sup> ba du xoggluku ci kawu bokkam, te du moye santaane bi fenn; du ndijoor, du càmmoñ, ndax mu gudd fan ci nguuram, moom ak askanam, ci digg Israyil.

## 18

### *Ay yelleef ñeel na Leween ñi ak sarxalkat yi*

<sup>1</sup> Leween ñiy ay sarxalkat, ba ci giirug Leween gépp nag, wenn wàll mbaa céru suuf ñeelu leen ci seen bokki Israyil. Saraxi sawara yu Aji Sax ji, akub céram, moom lañuy dunde. <sup>2</sup> Ab cér du leen ñeel ci seen biiri bokk. Aji Sax ji mooy seenub cér, na mu leen ko waxe woon. <sup>3</sup> Lii mooy li lew sarxalkat yi, te bàyyikoo ci askan wi, ci ñiy rendi ay sarax, muy aw nag, di ab gàtt: nañu jox sarxalkat bi, mbagg mi ak lex yi, ak mbàq gi. <sup>4</sup> Te seen pepp mu jékka ñor, ak seen biiñ bu bees, ak seen diw gu bees, ak kawar gi ngeen jékka wate ca seeni xar, joxleen ko ko, <sup>5</sup> ndax seen Yàlla Aji Sax ji moo ko taamu, ci seen mboolemi giir, ngir mu taxaw, di liggéey ci turu Aji Sax ji, moom ak askanam, ba fàww.

<sup>6</sup> Ab Leween bu dëkke benn ci seeni dëkk, ak fu mu mana doon ci Israyil, su fa jógee dem ci coobarey boppam, bérab bu Aji Sax ji taamu, <sup>7</sup> da fay liggéey ci turu Yàllaam Aji Sax ji ni mboolem bokki Leweenam, ña fa taxawe fa kanam Aji Sax ji, <sup>8</sup> njël lu yemook njëlal ña mu fa fekk it lew na ko, te limaaleesul lu ko dikke ci njaayum alalu baayam.

### *Kàddug waxyu day sotti*

<sup>9</sup> Bu ngeen demee ca réew ma leen seen Yàlla Aji Sax ji di jox, buleen roy jëf ju jomblu ju xeet yooyu. <sup>10</sup> Bu kenn fekk ci seen biir kuy sarxe doomam ju góor, ak ju jigéen, lakk ko; ak kuy luxus, ak kuy seet, ak kuy gisaane, ak kuy xërëm, <sup>11</sup> ak kuy liggéeyaate, ak kuy seete ab rawaan, ak kuy seete aw rab, mbaa kuy seete nit ñu dee, <sup>12</sup> ndax mboolem ñiy def yooyu, Aji Sax ji seexlu na leen. Jëf ju seexluwu jooju moo waral seen Yàlla Aji Sax ji di leen dàqal seeni boroom.

<sup>13</sup> Mucceen sikk seen digganteek seen Yàlla Aji Sax ji, <sup>14</sup> ndax xeet yooyii ngeen di dàqi kat, ay luxuskat aki seetkat lañuy déggal, waaye yeen seen Yàlla Aji Sax ji mayu leen loolu. <sup>15</sup> Ab yonent bu soqikoo ci yeen kay, di seen mbokk ni man, moom la leen seen Yàlla Aji Sax ji di feeñalal. Moom ngeen di déggal. <sup>16</sup> Mooy noonee ngeen ko sàkkoo woon rekk, ci seen Yàlla Aji Sax ji ca tundu Oreb, ca bés sub ndaje ma, ngeen ne: «Rikk bunu déggati sunu baatu Yàlla Aji Sax ji. Sawara wu réy wii it, bunu ko gisati, lu ko moy nu dee,» <sup>17</sup> te Aji Sax ji ne ma: «Ñoo yey wax loolu. <sup>18</sup> Ab yonent laa leen di feeñalal ci seen biiri bokk, ni yaw. Maay yeb samay kàddu ci gémmiñam, mu àgge leen mboolem lu ma ko sant. <sup>19</sup> Su boobaa ku déggalul sama kàddu yi muy wax ci sama tur, man maa ko koy topp. <sup>20</sup> Waaye déy yonent bu am fitu àddu genn kàddu ci sama tur, te santuma ko mu wax ko, mbaa mu wax ci turi yeneen yàlla, boobu yonent, dee mooy àtteem.»

<sup>21</sup> Dingeen wax ci seen xel, ne: «Ana nu nuy ràññee kàddu gu Aji Sax ji waxul?»

<sup>22</sup> La yonent bi wax ci turu Aji Sax ji, su sottiwul, dikkul rekk, loola du kàddu gu Aji Sax ji wax. Ñeme Yàlla la ko yonent ba waxe, buleen ko ragal.

## 19

### *Ber dëkki rawtu ndigal la*

<sup>1</sup> Gannaaw bu leen seen Yàlla Aji Sax ji wollilee xeet yi mu leen di jox seenum réew, ngeen dàq leen, ba dëkke seeni dëkk ak seeni kër, <sup>2</sup> ñetti dëkk yu mag

ngeen di ber ca biir réew mooma leen seen Yàlla Aji Sax ji jox, ngir ngeen jagoo ko. <sup>3</sup> Ngeen waajal nag yoon wu jëm ci dëkk bu ci nekk, te ngeen séddale ñetti pàcc réew mooma leen seen Yàlla Aji Sax ji sédd, ngir képp ku rey nit, man caa làquji.

<sup>4</sup> Mbirum ki rey nit te di fa làquji ba mucc, nii lay tédde: day fekk mu rey moroomam te du teyeefam, waaye bañu ko woon démb ak bëkk-démb. <sup>5</sup> Mu mel ni ku ànd ak moroomam ca gott ba, di gor matt. Mu doon xàcci sémmiñam di gor, weñ ga fettaxe ca njàppu la, dal ca moroom ma, mu dee. Kooku day làquji ci dëkk yooyu benn, ba mucc. <sup>6</sup> Toppkatu bakkan ba nag warul mana dabi ci biir xolam bu tàng, ki rey, ba rey ko ngir sorewaayu yoon wa jëm ca dëkkub rawtu ba, te àtteb yoon reyluwu ko, gannaaw fekkul woon mu bañ ka mu rey, démb ak bëkk-démb. <sup>7</sup> Looloo waral ma sant leen, ne leen ñetti dëkki rawtu ngeen di ber.

<sup>8</sup> Bu seen Yàlla Aji Sax ji yaatalee seen suuf, na mu ko giñale woon seeni maam nag, ba jox leen mboolem réew ma mu dige woon ne dina ko jox seeni maam, <sup>9</sup> ndegam sàmm ngeen mboolem santaane bii ma leen dénk tey, ngir di ko jëfe, ngir sopp seen Yàlla Aji Sax ji, di awe ay yoonam bés bu nekk, su boobaa nangeen yokkaat ñetti dëkk yu mag, mu dolliku ci ñetti dëkk yi ngeen jëkka ber. <sup>10</sup> Su ko defee deesul tuur deretu jaambur bu deful dara ci suufas réew, mi leen seen Yàlla Aji Sax ji sédd, ba àqu deret di leen topp.

<sup>11</sup> Su fekke ne nit ki dafa bañ moroomam, su ko tèroo, dal ci kawam, ba fàdd ko, mu dee, su làqujee ci dëkk yooyu benn, <sup>12</sup> su boobaa na magi dëkkam yeble, ñu jële ko foofa, teg ko ci loxol toppkatu bakkan ba, ngir mu dee. <sup>13</sup> Buleen ko xool bētu yërmande. Noonu ngeen di dindee ci Israyil, àqu deretu jaambur bu deful dara, ndax ngeen baaxle.

### *Lu jëm ci kemu suuf ak limu seede cib àtte*

<sup>14</sup> Te it buleen toxal seen yemukaayu suufas moroom yu maam ya yemalee woon ci seen biir céru suuf ba ngeen

jagoo, ca réew ma leen seen Yàlla Aji Sax ji di moomale.

<sup>15</sup> Bennub seede nag du taxaw, di tu-umaal kenn, ci genn tooñ mbaa bàkkaar, ak bépp bàkkaar bu mu mana bàkkaar. Ci kaw kàddug ñaari seede mbaa ñett la mbir ma di wére.

<sup>16</sup> Su ab seede safaan taxawee, tu-umaal kenn, ne moo lajj yoon, <sup>17</sup> na ñaari nit, ña séq mbir ma taxawi fa kanam Aji Sax ji, fa kanam sarxalkat ya, ak àttekat ya ca yooyu jant. <sup>18</sup> Su ko defee àttekat yi seet bu baax, ba mu wér ne seede ba kat, seede soskat la buy seedeel mbokkam aw sos, <sup>19</sup> te ngeen def ak moom, la mu naroon yóbbe ka mu sosal. Noonu ngeen di tenqee lu bon ci seen biir. <sup>20</sup> Ñi ci des dinañu ko dégg, te dinañu ragal ba duñu defati lu bon lu ni mel ci seen biir. <sup>21</sup> Buleen ci xool bētu yërmande. Bakkan, bakkan a koy fey; bêt, bêt; bēñ, bēñ; loxo, loxo; tànk, tànk.

## 20

### *Yoon wi sàrtal na mbirum xare*

<sup>1</sup> Bu ngeen demee ngir xarejeek seeni noon ba gis ay fas, aki watiir, ak gàngoor gu leen épp, buleen leen ragal, ndax seen Yàlla Aji Sax jaa ngeek yeen, ki leen jële woon réewum Misra. <sup>2</sup> Bu ngeen di waaja xare, na sarxalkat bi dik, wax ak mbooloo mi, <sup>3</sup> ne leen: «Éey Israyil, dégluleen, yeena ngi waaja xareek seeni noon tey jii. Buleen yox-yoxi, buleen ragal, buleen tiit, buleen teqlikook seen sago ci seen kanam! <sup>4</sup> Ndaxte seen Yàlla Aji Sax ji mooy kiy dox ànd ak yeen, xeexal leen ak seeni noon, ngir may leen ndam.»

<sup>5</sup> Su ko defee kilifay xarekat yi wax ak gàngoor gi, ne leen: «Ana góor gu ci tabaxoon néeg bu bees te daloogu ko? Na daldi dellu cab néegam bala moo dee ci xare bi, geneen góor daloo ko. <sup>6</sup> Ana góor gu ci jëmbatoon tóokëru reseñ te jariñoogu ko? Na daldi ñibbi bala moo dee ci xare bi, geneen góor jariño ko. <sup>7</sup> Ana ku ci ngoroom dëgëroon te jëlagul? Na daldi ñibbi bala moo dee ci xare bi, geneen góor jël ko.» <sup>8</sup> Gannaaw loolu, na kilifa yi dellu wax ak gàngoor gi, ne leen:

«Ana ku ci ragal, ana ku ciy yox-yoxi? Na daldi ñibbi kat, bala moo yoqiloo ay moroomam, ni moom.» <sup>9</sup> Bu kilifay xare ya waxeek gàngoor gi ba noppi, nañu tabb ay njiiti kurél, ñu jiite gàngoor gi.

<sup>10</sup> Bu ngeen dikkee ba jub ab dëkk, ngir xareek ñoom, jëkkleen leena woo ci jàmm. <sup>11</sup> Ndegam jàmm lañu leen wuyoo, ba ubbil leen, mboolem askan wa mu fekk ca biir dëkk ba dañuy tegoo liggéeyu sañul-bañ, ñeel leen, di leen jaamu. <sup>12</sup> Waaye bu ñu jàmmoowul ak yeen, xanaa di xareek yeen, gawleen dëkk ba. <sup>13</sup> Seen Yàlla Aji Sax ji moo leen di teg ci seen loxo, ngeen daldi leel ñawkay saamar mboolem seeni góor. <sup>14</sup> Waaye jigéen ñi ak tuut-tànk yi, ak jur gi, ak mboolem lu ne ca biir dëkk ba, mboolem alal ja, sèxëtooleen, jagoo. Lekkleen alal ji ngeen foqatee ci seen noon, yi leen seen Yàlla Aji Sax ji jébbal.

<sup>15</sup> Noonu ngeen di def ak dëkk yi soreek yeen lool te bokkuñu ci dëkki xeet yii ngeen jëm. <sup>16</sup> Dëkki xeet yii leen seen Yàlla Aji Sax ji sédd nag, buleen ci bàyyi lenn luy noyyi, mu dund. <sup>17</sup> Nangeen faagaagal Etteen ñi ak Amoreen ñi ak Kanaaneen ñi ak Periseen ñi ak Eween ñi ak Yebuseen ñi, na leen ko seen Yàlla Aji Sax ji sante woon, <sup>18</sup> ndax ñu bañ leena royloo, ngir ngeen di jëfe seen mboolem yu jomblu yi ñuy defal seeni tuur, ba ngeen moy seen Yàlla Aji Sax ji.

<sup>19</sup> Bu ngeen gawee lu yàgg ab dëkk, ngir song leen xare, ba nangu ko, buleen foom ay garabam, di ca gor lenn te mana lekk ca doom ya. Kon nag garab, buleen ko gor. Garab du nit ba ñu di ko def ni ku ñu gaw. <sup>20</sup> Terewul garab gu ngeen xam ne deesul lekk doom ya, gorleen ko, daaneel, te ngeen sàkke ko ab gawukaay bu wër dëkk biy xareek yeen, ba keroog dëkk bay daanu.

## 21

### *Njotlaay war na ci bóomkat bu umpe*

<sup>1</sup> Su dee dañoo fekk ku ñu bóom ci biir réew mi leen seen Yàlla Aji Sax ji moomale, mu tēdd ci àll bi, te xameesul ku ko rey, <sup>2</sup> na seeni mag ak seeni àttekat

dem, natti diggante fa néew ba tëdd, ak dëkk ya ko séq. <sup>3</sup> Su ko defee dëkk ba gëna jegewook néew ba, magi dëkk booba tãne ca nag wu jigéen wu ñu masula liggéeyloo, te maseesu koo ràng. <sup>4</sup> Na magi dëkk boobu wommat nag wi ba ci xur wu wal ma dul ñiise, te maseesu cee bey, maseesu cee ji. Ñu daldi damm loosu nag wu jigéen wi foofa ca wal ma.

<sup>5</sup> Su ko defee sarxalkat yi, Leween ñi dikk, ndax ñoom la seen Yàlla Aji Sax ji taamu, ngir ñu di ko liggéeyal, di barkeele ciw turam, te ci seen kaw kàddu lees di àttee bépp jote, ak gépp loraange ci wàllu yaram. <sup>6</sup> Dëkk boobu gëna jegewook fa néew ba tëdd, na mboolem seeni mag raxas seeni loxo, tiimale ca nag wu jigéen wa ñu damm loos wa, ca wal ma. <sup>7</sup> Ñu biral ne: «Nun déy sunuy loxo tuurul deretu nit kii, te sunuy gët it gisul ba ñu koy tuur. <sup>8</sup> Ngalla Aji Sax ji, jéggal Israyil, sa ñoñ ñi nga jot, te baña toppe àqu deretu jaambur bu deful dara, fi digg Israyil sa ñoñ.» Su ko defee njéggal ñeel leen, ca deretu nit ka. <sup>9</sup> Yeen nag, noonu ngeen di tenqee ci seen biir, àqu deretu jaambur ju ñu tuur, ndax kon def ngeen li Aji Sax ji rafetlu.

#### *Ay sàrt a ngi ci wàllu njaboot*

<sup>10</sup> Bu ngeen xarejeek seeni noon, te seen Yàlla Aji Sax ji teg leen ci seeni loxo, ba ngeen jàpp leen njaam, <sup>11</sup> su ngeen gisee ca jaam yu jigéen ya, ku rafet ku ngeen xédd, te bëgg koo jël jabar, <sup>12</sup> yóbbuleen ko seen biir néeg, mu watu nel, dagg ay wewam, <sup>13</sup> summi yére ya ñu ko jàppe njaam, te toog seen biir néeg. Day tiislu nag ndeyam ak baayam lu mat weeru lëmm. Gannaaw loolu ngeen dëkkoo ko, di jëkkëram, muy seen jabar. <sup>14</sup> Bu loolu amee ba neexatu leen, bàyyileen ko, mu dem fu ko neex, waaye buleen ko jaay muk, di ko weccikoo xalis. Buleen ko jaamloo it, gannaaw bu ngeen ko jabaroo ba noppi.

<sup>15</sup> Ku am ñaari jabar, su xejjoo kenn ki, foñ ki ci des, te ki mu xejjoo, ak ki mu foñ jural koy doom yu góor, te taaw bu góor bi di doomu ki mu foñ, <sup>16</sup> bés buy séddale doomam yu góor alalam, du saña

jox doomu xejj bi, cér bi taaw yelloo, wacc doomu ka mu foñ, te muy taaw. <sup>17</sup> Taaw bay doomu ka mu foñ, na ko nangul ab céram, jox ko ñaar-cay céru rakk ja, ci mboolem alalam, ndax kooka soqikoo ci digg dooleem, mooy ka yelloo céru taaw.

<sup>18</sup> Ku am doom ju góor ju dëgër bopp te të; déggalul baay, déggalul ndey, su ñu ko yaree, te taxul mu déggal leen, <sup>19</sup> na ko baayam ak ndeyam jàpp, yóbbu ba ca seen magi dëkk ba, ca seen bunt dëkk. <sup>20</sup> Ñu wax seen magi dëkk ba, ne leen: «Sunu doom jii ku dëgër bopp la te të. Déggalu nu, xanaa di xawaareek a màndi rekk.» <sup>21</sup> Na ko góori dëkk bépp dóori doj ba mu dee. Noonu ngeen di tenqee lu bon ci seen biir. Israyil gépp a koy dégg, daldi ragal.

#### *Deesul wékk nit, fanaanal ko*

<sup>22</sup> Su nit moyee ba dee di àtteem, ñu rey ko, wékk ko ci garab, <sup>23</sup> bu néewam fanaan ca garab ga, nañu ko daldi rob ca bés ba, ndax ki wékke alkàndey Yàlla la. Buleen sobeel réew mi leen seen Yàlla Aji Sax sédd.

## 22

#### *Yoon wi sàrtal na dundin wu jekk*

<sup>1</sup> Buleen gis seen nagu mbokk mbaa gàttam bu réer, ba jàpp ci seen njaambur. Fexeleen koo waññi, ba delloo ko seen mbokk ma. <sup>2</sup> Su mbokk mi jegewoowul ak yeen, mbaa xamuleen ko, yóbbuleen jur gi seen kër, mu des fa, ba mbokk mi dikk, di ko seet, ngeen delloo ko ko. <sup>3</sup> Noonu ngeen di def, su dee mbaam, noonu ngeen di def su dee mbubb, noonu it ngeen di def, ak mboolem lu seen mbokk réerle, ba ngeen gis ko. Dungeen ci mana jàpp seen njaambur.

<sup>4</sup> Buleen gis seen mbaamu mbokk, mbaa nagam wu daanu ciw yoon, ba ngeen jàpp ci seen njaambur. Fexeleen ba yékkatile ko ko.

<sup>5</sup> Bu lenn ci mboolem yëfi góor, tegu ci kaw ku jigéen, te bu góor sol yérey jigéen, ndax Aji Sax ji seen Yàlla seexlu na képp kuy def yooyu.

<sup>6</sup> Bu ngeen doxee ba yem ci tàggum picc ci seenu yoon, mu nekk ci garab gu mu

mana doon, mbaa ci suuf, cuuj ya mbaa nen ya nekk ca, te yaay ja bóof ca kaw cuuj ya, mbaa nen ya, buleen boole jël yaay ja ak cuuj ya. <sup>7</sup> Fexeleen ba bàyyi yaay ja, te jël cuuj ya, ndax ngeen baaxle te gudd fan.

<sup>8</sup> Su ngeen dee tabax kër gu bees, sàkkal-leen seen kawum taax, ab feguwaay, bala caa nit a daanoo, àqu deret topp seen kër.

<sup>9</sup> Buleen ji ci seen tóokëru reseñ, we-neen wirgo, lu ko moy lépp ay doon céru sellnga bu ngeen dul saña jariño: li jóge ci jiwu mi rax reseñ ji, ak itam meññeefum reseñ ji. <sup>10</sup> Buleen ràngandoo nag ak mbaam, di leen rijjiloo.

<sup>11</sup> Buleen sol ndimol njaxas lu ñu raxe kawaru gàtt ak wëñu lëe.

<sup>12</sup> Ay cimbir-cimbir nag ngeen di def ci ñeenti weti malaanum sàngukaay mu ngeen di sàngoo.

### *Sàmmonteleen ak àqu jigéen*

<sup>13</sup> Ku jël jabar, dëkkoo ko, ba noppi jéppi ko, <sup>14</sup> di ko tuumaal, di teg lu ñaaw ci deram, naan: «Ndaw sii ma jël, ba ma ággee ci moom, fekkuma ko janq.» <sup>15</sup> su boobaa na baayu ndaw si ak ndeyam, jël firndey ndaw la, yóbbu ko ba ca kanam magi dëkk ba, ca bunt dëkk ba. <sup>16</sup> Su ko defee baayu ndaw si ne mag ñi: «Sama doom laa mayoon waa jii jabar; mu walbatiku jéppi ko. <sup>17</sup> Mu ngii di ko tuumaal, naan: “Fekkuma sa doom ji janq.” Te sama ndawal doom a ngii!» Nañu tàllal malaan ma ca kanam magi dëkk ba. <sup>18</sup> Su loolu amee, na magi dëkk booba jàpp waa ji, yar ko. <sup>19</sup> Nañu ko daan téeméeri donji xalis, jox ko baayu ndaw si, ndax moo yàq deru janqub Israyil. Jabaram lay doon ba tey, te du ko saña wacc giiru dundam.

<sup>20</sup> Waaye su tuuma ji dee dëgg, te giseesul lenn ndaw ca ndaw sa, <sup>21</sup> nañu yóbbu ndaw sa ba ca bunt kër baayam, te góori dëkk bi dóor koy doj ba mu dee, ndax moo def jëf ju gâccelu ci digg Israyil, di gànctoo kër baayam. Noonu ngeen di tenqee lu bon ci seen biir.

<sup>22</sup> Bu ñu fekke kuy tédde ku am jëkkër; ka ko tédde ak ka ñu tédde, dee mooy

seen àtte, ñoom ñaar ñépp, ngeen tenqee ko lu bon ci Israyil.

<sup>23</sup> Su ab janq digoo ak waayam ab séy, gannaaw gi keneen dajeek moom ci biir dëkk bi, tédde ko, <sup>24</sup> génneleen leen ñoom ñaar, ba ca bunt dëkk booba, ngeen dóor leen ay doj ba ñu dee, ndax ndaw si moo yuuxuwul woon wall, te muy ca biir dëkk ba, te waa ji it moo jabaroo jabaru moroomu góoram. Noonu ngeen di tenqee lu bon ci seen biir.

<sup>25</sup> Su fekke ne ci àll bi la waa ji dajeek ndaw, si digook keneen ab séy, mu jàpp ko, tédde ko, nag, waa ji ko tédde donj la dee di àtteem. <sup>26</sup> Waaye ndaw si deesu ko def dara. Bàkkaar bu dee di àtteem toppu ko ca, ndax ni ku song moroomam, bóom ko rekk, ni la mbir moomu deme, <sup>27</sup> nde biir àll ba mu dajeek ndaw sa, bu ndaw sa yuuxu woon it, du am ku ko wallu.

<sup>28</sup> Ku dajeek as ndaw, te mu dib janq bu digoowul ak keneen ab séy, su ko jàppee, tédde ko, ba ñu gis leen, <sup>29</sup> kooka tédde ndaw sa, day jox baayu ndaw sa juróom fukki donji xalis. Jabaram lay doon it, gannaaw moo ko jabaroo, te du ko saña fase, giiru dundam.

## 23

<sup>1</sup> Bu kenn jël jabaru baayam, di teddadil lala baayam.

### *Am na ñu dul bokk ci ndajem Aji Sax ji*

<sup>2</sup> Ku ñu mor mbaa ñu dagg ngóoraam, du bokk ci ndajem gëmkati Aji Sax ji. <sup>3</sup> Ku dul doomu yoon du bokk ci ndajem gëmkati Aji Sax ji. Ku askanoo ci moom it, ba ca fukkeelu maas ga, du bokk ci ndajem gëmkati Aji Sax ji. <sup>4</sup> Ab Amoneen mbaa ab Mowabeen du bokk ci ndajem gëmkati Aji Sax ji. Ku askanoo ci ñoom it, ba ca fukkeelu maas ga, du bokk ci ndajem gëmkati Aji Sax ji muk, <sup>5</sup> ndax la ñu leen dabewul woon aw ñam, mbaa am ndox, ca yoon wa, ba ngeen génnee Misra, xanaa di fey Balaam doomu Bewor ma bokk Petor ca Aram Naarim, ngir mu sàbbi leen. <sup>6</sup> Waaye seen Yàlla Aji Sax ji moo nanguwula déglu Balaam; kàddug yàqe ga la leen seen Yàlla Aji Sax ji soppil

barke, ndax seen Yàlla Aji Sax ji da leena sopp. <sup>7</sup> Buleen sàkku mukki jàmmu ñooñu mbaa seen njariñ, seen giiru dund, ba fàww.

<sup>8</sup> Buleen bañ ab Edomeen, ndax seen mbokk la. Buleen bañ nitu Misra, ndax ay doxandéem ngeen woon ca seenum réew. <sup>9</sup> Ñi soqikoo ci ñaari xeet yooyii, ca ñetteelu maas ga, te di seeni sètaat\* nag, sañ nañoo bokk ci ndajem gëmcati Aji Sax ji.

<sup>10</sup> Bu ngeen génnee ba fàkk ab dal, ngir jànkoonde ak seeni noon, nangeen sàmmu ci lépp lu aay. <sup>11</sup> Su amee ci seen biir ku setul, ndax géntu guddi gu ko dikkal, na génn dal bi, ca biti, te bumu duggaat ci biir dal bi. <sup>12</sup> Bu ngoon di jubsii na sangu, ba jant bi so, mu doora délsi ci biir dal bi. <sup>13</sup> Te sàkkleen bérab bu génn dal bi, ngeen di fa dem, di suturluji. <sup>14</sup> Na ngaska bokk ci seeni fàgguwaay, ndax su ngeen suturlujee ca biti ba noppi, moom ngeen di gase, ba suul seeni jonkan. <sup>15</sup> Ndax seen Yàlla Aji Sax ji mooy dem ak a dikk ci seen biir dal bi, ngir xettli leen, ba jébbal leen seeni noon. Kon nag seenub dal daa wara sell, ngir Aji Sax ji ñàkka gis fi seen biir, lenn lu tegginewul, ba dèddu leen.

<sup>16</sup> Gannaaw loolu buleen delloo ab jaam bu làqu ci yeen, te réece ci ab sangam. <sup>17</sup> Ci yeen lay toog, ci seen biir, bérab ba mu taamu, ci benn bi ko génal ci seeni dèkk, te buleen ko néewal doole.

<sup>18</sup> Gànc bu jigéen buy gànctul ay tuur, bumu am ci biir jigéeni Israyil, te gànctul bu góor buy gànctul ay tuur†, bumu am ci góori Israyil. <sup>19</sup> Buleen indi mukki ci seen biir kër Yàlla Aji Sax ji, peyooru gànctul bu jigéen, mbaa bu góor, ngir wépp xas wu ngeen namma wàccoo googu peyoor, ndax yooyu jaar yépp, seen Yàlla Aji Sax ji seexlu na ko.

### *Deesul topp bànni Israyil ab tegandaay*

<sup>20</sup> Buleen teg seen mbokkum bànni Israyil tegandaayal xalis, mbaa tegandaayal ñam, mbaa tegandaayal mboolem

bor bu tegandaay tege. <sup>21</sup> Ab doxandéem, sañ ngeen koo sàkku tegandaay, waaye seen mbokkum bànni Israyil, buleen ko sàkku tegandaay. Su ko defee seen Yàlla Aji Sax ji mooy barkeel mboolem seenu ñaq, ca réew ma ngeen jëm, ngir nanguji ko.

### *Wàccook aw xas wartéef la*

<sup>22</sup> Su ngeen xasalee seen Yàlla Aji Sax ji, aw xas, buleen ko yeexa wàccool, ndax kon seen Yàlla Aji Sax ji du leen ko ñàkka topp, te kon muy seen bàkkaar. <sup>23</sup> Waaye baña xas, amul bàkkaar. <sup>24</sup> Li seen làmmiñ tudd, sàmmooleen koo jéfe na ngeen ko xasale woon seen Yàlla Aji Sax ji, ci seen sagoy bopp, ak seen kàddug bopp.

### *Raasaatu mu suur boroom lew na*

<sup>25</sup> Bu ngeen duggee ci seen tóokëru reseñu moroom, lekkleen ca reseñ ja lu leen neex ba suur, waaye seen ndab, buleen ko ca yeb. <sup>26</sup> Bu ngeen duggee ci seen toolu peppu moroom, fekk mu ñor, sàkkeleen seen loxo ca gub ya, waaye ab sàrt, buleen ko xàccil seen peppu moroom.

## 24

### *Yoon wi sàrtal na pase ak séyaat*

<sup>1</sup> Ku jël jabar, ba gannaaw gi xoolatu ko bētu yiw, ndax lu tegginewul lu mu ko gisal, su ko bindalee kayitu pase, teg ko ci loxoom, ba yiwi ko, mu jóge kërám, <sup>2</sup> su jógee ca kër ga, dem ba mujj doon jabaru keneen, <sup>3</sup> su ko jèkkëram ju mujj jooju jéppée, bindal ko kayitu pase, teg ko ci loxoom, ba yiwi ko, mu jóge kërám, mbaa su jèkkëram jooju ko mujja jël faatoo, <sup>4</sup> su boobaa jèkkëram ju jèkk ja ko yiwi woon du ko saña jèlaat jabar, gannaaw ba ndaw sa sobewoo noonu, ndax loolu lu jomblu la fi kanam Aji Sax ji, te waruleena indi bàkkaar ci biir réew mi leen seen Yàlla Aji Sax ji di moomale.

<sup>5</sup> Ku jël ab séet du bokk ci gàngoor gu jëm xare, te deesu ko sas lenn. Day moom

\* **23:9** 23.9 Mooy ñetteelu maasug xeet yooyu taamoo dèkke réewum Israyil. Seetal ci *Màndiñ ma* 12.1-15.

† **23:18** 23.18 Googu gànctu, jaamukati tuur ya ca Kanaan daan nañu ko jéfe, ngir yaakaar ne dina tax seenum njur, ak seeni tool nangu.



boppam atum lëmm, ngir toog këram, di bégal jabaram ji mu jël.

### *Yoon wi aar na néew-ji-doole*

<sup>6</sup> Buleen tayleloo kenn ñaari doji wolukaayam, ci bor bu mu leen ameel. Buleen ko tayleloo wenn doj wa féete kaw sax, ndax kon bakkanam ngeen def ub tayle.

<sup>7</sup> Su amee nit ku ñu fekke kenn ciy bokkam, ku mu sàcce ci bànni Israyil, mu di ko jaamloo, mbaa mu jaay ko, su boobaa dee mooy àtteb kooka ko sàcc. Noonu ngeen di tenqee lu bon ci seen biir.

<sup>8</sup> Fexeleen ba ci biir mbasum jàngoroy der juy màgg, ngeen di sàmmoo jëfe bu baax, mboolem lu leen sarxalkat yi, Leween ñi tegtal. Ni ma ko sante sarxalkat yi, Leween ñi, sàmmooleen koo jëfe noonu. <sup>9</sup> Fàttlikuleen la seen Yàlla Aji Sax ji defoon Maryaama ca yoon wa, ba ngeen génnee Misra\*.

<sup>10</sup> Bu ngeen lebalee seen moroom, ak lu bor ba mana doon, buleen dugg biir néegam, di fa jël ab tayleem. <sup>11</sup> Ca biti ngeen di taxaw, ka ngeen di lebal yótsi leen ab tayleem ca biti. <sup>12</sup> Su dee ku néew doole, buleen téraale ab tayleem. <sup>13</sup> Fexeleen ba delloo ko tayle ba bu jant biy so, ba mu téraale mbubbum tayle ma, sante leen ko, mu dig njekk, fa seen kanam Yàlla Aji Sax ji.

<sup>14</sup> Buleen gàddu àqu liggéeykat, baadoolo bu néew doole ci seen biiri bokk, mbaa ci seen dëkkandoo yiy doxandéem ci seen dëkk yi ci réew mi. <sup>15</sup> Ci bés bi ngeen koy fey peyooram. Bu ko jant sowe, ndax néew doole la te moom la yaakaara dunde. Lu ko moy mu boole leen ak Aji Sax ji, ngeen gàddu bàkkaar.

<sup>16</sup> Deesul teg waajur àtteb dee, ngir weccikoo ko doom ja, te doom it deesu ko teg àtteb dee, weccikoo ko waajur wa. Nit ku nekk, bàkkaar bu boppam lees koy tege àtteb dee.

<sup>17</sup> Buleen xañ dëgg ab doxandéem akub jirim, te buleen taylelu mbubbum jëtun.

<sup>18</sup> Fàttlikuleen ne ay jaam ngeen woon ca Misra, seen Yàlla Aji Sax ji moo leen

fa jote. Looloo waral man, ma sant leen ngeen jëfe ndigal loolu.

<sup>19</sup> Bu ngeen di góob seenub tool, ba fàtte ab sëq ca tool ba, buleen dellu di ko jëli. Ab doxandéem akub jirim akub jëtun, ñoom la poraat may ñeel, su ko defee seen Yàlla Aji Sax ji barkeel leen ci mboolem seenu ñaq. <sup>20</sup> Bu ngeen bàccee seen garabu oliw ba noppi, buleen toppaat car ya, di witt lu ca des. Ab doxandéem akub jirim akub jëtun, ñoom la ndesit way ñeel. <sup>21</sup> Bu ngeen witt-tee seen tóokëru reseñ, buleen dellu, di ko wittaat. Ab doxandéem akub jirim akub jëtun ñoom la wittaat may ñeel. <sup>22</sup> Fàttlikuleen ne ay jaam ngeen woon ca réewum Misra. Looloo waral man, ma sant leen ngeen jëfe ndigal loolu.

## 25

### *Njub ak yërmande wartéef la*

<sup>1</sup> Su ab jote amee diggante ay nit, nañu dem ca èttub àttekaay ba, ñu àtte leen, ba ki am dëgg, ñu jox ko dëgg, ki tooñ, ñu teg ko tooñ. <sup>2</sup> Su dee ay dóor la ki tooñ yelloo, na ko àttekat bi téral, ñu dóor ko ci kanamam, limu yar ba yemook tooñam. <sup>3</sup> Waaye ñeent fukki yar, bu ñu ko dóor lu ko èpp, ndax dóor ko lu èpp loolu, torxal seen mbokk ci seen kanam lay doon.

<sup>4</sup> Buleen sunjuñ gémmiñu nag, te fekk koy bojj am pepp.

### *Donn sa jabaru mbokk wartéef la*

<sup>5</sup> Bu ay góor yu bokk waajur dëkke, kenn ci ñoom dee te bàyyiwul doom ju góor, jabaru ki dee du gén, di séy akub jaambur. Jëkkëru donaleem ju bokk ak jëkkëram moo ko wara jël, donloo ko.

<sup>6</sup> Su ko defee bu ca ndaw sa taawloo góor, taaw ba saxal turu mbokkam ma dee, ba turam du fey ci biir Israyil. <sup>7</sup> Su waa ji buggula jël jabaru donaleem jooju, na ndaw sa dem ba ca mag ña ca bunt dëkk ba, ne leen: «Sama jëkkëru donale jii moo baña saxal turu mbokkam ci Israyil. Moo ma buggula donloo.» <sup>8</sup> Bu loolu amee na ko magi dëkkam woolu, wax ak moom.

\* 24:9 24.9 Seetal ci *Màndiñ ma* 12.10.

Su waa ji dëgëree, ne buggu koo jël, <sup>9</sup> na ko jabaru donaleem ja fekki ca kanam mag ña, daldi summi benn caraxu waa ji ba noppi, tifli waa ji ci kanam, ne ko: «Nii lees di def ku dul sampal mbokkam kër.» <sup>10</sup> Su boobaa tur wa ñuy dippee waa kër waa ja ci digg Israyil, di «Kërug summi carax.»

### *Am na jëf ju aay ci sot*

<sup>11</sup> Su ay góor dee jàppante, ba jabaru kenn ki dikk, di sotle jëkkëram; bu jàppee ca ngóoray kay jàppanteek jëkkër ja, <sup>12</sup> dogleen loxol ndaw sa te buleen ko ñéebli.

### *Ab nattukaay day mat*

<sup>13</sup> Buleen denc ci seen mbuus doju màndaxekaay ak moroom ma, te bii diis, bi ci des woyof. <sup>14</sup> Buleen denc seen kër nattukaayu sol-sotti ak moroom ma, bii réy, bi ci des tuut. <sup>15</sup> Doju màndaxekaay bu mat te dëggu ngeen wara am, te nattukaayu sol-sotti bu mat te dëggu ngeen wara am, ndax ngeen gudd fan ca réew ma leen seen Yàlla Aji Sax ji di jox. <sup>16</sup> Seen Yàlla Aji Sax ji kat seexlu na képp kuy def yoyyii, képp kuy def ug njublan.

### *Mbugal Amaleg ndigal la*

<sup>17</sup> Fàttlikuleen la leen Amalegeen ña defoon ca yoon wa, ba ngeen génnee Misra: <sup>18</sup> ñoo leen dab ci yoon wi, songe leen gannaaw, fàdd mboolem ña mujje woon, fekk ngeen sonn, loof, te ragaluñu ci sax Yàlla. <sup>19</sup> Bu ngeen demee ba seen Yàlla Aji Sax ji noppal leen ci mboolem seen noon yi séq réew, mi mu leen sédd, ngir ngeen nangu ko, nangeen far mboolem lu ñu doon fàttlikoo Amalegeen ñi fu asamaan tiim. Buleen ko fàtte.

## 26

### *Njotlaayal Aji Sax ji laaj na ab galag*

<sup>1</sup> Gannaaw loolu, bu ngeen demee ca réew ma leen seen Yàlla Aji Sax ji sédd, ba ngeen nangu ko, dëkke, <sup>2</sup> na ku nekk ci yeen sàkk ca ndoortel mboolem meññeefum suuf mu mu jële ca seen réew, ma leen seen Yàlla Aji Sax ji di jox, mu def ko ci pañe, yóbbu ca bérab ba seen Yàlla Aji Sax ji taamoo dëel turam

ëllëg. <sup>3</sup> Na àgg ca sarxalkat ba fa nekk ci yooyu jant, ne ko: «Maa biral tey jii fi sa kanam Yàlla Aji Sax ji, ne agsi naa ci réew mi Aji Sax ji giñaloon samay maam, ne moom la may jox.» <sup>4</sup> Na sarxalkat bi nangoo pañe bi ci loxoom, taaj ko fi seen kanam sarxalukaayu Yàlla Aji Sax ji. <sup>5</sup> Mu dellu nag wax fi seen kanam Yàlla Aji Sax ji, ne: «Sama maam ab Arameen buy màngaan la woon. Mu dem Misra, sance fa mbooloo su néew, te mujj di askan wu réy, am doole te bare. <sup>6</sup> Waa Misra nag soxore nu, mitital nu, yen nu liggéey bu diis. <sup>7</sup> Ba loolu amee nu yuuxu, woo sunu Yàllay maam Aji Sax ji wall, Aji Sax ji dëgg nu, gis sunu mitit, ak sunu coono, ak sunu notaange. <sup>8</sup> Aji Sax ji nag génne nu Misra ci dooley loxoom ak kàttanam, ci biir musiba mu réy, aki firnde, aki kéemaan. <sup>9</sup> Ba loolu wéyee mu indi nu fi bérab bii, jox nu réew mii, réew mu meew meek lem ji tuuroo. <sup>10</sup> Moo ma taxa indi nii ndoortel meññeefum suuf, si nga ma jox, Aji Sax ji.» Su ko defee mu taaj pañe bi fi seen kanam Yàlla Aji Sax ji, daldi sujjóot fi seen kanam Yàlla Aji Sax ji. <sup>11</sup> Mu bége nag, moom ak Leween ñeek doxandéem yi dëkk ci seen biir, mboolem lu baax li ko seen Yàlla Aji Sax ji jox, moom ak waa kërám.

<sup>12</sup> Gannaaw bu ngeen génnee mboolem céru fukkeelub meññeef, ci atum ñetteel, yemook atum génne cérub fukkeel, gannaaw ñaari at yu nekk, nangeen ko jox Leween ñi ak doxandéem yi ak jirim yi ak jëtun ñi, ngir ñu lekk ba regg, fa ñu féete ca seeni dëkk, <sup>13</sup> te na ku nekk ci yeen wax fi seen kanam Yàlla Aji Sax ji, ne: «Jële naa sama kër céru sellnga bi, ba jox ko Leween ñeek doxandéem yeek jirim yeek jëtun yi, noonee mu dëppook sa santaane bi nga nu dénk. Moyuma lenn ci say santaane, te fàttewuma ci lenn. <sup>14</sup> Lekkuma ci dara ci biir ab dëj, jëlewuma ci dara te fekk ma sobewu, te it sarxaluma ci dara ku dee. Sama kàddug Yàlla Aji Sax ji laa topp, noonee nga ma ko sante woon. <sup>15</sup> Ngalla geesool fa sa dëkkuwaayu sellnga, fa asamaan, te nga barkeel Israyil, sa ñoñ, barkeel suuf si nga nu jox, noonee nga ko giñale woon

sunuy maam, réew mu meew meek lem ji tuuroo.»

### *Kóllère feddliku na*

<sup>16</sup> Bésuub tey jii seen Yàlla Aji Sax ji moo leen sant ngeen jéfe dogal yii, ak àttey yoon yi. Sàmmooleen koo jéfe seen léppi xol, ak seen léppi bakkan. <sup>17</sup> Aji Sax ji ngeen biral bésuub tey, ne mooy doon seen Yàlla, te dingeen doxe ay yoonam, di sàmm dogali yoonam, aki santaaneem, ak àttey yoonam, tey dégg waxam. <sup>18</sup> Aji Sax ji it biral na bésuub tey, ne yeenay doon ñoñam ñi mu séddoo, noonee mu leen ko dige woon, te ngeen di sàmm mboolemi santaaneem. <sup>19</sup> Moo leen di aj ba ngeen tiim mboolem xeet yi mu sàkk, ci wàllu bayre, ak tur ak teddnga, te moo leen di def askan wu sell, ñeel seen Yàlla Aji Sax ji, noonee mu ko digee woon.

## **Musaa biral na yooni barke ak alkànde**

### **27**

*(Saar 27—30)*

<sup>1</sup> Ba loolu wéyee Musaa ak magi Israyil sant mbooloo ma, ne leen: «Sàmmleen mboolem santaane yi ma leen dénk bésuub tey. <sup>2</sup> Bés bu ngeen jàllee dexu Yurdan, ba ca réew ma leen seen Yàlla Aji Sax ji jox, sampleen ay doj yu mag, ngeen diw doj ya weexal, <sup>3</sup> te ngeen bind ca mboolem kàdduy yoon wii, gannaaw bu ngeen jàllee. Su ko defee ngeen mana dugg ca réew, ma leen Aji Sax jiy jox, réew mu meew maak lem ja tuuroo, noonee leen ko seen Yàllay maam Aji Sax ji waxe woon. <sup>4</sup> Gannaaw bu ngeen jàllee dexu Yurdan, sampleen doj yooyu ca kaw tundu Ebal, ni ma leen ko sante tey jii, te ngeen diw doj yi weexal. <sup>5</sup> Nangeen fa tabax ab sarxalukaay, ñeel seen Yàlla Aji Sax ji, ab sarxalukaay bu ñu defare doj yu jumtukaayu weñ laalul. <sup>6</sup> Doj yu mat yu ñu soppiwul lenn ca na ñu bindoo ngeen di tabaxale ab sarxalukaay, seen Yàlla Aji Sax ji, ngeen def ca ay saraxi rendi-dóomal, ñeel seen Yàlla Aji Sax ji. <sup>7</sup> Defleen ca itam ay saraxi cant ci biir jàmm yu ngeen di lekk foofa. Ngeen daldi bége fa seen kanam Yàlla Aji Sax ji.

<sup>8</sup> Nangeen bind ca kaw doj ya, mboolem kàdduy yoon wii, ba mu leer nàññ.»

<sup>9</sup> Ba mu ko defee Musaa ak sarxalkat yi, Leween ñi wax ak Israyil gépp, ne leen: «Yeen Israyil, neleen cell te déglu. Bés niki tey doon ngeen askan wu ñeel seen Yàlla Aji Sax ji. <sup>10</sup> Kon nag déggalleen seen Yàlla Aji Sax ji, te ngeen jéfe ay santaaneem, ak dogali yoonam, yi ma leen di dénk tey.» <sup>11</sup> Musaa nag sant mbooloo ma bésuub keroog, ne leen:

<sup>12</sup> «Giir yii may lim, ñooy taxawe kaw tundu Garisim, ngir ñaanaal mbooloo mi, gannaaw bu ngeen jàllee dexu Yurdan: Cimyoneen ñi ak Leween ñi ak Yudeen ñi ak Isakareen ñi ak Yuusufeen ñi ak Beñamineen ñi. <sup>13</sup> Giir yii nag ñooy taxaw di rëbbe, fa kaw tundu Ebal: Rubeneen ñi ak Gàddeen ñi ak Asereen ñi ak Sabuloneen ñi ak Daneen ñi ak Neftaleen ñi.»

### *Lu jëm ci alkànde yi*

<sup>14</sup> Leween ñi ñooy wax ak waa Israyil gépp, di àddu ca kaw, ne:

<sup>15</sup> «Alku ñeel na képp ku sàkk, bay teg ci bérab bu làqu, li Aji Sax ji seexlu, te ab liggéeykat sàkke ko ay loxoom, muy jëmmu tuur mu ñu yett, mbaa mu ñu móol.» Su ko defee mbooloo mépp àddoondoo, ne: «Amiin!»

<sup>16</sup> Ñu neeti: «Alku ñeel na ku torxal baayam mbaa ndeyam.» Mbooloo mépp ne: «Amiin!»

<sup>17</sup> Ñu neeti: «Alku ñeel na ku toxal màndargam kemu suufas moroomam.» Mbooloo mépp ne: «Amiin!»

<sup>18</sup> Ñu neeti: «Alku ñeel na ku sànk silmaxa ci aw yoon.» Mbooloo mépp ne: «Amiin!»

<sup>19</sup> Ñu neeti «Alku ñeel na ku jengal àtteb doxandéem ak jirim akub jëtun.» Mbooloo mépp ne: «Amiin!»

<sup>20</sup> Ñu neeti: «Alku ñeel na ku tédde jabaru baayam, ndax suturas baayam la xàwwi.» Mbooloo mépp ne: «Amiin!»

<sup>21</sup> Ñu neeti: «Alku ñeel na ku tédde mboolem luy mala.» Mbooloo mépp ne: «Amiin!»

<sup>22</sup> Ñu neeti: «Alku ñeel na ku tédde ab jigéenam, muy doomu baayam, mbaa doomu ndeyam.» Mbooloo mépp ne: «Amiin!»

<sup>23</sup> Ñu neeti: «Alku ñeel na ku tédde yaayu jabaram.» Mbooloo mépp ne: «Amiin!»

<sup>24</sup> Ñu neeti: «Alku ñeel na ku rey moroomam ci kumpa.» Mbooloo mépp ne: «Amiin!»

<sup>25</sup> Ñu neeti: «Alku ñeel na ku nangub ger, ngir rotal bakkanu nit ku deful dara.» Mbooloo mépp ne: «Amiin!»

<sup>26</sup> Ñu neeti: «Alku ñeel na ku saxoowul kàdduy yoon wii, di ko jéfe.» Mbooloo mépp ne: «Amiin!»

## 28

### *Lu jëm ci barke yi*

<sup>1</sup> Su ngeen déggalee ba déggal seen Yàlla Aji Sax ji, ngir di sàmmoo jéfe mboolem santaaneem, yi ma leen di dénk tey, kon Aji Sax ji seen Yàlla, Aji Kawe ji moo leen di aj ci kaw mboolem xeeti àddina. <sup>2</sup> Barke yii yépp a leen di dab, sottiku ci seen kaw, bu ngeen déggalee seen Yàlla Aji Sax ji:

<sup>3</sup> Barkeel a leen di ñeel ci biir dëkk, barkeel a leen di ñeel cib àll.

<sup>4</sup> Barkeel ay ñeel seen meññeefum njurukaay, ak seen meññeefum suuf, ak seenug jur, seen jur gu gudd, ak seen jur gu gàtt.

<sup>5</sup> Barkeel ay ñeel seenum witt, ak seenum xiiw.

<sup>6</sup> Barkeel ay ñeel seen yoonu dem, barkeel ay ñeel seen yoonu dikk.

<sup>7</sup> Aji Sax jeey def, noon yi leen di jógal, ñooy daanu fi seen kanam. Wenn yoon lañuy dikke, dal ci seen kaw, waaye juróom ñaari yoon lañuy awe, daw, jiitu leen.

<sup>8</sup> Aji Sax jee leen di booleek barke bu wàccal seenum sàq, ak seen mboolem ñaq, te moo leen di barkeel ca réew ma leen seen Yàlla Aji Sax ji jox. <sup>9</sup> Moo leen di defal boppam askan wu sell, noonee mu leen ko giñale woon, ndegam sàmm ngeen seen santaaney Yàlla Aji Sax ji, di doxey yoonam. <sup>10</sup> Su boobaa mboolem xeeti kaw suuf dinañu gis ne turu Aji Sax ji lees leen di wooye, te dinañu leen ragal.

<sup>11</sup> Aji Sax jee leen di xéewale, ngir baaxe seen meññeefum njurukaay, ak seenug jur, ak seen meññeefum suuf, ca réew

ma mu giñaloon seeni maam, ne moom la leen di jox. <sup>12</sup> Aji Sax jee leen di ubbil mbàndam mu baax ma fa asamaan, ba bu jotee mu tawal seenum réew, boole ci barkeel seen mboolem ñaq.

Yeenay lebal xeet yu bare, waaye yeen dungeen leb. <sup>13</sup> Aji Sax jee leen di def bopp, te du leen def ub geen, te kaw rekk ngeen di jëm, waaye dungeen jëm suuf, ndegam yeena ngi topp seen santaaney Yàlla Aji Sax ji ma leen di dénk sama bopp bésuub tey, di ko sàmmoo jéfe, <sup>14</sup> te mboolem kàddu yii ma leen di dénk tey, ngeen bañ koo moye ndijoor, mbaa càmmoñ, di topp yeneen yàlla yu ngeen di jaamu.

### *Déggadi, alku*

<sup>15</sup> Waaye nag su ngeen déggalul seen Yàlla Aji Sax ji, te baña sàmmoo jéfe mboolemi santaaneem, ak dogali yoonam, yi ma leen di jox tey, mboolem alkànde yii dina leen dab, sottiku ci seen kaw:

<sup>16</sup> Dingen alkoo biirub dëkk, alkoo àll.

<sup>17</sup> Dingen alkule am witt, akam xiiw.

<sup>18</sup> Dingen alkule meññeefum njurukaay, ak meññeefum suuf, ak jur gu gudd ak gu gàtt.

<sup>19</sup> Dingen alkoo seen yoonu dem, alkoo seen yoonu dikk.

<sup>20</sup> Aji Sax jeey yebal fi seen biir, kumte ak tiitaange, ak mbetteel ci mboolem lu ngeen ñaq, ba ngeen yàqu, ba jekki sàнку ndax seen jëf ju ñaaw ju ngeen ko dëddoo.

<sup>21</sup> Aji Sax jee leen di langalal mbas, ba raafal leen ca réew ma ngeen jëm, ngir nanguji ko. <sup>22</sup> Aji Sax jee leen di dumaa woppi ràgg, ak yaram wu tàng, ak lakk-lakk, ak jant bu tàng jérr, ak maral, ak gàncax gu xuur, tegi liir, lépp topp leen ba ngeen sàнку.

<sup>23</sup> Asamaan si tiim seen bopp nag da naan sereñ ni xàñjar, suuf si ngeen teg seeni tànk, wow koññ ni weñ gu ñuul.

<sup>24</sup> Aji Sax jeey def seen tawub réew di suuf ak pënd bu bawoo asamaan, di yuriku ci seen kaw, ba ngeen sàнку.

<sup>25</sup> Aji Sax jeey def ngeen daanu fi seen kanami noon. Wenn yoon ngeen di dikke,

song leen, waaye juróom ñaari yoon ngeen di awe, daw, te dees na leen seexlu ci mboolem nguuri kaw suuf. <sup>26</sup> Su ko defee seeni néew di poraatum mboolem njanaaw ak rabu àll, te kenn du leen dàq.

<sup>27</sup> Aji Sax jee leen di dumaa taabi Misra, ak neewoy kërug suuf, ak yaram wu xas, ak èr yuy xasan te dungeen mana am pajam. <sup>28</sup> Aji Sax jee leen di dumaa ag ndof akug cilmaxa ak ngëlëmte, <sup>29</sup> ba ngeen di làmbatoo digg bëccëg ni silmaxa di làmbatoo cig lëndëm. Dungeen sottal seeni mébét. Dees leen di néewal doole, di foqati seen alal rekk, bés bu nekk, te kenn du leen wallu.

<sup>30</sup> As ndaw, ngeen digool ab séy, keeneen tédde ko; ag kër, ngeen tabax, te dungeen ko dëkke; ab tóokëru reseñ, ngeen jëmbat, te dungeen ko jariñoo. <sup>31</sup> Seenu yëkk, ñu rendi, ngeen gis, te dungeen ci lekk; seen mbaam, ñu nangu ko ci seeni loxo, te du délsi ci yeen; seeni gàtt, ñu jébbal seeni noon, te kenn du leen wallu; <sup>32</sup> Seen doom yu góor ak yu jigéen, ñu jébbal weneen xeet ci seen kanam, ngeen di leen séentu ci neen bés bu Yàlla sàkk, te dungeen ci man dara. <sup>33</sup> Seen meññeefum suuf, ak mboolem seenu ñaq, xeet wu ngeen xamuloon a koy lekk, te dees leen di not ak a dëggaate rekk, bés bu nekk. <sup>34</sup> Dingen mujj dof ndax lu buur seeni bët ngeen di gis.

<sup>35</sup> Aji Sax jee leen di dumaa taabi óom, ak taabi yeel yu bon. Dungeen mana am pajam, te ci seen wewu tànk lay lawe, ba ci seen kaw bopp.

<sup>36</sup> Aji Sax jee leen di diri, yeen ak seen buur bi ngeen fal, ba ca biir xeet wu ngeen xamuloon, yeen ak seeni maam, ngeen di fa jaamu yeneen yàllay bant ak doj. <sup>37</sup> Dees na leen mujj seexlu, di leen léebook a kókkalee foofa ca biir mboolem xeet, ya mu leen dàq jème.

<sup>38</sup> Jiwu mu bare ngeen di yóbbu tool, te lu néew ngeen cay ame, ndax njéeréer yee koy wat. <sup>39</sup> Ay tóokëri reseñ, ngeen jëmbat, sonn ca, te biiñ, dungeen ko naan, dungeen witt doom ya it, ndax sax yee koy lekk. <sup>40</sup> Ay garabi oliw ngeen di am ci seen réew mépp, waaye ag diw,

dungeen ko diwoo, ndax seen doomi oliw ya day yolax. <sup>41</sup> Ay doom yu góor ak yu jigéen ngeen di jur, waaye duñu leen nekkal, ndax njaam lañuy duggi. <sup>42</sup> Seen gépp garab ak seen meññeefum suuf, soccet yee koy nangu.

<sup>43</sup> Doxandéem bu nekk ci seen biir mooy yéeg tiim leen, ba ca kawa kaw, yeen nag ngeen di wàcc, ba suufee suufe. <sup>44</sup> Moom moo leen di lebal, waaye dungeen ko lebal. Moom mooy doon bopp, yeen, ngeen di geen.

<sup>45</sup> Mboolem alkànde yii ñoo leen di dab, dal ci seen kaw, topp leen, ba ngeen sànk, ndax yeena déggalul seen Yàlla Aji Sax ji, ngir wormaal ay santaaneem, ak dogali yoonam, yi mu leen dénk. <sup>46</sup> Loolu mooy doon, ci seen biir ak seen biir askan, ba fàww, ay firnde aki kéemaan yu leen di àrtu.

<sup>47</sup> Gannaaw yeena jaamuwul seen Yàlla Aji Sax ji ci mbégte ak xol bu sedd, keroog ba ngeen barelee lépp, <sup>48</sup> seen noon yi Aji Sax jiy yebal ci seen biir, ñoom ngeen di jaamuji ci biir xiif, ak mar ak rafle, ak gépp ñàkk. Aji Sax jee teg yetu weñ ci seen ndodd, ba sànk leen. <sup>49</sup> Aji Sax jee jógloo ci seen kaw, xeet wu sore, ñu bàyyikoo ca cati àddina, dikk ne milib nig jaxaay, te dégguleen aw làkkam, <sup>50</sup> xeet wu ñàng kanam te rusuñu mag, yèremuñu gone. <sup>51</sup> Ñooy yàpp seenug jur, lekk seen gàncax, ba ngeen raaf. Duñu leen wacce dara; du pepp, du biiñ, dug diw, du doomu jur gu gudd ak gu gàtt, ba ngeen far sànk. <sup>52</sup> Dees na leen gawe ci seen dëkk yépp, ba seen tata yu kawe te dàbbliku, ya ngeen yaakaaron ci seen réew mépp, màbb. Dees na leen gawe seen dëkk yépp, ci mboolem réew, mi leen seen Yàlla Aji Sax ji jox. <sup>53</sup> Dingen mujj lekk seen meññeefum njurukaay, seen suuxu doom yu góor ak yu jigéen, yi leen seen Yàlla Aji Sax ji may, ndax gaw ba, ak tanc bu leen seeni noon tanc. <sup>54</sup> Góor gi gëna lewet ci yeen te xay lool dina xeelu mbokkam, xeelu jabar ju muy noyyee, ak ndesu doomam ju mu dese, <sup>55</sup> ngir baña sédd kenn ci ñoom ci yàppu doomam ya muy lekk, ndax du dese dara

ca biir gaw ba, ak tanc ba leen seeni noon tanc, ci seen dëkk yépp. <sup>56</sup> Jigéen ju gëna lewet te xay ci yeen, ba néegula teg ndëggul tãnkam ci suuf ndax xayteem ak lewetaayam, dina xeelu jëkkëram ju muy noyyee, ak doomam ju góor ak ju jigéen. <sup>57</sup> Day fekk mu namma lekk ci kumpa doom ju mu doora wasin, boole kook ànd ba, ndax lépp ay ñàkk ca biir gaw ba ak tanc, ba leen seeni noon tanc ca seeni dëkk.

<sup>58</sup> Su ngeen sàmmoowula jëfe mboolem kàdduy yoon wii binde ci téere bii, ngir wormaal boroom tur wu màgg wii te raglu, seen Yàlla Aji Sax ji, <sup>59</sup> su boobaa Aji Sax ji dina réyal seeni duma, ak seen dumay askan, duma yu mag te yàgg, ak wopp yu aay te ës. <sup>60</sup> Mooy délloosi fi seen kaw, mboolem jàngoroy Misra yu ngeen ragaloon, ñu taq leen. <sup>61</sup> Te it mboolem wopp ak mboolem mbugal mu bindewul ci téereb yoon wii, Aji Sax jee leen koy yen, ba ngeen sànk. <sup>62</sup> Nit ñu néew ngeen di dese, te bare woon ni biddiwi asamaan, ndax ñàkka déggal seen Yàlla Aji Sax ji. <sup>63</sup> Su ko defee noonee Aji Sax ji daan bége di leen baaxe ak a yokk, noonu la Aji Sax jiy bége di leen sànk ak a fàkkas, te dees na leen déjjatee ca réew ma ngeen jëm, ngir nanguji ko. <sup>64</sup> Aji Sax jee leen di wasaare ci biir mboolem xeeti àddina, cat ba cat, ngeen di fa jaamu yeneen yàlla yu ngeen xamuloon, du yeen du seeni maam, yàllay bant ak doj. <sup>65</sup> Ca biir xeet yooyu nag, dungeen fa astandikoo, dungeen fa am sax fu ngeen noppale seen téstën. Aji Sax jee leen fay teg fit wu rëcc, ak gët yu giim, ak xol bu jeex. <sup>66</sup> Seen bakkan ay nekk ci xott, ngeen dëkke tiitaangey guddi ak bëccëg, te seen ëllëg dootu leen wóor. <sup>67</sup> Ag suba ngeen ne: «Éy waay, bu doon ngoonati.» Bu ngoonee ngeen ne: «Éy waay, bu doon subaati!», ndax tiitaange lu ngeen di tiit, ak li ngeen di teg seeni gët. <sup>68</sup> Aji Sax jee leen di yeb ciy gaal, delloo leen Misra, yoon wu ma leen noon dungeen ko gisati, ngeen di fa jaay seen bopp seeni noon, ngir doon seen jaam yu góor ak yu jigéen, te kenn du leen jënd.

### *Kóllëre gi yeeslu na*

<sup>69</sup> Lii mooy sàrti kóllëre, gi Aji Sax ji santoon Musaa ngir mu fasoo ko ak bànni Israyil, ca réewum Mowab, te bokkewul ak kóllëre ga mu fasoo woon ak ñoom ca tundu Oreb.

## 29

<sup>1</sup> Ba mu ko defee Musaa woolu Israyil gépp. Mu ne leen:

Yeena gis mboolem la Aji Sax ji def, ngeen teg ci seen bët, ca réewum Misra, ci kaw Firawna ak dagam ñépp, ak réewam mépp. <sup>2</sup> Nattu yu mag yooyu, ak firnde yeek kéemaan yu réy yooyu, yeena ci teg seen bët, <sup>3</sup> te taxul Aji Sax ji may leen xel mu ngeen ràññee, ak gët yu ngeen gise, ak nopp yu ngeen dégge, booba ba sunu jonni yàllay tey! <sup>4</sup> Aji Sax ji nee: «Maa leen jüite ñeent fukki at ca màndiñ ma, seeni yére ràppul, seenu dàll ràppul. <sup>5</sup> Mburu, lekkuleen ko, biiñ mbaa geneen naan gu diis, naanuleen ko. Maa leen leel, ngir ngeen xam ne man maay seen Yàlla Aji Sax ji.» <sup>6</sup> Ba ngeen agsee ci bérab bii, Siwon buurub Esbon dikk, ànd ak Og buuru Basan, dikk dajeeek nun, ngir song nu xare, nu duma leen. <sup>7</sup> Nu nangu seenum réew, sédd ko Rubeneen ñi, ak Gàddeen ñi, ak genn-wàllu giirug Manaseen ñi. <sup>8</sup> Sàmmleen nag sàrti kóllëre gii, di ko jëfe ndax yàlla ngeen baaxle ci mboolem lu ngeen def.

### *Buleen caaxaane kóllëreg Aji Sax ji*

<sup>9</sup> Yeena ngii tey, taxaw jonn, yeen ñépp fi seen kanam Yàlla Aji Sax ji, seen njiiti giir, ak seeni mag ak seeni kàngam; mboolem góori Israyil, <sup>10</sup> ak seeni tuut-tànk, ak seeni jabar, akub doxandéem ci seenub dal, seen gorkatub matt, ba ci seenub rootkat. <sup>11</sup> Yeena ngi tàbbi ci seen biir kóllëreg Yàlla Aji Sax ji, ak ci ngiñam, kóllëre gi seen Yàlla Aji Sax ji fasoo ak yeen bésub tey, <sup>12</sup> ngir def leen bésub tey, askan wi mu ñoñoo; moom ci boppam mu doon seen Yàlla, na mu leen ko waxe woon, na mu ko giñale woon seeni maam, Ibraayma ak Isaaxa ak Yanqóoba. <sup>13</sup> Aji Sax ji nee: «Du yeen donñ laay fasool kóllëre gii, ak ngiñ lii.» <sup>14</sup> Yeen ñi taxaw

ci sunu biir tey, fi sunu kanam Yàlla Aji Sax ji, ci ngeen bokk, waaye ñi dikkagul bay bokk ak nun taxaw fii it, ci lañu.

<sup>15</sup> Yeen ci seen bopp, xam ngeen na nu nekke woon réewum Misra ak na nu jaare ca biir xeet ya ngeen jaare seeni réew. <sup>16</sup> Gis ngeen seen jëf ju jomblu, seen kasaray tuur ya: yëfi bant yeek yëfi doj yeek yëfi xalis yeek yëfi wurus yi ñu àndal. <sup>17</sup> Kon nag, muy góor, di jigéen, ak làng gu mu mana bokk, mbaa giir, fexeleen ba kenn ci yeen du walbatiku, dëddu bésub tey, sunu Yàlla Aji Sax ji, di jaamuji yállay xeet yooyu. Lu ko moy ab reen dina fëlle fi seen biir, meññal leen tooke ak wextan. <sup>18</sup> Jomblu mu am ku dégg kàdduy ngiñ lii, tey nax boppam cim xelam, naan: «Jàmm rekk laay am, maa tey të,» ba tax ñax mu wow lakkaale mu tooy. <sup>19</sup> Aji Sax ji du nangoo baal kooku, nde su boobaa, sànjum Aji Sax jee y ànd ak fiiraangeem, tàkk ci kawam, te mboolem alkànde gi ñu bind ci téere bii day këppu ci kawam, te Aji Sax jee far aw turam fu asamaan tiim. <sup>20</sup> Aji Sax jee koy seppee ci mboolem giiri Israyil, ngir sédd ko njekkar, na mu dëppook mboolem alkàndey kóllère gi ñu bind ci téereb yoon wii.

### *Mbugal du jaas*

<sup>21</sup> Maas giy ñëw, seen doom yi leen di wuutuji yeen, ñook doxandéem yi jóge fu sore, bu ñu gisee mbugal yi ci réew mii, ak wopp yi fi Aji Sax ji woppale, <sup>22</sup> tamarax ak xorom, ak lakk gi ci seen réew mépp, ba du lenn lees fay ji, mbaa lu fay jebbi, mbaa genn gàncax gu fay saxe, mbete tastey Sodom, ak Gomor ak Atma ak Ceboyim, dëkk ya Aji Sax ji tas, ca meram ma ak sànjam ma, <sup>23</sup> su boobaa yéefar yépp a naan: «Ana lu waral Aji Sax ji def nii réew mi? Lu waral mii sànj mu tàng te réy?» <sup>24</sup> Ñu ne leen: «Li ko waral mooy, dañoo fecci kóllèrey Aji Sax ji, seen Yállay maam, te mu fasoon ko ak ñoom ba mu leen jëlee réewum Misra. <sup>25</sup> Ñu dem nag, di jaamu yeneen yàlla, di leen sujjóotal, yàlla yu ñu xamuloon, te du lu leen Aji Sax ji féetale. <sup>26</sup> Moo tax sànjum Aji Sax ji tàkkal réew mii, ngir wàcceel

leen mboolem alkànde yi ñu bind ci téere bii. <sup>27</sup> Aji Sax ji nag moo leen déjjatee seenum réew ci biir mer, ak xadar, ak sànj mu réy, ba sànni leen meneen réew, niki bésub tey jii.»

<sup>28</sup> Mbir yi làqu daal, ñeel na sunu Yàlla Aji Sax ji, mbir yi feeñ nag, ñeel nu, nook sunuy doom ba fàww, te nu wara jëfe mboolem kàdduy yoon wii.

## 30

### *Dellusi ci Aji Sax ji, barkeel*

<sup>1</sup> Èllëg nag, su mboolem mbir yooyu dikkee fi seen kaw, muy barke yi, di alkànde yi ma teg fi seen kanam, su boobaa bu ngeen délloosee seen xel foofa mu leen fekk, ca biir mboolem xeet ya leen seen Yàlla Aji Sax ji dàq jëme, <sup>2</sup> ba ngeen dellusi ci seen Yàlla Aji Sax ji, di ko déggal ci mboolem ni ma leen ko sante bésub tey, yeen ak seeni doom, te ngeen defe ko seen léppi xol ak seen léppi bakkan, <sup>3</sup> su boobaa Aji Sax jee yijji seen wërsëg, yërëm leen. Seen Yàlla Aji Sax ji moo leen di dellu dajalee foofa, ci biir mboolem xeet ya mu leen tasaare woon ca seen biir. <sup>4</sup> Su ñu leen toxaloon ba ca cati asamaan sax, foofa la leen seen Yàlla Aji Sax ji di dajalee, te fa la leen di jële. <sup>5</sup> Seen Yàlla Aji Sax jee leen di delloo ca réew ma seen maam moomoon, ngeen moom ko, te moo leen di baaxe, yokk leen ba ngeen gëna bare seeni maam. <sup>6</sup> Su boobaa seen Yàlla Aji Sax jee leen di xarfal xarafu xol, te mooy xarfal xarafu xol, seen askan, ngir ngeen soppe seen Yàlla Aji Sax ji seen léppi xol, ak seen léppi bakkan, ndax ngeen dund. <sup>7</sup> Su loolu amee seen Yàlla Aji Sax jee teg mboolem alkànde yii ma leen limal, ci kaw seeni noon ak seen bañ yi leen tonjal. <sup>8</sup> Yeen nag dingeen walbatiku, di déggal Aji Sax ji, tey jëfe mboolem santaane yi ma leen di dénkk bésub tey jii. <sup>9</sup> Ci kaw loolu seen Yàlla Aji Sax ji mooy baaxal mboolem seenu ñaq, ak seen meññeefum njurukaay, ak seen meññeefum jur, ak seen meññeefum suuf, ngir lu baax. Aji Sax ji mooy bégewaati di leen baaxe na mu daan bégee baaxe seeni maam.

<sup>10</sup> Ndegam déggal ngeen seen Yàlla Aji Sax ji, di topp ay santaaneem, ak dogali yoonam, yi ñu bind ci téereb yoon wii; ndegam yeena walbatikoo seen léppi xol ak seen léppi bakkan, ba dellu ci seen Yàlla Aji Sax ji.

### *Musaa nee déggal Yàlla yomb na*

<sup>11</sup> Santaane bii ma leen di dénk tey nag, jafewul te sorewul ba të leen, <sup>12</sup> Ajewul kaw asamaan ba ngeen naan: «Ana ku nuy yéegali kaw asamaan, àjjil nu ko, dégtal nu ko, ba nu jéfe ko?» <sup>13</sup> Nekkul it wàllaa géej ba ngeen naan: «Ana ku nuy jállil wàllaa géej, jëlil nu ko, dégtal nu ko, ba nu jéfe ko?» <sup>14</sup> Kàddu gi kay jege na leen lool; ci seen gémmiñ ak ci seen biir xol la nekk, ngir ngeen di ko jéfe.

<sup>15</sup> Kon nag gis ngeen ko: Teg naa fi seen kanam, bés niki tey, dund ak mbaax, teg naa fi seen kanam, ndee ak loraange.

<sup>16</sup> Li ma leen sant, man, bés sub tey, mooy ngeen sopp seen Yàlla Aji Sax ji, di topp ay yoonam, di sàmm ay santaaneem, ak dogali yoonam, aki àtteem, ngir ngeen dund te yokku, seen Yàlla Aji Sax ji barkeel leen ca réew ma ngeen jëm, ngir nanguji ko. <sup>17</sup> Waaye su ngeen walbatee seen xol, dégluwuleen, xanaa ngeen lajj, di sujjóotal yeneen yàlla, di leen jaamu, <sup>18</sup> ma wax leen ko bés niki tey, su boobaa yeenay sànkoo sànkoo, te dungeen gudd fan ca réew ma ngeen di jàll dexu Yurdan, jëm fa, ngir nanguji ko.

<sup>19</sup> Woo naa seede asamaan ak suuf ci yeen, bés sub tey: dund ak ndee laa teg fi seen kanam, ak barke ak alkànde. Taamuleen dund ndax ngeen dund, yeen ak seen askan. <sup>20</sup> Soppleen seen Yàlla Aji Sax ji, déggal ko te taq ci moom, ndax moom mooy seenug dund, di seen guddgi-fan ca réew ma mu giñaloon seeni maam Ibraayma ak Isaaxa ak Yanqóoba, ne ñoom la koy jox.

## **Musaa tàggoon na**

### **31**

*(Saar 31—34)*

<sup>1</sup> Gannaaw loolu Musaa dellu na àddu kàddu yii, wax ak bànni Israyil gépp.

<sup>2</sup> Mu ne leen: «Maa ngi ci sama téeméeri

at ak ñaar fukk, tey. Manatumaajiite, te it Aji Sax ji moo ma wax ne ma: “Doo jàll dexu Yurdan gii.” <sup>3</sup> Seen Yàlla Aji Sax ji ci boppam moo leen di jiite jàll. Mooy fàkkas xeet yooyu fi seen kanam, ngeen nangu seenum réew. Yosuwe moo leen di jiite jàll, na ko Aji Sax ji waxe woon. <sup>4</sup> Aji Sax ji moo leen di def na mu defoon Siwon ak Og, buuri Amoreen ña, ak seenum réew, fàkkas leen. <sup>5</sup> Aji Sax jee leen di joxe fi seen kanam, ngeen def leen mboolem li ma leen santoon. <sup>6</sup> Dégèrluleen nag te am fit. Buleen tiit, buleen yox-yoxi ndax ñoom, ngir seen Yàlla Aji Sax ji mooy ànd ak yeen. Du leen ba, du leen wacc mukk.»

<sup>7</sup> Ba loolu amee Musaa woolu Yosuwe, wax ak moom, Israyil gépp teg ci seen bët. Mu ne ko: «Dégèrlul te am fit, ndax yaw yaay ànd ak mbooloo mii ca réew ma Aji Sax ji giñaloon seeni maam, ne ñoom la koy jox. Yaw it yaa leen koy sédde. <sup>8</sup> Aji Sax ji nag mooy dox, jiitu la. Moom mooy nekk ak yaw. Du la ba, du la wacc mukk. Bul tiit, bul yoqi.»

<sup>9</sup> Musaa moo bind kàddug yoon wii, dénk ko doomi Lewi yu góor, sarxalkat yay gàddu gaalu kóllérey Aji Sax ji, ñook magi Israyil ñépp. <sup>10</sup> Musaa sant leen, ne leen: «Njeexital juróom ñaareelu at mu nekk, àppook atum njéggalug bor, ci diiru màggalu Mbaar yi, <sup>11</sup> bu Israyil gépp teewsee fa seen kanam Yàlla Aji Sax ji, fa bérab ba muy taamuji, nangeen jàng kàdduy yoon wii fi kanam Israyil gépp, ñuy dégg. <sup>12</sup> Dangeen di dajale mbooloo mi, góor ñi ak jigéen ñi ak tuut-tànk yi, ba ci doxandéem bu nekk ci seen biir dëkk, ndax ñu déglu, ba tàggatu ci ragal seen Yàlla Aji Sax ji, di sàmmoo jéfe mboolem kàdduy yoon wii. <sup>13</sup> Su ko defee seen doom yi xamul dinañu ci dégg, ba tàggatu ci ragal seen Yàlla Aji Sax ji, mboolem fan ya ngeen di dund ca réew, ma ngeen jàll dexu Yurdan, jëm fa, ngir nanguji ko.»

<sup>14</sup> Ba loolu wéyee Aji Sax ji ne Musaa: «Ma ne, sa bés sub dee ngi jegesi. Wool Yosuwe, te ngeen teewsi fi xaymab ndaje mi, ma yeb ko.» Musaa dem, ànd



ak Yosuwe, ñu teewi fa xaymab ndaje ma. <sup>15</sup> Aji Sax ji nag feeñ ca xayma ba, ci biir taxaaru niir, taxaaru niir wa taxaw fa bunt xayma ba. <sup>16</sup> Aji Sax ji ne Musaa: «Yaa ngi nii di tëddi fa say maam. Mbooloo mii nag dinañu tàmbali di gànctuy topp yeneen yàllay doxandéem yu waa réew, ma ñu jëm ca seen biir. Dinañu ma wacc, fecci sama kóllère gi ma fasoon ak ñoom, <sup>17</sup> te samam sànj dina tàkk ci seen kaw bésub keroog. Maa leen di wacc, làq leen sama kanam, te kon dees na leen lekk. Musiba yu bare aki njàqare dina leen dikkal. Bésub keroog ñoo naan: «Xanaa sunu Yàllaa nekkul ci sunu biir kay, ba tax musiba yii dikkal nu!» <sup>18</sup> Man nag maa leen di làqa làq sama kanam, bésub keroog ndax mboolem mbon gi ñu def, ndax ñoo walbatiku ci yeneen yàlla. <sup>19</sup> Léegi nag bindleen woy wii ma leen di dégtal, te yaw Musaa nga jàngal ko bànni Israyil. Woyloo leen ko, ndax woy wii di sama seede ak bànni Israyil. <sup>20</sup> Maa leen di yóbbu déy ca réew ma ma giñaloon seeni maam, fa meew maak lem ja tuuroo, ñu lekk ba regg, yaflu, daldi walbatiku ci yeneen yàlla, di leen jaamu, xarab ma, fecci sama kóllèreek ñoom. <sup>21</sup> Su ko defee bu leen musiba yu bare dikkalee aki njàqare, woy wii mooy biral kàddug seede fi seen kanam, ndax su boobaa xel du ko faaye, ba mu réer seenu askan. Ndax kat xam naa seen mébét mi ñuy rabat, te yóbbooguma leen sax ca réew ma ma leen giñaloon.» <sup>22</sup> Ba loolu amee Musaa bind woy woowu bésub keroog, daldi koy jàngal bànni Israyil.

<sup>23</sup> Aji Sax ji nag yeb Yosuwe doomu Nuun ne ko: «Dégèrlul te am fit, ndax yaw yaay yóbbu bànni Israyil ca réew ma ma giñoon, te man ci sama bopp maay nekk ak yaw.»

<sup>24</sup> Ba Musaa bindee kàdduy yoon woowu cib téere ba mu mat, <sup>25</sup> dafa yeb Leween ñiy gàddu gaal gi àlluway kóllèrey Aji Sax ji dence, ne leen: <sup>26</sup> «Jël-leen téereb yoon wii, ngeen teg ko ci seen wetu gaalu kóllèrey Yàlla Aji Sax

ji, mu doon fa ab seede, ngir àtte leen. <sup>27</sup> Ndax maa xam seen jikkoy fippu, ak seenug dègèr bopp. Seetleen, ndegam bi may dundagum tey ci seen biir ngeen di fippu ci kaw Aji Sax ji, astamaak gannaaw bu ma deeyee. <sup>28</sup> Wool-leen ma seen magi giir yépp, ak seeni kàngam, ma wax kàddu yii, ñuy dégg, ba ma seedeloo asamaan ak suuf, ci seen kaw, ñoom. <sup>29</sup> Xam naa ne gannaaw bu ma deeyee, dingeen defa def ag yàqute, dingeen teggi yoon wi ma leen jaarloo woon, te musibaa leen di mujj dikkal, ndax yeenay def jëf ju bon ju Aji Sax ji ñaawlu, ba merloo ko ndax seeni jëf.» <sup>30</sup> Ba mu ko defee Musaa jàng kàdduy woy wii ba mu mat, ndajem Israyil ma mépp di dégg.

## 32

### *Musaa woy na kóllèreg Aji Sax ji*

<sup>1</sup> Yeen asamaan, teewluleen, ma wax, Yaw suuf, déglul sama kàddu yii.

<sup>2</sup> Na samam njàngle sóob nib taw, samay kàddu rogalaat nib lay, ba tuurul am ñax, baawaanal gàncax.

<sup>3</sup> Turu Aji Sax ji déy laay tudd, seedeleen sunu mäggaayu Yàlla.

<sup>4</sup> Kee di cès-laay, te mati jëf, wépp yoonam di njub.

Yàlla ju am kóllère, mucc njubadi, te njekk ak njub mooy boroom.

<sup>5</sup> Njabootam ñoo def ug yàqute ci kawam, ba dootuñuy doomam ndax seeni sikk. Ndaw maas gu dèng te njublan!

<sup>6</sup> Aji Sax ji lañuy feye lii? Ndaw xeet wu dofe te ñàkk xel! Mooy seen baay, bind leen, sàkk leen, samp leen.

<sup>7</sup> Fàttlikuleen jant ya jèkkoon, baleen xel maasi maas ya woon. Laajleen seeni baay, ñu xamal leen; ak seen mag ñi, ñu wax leen.

<sup>8</sup> Ba Aji Kawe ji séddee xeet yi seeni suuf, tasaare doom aadama yi ci àddina, moo àppal xeet yi seen kemi réew, na mu dèppook limeefu goney\* Yàlla yi.

\* 32:8 32.8 Mooy ndaw yi bokk ci péncum Yàlla.

9 Céru Aji Sax ji moo di ñoñam,  
askanu Yanqóoba woowooy wàllam.

10 Moo leen fekk réewum màndin,  
fu ne wëyën, ubaleeki sab,  
mu feg leen, topptoo leen, sàmm leen,  
ni bu ñu doon peru bētu boppam.

11 Moo mel ni jaxaay juy naawtal am  
tostanam,  
daayaarl, tiim leen,  
tàllali laafam, aw leen,  
teg ciw dunqam, boot leen.

12 Aji Sax ji donj a leen wommat,  
du yàllay jaambur ju ko ci fekk.

13 Moo leen waral kawtey réew ma,  
ñuy xontoo meñneefum àll bi,  
mu di leen nàmpale lem ju walew doj,  
ak diw gu balle xeer wu ne seren,

14 boole ca soowum nag ak meewum xar,  
nebbonu mbote, kuuyi diiwaanu Basan  
aki bëy,  
teg ca ngëneeli pepp,  
may leen biiñu reseñ ju xonq curr, ngeen  
naan.

15 Yeen Yesurun†, yeena yaflu, wanjeetu,  
solu yaram, ne faaj, ne fuux,  
fàtte Yàlla mi leen sàkk,  
faaleedi seen cëslaay li leen musal.

16 Ñoo yee firaangeem, ndax ay yàllay  
doxandéem,  
ñoo ko merloo ak seen tuur yu jomblu.

17 Ñoo sarxalal ay rab yu dul Yàlla;  
ay yàlla yu ñu masula xam,  
yu bees yu doora xew,  
yu seeni maam ràñneewuloon.

18 Cëslaay li leen meñ ngeen foñ,  
Yàlla ji leen jur ngeen fàtte.

19 Aji Sax jee gis loolu, gedd,  
ndax mere doomam yooyu, góor ak  
jigéen.

20 Mu ne: «Maa leen di xañ sama kanam,  
ba gis nu ñuy mujje,  
ndax maasug defkati njekkar lañu,  
doom yu ñàkk kóllère.

21 Ñoo ma fiirloo ak yàlla yu dul tus,  
merloo maak seen tuuri neen,  
man it maa leen di fiireloo xeet wu  
tekkiwul dara,  
ci waasow naataxuuna laa leen di merloo.

22 Sawaraa ngay tàkke ca samam sànj,  
di lakke ba ca xóotey njaniiw,  
ba xoyom suuf ak meñneefam,  
ba jafal reeni tund ya.

23 Maay jal ci seen kaw ay musiba,  
maa leen di soqil, ba jeexal samay fitt.

24 Ñooy loof cib xiif, jeex tàkk ndaxi  
jàngoro,  
ak mbas yu metti.

Ay selli rabi àll laay yebal ci seen kaw,  
boole ca danjuru ndox-suuf.

25 Fa biti la leen saamar di xañey doom,  
biir néeg ya, tiitaange luy reye feelu ko,  
buubaale waxambaane akub janq,  
luy nàmp, ak boroom bijjaaw.

26 «Maa noon maa leen di fàkkas,  
ba far dakkal lu leen nit doon fàttlikoo.

27 Waaye reetaani noon laa ci ragal,  
lu ko moy seeni bañ juume ko,  
ba naan: “Sunu njàmbaar a!”  
te waroon ne: “Aji Sax jee def lii lépp!”»

28 Wii xeet wu gàtt xel  
te ñàkk xam-xam!

29 Su ñu muusoon, xalaat ci lii,  
ba xam nu ñuy mujje.

30 Ana nu kenn di dàqe seen junni,  
ñaar di fëxal seen fukki junni,  
te ka ñu yaakaar jaayu leen,  
te Aji Sax ji, laa ne, waccu leen?

31 Yaakaaru noon yi de melul ni sunu  
yaakaar,

te loolu la noon ya àtte.

32 Seen reseñ a nga cosaanoo Sodom,  
ak tóokèri Gomor,  
doom ya di tooke, cëgg ya wex xàtt!

33 Seen biiñ danjuru ninki-nànka la,  
ak tookey ñàngóor bu aay.

34 «Xanaa du loolu laa làq fi sama wet,  
ne ko ràpp fi samay denc?

35 Maay kiy feye, di añale,  
te bu jotee ñu fakkastalu,  
ndax seen bésub toskaree dëgmal,  
dogal ba buur, wutsi leen!»

36 Aji Sax jeey dëggal ñoñam,  
mooy ñeewante ay jaamam,  
bu gisee doole dëddu,  
ba kenn desul, dub jaam, dus gor.

† 32:15 32.15Yesurun: tur wii ak Yanqóoba itam dees na ko wooye Israyil.

<sup>37</sup> Su boobaa da naan: «Ana seen yàlla ya, seen kiirlaay lañu daa làqoo?»

<sup>38</sup> Ñi lekk seen nebboni sarax, naan biiñ bi ñu leen di tuural kay, nañu jóg, boog, xettli leen, di seen ki-iraay!

<sup>39</sup> Kon gisleen ne man la, man donj, kenn du Yàlla ku dul man! Man maay rey, di dundal; di gaañe, di wéral; maay jàpp, te kenn du xettli.

<sup>40</sup> Maay yékkati sama loxo jème asamaan, giñ ne: “Ndegam maay dund ba fàww,

<sup>41</sup> bu ma daasee sama saamar buy melax, ba nàbb ko ci saab loxo, di àtte, maay fey samay digaale, añale samay bañ.

<sup>42</sup> Maay nàndal samay fitt deret, sama saamar di yàppe, deret di nàcce ci ku ñu jam, ak ku ñu jàpp,

tey tuuroo ci boppi kilifay noon yi.”»

<sup>43</sup> Yeen, xeet yi, tàcculeen ñoñam, deretu jaamam ñi lay feyul, pey gu muy fey ay bañam, ba jot suufam ak ñoñam.

### *Déggal Aji Sax ji, dund*

<sup>44</sup> Noonu la Musaa dikke, mook Yosuwe doomu Nuun, ba jaar ci mboolem kàdduy woy wii, mbooloo mi di dégg.

<sup>45</sup> Gannaaw ba Musaa noppee ci jottli Israyil gépp mboolem kàddu yooyu, <sup>46</sup> da ne leen: «Defleen seen xel ci mboolem kàddu yi ma leen di artoo man, bésuub tey, te ngeen sant seeni doom ñu sàmmoo jéfe mboolem kàdduy yoon wii. <sup>47</sup> Ndax kat du kàddug neen ci yeen. Mooy seenug dund! Ci gii kàddu ngeen di gudde fan, ca réew ma ngeen di jàll dexu Yurdan jëm fa, ngir nanguji ko.»

### *Aji Sax ji woo na Musaa*

<sup>48</sup> Ci kaw loolu Aji Sax ji wax Musaa bésuub keroog boobee, ne ko: <sup>49</sup> «Doxal yéegi ca tundi Abarim gii, nga jàll ba ca tundu Nebo ca diiwaanu Mowabeen, ba janook Yeriko. Nga séentu nag réewum Kanaan mi may jox bànni Israyil, ñu jagoo. <sup>50</sup> Boo noppee, deel ca kaw tund woowu nga yéeg jëm, ba ñu tërali la ca say bokk, noonee sa mag Aaróona deeye

woon ca kaw tundu Or, ba ñu tërali ko cay bokkam. <sup>51</sup> Li ko waral mooy yeena ma fecci worma ci digg bànni Israyil, ca ndoxi Meriba Kades, ca màndiñu Ciin, ndax yeena wormaalul sama sellnga ci digg bànni Israyil. <sup>52</sup> Kon nag ci biti ngay séentoo réew ma, waaye foofa, doo fa dem. Doo dugg ca réew, ma may jox bànni Israyil.»

## 33

### *Musaa ñaanal na bànni Israyil*

<sup>1</sup> Ñaan gii nag la Musaa, góoru Yàlla ga ñaanaloon bànni Israyil, bala moo nelaw.

<sup>2</sup> Da ne:

Aji Sax ji Sinayi la bawoo, fenkale leen fa Seyir, naajali leen fa tundu Paran, ànd ak ndiiraani ñu sell ña, ndijooram ba indil leen melax.

<sup>3</sup> Yaw kay yaa sopp xeet yi, sa ñu sell ñépp nga téyee say loxo, te ñoo topp say tànk, di taataan say tegtal.

<sup>4</sup> Aw yoon la nu Musaa dénk, muy jagleb péncum Yanqóoba.

<sup>5</sup> Yesurun am na buur, kera ba njiiti askan wa dajee, ba giiri Israyil bokk teew.

<sup>6</sup> Yal na Ruben dund, baña raaf, yàlla buy nitam néew.

<sup>7</sup> Lii nag moo ñeel Yuda. Mu ne: Éy Aji Sax ji déggal yuuxi Yuda te yóbbu ko ciy bokkam. Mooy jàankoontee dooley boppam, waaye yaa koy wallu ciy noonam.

<sup>8</sup> Lewi la wax ne ko: Sa Tumim ak sa Urim, jumtukaayi tegtal ya,

ñeel na góor gay sa wóllère, yaa ko nattoo ca Maasa, joteek moom ca ndoxum Meriba.

<sup>9</sup> Kee ne ndey ak baay:

«Gisuma leen,» ay doomi ndeyam, ràññeewu leen, te doomam, xamu ko. Xanaa di sàmm say wax, di sàmm sa kóllère.

10 Leween ñeey xamal askanu Yanqóoba say àtte,  
di won Israyil gii saw yoon.

Ñooy taal cuuraay fi sa kanam,  
di teg saraxi dóomal ci sab sarxalukaay.

11 Éy Aji Sax ji barkeelal dooley gii giir,  
te bége aw ñaqam.  
Dammal ndiggal ña koy jógal,  
ba ay bañam duñu jógati.

12 Beñamin la wax, ne ko:  
Soppeb Aji Sax jaa ngi,  
keey dëkke xel mu dal fi wetam,  
mu di ko yiir bésóo bés,  
te diggantey waggam la dëkke.

13 Yuusufa la wax, ne ko:  
Yal na barkeb Aji Sax ji ñeel suufam,  
bawoo ca xéewali asamaan, dib lay,  
ak ndox mu lal xóotey suuf,

14 ak xéewali meññeef mu jant ñoral,  
ak tànnéefi gàncax yiy sax ci weeram.

15 Na barke bawoo fa kawtey tundi cosaan  
yu mag ya,  
ak xéewali tundi cosaan yu ndaw ya,

16 ak xéewali suuf ak la ko fees,  
ànd ak yiwu ka màkkaanoo ngarab sa  
doon tàkk,

te wàccandoo ci kaw boppu Yuusufa;  
ak kaanji bokkam yay séddooy Aji Sax ji.

17 Taawub yëkk la, daraja mooy boroom,  
béjjén ya, béjjéni nagu àll la,  
ca lay butteendoo xeet yépp,  
ba ca cati àddina.

Ñooñooy junniy junniy nit ca giirug  
Efrayim,  
ak junni ca giirug Manase.

18 Sabulon la wax ne ko:  
Yaw, Sabulon, bégeel say dem,  
Isaakar yaw, bégeel sa biir xayma.

19 Xeet yi la ñooñu di woo ca tund wa,  
te fa lañuy sarxee sarax yi war,  
koomu géeej, ca lañuy nàmpe,  
booleek kumpay mbell yu làqu biir suuf.

20 Gàdd la wax ne ko:  
Barke ñeel na ku yaatal Gàdd.  
Ni gaynde la goore,  
te mooy xotat pèrèg akum kaan.

21 Moo xool cér ba jëkka lew, jagoo ko,

nde fa la wàllu njiit di xaar boroom.  
Moo fekksi njiiti askan wi,  
moo jëfe njekku Aji Sax ji,  
aki dogalam fi Israyil.

22 Dan la wax ne ko:  
Dan gaynde gu ndaw la,  
mooy tëbe fa diiwaanu Basan.

23 Neftali la wax ne ko:  
Neftalee ne xéew aku yiw,  
biibal barkey Aji Sax ji,  
te sowu ba bëj-saalum lay nangu.

24 Aser la wax ne ko:  
Yal na Aser gëna barkeel ci doom yi,  
ay bokkam baaxe ko,  
tànk yay xuuse ag diw.

25 Weñ ak xànjari la say xomb di doon,  
sa kàttan ànd ak saw fan.

26 Kenn du Yàllay Yesurun!  
Keey war asamaan, wallusi leen,  
war ay niir, ànd ak darajaam.

27 Yàlla ji sax fàww moo dib rawtu,  
pèrègam bi sax dàkk di cëslaay,  
moo la dàqal ab noon  
ne la: «Jekklil!»

28 Israyil a ngi dëkke xel mu dal,  
walu Yanqóoba mee fegu,  
di wale réewum pepp ak biiñ bu bees,  
asamaan it di ko wàcceel ab layam.

29 Ndokklee, Israyil, ana ku mel ni yeen,  
askan wu Aji Sax jiy wallu,  
di seen kiiraay, di seen ndimbal,  
di saamar bi leen di sagal?  
Seeni noon a leen di loxal,  
te yeen, fa seen gannaaw ya ngeen di  
daagoo.

## 34

### *Musaa wuyji na*

1 Ba loolu amee Musaa bàyyikoo jooru  
Mowab, yéegi tundu Nebo, ba ca collu  
tundu Pisga, wa jàkkaarlook Yeriko.  
Aji Sax ji nag won ko mboolem réew  
ma, diiwaanu Galàdd ba diiwaanu Dan,  
2 mboolem diiwaanu Neftali, ak diiwaanu  
Efrayim ak Manase, mboolem diiwaanu  
Yuda, ba ca géeej ga ca sowu, 3 ak wetu  
bëj-saalum, ak xuru Yeriko, dëkku tiir ya,

ba ca Sowar. <sup>4</sup> Aji Sax ji ne ko: «Réew mii laa giñaloon Ibraayma ak Isaaxa ak Yanqóoba, ne leen seen askan laa koy jox. Won naa la ko, ba nga teg ci sa bët, waaye foofa, doo fa teg sa t ànk.»

<sup>5</sup> Musaa, jaamub Aji Sax ji nag dee foofa ca réewum Mowab, na ko Aji Sax ji tudde.

<sup>6</sup> Mu rob ko ca xur wa ca réewum Mowab, fa janook Bet Pewor. Kenn xamul nag fu bàmmeelam nekk ba tey jii.

<sup>7</sup> Musaa amoon na téeméeri at ak ñaar fukk, ba muy faatu, te ay bëtam naqariwul, dooleem jeexul. <sup>8</sup> Bànni Israyil jooy nañu Musaa ca jooru Mowab diiru fanweeri fan, fani dēj ba doora mat. <sup>9</sup> Fekk na Yosuwe doomu Nuun feese xel mu rafet, ndax Musaa moo tegoon ay loxoom ci kawam, bànni Israyil nag déggal ko, di jēfe na ko Aji Sax ji sante woon Musaa.

<sup>10</sup> Ab yonent lukkeekootul ci Israyil, mel ni Musaa, ma Aji Sax ji xejjoo woon ba naan ko jàkk, mu ne ko jàkk, <sup>11</sup> ba ca mboolem firnde yaak kéemaan ya ko Aji Sax ji yebale woon, ngir mu def ko ca biir réewum Misra, ca Firawna ak jawriñam ñépp, ak ca biir réewam mépp, <sup>12</sup> ak itam mboolem doole ju màgg ja Musaa wone, ak jēf ju réy te raglu ja mu def, bànni Israyil gépp teg ci bët.

## Ruut

### *Musiba dikkal na kër Elimeleg*

<sup>1</sup> Ba njiit ya daan àtte faloo ca Israyil\*, jamono jooju dafa amoon xiif ca réew ma. Jenn waay bàyyikoo Betleyem ca diiwaanu Yuda, ànd ak soxnaam ak ñaari doomam yu góor, ñu toxuji ca réewum Mowab†. <sup>2</sup> Waa ja Elimeleg la tuddoon, soxnaam di Nawmi, ñaari doomam yu góor ya di Malon ak Kilyon. Ay Efrateen lañu, cosaano Betleyem ca Yuda. Ñu agsi ca réewum Mowab, daldi sanc foofa.

<sup>3</sup> Gannaaw gi Elimeleg jëkkëri Nawmi faatu, Nawmi des ak ñaari doomam yu góor. <sup>4</sup> Ñooñu mujj jël ay jigéeni Mowab soxna; kenn ka di Orpa, ka ca des di Ruut. Ba ñu nekke foofa lu tollu ci fukki at, <sup>5</sup> ñoom ñaar ñooñu di Malon ak Kilyon faatu ñoom it, jigéen ja ñàkk noonu ñaari doomam ak jëkkëram. Mu des moom kenn.

### *Ruut topp na Nawmi*

<sup>6</sup> Ba loolu amee Nawmi fabu, mook goroom ya, ngir jóge réew ma. Booba fekk na mu dégge ca Mowab ne Aji Sax ji xettli na ñoñam, ba may leen ab dund. <sup>7</sup> Ma ngay jóge fa mu dëkkoon, ànd ak ñaari goroom ya, ñu tegu ca yoon wa, jëm Yuda.

<sup>8</sup> Ci biir loolu mu wax ak ñaari goroom, ne leen: «Demleen kay, ñibbileen, ku nekk sa kër yaay. Yal na leen Aji Sax ji baaxe, na ngeen baaxe woon ñi wuutu, te baaxe ma, man itam. <sup>9</sup> Yal na Aji Sax ji may ku nekk ci yeen jàmm ca kër jëkkër ja muy amaat.» Ci kaw loolu mu foon leen, ñu ne yikkét jooyoo. <sup>10</sup> Ñu ne ko: «Déet, yaw kay lanuy àndal dem ca say boka.»

<sup>11</sup> Mu ne leen: «Ñibbileen ngalla, doom, lu ngeen di ànd ak man doye? Ndax dama leena manatee jural ay jëkkër ci sama biir bii? <sup>12</sup> Ñibbileen rikk doom, demleen, ngir man damay mag, ba wees séy; te su ma ci dese woon yaakaar it, guddig

tey jii sax su ma ci séyoon, jur ciy doom, <sup>13</sup> mbaa dingeen leen mana xaar, ba ñu màgg? Xanaa dungeen toog, baña séy ndax ñoom? Déedéet, doom. Maa leen épp naqar, man mi Aji Sax ji nattoo nii.»

<sup>14</sup> Ñu dellu ne yikkét, di jooyoo. Orpa foon goroom, tàggtook moom, Ruut nag moom langaamu ko rekk. <sup>15</sup> Mu ne ko: «Gis nga sa wuju peccorgo waa ngay ñibbi cay bokkam aki yàllaam. Àndal ak moom ñibbi kay!» <sup>16</sup> Mu ne ko: «Bu ma soññ mukki ci loolu, дума la wacc, дума la dëddu. Foo jëm, fa laa jëm; foo dal, fa laay dal; say bokk di saay bokk; sa Yàlla di sama Yàlla. <sup>17</sup> Foo deeye it, ma deeye fa, ñu denc ma fa. Yal na ma Aji Sax ji teg mbugal mu gëna tar, ndegam lenn lu moy dee tàggale na maak yaw.» <sup>18</sup> Nawmi nag gis ni Ruut dogoo ci ànd ak moom, ba tax soññatu ko. <sup>19</sup> Ba mu ko defee ñu ànd ñoom ñaar, ba àgg Betleyem.

Naka lañu àgg Betleyem, dëkk ba bépp ne kër-kër, ne këpp ndax ñoom. Jigéen ña naa: «Xanaa kii kay du Nawmi?» <sup>20</sup> Mu ne leen: «Buleen ma ne Nawmi (mu firi Boroom mbégte mi), neleen ma Mara (mu firi Boroom naqar wi), ndax Aji Man ji da maa teg naqar wu réya réy. <sup>21</sup> Maa demoon ak loxo yu ne gadd, Aji Sax ji délloosi maak loxoy neen. Kon lu ngeen may wooye Nawmi doye, te Aji Sax ji àtte ma ñàkkal? Ndax kat Aji Man ji ci njàqare la ma tàbbal!»

<sup>22</sup> Noonu la Nawmi jógee Mowab, ñibbsi, ànd ak Ruut, gorob Mowabeenam ba. Ñu agsi Betleyem, fekk ngóobum lors ma di tàmbali.

## 2

### *Ruut gis na ku ko baaxe*

<sup>1</sup> Nawmi nag amoon na wóllërey jëkkëram, di góor gu ñuy wax Bowas, bokk ci langu Elimeleg, di ku am daraja.

<sup>2</sup> Mu am bés Ruut, ndawas Mowab sa, ne Nawmi: «Tee maa dem tool, ndax ma gis boog ku ma laaye biir, ma mana foraatu gub yu des ca gannaawam?» Mu ne ko: «Waaw, demal, doom.» <sup>3</sup> Mu

\* **1:1** 1.1 Booba buur amagul woon ca Israyil. † **1:1** 1.1 réewum Mowab ak réewum Israyil ñoo feggoo woon, waaye seen diggante neexul woon.

dem ca tool ya, topp ñay góob, di foratu. Yàlla-woo-yàlla, tool booba di toolu Bowas ma bokk ak Elimeleg.

<sup>4</sup> Nes tuut Bowas ne jalañ, jóge Betleyem. Mu nuyook ñay góob ne leen: «Jaagéenjéf waay, yal na Aji Sax ji ànd ak yeen.» Ñu fey ko ne ko: «Jaajéf sa wàll, yal na la Aji Sax ji barkeel.» <sup>5</sup> Mu laaj ka jiite ngóob ma, ne ko: «Ndaw sii fu mu bokk?» <sup>6</sup> Mu ne ko: «Mooy waa Mowab, ba Nawmi àndal, jóge Mowab, ñibbsi. <sup>7</sup> Dafa ñaan ñu may ko, mu topp ci ñiy góob, ba saatu ci gub yi ñu rotle. Ci suba la ñew di liggéey ba nēgēni; noppluwul lu moy diir bu gàtt ci mbaar mi.»

<sup>8</sup> Bowas nag ne Ruut: «Doom, ma ne, bul saatuji ci beneen tool bu dul bii. Bul wees fii. Toogal fii ci samay surga yu jigéen. <sup>9</sup> Xoolal bu baax fi xale yu góor yiy góob, te nga topp fa jigéen ñi. Dinaa wax xale yu góor yi ne leen buñu la sonal. Soo maree, demal naan ca njaq ya góor ñi duy.»

<sup>10</sup> Naka la wax loolu, mu sujjóot, dēpp jēem fa suuf, ne ko: «Xanaa su la nexoon de, doo ma nemmiku sax, ndax ab doxandéem laa, waxatuma nga di ma laaye nii biir!» <sup>11</sup> Mu ne ko: «Dégg naa bu baax li nga defal sa goro lépp, te fekk sa jēkkēr faatu, ak ni nga wone gannaaw sa ndey ak sa baay ak sa réewum cosaan, ba ñew dēkksi ci biir xeet woo xamuloon démb ak bēkk-démb. <sup>12</sup> Yal na la Aji Sax ji fey sa jéf. Aji Sax ji Yàllay Israyil, ji nga làqusi ci kiiraayam, yal na la yool, ba mu mat sēkk.»

<sup>13</sup> Ruut ne ko: «Teral nga ma de, sang bi. Yaa ngi may laaye biir, ndaxte dēfal nga ma, wax ma lu seral sama xol, te moonna say surga yu jigéen yi sax a ma gēn.»

<sup>14</sup> Ba añ jotee, Bowas ne Ruut: «Kaay, sàkk ci mburu mi ak ñeex mi.» Mu daldi toog, feggook ñay góob; Bowas may ko mbool, mu lekk ba suur, ba desal.

<sup>15</sup> Naka la jóg, di saatuji, mu sant ay surgaam, ne leen: «Bu doon for ci biir sabaar yi sax, buleen ko ñàkke kersa.

<sup>16</sup> Roccil-leen koo roccil ci takk yi, bàyyi ko mu for, te buleen ko gēdd.»

<sup>17</sup> Ba loolu amee, Ruut di for ba ngoon jot, mu bàcc la mu for ci peppum lors, mu fees saaku bu ndaw. <sup>18</sup> Mu yóbbu ko ba ca dēkk ba, goroom gis la mu for, mu daldi yebbi la desoon ca añam, jox ko. <sup>19</sup> Goro ba ne ko: «Foo fore lii lépp tey? Ban tool nga doon liggéeye sax? Ki la nemmikoo nii de, yal na barkeel!» Ruut nag wax goroom ka mu doon liggéeye toolam, ne ko: «Ka ma doon liggéeye toolam de, Bowas lañu koy wax.»

<sup>20</sup> Nawmi ne Ruut: «Yal na Aji Sax ji barkeel Bowas, moom mi saxoo sàmm ngoram digganteem ak nit, muy dund ak mu dee!» Mu teg ca ne ko: «Kooku ku nu jege la; bokk na ci ñi am sañ-sañu jotaat\* nu.» <sup>21</sup> Ruut ndawas Mowab sa ne: «Moom de da ma ne sax, ma topp ciy surgaam, ba ngóobam mépp daj.» <sup>22</sup> Mu ne ko: «Waaw kay, doom, toppal ci surgay Bowas yu jigéen rekk, bala ñu laa soxore ci beneen tool.» <sup>23</sup> Noonu la Ruut ànde ak surgay Bowas yu jigéen, topp ci ñoom di for, ba keroog ngóobum lors baak bele ba, lépp jeex. Mu toog nag ak goroom.

### 3

#### *Ruut gise na ak Bowas*

<sup>1</sup> Gannaaw gi Nawmi, gorob Ruut ba, dafa wax Ruut ne ko: «Doom, tee ma laa sàkkal fooy ame jàmm, nga féete fa?

<sup>2</sup> Bowas mii nga nekkoon aki surgaam yu jigéen, du mbokk lenqe la? Guddig tey jii kat Bowas dina jériji peppum lors ca dāgga ja. <sup>3</sup> Kon nag sangul, solu ba jekk, xeeñu, dem ca dāgga ja. Bu ko feeñu nag te lekkul, ba naan ba noppi. <sup>4</sup> Bu demee ba tēdd, nanga nemmiku fa mu tēdd. Su ko defee nga àgg ba foofa, muri fa féeteek tànk ya, tēdd. Moom dina la xamal li nga wara def.» <sup>5</sup> Mu ne ko: «Baax na, loolu rekk laay def.»

<sup>6</sup> Ba mu ko defee mu dem ca dāgga ja, daldi def la ko goroom wax lépp. <sup>7</sup> Bowas lekk, naan ba xolam sedd, doora dem

\* **2:20** 2.20 jotaat: bu góor masaana dee te amul doom, mbokkam mi ko gēna jege mooy jēl jabaram, ngir jurat ko ku ko donn. Kooku mooy jotaat suufi mbokkam mi dee, jēnd ko, ngir alal ji des ci biiri bokkam.

tëdd ca peggub jalu pepp ba. Ruut jegesi ndànk, muri fa féeteek tànki yi, tëdd.

<sup>8</sup> Ñu dem ba xaaju guddi, góor gi jekki ne bërét, toog, yem ci ndaw si tëdd fi féeteeki tànkam. <sup>9</sup> Mu ne: «Kii ku mu?» Mu ne: «Man a Ruut, sang bi. Yiire ma sa mbubb, ndax mbokk nga, te sañ nga maa jootaat.»

<sup>10</sup> Mu ne ko: «Yal na la Aji Sax ji barkeel, doom! Jiwati nga bokk gi ngor lu gënatee rafet. Ndax su la neexoon, nga topp ci xale yu góor yi, ñu am ak ñu ñàkk.

<sup>11</sup> Léegi nag neel tekk rekk, doom. Loolu nga ñaan lépp, dinaa la ko defal, ndax waa dëkk bi bépp xam nañu ne jigéen ju jambaare nga. <sup>12</sup> Da di nag, dëgg la sax, mbokk laa mu la mana jootaat, waaye meneen mbokk mu la mana jootaat a ngi fi, te moo ma ci gëna yey. <sup>13</sup> Dangay fanaan fii. Bu ëllëgee, su fekkee ne nangu naa def warugaram ci yaw, na ko def, baax na. Su nanguwul nag, dogu naa ci Aji Sax ji, Kiy Dund, man dinaa ko def. Tëddal fii rekk, ba ëllëg.»

<sup>14</sup> Ba loolu amee mu tëdd fa féeteek tànki Bowas, ba njël jot, mu jóg balaa waxtu wu nit mana xàmmi moroomam. Booba Bowas bugguloo ñu xam ne ndaw si ñëw na ci dägga ji. <sup>15</sup> Mu ne ko: «Tállalal malaan mi nga sàngoo, te téye ko bu baax.» Mu tállal malaan ma, mu sotti ca juróom benni natti peppum lors, yen ko ko, doora dem ca dëkk ba\*.

<sup>16</sup> Naka la àgg ca goroom Nawmi, mu ne ko: «Doom, koo doon nag?!» Ruut nettali ko na góor gi def ak moom yépp, <sup>17</sup> daldi cay teg ne ko: «Juróom benni natti lors yii, moo ma ko may, ne ma дума dellu loxoy neen ca sama goro.» <sup>18</sup> Mu ne ko: «Yaw kay neel tekk fii rekk, doom, ba xam nu mbir miy mujje. Waa jii du toog te topptoowul mbir miy tey, ba mu leer.»

## 4

### *Bowas lal na pexe*

\* **3:15** 3.15 Manees naa dëgge nii itam: yen ko ko, mu ñibbi ca dëkk ba. \* **4:1** 4.1 ca bunt dëkk ba booy duggsi, fa la pénc ma nekkoon. † **4:6** 4.6 Su waa ji defoon warugaru jootaatam, ba denc Ruut, kon moom mooy yor Nawmi ak Ruut ak doom ju ñu am ci séy bi, te it ay doomi boppam duñu donn suufas Elimeleg. Doom ji muy am ak Ruut moo koy donn. Loolu moo doon aaday bànni Israyil.

<sup>1</sup> Ci biir loolu Bowas dem ba ca bunt dëkk ba\*, toog fa. Noonu rekk mbokk ma mu waxoon ne su dee jootaat, moo ko ci gëna yey, daldi fay jaare. Mu woo ko ne ko: «Diwoo, kaay fii, toog tuuti.» Mu dikk, toog. <sup>2</sup> Bowas woo fukki magi dëkk ba, ne leen: «Toogleen.» Ñu toog.

<sup>3</sup> Mu wax ak mbokk ma yeyoo sañ-sañu jootaat ba, ne ko: «Ab làccu suuf bu sunu mbokk Elimeleg moomoon la, Nawmi di ko jaay. Mooy ka jóge réewum Mowab, ñibbsi. <sup>4</sup> Man nag dama noon war naa la koo yegge, te laaj la ndax danga koy jënd ci kanam magi dëkk bi ak ñi fi toog. Soo béggee def sa warugaru jootaat, jëndal. Soo buggul, wax ma, ma xam. Ndax kat kenn gënu la cee yey, te maa topp ci yaw.» Mu ne ko: «Damay jënd kay!»

<sup>5</sup> Mu ne ko: «Áa bés boo jëndee suuf si ci Nawmi nag, yaay denc Ruut ndawas Mowabeen, sa doon soxnas ndem-si-yàlla si, ndax nga mana lawal askanam, ba du fey, boole ci sàmmal leen seen alal.»

<sup>6</sup> Mu ne: «Kon de дума mana def sama warugar, ndax sama alal a ciy yàqoo†. Fabal boog sama sañ-sañu jootaat, ndax дума ko mana jariño.»

<sup>7</sup> Booba Israyil, jamono yu jëkk yooya, mbirum njëndum jootaat mbaa ag weccoo, la ñu ko baaxoo dogale ci diggante nit ak moroom ma, nii la: kii day summi dàllam, jox kee. Noonu lees daan yoonale ag jëflante ca Israyil. <sup>8</sup> Moo tax ba boroom sañ-sañu jootaat ba waxee Bowas, ne ko: «Jënd ko yaw,» dafa daldi summi dàllam, dogale ko mbir ma.

<sup>9</sup> Ba mu ko defee Bowas wax ak mag ña ak ñeneen ña ñépp, ne leen: «Seedeleen bésuub tey ne jënd naa ci Nawmi mboolem alalu Elimeleg ak mboolem alalu Kilyon ak Malon, <sup>10</sup> boole ci Ruut, ndawas Mowab, sa doon soxnas Malon, muy sama soxna. Su ko defee ma mana lawal askanam, ba du fey, boole ci sàmmal leen seen alal, ba turu Elimeleg du réer ci biiri



bokkam te du raaf ci limeefu dëkk bi. Yeena ko seede bésub tey jii.»

<sup>11</sup> Waa pénc ma mépp ak mag ña nag ne ko: «Noo ko seede. Yal na Aji Sax ji def ndaw siy séysi sa kër, mel ni Rasel ak Leya†, ñoom ñaar ñi giir waa kër Israyil gépp. Yal nanga tekki ci digg Efrata te amu tur ci Betleyem. <sup>12</sup> Njaboot gu la Aji Sax jiy may ci ndaw sii, yal na ñu lawal saw askan, ba mu mel ni askanu Peres, ma Tamar am ak Yuda.»

*Yàlla barkeel na séy ba*

<sup>13</sup> Ba mu ko defee Bowas jël Ruut. Gannaaw gi mu dëkkoo ko; Aji Sax ji may ko mu ëmb, ba mujj am doom ju góor. <sup>14</sup> Jigéen ña ne Nawmi: «Sant Aji Sax ji, moom mi la xañul mbokk mu la jootaat nii tey! Yal na xale bi di ku amu tur ci Israyil gépp. <sup>15</sup> Dina la leqli, dimbali la keroog ba ngay mag, ndax sa goro bi la bëgg te dàqal la juróom ñaari doom yu góor, moo ko jur.»

<sup>16</sup> Nawmi nag fab xale bi, taf ko ci dënnam. Gannaaw loolu moo ko doon topptoo. <sup>17</sup> Jigéeni gox ba nag naa: «Waay waay Nawmi am na doom ju góor!» Ñu tudde xale bi Obedd. Obedd moo jur Yese, miy baayu Daawuda.

<sup>18</sup> Kon lii mooy askanu Peres§ ci wàllu geño: Peres moo jur Ebron, <sup>19</sup> Ebron, Ram; Ram, Aminadab; <sup>20</sup> Aminadab, Nason; Nason, Salma; <sup>21</sup> Salma, Bowas; Bowas, Obedd; <sup>22</sup> Obedd, Yese; Yese, Daawuda.

† 4:11 4.11 Rasel ak Leya ñooy doon soxnay Yanqóoba.

§ 4:18 4.18 Peres taawu Yuda la, di sētu Yanqóoba.

## Samiyel di téere bu jëkk bi Lii mooy jaar-jaari Samiyel

### *Aana ñaan na doom*

<sup>1</sup> Amoon na genn góoru Cuufeen gu dëkkoon Raama\*, ga ca tundi Efrayim. Ñu di ko wax Elkana, baayam di Yerowam. Yerowam, Eliyu mooy baayam; Eliyu, Towu mooy baayam; Towu, Cuuf mu Efrayim mooy baayam. <sup>2</sup> Elkana amoon na ñaari soxna. Kenn ka di Aana, ka ca des di Penina. Penina amoon na ay doom, waaye Aana amul woon doom. <sup>3</sup> At mu nekkaan Elkana day jóge dëkkam, dem Silo, maggali fa Aji Sax ji Boroom gàngoori xare yi, sarxalal ko ca Silo. Foofa la Ofni ak Fineyas, ñaari doomi Eli yu góor ya doonoon sarxalkati Aji Sax ji. <sup>4</sup> Bés bu Elkana daan sarxal, day jox soxnaam Penina, mook doomam yépp, góor ak jigéen, ci yàppu sarax si. <sup>5</sup> Waaye Aana la daan beral loxo ca sarax sa, ndax cofeelam ci moom, doonte Aji Sax ji mayul Aana doom. <sup>6</sup> Wujjam nag dëkke koo ñaawal, ngir naqaral ko ndax la ko Aji Sax ji mayul doom. <sup>7</sup> At mu nekkaan noonu la. Saa yu Aana demee kër Aji Sax ji, noonu la koy ñaawale, ba muy jooy, du nangoo lekk. <sup>8</sup> Elkana jëkkër ja di ko wax ne ko: «Aana, looy jooy, ak lu la tee lekk? Ñàkk doom a la tax ne yogg nii? Maa ngii! Dama laa gënalul fukki doom yu góor?»

<sup>9</sup> Mu am bés, gannaaw ba ñu lekkee ba naan ca seen saraxu cant, foofa ca Silo, Aana jóg. Booba Eli sarxalkat baa nga ca toogu ba, feggook jënu buntu jaamookaayu Aji Sax ji. <sup>10</sup> Aana dem ba foofa, ànd ak naqaru xolam, di ñaan ci Aji Sax ji, tey jooy jooy yu metti. <sup>11</sup> Ci biir loolu mu xas aw xas, daldi ne: «Éy Aji Sax ji Boroom gàngoori xare yi, Sang bi, soo nemmiku woon ba nemmiku njàqare jii ma nekke, bàyyi ma xel, bañ maa fàtte,

ba may ma doom ju góor! Kon déy, maa ko sédde Aji Sax ji, giiru dundam gépp, saatus watukaay du jaar ci boppam mukki!†.»

<sup>12</sup> Ñaanu Aana ca Aji Sax ji nag yàgg, Eli di ko seetlu. <sup>13</sup> Booba Aanaa ngay ñaan ca xelam, gëmmiñ ga rekk ay yèngu, waaye déggeesul baatam. Eli foog ne dafa mândi, <sup>14</sup> ne ko: «Foo àppal sa mândite mi? Doxal, giifali sa ñoll wi!»

<sup>15</sup> Aana ne ko: «Du loolu de, sang bi. Dama di jigéen ju ànd ak naqaru xol, waaye du biiñ, du leneen luy mândee lu ma naan. Dama doon diis Aji Sax ji sama tiisu xol. <sup>16</sup> Bu ma jappe jigéen ju bon, sang bi. Bare naqar aku tiis a ma tax di ñaan nii, booba ba léegi.» <sup>17</sup> Eli ne ko: «Kon nag demal ak jamm, yal na la Yállay Israyil nangul li nga koy ñaan.» <sup>18</sup> Aana ne ko: «Amiin, sang bi, yal nanga ma yàgga yéwéne.» Ba mu ko defee Aana dem yoonam, doora mana lekk, kanam ga leer.

<sup>19</sup> Ba loolu amee Elkana ak njabootam teela xëy ca èllëg sa. Ñu maggal Aji Sax ji, ba noppi bàyyikoo fa, ñibbi seen kër ca Raama.

### *Lu jëm ci juddub Samiyel ak ngoneem*

Gannaaw gi Elkana dëkkoo soxnaam Aana, Aji Sax ji nag bàyyi Aana xel. <sup>20</sup> Aana mujj ëmb ca ndeetel at ma. Gannaaw gi mu am doom ju góor, tudde ko Samiyel (mu firi Yàlla dégg na), ndax da ne: «Maa ko ñaan Aji Sax ji.»

<sup>21</sup> Gannaaw gi Elkana ànd ak njabootam gépp dellu Silo, ngir defali Aji Sax ji saraxu at ma, boole ca sarax bu mu xasoon ne dina ko def. <sup>22</sup> Waaye Aana demul, ndax dafa wax jëkkëram ne ko: «Gannaaw bu xale bi feree laa koy yóbbu, sédde ko Aji Sax ji, mu des foofa benn yoon.» <sup>23</sup> Elkana, jëkkër ja, ne ko: «Kon baax na, defal noonu nga bëgg. Toogal fii yaak moom, ba feral ko ba noppi. Yal na Aji Sax ji sottal la mu waxoon rekk.» Ndaw sa nag des ca Raama, di nàmpal doomam, ba feral ko.

\* **1:1** 1.1 Raama mooy Raamatayim ba tey. † **1:11** 1.11 Njañ lu ñu dul wat, moom lañu daan màndargaale nit ku ñu sédde Aji Sax ji. ‡ **1:24** 1.24 ñetti yëkk: am na ñu naan yëkku ñetti at.

<sup>24</sup> Naka la feral xale bi, ànd ak moom, muy lu tuut, mu yóbbu ko ca kër Aji Sax ji ca Silo. Mu yóbbaaale ñetti yëkk†, ak benn efab sunguf, yemook fukki kilo, ak mbuusu biiñ. <sup>25</sup> Ba mu ko defee ñu rendi yëkk wi, ba noppi indi xale bi ci Eli. <sup>26</sup> Aana ne ko: «Sang bi, baal ma de waaye giñ naa, nga fekke, maay ndaw si taxawoon fii ci sa wet, di ñaan ci Aji Sax ji. <sup>27</sup> Xale bii moo ma taxoon di ñaan, te Aji Sax ji defal na ma sama dagaan. <sup>28</sup> Léegi nag man maa ko sédd Aji Sax ji: giiru dundam lees ko sédd Aji Sax ji.» Ba loolu amee ñu sujjóotal Aji Sax ji foofa.

## 2

### *Aana sant na*

<sup>1</sup> Ci kaw loolu Aana ñaan ne: «Sama xol a ngi bége Aji Sax ji, ci Aji Sax ji laa ame doole. Maa am tontal noon yi, nde maa bânneexoo sag wall.

<sup>2</sup> «Kenn sellul ni Aji Sax ji, amuloo dend moos, cëslaay melul ni sunu Yàlla!

<sup>3</sup> «Buleen ñalñaleeti, di damook a damooti, bu reewande génne seen gémmin, Aji Sax jeey Yàlla ji xam lépp, te mooy natt jëfi nit.

<sup>4</sup> Fittu jàmbaar damm, néew-doole yi sol kàttan.

<sup>5</sup> Ña reggoon, bindu, di dunde, ña xiifoon, noppee liggéey. Jigéen ju njur tẽ woon jur juróom yaar, ku jur góori góor jeex tàkk.

<sup>6</sup> «Aji Sax jeey rey, di dundal, mooy wàcce jaam njaniw, génnee ko ca.

<sup>7</sup> Aji Sax jeey xañe, di maye, di detteel, di kaweel.

<sup>8</sup> Mooy yékkatee ku ndóol ci suuf, jële ku ñàkk ci mbuubit, boole leen dëj ca garmi ya, sédde leen jataayu teraanga.

«Aji Sax jee moom kenuy suuf,

samp ci àddina.

<sup>9</sup> Mooy sàmm jéegoy wóllèreem, ku bon sànkoo biir lëndëm, nde doole mayewul ndam.

<sup>10</sup> Aji Sax ji, ñi koy xeex ay rajaxoo, kaw asamaan lay dënoo ci seen kaw. Mooy mbugal àddina, ba mu daj, di kàttanal buuru ñoñam, di dooleel ki mu fal.»

<sup>11</sup> Gannaaw ba loolu wéyee Elkana ñibbi kërám ca Raama.

Ngóor sa moom, des ca Silo, di liggéeyal Aji Sax ji, fa kanam Eli sarxalkat ba.

### *Lu jëm ci doomi Eli*

<sup>12</sup> Doomi Eli yu góor ya nag def nit ñu bon ñu faalewul Aji Sax ji.

<sup>13</sup> Lii moo di li sarxalkat yooyu tàmmoonaa def ak askan wi. Saa yu nit indi waan juru sarax, bu ñuy togg yàpp wi, surgab sarxalkat bi day ñàbb roqub ñetti càq, dikk, <sup>14</sup> capp ko ci biir, muy ndab lu tell, mbaa kawdir, mbaa cin, mbaa mbana— lu roq ba génne rekk, mu jël, sarxalkat bi féetewoo. Noonu lañu daan def ak mboolem niti bànni Israyil, ña daan ñëw foofa ca Silo. <sup>15</sup> Rax ci dolli bala ñoo lakk nebbon bi\* sax, surgab sarxalkat bi day dikk, ne nit kiy sarxal: «Joxal sarxalkat bi ci yàpp wi, mu saaf. Du nangu nga jox ko yàpp wu ñor, yàpp wu xonq rekk.» <sup>16</sup> Su ko nit ki nee: «Xanaa dees na jékka lakk nebbon bi ba mu jeex, nga doora sàkk lu la neex?» Mu ne ko: «Mukk! Léegi nga ma ciy jox, lu ko moy doole laa koy jële.» <sup>17</sup> Bàkkaaruu doomi Eli yi réyoon na lool fi kanam Aji Sax ji, ndax dañu daan teddadil saraxu Aji Sax ji.

<sup>18</sup> Ci biir loolu ngóor sa Samiyel moom, ma ngay liggéeyal Aji Sax ji, sol xar-sànnim lëewam.

### *Lu jëm ci waa kër Samiyel*

<sup>19</sup> Mbubb mu ndaw nag la ko yaayam daan ràbbal, yóbbul ko at mu jotaan, buy ànd ak boroom kërám sarxali saraxu at ma. <sup>20</sup> Ci biir loolu Eli daan na ñaanal Elkana ak soxnaam, bala ñoo ñibbi, ne: «Yal na la Aji Sax ji may kuutaay ak sa soxna sii, ñu wuutu ki mu sédd Aji Sax

\* **2:15** 2.15 nebbon: nebbon ak deret, yoon mayewul woon ñu lekk ko. Seetal ci *Sarxalkat yi* 3.16-17.

ji.» <sup>21</sup> Aji Sax ji nag dikke Aana aw yiw, mu amaat ñetti doom yu góor ak ñaar ñu jigéen.

Ci biir loolu Samiyel moom, ma ngay màgg fa wetu Aji Sax ji.

### *Eli àrtu na ay doomam*

<sup>22</sup> Eli nag mujj na di mag lool. Ba mu yégee mboolem li doomam yu góor yi def ak Israyil gépp, bay tédde sax jigéen ñiy liggéey ci bunt xaymab ndaje mi, <sup>23</sup> da leena wax, ne leen: «Ana lu waral ngeen di def jëf jii? Maa dégge ci askan wépp jëf ju bon jii ngeen nekke. <sup>24</sup> Aa! Xale yi, coow li ma dégg, muy law ci biir ñoñi Aji Sax ji, rafetul de! <sup>25</sup> Su nit ki tooñee moroomu nitam, Yàllaay àtte; waaye su dee Aji Sax ji la nit ki tooñ, ana ku koy àtte?» Wax jooju nag taxul ba tey ñu déggal seen baay. Booba fekk na Aji Sax ji namm leena rey.

<sup>26</sup> Ci biir loolu yépp, ngóor sa Samiyel di màgg, neex Aji Sax ji, neex nit ñi.

### *Nitu Yàlla rëbb na Eli*

<sup>27</sup> Mu am bés genn góoru Yàlla dikk ci Eli, ne ko: «Aji Sax ji dafa wax ne: “Maa feeñu woon ci lu leer sa waa kër baay ba ñu nekkee Misra, di moomeelu kër Firawna. <sup>28</sup> Maa tannée sa baay ci digg giiri Israyil yépp, ngir mu doon sama sarxalkat, di yéeg ci sama sarxalukaay, di taal cuuraay, sol xar-sànni mi, janook man. Maa sédd it sa waa kër baay mboolem saraxi sawara yu bànni Israyil. <sup>29</sup> Lu tax ngeen di teddadil sama saraxi rendi ak yeneen sarax yi ma santaane ci màkkaan mi? Lu waral ngay teral sa doom yi teraanga joo ma joxul, ba ngeen di yafloo li gën ci mboolem saraxi Israyil sama ñoñ?” <sup>30</sup> Kon nag kàddug Aji Sax jee, Yàllay Israyil: “Maa waxoon déy ne, sa waa kër ak sa waa kër baay ñooy doxe fi sama kanam, di ma liggéeyal ba fàww.” Léegi nag, kàddug Aji Sax jee: “Loolu jomb naa ko tey. Ñi ma teral laay teral; waaye ñi ma teddadil, dees na leen tuutal. <sup>31</sup> Te kat ay bés a ngi ñëw, maay dagg sa doole, dagg sa dooley waa kër baay, ba deesatul màggate ci sa kër. <sup>32</sup> Njàqaree ngay saxoo ci sama dëkkuwaay. Israyil

dina baaxle moos, waaye du tax kenn màggate sa kër muk. <sup>33</sup> Dina am ku bokk ci yaw ku ma dul dagge ci liggéey bu jëm ci sama sarxalukaay, waaye maa lay jooyloo, ba nga ñàkki bët, teg la njàqarey xol, te mboolem ñu yokku ci sa kër, seen digg doole lañuy deeye. <sup>34</sup> Li nga ciy def ab takk mooy liy dikkal Ofni ak Fineyas, sa ñaari doom yu góor yii: Benn bés lañuy bokk dee ñoom ñaar ñépp. <sup>35</sup> Te it maay tabbal sama bopp sarxalkat bu wóor boo xam ne sama nammeelu xol ak sama bëgg-bëggu bakkan lay jëfe. Maa koy sampal kër gu wóor, muy doxe fi kanam ki ma fal ba fàww. <sup>36</sup> Su ko defee mboolem ku des ci sa waa kër dina ko sujjóotalsi, ngir as xalis mbaa as dogu mburu, naan ko ‘Ngalla sas ma lenn ci liggéeyu carxal gi, ndax ma am as dogu mburu su ma lekk’.»

## 3

<sup>1</sup> Ngóor sa Samiyel nag moom, di liggéeyal Aji Sax ji fi kanam Eli.

### *Yàlla def na Samiyel yonent*

Kàddug Aji Sax ji néewoon na ca yooya jamono, peeñu mu leer it tumuránke woon na.

<sup>2</sup> Mu am bés Eli tédde fa muy tédde naka jekk, fekk bët ya naqari, ba daanaka gisatul. <sup>3</sup> Booba làmpu jaamookaayu Yàlla bi feyagul, te Samiyel a ngi tédde ci biir jaamookaayu Aji Sax ji, fi gaalu Yàlla gi nekk. <sup>4</sup> Aji Sax ji woo Samiyel, mu ne: «Maa ngi», <sup>5</sup> daldi daw ba ca Eli, ne ko: «Maa ngi, du yaa ma woo?» Eli ne ko: «Wootewuma de, dellul tëri.» Mu dellu tédde.

<sup>6</sup> Aji Sax ji dellu woo Samiyel, Samiyel jóg, dem ba ca Eli ne ko: «Maa ngi, du yaa ma woo?» Eli ne ko: «Wootewuma de doom, dellul tëri.» <sup>7</sup> Booba Samiyel xamagul woon Aji Sax ji, te kàddug Aji Sax ji dikkalagu ko woon.

<sup>8</sup> Aji Sax ji wooti Samiyel ñetteel bi yoon, Samiyel jógati, dem ba ca Eli ne ko: «Maa ngi, du yaa ma woo?» Eli nag xam ne Aji Sax jee woo xale bi. <sup>9</sup> Mu ne Samiyel: «Demal tëri, bu la wootee, nee ko: “Aji Sax ji, maa ngi lay déglu, Sang bi, waxal.”» Samiyel dellu tédde fa muy tédde.

<sup>10</sup> Ba mu ko defee Aji Sax ji dikk taxaw, wooti ko na woon, ne ko: «Samiyel, Samiyel.» Samiyel ne: «Maa ngi lay déglu, Sang bi, waxal.» <sup>11</sup> Aji Sax ji ne Samiyel: «Maa ngii déy, di waaja def ci digg bànni Israyil, mbir muy buur noppi mboolem ku ko dégg. <sup>12</sup> Bésuub keroog ma matal ci Eli mboolem lu ma waxoon ne mooy dal waa këram, ndoorte la ba ca muj ga. <sup>13</sup> Waxoon naa ko ne ko dinaa teg waa këram mbugal mu sax dàkk, ndax ñaawtéef gu ay doomam nekke, di ñàkke Yàlla teggin, mu yég ko te jubbantiwu leen. <sup>14</sup> Looloo waral ma giñal waa kër Eli, ne du am mukkk benn saraxu jur mbaa beneen sarax bu leen mana jot ci seen ñaawtéef.»

<sup>15</sup> Ci kaw loolu Samiyel tëdd ba ca suba sa, mu tijji bunti kër Aji Sax ji, waaye ñemewula nettali Eli peeñu ma. <sup>16</sup> Eli nag woo ko ne ko: «Samiyel doom, ana nga?» Samiyel ne ko: «Maa ngi.» <sup>17</sup> Eli ne ko: «Kàddu gi mu la wax, lu mu doon? Bu ma nèbbu kay. Soo ma nèbbee lenn ci li mu la wax, yal na la Yàlla teg naqar wu gëna tar.» <sup>18</sup> Samiyel wax ko lépp, nèbbu ko ca dara. Eli ne: «Mooy Aji Sax ji. Li ko soob, na ko def.»

<sup>19</sup> Ci kaw loolu Samiyel di màgg, Aji Sax ji ànd ak moom, waccul genn kàddug Samiyel, mu fanaan àll. <sup>20</sup> Noonu la Israyil gépp ràññee, la dale Dan ca bëj-gànnaar ba ca Beerseba ca bëj-saalum, ne Samiyel taxaw na taxawaayu yonentu Aji Sax ji. <sup>21</sup> Aji Sax ji nag wéye koo feeñu ca Silo. Ci kàddug Aji Sax ji la ko Aji Sax ji daan feeñoo ca Silo.

## 4

### *Nangu nañu gaalu Yàlla ga*

<sup>1</sup> Kàddug Samiyel nag di dikkal Israyil gépp.

Ci biir loolu bànni Israyil dem, dajeek waa Filisti ngir xare. Ña nga dal fa feggook Eben Eser, waa Filisti dal ca Afeg.

<sup>2</sup> Waa Filisti làng-déral Israyil, xare ba

jib. Israyil daanu fa kanam waa Filisti, waa Filisti rey ca seeni làng lu jege ñeenti junni ca toolub xare ba. <sup>3</sup> Ba mbooloo ma ñibbee ca dal ba, magi Israyil ña ne: «Lu waral Aji Sax ji dumalu nu tey fi kanam waa Filisti? Nan jëleji gaalu kóllërey Aji Sax ji fa Silo; na dikk ci sunu biir, ba musal nu ci sunuy noon.»

<sup>4</sup> Ci kaw loolu mbooloo ma yónnee ca Silo, ñu jëli gaalu kóllërey Aji Sax ji Boroom gàngoori xare yi, Ki toog fi tiim ñaari malaakay serub yi\*. Foofa ca Silo la Ofni ak Fineyas, ñaari doomi Eli yu góor ya, nekkoon ak gaalu kóllërey Aji Sax ja.

<sup>5</sup> Ba gaalu kóllërey Aji Sax ji duggsee ca dal ba, Israyil gépp a xaacoondoo, ba suuf say riir. <sup>6</sup> Waa Filisti dégg coow la, ne: «Waaw, coow lu réy loolu ca dalub Ebrë ya, lu mu doon?»

Ba waa Filisti yégee ne gaalu kóllërey Aji Sax ja dugg na ca biir dal ba, <sup>7</sup> tiitaangee leen jàpp, ñu ne: «Am na yàlla ju dugg ca biir dal ba! Wóoy, ngalla nun! Nde guléet tey lu mel nii am! <sup>8</sup> Wóoy ngalla nun! Ku nuy musal ci jii yàlla ju bare doole. Yàlla jii moo dumaa woon waa Misra xeeti mbugal yu nekk, ca màndinj ma. <sup>9</sup> Dëgërluleen déy te diy góor, yeen waa Filisti, nde lu ko moy ngeen doon jaami Ebrë yi, na ñu nekke woon sunuy jaam. Góor-góorluleen boog te xeex.»

<sup>10</sup> Waa Filisti nag di xare, ba bànni Israyil daanu: ku nekk daw jëm xaymaam. Jéll ba réy na lool; fanweeri junniy xarekat yuy deme tànk. <sup>11</sup> Gaalu Yàlla ga, ñu jël; Ofni ak Fineyas, ñaari doomi Eli yu góor ya, dee.

### *Mbugal ma topp na waa kër Eli*

<sup>12</sup> Ba mu ko defee jenn waay ju bokk ci giirug Beñamin, dawee ca làngu xare ba ca Silo ci benn bés bi. Mu agsee yérey yu xottiku ak bopp bu fees ak suuf, di ko tiisloo. <sup>13</sup> Naka la agsi, yem ca Eli, mu toog ca toogoom ca peggu yoon wa, di séentu, ndax booba naw gaa ngay rëcc,

\* **4:4** 4.4 serub ya: baatu ebrë la. Ay malaaka lañu yu bokk ak Yàlla jataay. Gaalu kóllëre gu sell ga, ñaari serub yu ñu tëgge wurus lañu teg ca kawam, ñu tiim ko, seeni laaf tàllalu, di saamandaay ngàngunem buur. Loolu di wone ne Yàlla Aji Sax jaa nga fa teew, na mu teewe ca kaw asamaan, serub ya yéew ko. Yàlla ci boppam nag kenn jëmmalu ko fa, na ñu jëmmale serub ya ñu tëgg.

ngir tiitaange ca gaalu Yàlla ga. Naka la waa ja duggsi ca dëkk ba, ba wax la xew, dëkk ba bépp yuuxoondoo.

<sup>14</sup> Eli dégg coow la, ne: «Riir moomu lu mu?» Waa ja gaaw dikk, wax ko Eli. <sup>15</sup> Booba Elee ngi ci juróom ñeent fukki at ak juróom ñett (98), bët yi ne xóll te gisatul dara. <sup>16</sup> Waa ja ne ko: «Man mii maa jóge ca toolub xare ba. Maa dawè làng ga tey jii.» Eli ne ko: «Doom, lu xew?» <sup>17</sup> Ndaw la ne ko: «Bànni Israyil a daw, won waa Filisti gannaaw. Jéll bu réy la sunu mbooloo ma daanu, sa ñaari doom ya, Ofni ak Fineyas dee nañu, te it gaalu Yàlla ga, jël nañu ko.» <sup>18</sup> Naka la tudd gaalu Yàlla ga rekk, Eli xàwwikoo ca toogu ba, daanoo njaaxaanaay, dal ca bunt dëkk ba, loos wa damm, mu dee, ndax booba day mag mu ànd ak yaramam. Eli jiite na Israyil ñeent fukki at.

<sup>19</sup> Goroom, jabaru Fineyas nag jigéenu wérul la woon te booba mu ngi waaja wasin. Naka la dégg ne jël nañu gaalu Yàlla ga, te baayu jëkkëram ak jëkkëram dee nañu, mu daldi sukk wasin. Waaye fekk na mititu matam jeexal dooleem. <sup>20</sup> Ba loolu amee muy waaja dee, jigéen ña ko doon taxawu ne ko: «Na sa xel dal, ndax doom ju góor nga am.» Waaye àdduwul, teewluwul. <sup>21</sup> Ndaw sa nag tudde gone gi Ikabot (mu firi Ana leer ga?) te naan: «Leer ga dëddu na Israyil, dem ngàllo.» Ndax la ñu nangu gaalu Yàlla ga ak la goroom ak jëkkëram dee. <sup>22</sup> Mu ne: «Leer ga kay dëddu na Israyil, dem ngàllo, ndegam jëlees na gaalu Yàlla ga kay!»

## 5

### *Gaalu Yàlla ga jaaxal na Filisti*

<sup>1</sup> Ba waa Filisti nangoo gaalu Yàlla ga, Eben Eser lañu ko jële, yóbbu ko seen dëkk Asdodd. <sup>2</sup> Ñu dugal gaal ga ca seen biir kër tuur ma ñu naan Dagon, teg ko ca wetu jëmmu Dagon ja. <sup>3</sup> Waa Asdodd teela xëy ca èllëg sa, fekkuñu lu moy jëmmu Dagon ja, mu daanu ba dëféenu fa suuf, fa kanam gaalu Aji Sax ji. Ñu yékkati jëmmu Dagon ja, delloo ko fa mu

taxawoon. <sup>4</sup> Ca èllëg sa, ñu teela xëyati, fekkuñu lu moy jëmmu Dagon ja daanu ba dëféenu fa suuf, fa kanam gaalu Aji Sax ji. Bopp baak cati loxo ya damm, ne wesar ca dëwu bunt ba, desul lu moy yaram wa. <sup>5</sup> Looloo waral ba tey jii, sarxalkati Dagon yeek mboolem ñiy dugg kër tuur ma ñu wax Dagon ca Asdodd, kenn du ci joggi ca dëwu bunt ba.

<sup>6</sup> Ba mu ko defee loxol Aji Sax ji mujj diis ca kaw waa Asdodd. Mu wacce njàqare ca seen kaw, daldi teg waa Asdodd ak la ko wër ay taab. <sup>7</sup> Waa Asdodd gis la leen dal, daldi ne: «Bu gaalu Yàllay bànni Israyil gii des ci sunu biir kat, ndax loxoom dëgër na ci sunu kaw, nook Dagon sunu tuur mi.» <sup>8</sup> Ba loolu amee ñu yónnee, woolu mboolem kàngami waa Filisti. Ñu laaj leen ne leen: «Nan lanuy def ak gaalu Yàllay Israyil gii?» Ñu ne leen: «Toxal-leen gaalu Yàllay Israyil gi ca Gaat.» Ñu toxal gaalu Yàllay Israyil ca seen dëkk ba ñuy wax Gaat. <sup>9</sup> Naka lañu fa toxal gaal ga nag, loxol Aji Sax ji dal dëkk ba, mu jur tiitaange lu réy lool. Daa dal ca kaw dëkk ba, mag ak ndaw, ay taab ne fureet ca seen kaw. <sup>10</sup> Ñu yóbbu gaalu Yàlla ga beneen dëkk bu ñuy wax Ekkron. Gaal gaa ngay jubsu Ekkron, waa dëkk ba gaaw yuuxoondoo ne: «Indil nañu nu fi gaalu Yàllay Israyil, bëgg noo rey, nook sunu waa réew mépp!» <sup>11</sup> Ci kaw loolu ñu yónnee, woolu mboolem kàngami waa Filisti, ne leen: «Jëlelees fi gaalu Yàllay Israyil gii, mu dellu kërám, lu ko moy dina nu rey, nook sunu askan wépp.» Booba tiitaangey ndee dajal na dëkk ba bépp, ndax loxol Yàlla bu diis lool ca seen kaw. <sup>12</sup> Ña ca deewul nag, seen yaram yaqooki taab, yuux ya jollee ca dëkk ba, wuti asamaan.

## 6

### *Waa Filisti delloo nañu gaalu Yàlla ga*

<sup>1</sup> Gaalu Aji Sax ja nekk na réewum Filisti juróom ñaari weer. <sup>2</sup> Waa Filisti doora woolu seeni sarxalkat ak seeni gisaanekat, ne leen: «Nan lanuy def ak gaalu Aji Sax ji? Xamal-leen nu nan lanu koy delloo kërám!» <sup>3</sup> Ñu ne leen:

«Su ngeen dee delloo gaalu Yàllay Israyil, buleen ko delloo loxoy neen, waaye fex-eleen ba boole kook saraxu peyug tooñ, yónnee ko. Kon dingeen wér, te dingeen xam lu tax loxol Yàlla ji teggikuwu leen.»

<sup>4</sup> Waa Filisti ne leen: «Ban saraxu peyug tooñ lanu koy yónnee?» Ñu ne leen: «Limu kàngami Filisti ngeen di topp, daldi defarlu juróomi taabi wurus ak juróomi janaxi wurus, mu dèppook limu kàngami waa Filisti, ndax benn balaa bi leen dal moo dal seeni kàngam itam. <sup>5</sup> Noonu ngeen di sàkke ay jëmm yuy jëmmal seeni taab ak jëmm yuy jëmmal seen janax yiy yàq réew mi. Su ko defee ngeen defale ko Yàllay Israyil teraanga. Jombul mu woyofal loxoom ci seen kaw ak seeni tuur ak seenum réew. <sup>6</sup> Ana lu jar ngeen di jaay dëgër bopp ni waa Misraak Firawna? Ba leen Yàllay Israyil torxalee, bàyyiwuñu bànni Israyil, ñu dem seen yoon? <sup>7</sup> Kon waajal-leen watiir bu bees te ngeen jël ñaari nag yuy nàmpal yu ñu masula takkal. Ngeen takkal nag yi watiir bi te yóbbu doomi nag yi, fat. <sup>8</sup> Ngeen daldi jël gaalu Aji Sax ji, teg ko ci kaw watiir bi. Liggéeyi wurus yu peyug tooñ yooyu ngeen di yónnee nag, ci waxande wu ndaw ngeen koy yeb, te teg waxande wi ci wetu gaal gi. Su ko defee ngeen yebal watiir bi, mu dem. <sup>9</sup> Nangeen ko xool. Su jubalee réewam, wuti dëkk bi ñuy wax Bet Semes, kon Aji Sax jee nu teg musiba mu réy mii, lu ko moy nu xam ne du loxoom a nu dal, waaye ndogal lu nu dikkal la.»

<sup>10</sup> Waa Filisti def noona, daldi tànn ñaari nag yuy nàmpal, takkal nag yi watiir, doomi nag ya, ñu fat leen. <sup>11</sup> Ñu daldi teg gaalu Aji Sax ja ca kaw watiir ba, ak waxande wu ndaw, wa def janaxi wurus yaak seen jëmmi taab ya. <sup>12</sup> Ba mu ko defee, nag ya jubal xocc yoonu Bet Semes, topp wenn yoon wi rekk, di nàññiy dem. Jàdduñu ndijoor, jàdduñu càmmoñ. Kàngami Filisti ya topp ca, ba fa Bet Semes tàmbalee.

<sup>13</sup> Booba waa Bet Semes a ngay góob

\* **6:15** 6.15 Leween ña: Yàlla tànn na ñi bokk ci giirug Lewi doomu Yanqóoba, ñuy jàpple sarxalkat ya ca liggéeyu kër Yàlla ga. † **6:19** 6.19 Ni ñu ko binde ci ebrë manees na koo dégge nii: juróom ñaar fukki nit a dee ci juróom fukki junniy nit.

bele ca xur wa. Naka lañu dawal seen bët, séen gaal ga, daldi bég. <sup>14</sup> Watiir ba dikk ba ci toolu jenn waayu Bet Semes ju ñuy wax Yosuwe, mu taxaw fa. Aw doj wu mag a nga fa woon. Ci kaw loolu ñu xar mattum watiir ba, nag ya, ñu defal ko Aji Sax ji saraxu rendi-dóomal. <sup>15</sup> Fekk na Leween ña\* wàcce gaalu Aji Sax ja, ak waxande wu ndaw wa def liggéeyi wurus ya. Ñu teg lépp ca kaw doj wu mag wa. Bésub keroog waa Bet Semes def nañu ay saraxi rendi-dóomal ak yeneen sarax, ñeel Aji Sax ji. <sup>16</sup> Juróomi kàngami Filisti ya gis nañu loolu lépp, doora dellu Ekkron ca bés ba.

<sup>17</sup> Jëmmi taabi wurus yooyu waa Filisti yónnee ngir saraxu peyug tooñ, ñeel Aji Sax ji, ay teraanga la yu bawoo ci kilifay dëkk yii: Asdodd, benn; Gasa, benn; Askalon, benn; Gaat, benn; Ekkron, benn. <sup>18</sup> Limu janaxi wurus yi it dèppook limu dëkki waa Filisti, yi seen juróomi kàngam jiite, dale ko ci dëkk yi tata wër, ba ci dëkk-dëkkaan yi dara wërul, ba fi doj wu mag wi ñu tegoon gaalu Aji Sax ji. Doj waa nga ca toolub Yosuwe waa Bet Semes ba, ba tey jii.

<sup>19</sup> Terewul Yàlla mbugal ñenn ca waa Bet Semes, ndax dañoo yërndu woon ca biir gaalu Aji Sax ja. Juróom ñaar fukki nit† la fàdd ca ñoom. Waa dëkk ba nag di tiislu ndax mbugal mu réy moomu leen Aji Sax ji teg. <sup>20</sup> Ci kaw loolu waa Bet Semes ne: «Ana ku mana taxaw fi kanam Aji Sax ji, jii Yàlla ju sell? Ci kan lanuy yóbbu gaal gi, ba mu sore nu?» <sup>21</sup> Gannaaw gi ñu yebal ay ndaw ca waa Kiryaat Yarim, ne leen: «Waa Filisti de délloosi nañu gaalu Aji Sax ji. Tee ngeena dikk, yóbbu ko seen dëkk?»

## 7

<sup>1</sup> Waa Kiryaat Yarim nag dikk, jëlsi gaalu Aji Sax ji, yóbbu ko kër Abinadab ca kaw tund wa. Ñu sellal Elasar, doomam ju góor ngir muy wattu gaalu Aji Sax ja.

### *Samiyel jiite na Israyil*

<sup>2</sup> Gannaaw bés ba ñu yóbboo gaal ga Kiryaat Yarim, nekk na fa lu yàgg, ba am fa ñaar fukki at. Waa kër Israyil gépp nag namma dellu ci Aji Sax ji. <sup>3</sup> Samiyel wax ak waa kër Israyil gépp, ne leen: «Ndegam seen léppi xol ngeen namma delloo ci Aji Sax ji, jëleleen fi seen biir tuuri doxandéem yi, ak tuur yi ñu dippee Astàrt, te ngeen saxal seen xol ci Aji Sax ji, jaamu ko moom donj. Su ko defee mu xettli leen ci waa Filisti.» <sup>4</sup> Ba mu ko defee bànni Israyil génne seen tuur yi ñu dippee Baal ak Astàrt. Ñuy jaamu nag Aji Sax ji moom donj.

<sup>5</sup> Gannaaw loolu Samiyel ne leen: «Wooleen Israyil gépp, ñu daje ca Mispa, ma tinul leen Aji Sax ji.» <sup>6</sup> Ñu daje ca Mispa, tanq ndox, sotti fa suuf, fa kanam Aji Sax ji. Ñu woor nag bés sub keroog, daldi wax foofa ne: «Noo tooñ Aji Sax ji.» Ca Mispa la Samiyel doone njiitu Israyil.

<sup>7</sup> Ba waa Filisti yégee ne bànni Israyil daje na ca Mispa, kàngami waa Filisti ya jóg, ngir songi leen. Bànni Israyil yég ko, am tiitaange ca waa Filisti. <sup>8</sup> Bànni Israyil ne Samiyel: «Ngalla bu nu noppee jooytul ci sunu Yàlla Aji Sax ji, ndax mu wallu nook waa Filisti!» <sup>9</sup> Samiyel jël menn xar mu feragul, defal ko lépp Aji Sax ji saraxu rendi-dóomal. Mu jooytul Israyil ci Aji Sax ji, Aji Sax ji nangul ko. <sup>10</sup> Naka la Samiyel di joxe saraxu rendi-dóomal ba, waa Filisti di jegesi ngir xareek bànni Israyil. Aji Sax ji dënoo kàddu gu réy, ca kaw waa Filisti bés sub keroog, fëlxe leen, ñu daanu fa kanam bànni Israyil. <sup>11</sup> Bànni Israyil génne Mispa, dàqi waa Filisti, duma leen, bay waaja àgg Bet Kar.

<sup>12</sup> Gannaaw loolu Samiyel jël aw doj, teg ko ci diggante Mispa ak fu ñuy wax Sen; mu dippee doj wi Eben Eser (mu firi doju Wall). Mu ne: «Ba fii la nu Aji Sax ji wallu.» <sup>13</sup> Waa Filisti nag detteelu, dikkatuñu biir suufas Israyil. Giiru dundu Samiyel gépp loxol Aji Sax jaa ngi ci kaw waa Filisti. <sup>14</sup> Dëkk ya Filisti nangu woon ci Israyil daldi délsi ci seeni loxo; dale ko ca Ekkron ba Gaat. Israyil nango ci waa Filisti suufam sépp.

Diggante Israyil ak Amoreen ñi itam di jàmm.

<sup>15</sup> Samiyel jiite na Israyil giiru dundam gépp. <sup>16</sup> At mu jotaan day wër diggante Betel ak Gilgal ak Mispa, di àtte mbiri bànni Israyil, foofu fépp. <sup>17</sup> Gannaaw loolu mu dellu Raama ndax fa la kër am nekkoon, fa la daan àttee Israyil, te fa la tabax sarxalukaay, ñeel Aji Sax ji.

## Israyil sàkku na buur

### 8

#### *Bànni Israyil ñaan na Samiyel buur*

<sup>1</sup> Ba Samiyel màggatee, ay doomam yu góor la fal njiiti Israyil. <sup>2</sup> Taaw ba Yowel la tuddoon, ka ca topp di Abya. Ñoo doon njiit ya ca Beerseba. <sup>3</sup> Doomi Samiyel yu góor ya nag jaaruñu ci seen tànk baay. Daño ladj, topp alal ju lewul, di nangu ay ger, di jalgati dëgg.

<sup>4</sup> Ci kaw loolu magi Israyil ñépp daje, dem ca Samiyel ca Raama. <sup>5</sup> Ñu ne ko: «Góor gi, léegi danga di mag, te say doom jaaruñu ci say tànk. Kon danga nuy falal buur bu nu jiite, ni ko xeet yépp baaxoo.» <sup>6</sup> Samiyel ñaawlu la ñu ko ne mu falal leen buur bu leen jiite. Mu diis ko Aji Sax ji. <sup>7</sup> Aji Sax ji ne ko: «Déggalal mbooloo mi te def li ñu la wax lépp. Du yaw lañu bañ, waaye man mii lañu bañ ma doonati seen buur. <sup>8</sup> Na ñu daan def naka jekk, ba ma leen génnee Misra ba tey jii, di ma dëddu, di jaamu yeneen yàlla, noonu rekk lañuy def ak yaw. <sup>9</sup> Kon déggal leen rekk, waaye àrtu leen bu baax, xamal leen luy doon sañ-sañu buur bu leen di jiiteji.»

#### *Lu jëm ci sañ-sañu buur*

<sup>10</sup> Ba loolu amee Samiyel jottli mbooloo, ma doon sàkku mu falal leen buur, mboolem àrtub Aji Sax ji. <sup>11</sup> Mu ne: «Buur bi leen di jiiteji nag sañ-sañam moo di: Seeni doom yu góor lay jël, ngir tabb leen dawalkati watiiram aki fasam, ñuy daw jiitu watiiram. <sup>12</sup> Ñoom lay tabb ngir ñu doon njiiti kuréli junniy dag, mbaa njiiti kuréli juróom fukk. Ñoom it lay beyloo toolam, di leen góobloo, di leen sàkkloo ay gannaayi xareem ak



jumtukaayi watiiram. <sup>13</sup> Seen doom yu jigéen lay jël, def leen ay njafaan-kati cuuraay, aki toggkat ak lakk-kati mburu. <sup>14</sup> Seen ngèneeli tool ak tóokëri reseñ ak tooli oliw, mu jël, jox ay surgaam. <sup>15</sup> Seen pepp ak seen reseñ, fukkeel ba lay jël, jox ay jawriñam aki surgaam. <sup>16</sup> Seen jaam yu góor it, ak seen jaam yu jigéen, ak ñi épp doole ci seeni waxambaane ak seeni mbaam, mu jël, jëfandikoo ci liggéeyam. <sup>17</sup> Seeni gàtt, fukkeel ba lay jël, te yeen ci seen bopp, ay surgaam ngeen di doon. <sup>18</sup> Bu keroogee dingeen ne wóoy ndax buur bi ngeen falal seen bopp, te bu keroogee Aji Sax ji du leen wallu.»

<sup>19</sup> Mbooloo ma nag lànk, déggaluñu Samiyel, xanaa ne ko: «Ndokk! Buur daal lanuy am, <sup>20</sup> nun itam, ba mel ni xeet yépp. Sunu buur a nuy yilif, dox, jiite nu, di nu xareel sunuy xare.» <sup>21</sup> Samiyel déglu la mbooloo ma wax lépp, ba noppi yegge ko Aji Sax ji. <sup>22</sup> Aji Sax ji ne ko: «Déggal leen rekk, te falal leen buur.» Samiyel nag ne bànni Israyil: «Baax na, demleen ñibbi, ku nekk ca dëkkam.»

## Lii mooy jaar-jaari Sóol

### 9

#### *Sóol doxi na yónnent*

<sup>1</sup> Jenn waay la woon ju bokk ci giirug Beñamin, ñu di ko wax Kis. Abyel ay baayam; Abyel, Seror ay baayam; Seror, Bekorat ay baayam; Bekorat, Afiya Beñamineen ba di baayam. Kis ku am daraja la woon. <sup>2</sup> Mu am doom ju ñuy wax Sóol\*; xalelu góor bu góorayiw, ba kenn dàqu ko ci bànni Israyil, sut ñépp taxawaay.

<sup>3</sup> Mu am bés mbaam yu jigéen yu Kis, baayu Sóol, réer. Kis ne Sóol: «Àndal ak kenn ci surga yi, nga seetali ma mbaam yi.» <sup>4</sup> Ba loolu amee Sóol ak surgaam jaare tundi Efrayim, teg ca diiwaanu Salisa, gisuñu leen. Ñu jàll ba ca diiwaanu Saalim, dara. Ñu walbatiku jaaraat diiwaanu Beñamin, gisuñu leen.

<sup>5</sup> Ba ñu àggee diiwaanu Cuuf, Sóol ne surgaam ba mu àndal: «Ayca nu ñibbi, lu

ko moy nun la sama baay di xalaat, fàtte mbaam yi.» <sup>6</sup> Surga ba ne ko: «Xanaa lenn; genn góoru Yàllaa ngi ci dëkk bii, ku ñu naw la. Lépp lu mu wax, dara du ci fanaan àll. Nan fa dem kay, jombul mu xamal nu dara ci sunu yoon wi.» <sup>7</sup> Sóol ne surgaam: «Waaw, bu nu demee, lu nuy jox góor gi? Mburu mi woon ci sunuy mbuus jeex na, amunu dara lu nu yóbbul góoru Yàlla gi. Leneen lu nu am?» <sup>8</sup> Surga bi dellu ne Sóol: «Xanaa donju xaalis sii ma yor. Naa ko ko jox boog, mu won nu sunuw yoon!»

<sup>9</sup> Bu jëkkoon nag ci Israyil ku daan leerluji ci Yàlla da naan: «Nan dem ca giskat ba,» ndax ku ñuy wooye yonent tey, booba, ab giskat lañu ko daan wooye.

<sup>10</sup> Ci kaw loolu Sóol ne surgaam: «Wax nga dëgg. Kon nan dem.» Ñu jubal ca dëkk ba góoru Yàlla ga nekk. <sup>11</sup> Naka lañu yéeg tund wa, jëm ca dëkk ba, daldi taseek janq ju ca jóge, di rooti. Ñu laaj leen ne leen: «Góorug giskat bi fii la féete?»

<sup>12</sup> Ñu ne leen: «Waaw, mu ngi fii ngeen jublu, waaye gaawleen de; ndax tey jii la dikk ci dëkk bi, ngir sarax su waa dëkk bi xewle tey ca bérabu jaamookaay ba. <sup>13</sup> Bu ngeen di àgg biir dëkk bi rekk, dal ko fay fekk, bala moo dem jaamookaay ba, ca sarax sa. Waa dëkk bi duñu lekk muk te dikkul, ndax mooy ñaan ci sarax si. Bu noppee, ñi ñu woo doora lekk. Kon demleen gaaw, ndax nэгèni fa ngeen koy fekk.»

#### *Sóol gis na Samiyel*

<sup>14</sup> Ba loolu amee ñu dem bay dugg ca biir dëkk ba, yem ca Samiyel, muy dikk, dajeeek ñoom, jëm ca jaamookaay ba.

<sup>15</sup> Fekk na balaa Sóol di ñëw, Aji Sax ji déey na Samiyel bés ba jiitu, ne ko: <sup>16</sup> «Nэгèni èllég maa ngi lay yónnee waa ju dëkk diiwaanu Beñamin. Nanga ko diw, fal ko, ngir mu yilif Israyil, sama ñoñ, ba xettli sama ñoñ ci waa Filisti. Maa geesu sama ñoñ, ndax seeni yuux àgg na fi man.»

\* 9:2 9.2 Sóol: am na ñu ko gèna xam ci turu Talut.

<sup>17</sup> Naka la Samiyel séen Sóol, Aji Sax ji wax ko, ne ko: «Waa jii laa la wax. Kii mooy yor sama ñoñ.»

<sup>18</sup> Sóol dikk ba ca Samiyel, fa tollook bunt dëkk ba, ne ko: «Góor gi, baal ma tegtal ma kër giskat bi.» <sup>19</sup> Samiyel ne Sóol: «Man maay giskat bi. Doxal jiitu, nu dem ca jaamookaay ba. Yeen ak man ay bokk lekk tey. Bu subaa mboolem li ub sa bopp, dinaa la ko wax, door laa yiwi. <sup>20</sup> Mbaam yi nga réerle bëkk-démb, bu ci am benn xalaat, ndax feeñ nañu. Te sax, mboolem lu bakkane ci Israyil, xanaa du yaay boroom, yaak sa waa kër baay?» <sup>21</sup> Sóol ne ko: «Xanaa du man Beñamineen bi gëna néewle giir ci Israyil, sama làng gëna néew ci mboolem làng yi séq giirug Beñamin? Lii nga may wax, lu mu doon?»

<sup>22</sup> Samiyel daldi ànd ak Sóol ak surgaam, yóbbu leen ba ca biir néegu bernde ja. Mu beral leen nag jataay ca kanam mbooloo, ma ñu woo, te ñu wara tollu ci fanweer. <sup>23</sup> Samiyel ne toggkat ba: «Indil ma ndawal li ma la joxoon, te noon la, nga ber ko.» <sup>24</sup> Toggkat bi yékkati tànk baak la mu àndal, teg ko ca kanam Sóol. Samiyel ne ko: «Lii, lañu beroon, tegal sa kanam, te lekk. Moom lañu la dencal ci ndaje mii ma woo askan wi.» Noonu la Sóol bokke ak Samiyel lekk bés sub keroog.

<sup>25</sup> Gannaaw loolu ñu jóge ca jaamookaay ba, dellu ca dëkk ba. Ba ñu demee kër ga, Samiyel diisook Sóol ca kaw taax ma.

### *Samiyel diw na Sóol, fal ko*

<sup>26</sup> Ba ñu jógee ca èllëg sa, bët a ngay waaja set. Samiyel woo Sóol ca kaw taax ma, ne ko: «Fabul, ma yiwi la.» Sóol fabu, ànd ak Samiyel, ñu génn ñoom ñaar. <sup>27</sup> Naka lañu dem bay bëgga génn dëkk ba, Samiyel ne Sóol: «Neel surga bi, mu jiitu nu.» Mu wax ko surga ba, mu jiitu leen. Samiyel neeti Sóol: «Yaw, taxawal fii tuuti, ma dégtal la kàddug Yàlla.»

\* **10:5** 10.5 waxyu: wax lay doon, ju Yàlla déey ab yonent, mu di ko biral ci ndigalal Yàlla. Leeleeg bu ab yonent tolloo ci biral waxyu, day mel ni ku daanu leer.

## 10

<sup>1</sup> Ba loolu amee Samiyel jël njaqal diwu oliw lu ndaw, sotti ko ci kaw boppu Sóol, foon ko, ne ko: «Aji Sax ji diw na la déy, ngir fal la njiitu ñoñam. <sup>2</sup> Gannaaw boo teqlikook man, dinga dajeek ñaari góor ca wetu bàmmeelu Rasel ca Celca ca diiwaanu Beñamin. Dinañu la wax ne la mbaam ya nga seeti woon feeñ nañu. Te sax sa baay xalaatatul mbaam yi, yeena ko jaaxal. Ma nga naan: “Ana nu may def ak sama doom ji?” <sup>3</sup> Boo fa jógee, jubalal ba jot garab gu mag ga ca Tabor. Ñetti góor dinañu fa dajeek yaw, di maggali Yàlla ca Betel; kenn ka gaddu ñetti tef, keneen ka ñàbb ñetti kàmpi mburu, ka ca des yor mbuusum biiñ. <sup>4</sup> Dinañu la nuyuu, may la ñaari mburu; nga nangoo ko ca seeni loxo. <sup>5</sup> Bu loolu weesee nanga dem ba ca Gibeya Eloyim, fa dalub xarekati Filisti ya nekk. Booy jub dëkk ba, dinga dajeek kurélu yonent yu jóge ca bérabu jaamookaay ba, aw nit jiitoo leen powum tabalaaki toxoro, ak ñaari xeeti xalam, yonent ya di waxe ni yonent\*. <sup>6</sup> Su ko defee Noowug Aji Sax jee naa milib ci sa kaw, ngay waxandoo ak ñoom, soppiku, doon keneen nit. <sup>7</sup> Bu la firnde yooyu dikkalee rekk, xamal ne Yàllaa ngi ànd ak yaw. Su boobaa, lu bés bi laaj, def ko. <sup>8</sup> Léegi doxal jiitu ma Gilgal. Maa ngi noonu di la fekksi, ngir rendi fa saraxi rendi-dóomal, sarxe fa saraxi cant ci biir jàmm. Juróom ñaari fan nag ngay négandiku, ba ma fekksi la fa, xamal la looy def.»

### *Noowug Yàlla gane na Sóol*

<sup>9</sup> Naka la Sóol bàyyikoo ca Samiyel, walbatiku, Yàlla daldi soppu xelam. Firnde yooyu yépp nag matandoo ca bés ba. <sup>10</sup> Ba Sóol ak surgaam àggee Gibeya, kurélu yonent yaa ne pemm, dajeek moom. Noowug Yàlla ne milib ca kaw Sóol, muy waxandoo ak ñoom ay waxyu. <sup>11</sup> Ci kaw loolu mboolem ña xamoon Sóol démb ak bëkk-démb, daldi yem ci moom, mu ànd ak yonent ya di wax ay waxyu. Nit ña naan ca seen biir: «Waaw, Sóol

doomu Kis jii, lu ko jot nii? Sóol it ci yonent yi laa?» <sup>12</sup> Jenn waay ju fa dëkk ne: «Yii yonent sax, ci ngéru kan lañu bokk?» Ca lañu jóge, def ko waxin naan: «Sóol it ci yonent yi laa?» <sup>13</sup> Sóol biral ay waxyu ba noppi daldi dem ca bérabu jaamookaay ba.

<sup>14</sup> Ci kaw loolu baayu Sóol bu ndaw laaj Sóol ak surgaam, ne leen: «Fu ngeen de-moon?» Sóol ne ko: «Mbaam yi lanu seeti woon, gisunu dara, nu dem ca Samiyel.»

<sup>15</sup> Baayam bu ndaw ne ko: «Wax ma boog lu leen Samiyel wax.» <sup>16</sup> Sóol ne ko: «Samiyel da noo biralal ne mbaam ya feeñ na.» Mbirum nguur ma ko Samiyel wax nag, Sóol waxu ko baayam bu ndaw.

### *Yàlla feddi na palug Sóol*

<sup>17</sup> Gannaaw loolu Samiyel woolu askanu Israyil ca Aji Sax ji ca Mispa.

<sup>18</sup> Mu wax bànni Israyil, ne leen: «Aji Sax ji Yàllay Israyil dafa wax ne: “Man maa génne Israyil Misra. Maa leen xettli ca waa Misra ak mboolem buur ya leen notoon. <sup>19</sup> Waaye tey yeena dëddu seen Yàlla, ji leen musal ci mboolem seeni loraange ak seeni njàqare. Yeena ko ne: ‘Falal buur ci sunu kaw daal!’ Léegi nag taxawleen fi kanam Aji Sax ji, giir ak giir, làng ak làng.”»

<sup>20</sup> Ba Samiyel wooyee giiri Israyil yépp, ñu dikk, giirug Beñamin moo gén. <sup>21</sup> Mu woo giirug Beñamin, làng ak làng, làngu Matiri gén, Sóol doomu Kis génne ca. Ñu seet Sóol, gisuñu ko. <sup>22</sup> Ñu laajaat Aji Sax ji, ne ko: «Ndax keneen da fee ñëw?» Aji Sax ji ne: «Mu ngi nii, mu ngi làqu ci biir denc bi.» <sup>23</sup> Ñu daw jële Sóol foofa, mu taxaw ca biir mbooloo ma, sut ñépp. <sup>24</sup> Samiyel wax ak mbooloo mépp, ne leen: «Yeena gis ki Aji Sax ji taamu? Kenn melul ni moom ci mbooloo mi mépp.» Mbooloo ma mépp àddu ca kaw ne: «Buur, guddalu fan!» <sup>25</sup> Samiyel nag xamal mbooloo ma sañ-sañu buur. Mu bind ko cib téere, teg ca kanam Aji Sax ji. Ba mu ko defee Samiyel yiwi mbooloo mépp, ku nekk ñibbi kërám.

<sup>26</sup> Sóol itam ñibbi kërám ca Gibeya, jambaari góor yi ci Yàlla xiir, ànd ak moom. <sup>27</sup> Terewul mu am ay nit ñu

tekkiwul dara di wax, naan: «Ana nan lanu waa jii di xettlee?» Ñooñu sewal ko, yótuñu ko jenn teraanga. Sóol nag ne cell.

## 11

### *Sóol jéngu na*

<sup>1</sup> Nayas Amoneen ba moo dikoon, gaw dëkk ba ñu naan Yabes ca Galàdd. Waa Yabes gépp wax ak moom, ne ko: «Ngalla digool ak nun jàmm, te nu nangul la.»

<sup>2</sup> Nayas Amoneen ba ne leen: «Ni may digook yeen daal, mooy nii: luqi seen bētu ndijoor yeen ñépp, ba Israyil gépp torox.» <sup>3</sup> Magi Yabes ne ko: «May nu juróom ñaari fan, nu yebal ay ndaw ci Israyil gépp. Su amul kenn ku nu wallu, nu dikk, fekksi leen.»

<sup>4</sup> Ba ndaw ya dikkee Gibeya, ga Sóol dëkk, ba xamle mbir ma, waa dëkk ba di dégg, ñoom ñépp a yuuxu, di jooy. <sup>5</sup> Ci biir loolu Sóol ne tëll, jiital ay nagam, jóge tool ya. Mu ne: «Lu nit ñi xewle bay jooy nii?» Ñu nettali ko kàdduy waa Yabes.

<sup>6</sup> Naka la Sóol dégg kàddu yooyu, Noowug Yàlla ne milib ca kawam, mer ma ne jippét tàkk. <sup>7</sup> Mu rey ñaari nag, dog ko, yóbbante ko ay ndaw, yónnee ko Israyil gépp. Mu ne leen: «Képp ku toppul Sóol ak Samiyel, nii lees di def ay nagam.» Ba loolu amee tiitaange ju sababoo ci Aji Sax ji dal ca kaw askan wa, ñu sàqeendoo, di benn bopp. <sup>8</sup> Ba Sóol nemmikoo limu góori Israyil ca Beseg, ñetti téeméeri junni lañu (300 000), waa Yuda di fanweeri junni (30 000).

<sup>9</sup> Ñu wax nag ndaw ya jóge Yabes Galàdd, ñu jottli seen waa dëkk ba ne leen, ca èllég sa bu jant bi tàngee, dees na leen wallu. Ndaw ya dem, àgge ko waa Yabes, waa Yabes bég. <sup>10</sup> Ñu wax Amoneen ña, ne leen: «Èllég dinanu dikk, fekksi leen.»

<sup>11</sup> Ca èllég sa Sóol séddale mbooloom xareem ñetti kurél. Ba ñu tolloo ci wat-tub njël, ñu dugg biir dalu Amoneen ña, di leen дума ba jant bi tàng. Ña ca rëcce daldi tasaaroo ba ñaar sax àndatuñu. <sup>12</sup> Mbooloo ma ne Samiyel: «Ana ku noon: “Ndax Sóol ay falu ci sunu kaw?” Indileen ñooñu, nu rey leen!» <sup>13</sup> Sóol ne leen:

«Deesul rey kenn kay bésuub tey jii, ndax bésuub tey Aji Sax jee indi wall fi Israyil.»

<sup>14</sup> Ci kaw loolu Samiyel ne mbooloo ma: «Ñewleen nu dem Gilgal, ba feddli pal gi.»  
<sup>15</sup> Mbooloo ma mépp dem Gilgal, ñu fal Sool buur foofa, fa kanam Aji Sax ji ca Gilgal\*. Ñu sarxe fa saraxi cant ci biir jàmm fa kanam Aji Sax ji, Sool ak bànni Israyil gépp bannexoo fa bannex bu réy.

## 12

### *Samiyel wàcc na*

<sup>1</sup> Ba loolu weese Samiyel wax Israyil gépp ne leen: «Mu ngoog, nangul naa leen li ngeen ma wax lépp, ba falal leen buur. <sup>2</sup> Léegi Buur a ngii jiite leen. Man nag màggat naa ba weex tàll, te samay doom a ngii ci seen biir. Maa leen jiite, ba may ndaw ba tey jii. <sup>3</sup> Maa ngii! Seedeleen sama jépp tuuma fi kanam Aji Sax ji ak ki mu fal. Ana ku ma masa jël nagam, mbaa ma jël mbaamam? Ana ku ma masa lekk àqam, mbaa ma néewal ko doole? Ana ci kan laa masa nangoo alalu ger, ba nëpp-nèppal lu mu def. Lu ci am rekk, waxleen, ma fey ko.» <sup>4</sup> Ñu ne ko: «Lekkoo sunu àq, néewaloo nu doole. Masoo nangu lenn itam ci loxol kenn.» <sup>5</sup> Samiyel ne leen: «Kon Aji Sax ji seede na ci seen biir, ki mu fal it seede tey jii, ne gisuleen lenn ci sama loxo.» Ñu ne ko: «Seede na ko!»

<sup>6</sup> Samiyel ne mbooloo ma: «Aji Sax ji moo jéfoo Musaa ak Aaróona, ba génne seeni maam réewum Misra. <sup>7</sup> Kon nag taxawleen, ma layook yeen fi kanam Aji Sax ji, ci mboolem njekk gu leen Aji Sax ji defal, yeen ak seeni maam.

<sup>8</sup> «Gannaaw jamono ja Yanqóoba demee Misra, seeni maam a yuuxu, woo Aji Sax ji wall, Aji Sax ji yebal Musaak Aaróona, ñu génne seeni maam Misra, déel leen bérab bii. <sup>9</sup> Seenii maam nag ñoo fàtte seen Yalla Aji Sax ji, ba tax mu teg leen ca loxol Sisera njiitu xareb

dëkk ba ñuy wax Àccor, ak ca loxol waa Filisti, ak ca loxol buuru Mowab, ñooña doon xareek ñoom <sup>10</sup> Seenii maam jooj ko Aji Sax ji, ne: «Bàkkaar nanu de, nde noo wacc Aji Sax ji, di jaamu tuur yi ñu naan Baal ak Astart. Waaye rikk xettli nook sunuy noon, nu jaamu la.» <sup>11</sup> Aji Sax ji yebal Yërubaal\*, teg ca Bedan†, teg ca Yefte, teg ma ca, man Samiyel, daldi leen xettli ci seen noon yi leen séq, ba ngeen dëkke jàmm. <sup>12</sup> Waaye ba ngeen gisee Nayas, buurub Amoneen ña jëm ca seen kaw, yeena ma ne: «Buur bu nu jiite daal lanu bëgg.» Te Aji Sax ji seen Yalla di seen buur. <sup>13</sup> Léegi nag buur bi ngeen taamu, di ko sàkku, mu ngi nii. Mu ngoog, Aji Sax ji fal na buur bu leen jiite. <sup>14</sup> Su ngeen ragalee Aji Sax ji, jaamu ko, déggal ko, baña gantal ndigalu Aji Sax ji, yeen ak seen buur yépp ay topp seen Yalla Aji Sax ji. <sup>15</sup> Waaye kat, su ngeen bañee déggal Aji Sax ji, di gantal ndigalal Aji Sax ji, loxol Aji Sax jaa ngi ci seen kaw na mu nekke woon ca seen kaw maam ya.

<sup>16</sup> «Léegi nag taxawleen ba gis jaloore ju réy jii Aji Sax jiy def, ngeen teg ci bët. <sup>17</sup> Du nu ngi ci ngóobum bele tey? Dinaa ñaan ci Aji Sax ji, mu dënu, taw. Su boobaa dingeen xam xéll ne ba ngeen sàkkoo buur, lu bona bon ngeen def, Aji Sax ji seede.»

<sup>18</sup> Ci kaw loolu Samiyel ñaan ci Aji Sax ji, Aji Sax ji dënu, taw ca bés ba. Mbooloo ma mépp nag ragal lool Aji Sax ji ak Samiyel.

<sup>19</sup> Ba loolu wéyee mbooloo ma mépp ne Samiyel: «Ngalla sang bi, ñaanal nu ci sa Yalla Aji Sax ji, nu baña dee, ndax la nu bàkkaaroon lépp, yokkati nanu ci mbon gu tollu ni di sàkku buur.» <sup>20</sup> Samiyel ne mbooloo ma: «Buleen tiit; dëgg la, yeena def googu mbon gépp, waaye fexeleen rekk ba baña dëddu Aji Sax ji, te ngeen jaamoo Aji Sax ji seen léppi xol. <sup>21</sup> Buleen dëddu muk, ndax su boobaa topp ag neen lay doon; lu dul jariñe, du xettlee, ndax tuur yi kat, neenug neen la. <sup>22</sup> Aji

\* **11:15** 11.15 Li tax ñu ne fa kanam Aji Sax ji mooy Gilgal dafa amoon bérabu jaamookaayu Aji Sax ji. \* **12:11** 12.11 Yërubaal mooy Sedeyonj ba tey. Seetal *Njiit ya* 6—8. † **12:11** 12.11 Bedan: am na ñu jàpp ne mooy Barag. Seetal *Njiit ya* 4.

Sax ji moom turam wu màgg wi tax na du wacc ñoñam, ndax Aji Sax ji la soob, mu def leen ñoñam. <sup>23</sup> Man nag, yàlla tere may tooñ Aji Sax ji, di leen noppee ñaanal. Te it dinaa leen won yoon wi baax te jub: <sup>24</sup> ngalla fexeleen rekk ba ragal Aji Sax ji, te ngeen dëggu ci jaamoo ko seen léppi xol, ndax dangeen di xool ci jaloore yu yéeme yi mu leen defal. <sup>25</sup> Waaye su ngeen saxee ci def lu bon, yeen ak seeni buur ay bokk sànkú.»

## 13

### *Sóol tooñ na*

<sup>1</sup> Sóol ci boppam làqoon na ay at, ba muy falu buur; mu falu jüite Israyil ñaari at\*. <sup>2</sup> Ci kaw loolu mu tànn ñetti junniy nit ci Israyil; ñaari junniy nit ñuy nekk ak moom ca Migmas ak ca tundi Betel, ak junniy nit ñu nekk ak Yonatan doomu Sóol ca Gibeya gu Beñamin. Ña ca des mu yiwi leen, ñu ñibbi seeni xayma. <sup>3</sup> Yonatan nag song dalub waa Filisti ca Geba. Waa Filisti yég ko. Ba mu ko defee Sóol wal-lu liit ga ca réew ma mépp, ne: «Na ko Ebrë yi dégg!» <sup>4</sup> Ñu yégal Israyil gépp la xew ne leen: «Sóol song na dalub waa Filisti, ba tax waa Filisti jéppi bànni Israyil.» Gàngoor ga daldi daje, topp ca gannaaw Sóol ca Gilgal. <sup>5</sup> Ci biir loolu waa Filisti daje ngir xareek Israyil. Ña ngaak ñetti junniy† watiiri xare ak juróom benni junniy gawar, xarekat ya bare, mel ni feppi suufas géej. Ñu dem dali ca Migmas, ca penkub Bet Awen.

<sup>6</sup> Niti Israyil nag gis diggante bu metti bi ñu tollu ndax na ñu tance seen gàngoor ga. Ñu dem làquji ci ay xunteek ay dédd ak ay doj, aki seyaan aki kàmb. <sup>7</sup> Am na sax ay Ebrë yu jàll dexu Yurdan, wuti réewum Gàdd ak Galàdd. Fekk na Sóol a nga ca Gilgal ba tey. Mbooloom xareem ma mépp nekk faak moom, di pat-pati ndax tiitaange.

<sup>8</sup> Mu négandiku juróom ñaari fan, diir ba ko Samiyel àppaloon. Waaye taxul Samiyel agsi Gilgal. Mbooloo ma

tàmbalee dëddu Sóol, di tasaaroo. <sup>9</sup> Ba loolu amee Sóol ne: «Indil-leen ma saraxu rendi-dóomal bi, ak saraxu cantu biir jàmm bi.» Ñu indil ko, mu daldi def saraxu rendi-dóomal bi. <sup>10</sup> Naka la def saraxu rendi-dóomal bi ba sottal rekk, Samiyel ne jaas. Sóol génn gatandu ko, ngir nuyü ko. <sup>11</sup> Samiyel ne ko: «Loo def nii?» Sóol ne ko: «Man kat damaa gis mbooloo mi dëddu ma, di tasaaroo, te yaw it dikkoo bésu àpp bi. Rax ci dolli waa Filistee nga daje ca Migmas. <sup>12</sup> Ma noon, waa Filisti dinañu ma songsi Gilgal, te sàkkooguma ndimbalu Aji Sax ji. Looloo ma taxa sàcc sama bopp rekk, ba def saraxu rendi-dóomal bi.» <sup>13</sup> Samiyel ne Sóol: «Ag ndof nga def, ndax jëfewuloo santaane bi la sa Yàlla Aji Sax ji santoon. Soo ko defoon, Aji Sax ji dina saxal sa nguur ci kaw Israyil ba fàww. <sup>14</sup> Léegi nag sa nguur du wéy; Aji Sax ji sàkkul na boppam ki xolam jubool, te fal na ko njiitu ñoñam, ndax yaa sàmmul li Aji Sax ji santaane.»

<sup>15</sup> Ba mu ko defee Samiyel bàyyikoo Gilgal, dem Gibeya gu Beñamin. Sóol nag waññ ñi mu àndal, ñu tollu ci juróom benni téeméeri góor.

### *Yonatan def na njàmbaar*

<sup>16</sup> Sóol ak doomam Yonatan, ak gàngoor ga ànd ak ñoom ña nga dal ca Geba ‡ gu Beñamin, waa Filisti dal ca Migmas. <sup>17</sup> Ci biir loolu genn gàngooru yàqkat def ñetti kurél, jóge ca dalub waa Filisti. Genn ga jubal bëj-gànnaar, aw yoonu Ofra ca diiwaanu Suwal, <sup>18</sup> ñaareel ga jubal sowu ca Bet Oron, ñetteel ga jëm penku ca tund ya tiim xuru Ceboyim, fa féeteek màndin ma.

<sup>19</sup> Booba nag benn tegg amul woon ca réewum Israyil ba mu daj, ndax waa Filisti dañu noon: Bu Ebrë yi sàkk ay saamar aki xeej. <sup>20</sup> Moo tax bànni Israyil gépp, ku ci bëggoona nàmmlu sa ngajju mbaa sa daba, mbaa sa sémmiñ, mbaa sa sawta, doo man lu moy dem ca téggi waa Filisti. <sup>21</sup> Ku ci nekk, saa yu sa ngajju

\* **13:1** 13.1 Sóol falu na ñaari at bala ñoo tànn Daawuda, mi koy wuutu. Seetal ci 16.13 ak *Jëf ya* 13.21. † **13:5** 13.5 3 000: mooy lim bi ñu siiwal ni ñu ko tekkee ci làkku gereg ak yeneen làkk. ‡ **13:16** 13.16 Geba: seetal ci 13.3.

dayee, mbaa sa daba, ñaari ñetteelu si-ikal nga koy daasloo, njég gu jafe, tollook ñaari ñetteelu dogu xalis. Boo dee daaslu ab roqub ñetti càq, mbaa sémmiñ, mbaa ngay jubbantilu catal ràbbu, genn-wàllam ngay fey. <sup>22</sup> Looloo tax keroog bésub xare ba, du benn xarekat bu ànd ak Sóol ak Yonatan, te yor saamar mbaa xeej ci loxoom. Mennum Sóol rekk a ci amoon, mook doomam Yonatan.

<sup>23</sup> Ci biir loolu ab kurélu xarekati waa Filisti dem, taxawi ca jállukaayu Migmas ba.

## 14

### *Yonatan song na waa Filisti*

<sup>1</sup> Ci fan yooyu Yonatan doomu Sóol wax surga ba koy gàddul ngànaayam, ne ko: «Kaay nu dem ba ca gàngooru Filisti ga ca wàlla.» Baayam nag, waxu ko ci dara. <sup>2</sup> Fekk na baayam a nga dal fa Gibeya yem, ca ker garabu gèrenaat ga ca Migron. Mbooloo ma ànd ak moom tollu ci juróom benni téeméeri góor. <sup>3</sup> Axiya ma nga fa woon, sol xar-sànnim sarxalkat. Axiya mooy doomu Ayitub, mi bokk ak Ikabot seen baay Fineyas; Fineyas moomu, Eli, sarxalkatu Aji Sax ja ca Silo, mooy baayam. Mbooloo ma nag yéguñu ne Yonatan dem na. <sup>4</sup> Poot ba Yonatan jaare, wuti dalub waa Filisti, ñaari doj yu mag a sampe woon, séq ko. Ñu dippee wenn doj wa Boses, weneen wa di Sene. <sup>5</sup> Wenn doj waa nga sampe wetu bëj-gànaar, janook Migmas, wa ca des sampe wetu bëj-saalum, janook Geba\*.

<sup>6</sup> Yonatan ne gàddukatu gànnaayam: «Ayca nu dem ba ca dalub yéefar yee. Jombul Aji Sax ji defal nu yiw, ndax dara du tee Aji Sax ji maye ndam, nu bareek nu néew.» <sup>7</sup> Ba loolu amee gàddukatu gànnaayam ne ko: «Ayca, loo namm rekk, sang bi, yaw laa àndal ba jeex tàkk.» <sup>8</sup> Yonatan ne ko: «Ayca nu dem ba ca ñoom, feeñu leen. <sup>9</sup> Bu ñu nu nee: “Taxawleen foofu, ba nu fekksi leen,” nu yem fa, bañ leena fekki. <sup>10</sup> Waaye bu ñu nee: “Ayca, dikkleen,” nu daldí dem te

xam ne Aji Sax jee leen teg ci sunu loxo. Nan def loolu ab takk.»

<sup>11</sup> Ba loolu amee ñu feeñuji dalub waa Filisti, ñoom ñaar ñépp. Waa Filistee nga naan: «Xool-leen! Ay Ebraa ngay génne pax ya ñu làqu woon.» <sup>12</sup> Ci kaw loolu waa dal ba ne Yonatan ak gàddukatu gànnaayam: «Ée, dikkleen rekk, nu xamal leen lu tuut.» Yonatan ne gàddukatu gànnaayam: «Dikkal, topp ci man. Aji Sax ji teg na leen ci loxol Israyil.» <sup>13</sup> Yonatan ñalgu ca kaw tund wa, gàddukatu gànnaayam topp ko. Yonatan a ngay jam, waa Filisti di daanu, gàddukatu gànnaayam ba di leen jekkli ca gannaawam. <sup>14</sup> Cong mu jèkk mooma Yonatan song, mook gàddukatu gànnaayam, lu tollook ñaar fukki góor lañu ca tèral ci dénd bu wara tollook xéyu nag. <sup>15</sup> Ci kaw loolu tiitaange dajal dal baak àll ba ko wër, ak mbooloo ma mépp; muy dal ba, di kuréli yàqkat ya. Rax ca dollu suuf sa yèngu, muy tiitaange lu Yàlla wàcce.

<sup>16</sup> Fekk na ay jongrukati Sóol a nga tollu ca Gibeya gu Beñamin. Ñu jekki séen gàngooru Filisti gay raj-rajloo, fu ne ñu jëm fa. <sup>17</sup> Sóol ne ña ànd ak moom: «Wooteleen, ba xam ku jóge ci nun.» Ñu woote, Yonatan ak gàddukatu gànnaayam wuute. <sup>18</sup> Sóol ne Axiya sarxalkat ba: «Indil gaalu Yàlla gi.» Bésub keroog gaalu Yàlla gaa ngaak bànni Israyil. <sup>19</sup> Naka la Sóol di wax ak sarxalkat bi, coow la ca dalub waa Filisti gèna jolli. Sóol ne sarxalkat bi: «Ah, bàyyi ko sax.» <sup>20</sup> Ba mu ko defee Sóol ak gàngoor ga ànd ak moom gépp daje, dem ca xare ba. Gisufu lu moy waa Filisti ne kër-kër, ne képp, di jamante seeni saamar. <sup>21</sup> Ci biir loolu Ebrë yi nangul woon waa Filisti démb ak bëkk-démb te nekkandook ñoom ca dal baak fa ko wër fépp sax, ne waññet, faraat ak seen bokki bànni Israyil ya ànd ak Sóol ak Yonatan. <sup>22</sup> Mboolem bànni Israyil ya làqu woon ca tundi Efrayim dégg ne waa Filisti daw nañu. Ñoom it ne leen dann ca xare ba. <sup>23</sup> Noonu la Aji Sax ji maye Israyil ndam bésub keroog, xare bay law, ba ca wàlla

\* 14:5 14.5 Geba: seetal ci 13.3.

Bet Awen.

### *Sóol wax na lu ëpp*

<sup>24</sup> Bésusb keroog mbooloom Israyil jàq nañu, ndax ngiñ lu Sóol teg ci seen kaw, ne: «Képp ku lekk fii ba ngoon te feyooguma ci samay noon, yal na alku.» Mbooloo ma mépp, kenn sexu ca dugub. <sup>25</sup> Ci kaw loolu waa réew ma mépp dem ba ca gott ba. Fekk na ag lem a nga fa ca suuf. <sup>26</sup> Ba mbooloo ma duggee ca biir gott ba, yemuñu ca lu moy lem jay xelli, waaye kenn sàkku ci, jëme ci gémmiñam, ndax ragal ngiñ la. <sup>27</sup> Yonatan nag yégul woon ngiñal baayam la mu teg mbooloo ma. Mu tàllal yet wa ca loxoom, capp cat la ca lem ja, sex, bët ya daldi leer. <sup>28</sup> Kenn ca mbooloo ma ne ko: «Aa! Ngiñ lii de, sa baay giñoon na ko ci kaw mbooloo mi, ne: “Képp ku lekk tey, yal na alku,” moo tax mbooloo mi néew doole.» <sup>29</sup> Yonatan ne: «Sama baay de yàqal na mbooloo mi. Xool-leen rekk ni samay bët leere ndax lem sii ma ñam! <sup>30</sup> Astamaak bu mbooloo mi lekkoon tey ci lël ja ñu nangoo ci noon yi! Du ci la jéllu waa Filisti doon gëna réy a waay?»

<sup>31</sup> Bésusb keroog bànni Israyil a dumaa waa Filisti ca Migmas ba ca Ayalon. Bànni Israyil sonn lool nag. <sup>32</sup> Ba loolu amee ñu sèxëtoo lël ja, jël ca gàtt yaak nag ya ba ca wëllu ya, tër ca suuf, boole yàpp waak deret ja, lekk. <sup>33</sup> Ñu yegge ko Sóol, ne ko: «Mbooloo ma kat a nga nee, di moy Aji Sax ji, di lekk yàpp wu ànd ak deretam.» Sóol ne: «Yeenaka fecci kóllère! Bérañal-leen ma fii aw doj wu mag léegi.» <sup>34</sup> Gannaaw loolu mu joxe leneen ndigal, ne: «Tasaaroolen ci biir mbooloo mi, ne leen ñu indi fii ñoom ñépp seeni nag ak seeni gàtt. Fii lañuy rendee jur gi, door koo lekk. Su ko defee duñu moy Aji Sax ji, di lekk yàpp wu ànd ak deretam.» Mbooloo mépp daldi dikk guddig keroog, ku nekk akaw nagam. Ñu rendi foofa. <sup>35</sup> Sóol daldi fay tabax ab sarxalukaay, ñeel Aji Sax ji. Boobu sarxalukaay la jékka tabax ñeel Aji Sax ji.

### *Bànni Israyil jot na Yonatan*

<sup>36</sup> Ba loolu amee Sóol ne: «Nan toppi waa Filisti ci guddi gi, nu sèxëtoo seen alal ba bët set, te bunu ci bàyyi kenn, mu dund.» Mbooloo ma ne ko: «Loo bëgg rekk, defal!» Sarxalkat ba nag ne ko: «Nanu ko jékka diis Yàlla fii.» <sup>37</sup> Sóol laaj Yàlla ne ko: «Ndax ma topp waa Filisti? Ndax dinga leen teg ci loxol Israyil?» Bésusb keroog nag Yàlla tontuwul. <sup>38</sup> Sóol ne: «Yeen njiiti mbooloo mi yépp, dikkleen fii, nu seet ba gis bàkkaarub tey jii, lu mu doon. <sup>39</sup> Ndax giñ naa ci Aji Sax jiy dund, wallukatub Israyil, bu doon sax lu sama doom Yonatan ci boppam def, dee rekk ay àtteem.» Mbooloo mépp, kenn tontuwu ko. <sup>40</sup> Mu ne bànni Israyil gépp: «Taxaweleen nee, maak sama doom Yonatan, nu taxawe nii.» Mbooloo ma ne Sóol: «Loo bëgg rekk, defal.» <sup>41</sup> Sóol ñaan ci Aji Sax ji, ne ko: «Yaw Yàllay Israyil, ngalla xamleel liy dëgg.» Ñu daldi tegoo bant, mu dal ci kaw Yonatan ak Sóol, mbooloo ma wàcc. <sup>42</sup> Sóol ne: «Tegal-leen nu bant sama digganteek Yonatan.» Ñu tegal leen, mu dal ca doomam Yonatan.

<sup>43</sup> Sóol ne Yonatan: «Wax ma loo def.» Yonatan ne ko: «Aylayéwén maa ñam tuuti ca lem, ja ma cappe sama catu yet wi ma yoroon ci sama loxo. Maa ngi, naa dee!» <sup>44</sup> Sóol ne ko: «Na ma Yàlla teg mbugal mu gëna tar, waaye yaw Yonatan dinga dee déy!» <sup>45</sup> Mbooloo ma nag ne Sóol: «Lan? Yonatan dee, moom mi may Israyil ndam lu réy lii? Xalaateesu ko moos! Giñ nanu ci Aji Sax jiy dund, du lenn luy rote ci kawaru boppu Yonatan sax, dal fi suuf, ndax Yàlla la àndal def lii tey.» Noonu la mbooloo ma jote Yonatan, ba deewul. <sup>46</sup> Ba loolu wéyee Sóol noppee dàq waa Filisti, waa Filisti dellu ca seenum réew.

### *Sóol am na ndam*

<sup>47</sup> Gannaaw ba Sóol feddlee nguuram ca Israyil, xare naak seen noon ya leen wër yépp: Mowabeen ñaak Amoneen ñaak Edomeen ñaak buuri waa Soba, ak waa Filisti. Mboolem fu mu walbatiku rekk, moo daan. <sup>48</sup> Njàmbaar la xaree, duma Amalegeen ña, ba musal Israyil ca ña doon sèxëtoo seen alal.

<sup>49</sup> Doomi Sóol yu góor nag ñoo doon: Yonatan, ak Iswi ak Malkisuwa; ñaari doomam yu jigéen, di Merab mi ci gën di mag, ak Mikal mi gën di ndaw. <sup>50</sup> Soxnas Sóol moo doon Ayinowam, Ayimaas di baayu Ayinowam. Njiitu xareem moo doon Abner doomu Ner baayu Sóol bu ndaw, <sup>51</sup> Kis miy baayu Sóol, ak Ner, baayu Abner, Abyel ay seen baay.

<sup>52</sup> Xare bu metti la woon seen digg ak waa Filisti, giiru dundu Sóol gépp. Moo tax fu Sóol gisaan boroom kàttan mbaa boroomu fit, da koy dollikoo.

## 15

### *Sóol tooñati na*

<sup>1</sup> Samiyel daa waxoon Sóol, ne ko: «Man la Aji Sax ji yebal, ngir ma fal la buurub Israyil, aw ñoñam. Kon déglul kàddu yii Aji Sax ji wax. <sup>2</sup> Aji Sax ju gàngoor yi dafa wax ne: “Maay dikke mbugal mu faj la Amalegeen ña defoon Israyil, tëru leen ca yoon wa, ba ñuy génn Misra. <sup>3</sup> Demleen léegi, songi Amalegeen ñi. Faagaagal-leen\* seen lépp, te buleen leen ñeewante; reyleen góor ak jigéen, gone yi ba ci ñiy nàmp, ak nag ak gàtt, ak giléem ak mbaam.”»

<sup>4</sup> Ba loolu amee Sóol woo gàngoor ga, lim leen ca Telem, ñuy ñaar téeméeri junniy xarekat yuy deme tànk, ak fukki junniy góori Yudeen. <sup>5</sup> Sóol dem ba jot dèkkub Amalegeen ña, daldi waajal am tëru ca xur wa. <sup>6</sup> Mu yónnee ca Keneen ña, ne leen: «Demleen, dawleen jóge ci biir Amalegeen ñi, bala ma leena buubaaleek ñoom, te ba bànni Israyil di génn Misra, yeena leen jiwoon ngor ñoom ñépp.» Keneen ña daw, jóge ca biir Amalegeen ña.

<sup>7</sup> Ba mu ko defee Sóol song Amalegeen ña, dale ko Awila ba dèkk ba ñuy wax Sur ca penkub Misra. <sup>8</sup> Mu jàpp Agag buurub Amalegeen ña, gàngoor ga gépp, mu faagaagal, leel leen ñawkay saamar. <sup>9</sup> Sóol ak gàngooram nag bàyyi Agag, muy dund, mook la gëna baax ca nag yaak gàtt ya: jurug yafal gaak kuuy yu ndaw

ya, mboolem lu baax daal. Néeguñu caa faagaagal dara, waaye mboolem lu ca ñàkk solo mbaa mu yooy, loola lañu faagaagal.

### *Sóol ñàkk na*

<sup>10</sup> Gannaaw loolu kàddug Aji Sax ji dikkal Samiyel ne ko: <sup>11</sup> «Réccu naa li ma fale Sóol buur, ndax dèddu na ma, te samay ndigal, jéfewu ko.» Samiyel am ca njàqare lool, ba fanaanee tinu Aji Sax ji guddi gépp. <sup>12</sup> Ba bët setee Samiyel teela jóge dem ngir dajee Sóol. Ñu ne ko Sóol dem na dèkk ba ñuy wax Karmel, te defu fa lu moy yékkati am taax, terale ko boppam. Jóge na fa it, jàll ba Gilgal.

<sup>13</sup> Ba Samiyel demee ba gis Sóol, Sóol ne ko: «Yal na la Aji Sax ji barkeel. Def naa la Aji Sax ji santaane!» <sup>14</sup> Samiyel ne ko: «Ana meem joojuy tàbbi sama nopp bii, lu mu doon? Ak looluy nàññi, may dégg?» <sup>15</sup> Sóol ne ko: «Ca Amalegeen ña de lañu ko jële. Xarekat yee bàyyi li gën ci gàtt yeek nag yi, ngir sarxal ko sa Yàlla Aji Sax ji. Waaye la ca des moom, faagaagal nañu ko.» <sup>16</sup> Samiyel ne Sóol: «Defal ndànk! Dinaa la xamal li ma Aji Sax ji wax biig.» Mu ne ko: «Waxal!» <sup>17</sup> Samiyel ne ko: «Xanaa du yaa gisaloon sa bopp ne lu tuut nga woon, te yaay njiital giiri Israyil tey; Aji Sax ji fal la, ngay buurub Israyil. <sup>18</sup> Aji Sax ji teg la ci yoon wi, ne la: “Demal faagaagal moykati Amalegeen ñi. Xareel ak ñoom, ba jeexal leen tàkk.” <sup>19</sup> Lu la tere wona déggal Aji Sax ji, xanaa di saax-saaxee alal ji, di def li Aji Sax ji ñaawlu?»

<sup>20</sup> Sóol ne Samiyel: «Ndaxam déggal naa Aji Sax ji. Dox naa yoon wi ma Aji Sax ji yebal; indi naa Agag buurub Amalegeen te Amalegeen ñi, faagaagal naa leen. <sup>21</sup> Xarekat yi daal a tànné ci lèl ji li gën ci gàtt yeek nag yi ñu wara faagaagal, ngir sarxal ko sa Yàlla Aji Sax ji ca Gilgal.»

<sup>22</sup> Samiyel ne ko:

«Bànnexu Aji Sax ji ci saraxi rendi-dóomal ak yeneen sarax, mbaa tolloo naak bànnex ba muy am ci dégg ndigalal Aji Sax ji?

\* **15:3** 15.3 Lu Aji Sax ji aayal lañu koy def, yàq ko yaxee; muy nit, mbaa ag jur mbaa alal.



Ma ne, dégg ndigal a gën ab sarax;  
xol bu nangoo gën nebbonu kuuy.

<sup>23</sup> Bàkkaar ngisaane la déggadi yemool,  
ñaawtéefu bokkaale tollook reewande.  
Yaa gântal ndigalu Aji Sax ji,  
Moom mu gântal sa nguur.»

<sup>24</sup> Sóol ne Samiyel: «Bàkkaar naa!  
Ndax maa wàcc kàddug Aji Sax ji ak say  
digal, ndax ragal mbooloo mi, ba topp  
seen coobare. <sup>25</sup> Léegi nag ngalla waay,  
baal ma sama bàkkaar bii te walbatiku,  
ànd ak man, ma sujjóotali Aji Sax ji.»

<sup>26</sup> Samiyel ne Sóol: «Duma walbatiku ànd  
ak yaw, ndax yaa gântal kàddug Aji Sax  
ji, Aji Sax ji gântal sa nguur ci Israyil.»

<sup>27</sup> Naka la Samiyel ne wërëñ, di dem,  
Sóol jàpp ca catal mbubb ma, mu dagg.

<sup>28</sup> Samiyel ne ko: «Nii la Aji Sax ji dagge  
nguurug Israyil ci yaw bés niki tey, jox ko  
keneen ku la gën. <sup>29</sup> Te Aji Nekk-Fàww ju  
Israyil ji du fen, du réccu, ndax du nit bay  
réccu.»

<sup>30</sup> Sóol dellu ne: «Bàkkaar naa! Waaye  
ngalla waay sagal ma ci sama kanam  
magi askan wi ak ci kanam Israyil. Wal-  
batikul, ànd ak man rekk, ma sujjóotali sa  
Yàlla Aji Sax ji.» <sup>31</sup> Ba loolu amee Samiyel  
walbatiku topp Sóol. Sóol dem sujjóotali  
Aji Sax ji.

<sup>32</sup> Gannaaw loolu Samiyel ne: «Indil-  
leen ma Agag buurub Amalegeen ñi.»  
Agag nag dikk, wutsi ko, ne finaax. Booba  
Agag a nga naan ca xelam: «Dee moom,  
tiitatum ko, wees na!» <sup>33</sup> Samiyel nag ne  
ko: «Ni aw jigéen ñàkke ay doom yu leen  
sa saamar xañ, ni la sa ndey di bokke tey  
ci jigéen ñi ñàkk doom.» Ci kaw loolu  
Samiyel rey Agag fa kanam Aji Sax ji ca  
Gilgal.

<sup>34</sup> Ba mu ko defee Samiyel dellu Raama,  
Sóol moom ñibbi kërám ca Gibeya gu  
Sóol. <sup>35</sup> Ba ni Samiyel faatoo, seeteetul  
Sóol. Teewul mu jooy Sóol, waaye fekk  
na Aji Sax ji réccu la mu fal Sóol buurub  
Israyil.

## Lii moo dox diggante Sóol ak Daawuda

### 16

*Yàlla fal na Daawuda*

<sup>1</sup> Gannaaw ba loolu wéyee Aji Sax ji  
ne Samiyel: «Yaw foo àpp sa jooy yi  
ngay jooy Sóol te man maa ko dàq, ba  
doonatul buur ci Israyil? Gannaaw maa  
foq nguuram ci Israyil kay, duyal sa  
béjjén diwu oliw ba mu fees te nga dox,  
ma yebal la ci Yese waa Betleyem bi.  
Gis naa ciy doomam ki may fal buur.»

<sup>2</sup> Samiyel ne ko: «Ana nu ma fay deme?  
Sóol da koy dégg, rey ma!» Aji Sax ji ne  
ko: «Aw nag wu jigéen ngay jël, yóbbu,  
ne ko sarxalsi Aji Sax ji moo la indi. <sup>3</sup> Su  
ko defee nga woo Yese ca sarax sa. Man  
maa lay xamal nooy def, ba nga diwal ma  
ki ma la wax, fal ko.»

<sup>4</sup> Samiyel def la Aji Sax ji wax. Ba mu  
agsee Betleyem, magi dëkk ba gatandoo  
ko tiitaange, ne ko: «Mbaa tàñki jàmm?»

<sup>5</sup> Samiyel ne leen: «Jàmm rekk. Sarxalsi  
Aji Sax ji moo ma indi. Sell-luleen te dikk  
ànd ak man ca sarax sa.» Ci kaw loolu mu  
sellal Yese ak doomam yu góor, woo leen  
ca sarax sa.

<sup>6</sup> Naka lañu agsi, Samiyel gis Elyab,  
daldi ne ca xelam: «Xam naa kii fi kanam  
Aji Sax ji rekk mooy tànnéefam!» <sup>7</sup> Aji Sax  
ji nag ne Samiyel: «Bul xool ci melokaanu  
kii, mbaa jëmmu taxawaayam, ndax  
gântal naa ko. Lii du ci gis-gisu nit. Nit,  
li fees bêtam lay gis, waaye Aji Sax ji ci  
xol lay xool.» <sup>8</sup> Yese daldi woo Abinadab,  
indi ko fi kanam Samiyel. Mu ne: «Aji  
Sax ji tànnul kii ba tey de!» <sup>9</sup> Yese indi  
Simeya, Samiyel ne: «Aji Sax ji tànnul kii  
it.» <sup>10</sup> Yese indi juróom ñaari doomam  
yu góor fa kanam Samiyel, Samiyel ne ko:  
«Aji Sax ji tànnul kenn ci ñii.»

<sup>11</sup> Samiyel nag ne Yese: «Xale yu góor yi  
yemb nañu?» Yese ne ko: «Xanaa ki gën  
di ndaw. Ma ngay sàmm gàtt ya.» Mu  
ne ko: «Yónneel, woolu ko, dunu jekki te  
dikkul fii.» <sup>12</sup> Yese yónnee, ñu indi ko.  
Ma nga def ku xees, neexa xool, bêt ya  
leer nàññ. Aji Sax ji ne Samiyel: «Diw  
ko, kii la.» <sup>13</sup> Samiyel fab béjjénu diw ba,  
diw ko fa kanam magam ña. Ba mu ko  
defee Noowug Aji Sax ji ne milib ca kaw  
Daawuda, dale fa ànd ak moom bésuub  
keroog. Ba loolu wéyee Samiyel moom,  
dem dëkk ba ñu naan Raama.

*Daawuda dugg na ca liggéeyu Sóol*

<sup>14</sup> Ci kaw loolu Noowug Aji Sax ji dëddu Sóol, ngelaw lu aay bàyyikoo ci Aji Sax ji, ub boppam. <sup>15</sup> Ay dagi Sóol wax Sóol ne ko: «Lii kat ngelawal Yàlla lu aay la. Moo ub sa bopp. <sup>16</sup> Nu ngii nag fi sa kanam, joxeel ndigal rekk sang bi, nu wutali la ku mana xalam. Su ko defee bu la ngelawal Yàlla lu aay songee, mu xalamal la, nga am jàmm.»

<sup>17</sup> Sóol ne dagam ya: «Ayca, seetal-leen ma ku mane xalam bu baax, indil ma ko.»

<sup>18</sup> Kenn ca dag ya ne ko: «Man de, gis naa jenn doomu Yese waa Betleyem bi. Ku mana xalam la te jàmbaare. Ñeyi xare la. Ku déggi wax, ku góorayiw, te Aji Sax ji ànd ak moom.»

<sup>19</sup> Ba loolu amee Sóol yebal ay ndaw ca Yese ne ko: «Yónnee ma sa doom Daawuda, ma ca gàtt ya.» <sup>20</sup> Yese yebal doomam Daawuda, daldi takk mbaam, sêf ko mburu ak mbuusu biiñ ak ab tef, ngir mu joxal ko Sóol yóbbal. <sup>21</sup> Daawuda dem ca Sóol, daldi tàmbali di ko liggéeyal. Sóol sopp ko lool. Daawuda nag mujj di gàddukatu gannaayam. <sup>22</sup> Ci kaw loolu Sóol yónnee ca Yese, ne ko: «Bàyyil Daawuda, mu di ma liggéeyal far, ndax bég naa ci moom.» <sup>23</sup> Ci kaw loolu, saa yu ngelawal Yàlla songee Sóol, Daawuda fab xalam ga, xalamal ko, Sóol féex, am jàmm, ngelaw lu aay la dëddu ko.

## 17

### *Golyaat dëkk na bànni Israyil*

<sup>1</sup> Waa Filistee boole woon seeni gàngoor ngir xare. Ñu daje ca dëkk ba ñu naan Soko ca diiwaanu Yuda, daldi dale ca Efes Damim diggante Soko ak Aseka.

<sup>2</sup> Sóol ak waa Israyil nag daje, dale ca xuru Ela, làng-dér ngir jànkoondeek waa Filisti. <sup>3</sup> Waa Filistee nga taxawe tund wii, bànni Israyil taxawe tund wee, xur wa dox seen diggante.

<sup>4</sup> Ci biir loolu jenn jàmbaar génne ca làngu waa Filisti. Ku ñuy wax Golyaat\*, dëkke Gaat, taxawaayam di juróom benni xasab yu teg diggante baaraamu déy ak digg, xawa tollu ci ñetti meetar. <sup>5</sup> Mbaxanam xànjari la sol ak

kiiraayal dënnub juróom benn fukki kilo, ñu liggéeye ko waasintóori xànjari. <sup>6</sup> Ma nga takk kiiraayi yeel yu xànjari, gálloo xeeju xànjari bu ndaw ca waggi ya. <sup>7</sup> Bantu xeejam bu mag baa nga saf mbaamum ràbb, ñawkay xeej ba di weñ gu èpp juróom ñaari kilo. Gàddukatu pakkam baa ngay dox, jiitu ko.

<sup>8</sup> Golyaat taxaw, janook làngi Israyil, àddu ca kaw, ne leen: «Ana lu ngeen di génni, làng-déral xare nii? Xanaa du maay waa Filisti ji, yeen ngeen di surgay Sóol? Tabbleen genn góor, mu wàcc, dajeek man. <sup>9</sup> Su ma manee ba rey ma, nuy seeni jaam; waaye su ma ko manee ba rey ko, ngeen di sunuy jaam, di nu jaamu.» <sup>10</sup> Waa Filisti ba neeti: «Maa dëkk làngi Israyil bés niki tey. Booleleen maak genn góor rekk, nu xeex.» <sup>11</sup> Ba Sóol ak bànni Israyil yépp déggee waxi waa Filisti jooju, jàq nañu, tiit nañu lool.

### *Daawuda def na jaloore*

<sup>12</sup> Daawuda nag moo doon doomu góor googu dëkk Efrata ca Betleyem ga ca diiwaanu Yuda, ñu di ko wax Yese. Yese amoon na juróom ñetti doom yu góor. Góor ga, ca jamonoy Sóol, mag mu ñu nawloo la woon. <sup>13</sup> Ñetti doomi Yese yu góor yu mag ñoo ràngu woon, topp Sóol ca xare ba. Ñetti doom ya dem xare, taaw ba Elyab lañu koy wax, ka ca topp di Abinadab, ñetteel ba di Simeya.

<sup>14</sup> Daawudaa ca gënoon di ndaw. Ñetti magam yooyu ñoo toppoon Sóol, <sup>15</sup> waaye Daawuda da daan jaabantee fa Sóol ak Betleyem ga muy sàmme gàtti baayam.

<sup>16</sup> Subaak ngoon nag waayu Filisti ja ne jaas taxaw, ba mu am ñeent fukki fan. <sup>17</sup> Ci biir loolu Yese ne doomam Daawuda: «Ayca, jèlal nattub mbool mii ak fukki mburu yii te nga daw, yóbbul ko sa mag ya ca dal ba. <sup>18</sup> Fukki dogi formaas yii, yóbbul ko seen njiitu kurél. Nemmikul seen jàmmu yaram te nga sàkku ci seen firnde, indil ma. <sup>19</sup> Sóol a ngaak ñoom ak waa Israyil gépp ca xuru Ela, di xareek waa Filisti.»

\* **17:4** 17.4 Golyaat: am na ñu ko gëna xam ci turu Jalut.

<sup>20</sup> Daawuda teela jóg ca èllëg sa, wacce gàtt ya ab wattukat, daldi jël yóbbal ga, dem na ko ko baayam sante. Naka la àgg ca dal ba, yemook gàngoor gay génnaale seen xaacuy xare, ngir làng-déri. <sup>21</sup> Bànni Israyil ak waa Filisti daldi dér, gàngoor janook gàngoor. <sup>22</sup> Ci biir loolu Daawuda wàcce yóbbal ga, wacce ko wattukatub cummikaay ba, daldi daw ba ca làngu xare ba. Mu agsi, nuyook ay magam. <sup>23</sup> Na muy wax ak ñoom, jàmbaar ja ñuy wax Golyaat waa Filisti ba dëkke Gaat, ne tëll génne ca làngi waa Filisti. Mu dellu ca wax jooju mu waxoon, Daawuda dégg ca.

<sup>24</sup> Ba bànni Israyil gépp gisee waa ja, dañoo dellu gannaaw, tiit lool. <sup>25</sup> Ña nga naan ca seen biir: «Gis ngeen waa jee di ñëw, dëkksi Israyil a ko yékkati. Képp ku ko rey de, Buur dina ko jox alal ju bare. Doomam la koy may jabar, te waa kër baayam, dina leen jagleel ab cér ci digg Israyil.» <sup>26</sup> Daawuda ne ña mu dendal: «Ngeen ne, lees di defal ku rey waa Filisti bii, ba faj gâceeg Israyil? Ak kuy yéefaru waa Filisti bii sax, bay dëkk gàngoori Yàlla jiy dund?» <sup>27</sup> Nit ña dellu ca lola ñu waxoon, ne moom lañuy defal ku rey waa ja.

<sup>28</sup> Elyab, magu Daawuda, dégg Daawuda di wax ak ñooña. Mu mer, ne ko: «Yaw sax lu la fi indi? Ak koo wacce la fay gàtt ak as néew ca àll ba? Xam naa bu baax sag réy ngise, ak njubadi gi nga mébét. Seetaansi xare bi donj a la fi indi!» <sup>29</sup> Daawuda ne ko: «Waaw, man lu ma def? Xanaa du wax donj?» <sup>30</sup> Daawuda jóge ca mag ja, dem ca keneen, laaj ko mbir mooma, tont la di lenn.

<sup>31</sup> Ci kaw loolu ñu dégg kàddu ya ca Daawuda wax, yegge ko Sóol. Sóol woolu ko. <sup>32</sup> Daawuda dikk ne Sóol: «Bu kenn yoqil waa jii, sang bi. Man maay dem xeex ak waa Filisti bii.» <sup>33</sup> Sóol ne Daawuda: «Déedéet, yaw manoo songi waa Filisti bii, di xeex ak moom. Gone donj nga, te moom cag ndawam la dale di nitu xare.» <sup>34</sup> Daawuda ne Sóol: «Sang bi, bu may sàmm sama gàtti baay, ba gaynde mbaa rab wu aay dikk, jël ci ab gàtt,

<sup>35</sup> maa koy topp, dóor ko, nangoo gàtt bi ci gémmiñam. Te bu ma songee, sikkim bi laay sèq, fàdd, mu dee. <sup>36</sup> Rey naa gaynde, rey naa weneen rabu àll wu aay, sang bi. Kon nag yéefaru Filisti bii it ni wenn ci yooyu rab rekk, ndax moo tēkku gàngoori Yàlla jiy dund. <sup>37</sup> Daawuda neeti: Aji Sax ji ma musal ci pàddum gaynde ak weneen rabu àll wu aay, moo may musal ci loxol waa Filisti bii.» Sóol ne Daawuda: «Demal boog, yal na Aji Sax ji ànd ak yaw.»

<sup>38</sup> Ba mu ko defee Sóol solal Daawuda yérey boppam, solal ko mbax-anam xànjari, solal ko kiiraayal dënn. <sup>39</sup> Daawuda ràngoo saamarub Sóol, ca kaw yérey ya, daldi jéema dox, mu të, ndax ñàkk koo miin. Daawuda ne Sóol: «Manumaa doxaale lii ndax miinuma ko», daldi koy summi. <sup>40</sup> Ba loolu amee Daawuda jël yetam, tànn ca dex ga juróomi doj yu rattax, yeb ca gafakag mbuusum sàmmam, daldi ñàbb mbaqam, wuti waa Filisti ba. <sup>41</sup> Ci biir loolu waa Filisti ba, dox, dikk ba jege Daawuda, gàddukatu pakkam jiitu ko. <sup>42</sup> Waa Filisti ba séentu, séen Daawuda; muy xale su góor su ndaw, xees te góorayiw, mu daldi koy xeeb. <sup>43</sup> Mu ne Daawuda: «Xanaa ab xaj laa, ba nga di ma jëlalu yet?» La ca tegu waa Filisti ba móolu ko ca turi tuuram, <sup>44</sup> ne ko: «Dikkal fii rekk, ba ma leele saw suux njanaaw yeek rabi àll yi.»

<sup>45</sup> Daawuda ne waa Filisti ba: «Yaw de yaa may jëlal ab saamar ak xeej bu mag ak bu ndaw, waaye man turu Aji Sax ju gàngoor yi laa lay dikke, Yállay làngi xarey Israyil, ji nga tēkku. <sup>46</sup> Bésub tey jii Aji Sax jee lay teg ci sama loxo, ma rey la, dog sa bopp. Tey jii sax laay leele njanaaw yeek rabi àll yi, néewi xarekati Filisti, ba àddina sépp xam ne Israyil am na Yàlla. <sup>47</sup> Mboolem ñii fi daje dinañu xam ne du saamar te du xeej la Aji Sax jiy walloo, ndax Aji Sax jeey boroom xare bi, te moo leen teg ci sunuy loxo.»

<sup>48</sup> Ci kaw loolu waa Filisti ba daldi dikk, ba gèntee jege Daawuda, Daawuda riir, wuti làng ga, ngir dajeeek waa Filisti ba. <sup>49</sup> Mu yoor loxoom ca mbuusam, jël ca aw

doj, mbaq, jam waa Filisti ba ci jë, doj wa tàbbi ca biir jë ba. Mu ne jànjàn, dëpp kanam ga fa suuf. <sup>50</sup> Ag mbaq aku doj la Daawuda mane waa Filisti ba, jam ko, rey ko, te yorul saamar.

<sup>51</sup> Daawuda nag daw ba taxaw, tiim waa Filisti ba, jàpp saamaram, boccee ko ca mbar ma, jekkli ko, dog bopp ba. Waa Filisti gis ne seen ñeyu xare dee na, ñu daw. <sup>52</sup> Ba loolu amee mbooloom Israyil ak Yuda àddu xaacoondoo, daldi dàqi waa Filisti, ba jub xur wa, ba ca bunti Ekkron. Waa Filisti ya ñu rey ne wetar ca yoonu Saarayim ba Gaat, ba ca Ekkron. <sup>53</sup> Bànni Israyil nag wañnikoo ca ndàqum Filisti mu metti ma, daldi sèxëtoo seen dal ba. <sup>54</sup> Daawuda jël boppu waa Filisti ba, yóbbu Yerusalem, gannaayi waa ja, mu fat ca xaymab boppam.

<sup>55</sup> Lu jiitu loolu, ba Sóol gisee Daawuda, mu wuti waa Filisti ba, da ne Abner njiital mbooloom xareem: «Waaw, Abner, xale bii doomu kan a?» Abner ne ko: «Buur, giñ naa, nga fekke tey, xawma ko.» <sup>56</sup> Buur Sóol ne ko: «Nanga laajte, xale bii, doomu kan la.» <sup>57</sup> Naka la Daawuda rey waa Filisti ba, ba dikk, Abner jàpp ko, indi ko ca kanam Sóol. Daawuda nga ñàbb boppu waa Filisti ba, ba tey. <sup>58</sup> Sóol ne ko: «Yaw, gone gii, yaay doomu kan?» Daawuda ne ko: «Maay doomu Yese, sa surga ba dëkk Betleyem.»

## 18

### *Yonatan fas na kóllëreek Daawuda*

<sup>1</sup> Ba Daawuda di wax ak Sóol ba noppi, fekk na Yonatan yég ci xolam na mu taqook Daawuda ci biir cofeelu benn bakkan. Yonatan dafa soppoon Daawuda ni boppam. <sup>2</sup> Bésuub keroog la Sóol téye Daawuda, mayatu ko mu ñibbi kër baayam. <sup>3</sup> Ba loolu amee Yonatan fasook Daawuda kóllëre, ndax sopp ko ni boppam. <sup>4</sup> Ci biir loolu Yonatan summi turkeem, jox ko Daawuda, boole ca ay yérey xareem, ba ca saamaram ak fittam ak ngañayam sax. <sup>5</sup> Daawuda nag di dem ci bépp yoonu xare bu ko Sóol yebal, di ca am ndam. Sóol fal ko njiitu xarekat

ya, gàngoor gépp rafetlu loolu, jawriñi Sóol itam rafetlu ko.

### *Sóol a ngay fexeel Daawuda*

<sup>6</sup> Ba ñu demee ba xarekat yay ñibbi, gannaaw ba Daawuda reye waa Filisti ba, jigéeni mboolem dëkki bànni Israyil a génn gatanduji Buur Sóol, di fecc ak a woy, tabala ya ànd ak sarxolle ya ak xalam ya. <sup>7</sup> Ña ngay fo, di awoonte, naan: Sóol jam junneem, Daawuda jam fukki junneem.

<sup>8</sup> Sóol ñaawlu kàddu ga, mer lool. Mu ne ca xelam: «Daawuda lañu moomale fukki junni; man, junni! Lu ko deseeti lu moy jal bi?» <sup>9</sup> Bésuub keroog la Sóol dale ronni Daawuda.

<sup>10</sup> Ca èllëg sa ngelawal Yàlla lu aay ne milib ca kaw Sóol, muy waxtu ca digg kërám. Daawuda nag di ko xalamal, na mu daan def naka jekk, fekk Sóol ñàbb ab xeejam. <sup>11</sup> Mu jekki sànni xeej ba, te naan ca xelam: «Naa daaj Daawuda ci tabax bi!» Daawuda nag mbas ko ñaari yoon.

<sup>12</sup> Sóol daldi ragal Daawuda, ndax booba xam na ne Aji Sax jee ko dëddu, ànd ak Daawuda. <sup>13</sup> Ba loolu amee mu jële ko fi wetam, fal ko njiitu kurélu junniy xarekat, muy xareji, di délsi, jite gàngoor ga. <sup>14</sup> Daawuda baaxle ca yoonam yépp, Aji Sax ji ànd ak moom. <sup>15</sup> Ba Sóol gisee Daawuda àntule lool, mu gën koo ragal. <sup>16</sup> Teewul mboolem Israyil ak Yuda sopp Daawuda, ngir moo leen jiite woon, di xareji, di dikk.

### *Daawuda jël na doomu Sóol soxna*

<sup>17</sup> Ci kaw loolu Sóol ne Daawuda: «Sama taaw bu jigéen, Merab a ngii. Moom laa lay may. Nekkál ma sama jàmbaarú xare rekk, te xareel Aji Sax ji ay xareem.» Booba Sóol a nga naan ca xelam: «Bu ko sama loxo laal, nay loxol waa Filisti.»

<sup>18</sup> Daawuda ne Sóol: «Waaw, ana lu ma tekki, man maak samay bokk, sama askanu baay ci Israyil, ba wara mana goromlook Buur?» <sup>19</sup> Ba ñu demee ba wara jox Daawuda, Merab doomu Sóol ja, Àddiryel ma cosaanoo Mewola lañu ko may.

<sup>20</sup> Ci kaw loolu Mikal doomu Sóol bëgg Daawuda, ñu àgge ko Sóol, mu am ca mbégte. <sup>21</sup> Booba Sóol a nga naan: «Naa ko ko may, ngir mu doon ndëgg-sërëxam, ba waa Filisti teg ko loxo.» Sóol nag wax Daawuda, ñaareel bi yoon, ne ko: «Tey ngay samab goro.» <sup>22</sup> Ci biir loolu Sóol sant ay dagam, ne leen: «Diisool-leen maak Daawuda, ngeen wax ko ne ko: “Yaw kat, Buur am na bänneex ci yaw, te it dagam yépp a la sopp. Kon nag nangula doon gorob Buur.”» <sup>23</sup> Dagi Sóol ya déey Daawuda kàddu yooyu. Daawuda ne leen: «Ngeen defe ne goromlook buur daal, du dara? Man mii taqul dara, tekkiwuma dara!» <sup>24</sup> Dag ya yegge Sóol kàddu yooyu Daawuda wax.

<sup>25</sup> Sóol ne leen: «Waxleen Daawuda ne ko, Buur de sàkkuwul ub can: xanaa téeméeri mbuñukay waa Filisti yu mu feyoo ci noonam yooyu.» Booba la Sóol laloon mooy pexe mu tàbbal Daawuda ca loxol waa Filisti. <sup>26</sup> Dag ya yegge Daawuda kàddu yooya, doon gorob buur daldi koy jaral loola. Balaa àpp baa mat, <sup>27</sup> Daawuda dem na, mooki nitam ba rey ñaar téeméeri waa Filisti. Daawuda indi seeni mbuñuka, ñu waññal ko Buur ba mu mat sèkk, mu daldi yeyoo goromlook Buur. Ba loolu amee Sóol may Daawuda doomam Mikal. <sup>28</sup> Sóol nag xam xéll ne Aji Sax jee ànd ak Daawuda, te it doomam Mikal bëgg na ko, <sup>29</sup> mu gën koo ragalati. Fa la Sóol doxe doon noonub Daawuda ba fàww.

<sup>30</sup> Ci kaw loolu njiiti xarey Filisti di amal ay cong, noppiwuñoo xareek Israyil. Teewul saa yu ñu songaan, Daawudaay gëna am ndam mboolem jawriñi Sóol, ba mujj Daawuda amu tur lool.

## 19

### *Yonatan taxawu na Daawuda*

<sup>1</sup> Ba mu ko defee Sóol xamal doomam Yonatan ak dagam yépp ne reylu Daawuda mooy li mu nar. Te Yonatan doomu Sóol sopp Daawuda lool. <sup>2</sup> Yonatan yegge ko Daawuda, ne ko: «Sama baay a ngi lay wuta rey. Yaw nag fagarul kat te teela xëy èllëg, seet foo làquji te baña génn. <sup>3</sup> Man dinaa dem,

taxaw ci sama wetu baay fi nga nekk ci àll bi. Dinaa wax ak sama baay ci yaw, nu bokk taxaw ca tool ba ngay làquji, man ci sama bopp dinaa wax ak sama baay ci yaw ba gis nu mbir mi tédde, yegge la ko.» <sup>4</sup> Ci kaw loolu Yonatan wax baayam lu baax ci Daawuda, ne ko: «Buur, ngalla bul tooñ Daawuda, sa jaam bii, ndax moom kat tooñu la, lu baax rekk la la masa defal. <sup>5</sup> Jaay na bakkanam, ba rey waa Filisti ba. Aji Sax ji maye ca ndam lu réy, ñeel Israyil gépp, nga teg ci bët, am ca mbégte. Ana lu waral ngay tooñ, di tuur deretu jaamburu Yàlla bu mel ni Daawuda, reylu ko ci dara?» <sup>6</sup> Sóol nag déggal Yonatan, daldi ne: «Giñ naa ko ci Aji Sax jiy dund, deesul rey Daawuda.» <sup>7</sup> Yonatan woo Daawuda, nettali ko waxtaan wa wépp, door koo yóbbu ca Sóol, mu dellu di ko liggéeyal, na woon.

### *Mikal xettli na Daawuda*

<sup>8</sup> Ci kaw loolu xare jibaat, Daawuda dem xeexi ak waa Filisti, daan leen jéll bu réy, ñu daw. <sup>9</sup> Ci kaw loolu ngelaw lu aay lu Aji Sax ji dikkal Sóol, fekk ko toog ci biir këram, ñàbb ab xeejam, Daawuda di xalam. <sup>10</sup> Sóol di wuta jam Daawuda xeej bi, ngir daaj ko ca tabax ba. Daawuda nag mbas ko, mu jam xeej ba ca tabax ba. Daawuda daldi daw, ba raw guddig keroog.

<sup>11</sup> Sóol yebal ay ndaw ca kër Daawuda ngir ñu xoolal ko ko, ba bët set, ñu rey ko. Mikal, soxnas Daawuda, yégal ko Daawuda, ne ko: «Soo rawalewul sa bakkan ci guddi gi de, bu èllëgee dees na la rey.» <sup>12</sup> Ba loolu amee Mikal jaarale ko ca palanteer ba, mu wàcc, daw, ba raw. <sup>13</sup> Mikal jël gällaaju kër ga, teg ca lal ba, fab deru bëy, teg fa féeteek bopp ba, daldi koy sänge malaan. <sup>14</sup> Sóol yebal ay ndaw yu jàppsi Daawuda, Mikal ne: «Moom de daa wopp.» <sup>15</sup> Ci kaw loolu Sóol dellu yebal ndaw ya, ngir ñu dem ba gis ko. Mu ne leen: «Indil leen ma ko, booleek lal bi, ba ma rey ko!» <sup>16</sup> Naka la ndaw ya délsi, xool, gisuñu lu moy gällaaju kër ga ca kaw lal ba, ak deru bëy ba féeteek bopp ba. <sup>17</sup> Ba loolu amee Sóol ne Mikal:

«Ana lu waral nga wor ma nii, bàyyi sama noon, mu rëcc?» Mikal ne ko: «Moom kay moo ma ne: “Bàyyi ma, ma daw, lu ko moy ma rey la!”»

### *Sóol toppi na Daawuda ca Nayot*

<sup>18</sup> Noonu la Daawuda dawee ba raw. Mu fekki Samiyel ca Raama, wax ko la ko Sóol def lépp. Ñu ànd, mook Samiyel, dali ca Nayot. <sup>19</sup> Ñu yegge ko Sóol ne ko: «Ndeke Daawudaa nga Nayot ca dëkk ba ñuy wax Raama.» <sup>20</sup> Sóol yebal ay ndaw, ngir ñu jàpp Daawuda. Nit ña dikk, gis kurelu yonent yuy wax ay waxyu, Samiyel jiite leen. Ba loolu amee, ca kaw ndawi Sóol ya la Noowug Yàlla wàcc, ñuy wax ay waxyu, ñoom itam. <sup>21</sup> Ñu yegge ko Sóol, mu yebal yeneen ndaw, ñu dikk, di wax ay waxyu, ñoom it. Sóol dellóoti yebal ay ndaw, ñetteel bi yoon, ñu dikk, di wax ay waxyu, ñoom itam. <sup>22</sup> Mu jóg moom ci boppam, jëm Raama. Mu dikk ba ca teen bu mag ba ca Seeku, daldi laajte ne: «Ana fu Samiyel ak Daawuda nekk?» Ñu ne ko: «Ña nga ca Nayot ca Raama.»

<sup>23</sup> Sóol jubal yoonu Nayot ca Raama. Ba loolu amee, ca kawam, moom it, la Noowug Yàlla wàcc, muy wéy di wax ay waxyuy dem, ba àgg Nayot ca Raama. <sup>24</sup> Ci kaw loolu mu summiy yéreem, di wax ay waxyu moom it fa kanam Samiyel, daldi ne làndan, ne dun, bëccëg keroog gépp ak guddi ga gépp. Looloo waral ñu naan: «Moo Sóol it ci yonent yi laa?»

## 20

### *Yonatan wallu na Daawuda*

<sup>1</sup> Daawuda nag dawee Nayot, ca wetu dëkk ba ñuy wax Raama. Mu dikk ca Yonatan, ne ko: «Ana lu ma def? Ana ñaawtéef gu ma def, ak fu ma tooñe sa baay, ba muy wut sama bakkan?» <sup>2</sup> Yonatan ne ko: «Yàlla tere kay, doo dee mukk! Ma ne, sama baay du def dara lu réy ak lu tuut te yégalu ma ko. Su amoon moomu mébét, lu mu ma ciy nëbb? Loolu kay amul!» <sup>3</sup> Daawuda daldi giñ, neeti ko: «Dinaa la ko giñal, sa baay xam na xéll cér bi ma am ci yaw. Moo tax mu ne: “Bu Yonatan yég sama mébét mukk, lu ko

moy dina ko naqarlu.” Waaye giñ naa ko, nga fekke ci Aji Sax jiy dund, ab jéego sax doxul sama digganteek dee.» <sup>4</sup> Yonatan ne Daawuda: «Wax ma loo bëgg rekk, ma defal la ko.»

<sup>5</sup> Daawuda ne Yonatan: «Xanaa lenn. Èllëg la màggalu Terutel weer wi, te man, manumaa ñàkka toog ak Buur, ngir lekk. Waaye may ma, ma làquji àll ba, ba gannaaw èllëg ca ngoon. <sup>6</sup> Su sa baay seetloo ba seetlu ne nekkuma fa, nee ko: “Daawuda déy da maa tinoo tinu, ne ma yiwi ko, mu ne cowa ba Betleyem, dëkkam, ngir saraxu at ba at bu fa bokkam yépp amal.” <sup>7</sup> Su nee baax na de, sang bi, sama jàmm la, waaye su sànjoo ba sànju nag, xamal ne musiba la nar. <sup>8</sup> Su boobaa nag sang bi, yéwéne ma rekk sang bi, ngir kóllëreg Aji Sax ji nga fasook man. Waaye ndegam am na genn ñaawtéef gu ma gakkal, ngalla rey ma yaw ci sa bopp, jarul nga di ma yóbbu ci sa baay.» <sup>9</sup> Yonatan ne ko: «Yàlla tere. Te su ma yégoon ba yég musiba mu sama baay nara indi fi sa kaw, na la wóor ne dinaa la ko xamal.» <sup>10</sup> Daawuda ne Yonatan: «Su la sa baay tontoo kàddu yu ñagag nag, ana ku ma koy xamal?» <sup>11</sup> Yonatan ne Daawuda: «Kaay nu dem ba ca àll ba.» Ñu ànd ñoom ñaar ba ca àll ba.

<sup>12</sup> Yonatan ne Daawuda: «Giñ naa ci Aji Sax ji, Yàllay Israyil, dinaa seetlu sama baay nēgēni sii gannaaw èllëg. Su la naralee jàmm, yaw Daawuda, dinaa yónnee ci yaw ku la ko déey. <sup>13</sup> Waaye su la sama baay nammee indil musiba, yal na ma Aji Sax ji def lu ko raw, ndegam déeyuma la ko, ba rawale la ci jàmm. Yal na Aji Sax ji ànd ak yaw, na mu ànde woon ak saa baay. <sup>14</sup> Xanaa moos su may dund, ci ngorug Aji Sax ji ngay jēfēek man. Su ma deeyee nag, <sup>15</sup> bul noppee jēfe ngor sa digg ak sama waa kēr mukk, ba sax keroog bu Aji Sax ji faree fi kaw suuf képp kuy noonu Daawuda.» <sup>16</sup> Noonu la Yonatan fasook waa kēr Daawuda, ne: «Yal na Aji Sax ji fey nooni Daawuda.»

<sup>17</sup> Ba mu ko defee Yonatan dellu giñloo Daawuda ci cofeelam gi mu am ci Daawuda ndax ni mu soppe boppam la

ko soppe woon. <sup>18</sup> Yonatan dellu ne ko: «Ëllëg ci màggalu Terutel weer wi, sag wuute dina fés, ndax sa toogu ba mooy wéet. <sup>19</sup> Kon bu gannaaw ëllëgee gaawal dem, ba fa nga làqu woon keroog ba mbir mi amee, te nga négandiku ca wetu doju Gindikaay wa. <sup>20</sup> Man nag dinaa sànni ñetti fitt ca wet ga, mu mel ni daa am lu ma fay diir. <sup>21</sup> Su ko defee rekk, ma yebal ndaw, ne ko mu jëli fitt yi. Su ma nee ndaw li: “Ée! Xoolal fitt yaa ngii nga romb, foral!” Su boobaa, ñëwal, jàmm ñeel na la, te dara amul, giñ naa ko ci Aji Sax jiy dund. <sup>22</sup> Waaye su ma nee ndaw li: “Fitt yaa nga nale ca sa kanam!” Su booba, demal, ndax Aji Sax jee la yebal. <sup>23</sup> Mbir moomu nu digoo, maak yaw nag, Aji Sax jaa ngii, di ci seede sama digganteek yaw ba fàww.»

<sup>24</sup> Daawuda làquji ca àll ba. Ba màggalu Terutel weer wa jotee, Buur toog di waaja lekk. <sup>25</sup> Buur a nga toog ca toogoom naka jekk, fa sës ca miir ba. Yonatan taxaw, Abner toog, feg-gook Sóol, toogub Daawuda ba nag wéet. <sup>26</sup> Sóol waxul dara bésub keroog, ndax booba ma nga naan ci xelam: «Ndogal la, boo demee daa setul, xam naa daa setul rekk.» <sup>27</sup> Ca ëllëg sa, di ñaareelu bésu Terutel weer wa, toogub Daawuda bay wéet ba tey. Sóol nag ne doomam Yonatan: «Waaw, lu waral doomu Yese ji lekksiwul démb ak tey?» <sup>28</sup> Yonatan ne Sóol: «Daawuda de da maa tinoo tinu ngir ma yiwi ko, mu dem Betleyem. <sup>29</sup> Daf ma ne: “Ngalla yiwi ma, ndax saraxu biiri bokk lanu am ca dëkk ba, sama mag a ma sant, ma teeweji ko. Kon nag su la neexee, may ma rekk ma rëcc, seeti saay bokk.” Looloo waral dikkul ci sa ndab li, Buur.»

<sup>30</sup> Ba loolu amee Sóol xadaru ci kaw Yonatan. Mu ne ko: «Doomu caga bi, yaa të ndey! Xanaa xawma ne yaw, doomu Yese ji nga faral, muy sa gâcece, di sa gâceceg kanamu ndey? <sup>31</sup> Ngir li feek doomu Yese jiy dund fi kaw suuf, yaw doo taxaw, sa nguur du taxaw. Léegi nag, yónneel, ñu indil ma ko, ndax moom aji dee la!» <sup>32</sup> Yonatan ne baayam: «Lu tax muy dee? Ana lu mu def?» <sup>33</sup> Sóol ne ko

xërr xeej ba, nar koo rey. Yonatan nag xam ne rey Daawuda la baayam dogu. <sup>34</sup> Yonatan jóge ca ndab la ak tangooru meram. Lekkul dara keroog ñaareelu bésu màggalu Terutel weer wa, ndax naqar wu mu am ca na baayam torxale Daawuda.

<sup>35</sup> Ca ëllëg sa Yonatan xëy, xalelu góor bu ndaw ànd ak moom, mu dem ca àll ba, ca digoom baak Daawuda. <sup>36</sup> Mu ne xaleem ba: «Dawal seeti fitt yi may sànni.» Xale ba daw, mu soqi fitt ga, mu jiitu ko. <sup>37</sup> Xalelu góor ba dem ba fa fittu Yonatan ga dal, Yonatan woo xale bi, ne ko: «Ée! Xanaa du fitt gaa nga nale ca sa kanam?» <sup>38</sup> Mu wooti ko, ne ko: «Ée, doxal gaaw, bul taxaw!» Xale ba for fitt ga, dellu ca njaatigeem Yonatan. <sup>39</sup> Xale bu góor ba nag xamu ca dara, Yonatan ak Daawuda rekk a xam mbir ma. <sup>40</sup> Yonatan daldi jox xaleem ba ay gannaayam, ne ko: «Doxal, yóbbu ca dëkk ba.» <sup>41</sup> Xale ba dem, Daawuda jóg, génne ca làquwaayam ba fare bëj-saalum. Mu ne gurub, dëpp jëem fa suuf, sujjóot ñetti yoon, ku nekk foon sa moroom, ñoom ñaar ñépp jooy, te Daawuda rawati. <sup>42</sup> Yonatan ne Daawuda: «Demal ak jàmm, gannaaw noo giñoo nun ñaar ci turu Aji Sax ji ne “Aji Sax jee seede sama digganteek yaw, ak diggante sama askan ak saw askan, ba fàww.»»

## 21

<sup>1</sup> Ba mu ko defee Daawuda dem, Yonatan dellu ca dëkk ba.

### *Daawuda dem na ca Ayimeleg*

<sup>2</sup> Gannaaw ba loolu wéyee Daawuda dem dëkk ba ñuy wax Noob ca Ayimeleg sarxalkat ba. Ayimeleg gatandu ko, di lox, ne ko: «Lu la taxa wéet, kenn àndul ak yaw?» <sup>3</sup> Daawuda ne Ayimeleg sarxalkat ba: «Buur a ma sant ne ma: “Bu kenn xam lenn ci li ma la yónni, ak li ma la sant.” Samay ndaw nag, xamal naa leen ne bérab sàngam lañu wara xaar. <sup>4</sup> Loo fi denc nag? Su dee juróomi mburu mbaa lu beggandi rekk, jox ma!» <sup>5</sup> Sarxalkat ba ne Daawuda: «Dencuma mburum neen de, mburu mu sell a fi ne. Jëlal, jox say nit, ndegam fekk na leen ñu fegu ci

aw jigéen.» <sup>6</sup> Daawuda ne sarxalkat ba: «Aw jigéen kay mbañ la ci nun naka jekk, su ma nekkee ci yoonu xare, te sellal la sama nit ñi nekke nii. Doonte yoon wii laajul sellal, tey fekk na leen sellal moos ci moomu mbir.» <sup>7</sup> Ci kaw loolu sarxalkat ba jox ko loola ñu sellal, ndax mburu amu fa woon, lu moy mburum teewal, ma ñu jële woon fa Aji Sax ji, ba wuutal fa mburu mu tàng ca saa sa ñu ko fa jëlee.

<sup>8</sup> Fa la fekk keroog ab jawriñu Sóol bu yitte téye woon fa Aji Sax ji. Mooy Edomeen ba ñuy wax Doweg; njiital sàmmi Sóol la woon.

<sup>9</sup> Daawuda ne Ayimeleg: «Dencoo fi ab xeej mbaa saamar bu jàppandee? Ndax du saamar, du lenn ci samay gannaay lu ma indaale, ngir yónnentu Buur a jampoon lool.» <sup>10</sup> Sarxalkat ba ne ko: «Xanaa saamarub Golyaat waa Filisti ba nga reyoon ca xuru Ela. Ma nga nee laxase ca turki ba, ca gannaaw xar-sànni ma. Soo ko béggee, jëlal, boobu rekk a fi ne.» Daawuda ne ko: «Aa! Boobu kay amul moroom, jox ma ko.»

### *Daawuda nax na leen*

<sup>11</sup> Bésob keroog Daawuda daw na Sóol ba àgg ca Akis buurub Gaat. <sup>12</sup> Jawriñi Akis ya wax Akis ne ko: «Xanaa kii du Daawuda, boroom réew mi? Du kii lañuy woyal, di fecc, naan:

“Sóol jam junneem, Daawuda jam fukki junneem?”»

<sup>13</sup> Daawuda am lu mu foog ci kàddu yooyu, ba tax mu ragal lool Akis buurub Gaat. <sup>14</sup> Mu daldi soppliku ba mel ni ku teqlikook sagoom ca seen kanam, di dof-doflu ca seen kaw, di bindantu ca bunt yaaka rogalaatal ay yuut ca kawaru sikkim ba. <sup>15</sup> Akis ne jawriñam ya: «Xam ngeen ne kii ab dof la; ana lu ngeen ma koy indile? <sup>16</sup> Damaa ñàkk ay dof ba ngeen di ma yokkal lii, muy def yëfi dof fi sama kaw? Lu lii di wut sama biir kër?»

## 22

### *Daawuda jüite na gàngoor*

<sup>1</sup> Ba loolu amee Daawuda jóge Gaat, daw làquji ca biir xuntim Adulam. Magam yaak waa kër baayam gépp yég

ko, dikk, fekksi ko fa. <sup>2</sup> Ci biir loolu mboolem boroom njàqare ya, ak ña bor jiital, ak tàng-xol ya, ñoom ñépp dajaji fa Daawuda, mu doon seen njiit. Ñu wara tollook ñeenti téeméeri nit, ànd ak moom. <sup>3</sup> Daawuda bàyyikoo fa dem Misper, ca diiwaanu Mowab. Mu wax buuru Mowab ne ko: «Rikk may ma, sama baay ak sama ndey dikk toog ak yaw, ba ma xam nu Yàlla di def ak man.» <sup>4</sup> Noonu la Daawuda yóbboo ay waajuram Misper ca buuru Mowab, ñu toog fa mboolem diir ba mu làqu ca rawtoom ba. <sup>5</sup> Ci kaw loolu Yonent Yàlla Gàdd ne Daawuda: «Bul toog ci rawtu bi, fabul dem réewum Yuda.» Daawuda bàyyikoo ca, dem ba ca gottub Eret.

### *Sóol rey na sarxalkati waa Noob*

<sup>6</sup> Ci biir loolu Sóol dégg ne gis nañu Daawuda ak ña ànd moom. Booba Sóol a nga toog ca ker garabu tamaris, ga ca Gibeya ca kaw tund wa. Ma nga njàbb xeejam, jawriñam yépp taxaw ci wetam. <sup>7</sup> Sóol wax ak jawriñam yi taxaw ci wetam, ne leen: «Yeen Beñamineen ñi, dégluleen! Mbaa yeen ñépp, doomu Yese jee leen di jox ay tool aki tóokëri reseñ, am yeen ñépp lay fal njiiti kuréli junni ak njiiti kuréli téeméer, <sup>8</sup> ba ngeen di ma fexeel yeen ñépp? Du kenn ku ma yégal ne sama doom fasoo naak doomu Yese ji. Du kenn ku ma tiisoo, yégal ma ne sama doom a ngi xabtal sama surga ci sama kaw, ngir mu waajal ma am tëru ni tey jii!»

<sup>9</sup> Doweg, Edomeen ba taxawandook jawriñi Sóol, daldi àddu, ne: «Man de, gis naa doomu Yese ji, mu dikk dëkk ba ñuy wax Noob, ca Ayimeleg doomu Ayitub. <sup>10</sup> Ayimeleg seetal na ko ci Aji Sax ji, ab dund it may na ko ko, te it saamaru Golyaat waa Filisti ba, jox na ko ko.»

<sup>11</sup> Buur Sóol woolu sarxalkat ba Ayimeleg doomu Ayitub, ak mboolem bokki baayu Ayimeleg ya doon ay sarxalkat ca Noob; ñu wuysi Buur Sóol, ñoom ñépp. <sup>12</sup> Buur ne: «Yaw doomu Ayitub, déglu ma fii!» Mu ne ko: «Maa ngi lay dégg, sang bi.» <sup>13</sup> Sóol ne ko: «Li nga ma def nag, di ma fexeel, yaak doomu Yese ji? Yaa ko may



ab dund, yaa ko jox ab saamar, seetal ko ci Yàlla, ba mu jógal ma, di ma tëru nii tey!»

<sup>14</sup> Ayimeleg ne Buur: «Buur, ana sa surga yii ba ñu daj, ku la nangule ni Daawuda mii, di sa goro, jiite say dag, te di ku ñu nawloo ci sa biir ètt bii? <sup>15</sup> Du keroog laa ko jékka seetal ci Yàlla de! Te it Yàlla buma la lalal pexe! Dëgg waay, Buur sama sang, bu ma topp lenn maak kenn ci sama waa kër baay, ndax kat sang bi, xawma dara ba dara booloo jeex ci menn pexe.» <sup>16</sup> Buur Sóol ne ko: «Yaw Ayimeleg kay, dee rekk mooy sab àtte, yaak sa waa kër baay yépp.» <sup>17</sup> Ba mu ko defee Buur ne dagam ya ko dar: «Ayca, reyleen sarxalkati Aji Sax yii, gannaaw ñoom it ñook Daawudaa far. Yégoon nañu ba muy daw te xamaluñu ma ko.» Dagi buur ya nag baña xàcci seen loxo ci kaw sarxalkati Aji Sax ya. <sup>18</sup> Buur ne Doweg: «Ayca yaw, fàddal sarxalkat yii!» Doweg Edomeen ba fàdd sarxalkat ya. Rey na bés sub keroog juróom ñett fukki nit ak juróom (85) ñuy sol xar-sànnim lëe. <sup>19</sup> Waa Noob dëkkub sarxalkat ya it, mu jam leen, leele ñawkay saamar; góor ak jigéen, gone ya, ba ca ñay nàmp, ak nag yaak mbaam yaak gàtt ya, lépp la leele ñawkay saamar.

<sup>20</sup> Jenn doomu Ayimeleg miy doomu Ayitub donj a rëcc, te mooy Abiyatar. Mu daw, fekki Daawuda. <sup>21</sup> Mu yégal Daawuda ne ko Sóol reylu na sarxalkati Aji Sax yi. <sup>22</sup> Daawuda ne Abiyatar: «Xamoon naa bés sub keroog ne gannaaw Doweg Edomeen baa nga fa woon, du ñàkk moos mu nettali ko Sóol. Man mii maa gàddu sa bakkani waa kër baay gépp. <sup>23</sup> Waaye toogal fii ci man, te bul ragal dara. Ki lay wuta rey moo may wuta rey man itam. Soo nekkee ci sama wet nag, yiiru nga.»

## 23

### *Daawuda xettli na waa Keyla*

<sup>1</sup> Mu am bés nag, ñu yégal Daawuda, ne ko: «Waa Filisti de ña ngay song waa Keyla xare. Ña ngay sèxëtoo dàgga

ya.» <sup>2</sup> Daawuda seet ci Aji Sax ji, ne ko: «Ndax ma dem xarejeek waa Filisti?» Aji Sax ji ne Daawuda: «Demal kay xareek waa Filisti, xettli waa Keyla.» <sup>3</sup> Niti Daawuda ne Daawuda: «Waaw, ndegam fii ci Yuda lanu tiite, astamaak bu nu demee Keyla, ba janook làngi waa Filisti!» <sup>4</sup> Daawuda dellu seet ci Aji Sax ji, Aji Sax ji ne ko: «Doxal dem Keyla, man, maay teg waa Filisti ci say loxo.» <sup>5</sup> Ba mu ko defee Daawuda ànd aki nitam dem Keyla, xareek waa Filisti, duma leen duma yu réy, yóbbu seenug jur. Noonu la Daawuda xettlee waa Keyla.

<sup>6</sup> Ba Abiyatar doomu Ayimeleg dawee fekki Daawuda ca Keyla, xar-sànni ma\* la indaale.

<sup>7</sup> Ci kaw loolu ñu yegge Sóol ne ko Daawuda dem na Keyla. Sóol ne: «Kon de Yàllaa ko teg ci samay loxo, ndax ba mu duggee biir dëkk bu tëje ràpp la tëj boppam.» <sup>8</sup> Ba loolu amee Sóol woo gàngooram gépp xare, ngir ñu dem Keyla, gawi Daawudaaki nitam. <sup>9</sup> Daawuda nag yég ne moom la Sóol di fexeel njekkar. Mu ne Abiyatar sarxalkat ba: «Indil xar-sànni mi.» <sup>10</sup> Mu indi ko, Daawuda ne: «Éy Aji Sax ji, Yàllay Israyil sama Boroom, dégg naa déy ne Sóol a ngi waaja dikk Keyla gii, tas-si dëkk bi ndax man. <sup>11</sup> Mbaa kilifay Keyla duñu ma teg ci loxoom? Boroom bi, ndax li ma dégg ñu naan Sóol a ngi ñëw, dégg la? Éy Aji Sax ji, Yàllay Israyil, sama Boroom, ngalla wax ma!» Aji Sax ji ne: «Dina ñëw.» <sup>12</sup> Daawuda ne: «Mbaa kilifay Keyla duñu ma teg, maak samay nit ci loxol Sóol?» Aji Sax ji ne ko: «Ahakay.» <sup>13</sup> Daawuda fabu mooki nitam, ñu wara tollu ci juróom benni téeméer, daldi bàyyikoo Keyla, di taxawaaloo fépp fu ñu ñeme. Ba ñu yeggee Sóol ne ko Daawuda rëcce na Keyla, Sóol yebbi.

<sup>14</sup> Daawuda nag nekk ca xunti yu kawee ya ca màndinj ma, toog foofa ca tund, wa ca màndinj Sif. Sóol di ko seet bés bu nekk, waaye Yàlla tegul Daawuda cay loxoom. <sup>15</sup> Gannaaw gi Daawuda yég ne Sóol waajal na aw yoon ngir jël bakkanam.

\* **23:6** 23.6 xar-sànni ma: dañu ko daan seete ci Aji Sax ji.

Booba Daawudaa nga ca màndiṅu Sif ca Orsa. <sup>16</sup> Ci biir loolu Yonatan doomu Sóol ja dem Orsa ca Daawuda, di ko ñaax ngir mu gëna dëgërloo Yàlla. <sup>17</sup> Mu ne ko: «Bul tiit. Loxol Sóol sama baay du la jot. Yaw yaay falu Buur ci Israyil, te maay doon sa bummi. Sama baay ci boppam xam na loolu bu baax.» <sup>18</sup> Ci biir loolu ñu feddli seen kóllère ñoom ñaar fa kanam Aji Sax ji. Daawuda des Orsa, Yonatan ñibbi kërám.

### *Sóol topp na Daawuda*

<sup>19</sup> Ba loolu amee waa Sif dem Gibeya ca Sóol, ne ko: «Daawuda de, ma nga làqu fa nun. Ma nga ca xunti yu kawé ya ca Orsa, ca kaw tundu Akila, fa féete màndiṅ ma bëj-saalum. <sup>20</sup> Buur, saa yoo bëggee ñëw rekk, ñëwal. Kon, Buur, nun noo koy teg ci say loxo.» <sup>21</sup> Sóol ne leen: «Yal na leen Aji Sax ji barkeel ndax yég ngeen ma. <sup>22</sup> Léegi demleen, xoolaat bu baax; seetleen ba gis fu mu jaare, ak ku ko fa gis, ndax xamal nañu ma ne ku ñora ñor la. <sup>23</sup> Seetleen ba gis fépp fu mu mana làqu, doora délsi fii ci man, indil ma lu leer. Su ko defee ma ànd ak yeen. Su Daawuda nekkee ci gox bi, dinaa topp tànkam ci biir mboolém làngi Yudeen ñi.»

<sup>24</sup> Ba loolu amee waa Sif jiiuji Sóol ca Sif. Fekk na Daawudaaki nitam ña nga woon ca joor ga ca màndiṅu Mawon, fa féete màndiṅ ma bëj-saalum. <sup>25</sup> Sóol aki nitam dem, di wër Daawuda, ñu yegge ko Daawuda, mu dem ba ca doj wa, làqu foofa ca màndiṅu Mawon. Sóol yég ko, dàqi ko ca biir màndiṅu Mawon. <sup>26</sup> Sóol a ngay demee gii wetu tund wi, Daawudaaki nitam bartaloo wet ga ca des, gaawtu di wéy, ngir rëcc Sóol. Naka la Sóol ak mbooloom dem bay wër-ndombo Daawuda aki nitam, ngir jàpp leen, <sup>27</sup> ndaw dikk ca Sóol ne ko: «Dikkal gaaw, waa Filisti song nañu réew ma.» <sup>28</sup> Sóol nag fomm ndàqum Daawuda, ngir dajejeek waa Filisti. Looloo waral turu bérab boobu di Sela Amalekot (mu firi doju Rawukaay).

## 24

### *Daawuda gën na Sóol*

<sup>1</sup> Foofa la Daawuda bàyyikoo, dali ca xunti yu kawé ya ca Engedi. <sup>2</sup> Naka la Sóol délsi, jóge ca ndàqum waa Filisti, ñu ne ko: «Ndeke Daawudaa nga ca màndiṅu Engedi!» <sup>3</sup> Ci kaw loolu Sóol jël ñetti junniy xarekat yu mu tànné ci bànni Israyil gépp, ngir wëri Daawuda aki nitam, ba fa dendeek tundi Sikket ya. <sup>4</sup> Mu dem ba tollook ay ngéddi xar ca yoon wa; foofa am xuntee nga fa woon. Mu dugg ca biir, di suturlu. Fekk na Daawudaaki nitam a nga ca biir-a-biir xunti ma, toog.

<sup>5</sup> Ba mu ko defee niti Daawuda ya déey Daawuda, ne ko: «Xoolal bésub tey jii la la sa yàlla Aji Sax ji noon: “Maa ngii, di teg sab noon ci say loxo, nga def ko lu la neex.”» Daawuda yoot ndànk, ba dagg ca lafu mbubbum Sóol. <sup>6</sup> Ba loolu amee fitu Daawuda ne tërit ndax la mu dagg ca lafu mbubbum Sóol. <sup>7</sup> Mu ne nitam ña: «Yal na ma Aji Sax ji musal ba duma def sama sang, kii Aji Sax ji fal, jëf ju tollu ni xàccil ko sama loxo, ndax moom mooy ki Aji Sax ji fal.» <sup>8</sup> Kàddu yooyu la Daawuda dankaafu nitam ña; mayu leen ñu dal ci kaw Sóol, ba Sóol jóge ca xunti ma, dem yoonam.

<sup>9</sup> Daawuda nag génn xunti ma, woo Sóol, ne ko: «Éey, Buur sama sang!» Sóol geesu; Daawuda sukk, sujjóot, dëpp jëem fa suuf, <sup>10</sup> daldi wax Sóol ne ko: «Lu waral ngay déglu ku la naan: “Daawuda mii sa musiba lay wut.” <sup>11</sup> Bés a ngii tey, nga gisal sa bopp ni la Aji Sax ji tege tey ci samay loxo ci biir xunti mi. Nee ñu ma, ma rey la, waaye dama laa xool bëtü ñeewante. Maa ne duma xàccil mukka sama loxo sama sang, ndax mooy ki Aji Sax ji fal. <sup>12</sup> Te xoolal, Baay, xoolal rekk sa daggitu mbubb wii ci sama loxo. Gannaaw maa ko dagge ci sa mbubb te reyuma la, war ngaa xam, nag xéll ne naruma genn mbon mbaa pexem fippu, te tooñuma la. Yaw kay yaa may rëbb, ngir jël sama bakkan. <sup>13</sup> Yal na Aji Sax ji àtte sama digganteek yaw. Yal na ma Aji Sax ji feyul ci yaw, waaye du sama loxoo lay dal mukka. <sup>14</sup> Mooy la ñu léeb bu yàgg rekk ne: “Ku bon, mbon rekk.” Man nag sama loxo du la dal mukka. <sup>15</sup> Ana sax ku buurub

Israyil jóg, di dàqi? Ab xaj bu dee, aw fel donḡ lay dàq! <sup>16</sup> Aji Sax jeey àttekat bi, te mooy àtte sama digganteek yaw. Yal na ma geesu te sàmm sama àq. Yal na ma jox dëgg, ba génne ma ci say loxo.»

<sup>17</sup> Ba Daawuda waxee Sóol kàddu yooyu ba daaneel, Sóol da ne: «Éy Daawuda, doom, loolu sa baat la moos?», daldi ne yikkét jooy. <sup>18</sup> Mu ne Daawuda: «Dëgg déy nga am ci sama kaw, ndax yaa ma defal lu baax, ma fey la lu bon! <sup>19</sup> Yaa ma wax lu baax li nga ma defal tey; Aji Sax ji teg ma ci say loxo, te reyuloo ma. <sup>20</sup> Ana kuy jekku noonam, wacc ko mu dem ak jàmm? Yal na la Aji Sax ji fey lu baax li nga ma defal bésu tey jii. <sup>21</sup> Léegi nag dama ne, xam naa ne dinga doon buur moos, te nguurug Israyil dina sax ci say loxo. <sup>22</sup> Kon nag giñal ma ci Aji Sax ji ne doo dagg sama askan wi may wuutu, te doo raafal sama tur ci sama waa kër baay.» <sup>23</sup> Ba mu ko defee Daawuda giñal Sóol loolu, Sóol ñibbi këram, Daawuda ànd aki nitam, dellu ca xunti mu kawe ma.

## 25

### *Samiyel saay na*

<sup>1</sup> Gannaaw ba loolu wéyee Samiyel faatu, Israyil gépp daje, dëj ko, daldi koy denc ca këram ca Raama. Daawuda nag fabu, wuti màndiḡ Paran.

### *Nabal gântal na Daawuda*

<sup>2</sup> Jenn waay a nga woon ca dëkk ba ñuy wax Mawon. Amoon na alal foofa ca dëkk ba ñuy wax Karmel; ku barele woon lool la, amoon na ñetti junniy xar ak junniy bëy. Mu nekkoon Karmel, di watlu ay xaram.\* <sup>3</sup> Nabal la waa ji tuddoon, soxnaam di Abigayil. Ndaw su yewwu la woon te taaru, jëkkëram nag bokk ci giiru Kaleb, di ku ñàng te soxor. <sup>4</sup> Ci biir loolu Daawuda dëgge ca màndiḡ ma ne Nabal a ngay watlu ay xaram. <sup>5</sup> Mu yebal fukki ndaw, ne leen: «Demleen Karmel, ngeen àgg ba ca Nabal. Nuyulleen ma ko. <sup>6</sup> Ngeen ne ko Daawuda nee: “Fekkeel déwén, yal nanga am jàmm, sa

kër, jàmm, lépp lu bokk ci yaw it, jàmm. <sup>7</sup> Dëgg naa ne watkati jur yaa ngi wate ci yaw. Say sàmm nag nekkoon nañook nun, te soxorewunu leen, lenn lu bokk ci ñoom it réerul, mboolem diir ba ñuy sàmm ca Karmel. <sup>8</sup> Laajal rekk say surga, dinañu la ko wax. Daawuda sa doom nag, sang bi, moo lay ñaan nga yéwéne nu ci bésu tey bu rafet bii nu dikke, te may nu loo am rekk, nu bokk kook moom.”»

<sup>9</sup> Ndawi Daawuda ya nag dikk, jottli Nabal kàddu yooyu yépp ci turu Daawuda, ba daaneel, ne tekk. <sup>10</sup> Nabal ne ndawi Daawuda: «Ana kuy Daawuda? Kuy doomu Yese sax? Jamonoy tey jaam yu baree ngi fàqe ci seeni sang. <sup>11</sup> Ana luy ndeyi may jël saab dund ak samam ndox, ak yàppu jur, gi ma rendil sama watkati jur, di ko jox ñu ma xamul fu ñu jóge?» <sup>12</sup> Ba loolu amee ndawi Daawuda walbatiku ñibbi. Ba ñu dikkee, daldi koy yegge kàddu yooyu yépp. <sup>13</sup> Daawuda ne ndawam ya: «Ràngooleen seeni saamar, yeen ñépp.» Ñu ràngoo seeni saamar ñoom ñépp, Daawuda it ràngoo saamar, lu tollook ñeenti téeméeri góor ànd ak Daawuda, ñaar téeméer des ca seen cummikaay.

### *Jabaru Nabal def nag muus*

<sup>14</sup> Ci biir loolu kenn ca surga ya wax Abigayil jabaru Nabal, ne ko: «Áa, Daawuda de moo yebal ay ndaw yu jóge ca màndiḡ ma, ngir nuysi sunu sang, waaye moom, da leena jànni. <sup>15</sup> Ndaxam nit ñooñu de, ñu baaxoon lool lañu ci nun. Soxorewuñu nu, te réerlewunu lenn it mboolem diir ba nu bokkee ak ñoom aw yoon, ca àll ba. <sup>16</sup> Sunu kiiraay la nu woon guddi ak bëccég, la nu nekkoon ak ñoom lépp, di sàmm gàtt yi. <sup>17</sup> Léegi nag seetal, ba xam loo ci wara def, ndax musiba kat dëgmal na sunu sang, ak waa këram gépp. Moom nag dafa naqari deret, ba maneesula wax ak moom.»

<sup>18</sup> Ba mu ko defee Abigayil gaaw sàkk ñaar téeméeri mburu, ak ñaari mbuusi biiñ, ak juróomi gàtt yu ñu defar, ak juróomi natti peppum mbool, ak téeméeri cabbi reseñ, ak ñaar téeméeri

\* 25:2 25.2 Xari waa penku dañuy bare kawar gu ñuy wat ak a ëcc, di ci defar ag wëñ.

danki figg, boole ko sēf ci ay mbaam. <sup>19</sup> Mu ne ay surgaam: «Jiituleen, maa ngi topp ci yeen.» Nabal jëkkër ja nag, ndaw sa waxu ko ci dara. <sup>20</sup> Naka la ndaw sa dawal mbaamam, làqoo mbartalu tund wa, di wàcc ca xur wa, ndeke Daawudaa nga ànd aki nitam, di dajeeek moom; ndaw sa ne pemm ca ñoom. <sup>21</sup> Fekk na Daawuda doon wax naan: «Ndeke kay neen laa doon wattoo mboolem lu bokk ci kii ca màndiñ ma, ba lennam réerul; lu bon la ma feye lu baax. <sup>22</sup> Yal na ma Yàlla teg mbugal mu gëna tar, ndegam maa wacc bët di sete kenn ku bokk ci waa jii, kuy taxaw, colal.»

<sup>23</sup> Abigayil séen Daawuda, daldi gaaw wàcc mbaam ma, ne gurub fa kanamam, dëpp jëem fa suuf, sujjóot. <sup>24</sup> Naka la ne fëlëñ ca tànkì Daawuda, ne ko: «Sang bi, naa tegoo tooñ gi, may ma rekk, ma wax la. Ngalla sama sang, déglul sama kàddu. <sup>25</sup> Sang bi, bul déglu mukkk nit ku bon kii, Nabal mii. Moom turam donj la wuyu, nde Nabal (Dof bi) la tudd, te ndof la nekke. Man nag sang bi, gisuma woon ndaw yi nga yebal. <sup>26</sup> Léegi nag sang bi, giñ naa ko ci Aji Sax jiy dund, nga fekke tey, Aji Sax jee la teree tuur deret tey, di feyul sa bopp. Muy say noon, di ñi lay fexeel lu bon, yal nañu bokk ak Nabal mii demin. <sup>27</sup> Sarica bii ma la indil nag, sang bi, nañu ko jox xale yu góor yi topp ci yaw. <sup>28</sup> Sang bi, jéggal ma rekk ndax Aji Sax jee lay defal moos kër gu yàgg. Kon nag, Yàlla bu nit gis mukkk lu bon ci yaw, sa giiru dund. <sup>29</sup> Bu ñu la doon dàq, di wut sa bakkan, yal na fekk sa bakkan dence ca ëmbu aji dund ña, ca sa wetu Yàlla Aji Sax ji, sang bi. Waaye sa bakkan ub noon, yal na ko mbaq, sànni fu sore. <sup>30</sup> Keroog, sang bi, bu la Aji Sax ji defalee mboolem lu baax la mu la dig, ba fal la, nga jiite Israyil déy, <sup>31</sup> su boobaa doo réccu, doo am yaraange ci loo doon tuure deret ci neen, mbaa loo doon feyul sa bopp. Te ngalla sang bi, keroog bu la Aji Sax ji baaxee, fàttlikul sab jaam.»

<sup>32</sup> Daawuda ne Abigayil: «Cant ñeel na Aji Sax ji Yàllay Israyil, mi la yebal bésub tey jii, ngir nga dogale ma. <sup>33</sup> Maa ngi lay gërëme sa njort, di la gërëme sa jëmmu

bopp jii ma teree tuur deret, ngir feyul sama bopp. <sup>34</sup> Lu ko moy de, giñ naa ci Kiy Dund, Aji Sax ji Yàllay Israyil, ji ma téye ba loruma la, soo gaawul woon, dogalesi ma, du kenn moos ku ñuy wacc, bët di ko sete ci mboolem kuy taxaw colal te bokk ci Nabal.» <sup>35</sup> Ba loolu amee Daawuda nangoo ca loxol ndaw sa la mu ko indil, daldi ne ko: «Ñibbil ak jàmm. Dégg naa sa kàddu te nangul naa la.»

### *Nabal dee, Daawuda dikk*

<sup>36</sup> Ba mu ko defee Abigayil dellu ca Nabal, fekku ko lu moy mu amal biir kërám bernde ju mel ni berndey buur. Xol baa nga sedd, mu màndi lool, ba tax Abigayil waxu ko dara ba bët set. <sup>37</sup> Ca suba sa ba biiñub Nabal giifée, jabaram wax ko la xew, fit wa jekki dee goyy ca biir dënn ba, yaram wa daldi mel niw doj. <sup>38</sup> Ñu teg ca lu tollook fukki fan, Aji Sax ji fàdd Nabal, mu dee. <sup>39</sup> Ci kaw loolu Daawuda dégg ne Nabal dee na, mu ne: «Cant ñeel na Aji Sax ji sama boroom, mi àtte gâcce gi ma ame ci Nabal, te tere maa def lu bon. Mbonug Nabal la Aji Sax ji walbati, këpp ci kaw boppam.» Daawuda nag yónnee kàddoom ca Abigayil, ngir jël ko jabar. <sup>40</sup> Surgay Daawuda ya dem ca Abigayil ca Karmel, wax ko ne ko: «Daawudaa nu yónni fi yaw, ngir bëgg laa jël soxna.»

<sup>41</sup> Abigayil daldi sujjóot, dëpp jëem fa suuf, ne leen: «Maa ngii dib jaamam, ba ci raxas tànkì surgaam yi.» <sup>42</sup> Ci kaw loolu Abigayil ne ñokket, war mbaamam, juróomi surgaam yu jigéen ànd ak moom, mu topp ca ndawi Daawuda ya. Noonu la Abigayil doone soxnaam.

<sup>43</sup> Ayinowam ma cosaano Yisreel itam, Daawuda jëloon na ko soxna, ñuy wujje ñoom ñaar. <sup>44</sup> Fekk na Sóol nangu doomam Mikal, soxnas Daawuda, may ko waa Galim ba ñuy wax Palti doomu Layis.

## 26

### *Daawuda gënati na Sóol*

<sup>1</sup> Waa Sif ñoo demoon ca Sóol ca Gibeya, ne ko: «Yéguloo ne Daawudaa nga làqu ca tundu Akila, fa janook màndiñ ma?»

<sup>2</sup> Sóol dem ba ca màndiŋu Sif, ànd ak ñetti junniy ñeyi xarey Israyil, ngir rëbb Daawuda ca màndiŋu Sif. <sup>3</sup> Ba mu ko defee Sóol dale ca wetu yoon wa, ca kaw tundu Akila, janook màndiŋ ma. Daawuda ma ca màndiŋ ma nag yég ne Sóol toppsi na ko foofa. <sup>4</sup> Mu yebal ay ndaw yu ko nemmikujil, ba mu wóor ko ne Sóol agsi na. <sup>5</sup> Ci kaw loolu Daawuda dem ba fa Sóol dal. Mu gis fa Sóol tëdd, mook Abner doomu Ner njiital gàngooram. Sóol a nga tëdd ca digg dal ba, gàngoor ga tëdd, yéew ko.

<sup>6</sup> Daawuda daldi laaj Ayimeleg Etteen ba, ak Abisay ma Seruya di yaayam, te mu bokk ak Yowab. Mu ne leen: «Kuy ànd ak man dem ca biir dal ba, fa Sóol?» Abisay ne ko: «Man maay ànd ak yaw.» <sup>7</sup> Daawuda ànd ak Abisay ci guddi, ba fa dalu gàngoor ga. Ndeke Sóol a nga tëdd di nelaw ca digg dal ba, xeejam baa nga sampe fa suuf, féeteek bopp ba, Abner ak gàngoor gaa nga tëdd, yéew ko. <sup>8</sup> Abisay ne Daawuda: «Yàlla de teg na sab noon ci say loxo guddig tey jii. Bàyyil rekk ma daaj ko xeej bi fi suuf benn yoon rekk, du ñaar!» <sup>9</sup> Daawuda ne Abisay: «Bu ko rey. Ana kuy yékkati loxoom ci kaw ki Aji Sax ji fal, te yoon dabu ko?» <sup>10</sup> Daawuda teg ca ne ko: «Giñ naa ci Aji Sax jiy dund, Aji Sax ji ci boppam moo koy fàdd. Yaar àppam jot, mu dee, mbaa mu dem xare, des ca. <sup>11</sup> Waaye yal na ma Aji Sax ji musal ci yékkati sama loxo ci kaw ki Aji Sax ji fal. Xanaa nga jël rekk xeej bi féeteek bopp bi, ak njaqal ndox li, te nu dem.» <sup>12</sup> Daawuda nag jël xeej baak njaqal ndox la féeteek boppu Sóol. Ñu daldi dem te kenn gisul, kenn yégul, kenn yewwuwul, ndax ñépp a ngay nelaw nelaw yu xóot yu bawoo ci Aji Sax ji, daanu ci seen kaw.

<sup>13</sup> Ba loolu amee Daawuda jáll ba ca wàlla, daldi taxawe fu sore ca kaw tund wa, digganteem ak dalub Sóol ne yàmblañ. <sup>14</sup> Mu àddu ca kaw, wax ak gàngoor ga, daldi ne Abner doomu Ner: «Éey Abner, doo ma wuyu?» Abner ne ko: «Yaw yaa di kan bay joor Buur?» <sup>15</sup> Daawuda ne Abner: «Xanaa doo jàmbaaruu góor? Ku fiy sa moroom

ci Israyil? Ana lu la tee wattu Buur, sab sang? Am na ci xarekat yi ku bóomsi woon Buur, sab sang. <sup>16</sup> Xam nga ne li nga def baaxul de! Giñ naa ko ci Aji Sax jiy dund, dee rekk ngeen yelloo, yeen ñi wattuwul seen sang, ki Aji Sax ji fal! Xoolal bu baax, ana xeeju Buur ak njaqal ndox li féete woon ak boppam?»

<sup>17</sup> Ci kaw loolu Sóol xàmmi baatu Daawuda, ne ko: «Daawuda doom, loolu sa baat a?» Daawuda ne ko: «Sama baat a kay, Buur, samab sang.» <sup>18</sup> daldi cay teg ne ko: «Sang bi, looy toppe nii sab jaam? Ana lu ma def? Lan laa def ci lu bon? <sup>19</sup> Ngalla Buur, sama sang, déglul lii ma lay wax: su fekkee ne Aji Sax ji moo la xiir ci sama kaw, yal na ko cib sarax giifal. Waaye su dee ay doom aadama de, yal nañu alku ci kanam Aji Sax ji, ndax dàq nañu ma tey, ba xañ ma ab cér ci Aji Sax ji, mbete ku ñu ne: “Demal jaamuji yeneen yàlla.” <sup>20</sup> Man de yàlla bu sama bakkan rote àll, fu soreek Aji Sax ji. Te sax, lu tollu ni buurub Israyil ci boppam wutul lu moy wenn fel doŋŋ wu mel ni man? Mbete kuy rëbb cokkeer ci tund yi!»

<sup>21</sup> Sóol nag ne: «Bàkkaar naa de! Daawuda doom, ñibbsil, ndax dootuma la fexeel muk, gannaaw yaa wormaal sama bakkan tey jii! Lii ma def kay, yéfi dof la, juum naa lool sax.» <sup>22</sup> Daawuda ne ko: «Buur, sa xeej a ngii, na kenn ci sa xale yu góor yi jàllsi, jèlsi ko. <sup>23</sup> Yal na Aji Sax ji yool ku nekk njekkam ak kóllëreem, ndax Aji Sax jee la teg tey jii ci sama loxo, waaye maa buggula yékkati sama loxo ci kaw ki Aji Sax ji fal. <sup>24</sup> Ni ma yéemloo sa bakkan tey jii nag, yal na ni Aji Sax ji yéemloo sama bakkan, te xettlee ma ni ci gépp njàqare.» <sup>25</sup> Sóol ne Daawuda: «Daawuda doom, yal nanga barkeel. Dinga def ay jaloore déy, te dinga am ndam moos!» Ba mu ko defee Daawuda dem yoonam, Sóol walbatiku, ñibbi.

## 27

*Daawuda làquji na ca waa Filisti*

<sup>1</sup> Daawuda nag ma nga naan ca xelam: «Bés a ngi ñew bu ma nara sàнку ci loxol Sóol. Li gën ci man daal, du lenn lu moy dawa daw ba ca réewu waa Filisti, ba Sóol tàyyi maa rébbati ci Israyil gépp, ma daldi mucc.» <sup>2</sup> Ba loolu amee Daawuda ak juróom benni téeméeri nit ña ànd ak moom, daldi jàll ba ca buurub Gaat, Akis doomu Mawog. <sup>3</sup> Daawuda dal ca Akis ca Gaat, mook ay nitam, ku ci nekk ak njabootam; Daawuda ak ñaari soxnaam, Ayinowam waa Yisreel ba, ak waa Karmel ba, Abigayil, soxnas Nabal woon. <sup>4</sup> Ba ñu waxee Sóol ne ko Daawuda daw na, dem Gaat, Sóol rébbatu ko.

<sup>5</sup> Daawuda nag ne Akis: «Ngalla baaxe ma, may ma fi ab gox ci dëkki àll bii, ma man faa dëkke; ndax man sab surga laa, warumaa bokk dëkk ak yaw ci péeyu buur.» <sup>6</sup> Bés sub keroog la ko Akis jox dëkk ba ñuy wax Ciglaag. Moo tax Ciglaag ñeel buuri Yuda ba tey jii. <sup>7</sup> Diir ba Daawuda dal ca àllub Filisti, at la ak ñeenti weer.

<sup>8</sup> Ci biir loolu Daawuda aki nitam daan nañu song-songee Gesureen ñi ak Giraseen ñi ak Amalegeen ñi. Mooy ña dëkke woon naka jekk réew mooma, ba ca Sur, jàpp réewum Misra. <sup>9</sup> Saa yu Daawuda songaan gox ba, du ca wacc kuy dund; du góor, du jigéen, te it day lël jur gu gudd ak gu gatt, mbaam ak giléem, aki yére. Su ko defee mu walbatiku, dellu ca Akis. <sup>10</sup> Bu ko Akis laajee ne ko: «Fu ngeen léle woon tey?» Daawuda ne ko: «Xanaa wetu Negew ca Yuda,» mbaa «Xanaa wetu Negew ca Yerameleen ña,» mbaa mu ne ko: «Xanaa wetu Negew ca Keneen ña.» <sup>11</sup> Moo tax du genn góor mbaa jigéen ju Daawuda masa bàyyi mu dund, di ko indi Gaat, ndax ragal ñu nettali lu jëm ci ñoom, naan nàngam ak nàngam la ñoom Daawuda def. Noonu la jàppoo woon mboolem diir ba mu dal ca àllub Filisti. <sup>12</sup> Akis nag amoon na kóolote ci Daawuda, ndax da doon wax ci xelam naan: «Kii de yóbbe na boppam mbañeel gu ko bokki bànni Israyilam bañ lool. Moo tax sama surga rekk lay doon ba fàww.»

## 28

<sup>1</sup> Jamono yooyu nag waa Filistee dajale woon seeni gàngoori xare, ngir xeex ak Israyil. Akis ne Daawuda: «Xanaa moos xam nga ne man ngay àndal ci xare bi de, yaak say nit?» <sup>2</sup> Daawuda ne Akis: «Kon nag, sang bi, yaay gisal sa bopp li may def.» Akis ne ko: «Kon nag, def naa la sama dagu bopp ba fàww.»

### *Sóol seetluji na ca Endor*

<sup>3</sup> Samiyel nag faatu woon na, ba Israyil gépp dëj ko, denc ko ca Raama, dëkkam ba. Te itam Sóol mujjoon naa génne réew ma ñiy seete nit ñu dee, ak boroom rawaan yiy gisaane.

<sup>4</sup> Ci kaw loolu waa Filisti daje, dali ca dëkk ba ñuy wax Sunem; Sóol ànd ak bànni Israyil gépp, ñu dali ca Gilbowa. <sup>5</sup> Sóol gis gàngooru waa Filisti, daldi tiit lool ba fit wa récc. <sup>6</sup> Mu seetlu ci Aji Sax ji, Aji Sax ji wuyuwu ko; du ci gént, du ci jumptukaayu tegtal bi ñuy wax Urim, du ci kàddug yonent. <sup>7</sup> Sóol wax ay jawriñam, ne leen: «Seetal-leen ma jigéen juy seete nit ñu dee, ma seetluji ci moom.» Jawriñ ya ne ko: «Xanaa jigéenu gisaanekat ba ca Endor.»

<sup>8</sup> Ba mu ko defee Sóol soppiw melo, sol yeneen yére, daldi ànd ak ñaari nit ag guddi, ba ca jigéen ja. Mu ne ko: «Ngalla gisaaneel ma ci ab rawaan, te nga wool ma ku dee ki ma lay tudd!» <sup>9</sup> Jigéen ji ne ko: «Ma ne, yaw ci sa bopp xam nga li Sóol def; moo génne réew mi ñiy seete nit ñu dee, ak boroom rawaan yiy gisaane. Kon loo may fiire, nar maa reylu?» <sup>10</sup> Sóol giñal ko ci Aji Sax ji, ne ko: «Giñ naa ci Aji Sax ji, Kiy Dund, mbugal du la ci fekk.» <sup>11</sup> Jigéen ji ne ko: «Ku ma lay wool?» Mu ne ko: «Samiyel nga may wool.»

<sup>12</sup> Naka la jigéen ja gis Samiyel, daldi yuuxu ca kaw ne Sóol: «Lu tax nga nax ma? Yaw kay ndeke yaa di Sóol!» <sup>13</sup> Buur Sóol ne ko: «Bul tiit, loo gis?» Mu ne ko: «Ab rawaan laa gis, muy yéegé fa suuf.» <sup>14</sup> Mu ne ko: «Nu mu mel?» Mu ne ko: «Góor gu mag ay yéegsi. Mu ngi sàngoo mbubb.» Sóol xam ne Samiyel la, daldi sukk, sujjóot, dëpp jëem fa suuf. <sup>15</sup> Samiyel ne Sóol: «Ana loo may wooye,

di ma yékkati nii?» Sóol ne ko: «Damaa nekk ci njàqare lu réy. Waa Filistee ngi xareek man, te Yàlla dèddu na ma. Wuyootu ma, du ci kàddug yonent, du ci gént. Moo tax ma woo la, ngir nga xamal ma lu may def.» <sup>16</sup> Samiyel ne ko: «Loo may laaj, gannaaw Aji Sax jee la dèddu, def la ab noon? <sup>17</sup> Aji Sax jee sottal la mu waxoon, ma jottli ko, te Aji Sax jee foqati nguur gi ci say loxo, jox ko sa jegeñaale, muy Daawuda; <sup>18</sup> Yaa déggalul Aji Sax ji, jéfewuloo tangooru meram ngir mbugal Amalegeen ñi. Loolu moo waral lii la Aji Sax ji teg tey jii. <sup>19</sup> Te itam Aji Sax jee lay booleek Israyil, teg ci loxol waa Filisti. Nègèni èllég, yaw yaak say doom, dingeen ma fekksi. Te it dalub Israyil, Aji Sax jee koy teg ci loxol waa Filisti.»

<sup>20</sup> Sóol nag jekki ne dàll fa suuf, tàlli ñareet, tiitaange lu réy jàpp ko ndax kàdduy Samiyel. Rax ci dolli amul woon genn kàttan, ngir lekkul woon dara bëccég baak guddi ga gépp. <sup>21</sup> Jigéen ja dikk, gis Sóol mu jàq lool. Mu ne ko: «Aa, sang bi, man de déggal naa la. Jaay naa sama bakkan, def li nga ma sant. <sup>22</sup> Léegi nag, déggal ma rekk sang bi, ma may la tuuti loo lekk, ba am doole, doora topp yoon wi.» <sup>23</sup> Sóol lànk, ne ko: «Déédéet, lekkuma!» Jawriñam ña nag soññ ko, ñook jigéen ja, ba mu déggal leen. Mu jóge ca suuf, toog ca kaw lal ba. <sup>24</sup> Jigéen ja amoon na sèlluw yar ca kër ga. Mu gaaw rey ko, daldi sàkk sunguf, not ko, lakk ca mburu mu amul lawiir. <sup>25</sup> Ba mu ko defee mu taajal ko Sóol, mooki nitam. Ñu lekk ba noppi, bàyyikoo fa guddig keroog.

## 29

### *Waa Filisti dàq nañu Daawuda*

<sup>1</sup> Gàngoori waa Filisti yépp a daje woon ca Afeg. Israyil a nga dale woon ca wetu bētu ndox ba ca Yisreel. <sup>2</sup> Kàngami waa Filisti yaa ngay jaab jiiitu, ànd ak seen kuréli téeméeri xarekat ak kuréli junni. Daawudaaki nitam ànd ak Akis, jaab topp seen gannaaw. <sup>3</sup> Kilifay waa Filisti ne: «Ebrë yii, nag?» Akis wax ak kilifay waa Filisti, ne leen: «Xanaa du Daawuda,

surgab Sóol buurub Israyil? Lu èpp at a ngii mu nekk ak man, te gisuma ci moom sikk, ba mu teqlikook Sóol, ba bés sub tey jii.» <sup>4</sup> Kilifay waa Filisti nag ñéññ ca daldi ne ko: «Waññal waa jii, mu dellu ca gox ba nga ko teg. Bumu ànd ak nun ci xare bi, bay walbatiku di sunub noon ci biir xare bi. Ana lu koy jubaleeteek sangam, lu moy mu dog boppi nit ñii, jox ko? <sup>5</sup> Xanaa du Daawuda mii lañuy woyal, di fecc, naan:

“Sóol jam junneem,

Daawuda jam fukki junneem?”»

<sup>6</sup> Ci kaw loolu Akis woo Daawuda, ne ko: «Giñ naa ci Aji Sax ji, Kiy Dund, ku jub nga, te doon naa rafetlu sa ànd ak man, di xarejeek a dikk, ndax bés ba nga dikkee fi man ba tey jii, gisuma ci yaw lu bon. Waaye nag kàngami Filisti ñoo rafetluwul sa teewaay. <sup>7</sup> Kon nag waññikul, te dem ak jàmm bala ngaa def lenn lu kàngami Filisti rafetluwul.»

<sup>8</sup> Daawuda ne Akis: «Ana lu ma def, ak loo ma gisal, bés ba ma dikkee fi yaw, ba bés sub tey jii, ba tax дума xarejeek nooni Buur sang bi?» <sup>9</sup> Akis ne Daawuda: «Dara! Xam naa loolu. Bége naa la it ni ndawal Yàlla. Kilifay Filisti kay a ma ne: Bumu ànd ak nun ca xare ba. <sup>10</sup> Kon teelala fabu èllég, yaak sa surgay sang yi nga àndal; Dangeen di teela jóg rekk, bu bêt setee ngeen dem.» <sup>11</sup> Ca èllég sa nag Daawuda teela fabu, mooki nitam, ngir dellu réewum Filisti, waa Filisti ñoom jubal Yisreel.

## 30

### *Daawuda toppi na Amalegeen ña*

<sup>1</sup> Ba Daawuda aki nitam àggee Ciglaag, ca gannaaw èllég sa la. Fekk na Amalegeen ña song bëj-saalumu Yuda ak Ciglaag; ñu yàqte Ciglaag, lakk ko, <sup>2</sup> jàpp jigéen ña mu fa fekk, mag ak ndaw. Reyuñu ca kenn nag, dañu leena yóbbaaale, dem seen yoon. <sup>3</sup> Ba Daawudaaki nitam agsee Ciglaag, fekk nañu mu lakk ba jeex; seeni jabar ak seeni doom, góor ak jigéen, ñépp duggi njaam. <sup>4</sup> Daawudaak mbooloo ma mu àndal nag

di yuuxook a jooyoo, ba amatuñu dooley jooy.

<sup>5</sup> Ñaari soxnay Daawuda lañu jàpp; Ayinowam mu Yisreel ak Abigayil waa Karmel ba, soxnas Nabal woon. <sup>6</sup> Ba loolu amee Daawuda jàq lool, ndax mbooloo maa nga doon wax naan dañu koy dóori doj. Booba mbooloo ma ba mu daj, ku nekk a ngaak naqaru xol, di xalaat doomam yu góor ak yu jigéen. Daawuda nag dægërloo Yàllaam Aji Sax ji rekk. <sup>7</sup> Ci biir loolu Daawuda wax ak sarxalkat ba Abiyatar doomu Ayimeleg, ne ko mu indil ko xar-sànni mi. Abiyatar indil Daawuda xar-sànni ma. <sup>8</sup> Daawuda laaj Aji Sax ji, ne ko: «Ndax ma topp gàngooru yàqkat yii? Ndax dinaa leen dab?» Mu ne ko: «Demal, yaay dabe déy, te yaay xettlee déy.»

<sup>9</sup> Ba mu ko defee Daawuda dem, mook juróom benni téeméeri nit ña ànd ak moom. Ñu dem ba ca xuru Besor, ñenn ña yem fa. <sup>10</sup> Daawudaa ñoqli, mook ñeenti téeméeri nit, ñaar téeméeri nit yem foofa, ndax loof, ba manuño jàll xuru Besor. <sup>11</sup> Ci kaw loolu ña jàll yem ci jenn waayu Misra ci àll bi. Ñu indi waa ji ba ci Daawuda, daldi may waa ji mburu mu lekk, may ko ndox, mu naan. <sup>12</sup> Ab danku figg ju wow ak ñaari danki reseñ lañu ko leel, mu doora leqliku, ndax dafa fekk lekkul, naanul diiru ñetti guddi ak ñetti bëccëg. <sup>13</sup> Daawuda ne ko: «Yaw, kuy sab sang ak foo bokk?» Xalelu góor ba ne ko: «Man waa Misra laa, di jaamub jenn waayu Amalegeen. Sama sang a ma wacc, ba ma woppee bëkkaati-démb. <sup>14</sup> Noo song wetu Negew ca diiwaanu waa Keret ña, ak diiwaanu Yuda, ak wetu Negew ca diiwaanu Kaleb, te Ciglaag, noo ko lakk.» <sup>15</sup> Daawuda ne ko: «Ndax man nga maa yóbbu ba ci gàngooru yàqkat yooyu?» Mu ne ko: «Giñal ma ci Yàlla ne, doo ma rey, te doo ma delloo ca sama sang; kon dinaa la yóbbu ba ci gàngooru yàqkat yi.»

<sup>16</sup> Ci kaw loolu waa ja yóbbu Daawuda, ndeke nit ñaa nga ne wesar ca àll ba bépp, di lekk ak a naan, di mbumbaaye mboolem alal ju bare ja ñu nan-

goo ca réewum Filisti ak réewum Yuda. <sup>17</sup> Daawuda nag di leen fàdd, njël ba ca ngoon. Kenn réccul, lu moy ñeenti téeméeri xale yu góor yu war ay giléem, daw. <sup>18</sup> Daawuda nangu mboolem lu Amalegeen ña jëloon, nangu ñaari soxnaam. <sup>19</sup> Dara lu bokk ci ñoom rawul. Mag ñaak ndaw ñaak seen doom yu góor ak seen doom yu jigéen ak alal jaak mboolem lu ñu leen jëlaloon. Lépp la Daawuda délloosi. <sup>20</sup> Mu nangu mboolem jur gu gudd ak gu gàtt, nitam ña dàq, tofal ca juru Amalegeen ña, te naan: «Lëlub Daawudaa ngi!»

### *Daawuda gore na*

<sup>21</sup> Daawuda nag dikk ba ca ñaar téeméer ña lofooon ba manuñu koo topp, te ñu bàyyi woon leen ca xuru Besor. Naka lañu gatandu Daawuda ak ña mu àndal, Daawuda dikk, dajee ñoom, jàmmanteek ñoom. <sup>22</sup> Mboolem ñu bon ñaak ñu sew ña jàllandoo woon ak Daawuda nag ne leen: «Gannaaw ñii ànduñu woon ak nun, dunu leen jox dara ci alal ji nu nangu. Xanaa ku nekk jël jabaram aki doomam rekk, yóbbu te dem.» <sup>23</sup> Daawuda ne leen: «Déet bokk yi, buleen def noonu, ak li nu Aji Sax ji defal, aar nu, teg gàngooru yàqkat yi nu songoon ci sunuy loxo. <sup>24</sup> Ana nu xel mana nangoo loolu? Na ku xarejeek ku desoon ca cummikaay la, yem ak sa moroom cér; ñépp ay séddu.» <sup>25</sup> Bésub keroog la Daawuda dale def loolu mu dib dogal, di àtteb yoon bu ñeel Israyil ba tey jii.

### *Daawuda sédd na njiti Yudeen ña*

<sup>26</sup> Ba Daawuda delloo Ciglaag, sédd na ca lël ja, magi Yuda, xaritam ya. Mu yónnee leen ko, ne leen: «Lii, yeenay boroom; xéewal la gu jóge ca alalu nooni Aji Sax ji.» <sup>27</sup> Noonu la ca sédde waa Betel ak waa Ramot Negew ak waa Yatir <sup>28</sup> ak waa Arower ak waa Sifmot ak waa Estemowa <sup>29</sup> ak waa Rakal, ak waa dëkki Yerameleen ña ak waa dëkki Keneen ña, <sup>30</sup> ak ña ca Xorma ak ña ca Bor Asan ak ña ca Atag <sup>31</sup> ak ña ca Ebron ak mboolem waa gox ya mu jaare woon, mooki nitam.



## 31

### *Lu jëm ci mujug Sóol*

<sup>1</sup> Ci biir loolu waa Filisti jaamarloo ak Israyil, ba bànni Israyil won leen gannaaw, daw, ñu bare daanu ca kaw tundu Gilbowa. <sup>2</sup> Waa Filisti nag ne dann Sóol aki doomam, ba rey ca ñett; Yonatan ak Abinadab ak Malkisuwa. <sup>3</sup> Xare ba nag gëna mettee fa Sóol féete, fittkat ya jekku ko, mu jàq.

<sup>4</sup> Ba loolu amee Sóol ne gàddukatu gannaayam: «Boccil sa saamar, jam ma bala yéefar yee dikk, jam ma, torxal ma.» Gàddukatu gannaayam nag buggu koo jam ndax tiitaange lu réy. Sóol jël saamaru boppam, daldi daaneel boppam ca kaw ñawka ga. <sup>5</sup> Gàddukatu ngannaay ba gis ne Sóol dee na, moom it mu daaneel boppam ca kaw saamaram, dee topp Sóol. <sup>6</sup> Muy Sóol, di ñetti doomam, di gàddukatu gannaayam itam, di mboolem ay nitam, ñoom ñépp a bokk dee bésub keroog.

<sup>7</sup> Ci kaw loolu bànni Israyil, ya ca wàllaa xur wa, ak ña ca wàllaa dexu Yurdan gis ne xarekati Israyil daw nañu, te Sóol aki doomam dee nañu. Ñu daldi daw, gental seeni dëkk, waa Filisti dikk, dëkke.

<sup>8</sup> Ca èllëg sa, ba waa Filisti dikkee, di futtisi ña dee, ca tundu Gilbowa lañu fekk Sóol ak ñetti doomam, ñu tēdd. <sup>9</sup> Ñu dog boppu Sóol, jël ay gannaayam, ba noppi yeble ca réewum Filisti ba mu daj, ngir yégle ko ca seen kəri tuur ya ak ca askan wa. <sup>10</sup> Ba mu ko defee ñu denc gannaayi Sóol ca seen biir kër tuur ma ñuy wax Astàrt, néewub Sóol, ñu wékk ca miiru dëkk ba ñuy wax Bet San.

<sup>11</sup> Ba waa Yabes ga ca Galàdd déggee la waa Filisti def Sóol, <sup>12</sup> seen jambaar yépp a fabu, topp guddi ga gépp ba Bet San. Ñu wékkee ca miiru Bet San néewu Sóol ak néewi doomam yu góor, doora ñibbi Yabes, boole fa néew ya, lakk. <sup>13</sup> Ñu for nag seeni yax, suul ca ron garabu tamaris ga ca Yabes. Ba loolu amee ñu woor diiru juróom ñaari fan.

## Samiyel di téereb ñaareel bi Lii mooy jaar-jaari Buur Daawuda

### *Lu jëm ci tàggeb Sóol*

<sup>1</sup> Gannaaw ba Sóol faatoo, fekk na Daawuda walbatikoo ca dumay Amalegeen ña, dellu Ciglaag, ba toog fa ñaari fan. <sup>2</sup> Ca gannaaw ëllëg sa, jenn waay ne jimeet, jóge ca dalub Sóol, dikk. Yére yaa nga xottiku, bopp ba taq suuf, ngir naqarlu. Naka la agsi ci Daawuda, daldi daanu fi suuf, sujjóot.

<sup>3</sup> Daawuda ne ko: «Foo jóge nii?» Mu ne ko: «Ca dalub Israyil laa rëcce.»

<sup>4</sup> Daawuda ne ko: «Lu xew, gaawe ma!» Mu ne ko: «Mbooloom Israyil a dawé ca xare ba. Ñu bare ca ñoom daanu nañu, dee. Sóol ak doomam Yonatan it dee nañu.» <sup>5</sup> Daawuda ne ndaw la: «Lu la xamal ne Sóol ak doomam Yonatan dee nañu?» <sup>6</sup> Ndaw la ne ko: «Dafa yemook ma tollu tembe ca kaw tundu Gilbowa. Ndeke Sóol a nga fa, sukkandikoo xeejam. Watiiri xare yaak gawar ya defuñu lu moy ne ko dann. <sup>7</sup> Naka la ne gees, yem ci man, woo ma, ma wuyu. <sup>8</sup> Mu ne ma: “Yaa di kan?” Ma ne ko: “Ab Amalegeen laa.” <sup>9</sup> Mu ne ma: “Kaay fii, jekkli ma. Maa ngi ci miirum ndee, doonte dese naa tuuti.” <sup>10</sup> Ma dikk, daldi koy jekkli, ndax xamoon naa ne du dundati gannaaw jéllam ba. Ma summi nag mbaxanam buur ma mu soloon, tekki lam ba woon ca përeg ma. Yooyu laa la yótsi nii, sang bi.»

<sup>11</sup> Ba loolu amee Daawuda sëq yéreem, xotti, ña ànd ak moom ñépp itam, noonu, ndax aw naqar. <sup>12</sup> Ñaawlu nañu, di jooy, lekkuñu ba ca ngon ndax Sóol ak doomam Yonatan ak gangooru Aji Sax ji, waa kër Israyil, ña fàddoo saamar.

<sup>13</sup> Daawuda ne ndaw la: «Ana foo bokk?» Mu ne ko: «Man doomu doxandéemub Amalegeen laa.»

<sup>14</sup> Daawuda ne ko: «Noo saña xàccee sa loxo, di bóom ki Aji Sax ji fal?»

<sup>15</sup> Daawuda nag woo kenn cay surgaam, ne ko: «Dikkal dóor, mu dee!»

<sup>16</sup> Daawuda ne Amalegeen ba: «Yaa gàddu sa bakkanu bopp, ndax yaa seedee sa gémmiñu bopp ne yaa rey ki Aji Sax ji fal.» Surga ba dóor Amalegeen ba, mu dee.

### *Daawuda jooy na Sóol ak Yonatan*

<sup>17</sup> Kàddu yii la Daawuda jooye Sóol ak doomam Yonatan. <sup>18</sup> Moo santaane ñu jàngal ko askanu Yuda. «Fittkat» lañu dippee woy wi. Nii lañu ko binde ci «Téereb aji jub ji.» Mu ne:

<sup>19</sup> Wóoy Israyil, ña ngay sagoo lañu jam, ñu ne lareet ca sa tund ya!  
Jàmbaar ñaa daanu!

<sup>20</sup> Buleen ko siiwal fa Gaat, buleen ko yéene fa mbeddi Askalon, lu ko moy janqi Filisti bég, janqi yéefar yiy textexi.

<sup>21</sup> Wóoy tundi Gilbowa!  
Yàlla bu ngeen lay, bu ngeen tawlu,  
Yàlla bu seeni tool nangooti,  
ba duunal jooxeb pepp,  
nde foofa lees torxale pakkub jàmbaar.  
Wóoy pakkub Sóol ba deesul diwati!  
<sup>22</sup> Du deret mbaa nebbonu jàmbaar  
bu fittug Yonatan xof,  
te saamaru Sóol ba du sooy!

<sup>23</sup> Wóoy Sóol ak Yonatan,  
ñoo yiw, sopplu ba ñuy dund,  
te ba ñu deeyee, teqlikoowuñu.  
Ag jaxaay, ñoo ko gëna gaaw,  
te gaynde, ñoo ko gëna jàmbaare.

<sup>24</sup> Yeen jigéeni Israyil,  
jooyleen Sóol, ma leen wodde ndimol  
tànnéef  
lu xonq curr,  
takkaal leen gànjari wurus ca seen kawi  
yéere.

<sup>25</sup> Jàmbaar ñaa daanoo biir xare ba,  
Yonatan lañu jam ca kaw tund ya!

<sup>26</sup> Yonatan, doom yaay, tiisoo naa la,  
dama laa soppoon lool,

te sa mbëggeel ci man yéeme,  
ba raw mbëggeelu jigéen.

<sup>27</sup> Jàmbaar ñaa daanu,  
ngànnayyi xare ya sàнку!

## 2

### *Daawuda falu na buur ca Yuda*

<sup>1</sup> Gannaaw ba loolu weesee Daawuda daa laaj Aji Sax ji, ne ko: «Ndax ma dellu ci dëkki Yuda yi benn?» Aji Sax ji ne ko: «Demal.» Daawuda ne ko: «Bu ma ciy dem?» Aji Sax ji ne ko: «Ebron.» <sup>2</sup> Daawuda dem ca, ànd ak ñaari soxnaam, Ayinowam ma cosaanoo Yisreel, ak Abigayil ma doon jabaru Nabal waa Karmel ba. <sup>3</sup> Daawuda nag yóbbaaale nit ña ànd ak moom, kenn ku ci nekk ak njabootam, ñu dem sancii ca dëkk ya wër Ebron. <sup>4</sup> Ba mu ko defee waa Yuda dikk, diw fa Daawuda, fal ko buurub waa kër Yuda.

Gannaaw gi ñu wax Daawuda ne ko waa Yabes Galàdd ñoo rob Sóol. <sup>5</sup> Daawuda yónnee ay ndaw ca waa Yabes Galàdd, wax leen ne leen: «Yal na leen Aji Sax ji barkeel ndegam yeena jéfe ngor seen digganteek seen sang Sóol, ba rob ko. <sup>6</sup> Kon nag yal na Aji Sax ji jéfeek yeen ngor ak kóllère. Man itam dinaa leen yéwéne ndax nii ngeen jéfe. <sup>7</sup> Léegi nag dëgërluleen te góor-góorlu. Dëgg la seen sang Sóol faatu na, waaye man mii la giirug Yuda fal, may seen buur.»

### *Isboset falu na buur ca Israyil*

<sup>8</sup> Doomu Ner, Abner njiital mbooloom xarem Sóol nag, fekk na mu yóbbu Isboset\* doomu Sóol ju góor, jállale ko ba Maanayim. <sup>9</sup> Mu tabb ko nag buuru diiwaani Galàdd ak Asur ak Yisreel ak Efrayim ak Beñamin, Israyil gépp daal. <sup>10</sup> Ñeent fukki at la Isboset doomu Sóol amoon ba muy falu buurub Israyil, te ñaari at la nguuru. Waa kër Yuda donj ñoo toppoon Daawuda. <sup>11</sup> Diir ba Daawuda falu buurub Ebron gu waa kër

Yuda, juróom ñaari at la ak juróom benni weer.

### *Yuda ak Israyil xare nañu*

<sup>12</sup> Mu am bés, Abner doomu Ner ànd ak niti Isboset doomu Sóol, ñu jóge Maanayim, jëm diiwaanu Gabawon. <sup>13</sup> Yowab, mi Seruya di yaayam, daldi ànd ak niti Daawuda, ñu dem dajejeek ñoom ca wetu déegub Gabawon. Nii taxawe gii wet, ñee taxawe ca wàlla, ñu séq déeg ba. <sup>14</sup> Abner ne Yowab: «Ayca na xale yu góor yi jóg, daje fi sunu kanam.» Yowab ne ko: «Ayca!» <sup>15</sup> Ñu daldi limoo, fukki góor ak ñaar taxawal giirug Beñamin ak Isboset doomu Sóol; fukki góor ak ñaar taxawal Daawuda. <sup>16</sup> Ku nekk ne sa boppu moroom ñëjj, rekk boj sab saamar ca wet ga, ñu ànd daanu. Moo tax ñu wooye bérab booba ca Gabawon «Toolub ñawka yi.»

<sup>17</sup> Bés sub keroog xeex ba metti na lool, waaye Abner ak waa Israyil ñoo féete suuf niti Daawuda.

<sup>18</sup> Ñetti doomi Seruya ña nga fa woon: Yowab ak Abisay ak Asayel. Asayel nag daa manoon daw lool ni kéwél. <sup>19</sup> Asayel ne dann Abner rekk, jàddul ndijoor, jàddul càmmoñ. <sup>20</sup> Abner geesu ne ko: «Kii Asayel?» Mu ne ko: «Man a.» <sup>21</sup> Abner ne ko: «Tee ngaa jàdd ndijoor mbaa càmmoñ, te jàpp kenn ci xale yu góor yi, futti ko!» Asayel nag buggu koo bàyyi, xanaa topp ko rekk. <sup>22</sup> Abner dellu ne Asayel: «Xiddi ma! Bul tax ma jam la, nga daanu! Te kon xawma nu may jàkkaarlooteek sa mag Yowab!» <sup>23</sup> Asayel të ticc, topp ko. Abner jam ko catal xeejam ca biir ba, ba xeej ba fëll ca gannaaw ga, mu daanu dee ca saa sa. Ba loolu amee, ku dikk, ba tollook bérab ba Asayel daanu dee, daldi fay taxaw.

<sup>24</sup> Yowab ak Abisay nag dàqi Abner. Ba jant bay lang, ña nga tollu ca tundu Ama, wa janook Giya, ca yoon wa jëm màndiñu Gabawon. <sup>25</sup> Beñamineen ñi daldi mànkoo, topp ca gannaaw Abner,

\* **2:8** 2.8 Isboset: mbind mi ci ebrë, làkku bànni Israyil, Isboset la indi, mu firi Nitu gâce. Turam wu jëkk nag, Isbaal la woon, mu firi Nitu Baal. Bu jëkkoon Baal «kilifa gi» la doon tekki. Waaye gannaaw gi Baal turu tuur mu waa Kanaan la woon. Du woon teggin ñuy wooye buurub Israyil turu tuur moomu. Moo tax ñu soppi turam wu jëkk wa, tudde ko Isboset.

ñu def menn mbooloo, bokk taxaw ci kaw wenn tund. <sup>26</sup> Abner àddu ca kaw, ne Yowab: «Xanaa saamar day lekku suux ba fàww? Xamuloo ne lii aw naqar donj lay mujje? Ana looy xaarati ci ne mbooloo mi ñu noppee topp seeni bokk?» <sup>27</sup> Yowab ne ko: «Giñ naa ci Yàlla jiy dund, boo waxuloon, nit ñi duñu noppee dàq seeni bokk te bët setul.» <sup>28</sup> Ba loola amee Yowab wal liit ga, gaa ña ñépp nag taxaw, noppee topp Israyil, daldi dakkal xare ba. <sup>29</sup> Abner aki nitam dañoo fanaanee topp xuru Yurdan guddig keroog, ba jàll dexu Yurdan. Ñu daldi jaare Bittron gépp, door a agsi Maanayim.

<sup>30</sup> Gannaaw ba Yowab walbatikoo ca ndàqum Abner, daa woo gangooram gépp, fukk ak juróom ñeent wuute ci niti Daawuda, te limaalewuñu Asayel. <sup>31</sup> Waaye fekk na niti Daawuda rey ñetti téeméer ak juróom benn fukk (360) ca Beñamineen ñaak niti Abner. <sup>32</sup> Ñu yóbbu Asayel, rob ko ca wetu baayam ca Betleyem, Yowab aki nitam nag fanaanee dox, ba jant fenke leen Ebron.

### 3

<sup>1</sup> Xare ba nag yàggoon na diggante waa kër Sóol ak waa kër Daawuda. Daawuda di gëna am doole, waa kër Sóol di gëna néew doole.

#### *Daawuda am nay doom ca Ebron*

<sup>2</sup> Doomi Daawuda yu góor yi jud-doo Ebron ñoo di: taawam Amnon, mi Ayinowam waa Yisreel ba di ndeyam; <sup>3</sup> ñaareelu doomam di Kilab, ndeyam di Abigayil, ma doon jabaru Nabal waa Karmel ba; ñetteelu doomam di Absalom, mi Maaka di ndeyam. Maaka, Talmay buurub Gesur ay baayam; <sup>4</sup> ñeenteelu doomam di Adoña, mi Agit di ndeyam; juróomeelu doomam di Sefatiya mi Abital di ndeyam; <sup>5</sup> juróom benneelu doomam di Ittireyam, mi soxnaam si ñuy wax Egla di ndeyam. Ñooñu ñooy doomi Daawuda ya juddoo Ebron.

#### *Abner jote naak Isboset*

<sup>6</sup> Diir ba waa kër Sóol di xareek waa kër Daawuda, Abner a ngay gëna dëgéral

taxawaayam ca waa kër Sóol. <sup>7</sup> Sóol nag amoon na nekkaale bu ñuy wax Rispa doomu Aya. Mu am bés Isboset ne Abner: «Ana lu waral nga dëkkoo sama nekkaaleb baay?» <sup>8</sup> Abner mer lool ca la ko Isboset wax. Mu ne ko: «Ndax dama di xajub workat bu Yudeen ñi? Ba tey jii ngor laay jëfe ak sa waa kër baay Sóol, aki bokkam aki soppeem. Te it teguma la ci loxol Daawuda; yaw nga di ma tuumaal ci ndaw sii tey? <sup>9</sup> Yal na ma Aji Sax ji teg mbugal mu gëna tar ndegam defaluma Daawuda la ko Aji Sax ji giñaloon, <sup>10</sup> ne ko dina jële nguur gi ci waa kër Sóol, samp jalub Daawuda ci kaw Israyil ak Yuda, dale ko Dan ca bëj-gànnar, ba Beerseba ca bëj-saalum.» <sup>11</sup> Isboset nag ñemewula teg baat ca la Abner wax, ndax ragal ko.

#### *Abner fekki na Daawuda*

<sup>12</sup> Ba loolu amee Abner yebal ca saa sa ay ndaw ca Daawuda, ne ko: «Ana ku moom réew mii?» Mu neeti ko: «Fasool ak man kóllère. Maa lay jàpple, ba walbatil la Israyil gépp, ñu nangul la.» <sup>13</sup> Daawuda ne ko: «Baax na. Dinaa fasook yaw kóllère, waaye lenn rekk laa lay ñaan. Bul dikk fi sama kanam te indiloo ma sama jabar Mikal doomu Sóol.» <sup>14</sup> Gannaaw loolu Daawuda yebal ay ndaw ca Isboset doomu Sóol, ne ko: «Jox ma Mikal, sama jabar ja ma cane woon téeméeri mbuñukay waa Filisti.» <sup>15</sup> Isboset yónnee, jëli Mikal ca jëkkëram Paltiyel\* doomu Layis. <sup>16</sup> Paltiyel topp ca gannaaw ndaw sa, di jooy, ba ñu àgg Baxurim. Abner ne ko: «Ayca, doxal ñibbi.» Waa ja ñibbi.

<sup>17</sup> Ba mu ko defee Abner gise ak magi Israyil, ne leen: «Yàgg ngeena bégga fal Daawuda, muy seen buur. <sup>18</sup> Kon ayca boog! Ndax Aji Sax jee ko digoon Daawuda, ba mu nee: “Ci sama jaam Daawuda laay walloo Israyil sama ñoñ, ci waa Filisti ak mboolem seeni noon.”» <sup>19</sup> Abner wax ak giirug Beñamin itam déeyook ñoom ba noppi dem Ebron ca Daawuda, déey ko la waa Israyil ak giirug Beñamin gépp namma def. <sup>20</sup> Ba Abner agsee Ebron ca Daawuda, ñaar fukki

\* **3:15** 3.15 Paltiyel mooy Palti ba tey. Seetal ci 1.Samiyel 25.44.

nit la àndal. Daawuda berndeel Abner, mook nit ña ànd ak moom. <sup>21</sup> Ba loolu amee Abner ne Daawuda: «Buur sang bi, dama lay wool Israyil gépp, ñu wuysi la. Su ko defee ñu fasook yaw kóllère, nga mana nguuru fu la neex.» Ba loolu amee Daawuda yiwi Abner, mu dem ci jàmm.

### *Yowab fey na Abner*

<sup>22</sup> Ci kaw loolu rekk niti Daawuda ànd ak Yowab, jóge xare, indaale lèl ju bare. Waaye fekkul Abner Ebron ca Daawuda, ndax fekk na Daawuda yiwi ko, ba mu dem ci jàmm. <sup>23</sup> Yowab agsi mook mboolem gàngoor ga ànd ak moom. Ñu ne ko Abner doomu Ner ñëwoon na ca Buur, ba mu yiwi ko, mu dem ci jàmm. <sup>24</sup> Yowab dem ca Buur ne ko: «Waaw, li nga def nag? Abner mii dikk, nga bàyyi ko mu dem nii rekk! <sup>25</sup> Xam nga Abner doomu Ner! Wor la moo ko fi indi, ngir xam say dugg ak say génn, ak lépp looy def.» <sup>26</sup> Ci kaw loolu Yowab bàyyikoo ca Daawuda, yebal ay ndaw yu toppi Abner, dab ko, waññee ko ca teenub Sira. Waaye Daawuda yégu ca dara. <sup>27</sup> Naka la Abner délsi ba Ebron, Yowab berook moom ca buntu dékk ba, mel ni kuy déeyook moom, daldi koy jam ci biir, rey ko, feyul Asayel, rakkam ja Abner bóomoon.

<sup>28</sup> Gannaaw ga, ba ko Daawuda yégee, da ne: «Man de set naa wecc, maak sama waa réew ba fàww fi kanam Aji Sax ji ci bakkanu Abner doomu Ner bi rot. <sup>29</sup> Yal na deewug Abner këppu ci kaw boppu Yowab, mook waa kër baayam gépp. Yàlla bu waa kër Yowab ñàkk ku ànd ak jàngoroy xelli, mbaa jàngoroy der juy law†, mbaa lafañ buy doxe yet, mbaa ku deeye xare, mbaa ku amul lu mu lekk.»

<sup>30</sup> Noonu la Yowab ak rakkam Abisay bóome Abner, ndax la mu reyoon seen doomu ndey Asayel ca xareb Gabawon ba.

### *Jooy nañu Abner*

<sup>31</sup> Ba loolu wéyee Daawuda wax ak Yowab, mook mboolem gàngoor ga ànd ak moom, ne leen: «Xottileen seeni yére, soli saaku, ñaawloo ko deewug Abner.»

Buur Daawuda ci boppam dox na, topp ca jaat ja. <sup>32</sup> Ñu denc Abner ca Ebron. Buur Daawuda ne yikkét jooy ca bàmmeelu Abner, mbooloo ma mépp jooy. <sup>33</sup> Woy wii la Buur fent, jooye ko Abner. Mu ne: «Moo Abner, jombuloo dee ni sagaru nit a?

<sup>34</sup> Jéngesu la, yeeweesu laak càllala. Danga ne dàll daanu, ni ñuy daanoo fi kanam ku bon.» Mbooloo ma mépp dellu jooyati.

<sup>35</sup> Gannaaw gi mbooloo mépp di soññ Daawuda, ngir mu lekk, balaa jant a so. Daawuda daldi giñ ne: «Yal na ma Yàlla teg mbugal mu gëna tar ndegam maa sex dugub mbaa ñam wu mu doon, te jant sowul.» <sup>36</sup> Mbooloo ma mépp a seede loolu, rafetlu ko, na ñu rafetloo mboolem lu Buur Daawuda def. <sup>37</sup> Mbooloo mépp ak Israyil gépp a xam bésusb keroog ne pexe ma rey Abner doomu Ner jógewul ca Buur. <sup>38</sup> Ba loolu amee Buur wax aki nitam ne leen: «Xanaa xamuleen ne ab garmi, nit ku màgg moo daanu bésusb tey fi digg Israyil? <sup>39</sup> Bésusb tey jii li ma falu buur lépp, néew naa doole, ndax doomi Seruya yii ñoo ma gëna dëgër xol, ba jaaxal ma. Waaye yal na Aji Sax ji fey ku bon jëfam.»

## 4

### *Isboset faatu na*

<sup>1</sup> Ba Isboset doomu Sóol déggee ne Abner dee na ca Ebron, xolam jeex na, Israyil gépp jàq. <sup>2</sup> Isboset amoon na ñaari njiiti gàngooru yàqkat: kenn ka di Baana, ka ca des di Rekab, ñuy doomi góor gu ñuy wax Rimon, giiroo ci giirug Beñamin te dëkke Berot ga ñu boole woon ca suufas Beñamin; <sup>3</sup> ndax waa Berot a dawoon, làquji Gitayim, doon fa ay doxandéem ba tey jii.

<sup>4</sup> Fekk na Yonatan doomu Sóol ju góor am na doom ju góor ju tànk ya baaxul. Ndaxte ba ñu déggee tàgge bu jóge Yisreel, ñu ne Sóol ak Yonatan faatu nañu, fekk na xale ba am juróomi at. Ndaw sa ko daan topptoo, fab ko di gaawtuy

† 3:29 3.29 jàngoro yi: seetal ci *Sarxalkat yi* 13.2 ak 15.2.

daw, waaye na muy gaawtu di dem, xale ba daanu, daldi lafañ. Ma nga tuddoon Mefiboset\*.

<sup>5</sup> Rekab ak Baana, doomi Rimon ma dëkk Berot nag ñoo demoon kër Isboset, àgg fa ci biir tangooru njolloor, fekk Isboset di for bët. <sup>6</sup> Ñu jàll ba ca biir-a-biir kër ga, mel ni ñuy sàkk peppum bele, daldi ko jam ci biir, ba noppi yoxoosu daw. <sup>7</sup> Ba ñuy dugg këram, ma nga tēddoon ca lalam, ca néegu biiram. Ñu jam ko ba rey ko, dog bopp ba, yóbbu. Ñu jaare xuru Yurdan, fanaanee dox.† <sup>8</sup> Ci kaw loolu ñu yóbbul boppu Isboset Daawuda ca Ebron, ne ko: «Buur, Sóol, sa noon ba doon wut sa bakkan, boppu doomam Isboset a ngii. Bésub tey jii de sang bi, Aji Sax jee la feyul ci Sóol ak askanam.»

<sup>9</sup> Daawuda nag ne Rekab ak Baana, doomi Rimon waa Berot ba: «Giñ naa ci Aji Sax ji, Kiy Dund te musal sama bakkan ci gépp njàqare, <sup>10</sup> ka ma tàggesi woon Sóol, foog ne xibaaru jàmm la ma indil, dama koo jàpp, rey ko ca Ciglaag, yoole ko ko xibaaram. <sup>11</sup> Rawatina nag nit ñu bon ñu rey jaamburu Yàlla ci biir këram, ci kaw lalam sax. Kon дума def lu moy topp leen bakkanam, jële leen ci kaw suuf!» <sup>12</sup> Daawuda nag jox ay nitam ndigal, ñu rey leen. Ñu dog seeni loxook seeni tànk ca tenqo ya, wékk néew ya ca wetu déegub Ebron, daldi jël boppu Isboset, suul ca bàmmeele Abner ca Ebron.

## 5

### *Daawuda falu na buur ca Israyil*

<sup>1</sup> Ci kaw loolu giiri Israyil yépp dikk fa Daawuda ca Ebron, ne ko: «Noo ngii di say bokk lenqe. <sup>2</sup> Te it démb ak bëkk-démb, ba Sóol dee sunu buur, yaw yaa doon jiite Israyil ciy xareem. Aji Sax ji ne la: “Yaay sàmm Israyil sama ñoñ te yaay doon kilifag Israyil.”» <sup>3</sup> Noonu la magi Israyil ñépp dikke ca Buur Daawuda ca

Ebron, mu fasook ñoom kóllère fa kanam Aji Sax ji. Ñu sotti Daawuda diwu pal ga, muy buurub Israyil.

<sup>4</sup> Daawuda amoon na fanweeri at, ba muy falu buur, te ñeent fukki at la nguuru. <sup>5</sup> Ca Ebron la yore nguurug Yuda juróom ñaari at ak juróom benni weer, waaye ca Yerusaleem la yore diiru fanweeri at ak ñett, mboolem Israyil ak Yuda.

### *Daawuda nangu na Yerusaleem*

<sup>6</sup> Gannaaw loolu Buur Daawuda ànd aki xarekatam, jëm Yerusaleem, songi Yebuseen ña dëkkoon ca réew ma. Yebuseen ña ne Daawuda: «Doo fi dugg de, nde gumba yeek lafañ yi rekk ñoo lay wañni.» Booba foog nañu ne Daawuda manu faa dugg. <sup>7</sup> Terewul Daawuda nangu tatay Siyon, ga ñu dippee Kër Daawuda. <sup>8</sup> Daawudaa noon bésub keroog: «Ku bégga jam Yebuseen ñi, ca xuntim yoonu ndox ma ngay mana dabe seeni gumbaak seeni lafañ, xuloowaaley Daawuda yi.» Looloo waral waxin wi ñu naan: «Gumba akub lafañ du dugg kër Buur.» <sup>9</sup> Ba mu ko defee Daawuda dëkk ca biir tata ja, wooye ko Kër Daawuda, ba noppi tabax fa ko wër fépp, dale ko ca sèkkub Milo\*, ba ca biir. <sup>10</sup> Daawuda nag di gëna am doole, Aji Sax ji Yàlla, Boroom gàngoori xare yi ànd ak moom.

<sup>11</sup> Ci biir loolu Iram buurub Tir, yebal ay ndaw ca Daawuda, ñu yóbbul ko ay banti garabu seedar, ak ay liggéeykati bant ak yettkati xeer, ngir ñu tabaxal Daawuda kër. <sup>12</sup> Daawuda xam ne Aji Sax jee ko tabb buurub Israyil te moo kaweel nguuram ngir Israyil, aw ñoñam.

<sup>13</sup> Gannaaw ba Daawuda jógee Ebron, dellu na jël ay nekkaale aki soxna ca Yerusaleem. Mu am ca yeneen doom yu góor ak yu jigéen. <sup>14</sup> Doomam yu góor yi juddoo Yerusaleem ñoo di Samwa ak Sobab ak Natan ak Suleymaan; <sup>15</sup> ak Ibaar

\* **4:4** 4.4 Mefiboset dees na ko wooye Mefibaal ba tey. Seetal lu mel noonu ci 2.8. † **4:7** 4.6-7 Am na ci bind yu yàgg yi, yu ci indi: Am na ku jigéen ku doon wattu bunt ba, di bàcc pepp. Ay nelaw dab ko. Rekab ak Baana yoxoosu dugg. Ñu jàll ca néegu biiru Isboset, fekk ko mu tēdd ca lalam. Ñu jam ko, rey ko, dog bopp ba, yóbbu, jaareji xuru Yurdan, fanaanee dox. \* **5:9** 5.9 Milo xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkklu ko.

ak Elisawa ak Nefeg ak Yafiya; <sup>16</sup> ak Elisama ak Elyada ak Elifelet.

### *Buur Daawuda дума na waa Filisti*

<sup>17</sup> Ba waa Filisti déggee ne fal nañu Daawuda buurub Israyil, ñoom ñépp a jóg, di ko wër. Daawuda nag dégg ko, dem làquji ca biir tata ja. <sup>18</sup> Waa Filisti dikk, tasaaroo ca xuru Refayeen ña. <sup>19</sup> Daawuda laaj Aji Sax ji, ne ko: «Ndax ma songi waa Filisti? Dinga leen teg ci sama loxo?» Aji Sax ji ne ko: «Demal, maay teg waa Filisti ci say loxo déy!» <sup>20</sup> Daawuda dem ba ca Baal Perasim, дума leen foofa. Mu ne: «Aji Sax jee ma bëttal noon yi, ni walum ndox di bëtte, wéy.» Moo tax ñu wooye bérab boobu Baal Perasim (mu firi Boroom bëtt-bëtt yi). <sup>21</sup> Waa Filistee fa wacc seeni gällaaj, Daawudaaki nitam boole yóbbu.

<sup>22</sup> Ba mu ko defee waa Filisti dikkaat, tasaaroo ca xuru Refayeen ña. <sup>23</sup> Daawuda dellu laaj Aji Sax ji. Mu ne ko: «Bul jubal, doxeleen gannaaw, dal ca seen kaw fa janook garabi sànd ya. <sup>24</sup> Booy dégg tànk yuy jaab ca kaw njobbaxtali sànd ya rekk, gaawtul, ndax booba Aji Sax jee la jiitu, di dumaji waa dalub Filisti.» <sup>25</sup> Daawuda nag def noonee ko Aji Sax ji sant, ba дума waa Filisti diggante Geba, ba ca buntu Geser.

## 6

### *Gaalu Yàlla ga dem na Yerusalem*

<sup>1</sup> Ba loolu wéyee Daawuda dellu woo mboolem ñeyi xarey Israyil, ñuy fanweeri junni. <sup>2</sup> Mu fabu, mook mboolem gàngoor ga ànd ak moom, dem Baala, ca Yuda, ngir jëleji fa gaalu Yàlla gi ñu tudde Tur wi, turu Aji Sax ji Boroom gàngoori xare yi, ki tooge diggante malaakay serub, yi tiim gaal gi. <sup>3</sup> Ñu teg ko ci kaw watiir wu bees, jële ko kër Abinadab ga woon ca kaw tund wa. Usa ak Axyo, doomi Abinadab yu góor ya dox, jiite watiir wu bees wa. <sup>4</sup> Noonu lañu dawale watiir wa yeb gaalu Yàlla ga, jële ko kër Abinadab, ga ca kaw tund wa, Axyo dox jiitu ko. <sup>5</sup> Daawudaak waa kër Israyil gépp

\* **6:7** 6.7 Sarxalkat yi rekk ñoo amoon sañ-sañu laal gaalu Yàlla ga, te Leween ñi rekk ñoo amoon sañ-sañu gàddu ko.

a ngay bannexoo mboolem juntuukaayi xumbéen fi kanam Aji Sax ji; muy lu ñu defare bantu garabu sippar, ak ay kesen-kesen aki tabala ak xeeti xalam.

<sup>6</sup> Naka lañu dem ba tollu ca dàggay Nakon, nag ya tërëf, Usa tàllal loxoom, jàpp ca gaalu Yàlla ga. <sup>7</sup> Sànjum Aji Sax ji nag tàkk ci kaw Usa. Yàllaa ko fàdd foofa, ndax ug teeyadeem, mu dee foofa ca wetu gaalu Yàlla ga\*. <sup>8</sup> Ba loolu amee Daawuda mer ca mbugal mu metti ma Aji Sax ji teg Usa. Moo tax mu tudde bérab booba Peres Usa (mu firi Mbugalum Usa), muy turam ba tey jii.

<sup>9</sup> Daawuda am na tiitaange lool bésub keroog ci Aji Sax ji. Ma nga naan: «Ana nu gaalu Aji Sax ji mana dale ak man?» <sup>10</sup> Loolu nag tax Daawuda nanguwula yóbbu gaalu Aji Sax ji fa moom, ca gox ba ñu naan Kër Daawuda. Mu waññi gaal gi, yóbbu ko ca kër Obedd Edom waa Gaat ba. <sup>11</sup> Gaalu Aji Sax ji nekk na kër Obedd Edom waa Gaat ba ñetti weer. Aji Sax ji barkeel Obedd Edom, mook këram gépp.

### *Gaal ga dikk na Yerusalem*

<sup>12</sup> Ba loolu amee ñu xamal Buur Daawuda ne ko: «Aji Sax ji de barkeel na Obedd Edom ak mboolem lu bokk ci moom ndax gaalu Yàlla gi.» Daawuda jëleji gaalu Yàlla ga kër Obedd Edom, daldi koy yóbbu ci biir mbégte mu réy ba këram, fa ñu naan Kër Daawuda. <sup>13</sup> Ba ña gàddu gaalu Aji Sax ja séqee juróom benni jéego, aw yëkk ak wëllu wu duuf la Daawuda sarxal. <sup>14</sup> Daawudaa ngay fecc ak doole fa kanam Aji Sax ji. Daawudaa nga gaño am xar-sànnim lëe. <sup>15</sup> Naka la Daawuda ak waa kër Israyil gépp di yóbbu gaalu Aji Sax ji, sarxolle yaak liit ya jolli.

<sup>16</sup> Ba gaalu Aji Sax jay duggsi ca biir gox ba ñu naan Kër Daawuda, soxnas Daawuda, Mikal doomu Sóol a nga sèppu ca palanteeram. Mu gis Buur Daawuda di tëb ak a fecc ca kanam Aji Sax ji. Mu jéppi ko lool.

<sup>17</sup> Ba mu ko defee ñu indi gaalu Aji Sax ji, yeb ko ca bérabam, ca biir xayma ba ko

Daawuda sampal. Daawuda daldi joxe fa kanam Aji Sax ji ay saraxi rendi-dóomal, ak saraxi cant ci biir jàmm. <sup>18</sup> Daawuda joxe saraxi rendi-dóomal ak saraxi cant ci biir jàmm, ba noppi daldi ñaanal askan wi ci turu Aji Sax ji Boroom gàngoori xare yi. <sup>19</sup> Mu séddale aw ñam askan wépp, mbooloom Israyil mépp, góor ak jigéen; ku ci nekk mu jox la menn mburu ak yàpp wu ñu saaf† ak benn nàkku reseñ. Mbooloo ma doora dem, ku nekk ñibbi kèram.

<sup>20</sup> Ba loolu amee Daawuda walbatiku, dugg biir kèram, ngir ñaanal waa kèram. Soxnaam Mikal doomu Sóol génn dajeek moom, ne ko: «Buuru Israyiloo, yaaka teral sa bopp bésub tey jii! Nga futteeku tey jii fi kanam jigéen ñiy sa jaami jawriñ yi, mbete nit ku tekkiwul dara!»

<sup>21</sup> Daawuda ne Mikal: «Fi kanam Aji Sax ji ma taamu, wacc sa baay ak waa kèram gépp, ngir fal ma kilifag Israyil, ñoñi Aji Sax ji, fi kanam Aji Sax ji laay bannexu.

<sup>22</sup> Dinaa gëna teddadil sama bopp sax, gëna toroxlu, ba gisal ko sama bopp, te du tere jaam yu jigéen yi ngay wax teral ma.» <sup>23</sup> Mikal doomu Sóol jooju nag amul doom, ba ni mu deeye.

## 7

### *Lu jëm ci kër Yàlla ak kër Daawuda*

<sup>1</sup> Gannaaw loolu Buur Daawuda sanc na kèram, Aji Sax ji noppal ko ci noonam yi ko wër yépp. <sup>2</sup> Ci biir loolu mu ne Yonent Yàlla Natan: «Xoolal rekk, maa ngi dëkke kèru banti seedar, gaalu Yàlla gi dëkke ab xayma.» <sup>3</sup> Natan ne Buur: «Mboolem loo ci namma def rekk, defal, ndax Aji Sax ji yaw la àndal.»

<sup>4</sup> Guddig keroog nag kàddug Aji Sax ji dikkal Natan, ne ko: <sup>5</sup> «Demal wax sama jaam Daawuda, ne ko: “Aji Sax ji dafa wax ne: Ndax yaw yaa may tabaxal kèr gu ma dëkke? <sup>6</sup> Bés ba ma génnee bànni Israyil Misra ba tey jii, masumaa dëkke ci kër. Ci biir xaymab jaamookaay laa masa mänge. <sup>7</sup> Mboolem fu ma masa mängeji ak bànni Israyil gépp, ndax mas naa wax benn baat, jëme ci genn giirug Israyil gu

ma sant ñu sàmm Israyil sama ñoñ, ne leen ñu tabaxal ma kèrug bantu seedar?”

<sup>8</sup> «Kon nag waxal sama jaam Daawuda, ne ko: “Aji Sax ji Boroom gàngoori xare yi dafa wax ne: Maa la jële ca parlu, ga nga toppe woon gàtt ya, ngir nga doon kilifag Israyil, sama ñoñ. <sup>9</sup> Maa ànd ak yaw fépp foo dem, maa tenqee fi sa kanam mboolem say noon, te maa lay may tur wu màgge ni turi boroom daraja yi ci àddina. <sup>10</sup> Maay sàkkal dëkkuwaay Israyil sama mos, jëmbat ko, mu dëkke ko, ba deesu ko lëjalati, te ñu bon ñi duñu ko sonalati na woon, <sup>11</sup> ba ma falee ay njiit ci kaw Israyil sama ñoñ. Maa lay noppal ci sa noon yépp. Te it Aji Sax jaa ngi lay yégal ne la Aji Sax ji moo lay sosal kër. <sup>12</sup> Te bu say fan matee ba nga tēddi, fekki say maam, maay yékkati kenn ci saw askan, sa deretu bopp, mu wuutu la, te maay saxal nguuram. <sup>13</sup> Kookooy tabax kër, ñeel sama tur, te maay saxal ab jalam ba fàww. <sup>14</sup> Man maay doon baay ci moom, moom, muy doom ci man. Su defee naka su dul noonu, maa koy yare bantu nit, ak dumay doom aadama. <sup>15</sup> Waaye duma ko noppee laaye biir, ni ma noppee laaye biir Sóol ma ma la randalal. <sup>16</sup> Sa kër ak sa nguur day sax dakk fi sa kanam, te sab jal day dèju ba fàww.”»

<sup>17</sup> Noonee Natan jote mboolem kàddu yooyu ak peeñu moomu, na la ko yegge Daawuda.

### *Daawuda delloo na Yàlla njukkal*

<sup>18</sup> Ba loolu amee Buur Daawuda dikk ba fa kanam Aji Sax ji, toog ne ko:

«Boroom bi Aji Sax ji! Ana lu ma doon, ak lu sama waa kër doon, ba tax nga indi ma ba fii? <sup>19</sup> Boroom bi Aji Sax ji, loolu doyatu la, nga waxaale ci sama askan, wi xaajagula ñew, Sang bi. Boroom bi, Aji Sax ji, ndax nii ngay jēfeek doom aadama?

<sup>20</sup> «Boroom bi Aji Sax ji, ana lu ma lay waxati? Yaw de, Sang bi, yaa ma ràññee. <sup>21</sup> Sa kàddoo waral nga def mboolem jii jēf ju réy ci sa yéney xol, ba noppi yégal ma ko, Sang bi.

† 6:19 6.19 yàpp wu ñu saaf walla benn nàkku tàndarma.



<sup>22</sup> «Boroom bi, Aji Sax ji, Moo la tax di ku màgg! Kenn du yaw, kenn du Yàlla ku dul yaw donn, te mboolem lu nu nopp may, dëggal na loolu. <sup>23</sup> Ana askan wu mel ni Israyil sa ñoñ ci kaw suuf, wenn askan wu Yàlla dikk, goreel leen ngir def leen ñoñam, ba turam siiw? Yaa leen defal ay jaloore, yaa defal sam réew ay kéemaan ci sa kanam ñoñ ñi nga goreele fa Misra aki askanam aki yàllaam. <sup>24</sup> Yaa dëgéral Israyil sa ñoñ, ngir ñoñoo leen ba fàww, te yaw Aji Sax ji, yaa doon seen Yàlla.

<sup>25</sup> «Léegi nag, Aji Sax ji Yàlla, Sang bi, wax ji nga wax ci man, ak sama waa kër, saxal ko ba fàww rekk, te defe ko noonu nga ko waxe, <sup>26</sup> ngir saw tur di gëna màgg ba fàww, ñu naan: «Aji Sax ji Boroom gàngoori xare yi mooy Yàllay Israyil,» te waa kër Daawuda sax fi sa kanam, Sang bi.

<sup>27</sup> «Aji Sax ji Boroom gàngoor yi, Yàllay Israyil, yaw déy yaa ma déey, Sang bi, ne kër nga may sosal. Moo tax ma ñeme laa ñaan lii, Sang bi. <sup>28</sup> Léegi nag, Boroom bi Aji Sax ji, yaw yaay Yàlla, say kàddu mooy dëgg, te yaa ma wax lu baax lii, Sang bi. <sup>29</sup> Kon nag Sang bi, nangula barkeel sama kër, ngir mu sax ba fàww fi sa kanam. Ndax kat yaw Boroom bi Aji Sax ji yaa wax, te ci sa barke la sama kër di barkeele ba fàww, Sang bi.»

## 8

### *Daawuda дума na xeet ya ko wër*

<sup>1</sup> Gannaaw gi, Daawuda дума na Filis-teen ña, néewal leen doole, jële kilifteefu waa Filisti ca réew ma. <sup>2</sup> Daawuda дума Mowabeen ña itam, tëral leen ca suuf, sësale leen, natte leen ag buum. Ñaari buum yu mu natt, yemook ña ñu wara rey, buum gu mat ga ca topp yemook ñi wara dund. Mowabeen ña daldi nangul Daawuda, di ko indil galag.

<sup>3</sup> Daawuda дума na itam buurub Soba\*, Adadeser doomu Reyob, fekk Adadeser di fexee nanguwaat diiwaan ba feggook dexu Efraat. <sup>4</sup> Daawuda jàpp junniy gawaram ak juróom ñaar téeméer

(1 700) ak ñaar fukki junniy xarekat (20 000) yuy deme tánk, ba noppi dog sidditi tánk mboolem fas ya doon dawal watiir, bàyyiwu ca lu moy téeméeri fas.

<sup>5</sup> Waa Siri ña dëkke réewum Damaas dikk wallusi Adadeser buurub Soba. Daawuda rey ca ñoom ñaar fukki junneek ñaar (22 000). <sup>6</sup> Ba mu ko defe Daawuda tabb ay jawriñam ca Damaas ca Siri, waa Siri nekk ci curgag Daawuda, di ko fey galag. Aji Sax ji may Daawuda ndam fépp fu mu dem. <sup>7</sup> Daawuda nag nangu pakki wurus ya kilifay xarekati Adadeser daan aare seen bopp. Mu boole, yóbbu Yerusalem. <sup>8</sup> Dëkki Adadeser ya ñuy wax Beta ak Berotay it, xànjari ju bare lool la fa Buur Daawuda nangoo.

<sup>9</sup> Ci kaw loolu Toyi buurub Amat dëgg ne Daawuda дума na gàngooru Adadeser gépp. <sup>10</sup> Toyi yebal doomam Yoram ca Buur Daawuda, ngir mu nuyu ko, sargal ko ca la mu xareek Adadeser ba дума ko, ngir Toyi ci boppam xare woon naak Adadeser. Yoram indaaleel ko juntukeyi xaalis ak wurus ak xànjari. <sup>11</sup> Buur Daawuda boole loolu, jagleel ko Aji Sax ji, na mu ko jagleele woon xaalis baak wurus, wa mu lële ca mboolem xeet ya mu tegoon loxo; <sup>12</sup> la jóge ca Edomeen ñaak Mowabeen ñaak Amoneen ñaak waa Filisteeke Amalegeen ña ak la mu lële ca buurub Soba, Adadeser doomu Reyob.

<sup>13</sup> Daawuda nga gënatee siiw ba mu dumaa waa Siri, teg ca дума fukk ak juróom ñetti junniy (18 000) Edomeen ca xuru Xorom wa. <sup>14</sup> Mu daldi tabb ay jawriñam ca réewum Edom. Réewum Edom gépp la tabb ay jawriñ, Edomeen ñépp nekk ci curgag Daawuda. Aji Sax ji nag may Daawuda ndam fépp fu mu dem.

### *Lu jëm ci jawriñi Daawuda*

<sup>15</sup> Buur Daawuda ci kaw Israyil gépp la nguuru woon; muy jëfe njub ak njekk ñeel réewam mépp. <sup>16</sup> Yowab, mi Seruya di ndeyam, moo jiite woon mbooloom xare ma; Yosafat doomu Ayilut yor kàddug buur; <sup>17</sup> Cadog doomu Ayitub ak Ayimeleg doomu Abiyatar ñoo doon sarxalkat ya; Seruya di bindkat ba;

\* **8:3** 8.3 Soba turu dëkk la bu amoon buuru boppam. Waaye ci Siri la bokkoon.

18 Benaya doomu Yoyada moo jiite woon waa Keret ak waa Pelet, dagi buur ya; doomi Daawuda yu góor nag ay sarxalkat lañu woon†.

## 9

### *Daawuda baaxe na Mefiboset*

1 Daawuda moo noon: «Ndax kenn desul ba tey ci waa kër Sóol, ba ma jéfeek moom ngor ngir Yonatan?» 2 Fekk na ab surgaa nga woon ca kër Sóol, di ku ñuy wax Ciba. Ñu indi ko ca Daawuda, Buur Daawuda ne ko: «Yaa di Ciba?» Mu ne ko: «waaw, sang bi.» 3 Mu ne ko: «Ndax kenn desul ba tey ci waa kër Sóol, ba ma jéfeek moom ngor gu Yàlla gèrèm?» Ciba ne ko: «Doomu Yonatan ju tànk yi baaxul a nga fa ba tey kay.» 4 Buur ne ko: «Ana mu?» Mu ne ko: «Moom de, ma nga ca kër Makir doomu Amiyel, ca dëkk ba ñuy wax Lodebar.»

5 Buur Daawuda nag yeble, ñu jëleji ko ca Lodebar, ca kër Makir doomu Amiyel. 6 Ba loolu amee Mefiboset\* doomu Yonatan doomu Sóol, dikk ca Daawuda, ne gurub, dëpp jëëm fa suuf, sujjóot. Daawuda ne ko: «Mefiboset!» Mu ne ko: «Naam, sang bi.» 7 Daawuda ne ko: «Bul tiit, dinaa jéfeek yaw ngor déy ngir sa baay Yonatan. Dinaa la delloo mboolem sa suufas maam Sóol, te yaay bokk ak man ndab ba fàww.» 8 Mefiboset sujjóot, ne ko: «Moo sang bi, maay kan ba nga di ma geesu, man mi tekkiwul dara, ba dara boolor jeex?»

9 Ci kaw loolu Buur woolu Ciba, surgab Sóol ba, ne ko: «Mboolem lu bokk ci alalu Sóol ak alalu waa kërám jox naa ko Mefiboset, sa sëtub sang. 10 Dee ko beyal tool yi, di ko góobal, yaw yaak say doom ak say surga, ndax waa kërám am ab dund. Mefiboset nag, mook man ay bokk ndab.» Ciba amoon na fukki doom yu góor ak juróom, ak ñaar fukki surga. 11 Ciba ne ko: «Buur, sang bi, noonu nga ma ko sante rekk, ni laa koy defe.» Ci kaw loolu Mefiboset di lekk ca ndabal Daawuda, mel ni ku bokk ci doomi Buur.

12 Mefiboset amoon na doom ju ndaw ju góor, ju ñuy wax Mika. Waa kër Ciba ñépp nag daldi nekk ci liggéeyu Mefiboset.

13 Ci kaw loolu Mefiboset far féete Yerusalem gannaaw ñaari tànkam a làggi, ndax mu mana lekke ca ndabal Buur, bés bu nekk.

## 10

### *Daawuda jote naak Amoneen ña*

1 Gannaaw loolu Nayas buurub Amoneen ña dee, Anun doomam ju góor falu buur, wuutu ko. 2 Daawuda ne: «Dinaa jéfe ngor sama digganteek Anun doomu Nayas, na ma baayam jiye woon ngor.» Daawuda nag yebal ay ndawam ca Anun, di ko jaal baayam. Ba ndawi Daawuda ya agsee ca réewum Amoneen ña, 3 njiiti Amoneen ña wax ak seen sang Anun, ne ko: «Defe nga ne moos wormaal sa baay la Daawuda namm, ba yónnee la ay nit ñu la jaal? Foogoo ne seetsi dëkk bi ak nemmikusi ko, ba song ko moo tax Daawuda yebal ay nitam ci yaw?» 4 Anun daldi jàpp niti Daawuda ña, wat seen genn-wàllu sikkim, dagg seeni mbubb fa tollook toogukaay ba, daldi leen dàq. 5 Ñu yegge Daawuda mbir ma, mu yeble ngir ñu gatanduji leen ndax na ñu leen torxale. Mu ne leen ñu toog Yeriko, ba seeni sikkim sëqaat, ñu doora ñibbsi.

6 Amoneen ña xam ne Daawuda jéppi na leen lool. Ñu dem bindi ñaar fukki junniy (20 000) xarekat ca waa Siri ña dëkke Bet Reyob ak waa Siri ña dëkke Soba, teg ca junniy nit ñu bàyyikoo ca buuru Maaka, ak fukki junneek ñaar (12 000) ñu waa Tob. 7 Daawuda dégg ko, yebal Yowab ak mboolem gàngooru jàmbaar ña. 8 Ba mu ko defee Amoneen ña génn, làng-dér ca seen buntu péey ba, fekk waa Siri ña dëkke Soba ak Reyob ak waa Tob ak waa Maaka, ñoom ñépp a nga taxawee ca àll ba, seen wetu bopp. 9 Yowab gis làngi xare yi ñu wara jànkoonteel, ga ko féete kanam, ak ga ca gannaaw. Mu tànné ca jàmbaari Israyil yépp jàmbaari

† 8:18 8.18 Am na ñu jàpp ne sarxalkat yi ñuy wax fii, ay saytukat lañu woon.

\* 9:6 9.6 Mefiboset dees na

ko wooye Mefibaal ba tey. Seetal lu mel noonu ci 2.8.

xare yu mag, ñu làng-déral waa Siri.  
<sup>10</sup> La des ca gàngoor ga, mu teg ca loxol rakkam Abisay, làng-dérloo leen, ñu janook Amoneen ña. <sup>11</sup> Yowab ne Abisay: «Bu ma waa Siri éppee doole, nga wallusi ma; su la Amoneen ñi éppee doole, ma wallusi la. <sup>12</sup> Góor-góorlu nag, te nu bokk góor-góorlu ngir sunuw xeet ak sunu dëkki Yàlla yi. Aji Sax ji nag mooy def li ko soob.»

<sup>13</sup> Ba loolu amee Yowab ak gàngoor ga ànd ak moom sàqi ngir xareek waa Siri, waa Siri daw, won leen gannaaw. <sup>14</sup> Amoneen ña gis waa Siri di daw, ñoom it ñu daw, won Abisay gannaaw ba dellu ca biir dëkk ba. Yowab nag bàyyikoo ca xare baak Amoneen ña, daldi dellu Yerusalem.

### *Daawuda xare naak Siri*

<sup>15</sup> Gannaaw loolu waa Siri gis na ñu daanoo fa kanam Israyil. Ñu bokk daje ñoom ñépp. <sup>16</sup> Ci kaw loolu Buur Adadeser yónnee, jéli waa Siri ña ca wàllaa dexu Efraat. Waa wàllaa dex dikk ba dëkk ba ñuy wax Elam; Sobag, njiital gàngooru Adadeser jiite leen. <sup>17</sup> Naka lañu ko wax Daawuda, mu woo Israyil gépp, daldi jàll dexu Yurdan, ba àgg Elam. Waa Siri nag làng-déral Daawuda, song leen. <sup>18</sup> Waaye waa Siree daw, won Israyil gannaaw. Daawuda rey ca ñoom juróom ñaar téeméeri dawalkati watiiri xare (700), ak ñeent fukki junniy gawar (40 000). Sobag, seen njiital gàngoor, mu jam ko, mu dee foofa. <sup>19</sup> Ba mu ko defee mboolem buur yay jawriñi Adadeser gis na ñu daanoo fa kanam Israyil, ñu daldi jàmmook bànni Israyil, nangul leen. Ba loolu amee waa Siri ñemeetuñoo sotle Amoneen ña.

## 11

### *Daawuda topp na bakkanam*

<sup>1</sup> Gannaaw loolu, ca déwén sa, ja-mono ja buur ya daan xareji, Daawuda daa yebal Yowab, mu ànd aki nitam ak gàngooru Israyil gépp. Ñu faagaagal Amoneen ña, gaw péey ba ñu naan Raba. Fekk na Daawudaa nga des Yerusalem.

<sup>2</sup> Genn ngoon, Buur Daawuda jóge ca kaw lalloom, di doxantu ca kaw taaxum kërám. Mu tollu ca kaw taax ma, séen as ndaw suy sangu. Ndaw sa neexa xool lool. <sup>3</sup> Daawuda yónnee, gëstu mbiram, ñu ne ko: «Xanaa du Batseba doomu Eliyam, jabaru Uri, Etteen bi?»

<sup>4</sup> Ci kaw loolu Daawuda yebal ay ndaw yu jéli ndaw si, mu dikk, mu tédde ko. Fekk na ndaw sa gisoon baax bay doora sangu-set. Ndaw sa daldi ñibbi. <sup>5</sup> Ndaw si nag ëmb. Ba loolu amee mu yónnee ca Daawuda ne ko: «Man de, damaa ëmb.»

<sup>6</sup> Ba mu ko defee Daawuda yónnee ca Yowab, ne ko mu wool ko Uri, Etteen ba. Yowab wool ko Uri. <sup>7</sup> Ba Uri dikkee, Daawuda nuyook moom ne ko: «Mbaa Yowab jàmm? Mbaa mbooloo ma jàmm? Mbaa xare ba jàmm?» <sup>8</sup> Ba loolu wéyee Daawuda ne Uri: «Àggal sa kër nag te jàngu.» Uri bàyyikoo kër Buur, ab yóbbalu Buur topp ca gannaawam. <sup>9</sup> Ndeke Uri ñibbiwul kërám. Ca bunt kër Buur la tédde, mook mboolem surgay Buur.

<sup>10</sup> Ñu yégal Daawuda, ne ko: «Uri de ñibbiwul kërám,» mu ne Uri: «Xanaa du ciw yoon nga jóge? Lu la tee àgg sa kër?»

<sup>11</sup> Uri ne Daawuda: «Sang bi, gaalu Yàlla ga ak Israyil ak Yuda dëkke ay mbaar, sama njaatige Yowab ak surgay sang bi bokk dale ci digg àll bi, man may dem sama kër, di lekk ak a naan, di dëkkoo sama soxna? Mukk! Giñ naa, nga fেকে, дума def loolu!»

<sup>12</sup> Daawuda ne Uri: «Kon toogaatal fii tey ba èllég, ma yiwi la.» Uri toog Yerusalem bésub keroog ak ca èllég sa. <sup>13</sup> Ci biir loolu Daawuda woo Uri, mu bokk ak moom lekk, daldi naan. Mu nàndal ko ba mu màndi. Ba ngoon jotee Uri daa génn, tédde ca lalloom ca biir surgay sangam, waaye kërám, àgg fa ba tey.

<sup>14</sup> Ba bët setee Daawuda bind Yowab bataaxal, yóbbante ko Uri. <sup>15</sup> Mu bind ci bataaxal bi, ne Yowab: «Jiitalal Uri mii ca làngu kanam, ga xare ba gëna tange, te ngeen dánd ko, ndax ñu jam ko, mu dee.»

<sup>16</sup> Ci kaw loolu Yowab a nga bàyyi xel ca dëkk ba ñu gaw. Mu daldi teg Uri fu ko wóor ne ay ñeyi xarey dëkk baa

fa féete. <sup>17</sup> Ba loolu amee waa dëkk ba génn, xeex ak ñoom Yowab, mu am ñu daanu ca gàngoor ga, ca niti Daawuda ña, Uri Etteen ba bokk ca ña dee.

<sup>18</sup> Ba mu ko defee Yowab yónnee àgge Daawuda mboolem xew-xewi xare ba. <sup>19</sup> Yowab sant ndaw la, ne ko: «Boo nettalee buur li xew ci xare bi lépp, ba noppi, <sup>20</sup> su Buur meree, ne la: «Ana lu waral ngeen jegee noonu dëkk ba ci xeex? Xanaa xamuleen ne ca kaw tata ja lañu leen di fitte? <sup>21</sup> Ana ku reyoon Abimeleg doomu Yerubaset? Xanaa du ca kaw tata ja la ko aw jigéen sànnée doju wolukaay, ba mu dee ca Tebes? Lu waral ngeen jegee noonu tata ja?» Su boobaa nee ko: «Sa surga ba, Uri Etteen ba it dee na.»

<sup>22</sup> Ndaw la dem ba àgg, daldi àgge Daawuda la ko Yowab waxloo lépp. <sup>23</sup> Ndaw la da ko ne: «Nit ñaa nu jëkkoonna man. Dañoo génn, song nu ca àll ba. Waaye noo leen delloo gannaaw ba ca bunt dëkk ba. <sup>24</sup> Fittkat ya nag fitte nu ca kaw tata ja, ba mu am ñu dee ci say nit. Sa surga ba, Uri Etteen ba it dee na.» <sup>25</sup> Daawuda ne ndaw la: «Waxal Yowab ne ko, bumu tiislu moomu mbir; xare bu yóbbuwul kii, yóbbu kee. Na gëna song dëkk ba rekk, ba daane ko. Nga ñaaxe ko noonu.»

<sup>26</sup> Ba loolu amee jabaru Uri dégg ne jëkkëram dee na. Mu daldi koy ténj.

<sup>27</sup> Ba àppu ténj ba weese\*, Daawuda yónnee, indi ko këram, mu doon sox-naam. Gannaaw gi mu am doom ju góor. Aji Sax ji nag ñaawlu la Daawuda def.

## 12

### *Yonent Yàlla Natan yedd na Daawuda*

<sup>1</sup> Aji Sax ji moo yónni Natan ca Daawuda. Mu dikk, ne ko: «Ñaari góor la woon ci ab dëkk. Kenn ka barele, ka ca des néewle. <sup>2</sup> Ki barele am na jur gu bare lool, gu gudd ak gu gàtt. <sup>3</sup> Waaye ka néewle amul lu dul mbote mu ndaw mu jigéen mu mu jëndoon, yar ko biir këram, muy màggandook ay doomam. Ca njëlam sa la mbote ma daan lekk, ca kaasam la daan naane, te ca kaw dënnam la daan téd. Mbote mi daa

meloon ni doomam. <sup>4</sup> Ci biir loolu ku nekk ciw yoon dikk, dal ak ka barele. Waaye moom néegula sàkk ciy gàttam mbaa nagi boppam, ngir toggal ko gan gi dal ak moom. Ka néewle la nangu mboteem, toggal ko gan gi dal ak moom.»

<sup>5</sup> Daawuda nag mer lool ca jëfi nit kooku. Mu ne Natan: «Giñ naa ci Aji Sax jiy dund, dee rekk mooy àtteb waa ji def loolu! <sup>6</sup> Te it menn mbote mi, ñeentam la koy feye, gannaaw moo def jooju jéf, te amu ci jenn yërmande!» <sup>7</sup> Natan ne Daawuda: «Yaw, yaay waa ji! Aji Sax ji Yàllay Israyil dafa wax ne: «Man maa la fal buurub Israyil, maa la xettli ci Sóol. <sup>8</sup> Maa la jox sa kër sang, maa teg ci say loxo, sa jabari sang, jox la nguug Israyil ak Yuda. Te bu doyuloon it, ma dolli. <sup>9</sup> Ana lu waral nga ñàkke worma kàddug Aji Sax ji, di def lu mu ñaawlu? Uri Etteen bi, yaa ko fàdde saamar; jabaram nga jël, def ko sa jabar, moom nga fàdde ko saamaru Amoneen ñi. <sup>10</sup> Kon nag saamar dootu jóge sa kër mukk, ndax yaa ma ñàkke worma, ba jël jabaru Uri Etteen bi, def ko sa jabar.» <sup>11</sup> Aji Sax ji dafa wax ne: «Maa ngii di yékkati fi sa kaw musiba mu jóge ci sa kër. Maay jël say jabar, ngay gis, jox leen góor ni yaw, mu tédde say jabar bëccëg ndarakàmm. <sup>12</sup> Yaw déy ci sutura nga ko defe. Waaye man, ci kanam Israyil gépp laay sabab mbir moomu, bëccëg ndarakàmm.»

<sup>13</sup> Daawuda nag ne Natan: «Maa tooñ Aji Sax ji.» Natan ne ko: «Aji Sax ji it jéllale na sa bàkkaar; doo ci dee. <sup>14</sup> Du tere nag, gannaaw dangaa teddadil lool Aji Sax ji ci mbir mii, doom ji nga ci am, moom, day dee rekk.» <sup>15</sup> Ba loolu amee Natan dellu këram.

### *Doomu Daawuda faatu na*

Ba mu ko defee Aji Sax ji daane xale ba jabaru Uri am ak Daawuda. Xale ba wopp. <sup>16</sup> Daawuda nag tinu Yàlla ci xale bi: muy woor, fatu, fanaanee téd ci suuf. <sup>17</sup> Magi këram soññ ko ngir yékkatee ko fa suuf, nanguwul, te bokkul ak ñoom lekk dara. <sup>18</sup> Ñu teg ca juróom

\* **11:27** 11.27 Jamono yooyu bànni Israyil juróom ñaari fan lañu aadawoo woon di ténj.

ñaari fan, xale ba dee. Surgay Daawuda ya ragala wax Daawuda ne ko xale ba dee na. Booba ña ngay xalaat naan: «Ndegam ba xale bay dund lanuy wax ak moom, dégluwu nu kay, ana nu nu koy waxe ne xale bi dee na, muy def njaaxum?»<sup>19</sup> Daawuda nag gis surgaam ya ñuy déeyoo, mu xam ne xale bi dee na. Mu ne leen: «Xale bi daa dee?» Ñu ne ko: «Dee na.»

<sup>20</sup> Ba mu ko defee Daawuda jóge ca suuf, sangu, diwu, soluwaat. Ci kaw loolu mu dugg ca kër Aji Sax ji, sujjóot, daldi dem kërám, santaane, ñu taajal ko ag lekk, mu lekk.<sup>21</sup> Surga ya ne ko: «Li ngay def lu mu doon? Bi xale biy dund, danga doon woor ak a jooy, léegi bi xale bi deeyee, nga jóg, di lekk?»<sup>22</sup> Mu ne leen: «Ba xale biy dese bakkan laa doon woor ak a jooy, ndax dama noon: “Ana ku xam ndax Aji Sax ji dina ma defalu yiw, ba xale bi dund am déet?”<sup>23</sup> Waaye gannaaw léegi dee na, ana lu may woorati? Dama koo mana dekkal? Man kay maa koy fekki, waaye moom du délsi ci man muk.»

### *Suleymaan gane na àddina*

<sup>24</sup> Ba loolu amee Daawuda dëfal soxnaam Batseba. Mu dem ca moom, daldi ànd ak moom. Gannaaw gi ndaw si am ca doom ju góor, tudde ko Suleymaan. Aji Sax ji nag sopp xale bi,<sup>25</sup> ba xamle ko, Yonent Yàlla Natan jottli, daldi koy tudde Yedija (mu firi Soppey Aji Sax ji).

### *Daawuda nangu na péeyub Amoneen ña*

<sup>26</sup> Ci biir loolu Yowab xareek waa Raba, péeyub Amoneen ña, ba nangu tatay buur ba.<sup>27</sup> Ba loolu amee Yowab yebal ay ndaw ca Daawuda, ne ko: «Xare namaak waa Raba, nangu naa sax seen gox, ba ñuy jële am ndox.<sup>28</sup> Kon booleel ndesu gàngoor gi, te nga gaw dëkk bi, ba nangu ko. Lu ko moy maay nangu dëkk bi, ñu tudde ma ko.»<sup>29</sup> Daawuda nag dajale gàngoor gépp, daldi dem Raba, xareek ñoom, ba nangu ko.<sup>30</sup> Ba mu ko defee mu jële mbaxanam buur ma ñu solal

seen jëmmu tuur ma ñuy wax Milkom.\* Diisaayu mbaxana maa nga tollu ci fanweeri kiloy wurus, ab per bu gànjare tappe ca. Ñu tappal ko Daawuda ca kaw boppam. Alal ju baree bare la Daawuda nangoo ca dëkk ba.<sup>31</sup> Nit ña ca biir nag, mu génne leen, féetale leen ay xeetukaay ak ngaskay weñ ak sémmiñi weñ, boole ci di leen móol-loo. Noonu la def ak mboolem dëkki Amoneen ñi. Gannaaw loolu Daawuda ànd ak mbooloom xareem mépp, dellu Yerusalem.

## 13

### *Amnon tooñ na Tamar*

<sup>1</sup> Gannaaw loolu Absalom doomu Daawuda moo amoon jigéen bu rafet bu ñuy wax Tamar. Jeneen doomu Daawuda ju ñuy wax Amnon nag xemmem Tamar.<sup>2</sup> Jaaxle daldi dikkal Amnon, ba mu mujj wopp ngir Tamar, ab jigéenam, ndax ab janq la woon. Amnon daldi gis ne pexe mu muy jaare ba def Tamar lenn dina jafe.<sup>3</sup> Amnon nag amoon na xarit bu ñuy wax Yonadab doomu Simeya, miy doomu baayu Daawuda. Yonadab, ku ñawoona ñaw la.<sup>4</sup> Mu ne Amnon: «Waaw, yaw doomu buur nga, lu la tax ne yogg nii bés bu set? Doo ma ko wax?» Amnon ne ko: «Tamar, mi bokk ak sama doomu baay Absalom ndey ak baay, moom laa bëgg.»<sup>5</sup> Yonadab ne ko: «Dangay tēdd ci sa lal, wopp-wopplu, ba sa baay dikk, seetsi la, nga ne ko: “Na sama jigéen Tamar ñēw, may ma, ma lekk. Na ma toggal ci sama kanam, may gis, te mu sexal ma ci loxol boppam.”»

<sup>6</sup> Ba loolu amee Amnon tēdd, wopp-wopplu, ba Buur ñēw di ko seet. Amnon ne ko: «Na sama jigéen Tamar ñēw defaral ma ñaari mburu yu ndaw, may gis, te sexal ma ci loxol boppam, ma lekk.»<sup>7</sup> Daawuda yónnee kër ga ca Tamar, ne ko mu dem kër càmmiñam Amnon, toggal ko lu mu lekk.<sup>8</sup> Tamar dem kër càmmiñam Amnon, fekk ko mu tēdd. Mu sàkk sunguf, not ko, defal ko ko ay mburu yu ndaw, lakkal ko ko, muy gis.<sup>9</sup> Mu noppi, jël ndab la, taajal ko Amnon, Amon nag

\* 12:30 12.30 Am na mbind yu yàgg yu ñu indi ne seen buur lañu daan solal mbaxana mi.

baña lekk. Mu daldi ne: «Na ñépp génn, wacc ma fi!» Ñépp génn, wacc ko fa. <sup>10</sup> Mu ne Tamar: «Indil ma lekk gi ci sama biir néeg, te sexal ma ci sa loxol bopp, ma lekk.» Tamar jël mburu ya mu lakk, dugalal càmmiñam Amnon ca biir néegam. <sup>11</sup> Naka la Tamar dikk, taajal Amnon mburu ya, ngir mu lekk, mu ne ko katam, ne ko: «Kaay, tèdd ak man, sama jigéen.» <sup>12</sup> Mu ne ko: «Déedéet sama góor, bu ma néewal doole, ndax deesul defe nii ci Israyil! Bul def mukkk jooju jéf ju sew! <sup>13</sup> Fu ma jëm ak googu gacce, man? Te yaw it dootuloo jar dara ci digg Israyil. Tee ngaa wax ak Buur? Du ma la baña may.» <sup>14</sup> Amnon nag dégluwu ko, xanaa néewal ko doole, ba tédde ko.

<sup>15</sup> Gannaaw loolu Amnon jéppi ko njéefo lu raw mbéggeel ga mu ko béggoon. Mu ne ko: «Jógal, dem!» <sup>16</sup> Tamar ne ko: «Déet, soo ma dàqee def ma lu yées li nga ma def ba noppi!» Taxul Amon nangu koo déglu. <sup>17</sup> Dafa woo bëkk-néegam, ne ko: «Génneel ma kii te tēj bunt beek caabi.» <sup>18</sup> Surga ba génne ko, tēj bunt baak caabi.

Tamar a nga sol mbubb mu yànj, ndax booba janqi buur bu séyagul noonu la daan soloo. <sup>19</sup> Ba loolu amee Tamar sottikoo dóom ca bopp ba, xotti mbubb mu yànj ma mu sol, yenu loxo ya, di yuuxuy dem. <sup>20</sup> Càmmiñam Absalom gis ko, ne ko: «Xanaa Amnon sa càmmiñ see nekkoon ak yaw? Neel cell rekk, sama jigéen, sa càmmiñ la. Bul yenu lii mu la def.» Tamar nag ne cundum, tooge wéetaayam kër càmmiñam Absalom.

<sup>21</sup> Ba Buur Daawuda déggee mbir moomu mépp, mer na lool. <sup>22</sup> Absalom nag jéppi Amnon, ba séqatul ak moom jenn wax, ndax na mu torxale jigéenam Tamar.

### *Absalom feyu na*

<sup>23</sup> Ba ñu ca tegee ñaari ati lëmm, Absalom dem di watlu ay xaram\* ca Baal Àccor, fa feggook diiwaanu Efrayim. Absalom daldi fay woo doomi buur yu góor yépp. <sup>24</sup> Mu dem ca Buur ne ko:

«Buur Sang bi, man de, damay watlu samay xar. Tee ngaa ànd ak say jawriñ rekk, nu dem ca?» <sup>25</sup> Buur ne Absalom: «Déet, doom. Bunu dem nun ñépp. Day diis ci yaw.» Absalom soññ ko, soññ, Buur nanguwula dem. Teewul mu ñaanal ko. <sup>26</sup> Absalom nag ne ko: «Bàyyil boog sama mag Amnon, mu ànd ak nun.» Mu ne ko: «Lu muy ànd ak yaw doye?» <sup>27</sup> Absalom soññati ko, ba Buur yebal Amnon, mu ànd ak moom, ak yeneen doomi buur yu góor yépp.

<sup>28</sup> Ba mu ko defee Absalom sant ay nitam, ne leen: «Ma ne, bu Amnon naanee biiñ, ba xolam sedd, bu ma leen nee ngeen jam ko rekk, reyleen ko. Buleen ragal; man maa leen ko sant. Góor-góorluleen nag te ñeme.» <sup>29</sup> Niti Absalom ña def ak Amnon la leen Absalom sant, daldi rey Amnon. Ba loolu amee yeneen doomi buur yépp daldi war seeni berkelle, daw.

<sup>30</sup> Naka lañu topp yoon wa, xibaar dikkal Daawuda, ne ko: «Buur, Absalom jam na sa doom yu góor yépp, ba kenn desu ca.» <sup>31</sup> Buur daldi xotti ay yéreem, daanu ca suuf ndax naqar, surgaam yépp taxaw ak seen yére yu xottiku.

<sup>32</sup> Ci kaw loolu Yonadab doomu magu Daawuda Simeya, daldi wax ak baayam Daawuda. Mu ne: «Buur sang bi, bul defe ne sa doom yépp lañu rey de. Amnon rekk a dee, te mooy la Absalom dogu woon keroog ba Amnon torxalee rakkam Tamar. <sup>33</sup> Kon kat Buur sang bi, bul def ci sa xel ne sa doom yépp a dee. Amnon rekk a dee.» <sup>34</sup> Fekk na Absalom daw.

Ci kaw loolu ngóor sa aye jongru daldi séentu, gisul lu moy nit ñu bare ñuy dikk, awe yoonu Oronayim, bartaloo tund wa. <sup>35</sup> Ba loolu amee Yonadab ne Buur: «Mu ngoog, Buur sang bi, sa doom yaay dikk. La ma waxoon a am.» <sup>36</sup> Naka la daane kàddoom rekk, doomi Buur ya agsi, ne yikkét di jooy. Buur ak surgaam yépp it, di jooy jooy yu metti.

<sup>37</sup> Fekk na Absalom daw, dem ca buur-rub Gesur, Talmay doomu Amiyut. Buur Daawuda nag di jooy doomam bés bu

\* **13:23** 13.23 Xari waa penku dañuy bare kawar gu ñuy wat ak a ècc, di ci defar ag wëñ. Bu ñu daan watlu seeni xar, xew mu réy la woon.

nekk. <sup>38</sup> Ba Absalom dawee, dem Gesur, toog na fa ñetti at. <sup>39</sup> Gannaaw gi Buur Daawuda toppatul Absalom, ndax mujj na miis deewug Amnon.

## 14

### *Absalom délsi na*

<sup>1</sup> Ci biir loolu Yowab, mi Seruya di yaayam, xam ne xelu Buur Daawudaa ngi ci Absalom. <sup>2</sup> Yowab nag yónnee ca dëkk ba ñuy wax Tekowa, ñu jëleji fa jigéen ju rafet xel, indil ko ko. Yowab ne ko: «Dangay ñaawlu-ñaawlulu. Solal yérey ñaawlu, te bul xeeñu. Melal daal ni jigéen ju jota ñaawlu lu yàgg, ngir ku mu deele. <sup>3</sup> Su ko defee nga àgg ca Buur, wax ko lii ma lay wax.» Yowab wax ko kàddu ya mu wara wax.

<sup>4</sup> Jigéen ja dëkk Tekowa àgg ca Buur, daanu ci suuf, sujjóotal ko, ne ko: «Buur, wallu ma!» <sup>5</sup> Buur ne ko: «Lu la dal?» Mu ne ko: «Man de gore, dama dib jëtun; sama jëkkër a dee. <sup>6</sup> Sang bi, ñaari doom yu góor laa amoon. Dañu doon xeex ñoom ñaar ca àll ba te ku leen àtte nekku fa. Kenn ki dóor moroom mi, rey ko. <sup>7</sup> Bokk yépp daldi jóg dal ci sama kaw, sang bi. Ñu ne ma: “Jox nu sa doom ji rey doomu ndeyam, nu rey ko, feyul doomu ndeyam ji mu rey. Moo dese ndono li, kon danu koy sàkkal pexe, moom itam.” Dañoo nara fey wenn xal wi ma dese, ba xañ sama jëkkër aw tur, xañ ko aw askan ci kaw suuf.» <sup>8</sup> Buur ne ko: «Demal ñibbi. Man ci sama bopp maay joxe ndigal ci yaw.» <sup>9</sup> Jigéen ja ne ko: «Buur sang bi, àq ju ci am, yal na ma topp, maak sama waa kër baay, te nga bañ cee gàddu dara, yaak sa waa kër.» <sup>10</sup> Buur ne ko: «Ku la tudd, indil ma ko, dootu la sonal.» <sup>11</sup> Mu ne ko: «Kon ngalla Buur, woo ci seede sa turu Yàlla Aji Sax ji, ngir kiy toppe bakkanu ka dee baña yokk yàqute, ba ñu rey sama doom ji.» Mu ne ko: «Giñ naa ko ci turu Aji Sax ji, Kiy Dund, kawar gu gëna tuut du jóge ci sa boppu doom, wadd ci suuf.»

<sup>12</sup> Jigéen ja ne ko: «Buur, sang bi, ma ñeme laa waxati benn baat boog!» Mu ne ko: «Waxal.» <sup>13</sup> Mu ne: «Lu waral kon nga naral lu ni mel ñoñi Yàlla ñi? Buur, boo waxee loolu kay, mel na ni tooñ nga,

ndax jëliwoo sa doom ja gàddaay. <sup>14</sup> Su dee dee moom, nun ñépp ay dee ni ndox di tuuroo ba deesu ko tanqati. Yàlla nag musalul kenn ci dee, waaye moo lal pexe ngir ki gàddaay du saxoo gàddaay bérab bu ko sore. <sup>15</sup> Buur sang bi, maa ñëw wax la kàddu yii, ndax mbooloo mee ma tiital. Ma noon nag sang bi, naa wax ak Buur, jombul mu defal ma li may ñaan. <sup>16</sup> Jombul Buur sang bi nangu maa xettli ci ki nuy fexee boole ak sama doom sànk, beddee nu ci céru Yàlla. <sup>17</sup> Léegi nag sang bi, yal na sa kàddu gii di sama noflaay. Ndax yaw Buur, sama sang, dangaa mel ni malaakam Yàlla, am ug dégg, di teqale liy yoon ak li dul yoon. Yal na sa Yàlla Aji Sax ji ànd ak yaw.»

<sup>18</sup> Buur ne jigéen ja: «Léegi nag, bu ma nëbbu, tontu ma ci lii ma lay laaj.» Mu ne ko: «Waxal, Buur, sang bi.» <sup>19</sup> Mu ne ko: «Ndax du Yowab a nas pexe mii mépp, yaak moom?» Mu ne ko: «Buur, sang bi, ak sa barke, li nga wax rekk la, du leneen moos! Yowab, sa jawriñ bee ma ko sant. Moo ma waxloo lii lépp, sang bi. <sup>20</sup> Jubbanti mbir mii de moo tax Yowab def lii. Waaye yaw sang bi, danga di boroom xel mu rafet ni malaakam Yàlla. Xam nga mboolem lu xew ci réew mi.»

<sup>21</sup> Gannaaw gi Buur ne Yowab: «Waaw, baax na, nangu naa. Demal jëli ngóor sa, Absalom.» <sup>22</sup> Yowab nag daanu ca suuf, sujjóot, ne Buur: «Buur, sang bi, yal nanga barkeel, sang bi. Xam naa ne may nga ma cér, gannaaw yaa ma may lii may dagaan.» <sup>23</sup> Ba loolu amee Yowab dem Gesur, daldi délloosi Absalom Yerusalem. <sup>24</sup> Buur Daawuda nag ne, na Absalom yem kërám. Mu ne bumu taxaw ci kanamam. Ba mu ko defee Absalom yem kërám, te taxawul fa kanam Buur Daawuda.

<sup>25</sup> Absalom nag amul woon góor gu siiwe ni moom ci Israyil gépp ndax góorayiw. La ko dale ca wewu tãnkam ba ca digg bopp ba, du lenn lu ca sikk. <sup>26</sup> At mu jotaan mu watu ndax njañ lu diis, te bu wato, natt kawar ga ci doomi nattukaayu buur, mu jege ñaari kilook genn-wáll. <sup>27</sup> Absalom amoon na ñetti doom yu góor ak doom ju jigéen. Tamar, doom ju jigéen ja, doon ndaw su taaru.

<sup>28</sup> Absalom nekk na Yerusalem ñaari ati lëmm yu mu sañula taxaw fa kanam Buur baayam. <sup>29</sup> Gannaaw gi Absalom yónnee, ñu wool ko Yowab ngir mu yónni ko ca Buur. Yowab lànk, ñëwul. Mu yónneewaat, mu lànk. <sup>30</sup> Absalom ne ay surgaam: «Gis ngeen, toolub Yowab mook sama tool a sësoo, te peppum lors a nga ca. Demleen taal ko.» Surgay Absalom dem, taal tool ba. <sup>31</sup> Ba loolu amee Yowab waaxu ba ca kër Absalom, ne ko: «Ana lu waral say surga taal sama tool?» <sup>32</sup> Absalom ne Yowab: «Xam nga damaa yónnee ci yaw, ne la ñëwal, ma yónni la ca Buur, nga laajal ma ko lu ma taxa jóge Gesur. Li gënoon ci man kay mooy ma toog foofa! Léegi daal damay gis Buur. Su fekke ne damaa tooñ, na ma rey!»

<sup>33</sup> Yowab dem ca Buur, wax ko ko. Buur woolu Absalom. Mu dikk sukk, sujjóotal ko. Buur taf ko ca kawam.

## 15

### *Absalom lal na pexe*

<sup>1</sup> Gannaaw ba loolu wéyee Absalom daa jël watiir aki fas ak juróom fukki nit ñuy daw di ko jiitu. <sup>2</sup> Muy teela jóg nag, taxaw ca peggu yoon, wa jëm ca buntu dëkk ba. Saa yu nit dikkee, am lu muy tawat, di ko diis-si Buur, ngir mu àtte ko, Absalom woo ko, laaj ko ne ko: «Ci ban dëkk nga bokk?» Kooku ne ko ci giirug Israyil sàngam la bokk. <sup>3</sup> Absalom ne ko: «Gisal, sa tawat yoon la, jaadu na. Waaye kenn ku bokk ci Buur du la déglu.» <sup>4</sup> Su ko defee Absalom da cay teg ne ko: «Maa bëggoon ñu fal ma njiit, may àtte ci réew mi! Kon képp ku am lu muy tawat mbaa muy layoo, ci man lay ñëw, ma taxaw ci, ba jox ko li ko yoon may.» <sup>5</sup> Képp ku ñëwaan it di sukkal Absalom, Absalom da koy yóotu, jàpp ci moom, foon ko. <sup>6</sup> Absalom jàppoo ko noonu ak mboolem bànni Israyil yay ñëw ca buur ba, di sàkku yoon. Ni la fàbbee xoli bànni Israyil.

<sup>7</sup> Ba ñu demee ba ñeenti at\* jàll, Absalom ne Buur: «May ma, ma dem Ebron defali Aji Sax ji la ma ko xasaloon, <sup>8</sup> ndax

kat, sang bi, ba ma nekkee Gesur ca Siri, damaa dige woon ne: “Su ma Aji Sax ji delloo, ba ma dellu Yerusalem, dinaa dem màggali ko.”» <sup>9</sup> Buur ne ko: «Demal ak jàmm.» Mu daldi dem Ebron.

<sup>10</sup> Absalom nag yónnee ndéey. Ay ndaw yegge ko giiri Israyil gépp. Mu ne leen: «Bu ngeen di dégg liit gu jib rekk, ne leen: “Absalom falu na buur ca Ebron!”» <sup>11</sup> Ñaar téeméeri góor a jóge Yerusalem, Absalom woo woon leen, ñu ànd ak moom, yéguñu, tinuñu, xamuñu it dara ca mébétam. <sup>12</sup> Ci biir loolu Absalom di def ay sarax, daldi yónnee, ñu jëli Ayitofel ma topp ca Daawuda, di ko xelal. Ayitofel bàyyikoo ca Gilo. Pexe ma nag mujj na réy, ña topp Absalom di yokku ba bare.

### *Daawudaa ngi wuta rëcc*

<sup>13</sup> Ba mu ko defee ñu yebal ndaw, mu dikk ne Daawuda: «Bànni Israyil de jàmbo nañu, ba far ak Absalom.»

<sup>14</sup> Daawuda wax ak mboolem jawriñam ya mu nekkal ca Yerusalem, ne leen: «Nan daw! Lu ko moy kenn ci nun du rëcc Absalom. Nan dem léegi bala moo gaawtu, ba dab nu, def nu musiba, leel waa dëkk bi ñawkay saamar.» <sup>15</sup> Jawriñ ya ne Buur: «Buur, sang bi, lépp loo namm rekk, nu ngi nii taxaw.» <sup>16</sup> Ba loolu amee Buur tegu ca yoon wa, waa kërám yépp topp ciy tànkam. Bàyyiwul gannaaw lu moy fukki nekkaaleem, ñu wara topptoo kër ga.

<sup>17</sup> Buur dem, mbooloo mépp topp ko, ba ca kër gu mujj ga, ñu taxaw. <sup>18</sup> Nitam ñépp a dox romb ko, ñook dag ya ko dar yépp, di waa Keret ñaak waa Pelet ña, ak mboolem waa Gaat ya tollu ci juróom benni téeméeri nit te toppe woon ko ca Gaat. Ña ngay dox jiitu ko.

<sup>19</sup> Buur ne Itay waa Gaat ba: «Dangay ànd ak nun? Tee ngaa dellu Yerusalem, toog ca Buur Absalom? Gannaaw yaw doxandéem nga bu gaddaaye fa nga fekk baax. <sup>20</sup> Bëkk-démb donj nga fi ñëw, tey ma di la bàyyi ngay ànd ak nun di wëreelu, te xawma sax fu ma jëm. Dellul,

\* 15:7 15.7 ñeenti at yi ñuy wax fi am na ñu ne man naa doon ñeent fukki at.



kay, ànd ak sa waa réew. Yal na la Aji Sax ji won ngor ak worma.»

<sup>21</sup> Itay ne Buur: «Sang bi, giñ naa ci Aji Sax ji, Kiy Dund, nga fekke tey, fépp foo jëm yaw Buur, sama sang, dinaa fa ànd ak yaw, su may dund ak su may dee.»

<sup>22</sup> Daawuda ne Itay: «Kon doxal jiitu.» Itay jiitu, mook nitam ñépp ak mboolem njabootam.

<sup>23</sup> Mbooloom Daawuda mépp a ngay dem, waa réew ma mépp taxaw di yuux-ook a jooyoo. Buur ba jáll xuru Sedoron, mbooloo ma mépp ànd wuti màndiŋ ma.

<sup>24</sup> Cadog ak Abiyatar, sarxalkat yaa nga fa woon, ñoom itam. Ñenn ca góori Leween ña bokkoon nañu ca, di gàddu gaal ga àlluway kóllërey Yàlla ga dence. Ba ñu tegee gaal ga, Abiyatar di rendi ay sarax, ba mbooloo ma mépp génn dëkk ba. <sup>25</sup> Buur ne Cadog: «Dellool gaalu Yàlla gi ca dëkk ba. Bu ma Aji Sax ji baaxee, dina ma délloosi, ma gisaat gaal gi, gisaat fi mu dëkk. <sup>26</sup> Waaye bu ma waxee ne ma bégul ci man, su boobaa ba tey maa ngi. Na def li ko soob ci man.» <sup>27</sup> Buur dellu wax ak Cadog sarxalkat ba, ne ko: «Dégg nga déy? Dellul ak jàmm ca dëkk ba, ànd ak Ayimaas, sa doom ju góor, ak Yonatan doomu Abiyatar. Yaak Abiyatar àndleen ak seen ñaari doom yu góor. <sup>28</sup> Xoolal, dinaa leen xaar ca jállukaayu dex ba ca yoonu màndiŋ ma, ba keroog may dégg kàddu gu bawoo ci yaw.» <sup>29</sup> Ba loolu amee Cadog ak Abiyatar delloo gaalu Yàlla ga Yerusalem, daldi fay toog.

<sup>30</sup> Daawudaa ngay wéy, di yéeg tundu Oliw ya, tey jooy. Ma nga muuru, def t ànki neen ndaxu naqar. Nit ña mu àndal ñépp muur seen bopp ñoom it, di yéeg tey jooyoo. <sup>31</sup> Fekk na ñu wax Daawuda ne ko Ayitofel bokk na ca ña lëngook Absalom. Daawuda nag ñaan ne: «Yaw, Aji Sax ji, ngalla yaqal pexem Ayitofel.»

<sup>32</sup> Ba Daawuda àggee ca collu tund wa, fa ñu daan jaamoo Yàlla, fekku fa ku moy Usay, Arkeen ba. Mu gatandu ko. Ma ngay tiislu, mbubb ma xottiku, bopp ba pënd. <sup>33</sup> Daawuda ne ko: «Soo àndee ak man, danga may diisal rekk.

<sup>34</sup> Dangay dellu kay ca dëkk ba, ne Absalom: «Buur, sab jaam laa. Sa jaamu baay laa woon, waaye léegi sab jaam laa.» Noonu nga may yaqale pexem Ayitofel.

<sup>35</sup> Te sax Cadog ak Abiyatar, sarxalkat ya, nga fay bokk nekkal. Loo dégg kër Buur, wax leen ko. <sup>36</sup> Te sax seen ñaari doom yu góor a nga faak ñoom: Ayimaas doomu Cadog, ak Yonatan doomu Abiyatar. Yónnee ma leen, ñu yegge ma loo dégg.» <sup>37</sup> Ci kaw loolu Usay, nitu Daawuda, yoxoosu, duggsi Yerusalem, yemook Absalom itam di agsi.

## 16

### *Daawuda tase naak surgab Mefiboset*

<sup>1</sup> Naka la Daawuda dox ba wees tuuti collu tund wa rekk, yem ca Ciba, surgab Mefiboset. Ma nga làng ak ñaari mbaam yu ñu laltaay, sêf leen ñaar téeméeri mburu ak téeméeri danki reseñ ak téeméeri danki figg ak mbuusum biiñ.

<sup>2</sup> Buur ne Ciba: «Lii nga indi nag?» Mu ne ko: «Buur, mbaam yi sa waa kër laa ko indil, ñu war; mburu meek meñneef mi, gaa ñi lekk; biiñ bi, ñi loof ci màndiŋ mi naan ko.» <sup>3</sup> Mu ne ko: «Waaw, ana Mefiboset, sa sètu sang ba?» Ciba ne Buur: «Moom de ma nga des Yerusalem, ndax defe na ne tey bànni Israyil delloo ko nguurug maamam.» <sup>4</sup> Buur ne ko: «Kon boog, may naa la mboolem alalu Mefiboset.» Mu ne ko: «Jaajëf Buur sang bi, gis naa ni nga ma baaxee.»

### *Daawuda tase naak mbokkum Sóol*

<sup>5</sup> Gannaaw loolu Buur Daawuda dem bay jub dëkk ba ñuy wax Baxurim rekk, yemook jenn waay ju bokk ci waa kër Sóol. Ma nga tuddoon Simey doomu Gera. Naka la waa ja ne tëll, jubsì, di tifaar Daawuda ay saaga, <sup>6</sup> di ko sànni ay xeer, mooki jawriñam yépp. Faalewul kenn ci mbooloom Daawuda ma mépp ak jàmbaar ya ko dar yépp. <sup>7</sup> Simey a ngay saaga Daawuda naan: «Ayca, mott! Bóomkat bee, nit ku sew ki! <sup>8</sup> Aji Sax ji fey na la dereti waa kër Sóol ja nga tuur yépp, ba noppi falu, wuutu ko. Aji Sax ji teg na nguur gi ci sa loxol doom Absalom. Yaa ngi nii torox ndax bóomkat nga.»

<sup>9</sup> Ci kaw loolu Abisay, waa ja Seruya di yaayam, ne Daawuda: «Buur, sang bi, luy ndeyi xaj bu dee bii di la saaga? Bàyyil rekk ma jàll, teqale boppam ak baatam!» <sup>10</sup> Buur ne ko: «Yeen doomi Seruya yi, lu ciy seen yoon? Sañ na maa saaga. Su ko Aji Sax ji santee mu saaga ma, ana ku ko saña laaj lu tax?» <sup>11</sup> Ba loolu amee Daawuda wax ak Abisay ak jawriñam yépp, ne leen: «Du gis ngeen sama doom ji ma jur ci sama geño, muy wuta faat sama bakkan? Kon kay kii bokk ci giirug Beñamin matula wax. Bàyyileen ko, mu saaga ma, ndax Aji Sax jee ko ko sant. <sup>12</sup> Jombul Aji Sax ji gis sama naqar, ba feye ma aw yiw saagay kii tey.»

<sup>13</sup> Ba mu ko defee Daawuda ànd aki nitam topp yoon wa, Simey làng ak moom ca mbartalù tund wa, di dem, di ko saagaak a sànni xeer, di ko sèllax suuf. <sup>14</sup> Gannaaw gi Buur ak mbooloo ma mu àndal mépp agsi, sonn lool. Ñu daldi nopplu foofa.

### *Absalom dugg na Yerusalem*

<sup>15</sup> Fekk na Absalom agsi Yerusalem, ànd ak mboolem niti Israyil ñi far ak moom. Ayitofel a nga ànd ak moom. <sup>16</sup> Usay, Arkeen ba doon nitu Daawuda, dem ca moom, ne ko: «Yal na Buur gudd fan waay, yal na Buur gudd fan!» <sup>17</sup> Absalom ne Usay: «Loolooy sa kóllère ak sab xarit a? Lu la teree ànd ak sab xarit?» <sup>18</sup> Usay ne Absalom: «Déédéet, ki Aji Sax ji tànn, mbooloo mii tànn ko, ñook mboolem bànni Israyil, kookoo may moom, te ci moom laay toog. <sup>19</sup> Te sax ku may topp ku dul yaw, doomu buur? Ni ma toppe woon sa baay rekk laa lay toppe tey.»

<sup>20</sup> Ci kaw loolu Absalom ne Ayitofel: «Xelal-leen nu boog, lu nu wara def?» <sup>21</sup> Ayitofel ne ko: «Demal dèkkoo sa nekkaaley baay, yi mu wacce kèram, ñu di ko topptoo. Su ko defee bànni Israyil yépp dinañu xam ne def nga lu tax sa baay sib la. Dina tax say farandoo gèna am fit.» <sup>22</sup> Ba loolu amee ñu sampal Absalom xayma ca kaw taaxum kër Buur, Absalom di dèkkoo nekkaaley baayam, Israyil gépp seede ko.

<sup>23</sup> Booba lu Ayitofel masaana digle day mel ni kàddu gu bawoo ca Yàlla. Daawudaak Absalom, ñoom ñaar ñépp noonu lañu fonke woon ndigalu Ayitofel.

## 17

### *Usay nax na Absalom*

<sup>1</sup> Gannaaw loolu Ayitofel ne Absalom: «Ngalla may ma, ma tànn fukki jun-niy xarekat ak ñaar (12 000) te dàqi Daawuda ci guddi gi. <sup>2</sup> Bu may dal ci kawam, da koy fekk mu sonn, jàq. Su ko defee ma xoqtaal ko, ba mbooloo mi mu àndal mépp daw, ma rey ko, moom kenn. <sup>3</sup> Dinaa la délloosil mbooloo mépp. Bu ki ngay fexeel deeyee rekk, mbooloo mi mépp délsi, jàmm ne ñoyy.» <sup>4</sup> Pexe moomu nag jub ci Absalom, mook magi Israyil ñépp. <sup>5</sup> Teewul Absalom ne: «Wooleen Usay, Arkeen bi itam, nu déglu lu mu ciy wax.» <sup>6</sup> Usay dikk ca Absalom, mu wax ko la Ayitofel digle, ne ko: «Ndax loolu Ayitofel wax lanu wara def am déet? Wax nu lu ciy sa xalaat, yaw.»

<sup>7</sup> Usay ne Absalom: «Li Ayitofel digle bii yoon de baaxul. <sup>8</sup> Xam nga sa baay ak ay nitam. Ay xarekat yu jàmbara lañu te wex ni gaynde gu ñu nangu doom ya, te it, sa baay ku xam xeex la, du fanaan ak xarekat ya. <sup>9</sup> Xam naa ne ma nga làqu ci xuntim xeer, mbaa bérab rekk. Te bu aw nit jèkke daanu ci seen biir yeen, ku ko dégg dina ne: “Jéll bu réy am na ca mbooloom Absalom.” <sup>10</sup> Su boobaa, ku ñeme, ba dègeru fit ni gaynde sax, dinga tiit lool, ba ne yàcc, ngir Israyil gépp xam nañu ne sa baay ñeyi xare la, te it ñi ànd ak moom jàmbaar lañu. <sup>11</sup> Kon sama xalaat mooy nga boole ñi ànd ak yaw ba ñu daj, muy Israyil gépp, dale ko diiwaanu Dan ca bëj-gannaar ba ca Beerseba ca bëj-saalum. Muy mbooloo mu bare, tollu ni suufas géej; te yaw ci sa bopp, nga jiite leen ci xare bi. <sup>12</sup> Nu song ko nag fu nu ko mana fekk, dal ci kawam, ni ab lay ci kaw suuf. Deesu ci bàyyi kenn muy dund, du moom, du kenn ciy nitam. <sup>13</sup> Su làqoo ci ab dèkk bu mag, na Israyil gépp yóbbaaale ay buum ca tata ja, nu

laaw ko, wat ba ca xur wa, ba kenn dootu gis aw doj wu ca bokkoon.» <sup>14</sup> Absalom ak waa Israyil gépp daldi ne: «Ndigalal Usay, Arkeen bii kat, moo gën ndigalu Ayitofel.» Booba Aji Sax jee nara indil Absalom musiba. Moo tax mu neenal pexem Ayitofel mu jub ma mu laloon.

<sup>15</sup> Ci kaw loolu Usay wax ak Cadog ak Abiyatar sarxalkat ya, nettali leen la Ayitofel digal Absalom ak magi Israyil ña, ak la mu leen digal, moom Usay. <sup>16</sup> Mu ne leen: «Gaawleen yónnee léegi ca Buur Daawuda te wax ko ne ko bumu fanaan fa ñuy jàlle dex ga, jëm ca màndiñ ma. Na jàlla jàll dex ga, lu ko moy dees na ko bóom, mook mbooloo ma mu àndal mépp.»

<sup>17</sup> Ma nga fekk Yonatan ak Ayimaas ca En Rogel. Manuñu woona dugg ca biir dëkk ba, ndax ragal ñu gis leen. Ab jaam bu jigéen nag di dem ca Yonatan ak Ayimaas, di leen wax la xew, ngir ñu dem ca Buur Daawuda, yegge ko ko. <sup>18</sup> Teewul ab xale bu góor gis leen, wax ko Absalom. Ba mu ko defee ñu ànd ñoom ñaar, gaaw dem ca kër jenn waay ju dëkk Baxurim. Waa ja am ab teen ca éttam, ñu dugg ca biir. <sup>19</sup> Ci kaw loolu soxna sa jël basañ, lal ko ca pindu teen ba, ba noppi wasaare pepp ca kaw, ba kenn du ca foog dara. <sup>20</sup> Jawriñi Absalom dikk ca kër ga, fekk fa ndaw sa, ne ko: «Ana Ayimaas ak Yonatan?» Ndaw sa ne leen: «Jéggi nañu dex gi.» Ñu seet, gisuñu kenn, daldi dellu Yerusalem.

<sup>21</sup> Gannaaw ba ñu demee, Ayimaas ak Yonatan yéeg, génnteen ba, dem nag àrtuji Buur Daawuda. Ñu ne ko Ayitofel digle na nàngam ak nàngam ci moom, neeti ko: «Gaawleen jàll dex gi léegi.»

<sup>22</sup> Ca saa sa Daawudaaki nitam ñépp jàll dexu Yurdan ga. Ba jant bay fenk, kenn sax desul ku jàllul dex ga.

<sup>23</sup> Ci biir loolu Ayitofel gis ne déggeesul ndigalam, mu takk mbaamam, ñibbi ca dëkk ba mu fekk baax. Mu daldi topptoo mbiri këram ba mu jekk, ba noppi wékk boppam. Mu dee, ñu denc ko ca ségi baayam.

<sup>24</sup> Ba mu ko defee Daawuda àgg Maanayim, fekk Absalom di jàll dexu

Yurdan, ànd ak xarekati Israyil yépp. <sup>25</sup> Amasa nag la Absalom faloon, mu jiite mbooloom xare ma, wuutu Yowab. Amasa moo doon doomu góor gu ñuy wax Yittra, di bànni Israyil bu jëlloon Abigayil, mi Nayas di baayam. Abigayil ak Seruya, yaayu Yowab, ñoo bokk ndey. <sup>26</sup> Bànni Israyil daldi ànd ak Absalom dal ca diiwaanu Galàdd. <sup>27</sup> Ba Daawuda àggee Maanayim, Sobi doomu Nayas mu Raba, ga ca dëkkub Amoneen ña, moo ko teertu, mook Makir doomu Amiyel ma dëkk Lodebar; ak Barsilay waa Galàdd ba dëkk Rogelim. <sup>28</sup> Ñu daldi indi ay laltu aki ndab aki njaq, ak peppum bele ak peppum lors ak sunguf ak mbool ak xeeti ñebbe, <sup>29</sup> ak lem akum soow, aki gàtt, ak formaasu nag ngir Daawudaak mbooloom lekk. Ndaxte booba dañu ne: «Mbooloo mi de, xiif ak mar lañu boole, ak coonob màndiñ ma.»

## 18

### *Daawuda xare naak Absalom*

<sup>1</sup> Ba loolu weese Daawuda xayma na mbooloo ma mu àndal, fal ca seen biir njiiti kuréli junniy xarekat, kurél gu ci nekk ak njiiti kuréli téeméer ya ko sos. <sup>2</sup> Daawuda def mbooloo ma ñetti xaaj, yebal leen. Benn xaaju mbooloo ma, Yowab jiite leen; beneen xaaj ba, Abisay doomu baayu Yowab, mi Seruya di yaayam, jiite leen; xaaj ba ca des Itay waa Gaat ba jiite leen. Buur ne mbooloom xare ma: «Damay ànd ak yeen, man itam.» <sup>3</sup> Teewul mbooloo ma ne ko: «Déédéet, yaw doo ànd ak nun! Ndax nun su ñu nu dàqee, du am boobu solo. Bu sunu genn-wàll deeyee it, du am benn solo. Waaye sa jenn jëmm jii mooy fukki junni ci nun. Kon nag desal nu ci dëkk bi, di nu fi yónnee wall, moo gën.» <sup>4</sup> Buur ne leen: «Baax na, kon ma def noonu.» Ba loolu amee Buur taxaw ca bunt dëkk ba, xarekat ya def ay kuréli téeméer ak kuréli junni, daldi génnteen dem. <sup>5</sup> Buur nag joor Yowab ak Abisay ak Itay, ne leen: «Seetleen ci man te def ndànk ak ngóor si Absalom.» Xarekat yépp a dégg kàddu googu Buur dénki njiit ya ca mbirum Absalom.

<sup>6</sup> Mbooloo maa nga jëm ca toolub xare ba, di xarejeek Israyil. Xare baa nga ame ca gott ba ñuy wax Efrayim, <sup>7</sup> mbooloom Israyil nag daanu foofa ca kanam xarekati Daawuda. Bésusb keroog ñu baree dee: ñaar fukki junnee (20 000) daanu. <sup>8</sup> Xare ba daa law foofa ba daj diiwaan ba bépp; te ña dee ca gott ba bésusb keroog ñoo épp ña saamar rey.

<sup>9</sup> Ci biir loolu Absalom ne pemm taseek xarekati Daawuda. Ma nga war berkelle. Berkelle ba fëx wuti garab gu réy, te bànqaas ya fatt. Boppu Absalom tance ca garab ga, berkelle ba mu war topp xélam, mu des fa di sandaamtalu. <sup>10</sup> Ba mu ko defee jenn waay gis ko, dem, wax ko Yowab, ne ko: «Ki ma gis de, Absalom a, ma nga wékku ci genn garab.» <sup>11</sup> Yowab ne ko: «Nga ne? Gis nga ko te jamoo ko foofa, mu daanu? Kon de doon naa la jox fukki dogi xalis, takkal la ngañaayal xarekat tegal la ca.» <sup>12</sup> Waa ja ne Yowab: «Ku tegoon ci sama loxo junniy dogi xalis sax, дума xàcci sama loxo jëm ci doomu buur. Noo déggal sunu bopp Buur sant la, yaak Abisay ak Itay, ne leen: “Na ma ku nekk ci yeen dimbali, te def ndànk ak ngóor si Absalom.” <sup>13</sup> Su ma jaayoon sama bakkan, ba def njekkar it, amul dara lu ump Buur, te kon it yaw danga ciy raxas say loxo.» <sup>14</sup> Yowab ne ko: «Duma la déglu sax, nga di ma yàggal!»

Ci kaw loolu Yowab jël ñetti bant yu ñaw, jam ko Absalom ci xol, fekk ko muy dund ba tey ca xolu garab ga mu tancu. <sup>15</sup> La ca tegu fukki nit ña doon gàddul Yowab ngànaayam, dikk wër Absalom, jam ko, mu dee. <sup>16</sup> Yowab wal liit ga, dakkal xare ba, xarekat ya noppee dàq waa Israyil. <sup>17</sup> Ñu jël néewu Absalom, sànni ci kàmb gu réy ca àll ba, daldi jóor ca kawam jalu xeer bu maga mag. Bànni Israyil yépp nag daw ñibbi seeni kër.

<sup>18</sup> Absalom moo samplu woon cig dundam, doj wu mag wa ca xuru Buur, ndax da noon: «Bàyyiwuma doom ju góor ju ñu may fàttlikoo.» Moo tax mu tudde doj wa boppam, te doju Absalom lañu koy wooye ba tey jii.

*Lu jëm ci tàggeb Absalom*

<sup>19</sup> Ba loolu wéyee Ayimaas doomu Cadog ne: «May ma rekk ma daw yégali Buur xibaar bii, ne ko Aji Sax ji musal na ko ciy noonam.» <sup>20</sup> Yowab ne ko: «Du yaw yaay yégle xibaar tey jii. Man ngaa yégle xibaar beneen yoon, waaye du yaay yégleji tey, ndax doomu buur a dee.» <sup>21</sup> Yowab nag wax ab waa Kuus, ne ko: «Demal wax Buur li xew.» Waa Kuus ba sujjóotal Yowab, daldi dem. <sup>22</sup> Ayimaas doomu Cadog dellu ne Yowab: «Lu ci mana xew, may ma rekk, man itam ma daw topp ci gannaaw waa Kuus bi.» Yowab ne ko: «Doom, lu la taxa bégga dem, lii du xibaar bu ko jar.» <sup>23</sup> Mu ne ko: «Lu ci mana am, bégga namaa dem.» Yowab ne ko: «Demal!» Ayimaas daw, jaare ca joor ga, ba jëkk waa Kuus ba.

<sup>24</sup> Daawudaa nga toog ca diggante buntu dëkk, ba fëete biir ak bunt ba fëete biti. Fekk na wattukat ba yéeg ca kaw taax ma tiim buntu dëkk ba, ca kaw tata ja. Naka la dawal bêtam, séentu, gis jenn waay juy daw moom kenn, di ñëw. <sup>25</sup> Wattukat ba àddu ca kaw, yégal ko Buur. Buur ne: «Gannaaw kenn nit la de, xibaaru jàmm lay indi.» Waa ja di gëna jegesi, <sup>26</sup> wattukat ba gis jeneen waay juy daw di ñëw, mu wax ko farbay bunt ba, ne ko: «Xoolal, keneen a ngi, di ñëw, moom kenn.» Buur ne: «Kooku it de xibaaru jàmm lay indi.» <sup>27</sup> Wattukat ba ne: «Ni ma gise ki jiiu de, dawinu Ayimaas doomu Cadog la ma jox.» Buur ne: «Kooku ku baax la, jàmm rekk lay waxsi.» <sup>28</sup> Ci kaw loolu Ayimaas àddu ca kaw, ne Buur: «Jàmm la!» daldi sujjóotal Buur, dépp jëem fa suuf, ne ko: «Buur, sang bi, cant ñeel na sa Yàlla Aji Sax ji, moom mi teg ci sa loxo ña la doon fexeel.» <sup>29</sup> Buur ne ko: «Ngóor sa Absalom nag, mbaa jàmm la am?» Ayimaas ne ko: «Sang bi, ba Yowab di yónni sa bëkk-néeg ak man, booba gis naa kër-kër ju réy, waaye xawma lu mu doon.» <sup>30</sup> Buur ne: «Randul, taxawe nii.» Ayimaas randu, taxaw ca wet ga.

<sup>31</sup> Ci kaw loolu waa Kuus ba ne jimeet. Mu ne: «Buur, sang bi, déglul, xibaaru jàmm a ngi. Aji Sax ji musal na la bésusb tey ci ña la doon fexeel ñépp.» <sup>32</sup> Buur ne

waa Kuus ba: «Ngóor si Absalom mbaa jàmm la am?» Waa Kuus ba ne ko: «Buur sama sang, say noon ak mboolem ñi lay fexeel, yal nañu bokk ak ngóor soosu demin.»

## 19

<sup>1</sup> Naka la Buur dégg loolu, naqar wu réy jàpp ko. Mu dem ca biir néeg ba, ca taax ma tiim bunt dëkk ba, di jooy. Ma ngay dem te naan: «Wóoy Absalom sama doom ja! Éey sama doom ja, céy Absalom sama doom ja! Éey waay su ma sañoon dee sax wuutu la, Absalom, doom. Éey waay sama doom ja!»

### *Yowab sikk na Daawuda*

<sup>2</sup> Ci biir loolu ñu wax Yowab ne ko: «Buur Daawuda kat ma ngay jooy, di mititlu deewu doomam Absalom.» <sup>3</sup> Moo tax ndam la bésuub keroog walbatiku diw tiis ca gàngooru xarekat ya yépp, ndax lañu dégg ne Buur a ngay mititlu deewu doomam. <sup>4</sup> Xarekat ya nag di yoxoosuy dugg bésuub keroog ca Maanayim, mel ni nit ñu dawe xare, di yoxoosuy ñibbsi, ndax gâce. <sup>5</sup> Buur a nga dar kanamam, di jooy, baat bay jib ca kaw. Ma nga naan: «Wóoy Absalom, sama doom ja! Céy waay Absalom, sama doom ja! Éey waay sama doom ja!»

<sup>6</sup> Ba loolu amee Yowab fekk Buur ca kër ga, ne ko: «Bésuub tey jii torxal nga mboolem ñi la topp, ba musal sa bakkan bésuub tey, musal sa bakkani doom, góor ak jigéen ak sa bakkani soxnaak say nekkaale. <sup>7</sup> Ndax yaw dangaa bëgg ñi la bañ, bañ ñi la bëgg. Biral nga tey ne kilifay xarekat yeek xarekat yépp, tekkiwuñu dara ci yaw. Bir na ma ne bu Absalom doon dund tey te nun ñépp nu bokk dee, moo lay gènal. <sup>8</sup> Léegi nag, jógal kat génn wax ak say nit, ruccanti leen. Ndax giñ naa ci Aji Sax ji, soo génnul, du kenn ku fiy bokk fanaan ak yaw tey. Te loolu de musiba lay doon ci yaw, mu gèna réy musiba mu la masa dal, ba ngay ndaw ba tey.» <sup>9</sup> Buur daldi jóg, génn, toog ca buntu dëkk ba. Ñu wax mbooloo ma mépp ne leen: «Gisleen

Buur a ngee toog ca bunt ba.» Mbooloo mépp dikk taxaw ci wetam.

Fekk na bànni Israyil ya faroon ak Absalom daw ñibbi ca seeni kër.

### *Daawudaa ngi dellu Yerusalem*

<sup>10</sup> Ba loolu amee giiri bànni Israyil yépp diisoo ci seen biir. Ña nga naan: «Buur Daawudaa nu xettli woon ci sunuy noon, rawatina Filisteen ñi. Bu dawee génn réew mi, Absalom a ko waral. <sup>11</sup> Gannaaw Absalom ma nu faloon mu jiite nu, dee na ca xare ba, lu nu tee wax lu jëm ci délloosi Buur Daawuda?»

<sup>12</sup> Ci kaw loolu Buur Daawuda ci wàllu boppam yónnee ca Cadog ak Abiyatar, sarxalkat ya, ne leen: «Waxleen ak magi Yuda, te laaj leen, ne leen: “Xanaa ñépp duñu jéem lu délloosi Buur kèram, yeen ngeen des gannaaw, te moom ci boppam dégg na kàddug bànni Israyil gépp. <sup>13</sup> Yeen de yeenay bokki buur lenqe, ngeen bokk ak moom jenn deret; kon xanaa ñépp duñu délloosi Buur, ngeen des gannaaw?” <sup>14</sup> Te ngeen waxal ma Amasa ne ko: “Buur nee, xanaa doo mbokkam lenqe, di deretam? Nee yal na ko Yàlla teg mbugal mu gèna tar ndegam du la fal, nga jiite mbooloom xare mi ba fàww, wuutu Yowab.”» <sup>15</sup> Kàddu yooyu nag wañni xolu Yudeen ñépp, ñu bokk genn kàddu, daldi yónnee ca Buur ne ko mu délsi, mook nitam ñépp.

### *Simey tuubal na Daawuda*

<sup>16</sup> Gannaaw loolu Buur Daawuda walbatiku, dikk ba àgg dexu Yurdan, Yudeen ña dikk, teertusi ko ca Gilgal, ngir jállale ko dexu Yurdan. <sup>17</sup> Simey doomu Geraa ngay gaawtu. Mooy waa Baxurim ba askanoo ci Beñamin. Ma nga ànd ak Yudeen ña, di teertu Buur Daawuda. <sup>18</sup> Junniy nit ñu askanoo ci Beñamin a ko topp, ñook Ciba, surgab waa kër Sóol, ak fukki doomam yu góor ak juróom, ak ñaar fukki surgaam. Ñu riirandoo ca dex ga, di gatandu Buur Daawuda. <sup>19</sup> Ci kaw loolu ñu jàll dex ga, ngir jàlle waa kër Buur, defal ko coobareem. Ba Buur Daawuda di waaja jàll dex ga, Simey doomu Gera da ne gurub sukk, sujjóotal ko, <sup>20</sup> ne ko: «Buur, sang bi, ngalla bu ma

topp lu ñaaw li ma def. Bu ma jàppal mer ndax li ma la tooñ, keroog ba ngay jóge Yerusalem. Ngalla bu ma ko dencal ci sa xol, <sup>21</sup> ndaxte xam naa ne bàkkaar naa, sang bi. Waaye xoolal tey, Buur, sang bi, waa giirug Yuusufa gépp, maa ci jékka ñew gatandusi la.»

<sup>22</sup> Abisay ma yaayam di Seruya ne Buur: «Simey mii, lu muy wax nii? Kii deesu ko rey? Du moo la doon saaga, yaw mi Aji Sax ji fal?» <sup>23</sup> Daawuda ne Abisay: «Yeen, doomi Seruya, lu ciy seen yoon, ba ngeen di ma ñaññ nii tey? Xam naa xéll tey ne maay buurub Israyil. Kon ana ku wara rey kenn tey ci Israyil?» <sup>24</sup> Buur nag wax Simey ne ko deesu ko rey, daldi ko koy giñal.

#### *Daawuda baaxe na Mefiboset*

<sup>25</sup> Ci kaw loolu Mefiboset, sëtub Sóol, dikk moom it, di teertusi Buur. Dig-gante bés ba Buur gàddaayee nag, ba bés sub keroog ba mu délseek jàmm ca Yerusalem, Mefiboset jànguwul, watul sikkimam, te fóotul ay yéream. <sup>26</sup> Naka la Mefiboset dikk ca Buur, di ko teertu, Buur ne ko: «Mefiboset, lu la tee wona ànd ak man?» <sup>27</sup> Mu ne ko: «Éy Buur, sang bi, sama surga Ciba moo ma nax de, sang bi, ndax man, dama noon damay takklu sama mbaam war, gannaaw ab lafañ laa. Su ko defee ma ànd ak yaw. Yaay sama sang. <sup>28</sup> Waaye sama surгаа yàq sama der ci yaw. Yaw nag Buur, sang bi, ndokk ba nga matee ba mel ni malaakam Yàlla. Kon sang bi, defal li la soob. <sup>29</sup> Ndax kat sang bi, du kenn ci sama askanu maam ku yelloowul lu moy nga rey ko. Terewul danga maa xajal, sang bi, boole ma ci ñiy bokk ak yaw ndab. Kon Buur, ana lu ma la sañatee ñaan?» <sup>30</sup> Buur ne ko: «Ana looy waxati lii lépp? Dogal naa yaak Ciba, ngeen séddoo suuf si.» <sup>31</sup> Mu ne Buur: «Amul solo, Buur, sang bi; na jël lépp sax, ndegam yaw ñibbsi ngaak jàmm sa biir kër kay!»

#### *Daawuda tàggtoo na ak Barsilay*

<sup>32</sup> Fekk na Barsilay ma bokk ca Galàdd jóge woon Rogelim, ngir gunge Buur Daawuda, ba mu jàll dexu Yurdan, bala

moo tàggtoo ak moom ca wàllaa dex. <sup>33</sup> Barsilay mag la woon. Amoon na juróom ñett fukki at. Moom moo daan topptoo Buur diir ba mu nekk Maanayim, ndax nit ku bare alal la woon. <sup>34</sup> Buur ne Barsilay: «Jàllal nu dem, nga toog ci man, ma yor la ca Yerusalem.» <sup>35</sup> Mu ne Buur: «Moo, man, Buur, lu ma deseeti ciy fan, bay ànd ak yaw dem Yerusalem!» <sup>36</sup> Maa ngi ci juróom ñett fukki at tey, te xamatuma lu neex ak lu naqari. Sang bi, man xamatuma sax lu ma lekk di saf mbaa naan, te baatu woykat sax safatu ma dara, muy góor, di jigéen. Kon ana lu ma lay diisalati doye? <sup>37</sup> Naa jàll dex gi, gunge la tuuti rekk, Buur. Te sax gisuma lu jar nga di ma defal boobu yool! <sup>38</sup> Bàyyil rekk sang bi, ma ñibbi, ndax ma deeyi sama dëkk, ñu denc ma ca sama wetu ndey ak sama baay. Waaye ma ne, Buur, sang bi, Kimyam a ngoogu di sa surga. Na ànd ak yaw jàll. Defal ko lu la soob.» <sup>39</sup> Buur ne ko: «Baax na, na Kimyam ànd ak man, nu jàll. Dinaa ko defal li nga bëgg, te loo bëgg ma defal la ko rekk, dinaa la ko defal.»

<sup>40</sup> Noonu la mbooloo ma mépp jàlle dexu Yurdan, Buur it jàll. Buur nag taf Barsilay ca kawam, ñaanal ko, Barsilay doora ñibbi kër am. <sup>41</sup> Ba mu ko defee Buur jàll ba Gilgal, Kimyam ànd ak moom. Mbooloom Yuda gépp ak ñenn ci mbooloom Israyil itam ànd ak Buur dem.

<sup>42</sup> Naka la loolu am rekk waa Israyil yépp dikk ca Buur, ne ko: «Buur Daawuda, ana lu waral sunu bokki Yuda yi aakimoo la, jàlle la dexu Yurdan, yaak sa waa kër ak sa nit ñi nga àndal ñépp?»

<sup>43</sup> Waa giirug Yuda gépp nag mànkoo ne waa Israyil: «Li ko waral mooy Buur da di sunu mbokk lenqe. Ana lu ngeen di mer ci loolu? Danoo lekkal Buur dara mbaa nu sàkkal sunu bopp lenn ci alalam?»

<sup>44</sup> Waa Israyil ne waa Yuda: «Noo leen èpple ci Buur fukki yoon, noo leen èpp sañ-sañ fopp ci Daawuda. Lu ngeen nuy xeebe? Xanaa du noo jékka wax lu jëm ci délloosi sunu buur?» Ci kaw loolu waa Yuda dellu tontu waa Israyil kàddu yu gënatee ñagas.

## 20

### *Seba jàmbu na*

<sup>1</sup> Booba nit ku bon a nga woon ca mbooloo ma, ku ñuy wax Seba, di doomu Bikkri, ma bokk ca giirug Beñamin. Seba wal liit ga, daldi yéene ne:

«Sunu yoon nekkul ci Daawuda doomu Yese jii,

du benn cér bu nu am ci moom.

Yeen waa Israyil, ku nekk ca sa xayma!»

<sup>2</sup> Ba mu ko defee waa Israyil yépp jàmbu Daawuda, topp Seba doomu Bikkri. Teewul waa giirug Yuda ñoom taq ci seen buur, toppe ko dexu Yurdan ba Yerusalem.

<sup>3</sup> Buur Daawuda nag ñibbi këram ga ca Yerusalem. Teewul fukki nekkaaleem ña mu wacoon ñuy topptoo kër ga, da leena boole denc ci genn kër, ñu di leen fa wattu. Mu yor leen fa, te dëkkootu leen. Dees leen faa denc ba keroog ñuy dee, ñu mel ni ay jëtun.

<sup>4</sup> Gannaaw loolu Buur ne Amasa, ma jiite mbooloom xareem: «Danga may wool góori Yuda, ñu dajesi ci man fii ak ñetti fan, te yaw itam nga dikk taxaw fii.» <sup>5</sup> Amasa dem wooyi Yudeen ña, yàgg ca ba wees diir ba ko Buur àppaloon.

<sup>6</sup> Daawuda nag ne Abisay: «Seba doomu Bikkri jii de dina nu lor lu raw la nu Absalom loroon. Àndal ak ñenn ci samay dag te dàqi ko, lu ko moy dina gis fu mu làqu ci ay dëkk yu ñu wërale ay tata, ba raw nu.» <sup>7</sup> Ba loolu amee niti Yowab ña ànd ak waa Keret ñaak waa Pelet ñay dar Daawuda, ak xarekat yépp. Ñu jóge Yerusalem dàqi Seba doomu Bikkri.

<sup>8</sup> Dem nañu ba tollu ca doj wu mag wa ca Gabawon, doora gis Amasa, muy dox di dajeeq ñoom. Yowab a nga sol yérey xareem, laxasaay ga ca ndigg la ànd ak saamar bu roofe ca mbaram. Naka la séqi jéego jëm kanam, saamar ba rot.

<sup>9</sup> Yowab ne Amasa: «Mbokk mi, mbaa jàmm nga am?» Yowab jàpp sikkimu Amasa ca loxol ndijooram, mel ni ku koy foon. <sup>10</sup> Amasa foogul dara ci saamar ba ca loxol càmmoñu Yowab. Yowab bojj ko ko ci biir, wàlli ay butitam ci suuf. Tóllantiwul sax, Amasa dee.

Ci kaw loolu Yowab ànd ak rakkam Abisay, dàqi Seba doomu Bikkri. <sup>11</sup> Ci biir loolu kenn ci niti Yowab ña taxaw fa Amasa tèdd, daldi ne: «Ku sopp Yowab ak képp ku ànd ak Daawuda na topp Yowab.» <sup>12</sup> Néewub Amasaa nga ca digg yoon wa, sangoo deretam. Waa ja gis ne képp ku dox ba tollook moom, taxaw nga fa. Naka la waa ja gis ñépp di taxaw foofa, mu diri néew ba, jële ko ca yoon wa, ba ca àll ba. Mu sànni malaan ca kawam. <sup>13</sup> Ba ñu fa jëlee néewu Amasa, ñépp ànd ak Yowab toppi Seba doomu Bikkri.

<sup>14</sup> Yowab jaar ca giiri Israyil gépp ba ca Abel Bet Maaka. Waa Ber gépp dajee topp ko. <sup>15</sup> Ñu dikk gaw dëkk ba ñuy wax Abel Bet Maaka, fa Seba làqu. Ci kaw loolu ñu jal suuf fa sès ca buntu dëkk ba, mu kawé ba tollook tatay dëkk ba. La ca tegu xarekati Yowab yépp di jéema màbb tata, ja wër dëkk ba.

<sup>16</sup> Ci biir loolu senn as ndaw su am xel ca dëkk ba, woote ne leen: «Dama ne, dégluleen! Neleen Yowab mu ñëw, ma wax ko.» <sup>17</sup> Yowab dem ba ca moom, ndaw sa ne ko: «Yaa di Yowab?» Mu ne ko «Waaw.» Mu ne ko «Sang bi, dama ne...» Mu ne ko: «Áa.» <sup>18</sup> Mu ne ko: «Daa nañu wax bu jékk naan: “Lu waay di laaj, na dem Abel, tont laa nga fa.” Su ko defee, wax ja jeex. <sup>19</sup> Nun danu di niti jàmm ñu am kóllère ci digg Israyil. Yaw nag yaa ngi wuta faagaagal dëkk bu mag bu jaboote ñi ko wër ñépp ci digg Israyil. Ana lu waral nga namma tas dëkk bu Aji Sax ji séddoo?» <sup>20</sup> Yowab ne ko «Yàlla tere, tereeti ko, may tas ak a faagaagal kenn! <sup>21</sup> Du loolu! Jenn waay ju ñuy wax Seba doomu Bikkri te bokk ca waa tundi Efrayim, moo jógal Buur Daawuda. Joxleen ma ko moom donj, ma bàyyi dëkk bi te dem.» Ndaw sa ne Yowab: «Xoolal, boppam lañuy tollu ci kaw taax mi, sànni la ko.» <sup>22</sup> Ndaw sa nag dem ca mbooloo ma mépp, xelal leen pexeem mu jub moomu. Ñu dog boppu Seba doomu Bikkri, sànni ko Yowab. Yowab wal liit ga, nitam ña tasaaroo, bàyyi dëkk ba, ku nekk ñibbi këram. Yowab daldi dellu Yerusalem ca Buur.

*Lu jëm ci jawriñi Daawuda*

<sup>23</sup> Yowab moo jiite woon mbooloom xarem Israyil gépp; Benaya doomu Yoyada yilif dag ya dar Buur, te di waa Keret ak waa Pelet; <sup>24</sup> Adoram di saytu liggéey ya ñuy sase; Yosafat doomu Ayilut yor kàddug Buur; <sup>25</sup> Sewa di bindkat; Cadog ak Abiyatar di ay sarxalkat; <sup>26</sup> Ira ma fekk baax Yayir itam di sarxalkatu Daawuda.

## Yenn xew-xew a ngi

### 21

#### *Waa Gabawon feyu nañu*

<sup>1</sup> Jamono ya Daawuda nekkee ci jal bi, amoon na xiifub ñetti at yu tegloo. Daawuda diis ko Aji Sax ji. Aji Sax ji ne ko: «Li waral xiif bi moo di àqu deret ji topp Sóol ak waa këram ndax waa Gabawon ña mu rey.» <sup>2</sup> Buur woo waa Gabawon, wax ak ñoom. Waa Gabawon bokkuñu woon ci bànni Israyil, waaye ñoo desoon ca Amoreen ña bànni Israyil giñaloon ne duñu leen rey. Teewul Sóol xeroon lool ci bànni Israyil ak Yuda, bay fexee faagaagal waa Gabawon. <sup>3</sup> Daawuda laaj waa Gabawon, ne leen: «Lan ngeen bëgg ma defal leen ko? Ana lu may def ba jotoo ko àq, ji ñu leen ameel, ba ngeen ñaanal ñoñi Aji Sax ji?» <sup>4</sup> Waa Gabawon ne ko: «Du xalis, du wurus wu nuy laaj Sóol mbaa waa këram; te it du kenn ci Israyil ku nu saña reylu.» Mu ne leen: «Waxleen boog lu ngeen di laaj, ma defal leen ko.» <sup>5</sup> Ñu ne ko: «Sóol da noo naroon fexeel, sànk nu, faagaagal nu ci réewum Israyil. <sup>6</sup> Kon dees nuy jox juróom ñaari góor ñu askanoo ci Sóol, nu jam leen ba mu sar fa kanam Aji Sax ji ca Gibeya, dëkkub Sóol, ma Aji Sax ji faloon.» Buur ne leen: «Dinaa leen leen jox.»

<sup>7</sup> Teewul Daawuda déeg Mefiboset, ma Yonatan doomu Sóol di baayam, ndax la ñu giñoo woon ci Aji Sax ji, mook Yonatan doomu Sóol. <sup>8</sup> Buur nag jàpp Armoni ak meneen Mefiboset, te Rispa doomu Aya di seen yaay, Sóol di seen baay. Buur boole ca juróomi góor ña Mikal\* doomu Sóol di seen yaay, te Àddiryel doomu Barsilay ma

dëkk Mewola di seen baay. <sup>9</sup> Daawuda jébbal leen waa Gabawon, ñu jam leen ba mu sar, foofa ca kaw tund wa, fa kanam Aji Sax ji. Juróom ñaar ñoofu ñépp a bokk téd. Ña nga leen rey ca fan ya ñu tàmbalee góob, ca ndoortel ngóobum lors ba.

<sup>10</sup> Ba mu ko defee Rispa doomu Aya ju jigéen ja, jël ab saaku, tàllalal ko boppam ca doj wa. La ko dale ca ndoortel ngóob ma, ba keroog asamaan di sóob ca kaw néew ya, Rispa bàyyiwul dara mu laal leen bëccëg mbaa guddi, du picc, du rabu àll.

<sup>11</sup> Ba loolu amee ñu àgge Daawuda jëfi Rispa doomu Aya, nekkaaleb Sóol ba. <sup>12</sup> Daawuda dem jëleji yaxi Sóol ak doomam Yonatan ca waa Yabes Galàdd. Ndax gannaaw ba ñu daanee Sóol ca Gilbowa, Filisteen ña dañoo wékkoon néewu Sóol ak Yonatan ca péncum Bet San. Waa Yabes Galàdd dikk sàcce leen fa. <sup>13</sup> Ci kaw loolu Daawuda jële fa yaxi Sóol ak doomam Yonatan, ak yaxi nit ña ñu jamoon ba mu sar te wékk leen. <sup>14</sup> Ñu boole kook yaxi Sóol ak doomam Yonatan, denc lépp ca sègu Kis, baayu Sóol, ca diiwaanu Beñamin ca Sela. Ñu def la Buur santaane lépp. Gannaaw loolu Yàlla nangul réew ma.

#### *Daawuda daje naak ponkali waa Filisti*

<sup>15</sup> Bu loolu wéyee, xare amaat na diggante Filisteen ñi ak bànni Israyil. Daawuda ànd aki nitam xarejeek Filisteen ña. Daawuda nag sonn ci biir xare bi. <sup>16</sup> Ci kaw loolu Isbi Bënob ne dina rey Daawuda — kooku askanu ponkal ya ñu daan wooye Rafayeen, ca la bokkoon. Ñawkay xeejam xànjari la, diise ñetti kilo. Mu yore itam saamar bu bees. <sup>17</sup> Teewul Abisay doomu Seruya dikk, wallusi Daawuda, jam Filisteen ba, rey ko. Niti Daawuda daldi cay giñal Daawuda, ne: «Dootuloo ànd ak nun mukk cib xare. Lu ko moy dinga ci dee, askanu buur fey ci Israyil.»

<sup>18</sup> Gannaaw gi xare dellu am seen digganteek Filisteen ña ca dëkk ba ñuy wax

\* **21:8** 21.8 Mikal mii du Mikal mi ñuy wax ci 6.23, ne amul doom, ba keroog muy dee. Mikal mii mook Merab ñuy wax ci 1.Samiyel 18.19 kenn nit ki la. Jëkkëram mooy Àddiryel.



Gob. Ca la Sibeka, ma askanoo ci Usa, rey Saf ma bokk ca askanu ponkal ya. <sup>19</sup> Xare amati ca Gob seen digganteeek Filisteen ña. Elxanan doomu Yare Oregim ma dëkk Betleyem, jam Golyaat ma dëkk Gaat. Kookoo di waa ja bantub xeejam réyoon, ba tollu ni mbaam mu ñuy ràbbe.

<sup>20</sup> Xare dellu amati ca Gaat. Jenn waay ju réya réy a nga ca woon, ku am juróom benni baaraam, loxo bu nekk, ak juróom benni baaraam, tànk bu nekk, lépp di ñaar fukki baaraam ak ñeent. Moom it ponkalum Rafayeen la woon. <sup>21</sup> Ba mu tèkkoo Israyil, Yonatan a ko rey. Yonatan, Simeya magi Daawuda mooy baayam. <sup>22</sup> Ñeent ñooñu ay ponkali Rafayeen lañu woon ca Gaat. Daawudaaki nitam ñoo leen jam, ñu daanu.

## 22

### *Daawuda sant na*

<sup>1</sup> Daawuda woy na Aji Sax ji gannaaw ba ko Aji Sax ji xettlee ci mboolemi noonam, xettli ko it ci Sóol. Kàdduy woy wa lii la. <sup>2</sup> Mu ne: Aji Sax ji laay sës, mu di ma aar, di ma wallu. <sup>3</sup> Mooy sama Yàlla, ji ma sës, yiiru, fegu, mucc, làqu, raw, mucc fitna. <sup>4</sup> Ki yelloo cant, Aji Sax ji, moom laa woo, mucc ci samay noon.

<sup>5</sup> Gannaxi ndee mèdd ma, walum kasara naq ma.

<sup>6</sup> Buumi njaniiw laaw ma, dee ne jaas, di ma fiir.

<sup>7</sup> Ma jàq, woo Aji Sax ji, ne sama Yàlla wallóoy, mu dégge këram. Ma yuuxu, muy dégg.

<sup>8</sup> Mu mer, suuf yëngu, di ker-keri, kenuy asamaan jaayu, di reg-regi.

<sup>9</sup> Saxar di sël-sëlee ca wakkan ya, sawara boye ca gémmiñ ga, xal yu yànj tàkke ca.

<sup>10</sup> Mu firi asamaan, wàcc, niir yu fatt lal tànk ya.

<sup>11</sup> Ma nga war malaakam serub, di naaw,

daayaanloo laafi ngelaw.

<sup>12</sup> Ma nga bàddoo lëndëm, làmboo jali ndox aki xàmbaar.

<sup>13</sup> Leer a ko jiitu, ay xali sawara topp ca.

<sup>14</sup> Aji Sax jee dënoo asamaan. Aji Kawe jee àddu,

<sup>15</sup> soqiy fitt ak jumi melax, tasaare leen, fëlxe.

<sup>16</sup> Aji Sax ji gëdd, nokki, mu riir; xuri géej ne fàññ, kenuy suuf ne duññ.

<sup>17</sup> Moo yóotoo fa kaw, jàpp ma, seppee ma ca xóotey ndox ma,

<sup>18</sup> musal ma ca noon yu mag, ya ma bañ te man ma.

<sup>19</sup> Ñu dajeeek man, bés ba ma jàqee, Aji Sax ji taxawu ma,

<sup>20</sup> yaatal ma, bége ma, ba xettli ma.

<sup>21</sup> Aji Sax jee ma yool sama njekk, samay loxoo set, mu fey ma.

<sup>22</sup> Sàmm naa yooni Aji Sax ji, bonuma, di moy sama Yàlla.

<sup>23</sup> Dama ne jàkk ndigalam yépp, dëdduwma dogali yoonam.

<sup>24</sup> Seede na, may jéfeg mat, di moyoo tooñ.

<sup>25</sup> Aji Sax jee ma yool sama njekk, rafetlu sama mucc ayib.

<sup>26</sup> Yaw Aji Sax ji, ku gore, fekk la gore; ku matale, fekk la matale;

<sup>27</sup> ku sellal, fekk la sell; ku dëng, fekk laak say feem.

<sup>28</sup> Yaw yaay musal xeet wu néew doole, kuy danñiiral, nga detteel.

<sup>29</sup> Yaw Aji Sax ji, kay, laay niitoo, Aji Sax jeey leeral sama lëndëm.

<sup>30</sup> Maak yaw kay, ma song gàngoor. Maak sama Yàlla, ma tèb um tata.

<sup>31</sup> Yàllaa mat, kàddug Aji Sax jee wér te wóor. Mooy feg képp ku ko làqoo.

<sup>32</sup> Ana kuy Yàlla ku moy Aji Sax ji? Ku jara sës ku dul sunu Yàlla?

<sup>33</sup> Yàllaa may làqe dooleem,  
 xàllal ma, yoon mat.  
<sup>34</sup> Moo ma gaawal ni kéwél,  
 taxawal ma fu kawee.  
<sup>35</sup> Moo may tàggat ngir xare,  
 may bank xalag xànjär.  
<sup>36</sup> Aji Sax ji, yaa may feg, musal ma,  
 yaa may nangul, darajaal ma.  
<sup>37</sup> Yaa ma xàllalu yoon,  
 duma tërëf.  
<sup>38</sup> Maay dàq noon yi, falaxe,  
 jekkli, doora dëpp.  
<sup>39</sup> Ma rajaxe, nemmali, jógatuñu,  
 xanaa fëlëñu, ma joggi.  
<sup>40</sup> Sol nga ma dooley xare,  
 sukkal ñi ma jógal, ñu féete ma suuf.  
<sup>41</sup> Yaa ma won ndoddi noon,  
 ma boole bañ yi, bóom.  
<sup>42</sup> Ñu ne wallóoy, wall amul,  
 ñu woo Aji Sax ji, faalewu leen.  
<sup>43</sup> Ma wol, ba ñu doon pënd,  
 dër, note ni banu mbedd.  
<sup>44</sup> Yaa ma xettli ci bokk yiy fippu,  
 def ma, ma jiite ay xeet;  
 waaso wu ma xamul sax nangul ma,  
<sup>45</sup> ku ma ci dégg, déggal ma,  
 ay doomi doxandéem di ma raamal,  
<sup>46</sup> ne yàcc,  
 génne seeni tata, di lox.  
<sup>47</sup> Aji Sax jeey Kiy dund.  
 Kii ma sës moo jara sant.  
 Yàlla sama cëslaay ji may musal moo  
 màgg!  
<sup>48</sup> Mooy Yàlla ji may feyul,  
 di ma suufeelal xeet yi.  
<sup>49</sup> Xettli nga maak ku ma bañ ak ku ma  
 jógal,  
 kaweel ma, ma tiim leen,  
 xettleeti ma cib soxor.  
<sup>50</sup> Kon Aji Sax ji, ma sant la ci biir xeet yi,  
 kañ la!  
<sup>51</sup> Yaay may sa buuru ñoñ ndam lu réy,  
 yaay ji ngor ki nga fal,  
 muy man Daawuda, di sama askan ba  
 fàww.

## 23

### *Daawuda biral na waxyu*

<sup>1</sup> Kàddu yii la Daawuda tàggtoo. Da ne:

Kàddug Daawudaa ngi, doomu Yese,  
 kàddug góor gu ñu kaweel,  
 góor gi Yàllay Yanqóoba fal,  
 muy woykatu Israyil, bi ñu ñal.

<sup>2</sup> Noowug Aji Sax jee may waxe,  
 sol ma kàddoom.

<sup>3</sup> Yàllay Israyil a wax,  
 moom mi Israyil sës, moo ne:

Ku jiite ay nit cig njub,  
 bu jiitee cig ragal Yàlla,

<sup>4</sup> day mel ni leeru jant bu fenk,  
 kaw asamaanu suba su niir newul,  
 leeru asamaan su set, taw ba siwet,  
 ba ñax jebbi.

<sup>5</sup> Du nii la sama waa kër def ak Yàlla?  
 Moo fas ak man kóllère gu sax dàkk,  
 lépp jekk, mat sèkk.

Moo may may ndam saa su ne,  
 di ma defal lu ma namm.

<sup>6</sup> Waaye ku bon, ñu buub nig taxas, sànni.  
 Deesu ko fore loxo,

<sup>7</sup> xanaa fore ko weñ mbaa bantub xeej,  
 jafal mu lakk fa mu ne.

### *Jàmbara Daawuda def nañuy jaloore*

<sup>8</sup> Ñeyi xarey Daawuda ya, ñoo di:  
 Yosebasebet waa Agmon ba bokk ca  
 mbëri xare ya.

Moo xàcci xeejam, dal ci juróom ñetti  
 téeméeri nit,  
 rey leen ci menn cong.

<sup>9</sup> Ka ca topp di Elasar,  
 Elasar, Dodo.

Dodo, Awoya.

Elasar bokkoon na ci ñetti jàmbara xare  
 ya àndoon ak Daawuda,  
 di dëkk Filisteen ña fa daje woon ngir  
 xare.

Fekk bànni Israyil di dellu gannaaw.

<sup>10</sup> Elasar a taxaw, di cor Filisteen ña,  
 ba loxo ba banku, taq ca njàppul saama-  
 ram.

Aji Sax jee maye ndam lu réy bésub  
 keroog!

Ba ko mbooloom bànni Israyil fekksee,  
 defuñu lu moy futti néew ya.

<sup>11</sup> Ka topp ca Elasar di Saama.

Saama, Age ma dëkk Arar ay baayam.

Ba Filisteen ña daje ca Léyi,

wetu toolub ñebbe ba meññoon, ba fees dell,

bànni Israyil dañoo daw.

<sup>12</sup> Saamaa taxaw ca digg tool ba, aar tool ba, дума Filisteen ña. Aji Sax jee ca maye ndam lu réy!

<sup>13</sup> Mu am bés, jamonoy ngóob, ñetti ca mbëri xare ya fekki Daawuda ca xunti ma ca Adulam. Mbooloom Filisteen ñaa nga dal ca xuru Refayeen.

<sup>14</sup> Daawudaa nga ca biir rawtoom. Mu am kurélu xareb Filisteen ñu dal Betleyem.

<sup>15</sup> Daawuda jekki-jekki xel ma sore. Mu ne: «Éy ku ma wutali woon ndox mu ma naan ca teenu Betleyem ba ca buntu dëkk ba!»

<sup>16</sup> Ci kaw loolu ñetti jàmbaraari xare ya bëtt dalub Filisteen ña.

Ñu dem dui ndox ca teenu Betleyem ba ca wetu buntu dëkk ba, dikk yót Daawuda ndox ma. Daawuda nag néegu koo naan; da koo tuur, te Aji Sax ji tax.

<sup>17</sup> Mu ne: «Yàlla tere, Aji Sax ji, may naan miim ndox, nde kon deretu ñii dem jaayi seen bakkan laa naan.» Daawuda naanul ndox ma.

Jooju jëf la ñetti jàmbaraari xare ya def.

<sup>18</sup> Abisay bokkoon na ca mbëri xare ya. Abisay ak Yowab, Seruyaa di seen yaay. Abisay a xàcci woon xeejam, dal ci kaw ñetti téeméeri nit, rey leen.

Mu doxe fa siiw ni ñetti ñooña.

<sup>19</sup> Abisay bokk na ca ña gënoona siiw ca Fanweeri jàmbaraar ya; mujj na sax di seen njiit, waaye bokkuloon ca Ñetti ña.

<sup>20</sup> Benaya nag, Yoyadaay baayam, xarekat bu mag la woon, dëkkoon Kabsel. Def na jaloore yu réy!

Moo rey ñaari Mowabeen ña gënoona jàmbaraare.

Moo wàccoon ci kàmb, bésu tawu yuur, rey fa gaynde.

<sup>21</sup> Moo reyoon it waa Misra bu jekk ba taxawaay.

Waa Misra baa nga yor ab xeej, Benaya songewu ko lu moy aw yet.

Mu bif xeeju waa Misra ba, nangoo ko ciy loxoom, reye ko ko.

<sup>22</sup> Jooju jëf la Benaya doomu Yoyada def. Moom it siiwoon na ni ñetti mbëri xare ya,

<sup>23</sup> ñu gënoon koo naw ca Fanweeri jàmbaraar ya,

waaye bokkuloon ca Ñetti ña.

Daawuda nag def ko njiitu dag ya ko dar.

<sup>24</sup> Ñii bokkoon nañu ca Fanweeri jàmbaraar ya:

Asayel, rakki Yowab, Elxanan, Dodo di baayam, dëkk Betleyem,

<sup>25</sup> Saama ma doon waa Arot, Elika, di waa Arot,

<sup>26</sup> Eles ma dëkk Pelet,

Ira, Ikes di baayam, dëkk Tekowa,

<sup>27</sup> Abiyeser ma dëkk Anatot, Mebunay dëkk Usa,

<sup>28</sup> Salmon dëkk Awoya, Maaray dëkk Netofa,

<sup>29</sup> Eleb, Baana di baayam, dëkk Netofa, Itay, Ribayi di baayam, dëkk Gibeya ca giirug Beñamin.

<sup>30</sup> Benaya ma dëkk Piraton, Iday ma dëkk walum Gaas,

<sup>31</sup> Abi Albon dëkk Bet Araba, Asmawet dëkk Barum,

<sup>32</sup> Elyaba dëkk Saalbon,

ak góor ñi Yasen di seen baay,

ak Yonatan, <sup>33</sup> Saama di baayam, dëkk Arar,

Akiyam, Sarar di baayam, dëkk Arar,

<sup>34</sup> ak Elifelet, Axasbay di baayam, Axasbay, baayam dëkk Maaka,

ak Eliyam, Ayitofel di baayam, dëkk Gilo,

<sup>35</sup> ak Esray ma dëkk Karmel, ak Paray dëkk Arab,

<sup>36</sup> ak Igal, Natan di baayam, dëkk Soba, ak Bani ma dëkk Gàdd,

<sup>37</sup> ak Seleg, Amoneen ba,

ak Naray ma dëkk Berot.

Kookoo yoroon ngànaayi Yowab ma Seruya di yaayam.

<sup>38</sup> Ira ma dëkk Yeter ca la,  
ak Gareb dëkk Yeter,  
<sup>39</sup> ak Uri, Etteen ba.

Ñoom ñépp tollu ci fanweeri jàmbaar  
ak juróom jaar.

## 24

### *Daawuda waññ na bànni Israyil*

<sup>1</sup> Gannaaw ba loolu wéyee Aji Sax ji mereeti\* bànni Israyil, ba tax mu xiir Daawuda ci def lu leen di lor. Mu def ci xelam ne ko mu dem lim waa Israyil ak Yuda.

<sup>2</sup> Buur wax ak Yowab ma ca wetam, di njiital xarekat ya. Mu ne ko: «Wèral ci biir giiri Israyil gépp ba ñu daj, li ko dale diiwaanu Dan ca bëj-gànnar ba Beerseba ca bëj-saalum. Nañu bind askan wi, ndax ma xam seenub lim.»

<sup>3</sup> Yowab ne ko: «Buur, yal na Aji Sax ji ful askan wi téeméeri yoon, nga fekke. Waaye sang bi, lu la xiir ci loolu?»

<sup>4</sup> Teewul kàddug Buur épp doole Yowab ak njiiti xarekat ya. Ñu bàyyikoo ca Buur, dem bindi askanu Israyil. <sup>5</sup> Ñu jàll dexu Yurdan, dem dali Arower ca bëj-saalumu dëkk ba, ca biir xur wa, daldi dem Gàdd, jaare fa jëm Yaser. <sup>6</sup> Ci kaw loolu ñu dem diiwaanu Galàdd, jàll ba Kades ca diiwaanu Etteen ña, dem Dan Yaan ak la ko wër, teg ca Sidon. <sup>7</sup> Ba mu ko defee ñu dem ba Tir, dëkk ba ñu wèralee ab tata, jóge fa dem ca mboolem dëkk-dëkkaani Eween ñaak Kanaaneen ña. Ñu àkkeji Beerseba ca bëj-saalumu màndiñu Yuda. <sup>8</sup> Wër nañu réew ma mépp ci juróom ñeenti weer ak ñaar fukki fan, doora ñibbsi Yerusalem.

<sup>9</sup> Yowab nag indil Buur limu askan wa: Israyil di juróom ñetti téeméeri junniy góor (800 000) ñu tollu ci xare; Yuda di juróomi téeméeri junniy góor (500 000).

<sup>10</sup> Daawuda waññ askan wa ba noppi, fit wa ne rës, mu yedd boppam, daldi ne Aji Sax ji: «Aji Sax ji, bàkkaar naa lool. Léegi nag ngalla jéggal ma sama ñaawtéef, ndax def naa jëfi dof ju réy lool.» <sup>11</sup> Ba Daawuda jógee ca èllëg sa, kàddug Aji Sax ji dikkal Gàdd, yonent

Yàlla ba fèetewoo kër Buur Daawuda. Mu ne ko: <sup>12</sup> «Demal ne Daawuda: “Aji Sax ji dafa wax ne: Ñett laa lay jox, nga tànn ci lenn lu ma lay def.”» <sup>13</sup> Gàdd dem ca Daawuda, jottli ko ko, ne ko: «Ana yii yett loo ci taamu, mu dal ci sa kaw: juróom yaari ati xiif ci sam réew, am ñetti weer yooy daw say noon, am ñetti fani mbas ci sam réew? Xalaatal léegi te wax ci lenn, ma xam lu may jottli ki ma yónni.» <sup>14</sup> Daawuda ne Gàdd: «Am naa njàqare lool; waaye naa tàbbi ci loxol Aji Sax ji, ndax yërmandeem réy na, waaye yàlla buma daanu ci loxol nit!»

<sup>15</sup> Ba loolu amee Aji Sax ji wàcce mbas ci kaw Israyil, dale ko ca suba soosa ba keroog ba àpp ba matee. Ña dee ca askan wa di juróom ñaar fukki junni (70 000) diggante Dan ca bëj-gànnar ba Beerseba ca bëj-saalum. <sup>16</sup> Naka la malaaka ma tàllal loxoom, ngir faagaagal Yerusalem, Aji Sax ji fomm, daldi wax ak Malaakam bóomkat may fàdd askan wa. Mu ne ko: «Doy na! Teggil sa loxo.» Booba malaakam Aji Sax jaa nga ca wetu dàggay Arawna, Yebuseen ba.

<sup>17</sup> Daawuda nag gis malaaka may fàdd askan wa. Mu ne Aji Sax ji: «Man miy sàmm bi† déy, maa bàkkaar, maa def lu bon. Ñii diy xar donñ yu topp ci man, lu ñu def? Na sa loxo dal ci sama kaw man kay, maak sama waa kër baay!» <sup>18</sup> Ba loolu amee Gàdd dem ca Daawuda keroog ca bés ba, ne ko: «Demal, nga tabaxal Aji Sax ji sarxalukaay ca dàggay Arawna, Yebuseen ba.» <sup>19</sup> Daawuda dem ca, na ko ko Aji Sax ji sante, Gàdd jottli.

<sup>20</sup> Ba mu ko defee Arawna séen Buur, mu ànd aki jawriñam, jëm ca moom. Mu génn sujjóotal ko, dëpp jëem ca suuf, <sup>21</sup> ne ko: «Buur, sang bi, lu doon say tànk?» Daawuda ne ko: «Xanaa jëndsi sa dàgga jii, ba tabaxal fi Aji Sax ji sarxalukaay, ndax mbas mi dal ci kaw askan wi yem fi.» <sup>22</sup> Arawna ne Daawuda: «Buur, sang bi, jëlal lu la neex, def ko sarax. Nag yaa ngi, jëlal def saraxu rendi-dóomal, watiiri bojju yeek bant, yi nag yiy lëkkloo, nga

\* **24:1** 24.1 Seetal ci 21.1-14. † **24:17** 24.17 sàmm bi: am na ci bind yu yàgg yi, yu ci indiwul baatub sàmm bi ci aaya bii.

def ko matt. <sup>23</sup> Man Arawna, maa la jox lii lépp, Buur. Yal na la sa Yàlla Aji Sax ji nangul.»

<sup>24</sup> Teewul Buur ne Arawna: «Déédéet, dama koy jënd ci yaw kay. Ab saraxu rendi-dóomal bu ma dikkewul dara, duma ko defal sama Yàlla Aji Sax ji.» Ci kaw loolu Daawuda jënd daggga ja ak nag ya ci juróom fukki dogi xalis.

<sup>25</sup> Gannaaw loolu Daawuda tabaxal fa Aji Sax ji ab sarxalukaay, rendi fa ay saraxi dóomal, ak ay saraxi cant ci biir jàmm. Ba mu ko defee Aji Sax ji nangul réew ma, mbas ma bàyyi Israyil.

## Buur ya di téere bu jëkk bi Lu jëm ci nguurug Suleymaan

(Saar 1.1—11.43)

### *Daawuda néew na doole*

<sup>1</sup> Gannaaw gi Buur Daawuda mujj naa màggat, ba làq at yu bare, ñu di ko sàng ay sér te du ko taxa tàng. <sup>2</sup> Ay dagam ne ko: «Buur, sang bi, nañu la wutal ab janq, mu di la taxawu, di la topptoo. Man naa téd d it ci sa wet, Buur, ndax nga liwwi, sang bi.» <sup>3</sup> Ñu daldi seet ci tundu Israyil wépp, ba gis janq bu rafet bu ñuy wax Abisag, di waa Sunem. Ñu indil ko Buur. <sup>4</sup> Janq baa nga taaru lool. Muy topptoo nag Buur, di ko taxawu, waaye Buur dëkkoowu ko.

### *Adoñaa ngi sàkku jal bi*

<sup>5</sup> Ci biir loolu Adoña doomu Daawudaak Agit, di téggu naan: «Man mii maay doon buur.» Mu waajalal boppam watiiru xare aki fas ak juróom fukki nit ñuy daw di ko jiitu. <sup>6</sup> Baayam Daawuda nag masu koo wax dara, ak lu mu mana def. Adoña moo toppoon ci Absalom. Mu doonoon ku góorayiw lool.

<sup>7</sup> Ci kaw loolu Adoña diisook Yowab, mi Seruya di ndeyam, ak Abiyatar sarxalkat ba, ñooñu jàpple ko. <sup>8</sup> Waaye Cadog sarxalkat ba ak Benaya doomu Yoyada, ak Yonent Yàlla Natan, ak Simey ak Reyi, ñook jàmbari Daawuda ya koy dar, ñooñu ànduñu woon ak Adoña. <sup>9</sup> Ba mu ko defee Adoña sarxe ay xar aki nag aki wëllu yu duuf ca wetu doju Soyelet, fa feggook En Rogel. Mu woo ca mboolem doomi Buur yu góor ya mu bokkal baay, ak jawriñi Buur yu diiwaanu Yuda. <sup>10</sup> Waaye woowul Yonent Yàlla Natan ak Benaya, woowul jàmbaar yay dar Daawuda, woowul rakkam Suleymaan.

<sup>11</sup> Ba loolu amee Natan laaj Batseba, ndeyu Suleymaan, ne ko: «Waaw, xanaa déggoo ne Adoña doomu Agit falu na

buur te sunu sang Daawuda yégu ko? <sup>12</sup> Kaay gaaw, ma digal la nooy def, ba musal sa bakkan ak sa bakkanu doom Suleymaan. <sup>13</sup> Gaawal dem ca Buur Daawuda, ne ko: «Buur, sang bi, du yaa ma giñaloon, yaw sang bi, ne ma sama doom Suleymaan mooy falu buur, wuutu la, te mooy toog ci sa jal bi? Kon nag lu tax Adoña falu buur?» <sup>14</sup> Gisal, diir bi ngay wax ak Buur foofa, man dinaa duggsi, topp ci yaw te dinaa dëggal sa kàddu.»

<sup>15</sup> Batseba dem ba ca Buur, ca biir néegam. Buur a nga màggat lool, Abisag mu Sunem di ko taxawu. <sup>16</sup> Batseba agsi sujjóotal Buur, sukk fi kanamam. Buur ne ko: «Lu doon say tànk?» <sup>17</sup> Mu ne ko: «Sama sang, yaw yaa ma giñal ci sa Yàlla Aji Sax ji, sang bi, nga ne ma sama doom Suleymaan de dina falu buur moos, wuutu la, te moom mooy toog ci sa kaw jal bi. <sup>18</sup> Waaye xoolal léegi Adoña ngii falu buur, te yaw Buur sang bi, yéguloo ko. <sup>19</sup> Sarxe na ay nag ak wëllu yu duuf ak xar yu bare. Woo na ca doomi Buur yu góor yépp, woo ca Abiyatar sarxalkat ba, woo ca Yowab, njiitu mbooloom xare mi. Waaye Suleymaan sa surga ba, woowu ko. <sup>20</sup> Yaw nag Buur, sang bi, Israyil gépp a ngi ne jàkk ci yaw, ngir nga xamal leen kan ngay dëj ci sab jal, mu wuutu la, sang bi. <sup>21</sup> Lu ko moy de Buur, sang bi, bés boo nopplujee fekki say maam, su boobaa man, maak sama doom Suleymaan dinañu nu tuumaal.»

<sup>22</sup> Na Batseba di wax ak Buur, Yonent Yàlla Natan jekki ne jalañ. <sup>23</sup> Ñu wax ko ne ko: «Buur, Yonent Yàlla Natan a ngoog.» Mu agsi ba ci kanam Buur, sujjóotal ko, dëpp kanamam fa suuf. <sup>24</sup> Natan ne ko: «Buur, sang bi, ndax yaa wax ne Adoña mooy falu buur, wuutu la, te moom mooy toog ci kaw jal bi? <sup>25</sup> Ndax kat, Adoña dem na tey jii, sarxeji lu bare ciy nag ak wëllu yu duuf aki xar. Woo na ca doomi Buur yu góor yépp, ñook njiiti xare yeek Abiyatar sarxalkat bi. Ña nga noonee di lekk ak a naan ñook moom te naa: «Buur Adoña, guddalu fan!» <sup>26</sup> Man sa surga bii nag, maak Cadog sarxalkat bi ak Benaya doomu Yoyada ak sa surga ba Suleymaan, woowu nu ca. <sup>27</sup> Buur,

sang bi, ndax wér na ne loolu ndigal la lu bàyyikoo fi yaw, te xamaloo nu kan mooy toog ci sa kaw jal bi, wuutu la, yaw Buur, sang bi?»

<sup>28</sup> Buur Daawuda ne ko: «Wool ma Batseba!» Ci kaw loolu Batseba dikk taxaw fa kanam Buur. <sup>29</sup> Buur daldi giñ ne: «Giñ naa ci Aji Sax ji, Kiy Dund te musal sama bakkan bii ci jépp njàqare, <sup>30</sup> bir na ne loolu ma la giñaloon ci Aji Sax ji, Yàllay Israyil, ne la bir na ne Suleymaan sa doom mooy doon buur wuutu ma te mooy toog ci kaw jal bii ma toog— loolu déy dinaa ko sottal bés niki tey.» <sup>31</sup> Ba mu ko defee Batseba dëpp kanamam fa suuf, sukk fa kanam Buur, ne ko: «Buur Daawuda, sang bi, yal nanga fi yàgg.»

### *Suleymaan falu na*

<sup>32</sup> Buur Daawuda daldi ne: «Wool-leen ma Cadog sarxalkat bi, ak Yonent Yàlla Natan ak Benaya doomu Yoyada.» Ba ñu dikkee fa kanam Buur, <sup>33</sup> Buur ne leen: «Àndleen ak samay dag, ngeen waral sama doom Suleymaan ca sama kaw berkelle bu jigéen ba, te yóbbu ko Giyon, bētu ndox ba. <sup>34</sup> Cadog sarxalkat bi ak Yonent Yàlla Natan, nañu ko diw foofa, fal ko mu jiite Israyil. Su ko defee ngeen wal liit gi te yéene ne: “Buur Suleymaan, guddalu fan!” <sup>35</sup> Ngeen topp nag ci moom, délsi, mu dikk toog ci kaw jal bi. Moom mooy nguuru, wuutu ma. Moom laa fal, mu yilif Israyil ak Yuda.» <sup>36</sup> Ba loolu amee Benaya doomu Yoyada ne Buur: «Buur, sang bi, yal na ko Aji Sax ji sa Yàlla dogal. Amiin! <sup>37</sup> Na Aji Sax ji ànde woon ak yaw Buur, sang bi, yal na ni àndeek Suleymaan, te yal na kaweel ab jalam, ba mu sut sab jal, yaw Buur Daawuda, sang bi.» <sup>38</sup> Gannaaw loolu Cadog sarxalkat ba daldi ànd ak Yonent Yàlla Natan ak Benaya doomu Yoyada, ak waa Keret ak waa Pelet yay dar Daawuda. Ñu waral Suleymaan berkelleb Buur Daawuda. Ñu dar ko ba Giyon, bētu ndox ba. <sup>39</sup> Ci kaw loolu Cadog sarxalkat ba dem ca xaymab Aji Sax ji, jële fa béjjén ba def

diwu pal ga, diw ca Suleymaan. Ñu wal liit ga, mbooloo ma mépp àddu ca kaw ne: «Buur Suleymaan, guddalu fan!» <sup>40</sup> Ba loolu amee mbooloo ma mépp topp ca, bég lool, di toxoro, coow la jolli, ba suuf sa di riir.

<sup>41</sup> Ba mu ko defee Adoña dégg ca, mook mboolem ña mu woo woon, ñu nekk faak moom. Fekk ñu lekk ba noppi. Ba Yowab déggee liit ga, da ne: «Waaw, riir mi ci dëkk bi, lu mu doon?» <sup>42</sup> Daaneelagul kàddoom sax, Yonatan doomu Abiyatar sarxalkat ba ne jaas, agsi. Adoña ne ko: «Dikkal, yaw nit ku baax nga, te xibaaru jàmm ngay indi.» <sup>43</sup> Yonatan ne Adoña: «Déédéet kay, sunu sang Buur Daawuda fal na Suleymaan buur. <sup>44</sup> Buur boole na kook Cadog sarxalkat bi ak Yonent Yàlla Natan ak Benaya doomu Yoyada ak waa Keret ak waa Pelet yay dar Buur. Yebal na leen, ñu waral ko berkelleb Buur. <sup>45</sup> Cadog sarxalkat baak Yonent Yàlla Natan diw nañu ko, fal ko ca Giyon, ba bàyyikoo ca, di ko bége, mu dim riir ci dëkk bi. Mooy coow, li ngeen dégg. <sup>46</sup> Suleymaan sax toog na ca jalu buur; <sup>47</sup> te it jawriñi Buur ñew nañu, di sargalsi sunu sang Buur Daawuda, ne ko: “Yal na sa Yàlla siiwal turu Suleymaan, ba mu gën laa amu tur. Yal na kaweel ab jalam, ba mu gëna kawee sab jal.” Buur sujjóot ca kaw lalam, <sup>48</sup> teg ca ne: “Cant ñeel na Aji Sax ji, Yàllay Israyil, ji ma jox bésuub tey ku ma wuutu ci samab jal, may gis.”» <sup>49</sup> Ba loolu amee tiitaange jàpp mboolem ña ñu woo woon ca jataayu Adoña. Ñu jóg, tasaaroo, ku nekk dem yoonam.

<sup>50</sup> Adoña nag ragal Suleymaan, daldi dem jàpp ca béjjén ya ca cati sarxalukaay ba, ngir rawale bakkanam\*. <sup>51</sup> Ñu wax ko Suleymaan, ne ko: «Buur Suleymaan, Adoña de, ragal na la. Deful lu moy jàpp ca béjjéni sarxalukaay ba te naa: “Na ma Buur Suleymaan sang bi giñal tey jii ne du ma jam saamar, ma dee.”» <sup>52</sup> Suleymaan daldi ne: «Su dee nit ku jara wóolu de, genn kawaram du wadd ci suuf. Waaye su lalee pexem wor de, dina dee.» <sup>53</sup> Ba

\* **1:50** 1.50 Jàpp ca sarxalukaay ba ca kër Yàlla ga, nit daan na ko def, di ko sàkkoo rawale bakkanam. Seetal ci *Mucc ga* 21.14.

loolu amee Buur Suleymaan yónee, ñu jëleji Adoña ca sarxalukaay ba, mu dikk, sujjóotal Buur Suleymaan. Mu ne ko: «Man ngaa ñibbi sa kër.»

## 2

### *Daawuda dénkú na Suleymaan*

<sup>1</sup> Ba ñu demee ba bésu àppu Daawuda di jegesi, Daawuda dafa dénk doomam Suleymaan, ne ko: <sup>2</sup> «Maa ngi ci yoon wu dul jaas ci mboolem àddina. Nanga dëgër lu te góor-góorlu, <sup>3</sup> di dénkoo sa ndénkaanel Yàlla Aji Sax ji, di topp ay yoonam, sàmmontee ay dogali yoonam aki santaaneem aki àttey yoonam aki seedeem, ni ñu ko binde ci yoonu Musaa. Su ko defee dinga am ndam ci lépp loo def ak fépp foo jëm, <sup>4</sup> ba keroog Aji Sax ji sottal kàddoom ga mu ma waxoon ne ma: “Su say sèt sàmmee seen dundin, saxoo ngëm gu ma wéetal, te gar ci seen bakkan, kon doo ñàkk mukku ku lay wuutu ci jalub Israyil.”

<sup>5</sup> «Yaw ci sa bopp xam nga li ma Yowab doomu ndaw sa Seruya def, te def na ko ñaari njiiti xarey Israyil, di Abner doomu Ner ak Amasa doomu Yeter: rey na leen, tuur seen deret ni bu doon xare, ba taqal boppam ripp. Moo rendi ci biir jamonoy jàmm. <sup>6</sup> Jëflanteel ak moom ci kaw xel, bu ko bàyyi mu duggaale bàmmeeel bijjaaw.

<sup>7</sup> «Góor ñiy doomi Barsilay mu Galàdd nag, nanga leen baaxe, te ñuy boka ak yaw ndab, ndax kat taxawu woon nañu ma, ba may daw Absalom sa doomu baay.

<sup>8</sup> «Gannaaw loolu bàyyil xel ci Simey mi nga feggool, muy doomu Gera mu Baxurim, mi bokk ci giirug Beñamin. Moom moo ma doon tifaari saaga, bés ba ma jëmee Maanayim, moom mu dikk dajeek man ca dexu Yurdan. Ma giñal ko ci Aji Sax ji ne ko: “Duma la rey, sama saamar du la dal!” <sup>9</sup> Waaye yaw de, bu ko ñàkka topp, ndax boroom xel nga, te dinga xam ni ngay defeek moom, ba mu sangoo deretam, ànd ak bijjaawam, dugg bàmmeeel.»

<sup>10</sup> Gannaaw loolu Daawuda nelaw, fekki ay maamam, ñu denc ko ca gox

ba ñu naan Kër Daawuda. <sup>11</sup> Nguurug Daawuda ci Israyil tollu na ci ñeent fukki at, di juróom ñaari at ya mu péeyoo Ebron, ak fanweeri at ak ñett ya mu péeyoo Yerusalem.

<sup>12</sup> Suleymaan nag toog ca jalub baayam Daawuda; nguuram dëgër, ne kekk.

### *Nii la Adoña mujje*

<sup>13</sup> Ci biir loolu Adoña ma Agit di ndeyam, dem ca Batseba, ndeyu Suleymaan. Mu ne ko: «Mbaa jàmm a la indi?» Mu ne ko: «Jàmm la.» <sup>14</sup> Mu neeti ko: «Mbir la mu ma lay wax.» Mu ne ko: «Waxal.» <sup>15</sup> Mu ne ko: «Xam nga ne maa moomoon nguur gi, te man la Israyil gépp séentu woon, ma falu buur. Waaye tey nguur gi walbatiku na, tegu ci sama loxol doomu baay, ndax Aji Sax jee ko ko jox. <sup>16</sup> Léegi nag lenn rekk laa lay ñaan, te nga bañ maa gantu.» Mu ne ko: «Waxal rekk.» <sup>17</sup> Mu ne ko: «Buur Suleymaan du la gantu, rikk ñaanal ma ko, mu may ma Abisag mu Sunem soxna.»

<sup>18</sup> Batseba ne ko: «Baax na, man kay maa la koy waxal Buur.» <sup>19</sup> Batseba dem ca Buur Suleymaan, ngir wax ko mbirum Adoña ma. Buur jóg gatandu ko, sukkaal ko, daldi toogaat ci ngànguneem. Mu tegal ndeyam ngàngune, mu toog ci ndijooram. <sup>20</sup> Mu ne ko: «Man de, lenn lu tuut rekk laa lay ñaan, te bu ma gantu.» Mu ne ko: «Waxal, saa ndey, duma la gantu.» <sup>21</sup> Mu ne ko: «Abisag mu Sunem, may ko sa doomu baay Adoña soxna.» <sup>22</sup> Buur Suleymaan ne ndeyam: «Nga ne! Adoña ngay ñaanal Abisag mu Sunem soxna? Tee nga koo ñaanal nguur gi far, nde mooy sama mag, ñaanalaale ko Abiyatar sarxalkat bi, mook Yowab doomu Seruya?»

<sup>23</sup> Buur Suleymaan nag giñ ci Aji Sax ji ne: «Yal na ma Yàlla teg mbugal mu gëna tar, ndegam Adoña du feye bakkanam lii muy sàkku! <sup>24</sup> Léegi nag giñ naa ci Aji Sax ji, Kiy Dund, te teg ma fi, dëj ma ci jalub Daawuda sama baay, sampal ma askanu nguur, wa mu dige woon, bésu tey jii Adoña dina dee.» <sup>25</sup> Buur Suleymaan daldi jox ndigal Benaya doomu Yoyada. Benaya jam Adoña, mu dee.



### *Nii la Abiyatar mujje*

<sup>26</sup> Abiyatar sarxalkat bi nag, Buur ne ko: «Dellul Anatot ca say tool. Dee rekk a war ci yaw, waaye bésuub tey jii duma la rey, ndax li nga gàddu woon gaalu Aji Sax ji Boroom bi, dox jiitu sama baay Daawuda. Nga teg ci bokk ak sama baay mboolem coono bu mu daj.» <sup>27</sup> Suleymaan nag jële Abiyatar ci liggéeyu saraxi Aji Sax ji, daldi matal li Aji Sax ji waxoon ci waa kër Eli ca Silo.

### *Nii la Yowab mujje*

<sup>28</sup> Yowab àndul woon ak Absalom ci pexeem, waaye Adoña la mujj àndal. Ba Yowab yégee la xew, daa daw ba ca xaymab Aji Sax ji, jàpp ca béjjén ya ca cati sarxalukaay ba, ngir rawale bakkanam. <sup>29</sup> Ñu wax Buur Suleymaan ne ko: «Yowab daw na, làquji ca xaymab Aji Sax ji, te kat ma nga ca sarxalukaay ba.» Suleymaan sant Benaya doomu Yoyada, ne ko mu dem, jam ko. <sup>30</sup> Benaya dugg ca biir xaymab Aji Sax ja, ne ko: «Buur nee nanga génn!» Yowab ne ko: «Génnuma, fii laay deeye!» Benaya yegge Buur waxi Yowab ak la mu ko tontu. <sup>31</sup> Buur ne ko: «Defal li mu wax, jam ko mu dee, nga suul ko, ndax ma set, maak sama waa kër baay, ci deretu jaamburi Yàlla ji Yowab tuuroon. <sup>32</sup> Su ko defee Aji Sax ji dina ko gàdduloo bakkanu boppam, feye ko ko bakkanu ñaar ña mu songoon, di Abner doomu Ner, njiital xarey Israyil, ak Amasa doomu Yeter, njiital xarey Yuda; muy ñu jub, ñu ko gën, teewul mu jam leen saamar, ñu dee te sama baay Daawuda yégu ko. <sup>33</sup> Yal na Yowab ak askanam gàddu seen bakkan ba fàww. Waaye Daawudaak askanam ak waa kër am akub jalam, yal na leen Aji Sax ji jàmmal ba fàww.» <sup>34</sup> Ba loolu amee Benaya doomu Yoyada daldi dem jam Yowab, rey ko. Ñu suul ko ca kër am ga ca màndiñ ma. <sup>35</sup> Gannaaw loolu Buur tabb Benaya doomu Yoyada ca boppu mbooloom xare ma, mu wuutu Yowab. Cadog sarxalkat ba, Buur tabb ko, mu wuutu Abiyatar.

### *Nii la Simey mujje*

<sup>36</sup> Ba mu ko defee Buur yónnee woolu Simey, wax ko ne ko: «Tabaxalal sa bopp

kër fii ci Yerusalem, dëkk ca waaye bul dem fenn. <sup>37</sup> Ndaxte bés boo fi jógee, ba jéggi xuru Sedoron, xamal xéll ne dee rekk mooy sab àtte, te yaay gàddu sa bakkanu bopp.» <sup>38</sup> Simey ne Buur: «Baax na, Buur, sang bi. Li nga ma wax rekk de laay def, sang bi.» Ba loolu amee Simey toog Yerusalem lu yàgg.

<sup>39</sup> Ba ñu ca tegee ñetti at, ñaari jaami Simey daw dem ca Akis buurub Gaat doomu Maaka. Ñu wax Simey, ne ko: «Ndeke sa jaam yaa nga Gaat!» <sup>40</sup> Simey daldi takk mbaamam, dem Gaat ca Akis, ngir jëli ay jaamam. Mu jëleji Gaat ay jaamam, délloosi leen. <sup>41</sup> Ba ñu waxee Buur Suleymaan, ne ko Simey jóge na Yerusalem dem Gaat, ba délsi, <sup>42</sup> Buur yónnee, woolu Simey, ne ko: «Xanaa giñloowuma la woon ci Aji Sax ji, àrtu la ne la: “Bés boo fi jógee dem fenn, xamal xéll ne dee rekk mooy sa àtte”? Nga ne ma: “Baax na, dinaa la déggal.” <sup>43</sup> Ana lu waral nag sàmmoo la nga giñoon ci Aji Sax ji te ma santoon la ko?» <sup>44</sup> Buur dellu ne Simey: «Yaw ci sa bopp xam nga xéll mboolem li nga lor sama baay Daawuda. Léegi Aji Sax ji dina la fey sa jëf ju bon, mu këppu ci sa kaw bopp. <sup>45</sup> Waaye man Buur Suleymaan du ma teree barkeel; jalub Daawuda it day sax fàww fi kanam Aji Sax ji.» <sup>46</sup> Buur nag sant Benaya doomu Yoyada, mu génne Simey, jam ko, mu dee. Ba loolu amee nguur ga gëna dëgër ca loxol Suleymaan.

## 3

### *Buur Suleymaan ñaan na Yàlla xel*

<sup>1</sup> Gannaaw ba loolu wéyee Suleymaan goromloo naak Firawna buuru Misra, jël doomu Firawna, indi ko gox ba ñu naan Kër Daawuda, ba keroog muy noppee tabax kër am ak kër Aji Sax ji ak tata ja wër Yerusalem. <sup>2</sup> Terewul mbooloo ma di rendi ay sarax ca bérabi jaamookaay ya, ndax ca yooya jamono tabaxaguñu woon kër gu ñu tudde Aji Sax ji. <sup>3</sup> Suleymaan nag wone na cofeelam ci Aji Sax ji, di wéy ci sàrti baayam Daawuda, xanaa lu moy bérabi jaamookaay ya rekk. Moom daan na fa rendi sarax, di fa taal cuuraay.

<sup>4</sup> Ci biir loolu Buur dem Gabawon, sarxali fa, ndax foofaa doon bérabu jaamookaay ba gënoona mag: junni saraxi rendi-dóomal, Suleymaan joxe na ko fa ca kaw sarxalukaay booba. <sup>5</sup> Foofa ca Gabawon la Aji Sax ji feeñu woon Suleymaan ci géntug guddi. Yàlla ne ko: «Ñaanal loo bëgg, ma may la ko.» <sup>6</sup> Suleymaan ne ko: «Yaw de yaa baaxe lool sab jaam Daawuda, saa baay, ngir na mu daan doxale fi sa kanam ci dëgg ak njekk ak njubteg xol. Yaa ko baaxe lool, may ko doom ju góor ju toog cib jalam, bésuub tey jii. <sup>7</sup> Léegi nag Aji Sax ji, sama Yàlla, fal nga ma buur, ma wuutu saa baay Daawuda. Waaye Sang bi, man ndaw lu tuut laa, xawma sax nu may doxale. <sup>8</sup> Rax ci dolli, Sang bi, ma nekk ci digg askan wi nga taamu, askan wu yaa, ba maneesu koo waññ mbaa di ko lim. <sup>9</sup> Kon nag Sang bi, may ma xel mu am ug dégg mu ma àttee sa ñoñ, ngir may raññee lu baax ak lu bon. Ndax kat, ana kan moo mana àtte sa ñoñ, wii askan wu réy?»

<sup>10</sup> Kàddug Suleymaan ga nag neex Aji Sax ji, ndax loolu mu ñaan.

<sup>11</sup> Mu ne ko: «Gannaaw loolu nga ñaan, te ñaanuloo fan wu gudd, ñaanuloo alal, ñaanuloo itam say noon dee, xanaa di ñaan xel mu rafet moo àttee dëgg, <sup>12</sup> dama ne, dinaa la defal li nga ñaan, te sax dinaa la may xel mu rafet, nga am ug dégg, ba raw ku la jiitu ak ku la wuutu. <sup>13</sup> Te itam li nga ñaanul dinaa la ko may, booleel la alal ak teraanga, ba doo am moroom ci buur yi, sa giiru dund. <sup>14</sup> Te soo jaaree ci samay yoon, jëfe samay sàrt ak samay santaane, muy fi sa baay Daawuda jaaroon, kon dinaa guddal saw fan.»

<sup>15</sup> Ba loolu amee Suleymaan yewwu, ndeke gént la woon. Mu dellu Yerusalem, taxaw fa kanam gaalu kóllërey Aji Sax ji, def fa ay saraxi rendi-dóomal, ak saraxi cant ci biir jàmm, daldi berndeel jawriñam yépp.

### *Suleymaan wone na xelam*

<sup>16</sup> Ba loolu wéyee mu am ñaari gànc yu dikk ca Buur, agsi ca kanamam. <sup>17</sup> Senn

ndaw sa ne: «Éy sang bi, maak ndaw sii de, danoo bokk genn kër, bokk fa wasin nun ñaar. <sup>18</sup> Ba ma amee doom ba mu am ñetti fan, moom mii itam mu am doom, te nun rekk a dëkk, keneen nekkul ak nun ca biir kër ga, xanaa nun ñaar. <sup>19</sup> Doomu ndaw sii nag dee ci guddi, ndax daa tédoon ci kawam. <sup>20</sup> Mu jóg ci xaaju guddi, jële sama doom fi sama wet, tëral ci wetam. Fekk man, sang bi, maa ngi nelaw. Doomam ji dee nag, mu tëral ko ci sama wet. <sup>21</sup> Naka laa jóg ci suba, di nàmpal sama doom, gisuma lu moy mu dee. Ba bët setee nag ma xool ko bu baax, ndeke du sama doom ji ma jur.» <sup>22</sup> Seneen ndaw sa ne: «Déedéet, sama doom mooy dund, sa doom a dee.» Ku jëkk ka ne: «Déedéet, sa doom a dee, sama doom a ngi dund.» Ñu di ko werante fi kanam Buur.

<sup>23</sup> Buur ne: «Kii a ngi naan: “Sama doom jii mooy dund, sa doom a dee.” Kee naan: “Déedéet, sa doom a dee, sama doom mooy dund.”» <sup>24</sup> Buur teg ca ne: «Indil-leen ma saamar!» Ñu indil Buur saamar. <sup>25</sup> Buur ne: «Dogleen xale biy dund ñaar, te jox kii genn-wàll, jox kee genn-wàll.» <sup>26</sup> Ci kaw loolu ndaw si doomam di dund daldi ñeewante doomam. Mu ne: «Déet, sang bi, jox ko xale bi. Bu ko rey muk!» Ndaw sa ca des, moom, ne: «Deesu ma ko jox, deesu la ko jox; dogleen ko ñaar!» <sup>27</sup> Ba loolu amee Buur daldi àtte ne: «Joxleen ndaw sii liir biy dund, te buleen ko rey. Mooy ndeyam.»

<sup>28</sup> Israyil gépp nag dégg àtteb Buur, daldi yéemu ci moom, ndax dañoo gis ne xelum Yàlla mu rafet a ngi ci moom, di ko jiite ci àtte dëgg.

## 4

### *Suleymaan fal na ay njiit*

<sup>1</sup> Ci kaw loolu Buur Suleymaan di bo-room Israyil gépp. <sup>2</sup> Ay jawriñam ñii la woon: Asaryaa sētu Cadog moo doon sarxalkat bi; <sup>3</sup> Eliyoref ak Awiya doomi Sisa di bindkat yi; Yosafat doomu Ayilut yore kàddug Buur; <sup>4</sup> Benaya doomu Yoyada jiite mbooloom xare ma; Cadog ak Abiyatar di ay sarxalkat. <sup>5</sup> Asaryaa

doomu Natan moo jiite woon ndawi Buur ya, Sabudd doomu Natan di sarxalkat te di diglekatu buur. <sup>6</sup> Ayisar moo doon saytu kër Buur, Adoniram doomu Abda di sase liggéeyi sañul-bañ ya.

<sup>7</sup> Buur Suleymaan amoon na fukki jawriñ ak ñaar ci Israyil gépp. Ñuy topptoo dundub Buur ak waa këram, weer wu nekk kenn ci ñoom yor dund ba, ba at mi mat. <sup>8</sup> Ñooño di:

Ben Ur ma sasoo woon diiwaanu tundi Efrayim.

<sup>9</sup> Ben Deker sasoo Makas ak Saalbim ak Bet Semes ak Elon Bet Anan.

<sup>10</sup> Ben Keset sasoo Arubot, boole kook Soko ak mboolem diiwaanu Efer.

<sup>11</sup> Ben Abinadab sasoo diiwaanu Dor bépp; Tafat doomu Suleymaan di soxnaam.

<sup>12</sup> Baana doomu Ayilut sasoo Taanag ak Megido ak diiwaanu Bet San gépp, feggook Sartan, fa féete Yisreel suuf, muy diggante Bet San ba Abel Mewola, ba ca wàllaa Yogmeyam.

<sup>13</sup> Ben Geber a sasoo woon Ramot ca Galàdd, booleek dëkk-dëkkaan ya làngu Yayir doomu Manase féetewoo woon, foofa ca Galàdd ak diiwaanu Argob ca Basan. Muy juróom benn fukki dëkk yu mag yu ñu wërle ay tata ak seeni bunt ak yeti xàñjar yu koy tëj.

<sup>14</sup> Ayinadab doomu Ido sasoo Maanayim.

<sup>15</sup> Ayimaas ma sasoo Neftali; moom it jël na doomu Suleymaan ju ñuy wax Basmal soxna.

<sup>16</sup> Baana doomu Usay boole diiwaanu Aser ak Beyalot.

<sup>17</sup> Yosafat doomu Paruwa sasoo diiwaanu Isaakar.

<sup>18</sup> Simey doomu Ela sasoo diiwaanu Beñamin.

<sup>19</sup> Geber doomu Uri sasoo diiwaanu Galàdd, di réewum Siwon buurub Amoreen ña ak réewum Og buuru Basan. Muy benn ndawal buur bu yilif réew mooma.

<sup>20</sup> Waa Yuda ak Israyil dañoo bare woon, ba mel ni feppi suufas géej, di lekk, di naan, nekke mbégte.

## 5

<sup>1</sup> Ci kaw loolu Suleymaan moo yilifoon mboolem réew ya dale dexu Efraat, ba ca dëkki Filisteen ña, dem ba ca digu réewum Misra. Ñooña di indil Suleymaan galag, nangul ko giiru dundam.

<sup>2</sup> Suleymaan daan na njëloo bés bu nekk ñeent fukki barigoy sunguf ak juróom (45), ak juróom ñeent fukki (90) barigo ci sunguf su ñagas; <sup>3</sup> ak fukki nag yu ñu yafal, ak ñaar fukki nagi parlu, ak téeméeri gàtt, te limaalesul xeeti kéwél yaak boroom dunq yu duuf ya.

<sup>4</sup> Suleymaan moo yilifoon mboolem réew ma féete dexu Efraat sowu, dale ko ca Tifsa ba ca Gasa, muy mboolem réew ya féete dexu Efraat sowu. Jàmm ne ñoyy, féete ko wet gu nekk.

<sup>5</sup> Diirub ayu Suleymaan gépp nag, waa Yudak Israyil ànd ak xel mu dal; ku ci nekk ak sa ker garabu reseñ ak sa ker garabu figg, fa dale diiwaanu Dan ba ca Beerseba. <sup>6</sup> Suleymaan amoon na ñeenti junniy (4 000) wuddi fasi watiir ak fukki junniy fas ak ñaar (12 000). <sup>7</sup> Jawriñ ya dañu daa ay-ayloo, ku nekk ak sa weer wi ngay topptoo dundub Buur Suleymaan, mook mboolem ñi mu bokkaloon njël, ba dara daawu ca ñàkk. <sup>8</sup> Peppum lors ji ànd ak ñax mi jëm ci fasi watiir yeek fasi dawkat yi itam, ku nekk ci ñoom da daan indi la ñu ko ca sas, teg ko fa mu wara nekk.

### *Suleymaan kenn la woon*

<sup>9</sup> Ci biir loolu Yàlla jagleel Suleymaan mu ñaw lool, am xel mu rafet ak xam-xamam bu yaa, bu solowoo fànn yu bare ni feppi suufas géej. <sup>10</sup> Suleymaan rafetoon nam xel, ba sut mboolem doomi réewum penku ak mboolem waa Misra.

<sup>11</sup> Rafetoon nam xel ba raw ñépp: muy Etan Eraseen ba, di Eman, di Kalkol, di Darda, doomi Maxol yu góor ya. Turam nag siiw ca mboolem xeet ya ko wër.

<sup>12</sup> Léeb na ñetti junniy kàddu, woy yi mu fent ëpp junni. <sup>13</sup> Faramfàcce na it mbirum gàncax, dale ko ci garabu seedar gu Liban ba ci isob giy sax cib tabax. Jàngle na mbirum mala ak njanaaw ak luy raam, ba ci jën. <sup>14</sup> Nit ñi dañu daan

jóge ci xeet yépp, di sàkkusi xelam Suleymaan mu rafet; te dañu daan bàyyikoo ci mboolem buuri àddina yi déggoon xelam mu rafet.

### *Suleymaan waajal na tabaxu kër Yàlla ga*

<sup>15</sup> Ba Iram buurub Tir déggee ne Suleymaan lañu fal buur, mu wuutu baayam Daawuda, ak na mu xaritoo woon ak Daawuda naka jekk, Iram daa yónnee ay ndawam ca Suleymaan. <sup>16</sup> Suleymaan it yónnee ca Iram, ne ko: <sup>17</sup> «Xam nga sama baay Daawuda manul woon tabaxal Yàllaam Aji Sax ji kër gu mu ko tudde, ndax xare yi mu séqoon ak noonam yi ko wër, ba ni leen Aji Sax ji daaneele, mu teg leen tànk. <sup>18</sup> Léegi nag sama Yàlla Aji Sax ji may na ma jàmm ne ñoyy, féete ma wet gu nekk, ba awma benn noon, te musiba dabu ma. <sup>19</sup> Fii ma nekk damaa fas yéene tabax kër, tudde sama Yàlla Aji Sax ji. Muy la Aji Sax ji waxoon sama baay Daawuda, ne ko: “Sa doom ji may def sa kuutaay ci sab jal moo may tabaxal kër, tudde ma ko.” <sup>20</sup> Ci biir loolu ma di la ñaan, nga santaane, ñu goral ma banti seedar yu Libañ, te samay surga ànd ak say surga ci liggéey bi. Sa peyooru nit ñi dinaa la ko fey ak loo mana feyeeku, ndax yaw xam nga ne amunu ci sunu biir ñu mane yett bant ni waa Sidon.»

<sup>21</sup> Ba Iram déggee li Suleymaan wax, am na ca mbégte mu réy. Mu ne: «Cant ñeel na Aji Sax ji tey jii, bi mu mayee Daawuda doom ju rafet xel, mu jiite xeet wu réy wii.» <sup>22</sup> Ci kaw loolu Iram yónnee ca Suleymaan, ne ko: «Dégg naa kàddu yi nga ma yóbbante. Man ci sama bopp dinaa la defal li nga bëgg lépp ci wàllu banti garabi seedar ak sippar\* . <sup>23</sup> Samay surgaa koy diree Libañ ba ca géej ga, rabat ko, ma jaarale ko ci géej gi ba foo ma wax. Su ko defee ma tas ko foofa, nga yóbbu. Yaw nag nangul ma rekk li may sàkku, muy nga joxal ma sama waa kër ab dund.»

\* **5:22** 5.22 sippar garab la gu xeetook filaawo. \* **6:1** 6.1 weeru Siw moo yemook awril, jàpp me. † **6:2** 6.2 xasab mooy guddaayu loxo, diggante catu baaramu digg ak conc.

<sup>24</sup> Ba loolu amee Iram jox Suleymaan la mu bëgg ci banti garabi seedar ak sippar. <sup>25</sup> Suleymaan ci wàllu boppam jox Iram ñaar fukki junni ak juróom ñetti (28 000) barigoy peppu bele, ak ñaar fukki barigo ak ñaar (22) ci diwu oliw gu ñu segal. Suleymaan di defal Iram noonu at mu ne. <sup>26</sup> Bu loolu weesee Aji Sax ji mayoon na Suleymaan xel mu rafet, na mu ko ko dige woon. Jàmm it doxoon na diggante Iram ak Suleymaan, ba ñu fasante kóllère ñoom ñaar.

<sup>27</sup> Buur Suleymaan nag sas fanweeri junniy nit (30 000) ci Israyil gépp ay liggéeyi sañul-bañ. <sup>28</sup> Mu di leen yebal Libañ, weer wu nekk fukki junni (10 000) dem. Bu ñu amee Libañ weer, am seeni kër ñaari weer. Adoniram a jiite woon sas ya. <sup>29</sup> Suleymaan sàkk juróom ñaar fukki junniy (70 000) yenukat, ak juróom ñett fukki junniy (80 000) yettkati doj ca tund ya, <sup>30</sup> te bokkul ak ñetti junni ak ñetti téeméeri nit (3 300) ñi Suleymaan tabb, ñuy jiite liggéey bi, di saytu liggéeykat yi. <sup>31</sup> Buur santaane ñu jële fa doji tànnéef yu réy yu ñuy yett, muy kenug kër Yàlla ga. <sup>32</sup> Ba mu ko defee tabaxkati Suleymaan ak tabaxkati Iram ak waa Gebal di yett ak a waajal bant yaak doj, ya ñuy tabaxe kër ga.

## 6

### *Suleymaan tabax na kër Yàlla ga*

<sup>1</sup> Ca ñeenti téeméereelu at maak juróom ñett fukk (480), gannaaw ba bànni Israyil génnee réewum Misra, ca ñeenteelu atu nguugurug Suleymaan, ci weeru Siw, di ñaareelu weeru at ma\* , ca la Suleymaan tàmbalee tabax kër Aji Sax ji.

<sup>2</sup> Kër gi Buur Suleymaan tabaxal Aji Sax ji, juróom benn fukki xasab† la guddaay bi am, yaatuwaay bi di ñaar fukki xasab, taxawaay bi di fanweeri xasab. <sup>3</sup> Buntu néeg bu mag bi ab dëru biti la jàkkaarool, yaatuwaayu dër bi di ñaar fukki xasab, tollook yaatuwaayu kër gi. Guddaayam féete ci kanam kër gi, yokke

guddaayu kër gi fukki xasab. <sup>4</sup> Mu defal miiri kër gi ay palanteer yu am feguwaay yu ñu we ay caax. <sup>5</sup> Mu tabax ay taax yu sès ca ñetti miiri kër gi. Taax yi dar ñaari miiri néeg bu mag bi ak miiru néegu biir bu sell bi ci gannaaw. Taax yi def ay néeg yu ndaw. <sup>6</sup> Taax mi féete suuf juróomi xasab mooy yaatuwaayam, taax mi ci tegu di juróom benni xasab. Taaxum kaw mi am yaatuwaayu juróom ñaari xasab; ndax dañoo bàyyi ay teguy làcc ci miiri kër gi, ngir xaddi taax yi baña jàpp ci miiri kër gi.

<sup>7</sup> Kër ga, ba ñu koy tabax ay doj lañu ko tabaxe, muy doj yu ñu yett fa ñu ko jële ba noppi, moo tax du saddu, du sémmiñ mbaa lenu luy juntuukaayu weñ bu ñu dégg mu dal, diir ba ñuy tabax kër ga.

<sup>8</sup> Buntu taax mi ci suuf ma nga féete woon ndijoor, nit mana jaare ci ay déggastal, yéeg jàll ci taaxum digg mi, jóge ci taaxum digg mi, jàll ci taax mi ci kaw.

<sup>9</sup> Suleymaan tabax kër gi ba noppi, xadde ko dénki garabi seedar ak gálluy seedar. <sup>10</sup> Taaxi kaw yi wër kër gépp, bu ci nekk juróomi xasab la def taxawaayam, lékklee ko peeri garabu seedar, ba mu sès ca kër ga.

<sup>11</sup> Ci biir loolu kàddug Aji Sax ji dikkal Suleymaan. Mu ne ko: <sup>12</sup> «Kër gii de yaa ngi koy tabax. Waaye soo sàmmeé samay dogal ak samay ndigal, di jëfe sama san-taane yépp, di ci topp, su boobaa dinaa sottal li ma digoon sa baay Daawuda ci sa mbir. <sup>13</sup> Dinaa dëkk ci digg bànni Israyil, te duma dëddu Israyil, sama ñoñ.» <sup>14</sup> Ba mu ko defee Suleymaan tabax kër gi, ba sottal ko.

### *Liggéey nañu biir kër gi*

<sup>15</sup> Fa féete biir nag, mu lale miir yi xànqi seedar, dale ko ci suuf ba ci xadd bi. Dafa lal biir kër gi bant, lal dër bi xànqi sippar. <sup>16</sup> Bàyyi na itam ñaar fukki xasab ci biir kër gi ci gannaaw, muy néeg bu mu lale banti seedar ci suuf ba ci xadd bi ci kaw. Mu sàkk ko ci biir kër gi, mu dib néegu biir bu sell, di bérab bu sell baa sell. <sup>17</sup> Ñeent fukki xasab yi ko féete kanam di néeg Yàlla bu mag bi. <sup>18</sup> Banti

seedar yi lale ci biir kër gi, dees cee yett ay nataali koog ak tóor-tóor yu focci; lépp di bantu seedar, ba xeer feeñul.

<sup>19</sup> Néeg bu sell baa sell ca biir kër ga ca biir-a-biir la waajal, ngir yeb fa gaal gay def àlluway kóllérey Aji Sax ji. <sup>20</sup> Néeg bu sell baa sell amoon na guddaayu ñaar fukki xasab, yaatuwaay ba di ñaar fukki xasab, taxawaay ba di ñaar fukki xasab; Suleymaan xoob ko wurusu ngalam. Sarxalukaayu seedar ba jàkkaarlook néeg ba, moom it xoob na ko wurusu ngalam. <sup>21</sup> Ci biir loolu Suleymaan xoob biir néeg Yàlla ba wurusu ngalam. Mu tàllal ay càllalay wurus fi kanam néeg bu sell baa sell, <sup>22</sup> daldi xoob ci biir wurus ba mu daj.

Sarxalukaayu néeg bu sell baa sell, lépp la xoob wurus.

<sup>23</sup> Ci kaw loolu mu sàkk ca biir néeg bu sell baa sell ñaari malaakay serub yu ñu yette bantu oliw, jëmm ju ci nekk am taxawaayu fukki xasab. <sup>24</sup> Benn serub bi laaf mu ci nekk juróomi xasab la, muy fukki xasab ci catal menn laaf mi ba ca catal laaf ma ca des. <sup>25</sup> Fukki xasab it mooy taxawaayu ñaareelu serub bi, ndax ñaari serub yee tolloo dayo, bokk bind; <sup>26</sup> taxawaayub serub bu ci nekk fukki xasab la.

<sup>27</sup> Suleymaan teg serub ya ca digg néeg bu sell baa sell, seeni laaf fireeku, catal laafu benn serub bi di laal genn wetu tabax bi, catal laafu serub ba ca des di laal geneen wetu tabax bi. Seen ñaari cati laaf yi ci des it di laale fa tollook digg néeg ba. <sup>28</sup> Mu teg ca xoob serub yi wurus.

<sup>29</sup> Mu yettlu nag ay serub ci kaw miiri ñaari néegi kër gi, yettaale garabi ron aki tóor-tóor yu focci, wër ale. <sup>30</sup> Xoob na itam dëru tabax bi wurus, ci néegu biir bi ak ci biti.

<sup>31</sup> Buntu néeg bu sell baa sell, kubeeri banti oliw la ko def, njëel bunt bi aki jënam bant lañu yu bindoo juróomi wet.

<sup>32</sup> Ñaari kubeer yi banti oliw la; mu yettlu ca kawam ay malaakay serub aki ron aki tóor-tóor yu focci, ba noppi xoob lépp wurus, xoobaale serub yi wurus ak ron yi itam. <sup>33</sup> Noonu it la def buntu néeg bu mag bi, ay jënam di bantu oliw, waaye

bunt bi, jëwam aki jënam, bant lañu yu bindoo ñeenti wet. <sup>34</sup> Ñaari kubeeram di bantu sippa, bu ci nekk di ñaari xànqi yuy warangiku. <sup>35</sup> Mu yettlu ci kaw kubeeri bunt yi jëmme serub aki ron aki tóor-tóor yu focci, daldi xoob lépp wurus.

<sup>36</sup> Suleymaan tabaxe miiru èttu biir bi ay xeeru yett ak xànqi seedar, ba ñetti sésalantey xeer yu tegloo yu ne, benn sésalanteb xànqi seedar tege ca.

<sup>37</sup> Ca ñeenteelu atu nguug Suleymaan, yemook ñaareelu weer wa, di weeru Siw, ca lañu teg kenug kër Aji Sax ji. <sup>38</sup> Ca fukkeelu at maak benn, yemook juróom ñetteelu weer wa, di weeru Bul†, ca la kër ga sotti, mook mboolem la ca bokk ak na mu wara bindoo lépp. Suleymaan tabax na kër ga ci juróom ñaari at.

## 7

### *Suleymaan tabax na kërám*

<sup>1</sup> Kërug boppam nag, Suleymaan tabax na ko ci fukki at ak ñett, doora sottaal kërám gépp. <sup>2</sup> Ma nga jëkka tabax kër ga ñuy wooye Gottub Libañ. Guddaay bi di téeméeri xasab, yaatuwaay bi di juróom fukki xasab, taxawaay bi di fanweeri xasab, def ñeenti sàppey jëni seedar yu yenu ay gálluy seedar yu ñu yett. <sup>3</sup> Ñu teg ay banti seedar ci kaw gällu, yi jën yi yenu: muy ñeent fukki gällu ak juróom, sàppe bu nekk fukki gällu ak juróom. <sup>4</sup> Mu am ñetti sésalantey palanteer yu ñu fege ay laat te ñu dékkaarloo ñett-ñett. <sup>5</sup> Bunt yépp ànd ak seen banti feguwaay, bunt bu ci nekk def ñeenti wet yu janoo màkk ñaar-ñaar; bunt yi sésaloo te dékkaarloo ñett-ñett.

<sup>6</sup> Ci biir loolu mu defar néeg ba ñuy wooye Néegu jëni kenu ya. Guddaay bi di juróom fukki xasab, yaatuwaay bi di fanweeri xasab, ak beneen néeg ci kanamam, mu ànd ak ay jëni kenoom ak xaddam bu mbaar ci kanam. <sup>7</sup> Mu tabax néeg ba ñuy wooye Néegu ngàngune ma walla Àttekaay ba, mu di fa àttee. Mu

dare néeg bi banti seedar ci suuf ba ci kaw.

<sup>8</sup> Kërám ga mu dëkk it, ñu tabaxe ko noonu ci gannaaw Néegu ngàngune ma. Suleymaan teg ca tabaxal soxnaam doomu Fírawna ja geneen kër gu nirook kërám.

<sup>9</sup> Tabax yooyu yépp biir ak biti xeeru tànnéef yu ñu yett la, natt ko, xacc ko, rattaxal, dale ko ci kenu gi, ba ci cati xadd bi ci kaw, daleeti ci biti ba ci ètt bu mag bi. <sup>10</sup> Ñu defare kenu yi xeeru tànnéef yu mag: yii di fukki xasab, yii di juróom ñetti xasab. <sup>11</sup> Xeer yi tege ci kenu gi, xeeru tànnéef la yu ñu yett, natt ko, yemale, booleek banti seedar. <sup>12</sup> Miiru ètt bu mag bi dees koo wëralee ay xeeru yett aki xànqi seedar: ñetti sésalantey xeer yu tegloo yu ne, benn sésalanteb xànqi seedar tege ca. Mu mel ni na ñu def èttu biir bu kër Aji Sax ja ak dëru buntu kër ga.

### *Tëgg ba def na wàllam*

<sup>13</sup> Ci kaw loolu Buur Suleymaan yónnee, jëli ca Tir ku ñuy wax Uram\*. <sup>14</sup> Doomu jëtun la woon, bokk ci giirug Neftali. Baayam dëkkoon Tir†, di tëggub xànjari. Uram di ku xareñ lool, rafet xel te mane mboolem liggéeyu xànjari. Mu dikk ca Buur Suleymaan, liggéeyal ko la ñu ko sant lépp.

<sup>15</sup> Mu móol ñaari xeri xànjari, wu ci nekk am taxawaayu fukki xasab ak juróom ñett, te wu ci nekk buumu fukki xasab ak ñaar a koy ub. <sup>16</sup> Ci biir loolu mu defar ñaari boppi xànjari yu mu xelli, teg ko ci kaw xer yi, bopp bu ci nekk am taxawaayu juróomi xasab. <sup>17</sup> Bopp yi ci kaw xer yi, bu ci nekk da koo rafetale ab caaxu cállala, bopp bu ci nekk am ci juróom ñaar. <sup>18</sup> Mu defar ñaari jaray gërënaat, solal ko caax yi, wëralee ko bopp yi, ci xer wu ci nekk. <sup>19</sup> Bopp yi nekkoon ci kaw xer yi ci kanam nag bindoo ni léppi tóor-tóor te bu ci nekk di ñeenti xasab. <sup>20</sup> Bopp yi ci kaw ñaari xer yi, bu ci nekk ñaar téeméeri gërënaat a

† **6:38** 6.38 weeru Bul moo yemook oktoobar, jàpp nowàmbar. † **7:14** 7.14 Tir ab dëkk la bu bokkul ci Israyil.

\* **7:13** 7.13 Uram mooy Iram ba tey. Seetal it

ko wër ci kaw, feggook gamb bi ci wàllaa caax bi.

<sup>21</sup> Mu samp jën yi ci kanam bunt néeg Yàlla bu mag bi; samp jënu ndijoor wi, tudde ko Yakin (Kiy taxawal), samp jënu càmmoñ wi, tudde ko Bowas (Kiy dooleel). <sup>22</sup> Kaw xer yi ay lèppi tóor-tóor yu ñu xellee ci tege. Liggéeyu xer ya daldi sotti.

<sup>23</sup> Ba mu ko defee Uram móol mbalkam njàpp mu weñ, ñu di ko wax Géej ga. Mbalka ma daa mērgalu, yaatoo fukki xasab, catu omb ba catu omb, taxawaay ba di juróomi xasab, ag buumu fanweeri xasab di ko ub. <sup>24</sup> Ay gamb la ko sàkkal ci suufu kéméj gi, fukki gamb tollook xasab. Mu def gamb yi ñaari caq yu wër mbalka mi ba mu daj te ànd ak mbalka mi ci benn xelli. <sup>25</sup> Mbalkam njàpp mi tege ci kaw fukki jëmme nag ak jaar, ñett jublu bēj-gànnar, ñett jublu sowu, ñett jublu bēj-saalum, ñett jublu penku. Mbalka mi war nag yi, seeni gannaaw féete biir, ñoom ñépp. <sup>26</sup> Déllaayu mbalka mi yaatuwaayu loxo la, kéméj gi mel ni gémmiñu kaas, di nirook lèppi tóor-tóor. Naar téeméeri barigo la mbalka miy def. (200).

<sup>27</sup> Mu daldi sàkk fukki watiiri rootukaayi xànjari, wu ci nekk am guddaayu ñeenti xasab, yaatuwaayam di ñeenti xasab, taxawaayam di ñetti xasab.

<sup>28</sup> Ni ñu defare rootukaay yi nii la: ay wetam lañu defare làcci xànjari, lèkklee làcc yi ay laat. <sup>29</sup> Muy làcc yu Uram yett ci kawam ay gaynde, ay nag ak malaakay serub. Kaw laat yi itam am na ci nataal yi. Mu yett ay caqi tóor-tóor yuy lang ci suufu gaynde yeek nag yi. <sup>30</sup> Rootukaay bu nekk am na ñeenti mbegey xànjari yu ñu lèkklee yeti xànjari. Mu am ay kenu yu ñu xellil rootukaay bi ci ñeenti koñam, kenu yi yenu benn bagaan te am ay nataali tóor-tóor. <sup>31</sup> Gémmiñu rootukaay bu nekk amoon na omb bu mērgalu bu bagaanu ndox biy tege. Xóotaayu gémmiñ gi di xasab, yaatuwaay bi di xasab ak genn-wàll. Ñu yett ci kaw gémmiñ gi ay nataal ba tey. Rootukaay bi mērgaluwul, waaye daa bindoo ñeenti wet yu janoo màkk ñaar-ñaar te yem

kepp. <sup>32</sup> Ñeenti mbege yi ronu làcc yi, tóori weñ yi ci wewe sax ci rootukaay bi. Mbege mu ci nekk am na taxawaayu xasab ak genn-wàll. <sup>33</sup> Mbege yi bindoo ni mbegey watiiri xare. Tóor yeek mbege yi ak sidditi mbege yi ak ñanku yi, xànjari lañu ko xellee. <sup>34</sup> Ñeenti kenu yi ci ñeenti koñi rootukaay bi, bu ci nekk dees koo xelleendook weti rootukaay yi, ba lépp di benn. <sup>35</sup> Kaw boppu rootukaay bu nekk, kéméj gu mērgaloo féete ci kaw, taxawaayam di genn-wàllu xasab, njàppu yeek làcc yi sax ci, lépp di benn. <sup>36</sup> Fi amul dara ci kaw njàppu yeek làcc yi, mu ñaas ci ay nataali serub aki gaynde aki garabi ron yu ñu wērale ay caqi tóor-tóor. <sup>37</sup> Noonu la Uram defare fukki rootukaay yi. Lépp bokk móol, yem dayo te bokk bind.

<sup>38</sup> Mu defar itam fukki bagaani xànjari; bagaan bu ci nekk tollook ñeenti xasab, di def lu xawa tollook juróomi barigo; bagaan bu ci nekk tegu cib rootukaay, ba fukki rootukaay yi daj.

<sup>39</sup> Ba mu ko defee mu taaj juróomi rootukaay fa féete kër Yàlla ga ndijoor ak juróomi rootukaay fa féete kër ga càmmoñ. Mu teg mbalkam jàpp mi fa féete kër ga ndijoor, ca wetu bēj-saalum, jàpp penku.

<sup>40</sup> Iram sàkk itam ndab yu ndaw yi ak ñiitukaay yi ak kelli tuurukaay yi.

Ci kaw loolu Iram sottal mboolem liggéey ba mu liggéeyal Buur Suleymaan ca kër Aji Sax ji: <sup>41</sup> muy ñaari jën yi, ak ñaari gamb yiy boppi jën yi, ak ñaari caaxi cállala yiy muur ñaari gamb yi, <sup>42</sup> ak ñeenti téeméeri gērēnaat yiy ànd ak ñaari caax yi; caax bu nekk, ñaari caqi gērēnaat, ñu dar ñaari gamb yiy boppi xer yi; <sup>43</sup> ak fukki rootukaay yi ak fukki bagaan yi ci kaw rootukaay yi. <sup>44</sup> Mbalkam jàpp mi it ci la, ak fukki nag ak jaar yi ronu mbalkam jàpp mi. <sup>45</sup> Bagaan yu ndaw yi bokk na ci, ak ñiitukaay yi ak kèll yi. Mboolem yooyu jomtukaayi kër Aji Sax ji, xànjari bu ñu jonj la Buur Suleymaan sant Uram, mu defare ko. <sup>46</sup> Ca joorug Yurdan la ko Buur xellilu, ci móoli ban, diggante Sukkóot ak

Sartan. <sup>47</sup> Suleymaan daldi bàyyi jumtukaay yépp noonu, ndax na mu baree lool, ba natteesul diisaayu xànjari ba ca dem.

<sup>48</sup> Gannaaw loolu Suleymaan defarlu na mboolem yeneen jumtukaayi kër Aji Sax ji: muy sarxalukaayu wurus ba, ak taabal ja ñuy teg mburum teewal ma† <sup>49</sup> ak tegukaayi làmpi wurusu ngalam yi, juróom ci wetu ndijoor, juróom ci wetu càmmoñ, fi kanam néeg bu sell baa sell; tóor-tóor yi ak làmp yi ak ñiim yi, lépp di wurus; <sup>50</sup> ndab yi itam, ak feyukaay yi ak këll yi ak kopp yi ak andi cuuraayu yi, lépp di wurusu ngalam. Te it ngoosi wurus yi bunti néeg bi wewe, ñu di fa jaare dugg ca bérab bu sell baa sell, ak ngoosi wurus yi beneen buntu néeg bi wewe, ñu di fa jaare dugg ci néeg Yàlla bu mag bi, lépp wurus la.

<sup>51</sup> Ba loolu amee, mboolem lu Buur Suleymaan liggéeyal kër Aji Sax ji daldi sotti. Mu boole xalis baak wurus waak jumtukaay ya baayam Daawuda sellalaloon Aji Sax ji, yeb ko ca denc ya def alali kër Aji Sax ji.

## 8

### *Sancal nañu gaalu Yàlla ga*

<sup>1</sup> Ba mu ko defee Suleymaan woolu magi Israyil. Mboolem kilifay giiri Israyil ak seen njiiti kër maam ya daje Yerusalem ca moom, ngir ñu àgg Siyon, gox ba ñu naan Kër Daawuda, ba yékkatee fa gaal ga kóllérey Aji Sax ji dence.

<sup>2</sup> Waa Israyil gépp nag daje ca Buur Suleymaan, ca weeru Etanim\*, ca màggalu juróom ñaareelu weer woowu. <sup>3</sup> Ba magi Israyil ñépp dikkee, sarxalkat ya yékkati gaal ga. <sup>4</sup> Ñu boole gaalu Aji Sax ja, ak xaymab ndaje ma, ak mboolem jumtukaay yu sell ya ca biir xayma ba. Sarxalkat ya ak Leween ña daldi gaddu lépp. <sup>5</sup> Buur Suleymaan ak mbooloom Israyil ma daje fa moom, ñoom ñépp a nga bokk ak moom, teew. Ñu jàkkaarlook

gaal ga, di rendi ay gàtt aki nag yu kenn manula lim mbaa di ko waññ, ndax bare.

<sup>6</sup> Gannaaw loolu sarxalkat ya yóbbu gaalu Aji Sax ja ca bérabam, ca biir néeg bu sell baa sell, ca ron laafi malaakay serub ya. <sup>7</sup> Ndaxte jëmme serub ya, seeni laaf daa tàllalu, tiim bérabu gaal ga, laaf ya yiir kaw gaal ga aki njàppoom. <sup>8</sup> Njàppu ya daa guddoon, ba nit mana séen cat ya te fekk ko tollu ca bérab bu sell ba, ca kanam néeg bu sell baa sell. Waaye maneesula tollu ca biti di séen cat ya. Njàppu yaa nga fa ba tey jii. <sup>9</sup> Dara nekkuloon ca biir gaal ga, lu moy ñaari àlluway doj ya ca Musaa yeboon ca tundu Orebt†, fa Aji Sax ji fase woon kóllérey ak bànni Israyil, ba ñu génnee réewum Misra.

<sup>10</sup> Ba sarxalkat ya génnee bérab bu sell ba, niir wa daa fees kër Aji Sax ja, <sup>11</sup> ba sarxalkat ya talatuñoo liggéey, ndax leeru Aji Sax jaa nekkoon ca niir wa, niir wa feesal kër ga.

### *Suleymaan àddu na*

<sup>12</sup> Ba mu ko defee Suleymaan ne: «Aji Sax ji moo noon lëndem gu fatt lay màkkaanoo.» <sup>13</sup> Mu ne Aji Sax ji: «Tabaxal naa la kër gu màgg, màkkaan mooy dèkke ba fàww.» <sup>14</sup> Ci kaw loolu Buur Suleymaan walbatiku, ñaanal mbooloom Israyil mépp, fekk mbooloom Israyil mépp a nga taxaw. <sup>15</sup> Mu ne: «Cant ñeel na Aji Sax ji, Yàllay Israyil, moom mi sottale loxol boppam, la mu waxoon Daawuda sama baay ci gémminam, ne ko: <sup>16</sup> “La dale bés ba ma génnee bànni Israyil, sama ñoñ ca Misra ba tey, taamuwuma benn dèkk, ci mboolem giiri Israyil, bu ñuy tabax kër, gu sama tur di nekk. Waaye maa taamu Daawuda, ngir mu falu ci kaw Israyil sama ñoñ.” <sup>17</sup> La doon yéney Daawuda sama baay nag moo doon tabax kër gu mu tudde Aji Sax ji, Yàllay Israyil. <sup>18</sup> Teewul Aji Sax ji wax Daawuda sama baay, ne ko: “Gannaaw yaa fasoon ci sa xol, yéney tabax kër, tudde ma ko, def nga lu rafet,

† 7:48 7.48 mburum teewal mi mooy mburu mi ñuy teewal fi kanam Aji Sax ji. \* 8:2 8.2 weeru Etanim moo yemook sàttumbar, jàpp oktoobar, ñu daan ca amal màggalu Mbaar ya. † 8:9 8.9 Oreb mooy Sinayi ba tey.



ngir sa yéeneey xol la woon. <sup>19</sup> Waaye du yaw yaay tabax kër gi; sa doom ju góor ju soqikoo ci sa geño, moom mooy tabax kër gi, tudde ma ko.”

<sup>20</sup> «Aji Sax ji moo sotal waxam ja mu waxoon. Wuutu naa sama baay Daawuda, toog naa ci jalub Israyil, noonee ko Aji Sax ji waxe woon. Tabax naa kër gi, tudde ko Aji Sax ji, Yàllay Israyil. <sup>21</sup> Te it sàkk naa fa bérab bu ñeel gaal gi def àlluway kóllérey Aji Sax, ji mu fasoon ak sunuy maam, ba mu leen génnee réewum Misra.»

### *Suleymaan yékkati na kàddug ñaan*

<sup>22</sup> Gannaaw loolu Suleymaan taxaw jàkkaarlook sarxalukaayu Aji Sax ji, fa kanam mbooloom Israyil mépp. Mu daldi tàllal ay loxoom asamaan, <sup>23</sup> daldi ne: «Yaw Aji Sax ji Yàllay Israyil, amul jenn yàlla ju mel ni yaw fa kaw asamaan mbaa ci kaw suuf si mu tiim, yaw miy sàmm kóllère ak ngor, ñeel sa jaam ñiy doxe seen léppi xol, fi sa kanam. <sup>24</sup> Yaa sàmm kàddu ga nga waxoon sa jaam ba, Daawuda sama baay, ci sa gémmiñu bopp, te yaa sotal sab loxo, sa kàddu bés niki tey.

<sup>25</sup> «Léegi nag Aji Sax ji, Yàllay Israyil, ngalla sàmmal li nga waxoon sa jaam ba, Daawuda sama baay, ne ko: “Deesu la xañ mukki ci saw askan ku góor kuy tooge jalub Israyil fi sama kanam, ndegam saw askan a ngi moytu seenu yoon, tey doxe fi sama kanam noonee nga daan doxe fi sama kanam.” <sup>26</sup> Kon nag yaw Yàllay Israyil, ngalla saxalal wax jooju nga waxoon Daawuda, sa jaam ba.

<sup>27</sup> «Waaye yaw Yàlla! Ndax yaay dëkk ci kaw suuf sax? Seetal rekk, asamaan yi ba ca asamaani asamaan ya manu laa fat, waxumalaa kër sii ma tabax. <sup>28</sup> Waaye Aji Sax ji, sama Yàlla, rikk, teowlul li ma lay ñaan, man sab jaam, di la ko dagaan; ngalla déggal sama yuux, te nangu ñaan gi ma lay ñaan bés niki tey. <sup>29</sup> Yal nanga ne jàkk guddeek bëccëg ci kër gii, bérab bi nga noon: “Fi la sama tur di nekk,” te yal nanga dégg ñaan gi ma jublu bérab bii, di ko ñaan, man sab jaam. <sup>30</sup> Yal nanga may nangul sama dagaan, nangul

Israyil sa ñoñ. Bu ñu jubloo bérab bii, ñaan la, yal nanga ko dégge bérab ba nga dëkke ca asamaan, ba nangul leen, jéggal leen.

<sup>31</sup> «Ku ñu tuumaal ne moo tooñ mo-roomam, te yoon waatloo ko ba waat war ko, bu dikkee di waatsi fi sa kanam sarxalukaay bi ci biir kër gii, <sup>32</sup> Su boobaa, yaw rikk dégge ko asamaan, àtte say jaam, ngir teg ki tooñ, daanub tooñ, këpp añu jëfam ci kaw boppam, te nga déggal ki am dégg, jox ko déggam gi mu yelloo.

<sup>33</sup> «Bu Israyil sa ñoñ daanoo fi kanam ab noon, ndax tooñ gu ñu la tooñ, bu ñu waññikoo ci yaw, sàbbaal saw tur, ñaan, sàkku saw yiw ci biir kër gii, <sup>34</sup> su boobaa yaw, yal nanga dégge asamaan, ba jéggale bàkkaarub Israyil sa ñoñ, te nga delloo leen ca réew ma nga joxoon seeni maam.

<sup>35</sup> «Bu asamaan tëjoo, taw amul ndax tooñ gu ñu la tooñ, bu ñu jubloo bérab bii, ñaan la, sàbbaal saw tur te dëddu seen bàkkaar ndax sa mbugal, <sup>36</sup> su boobaa yaw ngalla nangool fa asamaan, te nga jéggale sa bàkkaarub jaam ñi, Israyil sa ñoñ. Ngalla xamal leen yoon wu baax wi ñu wara doxe te nga tawal sa suuf, si nga joxoon sa ñoñ, muy seen cér.

<sup>37</sup> «Bu xiif amee ci réew mi, mbaa mbaa, mbaa gàncax gi lakk, mbaa benaat xuural ko, mbaa mu diy njéeréer mbaa soccet, mbaa su dee congum seen noon ci seen dëkki réew mi, mbaa muy mboolem luy musiba ak mboolem jàngoro, su boobaa, <sup>38</sup> lépp lu ciy ñaan akug tinu gu bawoo ci képp ku mu doon mbaa ci mboolem Israyil sa ñoñ, te fekk ku ci nekk ràññee mititu xolam, ba tàllal ay loxoom jublook kër gii, <sup>39</sup> su boobaa, yaw, ngalla nangoo ko asamaan, màkkaan ma nga dëkke, ba jéggale, te nga jëf ba yool ku nekk kemu mboolem ay jëfam, yaw mi xam xolam, ndax yaw donj yaa xam xolu mboolem doom aadama. <sup>40</sup> Su ko defee dinañu la ragal seen giiru dund ci kaw suuf si nga joxoon sunuy maam.

<sup>41</sup> «Te itam doxandéem bu bokkul ci Israyil sa ñoñ bu jógee réew mu sore ngir sa tur, <sup>42</sup> ndax kat dees na dégg sa tur wu réy, ak sa dooley loxo ak sa

kàttanu pèrèg, bu dikkee ba jublu ci kër gii, ñaan, <sup>43</sup> su boobaa ngalla nangool asamaan, màkkaan ma nga dèkke, te nga defal doxandéem boobu mboolem lu mu la ñaan, ndax xeeti àddina yépp xam sa tur, ngir ragal la ni Israyil sa ñoñ, te xam ne saw tur lañu tudd ci kër gii ma tabax.

<sup>44</sup> «Bu sa ñoñ di xarejeek seen noon, ci yoon woo leen yebal, su ñu ñaane ci Aji Sax ji, jublook dèkk bii nga taamu, ak kër gii ma tabax ngir saw tur, <sup>45</sup> su boobaa ngalla nangool asamaan, seenug ñaan ak seen dagaan te nga may leen ndam. <sup>46</sup> Bu ñu la moyee, nde amul nit ku dul moy, ba nga mere leen, teg leen ci loxob noon, noon ba jàpp leen, yóbbu am réewam, mu sore mbaa mu jege, <sup>47</sup> bu ñu demee ba seenum xel dellusee fa réew ma ñu leen yóbbu ngallo, ñu tuub tey sàkku aw yiw fi yaw foofa ca réewum ña leen jàpp, ne la noo moy, noo ñaaw, noo def lu bon, <sup>48</sup> bu ñu wañnikoo seen léppi xol, ak seen léppi jèmm ci yaw, foofa ca seen réewu noon ya leen jàpp, ba ñaan la, jublook seen réew ma nga joxoon seeni maam, jublook dèkk bi nga taamu, ak kër gii ma tabax ngir saw tur, <sup>49</sup> ngalla su boobaa, nangool ca asamaan, bérab ba nga dèkke, seen ñaan ak seen dagaan, te nga sàmm seen àq, <sup>50</sup> te it nga jéggal sa ñoñ ñi la moy, jéggal leen seen mboolem tooñ yu ñu la tooñ, te may leen yërmandey ña leen jàpp, ba ñu yèrèm leen. <sup>51</sup> Ndax kat ñooy sa ñoñ ñi nga séddoo, génnee leen Misra, taalu xellikaayu weñ gu ñuul ga.

<sup>52</sup> «Sang bi, teewlul bu baax samay tinu ak sa tinuy mbooloom Israyil mii, ba nangul leen mboolem lu ñu la jooy, <sup>53</sup> ndaxte danga leena ber ci biir xeeti àddina yépp, séddoo leen, te waxoon nga ko, Musaa sa jaam ba jottli ko, ba ngay génne sunuy maam Misra, yaw Boroom biy Aji Sax ji.»

### *Suleymaan ñaanal na bànni Israyil*

<sup>54</sup> Ba Suleymaan noppee ñaan Aji Sax ji mboolem ñaanam ya ak dagaanam yooyu, daa siggee ca sarxalukaayu Aji Sax, ja mu sukkoon tàllal loxo ya, jublu asamaan. <sup>55</sup> Mu taxaw, di ñaanal mbooloom Israyil mépp, daldi àddu ca

kaw ne: <sup>56</sup> «Cant ñeel na Aji Sax, ji may Israyil mbooloom ab dal-lukaay, muy la mu waxoon lépp, ngir benn baat fanaanul àll ci digey jàmm yi mu dige woon yépp, Musaa jaamam ba jottli. <sup>57</sup> Yal na sunu Yàlla Aji Sax ji ànd ak nun, na mu ànde woon ak sunuy maam. Yàlla bu nu wacc mukk mbaa mu di nu dèddu. <sup>58</sup> Yal na nu xiir ci boppam, nuy tegu ci yoonam yépp, di jéfe ay santaaneem aki dogalam ak àttey yoonam yi mu dénkoon sunuy maam. <sup>59</sup> Sama kàddu yii ma ñaan fi kanam Aji Sax ji, yal na doon lu sunu Yàlla Aji Sax ji def yitteem guddeek bëccëg. Mu di ma dëggal, man jaamam, di dëggal Israyil ñoñam, saa yu nu ko soxlaa. <sup>60</sup> Su ko defee xeeti àddina yépp dinañu xam ne Aji Sax ji mooy Yàlla, te amul moroom. <sup>61</sup> Waaye nag joxleen Aji Sax ji sunu Yàlla seen léppi xol, ngir ngeen mana ténku ciy dogalam tey jéfe ay santaaneem ni bésuub tey.»

### *Suleymaan daloo na kër Yàlla ga*

<sup>62</sup> Ba mu ko defee Buur Suleymaan ànd ak Israyil gépp, sarxe ab sarax fi kanam Aji Sax ji. <sup>63</sup> Mu defal Aji Sax ji saraxi cant ci biir jàmm, lépp di ñaar fukki junniy nag ak ñaar (22 000) ak téeméeri junniy gàtt ak ñaar fukk (120 000). Noonu la Buur ak bànni Israyil gépp amale xewu jagleb kër Aji Sax ji. <sup>64</sup> Bésuub keroog Buur sellal na digg ètt ba janook néeg Aji Sax ji, ndax fa la joxe saraxu rendi-dóomal ba, ak saraxu pepp ba, ak nebbonu saraxu cant ci biir jàmm, ndax sarxalukaayu xàñar ba fa kanam Aji Sax ji moo tuutoon ci defandoo saraxu rendi-dóomal ba, ak saraxu pepp ba, ak nebbonu saraxu cant ga ci biir jàmm.

<sup>65</sup> Suleymaan nag amal màggal ga jant yooyu, ànd caak Israyil gépp, muy ndaje mu réy mu jóge Lebo Amat ca bëj-gànnar ba ca xuru Misra ca bëj-saalum, di màggalsi fi sunu Yàlla Aji Sax ji, ba mu am juróom ñaari fan, tegaat ca juróom ñaari fan, muy fukki fan ak ñeent. <sup>66</sup> Bésuub juróom ñetteel ba nag Buur yiwi mbooloo ma, ñu ñaanal ko, daldi dellu seeni xayma, ci biir mbégte ak xol bu sedd ci mboolem lu baax la Aji Sax

ji defal Daawuda jaamam ba, ak Israyil, ñoñam.

## 9

### *Aji Sax ji feeñu na Suleymaan*

<sup>1</sup> Ba Suleymaan noppee ci tabax kër Aji Sax ji ak kër Buur, ak mboolem nammeelam gu mu bëggoona sottal, <sup>2</sup> la ko Aji Sax ji feeñu ñaareel bi yoon, na mu ko feeño woon fa Gabawon. <sup>3</sup> Aji Sax ji ne ko: «Dégg naa sag ñaan, ak sab dagaan. Sellal naa kër gii nga tabax, ngir teg fi sama tur ba fàww. Samay gët ak sama xol it fi lay nekk bés bu nekk.

<sup>4</sup> «Yaw nag, soo doxee fi sama kanam ni Daawuda sa baay daan doxe cig mat akug njub, di def lépp lu ma la sant, di sàmm sama dogali yoon, ak sama àttey yoon, nga di ko sàmm, <sup>5</sup> kon dinaa saxal sab jal ci kaw Israyil ba fàww, na ma ko waxe woon Daawuda sa baay, ne ko: “Doo ñàkk ku góor kuy toog ci jalub Israyil.” <sup>6</sup> Waaye su ngeen ma dëddoo ba dëddu ma, yeen ak seeni sët, ba jëfewuleen samay santaane, sama dogali yoon yi ma leen tëralal, xanaa di topp aka jaamu yeneen yàlla, di leen sujjóotal, <sup>7</sup> su boobaa maay dagge bànni Israyil fi dëndu suuf si ma leen jox, te kër gi ma sellal ngir sama tur, maa koy xalab, mu sore ma, te kon Israyil mujj di tur wu ñuy lééboo ak di ko kókklee ci biir xeet yépp.

<sup>8</sup> «Su boobaa kër gii dina gent te képp ku ko romb dina yéemu tey muslu ci lu ni mel. Dinañu ne: “Lu tax Aji Sax ji def nii réew mii ak kër gii?” <sup>9</sup> Ñu ne: “Xanaa li ñu dëddu seen Yàlla Aji Sax, ji jële seeni maam réewum Misra, di topp yeneen yàlla, di leen sujjóotal ak a jaamu. Moo tax Aji Sax ji teg leen musiba mii mépp.”»

### *Buur Suleymaan jëflante naak Buur Iram*

<sup>10</sup> Ñaar fukki at yi Suleymaan tabax ñaari kër yi, kër Aji Sax ji ak kër Buur, ba mu matee <sup>11</sup> fekk na Iram buurub Tir jox Suleymaan ay banti garabi seedar

ak sippar\*, ak mboolem lu mu soxla ci wurus. Buur Suleymaan nag jox Iram ñaar fukki dëkk ci diiwaanu Galile. <sup>12</sup> Ci kaw loolu Iram bàyyikoo Tir, seeti dëkk ya ko Suleymaan jox, waaye dëkk ya neexu ko. <sup>13</sup> Mu ne ko: «Sama waay, dëkk yi nga ma jox nag?» Mu daldi tudde dëkk ya réewum Kabul†, mooy turam ba tey jii. <sup>14</sup> Iram yónnee woon na Buur fanweeri barigoy wurus ak juróom.

<sup>15</sup> Buur Suleymaan dafa dogaloon liggéeyu sañul-bañ bu mu sas ay nit. Ñu tabax kër Aji Sax ji ak kër buoppam ak sèkkub Milo‡ ak tatay Yerusaleem ya ak dëkk yii di Àccor, Megido ak Geser. Ni mu deme nii la: <sup>16</sup> Firawna buuru Misra moo daloon ci kaw Geser, nangu dëkk ba, lakk ko, rey Kanaaneen ña ca dëkkoon, daldi may dëkk ba doomam jay soxnas Suleymaan, muy yebam. <sup>17</sup> Suleymaan tabaxaat Geser ak Bet Oron Suuf, <sup>18</sup> ak Baalat ak Tamar§ ca màndiñu réew ma, <sup>19</sup> ak mboolem dëkki dencukaayam, ak dëkk ya watiiri xare ya dence, ak dëkki gawar ya. Lu Suleymaan nammoonu tabax daal, tabax na ko ca Yerusaleem ak ca Liban ak mboolem réewum kilifteefam.

<sup>20</sup> Mboolem nit ña desoon ca Amoreen ñaak Etteen ñaak Periseen ñaak Eween ñaak Yebuseen ña, ñoofu bokkul ci bànni Israyil. <sup>21</sup> Seen sët ya leen wutu ca réew ma, te bànni Israyil manuñu leen woona faagaagal, Suleymaan moo leen dugal ci liggéeyu njaam ak sañul-bañ, ñu nekke ko ba tey jii. <sup>22</sup> Waaye ñi bokk ci bànni Israyil, Suleymaan defu leeni jaam, ndax ñoom ñoo doon ay xarekatam, aki dagam aki jawriñam, ak njiiti xareem ak boroom watiiri xareem, ak dawalkati watiiram. <sup>23</sup> Ñoo doon itam saytukat yi yore liggéeyi Suleymaan. Amoon na juróomi téeméeri jawriñam ak juróom fukk (550) yu daan jiite nit ñiy def liggéey bi.

<sup>24</sup> Doomu Firawna ju jigéen ja nag jóge gox ba ñu naan Kër Daawuda, séyi kërug boppam ga ko Suleymaan tabaxal.

\* **9:11** 9.11 sippar: seetal ci 5.22. † **9:13** 9.13 Kabul man naa firi Jarul dara. ‡ **9:15** 9.15 Milo xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkklu ko. § **9:18** 9.18 Tamar dees na ko wax Tadmor ba tey.

Gannaaw gi la Suleymaan tabax sèkkub Milo.

<sup>25</sup> Suleymaan di def ñetti yoon cim at ay saraxi rendi-dóomal, ak saraxi cant ci biir jàmm, di ko sarxal ci kaw sarxalukaay bi mu tabaxal Aji Sax ji, boole ci di taal cuuraay ci kaw sarxalukaay bi, fi kanam Aji Sax ji. Mu daldi matal la war ca kër Yàlla ga.

<sup>26</sup> Ay gaal yu mag itam Buur Suleymaan defarlu na ko ca Esiyon Geber ga ca wetu Elat, ca tefesu géēju Barax ya, ca réewum Edom. <sup>27</sup> Iram yebal ay nitam, ñuy mool yu xam gééj. Ñuy liggéeyandook niti Suleymaan ca gaal ya. <sup>28</sup> Ñu daldi ànd dem Ofir, jële fa téeméeri barigoy wurus ak ñaar fukk, indil Buur Suleymaan.

## 10

### *Lingeer buurub Saba seetsi na Suleymaan*

<sup>1</sup> Ci kaw loolu Lingeeru Saba dégg riirum Suleymaan ma turu Aji Sax ji waral. Mu dikk di nattusi am xelam, di ko cax cax yu jafe. <sup>2</sup> Mu agsi Yerusalem, ànd ak topp mu takku lool ak giléem yu sêf ay ndàbb yu xeeñ ak wurus wu baree bare ak per yu gànjare. Ba mu dikkee ba ca Suleymaan, mboolem la mu jàppoon ca xelam la ko wax. <sup>3</sup> Suleymaan tontu ko ca mbir ya mu laaj yépp; amul menn mbir mu tiiñ Buur ba leeralalu ko ko. <sup>4</sup> Lingeer buurub Saba gis mboolem xelam Suleymaan mu rafet, ak kër ga mu tabax, <sup>5</sup> ak njëlu këram, ak jataayu dagam ya, ak taxawaayu surgaam ña, ak seen col ga, ak ña yor ay naanam, ak saraxi rendi-dóomal ya muy joxe ca kër Aji Sax ji. Mu daldi yéemu, ba ag noowam réer ko.

<sup>6</sup> Mu ne Buur: «jëw ba ma déggoon ca sama réew ci say mbir ak sa xel mu rafet kay, dégg la! <sup>7</sup> Gëwma ko woon ba bi ma dikkee, ba teg ci samay bët. Ndeke genn-wàll gi sax waxeesu ma ko woon. Wees nga riir ma ma déggoon ci yaw, ci xel mu rafet ak alal. <sup>8</sup> Ndokklee say nit! Ndokklee sa jawriñ ñii dëkke taxaw ci sa kanam, di dégg sam xel! <sup>9</sup> Cant ñeel na sa Yàlla Aji Sax ji, moom mi la bége, ba teg la ci jalub Israyil. Aji Sax ji daa sopp Israyil cofeel

gu dul jeex, moo tax mu fal la buur, ndax nga saxal fi dégg ak njekk.»

<sup>10</sup> Ba mu ko defee Lingeer buurub Saba may Suleymaan fanweeri barigoy wurus ak juróom, ak cuuraayu ndàbb lu ne gàññ, ak per yu jafe. Cuuraayu ndàbb loola Lingeer buurub Saba mayoon Buur Suleymaan, lu ni mel dikkatu fa ndax bare.

<sup>11</sup> Ci kaw loolu itam gaali Buur Iram ya daan jële wurus ca réewum Ofir, jële Ofir lu takkoo takku ci banti sàntaal ak per yu gànjare. <sup>12</sup> Buur sàkke ca banti sàntaal ya, ay sèppukaayi kaw taax ngir kër Aji Sax ji, ak kër Buur ak xeeñ xalam ngir woykat yi. Banti sàntaal bu ni mel masu faa dikk, te giseesu ko fi ba tey jii.

<sup>13</sup> Buur Suleymaan itam may Lingeer buurub Saba mboolem lu mu sàkku, te bokkewul ak la ko Suleymaan joxal boppam ca loxoom bu tàlli ba buur yelloo. Ba loolu amee Lingeer buurub Saba walbatiku, ñibbim réewam, mooki surgaam.

### *Suleymaan bare woon na alal*

<sup>14</sup> Wurus wa daan dikkal Suleymaan cim at, diisaay ba ñaar téeméeri barigoy wurus la, <sup>15</sup> te limaaleesul galag ya jóge ca jaaykat ya ak jula yaak mboolem buuri Arabi, ak jaraafi réew ma.

<sup>16</sup> Buur Suleymaan nag sàkklu ñaar téeméeri pakk yu mag yu wurus wu ñu tégg ba mu jekk, benn bu ci nekk jël juróom benni kiloy wurus, <sup>17</sup> ak ñetti téeméeri pakk yu ndaw yu wurus wu ñu tégg ba mu jekk, pakk bu ci nekk di kilo ak liibaru wurus. Buur boole ko denc ca këram ga ñuy wax Gottub Libañ.

<sup>18</sup> Buur teg ca sàkk ngàngune mu mag mu bëñi ñay, daldi koy xoob wurus wu set wecc. <sup>19</sup> Juróom benni déggastal la ngàngune ma am, wéeruwaay ba ca kaw mërgalu. Mu am loxo wet gu nekk. Loxo yaa nga feggook ñaari jëmme gaynde yu taxaw, wet gu nekk benn. <sup>20</sup> Mu am it fukki jëmme gayndeek ñaar yu taxaw ca ñaari weti juróom benni déggastal ya, ñaari gaynde séq ndéggastal lu nekk. Sàkkeesul lu ni mel ci mboolem nguur yi!

<sup>21</sup> Mboolem lu Buur Suleymaan daan naane wurus la, te mboolem ndabi këram

ga ñuy wax Gottub Liban wurusu ngalam la. Dara du ca xaaalis, ndax xaaalis jàppeesu ko woon muy dara ca janti Suleymaan. <sup>22</sup> Te sax ay gaal yu mag la Buur amoon, ñuy ànd ak gaali Iram, benn yoon ci ñetti at yu nekk gaal ya yeb wurus ak xaaalis ak béñi ñay, aki golo ba ciy dàngin.

<sup>23</sup> Buur Suleymaan dem na ba sut mboolem buuri kaw suuf ci wàllu alal, ak ci wàllu xel mu rafet. <sup>24</sup> Mboolem àddinaa daan wuta giseek Suleymaan, ngir taataansi xelam mu rafet mi Yàlla def cib xolam. <sup>25</sup> Nñoonu ñoo ko daan indil at ci kaw at, ku nekk ak sab teraanga, muy ay jumtukaayi wurus ak yu xaaalis aki mbubb aki gannaay aki cuuraay aki fas aki berkelle.

<sup>26</sup> Ba mu ko defee Suleymaan dajale watiir yaak fas ya, muy junni ak ñeenti téeméeri watiir (1 400), ak fukki junniy fas ak ñaar (12 000) yu mu yebal ca dëkk ya watiir ya féete, ak ca Yerusalem ga mu nekk. <sup>27</sup> Buur Suleymaan a def xaaalis late biir Yerusalem bay safi doj, garabi seedar di fa saf garabi sikomoor yi ne xas ci suufu tund yi. <sup>28</sup> Fasi Suleymaan, Misra lañu leen daan jëggaanee ak Silisi\*, baana-baanay buur, ca Silisi lañu leen daan jënde. <sup>29</sup> Ab watiir bu ñu jëggaanee Misra, indi, juróom benni téeméeri dogi xaaalis (600) la leen daan dikke, aw fas di téeméer ak juróom fukki dogi xaaalis (150), te noonu lañu ca daan jëndaaleel mboolem buuri Etteen ña ak buuri Siri, indil leen.

## 11

### *Suleymaan moy na*

<sup>1</sup> Ci biir loolu Buur Suleymaan bëggoon na jigéeni yeneen xeet yu bare te bokkul ak doomu Firawna ji mu jëloon: ñuy ay jigéeni Mowabeen ak jigéeni Amoneen ak jigéeni Edomeen ak jigéeni waa Sidon ak jigéeni Etteen. <sup>2</sup> Nñoonu bokk ci xeet, yi Aji Sax ji waxoon bànni Israyil ne leen: «Buleen jëli jabar ci ñoom, ñoom it buñu

takksi ci yeen, ndax kon dinañu leen dëpp, ngeen topp seeni tuur.» Teewul Suleymaan bëgg leen, taq leen. <sup>3</sup> Mu denc ca juróom ñaar téeméeri lingeer (700) ak ñetti téeméeri (300) nekkaale. Soxnaam ya nag dëpp ko.

<sup>4</sup> Ba Suleymaan demee ba màggat, ay soxnaam xiir ko ci topp yeneen yàlla, ba wéetalul Yàllaam Aji Sax ji, na ko Daawuda, baayam wéetale woon. <sup>5</sup> Ba loolu amee Suleymaan di topp tuur ya ñuy wax Astàrt\* di tuuri waa Sidon, ak Milkom, tuuru Amoneen mu siblu ma. <sup>6</sup> Mu def lu ñaaw fi kanam Aji Sax ji. Suleymaan jeexul woon ci Aji Sax ji, na baayam Daawuda jeexe woon ci moom. <sup>7</sup> Ci biir loolu Suleymaan tabaxal Kemos, tuuru Mowab mu siblu ma, ab bérabu jaamookaay ca kaw tund wa féete Yerusalem penku. Mu tabaxaaleel ca Moleg†, tuur mu siblu ma Amoneen ñay jaamu. <sup>8</sup> Mu defal noonu mboolem soxnaam ya xeetoo feneen, ñuy taalal seeni tuur cuuraay, di leen rendil ay sarax.

<sup>9</sup> Aji Sax ji nag mere Suleymaan ndax la mu ko dëddu, moom Aji Sax ji, Yàllay Israyil ji ko feeñu woon ñaari yoon. <sup>10</sup> Dafa santoon Suleymaan ci mbir moomu, ne ko bumu topp tuuri yeneen xeet yi. Waaye deful li ko Aji Sax ji santoon. <sup>11</sup> Aji Sax ji ne Suleymaan: «Gannaaw nii nga defe, sàmmoo sama kóllère, sàmmoo sama dogal yi ma la tegoon, dinaa foqatee nguur gi ci say loxo, jox ko sab surga. <sup>12</sup> Waaye duma ko def ci sag dund ngir sa baay Daawuda. Ci sa loxol doom ju góor laa koy foqatee. <sup>13</sup> Te ba tey du nguur gépp laay foqati. Dinaa bàyyee sa doom genn giir ngir Daawuda sama jaam ba ak Yerusalem gi ma tànn.»

### *Ay noon jógal nañu Suleymaan*

<sup>14</sup> Ba mu ko defee Aji Sax ji gemb ab noon bu jógal Suleymaan. Muy Adàdd, Edomeen ba askanoo ca buurub Edom. <sup>15</sup> Ba Daawuda di xareek waa Edom te Yowab njiital xareem demoon di suuli

\* **10:28** 10.28 Silisi mooy Kewe ba tey. \* **11:5** 11.5 Astàrt tuur mu jigéen la woon bu ay xeeti penku daan jaamu. Ñu yaakaaroon ne dina leen may, ñu jur doom yu bare, seeni jur ak seeni tool it, lépp nangu ba bare. Ñu jàppoon ne Astàrt mooy jabaru tuur ma ñu naan Baal. † **11:7** 11.7 Moleg ak Milkom jàpp nañu ne benn la.

néew ya, Daawuda daa reyoon góori Edomeen ña ñépp. <sup>16</sup> Yowab ak Israyil gépp toog fa juróom benni weer, ba keroog ñu rey góori Edomeen ñépp. <sup>17</sup> Ci biir loolu Adàdd ànd ak ay Edomeen ñu bokkoon ci dagi baayam, daldi daw jëm Misra. Booba Adàdd xale bu góor bu ndaw la woon. <sup>18</sup> Ñu jóge Majan, dem Paran, ànd ak ay waa Paran dem Misra, ca Firawna buuru Misra. Firawna jox Adàdd suuf, may ko kër akub dund. <sup>19</sup> Firawna dafa béggoon Adàdd lool, ba may ko jabar rakki Lingeer Tapenes, jabari boppam. <sup>20</sup> Rakki Tapenes ja am ak Adàdd doom ju góor, di Genubat; Tapenes yor ko ca biir kër Firawna, Genubat nekk ak doomi Firawna, ca biir kër Firawna. <sup>21</sup> Ci kaw loolu Adàdd dégge fa mu nekk ca Misra ne Daawuda nelaw na, fekki ay maamam, te Yowab njiital xare la it dee na. Adàdd ne Firawna: «Yiwi ma, ma dellu sama réew.» <sup>22</sup> Firawna ne ko: «Ana loo ñàkk fii ci man, ba bégga dellu nii sam réew?» Adàdd ne ko: «Du dara sax de, xanaa bégg rekk, nga yiwi ma, ma dem.» <sup>23</sup> Yàlla dellu gemb ab noon bu jógal Suleymaan. Muy Reson doomu Eliyada ma dawee woon ca Adadeser buurub Soba, sangam ba. <sup>24</sup> Mu boole ay farandoom, ànd ak ñoom, jiite leen gannaaw ba Daawuda faagaagalee xarekati sangam. Ñu dem sanc Damaas, moom ko. <sup>25</sup> Reson nag moo noonoo woon Israyil diir ba Suleymaan di dund, dolli ca la leen Adàdd lèjal. Ci kaw loolu Reson falu ca Siri, di bañaaleb Israyil.

<sup>26</sup> Keneen ku jógal Buur Suleymaan di Yerbowam doomu Nebat, Efraymeen bu dëkk Cereda, ndeyam tudd Ceruya, dib jëtun. Ma nga bokkoon ca jawriñi Suleymaan. <sup>27</sup> Ni mu jógale Buur nii la: Suleymaan da doon yékkati sèkkub Milo ba†, di fatt tatay gox ba ñu naan Kër Daawuda miy baayam. <sup>28</sup> Booba Yerbowam xalelu góor bu jambaare la woon. Suleymaan jot koo nemmiku ci biir liggéeyam, ba tax mu tabb ko ca kaw mboolem liggéeykati sañul-bañ, ya askanoo ca Yuusufa.

<sup>29</sup> Mu am bés Yerbowam doon génne Yerusalem. Axiya, yonent bu dëkk Silo ba, dajeek moom ca yoon wa. Ma nga sol mbubb mu bees. Ñoom ñaar rekk ci àll bi. <sup>30</sup> Axiya daldi jàpp ci mbubb mu bees mi mu sol, ne ko tareet, dagg ko fukki dog ak ñaar. <sup>31</sup> Mu ne Yerbowam: «Jëlalal fii sa bopp fukki dog, ndax Aji Sax ji Yàllay Israyil da ne: “Gisal, maa ngi dagge nguur gi ci loxol Suleymaan, te dinaa la ci jox fukki giir. <sup>32</sup> Waaye genn giir gi Suleymaan a koy moom ngir Daawuda sama jaam ba, ak Yerusalem, dëkk ba ma tannée ci mboolem giiri Israyil. <sup>33</sup> Li ko waral mooy dañu maa dëddu, di jaamu Astàrt, tuur mu jigéen mu waa Sidon di jaamu, ak Kemos, tuuru Mowabeen ñi, ak Milkom, tuuru Amoneen ñi. Daño baña topp samay yoon, baña def li ma rafetlu, di sàmm samay dogal ak sama àttey yoon, na ko Daawuda baayu Suleymaan daa defe. <sup>34</sup> Waaye дума jële nguur gépp ci loxoom, ndaxte dama koo def njiit giiru dundam gépp ngir Daawuda sama jaam ba ma tànnal sama bopp, te mu doon jëfe samay santaane ak samay dogal. <sup>35</sup> Du tee ma nangoo nguur gi ci loxol doomam ju góor, jox la ci fukki giir. <sup>36</sup> Doomam nag dinaa ko jox genn giir gi ci des, ngir askanu Daawuda, sama jaam ba, baña fey mukk sama kanam ci biir Yerusalem, dëkk bi ma tànnal sama bopp, dëël fa sama tur. <sup>37</sup> Yaw dinaa la jël, def la nga jiite fépp foo bégg, di buurub Israyil. <sup>38</sup> Te soo defee mboolem li ma la sant, topp samay yoon, di def li ma rafetlu tey jëfe samay dogal ak samay santaane, na ko Daawuda sama jaam ba daa defe, su boobaa dinaa ànd ak yaw te dinaa la sampal kër gu sax, ni ma ko sampale woon Daawuda, te dinaa la jox Israyil. <sup>39</sup> Kon dinaa torxal askanu Daawuda waaye du doon ba fàww.”»

<sup>40</sup> Ba mu ko defee Suleymaan di fexee rey Yerbowam; Yerbowam daw ba Misra, fa Sisag buuru Misra. Mu toog foofa ca Misra, ba Suleymaan nelaw.

### *Suleymaan nelaw na*

† 11:27 11.27 Milo xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkklu ko.

<sup>41</sup> Li des ci mbiri Suleymaan ak mboolom lu mu def ak lu jëm ci xelam mu rafet, bindees na lépp moos ca téere ba ñu dippee Jaloorey Suleymaan. <sup>42</sup> Àpp bi Suleymaan nguuru fa Yerusalem, ci kaw Israyil gépp, ñeent fukki at la. <sup>43</sup> Gannaaw loolu Suleymaan tédd, fekki ay maamam. Gox ba ñuy wax kër Daawuda baayam, fa lañu ko denc, doomam Robowam falu buur, wuutu ko.

## Réew ma xajjalikoo na

(Saar 12.1—22.54)

# 12

### Israyil jàmbo na Robowam

<sup>1</sup> Ba loolu amee Robowam dem dëkk ba ñuy wax Sikem, ndax fa la Israyil gépp daje woon, ngir fal ko buur. <sup>2</sup> Yerbowam doomu Nebat dégge ko ca Misra ga mu dawoon dem, di fa làqu Buur Suleymaan, te togoon foofa ca Misra ba booba. <sup>3</sup> Waa giiri bëj-gànnar woolu ko, ñu daldi ànd mook mbooloo mépp ca Robowam. Ñu ne ko: <sup>4</sup> «Sa baay da noo tegoon njaam gu metti. Léegi yaw dangay woyofal sunu liggéey bu metti bi nu sa baay sëf, te yolomal buumu njaam gu teen gi mu nu gáll, kon nu jaamu la.» <sup>5</sup> Mu ne leen: «Demleen ba mu am ñetti fan, ngeen délsi.» Mbooloo ma dem.

<sup>6</sup> Buur Robowam giseek mag ña daa taxawu Suleymaan baayam ba muy dund. Mu ne leen: «Lu ngeen may digal, ma wax ko mbooloo mii?» <sup>7</sup> Ñu ne ko: «Soo nangulee tey mbooloo mii, déggal leen, wax leen kàddu yu rafet, say jaam lañuy doon ba fàww.»

<sup>8</sup> Robowam nag dégluwul waxi mag ña, xanaa dem giseek xale yu góor, ya màggandoo ak moom te di ko taxawu. <sup>9</sup> Mu ne leen: «Lu ngeen may digal ma wax ko mbooloo mii ne ma, ma yolomal buumu njaam gi leen sama baay gállon?»

<sup>10</sup> Xale yu góor ya mu màggandool ne ko: «Mbooloo mii ne la sa baay da leena gállon buumu njaam gu teen, waaye yaw yolomalal leen ko; li nga leen di wax mooy lii: “Sama baaraamu sanqleeñ moo gëna diis sama tànku baay. <sup>11</sup> Sama baay

a leena tegoon njaam gu metti, waaye man maay yokk seen njaam, ba mu gëna metti. Te sama baay ay yar la leen daan cawe, waaye man ay leraw yu ñu kor weñ laa leen di cawe.”»

<sup>12</sup> Ñetteelu bés ba Yerbowam ànd ak mbooloo ma mépp, dellu ca Robowam, noonee leen ko Buur waxe woon ne leen ñu dem ba mu am ñetti fan, ñu délsi. <sup>13</sup> Buur tontu mbooloo ma kàddu gu ñagas, bàyyi la ko mag ña digaloon. <sup>14</sup> Na ko xale yu góor ya digale la waxeek ñoom, ne leen: «Sama baay a leen tegoon njaam gu metti, waaye man maa koy yokk, mu gëna metti. Te sama baay ay yar la leen daa cawe, waaye man ay leraw yu ñu kor weñ laa leen di cawe.» <sup>15</sup> Noonu la Buur tanqamloo mbooloo ma, te Aji Sax ji moo walbatee noonu mbir ma, ngir amal wax, ja mu waxoon Yerbowam doomu Nebat, Axiya waa Silo ba jottli.

<sup>16</sup> Ba Israyil gépp gisee na leen Buur tanqamloo, dañu koo tontu ne ko:

«Ana lu nu bokk ak Daawuda,  
lu nu séq ak doomu Yese?

Bànni Israyiloo, ca seeni xayma!

Yaw askanu Daawuda, xoolalal sa bopp sa kër.»

Ba mu ko defee bànni Israyil dellu ca seeni xayma; <sup>17</sup> Teewul bànni Israyil ya dëkkoon ca dëkki Yuda, Robowam wéy di seen buur. <sup>18</sup> Ci kaw loolu Buur Robowam yónni Adoram may sase liggéeyi sañulbañ ya. Teewul Israyil gépp bokk dóor ko ay doj ba mu dee. Buur Robowam daldi gaaw war watiir, daw làquji Yerusalem. <sup>19</sup> Noonu la Israyil fippoo ci kaw waa kër Daawuda ba sunu jonni yállay tey.

<sup>20</sup> Ci biir loolu Israyil gépp dégg ne Yerbowam délsi na; ñu woote ndaje, woo ko ca, fal ko buurub Israyil gépp. Kenn farul ak waa kër Daawuda, lu moy waa giirug Yuda donj.

<sup>21</sup> Ci kaw loolu Robowam agsi Yerusalem, daldi woo waa kër Yuda gépp, ñook giirug Beñamin, ñu daje di téeméer ak juróom ñett fukki junniy nit (180 000), diy ñeyi xare. Ñu nara xareek waa kër Israyil, ngir delloo nguuru ga ca loxil Robowam doomu Suleymaan.

22 Ci biir loolu kàddug Yàlla dikkal góoru Yàlla gu ñuy wax Semaya. Mu ne ko: 23 «Waxal Robowam doomu Suleyman buurub Yuda, ak waa kër Yudak Beñamin ak mbooloo ma ca des, ne leen: 24 «Aji Sax ji dafa wax ne: Buleen jóg di xeex ak seen bokki bànni Israyil. Na ku nekk ñibbi kërám, ndax ci man la mbir mii sababoo.» Ñu dégg kàddug Aji Sax ji, walbatiku dem, noonee ko Aji Sax ji waxe.

### *Buurub Israyil bokkaale na*

25 Gannaaw loolu Yerbowam tabaxaat Sikem, dëkk ba ca diiwaanu tundi Efrayim, daldi fay dëkk. Mu jóge foofa tabaxaat dëkk ba ñuy wax Penuwel. 26 Yerbowam nag di wax ca xelam naa: «Léegi nguur gi dellu ci loxol waa kër Daawuda. 27 Bu mbooloo mii demee di sarxali ca kër Aji Sax ji ca Yerusalem, seen xol dina walbatiku ne napp ca seen sang, Robowam buurub Yuda. Su ko defee ñu rey ma, dellu ca Robowam buurub Yuda.»

28 Ci kaw loolu Buur seetluwaat mbir ma, daldi sàkklu ñaari wëlluy wurus. Mu ne mbooloo ma: «Yeen waa Israyil, bare ngeen lu ngeen di jaabante yoonu Yerusalem. Xool-leen fii kay! Seen yàlla ya leen génne woon réewum Misraa ngi.» 29 Ba loolu amee mu teg wenn wëllu wa ca dëkk ba ñuy wax Betel, wa ca des mu tegi ko ca Dan. 30 Mbir moomu doon bàkkaar. Mbooloo ma dox jiitu wenn wëllu wa, ba àgg Dan. 31 Ci kaw loolu Yerbowam tabax ay bérabi jaamookaay, ba noppi tabb ay sarxalkat ci baadoolo yu bokkul ci askanu Lewi.

32 Ba mu ko defee Yerbowam dogal màggalug fukki fan ak juróom ca weeru juróom ñetteel wa. Mu mel ni màggal gay am Yuda. Yerbowam rendi ay sarax ca sarxalukaay ba. Noonu la def Betel, rendil fa ay sarax wëllu ya mu defarlu woon, defal ko wëllu ya sarax. Ci biir loolu mu tabb ca Betel ay sarxalkat ngir bérabi jaamookaay yooyu mu sos. 33 Nii la rendee ay sarax ca kaw sarxalukaay ba mu sàkklu ca Betel, ca fukki fan ak juróom ca weeru juróom ñetteel wa, muy weer wu mu tànnal boppam. Ba mu ko defee mu dogalal waa Israyil màggal

googu, daldi yéeg ca kaw sarxalukaay ba, ngir taal fa sarax su ñuy lakk.

## 13

### *Nitu Yàlla àddu na ca Betel*

1 Yàlla-woo-yàlla, genn góoru Yàlla jóge Yuda, dikk ba Betel ci ndigalal Aji Sax ji, fekk Yerbowam taxaw ca sarxalukaay ba, nara taal saraxu cuuraay. 2 Góor ga xaacu, gëdd sarxalukaay ba ci ndigalal Aji Sax ji, daldi ne: «Yaw sarxalukaay bi, éey sarxalukaay bii! Aji Sax ji dafa wax ne: «Xamal ne doom ju góor dina juddoo kër Daawuda, Yosya lay tudd. Sarxalkati bérabi jaamookaay yiy taal saraxu cuuraay ci sa kaw, ñoom lees di rendi ci sa kaw. Yaxi nit lees di lakk ci sa kaw.»» 3 Góor ga joxe na ca bésab keroog ab takk; mu ne: «Takk bii la ci Aji Sax ji biral: «Seetluleen, sarxalukaay bi dina xar ñaar, dóom bi ci kaw sottiku.»»

4 Naka la Buur Yerbowam dégg na góoru Yàlla ga xaacoo, gëdd sarxalukaayu Betel ba, mu daldi koy tàllal loxoom, foofa ca sarxalukaay ba. Mu ne: «Jàppleen ko!» Loxo ba mu ko tàllal nag ne kàdd, manatu koo bank. 5 Sarxalukaay ba xar ñaar, dóom ba tuuroo ca sarxalukaay ba, ne wàww. Muy takk ba góoru Yàlla ga joxe woon ci ndigalal Aji Sax ji. 6 Buur ne góoru Yàlla ga: «Rikk tinul ma sa Yàlla Aji Sax ji te ñaanal ma, sama loxo mana banku.» Góoru Yàlla ga tinul Buur Aji Sax ji, loxoom bankuwaat, mel na mu meloon.

7 Ci kaw loolu Buur wax góoru Yàlla ga ne ko: «Ñëwal nu dem kër ga, nga xéewlu, ba noppi ma am lu ma la may.»

8 Góoru Yàlla ga nag ne Buur: «Soo ma joxoon sa genn-wàllu kër sax, дума ànd ak yaw te дума sex dugub it mbaa may naan um ndox ci bii bérab, 9 ndax loolu lañu ma sant ci ndigalal Aji Sax ji, ne ma: «Bul sex dugub, bul naan um ndox te bul walbatiku jaare yoon wa nga jaare woon bi ngay ñëw.»» 10 Góor ga nag awe feneen, baña walbatiku awe fa mu awoon ba muy dikk Betel.

### *Ab yonent nattu na moroomam*

11 Booba ab yonent bu màggat a nga woon ca Betel. Ay doomam yu góor



dikk. Kenn ci ñoom nettali ko mboolem la góoru Yàlla ga def bésuub keroog ca Betel ak la mu wax Buur. Ñu yegge ko seen baay. <sup>12</sup> Seen baay laaj leen ne leen: «Ana yoon wu mu jaare?» Fekk na doomam yu góor ya gisoon nañu fa góoru Yàlla ga jaare woon, bàyyikoo Yuda. Ñu wax ko. <sup>13</sup> Mu ne leen: «Takkal-leen ma mbaam mi.» Ñu takkal ko mbaam ma, mu war, <sup>14</sup> toppi góoru Yàlla ga, fekk ko ci genn ker garabu terebent. Mu ne ko: «Yaa di góoru Yàlla gi jóge Yuda?» Mu ne ko: «Waaw.» <sup>15</sup> Mu ne ko: «Kaay, nu dem kër ga, nga sex dugub, boog.» <sup>16</sup> Mu ne ko: «Duma mana walbatiku ànd ak yaw, manumaa sex dugub it mbaa may bokk ak yaw ndoxum naan ci bii bérab. <sup>17</sup> Ndaxte dañu maa wax ci ndigalal Aji Sax ji ne ma: «Bu fa sex dugub, bu fa naan um ndox te bul walbatiku jaare yoon wa nga jaare woon bi ngay ñew.» <sup>18</sup> Mu dellu ne ko: «Man itam yonent laa ni yaw. Malaaka wax na ma ci ndigalal Aji Sax ji ne ma: «Wañni ko, mu ànd ak yaw sa kër, sex dugub, naan ndox.»» Fekk na la muy wax amul. <sup>19</sup> Mu walbatiku ànd ak moom ca kër ga, sex fa dugub, naan fa ndox.

<sup>20</sup> Ba ñu toogee ca ndab la, kàddug Aji Sax ji dikkal yonent ba wañni góoru Yàlla ga. <sup>21</sup> Mu àddu ca kaw ne góoru Yàlla ga jóge Yuda: «Aji Sax ji dafa wax ne: Gannaaw tebbi nga waxi Aji Sax ji te defoo li la sa Yàlla Aji Sax ji sant, <sup>22</sup> xanaa walbatiku di sex dugub, di naan ndox ci bérab bi mu la waxoon ne la bu fi sex dugub, bu fi naan ndox, sab néew du fekki say maam ca seen bàmmeel.» <sup>23</sup> Ba góoru Yàlla ga sexee dugub ba naan ndox, yonent ba ko wañni woon takkal ko mbaam ma. <sup>24</sup> Mu dem, gaynde dogale ko, rey ko, néewam ne lareet ca yoon wa, mbaam maak gaynde ga taxaw ca wet ga. <sup>25</sup> Naka la ay nit jaare foofa, séenuñu lu moy néew ba ne lareet ca yoon wa, gaynde ga taxaw ca wet ga. Ñu dem yegge ko waa dëkk, ba yonent bu màggat ba dëkkoon.

<sup>26</sup> Yonent booba ko wañni woon ca yoon wa nag dégg ko ne: «Góoru Yàlla gaa! Ka tebbi woon waxi Aji Sax ji, Aji Sax

ji boole kook gaynde gi, mu fàdd ko, rey ko. Moom la ko kàddug Aji Sax ji waxoon.» <sup>27</sup> Mu ne doom ya: «Takkal-leen ma mbaam mi.» Ñu takkal ko. <sup>28</sup> Mu dem fekk néew ba ne lareet ca yoon wa, mbaam maak gaynde ga taxaw ca wet ga. Gaynde ga lekkul néew ba, fàddul mbaam ma. <sup>29</sup> Yonent ba yékkati néewu góoru Yàlla ga, teg ko ca kaw mbaam ma, délloosi ko. Noonu la yonent bu màggat ba ñibbee dëkkam ngir rob ko, jooy ko. <sup>30</sup> Mu denc néew ba ca bàmmeelu boppam. Ñu di ko jooy, naan: «Wóoy sunu mbokk ma!» <sup>31</sup> Gannaaw ba ñu ko robee, mu wax doomam yu góor ya ne leen: «Bu ma faatoo, nangeen ma rob ci bàmmeel bii ñu denc góoru Yàlla gi. Fi weti yaxam ngeen di téral samay yax. <sup>32</sup> Ndaxte li wér te wóor déy, wax ji mu jottli ci ndigalal Aji Sax ji, ba muy gëdd sarxalukaayu Betel bi ak mboolem bérabi jaamookaay yi ci dëkki Samari, wax jooju dina am.»

<sup>33</sup> Gannaaw loolu Yerbowam dëppul yoonam wu bon wa mu topp. Dafa dellu tabb ci biir baadoolo yi ay sarxalkat ngir bérabi jaamookaay ya. Ku bëgg rekk mu tabb la, ngay sarxalkat ca bérabi jaamookaay ya. <sup>34</sup> Loolu nag di bàkkaar bu réy ci biir kër Yerbowam, ba tax askanam daanu, ba raaf fi kaw suuf.

## 14

### *Aw tiis dikkal na Yerbowam*

<sup>1</sup> Ca yooyu jamono Abya doomu Yerbowam ju góor wopp. <sup>2</sup> Yerbowam wax soxnaam, ne ko: «Ayca, doxal soppiji col, ba kenn du xam ne sama soxna nga, te nga dem Silo. Dama ne, Axiya yonent baa nga fa. Moo ma waxoon ne ma dinaa falu buur, jiite mbooloo mii. <sup>3</sup> Yóbbaleel fukki mburu ak nàkk yu ndaw ak taxub lem te nga dem ca moom. Moom dina la wax nan la mbiri gone gii di deme.» <sup>4</sup> Soxnas Yerbowam def noona, daldi dem Silo, agsi kër Axiya.

Booba Axiya gisatul. Bët ya daa muuru ndax màggat. <sup>5</sup> Waaye fekk na Aji Sax ji wax Axiya, ne ko: «Dama ne, soxnas Yerbowam a ngi ñew di leerlusi mbirum

doomam ju góor ci yaw, ndax dafa wopp. Bu dikkee keneen lay mbubboo.» Aji Sax ji ne Axiya, mu wax ko nàngam ak nàngam.

<sup>6</sup> Ba loolu amee Axiya dégg tànk ndaw sa ca bunt ba. Mu ne ko: «Soxnas Yerbowam, agsil! Ana looy mbubboo keneen nii? Man de yóbbante nañu ma ci yaw xibaar bu tiis. <sup>7</sup> Demal ne Yerbowam: “Aji Sax ji, Yàllay Israyil dafa wax ne: Dama laa yékkati ci biir mbooloo mi, fal la nga jiite Israyil sama ñoñ. <sup>8</sup> Damaa foqatee nguur gi ci loxol waa kër Daawuda, jox la ko. Waaye meloo ni Daawuda, sama jaam ba daan jéfe samay santaane, toppe ma léppi xolam, du def lu moy lu ma rafetlu. <sup>9</sup> Def nga musiba, ba raw mboolem ñu la jiitu, dem di sàkkal sa bopp yeneen yàlla ak tuur yu ñu móole weñ, ba sama xol fees. Man mii nga xarab, dëddu ma. <sup>10</sup> Moo tax дума def lu moy wàcce musiba ci kër Yerbowam.

Dinaa faagaagal ku mana taxaw, colol, te bokk ci Yerbowam, ba ci ku gëna néew doole te tumurànke fi digg Israyil.

Dinaa buub kër Yerbowam, sànni, ni ñuy buubee neefare, ba mu jeex tàkk.

<sup>11</sup> Ku Yerbowam deele ci dëkk bi, xaj yi lekk;

ku ca médd ca àll ba, njanaaw ya for.

Aji Sax ji wax na ko.”

<sup>12</sup> «Yaw nag jógal ñibbi sa kër. Booy teg sa tànk ca biir dëkk ba rekk, gone gi dee. <sup>13</sup> Israyil gépp dinañu ko jooy. Kooku rekk déy lees di denc ci bàmmeel, ci ku bokk ci Yerbowam, ngir ci moom donj la Aji Sax ji Yàllay Israyil gis lu baax, ci waa kër Yerbowam. <sup>14</sup> Aji Sax ji dina falal boppam buur bu jiite Israyil, te kooku dina faagaagal waa kër Yerbowam. Bés bi taxaw na jeeg! Ana lu ciy topp?

<sup>15</sup> Aji Sax ji dina fàdd Israyil. Dinañu mel ni gattax guy foy-foyi cim ndox. Dina déjjatee Israyil ci suuf su baax sii mu joxoon seeni maam, tasaare leen ca wàllaa dexu Efraat, ndax dañoo samp ay xer yu ñuy jaamoo Asera, di merloo Aji Sax ji. <sup>16</sup> Aji Sax ji dina wacc Israyil ndax bàkkaar Yerbowam yi mu bàkkaar te di ko bàkkaarloo Israyil.»

<sup>17</sup> Ba loolu amee soxnas Yerbowam jóg, bàyyikoo fa, ba àgg Tirsa. Naka la agsi ca bunt kër ba, xale ba dee. <sup>18</sup> Ñu rob ko, Israyil gépp jooy ko, muy la Aji Sax ji waxoon, Yonent Yàlla Axiya jaamam ba jottli.

<sup>19</sup> Li des ci mbiri Yerbowam, ay xareem ak na nguuram deme woon, bindees na lépp moos ca téere ba ñu dippee Jaloorey buuri Israyil ca seeni jant. <sup>20</sup> At ya Yerbowam falu buur ñaar fukki at la ak ñaar. Gannaaw loolu mu saay, fekki ay maamam. Nadab doomam falu, wuutu ko.

### *Robowam falu na ca Yuda*

<sup>21</sup> Robowam doomu Suleymaan moo doon buurub Yuda. Amoon na ñeent fukki at ak benn ba muy falu. Fukki at ak juróom ñaar la péeyoo Yerusalem, dëkk ba Aji Sax ji tànn ci mboolem giiri Israyil, dëel fa turam. Ndeyam di Naama, dib Amoneen. <sup>22</sup> Waa Yuda nag di def li Aji Sax ji ñaawlu, ba di ko fiirloo firaange gu raw ga ko seen maam daa fiirloo ndax seen bàkkaar. <sup>23</sup> Dañoo sàkkal seen bopp ay bérabi jaamookaay, samp ay tuuri doj aki xer yu ñuy jaamoo Asera ca kaw mboolem tund wu kawe mbaa ker garab gu naat. <sup>24</sup> Réew ma amoon na sax ñuy jaay seen bopp fa ñuy màggale tuur ya. Ñuy def mboolem ñaawtéefi xeet ya Aji Sax ji dàqoon ngir bànni Israyil.

<sup>25</sup> Ba Buur Robowam faloo, ba dugg ci juróomeelu atu nguuram, Sisag buuru Misra song Yerusalem. <sup>26</sup> Ci kaw loolu Sisag jël alali kër Aji Sax ji, ak alali kër Buur. Lépp la jël ba ca mboolem pakki wurus ya Suleymaan defarlu woon. <sup>27</sup> Ba mu ko defee Buur Robowam defarlu ay pakku xàñar yu wuutu yu wurus ya. Mu teg ko ca loxoy njiiti dag yay wattu buntu kër Buur. <sup>28</sup> Saa yu Buur dee duggsi ca kër Aji Sax ji, dag ya nàbb pakk ya, bu ñu noppee delloo ko ca néegu dag ya.

<sup>29</sup> Li des ci mbiri Robowam ak mboolem la mu def, bindees na ko moos ca téere ba ñu dippee Jaloorey buuri Yuda ca seeni jant. <sup>30</sup> Xare masula dakk diggante Robowam ak Yerbowam. <sup>31</sup> Gannaaw

gi Buur Robowam tëdd, fekki ay maamam, ñu denc ko fa ay maamam ca gox ba ñu naan Kër Daawuda. Ndeyam a doon Naama, Amoneen ba. Ci kaw lool doomam Abiyam falu buur, wuutu ko.

## 15

### *Abiyam falu na ca Yuda*

<sup>1</sup> Ca fukki at ak juróom ñetteelu ngu-urug Yerbowam, ca la Abiyam doomu Nebat falu buur ca kaw Yuda. <sup>2</sup> Ñetti at la nguuru fa Yerusalem te yaayam moo doon Maaka doomu Abisalom\*. <sup>3</sup> Muy roy nag baayam ca mboolem bàkkaar ya mu daan def. Te it wéetalul woon Yàllaam Aji Sax ji ni maamam Daawuda. <sup>4</sup> Terewul Daawuda tax Aji Sax ji Yàllaam may ko doom ju góor ju koy wuutu ca Yerusalem, ndax askanu Daawuda baña fey, Yerusalem it mana ñoŋ. <sup>5</sup> Li ko waral mooy Daawuda da daan jëfe njub lu Aji Sax ji rafetlu, te giiru dundam gépp teggiwul lenn lu ko Aji Sax ji sant lu moy ci mbirum Uri Etteen ba.† <sup>6</sup> Xare masula dakk diggante waa kër Robowam ak Yerbowam giiru dundu Abiyam gépp.

<sup>7</sup> Li des ci mbiri Abiyam ak mboolem lu mu def, bindees na ko moos ca téere ba ñu dippee Jaloorey buuri Yuda ca seeni jant. Xare it jiboon na diggante Abiyam ak Yerbowam. <sup>8</sup> Gannaaw gi Buur Abiyam tëdd, fekki ay maamam, ñu denc ko ca gox ba ñu naan Kër Daawuda, Asa doomam falu buur, wuutu ko.

### *Asa falu na ca Yuda*

<sup>9</sup> Ba Buur Yerbowam faloo Israyil, ba dugg ñaar fukkeelu atu nguuram, ca la Asa falu buur, jiite Yuda. <sup>10</sup> Ñeent fukki at ak benn la Buur Asa péeyoo Yerusalem. Maaka doomu Abisalom ju jigéen moo doon maamam. <sup>11</sup> Asa nag di def njub gi Aji Sax ji rafetlu, Daawuda maamam. <sup>12</sup> Dàqe na ca réew ma ñu daan jaay seen bopp fa ñuy màggale tuur ya. Mu jële ca réew ma kasaray tuur ya fa ay maamam defoon yépp. <sup>13</sup> Maaka maamam ju

jigéen sax, Asa xañ na ko céru lingeer yaayu buur ba mu amoon, ndax Maaka moo sàkkaloon Asera tuur ma, ab xer bu seexluwu bu ñu koy màggale. Asa gor xeru maamam ja, lakk ko ca xuru Sedoron. <sup>14</sup> Waaye bérabi jaamookaay ya, jëleesu ko fa, doonte Asa, Aji Sax ji la wéetaloon cib xolam, giiru dundam gépp. <sup>15</sup> Moo indi ca kër Aji Sax ji, jumtukaay yu sell yu baayam ya, ak jumtukaay yu sell yu boppam, muy xaaalis ak wurus aki ndab.

<sup>16</sup> Xare nag masula dakk diggante Asa ak Basa buurub Israyil seen giiru dund gépp. <sup>17</sup> Ci biir loolu Basa buurub Israyil song Yuda, daldi dàbbli dëkk ba ñuy wax Raama‡, ba kenn du dugg jëm ca Asa buurub Yuda mbaa muy génn. <sup>18</sup> Asa dajale mboolem luy xaaalis ak wurus wu desoon ca denci kër Aji Sax ji, ak denci kër Buur. Mu teg ko ci loxoy jawriñam ña. Ba mu ko defee Buur Asa yebal leen ca buurub Siri ba ca Damaas, di Ben Addàd doomu Tabrimon doomu Esiyon.

Asa nag ne Ben Addàd: <sup>19</sup> «Kóllëree dox sama digganteek yaw, na mu doxe woon sama diggante baay ak sa baay. Lii nag maa la ko may, xaaalis la ak wurus. Te nga dogoo rekk ak Basa buurub Israyil, ndax mu jóge samam réew.» <sup>20</sup> Ben Addàd déggal Buur Asa, daldi yebal njiiti xarey gàngooram ca dëkki Israyil. Ni la nangoo dëkk ya ñuy wax Yon ak Dan ak Abel Bet Maaka ak diiwaanu Kineret gépp, boole ca diiwaanu Neftali gépp. <sup>21</sup> Ba ko Basa dégge, Raama ga mu doon dàbbli la ba, ba dem toogi Tirsà.

<sup>22</sup> Ba loolu amee Buur Asa joxe ndigal, woolu waa Yuda gépp, kenn desul. Ñu ànd jëleji ca Raama doj yaak bant ya Basa doon tabaxe. Buur Asa tabax ca dëkk ba ñuy wax Geba gu giirug Beñamin, tabax ca Mispa.

<sup>23</sup> Li des ci mbiri Asa ak mboolem njàmbaar ak la mu def yépp ak dëkk ya mu tabax, bindees na lépp moos ca téere ba ñu dippee Jaloorey buuri Yuda ca

\* **15:2** 15.2 Abisalom ak Absalom jàpp nañu ne kenn ki la. † **15:5** 15.5 Seetal ci 2.Samiyel 11. ‡ **15:17** 15.17 Raama ma nga féete woon Yerusalem bëj-gannaar, tollu diggante ñaari réew yi. Mu nekkoon ci kaw tund wu aw yoon jaar, jóge péeyu Israyil, jëm Yerusalem.

seeni jant. Ba Asa demee ba màggat nag, jàngoroy t ànk la ame woon. <sup>24</sup> Gannaaw gi mu tèdd, fekki ay maamam, ñu denc ko ca gox ba ñu naan Kër Daawuda maamam. Yosafat doomam falu buur, wuutu ko.

### *Nadab falu na ca Israyil*

<sup>25</sup> Ba Asa buurub Yuda duggee ñaareelu atu nguuram, ca la Nadab doomu Yerbowam falu buur, jiite Israyil. Nadab jiite na Israyil ñaari at, <sup>26</sup> di jëfe lu Aji Sax ji ñaawlu, aw ci t ànki baayam, di bàkkaarloo Israyil. <sup>27</sup> Ci biir loolu doomu Axiya, ji giiroo ci Isaakar te ñu di ko wax Basa, daldi fexeel Nadab, jam ko ca Gibeton gu Filisteen ña. Fekk Nadab ànd ak Israyil gépp, gaw Gibeton. <sup>28</sup> Basa daldi rey Nadab, yemook ba Asa buurub Yuda di dugg ñetteelu atu nguuram. Basa falu buur, wuutu Nadab. <sup>29</sup> Naka la falu, daldi rey waa kër Yerbowam gépp. Bàyyiwul kenn kuy noyyi te bokk ci Yerbowam. Mu faagaagal leen, muy la Aji Sax ji waxoon, Axiya jaamam ba ca Silo jottli. <sup>30</sup> Li ko waral mooy bàkkaari Yerbowam yi mu bàkkaar te bàkkaarloo ko waa Israyil, di merloo Aji Sax ji, Yàllay Israyil, ba feesal xolam.

<sup>31</sup> Li des ci mbiri Nadab ak mboolem lu mu def, bindees na ko moos ca téere ba ñu dippee Jaloorey buuri Israyil ca seeni jant.

<sup>32</sup> Xare masula dakk diggante Asa ak Basa buurub Israyil, seen giiru dund gépp.

### *Basa falu na ca Israyil*

<sup>33</sup> Ba Asa buurub Yuda duggee ñetteelu atu nguuram, ca la Basa doomu Axiya falu buur ca Israyil gépp, péeyoo Tirsa. Nguuru na ñaar fukki at ak ñeent. <sup>34</sup> Da daan def li Aji Sax ji ñaawlu, aw ci t ànki Yerbowam ak bàkkaaram ya mu daan bàkkaarloo Israyil.

## 16

<sup>1</sup> Gannaaw loolu kàddug Aji Sax ji dikkal Yewu doomu Anani, di rébb Basa. Mu ne ko: <sup>2</sup> «Damaa fekk nga maaseek pëndub suuf, ma yékkati la, jüital la, nga yilif Israyil sama ñoñ. Nga aw

nag ci yoonu Yerbowam, di bàkkaarloo Israyil sama ñoñ, ba ma mer ndax seeni bàkkaar. <sup>3</sup> Kon dama ne, dinaa la far, yaw Basa, yaak sa waa kër. Dinaa def sa kër mel ni kër Yerbowam doomu Nebat.

<sup>4</sup> Ku Basa deele ci dëkk bi, xaj yi lekk; ku médd ca àll ba, njanaaw ya for.»

<sup>5</sup> Li des ci mbiri Basa ak la mu def ak njambaaram, bindees na lépp moos ca téere ba ñu dippee Jaloorey buuri Israyil ca seeni jant. <sup>6</sup> Gannaaw loolu Buur Basa saay, fekki ay maamam, ñu denc ko Tirsa. Ela doomam falu buur, wuutu ko.

<sup>7</sup> Te itam ba kàddug Aji Sax ji dikkalee Yonent Yàlla Yewu doomu Anani ci mbirum Basa ak waa kër am, li ko waral mooy la Basa def lépp, di roy waa kër Yerbowam, Aji Sax ji ñaawlu ko ba xolam fees. Rax ci dolli Basa rey waa kër Yerbowam.

### *Ela falu na ca Israyil*

<sup>8</sup> Ba Asa buurub Yuda duggee ñaar fukkeelu atu nguuram ak juróom benn, ca la Ela doomu Basa falu buur, jiite Israyil. Péeyoo na Tirsa diiru ñaari at. <sup>9</sup> Simri, jawriñam ba yilifoon genn-wàllu watiiri xareem, moo ko fexeel. Booba Elaa ngay naan ba màndi ca kër Arsa, ka yor mbiri kër am ca Tirsa. <sup>10</sup> Simri duggsi, jam ko, mu dee. Loolu yemook ba Asa buurub Yuda di dugg ñaar fukkeelu atu nguuram ak juróom ñaar. Simri falu, wuutu ko.

<sup>11</sup> Simri falu ba toog ci jal bi, daldi rey mboolem waa kër Basa. Bàyyiwu ca kuy taxaw, colol; du mbokk, du xarit. <sup>12</sup> Simri faagaagal waa kër Basa gépp, muy la Aji Sax ji waxoon, ba mu rébbee Basa, Yonent Yàlla Yewu jottli. <sup>13</sup> Li ko waral di mboolem bàkkaar yi Basa ak doomam Ela bàkkaar te bàkkaarloo ko Israyil, ba feesal xolu Aji Sax ji Yàllay Israyil ndax seen tuuri neen.

<sup>14</sup> Li des ci mbiri Ela ak mboolem lu mu def, bindees na ko moos ca téere ba ñu dippee Jaloorey buuri Israyil ca seeni jant.

### *Simri falu na ca Israyil*

<sup>15</sup> Ba Asa buurub Yuda duggee ñaar fukkeelu atu nguuram ak juróom ñaar, ca la Simri falu. Mu nguuru diiru juróom ñaari fan ca Tirsa. Booba mbooloom xareem Israyil a nga jógal dëkkub Filisteen

ba ñuy wax Gibeton. <sup>16</sup> Mbooloo ma ca dal ba dégg ñu naan: «Simri de lalal na Buur pexe, ba rey ko.» Israyil gépp daldi fal buur Omri, ma jiite woon mbooloom xarem Israyil. Mu moom Israyil bésub keroog ca dal ba. <sup>17</sup> Omri ak Israyil gépp bàyyikoo Gibeton, ànd gawi dëkk ba ñuy wax Tirsa. <sup>18</sup> Ba Simri gisee ne nangu nañu dëkk ba, daa dugg kër Buur, jáll ca biir-a-biir, daldi taal kër ga ca kawam, dee. <sup>19</sup> Li ko waral mooy bàkkaar yi mu bàkkaar, di def lu bon lu Aji Sax ji ñaawlu, aw ci tànkì Yerbowam, di bàkkaarloo Israyil.

<sup>20</sup> Li des ci mbiri Simri ak pexe ma mu laloon, bindees na lépp moos ca téere ba ñu dippee Jaloorey buuri Israyil ca seeni jant.

<sup>21</sup> Ba mu ko defee mbooloom Israyil séddlikoo, def ñaari xaaj. Genn-wàllu mbooloo ma topp ca gannaaw Tibni, nar koo fal buur. Tibni nag, Ginat ay baayam. Genn-wàll ga ca des ànd ak Omri. <sup>22</sup> Mbooloom Omri épp doole mbooloom Tibni doomu Ginat. Tibni daldi dee, Omri di buur.

### *Omri falu na ca Israyil*

<sup>23</sup> Ba Asa buurub Yuda duggee fanweereelu atu nguuram ak benn, ca la Omri falu buur, jiite Israyil. Omri nguuru na diiru fukki at ak ñaar. Mu péeyoo Tirsa juróom benni at. <sup>24</sup> Omri nag dem ca Semer, jènde ca moom tundu Samari ci juróom ñaar fukki kiloy xalis. Omri tabax ca kaw tund wa, dippee dëkk ba mu tabax Samari, mu dëppook Semer, turu boroom tund wa.

<sup>25</sup> Teewul Omri di def lu bon lu Aji Sax ji ñaawlu, ba gëna bàkkaar mboolem ña ko jiitu. <sup>26</sup> Daa aw ci tànkì Yerbowam doomu Nebat ci mboolem lu mu daan def ba ci bàkkaaram bi mu daan bàkkaarloo Israyil, di jógal xolu Aji Sax ji Yállay Israyil ci seen tuuri neen.

<sup>27</sup> Li des ci mbiri Omri aki jëfam ak njàmbaram, bindees na lépp moos ca téere ba ñu dippee Jaloorey buuri Israyil ca seeni jant. <sup>28</sup> Buur Omri saay, fekki ay

maamam, ñu denc ko ca Samari. Axab doom ja falu buur, wuutu ko.

### *Axab falu na Israyil*

<sup>29</sup> Ba Asa buurub Yuda duggee fanweereelu atu nguuram ak juróom ñett, ca la Axab doomu Omri falu, jiite Israyil. Axab doomu Omri nguuru na Israyil ñaar fukki at ak ñaar, péeyoo Samari.

<sup>30</sup> Axab doomu Omri di def li Aji Sax ji ñaawlu, ba raw mboolem ña ko jiitu. <sup>31</sup> Mu sàlloo bàkkaari Yerbowam doomu Nebat. Loolu doyatu ko, mu jël jabar Yesabel doomu Etbal, buurub waa Sidon ña. Mu dem bay jaamu seen tuur mi ñuy wax Baal, di ko sujjóotal. <sup>32</sup> Mu yékkatil Baal ab sarxalukaay ca kër Baal, ga mu tabax ca Samari. <sup>33</sup> Axab teg ca samplu xer wu ñuy jaamoo Asera. Axab def na lu rawati la mboolem buuri Israyil ya ko jiitu defoon, ba feesal xolu Aji Sax ji, Yállay Israyil.

<sup>34</sup> Ca jamonoy Axab la Iyel ma dëkk Betel tabaxaat Yeriko. Abiram taawam la Iyel ñàkk ba muy téral kenug tabax ba, teg ca ñàkk Segub, am caatam ba muy taxawal bunti dëkk ba. Mu dëppook kàddug Aji Sax, ja Yosuwe doomu Nuun jottli woon.\*

## 17

### *Yonent Yàlla Ilyaas yégle na bekkoor*

<sup>1</sup> Ci kaw loolu Yonent Yàlla Ilyaas, ma dëkk Tishi ga ca Galàdd, wax Axab, ne ko: «Giñ naa ci Aji Sax ji, Kiy Dund, di Yállay Israyil ji may jaamu: at yii nu nekk, du taw te du lay, lu moy dama koo wax ci sama làmmiñ.»

<sup>2</sup> Kàddug Aji Sax ji dikkal Ilyaas ne ko: <sup>3</sup> «Jógeel fii, walbatiku jëm penku, te làquji ca xuru Kerit ca penkub dexu Yurdan. <sup>4</sup> Su ko defee, ca ndoxum xur wa ngay naane. Jox naa itam ndigal baaxoñ yi, ñu di la leel foofa.»

<sup>5</sup> Ilyaas dem, def la Aji Sax ji wax, toogi ca xuru Kerit ca penkub dexu Yurdan. <sup>6</sup> Baaxoñ ya di ko indil mburu ak ndawal bëccëg, mburu ak ndawal ngoon, ndox may wal, mu di ca naan.

\* 16:34 16.34 Seetal ci Yosuwe 6.26.

### *Ilyaas waar na jëtun ba*

<sup>7</sup> Mu am ay fan, xur wa ñiis, ndax réew ma tawluwul. <sup>8</sup> Kàddug Aji Sax ji dikkal ko ne ko: <sup>9</sup> «Demal Sarebta ga ca Sidon te toog foofa. Ma ne, sant naa fa ab jëtun, mu may la loo lekk.» <sup>10</sup> Ilyaas dem Sarebta. Ba mu agsee ca buntu dëkk ba, gisul lu moy ab jëtun buy taxan. Mu woo ko ne ko: «Ngalla may ma tuuti ndox ci njaq li, ma naan.» <sup>11</sup> Mu dem di wuti ndox, Ilyaas dellu ko woo, ne ko: «Rikk sàkkal dogu mburu, yótaale ma.» <sup>12</sup> Jëtun ba nag ne ko: «Giñ naa ci Aji Sax ji sa Yàlla jiy dund, awma mburu. Awma lu moy barci-loxob sunguf ca njaq la ak as diw ca tax ba. Gis nga, may for nii ñetti bant, ba toggi ko, nu lekk, maak sama doom, doora dee ak xiif.» <sup>13</sup> Ilyaas ne ko: «Bul ragal dara, demal rekk, def ni nga wax. Waaye jëkk ma cee defaral mburu mu ndaw, indil ma, doora defaral sa bopp, yaak sa doom; <sup>14</sup> ndax Aji Sax ji Yállay Israyil dafa wax ne: “Njaqub sunguf bi du jeex; taxub diw bi it du jeex, ba keroog Aji Sax ji di taw ci réew mi.”»

<sup>15</sup> Jigéen ja dem, def la ko Ilyaas wax, mook waa këram ñu bokk ak Ilyaas lekk ay fan. <sup>16</sup> Njaqu sunguf ba jeexul, taxub diw ba jeexul. Muy la Aji Sax ji waxoon, Ilyaas jottli.

### *Ilyaas ñaanal na doomu jëtun ba*

<sup>17</sup> Ba loolu weesee jigéen, ja dese kër ga, doomam ju góor wopp. Mu mujj metti lool, ba noyyeetul. <sup>18</sup> Jigéen ja ne Ilyaas: «Éy góoru Yàlla gii! Ana lu ma séq ak yaw? Xanaa dangaa ñëw sullisi sama bàkkaar, ba tax nga rey sama doom ju góor jii?»

<sup>19</sup> Ilyaas ne ko: «Jox ma sa doom!» Mu jële ko ca loxoy jigéen ja, yóbbu ko ca néeg ba mu dal ca kaw taax ma, tëral ko ca kaw lalam. <sup>20</sup> Ba mu ko defee Ilyaas ñaan ci Aji Sax ji, ne ko: «Éy Aji Sax ji, sama Yàlla, xanaa doo teg jëtun bii ma dalal, naqar wu tollu ni, di seetaan doomam ju góor muy dee?» <sup>21</sup> Ci kaw loolu mu tëdd, tàlli ñetti yoon ca kaw xale bu góor ba, tey ñaan ci Aji Sax ji naan:

«Éy Aji Sax ji sama Yàlla, rikk bàyyil bakkanu xale bii, mu délsi ci moom!»

<sup>22</sup> Aji Sax ji nangul Ilyaas kàddug ñaanam, bakkanu xale bu góor ba délsi ca moom, mu dund. <sup>23</sup> Ilyaas fab xale ba, jële ko ca néeg ba ca kaw taax ma, wàcce ko ca biir kër ga, jox ko ndeyam. Mu ne ko: «Xoolal, sa doom a ngi dund!» <sup>24</sup> Jigéen ja ne Ilyaas: «Léegi nag xam naa ne nitu Yàlla nga, te kàddug Aji Sax ji ngay waxe moos.»

## 18

### *Ilyaas daje naak surgab Buur Axab*

<sup>1</sup> Ba ñu demee ba mu yàgg, kàddug Aji Sax ji dikkal Ilyaas, ca ñetteelu atu maral wa. Mu ne ko: «Demal jàkkaarlook Axab, ma daldi taw ci kaw réew mi.» <sup>2</sup> Ilyaas tegu ca yoon wa ngir jàkkaarloojeek Axab.

Booba xiif ba metti na ca Samari. <sup>3</sup> Ci biir loolu Axab woolu Abdiyas ma yor këram. Abdiyas doonoon ku ragal Aji Sax ji lool. <sup>4</sup> Ndax ba Yesabel jabari Axab di rey yonenti Aji Sax ji, Abdiyas a boole woon téeméeri yonent, làq leen ci ñaari xuntiy xeer, xunti mu nekk juróom fukk. Mu di leen fa may lekk ak naan.

<sup>5</sup> Axab nag ne Abdiyas: «Duggal ci biir réew mi te seet ci bëti ndox yeek xur yépp. Jombul nu gis ñax, ba mana rawale bakkanu fas yeek berkelle yi, ba du jar nu di leen jekkli.» <sup>6</sup> Ba loolu amee ñu séddoo réew ma, ba mu daj, Axab fii, Abdiyas fee. <sup>7</sup> Abdiyas di dem, Ilyaas ne pemm dajeek moom ca yoon wa. Abdiyas xàmmi ko, sujjóotal ko, dëpp jë ba fa suuf, ne ko: «Kii Ilyaas a, sama sang?» <sup>8</sup> Mu ne ko: «Man a kay! Demal boog wax sa sang Axab, ne ko Ilyaas a ngoog de!»

<sup>9</sup> Abdiyas ne ko: «Ana lu ma def lu bon, sang bi, ba nga di ma booleek Axab, mu di ma rey? <sup>10</sup> Giñ naa ci Aji Sax ji, sa Yàlla jiy dund, amul wenn xeet mbaa réew mu sama sang Axab yónneewul, di la seet. Te bu ñu nee nekkoo fa, mu giñloo waa réew maak xeet wa ne gisuñu la. <sup>11</sup> Léegi nag nga naan ma: “Demal wax sa sang ne ko Ilyaas a ngoog.” <sup>12</sup> Su ko defee su ma teqlikook yaw, ngelawal Aji

Sax ji yóbbu la fu ma xamul, fekk ma dem wax ko Axab, te du la gis. Kon da may rey! Moona sang bi, man de, damaa masa ragal Aji Sax ji ba may ndaw ba tey. <sup>13</sup> Moo sang bi! Xanaa waxuñu la li ma def, ba Yesabel di rey yonenti Aji Sax ji? Maa làq téeméeri yonenti Aji Sax ji ci ay xuntiy xeer, xunti mu nekk juróom fukk, di leen may lekk ak naan. <sup>14</sup> Léegi nga naa ma: “Demal wax sa sang ne ko Ilyaas a ngoog!” Mu di ma rey?» <sup>15</sup> Ilyaas ne ko: «Giñ naa ci Aji Sax ji Boroom gàngoori xare yi, moom mi may jaamu, tey dinaa jàkkaarloojeek Axab moos.»

### *Ilyaas jànkoonde naak Axab*

<sup>16</sup> Abdiyas dem ca Axab, yegge ko ko. Axab dikk taseek Ilyaas. <sup>17</sup> Naka la Axab gis Ilyaas, ne ko: «Kii yaw a, di lèmbè Israyil nii?» <sup>18</sup> Ilyaas ne ko: «Du maa lèmbè Israyil de. Yaw kay la, yaak sa kër baay, ndax yeena dèddu santaaney Aji Sax ji, di topp tuur yi nuy wax Baal. <sup>19</sup> Léegi nag wooteel, Israyil gépp daje, fekki ma ca tundu Karmel, ñu ànd ak ñeenti téeméeri yonenti Baal ak juróom fukk (450) ak ñeenti téeméeri nit (400) ñuy lekk njèlal Yesabel, te di yonenti Asera tuur ma.»

### *Ilyaas fenqoo naak waa kër Baal*

<sup>20</sup> Ba loolu amee Axab yónnee ca waa Israyil gépp, woo yonent ya, ñu daje ca tundu Karmel. <sup>21</sup> Ilyaas dikk jàkkaarlook mbooloo ma mépp. Mu ne: «Yeen nag dungeen dakkal seen cijiñ-canjañ ji ngeen nekke, wet gu nekk ngeen féete fa? Su Aji Sax ji dee Yàlla, toppleen ko; su dee Baal, ngeen topp ko.» Mbooloo ma ne patt. <sup>22</sup> Ilyaas ne mbooloo ma: «Man de maa fi des ci yonenti Aji Sax ji, man donj, te yonenti Baal yi ñeenti téeméer lañook juróom fukk (450). <sup>23</sup> Léegi nag, indil-leen nu ñaari yèkk. Bàyyileen yonenti Baal, ñu tànn wenn yèkk wi, def ko ay dog, teg ci kaw matt mi, bañ koo taal. Man it dinaa defar weneen yèkk wi, teg ci kaw matt mi, bañ koo taal. <sup>24</sup> Su ko defee ngeen ñaan ci seeni tuur, man it ma ñaan ci Aji Sax ji. Su boobaa, Yàlla ju ci wuyoo sawara, kookoo di Yàlla.» Mbooloo ma mépp ne: «Waaw, baax na!»

<sup>25</sup> Ci kaw loolu Ilyaas wax yonenti Baal ya ne leen: «Tànnleen wenn yèkk te jékka defar, ndax yeena gèna bare. Bu ngeen noppee, ñaanleen ci seeni tuur, waaye buleen taal.» <sup>26</sup> Ñu jël yèkk wa mu leen jox, defar ko. Ñuy yuuxu, di woo Baal suba ba digg bëccëg, naan: «Baal, wuyu nu!» Waaye kenn àdduwul, kenn wuyuwul. Ña ngay cijiñ-canjañ, di wër sarxalukaay ba ñu defar. <sup>27</sup> Digg bëccëg jot, Ilyaas di leen ñaawal, naan leen: «Yuuxuleen ca kaw, waay! Mooy Yàlla moos; jombul daa am lu muy xalaat, mbaa mu jàpp, mbaa mu tukki, mbaa xanaa muy nelaw, ñu war koo yee.»

<sup>28</sup> Ba mu ko defee ñu gènatee yuuxu, di dagg seen yaram aki saamar aki xeej, ni ñu ko baaxoo, ba deret ja sang leen. <sup>29</sup> Digg bëccëg wees, ñu gèna ràkkaaju di wax ay waxyu, ba saraxu ngoon jot. Waaye du lenn lu àddu mbaa lenn lu wuyu mbaa lu leen faale.

<sup>30</sup> Ba mu ko defee Ilyaas wax ak mbooloo ma mépp, ne leen: «Jege-sileen fii!» Ñépp jegesi. Mu defaraat sarxalukaayu Aji Sax ja tasaaroo woon, <sup>31</sup> daldi jël fukki doj ak ñaar, mu tollook limu giiri doomi Yanqóoba. Yanqóoba la kàddug Aji Sax ja dikkaloon ne ko Israyil ay doon turam. <sup>32</sup> Ilyaas jël doj ya, defare ab sarxalukaay ngir Aji Sax ji, ba noppi gas kàmb gu mana def fanweeri liitar, kàmb ga wër sarxalukaay ba. <sup>33</sup> Mu teg matt ma ba mu jekk, daggat yèkk wa, teg ca kaw. <sup>34</sup> Mu ne leen: «Duyleen ñeenti njaqi ndox, tuur ci kaw yàpp week matt mi.» Ñu def ko. Mu ne: «Defaatleen!» Ñu defaat. Mu ne: «Defatileen, muy ñetti yoon!» Ñu def ko, ba muy ñetti yoon. <sup>35</sup> Ndox ma wal, wër sarxalukaay ba, ba kàmb ga sax fees ak ndox.

<sup>36</sup> Ba saraxu ngoon jotee, Yonent Yàlla Ilyaas jegesi, ñaan ne: «Aji Sax ji, yaw Yàllay Ibraayma ak Isaaxa ak Yanqóoba, xamleel bésub tey jii ne yaw yaa di Yàlla ci Israyil, ma di sab jaam bi def lii lépp ci sa ndigal. <sup>37</sup> Nangul ma, Aji Sax ji, rikk nangul ma, ba mbooloo mii xam ne yaw

Aji Sax ji yaa di Yàlla te yaay délloosi seen xol ci yaw.»

<sup>38</sup> Ba loolu amee sawaras Aji Sax ji ne milib boole xoyom yàpp waak matt maak doj yaak suuf sa, ba far manq ndox ma ca kàmb ga.

<sup>39</sup> Ba mbooloo mépp gisee loolu, dañu ne gurub, dépp seen jë fa suuf, daldi ne: «Aji Sax jeey Yàlla! Aji Sax ji kay mooy Yàlla!» <sup>40</sup> Ilyaas ne leen: «Jàppleen yonenti Baal yii. Bu kenn ci ñoom rëcc.» Ñu jàpp leen, Ilyaas yóbbu leen ba ca xuru Kison, rendi leen foofa.

<sup>41</sup> Gannaaw loolu Ilyaas ne Axab: «Doxal lekki te naan, ndax taw bu réy a ngi riir di ñëw.» <sup>42</sup> Axab dem, lekk, daldi naan. Ilyaas moom yéegi ba ca kaw tundu Karmel, sukk, dépp jëem ca diggante bëti óomam. <sup>43</sup> Mu ne surgaam: «Laggal séentuji wetu géej.» Surga ba séentuji, dikk, ne ko: «Dara newu fa.» Ilyaas ne ko mu dellu xool ba muy juróom ñaari yoon.

<sup>44</sup> Juróom ñaarelu yoon ba, surga ba ne: «Lee de niir la wu tuut, tollu ni loxol nit, jóge géej.» Ilyaas ne ko: «Demal ne Axab, mu takk watiiram te dem, bala koo taw bee ub.» <sup>45</sup> Nes tuut asamaan ñuul kukk aki xambaar, ngelaw la jóg, taw ba sóob ak doole. Ci biir loolu Axab dawal watiiram, jëm Yisreel. <sup>46</sup> Aji Sax ji nag dooleel Ilyaas. Mu takk ndigg la, daw jiitu Axab ba ca buntu Yisreel.

## 19

### *Ilyaas gedd na*

<sup>1</sup> Gannaaw gi Axab nettali Yesabel la Ilyaas def lépp ak na mu rendee saamar mboolem yonent ya. <sup>2</sup> Yesabel yónnee Ilyaas ndaw, ne ko: «Yal na ma tuur yi teg mbugal mu gëna réy, ndegam nëgëni ëllëg jëluma sa bakkan, ni nga jële bakkani yonent yii.»

<sup>3</sup> Ilyaas gis na mu deme, daldi daw, ngir rawale bakkanam. Mu dem ba Beerseba ca réewum Yuda, bàyyi fa surgaam.

<sup>4</sup> Moom ci boppam mu topp màndinj ma lu tollook doxub benn bés, doora toog ci taatu benn gajj. Ma ngay ñaan dee, naan: «Doy na sëkk, Aji Sax ji, jëlal

sama bakkan rekk, ndax man kat gënuma samay maam.»

<sup>5</sup> Mu tēdd, ay nelaw jàpp ko ca taatu gajj ba. Yégul lu moy am malaaka mu ko laal, ne ko: «Jógal lekk!» <sup>6</sup> Ilyaas ne xiféet, yem ci mburu mu ñu lakke doj yu tàng, ak njaqub ndox. Mu lekk, daldi naan, ba noppi tēddaat. <sup>7</sup> Malaakam Aji Sax ja dellu ñëw, laal ko, ne ko: «Jógal lekk, lu ko moy doo àttan yoon wi.»

<sup>8</sup> Ilyaas jóg lekk, daldi naan, leqliku, ba dox ñeent fukki guddi ak ñeent fukki bëccëg, ba ca Oreb, tundu Yàlla wa. <sup>9</sup> Mu dugg foofa ca biir xunti ma, fanaan fa.

### *Aji Sax ji yónniwaat na Ilyaas*

Ci biir loolu kàddug Aji Sax ji dikkal Ilyaas, ne ko: «Ana looy def fii, Ilyaas?» <sup>10</sup> Ilyaas ne: «Man kat damaa xéroona xér ci yaw Aji Sax ji Boroom gàngoori xare yi. Waaw, bànni Israyil dañoo fecci sa kóllëreek ñoom; say sarxalukaay, ñu màbb; say yonent, ñu jam saamar. Ma des man donj, ñuy wuta jël sama bakkan nii!» <sup>11</sup> Aji Sax ji ne ko: «Génnal taxaw ci kaw tund wi, fi sama kanam, ndax kat man Aji Sax ji maa ngi waaja romb.» Ci kaw loolu ngelaw lu réy te bare doole jiitu Aji Sax ji, xar tund ya, rajaxe doj ya, waaye Aji Sax ji nekkul ca ngelaw la. Ngelaw la dal, suuf sa yëngu, waaye Aji Sax ji nekkul ca yëngu-yëngu suuf ba. <sup>12</sup> Suuf sa dal, sawara dikk, waaye Aji Sax ja nekkul ca sawara wa. Sawara wa dal, ndéey lu suufe topp ca. <sup>13</sup> Ilyaas dégg ca, muuroo mbubbam, génn taxaw ca buntu xunti ma; déggul lu moy baat bu ko ne: «Ana looy def fii, Ilyaas?» <sup>14</sup> Mu ne: «Man kat damaa xéroona xér ci yaw Aji Sax ji Boroom gàngoori xare yi. Waaw, bànni Israyil dañoo fecci sa kóllëreek ñoom; say sarxalukaay, ñu màbb; say yonent, ñu jam saamar. Ma des man donj, ñuy wuta jël sama bakkan nii!»

<sup>15</sup> Aji Sax ji ne ko: «Dellul topp say tànki te jaare ci màndinj mi ba Damaas. Boo àggee, nanga diw Asayel, fale ko ko buurub Siri. <sup>16</sup> Yewu ma baayam di Nimsi it, diw ko, fal ko buurub Israyil; te Alyaasa, ma baayam di Safat, dëkk diiwaanu Abel Mewola, nanga ko diw, fal



ko, muy yonent, wuutu la. <sup>17</sup> Su ko defee ku Asayel reyul ba nga raw, Yewu rey la; ku Yewu reyul ba nga raw, Alyaasa rey la. <sup>18</sup> Waaye dinaa déeg ci biir Israyil juróom ñaari junniy (7 000) nit, di mboolem ñi sujjóotaluloon Baal te seen gémmiñ masu koo foon.»

### *Ilyaas am na bëkk-néeg*

<sup>19</sup> Ilyaas bàyyikoo fa, fekk Alyaasa doomu Safat, Alyaasa di gabb ak ñaar fukki nag ak ñeent yu ko jiitu, ñu likke leen ñaar-ñaar, moom ci boppam mu jiital fukkeelu likke baak ñaar. Ilyaas dikk ba ca moom, sànni mbubbam ca kaw Alyaasa. <sup>20</sup> Alyaasa bàyyikoo ca nagam ya, daw topp ca Ilyaas, ne ko: «Ngalla may ma, ma tàgguji sama ndey ak sama baay te topp la.» Ilyaas ne ko: «Doxal dellu; lu ma la def?»

<sup>21</sup> Alyaasa bàyyi fa Ilyaas, dellu jël ñaari nag, rendi ko sarax, jël banti rangaay ya, togge yàpp wa, jox ko mbooloo ma, ñu lekk, ba noppi Alyaasa topp ci gannaaw Ilyaas, di bëkk-néegam.

## 20

### *Siri song na Samari*

<sup>1</sup> Fekk na Ben Addàd buurub Siri woo mbooloom xareem mépp, ñu daje, ànd ak fanweeri buur ak ñaar yu mu faral, ñook seeni fas ak seeni watiir. Ñu dem song Samari, gaw ko. <sup>2</sup> Ci kaw loolu Ben Addàd yónni ay ndaw ca biir dëkk ba ca Axab buurub Israyil. <sup>3</sup> Ñu ne ko: «Ben Addàd dafa wax ne: “Sa xalis ak sa wurus, maay boroom. Say jabar it, ak ñi gëna dègër ci say doom, maay boroom.”» <sup>4</sup> Buurub Israyil ne ko: «Loo wax rekk, Buur sang bi, maak lépp lu ma moom yaay boroom.» <sup>5</sup> Ndaw ya dikkaat ne ko: «Ben Addàd dafa wax ne: “Maa yónnee woon ci yaw, di sàkku nga jox ma sa xalis ak sa wurus ak say jabar ak say doom yu góor. <sup>6</sup> Waaye nēgēni ēllēg sax dinaa yónni samay jawriñ ci yaw, ñu seet ci sa biir kër ak say kër jawriñ. Mboolem luy sa alal dinañu ci teg loxo, nangu ko, yóbbu.”»

<sup>7</sup> Buurub Israyil nag woolu magi réew ma mépp, ne leen: «Boo yeboo ngeen

xam ne waa jii kat fitna lay wut; gis ngeen mu yeble ci man, bēgga nangu samay jabar ak sama doom yu góor ak sama xalis ak sama wurus, te bañaluma ko ci dara.» <sup>8</sup> Mag ñaak mbooloo ma mépp ne ko: «Bu ko déglu te bul nangu!» <sup>9</sup> Axab ne ndawi Ben Addàd ya: «Waxleen Buur, sama sang, ne ko: “Sa jaam ba nee mboolem la nga jëkkoonaa yónnee di ko sàkku dina ko def. Waaye lii nga mujja laaj moom, du ko def.”» Ndaw ya dem jottli tontam. <sup>10</sup> Ben Addàd dellu yeble ca moom ne ko: «Yal na ma tuur yi teg mbugal mu gëna tar, ndegam duma tas Samari, ba pëndu tabax du fi des buy fees loxoy mboolem ñi ma topp.»

<sup>11</sup> Buurub Israyil ne: «Waxleen ko ne ko: “Jóge xare, di bàkku moo gën jëm xare, di bàkku.”»

<sup>12</sup> Ba Ben Addàd di jot ca kàddu googu, ma ngay naan, mook buur ya far ak moom ca mbaar ya. Mu jox ay nitam ndigal ne leen: «Takkuleen!» Ñu takku, ngir songi dëkk ba. <sup>13</sup> Ndeke ci biir loolu ab yonent dem na ca Axab buurub Israyil, ne ko: «Aji Sax ji dafa wax ne: Gis nga mbooloom xare mii mépp ak li ñuy bare lépp, xamal ne teg naa leen ci sa loxo bésuub tey, ndax nga xam ne maay Aji Sax ji.» <sup>14</sup> Axab ne ko: «Ku may defal loolu?» Mu ne ko: «Aji Sax ji nee: Dag yi kilifay diiwaan yi yebal lay doon.» Axab ne ko: «Kuy sooke xare bi?» Mu ne ko: «Xanaa yaw.»

### *Israyil daan na Siri*

<sup>15</sup> Ba mu ko defee Axab lim dag ya kilifay diiwaan ya yebal, ñuy ñaar téeméer ak fanweer ak ñaar (232). Gannaaw loolu mu lim mbooloom Israyil gépp, ñuy juróom ñaari junni (7 000). <sup>16</sup> Ñu gén digg bëccëg, fekk Ben Addàd a ngay màndi mook fanweeri buur ak ñaar ya mu faral, ca mbaar ya.

<sup>17</sup> Dag ya kilifay diiwaan ya yebal a nga jiitu. Ci biir loolu Ben Addàd yónnee, ñu wax ko ne ko: «Am na ñu jóge Samari, di ñëw.» <sup>18</sup> Mu ne: «Su leen jàmm taxee jóg, jàppleen leen, ñuy dund; su leen xare taxee jóg it, jàppleen leen, ñuy dund.»

<sup>19</sup> Ba mu ko defee dagi kilifay diiwaan ya génne ca dëkk ba, mbooloom xare ma topp ca seen gannaaw. <sup>20</sup> Ku nekk jam noon ba nga janool, waa Siri daw, Israyil topp leen. Ben Addàd buurub Siri nag war fas, daw mooki gawaram. <sup>21</sup> Buurub Israyil nag song leen, rey fas ya, yàq watiir ya, daan waa Siri jéll bu réy. <sup>22</sup> Yonent ba dikk ca buurub Israyil ne ko: «Nanga dëgërluwaat te xam ni nga wara def, ndax nëgëni déwén buurub Siri dina la songaat.»

### *Siri songati na Israyil*

<sup>23</sup> Ba loolu amee kàngami buurub Siri digal buurub Siri ci wàllu Israyil, ne ko: «Ñii, seeni tuur tuuri tund lañu; moo tax ñu épp nu doole, waaye su nu xeexëek ñoom ci joor gi déy, su boobaa noo leen di épp doole. <sup>24</sup> Defal nii: follil buur yi ci sa gannaaw yépp, jële leen fa ñu jüite, teg fa jawriñ yu leen wuutu. <sup>25</sup> Te yaw nga sosaat mbooloom xare mu mel ni ma nga amoon, fas ak fas, watiir ak watiir, ndax nu mana xareek ñoom ci joor gi. Su boobaa déy, noo leen di épp doole.» Mu déggal leen, def noona.

<sup>26</sup> Ca déwén sa Ben Addàd lim waa Siri, daldi dem Afeg ca xare baak Israyil. <sup>27</sup> Waa Israyil daje, sàkk ab dund, ba noppi dox wuti leen. Waa Israyil a nga dal janook ñoom, di saf ñaari gétti bëy. Waa Siri ñoom fees àll ba. <sup>28</sup> Góoru Yàlla ga dikk ne buurub Israyil: «Aji Sax ji dafa wax ne: Gannaaw waa Siri dañoo yaakaar ne man Aji Sax ji, yállay tund laa, duma yállay xur, maay teg mbooloo mu réy mii mépp ci say loxo. Su ko defee ngeen xam ne maay Aji Sax ji.»

<sup>29</sup> Diiru juróom ñaari fan nag ñu jàkkaarloo ca seeni dal. Bésob juróom ñaareel ba xare ba jib, waa Israyil daane téeméeri junniy xarekat (100 000) yu warul fas ca waa Siri ci benn bés bi; <sup>30</sup> ña ca des daw ba Afeg, ca biir dëkk ba, tata ja màbb ca kaw ñaar fukki junniy nit ak juróom ñaar (27 000) ca ñoom. Fekk na Ben Addàd daw dugg ca biir dëkk ba, jàll ci biir néeg bu làqoo làqu. <sup>31</sup> Ay jawriñam ne ko: «Waaw, nun de dégg nanu ñu naa buuri Israyil buur yu baax

lañu. Tee noo sol ay saaku, tañlaayoo buum, toroxloo ko, te dem ca buurub Israyil? Jombul mu bàyyi la, nga dund.»

<sup>32</sup> Ñu teraxlaayoo ay saaku, tañlaayoo ay buum, dem ca buurub Israyil, ne ko: «Ben Addàd sa jaam ba nee, nga baal ko ngalla te bàyyi ko mu dund.» Mu ne: «Ndeke mu ngi dund ba tey? Moom sama mbokk a!» <sup>33</sup> Ndaw ya am njort lu rafet nag. Ñu gaaw naa: «Ben Addàd kay sa mbokk a!» Mu ne leen ñu dem indi ko. Ba Ben Addàd dikkee ba ca moom, mu waral ko ca watiiram.

<sup>34</sup> Ben Addàd ne Axab: «Dëkk yi sama baay nangoo woon ci sa baay dinaa la ko delloo, te boo yeboo sàkkal sa bopp ay bérabi njaay ca Damaas, na sama baay def ca Samari.» Axab ne ko: «Man nag damay fasanteek yaw kóllère ci loolu, bàyyi la nga dem.» Ba loolu amee mu fasanteek moom kóllère, bàyyi ko mu dem.

### *Ab yonent sikk na Axab*

<sup>35</sup> Ci biir loolu kenn ca kurélu yonent ya wax moroom ma ci ndigalal Aji Sax ji, ne ko: «Ayca, jam ma!» Waa ja lànk, ne du ko jam. <sup>36</sup> Mu ne ko: «Gannaaw nanguwuloo déggal Aji Sax ji, dama ne, booy teqlikook man, gaynde fàdd la.» Naka la teqlikook moom, gaynde dajëek moom, fàdd ko. <sup>37</sup> Waa ja gisaat keneen ca ñoom ne ko: «Ayca, jam ma!» Kooka jam ko bu baax, ba gaañ ko. <sup>38</sup> Yonent ba dem, taxaw ca yoon wa, soppi colam, fab kaala, takke bët ya, di xaar Buur. <sup>39</sup> Buur romb, mu woo ko, ne ko: «Man de sang bi, damaa gaañu ci digg xare, nit dikk, indil ma keneen, ne ma: “Xoolal ma kii, su rëccee, sa bakkan ay fey bakkanam, mbaa nga feye ko ñetti junniy (3 000) dogi xalis.” <sup>40</sup> Waaye man damaa fekk ma jàpp wet gu nekk, waa ja nag rëcc.» Buurub Israyil ne ko: «Sab àttee ngoog, yaa ko waxal sa bopp.» <sup>41</sup> Ci kaw loolu yonent ba ne muret kaala ga mu takkoon ca bët ya; buurub Israyil xàmmi ko, xam ne ci yonent yi la. <sup>42</sup> Mu ne ko: «Aji Sax ji dafa wax ne: Gannaaw yaa bàyyi ku ma aayaloon bakkanam, sa bakkan mooy fey bakkanam te say bokk ay fey bokkam.»

<sup>43</sup> Ba loolu amee buurub Israyil mer, ne fónñ, daldi ñibbi këram, ca Samari.

## 21

### *Buur Axab tooñ na Nabot*

<sup>1</sup> Gannaaw ba loolu wéyee mu am lu xew, di mbirum toolu reseñu Nabot, waa ju dëkk Yisreel. Nabot daa amoon tool ca Yisreel, ca wetu kër Axab buurub Samari.

<sup>2</sup> Axab ne Nabot: «Jox ma sa toolub reseñ bi, ma def kob tóokër, ndax jege na sama kër. Dinaa la ko wecci toolub reseñ bu ko gën, walla su la gënalee ma delloo la njégam ci xalis.» <sup>3</sup> Nabot tudd Aji Sax ji, ne Axab: «Yàlla tere ma di la jox sama suufas maam!»

<sup>4</sup> Axab ñibbi këram, mer, ne fónñ ndax la ko Nabot waa Yisreel ba wax, ne ko du ko jox suufas maamam. Mu tēdd ca lalam, gedd, baña lekk. <sup>5</sup> Soxnaam Yesabel dikk ne ko: «Lu la tax ne fónñ nii? Lu la teree lekk?» <sup>6</sup> Axab ne ko: «Damaa wax ak Nabot waa Yisreel bi, ne ko mu jaay ma toolub reseñam, ma fey ko xalis mbaa su ko neexee ma wecci ko ko beneen toolub reseñ. Mu ne ma du ma jox toolub reseñam.»

<sup>7</sup> Yesabel ne ko: «Xanaa du yaay buurub Israyil? Jógal lekk waay te bégal sa xol. Man maa lay jox toolu reseñu Nabot.»

<sup>8</sup> Ci kaw loolu Yesabel bind ay bataaxal ci turu Axab, def ci màndarga torlub Axab. Mu yónnee bataaxal ya ca mag ñaak gor ña ca dëkkub Nabot. <sup>9</sup> Mu bind ca bataaxal ya ne: «Yéeneleen koor\*, beral Nabot jataay ci kanam mbooloo mi, <sup>10</sup> te teg ñaari nit ñu tekkiwul dara, ñu janook moom. Na ñooñu duural Nabot ne ko: “Saaga nga Yàlla, saaga Buur.” Su ko defee ngeen génne ko dëkk ba, dóor ko ay doj ba mu dee.»

<sup>11</sup> Ba mu ko defee waa dëkkub Nabot, mag ñaak gor ña daldi def la Yesabel san-taane te bind ko ca bataaxal ya mu leen yónnee. <sup>12</sup> Ñu yéene koor, beral Nabot jataay ca kanam mbooloo ma. <sup>13</sup> Ñaari nit ñu tekkiwul dara dikk toog janook moom. Ñu duural ko ca kanam mbooloo ma, ne Nabot daa saaga Yàlla, saaga Buur. Ñu génne Nabot dëkk ba, dóor ko ay doj ba

mu dee. <sup>14</sup> Ñu yónnee nag ca Yesabel ne ko dóor nañu Nabot ay doj ba mu dee.

<sup>15</sup> Yesabel dégg ca, ne Axab: «Jógal nanguji toolu reseñu Nabot waa Yisreel bi. Moo la ko bañoona jaaye xalis, waaye dundatul, dee na.» <sup>16</sup> Axab dégg ca, daldi jubal toolu reseñu Nabot waa Yisreel ba, nangu ko.

### *Aji Sax ji dogal na mbugalu Axab*

<sup>17</sup> Ci biir loolu kàddug Aji Sax ji dikkal Ilyaas ma dëkk Tisbi, ne ko: <sup>18</sup> «Demal taseek Axab buurub Israyil ba ca Samari. Ma nga nee ca toolu reseñu Nabot ba mu nanguji. <sup>19</sup> Wax ko ne ko: “Aji Sax ji dafa wax ne: Du dangaa rey nit, ba nangu alalam?” Nga teg ca ne ko: “Aji Sax ji dafa wax ne: Fa xaj ya xabe deretu Nabot, ay xaj dina fa xabe sa deret, yaw itam.”»

<sup>20</sup> Axab ne Ilyaas: «Áa, noon bi, gisati nga ma?» Ilyaas ne ko: «Gis naa la, ndax dangaa dogu ci def lu bon lu Aji Sax ji ñaawlu. <sup>21</sup> Aji Sax ji nee na: Dama ne, dinaa wàcce lu bon ci sa kaw, fállas say sèt, ba faagaagal ci digg Israyil kuy taxaw, colal, te bokk ci yaw Axab, muy gor, di jaam. <sup>22</sup> Dinaa def sa kër mel ni kër Yerbowam doomu Nebat mbaa kër Basa doomu Axiya, ndax merloo nga ma te bàkkaarloo nga Israyil. <sup>23</sup> Te itam Aji Sax ji wax na ci mbirum Yesabel ne: Ay xaj dina lekk Yesabel ca wetu tatay Yisreel.

<sup>24</sup> Ku Axab deele ci dëkk bi, xaj yi lekk; ku ci médde àll, njanaaw ya for.»

<sup>25</sup> Axab dafa dogu woon ci def lu bon lu Aji Sax ji ñaawlu, ba amu ci moroom moos, te jabaram Yesabel di ko ci xabtal. <sup>26</sup> Axab daan na def ñaawtéef ju réy, di topp ay kasaray tuur, di def mboolem lu doon baaxu Amoreen ña Aji Sax ji dàqoon ngir bànni Israyil.

<sup>27</sup> Ba Axab déggee kàddu yooyu, daa xotti ay yéereem, di woor, sol ay saaku, tēddaale ko, di temp ndànk, ngir toroxlu. <sup>28</sup> Ci biir loolu kàddug Aji Sax ji dikkal Ilyaas waa Tisbi ba, ne ko: <sup>29</sup> «Gis nga ni Axab toroxloo fi sama kanam? Gannaaw toroxlu na nii ci sama kanam, duma wàcce lu bon cig dundam. Ci jamonoy

\* **21:9** 21.9 koor googu dafa mel ni tuub ak toroxlu lañu ci jublu.

doomam ju góor laay wàcce lu bon ci waa kërám.»

## 22

### *Axab songati na Siri*

<sup>1</sup> Gannaaw loolu toog nañu ñetti at yu xare amul diggante Siri ak Israyil.

<sup>2</sup> Ca ñetteelu at ma, Yosafat buurub Yuda dikk ca buurub Israyil. <sup>3</sup> Fekk buurub Israyil wax aki jawriñam ne leen: «Xanaa xamuleen ne Ramot ga ca Galàdd noo ko moom? Te jéemunoo def dara, ba nangu ko ci loxol buurub Siri!» <sup>4</sup> Mu ne Yosafat: «Xanaa dinga ànd ak man ca xareb Ramot ga ca Galàdd?» Yosafat ne buurub Israyil: «Maa ngi, yaa ngi, samay nit ay say nit, te samay fas ay say fas.» <sup>5</sup> Yosafat teg ca ne buurub Israyil: «Jëkkala seet lu ci Aji Sax jiy wax.»

<sup>6</sup> Buurub Israyil nag woo yonent yi, ñu daje, xawa tollook ñeenti téeméer. Mu laaj leen ne leen: «Ndax ma dal ci kaw Ramot ga ca Galàdd, am ma bàyyi?» Ñu ne ko: «Demal, ndax Boroom bi moo leen di teg ci sa loxo.» <sup>7</sup> Yosafat dellu ne: «Xanaa beneen yonentu Aji Sax ji da fee amatul, ba ñu mana seetlujeeti fa moom?» <sup>8</sup> Buurub Israyil ne Yosafat: «Am na ba tey genn góor gu ñu mana seetal ci Aji Sax ji. Waaye man maa ko jéppi, ndax du wax waxyu bu baax ci man, lu bon rekk; mooy Mise doomu Yimla.» Yosafat ne ko: «Buur, bul waxe noonu.» <sup>9</sup> Buurub Israyil daldi woo ab jawriñam ne ko: «Demal indil ma gaaw Mise doomu Yimla.»

<sup>10</sup> Buurub Israyil ak Yosafat buurub Yuda nag, ña nga toog, ku ci nekk ci ngànguneem. Ña nga solu ba jekk ca daggga ja ca buntu Samari. Yonent yépp janook ñoom di biral ay waxyu. <sup>11</sup> Fekk na Cedekiya doomu Kenaana, ma woon ci seen biir, defarlu ay béjjéni weñ. Ma nga naan: «Aji Sax ji dafa wax ne: “Yii ngay jame waa Siri, ba jeexal leen.”» <sup>12</sup> Mboolem yonent ya ca des nag di waxe jenn waxyu jooju, naan: «Buur, songal Ramot ga ca Galàdd te jël ndam li, ndax Aji Sax ji moo leen teg ci say loxo.»

### *Mise yégle na jéllub Axab*

<sup>13</sup> Ci kaw loolu ndaw la wooyi Mise, dem ne ko: «Ma ne, kàddug yonent ya genn la: jàmmu Buur. Kon nag, na sa kàddu ànd ak seen kàddu di genn, te nga wax jàmm.» <sup>14</sup> Mise ne ko: «Giñ naa ci Aji Sax ji, Kiy Dund, li ma Aji Sax ji wax rekk laay wax.» <sup>15</sup> Ba Mise dikkee ba ca Buur, Buur ne ko: «Mise, ndax nu songi xare Ramot ga ca Galàdd, am nu bàyyi?» Mu ne ko: «Buur songal, daan, Aji Sax jee koy teg ci sa loxo!» <sup>16</sup> Buur nag ne ko: «Ñaata yoon laa lay giñloo ne la bu ma wax lu moy dëgg ci turu Aji Sax ji?» <sup>17</sup> Mise ne ko:

«Israyil gépp laa gis ñu tasaaroo ca tund ya,

mbete xar yu amul sàmm.

Aji Sax ji ne: «Ñii de amuñu boroom.

Na ku nekk ci ñoom ñibbi kërám ci jàmm.»»

<sup>18</sup> Buurub Israyil ne Yosafat: «Waxuma la woon ne du wax waxyu bu baax ci man, xanaa lu bon?» <sup>19</sup> Mise teg ca ne ko: «Kon nag déglul kàddug Aji Sax ji. Gis naa Aji Sax ji, mu toog ci ngànguneem, mboolem gàngooru asamaan a nga taxaw ndijooram ba càmmoñam. <sup>20</sup> Aji Sax ji nag ne: “Ana kuy nax Axab, mu songi Ramot ga ca Galàdd, ba daanu ca?” Kii ne nii, kee ne nee. <sup>21</sup> Noo ga dikk, taxaw fa kanam Aji Sax ji. Mu ne: “Man maa koy nax.” Aji Sax ji ne ko: “Nan?” <sup>22</sup> Mu ne: “Maay dikk, doon xel muy safaan dëgg ci làmmiñu yonentam yépp.” Mu ne ko: “Yaa koy nax, te man nga ko. Demal defe noonu.” <sup>23</sup> Looloo waral lii. Aji Sax ji moo def xel muy safaan dëgg ci sa làmmiñu yonent yii yépp, te Aji Sax ji moo tudd musiba ci sa kaw.»

<sup>24</sup> Ba loolu amee Cedekiya doomu Kenaana talaata Mise, ne ko: «Ana fu Noowug waxyu gu Aji Sax ji jaare, ba jóge ci man di wax ak yaw?» <sup>25</sup> Mise ne ko: «Yaw mii yaa koy gisal sa bopp, keroog ba ngay dugg néegoo néeg, di làqtu.» <sup>26</sup> Buurub Israyil ne ab surgaam: «Jàppal Mise, yóbbu ko ca Amon boroom dëkk bi, ak ca doomu Buur\*.» <sup>27</sup> Nga ne ko: “Buur

\* 22:26 22.26 Doomu Buur daa nañu ko wooye ndawal buur lu sasoo lenn ci liggéeyu èttu buur bi.

dafa wax ne: Dugal-leen kii ndungsiin, di ko jox lekk gu néew ak ndox mu néew, ba keroog may dikk ak jàmm.»<sup>28</sup> Mise ne: «Soo délseek jàmm déy, Aji Sax ji waxul, ma jottli.» Mu dellu ne: «Mbooloo mi, yeena ko déggandoo, yeen ñépp.»

### *Axab daanu na*

<sup>29</sup> Ba mu ko defee buurub Israyil ànd ak Yosafat buurub Yuda, ñu songi Ramot ga ca Galàdd. <sup>30</sup> Buurub Israyil nag ne Yosafat: «Damay soppo col, dugg ci xeex bi, waaye yaw solal sa mbubbam buur.» Buurub Israyil daldi soppig col, dugg ca xeex ba. <sup>31</sup> Fekk na buurub Siri jox ndigal fanweeri nitam ak ñaar, ñay jiite watiiri xare ya. Mu ne leen: «Buleen xeex ak kenn, du ku tuut, du ku réy, diirleen buurub Israyil, moom rekk.» <sup>32</sup> Ba loolu amee, ña jiite watiiri xare ya gis Yosafat, daldi ne: «Kii kay mooy buurub Israyil!» Ñu walbatiku ci kawam, ngir song ko. Yosafat nag àddu ca kaw, <sup>33</sup> njiiti watiir ya xam ne du buurub Israyil, ñu walbatikuwaat, bàyyi ko. <sup>34</sup> Ci biir loolu mu am ku soqi ag fitt te teyu ko, mu dal buurub Israyil ci diggante ñaari wàlli pakk bi mu sol. Mu ne dawalkatu watiiram: «Wañnikul, génne ma ci xeex bi, gaañu naa!» <sup>35</sup> Naka la xare ba tàkkarnaase bésub keroog bépp, ñu téye buur ba ca biir watiir wa, mu janook waa Siri, ba ca ngoon sa, mu doora dee. Jam-jam baa nga nàcc, ba taa ca biir watiir ba. <sup>36</sup> Jant baa ngay xalambaayu, yéene jib, ba dajal mbooloo ma. Ña nga naan: «Na ku nekk ñibbi sa dëkk, ca sam réew!»

<sup>37</sup> Buur ba nag saay, ñu yóbbu ko Samari, denc ko foofa. <sup>38</sup> Ba ñuy raxas watiir ba ca déeg ba ñuy wax Samari, xaj ya di xab deret ja, gànc ya di sangu ca ndoxum déeg ma, muy la Aji Sax ji waxoon.

<sup>39</sup> Li des ci mbiri Axab ak mboolem lu mu def ak kër ga mu tabax, rafetale ko béñi ñay, ak mboolem dëkk ya mu tabax, loolu lépp, bindees na ko moos ca téere ba ñu dippee Jaloorey buuri Israyil ca seeni jant. <sup>40</sup> Buur Axab nag saay, fekki ay maamam, doomam Akasiya falu buur, wuutu ko.

### *Yosafat falu na Yuda*

<sup>41</sup> Axab moomu, ba mu faloo Israyil, ba dugg ñeenteelu atu nguuram, ca la Yosafat doomu Asa falu buur ca kaw Yuda. <sup>42</sup> Yosafat amoon na fanweeri at ak juróom, ba muy falu te ñaar fukki at ak juróom la falu ca Yerusalem. Yaayam moo doon Asuba, doomu Sili. <sup>43</sup> Yosafat ci tànkii baayam Asa la aw, jàddul fenn, xanaa di def njub lu Aji Sax ji rafetlu. <sup>44</sup> Teewul jëlewu fa bérabi jaamookaay ya. Askan wa dañu fa daa dem ba tey, di fa rendi saraxi jur, di fa taal cuuraay. <sup>45</sup> Séqoon na nag ak buurub Israyil jàmm.

<sup>46</sup> Li des ci mbiri Yosafat ak njambaaram aki xareem, bindees na lépp moos ca téere ba ñu dippee Jaloorey buuri Yuda ca seeni jant. <sup>47</sup> La desoon ca ñay jaay seen bopp ca jaamookaayi tuur, ya fa desoon ca jamonoy baayam Asa, ba booba, Yosafat da leena jële ca réew ma.

<sup>48</sup> Booba réewum Edom amuloon buur. Ab jawriñ lañu fa daan tabb.

<sup>49</sup> Yosafat defaroon na ay gaal yu mag yu mu deme réewum Ofir, di wuti wurus. Waaye sottiwul, ndax gaal yaa nga suux ca Esiyon Geber. <sup>50</sup> Booba la Akasiya doomu Axab wax Yosafat ne ko: «Tee ngaa may samay nit, ñu ànd ak say nit ci gaal yi?» Yosafat lank.

<sup>51</sup> Gannaaw gi Buur Yosafat tēdd, fekki ay maamam, ñu denc ko fa ñu denc ay maamam ca gox ba ñu naan Kër Daawuda maamam. Doomam Yoram falu buur, wuutu ko.

### *Akasiya falu na Israyil*

<sup>52</sup> Yosafat moomu, ba mu faloo Yuda, ba dugg fukkeelu atu nguuram ak juróom ñaar, ca la Akasiya doomu Axab falu buur ca Israyil, péeyoo Samari. Akasiya nguuru na Israyil ñaari at. <sup>53</sup> Da daan def lu bon, lu Aji Sax ji ñaawlu, topp tànkii ndeyam ak baayam ak tànkii Yerbawam doomu Nebat, ma doon bàkkaarloo Israyil. <sup>54</sup> Akasiya jaamu na Baal, tuur ma, di ko sujjóotal, ba merloo Aji Sax ji, Yállay Israyil, muy mboolem la baayam daa def.

## Buur ya di téereb ñaareel bi

### *Yonent Yàlla Ilyaas yar na Buur Akasiya*

<sup>1-2</sup> Ba Axab buurub Israyil saayee yàggul dara, Mowabeen ña dañoo fippu, jógal doomam Buur Akasiya.

Mu am bés Akasiya tollu biir néegam ca kaw taaxum kèram ga ca Samari, daldi xàwwikoo ca palanteer ba, daanu ba gaañu lool. Gannaaw gi mu yónni ay ndaw, ne leen: «Demleen seetal ma ca Baal Sebut, tuuru Ekkron, ba xam ndax dinaa dund gannaaw jéll bii ma daanu.»

<sup>3</sup> Ci biir loolu malaakam Aji Sax ji wax Ilyaas, ma cosaano Tisbi, ne ko: «Demal gaaw dajee ndawi buurub Samari te laaj leen ne leen: “Xanaa Yàlla daa amul ci Israyil, ba ngeen di seeti ca Baal Sebut, tuuru Ekkron?” <sup>4</sup> Loolu tax na Aji Sax ji wax buurub Israyil ne ko: “Lal bi nga tēdd doo ko wàcc, ndax dinga dee moos.”» Ci kaw loolu Ilyaas dem.

<sup>5</sup> Ba ndaw ya wañnikoo, Buur Akasiya ne leen: «Lu leen wañni?» <sup>6</sup> Ñu ne ko genn góor a leen dogale, ne leen ñu dellu ci buur bi leen yónni, te wax ko ne ko: «Aji Sax ji nee: Ndax Yàlla daa amul Israyil ba ngay yónnee di seetluji ca Baal Sebut, tuuru Ekkron? Loolu tax na lal bi nga tēdd doo ko wàcc, ndax dinga dee moos.» <sup>7</sup> Mu ne leen: «Waaw, góor gi leen dogale, wax leen loolu, nu mu mel?» <sup>8</sup> Ñu ne ko: «Góor ga boroom kawar la te ngembaal der la gemboo.» Akasiya ne: «Kooku Ilyaas mu Tisbi la.»

<sup>9</sup> Ba mu ko defee Akasiya yebal njiitu juróom fukki dag, mu ànd ak juróom fukki nitam, dem ba ca Ilyaas. Gisuñu lu moy mu toog ca kaw tund wa. Njiit la ne ko: «Ée góoru Yàlla gi, Buur nee nga wàcc.» <sup>10</sup> Ilyaas wax njiital juróom fukki dag ya, ne ko: «Ndegam góoru Yàlla laa, yal na sawara wàcce asamaan xoyom la, yaw yaak sa juróom fukki dag.» Sawara daldi bàyyikoo asamaan, ne jippét xoyom leen, mook juróom fukki

dagam ya. <sup>11</sup> Buur dellu yebal keneen ku jiite juróom fukki dag, mu ànd ak juróom fukkam ña. Njiit la dem ne Ilyaas: «Ée góoru Yàlla gi, Buur nee nga wàcc gaaw!» <sup>12</sup> Ilyaas wax leen ne leen: «Ndegam góoru Yàlla laa, yal na sawara wàcce asamaan xoyom la, yaw yaak sa juróom fukki dag.» Sawaraw Yàlla bàyyikoo asamaan, xoyom njiit la, mook juróom fukki dagam ya. <sup>13</sup> Mu delluwaat yebal njiital juróom fukki dag, mu ànd ak juróom fukkam ña, muy ñetteel bi yoon. Mu daldi dem ba àgg ca Ilyaas, ne gurub sukk ca kanamam; tinu ko ne ko: «Éy góoru Yàlla gi, ngalla wormaalal sama bakkan ak bakkani juróom fukk ñii, sang bi. <sup>14</sup> Gis nga ni sawara wàcce asamaan, xoyom ñaari njiiti juróom fukki dag yi ma jiitu, ñook seen juróom fukki dag, waaye rikk wormaalal sama bakkan.»

<sup>15</sup> Malaakam Aji Sax ji ne Ilyaas: «Wàccal ànd ak moom, bu ko ragal.» Mu daldi wàcc ànd ak njiit la ba ca Buur, <sup>16</sup> ne ko: «Aji Sax ji nee: Yónni nga ay ndaw, di seeti ca Baal Sebut, tuuru Ekkron, mel ni Yàlla amul ci Israyil, ba ñu man koo laaj kàddoom. Loolu tax na lal bi nga tēdd, doo ko wàcc, nde dinga dee moos!»

<sup>17</sup> Ba loolu amee mu dee, muy la Aji Sax ji waxoon, Ilyaas biral ko. Rakkam Yoram nag falu buur, wuutu ko ca ñaareelu atu nguurug Yoram doomu Yosafat buurub Yuda. Fekk na Akasiya amuloon doom ju góor. <sup>18</sup> Li des ci mbiri Akasiya aki jéfam, bindees na ko moos ca téere bi ñu dippee Jaloorey buuri Israyil ca seeni jant.

## 2

### *Yonent Yàlla Ilyaas yéeg na*

<sup>1</sup> Bés ba Aji Sax jiy yóbbu Ilyaas kaw asamaan ci biir callweer, ma nga bàyyikoo woon Gilgal, ànd ak Alyaasa.

<sup>2</sup> Ci biir loolu Ilyaas ne Alyaasa: «Xaaral fii rikk, ndax Aji Sax ji da maa yebal Betel.» Alyaasa ne ko: «Ak sama digganteek Aji Sax ji, Kiy Dund, nga fekke tey, duma teqlikook yaw muk.» Ñu daldi ànd, dem Betel.

<sup>3</sup> Kurélu yonenti Betel nag dikk ca Alyaasa ne ko: «Ndax xam nga ne bésu

tey jii Aji Sax ji dina la yenni sa kilifteefu sang Ilyaas?» Mu ne: «Man kay xam naa ko; waaye noppileen rekk.»

<sup>4</sup> Ba mu ko defee Ilyaas ne Alyaasa: «Ngalla xaar ma fii nag, ndax Aji Sax ji da maa yebal Yeriko.» Alyaasa ne ko: «Ak sama digganteek Aji Sax ji, Kiy Dund, nga fekke tey, duma teqlikook yaw mukk.» Ñu daldi ànd, dem Yeriko.

<sup>5</sup> Kuréli yonenti Yeriko nag dikk ba ca Alyaasa ne ko: «Ndax xam nga ne bésub tey jii Aji Sax ji dina la yenni sa kilifteefu sang Ilyaas?» Mu ne leen: «Man kay xam naa ko, waaye noppileen rekk.»

<sup>6</sup> Gannaaw loolu Ilyaas ne Alyaasa: «Ngalla xaaral fii, ndax Aji Sax ji da maa yebal dexu Yurdan.» Alyaasa ne ko: «Ak sama digganteek Aji Sax ji, Kiy Dund, nga fekke tey, duma teqlikook yaw mukk!» Ñu ànd ñoom ñaar.

<sup>7</sup> Ba loolu amee juróom fukki nit bawoo ca kuréli yonent ya, dikk taxaw, dànd leen, janook ñoom fa ñu yem ñoom ñaar ca tàkkal dexu Yurdan. <sup>8</sup> Ilyaas jël mbubbam, taxañ, ne ko tàrr ca ndox ma, mu xàjjalikoo jaar. Ñu jaar ci suuf su wow si, jáll ca wàlla.

<sup>9</sup> Ba ñu jàllee, Ilyaas ne Alyaasa: «Wax ma lu ma lay defal bala ñu maa yóbbu, may teqlikook yaw!» Alyaasa ne ko: «Xanaa naa am lu mat sag leer ñaari yoon.» <sup>10</sup> Ilyaas ne ko: «Ñaan nga lu jafe. Waaye soo ma gisee bu ñu may jële fi ma nekk ak yaw, yóbbu, kon dinga ko am. Soo ma gisul nag, doo ko am.»

<sup>11</sup> Ci kaw loolu ñu ànd di waxtaan, di dem. Yéguñu lu moy watiiru sawara, wu ànd ak fasi sawara, ne jimeet, dox seen diggante ñoom ñaar; Ilyaas yiiroo aw callweer, yéeg kaw asamaan. <sup>12</sup> Alyaasa gis loolu, daldi yuuxu, naan: «Wuy baayee, baay bóoy, yaay watiiru xarey Israyil aki gawaram!» Ba loolu amee gisatu ko. Mu ne sèq ay yéreem, ne ko tareet, def ko ñaar ndaxu tiis, <sup>13</sup> doora for mbubb ma wadde ca Ilyaas; ne wërëñ, dem taxawi ca tàkkal dexu Yurdan. <sup>14</sup> Ba mu ko defee Alyaasa fab mbubb ma wadde ca Ilyaas, ne ko tàrr ca ndox ma

ne: «Ana Aji Sax ji, Yállay Ilyaas? Ana mu?» Naka la Alyaasa dóor ca ndox ma moom itam, mu xàjjalikoo jaar, mu jáll.

<sup>15</sup> Kuréli yonenti Yeriko ya doon seetaan a nga janook moom naa: «Leeru Ilyaas wàcc na ci kaw Alyaasa!» Ba loolu amee ñu gatandu ko, sujjóotal ko, dëpp seen jë ca suuf.

<sup>16</sup> Ci kaw loolu ñu ne ko: «Xam nga lan la, sang bi? Am na ci nun juróom fukki nit ñu jambaare. Nañu dem seetali la sa sang ba. Jombul leeru Yàlla yóbbu ko, teg ko ci kaw tund yii, wenn, mbaa mu teg ko ci biir xur yii, wenn.» Mu ne leen: «Déedéet, buleen leen yebal.» <sup>17</sup> Ñu soññ ko, ba mu am ca kersa, ne leen: «Waaw, yebal-leen leen.» Ñu daldi yebal juróom fukki nit, ñu seet diiru ñetti fan, gisuñu kenn. <sup>18</sup> Naka lañu dellu ca moom, fekk ko ca Yeriko, mu ne leen: «Newuma leen woon buleen dem?»

<sup>19</sup> Gannaaw loolu waa dëkk ba ne Alyaasa: «Xam nga fi dëkk bi nekk baax na, sang bi, waaye ndox mi baaxul, te suuf si nanguwul.» <sup>20</sup> Alyaasa ne leen: «Indil-leen ma ndab lu bees, te def ci xorom.» Ñu indil ko. <sup>21</sup> Mu dem ba ca bētu ndox ba, sànni ca xorom sa, ne: «Aji Sax ji nee: Laabal naa ndox mii. Dootu rey te dootu tax suuf si du nangu.» <sup>22</sup> Ndox ma daa laab ba tey jii, muy la Alyaasa waxoon.

<sup>23</sup> Alyaasa bàyyikoo fa, jëm Betel. Ma nga topp yoon wa di dem, ay gone jóge ca dëkk ba, di ko ñaawal, naan ko: «Boroom nel, ca kaw! Ée boroom neleey, ayca ca kaw!» <sup>24</sup> Naka la ne gees, ne leen jàkk, daldi leen móolu ci turu Aji Sax ji. Ci kaw loolu ñaari urs\* génne ca àll ba, fàdd ca gone ya ñeent fukk ak ñaar. <sup>25</sup> Mu bàyyikoo foofa jubal tundu Karmel, jóge fa dellu Samari.

### 3

#### *Israyil ak Mowab jote nañu*

<sup>1</sup> Ba Yosafat faloo Yuda, ba dugg fukkeelu atu nguuram ak juróom ñett, ca la Yoram doomu Axab falu buur ca Israyil, péeyoo Samari. Yoram nguuru na fukki at ak ñaar, <sup>2</sup> di def li Aji Sax ji ñaawlu.

\* 2:24 2.24 urs rab wu ñàng la; man naa ëpp gaynde.

Waaye taxul mu dab ndeyam ak baayam: jële na fa doj wa ñuy jaamoo Baal te baayam sampoon ko fa. <sup>3</sup> Terewul mu sax ci xeetu bàkkaar ya Yerbowam doomu Nebat doon bàkkaarloo Israyil, bañ koo dëddu.

<sup>4</sup> Ci biir loolu, Mesa buuru Mowab doonoon boroom jur, di fey buurub Israyil galagu téeméeri junniy xar (100 000) ak téeméeri junniy kuuy (100 000) yu ñu watul. <sup>5</sup> Buur Axab nag dee, buuru Mowab jógal buurub Israyil ba ko wuutu. <sup>6</sup> Ba mu ko defee Buur Yoram daldi génn Samari ca saa sa, lim mbooloom xarem Israyil mépp. <sup>7</sup> Ba loolu amee mu yónnee ca Yosafat buurub Yuda, ne ko: «Buuru Mowab fippu na, jógal ma. Ndax doo ànd ak man, nu xarejeek Mowab?» Mu ne ko: «Ahakay! Maak yaw benn lanu. Sama mbooloooy sa mbooloo, samay fas di say fas,» <sup>8</sup> teg ca ne: «Fu nuy jaare, song leen?» Mu ne ko: «Xanaa ca màndiñu Edom.»

<sup>9</sup> Ba mu ko defee buurub Israyil ak buurub Yudak buurub Edom dem di dox diiru juróom ñaari fan, ba ñook jur gi ñu àndal, kenn amatu ci ndox. <sup>10</sup> Buurub Israyil ne: «Musiba am na walla! Nde Aji Sax ji da noo woo, nun ñetti buur yii, ngir teg nu ci loxol buuru Mowab.» <sup>11</sup> Yosafat daldi ne: «Ndax yonentu Aji Sax ji nekkul fii, ba nu seetloo ko ci Aji Sax ji?» Kenn ca jawriñi buurub Israyil ne: «Alyaasaa ngi fi, mooy doomu Safat ji doonoon bëkk-neegu Ilyaas.» <sup>12</sup> Yosafat ne: «Waaw, kàddug Aji Sax jaa ngi ci moom kay.»

Ba mu ko defee buurub Israyil ànd ak Yosafat buurub Yuda, ak buurub Edom, dem ca Alyaasa. <sup>13</sup> Mu wax ak buurub Israyil ne ko: «Ana lu ma séq ak yaw? Demal kay ca sa yonenti baay yaak sa yonenti ndey ya!» Buurub Israyil ne ko: «Déedéet, ndaxte Aji Sax jee nu fi woo, nun ñetti buur yii, ngir teg nu ci loxol Mowab.» <sup>14</sup> Alyaasa ne ko: «Giñ naa ci Aji Sax ji, Kiy Dund, Boroom gàngoori xare yi, moom mi may jaamu, bu dul woon ak Yosafat buurub Yuda mii teew, te ma rus ko, duma la xool sax mbaa ma di la faale. <sup>15</sup> Waaye indil ma ab xalamkat.» Mu indil ko.

Naka la xalamkat bay xalam, leeru Aji Sax ji dikkal Alyaasa. <sup>16</sup> Alyaasa ne: «Aji Sax ji nee: Gasleen ci xur wii ay kàmbi kàmb. <sup>17</sup> Ndaxte Aji Sax ji nee: Du ngelaw lu ngeen di gis mbaa taw, te du tee xur wii fees dell ak ndox, ngeen naan yeen ak seen gétt ak seen jur gu gudd. <sup>18</sup> Loolu yomb na Aji Sax ji te dina teg Mowab ci seen loxo it. <sup>19</sup> Dingen nangu mboolem dëkk bu mag bu ñu wëraley tata ak mboolem péey; garab gu baax ngeen gor, mboolem bëti ndox ngeen fatt, tool bu nangu ngeen yàq kooki xeer.» <sup>20</sup> Ca suba sa, ba ñuy tollu ci rendi sarax rekk; ndox ma bàyyikoo yoonu Edom, wal, ba fépp fees ak ndox.

<sup>21</sup> Ci biir loolu Mowabeen ñépp dégg ne buur ya ñëw nañu xareseek ñoom. Ñu woo képp ku àttan ngànaay, mag ak ndaw, ñu bokk taxaw fa seeni réew digaloo.

<sup>22</sup> Ba ñu fanaanee ba ca suba sa, jant bay leroxat ca ndox ma. Waa Mowab tollu ca wàlla, di gis ndox ma xong, mel ni deret. <sup>23</sup> Ña nga naan: «Lee de deret la! Xam naa buur yaa xeexa xeex, ba reyante ca seen biir. Kon nag waa Mowab, ayca, ca lël ja!»

<sup>24</sup> Ba ñu dikkee ba ca dalub Israyil, waa Israyil jógal dal ca seen kaw, ba ñu won leen gannaaw, ne wëqet. Ñu dugg réewum Mowab, duma leen. <sup>25</sup> Ba loolu amee ñu yàqte dëkk ya, mboolem tool bu nangu, kenn ku nekk sànni ca xeer ba mu fees, bëtu ndox bu nekk, ñu fatt, garab gu baax gu ne, ñu gor. Mujj na dëkk bu ñu naan Kir Eres donj a ne ñumm ak xeer ya ñu ko tabaxe. Teewul boroom mbaq ya gaw ko, song ko. <sup>26</sup> Ba buuru Mowab gisee xeex bi di ko ëpp doole, daa woo juróom ñaar téeméeri boroom saamar, ànd ak ñoom ngir bëtt, ba àgg ca buurub Edom. Waaye sottiwul. <sup>27</sup> Ba loolu amee mu jël taawam bu góor bi nara falu buur, wuutu ko, ne ko teqet rendi, def ko saraxu rendi-dóomal ca kaw tata ja. Waa Israyil ñaawlu jëf ja lool, daldi won buuru Mowab gannaaw, ñibbi seenum réew.



## 4

*Alyaasa jot na jëtun ba*

<sup>1</sup> Am na bés ku jëkkëram bokkoon ci yonent yi, di jooytu ci Alyaasa ne ko: «Sama jëkkër de sa ndongo la woon. Léegi nag faatu na, te yaw ci sa bopp sang bi, xam nga ne ku ragaloon Aji Sax ji la. Waaye ka mu ameeloon bor moo dikk, bëgga yóbbu sama ñaari doom yu góor, ngir def leeni jaam.» <sup>2</sup> Alyaasa ne ko: «Loo bëgg ma dimbalee la ko? Wax ma loo am ca kër ga.» Mu ne ko: «Dara, sang bi. Awma dara ca kër ga lu moy taxub diw.» <sup>3</sup> Mu ne ko: «Demal àbbi ay ndab yu deful dara ci sa dëkkandoo yi la wër yépp, te bumu néew. <sup>4</sup> Su ko defee nga dellu tëjook say doom, ba noppi nga sotti diw gi ci ndab yooyu yépp, bu ci fees, nga ber.»

<sup>5</sup> Mu bàyyikoo nag ca Alyaasa. Gannaaw gi mu tëjuji, mooki doomam; ñu di ko jox, muy sotti. <sup>6</sup> Mu dem ba ndab ya fees, mu ne doom ja: «Jottli ma ndab leneen.» Mu ne ko: «Ndab desu fi de.» Diw ga it ne tekk, xelleetul. <sup>7</sup> Mu daldi dem wax ko góoru Yàlla ga. Mu ne ko: «Doxal jaay diw gi, fey say bor; la ca des nga dunde, yaak say doom.»

*Alyaasa am nab dal*

<sup>8</sup> Am na bés Alyaasa jaare dëkk bu ñuy wax Sunem. As ndaw su bare alal woo ko lekk këram, di ko soññ. Mujj na saa yu fa jaaree, daldi fay toog, ba xéewlu. <sup>9</sup> Ci biir loolu mu ne jëkkëram: «Aa, man déy, xam naa ne kiy fara dal ak nun góoru Yàlla gu sell la. <sup>10</sup> Tee nu koo tabaxal néeg bu ndaw ci kaw taax mi, defal ko ca ab lal ak taabal ak toogu akub làmp, ba bu ñëwatee dal ca?»

*Alyaasa delloo na njukkal*

<sup>11</sup> Noonu la Alyaasa dikke bés, dal ca néeg ba ñu ko tabaxal ca kaw taax ma, tèdd fa. <sup>12</sup> Ci kaw loolu mu ne surgaam Gewasi: «Wool ma ndawas Sunem sii.» Mu wool ko ko, mu dikk taxaw. <sup>13</sup> Mu ne surgaam: «Waxal ma ndaw sii ne ko: «Waaw, yaw de yaa ngi sonn ci nun coono bii bépp! Ana loo bëgg nu defal la ko? Ndax nu waxal la Buur lu jëm ci yaw, am nu wax ak njiital mbooloom xare ma?»»

Mu wax ko, mu ne ko: «Jërëjër, waaye am naa teraanga ci sama biiri bokk.» <sup>14</sup> Alyaasa ne Gewasi: «Ana lu nu koy defal nag?» Mu ne ko: «Amul doom ju góor de, te jëkkëram mag la.» <sup>15</sup> Alyaasa ne ko: «Woowaat ko.» Mu woo ko; mu dikk, taxaw ca bunt ba. <sup>16</sup> Alyaasa ne ko: «Nëgëni déwén dinga leewu doom ju góor.» Mu ne ko: «Déet, sang bi, góoru Yàlla gi, bu ma nax mukk, sang bi.»

<sup>17</sup> Ndaw sa nag mujj ëmb; ca déwén sa mu am doom ju góor, ca jamono jooja, muy la ko Alyaasa waxoon.

<sup>18</sup> Xale ba di màgg. Mu am bés mu dem fekki baayam ca ñay góob. <sup>19</sup> Mu jekki ne baayam: «Wóoy baay, sama bopp bi, sama bopp bi!» Baay ba ne surga ba: «Yóbbu ko ca yaayam.» <sup>20</sup> Surga ba fab ko, yóbbu ca yaayam, mu uuf ko, ba ca digg bëccëg, xale ba dee. <sup>21</sup> Yaay ja yéeg, tëral ko ca kaw lalu góoru Yàlla ga, tëj bunt ba, daldi génn. <sup>22</sup> Mu woo jëkkëram, ne ko: «Rikk boole maak kenn ci surga yi te jox ma menn mbaam, ma daw ba ca góoru Yàlla ga te ñëw gaaw.» <sup>23</sup> Mu ne ko: «Ana loo wuti ca moom tey, te du Terutel weer, du bés sub Noflaay?» Mu ne ko: «Jàmm la.»

<sup>24</sup> Ba loolu amee ndaw sa takk mbaam ma, ne surgaam: «Doxal jiiitu, bu ma taxawloo ci yoon wi te waxuma la ko.» <sup>25</sup> Mu dem ba àgg ca góoru Yàlla ga, ca tundu Karmel.

Góoru Yàlla ga séen ko fu sore, ne surgaam Gewasi: «Xoolal, ndawas Sunem saa ngi. <sup>26</sup> Dawal gaaw dajeek moom, laaj ko mbaa mu ngi ci jàmm mook jëkkëram ak doomam.» Mu laaj ko, mu ne ko: «Jàmm rekk la.» <sup>27</sup> Mu agsi nag ca góoru Yàlla ga, ca kaw tund wa, ne fëlëñ ca suuf, jàpp ca tànk ya. Gewasi dikk, bëgg koo bëmëx, mu ne ko: «Bàyyi ko, xolam a naqari. Aji Sax ji nag nëbb na ma ko, xamalu ma lan la.» <sup>28</sup> Ndaw sa ne ko: «Sang bi, ndax maa la ñaan doom ju góor? Newuma la woon bu ma nax?»

<sup>29</sup> Ba loolu amee Alyaasa ne Gewasi: «Takkul, nàbb sama yet ci sa loxo te daw dem. Koo mana taseel, bu ko nuyuu te bu la nuyoo, bu ko fey. Boo àggee, tegal sama yet wii ca kaw kanamu xale ba.»

<sup>30</sup> Teewul yaayu xale ba ne ko: «Ak sama digganteek Aji Sax ji, Kiy Dund, nga fekke tey, duma la fi bàyyi.» Mu daldi jóg topp ca moom.

<sup>31</sup> Fekk na Gewasi jiitu leen. Ba mu agsee, teg na yet wa ca kaw kanamu xale ba, waaye xale ba àdduwul, yènguwul. Gewasi waññiku, dajeek Alyaasa ne ko: «Xale ba de yewwuwul!» <sup>32</sup> Ba Alyaasa agsee ca kër ga it, fekkul lu moy néewu xale bi tèdd ca kaw lal ba. <sup>33</sup> Naka la dugg, tëj bunt ba, ñoom ñaar ca biir. Mu ñaan ci Aji Sax ji, <sup>34</sup> ba noppi yéeg, daldi tàlli ca kaw xale ba, tafu ca kawam, gémmiñ ak gémmiñ, bët ak bët, biir loxook biir loxo. Naka la bóof ca kaw xale ba, yaram wa tàmbalee tàngaata. <sup>35</sup> Alyaasa jóg di jaabante ca biir néeg ba. Nes tuut mu yéeg, bóofaat ca kaw xale ba; xale ba daldi tislí ba muy juróom ñaari yoon, ne xiféet. <sup>36</sup> Ba loolu amee Alyaasa woo Gewasi ne ko: «Wool ndawas Sunem soosu.» Mu woo ndaw sa, mu dikk. Mu ne ko: «Jëlal sa doom.» <sup>37</sup> Ndaw sa ne gurub cay tànkam, sujjóot; ba noppi fab doomam, génn.

### *Alyaasa sekki na tooke ja*

<sup>38</sup> Gannaaw loolu Alyaasa ñibbi Gilgal, mu yemook xiif am ca réew ma. Mu am bés kurélu yonent ya daje fa moom. Alyaasa ne surgaam: «Tegal cin lu mag li te toggal yonent yii mbuum.» <sup>39</sup> Ci kaw loolu kenn ca ñoom génn, dem ca àll ba, di witti ay xob, daldi fa gis ag lawtan gu doom ya mel ni yomb, mu witt ca ba mbubbam fees. Mu dellu, fejat ko, yeb ca cinu mbuum la, te kenn xamul lu mu doon. <sup>40</sup> Ñu yekkal ko nit ña, waaye manuñu koo lekk. Naka lañu mos rekk, yuuxoo ne: «Lekk-dee la cin li def de, góoru Yàlla gi!» <sup>41</sup> Alyaasa ne: «Indil-leen ma sunguf.» Ñu indi, mu xëpp ca cin la, daldi ne: «Sottil-leen mbooloo mi, ñu lekk.» Ba loolu amee dara lu aay amatul ca cin la.

### *Alyaasa leel na mbooloo*

<sup>42</sup> Ba loolu wéyee jenn waay jóge Baal Salisa, indil góoru Yàlla ga mburum pepp

ma jékka ñor, muy ñaar fukki mburuy lors, boole ciy gubi bele, yeb ko ci saakoom. Alyaasa ne ñu jox ko mbooloo mi, ñu lekk. <sup>43</sup> Ka koy séddale ne ko: «Waaw, nu may taajale lii téeméeri nit?» Mu ne ko: «Joxal mbooloo mi ñu lekk, ndax Aji Sax ji nee: Dinañu lekk ba mu des.» <sup>44</sup> Mu taajal leen ko, ñu lekk ba desal, muy la Aji Sax ji waxoon.

## 5

### *Alyaasa faj na kilifa*

<sup>1</sup> Bu loolu wéyee Naaman njiital xareb buurub Siri la woon. Sangam buurub Siri nawloo ko lool, def ko nitam, ndax ciy loxoom la Aji Sax ji jaarale ndam li mu mayoon waa Siri. Ku jàmbaare la woon, waaye daa amoon jàngoroy ngaana\*.

<sup>2</sup> Fekk na ay xarekati waa Siri dem songi réewum Israyil, jàppe fa ab janq, def ko surgab jabaru Naaman. <sup>3</sup> Mu am bés janq ba ne njaatigeem: «Éy su sama sang bi demoon ca yonent ba ca Samari! Kon de dina ko teggil jàngoroy deram ji.»

<sup>4</sup> Naaman nag dem wax Buur, sangam, ne ko janqub waa Israyil ba nee na nàngam ak nàngam. <sup>5</sup> Buurub Siri ne ko: «Demal kay, dinaa la yóbbante buurub Israyil bataaxal.» Mu dem, yóbbaaale ñetti téeméeri kiloy xalis, ak juróom benn fukki kiloy wurus, ak fukki mbubbi xew; <sup>6</sup> bataaxal ba mu yót buurub Israyil nag, lii lañu ca bind: «Bataaxal bii maa ko teg ci sama loxol surga Naaman, yebal ko ci yaw, ngir nga fajal ko ngaana gi ko dal.»

<sup>7</sup> Naka la buurub Israyil jàng bataaxal ba rekk, ne mbubb ma tareet ndax jaaxle, daldi ne: «Man dama di Yàlla bay rey, mbaa may dundal, ba kii di yebal nit ku may fajal ngaana! Seetleen lii rekk: kii da may wut!»

<sup>8</sup> Ba Alyaasa, góoru Yàlla ga dégge ne buurub Israyil xotti na mbubbam, daa yónnee ca moom, laaj ko ne ko: «Ana lu tax nga xotti sa mbubb? Yebalal waa ji ci man rekk. Dina xam ne yonent a ngi ci Israyil.» <sup>9</sup> Ba loolu amee Naaman yóbbaaale

\* 5:1 5.1 ngaana: baat bi man naa ëmb yeneen jàngoroy der juy law te aay, yu dul ngaana kese.

ay fasam aki watiiram, dikk taxaw ca bunt kër Alyaasa. <sup>10</sup> Alyaasa yebal ndaw ca moom ne ko: «Demal sanguji juróom ñaari yoon ca dexu Yurdan, sa yaram set, dellu mel na mu meloon.»

<sup>11</sup> Naaman nag mer. Ma ngay dem te naan: «Xoolal rekk, man mi noon day daldi génn taxaw ci biti, ñaan ci Yàllaam Aji Sax ji, tiimale loxoom èr bi, daldi teggi jàngoro ji! <sup>12</sup> Te sax xanaa Abanaa ngi nii ak Parpar, di dexi Damaas, gën fopp mboolem ndox muy wal ci Israyil? Ndax dama caa manuloona sangu, ba wér?» Mu walbatiku dem, mer lool.

<sup>13</sup> Surgaam ya nag dikk, kenn ca ñoom ne ko: «Baay Naaman, su doon lu jafe la la yonent bi wax ndax danga ko dul def? Kon kay su la nee nga sangu rekk, set wecc, nga war koo def!» <sup>14</sup> Naaman nag doora dem, sóobu ca dexu Yurdan ga, ba muy juróom ñaari yoon, muy la góoru Yàlla ga waxoon. Mu daldi wér, yaram wa mel ni yaramu xale bu góor bu ndaw, set wecc.

<sup>15</sup> Ba loolu amee Naaman dellu ca góoru Yàlla ga, mook mboolem toppam ma. Mu dikk ba ca moom, taxaw ne: «Dama ne léegi wóor na ma ne amul jenn Yàlla ci mboolem àddina ju moy Yàlla ji ci Israyil. Kon nag sang bi, ngalla nangul lii, maa la ko may.» <sup>16</sup> Alyaasa ne ko: «Déédéet. Giñ naa ci Aji Sax ji, Kiy Dund, moom mi may jaamu, дума ko jël.» Mu soññ ko, soññ, mu bañ. <sup>17</sup> Naaman ne ko: «Gannaaw bañ nga, sang bi, nañu ma may sēfub ñaari berkelle ci suuf, ngir kat, sang bi, dootuma jébbal ay tuur saraxu rendi-dóomal mbaa yeneen sarax, xanaa Aji Sax ji donj†. <sup>18</sup> Waaye sang bi, lenn rekk laay ñaan, Aji Sax ji jéggal ma ko. Bu sama sang ba di dugg ca kër tuur ma ñuy wax Rimon, di ko sujjóotal, ba jàpp sama loxo, ma ànd ak moom sujjóot ca kër Rimon, yal na ma Aji Sax ji jéggal la ma fay sujjóot rekk, sang bi.» <sup>19</sup> Alyaasa ne ko: «Demal ak jàmm.»

### *Gewasi lal na pexe*

† 5:17 5.17 Naaman dafa yaakaaroon ne Aji Sax ji, Israyil rekk lañu ko mana jaamoo. Teewul mu defe ne ku sàkk suufas Israyil, tabaxal ko ca feneen sarxalukaay, Aji Sax ji man na faa nangu sa jaamu ba tey.

Ba Naaman bàyyikoo ca Alyaasa, dem ba xawa sore, <sup>20</sup> Gewasi surgab góoru Yàlla ga, Alyaasa, ne ca xelam: «Eewaay sama sang daal! Day bàyyi Naaman waa Siri bii mu dem noonu rekk; jëlul dara ci li mu indi. Giñ naa ko ci Aji Sax ji, Kiy Dund, dinaa daw dabi ko, ba am ci moom as lëf.»

<sup>21</sup> Gewasi daldi daw dabi Naaman. Ba ko Naaman séenee muy daw wutsi ko, mu cëppoo ca watiiram dajeek moom, ne ko: «Mbaa jàmm la?» <sup>22</sup> Mu ne ko: «Jàmm la kay. Sama sang a ma yónni ne ma ma wax la ne ñaari xale yu góori yonent a agsi léegi, jóge diiwaanu tundi Efrayim. Nee ndax doo ko jox fanweeri kiloy xalis ak ñaari mbubbi xew yu mu leen may?» <sup>23</sup> Naaman ne ko: «Ahakay! Jëlal juróom benn fukki kiloy xalis kay!» Mu soññ ko nag, ba mu èmb juróom benn fukki kiloy xalis yi ci ñaari mbuus, boole ca ñaari mbubbi xew, jox ko ñaari surgaam, ñu gàddu, jiitu Gewasi. <sup>24</sup> Gewasi agsi ca tund wa, jële ko ca seeni loxo, dem, denci ko ca biir kër ga, ba noppi yiwi leen, ñu dem.

<sup>25</sup> Ba loolu wéyee mu dellu ca sangam Alyaasa. Mu ne ko: «Foo jóge nii?» Mu ne ko: «Demuma fenn di, sang bi.» <sup>26</sup> Alyaasa ne ko: «Defe nga ne samag leer teewuloon, ba nit kay wàcce ca watiiram, di dajeek yaw? Ndax danoo tollu ci jël xalisu kenn aki mbubb mbaa ay tooli oliw aki tooli reseñ aki gàtt aki nag aki jaam yu góor ak yu jigéen? <sup>27</sup> Ngaanag Naaman dina la topp, yaak saw askan ba fàww!» Ba mu ko defee Gewasi bàyyikoo ca Alyaasa, daldi gaana, yaram wa ne fureet, weex furr.

## 6

### *Weñu sémmiñ ga tëmb na*

<sup>1</sup> Am na bés mbooloom yonent ya wax Alyaasa ne ko: «Xoolal, fii nuy dajeek yaw daa xat. <sup>2</sup> Nan dem ngalla ba ca tàkkal dexu Yurdan, ku nekk ci nun sàkk fa aw dénk, nu defaral fa sunu bopp bérab bu nu daje.» Alyaasa ne leen:

«Demleen.»<sup>3</sup> Kenn ca ñoom ne ko: «Sang bi, ñewal nu dem kay!» Mu ne ko: «Waaw, nan dem.»<sup>4</sup> Mu ànd ak ñoom dem ba ca dexu Yurdan, di fa gor ay garab.<sup>5</sup> Kenn ca ñoom doon gor; weñu sémmiñam wadd ca ndox ma. Mu jalu, ne: «Éy, sang bi, te dama koo àbboon kat!»<sup>6</sup> Góoru Yàlla ga ne ko: «Fu mu wadd?» Mu won ko fa mu wadd, mu dog bant sànni foofa, weñ ga tëmb.<sup>7</sup> Mu ne ko: «Foral!» Mu yóotu, for ko.

### *Alyaasa sànk na gàngoor*

<sup>8</sup> Bu loolu wéyee buurub Siri doon na xareek Israyil. Ci biir loolu mu diisooki surgaam, ne leen bérab sàngam lay def ab dalam.<sup>9</sup> Ci kaw loolu góoru Yàlla ga yónnee ca buurub Israyil, ne ko: «Nanga moytoo jaare bérab sàngam, ndaxte fa la waa Siri jëm.»<sup>10</sup> Buurub Israyil yónnee fa ko góoru Yàlla ga wax, ngir nemmiku foofa. Alyaasa di artoo Buur noonu, muy fàggandiku. Loolu am na bu dul benn yoon, du ñaar.<sup>11</sup> Buurub Siri nag jàq lool ci loolu, daldi woolu ay jawriñam ne leen: «Ana kan ci yeen moo fi nekkal buurub Israyil?»<sup>12</sup> Kenn ca jawriñ ya ne ko: «Du kenn, Buur sang bi; waaye Alyaasa, yonent bi ci Israyil mooy jottli buurub Israyil kàddu yi ngay wax ci sa biir néegu biir.»<sup>13</sup> Mu ne: «Seetalileen ma ko, ma yónnee, jàpp ko.» Ñu mujj xamal ko ne: «Moom de, ma nga ca Dotan.»<sup>14</sup> Buurub Siri yebal fa ay dag yu takku, yóbbaale ay fas aki watiir. Mu agsi guddi, gaw dëkk ba.

<sup>15</sup> Ci kaw loolu bëkk-néegub góoru Yàlla ga jóg ca suba teel, génn, gisul lu moy mbooloom xare mu gaw dëkk ba, aki fas aki watiir. Mu ne ko: «Éy sang bi, fu nu jëm?»<sup>16</sup> Alyaasa ne ko: «Bul tiit, noo leen ëpple ñu ñu àndal.»<sup>17</sup> Alyaasa nag ñaan ne: «Aji Sax ji, ngalla ubbil ay bëtam, mu gis.» Aji Sax ji ubbi bëti surga ba, mu xool, ndeke tund waa nga fees aki fas aki watiiri sawara, wër Alyaasa.

<sup>18</sup> Ba mu ko defee waa Siri wutsi Alyaasa, mu ñaan ci Aji Sax ji ne ko: «Rikk mural bëti mbooloo mii.» Aji Sax

ji muur seeni bët, na mu ko ko ñaane.<sup>19</sup> Alyaasa nag ne leen: «Fii du yoon wi de, te du dëkk bi ngeen di seet it. Toppleen ma, ma yóbbu leen ci ki ngeen di seet.» Mu daldi leen yóbbu ba Samari.

<sup>20</sup> Ba ñu duggee Samari, Alyaasa dellu ñaan ne: «Aji Sax ji, ngalla ubbil bëti nit ñii, ñu gis.» Aji Sax ji muri seeni bët, ñu xoolle rekk, gis ne ñu ngi biir Samari.<sup>21</sup> Buurub Israyil gis leen ne: «Baay Alyaasa, ma rey leen? Áa, ma rey leen?»<sup>22</sup> Mu ne ko: «Bu leen rey mukk. Xanaa ñoo jàpp cib xare sax doo leen rey? May leen ñu lekk, naan, te dellu ca seen sang.»<sup>23</sup> Ba loolu wéyee Buur berndeel leen bernde ju réy; ñu lekk, naan; mu yiwi leen, ñu ñibbi ca seen sang. Booba la waa Siri gëjoona def gàngoori yàqkat, di dugg biir réewum Israyil.

### *Xiif ba tar na ca Samari*

<sup>24</sup> Ba ñu demee ba yeneen jamono, Ben Addàd buurub Siri woo mbooloom xareem mépp, dem gawi Samari.<sup>25</sup> Xiif bu metti am ca Samari ndax gaw ba, ba boppub mbaam-sëf di jar juróom ñett fukki dogi xalis, genn-wàll liibaru jonkanu pitax\* di jar juróomi dogi xalis.<sup>26</sup> Mu am bés buurub Israyil jaar ca kaw tata ja, senn as ndaw àddu ca kaw ne ko: «Buur, sang bi, ngalla wallu ma!»<sup>27</sup> Mu ne ko: «Bu la Aji Sax ji walluwul, nu ma lay walloo? Du pepp, du ndoxum reseñ ju ma la mana may.»<sup>28</sup> Mu teg ca ne ko: «Lan la sax?» Ndaw sa ne ko: «Ndaw sii da ma noon: “Indil sa doom, nu lekk ko tey, èllëg nu lekk sama doom.”<sup>29</sup> Nu togg sama doom, bokk ko lekk. Ma ne ko: “Su èllëgee indil sa doom, nu bokk ko lekk.” Moom nag mu làq doomam.»<sup>30</sup> Ba Buur déggee kàdduy ndaw sa, daa xotti mbubbam ndaxu naqar. Ma ngay dox, di wéy ca kaw tata ja, mbooloo ma tollu ci suuf séenuñu lu moy saaku bi mu def njiitlaay, di ko ñaawloo.

<sup>31</sup> Ma nga naan: «Yal na ma Yàlla teg mbugal mu gëna tar ndegam bésub tey jii boppub Alyaasa doomu Safat du teqlikook baatam.»<sup>32</sup> Fekk na Alyaasaa

\* 6:25 6.25 jonkanu pitax: am na ñu jàpp ne jonkanu pitax xollitu peppu saxayaay la gu ñuy wooye noonu.

nga ca këram toog, mag ña bokk toog ak moom. Buur yebal ndaw ca moom. Ndaw la agseegul, Alyaasa ne mag ña: «Xoolleen bóomkat bii yebal kuy dogsi sama bopp! Xam ngeen lan la, bu ndaw li agsee rekk, tëjleen bunt bi, tere koo dugg; ndax du tàñki sangam laay dégg, mu topp ci moom sax?»

<sup>33</sup> Naka la Alyaasa di wax, ndaw la ne jimeet, jëm ca moom. Ma nga naan: «Gis nga musiba mii Aji Sax ji wacce. Kon ana lu may séentooti ci Aji Sax ji?»

## 7

<sup>1</sup> Ba loolu amee Alyaasa ne: «Dégluleen kàddug Aji Sax ji. Aji Sax ji nee: Nègèni èllég benn nattub lëmm ci sunguf su mucc ayib benn dogu xalis donj lay doon, ñaari natti lors it di benn dogu xalis ca buntu Samari.» <sup>2</sup> Jaraaf ja daan ànd ak Buur saa su ne àddu ca ne góoru Yàlla ga: «Ma ne, su Aji Sax ji ubbi woon sàqi asamaan sax, ndax man naa tax loolu am?» Mu ne ko: «Dinga ci teg sa bët déy, waaye doo ci lekk.»

### *Aji Sax ji wallu na Samari*

<sup>3</sup> Ci biir loolu amoon na ñeenti gaana yu nekkoon ca bunt dëkk ba. Ña nga naan ci seen biir: «Xanaa dunu toog fii ba dee? <sup>4</sup> Su nu demee ca biir dëkk ba, danuy dee ak xiif. Su nu toogee fii itam, dee ak xiif. Kon kay nan dem ca dalub waa Siri, jébbal leen sunu bopp. Su ñu nu bàyyee, nu dund, baax na. Su ñu nu reye it, nu dee rekk.»

<sup>5</sup> Ci kaw loolu ñu jóg timis, jëm ca dalub waa Siri. Ba ñu agsee ca peggub dalu waa Siri, gisuñu luy nirook nit sax. <sup>6</sup> Booba fekk na Boroom bi dégtal waa dalub Siri ba riirum fas yu ànd aki watiiri xare ak gàngoor gu réy, ba tax ñu naan ca seen biir: «Áa! Loolu de, buuri Etteen ñaak buuri Misraa, Buurub Israyil fey leen, ngir ñu songsi nu!» <sup>7</sup> Ba mu ko defee ñu jóge fa ca timis, bàyyi fa seeni xaymaak seeni fas ak seeni mbaam, wacc dal ba noonu, daw rawaleji seen bakkan.

<sup>8</sup> Ñeenti gaana ya nag dikk, ba jub dal ba, daldi jegesi, dugg cib xayma, lekk fa, naan, jële fa xalis ak wurus aki yére,

dem nëbbi ko; dellu duggaat cib xayma jëleeti fa, dem nëbbi ko. <sup>9</sup> Ba loolu amee ñu ne ca seen biir: «Nun kat defunu njub. Bésub tey jii bésub jàmm la; nun, nu ne patt yéglewunu ko. Su nu xaaree ba jant bi leer de, àq dina nu topp. Kon nag aycaleen nu dem yeggeji ko waa kër Buur.» <sup>10</sup> Ñu daldi dem woo wattukati bunt dëkk ba, wax leen, ne leen: «Dem nanu ca biir dalu waa Siri; ndeke kenn nekku fa, baat jibu fa; dara lu moy fas yu yeeweek mbaam yu yeeweek xayma yu ne ñumm.»

<sup>11</sup> Wattukati bunt ba woote, yégle ko ca biir kër Buur. <sup>12</sup> Buur jóg ca guddi, wax aki jawriñam ne leen: «Ma wax leen nag li nu waa Siri di fexeel. Xam nañu ne nu ngi dee ak xiif. Moo tax ñu jóge ca seen dal, làquji ca àll ba. Xam naa dañu ne: “Bu ñu génnee dëkk bi rekk, nu jàpp leen, ba noppi dugg ci biir dëkk bi.”» <sup>13</sup> Kenn ca jawriñ ya ne ko: «Nanu yónni rekk ay nit ñu war juróomi fas ci yi nu dese ci dëkk bi. Bu ñu leen reye de, ñook mbooloom Israyil mi des ci dëkk bi yépp ay yem demin. Kon nanu leen yónni rekk te seet ba xam.»

<sup>14</sup> Ba loolu amee ñu waajal ñaari watiir ak seeni fas, Buur yebal ay ndaw yu toppi mbooloom Siri, ne leen: «Demleen seeti.» <sup>15</sup> Ñu dem toppi leen ba ca dexu Yurdan, ndeke yoon wa fees na dell aki yéreeki jumtukaay yu waa Siri sànni, ba ñuy daw. Ndaw ya waññiku, wax ko Buur. <sup>16</sup> Mbooloo ma riir, génwuti dalu Siri ba, sèxëtoo ko. Ci kaw loolu benn nattub lëmm ci sunguf su mucc ayib di jar benn dogu xalis donj, ñaari natti lors it di benn dogu xalis, muy la Aji Sax ji waxoon. <sup>17</sup> Fekk na Buur teg jawriñam ja mu doon àndal saa su nekk ca buntu dëkk ba, mu di ko wattu. Mbooloo ma nag di buuxante, ba dèggaate ko ca bunt ba, mu dee. Muy la góoru Yàlla ga yégle woon ba Buur dikkee ca moom. <sup>18</sup> Na ko góoru Yàlla ga waxe woon Buur, ne ko: «Nègèni èllég benn nattub lëmm ci sunguf su mucc ayib doon benn dogu xalis donj, ñaari natti lors it di benn dogu xalis ca buntu Samari,» noonu la ame. <sup>19</sup> Jaraaf ja da caa àddu woon ne

góoru Yàlla ga: «Ma ne, su Aji Sax ji ubbi woon sàqi asamaan sax ndax man naa tax loolu am?» Mu ne ko: «Dinga ko gisal sa bopp déy, waaye doo ci lekk.»<sup>20</sup> Loolu ci boppam moo ko dal itam, ndax mbooloo ma dañoo buuxante, ba dëggaate ko ca bunt ba, mu dee.

## 8

### *Ndawas Sunem sa jotaat na alalam*

<sup>1</sup> Am na bés Alyaasa wax ndaw sa mu dekkaloon doomam ju góor ne ko: «Ayca, àndal ak sa njaboot, ngeen dali fu ngeen mana dal, ndax Aji Sax ji dogal na ab xiif ci réew mi, te dina am juróom ñaari at.»<sup>2</sup> Ndaw sa fabu, def la ko góoru Yàlla ga wax, dem yoonam mook njabootam, dali ca réewum Filisteen ña, toog fa diiru juróom ñaari at.<sup>3</sup> Ba juróom ñaari at ya matee, ndaw sa jóge ca réewum Filisteen ña, ñibbsi. Mu dem ca Buur, di sàkku mu delloo ko kërám ak suufam.<sup>4</sup> Loolu fekk Buur di waxtaan ak Gewasi, surgab Alyaasa góoru Yàlla ga, naan ko: «Ayca, wax ma mboolem jaloore yi Alyaasa def.»<sup>5</sup> Gewasi nag di nettali Buur na Alyaasa dekkalee woon xale ba, rekk ndaw sa Alyaasa dekkaloon doomam ju góor ne jalañ, di sàkkusi ca Buur mu jox ko kërám ak suufam. Gewasi ne ko: «Ndaw saa ngii nag, Buur, sang bi. Doomam ju góor jii la Alyaasa dekkaloon.»<sup>6</sup> Buur laaj ndaw sa, mu wax ko lépp. Buur boole kook bèkk-néegam ne ko: «Fexeel ba ñu delloo ndaw sii lépp luy alalam ak dayob lépp lu suufam meññoon, la ko dale ca bés ba mu fi jógee ba tey jii.»

### *Asayel mujj na falu ca Siri*

<sup>7</sup> Am na it yoon wu Alyaasa demoon Damaas, péeyu Siri. Fekk Ben Addàd buurub Siri wopp. Ba ñu ko waxee ne ko: «Góoru Yàlla gi ñëw na fi.»<sup>8</sup> Buur ne Asayel, ab jawriñam: «Demal ca góoru Yàlla ga te yóbbaaale loo teg ci loxoom, mu seetal ma ci Aji Sax ji. Laajal ma ko ne ko: “Ndax dinaa jóg ci sama wopp jii?”»<sup>9</sup> Asayel dem ca moom, yóbbaaale lu mu ko jox, muy mboolem la gën ca Damaas, tollu ci sēfub ñeent fukki giléem. Mu dikk taxaw ca kanamam, ne ko: «Ben Addàd

buurub Siri moo ma yónni fi yaw, ne ma: “Laajal ma Baay Alyaasa ndax dinaa jóge ci sama wopp jii.”»<sup>10</sup> Alyaasa ne ko: «Demal ne ko dina jóg moos, waaye Aji Sax ji won na ma ne dina dee déy!»<sup>11</sup> Ba loolu amee góoru Yàlla ga ne dann, ne ko jàkk, ba Asayel rus. Mu daldi jooy.

<sup>12</sup> Asayel ne ko: «Sang bi, looy jooy?» Mu ne ko: «Damaa xam lu bon li ngay defi waa Israyil. Seeni tata ngay taal, seeni xale yu góor nga jam saamar ñu dee, seeni doom nga tas ci suuf, seeni jigéeni biir nga butti.»<sup>13</sup> Asayel ne ko: «Moo sang bi, man mi ab xaj gën, nu ma mana defe jooju jëf ju réy?» Alyaasa ne ko: «Aji Sax ji won na ma ne yaay doon buurub Siri.»<sup>14</sup> Asayel bàyyikoo ca Alyaasa, dellu ca sangam. Mu ne ko: «Lu la Alyaasa wax?» Mu ne ko: «Nee na ma de dinga jóg moos.»<sup>15</sup> Ca èllég sa nag Asayel fab malaan, xooj ko ci ndox, dëpp ko ca kanamu buur ba, fatt ko, mu dee. Gannaaw loolu Asayel falu buur, wuutu ko.

### *Yoram falu na Yuda*

<sup>16</sup> Ba buurub Israyil Yoram doomu Axab duggee juróomeelu atu nguuram, ca la Yoram doomu Yosafat buurub Yuda falu buur ca Yuda.<sup>17</sup> Fanweeri at ak ñaar la amoon ba muy falu buur, te juróom ñetti at la nguuru fa Yerusalem.<sup>18</sup> Tàñki buuri Israyil la topp, di roy waa kër Axab, ndax doomu Axab la jël jabar, di def li Aji Sax ji ñaawlu.<sup>19</sup> Waaye Aji Sax ji bugguloona tas Yuda ngir Daawuda, jaamam ba, ndax la mu ko digoona may ci ay doomam kuy saxal nguuram fàww, ba du fey.

<sup>20</sup> Ca jamonoy Yoram la Edomeen ña fippu, bañ moomeelu Yuda, ba fal seen buuru bopp.<sup>21</sup> Gannaaw loolu Yoram jáll ba Sayir, yóbbaaale watiiri xareem yépp. Moo jóg ag guddi, dal ca kaw Edomeen ña leen gawoon, moom ak njiiti watiiri xareem. Waaye gàngooru Yuda ñoo daw, dellu ca seeni xayma.<sup>22</sup> Edomeen ñaa ngi bañ moomeelu Yuda ba tey jii. Jant yooyu la Libna itam fippu.

<sup>23</sup> Li des ci mbiri Yoram ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant.

<sup>24</sup> Yoram nag tëdd, fekki ay maamam, ñu denc ko ca bàmmeelu maamam ca gox ba ñu naan Kër Daawuda. Doomam Akasiya falu buur, wuutu ko.

### *Akasiya falu na Yuda*

<sup>25</sup> Ba Yoram doomu Axab buurub Israyil duggee ca fukkeelu atu nguuram ak ñaar, ca la Akasiya doomu Yoram falu buur ca Yuda. <sup>26</sup> Ñaar fukki at ak ñaar la Akasiya amoon ba muy falu buur, te menn at la nguuru fa Yerusalem. Atalyaa mooy yaayam, sëtub Omri buurub Israyil. <sup>27</sup> Akasiya topp ca tãnki waa kër Axab, di def li Aji Sax ji ñaawlu ni waa kër Axab, ndax goro la woon ca waa kër Axab. <sup>28</sup> Akasiya ànd naak Yoram doomu Axab, xarejeek Asayel buurub Siri ca Ramot Galàdd. Waa Siri jam Yoram. <sup>29</sup> Buur Yoram nag walbatiku fajuji ca Yisreel ndax jam-jami waa Siri ya ca Raama, ba muy xareek Asayel buurub Siri. Doomu Yoram, Akasiya buurub Yuda nag dem seeti Yoram doomu Axab fa Yisreel ndax jagadeem ga.

## 9

### *Alyaasa fal na Yewu*

<sup>1</sup> Ci kaw loolu Yonent Yàlla Alyaasa woolu kenn ca kurélu yonent ya, ne ko: «Takkul, jël taxub diw bii, te dem ba Ramot Galàdd. <sup>2</sup> Boo yeggee, seet fa Yewu doomu Yosafat doomu Nimsi. Fekk ko ca ña muy àndal, jële ko ca seen biir, ànd ak moom, dugg néeg bu ngeen mana ñaaroo. <sup>3</sup> Su ko defee nga jël taxub diw bi, sotti ko ci kaw boppam te wax ko ne ko: “Aji Sax ji nee: Diw naa la, fal la ngay buurub Israyil.” Boo noppee, bul yeexantu. Ubbil bunt ba, daw.»

<sup>4</sup> Ba loolu amee xale bu góor ba, yonent bu ndaw ba, dem ba àgg Ramot Galàdd. <sup>5</sup> Naka la agsi rekk, fekk njiiti mbooloom xare mi bokk toog. Mu ne: «Kilifa gi, bataaxal laa la indil.» Yewu ne ko: «Ku ko moom ci nun?» Mu ne ko: «Xanaa yaw, kilifa gi.» <sup>6</sup> Yewu jóg, ànd ak moom, dugg ca biir kër ga, mu sotti diw ga ca boppam, ne ko: «Aji Sax ji Yállay Israyil nee: Diw naa la, fal la buurub Israyil sama ñoñ. <sup>7</sup> Nanga tas sa kër sang Axab, te

noonu laay toppe soxnaam Yesabel sama bakkani jaam ñépp: muy yonent Aji Sax jeek ñi dul yonent. <sup>8</sup> Waa kër Axab yépp ay dee. Dinaa faagaagal képp kuy góor te bokk ci waa kër Axab, ci digg Israyil, muy gor di jaam. <sup>9</sup> Dinaa def kër Axab tas, mel ni kër Yerbawam doomu Nebat, mbaa kër Basa doomu Axiya. <sup>10</sup> Yesabel moom, ay xaj a koy lekk ca toolub Yisreel, kenn du ko suul.» Ba loolu amee mu ubbi bunt ba, daw.

<sup>11</sup> Yewu génn, dellu ca moroomi jawriñam ña. Ñu ne ko: «Mbaa jàmm? Lu indi dof bii ci yaw?» Mu ne leen: «Ah, xam ngeen nit kii aki waxam rekk!» <sup>12</sup> Ñu ne ko: «Wax nu waay, bu nu nax!» Mu ne leen nee na ko nàngam ak nàngam, teg ca ne leen: «Mu ne: “Aji Sax ji nee: Diw naa la, fal la buurub Israyil.”» <sup>13</sup> Ba mu ko defee ñu gaaw, summi seeni mbubb ñoom ñépp, lalal ko ca kaw dëggastal ya, ba noppi wal liit ga naa: «Yewu falu na buur!»

### *Yewu fexeel na buur ya*

<sup>14</sup> Ba loolu amee Yewu doomu Yosafat doomu Nimsi fexeel Yoram. Fekk na Yoram ak waa Israyil yépp a ngay wattu Ramot ga ca Galàdd, ndax Asayel buurub Siri. <sup>15</sup> Booba Buur Yoram moom dem na Yisreel, fajuji ndax jam-jam ya ca xareem baak Asayel buurub Siri. Yewu nag ne: «Ndegam man ngeen àndal, bu kenn rëcce ci biir dëkk bi, di nettaliiji waa Yisreel.» <sup>16</sup> Mu war watiir, jëm Yisreel, fekk Yoram a nga fa woon tëdd ndax jam-jam ya. Akasiya buurub Yuda dikk, di ko seet. <sup>17</sup> Ci biir loolu jongrukat ba ca kaw tatay Yisreel séen gàngoor ga Yewu àndal. Mu ne Buur Yoram: «Séen naa gàngoor guy ñëw de.» Yoram ne ko: «Yebalal gawar bu leen gatandu, laaj leen mbaa jàmm la.» <sup>18</sup> Ci kaw loolu gawar ba gatanduji leen, ne leen: «Buur nee: Mbaa jàmm la?» Yewu ne ko: «Ana luy sa yoon ci jàmm laam déet? Ayca, toppal sama gannaaw.» Jongrukat ba daldi yégle la xew, ne: «Ndaw la àgg na ca ñoom de, waaye dëppul.» <sup>19</sup> Yoram yebalaat beneen gawar. Ba mu àggee ca ñoom, ne leen: «Buur nee: “Mbaa jàmm?”» Yewu ne ko: «Ana luy sa yoon ci jàmm laam

déet? Ayca, sama gannaaw.» <sup>20</sup> Ba loolu amee jongrukat ba dellu yégle la xew, ne: «Ndaw la àgg na ca ñoom de, waaye dëppul. Te na kee di dawale mel na ni Yewu doomu Nimsi, ndax dawalinu dof lay dawal.»

<sup>21</sup> Ba mu ko defee Yoram ne: «Takkleen!» Ñu takkal Yoram buurub Israyil watiiram, mu génnd ak Akasiya buurub Yuda, ku nekk ak sa watiir; ñu dawal dogaleji Yewu, taseek moom fa doonoon toolub Nabot mu Yisreel\*. <sup>22</sup> Yoram jàkkaarlook Yewu, ne ko: «Yewu, mbaa jàmm?» Yewu ne ko: «Ana nu jàmm di ame te sa bàkkaarub bokkaaley ndey Yesabel jógu fi, mook xërémam yi ne xas?» <sup>23</sup> Yoram ne wërëñ daw, àddu ca kaw, ne Akasiya: «Akasiya, wor nañu nu!» <sup>24</sup> Yewu daldi sox fittam ak doole, fitt Yoram ca diggante mbaag ya, mu génne ca xol ba, Yoram ne lasiim ca watiiram.

<sup>25</sup> Ba loolu amee mu ne jaraafam ba ñuy wax Bitkar: «Foral sànni ci toolub Nabot mu Yisreel. Yaa ngi fàttliku ba nu bokkee watiir maak yaw topp ca baayam Axab te Aji Sax ji rëbb ko ne ko: <sup>26</sup> «Aji Sax ji dafa wax ne: Deretu Nabot ak deretu doomam yi déy, gis naa mu tuuru fii démb. Kon nag dinaa la ko topp, nga fey ko ci tool bii. Loolu la Aji Sax ji wax†.» Kon nag yóbbul sànni ci tool bi, muy la Aji Sax ji waxoon.»

<sup>27</sup> Akasiya buurub Yuda gis loolu, daw jaare ca yoonu Bet Gan, Yewu dàqi ko, tey yuuxu naan: «Jamleen ko, moom itam.» Ñu jam ko ca kaw watiiram ca yoon wa ngay yéeg jëm Gur, ca wetu Yiblam. Mu daw ba Megido, dee foofa. <sup>28</sup> Ba loolu amee ay surgaam yeb ko ca watiiram, yóbbu Yerusalem, ñu denc ko ca bàmmelam, fa ñu denc ay maamam, ca gox ba ñu naan Kër Daawuda. <sup>29</sup> Ca fukkeelu at ak benn ca nguug Yoram doomu Axab la Akasiya falu buur ca Yuda.

### *Yesabel dee na*

<sup>30</sup> Gannaaw loolu Yewu jubsu Yisreel, Yesabel yaayu Buur dégg ko, tusngalu,

defaraat boppam, taxaw ca palanteer ba, di séentu. <sup>31</sup> Naka la Yewu wees buntu dëkk ba, di duggsi rekk, mu ne: «Mbaa jàmmee, Simri mu ndaw, bóomkatub sangam‡?» <sup>32</sup> Yewu séentu palanteer ba ne: «Ana ku far ak man fii waay?» Ñaar ba ñetti bëkk-néeg ne pëll ca kaw palanteer ba, séentu ko. <sup>33</sup> Mu ne: «Sànnileen ko ci suuf.» Ñu jàpp Yesabel, sànni ko fa suuf, deret ja tis ca kaw taax maak fas ya; Yewu dëggaate néew ba.

<sup>34</sup> Ba loolu wéyee mu jàll ca biir dëkk ba; lekk daldi naan ba noppi, ne: «Jubluleen ci jigéen ju alku jee te suul koo waay, ndaxte doomu buur la.» <sup>35</sup> Ba ñu demee, di ko suuli nag, fekkuñu dara ca moom lu moy kaan ma donn ak ndëgguy tánk yaak cati loxo ya. <sup>36</sup> Ñu dellu wax ko Yewu, mu ne: «Loolu moo doon kàddug Aji Sax ja mu waxoon, Ilyaas mu Tisbi jaamam ba jottli ko, ne: “Ci toolub Yisreel la xaj yi di lekke Yesabel§. <sup>37</sup> Néewub Yesabel dina mel ni mbalit ci àll bi, ci biir toolub Yisreel, ba kenn du man ne: Kii Yesabel a.”»

## 10

### *Yewu bóom na waa kër Axab*

<sup>1</sup> Buur Axab amoon na juróom ñaar fukki doom yu góor ca Samari. Yewu bind ay bataaxal, yónnee ca Samari ca kilifay Yisreel ak mag ñaak dagi doomi Axab, ne leen: <sup>2</sup> «Gannaaw yeenay wattu seen doomi sang te yeena yor watiir yeek fas yi, dëkke dëkk bi ñu wëraley tata, boole ci yore gannaay yi, bu ngeen dee jot ci bataaxal bii rekk, <sup>3</sup> tannleen ki gën te gën di jàmbaar ci seen doomi sang, ngeen teg ko ci jalu baayam. Su ko defee ngeen xeexal seen waa kër sang.» <sup>4</sup> Ñu am tiitaange nag lool, daldi ne ca seen biir: «Seetleen rekk ñaari buur a ngii yu manula të Yewu; mbaa nun dinanu ko mana të yee?» <sup>5</sup> Ba loolu amee ka yilif kër buur ak ka yilif dëkk baak mag ñaak dag ya yónnee ca Yewu, ne ko: «Nun say surga lanu, lépp loo nu wax dinanu ko

\* **9:21** 9.21 toolub Nabot mu Yisreel: seetal ci *1.Buur ya 21*. † **9:26** 9.26 Seetal ci *1.Buur ya 21.19*. ‡ **9:31** 9.31 Seetal ci *1.Buur ya 16.8-20*. § **9:36** 9.36 Seetal ci *1.Buur ya 21.19*.



def. Dunu fal kenn buur. Loo def baax na.»

<sup>6</sup> Ba mu ko defee Yewu bind leen ñaareelu bataaxal, ne leen: «Ndegam man ngeen àndal te sama kàddu ngeen di dégg, dogleen seen boppi doomi sang yu góor te fekk ma fii ci Yisreel nēgēni èllēg.» Booba doomi buur yu góor juróom ñaar fukk lañu, nekk ak kàngami dēkk ba leen yar. <sup>7</sup> Ba bataaxal ba agsee, kàngam yooyu boole doomi buur yu góor ya, rendi, ñuy juróom ñaar fukki góor. Ñu yeb seeni bopp ciy damba, yónnee Yewu ca Yisreel. <sup>8</sup> Ndaw la agsi ne ko: «Indi nañu boppi doomi buur ya.» Yewu ne: «Defleen ko ñaari jal ca buntu dēkk ba, ba èllēg.» <sup>9</sup> Ca èllēg sa mu génntaxaw ca kanam mbooloo mépp ne: «Yeen defuleen dara. Man mii maa fexeel samab sang, rey ko. Waaye ana ku bóom ñii ñépp? <sup>10</sup> Kon xamleen ne du lenn luy fanaan àll ci kàddug Aji Sax ji ci li mu wax ci waa kër Axab. Aji Sax ji sottal na la mu waxoon, Ilyaas jaamam ba jottli ko.» <sup>11</sup> Ba mu ko defee Yewu rey mboolem ña desoon ca kër Axab ca Yisreel ak mboolemi kàngamam aki jegeñaaleem aki sarxalkatam, bàyyiwu ca kenn, mu récc.

<sup>12</sup> Gannaaw loolu Yewu fabu jëm Samari. Ba mu demee ba tollook Bet Eket, ca sàmm sa, <sup>13</sup> daldi dajeek bokki Akasiya buurub Yuda. Mu ne leen: «Yeenay ñan?» Ñu ne ko: «Bokki Akasiya lanu. Danuy nuyuji doomi Buur Axab, ak doomi Lingeer yaayu Buur.» <sup>14</sup> Mu ne: «Jàppleen leen!» Ñu jàpp leen, dem rendi leen ca wetu teenu Bet Eket; ñuy ñeent fukk ak ñaar, bàyyiwuñu ca kenn, mu récc.

<sup>15</sup> Ba loolu wéyee Yewu bàyyikoo fa, gis Yonadab doomu Rekab, mu dikk dajeek moom. Mu nuyook moom, ne ko: «Mbaa ni ma fareek yaw te muy dēgg, ni nga fareek man te muy dēgg?» Yonadab ne ko: «Waawaaw.» Yewu ne ko: «Kon nag jox ma sa loxo!» Mu jox ko loxo; mu xēcc ko, yéegē ko ca watiir ba, <sup>16</sup> ne ko: «Ñēwal nu dem rekk, nga gis ni ma farloo ci mbiri Aji Sax ji.» Mu waral ko watiiram, yóbbu ko. <sup>17</sup> Ba Yewu àggee Samari, daa

rey mboolem ña desoon ca waa kër Axab ca Samari, faagaagal leen, muy la Aji Sax ji waxoon Ilyaas.

### *Yewu fiir na waa kër Baal*

<sup>18</sup> Ba mu ko defee Yewu woo mbooloo ma mépp, ne leen: «Axab tuuti la jaamu Baal. Man Yewu bu baax laa koy jaamu. <sup>19</sup> Ayca, wool-leen ma yonenti Baal yépp ak sarxalkatam yépp ak jaamukatam yépp. Bu kenn wuute, ndax sarax bu réy laay defal Baal. Képp ku ko wuute dina dee.» Booba Yewoo ngi fexee nax ñiy jaamu Baal, ba rey leen. <sup>20</sup> Yewu ne leen: «Beral-leen Baal am ndaje.» Ñu yéene. <sup>21</sup> Yewu nag yónnee ca Israyil gépp; mboolem ñay jaamu Baal dikk, kenn desul. Ci kaw loolu, ñu dugg kër Baal, ba kër ga fees dell. <sup>22</sup> Yewu ne ka yor cummikaay la: «Képp kuy jaamu Baal, indil ko mbubb.» Mu indil leen ay mbubb. <sup>23</sup> Ba loolu amee Yewu ànd ak Yonadab doomu Rekab, duggsi biir kër Baal. Mu ne jaamukati Baal ya: «Xool-leen bu baax, ba gis ne yéenu neen la, te jaamukati Aji Sax ji raxu leen, xanaa jaamukati Baal rekk.» <sup>24</sup> Ña ngay dugg, ne dañuy def ay saraxi rendi-dóomal ak yeneen sarax. Fekk na Yewu teg ca biti juróom ñett fukki nit, ne leen: «Ku ci bàyyi kenn ci ñi ma leen reyloo, ba mu récc, sa bakkan ngay feye bakkanam.»

<sup>25</sup> Ba ñu noppee ca saraxi rendi-dóomal ya, Yewu ne dag yaak jawriñi xarekat ya: «Duggleen, fàdd leen. Bu kenn génntaxaw.» Ñu daldi leen leel ñawkay saamar, ñu daanu. Dag yaak jawriñ ya sànni néew ya ca biti, ba noppi dugg ca néegu Baal ba gēna biire. <sup>26</sup> Ñu génne tuuri doj ya sampe woon ca kër Baal, lakk ko. <sup>27</sup> Daño daane jēm̄mi Baal ja, mabb kër Baal, boole ca, def kob sēn, te moom la ba tēy jii.

<sup>28</sup> Nii la Yewu raafale lu bokk ci Baal ci Israyil. <sup>29</sup> Teewul mu baña dēddu bàkkaar ya Yerbowam doomu Nebat daan bàkkaarloo Israyil, ñuy jaamu ay sēlluy wurus la ko dale Betel, ba ba ngay àgg Dan.

<sup>30</sup> Aji Sax ji nag ne Yewu: «Gannaaw def nga lu baax, di jēfe li ma rafetlu te def nga

waa kër Axab mboolem li ma bëggoon, saw askan dina toog ci jalub Israyil ba ca sa sët-sëtaat.» <sup>31</sup> Terewul Yewu amuloon pastéefu toppe léppi xolam yoonu Aji Sax ji Yállay Israyil. Dëdduwul ba tey bàkkaari Yerbowam ya mu daan bàkkaarloo Israyil.

<sup>32</sup> Ca jamono jooja nag la Aji Sax ji tàmbalee fell suufas Israyil, Asayel buurub Siri di leen duma ca réew ma mépp. <sup>33</sup> Noonu lañu ñàkke fa féete dexu Yurdan penku dale ca diiwaanu Galàdd bépp, boole ca suufas waa Gàdd ak waa Ruben ak waa Manase. Mooy la tàmbalee dëkk ba ñuy wax Arower ca kaw dexu Arnon ba ca diiwaanu Galàdd ak Basan.

<sup>34</sup> Li des ci mbiri Yewu ak mboolem lu mu def ak njambaaram gépp, bindees na ko moos ci téere bi ñu dippee Jaloorey buuri Israyil ca seeni jant. <sup>35</sup> Noonu Buur Yewu saay, fekki ay maamam, ñu denc ko ca Samari. Doomam Yowakas falu buur, wuutu ko. <sup>36</sup> Diir bi Yewu nguuru ci Israyil, péeyoo Samari, ñaar fukki at la ak juróom ñett.

## 11

### *Lingeer Atalyaa falu na Yuda*

<sup>1</sup> Ci kaw loolu Atalyaa yaayu Akasiya xam ne doomam ju góor dee na, mu daldi faagaagal mboolem ku bokk ci askanu buur. <sup>2</sup> Teewul jigéenub Akasiya, Yoseba doomu Buur Yoram, jàpp Yowas doomu Akasiya ju góor, jële ko ca biir doomi buur ya ñuy fexee rey, ba rawale ko. Ci biir loolu mu boole kook nàmpalkatam, tēj cib néeg ngir làq ko Atalyaa, ba kenn rey ko. <sup>3</sup> Yowas nekk naak Yoseba fa kër Yàlla ga, làqu fa juróom benni at, te Atalyaa di nguuru fa réew ma.

### *Yuda bañ na*

<sup>4</sup> Ca atum juróom ñaareel ma, Yoyada moo woolu waa Keret ya jiite kuréli téeméeri nit, ak yeneen dag ya, ñu wuysi ko ca kër Aji Sax ji. Mu fasook ñoom kóllère, giñloo leen ca kër Aji Sax ji, ba noppi nuyole leen ak doomu Buur. <sup>5</sup> Ci kaw loolu mu sant leen ne leen: «Li ngeen di def mooy lii: Yeen ñi aye liggéey bés sub Noflaay, na seen xaajub ñetteel dénkoo dénkaaney kër Buur, <sup>6</sup> beneen

xaajub ñetteel ba wattu buntu Sur ba, xaajub ñetteel ba ca des féeteek bunt ba ca gannaaw dawkat ya. Noonu ngeen di ay-ayloo wattub kër Buur. <sup>7</sup> Seen yeneen ñaari kurél yi ayewul bés sub Noflaay, nañu wattusi kër Aji Sax ji, ngir aar buur bi. <sup>8</sup> Yeen ñiy dar Buur, fegleen ko wet gu nekk, ku nekk nàbb ngànaayam. Képp ku jëm ci seenug làng, dees koy rey, te àndleen ak buur bi buy dugg ak buy gén.» <sup>9</sup> Ci kaw loolu njiiti kuréli téeméer ya def mboolem la leen Yoyada sarxalkat ba sant. Ku nekk ànd ak say nit, ña aye bés sub Noflaay ak ña ayewul bés sub Noflaay, ñu bokk dikk ca Yoyada, sarxalkat ba. <sup>10</sup> Ba loolu amee, sarxalkat ba jox njiiti kuréli téeméer ya, xeej yaak pakki Buur Daawuda ya nekkoon ca biir kër Aji Sax ji. <sup>11</sup> Dag ya nag dar buur ba, ku nekk nàbb ay gannaayam, ñu dare kër Yàlla ga ak sarxalukaay ba, wetu ndijoor ba wetu càmmoñ, ngir yéew buur ba. <sup>12</sup> Yoyada génne doomu buur ba, solal ko mbaxanam buur, jox ko kayitu doxalinu nguuru ga; ñu fal ko nag buur, diw ko diwug pal. Ba loolu amee ñu tàccu, ne: «Guddalu fan, Buur!»

<sup>13</sup> Ba Atalyaa déggee coowal dag yaak mbooloo ma, daa àgg ca mbooloo ma, fa kër Aji Sax ji. <sup>14</sup> Mu xool, yem ci buur ba taxaw fa kenu ga, na ñu ko baaxoo, kilifay xarekat yaak boroom liit ya dar Buur, waa réew ma mépp di bannexook a wal liit ya. Atalya ne tareet ay yéereem ndax naqar, daldi yuuxu ne: «Wor am naay, wor am na!» <sup>15</sup> Ci kaw loolu Yoyada sarxalkat ba sant njiiti kuréli téeméer ya, kilifay gàngoor ga, ne leen: «Génneleen ko làng gi, te ku ko topp, jamleen ko, mu dee.» Fekk na Yoyada ne buñu ko rey ci biir kër Aji Sax ji. <sup>16</sup> Ba mu ko defee ñu teg ko loxo. Ba mu demee ba àgg kër Buur, bay tollook fa fas yay dugge, foofa lañu ko reye.

<sup>17</sup> Ba loolu amee Yoyada digoo kóllère diggante Aji Sax ji, ak buur baak askan wa, ngir ñu doon ñoñi Aji Sax ji. Mu digoo ko itam diggante Buur ak askan wa. <sup>18</sup> Ci kaw loolu waa réew ma mépp ànd dem ca kër Baal. Ñu màbb ko, ay

sarxalukaayam ak jëmmi nataalam, ñu tas tasar, Matan sarxalkatu Baal ba, ñu rey ko ca kanam sarxalukaay ya. Ci biir loolu Yoyada sarxalkat ba teg ay wattukat ca kër Aji Sax ji. <sup>19</sup> Mu dellu nag woo njiiti téeméeri nit yaak waa Keret ñaak yeneen dag yaak mboolem waa réew ma, ñu jële Buur kër Aji Sax ji, jaare ca buntu dag ya, yóbbu ko kër Buur. Yowas daldi toog ca ngànguney buur ya. <sup>20</sup> Waa réew mépp di bânneexu, péey ba ne tekk. Atalya moom, fekk na ñu jam ko saamar ba mu dee ca kër Buur.

## 12

### *Yowas santaane na ñu defaraat kër Aji Sax ji*

<sup>1</sup> Juróom ñaari at la Yowas amoon ba muy falu buur. <sup>2</sup> Ca juróom ñaareelu atu nguurug Yewu buurub Israyil, ca la Yowas falu ca Yuda. Ñeent fukki at la nguuru fa Yerusalem. Yaayam mooy Sibiya ma cosaanoo Beerseba. <sup>3</sup> Yowas di def li Aji Sax ji rafetlu mboolem diir ba muy wáy ci ndigalal Yoyada. <sup>4</sup> Taxul nag ñu jële fa bérabi jaamookaay ya, te mbooloo ma noppiwuñu faa rendi ay sarax, di fa taal cuuraay.

<sup>5</sup> Mu am bés mu wax sarxalkat ya ne leen: «Mboolem xalis bu ñu sellalal kër Aji Sax ji, muy xalisu njot-gi-bakkan\*, mbaa xalis bu ñu wàccoo ngiñ, mbaa bépp xalisu saraxu yéene bu nit di indi kër Aji Sax ji, <sup>6</sup> na ko sarxalkat bu nekk nangoo ci seen loxoy xame, ngir ñu liggéeye ko kër Yàlla gi, fépp fu fi laaj ñu defaraat ko.»

<sup>7</sup> Teewul Yowas dugg na ñaar fukkeelu atu nguuram ak ñett, te taxul sarxalkat ya defarluwaat lenn ci kër Aji Sax ji. <sup>8</sup> Buur Yowas woolu Yoyada, sarxalkat ba ak yeneen sarxalkat ya, ne leen: «Ana lu waral defaruleen lenn ci kër Aji Sax ji? Léegi nag buleen nangooti xalis ci seeni xame, waaye joxeleen ko, ñu defare ko kër Aji Sax ji.» <sup>9</sup> Sarxalkat ya déggal ko, jëlatsuñu xalis ci mbooloo mi, sasootuñu liggéeyu defaraat kër Aji Sax ji.

<sup>10</sup> Ba mu ko defee Yoyada sarxalkat ba wut waxande, bënn pax ca kubeer ga, teg ko ca wetu sarxalukaay ba, fa féete ndijoor, booy duggsi ci kër Aji Sax ji. Sarxalkat yay wattu bunt ba di def ca waxande wa mboolem xalis bu ñu indi ca kër Aji Sax ji. <sup>11</sup> Ci kaw loolu saa yu ñu gisee ne xalis bu takkoo ngi ci waxande wi ci kër Aji Sax ji, bindkatub Buur ànd ak sarxalkat bu mag ba dikk, wañni ko, fas ko. <sup>12</sup> Bu ñu takkee limu xalis ba, teg ko ca loxoy ña ñu tabb, ñu wara saytu liggéeyu kër Aji Sax ji. Su ko defee ñu fey ca ñay liggéey ca kër Aji Sax ji, muy liggéeykatu bant yaak yeneen liggéeykat ya, <sup>13</sup> ak tabaxkat yaak yettkati doj ya, jënd ca bant ak doji yett, yi ñu soxla ci defarub kër Aji Sax ji, ak mboolem lu ñuy jënd ngir defar kër Aji Sax ji. <sup>14</sup> Waaye xalis bi ñuy indi ci kër Aji Sax ji defaraluñu ci kër Aji Sax ji ay mbalkay xalis mbaa ay paakaaki këllu tuuru mbaa ay liit ak lenn luy jumtukaayu wurus mbaa xalis. <sup>15</sup> Ñi yor liggéey bi daal lañu ko jox ngir ñu defaraat kër Aji Sax ji. <sup>16</sup> Soxlawuñu woona laaj dara nit ñi ñuy teg xalis bi ci seeni loxo ngir ñu fey liggéeykat yi, ndax maandu ga ñu daan jëfe.

<sup>17</sup> Xalisu saraxu peyug tooñ nag ak xalisu saraxu pootum bàkkaar daawuñu ko indi ci kër Aji Sax ji. Sarxalkat yaa ko moomoon.

### *Buur Yowas jeexal na*

<sup>18</sup> Ca jamono yooyu Asayel buurub Siri dem na songi Gaat, nangu ko, doora walbatiku nara dal ci kaw Yerusalem. <sup>19</sup> Buur Yowas nag dajale mboolem gànjar ga maamam ya, Yosafat ak Yoram ak Akasiya, jagleeloon Aji Sax ji, boole ca gànjar ga mu ko jagleeloon moom ci boppam, ak lépp luy wurus ca dencukaayi kër Aji Sax jeek kër Buur. Mu yónnee lépp Asayel buurub Siri, mu dëpp, bàyyi Yerusalem.

<sup>20</sup> Li des ci mbiri Yowas ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. <sup>21</sup> Gannaaw gi ay jawriñam fexeel

\* **12:5** 12.5 xalisu njot-gi-bakkan: seetal ci *Mucc ga* 30.11-16.

ko ba bóom ko ca Bet Milo ca yoonu Sila. <sup>22</sup> Jawriñam ya ñuy wax Yosabàdd doomu Simeyat ak Yewosabàdd doomu Somer, ñoo ko jam, mu dee; ñu denc ko fa ay maamam ca gox ba ñu naan Kër Daawuda. Doomam Amaciya moo falu buur, wuutu ko.

## 13

### *Yowakas falu na ci Israyil*

<sup>1</sup> Ba doomu Akasiya, Yowas buurub Yuda duggee ñaar fukkeelu atam ak ñett ci nguuram, ca la Yowakas doomu Yewu falu buur ca Israyil, péeyoo Samari. Nguuru na fukki at ak juróom ñaar. <sup>2</sup> Muy def li Aji Sax ji ñaawlu, topp ci tànkì Yerbowam doomu Nebat, di ko roy ci bàkkaar ya mu daan bàkkaarloo Israyil, bañ koo dèddu. <sup>3</sup> Merum Aji Sax ji nag ne jippét ca kaw Israyil, mu teg leen lu yàgg ci loxoy Asayel buurub Siri ak Ben Addàd doomu Asayel. <sup>4</sup> Yowakas nag tinu Aji Sax ji, mu nangul ko, ndax fekk na mu gis fitnay Israyil ji leen buurub Siri fitnaal. <sup>5</sup> Aji Sax ji daldi may Israyil ku leen xettli, ba ñu génn ca loxol waa Siri. Ba loolu amee waa Israyil dellu nekk ca seeni kër ci jàmm, na woon démb ak bëkk-démb. <sup>6</sup> Taxul ba tey ñu dèddu bàkkaari waa kër Yerbowam ya ñu doon bàkkaarloo Israyil. Dañu caa sax. Te it xer wa ñuy jaamoo Aseraa nga sampe woon ca Samari ba booba. <sup>7</sup> Mujj na Yowakas desewulooon ca mbooloom xareem lu moy juróom fukki gawar ak fukki watiir ak fukki junniy xarekat (10 000), ndax buurub Siri moo faagaagal ña ca des ñépp, duma leen ba ñu ne mbëtt.

<sup>8</sup> Li des ci mbiri Yowakas ak mboolem lu mu def aki njàmbaar, bindees na lépp moos ci téere bi ñu dippee Jaloorey buurub Israyil ca seeni jant. <sup>9</sup> Ba mu ko defee Buur Yowakas saay, fekki ay maamam, ñu denc ko ca Samari. Doomam Yowayas falu buur, wuutu ko.

### *Yowayas falu na ca Israyil*

<sup>10</sup> Ba Yowas buurub Yuda duggee fanweereelu atu nguuram ak juróom ñaar,

ca la Yowayas doomu Yowakas falu buurub Israyil, péeyoo Samari. Nguuru na fukki at ak juróom benn.

<sup>11</sup> Muy def li Aji Sax ji ñaawlu nag, dèdduwul lenn ci bàkkaar ya Yerbowam doomu Nebat doon bàkkaarloo Israyil. Da caa sax kay.

<sup>12</sup> Li des ci mbiri Yowayas ak mboolem lu mu def ak njàmbaar ga mu xareek Amaciya buurub Yuda, bindees na lépp moos ci téere bi ñu dippee Jaloorey buuri Israyil ca seeni jant. <sup>13</sup> Yowayas nag saay, fekki ay maamam, Yerbowam falu, wuutu ko. Ñu denc Yowayas fa ñu denc buuri Israyil ca Samari.

### *Yonent Yàlla Alyaasa faatu na*

<sup>14</sup> Ba Alyaasa téddee ca wopp ja ko wara yóbbu, Yowayas buurub Israyil seeti woon na ko, tiim ko, di jooy naan: «Éy baayoo, baay Alyaasa, yaay watiiru xarey Israyil aki gawaram!»

<sup>15</sup> Alyaasa ne ko: «Indil xala aki fitt.» Mu indi. <sup>16</sup> Alyaasa ne ko: «Soxal.» Mu sox. Alyaasa teg ay loxoom ca kaw loxoom, <sup>17</sup> ba noppi ne ko: «Ubbil palanteeru penku bi.» Mu ubbi. Alyaasa ne ko: «Soqil!» Mu soqi. Mu ne ko: «Fittu ndamal Aji Sax jaa ngoog, di fitt gi ngay ame ndam ci waa Siri. Dinga daan waa Siri ca Afeg, ba faagaagal leen.» <sup>18</sup> Mu delluwaat ne ko: «Jélal fitt yi.» Mu jél. Mu ne ko: «Soqil fi suuf!» Mu soqi, ba muy ñetti yoon, bàyyi. <sup>19</sup> Góorug Yàlla ga nag mere ko, ne ko: «Soo jamoon juróomi yoon ba juróom benni yoon, dinga daan waa Siri, ba jeexal leen tàkk; waaye léegi nag ñetti yoon rekk ngay daan waa Siri.» <sup>20</sup> Gannaaw gi Alyaasa faatu, ñu denc ko.

Loolu fekk na ndoortel at mu jotaan ay gàngoori yàqkati Mowabeen dugg ca réew ma. <sup>21</sup> Mu am bés ay nit doon rob, jekki-jekki gis gàngooru yàqkat di dikk. Ñu sànni néew ba ca bàmmeeelu Alyaasa, daldi daw. Naka la néew ba dal ca yaxi Alyaasa, rekk dekki, ne ñokket, taxaw.

### *Israyil duma na Siri*

<sup>22</sup> Ci kaw loolu Asayel buurub Siri di fitnaal Israyil mboolem diir ba Yowakas di buur. <sup>23</sup> Aji Sax ji nag baaxe leen,

yërëm leen, geesu leen ndax kóllëreem ak Ibraaymaak Isaaxaak Yanqóoba. Looloo tax buggu leena faagaagal, te ba tey jii xalabu leen. <sup>24</sup> Ba Asayel buurub Siri deeyee, doomam Ben Addàd falu, wuutu ko. <sup>25</sup> Ba mu ko defee Yowayas nangoo ci moom dëkki Israyil ya Asayel jële woon ca loxol baayam Yowakas ci xare. Ñetti yoon Yowayas дума na ko Ben Addàd, ba nanguwaat dëkki Israyil.

## 14

### *Buuri Israyil ak Yudaa ngi xeexoo*

<sup>1</sup> Ba buurub Israyil Yowayas doomu Yowakas duggee ñaareelu atu nguuram, ca la Amaciya doomu Yowas falu buur ca Yuda. <sup>2</sup> Ñaar fukki at ak juróom la amoon ba muy falu, te ñaar fukki at ak juróom ñeenti la nguuru fa Yerusalem. Yaayam moo doon Yowadan ma cosaanoo Yerusalem. <sup>3</sup> Def na njub gi Aji Sax ji rafetlu, waaye dabul Daawuda maamam. Mboolem noonee Yowas baayam daan jëfe, na la daan jëfe <sup>4</sup> Bérabi jaamookaay ya jëleesu ko fa. Mboolo maa nga doon def ay sarax ca bérabi jaamookaay ya ba tey, di fa taal cuuraay. <sup>5</sup> Ba nguur ga demee ba dëgër ci loxoom, moo bóom jawriñam ña bóomoon Buur baayam. <sup>6</sup> Waaye doomi bóomkat ya, bóomu leen, ngir dëppook la ñu bind ci téereb yoonu Musaa, te Aji Sax ji santaane ko, ne: «Deesul rey baay ndax doom te deesul rey doom ndax baay. Nit ku nekk, bàkkaaruu boppam lees koy reye\*.»

<sup>7</sup> Moom Amaciya moo дума fukki junniy (10 000) waa Edom ca xuru Xorom wa, nangu dëkk ba ñuy wax Sela ca xare ba, tudde ko Yogtel, te noonu la tudd ba bésu tey jii. <sup>8</sup> Ba loolu amee Amaciya yónni ay ndaw ca buurub Israyil Yowayas doomu Yowakas doomu Yewu. Mu ne ko: «Dëkk naa la, dikkal nu jàkkaarloo!» <sup>9</sup> Yowayas buurub Israyil yónnee Amaciya buurub Yuda tontam, ne ko: «Ndég ga ca Liban moo yónnee woon ca garabu seedar gu mag ga ca Liban, ne ko: “Sa doom jii, may ko sama doom

jabar.” Ci kaw loolu rabu àllu Liban jaare fa, dëggaate ndég ga. <sup>10</sup> Dëgg la moos, yaa дума Edom, ba tax nag sam xel jay la. Tee ngaa bàkku te toog sa kër? Te sax ana looy dugge ci jote buy indi ay wu lay daane, yaw, daanewaale Yuda?»

<sup>11</sup> Amaciya nag faalewul wax jooju, Yowayas buurub Israyil jóg; ñu jàkkaarloo mook Amaciya buurub Yuda, ca Bet Semes ga ca Yuda.

<sup>12</sup> Ba mu ko defee muy jëllu Yuda fa kanam Israyil. Waa Yuda tasaaroo, ku nekk ñibbi ca sab xayma. <sup>13</sup> Yowayas buurub Israyil nag jàpp buurub Yuda, Amaciya doomu Yowas doomu Akasiya, ca Bet Semes. Gannaaw loolu mu dem Yerusalem màbb tata ja, la ko dale buntu Efrayim ba ca buntu ruq ba, muy ñeenti téeméeri xasab. <sup>14</sup> Ci kaw loolu mu jël mboolem lu doon wurus ak xalis aki ndab ca kër Aji Sax ja, ak ca dencukaayi kër Buur, boole ca nit ñu mu jàpp, daldi dellu Samari.

### *Yowayas buurub Israyil saay na*

<sup>15</sup> Li des ci mbiri Yowayas ak li mu def ba ci njambaaram gi mu xareek Amaciya buurub Yuda, bindees na lépp moos ci téere bi ñu dippee Jaloorey buuri Israyil ca seeni jant. <sup>16</sup> Gannaaw gi Buur Yowayas saay, fekki ay maamam, ñu denc ko Samari, fa bàmmeelu buuri Israyil. Doomam Yerbawam falu buur, wuutu ko.

### *Amaciya buurub Yuda saay na*

<sup>17</sup> Amaciya doomu Yowas buurub Yuda dund na fukki at ak juróom gannaaw deewug buur Israyil Yowayas doomu Yowakas. <sup>18</sup> Li des ci mbiri Amaciya, bindees na ko moos ci téere bi ñu dippee Jaloorey buuri Yuda ca seeni jant. <sup>19</sup> Lalal nañu ko peXe ca Yerusalem, mu daw dem Lakis. Ñu yónnee dabi ko ca Lakis, rey ko foofa. <sup>20</sup> Ba mu ko defee ay fas lañu yóbboo néew ba, denci ko Yerusalem, fa ay maamam, ca gox ba ñu naan Kër Daawuda.

<sup>21</sup> Ba loolu wéyee waa Yuda gépp fal Asaryaa† buur, mu wuutu baayam Amaciya, fekk mu am fukki at ak juróom

\* **14:6** 14.6 Seetal ci *Baamtug Yoon wi* 24.16. † **14:21** 14.21 Asaryaa mooy Osiyas ba tey.

benn. <sup>22</sup> Moom moo tabaxaat dëkk ba ñuy wax Elat, delloo ko ci biir Yuda, gannaaw ba Buur Amaciya saayee, fekki ay maamam.

### *Yerbowam mu ndaw falu na ca Israyil*

<sup>23</sup> Ba buurub Yuda Amaciya doomu Yowas duggee fukkeelu atu nguuram ak juróom, ca la Yerbowam doomu Yowayas falu ca Israyil, péeyoo Samari. Nguuru na ñeent fukki at ak benn. <sup>24</sup> Muy def li Aji Sax ji ñaawlu, dëdduwul lenn ci bàkkaar ya Yerbowam doomu Nebat daan bàkkaarloo Israyil. <sup>25</sup> Moom moo delloo kemu réewum Israyil fa mu nekkoon, dale ko ca buntu dëkk ba ñuy wax Amat ba ca géēju Araba, muy la Aji Sax ji Yállay Israyil waxoon jaamam ba, Yonent Yàlla Yunus, ma baayam Ametay cosaano Gaat Efer, Yunus jottli ko. <sup>26</sup> Fekk na Aji Sax ji gis Israyil gépp, gor ak jaam, nekke fitna ju metti te amul kenn ku leen wallu. <sup>27</sup> Aji Sax ji nag nammul wona far turu Israyil, ba jant bi dootu ko tiim fenn. Moo tax mu may leen ku leen xettli, muy Yerbowam doomu Yowayas.

<sup>28</sup> Li des ci mbiri Yerbowam ak mboolem lu mu def ak njàmbaraam gi mu xaree te nangoo ko dëkk yi ñuy wax Damaas ak Amat gu Yuda, delloo ko Israyil, bindees na lépp moos ci téere bi ñu dippee Jaloorey buuri Israyil ci seeni jant. <sup>29</sup> Gannaaw gi Buur Yerbowam saay, fekki maamam ya doon buuri Israyil. Doomam Sàkkaryaa<sup>†</sup> falu buur, wuutu ko.

## 15

### *Asaryaa falu na buur ca Yuda*

<sup>1</sup> Ba Yerbowam buurub Israyil duggee ñaar fukkeelu at ak juróom ñaar ci nguuram, ca la Asaryaa\* doomu Amaciya falu buur ca Yuda. <sup>2</sup> Fukki at ak juróom benn la amoon, ba muy falu buur, te nguuru na juróom fukki at ak ñaar ca Yerusalem. Yaayam mooy Yekolyaa ma cosaano Yerusalem. <sup>3</sup> Asaryaa di def li Aji Sax ji rafetlu, mboolem noonee ko Amaciya baayam daan defe. <sup>4</sup> Terewul

bérabi jaamookaay ya jëleesu ko fa. Mbooloo ma dañoo wéy di fa def ay sarax ak a taal cuuraay. <sup>5</sup> Aji Sax ji nag mbugal Asaryaa, teg ko jàngoroy ngaana ba kera bés ba mu deeyee. Ci néeg bu ñu ko ber la dëkk. Doomu Buur Yotam moo jiite kër ga, yor kilifteefu askanu réew ma.

<sup>6</sup> Li des ci mbiri Asaryaa ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. <sup>7</sup> Gannaaw gi Asaryaa tēdd, fekki ay maamam, ñu denc ko ca bàmmeele maamam ya, ca gox ba ñu naan Kër Daawuda. Yotam doomam moo falu buur, wuutu ko.

### *Sàkkaryaa falu na buur ca Israyil*

<sup>8</sup> Ba Asaryaa buurub Yuda duggee fanweereelu atu nguuram ak juróom ñett, ca la Sàkkaryaa doomu Yerbowam falu buurub Israyil, péeyoo Samari. Juróom benni weer la nguuru.

<sup>9</sup> Muy def nag li Aji Sax ji ñaawlu, na ko ay maamam daa defe. Dëdduwul bàkkaar yu Yerbowam doomu Nebat daan bàkkaarloo Israyil. <sup>10</sup> Ci kaw loolu Salum doomu Yabes fexeel ko, jam ko ca kanam mbooloo ma, rey ko, daldi falu buur, wuutu ko. <sup>11</sup> Li des ci mbiri Sàkkaryaa bindees ko moos ci téere bi ñu dippee Jaloorey buuri Israyil ca seeni jant. <sup>12</sup> Loolu mooy kàddu ga Aji Sax ji waxoon Yewu ne ko: «Saw askan dinañu toog ci kaw jalu Israyil ba ci sa sēt-sētaat.» Te noonu la amee.

### *Salum falu na buur ca Israyil*

<sup>13</sup> Ba Asaryaa buurub Yuda duggee fanweereelu atu nguuram ak juróom ñeent, ca la Salum doomu Yabes falu buur ca Israyil. Wenn weer la nguuru, péeyoo Samari. <sup>14</sup> Gannaaw loolu Menayem doomu Gadi bàyyikoo Tirsa ba Samari, daldi fa jam Salum doomu Yabes, bóom ko, falu buur, wuutu ko. <sup>15</sup> Li des ci mbiri Salum ak pexeem ma mu laloon, bindees na ko moos ca téere bi ñu dippee Jaloorey buuri Israyil ca seeni jant.

<sup>16</sup> Booba la Menayem song dëkk ba ñuy wax Tifsa, rey ña fa nekkoon ñépp, boole

<sup>†</sup> 14:29 14.29 Sàkkaryaa mii wuute naak Yonent Yàlla Sàkkaryaa. \* 15:1 15.1 Asaryaa mooy Osiyas ba tey.

ca faagaagal diiwaan ba dale Tirsa ba Tifsa, ndax ñoo ko gântal, bañ koo ubbi buntu dëkk ba. Mu butti jigéeni wérul ña fa nekk ñépp.

### *Menayem falu na buur ca Israyil*

<sup>17</sup> Ba Asaryaa buurub Yuda duggee fanweereelu atu nguuram ak juróom ñeent, ca la Menayem doomu Gadi falu buurub Israyil, péeyoo Samari. Nguuru na fukki at. <sup>18</sup> Muy def nag li Aji Sax ji ñaawlu; giiru dundam dëdduwul bàkkaar ya Yerbowam doomu Nebat daan bàkkaarloo Israyil. <sup>19</sup> Ci jamonoom la Tiglaat Pilser† buurub Asiri song réew ma, Menayem jox ko ñetti téeméeri barigoy xalis ngir mu jàpple ko, ba nguuram gëna dëgër. <sup>20</sup> Menayem dajale xalis boobu ci Israyil; jële ko ca mboolem boroom alal ya, ku nekk ci ñoom joxe juróom fukki dogi xalis, ñu yót ko buuri Asiri, mu doora jóge ca réew ma, ñibbi. <sup>21</sup> Li des ci mbiri Menayem ak mboolem lu mu def, bindees na ko moos ci téere bi ñu dippee Jaloorey buuri Israyil ca seeni jant. <sup>22</sup> Gannaaw loolu Buur Menayem saay, fekki ay maamam. Doomam Pekaxiya falu buur, wuutu ko.

### *Pekaxiya falu na buur ca Israyil*

<sup>23</sup> Ba Asaryaa buurub Yuda duggee juróom fukkeelu atu nguuram, ca la Pekaxiya doomu Menayem falu buurub Israyil, péeyoo Samari. Nguuru na ñaari at. <sup>24</sup> Muy def li Aji Sax ji ñaawlu, dëdduwul bàkkaar ya Yerbowam doomu Nebat daan bàkkaarloo Israyil. <sup>25</sup> Ba mu ko defee Peka doomu kilifag xarekatam Remalya, fexeel ko, ba rey ko ca Samari, ca tatay kër buur, jamaale Argob ak Arye. Remalyaa nga àndoon ak juróom fukki niti Galàdd. Noonu la ko reye, falu buur, wuutu ko.

<sup>26</sup> Li des ci mbiri Pekaxiya ak mboolem lu mu def, bindees na ko moos ci téere bi ñu dippee Jaloorey buuri Israyil ca seeni jant.

### *Peka falu na buur ca Israyil*

<sup>27</sup> Ba Asaryaa buurub Yuda duggee juróom fukkeelu atu nguuram ak ñaar,

† 15:19 15.19 Tiglaat Pilser mbaa Pul ba tey.

ca la Peka doomu Remalyaa falu buurub Israyil, péeyoo Samari. Nguuru na ñaar fukki at. <sup>28</sup> Muy def li Aji Sax ji ñaawlu, dëdduwul bàkkaar ya Yerbowam doomu Nebat daan bàkkaarloo Israyil. <sup>29</sup> Ci jamonoy Peka buurub Israyil, Tiglaat Pilser buurub Asiri dikk, nangu dëkk yi ñuy wax Yon ak Abel Bet Maaka ak Yanowa ak Kedes ak Àccor ak diiwaani Galàdd ak Galile ak mboolem réewum Neftali. Mu jàpp waa réew ma, yóbbu Asiri.

<sup>30</sup> Ba loolu amee ku ñuy wax Ose doomu Ela lalal Peka doomu Remalya pexe, jam ko mu dee. Mu daldi falu buur, wuutu ko. Loolu yemook ñaar fukkeelu atu nguurug buurub Yuda Yotam doomu Asaryaa. <sup>31</sup> Li des ci mbiri Peka ak mboolem lu mu def, bindees na ko moos ci téere bi ñu dippee Jaloorey buuri Israyil ca seeni jant.

### *Yotam falu na buur ca Yuda*

<sup>32</sup> Ba buurub Israyil Peka doomu Remalya duggee ñaareelu atu nguuram, ca la Yotam doomu Asaryaa falu buur ca Yuda. <sup>33</sup> Amoon na ñaar fukki at ak juróom ba muy falu te nguuru na fukki at ak juróom benn ca Yerusalem. Yaayam mooy Yerusa doomu Cadog. <sup>34</sup> Muy def li Aji Sax ji rafetlu; mboolem na baayam Usiya daan defe la daan defe. <sup>35</sup> Terewul jëleesu fa bérabi jaamookaay ya, xanaa mbooloo ma di def ay sarax ak a taal cuuraay ba tey, ca bérabi jaamookaay yooyu. Moom nag moo tabax buntu kër Aji Sax ja féete běj-gànnar. <sup>36</sup> Li des ci mbiri Yotam aki jëfam, bindees na ko moos ci téere bi ñu dippee Jaloorey buuri Yuda ca seeni jant. <sup>37</sup> Ci jamonoom la Aji Sax ji tàmbalee xabtal Reccin buurub Siri ak Peka doomu Remalya ci kaw Yuda.

<sup>38</sup> Gannaaw gi Yotam tēdd, fekki ay maamam. Ca bàmmeelu maamam ya lees ko denc, ca gox ba ñu naan dëkku Daawuda, maamam. Doomam Axas falu buur, wuutu ko.

## 16

### *Axas falu na buur ca Yuda*

<sup>1</sup> Ba buurub Israyil Peka doomu Remalya duggee fukkeelu atu nguuram ak

juróom ñaar, ca la Axas doomu Yotam falu buur ca Yuda. <sup>2</sup> Ñaar fukki at la Axas amoon ba muy falu buur. Nguuru na fukki at ak juróom benn ca Yerusalem, waaye deful li Aji Sax ji Yàllaam rafetlu, na ko maamam Daawuda baaxoo woon. <sup>3</sup> Ca tàñki buuri Israyil la topp. Doomam ju góor sax def na ko sarax, lakk ko ngir tuur ya, di roy ñaawtéefi xeet, ya Aji Sax ji dàqoon ngir bànni Israyil. <sup>4</sup> Rendi nay sarax, taal na cuuraay ca bérabi jaamookaay yaak ca kaw tund yaak mboolem ker garab gu naat.

<sup>5</sup> Ci kaw loolu Reccin buurub Siri, ak buurub Israyil Peka doomu Remalya, jóg song Yerusalem xare. Ñu gaw Buur Axas, te manuñu koo daan. <sup>6</sup> Jamono yooyu, fekk na Reccin nangu Elat, mu tàbbi ci loxol Siri. Mu génne waa Yuda Elat; Edomeen ña délsi Elat, dëkk fa ba bésuub tey jii. <sup>7</sup> Axas nag yebal ay ndaw ca Tiglaat Pilser buurub Asiri, ne ko: «Man de, dama di sab jaam, te di sa doom. Kon nag ngalla dikkal xettli ma ci ñi ma jógal, di buurub Siri ak buurub Israyil.» <sup>8</sup> Axas jël xalis ak wurus wa nekkoon ca kër Aji Sax ja ak ca dencukaayi kër Buur, defal ko buurub Asiri yóbbal. <sup>9</sup> Buurub Asiri nangul ko, dal ca kaw Damaas, nangu dëkk ba, jàpp waa dëkk ba, yóbbu Kir, ba noppi rey Reccin.

<sup>10</sup> Gannaaw loolu Buur Axas dem ca Tiglaat Pilser buurub Asiri ca Damaas, gis fa sarxalukaay ba fa nekk. Ba mu ko defee Buur Axas yónnee ca Uri sarxalkat ba, nataalu sarxalukaay ba ak tabaxin waak mboolem na mu bindoo. <sup>11</sup> Urya sarxalkat ba daldi tabax sarxalukaay bu dëppook mboolem tegtal ya bàyyikoo ca Buur Axas ca Damaas. Uri noppi na ko bala Buur Axas di ñibbsi. <sup>12</sup> Ba Buur Axas ñibbsee, jóge Damaas, ba nemmiku sarxalukaay ba, daa dikk ba ca sarxalukaay ba, joxe fa sarax. <sup>13</sup> Taal na fa saraxu rendi-dóomalam, joxe ca saraxu peppam, sotti ca saraxu tuuroom, ba noppi xëpp deretu saraxu cantam ci biir jàmm ca kaw sarxalukaay ba. <sup>14</sup> Sarxalukaayu xàñjar ba tege woon ca

kanam Aji Sax ji, mu jële ko ca kanam kër ga mu nekkoon, ca diggante sarxalukaay bu bees baak kër Aji Sax ji, teg ko ca wetu sarxalukaay bu bees ba, fa féete bëj-gàñnaar. <sup>15</sup> Ci biir loolu Buur Axas sant Uri sarxalkat ba ne ko: «Ci kaw sarxalukaay bu mag bi ngay joxe saraxu rendi-dóomal suba si, ak saraxu pepp bu ngoon bi, ak saraxu rendi-dóomal buur bi, ak saraxu peppam, boole ci saraxu rendi-dóomal bi ñuy joxeel mboolem waa réew mi, ak seen saraxu pepp, ak seen saraxu tuuru. Te nga xëpp ci kawam mboolem deretu saraxu rendi-dóomal bi, ak deretu mboolem sarax su ñuy rendi. Sarxalukaayu xàñjar bi moom, maa koy moom, di ko gindikoo ci Aji Sax ji.» <sup>16</sup> Uri sarxalkat ba def la ko Buur Axas sant lépp.

<sup>17</sup> Ci kaw loolu Buur Axas toj làcci rootukaay ya ñuy dawal\*, jële bagaan ya woon ca kaw, teggi mbalka mu mag ma ñuy wax Géej te tege woon ca yëkki xàñjar ya ko yenu. Mu teg ko ci kawab dëru doj. <sup>18</sup> Ci kaw loolu bëgg lu neex buurub Asiri tax mu soppi buntu bésuub Noflaay, ba mbaar tiimoon ci biir kër Aji Sax ji, soppiwaale buntu buur ba féete biti.

<sup>19</sup> Li des ci mbiri Axas ak la mu def, bindees na ko moos ci téere bi ñu dippee Jaloorey buuri Yuda ca seeni jant. <sup>20</sup> Gannaaw gi Axas tēdd, fekki ay maamam. Ca ay maamam lañu ko denc, ca gox ba ñu naan dëkku Daawuda, Esekiya doomam falu buur, wuutu ko.

## 17

### *Ose falu na buur ca Israyil*

<sup>1</sup> Ba Axas buurub Yuda duggee fukkeelu atu nguuram ak ñaar, ca la Ose\* doomu Ela falu buurub Israyil, péeyoo Samari. Nguuru na Israyil juróom ñeenti at, <sup>2</sup> di def li Aji Sax ji ñaawlu. Waaye dabul buurub Israyil ya ko jiitu.

<sup>3</sup> Moom la Salmanasar buurub Asiri song, mu nangul ko, di ko fey galag. <sup>4</sup> Gannaaw gi nag buurub Asiri gis ne Ose lal na pexe, ndax daa yónnee ay ndaw ca

\* **16:17** 16.17 làcci rootukaay: seetal ci *1.Buur ya 7.27-29*.

\* **17:1** 17.1 Ose mii wuute naak Yonent Yàlla Ose.



So buuru Misra, ba noppi lànk ne du fey galag at mu nekk. Buurub Asiri jàpp ko, tëj.

### *Samari, péeyu Israyil, tas na*

<sup>5</sup> Ba loolu amee Salmanasar buurub Asiri dal ca kaw réew ma mépp, dikk ba Samari, gaw ko diiru ñetti at. <sup>6</sup> Ba Ose duggee juróom ñeenteelu atu nguuram, ca la buurub Asiri nangu Samari, jàpp waa Israyil, yóbbu Asiri. Ñii mu teg leen ca diiwaanu Ala, ñee ca Gosan ca wetu dex ga ñuy wax Abor, ña ca des mu dëel leen ca dëkki xeet wa ñuy wax Medd.

<sup>7</sup> Li waral ñu nangu Samari mooy waa Israyil a bàkkaar, tooñ Aji Sax ji seen Yàlla ja leen génne réewum Misra, xettli leen ca Firawna buuru Misra. Waa Israyil di jaamu yeneen yàlla, <sup>8</sup> di topp baaxi xeet ya Aji Sax ji dàq ngir ñoom, di topp baax yi buuri Israyil tëralal seen bopp. <sup>9</sup> Waa Israyil teg ca di jéema nëbbuy def njubadi gu seen Yàlla Aji Sax jiy tere; di tabax ay bérabi jaamookaay ca seen dëkk yépp, dale ko ca tatay wattukat ya, ba ca dëkk ya ñu wëraley tata. <sup>10</sup> Ñu boole ca sampal seen bopp ay tuuri doj ak xer yu ñuy jaamoo Asera ci kaw mboolem tund wu kawe mbaa ker garab gu naat. <sup>11</sup> Ñuy taal cuuraay foofa ca mboolem bérabi jaamookaay ya, di roy xeet ya Aji Sax ji dàq ngir ñoom. Ñuy def daal ay ñaawtéef, di merloo Aji Sax ji, <sup>12</sup> di jaamu ay kasaray tuur, te Aji Sax ji waxoon leen ne buñu leen jaamu. <sup>13</sup> Moonte Aji Sax ji àrtu woon na Israyil ak Yuda, mboolem yonentam yaak boroom peeñu ya jottli leen ko, ne leen: «Dëppleen seen yoon yu bon yii ngeen topp, te sàmm samay santaane, wormaal samay dogal, na mu dëppook mboolem yoon wi ma tëralal seeni maam, yónnee leen ko, yonent yiy samay jaam jottli leen ko.»

<sup>14</sup> Teewul ñu të ticc, sajju loos ni seen maam ya gëmuloon seen Yàlla Aji Sax ji. <sup>15</sup> Daño xalab ay ndigalam ak kóllère ga mu fasoon ak seeni maam, xalab kàddu ya mu leen artoo woon. Ñu topp ay tuuri caaxaan ba mujj di niti caaxaan, di roy xeet yi leen wër, te Aji Sax ji tere woon

leen ñu roy leen. <sup>16</sup> Ba loolu amee ñu dëddu mboolem seen santaaney Yàlla Aji Sax ji; sàkkal seen bopp ñaari wëllu yu ñu móol, samp xer wu ñuy jaamoo Asera, di sujjóotal mboolem biddiwi asamaan tey jaamu Baal. <sup>17</sup> Ci biir loolu ñuy lakk seen doom yu góor ak yu jigéen ngir ay tuur, di gisaaneek a xërëmtu, ba laggi ci jëfi mbon yu Aji Sax ji ñaawlu, ba tax mu mer. <sup>18</sup> Moo tax Aji Sax ji mere Israyil lool, ba jële leen fi kanamam, ba giirug Yuda rekk des fa.

<sup>19</sup> Waa Yuda it sàmmuñu seen santaaney Yàlla Aji Sax ji. Daño roy ci aada yi Israyil sos, di ko jëfe. <sup>20</sup> Moo tax Aji Sax ji xalab mboolem bànni Israyil, fitnaal leen, teg leen ci loxoy yàqkat yi, ba ni mu leen wacce.

<sup>21</sup> Ba Aji Sax ji foqatee Israyil ca loxol waa kër Daawuda, daño fal Yerbowam doomu Nebat buur; Yerbowam dëddale Israyil ak Aji Sax ji, yóbbe leen bàkkaar bu réy; <sup>22</sup> mbooloom Israyil topp Yerbowam ci bàkkaar ya muy def yépp, bañ koo dëddu, <sup>23</sup> ba Aji Sax ji dëddu leen, muy la mu waxoon, yonent yay jaamam jottli ko. Noonu la mujj génne Israyil réewam, yóbbu leen Asiri ba bésuub tey jii.

### *Waa Asiri sancal nañuy jaambur ca Samari*

<sup>24</sup> Ci kaw loolu buurub Asiri jële ay nit dëkk ya ñuy wax Babilon ak Kuta ak Awa ak Amat ak Sefarwayim, dëel leen dëkki Samari, ñu wuutu bànni Israyil. Ñu daldi moom diiwaanu Samari, féetewoo dëkk ya. <sup>25</sup> Ba ñuy doora sanc foofa, ragaluñu woon Aji Sax ji, ba tax Aji Sax ji yebal ay gaynde ci seen biir, ñu di leen rey. <sup>26</sup> Ñu wax buurub Asiri ne ko: «Xeet ya nga toxal, sancal leen ca dëkki Samari de, xamuñu yoonu Yàllay réew ma. Yebal na ay gaynde ci seen biir. Ña nga leen di rey, ndax xamuñu yoonu Yàllay réew ma.»

<sup>27</sup> Ba loolu amee buurub Asiri joxe ndigal ne: «Yebal-leen fa kenn ci sarxalkat ya ngeen fa toxale, mu dem toog foofa, jàngal leen yoonu Yàllay réew ma.» <sup>28</sup> Kenn ca sarxalkat ya ñu jële woon Samari nag dikk, dëkksi Betel, jàngal leen

nu ñuy jaamoo Aji Sax ji. <sup>29</sup> Terewul xeet wu ci nekk di sàkk ba tey seen tuuri bopp ca seen dëkk ya ñu féete, ba dugal tuur ya ca bérabi jaamookaay, ya waa Samari defaroon. <sup>30</sup> Ci biir loolu waa Babilon sàkk tuur ma ñuy wax Sukkóot Benoot, waa Kuta sàkk Nergal, waa Amat sàkk Asima; <sup>31</sup> waa Awa sàkk Nibaas ak Tartag, waa Sefarwayim di lakk seeni doom ngir tuuri Sefarwayim yi ñuy wax Addraameleg ak Anameleg. <sup>32</sup> Ñu boole ci di jaamu Aji Sax ji, tabb fu nekk ci seen biir ay sarxalkat ngir bérabi jaamookaay ya, ñu di leen sarxalal ca bérabi jaamookaay yooyu. <sup>33</sup> Ñuy wormaal Aji Sax ji, di jaamuwaale seen tuuri bopp itam, na ñu ko baaxoo ca seen waa réewum cosaan ma ñu leen toxale. <sup>34</sup> Ba tey jii ñu ngi topp seen aaday cosaan. Ragaluñu Aji Sax ji dëgg te sàmmontewuñook santaane yeek dogal yeek yoon week ndigal li Aji Sax ji joxoon askanu Yanqóoba mi mu tudde Israyil. <sup>35</sup> Aji Sax ji daa fasoon ak ñoom kóllère, sant leen ne leen: «Buleen wormaal yeneen yàlla, buleen leen sujjóotal, buleen leen jaamu, te buleen leen sarxalal itam. <sup>36</sup> Man Aji Sax ji leen génne réewum Misra ci sama kàttan gu màgg ak sama dooley loxo, man ngeen wara wormaal, di ma sujjóotal, di ma sarxalal. <sup>37</sup> Te santaane yeek dogal yeek yoon week ndigal li ma leen bindaloon, fexeleen ba di sàmmonteek moom ba fàww. Buleen wormaal yeneen yàlla. <sup>38</sup> Kóllère gi ma fasoon ak yeen nag, buleen ko fàtte. Buleen wormaal it yeneen yàlla. <sup>39</sup> Waaye man seen Yàlla Aji Sax ji ngeen di wormaal, ma xettli leen ci seen loxol mboolem noon.» <sup>40</sup> Taxul ñu dëgg, xanaa sax rekk ci seen aaday cosaan. <sup>41</sup> Noonu la xeet yooyu daan wormaale Aji Sax ji, boole ci di jaamu seen jëmmi tuur. Seeni doom it noonu, ba tey seeni sët di def na seeni maam daan def.

## 18

### *Esekiya falu na buur ca Yuda*

<sup>1</sup> Ba Ose doomu Ela buurub Israyil duggee ñetteelu atu nguuram, ca la Esekiya doomu Axas falu ca Yuda. <sup>2</sup> Amoon

na ñaar fukki at ak juróom ba muy falu buur. Nguuru na ñaar fukki at ak juróom ñeent, péeyoo Yerusalem. Yaayam nag mooy Abi doomu Sàkkaryaa. <sup>3</sup> Mui def li Aji Sax ji rafetlu, mboolem noonee ko Daawuda maamam daan defe.

<sup>4</sup> Moom moo dindi bérabi jaamookaay ya, toj tuuri doj ya, gor xer wa ñuy jaamoo Asera, rajaxe jaanu xàñjar ja Musaa defaroon. Ndax ba ca jamono yooya waa Israyil dañu daan taalal jaanu xàñjar ja cuuraay, tudde ko Nexustan. <sup>5</sup> Ni Esekiya wóoloo woon Aji Sax ji Yàllay Israyil amu ci moroom ci mboolem buuri Yuda yi topp ci moom mbaa yi ko jiiitu. <sup>6</sup> Dafa sax ci Aji Sax ji, dëdduwu ko, xanaa di topp ndigal ya Aji Sax ji joxoon Musaa.

<sup>7</sup> Aji Sax ji nag ànd ak Esekiya, mu am ndam ci mboolem lu mu sumb. Bañ na noteelu buurub Asiri, ba nangulatu ko. <sup>8</sup> Ci kaw loolu dàq na waa Filisti, ba ca dëkk ba ñuy wax Gasa ak diiwaanam, dale ko ca tatay wattukat ya ba ca dëkk yu mag ya ñu wëraley tata.

<sup>9</sup> Ba Esekiya buurub Yuda duggee ñeenteelu atu nguuram, yemook ba buurub Israyil Ose doomu Ela duggee juróom ñaareelu atu nguuram, ca la Salmanasar buurub Asiri song Samari, gaw ko. <sup>10</sup> Gaw nañu Samari ba ca ñetteelu at ma, door koo nangu, ca juróom benneelu atu nguurug Esekiya, yemook ba Ose buurub Israyil duggee juróom ñeenteelu atu nguuram. <sup>11</sup> Ba mu ko defee buurub Asiri jàpp Israyil, yóbbu Asiri, dëel leen diiwaanu Ala ak Gosan ga dexu Abor wale, ak ca dëkki xeetu Medd ya. <sup>12</sup> Li waral loolu mooy waa Israyil a déggalul seen Yàlla Aji Sax ji. Daño fecci kóllèreem ak moom, ba mboolem li Musaa, jaamu Aji Sax ji, santaane woon, faalewuñu ko, jéfewuñu ko.

### *Asiri song na Yuda*

<sup>13</sup> Ca fukk ak ñeenteelu atu nguurug Esekiya buurub Yuda, ca la Senakerib buurub Asiri dikk song mboolem dëkki Yuda ya tata wër, daldi leen nangu. <sup>14</sup> Esekiya buurub Yuda yónnée ca buurub Asiri ca Lakis ne ko: «Tooñ naa de, waaye ngalla baal ma, te dem. Loo

ma sas dinaa ko fey.» Buurub Asiri sas Esekiya buurub Yuda juróom ñeent fukki barigoy xalis ak juróom ñeenti barigoy wurus. <sup>15</sup> Esekiya joxe mboolem xalis ba nekkoon ca kër Aji Sax ji ak ca dencukaayi kër Buur. <sup>16</sup> Booba la Esekiya xobbi wurus wa ñu xoobe woon bunti kër Aji Sax ji ak kenu ya, yónnee ko buurub Asiri.

<sup>17</sup> Buurub Asiri nag tollu ca Lakis, yebal bummeem ak kilifay jawriñam ak bëkk-néegam, ñu ànd ak mbooloom xare mu takku, dem Yerusalem. Ba ñu agsee Yerusalem ba tollook solomu mbàndum kaw ma, fa feggook yoon wa jëm ca toolub fótukaay ba, fa lañu taxaw. <sup>18</sup> Ci kaw loolu ñu woolu Buur. Gannaaw loolu bootalub buur Elyakim doomu Ilkiya moo ànd ak Sebna bindkat ba, ak ka yor téere ya, Yowa doomu Asaf, ñu dikk dajeek ñoom.

<sup>19</sup> Ba mu ko defee Rabsake bëkk-néegu buurub Asiri ne leen: «Waxleen nag Esekiya ne ko: Buur bu mag ba, buurub Asiri dafa wax ne: “Sa yaakaar jii nga yaakaar, ana foo ko teg? <sup>20</sup> Defe nga ne làmmiñ kese doy na pexeek njàmbaar cib xare? Ma ne: Ana kan nga yaakaar bay fippu ci sama kaw? <sup>21</sup> Misra daal, nga def sa yaakaar, bantu barax bu tas boobu di sokk képp ku ko wéeroo! Firawna buuru Misra de, mooy boobu bant ci képp ku ko yaakaar. <sup>22</sup> Xanaa doo ma ne seen Yàlla Aji Sax ji ngeen yaakaar? Xanaa du moom nga toxal bérabi jaamookaayam yeek sarxalukaayam, ba noppi ne waa Yerusalem ak Yuda sarxalukaay boobu ci Yerusalem lañuy sujjóotal?” <sup>23</sup> Léegi daal, déggool rekk ak sama sang buurub Asiri, ma jox la ñaari junniy fas. Ndegam am ngay gawaram! <sup>24</sup> Ana noo mana tēwe ki gēna tuut ci sama jawriñi sang? May wax ngay yaakaare Misra ay watiir aki fas! <sup>25</sup> Te sax, xanaa du Aji Sax ji laa àndal ba dalsi fi kaw bérab bii, ngir tas ko? Aji Sax ji ci boppam moo ma ne: “Songal réew mii, tas ko!”»

<sup>26</sup> Ci kaw loolu Elyakim doomu Ilkiya ak Sebna ak Yowa ñaan Rabsake, ne ko: «Ngalla, làkk nu arameen, dégg nanu ko. Bu nu wax ebrè, mbooloo mi ci kaw tata ji di ci dégg.» <sup>27</sup> Bëkk-néeg ba ne

leen: «Ndax yeen ak seen sang donj la ma sama sang yóbbante kàddu yii? Ñi toog ci kaw tata ji dañu cee bokkul? Te ñu nara ànd ak yeen lekk seen jonkani bopp, naan seenum saw!» <sup>28</sup> Ba loolu amee bëkk-néeg ba taxaw, xaacu ca kaw ci ebrè ne: «Dégluleen kàddug buur bu mag bi, buurub Asiri. <sup>29</sup> Buur dafa wax ne bu leen Esekiya nax, ndax manu leena xettli ci loxoom. <sup>30</sup> Bu leen Esekiya yaakaarloo Aji Sax ji it, naan leen: “Aji Sax ji moo nuy xettli moos, te deesul teg dëkk bii ci loxol buurub Asiri!” <sup>31</sup> Buleen déglu Esekiya. Buurub Asiri kat dafa wax ne: Jàmmooleen ak man te ngeen génn dëkk bi, dikk nangul ma. Su ngeen ko defee, ku nekk ci yeen mana lekk ak jàmm ci garabu reseñam, lekk ak jàmm ci figgam, di naan ndoxum teenam, <sup>32</sup> ba keroog may dikk, yóbbu leen réew mu mel ni seen reew mi, réewum pepp ak ndoxum reseñ, réewum mburu ak tooli reseñ, réewum garabi oliw, diw ak lem tuuru, ndax ngeen dund te baña dee. Bu leen Esekiya sànk, naan leen: “Aji Sax ji moo nuy xettli.” Buleen ko déglu! <sup>33</sup> Ndax tuuri xeet yi mas nañoo xettli réewu wenn xeet ci buurub Asiri? <sup>34</sup> Ana tuuri réew yii di Amat ak Arpàdd? Ana tuuri Sefarwayim ak Ena ak Iwa? Ndax dañoo xettli Samari ci man? <sup>35</sup> Tuuri réew yépp, ana mu ci xettli menn réew ak man, ba Aji Sax ji wara mana xettli, Yerusalem ak man?»

<sup>36</sup> Mbooloo ma nag ne cell, tontuwuñu ko baat, ndax Buur moo leen santoon ne leen buñu ko tontu. <sup>37</sup> Ba loolu amee bootalub Buur, Elyakim doomu Ilkiya ak Sebna, bindkat ba, ak doomu Asaf, Yowa ma denc téere ya, ñoo dem ak seen yérey ñaawlu yu xottiku, ba ca Esekiya. Ñu daldi koy àgge kàddug bëkk-néeg ba.

## 19

<sup>1</sup> Naka la ko Buur Esekiya dégg, daldi zotti ay yéream, sol saaku yu muy ñaawloo. Mu dem nag ca kër Aji Sax ji <sup>2</sup> Ba loolu amee mu yebal Elyakim bootalub Buur ak Sebna bindkat ba, ak ñay mag ca sarxalkat ya. Ñu sol saaku yu ñuy ñaawloo, daldi dem ca Yonent

Yàlla Esayi doomu Amocc. <sup>3</sup> Ñu ne ko: «Esekiya dafa wax ne: “Bésuub tey bésuub njàqare la ak mbugal ak gâce. Mooy li ñuy wax naa: Doom a ngi ci buntub juddu, te dooley wasin réer! <sup>4</sup> Jombul nag sa Yàlla Aji Sax ji dégg mboolem kàdduy bëkk-néeg bi sangam buurub Asiri yebal, ngir mu kókkali Yàlla jiy dund. Te kon sa Yàlla Aji Sax ji mooy dogal mbugal mi war ci kàddu yooyu mu dégg. Yékkatil kàddug ñaan rekk, ngir ñi fi desagum.”»

<sup>5</sup> Ba surgay Buur Esekiya àggee Esayi wax jooju leen seen sang wax, <sup>6</sup> Esayi da ne leen: «Waxleen seen sang ne ko: Aji Sax ji dafa wax ne: “Bul ragal kàddu yi nga dégg surgay buurub Asiri ñàkke ma ko kersa. <sup>7</sup> Maa ngii di ko sol xel mu ko gëmloo xibaar bu muy dégg, ba dellu réewam, ma fàdde ko ab saamar ca am réewam.”»

### *Asiri tooñati na Yuda*

<sup>8</sup> Gannaaw loolu Rabsake dégg ne buurub Asiri bàyyikoo na Lakis, bay xareek dëkk ba ñuy wax Libna. Mu walbatiku fekki ko foofa. <sup>9</sup> Booba buurub Asiri daa dégg ne Tiraka buurub Kuus moo leen di songsi. Mu dellu yebal ay ndaw ca Esekiya, ne leen: <sup>10</sup> «Waxleen Esekiya buurub Yuda, ne ko: “Seen Yàlla ji ngeen yaakaar, bumu leen nax, naa leen deesul teg Yerusalem ci loxol buurub Asiri. <sup>11</sup> Xanaa yaw ci sa bopp dégg nga li buuri Asiri def mboolem réew yi, faagaagal leen? Yaw nag, yaa ciy mucc? <sup>12</sup> Xee yi samay maam sànk, seeni tuur dañu leena musal, muy Gosan, di Karan, di Resef, di askanu Eden wa woon ca Telasar? <sup>13</sup> Ana buuri Amat ak Arpàdd ak Layir ak Sefarwayim ak Ena ak Iwa?”»

<sup>14</sup> Ba Esekiya jëlee bataaxal ba ca loxol ndaw ya, jàng ko ba noppi, dafa dem ba ca kër Aji Sax ji. Mu daldi tàllal bataaxal ba fa kanam Aji Sax ji. <sup>15</sup> Esekiya ñaan fi kanam Aji Sax ji, ne ko: «Éy Aji Sax ji Boroom gàngoori xare yi, Yàllay Israyil mi toog fi tiim malaakay serub yi. Yaw donj yaa di Yàllay mboolem nguuri àddina. Yaw déy, yaa sàkk asamaan ak suuf. <sup>16</sup> Ngalla Aji Sax ji, dékkal sa nopp ba dégg; Aji Sax ji, xippil say gët

ba gis, te dégg kàdduy Senakerib yi mu yóbbante, ngir ñàkke la ko kersa, yaw, Yàlla jiy dund! <sup>17</sup> Aylayéwén Aji Sax ji, buuri Asiree tas xee yee seeni réew, <sup>18</sup> te ñoo sànni seeni yàlla ci sawara it, ndax yooyoo dul Yàlla, xanaa lu nit sàkke loxoom, bant ak doj, ba tax ñu sànk leen. <sup>19</sup> Kon nag Aji Sax ji sunu Yàlla, ngalla wallu nook moom, ba mboolem nguuri àddina xam ne yaw Aji Sax ji donj yaa di Yàlla.»

### *Yonent Yàlla Esayi yégle na jéllub Asiri*

<sup>20</sup> Ba mu ko defee Esayi doomu Amocc yónnee ca Esekiya ne ko: «Aji Sax ji Yàllay Israyil dafa wax ne li nga ko ñaan ci Senakerib buurub Asiri, dégg na ko. <sup>21</sup> Lii moo di kàddu gi Aji Sax ji wax ci moom:

Yaw, janq Siyon mu taaru da laa xeeb, di la ñaawal.

Yerusalem, dëkk bu taaru booboo

lay wëcc bopp,

di la kekku sa gannaaw.

<sup>22</sup> Ana kooy kókkaleek a ñàkke kersa?

Moo kooy yékkatil kàddu?

Kooy xool gëti xeebeel?

Xanaa du Aji Sell ju Israyil ji?

<sup>23</sup> Yaa yebal say ndaw, di kókkali Boroom bi,

te naa: “Sama watiir yi ne xas

laa ware kawtey tund yi, jàll ba ca xolu Liban.

Maa gor seedaram ya fa sut,

ak tànnéefi garabi sipparam,

maay àkki ba ca collub dalub tundu Liban,

ak gottam bu naat ba nib tóokër.

<sup>24</sup> Maa gas ay teen, naan ndoxum réewum jaambur,

maa joggatee sama téstën, wali Misra yépp,

ñiisal ko.”

<sup>25</sup> «Waaye xanaa déggoo ne bu yàgg laa dogal loolu?

Ca jant ya woon laa ko nasoon,

tey ma sottal ko,

ba nga mana def genti jali tojit, dëkk yu tata wër.

<sup>26</sup> Waa dëkk ya ne yàcc, jàq, torox,

mel ni gàncaxu àll mbaa ñax mu yees,

mbete caxum xadd,  
balaa màgg lax.

27 «Waaye boo toogee, boo génnee, boo  
duggee,  
xam naa,

boo xadaroo sama kaw it, xam naa.

28 Yaa xadaru sama kaw,  
ba sag reewande tàbbi sama nopp!  
Maa lay takkal ag nos akug laab,  
waññi la, nga dellu yoon wa nga dikke  
woon.

29 «Lii, def ko ci, mu dib takk.  
Dees na lekk ren peppum saxayaay,  
dèwén it dees na lekk lu saxal boppam.  
Waaye dèwén-jéeg,

ngeen ji, góob,  
jèmbat tóokëri reseñ, lekk ca meññeef  
ma.

30 Ndes wa des ca askanu Yuda  
ñooy saxaat ay reen,  
ba meññaat ay doom.

31 Yerusalem kay law ndes di génne,  
aw ndes ay rëcce tundu Siyon,  
te Aji Sax ji Boroom gàngoor yi  
mooy sottal loolu ci xéraangeem.

32 «Moo tax Aji Sax ji wax ci buurub  
Asiri ne:

“Du dugg ci dëkk bii,  
du fi soqig fitt,  
du fi taxawe ab pakk,  
du fi jal jal bu muy gawe.

33 Yoon wa mu dikke lay delloo,  
biib dëkk du fi dugg.  
Kàddug Aji Sax jee.

34 Maay aar dëkk bii, musal ko  
ngir man ci sama bopp,  
ak Daawuda sama jaam bi.”»

35 Guddig keroog malaakam Aji Sax ji  
moo dikk, fàdd ca dalub Asiri téeméer  
ak juróom ñett fukk ak juróomi junni  
(185 000). Ca èllëg sa ña mucc teela xëy,  
yemuñu ci lu moy ñooña ñépp, diy néew.

36 Ba loolu amee Senakerib buurub  
Asiri daldi fabu, ñibbi. Mu toog nag ca  
Niniw. 37 Gannaaw gi, ba muy sujjóot  
ca kër tuuram ma ñuy wax Nisrog, Ad-  
draameleg ak Sareser, doomam yu góor  
ñoo ko fa fàdde saamar. Ñoom nag, ñu  
daw làquji réew ma ñuy wax Araraat. Ci

kaw loolu doomam Asaradon falu buur,  
wuutu ko.

## 20

### *Esekiya wopp na, ba jóg*

1 Jant yooyu Esekiya moo woppoon bay  
waaja dee. Yonent Yàlla Esayi doomu  
Amocc dikk, ne ko: «Aji Sax ji dafa  
wax ne: Dénkaaneel sa mbiri kër, ndax  
dangay dee, doo jóg!» 2 Mu walbatiku  
nag, jublook miir ba, ñaan ci Aji Sax ji ne  
ko: 3 «Éy Aji Sax ji, ngalla bàyyil xel ni ma  
àndeek yaw sama léppi xol, ci kóllëre, te  
li nga rafetlu laa jëfe.» Mu jooy nag, jooy  
yu metti.

4 Ba loolu amee Esayi génn, weeseegul  
digg ètt ba sax, kàddug Aji Sax ji dikkal  
ko ne ko: 5 «Dellul ba ca Esekiya, sama  
njiitu ñoñ, nga ne ko: “Aji Sax ji sa Yállay  
maam Daawuda dafa wax ne: Dégg naa  
sag ñaan, gis naa say rongooñ. Maa ngii  
di la wéral, te bu gannaaw èllëgee dinga  
dem kër Aji Sax ji. 6 Dinaa yokk ci saw  
fan, fukki at ak juróom. Buurub Asiri ak  
dooleem, maa la ciy xettli, yaw ak dëkk  
bii, te maay aar dëkk bii ndax man ci  
sama bopp ak Daawuda sama jaam bi.”»  
7 Esayi teg ca ne: «Indileen danku figg.»  
Ñu indi, teg ko ca taab ba, Esekiya wér.

8 Fekk na Esekiya ne Esayi: «Ana lu  
di takk biy firndeel ne Aji Sax ji dina  
ma wéral, ba ma mana dem gannaaw  
èllëg ca kër Aji Sax ji?» 9 Esayi ne  
ko: «Takk biy bàyyikoo ci Aji Sax ji,  
di firndeel ne dina def li mu wax, yaar  
yii loo ci bègg: ker gi màgg lu tollook  
fukki dëggastal, mbaa mu dellu gannaaw  
fukki dëggastal?» 10 Esekiya ne ko:  
«Ker gi màgg lu tollook fukki dëggastal  
moom, yomb na. Kon na dellu gannaaw  
fukki dëggastal.» 11 Ci kaw loolu Yonent  
Yàlla Esayi ñaan ci Aji Sax ji, Aji Sax ji  
delloo ker ga gannaaw lu tollook fukki  
dëggastal ya mu wàccoon ca kaw iskaleb  
Axas ba.

### *Buuru Babilon yónnee na ca Esekiya*

12 Jant yooyu doomu Baladan Berodag  
Baladan\* buuru Babilon moo yónnee

\* 20:12 20.12 Berodag Baladan mooy Merodag Baladan ba tey.

Esekiya bataaxal ak yóbbal. Booba dafa dégg ne Esekiya daa woppoon. <sup>13</sup> Esekiya nag déglu ndaw ya, ba noppi won leen mboolem kërug dencukaayam: xalis baak wurus waak ndàbb jaak diwu tànnéef gaak néegub gannaayam ak mboolem lu nekkoon cay dencam. Amul lenn lu leen Esekiya wonul ci biir kërám ak mboolem fu bokk ci kilifteefam.

<sup>14</sup> Gannaaw loolu Yonent Yàlla Esayi dikk ne Buur Esekiya: «Lu la nit ñii wax ak fu ñu jóge sax ba fi yaw?» Esekiya ne: «Réew mu sore lañu bàyyikoo, dikk, réewum Babilon.» <sup>15</sup> Mu ne ko: «Ana lu ñu gis sa biir kër?» Esekiya ne ko: «Mboolem lu nekk sama biir kër, gis nañu ko. Amul lenn lu ma leen wonul ci samay denc.» <sup>16</sup> Esayi ne Esekiya: «Déglul kàddug Aji Sax ji: <sup>17</sup> “Ay jant a ngii di ñëw, dees na yóbbu Babilon lépp lu nekk sa biir kër, te say maam dencoon ko, ba tey jii. Du lenn luy des. Kàddug Aji Sax jee. <sup>18</sup> Te it ñenn ci sag njaboot, ñu soqikoo ci yaw, di ñoo meññ ci sa geño, dinañu leen jàpp, ñu doon jaam yu ñu tàpp ca biir kër buuru Babilon.”» <sup>19</sup> Esekiya ne Esayi: «Kàddug Aji Sax ji nga jottli jàmm la.» Booba ma nga naan: «Xanaa du jàmm ju ne ñooy ay am sama giiru dund?»

### *Buur Esekiya saay na*

<sup>20</sup> Li des ci mbiri Esekiya ak mboolemi njàmbaraam ak mbànd mi mu defar ak solomam, muy indi ndox ca biir dëkk ba, bindees na lépp moos ci téere bi ñu dippee Jaloorey buuri Yuda ca seeni jant. <sup>21</sup> Esekiya nag saay, fekki ay maamam. Doomam Manase falu buur, wuutu ko.

## 21

### *Manase falu na buur ca Yuda*

<sup>1</sup> Fukki at ak ñaar la Manase amoon ba muy falu buur. Nguuru na juróom fukki at ak juróom fa Yerusalem. Yaayam mooy Efsiba. <sup>2</sup> Manase nag di def li Aji Sax ji ñaawlu, topp ñaawtéefi xeet ya Aji Sax ji dàqoon ngir bànni Israyil. <sup>3</sup> Moo tabaxaat bérabi jaamookaay ya Esekiya baayam tasoon, yékkatil tuur mi ñu naan Baal ay sarxalukaay, samp xer wu ñuy jaamoo

Asera, noonee ko Axab buurub Israyil defe woon, boole ca di sujjóotal mboolem biddiwi asamaan, di leen jaamu. <sup>4</sup> Moo yékkati yeneen sarxalukaayi tuur ca biir kër Aji Sax ji, fa Aji Sax ji waxoon ne: «Fii ci Yerusalem laay dēj sama tur.» <sup>5</sup> Ay sarxalukaay it la tabaxal biddiwi asamaan yépp ca biir ñaari ètti kër Aji Sax ji. <sup>6</sup> Te itam sarxal na doomam, lakk ko ngir ay tuur. Ci biir loolu jabar na, ñeengo na, jëflante naak boroom rawaan aki gisaanekat. Bare na lu mu def lu Aji Sax ji ñaawlu, ba merloo ko.

<sup>7</sup> Moo dugal ba tey jëmm ja mu sàkkoon ngir tuur ma ñuy wax Asera, ca biir kër ga Aji Sax ji waxoon Daawudaak doomam Suleymaan ne leen: «Ci biir kër gii ci Yerusalem, gi ma tãne ci mboolem giiri Israyil, laay dēj sama tur ba fàww. <sup>8</sup> Ndegam bànni Israyil saxoo nañoo sàmm mboolem lu ma leen san-toon, te mu dèppook mboolem yoon wi leen Musaa sama jaam ba sant ñu topp ko, dootuma leen wërloo, ñu wacc réew mi ma joxoon seeni maam.» <sup>9</sup> Waaye bànni Israyil ñoo dégluwul, ba Manase waññi leen, ñuy def ay ñaawtéef, ba raw xeet ya Aji Sax ji sànkoon fi kanam bànni Israyil.

<sup>10</sup> Ba loolu amee Aji Sax ji wax, yonent yay jaamam jottli. Mu ne: <sup>11</sup> «Manase buurub Yuda moo def yii ñaawtéef, ba jëfam ju bon raw mboolem lu Amoreen ña ko jiitu defoon, ba yóbbe waa Yuda ñuy moye ay kasaray tuur. <sup>12</sup> Moo tax man Aji Sax ji Yállay Israyil damaa wax ne: “Maa ngii di wàcce ci Yerusalem ak Yuda musiba muy buur noppi képp ku ci dégg. <sup>13</sup> Dinaa nattoo Yerusalem buumu beteex ba ma nattoo Samari ak nattukaay ba ma nattoo waa kër Axab. Dinaa ñédd Yerusalem, ba mu mel ni ndab lu ñu ñiit ba mu set, dèpp ko. <sup>14</sup> Dinaa suur sama ndesu ñoñ te dinaa leen teg ci seen loxol noon yi, seen bañ yépp di leen futteek a sèxëtoo, <sup>15</sup> ndegam li ma ñaawlu lañu masa def, di ma merloo, ba seeni maam génnee Misra ba tey jii.”»

<sup>16</sup> Te it deretu nit ñu deful dara la Manase tuur, ba mu fees Yerusalem dell, cat ba cat, te bokkul ak bàkkaar bi mu

bàkkaarloo waa Yuda, ba ñuy def li Aji Sax ji ñaawlu.

<sup>17</sup> Li des ci mbiri Manase ak mboolem lu mu def ak bàkkaaram ba mu def, bindees na lépp moos ci téere bi ñu dippee Jaloorey buuri Yuda ca seeni jant. <sup>18</sup> Gannaaw gi Manase saay, fekki ay maamam, ñu denc ko ci toolub këram, di toolub Usa. Doomam Amon falu buur, wuutu ko.

### *Amon falu na buur ca Yuda*

<sup>19</sup> Ñaar fukki at ak ñaar la Amon amoon ba muy falu buur. Ñaari at la nguuru fa Yerusalem. Yaayam moo doon Mesulemet doomu Arus ma cosaano Yotba. <sup>20</sup> Amon di def nag li Aji Sax ji ñaawlu, la baayam Manase daan def. <sup>21</sup> Topp na baayam ci mboolem tànk ya mu jaaroon, di jaamu kasaray tuur yi baayam daan jaamu, di leen sujjóotal. <sup>22</sup> Daa dëddu Aji Sax ji, Yállay maamam, baña jaar ci yoonu Aji Sax ji.

<sup>23</sup> Ci kaw loolu surgay Amoon lalal Amon pexe, bóom ko ca biir këram. <sup>24</sup> Waa réew ma nag rey mboolem ña fexeelon Buur Amon. Ba loolu amee waa réew ma fal buur doomam Yosya, mu wuutu ko. <sup>25</sup> Li des ci mbiri Amon ak li mu def, bindees na ko moos ci téere bi ñu dippee Jaloorey buuri Yuda ca seeni jant. <sup>26</sup> Ba loolu amee ñu denc ko ca bàmmeelam ca toolub Usa, Yosya doomam falu buur, wuutu ko.

## 22

### *Yosya falu na buur ca Yuda*

<sup>1</sup> Juróom yetti at la Yosya amoon ba muy falu buur, te fanweeri at ak benn la nguuru fa Yerusalem. Yaayam mooy Yedida doomu Adaya ma cosaano Boskat. <sup>2</sup> Yosya di def li Aji Sax ji rafetlu, topp ci mboolem tànk yi maamam Daawuda jaaroon, jàddul fenn, du ndi-joor, du càmmoñ.

<sup>3</sup> Buur Yosya nag, ca fukk ak juróom ñetteelu atu nguuram, dafa yebal bindkat ba, Safan doomu Asalyaa doomu Mesulam, ca këer Aji Sax ji. Mu ne ko: <sup>4</sup> «Demal ca Ilkiya sarxalkat bu mag ba, ne ko mu yembal saraxi xalis, yi

wattukati bunti këer Aji Sax ji nangoo ci nit ñi. <sup>5</sup> Nañu ko teg ci loxoy liggéeykat yiy saytu liggéeyu këer Aji Sax ji. Ñooñu jox ko liggéeykat ya ca këer Aji Sax ji, di defaraat këer ga, <sup>6</sup> muy liggéeykati bant yi ak tabaxkat yi ak yeneen liggéeykat. Nañu ci jënd bant ak doji yett, defare ko këer gi. <sup>7</sup> Waaye buñu leen laaj nu ñu def xalis bi ñu leen jox, ndax ñu maandu lañu ci seen liggéey.»

### *Téereb yoon wi feeñ na*

<sup>8</sup> Ilkiya sarxalkat bu mag ba nag ne Safan bindkat ba: «Téereb yoon wi de laa gis ci këer Aji Sax ji!» Ci kaw loolu Ilkiya jox Safan téere ba, mu jàng ko. <sup>9</sup> Ba loolu amee Safan bindkat ba dellu ca Buur, àgge ko gii kàddu: «Sa surga ya sotti nañu xalis ba nekkoon ca këer Aji Sax ji, ba teg ko ca loxol ñi yor liggéey bi te di saytukati këer Aji Sax ji.» <sup>10</sup> Safan bindkat ba teg ca xamal Buur ne ko: «Ab téere nag la ma Ilkiya sarxalkat bi jox.» Safan jàngal ko Buur.

<sup>11</sup> Ba Buur dégge kàdduy téereb yoon wa, daa xotti ay yéreem ndax tiitaange. <sup>12</sup> Mu wax Ilkiya sarxalkat ba, mook Ayikam doomu Safan, ak Agbor doomu Mikaya, ak Safan bindkat ba, ak Asaya bëkk-néegu buur, ne leen: <sup>13</sup> «Demleen seetal ma ci Aji Sax ji, seetaaleel mbooloo meek Yuda gépp ci mbirum kàdduy téere bii feeñ. Sànjum Aji Sax ji tàkk ci sunu kaw kat réy na, ndax sunuy maam a déggul kàdduy téere bii, ngir jéfe mboolem li ñu nu ci bindal.» <sup>14</sup> Ilkiya sarxalkat ba daldi dem ànd ak Ayikam ak Agbor ak Safan ak Asaya, ba ca Ulda yonent bu jigéen bay soxnas wattukatub yére ya, Salum doomu Tigwa doomu Aras. Ulda ma nga dëkkoon Yerusalem ca sanc ba. Ñu wax ak moom.

<sup>15</sup> Jigéen ja ne leen: «Aji Sax ji Yállay Israyil nee: Xamal-leen ki leen yebal ci man ne ko: <sup>16</sup> «Aji Sax ji nee: Maa ngii di wacce musiba ci bérabi bii ak ñi ko dëkke, muy mboolem kàdduy téere bi buurub Yuda jàng. <sup>17</sup> Gannaaw ñoo ma dëddu, di taalal yeneen yalla cuuraay, ngir merloo ma ci mboolem liggéey bu ñu defe seeni loxo, samam sànj mooy tàkk

fi bérab bii te du fey.”<sup>18</sup> Buuru Yuda mi leen yónni, ngir ngeen seetlusi ci Aji Sax ji nag, waxleen ko ne ko: “Li Aji Sax ji Yállay Israyil wax ci kàddu yi ngeen dégg moo di: <sup>19</sup> Gannaaw yaa réccu ci sa xol, ba toroxlu ci kanam Aji Sax ji, ba nga dégge ni ma rëbbe bérab bii mook ñi ko dëkke, muy seen toroxteek seen alkànde, te yaa xotti say yére, jooy fi sama kanam, man it dégg naa la. Kàddug Aji Sax jee. <sup>20</sup> Moo tax maa ngii di la yóbbu nga fekki say maam, dees na la yóbbu ak jàmm ca sa bàmmeel, te say bët du tegu ci mboolem musiba mi may wàcce ci bii bérab.”» Ba loolu amee ñu dellu, yegge Buur kàddu ga.

## 23

### *Yosya sellal na réew mi*

<sup>1</sup> Ci kaw loolu Buur yónnee, ñu woo mboolem magi Yuda ak Yerusalem, ñu dikk. <sup>2</sup> Buur dem ca kër Aji Sax ji, ànd ak waa Yuda gépp, Yerusalem gépp; sarxalkat yaak yonent yaak askan wépp, ka gën a tuut ba ca gën a mag. Mu jàngal leen, ñuy dégg, mboolem kàdduy téereb kóllère\* ba feeñ ca kër Aji Sax ji. <sup>3</sup> Buur nag taxaw fa kenu ga, feddli kóllère ga fa kanam Aji Sax ji, ngir topp Aji Sax ji, di sàmme léppi xol ak léppi bakkan, ay santaaneem ak seedey yoonam, ak dogali yoonam, ngir saxal kàdduy kóllère googu ñu bind ci téere boobu. Askan wépp yebu ca kóllère ga.

<sup>4</sup> Ba loolu amee Buur sant Ilkiya sarxalkat bu mag ba, mook sarxalkat ya ca topp, ak wattukati buntu kër Aji Sax ji, ne leen ñu génnee kër Aji Sax ji mboolem ndab ya ñu defaraloon Baal ak Aseraak biddiwi asamaan yépp. Mu génne lépp Yerusalem, lakk ko ca tooli Sedoron, ba noppi yóbbu dóom ba Betel. <sup>5</sup> Gannaaw loolu mu dàq sarxalkati tuur ya buuri Yuda faloon ñuy taal cuuraay ca bérabi jaamookaay ya ca dëkki Yuda ak la wër Yerusalem, dàqaale ñay taalal cuuraay Baal, ak jant beek weer week xeeti dëlloñ yeek mboolem biddiwi asamaan yépp. <sup>6</sup> Bu loolu weesee jële na kër

Aji Sax ji tuur ma tudd Asera, génne ko Yerusalem ba ca xuru Sedoron, lakk ko foofa ca xuru Sedoron, wol ko ba muy sunguf, mu xëpp ko ca sègi baadoola ya. <sup>7</sup> Màbb na it kèri nit ña doon jaay seen bopp fa ñuy màggale tuur ya ca biir kër Aji Sax ji, te jigéen ña daan fa ràbbal tuur ma ñuy wax Asera ay xayma.

<sup>8</sup> Ba loolu wéyee Yosya indi Yerusalem mboolem sarxalkat ya doon sarxal ca dëkki Yuda, diggante Geba ba Beerseba, daldi sobeel bérabi jaamookaay ya ñu daan taal cuuraay, daaneel bérabi jaamookaay ya ca bunt ya, boole ca ba nekkoon ca buntu Yosuwe, boroom dëkk ba, te féete càmmoñ booy jaare ci buntu dëkk ba di duggsi. <sup>9</sup> Mayuñu woon nag sarxalkati bérabi jaamookaay ya ñuy dikk ba ca sarxalukaayu Aji Sax ji ci Yerusalem. Sañuñu woon lu moy bokk lekk mburu mu amul lawiir ñook sarxalkat yi ci des. <sup>10</sup> Ci kaw loolu Yosya sobeel na fa ñuy wax Tofet ca xuru Ben Inom, ba kenn dootu fa lakk sa doom ju góor mbaa ju jigéen ngir tuur wi ñuy wax Moleg. <sup>11</sup> Jële na ca bunti kër Aji Sax ji fas ya ay buuri Yuda jagleeloon jant bi. Ña nga woon ca ètt ba, ca wetu néegu jawriñ bu ñuy wax Netan Meleg. La ca tegu Yosya lakk watiir ya ñu jagleel jant bi. <sup>12</sup> Ci biir loolu Buur daane sarxalukaay ya ay buuri Yuda yékkati woon ca kaw xaddub néegub kaw bu Axas, ak sarxalukaay ya Manase tabaxoon ca ñaari ètti kër Aji Sax ji. Mu jële fa lépp, def ko pënd, sànni ca xuru Sedoron. <sup>13</sup> Bérabi jaamookaay ya féete woon Yerusalem penku ca bëj-saalumu tundu Alkànde, Buur Suleymaan tabaxaloon ko tuur ma ñuy wax Astàrt, kasaray waa Sidon ya, ak tuur ma ñuy wax Kemos, kasaray Mowabeen ña, ak tuuru Amoneen mu siblu ma ñuy wax Milkom, Buur Yosya daa boole lépp sobeel ko. <sup>14</sup> Rajaxe na tuuri doj ya, daane xer ya ñuy jaamoo Asera, wuutal fa ay jali yaxi nit, ba mu daj.

<sup>15</sup> Naka noona mu boole ca sarxalukaay

\* 23:2 23.2 téereb kóllère gi mooy Tawreetu Yonent Yàlla Musaa.



ba ca Betel ak bérabu jaamookaay ba fa doomu Nebat Yerbowam ma bàkkaarloo woon Israyil, yékkati woon. Sarxalukaay boobaak bérabu jaamookaay booba sax yàq na ko. Dafa lakk bérabu jaamookaay ba, wol ko ba mu mokk, lakk xer wa ñuy jaamoo Asera. <sup>16</sup> Ba mu ko defee Yosya ne gees, gis bàmmeel ya nekk foofa ca tund wa. Mu yeble, ñu sullil ko yax ya, mu lakk ko ca kaw sarxalukaay ba, sobeel ko noonu, muy kàddug Aji Sax ji góoru Yàlla ga waxoon†, keroog ba Yerbowam taxawee ca sarxalukaay ba, bésusb màggal. Buur Yosya neeti gees, yem ci bàmmeelu góoru Yàlla ga biraloon waxyu ba. <sup>17</sup> Mu ne: «Doj wee may séen bàmmeelu kan a?» Waa dëkk ba ne ko: «Xanaa bàmmeelu góoru Yàlla ga bàyyikoo woon Yuda. Moo waxoon bu yàgg jëf jii nga def sarxalukaayu Betel bii tey.» <sup>18</sup> Mu ne: «Bàyyileen ko noonu! Bu kenn laal ay yaxam!» Ñu wacc fa ay yaxam ak yaxi yonent ba jóge woon Samari.

<sup>19</sup> Mboolem bérabi jaamookaay ya nekkoon ca dëkki Samari yu mag ya te buuri Israyil tabaxoon ko, ba merloo Aji Sax ji, Yosya jële na ko fa, def ko na mu defoon ca Betel rekk. <sup>20</sup> Gannaaw loolu mu rendi ca sarxalukaay ya mboolem ña fa doon sarxalkati bérabi jaamookaay ya, ba noppi lakk yaxi nit ca kaw, ngir sobeel lépp, doora dellu Yerusalem.

### *Màggalu bésusb Mucc délsi na*

<sup>21</sup> Buur Yosya nag jox mbooloo mépp ndigal ne leen: «Màggal-leen bésusb Mucc ga, ñeel seen Yàlla Aji Sax ji, ni ñu ko binde ci téereb kóllère gii.» <sup>22</sup> Bésusb Mucc booba, na ñu ko màggale atam, maseesu ko nee màggale ca jamonoy njiit ya yilifoon Israyil, ba ci jamonoy buuri Israyil ak Yuda. <sup>23</sup> Ca fukk ak juróom ñetteelu atu Yosya donj lañu dellu màggal bésu Mucc boobu ca Yerusalem, ñeel Aji Sax ji. <sup>24</sup> Rax ci dolli boroom rawaan yeek gisaanekat yeek gàllaaji kër yeek kasaray tuur yeek mboolem kasara yu ni mel te ñu daan ko

gis ca réewum Yudak Yerusalem, Yosya jële na ko fa ngir mana saxal kàdduy yoon wa ñu bind ca téere ba Ilkiya sarxalkat ba gisoon ca biir kër Aji Sax ji. <sup>25</sup> Mboolem buur yi jiitu Yosya, kenn jubloowu ci Aji Sax ji léppi xolam ak léppi jëmmam ak kem kàttanam, bay sàmm yoonu Musaa wépp. Mboolem ñi ko wuutu it, kenn dabu ko ci.

<sup>26</sup> Teewul Aji Sax ji dëppul ci meram mu réy mi mu dale ci kaw Yuda ndax mboolem li Manase def, ba merloo ko. <sup>27</sup> Aji Sax ji nag ne: «Yuda itam dinaa ko jële fi sama kanam, ni ma fi jëlee Israyil. Dinaa xalab dëkk bii ma tànn, di Yerusalem ak kër gii ma wax ne sama tur dina fi nekk.»

### *Buur Yosya saay na*

<sup>28</sup> Li des ci mbiri Yosya ak mboolem li mu def, bindees na ko moos ci téere bi ñu dippee Jaloorey buuri Yuda ca seeni jant. <sup>29</sup> Ca ay jantam la Firawna Neko buuru Misra jóg jàppleji buurub Asiri ca wetu dexu Efraat, Buur Yosya dogaleji ko. Teewul ba ko Neko gisee la ko rey ca Megido. <sup>30</sup> Ba loolu amee surgay Yosya yeb néew ba ci watiir, jële ko Megido, indi ko Yerusalem, denc ko ci bàmmeelu boppam. Askanu réew ma nag jël Yowakas doomu Yosya, diw ko diwug pal, fal ko buur, mu wuutu baayam.

### *Yowakas falu na buur ca Yuda*

<sup>31</sup> Ñaar fukki at ak ñett la Yowakas amoon ba muy falu buur. Ñetti weer la nguuru fa Yerusalem. Yaayam mooy Amutal doomu Yeremi ma cosaano Libna. <sup>32</sup> Muy def li Aji Sax ji ñaawlu, na ko ay maamam daan defe rekk. <sup>33</sup> Firawna Neko moo làqoon jant bi Yowakas ca dëkk ba ñuy wax Ribla ca réewum Amat, ba nguurootul ca Yerusalem. Mu teg réew ma galagu fanweeri barigoy xaaalis, ak fanweeri kiloy wurus. <sup>34</sup> Ci kaw loolu Firawna Neko fal Elyakim doomu Yosya buur, mu wuutu baayam Yosya, soppi turam, tudde ko Yowakim‡; Yowakas moom mu jàpp ko, yóbbaaale Misra. Foofa la deeye.

† 23:16 23.16 Seetal ci 1.Buur ya 13.2. ‡ 23:34 23.34 Ci seen aada, ku jox nit aw tur, fekk na nga am kilifteef ci kawam.

### *Buur Yowakim fey na Misra galag*

<sup>35</sup> Yowakim jox na Firawna Neko xaalis baak wurus wa mu laaj. Waaye waa réew ma la ko sas, ba jële ca ñoom xaalis baak wurus wa, ku nekk ak sab sas, daldi koy dajale, jox ko Firawna Neko.

<sup>36</sup> Ñaar fukki at ak juróom la Yowakim amoon ba muy falu buur, te fukki at ak benn la nguuru fa Yerusalem. Yaayam mooy Sebuda doomu Pedaya ma cosaanoo Ruma. <sup>37</sup> Muy def li Aji Sax ji ñaawlu, mboolem noonee ko ay maamam defe woon.

## 24

<sup>1</sup> Ca ay jantam la Nabukodonosor buuru Babilon song réew ma. Yowakim nangul ko diiru ñetti at, doora walbatiku fippu.

<sup>2</sup> Ci kaw loolu Aji Sax ji yebal ci kawam ay yàqkati waa Babilon ak yàqkati Siri ak yàqkati Mowab ak yàqkati Amoneen ña. Aji Sax ji yebal leen Yuda ngir ñu yàqte ko, mu dëppook kàddu ga mu waxoon, yonent yiy surgaam jottli ko. <sup>3</sup> Ci ndigalal Aji Sax ji moos la loolu xew ca Yuda, ba mu mujj leen xarab ndax bàkkaari Manaseek li mu def lépp, <sup>4</sup> ak deretu nit ñi mu tuur te defuñu dara; ndax Manase daa feesal Yerusalem ak deretu jaamburi Yàlla, ba Aji Sax ji nanguwu koo baal.

<sup>5</sup> Li des ci mbiri Yowakim ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. <sup>6</sup> Gannaaw gi Buur Yowakim tēdd, fekki ay maamam. Doomam Yowakin nag falu buur, wuutu ko. <sup>7</sup> Jamono yooyu buuru Misra génnatul réewam di xareji, ndax fekk na buuru Babilon nangu suufam sépp la ko dale ca xuru Misra ba ca dexu Efraat.

### *Yowakin falu na buur ca Yuda*

<sup>8</sup> Fukki at ak juróom ñett la Yowakin amoon ba muy falu buur. Ñetti weer la nguuru, péeyoo Yerusalem. Yaayam mooy Newusta doomu Elnatan ma cosaanoo Yerusalem. <sup>9</sup> Muy def li Aji Sax ji ñaawlu, mboolem noonee ko baayam defe woon.

<sup>10</sup> Jamono jooja la jaraafi Nabukodonosor buuru Babilon, song Yerusalem, gaw

dëkk ba. <sup>11</sup> Nabukodonosor dikk ca dëkk ba, fekk ay jaraafam gaw ko. <sup>12</sup> Yowakin buurub Yuda génn fekki buuru Babilon, jébbal ko boppam, mook ndeyam aki surgaam aki jaraafam ak jawriñi kërám. Buuru Babilon nag jàpp ko. Looloo nga yemook juróom ñetteelu atu nguurug Nabukodonosor buuru Babilon. <sup>13</sup> Nabukodonosor jële fa mboolem alali kër Aji Sax ji ak alali kër Buur, daldi buub lépp luy ndabu wurus lu Suleymaan buurub Israyil defarlu woon ci kër Aji Sax ji, muy la Aji Sax ji waxoon.

<sup>14</sup> Ci biir loolu buuru Babilon yóbbu Yerusalem gépp, muy mboolem jaraaf yeek jàmbaari góor ñi, ñuy fukki junni, ñook mboolem liggéeykat yaak tēgg ya. Kenn desul, lu moy baadoola ya gēna néew doole.

<sup>15</sup> Mu yóbbu Yowakin Babilon mook ndeyam aki soxnaam aki jawriñam ak kil-ifay réew ma. <sup>16</sup> Buuru Babilon boole ca jàppaale juróom ñaari junniy jàmbaari góor (7 000), ak junniy liggéeykat aki tēgg, ñoom ñépp di boroom kàttan te tollu ci xare; mu boole leen jàpp jaam, yóbbu Babilon. <sup>17</sup> Buuru Babilon moo fal Mataña, baayu Yowakin bu ndaw, mu wuutu Yowakin, daldi soppo turu Mataña, tudde ko Cedekiya.

### *Cedekiya falu na buur ca Yuda*

<sup>18</sup> Ñaar fukki at ak benn la Cedekiya amoon ba muy falu buur, te fukki at ak benn la nguuru fa Yerusalem. Yaayam mooy Amutal doomu Yeremi ma cosaanoo Libna. <sup>19</sup> Muy def li Aji Sax ji ñaawlu, mboolem noonee ko Yowakim defe woon. <sup>20</sup> Merum Aji Sax ji nag dikkal Yerusalem ak Yuda, ba mu mujj xarab leen.

Gannaaw gi Cedekiya fippu buuru Babilon.

## 25

### *Nangooti nañu Yerusalem*

<sup>1</sup> Ba Cedekiya tolloo ci juróom ñeenteelu atu nguuram, fukki fan ca fukkeelu weeram, ca la Nabukodonosor buuru Babilon ànd ak mbooloom xareem mépp ci kaw Yerusalem. Ñu dal fa janook

ñoom, yékkati gawukaay, wërale ko.  
<sup>2</sup> Dëkk ba gawe, ba keroog Cedekiya tollu ci fukkeelu atu nguuram ak benn.  
<sup>3</sup> Keroog juróom ñeenti fan ca weer wa, xiif ba tar lool ca biir dëkk ba, ba waa réew ma amatuñu ab dund.  
<sup>4</sup> Xarekati Yuda ya génn guddi daw. Fekk na waa Babilon gaw dëkk ba. Teewul ñu rëcc, jaare ca bunt ba ca diggante ñaari tata ya, ca wetu toolu buur. Cedekiya daldi wuti xuru Yurdan.  
<sup>5</sup> Waa Babilon nag topp Buur Cedekiya, ba dab ko ca jooru Yeriko, fekk mbooloom xareem mépp tasaaroo, wacc ko.  
<sup>6</sup> Ñu jàpp ko, yóbbu ko ca buuru Babilon ca dëkk ba ñuy wax Ribla. Ñu dogal fa àtteem.  
<sup>7</sup> Doomi Cedekiya yu góor lañu rendi, muy gis, ba noppi ñu tuur ay bëtam, jéngé ko jéngi xàñjar, yóbbu ko Babilon.

### *Yàq nañu kër Aji Sax ji*

<sup>8</sup> Ba Nabukodonosor buuru Babilon tolloo ci fukkeelu atu nguuram ak juróom ñeent, ba am juróom ñaari fan ca juróomeelu weeru at ma, ca la bëkk-néegu buuru Babilon, Nebusaradan njiitu dag ya, dugg Yerusalem.  
<sup>9</sup> Mu taal kër Aji Sax ji, taal kër Buur, ak kəri Yerusalem gépp, boole ca kəri boroom barke ya.  
<sup>10</sup> Gàngooru Babilon gépp daldi ànd ak njiital dagi buur, ñu màbb tata ya wër Yerusalem.  
<sup>11</sup> Gannaaw gi ña nekkoon ca dëkk ba ba booba, ak ña jébbaloon seen bopp buuru Babilon ak la desoon ca waa réew ma, Nebusaradan njiital dagi buur, boole leen yóbbu ngàllo.  
<sup>12</sup> Teewul ñenn ca baadooloy réew ma, njiital dag ya bàyyi leen fa, ñuy liggéey tóokəri reseñ yaak tool ya.

<sup>13</sup> Ci biir loolu kenuy xàñjar ya woon ca kër Aji Sax ji ak rootukaay yaak mbalkam xàñjar ma, waa Babilon toj lépp, boole xàñjar ja, yóbbu Babilon.  
<sup>14</sup> Ñu yóbbaaale mboolem ndabi xàñjar yi ñuy liggéeye ci kër Aji Sax ji; ndab yiy def dóom, ak ñiitukaay yi, ak ñiimi feyukaayi làmp yi, ak ndab yiy def deretu sarax yi, ak mboolem jomtukaayi xàñjar yu ñuy sarxalee.  
<sup>15</sup> Njiital dag ya yóbbaaale and

yaak ndab yiy def deret. Lu ciy wurus, mu ber, lu ciy xaaalis, mu ber.  
<sup>16</sup> Ñaari kenu yooyu ak mbalka maak rootukaay ya, lépp di xàñjar bu Suleymaan defaraloon kër Aji Sax ji, maneesula takk diisaay ba.  
<sup>17</sup> Taxawaayu kenu gu ci nekk fukki xasab\* laak juróom ñett. Ab ponkub xàñjar a ci tege, bu taxawaay ba di ñetti xasab. Ab caax wodd ponk bi, ànd ak doomi gërënaati xàñjar. Ñaari kenu yépp noonu, ànd ak seeni caax.

### *Jàpp nañu Yudeen ñi njaam*

<sup>18</sup> Ci kaw loolu njiital dag ya jàpp Seraya sarxalkat bu mag ba, ak Cefaña sarxalkat ba ca topp, ak ñetti dagi bunt kër Aji Sax ja.  
<sup>19</sup> Biir dëkk ba nag mu jële fa jenn jawriñ ju jiite ay xarekat, ak juróomi niti dëkk ba ñu sès ci Buur, ak bindkatub njiital xare ba sasoo bind xarekat yi, ak juróom benn fukki Yudeen ñu mu fekk ca biir dëkk ba.  
<sup>20</sup> Ba mu ko defee Nebusaradan, njiital dagi buur, boole leen yóbbu ca buuru Babilon ca Ribla.  
<sup>21</sup> Buuru Babilon nag jam leen, ñu dee, foofa ca Ribla, ca réewum Amat. Noonu la Yuda génne réewam, dem ngàllo.

### *Nabukodonosor tabb na Gedalya ca Yuda*

<sup>22</sup> Mbooloo ma des ca réewum Yuda te Nabukodonosor buuru Babilon bàyyi leen fa nag, Gedalya doomu Ayikam doomu Safan la tabb mu jiite leen.  
<sup>23</sup> Ba mboolem kilifay xare ya déggee ñook seeni nit ne buuru Babilon fal na Gedalya, dañoo ànd dikk ca Gedalya ca Mispa. Kilifa yooyu Ismayil doomu Netaña la woon, ak Yowanan doomu Kareya, ak Seraya doomu Tanumet ma dëkk Netofa, ak Yaasaña doomu waa Maaka ba, ñook seeni nit.  
<sup>24</sup> Gedalya giñal leen ne leen: «Buleen ragala bokk ci surgay waa Babilon. Toogleen ci réew mi te nangul buuru Babilon, muy seen jàmm.»

<sup>25</sup> Gannaaw gi, ca juróom ñaareelu weeru at ma, Ismayil doomu Netaña doomu Elisama, bokk ci askanu buur, ànd ak fukki nit, dikk bóom Gedalya, bóomaale waa Yudak waa Babilon ya

\* 25:17 25.17 xasab mooy guddaayu loxo, diggante catu baaraamu digg ak conc.

nekkoon ak moom ca Mispa. <sup>26</sup> Ci kaw loolu mbooloo mépp fabu, baadoolook boroom barke, ñook kilifay xarekat ya, ñu daldi daw dem Misra ndax ragal waa Babilon.

*Tijji nañu Yowakin buurub Yuda*

<sup>27</sup> Yóbbu nañu Yowakin buurub Yuda ngàllo ba mu am fanweeri at ak juróom ñaar, Ewil Merodag doora falu buur ca Babilon. At mooma, fukkeelu weer waak ñaar, ñaar fukki fan ak juróom ñaar ca weer wa, ca la Ewil Merodag siggil Yowakin buurub Yuda, daldi koy tijji. <sup>28</sup> Ci biir loolu mu rafetook moom, jox ko cér bu sut cér ba mu jox yeneen buur ya mu bokkal curga ca Babilon. <sup>29</sup> Yowakin nag teqlikook yérey kaso ya, ba noppi ñu may ko muy bokk ak Buur ndab giiru dundam. <sup>30</sup> Ci biir loolu ñu dogal ko njélam lu sax dàkk, bàyyikoo ci Buur bés bu jot, giiru dundam.

## Esra

### *Lu jëm ci dogalu Sirius*

<sup>1</sup> At ma jëkk ca nguurug Sirius buuru Pers, Aji Sax ji moo nammoona sottal kàddu ga mu waxe ca gëmmiñug Yeremi, ba tax mu xiir Sirius buuru Pers, mu siiwtaane ab dogal ci mboolem réewam, boole ci bind ko ne:

<sup>2</sup> Sirius buuru Pers dafa wax ne: Mboolem réewi àddina, Yàlla Boroom asamaan\* moo ma leen dénk, te moom moo ma tabb, ngir ma tabaxal ko kër ca Yerusalem ga ca Yuda. <sup>3</sup> Képp ku bokk ci mboolem ñoñam, yal na Yàllaam ànd ak moom, mu dem ba Yerusalem ga ca Yuda, tabax fa kër Aji Sax ji, Yàllay Israyil, Yàlla ja ca Yerusalem.

<sup>4</sup> Mboolem bànni Israyil, ak fu ci nit mana féete, na ko waa foofa indil ndimbal ci wàllu xalis ak wurus, alal aku jur ak saraxi yéene yu jëm ca kër Yàlla ga ca Yerusalem.

<sup>5</sup> Ba mu ko defee ña jiite waa kër Yuda ak Beñamin ak sarxalkat yaak Leween ña, képp ku ci Yàlla xiir rekk, mu daldi dem tabaxi kër Aji Sax ja ca Yerusalem.

<sup>6</sup> Mboolem seeni dëkkandoo daldi def ci seen loxo jumtukaayi xalis ak wurus, alal akug jur ak gänjar, te bokkul ak mboolem seen saraxi yéene. <sup>7</sup> Ci biir loolu Buur Sirius génne ndabi kër Aji Sax, ja Nabukodonosor jële woon Yerusalem te yeboon ko ca kër tuuram ya. <sup>8</sup> Sirius buuru Pers nag sant Mittredat farbay alalam, mu génne ko, daldi koy waññal Sesbasar, boroom Yuda.

<sup>9</sup> Lenn ci lim bi tédde nii: fanweeri ndabi wurus (30), ak junniy ndabi xalis (1 000), ak ñaar fukki paaka ak juróom ñeent (29), <sup>10</sup> ak fanweeri këlli wurus yu ndaw (30) yu ànd ak ñeenti téeméeri këll ak fukk yu ndaw yu xalis (410) ak junniy jumtukaay yeneen (1 000). <sup>11</sup> Mboolem ndabi wurus yeek yu xalis yi juróomi

junni la ak ñeenti téeméer (5 400). Sesbasar jële lépp Babilon, yóbbu Yerusalem, ba ngàllo gay ñibbi.

## 2

### *Limeefu ngàllo ga ñibbsi nii la*

<sup>1</sup> Nii nag ñoo di niti diiwaanu Yuda, ña jóge njaam ca ngàllo ga leen Nabukodonosor buuru Babilon yóbbu woon, te ñu jóge ca ñibbsi Yerusalem ak Yuda, ku nekk ak fa mu dëkk. <sup>2</sup> Ña nga ñibbi ca njiital Sorobabel ak Yosuwe\* ak Neyemi ak Seraya ak Relaya ak Mardose ak Bilsan ak Mispar ak Bigway ak Reyum ak Baana.

Limeefu góori bànni Israyil nii la tédde:

<sup>3</sup> Askanu Paros, ñaari junni ak téeméer ak juróom ñaar fukk ak ñaar lañu (2 172). <sup>4</sup> Askanu Sefatiya, ñetti téeméer ak juróom ñaar fukk ak ñaar lañu (372).

<sup>5</sup> Askanu Ara, juróom ñaar téeméer ak juróom ñaar fukk ak juróom lañu (775).

<sup>6</sup> Askanu Payat Mowab, soqikoo ci Yeswa ak Yowab, di ñaari junni ak juróom ñetti téeméer ak fukk ak ñaar (2 812).

<sup>7</sup> Askanu Elam, junni ak ñaar téeméer ak juróom fukk ak ñeent lañu (1 254).

<sup>8</sup> Askanu Sàttu, juróom ñeenti téeméer ak ñeent fukk ak juróom lañu (945).

<sup>9</sup> Askanu Sakay, juróom ñaar téeméer ak juróom benn fukk lañu (760).

<sup>10</sup> Askanu Baani, juróom benni téeméer ak ñeent fukk ak ñaar lañu (642).

<sup>11</sup> Askanu Bebay, juróom benni téeméer ak ñaar fukk ak ñett lañu (623).

<sup>12</sup> Askanu Asgàdd, junni ak ñaar téeméer ak ñaar fukk ak ñaar lañu (1 222).

<sup>13</sup> Askanu Adonikam, juróom benni téeméer ak juróom benn fukk ak juróom benn lañu (666).

<sup>14</sup> Askanu Bigway, ñaari junni ak juróom fukk ak juróom benn lañu (2 056).

<sup>15</sup> Askanu Adin, ñeenti téeméer ak juróom fukk ak ñeent lañu (454).

<sup>16</sup> Askanu Ater, soqikoo ci Esekiya, di juróom ñeent fukk ak juróom ñett (98).

\* **1:2** 1.2 Yàlla Boroom asamaan turu darajaal la bu ñuy waxe ci gàttal ne mooy Yàllay asamaan ak suuf, muy wund ne du Israyil rekk lay seen Yàlla, waaye mooy Yàllay àddina sépp. \* **2:2** 2.2 **Yosuwe:** Yeswa ci làkku ebré. Yosuwe lanu bind ci tekki bii, muy doomu Yoccadag te doon sarxalkat bu mag bi mujj lu jiitu ngàllo ga ca Babilon. Yosuwe mii lu gëna bare dees na ko tudaaaleek Sorobabel. Feneen fu ñu ne Yeswa ci téere bi, keneen a tax ñuy wax.

<sup>17</sup> Askanu Besay, ñetti téeméer ak ñaar fukk ak ñett lañu (323). <sup>18</sup> Askanu Yora, téeméer ak fukk ak ñaar lañu (112). <sup>19</sup> Askanu Asum, ñaar téeméer ak ñaar fukk ak ñett lañu (223). <sup>20</sup> Askanu Gibar, juróom ñeent fukk ak juróom lañu (95).

<sup>21</sup> Waa Betleyem, téeméer ak ñaar fukk ak ñett lañu (123). <sup>22</sup> Waa Netofa, juróom fukk ak juróom benn lañu (56). <sup>23</sup> Waa Anatot, téeméer ak ñaar fukk ak juróom ñett lañu (128). <sup>24</sup> Waa Asmawet, ñeent fukk ak ñaar lañu (42). <sup>25</sup> Waa Kiryaat Yarim ak Kefira ak Berot, juróom ñaar téeméer ak ñeent fukk ak ñett lañu (743). <sup>26</sup> Waa Raama ak Geba, juróom benni téeméer ak ñaar fukk ak benn lañu (621). <sup>27</sup> Waa Migmas, téeméer ak ñaar fukk ak ñaar lañu (122). <sup>28</sup> Waa Betel ak Ayi, ñaar téeméer ak ñaar fukk ak ñett lañu (223). <sup>29</sup> Waa Nebo, juróom fukk ak ñaar lañu (52). <sup>30</sup> Waa Magbis téeméer ak juróom fukk ak juróom benn lañu (156). <sup>31</sup> Waa Elam gu ndaw, junni ak ñaar téeméer ak juróom fukk ak ñeent lañu (1 254). <sup>32</sup> Waa Arim, ñetti téeméer ak ñaar fukk lañu (320). <sup>33</sup> Waa Lodd ak Adidd ak Ono, juróom ñaar téeméer ak ñaar fukk ak juróom lañu (725). <sup>34</sup> Waa Yeriko, ñetti téeméer ak ñeent fukk ak juróom lañu (345). <sup>35</sup> Waa Sena, ñetti junni ak juróom benn téeméer ak fanweer lañu (3 630).

<sup>36</sup> Sarxalkat yi ñii la:

Askanu Yedaya, soqikoo ci waa kër Yosuwe, di juróom ñeenti téeméer ak juróom ñaar fukk ak ñett (973). <sup>37</sup> Askanu Imer, junni ak juróom fukk ak ñaar lañu (1 052). <sup>38</sup> Askanu Pasur, junni ak ñaar téeméer ak ñeent fukk ak juróom ñaar lañu (1 247). <sup>39</sup> Askanu Arim, junni ak fukk ak juróom ñaar lañu (1 017).

<sup>40</sup> Leween ñi ñii la: Askanu Yeswa ak Kadmiyel. Mooy ñi bànqaasoo ci Odawya, tollu ci juróom ñaar fukk ak ñeent (74).

<sup>41</sup> Jàngkat yi ñoo di: Askanu Asaf, di téeméer ak ñaar fukk ak juróom ñett (128).

<sup>42</sup> Askanu fara bunt yi ñoo di: Askanu Salum, ak askanu Ater, ak askanu Talmon, ak askanu Akub, ak askanu Atita,

ak askanu Sobay, ñépp di téeméer ak fanweer ak juróom ñeent (139).

<sup>43</sup> Liggéeykati kër Yàlla gi ñoo di: Askanu Ciya, ak askanu Asufa, ak askanu Tabawot, <sup>44</sup> ak askanu Keros, ak askanu Siya, ak askanu Padon, <sup>45</sup> ak askanu Lebana, ak askanu Agaba, ak askanu Akub, <sup>46</sup> ak askanu Agab, ak askanu Samlay, ak askanu Xanan, <sup>47</sup> ak askanu Gidel, ak askanu Gayar, ak askanu Raaya, <sup>48</sup> ak askanu Reccin, ak askanu Nekoda, ak askanu Gasam, <sup>49</sup> ak askanu Usa, ak askanu Paseya, ak askanu Besay, <sup>50</sup> ak askanu Asna, ak askanu Meyunim, ak askanu Nefusim, <sup>51</sup> ak askanu Bagbug, ak askanu Akufa, ak askanu Arur, <sup>52</sup> ak askanu Baslut, ak askanu Meyida, ak askanu Arsa, <sup>53</sup> ak askanu Barkos, ak askanu Sisera, ak askanu Tema, <sup>54</sup> ak askanu Necciya, ak askanu Atifa.

<sup>55</sup> Askanu jaami Suleymaan ñii la: Askanu Sotay, ak askanu Asoferet, ak askanu Peruda, <sup>56</sup> ak askanu Yaala, ak askanu Darkon, ak askanu Gidel, <sup>57</sup> ak askanu Sefatiya, ak askanu Atil, ak askanu Pokeret Asbayim, ak askanu Aami.

<sup>58</sup> Mboolem liggéeykati kër Yàlla gi ak askanu jaami Suleymaan yi, ñetti téeméer ak juróom ñeent fukk ak ñaar (392).

<sup>59</sup> Ña bàyyikoo Tel Mela ak Tel Arsa ak Kerub Adon ak Imer te manuñoo firndeel ne seen waa kër maam ak seen askan ci Israyil lañu bokk, ñii la: <sup>60</sup> Askanu Delaya, ak askanu Tobya, ak askanu Nekoda, di juróom benn téeméer ak juróom fukk ak ñaar (652).

<sup>61</sup> Am na it ñu loolu daloon ci askanu sarxalkat yi, muy askanu Abaya, ak askanu Akocc, ak askanu Barsilay, ma doon denc doomu Barsilay waa Galàdd ba, ba tax ñu santale ko seen sant.

<sup>62</sup> Ñooñu, seet nañu seen limeefu kër maam, waaye gisuñu ko. Ñu daldi leen doyadal, génne leen ci carxal gi. <sup>63</sup> Boroom dëkk ba nag aaye leen ñu lekk ci ñam yu sell yaa sell, ba keroog ab sarxalkat di am lu leer ci ñoom ci jumtukaayi tegtal yi ñuy wax Urim ak Tumim.

<sup>64</sup> Limu mbooloo ma mépp ba mu daj, ñeent fukki junneek ñaar ak ñetti téeméer ak juróom benn fukk lañu (42 360), <sup>65</sup> te limaaleesul seen jaam yu góor ak yu jigéen, yi tollu ci juróom ñaari junni ak ñetti téeméer ak fanweer ak juróom ñaar (7 337). Amoon nañu itam ay jàngkat yu góor ak yu jigéen, yu tollu ci ñaar téeméer (200). <sup>66</sup> Amoon nañu juróom ñaar téeméeri fas ak fanweer ak juróom benn (736), ak ñaar téeméeri berkelle ak ñeent fukk ak juróom (245), <sup>67</sup> ak ñeenti téeméeri giléem ak fanweer ak juróom (435), ak juróom benni junniy mbaam ak juróom ñaar téeméer ak ñaar fukk (6 720).

<sup>68</sup> Ba ñu àggee ca kër Aji Sax ja ca Yerusalem, am na ñenn ca kilifa ya jiite seen kër baay, ñu joxe ay saraxi yéene ngir tabaxaat kër Yàlla ga ca gentam. <sup>69</sup> Joxe nañu ku nekk la mu man, jème ca alal ja ñuy liggéeye, muy juróomi barigoy wurus ak fanweeri barigoy xaalis, ak téeméeri mbubbi sarxalkat.

<sup>70</sup> Ba loolu amee bànni Israyil gépp sancaat ca seen dëkki cosaan, sarxalkat yaak Leween ñaak ñenn ca baadoolo yaak jàngkat yaak fara bunt yaak liggéeykati kër Yàlla ga.

### 3

#### *Njaamug Aji Sax ji feddliku na*

<sup>1</sup> Ba juróom ñaareelu weer wa agsee, fekk na bànni Israyil sancaat ca seeni dëkk, mbooloo ma daje doon benn bopp ca Yerusalem. <sup>2</sup> Ba mu ko defee Yosuwe doomu Yoccadag, mook moroomi sarxalkatam, ak Sorobabel doomu Selcel aki bokkam daldi tabax sarxalukaayu Yàllay Israyil, ngir sarxal ca saraxu dóomal ba, mu dëppook li ñu bind ci téereb yoonu Musaa, góorug Yàlla ga. <sup>3</sup> Ci kaw loolu ñu yékkatiwaat sarxalukaay ba, ca kenoom gu jëkk ga, doonte ragaloon nañu waasoy réew ma. Ba ñu noppee, defal ca Aji Sax ji ay saraxi dóomal subaak ngoon. <sup>4</sup> Ñu teg ca amal màggalu Mbaar ya, mu dëppook la ñu bind, boole kook saraxu dóomal yi war bés bu nekk. <sup>5</sup> Gannaaw loolu ñu joxe saraxu dóomal bi sax fàww,

ak saraxi Terutel weer ya, ak sarax yu sell yi war ci mboolem màggali Aji Sax ji, ak mboolem saraxi yéene yi ñuy indil Aji Sax ji. <sup>6</sup> Benn fan ca juróom ñaareelu weer wa lañu tàmbalee defal Aji Sax ji ay saraxi dóomal, te fekkul ñu yékkatiwaat kenug kër Aji Sax ji. <sup>7</sup> Ci biir loolu ñu jox xaalis yettkati doj yeek xaddkat yi, jox waa Sidon ak waa Tir ab dund, aki naan akug diw, ngir ñu jéleji Libañ ay banti seedar, jaarale ko ci géej gi ba Yafa, ci ndigalal Sirius buuru Pers.

<sup>8</sup> Ba ñu dikkee ca kër Yàlla ga ca Yerusalem, ba ca déwén sa, ca ñaareelu weeru at ma, Sorobabel doomu Selcel, ak Yosuwe doomu Yoccadag ànd nañook ña des ca seeni bokk, sarxalkat yaak Leween ñaak mboolem ña jóge ca njaam ga délsi Yerusalem. Ñu daldi tàmbali liggéey bi. Ci biir loolu ñu tabb ay Leween ñu am ñaar fukki at, jëm kaw, ñuy saytu liggéeyu kër Aji Sax ja. <sup>9</sup> Yeswa nag jàpp ca, mook doomam yu góor aki bokkam, ak Kadmiyel ak doomam yu góor, ñuy askanu Odawya. Ñu mànkoo di jiite liggéeykat yiy tabaxaat kër Yàlla ga. Waa askanu Enadàdd jàpple nañu leen ci, ñook seen doom yu góor ak seen bokki Leween ña.

<sup>10</sup> Ba tabaxkat ya lalee kenug kër Aji Sax ji, ñu tabb ay sarxalkat. Ñu solu ba jekk, yor ay liit, feggook Leween ña askanoo ca Asaf, ànd ak tégum weñ, di màggal Aji Sax ji, muy la Daawuda buurub Israyil digle woon. <sup>11</sup> Ña ngay jàng, di màggal ak a sant Aji Sax ji, naan:

«Kee baax.

Kee gore ba fàww ci Israyil.»

Ci kaw loolu mbooloo ma mépp xaacu, di ko màggale Aji Sax ji ngir kenug kër Aji Sax ja lale. <sup>12</sup> Teewul ñu bare ca ña féete mag, diy sarxalkat aki Leween aki boroom kër, gisoon nañu kër gu jëkk ga. Ba ñu gisee kenug kër gu bees ga, dañoo yékkati seen kàddu ca kaw di jooy, ñu bare it di xaacu ndax mbégte. <sup>13</sup> Kenn manuloona ràññee coowal mbégte laak jooy ya ndax riiru mbooloo mu réy, di àkki fu sore.

## 4

*Liggéey baa ngi sooxe*

<sup>1</sup> Ba nooni Yudak Beñamin déggee ne waa ngallo, ga ñibbsee ngay tabaxal Aji Sax ji Yállay Israyil kër, <sup>2</sup> ñëw nañu ca Sorobabel ak ca kilifay kër ya, wax leen ne leen: «Danuy ànd ak yeen tabax ndax danuy topp seen Yàlla, ni yeen, te ca jamonoy Asaradon buurub Asiri, mi nu fi indi ba tey, Aji Sax ji lanuy defal sarax.» <sup>3</sup> Sorobabel nag ànd ak Yosuwe ak yeneen kilifay kër Israyil ya ne leen: «Dungeen bokk ak nun tabax sunu kër Yàlla gi. Nun donj ay tabaxal Aji Sax ji Yállay Israyil, te loolu la Sirus buuru Pers santaane.» <sup>4</sup> Ci biir loolu waa réew ma di yoqiloo waa Yuda, di leen xoqtal, ba ñu ragala tabax. <sup>5</sup> Diirub nguurug Sirus buuru Pers, ba ca nguurug Daryus, waa réew ma dañu daan fey ay xelalkati buur ngir ñuy nasaxal pexey bànni Israyil.

<sup>6</sup> Ca ndoortel nguurug Aserus nag, ñu bind Aserus bataaxal buy duural waa Yudak Yerusalem.

<sup>7</sup> Ba tey ci janti Artaserses ku ñuy wax Bislam ak ku ñuy wax Mittredat ak Tabel aki nàttongoom, bind nañu Artaserses buuru Pers bataaxal bu ñu doore nii ci làkku arameen bala ñu koo tekki:

<sup>8</sup> Reyum boroom dëkk ba, ak Simsay bindkatam, ñoo bind Buur Artaserses bataaxal bii jëm ci Yerusalem, di ko wax ne ko:

<sup>9</sup> Bataaxal bii mu ngi bawoo ci Reyum, boroom dëkk bi, ak Simsay bindkatam, ak seen nàttongoy àttekat yeek kàngam yeek saytukat yeek boroom téere yi\*, ak waa Urug ak waa Babilon ak waa Sus, Elameen ña, <sup>10</sup> bawoo it ci yeneen mbooloo ya Asnapar† mu mag mu tedd ma toxaloon, sancal leen ca dëkki Samari ak li des ca Wàllaa Dex, ak ñoom seen.

<sup>11</sup> Li ñu bind ci bataaxal ba jëm ca Buur Artaserses mooy lii:

Nun sa surga yii ci Wàllaa Dex ak li ci topp, <sup>12</sup> nu ngi lay xamal yaw Buur, ne Yawut ñi bàyyikoo fi yaw, ñëw fii

ci nun, agsi nañu Yerusalem, dëkku fippukat bu bon bi, te ñu ngi koy tabaxaat. Ña ngay yékkati tata ya, gannaaw ba ñu lalaatee kenu ya. <sup>13</sup> Léegi nag Buur, xamal ne bu ñu tabaxaatee dëkk boobu, ba yékkatiwaat tata ya, galag mbaa njoti bopp mbaa juuti dootuñu ko fey, te kon koomu nguur gi dina ko yég. <sup>14</sup> Gannaaw nag sunu njël Buur la, jekkul ci nun nuy seetaan mbir mii. Looloo waral, Buur, nu yónnee, di la ko xamal, <sup>15</sup> ngir ñu seet ci sa téereb xew-xewi maam. Kon dinga ko ci gis ba xam ne dëkk boobu dëkku fippukat la, te sonal na ay buur aki boroom dëkk, te naka jekk dañu daan fippu ci seen biir. Looloo tasoon dëkk boobu. <sup>16</sup> Buur, nu ngi lay xamal ne bu ñu tabaxaatee dëkk boobu, ba yékkatiwaat tata ya, wetu Wàllaa Dex gii dootu doon sag moomeel.

<sup>17</sup> Ci kaw loolu Buur yónnee tont la Reyum boroom dëkk ba, mook Simsay bindkat ba, ak nàttongoom ya ca des te dëkk Samari ak la des ca Wàllaa Dex. Mu nuy leen, ne leen:

<sup>18</sup> Bataaxal bi ngeen ma yónnee, tekkees na ko, jàngal ma ko bu leer.

<sup>19</sup> Ndigal tukkee na ci man, ngir ñu seet te gis nañu ne dëkk boobu kay yàgg nañoo fexeel buur yi, loolu indi fa ay fippooki pexey bañ. <sup>20</sup> Yerusalem nag amoon na buur yu am doole yu moom mboolem wet ga ca Wàllaa Dex, ñu di leen fey galag ak njoti bopp ak juuti. <sup>21</sup> Nangeen daldi joxe ndigal lu bàyyiloo nit ñooñu liggéey bi, ñu baña tabax dëkk boobu, ba keroog ma di ci joxe ndigal. <sup>22</sup> Fexeleen ba baña néewal mbir moomu bala muy law, ba doon loraange ci nguur gi.

<sup>23</sup> Naka lañu jàng bataaxalu Buur Artaserses fa kanam Reyum boroom dëkk ba, ak Simsay bindkat ba aki nàttongoom, ñu ne coww ba Yerusalem, ca Yawut ña, jaay leen doole, gétèn leen, ñu bàyyi liggéey ba. <sup>24</sup> Ci kaw loolu

\* **4:9** 4.9 Ñeenti xeeti ndomboy tànk yi ñu lim fii am na tekki yu fi wuutal ñeenti turi dëkk. Su doon noonu dañu naan: ak seen nàttongo ya ca Din ak Arfasatag ak Tarpel ak Afaras. † **4:10** 4.10 Asnapar: jombul mooy Asurbanipal, mi wuutu Àccar Adon ci jalu Asiri.



liggéeyu kër Yàlla ga ca Yerusalem taxaw. Taxaw na ba ca ñaareelu atu nguurug Daryus buuru Pers.

## 5

### *Liggéey bi dooraat na*

<sup>1</sup> Gannaaw loolu Yonent Yàlla Ase ak Yonent Yàlla Sàkkaryaa sètub Ido, wax nañu ci turu Yàllay Israyil jiy seen Yàlla, ñeel Yawuti Yuda ak Yerusalem. <sup>2</sup> Booba la Sorobabel doomu Selcel, ak Yosuwe doomu Yoccadag tàmbalee tabaxaat kër Yàlla ga ca Yerusalem. Yonenti Yàlla ya nag ànd ak ñoom, di leen jàpple.

<sup>3</sup> Booba la Tatnay, boroom Wàllaa Dex, ànd ak Setar Bosnay ak seeni nàttongo, dikk ne leen: «Ana ku leen may sañ-sañu tabaxaat kër gii, bay yékkati miir bi?»

<sup>4</sup> Ñu dellu ne leen: «Ana ñan sax ñooy tabax taax mii?»

<sup>5</sup> Fekk na seen Yàllaa ngi ne jàkk ci magi Yawut ñi, ba kenn bàyyiwul liggéey ba, ba keroog ñuy yónnee xibaar ba Buur Daryus, ba jot ci bataaxalu tontam ca mbir ma.

<sup>6</sup> Bataaxal ba ñu bind Buur Daryus, te Tatnay boroom Wàllaa Dex yónnee ko ko, mook Setar Bosnay, ak jawriñi Tatnay ca Wàllaa Dex, lii moo ca nekk. <sup>7</sup> Kàddu ga nii la tédde:

Buur Daryus, nu ngi lay bind, di la dikke sunu nuyoob jàmm ju sax. <sup>8</sup> Buur, nu ngi lay xamal ne dem nanu ca diiwaanu Yuda, ca kër Yàlla ju màgg ja. Ña nga koy tabaxe doj yu mag, di teg ay dénk ca miir ya. Liggéey baa ngay dox bu baax, di jëm kanam.

<sup>9</sup> Ci biir loolu laaj nanu seen mag ñooñu, ne leen: «Ana kan moo leen may sañ-sañu tabaxaat kër Yàlla gii, bay yékkati miiram bii?» <sup>10</sup> Nu laaj leen itam ñan ñoo koy tabax, ndax nu mana bind seen turi njiit, ba xamal la ñan la.

<sup>11</sup> Li ñu nu tontu mooy lii:

«Nun ay jaami Yàlla Boroom asamaan ak suuf lanu. Danuy tabaxaat kër Yàlla gi ñu tabaxoon lu jiitu ay at yu bare. Buurub Israyil bu mag moo ko

tabaxoon ba sottal ko. <sup>12</sup> Sunuy maam nag ñoo merloo Yàllay asamaan, ba tax mu teg leen ci loxoy Nabukodonosor buuru Babilon, ma askanoo ci waa Kalde. Mu toj kër gii, yóbbu xeet wi ngàllo ca Babilon. <sup>13</sup> Terewul ca at ma jëkk ca nguurug Sirius buuru Babilon\*, Buur Sirius joxe ndigal ngir ñu tabaxaat kër Yàlla gii. <sup>14</sup> Te sax ndabi wurus ak xalis yu kër Yàlla ya Nabukodonosor jële woon ca Yerusalem, te yóbbu ko ca kër tuuram ga ca Babilon, Buur Sirius jële na ko ca kër tuuram ga ca Babilon, teg ko ca loxol ku mu fal boroom dëkk, ñu di ko wax Sesbasar. <sup>15</sup> Mu ne ko: «Ndab yii, jël ko yóbbu ca kër Yàlla ga ca Yerusalem, te nañu tabaxaat kër Yàlla ga fa mu nekkoon.» <sup>16</sup> Sesbasar moomu nag ñew lal kenug kër Yàlla gi ci Yerusalem. Booba ba léegi, ñu ngi koy tabax waaye noppeegul.»

<sup>17</sup> Léegi nag Buur, su la soobee, nañu seet ca denci buur, foofu ci Babilon, ngir wóorlu ndax Buur Sirius joxe woon na ndigal ne ñu tabaxaat kër Yàlla gi ci Yerusalem. Gannaaw loolu loo dogal ci mbir mi rekk, Buur, yónneel, jottli nu ko.

## 6

### *Buur Daryus joxe na ndigal*

<sup>1</sup> Ba loolu amee Buur Daryus joxe ndigal, ñu seet ca kërug dencukaayi téere ya, fa ñu denc alali Babilon. <sup>2</sup> Ñu gis ca Egbatan, péeyu diiwaanu Medd, taxañ bu ñu bind seede bii:

<sup>3</sup> At ma jëkk ca nguurug Buur Sirius, Buur Sirius joxe na ndigal ci mbirum kër Yàlla ga ca Yerusalem. Mu ne:

Nañu tabaxaat kër Yàlla gi, muy bérab bu ñuy sarxee ay sarax. Nañu dëgéral kenu ya. Na tax-awaayam di juróom benn fukki xasab\*, yaatuwaayam di juróom benn fukki xasab, <sup>4</sup> te ñetti sésalantey doj yu mag yu tegloo yu ne, ab sésalanteb dénk tege ca kawam. Nañu génnee njég ga ca alali Buur, joxe ko. <sup>5</sup> Bu loolu weesee,

\* **5:13** 5.13 Sirius buuru Babilon bi ñuy wax fii mooy Buuru Pers rekk, ndax fekk na Pers moom nguurug Babilon.

\* **6:3** 6.3 xasab mooy guddaayu loxo bu digg-dóomu diggante catu baaraamu digg ak conc.

ndabi wurus yaak yu xalis ya woon ca kër Yàlla ga, te Nabukodonosor jële woon ko ca kër Yàlla ga ca Yerusalem, indi ko Babilon, nañu ko delloo fa mu nekkoon ca kër Yàlla ga ca Yerusalem te fat ko fa.

<sup>6</sup> Kon nag ñooñu di Tatnay boroom Wàllaa Dex ak Setar Bosnay ak seen nàttongo yay jawriñ ca Wàllaa Dex, nañu sore foofa. <sup>7</sup> Buleen tere liggéeyu kër Yàlla gee dox. Na boroom dëkki Yawut ñi ànd ak magi Yawut ñi, ñu tabaxaat kër Yàlla googu fa mu nekkoon.

<sup>8</sup> Rax ci dolli ndigal a ngii tukkee ci man, jëm ci li ngeen wara defal magi Yawut yooyu ci biir liggéeyu kër Yàlla googu: Njég ga mu leen dikke, nañu leen ko fey ba mu mat, jële ko ca alali buur, ca galagi diiwaan ba ca Wàllaa Dex. Nañu ko fey ñooñu, ba liggéey ba baña taxaw. <sup>9</sup> Mboolem lu ci war, muy yëkk yu ndaw mbaa ay kuuy mbaa ay xar yu ndaw yu ñuy defal Yàlla Boroom asamaan saraxu dóomal, muy bele it mbaa xorom mbaa biiñ mbaa diw, lu ci sarxalkati Yerusalem laaj, nañu leen ko jox bés ak bés, te bañ koo sàggane.

<sup>10</sup> Su ko defee ñu mana sarxalal Yàlla Boroom asamaan lu ko neex tey ñaanal Buur aki doomam gudd fan.

<sup>11</sup> Gannaaw loolu ndigal a ngii tukkee ci man ñeel képp ku tebbi bii dogal: Dees na roccee ca néegam ab xàñq, yékkati ko, wékk ko ca, ba noppi def kërám ab sèn ndax jëfam jooju. <sup>12</sup> Yàlla ji dëel turam boobu bérab nag, yal na daaneel bépp buur mbaa xeet wuy fexee tebbi bii dogal, ba nara yàq kër Yàlla gii ci Yerusalem.

Man Daryus maa joxe ndigal lii. Nañu ci farlu.

<sup>13</sup> Ba mu ko defee Tatnay boroom Wàllaa Dex, ak Setar Bosnay ak seeni nàttongo daldi xar seen tànkú tubéy ci jëfe ndigal la Buur Daryus joxe. <sup>14</sup> Magi Yawut ña nag tabax ba mu baax, mu dëppook kàdduy Yonent Yàlla Ase ak Sàkkaryaa, sëtub Ido. Ñu tabax ba sottal, muy la Aji Sax ji Yàllay Israyil san-

taane woon, te dëppook ndigalul Sirus ak Daryus ak Artaserses buuru Pers. <sup>15</sup> Kër gaa nga sotti ci ñetti fanu weeru Adar, juróom benneelu atu nguug Daryus.

<sup>16</sup> Ci kaw loolu mboolum Israyil ànd ak sarxalkat yaak Leween ñaak mboolem ña ñibbsee ca ngàllo ga, ñu daloo tabax ba ci biir mbégte. <sup>17</sup> Sarxe nañu ca daloog kër Yàlla googu téeméeri yëkk, ak ñaar téeméeri kuuy ak ñeenti téeméeri xar yu ndaw, ak fukki sikket ak ñaar, dëppook limu giiri Israyil, def ko saraxu póotum bàkkaar, ñeel Israyil gépp. <sup>18</sup> Ci biir loolu ñu tabb sarxalkat ya, ca wàll ya ñu bokk ak Leween ña ca seeni kurél, ñu sasoo liggéeyu Yàlla ji ci Yerusalem, muy la ñu bind ci téereb Musaa.

<sup>19</sup> Fukki fan ak ñeent ca weer wu jëkk wa nag, ña ñibbsee woon ngàllo ga daldi màggal bés sub Mucc ba. <sup>20</sup> Fekk na sarxalkat yaak Leween ña laabal seen bopp, ba ñoom ñépp bokk laab. Ba loolu amee ñu rendi xarum bés sub Mucc ba, ñeel mboolem ña ñibbsee ngàllo, ak ñoom sarxalkat yi ci seen bopp, ñook seeni bokk. <sup>21</sup> Ba mu ko defee, bànni Israyil ga ñibbsee ngàllo ga daldi bokk reerub bés sub Mucc ba, ñook mboolem ña dogoo woon ak sobey yéefar yi ci réew mi, ngir sàkku Aji Sax ji, Yàllay Israyil. <sup>22</sup> Wormaal nañu it màggalu Mburu mu amul lawiir, diiru juróom ñaari fan, ci biir mbégte, ndax fekk na Aji Sax ji bégal leen lool ca na mu xiire buurub Asiri†, mu yéwéne leen ba dimbali leen ci tabaxu kër Yàlla ga, Yàllay Israyil.

## 7

### *Buur Artaserses yéwéne na Esra*

<sup>1</sup> Ba loolu weese, ca jamonoy nguug Artaserses buuru Pers, am na góor gu ñuy wax Esra, Seraya di baayam. Seraya, Asaryaa; Asaryaa, Ilkiya; Ilkiya, <sup>2</sup> Salum; Salum, Cadog; Cadog, Ayitub; <sup>3</sup> Ayitub, Amarya; Amarya, Asaryaa; Asaryaa, Merayot; <sup>4</sup> Merayot, Seraya; Seraya, Usi; Usi, Bukki; <sup>5</sup> Bukki, Abiswa; Abiswa, Fineyas; Fineyas, Elasar; Elasar, Aaróona, sarxalkat bu mag ba. <sup>6</sup> Esra moomu jóge

† 6:22 6.22 Asiri gi ñuy wax fii, booba mu ngi ci loxol buuru Pers.

Babilon, nekkoon jànglekat bu xareñ, bu géēju ci yoonu Musaa, wi Aji Sax ji Yàllay Israyil joxoon ñoñam. Aji Sax ji Yàllaam nag toppe ko yiwam, ba Buur defal ko mboolem lu mu ñaan.

<sup>7</sup> Ca juróom ñaareelu atu nguurug Buur Artaserses, mu am ñenn ci bànni Israyil ñu ànd, di ay sarxalkat aki Leween aki jàngkat aki fara bunt, ak liggéeykati kër Yàlla ga. Ñu daldi dem Yerusalem. <sup>8</sup> Esra nag bokkoon ca. Mu agsi Yerusalem ca juróomeelu weeru at mooma, di juróom ñaareelu atu buur ba. <sup>9</sup> Ca benn fanu weer wa jëkk la dooroon yoon woowu mu bàyyikoo Babilon. Mu agsi Yerusalem ca benn fanu juróomeelu weer wa, ci mbaaxu Yàllaam ji ko toppe yiwam. <sup>10</sup> Esra nag doonoon ku pastéefu ci jàng yoonu Aji Sax ji, di ko sàmm tey jàngle ci Israyil ay dogalam ak ndigali yoonam.

#### *Buur Artaserses bind na Esra*

<sup>11</sup> Lii mooy li ñu bind ci bataaxal ba Buur Artaserses jox Esra, sarxalkat ba, jànglekat ba géēju ci mbiri santaaney Aji Sax ji ak dogalam yi ñeel Israyil.

<sup>12</sup> Bataaxal bii mu ngi bàyyikoo ci Artaserses, buuru buur yi, jëm ca Esra, sarxalkat biy jàngle yoonu Yàlla Boroom asamaan. Maa ngi lay nuy.

Gannaaw loolu nag, <sup>13</sup> ndigal tukkee na ci man ne mboolem kuy bànni Israyil ci samam réew, ba ci sarxalkat yeek Leween ñi, ku ci bégga ànd ak yaw Yerusalem, man naa dem. <sup>14</sup> Man Buur, maa la yebal, maak sama juróom ñaari wóllère; noo la yebal Yerusalem ak Yuda, ngir nga gëstujil ma nu ñu fay toppe sa yoonu Yàlla, wi nga yor téereem ci say loxo. <sup>15</sup> Te nga yóbbaaale xaalis beek wurus, wi ma joxe ci xol bu tàlli, jagleel ko Yàllay Israyil ji ci Yerusalem, man Buur, maak samay wóllère, <sup>16</sup> boole ci mboolem xaalis mbaa wurus woo mana jële ci diiwaanu Babilon bépp, ak itam saraxi yéene yi baadoolo yeek sarxalkat yi joxe ci xol bu tàlli, lépp ñeel seen kër Yàlla ga ca Yerusalem. <sup>17</sup> Ci biir loolu, xaalis boobu nanga ko daldi jënde ay yëkk aki kuuy ak xar yu ndaw ak saraxi pepp ak saraxi

tuuru yi muy àndal te nga boole ko, jooxe ca seen sarxalukaayu kër Yàlla ga ca Yerusalem. <sup>18</sup> Li des ci xaalis beek wurus wi nag, defleen ko lu ngeen namm, yaak say bokk, na mu dëppook seen coobarey Yàlla. <sup>19</sup> Bu loolu weese ndab yi ñu la jox, ñu di ko jaamoo ca seen kër Yàlla ga, nanga ko boole teg fa kanam Yàllay Yerusalem. <sup>20</sup> Leneen lu des it, loo wara def ci sa kër Yàlla gi, sañ nga koo génnee ci alalu buur.

<sup>21</sup> Man Buur Artaserses, jox naa ndigal mboolem denckati alali buur ya ca Wàllaa Dex, ne leen: Lépp lu Esra, sarxalkat biy jàngle yoonu Yàlla Boroom asamaan, sàkku ci yeen, nangeen ko daldi def; <sup>22</sup> ba ci fanweeri barigoy xaalis, ñetti téeméeri barigoy bele, ñaar fukki barigoy biiñ, ak ñaar fukki barigoy diw, ak lu mu soxla ci xorom. <sup>23</sup> Lépp lu Yàlla Boroom asamaan digle, nañu ko defe noonee ca kër Yàlla Boroom asamaan, ndax meram baña dal ci sama kaw nguur gii ak ci sama kaw askan. <sup>24</sup> Nu ngi leen di xamal itam ne képp kuy sarxalkat mbaa ab Leween, mbaa mu dib jàngkat mbaa fara bunt, mbaa mu di liggéeykatu kër Yàlla gi, mbaa surga buy liggéey ci kër Yàlla googu, du galag bu ñu ko saña teg mbaa njotu bopp mbaa ab juuti.

<sup>25</sup> Yaw Esra nag, seetal ci xel mu rafet mi sa Yàlla digle ci yoonam wi nga yor, nga tabb ay njiit aki xaali, ngir ñuy àtte mboolem ñi xam sa yooni Yàlla ci diiwaani Wàllaa Dex. Te ñi ko xamul, nga xamal leen ko. <sup>26</sup> Képp ku ci sàmmul sa yoonu Yàlla ak yoonu buur, nañu ko daldi teg mbugal mi war ci moom. Dee mooy doon àtteem, mbaa ñu génne ko réew mi, mbaa ñu nangu alalam, mbaa ñu tēj ko.

#### *Esra sant na*

<sup>27</sup> Cant ñeel na Aji Sax ji, sunu Yàllay maam, moom mi def nii ci xolub Buur yéney teral kër Aji Sax ji ci Yerusalem, <sup>28</sup> te dawal ngor sama digganteek Buur aki wóllèreem ak mboolem kàngami buur yu mag yi! Man nag, nii la ma sama Yàlla Aji Sax ji toppe yiwam, ba ma

dëgërlu, boole njiiti Israyil, ñu daje, ànd ak man dem.

## 8

### *Lu jëm ci ñi ànd ak Esra*

<sup>1</sup> Ñi jiite seen làngì kër maam ak ñi ñu bindaaleek ñoom ci limeef yi, te ñu ànd ak man Esra, jóge Babilon ca jamonoy Buur Artaserses, ñii la: <sup>2</sup> Ci askanu Fineyas, Gersom la. Ci askanu Itamar, Dañeel la. Ci askanu Daawuda, Atus, <sup>3</sup> mi askanoo ci Sekaña la. Askanu Paros, Sàkkaryaa bawoo ca, ànd ak téeméeri góor ak juróom fukk (150). <sup>4</sup> Ci askanu Payat Mowab, Elyowenay doomu Seraya la, mook ñaar téeméeri góor (200). <sup>5</sup> Ci askanu Sattu\*, Sekaña doomu Yasyel la, mook ñetti téeméeri góor (300). <sup>6</sup> Ci askanu Adin, Ebedd doomu Yonatan la, mook juróom fukki góor (50). <sup>7</sup> Ci askanu Elam, Esayi doomu Atalyaa la, mook juróom ñaar fukki góor (70). <sup>8</sup> Ci askanu Sefatiya, Sebadiya doomu Mikayel la, mook juróom ñett fukki góor (80). <sup>9</sup> Ci askanu Yowab, Obadiya doomu Yeyel la, mook ñaar téeméeri góor ak fukk ak juróom ñett (218). <sup>10</sup> Ci askanu Baani†, Selomit doomu Yosifya la, mook téeméeri góor ak juróom benn fukk (160). <sup>11</sup> Ci askanu Bebay, Sàkkaryaa doomu Bebay la, mook ñaar fukki góor ak juróom ñett (28). <sup>12</sup> Ci askanu Asgàdd, Yowanan doomu Àkkatan la, mook téeméeri góor ak fukk (110). <sup>13</sup> Askanu Adonikam ñoo mujje, ñu di leen wax Elifelet ak Iyel ak Semaya, ñook juróom benn fukki góor (60). <sup>14</sup> Ci askanu Bigway, Utay la ak Sabudd, ñook juróom ñaar fukki góor (70).

<sup>15</sup> Ci kaw loolu ma boole leen, ñu daje ca wetu dex, ga jëm Aawa, dal fa ñetti fan. Ma seetlu fa baadoolo ya, seet ca biir sarxalkat ya, gisuma kenn ku bokk ci Leween ñi. <sup>16</sup> Ma woolu njiit ya: Elyeser ak Aryel ak Semaya ak Elnatan ak Yarib ak Elnatan meneen ma, ak Natan ak Sàkkaryaa ak Mesulam, ak Yowarib ak Elnatan ma ca des, ñaari jànglekati yoon ya. <sup>17</sup> Ba mu

ko defee ma yebal leen ca Ido, njiit la ca gox ba ñuy wax Kasifya, daldi leen wax kàddu ya ñuy jottli Ido ak bokkam yay liggéeykati kër Yàlla, ya dëkk Kasifya, ndax ñu yónnee nu ay surga ci sunu liggéeyu kër Yàlla gi. <sup>18</sup> Sunu Yàlla nag toppe nu mbaaxu yiwam, ba ñu indil nu waa ju am xel, askanoo ci Maali sëtub Lewi doomu Israyil. Ñu di ko wax Serebya. Mu ànd ak doomam yu góor aki bokkam, ñuy fukk ak juróom ñett (18), <sup>19</sup> ñook Asabya ak Esayi sëtü Merari. Ñu ànd ak seeni bokk ak seen doom yu góor, di ñaar fukki góor (20). <sup>20</sup> Indaale nañu ñaar téeméeri liggéeykati kër Yàlla ak ñaar fukk (220), di ñu askanoo ca ña Daawudaaki jawriñam tannoos, bind seeni tur, ngir ñuy japple Leween ñi.

<sup>21</sup> Ba loolu amee ma digle foofa koor ca tàkkal dexu Aawa, toroxloo ko fa sunu kanam Yàlla, ngir ñaan ko mu may nu yoonu jàmm, nook sunuy doom ak mboolem lu bokk ci nun. <sup>22</sup> Ndaxte rusoon naa ñaan Buur mu boole nook ay dag ak gawar yu nu aar ci noon yi ci yoon wi. Li ko waral mooy fekkoon na nu wax Buur ne ko: «Sunu Yàlla mooy toppe yiwam mboolem ku ko yaakaar, di ko defal jàmm, waaye meram dina dal ak doole ci kaw mboolem ku ko dëddu.» <sup>23</sup> Nu woor, daldi dagaan sunu Yàlla mbir moomu, mu nangul nu. <sup>24</sup> Ba loolu amee, ma tann fukki sarxalkat ak ñaar yu mag, ñuy Serebya ak Asabya ak seen fukki bokk. <sup>25</sup> Gannaaw loolu ma nattal leen xalis baak wurus waak ndab, ya Buur aki wóllëreem aki jawriñam jooxe woon, ñook mbooloom Israyil ma fa teewoon, te lépp jëm ca sunu kër Yàlla ga. <sup>26</sup> Natt naa ba teg ci seeni loxo ñaar téeméeri barigoy xalis ak fanweeri barigo ci jumptukaayi xalis ak fanweeri barigoy wurus, <sup>27</sup> ak ñaar fukki koppi wurus yu wecci junniy poseti wurus, ak ñaari ndab yu jafe, yu xàñar bu ñu raxas ba muy melax, mel ni wurus. <sup>28</sup> Ma ne leen: «Yeen, dees leena sellalal Aji Sax ji, ni ñu sellale ndab yi, te xalis beek wurus wi di saraxu yéene ñeel Aji Sax ji, seen Yállay maam. <sup>29</sup> Xool-

\* **8:5** 8.5 Sattu: tekki bu jëkk ba ci làkku gereg moo indi turu Sattu. † **8:10** 8.10 Baani: tekki bu jëkk ba ci làkku gereg moo indi turu Baani.

leen ko te sàmm ko bu baax, ba kera ngeen koy natt ca denci kër Aji Sax ji ca Yerusalem, fa kanam kilifay sarxalkat yaak Leween ñaak ña jiite seen làngi kër maam ci bànni Israyil.»

<sup>30</sup> Ci kaw loolu nu nattal sarxalkat yeek Leween ñi xalis baak wurus waak ndab yu sell ya, ngir ñu yóbbu ko ca sunu kër Yàlla ga ca Yerusalem. <sup>31</sup> Fukki fan ak ñaar ca weer wa jëkk lanu bàyyikoo dexu Aawa, daldi jëm Yerusalem. Sunu Yàlla nag toppe nu yiwam, ba musal nu ci noon akub saaysaay ci yoon wi.

<sup>32</sup> Gannaaw loolu nu agsi Yerusalem, nopplu fa ñetti fan. <sup>33</sup> Bésuub ñeenteel ba nu natt diisaayu xalis baak wurus waak ndab ya ca sunu biir kër Yàlla ga, teg ko ca loxol Meremot doomu Uri, sarxalkat ba, mook Elasar doomu Fineyas, ak Leween ña, di Yosabàdd doomu Yeswa, ak Nowadiya doomu Binuy. <sup>34</sup> Ñu limaat lépp, nattaat diisaay ba, daldi bind ca saa sa dayo ba bépp.

<sup>35</sup> Ba mu ko defee ña jóge njaam, ñibbsee ca ngàllo ga, daldi defal Yàllay Israyil ay saraxi dóomal. Muy fukki yëkk ak ñaar, ñeel Israyil gépp ak juróom ñeent fukki kuuy ak juróom benn (96), ak juróom ñaar fukki xar yu ndaw ak juróom ñaar (77), ak fukki sikket ak ñaar yu ñu def saraxu póotum bàkkaar; ñu def lépp saraxu dóomal, ñeel Aji Sax ji. <sup>36</sup> Ci biir loolu ñu jottli ndigali buur, ya jëm ca ay jawriñam ak njiiti Wàllaa Dex. Nnoonu it jàpple mbooloo ma ca liggéeyu kër Yàlla ga.

## 9

### *Askan wi rax na*

<sup>1</sup> Gannaaw ba loolu wéyee njiit ya dikk, ne ma: «Du bànni Israyil, du sarxalkat yi, du Leween ñi, kenn ci ñoom teq-likoowul ak xeeti réew meek seen aada yu siblu. Dañuy jëfe ni Kanaaneen ñeek Èt-teen ñeek Periseen ñeek Yebuseen ñeek Amoneen ñeek Mowabeen ñeek waa Mis-raak Amoreen ñi. <sup>2</sup> Jël nañu jabar ci ñoom, jèlal ci jabar seeni doom, ba jaxase jiwu mu sell mi ak waasoy réew yi. Njiit

yeek mag ñi sax ñoo jiitu ci googu fecci kóllère.»

<sup>3</sup> Ba ma dégge loolu damaa xotti sama turki ak sama mbubb, xuuf sama kawaru bopp ak sama sikkim, daldi toog, ne tott.

<sup>4</sup> Ba loolu amee mboolem ñi wormaal kàddug Yàllay Israyil daje, wër ma ndax ñàkk kóllèreg ña ñibbsee ca ngàllo ga. Ma toog, ne tott ba waxtuw saraxu ngoon.

<sup>5</sup> Saraxu ngoon jot, ma jóge ca sama jataayu toroxtaange, ba ma xottee sama turki baak sama mbubb ma. Ma ne gurub sukk, tàllal sama Yàlla Aji Sax ji loxo, <sup>6</sup> daldi ñaan, ne:

Éy sama Yàlla maa rus, maa torox, ba manumaa siggi fi sa kanam, ndaxte sunuy bàkkaar bare na, ba mëdd nu, sunuy moy tegloo ba àgg asamaan. <sup>7</sup> La ko dale ca sunu janti maam ba bésuub tey jii, nu ngi ci moy gu réy. Sunuy bàkkaar tax na buuri réew yi teg nu loxo, nook sunuy buur ak sunuy sarxalkat, ñu di nu rey, di nu jàpp njaam, di lèl sunu alal, di nu torxal ba sunu jonni yàllay tey.

<sup>8</sup> Waaye yaw Aji Sax ji sunu Yàlla, yàggul dara aw yiw bàyyikoo na ci yaw, musal ñenn ci nun, may nu ndëgërlaay ca sa bérab bu sell ba. Yaw sunu Yàlla, yaa nu taxa leqliku, yaa nu dundalaat ci sunu biir njaam gi. <sup>9</sup> Ndax ay jaam lanu, waaye yaw sunu Yàlla, waccewoo nu sunug njaam. Yaa dawal ngor sunu digganteek buuri Pers, ngir mayaata nu dooley tabax sunu kër Yàlla, yékkatee ko ca gentam ba, may nu kiiraay ci Yerusalem ak ci Yuda.

<sup>10</sup> Yaw sunu Yàlla, ana lu nuy waxati nag gannaaw lii? Ndax kat noo dëddu sa santaane, <sup>11</sup> yi nga nu dénk, yonent yiy say jaam jottli ko, ne nu: «Réew mi ngeen di nanguji, réew mu sobewu la ndax sobey waasoy réew ma. Feesal nañu kook seeni jëf ju siblu ak seen tilim, ba fépp daj. <sup>12</sup> Kon nag seen doom yu jigéen buleen leen may seen doom yu góor, te seen doom yu jigéen buleen leen jèlal seen doom yu góor. Buleen seet mukk seen jàmm mbaa seen njariñ. Looloo leen di taxa am doole, bay xéewlu ci ngèneeli réew mi,

ba wacce ko seen askan fàww.» <sup>13</sup> Loolu nu dal lépp, sunu jéf ju bon a tax, ak sunu tooñ gu réy. Terewul yaw sunu Yàlla, tegoo nu lu dul mbugal mu yées mi sunuy bàkkaar yellool. Terewul yaw sunu Yàlla, li nu bàkkaar mbugaloo nu ko, te moo nu fi taxa des di dund nii. <sup>14</sup> Nan lanu mana dellooti di xëtt say santaane, di séyanteek xeet yii ak seen jéf ju siblu? Kon doo nu mere, faagaagal nu, ba kenn du desati mbaa muy rëcc? <sup>15</sup> Yaw Aji Sax ji Yàllay Israyil, yaay boroom njekk. May nga nu bés sub tey jii nu dese bakkan. Nu ngi nii fi sa kanam ci biir tooñange, ba tax du kenn ci nun ku am lay fi sa kanam.

## 10

### *Fase nañu jaambur ñi*

<sup>1</sup> Naka la Esra di ñaan ak a tuub, di jooy, ak a daanu fa suuf ca buntu kër Yàlla ga, bànni Israyil yéew ko, bare lool, góor ak jigéen, ba ca xale ya. Mbooloo ma it di jooy jooy yu metti. <sup>2</sup> Ci biir loolu Sekaña doomu Yeyel ma askanoo ci Elam, daldi wax Esra ne ko: «Noo tooñ sunu Yàlla, di jël ay jaambur jabar ci xeeti réew mi. Waaye loolu terewul Israyil am yaakaar ba tey. <sup>3</sup> Léegi kay nanu fasanteek sunu Yàlla kóllère, daldi fase jigéen ñooñu ñépp, ñu ànd ak seeni doom, muy ni nga ko diglee rekk, sang bi, yaak ñi wormaal sunu santaaney Yàlla. Li yoon wi digle daal, na am. <sup>4</sup> Jógal nag, mbir maa ngi ci say loxo, te noo ngi ànd ak yaw. Kon dëgërlul te def ko.»

<sup>5</sup> Ci kaw loolu Esra jóg, wax kilifay sarxalkat yaak Leween ñaak Israyil gépp, ne leen ñu giñ ne noonu lañu koy defe. Ñu giñ ko. <sup>6</sup> Ba loolu amee Esra bàyyikoo kër Yàlla ga, fatuji néegu Yowanan doomu Elyasib. La mu fa nekk nag lekkul, naanul, xanaa di ñaawlu na ngàllo, ga ñibbsi feccee worma. <sup>7</sup> Ba mu ko defee ñu yéene ci Yerusaleem ak Yuda, yégal mboolem ngàllo ga ñibbsi, ne leen ñu daje ca Yerusaleem. <sup>8</sup> Ñu ne képp ku teewul ci diiru ñetti fan, ni ko kilifa yeek mag ñi diglee, dees na teg alalam jépp

loxo, te moom ci boppam dees na ko dagge ca ngàllo, ga ñibbsi.

<sup>9</sup> Ba ñu ca tegee ñetti fan mboolem góori Yudak Beñamin daje nañu Yerusaleem, mu yemook ñaar fukki fan ca juróom ñeenteelu weer wa. Ña nga toog ñoom ñépp ca èttu kër Yàlla ga, di lox ndax solob ndaje ma, ak itam taw bu bare ba mu yemool. <sup>10</sup> Ci kaw loolu Esra sarxalkat ba jóg taxaw, ne leen: «Yeena fecci kóllère ndax yeena jël ay jaambur jabar, di yokk tooñaangey Israyil. <sup>11</sup> Léegi nag tuubleen ci Aji Sax ji seen Yàllay maam te def coobareem. Teqlikoolen ak xeeti réew mi, teqlikook jigéen ñii diy jaambur.»

<sup>12</sup> Ci kaw loolu mbooloo mépp bokk àddu ca kaw ne ko: «Tigi, li nga wax rekk lanu wara def. <sup>13</sup> Waaye danoo bare, te muy jamonoy taw. Manunoo toog fii ci biti. Te it mbir mi maneesu koo lijjanti ci benn bés mbaa ñaar, ndax sunu tooñ ci mbir mii daa yaatu. <sup>14</sup> Kon daal na sunuy kilifa taxawal askan wi. Su ko defee mboolem ku nekk ci sunuy dëkk te jël ci jaambur ñi jabar day dikk, ku ci nekk ca bés ba ñu ko àppal, te mu ànd ak kilifa yaak àttekati dëkkam. Ñu topptoo mbir mi nag, ba keroog sunu merum Yàlla mu réy mi sababoo ci lii, dëddu nu.»

<sup>15</sup> Mennum Yonatan doomu Asayel, ak Yaasya doomu Tigwa, ñoom donj, ñook Mesulam ak Sabtay, Leween ba, ñoo àndul ca loola. <sup>16</sup> Ci kaw loolu ngàllo, ga ñibbsi daldi def la ñu wax. Esra sarxalkat ba tànn nit ña jiite seen kër baay, ku nekk ak làngam, ñoom ñépp ñu tudd seeni tur. Keroog benn fan ca fukkeelu weer wa nag, ñu toog ngir seet mbir ma. <sup>17</sup> Ca benn fanu weer wa jëkk ca déwén sa lañu lijjanti mbiru mboolem ña jëloon jabar ay jaambur.

### *Ñii ñoo jëggaani ay soxna*

<sup>18</sup> Ñu gis ne ñenn ci askanu sarxalkat yi jëloon nañu ay jaambur soxna: Ci askanu Yosuwe doomu Yoccadag aki bokkam, Maaseya ak Elyeser ak Yarib ak Gedalya bokk nañu ca. <sup>19</sup> Ñu xas ne dinañu fase seeni soxna, daldi

- nangu ne tooñ nañu, ba noppi ku nekk ci ñoom sarxe am kuuy, muy peyug tooñam.
- <sup>20</sup> Ci askanu Imer, Anani la ak Sebadiya.
- <sup>21</sup> Ci askanu Arim, Maaseya laak Ilyaas ak Semaya ak Yeyel ak Osiyas.
- <sup>22</sup> Ci askanu Pasur, Elyonay laak Maaseya ak Ismayla ak Netanel ak Yosabàdd ak Elasa.
- <sup>23</sup> Ci Leween ñi: Yosabàdd laak Simey ak Kelaya, mooy Kelita ba tey, ak Petaya ak Yuda ak Elyeser.
- <sup>24</sup> Ci jàngkat yi: Elyasib la.  
Ci fara bunt yi: Salum laak Telem ak Uri.
- <sup>25</sup> Bànni Israyil yi ci des:  
Ci askanu Paros, Ramya laak Isya ak Malkiya ak Miyamin ak Elasar ak Malkiya ak Benaya.
- <sup>26</sup> Ci askanu Elam, Mataña laak Sàkkaryaa ak Yeyel ak Abdi ak Yeremot ak Ilyaas.
- <sup>27</sup> Ci askanu Sàttu, Elyonay laak Elyasib ak Mataña ak Yeremot ak Sabàdd ak Asisa.
- <sup>28</sup> Ci askanu Bebay, Yowanan laak Anaña ak Sabay ak Atlay.
- <sup>29</sup> Ci askanu Baani, Mesulam laak Malug ak Adaya ak Yasub ak Seyal ak Yeremot.
- <sup>30</sup> Ci askanu Payat Mowab, Adna laak Kelal ak Benaya ak Maaseya ak Mataña ak Besalel ak Binuy ak Manase.
- <sup>31</sup> Ci askanu Arim, Elyeser laak Isija ak Malkiya ak Semaya ak Simeyon, <sup>32</sup> ak Beñamin ak Malug ak Semarya.
- <sup>33</sup> Ci askanu Asum, Matenay laak Matata ak Sabàdd ak Elifelet ak Yeremay ak Manase ak Simey.
- <sup>34</sup> Ci askanu Baani, Madaay laak Amram ak Uyel <sup>35</sup> ak Benaya ak Bedeya ak Keluyi <sup>36</sup> ak Waña ak Meremot ak Elyasib <sup>37</sup> ak Mataña ak Matenay ak Yasaaw <sup>38</sup> ak Baani ak Binuy ak Simey <sup>39</sup> ak Selemya ak Natan ak Adaya <sup>40</sup> ak Magnadebay ak Sasay ak Saray <sup>41</sup> ak Asarel ak Selemya ak Semarya <sup>42</sup> ak Salum ak Amarya ak Yuusufa.
- <sup>43</sup> Ci askanu Nebo, Iyel la, ak Matitiya ak Sabàdd ak Sebina ak Yaday ak Yowel ak Benaya.
- <sup>44</sup> Ñooñu ñépp jël nañu ay jaambur jabar, ba ñenn ci ñoom ami doom.

## Neyemi

### *Neyemi am naw tiis*

<sup>1</sup> Mbiri Neyemee ngi, góor gay doomu Akalya: Ca ñaar fukkeelu atu nguurug Artaserses, ci weeru Kislew\*, man Neyemi maa nga woon ca Sus, péey ba. <sup>2</sup> Ci kaw loolu Anani, kenn ci saay bokk bàyyikoo Yuda, ànd aki nit. Ma laaj leen ndesu Yawut ya rëcce ca njaam ga, laaj leen it mbirum Yerusalem. <sup>3</sup> Ñu wax ma, ne ma: «Ña rawe ca njaam ga de, ña nga diiwaanu Yuda, ci njàqare ju réy akug toroxte. Tatay Yerusalem jaa nga tojatoo, bunt ya lakk.»

<sup>4</sup> Ba ma déggee kàddu yooyu, damaa toog di jooy, ñaawlu ko ay fan, di woor ak a ñaan ci Yàlla Boroom asamaan. <sup>5</sup> Ma ne: «Éy Aji Sax ji, yaw Yàlla Boroom asamaan, Yàlla ju màgg ji te raglu, di sàmm kóllèreek ngor, ñeel ñi la sopp tey topp say santaane. <sup>6</sup> Ngalla Sang bi, teewlu ma, xippi say gët, te déglu sama ñaan, yi may ñaanal guddeek bëccëg bànni Israyil, say jaam. Tegoo naa moy yi la bànni Israyil moy, te man sax maak sama waa kër baay, moy nanu la. <sup>7</sup> Lu ñaawa ñaaw lanu la def, te sàmmunu say santaaneek say dogal ak sa ndigali yoon ya nga dénkoon Musaa, sa jaam ba. <sup>8</sup> Rikk bàyyil xel kàddu ya nga dénkoon Musaa, sa jaam ba, ne ko: “Bu ngeen feccee kóllère, maa leen di tasaare ci biir xeet yi. <sup>9</sup> Waaye bu ngeen walbatikoo ci man, sàmm samay santaane, di ko jëfe, bu ñu yóbbu woon seeni ñoñ ba fa suuf digalook asamaan sax, fa laa leen di jële, boole leen yóbbu ca bérab, ba ma taamoo dëel sama tur.” <sup>10</sup> Ñooy say jaam, sa ñoñ ñi nga jote sa kàttan gu réy ak sa doole ju bare. <sup>11</sup> Éy Boroom bi, Sang bi, rikk teewlul bu baax samag ñaan, ak sa ñaanu jaam ñi safoo wormaal saw tur. Ngalla Sang bi, nangul ma tey jii, may ma waa jii yéwéne ma.» Booba maa yore woon naani Buur.

## 2

### *Neyemi jot na ndigal*

<sup>1</sup> Mu am bés, ci weeru Nisan, ñeenti weer gannaaw Kislew, yemook ñaar fukkeelu atu nguurug Artaserses, ma jël biiñ ba taaje woon fa kanam Buur, di ko ko xellil. Booba maa nga ànd ak tiis, ne yogg; lu ma masula dal ca kanamam. <sup>2</sup> Buur laaj ma, ne ma: «Lu la tax ne yogg te woppuloo? Mbaa du tiisu xol?» Maa ngi tiit lool. <sup>3</sup> Ma daldi ne Buur: «Guddalu fan, Buur! Nu may def ba duma ne yogg, te dëkk ba samay maam téd d gental, bunt ya lakk ba xoyomu?» <sup>4</sup> Buur wax ma, ne ma: «Ana looy sàkku?» Ma ñaan gaaw ci Yàlla Boroom asamaan, <sup>5</sup> door ne Buur: «Xanaa Sang bi, su la neexee rekk, nga yéwéne ma, yebal ma Yuda, dëkk ba ñu denc samay maam, ba ma tabaxaat ko.» <sup>6</sup> Buur nag wax ak man, fekk Lingeer soxnaam toog, feggook moom. Mu ne ma: «Boo demee, ana loo fay toog, doora délsi?» Ma wax ko. Gannaaw loolu Buur nangu maa bàyyi ma dem. <sup>7</sup> Ci kaw loolu ma ne Buur: «Buur, su la soobee, ngalla nañu ma jox ay bataaxal yu jëm ca kilifay Wàllaa Dex ya, ngir ñu jàllale ma, ba ma àgg Yuda; <sup>8</sup> akub bataaxal bu jëm ca Asaf may wattu toolu buur, ngir mu may ma bant yu ma defareji bunti tatay kër Yàlla ga, defaraale ca tatay dëkk baak kër ga may dali.» Buur nangul ma, ndax sama Yàlla ji ma toppe mbaaxam. <sup>9</sup> Ba loolu amee ma dem ba ca kilifay Wàllaa Dex ya, jox leen bataaxali Buur, fekk Buur boole maakay njiiti xare aki gawar.

<sup>10</sup> Ba mu ko defee, Sanbalat ma dëkk Oron dégg mbir ma, mook Tobya, Amoneen ba, ndawal Buur. Ñu am lu leen soofa soof, te mooy li nit ñëw, di sàkkusi njariñu bànni Israyil.

### *Neyemi xool na tata ja wër Yerusalem*

<sup>11</sup> Ma àgg nag ba Yerusalem, toog fa ñetti fan. <sup>12</sup> Gannaaw loolu ma jóg guddi, maak nit ñu néew, te waxuma kenn li ma sama Yàlla nammloo ngir ma defal ko Yerusalem. Yoruma woon jenn daamar ju moy ji ma war. <sup>13</sup> Ma génne dëkk ba guddi, jaare buntu tata ba ñuy wax Xur

\* 1:1 1.1 weeru Kislew moo yemook juróom ñeenteelu weer wa ci seen nattin.



wa, wutali walu ndox ma ñuy wax walu Ninki-nànka, daldi jàll ba ca buntu Sën ba. Ci biir loolu ma seetlu tatay Yerusalem ji toj fu nekk, bunt yi lakk ba xoyomu. <sup>14</sup> Ma jubal wutali bunt ba ñuy wax Bëtu Ndox, jaare ca wetu déegu Buur. Amatul nag fu sama daamar ji ma war mana jaare. <sup>15</sup> Ma daldi topp xur wa ca guddi ga, di seetlu tata ji, ba noppi waññiku, jaare ca buntu Xur wu xóot wa, duggsiwaat. <sup>16</sup> Kilifay dëkk ba nag xamuñu fu ma demoon, mbaa lu ma doon def. Ndax fekkul woon ma wax kenn dara, du Yawut yi, du sarxalkat yi, du garmi yi, du kilifa yi te du keneen ci ñi wara sasoo liggéey bi.

<sup>17</sup> Ba loolu amee ma ne leen: «Yeena gisal seen bopp toskare gi nu nekke. Yerusalem tas na, bunt yi lakk na. Aycaleen nu tabaxaat tatay Yerusalem ndax sunu gacce faju.» <sup>18</sup> Gannaaw loolu, ma nettali leen ni ma sama Yàlla toppe yiwam, ak kàddu yi ma Buur wax. Ñu ne ma: «Nanleen tabax!» Ñu daldi gëna pastéefu ca liggéeyu ngëneel ba.

<sup>19</sup> Ba loolu amee Sanbalat ma dëkk Oron dégg ko, mook Amoneen ba Tobya, jawriñ ba, ak Gesem, Araab ba. Ñu di nu ñaawal ak a diiju naan: «Li ngeen di def nii lu mu doon? Dangeen di fexeel Buur?» <sup>20</sup> Ma ne leen: «Yàlla Boroom asamaan moo nuy may ndam. Nun ñiy jaamam nooy jóg tabaxaat dëkk bi. Yeen nag amuleen wàll ci Yerusalem, te baaxoowuleen fi benn sañ-sañ!»

### 3

#### *Ñu ngi tabaxaat tata ja*

<sup>1</sup> Gannaaw loolu Elyasib sarxalkat bu mag ba ànd ak bokki sarxalkatam, ñu tabaxaat bunt ba ñuy wax Gàtt ya, sellalal ko Yàlla, taxawal laf ya, defaraat tata ja, ba ca soorooru Meya, sellalal ko Yàlla, jàppoo ko noonu ba ca soorooru Ananel. <sup>2</sup> Waa Yerikoo nga feggook ñoom di tabax, Sakuur doomu Imri di tabax ca wet ga.

<sup>3</sup> Bunt ba ñuy wooye buntu Jën ya, góori waa Sena ñoo daaj bant ya, taxawal laf ya, def ca tëjukaay yaak dénki galan ya muy àndal. <sup>4</sup> Meremot doomu Uri doomu

Akocc, moo làng ak ñoom di defar; ka feggook ñoom di defar, di Mesulam doomu Berekiya doomu Mesesabel. Ka feggook ñoom di defar, di Cadog doomu Baana. <sup>5</sup> Ka feggook ñoom, ba tey, di defar di waa Tekowa. Seenii kilifa nag ñoo bañoona liggéey ci njiital jawriñ yi yore liggéey bi.

<sup>6</sup> Buntu Cosaan ba, Yowada doomu Paseya ak Mesulam doomu Besodiya ñoo ko defaraat, daaj bant ya, taxawal laf ya, ak tëjukaay yaak dénki galan ya cay ànd. <sup>7</sup> Ña feggook ñoom di defar, di Melatiya ma dëkk Gabawon ak Yadon ma dëkk Meronot ak ñeneen waa Gabawon ak Mispa, gox ya ca kilifteefu boroom Wàllaa Dex. <sup>8</sup> Ka feggook ñoom di defar, di Usyel doomu Xaraya, tëggu wurus ba. Ka feggook moom di defar, di Anaña, bokk ca defarkati cuuraay ya. Ñu sottal seen liggéey ca Yerusalem gannaaw ba ñu àggee fa tata ja gëna yaatoo. <sup>9</sup> Ka feggook ñoom di liggéey, Refaya doomu Ur la. Moo yilifoon genn-wàllu diiwaanu Yerusalem. <sup>10</sup> Ka ca topp di liggéey dog ba janook këram, Yedaya la, doomu Arumaf; Atus doomu Asabneya feggook moom di defaraat. <sup>11</sup> Am na weneen làccu tata wu Malkiya doomu Arim di defaraat, mook Asub doomu Payat Mowab; ñu defaraale sooroor ba ñuy wax Taal ya. <sup>12</sup> Ka feggook moom di defaraat, di Salum doomu Aloyes, kilifag geneen wàllu diiwaanu Yerusalem, ay doomam yu jigéen di ko jàpple ca liggéey ba.

<sup>13</sup> Buntu Xur wa, Anun a ko defaraat, mook ña dëkk Sanowa. Ñoo ko tabaxaat, taxawal laf ya, ak tëjukaay yaak dénki galan ya cay ànd. Ñu teg ca defaraat làccub juróomi téeméeri meetar ca tata ja, ba àgg ca buntu Sën ba.

<sup>14</sup> Buntu Sën ba nag, ka ko defaraat Malkiya doomu Rekab la, di boroom gox ba ñuy wax Bet Kerem. Moo ko defaraat, taxawal laf ya, ak tëjukaay yaak dénki galan ya cay ànd.

<sup>15</sup> Bunt ba ñuy wax Bëtu Ndox ba, Salun doomu Kol Ose, boroom gox ba ñuy wax Mispa, moo ko defaraat. Moo ko tabaxaat, xadd ko, taxawal laf ya, ak tëjukaay yaak dénki galan ya cay ànd, ak itam tata ja ca

déegub Silowe, bay suuxat toolu buur, ba ca dëggastal ya ngay wàcce, génn gox ba ñuy wax Kër Daawuda. <sup>16</sup> Ka ca topp di defar, Neyemi doomu Asbug la, boroom genn-wàllu gox ba ñuy wax Bet Cur. Moo féetewoo la dale fa janook sègi Daawuda ya, ba ca déeg ba nit ña sàkk, dem ba ca dalu Xarekat ya. <sup>17</sup> Leween ñaa ca topp di defaraat, di Reyum doomu Baani; ka dend ak moom, taxawal goxam di defaraat, di Asabya, may boroom genn-wàllu gox ba ñuy wax Keyla. <sup>18</sup> Ka topp ca moom di liggéey, di seen mbokk Binuy doomu Enadàdd, boroom geneen wàllu gox ba ñuy wax Keyla. <sup>19</sup> Ka feggook moom di liggéey, Eser la, doomu Yeswa, boroom Mispá. Muy defaraat làcc wa janook fa ngay yéegé jëm ca dencu gannaay ya, ca koñu tata ja. <sup>20</sup> Ka topp ca moom di liggéey ak pastéef Barug la, doomu Sabay. Muy defaraat weneen làccu tata ja dale ca koñ ba ca bunt kër Elyasib, sarxalkat bu mag ba. <sup>21</sup> Ka topp ca moom Meremot la, doomu Uri doomu Akocc. Muy defaraat làcc wa dale ca bunt kër Elyasib, ba fa kër ga yem. <sup>22</sup> Ña topp ca moom di defaraat, di sarxalkat ya dëkke la wër Yerusalem. <sup>23</sup> Ña ca topp di liggéey, Beñamin la ak Asub. Ñuy defaraat làcc wa janook seen kër. Ka ca topp di liggéey, di Asaryaa doomu Maaseya doomu Anaña. Muy defaraat fa dendeek këram. <sup>24</sup> Ka ca topp di Binuy doomu Enadàdd. Muy defaraat làcc wa dale ca kër Asaryaa ba ca koñ ba, ca ruqu tata ja. <sup>25</sup> Palal doomu Usay di defaraat diggante koñ ba ak sooroor bu kawé ba tiim kër buur, jàpp èttu dag ya. Ka ca topp di Pedaya doomu Paros. <sup>26</sup> Liggéeykati kër Yàlla ya féete Ofel ca tund wa, di liggéey, ba fa janook soorooru koñ, ba féete buntu Ndox ma penku. <sup>27</sup> Ña ca topp di waa Tekowa, di defaraat làcc wa ca topp, dale fa janook soorooru koñ bu kawé ba, ba ca tatay tund wa.

<sup>28</sup> La ko dale ca buntu Fas ya, ay sarxalkat a fa doon liggéey, ku nekk janook këram. <sup>29</sup> Ka ca topp di liggéey, Cadog doomu Imer la. Muy defaraat fa janook këram. Ka ca topp di defaraat,

di Semaya doomu Sekaña; moo doon wattukatu buntu Penku ba. <sup>30</sup> Ña topp ca moom di liggéey, di Anaña doomu Seleya ak Anun, juróom benneelu doomu Calaf. Muy defaraat làcc wa ca topp. Ka ca topp di liggéey, Mesulam doomu Berekiya la. Muy defaraat fa janook dëkkuwaayam. <sup>31</sup> Ka ca topp di defar, di Malkiya, bokk ca téggi wurus ya. Muy liggéey ba ca keri liggéeykati kër Yàlla ga ak jaaykat ya, fa janook buntu Ndaje ba, jàpp ca néegu jongrukat bu kawé ba ca ruq ba. <sup>32</sup> Diggante néegu jongrukat bu kawé ba ca koñ ba, ak buntu Gàtt ya, ña fa doon liggéey téggi wurus ya la ak jaaykat ya.

### *Liggéey bi am na gállankoor*

<sup>33</sup> Ba Sanbalat dégge ne nu ngi tabaxaat tata ja, am na naqar wu réy, mer lool. Muy ñaawal Yawut yi <sup>34</sup> ca kanam bokkam yaak xarekati Samari ya naan: «Ana lu Yawut yi yaafus yii di jéema def nii? Ñu defe ne moos seen peXe dina sotti, ba ñuy def ay sarax? Fu ñuy noppee seen tabax bi bésub tey? Te yékkatiwñu lu moy ay doj yu ñu sullee ci jalub tojit yu lakk ba noppi?» <sup>35</sup> Tobbya Amoneen ba mu feggool nag ne ca tonet ne: «Tata ji ñuy tabax de, su ci wel sax yéegoon, mu ànd aki dojam, màbb.»

<sup>36</sup> Ci biir loolu ma ne: «Ngalla sunu Yàlla, déggal rekk xeebeel gi ñu nu xeeb te walbati seeni xaste, mu këppu ci seen kaw. Ngalla jébbal leen nit ñu séxétoo seen alal ci réew mu ñu leen jàpp njaam. <sup>37</sup> Bu leen jéggal seen tooñ, bul far seen bàkkaar, ndaxte ñoo naqaral ñiy tabax.»

<sup>38</sup> Ci kaw loolu nu tabaxaat tata ja, wërale ko ba mu àgg ca genn-wàllu taxawaayam, ndax fekk na mbooloo ma pastéefu ca liggéey ba.

## 4

<sup>1</sup> Sanbalat nag ak Tobbyaak Araab yaak Amoneen ñaak Asdoddeen ña, ñoom ñépp dégg ne liggéeyu tatay Yerusalem a ngay jëm kanam, te xar-xar yaa ngay tàmbalee fatt. Ñu mer ca lool, <sup>2</sup> daldi mànkoo, lal peXe ngir xareek Yerusalem, fitnaal leen. <sup>3</sup> Ba mu ko defee nu ñaan

ci sunu Yàlla, ba noppi teg fa ay nit ñuy wattu guddeek bëccëg, ngir bàyyi leen xel.

<sup>4</sup> Fekk na waa Yudaan ngi naan:

«Dooley yenukat ñiis,

tojit jalee jale.

Nu nuy tabaxeeti jii tata?»

<sup>5</sup> Ci biir loolu noon ya naan: «Bala ñu noo yég mbaa ñu di nu gis, nu ne saraax ci seen biir, rey leen, yemale fi liggéey bi.»

<sup>6</sup> Yawut ya ñu dëkkal nag dikk waxsi nu fukki yoon ak juróom li ñu nuy fexeel, ne nu «Fu ne lañuy jóge, songsi nu.»

### *Neyemi gannaayal na ay wattukat*

<sup>7</sup> Ma teg nag ay nit ci bérab yu ne fàññ te suufe ca gannaaw tata ja. Ma def leen ay kurél, gu ci nekk ak làngam ak bérabam. Ña nga gannaayoo seeni xeej ak seeni saamar ak seeni fitt. <sup>8</sup> Ba loolu amee ma xoolaat lépp, ba noppi wax ak kàngam yaak kilifa yaak mbooloo ma ca des ne leen: «Buleen leen ragal. Fàttlikuleen ne Boroom bi moo màgg te jara ragal te ngeen xeexal seeni bokk ak seen doom yu góor ak yu jigéen, ak seeni jabar ak seeni kër.»

<sup>9</sup> Gannaaw gi noon ya xam ne yég nanu leen, te Yàlla nasaxal na seen pexe. Ba mu ko defee nu walbatikuwaat nun ñépp ca tata ja, ku nekk dellu ca liggéeyam.

<sup>10</sup> La ko dale bésub keroog sama xaaju nit ña rekk a doon liggéey, xaaj ba ca des gannaayoo ay xeej aki pakk aki fitt ak kiiraayal dënn. Kilifa ya nag taxaw ca gannaaw mboolem waa Yuda. <sup>11</sup> Ña doon tabax tata jaak ñay yenook ñay yene, ñépp di liggéeye benn loxo, loxo ba ca des ñàbb ngànaay. <sup>12</sup> Te it ñay tabax, ku ci nekk, sab saamar a nga takke ci sa ndigg, ngay liggéey, boroom liit gi feggook man. <sup>13</sup> Ma wax ak garmi yaak kilifa yaak mbooloo ma ca des, ne leen: «Liggéey bi réy na, yaatu na, te nun danoo tasaaroo te soreyantoo ci tata ji. <sup>14</sup> Fu ngeen dégg liit gi jibe fa, fekksileen nu fa. Sunu Yàlla dina nu xeexal.» <sup>15</sup> Nu nekk nag ci liggéey bi, genn-wàllu nit ñi yore ay xeej, dale ko ba bët di set, ba biddiiw yiy feq.

<sup>16</sup> Boobu it laa wax mbooloo ma ne leen: «Na ku nekk ànd ak ka muy

liggéeyandool, fanaan ci biir Yerusalem. Su ko defee nu man di wattu guddi, di liggéey bëccëg.» <sup>17</sup> Booba kenn ci nun summiwul ay yéreem, du man, du samay bokk, du samay nit, te du wattukat yi ànd ak man. Ku nekk day ñàbb ngànaayam akam ndox.

## 5

### *Neyemi aar na néew-ji-doole*

<sup>1</sup> Ci biir loolu askan waak seeni jabar di xultu lool ci seen kaw bokki Yawut.

<sup>2</sup> Ñii naan: «Nun danoo jaboot, nook sunu doom yu góor ak yu jigéen. Nañu nu jox pepp mu nu lekk, ba mana dund.» <sup>3</sup> Ñee naan: «Sunuy tool ak sunuy tookeeri reseñ ak sunuy kër lanuy tayle ngir am pepp ci xiif bi.» <sup>4</sup> Ña ca des naan: «Danoo àbb xaaalis, taylee ko sunuy tool ak tookeeri reseñ ngir fey galagu buur. <sup>5</sup> Moona nun de, nook ñi nuy lebal benn lanu, diy bokk lenqe, te seeni doom gënuñu sunuy doom. Terewul nu ngi nara dugal sunuy doom yu góor ak yu jigéen cig njaam. Am na sax ñenn ci sunuy doom yu jigéen, ñu nekk cig njaam ba noppi. Manunu ci dara ndax sunuy tool ak sunu tookeeri reseñ a ngi ci yeneen loxo.»

<sup>6</sup> Ba ma déggeee seeni xultook seen wax jooju, mer naa lool. <sup>7</sup> Ma daldi dogu ci sama xol ne dinaa yedd garmi yeek njiit yi. Ma ne leen: «Yeen yeenay lebal seeni bokk, di sàkku tegandaay.» Ci kaw loolu ma woote ndaje mu réy ci seen mbir. <sup>8</sup> Ma ne leen: «Nun def nanu sunu kem kàttan ngir jootaat sunu bokki Yawut yi ñu jaayoon ay jaambur. Léegi yeen ci seen bopp ngeen di jaay seeni bokk, nun nu war leena jootaat?» Ñu ne xerem, amuñu lu ñu wax. <sup>9</sup> Ma dellu ne leen: «Li ngeen di def de baaxul. Lu leen tee di ragal sunu Yàlla bala noo torox ci kanam noon yi dul Yawut? <sup>10</sup> Man itam, maak samay bokk ak samay nit, nu ngi lebal askan wi xaaalis ak pepp. Waaye nanu leen baal bor bii. <sup>11</sup> Dellooleen leen seeni tool, tey jii, ak seeni tookeeri reseñ ak seen garabi oliw ak seeni kër. Dellooleen leen itam li ngeen leen tegeon, muy benn ci témeeri xaaj, ci xaaalis ak pepp ak biiñ ak diw.» <sup>12</sup> Ñu

ne: «Li nga wax lanuy def. Dinanu leen ko delloo te dootunu leen laaj dara.» Ba mu ko defee ma woo sarxalkat ya, giñloo leen ca kanam sarxalkat ya, ne dinañu def li ñu wax. <sup>13</sup> Ba loolu amee ma yëlëb sama lafu mbubb wi may dence, daldi ne: «Yal na Yàlla yëlëbe nii mboolem ku sàmmul kàddu gii ci yeen, ba xañ ko kërám ak alalam. Yal nañu ko ni yëlbe, ba mu jeexle tàkk.» Mbooloo ma mépp ne: «Amiin,» daldi bokk sargal Aji Sax ji. Mbooloo ma mépp nag def loolu ñu wax.

<sup>14</sup> Bu loolu weese, la ko dale bés ba ñu ma falee boroom diiwaanu Yuda, ca ñaar fukkeelu atu nguurug Artaseres, ba ca fanweeru atam ak ñaar, muy fukki at ak ñaar, lekkunu alalu galag bu boroom diiwaan yelloo, du man, du samay bokk. <sup>15</sup> Waaye boroom diiwaan yi ma jiiu dañu daan not askan wi, di leen sëf seen dund ak seen biiñ, boole ci ñeent fukki dogi xalis\*. Seeni surga it di néewal askan wi doole. Man nag defuma noonu ndax ragal Yàlla. <sup>16</sup> Xanaa kay damaa saxoo jàpp ci liggéeyu tata jii. Masunoo jënd suuf, te sama nit ñépp a daan daje ci liggéey bi. <sup>17</sup> Rax ci dolli daan naa woo téeméeri kilifay Yawut ak juróom fukk (150), di bokk ak ñoom sama njël, te limaalewuma ñi bàyyikoo ci jaambur yi nu séq, di nu fekkisi. <sup>18</sup> Bés bu nekk daan nañu ma waajalal aw yëkk, ak juróom benni xari yar, ak boroomi dund, ak lu baree baree ci mboolem xeetu biiñ, ñu di ko indi fukki fan yu nekk. Loolu taxul ma sàkku benn yoon galag bu boroom diiwaan di dunde, ndax liggéey bi diisoon na lool jeeg ci askan wi.

<sup>19</sup> Kon nag rikk sama Yàlla, bàyyil xel ci man te baaxe ma, ndax mboolem li ma defal askan wii!

## 6

### *Tata ja noppi na*

<sup>1</sup> Sanbalat ak Tobya nag dégg, ñook Gesem Araab baak noon ya ca des ne tabaxaat naa tata ja, ba xar-xar desatu ca, doonte taxawalaguma woon lafi bunt ya.

\* **5:15** 5.15 40 dogi xalis: lim boobu mu ngi tollook liibaru xalis. \* **6:6** 6.6 Gesem ak Gasmu kenn ki la.

† **6:11** 6.11 néeg Yàlla bu mag bi, sarxalkat yi rekk ñoo fa sañoona dugg. Keneen ku fa dugg, ku dul sarxalkat, day dee.

<sup>2</sup> Sanbalat ak Gesem yónnee ci man, ne ma: «Dikkal nu dem Kefirim ca xuru Ono, diisooji fa.» Booba ña nga may fexeel.

<sup>3</sup> Ma yónnee leen ay ndaw, ne leen: «Damaa jàpp lool. Duma mana ñëw. Xanaa duma dakkal liggéey bi, bàyyi ko fi, di leen fekki?» <sup>4</sup> Ñu yónnee ci man, wax ma loolu ba muy ñeenti yoon, sama tont di lenn. <sup>5</sup> Ba ko juróomeel Sanbalat yóbbanteeti ab surgaam genn kàddu gi, mu indaale bataaxal bu tējuwul, yor ko ci loxoom. <sup>6</sup> Ñu bind ci ne:

Dégg nañu ci xeet yi dul Yawut, te Gesem\* sax dëggal na ko, ne yaw yaak sa bokki Yawut dangeen di fexee fippu. Ñu ne moo tax ngay tabaxaat tata ji. Wax nañu sax ne dangaa bégga doon seen buur, <sup>7</sup> te xas ngaa tànn ay yonent yu wara yéene ci Yerusalem, ne falu nga buur ci Yuda. Balaa yàgg nag buuru Pers dina jot ci wax jooju. Kon nag dikkal, nu bokk diisoo ci.

<sup>8</sup> Ma yónnee ca Sanbalat, ne ko: «Li nga wax amul. Yaw yaa ko fental sa bopp.» <sup>9</sup> Fekk na ñoom ñépp a nu doon jéema xoqtal, yaakaar ne dinanu yoqi, ba liggéey bi du sotti. Ma daldi ne: «Léegi nag Yàlla, ngalla dooleel ma!»

<sup>10</sup> Ci kaw loolu ma dem kër Semaya doomu Delaya doomu Metabel, fekk ko mu tēju cib néegam. Mu ne ma:

«Nan ànd dem ca kër Yàlla ga, ca néeg bu mag ba,

nu tēju ca néeg bu mag ba balaa ñu lay reysi.

Guddi lañuy ñëw, reysi la.»

<sup>11</sup> Ma ne ko: «Man duma kuy daw! Te sax gannaaw duma sarxalkat, nu may dugge ci biir néeg Yàlla bu mag bi, di gennaale bakkan†? Man kay demuma.» <sup>12</sup> Booba la ma leer ne ndeke Yàlla yónniwu ko, waaye Tobyaak Sanbalat ñoo ko fey ngir mu birale ma noonu waxyu, di ma fexeel. <sup>13</sup> Dañu koo feyoon ngir mu tiital ma, ma def noonu, muy bàkkaar. Su ko defee ñu yàq sama der, torxal ma.

<sup>14</sup> Sama Yàlla, yal nanga bàyyi xel ci Tobyaak Sanbalat te fey leen seen jëf jii, ñook Nowadiya, yonent bu jigéen beek yeneen yonent yi ma doon xoqtaal.

<sup>15</sup> Ba mu ko defee tata ji noppi ñaar fukki fan ak juróom ci weeru Elul†. Ñu liggéey ko ci juróom fukki fan ak ñaar.

<sup>16</sup> Ba ko sunu noon yépp yégee, ñook mboolem jaambur ñi ñu wër, am nañ tiitaange ak mbetteel mu réy, ndax xam nañu ne sunu ndimbalu Yàlla rekk lanu sottale boobu liggéey.

<sup>17</sup> Ca yooya jamono garmiy Yuda daan nañu bindanteek Tobya lu bare. <sup>18</sup> Bare na sax ci waa Yuda ñu faroon ak moom ci kaw ngiñ, ndax la mu doon denc doomu Sekaña, ma Ara di baayam, te doomam Yowanani di denc doomu Mesulam ma Berekiya di baayam. <sup>19</sup> Rax ci dolli ñu di ma gëmloo ag mbaaxam, te di ko jottli samay kàddu. Tobya nag yónnee ma ay bataaxal, di ma xoqtaal.

## 7

<sup>1</sup> Gannaaw ba ñu tabaxaatee tata ja, ma taxawal lafi bunt ya, ba noppi dénk fara bunt ya seen liggéey, ñook jàngkat yaak Leween ña. <sup>2</sup> Ci kaw loolu ma sas sama mbokk Anani, mu jiite Yerusalem, mook Anaña boroom tata ja, ndax la mu gëna dëggu ñu bare, gën leena ragal Yàlla. <sup>3</sup> Ma ne leen: «Bu bunti Yerusalem ubbiku li feek jant bi tàngul. Santleen fara bunt yi ñuy tëj bunt yi, sës ci galani tëjukaay yi, balaa waa dëkk biy tëdd. Na ku nekk ci waa Yerusalem di wattoo ca bérabu wattukaayam, mbaa buntu kërám.»

<sup>4</sup> Booba dëkk ba réy na, yaatu na; waaye nit ña ca dëkk ñoo néew, te kër ya tabaxewaatul woon. <sup>5</sup> Sama Yàlla xiir ma ma woo garmi yeek kilifa yeek baadoolo yi, ngir bind leen. Ci biir loolu ma gis limeefu làng ya jékka jóge ngàllo ga, ba ñibbsi. Li ma fekk ñu bind ko ci mooy lii:

<sup>6</sup> Ñii nag ñoo di niti diiwaanu Yuda, ña jóge njaam ca ngàllo ga leen Nabukodonosor buuru Babilon yóbbu

woon, te ñu jóge ca ñibbsi Yerusalem ak Yuda, ku nekk ak fa mu dëkk. <sup>7</sup> Ña nga ñibbi ca njiital Sorobabel ak Yosuwe\* ak Neyemi ak Asaryaa ak Ramya ak Nayamani ak Mardose ak Bilsan ak Misperet ak Bigway ak Neyum ak Baana. Limeefu góori bànni Israyil nii la tédde: <sup>8</sup> Askanu Paros ñaari junni ak téeméer ak juróom ñaar fukk ak ñaar lañu (2 172). <sup>9</sup> Askanu Sefatiya ñetti téeméer ak juróom ñaar fukk ak ñaar lañu (372). <sup>10</sup> Askanu Ara di juróom benn téeméer ak juróom fukk ak ñaar (652). <sup>11</sup> Askanu Payat Mowab, soqikoo ci Yeswa ak Yowab, di ñaari junni ak juróom ñetti téeméer ak fukk ak juróom ñett (2 818). <sup>12</sup> Askanu Elam junni ak ñaar téeméer ak juróom fukk ak ñeent lañu (1 254). <sup>13</sup> Askanu Sattu juróom ñetti téeméer ak ñeent fukk ak juróom lañu (845). <sup>14</sup> Askanu Sakay juróom ñaar téeméer ak juróom benn fukk lañu (760). <sup>15</sup> Askanu Binuy juróom benn téeméer ak ñeent fukk ak juróom ñett lañu (648). <sup>16</sup> Askanu Bebay juróom benn téeméer ak ñaar fukk ak juróom ñett lañu (628). <sup>17</sup> Askanu Asgàdd ñaari junni ak ñetti téeméer ak ñaar fukk ak ñaar lañu (2 322). <sup>18</sup> Askanu Adonikam juróom benni téeméer ak juróom benn fukk ak juróom ñaar lañu (667). <sup>19</sup> Askanu Bigway ñaari junni ak juróom benn fukk ak juróom ñaar lañu (2 067). <sup>20</sup> Askanu Adin juróom benn téeméer ak juróom fukk ak juróom lañu (655); <sup>21</sup> askanu Ater soqikoo ci Esekiya, di juróom ñeent fukk ak juróom ñett (98); <sup>22</sup> Askanu Asum ñetti téeméer ak ñaar fukk ak juróom ñett lañu (328). <sup>23</sup> Askanu Besay ñetti téeméer ak ñaar fukk ak ñeent lañu (324). <sup>24</sup> Askanu Arif téeméer ak fukk ak ñaar lañu (112). <sup>25</sup> Askanu Gabawon juróom ñeent fukk ak juróom lañu (95). <sup>26</sup> Waa Betleyem ak Netofa téeméer ak juróom ñett fukk ak juróom ñett lañu (188). <sup>27</sup> Waa Anatot téeméer ak ñaar fukk ak juróom ñett lañu (128).

† **6:15** 6.15 weeru Elul moo yemook juróom benneelu weer ci nattinu yawut, muy ndeeteel ut, jàpp sàttumbar.

\* **7:7** 7.7 Yeswa ci làkku ebrë. Yosuwe lanu bind ci tekki bii, muy doomu Yoccadag te doon sarxalkat bu mag bi mujj lu jiitu ngàllo ga ca Babilon. Yosuwe mii lu gëna bare dees na ko tuddaaleek Sorobabel. Feneen fu ñu ne Yeswa ci téere bi, keneen a tax ñuy wax.

28 Waa Bet Asmawet ñeent fukk ak ñaar lañu (42). 29 Waa Kiryaat Yarim ak Kefira ak Berot juróom ñaar téeméer ak ñeent fukk ak ñett lañu (743). 30 Waa Raama ak Geba juróom benni téeméer ak ñaar fukk ak benn lañu (621). 31 Waa Migmas téeméer ak ñaar fukk ak ñaar lañu (122). 32 Waa Betel ak Ayi téeméer ak ñaar fukk ak ñett lañu (123). 33 Waa Nebo gu ndaw juróom fukk ak ñaar lañu (52). 34 Waa Elam gu ndaw junni ak ñaar téeméer ak juróom fukk ak ñeent lañu (1 254). 35 Waa Arim ñetti téeméer ak ñaar fukk lañu (320) 36 Waa Yeriko ñetti téeméer ak ñeent fukk ak juróom lañu (345). 37 Waa Lodd ak Adidd ak Ono juróom ñaar téeméer ak ñaar fukk ak benn lañu (721). 38 Waa Sena ñetti junni ak juróom ñeenti téeméer ak fanweer lañu (3 930).

39 Sarxalkat yi ñii la:

Askanu Yedaya, soqikoo ci waa kër Yosuwe, di juróom ñeenti téeméer ak juróom ñaar fukk ak ñett (973). 40 Askanu Imer junni ak juróom fukk ak ñaar lañu (1 052). 41 Askanu Pasur junni ak ñaar téeméer ak ñeent fukk ak juróom ñaar lañu (1 247). 42 Askanu Arim junni ak fukk ak juróom ñaar lañu (1 017).

43 Leween ñi ñii la: Askanu Yeswa ma soqikoo ca Kadmiyel. Mooy ñi bànqaasoo ci Odawya, tollu ci juróom ñaar fukk ak ñeent (74).

44 Jàngkat yi ñoo di: Askanu Asaf, di téeméer ak ñeent fukk ak juróom ñett (148). 45 Askanu fara bunt yi ñoo di: Askanu Salum, ak askanu Ater, ak askanu Talmon, ak askanu Akub, ak askanu Atita, ak askanu Sobay, di téeméer ak fanweer ak juróom ñett (138).

46 Liggéeykati kër Yàlla gi ñoo di: Askanu Ciya, ak askanu Asufa, ak askanu Tabawot, 47 ak askanu Keros, ak askanu Siya, ak askanu Padon, 48 ak askanu Lebana, ak askanu Agaba, ak askanu Salmay, 49 ak askanu Xanan, ak askanu Gidel, ak askanu Gayar, 50 ak askanu Raaya, ak askanu Reccin, ak askanu Nekoda, 51 ak askanu Gasam, ak askanu Usa, ak askanu Paseya, 52 ak askanu Besay, ak askanu Meyunim, ak askanu Nefusim, 53 ak askanu Bagbug, ak askanu

Akufa, ak askanu Arur, 54 ak askanu Baslut, ak askanu Meyida, ak askanu Arsa, 55 ak askanu Barkos, ak askanu Sisera, ak askanu Tema, 56 ak askanu Necciya, ak askanu Atifa.

57 Askanu jaami Suleymaan ñii la: Askanu Sotay, ak askanu Soferet, ak askanu Perida, 58 ak askanu Yaala, ak askanu Darkon, ak askanu Gidel, 59 ak askanu Sefatiya, ak askanu Atil, ak askanu Pokeret Asbayim, ak askanu Amon.

60 Mboolem liggéeykati kër Yàlla gi ak askanu jaami Suleymaan yi, ñetti téeméer ak juróom ñeent fukk ak ñaar (392).

61 Ña bàyyikoo Tel Mela ak Tel Arsa ak Kerub Adon ak Imer te manuño firndeel ne seen waa kër maam ak seen askan ci Israyil lañu bokk, ñii la: 62 Askanu Delaya, ak askanu Tobya, ak askanu Nekoda, di juróom benn téeméer ak ñeent fukk ak ñaar (642).

63 Am na it ñu loolu daloon ci sarxalkat yi, muy askanu Abaya, ak askanu Akocc, ak askanu Barsilay, ma doon denc doomu Barsilay waa Galàdd ba, ba tax ñu santale ko seen sant. 64 Ñooñu seet nañu seen limeefu kër maam, waaye gisuñu ko. Ñu daldi leen doyadal, génne leen ci carxal gi. 65 Boroom dëkk ba nag aaye leen ñu lekk ci ñam yu sell yaa sell, ba keroog sarxalkat ba di am lu leer ci ñoom ci jumtukaayi tegtal yi ñuy wax Urim ak Tumim.

66 Limu mbooloo ma mépp ba mu daj, ñeent fukki junneek ñaar ak ñetti téeméer ak juróom benn fukk lañu (42 360), 67 te limaaleesul seen jaam yu góor ak yu jigéen, yi tollu ci juróom ñaari junni ak ñetti téeméer ak fanweer ak juróom ñaar (7 337). Amoon nañu itam ay jàngkat yu góor ak yu jigéen, yu tollu ci ñaar téeméer ak ñeent fukk ak juróom (245), 68 ak ñeenti téeméeri giléem ak fanweer ak juróom (435), ak juróom benni junniy mbaam ak juróom ñaar téeméer ak ñaar fukk (6 720).

69 Am na ñu jiite seen kër baay, ñu def seen loxo ca liggéey ba. Boroom dëkk ba def na ca alal ja junniy poseti wurus (1 000) ak juróom fukki këll (50)

ak fanweeri mbubbi sarxalkat (30) ak juróomi téeméeri dogi xaalis (500)†.

<sup>70</sup> Ñenn ca ña jiite seen kër baay def nañu seen loxo ca alal ja ñu jagleel liggéey ba, mu tollu ci ñaar fukki junniy poseti wurus (20 000) ak ñaari junniy dogi xaalis ak ñaar téeméer (2 200).

<sup>71</sup> La des ca askan wa joxe na ñaar fukki junniy poseti wurus (20 000) ak ñaari junniy dogi xaalis (2 000) ak mbubbi sarxalkat yu tollu ci juróom benn fukk ak juróom ñaar (67).

<sup>72</sup> Ba loolu amee bànni Israyil gépp sancaat ca seen dëkki cosaan, sarxalkat yaak Leween ñaak fara bunt yaak jàngkat yaak ñenn ca baadoolo yaak liggéeykati kër Yàlla ga.

## 8

### *Esra jàngal na mbooloo ma*

Ba juróom ñaareelu weer wa teroo, ba bànni Israyil sancaat seeni dëkk, <sup>1</sup> mbooloo mépp a daje, di benn bopp ca mbedd ma jàkkaarlook buntu Ndox ma. Ñu wax Esra bindkat ba, ne ko mu indi téereb yoonu Musaa wi Aji Sax ji dénk Israyil. <sup>2</sup> Esra, sarxalkat ba, indi téereb yoon wi keroog benn fanu juróom ñaareelu weer wa, fa kanam mbooloo ma, góor ak jigéen, mboolem ña seeni at may ñu dégg ko. <sup>3</sup> Esra jàng na ko janook mbedd ma jàkkaarlook buntu Ndox ma, dale ko ba bêt setee ba ca digg bëccëg. Mbooloo maa nga teew, góor ak jigéen, mboolem ña dégg la ca nekk. Ñépp nag di teewlu kàdduy téereb yoon wa.

<sup>4</sup> Esra bindkat baa nga taxaw ca kaw dëxu bant ba ñu defaral bés ba. Ña feggook moom ca ndijooram di Matitiya ak Sema ak Anaya ak Uri ak Ilkiya ak Maaseya. Ña ko féete càmmoñ di Pedaya ak Mikayel ak Malkiya ak Asum ak Asbadana ak Sàkkaryaa ak Mesulam. <sup>5</sup> Ba Esra di ubbi téere ba, mbooloo mépp a ca teg seeni bêt, ndax mbooloo mépp la tiim. Mbooloo mépp nag jóg taxaw. <sup>6</sup> Esra daldi sant Aji Sax ji, Yàlla

ju màgg ji. Mbooloo ma mépp ànd ne: «Eskëy, eskëy!» yékkati seeni loxo, sukk, sujjóotal Aji Sax ji, dëpp seeni jë fa suuf. <sup>7</sup> Ci kaw loolu Yeswa ak Baani ak Serebya ak Yamin ak Akub ak Sabtay ak Odiya ak Maaseya ak Kelita ak Asaryaa ak Yosabàdd ak Xanan ak Pelaya ak Leween ña di leeralal mbooloo ma yoonu Musaa. Mbooloo maa nga taxaw, kenn ku nekk benn bérab. <sup>8</sup> Ci biir loolu ñu di leen jàngal téereb yoonu Yàlla wi, njàng mu leer, di leen ko firil ba ñu xam li ñuy jàng.

<sup>9</sup> Gannaaw loolu Neyemi boroom dëkk ba ànd ak Esra sarxalkat ba, di bindkat ba ba tey, ak Leween ñay xamal mbooloo ma, wax ak ñoom ñépp, ne leen: «Bésuub tey jii, bés bu sell la, ñeel Aji Sax ji, seen Yàlla. Buleen ci naqarlu, buleen ci jooy.» Booba mbooloo ma mépp a doon jooy ca kàdduy yoon wa ñu dégg.

<sup>10</sup> Esra ne leen: «Ayca demleen lekk lu gëna duuf, naan lu neexa neex te sédd ci ñi amul lu ñu togg; ndax bésuub tey bés bu sell la ñeel sunu Boroom. Kon buleen ci naqarlu kat, ndax bége Aji Sax ji mooy seen doole!» <sup>11</sup> Leween ña nag di dëfal mbooloo ma mépp, naan leen: «Noppileen waay, ndax tey bés bu sell la. Kon buleen ci naqarlu.» <sup>12</sup> Ba mu ko defee mbooloo ma mépp ñibbi, di lekk ak a naan ak a yekkle di bannexu bu baax. Fekk na ñu xam kàddu ya ñu leen doon xamal.

### *Feddi nañu màggalu Mbaar yi*

<sup>13</sup> Keroog ñaari fan ca weer wa nag ña yilif seen kër baay yépp ànd ak sarxalkat yaak Leween ña, ñu daje ca Esra bindkat ba, di gëstu kàdduy yoon wi. <sup>14</sup> Ci kaw loolu ñu gis ne bind nañu ci yoon wi Aji Sax ji santaane, te Musaa jottli ko, ne: «Bànni Israyil dañoo wara dëkk ci ay mbaar diiru màggalu weeru juróom ñaareel wa.» <sup>15</sup> Ñu siiwal nag ndigal, ca mboolem seeni dëkk ak ca Yerusalem, daldi yéene ne: «Demleen ca tund ya, wuti ay cari garabi oliw, ak cari garabi pëe\*, ak cari garabi mirt, ak cari garabi tándarma, ak cari garab yu sëq, ndax

† 7:69 7.69 Fi ñu tudd fanweeri mbubbi sarxalkat yi ak juróomi téeméeri dogi xaalis, am na ñu fi boole ñaari lim yooyu, moomale ko dayob mbubbi sarxalkat yi donj. \* 8:15 8.15 garabi pëe xeetoo naak filaawoo.

ñu defare ko ay mbaar, muy li ñu bind.»  
<sup>16</sup> Ba loolu amee mbooloo ma wuti ay car, defare ko ay mbaar ca seen kaw taaxi kër ak ca seeni biir ètt ak ca ètti kër Yàlla ga ak ca mbedd ma ca buntu Ndox ma ak ca mbedd ma ca buntu Efrayim. <sup>17</sup> Ci kaw loolu mboolem ña ñibbsee ca njaam ga defar ay mbaar, dal ca mbaar ya. La ko dale jamonoy Yosuwe doomu Nuun, ba bés sub keroog bànni Israyil defatuñu woon lu ni mel. Muy mbégte mu réya réy. <sup>18</sup> Ci biir loolu ñuy jàng ci téereb yoonu Yàlla wi bés bu nekk, tàmbalee ko ca bés bu jëkk ba, ba ca bés bu mujj ba. Amal nañu màggal ga diiru juróom ñaari fan. Bés sub juróom ñetteel ba nag ñu woote ca am ndaje mu sell, muy la ñu digle.

## 9

### *Kàdduy tuub jib na*

<sup>1</sup> Keroog ñaar fukki fan ak ñeent ca weer woowa, bànni Israyil daje nañu, sol ay saaku, xëppoo suuf, di ko ñaawloo ci biir koor. <sup>2</sup> Ci kaw loolu askanu Israyil beddeeku doxandéem yépp. Ñu taxaw nag, tudd seen bàkkaari bopp ak seen ñaawtéefi maam. <sup>3</sup> Ci biir loolu ñu taxaw, di jàng ca seen téereb yoonu Yàlla Aji Sax ji, diirub xaajaatu bés ba. Xaajaatu bés ba ca topp ñuy tuub ak a sujjóotal seen Yàlla Aji Sax ji. <sup>4</sup> Yeswa daldi taxaw ca kaw dëx ba ñu jagleel Leween ña, mook Baani ak Kadmiyel ak Sebaña ak Buuni ak Serebya ak Baani meneen ma, ak Kenani. Ña ngay àddu ca kaw, di wax ak seen Yàlla Aji Sax ji. <sup>5</sup> Yeswa nag ak Kadmiyel ak Baani ak Asabneya ak Serebya ak Odiya ak Sebaña ak Petaya, Leween ñooñu ñépp àddoondoo ne: «Màggal-leen seen Yàlla Aji Sax ji sax dàkk, ba fàww. Nañu màggal sa tur wu tedd, wi raw gépp cant ak ngèrëm.»

<sup>6</sup> «Yaw Aji Sax ji, yaw kenn yaa sàkk asamaan yi, ba ca asamaan ya gëna kawe ak seen gàngoor yépp, ak suuf ak lépp li ci kawam, ak géej ak li ci biiram lépp. Yooyu yépp, yaay ki leen di may bakkan, te gàngoori asamaan, yaw lañuy sujjóotal. <sup>7</sup> Yaw yaa di Aji Sax ji, Yàlla ji tànn Ibraam, jële ko Ur

gu waa Kalde, tudde ko Ibraayma. <sup>8</sup> Yaa gis mu nangul la ci xolam; nga fas ak moom kóllère, dig askanam réewum Kanaaneen ñaak Etteen ñaak Amoreen ñaak Periseen ñaak Yebuseen ñaak Girgaseen ña. Te def nga li nga dige it, ndax yaw boroom njekk nga. <sup>9</sup> Ba nga gisee sunu toroxtey maam ya ca Misra, dégg seeni yuux ca tefesu géēju Barax ya, <sup>10</sup> yaa wàcce ay firndeeki kéemaan ca kaw Firawnaaki jawriñam ñépp ak askanu réewam mépp, ndaxte yégoon nga reewande ga waa Misra doon jëflanteek sunuy maam. Ca nga siiwal saw tur ba tey jii. <sup>11</sup> Géej nga leen xaral, ñu jaare suuf su wow konḡ, ca digg géej ga, ña leen doon dàq nag, nga fël leen, ca biir xóote ya, ñu tàbbi niw doj ci ndox mu baawaan. <sup>12</sup> Ci kaw loolu nga di leen jiitee bëccëg aw taxaaru niir, di leen jiitee guddi taxaaru sawara, di leen niital yoon wa ñuy jaare. <sup>13</sup> Ca tundu Sinayi wa nga wàcc, àddoo asamaan, wax ak ñoom, dénk leen ndigal yu jub, ak yoon yu dëggu, ak dogali yoon ak santaane yu baax. <sup>14</sup> Sa bés sub Noflaay bu sell it, yaa leen ko xamal, te say santaaneeki dogali yoon ak saw yoon, yaa leen ko dénk. Musaa, sa jaam ba, jottli leen ko. <sup>15</sup> Pepp mu tawe asamaan nga faje seen xiif, ndox mu balle ciw doj, nga faje seen mar, te ne leen ñu dem nanguji réew ma nga leen giñaloon.

<sup>16</sup> «Sunu maam yooyu kay ñoo mujj fuuy, sajjuu loos, ba sàmmuñu say santaane. <sup>17</sup> Ñoo baña dégg, baña bàyyi xel sa kéemaan yi nga def ci seen biir, te ñoo sajjuu loos, fétteeral ba fal njiit, nara dellu ca seen njaam ga. Waaye yaw yaay Yàlla jiy boroom njéggal ak yiw ak yërmande, di muñ mer, te bare ngor, ba tax wacoo leen. <sup>18</sup> Dem nañu sax ba móolal seen bopp jëmmu wëllu te naan: “Yeen, seen Yàllaa ngi; moo leen génnee réewum Misra,” ñakke la kersa lool. <sup>19</sup> Waaye yaw, ci sa yërmande ju réy, wacoo leen ca màndiḡ ma. Taxaaru niir wa noppiwula taxaw ci seen kanam bëccëg bu nekk, di leen jiite ca yoon wa. Taxaaru



sawara wa it noppiwula taxaw guddi, di leen niital yoon wa ñuy jaar. <sup>20</sup> Sa xel mu rafet nga leen may ba ñu mana ràññee, sa mànn\* it, noppiwuloo leen koo leel, teg ca ndox ma nga leen daan fajale mar. <sup>21</sup> Diiru ñeent fukki at nga leen dundal ca màndiŋ ma, ñàkkuñu dara. Seeni yére ràppul, seeni tànk newiwul.

<sup>22</sup> «Yaa leen moomale ay réew aki xeet, séddale leen suuf. Ñu nangu réewum Siwon, réewum buurub Esbon, teg ca réewum Og buuru Basan. <sup>23</sup> Giiral nga leen, ba ñu tollu ni biddiwi asamaan, ba noppi dugal leen ca réew ma nga waxoon seeni maam ñu nanguji ko. <sup>24</sup> Ci kaw loolu seeni doom nanguji réew ma. Yaa leen nangulal Kanaaneen ña dëkkoon ca réew ma, teg ci seeni loxo buuri réew maak baadoola ya, ñu di leen def lu leen soob. <sup>25</sup> Nangu nañu ay dëkk yu tata wër, ak suuf su nangu, aakimoo kër yu fees ak gépp ngëneel, aki teen, ak tóokëri reseñ, ak garabi oliw, garab yay meññ, ne xas; ñuy lekk ba suur. Ñu regg, di xéewloo sa mbaax gu réy gi.

<sup>26</sup> «Waaye déguñu ndigal, xanaa di la gantal. Dañoò sànni saw yoon seen gannaaw; sa yonent ya leen doon xiirtal ci délsi ci yaw, ñu rey leen, ba ñàkke la kersa lool. <sup>27</sup> Nga daldi leen teg ci seen loxoy noon, ñu fitnaal leen. Teewul ñu jàq, woo la wall, nga dégge ko fa asamaan, ba jox leen ñu leen xettli, ci sa yërmande ju yaa, ñu xettli leen ci seen dooley noon. <sup>28</sup> Naka lañu am noflaay, daldi dellu ci def lu bon fi sa kanam. Nga wacc leen nag ca seen loxoy noon, ñu moom leen. Ba ñu delloo woo la wall, yaa leen dégge fa asamaan, ba xettli leen ay yooni yoon ci sa yërmande ju réy. <sup>29</sup> Artu nga leen ndax ñu dellu ci saw yoon, teewul ñu bew, ba sàmmuñu say santaane, xanaa di moy sa àttey yoon yiy taxa dund képp ku ci sàmmu. Ñuy danjiiral, sajju loos, bañ laa déggal. <sup>30</sup> Ndaxam muñal nga leen ay at yu bare, di leen artoo

sam xel, say yonent di leen ko jottli; waaye taxul ñu déglu. Nga teg leen nag ci loxoy waa réew yi. <sup>31</sup> Sa yërmande ju réy nga topp, ba faagaagaloo leen. Wacculoo leen it, ndax yaw Yállay yiw ak yërmande nga!

<sup>32</sup> «Kon rikk waay, yaw sunu Yàlla, Yàlla ju màgg, ji àttan te mata ragal, di sàmm kóllèreek ngor; ngalla bul xeeb mboolem toskare ji dikkal sa ñoñ, muy buur ak njiit, sarxalkat ak yonent, dale ca sunuy maam ba ci nun ñépp tey, ca janti buuri Asiri, ba sunu jonni yállay tey. <sup>33</sup> Yaw nag yaa yelloo njekk ci mboolem li nu dal, ndax worma nga jéfe, nun noo bon. <sup>34</sup> Sunuy buur ak sunuy njiit nag ak sunuy sarxalkat ñoo dale ca sunuy maam, di baña topp sa yoon, baña sàmm say santaane, bàyyiwuñu xel it ci kàdduy seede yi nga leen artoo. <sup>35</sup> Ba ñu moomee seenum réew, nekk ci sa teraanga ju réy ja nga leen may ca suuf su yaa, su nangu sa nga leen jox, jaamuwñu la woon te dëdduwñu seen manin yu ñaaw ya. <sup>36</sup> Nu ngi nii tey diy jaam. Réew ma nga joxoon sunuy maam, ñuy lekk meññeefam aki ngëneelam, fi lanu doon nii ay jaam. <sup>37</sup> Li suuf siy jur a ngi ne gàññ, di alalu buur yi nga teg ci sunu kaw, ndax sunuy moy. Dañu noo yilif, yilif sunug jur, nu mu leen neexe, nu nekke njàqare ju réy.»

## 10

### *Bànni Israyil dogu nañu*

<sup>1</sup> Loolu yépp tax na nuy tëral takktoo bu dogu, bind ko, sunuy njiit ak sunuy Leween ak sunuy sarxalkat def ci seen màndargay torlukaay.

<sup>2</sup> Ñi ko torlu ñoo di:

Boroom dëkk bi Neyemi doomu Akalya, mook Cedekiya <sup>3</sup> ak Seraya ak Asaryaa ak Yeremi <sup>4</sup> ak Pasur ak Amarya ak Malkiya <sup>5</sup> ak Atus ak Sebaña ak Malug <sup>6</sup> ak Arim ak Meremot ak Obadiya <sup>7</sup> ak Dañeel ak Ginton ak Barug <sup>8</sup> ak Mesulam ak Abya

\* 9:20 9.20 mànn: seetal ci *Mucc ga* 16.

ak Miyamin <sup>9</sup> ak Maasya ak Bilgay ak Semaya. Ñooñu ñoo di sarxalkat ya.

<sup>10</sup> Leween ñi ñoo di:

Yeswa doomu Asaña, ak Binuy, kenn ca doomi Enadàdd, ak Kadmiyel. <sup>11</sup> Seeni bokk ca lañu, di Sebaña ak Odiya ak Kelita ak Pelaya ak Xanan <sup>12</sup> ak Mika ak Reyob ak Asabya <sup>13</sup> ak Sakuur ak Serebya ak Sebaña <sup>14</sup> ak Odiya ak Baani ak Beninu.

<sup>15</sup> Njiiti askan wi ñoo di:

Paros ak Payat Mowab ak Elam ak Sàttu ak Baani <sup>16</sup> ak Buuni ak Asgàdd ak Bebay <sup>17</sup> ak Adoña ak Bigway ak Adin <sup>18</sup> ak Ater ak Esekiya ak Asur <sup>19</sup> ak Odiya ak Asum ak Besay <sup>20</sup> ak Arif ak Anatot ak Nebay <sup>21</sup> ak Magpiyas ak Mesulam ak Esir <sup>22</sup> ak Mesesabel ak Cadog ak Yaduwa <sup>23</sup> ak Pelaca ak Xanan ak Anaya <sup>24</sup> ak Oseya ak Anaña ak Asub <sup>25</sup> ak Aloyes ak Pila ak Sobeg <sup>26</sup> ak Reyum ak Asabna ak Maaseya <sup>27</sup> ak Axiya ak Xanan ak Anan <sup>28</sup> ak Malug ak Arim ak Baana.

### *Solob dogu baa ngi*

<sup>29</sup> Bànni Israyil ga ca des nag fekksi leen, muy sarxalkat yaak Leween ñaak fara bunt yaak jàngkat yaak liggéeykati kër Yàlla ga, di mboolem nun ñi beddeeku woon waasoy réew yi, ngir topp yoonu Yàlla wi, nook sunuy jabar ak sunu doom yu góor ak yu jigéen, mboolem ñi xam te xàmme. <sup>30</sup> Ci kaw loolu nu ànd ak sunu bokki garmi, waatook ñoom ne dinanu topp yoonu Yàlla wi mu dénkaane, Musaa jaamam ba jottli; di ko sàmm, di jêfe mboolem sunu santaaney Boroom Aji Sax ji, ak àttey yoonam ak dogali yoonam.

<sup>31</sup> Nu ne nag dunu may waa réew mi sunu doom yu jigéen te dunu jèlal sunuy doom seeni doom yu jigéen.

<sup>32</sup> Te itam bu waa réew mi indee am njaay mbaa lépp luy pepp, di ko jaay ci bés sub Noflaay, dunu ko jënd ci ñoom bés sub Noflaay mbaa bés bu sell, te atum juróom ñaareel mu nekk dinanu bale bépp bor.

<sup>33</sup> Ci biir loolu nu warloo santaaney joxe at mu nekk ñeenti garaami xalis, bu jëm ca sunu liggéeyu kër Yàlla ga, <sup>34</sup> jëm ca mburum wone ba, ak saraxi pepp yi war bés bu nekk, ak saraxi

dóomal yu bés bu nekk, ak saraxi bési Noflaay, ak yu Terutel weer ak yu bési màggal yi, ak yeneen yu ñu sellalal Yàlla, ak saraxi póotum bàkkaar yi bànni Israyil di jotoo, ak mboolem la war ca sunu liggéeyu kër Yàlla ga.

<sup>35</sup> Ay bant lanu tegoo ci sunu biir, nun sarxalkat yeek Leween ñeek baadoolo yi, ngir dogalal waa kër gu nekk àpp ba ñu wara aye cim at, te ñu war caa yóbbu seen sasu matt ca sunu kër Yàlla ga, ngir taal ko ca sunu sarxalukaayu Yàlla Aji Sax ji, muy la ñu bind ci téereb yoon wi.

<sup>36</sup> Nu dogu ba tey ne dinanu yóbbu ca kër Aji Sax ji, at mu nekk, li sunu suuf jékka meññle ak lu garab yépp jékka ñorle. <sup>37</sup> Ci biir loolu nu dogoo def li ñu bind ci yoon wi, di yóbbu ca sunu kër Yàlla ga sunu taaw yu góor ak lu sunu jur taawloo, gu gudd gaak gu gàtt ga, di teg lépp ci loxoy sarxalkat ya fay liggéey. <sup>38</sup> Ci kaw loolu nu wara yóbbu ca sunu néegi dencukaayi kër Yàlla ga lu jékk ci sunu notu sunguf, ak sunu jooxey pepp, ak sunu meññeefi garab yépp, ak sunu biiñ ak diw, di teg lépp ci loxoy sarxalkat yi. Ba tey nuy indil Leween ñi céru fukkeelub lépp luy meññee ci sunu suuf, ndax Leween ñeey dajalesi céri fukkeel yi ci gox yi nuy bey yépp. <sup>39</sup> Sarxalkat bu askanoo ci Aaróona mooy gunge Leween ñiy jèlsi céri fukkeel yi. Su ko defee Leween ñi yóbbu fukkeelu céri fukkeel yi ba ca sunu kër Yàlla ga, fat ko ca néegi dencukaayi alal ya. <sup>40</sup> Ci néeg yooyu la bànni Israyil ak askanu Leween ñi di yóbbu jooxeb pepp ba ak biiñ baak diw ga; fa la ndabi bérab bu sell ba dence, te fa la sarxalkat, ya sasoo liggéey ba nekk, ñook fara bunt yaak jàngkat ya.

Nu dogu nag ne dunu sàggane sunu kër Yàlla ga.

## 11

<sup>1</sup> Ba mu ko defee njiiti mbooloo ma dëkk Yerusalem. Ña des ca mbooloo ma tegoo bant ngir fukk ñu daje kenn génne ca, dëkk Yerusalem, dëkk bu sell

bi, juróom ñeent ñi ci des toog ca (seeni) dëkk yu ndaw. <sup>2</sup> Mbooloo ma nag gërëm ñi nangul seen bopp ne dañuy dëkk Yerusalem. <sup>3</sup> Dëkki Yuda ya bànni Israyil yaa ca dëkkoon, ñook sarxalkat yaak Leween ñaak, ña féetewoo liggéey yu sew ya ca kër Yàlla gaak ña askanoo ca jaami Suleymaan ya, ku nekk ak sa céru suuf, ca dëkk ba nga bokk. Nii ñuy lim nag ñooy njiiti diiwaan ñi dëkke Yerusalem. <sup>4</sup> Amoon na it ñu dëkkoon Yerusalem te bokk ci giirug Yuda ak giirug Beñamin.

Ñi bokk ci askanu Yuda Ataya la, ku góor ka Usiya di baayam; Sàkkaryaa di baayu Usiya; Amarya di baayi Sàkkaryaa; Sefatiya di baayi Amarya; Mayalel di baayi Sefatiya, Peres di baayi Mayalel; <sup>5</sup> ak Maaseya, ku góor ka Barug di baayam; Kol Xose di baayu Barug; Xasaya di baayu Kol Xose; Adaya di baayu Xasaya; Yowarib di baayu Adaya; Sàkkaryaa may doomu ku dëkk Silon di baayu Yoyarib. <sup>6</sup> Waa askanu Peres ya dëkk Yerusalem ñeenti téeméeri jàmbaar lañu ak juróom benn fukk ak juróom ñett.

<sup>7</sup> Ñi bokk ci askanu Beñamin Salu la, ku góor ka Mesulam di baayam; Yowet di baayu Mesulam, Pedaya di baayu Yowet; Kolaya di baayu Pedaya, Maaseya di baayu Kolaya, Itiyel di baayu Maasya, Yisaya di baayu Itiyel; <sup>8</sup> Gabay ak Salay topp ca Ñoom ñépp di juróom ñeenti téeméer ak ñaar-fukk ak juróom ñett. <sup>9</sup> Yowel doomu Sikkri moo leen jiite woon, Yewuda doomu Asenuwa topp ca, di ñaareelu kilifag dëkk ba.

<sup>10</sup> Sarxalkat ya Yedaya doomu Yoyarib Yakin bokk na ca, <sup>11</sup> ak Seraya, baayam di Ilkiya, Mesulam di baayu Ilkiya, Sadog di baayu Mesulam, Merayot di baayu Sadog, Ayitub, njiital kër Yàlla ga di baayu Merayot. <sup>12</sup> Ñoom ak ña ñu àndal ca liggéeyu kër Yàlla ga. Ñuy juróom ñetti téeméer ak ñaar fukk ak ñaar. Adaya ma Yerowam di baayam it bokk na ca. Pelaliya di baayu Yerowam, Amsi di baayu Pelaliya, Sàkkaryaa, di baayu Amsi, Pasur di baayu Sàkkaryaa, Malkiya di baayu Pasur. <sup>13</sup> Maam la ak ña mu

àndal ca liggéey ba te ñu yilif seeni kër baay, ñuy ñaar téeméer ak ñeent-fukk ak ñaar. Amasay ma Asarel di baayam bokk na ca; Axsay di baayu Asarel; Mesilemot di baayu Axsay; Imer di baayu Mesilemot. <sup>14</sup> Moom la ak seeni bokk, yu jàmbaare te ñeme. Ñuy téeméer ak ñaar fukk ak juróom ñett. Sabdiyel ma Agdolim di baayam moo leen jiite woon.

<sup>15</sup> Leween ña Semaya ma Xasub di baayam bokk na ca, Asrikam ay baayu Xasub; Asabiya di baa yu Asrikam, Buni di baayam Asabiya; <sup>16</sup> moom la ak Sabtay ak Yosabàdd, di ñaari kilifay Leween yu sasoo liggéeyu kër Yàlla ga, fa féete biti; <sup>17</sup> ak Mataña ma baayam di Mika. Sabdi mooy baayu Mika; Asaf miy baayu Sabdi moo doon kilifa gay jiite ci cant ak ñaan; ak Bagbukiya miy mbokkum Mataña tey njiit li topp ci moom ak Abda mi Samuya di baayam; Galal di baayu Samuya, Yedutun di baayu Galal. <sup>18</sup> Mboolem Leween ña dëkkoon ca dëkk bu sell ba ñaar téeméer lañu ak juróom ñett fukk ak ñeent. <sup>19</sup> Wattukati bunt ya Akub la woon ak Talmon ak seeni bokk. Ñoo doon wattu bunt ya, tollu ci téeméer ak juróom ñaar fukk ak ñaar.

<sup>20</sup> Ña des ci bànni Israyil nag, boole ca sarxalkat yaak Leween ña ca des daldi dëkke mboolem dëkki Yuda ya, ku nekk ak fa mu séddoo.

<sup>21</sup> Ci kaw loolu ña féetewoo liggéey yu sew ya ca kër Yàlla ga dëkk Ofel, Siyxa ak Gispá jiite leen.

<sup>22</sup> Kilifag Leween ña ca Yerusalem moo doon Utsi ma Bani di baayam; Xasabiya di baayu Bani, Mataña di baayu Xasabiya, Mika di baayu Mataña. Utsi bokkoon ci ñi askanoo ci Asaf te doonoon woykat yay woy ca kër Yàlla ga. <sup>23</sup> Woykat ya sax ña nga nekkoon ca ndigalal Buur lu leen di dogalal la leen war bés bu nekk.

<sup>24</sup> Petaya ma baayam di Mesesabel mu bokk ci askanu Sera doomu Yuda moom la Buur dénkkoon mboolem mbir yi soxal mbooloo mi.

<sup>25</sup> Ci wàllu dëkk yu ndaw yeek seeni àll nag am na waa kër Yuda yu dëkke woon Kiryaat Arba ak dëkk-dëkkaan ya ko wër, am ñu ca dëkke Dibon ak la ko wër, am

ñu dëkke Yekabseel ak gox ya ko wër; <sup>26</sup> am ñu dëkke Yeswa ak Molada ak Bet Pelet; <sup>27</sup> ak Accar Suwal ak Beerseba ak la ko wër. <sup>28</sup> Mu am ñu dëkke Ciglaag ak Mekona ak la ko wër; <sup>29</sup> ak En Rimon ak Sora ak Yarmut; <sup>30</sup> ak Sanowa ak Adulam ak gox ya ko wër ak Lakis aki àllam ak Aseka ak la ko wër. Noonu ñu dëkke la dale Beer Seba ba ca xuru Inom.

<sup>31</sup> Noonu waa giirug Beñamin dëkke la dale Geba ak Migmas, boole ca Aya ak Betel ak la ko wër. <sup>32</sup> Mu am ñu ca dëkke Anatot ak Nob ak Anaña; <sup>33</sup> ak Accor ak Raama ak Gitayim; <sup>34</sup> ak Adit ak Seboyim ak Nebalat; <sup>35</sup> ak Lot ak Ono ca xuru liggéeykat ya. <sup>36</sup> Am na nag ay kuréli Yudeen ñu bàyyikoo Yuda sancii ca waa giirug Beñamin.

## 12

### *Ñii ñooy Leween ñeek sarxalkat yi jëkka ñibbsi*

<sup>1</sup> Sarxalkat yaak Leween ña ñibbsi, ànd ak Sorobabel doomu Selcel, ak Yosuwe sarxalkat bu mag ba, ñii la:

Seraya ak Yereji ak Esra <sup>2</sup> ak Amarya ak Malug ak Atus <sup>3</sup> ak Sekaña ak Reyum ak Meremot <sup>4</sup> ak Ido ak Gintoy ak Abya <sup>5</sup> ak Miyamin ak Maadiya ak Bilga <sup>6</sup> ak Semaya ak Yowarib ak Yedaya <sup>7</sup> ak Salu ak Amog ak Ilkiya ak Yedaya. Ñooñooy kilifay sarxalkat yeek seeni boka ca jamonoy Yosuwe.

<sup>8</sup> Leween ñi ñoo doon Yeswa ak Binuy ak Kadmiyel ak Serebya ak Yuda ak Mataña may jiite jàngi cant ya, mooki bokkam. <sup>9</sup> Bagbukiya ak Uni ak seeni bokk janook ñoom ca liggéey ba.

<sup>10</sup> Yosuwe, sarxalkat bu mag ba mooy baayu Yowakim. Yowakim di baayu Elyasib, Elyasib di baayu Yowada, <sup>11</sup> Yowada mooy baayu Yonatan, Yonatan di baayu Yaduwa.

<sup>12</sup> Ca jamonoy Yowakim sarxalkat bu mag ba, ña jiite woon kër sarxalkat ya ñii la: Meraya ma bawoo ca waa kër Seraya ak Anaña bawoo ca waa kër Yereji, <sup>13</sup> Mesulam bawoo ca waa kër Esra, Yowanan bawoo ca waa kër Amarya, <sup>14</sup> Yonatan bawoo ca waa kër Malug, Yusufa bawoo ca waa kër Sebaña, <sup>15</sup> Adna

bawoo ca waa kër Arim, Elkay bawoo ca waa kër Merayot, <sup>16</sup> Sakkaryaa bawoo ca waa kër Ido, Mesulam bawoo ca waa kër Ginton, <sup>17</sup> Sikkri bawoo ca waa kër Abya. Mu am ñu jóge ca waa kër Miñamin. Piltay bawoo ca waa kër Mowadiya, <sup>18</sup> Samwa bawoo ca waa kër Bilga, Yonatan bawoo ca waa kër Semaya, <sup>19</sup> Matenay bawoo ca waa kër Yowarib, Usi bawoo ca waa kër Yedaya, <sup>20</sup> Kalay bawoo ca waa kër Salu, Eber bawoo ca waa kër Amog, <sup>21</sup> Asabya bawoo ca waa kër Ilkiya, Netanel bawoo ca waa kër Yedaya.

<sup>22</sup> Ca janti sarxalkat yu mag ya, Elyasib ak Yowada ak Yowanan ak Yaduwa, ku nekk ak jamonoom, ña jiite woon keri Leween ña ak sarxalkat ya, bindoon nañu leen ci biir nguug Daryus buuru Pers. <sup>23</sup> Ña jiite woon seeni kër baay te askanoo ci Lewi, ba ca jamonoy Yonatan sëtub Elyasib daan nañu leen bind ñoom ñépp ca téere ba ñu dippee Xew-xew ya.

<sup>24</sup> Njiiti Leween ñi ñoo doon: Asabya ak Serebya ak Yeswa doomu Kadmiyel, ñook seen bokk ña ñu daan awanteel làng ak làng ci jàngi cant, muy la Daawuda gooru Yalla ga santaane woon. <sup>25</sup> Mataña ak Bagbukiya ak Obadiya ak Mesulam ak Talmon ak Akub ñoo doon fara bunt ya, di wattu néegi dencukaay, ya ca bunt ya.

<sup>26</sup> Ñooño fa nekkoon ca jamonoy Yowakim doomu Yosuwe. Yosuwe, Yocadag mooy baayam. Ñoo fa nekkoon itam ca jamonoy Neyemi boroom dëkk ba, ak Esra ma doon sarxalkat, di bindkat.

### *Daloo nañu tata ja*

<sup>27</sup> Gannaaw gi, ca xewu daloog tatay Yerusalem ja, ñu wooye Leween ña mboolem fa ñu dëkke, indi leen Yerusalem, ngir ñu manggal daloo ga ci biir mbég ak jàngi cant; tégum weñ ya jib, ànd ak xeeti xalam. <sup>28</sup> Ci biir loolu ñu indi jàngkat ya ñoom it, boole leen jële ca diiwaan ba wër Yerusalem, ca dëkk yu ndaw ya ca Netofa, <sup>29</sup> ak Bet Gilgal ak diiwaani Geba ak Asmawet. Fekk na jàngkat ya tabax ay dëkk yu ndaw fa wër Yerusalem.

<sup>30</sup> Ba loolu amee sarxalkat yaak Leween ña laabal seen bopp, doora laabal mbooloo ma, ak bunt yaak tata ja.

<sup>31</sup> Ci kaw loolu ma yéegloo njiiti Yudeen ña ca kaw tata ja, daldi sos ñaari kuréli jàngkat yu mag. Genn ga di dox ca kaw tata ja ci wetu ndijoor, wuti buntu Sën ba. <sup>32</sup> Osaya ma nga topp ca seen gannaaw, ànd ak genn-wàllu njiiti Yudeen ña, <sup>33</sup> ak Asaryaa ak Esra ak Mesulam, <sup>34</sup> ak Yuda ak Beñamin ak Semaya ak Yeremi. <sup>35</sup> Lenni sarxalkat yaa nga ca topp aki liit, di ñi ànd ak Sàkkaryaa doomu Yonatan. Yonatan, Semaya mooy baayam; Semaya, Mataña di baayam, Mataña, Mikaya mooy baayam; Mikaya, Sakuur ay baayam; Sakuur, Asaf mooy baayam. <sup>36</sup> Sàkkaryaa ànd aki bokkam, ñuy Semaya ak Asarel ak Milalay ak Gilalay ak Maay ak Netanel ak Yuda ak Anani. Ña nga yore ay juntuukaayi xumbéen yu Daawuda, góorug Yàlla ga. Esra bindkat ba moo leen jiite woon. <sup>37</sup> Ñu dikk ba tollook buntu Ndox ma, janook dëggastal, ya jëm ca Kër Daawuda, fa ñuy yéegge jëm ca tata ja tiim kër Buur Daawuda. Ñu jubal nag ba ca buntu Ndox ma, ca penku.

<sup>38</sup> Ci biir loolu ñaareelu kurélu jàngkat ya doxe wetu càmmoñ; man nag, ma topp ca seen gannaaw ca kaw tata ja, ànd ak genn-wàllu mbooloo ma. Nu jaare ca wetu sooroor ba ñuy wax Taal ya, ba fa tata ja yaatoo. <sup>39</sup> Nu romb nag fa tiim buntub Efrayim ak buntu Cosaan ba, ak buntu Jën ya ak soorooru Ananel, wees soorooru Meya, ba àgg ca buntu Gàtt ya. Ña nga taxaw ca buntu Dag ya. <sup>40</sup> Ci kaw loolu ñaari kuréli jàngkat ya taxaw ca biir kër Yàlla ga, man itam ma taxaw, maak genn-wàllu mbooloom jawriñ ñi ma àndal, <sup>41</sup> ak sarxalkat ya, di Elyakim ak Maaseya ak Miñamin ak Mikaya ak Elyonay ak Sàkkaryaa ak Anaña, ñook seeni liit.

<sup>42</sup> Maaseya it a nga ca woon ak Semaya ak Elasar ak Usi ak Yowanen ak Malkiya ak Elam ak Eser. Jàngkat ya daldi samp, Israyil jiite leen.

<sup>43</sup> Sarxe nañu bésusb keroog sarax yu réy tey bannexu, ndax Yàlla leen may bannex bu réy. Jigéen ñaak gone ya it di bannexu, mbégarey Yerusalem di dégtu fu sore.

<sup>44</sup> Ñu daldi tànn bésusb keroog ay nit, dénk leen néegi dencukaay, ya ñuy yeb ay jooxe, ak saraxi ndoortel meñneef, ak céri fukkeel yu ñuy génne. Ñu war caa dajale nag cér ya yoon wi dogalal sarxalkat yeek Leween ñi, te mu jóge ci tool yi wër dëkk yi. Waa Yuda rafetlu ca taxawaayu sarxalkat yaak Leween ña. <sup>45</sup> Leween ñaa dénkoo woon seen dénkaneey Yàlla, ak dénkaneey laabal ba, ak jàngkat yaak fara bunt yay topp la Daawuda santaane woon, mook doomam Suleymaan. <sup>46</sup> Te naka jekk ca janti Daawuda ak Asaf amoon na ay njiiti jàngkat yuy jiite ay jànggi màggal ak jànggi cant, ñeel Yàlla. <sup>47</sup> Ci biir loolu, ca janti Sorobabel ak ca janti Neyemi, askanu Israyil gépp daan nañu génneel jàngkat yeek fara bunt yi seen cér, bés bu nekk it, génneel Leween ñi seen cér, Leween ñi génneel askanu Aaróona seen cér.

## 13

### *Neyemi sopparñi na*

<sup>1</sup> Bésusb keroog jàng nañu ci téereb Musaa, mbooloo ma di dégg. Ñu gis ñu bind ca ne, muy Amoneen, muy Mowabeen, kenn du ci bokk ci ndajem bànni Israyil mu ñuy màggale Yàlla, ba fàww. <sup>2</sup> Li ko waral moo di ñoo bañoona dabe bànni Israyil aw ñam wu ñu lekk ak ndox mu ñu naan, xanaa di fey Balaam, jibar ba, ngir mu rëbbal leen leen. Teewul sunu Yàlla soppi rëbb ga barke. <sup>3</sup> Naka la mbooloo ma dégg la yoon wa digle, ñu daldi dàqe Israyil mboolem askan wu raxe.

<sup>4</sup> Lu jiitu loolu nag tabboon nañu Elyasib, sarxalkat ba, dénk ko sunu néegi dencukaayi kër Yàlla ga. Mu doonoon jegeñaaleb Tobya, <sup>5</sup> ba tax Elyasib jël néegu dencukaay bu yaatu, jox ko Tobya. Néeg booba lañu daan denc saraxi pepp yaak cuuraay yaak ndab yaak céri fukkeel ya, muy bele ak biiñ ak diw, te ndigal

sédd ko Leween ñeek jàngkat yeek fara bunt yi. Foofu it lañu daan denc jooxe yi ñeel sarxalkat yi. <sup>6</sup> Booba yépp nag nekkuma woon Yerusalem, ndax fekkoon na ma dellu ca Artaserses buuru Babilon, ca fanweereelu atu nguuram ak ñaar. Toog naa fa lu yàgg, doora ñaan Buur, ba mu yiwiwaat ma. <sup>7</sup> Ba ma àggee Yerusalem, ma yég tojaange gi Elyasib defal Tobya, jox ko néeg ca biir èttu kër Yàlla ga. <sup>8</sup> Ma ñaawlu ko lool, daldi boole yéfi Tobya, génnee néeg ba, sànni. <sup>9</sup> Ci kaw loolu ma santaane ñu laabal néeg ya, ba noppi ma yebaata ca ndabi kër Yàlla ga ak saraxi pepp yaak cuuraay la.

<sup>10</sup> Ma dégg itam ne joxuñu Leween ñi seeni cér, ba tax ku nekk ci Leween ñaak jàngkati kër Yàlla ga ne coww ca toolu boppam, bàyyi liggéey bi mu sasoo. <sup>11</sup> Ma ñàññ jawriñ yi, ne leen: «Ana lu waral ñuy sàggane kër Yàlla gi?» Ci biir loolu ma woo Leween ñeek jàngkat yi, ñu daje, ma delloo leen ca seeni liggéey. <sup>12</sup> Ba mu ko defee waa Yuda gépp dellu di indi ca biir néegi dencukaay ya céri fukkeel ya ñuy génne, di pepp ak biiñ aku diw. <sup>13</sup> Ba loolu amee ma tabb Seleya sarxalkat ba, ak Cadog bindkat ba, dénk leen dencukaay ya, ñook Pedaya Leween ba; ka leen ciy jàpple di Xanan doomu Sakuur. Sakuur, Mataña mooy baayam. Ñu doonoon nit ñu ñu ràññee seen maandute, ba sas leen ñuy séddale sarax yi ci seen biir.

<sup>14</sup> Rikk sama Yàlla, bàyyee ma lii xel, te bul far sama jéfi ngor ji ma jéfe ci sama biir kër Yàlla gi aki wartéefam.

<sup>15</sup> Ci fan yooyu ma gis ci Yuda ay nit ñuy nal reseñ, bésusb Noflaay. Mu am ñuy indi ay sabaari pepp yu ñuy sèf ay mbaam, boole ca biiñ ak reseñ ak figg ak lu nekk, di ko yóbbu Yerusalem ci bésusb Noflaay. Ma àrtu leen it ca la ñuy jaay seen yéfi yooyu ci boobu bés. <sup>16</sup> Amoon na itam ay waa Tir yu féete Yerusalem, di fa indi ay jën ak mboolem xeeti njaay, di ko jaay waa Yuda Yerusalem ci bésusb Noflaay. <sup>17</sup> Ma ñàññ kàngami Yuda, ne leen: «Lu ñaaw lii ngeen di def nag di teddadil bésusb Noflaay? <sup>18</sup> Xanaa du nii la

seen maam ya daan def, ba tax sunu Yàlla wàcce ci sunu kaw musiba mii mépp, wàcce ko ci dèkk bii, yeen ngeen di wooti sànjum Yàlla ci kaw Israyil, di teddadil bésusb Noflaay?»

<sup>19</sup> Ci kaw loolu, balaa bésusb Noflaay biy duggsi, bu bunti Yerusalem tàmbalee keppaaral ci ngoon si rekk, ma santaane ñu tēj, baña ubbeeti, ba bésusb Noflaay bi wees. Ci biir loolu ma tànn ci samay nit, taxawal leen ca bunt ya, ngir ñu baña dugal ay sèf bésusb Noflaay. <sup>20</sup> Ba mu ko defee jula yu mag yaak ñay jaayaatu lu nekk, fanaan benn yoon ba ñaar ca biti. <sup>21</sup> Ma àrtu leen, ne leen: «Ana lu waral ngeen di fanaan ci taatu tatay dèkk bi? Bu ngeen ko defatee, dinaa leen teg loxo!» Booba lañu noppee dikk bésusb Noflaay. <sup>22</sup> Ma sant it Leween ñi ñu laabal seen bopp te dem wattuji bunt ya, ngir sellal bésusb Noflaay.

Ngalla sama Yàlla, bàyyee ma lii xel itam te yèreme ma sa ngor lu bare.

<sup>23</sup> Ma gisati ci jamono yooyu ay Yudeen ñu jël jabar ci waa Asdodd ak Amon ak Mowab. <sup>24</sup> Seen genn-wàlli njaboot di làkk asdodd, ña ca des di làkk leneen ci làmmiñi doxandéem yi, te kenn ci ñoom manula wax yawut. <sup>25</sup> Ma ñàññ leen, móolu leen, dóor ñenn ci ñoom, xuuf seen kawar, giñloo leen ci Yàlla ne dootuñu may seen doom yu jigéen ay doxandéem te dootuñu ci jèlal jabar seeni doom mbaa seen bopp. <sup>26</sup> Ma ne leen: «Xanaa du nii la Suleymaan buurub Israyil bàkkaare woon? Li xeet yiy bare lépp amul benn buur bu meloon ni moom. Ku Yàllaam soppoon la te Yàllaa ko faloon buurub Israyil gépp. Waaye moom sax jigéeni doxandéem yi bàkkaarloo nañu ko. <sup>27</sup> Bèggatunoo dégg ngeen di def gii ñaawtéef gu réy, bay ñàkke sunu Yàlla kóllere, di jël ay doxandéem jabar.» <sup>28</sup> Fekk na kenn ci doomi Yowada doomu sarxalkat bu mag ba Elyasib sax, jël doomu Sanbalat mu Oron. Teewul ma dàq waa ji, mu daw ba sore ma.

<sup>29</sup> Ngalla sama Yàlla, bàyyil xel mbugal mu ñeel ñii teddadil liggéeyu carxal, fecci worma sasu carxal ak xeetu Leween.

<sup>30</sup> Ma laabal leen nag, ñu teqlikook lu bokk cig ndoxandéem, ba noppi sas sarxalkat yeek Leween ñi, ku nekk ca liggéeyam. <sup>31</sup> Ma dekkal saraxu matt yi ñu wara joxe bu àppam jotee, ak saraxi ndoortel meññeef.

Ngalla sama Yàlla, bàyyee ma lii xel ngir ngëneel.

## Esteer

### *Buur Aserus a ngi xawaare*

<sup>1</sup> Lii mu ngi amoon ci jamonoy Aserus\*. Mooy Aserus ma falu woon, jiite téeméeri diiwaan ak ñaar fukk ak juróom ñaar, dale ko ca End ga woon, ba ca réewum Kuus. <sup>2</sup> Jamono yooyu Buur Aserus moo toogoon ca jal ba ca Sus, péey ba†. <sup>3</sup> Ci ñetteelu atu nguuram mu maye bernde, ñeel kàngamam yépp ak jawriñam yépp, di njiiti xarey diiwaanu Pers ak diiwaanu Medd, garmi yeek kàngami dëkk yi bokk teew. <sup>4</sup> Ci diir bu takku, tollook téeméeri fan ak juróom ñett fukk (180), mu di leen won alalu nguuram ju yéeme ak dayoom ak darajaam ju réy. <sup>5</sup> Ba fan yooyu matee, buur ba maye berndey juróom ñaari fan ci biir toókëram, ñeel mboolem ña nekkoon ca Sus, péey ba, ka gëna màgg ba ca ka gëna tuut. <sup>6</sup> Ay ndimoy wëñ gu èccu gu weex ak gu baxaa nga wékke ca buumi lëe yu weex ak yu xonq curr, takke ci ay jaaroy xalis yu wewe ci ay jën yu ñu tabaxe doju màrb. Ay lali wurus ak xalis a nga tege fa suuf, sa ñu dëre doj yu gànjare: yu màrb ak yu pere ak yu ñuul. <sup>7</sup> Ña ngay maye naan ci ay kaasi wurus, bu ci nekk wuuteek moroom ma na mu bindoo. Biiñu buur di walangaan ni loxol Buur. <sup>8</sup> Kenn gawuloon kenn nag ci naan gi, ndax Buur joxoon na ndigal farbay këram yépp, ne leen ñu topp ku nekk ci coobareem. <sup>9</sup> Ci biir loolu Lingeer Wasti moom it maye bernde ñeel jigéeni kër Buur Aserus.

<sup>10</sup> Keroog bésub juróom ñaareel ba Buur Aserus naan biiñ, ba xolam sedd, mu sant juróom ñaari bëkk-néegam‡: Meyuman ak Bista ak Arbona ak Bigta ak Abagta ak Setar ak Karkas, ne leen <sup>11</sup> ñu indil ko Lingeer Wasti, mu sol mbaxanam lingeeram, ngir won taaram ba nit ñaak kàngam ya, ndax jigéen ju rafetoon la. <sup>12</sup> Teewul ba bëkk-néeg ya yeggee Lingeer Wasti ndigalal Buur, mu

lànk, ne du ñëw. Buur nag mer lool, ba xol bay bax. <sup>13</sup> Booba mboolem mbirum buur, xamkati jamono ya ci wàllu yoon ak àtteb yoon lees koy diis. <sup>14</sup> Ña ca gënoona jege Buur di Karsena ak Setar ak Admata ak Tarsis ak Meres ak Marsena ak Memukan, ñuy juróom ñaari kàngami diiwaani Pers ak Medd, di bokk ak Buur jataay te gëna kawé ca nguur ga. <sup>15</sup> Mu ne leen: «Ci yoon, ana lu war ci Lingeer Wasti, gannaaw déggul ndigal li ma joxe, man, Buur Aserus, samay bëkk-néeg jottli ko ko?»

<sup>16</sup> Memukan wax ca kanam Buur ak kàngam ya, ne leen: «Du Buur doŋŋ la Lingeer Wasti tooñ. Waaye tooñ na mboolem kàngam yi ak mboolem baadoolo yi ci mboolem diiwaan yi. <sup>17</sup> Nde jëfi lingeer jii dina yegg ci noppi jigéen ñépp, ba tax ñuy sofental seen jëkkër. Ndax dañu naan: “Xanaa Buur Aserus woowul Lingeer Wasti, mu lànk, ne du ñëw”? <sup>18</sup> Li ko dale bésub tey, kuy garmi bu jigéen ci Pers ak Medd, bu déggee jëfi lingeer jii, noonu lay waxeek mboolem kàngami buur, mu indi yabeel ak réeroo bu dul jeex. <sup>19</sup> Kon nag Buur, ndegam soob na la, na ab dogal tukkee fi yaw, ñu bind ko ci ndigali yooni Pers ak Medd, yi dul toxu, di xamle ne Wasti dootu jàkkaarlooteek Buur Aserus. Te Buur, dangay nangu céru lingeeram, jox ko moroomam mu ko gën. <sup>20</sup> Su ko defee bu ñu yéenee dogalu buur bi ci mboolem dëndu buur bu yaatu bii, jigéen ñépp dinañu weg seen jëkkër, boroom daraja ba ci baadoolo bi.»

<sup>21</sup> Loola nag neex Buur ak kàngam ya. Buur nag def la ko Memukan wax. <sup>22</sup> Ba mu ko defee mu yónnee ay bataaxal fépp ca réew ma, diiwaan bu nekk ak mbindum boppam, waaso wu nekk it ci làkku boppam. Mu biralal waaso wu nekk ci làkku boppam, ne leen na góor gu nekk doon kilifay këram.

## 2

### *Buur Aserus wutal na Wasti kuutaay*

\* **1:1** 1.1 Aserus dees na ko wooye Serses itam. † **1:2** 1.2 Sus, péey ba, walla Sus dëkk ba ñu dàbbli. ‡ **1:10** 1.10 bëkk-néeg yooyu, ay jaam yu ñu tàpp lañuy doon.



<sup>1</sup> Gannaaw ba mbir yooyu amee, ba merum Buur Aserus giif, xelam dem ca Wasti ak la mu def ak la mu dogal ca moom. <sup>2</sup> Ba loolu amee surgay buur yi koy topptoo ne ko: «Nañu la seetal ci janq ju rafet ji. <sup>3</sup> Buur, dangay yónnee ay ndaw ci sa mboolem diiwaani réew mi, ñu dajaleel la mboolem janq ju rafet ji, indi leen fii ci Sus, péey bi, dugal leen ci kër jigéen ñi, ñu teg leen ci loxol Ege, sa bëkk-néeg biy wattu jigéen ñi. Ñu jox leen lu ñuy defaroo ba rafet. <sup>4</sup> Su ko defee nag Buur, janq bu la ci neex doon lingeer, wuutu Wasti.» Buur rafetlu la ñu wax, daldi def noona.

<sup>5</sup> Fekk na jenn waayi Yawut a ngi ci Sus, péey ba. Ma nga tudd Mardose. Yayir di baayam. Yayir, Simey ay baayam. Simey, Kis ay baayam, bokk ci giirug Beñamin. <sup>6</sup> Mu askanoo ca ngallo ga Nabukodonosor buuru Babilon jële woon Yerusalem, boole leen ak Yekoña\* buurub Yuda. <sup>7</sup> Mardose yoroon ku ñuy wax Adasa, muy Esteer ba tey, di doomu baayam bu ndaw, ndax amuloon ndey, amuloon baay. Xale bi nag rafet, jekk bind. Ba ndeyam ak baayam deeyee, Mardosee ko jël, yar ko ni doomam.

<sup>8</sup> Gannaaw ba ñu yéenee ndigalu Buur ak dogalam ba, ñu dajale janq ju bare ca Sus, péey ba, teg leen ca loxol Ege. Noonu lañu indaalee Esteer, ba ca kër Buur, teg ko ci loxol Ege may wattu jigéen ña. <sup>9</sup> Xale bi neex Ege, mu baaxe ko, gaaw indil ko lu mu defaroo, nàddil ko ag lekkam, féetale ko juróom ñaari surga yu jigéen yu ñu tanne kër Buur. Ci kaw loolu mu dalal Esteer mooki surgaam fa gën ca kër jigéen ña. <sup>10</sup> Fekk na Esteer waxul askan wa mu bokk ak kër ga mu fekk baax, ndax Mardose da koo santoon ne ko bumu ko wax. <sup>11</sup> Bés bu nekk nag Mardose doxantoo fa kanam kër jigéen ña, ngir xam lu Esteer nekke ak nu ñu def ak moom.

<sup>12</sup> Booba bala ayu kenn ci xale yu jigéen ñiy agsi, ba muy dem ca Buur Aserus, day fekk mu matal fukki weer ak jaar yi ñu àppal jigéen ñi, ngir ñu yokk ci

seen taar. Juróom benni weer yi, ñu di leen diw ndàbb lu ñuy wax miir; juróom benni weer yi ci des, ñu di leen diw ay diw yu xeeñ ak yeneen yu jigéen ñiy defaroo.

<sup>13</sup> Ni ndaw siy deme ca Buur nag nii la. Mboolem lu mu bëgg, dees ko koy jox, mu jële ko ca kër jigéen ña, yóbbaaale kër buur. <sup>14</sup> Bu ngoonee mu dem ca Buur, bu bët setee mu dellu kër jigéen ña, ca geneen wàlla ci njiital Sasgas, bëkk-néeg bay wattu nekkaaley buur. Su ko defee ndaw sa du dellooti ca Buur lu moy ndaw si neex ko, mu ne: «Wool-leen ma diw.»

<sup>15</sup> Ba loolu amee muy ayu Esteer doomu Abyel, baayu Mardose bu ndaw, janq ba mu yaral boppam ni doomam. Mu wara dem ca Buur, te laajul dara lu moy la ko Ege bëkk-néegu buur bay wattu jigéen ña, sant. Mboolem ku gis Esteer nag, xool ko bētu yiw. <sup>16</sup> Ñu yóbbu Esteer ca Buur Aserus, ca biir këram, ca fukkeelu weer wa ñuy wax Tebet, ca juróom ñaareelu atu nguuram. <sup>17</sup> Ci kaw loolu Buur gëna bëgg Esteer ci jigéen ñépp. Mu gëna baaxe Esteer, gën koo sopp janq jépp. Ba mu ko defee mu solal ko mbaxanam lingeer, fal ko lingeer, mu wuutu Wasti. <sup>18</sup> Buur def bernde ju réy ngir mboolemi kàngamam aki jawriñam, terale ko Esteer; daldi noppal diiwaan yi, teg ca nàddil nit ñi ni mu ware buur.

<sup>19</sup> Ba ñu dajalewaatee janq ja ñaareel bi yoon, fekk na Mardose am ndombol tànk ca buntu kër buur. <sup>20</sup> Booba Esteer waxul ba tey fa mu fekk baax ak fa mu bokk, muy la ko Mardose santoon. Esteer wéye topp ndigali Mardose rekk, mel ni ba mu ko yoree ca këram.

### *Pexe moy na*

<sup>21</sup> Jamono yooyu Mardose amee ndombol tànk ca buntu kër buur, ku ñuy wax Bigtan ak ku ñuy wax Teres, di ñaari fara buntu kër buur, ñoo am lu ñu meree lool Buur Aserus, bay lal pexe mu ñu ko bóome. <sup>22</sup> Teewul Mardose yég pexe ma, wax ko Lingeer Esteer, mu yegge ko Buur, ci turu Mardose. <sup>23</sup> Ba ñu seetloo mbir ma ba muy dëgg, dañu leena wékk ñoom

\* **2:6** 2.6 Yekoña ak Yowakin kenn ki la. † **2:23** 2.23 Jombul dañu leen daan rey ba noppi wékk seeni néew ci bant.

ñaar ci bant†. Bindees na ko ci teewaayu Buur ci téere ba nu dippee Xew-xew ya.

### 3

#### *Pexem sànk Yawut yi lale na*

<sup>1</sup> Gannaaw ba xew-xew yooyu jàllee, Buur Aserus teral ku ñuy wax Aman doomu Amdeta mi askanoo ci Agag\*, yékkati ko, teg ko ci kaw mboolem kàngam yi ci wetam. <sup>2</sup> Mboolem jawriñi buur yi féete buntu kër buur nag di sukkal Aman, di ko sujjóotal, ndax loolu la Buur santaane woon ci moom. Teewul Mardose lànk, sukkal ko, sujjóotalu ko. <sup>3</sup> Yeneen jawriñi buur ya ca buntu kër buur wax Mardose ne ko: «Ana lu waral ngay gantal santaane Buur?» <sup>4</sup> Ñu di ko ko wax bés bu jot, mu lànk, déggalu leen. Ñu wax ko Aman, di seet ba xam ndax la Mardose wax dina ca mujj. Fekk na mu wax leen ne moom Yawut la. <sup>5</sup> Ba Aman gisee ne Mardose du ko sukkal, du ko sujjóotal, daa mer ba fees dell. <sup>6</sup> Teewul mu siide fexeel Mardose donj, ndax booba waxoon nañu ko askan wi Mardose bokk. Ba loolu amee Aman di wuta sànk mboolem Yawut yi nekk ci mboolem réewum Aserus, di bokki Mardose. <sup>7</sup> Ca fukkeelu at maak ñaar ci nguug Buur Aserus, ca weer wa jiitu, di weeru Nisan, ñu sànni ci kanam Aman jomtukaayu tegtal bi ñuy wax Pur, ngir seet bés bu baax ak weer wa, ci pexe ya mu nas. Ñu seet, mu yemook weeru Adar, di fukkeelu weer waak jaar.

<sup>8</sup> Aman wax Buur Aserus ne ko: «Aw xeet a ngi fi, tasaaroo ci biir xeet yi, jaxasoo ci seen biir, ci mboolem sa diiwaani réew mi. Seen aada daa wuuteek yu xeet yépp; yoon yi Buur tëral, duñu ko jéfe, te jaaduwal ci Buur mu di leen seetaan. <sup>9</sup> Ndegam neex na la, Buur, bindal ab dogal bu leen sànklu. Kon ñetti junniy barigoy xaalis laay teg ci loxoy saytukat yi, ñu yeb ko ci dencu buur.» <sup>10</sup> Ba mu ko defee Buur tekki jaarob torlukaayam ci baaraamam, jox ko Aman doomu Amdeta ma askanoo ca Agag, noonub Yawut ya.

<sup>11</sup> Buur ne Aman: «Xaalis bi téye ko, te xeet woowu nga def leen li la soob.»

<sup>12</sup> Gannaaw loolu ñu woolu bindkati buur ca weer wa jèkk ca at ma, yemook fukki fan ak ñett. Ñu bind ci bindinu diiwaan bu nekk, ak ci làkku xeet wu nekk mboolem lu Aman digle, mu jëm ca jawriñi buur ak boroom dèkk yaak kàngami xeetoo xeet. Ci turu Aserus lañu bind bataaxal yi, tay ko, mu ànd ak torlub buur. <sup>13</sup> Ñu daldi koy yónnee, ay ndaw yóbbu ko ca mboolem diiwaani buur, ngir ñu sànk mboolem Yawut yi, rey leen, faagaagal leen, mag ak ndaw ba ca tuut-tànk yaak jigéen ña ci benn bés, mu yemook fukki fan ak ñett ci weeru Adar, di fukkeelu weer waak jaar. Seen alal it, ñu war koo lël. <sup>14</sup> Ba loolu amee ñu sotti dogal ba ñu bind, def ko ndigalu yoon, siiwal ko ci mboolem diiwaan, xamal ko xeet yépp, ngir ñu séentu bés booba.

<sup>15</sup> Ndaw ya gaaw dem ci ndigalal buur, ñu biral dogal ba ca Sus, péey ba. Buur a nga toog ak Aman, di naan, waa Sus nekk ci njàqare.

### 4

#### *Mardose lal na pexem mucc*

<sup>1</sup> Ba Mardose yégee la ñu def lépp, daa xottiy yéreem, sol ay saaku, sottikoo dóom, di ko ñaawloo, dugg ci biir dèkk bi, di yuuxu yuux gu réy te metti. <sup>2</sup> Mu dem ba ca buntu kër buur, yem fa ndax deesul dugge kër buur yérey saaku. <sup>3</sup> Ci biir loolu mboolem diiwaani réew mi, fépp fu dogalu buur ak ndigalam àgg, muy ñaawlu gu réy ca Yawut ya. Ñu boole kook koor aki jooy aki yuux. Ñu bare sol ay saaku, sottikoo dóom, di ko toroxloo.

<sup>4</sup> Ba surgay Esteer yu jigéen yaak bëkk-néegam yu góor ya dikkee wax ko Esteer, tiislu na ko lool, daldi yónnee Mardose ay yérey, ngir mu summi saaku ya mu sol. Waaye Mardose nanguwul. <sup>5</sup> Esteer woolu Atag, ma Buur féetaleek moom, te muy kenn ci bëkk-néegi buur. Mu yebal ko ci Mardose, ngir xam lan la ak lu waral loolu. <sup>6</sup> Atag dem ba ca Mardose, ca pénc

\* **3:1** 3.1 Agag: Amalegeen ñi Buur Agag askanoo, ñook bànni Israyil, seenug noonoo cosaan la. Seetal ci *Mucc ga* 17.8-16 ak *1.Samiyel* 15.

ma janook buntu kër buur. <sup>7</sup> Mardose wax ko mboolem la ko dal, ak dayob xaalis ba Aman digee fey, nar koo def ca denci buur ngir mana sànk Yawut yi. <sup>8</sup> Mu jël sottib mbindum dogal ba ñu yéene ca Sus ne dinañu leen faagaagal, daldi ko koy jox, ngir mu won ko Ester; xamal ko ko, ne ko mu gaaw dem ca Buur, ñaanal ko ko, tinul ko aw xeetam. <sup>9</sup> Atag dellu ca Ester; yegge ko kàdduy Mardose. <sup>10</sup> Ester ne Atag mu dem wax Mardose, ne ko: <sup>11</sup> «Mboolem surgay buur ak waa diiwaani buur xam nañu ne yoon a toppe àtteb dee képp ku dugg kër buur, ba ci èttu biiram, muy góor mbaa jigéen, te wooyeesu la. Xanaa ku buur tàllal yetu wurus wiy màndargaal nguuram. Man nag fanweeri fan a ngii wooyeesu ma fa Buur.» <sup>12</sup> Ñu yegge Mardose kàdduy Ester; <sup>13</sup> Mardose dellu yónnee ne ko: «Áay! Yaa ngi kër buur de! Waaye bul defe ne man ngaa mucc, yaw donj, ci mboolem Yawut yi. <sup>14</sup> Ndax soo ci selanjloo ba selanjlu ci tey jii it, wall ak xettal dina bawoo feneen ñeel Yawut yi, waaye yaw yaak sa waa kër baay dingeen sànk. Li nga dugg ci nguur gi sax, nga defe ne neen la? Jombul diggante bii nu tollu tey moo ko waral.» <sup>15</sup> Ester dellu yónnee ca Mardose, ne ko: <sup>16</sup> «Demal woo mboolem Yawut yi, ci Sus, ñu daje. Te ngeen wooral ma: buleen lekk, buleen naan diiru ñetti fan, du guddi, du bëccëg. Man it maak sama surga yu jigéen, nu woore noonu. Su ko defee ma dem ca Buur doonte yoon nanguwu ko. Su ma dee dee, ma dee rekk.» <sup>17</sup> Mardose nag dem, def la ko Ester sant lépp.

## 5

### *Ester woote na bernde*

<sup>1</sup> Ba mu amee ñetti fan Ester sol yérey lingeer, taxaw fa janook kër buur ca èttu biiram, fekk Buur toog ca ngànguneem, ca biir néegam, janook buntu kër ga. <sup>2</sup> Ba mu ko defee Buur gis Lingeer Ester, mu taxaw ca biir ètt ba. Mu baaxe ko, daldi koy tàllal yetu wurus wa muy màndargaale nguuram. Ester jegesi, laal boppu yet wa, di ko ko sante. <sup>3</sup> Buur

ne ko: «Lingeer Ester, lan la, ak looy sàkku? Su doon genn-wàllu nguur gi sax, dees na la ko jox!» <sup>4</sup> Ester ne ko: «Ngalla Buur, bu la soobee, ñëwal yaak Aman ci bernde ji may woote tey.» <sup>5</sup> Buur ne: «Wool-leen ma Aman léegi, nu defal Ester li muy ñaan.» Ba loolu amee Buur ànd ak Aman dem ca bernde ja Ester woote. <sup>6</sup> Naka lañuy naan biiñ, Buur ne Ester: «Ana looy laaj, ñu jox la ko, ana looy sàkku, ba ci genn-wàllu réew mi, ñu defal la ko.» <sup>7</sup> Ester wax ko ne ko: «Li may ñaan, di ko sàkku de, <sup>8</sup> Buur, ndegam yéwéne nga ma, te may ma li may ñaan, defal ma li may sàkku di sa coobare, ngalla, Buur, àndal ak Aman, dikk ca bernde ja ma leen di waajalal. Kon bu subaa dinaa la wax li ngay laaj.»

### *Aman jógal na Mardose*

<sup>9</sup> Aman a ngay génndi dem, bésub keroog ànd ak mbégte, xol bay neex. Ba mu gisee Mardose ca buntu kër buur nag, te Mardose jógul, amul benn tiitaange ci moom, daa mer ba fees dell. <sup>10</sup> Terewul Aman ànd ak sagoom, ñibbi këram. Ci kaw loolu mu yónnee, woolu ay xaritam ak Seres jabaram. <sup>11</sup> Ba loolu amee Aman di leen limal alalam ju bare ak doomam yu góor yu bare ak mboolem ni ko Buur terale, yékkati ko, mu gëna kawe ci kàngami buur aki jawriñam. <sup>12</sup> Aman teg ca ne: «Te kat amul ku Lingeer Ester woo, mu wara ànd ak Buur ca bernde ja muy def, ku moy man. Èllëg man la woo maak Buur. <sup>13</sup> Waaye loolu lépp doyu ma, li feek maa ngi gis benn yoon Mardose, Yawut bi, mu toog ca buntu kër buur.» <sup>14</sup> Seres jabaram ak xaritam ya yépp ne ko: «Dangay defarlu bant bu am taxawaayu ñaar fukki meetar ak juróom. Bu subaa nga ne Buur ñu wékk ci Mardose, ba noppi nga ànd ak Buur ca bernde ja, sa xol sedd.» Aman nag rafetlu xel ma, ba defarlu bant ba.

## 6

### *Aman am na mbetteel*

<sup>1</sup> Guddig keroog Buur tëlee nelaw, daldi santaane ñu indil ko téere ba ñu dippee Xew-xew ya. Ci kaw loolu ñu di ko jàngal

Buur. <sup>2</sup> Ca lañu gis ñu bind ca ne Mardose moo boole woon Bigtan ak Teres, ñaari fara buntu kër buur ya laloon pexe ngir bóom Buur Aserus. <sup>3</sup> Buur ne: «Ana teraangaak njukkal lu ñu defal Mardose ci lii?» Surga ya ne ko: «Dara.» <sup>4</sup> Buur ne: «Ku nekk ci ètt bi?» Mu yemook Aman duggsi ci èttu buur, ba féete biti, ngir waxsi ko, ne ko ñu wékk Mardose ca bant ba mu ko waajalal. <sup>5</sup> Surga ya ne ko: «Aman déy a taxaw ci ètt bi.» Buur ne: «Na agsi!» <sup>6</sup> Aman duggsi, Buur ne ko: «Ana lees di defal waa ju buur namma teral a waay?» Booba Aman a nga naan ca xel ma: «Ana ku Buur namma teral ku dul man mii?» <sup>7</sup> Mu ne Buur: «Waa ji Buur namma teral déy, <sup>8</sup> nañu ko indil mbubbum buur mu Buur masa sol ak fas wu Buur masa war, ñu solal fas wi mbaxanam nguur. <sup>9</sup> Nañu jox mbubb meek fas wi kenn ci ñi gëna magg ci jawriñi buur. Ñu solal waa ji Buur namma teral, waral ko fas wi, wërale ko pénc mi, ñu jiitu ko, di yéene naan: «Lii lees di defal waa ju Buur namma teral!» <sup>10</sup> Buur ne Aman: «Doxal jël mbubb meek fas wi, li nga wax rekk, te nga defal ko Mardose, Yawut biy toog ca buntu kër buur. Bul bàyyi dara ci mboolem li nga wax.»

<sup>11</sup> Ci kaw loolu Aman jëli mbubb maak fas wa, solal Mardose, waral ko, jiitu ko, di ko wërle pénc mi, tey yéene naan: «Lii lees di defal waa ju Buur namma teral!»

<sup>12</sup> Gannaaw loolu Mardose dellu ca buntu kër buur. Aman nag muuru, daw ñibbi këram, ànd aku naqar. <sup>13</sup> Ba mu ko defee Aman nettali Seres jabaram ak ay xaritam la ko dal lépp. Ña koy xelal ak jabaram bokk ne ko: «Mardose mii nga tàmbalee torox ci kanamam, ndegam ab Yawut la de, du lenn loo koy manal. Dangay xala daanu rekk ci kanamam.» <sup>14</sup> Naka lañuy wax ak moom, ndawi buur ne jalañ, daldi gaaw yóbbu Aman ca bernde ja Esteer di waajal.

## 7

### *Yéene néeg la*

<sup>1</sup> Ba loolu amee Buur ànd ak Aman dem ca berndey Lingeer Esteer. <sup>2</sup> Ñu dem

bay naan biiñ ca bésub ñaareel booba, Buur dellu ne: «Lingeer Esteer, ana looy ñaan, ñu may la ko. Looy sàkku? Ba ci genn-wàllu réew mi sax, ñu defal la ko.» <sup>3</sup> Lingeer Esteer àddu ne ko: «Buur, ndegam xool nga ma bētu yiw te neex na la, may ma, ma mucc maak samaw xeet; moom laay ñaan te moom laay sàkku. <sup>4</sup> Ndax dañu noo fexeel maak samaw xeet, nar noo sànk, bóom nu, faagaagal nu. Su doon ay jaam yu góor ak yu jigéen sax lañu nuy fexee def, dama naan cell, ndax njàqare ju ni tollu sax jarul ñuy lëjal Buur.» <sup>5</sup> Buur Aserus wax ak Lingeer Esteer ne ko: «Kooku ku mu? Ana kuy mébét loolu, nar koo def?» <sup>6</sup> Esteer ne ko: «Waa ji nuy fexeel, di bañ, dib noon de, Aman mu bon mii la!» Aman nag tiit lool fa kanam Buur ak Lingeer. <sup>7</sup> Buur ne ñokket, mer ba fees, bàyyi fa biiñ ba, dugg ca biir tóokëram. Aman moom, des fa, di tinu Lingeer Esteer ngir bakkanu boppam, ndax booba xam na ne su dee Buur rekk, njekkaram taxaw na. <sup>8</sup> Ci kaw loolu Buur bàyyikoo ca tóokër ba, délsi ca èttu bernde ja, fekk Aman di sukk ca lal ba Esteer tédde. Buur ne: «Áa! Ba ci yekktaan Lingeer nag, te ma nekk ci biir kër gi?» <sup>9</sup> Naka la kàddu ga jibe ca gémmini Buur, ñu muur kanamu Aman, màndargaale ko àtteb deeyam. Ci biir loolu Arbona kenn ci bëkk-néegi buur ne: «Te kat bant bu ëpp ñaar fukki meetar ak nga sampe ca wetu kër Aman, di xaar Mardose mi waxoon jàmmi Buur.» Buur ne: «Wékkleen ko ca!» <sup>10</sup> Ba mu ko defee ñu wékk Aman ca bant ba mu waajaloon Mardose. Merum Buur doora giif.

## 8

### *Mardose falu, Yawut ya mucc*

<sup>1</sup> Gannaaw loolu Buur Aserus jox bésub keroog Lingeer Esteer kër Aman, fitnaalkatu Yawut ya. Ñu woo Mardose ca Buur, ndax fekk na Esteer xamle ba noppi na Mardose bokkeek moom. <sup>2</sup> Buur nag tekki jaarob torlukaayam ba mu nangoo ca Aman, jox ko Mardose. Esteer daldi teg kër Aman ci loxol Mardose, mu di ko saytu.

<sup>3</sup> Ester daldi dellu wax ak Buur, ne gurub cay tãnkam, jooy, tinu ko, ne ko mu fanq musiba mi Aman Agageen ba sooke ak pexe mi mu lalaloon Yawut yi. <sup>4</sup> Ci kaw loolu Buur tállal Ester yetu wurus wa, Ester jóg taxaw ca kanam Buur. <sup>5</sup> Mu ne: «Buur, ndegam neex na la, te xool nga ma bëtu yiw, ndegam jaadu na ci yaw, te ma saf la, bindlul ndigal luy neenal bataaxal yi sosoo ci Aman Agageen ba, doomu Amdeta. Mu bindoon ko ngir faagaagal Yawut yi ci mboolem diiwaani buur. <sup>6</sup> Ana nu ma mana seetaane musiba di dal samaw xeet ak nu ma mana seetaane ñuy sànk samay bokk?» <sup>7</sup> Buur Aserus wax ak Lingeer Ester ak Mardose Yawut ba, ne leen: «Ma ne, kër Aman jox naa ko Ester; Aman, ma wékklu ko ca bant ba, ndax li mu dal ci kaw Yawut yi. <sup>8</sup> Yeen ci seen wàllu bopp nag, bindleen ci Yawut yi lu leen soob ci sama tur, man Buur. Tayleen ko, torloo ko sama jaaro. Ndax mbind mu ñu bind ci turu buur, tay ko, torloo ko jaarob buur, maneesu koo toxal.»

<sup>9</sup> Ci kaw loolu ñu woo bindkati buur ca bés ba, di ñaar fukki fan ak ñett ca weeru Siwan, ñetteelu weer wa. Ñu daldi bind mboolem lu Mardose santaane, ca mbirum Yawut yaak jawriñ yaak boroom dëkk yaak kàngami diiwaan ya, dale ko ca End ba ca Kuus. Muy téeméeri diiwaan ak ñaar fukk ak juróom ñaar (127). Ñu bind ndigal ya ci mbindum diiwaan bu nekk ak ci làkku xeet wu nekk, Yawut ya it ak seen mbindu bopp ak seen làkku bopp. <sup>10</sup> Mardose bind ci turu Buur Aserus, tay bataaxal yi, torloo ko jaarob buur, yóbbante ko ay gawar yu war dawkat naari góor yu ñu tann. <sup>11</sup> Ñu bind ca bataaxal ya, ne Buur may na Yawut yi ci dëkkoo dëkk sañ-sañu taxawandoo, aar seen bopp. Sañ nañoo tas mbooloo mu leen mana song, ak xeet wu ñu bokk mbaa diiwaan bu ñu bawoo. Nañu sànk woowu xeet, rey leen, faagaagal leen ñook seeni jabar ak seeni doom, boole ca lël seen alal. <sup>12</sup> Bés ba ñu mayee loolu ci mboolem diiwaani Buur Aserus di fukki fan ak ñett ci weeru Adar, fukkeelu weer waak ñaar. <sup>13</sup> Ñu wara siiwal ab

sottib bataaxal ba, muy ndigalu yoon ci diiwaanoo diiwaan, biralal ko mboolem xeet yi, ngir bés sub keroog Yawut yi taxaw temm, feyoontek seeni noon. <sup>14</sup> Ndaw ya war fasi buur yu diy dawkat, ñu sàqi, gaaw, rëpptal ci ndigalu buur. Ñu siiwal nag dogal ba ca Sus, péey ba.

<sup>15</sup> Ba mu ko defee Mardose bàyyikoo ca Buur; ma nga sol yérey buur, baxa ak weex, ak mbaxanam buur mu wurus mu réy, ak mbubbum lée mu xonq curr. Dëkku Sus baa ngay riire mbégteek bannex. <sup>16</sup> Kanami Yawut yaa nga ne ràññ ci biir mbégteek bannex akub sag. <sup>17</sup> Mboolem diiwaan mbaa dëkk bu mag bu dogalu buur ba àgg, muy mbégteek bannex ca Yawut ya; ñu def ko bés bu rafet, di xawaare. Bare na sax ñu bokk ci xeeti réew ma, ñu walbatiku dugg ci diiney Yawut ndax ragal Yawut ya.

## 9

### *Yawut yaa man*

<sup>1</sup> Gannaaw loolu fukki fan ak ñett ci weeru Adar, fukkeelu weer waak ñaar taxaw, ñu war caa amal dogalu buur ba. Muy bés ba nooni Yawut ya yaakaaroonna jekku Yawut ya. Mbir ya nag mujj safaano, Yawut ya jekku seeni bañ. <sup>2</sup> Yawut ya daje seeni biir dëkk ca mboolem diiwaani Buur Aserus, ngir dal ci kaw ñi leen di wuta lor. Amul ku leen mana tè ci xeet yépp, ndax tiitaange lu réy lu ñu am ci ñoom. <sup>3</sup> Ci biir loolu mboolem kàngami diiwaan yaak jawriñ yaak boroom dëkk yaak saytukati buur, ñoom ñépp di dimbali Yawut yi ndax tiitaange lu ñu am ci Mardose. <sup>4</sup> Mardose nag am daraja lool ci biir kër buur, bayreem dajal diiwaan yépp, muy gën di am doole.

<sup>5</sup> Ba loolu amee Yawut ya di fàdd seen noon yépp, saamar yay dal, ñu di leen bóom ak a faagaagal. Ñuy def seeni bañ lu leen neex. <sup>6</sup> Ca biir Sus, péey ba, Yawut ya bóom nañu fa juróomi téeméeri nit (500), sànk leen. <sup>7</sup> Ñu bóom Parsandeta ak Dalfon ak Aspata, <sup>8</sup> ak Porata ak Adalya ak Arideta <sup>9</sup> ak Parmasta ak Arisay ak Aridey ak Wasata. <sup>10</sup> Ñuy fukki góor, di doomi

Aman doomu Amdeta, fitnaalkatu Yawut ya. Bóom nañu leen, waaye seen loxo laalul alal ja.

<sup>11</sup> Bésuub keroog ñu yegge Buur limu nit ña ñu rey ca Sus, péey ba. <sup>12</sup> Buur ne Lingeer Ester: «Biir Sus, péey bii, Yawut yi rey nañu ci juróomi téeméeri nit, reyaale fukki doomi Aman yu góor. Kon diiwaani buur yi ci des xawma nu ñu def ak ñoom. Ana looy ñaanati, ñu may la ko ak looy sàkkooti, ñu defal la ko?» <sup>13</sup> Ester ne ko: «Buur, ndegam soob na la, mayeel èllég itam Yawut yi ci Sus mana wéyal dogalu tey bi. Te fukki doomi Aman yu góor yi, ñu wékk seeni néew ci bant.» <sup>14</sup> Buur joxe ndigal ngir ñu def noona. Ba loolu amee ñu siiwal ab dogal ca Sus, daldi wékk fukki doomi Aman yu góor ya. <sup>15</sup> Yawut ya ca Sus nag daje ca fukki fan ak ñeent ci weeru Adar, bóom fa ñetti téeméeri nit, te seen loxo laalul alal ja.

<sup>16</sup> Ci biir loolu Yawut ya ca des te dëkke yeneen diiwaani buur ya daldi daje ngir aar seen bopp, ba am jàmm ca seeni noon. Ñu rey ca seeni bañ juróom ñaar fukki junniy nit ak juróom (75 000), te seen loxo laalul alal ja. <sup>17</sup> Loolaa nga am ca fukki fan ak ñett ci weeru Adar, èllég sa di fukki fan ak ñeent. Ñu nopplu, def ko bésuub mbégteek bannex. <sup>18</sup> Yawut ya nekk Sus te daje woon ca fukki fan ak ñett ak fukki fan ak ñeent ca weer wa nag, ña nga dal-lu ca fukki fan ak juróom ca weer wa, def ko bésuub bernde ak bannex. <sup>19</sup> Looloo waral Yawuti kaw-kaw yi ci dëkk yu ndaw yi di wormaal fukki fan ak ñeent ci weeru Adar, def ko bésuub bannex ak bernde, di ci joqlantey teraanga.

### *Yoonal nañu màggalu bési Purim*

<sup>20</sup> Ci kaw loolu Mardose ténk xew-xew yooyu ci mbind, daldi yónnee ay bataaxal yu jëm ca mboolem Yawuti mboolem diiwaani Buur Aserus, mu jege, mu sore, <sup>21</sup> ngir sas leen at mu nekk, ñu wara wormaal fukki fan ak ñeent ak fukki fan ak juróom ci weeru Adar, <sup>22</sup> di ko baax-antale bés ya Yawut yi dal-loo ca seeni noon, ak weer wa seen naqar walbatikoo

di mbégte, seen tiis di bésuub jàmm, ngir ñuy wormaal yooyu bés, muy bési bernde ak bannex yu ñuy joqlantey teraanga, di ci defal néew-ji-doole. <sup>23</sup> Ba mu ko defee Yawut ya sasoo la ñu tàmbali woon def, di wormaal yooyu bés, na leen ko Mardose bindale. <sup>24</sup> Aman doomu Amdeta, Agageen ba, fitnaalkatu bépp Yawut, moo fexeeloon Yawut yi, ngir faagaagal leen. Juntukaayu tegtal bi ñuy wax Pur lañu jëfandikoo woon, ngir jàpp bés ba mu leen wara faagaagal, sànk leen. <sup>25</sup> Waaye ba mbir ma àggee ca Buur, Buur a joxe ay ndigal yu ñu bind, ne pexe mu bon ma Aman nasaloon Yawut yi, na walbatiku kèppu ci kaw boppam. Te mook ay doomam yu góor dees leen di wékk ci bant. <sup>26</sup> Moo waral ñuy wooye yooyu bés bési Purim, mu jóge ci baatu «Pur», di juntukaayu tegtal boobu. Mboolem la ñu bind ca bataaxal boobu nag ak itam la ñu gisal seen bopp ak la ñu daj, <sup>27</sup> moo tax Yawut yi di wormaal ñaari bés yooyu, sasoo ko, at mu nekk, bañ koo bàyyi, ñook seen askan ak ku ànd ak ñoom. Ñu war koo def, na ñu leen ko bindale, saa yu jotee at mu nekk. <sup>28</sup> Bés yooyu di lu ñu wara bàyyi xel, di ko wormaal ci bépp maas ci kër gu nekk, diiwaan bu nekk ak dëkk bu mag bu nekk. Bési Purim yooyu Yawut yi waruñu koo noppee wormaal, te wareesu koo fàtte ci seen askan.

<sup>29</sup> Ci kaw loolu Lingeer Ester doomu Abyel, ànd ak Mardose Yawut ba, ñu bind ci sañ-sañ bu mat sèkk, di dëggal ñaareelu bataaxal boobu jëm ci bési Purim. <sup>30</sup> Ñu yónnee ay bataaxal yu jëm ca mboolem Yawut ya ca téeméeri diiwaan ak ñaar fukk ak juróom ñaar (127) ca réewum Buur Aserus. Muy kàdduy jàmm ak kóllère, <sup>31</sup> ngir saxal bési Purim yooyu saa yu jotee, na leen ko Mardose Yawut ba dogalale, mook Lingeer Ester. Mu dëppoo it ak na ñu dogalale seen bopp jamonoy koor ak ñaawlu, ñoom ak seen askan. <sup>32</sup> Dogalu Ester ba nag wéral ndigal yooyu jëm ci bési Purim, ñu daldi koy bind ci téere bi.

*Mardose daan na*

<sup>1</sup> Gannaaw loolu Buur Aserus gäll ab galag ca réew ma mépp, ba ca duni géej ga. <sup>2</sup> Mboolem jaloore ya Buur Aserus def, ca dooleem ak mäggaayu darajaam ak na mu yékkatee Mardose, ba mu kawe, lépp bindees na ko moos ca téere ba ñu dippee Jaloorey buuri Medd ak Pers ca seeni jant. <sup>3</sup> Mardose Yawut ba, moo sësoon rëkk ca Buur Aserus, sut Yawut yépp, ay bokki Yawutam yu bare nawloo ko. Muy sàkku nag ngëneeli ñoñam, di waxal jàmm mboolem askanam.

## Ayóoba Ubbite gi

Téereb *Ayóoba* moo nettali dundu nit ku baax ku musiba mu réy dal. Alalam jépp la jékka ñàkk, teg ci ñàkk doomam yépp, boole ci jàngoro ju daw yaram. Gannaaw loolu, téere bi indi na ñetti pàcci wàqante yu taalife yu Ayóoba séq aki xaritam, te lépp di biral seeni tont ci tiis yooyu. Li gëna fés ci seen werante moo di ni Yàlla farala jëflantee ak doom aadama, waaye Yàlla ci boppam moo mujj feeñu Ayóoba.

Xariti Ayóoba yi, ni ñu jàngate tiisi Ayóoba mooy ni ko aaday cosaan gise ci wàllu diine rekk. Foog nañu ne, gannaaw Yàlla mbaax la mas di yoole jëf ju baax, di añale mbugal jëf ju bon, coono yi Ayóoba daj, añub bàkkaaram donj lay mana doon. Teewul Ayóoba xamle ne mbir mi yombewul noonu, te it yelloowul mbugal mu mettee ni li ko dal lépp, ndax moom ci boppam, mbaax geek njubte gi mu masa jàppoo, barewu ciy moroom. Xelum Ayóoba moo manula jàpp nan la Yàlla mana seetaane yooyu coono di dikkal ku mel ni moom. Moo tax mu am fitu dëkk Yàlla ci layoo bu mu bégga séq ak moom. Taxul Ayóoba gëmadi, waaye nammeelam moo di mu am dëgg fi kanam Yàlla, ak itam firnde ju setal deram, gannaaw moom nit ku baax la.

Li Ayóoba laaj nag, Yàlla àdduwu ci, waaye ngëmu Ayóoba la tontoo kàddu gu jeexal aw lay, ci ab taalif bu mu misaale ne moo man te moo xam. Gannaaw loolu la Ayóoba nangu ne Yàlla mooy Buur te moom rekk a xam. Ci kaw loolu la tuub waxi meram ju épp.

Tëjteb téere bi moo nettali ni Ayóoba mujje. Xariti Ayóoba ya nag la Yàlla sikke kàddu yu dëng ya ñu firee coonoy Ayóoba. Mennum Ayóoba donj moo njort ne màggug Yàlla weesu na ni xaritam yooyu fooge Yàlla, ci seen gis-gis bi leen diiney cosaan gisloo.

### *Ayóobaa barkeel, ragal Yàlla*

<sup>1</sup> Amoon na ca réewum Ucc\*, góor gu ñuy wax Ayóoba. Góor googu nekkoon ku mat te jub, ragal Yàlla te dëddu lu bon. <sup>2</sup> Amoon na juróom ñaari doom yu góor ak ñett ñu jigéen. <sup>3</sup> Alalam juróom ñaari junniy (7 000) gàtt la woon, ak ñetti junniy (3 000) giléem, ak juróomi téeméeri (500) lëkkey nag yuy rijji, ak juróomi téeméeri (500) mbaam yu jigéen, ak jaam yu bare lool. Góor googu daal moo éppoon daraja ca mboolem waa penku.

<sup>4</sup> Doomi Ayóoba yu góor ya nag dañu daa ay-ayloo berndey biir kër, ku nekk ak bésam. Su ko defee ñu yónnee, woo ca seen ñetti jigéen ña, ngir ñu bokk di lekk ak a naan. <sup>5</sup> Bu ñu demaan ba ñépp fégal, Ayóoba day yónnee ngir sell-luloo leen. Ci biir loolu day teela xëy, daldi leen joxeel ñoom ñépp ba ñu daj saraxu rendidóomal, ku nekk benn. Booba Ayóoba da naan: «Jombul sama doom yii bàkkaar nañu mbaa ñu xarab Yàlla ci seen xel.» Noonu la Ayóoba jàppoo woon bés bu nekk.

### *Nattu nuyoo na*

<sup>6</sup> Mu am bés goney Yàlla dikk, teewsi fa Aji Sax ji. Seytaane tuumaalkat bi itam bokk ca. <sup>7</sup> Aji Sax ji ne Seytaane: «Ana foo jóge?» Mu ne: «Ci wër-wëraan ak doxantoo àddina laa jóge.» <sup>8</sup> Mu ne ko: «Xanaa seetlu nga Ayóoba, sama jaam bi! Amul moroom fi kaw suuf de! Ku mat la te jub, ragal Yàlla te dëddu lu bon.» <sup>9</sup> Mu ne ko: «Ayóoba daa ragal Yàlla ci neen a? <sup>10</sup> Xanaa du yaa ko ñag, ñag këram ak mboolem alalam, ba mu daj? Liggéeyam, nga barkeel, ba ag juram law ci réew mi. <sup>11</sup> Xàccil sa loxo rekk, dal ci mboolem lu bokk ci moom. Ndegam du jàkkaarlook yaw, xarab la.» <sup>12</sup> Aji Sax ji ne Seytaane: «Ayca boog! Mboolem lu bokk ci moom a ngi ci say loxo, waaye moom ci boppam, bu ko sa loxo laal.» Ba loolu amee Seytaane bàyyikoo fa Aji Sax ji.

\* 1:1 1.1 Ucc: jombul ma nga woon ca penkub Israyil, fi ñuy wax tey Arabi mbaa Yordani mbaa Siri.



13 Mu am bés doomi Ayóoba yu góor ak yu jigéen bokk toog di lekk ak a naan biiñ ca seen kër taaw. 14 Ci biir loolu ndaw dikk ne Ayóoba: «Nag ya daal a doon rijji, mbaam ya di for ca wet ga. 15 Genn gàngooru yàqkat bàyyikoo Saba, dikk daanu ci seen kaw, yóbbu leen; surga ya, ñu leel ñawkay saamar. Mennum man mii maa ca rëcce ba àggesi la ko.» 16 Kooku daaneelagul kàddoom sax, keneen dikk ne: «Sawaraw Yàlla daal a wacce asamaan, boole gàtt yaak surga ya, jafal ba xoyom leen. Mennum man donj maa ca rëcce ba àggesi la ko.» 17 Kooka daaneelagul kàddoom, keneen dikk ne: «Kaldeen ñaa def ñetti gàngoor, dikk sèxëtoo giléem ya, yóbbu, surga ya, ñu leel leen ñawkay saamar. Mennum man donj maa ca rëcce ba àggesi la ko.» 18 Kooka daaneelagul kàddoom, keneen dikkati ne ko: «Sa doom yu góor ak yu jigéen a doon lekk ak a naan biiñ ca seen kër taaw. 19 Ngelaw lu mag jekki bàyyikoo ca wàllaa màndiñ ma, dal ca ñeenti weti néeg ba, mu màbb ca kaw gone ya, ñu dee. Mennum man donj maa ca rëcce ba àggesi la ko.» 20 Ba mu ko defee Ayóoba jóg, ne tareet mbubbam, ba noppi watu nel, di ko ñaawloo. Mu daanu fi suuf, sujjóot, 21 daldi ne: «Dunj laa génne sama biiru ndey te dunj laay delloo. Aji Sax jee maye, Aji Sax jee nangu. Cant ñeel na Aji Sax ji.» 22 Ci biir loolu lépp Ayóoba bàkkaarul, jiiñul Yàlla lenn lu juunu.

## 2

### *Nattu nuyooti na*

1 Mu am bés goney Yàlla dikk, teewsi fa Aji Sax ji. Seytaane itam bokk ca, dikk teewsi fa Aji Sax ji. 2 Aji Sax ji ne Seytaane: «Ana foo jóge nii nag?» Mu ne ko: «Ci wër-wëraan ak doxantoo àddina laa jóge.» 3 Mu ne ko: «Xanaa seetlu nga Ayóoba, sama jaam bi! Amul moroom fi kaw suuf de! Ku mat la te jub, ragal Yàlla te dëddu lu bon.» 4 Seytaane ne Aji Sax ji: «Bakkan a wuutu bakkan rekk. Mboolem lu nit am, man na koo wecee bakkanam. 5 Léegi xàccil sa loxo rekk,

dal ci kaw jëmmam jépp. Ndegam du jàkkaarlook yaw, xarab la.» 6 Aji Sax ji ne Seytaane: «Kon mu ngoogu say loxo. Waaye bakkanam daal, sàmm ko.» 7 Ba mu ko defee Seytaane bàyyikoo fa Aji Sax ji. Ci kaw loolu mu sànni Ayóoba ay taab yu metti, dale ko ca téstën ma, ba ca kaw bopp ba. 8 Mu wut tojitu njaq, di ko xasanoo, daldi toog ci biir jalub dóom. 9 Jabaram ne ko: «Yaa ngi ñoy ci sa mat gi ba tey? Xarabal Yàlla boog te dee!» 10 Mu ne ko: «Waxi jeeg bu dof daal ngay wax, yaw! Du Yàlla da nuy may lu baax, nu jël? Kon kay bu nu mayee safaan ba it, nu wara jël.» Ci biir loolu lépp Ayóoba bàkkaarul ciw lammañam.

### *Ayóoba am nay gan*

11 Gannaaw loolu ñetti xariti Ayóoba ñoo dégg mboolem musiba moomu ko dikkal. Ku nekk ci ñoom jóge këram: Elifas waa Teman ba, ak Bildàdd waa Suwa ba, ak Cofar waa Naama. Ñu bokk daje ngir dikk mas-sawu Ayóoba, dëfal ko. 12 Ñu dikk ba jub ko, di ko séentoo fu xawa sore, waaye xàmmeetuñu ko. Ñu daldi ne yikkét jooy. Ba ñu agsee ku ci nekk ne sa mbubb tareet. Ñuy ñaawlu, di tibb suuf, di sànni ca kaw, muy sottiku ci seen kaw bopp. 13 Bokk nañu toog ak Ayóoba fa suuf juróom yaari bëccëg ak juróom yaari guddi, kenn waxu ko baat, ndax dañoo gis mitit wa mu àndal tar lool.

## 3

### *Ayóoba rëbb na bésu juddoom*

1 Gannaaw loolu Ayóoba àddu, ma ngay móolu bés ba mu juddoo. 2 Mu ne: 3 Sànkute ñeel na bés ba ma juddoo, ba ca guddi ga noon: «Sosees na góor!» 4 Boobu bés yal na di lëndëmu neen, di bés bu Yàlla ma fa kaw faaleedi, te genn leer du ko leeralati. 5 Yal na lëndëmu njaniiw aakimoo boobu bés, xàmbaar mbaaral ko, muy guddig digg bëccëg gu raglu. 6 Googu guddi yal na ko lëndëm moom, yàlla bumu bége fi digg bési at mi,

yàlla bees ko limaaleti ci weer yi.

<sup>7</sup> Googu guddi kay yàlla bu ci gone sosooti, yàlla bu ci sarxolle jolleeti.

<sup>8</sup> Yal na alagkati bés yi alag googu guddi, alagkat yu mana xabtal ninki-nànka.

<sup>9</sup> Yal na biddiwi njëlam giim, muy séentug leer te du am; yàlla bumu gis fu njël di xippee,

<sup>10</sup> gannaaw moo tëjul sama biiru ndey, ba làq saay gët coono.

<sup>11</sup> Moo lu ma tee woona deeye biiru yaay? Lu ma tee ne putt, dog, boog?

<sup>12</sup> Ana lu may óom doon uufe? Ana lu ma doon nàmpey ween?

<sup>13</sup> Tëdd koon naak jàmm biir bàmmeel, di nelaw, nopploondook

<sup>14</sup> buur yeek jawriñi àddina, yi tabaxal seen bopp, kèri buur yu gental tey.

<sup>15</sup> Nopplu koon naak garmi yay boroom wurus, te daan feesal seeni kër, xaaalis.

<sup>16</sup> Mbaa ma mel koon ni lumb wu làqu biir suuf, mbaa cuux mu jotula gis ug leer.

<sup>17</sup> Biir bàmmeel la ñu bon ñiy noppee sonle, fa la ña jeele doole nopploo,

<sup>18</sup> ña ñu tëjoon ne finaax, déggatuñu coowal ku leen di sas,

<sup>19</sup> ku tuut ak ku mag di fa benn, jaam noppi faa jaamu sangam.

<sup>20</sup> Boroom tiis, ana lees koy maye leeru kaw suuf?

Lu boroom naqar di doye bakkan?

<sup>21</sup> Ku ni mel ku yàkkamti dee gu dikkul, te gëna sàkku dee alal ju làqu,

<sup>22</sup> ba bu gisoon bàmmeel, di textexi ci biir mbég ak bàmneex.

<sup>23</sup> Ngóor sii aw yoonam làqu, ana lu muy doye dund, te Yàlla dar kepp ko?

<sup>24</sup> Samay binni di samaw ñam, samay yuux fettax nim ndox.

<sup>25</sup> Tiitaange déy a ma dikkal, li ma ragaloon kay a ma dab.

<sup>26</sup> Du jàmm, dug dal, du noflaay bu ma am, jallaañoo dikk na!

## 4

### *Elifas nee yaru Yàlla du ñàkk*

<sup>1</sup> Elifas waa Teman ba àddu ne:

<sup>2</sup> Ma jéema àddu boog, soo ma talee! Ndaxam noppeeti, maneesu ko.

<sup>3</sup> Yaw de, ñu bare jàngal nga leen, loxo yu toqi woon, nga dooleel,

<sup>4</sup> ku jangoon, nga wax, mu taxaw, kuy óomam dammoon, nga dëgéral.

<sup>5</sup> Léegi muy yaw, nga yoqi; mbir mi dal fi sa kaw, nga jànnaxe.

<sup>6</sup> Xanaa du sag ragal Yàllaay sa cëslaay, sag maandute di sa yaakaar?

<sup>7</sup> Seetal rekk, ana jaamburu Yàlla bu masa sànkú?

Ana foo gis ku jub ku mujje yàqu?

<sup>8</sup> Li ma gis daal, ku bey ñaawtéef, ji coono, yaa koy góob.

<sup>9</sup> Yàllaay wal noowam, nga sànkú, sànjam gelaw, nga jeele.

<sup>10</sup> Gaynde ñar, segg xiiru, selli waxambaaney gaynde tojandoo.

<sup>11</sup> Gaynde ga ñàkk um pàdd, dee, doomi gaynde ga tasaaroo.

<sup>12</sup> Man la kàddu dikkal ci kumpa, sama nopp taataan ndéey la,

<sup>13</sup> ci géntu guddi, fa xalaat di jaxasoo, nelaw yu xóot dikkal boroom.

<sup>14</sup> Tiitaange ne ma taral, may lox, cér yépp di kat-kati.

<sup>15</sup> Ngelaw lu sew jaare sama kanam, sama kawari yaram ne sàyy-sàyyaaral.

<sup>16</sup> Mu def ku taxaw, te xàmmiwuma ko, di jëmm ju janook man, may gis.

Mu jëkke ne cell, mujje àddu, ma dégg.

<sup>17</sup> Mu ne: «Nit man naa am njekk fa kanam Yàlla?

Am man naa laab fi kanam ki ko sàkk?

<sup>18</sup> Ndegam surgaam ya ca asamaan sax wóoluw leen,

ay malaakaam sax, mu sikk leen,

<sup>19</sup> gën ñi dëkke kèri ban,

cosaano ci pëndub neen,

gëna neexa nappaaje gunóor.

<sup>20</sup> Diggante subaak ngoon, ñu moxoñoó, bala ngaa yég, ñu sànkú fàww,

<sup>21</sup> seen buumi xayma foqatiku,

ñu dee ci biir ag umple.»

## 5

<sup>1</sup> Rikk wooteel, ndegam am na ku lay wallu!

Ana ci ñu sell ñi, kan ngay sàkku ndimbal?

<sup>2</sup> Am sannax déy, naqari deret a koy rey, ab téxét, xéraangee koy faat.

<sup>3</sup> Maa gis am sannax, mu saxi reen, ma jekki ñaan alkàndey dèkkuwaayam.

<sup>4</sup> Ay doomam ay sore yoonu mucc, ñu di leen dèggaate ca pénc ma, te kenn du leen xettli.

<sup>5</sup> Am ngóobam, ku xiif a koy lekk, ba lekkaale la saxe biir dég ya, te alalam, ku mar a koy ñaf-ñafee.

<sup>6</sup> Aw ay du garab, bay fèlle biir suuf, coono du jekki, jebbi.

<sup>7</sup> Ku juddu, coono nga juddul, mooy ferñent, kaw rekk la jëm.

<sup>8</sup> Man de su ma doon yaw damay sàkku Yàlla,

te kon Yàlla laay diis sama mbir.

<sup>9</sup> Keey def jéf ju màgg ju nattuwal, di def kiraama yu limuwul.

<sup>10</sup> Keey taw, suuxat suuf, yónnee ndox, nàndal ub àll.

<sup>11</sup> Keey kaweel ku suufe, kuy ñaawlu siggee mbégte.

<sup>12</sup> Keey neenal pexem ku muus, ba mébétam du sotti.

<sup>13</sup> Keey kepp boroom xel cig muusam, ba pexem ndèngteem teela sooy.

<sup>14</sup> Ñu ni mel, bëccëg ñu dajeek lëndëm, di làmbatoo digg bëccëg ni bu doon guddi.

<sup>15</sup> Yàllaay musal néew-ji-doole ci saamaru làmmiñ

ak loxol boroom doole,

<sup>16</sup> néew-ji-doole jagoo yaakaar, defkatu njekkar ub gémmiñug boppam.

<sup>17</sup> Ma ne, ndokklee ku Yàlla jubbanti, kon bul bañ yarub Aji Kawe ji.

<sup>18</sup> Moom kat mooy mitital, di fajtal; mooy gaañe, di wérale loxol boppam.

<sup>19</sup> Juróom benni njàqare teew, mu xettli la ca,

ba ko juróom yaareel sax, doo ca loru.

<sup>20</sup> Ab xiif, moo la cay jote ba doo dee, ab xare, nga mucc ñawkay saamar,

<sup>21</sup> aaytéefu làmmiñ, nga fegu ca, te yàqule guy dikk, doo ko ragal.

<sup>22</sup> Yàquleek ub xiif, nga kekku; rabu àll, doo ko ragal.

<sup>23</sup> Doji àll bi sax, kòllèreg jàmm ngay séq ak ñoom,

te ndundati àll bi dañuy jàmmook yaw,

<sup>24</sup> nga xam ne sa xayma, jàmm,

soo nemmikoo sa parlu, dara du ca wuute.

<sup>25</sup> Dangay ràññee ni saw askan di yaatoo, say sèt di law ni gàncax.

<sup>26</sup> Ni pepp di ñore, ñu door koo góob, ni ngay màggataale doole, doora dègmal bàmmeel.

<sup>27</sup> Lii kat lanu gis, te lii rekk la. Dégg, jariñu.

## 6

### *Maa yey ne ba ma*

<sup>1</sup> Ayóoba daldi ne:

<sup>2</sup> Éy su sama tiis wii doon lu ñuy natt diisaayam?

Su sama ay wii wépp doon lees di màndaxe?

<sup>3</sup> Kon tey mu gëna diis suufoo suufi géej. Moo waral sama kàddu yi ma rëcc.

<sup>4</sup> Da di fetti Aji Man jee ma jam, ba tooke ji nàndal samam xel, mbugalu Yàlla yu raglu làng-déral ma.

<sup>5</sup> Mbaamu àll dina ñaax te tiim ñax mu tooy a?

Am nag dina nàññi te tiim um ngooñam?

<sup>6</sup> Deesul lekk lu soof, loo deful xorom, rawatina lu weex li ci nen.

<sup>7</sup> Sama xel a ko nanguwul, ñam la wu ma seexlu.

<sup>8</sup> Éy kuy amal sama dagaan, ba Yàlla sottal sama yaakaar!

<sup>9</sup> Yal na neex Yàlla mu nappaaje ma, yal na afal loxoom, ne ma tipp.

<sup>10</sup> Konoon sama ndàmpaay di li ma gàntalul

kàdduy ku Sell ki,

te kon ma bég, di fecce biir mitit wu dul dal.

<sup>11</sup> Ana doole ju ma amati bay muñ? Ana luy sama muj ba may dundati?

<sup>12</sup> Dama diw doj bay àttan lu ne?

Am yaramu xàñjar laa am?

<sup>13</sup> Ndax amati naa wall,  
te peXe réer ma mèrr?

<sup>14</sup> Ku ne lasiim, saña séentu xarit baaxe  
la,

doonte fekkul nga ragal Aji Man ji.

<sup>15</sup> Samay xarit a ma wor ni yol moo fekk  
ñiis.

Dañoó mel ni dex yoo fekk ndox ma jeex,

<sup>16</sup> te ba sedd bay tàggoó,  
ndox mu wayoon ànd caakam yuur,  
di seey,

mu fees dell ak ndox mu nêx.

<sup>17</sup> Waaye bu noor biy dikk, mu wow,  
tàngoór jam, mu ñiis.

<sup>18</sup> Jèggi giléem ay wër um ndox, ba wacc  
seenu yoon,

saaraan ca ndànd-foyfoy ga, réer.

<sup>19</sup> Waa jègg ya bawoo Tema di wër ay yol,  
tukkikat ya bawoo Saba di séentuy dex,

<sup>20</sup> ba àgg fa ñu ko fooge woon, yaakaar  
tas,

seen kóolute mujje mbetteel.

<sup>21</sup> Yeen déy, yeenay yooyu wal ci man.

Yeena gis sama njàqare, jàq.

<sup>22</sup> Dama leena masa ñaan dara,  
mbaa ma sàkkoo ci seen alal ab ger,

<sup>23</sup> ngir ngeen xettli ma ci loxol noon,  
mbaa ngeen jot ma ci boroom doole bu  
néeg?

<sup>24</sup> Xamal-leen ma, man ma ne cell!  
Ana fu ma juume? Wonleen ma ko!

<sup>25</sup> Kàddu yu jub da lay yey,  
ana li ngeen may yedde, lu mu doon?

<sup>26</sup> Dangeen di jéema sikk samay wax,  
di jàppe ngelaw kàdduy xol bu jeex?

<sup>27</sup> Ab jirim sax àttan ngeen koo tegoo  
bant,

seen xarit sax sañ ngeen koo jaay.

<sup>28</sup> Léegi nag, rikk walbatikuleen fi man,  
xanaa дума janook yeen di fen?

<sup>29</sup> Deltuleen gannaaw, bu njubadi am.  
Dellootileen gannaaw, sama der set na  
wecc!

<sup>30</sup> Ana fu ma waxe njubadi?

Am damaa xamul lu njekkar di saf?

## 7

<sup>1</sup> Xanaa du fani doom aadama fi kaw suuf  
àppu doñ-doñ la,

dundam di dundu liggéeykat bu ñu bind?

<sup>2</sup> Daa mel ni jaam bu namm keppaar  
mbaa mbindaan mu yàkkamtig peyam.

<sup>3</sup> Noonu laa séddoo ay weeri mititu neen,  
jagoo ni ay guddiy coono.

<sup>4</sup> Damay tēdd te naa:

«Kañ laay jóg nag?»

Waaye guddi gudda gudd,  
walbatiku ba fajar xar génnliku na ma!

<sup>5</sup> Maa ngi sàngooy sax ak àkki ban,  
sama der biy xar, di wal.

<sup>6</sup> Kukkub ràbb sax  
ni samay fan di jeexee ko gaaw,  
poqe di jeex, te yaakaar amul.

<sup>7</sup> Éy Yàlla, bul fàtte ne sama dund gii,  
ag noo donj la,

te dootuma teg bēt ngēneel.

<sup>8</sup> Bēt bi may gis tey du ma gisati,  
dinga ma niir, fekk nekkatuma.

<sup>9</sup> Niir wu naaxsaay, ne mes,  
mooy ku wàcci njaniiw, du yéegati!

<sup>10</sup> Du ñibbeeti këram,  
dèkkuwaayam dootu ko fat.

<sup>11</sup> Moo tax дума téye sama làmmiñ,  
xanaa di waxe biir njàqare,  
di jooye biir naqar.

<sup>12</sup> Dama di Géej menn mbaa Ninki-nànka,  
ba nga di ma booleek ku may wattu?

<sup>13</sup> Dama naan: «Naa nopploo tēraayub  
laltu,

ba yennikoo ab lal sama tawat,»

<sup>14</sup> nga di ma tiitale ay gént,

di ma xoqtale ay jeneer,

<sup>15</sup> ba ku ma xojoon sax, ma jël,  
nde dee a ma gēnal dese yii yax.

<sup>16</sup> Doy na sèkk! Dunduma ba fàww;  
ba ma, samay fan genn noo la!

<sup>17</sup> Luy nit ba nga di ko gēddaal,  
bay def sam xel ci moom,

<sup>18</sup> di ko nemmiku saa yoo xēyee,  
di ko nattu saa su ne?

<sup>19</sup> Doo ma dummóoyu boog,  
may ma sax fu ma wonaasoo?

<sup>20</sup> Yaw miy seetlu jaam ñi,  
ma bàkkaar, lu mu lay wàññi?

Ana lu tax nga di ma diiral sa bopp nii,  
ba ma mujj diis la gann?

<sup>21</sup> Lu tee kon nga baal ma samag moy,  
jéggal ma samag tooñ?

Léegi tey ma tëri biir suuf,  
nga di ma seeta seet, fekk nekkatuma.

## 8

### *Bildàdd nee musiba, aña boroom*

- <sup>1</sup> Bildàdd ma bàyyikoo Suwa, àddu ne:  
<sup>2</sup> Ana foo àppal sa wax jii?  
 Ngay mbel-mbeli ni callweer!  
<sup>3</sup> Ana Yàllaak safaan yoon?  
 Ana Aji Man jeek safaan dëgg?  
<sup>4</sup> Bu ko sa doom yi moyee, kay,  
 mu ba leen ak seen añaub tooñ!  
<sup>5</sup> Yaw nag soo sàkkoo Yàlla,  
 dagaan Aji Man ji aw yiwam,  
<sup>6</sup> soo muccee ayib te jub,  
 day daldi taxaw temm ci say mbir,  
 delloo la sa kërug njekk,  
<sup>7</sup> nga yokkoo yokku èllëg,  
 ba xeeb sa démb.  
<sup>8</sup> Laajal rekk maas gi nu jiitu,  
 te teewlu seen gëstuy maam ya.  
<sup>9</sup> Nun xamunu, démb rekk lanu,  
 sunu fani kaw suuf di takkndeer suy wéy.  
<sup>10</sup> Ñi ñu jiitoo lay xamal, wax la,  
 tibbe seen xol yii kàddu, dénk la:  
<sup>11</sup> «Ndax jàqaar dina naate fu dul ban bu  
 tooy,  
 am barax dina saxe fu amul ndox?  
<sup>12</sup> Bu ndox ma njiisee, mooy jëkka lax,  
 te du ñoragum bay mata dog.»  
<sup>13</sup> Loolooy muju képp ku fàtte Yàlla,  
 yaakaaru yéefar, tas rekk,  
<sup>14</sup> cëslaayam màbb,  
 làquwaayam di lëndu jargoñ.  
<sup>15</sup> Mu wéeroo kërám, kër gay yëngu;  
 mu ñoyu ca, muy jaayu.  
<sup>16</sup> Ku gëmadee ngi mel ni garab  
 gu jant biy jam, mu naat;  
 car yay lawe tool ba mu saxe,  
<sup>17</sup> reen ya rawaasoo ci biir jalub xeer,  
 muy kërug dojam gu mu ñoy.  
<sup>18</sup> Nga buddee ko bérab ba mu sax,  
 bérab ba jàmbo ko, ne ko: «Masuma laa  
 gis!»  
<sup>19</sup> Geneen garab ay jebbi, wuutu ko.  
 Mu ngoog, ab yéefar, nii la mujam di  
 rafete!  
<sup>20</sup> Dama ne: Yàlla du gántal ku maandu,  
 te du dooleel kuy def lu bon.

- <sup>21</sup> Moo lay may loo ree,  
 bay sarxolle,  
<sup>22</sup> say bañ gaccóo gacce,  
 xaymab ñu bon ña gental.

## 9

### *Ayóoba nee Yàlla du ku ñuy layool*

- <sup>1</sup> Ayóoba dellu ne ko:  
<sup>2</sup> Waaw, noonu la moos, xam naa ko!  
 Ana nu nit di ame dëgg fa kanam Yàlla?  
<sup>3</sup> Ku bégga layook Yàlla it,  
 mu laaj la junni, doo tontu lenn.  
<sup>4</sup> Moo rafet xel, bare doole!  
 Ana ku koy jéema të, mu jig ko?  
<sup>5</sup> Keey randal tund yi te duñu ko yég;  
 keey mer, jàllarbi leen,  
<sup>6</sup> gësëm suuf fa mu tege,  
 ay kenoom jaayu.  
<sup>7</sup> Keey gëdd jant bi, aaye koo fenk,  
 ub ràpp biddiwi asamaan.  
<sup>8</sup> Keey wéetoo di firi déndi asamaan,  
 di daagoo kawtey géej.  
<sup>9</sup> Moo sàkk dëllooñ gi féete bëj-gànnar  
 ak yaar yi ci digg asamaan,  
 ak ga ca néegi bëj-saalum.  
<sup>10</sup> Keey def jëf ju màgg ju nattuul,  
 ak kiraama yu limuwul.  
<sup>11</sup> Mu ngoog, daf may romb te дума ko  
 gis,  
 jàll, wéy te дума ko yég.  
<sup>12</sup> Kii, bu kéfee, ana ku koy tere?  
 Ana ku ko naa: «Looy def nii?»  
<sup>13</sup> Yàlla du dánk meram,  
 ciy tánkam la farandooy Raxab,  
 ninki-nànkay géej, di gappru!  
<sup>14</sup> Ana nu ma koy àddoo, man?  
 Ana kàddu yu may layook moom?  
<sup>15</sup> Su sama der setee it, дума mana àddu,  
 xanaa sama àttekat bii laay tinu.  
<sup>16</sup> Su ma ko woon cib layoo, mu wuyu  
 itam,  
 du tax mu wóor ma ne dina ma teewlu.  
<sup>17</sup> Moom mi may rajaxee ngelaw lu réy,  
 te di ma gaaña gaañ ci dara,  
<sup>18</sup> mayuma sax ma astandiku,  
 xanaa reggal ma aw naqar.  
<sup>19</sup> Su dee kàttan, kee bare doole!  
 Su dee wàllu yoon, kan moo ma cay woo?

20 Ma am dëgg, sama kàddu sikkal ma,  
ma mucc ayib, sama kàddu teg ma tooñ.  
21 Maa mucc ayib a? Xam!  
Maa sib sama dund gii!  
22 Lépp benn la rekk! Moo tax ma ne:  
«Ku mucc ayib ak ku bon lay boole  
fàkkas.»  
23 Mbas ne jaas, rey ñu deful dara,  
Yàlla di leen kekkook seen njàqare.  
24 Àddinaa ngi tege ci loxol ku bon,  
te Yàllaa ngi muur gëti àttekat yi!  
Su dul moom ana ku mu doon?

25 Ab dawkat sax ni samay fan di jeexee  
ko raw.  
Wone nañu gannaaw te gisuñu lu baax.  
26 Samay fan tarxiis nañu, wéy, woyof ni  
gaali barax,  
mbaa jaxaay ju naan jàyy cim rëbbam.  
27 Su ma nee: «Naa fàtte sama tawat,  
leeral kanam te bég,»  
28 du tee ma ragal mboolem samay mitit,  
nde xam naa ne du tee nga topp ma.  
29 Ndegam maa tooñ,  
ana lu may sonn, doye?  
30 Su ma raggoo woon saabu,  
ba raxasoo xeme sax,  
31 du tee nga tàbbal ma cim leeñ,  
ba samay yére sax seexlu ma.

32 Yàlla da dul nit ni man, ba may weran-  
teek moom,  
di ànd ak moom, layooji.  
33 Su amoon sax kuy dox sunu digg, jubale  
nu;  
sañ noo boole teg loxo,  
34 teggil ma yetam, mu sore ma,  
ba darajaam ju raglu dootu ma tiital,  
35 konoon ma wax ak moom te дума tiit.  
Waaye gannaaw demewul noonu, man  
laak man!

## 10

### *Ayóoba nee lu mu def Yàlla?*

1 Maaka sib sama dund gii!  
Naa afal sama kàddug tawat,  
di àddoo naqaru xol.  
2 Dama naa Yàlla: Bu ma topp ug tooñ.  
Xamal ma kay li nga may topp, lu mu!  
3 Ana lu la note di jariñ,  
ba ngay bañ li nga sàkke sa loxol bopp,

tey àntal pexem ku bon?  
4 Xanaa gëti nit donj nga am,  
am ni nit di gise rekk ngay gise?  
5 Say fan daa tollook fani doom aadama,  
am say at daa yem ak ati nit,  
6 ba ngay seet fu ma ñaawe,  
di liñbat fu ma moye?  
7 Moona xam nga xéll ne tooñuma,  
te amul kenn kuy xettli nit ci sa loxo.  
8 Say loxoo ma mooñ, tabax ma ba ma mat  
sëkk,  
léegi nga di ma yàq yaxee!

9 Rikk fàttlikul ne yaa ma tabax,  
ni bu ma doon ban,  
xanaa doo ma delloo xaat ci pëndub suuf?  
10 Xanaa du yaa ma xelli woon ni meew  
ci sama biiru ndey,  
wayal ma nim soow,  
11 wodde ma der ak suux,  
ràbbe ma yax aki siddit?  
12 Yaa ma may bakkan, won ma ngor,  
yaa sàmme sa yégeel samag noo.

13 Ndeke yoo lii nga dencoon ci sa xol,  
xam naa ne lii nga naroon:  
14 ne ma dann, ba su ma bàkkaaree,  
doo ma baal samag tooñ.  
15 Su ma defee lu bon, ngalla man,  
te bi ma defee njekk it, sañumaa siggi,  
gàcce laa suure, sangoo toroxte.  
16 Waaye su may siggi rekk nga mel ni  
gaynde,  
di ma rëbb,  
dellu di ma lore say kiraama,  
17 yónneeti ma say seede,  
gën maa songati,  
ay gàngoor di wuutante fi sama kaw.  
18 Ana loo ma doon génnee sama biiru  
ndey?  
Doon naa dee te bët du ma gis!  
19 Doon naa mel ni ku masula am,  
jóge ci biir, ñu yóbbu bàmmeeel.  
20 Xanaa du fan yu néew laa dese? Ba ma  
boog!  
Xiddil, ma leqliku,  
21 bala may dëddu, délseetuma,  
bala may tàbbi réew mu lëndëm ga ne  
këruus,  
22 réewum lëndëm,  
mu ne këruus, salfaañoo,

ag leer sax, saf fa lëndëm!

## 11

*Cofar nee tuub, raw*

- <sup>1</sup> Cofar ma bàyyikoo Naama àddu, ne:  
<sup>2</sup> Yii kàddu yu wale, deesu ko tontoo?  
 Wax ju bare tax na nit a yey?  
<sup>3</sup> Sa kebetu yii wedamal na kenn a?  
 Am dangay ñaawle te deesu la tiiñal?  
<sup>4</sup> Nee nga sa àlluwa wér na péññ,  
 sa jëw rafet, Yàlla seede.
- <sup>5</sup> Éy su Yàlla nammoona wax,  
 ba àddu, wax ak yaw,  
<sup>6</sup> àgge la kumpay xelam mu rafet,  
 mi wees dég-dég,  
 kon nga xam ne Yàlla jéllale na sa lenni  
 tooñ!
- <sup>7</sup> Dangaa mana gëstu mbóoti Yàlla, ba gis  
 ko?  
 Am yaa ñédd Aji Man ji?  
<sup>8</sup> Lu gëna kawé kaw, ana loo ci man?  
 Lu gëna xóot njaniiw, ana loo ci xam?  
<sup>9</sup> Mànggaayu Yàllaa sut suuf,  
 gëna yaatu géej!  
<sup>10</sup> Su dikkee, tëj nit,  
 woo ko péncum àtte, ku ci man dara?  
<sup>11</sup> Moom mi xàmmeë ñi dul niti dara,  
 mooy gis lu bon, te du laaj mu teewlu.  
<sup>12</sup> Waaye ku boppam feesul, bu muusee,  
 mbaamu àll a judduwaale nangu.
- <sup>13</sup> Waaye yaw soo defee sa xel ci Yàlla,  
 dékk ko say loxo,  
<sup>14</sup> fabal say ñaawtéef, sànni,  
 te baña xajal njubadi sa biir xayma,  
<sup>15</sup> kon déy, nga mucc gàkk, siggi;  
 dëju te doo tiit,  
<sup>16</sup> sa coonob tey ngay fàtte,  
 ni waltan mu wal ba wéy donñ  
 ni nga koy fàttlikoo,  
<sup>17</sup> te yaay gëna leer jantub njolloor,  
 ba lëndëm di saf leeru njël.  
<sup>18</sup> Kon nga am yaakaar ak kóolute,  
 aaru, soo téddee, nelaw,  
<sup>19</sup> jaaxaan, kenn du la lëjal,  
 ñu bare di la leewaayu;  
<sup>20</sup> ku bon jàq, ba gët ya giim,  
 rawtu réer ko,

yaakaaratul lu moy noowam gu mujj.

## 12

*Ayóoba nee Yàlla lu ko neex lay def*

- <sup>1</sup> Ayóoba àddu ne:  
<sup>2</sup> Yeen daal yeenay nit;  
 ngeen dee, xel mu rafet dee.  
<sup>3</sup> Ndaxam man it am naam xel ni yeen,  
 duma seen cuune fenn,  
 te lii ngeen wax, kenn umplewu ko.  
<sup>4</sup> Maay reetaanu xarit,  
 te daan woo Yàlla, muy wuyu;  
 tey ñuy reetaan ku jub, mucc ayib!  
<sup>5</sup> Ku neexlee ngi ñaawal ku safaan dab,  
 defe ne safaan, ku tarxiis lay bëmëx.  
<sup>6</sup> Jàmm a nga ca xaymay yàqkat ya,  
 te xel mu dal di céru tooñkati Yàlla yooyu,  
 ñabb seeni yàlla.
- <sup>7</sup> Laajal rekk rab yi, ñu xamal la;  
 mbaa njanaaw yi, ñu wax la;  
<sup>8</sup> mbaa nga diisook suuf, mu xamal la;  
 mbaa jëni géej, ñu nettali la.  
<sup>9</sup> Ana ku umple ci mboolem ñii,  
 ne loxol Aji Sax jee def lii lépp?  
<sup>10</sup> Moo yor ci loxoom lépp luy dund,  
 yor noowal képp kuy noyyi.  
<sup>11</sup> Xanaa du nopp ay natt baat bu jib,  
 denqleñ di mosu ñam?  
<sup>12</sup> Mag ak xel mu rafet,  
 fan wu gudd ak ràññee.  
<sup>13</sup> Waaye Yàllaa boole xel ak doole,  
 moom pexeek ràññee.
- <sup>14</sup> Mu ngoog, keey màbb te deesul tabax-  
 aat,  
 di tëj nit, te deesul tijji.  
<sup>15</sup> Mu ngoog, keey aj am ndox, mu maral,  
 mu afal am ndox, mu salfaañe àddina.  
<sup>16</sup> Kee am doole, keey sottal,  
 di boroom aji réer ak ka ko réeral.  
<sup>17</sup> Keey futti kàngam,  
 dofloo kilifa.  
<sup>18</sup> Keey foq mbaxanam buur,  
 jox ko ngemb, mu gemboo.  
<sup>19</sup> Keey futti sarxalkat,  
 jàllarbi njiit lu riigu.  
<sup>20</sup> Keey wedamal ku ñu wóolu,  
 xañ mag xelum ràññee.  
<sup>21</sup> Keey torxal garmi,

yolomal ngañaayu boroom doole.

<sup>22</sup> Keey ñori lu làqoo xóotey lëndëm, leeral lu noon këruus.

<sup>23</sup> Keey màggal aw xeet, teg ca fàkkas leen;

keey lawal aw xeet, teg ca toxal leen.

<sup>24</sup> Keey xañ njiitu xeet am xelam, wërloo ko ndànd-foyfoy lu yoon amul,

<sup>25</sup> muy làmbatoo lëndëm gu genn leer amul, moo koy wërloo ni màndikat.

## 13

### *Ayóoba nee su layoo, yey*

<sup>1</sup> Dama ne, lii lépp maa ko gis, dégg ko, xam ko.

<sup>2</sup> Li ngeen xam, man it xam naa ko; дума seen cuune fenn.

<sup>3</sup> Waaye man Aji Man ji laay waxal, layook Yàlla laa namm.

<sup>4</sup> Yeen nag yeenay rafetalkati fen, yeen ñépp di fajkati caaxaan.

<sup>5</sup> Céy su ngeen noon cell, muy seen rafet xel!

<sup>6</sup> Ngalla dégluleen sama tawat, teewluleen sama kàddug layoo.

<sup>7</sup> Yàlla daal ngeen di waxal njubadi, di ko duural?

<sup>8</sup> Yàlla ngeen faral, am Yàlla ngeen di layool?

<sup>9</sup> Bu leen luqatu woon dina baax a? Am ni ñuy naxe nit ngeen koy naxe?

<sup>10</sup> Su ngeen ko faraloon ci kumpa sax, du tee mu sikk leen moos.

<sup>11</sup> Xanaa màggaayu Yàlla tiitalu leen? Am ragluwaayam ëlëmu leen?

<sup>12</sup> Seenii tari, léebi neen, seenii tont, kiiraayu boob.

<sup>13</sup> Xeremluleen, ba ma wax man ak lu ma mana dal.

<sup>14</sup> Ana lu ma tax di yàpp sama pàllax, di jaay sama bakkan?

<sup>15</sup> Su ma doon rey it moom laay yaakaar, maay janook moom, layool sama bopp.

<sup>16</sup> Loolu it sama mucc a ngi ci, nde ab yéefar du dikk di janook moom.

<sup>17</sup> Dégluleena déglu sama baat, sama kàddu ci seenii nopp.

<sup>18</sup> Dégluleen maa, ma lañal ab layoo, bir na ma ne maay yey.

<sup>19</sup> Ana ku may yey cib layoo?

Kon de ma wedam te dee.

<sup>20</sup> Xanaa nga may ma jaar rekk, ba du jar ma di la làqu:

<sup>21</sup> ngalla teggi ma sa loxo, te buma dabeeti tiitaange loo sabab.

<sup>22</sup> Wooteel, ma wuyu, mbaa ma wax, nga àddu ma.

<sup>23</sup> Ana luy sama ñaawtéef aki moy? Xamal ma samag tooñ ak sama moy.

<sup>24</sup> Ana loo may làqe sa leeru kanam? Danga maa jàppe sab noon?

<sup>25</sup> Xob wuy wéy ngay xoqtal? Ana boob muy naaw, loo ciy topp?

<sup>26</sup> Yaa ma bindal dogal yu wex, añale ma sama ñaawtéefi ndaw!

<sup>27</sup> Yaa ma jéng, di sàmm fépp fu ma jaare, topp sama tànk!

<sup>28</sup> Sama bakkan a ngi ruus ni bant bu fënëx, mbaa mbubb mu maxe.

## 14

### *Àddinaa gàtt, barew tiis*

<sup>1</sup> Ku jigéen jur, yaa néewi fan, géegal coono!

<sup>2</sup> Dangay tóor rekk, lax, wéy ni takkndeer, doo toog.

<sup>3</sup> Mooy kii nag nga teg bët, mooy man mii nga nara layool!

<sup>4</sup> Lu sobewu, ana ku ci mana am lu laab? Du kenn!

<sup>5</sup> Ndegam yaa dogalal nit ay fanam, lim ay weeram,

dogal àpp ba, te du jaas,

<sup>6</sup> teggi ko boog say gët, mu dal-lu, ni liggéeykat bu jaanam wàcc ci bés.

<sup>7</sup> Garab sax ñàkkul yaakaar.

Boo goree, mu jebbiwaat, ba du ñàkk ay njebbat.

<sup>8</sup> Reen ba man naa màggat, èkk ba deeye biir suuf,

<sup>9</sup> mu yég um ndox, rekk, jebbi, saxaat nim njëmbat.

<sup>10</sup> Waaye nit dee, doole réer, bakkan rot, mu ne mes.

<sup>11</sup> Day mel ni déeg bu ñiis, mbaa dex gu wow ba jeex.



12 Doom aadama it tëdd, du jógati,  
du yewwooti, asamaan fekke,  
du jógeeti ci nelaw.

*Làq ma sa mer, ba giif*

13 Éy soo ma nëbboon biir njaniw,  
làq ma, ba sa mer giif,  
dogalal ma àpp, te bañ maa fàtte!  
14 Ndax dees na dee, di dundati?  
Konoon ma muñe ko sama fani coono  
yépp,  
ba keroog sama kuutaay yiwisi ma.  
15 Konoon nga woo ma, ma wuyu,  
te kon nga namm sa càkkéefu loxo.  
16 Konoon yaay lim samay jéego,  
te doo ma topp samay bàkkaar.  
17 Konoon samag tooñ yebe  
ci mbuus mu takke,  
sama ñaawtéef, nga muure ko malaan.

18 Waaye aw tund day màbb, ruus;  
aw doj di toxu,  
19 am ndox di jonji xeer ba mu jeex,  
waame buub suuf, yóbbu,  
te noonu ngay neenale yaakaaru doom  
aadama,  
20 man ko, mu dèddu fàww,  
kanam ga soppiku, nga jalax.  
21 Doom ya tedd, yégul;  
ñu tekkeedi, tinul.  
22 Nit yégul lu moy mititu boppam  
te bakkanu boppam lay tiisoo.

## 15

*Nee ñu lu waay def, boppam*

1 Elifas àddu, ne:  
2 Ayóoba, ku xelu dina tontoo kàdduy  
ngelaw,  
mbel-mbelam nib jaas bu fees dënnam a?  
3 Ku xelu du layoo waxi caaxaan,  
kàddu yu amul lenn njariñ.  
4 Yaw de, yaa ngi neenal worma,  
di yàq njàngat mi war fa Yàlla.  
5 Saw làmmiñ déy, sa ndëngtee koy sa,  
yaa taamu di wax njublan.  
6 Du man de, sa gémmiñu bopp a la teg  
daan,  
sa làmmiñu bopp a la tuumaal.  
7 Xanaa yaa jékka juddu ci nit?  
Am balaa tund yee sosu lañu la jur?

8 Ba Yàllay féncoo yaa doon déglu,  
ba mana aakimoo xel mu rafet?  
9 Ana loo xam lu nu xamul  
ak dég-dég boo am, te nu rafle ko?  
10 Boroom bijjaaw ak màggat a ngi sunu  
biir,  
di ñu sut sa baay aw fan.  
11 Kàddu yi la Yàlla di mas-sawoo da laa  
doyul?  
Boole ci li ñu lay waxe teeyu bakkan?  
12 Ana looy waxe xol,  
di saxaral kanam nii?  
13 Ngay sippi Yàlla sa mer,  
di ko wax lu mel nii!  
14 Ana nit ku mana jub xocc?  
Ana ku laab ku jigéen jur?  
15 Yàlla wóluwul sax ñu sellam ña ca  
asamaan,  
te asamaan sellul ba dooy ko,  
16 rawatina nit, moom mi jara seexlu,  
yàqu jikko,  
di def njubadi ni ndoxum naan.

17 Déglu ma, ma wax la,  
xamal la li ma gis,  
18 muy lu ñu rafet xel ñi jottli,  
jële ko ca seeni maam, te làquñu ko.  
19 Ñoom, seeni maam donj a jagoo woon  
réew mi,  
ba leen doxandéem raxaguloon.  
20 Bésou bés ku bon ay bittarñikoo biir  
njàqare,  
te diirub at yi ñu àppal ku néeg,  
21 coowal musiba mooy buur nopp ya,  
yàqkat bette ko biir jàmm.  
22 Dootu yaakaara mucc musiba,  
saamar a koy yoot,  
23 muy taxawaalu, tan ya mujj xontoo,  
mu xam ne bésou safaan taxaw na.  
24 Njàqareek tiitaangee koy èlém,  
song ko ni buur bu jekku xare.  
25 Moo xàccil Yàlla loxo,  
di jaay Aji Man ji njàmbaar,  
26 danjiiral, buur, wuti ko,  
yiiroo dèllaayu pakkam,  
27 te fekk ko yaflu ba gèt suulu,  
pooj ya duuf bay lob-lobi.  
28 Ku ni mel ay dëkke dëkk yu gental,  
ci kër yu kenn dul dëkke,  
kër yu nara doon jali tojit.

29 Ku bon kooku du woomle, alalam du toog,  
te koomam du lawe miim réew.  
30 Du mucc musiba,  
mooy garab gu daay xoyom car yu yees ya,  
Yàlla wal, mu ne mes.  
31 Bumu yaakaar naxi neen, di nax bop-pam,  
nde neen ay doon ab añam.  
32 Balaa jantam a lang mu jot añam,  
te caram dootu naat.  
33 Day mel ni reseñ gu doom yay yolax,  
mbaa oliw gu tóor-tóor yay ruus.  
34 Waa lāngu yéefar yi duñu am kuutaay,  
te xaymay lekk-kati ger yi la sawara di xoyom.  
35 Ñooy sos joote, wasin ñaawtéef,  
ñoom la seen biir di ëmb wuruj.

## 16

### *Ayóoba gisatul yaakaar*

1 Ayóoba àddu ne:  
2 Kàddu yu mel nii, dégg naa ko lu bare.  
Dëfalkati yokk joote yi ngeen doon, yeen ñépp!  
3 Sa waxi ngelaw yii da dul jeex?  
Ana lu la cuq, ba ngay wax rekk?  
4 Su ngeen doon man, may yeen,  
kon it ma mana wax ni yeen,  
tuur leen baati tuuma,  
wëcc leen bopp.  
5 Waaye su doon man,  
ma wax ak yeen, ba dëfal leen,  
mas-sawu leen, ba ngeen giif.  
6 Waaye su ma waxee, mitit du giif;  
su ma noppee, du tax mu sore.  
7 Yàlla kay a jeexal sama doole,  
tas sama gàngoor.  
8 Moo ma jàpp, semmal ma;  
samab jeexaay seedeel ma tuuma.  
9 Meram la ma daggatee, jéppi ma,  
di yéyu ci sama kaw,  
daasal ma gëti noon, ne ma jàkk.  
10 Nit ñaa ngi ña nàpp fi sama kaw,  
sewal ma, di ma talaata,  
dajaloo, sam ma.  
11 Yàlla da maa wacce ab kàccoor,  
rattax ma ci loxoy ñu bon ñi.  
12 Féexoon naa, mu falaxe ma;

sëq sama ndodd, rajaxe ma,  
def ma diirukaayam,  
13 ay fittkatam gaw ma,  
mu di ma butti te yërëmul,  
di tuur sama sébbriit fi suuf.  
14 Mooy buur ni xarekat fi sama kaw,  
di ma jamat.  
15 Ab saaku laa ñaw, taqoo,  
torox, ne dett fi suuf.  
16 Sama kanam a ngi xonq curr aki jooy,  
sama mbari bët bàddoo lëndëm.  
17 Moona saay yoxo jëfewul coxor,  
te samag ñaan lal na worma.  
18 Suufoo, bul làq sama deret ji tuuru,  
te yal na sama yuux jollee fu af.  
19 Ma ne, tey fi tey, am naa ab seede kaw  
asamaan,  
sama seede kay a nga fa kaw.  
20 Ñi may kókkali, saay xarit a,  
waaye Yàlla laa koy jooy.  
21 Na ab seede layool nit fa Yàlla,  
ni doom aadama di layool moroom ma fi  
kaw suuf!  
22 At yu néew déy a ci des,  
ma dem yoon wu ma dul délsi.

## 17

1 Sama xol jeex,  
samay fan tàggo,  
bàmmeel di ma xaar.  
2 Fu ma jublu ñu di ma ree,  
di ma ñaawal, may gis.  
3 Ngalla Yàlla, gàddul mab daan  
sama digg ak yaw,  
su dul yaw, ana ku may gàddu?  
4 Yaa fatt xelu ñii,  
kon nag bu leen may ndam.  
5 Nee ñu, ku njariñ tax nga wor xarit,  
say doom a cay loru.  
6 Man la nit ñi def léebukaay,  
di ma tifli ci kanam.  
7 Naqar tax na saay gët giim,  
saa cér yépp jeex ba mel ni takkndeer.  
8 Ku jub a ngii jommi ci lii ma dal,  
ku tooñul a ngi xabtalul fi kaw yéefar yi.  
9 Waaye aji jub a ngi topp yoonam,  
boroom loxo yu set a ngi gëna am kàttan.  
10 Waaye yeen ñépp, waxaatleen, ma  
dégg,

boroom xel daal duma ko gis ci seen  
biir!  
11 Samay fan wéy na,  
mébét yàqu,  
yaakaar yàkki.  
12 Ñii guddi lañu def bëccëg,  
naan leer sorewul, te lëndëm teew.  
13 Ndegam kërug njaniw laa yaakaarati,  
te biir lëndëm laa nara tëri,  
14 ndegam maa naa paxum yàqute ma:  
«Yaay sama baay!»  
naa saxu bàmmeel: «Yaay bóoy!» mbaa  
«Jigéen sama!»  
15 Kon ana sama yaakaar?  
Ana ku gisati sama yaakaar?  
16 Xanaa day ànd ak man tàbbi bàmmeel,  
nu bokk tëraayu pënd.

## 18

### *Bildàdd buurati na*

1 Bildàdd mu Suwa àddu, ne:  
2 Xanaa dungeen noppi mukk?  
Àndleen ak xel, nu wax.  
3 Ay mala ngeen nu teg daal,  
def nu ay naataxóona?  
4 Yaw nag yaa topp sa mer ba loru!  
Ayóobaa, àddina day gentel ngir yaw a?  
Am aw doj ay toxal boppam ngir yaw?  
5 Ku bon kay lag leeram di fey,  
te taalam du jolli.  
6 Xaymaam day lëndëm,  
làmpam ba ko tiim ne kamaj.  
7 Bu daa waaxu démb, di temp tey,  
ay mébétam di ko mbas.  
8 Moo dox ba tàbbi cib caax,  
wèndeeloo biir mbaal,  
9 tànk ba téqtaloog fiir,  
ab racctal ne ko ràtt.  
10 Buum ga koy lonk a nga suulu,  
am yeer di ko xaarew ñall.  
11 Lu ragloo koy darey mbetteel,  
ne ko dann.  
12 Mooy xiif ba doole réer ko,  
musiba taxaw, xejjoo ko.  
13 Jàngoro di ko ñacc,  
woppi ndee di lekk cér ya.  
14 Ku bon lees di ñoddee fa jàmmi xay-  
maam,  
diri ko ba fa kanam buuru musiba yi,

15 manees naa dëkke xaymaam, moomatu  
ko,  
tamarax lees fay suy.  
16 Ku bon mooy garab gu dee kaw ak suuf,  
reen wow, xob lax.  
17 Turam tukkee kaw suuf,  
ba deesatu ko tuddem pénc.  
18 Dees koy bëmëxeg leer, tàbbal lëndëm,  
dàqe ko àddina.  
19 Du doom, du askan wu muy waccey  
bokkam,  
te kenn du desey dalam.  
20 Waa sowu jommi cig mujam,  
waa penku di rasu naa:  
21 «Dalub kàccoor déy, lee di mujam,  
ku faalewul Yàlla, nii la màkkaanam!»

## 19

### *Yàllaa may jot*

1 Ayóoba àddu ne:  
2 Dungeen ma noppee xañ jàmmi bakkan,  
di ma sëf wax ju dul jeex?  
3 Fukki yoon a ngii ngeen di ma saaga,  
te rusuleen maa sonal.  
4 Su ma moyoon dëgg sax,  
maay bokk ak sama moy fanaan.  
5 Defe ngeen ne yeena ma gën,  
ba di ma sikke musiba mii ma dal?  
6 Waaye xamleen ne Yàllaa ma tooñ,  
ab caaxam a ma dar kepp.  
7 May woote wall, wuyeesu ma,  
ma ñaan ndimbal, àtteesu ma.  
8 Manumaa jàll, Yàllaa fatt sama yoon,  
lëndëmal samay jaaruwaay,  
9 sàggi sama sag,  
foq sama kaala,  
10 tojat ma wetoo wet ba ma tàggoo,  
déjjati sama yaakaar ni garab,  
11 jafalal mam sànjam,  
boole ma ciy noonam,  
12 ay gàngooram dikkandoo,  
yékkatiy jal, gawe ma,  
dal fi wër sama xayma.  
13 Samay bokk, mu soreleek man,  
samay xame sax ñooru ma.  
14 Jegeñaale ba ma,  
xame fàtte ma,  
15 sama gani démb def ma ni jaambur tey,  
samay mbindaan it noonu,  
ñu def ma ni doxandéem.

16 Su ma doon woo sama surga, ba di ko tinu sax, da may tanqamlu.

17 Sama xetu gémmiñ dàq na sama jabar, sama doomi ndey sax seexlu ma.

18 Gone yi sax a ngi may sewal, su ma jógee di dem, ñu di ma baatal.

19 Sama wóllërey démb yépp a ma sib, ma sopp leen, tey ñu dëddu ma.

20 Der aki yax laa dese, daanaka dee naa.

21 Yërmandee, yërmande, yeen samay xarit,

Yàllaa xàcci, fàdd ma!

22 Lu ngeen ma toɲale nii ni Yàlla?

Xanaa yàppuleen ma ba suur?

23 Éy su samay kàddu ténku woon ci mbind!

Éy su ñu manoon xacc mbind ma cib téere,

24 xacce ko xalimag weñ ak beteex mu ñaase fàww ciw doj!

25 Waaye man xam naa ne sama jotkat a ngi dund,

te mooy mujje taxaw fi kaw suuf.

26 Bu sama der bi lekkoo sax, du tee ma dese suux wu ma xoole Yàlla,

27 xoolal ko sama bopp, te du doon sama gan.

Maaka namm lii ci sama xol!

28 Yeena ngi naan: «Ana nun koy toɲale, ba am lay wu ko tiiñal?»

29 Ragal-leen saamar!

Seen xadar jii ñaawtéef la, saamar ay àtteem,

xamleen ne àtte am na.

## 20

### *Cofar nee ku musiba dab, yaa tooñ*

1 Cofar mu Naama àddu ne:

2 Kon ma àddooti ndax jaaxle, ba xol jallaañoo.

3 Dégg naa kàddug yedde gi nga may saagaa,

waaye samam xel a ma déey sa tont.

4 Xanaa xamoo lii? La dale ca cosaan, ba nit tegoo kaw suuf ba tey,

5 xamoo ne ku bon, ag sarxolleem àggul fenn,

te bannëexu yéefar yàggul?

6 Bu màggoon ba tollook asamaan it, ba bopp ba àkki fa kawa kaw,

7 day mujj seey fàww niy jonkanam; ña ko daa gis naa: «Ana mu?»

8 Kenn du ko gisati, day réer ni gént, mbaa njeneeru guddi ju dàqu, wéy.

9 Bët bu ko gisoon du ko tóllanti, dëkkuwaayam dootu ko séen,

10 ay doomam ay dàmپ néew-ji-doole yi, ba delloo seen alal.

11 Mooy ànd ak dooley ndawam, tëri biir bàmmeel.

12 Lu bon la daa tàqamtikoo, log ko, làq ca suufu làmmiñ wa,

13 di ko siiramtal te du ko wacc, xanaa taf ko ca digg denqleñ ma.

14 Waaye la muy lekk ay soppiku ca biiram,

doon danaru ñàngóor ca butit ya.

15 Moo dërëxoon alal, moo koy goqi, ca biiram la ko Yàlla di yuree.

16 Ndeke tookey ñàngóor la muucu, mu rey ko ni mat-matu saamaan.

17 Yàlla bumu niir wali dex ak waltani lem ak soow.

18 Dina delloo lu mu amoon, du ko warax; te alal ju mu jula woon, du ko jariño.

19 Moo dëggaate néew-ji-doole, dëddu ko;

aakimoo kër jaambur te tabaxu ko.

20 Biir ba du wéet, lu mu xemmem, du récc.

21 Dara du récc ab kollam, moo tax xéewalam du toog.

22 Fa mu regge lay jàqe, mépp musiba këppu ci kawam.

23 Ba muy sol kollam

la ko Yàlla di yónnee tàngooru sànjam, tawal ko ko lu fees déqam.

24 Mu daw ngànaayu weñ, fittu xàñjar bëtt ko,

25 jam ko ba fëll,

cat la bëtt xol ba, di melax fa mu sare, tiitaangey ndee ne ko taral.

26 Mboolem lëndëm a làqu di ko xaar, te sawara wu loxo jafalul a koy xoyom, lakkaale lu desoon ca xaymaam.

27 Asamaan ay weer ñaawtéefam,

suuf jóg, seedeel ko tuuma.

<sup>28</sup> Koomum këram day tukki, ne mes,  
keroog sànjum Yàlla ma.

<sup>29</sup> Lii moo di wàllu nit ku bon, fa Yàlla,  
muy cér bu ko Yàlla dogalal.

## 21

### *Ayóoba weddi na àlluway xarit ya*

<sup>1</sup> Ayóoba àddu ne:

<sup>2</sup> Dégluleen maa, dégluleen sama baat,  
te mas-sawoo ma seenug teewlu.

<sup>3</sup> Muñal-leen ma boog, ma wax, man,  
balaa nit a reeti.

<sup>4</sup> Sama tawat lii, da di maak nit a?  
Gannaaw du nit, ana lu ma tee xàddi?

<sup>5</sup> Geesuleen ma, waaru,  
ba loxo ub gémmiñ.

<sup>6</sup> Su ma ko xalaatee, damay tiit,  
di kat-kati.

<sup>7</sup> Lu tax ku bon di dund,  
bay magal sax, di ànd ak doole?

<sup>8</sup> Doomam day toog, mu fekke,  
bay xool ay sètam,

<sup>9</sup> këram nekke jàmm, mucc safaan,  
te yetu Yàlla du ko dal.

<sup>10</sup> Ku bon, yèkkam day tëb te du moy,  
nagam di jur te du xàcc.

<sup>11</sup> Day gis ay xaleem di bajantu,  
goneem yépp di tëbantü.

<sup>12</sup> Day xaacoondook um tëgg aki xalam,  
di bége baatub toxoro,

<sup>13</sup> Ku bon ay ñédd ay fanam ci biir  
teraanga,  
doora jekki wàcci njaniiw.

<sup>14</sup> Moona kee noon Yàlla: «Xiddi ma!  
Xam saw yoon soxalu ma.

<sup>15</sup> Ana kuy Aji Man ji sax ba ma di ko  
jaamu?

Su ma ko tinoo, ana lu mu may jariñ?»

<sup>16</sup> Kii xanaa du teraangaam a ngi ciy  
loxoom?

Ndaxam taxul ma roy ko fenn!

<sup>17</sup> Ku bon, ana fu ag xuyyam kamaje?  
Fu ko musiba dikkale?

Fu Yàlla mere, ba sédd ko safaan?

<sup>18</sup> Ana fu ku bon mele nim ñax mu ngelaw  
wal,

mbaa boob mu callweer yóbbu?

<sup>19</sup> Æa ku bon daal ay tooñ, Yàlla dencal  
doomam añ ba?

Ki tooñ kay, na ko fey, mu xam,

<sup>20</sup> gisal boppam sànkuteem,  
ba jolu merum Aji Man ji!

<sup>21</sup> Ana luy yoonu ku bon ci waa këram,  
gannaawam,

te fekk limu fanam jeex?

<sup>22</sup> Ana kuy jàngal Yàlla xam-xam,  
moom miy àtte ñu kawé ña?

<sup>23</sup> Kii a ngi deeyaale dooleem,  
xel ma dal, tiitul dara,

<sup>24</sup> yaram wa niin,  
yax ya naat.

<sup>25</sup> Kee deeye naqaru xol,

masula ñam bàmneex,

<sup>26</sup> te ñooy tëddandoo biir suuf,  
bokk sàngooy sax.

<sup>27</sup> Mu ngoog! Maaka xam li ngeen foog,  
te di ma ko fexee fitnaale!

<sup>28</sup> Ngeen ne: «Ana fu kër kàngam di  
mujje?

Ana xayma ba ku bon ka dèkke?»

<sup>29</sup> Xanaa laajuloo tukkikat yi?

Am gëmuloos seeni seede?

<sup>30</sup> Bésub safaan ku bon ay mucc,  
bésub mbugal it, mooy raw.

<sup>31</sup> Ana kuy janook moom, sikke ko  
jikkoom?

La mu def, ana ku ko koy fey?

<sup>32</sup> Moom de bu deeyee, sèg ya lees koy  
robi,

te bàmmeelam, dees na ko wattu.

<sup>33</sup> Liy topp néew ba, day bare,

liy dox jiiitu ko wees ab lim,

te suufu xur wa sax da koy sedde.

<sup>34</sup> Kon seeni mas-sawu, cóolooli neen!

Seenii tont, jinigali kese!

## 22

### *Elifas nee tuub a war Ayóoba*

<sup>1</sup> Ba loolu amee Elifas ma cosaanoos  
Teman àddu ne:

<sup>2</sup> Yàlla, ana lu ko nit mana jariñ?

Xanaa ku xelu jariñ boppam!

<sup>3</sup> Ana lu sag njub mana yokk Aji Man ji?

Lu ko sag mucc ayib mana indil?

<sup>4</sup> Xanaa du sag njullite la lay bantale,  
bay àgg ak yaw ci layoo?

<sup>5</sup> Du sag mbon gu réy a la ko yóbbe,

ak say tooñ yu amul kem?

<sup>6</sup> Yaa lebal mbokk, aakimoo tayleem ci dara,  
bay nangu mbubbam néew-ji-doole, mu ne dunj.

<sup>7</sup> Yaa mayul ku mar ndox mu naan, mbaa nga xañ ku xiif lu mu lekk.

<sup>8</sup> Boroom doole jagoo réew mi, ku ñu beral loxo dëkke.

<sup>9</sup> Yaa bëyyi jëtun, mu deme loxoy neen, tey néewal doole ab jirim.

<sup>10</sup> Moo tax ay ndëgg-sërëx di la dar kepp, musiba jekki ne la taral,

<sup>11</sup> mbaa lëndëm gu la teree gis, mbàmbulaan dikk, mëdd la.

<sup>12</sup> Xanaa Yàlla sutul asamaan? Xoolal biddiiw ya gëna kawe!

<sup>13</sup> Nga naa: «Ana lu Yàlla xam?

Ana nu muy àttee ci gii lëndëm gu tar?

<sup>14</sup> Niir yee ko làq ba du nu gis, fa muy doxantoo ca kaw taaxum asamaan!»

<sup>15</sup> Dangaa nara topp ñallu démb, wa nit ñu bon ña ñaloon?

<sup>16</sup> Ñoo buube, ne mes te seen àpp jotul, seen kenu màbb, wéy nim wal,

<sup>17</sup> te ñoo doon naa Yàlla: «Xiddi nu!»

Ñii ana lu leen Aji Man ji di def?

<sup>18</sup> Moona moo feesaloon seeni kër ay teraanga,

waaye ñu bon ñii, royuma leen fenn.

<sup>19</sup> Aji jub ñeey gis sànkutey ñii, bég; ñu mucc tuuma ñaa leen di kókkali,

<sup>20</sup> naan: «Ña nu jógaloon sàнкуwuñoom? Seen koom ma xoyomuwal a?»

<sup>21</sup> Jubool ak Yàlla rekk, am jàmm, ngëneel dikkal la.

<sup>22</sup> Nangool ndigal ci làmmiñam, te dëxëñi kàddoom ci sa biir xol.

<sup>23</sup> Dellul ci Aji Man ji rekk, ba taxawaat, te nga sorele sa xayma njubadi.

<sup>24</sup> Tegal wurus ci suuf, wacce wurusu ngalam doji xur,

<sup>25</sup> te Aji Man ji di sa wurus, di sa jali xalis.

<sup>26</sup> Su boobaa nga bége Aji Man ji, mana siggi, séentu Yàlla,

<sup>27</sup> di ko ñaan, mu di la nangul, yaw it ngay waccook say dige,

<sup>28</sup> loo dogu, mu sotti,

foo jaare, mu leer,

<sup>29</sup> ba bu nit detteeloo, nga yékkati ko, te ku toroxlu, Yàlla wallu la.

<sup>30</sup> Ku ñàkkula tooñ sax, mu xettli la, te sag ñàkk sikk lees koy xettlee.

## 23

### *Ayóoba nee Yàlla noppi na*

<sup>1</sup> Ba loolu amee Ayóoba àddu, ne:

<sup>2</sup> Ba tey maa ngi jooy jooy yu metti, di onk bay ub gëmmin,

<sup>3</sup> Éy bu ma xamoon fa may gise Yàlla, ba àkki péncam,

<sup>4</sup> diis ko sama mbir, àgge ko lépp lu may tawat,

<sup>5</sup> ba xam lu di tontam, dégg li mu may wax.

<sup>6</sup> Ndax dooleem ju bare la may yeye?

Déedéet xanaa! Dina ma teewlu moos,

<sup>7</sup> ba ku jub layoo faak moom,

ma daldi mucc sama àttekat fàww.

<sup>8</sup> Seet naa wetu penku, Yàlla nekku fa, ma seet sowu, gisuma ko.

<sup>9</sup> Bu jàppee fa wetu bëj-gànnaar, gisuma ko fa,

bu jàlle bëj-saalum séenuma ko fa.

<sup>10</sup> Ndaxam moo xam fi ma jaare,

te bu ma nattoo, ma gén ci ni wurus wu ñu xelli.

<sup>11</sup> Tànkam, sama tànk, yoonam laa tegu, moyuma ko.

<sup>12</sup> Dëdduwma ay santaaneem, sama biir xol laa denc ay kàddoom.

<sup>13</sup> Yàlla de kenn la, ana ku koy waññi? Coobarey bakkanam lay def.

<sup>14</sup> Mooy sottal lu mu ma dogalal, te bare na lu mu ma nasal.

<sup>15</sup> Lee tax su ma janook moom, tiit, te lu ma gëna xalaat, gën koo ragal.

<sup>16</sup> Yàlla daal a réccal samaw fit, Aji Man jee ma tiital!

<sup>17</sup> Du lëndëm gi ma nekke moo ma wedamal,

du lëndëm gii ma muur.

## 24

### *Ayóoba nee Yàllaa ngi tanqamlu*

<sup>1</sup> Lu tee Aji Man ji àppal nit bési mbugal, ba ku raññee Aji Sax ji fekke yooyu bésam?

2 Nit a ngi toxal kemu suuf,  
nit a ngi sàcc ug jur, foral leen.  
3 Mbaamu jirim, ñu wommat, yóbbu;  
nagu jëtun, ñu jël kob tayle.  
4 Néew-ji-doole, ñu buuxe ko ciw yoon,  
baadoolo yi far bokk làquji.  
5 Néew-ji-doole yaa ngii mel niy mbaami  
àll ci màndiñ mi,  
di fortaatu lu ñu lekk,  
àll bu wow bi yor seen xontu njaboot.  
6 Tooli jaambur lañuy góobaani,  
di wittaani reseñ ca tóokëri ñu bon ña.  
7 Duññ lañuy fanaane ndax rafle,  
sàngoo seen der ci sedd bi.  
8 Ñooy tawtee tund ya,  
di làqoo xunti yu ñu seeloo.

9 Xoncees na jirim ci weenu ndeyam,  
jëlees na tayle alalu néew-ji-doole.

10 Duññ lañuy wéye ndax rafle,  
biir wéet, ñuy gàdduy sabaar,  
11 di nal diwu oliw ci tooli jaambur,  
di dër reseñ ju ñu dul naan.  
12 Biir dëkk ba la nit ñay binnee,  
ña ñu gaañ di woote wall,  
te Yàlla toppul kenn tooñ.  
13 Ñee noonoog leer,  
faalewñu yoonu bëccëg  
te duñu fa taxawaaloo.  
14 Bèt di set, bóomkat jóg,  
bóom baadoolo bi néew doole,  
guddi jot mu dib sàcc.  
15 Moykat bu góor a ngi yeeru timis,  
fab ndimo, kaalawoo,  
naan bêt du ko gis.  
16 Ñu ngi lëndëmtu, di toj kër yi,  
bëccëg ñu tëju,  
xamuñug leer.  
17 Ñoom ñépp ñuulaayu guddeey seen  
bëccëg,  
lëndëm gu ne kërueus lañu xejjool.  
18 Yal nañu wéye walum ndox,  
te suuf sa ñu séddoo alku,  
ba kenn dootu dëgmal tóokëru reseñ.  
19 Yal na maral ak tàngoor ñiisal seen  
ndoxum taw,  
te njaniw mëdd ña bàkkaar.  
20 Yal na leen seen ndey sax fàtte,  
sax yi muucu leen,

ñu fàtte leen,  
ba njubadi déjjetiku ni garab.  
21 Ñu ni mel ay lekk alalu jigéen ju tëlee  
jur,  
te duñu baaxe jëtun.  
22 Waaye Yàllaa mana dàq boroom doole,  
su nee tëll, mu xalaat bakkanam.  
23 Moo leen di may ñu wéeroo seen  
cëslaay,  
tey xool fa ñuy jaare.  
24 Dañuy jóg, nes tuut ñu ne mes,  
wadd, ñu boole for,  
ñu daldi lax niy gub.  
25 Su dul noonu, ana ku may fenloo?  
Ana ku mana neenal samay wax?

## 25

### *Deesul am dëgg fa Yàlla*

1 Bildàdd ma bàyyikoo Suwa àddu, ne:  
2 Yàllaa man te mata ragal,  
di def jàmm fa kawteem ya.  
3 Ay gàngooram limu naam?  
Ana ku mu dul jam ceeñeeram?  
4 Ana nu nit di ame dëgg fa kanam Yàlla?  
Ku jigéen jur, nu mu mana laabe?  
5 Xoolal, weer wi sax leerul ba dooy ko,  
te biddiiw yeet gisul seen sellaa yu leer,  
6 astamaak nit kii tanewulu sax,  
doom aadama jii gënul gasax.

## 26

### *Yaa mat wall*

1 Ayóoba àddu, ne:  
2 Ndaw ndimbal lu réy ci ku néew doole!  
Yaaka mana wallu ku amul kàttan!  
3 Yaaka mana xelal ku xeluwul  
ak xam-xam bu yaa bi nga fi xamle!  
4 Ana ci koo jële sa kàddu yii sax?  
Ak ku la xelal miim xel?

### *Yàlla kenn xamu ko.*

5 Ndem-si-yàlla yaa ngay lox  
ca ron ndoxi biir suuf, ñook ña fa  
dëkke.  
6 Fànñ la njaniw def fa kanam Yàlla;  
du genn kiiraay gu ko làq paxum sànkute.  
7 Kee firi asamaan fu dara amul,  
sanjamtal suuf fu dara newul.  
8 Kee gëndaley ndox ciy xàmbaar,  
te taxul niir wa ñu laloo fàcc.  
9 Kee firi aw niiram,

yiire ngànguneem.

<sup>10</sup> Kee rëdd digu wërngal fi kaw géej yi, fa cat la leer ak lëndëm digaloo,

<sup>11</sup> kenuy asamaan jaayu, di jommi ci kàddu yi muy gëddee.

<sup>12</sup> Dooleem la mane géej, manooreem la rajaxee Raxab ninki-nànka ja.

<sup>13</sup> Noowam wal, asamaan leer, loxoom jam jaan jay balaw-balawi.

<sup>14</sup> Lii de, mooy lenni jalooreem! Ndaw ndéey lu tuut lu nu ci dégandeeem! Ana ku mana xam riiru dooleem?

## 27

### *Ayóoba bañ na*

<sup>1</sup> Ayóoba dellu yékkati kàddoom, ne:  
<sup>2</sup> Yàlla miy dund seere na, moom mi ma xañ dëgg,

moom Aji Man ji ma teg naqaru xol,

<sup>3</sup> ne li feek may ànd ak bakkan, di noyyee noowal Yàlla,

<sup>4</sup> sama gémmiñ gii du wax njubadi, sama làmmiñ wii laa ne, du tudd ay fen.

<sup>5</sup> Yàlla buma leen jox dëgg, ba ba may dee дума weddi samag mucc sikk.

<sup>6</sup> Sama njekk laay ñoy, дума ko ba, sama giiru dund sama xel du ma yedd.

### *Yéene néeg la*

<sup>7</sup> Yal na noon bokk ak ku bon demin, ku may fexeel bokk ak kàccoor ag muj.

<sup>8</sup> Ana lu yéefar biy yaakaarati bu fàddoo, ba Yàlla moom bakkanam?

<sup>9</sup> Bu ko njàqare di dikkal, Yàlla day dëgg yuuxam a?

<sup>10</sup> Ndax Aji Man ji la daan bége, am daan na tudd Yàlla fu mu tollu?

<sup>11</sup> Ma xamal leen boog li ci dooley Yàlla, дума leen nèbb li Aji Man ji namm.

<sup>12</sup> Dama ne, yeen ñépp a ko gisal seen bopp sax, kon lu leen yebuloo nii ci neenug neen?

<sup>13</sup> Lii mooy cér bi Yàlla sédd ku bon, mooy wàll wi Aji Man ji dencal ku néeg.

<sup>14</sup> Njabootam ne xas, saamar jagoo, te balaa booba duñu lekk ba suur.

<sup>15</sup> Ña koy wuutu, mbas a leen di rey, te ay jëtunam duñu ko jooy.

<sup>16</sup> Su doon jal xaalis ni suuf, yére yomb ko ni feppi suuf,

<sup>17</sup> mooy dajale, aji jub sol; xaalis ba, kay def njub séddoo.

<sup>18</sup> Mooy tabax kër gu tanewul mbaarum wattukatu tool, te lëndu jargoñ gën koo dëgër.

<sup>19</sup> Keey tēraale alal ju mu dul gisati; day xippi, fekk mu ne mes.

<sup>20</sup> Musibaa koy dab nim wal, ngélenu guddi kēf, yóbbu,

<sup>21</sup> ngelawal penku déjjatee ko kēram, jalax, mu wéy.

<sup>22</sup> Dees na ko diir, bañ koo ñéebalu, mu daw, di wuta rēcc dooley saan ya.

<sup>23</sup> Dees na ko tacc-taccali loxo, di ko ciipoo fa kēram.

## 28

### *Xel mu rafet, fa Yàlla*

<sup>1</sup> Xaalis déy am na mbellam, wurus am bérabu seggukaayam,

<sup>2</sup> weñ gu ñuul ci suuf lees ko jële, te xàñjar, ay doj lees di xelli, ba am ko.

<sup>3</sup> Dees na taal, dàq ug lëndëm, di gëstu ba fu gëna làqu doji biir lëndëm gu ne kēruus.

<sup>4</sup> Nit a ngi gas ay xunti fu soreeki dëkkuwaay, di sandaamtalook a jaayu fu kenn newul, te tãnk jaarewu fa.

<sup>5</sup> Kaw suuf day meññ ub dund, xóote ya mel ni lu sawara salfaañe.

<sup>6</sup> Doj ya ca biir la peri safiir màkkaanoo, te pëndaxu wurus ñàkku fa.

<sup>7</sup> Wii yoon, tan xamu ko, bētu jaxaay du ko gis.

<sup>8</sup> Rabu àll du fa joggi, te gaynde sax du fa jaare.

<sup>9</sup> Loxol nit ay song doju kekk, buddi reeni tund, jàllarbi.

<sup>10</sup> Ci biir xeer yi lay yettey xunti, ba bëtam di gis lu cay alal.

<sup>11</sup> Nit a ngi dogale wali ndox, ba lu làqu woon, mu leeral nàññ.

<sup>12</sup> Waaye xel mu rafet fees koy jële, ak fu ag dëgg màkkaanoo?



13 Doom aadama xamul njégam,  
te amul biir réewum aji dund ñi.  
14 Xóote ya nee: «Xel mu rafet dëkku fi  
de!»  
Géej ne: «Nekku fi de!»  
15 Wurus mayewu ko,  
xaalis wecciwul njégam.  
16 Deesu ko weccee wurusu ngalam it,  
mbaa peri onigsë ak safir.  
17 Deesu ko méngaleek wurus  
ak ngën-gi-per yuy tàkk,  
te ngën-gi-gànjari wurus wecciwu ko,  
18 waxeesuli xor ak yeneen xeeti per;  
xel mu rafet a gën per yu gëna jafe,  
19 du moroomu peru topaas  
ba ca réewum Kuus,  
te wurusu ngalam daal wecciwu ko.  
  
20 Xel mu rafet, ana fu mu jóge,  
ak fu ag dégg màkkaanoo?  
21 Ump na bëtù lépp luy dund;  
njanaaw la fa kaw sax gisu ko.  
22 Paxum sànkutee ngi àddoondook ndee  
naan:  
«Dégmati nan ub jëwam de!»  
23 Yàllaa ràññee yoon wa jëm xel mu  
rafet,  
te moo xam màkkaanam.  
24 Kii daal ay jéer ba fa cati àddina,  
di gis mboolem lu asamaan tiim.  
25 Ba Yàllaa àppalee ngelaw diisaayam,  
nattal ndox ab dayoom,  
26 ba mu sàkkalee ab taw dogalu yoonam,  
sàkkal melax ak dënu aw ñallam,  
27 ca la nemmiku xel mu rafet, xamle ko,  
samp ko, gëstu ko,  
28 daldi ne doom aadama:  
«Ragal Boroom bi daal, mooy xel mu  
rafet,  
te dëddu lu bon mooy am ug dégg.»

## 29

### *Ayóoba jooy na démbam*

1 Ayóoba tàmbaleeti ne:  
2 Éy ku ma doon delloo jamono ya woon,  
fan ya ma Yàllaa daa wattoo;  
3 ba mu may tiim, di ma niital,  
may doxe ag leeram, biir lëndëm!  
4 Ba ma tolloo sama digg doole,  
te Yàllaa xejjoo sama xayma.  
5 Booba Aji Man jaa ngeek man ba tey,

sama gone yu góor yéew ma,  
6 may jàngoom niw,  
seggukaay di ma walal ag diw.  
7 Bu ma génnaa ba ca bunt dëkk ba,  
digg pénc ma laay jekkasndikoo,  
8 waxambaane gis ma, ñooru,  
mag ña jóg, taxawal ma,  
9 kàngam ne xerem,  
ub gémminam,  
10 garmi ne selaw,  
lámminam taqoo denqleñam,  
11 nopp dégg ma, ndokkeel ma,  
bët gis ma, seereel ma yiw.  
12 Néew-ji-doole woote, ma wallu,  
boole ci jirim bu tumurànke.  
13 Ñaanu ku naroono sànkú di ma dal,  
may tooyal xolu jëtun.  
14 Njekk laa woddoo woon, njekk wodd  
ma,  
te dégg laa defoon mbubb ak kaala.  
15 Silmaxa, maa dooni gëtam;  
ab lafañ, ma diy tànkam.  
16 Néew-ji-doole, maa doon baayam,  
ku ma xamul sax, may seet àqam.  
17 Ku jubadi, ma dammi ñaamam,  
foqatee am pàddam cay sellam.  
  
18 Ma noon samay fan dina neexook feppi  
suuf,  
ma doora deeye sama biir njaboot.  
19 Ma noon su ma doon garab samay reen  
fëllem ndox,  
ab lay fanaanee faam car ya.  
20 Ma noon darajaa may yeesalal nganam,  
may gëna danjalati xala.

21 Man lees daa déglu, di ma xaar;  
ne cell, di taataan samam xel.  
22 Samay kàddoo leen di dal, genn-genn,  
te su ma àddoo ba daaneel, kàddu jeex.  
23 Booba lees ma daa séentu nib taw;  
ña ñàpp, di nég waamey waxset.  
24 Samay ree gëmeesu ko woon,  
xanaa ne siiwa gis sama kanam gu leer.  
25 Maa jiite woon, di dogal doxalin,  
toog toogaayu buur ci biir gàngooram,  
te di leen dëfal ci seen naqar.

## 30

### *Ayóoba jooy na coono*

1 Tey ñi may diijoo ngii, te ñoo ma féete ndaw,  
seeni baay a tekkiwuloon tus,  
ba ma siide leena jël,  
ñuy sàmmandook samay xaj.

2 Ana njariñ lu ñu ma amaloon sax?  
Yooyu kooñoor yu jeele?

3 Ñii ndóol, xiif, deseey yax,  
di ñeeñaatoo biir àll,  
fu lëndëm, gentel, maral,

4 di witt ñax mu saxe ciy tan  
ak a gasi reen, di dunde.

5 Ñooñu lees dàqe fi biir nit ñi,  
di leen yuuxoo niy sàcc,

6 ñu dëkkey xur,  
ci biiri pax aki doj,

7 di ñaaxe biir gajj gi,  
dankaloo ci ron dég yi.

8 Ñu sew lañu, ñu kenn yégul,  
xanaa caw leen, génne réew mi.

9 Tey nag ñoo may woyantoo,  
di ma lééboo.

10 Dañu maa seexlu, ñooru ma,  
néeg maa serati ci kanam.

11 Yàllaa ma nasaxal, torxal ma,  
ba amatuñook man yemukaay.

12 Mii njurum baadoola mu féete ndijoor,  
di ma téqtal,  
di ma xàllal yooni sànkute.

13 Ñu ngi may dogale, nar maa musibaal,  
te soxlawuñu ci ndimbal.

14 Fu yaa lañu bëtte,  
buure jali tojit, ne jàyy fi sama kaw.

15 Musiba da maa èlëm,  
sama daraja naaw ni ngelaw,  
sama teraanga naaxsaay niw niir.

16 Tey maa ngii sama bakkan di ñiis,  
bési njàqare ne ma taral.

17 Guddi dikk di bënn samay yax, muy rot,  
mitit di ñereñ te du selaw.

18 Kii ne nikk sama mbubb,  
ne ratt sama baatu mbubb,

19 xalab ma ci biir ban bi,  
may nirook pënd akub dóom.

20 Woo naa la wall, wuyuwoo ma,  
ma taxaw, nga niir ma.

21 Yaa soppiku, néege ma,  
di ma soxoree sa diisaayu loxo.

22 Yaa ma ne siféet, waral ma ngelaw,  
panti-pamtee ma biir ngélén.

23 Xam naa xéll ne ci dee nga ma jëme,  
te mooy kërug ndajem képp kuy dund.

24 Ku sànkule du tàllal loxoo?  
Ku musiba dab du woote wall?

25 Moona sama rongooñ a daan tuurul  
boroom tiis,  
sama xol di tiisoo aji ñàkk ji.

26 Lu baax laa yaakaar, lu bon ne jalañ,  
leer laa séentu, guddi ne jaas,

27 sama xol lëmbaajoo, tëë dal,  
bési naqar dogale ma.

28 Maa ngi wéye ñuulaay bu ma tàngoor  
tegul,

di taxawe biir ndaje, di woote wall.

29 Damaa mujj bokk ak till,  
neexook looy,

30 ñuul, yaram di xub,  
tàng, di bax,

31 sama xalam tiisal,  
sama toxoro jooy.

## 31

### *Ayóoba waat na*

1 Maa jaayanteek samay gët.  
Ana nu may xooleb janq?

2 Lu ko moy ana sama cér ca Yàlla ma fa  
kaw?

Lu ma Aji Man jiy sédde fa kawte ya?

3 Xanaa du safaan a ñeel ku bon,  
naqar ñeel ku ñaaw?

4 Du Yàllaa ngi gis fu ma jaare,  
di waññ sama bépp jéego?

5 Ndegam damaa doxe ndëngte,  
mbaa ma gaawtoo njoblan,

6 na ma Yàlla natte màndaxekaayu dëgg,  
ba ràññee samag mat!

7 Ndegam samay tànk a moy yoonu njob,  
mbaa sama xol topp saay gët,  
mbaa sama yoxo yii gàkk fenn,

8 yal naa ji, keneen lekk,  
ma jëmbat, ñu buddi.

9 Ndegam jabaru jaambur a ma xañ sago,  
ba ma di ko yeeroo sama buntu kër  
moroomu góor,

10 yal na sama jabar bojjal keneen,  
ñeneen tiim ko.

11 Su ma ko defoon, muy jëfu yàqute,  
di moy gu yeyoo pénc,

12 te di sawara wu may xoyom  
ba ca paxum sànkute ma,  
lu ma meññle, mu buubaale.

13 Ndegam maa sofental sama àqu jaam,  
bu ñu may jooytu, diy góor mbaa jigéen,

14 bu ci Yàlla jógee, ana nu may def?  
Bu ma ko laajee, ana lu ma koy wax?

15 Ki ma sàkk ci sama biiru ndey,  
xanaa du moo leen sàkk ñoom itam?  
Du kenn kee nu sos ci njurukaay?

16 Damaa masa xañ néew-ji-doole lu muy  
sàkku,  
mbaa ab jëtun wékk ma bët, ma tas  
yaakaaram?

17 Am damaa masa wéetoo ab dog,  
te sédduma ca jirim?

18 Ba may ndaw laa dala yor ab jirim ni  
baayam;  
te ba ma juddoo ci sama ndey laa dala  
gindi ab jëtun.

19 Ndegam maa seetaan ku rafle nara  
sànkú,

seetaan néew-ji-doole ju amul malaan,

20 te sànguma céram, mu sante ma ko,  
di nugloo ndimo lu ñu ràbbe sama kawari  
gàtt,

21 ndegam maa xàccil sama loxo ab jirim,  
ndax yaakaar kiirilaay ca pénc ma,

22 yal na sama loxo teqlikook sama  
mbagg,

sama pèrèg fàqe ci conc li.

23 Mbugalu Yàlla kat laa ciy ragal,  
te màggaayam xajul ci man.

24 Ndegam damaa def wurus sama  
yaakaar,

bay tudde ngèn-gi-wurus sama cëslaay;

25 ndegam maa bége sama alal ju bare,  
bége koom gu ma sama doole may;

26 ndegam maa masa niir jant beek leer-  
aayam,

mbaa weer wiy daagoo yànjaayam,

27 ba namma làqu, di ci jaamu lenn,  
bay foon sama loxo, wormaale leen;

28 konoon it muy ñaawtéef gu yeyoo àtte,  
nde kon ma weddi Yàlla ma fa kaw.

29 Ndegam maa bége musibay bañ,  
mbaa ma bellaxndikoo loraange ju ko  
dab,

30 te bàkkaarewuma sama làmmiñ sax,  
ba di ci ñaanal noon alkànde,

31 ndegam du samay bokk a ma seedeel  
ne:

«Ana ku mu leelul ndawal ba mu regg?»

32 te biti, masumaa wacc doxandéem di fa  
fanaan,

sama bunt laay ubbil ku nekk ciw yoon,

33 ndegam maa roy nit ñi, di nèbb samay  
tooñ,

di nèpp-nèppal sama sikkaange,

34 ragaluma jëwu àddina de,

tiituma mbooloo mu ma nawloodi it,

ba ne cell baña génn sama buntu kër.

35 Ma ne éy ku may may nopp?

Sama torloo ngoog, na ma Aji Man ji  
tontu!

Su dee téereb tuuma bu ma ku may layool  
bindal,

36 maa koy gàddu, kaalawoo.

37 Maay limal Yàlla jéego bu ma séqi,  
di taxawi fa kanamam taxawaayu garmi.

38 Ndegam sama tool a ma tuumaale ay  
jooy,

rongooni toobo yay bas-baseendoo,

39 ndegam maa lekk lu ca ñor, te  
dikkewuma dara,

ba xañ bakkan ña ma ko beyaloon,

40 kon yal na ay dég wuutu bele ba,

ñax mu bon wuutu lors ba.

Fii la kàdduy Ayóoba yem.

## 32

### *Ndaw nee na mooy tontu mag*

1 Fa la ñetti góor ñooña noppee tontu  
Ayóoba, ndax la Ayóoba gis njekkam.

2 Ba loolu amee Eliyu doomu Barakel ma  
askanoo ci Buus, bokk ci làngu Ram daa  
mer ba futt ca la Ayóoba dëggal boppam  
fi kanam Yàlla, <sup>3</sup> ak la ñetti xariti Ayóoba  
ya ñàkk lu ñu ko tontu, ba tax ñu teg Yàlla  
tooñ. <sup>4</sup> Eliyu nag moo mujjoona wax ak  
Ayóoba, ndax moo féete ndaw ñett ña.

<sup>5</sup> Mu gis ne ñetti góor ña amatuñu tont,  
xol ba sot, mu mer ba futt. <sup>6</sup> Ca la Eliyu  
doomu Barakel waa Buus ba, àddu ne:

Man de damay ndaw, ngeen diy mag,  
 ba tax may teeylu,  
 ragal leena biralal sama xam-xam.  
 7 Ma noon: «Na yàgga-dund wax,  
 na dund-jopp xamle xel mu rafet.»  
 8 Ndeke xel mi ci nit  
 mooy noowal Aji Man ji koy may dég-dég.  
 9 Dund-jopp taxula rafet xel,  
 te di mag taxula xam yoon.  
 10 Moo tax ma ne: «Déglu ma;  
 man it ma biral sama xam-xam.»  
 11 Dama ne, négandiku naa seeni kàddu,  
 teewlu seeni déggin,  
 ba ngeen di jeexi tont ba tey.  
 12 Yeen laa doon teewlu,  
 te kat kenn ci yeen yeyu ci Baay Ayóoba,  
 kenn joxu ko tontam.  
 13 Buleen ma ne:  
 «Xel mu rafet mi nu ci gis moo di:  
 Yàllaa ko mana tiiñal waaye du nit.»  
 14 Du man la Baay Ayóoba jème  
 kàddoom,  
 kon du seeni wax laa koy tontoo.  
 15 Ñii kat jommi nañu, waxatuñu;  
 ba kàddu dèddu leen!  
 16 Dama leen di xaar te waxuñu,  
 xanaa taxaw, tontootuñu?  
 17 Damay tontu sama wàll, man it;  
 damay biral sama xam-xam, man it kay!  
 18 Sama dènn a fees aki wax,  
 te samam xel xiir ma ci wax.  
 19 Sama xol baa ngii mel ni  
 lu sol biiñ, ube ràpp,  
 mbete mbuus mu yees mu nara fàcc.  
 20 Naa wax boog, ba féex,  
 naa àddu, ba tontu.  
 21 Duma ci am xejj ak seen,  
 te duma jay kenn.  
 22 Xawma sax nu ñuy jaye,  
 nde konoon ki ma sàkk gaaw ma fee jële.

### 33

1 Léegi Baay Ayóoba, ngalla déglul samay  
 wax  
 te teewlu sama kàddu yépp.  
 2 Xaaral, ma àddu boog,  
 ba sama làmmiñ tudd li may bégga wax.  
 3 Xel mu dèggu laay waxe,  
 samay kàddu di xam-xam bu wóor.  
 4 Ngelawal Yàllaa ma sos,

noowal Aji Man ji daal a ma may bakkan.  
 5 Soo manee, tontu ma;  
 defarul, janook man.  
 6 Maa ngii, yem ak yaw fa Yàlla;  
 ci ban lañu ma mooñe man itam.  
 7 Du sama ñàngaay bu lay tiital,  
 du sama daraja ju la diis.

#### *Yàlla du moroom*

8 Yaa wax déy, ma dégg,  
 te dégg naa bu baax say kàddu.  
 9 Nga ne: «Set laa def, tooñuma;  
 mucc ayib laa def, ñaawuma fenn.  
 10 Waaye Yàllaa ngii di ma wuta taqal,  
 def ma ab noonam,  
 11 jéng ma,  
 di xool fépp fu ma jaare.»  
 12 Foofu déy, moy nga dègg, ma wax la  
 ko,  
 Yàllaa sut doom aadama.  
 13 Ana loo koy sikke,  
 naan du layoo lenn ci mboolemi jëfam?

#### *Yàlla dina wax ciy gént*

14 Yàlla déy, dees koo teewluwul,  
 waaye day wax benn yoon ba jaar  
 15 ci biir peeñum géntu guddi,  
 fa nelaw dabe nit,  
 ba mu yàndoore kaw lalam.  
 16 Mu ne ko rukk ndéey,  
 boole kook màndarga, artoo ko ko,  
 17 ngir dèdduloo doom aadama ji ay  
 jëfam,  
 musal jàmbaar cig réy,  
 18 sorale bakkanam pax,  
 ba ab xeej du ko bóom\*.

#### *Eliyu nee mitit ndéey la*

19 Nit dina mbugaloo mitit wu ko tëral,  
 muy kat-kati rekk.  
 20 Day bañ dugub,  
 seexlu ñam wu ko gènoona neex,  
 21 jeex tàkk bay réer ak a feeñ,  
 yaxam ya ne fàññ te sàngu woon,  
 22 dundam dègmal ndee,  
 bakkanam di jegeji pax.

#### *Eliyu nee njotlaay du ñàkk*

23 Waaye su nit ki amee malaakam  
 àttekat,  
 nay kenn sax ci junniy malaaka,

\* 33:18 33.18 Manees na koo jàngé nii itam: ba du jàllagum dexu ndee.

ngir xamal nit ki li ko war,  
<sup>24</sup> da koy baaxe, daldi ne Yàlla:  
 «Musal ko ba du wàccagum biir pax.  
 Maa ngeek njotlaayam.»  
<sup>25</sup> Yaram wa jootaat tooyaayu ndaw,  
 mu amaat dooley ngoneem;  
<sup>26</sup> bu ñaane Yàlla, mu nangul ko,  
 geesu ko, mu sarxolle,  
 nde Yàllaay fey nit njekkam,  
<sup>27</sup> nit ki seedeeli ko ca nit ña, ne:  
 «Maa bàkkaar, maa xëtt njub,  
 te feyeesu ma ko sax!  
<sup>28</sup> Yàllaa ma jot ba jàlluma, jëm pax,  
 xanaa dellu di gis ug leer.»  
<sup>29</sup> Lii lépp déy, la Yàlla di def,  
 mook nit ñaari yoon ba ñett,  
<sup>30</sup> ngir sorale bakkanam pax,  
 bàyyee ko leeraangey àddina.  
<sup>31</sup> Baay Ayóoba, teewlul, déglu ma,  
 neel cell, ma wax la, man.  
<sup>32</sup> Soo amee lenn loo wax, àddul;  
 waxal, ngir bëgg naa laa dëggal.  
<sup>33</sup> Lu ko moy nag, yaa may déglu,  
 ne cell, ma jàngal la xam-xam.

## 34

### *Eliyu nee Ayóoba moy na dëgg*

<sup>1</sup> Eliyu dellu ne:  
<sup>2</sup> Yeen ñi xelu, dégluleen samay wax,  
 yeen ñi xam, teewluleen ma.  
<sup>3</sup> Purux déy ay mosu ñam,  
 nopp natt kàddu.  
<sup>4</sup> Kon nan ànd seet li dëgg  
 te bokk ràññee li baax.  
<sup>5</sup> Baay Ayóoba kat nee moo yey,  
 Yàlla xañ ko dëggam.  
<sup>6</sup> Mu am dëgg, ñu ne moo fen,  
 tooñul, mu jam ko fittu ndee.  
<sup>7</sup> Ana ku mel ni Baay Ayóoba mii,  
 di ñaawle ni muy naanem ndox,  
<sup>8</sup> di àndandook ñiy def lu ñaaw,  
 di lëngook nit ñu bon ñi,  
<sup>9</sup> te naa: «Nit ki seet bannexu Yàlla,  
 ana lu mu koy jariñ?»

### *Yàlla du def lu bon*

<sup>10</sup> Kon yeen niti xel ñee, dégluleen ma,  
 Yàlla jegewul fenn mbon!  
 Aji Man ji jegewul muk njubadi!

<sup>11</sup> Jëfu doom aadama ji daal, moom la koy  
 fey;  
 na nit kiy jëfe rekk la koy yoole.  
<sup>12</sup> Li wóor mooy Yàlla du def lu bon,  
 Aji Man ji du jalgati yoon.  
<sup>13</sup> Ana ku ko dénk kilifteefu dun bi?  
 Ana ku ko yen àddina wërngal këpp?  
<sup>14</sup> Bu ci Yàlla yebu woon,  
 ba roccim xelam ak noowam,  
<sup>15</sup> bépp boroom bakkan ay bokk ne lasiim,  
 doom aadama dellu di pëndub suuf.

### *Yàlla amul par-parloo*

<sup>16</sup> Ndegam am ngag dégg, dëggal lii,  
 teewlul sama kàddu gii.  
<sup>17</sup> Manees naa jiite te bañ yoon?  
 Am dangay sikkal ki njubam matale?  
<sup>18</sup> Kii moo naan buur: «Yaa sew!»  
 naa garmi: «Yaa bon!»  
<sup>19</sup> Kii du far kàngam,  
 du teg ku am ci kaw ku ñàkk,  
 nde ñoom ñaar la boole sàkk.  
<sup>20</sup> Nes tuut, dee dikke xaaju guddi,  
 mbooloo fippu, kàngam ya ne mes,  
 boroom doole sànk, te loxo laalu ko.  
<sup>21</sup> Yàlla déy a ngi ne jàkk ci jaar-jaari nit  
 ki,  
 di xool bépp jéegoom.  
<sup>22</sup> Du fenn fu lëndëm mbaa fu ne këruus,  
 fu kuy def lu ñaaw mana làqoo.  
<sup>23</sup> Yàlla daal, soxlawula liñbat nit ki,  
 bala mu koy woo cib àtte.  
<sup>24</sup> Mooy rajaxe boroom doole te du laajte,  
 daldi fal keneen mu wuutu ko.  
<sup>25</sup> Moo ràññee moos jëfi boroom doole,  
 ba jàllarbi ko genn guddi, mu rajaxoo.  
<sup>26</sup> Moo koy dóore fu ne fàññ,  
 ni ñuy dóore ku bon.  
<sup>27</sup> Li ko waral di boroom doolee dëddu  
 Yàlla,  
 sofental mboolem digley yoonam,  
<sup>28</sup> ba yuuxi baadoola yi àgg fa moom,  
 mu dëgg yuuxi néew-ji-doole ya.  
<sup>29</sup> Bu Yàlla nee cell, ana ku koy ñàññ?  
 Bu làqee kanamam, ana ku koy niir?  
 Xeet yeek nit ñi la boole tiim,  
<sup>30</sup> ngir yéefar bi baña falu,  
 bay tàbbal aw xeet ciy fiir.

### *Eliyu nee kàdduy Ayóoba du xel*

<sup>31</sup> Su nit ki nee Yàlla:  
 «Jot naa samab añ, dootuma bàkkaar.  
<sup>32</sup> Won ma sama tooñ yi ma gisul.

Su ma defee lu ñaaw, dootuma ko def!»

<sup>33</sup> Kooku, Yàlla dina ko mbugal a?

Lu ciy sa xalaat, yaw miy diinjat,  
gannaaw yaay seet te du maay seet?

Waxal boog, loo ci xam!

<sup>34</sup> Niti xel ñi dinañu wax,  
ñook ku rafet xel ku may déglu,

<sup>35</sup> ne ma: «Ayóoba mii waxewul xam-  
xam,

te kàddoom yi du xel.»

<sup>36</sup> Kon na àtteb Baay Ayóoba mii mat  
sèkk,

nde tontam bokk na ci tontu nit ñu bon  
ñi.

<sup>37</sup> Moo bàkkaar, doyatul muy diinjat,

di werante ci sunu biir,

di kebetu ci kaw Yàlla.

### 35

<sup>1</sup> Eliyu dellu ne:

<sup>2</sup> Defe nga ne lii yoon la?

Nga ne: «Maa am dëgg fi kanam Yàlla,»

<sup>3</sup> te naan ko: «Ana lu ma ci soxal man,  
ak lu ma ñàkka bàkkaar di jariñ?»

<sup>4</sup> Man mii nag maa lay tontu,  
yaak say xarit.

<sup>5</sup> Séentul asamaan te xool,  
niiral niir yii la tiim!

<sup>6</sup> Soo bàkkaaree, lu muy wàññi Yàlla?  
Man ngaa tooñ, tooñati ba def ko dara?

<sup>7</sup> Ana njekk goo def ba may ko lenn,  
ak lu muy jële sax ci say loxo?

<sup>8</sup> Sag mbon, sa moroomu nit lay lor,  
sag njekk it doom aadama ni yaw lay  
jariñ.

<sup>9</sup> Noteel law na ba nit ñiy yuuxu,  
di woote ku leen wallu ci loxol boroom  
doole.

<sup>10</sup> Waaye kenn du ci ne: «Wóoy ana Yàlla  
mi ma sàkk,

kiy fentloo woyi cant ci biir guddi,

<sup>11</sup> di nu xamal lu rabu àll xamul?  
di nu may xel mu njanaaw amul?»

<sup>12</sup> Bu nit ñu bon ñiy woote wall, du wuyu  
ngir seenug réy.

<sup>13</sup> Neen lañuy woote, nde Yàlla du leen  
déglu,

Aji Man ji du leen faale.

<sup>14</sup> Kon ngalla yaw mi ne gisoo ko,  
te ne diis nga ko sa mbir, di ko xaar.

<sup>15</sup> Nga neeti Yàlla du mer, di mbugale,  
te yoonam newul ci njubadiy nit.

<sup>16</sup> Ayóoba mii de, cóolóolu neen lay wax,  
mbel-mbel ju àndul ak xam-xam.

### 36

*Eliyu nee coonoy àddina am njàng la*

<sup>1</sup> Eliyu dellu ne:

<sup>2</sup> Négal tuuti, ma xamal la;  
ay kàddoo ngeeti yu may waxal Yàlla.

<sup>3</sup> Fu xóot laay jukkee sama xam-xam,  
ba delloo dëgg ki ma sàkk.

<sup>4</sup> Sikk déy, nekkul ci li ma lay wax;  
ku buural xam-xam a janook yaw nii!

<sup>5</sup> Dama ne, Yàllaa màgg te du jalaxe,  
moo màgg te réy um xel.

<sup>6</sup> Du ba ku bon, mu dund,  
te mooy jox néew-ji-doole àqam.

<sup>7</sup> Du noppee xool aji jub ñi,  
xanaa di leen dëj ci jali buur yi,  
saxal seen toogaay, màggal leen.

<sup>8</sup> Bu ñu demee ba ñu jéng leen,  
mbaa buumi njàqare ñodaar leen,

<sup>9</sup> Yàllaa leen koy artoo ci seeni jëf,  
seen tooñi reewande.

<sup>10</sup> Da leen di dégtal ndigal,  
ne leen ñu dëddu ñaawtéef.

<sup>11</sup> Su ñu ko déglu, déggal ko,  
jeexale bés yu rafet,  
mujje ati bannex.

<sup>12</sup> Su ñu dégluwul, jàlli dexu ndee,  
faatuu ndax xamadi.

<sup>13</sup> Ab yéefar day denc mer,  
te mbugal du tax mu woote wall.

<sup>14</sup> Ku ni mel ay deeye ndaw,  
ay fanam jeexe biir gacce.

<sup>15</sup> Yàllaay wallu boroom tiis ciw tiisam,  
di tege coono, ba ñu déglu ko.

<sup>16</sup> Moom it moo lay xettli ci njàqare,  
weccee la ko fu yaa fu la dara xatalul,  
taajal la ñam wu duun te niin.

<sup>17</sup> Waaye aña ku bon duunal na la,  
dëgg ak yoon ne la taral.

<sup>18</sup> Bu la kenn xiirtale alal,  
te bu la ger bu réy jengloo.

<sup>19</sup> Kon déy doo yuuxu ba mucc ci njàqare,  
kër-kèreek doole it du la ca génne.

<sup>20</sup> Bul yàkkamti guddi;  
ca law xeet di jekki buuboo seenum réew.

<sup>21</sup> Moytula walbatiku di def ñaawtéef,  
moo tax nattu dikkal la.

*Yàlla mooy buur*

22 Yàlla, kay, mooy ki dooleem kaweel!  
 Ana ku mana jàngle ni moom?  
 23 Ana ku ko masa rëddal yoonam?  
 Ak ku ko ne: «Def nga naka-su-dul-  
 noonu?»  
 24 Bul di fàttee màggal jëfam,  
 yi ko nit ñiy woye.  
 25 Mboolem doom aadama gis na ko;  
 nitoo nit séene ko fu sore.  
 26 Yàlla, kay daa màgg ba wees xam-xam,  
 te ay atam, deesul xayma lim ba.  
 27 Keey ñoddi toqi ndox,  
 mu def ub lay, tawal,  
 28 niir yi sotti,  
 baawaanal doom aadama.  
 29 Ana ku xam ni aw xiin di firikoo,  
 ba dënu fettaxe xaymab Yàlla ba?  
 30 Keey taal melaxam, mu dajal asamaan,  
 sàng xóotey géej.  
 31 Noonu lay saytoo xeet yi,  
 ba maye ñam wu ne gàññ.  
 32 Yaari loxoom lay ñebe melax gi,  
 dalal ko fa mu ko sant,  
 33 kàddu yéene ab taw,  
 jur gi yég ne mu ngi dikk.

### 37

1 Lii déy a rëccal sama fit,  
 muy tēf-tēfee fa mu sax.  
 2 Dégluleena déglu dënoom gay ràndan,  
 kàddu gay rëkke fa gémmiñam,  
 3 muy riiral fépp fu asamaan tiim,  
 di fettaxal melaxam ba cati àddina.  
 4 Ca lay yëmmu,  
 dënoo kàddoom gu màgg,  
 te dootu téye melax yi,  
 li feek baatam di jib.  
 5 Yàllaay dënu kéemtaan,  
 di def kiraama yu nu wees.  
 6 Kee naan tawub yuur mu sóobal suuf,  
 di yebal taw ba ci waame yiy sóobe doole,  
 7 daldi téye loxol képp ku doon liggéey,  
 ngir képp ku mu sàkk xam jëfam;  
 8 Rabu àll duggi biir xunteem,  
 goori biir paxam,  
 9 ngélén bawoo néegam  
 sedd ba tukkee fa ngelawi bëj-gàннаar.  
 10 Yàllaay nokki, ndox way,  
 wali ndox rasu, ne kekk.  
 11 Keey sēf xàmbaar, mu guux,  
 keey tasaare niir yi làmboo melaxam,

12 ñu jargandalu ci ndigalam  
 di fexee sottal mboolem santaaneem  
 ci kaw àddina wërngal képp,  
 13 mu mel ni yet wu muy bantale waa  
 àddinaam,  
 mbaa mu firndeele leen ko ngoram.  
 14 Yaw Baay Ayóoba, teewlul lii,  
 neel tekk te jàngat kéemaani Yàlla yi.  
 15 Dangaa xam nu Yàlla di sosey niiram,  
 ba melaxal melax gi ci niiram?  
 16 Dangaa xam nu niir yiy ajoo ci jaww ji,  
 kiraamay ku buural xam-xam a ngoog!  
 17 Yaw mi say yéere di tàng,  
 bu ngelawu bëj-saalum di upp, suuf ne  
 tekk,  
 18 ndax yaa ko lal-le woon dëndub  
 asamaan,  
 mu dègèr ni weñ gu ñu xelli?  
 19 Xamal nu boog lu nuy wax Yàlla!  
 Dunu mana lay ndax ñàkka xam.  
 20 Ndax dees koy yéegal ne maay waaja  
 wax?  
 Ana nit kuy ñaan sànkutey boppam?  
 21 Kenn manula xool jant bu ne ràññ,  
 gannaaw bu ngelaw walee niir yi ba mu  
 set.  
 22 Bëj-gàннаar la leeru wurus di dikke,  
 booba Yàllaa làmboo darajaam ju raglu.  
 23 Aji Man ji nu dul daj daa bare doole,  
 dèggu, bare njekk, du note.  
 24 Moo tax ñu ragal ko,  
 faalewul kenn ku naw um xelam.

### 38

#### *Aji Sax ji àddu na*

1 Ba loolu amee Aji Sax ji àddoo fa  
 ngélén la, ne Ayóoba:  
 2 Ana koo doon, bay lëntal samay dogal,  
 di wax loo xamul dara?  
 3 Takkul boog te góor-góorlu,  
 ma laaj la, nga xamal ma.  
 4 Ana foo nekkoon ba may samp suuf?  
 Waxal su la ko sam xel mayee.  
 5 Ana ku dogal dayo ya, umpu la?  
 Ku tàllal buum, natte ko ko?  
 6 Ana fu kenu ya sampe?  
 Ak ku teg doju coll wa,  
 7 ba biddiwi njël sarxolleendoo,  
 goney Yàlla yépp xaacoondoo?  
 8 Ana ku tëjoon lafi buntu géej,  
 ba muy buccikoo xóote ya, fettax,

9 ba ma solal ko aw niir, mbubb,  
 laltaaye ko lëndëm,  
 10 dagg aw xélam, àppal ko kemu,  
 dogalee ko bunt bu tëje ràpp,  
 11 ba ne ko: «Fii ngay yem, doo fi wees.  
 Fii la say gannax di noppee buure?»  
 12 Ana foo masa joxe suba ndigal,  
 ba xamal njël bérabam,  
 13 ngir mu jàppe cati àddina, ag leeram,  
 yèlèbe ca ñu bon ñi,  
 14 àddina mel ni ban bu ñu teg torluwaay,  
 tey saamandaay mbubb mu ñu suub,  
 15 ñu bon ñi, ñu xañ leen seenug leer,  
 ba loxo ba ñu xàcci woon damm?  
 16 Yaa àkki ba fa géej bënne?  
 Am yaa daagoo ruqi xóotey géej?  
 17 Dees laa won bunti ndee?  
 Am yaa gis bunt ya jëm lëndëmu njaniiw?  
 18 Dangaa ràññee yaatuwaayu suuf si?  
 Waxal, ndegam xam nga lii lépp!  
 19 Ana yoon wa jëm fa leer dëkke,  
 ak fa lëndëm màkkaanoo,  
 20 ba nga man leena yóbbu fa ñu digaloo,  
 te ràññee seen yooni kër?  
 21 Xam nga ko moos, fekk na la juddu;  
 dund nga ay fani fan!  
 22 Yaa àkki ba fa mbàndi tawu yuur ya?  
 Am yaa gis mbàndi waamey donj yu sedd,  
 23 ya may dencal jamonoy njàqare  
 ngir bésuub ndajem xare?  
 24 Ana yoon wu jëm fa leer di tasaaroo?  
 Ak fu ngelawal penku di xàjjalikoo,  
 ba dajal suuf si?  
 25 Ana ku xàllal waame,  
 ak ku sàkkal melax ak dënu aw yoon,  
 26 di taw fu kenn newul,  
 ci màndiñ mu nit amul,  
 27 di suuxat gent bu maral,  
 ba saxal fam ñax?  
 28 Ab taw daa am baay?  
 Ana ku geñoom sos toqi lay?  
 29 Ana ku wasin ndox mu way,  
 ak ku jur layub asamaan bu sedd ba wow,  
 30 ba wali ndox yi dëgër niw doj,  
 déndu géej fasu, ne kekk?  
 31 Yaay faste genn dëlloñ gu ndaw  
 gi ci digg asamaan?  
 Am yaay yiwi dëlloñ gu mag ga mu  
 dendal?  
 32 Yaay def bu jotee, nga feeñal biddiww  
 yi?

Am yaay wommat dëlloñu bëj-gànnar  
 ak njabootam gu sew?  
 33 Dangaa xam dogali yoon yi yor  
 asamaan?  
 Am yaay saytu kilifteefam fi kaw suuf?  
 34 Yaay yékkatil niir yi kàddug ndigal,  
 rekk waame sang la?  
 35 Yaay yebal melax yi ñu dem,  
 melaxi, délsi, ne la: «Nu ngi, ak fan?»  
 36 Ana ku yeb xel mu rafet cib dënn,  
 ak ku may ab xol dëg-dëg?  
 37 Ana ku xareñ ba waññ niir yi?  
 Ak kuy jolal mbuusi asamaan,  
 38 ba suuf di bàq, dankaloo,  
 defi donj, taqloo?

39 Yaay rëbbal gaynde?  
 Am yaay reggal doomu gaynde  
 40 ju goore biir paxam,  
 mbaa mu waafem ngeer, di tëroo?  
 41 Ana kuy xont baaxoñ,  
 fa doom yay wooye Yàlla wall,  
 di tërëf ndax ub xiif?

### 39

1 Yaa xam jamono ju kéwéli tund di jur?  
 Am yaa gis fu kéwél di ame doom?  
 2 Yaa lim weer yi muy ëmb,  
 am yaa xam fu njuram jote,  
 3 ba mu sukk, jur,  
 tàggook mititu matam,  
 4 ak fa doom jay leqlikook a màgg ci àll  
 bi,  
 ba dem, te du délsi?  
 5 Ana ku yóbbu fasu àll, afal ko?  
 Ana ku yiwi mbaamu àll, wacc ko?  
 6 Moom mi ma jox màndiñ mi, mu dëkke,  
 ak jooru xorom, mu màkkaanoo?  
 7 Yéguul riirum taax,  
 déggul coowal dawalkat.  
 8 Tund yi lay wërem poram,  
 di fa seete gépp gàncax gu tooy.  
 9 Ndax nagu àll a lay nangoo liggéeyal?  
 Mbaa mu di la fanaanal ci sa ngédd?  
 10 Man ngaa takk nagu àll cim rijji,  
 ba mu topp la, rijjil lab tool?  
 11 Yaa koy yaakaare dooleem ju bare,  
 ba dénk ko sab liggéey?  
 12 Yaay yaakaar mu fatal la jiwu,  
 jëlil la ko ca dàgga ja?



13 Bànjóolee ngi tēf-tēflu,  
te xodd gën koy laaf.  
14 Mooy wacci nenam fi suuf,  
bàyyee ko tangooru suuf.  
15 Xalaatul tànk bu ci joggi  
ak rabu àll wu ko dēggaate.  
16 Day soxore doom yi ni lu mu jurul,  
coonoom neen, yoonam.  
17 Yàllaa ko xañ xam-xam,  
te séddu ko xelum ràññee.  
18 Waaye bu sàqee, ba sàqi,  
faalewul fas ak gawaram.

19 Ndax yaa may aw fas, kàttan?  
Am yaa solal ndodd ma, ciiriir?  
20 Am yaa koy tēbloo nim soccet,  
bu fiiroo, fit rēcc?  
21 Fas a ngi bége dooleem, di curpee xur  
wa,  
rididi, dajeeek ngànnaa.  
22 Yégul tiitaange, ragalul,  
dawul saamar.  
23 Mbarum fitt a ngay kesen-keseni fa  
kawam,  
fa xeej ak jaasi leroxatandoo,  
24 mu buure xadar, taxañ suuf si,  
téyeetul boppam ndax liit ga jolli,  
25 mu feeloo ko coowal wakkan ya.  
Fu sore lay xañtoo xare ba,  
ak kàdduy njiiti xare,  
ya riirandook xaacu ya.

26 Ndax sam xel la céeliy daayaarlo,  
ba firiy laafam, jēm bēj-saalum?  
27 Am yaa sant jaxaay mu naaw ba fa kaw,  
di tàgge kawte ya?  
28 Aw doj, mu màkkaanoo,  
di fanaan kaw catu doj  
wu ko kenn dul jote.  
29 Fa lay yeerom rēbbam,  
di ko niire fu sore.  
30 Ku ñu bóom, ma nga fa teew,  
doom yay xab deret ja.

## 40

1 Aji Sax ji dellu ne Ayóoba:  
2 Yaw miy layook Aji Man ji, dangay  
diinjat?  
Yaw miy weranteek Yàlla, doo tontu?

3 Ayóoba àddu ne Aji Sax ji:  
4 Man mi tekkiwul dara, nu ma lay ton-  
too?  
Sama loxo laa ube sama gēmmiñ.  
5 Maa waxoon benn yoon, waxatuma;  
maa tóllanti woon, dootu am.

### Yàlla dēkk na Ayóoba

6 Aji Sax ji daldi àddoo fa ngélén la, ne  
Ayóoba:  
7 Takkul boog te góor-góorlu,  
ma laaj la, nga xamal ma.  
8 Sañ nga maa teg tooñ daal,  
di ma sikkal, ba am dēgg?  
9 Dangaa am dooley Yàlla,  
mbaa kàddu guy dēnu ni gosam?  
10 Ràngool boog màggaay ak teddnga,  
te làmboo dayook daraja.  
11 Yuril sa mer,  
te xool képp ku bew, detteel ko,  
12 xoolal képp ku bew, torxal ko,  
te dēggaate ku bon fa mu taxaw.  
13 Boole leen làq biir suuf,  
tējleen ràpp fu làqu fa,  
14 Kon déy man maa lay sargal,  
muy ndam lu la sa doole may.

15 Beyemot rab wu réy\* waa ngii, maa ko  
sàkk, sàkk la,  
ñax lay lekk niw nag.  
16 Doole jaa ngoogu ca ndigg la,  
kàttan ga laloo suuxi biir ba,  
17 geen ga ne kàdd ni garabu seedar,  
sidditi lupp ya ñabaloo,  
18 yax ya di ponki xàñjar,  
cér ya mel ni yeti weñ.  
19 Moo gēna yéeme ci li Yàlla sàkk,  
te ki ko sàkk donj a koy boccil saamar.  
20 Xontam déy tund yee ko yor,  
rabi àll yépp di foye fa wetam.  
21 Keppaaru déem lay goore,  
làqoo barax ak ban,  
22 déem ya keral ko,  
garabi tàkk ga yéew ko.  
23 Dex gu fees jaaxalu ko,  
gannaxi Yurdan di ko talaata, mu ne tekk.  
24 Ana ku koy jàpp te muy xoole?  
Ak ku koy nos, ba téye ko?

\* **40:15** 40.15 rab wu réy wi am na ñu jàpp ne léebéer la. † **40:25** 40.25 ninki-nànka jii am na ñu jàpp ne jasig la.

25 Ninki-nànka† nag yaa koy nappe oos?  
Am yaay yeewe làmmiñ wa ag buum?  
26 Yaay nase wakkan ya ag buum?  
Am yaay bètt ñaam wa, we ca lonku?  
27 Xanaa ca la lay tinoo tinu,  
di la lewetali kàddoom?  
28 Xanaa kon mooy digook yaw,  
ngir nga def ko jaam ba fàww?  
29 Am yaa koy foye ni picc,  
takkaal ko sa janq ji, ñu di ko seetaan?  
30 Dees na ko waxaaleendoo?  
Am ay julaa koy séddoo?  
31 Yaa koy jamati xeepp a?  
Am yaa koy xaañ xeeju nappkat?  
32 Teg ko loxo, seet;  
dootoo fàtte boobu xeex,  
te doo ko dolleeti.

## 41

1 Wii rab, yaakaar koo jàpp nax sa bopp  
la;  
bu nee jaas, nga jóoru.  
2 Kenn ñàngul, ba sañ koo merloo.  
Kon ana kuy taxaw fi sama kanam man?  
3 Ana ku ma abal lenn ba ma war koo  
delloo?  
Lépp lu mboolem asamaan tiim, maay  
boroom!  
4 Rab wii, duma noppee waxtaaney  
céram,  
kiraamay dooleem ak jekkaayu bindam.  
5 Ana ku mana summib turkeem?  
Ana ku mana bètt kiiraayu ñaar-caam?  
6 Ana ku koy ñaal,  
ak sellam yu dajal te raglu?  
7 Gannaaw gi ay sàppey pakk la,  
di ab tay bu tëje ràpp,  
8 dugglante, benn-benn,  
ba ngelaw sax xaju ca,  
9 xanaa ñu ne ñàpp, ku ne taq sa moroom,  
te duñu teqlikoo.  
10 Bu tisee, melax ne ràyy,  
mu xippi, nga ne fajar ay xapp-xappal.  
11 Jumi sawaraay tàkke ca gémmiñ ga,  
ferñent ya jiitu,  
12 saxar di sël-sëlee ca wakkan ya,  
mbete cóoloolu cin luy bax.  
13 Ngelawal bakkanam jafal nay xal,  
sawara ne jippét, tàkke ca gémmiñam.  
14 Ndoddam la doole daloo,  
te fu mu dëgmal tëbum tiitaange fa la.  
15 Ay ndombo la der ba def, dànkalikoo,

ne këcc, ne degg.  
16 Dënn baa nga dëgër niw doj,  
ne këcc ni doju wolukaay.  
17 Bu jógee, jàmbaar ñi tiit,  
muy rajaxe, ñu jommi.  
18 Nga jam ko saamar, du dugg;  
xepp akug fitt akub xeej, noonu.  
19 Weñ gu ñuul di ko saf um mboob,  
xàñar niru ko matt mu nèb.  
20 Ndawal xala dawloowu ko,  
doju mbaq di ngooñ mu koy ñiiramtal.  
21 Bolde di ko saf ñax gu wow,  
ab xeej riir, def koy ree.  
22 Lu mel ni tojitu xandeer a lal biir ba,  
di rijji bañ bi.  
23 Mooy baxloo xóote yi, ni cin,  
di fuural géej ni njaq lu garab xooje.  
24 Gannaawam ay def xàll wuy lèrxat,  
mbàmbulaan miy saf bijjaaw.  
25 Amul niruwaale fi kaw suuf,  
mii mbindeef mu dul tiit.  
26 Képp ku réy, moo ko naa sutt, xool,  
képp ku bew, muy sa buur.

## 42

### *Ayóoba tuub na*

1 Ba loolu amee Ayóoba àddu ne Aji Sax  
ji:  
2 Xam naa ne lépp nga man;  
du lenn loo tële.  
3 Nee nga ma: «Ana koo doon,  
bay lèntal samay dogal te xamoo?»  
Maa wax moos te xawma lenn  
ci kawtéef yu ma wees, ump ma.  
4 Nee nga: «Déglul, maa lay wax.  
Ma laaj la, nga xamal ma.»  
5 Dég-dégu nopp laa amoon ci yaw,  
tey bët laa la teg.  
6 Moo ma tax ne: «Wàqet, tuubi-ruubi,»  
ba diwoo suuf akub dóom.

### *Yàlla leqli na Ayóoba*

7 Gannaaw ba Aji Sax ji waxee Ayóoba  
yooyu kàddu, Aji Sax ji dafa wax Elifas  
ma cosaanoo Teman, ne ko: «Sama xol  
tàng na ci yaw, yaak sa ñaari xarit yi,  
ndax waxuleen dëgg ci man ni sama jaam  
bi Ayóoba waxe. 8 Kon nag sàkkleen  
juróom ñaari yëkk, ak juróom ñaari  
kuuy. Ngeen dem ba ca sama jaam ba  
Ayóoba, joxe ko fa saraxu rendi-dóomal,

te Ayóoba ñaanal leen, ma seet ci moom ba bañ leena mbugale seenug ndof. Ndax waxuleen dëgg ci man ni sama jaam bi Ayóoba waxe.»

<sup>9</sup> Ba loolu amee Elifas waa Teman ba, ak Bildàdd waa Suwa, ak Cofar waa Naama daldi dem, def la leen Aji Sax ji sant. Aji Sax ji seet ci Ayóoba. <sup>10</sup> Gannaaw ba Ayóoba ñaanalee xaritam ya, Aji Sax ji tijji wërsëgu Ayóoba. Aji Sax ji ful na ñaari yoon mboolem alalu Ayóoba. <sup>11</sup> Ba loolu amee mboolemi bokkam, góor ak jigéen, ak mboolemi xameem ya woon, dikk bokk ak moom bernde ca këram. Ñu dëfal ko, mas-sawu ko ci bépp coono bu ko Aji Sax ji tegoon. Ku ci nekk jox ko dogu xalis ak jaarob wurus. <sup>12</sup> Aji Sax ji nag barkeel mujug Ayóoba lu raw ndoor-teem. Mu am fukki junniy gàtt ak ñeent (14 000), ak juróom benni junniy giléem (6 000), ak junniy lëkkey nag (1 000) yu muy rijjee, ak junniy mbaam yu jigéen (1 000). <sup>13</sup> Mu amaat juróom ñaari doom yu góor ak ñett ñu jigéen, <sup>14</sup> ka mag ca jigéen ña, mu tudde ko Yemima, ka ca topp di Keciya, ka ca toppaat di Keren Apug. <sup>15</sup> Mboolem jigéeni réew ma, amul ku rafete woon ni ñetti doomi Ayóoba yooyu. Seen baay nag sédd leen ndono lu tollook seen céri càmmiñ. <sup>16</sup> Gannaaw loolu Ayóoba dundaat na téeméeri at ak ñeent fukk (140). Gis na ay doomam, gis ay sëtam, ba muy ñeenti maas. <sup>17</sup> Ayóoba màggat na ba ñor xomm, doora dee.

## Sabóor

### 1

#### *Ñaari yoon a ngii*

<sup>1</sup> Ndokklee yaw mi toppul tànkì ku bon,  
taxawewuloo yoonu moykat,  
toogewuloo jataayu ñaawlekat.

<sup>2</sup> Xanaa di bége yoonu Aji Sax ji,  
di ko jàngat guddeek bëccëg.

<sup>3</sup> Loo def mu àntu:  
nga mel ni garab gu saxe walum ndox,  
bu jotee meññ,  
te xob wa du lax.

<sup>4</sup> Loolu dalul moos ku bon,  
kay mel ni xatax bu ngelaw li wal.

<sup>5</sup> Moo tax ku bon du siggee àtte ba,  
moykat du taxawe ndajem aji jub ña.

<sup>6</sup> Aji Sax ji kay ay sàmm yoonu aji jub;  
yoonu ku bon di sànk boroom.

### 2

#### *Yàlla fal na buur*

<sup>1</sup> Ana lu xeeti àddina di riir,  
lu giir yiy nas pexey neen?

<sup>2</sup> Buuri àddinaa ngi dér,  
boroom nguur yi daje,  
di fexeel Aji Sax ji,  
mook ki mu fal.

<sup>3</sup> Ña nga naan: «Nanu dagg càllala yi,  
sànni jéng yi!»

<sup>4</sup> Ki ci jalub asamaan a ngay ree,  
Boroom baa nga leen di kókkali,

<sup>5</sup> mer, ba gëdd leen,  
xadaru, tiital leen ne:

<sup>6</sup> «Man maa tabb buur, fal ko ci Siyon»\*,  
sama tund wu sell.»

<sup>7</sup> Buur ne: «Ma biral dogalu Aji Sax ji,  
moom mi ma ne: “Yaa di sama doom,  
bés niki tey, maa la jur†.»

\* **2:6** 2.6 Siyon: Siyon fii mooy tund wa kër Yàlla ga nekkoon ca Yerusalem. Daan nañu ko tudde it dëkku Yerusalem mbaa réewum Israyil. † **2:7** 2.7 Jur: su Yàlla nee moo jur buur bi, waxin la rekk. Bés bi ñuy fal buur bi la Yàlla di biral ne jàppe na buur bi ni doomam. Ni doom di taxawale baayam, ni la buur biy taxawale Yàlla ci kaw suuf. Ni baay di sàmm doomam it, ni la Yàlla di sàmm buur bi, ngir mu am ndam. \* **3:1** 3.1 Seetal ci 2.Samiyel 15—16.

<sup>8</sup> Ñaan ma xeeti àddina, ma sédd la ko,  
nga moom ba ca cati àddina,

<sup>9</sup> yilife leen yetu weñ,  
rajaxe leen ni njaqal xandeer.”»

<sup>10</sup> Kon yeen buur yi, muusleen,  
kilifay àddina, fàgguleen.

<sup>11</sup> Jaamuleen Aji Sax ji, ragal ko,  
di ko bége, ba yaram daw.

<sup>12</sup> Sujjóotal-leen doom ji, bala moo mer,  
ngeen sànkoo seenu yoon;  
meram day jekki ne jippét,  
waaye ndokklee képp ku ko làqoo!

### 3

#### *Aji jub a ngi woote wall*

<sup>1</sup> Muy kàddug Sabóor, ñeel Daawuda, ba  
muy daw Absalom doomam ju góor\*.

<sup>2</sup> Éy Aji Sax ji, noon yeeka bare!  
Ñu baree may jógal,

<sup>3</sup> ñu baree may tooge naa:  
«Yàlla du ko wallu!»

Selaw

<sup>4</sup> Waaye yaw Aji Sax ji, yaa may feg,  
di ma teral, di ma siggil.

<sup>5</sup> Maay woo Aji Sax ji wall,  
mu walloo ma fa tundam wu sell wa.  
Selaw.

<sup>6</sup> Maay tëdd nelaw, yewwu;  
Aji Sax ji di ma aar.

<sup>7</sup> Ñu dul jeex a ma jógal, gaw ma,  
te дума ragal.

<sup>8</sup> Éy Aji Sax ji sama Yàlla,  
jógal, wallu ma!  
Yaa toj kaabaabi noon yu bon yépp,  
foq seeni sell.

<sup>9</sup> Aji Sax ji, yaa moom wall,  
sa mbooloo jagoo sa barke.

Selaw.

## 4

*Ma gonloo ñaan*

1 Mu jëm ci njiital jàngkat yi, ànd aki xalam, di kàddug Sabóor, ñeel Daawuda.

2 Éy Yàlla, yaw mi may àtte dëgg, maa ngi woote, wuyu ma; maa xatoon, nga yaatal ma. Ngalla baaxe ma, nangul ma.

3 Yeen boroom daraja yi, buleen yàqati sama der, buleen sopp caaxaan, di sos.

4 Xamleen ne Aji Sax ji day séddoo ku ko ragal, te bu ma wooyee Aji Sax ji, mu dégg.

5 Loxleen te baña bàkkaar, waxtaanleen ak seen ngegenaay te noppi.

6 Rendileen seen sarax yi war, te wóolu Aji Sax ji.

7 Bare na ñu naan: «Ana ku nuy won lu baax?»

Éy Aji Sax ji, baaxe nu saw yiw!

8 May nga ma bannexu xol bu raw seen pepp mu tuurook biiñ bu wal.

9 Jàmm laay tédde, nelaw, Aji Sax ji, yaw donḡ yaa may dëel fu wóor.

## 5

*Ma jëluy ñaan*

1 Mu jëm ci njiital jàngkat yi, ànd aki toxoro, di kàddug Sabóor, ñeel Daawuda.

2 Éy Aji Sax ji, maa ngi àddu, déglu ma, maa ngi onk, teewlu ma.

3 Sama Buur, sama Yàlla, déglul, ma ne wallóoy! Yaw laay ñaan.

4 Aji Sax ji, ag suba, ngay dégg sama baat, suba su ne ma diis la samay dagaan, di séentu.

5 Doo Yàlla ju safoo coxor, yaw lu bon du la daloo.

6 Ku réy du taxaw fi sa kanam, kuy def lu ñaaw, bañ nga ko.

7 Aji Sax ji, yaay sànk kuy fen,

sib kuy bóomeek kuy wore.

8 Man nag, sa ngor lu yaa laa saña dugge sa kër, sujjóotal sa bérab bu sell, wormaale la.

9 Éy Aji Sax ji, wommate ma sa njekk ndaxi noon, te xállal ma saw yoon.

10 Ñii, lu ñu wax, wérul, seen xol a mébét njekkar, seenug boli di bàmmeel bu ne nàpp, ñuy naxe làmmiñ wu neex.

11 Éy Yàlla, topp leen, ñu fakktaloo seeni pexe; xalabal ñii barey moy, ñoo la gàntal.

12 Képp ku la làqoo, yal na bég, di saxoo sarxolle, nga di ko yiir, te ku la sopp di la bége.

13 Aji Sax ji yaw kat, yaay barkeel ku jub, yiire ko saw yiw, fege ko.

## 6

*Jarag a ngi woote wall*

1 Mu jëm ci njiital jàngkat yi, ànd ak xalamu juróom ñetti buum, di kàddug Sabóor, ñeel Daawuda.

2 Éy Aji Sax ji, bul mer, ba di ma rëbb, bul xadaru, ba di ma mbugal.

3 Aji Sax ji, damaa néew doole, yërëm ma! Éy Aji Sax ji, sama yaram a tas, dàmpe ma!

4 Sama xol a jeex tàkk. Aji Sax ji, loo deeti xaar nag?

5 Éy Aji Sax ji, délsil, xettli ma! Walloo ma sa ngor.

6 Deesul dee ba fàttliku la; ku dugg njaniiw, nu mu lay sante?

7 Onk naa ba loof, di fanaanee jooy, sama lal di féey, ba far seeye rongooñ.

8 Saay gët a ngi xóot ndaxu naqar, boole ci giim ndax tooñi noonoo noon.

9 Yeen, defkati ñaawtéef yépp, xiddileen ma! Aji Sax ji dégg na saay jooy,

10 Aji Sax ji dégg na saay dagaan,  
Aji Sax jii nangu na samag ñaan.  
11 Noon yépp a am gâce, ba jàq lool,  
ne wërëñ ak gâceeg mbetteel.

## 7

### *Boroom tuumaa ngi woote wall*

1 Muy woyu njàmbat, ñeel Daawuda. Mu woyaloon ko Aji Sax ji ci mbirum kàddu yu tukkee woon ca Kuus, ma bokkoon ci giirug Beñamin.

2 Éy Aji Sax ji, sama Yàlla, yaw laay làqoo!  
Musal ma, xettli maak ñi may dàq ñépp.

3 Lu ko moy ñu fàdd ma ni gaynde,  
daggate ma te kenn du wallu.

4 Aji Sax ji sama Yàlla, ndegam maa def  
lii,

ndegam maa taq fenn lu ñaaw,

5 ndegam ku ma jàmmal laa feye aw ay,  
mbaa ma dimbali ku ko noonoo te defu  
ko dara,

6 yal na ma noon rëbb,  
dab ma, dèggaate ma,  
sàggi saab sag, tëral ci pëndub suuf.

Selaw.

7 Aji Sax ji, meral, jóg,  
dajeel maak xadaru noon yi!  
Ngalla teewlu ma; yaw, yoon nga san-  
taane.

8 Yal na xeet yi daje, wër la,  
nga délsi tiim leen fu kawe.

9 Yal na Aji Sax ji àtte xeet yi;  
Aji Sax ji, seetal ci sama njubteek sama  
maandute te dëggal ma.

10 Yal na mbonug ku bon tees,  
te nga saxal kuy def njekk.  
Yaw Yàlla Boroom njekk, yaay natt xel ak  
xol.

11 Sama kaaraange, fa Yàlla,  
miy musal boroom xol bu dëggu.

12 Yàllaay àtte dëgg.  
Yàllaay rëbbe bés bu ne.

13 Ku tuubul, Yàlla nàmm saamaram,  
bank xalaam, diir la.

14 Moom la waajalal ngànnayyi ndee,

def ko fitt yuy boy.

15 Ku bon a ngoog, di matu doomu  
ñaawtéef.

Day sos njombe, wasin njublan.

16 Am kan lay gas, ba mu xóot,  
te pax ma mu gas, moo ca tàbbi.

17 Fitnaam, këpp ci boppam;  
coxoram, xàṅṅ cim kaanam.

18 Naa sante Aji Sax ji njekkam,  
ma woy Aji Sax jiy Aji Kawe ji.

## 8

### *Aji Sax ji teral na nit*

1 Mu jëm ci njiital jàngkat yi, ànd ak  
xalam gu ñuy wax gitiit\*, ñeel Daawuda,  
di kàddug Sabóor.

2 Aji Sax ji sunu Boroom,  
sa tur aka màgg ci kaw suuf sépp!  
Sag leer tiim asamaan.

3 Làmmiñu tuut-tànk, ba ci luy nàmp,  
feeñal nga ca sa kàttan,  
bañaaleek feyukat ne xerem.

4 Damay xool sa asamaan si nga móol,  
ak weer week biddiww yi nga fi teg.

5 Moo luy nit, ba nga di ko bàyyi xel?  
Luy doom aadamaak loo koy yége?

6 Yaa def nit mu yées malaaka yi as lëf,  
te yaa ko kaalaa teraangaak daraja,

7 fal ko ci kaw loo bind,  
jox ko lépp, mu teg tànk:

8 jur gépp, gu gudd ak gu gàtt,  
rabi àll it ca la,

9 ak njanaaw ak jën,  
ak luy jaare yooni géej.

10 Aji Sax ji sunu Boroom,  
sa tur aka màgg ci kaw suuf sépp!

\* 8:1 8.1 gitiit tur la wu réer ci làkku ebrë. Man na doon xeetu xalam gu cosaanoò dëkk ba ñuy wax Gaat ci réewu Filisti. Man na nekk it galan bu ñu daan woye ci jamono bu ñuy witt reseñ, di ko nal.

## 9

*Aji Sax ji dëgg lay àtte*

<sup>1</sup> Mu jëm ci njiital jàngkat yi, dëppook galan bu ñuy wax Deewug doom ju góor, ñeel Daawuda, di kàddug Sabóor.

<sup>2</sup> Ma sante Aji Sax ji sama xol bépp, di siiwal mboolemi kéemaanam.

<sup>3</sup> Yaw Yàlla, dama lay bége, bannexoo la,

woy la, yaw Aji Kawe ji.

<sup>4</sup> Noon yeey dellu gannaaw, tërëf, sànkú fi sa kanam.

<sup>5</sup> Yaa ma àtte yoon, dëggal ma, toog ci sab jal, di àtte njub.

<sup>6</sup> Rèbb nga xeet yi, sànkú ñu bon ñi, far seeni tur ba fàww.

<sup>7</sup> Noon ya raaf, gental ba fàww.

Yaa déjjati seeni dëkk, seenu askan fey.

<sup>8</sup> Aji Sax jee sax dàkk, samp jalam ngir àtte.

<sup>9</sup> Moom mooy àtte àddina cig njub, di dogalal xeet yi dëgg.

<sup>10</sup> Aji Sax jee lay làq néew-ji-doole, mooy làqe bésú njàqare.

<sup>11</sup> Aji Sax ji, yaw, ku la xam, wóolu la.

Aji Sax ji, yaw, ku lay sàkkú, doo ko wacc.

<sup>12</sup> Woyleen Aji Sax ji dëkke Siyon, siiwal-leen ay jalooreem ci xeet yi!

<sup>13</sup> Mooy topp nit bakkanu moroomam, di ko ba xel,

te du fàtte yuuxi néew-ji-doole.

<sup>14</sup> Éy Aji Sax ji, baaxe ma, gisal naqar wi ma bañ yi teg.

Yaa may yékkatee fa bunti ndee,

<sup>15</sup> ba ma siiwali sa woy yépp, fa buntu Siyon, dëkk bu taaru ba, di bannexoo sa wall gii!

<sup>16</sup> Xeet yee tàbbi pax ma ñu gasoon, fakktaloo fiir ga ñu làqoon.

<sup>17</sup> Aji Sax jaa ngi feeñoó, di àtte yoon; ku bon teg ug fiir, tàbbi ca.

Na jib ndànk. Selaw.

<sup>18</sup> Ñu bon ñee dëddu, dem njaniiw, ànd ak xeet yi fàtte Yàlla yépp.

<sup>19</sup> Yàlla du tanqamlu ab ndóol ba fàww, yaakaaru néew-ji-doole du tas muk.

<sup>20</sup> Aji Sax ji, jógal, bu la nit yab; na xeet yi dikk fi sa kanam, nga àtte leen.

<sup>21</sup> Rikk Aji Sax ji, yónnee leen tiitaange, xamal leen ne nit donj lañu.

Selaw.

## 10

*Néew-ji-doole sàkkú na yoon*

<sup>1</sup> Éy Aji Sax ji, lu la taxa sore?

Xanaa dangay làqu, bésú njàqare?

<sup>2</sup> Ku bon naagu na, ne dann néew-ji-doole, lal ay peXeem, ba jàpp ko.

<sup>3</sup> Ku bon déy a ngi téggoó bannexu bakkanam,

ku bégge di ñàkke wormaak a teddadil Aji Sax ji.

<sup>4</sup> Ku bon danjiiral, seetul dara, xalaatam yépp mooy Yàlla amul.

<sup>5</sup> Saa yu fexee, juble, te gisul sa ndigali yoon yi ko tiim. Ma ngay ciipu bañam yépp.

<sup>6</sup> Ma nga naan ca xelam: «Duma tërëf, safaan du ma dab tey ak èllëg.»

<sup>7</sup> Ay móolu la gémmiñ ga fees, ak fen ak njublan,

njekkar ak ñaawtéef lal làmmiñ wa.

<sup>8</sup> Day tëroo ciy dëkk-dëkkaan, làqu di bóom ku deful dara, nèbbu di wootal néew-ji-doole.

<sup>9</sup> Day làqu bérab, di yeeroo ni gaynde cim xunteem,

di yeeru aji ñàkk, ba jàpp ko, laaw ko, ñoddi, yóbbu.

<sup>10</sup> Ma ngay sègg ak a waaf, ba aji ñàkk daanu ci loxoom.

<sup>11</sup> Mu naa ca xelam: «Yàlla fàtte na, dummóoyu na, du xoolati.»

<sup>12</sup> Aji Sax ji, jógal!

Éy Yàlla, xàccil sa loxo.

Bul fàtte néew-ji-doole.

<sup>13</sup> Bul may ku bon mu sofental la, te naan ci xelam: «Yàlla du ma ko topp.»

<sup>14</sup> Yaw de yaay ki nemmiku, di gis njekkar ak naqar,

ku mu dal, nga sàmm àqam.  
Néew-ji-doole wéeroo la,  
ab jirim, nga dimbali.

<sup>15</sup> Ngalla dammal loxol ku soxor ak ku  
bon,  
topp leen seen coxor,  
gi ñu yaakaaroon ne du feeñ.

<sup>16</sup> Aji Sax jee di Buur ba fàww!  
Xeet yeey sàнку, jeex cim réewam.

<sup>17</sup> Néew-ji-doole dagaan, Aji Sax ji dégg,  
dalal xelam, teewlu ko,

<sup>18</sup> ngir sàmm àqu jirim ak néew-ji-doole,  
ba nit kiy suufu kese dootu xèble.

## 11

### *Ma làqoo Aji Sax ji*

<sup>1</sup> Mu jëm ci njiital jàngkat yi, ñeel  
Daawuda.

Aji Sax ji laa làqoo.  
Ana lu ngeen ma naa: «Neel fëyy ni picc,  
tonj sa kaw tund.

<sup>2</sup> Xanaa du ñu soxor ñaa ngii, bank seen  
xala,  
nas seenu fitt,  
nara lëndëmtu, jam ku jub?

<sup>3</sup> Bu ponki njub màbbee,  
nu aji jub di def?»

<sup>4</sup> Aji Sax jaa nga këram gu sell.  
Aji Sax jaa nga asamaan, kaw jalam,  
ne jàkk doom aadama, di ko seetlu.

<sup>5</sup> Aji Sax ji day seetlu ku jub;  
ku soxor, bëgg fitna, mu bañ.

<sup>6</sup> Day tawal ku bon ay mbugal;  
sawaraak tamarax akub jaas dib añaam.

<sup>7</sup> Aji Sax jee jub, sopp njub;  
kuy jubal, gis yiwam.

## 12

### *Kàddug Yàllaa wóor*

<sup>1</sup> Mu jëm ci njiital jàngkat yi, ànd ak  
xalamu juróom ñetti buum, di kàddug  
Sabóor, ñeel Daawuda.

<sup>2</sup> Wallóoy, Aji Sax ji, ngor jee na!  
Kóolute réer na doom aadama.

<sup>3</sup> Dañuy fenante,  
làmmiñ dig lem, xol ba njuuy la.

<sup>4</sup> Yal na Aji Sax ji tēj gëmmiñu kuy naxe,

ak kuy làmmiñuy tēggu.

<sup>5</sup> Ñu ngi naa: «Sunu làmmiñ lanuy daane,  
nook sunu kàddu; ku nu manal dara?»

<sup>6</sup> Ku ñàkk a ngi, ñu futti,  
mu ngi binni, di néew-ji-doole.  
Aji Sax ji nee: «Maa ngii, di ci jóg,  
teg leen fi rawtu gu ñu ne siiw.»

<sup>7</sup> Kàddug Aji Sax ji, kàddu gu sell la,  
ni xalis bu ñu xelli ci taalu ban,  
settli ko juróom ñaari yoon.

<sup>8</sup> Ngalla Aji Sax ji, sàmmal ku néewle,  
aar ko saa su ne ci nitu tey.

<sup>9</sup> Ñu bon ñaa ngi taxawaalu fu ne,  
jikko ju sew falu ci biir doom aadama yi.

## 13

### *Aji Sax ji, loo deeti xaar?*

<sup>1</sup> Mu jëm ci njiital jàngkat yi, di kàddug  
Sabóor, ñeel Daawuda.

<sup>2</sup> Céy Aji Sax ji, loo deeti xaar?  
Xanaa doo ma tanqamlu ba fàww?

Loo deeti xaar, bañ maa geesu,  
<sup>3</sup> ba ma tàggook bopp bu ubu  
ak njàqarey xol bu sax,  
ba noon dootu ma man?

<sup>4</sup> Céy Aji Sax ji sama Yàlla, geesu ma,  
wuyu ma,  
leqli ma, bala ma ne sërëx ci nelawi ndee,  
<sup>5</sup> noon ba naan: «Daan naa ko,»  
bañ yay bége saab jéll.

<sup>6</sup> Man de maa ngi dénkoo sa ngor,  
di bannexoo sag wall.  
Naa woy Aji Sax ji,  
ki may baaxe xéewalam.

## 14

### *Yàqute maase na*

<sup>1</sup> Mu jëm ci njiital jàngkat yi, ñeel  
Daawuda.

Ab dof a ngi naa ci xelam: «Yàlla amul!»  
Ñu ni mel ay def njekkar, seeni jéf siblu,  
kenn defu ci lu baax.

<sup>2</sup> Aji Sax jee tollu asamaan, jéer doom  
aadama,  
di seet ku ci xelu, tey sàkku Yàlla.



3 Ñépp lajj,  
bokk yàqu yaxeet.  
Kenn deful lu baax,  
du kenn sax.  
4 Aji Sax ji nee: «Xanaa ñiy def lu bon  
ñépp xamuñu dara?  
Ñuy lekk sama ñoñ niw ñam,  
te sàkkuwuñu Aji Sax ji.»  
5 Foofu lañuy tiite tiitaange lu réy!  
Du Yàllaa ngi ànd ak kuréli ñu jub ñi?  
6 Ku néewlee yaakaar, ngeen tas ko,  
waaye Aji Sax ji la làqoo.  
7 Ana kuy xettlee Israyil fa Siyon?  
Éy bés bu Aji Sax ji delloo ñoñam ndam,  
ndaw mbégte ci giirug Yanqóoba!  
Ndaw bannex laa ne, ci Israyil gii!

## 15

### *Kuy aji jub?*

1 Muy kàddug Sabóor, ñeel Daawuda.

Aji Sax ji, kuy ganeji sa xayma?  
Ana kuy dëkki sa tund wu sell?

2 Xanaa ki wéye maandu,  
di def njekk,  
di wax dëggu xolam.  
3 Du sos,  
du tooñ dëkkandoo,  
du baatal moroomam.  
4 Ku siblu, mu sib,  
ku ragal Yàlla, mu teral.  
Mooy sàmm ngiñam,  
su ko dee lor it.  
5 Du leble, ba teg ca;  
du nangu ger, ngir fexeel jaambur.

Lii ku koy jëfe doo jang.

## 16

### *Aji Sax ji laa séddoo, dund ak dee*

1 Muy taalifu Daawuda, ngir jàngle.  
2 Éy Yàlla, sàmm ma, maa ngi làqu fi yaw!  
Maa ne Aji Sax ji: «Yaay sama Boroom,  
awma alal ju la moy.»  
3 Ñu sell ñi ci réew mi ñooy garmi yi,

sama mbégte mépp ñoom a.  
4 Kuy sàkkuy tuur barew tiis,  
man de дума leen tuural deret,  
sama làmmiñ du leen tudd.  
5 Aji Sax ji, yaay wàll wi ma séddoo,  
di sama ndabal xéewal.  
Yaa yor sama wërség.  
6 Maa muurloo bérab bu neex,  
ndaw cér bu rafet!  
7 Ma sant Aji Sax ji may xelal,  
ba guddi sax sama xel di ma yedd.  
8 Damaa saxoo ne jàkk ci Aji Sax ji  
ndijoor la ma fare, ba дума tërëf,  
9 xanaa di bannexu, sama xol bég,  
sama yaram finaax.  
10 Doo ma wacc njaniiw moos,  
sa wóllère wa, doo ko won yàqutey  
bàmmeel\*.  
11 Yaa may xamal yoonu ndund.  
Fu bannex mate, yaa teew,  
xéewal sa ndijoor la saxe.

## 17

### *Aji Sax ji, jox ma dëgg*

1 Muy ñaanu Daawuda.  
Éy Aji Sax ji, déglul liy dëgg,  
déglul, ma woote!  
Teewlul, ma dagaane la  
làmmiñ wu mucch fen.  
2 Yal na sama àtte bawoo fi yaw,  
nga gis sama njubte.  
3 Natt nga saab xol, niir ma guddi,  
settantal ma, gisoo dara.  
Dogu naa ne дума moye wax.  
4 Su may jëf it, di sàmm sa kàddu.  
Maay moyu yoonu ku bon.  
5 Sa tànk, sama tànk,  
jàdduma fenn.

6 Éy Yàlla, maa lay woo, nga di ma wuyu;  
teewlu ma te déglu ma!  
7 Na sa ngor feeñ,  
yaw miy walloo sa doole  
ku la làqooy noonam.  
8 Sàmm ma ni peru bët;  
làqe ma sa ker,

\* 16:10 16.10 Woykat bi di wone fii kóoluteem ne Aji Sax ji du ko seetaan muy dee ci saa si, waaye dina ko musal ci dee gi ko doon yoot ca fan yooya. Seetal ci jëf ya 13.34-37.

<sup>9</sup> ma rëcc ñu bon ñi ma song,  
noon ñii ma gaw, nar maa bóom.

<sup>10</sup> Seen xol dàq yërmande,  
seeni wax di reewande.

<sup>11</sup> Tanc nañu nu fépp,  
ne nu jàkk, nar noo tèral.

<sup>12</sup> Mbeté gaynde gu namma fàdde,  
gaynde gu mat guy tèroo!

<sup>13</sup> Éy Aji Sax ji, jógal dajeek moom, detteel  
ko.

Xettlee ma sa saamar, ma rëcc ku bon.

<sup>14</sup> Éy Aji Sax ji, walloo ma sa doole,  
ma rëcc ñi séddoo dundu àddina.  
Say soppe, nga reggal,  
seeni doom regg,  
desalal seeni doom.

<sup>15</sup> Man nag ma am dëgg, ne la jàkk,  
yewwu, regge sa jëmm.

## 18

### *Buur daan, sant Aji Sax ji*

<sup>1</sup> Mu jëm ci njiital jàngkat yi, ñeel  
Daawuda jaamub Aji Sax ji. Mu jagleel  
Aji Sax ji woy wii, bés ba mu ko xettlee  
ci mboolem noonam, xettli ko it ci Buur  
Sóol. Kàdduy woy yaa ngii.

<sup>2</sup> Mu ne:  
Aji Sax ji, maa la sopp, yaw mi may  
dooleel.

<sup>3</sup> Aji Sax ji laay sës,  
mu di ma aar,  
di ma wallu.  
Mooy sama Yàlla, ji may sës, yiiru, fegu;  
mooy Boroom doole ji may musal, di ma  
làq.

<sup>4</sup> Ki yelloo cant, Aji Sax ji,  
moom laa woo, mucc ci samay noon.

<sup>5</sup> Buumi ndee tanc ma,  
walum kasara naq ma,

<sup>6</sup> buumi njaniiw laaw ma,  
dee ne jaas, di ma fiir.

<sup>7</sup> Ma jàq, woo Aji Sax ji,  
ne sama Yàlla wallóoy,  
mu dégge kèram.  
Ma yuuxu, muy dégg.

<sup>8</sup> Mu mer, suuf yëngu, di ker-keri;

kenuy tund ya jaayu, di reg-regi.

<sup>9</sup> Saxar di sël-sélee ca wakkan ya,  
sawara boye ca gémmiñ ga,  
xal yu yànj tàkke ca.

<sup>10</sup> Mu firi asamaan, wàcc,  
niir yu fatt lal tànk ya.

<sup>11</sup> Ma nga war malaakam serub, di naaw,  
daayaarloolaa fi ngelaw.

<sup>12</sup> Ma nga bàddoo lëndëm, làqoo,  
làmbóo ndox mu lëndëm aki xàmbaar,

<sup>13</sup> leer a ko jiitu, xàmbaar ya topp ca,  
ak tawub yuur ak xali sawara.

<sup>14</sup> Aji Sax jee dënoo asamaan.  
Aji Kawe jee àddu,  
muy tawub yuur ak xali sawara,

<sup>15</sup> mu soqiy fitt ak jumi melax,  
tasaare leen, fëlxe.

<sup>16</sup> Aji Sax ji, dangaa gëdd,  
nokki, mu riir,  
xuri géej ne fàññ,  
kenuy suuf ne dunñ.

<sup>17</sup> Aji Sax jee yóotoo fa kaw, jàpp ma,  
seppee ma ca xóotey ndox ma,

<sup>18</sup> musal ma ca noon yu mag,  
ya ma bañ te man ma.

<sup>19</sup> Ñu dajeek man, bés ba ma jàqee,  
Aji Sax ji taxawu ma,

<sup>20</sup> yaatal ma,  
bége ma, ba xettli ma.

<sup>21</sup> Aji Sax jee ma yool sama njekk,  
samay loxoo set, mu fey ma.

<sup>22</sup> Sàmm naa yooni Aji Sax ji,  
bonuma, di moy sama Yàlla.

<sup>23</sup> Dama ne jàkk ndigalam yépp,  
xalabuma dogali yoonam.

<sup>24</sup> May ànd ak moom, di jëfeg mat,  
di moyoo tooñ.

<sup>25</sup> Aji Sax jee ma yool sama njekk,  
rafetlu sama mucc ayib.

<sup>26</sup> Yaw Aji Sax ji, ku gore, fekk la gore;  
ku matale, fekk la matale;

<sup>27</sup> ku sellal, fekk la sell;  
ku dëng, fekk laak say feem.

<sup>28</sup> Yaw yaay musal xeet wu néew doole,  
kuy danñiiral, nga detteel.

<sup>29</sup> Yaw kay yaa may niital.

Aji Sax ji sama Yàllaay leeral sama  
lëndëm.

<sup>30</sup> Maak yaw kay, ma song gàngoor.  
Maak sama Yàlla, ma tëb um tata.

<sup>31</sup> Yàllaa mat.

Kàddug Aji Sax jee wér te wóor.

Mooy feg képp ku ko làqoo.

<sup>32</sup> Ana kuy Yàlla ku moy Aji Sax ji?  
Ku jara sës ku dul sunu Yàlla?

<sup>33</sup> Yàllaa may dooleel,  
di ma xállal, yoon mat.

<sup>34</sup> Moo ma gaawal ni kéwél,  
taxawal ma fu kawé.

<sup>35</sup> Moo may tàggat ngir xare,  
may bank xalag xànjari.

<sup>36</sup> Aji Sax ji yaa may feg, musal ma,  
dooleel ma sa loxo,  
nangul ma, darajaal ma.

<sup>37</sup> Yaa ma xállalu yoon,  
ba дума tërëf.

<sup>38</sup> Ma dàq noon yi, dab leen,  
jekkli, doora dëpp.

<sup>39</sup> Ma jam leen, jógatuñu,  
xanaa fëlëñu, ma joggi.

<sup>40</sup> Sol nga ma dooley xare,  
sukkal ñi ma jógal, ñu féete ma suuf.

<sup>41</sup> Won nga ma ndoddi noon,  
ma boole bóom bañ yi.

<sup>42</sup> Ñu ne wallóoy, wall amul;  
ñu woo Aji Sax ji, faalewu leen.

<sup>43</sup> Ma wol, ba ñu doon pënd, ngelaw wal,  
ma wetti ni banu mbedd.

<sup>44</sup> Xettli nga ma ci bokk yiy fippu,  
def ma, ma jiite ay xeet;  
waaso wu ma xamul sax nangul ma,

<sup>45</sup> ku ma ci dégg, déggal ma,  
ay doomi doxandéem di ma raamal,

<sup>46</sup> ne yàcc,  
génne seeni tata, di lox.

<sup>47</sup> Aji Sax jeey kiy dund.

Kii ma sës a jara sant.  
Yàlla mi may musal moo màgg!

<sup>48</sup> Mooy Yàlla ji ma feyul,  
nangulal ma xeet yi.

<sup>49</sup> Xettli nga maak noon,  
kaweel ma, ma tiim ku ma jógal,  
xettleeti ma cib soxor.

<sup>50</sup> Kon Aji Sax ji, ma sant la ci biir xeet yi,  
kañ la!

<sup>51</sup> Yaay may sa buuru ñoñ ndam lu réy,  
yaay ji ngor ki nga fal,  
muy man Daawuda, di sama askan ba  
fàww.

## 19

### *Aji Sax ji màgg na*

<sup>1</sup> Mu jëm ci njiital jàngkat yi, di kàddug  
Sabóor, ñeel Daawuda.

<sup>2</sup> Asamaan nee Yàlla màgg na,  
kaw ne màww, biral liggéeyu loxoom!

<sup>3</sup> Bésoo bés kàddu seere ko,  
guddee guddi xamle ca mbir.

<sup>4</sup> Du làkk, duy wax,  
du baat bu dégtu,

<sup>5</sup> suuf sépp la seen ndéey jibal,  
seen kàddoo àkki cati àddina.

Kaw la Yàlla sampal jant xayma,

<sup>6</sup> mu mel ni boroom séet, génne néegam,  
di mbër mu dojali, xéluw yoonam.

<sup>7</sup> Asamaan lay fenke cat lii,  
wëndeelu, sowi cat lee;  
amul lu rëcc tàngooram.

<sup>8</sup> Yoonu Aji Sax jee mat,  
di leqli bakkan.

Lu Aji Sax ji seede dëgg la,  
day xelal ku xeluwul.

<sup>9</sup> Lu Aji Sax ji tegtale, njub la,  
di bégal xol.

Lu Aji Sax ji santaane, leeraange la,  
di leeral gis-gis.

<sup>10</sup> Santaaneb ragal Aji Sax ji mooy li sell  
te sax ba fàww.

Lu Aji Sax ji digle, dëgg la,  
ak njekk gu sotti.

<sup>11</sup> Moo dàq wurus,  
raw wurusu ngalam wu ne xas;  
dàqati lem,  
ëpp tem-tem.

<sup>12</sup> Man, Sang bi, ci laay leerloo,  
ku ko sàmm yokku yool.

<sup>13</sup> Nit juum na, umple ko,  
baal ma tooñ gu ma umple.

<sup>14</sup> Te Sang bi, musal ma ci bàkkaar  
teyeef,

mu bañ maa jiital,  
ma mana maandu,  
mucc moy gu réy.

15 Éy Aji Sax ji, lu saaw làmmiñ tudd  
mbaa sama xol déey ma ko,  
yal nay loo gërëm,  
yaa may aar, yaa ma jot.

## 20

### *Yal na Buur daan*

1 Mu jëm ci njiital jàngkat yi, di kàddug  
Sabóor, ñeel Daawuda.

2 Buur, yal na la Aji Sax ji nangul bésu  
njàqare,  
yal na la turu Yàllay Yanqóoba aj fu kawe,  
3 yal na la yónnee wallam fa kërám,  
jàpplee la fa, ca Siyon.

4 Yal na xool loo ko jébbal,  
di rafetlu sarax soo ko lakkal.

Selaw.

5 Yal na la may li nga namm,  
di sottal loo mébét,  
6 ngay daan, nuy ree,  
yéege sunu raaya, màggal sunu Yàlla.  
Yal na Aji Sax ji nangu loo dagaan.

7 Aji Sax jeey musal ki mu fal, bir na ma  
tey.

Moo koy nangule fa asamaan su sell sa,  
ci dooley ndijooram biy musle.

8 Ñiiki watiir,  
ñeeki fas,  
nun sunu turu Yàlla Aji Sax ji lanuy tudd.

9 Ñoom ñooy jeng ak a jóoru,  
nun, nu jóg, taxaw jonn.

10 Éy Aji Sax ji, mayal Buur mu daan,  
te bés bu nu ko ñaane, mu nangul nu.

## 21

### *Aji Sax ji baaxe na Buur*

1 Mu jëm ci njiital jàngkat yi, di kàddug  
Sabóor, ñeel Daawuda.

2 Céy Aji Sax ji, Buur a ngi bége sa doole,  
di bannexoo sag wall, rekk.

3 Yaa ko may nammeeli xolam,  
gàntuwulooy dagaanam.

Selaw.

4 Yaa ko gatandoo barkey ngëneel,  
kaalaa ko wurusu ngalam.

5 Mu ñaan mucc,  
nga saxal jalam fàww,

6 sag wall a ko sagala sagal!  
Teddngaak daraja nga ko sédd,

7 jagleel ko barke bu sax dàkk,  
bégale ko sa kanam, mu bannexu.

8 Buur wóolu na Aji Sax ji, moos,  
du tërëf, Aji Kawe jee gore.

9 Buur, yaa naan sa noon yépp céex,  
ne say bañ taral.

10 Soo nee jalañ, jafal, ñu boy.  
Aji Sax ji mer, sànk leen,  
sawara xoyom leen.

11 Yaay raafal seeni giir fi kaw suuf,  
fey seen askan ci doom aadama yi.

12 Ñoo la mébal lu bon,  
nasal la pexe, joyul.

13 Nga di leen diir fittu kanam,  
ñu wone gannaaw.

14 Aji Sax ji, jógal ak sa manoore,  
nu joobe la, woy sa jaloore.

## 22

### *Jëkke jàq, mujje sant*

1 Mu jëm ci njiital jàngkat yi, di kàddug  
Sabóor, ñeel Daawuda, dèppook galan bi  
ñu dippee Kéwélu fajar.

2 Sama Yàlla, sama Yàlla, lu tax nga wacc  
ma?

Ma binni, binneeti, wall sore.

3 Éy sama Yàlla, ma woote bëccëg, wuyu-  
woo;

woote guddi, nopploo ma.

4 Yaw de, yaay ku sell, tooge sab jal,  
Israyil di la kañ.

5 Yaw la sunuy maam wóolu woon,  
wóolu la, nga xettli leen.

6 Yaw lañu daa woo wall, mucc;  
yaw lañu wóolu woon te rusuñu.

7 Man nag aw sax rekk laa, matuma nit.  
Doom aadama sewal ma, aw xeet tuutal  
ma.

8 Ku ma gis ñaawal ma,  
biiñ ma, xeelu ma, naa:

9 «Na wéeroo Aji Sax ji, mu xettli ko;

su ko soppee, na ko wallu.»

<sup>10</sup> Yaw de yaa ma roccee sama biiru ndey, naxe ma sama weenu yaay.

<sup>11</sup> Yaw laa dénkoo ba may juddu, ba ma juddoo sama ndey, ngay sama Yàlla.

<sup>12</sup> Bul ma sore, musiba teew na, wall amul!

<sup>13</sup> Noon yaa ngi ma gaw ni coggalu yëkk, dar ma ni ponkali yëkk ya fa Basan.

<sup>14</sup> Ñu ña ma, ñàpp, ni gaynde, guy yèmmook a fàdde.

<sup>15</sup> Doole ñiis, yax yoqi,

fit ne soyox, seey.

<sup>16</sup> Làmmiñ taqoo denqleñ, doole jeex, ma wow koññ, nga tèral ma buntu bàmmeeel.

<sup>17</sup> Ay xaj a ma wër, di gàngooru saaysaay, dar ma kepp, bëtt samay yoxook samay tànkk.

<sup>18</sup> Maa ngii, mana waññ sama yax yépp, ñoom ñuy xoole, di ma seetaan,

<sup>19</sup> séddoo samay yére, tegoo bant sama mbubb.

<sup>20</sup> Waaye yaw, Aji Sax ji, bul sore; yaa may dooleel, gaawe ma.

<sup>21</sup> Xettlil sama bakkan ci saamar, ba sama benn bakkan bii mucc selli xaj!

<sup>22</sup> Musal ma ci pàddum gaynde ak ndañum nagu àll.

Yaa ma wallu woon!

<sup>23</sup> Ma siiwali saw tur ci bokk yi, màggale la digg mbooloo mi.

<sup>24</sup> Yeen ñi ragal Aji Sax ji, santleen ko. Yeen askanu Yanqóoba wépp, màggal-leen ko.

Yeen bànni Israyil gépp, wormaal-leen ko.

<sup>25</sup> Moom de sàgganewul boroom tiis, làqu ko kanamam, ba mu wootee, wuyu na ko.

<sup>26</sup> Yaw laay sante ndaje mu mag, sottalal la samay dige\*, ñi la ragal seede.

<sup>27</sup> Ku woyof a cay lekk ba doyal, kuy wut Aji Sax ji, sant ko. «Guddleena gudd fan!»

<sup>28</sup> Àddina wërngal këpp ay fàttliku,

\* **22:26** 22.26 sottalal la samay dige: dige yooyu ay saraxi cant la yu ñuy bokk lekk. Ki koy joxe mooy ñaanal ñi mu ci woo jàmm ak wér ak barke.

walbatiku ci Aji Sax ji.

Làngi xeet yépp sukkalsi ko.

<sup>29</sup> Aji Sax jeey boroom nguur, moo yilif xeet yi.

<sup>30</sup> Boroom barke xéewlu, sujjóotal ko, ku jëm pax it, te bakkanam di lang, di ko sukkal.

<sup>31</sup> Askan wu dikkagul dina jaamu Boroom bi,

ñiy ñëw te juddooguñu dees na leen wax ay mbiram.

<sup>32</sup> Ñu dikk, biral njekkam, jottli xeet wu sosoogul jalooreem.

## 23

### *Aji Sax jee may sàmm*

<sup>1</sup> Ñeel Daawuda, di kàddug Sabóor.

Aji Sax jee may sàmm, du lenn lu ma ñàkk.

<sup>2</sup> Parlu mu naat la may gooral, wal mu dal, mu tette ma ca,

<sup>3</sup> leqli ma, teg ma ci yooni njekk ngir tedngay turam.

<sup>4</sup> Su may jaare xuru ndee wu ne këruus it,

duma ragal loraange:

yaw laak man, sa bantu sàmm ak sa nguul, yooyoo may dalal.

<sup>5</sup> Yaa ma berndeel, noon yi gis,

nga diwal ma saa bopp, terale ma, saab kaas rembat.

<sup>6</sup> Mbaax ak ngor kay la ma Aji Sax jiy dare sama giiru dund, ma dëkke këram ba fàww.

## 24

### *Ana kuy màggal Buur Yàlla?*

<sup>1</sup> Ñeel Daawuda, di kàddug Sabóor.

Aji Sax jee moom suuf ak li ko fees, ak àddina ak li ci biiram.

<sup>2</sup> Moo samp suuf biir géej, dëj ko ci kaw wal mi.

<sup>3</sup> Ana kuy yéegi tundu Aji Sax ji,  
kuy taxawi bérabam bu sell ba?

<sup>4</sup> Xanaa ku mucc ayib, sell ab xol,  
xemmemul caaxaani neen,  
du giñey fen.

<sup>5</sup> Kookooy jagoo barkeb Aji Sax ji,  
ak njekku Yàlla, mi koy musal.

<sup>6</sup> Ñooñooy waa làng, gi lay sàkku,  
di maasug Yanqóoba, giy sàkku sa yiw.

Selaw.

<sup>7</sup> Neleen bunt yi kulbét,  
ubbileen bunti cosaan yi,  
Buur Boroom ndam duggsi.

<sup>8</sup> Buur Boroom ndam booboo di kan?  
Xanaa Aji Sax ji Boroom dooleek  
njàmbaar,

Aji Sax ji jàmbaaruu xare ji.

<sup>9</sup> Neleen bunt yi kulbét,  
ubbileen bunti cosaan yi,  
Buur Boroom ndam duggsi.

<sup>10</sup> Buur Boroom ndam booboo di kan?  
Xanaa Aji Sax ju gàngoor yi.  
Kookooy Buur Boroom ndam.

Selaw.

## 25

### *Aji Sax jeey gindee, di yiire*

<sup>1</sup> Ñeel Daawuda.

Aji Sax ji, yaw laay diis sama bakkan.

<sup>2</sup> Sama Yàlla, yaw laa yaakaar.  
Yàlla buma rus,  
noon yi ree.

<sup>3</sup> Deesu la séentu, ba rus.  
Kuy wor ci neen mooy rus.

<sup>4</sup> Éy, Aji Sax ji, won ma saw yoon,  
xamal ma fi nga ma jaarloo.

<sup>5</sup> Jiitee ma sag dëgg, jàngal ma.  
Yaw yaay Yàlla ji may musal,  
ma di la yendoo yaakaar.

<sup>6</sup> Aji Sax ji, bàyyil xel sa yërmandeek sa  
ngor.

Naka jekk sa jikkoo!

<sup>7</sup> Bul xool li ma bàkkaare ndaw ak li ma  
moy.

Aji Sax ji, xoole ma sa ngor ngir sag  
mbaax.

<sup>8</sup> Aji Sax jee baax, rafeti dogal,

di gindi moykat ci yoon wi,

<sup>9</sup> di jiite ku woyof mbubb ci njubte,  
di ko xamal aw yoonam.

<sup>10</sup> Aji Sax ji ngor ak dëgg rekk lay jiitee  
kuy sàmm kóllèreem ak seedey yoonam.

<sup>11</sup> Éy Aji Sax ji, tooñ naa lool,  
jéggal ma ngir saw tur.

<sup>12</sup> Ana kuy wormaal Aji Sax ji,  
mu won ko yoon wi mata taamu,

<sup>13</sup> muy dunde ngëneel,  
askanam moom réew mi?

<sup>14</sup> Ndéeyu Aji Sax ji, jagley ku ko ragal.  
Kóllèreem la koy xamal.

<sup>15</sup> Samay gët jàkk rekk ci Aji Sax ji,  
moo may xettli ci fiiru noon.

<sup>16</sup> Ngalla geesu ma, baaxe ma,  
maa wéet, néew doole,

<sup>17</sup> sama xol feesey xalaat.  
Rikk, teggil ma njàqare!

<sup>18</sup> Xoolal sama naqar ak sama tiis,  
te baal ma bépp bàkkaar.

<sup>19</sup> Xoolal noon yi ne gàññ,  
bañ ma mbañeelu fitna.

<sup>20</sup> Éy, aar ma, musal ma!

Bu ma rusloo,  
yaw laa làqoo.

<sup>21</sup> Yal na ma maanduteek njub taxawu,  
maa ngii, di la xaar.

<sup>22</sup> Éy Yàlla, teggilal Israyil tiisoo tiis.

## 26

### *Ma waajal ndajem kër Aji Sax ji*

<sup>1</sup> Ñeel Daawuda.

Aji Sax ji, àtte ma,  
man de maandu laa wéye,  
Aji Sax ji laa wóolu, jenguma.

<sup>2</sup> Aji Sax ji, nattu ma, seetlu ma,  
seggal xel ak xol.

<sup>3</sup> Maa ngi janook sa ngor,  
di jéfe sa worma.

<sup>4</sup> Toogumaak naxekat,  
lëngoowumaak naaféq,

<sup>5</sup> sib naa gàngooru saaysaay,  
toogumaak ku bon.

<sup>6</sup> Aji Sax ji, maay jàpp ci biir mucc ayib,  
di wër sa sarxalukaay,

<sup>7</sup> àddu, sant la,  
lim sa jépp jaloore.  
<sup>8</sup> Aji Sax ji, maa sopp sa dëkkuwaay,  
bëgg bérab bi sag leer teew.

<sup>9</sup> Bu ma buubaaleek bàkkaarkat, sànni,  
di ma booleek bóomkat, bóom.  
<sup>10</sup> Seeni yoxoo nga sóobu ci mbon,  
ndijoor ya fees aki ger.

<sup>11</sup> Man nag maandu laay wéye,  
tee nga maa jot, baaxe ma?  
<sup>12</sup> Ndokk bi ma taxawee joor gu wóor.  
Ma màggal Aji Sax ji fi ndajey way-gëm  
ñi.

## 27

### *Xare jib, ma ànd ak Yàlla*

<sup>1</sup> Ñeel Daawuda.

Aji Sax jee may leeral, di ma wallu.  
Ana ku may ragal?  
Aji Sax jeey aar sama bakkan.  
Ana ku may tiit?  
<sup>2</sup> Ab soxor wutsi ma,  
nar maa yàpp,  
noonoo ma, bañ ma;  
mooy tërëf, fëlëñu.  
<sup>3</sup> Bu gàngoor booloo sama kaw,  
duma raf.  
Ab xare jib,  
ma ànd ak Yàlla.

<sup>4</sup> Lenn laa ñaan Aji Sax ji,  
lii laay sàkku:  
dëkk kër Aji Sax ji,  
sama giiru dund,  
di niir taaru Aji Sax ji,  
te yéemoo këram.  
<sup>5</sup> Bésub ay, mu yiire ma mbaaram,  
làq ma, ma làqoo xaymaam,  
aj ma ciw doj, ma raw.  
<sup>6</sup> Ma doxe fa siggi,  
tiim noon yi ma wër,  
di sarxali fa xaymaam  
saraxi sarxolle.  
Naa woyal Aji Sax ji, joobe ko.

<sup>7</sup> Éy Aji Sax ji, déglul, ma woote!  
Ngalla baaxe ma, nangul ma.  
<sup>8</sup> Yaw la sam xel ne ma, ma sàkku la,

te it yaw Aji Sax ji laay sàkku.  
<sup>9</sup> Sang bi, bu ma làqu,  
bul mer, jañax ma.  
Yaa ma daa wallu.  
Bu ma wacc, bu ma ba,  
yaay Yàlla mi may musal.  
<sup>10</sup> Ndey ak baay man nañu maa wacc,  
Aji Sax ji fat ma.  
<sup>11</sup> Éy Aji Sax ji, joxoñ ma saw yoon,  
jaarale ma joor gu wóor,  
ngir ñi may tëru.  
<sup>12</sup> Bu ma baye bänneexu noon.  
Seedey naaféq a ma jógal,  
di sos fitna.  
<sup>13</sup> Maay dajeek ngëneelu Aji Sax ji  
fi kaw suuf sii.  
Lii wóor na ma.  
<sup>14</sup> Yaakaaral Aji Sax ji,  
dëgërlul te amu fit,  
te yaakaarati Aji Sax ji.

## 28

### *Aji Sax jeey àtte ñoñam*

<sup>1</sup> Ñeel Daawuda.

Éy Aji Sax ji, yaw laay woo,  
di la wéeroo, bu ma tanqamlu.  
Soo nee cell,  
ma xawa tàbbim pax.  
<sup>2</sup> Ngalla déglul, ma tinu la,  
woo la wall,  
dëkk lay yoxo,  
jublu sa néegu biir bu sell ba.

<sup>3</sup> Bu ma sànkaleek ab soxor,  
di ma booleek kuy def lu bon,  
di wax moroom ma jàmm,  
te dencal ko ay ca xolam.  
<sup>4</sup> Fey leen seen liggéey,  
seen kemu jëf ju bon.  
Jox leen seen aña jëf,  
yool leen seen yelleef.  
<sup>5</sup> Xooluñu Aji Sax jeeki jëfam,  
ak liggéey bi mu def.  
Da leen di yàqte,  
te dootu leen yékkati.

<sup>6</sup> Jaajëfe Aji Sax ji,  
ki ma nangul samay dagaan!  
<sup>7</sup> Aji Sax jee may dooleel, di ma feg.  
Moom laa wóolu, mu wallu ma,

sama xol tooy,  
ma woy, sante ko.  
8 Aji Sax jeey dooleel ñoñam.  
Mooy làq, di musal buur bi mu fal.  
9 Ngalla musalal sa mbooloo,  
barkeelal sa ñoñ ñii,  
sàmm leen, boot ba fàww.

## 29

### *Aji Sax jeey boroom ndam*

1 Muy kàddug Sabóor, ñeel Daawuda.

Yeen goney Yàlla yi, seedeel-leen Aji Sax  
ji,  
seedeel-leen ko teddngaak doole,  
2 seedeel-leen Aji Sax ji teddngay turam.  
Sujjóotal-leen Aji Sax ji,  
ki gànjaroo sellnga.

3 Aji Sax jeey àddu ca kaw ndox ma,  
Yàlla mu tedd maa dënu,  
Aji Sax jeey tiim ndox, mi ne màww.

4 Aji Sax jeey àddoo doole,  
Aji Sax jeey àddoo daraja.

5 Aji Sax jeey àddu, falaxe garabi seedar,  
Aji Sax jee rajaxe seedari Libañ.

6 Réewum Libañ, mu curpiloo ni wëllu,  
tundu Siryon\* it, mbete yëkk wu ndaw.

7 Aji Sax jeey àddu,  
fettaxal sawara, mu boy.

8 Aji Sax ji àddooti, yëngal màndin,  
Aji Sax jee yëngal màndinju Kades.

9 Aji Sax jeey àddu, kéwél matu,  
garabi àll ruus,  
biir këram di mennum riir,  
naan: «Màggal-leen ko!»

10 Aji Sax ji la mbënn ma fekk falu,  
Aji Sax jee falu buur ba fàww.

11 Aji Sax jeey kàttanal ñoñam,  
di barkeele jàmm ñoñam.

## 30

### *Mucc, bég*

1 Muy woyu Sabóor, ñeel Daawuda ca  
daloob kër Yàlla ga\*.

\* 29:6 29.6 tundu Siryon mooy tundu Ermon ba tey. \* 30:1 30.1 Woyu Sabóor wii Daawuda da koy sante Yàlla gannaaw mbas ma, ba mu jëndee dàgga ngir rendi fa sarax su dakkal mbas ma. Dàgga jooju lañu mujj tabax jaamookaay ba. Seetal ci 2.Samiyel 24, ak 1.Jaar-jaar ya 21.

2 Aji Sax ji, dama lay kañ.

Yaa ma yékkati,  
ba noon reetaanu ma.

3 Aji Sax ji sama Yàlla, maa la woo wall,  
nga faj ma.

4 Aji Sax ji, yaa ma jukkee njaniiw,  
may ma bakkan, ma tàggook ñiy tàbbi  
njaniiw.

5 Yeen aji gëm ñi, woyleen Aji Sax ji,  
njukkale ko sellngaam.

6 Meram di lu gàtt,  
aw yiwam sax dàkk.  
Rongooñ gane, fanaan,  
ay ree xëysi.

7 Man damaa baaxle woon, ba ne:  
«Deesu ma rëññeel mukk.»

8 Aji Sax ji, booba yaa ma baaxe,  
dëj ma, ma ne kekk niw tund.  
Nga fuuyu, ma jàq.

9 Aji Sax ji, yaw laa woo wall;  
Boroom bi, yaw laa ñaanu yiw,

10 ne la: «Ma dee, tàbbi bàmmeel,  
ana lu mu lay jariñ?»

Nu la pëndu pax di sante,  
bay biral sa worma?

11 Aji Sax ji, déglul, baaxe ma;  
éy Aji Sax ji, dimbali ma.»

12 Yaa ma soppil samay rongooñ ay ree,  
summi sama yérey tiis, solal ma bannex.

13 Naa la woye xol, baña selaw.

Aji Sax ji, sama Yàlla, ma sant la ba fàww!

## 31

### *Naa siggi, noon sègg*

1 Mu jëm ci njiital jàngkat yi, di kàddug  
Sabóor, ñeel Daawuda.

2 Aji Sax ji, yaw laa làqoo,  
yàlla buma rus mukk.

Yiwee ma sa njekk.

3 Teewlu ma,  
gaawe ma,  
may ma, ma sës ci yaw, fegu.  
Aar ma, ma mucc.

4 Yaa may yiir, di ma aar,



jiite ma, wommat ma ngir yaw.  
<sup>5</sup> Génne ma fiir gi ñu may tëroo;  
 yaw yaa di sama rawtu.  
<sup>6</sup> Yaw laa dénk sama bakkan.  
 Aji Sax ji, Yàlla miy dëgg, ngalla jot ma.

<sup>7</sup> Maa bañ kuy topp tuuri neen.  
 Man, Aji Sax ji laa wóolu.  
<sup>8</sup> Damay bég, di bänneexoo sa ngor,  
 li nga xoole samaw tiis.  
 Ràññee nga sama njàqarey xol.  
<sup>9</sup> Wacoo ma ci loxol noon,  
 danga maa taxawal fu ma yaatoo.

<sup>10</sup> Éy Aji Sax ji, baaxe ma, jàq naa!  
 Samay gët a ngi giim ndaxu tiis,  
 xol jeex, yaram jeex.  
<sup>11</sup> Naqar a ngi may rey,  
 tiis di wàññi samay fan,  
 sama doole ñiis ndax sama njubadi,  
 samay yax semm.  
<sup>12</sup> Noonoo noon a ma sewal,  
 dëkkandoo waxi noppi,  
 xame seexlu ma,  
 ku ma gis biti, di ma daw.  
<sup>13</sup> Kenn xalaatu ma, xanaa fàtte ma ni ku  
 dee,  
 ma mel ni ndab lu yàqu.  
<sup>14</sup> Damaa dëgg jëw yu bare,  
 lu raglu dar ma kepp.  
 Ñu ngi mànkoo, di ma fexeel,  
 di wut sama bakkan.

<sup>15</sup> Man nag Aji Sax ji, ci yaw laa dénku.  
 Ma ne: «Yaay sama Yàlla.»

<sup>16</sup> Yaa yor sama àpp.  
 Xettli maak ku ma noonoo  
 ak ku may sonal.

<sup>17</sup> Leeralal ma sa kanam, Sang bi,  
 walloo ma sa ngor.

<sup>18</sup> Éy Aji Sax ji, woo naa la wall,  
 yàlla buma rus.  
 Yal na ku bon rus,  
 ne xerem biir njaniiw.

<sup>19</sup> Yal nanga tēj gémminiū fen-kat  
 buy wax aji jub waxi reewande,  
 di réy-réylook a xeebaate.

<sup>20</sup> Yàlla yaa yaa ngéneel  
 loo dencal ku la ragal,  
 defal ko ku la làqoo,

doom aadama seede.  
<sup>21</sup> Yaa koy làq fa nga làqu,  
 fa pexey nit àggul.  
 Nga yiir ko, mu yiiru  
 ci ayu làmmiñ.

<sup>22</sup> Teddnga ñeel na Aji Sax ji!  
 Ndaw kéemtaan ci ngor li mu ma jiwe  
 biir dëkk bu ñu gaw.

<sup>23</sup> Man nag saalitoon naa ne:  
 «Yàlla dagg na ma, sànni!»  
 Ndeke ba ma lay woo,  
 dëgg nga samay dagaan.

<sup>24</sup> Képp kuy aji gëm, soppal Aji Sax ji.  
 Aji Sax jeey sàmm ku ko gëm,  
 di yool, ba wis kuy réy-réylu.  
<sup>25</sup> Képp ku yaakaar Aji Sax ji,  
 dëgërlul te amu fit.

## 32

### *Njéggal barke la*

<sup>1</sup> Dib taalif, ñeel Daawuda.

Ndokklee yaw mi ñu baal bàkkaar,  
 jéggal la ag moy.

<sup>2</sup> Ndokklee yaw mi Aji Sax ji toppul ag  
 tooñ,  
 te amoo xelum njublan it.

<sup>3</sup> Ba ma nee cell,  
 damaa ràgg,  
 dëkke naqar.

<sup>4</sup> Guddeek bëccëg  
 sa loxo diis gann ci man.  
 Sama doole ñiis  
 ni ndox mu jaas upp.

Selaw.

<sup>5</sup> Ma xamal la ne moy naa,  
 làqatuma la sama ñaawtéef.  
 Ma ne: «Naa àgge Aji Sax ji sama  
 bàkkaar.»  
 Yaw nga baal ma peyug tooñ.

Selaw.

<sup>6</sup> Nii, kuy aji gëm, na la ni ñaane,  
 ba ñaan jotee.  
 Mbënn mu baawaan, di wal sax,  
 du ko laal fenn.  
<sup>7</sup> Yaw laay làqoo,  
 nga di ma aar ciw ay,

may ma ñu ma yéew, di ko bége.

Selaw.

<sup>8</sup> Nga ne ma: «Dama laa xelal, xamal la fi ngay jaar, digal la, di la xool.

<sup>9</sup> Buleen mel ni fas mbaa berkelle mi amul ag dégg, laab ak tarka di ko téye, mu doora yem fi seen wet.»

<sup>10</sup> Ku bon barew tiis. Ku wóolu Aji Sax ji, mu yiire la ngoram.

<sup>11</sup> Yaw aji jub ji, bégal te bânneexoo Aji Sax ji.

Képp kuy def njub, sarxolleel!

### 33

#### *Nan woy Boroom bi nu sàkk*

<sup>1</sup> Yeen aji jub ñi, sarxolleleen ci Aji Sax ji; kuy jubal, màggal war na la.

<sup>2</sup> Xalamleen, sante Aji Sax ji, xalamal-leen ko xalamu fukki buum.

<sup>3</sup> Fental-leen ko woy, xalam, mu neex, sarxolle jib.

<sup>4</sup> Aji Sax jee jub kàddu.

Mooy jéfe lépp kóllère.

<sup>5</sup> Moo sopp dégg ak yoon.

Aji Sax ji, ngoram a fees àddina.

<sup>6</sup> Kàddug Aji Sax ji la asamaan sosoo, ci baatam la gàngoori asamaan yépp sàkkoo.

<sup>7</sup> Moo boole ndoxi géej, jal, yeb xóotey géej ciy mbànd.

<sup>8</sup> Yeen waa àddina sépp, ragal-leen Aji Sax ji;

yeen àddina wërngal këpp, wormaal-leen ko.

<sup>9</sup> Moo àddu, mu am; santaane, mu sotti.

<sup>10</sup> Aji Sax jee neenal li xeet yiy fexe, di gântal li mbooloo yiy mébét;

<sup>11</sup> Aji Sax ji nas, mu àntu ba fàww, mu mébét, mu sottil maasoo maas.

<sup>12</sup> Ndokklee yeen xeet wi Aji Sax ji di seen Yàlla,

yeen askan wi Aji Sax ji séddoo.

<sup>13</sup> Asamaan la Aji Sax jiy jéere,

di gis doom aadama yépp.

<sup>14</sup> Jal ba mu tooge

lay niire waa àddina sépp.

<sup>15</sup> Moo tabax seen xol, ñoom ñépp; lu ñu def, xam na ko.

<sup>16</sup> Mbooloo mu réy mayul Buur ndam, doole ju bare walluwul jàmbaar.

<sup>17</sup> Yaakaar aw fas nax sa bopp la, kàttanu fas dug wall.

<sup>18</sup> Ma ne, Aji Sax jee naa jàkk ku ko ragal tey wéeroo ngoram.

<sup>19</sup> Day jot bakkanam, di ko dundal cib xiif.

<sup>20</sup> Nu ngi séentu Aji Sax ji, moo nuy taxawu, di nu feg.

<sup>21</sup> Ci moom la sunu xol di sedde, turam wu sell lanu wóolu.

<sup>22</sup> Aji Sax ji, ngalla baaxe nu sa ngor, moom lanu yaakaar fi yaw.

### 34

#### *Aji Sax ji du tanqamlu aji jub*

<sup>1</sup> Ñeel Daawuda. Mooy ba muy wayadi-wayadilu ca kanam Abimeleg, ba Abimeleg dàq ko, mu dem\*.

<sup>2</sup> Naa màggal Aji Sax ji saa su ne, di ko sant fu ma tollu.

<sup>3</sup> Aji Sax ji laay sagoo, néew-ji-doole dégg, bég.

<sup>4</sup> Kañleen Aji Sax ji, ànd ceek man, nu bokk wormaal turam.

<sup>5</sup> Maa sàkku Aji Sax ji, mu nangul ma, tàggale maak lépp lu ma ragal.

<sup>6</sup> Ku yaakaar Aji Sax ji bég, leer nàññ, gâce du ko sëlëm.

<sup>7</sup> Néew-ji-doole woote, Aji Sax ji wuyu, musal ko fu mu jàqe.

<sup>8</sup> Ku ragal Aji Sax ji, malaakaam yiir la, di la wallu.

<sup>9</sup> Mosleen, xam ne Aji Sax jee baax, ndokklee yaw mi ko làqoo.

<sup>10</sup> Ragal-leen Aji Sax ji, yeen nitam ñu sell ñi;

ku ko ragal doo ñàkk dara.

<sup>11</sup> Gaynde man naa ndóol, xiif,

nit sàkku Aji Sax ji, ñàkkul lenn lu baax.

\* **34:1** 34.1 Seetal ci *1.Samiyel* 21.10-15. Akis buurub Gaat mooy Abimeleg ba tey.

12 Dikkal doom, déglu ma,  
ma jàngal la ragal Aji Sax ji.  
13 Ana ku dund neex,  
mu bëgga gudd fan, ba gis ngëneel?  
14 Na lammañam daw lu aay,  
dawi fen.  
15 Na dëddu lu bon tey def lu baax,  
sàkku jàmm, saxoo ko.

16 Ay gët la Aji Sax ji ne jàkk aji jub ji,  
te ay noppam la dékk wooteb wallam.  
17 Aji Sax jeey rëbb kuy jëfe mbon,  
ngir dagge ko kaw suuf, far turam.  
18 Ku jub yuuxu, Aji Sax ji dégg,  
fu mu jàqe, mu musal ko.  
19 Sa yaakaar tas, Aji Sax ji jege la,  
sa xol jeex, Aji Sax ji wallu la.  
20 Musiba bare naa dal ku jub,  
Aji Sax ji musal ko ci lépp,  
21 di ko sàmm,  
ba benn yaxam du damm.  
22 Musiba nag day rey ku bon,  
te ku bañ aji jub, yoon dab na la.  
23 Aji Sax jeey jot ab jaamam,  
képp ku ko làqoo, yoon du la dab.

## 35

### *Aji Sax ji, àtte maak noon*

1 Ñeel Daawuda.

Éy Aji Sax ji, digaaleel ak samay digaale,  
xeexal maak ñi may xeex.  
2 Fëkkal sa pakk ak sa kiiraay,  
taxawusi ma,  
3 xàcci sa xeej ak sa sémmiñ,  
dajeek ñi may dàq.  
Déey ma, ne ma: «Sag mucc, man a.»  
4 Ñiy wut sama bakkan, yal nañu rus ba  
torox;  
ñi may fexee lor, yal nañu leen wañni,  
sewal leen.  
5 Yal na leen malaakam Aji Sax ji bëmëx,  
nim ñax mu ngelaw wal.  
6 Yal na leen malaakam Aji Sax ji dàq,  
ñuy lëndëmtuy tarxiis.  
7 Defuma dara, ñu di ma fiir,  
defuma dara, ñu gas um yeer, di ma tëru.  
8 Yal nañu sànkoo mbetteel,  
keppoo seen fiir,  
sànkoo seenum yeer.

9 Su boobaa ma bége Aji Sax ji,  
bànnexoo wallam,  
10 di ko sante sama jëmm jépp,  
naan: «Éy Aji Sax ji, ana ku mel ni yaw,  
di xettli néew-ji-doole ci boroom doole,  
ak ku néewleek ku ñàkk ca ka leen di  
lekk?»

11 Nit ku bon a ngi may duural,  
di ma jiiñ lu ma yégul.  
12 Ma ji leen njekk, ñu fey ma njekkar,  
ndaw tiisu xol!  
13 Man de ba ñu woppee, maa ngi ñaawlu,  
di woor, toroxloo,  
sukk, ñaanal leen,  
14 tiisoo leen ni saab xarit mbaa doomu  
ndey,  
di ñaawlook a yoggoorlu ni ku ñàkk yaay.  
15 Ma daanu tey, ñu daje di ko bége,  
dajaloo fi sama kaw,  
di ma fexeel te yéguma,  
di ma yàpp, tëë ba.  
16 Tekkiwuñu dara, di ma ñaawal rekk  
te di ma mattu.  
17 Éy Aji Sax ji, loo deeti seetaan?  
Musal ma ci seenum pàdd,  
wallu ma ci yii gaynde,  
sàmmal ma sama benn bakkan bii!  
18 Maa lay sante fa ndaje yaatoo,  
màggal la digg mbooloo mu yaa.

19 Noon bu ma deful dara, yàlla bumu gis  
lu mu ma damoo.  
Ku ma bañ ci dara, yàlla bumu ma ree.  
20 Waxuñu jàmm,  
xanaa di ràbbal niti jàmm ci réew mi  
ay kàdduy tuuma.  
21 Ñu ngi ma ña ñàpp, di ma tuumaal,  
naan: «Yaw a, yaw a, noo la gis!»  
22 Éy Aji Sax ji, yaa ci gis, bul selanlu,  
éy Boroom bi, bul ma sore.  
23 Jógal, sàmmal ma sama àq.  
Sama Yàlla, Boroom bi, àtte ma yoon.  
24 Aji Sax ji sama Yàlla, àtte ma sa dégg,  
ñu bañ maa ree!  
25 Yàlla buñu ne: «Ñaw! Lii rekk lanu  
bëggoon.»  
Yàlla buñu ne: «Sàkkal nanu ko pexe.»  
26 Ku bége sama njàqare,  
yal nanga rus, ba torox.

Kuy réy-réylu ci sama kaw,  
yal nanga am gacce, ne yàcc.  
27 Ku bége sama der bu set,  
yal nanga bannexu, di sarxolle,  
foo tollu di biral naan:  
«Aji Sax jee magg!  
moom miy bége jàmmi jaamam.»  
28 Man it ma tudd sa njekk,  
di la dëkke manggal!

### 36

#### *Nit ñaaw, Aji Sax ji gore*

1 Mu jëm ci njiital jàngkat yi, ñeel  
Daawuda jaamub Aji Sax ji.

2 Kàddug tooñ ga ku bon wax mu ngi  
sama xel mi.

Mu ne: «Ana lu may ragal ci Yàlla?»

3 Day gis boppam, naagu,  
ba du gis sikkam, sib ko.

4 Ay waxam coxor aki fen,  
jëfeetul lu rafet ak lu baax.

5 Day mébét lu ñaaw cib lalam,  
taxawe yoon wu dëddu mbaax,  
te du bañ lu bon.

6 Céy Aji Sax ji, gore nga ba kaw asamaan,  
dëgggu ba kaw-li-kaw.

7 Sa njekk a tiim tund yu mag yi,  
sa àtte ne xéew ni xóotey géej.  
Céy Aji Sax ji, nit ak mala, nga boole  
sàmm!

8 Céy Yàlla, yaa wéet ngor,  
doom aadama yiirroo sa ker, yiiru;

9 yafloo sa njël lu duun,  
sa xéewal wal, nga nàndale ko.

10 Ci yaw la dund di balle,  
te sag leer lanuy leerloo.

11 Jotaleel sa ngor ku la xam,  
jotale sa njekk kuy nas njub.

12 Yàlla bu ma ku reew teg tànk;  
loxo ku bon, yàlla bumu ma taxa daw.

13 Defkati mbon yaa ngii, daanu,  
ne lareet, tëlee jóg.

### 37

#### *Bu sa xol jóg*

1 Ñeel Daawuda.

Bu sa xol jóg ci ku bon,  
bul ñee kuy def njombe.

2 Léegi mu wow nim ñax,  
lax ni gancax.

3 Dénkul ci Aji Sax ji, di def lu baax,  
ba des ci réew meek jàmm.

4 Deel bannexoo Aji Sax ji,  
mu may la say nammeel.

5 Jébbalul ci Aji Sax ji,  
dénku ci moom, mooy sottal.

6 Day setal sab der ni jant bu fenk;  
sab àtte ne ràññ ni njolloor.

7 Neel tekk, xaar Aji Sax ji,  
yaakaar ko.

Bu sa xol jóg ci kuy baaxle,  
tey lal ay peXe.

8 Baal mer, dëddu xadar.  
Xol bu jóg, loraangey neen.

9 Ku bon, ñu dagg, sànni;  
ku yaakaar Aji Sax ji, jagoo réew mi.

10 Nes tuut, ku bon ne mes,  
nga seet, seet, mu réer.

11 Waaye néew-dooleey jagoo réew mi;  
jàmm ne ñoyy, ñu bége.

12 Ku bon fexeel ku jub,  
di ko màttu,

13 Buur Yàlla di ko ree,  
xam ne bésam a ngi ñëw.

14 Ku bon bocci saamar,  
tàwwig fitt,  
nara rey ku ñàkk, néewle,  
nara bóom kuy jubal;

15 far jam boppam saamaru xol,  
fittam damm.

16 Aji jub, as tuutam  
moo gën koomu ku bon.

17 Ku bon kat, sa doole dëddu la;  
ku jub, Aji Sax ji wallu la.

18 Ku maandu, Aji Sax ji yég la,  
sab cér sax.

19 Bu mettee doo rus,  
te bésuub xiif dangay regg.

20 Ku bon sàнку; noonub Aji Sax ji, taaru tool bu naat la, bu tàkke, jeex tàkk.

21 Ku bon leb, du fey; ku jub yéwén, di joxe.

22 Aji Sax ji barkeel la, nga jagoo réew mi moos; mu alag la, nga dog.

23 Aji Sax jeey sopp saw yoon, jiite say jéego.

24 Soo tërèfee it, doo daanu. Aji Sax jee lay walloo loxoom.

25 Ba may ndaw, ba tey may mag, gisuma ku jub ñàkk ndimbal, mbaa askanam di dunde yalwaan.

26 Day saxoo tabe, di leble, askanam barkeel.

27 Dëddul mbon, di jëfe mbaax, ba dëkke réew mi fàww.

28 Aji Sax ji kat daa sopp yoon, te du wacc jaamam bu gore.

Day feyu ba fàww, askanu ku bon dog.

29 Aji jub ay jagoo réew mi, dëkke ko ba fàww.

30 Kàddug aji jub day xelu, wax ja jub;

31 yoonu Yàllaam a nga ca xol ba, du dox ba tërèf.

32 Ku bon a ngi yeeru ku jub, di ko wuta bóom.

33 Waaye Aji Sax ji du ko bàyyeek moom, te deesu ko daan cib layoo.

34 Yaakaaral Aji Sax ji, sàmm yoonam, mu teral la, nga jagoo réew mi, ku bon sàнку, ngay gis.

35 Damaa gis ku bon di note, te sèq ni garab gu naat fa mu fekk baax,

36 ma jaareeti fa, ndeke wuute na, ma seet ko, gisuma ko.

37 Bàyyil xel ku maandu, xool ku jub; muj, fa nitu jàmm.

38 Moykat yeey sàнкуoondoo, ku bon amul muj.

39 Aji Sax jeey musal ku jub, di ko aar bésub njàqare.

40 Aji Sax jee koy taxawu, wallu ko, wallu ko ci ku bon, musal ko, ndax li mu ko làqoo.

## 38

### *Maa wopp, tuub, di jooy*

1 Muy kàddug Sabóor guy fàttlee, ñeel Daawuda.

2 Éy Aji Sax ji, bul mer, di ma rëbb; bul xadaru, di ma mbugal.

3 Aji Sax ji, fitt nga maa fitt, dóor nga ma.

4 Danga maa mere, ma wéradi; maa bàkkaar, ba jagadi.

5 Samay ñaawtéef mëdd ma, diisa diis, ba àttanuma ko.

6 Maa def ug ndof, ba am dana yu bédd, ba xasaw.

7 Maa ngi sègg, ne yàcc, ne yasar, di wéye tiis,

8 yaram tàng, di bax, ma wéradi, ne làcc.

9 Sama yaram dee goyy, ma ne lasar, jàq, di binni.

10 Boroom bi, yaa ngi ne jàkk ci samay nammeel, samay onk umpu la.

11 Sama fit a ngi tëf-tëfi, doole ñiis, gèt giim.

12 Xarit ak dëkkandoo di ma daw, mbokk dànd ma.

13 Ñi may wuta rey a ngi may fiir, di ma jéema lor, di ma waxal musiba, yendu maa lalal pexe.

14 Man, ma mel nib tëx, dégguma, mel ni luu, àdduwma,

15 di saf ku dul dégg, bay layoo.

16 Aji Sax ji, yaw laa yaakaar; Boroom bi, sama Yàlla, yaa may nangul.

17 Ma ne, ngalla buñu ma ree, di damoo samab jéll.

18 Maa ngii di waaja daanu,

dëkke metit.

<sup>19</sup> Ma ne, aylayéwén def naa lu ñaaw, sama bàkkaar tiital na ma.

<sup>20</sup> Noon yaa ngi ne jonn ak seen doole, bare na ñu ma bañ ci neen.

<sup>21</sup> Ma ji leen njekk, ñu fey ma njekkar; may sàkku lu baax, ñu di ma sikk.

<sup>22</sup> Éy Aji Sax ji sama Yàlla, bu ma wacc, bu ma sore.

<sup>23</sup> Ngalla gaawe ma; Boroom bi, yaa may musal.

### 39

#### *Dund yàggul*

<sup>1</sup> Mu jëm ci Yedutun, njiital jàngkat yi, di kàddug Sabóor, ñeel Daawuda.

<sup>2</sup> Dama noon: «Damay moyu ba duma moye làmmiñ.»

Li feek ku bon di teew, may ñalaab sama gémmiñ.

<sup>3</sup> Dama noon cell, ne patt, noppi, ba mu ëpp; sama njàqare yokku,

<sup>4</sup> sama xol diis, xel di xelaat, xol diis gann; ma mujj àddu,

<sup>5</sup> ne: «Éy Aji Sax ji, xamal ma sama muj ak sama àppi fan, ma xam ni sama dund gatte.

<sup>6</sup> Yaatuwaayu loxo nga ma àppal ciy fan, sama giiru dund du dara fi yaw. Képp ku taxaw di cóolóolu neen.

Selaw.

<sup>7</sup> Nit du lu moy takkndeer buy dem, cóolóolu neen lay kër-këri. Nit a ngi dajale, xamul kuy for.

<sup>8</sup> «Éy Boroom bi, lu may xaarati? Sama yaakaar yaw a.

<sup>9</sup> Musal ma ci sama mbugali tooñoó tooñ, bu ma bàyyi, dof di ma reetaan!

<sup>10</sup> Noppi naa, dootuma wax, yaw yaa dogal lii.

<sup>11</sup> Waaye ngalla teggil sab yar, sa diisaayu loxoo ngi may jekkli.

<sup>12</sup> Yaay mbugal ku bàkkaar, yar ko, ronq ni max la mu gëna fonk.

Nitoo nit, cóolóolu neen.

Selaw.

<sup>13</sup> Éy Aji Sax ji, déglul, ma ñaan la,

teewlul, ma woo la wall; bul tanqamlu sama yuux, doxandéem donq laa fi yaw, di gan ni maam yépp.

<sup>14</sup> Ngalla xiddi ma, ma muuñ, bala maa dëddu, réer.»

### 40

#### *Déggal Aji Sax jee am solo*

<sup>1</sup> Mu jëm ci njiital jàngkat yi, ñeel Daawuda, di kàddug Sabóor.

<sup>2</sup> May xaara xaar Aji Sax ji, mu dégg may woote, geesu ma, <sup>3</sup> génnee ma ca kàmbug sànkute, sippee ma ca xóotey ban ba,

céppe ma ciw doj, samp ma, ma dëgër.

<sup>4</sup> Moo ma may, ma fent, woy wu ma woye sunu Yàlla. Ñu baree seede, di wormaal ak a dénku ci Aji Sax ji.

<sup>5</sup> Ndokklee, yaw mi dénku ci Aji Sax ji, te sàkkuwoo ku bew ak kuy topp ay fen.

<sup>6</sup> Yaw Aji Sax ji sama Yàlla, bare nga loo def,

amuloo moroom!

Bare nga kéemaan aki mébét yoo nu sottalal,

ma bégga xamle lépp,

te mu bare ba wees ab lim.

<sup>7</sup> Saraxi gatt mbaa pepp, taamuwuloo ko, ay nopp nga ma bënnal, saraxu rendi-dóomal, ak saraxu póotum bàkkaar,

sàkkuwuloo ko.

<sup>8</sup> Ma ne: «Maa dikk nii, téereb yoon wi indi na li ñu bind ci man.

<sup>9</sup> Sama Yàlla, maa soppa def sa coobare, ci sama biir xol la sa ndigali yoon nekk.»

<sup>10</sup> Siiwal naa sag njekk ca ndaje mu mag ma.

Dama ne, Aji Sax ji duma noppi, xam nga ko.

<sup>11</sup> Làquma sag njekk, ne cell ak moom.

Yaa wóor, di walloo, siiwal naa ko.

Làquma ndaje mu mag ma sa ngor ak sa worma.

12 Éy Aji Sax ji, bu ma xañ sa yërmande.  
Sa ngor ak sa worma,  
yal na ma feg ba fàww.

13 Ay musibaa ma tanc,  
ne gàññ, ba wees ab lim.  
Samay ñaawtéef a ma dab, ba gisatuma,  
baree bare, ba èpp sama kawari bopp;  
sama xol jeex tàkk.

14 Éy Aji Sax ji, yal na la neex, nga wallu  
ma!

Éy Aji Sax ji, gaawe ma!

15 Képp kuy wuta fëkk sama bakkan,  
yal na rus, torox ne tott.  
Kuy bége sama loraange,  
yal nañu ko дума, mu ne yàcc.

16 Ku may ñaawal,  
yal nañu ko torxal, mu jommi.

17 Képp ku lay sàkku,  
yal na bég, di la bànnexoo.

Képp ku safoo sag wall,  
yal na jàppoo: «Aji Sax ji màgg na!»

18 Man, néew naa doole, ñàkk naa,  
waaye yaw Aji Sax ji, danga maa yég.  
Yaw yaa may wallu, xettli ma;  
sama Yàlla, bu ma yeexe.

## 41

### *Jarag bu ñu tonjal a ngi ñaan*

1 Mu jëm ci njiital jàngkat yi, di kàddug  
Sabóor, ñeel Daawuda.

2 Ndokklee yaw mi yég néew-ji-doole.

Aji Sax jee lay xettli, bésab njàqare.

3 Aji Sax jee lay aar, di sàmm sa bakkan,  
nga jagoo barke ci réew mi,  
te du la bàyyi noon def la lu ko neex.

4 Aji Sax jee lay dooleel soo woppee,  
di soppi bu baax sa tëraay.

5 Dama ne: «Aji Sax ji, tooñ naa la;  
baaxe ma, faj ma.»

6 Noon yaa ngi may yéene lu bon,  
naan: «Xanaa kii du dee, ba ñu fàtte ko?»

7 Ku dikk, di ma seet, di jinigal  
tey fenti sos ci xolam,  
bu génnee, tasaare ko.

8 Bañ yépp a ngi may déeyoo,  
di ma fexeel lu bon,

9 naan: «Musiba dal na ko, du jógati!»

10 Sama am-di-jàmm bu ma wóolu sax  
jógal na ma,  
te daan lekk samaw ñam.

11 Waaye ngalla Aji Sax ji, baaxe ma,  
yékkati ma, ma fey leen.

12 Su noon damuwul ci sama kaw,  
ma doora xam ne bége nga ma.

13 Man, damaa maandu, nga taxawu ma,  
dëj ma fi sa kanam, ba fàww.

14 Cant ñeel na Aji Sax ji, Yàllay Israyil.  
Moo masa yelloo cant, ba fàww.  
Amiin, Amiin.

## 42

### *Maa namm Yàlla*

1 Mu jëm ci njiital jàngkat yi, di taalif bu  
ñeel askanu Kore wu góor.

2 Yaw Yàlla, ni kèwél di sàkkoo walum  
ndox,

maa la koy sàkkoo xol.

3 Maa mar Yàlla,  
Yàlla jiy dund!

Kañ laay teewi fa kanam Yàlla?

4 Rongoon laay dunde  
guddeek bëccëg,

noon yi di ma dëkke naa:

«Ana sa Yàlla ji?»

5 Lii laay fàttliku, sama xol jeex:  
dama daan jàll, jiite mbooloo ma,  
jëm kër Yàlla ga, di sarxolleek a sant,  
ñu booloo di màggal.

6 Moo man, lu may yoggaaral nii?  
Lu may jàq?

Naa yaakaar Yàlla,  
ba dellu sante sama Yàlla wallam.

7 Maa ngi ne yogg,  
ba di la fàttlikoo fa réewum Yurda  
ak tundi Ermon ak Misar.

8 Sa wal ya sotti, xóote awu moroom ma;  
say wal ak say gannax, lépp a jaare sama  
kaw.

9 Bëccëg Aji Sax ji baaxe ma ngoram,  
guddi ma fanaane koo woy,  
di ñaan Yàlla mi may dundal.

10 Naa wax Yàlla ji ma sës, ne ko:  
«Lu tax nga fàtte ma,  
noon di ma fitnaal,  
may wéye tiis?»

11 Noon yaa ngi may ñaawal,  
di ma yendoo naa:  
«Ana sa Yàlla ji?»  
Ma ne yàcc, ne yasar.  
12 Moo man, lu may yoggaaral nii?  
Lu may jàq?  
Naa yaakaar Yàlla,  
ba dellu sante sama Yàlla wallam.

### 43

#### *Éy Yàlla, àtte ma*

1 Éy Yàlla, àtte ma,  
layool maak xeet wu gorewul,  
xettli maak ku njoblanj te dëng.  
2 Yaw Yàlla kat yaay sama rawtu.  
Lu tax nga wacc ma,  
may wéye tiis,  
ci noteelu noon?  
3 Ngalla yónneel sag leer ak sa dëgg,  
yal na ma yooyu jiite,  
yóbbu ma sa tund wu sell,  
sa dëkkuwaay ba.  
4 Kon Yàlla, naa àgg sa sarxalukaay;  
yaw Yàlla, yaay sama mbégte, di sama  
bànnex.  
Yaw Yàlla, sama Yàlla,  
naa la mággaale xalam.  
5 Moo man, lu may xàddi, ne yogg?  
Lu may jàq nii?  
Tee maa yaakaar Yàlla, ba santati ko,  
moom sama Yàlla mi may wallu?

### 44

#### *Xeet waa ngi jooy*

1 Mu jëm ci njiital jàngkat yi, di taalif bu  
ñeel askanu Kore wu góor.  
2 Éy Yàlla, noo déggal sunu bopp,  
sunuy maam a nu wax  
jëf ja nga jëf, ca seeni jant,  
bu yàgga yàgg.  
3 Yaw ci sa bopp yaa dàq xeet yi,  
jëmbat fa maam ya;  
yaa mbugal xeet yi,  
ñoom, nga yiwi leen.  
4 Du seen saamar lañu nangoo réew mi  
moos,  
seen dooley bopp it mayu leen ndam.  
Yaa ko defe kàttan ak doole,  
geesoo leen sa leeru kanam,

ngir sa cofeel.

5 Yaay kiy sama buur, di sama Yàlla,  
mayal askanu Yanqóoba ay ndam.  
6 Yaw lanuy dàqe bañ yi,  
sa tur lanuy dëggaatee ñi nu song.  
7 Du fitt laa wóolu,  
du saamar a may may ndam.  
8 Yaa nuy musal ci bañ yi,  
yaay gacceel noon ñi.  
9 Yàlla lanuy damoo bésoo bés,  
di mággal turam ba fàww.

Selaw.

10 Waaye danga noo wacc,  
torxal nu,  
ba àndulook sunu mbooloooy xare.  
11 Waññi nga nu, nu won noon yi gan-  
naaw,  
ñu bañ nu, ba futti nu.  
12 Ni gätt yu ñuy yàpp, ni nga nu joxee,  
tasaare nu ci biir xeet yi.  
13 Jaay nga sa mbooloo ci dara,  
te jariñu la tus.  
14 Tax nga sunuy dëkk di nu ree,  
ñi nu séq di nu kókkaleek a ñaawal.  
15 Tax nga xeet yi di nu léebou,  
jaambur yaa ngi nuy wëcc bopp!  
16 Damaa dëkke gacce,  
sëlmoo kersa  
17 ndax kókkali yeek xastey nit  
ñi ma bañ, di feyoontee man.

18 Lii lépp dal na nu,  
te fàttewunu la, fecciwunu la kóllère.  
19 Dëdduwunu la,  
wàccunu saw yoon,  
20 teewul nga not nu, wacce nu xaj ya,  
këpp nu lëndëmu ndee.  
21 Su nu la fàtte woon yaw, sunu Yàlla,  
ba tàllal tuuri doxandéem yi loxo,  
22 du la ump, yaw Yàlla,  
mi xam kumpay xol.  
23 Yaa tax ñu yendu noo bóom,  
dees noo jàppe ni xar yu ñuy tër.

24 Éy Aji Sax ji, jógal! Looy nelaw?  
Yewwul, bu nu wacc ba fàww.  
25 Loo nu làqe saw yiw,  
di fàtte sunu njàqareek sunu coono?  
26 Nu ngi ne ñàyy ci pënd bi,



di watat koll fi suuf.  
<sup>27</sup> Wallusi nu, jot nu  
 ngir sa ngor.

## 45

### *Buur a ngi séetal*

<sup>1</sup> Mu jëm ci njiital jàngkat yi, dëppook  
 galan bu ñuy wax Tóor-tóor, ñeel askanu  
 Kore wu góor, dib taalif, te di woyu  
 mbëggeel.

<sup>2</sup> Woy wu neex a fees sama xol,  
 may taalifal Buur,  
 sama làmmiñ ni xalimag bindkatu  
 ndaanaan.

<sup>3</sup> Yaa gëna góorayiwe ci àddina,  
 sa kàddu diw yiw,  
 ndax Yàllaa la barkeel ba fàww!

<sup>4</sup> Jàmbaaroo, takkal sa saamar,  
 te yànj, am daraja;

<sup>5</sup> ànd ak daraja, dawal ba am ndam,  
 di dawal dëgg ak yërmande ji war,  
 ba mana def ay jaloore.

<sup>6</sup> Yaw Buur, say fitt a ñaw,  
 di jam say noon ci xol,  
 ay xeet daanu, nga tiim.

<sup>7</sup> Yaw Yàlla, sab jal a sax dàkk ba fàww.  
 Njub nga ñanke sa nguur gi,

<sup>8</sup> di sopp dëgg, bañ lu bon,  
 ba Yàlla, sa Boroom diwe la diwu mbég,  
 nga tiim say moroom:

<sup>9</sup> sa yére yépp di gilli ndàbb, alowes akum  
 kanel,

ñu di la bégale xalam,  
 ca sa biir kër yu yànj.

<sup>10</sup> Ay doomi buur a ngi ci jigéen ñi nga  
 teral,

sab lingeer féete la ndijoor,  
 takkoo gëneelu wurus.

<sup>11</sup> Janq doom, gisal, déglul te teewlu ma,  
 fátteel say bokk, fátte sa kër baay,

<sup>12</sup> Buur xemmeme la sab taar;  
 mooy sab sang, wormaal ko.

<sup>13</sup> Waa Tir a lay yótsiy may,  
 ay boroom alal di wut lu la neex.

<sup>14</sup> Séetu Buur duggsi na, ne ràññ,  
 sol mbubb mu wurus way tàkk.

<sup>15</sup> Ñu yóbbul ko Buur, mu ne boyy,

janq ja ànd ak moom, diy toppam, ñu  
 indil leen Buur,

<sup>16</sup> ñu duggsi kër Buur,  
 ci biir mbégteek bannex.

<sup>17</sup> Yal na la sa doom yu góor wuutu ci seen  
 jalu maam,

nga def leeni kàngam ci réew mi mépp.

<sup>18</sup> Maa lay joobe ba sa tur du fey muk,  
 xeet yi saxoo laa sant ba fàww.

## 46

### *Aji Sax jee ànd ak man*

<sup>1</sup> Mu jëm ci njiital jàngkat yi, di jàngin  
 wu ñeel askanu Kore wu góor, dëppook  
 galan bu ñuy wax Baatu jigéen.

<sup>2</sup> Sunu Yàllaa nuy rawale, di nu dooleel,  
 di nu wallu fu nu jaaxlee,

<sup>3</sup> ba dunu tiit suuf su yëngu sax,  
 ba tund yiy tàbbi biir géej,

<sup>4</sup> mbaa gannax yuy riir, di fuur  
 ak a fuddu bay gësëm tund yi.

Selaw.

<sup>5</sup> Ag dex a ngi defi wal, di bannexal  
 dëkku Yàlla,

sellngay dëkkuwaayi Aji Kawe ji.

<sup>6</sup> Yàllaa ngi ci biir dëkk bi, du raf;  
 Yàllaa koy dimbali ba jant fenkee.

<sup>7</sup> Ay giir a riir, ay réew yëngu;  
 mu àddu, suuf seey!

<sup>8</sup> Aji Sax ji Boroom gàngoor yee ànd ak  
 nun,

Yàllay Yanqóoba jee nuy rawale.

Selaw.

<sup>9</sup> Dikkleen gis jaloorey Aji Sax ji,  
 ak yàqute gi mu dogal ci kaw suuf.

<sup>10</sup> Mu ngi fey xare ci àddina sépp,  
 dog fitt, damm xeej,

lakk pakk.

<sup>11</sup> Mu ne: «Dal-leen te xam ne maay Yàlla,  
 màgg ci biir xeet yi, màgg fi kaw suuf.»

<sup>12</sup> Aji Sax ji Boroom gàngoor yee ànd ak  
 nun,

Yàllay Yanqóoba jii a nuy rawale.

Selaw.

## 47

*Yàllaay buur*

1 Mu jëm ci njiital jàngkat yi, di kàddug Sabóor, ñeel askanu Kore wu góor.

2 Na xeetoo xeet tàccu, xaacu, sarxolleel Yàlla!

3 Aji Sax ji, Aji Kawe jee jara ragal, mooy buur bu mag bi tiim àddina sépp.

4 Moo nu nangulal xeet yi, nu teg tànk gàngoor yi.

5 Moo nu tànnal céru suuf, muy sagu askanu Yanqóoba wii mu sopp.

6 Yàllaa yéeg, kàddu riir. Aji Sax jee yéeg, bufta jolli.

7 Woyleen Yàlla, woyleen, woyleen Yàlla sunu buur, woyleen.

8 Yàllaay buuru àddina sépp; taalifleen, woy ko.

9 Yàllaa di buuru xeet yi, Yàllaa tooge jalam bu sell.

10 Kàngami xeet yeey daje, ànd ak ñoñi Yàllay Ibraayma; Yàllaa moom buur yi yiir àddina, te moo kawee kawee.

## 48

*Aji Sax ji aar na Siyon*

1 Muy woyu Sabóor, ñeel askanu Kore wu góor.

2 Aji Sax jee màgg, jara màggala màggal ca sunu biir dëkku Yàlla, kaw tundam wu sell.

3 Jekk taxawaayee tundu Siyon, catu bëj-gànnaar, dëkku buur bu mag bi, di mbégtem àddina sépp.

4 Yàllaa wone kaaraangeem ca biir tatay dëkk ba.

5 Buur yaa ngoog daje, àndandoo.

6 Nun noo gis, jommi, tiit, fëx,

7 ne fay pat-pati, jàq ni kuy matu.

8 Ngelawal penku, moom ngay tase gaal gu mag.

9 La nu déggoon de lanu gis ca dëkkub Aji Sax ji Boroom gàngoor yi, sunu dëkku Yàlla ba. Yàllaa koy dégéral ba fàww.

Selaw.

10 Céy Yàlla, nu ngi sa biir kër, di xalaat sa ngor.

11 Céy Yàlla, sa tur ay sa woy ba ca cati àddina. Njekk la sa loxo fees.

12 Yal na waa tundu Siyon bég, waa Yuda bannexoo say àtte.

13 Doxleen biir Siyon, wër ko, waññleen ay soorooram,

14 nemmikuy tataam, doxantoo keri buur,

15 ne leen kii ay Yàlla, sunu Yàlla, tey ak èllég.

Moo nuy jiite ba saa taxaw.

## 49

*Alal day naxe*

1 Mu jëm ci njiital jàngkat yi, di kàddug Sabóor, ñeel askanu Kore wu góor.

2 Yeen, xeetoo xeet, dégluleen; yeen, waa àddina yépp, teewluleen,

3 ngay ku tuut di ku mag, nga bareleek nga néewle.

4 Li may wax xel la, di xalaat yu déggu.

5 Damay teewlu kàddu yu xelu, xalamal la sama tekkiteb cax.

6 Ana lu may tiit bés yu metti, yu ma njoblan yéewe seeni ñaawtéef,

7 di ñu wóolu seen am-am, di kaño alal ju bare?

8 Ana ku mana jota jot sa bakkanu mo-room,

mbaa mu di ko feyal Yàlla njot ga?

9 Njotug bakkan jafe na, bu ci jém dara.

10 Ana kuy dund ba fàww, ba doo gis bàmmeel?

11 Xanaa gis ngeen ne xelu, dee; dof, dee; naataxuuna it faatu rekk, wacce keneen alalam.

12 Sa bàmmeele di sa kër, ba fàww,  
di sa dëkkuwaay bu sax dàkk,  
boo tudde woon sa bopp ay suuf sax.  
13 Nit ak darajaam fanaanul,  
mook aw rab a yem, sànkuru rekk.

14 Nii la ku wóolu boppam di mujje,  
mook ku ko topp, di safooy waxam.

15 Nara dee rekk niy xar,  
ndee wommat, yóbbu,  
njub fenk nib jant, ku jub moom leen,  
njaniiw mëdd seen jëmm,  
fu sore kërüg daraja.

16 Waaye Yàllaa may musal ci dooley  
njaniiw,  
jot sama bakkan, ba jël ma.

17 Buleen yéemu ci ku barele,  
teraangay kërám di yokku.

18 Du dee ba yóbbaaale dara,  
teraangaam du ko topp biir bàmmeele.

19 Na bége bannëexu bakkanam,  
ñu di ko kañe koomam,

20 ba tey, day dee, fekkiy maamam,  
ña dootu gis ug leer ba fàww.

21 Nit ak darajaam fanaanul;  
mook aw rab a yem, sànkuru rekk.

## 50

### *Aji Sax ji xol lay gërëm*

1 Muy kàddug Sabóor, giiroo ci Asaf.

Yàlla, Aji Sax ji Yàlla àddu na,  
di woo àddina, penku ba sowu.

2 Ca Siyoŋ, dëkk ba ca taar ba  
la Yàlla feeñe ni leer gu jolli.

3 Sunu Yàllaa ngi ñëw te du ne cell,  
sawaraa ko jiitu, di xoyome,  
ngélén lu mag wër ko.

4 Ma ngay woo seede asamaan ak suuf,  
ngir àtte ñoñam.

5 Mu ne: «Dajaleel ma sama wóllère  
ñiy sarxal, di ko fase sama kóllèreek  
ñoom.»

6 Asamaan a ngi biral njekkam,  
ngir Yàllaay àtte.

Selaw.

7 «Yeen sama ñoñ, dégluleen, ma wax  
leen;

yeen waa Israyil, ma sikk leen.  
Maa di Yàlla, seen Yàlla.

8 Du seeni sarax laa leen di sikke,  
mbaa seen saraxi rendi-dóomal yi sax fi  
sama kanam.

9 Soxlawuma yèkku yar  
ak sikketu gétt.

10 Maay boroom raboo rabu àll,  
ak junniy nag yuy fore tund ya.

11 Xam naa njanaawi tund yi,  
luy ndundatub tool maa ko moom.

12 Su ma xiifoon, дума leen ko wax,  
maa moom àddinaak li ci biiram.

13 Damay lekk yàppu nag  
ak a naan deretu sikket a?

14 Deel jaajëfal Yàlla, sarxale ko,  
di fey Aji Kawe ji loo dige,

15 di ma woo bésub njàqare,  
ma wallu la, nga màggal ma.»

16 Ñu bon ñi Yàlla ne leen:  
«Lu ngeen di tari sama dogali yoon,  
di waxe sama kóllère?»

17 Yeena ngii, bañ sama yar,  
xalab samay kàddu.

18 Fu ngeen gis ub sàcc, neexook moom,  
ab njaalookat, ngeen lëngool.

19 Dangeena afal seen gëmmiñ ci mbon,  
seen lãmmiñ taqoo fen,

20 ngeen di tooge seen mbokk,  
di yàq deru doomu ndey.

21 Lii yeena ko def! Damay noppi,  
ngeen defe ne damaa mel ni yeen?  
Dama leen di sikk, tuumaal leen, ngeen  
gis!

22 «Yeen fàttekati Yàlla yi, déggleen lii,  
bala maa fàdd te kenn du wallu.

23 Ki may sarxale jaajëf moo ma teral;  
ku topp yoon, ma won ko wallu Yàlla.»

## 51

### *Yàlla, yërëm ma*

1 Mu jëm ci njiitu jàngkat yi, di kàddug  
Sabóor, ñeel Daawuda. 2 Mooy ba ko  
Yonent Yàlla Natan seetsee, gannaaw ba  
Daawuda dëkkoo ndaw sa ñuy wax Bat-  
seba\*.

\* 51:2 51.2 Seetal ci 2.Samiyel 11—12.25.

<sup>3</sup> Éy Yàlla, ni nga goree, baaxe ma ni,  
faral samag tooñ ngir sa yërmande ju yaa.

<sup>4</sup> Fóotal maa fóotal sama ñaawtéef,  
raxasal ma sama moy.

<sup>5</sup> Xam naa ne maa tooñ,  
sama moy a ngi janook man saa su ne.

<sup>6</sup> Yaw laa moy, yaw donj.

Li nga ñaawlu laa def.

Kon boo waxee, yaa yey;  
te soo àttee, wàcc nga.

<sup>7</sup> Ñaawtéef daal laa judduwaale,  
te sama ndey èmbaale ma bàkkaar.

<sup>8</sup> Dëgg daal nga namm, dëgg reenu xol,  
kon déey ma xel mu rafet.

<sup>9</sup> Wis ma ndox, ma sell;  
sang ma, ma set wecc.

<sup>10</sup> Yal nanga ma dégtal mbég ak bânneex,  
ma bégati, gannaaw ba nga ma damma-  
tee.

<sup>11</sup> Bul xool samay moy,  
faral sama ñaawtéef yépp.

<sup>12</sup> Éy Yàlla, sàkkal ma xol bu sell,  
yeesalal ma pastéefu xol.

<sup>13</sup> Bu ma xalab,  
bu ma xañ sa noo gu sell.

<sup>14</sup> May ma, ma bégeeti sag wall,  
te dundale ma xol bu tàlli,

<sup>15</sup> ma xamal tooñkat sa war,  
ba moykat dellu ci yaw.

<sup>16</sup> Céy Yàlla, yaw Yàlla mi may musal,  
baal ma deret ji ma tuur,  
ma siiwal sa njekk.

<sup>17</sup> Boroom bi, may ma, ma wax,  
ma delloo la njukkal.

<sup>18</sup> Sàkkuwloo sarax, nde kon ma indi;  
te soppuloo saraxu rendi-dóomal.

<sup>19</sup> Saraxi Yàlla, xol bu tuub la,  
yaw Yàlla, xol bu tuub ba moka, doo  
gàntal boroom.

<sup>20</sup> Ngalla baaxeel Siyon,  
yal nanga tabax tatay Yerusalem.

<sup>21</sup> Su boobaa nga nangu sarax yi war,  
di saraxu rendi-dóomal.  
Su boobaa ñu rendi ay yëkk ca sa sarx-  
alukaay.

## 52

### *Yàllaa man boroom doole*

<sup>1</sup> Mu jëm ci njiital jàngkat yi, di taalif  
bu ñeel Daawuda. <sup>2</sup> Mooy ba Doweg,  
Edomeen ba, demee ca Sóol, ne ko  
Daawuda dem na kër Ayimeleg\*.

<sup>3</sup> Moo jàmbaar ji, looy damoo jëfi coxor?  
Yàlla, ngoram, bés bu nekk la.

<sup>4</sup> Ak sa làmmiñ wi ngay sose loraange,  
mel ni saatu su ñu xacc,  
rambaaj bi!

<sup>5</sup> Lu bon a la gënal lu baax,  
fen a la gënal wax dëgg.

Selaw.

<sup>6</sup> Yaa bëgg jépp wax juy yàq,  
waabajiba bi!

<sup>7</sup> Yàlla da lay sànk ba fàww,  
fëkke la sab xayma, yóbbu,  
déjjatee la réewum aji dund.

Selaw.

<sup>8</sup> Aji jub gis ko, yéemu,  
di la ree, naa:

<sup>9</sup> «Xool-leen jàmbaar ji làqoowul Yàlla,  
xanaa di yaakaar alalam ju bare,  
di yokkoo loraange.»

<sup>10</sup> Man, ma mel ni garabu oliw gu naat  
fa biir kër Yàlla,  
di wóoloo Yàlla ngoram  
tey ak èllëg.

<sup>11</sup> Naa la sante sa jëf ba fàww,  
naa biral sa tur wu baax,  
say wóllère teew.

## 53

### *Mbon maase na*

<sup>1</sup> Mu jëm ci njiital jàngkat yi, dëppook  
galan bu ñuy wax Maalat, di taalif bu ñeel  
Daawuda.

<sup>2</sup> Ab dof a nga naa ca xelam:  
«Yàlla amul,»  
tey def njekkar,  
njubadeem siblu,  
kenn defu ci lu baax.

<sup>3</sup> Yàllaa tollu asamaan, jéer doom  
aadama,

\* 52:2 52.2 Seetal ci 1.Samiyel 21—22.

di seet ku ci xelu,  
tey sàkku Yàlla.

<sup>4</sup> Ñépp a dëddu,  
bokk yàqu yaxeeet.  
Kenn deful lu baax,  
du kenn sax.

<sup>5</sup> Yàlla nee: «Xanaa ñiy def lu bon,  
xamuñu dara?

Ñuy lekk sama ñoñ niw ñam,  
te sàkkuwuñu Yàlla.»

<sup>6</sup> Waaye ñooy tiita tiit  
fu tiitaange amul.

Yàllaay tasaare néewi nit ñi la gaw.  
Yàllaa leen wacc, nga gâceeel leen.

<sup>7</sup> Ana kuy tollu Siyon, xettli Israyil?  
Éy, bés bu Yàlla delloo ñoñam ndam,  
ndaw mbégte ci giirug Yanqóoba!  
Ndaw bänneex ci Israyil gii!

## 54

### *Yàlla, dimbali ma*

<sup>1</sup> Mu jëm ci njiital jàngkat yi, ànd aki  
xalam, di taalif bu ñeel Daawuda. <sup>2</sup> Mooy  
ba waa Sif demee ca Sóol, ne ko Daawu-  
daa nga làqu ca seenum réew\*.

<sup>3</sup> Éy Yàlla, musal ma ngir sa tur,  
jox ma dëgg, ci sa kàttan.

<sup>4</sup> Éy Yàlla, déglul, ma ñaan,  
teewlul, ma wax la.

<sup>5</sup> Ay doxandéem a ma jógal,  
di ñu néeg, bégga jël sama bakkan,  
te seetuñu ci Yàlla.

Selaw.

<sup>6</sup> Yàllaa ngii, moo may dimbali;  
Boroom bee yor sama bakkan.

<sup>7</sup> Yal na ay wi këppu ci ñi may tëru,  
yal na leen sa dëgg sànk.

<sup>8</sup> Xol bu tàlli laa lay sarxale.  
Aji Sax ji, yaa baax,  
ma sant la.

<sup>9</sup> Lépp luy njàqare, yaa ma ci jële,  
ma tiim samay noon.

\* **54:2** 54.2 Seetal ci 1.Samiyel 23.14-28; 26.1-5.

## 55

### *Xarit wor na ma*

<sup>1</sup> Mu jëm ci njiital jàngkat yi, ànd aki  
xalam, dib taalif, ñeel Daawuda.

<sup>2</sup> Éy Yàlla, déglul, ma ñaan la,  
bul làqu, dama lay dagaan.

<sup>3</sup> Teewlu ma, nangul ma.

Li may tawat a ma xañ jàmm, ub sama  
bopp;

<sup>4</sup> coowal noon yee  
ak coonob ñu bon ñi.  
Dañu maa teg fitna,  
di ma songe xadar.

<sup>5</sup> Sama fit a ngi rëcc, di tef-tëfi;  
tiitaangey ndee ne ma taral.

<sup>6</sup> Njàqaree ma dugg, may kat-kati,  
musiba mëdd ma.

<sup>7</sup> Dama ne: «Éy ku may may laafi xati,  
ma ne fërr, noppluji.

<sup>8</sup> Xanaa ma naaw, ba sore,  
fanaani mändinj ma.

Selaw.

<sup>9</sup> Naa gaawtu, seeluji  
ngelaw lu riddi ak ngélén.»

<sup>10</sup> Éy, Boroom bi, beenal seeni wax, neenal  
leen.

Damaa gis fitnaak xuloo ci dëkk bi,  
<sup>11</sup> guddeek bëccëg ñuy wër,  
ñaawtéef ak ayib wéttali leen.

<sup>12</sup> Yàq a nga ca biir,  
te noteel ak njublan jógul ca pénc ma.

<sup>13</sup> Su doon noon bu may ñaawal,  
ma muñ ko,  
mbaa muy bañ bu may won ab dayo,  
ma daw ko.

<sup>14</sup> Waaye yaw la, sama nawle,  
di sama wóllère, ma xam la.

<sup>15</sup> Nu daan bokk bänneexu diisoo,  
ànd ak mbooloo, di jaamuji kër Yàlla ga.

<sup>16</sup> Yal na leen dee bett,  
ñu jekki tàbbi njaniiw,  
ngir mbon ga seen biir ak seen  
dëkkuwaay.

<sup>17</sup> Waaye man, Yàlla laay woo wall,  
te Aji Sax jee may wallu.

18 Subaak ngoon ak njolloor,  
may ñaxtook a ñurumtu,  
mu dégg ma.

19 Moo may jot ak jàmm,  
ba ma mucc ci xare ya ma ñu bare di  
songe.

20 Yàllaay dégg, duma leen,  
moom mi nguoram yàgga sax.

Soppikuwuñu fenn  
te ragaluñu Yàlla.

21 Kii a ngi xàccil ñi mu takktool,  
di fecci kóllère,

22 làmmiñ wa daa neex ni lem,  
te xare lal xol ba;  
kàddu ya gëna nooy ag oliw  
te di saamar bu génn mbaram.

23 Sippikul Aji Sax ji lu la diis,  
moom moo lay taxawu.  
Du bàyyi mukku aji jub, muy tërëf.

24 Waaye yaw Yàlla, yaa leen di tàbbal,  
bóomkat ak naaféq ci pax mu xóota xóot,  
te seenu fan xaajul.  
Man nag, ma di la wóolu.

## 56

### *Yàlla laa wóolu, ragaluma nit*

1 Mu jëm ci njiital jàngkat yi, dëppook  
galan bi ñu dippee Pitax mu luu, dëkk  
fu sore; di taalifu jàngle bu Daawuda  
fentoon, ba ko Filisteen ña jàppee ca  
Gaat\*.

2 Éy Yàlla, baaxe ma,  
nit a ngi may lakkal,  
ab xeexkat a ma yendoo sonal.

3 Noon yee ma yendoo lakkal,  
bare lool di xareek man.  
Ku Màgg ki,

4 bés bu ma tiitee,  
yaw laay wóolu.

5 Yàlla laay màggal kàddoom,  
Yàlla laa wóolu, ragaluma.  
Lu ma nit manal?

6 Bésoo bés ñu ngi jalgati samay wax,

\* 56:1 56.1 Seetal ci 1.Samiyel 21.10-15. \* 57:1 57.1 Seetal ci 1.Samiyel 24.

seen mépp mébét di sama loraange.

7 Ñu ngi mànkoo, di ma yeeru,  
topp sama tànk,  
di wut sama bakkan.

8 Éy gii ñaawtéef! Ñii nu ñu mana mucce?  
Éy Yàlla, yal na leen sa mer dal!

Selaw. 9 Tumurànke naa, nga gis.  
Duyal samay rongooñ ci sa mbuus.  
Du lim nga lépp?

10 Bés bu ma wootee wall,  
dees na waññi noon yi,  
ma xam ne Yàllaa ànd ak man.  
11 Yàlla laay màggal kàddoom,  
Aji Sax ji laay màggal kàddoom,  
12 Yàlla laa wóolu, ragaluma.  
Lu ma nit manal?

13 Éy Yàlla, maa tegoo la ma la giñal,  
maa lay defal saraxi cant.

14 Yaa ma rawale, ba deewuma,  
te duma tërëf.  
Damay daagu fi kanam Yàlla,  
ci biir leeru àddina.

## 57

### *Yàlla jógal, wallu ma!*

1 Mu jëm ci njiital jàngkat yi, dëppook  
galan bi ñuy wooye Bul yàq, di taalifu  
jàngle bu Daawuda fentoon, gannaaw ba  
mu dawee Buur Sóol, ba dugg ca xunti  
ma\*.

2 Éy Yàlla, baaxe ma, ngalla baaxe ma,  
fi yaw laay làqu,  
yiiroo sa kiiraay,  
ba musiba yi jàll.

3 Ma woo Yàlla, Aji Kawe ji,  
Yàlla, mi may matalal.

4 Mooy yónnee fa asamaan, musal ma,  
dumaal ma ku may not.

Selaw.  
Yàllaay yónnee jëfi ngoram ak wormaam.

5 Maa ngi tëdd ci biiri noon  
yu mel niy gaynde, di yàpp doom aadama.  
Seeni sell niy xeej aki fitt,  
seen làmmiñ di saamar yu ñaw.

<sup>6</sup> Éy Yàlla, yaa màgg, ba sut asamaan,  
sag leer tiim suuf sépp.

<sup>7</sup> Noon yi di ma fiir,  
sama xol jeex.

Ñu gasal mam pax,  
far tàbbi ca.

Selaw.

<sup>8</sup> Yàlla, dogu naa,  
dogu naa woy, di la kañ.

<sup>9</sup> Na sama jëmm jépp yewwu,  
xalam ak moroom ma yewwu;  
ma yee leeru njël.

<sup>10</sup> Boroom bi, naa lay gërëm ci biir xeet  
yi,

kañ la ci biir waaso yi.

<sup>11</sup> Sa ngor a màgg, ba àkki asamaan,  
sa worma àkki fa kawa kaw.

<sup>12</sup> Éy Yàlla, yaa màgg, ba sut asamaan,  
sag leer tiim àddina sépp.

## 58

### *Yàllaa mana mbugal*

<sup>1</sup> Mu jëm ci njiital jàngkat yi, dëppook  
galan bi ñuy wooye Bul yàq, di taalifu  
jàngle, ñeel Daawuda.

<sup>2</sup> Yeen daal, su ngeen waxee, dëgg selaw.  
Mbaa yeena ngi àtte nit ñi ci yoon?

<sup>3</sup> Yeena ngi mébét njubadi,  
di lawal fitna ci réew mi.

<sup>4</sup> Ku bon day sosu rekk, dëng;  
juddu, teggi yoon, dib fen-kat.

<sup>5</sup> Day am danjar ni ñàngóor,  
fatti noppam ni jaan ju tēx:

<sup>6</sup> du dégg baatu jatkat,  
mbaa jati ñeengokat bu ñàng.

<sup>7</sup> Yàlla, ngalla tojal seeni gëñ;  
Aji Sax ji, foqal seen selli gaynde yii.

<sup>8</sup> Yal nañu ne mes ni ndox muy wal,  
yal nañu diir seen fitt, mu damm,

<sup>9</sup> yal nañu mel ni ngumba-an-tooye buy  
dox, di seey,

mbaa lumb wu jigéen tuur, gisul jant.

<sup>10</sup> Balaa seen cin a yég tàngooru gajj,  
muy gu tooy, muy guy boy,

\* 58:10 58.10 Li ñu wax ci aaya wii am na werante.

yal na leen fekk sàнку\*.

<sup>11</sup> Aji jub day gis ñu feyul ko, mu bég,  
muy jàngoo deretu ku bon.

<sup>12</sup> Ku ne naan: «Ku jub jot sab yool moos!  
Te Yàllaa ngi fi moos, di àtte àddina!»

## 59

### *Wallu maak ñu bon ñi*

<sup>1</sup> Mu jëm ci njiital jàngkat yi, dëppook  
galan bi ñuy wooye Bul yàq, di taalifu  
jàngle bu Daawuda fentoon. Mooy ba  
Buur Sóol yónnee ay nit ñu ko xoolal kër  
Daawuda, ngir rey ko\*.

<sup>2</sup> Éy sama Yàlla, xettli maak noon yi,  
làq ma ñi ma jógal.

<sup>3</sup> Xettlimaak ñiiy def lu bon,  
wallu maak bóomkat yi.

<sup>4</sup> Aji Sax ji, ñu ngii di ma tëru, nar maa  
rey,

di ma songe seen doole,  
te tooñuma, moyuma.

<sup>5</sup> Defuma lu ñaaw, ñuy xélu, di ma waajal;  
ngalla, jógal taxawusi ma, ba gis.

<sup>6</sup> Aji Sax ji, Yàllay Israyil, Yàlla Boroom  
gàngoor yi,

yewwul, dikkeel xeeti yéefar yépp, mbugal!

Workat yu bon yi, bu leen yërëm!

Selaw.

<sup>7</sup> Bu ngoonee ñu wàccsi,  
di xiiru niy xaj,

di wër dëkk bi.

<sup>8</sup> Déglul li ñuy yebbee ci seen gëmmin,  
seen làmmiin niy saamar,  
ñu defe ne kenn dégg leen.

<sup>9</sup> Te yaw Aji Sax ji, yaa ngi leen di ree,  
yaa ngi kekku yéefar yii yépp.

<sup>10</sup> Yaay sama doole, ma di la séentu,  
yaw Yàlla, yaay sama rawtu.

<sup>11</sup> Sama Yàlla ju goree may gatandu.

Moo may may ndam ci noon yi, ma gis.

<sup>12</sup> Yàlla, bu leen rey,  
lu ko moy samaw xeet fàtte.

Tasaaree leen sa doole, daane leen.  
Boroom bi, yaa nuy feg.

\* 59:1 59.1 Seetal ci 1.Samiyel 19.11-17.

13 Bàkkaar lañuy wax,  
seeni kàddu, bàkkaari neen.  
Yal nañu bew ba daanu,  
yooloo ko seeni saagaak seeni fen.

14 Meral, jeexal leen,  
jeexal leen, ba ñu jeex tàkk,  
ba ñépp xam ne Yàllaay Buur ci giirug  
Yanqóoba,  
ba ca cati àddina.

Selaw.

15 Bu ngoonee ñu wàccsi,  
di xiiru niy xaj,  
di wër dëkk bi.

16 Ñuy wër di wut lu ñu lekk,  
su ñu suurul, di ñurumtu.

17 Maa lay woye sa doole,  
xëy, di sarxolle ngir sa ngor.  
Yaay sama rawtu,  
di sama làquwaay bésub njàqare.

18 Sama doole yaw a, naa la woy,  
Yàlla, sama rawtu, Yàlla, boroom ngor.

## 60

### *Yàllaa yor sunu mucc*

1 Mu jëm ci njiital jàngkat yi, dëppook  
galan bu ñuy wax Seede Tóor-tóor, di  
taalifu jàngle, ñeel Daawuda. 2 Mooy  
ba Daawuda di xareek waa Siri ña ca  
Mesopotami ak waa Siri ña ca Soba te  
ba ñu ca bàyyikoo, Yowab duma fukki  
junniy Edomeen ak ñaar (12 000) ca xuru  
Xorom wa\*.

3 Éy Yàlla, wacc nga nu, bëtt sunu kiiraay.  
Mer nga, waaye ngalla xettli nu.

4 Yëngal nga suuf, xar ko;  
ngalla jagalal, mu tëju, mu ngi jaayu!

5 Won nga sa mbooloo lu metti,  
nàndal nu biiñu mbugal, ba nu miir.

6 Artu nga ñi lay jaamu,  
ngir mucc fitt.

Selaw.

7 Walloo nu sa ndijoor, nangul nu,  
ba say soppe xettliku.

8 Yàllaa àddoo fa këràm gu sell,  
ne: «Maay damu, dogat suufas Sikem,  
séddale xuru Sukkóot.

9 Maa moom diiwaanu Galàdd, moom  
Manase,

Efrayim di sama mbaxanam xare,  
Yuda di sama yetu nguur,

10 réewum Mowab di sama ndabal raxas-  
ukaay,

Edom, ma teg tànk;  
Filisti, ma xaacoo fa.»

11 Éy Yàlla, ana ku may yóbbu dëkk ba  
tata wër?

Ku may jiite ba Edom?

12 Xanaa kay du yaw, Yàlla mi nu wacc,  
yaw Yàlla, mi baña ànd ak sunu  
mbooloooy xare?

13 Ngalla dimbali nu ci bañaale;  
doom aadama, wallam neen la.

14 Nook Yàlla, nu def njàmbaar;  
moom mooy not sunuy noon.

## 61

### *Naa woote wall*

1 Mu jëm ci njiital jàngkat yi, ànd aki  
xalam, ñeel Daawuda.

2 Ngalla Yàlla, déglul, maa ne wallóoy,  
teewlul, ma dagaan la.

3 Àll laa lay wooye,  
sama xol jeex;  
yéege ma doju rawtu wu ma jotul.

4 Yaw laa làqoo,  
ngay tata ju dëgër, fegal ma noon.

5 Naa dëkke sa xayma, ba fàww;  
làqoo sa kiiraay.

Selaw.

6 Yàlla, yaa dégg samay dige,  
sédd ma céru ñi la wormaal.

7 Ngalla féqal fani Buur,  
ay atam bare, sët ba sëtaat.

8 Éy Yàlla, yal na Buur toog ba fàww fi sa  
kanam,  
nga sédd ko sa ngor ak sa worma, mu  
fegoo;

9 kon ma woy la ba fàww,  
di jëfe samay dige bésoo bés.

\* 60:2 60.2 Seetal ci 2.Samiyel 8.3-14; 1.Jaar-jaar ya 18.3-13.



## 62

*Yaakaar, fa Yàlla*

1 Mu jëm ci Yedutun, njiital jàngkat yi, di kàddug Sabóor, ñeel Daawuda.

2 Yàlla donj ay dalal sama xel, moo may wallu.

3 Moom donj mooy sama wéeru-mucc, di ma rawale, ba duma sànk!

4 Xanaa dungen bayyee songandoo nit, nar koo sànk, ni kuy màbb tabax bu joy, mbaa ngay bàddi per mu ràpp?

5 Seeni mébét, wacce boroom daraja donj; yeena ngi bége ay fen, seeni kàddu diw yiw, seen xalaat diy saaga.

Selaw.

6 Yal na Yàlla donj di dalal sama xel, moom mi ma yaakaar.

7 Moom donj a di sama cëslaay, di sama wall, di sama rawtu, duma tërëf.

8 Yàllaa may musal, di ma sagal, ma di ko doolewoo. Sama kiiraay, Yàllaa!

9 Bokk yi, wóoluleen ko fu ngeen tollu, diisleen ko seen xol, Yàllaay sunu kiiraay.

Selaw.

10 Doom aadama, ngelawal neen; nit, naxi neen. Booleel teg ci lu ñuy natte diisaay, kaw la jëm.

Ñooy gëna woyof ngelaw!

11 Bul wóolu ribaa, bul yaakaar alalu càcc, neen la. Bu sa alal yokku, nga taf ci sa xol.

12 Benn yoon la Yàlla wax, yaari yoon laa dégg, ñu ne; «Doole, fa Yàlla.»

13 Boroom bi, ngor, yaay boroom, yaw daal, yaay yool nit jëfam.

## 63

*Maa namm Aji Sax ji*

1 Muy kàddug Sabóor, ñeel Daawuda. Mooy ba mu nekkee ca màndiñu Yuda\*.

2 Yaw Yàlla, yaay sama Yàlla, ma di la sàkku, sama bakkan mar la, sama jëmm namm la, fu suuf mare ndox, ne serej.

3 Moo tax kër gu sell ga laa la séentoo, ngir niir sa leer ak sa tednga.

4 Xéewloo sa ngor moo dàq dundu bakkan; ma àddu boog, kañ la!

5 Dama lay sant, sama giiru dund kay, yékkatiy loxo, sàbbaale la.

6 Sama xol di sedd, ni ku ñam wu duun suural, ma bég, sarxolle, manggal la.

7 Su ma tëddee, fàttliku la, waxtuw guddi dama lay xalaat.

8 Yaay sama ndimbal, may làqoo sa kiiraay, di sarxolle.

9 Sama xol taq la, nga téyee ma sa ndijoor.

10 Waaye ñiy wuta faat sama bakkan ñoo jëm xóotey njaniiw.

11 Ñu jébbal leen ñawkay saamar, till séddoo.

12 Buur moom, di bége Yàlla; képp ku koy giñe di ko kañoow, fen-kat ne xerem.

## 64

*Yàllaa man ag fitt*

1 Mu jëm ci njiital jàngkat yi, di kàddug Sabóor, ñeel Daawuda.

2 Éy Yàlla, déglul sama kàddug tawat; ngalla aaral sama bakkan ci noon bu raglu.

3 Làq ma pexey ku bon, ma rëcc gàngooru defkati ñaawtéef.

\* 63:1 63.1 Seetal ci 1.Samiyel 23.14; 24.2; 2.Samiyel 15.23.

4 Ñu ngi daas seen làmmiñ niy saamar,  
di fitte seeni kàdduy wextan,

5 di jam ku ñu tëru te deful dara;  
jekki jam ko, te tiituñu ci dara.

6 Dañoo dogu ca lu bon la ñu nar,  
di diisoo na ñuy làqe ay fiir,  
te naan: «Kenn du ko gis!»

7 Dañuy lal pexem njubadi te naan:  
«Lal nanu pexe mu mat sèkk.»  
Nit aka xóot xel te xóoti mbóot!

8 Waaye Yàllaa leen di jamu fittam,  
ñu jekki daanu.

9 Seen làmmiñ a leen di fakkastal,  
ba ku leen xool wëcc bopp.

10 Ñépp a ciy am tiitaange,  
bay siiwal la Yàlla def,  
tey xalaataat jéfam jooju.

11 Ku jub bége Aji Sax ji, làqoo ko.  
Képp ku namm njub, damu.

## 65

### *Yàllaay nangul suuf*

1 Mu jëm ci njiital jàngkat yi, di woyu  
Sabóor, ñeel Daawuda.

2 Éy Yàlla, yaa jagoo cant fa Siyon,  
yaw lees di jéfeel ab dige.

3 Yaw miy nangug ñaan,  
yaw la képp di wuysi.

4 Samay ñaawtéef man na ma,  
waaye sunuy tooñ, yaa nu koy baal.

5 Ndokklee koo tànn, woo ko,  
mu dale say ètt,  
di xéewloo sa ngëneeli kër,  
ak sa sellngay dëkkuwaay.

6 Defal nga nuy kéemaan,  
nangug ñaan ci njekk,  
yaw Yàlla, mi nuy wallu,  
di yaakaaru àddina wërngal képp,  
ba ca géej gu sore ga.

7 Yaa dëje tund yu mag yi doole,  
gañoo sa kàttan,

8 di dalal riirum géej aki gannaxam,  
ak coowal xeet yi,

9 ba waa cati àddina yéemoo say firnde,  
waa penkook sowu di sarxolle.

10 Yaa dikke suuf am wal,  
nangul koo nangul.

Dexu Yàllaa fees ndox,  
ngay may nit peppam,  
ni nga ko waajale suuf si,

11 di suuxat ngàbb mi,  
maasalee ko jal yi,  
sottiy waame, mu mokk,  
cax ma, nga barkeel.

12 Yaay tëje mbeyum at mi say ngëneel,  
foo jaare, xéewal walangaan.

13 Parluy màndin yaa ngi walangaan,  
li wër tund yu ndaw yi di xumbéen.

14 Joor gaa ngi, jur gi muur,  
xur yi sàngoo pepp,  
lépp di xaacook a woy.

## 66

### *Yàllaay aar nitam*

1 Mu jëm ci njiital jàngkat yi, di woyu  
Sabóor.

Yeen waa àddina sépp, sarxolleel-leen  
Yàlla,

2 woyleen tedngay turam,  
darajaal-leen cantam.

3 Neleen Yàlla: «Yaaka yéemey jaloore!  
Sa doolee bare, ba say noon rasu,

4 àddina yépp di la sujjóotal,  
di la woy, di joobe sa tur.»

Selaw.

5 Dikkleen gis li Yàlla def,  
jéf la ju yéeme, ñeel doom aadama yi.

6 Moo soppi géej ag joor,  
maam ya dox jàll.

Nanu ko bége foofa.

7 Mooy nguuroo njàmbaraam ba fàww,  
di topp xeet yeek bët.

Ku koy diinjat, yàlla boo damu!

Selaw.

8 Yeen xeet yi, santleen sunu Yàlla,  
te biral cantam!

9 Moo sàmm sunu bakkan,  
te waccu nu, nu tërëf.

10 Éy Yàlla, nattu nga nu,  
xelli nu, ni ñuy xellee xalis;

11 laaw nga nu,  
teg nu njàqare.

12 May nga noon not nu,  
nu jaare sawara, jaarem ndox;  
nga génne nu, yaatal nu.

13 Maay duggaale sa kër ay saraxi rendi-  
dóomal,  
defal la samay dige,

14 yi ma waxoon ci sama gémmiñ,  
sama làmmiñ tudd ko, ba ma jàqee.

15 Jurug yafal, ma defal la saraxu rendi-  
dóomal,  
saxar sa jollee ca kuuyu sarax ya,  
ma boole ca saraxu nag ak sikket.

Selaw.

16 Képp ku ragal Yàlla dikkal, déglu,  
ma limal la li mu ma defal.

17 Moom laa woo wall,  
àddu, màggal ko.

18 Su ma naroon ñaawtéef,  
Boroom bi du ma déglu.

19 Waaye Yàlla dégg na ma,  
teewlu na samag ñaan.

20 Cant ñeel na Yàlla,  
gàntuwul samay ñaan,  
xañu ma ngoram.

## 67

### *Yal na nu Yàlla barkeel*

1 Mu jëm ci njiital jàngkat yi, ànd aki  
xalam, di woyu Sabóor.

2 Éy Yàlla, yéwéne nu, barkeel nu,  
te geesoo nu sa leeru kanam,

Selaw,

3 ba ñu ràññee sa loxo fi kaw suuf,  
gis sag wall fi biir xeet yépp.

4 Yaw Yàlla, na la xeet yi sant,  
na la xeet yépp sant.

5 Na xeet yiy bég, di sarxolle;  
loo dogalal xeet yi njub la,  
te yaay wommat xeet yi ci kaw suuf.

Selaw.

6 Yaw Yàlla, na la xeet yi sant,  
na la xeet yépp sant.

7 Suuf si nangu na,  
yal na nu Yàlla, sunu Yállay barkeel.

8 Yal na nu Yállay barkeel,  
ba àddina wërngal képp ragal ko.

## 68

### *Yàlla daagu, daan*

1 Mu jëm ci njiital jàngkat yi, ñeel  
Daawuda, di woyu Sabóor.

2 Yàllaay jóg, noonam ya tasaaroo;  
bañam ña daw, dëddu ko.

3 Yàlla wal, ñu naaw ni saxar.

Ñu bon ñi sànkú fi kanam Yàlla,  
mbete dax ak sawara.

4 Ñu jub ñi nag bég, di bannexu fi kanam  
Yàlla,  
tey puukarewoo mbégte.

5 Woyleen Yàlla, teral turam,  
xállal-leen kiy war niir yi,  
Ki Sax moo di turam.

Banneexuleen fi kanamam.

6 Mooy baayoo jirim, di àtte jëtun,  
kookoo di Yàlla ja fa dëkkuwaayu sell-  
ngaam.

7 Yàllaay sàkkal ku wéet wéttal,  
di afal ku ñu tëjoon, bégal ko,  
ku déggadi rekk ay dëkke suuf su ne  
serej.

8 Céy Yàlla, yaa génn, jiitu sa mbooloo,  
daagu, dugg màndiñ ma.

Selaw.

9 Suuf yëngu,  
asamaan sóob  
fi kanam Yàlla, boroom tundu Sinayi,  
Yállay Israyil ja!

10 Yàlla, waame nga tawal,  
leqlee ko réew mi nga séddoo, fa mu  
sonne,

11 sa mbooloo dëkke fa.  
Yàlla yaa leel néew-ji-doole ci sag mbaax.

12 Boroom beey joxe ndigal,  
gàngooru jigéen indi xibaar:

13 «Buur yaak seeni gàngoor a ngay dawa  
daw,  
jongomay kër gi di séddale lël ja.

14 Yeen ñiy waaf ci gétt gi, bésuub xare,  
gànjar a ngi, di laafi pitax yu ñu xoob  
xaalis,

dunq ya teg wurus wuy ray-rayi.»

15 Ba fa Aji Man ji tasaaree buur ya,  
tawub yuur a ngay sóobe tundu Calmon.

16 Yaw tundu yàlla yi, yaw tundu Basan,  
tundu Basan, tund wi ci coll yi,

17 looy xeelook say coll, di fiire  
tund wi Yàlla namma dëkke?  
Aji Sax ji kat, fa lay dëkk ba fàww!

18 Watiiri xarey Yàlla di ñaar fukki junni  
(20 000),  
ba ci junniy junni.  
Boroom bi ne ca seen biir,  
di boroom tundu Sinayi fa biir sellngaam.

19 Yaa yéeg fa kawa kaw,  
jàpp ay jaam, yóbbaaale.  
Yaa nangooy galag ci nit ñi,  
ba ci ñiy fippu  
ndax li Yàlla Ki Sax dëkke Siyon.

20 Cant ñeel na Yàlla bésoo bés.  
Moo nuy jaboote. Yàllaa nuy musal.  
Selaw.

21 Sunu Yàllaa di Yàlla jiy walloo,  
Aji Sax ji Boroom beey musal bakkan.

22 Yàlla daal ay rajaxe boppi noonam  
ak kaan mu sèq mu boroom wéye tooñ.

23 Boroom bi nee: «Basan laay waññee  
noon yi,  
waññee leen xóotey géej,  
24 ngeen mana xuus ci seen deret,  
seeni xaj séddu ci seeni néew.»

25 Céy Yàlla, gis nañu sa gàngoor di  
daagu,  
sama Yàlla, sama buur, sa gàngoor ba ca  
biir kër gu sell ga.

26 Woykat ya jiitu, xalamkat ya mujje,  
janq ji yéewe leen tegg um njiin.

27 Dajeleen, di sant Yàlla,  
yeen askanu Israyil, santleen Aji Sax ji.

28 Giirug Beñamin a ngi jiitu, gën cee  
néew,  
njiiti Yuda topp caak seeni kurél,  
njiiti Sabulon topp caak njiiti Neftali.

29 Yeen, seen Yàlla dogalal na leen kàttan;  
éy Yàlla, jéfeel doole ja nga nu jéfeeloon.

30 Sa kër gi tiim Yerusalem,  
fa la la buur yiy indiley galag.

31 Nanga fa gëdde rabu àll wi\* ci barax yi,  
ñooy gétti yëkk yi, xeet yi ci des diy sellu.  
Gëdd leen, ba ñu sujjóotalsi laak dogi  
xaalis.

Tasaareel xeet yooyu sopp xare,  
32 ay kàngam bàyyikoo Misra aki galag,  
réewum Kuus baral loxoom, indil Yàlla.

33 Yeen waa réewi àddina, woyleen Yàlla,  
teral-leen Boroom bi,  
Selaw

34 gawar bi ci asamaan,  
asamaani démb.  
Ma ngooguy àddu kàddug doole.

35 Seedeleen ne doole, fa Yàlla,  
mi tiime Israyil darajaam,  
dooleem feeño xambaar ya.

36 Céy Yàllaaka mata ragal fa kër am gu  
sell!

Mooy Yàllay Israyil,  
di may mbooloo mi dooleek kàttan.  
Cant ñeel na Yàlla!

## 69

### *Ku ñu fitnaal a ngi ñaan*

1 Mu jëm ci njiital jàngkat yi, dëppook  
galan bu ñuy wax Tóor-tóor, ñeel  
Daawuda.

2 Éy Yàlla, wallu ma!  
Ndox maa ngi ma tollu ci put.

3 May suux ci ban bu xóot,  
te awma fu ma teg tànk.  
Maa ngi nii ci ndox mu xóot,  
gannax yi médd ma.

4 Ma woote wall ba tàyyi,  
sama put gi wow konḡ.  
Ma séentu la, yaw sama Yàlla,  
ba samay gët giim.

5 Sama kawari bopp sax,  
ñi ma bañ ci daraa ko ëpp.  
Ñu bare doole, bëgg maa sànk,  
noonoo ma ci dara.  
Sàccuma, nara fey!

6 Yaw Yàlla, xam nga sama jëfi dof,  
te samay tooñ umpu la.

7 Yàlla buma rusloo ñi la yaakaar,  
yaw Boroom bi, Aji Sax ji Boroom  
gàngoor yi,  
yàlla buma gàcceel ñi la topp,  
yaw Yàllay Israyil.

\* 68:31 68.31 rabu àll wi: jàpp nañu ne jombul Misra lay doon.

8 Yaa tax ma dékku, ñu di ma sewal,  
ma rus ba sëlmoos gâcee.  
9 Jaambur laa léegi ci saay bokk,  
mel ni doxandéem sama biir doomi ndey.

10 Damaa xér ci sa kër gi, ba jeex tàkk,  
te jëf ji ñu la sewale man la dal.  
11 May jooy, di woor,  
ñu di ma sewal.  
12 Ma sol ay saaku, di ko ñaawloo,  
ñu di ma léebu.  
13 Waa pénc ma di ma tooge,  
màndikat yi di ma woyal.  
14 Waaye man, Aji Sax ji, yaw laay dagaan.  
Éy Yàlla, na tey di bésub yiw.  
Ngalla nangul ma ci sa ngor lu yaa  
ak sa wall gu wóor.  
15 Xettli ma ci ban bi, ma baña suux,  
xettliku ci samay noon.  
Rikk génne ma yii xóotey ndox,  
16 ba gannax du ma mëdd,  
xóotey géej du ma warax,  
pax du ma kepp.

17 Éy Aji Sax ji, yaa rafet ngor, nangul ma!  
Geesoo ma sa yërmande ju yaa!  
18 Bu ma làqu, Sang bi.  
Jàq naa, gaawe ma.  
19 Jege ma, jot ma,  
musal ma ci noon yi!  
20 Yaa gis ñu di ma sewal, di ma ruslook  
a torxal,  
yaa ngi ne jàkk ci noonoo noon.  
21 Dees maa sewal, sama xol jeex, ma  
wopp;  
may sàkku yërmande, awma ko;  
ku ma dëfal it, gisuma ko.  
22 Tooke lañu ma leel,  
ma mar, ñu nàndal ma lu forox.

23 Yal na seen ndab di seenum yeer,  
seeni am-di-jàmm di seenug fiir.  
24 Yal na seeni gët giim, ba dootu gis;  
yal na seen ndigg récc fàww.  
25 Yal nanga leen yuri mbugal,  
sa mer tàkk, dab leen.  
26 Yal na seeni dal gent,  
seeni xayma wéet.  
27 Yaw, nga дума ba noppi, ñu toppaat ca,  
nga gaañ, ñu siiwal mitit wa.  
28 Dencal leen tooñ ci kaw tooñ,  
te yàlla buñu tàbbi ci sag njekk.

29 Yal nañu leen far ca téereb dund ba,  
bañ leena limaale ca aji jub ña.  
30 Man de, damaa jàq, tiis.  
Éy Yàlla, yal naa làqoo sag wall.  
31 Damay woy Yàlla, teral ko,  
màggal ko, sant ko.  
32 Mu gënal Aji Sax ji saraxu yëkk,  
aki béjjénam aki wewam.  
33 Néew-ji-doole di gis, bége,  
kuy sàkku Yàlla yokku fit.  
34 Aji Sax ji day dégg néew-ji-doole moos,  
te du sàggane ñoñam ñi ñu njoñ.  
35 Na asamaan ak suuf màggal Yàlla,  
mook géej ak lu cay yèngoo.  
36 Yàlla kat mooy musal Siyoñ,  
tabaxaat dëkki Yuda yu mag yi,  
ay nitam moom, dëkke.  
37 Askanu jaamam ñee koy jagoo,  
ay soppeem a koy dëkke.

## 70

### *Yàlla, gaawe ma*

1 Mu jëm ci njiital jàngkat yi, ñeel  
Daawuda, di woy wuy fàttlee.  
2 Yàlla, wallu ma!  
Éy Aji Sax ji, gaawe ma!  
3 Kuy wut sama bakkan,  
yal na rus, torox ne tott.  
Kuy bége sama loraange,  
yal nañu ko дума, wañni ko, mu ne yàcc.  
4 Kuy ñaawle,  
yal na dellu gannaaw, torox.  
5 Képp ku lay sàkku,  
yal na bég, di la bannexoo.  
Képp ku sopp sag wall,  
yal na jàppoo: «Yàlla màgg na!»  
6 Man de, néew naa doole, ñàkk naa.  
Éy Yàlla, gaawe ma.  
Yaw yaa may wallu, xettli ma.  
Éy Aji Sax ji, bu ma yeexe.

## 71

### *Mag a ngi séentu njekku Yàlla*

1 Aji Sax ji, yaw laa làqoo,  
 yàlla buma rus muk.  
 2 Xettlee ma sa njekk, yiwi ma;  
 ngalla teewlu ma, te wallu ma.  
 3 Yal nangay sama cēslaay, sama rawtu  
 bu may rawesi saa su ne,  
 te nga dogal sama mucc.  
 Yaw yaa may téye, di ma aar.  
 4 Éy sama Yàlla, musal ma ci dooley ku  
 bon  
 ak ab saaysaay ak ab néeg.  
 5 Boroom bi, Aji Sax ji, yaw de laa  
 yaakaar,  
 dale laa wóolu ba may ndaw.  
 6 Yaw laa wéeroo ba may juddu;  
 yaw yaa ma roccee sama biiru ndey.  
 Yaa yelloo sama cant fàww.  
 7 Firndey alkànde la ma ñu bare xoole  
 woon,  
 te yaw ngay sama rawtu bu wóor.  
 8 Samay kàddu sag cant la fees  
 ak di la saxoo darajaal.  
 9 Ngalla bu ma wacc, mag laa;  
 bu ma ba fi doole jeexe.  
 10 Noon yaa nga may tooge,  
 ñi may tēroo ngay diisoo,  
 11 naan: «Yàlla wacc na ko,  
 nan ko dàq, jàpp;  
 kenn du ko wallu.»  
 12 Éy Yàlla, bu ma sore.  
 Sama Yàlla, gaawe ma.  
 13 Samay seytaane,  
 yal nañu leen rusloo, sànk leen.  
 Ñi may wuta lor,  
 yal nañu leen gâceel, sewal leen.  
 14 Man may saxoo yaakaar,  
 di la sant, di santati.  
 15 May siiwal sa njekk,  
 di yendoo waxtaane say wall,  
 doonte lim ba wees na ma.  
 16 Boroom bi, Aji Sax ji, ma dikke la sag  
 njàmbaar,  
 di tudd sa njekk gu wéet.  
 17 Éy Yàlla, ba may ndaw, nga ma xamal  
 say kéemaan,  
 te ba tey jii maa ngi koy biral.  
 18 Éy Yàlla, bu ma bijjaawee ba weex tàll  
 it, bu ma wacc,

ba keroog may xamal maasu tey sa doole,  
 xamal ñi ciy topp ñépp sag njàmbaar.  
 19 Céy Yàlla, sa njekk àkki na fa kawa kaw.  
 Def nga lu réy.  
 Yaw Yàlla, ana ku mel ni yaw?  
 20 Won nga ma ay yoon coonooki tiis,  
 waaye yaa may dundalaat,  
 ma mucc xóotey suuf.  
 21 Yal nanga ma gēna sagal,  
 geesu, bégal ma.  
 22 Man it sama Yàlla, ma xalam, sant la  
 ngir sa kóllère.  
 Aji Sell ji séddoo Israyil,  
 dama lay woy aki xalam,  
 23 sarxolle, woy la,  
 bége sag njot.  
 24 May yendoo siiwal sa njekk  
 nde ña ma doon wuta lor  
 lañu rusloo, sewal leen.

## 72

### *Nu ñaanal Buur*

1 Ñeel Suleymaan.

Céy Yàlla, mayal Buur sa xelum àtte,  
 mayal doomu Buur bii sa xelum njekk,  
 2 muy àttee sa mbooloo njub,  
 di àttee sa néew-ji-doole ñi yoon,  
 3 tooli tund yu mag yi indil mbooloo mi  
 jàmm,  
 tooli tund yu ndaw yi xéewale leen njekk,  
 4 Buur di àtte néew-ji-dooley xeet wi,  
 di wallu doomi néew-ji-doole  
 tey dēggaate kiy nennoo.  
 5 Yal nañu la wormaal feek jant biy am,  
 feek weer wiy feq, sèt ba sētaat.  
 6 Yal na Buur di xéewalu réewam nib taw  
 cig ruujeef,  
 mbaa waame wuy suuxat suuf.  
 7 Janti Buur aji jub day woomle,  
 te ba keroog weer wiy fey, jàmm di law,  
 8 mu yilif géej ba géej  
 ak dex ba ca cati àddina.  
 9 Waa màndiñ mi di ko sukkaal,  
 ay noonam mēq suuf,  
 10 buuri Tarsis ak dun ya  
 di ko indil ay galag;  
 buuri Saba ak Seba  
 di ko yótsi yóbbal,

11 buuroo buur di ko sujjóotal,  
 xeetoo xeet di ko surgawu.  
 12 Mooy xettliji aji tumuránke bu woote  
 wall  
 ak aji néewle ju sésul fenn.  
 13 Mooy yërëm ku néewleek ku tu-  
 muránke,  
 di sàmm bakkanu aji tumuránke,  
 14 boole leen jot ci notaangeek loraange,  
 ngir fonk seen bakkan.  
 15 Yal na Buur gudd fan,  
 yal nañu ko may wurusu Saba.  
 Nañu koy ñaanal saa su ne,  
 di ko saxoo, mu barkeel.  
 16 Yal na pepp ne gàññ ci réew mi,  
 yal na gub yay jaayu ca tund ya ni gottub  
 Libañ;  
 dëkk yu mag yi sèqi nit ba law,  
 17 yal na turam sax,  
 ba law fu jant tiim,  
 yal na xeet yépp barkeele ci moom,  
 te di ko ndokkle.  
 18 Cant ñeel na Yàlla Aji Sax ji,  
 Yállay Israyil, mi wéetooy jalooreem.  
 19 Cant ñeel na teddngaam, ba fàww,  
 yal na teddngaam dajal suuf sépp!  
 Amiin, Amiin!  
 20 Ñaani Daawuda doomu Yese jeexe fii.

## 73

### *Am Yàllaa gën*

1 Muy kàddug Sabóor, giiroo ci Asaf.  
 Yàlla kay baax na ci Israyil,  
 baax ci ku rafet xol.  
 2 Waaye man de tuuti kon ma lajj,  
 tuuti ma tarxiis,  
 3 ngir maa ñee ku bew,  
 ndax gis mu baaxle te di ku bon.  
 4 Amuñu metit,  
 xanaa ne faaj.  
 5 Doñ-doñu nit dabu leen,  
 coonoy doom aadama dalu leen.  
 6 Moo leen taxa ràngoo reewande,  
 làmboo coxor.  
 7 Dañoos suur ba gët suulu,  
 seen xalaati xel xëtt yoon.

8 Dañuy ñaawle, di wax lu bon,  
 di réy-réylu, boole ci kàdduy jaay-doole.  
 9 Seen ñal-ñal àkki asamaan,  
 làmmiñ dajal suuf.  
 10 Moo tax ñoñi Yàlla walbatiku ci ñoom,  
 di jolu seen wax nim ndox  
 11 te naan: «Lu ci Yàlla xam?  
 Ana xam-xam fa Aji Kawe ji?»  
 12 Ñu bon ñaa ngoog!  
 Ne finaax, di gëna woomle.  
 13 Man kay maa sellal ci neen,  
 di sàmm sama der.  
 14 Bés bu ne yar dal ma,  
 saa yu ma xëyee, jot mbugal.  
 15 Su ma noon: «Naa waxe ni ñoom,»  
 kon de, ma wor sa askanu mbooloo.  
 16 Naka laay jéema ràññee lii,  
 mbir mi èlëm ma.  
 17 Ba ma àggee sa kër gu sell ga,  
 laa doora gis muju ku bon.  
 18 Yoonu tarxiis kay, nga leen teg,  
 daane leen, ñu sàнку,  
 19 Yàquleeka leena bett!  
 Musibaa leen ne fuuf, ñu ne mes!  
 20 Day mel ni gént goo yewwoo.  
 Céy Boroom bi, boo xippee, jëmmu gént  
 ga soof la.  
 21 Naqar laa amoon,  
 sama xol di dagg.  
 22 Booba ngaaka laa, xawma dara;  
 rab laa woon fi sa kanam.  
 23 Teewul ma des ak yaw,  
 nga jàpp sama loxol ndijoor.  
 24 Danga maa gindee sam xel,  
 teg ca dalale ma sa teddnga.  
 25 Ana ku ma am asamaan ku la moy?  
 Ku ma safoo kaw suuf ku la moy?  
 26 Kàttan ak pexe jeex,  
 Yàlla di ma dooleel,  
 ma séddoo ko fàww.  
 27 Ku la sore kat, sàнку,  
 képp ku la wor, nga fàkkas.  
 28 Man de, jege Yàllaa ma gënal.  
 Boroom bi, Aji Sax ji, yaw laa def kiiraay,  
 ngir siiwal sa jépp jëf.

## 74

*Yàlla, bu la noon ree*

1 Muy taalifu yeete, giiroo ci Asaf.

Éy Yàlla, lu tax nga wacc nu fàww,  
di dal ak xol bu tàng  
ci sa xari parlu yii?

2 Bàyyil xel askan wi nga jënd bu yàgg,  
yaa jot gii giir, séddoo leen.  
Bàyyil xel tundu Siyon, fa nga dëkke  
woon.

3 Dikkal, xool gent bu yaa bii dul jeex,  
noon yàq lépp ci biir kër gu sell gi.

4 Say bañ xaacu nañ fa sa digg bérabu  
ndaje ma,  
samp seen raaya.

5-6 Sémmiñ dal, wàkku awu.  
Mbete ñu xàcciy sémmiñ, di gori geer,  
ba lu fa doon liggéeyu yett, tas.

7 Daño taal sa kër gu sell,  
sa dëkkuwaayu tur lañu daaneel, ba  
sobeel ko.

8 Ñu namm noo not ba nu nooy,  
fuy bérabu ndajem Yàlla ci réew mi, ñu  
lakk.

9 Sunuy takk réer na nu,  
yonent amatul,  
te kenn xamul fu lii di àkki.

10 Éy Yàlla, fu reetaani noon di dakke?  
Xanaa bañ yi duñu la ñàkke kersa ba  
fàww?

11 Looy téye sa loxol ndijoor?  
Na sa loxo jóge sa dënn, nga buube leen.

12 Yàlla, yaa masa doon sama buur,  
di ma walloo ci digg réew mi.

13 Yaa xàjjale géej gi ci sa doole,  
toj boppi ninki-nànka ya ca ndox ma,

14 yaa rajaxe kaanji rab wa,  
leele ko rabi màndiñ ma.

15 Yaa fettaxal fii bëti ndox akum wal,  
ñiisal dex yu masa wal.

16 Yaa moom bëccëg, moom guddi,  
teg fi weer week jant bi.

17 Yaa rëdd mboolem digi suuf,  
sàkk noor ak nawet.

18 Kon xoolal, Aji Sax ji, noon a ngi ree,  
xeet wu amul bopp a lay sewal.

19 Bul wacce rabu àll sam xati,  
bul sàggane sa néew-doole yi mukk.

20 Ngalla xoolal ci kóllère gi,  
fu làqu ci réew mi, fitna dale fa ba dajal.

21 Yàlla bu néew-doole ñibbaale gâce,  
yal na ku ñàkk ak ku néewle di la  
santandoo.

22 Éy Yàlla, jógal ñonjal sa dëgg,  
bàyyil xel dof bi la dëkkee sewal.

23 Bul tanqamlu sa coowal noon yi,  
ñii la jógal, seenum riir a ngi jolli saa su  
ne.

## 75

*Yàllaay àtte*

1 Mu jëm ci njiital jàngkat yi, dëppook  
galan bi ñu dippee Bul yàq, di woyu  
Sabóor, giiroo ci Asaf.

2 Yàlla, nu sant la, santati la;  
nu ngi lay woo,  
di siiwal say jaloore.

3 Yàlla nee: «Maay takk ab àpp,  
àtte ca njub.

4 Bu suuf di yëngu mook ñi ko dëkke  
ñépp,  
maay kiy téye ay kenoom.

5 Dama ne ku réy: “Bul réy-réylu,”  
ne ku bon: “Bul bew,

6 bul bewa bew,  
bay waxe reewande.”»

7 Du penku, du sowu,  
te du màndiñ ma la daraja di jóge.

8 Yàllaay àtte:  
kii mu detteel, kee mu kaweel.

9 Merum Aji Sax ji dib kaas ci loxoom,  
biiñu njafaan bu wex di ca fuur,  
mu jol ko képp ku bon ci àddina,  
mu naan ba naanaale ginjrit ga.

10 Man may biral jëfam ba fàww.  
Damay woy Yàllay Yanqóoba.

11 Mu ne: «Jépp dooley ku bon, ma  
neenal;  
dooley ku jub yokku.»



## 76

### *Yàllaa moom xare*

1 Mu jëm ci njiital jàngkat yi, ànd aki xalam, di woyu Sabóor, giiroo ci Asaf.

2 Yàlla siiw na fa Yuda, aw turam màgg fa Israyil.

3 Xaymaam a nga Salem, di xunteem ma fa Siyoŋ.

4 Fa la rajaxee fitt yuy boy ak pakk ak saamar ak ngànaayal xare. Selaw.

5 Yàlla yaa ne ràññ te darajawu, ba raw tundi rëbbkat yi.

6 Futtees nay boroom fit, ñu ne nërëm, nelaw;

kuy ñeyi xare, say yoxo nasax.

7 Yaw Yàllay Yanqóoba, yaa gëdd, gawar ak fasam nelaw.

8 Yaw mii, yaa mata ragal; boo meree, ana kuy taxaw fi sa kanam?

9 Fa asamaan nga biraleb àtte; suuf tiit, ne cell.

10 Ca la Yàllay jóg, ngir àtte, ba wallu kuy néew dooley àddina.

11 Doom aadamaak xadaram rafetal sa woy; desu xadaram, nga gañoo. Selaw.

12 Seen Yàlla Aji Sax ji, digooleen ak moom te jëfe ko.

Kee jara ragal.

Na ñi ko wër ñépp yótsiy teraanga.

13 Mooy sàggi sagu kilifa yi, di tiitaangey buuri àddina.

## 77

### *Yàllaa ngi seetaan*

1 Mu jëm ci Yedutun, njiital jàngkat yi, di kàddug Sabóor, giiroo ci Asaf.

2 Naa xaacu, woo Yàlla, sama baat fa Yàlla, ngir mu déglu ma.

3 Bëccëg, ma jàq, sàkku Boroom bi; guddi, ma tàllal loxo, toqiwuma.

Sama xol tée sedd.

4 Ma bàyyi Yàlla xel, binni, xalaat, xol jeex.

Selaw.

5 Éy Yàlla, tere nga maa gëmm bët, ma jaaxle ba waxatuma,

6 xanaa xalaat janti démb, at ya woon.

7 Guddi may fàttliku sama woy, di waxtaan ak sama ngegenaay, sama xel di jéex te naa:

8 «Boroom bi da may gàntal ba fàww, ba du ma baaxeeti mukk a?

9 Xanaa daa jeexal ngor tàkk?

Am kàddoom a deñ ba fàww?

10 Moo Yàlla daa fàtte ñeewantee? Am meram a tēj buntu yërmandeem?»

Selaw.

11 Ma ne, sama naqar daal mooy Aji Kawe ji daa soppi loxoom.

12 Waaye naa fàttliku jaloorey Ki Sax rekk,

fàttliku kéemaanam ya woon.

13 Naa xalaat sa bépp liggéey, di jàngkat say jëf.

14 Céy Yàlla, yaa sell jikko!

Jan yàllaa màgg ni Yàlla?

15 Yaa di Yàlla juy jëfi kéemaan, yaa siiwal sa doole ci biir xeet yi.

16 Kàttan nga jote sa mbooloo ma, sèti Yanqóobaak Yuusufa.

Selaw.

17 Yàlla, ndox maa la gis, ndox maa la gis, di lox;

xóote yaa say,

18 niir ya yuri,

kàddu riire asamaan,

say fitt, fettaxandoo,

19 nga dënoo biir callweer,

melax yi taal àddina,

suuf di lox, di reg-regi.

20 Biir géej di saw yoon;

saw xàll ci digg ndox mu ne xéew,

te kenn gisul foo teg tànk!

21 Wommat nga sa mbooloo ni ag jur,

Musaak Aaróona jiite.

## 78

### *Nit goreedi, Yàlla gore*

1 Muy taalif bu giiroo ci Asaf.

Yeen sama xeet, dégluleen, ma digal leen; teewluleen ma, ma wax leen.

2 Maa ngi leen di léeb,

di sulli kumpay démb,  
<sup>3</sup> muy lu nu dégg, xam ko,  
 sunuy maam xamal nu ko.  
<sup>4</sup> Dunu ko nëbb sunuy doom,  
 xanaa di ko jottli maas giy ñëw,  
 xamal leen jaloorey Aji Sax ji  
 ak kàttanam aki kéemaanam.  
<sup>5</sup> Bindal na sèti Yanqóoba téereb seede,  
 muy yoon wi mu tegal Israyil.  
 Mu sant maam yi, ñu xamal ko seeni  
 doom,  
<sup>6</sup> ngir ñiy juddu èllëg xam ko,  
 am ay doom,  
 ñu màgg, ba xamal ko seeni doom,  
<sup>7</sup> ngir ñu wóolu Yàlla,  
 baña fàtte jëfi Yàlla,  
 di jëfey santaaneem,  
<sup>8</sup> te baña roy seeni maam;  
 maas gu të woon te déggadi,  
 ñu ñàkk pastéef  
 te sàmmuñu kóllërey Yàlla.  
<sup>9</sup> Waa giirug Efrayim ñoo soxi fitt,  
 te keroog xare ba ñoo daw.  
<sup>10</sup> Ñoo sàmmul kóllërey Yàlla,  
 gàntal yoonam,  
<sup>11</sup> ba fàtte ay jalooreem,  
 di kéemaan yi mu leen won.  
<sup>12</sup> Fa seen kanami maam la def kéemaan,  
 fa diiwaanu Cowan, réewum Misra.  
<sup>13</sup> Moo xar géej ga, jal ndox ma nim tata,  
 jàlle leen.  
<sup>14</sup> Bëccëg mu jütee leen aw niir,  
 ak leeru sawara guddi gépp.  
<sup>15</sup> Moo xar ay doj ca màndiñ ma,  
 mbàmbulaan wal, mu nàndal leen;  
<sup>16</sup> mu sotti ndox mu balle ciw xeer,  
 walal, mu safi dex.  
<sup>17</sup> Teewul ñu wéy di moy Aji Kawe ji,  
 di ko gàntal ca màndiñ ma.  
<sup>18</sup> Ñoo diiñate Yàlla xol,  
 di xemmëm ñam wu bakkane.  
<sup>19</sup> Ñuy waxal Yàlla naan:  
 «Xam ngeen ne Yàlla manu noo taajal  
 ndab ci màndiñ mi!  
<sup>20</sup> Dóor naw doj, moos, ndox ma fettax,  
 wal ma baawaan,  
 waaye aw ñam nag?  
 Daa mana leel mbooloo mii aw yàpp?»  
<sup>21</sup> Aji Sax ji dégg ci, mer lool;

xolam tàng ci sèti Yanqóoba,  
 am sànj tàkkal Israyil.  
<sup>22</sup> Dañoo gëmul Yàlla,  
 doyloowuñu wallam.  
<sup>23</sup> Mu digal niir ya fa kaw,  
 ubbi bunti asamaan,  
<sup>24</sup> tawal leen mànn, ñu lekk:  
 peppum asamaan la leen leel;  
<sup>25</sup> mburum jàmbaar la nit lekk,  
 mu wàcceel leen ca lu ne gàññ.  
<sup>26</sup> Yàlla wale ngelawal penku fa asamaan,  
 bëmëx ak dooleem ngelawal bëj-saalum.  
<sup>27</sup> Mu tawal leenu yàpp, mu saawe ni  
 pënd,  
 di njanaaw yu ne gàññ ni feppi suufas  
 géej,  
<sup>28</sup> wàcce ko fa seen digg dal ba,  
 mu dajal seeni dëkkuwaay.  
<sup>29</sup> Mu faj seen aajo,  
 ñu lekk ba suur këll.  
<sup>30</sup> Teewul bala seen xel a dal,  
 seen lanc jàllagul sax,  
<sup>31</sup> Yàlla mer na, dal ci seen kaw,  
 bóom ña ëpp doole ca ñoom,  
 fàdd waxambaaney Israyil.  
<sup>32</sup> Loolu lépp teewul ñuy bàkkaar ba tey  
 te gëmuñu ay kéemaanam.  
<sup>33</sup> Mu dagg seeni fan, mu wéy ni cóolóol,  
 faat seen bakkan ci safaan bu gaaw.  
<sup>34</sup> Ba leen Yàlla fàddee, ña des sàkku ko,  
 tuub, waññiku ci moom.  
<sup>35</sup> Ñu fàttliku ne Yàllaay seen cëslaay,  
 xam ne Yàlla Aji Kawe jeey seen njotlaay.  
<sup>36</sup> Teewul ñu di ko jéema naxey wax,  
 di ko fen.  
<sup>37</sup> Joxuñu ko woon xol,  
 sàmmuñu kóllëreem.  
<sup>38</sup> Teewul mu yërëm,  
 baal leen seen ñaawtéef,  
 ba sàнку leen.  
 Muñ na meram, muñati,  
 te toppul xolam,  
<sup>39</sup> ndax xalaataat ne suuxu neen lañu,  
 di noo guy dem te du délsi.  
<sup>40</sup> Gàntal nañu ko ba tàyyi ca màndiñ ma,  
 teg ko naqar ca ndànd-foyfoy ga.  
<sup>41</sup> Ñu dellu di diiñat Yàlla,  
 di naqaral Aji Sell, ji séddoo Israyil.  
<sup>42</sup> Fàtte nañu ndimbalam la,  
 bés ba mu leen jotee ca noon ba,

43 ba def ay firndeem ca Misra,  
muy kiraamaam ya ca Cowan.

44 Moo soppli deret seen yooni ndox,  
ba naaneetuñu wal ya.

45 Mu wàcce seen biir ndiiraanu weñ  
yu leen di lekk,  
ak mbott yu leen sànk.

46 Mu jox soccet yi seen gàncax,  
jébbal njéeréer yi seen meññeef.

47 Seen garabi reseñ, mu fóome tawab  
yuur,

seen garabi sikomoor, mu fóome waame.

48 Seen jur gu gudd, mu bàyyeek tawab  
yuur,

seeni gàtt, mu bàyyeek sawaray melax.

49 Yàlla sotti leen tàngooru xadaram,  
mu dim sànj ak naqar ak njàqare,  
lépp di gàngooru ndaw yu indiy musiba.

50 Mu afal meram,  
ba musalul seen bakkan,  
xanaa jébbal leen mbas ma.

51 Daa fàdd képp kuy taaw ca Misra  
te juddoo seen digg doole, fa xaymay sèti  
Xam\*.

52 Mu génne ñoñam niy gàtt,  
wommat leen ni gétt ca màndiñ ma,

53 ba yóbbu leen fu wóor te tiituñu;  
seeni noon, géej ga mëdd leen.

54 Mu yóbbu leen fa suufam su sell sa,  
fa tund woowu mu jènde dooleem.

55 Da leena dàqal ay xeet,  
dogal leen céru suuf,  
sancal giiri Israyil ca seeni xayma.

56 Teewul ñuy diināt ak a gantal Yàlla Aji  
Kawe ji,

sàmmuñu ay dénkaaneem,

57 xanaa dèddu, di ko wor ni seeni maam,  
toogadi ni xala gu yolom.

58 Ñu di ko merlook seen bérabi  
jaamookaay,

di ko fiirlook seen jëmmi tuur.

59 Ba ko Yàlla yégee, mer na,  
ba jéppi Israyil lool.

60 Mu gental dèkkuwaayam ba ca Silo,  
xaymaam ba mu sampoon ca doom  
aadama ya.

61 Mu jébbal ngàllo màndargam  
dooleem†,

may gànjaram ca loxol noon ba.

62 Daa bàyyee ñoñam saamaru noon,  
ndax mere yooya séddoom.

63 Seeni waxambaane deeye xare,  
seeni janq lamb;

64 seeni sarxalkat loroo saamar,  
te jètun jooyul.

65 Ca la Boroom bi yewwu ni ku doon  
nelaw,

mel ni jàmbaar ju biiñ xabtal.

66 Mu dóor noon ba yari gannaaw,  
teg leen gacce gu dul fey,

67 ba noppi xalab waa kër Yuusufa,  
te tànnul giirug Efrayim,

68 xanaa tànn giirug Yuda,

taamu tundu Siyoñ wi mu sopp.

69 Mu tabax kèram gu sell, na mu mel fa  
kawa kaw,

dégër ni suuf, si mu samp ba fàww.

70 Mu teg ca tabb Daawuda, jaamam ba,  
jèle ko ca gétti xar ya,

71 fa mu doon topptoo jur ga;  
mu sàmmal ko waa kër Yanqóoba,  
askanu Israyil wi mu séddoo.

72 Daawuda sàmme leen xol bu mucc  
ayib,

jiitee leen manooreem.

## 79

### *Yàlla, feyul nu*

1 Muy kàddug Sabóor, giiroo ci Asaf.

Céy Yàlla, yéefar yi song nañu sa  
moomeel,

teddadil nañ sa kër gu sell,  
gental nañ Yerusalem.

2 Leel nañ tan yi sa néewi jaam ñi,  
leel nañ rabi àll yi sa suuxi wóllère yii.

3 Ñu tuur seen deret nim ndox,  
ba Yerusalem daj,

te amul kuy rob néew yi.

4 Noo ngi nii di mbalitu dèkkandoo yi;  
ñu séqe nu ay kókkaleeki kekku.

5 Aji Sax ji, xanaa doo nu mere ba fàww,

\* 78:51 78.51 sèti Xam mooy Misra ba tey. † 78:61 78.61 màndargam dooleem ji ñu wax fi mooy gaal gi àlluway kóllèrey Yàlla dence.

sa firaange ni sawara ci sunu kaw?

<sup>6</sup> Sippil sa mer yéefar yi la xamul,  
ak réew yi wormaalul sa tur.

<sup>7</sup> Ñoo sèxètoo giirug Yanqóoba,  
gental dèkkuwaayam.

<sup>8</sup> Bul nu topp ñaawtéef ya woon,  
ngalla gaaw noo gatandoo sa yërmande.  
Danu ne dàll, ba ne dett.

<sup>9</sup> Éy Yàlla, yaa nuy musal, wallu nu,  
ba sa seede rafet.  
Xettli nu te baal nu sunuy bàkkaar,  
ba sa woy rafet.

<sup>10</sup> Bul tax yéefar yi naa:

«Ana seen Yàlla?»

May nu, nu gis ni ngay mbugale yéefar yi,  
feye leen sa deretu jaam yi tuuru.

<sup>11</sup> Ñi ñu jàpp, yal na seeni onk àkki fa  
yaw.

Ñi ci tànkì ndee, yal nanga leen musale sa  
doole ju màgg.

<sup>12</sup> Boroom bi, sewal gi la sunuy dèkk  
sewal,

kèpp leen ko juróom yaari yoon,

<sup>13</sup> te nun ñiy sa mbooloo, di sa gétt gi ngay  
foral,

nu di la sant ba fàww,  
di biral sa ngèrèm sèt ba sètaat.

## 80

### *Yàlla, suqilil sa njëmbat*

<sup>1</sup> Mu jëm ci njiital jàngkat yi, dèppook  
galan bu ñuy wax Tóor-tóor yi, di seede  
Sabóor, giiroo ci Asaf.

<sup>2</sup> Éy yaw, Sàmmu Israyil, teewlu nu;

yaw mi jüite Yuusufa ni ag jur,  
yaw mi toogandook malaakay serub yi,  
feqal sag leer.

<sup>3</sup> Dawalal sa njàmbaar, ñeel Efrayim ak  
Beñamin ak Manase,

te wallusi nu.

<sup>4</sup> Éy Yàlla, suqli nu;  
geesoo nu sa leeru kanam, nu raw.

<sup>5</sup> Éy Aji Sax ji, Yàlla Boroom gàngoor yi,  
foo àppal sa mer,

mi ngay wuyoo sa ñaanu mbooloo mi?

<sup>6</sup> Leel nga nuw naqar,  
nàndal nu mbàndum rongooñ,

<sup>7</sup> def nga dèkkandoo di nu xèccoo,  
noon di nu ree.

<sup>8</sup> Éy Yàlla Boroom gàngoor yi, suqli nu;  
geesoo nu sa leeru kanam, nu raw.

<sup>9</sup> Yaa déjjatee reseñ Misra,  
dàq yéefar yi, indi, jëmbataat.

<sup>10</sup> Nga wéex ko,  
mu sampu, law, dajal réew mi;

<sup>11</sup> keppaaram muur tund yi,  
ay caram sàng garabi seedar yu mag yi.

<sup>12</sup> Mu tàllal ay bànqaasam ba géej,  
lawal njebbit la ba dex ga.

<sup>13</sup> Lu tax nga bètt ay miiram,  
ba ku fa jaare witt ca,

<sup>14</sup> mbaam àll di ko ruur,  
ndundati àll di ca for?

<sup>15</sup> Éy Yàlla Boroom gàngoor yi, geesul;  
séentool asamaan, ba gis  
te taxawusi reseñ jii.

<sup>16</sup> Taxawusil njëmbat lii nga jëmbate sa  
ndijoor,

ngarab sii nga dooleelal sa bopp.

<sup>17</sup> Dees koo gor, taal;  
yal na ñii sànkoo sa mbugal.

<sup>18</sup> Yal nanga yiir ki nga tànn,  
kii nga dooleelal sa bopp,

<sup>19</sup> ba dootunu la dèddu.

May nu nu dund, nu wormaal sa tur.

<sup>20</sup> Éy Aji Sax ji, Yàlla Boroom gàngoor yi,  
suqli nu,

geesoo nu sa leeru kanam, nu raw.

## 81

### *Déggal Yàlla, jariñu*

<sup>1</sup> Mu jëm ci njiital jàngkat yi, giiroo ci  
Asaf, te ànd ak xalam gu ñuy wax gitiit.

<sup>2</sup> Sarxolleleen ci Yàlla, mi nuy dooleel;  
xaaculeen ci Yàllay Yanqóoba.

<sup>3</sup> Yékkatileen woy te jiin,  
xalam neex, ànd ak moroom ma.

<sup>4</sup> Wal-leen liit gi ci Terutel weer wi,  
ak weer wu birale bésu màggal.

<sup>5</sup> Loolu wartéefu Israyil la,  
di ndigalu Yàllay Yanqóoba,

<sup>6</sup> di ndénkaane lu mu dénk waa kër  
Yuusufa,

ba Yállay dali ca kaw réewum Misra.  
Baat bu ma xamul laa dégg, mu naan:

<sup>7</sup> «Sippi naa leen,  
woyofal seeni yoxo.

<sup>8</sup> Ngeen jaq, woo ma, ma xettli leen,  
wuyoo leen fa kiiraayal dënn ya,  
te maa leen nattoo fa wal ma ca Meriba.  
Selaw.

<sup>9</sup> Yeen sama ñoñ, dégluleen, ma dénk  
leen.

Éy Israyil, su ngeen ma déglu woon!

<sup>10</sup> Buleen fat tuuru jaambur,  
buleen sujjóotal tuuru doxandéem.

<sup>11</sup> Man, Aji Sax ji, maay seen Yàlla  
ji leen yékkatee réewum Misra.  
Ñaleen ñafeet, ma reggal leen.

<sup>12</sup> «Waaye sama ñoñ déggaluñu ma,  
Israyil gii nangulu ma.

<sup>13</sup> Moo tax ma bërgël leen ak seenug të,  
ñuy wéye seeni pexe.

<sup>14</sup> Éy su ma sama ñoñ déggaloon,  
éy su Israyil toppoon samay nammeel!

<sup>15</sup> Ci saa si laay torxal seeni noon,  
duma seeni bañ,

<sup>16</sup> ba ku bañ Aji Sax ji di ko raamal,  
te àppam du jeex ba fàww.

<sup>17</sup> Kon yeen, ma leel leen ngën-gi-pepp,  
reggal leen lem ju doj xelli.»

## 82

### *Yàllaay àtte ndawi péncam*

<sup>1</sup> Muy kàddug Sabóor, giiroo ci Asaf.

Yàlla toog na, di jiite ndajem boppam,  
di àtte ndawi péncam, naan:

<sup>2</sup> «Dungeen bàyyi àtteb njoblan,  
ak di faral ku bon?

Selaw.  
<sup>3</sup> Sàmmleen àqu néew-ji-dooleek jirim,  
tey àtte yoon ku ñàkk ak ku ndóol.

<sup>4</sup> Walluleen néew-ji-dooleek walaakaana,  
di leen xettli ci ku bon.

<sup>5</sup> «Ndawi péncum Yàlla yii xamuñu,  
dégguñu;  
xanaa di doxe lëndëmu ñaawtéef,  
ba kenuy suuf yépp di jaayu.

<sup>6</sup> «Dama ne ay yàlla ngeen,

\* **83:10** 83.10 Seetal ci *Njiit ya* 7—8.

yeen ñépp di njabootu Aji Kawe ji.

<sup>7</sup> Waaye du leen tee dee ni doom aadama,  
du leen tee daanu ni képp kuy njiit.»

<sup>8</sup> Ngalla Yàlla, taxawal, àtte àddina,  
yaw yaa séddoo xeetoo xeet.

## 83

### *Yàlla, mbugalal noon yi*

<sup>1</sup> Di woyu Sabóor, giiroo ci Asaf.

Éy Yàlla, bul ne cell,

<sup>2</sup> rikk Yàlla, bul tanqamlu, ne patt.

<sup>3</sup> Xoolal sa noon yiy riir,  
sa bañ yi fippu ba téen!

<sup>4</sup> Sa ñoñ lañuy rabatal,  
di mànkool sa séddoo yii.

<sup>5</sup> Ñu ne: «Ayca nu far seen xeet wi,  
ba deesul fàttlikooti turu Israyil.»

<sup>6</sup> Dañoò mànkoo kat,  
te yaw lañu takktool:

<sup>7</sup> muy néegi Edom ak Ismayla,  
néegi Mowab ak Agar,

<sup>8</sup> néegi Gebal, Amon ak Amaleg  
ak waa Filisteeek waa Tir,

<sup>9</sup> réewum Asiri it fekki leen,  
di dooleel askanu Lóot wa.

Selaw.

<sup>10</sup> Def leen na nga defoon waa Majan,  
def ko Sisera ak Yabin ca dexu Kison\*.

<sup>11</sup> Ña nga sànkoo Endor,  
ba doon ub tos fi kaw suuf.

<sup>12</sup> Defal seeni njiit na Oreb ak Seeb,  
def seen kilifa yépp ni Seba ak Salmuna,

<sup>13</sup> ña ne woon: «Nan séddoo parluy Yàlla  
yi.»

<sup>14</sup> Éy Yàlla, wëndeel leen ni callweer,  
ñu mel ni boob mu ngelaw wal.

<sup>15</sup> Éy Yàlla, ni daay di xoyome àll,  
sawara wa jafal tund ya,

<sup>16</sup> yal nanga leen ni toppeek sa dooley  
ngelaw,  
tiitale leen sa ngélén.

<sup>17</sup> Aji Sax ji, sëlëm leen gâcece,  
ba ñu sàkku la.

<sup>18</sup> Yal nañu rus, jaq ba fàww.  
Yal nañu torox, sànkú.

19 Yal nañu xam ne yaw mi tudd Aji Sax ji  
doŋŋ  
yaay Aji Kawe ji yilif àddina yépp.

## 84

### *Ku dal ak Yàlla bég*

1 Mu jëm ci njiital jàngkat yi, ànd ak  
xalam gu ñuy wax gitiit, ñeel askanu Kore  
wu góor.

2 Aji Sax ji Boroom gàngoor yi,  
yaaka sopplub dëkkuwaay!

3 Damaa namm èttub Aji Sax ji,  
di ko gelu ba jeex tàkk,  
jëmm jeek xol bi,  
di xaacul Yàlla jiy dund.

4 Éy Aji Sax ji Boroom gàngoor yi,  
sama buur, sama Yàlla,  
sawoor sax tag, nga fat ko,  
mbelaar it sàkk tàggam,  
denc ay cuujam fa sa sarxalukaay.

5 Ndokklee ku dëkke sa kër,  
di la màggalati.

Selaw.

6 Ndokklee ku lay doolewoo,  
te namma topp njool ma jëm sa kër.

7 Buy jàll xuru Jooyoo,  
mu saf ko bëti ndox,  
céebo sànge xur wa barke,

8 muy gëna am doole,  
ba teewi fa Yàlla ca Siyoŋ.

9 Éy Yàlla Aji Sax ji Boroom gàngoor yi,  
déglul, ma ñaan la!  
Yàllay Yanqóoba, teewlu ma.

Selaw.

10 Éy Yàlla, geesul Buur, sunu kiirilaay,  
ngalla niiral kii nga fal.

11 Benn fan ci sab ètt de  
moo dàq junniy fan feneen.  
Sama taxawaayu bunt kër Yàlla  
moo ma gënal tēraayu biir xaymab ku  
bon.

12 Aji Sax ji Yàllaa mat jant, mat kiiraay;  
yiw ak daraja, Aji Sax ji joxe;  
te du ngēneel lu muy bañal ku mat.

13 Éy Aji Sax ji Boroom gàngoor yi,  
ndokklee ku la wóolu.

## 85

### *Aji Sax ji, suqleeti nu*

1 Mu jëm ci njiital jàngkat yi, di kàddug  
Sabóor, ñeel askanu Kore wu góor.

2 Éy Aji Sax ji, yaa baaxe woon sa réew  
mi,

ba suqli sēti Yanqóoba yi,

3 baal sa mbooloo seeni ñaawtéef,  
jéggal leen bépp bàkkaar.

Selaw.

4 Ba nga xadar ja,  
muñ mer ma.

5 Éy Yàlla mi nuy musal, suqli nu,  
te meddi.

6 Xanaa doo nu mere fàww,  
ba ca sēt yaak sētaat ya?

7 Xanaa dinga leqli sa mbooloo,  
ba ñu man laa bānneexoo?

8 Éy Aji Sax ji, won nu sa ngor,  
baaxe nu sag wall.

9 Woykat ba nee: «Naa déglu  
lu Aji Sax ji Yàlla di wax.»  
Jàmm lay wax wóllēreem ñiy ñoñam,  
ba duñu dellu ci jēfi dof.

10 Wallam aka jege ñi ko ragal,  
te leeram dēgmal sunu réew mii!

11 Ngor ak kóllēree daje,  
njekk ak jàmm saafonte,

12 kóllēre jebbee fa suuf,  
njekk séentoo asamaan,

13 Aji Sax ji it maye ngēneel,  
sunu suuf meññal,

14 njekk jūtu Aji Sax ji,  
di ko xàllal yoonam.

## 86

### *Ma ñaan, bésib njàqare*

1 Mu di ñaanu Daawuda.

Éy Aji Sax ji, teewlu ma, nangul ma,  
damaa ñàkk, néew doole.

2 Maa gore, musal ma;  
maay sa jaam bi la wóolu,  
yaw, sama Yàlla, wallu ma.

3 Éy Boroom bi, baaxe ma;  
yaw laay yendoo woo wall.

4 Boroom bi, bānneexalal sab jaam,

yaw laa dékk sama xol.

<sup>5</sup> Boroom bi, yaa baax, di bale,  
di nàddil sa ngor képp ku lay sàkku.

<sup>6</sup> Éy Aji Sax ji, teewlul, ma ñaan la;  
déglul, ma tinu la.

<sup>7</sup> Bu ma la wooyee bésub njàqare,  
yaa may nangul.

<sup>8</sup> Boroom bi, doo moroomu tuur yi,  
te jëf melul ni sa jos.

<sup>9</sup> Boroom bi, mboolem xeet yi nga sàkk  
ñoo lay sujjóotali,  
di màggal sa tur.

<sup>10</sup> Yaa màgg te yéemey jëf,  
yaw donḡ yaa di Yàlla.

<sup>11</sup> Éy Aji Sax ji, won ma sa nammeel,  
ma doxe sa worma.  
Tënkal sama xol ci ragal la.

<sup>12</sup> Boroom bi sama Yàlla,  
naa la sante xol bu fees,  
màggal la ba fàww.

<sup>13</sup> Ngor lu réy nga ma won,  
sorele maak tēraayu bàmmeel.

<sup>14</sup> Éy Yàlla, nit ñu bew a ma jógal,  
def gàngoor gu néeg, di rébb sama  
bakkan,  
te seetuñu la ci.

<sup>15</sup> Waaye yaw Boroom bi Yàlla, yaa  
ñeewante, yērēm,  
yaa muñ mer, bare ngor ak worma.

<sup>16</sup> Geesu ma, baaxe ma.  
Dooleelal sab jaam,  
wallul ki sa jaam sukk jur!

<sup>17</sup> Ngalla def ma sa firndey mbaax,  
ba bañ yi gis ci, rus,  
ndax yaw Aji Sax, ji ma dimbali, dēfal ma.

## 87

### *Siyon, yaay ndeyu xeet yi*

<sup>1</sup> Ñeel askanu Kore wu góor, di woyu  
Sabóor.

Dëkkub Aji Sax ji, kenu yaa nga ca tund  
yu sell ya.

<sup>2</sup> Aji Sax jee sopp bunti Siyon gii,  
mu gēnal ko fu askanu Yanqóoba dëkke.

<sup>3</sup> Yaw, dëkkub Yàlla bi,  
tuddees na say jaloore.

Selaw.

<sup>4</sup> Yàlla nee: «Ma limaale Misraak Babilon,  
ñi ma xam di dégg.

Xoolal Filisti ak Tir, ak réewum Kuus.  
Nit a ngii, juddoo fa,»

<sup>5</sup> te teewul ñu cosaanale ko Siyon,  
ne kii ak kee fa bokk juddoo,  
te Aji Kawe jee saxal Siyon.

<sup>6</sup> Aji Sax jee lim xeet yi, limaale leen  
ne: «Kii fi la juddoo.»

Selaw.

<sup>7</sup> Kuy fecc ak kuy woy ànd naan:  
«Sunu cosaanoo cosaan fii la!»

## 88

### *Ma jàq, jooy*

<sup>1</sup> Muy woyu Sabóor, ñeel askanu Kore wu  
góor, jēm ci njiital jàngkat yi, dēppook  
galan bu ñuy wax Maalat Leyanot, di  
taalifu Eman, mi bokk ci giirug Esra.

<sup>2</sup> Éy Aji Sax ji, Yàlla ji may musal,  
bëccëg ma yuuxu,  
guddi ma yuuxu fi sa kanam.

<sup>3</sup> Yal na sama ñaan àgg fa yaw;  
teewlul, ma woote wall.

<sup>4</sup> Damaa suur kēll ay musiba,  
ba soreetuma njaniiw,

<sup>5</sup> ñu sóoraale maak ñi wàcci biir  
bàmmeel.

Ma mel ni jàmbaar ju kenn amatul  
yaakaar,

<sup>6</sup> bokk ci néew, yi dara waratul,  
mbaa ku ñu bóom, mu tēdd cim pax,  
faaleetoo ko, xanaa dagg ko, wacc.

<sup>7</sup> Tàbbal nga ma kàmb gu xóot,  
biir xóotey lëndēm.

<sup>8</sup> Yen nga ma sa xadar,  
tance ma sa gannax yépp.

Selaw.

<sup>9</sup> Dàqal nga may xame,  
tax nga ñu seexlu ma;  
ma tēju, génnatuma.

<sup>10</sup> Samay gēt a ngi giim ndax naqar.

Éy Aji Sax ji, maa ngi lay woo bés bu ne,  
dékk lay loxo.

<sup>11</sup> Ku dee, lu muy doyeeti say kéemaan?  
Ndax néew dina jóg di la màggal?

Selaw.

<sup>12</sup> Dees na siiwal sa ngor biir bàmmeel,  
mbaa sa worma ci paxum sànkute?

13 Ana kuy yég say kéemaan ci googu lëndëm?  
Ku lay seedeel njekk réew ma fàtte faloo?

14 Aji Sax ji, man, yaw lay woo wall,  
xëy, kare la gii ñaan, ne la:

15 Éy Aji Sax ji, loo may gântale,  
di ma fuuylu?

16 Mitit bay laatikaaf, sama ngone ba tey;  
sa mbugal yu raglu, ba bopp ubu ràpp!

17 Sa mer mëdd ma,  
sa mbugal yu raglu sànk ma,

18 mëdd ma nim ndox bés bu ne,  
gëndoo fi sama kaw.

19 Dàqal nga ma soppeek xarit,  
ma far xejjoo lëndëm.

## 89

### *Aji Sax ji, loo dige woon?*

1 Muy taalif bu ñeel Etan mi bokk ci giirug  
Esra.

2 Aji Sax ji laay woye ngoram, ba fàww,  
di biral wormaam sèt ba sètaat.

3 Dama ne, sa ngor dàkk la sax,  
fa asamaan nga dëël sa worma.

4 Aji Sax ji nee: «Damaa fas kóllèreek ki  
ma tànn,  
muy Daawuda sama jaam bi ma giñal ne  
ko:

5 “Damay saxal sa askan ba fàww,  
samp sab jal sèt ba sètaat.”»

Selaw.

6 Aji Sax ji, waa asamaan a ngi lay sante  
say jaloore,

ndajem ñu sell ña di la joobee sa worma.

7 Ana kuy dab-dabal Aji Sax ji, fa kawa  
kaw?

Ana ci goney Yàlla yi ku nirook Aji Sax ji,

8 Yàlla, ji ñu terala teral ci jataayu ñu sell  
ñi,

te mu gëna raglu lu ko wër?

9 Yàlla, Aji Sax ji Boroom gàngoor yi,

Ki Sax, ana ku tollook yaw doole?

Yaw mi worma féete fu ne!

10 Yaw yaa man géej gu sàmbaraax;  
gannax ya fuddu, nga dalal.

11 Yaa fàdd Raxab\*, bóom ko,

tasaare say noon ci sa doole.

12 Yaa moom asamaan, yaa moom suuf.

Àddinaak li ci biiram, yaa ko taxawal.

13 Bëj-gànnar ak bëj-saalum, yaa ko  
sàkk.

Tabor ak Ermon, tund ya, di sarxollee sa  
tur.

14 Yaa àttan, jàmbaare;

sa loxo di dooley neen,

sa ndijoor ca kaw!

15 Njekk ak njub a lal sab jal,

ngor ak worma dox jiitu la.

16 Aji Sax ji, ndokkee mbooloo mu la xal  
di sarxollee,

di niitoo saw yiw,

17 ànd di la bége bés bu ne,

sag njekk siggil leen.

18 Seen darajay doole, yaw a.

Boo nu baaxee, nu yokku kàttan.

19 Sunu kiirilaay lii, Aji Sax jeey boroom;

sunu buur bii, Aji Sell ji séddoo Israyil ay  
boroom.

20 Wax nga say wóllère ci peeñu,  
ne leen: «Tànnè naa jàmbaar ci xeet wi,  
dénk ko ndimbal.

21 Gis naa sama jaam Daawuda,

fale ko sama diw gu sell,

22 ànd ak moom, saxal ko,

di ko dooleel.

23 Noon du ko bett,

ku bon du ko torxal.

24 Ay bañam, ma rajaxe;

ay noonam, ma fàdd,

25 sama wormaak sama ngor di ko gunge,

may yokk kàttanam.

26 Géej, ma teg ci loxoom,

dex, ma ne ca tegg ndijooram.

27 Moo ma naa: “Yaay sama baay,

di sama Yàlla, di sama wéeru-mucc.”

28 Te it maa koy def samab taaw,

tiimale ko buuri àddina,

29 sàmmal ko sama ngor ba fàww,

feddlil ko sama kóllère.

30 Damay saxal askanam ba fàww,

yàggal ab jalam ni asamaan.

31 Bu ay sètam wàccee sama yoon,

baña doxe samay ndigal,

32 mbaa ñu xëtt sama dogali yoon,

\* 89:11 89.11 Raxab: mbaa ninki-nànka ba tey.



baña sàmmonteeek samay santaane,  
 33 ma bantale leen seenug moy,  
 dumaa leen seen ñaawtéef.  
 34 Waaye дума ko daggal sama ngor,  
 te дума ko ñàkke worma.  
 35 Дума fecci sama kóllère,  
 te дума toxal sama kàddu.  
 36 Benn yoon laa ko giñ ci sama sellnga,  
 дума fen Daawuda:  
 37 askanam, dàkk;  
 ab jalam fi sama kanam ni jant bi,  
 38 ak weer wi sax ba fàww,  
 dib seede bu wér ca niir ya.»

Selaw.

39 Ndaxam yaw Yàlla, jéppi nga ki nga fal,  
 mere ko, wacc ko.  
 40 Fecci nga sa kóllèreek sab jaam,  
 foq nguuram, detteel ko.  
 41 Bètt nga miiram yépp,  
 saam ay tataam,  
 42 ku fa jaare, jël ca alalam,  
 mu doon mbalitu dèkkandoo yi.  
 43 Yékkati ngay bañam,  
 noonam yépp di ree.  
 44 Dayal nga saamaram,  
 te taxawuwloo ko cib xare.  
 45 Xañ nga ko darajaam,  
 rattax ngànguneem fa suuf.  
 46 Dagg nga fani ngoneem,  
 sang ko gacce.

Selaw.

47 Éy Aji Sax ji, xanaa lii du jeex?  
 Xanaa doo làqu fàww nii,  
 sa mer di boy?  
 48 Bàyyi ma xel, samay fan yàggul.  
 Xanaa du neen a tax nga sàkk mboolem  
 doom aadama?  
 49 Ana kuy dund te du dee?  
 Ku mana rëcc tëraayu bàmmeel?  
 Selaw.  
 50 Boroom bi, ana sa ngor la nga daan jéfe  
 te nga giñale woon ko Daawuda ci sa  
 worma?  
 51 Boroom bi, bàyyil xel ci sa gâceeg jaam  
 ñi,  
 ak xeet yu bare yi ma yenu yépp.  
 52 Aji Sax ji, say noon a ngi sewal  
 buur bi nga fal, ne ko dann.

53 Cant ñeel na Aji Sax ji ba fàww.  
 Amiin, amiin.

## 90

### *Doom aadama yàggul*

1 Muy ñaanu Musaa, góorug Yàlla ga.

Boroom bi, yaa nu masa fat  
 maasoo maas.  
 2 Bala tund yee juddu,  
 bala ngay sos suuf ak àddina,  
 yaa mas di Yàlla, ba fàww.  
 3 Yaay delloo doom aadama ci pënd,  
 ne ko: «Yaw, doom aadama, dellul!»  
 4 Junniy at ci yaw  
 daa gaaw ni démb ak tey,  
 mbete waxtu yu néew ci wattub guddi.  
 5 Yaay buub nit, nelawal ko.  
 Suba mu jebbi nim ñax,  
 6 xëy, jebbi, naat;  
 ngoon mu lax, wowal.  
 7 Soo meree kay, nu sàнку,  
 nga xadaru, nu jàq.  
 8 Sunuy ñaawtéef a ngi janook yaw,  
 te sunu mbóot leer na la.  
 9 Sunu giiru dund nga di nu mere,  
 sunuy fan jeex ni noo guy naaw.  
 10 Sunu àppu dund di juróom ñaar fukki  
 at,  
 ku dëgër ba dëgër, juróom ñett fukk;  
 li ci èpp di coonooku tiis,  
 ne fëyy, nu wéy.  
 11 Ana ku xam sa dooley mer  
 ak sa xadar ju raglu?  
 12 Yal nanga nu xiir ci lim sunuy fan,  
 ba nu mana dawal xel mu rafet.  
 13 Aji Sax ji, délsil, loo deeti xaar?  
 Ngalla yërëmal sa jaam ñi.  
 14 Nu xëy, nga reggal nu sa ngor,  
 nuy sarxolle, bannexoo ko sunu giiru  
 dund.  
 15 Banneexal nu limu fan yi nga nu  
 mbugal,  
 diirub ati tiis yi nu dund.  
 16 Yal na sa jaloore leer sa jaam ñi,  
 sa daraja leer seeni doom.  
 17 Boroom bi sunu Yàlla, ngalla baaxe nu.  
 Sottalal nu sunuy liggéey,  
 rikk, sottalal nu sunuy liggéey.

## 91

### *Aji Sax jee mat kaaraange*

1 Ku dëkke kiiraayu Aji Kawe ji

yaa këroo keppaaru Aji Man ji.  
<sup>2</sup> Dama naa Aji Sax ji:  
 «Yaw laay làqoo, di la fegoo;  
 ngay sama Yàlla ji ma doyloo.»  
<sup>3</sup> Kii kay moo lay musal cig fiir  
 ak loraangey mbas.  
<sup>4</sup> Kiiraayam la lay sànge,  
 nga yiiru, làqu;  
 wormaam yéew la, di la aar.  
<sup>5</sup> Doo ragal njàqarey guddi  
 mbaa fittu bëccëg  
<sup>6</sup> mbaa mbas mu yooteq lëndëm,  
 ak balaa buy fàdde njolloor.  
<sup>7</sup> Junni daanu fi sa wet,  
 fukki junni (10 000) daanu fi sa ndijoor,  
 du tax mu jege la.  
<sup>8</sup> Say gët nga ciy teg,  
 di seetaan ku bon di jot yoolam.  
<sup>9</sup> Yaw mi màkkaanoo Aji Sax ji,  
 Aji Kawe jii di sama rawtu,  
<sup>10</sup> genn loraange du la dab,  
 balaa du jege sa xayma.  
<sup>11</sup> Ay malaakaam la lay booleel,  
 ñu di la sàmm foo jëm.  
<sup>12</sup> Seeni loxo lañu lay leewoo,  
 ba doo fakkastaloow doj.  
<sup>13</sup> Dangay falaxe jaan ak gaynde,  
 di rajaxe ñàngóor ak sibi.

<sup>14</sup> Yàlla da naa: «Kii de man la safoo,  
 ma di ko xettli.  
 Man la xam, te maa koy teg fu wóor.  
<sup>15</sup> Mu woo ma, ma wuyu ko;  
 mook man ci biir njàqare,  
 ma xettli ko, darajaal ko,  
<sup>16</sup> reggal koy fan,  
 baaxe ko samag wall.»

## 92

### *Nu woy bésub Noflaay*

<sup>1</sup> Muy woyu Sabóor ngir bésub Noflaay.

<sup>2</sup> Céy ngëneel li ci sant Aji Sax ji,  
 di la woy, yaw Aji Kawe ji,  
<sup>3</sup> xëye tudd sa ngor,  
 gonloo xamle sa worma,  
<sup>4</sup> xalamu fukki buum ànd ak moroom ma,  
 xeetu kooraa jibandoo.  
<sup>5</sup> Aji Sax ji, yaa ma bégale say jaloore,  
 may sarxolle ci say manoore.

<sup>6</sup> Aji Sax ji, yaa réyi jëf;  
 xóoti pexe.  
<sup>7</sup> Ku ñàkk xel réere ko,  
 ku dofe umple ko.  
<sup>8</sup> Bu ku bon sèqlee nim ñax,  
 képp kuy def lu bon di yokkule,  
 dañoo nara sàнку ba fàww rekk.

<sup>9</sup> Waaye yaw ma fa kaw,  
 yaay Aji Sax ji ba fàww.

<sup>10</sup> Aji Sax ji, sa noon yi kay, ndeke yoo;  
 ndeke yoo sa noon yi, sàнку rekk;  
 defkati mbon ñépp, fëlxxoo rekk.  
<sup>11</sup> May nga ma dooley nagu àll,  
 ma diwoo diw gu bees.  
<sup>12</sup> Maa gis jéllu noon yi,  
 dégg yuuxi ñu bon ñi may tëru.  
<sup>13</sup> Ku jub day naat nig tàndarma,  
 màgg ni seedaru Liban  
<sup>14</sup> gu ñu jëmbat biir kër Aji Sax ji,  
 muy naate sunu biir èttu Yàlla;  
<sup>15</sup> bu màggatee sax di meññ,  
 tooy xepp, sèq lipp,  
<sup>16</sup> di biral njubtey Aji Sax ji,  
 sama cëslaay ji dencul njubadi.

## 93

### *Ma bàkk Aji Sax ji*

<sup>1</sup> Aji Sax jee buur, soloo daraja;  
 Aji Sax jee solu, gaño doole:  
 àddinaa ngii, dëju te raful.  
<sup>2</sup> Sab jal a masa sax,  
 te yaa masa nekk.  
<sup>3</sup> Aji Sax ji, géej a riir,  
 géej a àddu, mu riir,  
 gannax ya rëkk, mu riir.  
<sup>4</sup> Waaye riirum wal mu walangaanoo,  
 ak géej gu sàmbaraaxoo,  
 Aji Sax ja fa kaw a rawati!  
<sup>5</sup> Say santaanee wér te wóor;  
 Aji Sax ji, sellnga la sa kër jagoo  
 bésou bés.

## 94

### *Yàllaay mbugal ku bon*

<sup>1</sup> Éy Aji Sax ji Yàlla, boroom mbugal!  
 Boroom mbugal, feqal sag leer!  
<sup>2</sup> Yaw miy àtte àddina, jógal  
 yool ku bew.

3 Aji Sax ji, fu ku bon kiy àkki?  
Fu ku bon kiy kañu àkki?  
4 Ñu ngi lammíño reewande,  
képp kuy def lu bon di damu.  
5 Aji Sax ji, say ñoñ lañuy dëggaate;  
say séddoo lañuy néewal.  
6 Jëtun akub doxandéem, ñu faat;  
ab jirim, ñu bóom,  
7 te naa: «Ki Sax gisu ci,  
Yállay Yanqóoba jii yégu ko.»

8 Yeen bokk yu dofe yi, moytuleen.  
Gàtt xel yi, kañ ngeen di muus?  
9 Ki jëmbati nopp, da dul dégg a?  
Am ki xari gët, da dul gis?  
10 Kiy yar yéefar yi, da dul mbugalee?  
Du mooy kiy xamal nit?  
11 Aji Sax ji xam na xalaatu nit,  
xam ne cóolóolu neen la.  
12 Ki Sax, ndokklee ki ngay yar,  
tàggat ko ci saw yoon,  
13 dëfal ko ci bési safaan,  
ba keroog ñuy gasal ku bon.  
14 Boroom bi kat du wacc ñoñam muk,  
du bàyyi ay séddoom.  
15 Àtte dina dellu laloo njekk,  
képp ku jub topp ca.  
16 Ana ku may taxawal ci ñu bon ñi?  
Ku may jógal ci biir ñiy def lu bon?  
17 Su ma Aji Sax ji walluwloon,  
tuuti ma fanaani réew ma ne selaw.  
18 Dama noon: «Tarxiis naa!»  
Waaye yaa ma awoo sa ngor.  
19 Ma bare xalaati xol,  
nga dëfal ma, ma bég.  
20 Loo séq ak njiit lu jubadi  
luy yoonal njubadi?  
21 Ñii dañoo mànkoo, di tëru ku jub,  
di teg àtteb dee ku deful dara.  
22 Waaye Aji Sax jee sama rawtu,  
sama Yàlla laay sës, làqu.  
23 Moo leen di képp seen ñaawtéef,  
sàнке leen seenug mbon.  
Sunu Yàlla Aji Sax jee leen di sànk.

## 95

### *Kaayleen, nu sant*

1 Kaayleen, nu sarxolleel Aji Sax ji,

\* 95:9 95.9 Seetal ci *Mucc ga* 17.1-7.

nu xaacul ki nuy sës, mucc.  
2 Nanu ko dikke cant,  
woyal ko, mu riir.  
3 Aji Sax jee Yàlla ju màgg ji,  
buur bu mag bi tiim yállay xeet yépp.  
4 Moo moom xóotey suuf,  
moom colli tund yi,  
5 moom géej, sàkk ko,  
moom jéeri ji mu mooñ.  
6 Nan sëgg, sujjóot,  
sukkal Aji Sax ji nu sàkk.  
7 Mooy sunu Yàlla,  
nuy xeet wi muy foral,  
diy gàtt ciy loxoom.

Bésuub tey yal nangeen dégg kàddoom  
8 ga mu noon: «Buleen tè, na woon fa  
Meriba,  
jantub keroog fa Maasa, ca màndiñ ma,  
9 fa ma seeni maam doon nattoo,  
di ma seetlu te gis la ma def\*.  
10 Ñeent fukki at laa jéppi googu maas,  
ma ne: “Xeet wu ñàkk wormaa ngi,  
te faaleedi samay santaane.”  
11 Moo ma taxa mer, ba giñal leen,  
ne duñu tàbbi fa sama noflaay.»

## 96

### *Buur Yàllaa ngi àttesi àddina*

1 Woyleen Aji Sax ji woy wu yees,  
te àddina yépp woy Aji Sax ji.  
2 Woyleen Aji Sax ji, màggal turam,  
di yéene bés ak bés ne mooy musle.  
3 Siiwal-leen teddngaam fi biir xeet yi,  
xamal waasoo waaso ay jalooreem.  
4 Aji Sax jee màgg, jara santa sant  
te gëna mata ragal lépp lu ñuy jaamu.  
5 Mboolem yàlla yi xeet yiy jaamu,  
yállantu la,  
waaye Aji Sax jee sàkk asamaan.  
6 Màggaay ak daraja, fa moom,  
dooleek taar, fa këram gu sell.  
7 Yeen làngi xeet yi, seedeel-leen Aji Sax  
ji;  
seedeel-leen Aji Sax ji teddngaak doole.  
8 Seedeel-leen Aji Sax ji teddngay turam,  
yékkatil kob sarax, duggaale éttam.

<sup>9</sup> Sujúotal-leen Aji Sax ji làmboo sellnga, te àddina wèrngal kèpp di ko loxal.

<sup>10</sup> Neleen xeet yi Aji Sax jeey buur: àddinaa ngii, dèju te raful.

Mooy àtte xeet yi njub.

<sup>11</sup> Asamaanoo, bégal! Suufoo, bânneexul!

Géejoo, riiral yaak li la fees,

<sup>12</sup> te mbooy mi di jaayu, mook lu ci biiram, garabi àll bi sarxolleendoo,

<sup>13</sup> gatandoo ko Aji Sax jiy dikk,

àttesi àddina, di àtte dun bi njekk,

tey àttee xeet yépp dëggam.

## 97

### *Nguurug Aji Sax ji njekk la*

<sup>1</sup> Aji Sax jeey Buur, na àddina bég; dunoo dun bânneexu.

<sup>2</sup> Ay xambaar a ko yéew, njekk ak njub lal ab jalam.

<sup>3</sup> Sawaraa dox, jiitu ko, di xoyomi noonam wetoo wet,

<sup>4</sup> ay melaxam leeral àddina, waa àddina gis, di pat-pati;

<sup>5</sup> tund yi ne soyox seey fi kanam Aji Sax ji boroom àddina sépp.

<sup>6</sup> Asamaan a ngi biral njekkam, xeetoo xeet di gis darajaam.

<sup>7</sup> Gàcce ñeel na kuy jaamu jëmmi tuur, di puukarewoo ay yállantu.

Yeen yállay xeet yépp, sújjóotal-leen kii,

<sup>8</sup> Siyon dëgg ca, bég, waa Yuda it di bânneexoo àttey Aji Sax jii.

<sup>9</sup> Aji Sax ji, Aji Kawe ji tiim suuf sépp; yaaka mágga mág, ba sut tuuroo tuur.

<sup>10</sup> Yeen soppey Aji Sax ji, bañleen lu bon. Aji Sax jeey sàmm ay wóllereem,

di leen musal ci ku bon.

<sup>11</sup> Jub, leerlu; jubal, bég.

<sup>12</sup> Yeen aji jub ñi, bânneexooleen Aji Sax ji, sante ko sellngaam.

## 98

### *Woyleen Aji Sax jiy àttesi*

<sup>1</sup> Muy kàddug Sabóor.

Woyleen Aji Sax ji woy wu yees, moo def ay jaloore, kàttanam ak sellngay dooleem jox na ko ndam li.

<sup>2</sup> Aji Sax jee xamleg wallam, feeñal njekkam, xeet yi gis.

<sup>3</sup> Moo dencal banni Israyil ngoram, dencal ko wormaam,

àddina ba mu daj di gis ni nu sunu Yàlla walloo.

<sup>4</sup> Yeen àddina sépp, xaacul-leen Aji Sax ji, sampleen, sarxolle te woy!

<sup>5</sup> Xalamal-leen Aji Sax ji, woyal ko, xalamal ko, woyati.

<sup>6</sup> Wal-leen liit yi, wal bufta yi te xaacul Buur Aji Sax ji!

<sup>7</sup> Na géej riirandook li ko fees, mook àddinaak li ci biiram,

<sup>8</sup> dex tàccu, tund sarxolleendoo,

<sup>9</sup> gatandoo ko Aji Sax jiy dikk, àttesi àddina,

di àtte dun bi njekk, tey àttee xeet yépp dëgg.

## 99

### *Aji Sax ji buur bu sell la*

<sup>1</sup> Aji Sax jeey Buur. Yeen xeet yi, ragal-leen ko!

Moo toogandook malaakay serub yi. Suufoo, soo yeboo, yèngu!

<sup>2</sup> Aji Sax ji fi Siyon a mág, kawé, tiim xeetoo xeet.

<sup>3</sup> Sa tur weeka mág te raglu. Sàbbaal-leen ko.

—Kee sell!

<sup>4</sup> Buur, jéfe yoon mooy dooleem, te yaa saxal njub, yoon ak njekk ci askanu Yanqóoba.

<sup>5</sup> Mággal-leen sunu Yàlla, Aji Sax ji, te sújjóot fa ndëggastalam.

—Kee sell!

<sup>6</sup> Musaak Aaróona bokk ciy sarxalkatam, Samiyel bokk ca ñay tudd turam.

Ñuy ñaan Aji Sax ji, mu di leen nangul.

<sup>7</sup> Fa biir taxaaru niir wa la waxeek ñoom, ñu topp kàdduy seedeem ak dogalu yoonam ba mu leen joxoon.

8 Céy sunu Yàlla Aji Sax ji, yaa leen ngir dagge ci dëkkub Aji Sax jii képp kuy nanguloon,  
 di seen Yàlla ju leen di baal,  
 te di leen mbugale seeni jëf ju bon.  
 9 Mànggal-leen sunu Yàlla, Aji Sax ji,  
 te sujjóot fa tundam wu sell wa.  
 —Sunu Yàlla Aji Sax jee sell!

## 100

### *Aji Sax jee baax*

1 Muy jàngi cant.

Yeen waa àddina sépp,  
 xaacul-leen Aji Sax ji.  
 2 Nangeen jaamoo Aji Sax ji mbég,  
 dikke koy woy!  
 3 Seedeleen ne Aji Sax jee Yàlla.  
 Moo nu sàkk, nuy ñoñam,  
 di gàttam yi muy foral.  
 4 Nangeen dugge këram ag cant,  
 dugg èttam di manggal,  
 sant ko, teral turam.  
 5 Aji Sax jee baax, gore ba fàww,  
 worma ja sax dàkk!

## 101

### *Buur a ngi jaayanteek Yàlla*

1 Ñeel Daawuda, di kàddug Sabóor.

Ngor ak yoon laay woy.  
 Yaw Aji Sax ji laay joobe.  
 2 Naa teewlu yoonu maandute.  
 Ana kañ nga may dikkal?  
 Naa doxe maandute  
 fi sama biir waa kër.  
 3 Caaxaani neen, xooluma;  
 jëf ju wàcc yoon, bugguma,  
 taqu ma fenn.  
 4 Kuy nas njekkar, sore ma;  
 lu bon, xawma ko.  
 5 Kuy jëw moroomam, ma wedamal;  
 ku danjiiral ak ku reew, muñaluma la.  
 6 Ku dëgg ci réew mi, ma geesu,  
 ngir fat ko.  
 Te kuy wéye maandute,  
 kookoo may liggéeyal.  
 7 Kuy njublan du tooge sama kër,  
 kuy fen du taxaw sama kanam.  
 8 Maay xëy, sànk képp ku bon ci réew mi,

ngir dagge ci dëkkub Aji Sax jii képp kuy def lu ñaaw.

## 102

### *Yàlla, bu ma rey*

1 Muy ñaanu néew-ji-doole ju sonn, bay diis Aji Sax ji njàqareem.

2 Éy Aji Sax ji, déglul, ma ñaan la;  
 yal na sama yuux àgg fa yaw.  
 3 Bu ma dummóoyu bés sub njàqare;  
 teewlu ma,  
 gaawe ma sama bés sub woote!  
 4 Samay fan a ngi wéy ni saxar,  
 sama yax yi mel nib taal.  
 5 Sama xol bi wow ni ñax mu xuur,  
 ba lekk safatu ma.  
 6 Damaa jàq, di onka onk,  
 ba desey yax.  
 7 Ma mel nim tan ci màndin mi,  
 mbete looy cib gent.  
 8 Nelaw të;  
 ma mel ni picc mu wéetoo puju néeg.  
 9 Bés bu ne noon yi di ma sewal;  
 ñi may ñaawal di móoloo sama tur.  
 10 Lekkuma xanaa di diwoob dóom,  
 toroxloo;  
 te lu ma naan, tuur ca rongooñ,  
 11 te sa mer ak sa xadar a tax,  
 nde yaa ma fab, xalab.  
 12 Ker a ngi law, nara mëdd samay fan.  
 Maa ngi wowat nim ñax.  
 13 Waaye yaw Aji Sax ji, yaay des ba fàww,  
 saw tur saxal maasoo maas.  
 14 Yaw yaay taxaw, ñeewante Siyon,  
 ndax baaxe ko jot na,  
 àpp ba kay mat na.  
 15 Sa jaam ñeeka sopp doji dëkk bii ñu  
 màbb,  
 ñoo ñeewante tojiti gentam bii.  
 16 Na xeet yi wormaal turu Aji Sax ji,  
 buuri àddina sépp wormaal darajaam,  
 17 nde Aji Sax jee tabaxaat Siyon,  
 nara feeñeg leeram.  
 18 Mooy nangul aji tumurànke,  
 xeebul ñaanam.  
 19 Nañu bindal lii maasug èllëg,  
 ba xeet wu sosoogul manggal Ki Sax,  
 20 nde Aji Sax jee jéere fu sellam fa ca  
 kaw,

di niire suuf fa asamaan,  
<sup>21</sup> ngir teewlu onki ñi ñu tëj,  
 nara ubbi ñi dee di seen àtte,  
<sup>22</sup> ba ñu siiwal turu Aji Sax ji fi Siyon,  
 mǎggale ko fi Yerusalem,  
<sup>23</sup> kera ba xeet yiy bokk daje,  
 ñook réew yi, ngir jaamu Aji Sax ji.

<sup>24</sup> Sama digg doole la ma semmale,  
 gǎttal samaw fan.  
<sup>25</sup> Ma ne: «Éy sama Yàlla, maasoo maas,  
 say at du jeex.  
 Bu ma yóbbóo sama diggi fan.  
<sup>26</sup> Bu yàgg nga samp suuf,  
 sàkke asamaan say yoxo.  
<sup>27</sup> Ñoom ñuy jeex, yaw nga sax,  
 ñoom ñépp ràpp ni mbubb,  
 nga soppì leen niy yère, sànni;  
<sup>28</sup> te yaw ngay kenn ki,  
 te say at amul kem.  
<sup>29</sup> Sa doomi jaam ñeey dëkk;  
 seen askan sax fi sa kanam.»

## 103

### *Ma sant Aji Sax ji*

<sup>1</sup> Ñeel Daawuda.

Naa sant Aji Sax ji ci saa xol bii,  
 saa jëmm jépp di sàbbaal sellngay turam!  
<sup>2</sup> Naa sant Aji Sax ji ci saa xol bii,  
 te baña fàtte mboolem xéewalam!  
<sup>3</sup> Moo lay baal foo ñaawe,  
 di la wéral foo woppe.  
<sup>4</sup> Mooy jot sa bakkan,  
 kaalaa la ngor ak yërmande,  
<sup>5</sup> di reggal sa bakkan bǎnneex,  
 yeesalal lag ndaw,  
 nga mǎggataale doole nig jaxaay.

<sup>6</sup> Aji Sax jeey def njekk,  
 di àtte jépp néew-ji-doole.  
<sup>7</sup> Moo xamal Musaa ay nammeelam,  
 xamal bǎnni Israyil ay jëfam.  
<sup>8</sup> Yërmandeeku yiw, fa Aji Sax ji.  
 Moo muñ mer te bare ngor.  
<sup>9</sup> Saxoowul di toppe,  
 dencul mer ba fàww.  
<sup>10</sup> Du sunuy bàkkaar la nu mbugal,  
 du sunuy ñaawtéef la nu fey.  
<sup>11</sup> Ni asamaan tiime suuf,

ni la ngoram yiire ku ko ragal.  
<sup>12</sup> Ni penku soree sowu,  
 ni la nu soreleek sunu mbugali tooñ.  
<sup>13</sup> Ni baay yèreme doom,  
 ni la Aji Sax ji yèreme ku ko ragal.  
<sup>14</sup> Moo xam sunu bind,  
 di bàyyi xel ne pënd lanu.  
<sup>15</sup> Nit aki fanam di saxayaay  
 suy law ni tóor-tóoru àll;  
<sup>16</sup> ngelaw li wal, mu ne mes,  
 mel ni masu faa nekk.  
<sup>17</sup> Waaye ngoru Aji Sax ji naka jekk  
 ñeel na fàww ku ko ragal;  
 njekkam ñeel sètaati  
<sup>18</sup> kuy sàmm kóllèreem,  
 di saxoo jéfe tegtali yoonam.  
<sup>19</sup> Aji Sax jee samp asamaan ab jalam,  
 nguuram ñank lépp.  
<sup>20</sup> Yeen malaaka yi, santleen Aji Sax ji,  
 yeen jambaar yu mag yiy jéfe ndigalam,  
 di sàmm kàddoom.  
<sup>21</sup> Santleen Aji Sax ji, yeen gàngoori  
 xareem yépp,  
 yeen dagam yiy jéfe coobareem.  
<sup>22</sup> Yeen bindeef yépp, nangeen sante Aji  
 Sax ji  
 fépp fu mu tiim.  
 Naa sant Aji Sax ji ci saa xol bii!

## 104

### *Mǎggal-leen ki sàkk lépp*

<sup>1</sup> Naa sant Aji Sax ji ci saa xol bii!  
 Aji Sax ji sama Yàlla, yaaka mǎgga mǎgg.  
 Teddngaak daraja nga soloo,  
<sup>2</sup> làmboo leer ni mbubb,  
 firi asamaan ni ndimo,  
<sup>3</sup> xadd say néegi kaw ci biir ndox mi,  
 def niir yi say waruwaay,  
 di daagoo kaw laafi ngelaw,  
<sup>4</sup> def ngelaw yi say ndaw,  
 ay sawara boy, di say jawriñ.  
<sup>5</sup> Yaa dëj suuf ciy kenoom,  
 deesu ko yèngal ba fàww.  
<sup>6</sup> Yaa ko sànge xóotey géej ni mbubb,  
 ndox ma taxaw, tiim tund ya.  
<sup>7</sup> Nga gëdd, ndox ma fëx;  
 nga dënu, mu daw,  
<sup>8</sup> wale kaw tund ya, wàccsi xur ya,  
 di bérab ba nga ko beral.

9 Ag kemu nga teg, du ko wees,  
te dootu muur suuf si.  
10 Yaa ballal bëti ndox ya ca xur ya,  
ñuy wale digg tund ya,  
11 ngay nàndal bépp ndundatu àll,  
di wëgg mbaamu àll,  
12 njanaaw dëkke ca wet ga,  
baatam jibe fa garab ya.  
13 Yaa suuxate tund ya fa sa néegi kaw,  
sa liggéey reggal suuf.

14 Yaa saxalal jur gi ñax  
ak gàncax gu doom aadama di bey,  
ba génnee ab dund fi suuf,  
15 dugub di ko dooleel,  
biiñ di bégal xolam,  
ag diw di leeral kanamam.  
16 Garabi Aji Sax ja, seedari Liban,  
ya mu jëmbat, regg nañu,  
17 picc tagge ca,  
xodd dëkke garab gu dul ruus,  
18 tund wu mag ñeel kéwéli àll,  
xunti di rawtub daman\*.  
19 Yaa sàkk weer, muy takku jamono,  
sàkk jant, mu xam waxtuw fatoom.  
20 Yaa def lëndëm, mu guddi;  
bépp rabu àll di ca dox,  
21 gaynde gu ndaw ñaral am pàddam,  
di sàkkoo dundam fa Yàlla.  
22 Bu jant fenkee, ñu dellu,  
goori ca seeni pax,  
23 doom aadama tàmbali kër-këram,  
di yendoo liggéey ba ngoon.

24 Éy Aji Sax ji, yaa bare loo liggéey,  
te lépp di xel mu rafet.  
Suuf daa fees ak say càkkéef.  
25 Géej a ngee réy te yaa,  
la fay yëngu maneesu koo lim,  
muy ndundat lu mag ak lu ndaw.  
26 Fa la gaal di daw,  
ak ngaaka la nga bind, mu di fa foye.  
27 Ñoom ñépp yaw lañuy séntu,  
ngir bu jotee, nga leel leen,  
28 may leen lu ñu for;  
ñëbal leen, ñu suur ngëneel.  
29 Soo leen làqoo, ñu tiit;  
nga rocci seen noo, ñu saay,  
dellu di pënd.

\* 104:18 104.18 daman xeetoo naak njomboor.

30 Yaay yónnee sag noo, ñu nekk;  
te yaay yeestal li ci kaw suuf.  
31 Yal na darajay Aji Sax ji sax,  
yal na Aji Sax ji bégey jalooreem.  
32 Kee naan jàkk suuf, muy lox;  
mu laal tund yi, ñuy saxar!  
33 Naa woy Aji Sax ji li feek may dund,  
naa kañ sama Yàlla li feek may tooy.  
34 Sama xalaat bii, yal na ko neex.  
Man de maa ngi bége Aji Sax ji!  
35 Yal na bàkkaarkat raaf fi kaw suuf,  
te ku bon noppee nekk.  
Naa sant Aji Sax ji ci saa xol bii.  
Màggal-leen Ki Sax!

## 105

### *Aji Sax ji sàmm na kóllère*

1 Santleen Aji Sax ji, tudd turam,  
xamley jalooreem ci biir xeet yi,  
2 woy ko, tagg ko,  
yégle mboolemi kéemaanam!  
3 Damooleen turam wu sell.  
Kuy wut Aji Sax ji, yal na am bannexu  
xol.  
4 Gëstuleen Aji Sax jeek dooleem,  
di ko sàkku saa su ne.  
5 Fàttlikuleen ay jalooreem  
aki misaalam aki àtteem.  
6 Yeen askanu Ibraayma, jaamam ba,  
yeen ñiy sèti Yanqóoba, ñiy tànnéefam,  
7 kee di sunu Yàlla Aji Sax ji,  
di àtte suuf sépp,  
8 di fàttliku ba fàww kóllèreem,  
di bàyyi xel ba ci junniy maas kàddoom  
9 ga mu digoon Ibraayma,  
giñal ko Isaaxa,  
10 dëggalal ko Yanqóoba, sàrtal ko,  
fase kook Israyil mooma kóllère gu sax.  
11 Mu ne: «Yaw laay jox réewum Kanaan,  
muy sa cér, nga séddoo.»  
12 Ba bànni Israyil dee ñu néew,  
diy doxandéem ca réew ma,  
13 di wëreelu ci biir xeetoo xeet,  
ak nguuroo nguur,  
14 mayul nit mu not leen,  
te yaral na leen ay buur,  
15 ne leen: «Buleen laal samay tànnéef,  
buleen lor samay yonent.»

16 Moo wàcce ab xiif ca réew ma,  
dagge fa luy gub,  
17 yónnee ku leen jiitu,  
muy Yuusufa ma ñu jaayoon njaam,  
18 tànk ya, ñu jéng jéng yu tar,  
baat ba, ñu yeewe caqu weñ.  
19 Kàddug Aji Sax ji di nattu Yuusufa,  
ba keroog pirim ma dikk,  
20 Buur a yónni ku ko yiwi,  
ku yilifi xeet a ko tijji.  
21 Mu sas ko mu jiite këram,  
di saytu mboolem alalam,  
22 ba saña tënk jawriñi buur ci cooba-  
reem,  
tey xelal mag ña.  
23 Israyil agsi Misra,  
muy nganug Yanqóoba ga ca réewum  
Xam\*.

24 Aji Sax ji giiral xeetam wa,  
ba ñu gëna bare seeni noon,  
25 mu xiir waa Misra ci dëddu ñoñam,  
ñuy fexeel jaamam ñooña.  
26 Mu yónni Musaa, jaamam ba,  
tànn Aaróona, boole ca,  
27 ñu sotal ci seen biir firndeem ya mu  
waxoon,  
muy kéemaan ya ñu def ca réewum Xam.  
28 Moo yónnee lëndëm, lëndëmal,  
te Musaa ak Aaróona gântaluñu  
kàddoom.  
29 Moo soppo seen ndoxum réew deret,  
rey seeni jën,  
30 feesal seen réew ay mbott  
yu àkki seen biir néegi buur ya.  
31 Moo àddu, weñ ya dikk,  
rayentaan ya dajal seen réew ma.  
32 Mu def seenub taw tawub yuur,  
sawaray melax jafal seen réew ma.  
33 Mu dóor seen figg ak reseñ,  
fóom seen garabi réew ma.  
34 Mu àddooti, ay soccet dikk,  
di njéeréer yu wees ab lim,  
35 ñu lekk luy gancax ca seenum réew,  
lekk lu suuf sa meññ.  
36 Moo fàdd luy taaw ca seenum réew,  
muy lu jékka soqekoo seen digg doole.

37 Mu génne leen, ñu yóbbaaale xalis ak  
wurus,

te kenn tërëful ca seeni giir.  
38 Misra daa bég ba ñu demee  
ndax tiitaange lu ñu leen tiital.  
39 Mu firiw niir, yiire leen,  
ak sawara, ñu niitoo guddi.  
40 Ñu sàkku, mu wàcceey picci  
përëntaan,  
teg ca reggal leen mburum asamaan.  
41 Mu bënnu doj, ndox ma ball,  
di dex, wale joor gu wow.  
42 Daa bàyyi xel kàddoom gu sell,  
ga mu waxoon Ibraayma, jaamam ba.  
43 Moo génne ñoñam, ñu bég,  
moo génne tànnéefam ña, ñuy sarxolle.  
44 Mu jox leen suufi yéefar ya,  
ñu jagoo ñaqa xeet ya,  
45 ngir ñu sàmm ay dogali yoonam,  
topp ndigali yoonam.  
Màggal-leen Ki Sax!

## 106

### *Israyil di wor, Yàlla di wóor*

1 Màggal-leen Ki Sax!  
Santleen Aji Sax ji, kee baax,  
kee saxoo ngoram!  
2 Ana ku mana tudd jaloorey Aji Sax ji?  
Ana ku mana teesal woyam?  
3 Ndokklee kuy sàmm yoon,  
di def njekk fu mu tollu.  
4 Éy Aji Sax ji, séddaale ma ci sa yiwu  
ñoñ,  
ngalla, dikke ma sag wall,  
5 ma gis ngëneelu ñi nga tànn,  
di bannexoo sa bannexu xeet wi,  
tey damoondook ñoom ñi nga séddoo.  
6 Noo bàkkaar, nook sunuy maam;  
noo def lu ñaaw, def lu bon.  
7 Sunuy maam seetuñu ca say kéemaan  
ca Misra,  
bàyyiwuñu xel ca sa ngor lu réy,  
xanaa di fippu ca géeg ga, géegu Barax ya.  
8 Teewul Yàlla wallu leen ngir turam,  
ba xamle njambaaram.  
9 Dafa gëdd géegu Barax ya, mu ne seren;  
xóotey géeg mel ni màndiñ, mu jàlle leen,  
10 musal leen ci loxol bañaale,  
11 ndox ma mëdd bañ ya,

\* 105:23 105.23 Israyil ak Yanqóoba, kenn ki la; réewum Xam mooy Misra ba tey.



kenn desu ca.

<sup>12</sup> Ca lañu gëm ay waxam,  
woy ko.

<sup>13</sup> Nes tuut ñu fàtte jëfam ja,  
xaaratuñu ndigalam,

<sup>14</sup> di ñaf-ñafi ca màndiñ ma,  
di diiñat Yàlla ca àll ba.

<sup>15</sup> Yàlla jox leen la ñuy sàkku,  
wàccaaleel leen woppi ràgg.

<sup>16</sup> Ba ñu demee ba iñaane Musaa ca dal  
ba,  
boole ca Aaróona mu sell ma, nitu Aji Sax  
ja,

<sup>17</sup> suuf a ne ñafeet, wonn Datan\*,  
mèddaale gàngooru Abiram;

<sup>18</sup> sawara ne jippét fa seen biir,  
tàkk ba lakk ñu bon ñooña.

<sup>19</sup> Tëgg nañu aw nag ca tundu Oreb,  
di sujjóotal jëmm ju ñu móol,

<sup>20</sup> di jënde seen tedngay Yàlla ja  
jëmmu nag wuy for um ñax.

<sup>21</sup> Daño fàtte Yàlla ma leen di musal  
te def jaloore ca Misra.

<sup>22</sup> Mooy kéemaan ya fa réewum Xam†,  
kiraama ya ca géēju Barax ya.

<sup>23</sup> Yàlla da leen doon sànk,  
bu dul woon ak Musaa, xejjam  
ba ko kar, àtte leen,  
mu giif, ba fàkkasu leen.

<sup>24</sup> Daño gàntal réew mu neex,  
gëmuñu kàddug Yàlla,

<sup>25</sup> xanaa di xultoo seen biiri xayma,  
baña déggal Aji Sax ji.

<sup>26</sup> Moo tax mu giñal leen  
ne dina leen tëral fa màndiñ ma,

<sup>27</sup> tëral seen askan ci biir xeet yi,  
wasaare leen ci réew yi.

<sup>28</sup> Ñuy darook tuurum Baal Pewor,  
di lekk lu ñu sarxal ay yàlla yu amul  
bakkan,

<sup>29</sup> di merloo Yàlla ci seeni jëf,  
ba mbas ne dàll fa seen biir.

<sup>30</sup> Fineyas taxaw, àtte;  
mbas ma dal,

<sup>31</sup> muy njekk lu ñu ko waññal

tey ak èllëg.

<sup>32</sup> Ñu merlooti Yàlla ca ndoxum Meriba  
ma,

muy loraangey Musaa te ñoo ko waral.

<sup>33</sup> Ñoo naqaral Musaa,  
ba mu wax wax ju ko rëcc.

<sup>34</sup> Te it faagaagaluñu yéefar,  
ya leen Aji Sax ji waxoon,

<sup>35</sup> xanaa di jaxasook yéefar yooya,  
di roy seeni jëf,

<sup>36</sup> di jaamu seeni tuur,  
mu mujj dig fiir ca ñoom.

<sup>37</sup> Ñuy sarxalal rab ya  
seen doom yu góor ak yu jigéen,

<sup>38</sup> di tuur deretu ñu deful dara,  
te muy seen deretu doom yu góor ak yu  
jigéen

ya ñu sarxalal tuuri Kanaaneen ña,  
deret ja sobeel réew ma,

<sup>39</sup> seeni jëf sobeel leen,  
ndax seen bokkaale.

<sup>40</sup> Aji Sax ji mere ñoñam,  
sib xeet woowu mu séddoo,

<sup>41</sup> ba tax mu teg leen ca loxol yéefar ya,  
seeni bañ yilif leen,

<sup>42</sup> seen noon ya not leen,  
ñu torox ca seeni loxo.

<sup>43</sup> Ay yooni yoon la leen xettli,  
teewul ñuy nas pexey fippu,

ba suux ci seeni ñaawtéef.

<sup>44</sup> Mu gis nag seen njàqare,  
dégg seeni tinu,

<sup>45</sup> bàyyi xel ci kóllëreem ak ñoom,  
topp ngoram lu réy, ba giif,

<sup>46</sup> xiir ña leen jàpp ñépp,  
ñu yërëm leen.

<sup>47</sup> Éy Aji Sax ji, sunu Yàlla, wallu nu,  
génnee nu ci xeet yi, dajale nu,  
nu sante la sa sellnga,  
di sagoo sa tednga.

<sup>48</sup> Santleen Aji Sax ji, Yállay Israyil  
cant gu sax dàkk, ba fàww.

Na ñépp ne: «Amiin!»

Màggal-leen Ki Sax!

\* **106:17** 106.17 Datan: seetal ci *Màndiñ ma* 16.27, 31-33. † **106:22** 106.22 réewum Xam mooy Misra ba tey.

## 107

### *Aji Sax jeey xettlee*

- 1 Santleen Aji Sax ji, kee baax,  
kee saxoo ngoram!  
2 Waxleen lii, yeen ñi Aji Sax ji jot,  
jote leen ci loxol bañ,  
3 dajalee leen fa réew ya,  
jële leen penkook sowu,  
ak bëj-gàннаar ak wetu géej.
- 4 Ñee ngi taxawaaloo màndinj mu wéet,  
gisuñu dëkkuwaay,  
5 boole xiif ak mar,  
ba bakkan di tàggoo.  
6 Ñu jàq, woo Aji Sax ji wall,  
mu xettlee leen seen njàqare,  
7 jaarale leen yoon wu jub,  
ngir ñu àgg cib dëkk.  
8 Nañu sante Aji Sax ji ngoram  
ak kéemaanam yi ñeel doom aadama yi.  
9 Mooy màndal put gu wow,  
di feesal ngéneel biir bu wéet.
- 10 Ñee ngi dëkke lëndëm gu tar,  
ñu yeewe leen jéngi weñ yu tar.  
11 Ñoo gantal waxi Yàlla,  
néewal ndigalal Aji Kawe ji.  
12 Mu teg leen naqar, ba torxal leen,  
ñu ne nërëm te kenn walluw leen.  
13 Ñu jàq, woo Aji Sax ji wall,  
mu walloo leen seen njàqare,  
14 xar seeni jéng yaar,  
génnee leen lëndëm gu tar.  
15 Nañu sante Aji Sax ji ngoram  
ak kéemaanam yi ñeel doom aadama yi.  
16 Moo rajaxe bunti xàñjar,  
damm galani weñ.
- 17 Ñu dofe ñalee ngi topp yoonu moy,  
loroo seeni ñaawtéef,  
18 ba luy ñam di daw seen yaram,  
ñu jege bunti ndee.  
19 Ñu jàq, woo Aji Sax ji wall,  
mu walloo leen seen njàqare.  
20 Daa yónnee kàddoom, wéral leen,  
kéfe leen cim yeer.  
21 Nañu sante Aji Sax ji ngoram  
ak kéemaanam yi ñeel doom aadama yi.  
22 Nañ ko sarxal saraxi cant

tey sarxolle, siiwale koy jalooreem.

- 23 Ña ca des a ngi war gaal, dugg géej,  
di liggéeye mbeex mu ne xéew.  
24 Ñooñoo seede jaloorey Aji Sax ji,  
ak kéemaanam ya fa xóote ya.  
25 Day àddu, sant ngélén,  
mu yékkati gannax yi.  
26 Gannax ya fettax ba ca kawa kaw,  
xàwwikoo fa, tàbbi xóote ya.  
Ñu jàq ba fit ne soyox,  
27 di jang, di kayan-kayani niy màndikat,  
pexe jeex.  
28 Ñu jàq, woo Aji Sax ji wall,  
mu génnee leen seen njàqare,  
29 dalal ngélén la,  
gannax ya selaw,  
30 ne tekk, ñu bég,  
mu gindi leen ba fa ñu bégga teer.  
31 Nañu sante Aji Sax ji ngoram  
ak kéemaanam yi ñeel doom aadama yi.  
32 Nañu ko kañe ndajem mbooloo mi,  
di ko màggale péncu mag ñi.
- 33 Mooy soppo wali ndox màndinj,  
soppo bëti ndox suuf su ne seren,  
34 suuf su nangu doon jooru xorom  
ndax mbonug ña ko dëkke.  
35 Mooy soppo màndinj it, ndox ya taa,  
soppo suuf su ne seren bëti ndox;  
36 dëel fa ñu xiif,  
ñu sanc fab dëkk, dëkke,  
37 ji ay tool, jëmbat ay reseñ,  
mu meññ, ñoral,  
38 Aji Sax ji barkeel, ñu giira giir,  
te wàññiwul seenug jur.  
39 Bu ñu wàññikoo, ba néew doole  
ndax noteel ak coonooku tiis,  
40 Aji Sax ji sib seen njiit yi leen not,  
wërloo leen àll bu amul yoon.  
41 Waaye mooy teggil néew-ji-doole  
coonoom,  
ful njabootam nig jur,  
42 aji jub ñi gis ko, bég;  
mboolem ku bon wedam.  
43 Ku xelu ku ne, na ràññee lii  
te seede li Aji Sax ji jéfe ngoram.

## 108

### *Yàlla, may nu ndam*

1 Muy woyu Sabóor, ñeel Daawuda.

2 Yàlla, dogu naa,  
damay woy, di la kañ;  
sama jëmm jépp di la woy.

3 Na mboolem xalam yewwu,  
ma yee leeru njël.

4 Aji Sax ji, dama lay gërëm ci biir xeet yi,  
kañ la ci biir waaso yi.

5 Sa ngor a màgg ba sut asamaan,  
sa worma àkki fa kawa kaw.

6 Éy Yàlla, yaa màgg ba sut asamaan,  
sag leer tiim suuf sépp.

7 Walloo nu sa ndijoor,  
nangul ma,  
ba say soppe xettliku.

8 Yàllaa àddoo fa këräm gu sell,  
ne: «Maay damu, dogat suufas Sikem,  
séddale xuru Sukkóot.

9 Maa moom diiwaanu Galàdd, moom  
Manase,  
Efrayim di sama mbaxanam xare,  
Yuda di sama yetu nguur,

10 réewum Mowab di sama ndabal raxas-  
ukaay,

Edom, ma teg tànk;  
Filisti, ma xaacoo fa.»

11 Éy Yàlla, ana ku may yóbbu dëkk ba  
tata wër?

Ku may jiite ba Edom?

12 Yàlla, xanaa du yaa nu wacc?

Éy Yàlla, yaa baña ànd ak sunu mboolooy  
xare?

13 Ngalla dimbali nu ci bañaale;  
doom aadama, wallam neen la.

14 Nook Yàlla, nu def njàmbaar;  
moom mooy not sunuy noon.

## 109

### *Yal na Yàlla mbugal noon bi*

1 Mu jëm ci njiital jàngkat yi, ñeel  
Daawuda, di kàddug Sabóor.

Éy Yàlla mi may sant, bul tanqamlu!

2 Ku bon ak kuy fen a ma waxal,  
sosal ma,

3 tance ma kàdduy mbañeel,  
song ma ci dara.

4 Ma ji nit cofeel, mu sosal ma;  
te man ma di ko ñaanal.

5 Sama jëf ju baax, loraange lañu ma ko  
feye,  
sama cofeel, ñu feye ma ko mbañeel.

6 Yal nanga fal ku bon ci kaw kii,  
ab soskat féete ko ndijoor.

7 Bu ñu koy àtte, yal nañu ko yey,  
te yal na ñaanam walbatiku di bàkkaar.

8 Yal naw fanam gàtt,  
keneen jagoo sasam.

9 Yal nay doomam diy jirim,  
jabaram dib jëtun,

10 ay doomam di tambaambaluy yalwaan,  
dèddu seeni gent, dem tàllal ay loxo.

11 Yal na ko kuy feyeeku futti,  
ay doxandéem foqati ñaqam.

12 Yàlla bu ko kenn ji ngor,  
yàlla bu kenn baaxe jirim yi ko wuutu.

13 Yal na askanam dagg.

Balaa geneen maas a wéy, yal na seenu  
tur fey.

14 Yal na Aji Sax ji bàyyi xel ñaawtéefi  
maamam.

Yàlla bu bàkkaar ndeyam faru.

15 Yal na seeni moy sax fi kanam Aji Sax  
ji.

Yal na seen tur dagge fi kaw suuf.

16 Moo séddul ngor,  
di topp ku néewle te sonn,  
seen xol jeex, mu bóom.

17 Moo bèggoon di móoloo, yal na ko  
képpoo;

soppul ag ñaan it, yal na ko barke sore.

18 Móolook sol mbubb la yemale,  
yal nañu duy nim ndox ay móoloom ci  
yaramam,

mu seeb ci biiri yaxam nig diw.

19 Yal nay móoloom di mbubbam,  
te di laxasaay gu mu saxoo.

20 Lii, yal na ko Aji Sax ji feye ñi may sosal,  
di teg lu ñaaw ci sama der.

21 Waaye Boroombi Aji Sax ji,  
defal ma li sa tur laaj.

Yaa baax, gore, xettli ma.

22 Damaa néewle te sonn,  
sama xol dagg, ba jeex tàkk.

23 Maa ngi tàggoo ni keru ngoon,  
ñu di ma fél ni soccet.  
24 Samay óom a ngi nasax ndax ñàkka  
lekk,  
desewuma lu moy yaxi neen.  
25 Maa ngii, ñu di ma sewal,  
ku ma gis, wëcc bopp.  
26 Éy Aji Sax ji, sama Yàlla, dimbali ma,  
walloo ma sa ngor,  
27 ba ñu xam ne lii sa loxoo,  
xam ne yaw Aji Sax ji, yaa ko def.  
28 Ñooy móolu, yaw nga barkeel;  
ñoo ma jógal, ñooy torox,  
man, ma bég, Sang bi!  
29 Yal na ñi may sosal sàngoo toroxte,  
làmbóo gâce ni mbubb.  
30 Ma àddu, santa sant Aji Sax ji,  
di ko màggale digg mbooloo mu yaa.  
31 Mooy féete ndijoor néew-ji-doole,  
musal ko ci ku koy teg àtteb dee.

## 110

### *Yàlla fal na nitam*

1 Ñeel Daawuda, di kàddug Sabóor.

Aji Sax ji daa wax sama Sang, ne ko:  
«Toogeel sama ndijoor,  
ba ma def say noon sa ndëggastal.»

2 Sa nguur la Aji Sax ji saxal, dale ko fa  
Siyon.

Yilifal noon yi la wër!

3 Sa mbooloo taxawal seen bopp,  
sa bésub xare.  
Na nga soloo darajaak sellnga,  
faboo fa njël sosoo,  
diy ndaw, wàccsil la, mbeteb lay.

4 Aji Sax jee ko giñ,  
te du dellu gannaaw:  
«Yaa dib sarxalkat ba fàww,  
topp dayob Melkisedeg\*.»

5 Sang baa ngi fi sa ndijoor  
te mooy rajaxe buur yi, bés bu meree.

6 Mooy mbugal xeet yi, jal seeni néew,  
di rajaxe kilifay àddina, ba mu daj.

\* **110:4** 110.4 Melkisedeg: buurub Salem la woon, di sarxalkat bu Yàlla faloon ci jamonoy Ibraayma, maanaam ñeenti téeméeri at laata Aaróonaa doon ab sarxalkat.

7 Déeg ba feggook yoon wa, Buur a cay  
naan,  
te moo ko tax di siggi.

## 111

### *Yàlla la ay mbiram sax*

1 Màggal-leen Ki Sax!

Naa sante Aji Sax ji léppi xol  
ci biir ñu jub ñi bokk jataay.

2 Liggéeyi Aji Sax ji réy na,  
ku ko safoo di ko gëstu.

3 Jëfam teddnga laak daraja,  
njekkam di sax ba fàww.

4 Moo dogal ñuy fàttlikuy kéemaanam;  
Aji Sax ji boroom yiw ak yërmande.

5 Mooy leel ku ko ragal,  
di bàyyi xel kóllëreem gi ba fàww.

6 Won na ñoñam dooley jëfam,  
ba mu leen joxee suufu xeet yi.

7 Ay jëfam dëgg laak njub,  
tegtalam yépp mata wóolu,

8 laloo dëgg ak njub,  
te sax dàkk ba fàww.

9 Moo yónnee xeetam wall,  
fas ak ñoom kóllëre gu sax.  
Kee sell te jara ragal!

10 Ragal Aji Sax ji di ndoortel rafet xel,  
dég-dég bu rafet ñeel ku koy wéye.  
Moo yeyoo cant ba fàww.

## 112

### *Ku ragal Yàlla gis njekkam*

1 Màggal-leen Ki Sax!

Ndoklee ku ragal Aji Sax ji,  
di tàqamtikoo ay santaaneem.

2 Aw askanam ay am doole ci réew mi.  
Ku jub saw xeet barkeel,

3 alal ak koom am sa kër,  
sag njekk sax dàkk.

4 Ceeñeeru biir lëndëm jollil na ku jub  
ak ku baax, di boroom yërmande ak  
njekk.

5 Ki baaxle mooy ki laabiir, di leble,  
di jëflante cig njub.

6 Ku jub du tërëf muk, te dees na ko fàttliku ba fàww.

7 Du ragal dég-dég bu tiis,  
xel ma day dal, mu wóolu Aji Sax ji,

8 fit wa toog, du ragal,  
ba kera muy gis noonam jóoru.  
9 Mooy nàddil néew-doole yi,  
njekkam sax dàkk,  
dooleem di yokku, ànd ak daraja.  
10 Soxor bi da koy gis, mer,  
iñaan bay yéyu, jeex tàkk;  
nde soxor, yaakaar ju tas rekk.

## 113

### *Buur Yàllaay walloo*

1 Màggal-leen Ki Sax!  
Yeen ñiy jaamu Aji Sax ji, màggal-leen ko,  
màggal-leen turu Aji Sax ji!  
2 Yal nañu teral turu Aji Sax ji  
tey ak èllég!  
3 Li dale penku ba sowu,  
màggal-leen Aji Sax ji.  
4 Aji Sax jee kawee, tiim xeetoo xeet,  
teddngaam sut asamaan!  
5 Ana ku mel ni sunu Yàlla Aji Sax ji,  
ki kaweel ab jalam, toog,  
6 di jээр asamaan ak suuf?  
7 Mooy yékkatee ku néewle fa suuf,  
di seppée ku sonn cib sën,  
8 bokkal ko jataayu kilifa,  
ya jiite xeetam.  
9 Mooy dèel jigéen ju tële woona jur,  
may ko mbégtém njureel.  
Màggal-leen Ki Sax!

## 114

### *Yàllaay walloo dooleem*

1 Ba Israyil bàyyikoo fa Misra,  
ba waa kër Yanqóoba dèddu làkk-kat  
yooya,  
2 ca la Yuda doon kër Aji Sax ji,  
giirug Israyil googu doon ab jagleem.  
3 Géej gaa leen gis, daw,  
dexu Yurdan a deltu gannaaw,  
4 tund yu mag yiy curpi niy kuuy,  
di curpeendook tund yu ndaw yi niy  
mbote.  
5 Moo géej, loo xewle bay daw?  
Yaw, dexu Yurdan, looy deltu gannaaw?

6 Tund yu mag yee, lu ngeen di curpi niy  
kuuy?  
Yeen, tund yu ndaw yi, lu ngeen di curpi  
niy mbote?

7 Suufee, loxalal Boroom bi,  
Yàllay Yanqóoba mii,  
8 ki soppliw doj ndox mu taa,  
xeer wu ne seren, mu def bētu ndox.

## 115

### *Ku wóolu Yàlla barkeel*

1 Bu muy nun, Aji Sax ji, bu muy nun,  
saw tur nga wara teral,  
ngir sa ngor ak sa worma.  
2 Bu yéefar yi ne muk:  
«Moo ñii, ana seen Yàlla?»  
3 Te yaw sunu Yàlla, yaa ngi asamaan,  
di def lu la soob.  
4 Seeni tuur xaalis laak wurus,  
di liggéeyu doom aadama:  
5 am gémmiñ te du wax,  
ami gèt te du gis,  
6 ami nopp, du dégg,  
ami wakkan, du xañtu,  
7 ay yoxo it te du yég,  
ay tànk it te du dox,  
du xàddmiku sax.  
8 Ñi sàkk yii tuur, yal nañu mel ni ñoom,  
ñook ñi leen wóolu ñépp.  
9 Éy Israyil, wóolul Aji Sax ji,  
moo lay jàpple, di la aar.  
10 Yeen waa kër Aaróona, wóoluleen Aji  
Sax ji,  
moo leen di jàpple, di leen aar.  
11 Yeen ñi ragal Aji Sax ji, wóoluleen Aji  
Sax ji,  
moo leen di jàpple, di leen aar.  
12 Aji Sax jee nuy bàyyi xel, di nu barkeel,  
di barkeel kër Israyil,  
di barkeel kër Aaróona.  
13 Aji Sax jeey barkeel ku ko ragal,  
mag ak ndaw.  
14 Yal na leen Yàlla ful,  
ful seeni doom.  
15 Yal nangeen barkeeloo Aji Sax ji,  
ki sàkk asamaan ak suuf.  
16 Asamaan, asamaanu Aji Sax jee,

suuf la dénk doom aadama.  
 17 Du ku dee mooy màggal Ki Sax,  
 du kenn ku tàbbi réewum tàbbi-selaw!  
 18 Nun, nooy sargal Ki Sax,  
 tey ak èllég.  
 Màggal-leen Ki Sax!

## 116

*Ma sant Yàlla mi ma jot*

1 Maa bëgg Aji Sax ji: maa ko woo,  
 dagaan ko, mu dégg ma.  
 2 Teewlu na ma moos,  
 dama koy woo li feek may dund.  
 3 Buumi ndee a ma laawoon,  
 njàqarey njaniiw dab ma,  
 ma dajeek naqar aku tiis.  
 4 Ma woo Aji Sax ji wall, ne ko:  
 «Ngalla Aji Sax ji, xettli ma!»  
 5 Aji Sax jeey boroom yiw ak njekk,  
 sunu Yàllaay boroom yërmande.  
 6 Aji Sax jeey aar ku xamul àddina;  
 tumurànke woon naa, mu wallu ma.  
 7 Bu ma yeboo sama xel dal,  
 Aji Sax ji baaxe na ma!

8 Xettli nga ma, ba deewuma,  
 jàpple ma ba tërëfuma,  
 feral nga it samay rongooñ.  
 9 Damay topp Aji Sax ji  
 ci biir réewum aji dund ñi.  
 10 Ba ma naa: «Torox naa ba toskare,»  
 teewul may ànd ak ngëm.  
 11 Maa jàqoon ba naan:  
 «Ñéppi fen-kat lañu!»  
 12 Ana lu may njukkale Aji Sax ji,  
 li mu ma baaxe lépp?  
 13 Xanaa ma yékkati kaasu Aji Sax  
 jiy misaal wallam,  
 te may tudd turam.  
 14 Samay digeek Aji Sax ji laay matal  
 fi kanam ñoñam ñépp.

15 Wóllërey Aji Sax ji,  
 bakkanam ñor na Aji Sax ji.  
 16 Aji Sax ji, maay sab jaam,  
 maay sab jaam, di sa doomu jaam bi ma  
 sukk jur.  
 Yaa yiwi samay buum,  
 17 yaw laay sarxalal saraxu cant,  
 te turu Aji Sax ji laay tudd.

18 Samay digeek Aji Sax ji laay matal  
 fi kanam ñoñam ñépp,  
 19 fi ètti kër Aji Sax ji,  
 fi digg Yerusalem.  
 Màggal-leen Ki Sax!

## 117

*Na ñépp ànd ak Israyil sant Yàlla*

1 Yeen xeetoo xeet, màggal-leen Aji Sax ji,  
 réewoo réew, kañleen ko.  
 2 Moo nu xéewale ngoram gu réy,  
 te wormay Aji Sax jee sax dàkk.  
 Màggal-leen Ki Sax!

## 118

*Aji Sax jeek man, ma daan*

1 Santleen Aji Sax ji, kee baax,  
 kee saxoo ngoram!  
 2 Rikk Israyil, neleen:  
 «Kee saxoo ngoram!»  
 3 Rikk waa kër Aaróona, neleen:  
 «Kee saxoo ngoram!»  
 4 Rikk yeen ñi ragal Aji Sax ji, neleen:  
 «Kee saxoo ngoram!»

5 Ci xat-xat laa wooye Ki Sax wall,  
 Ki Sax wuyu ma, yaatal ma.  
 6 Aji Sax jeek man, duma tiit.  
 Ana lees ma manal?  
 7 Aji Sax jeek man, di ma dimbali,  
 may seetaan bañ yi.  
 8 Làqoo Aji Sax jee gën  
 wóolu doom aadama,  
 9 Làqoo Aji Sax jee gën  
 wóolu garmi.  
 10 Yéefar yépp a ma sam,  
 ma bëmëx leen ci dooley Aji Sax ji.  
 11 Ñu sam maa sam,  
 ma bëmëx leen ci dooley Aji Sax ji.  
 12 Naka lañu ma sam niy yamb,  
 jekki ne kamaj ni taalu boob,  
 ma bëmëx ci dooley Aji Sax ji.  
 13 Dees maa jañaxa jañax, ma ter-teri,  
 Aji Sax ji dimbali ma.

14 Sama doole, sama kaaraange, Ki Sax a;  
 te mooy sama wall tey.  
 15 Ndam aki sarxolle ca xaymay ñu jub ña,  
 ndijooru Aji Sax jee def njàmbaar!  
 16 Ndijsa la Aji Sax ji xàcci,

ndijooru Aji Sax jee def njàmbaar.

17 Duma dee moos, xanaa dund,  
ba nettali jaloorey Ki Sax.

18 Ki Sax mbugal na maa mbugal,  
waaye waccu ma, ma dee.

19 Ubbil-leen ma bunti njekk,  
ma dugg santi Ki Sax.

20 Buntu Aji Sax jaa ngi;  
ñu jub ñee ciy dugge.

21 Dama lay sant, yaa ma nangul,  
wallu ma tey.

22 Doj wi tabaxkat yi beddi woon,  
moo mujj doju coll wi.

23 Lii de, Aji Sax jee ko def,  
nu gis ko, yéemu.

24 Bésub tey jii, Aji Sax jee;  
nan ko bége, bannexoo ko.

25 Ngalla Aji Sax ji, wallu nu.  
Ngalla Aji Sax ji, may nu ndam.

26 Yal na Yàlla barkeel ki dikke turam.  
Nu ngi leen di ñaanale fi néegu Aji Sax ji.

27 Aji Sax jee di Yàlla, di nu leeral.  
Ñabbleen car yi, mǎggale,  
te dox ba ca béjjéni sarxalukaay ba.

28 Yaa di sama Yàlla, ma di la sant;  
céy sama Yàlla, dama lay kañ.

29 Santleen Aji Sax ji, kee baax,  
kee saxoo ngoram.

## 119

### *Aji Sax ji, sa kàddu laay bége*

1 Ndokklee yaw mi maandu,  
di wéye yoonu Aji Sax ji.

2 Ndokklee yaw miy wattu kàdduy  
seedeem,  
di ko sàkkoo sa léppi xol.

3 Doo def njubadi,  
di topp fi mu la jaarloo.

4 Aji Sax ji, yaa joxe sa tegtal  
yi ñu wara toppa topp.

5 Yal naa saxoo  
di sàmm sa dogali yoon,

6 di teewlu loo santaane,  
ba duma rus.

7 Damay gèstu sa ndigal yu jub,  
di la sante xol bu dèggu.

8 Sa dogali yoon laay sàmm;  
ngalla bu ma wacca wacc.

9 Ana nu ndaw mana sellalee?

Xanaa di sàmm sa kàddu.

10 Sama léppi xol laa lay sàkkoo,  
bul ma wacc, ma wàcc say santaane.

11 Sama xol laa làq say wax,  
ngir bañ laa moy.

12 Jaajëfe, yaw Aji Sax ji,  
jàngal ma sa dogali yoon.

13 Maa àddu, tari  
mboolem lu sa kàddu digle.

14 Topp say tegtal laay bége  
mbégtem jépp alal.

15 Say tegtal laay jàngat,  
di teewlu say xàll.

16 Sa dogali yoon, ma tàqamtikoo,  
sa kàddu, ma fat ba fàww.

17 Sang bi, baaxe ma, ma dund,  
ba mana sàmm sa kàddu.

18 Ngalla muril saay gèt, ma niir  
sa kéemaani yoon.

19 Doxandéem laa fi kaw suuf,  
bu ma làq say santaane.

20 Fu ma tollu maa ngi namm say ndigal  
ba sama xol ñiis.

21 Rëbb nga ñu reew, ñu alku,  
ñiy dèddu say santaane.

22 Musal ma ciy kókkaleeki xaste,  
maa ngi topp sa kàdduy seede.

23 Te it kàngam yaa ngi may tooge,  
te may gèstu sa dogali yoon, Sang bi.

24 Sa kàdduy seede laay safoo,  
ñuy sama xejj yi may xelal.

25 Maa ngi ne ñàyy ci pënd bi,  
musal ma, yaa ko dige.

26 Wax naa la samay jaar-jaar, nga wuyu  
ma;  
ngalla xamal ma sa dogali yoon.

27 Dégtal ma li sa tegtal yiy firi,  
ma jàngat say kéemaan.

28 Naqaru xol sonal na ma,  
may ma ndégërlaay, yaa ko dige.

29 Sorele maak yoonu fen,  
te baaxe ma saw yoon.

30 Yoonu worma laa taamu,  
jàkkaarlook say ndigal.

31 Éy Aji Sax ji, damaa langaamoo sa  
kàdduy seede,  
ngalla bu ma rusloo.

32 Sa yoonu santaane laay daw,

yaa may may xol bu tàlli.

<sup>33</sup> Aji Sax ji, xamal ma li sa dogali yoon  
yiy firi,

ma topp ko ba mu jeex.

<sup>34</sup> May ma dég-dég, ma topp saw yoon,  
toppe ko xol bu tàlli.

<sup>35</sup> Jiite ma ci sa xàllu santaane yi,  
mooy sama bânneex.

<sup>36</sup> Joyantil sama xol, mu féeteek sa  
kàdduy seede,

te dummóoyu alal ju lewul.

<sup>37</sup> May ma, ma fénati caaxaani neen,  
te musale ma saw yoon.

<sup>38</sup> Sang bi, sottalal ma sa dige  
bi nga digook ku la ragal.

<sup>39</sup> Moyale ma gâcce gi ma ragal;  
yaa baaxi ndigal.

<sup>40</sup> Maaka namm say tegtal,  
musale ma sag njekk!

<sup>41</sup> Aji Sax ji, yaa ko dige,

dikke ma sa jëfi ngor ak sa wall,

<sup>42</sup> ba ku ma kókkali, ma am tontam.  
Maa doylloo sa kàddu.

<sup>43</sup> Bu ma xañ muk kàddug dëgg,  
say àtte laa yaakaar kat.

<sup>44</sup> Maay topp saw yoon, sàlloo ko,  
saxoo ko ba fàww,

<sup>45</sup> di daagoo sago,  
nde say tegtal laay sàkku.

<sup>46</sup> Maay àgge ay buur sa kàdduy seede,  
te дума rus.

<sup>47</sup> Maay bége sa santaane  
yi ma sopp,

<sup>48</sup> di yóotu sa santaane yi ma sopp,  
di jàngat sa dogali yoon.

<sup>49</sup> Bàyyil xel li nga ma dig, Sang bi;  
moom laa yaakaar.

<sup>50</sup> Lii laay muñe samaw naqar,  
sa kàddoo may dundal.

<sup>51</sup> Nit ñu bew ñi ñaawal nañu ma lool,  
waaye dëdduwma saw yoon.

<sup>52</sup> Éy Aji Sax ji, damaa fàttliku sa àtte ya  
woon,

daldi muñ.

<sup>53</sup> Sama xol daa fees ndax ñu bon  
ñiy wacc saw yoon.

<sup>54</sup> Sa dogali yoon laay woyantoo,  
fu ma mana sance.

<sup>55</sup> Aji Sax ji, tudd naa la guddi,  
di sàmm saw yoon.

<sup>56</sup> Lii laa séddoo,  
maa topp sa tegtali yoon.

<sup>57</sup> Aji Sax ji, yaw laa séddoo;  
di digee sàmm sa kàddu.

<sup>58</sup> Sama léppi xol laa sàkkoo saw yiw,  
ngalla baaxe ma, yaa ko dige.

<sup>59</sup> Damaa seetlu sama jëfin,  
dëpp, topp sa kàdduy seede.

<sup>60</sup> Maa ngi gaawtu,  
yeexewma say santaane moos!

<sup>61</sup> Buumi ñu bon ñaa ngi may laaw,  
te sàgganewma saw yoon.

<sup>62</sup> Xaaju guddi laay jóg,  
di la sante sa àttey njekk.

<sup>63</sup> Maa xejjoo képp ku la ragal,  
tey topp say tegtal.

<sup>64</sup> Aji Sax ji, sa ngor dajal na àddina;  
xamal ma sa dogali yoon.

<sup>65</sup> Aji Sax ji, def nga la nga dige woon,  
Sang bi, defal nga ma ngëneel.

<sup>66</sup> Xamal ma ngëneeli àtte ak xam-xam,  
maa doylloo say santaane.

<sup>67</sup> Maa jàddoon, nga дума ma,  
léegi sa kàddu laay sàmm.

<sup>68</sup> Yaaka baax tey baaxe;  
rikk xamal ma say tegtal.

<sup>69</sup> Ñu bew ñee yàq sama der aki sos,  
te ma topp say tegtal, wéetal la.

<sup>70</sup> Ñu ngi nii, seen bopp yi, tafas;  
te man may tàqamtikoo saw yoon.

<sup>71</sup> Ngëneel la ma дума yi jural,  
ngir jànge naa ci say tegtal.

<sup>72</sup> Sa ngëneelu yoon wi nga digle  
moo ma gënal ay junniy xalis ak wurus.

<sup>73</sup> Say loxoo ma sàkk, tabax ma,  
may ma ag dëgg, ma mokkal say san-  
taane,

<sup>74</sup> ñi la ragal gis ma, bég;  
nde sa kàddu laa yaakaar.

<sup>75</sup> Aji Sax ji, ràññee naa ne say ndigal  
njekk la,

te worma nga ma dumaa.

<sup>76</sup> Ngalla dëfale ma sa ngor;  
Sang bi, yaa ko dige.



77 Nanga ma ganesee sa yërmande, ma dund;

saw yoon ay sama bänneex!

78 Yal na ñu bew ñi torox,  
ñoo ma lor ak seeni sos,  
te man may gëstu say tegtal.

79 Yal na ku la ragal waññiku fi man,  
ba xam sa kàdduy seede.

80 Yal naa toppe say tegtal xol bu mat  
sëkk,  
ba duma rus.

81 Sàkku naa sag wall ba xol jeex,  
di xaar sa kàddu.

82 Séentu naa sab dige, ba gët giim;  
kañ nga may xettli?

83 Damaa mujj ras ni mbuusum der mu  
saxar jàpp,  
waaye sàgganewma say tegtal.

84 Ñaata fan laay toogati, Sang bi?  
Kañ ngay mbugal ñi ma topp?

85 Ñu bew ñi gasal nañu ma ay yeer,  
yu saw yoon diglewul.

86 Sa santaane yépp worma la;  
te dees maa toppey sos, wallu ma!

87 Nes tuut ñu sàнке ma fi kaw suuf,  
te man dëdduwma say tegtal.

88 Musale ma sa ngor,  
ba jëfe sa kàdduy seede.

89 Aji Sax ji, sa kàddoo sax dàkk,  
taxaw jonn fa asamaan.

90 Sa worma, ba maasoo maas,  
yaa samp suuf, saxal ko.

91 Ci sa ndigal la lépp taxawe ba tey,  
lépp ànd, di la jaamu.

92 Su ma bégewuloon saw yoon,  
sànkoo sama toskare ji.

93 Duma fàtte mukku say tegtal,  
ci nga may musale.

94 Yaa ma moom, wallu ma;  
say tegtal laay sàkku.

95 Man la ñu bon ñi tëru, nar maa sànk,  
waaye sa kàdduy seede laay niir.

96 Gis naa ne lu mat lu ne am na kemu,  
waaye sa santaane mat ba wees kemu.

97 Maaka sopp saw yoon,  
di ko jàngat bés bu jot.

98 Li ma xelal ba ma raw noon yi,  
mooy sa santaane, yi ma jagoo fàww.

99 Maa gëna ñaw képp ku may jàngal,  
nde sa kàdduy seedeey sama njàngat.

100 Maa ëpp mag ñi dég-dég,  
nde say tegtal laa topp.

101 Luy yoon wu aay, ma moyu,  
ba mana sàmm sa kàddu.

102 Say santaane it dëdduwma ko,  
nde yaw yaa ma jàngal.

103 Sa kàddooka maa neex,  
ba dàqal ma tem-temu lem!

104 Say tegtal laay ràññee,  
ba tax ma bañ luy yoonu fen.

105 Sa kàddu laay niitoo samay tànk,  
muy leeral samaw yoon.

106 Giñ naa te di ko dëggal,  
ne dinaa sàmmonteek sa ndigali njekk.

107 Toskare naa ba ci lool;  
éy Aji Sax ji, musal ma, yaa ko dige.

108 Aji Sax ji, rikk nangul ma kàdduy cant  
yi ma lay jébbal,

te xamal ma say ndigal.

109 Sama bakkan ci xott saa su ne,  
waaye fàttewuma saw yoon.

110 Ñu bon ñi ma gasal um pax  
taxul ma wàcc say tegtal.

111 Maa séddoo fàww sa kàdduy seede,  
loolooy seral sama xol.

112 Damaa dogoo jëfe sa dogali yoon,  
saxoo ko ba mu jeex.

113 Maa bañ kuy ñarale,  
maa sopp saw yoon.

114 Sama rawtu, sama kiiraay, yaw a;  
sa kàddu laay xaar.

115 Yeen ñiy def lu bon, xiddileen ma,  
ba ma sàmmonteek sama santaaney  
Yàlla.

116 Yaa ko dige, dooleel ma, ma dund;  
bul tas sama yaakaar.

117 Kàttanal ma, ma raw,  
di yittewoo say tegtal, ba fàww.

118 Yaay xarab képp ku wàcc sa dogali  
yoon,  
ay peXeem neen.

119 Yaay tonni ni purit képp ku bon fi kaw  
suuf,

moo tax ma sopp sa kàdduy seede.

120 Sama yaram a ngi daw ndax ragal la,  
ragal say àtte.

121 Def naa njub, def njekk;  
 bu ma wacce ñi may néewal.  
 122 Sang bi, gàddu ma, ma am jàmm,  
 bu ma ñu bew ñi néewal.  
 123 Séentu naa sag wall ak sa kàddug  
 njekk,  
 ba saay gët giim.  
 124 Sang bi, jéfeel ma sa ngor,  
 xamal ma sa dogali yoon.  
 125 Sab jaam laa, may ma, ma ràññee,  
 ba xam sa kàdduy seede.  
 126 Aji Sax ji, jëf jot na,  
 ñee ngi jalgati saw yoon!  
 127 Maa sopp say santaane,  
 mu gënal ma wurus ba ci wurusu ngalam.  
 128 Moo tax foo tegtale, ma rafetlu,  
 lépp luy yoonu fen, ma bañ.  
  
 129 Sa kàdduy seede kéemaan la,  
 moo tax ma di ko toppé xol.  
 130 Sa pirim kàddu day leeral,  
 di xelal ku xeluwul.  
 131 Damaa ña ñafeet, di àppaat,  
 ngir namm say santaane.  
 132 Éy geesu ma te baaxe ma,  
 ni nga baaxook ñi sopp sa tur.  
 133 Dooleelal ma samay tànk, yaa ko dige,  
 te bu ma lenn lu bon man.  
 134 Jot ma ci noteelu doom aadama,  
 ma mana topp say tegtal.  
 135 Sang bi, geesoo ma sag leer,  
 te xamal ma sa dogali yoon,  
 136 ay wali rongooñ ay wale saay gët,  
 ndax sàmmeesul saw yoon.  
  
 137 Aji Sax ji, yaaka jub,  
 te say àtte di yoon.  
 138 Yaa santaane sa kàdduy seede ci njekk  
 ak worma ju yaa.  
 139 Damaa gis bañ yiy sàggane say wax,  
 xol bu tàng di ma rey.  
 140 Sang bi, maaka sopp sa kàddu  
 gi set ni weñ gu ñu xelli!  
 141 Ñàkk naa solo, faaleesu ma,  
 waaye sàgganewma say tegtal.  
 142 Sag njekk moo dig njekk ba fàww,  
 te saw yoon a dëgg.  
 143 Njekkar ak njàqare dab ma,  
 say santaane di sama bàmneex.  
 144 Sa kàdduy seedee di njekk ba fàww,

may ma, ma ràññee, ba dund.  
 145 Aji Sax ji, woo naa la wall lu ma man,  
 wuyu ma, ma topp sa dogali yoon.  
 146 Dama ne: «Wóoy, wallu ma,  
 ma sàmme sa kàdduy seede.»  
 147 Damaa jëlu, di la woo,  
 di xaar sa kàddu.  
 148 Damay xoolle guddi gépp,  
 di jàngat sa kàddu.  
 149 Aji Sax ji, sama baat bii, teewloo ko sa  
 ngor,  
 te musal ma ni nga baaxoo muslee.  
 150 Rabatkati peXe yaa ngi jegesi,  
 di nit ñu sore saw yoon.  
 151 Waaye yaw Aji Sax ji, jege nga,  
 te sa santaane yépp a dëgg.  
 152 Yàgg naa xam ne sa kàdduy seede  
 wax la joo saxal dàkk.  
  
 153 Xoolal sama coono te xettli ma;  
 saw yoon déy, sàgganewma ko.  
 154 Àtte ma, ba jot ma;  
 musal ma, yaa ko dige.  
 155 Ku bon sore sa wall,  
 ngir sàkkuwul sa dogali yoon.  
 156 Aji Sax ji, sa yërmande yaa na;  
 musal ma ni nga ko baaxoo.  
 157 Ñi ma topp ak ñi ma baña bare,  
 te taxul ma dëddu sa kàdduy seede.  
 158 Damaa gis workat yi, sib leen;  
 ñoo sàmme sa kàddu.  
 159 Seetlul ni ma soppé say tegtal.  
 Éy Aji Sax ji, musal ma, yaa gore!  
 160 Sa mboolem kàddu dëgg la,  
 sa ndigal yépp di njekk, sax dàkk.  
  
 161 Ay kilifaa ma topp ci dara,  
 te teewul ma wormaal sa kàddu.  
 162 Man de, maa ngi bége sa kàddu  
 ni ku for alal ju bare.  
 163 Fen, ma bañ, ba sib;  
 sa yoon, ma sopp.  
 164 Juróom yaari yoon ci bés  
 màggale naa la ko say àttey njekk.  
 165 Jàmm ju baree ñeel ku sopp sa yoon,  
 te dara du ko fakktal.  
 166 Aji Sax ji, sa wall laa yaakaar,  
 say santaane laa jéfe.  
 167 Sama xol laa toppé sa kàdduy seede,  
 te sopp koo sopp.

168 Damaa topp say tegtal ak sa kàdduy  
seede,  
fépp fu ma jaar kay yaa ngi ciy gis.

169 Aji Sax ji, yal na sama yuux àgg fa yaw;  
may ma, ma ràññee, yaa ko dige.

170 Yal na sama dagaan àgg fa yaw;  
xettli ma, yaa ko dige.

171 Naa xaacu, woyal la,  
yaa may jàngal sa dogali yoon.

172 Naa woye sa kàddu,  
loo santaane, njekk la.

173 Yal nanga ma dikke ndimbal,  
say tegtal laa taamu.

174 Aji Sax ji, namm naa sa wall,  
sa yoon ay sama bânneex.

175 Yal naa dund ba mággal la,  
say ndigal di sama ndimbal.

176 Lajj naa ni xar mu réer;  
gindi ma, Sang bi,  
sàgganewma say santaane de!

## 120

### *Ma ñaan ci biir tuuma*

1 Muy jàngi yéeg, ñu di ko mágale Yàlla.

Ci sama njàqare laa woo Aji Sax ji wall,  
mu wuyu ma.

2 Éy Aji Sax ji, musal ma ci gémminiñu fen-  
kat,  
ak làmmiñu njublanj.

3 Yaw boroom làmmiñu njublanj,  
ana lu ñu lay añale  
ak lu ñu lay dolli?

4 Xanaa fitti mbër yu ñaw  
ak xal yu yanj.

5 Wóoy man mi ganeyaani baadooley  
Meseg ya  
tey dali fa xaymay waa Kedar ñu xayadi  
ña!

6 Yàgg naa lool ci biir nit ñi bañ jàmm.

7 Man may wut jàmm,  
te su ma waxee,  
ñoom ñuy ayoo.

## 121

### *Ana ku may sàmm?*

1 Muy jàngi yéeg, ñu di ko mágale Yàlla.

Damaa séentu tund ya,

te naan fu wall di jóge?

2 Sama wall a nga fa Aji Sax ji,  
ki sàkk asamaan ak suuf.

3 Kii du la bàyyi nga tërëf,  
sa sàmm bii gëmmul.

4 Kiy sàmm Israyil kay  
gëmmul, nelawul.

5 Aji Sax jee lay sàmm,  
Aji Sax jee lay yiir,  
féete la ndijoor.

6 Du naaj wu lay dal bëccëg,  
mbaa leer gu ndaw guddi.

7 Aji Sax jee lay sàmm ci gépp loraange,  
di sàmm sa bakkan.

8 Aji Sax jee lay sàmm, dem ak dikk,  
tey ak èllëg.

## 122

### *Nu ñaanal Yerusalem*

1 Muy jàngi yéeg, ñu di ko mágale Yàlla,  
ñeel Daawuda.

Maaka bég, ba ñu ma nee:  
«Kër Aji Sax ji lanu jëm.»

2 Yaw Yerusalem, noo ngii taxaw sa bunt.

3 Céy, Yerusalem, dëkkub tabax bu baax,  
bi booloo, di benn.

4 Fii la giiri Israyil di yéegsi,  
di giir yi Ki Sax séddoo.

Ñu ngi santsi Aji Sax ji,  
ni ko Israyil warloo.

5 Fii la ngànguney Israyil tege,  
askanu Daawuda toog ca, di àtte.

6 Dagaanleen jàmmi Yerusalem:

«Yerusalem, yal na sa xeli soppe dal,

7 jàmm ne ñooy fi say tata wër,  
te xel dal ci biir keri Buur.»

8 Mbokk ak xarit a waral  
may ñaan jàmmi Yerusalem.

9 Sunu kër Yàlla Aji Sax jee ma tax  
di sàkku ngëneelu Yerusalem.

## 123

### *Yàlla, fajal nu gàcce*

1 Muy jàngi yéeg, ñu di ko mágale Yàlla.

Yaw laay séentu,

yaw mi toog fa asamaan.

<sup>2</sup> Ma ne, ni jaam bu góor di wékke sangam bêt,  
jaam bu jigéen di ko wékke bêt sangam bu jigéen,  
ni lanuy wékke sunu Yàlla Aji Sax ji bêt,  
ba keroog mu baaxe nu.

<sup>3</sup> Éy Aji Sax ji, baaxe nu, rikk baaxe nu, dañu noo torxal, ba nu ne tott.

<sup>4</sup> Ñu reew ñaa ngi nuy ñaawal, sunu xol fees,  
ñu bew ñaa ngi nuy sewal.

## 124

### *Nanu sante Aji Sax ji wallam*

<sup>1</sup> Muy jàngi yéeg, ñu di ko mǎggale Yàlla, ñeel Daawuda.

Éy su dul woon ak Aji Sax ji nu nekkal!  
Israyiloo, waxati ko:

<sup>2</sup> su dul woon ak Aji Sax ji nu nekkal,  
ba ñu nu jógalee,

<sup>3</sup> ba nit ña xadaroo sunu kaw,  
dañu nu doon wonn, nuy dund,

<sup>4</sup> dañu nu doon mëdd nim ndox,  
def um wal, buub nu,

<sup>5</sup> def waame wuy wal-wali,  
buub nu, yóbbu.

<sup>6</sup> Cant ñeel na Aji Sax ji,  
ki nu bàyyiwul, noon yi yàpp nu.

<sup>7</sup> Danu ne fèrr, nim picc  
mu rëcc fiiru rëbb,  
fiir ga toj, nu raw.

<sup>8</sup> Sunu ndimbal a ngi ci turu Aji Sax ji,  
ki sàkk asamaan ak suuf.

## 125

### *Ku doyloo Aji Sax ji raw*

<sup>1</sup> Muy jàngi yéeg, ñu di ko mǎggale Yàlla.

Ku doyloo Aji Sax ji,  
yaay tundu Siyon, doo toxu;  
dangay sax ba fàww.

<sup>2</sup> Ni tund yi yéewe Yerusalem,  
ni la Aji Sax ji yéewe ñoñam,  
tey ak èllëg.

<sup>3</sup> Nguur gu bon du saxe

kaw suuf su nit ñu jub muurloo.  
Lu ko moy ñu jub ñi sàkku lu bon,  
di ko jéfe.

<sup>4</sup> Éy Aji Sax ji, baaxeel ku baax,  
ak kuy mébét njub.

<sup>5</sup> Waaye kuy topp yoonu ndëngte,  
Aji Sax jee koy sànk,  
boole kook kuy def lu bon.

Yal na jàmm dal Israyil.

## 126

### *Yàlla, delloo nu*

<sup>1</sup> Muy jàngi yéeg, ñu di ko mǎggale Yàlla.

Ba Aji Sax ji delloo waa Siyon seen réew,  
danoo meloon ni ñuy gént,

<sup>2</sup> di reek a sarxolle rekk.  
Yéefar yi naa:

«Lu réy la Aji Sax ji defal ñii.»

<sup>3</sup> Lu réy la nu Aji Sax ji defal moos,  
nu bég.

<sup>4</sup> Aji Sax ji, rikk delloo nu na woon,  
ni ngay delloo wal yu ñiis, mu walaat ca  
àllub Negew.

<sup>5</sup> Kuy ji di jooy,  
yal na góob, di sarxolle.

<sup>6</sup> Ku doon wéya wéy, di jooy;  
ñàbb mbuusum jiwoom,  
yal na dikka dikk, di woy,  
ñibbaale sabaaram.

## 127

### *Barkeb Yàllaa wóor*

<sup>1</sup> Muy jàngi yéeg, ñu di ko mǎggale Yàlla,  
ñeel Suleyman.

Kër, su ko Aji Sax ji tabaxul,  
ku ko tabax, neen nga doñ-doñi.  
Ab dëkk, su ko Aji Sax ji wattuwul,  
ku ko wattu, neen nga teewlu.

<sup>2</sup> Neen it la nit di teela jóg  
ak a guddee tëdd,  
di doñ-doñi lu mu lekk:  
Aji Sax ji leel na soppeem lu ni day,  
fekk ko muy nelaw.

<sup>3</sup> Ma ne, doom Aji Sax jee koy sédde,  
njurum doom yool la.

<sup>4</sup> Doom joo jure ndaw,  
mooy fitt ci loxol jàmbaar;  
<sup>5</sup> ndokklee ku ci mbuusam fees,  
ba bu ñu taseek ub noon ca pénc ma,  
duñu am gacce mukk.

## 128

### *Ragal Yàlla, jàmmi kër*

<sup>1</sup> Muy jàngi yéeg, ñu di ko màggale Yàlla.

Ndokklee képp ku ragal Yàlla,  
di jéfe ay yoonam.

<sup>2</sup> Yaay lekk saw ñaq,  
mbégteek ngéneel ñeel la.

<sup>3</sup> Sa jabar ni garab gu nangoo sa wanag,  
say doom wëra wër sa ndab ni njëmbat  
lu jebbi.

<sup>4</sup> Ki ragal Aji Sax jaa ngoog,  
nii rekk lay barkeele.

<sup>5</sup> Yal na la Yàlla barkeele fii ci Siyon;  
yal nanga teewe xéewalu Yerusalem  
sa giiru dund gépp,

<sup>6</sup> te nga gis say sët.

Yal na jàmm dal Israyil.

## 129

### *Noon manul Israyil*

<sup>1</sup> Muy jàngi yéeg, ñu di ko màggale Yàlla.

Ba may ndaw ba tey, ñu ngi may sonala  
sonal.

Israyiloo, waxati ko:

<sup>2</sup> Ba may ndaw ba tey, ñu ngi may sonala  
sonal,

te taxul ñu man ma.

<sup>3</sup> Sama gannaaw gi lañu gàbba gàbb,  
rëdd koo rëdd nib tool.

<sup>4</sup> Waaye Aji Sax ji boroom njekk  
dog na buumi ñu bon ña.

<sup>5</sup> Képp ku noonoo Siyon  
yal nañu ko dëpp, gacceel ko.

<sup>6</sup> Yal nañu mel ni ñax mu saxem xadd,  
balaa law, lax.

<sup>7</sup> Du doyub njob ku ko dog;  
du doyub say ku ko for.

<sup>8</sup> Ku fa jaare it du ko ne:

«Jaajëf, Aji Sax ji barkeel;

jaajëfe yaw, yal na Aji Sax ji barkeel.»

## 130

### *Nu séentu njotug Yàlla*

<sup>1</sup> Muy jàngi yéeg, ñu di ko màggale Yàlla.

Aji Sax ji, ci ay xóote laa lay wooye.

<sup>2</sup> Boroom bi, déglu ma,  
teewlu ma, ma tinu la.

<sup>3</sup> Ki Sax, yaw, soo doon lim bàkkaar,  
Boroom bi, ana kuy taxaw?

<sup>4</sup> Waaye yaay jéggale,  
ñu ragal la.

<sup>5</sup> Damay xaar Aji Sax ji, di ko xaare xol,  
di yaakaar kàddoom.

<sup>6</sup> Wattukat bi yàkkamti njël,  
wattukat bi yàkkamti njël, laa ne,  
ni ma yàkkamtee Aji Sax jee ko raw.

<sup>7</sup> Éey Israyil, négandikul Aji Sax ji.  
Aji Sax jee gore,  
te yaatug njot.

<sup>8</sup> Mooy jot Israyil ci ñaawtéefam yépp.

## 131

### *Damaa woyof, gëm Yàlla*

<sup>1</sup> Muy jàngi yéeg, ñu di ko màggale Yàlla,  
ñeel Daawuda.

Éy Aji Sax ji, man de, réy-réyluwma,  
daññiiraluma,  
xintewoowma lu réy it,  
mbaa lu ma ëlëm.

<sup>2</sup> Xanaa ne tekk, ne cell,  
ni perantal ak ndeyam;  
sama xel dal ni perantal.

<sup>3</sup> Éey Israyil, yaakaaral Aji Sax ji  
tey ak ëllëg.

## 132

### *Yàlla digoo naak ki mu fal*

<sup>1</sup> Muy jàngi yéeg, ñu di ko màggale Yàlla.

Éy Aji Sax ji, bàyyil xel Daawuda,  
ak gépp njàqareem.

<sup>2</sup> Moo giñaloon Aji Sax ji,  
moo digook Mbërum Yanqóoba ma.

<sup>3</sup> Mu ne: «Duma ñibbi,

<sup>4</sup> duma tëddi sama kaw lal ba,

duma nelaw, дума гëmm sax bët,  
<sup>5</sup> li feek sàkkaluma Aji Sax ji bérab,  
 ba dëkkal Mbërum Yanqóoba ma.»  
<sup>6</sup> Ma ne, Efrata lanu dégg gaalu Yàlla ga,  
 fekk ko àllub Yaar.  
<sup>7</sup> Nan dem ba këram,  
 sujjóotali ndëggëstalu tànkam ya.  
<sup>8</sup> Aji Sax ji, jógal agsi sa dal-lukaay,  
 yaak sa gaal gi jëmmal sa doole.  
<sup>9</sup> Say sarxalkat, yal nañu woddoo njekk,  
 sa wóllëre yi sarxolleendoo.  
<sup>10</sup> Xoolal ci Daawuda, sa jaam ba,  
 bul gantu ki nga fal.

<sup>11</sup> Aji Sax ji daa giñal Daawuda  
 dégg gu mu dul dëddu,  
 ne ko: «Ku jóge sa geño  
 laay wuutal ci sa jal bi,  
<sup>12</sup> te say doom, bu ñu sàmme sama  
 kóllëre,  
 ak sama kàdduy seede yi ma leen di  
 xamal,  
 seeni doom it ñooy tooge  
 sa jal ba fàww.»  
<sup>13</sup> Aji Sax ji kat a tànn Siyon,  
 taamu faa dëkke.  
<sup>14</sup> Mu ne: «Fii laay dal-loo ba fàww,  
 fii laay dëkk, maa ko taamu.  
<sup>15</sup> Dund bi, ma barkeela barkeel,  
 néew-ji-doole yi, ma reggal;  
<sup>16</sup> sarxalkat yi, ma wodde njot;  
 way-gëm ñi di sarxollee sarxolle.  
<sup>17</sup> Fa laay dooleele Daawuda,  
 taalal ki ma fal,  
<sup>18</sup> ay noonam, ma wodde gacce;  
 moom, kaalaam ne ràññ.»

## 133

### *Bokk, bennoo neex*

<sup>1</sup> Muy jàngi yéeg, ñu di ko màggale Yàlla,  
 ñeel Daawuda.

Céy liika baax te neexati,  
 ay bokk yu bokk dëkk, di benn!  
<sup>2</sup> Daa neex ni diwu bopp gu xeeñ,  
 siite sikkim, bu mel ni sikkimu Aaróona,  
 rogalaat ba ci mbubbam,  
<sup>3</sup> neex ni layub tundu Ermon,  
 neex ni lay bu ni mel tey rogalaate tundi  
 Siyon.  
 Fa la Aji Sax ji dogal barke,

muy dund gu dul jeex.

## 134

### *Way-gëm ñaa ngi sant*

<sup>1</sup> Muy jàngi yéeg, ñu di ko màggale Yàlla.

Ayca, santleen Aji Sax ji,  
 yeen jaami Aji Sax ji yépp,  
 yeen ñiy taxawe kër Aji Sax ji guddi.  
<sup>2</sup> Yékkatileen seeni loxo bérab bu sell ba,  
 te sant Aji Sax ji.

<sup>3</sup> Yal na la Aji Sax ji barkeele fa Siyon,  
 moom mi sàkk asamaan ak suuf.

## 135

### *Aji Sax ji jot na Israyil*

<sup>1</sup> Màggal-leen Ki Sax!  
 Màggal-leen turu Aji Sax ji,  
 éey jaami Aji Sax ji, màggal-leen,  
<sup>2</sup> yeen ñi taxawe kër Aji Sax ji,  
 fi sunu biir èttu Yàlla bi.  
<sup>3</sup> Màggal-leen Ki Sax, Aji Sax jee baax!  
 Kañleen ko, kee sopplu!  
<sup>4</sup> Ki Sax a taamu Yanqóoba,  
 muy Israyil mi mu séddoo.

<sup>5</sup> Maa xam ne Aji Sax ji màgg na!  
 Sunu Boroom a sut lépp lu ñuy jaamu.

<sup>6</sup> Lépp lu Aji Sax ji namm,  
 moom lay def asamaan ak suuf,  
 ak biir géej ak xóote yépp.

<sup>7</sup> Mooy yékkateey niir fa cati àddina,  
 sàkkal taw ay melax,  
 yebbee ngelaw cay dencam,

<sup>8</sup> fàdd luy taaw fa Misra,  
 doom aadama, ba ci mala.

<sup>9</sup> Yeen waa Misra, moo yónnee ay firn-  
 deeki kéemaan fi seen biir,  
 ñeel Firawnaak jawriñam ñépp.

<sup>10</sup> Moo дума ay xeeti xeet,  
 bóom buur yu mag yi,

<sup>11</sup> muy Siwon buurub Amoreen ña,  
 ak Og buuru Basan,  
 ak buuri Kanaan ñépp.

<sup>12</sup> Moo nangu seen réew, séddale,  
 bànni Israyil ñiy ñoñam séddoo.

<sup>13</sup> Aji Sax ji, sa tur ba fàww;  
 Aji Sax ji, sa woy a saxal maasoo maas.

14 Aji Sax ji kay ay àtte ñoñam ñi,  
di ñeewante jaamam ñi.  
15 Tuuri yéefar yi, xalis ak wurus,  
loxoo ko sàkk.  
16 Am gémmin te du wax,  
ami gët te du gis,  
17 ami nopp te du dégg,  
du sax noowal bakkan.  
18 Ñi sàkk yii tuur, yal nañu mel ni ñoom,  
ñook ñi leen wóolu ñépp.  
19 Éey waa kër Israyil, santleen Aji Sax ji!  
Éey waa kër Aaróona, santleen Aji Sax ji!  
20 Éey waa kër Lewi, santleen Aji Sax ji!  
Yeen ñi ragal Aji Sax ji, santleen Aji Sax ji!  
21 Nañuy sante Aji Sax ji Siyon,  
moom mi dëkke Yerusalem.  
Màggal-leen Ki Sax!

## 136

### *Yàllaa am kóllère*

1 Nangeen sante Aji Sax ji mbaaxam.  
Kee saxoo ngoram!  
2 Santleen Yàllay yàlla yi.  
Kee saxoo ngoram!  
3 Santleen Sangu sang yi.  
Kee saxoo ngoram!  
4 Moo wéetoo jaloore yu mag yi.  
Kee saxoo ngoram!  
5 Moo sàkke asamaan manoore.  
Kee saxoo ngoram!  
6 Moo lal suuf ca kaw ndox ma.  
Kee saxoo ngoram!  
7 Moo sàkk leer yu mag yi:  
Kee saxoo ngoram!  
8 jant bi yilif bëccëg,  
Kee saxoo ngoram!  
9 weer ak biddiww, guddi.  
Kee saxoo ngoram!  
10 Moo fàdd taawi Misra yu góor ya,  
Kee saxoo ngoram!  
11 seppée bànni Israyil ca ñoom,  
Kee saxoo ngoram!  
12 ci dooley loxoom ak kàttanu pèrëgam.  
Kee saxoo ngoram!  
13 Moo xar gééju Barax ya jaar,  
Kee saxoo ngoram!  
14 jàllale bànni Israyil ca digg ba.  
Kee saxoo ngoram!

15 Moo xalab Firawnaak mbooloom ca  
gééju Barax ya.  
Kee saxoo ngoram!  
16 Moo jiite ñoñam ca màndiñ ma.  
Kee saxoo ngoram!  
17 Moo дума buur yu mag ya,  
Kee saxoo ngoram!  
18 bóom buur yu màgg ya,  
Kee saxoo ngoram!  
19 reyaale Siwon buurub Amoreen ña,  
Kee saxoo ngoram!  
20 reyati Og buuru Basan.  
Kee saxoo ngoram!  
21 Moo nangu seen réew, joxe,  
Kee saxoo ngoram!  
22 sédde Israyil ma dib jaamam.  
Kee saxoo ngoram!  
23 Ci biir notaange la nu geesoo,  
Kee saxoo ngoram!  
24 ne nu siféet ci loxoy noon ya.  
Kee saxoo ngoram!  
25 Mooy leel bépp boroom bakkan.  
Kee saxoo ngoram!  
26 Santleen Yàlla mi ci asamaan!  
Kee saxoo ngoram!

## 137

### *Jooye nanu àll*

1 Ca tàkkal dexi Babilon,  
foofa lanu daa toog,  
fàttliki Siyon, jooy.  
2 Ca garab ya  
lanu daa wékk sunuy xalam.  
3 Fa la nu sunuy sang daa woyloo,  
not nu, bëgg nu bégal leen,  
naan: «Woyal-leen nu ci woyi Siyon.»  
4 Moo nu nuy woye woyu Aji Sax ji  
kaw suufas yéefar?  
5 Éy Yerusalem, su ma la naree fàtte,  
yal na ma doole dëddu!  
6 Yerusalem, su ma la fàttlikiwul,  
fonk la, ba gën laa bége lépp,  
yal na sama làmmiñ tafoo sama denqleñ.  
7 Aji Sax ji, fàttlikul Edomeen ña,  
keroog jantub Yerusalem,  
ba ñu naan: «Màbbleena màbb,  
ba kenug dëkk bi siiñ!»  
8 Yeen waa Babilon, gi ñu nara fàllas,  
ndokklee ku leen fey jëf,

ja ngeen nu def!

<sup>9</sup> Ndokklee ku ne cas seeni fere,  
tas ciw doj!

## 138

### *Aji Sax ji waccu ma*

<sup>1</sup> Ñeel Daawuda.

Ma sante la sama léppi xol,  
woy la, gàngooru Yàlla ga ca kaw seede.

<sup>2</sup> Ma sujjóot jublook sa kër gu sell gi,  
di wormaal saw tur,  
ngir sa ngor ak sa worma.

Màggal nga sa tur ak sa kàddu,  
ba mu tiim lépp.

<sup>3</sup> Bés ba ma wootee, yaa ma wuyu,  
ñemeel ma, dooleel ma.

<sup>4</sup> Aji Sax ji, na la buuri àddina yépp  
màggal,

ñoo dégg kàddu yi nga wax.

<sup>5</sup> Nañu woy say jaloore, naan:  
«Aji Sax jeeka màgg teddnga!»

<sup>6</sup> Aji Sax jee kawel!  
Ku toroxlu, mu niir;  
ku réy, mu ñooru.

<sup>7</sup> Ma wéye njàqare,  
nga musal ma,  
dogalee sa loxo merum noon,  
walloo ma sa ndijoor.

<sup>8</sup> Aji Sax jee may feyul.

Éy Aji Sax ji, yaa saxoo ngor!  
Bul wacc ñi nga binde sa loxo.

## 139

### *Aji Sax jee ma xam, ba jeexal ma*

<sup>1</sup> Mu jëm ci njiital jàngkat yi, ñeel  
Daawuda, di kàddug Sabóor.

Aji Sax ji, yaa ma natt, xam ma;

<sup>2</sup> yaa xam sama toogaay ak sama tax-  
awaay,

di ràññee fu sore samay xalaat,

<sup>3</sup> di càmbar samab dox ak sama tēraay,  
yittewoo lépp lu may def.

<sup>4</sup> Aji Sax ji, bala maa wax baat,  
ndeke yaw, xam nga lépp.

<sup>5</sup> Kanam ak gannaaw nga ma dare,  
teg ma sa loxo.

<sup>6</sup> Ni nga ma xame daa yéeme,  
xóot lool, ba wees ma.

<sup>7</sup> Fu ma jëm, ba sore la?  
Fu ma daw jëm, foo teewul?

<sup>8</sup> Ma ñalgu ba asamaan, yaa nga fa!  
Ma tēri njaniiw, ndeke yaa nga fa!

<sup>9</sup> Ma war laafi njël,  
dëkki wàllaa géej,

<sup>10</sup> nga tettee ma fa ba tey,  
téyee ma sa ndijoor.

<sup>11</sup> Su ma noon: «Na ma lëndem mëdd  
boog,

ba leer gi far guddil ma,»

<sup>12</sup> du tax lëndem lëndemal la dara.  
Guddi da laa leeralal ni bëccëg,  
lëndem dig leer fi yaw.

<sup>13</sup> Yaa ma sàkkal xol ak xalaat,  
ràbbe ma sama biiru ndey.

<sup>14</sup> Naa la sante sama bind bu raglu bii te  
yéeme,

say jalooree di kéemaan, bir na ma!

<sup>15</sup> Sama jëmm jii umpu la,  
ba muy bindu ci kumpa,  
mel ni lu ñu ràbbe ci xóotey suuf.

<sup>16</sup> Gis nga ma, ba ma diw lumb;  
sa téere lim na

fan yi nga ma àppal,  
ba ca benn dooragul.

<sup>17</sup> Yàlla, say xalaat aka maa yéem!  
Ndaw lim bu réy!

<sup>18</sup> Su ma ko doon waññ, moo ëpp feppi  
suuf.

Maa ngii yewwu, ne feek yaw ba tey.

<sup>19</sup> Éy sama Yàlla, soo reyoon ñu bon ñii!  
Yeen bóomkat yi, soreleen ma!

<sup>20</sup> Ñii sa tur lañuy luubale,  
noonoo la, di tudd sa tur ciy caaxaan.

<sup>21</sup> Aji Sax ji, maaka bañ ñi la bañ  
te sib ñi lay gantal.

<sup>22</sup> Dama leena bañ ba fa mbañeel yem;  
samay noon dëgg lañu.

<sup>23</sup> Yàlla, seetlu ma, ba ràññee sama xol;  
natt ma, ba ràññee sama xalaati xol.

<sup>24</sup> Xoolal ndax maa ngi doxe yoon wu aay,  
te nga teg ma ci yoon wi sax.



## 140

### *Ku ñu tonjal a ngi ñaan*

<sup>1</sup> Mu jëm ci njiital jàngkat yi, di kàddug Sabóor, ñeel Daawuda.

<sup>2</sup> Éy Aji Sax ji, xettli ma ci ku bon, musal ma ci nitu fitna,  
<sup>3</sup> kuy nas lu bon, tey saxoo di sookey xare,  
<sup>4</sup> daas làmmiñam ni jaan, guux danjaru ñàngóor.

Selaw.

<sup>5</sup> Éy Aji Sax ji, aar ma ci loxol ku bon, musal ma ci nitu fitna, ku may fexee fakktal.  
<sup>6</sup> Ñu bew ñee ma làqali yeer, lalal may buum aki caax, feggal ma seeni fiir ci yoon wi.

Selaw.

<sup>7</sup> Dama ne Aji Sax ji, yaay sama Yàlla; Aji Sax ji, teewlul, ma dagaan la.  
<sup>8</sup> Aji Sax ji Boroom bi may walloo doole, yaa ma yiir keroog bésub xare.

<sup>9</sup> Aji Sax ji, bul may ku bon nammeelam, bul joyal pexeem, muy yékkatiku.

Selaw.

<sup>10</sup> Ñi ma sam, yal na seen ayu làmmiñ këppu seen kaw bopp.  
<sup>11</sup> Yal nañu këppoo xali sawara, tàbbi ciy pax te dootuñu jóg.  
<sup>12</sup> Kuy yàq der, yàlla bumu toog ci réew mi.  
 Nitu fitna, yal na ko ay topp, ba dal ci kawam.  
<sup>13</sup> Xam naa ne Aji Sax jeey jox néew-ji-doole dëgg;  
 di sàmm àqu baadoolo.  
<sup>14</sup> Ku def njekk kay a lay sant; ku jub dëkke saw yiw.

## 141

### *Yàlla, sàmmal sama làmmiñ*

<sup>1</sup> Muy kàddug Sabóor, ñeel Daawuda.

Aji Sax ji, woo naa la, gaawe ma!  
 Bu ma lay woo, teewlu ma.  
<sup>2</sup> Yal nanga ma nangul samag ñaan

ni cuuraay lu ñu la taalal,  
 yoxo yi ma la tàllal di saraxu ngon soo gërëm.

<sup>3</sup> Aji Sax ji, sàmmal ma sama làmmiñ, saytul ma sama kàddu.

<sup>4</sup> Bu ma xiir ci lu aay, may jéfe jéf ju bon, ànd ceek ñiy jéf lu ñaaw, di wàlli seeni bernde.

<sup>5</sup> Kuy déggal Yàlla, man na maa dóor, bantal ma ci ngor.  
 Loolu ngëneelu cuuraay la, duma ko bañ.  
 Waaye maa ngi saxoo ñaan pexey noon moy.

<sup>6</sup> Yal nañu fenqe seeni njiit ciw doj, ba noon yi xam ne dëgg laa wax.

<sup>7</sup> Ni ñuy gábbe suuf ba mu ne ñafeet, ni la njaniiw di ñaye, aw seeni yax yu tasaaroo.

<sup>8</sup> Aji Sax ji Boroom bi, yaw laa wékki gët, yaw laa làqoo, bu ma seetaan, ma dee.

<sup>9</sup> Musal ma ci yeer yi ñu ma gasal, ak fiir yi ma defkati ñaawtéef yi tegal.

<sup>10</sup> Yal na ku bon tàbbi cig fiiram, te man ma teggi, wéy.

## 142

### *Aji Sax ji rekk a ma yég*

<sup>1</sup> Muy taalifu ñaan bu ñeel Daawuda, ba mu nekkee ca xunti ma.

<sup>2</sup> Ma àddu, ñaan Aji Sax ji; àddu ca kaw, di tinu Aji Sax ji,  
<sup>3</sup> sippi ko sama tawat, diis ko sama njàqare.

<sup>4</sup> Bu ma yoqee, ràññee nga samay jéego; yoon wi may jaare lañu ma làqal am yeer.

<sup>5</sup> Ma geesu ndijoor, xool; du kenn ku ma faale.  
 Rawtu réer ma, du kenn ku sama bakkan saf.

<sup>6</sup> Aji Sax ji, ma woo la wall; ma ne, yaay sama kiiraay, di sama séddoo fi kaw suuf.

7 Teewlul, ma ne wóoy,  
damaa manatul,  
xettli ma ci ñi ma topp,  
dañu maa ëpp doole.  
8 Ngalla génne ma fi ma tëje,  
ma sant la.  
Man la way-gëm ñi di yéew ëllëg,  
yaa may xéewale ab yool.

## 143

### *Aji Sax jeey sama yaakaar*

1 Muy kàddug Sabóor, ñeel Daawuda.

Éy Aji Sax ji, déglul, ma ñaan la;  
teewlul, ma tinu la;  
nangul ma ci sa wormaak sa njekk.  
2 Sang bi, bul layook man;  
kenn jubul fi sa kanam, du kuy dund.  
3 Noon a ma sambal,  
daane ma, joggati,  
dëel ma ci lëndëm  
ni ku dee bu yàgg.  
4 Sama doole jeex tàkk,  
sama xol jeex, ma ne yàcc.  
5 May fàttliku bu jëkkoon,  
di xalaat sa jaloore yépp,  
seetaat li nga def.  
6 Ma tàllal lay loxo,  
di la sàkku, ni suuf su mar di sàkkoo  
ndox.

Selaw.

7 Aji Sax ji, gaawal wuyu ma;  
sama xol a jeex, ma ne yàcc,  
bu ma xañ sa yiw,  
ma yem ak kuy tàbbiji biir pax.  
8 Xëye ma sa ngor,  
yaw laa wóolu;  
xamal ma fu may doxe,  
yaw laa wékk sama bakkan.  
9 Aji Sax ji, musal ma ci noon yi,  
yaw laa làqoo.  
10 Jàngal ma, ma jëfe sa coobare;  
yaa di sama Yàlla.  
Yal na ma sam xel jiitee mbaax  
ci yoon wu tàlli.  
11 Aji Sax ji, musal ma ngir saw tur,  
jëfeel sag njekk,  
teggil ma njàqarey bakkan.  
12 Sànk'al ma noon yi ci sa ngor,  
bóomal ma bépp bañ.

Man de, maay sab jaam!

## 144

### *Aji Sax ji, laggsil*

1 Ñeel Daawuda.

Cant ñeel na Aji Sax ji ma sës,  
mu di ma jàngal xeex,  
di ma tàggat ngir xare,  
2 di sama wóllëre, di ma yiir,  
di ma làq, di ma xettli,  
di ma aar, ma di ko làqoo,  
mu di ma nangulal ay xeet.  
3 Aji Sax ji, luy nit, ba nga di ko ràññee?  
luy doom aadama, ba nga di ko faale?  
4 Nit ni ngelaw,  
ay fanam di takkndeer, wéy.  
5 Aji Sax ji, firil asamaan, wàcc;  
laal tund yi, ñu saxar.  
6 Melaxal, falaxe noon yi;  
fittal, ñu fëlfoo,  
7 nga yóotoo ma fu kawé,  
xettli ma, wallu ma ci doxandéem  
yi def wali wal fi sama kaw,  
8 di fen,  
di giñ ay fen.  
9 Yàlla, naa la woyal woy wu yees,  
xalamal la xalamu fukki buum.  
10 Yaay may buur yi ndam,  
yaa musal sa jaam ba, Daawuda  
ci saamar bu aay.  
11 Musal ma, xettli ma  
ci loxol doxandéem  
yiy fen, di giñ ay fen.

12 Su boobaa sunu doom yu góor  
màgge ndaw, ni gancax gu mat sèkk;  
sunuy janq jekk ni doji yett,  
yu ñu tabaxe kër buur.  
13 Sunuy sàq feese wirgoy wirgo,  
sunuy gàtt jur junni,  
ba fukki junni (10 000) ci parlu yi,  
14 nag yi ëmb ba diis,  
du mbas, du biir bu yàqu,  
te deesu fi yuuxoo pénc ya.  
15 Ndokklee xeet wu am lii!  
Ndokklee xeet wu yàllawoo Aji Sax ji!

## 145

### *Ma kañ Buur Yàlla*

1 Muy jàng'i màggal, ñeel Daawuda.

Sama Yàlla, Buur bi, naa la màggal,  
 teral sa tur ba fàww.  
<sup>2</sup> Bésóo bés ma di la sant,  
 di màggal sa tur ba fàww!  
<sup>3</sup> Aji Sax jee màgg te jara màggala  
 màggal,  
 kii màggam amul kemu!

<sup>4</sup> Na maasoo maas di màggal say jaloore,  
 di biral sa njàmbaarte.  
<sup>5</sup> Sa leeru teddnga ji ne ràññ,  
 ak sa jëf ju yéeme laay jàngat!  
<sup>6</sup> Sa dooley jëf ju raglu dees na ko jottli,  
 te sa màggaay maa koy yéene.  
<sup>7</sup> Sa mbaax gu réy, dees na ko tari,  
 te sag njekk, dees na ko woy.  
<sup>8</sup> Yiw ak yërmande, Aji Sax ji;  
 kee muñ mer te bare ngor!  
<sup>9</sup> Aji Sax jee baaxe ñépp,  
 di yërëm lu mu sàkk.

<sup>10</sup> Aji Sax ji, lépp loo sàkk a lay gërëm,  
 sa wóllère yi di la sant,  
<sup>11</sup> di tudd sa teddngay nguur,  
 tey dégtale sag njàmbaar,  
<sup>12</sup> doom aadama xam say jaloore  
 ak sa teddngaak sa darajay nguur.  
<sup>13</sup> Sa nguur ay nguur gu sax dàkk,  
 sa kilifteef ñeel maasoo maas.

Aji Sax ji daa sàmm ay waxam,  
 gore ciy jëfam.  
<sup>14</sup> Ku daanu, Aji Sax ji wallu;  
 ku sègg, mu siggil.  
<sup>15</sup> Ñépp a la wékk bët, di yaakaar,  
 te bu jotee, yaa leen di leel,  
<sup>16</sup> tàllal sa loxo,  
 reggal luy dund, ba xolam sedd.  
<sup>17</sup> Aji Sax ji, jëfinam jépp njekk la,  
 jëfam jépp ngor la.  
<sup>18</sup> Aji Sax ji, képp ku ko woo wall, mu jege  
 la,  
 képp ku ko woo wall te muy dëgg.  
<sup>19</sup> Nammeelu ku ko ragal, mu sottal;  
 yuuxam, mu dégg, musal.  
<sup>20</sup> Aji Sax jeey sàmm kuy soppeem,  
 di sànk képp ku bon.  
<sup>21</sup> Naa sàlloo sant Aji Sax ji,  
 na luy dund saxoo dàkk di màggal sell-  
 ngay turam!

## 146

### *Buur Yàllaa jara wóolu*

<sup>1</sup> Màggal-leen Ki Sax!  
 Naa màggale Aji Sax ji xol,  
<sup>2</sup> li feek may dund, di ko kañ,  
 li feek may noyyi, di woy sama Yàlla.

<sup>3</sup> Buleen wóolu kilifa,  
 doom aadama amul wall.  
<sup>4</sup> Noo ga day rëcc, mu dellu suuf;  
 bu bés baa, pexeem jeex.

<sup>5</sup> Ndokklee kuy dimbalikoo Yàllay  
 Yanqóoba;  
 di yaakaar Yàllaam Aji Sax ji,  
<sup>6</sup> ki sàkk kaw ak suuf,  
 géej ak lu ci biiram,  
 di sàmm dëgg ba fàww,  
<sup>7</sup> di àtte néew-ji-doole,  
 di leel ku xiif.  
 Aji Sax jeey tijji ku ñu tëj.  
<sup>8</sup> Aji Sax jeey xippil silmaxa,  
 di siggil ku sègg.  
 Aji Sax jee sopp ku jub.  
<sup>9</sup> Aji Sax jeey sàmm doxandéem,  
 taxawu jirim ak jëtun,  
 waaye mooy lajjal pexem ku bon.

<sup>10</sup> Aji Sax jeey nguuru ba fàww.  
 Yaw Siyon, sa Yàllaa ñeel maasoo maas.  
 Màggal-leen Ki Sax!

## 147

### *Yàllaa gën ci àddina, gën ci nit*

<sup>1</sup> Màggal-leen Ki Sax!  
 Kañ sunu Yàllaa baax,  
 màggal koo neex te war.  
<sup>2</sup> Aji Sax jaa ngi tabaxaat Yerusalem,  
 di délloosi ña ñu dàqe Israyil,  
<sup>3</sup> di faj naqaru xol,  
 fajtal góomi boroom.  
<sup>4</sup> Mooy lim biddiwi yi,  
 tudd bu ci nekk.  
<sup>5</sup> Sunu Boroom a màgg, bare doole;  
 am xelam wees kemu.  
<sup>6</sup> Aji Sax ji, néew-ji-doole, mu yenni;  
 ku bon, mu daane ci suuf.

<sup>7</sup> Woyeleen Aji Sax ji kàddug cant,  
 kañeleen sunu Yàlla jii ay xalam;  
<sup>8</sup> mooy sànge asamaan ay niir,

tawal suuf,  
saxal tund yi am ñax,  
9 leel mala,  
xol liiru baaxoñ bu jooy.  
10 Kii nawul dooley fas,  
gërëmul kàttanu jàmbaar.  
11 Ki Aji Sax ji gërëm mooy ki ko ragal  
te di ko yaakaare ngoram.

12 Yerusalem, sargal-leen Aji Sax ji!  
yeen waa Siyoñ laa ne, màggal-leen seen  
Yàlla!  
13 Mooy tēj ràpp seen bunti dëkk,  
barkeel seen askan wa ca biir,  
14 jàmmal seen suufas réew,  
reggal leen ngëneelu pepp,  
15 yónnee suuf ndigalam,  
kàddoom ne coww, daw ca.  
16 Mooy tawal yuur bu mel ni wëttéen,  
di lay lay bu sedd, mel ni pënd ci suuf.  
17 Mooy yuri tawub yuuram niy donj.  
Bu ni seddee, ana kuy taxaw?  
18 Mu yebal kàddoom, seeyal;  
wal ngelawam, ndox walalaan.  
19 Mooy wax Yanqóoba kàddoom,  
dogalam yaak ndigali yoonam ñeel Is-  
rayil.  
20 Loolu defalu ko wenn xeet;  
kenn xamu ci ndigali yoonam.  
Màggal-leen Ki Sax!

## 148

### *Na àddina wërngal këpp màggal Yàlla*

1 Màggal-leen Ki Sax!  
Nangeen màggale Aji Sax ji fa asamaan,  
màggale ko fa kawa kaw.  
2 Màggal-leen ko, yeen malaakaam yépp,  
màggal-leen ko, yeen gàngooram yi.  
3 Màggal-leen ko, yeen jant beek weer wi,  
màggal-leen ko, yeen mboolem biddiww  
yii di nes-nesi.  
4 Màggal-leen ko, yeen asamaani kaw-li-  
kaw,  
ba ca ndox ma tiim asamaan ya.  
5 Nañu màggal turu Aji Sax ji,  
kii kat a santaane, lii lépp am.  
6 Moo leen samp, ñu sax ba fàww,  
mu dogal ko, te du toxu.

7 Nangeen màggale Aji Sax ji fa kaw suuf,

yeen ninki-nànkay géej ak xóote yépp,  
8 ba ca melax yaak doj yu sedd yay taw,  
ak tawub yuur akub lay,  
ba ca ngélén yu mag yay def ndigalam.  
9 Màggal-leen ko yeen tund yu mag yeek  
yu ndaw yépp,  
ba ci garab yiy meññ ak garabi seedar yi,  
10 ba ci mala yépp, yu àll ak gépp jur  
ak luy raam ak njanaaw,  
11 ak buuri àddinaak xeet yépp,  
ak kilifa yeek njiiti àddina yépp,  
12 xale bu góor ak bu jigéen,  
mag ak ndaw.  
13 Màggal-leen turu Aji Sax ji,  
moom donj la turam kawe,  
darajaam tiim asamaan ak suuf.  
14 Moo dooleel ñoñam,  
wóllëreem ñiy mbooloom bànni Israyil,  
xeet wi mu xejjoo, di ko màggal.  
Màggal-leen Ki Sax!

## 149

### *Na Israyil màggal Ki Sax*

1 Màggal-leen Ki Sax!  
Woyleen Aji Sax ji woy wu yees,  
màggal ko fi ndajem wóllëreem ñi.  
2 Na Israyil bége kii ko sàkk,  
doomi Siyoñ, laa ne, ñu bannëexoo seen  
buur bii.  
3 Nañu màggale turam am pecc,  
tëggal ko, xalamal ko.  
4 Aji Sax jee safoo ñoñam,  
di terale néew-ji-doole ag mucc.  
5 Na wóllërey Yàlla bannëexoo seen  
ndam,  
bu ñu téddee sax, di sarxolle,  
6 di xaacuy kañ Yàlla,  
ñàbbaale saamaru ñaari ñawka,  
7 ngir дума yéefar yi,  
mbugale ko yooyu xeet,  
8 yeewe seeni buur ay cállala,  
jéngé seeni njiit jéngi weñ,  
9 ngir sottalal leen àtte bi ñu bind,  
muy ndamu wóllërey Yàlla yépp.  
Màggal-leen Ki Sax!

## 150

### *Màggal-leen Ki Sax!*

1 Màggal-leen Ki Sax!

Nangeen màggale Yàlla biir kèram gu  
sell,  
màggale ko ca tatay asamaanam.  
<sup>2</sup> Màggaleleen ko ay jalooreem,  
màggale ko màggam gu réy.  
<sup>3</sup> Màggaleleen kog liit,  
màggale ko xalam ak moroom ma.  
<sup>4</sup> Màggaleleen ko njiin aki pooj,  
màggale ko xalam ak toxoro.  
<sup>5</sup> Màggaleleen ko teggum weñ mu xumb,  
màggale ko teggum weñ mu kawé.  
<sup>6</sup> Na lépp luy noyyi màggal Ki Sax!  
Màggal-leen Ki Sax!

## Kàddu yu Xelu

### *Li tax téere bi jóg*

<sup>1</sup> Kàddu yu xelu yu Suleymaan buurub Israyil, di doomu Daawuda.

<sup>2</sup> Li ko taxa jóg di nit ñi am xel mu rafet, am ab yar, ngir xam wax ju lal dég-dég, <sup>3</sup> ngir yaru ci jéfe xel ak njub ak yoon, di jubal, <sup>4</sup> ndax ab téxét di foog, ndaw li it xam tey xalaat. <sup>5</sup> Na boroom xel mu rafet déglu, yokk dég-dégam, te kiy ràññee di jariño ay tegtal, <sup>6</sup> ngir mana xam aw léeb aku taas ak kàddug boroomi xel yu rafet ak seeni cax.

<sup>7</sup> Ragal Aji Sax ji di njàlbéenu xam-xam, te xel mu rafet akub yar, dof yaa ko xeeb.

### **Déglul, waajur àrtu la**

*(Saar 1.8—7.27)*

<sup>8</sup> Doom, toppal yaru baay, te bul wacc ndigalu yaay.

<sup>9</sup> Kaala gu jekk la ci bopp, di gànjar ci baat.

<sup>10</sup> Doom, bàkkaarkat bu la xiirtal, lánkal.

<sup>11</sup> Dañu la naan: «Dikkal, nu tëruji bakkan, yeeruji jaambur bu deful dara.

<sup>12</sup> Nanu mel ni njaniiw, mëdd kuy dund, mu jekki tàbbi biir bàmmee.

<sup>13</sup> Mboolem alal ju réy, nu jagoo, yeb sunu biir kër, mu fees.

<sup>14</sup> Dikkal nu far, mbuus miy benn, nu bokk.»

<sup>15</sup> Doom, bul ànd ak ñoom ciw yoon, bul jaare fa ñuy jaar,

<sup>16</sup> ngir dañuy xélu, nar musiba, di gaawtuy sànk bakkan.

<sup>17</sup> Doo firib caax, ba jàpp njanaaw luy xoole.

<sup>18</sup> Nii kat seen bopp lañuy fiir, seen bakkanu bopp lañu sànk.

<sup>19</sup> Képp kuy lekk lu lewul, nii lay mujje: wutin wu lewul jël bakkanu boroom.

*Xel mu Rafet woote na*

<sup>20</sup> Xel mu Rafet a ngay woote ca mbedd ma, di xaacu ca pénc ma.

<sup>21</sup> Ma ngay wootee bérab yu gëna xumb, di dégtaley kàddoom, bunt dëkk ba.

<sup>22</sup> Ma nga naan: «Moo téxét bi, foo àppal sa téxét gi?

Ñaawlekat bi, foo àppal sa ñaawle bi? Dof bi, ñaata yoon ngay bañ xam-xam?

<sup>23</sup> Soo dèppee ba déglu, ma àrtu la. Ma ne, kon ma xellil la samam xel, xamal la samay kàddu.

<sup>24</sup> Damaa woote, nga gàntal, ma tàllal loxo, faaleesu ma.

<sup>25</sup> Sofental nga samay digle, nanguwoo samay àrtu.

<sup>26</sup> Kon boo sèngéemee, man it ma ree, njàqare dab la, may textexi.

<sup>27</sup> Njàqare di ngélén, dab la, sa musiba def callweer, buub la, njekkar ak fitna dal la.

<sup>28</sup> Keroog nga woo ma wall, duma wuyu, nga seet ma, seet, doo ma gis.

<sup>29</sup> Daa fekk nga baña xam, te ragal Yàlla du loo taamu.

<sup>30</sup> Dégluwoo samay digle it, xanaa xeeb samay àrtu yépp.

<sup>31</sup> Waaye loo ci góobe, gar ko, say pexe suur la kèll.

<sup>32</sup> Déggadi sànk ab téxét, naagu rey ab dof.

<sup>33</sup> Waaye déggal ma, dëkke jàmm, tàggook njekkar ak safaan.»

## 2

### *Muus, mucc*

<sup>1</sup> Sama doom, déggal samay wax, fonk samay santaane.

<sup>2</sup> Teewlul xel mu rafet, sam xel di dégg.

<sup>3</sup> Ngalla wutala dégg, wool dég-dég wall.

<sup>4</sup> Sàkkul xel mu rafet ni xalis, wut ko ni alal ju làqu.

<sup>5</sup> Kon nga xam luy ragal Aji Sax ji, xam Yàllaa di kan;

<sup>6</sup> ndax Aji Sax jeey maye xel mu rafet, kàddoom di taxa xam, di dégg.

<sup>7</sup> Day dencalal ndam kiy jubal, di yiir ku mat.

8 Day wattu ku jub fu mu jaare,  
 di sàmm wóllèreem ciw yoon.  
 9 Kon nga xam njub ak yoon,  
 xam jubal ak mboolem yoonu mbaax.  
 10 Ndax xel mu rafet miy tàbbi sa xol,  
 nga xam, sa xol tooy,  
 11 nga foog, fegu,  
 am ug dégg, raw,  
 12 mucc ci yoonu ku bon  
 ak kuy wax lu jekkadi,  
 13 mucc ci kuy wacc yoonu njub,  
 di jaare mbedd yu lëndëm.  
 14 Kon nga mucc ci kuy def lu bon,  
 tey bannexoo lu jekkadi.  
 15 Yoonu ku ni mel day lunk,  
 jaaruwaayam dëng.  
 16 Xel mu rafet da lay musal ci ndaw su  
 yemadi,  
 bokk feneen, di wax lu neex.  
 17 Day dëddu wóllèreem, ba muy ndaw,  
 fàtte kóllèreem ak Yàllaam.  
 18 Këram day joy wuti ndee,  
 ay jaaruwaayam jëm njaniiw.  
 19 Ku dem ca moom dootoo délsi,  
 doo gisati yoonu dund muk.  
 20 Kon nag aweel mbeddum waa ju baax,  
 toppal yoonu ku jub,  
 21 ndax kuy jubal ay dëkke réew mi,  
 te ku mat a fiy des.  
 22 Ku bon, ñu dagge ci réew mi;  
 kuy fecci worma, ñu buddi, sànni.

### 3

#### *Wóolul Yàlla*

1 Doom, bul fàtte sama njàngle,  
 defal sa xel ci saay santaane,  
 2 ngir fan wi gudd lool,  
 nga gëna am jàmm.  
 3 Bu la ngor ak worma dëddu,  
 booleel takk ci sa baat,  
 bind ko ci sa àlluway xol.  
 4 Kon nga xam lu jaadu,  
 neex Yàllaak doom aadama.  
 5 Nanga wóoloo Aji Sax ji, sa léppi xol,  
 te bul wéeru ci saw déggìn.  
 6 Loo mébét, bàyyil Yàlla xel,  
 mu xàllal la yoon.  
 7 Bul doylloo sa xel mu rafet,  
 ragalal Aji Sax ji, dëddu mbon;

8 sa yaram wér,  
 say cér naat.

9 Teralal Aji Sax ji ci sa alal  
 ak loo jëkka meññle,  
 10 say sàq day fees, ne xéew,  
 say mbàndi ndoxi reseñ di wal.

11 Doom, bul xeeb yaru Aji Sax ji,  
 bul bañ mu waññi la,  
 12 ndax Aji Sax ji, ku mu sopp, waññi la,  
 ni baay, ak doom ju ko neex.

#### *Li xel mu rafet di jariñ*

13 Mbégtee ñeel ku daj xel mu rafet  
 ak ku am ug dégg.  
 14 Am koo gën am xalis,  
 te njariñ laa raw wurus.  
 15 Xel mu rafet a gën gànjar;  
 loo mana bëgg moo ko raw.  
 16 Gudd fan, mu joxee ndijoor;  
 càmmoñ ba, alal ak teraanga.  
 17 Fa muy jaare yiw la,  
 fu mu awe jàmm la.  
 18 Mooy garabu gudd fan ci ku ko jàpp,  
 di mbégtey ku ca ñoy.  
 19 Aji Sax ji xel mu rafet la sose suuf,  
 lale asamaan ag dégg.  
 20 Ci xam-xamam la ndoxi xóote ya ne  
 jàyy,  
 ay niir di lay.

#### *Rafet xel barke la*

21 Sama doom, saxool xelu akug foog,  
 dee ci xool foo tollu.  
 22 Day guddal saw fan,  
 di rafetal sa jikko.  
 23 Kon sab dox wóor,  
 doo fakktalu.  
 24 Soo téddee doo tiit;  
 say nelaw day neex.  
 25 Kon doo ragal njàqare lu bette  
 ak saaysaay buy songe,  
 26 ndax Aji Sax ji da lay yiir,  
 di la musal cig fiir.  
 27 Bul xañ njekk ku ko yelloo,  
 ndegam man nga ko.  
 28 Bul ne say dëkk: «Demal ba beneen,  
 ma jox la,»  
 te fekk la yor.

29 Bul fexeel dëkkandoo  
bu dëkk ak yaw ci kóolute.  
30 Bul joteek kenn ci neen,  
te tooñu la.

31 Bul ñee ku néeg,  
te bu ko roy fenn.  
32 Aji Sax ji daa sib ku dëng,  
xejjoo kuy jubal.

33 Aji Sax ji day alag kër ku bon,  
di barkeel waa kër ku jub.

34 Kuy ñaawle, moo lay ñaawal,  
ku toroxlu, mu may law yiw.

35 Teraanga di céru ku rafet xel,  
ab dof gaccóo gacce.

## 4

### *Ku dégg ndigal, jariñu*

1 Gone yi, tee ngeena dégg yaru baay,  
te déglu, ba am ug dégg?

2 Maa ngi leen di jàngal lu baax,  
buleen fàtte sama njàngle.

3 Man it amoon naa baay,  
di benn bàjjo ci saa ndey.

4 Baay digal ma, ne ma:  
«Jàppal samay wax ci sam xel,  
di jéfe samay santaane, ba dund.

5 Amal xel mu rafet akug dégg.  
Bul fàtte te bul moy samay wax.

6 Bul dëddu xel mu rafet, da lay aar;  
sopp ko, mu sàmm la.

7 Njàlbéenu xel mu rafet mooy sàkku ko;  
ak loo mana am, amal ug dégg.

8 Nawal xel mu rafet, mu darajaal la;  
tafoo ko, mu teral la.

9 Da lay takkal kaala gu jekk,  
solal la mbaxanam buur.»

### *Moytul yoonu ku bon*

10 Déglul, doom, te dégg saay wax,  
ndax nga gudd fan.

11 Yoon wu xelu laa la teg,  
jaarloo la yoonu njub.

12 Doo dox ba tërëf,  
doo daw, téqtalu.

13 Noyal cib yar, bul yoqi,  
sàmm ko, moo yor sa bakkan.

14 Yoonu ku bon, bu ci tegu;  
fu ab soxor di jaar, bu fa dox.

15 Moyul, bu fa jaare;  
mbasal te wéy!

16 Ku bon du nelaw te lorewul,  
du dajjant ba kera muy téqe.

17 Daa bon, def ko lekk,  
di màndee coxoram.

18 Yoonu ku jub day leer,  
ba ne ràññ ni bëccëg.

19 Yoonu ku bon ne kèruus,  
du xam lu muy téqtaloo.

### *Saxal ci lu baax*

20 Doom, déglul samay kàddu,  
teewlul samay wax.

21 Bu ci noppee ja jàkk,  
te jàpp ko ci sa biir xel.

22 Mooy dundloo ku ci jàpp,  
di wéral jëmmam jépp.

23 Sàmmala sàmm sab xol,  
nde xalaati xol ngay jéfe.

24 Dàqal wor, mu sore la;  
kàdduy naxe, na la dànd.

25 Xooleel, sa bët ne jàkk,  
ngay xool sa kanam màkk.

26 Seetlul fi ngay teg tànk,  
ba foo awe, mu wóor.

27 Bul jàdd, ndijoor mbaa càmmoñ,  
na sa tànk moyu lu bon.

## 5

### *Moytul njaaloo*

1 Sama doom, déglul sama xel mu rafet,  
teewlul sama déggin,

2 kon nga saxoo foog,  
say wax tegu ci xam-xam.

3 Lu mel ni lem la ndaw su yemadi di wax,  
làmmiñ wa ni diw gu ñu lay raay.

4 Muj ga mu wex xàtt,  
di gaañe ni ñawkay saamar.

5 Tànk ya day bartalu wuti ndee,  
ay jéegoom àkki njaniiw.

6 Réddul yoonu dund,  
daa lajj, te xamu ko.

7 Kon, doom, déglu ma,  
bul wacc samay kàddu.

8 Soreel ndaw soosu,  
bul jege bunt këram.

9 Kon nga ñàkk daraja, keneen jagoo;  
ku néeg bóom la.

10 Jaambur jariñoo sa doole,  
doxandéem jagoo saw ñaq.

11 Ngay mujje onk,



dese yax, jeex tàkk.

<sup>12</sup> Nga naan: «Su ma yégoon, sopp ab yar te baña sofental waxi àrtu.

<sup>13</sup> Lu ma tee woona dégg ku may digal, tey teewlu sama waxi sériñ ya?

<sup>14</sup> Tuuti ma yàqu yaxeeet fi kanam ñépp!»

### *Yemal ci sa jabar*

<sup>15</sup> Naanal ci sa mbalkam bopp, ndox ma balle sa teenu bopp.

<sup>16</sup> Xanaa doo wasaare sa bëti ndox ca biti, mu def ay wal ca pénc ya?

<sup>17</sup> Nay sa alal, yaw donṅ, ku bokk feneen bokkul.

<sup>18</sup> Yal na sa naanukaay barkeel, nga bânneexoo kiy sa jabar ba ngay ndaw.

<sup>19</sup> Aka sopplu te jekk! Na lay céram doy foo tollu, na la xañ sago saa su ne.

<sup>20</sup> Doom, ana looy xemmeme keneen, bay foye céri jaambur?

<sup>21</sup> Lu waay jëf, Aji Sax ji gis, di xool mboolem fu mu jaare.

<sup>22</sup> Jëf ju bon day fiir ka ko sàlloo, bàkkaaram di mbaal, jàpp ko.

<sup>23</sup> Ñàkk yar, dee; ndof gu réy, sànk.

## 6

### *Bul gàddul kenn bor*

<sup>1</sup> Doom, dangaa gàddul nit bor, dige feyal jaambur,

<sup>2</sup> saw lămniñ yeb la cim pax, nga keppu?

<sup>3</sup> Yaa ngi ci sa loxoy moroom, kon defal nii, doom, ba rëcc: doxal tinuji ko, raamali ko.

<sup>4</sup> Bul gëmm, bul nelaw!

<sup>5</sup> Dawal ni kéwél gu rëcc ub rëbb, ne fërr ni picc mu raw ab fiirkat.

### *Bul yaafus*

<sup>6</sup> Yaafus bee, xoolal xorondom, seetal ci moom, ba muus.

<sup>7</sup> Du ku ko yilif mbaa ku koy sas, te jiiteesu ko.

<sup>8</sup> Bu jotee mu denc ab dundam,

mu jot, mu for lekkam.

<sup>9</sup> Moo yaafus bi, foo àppal tëraay bi? Loo deeti xaar ci yewwu?

<sup>10</sup> Ngay dajjant ak a for bët, di tegley loxook a jaaxaan.

<sup>11</sup> Néewlee ngi lay dikkal nib sàcc, ñàkk gannaayul la.

### *Ku dëng, nii lay mel*

<sup>12</sup> Ku tekkeedi te bon, day wër di fen,

<sup>13</sup> day piis, di wokkeb tànk, di waxe baaraam,

<sup>14</sup> jekkadiy xalaat, di mébét lu bon aka yokku ay.

<sup>15</sup> Moo tax musiba di jekki dal ko, mu jekki yàqu, ba wees paj.

### *Aji Sax ji bañ na lii*

<sup>16</sup> Juróom benn a ngii yu Aji Sax ji bañ, ba ci juróom jaar yu mu seexlu:

<sup>17</sup> kuy danṅiiral, kuy fen,

kuy rey nit ku deful dara,

<sup>18</sup> kuy fexe lu bon ci xolam,

kuy gaawtuy def lu ñaaw,

<sup>19</sup> seede buy fen rekk, rawatina kuy yokku ay ci biiri bokk.

### *Ku njaaloo gis ko*

<sup>20</sup> Doom, defal li la baay sant, te bul wacc ndigalal yaay.

<sup>21</sup> Takkal foo tollu, taf ci sa xol, fas ko ci sa baat.

<sup>22</sup> Booy dox mu di la jiite, nga tëdd, mu di la sàmm, nga yewwu, mu di la waxal.

<sup>23</sup> Santaane da lay niital, ndigal leeralal la, artook ub yar di yoonu dund.

<sup>24</sup> Da lay aar ci ndaw su bon ak jabaru jaambur ak lămniñam wu neex.

<sup>25</sup> Bu ko xemmeme taaram, bumu la fiir aki lamsal.

<sup>26</sup> Dogu mburu fey nab gànc; waaye jabaru jaambur, bakkanu lëmm.

<sup>27</sup> Te ku ne sawara cas, tafoo, lakk say yére.

<sup>28</sup> Ku dox ciy xal it, say tànk ñor.

<sup>29</sup> Mooy ànd ak jabaru jaambur, ku ko def gis ko.

30 Deesul sikk ku sàcc aw ñam,  
def ci biiram ndax xiif.  
31 Waaye bu feeñee, fey boroom juróom  
yaari yoon,  
joxe alalu këram yépp.  
32 Njaaloo di ñàkk bopp,  
kuy sànk bakkanam a koy def.  
33 Mbugal ak toroxte dib añaam,  
te gacceem du deñ.  
34 Fiiraange day feesal xolu góor,  
te du ñéeb lu buy feyu.  
35 Du faale ndàmpaay,  
loo ko may, may, du giif.

## 7

### *Ndaw su yemadi da lay fiir*

1 Doom, sàmmal samay wax,  
fonk samay santaane.  
2 Jéfeel samay santaane, ba dund,  
jàppal samay ndigal sa fukki loxo.  
3 Takkal ci say waaraam,  
bind ko ci sa àlluway xol.  
4 Safool xel mu rafet, muy sab jigéen,  
te nga xejjoo dég-dég ni sa mbokk lenqe.  
5 Dina la aar ci ndaw su yemadi,  
bokk feneen, di wax lu neex.

### *Ndaw su yemadi woote na*

6 Damaa tollu sama palanteer,  
séentu ca xarante ya,  
7 séen ca biir téxét ya,  
ku ma seetlu ca xale yu góor ya,  
muy ku ñàkk bopp.  
8 Muy dem ba fa ndaw say taxaw, ca  
selebe yoon wa,  
daldi wuti kër ndaw sa.  
9 Ngoonug suuf la, jant biy lang,  
muy lëndëm di gëna guddi.  
10 Ndaw si jekki dajeek moom,  
sol yérey gànc, lal pexeem.  
11 Daa xumb, të,  
du toog këram.  
12 Ma nga ca mbedd ma, ne ca pénc ya,  
ruqoo ruq, ma ngay yeeroo.  
13 Ndaw sa ne ko katam, foon,  
ne wajj, ne ko:  
14 «Tey matal naa la ma digoon Yàlla,  
yàppu bernde waa nga kër ga, saraxu  
cant la\*.

\* 7:14 7.14 saraxu cant: ku masaana rendi gàtt bu mu def saraxu cant ci biir jàmm, dangay jël lenn ci yàpp wi, bokk kook sa njaboot, lekk. Ci lekk googa la ndaw siy woo xale bu góor bi.

15 Moo ma taxa dikk dajeek yaw.  
Seet naa laa seet, ba gis la.  
16 Lal naa saab lal, ba mu jekk,  
di malaan yu yànj, bawoo Misra.  
17 Lal ba, ma xeeñal, mu ne bann,  
di ndàbb, cuuraay ak xas mu neex.  
18 Dikkal, nu baanee baane, ba bët set,  
te bannexu ci mbëggeel.  
19 Sama jëkkër newu fa,  
daa dem yoon wu sore.  
20 Mbuusum xaalis la nàbb, yóbbu,  
du ñibbsi ndare weer wi fees dell.»  
21 Muy mocc ak a moccaat, ba nax ko,  
di wax lu neex, ba man ko.  
22 Waa ja jekki, topp ko,  
mbete yëkk wu ñuy rendiji,  
mbaa dof bu ñu jéng, di ko yari.  
23 Mooy picc mu tàbbi cig fiir.  
Du xam ne day dee,  
ba keroog fitt jam ko ci xol.

24 Kon nag, doom, dégluleen ma,  
teewluleen samay wax.  
25 Bu leen soosu ndaw xiir ci moy,  
buleen teggi, topp ko.  
26 Bare na ku dee, moo ko rey,  
maneesula waññ ñi mu rey ñépp.  
27 Këram yoonu njaniw la,  
daa bartalu, tàbbi néegi ndee.

## **Xel mu Rafet bàkku na**

## 8

### *(Saar 8)*

1 Déggal! Soxna si, Xel mu Rafet a ngi  
woote,  
dé-g-dég di xaacu.  
2 Ma nga taxaw ca selebe yoon ya,  
fu gëna kawé ca yoon wa.  
3 Ma nga bunt dëkk ba, taxaw;  
fa nit ñay jaare lay xaacoo naan:  
4 «Yeen mbooloo yi laay yéene,  
doom aadama yi laay joor.  
5 Téxét bi, deel foog,  
dof bi, déggal ndéey lu xelu.  
6 Déglul, ma wax la lu am solo,  
dégtal la njub.  
7 Dégg laay wax,  
di bañ wax ju bon.

8 Lu ma wax njob la.  
Amul lu dëng mbaa lu jekkadi.  
9 Lépp a dëgg ci ku am ug dégg,  
te jub ci ku for xam-xam.  
10 Na la samab yar gënal xaalis,  
xam-xam dàqal la ngën-gi-wurus.  
11 Ndax man, xel mu rafet, maa gën  
gànjjar,  
loo bëgg maa ko raw.

12 «Man, Xel mu Rafet, foog di sama kër;  
xam-xam ak pexe, ma for.  
13 Ragal Aji Sax ji mooy bañ lu bon.  
Réy, xeebaate, yoonu mbon,  
ak wax ju jekkadi, ma boole bañ.  
14 Maa moomi digle, di maye gis-gis;  
maa am ug dégg, di boroom doole.  
15 Samay pexe la buur di jiiitee,  
kilifa di ci àttee dëgg.  
16 Ci samay pexe la njiit di saytoo,  
ñook kàngam yeek ñiy àtte dëgg ñépp.  
17 Maa sopp ku ma sopp,  
ku ma seet tigi, gis ma.  
18 Alal ak teraangaa ngi fi man,  
am-am bu sax it ak yoolu njekk.  
19 Li may mayee gën wurus, wa gën,  
sama njariñ wees xaalis ba gën.  
20 Yoonu njekk laay jaare,  
di jëfe li yoon àtte rekk.  
21 Ku ma sopp, ma nàddil la,  
feesal sab denc.»

### *Xel mu Rafet a mag lépp*

22 Soxna si, Xel mu Rafet nee na:  
«Aji Sax ji jagoo na ma ca njàlbéen,  
ma jiiitu ca jéfam ya woon.  
23 Bu yàgg lañu ma dëj,  
ca ndoorte la, bala suuf a sosu.  
24 Ba may dikk, géej amul,  
ndox ballul bay fees, di wal-wali.  
25 Dikk naa bala tund yu mag yee sampu,  
lu jiiitu tund yu ndaw yi,  
26 laata Yàllaa sàkk suuf aki àllam  
ak feppu pënd ci àddina.  
27 Ba muy taxawal asamaan, maa nga fa,  
ak ba muy rëdd fa asamaan taseek géej,  
28 ak ba muy teg niir ya fa kaw,  
ak ba muy dooleel ndoxi xóotey géej,  
29 ak ba muy sàkkal géej kemoom,  
ba du jàll fa mu wax.  
Ba muy rëdd fa muy samp àddina,

30 man, Xel mu Rafet, maa doon ku xareñ  
ci wetam,  
di ko bannexal bés bu ne,  
tey bannexu fi kanamam.  
31 May bége wërngalu àddinaam,  
di bannexoo doomi aadama.»

*Xel mu Rafet dénkaane na*

32 «Kon nag, doom, dégluleen ma.  
Mbégte ñeel na ki may topp.  
33 Dégluleen ku leen di yar, daldi muus.  
Buleen ko sàggane!  
34 Mbégte ñeel na ki may déglu,  
di teewlu ca sama bunt bés bu nekk,  
di ma toogaanu sama bunt kër.  
35 Ku ma daj, gudd fan,  
Aji Sax ji bége la.  
36 Ku ma moy loru,  
ku ma bañ, daa repp.»

## **Ñaari berndee ngi**

### **9**

*(Saar 9)*

### *Xel mu Rafet a ngi berndeel*

1 Soxna si, Xel mu Rafet daa tabax këram,  
yett juróom yaari kenoom.  
2 Mu rendi ag juram,  
njafaan ay biiñam, xelli,  
taaj ay ndabam.  
3 Xel mu Rafet yónni ay janqam,  
di wootee fu kawee kawee ca dëkk ba,  
4 naan: «Képp ku téxét, jàddal ba fii!»  
Ku ñàkk bopp, mu ne ko:  
5 «Kaay, ma may la, nga lekk,  
xellil lay biiñ, nga naan.  
6 Dëddul jëfi téxét ba dund,  
di jubal ci yoonu dégg.»

### *Kuy xeloo ngi ak kuy ñaawle*

7 Artu kuy ñaawle, feyoo saaga rekk,  
yedd ab soxor, yooloo loraange.  
8 Bul yedd kuy ñaawle, da lay jéppi;  
yeddal ku rafet xel, mu naw la.  
9 Xelalal ku xelu, mu yokku.  
Xamalal ku jub, mu yokk njàngam.  
10 Ragal Aji Sax ji di njàlbéenu rafet xel,  
xam Aji Sell ji di am ug dégg.  
11 Maay Xel mu Rafet, ku ma topp gudd  
fan,  
dund, dundati.  
12 Rafet xel, jariñu,

kuy kókkalee, wéetook sa añ.

*Ku dofee ngi berndeel*

<sup>13</sup> Jigéen ju dof day xumb,  
reew, du xam lu xew.

<sup>14</sup> Day toog bunt këram,  
mbaa fu kawee kawee ca dëkk ba,

<sup>15</sup> di woo ña fay jaare  
te jubal seenu yoon.

<sup>16</sup> Ma nga naa: «Képp ku téxét, jàddal ba  
fii!»

Ku ñàkk bopp, mu ne ko:

<sup>17</sup> «Ndox mu lewul a neex,  
ñamu làqu-lekk dàqati.»

<sup>18</sup> Waaye kooka du xam ne waa njaniiw a  
nga fa,

te ku wuyji, tàbbi biir bàmmeeel.

## Kàddu yu Xelu yu Suleymaan

### 10

*(Saar 10—24)*

<sup>1</sup> Kàddu yu xelu yu Suleymaan.

Doom rafet xel, baay ba bég;  
doom dof, ndey ja tiis.

<sup>2</sup> Alal ju lewul du jariñ;  
jub, mucc ci gàtt fan.

<sup>3</sup> Aji Sax ji du seetaan ku jub, di xiif,  
waaye day xañ ab soxor la mu xemmem.

<sup>4</sup> Yaafus, walaakaana;  
farlu, woomle.

<sup>5</sup> Ku ngóob jot, nga góob, xelu nga;  
ngóob taxaw, ngay nelaw, gacce la.

<sup>6</sup> Jub, barkeelu;  
ku soxor, wax ja làq fitna.

<sup>7</sup> Ku jub barkeel, saw tur du fey;  
ab soxor, turam seey.

<sup>8</sup> Ku rafet xel day jëfe santaane,  
ab dof waxa wax, ba loru.

<sup>9</sup> Maandu, fegu;  
dëng, weeru.

<sup>10</sup> Piiseek làq-làqal, sabab njàqare;  
ab dof waxa wax, ba loru.

<sup>11</sup> Kàdduy ku jub bētu ndox la, day naatal;  
waaye ku soxor, wax ja làq fitna.

<sup>12</sup> Mbañeelak ayoo;  
cofeelak jéggale bépp tooñ.

<sup>13</sup> Kuy dégg, say wax rafet;  
te ku ñàkk bopp, yelloo yetu gannaaw.

<sup>14</sup> Ku rafet xel day xam, ne cell;  
bu dof noppiwul, yàqule teew.

<sup>15</sup> Alal day aar boroom ni ab tata,  
ñàkk di lor baadoolo.

<sup>16</sup> Ku jub jot peyam, dunde;  
ab soxor di bàkkaare alalam.

<sup>17</sup> Yaru, gudd fan;  
sàgganey àrtu, sànkú.

<sup>18</sup> Ku la nëbbal mbañeel, da lay fen;  
kuy wër di sos, ab dof la.

<sup>19</sup> Wax ju bare, moy ñàkku ca;  
ku moom sa làmmiñ, xelu nga.

<sup>20</sup> Kàddug ku jub di ngèn-gi-xaalis,  
xelum coxor amul solo.

<sup>21</sup> Kàdduy ku jub jariñ na ñu bare,  
dof ñàkk na bopp, ba far dee.

<sup>22</sup> Barkeb Aji Sax jeey maye alal,  
kër-këri taxula barele.

<sup>23</sup> Jëf ju bon la dof di foye;  
ku am dég-dég safoo lu xelu.

<sup>24</sup> Ab soxor, li mu ragal moo koy dab;  
nammeelu ku jub day sotti.

<sup>25</sup> Bu ngélén walee, ab soxor ne mes;  
ku jub, sab reen sax ba fàww.

<sup>26</sup> Ndaw lu tayel ca ka yónnee  
daa mel ni lu forox ciy gëñ  
mbaa saxar ciy gët.

27 Ragal Aji Sax ji, gudd fan;  
soxor, gàtt fan.

28 Ku jub day séentu mbégte, gis ko;  
ab soxor yaakaar, yàkki.

29 Aji Sax jeeki nammeelam rawtu la ci ku  
mat,  
di sànkute ci kuy def lu bon.

30 Ku jub deesu ko daaneel mukk,  
ku soxor du yàgg cim réew.

31 Kàddug ku jub day jur xel mu rafet,  
ku wax njekkar ñu tēj sa gémmiñ.

32 Ku jub day xam wax ju yiw;  
ab soxor sàlloo waxi njekkar.

## 11

1 Aji Sax ji bañ na njublanj ci nattub  
diisaay,  
ay nattukaay na mat, muy bannexam.

2 Ku réy-réylu rus;  
woyofal ndax nga xelu.

3 Kuy jubal, jiital mat.  
Njublanj ak wor, detteelu.

4 Alal du jariñ bésu mbugal;  
jub, mucc ci gàtt fan.

5 Ku mat, njekk xàllal la;  
coxor daaneel boroom.

6 Jubalal, sa njekk musal la;  
ab workat day bégge, ba far keppu.

7 Ab soxor saay, yaakaaram seey,  
rawatina yaakaar ju sēs ci alal.

8 Ku jub mucc ci njàqare,  
ab soxor wuutu ko ca.

9 Ay sos la yéefar di loree,  
waaye ku jub xam-xam la cay mucce.

10 Ku jub baaxle, waa dëkkam bannexu;  
ab saaysaay saay, mbégte dim riir.

11 Barkeb ku jub teral nab dëkk,  
kàddug ku soxor tas nab dëkk.

12 Waxi xeebaate ñàkk bopp la,  
ku am ag dégg day noppi.

13 Kuy wër di sos dangay wuññi sutura,  
ku jara wóolu dangay am bannemeelu biir.

14 Tegtal tumurànke, am réew suux;  
digle bare, ndam dikk.

15 Bul gàddul kenn bor, di loru;  
bañ koo dige, daldi am jamm.

16 Jigéen, na yiw, ñu sagal ko;  
góor gu néeg, alal donj.

17 Ku baax, boppam;  
ku bon, boppam.

18 Coxor feyul boroom, day naxe;  
deel def njekk, sag pey wóor.

19 Saxoo njekk, dund;  
sàlloo mbon, dee rekk.

20 Aji Sax ji bañ na njublanj,  
safoo maandute.

21 Ab soxor mbugalam du jaas, wóor na;  
te ku jub, saw askan mucc.

22 Taaru jongama ju xel ma gàtt,  
mooy jaaro wurus ci noppu mbaam-xuux.

23 Ku jub, lu baax rekk lay sàkku;  
soxor biy yaakaar, mujje mbugal.

24 Nit a ngi tabe, di yokkule;  
nit di nēj-nēji, gēna ñàkk.

25 Ku yéwén, woomle;  
kuy suuxat, suuxu.

26 Nit a ngi móolu kuy denc pepp, ba mu  
ñàkke,  
di gērēm ka koy jaay.

27 Wutala wut lu baax, ñu nawloo la;  
ku sàkku lu bon, yaa koy yenu.

28 Ku yaakaar sa alal sab jéll a ngi ñëw,  
ku jub day juble ni gàncax gu naat.

29 Kuy fitnaal sa waa kër doo donn dara,  
ku dof, boroom xel yilif la.

30 Nit ku jub garab la, doom ya di dundal;  
ku rafet xel wut nit ñi.

31 Ku jub, jot sa yool ci kaw suuf,  
moykat beek soxor bi it daw raw.

## 12

1 Ku bëgga xam, bëgg ku la yedd;  
ku bañ ku la àrtu, bàyyima nga.

2 Ku baax, Aji Sax ji bége la;  
kuy fexe lu bon, mu daan la.

3 Ab soxor, taxawaayam du yàgg;  
ku jub garab la, reen ba ne kekk.

4 Jeeg bu jàmbaare day teral jëkkër ja,  
jeeg buy rusloo day semmal jëkkër ja.

5 Ku jub, yoon lay mébét;  
ab soxor di lal pexey wor.

6 Ab soxor, waxam am tëru la, day reye;  
kàdduy kiy jubal di musle.

7 Ab soxor bu daanoo, jeex na;  
ku jub, sa kër taxaw, ne këcc.

8 Xel mu ñaw, jëw bu rafet;  
sam xel jekkadi, ñu xeeb la.

9 Woyof mbubb, am benn surga donṅ,  
moo gën réyal turki tey dee ak xiif.

10 Ku jub day topptoo ag juram,  
ab soxor néeg cig juram.

11 Beyal sab tool, sab dund doy;  
topp ay caaxaan ñàkk bopp la.

12 Ab soxor ay xemmem alal ju lewul,  
ku jub garab la, reen baa ko meññal.

13 Bàkkaaruu làmmiñ dugal na boroom,  
ku jub mucc ci njàqare.

14 Làmmiñ reggal na boroom;  
ñaq, jariñu.

15 Na dof di jëfe, njub la ci moom;  
dégg ndigal rafet um xel la.

16 Ab dof bu meree, mu gaawa feeñ;  
ku teey, tanqamlu saaga.

17 Ku dëggu, seede dëgg;  
seede bu bon, fen rekk.

18 Làmmiñu waxkat, jam-jami jaasi;  
kàddu gu xelu, garab la ci.

19 Kàdduy dëgg, day sax dàkk;  
fen, xef xippi, mu wéy.

20 Kuy ràbb lu bon lal pexey wor,  
kuy digle jàmm, am mbégte.

21 Ku jub du amu ay,  
ab soxor du tàggook musiba.

22 Aji Sax ji sib na fen-kat,  
safoo ku dëggu.

23 Nit ku ñaw day xam, ba ca;  
ab dof siiwal waxi dofam.

24 Njaxlaf, jiitu;  
yaafus, des gannaaw.

25 Njàqare day jeexal xolu boroom,  
wax ju neex di tooyal xolam.

26 Ku jub day seetlu ku muy xaritool\*;  
soxor bi, jikkoom a koy sànk.

27 Ab yaafus bu rëbbee, sooy;  
cawarte koom la.

28 Jaaral ci njekk, ba gudd fan;  
yoon wu baax deesu fa dee.

\* 12:26 12.26 Mbaa: Ku jub day teg moroomam ciw yoon.

**13**

<sup>1</sup> Doom ju xelu dégg yaru baay,  
kuy ñaawle faalewuli àrtu.

<sup>2</sup> Wax ju rafet yool na boroom,  
workat fitna la namm.

<sup>3</sup> Moom sa làmmiñ, sàmm sa bakkan;  
rattaxle, yàqule.

<sup>4</sup> Ab yaafus day yaakaar, du am;  
ab njaxlaf sàkku, woomle.

<sup>5</sup> Ku jub bañ na ay fen,  
ku soxor di indi gàcceek yeraange.

<sup>6</sup> Ku mat day jub, ba fegu;  
moykat soxor, ba sànkku.

<sup>7</sup> Nit a ngi am-amlu, amul dara;  
nit di dee-deelu te fees dell.

<sup>8</sup> Ku am ay fey alal, ba mucc;  
ku amul deesu ko tèkku.

<sup>9</sup> Ku jub day leer nàññ,  
ab soxor mel ni taal bu fey.

<sup>10</sup> Réy-réylu jote rekk lay jur,  
ku dégg ndigal a xelu.

<sup>11</sup> Alal ju lewul day naaw;  
foral benn-benn, ba biibal.

<sup>12</sup> Yaakaar ju tas day jeexal xol,  
aajo ju faju di suuxat bakkan.

<sup>13</sup> Ku sofental ndigalu Yàlla, yàqule;  
ku jëfe santaane Yàlla, yoolu.

<sup>14</sup> Njàngle mu xelu day suuxat bakkan,  
ba boroom du tàbbi ci fiiri ndee.

<sup>15</sup> Dangay xam lu jaadu, ñu naw la;  
yoonu workat day metti.

<sup>16</sup> Képp ku teey jëfe xam-xam;  
ab dof ay siiwal ndofam.

<sup>17</sup> Ndaw lu bon day loru.  
Ndaw lu wóor garab la ci nit.

<sup>18</sup> Ku sàggane yoonu yar, séddoo ñàkk ak  
gàcce;  
kuy déggi àrtu, am teraanga.

<sup>19</sup> Aajo ju faju tooyal na xol,  
te ab dof jomb naa dèddu mbon.

<sup>20</sup> Àndal ak ku xelu, sam xel rafet;  
ku lèngook ub dof, loru.

<sup>21</sup> Ay topp na moykat,  
ku jub juble.

<sup>22</sup> Ku baax, donale ba cay sètam;  
alalu moykat, muuru ku jub.

<sup>23</sup> Ku néewle bey na, meññeef ne gàññ,  
ñu àtte ko ñàkkal, mu ñàkk ko.

<sup>24</sup> Ku dul bantal sa doom, bëggoo ko.  
Ku bëgg sa doom teel koo yar.

<sup>25</sup> Ku jub day lekk ba regg,  
soxor ba dèkke xiif.

**14**

<sup>1</sup> Jigéen, rafet xel, dimbali waa këram,  
su deeb dof, tas këram.

<sup>2</sup> Kuy jubal day ragal Aji Sax ji,  
ku dëng teddadil nga ko.

<sup>3</sup> Ab dof a ngi réy-réylu, làmmiñam yar  
ko;  
ku rafet xel, sa kàddu aar la.

<sup>4</sup> Su yëkk takkul, bey, sàq wéet;  
mu beye dooleem, meññeef ne gàññ.

<sup>5</sup> Seede bu dëgg, dëgg rekk,  
seede bu dëgguwul, fen rekk.

<sup>6</sup> Ab ñaawlekat day wut xel mu rafet, mu  
réer ko;  
ku am ug dégg, xam yomb la.

<sup>7</sup> Dàndal ab dof,  
du la yokk xam-xam.

<sup>8</sup> Ku ñaw day xelu, xam li muy def;  
ab dof di nax boppam.

9 Ab dof, su bàkkaaree, yoonam!  
Te ñay jubal a séq yiwu Yàlla.

10 Tiisu xol, boroom a ko xam;  
mbégte ma it jaambur bokku ca.

11 Ab soxor, këram day tas,  
mbaarum ku jub di naat.

12 Yoon a ngii, nit defe ne jub na,  
te mu jëme ko ci dee.

13 Nit a ngi ree, xol ba tiis,  
te mbégte mujje na njàqare.

14 Ku def njekkar sab añ mat,  
ku baax gën law demin.

15 Ab téxét, loo wax mu gëm;  
ku ñaw xam fi ngay jaare.

16 Ku xelu day ragal, di dëddu lu bon;  
ab dof day ràkkaaju, du tiit.

17 Ku gaawa mer, def jëfi dof,  
te kuy fexeel nit, ñu bañ la.

18 Ab téxét ndof ay céram,  
ku ñaw jagoo xam-xam.

19 Ku bon, ku baax sut la;  
ku soxor ay toogaanu ku jub.

20 Ku ñàkk, say dëkk sax bañ la;  
ku barele, barey xarit.

21 Ku xeeb sa dëkkandoo, bàkkaar nga;  
ku baaxe ku ñàkk, mbégte ñeel la.

22 Kuy mébét lu bon daa réer,  
kuy mébét lu baax am nga ngor ak  
worma.

23 Kër-këri, jariñu;  
waxi neen, loxoy neen.

24 Ku rafet xel jagoo alal,  
ab dof ràngoo ndofam.

25 Seede bu dëgg day jot bakkan,  
kuy fen day wore.

26 Ragal Aji Sax ji kaaraange gu wér la ci  
nit,  
di rawtu ciy doomam.

27 Ragal Aji Sax ji day suuxat bakkan,  
ba boroom du tàbbi ci fiiri ndee.

28 Su mbooloo baree, buur am ndam;  
fu nit ña néew, kilifa du fa dara.

29 Muñ mer, déggin wu yaa;  
gaawa tàng, gënatee dof.

30 Xel mu dal, yaram wu naat;  
firaange semmal boroom.

31 Ku sonal ku ñàkk, tooñ nga ka ko sàkk;  
ku baaxe ku néewle, teral nga ka ko sàkk.

32 Coxor detteel boroom;  
ku jub fegoo maanduteem.

33 Kuy dégg, sam xel saxoo rafet;  
ab dof sax xam na lu xelu.

34 Njekk day teral aw xeet,  
moy di gâceel aw askan.

35 Buur day bége jawriñ ju xelu,  
di mbugal nitu gâce.

## 15

1 Tont lu neex day giifal,  
baat bu ñagas di jógal xol.

2 Ku xelu àddu, xam-xam rafet;  
ab dof di talalali.

3 Aji Sax ji moo gis lépp,  
di xool ku baax ak ku bon.

4 Wax ju neex garab la, doom ya di  
dundal,  
kàddu yu jekkadi di jeexal xol.

5 Ab dof day xeeb yaru baay ba,  
kuy dégg waxi àrtu, xelu nga.

6 Kër ku jub, koom gu yaa;  
ku jubadi, alalam jur fitna.



7 Ku xelu àddu, xam-xam law;  
ab dof amul xelam.

8 Saraxub ku soxor, Aji Sax ji bañ na ko;  
ñaanu kuy jubal da koy bége.

9 Jëfi ku bon, Aji Sax ji seexlu na ko;  
ku sàlloo njekk, safoo na la.

10 Mbugal tar na, ñeel ku wacc yoon;  
ku bañ waxi àrtu, dangay dee.

11 Njaniiw ak biir suuf, Aji Sax ji di gis,  
xolu doom aadama waxi noppi.

12 Kuy ñaawle buggul ku ko àrtu,  
te du laaji ku rafet xel.

13 Xol bu sedd, kanam gu leer;  
xol bu tiis, boroom ne yogg.

14 Ku am ug dégg sàkku xam-xam,  
ab dof di toppi caaxaan.

15 Xol bu tiis, naqar wu sax;  
xol bu neex, bannex bu sax.

16 Néewle te ragal Aji Sax ji  
moo gën barele, sa bopp ubu.

17 Njëlu ñetti xob fa ñu la soppe  
moo dàq yàpp wu duuf fu ñu la bañe.

18 Naqari deret, taalu ay.  
Teey, fey fitna.

19 Yoonu yaafus, dégi neen;  
kuy jubal, saw xàll yaa.

20 Doom rafet xel, baay ba bég;  
te ab dof ay xeeb ndey ja.

21 Jëfi dof a neex ku ñàkk bopp,  
ku am ug dégg def njub.

22 Diisoo ñàkk, pexe moy;  
digle takku, pexe joy.

23 Nit bége na tontam lu dal,  
kàddu gu jib fa mu ñoree neex!

24 Ku rafet xel, jubal nga yoonu gudd fan,  
moyu teggi, ba jëm njaniiw.

25 Ku bew, Aji Sax ji màbb sa kër;  
ab jëtun, Aji Sax ji ñonjal pàkkam.

26 Aji Sax ji bañ na mébét mu bon,  
te wax ju yiw daa sell fa moom.

27 Wutin wu lewul, sonal sa waa kër;  
ku bañ alalu ger gudd fan.

28 Ku jub day teeylu tontam;  
ab soxor, wax ju ñaaw rekk.

29 Aji Sax ji day dëddu ab soxor,  
di nangu ñaanu ku jub.

30 Kanam gu leer day seral xol;  
xibaaru jàmm, jàmmu yaram.

31 Kuy dégg àrtu yu koy musal,  
ku rafet xel a ngoog.

32 Xalab waxi yar, foye sa bopp la;  
deel déggi àrtu, yokk sam xel.

33 Ragal Aji Sax ji day rafetal xel;  
jèkke woyof, mujje tedd.

## 16

1 Nit ay dogu ci xolam,  
Aji Sax ji dogal, mu sotti.

2 Lu waay def, daa jekk ca moom,  
waaye Aji Sax jeey natt xol yi.

3 Loo bégga def, diis ko Aji Sax ji,  
say mébét sotti.

4 Lu Aji Sax ji sàkk, mbir la ca namm,  
ba ci ku soxor ak bésu mbugalam.

5 Aji Sax ji sib na ku réy,  
da koy mbugal ci lu wér.

6 Ku jiital ngor ak worma, Yàlla jéggal la;  
ku ragal Aji Sax ji, dëddu lu bon.

7 Ku Aji Sax ji rafetlu say jëf,

say bañ sax, mu jubaleek yaw.

<sup>8</sup> Néewle te jub  
moo gën barele te jubadi.

<sup>9</sup> Nit ay sumb yoonam,  
Aji Sax ji sottal.

<sup>10</sup> Su buur àddoo cib àtte,  
muy kàddu gu Yàlla dogal.

<sup>11</sup> Nattub diisaay aki ndabam, na jub ngir  
Aji Sax ji.  
Moo sàkk mboolem nattukaay.

<sup>12</sup> Buur daa sib kuy def lu bon,  
ngir njekkay dëgëral nguuram.

<sup>13</sup> Wax ju dëggu, buur safoo boroom;  
ku jub, buur bëgg sa kàddu.

<sup>14</sup> Merum buur ndaw la, dee a ko yónni;  
ku rafet um xel, giifal ko.

<sup>15</sup> Buur, na kanam ga leer, sa bakkan  
mucc,  
su la baaxee, mu mel ni taw bu topp um  
nji.

<sup>16</sup> Wutal xel mu rafet, bàyyi wurus;  
taamul ag dëgg, wacc xaalis.

<sup>17</sup> Yoonu kuy jubal day moyu lu bon,  
ku teeylu sa jëfin, sàmm sa bakkan.

<sup>18</sup> Réy, yàqule;  
xeebaate, jóoru.

<sup>19</sup> Woyof, ànd ak ku néewle  
moo gën séddook ku bew la mu lewal.

<sup>20</sup> Ku teewlu mbir, baaxle;  
ku wóolu Aji Sax ji, bég.

<sup>21</sup> Ki rafet xel mooy kiy ràññee,  
te su wax rafetee, dég-dég yomb.

<sup>22</sup> Xel mu ñaw day suuxat bakkan,  
te ab dof jëfi dofam a koy yar.

<sup>23</sup> Ku rafet xel, say kàddu xelu;

soo waxee, yey.

<sup>24</sup> Wax ju yiw di lem juy xelli,  
neexa ñam, di jàmmi yaram.

<sup>25</sup> Yoon a ngi, nit defe ne jub na,  
te mu jëme ko ci ndee.

<sup>26</sup> Ku bëgg lu neex, liggéey;  
ku bëgga faj sab xiif, njaxlaf.

<sup>27</sup> Sagaru nit mooy sulli lu bon,  
ay waxam sax sawara la.

<sup>28</sup> Nitu njekkar day yokk réeroo,  
ab soskat di féewaley xarit.

<sup>29</sup> Ab soxor day yóbbaaale dëkkandoom,  
jëme ko ci lu bon.

<sup>30</sup> Piise, ku nar njekkar;  
màttu, ku def lu bon.

<sup>31</sup> Bijjaawu bopp kaala gu yànj la,  
njekk a koy maye.

<sup>32</sup> Muñ mer, moo gën njambaar;  
tënk sa bakkan moo raw nangub dëkk.

<sup>33</sup> Tegoo bant nit a koy def,  
dogal ba Aji Sax ji la.

## 17

<sup>1</sup> Feppu dugub wu ànd ak dal  
moo gën lu ne gàññ kërug ayoo.

<sup>2</sup> Surga, bu rafetee xel, tiim doom juy  
rusloo,  
séddu ni doom ci alalu sangam.

<sup>3</sup> Xaalis ak wurus sawaraa koy xelli,  
waaye nit, ab xolam, Aji Sax jee koy nattu.

<sup>4</sup> Ku bon ay déglu wax ju bon,  
fen-kat di teewlu ay sos.

<sup>5</sup> Kuy ñaawal ku ñàkk, tooñ nga ka ko  
sàkk;  
kuy reetaan ku jàq, mbugalam du jaas.

6 Teraangay maam, sèt ba;  
sagu doom, baay ba.

7 Waxi teggin jekkul cib dof,  
ay fen ci as gor waxi noppi.

8 Alalu ger njiglaay la ca ka koy joxe,  
ba fu mu jublu, mu nooy.

9 Bale tooñ, yokk cofeel;  
sulliw ay, tas xarit.

10 Ku am ug dégg ngay yedd benn yoon,  
ab dof téeméeri yar du ko wañni.

11 Ku bon fippu donṅ lay jéem,  
te musibaa koy dikkal.

12 Taseek gaynde gu ñàkki doomam  
moo gën taseek dof ak yëfi dofam.

13 Kuy feye mbon jëf ju baax,  
lu bon du jóge sa kër.

14 Ndoortel ay di wal mu tàmbali,  
luy indib xuloo, bàyyil.

15 Dëggal ku sikk ak daan ku jub,  
Aji Sax ji sib na yooyu jaar.

16 Ab dof du am xalis, jënde xel mu rafet;  
buggu ca dara.

17 Xarit du bëgg, di bañ;  
mbokk day bokk ak yaw say coono.

18 Ku ñàkk bopp ay dige feyal jaambur,  
di ko gàddul boram.

19 Ku bëggu ay bëggi tooñ;  
damu, yàqule.

20 Ku njublanṅ du baaxle,  
kuy wax njekkar aṅe musiba.

21 Ku jur ab dof, am naqar;  
ab dof waajuram du bég.

22 Xol bu sedd day garabal,  
xol bu tiis day semmal.

23 Ku bon day nangu alalu ger ca suuf,  
nara jalgati yoon.

24 Ku am ug dégg ne jàkk ci xel mu rafet,  
ab dof ne xóll, xel ma sore lool.

25 Doom ju dof di tiisu baay ba  
ak naqaru ndey ja.

26 Ku deful dara, feyloo kob daan, dug  
njub;  
dóor as gor du yoon.

27 Ku moom sa làmmiñ am nga xam-xam,  
te ku teey am ngag dégg.

28 Ab dof sax bu noppee, niroom boroom  
xel;  
ku ne cell, ñu fooge lag muus.

## 18

1 Ab siis, bànnexu boppam rekk,  
loo ko digal mu xalab.

2 Ab dof wutul ag dégg,  
balaa caag muy jaay ag muus.

3 Bu mbon nuyoo, xeebeel topp ca;  
jëf ju ñaaw, gacce rekk.

4 Waxi nit ndox mu xóot la,  
bu bënnee, xelli, ñu di ca xelu.

5 Faral ku tooñ baaxul,  
bul xañ dëgg ku deful dara.

6 Ab dof, làmmiñam sooke naw ay,  
ay waxam di sàkku yeti gannaaw.

7 Ab dof, waxam a koy sànk,  
làmmiñu boppam a koy dugal.

8 Waxi jëwkat di ñam wu neex  
wuy seey, jàll ca biir-a-biir.

9 Kuy sàggane sa liggéey,  
yaak kuy yàq a bokk.

10 Turu Aji Sax ji rawtu bu mag la.  
Ku jub daw làqu ca, raw.

11 Alal day aar boroom ni ab tata,  
mu xalaat ne maneesu koo bëtt.

12 Bew, yàqule;  
jèkke woyof, mujje tedd.

13 Tontu te déggagoo,  
ndof la, ak ñàkk kersa.

14 Ku bëgga dund, dékku woppi yaram,  
waaye xol bu jeex maneesu koo wéye.

15 Ku am ug dégg wut xam-xam,  
ku rafet xel sàkku xam-xam.

16 Deel maye, da lay ubbil bunt,  
di la àggle ci boroom daraja.

17 Ku jèkke layoo, ñu ne yaa yey,  
ba keroog ka nga joteel weddi la.

18 Tegoo bant day feyu ay,  
di àtte boroom doole yu jote.

19 Jubook mbokk moo tooñ,  
jéggi tataa ko gëna yomb,  
mbaa ubbi bunt yu tëje ràpp.

20 Làmmiñ feesal na biiru boroom,  
yoolu kàddu suur na boroom.

21 Dund ak dee a ngi ci làmmiñ,  
te wax garab la, ku ko bëgg, lekk ca doom  
ya.

22 Ku am jabar, am nga ngëneel,  
am nga yiwu Aji Sax ji.

23 Ku ñàkk a ngi leewaayu,  
boroom alal di ko jànni.

24 Barey àndandoo lor a ngi ci,  
waaye xarit a ngi gëna taq nit mbokkam.

## 19

1 Ñàkk te mat,  
moo gën dof, di wax njekkar.

2 Teeyadi baaxul,  
ku yàkkamti moy saw yoon.

3 Nit def na jëfi dof, ba sànkú,  
walbatiku mere Aji Sax ji.

4 Ku barele, barey xarit;  
ku ñàkk, sab xarit dagg la.

5 Seede buy fen muccul mbugalam,  
kuy noyyee ay fen du rëcc àtteem.

6 Ñu baree ngi wuta neex boroom daraja,  
ku nekk a bëgga xaritook kuy joxe.

7 Ku ñàkk, sa bokk yépp dëddu la,  
sab xarit gën laa soreeti,  
ngay wax ak ñoom, dara.

8 Kuy sàkku xel, bëgg nga sa bopp;  
kuy wut ag dégg day baaxle.

9 Seede buy fen muccul mbugalam,  
kuy noyyee ay fen, mujje sànkú.

10 Dund gu neex jekkul cib dof,  
surga buy jiite kilifa it moo yées.

11 Ku xam lu jaadu, muñ mer,  
tanqamlu ku la tooñ ngay damoo.

12 Merum buur ni gaynde gu ñar;  
yërmandey buur ni lay cig mbooy.

13 Doom ju dof naqaru baay baa,  
te jabar ju pànk mooy senn bu dakkul.

14 Kër ak alal ngay donne ci baay;  
jabar ju xelu, Aji Sax jee koy maye.

15 Ab yaafus, nelaw yu xóot,  
te ku yàccaaral xiif.

16 Ku jëfe ndigal, sàmm sa bakkan;  
ku moytuwul sa bopp, dangay dee.

17 Ku baaxe ku ñàkk, lebal nga Aji Sax ji,  
te moo lay yool.

18 Yaral sa doom ba muy teel,  
waaye bul topp sa xol, ba rey ko.

19 Ku naqari deret, sonal nga sa bopp;  
ku la xettli, tóllanti ko.

20 Déggal ndigal te yaru,  
ndax èllëg nga xelu.

21 Bare na lu xol di mébét,  
waaye Aji Sax jeey dogal.

22 Li ñu sopp ci nit mooy ngor,  
néewle moo gën fen.

23 Ragalal Aji Sax ji ndax nga gudd fan,  
noplu te baña loru.

24 Ab yaafus day yeb loxoom ci ndab,  
tàyyi ko yékkati, sex.

25 Boo ñefee ab ñaawlekat, téxét ba  
jànge ca;  
nga yedd kuy dégg, mu xame ca.

26 Kuy yàqal sa baay, di dàq sa ndey,  
yaay indi gâceek yeraange.

27 Doom, soo noppee déglu ku lay yar,  
sore nga kàdduy xam-xam.

28 Seedeab naaféq faalewul yoon,  
ab soxor lu bon lay tàqamtikoo.

29 Na ñaawlekat bi séentu mbugal;  
ab dof, yeti gannaaw.

## 20

1 Naan biiñ ak ñaawle, naan ñoll, tanqale,  
ku mu nax xeluwoo.

2 Buur mer lool, mel ni gayndee ñar;  
boo ko merloo, dangay xaru.

3 Moytuw ay, ndam la;  
dof boo gis day bëgg xuloo.

4 Ab yaafus du gàbb ba mu jotee,  
day wut am ngóob, du am dara.

5 Mébétu jaambur day teen bu xóot,  
ku am ug dégg a cay root.

6 Ñu baree ngi naa: «Gore naa,»  
waaye kuy boroom kóllère dégg?

7 Ku jub, di jëfeg mat,  
doom ju la wuutu bég na.

8 Su buur toogee di àtte,  
day gis, di ràññee mboolem ayib.

9 Ana ku man ne fóot na xolam,  
ba tàggook bàkkaar?

10 Nattu diisaay yu yemul ak lu ni mel,  
Aji Sax ji bañ na ko.

11 Gone sax day jëf, nga gis jikkoom;  
bu naree dëggu te jub, nga xam.

12 Nopp buy dégg ak bët buy gis,  
Aji Sax jee sàkk lu ci nekk.

13 Bul bëggi nelaw, ba ñàkk dab la;  
boo njaxlafee, lekk ba desal.

14 Kuy waxaalee ngi naan: «Baaxul de!»  
Bu nee wërëñ, di damu naan: «Aka jar!»

15 Wurus am na ak gànjar yu bare,  
waaye kàdduy xam-xam a gën per yu jafe.

16 Ku gàddul jaambur bor, jëlal mbub-  
bam;  
tayle ko, moo dige feyal jaambur.

17 Njublan, lekk, jëkke neex,  
mujj mel ni lancub suuf.

18 Pexe, ndigal a koy lal;  
xare, ay tegtal.

19 Kuy wër di jëw, wuñni sutura;  
ku réy làmmiñ, bul déeyook moom.

20 Ku saaga sa ndey mbaa sa baay  
añe lëndëmu bàmmeel.

21 Alal ju gaaw  
du mujje barkeel.

22 Bul feyantook ku la tooñ;  
dénkul ci Aji Sax ji, mu wallu la.

23 Aji Sax ji bañ na nattu diisaay yu wuute,  
njublan ci natti diisaay baaxul.

24 Jéegoy jaam Aji Sax jee ko yor;  
kenn xamul foo jëm.

25 Bul gaawtuy digeek Yàlla, di dugal sa  
bopp;  
bul giñ, di réccu.

26 Buur, bu xeloo, ràññee ku bon,  
mbugal ko, te du ko ñéebalu.

27 Xelum nit làmp la bu Aji Sax ji taal,  
da koy niital ba ca biir xolam.

28 Ngor ak worma day aar buur,  
ngor ay saxal ab jalam.

29 Sagu ndaw, doole ja;  
gànjaru mag, bijjaaw ba.

30 Dóor yu la gaañ faj na sag mbon,  
ay yar fóot na xolu boroom.

## 21

1 Xolu buur walum ndox la ci loxol Aji Sax  
ji,  
fu ko soob mu jëme ko fa.

2 Lu waay def, daa jub ca moom,  
waaye Aji Sax jee y natt xol yi.

3 Deel def dëgg ak njekk,  
moo gënal Aji Sax ji ab sarax.

4 Xeebaateek réy-réylu  
mooy bàkkaar yi ñuy ràññee ku bon.

5 Farlu, woomle;  
ku gaawtu, mujj néewle.

6 Alal ju la fen may,  
cóolool la, day naaw, wut ko xaru la.

7 Coxor day sànk boroom,  
ndax day baña def njub.

8 Ab saaysaay day dëngal,  
nit ku dëggu di jubal.

9 Dëkkeb ruq cim sàq  
moo gën jabar ju pànk.

10 Ab soxor day namma lore,  
te du yërëm moroomam.

11 Boo mbugalee kuy ñaawle, ab téxét  
jànge ca;  
nga jàngal ku rafet xel, mu yokku.

12 Aji Jub ji Yàlla xam na la ne ca biir kër  
ku bon,  
te mooy sànk ku bon.

13 Ku tanqamlu jooyi ku ñàkk  
dina woote wall, wall ñàkk.

14 Ku mer, may ko ci sutura, mu giif;  
boroom xadar, boqal ko neexal, mu dal.

15 Bu yoon amee, ku jub bég;  
kuy def lu bon jàq.

16 Ku noppee jëfe xel,  
noppluji njaniiw.

17 Ku topp sa bannex, mujje ñàkk;  
ku sopp biiñ ak lu niin du woomle.

18 Ku bon këppoo ayu ku baax,  
workat gàddu musibam kuy jubal.

19 Dëkke ndànd-foyfoy  
moo gën jabar ju tàng, bare ay.

20 Ku xelu denc këram ngëneeli alal aku  
diw,  
ab dof saax-saaxee josam.

21 Ku saxoo njekk ak ngor  
am fan wu gudd, naataangeek daraja.

22 Ku ñaw mana daan jàmbaraari dëkk bu  
mag,  
ba màbb tata ja ñu yaakaaroon.

23 Ub sa gëmmiñ, moom sa làmmiñ,  
mucc ci njàqare.

24 Ku réy te bew, mooy ñaawle,  
day reew, ba jéggi dayo.

25 Ab yaafus day bëgg lu mu amul ba dee,  
ndax du nangoo liggéey;

26 day yendoo xemmem, te du am,  
ka jub di joxeek a joxewaaf.

27 Saraxu nit ku bon ñaawtéef la,  
rawatina bu ci jubloo lu bon.

28 Seede buy fen day sànkú,  
kuy dégg, sa kàddu sax.

29 Ku bon day ñeme-ñemelu,  
ku jub la muy def da koy wóor.

30 Nit xeluwul, amul ug dégg ak pexe,  
ba manal Aji Sax ji dara.

31 Nit ay takk, bésúb xare,  
Aji Sax ji di maye ndam.

## 22

1 Jëw bu rafet a gën barele,  
wegeel gën xalis ak wurus.

2 Ku am ak ku ñàkk a bokk lenn:  
Aji Sax jee leen boole sàkk.

3 Kuy foog, gisu ay, làqu;  
ab téxét ne ca tēñëx, loru.

4 Woyofal te ragal Aji Sax ji,  
am alal, gudd fan ak daraja.

5 Yoonu njoblan, ay dég aki fiir;  
ku sàmm sa bakkan sore ko.

6 Tegal gone ciw yoon,  
ba bu mäggee, du ko wacc.

7 Ku am ay yilif ku ñàkk,  
koo leb di surgaam.

8 Ku ji njobadi, góob fitna,  
yet wa muy dóore, damm.

9 Ku tabe am barke,  
mooy kiy sédd ku ñàkk cib dundam.

10 Dàqal kuy ñaawle, ay jeex,  
xulooki saaga dakk.

11 Ku dëggu, wax ja yiw,  
buur di xaritam.

12 Aji Sax jeey sàmm liy dëgg,  
di weddi waxi fen-kat.

13 Bul yaafus, ba naan: «Gayndee ngi ci  
biti,  
dañu may rey ci mbedd mi!»

14 Waxi ndaw su yemadi am yeer la,  
ku Aji Sax ji rëbb moo cay tàbbi.

15 Yëfi dof daa sax ci xolu gone,  
boo bantalee, mu tàggook moom.

16 Not néew-ji-doole ngir yokkule,  
mbaa may boroom alal,  
loo ci def mu wàññi la.

### *Fanweeri tegtal a ngi*

17 Teewlul te déglu li boroom xel yi wax.  
Defal sam xel ci li ma lay xamal.

18 Soo mukkalee, ba man koo tari,  
muy sa mbégte.

19 Yaw laa koy xamal tey jii,  
ndax nga wóolu Aji Sax ji.

20 Dama laa bindal fanweeri dénkaane,  
ci wàllu digal ak xam-xam,

21 ngir xamal la lu wér te dëggu,  
nga yóbbaaale kàdduy dëgg,  
yoo tontoo ña la yebal.

### [1]

22 Bul xañ néew-ji-doole; néew-ji-doole  
la.

Ku tumurànke, bu ko soxore cib àtte,

23 Aji Sax ji da koy taxawu,  
ku ko xañ, mu xañ la bakkan.

### [2]

24 Bul xaritook ku gaawa mer,  
bul ànd ak ku tàng bopp.

25 Lu ko moy nga mel ni moom,  
te kon nga lonku.

### [3]

26 Bul bokk ci ñiy dige,  
di gàddul nit bor.

27 Soo amul loo ko feyale,  
ñu yékkatee la sab lal, nangu ko.

### [4]

28 Bul toxal màndargam cosaan ci làccu  
suuf

te say maam tegoon ko fa démb.

### [5]

29 Seetlul ku man liggéeyam,  
buur lay liggéeyal,  
du liggéeyal baadoolo.

## 23

[6]

1 Soo bokkeek kilifa ndab,  
xamal bu baax ni ngay lekke.  
2 Soo dee ku bëgg lekk,  
téyeel sa loxo.  
3 Bul xemmem daraam lu neex,  
ñam woowu la lay naxe.

[7]

4 Bul rey sa bopp ci wut alal,  
bu ko xalaat sax.  
5 Ndax xef ak xippi mu wéy,  
mel ni lu saxi laaf,  
ne fëyy, naaw ni jaxaay.

[8]

6 Ab nay, bul lekke këram,  
bul xemmem daraam lu neex.  
7 Ma ngay xool la ngay lekk, nu mu tollu,  
naan la: «Lekkal, naanall!»  
Te xol ba àndu ca.  
8 Ndog soo ca lekk, waccu ko,  
yiw woo ko wax daldi neen.

[9]

9 Bul wax akub dof,  
day xeeb sam xel.

[10]

10 Bul toxal màndargam cosaan ci làccu  
suuf,  
bul aakimoo suufas jirim.  
11 Ki koy aar màgg na,  
da koy taxawu, dal ci sa kaw.

[11]

12 Defal sam xel ci yar,  
te teewlu kàdduy xam-xam.

[12]

13 Bul ñéebloo yar gone,  
bantal ko taxu koo dee.  
14 Soo ko bantalee,  
mu mana mucc.

[13]

15 Sama doom, soo xeloo,  
sama xol neex.  
16 Ngay wax njub,  
ma bég.

[14]

17 Bul ñee bàkkaarkat,  
saxool ragal Aji Sax ji,  
18 ndax kat moo am muj,  
te kon sa yaakaar du tas.

[15]

19 Déglul, doom, muusal  
te yebu ci yoonu njub.  
20 Bul bokk ci ñiy lekk lu ëpp,  
ak a màndi,  
21 ndax ku bëgg lekk ak a màndi, ñàkk  
dab la,  
dajjant it, rafle rekk.

[16]

22 Déglul sa baay bi la jur.  
Bu sa ndey màggatee, bu ko sàggane.  
23 Jëndal dëgg te bu ko jaay.  
Sàkkul xel mu rafet ak yar akug dëgg.  
24 Su doom jubee, seral xolu baay.  
Boo juree ku rafet xel, am nga bânneex.  
25 Deel bégal ndey ak baay,  
rawatina ndey ji la jur.

[17]

26 Doom, teewloo ma xel  
te roy ma.  
27 Ab gànc yeer mu xóot la,  
jabaru jaambur di teen bu xat.  
28 Ma ngay tëroo nib sàcc,  
góor ñu bare lay fecciloo worma.

[18]

29 Ana kuy tiislu, naan: «Wóoy, ngalla  
man!»  
Ana kuy xulook a jàmbat,  
di gaañu ci dara,  
bët ya xonq curr?  
30 Xanaa kiy naan-naane biiñ,  
di mosi yeneen njafaan?  
31 Bul xool biiñ ak xonqaayam.  
Aka yànj cib kaas  
te neexa jolu!  
32 Bu weese mu màtt la ni jaan,  
ne la càppit ni ñàngóor.  
33 Dangay mel ni kuy gis lu doyy waar,  
sam xel di ràbb lu jekkadi.  
34 Nga mel ni ku tëdd biir géej,  
di jaayu ca biir gaal ga,  
35 nga naan: «Dañu maa dóor te  
gaañuwuma,  
duma ma te yéguma ko.



Moo! Duma yewwu nag,  
ba naaneeti?»

## 24

[19]

<sup>1</sup> Bul ñee ku bon,  
bul wuta ànd ak moom,  
<sup>2</sup> ndax coxor lay nas ci xolam,  
te fitna la ay waxam di yee.

[20]

<sup>3</sup> Xel mu rafet ay tabax kër,  
rafet déggìn a koy samp.  
<sup>4</sup> Xam-xam ay feesal néeg ya  
ak mboolem alal ju jafe te yànj.

[21]

<sup>5</sup> Ku rafet xel di boroom doole,  
ku xam, gëna man;  
<sup>6</sup> tegtal yu xelu lañuy xaree,  
diisoo bu yaatooy maye ndam.

[22]

<sup>7</sup> Wax ju xelu sut nab dof,  
jataayu pénc du fa àddoo.

[23]

<sup>8</sup> Kuy mébét lu bon,  
ñu ne yaay rambaaj bi.  
<sup>9</sup> Pexem dof bàkkaar la,  
te kuy ñaawle, ñu sib la.

[24]

<sup>10</sup> Bu mettee, nga yoqi,  
sa doolee néew.

[25]

<sup>11</sup> Wallul ku ñuy reyi te tooñul,  
xettlil kuy tërëf, ñu di ko reyi.  
<sup>12</sup> Soo nee sa yoon nekku ci it,  
kiy natt xol yi, xam na,  
moom miy wattu sa bakkan, xam na,  
te kat mooy fey nit jëfam.

[26]

<sup>13</sup> Doom, deel lekk lem, baax na,  
lem ju xelli, boo sexee, mu tem-temi.  
<sup>14</sup> Xamal ne xel mu rafet ni la neexe;  
soo xeloo, sa muj rafet,  
te sa yaakaar du tas.

[27]

<sup>15</sup> Soxor bi, bul tëru ku jub ci këram,  
bul yàq dëkkuwaayam.  
<sup>16</sup> Ku jub day daanu juróom yaari yoon,  
jógaat,

ab soxor sërëx ci njekkar.

[28]

<sup>17</sup> Bu sab noon daanoo, bu ko bannexoo,  
bu tërëfee, bu ko bége.

<sup>18</sup> Lu ko moy Aji Sax ji gis la, ñaawlu ko,  
daldi giif, dootu ko mbugal.

[29]

<sup>19</sup> Bu sa xol tàng ci ku bon,  
bul ñee ku soxor.  
<sup>20</sup> Ku bon amul muj,  
ku soxor day mel ni taal bu fey.

[30]

<sup>21</sup> Doom, ragalal Aji Sax ji, wormaal buur.  
Bul lëngook kuy fippu.

<sup>22</sup> Yàllaak buur a koy bette mbugal,  
te kenn xamul musiba mu muy doon.

*Yeneen tegtal a ngi*

<sup>23</sup> Lii it ñi rafet xel a ko wax.

Par-parloo cib àtte baaxul.

<sup>24</sup> Ku ne defkatu lu bon: «Yaw, tooñoo,»  
aw nit móolu la, mbooloo ñàññ la;

<sup>25</sup> ku ko ne: «Yaa tooñ,» yaay baaxle,  
taasoo barke bu yaa.

<sup>26</sup> Ki lay wax dëgg  
sa soppe la.

<sup>27</sup> Ruujal sab tool, ji ko,  
doora tabax sa kër.

<sup>28</sup> Bul tuumaal nit ci neen,  
te bu ko seedeel ay fen.

<sup>29</sup> Bul ne: «Li mu ma def laa koy def,  
damay feyu li mu ma def.»

*Yaafus amul njariñ*

<sup>30</sup> Toolub ku yaafus laa jaare,  
ak tóokërub nit ku ñàkk bopp.

<sup>31</sup> Ndeke lépp a nga saxi dég,  
fépp fees akum ñax,  
tabaxu doj ba ko wër màbb.

<sup>32</sup> Maa ko gis, di xalaat,  
xoolaat ko, jànge ca.

<sup>33</sup> Booy dajjant ak a for bët,  
di tegley loxook a jaaxaan,

<sup>34</sup> néewlee ngi lay dikkal nib sàcc,  
ñàkk gannaayul la.

**Yeneen kàddu yu xeloo ngi  
yu tukkee ci Suleyman**

## 25

(Saar 25—29)

<sup>1</sup> Lii it ay kàddu yu xelu la, di yu Suleymaan, ay niti Esekiya buurub Yuda sotti ko.

<sup>2</sup> Màggug Yàllaa ngi ci li mu làq, darajay buur a ngi ci li mu feeñal.

<sup>3</sup> Maneesula daj li ci xelu buur, xalaatam daa kawe ni asamaan, xóot ni suuf.

<sup>4</sup> Xellil xaalis, tonni lu ca rax, ba ab tégg man caa am ndab.

<sup>5</sup> Ab soxor it, dàqal, mu sore buur, ngir njubte law, jalam sax.

<sup>6</sup> Bul réy-réylu fi kanam buur, bul tooge jataayu boroom daraja,  
<sup>7</sup> ndax ñu ne la: «Yéegal, jegesi fii,» moo gën ñu torxal la ci kanam kilifa.

Boo gisalee sa bopp it,  
<sup>8</sup> bul gaawa layooji, ana nooy def èllég, bu ñu la yeyee?  
<sup>9</sup> Ñaarool ak ki nga joteel, te bul jéebaane jaambur.  
<sup>10</sup> Lu ko moy ñu dégg ko, rusloo la, sab der yàqu yaxeeet.

<sup>11</sup> Wax ju ñor di nataalu wurus wu tege ci xaalis.  
<sup>12</sup> Kàddu yu lay yedd ci kuy dégg, jaarob wurus la mbaa gànjaru ngalam.

<sup>13</sup> Ndaw lu wóor day seral xolu njaatigeem, mooy ndox mu sedd ci tàngooru ngóob.

<sup>14</sup> Kuy dige te doo joxe, yaay xiin wu ngelaw, mu naaxsaay.

<sup>15</sup> Muñ mer ay nax kilifa, te wax ju neex, fu mu jaar, mu nooy.

<sup>16</sup> Boo gisee lem, lekkal lu yem; bu éppee, nga waccu ko.

<sup>17</sup> Na sa tànk di gëj kër dëkkandoo; boo ko sàppee, mu jéppi la.

<sup>18</sup> Ku seedeel sa moroom ay fen, yen nga ko aw njur mbaa saamar mbaa fitt.

<sup>19</sup> Bul wóolu workat bésub njàqare, mooy bēñ bu bon mbaa tànk bu nasax.

<sup>20</sup> Kuy woy, boroom tiisu xol di dégg, yaa futti mbubbam cib sedd, mbaa nga jonj xorom ci góomam.

<sup>21</sup> Bu sab noon xiifée, jox ko mu lekk, bu maree, may ko mu naan,  
<sup>22</sup> day rus ba mel ni koo yeni xal, te Aji Sax jee lay fey.

<sup>23</sup> Jëw, mer a cay topp; mooy ngelawal taw, taw a cay topp.

<sup>24</sup> Dëkkeeb ruq cim sàq moo gën jabar ju pànk.

<sup>25</sup> Xibaaru jàmm, bawoo fu sore mooy ndox mu sedd ci ku loof.

<sup>26</sup> Ku jub bu dee nangul ku bon, yàqu na, ni seyaan bu nēx mbaa teen bu xàbb.

<sup>27</sup> Lekk lem ju èpp baaxul, te wut waaw-góor du ngóora.

<sup>28</sup> Ku dul ànd ak sa sago, yaa neexa song ni dëkk bu dara wërul.

## 26

*Ràññeel ab dof*

<sup>1</sup> Teraanga jekkul cib dof, mooy seddub nawet mbaa taw cim ngóob.

<sup>2</sup> Ñaan-yàlla, soo tooñul, du la dal, day mel ni picc muy naaw, tēē toñ.

<sup>3</sup> Xiir, aw fas; laab, mbaam; yetu gannaaw, ab dof.

<sup>4</sup> Bul topp ab dof cig ndofam, lu ko moy nga mel ni moom.

<sup>5</sup> Waaye toppal ab dof cig ndofam, lu ko moy mu defe ne daa muus.

<sup>6</sup> Ku yóbbante ab dof kàddu, yaa woo fitna, gor say tànk.

<sup>7</sup> Kàddu gu xelu ci gémmiñug dof,

mooy tànkì lafañ, amalu ko njariñ.

<sup>8</sup> Kuy teral ab dof,

jël ngaw doj, takk ko ci mbaq.

<sup>9</sup> Kàddu gu xelu ci gémminug dof mooy car aki dégam, màndikat xàcci.

<sup>10</sup> Njaatige luy liggéeyloo ab dof ak kuy romb,

daa mel ni fittkat buy gaañ ku ne.

<sup>11</sup> Dof day def jëfi dof, dellu ca, mooy xaj, bu wacoo, lekkaat ko.

<sup>12</sup> Ana koo gis mu ne: «Maa xelu»? Kooku ab dof a ko gën demin.

### *Ab yaafus a ngi*

<sup>13</sup> Ab yaafus da naan: «Gayndee ngi ci yoon wi!

Gayndee ngi ci mbedd mi!»

<sup>14</sup> Ab yaafus day tëdd ak a walbatiku, mooy bunt, day jaayu, demul fenn.

<sup>15</sup> Ab yaafus day yeb loxoom ci ndab, waaye yékkati ko, sex, da koy sonal.

<sup>16</sup> Ab yaafus day foog ne moo gëna muus juróom ñaari boroom xel yu xam tont.

### *Ay nit ñuy loree ngi*

<sup>17</sup> Kuy xuloo lu sa yoon newul, yaa jàpp ci noppi xaj buy romb.

<sup>18-19</sup> Nit kuy naxe, naan: «Damay fo!»

yaay dof buy sànniy jum, di fitteek a reye.

<sup>20</sup> Bu matt amul, ab taal fey, fu soskat amul it, xuloo jeex fa.

<sup>21</sup> Këriñ defi xal, matt xamb ub taal, ab xulookat di xambu ay.

<sup>22</sup> Waxi jëwkat di ñam wu neex, wuy seey, jáll ca biir-a-biir.

<sup>23</sup> Kuy wax lu neex, tey mébét lu bon, yaay xalis bu rax, ñu xoob ca ndabal xandeer.

<sup>24</sup> Ab noon làqoo na ay waxam, lal pexey wor ca xolam.

<sup>25</sup> Buy wax lu neex, bul gëm, ñaawtéef la xol ba fees dell.

<sup>26</sup> Su la nëbbalee mbañeel, di la nax it, ag mbonam mujj bir ñépp.

<sup>27</sup> Ku gasal nit am yeer, yaa cay daanu; ku bérañu doj, ngir tance, yaay tancu.

<sup>28</sup> Kuy fen, dangaa bañ ka nga fenal, te boroom làmmiñ wu neex day sàнке.

## 27

### *Yeneen diglee ngi*

<sup>1</sup> Bul damoo èllëg, ndax xamoo luy xew tey.

<sup>2</sup> Bul tëggu, bàyyil ñu tagg la, muy waxi keneen; yaw, bu ko wax.

<sup>3</sup> Doj diis na, suuf dib sëf, waaye fitnay dof a ko raw.

<sup>4</sup> Xadar day ñàng, mer di wal mu baawaan, waaye fiiraange amul moroom.

<sup>5</sup> Artu yu ñu la biralal moo gën cofeel gu la boroom ñooru.

<sup>6</sup> Soppe, bu lay gaañ sax, wóolu ko. Nit bañ na la, te di la foon lu bare.

<sup>7</sup> Ku suur, bañ lem ju xelli, waaye boo xiifée, lu wex lu ne neex la.

<sup>8</sup> Ku sore fa nga bokk, dangay mel ni picc mu sore tàggam.

<sup>9</sup> Diwook suuru day naatal xol; waaye li neex cib xarit, xol la lay digale.

<sup>10</sup> Bul fàtte sab xarit mbaa sa xaritu baay, bul jàq ba seeti sa mbokk; dëkkandoo bu jegee gën mbokk mu sore.

<sup>11</sup> Muusal, doom, ma bég, ba mana tontu ku ma sikk.

<sup>12</sup> Kuy foog, gisu ay, làqu; ab téxét ne ca tēñëx, loru.

<sup>13</sup> Ku gàddul jaambur bor, jëlal mbub-bam; tayle ko, moo dige feyal ndaw su yemadi.

<sup>14</sup> Nuyoo bu xumb, suba teel mooki saagaa yem.

<sup>15</sup> Jabar ju pànk mooy senn bu dakkul, cib taw;

<sup>16</sup> ku ko mana yemale, mana téye ngelaw mbaa nga nëb ag diw.

<sup>17</sup> Weñ ay nàmm weñ,

nit ay nàmm xelu moroom ma.

18 Ku aar garab, lekk ca doom ya;  
ku topptoo sa sang, am ngërëm.

19 Ku xool cim ndox, gis sa kanam,  
nga xool sab xol, gis sa jikko.

20 Njaniiw ak biir suuf du fees,  
bët it du doylu muk.

21 Xaalis ak wurus sawaraa koy xelli,  
waaye àtteb nit ca jëëm.

22 Soo jëloon ub dof, yeb ci gënn,  
booleek pepp, wol,  
du tax ndof ga deñ.

23 Xamal bu baax lu say gàtt nekke,  
te def sa xel ci say gétt,

24 ndax alal wéyul fàww,  
ag pal du ñeel sètoo sët.

25 Gannaaw bu ñu gubee,  
ba ñax saxaat,

ñu dajale ngoon ma ca tund ya\*,

26 say xar da lay amal koddaay,  
bëy yi gënneel la njégu tool.

27 Meewum bëy daldi am, ba doyl la dund,  
yaak sa waa kër  
ak sa surga yu jigéen.

## 28

1 Ku bon daw na te dàqeesu ko,  
ku jub ñeme ni gaynde.

2 Bu am réew dee fippu, kilifa ya bare;  
réew mu jàmm sax, kilifa gaa am déggin  
ak xam-xam.

3 Ku ñàkk, su jekkoo ab ndóol,  
du ko bàyyil fepp, day mel ni waame.

4 Ku wacc yoon, gërëm ku bon;  
ku wormaal yoon, jànkoontee ku bon.

5 Ku bon xamul njub,  
kuy wut Aji Sax ji, xam nga njub bu wér.

\* 27:25 27.25 Ca Israyil tund yaa ëpp lu muy taw, te fa la ñax ma ëppe.

6 Ñàkk te mat  
moo gën barele te dëng.

7 Gone gu sàmm yoon am nag dégg,  
ku ànd ak sagaru nit gâceel sa baay.

8 Kiy leble di tege, ba barele,  
kay yéwéne néew-ji-doole lay dencal.

9 Soo dee tanqamlu yoon,  
sag ñaan sax Yàlla suur na ko.

10 Ku yóbbe bàkkaar nit kuy jubal,  
yeer ma nga gas, yaa cay tàbbi,  
waaye ku mat di jagoo ngëneel.

11 Waay a ngi barele, defe ne xelu na;  
ku néewle am ug dégg, gis ne xeluwul.

12 Bu ku jub amee ndam, mbégte mu réy  
la;  
ab soxor falu, ñépp làquji.

13 Kuy làq say tooñ doo baaxle,  
ku koy nangu, tuub ko, am yërmandey  
Yàlla.

14 Mbégte ñeel na ku saxoo ragal,  
waaye ku dëgër bopp tàbbi ci njekkar.

15 Kilifa guy soxore néew-ji-doole  
mook gaynde guy yëmmoo yem, mbaa  
rab wuy songe.

16 Kilifa gu amul ug dégg, day foqati rekk,  
waaye ku bañ lu lewul, gudd fan.

17 Ku bóom nit, daw, ba tàbbi njaniiw;  
bu ko kenn taxawu.

18 Mat, mucc;  
dëng, dàll daanu.

19 Beyal sab tool, sab dund doyl;  
topp ay caaxaan, ndóol ba doyal.

20 Boroom worma, bare barke;  
ku yàkkamtee woomle, sa mbugal du  
jaas.

21 Par-parloo baaxul,  
waaye dogu mburu moyloo na kilifa.

22 Ab nay day yàkkamtee barele,  
te xamul, ba ko ñàkk di dab.

23 Boo artoo nit, mu baaxe la èllëg;  
yaa koy gënal ku ko doon jay.

24 Ku xañ say waajur seen alal  
te defe ne tooño, yaa neexook  
saaysaayu yàqkat.

25 Ku bégge day sooke ay,  
te ku wóolu Aji Sax ji, woomle.

26 Ku doyloo sam xel, dof nga;  
ku jéfe xel mu rafet, mucc nga.

27 Kuy jox néew-ji-doole, doo ñàkk;  
nga gëmm ne gisoo, bare ku la móolu.

28 Bu ab soxor faloo, ñépp làquji,  
bu daano, ku jub teg tànk.

## 29

1 Ku ñuy àrtu, nga të ticc,  
dangay jekki yàqu, ba wees am paj.

2 Ku jub falu, baadoolo bég;  
ab soxor jiite, baadoolo binni.

3 Kuy jéfe xel, bégal sa baay;  
nga ànd aki gànc, yàq alal.

4 Buur jub, am réew dëgër;  
mu béggi galag, réew ma sàнку.

5 Kuy jay sa moroom,  
yaa ngi koy dugal.

6 Ku bon day moy, ba dugal boppam;  
ku jub di woy ak a bannexu.

7 Ku jub a xam àqu néew-ji-doole,  
ab soxor xamu ca dara.

\* **29:21** 29.21 Mbaa: bu èllëge mu jaaxal la. † **29:24** 29.24 Yàlla topp la: seetal ci *Sarxalkat yi* 5.1: Bu nit bákkaaree ndax lu mu dégg wooteb seede cib àtte, ba noppi baña wax la mu gis mbaa mu xam ko ca mbir ma, dees na ko ko topp.

8 Ñaawlekat a ngi taal ab dëkk,  
ku xelu di giifal mer.

9 Boroom xel, buy layook ub dof,  
bu mereek buy ree, jàmm du am.

10 Ab bóomkat day sib ku mat,  
di wuta bóom kuy jubal.

11 Ab dof day mer, sàmbaar;  
ku xelu, mer, ànd ak sagoom.

12 Kilifa dégluy fen,  
jawriñ yépp di ñu bon.

13 Ku ñàkk ak ka ko nennoo bokk lenn,  
Aji Sax jee leen boole sàkk.

14 Buur àtte way-ñàkk ci dëgg,  
ab jalam sax.

15 Deel bantal ak a yedde, day rafetal xel;  
gone goo bay-bayal, mu gàcceel ndeyam.

16 Bu ku bon féetee kaw, ag moy law,  
waaye ku jub, fekke jéllu ku bon.

17 Yaral sa doom, mu noppal la,  
bànnexal la.

18 Fu Yàlla feeñoowul, nit ña fétteeral,  
waaye ku topp yoon, am mbégte.

19 Waxi neen yarul surga,  
da lay dégg te du la déggal.

20 Ana koo gis, mu rattaxle?  
Kooku ab dof a ko gën demin.

21 Ku yàq sab surga ba muy ndaw,  
bu èllëgee mu defe ne doom la\*.

22 Boroom xadar day sooke ay,  
te ku tàng bopp moy, moyati.

23 Réy-réylu, detteelu rekk;  
woyofal, ñu naw la.

24 Ku ànd akub sàcc, sa noonu bopp nga:  
soo waxee dëgg, yoon topp la;  
soo ko miimee, Yàlla topp la†.

25 Ragal nit dugal sa bopp la,  
ku wóolu Aji Sax ji, fegu.

26 Ñu baree ngi sàkku kilifa baaxe leen,  
moonu Aji Sax jeej àtteb jaam.

27 Ku jub day sib ku dëng,  
ku bon sib kuy jubal.

## Kàddu yi Agur wax

### 30

(Saar 30)

1 Lii waxi Agur la, góor gay doomu Yake  
mu Maasa\*. Góor ga daa wax ak Itiyel,  
wax ak Itiyel ak Ukal. Mu ne:

2 Maa dofe dëgg, ba yées ci nit ñi,  
dég-dégu nit sax awma ko.

3 Jànguma, ba am xel mu rafet,  
awma xam-xam ci Aji Sell ji.

4 Ana ku yéegoon asamaan, ba wàcc?  
Mbaa mu masa ñeb ngelaw ciy loxoom?  
Ana ku masa ëmb ndox ci ndimo?  
Mbaa mu rédd mboolem kemi àddina?  
Nu mu tudd ak ñu doomam tudd?  
Wax ma, yaw mi ko xam!

5 Lu Yàlla wax, mat na sèkk,  
mooy yiir ku ko làqoo.

6 Bul yokk ay waxam,  
mu weddi say fen, nga weeru.

7 Éy Yàlla, yaar laa la ñaan,  
ngalla may ma ko sama giiru dund:

8 caaxaan aki fen, yal na ma sore,  
néewleek barele, bu ma ci may lenn,  
leel ma lu ma doy;

9 lu ko moy ma regg, weddi la,  
ba naan: «Kuy Aji Sax ji?»

Mbaa ma ñàkk bay sàcc,  
di la ñàkke worma, yaw sama Yàlla.

10 Bul sikkal ab surga ca njaatigeem,  
da lay ñaan-yàlla, mu dal la.

11 Ag maas a ngi saaga baay,  
te wormaaluñu ndey.

12 Ag maas a ngi defe ne set nañu,  
te taq ripp ak bàkkaar.

13 Ag maas a ngi danñiiral;  
aka ñoo mana xeeloo!

14 Ag maas a ngi, seeni sell niy saamar,  
seeni gëñ niy paaka,  
ñuy lekk néew-ji-doole, ba raafal leen ci  
réew mi,  
ba ku ñàkk jeex ci biir nit ñi.

*Ay kàddoo ngi yu ànd ak lim*

15 Saxu watar du suur, ñaar ñu jigéen la  
am:  
Jox Ma ak Jox Ma.

Ñett a ngii ñu dul suur,  
ba ci ñeent ñu dul ne doy na mukk:

16 njaniiw,  
jigéen ju jaasir,  
suuf, du màndi ndox,  
sawara, du ne doy na mukk.

17 Kuy xeelu sa baay,  
di siidee déggal sa ndey,  
baaxoñ génne ciw xur, luqi sa bët,  
tan ya lekk.

18 Ñett a ngii, yéem na ma,  
ba ci ñeent yu ma xamul:

19 yoonu jaxaay ci asamaan,  
yoonu jaan ci kaw doj,  
yoonu gaal ci diggu géej,  
yoon wi góor di jaar as ndaw.

20 Jikkoy jigéenu moykat a ngi.  
Day lekk, wommiku, te naan:  
«Defuma dara lu aay!»

21 Ñett a ngii, day yëngal suuf,  
ba ci ñeent yu suuf àttanul:

22 jaam bu falu buur,  
dof bu regg,

23 ndaw su bon su for jëkkër,  
jigéen ju wuutu sangam bu jigéen.

24 Ñeent a ngii, di lu tuut ci kaw suuf,  
te am xel, yaroo xel:

25 xorondom, néew na doole,

\* 30:1 30.1 Maasa bérab la bu genn giirug Israyil sancoon ca bëj-gànnaru Arabi.

waaye bu jotee, mu denc dundam;  
<sup>26</sup> daman†, barewul kàttan,  
 te day dëkk ciy doj;  
<sup>27</sup> soccet, amul buur,  
 teewul ñuy àndandoo, diy gàngoor;  
<sup>28</sup> sindax, manees na koo ñeb,  
 teewul ma nga biir kër buur.

<sup>29</sup> Ñett a ngii, ñu jekk um ndaag,  
 ba ci ñeent ñu jekk doxin:  
<sup>30</sup> gaynde, mooy buuru rab yi,  
 ragalul kenn;  
<sup>31</sup> séq daagu, jekk taxawaay,  
 ab sikket,  
 ak buur ci biiri dagam.

<sup>32</sup> Boo sàgganee bay téggu,  
 mbaa ngay mébét lu bon,  
 nanga téye saw làmmiñ.  
<sup>33</sup> Ndax ku ruux soow, am ca dax,  
 ku wañaar bakkan, mu nàcc,  
 te lu jógal xol, indiw ay.

## Buur Lemuyel a ngi yeete

### 31

(Saar 31)

<sup>1</sup> Lii waxi Lemuyel la, buuru Maasa\*, te ndeyam jàngal ko ko. Mu ne:

<sup>2</sup> Ngóor si doom, saa doomi bopp!  
 Yaa di ñaan gu nangu, doom!  
<sup>3</sup> Bul jox jigéen ñi sa doole,  
 bul jox say siddit jigéen ñiy sànk buur.  
<sup>4</sup> Buur moomul di naan biiñ, Lemuyel,  
 buur moomu ko;  
 kilifa moomul di sàkku ñoll.  
<sup>5</sup> Lu ko moy mu naan, ba fàtte lu yoon  
 tëral,  
 xañ néew-ji-doole ju ne, àqam.  
<sup>6</sup> Bàyyeel ñoll kuy sànk,  
 bàyyi biiñ ak boroom naqar.  
<sup>7</sup> Bu ñu naanee, fàtte seen néewle,  
 ba dootuñu fàttliku seenu tiis.  
<sup>8</sup> Nanga àddul ku amul kàddu,  
 ku sësul fenn, nga ñoñal àqam.  
<sup>9</sup> Deel àddu, di àtte njub;  
 ku ñàkk ak ku néewle, nga sàmm àqam.

## Jeeg bu baax nii lay mel

<sup>10</sup> Jeeg bu jàmbaare, ndaw lu jafe,  
 ba rawati gànjar!  
<sup>11</sup> Jëkkër ja da koy wóolu,  
 te jëkkër ja day am xéewal, du ko ñàkk.  
<sup>12</sup> Day defal jëkkëram lu baax, du ko lor,  
 tey ànd ak bakkan.  
<sup>13</sup> Day wut kawari gàtt aki wëñ,  
 di ca liggéeye mbégte.  
<sup>14</sup> Day mel ni gaalu jula,  
 di jëli dundam fu sore.  
<sup>15</sup> Day jóg te bët setul,  
 di waajal njëlu njabootam,  
 ak a sas ay janqam.  
<sup>16</sup> Day seetlu ab tool, jënd ko,  
 sàkk ciw ñaqam, jëmbat tóokër.  
<sup>17</sup> Day gañu di góor-góorlu,  
 ak a dëgëral përeg ya.  
<sup>18</sup> Day gis njartel liggéeyam,  
 te làmpam du fey guddi.  
<sup>19</sup> Ma ngay yor poqe  
 ak këccu, di ëcc.  
<sup>20</sup> Day jox ku ñàkk,  
 di sàkkal néew-ji-doole.  
<sup>21</sup> Tiitul ci njaboot gi sedd bu metti,  
 ndax ñoom ñépp ay tegley yére.  
<sup>22</sup> Mooy sàkkal boppam ay malaan,  
 ay yéreem mucc ayib te yànj.  
<sup>23</sup> Dees na ràññee jëkkëram ca pénc ma,  
 fa muy toog ca magi réew ma.  
<sup>24</sup> Ndaw su ni mel day ràbb ay yére, di  
 jaay,  
 aki gañaay, di jox jaaykat yi.  
<sup>25</sup> Faaydaak jom la làmboo,  
 te ëllëg ubul boppam.  
<sup>26</sup> Day wax lu xelu,  
 di digle ngor.  
<sup>27</sup> Jigéen jooju mooy bàyyi xel ci nja-  
 bootam,  
 te du nangoo yàccaaral.  
<sup>28</sup> Doom ya dañu ko naan: «Jarawlack!»  
 jëkkër ja di ko gërëm naan:  
<sup>29</sup> «Jeeg bu jàmbaare bare na,  
 waaye yaw, yaa ci raw.»  
<sup>30</sup> Melokaan wu jekk day naxe, taar day  
 wéy,  
 waaye jigéen ju ragal Aji Sax ji,  
 kookoo jara gërëm.

† 30:26 30.26 Daman xaw na nirook njomboor. \* 31:1 31.1 Maasa bérab la bu genn giirug Israyil sancoon ca bëj-gànnaru Arabi.

<sup>31</sup> Joxleen ko njukkalu ñaḡam,  
jɛfam di woyam ca pénc ma.



## Kàdduy Waare di téere bu ëmb ay gëstu ci solob dundu nit

<sup>1</sup> Lii kàdduy waarekat baa, di doomu Daawuda te di buurub Yerusalem.

### *Luy solob àddina?*

<sup>2</sup> Cóolooloo cóolool, waru waarekat ba, cóolooloo cóolool, léppi cóolooli neen.

<sup>3</sup> Ana sax luy njariñu doñ-doñoo doñ-doñ ju nit di doñ-doñi fi kaw dun bi?

<sup>4</sup> Ag maas wéy, ag maas teew; àddina sax ba fàww.

<sup>5</sup> Jant fenk, so, ne coww dellu fa muy fenke.

<sup>6</sup> Ngelaw jëm bëj-saalum, wiiri jëm bëj-gànnar, di wiir ak a wiiraat, di delluy wëndeelu, topp yoonam.

<sup>7</sup> Dexoo dex wal, wuti gééj, te taxul gééj fees.

Fa dex wal jëm, fa lay walati, jëm.

<sup>8</sup> Jëfoo jëf ca jëfit, làmmiñ tuddul lépp, bët du suur, nopp du buur.

<sup>9</sup> Lu ayoon mooy ayati, lu ñu jëfoon moom lañuy jëfati. Dara yeesul fi kaw suuf.

<sup>10</sup> Lëf a ngii, nit naa: «Lii de lu bees la,» te mu ngi fi woon lu yàgg, lu jiitu sunu juddu.

<sup>11</sup> Kenn du fàttliku ñi jiitu, ñiy ñëwit, ñi leen topp duñu leen fàttliku.

## **Ma seet lu ma doy**

*(Saar 1.12—2.23)*

### *Rafet xel doyl*

<sup>12</sup> Man waarekat bi, buurub Israyil laa woon ci Yerusalem.

<sup>13</sup> Damaa dogu ne damay gëstu, teg ko ci xel mu rafet, di settantal mboolem lu nit def fu jant bi tiim. Ndaw sas wu tiis wu Yàlla sase, ñu war koo sasoo!

<sup>14</sup> Gis naa jépp jëf ju jëfe ci kaw suuf, ndeke lépp cóolooli neen la ak napp um ngelaw.

<sup>15</sup> Lu wañaaru, maneesu koo jubbanti; lu teewul, maneesu koo lim.

<sup>16</sup> Damaa wax ci saam xel naa: Man de, maa ngii di gëna xelu, ba sut ku ma jiitu ci jalub Yerusalem.

Damaa xuus ci xel mu rafet ak xam-xam,

<sup>17</sup> di dogoo xam luy xel mu rafet, xam luy nitoodi akug ndof.

Fekk loolu it napp um ngelaw la.

<sup>18</sup> Ku gééjal xel mu rafet, gééjal naqar; yokku xam-xam, yokku tiis.

## 2

### *Bànnexu neen doyl*

<sup>1</sup> Saam xel da ne: «Xaaral rekk, ma natt bànnex, ñam lu neex ba xam.» Ndeke loolu it, cóolooli neen.

<sup>2</sup> Ma ne: «Reetaan ag nitoodi la; te mbégte lu muy jariñ?»

<sup>3</sup> Saam xel ne ma, ma naan biiñ boog, bégloo,

ba mel nib dof,

tey ànd ak sama xel,

ba gis lu ci baax,

ba doom aadama di ko def,

giiru dundam fi ko jant bi tiim.

<sup>4</sup> Damaa liggéey lu réy.

Tabaxlu naa samay kër, jëmbat sama toolub reseñ.

<sup>5</sup> Ma sàkki tóokër aki tool, jëmbat ca garab yuy meññ lu ne,

<sup>6</sup> sàkklu samay déeg,

di ko suuxate, garab ya naat.

<sup>7</sup> Ma jëndi jaam, góor ak jigéen;

ñu ami doom ci kër gi.

Ma am jur gu ne gàññ, gu gudd ak gu gàtt, ba ëpple ku ma jiitu ci Yerusalem.

<sup>8</sup> Ma dajale sama xalis ak sama wurus, moom alali buur yeek diiwaan yi ma yilif, tabb samay woykat, góor ak jigéen, boole ci bànnex bi ci jabari jabar.

<sup>9</sup> Ma am doole, yokku,

ba sut ku ma jiitu ci Yerusalem, te teewul may jëfe xel.

<sup>10</sup> Lépp lu saay gët xemmema,

xañuma ko sama xol.  
Bañaluma sama bopp benn bannex,  
xanaa di bége lu ma liggéey,  
yooloo ko la ma liggéey.

11 Ma xoolaatal sama bopp  
lépp lu ma sottal,  
doñ-doñi ko, ba sottal,  
ndeke lépp, cóolóoli neen ak napp um  
ngelaw.

Nit gisul njariñ ci kaw suuf.

### *Rafet xel fanqul dee*

12 Ma geesu xoolaat xel mu rafet,  
xool ag nitoodi akug ndof.

Ana ku may wuutuji ci nguur gi,  
lu muy def lu moy lu ñu daan def?

13 Ma gis ne ni leer éppe lëndëm njariñ,  
ni la xel mu rafet éppe ndof njariñ.

14 Ku xelu day xool fa muy jaare,  
dof biy tēñëx-tēñëxi cig lëndëm.  
Ma ne moona ñoom ñaar a bokk dogal  
moos.

15 Ma xalaataat, saam xel ne ma,  
dof bi noonu, man it noonu;  
ana lu may xeloo xelu doye?  
Saam xel ne ma loolu it, cóolóoli neen.

16 Ku xelook ku dof, du yàgg ñu fàtte la;  
ay bés yu néew, ñu fàtte lépp.  
Acam! Dof, dee; rafet xel, dee.

17 Ma far bañ àddina.  
Ndaw naqar ci jëfi kaw suuf,  
te lépp di cóolóol ak napp um ngelaw!

18 Sama doñ-doñ, ji fi kaw dun bi,  
génniku na ma,

dama koy wacce ka may wuutuji rekk,

19 xameesul ku xeloom ku nitoodi lay  
doon,

mooy moom lu ma doon doñ-doñi,  
te sama mañore manaloon ma ko fi kaw  
dun bi.

Loolu it, cóolóoli neen.

20 Sama xol a jeex ci doñ-doñ ju ma doñ-  
doñi fi kaw dun bi.

21 Nit a ngi doñ-doñee xel, xam-xam ak  
mañore,

te ku doñ-doñiwuloon lay wacce alalam.  
Loolu it, cóolóoli neen ak naqar wu réy.

22 Ma ne ana lu nit di jariñoo  
ci doñ-doñ ak xalaatu xol, yi muy doñ-  
doñaale fi kaw dun bi?

23 Ndegam day yendoo tiis ak naqaru tēs-  
tēs,  
ba far fanaanoo xel mu dalul.  
Loolu it, cóolóoli neen.

## **Njariñ, fa Yàlla**

*(Saar 2.24—12.8)*

### *Jàmm, fa Yàlla*

24 Kon nit amul lu gën di lekk ak a naan,  
di bannexoo ñaqam.

Ma gis ne loolu it Yàllaa koy maye.

25 Ana kuy lekk ak a bannexu, te du  
Yàlla?

26 Yàlla de, ku mu gërëm,  
xelal ko, xamal ko, bégal ko;  
bàkkaarkat bi, Yàlla teg ko,  
muy denc ak a dajale, ka mu gërëm jël.  
Loolu it di cóolóoli neen ak napp um  
ngelaw.

## **3**

### *Jamono, Yàlla*

1 Lu nekk ak jotam,  
jot gu nekk ak la ca war fi jant bi tiim.

2 Day jot nga juddu, mu jot nga dee;  
mu jot nga jëmbat, mu jot nga buddi.

3 Mu jot nga rey, mu jot nga faj;  
mu jot nga toj, mu jot nga tabax.

4 Mu jot nga jooy, mu jot nga ree;  
mu jot nga ñaawlu, mu jot nga dukkat.

5 Day jot nga sànniy doj, mu jot nga dajale;  
mu jot nga foon, mu jot nga baña foon.

6 Mu jot nga sàkku, mu jot nga ñakk;  
mu jot nga sàmm, mu jot nga xalab.

7 Mu jot nga xar, mu jot nga gaar;  
mu jot nga selaw, mu jot nga wax.

8 Mu jot nga sopp, mu jot nga jéppi;  
mu jot nga xare, mu jot nga jàmmoo.

9 Ana lu liggéeykat biy jariñoo ciw  
ñaqam?

10 Gis naa ne sas la bu Yàlla sase,  
nu war koo sasoo.

11 Lépp la Yàlla def,  
ba bu jotee rafet.

Moo may nit muy njort èllëg,  
te taxul mu mana ràññee jëf ji Yàlla jëf,  
njàlbéen ba muj ga.

12 Ma gis ne nit amul lu gën  
bannex ak jàmmi bakkan cig dundam,

13 te nitoo nit, su dee lekk ak a naan,

di ñaq, jariño,  
 loolu mayu Yàllaa.  
 14 Ma xam ne lu Yàlla def,  
 loola day sax ba fàww.  
 Deesu ci yokk, mbaa di wàññi dara;  
 Yàllaa ko def, ngir nit di ko wormaal.  
 15 Lu ay tey, ayoon na,  
 lu ay èllëg it ayoon na.  
 Yàllaay namma indi la woon.

### *Yaakaar feyul boroom*

16 Ma dellu gis fi kaw suuf ne,  
 fu yoon moom, fa la njubadi ne,  
 fa njub moom it, fa la njubadi ne.  
 17 Saam xel ne ma,  
 ku jub ak ku bon la Yàlla di boole àtte,  
 ngir mbir mu ne ak jëf ju ne ak bésam.  
 18 Saam xel neeti ma,  
 nun doom aadama, Yàllaa nuy nattu,  
 nu gis ne ay mala donḡ lanu.  
 19 Dogalu doom aadama ji  
 ak dogalu mala mi,  
 benn dogal bee;  
 ni kii di deeye la kee di deeye,  
 genn noo gee, nu bokk ko.  
 Lu nit èpplee mala neen na,  
 ñoom ñépp, cóolóoli neen.  
 20 Ñoom ñépp a bokk jëm benn bérab ba,  
 bokk jóge pëndub suuf,  
 bokk dellu suuf.  
 21 Ana ku mu wóor ne  
 bakkanu nit day yéeg asamaan,  
 bakkanu mala tàbbi suuf?  
 22 Ma gis nag ne nit amul lu gën  
 di bannexoo ñaqam, loolooy wàllam.  
 Ana ku koy xamal gannaawam?

## 4

### *Alal doyul boroom*

1 Ma seetlooti gépp notaange gu am fi kaw  
 suuf.  
 Ndeke néew-doolee ngi jooy,  
 amul ku ko dëfal.  
 Ki koy not a am doole,  
 te néew-doolee ji amul ku ko dëfal.  
 2 Dama ne ndoklee, yeen ñi dee jeeg,  
 nde raw ngeen ñiy dund!  
 3 Ki leen taneeti yeen ñépp di ki juddoogul  
 sax,  
 moom mi gisul jëf ju bon fi kaw suuf.  
 4 Ma gis ne nit ak kër-këram jépp

ak bépp manoorey liggéey,  
 iñaanantee ko waral.  
 Loolu it, cóolóoli neen ak napp um  
 ngelaw.  
 5 Dof banki loxoom, sànk boppam.  
 6 Waaye benn nëb bu ànd ak dal  
 moo gën ñaari nëbi doñ-doñ ci napp um  
 ngelaw.

### *Wéttalikoo gën wéet*

7 Ma seetlu leneen luy cóolóoli neen fi  
 kaw suuf.  
 8 Kenn a ngii, kenn ñaareelu ko,  
 du doom, du mbokk.  
 Doñ-doñam du dakk, te du doylu,  
 mujj mu naan: «Kan laay doñ-doñil,  
 di xañ sama bopp bannex?»  
 Loolu it, cóolóoli neen, di sas wu tiis.  
 9 Ñaar a man kenn;  
 doñ-doñoondoo, yoolu bu baax.  
 10 Kenn daanu,  
 moroom ma may ko loxo.  
 Waaye ngalla ku daanu  
 te amuloo ku la may loxo!  
 11 Bu ñu téddee di ñaar it,  
 mana bokk nuglu.  
 Waaye soo dee kenn, nooy nugloo?  
 12 Fu ñu mane kenn,  
 ñaar taxaw fa, jéngu,  
 te buumu ñetti xànc gaawula dog.

### *Kilifteef saxul*

13-14 Kuy ndaw, génne kaso,  
 tàmbalee nguuru fa mu juddoo woon  
 mbaadoolo,  
 ndaw loolu su dee baadoolo te xelu it,  
 moo gën buur bu màggat, dofe, dégguli  
 àrtu.  
 15 Ma gis mboolem luy dund  
 tey dox fi kaw suuf,  
 di topp ndaw la wuutu buur.  
 16 Mbooloo ngii mu janool,  
 bare lool ba wees ab lim,  
 te ña leen wuutu bégewuñu ki wuutu  
 buur.  
 Loolu it di cóolóoli neen ak napp um  
 ngelaw.  
 17 Moitul sa bopp booy dem kër Yàlla.  
 Duggal te déglu,

bala ngay def saraxi dof bu xamul ne mu  
ngi def lu bon.

## 5

<sup>1</sup> Bul gaaw làmmiñ,  
bul gaawa dikke Yàlla mbir.  
Yàllaa ngi kaw asamaan,  
yaw yaa ngi fi suuf.  
Kon na say kàddu néew.

<sup>2</sup> Bu xalaat baree, indi gént;  
bu wax baree, waxi dof jib.

<sup>3</sup> Boo digook Yàlla,  
bu ko yeexe;  
Daray foontukat neexul,  
defal li nga dige.

<sup>4</sup> Baña digee gën dige loo deful.

<sup>5</sup> Bu la sa làmmiñ yóbbe bàkkaar,  
ba ngay lay ndawal Yàlla la, naan lii  
njuumte la woon.

Ana lu jar Yàlla di la meree sa kàddu,  
bay neenal saw ñaq?

<sup>6</sup> Wax ju bare, caaxaani neen;  
mook gént yu baree yem.  
Kon, Yàlla, ragal ko.

### *Nguur bare na àq*

<sup>7</sup> Boo gisee ñuy not néew-ji-doole,  
di jalgati dëgg ak yoon cib gox,  
bumu la jaaxal;  
kilifa gi, kilifaam a ko yiir;  
ñoom it seen kilifaa leen yiir.

<sup>8</sup> Xanaa ndax buur suqal mbey mi,  
ba ñépp jariñoos suuf si.

### *Alal coono la*

<sup>9</sup> Bëggkatu xaalis du doyal xaalis,  
bëggkatu alal du doyal tono,  
te loolu it, cóolóoli neen.

<sup>10</sup> Bu koom yokkoo,  
lekk-kat yi yokku.  
Ana lu muy jariñ boroom koom ga,  
xanaa di ko duufale bëtam?

<sup>11</sup> Surga, lekkam néew, bare,  
mu nelaw, ba fáttey boram;  
boroom alal regg,  
du nopplu, du nelaw.

<sup>12</sup> Naqar wu réy laa gis fi kaw suuf:  
Alal ju boroom dajale ba loru,

<sup>13</sup> mbaa pexeem moy, mu sànkule;

ba bu amee doom it, du ko wacce dara.

<sup>14</sup> Nga juddoo ci sa ndey loxoy neen,  
walbatiku dellu na nga dikke woon.  
Du dara loo ñaqoon ba yóbbaale ko.

<sup>15</sup> Dikke ni, delloo ni,  
loolu it tiis wu réy la.  
Doñ-doñi, ngelawal neen,  
ana jariñ la?

<sup>16</sup> Ngay dunde tiis bésoo bés,  
ak naqar ak wopp ak xol bu tàng!

### *Bànnexu bakkan, Yàlla*

<sup>17</sup> Lii daal laa ci gis, man.  
Li gën te jaadu ci nit: Na lekk, naan  
te bànnexoo ñaqam wu mu ñaqe kaw  
suuf  
giiru dund gi ko Yàlla may.  
Loolu mooy céram.

<sup>18</sup> Alal ak koom, ku ko Yàlla may,  
may ko mu tal koo xéewloo,  
mu nangu céram, bànnexoo ñaqam,  
loolu mayu Yàllaa.

<sup>19</sup> Yàllaa koy bànnexal,  
ba du tiisoo ay fanam.

## 6

### *Alal, na la jariñ*

<sup>1</sup> Aw tiis a ngi wu ma gis fi kaw suuf,  
di tiis wu diis doom aadama:  
<sup>2</sup> Nit ku Yàlla may alal, koom ak daraja,  
te mboolem lu mu namm, ñàkku ca lenn,  
waaye Yàlla mayu ko mu tal caa lekk,  
xanaa jaambur di ko xéewloo —  
loolu cóolóoli neen la, di naqar wu tar.

<sup>3</sup> Ku giir téeméeri doom,  
dund ati at,  
ak lu at ya bare bare,  
su bégewul teraanga ja mu am  
te amul njégu bàmmeelam sax,  
kooku lumb wu tuuroo ko tane.  
<sup>4</sup> Lumb wa ñew na moos ci neen,  
bàddoo lëndëm, turam sàngoo lëndëm.

<sup>5</sup> Gisul jant, xamu ko,  
waaye noflaay moo ko ëpple mag ma,  
<sup>6</sup> bu dundoon junniy junniy at sax  
te amul jàmm.  
Xanaa du benn bérab la ñépp jëm?

<sup>7</sup> Nit ak doñ-doñam jépp, biiram,

te taxul mu doylu.

<sup>8</sup> Ana lu boroom xel èpplee ku dofe?

Nga ñàkk, xam doxalin,  
lu mu lay jariñ?

<sup>9</sup> Doyloo li nga gis a gën di wéye xemmem.  
Loolu it, cóolóoli neen ak napp um  
ngelaw.

### *Nit dogalul*

<sup>10</sup> Lu masa ay, dees koo tuddoon;  
lu doom aadama doon, xamees na ko,  
te kenn du layook ku la sut.

<sup>11</sup> Loo ci wax wax,  
solo sa gëna néew.  
Kon ana loo ci jële?

<sup>12</sup> Ana ku xam lu gën ci nit ak fanam ni  
cóolóol,  
toogadi ni takkndeer?  
Ku koy wax luy am gannaawam fi kaw  
suuf?

## 7

### *Nit am na pexe ciw tiisam*

<sup>1</sup> Jëw bu rafet a gën diw gu xeeñ,  
bésub dee a gën bésub juddu.

<sup>2</sup> Dem dëj a gën wàlli bernde,  
mooy muju képp.

Kuy dund, sóoraale ko.

<sup>3</sup> Naqar a gën xaxaloo;  
aw tiis ñëkkal kanam, rafetal xol.

<sup>4</sup> Ku xelu, xalaat kërug dëj;  
ku dofe, xalaat kërug puukare.

<sup>5</sup> Déglu ku xelu di la àrtu  
moo gën déglu dof bu lay woy.

<sup>6</sup> Ab dof day textexi  
ni dég yuy retete taal bu cin tege.  
Loolu it di cóolóoli neen.

<sup>7</sup> Foqarñi kay day dofloo boroom xel,  
te ab ger da lay gëlëmal.

<sup>8</sup> Fa mbir mujjee gën fa mu doore,  
te muñ a gën réy-réylu.

<sup>9</sup> Bul gaawa mer;  
mer, xolub dof la samp këram.

<sup>10</sup> Bul ne lu tax démb dàq tey,  
loolu, laaj ko du xel.

<sup>11</sup> Xel mu rafet daa neex ni ndono,  
njariñ la ci kuy dund.

<sup>12</sup> Xel mu rafet kiiraay la,

xaalis kiiraay la;  
njariñu xam-xam mooy  
xelu, mucc.

<sup>13</sup> Xoolal ci li Yàlla def;  
Ana ku mana jubbanti lu mu dëngal?

<sup>14</sup> Su neexee, bannexul;  
su mettee, xoolal ne lu ci ne, Yàllaa ko def  
ngir jaam bi umple gannaawam.

### *Lu èpp tuuru*

<sup>15</sup> Lu ne laa gis  
ci sama dund gu gàtt gii!  
Nit a ngii jub, teewu koo sànkook njubam;  
nit bon, ànd ak mbonam, gudd fan.

<sup>16</sup> Bul jub ba mu èpp,  
bul wóolu sam xel ba mu èpp,  
lu ko moy nga yàqule.

<sup>17-18</sup> Bu la mbon jiital,  
te bul dofe.  
Jàppool lii,  
te baña wacc lee, mooy li gën,  
lu ko moy nga dee te sa àpp jotul.  
Ku ragal Yàlla kat  
sàmm yooyu jaar.

### *Xel mu rafet réer na ma*

<sup>19</sup> Xel mu rafet day dooleel boroom,  
ba mu man fukki kàngam cib dëkk.

<sup>20</sup> Amul moos ku jub ci kaw suuf,  
kuy def lu baax te du bàkkaar.

<sup>21</sup> Te it du lépp lu ñu wax,  
ngay bàyyi xel.

Kon doo dégg surga bu la nàññ,  
<sup>22</sup> ndax xam nga xéll ne yaw it  
nàññe nga ay yooni yoon.

<sup>23</sup> Loolu lépp maa ko natte xel mu rafet,  
te naan: «Naa xelu,»  
ndeke mbir ma sore na ma.

<sup>24</sup> Li wara am daa loq, te xóota xóot;  
ana ku ko mana daj?

<sup>25</sup> Ma walbatiku, di jéema xam,  
di wut, di càmbar, di sàkkum piri,  
ngir xam li bon cig ndof,  
ak li dofe, cig ndof.

<sup>26</sup> Ma seetlu lenn lu gëna naqari dee:  
muy ndaw su la fiir.  
Kooku cofeelam mbaal la,  
yoxo ya dib jéng.  
Ku Yàlla gërëm a koy rëcc,  
bàkkaar kat bi lay jàpp.

27 Waarekat ba nee: Xoolal li ma gis,  
benn-bennal ko, ngir gis lu mu firí.  
28 Ma seeta seet, gisuma.  
Genn góor laa ràññee ci junniy góor,  
ràññeewuma kenn ci jigéen ñi ñépp.  
29 Lenn daal laa ràññee:  
Yàlla daa sàkk nit, jubal ko,  
nit di wuta sél fu ne.

## 8

### *Ana ku rafet xel?*

1 Ana ku rafet xel nu muy mel?  
Ana ku xam piri?  
Am xel rafet, kanam leer, gëna lewet.  
2 Dama ne déggalal Buur,  
yaa ko giñoon ci Yàlla\*.  
3 Bul gaawa won buur gannaaw;  
bul saxoo lu buur buggul;  
Buur, lu ko neex lay def.  
4 Kàddug buur kilifteef la.  
Ana ku ko naan: «Looy def nii?»  
5 Ku dégg ndigal  
doo am lu la soof.  
Ku xelu, xam lu jot,  
xam doxalin.  
6 Mbir mu mu doon kat ak jotam ak  
doxalinam,  
waaye nit am na tiis wu ko diis.  
7 Kenn xamul luy xew èllëg,  
kenn manula wax luy xew èllëg.  
8 Kenn moomul bakkanam, ba man koo  
dese,  
kenn amul sañ-sañ ci bésub deeyam,  
kenn muccul ci boobu xare,  
te mbon du ca wallu boroom.  
9 Loolu lépp gis naa ko,  
ba may xalaat ci jépp jëfi kaw suuf;  
fi nit di yilife nit, muy loraange.

### *Bul roy lu bon.*

10 Ma gis itam ñu bon ñu ñu rob,  
ñu daan yaale kër Yàlla ga,  
ñu di leen gërëme tey seeni jëf ca dëkk  
ba.  
Loolu it, cóolooli neen.  
11 Jëf ñaaw na, mbugal ma yeex,  
ba tax doom aadama sóobu ci mbon.  
12 Nit bàkkaar na téeméeri yoon,  
te teewul mu gudd fan.  
Xam naa it ne nee ñu

\* 8:2 8.2 Seetal ci 2.Buur ya 11.17.

ngëneel a ñeel ku ragal Yàlla,  
ndax wormaal ko.  
13 Ku bon, du am lu baax,  
fanam du màgg ni ker,  
ndax wormaalul Yàlla.  
14 Waaye cóolooli neen a ngi am fi kaw  
suuf:  
Ku jub jot yoolu ku bon,  
ku bon jot yoolu ku jub.  
Ma ne loolu it cóolooli neen la.

15 Man daal damay digle bannëex,  
ndax nit amul lu gën fi kaw suuf  
di lekk ak a naan ak a bannëexu,  
muñe ko doñ-doñam,  
fan yi ko Yàlla may fi kaw suuf.

### *Yàlla, kenn xamu ko*

16 Ma walbatiku xalaat, di jéema xam fu  
xel rafete,  
di xoolaat li nit jàppoo fi kaw suuf,  
ba guddeek bëccëg, gëmmul bët.  
17 Ma daldi gis li Yàlla def lépp.  
Nit kay xel ma du daj liy xew fi kaw suuf.  
Day seet ba sonn, du ko daj.  
Boroom xel bu wax ne xam na ko it,  
du ko daj.

## 9

1 Loolu lépp laa walbatiku xalaat,  
ngir lépp leer ma:  
Ku jub ak ku xelu ak seeni jëf,  
lépp a ngi ci loxol Yàlla.  
Mbëggeel ak mbañeel, xamoo lu la ciy  
xaar,  
lépp a nga ca kanam.  
2 Ñépp a bokk benn dogal bi,  
ku jub ak ku bon,  
ku baax ak ku set, ak ku sobewu;  
kuy sarxal ak ku dul sarxal,  
muy ku baax ki, di bàkkaar kat bi,  
muy kiy giñ, di ki ragal ngiñ.  
3 Lu mettee ngi nii ci mboolem lu am fi  
kaw suuf:  
Benn dogal la ñépp bokk,  
te it nit a ngi sóobu ci mbon,  
di mébét jëfi dof giiru dundam,  
ba noppi fekki ña dee.  
4 Képp kuy dund kat, am nga yaakaar,  
te xaj buy dund a gën gaynde gu dee.  
5 Kuy dund xam ne dangay dee,

waaye ku dee xamul dara,  
te séentootul ab yool.

Ku dee, ñu fàtte la.

<sup>6</sup> Muy sa cofeel, di sa mbañeel,  
ba ci sa kiñaan ànd ak yaw seey.

Du lenn lu deeti sa wàll  
ci jépp jéfi kaw suuf.

### *Bégeel sa bakkan*

<sup>7</sup> Kon doxal, lekk saw ñam, bége,  
te naan sa biiñ ci xol bu sedd.  
Yàlla kat nangul na la jeeg say jéf.

<sup>8</sup> Foo tollu, solul ba jekk,  
te bul fàttee xeeñlu.

<sup>9</sup> Banneexul yaak ndaw si nga sopp  
ci fan wu gàtt wi la Yàlla may fi suuf,  
ndax loolu nga séddoo  
ci fan wu gàtt wii ngay doñ-doñaale fi  
kaw dun bi.

<sup>10</sup> Liggéey boo gis, liggéeyal;  
def ci loo man.

Ndax muy jéf, di doxalin,  
di xam-xam, di manoore,  
dara amu ci njaniiw, ga nga jëm.

### *Addina wóorul*

<sup>11</sup> Ma seetlooti fi kaw suuf ne  
du ku gaaw, yaay raw;  
du ku jambaare, yaa moom xare;  
du ku xelu, am loo dunde;  
du ku muus, duunle;  
du kuy xamkat, amu yiw;  
ku nekk ak bésam ak wërsëgam.

<sup>12</sup> Doom aadama la bésu safaan bay bett,  
jekki ne dàll fi kawam,  
ni jën wu keppu cib caax, loru,  
mbaa picc mu tancu cig fiir.  
Doom aadama xamul bésam.

### *Xel mu rafet taxul ñu naw la*

<sup>13</sup> Lii it gis naa ko, muy lu ma yéem,  
di mbirum xel mu rafet fi kaw suuf.

<sup>14</sup> Ab dëkk bu ndaw la woon, nit ña néew.  
Buur bu mag song dëkk ba, gaw ko,  
jal jali suuf yu mag, sësäl ca tata ja.

<sup>15</sup> Fekk fa ku néewle te xelu.  
Mu manoona xelal dëkk ba, xettli leen,  
waaye kenn faalewu ko.

<sup>16</sup> Man dama noon xel mu rafet a gën  
doole!

Ndeke ku néewle ñu xeeb la,  
tanqamlu say wax.

### *Li xel wuuteek ndof*

<sup>17</sup> Ku xelu, kàddoom yu dégtu ndànk  
moo gën ñal-ñalu kilifa ci biir ñu dofe.

<sup>18</sup> Xel mu rafet a gën ngànaayi xare,  
waaye benn bàkkaarkat day yàq ngëneel  
lu réy.

## 10

<sup>1</sup> As weñ tàbbi ci diw gu xeeñ, yàq ko;  
ab dof it jëfam su tuut  
neenal na xel mu rafet ak daraja.

<sup>2</sup> Xelu, jubal;  
dofe, jàdd.

<sup>3</sup> Te it ku dofe buy dox sax,  
du ànd ak xelam;  
ku ko gis, xam ne kii dof la.

<sup>4</sup> Su la sa kilifa meree,  
bul jóge fa ñu la teg;  
tooñ yu mag, teey ba giif.

<sup>5</sup> Lu mettee ngi lu ma gis fi kaw suuf,  
lu mel ni njuumte lu récc kilifa:

<sup>6</sup> Ab dof bu ñu jox cér yu bare,  
boroom daraja féete suuf;

<sup>7</sup> ma gis baadoolo war fas,  
kilifa di rung ni baadoolo.

<sup>8</sup> Ku gas um yeer, repp nga tàbbi ca;  
ku bètt miir, repp jaan matt la;

<sup>9</sup> kuy yett ay doj, repp nga caa gaañu;  
kuy gor bant, repp nga caa loru.

<sup>10</sup> Liggéeye weñ gu day te xaccesu ko,  
góor-góorlu war na ca;  
xelu, baaxle jariño.

<sup>11</sup> Jaan mätte, balees koo jat,  
du njariñal jatkat ba.

<sup>12</sup> Ku xelu àddu, mu diw yiw;  
ku dofe wax, sànk.

<sup>13</sup> Bu jëkke wax ju amul bopp,  
daaneele ndof gu sotti.

<sup>14</sup> Ab dof a ngi waxa wax,  
te kenn xamul luy xew ëllëg.  
Ana ku koy xamal gannaawam?

<sup>15</sup> Ab dof ak kër-këreem, coonoy neen;  
du xam sax yoonu taax ya.

<sup>16</sup> Ngalla yeen, réew mi gone falu buur,  
jawriñ ña di xëye xawaare.

<sup>17</sup> Ndokklee, yeen, réew ma as gor falu,  
te bu jotee, jawriñ ñay xéewlu,

ngir am doole te baña màndi.

<sup>18</sup> Tayel, puj bu màbb;  
yaafus, néeg buy senn.

<sup>19</sup> Aw ñam bégal,  
aw ñoll bannexal,  
xaalis tontu lu ne.

<sup>20</sup> Sam xel sax bu ca saaga buur,  
sa néegu biir sax, bu fa saagaa boroom  
daraja.

Xamoo picc muy yóbbu sa kàddu,  
mbaa njanaaw luy siiwali mbir ma.

## 11

### *Kenn xamul, waaye beyal sa tool*

<sup>1</sup> Dugalal sa alal, dawloo ko;  
yàgg-yàgg nga jootaat ci.

<sup>2</sup> Séddal ab cér juróom yaari nit ba  
juróom yett;

xamoo safaan buy dikkal àddina.

<sup>3</sup> Xàmbaar bu duyee, ba fees,  
fi kaw suuf lay soob.

Garab, bu daano ndijoor mbaa càmmoñ,  
fa mu daanu lay des.

<sup>4</sup> Kuy déglu ngelaw, doo ji,  
kuy seetluy niir, doo góob.

<sup>5</sup> Xamoo yoonu ngelaw,  
xamoo nu doom di sosoo ci ndeyam;  
kon manoo xam lu Yàllay def,  
moom miy def lépp.

<sup>6</sup> Xéyal, ji sa jiwu,  
gont, baña tàyyi;  
muy lii di lee, xamoo lu ciy nangu,  
am ñaar ñépp ay bokk baax.

### *Bégal te xam ne man saxul*

<sup>7</sup> Leer neex na,  
gis jant neex na.

<sup>8</sup> Ak lu say at bare bare,  
bégeel at mu ci nekk,  
waaye bàyyil xel lëndëmu bàmmeel,  
lu yàgg lay doon,  
te liy ñëw lépp, cóolóoli neen.

<sup>9</sup> Xalelu góor bi, bannexul bi ngay gone,  
bégalal sa xol bi ngay ndaw.

Toppal loo namm ak loo xemmam,  
waaye xamal ne loolu lépp,  
Yàlla da la koy laaj.

<sup>10</sup> Félal naqaru xol,  
dàq woppi yaram;

waaye ndaw ak kawar gu ñuul, cóolóoli  
neen.

## 12

<sup>1</sup> Bàyyil xel ki la sàkk,  
bi ngay dese ndaw,  
bala bési safaan a taxaw,  
ba jant ñëw, nga naa:

«Amatuma bannex.»

<sup>2</sup> Fa la jant di lëndëme,  
weer giim, biddiww giim,  
taw siwet, mu niru la lu xiinati.

<sup>3</sup> Su bés baa wattukati kër gi di lox,  
jàmbaari xare yi sègg,

wolkat yi néew, ba wolatuñu,  
ñiy séentu ci caax yi giimle,

<sup>4</sup> bunt yi féeteek mbedd mi tëje,  
coowal wol dal,

as picc sab, nelaw naaw,  
janq ju doon woy, selaw.

<sup>5</sup> Nga dem, ba ragal fu kawé,  
am tiitaange ciw yoon,

garab tóor, ba weex furr,  
soccet di yokokoki,

doomu garab tëë yékkati siddit,  
nga jëm kër gu mujj,

waa dëj bi fees mbedd mi.

<sup>6</sup> Bàyyil xel ki la sàkk,  
balaa buumu xaalis bi ne tipp,

ndabal wurus wi, tasar,  
njaq la ñuy roote, rajax,

poli ba ca teen ba, tàllit.

<sup>7</sup> Su boobaa pënd dellu suuf, na woon;  
bakkan dellu fa Yàlla ma able woon.

<sup>8</sup> Cóolóolo cóolóol, waru waarekat ba.  
Léppi cóolóoli neen.

### *Ma daaneel*

<sup>9</sup> Waarekat ba daa xelu,  
di jànglewaale xam-xam,

di natt ak a gëstu,  
di jekk-jekkal kàdduy xel yu takku.

<sup>10</sup> Waarekat ba daa tànn baat yu saf,  
bind ko, mu jub te dëggu.

<sup>11</sup> Waxi ku xelu day gindee, bantub sàmm  
la;

tënk ba diy pont, sampe ca.

Loolu ag may la, jóge ci sàmm biy kenn.

<sup>12</sup> Doom, leneen lu ci tegu, moytu ko:

Yokki téere amul kemu,  
njàng mu bare, coonoy boroom.

<sup>13</sup> Ma daaneele fii, déggees na lii lépp:



Yàlla, ragal ko;  
ay santaaneem, jëfe ko;  
loolu rekk mooy nit.  
<sup>14</sup> Jépp jëf déy, la Yàlla di àtte,  
ba ci lépp lu làqu,  
muy lu baax, di lu bon.

## Ngën-gi-woy

<sup>1</sup> Lii, di ngën-gi-woy, ñeel Suleymaan.

### *Ndaw si*

<sup>2</sup> Foon maa, ngalla foon ma,  
sa cofeel a ma dàqal biiñ.

<sup>3</sup> Sa diw yi ngay xeeño neex,  
saw tur jib, mel ni lu xeeñ a xelli.  
Moo tax janq ji nob la.

<sup>4</sup> Yóbbaaale ma, nu daw, dem.  
Sama buur, yóbbu ma sa néeg,  
nu bokk mbég ak bannex,  
di tàqantikoo sa cofeel gi dàq biiñ.  
Ñoo yey nob la!

### *Njèkke ñooru, mujje xejjoo*

### *Ndaw si*

<sup>5</sup> Yeen janqi Yerusalem, damaa ñuul,  
rafet;

ñuul ni xayma ya ca Kedar\*,  
mel ni ridoy Buur Suleymaan.

<sup>6</sup> Buleen ma xoole sama ñuulaay bi,  
jant bee ma lakk.

Samay càmmiñ a ma mere,  
di ma wattuloo tóokëri reseñ ya,  
te wattuwuma sama tóokëri bopp†.

<sup>7</sup> Sama soppey xol, ngalla wax ma  
ana fooy foral,  
di fa gooral, digg bëccëg?  
Lu ko moy may muuru, di la wër  
fi say xarit ak seeni gétt.

### *Waa ji*

<sup>8</sup> Aa! Xamoo koo?  
Yaw mi dàq ci jigéen ñi!  
Génnal rekk, topp wewi jur gi,  
sàmmi say tef,  
fi dendeek mbaari sàmm si.

<sup>9</sup> Xarit, xam nga lu ma lay xoole?  
Yànjaayu wajan wu takk watiiru Firawna.

<sup>10</sup> Sa lex yaa ngi tàkk fi digg sàdd yi!  
Céy wii loos ak caqu peram!

<sup>11</sup> Sàddi wurus lanu lay defaral,

\* **1:5** 1.5 Kedar diiwaanu Arabi la woon bu genn giirug Ismayla dëkke woon bu yàgg. Dañu daan defare seeni xayma ay deri bëy yu ñuul. † **1:6** 1.6 tóokër ak càmm ay baat la yu ñuy méngalee ndaw si ci waxin. Seetal it ci 1.8. ‡ **1:14** 1.14 tóokëri Engedi bëtu ndox la bu nekk ca sowub géēju Xorom ga. Engedi di tekki «bëtu ndoxu bëy». § **1:17** 1.17 seedar ak garab gu dul ruus ay garab lañu yu neex xet.

tapp ca xalis.

### *Ndaw si*

<sup>12</sup> Li sama buur tēdd, di xéewlu lépp,  
maa ngi gilli lu neex.

<sup>13</sup> Sama nijaay di mbuusum ndàbb  
may fanaan sama digg ween.

<sup>14</sup> Saa nijaay, saa cabbu tóor-tóoru  
fuddën,  
fa digg tóokëri Engedi‡.

### *Waa ji*

<sup>15</sup> Xarit, yaaka rafet,  
yaaka taaru!  
Say gèt niy pitax.

### *Ndaw si*

<sup>16</sup> Nijaay, yaaka góorayiw,  
yaaka maa neex!

Mbooy gu naat, nu laloo,  
<sup>17</sup> garabi seedar di sunu xànqi néeg,  
garab gu dul ruus xadd ko§.

## 2

<sup>1</sup> Waaye man saxayaayu joor donj laa,  
nirook as tóor-tóor ciw xur.

### *Waa ji*

<sup>2</sup> Xanaa as tóor-tóor su ne ràññ ci biiri  
dég!

Kookooy sama xarit ci biir janq ji.

### *Ndaw si*

<sup>3</sup> Mbete garab gu gëna neex ci gott bi,  
kookooy sama nijaay ci biir xale yu góor  
yi.

May bége keppaaram, safoo doom ya.

<sup>4</sup> Dugal na ma néegub sago-jeex-na,  
yiire ma mbëggeel.

<sup>5</sup> Gaaweleen ma nàkki reseñ, ma dëgër,  
leel-leen may meñneef, leqlee ma.  
Wopp laa def ndax mbëggeel!

<sup>6</sup> Sama càmmoñu waay, ma gegenoo,  
ndijooram, ma laxasoo.

<sup>7</sup> Yeen janqi Yerusalem, waatal-leen ma  
ci taaru kéwél ak koobay àll bi,

ne dungeen dakkal te dungeen sooke  
tëraayu mbëggeel  
te jotul.

### *Wootante jib na*

#### *Ndaw si*

<sup>8</sup> Dégluleen, sama nijaay a,  
mu ngooguy ñëw,  
di xéluy jéggi tund yu ndaw yi,  
di tëb tund yu mag yiy dikk.

<sup>9</sup> Sama nijaay a ngi mel ni kéwél,  
mbaa kooba gu ndaw.

Mu ngi noonu taxaw ca gannaaw miir ba,  
di séentu ci palanteer bi  
ak a yër ci caax bi.

<sup>10</sup> Sama nijaay ne ma:

«Xarit, ayca,  
jongama sama, dikkal boog!

<sup>11</sup> Xoolal, tawub sedd wees na,  
waame jàll, wéy\*.

<sup>12</sup> Tóor-tóor yi lal na réew mi,  
jamonoy woy dikk,  
sabum pégét† jibe sunum réew.

<sup>13</sup> Figg a ngi ñorsi,  
reseñ tóor, di gilli.

Xarit, ayca,  
jongama sama, dikkal boog!»

#### *Waa ji*

<sup>14</sup> Soppe, sore nga ni xati mu dëkke xar-  
xari doj,

làqoo ruqi mbartal yi.

Won ma sa jëmm,  
dégtal ma sa baat.

Sa baat a neex,  
sa jëmm jekk!

#### *Ndaw si*

<sup>15</sup> Jappal-leen ma till yi,  
till yu ndaw yiy ruur reseñ,  
te sunu reseñ jiy tóor.

<sup>16</sup> Sama nijaay, maa moom, man it, moo  
moom,

di fore digg tóor-tóor yi.

<sup>17</sup> Nijaay, balaa jant a fenk,  
ker toxu,  
dellul gaaw ni kéwél,

\* **2:11** 2.11 Ci Israyil, jamonoy sedd day taw. Bu taw bi jeexee, tàngoor wi dikk, gàncax gi jebbi, daldi naat.

† **2:12** 2.12 pégét xeetu picc la mu nirool pitax.

mbaa kooba gu ndaw kaw tund yu  
xàjjalikoo ya.

## 3

### *Réeroo, gise*

#### *Ndaw si*

<sup>1</sup> Sama kaw lal, guddi,  
laa seet sama soppey xol.

Seet naa ko, gisuma ko.

<sup>2</sup> Naa jóg, wër dëkk bi.

Mbedd yeek pénc yi  
laay seete sama soppey xol.

Seet naa ko, gisuma ko.

<sup>3</sup> Wattukat yee ma gis,  
ba ñuy wër dëkk bi.

Ma ne leen: «Sama soppey xol, gisuleen  
ko?»

<sup>4</sup> Ma romb leen tuuti rekk,  
gis sama soppey xol.

Ma ne ko taral, bàyyeetuma ko,

ba yóbbu ko sama kër yaay,  
ba sama biir néegu ndey ji ma jur.

<sup>5</sup> Ngalla yeen, janqi Yerusalem, waatal-  
leen ma

ci taaru kéwél ak koobay àll bi,

ne dungeen dakkal te dungeen sooke  
tëraayu mbëggeel

te jotul.

### *Daagu, jëm toolu mbëggeel*

#### *Ñeneen*

<sup>6</sup> Ana luy jóge màndiñ ma nii,

mel ni taxaaru saxar,

suuroo ndàbb ak xas mu xeeñ

ak mboolem cuuraayi jula?

#### *Ndaw si*

<sup>7</sup> Laltub Suleymaan a ngoog,  
juróom benn fukki jàmbaar dar ko,  
di jàmbaari Israyil.

<sup>8</sup> Népp mane saamar,  
ku ci nekk mokkal xare,  
saamar ci pooj,

ngay fàggu mbettum guddi.

<sup>9</sup> Ab toogu la Buur Suleymaan defarlu,  
ñu defare ko bantu Liban,

<sup>10</sup> ponku ya, mu def ko xaalis,  
wéeruwaay ba wurus;

tooguwaay ba di ndimo lu xonq curr,  
biir ba di liggéeyu ràbb  
bu janqi Yerusalem ràbbe cofeel.

<sup>11</sup> Yeen janqi Siyon, génnleen,  
xool Buur Suleyman ak mbaxanam  
céetal  
mi ko yaayam solal ci bésub céetalam,  
bésu bânneexam.

#### 4

##### *Waa ji*

<sup>1</sup> Yaaka rafet, xarit, yaaka taaru!  
Sa gët yi niy pitax, làqoo muuraay bi,  
njañ liy loy-loyee ngi saf géttu bëy yu ñuul  
yu bartaloo kaw tundu Galàdd.

<sup>2</sup> Sa gëñ yi weex ni xar yu ñu wat  
ñuy yéegé ca sangukaay ba,  
ku nekk ak seexam,  
kenn wéetu ca.

<sup>3</sup> Sa tuñ yi mel ni wëñ gu xonq curr,  
ndaw gémmiñ gu jekk!

Sa lex yiy tàkk ni ñaali gërënaat,  
làqoo sa muuraay bi;

<sup>4</sup> sa loos wi ne coleet ni tatay Daawuda,  
mërgalu ba jekk,  
caq bay lang ni junniy kiiraayi jàmbaar.

<sup>5</sup> Sa ween yi ni ñaari tef,  
mbaa seexi kéwél yuy fore digg tóor-tóor  
yi.

<sup>6</sup> Balaa jant a fenk,  
ker gàddaay,  
ma ne coww diggante tund wa ndàbb ne  
bann,  
ak tund wa xas ma neexe.

<sup>7</sup> Xarit, sa lépp a rafet,  
sikk nekkul ci yaw.

<sup>8</sup> Séet sama, jógeel Libañ, jege ma,  
bawool Libañ, jegesi ma.  
Wàcceel colli Amana  
ak colli Senir ak Ermon.  
Génnal xunti gaynde yooyook  
tundi segg ya.

<sup>9</sup> Jigéen sama, séet sama, benn yoon nga  
ma xool,  
sama fit ne tërit.  
Sa benn peru caq rekk,  
sama fit ne tërit.  
<sup>10</sup> Jigéen sama, séet sama,

sa mbëggeel a neex!  
Sa mbëggeel a dàq biiñ,  
sa diw yu xeeñ dàq luy cuuraay.

<sup>11</sup> Séet sama! Lem ay xellee sa gémmiñ,  
lem ak meew lal sa làmmiñ.

Sa xetu yére xetu àllub Libañ la.

<sup>12</sup> Jigéen sama, séet sama, yaay tóokër bu  
tëje,

yaay seyaan bu tëje,  
di bëtu ndox bu saañe.

<sup>13</sup> Yaa di toolub gërënaat bu naat,  
meññ ngën-gi-meññeef

ak fuddën ak reen yu xeeñ,

<sup>14</sup> muy reen yu xeeñ, safroñ, barax, kanel,  
ak xasoo xas mu xeeñ,

ndàbb ak alowes  
ak lépp lu xeeña xeeñ.

<sup>15</sup> Yaa di bëtu ndox ci tool yi,  
di teen bu fees ak ndox muy daw,  
wale tundi Libañ.

##### *Ndaw si*

<sup>16</sup> Yaw, ngelawal bëj-gànaar, yewwul,  
ngelawal bëj-saalum, dikkal,

wolal-leen ma sama tool bi,  
mu gilli;

sama nijaay dugg toolam,  
xéewloo ngën-gi-meññeefam.

#### 5

##### *Waa ji*

<sup>1</sup> Jigéen sama, séet sama, dikk naa sama  
tool,

sama ndàbb ak sama cuuraay, ma for,  
sama lem xelli, ma lekk,  
sama biiñ ak sama meew, ma naan.

##### *Awu*

Yeen soppe yi, lekkleen;  
yeen ñi bëggante, naanleen ba màndi.

##### *Xol jeex na, mujje neex*

##### *Ndaw si*

<sup>2</sup> Maa ngi nelaw, te xol yewwu;  
dégluleen, sama nijaay ay fëgg.

Mu ne: «Xaritoo, jigéen sama, ubbil ma,  
sama nenne, alal sama!

Sama bopp a ngi laye ba tooy,  
njañ li fanaanee guus.»

<sup>3</sup> Ma ne ko: «Summiku naa de,  
xanaa дума soluwaat?  
Jàngu naa jeeg,

xanaa duma taqati?»

<sup>4</sup> Sama nijaay yoor loxoom ci xarante bi, sama yaram ne sàyy.

<sup>5</sup> Ma ne bërét, di ubbil nijaay, sama yoxo yi, diwu ndàbb di ca siit, sama waaraam yi, ndàbb rogalaat ba ci njàppul bunt bi.

<sup>6</sup> Maa ubbil nijaay, waaye nijaay waññiku na, ba wéy. Ba mu waññikoo, tuuti ma dee. Seet naa ko, gisuma ko; ma woo ko, wuyuwul.

<sup>7</sup> Wattukat yiy wër dëkk bi gis ma; ñu dóor ma, gaañ ma, ñori sama malaan. Wattukati tata jaa!

<sup>8</sup> Ngalla yeen, janqi Yerusalem, waatal-leen ma ne su ngeen gisee sama nijaay, ne ko damaa wopp ndax mbëggeel.

### *Janqi Yerusalem*

<sup>9</sup> Yaw mi dàq ci jigéen ñi, ana lu sa nijaay gène keneen? Ana lu mu ëpplee keneen, ba nga di nu waatloo lii?

### *Ndaw si*

<sup>10</sup> Sama nijaay daa xees, leer; kenn la ci fukki junniy góor.

<sup>11</sup> Kanam gi ni wurus, di wurusu ngalam; njañ li lëmësu, ñuul ni ndobin.

<sup>12</sup> Gët yi ni pitax yu feggook wali ndox, sangoo meew,

feggook ndox mu ne xéew.\*

<sup>13</sup> Lex ya di tool, gancax ga ne ca bann, tuñ ya diy tóor-tóor, ndàbb wale ca, rogalaat.

<sup>14</sup> Yoxo yi banti wurus la, ngën-gi-per tappe ca; jëmm ja rattax ni bëñu ñay laloo peri safir;

<sup>15</sup> yeel yi kenuy doj wu jafe la, sampe ci tàñki wurusu ngalam. Meloom ni tundi Liban, di tànnéef ni garabi seedar.

<sup>16</sup> Gémmiñam, bannexxi neen,

jëmmam jépp jara xédd!

Yeen janqi Yerusalem, sama nijaay a ngoog, samab xarit.

## 6

### *Janqi Yerusalem*

<sup>1</sup> Yaw mi dàq ci jigéen ñi, ana fu sa nijaay dem? Wax nu fu sa nijaay jaar, nu seetle la ko.

### *Ndaw si*

<sup>2</sup> Sama nijaay dugg na biir toolam, fa gancax ga ne bann. Mu ngi foral ci tool bi, ak a fori tóor-tóor.

<sup>3</sup> Man, nijaay a moom; nijaay it, maa moom.

Mooy fore sama digg tóor-tóor yi.

### *Yaaka taaru*

#### *Waa ji*

<sup>4</sup> Xarit, taaru nga ni Tirsa ak Yerusalem, péeyi buur ya, yéeme nga ni péey yu kawé ya!

<sup>5</sup> Wuy, geesul fee!

Soo ma nee jàkk, ma jànnaxe.

Sa njañ liy loy-loyee ngi saf géttu bëy yu ñuul,

yu bartaloo kaw tundu Galàdd.

<sup>6</sup> Sa gëñ yi ni mbote yu weex, yéege ca sangukaay ba, ku nekk ak seexam, kenn wéetu ca.

<sup>7</sup> Sa lex yiy tàkk ni ñaali gërënaat, làqoo sa muuraay bi.

<sup>8</sup> Buur day am juróom benn fukki lingeer ak juróom ñett fukki jongama ak jeeg ju dul jeex.

<sup>9</sup> Waaye sama nenne kenn la, matal ma sëkk,

yaayam kennal ko,

muy ngëneelu biiru yaayam.

Janq ji gis ko, di ko jëwe mbégteem, lingeeri buur aki jongamaam di ko kañ.

<sup>10</sup> Ña nga naa: «Ndaw sii ku mu?

Bu nee xiféet, nga ne fajar a xar, rafet ni leer gu ndaw,

yànj ni jant bi,

yéeme ni gàngoori biddiwi!»

<sup>11</sup> Damaa wàcc ba ca toolub saal ya,

\* 5:12 5.12 Li ñu wax fii ci làkku ebré am na werante.

xooli cax mu yees mi ci xur wi,  
 bu reseñ ji jebbee,  
 mbaa gèrënaat ji tóor, ma gis.  
 12 Damaa ràkkaaju bay lox,  
 mel ni ku war watiiru buur\*.

## 7

*Janqi Yerusalem*

1 Dikkal, janqu waa Sulam bee, dikkal;  
 dikkala dikk, nu niir la.

*Waa ji*

Moo, lu ngeen di seetaane janqub waa  
 Sulam bi

ni kuy fecc galanu Ñaari Dali Xare?

2 Janqoo, lingeer sama,  
 sa tànk yee ka jekk ci sa dàll yi,  
 sa mooco yi mèrgalu niy jaaro  
 yu ndaanaanu tegg yette loxoom.

3 Sa jumbux bi di kaas bu mèrgalu,  
 yàlla bumu ñàkk biiñu njafaan!

Sa biir bi di jalu pepp  
 mu ay tóor-tóor ñag.

4 Sa ween yi ni ñaari tef,  
 mbaa seexi kéwél.

5 Sa loos wi, coleet, rattax, ni tatay bëñi  
 ñay;

say gët di lerxat ni déegi Esbon,  
 ya feggook buntu Bat Rabim.

Sa bakkan bi jub xocc ni tatay Liban  
 ja tiim Damaas.

6 Sa bopp siggi ni tundu Karmel,  
 njañ liy nes-nesi ni sooyu buur,  
 létt yay fëy-fëyi, ba laaw buur.

7 Rafet, sopploo!

Soppee, bânneex nga!

8 Sa taxawaay bii garabu tàndarma la,  
 sa ween yi di cëggi doom ya.

9 Ma ne, maay yéeg tàndarma gi,  
 ñëb doom yi.

Yal na say ween di sama cëggi reseñ,  
 sag noo jox ma doom yu xeeñ,

10 sa gémmeñ di xelli ngëneelu biiñ.

*Ndaw si*

Na walal sama nijaay,

\* 6:12 6.12 Li ñu wax fii ci làkku ebrë am na werante.

tóor-tóor yu xeeñ yi màndaragoor la ci làkku ebrë. Ñu yaakaar ne, day may góor doole tey giiral jigéen. \* 8:2

8.2 Mbaa: nga jàngal ma baane, † 8:6 8.6 torlukaay mooy juntuukaay bu mel ni lu ñuy tàmponee. ‡ 8:6 8.6

Mbaa: tàkk di sël-sëli.

tuurul ñiy nelaw.

11 Man, nijaay a moom,  
 te maay nammeelam.

*Ayca ca tool ba**Ndaw si*

12 Nijaay, ayca nu dem tool ba,  
 fanaani ca tóor-tóori fuddën ya\*.

13 Nan teela xëyi ca tóokëri reseñ ya,  
 bu reseñ ji jebbee,

mbaa tóor-tóor yi focci,  
 mbaa gèrënaat ji tóor, nu gis.

Fa laa lay jébbale mbëggeel.

14 Tóor-tóor yu xeeñ† yaa ngi gilli,  
 lépp luy doom yu neex aje sunu bunt  
 néeg,

yu yees yaak ya woon,  
 ma boole dencal la, nijaay.

## 8

1 Éy su meloon ni sama càmmiñ nga,  
 mel ni ku ma bokkal wenn ween,  
 ba ma dajeeek yaw biti, sañ laa dar,  
 te du tax ñu sikk ma!

2 Ma jàpp la, yóbbu sama néeg yaay,  
 moom mi ma yar,\*

ma may la biiñ bu saf,  
 ak sama ndoxum gèrënaat, nga naan.

3 Sama càmmoñu waay, ma gegenoo,  
 ndijooram, ma laxasoo.

4 Yeen janqi Yerusalem, waatal-leen ma  
 ne dungeen dakkal te dungeen sooke

tëraayu mbëggeel  
 te jotul.

*Joxe naa xol**Janqi Yerusalem*

5 Ana ndaw suy jóge màndiñ ma nii,  
 wéeroo nijaayam?

*Ndaw si*

Ci ron pom gi laa la yee,  
 fa la sa yaay jappe ëmb,

jur la fa.

6 Teg ma ci sa xol ni torlukaay†,  
 mbaa ci sa përeg ni lamu màndarga.

Mbëggeel a bare doole ni ndee,  
 firaange xér ni bàmmeel.

\* 7:12 7.12 Mbaa: ca dëkk yu ndaw ya. † 7:14 7.14

tóor-tóor yu xeeñ yi màndaragoor la ci làkku ebrë. Ñu yaakaar ne, day may góor doole tey giiral jigéen. \* 8:2

8.2 Mbaa: nga jàngal ma baane, † 8:6 8.6 torlukaay mooy juntuukaay bu mel ni lu ñuy tàmponee. ‡ 8:6 8.6

Mbaa: tàkk di sël-sëli.

Day jàpp jippét,  
 di jum bu Aji Sax ji taal.‡  
 7 Ndox mu ne xéew du fey mbëggeel,  
 ay dex du ko mëdd.  
 Ku koy weccee sa alalu kër gépp it,  
 ñu jéppi laa jéppi rekk.

*Càmmiñi ndaw si*

8 Sunub jigéen lu ndaw la,  
 ween sax amu ko.  
 Lu nuy defal sunub jigéen  
 bés bu ñu koy béggsi?  
 9 Su doon am tata,  
 nu tabaxal ko soorooru xaaalis.  
 Su doon bunt,  
 nu aare ko xànqi seedar.

*Ndaw si*

10 Maa dim tata,  
 sama ween di sooroor ya;  
 moo tax waa ji xam ne  
 maa di jàmmam.

11 Suleymaan am na reseñ ca Baal Amon.  
 Da koo dénk ay beykat.  
 Ku nekk di ko fey meñneef ma  
 junniy dogi xaaalis.

12 Junniy dogi xaaalis yi,  
 Suleymaan, yaa ko moom;  
 ñaar téeméer yi, beykat yi.  
 Waaye sama toolub reseñ, maa ko moom.

*Waa ji*

13 Yaw mi tooge digg tool bi,  
 samay xarit a ngi teewlu sa baat,  
 waxal boog, ma dégg.

*Ndaw si*

14 Nijaay, dawsil,  
 melal ni kéwél,  
 mbaa kooba gu ndaw  
 ci kaw tund wi ci gàncax gu xeeñ gi.

## Esayi Mucc a ngi ci Emanuwel

(Saar 1—12)

<sup>1</sup> Lii moo di peeñum Esayi doomu Amocc, di lu mu gis ci mbirum Yuda ak Yerusalem ci janti buuri Yuda yi ñuy wax Osiyas\* ak Yotam ak Axas ak Esekiya.

*Aji Sax ji sikk na ñoñam*

<sup>2</sup> Asamaan, déglul; suuf, teowlul, Aji Sax jeey àddu:

«Ay gone laa yar, mǎggloo leen, ñoom, ñu gǎntal ma.

<sup>3</sup> Aw yékk xam na boroomam, mbaam-séf xam gǎmb,

bi ko boroomam di xonte, waaye Israyil xamul, sama ñoñ ñii xàmmeewuñu.»

<sup>4</sup> Wóoy wii xeetu moykat, wii askan wu diisu ñaawtéef, mii njurum defkati mbon, yii doomi yàqute!

Ñoo wacc Aji Sax ji, ñoo teddadil Aji Sell ju Israyil, dèddu ko.

<sup>5</sup> Xanaa dungeen wéye fippu, ñu gën leena duma, te bopp di góomi neen, xol jeex tàkk?

<sup>6</sup> Bopp ba téstèn, fenn jagul. Xanaa gaañu-gaañu aki dagg-dagg rekk, ak góom yuy nàcc, fajeesu ko, takkeesu ko, gajfaleesu kook ag diw.

<sup>7</sup> Seenum réew gental, seeni dèkk xoyomu, seen suuf, doxandéem yi lekk fi seen kanam,

muy gent bu doxandéem tas.

<sup>8</sup> Siyoñ, dèkk bu taaru baa ngi wéet ni mbaarum tóokër mbaa dalub toolu xaal.

Mbete dèkk bu ñu gaw!

<sup>9</sup> Bu nu Aji Sax ji Boroom gàngoor yi waccalul woon li nu deseek as néew, ni Sodom† lanuy mel, Gomor lanuy neexool.

*Aji Sax ji bañ na ngistal*

<sup>10</sup> Dégluleen kàddug Aji Sax ji, yeen njiiti Sodom,

teowluleen sunu yoonu Yàlla, yeen askanu Gomor.

<sup>11</sup> «Lu may doye seen sarax yu bare?» la Aji Sax ji wax.

«Damaa suur seen saraxi rendi-dóomali kuuy,

suur nebbonu juru yar gi, deretu yékk ak xar ak sikket it, safu ma.

<sup>12</sup> Bu ngeen dikkee, teewsi fi sama kanam, ana ku leen sant ñu joggat-joggatee nii sama èttu kër?

<sup>13</sup> Buleen fi indeeti saraxi caaxaan, seen saraxu cuuraay, lu ma seexlu la.

Terutel weer ak bésub Noflaay ak wooteb ndajee ci yem!

Duma mana dékku ndajem diine mu rax njubadi.

<sup>14</sup> Seeni Terutel weer ak seen bési mǎggal laa bañ ci sama xol;

yooyu mǎggal a ma diis ba àttanatuma ko.

<sup>15</sup> Bu ngeen ma tàllaleey loxo, ma fuuyu.

Bu ngeen doon ñaan-ñaanee it, du maa leen di déglu:

seeni loxo, deret la taq ripp.

<sup>16</sup> Raxasuleen ba set wecc, jéleleen seeni jéf ju bon fi sama kanam, te ngeen ba lu bon.

<sup>17</sup> Jàngleen di def lu baax, sàkku njub,

wañni ab notkat, àtte dègg, ab jirim,

sàmm àqu jètun.

<sup>18</sup> «Kaayleen, nu waxtaan ba juboo,» la Aji Sax ji wax.

«Li seeni bàkkaar di xonq lépp, tàll lay weexeji.

Li muy xonq curr lépp, weex furr lay mujje.

<sup>19</sup> Su ngeen ma nangoo déggal, ngéneelu réew mi ngeen di xéewloo.

<sup>20</sup> Waaye su ngeen lànkee, fippu, saamar a leen di xéewloo.»

Aji Sax ji déy a ko wax ci gémmiñam.

\* 1:1 1.1 Osiyas mooy Asaryaa ba tey. † 1:9 1.9 Seetal ci *Njàlbéen ga* 19.23-29.



*Mbugal mooy setal Yerusalem*

<sup>21</sup> Ana nu biib dëkk yàqoo, mbeteb gànc,  
te nekkoon dëkkub kóllère,  
njubte mate fa,

njekk lal fa panaan,  
tey ñu diy bóomkat!

<sup>22</sup> Sa xalis doon na raxit,  
sa biiñ xormbet.

<sup>23</sup> Seenii njiit të,  
xejjoo ay sàcc,  
ñoom ñépp sopp ger,  
di dàq ay neexal,  
ab jirim, sàmmuñu àtteem,  
àqu jëtun soxalu leen.

<sup>24</sup> Moo tax, kàddug Boroom bee,  
Aji Sax ju gàngoor yi,  
Jàmbaaruu Israyil:

«Maay lijanti samay bañ, ngalla ñoom!  
Maay fey samay noon!

<sup>25</sup> Yerusalem, maa lay teg loxo,  
maay seeyal sa raxit ni xeme,  
ba dindi sa mbuubit mépp.

<sup>26</sup> Maay wañni say àttekat, ñu mel na  
woon,  
say diglekat it dellu mel ni bu jëkkoon.  
Su boobaa ñu wooye la Dëkkub Njekk,  
ak Dëkkub Kóllère.»

<sup>27</sup> Siyoñ dëppook yoon, mucc,  
ay tuubkatam wormaal njekk, raw;

<sup>28</sup> moykat ak bàkkaarkat yàqoondoo,  
dëddukati Aji Sax ji sànkoonndoo.

<sup>29</sup> Yeenay rus moos ci garab yu mag,  
yi ngeen soppoona daje, di xërëmtu.

Yeenay am gâce ci tóokër,  
yi ngeen taamu woona daje, di  
bokkaale.

<sup>30</sup> Yeenay meli ni garab gu mag gu xob ya  
lax,

mbaa tóokër bu amul siitu ndox.

<sup>31</sup> Boroom doole mel ni boob,  
la mu liggéey di ferñent,  
ànd ak moom ne jéppét,  
te kenn du fey sawara wa.

**2***Kilifteef gu bees taxaw na*

<sup>1</sup> Mbir mii la Yàlla won Esayi doomu  
Amocc ci mbirum Yuda ak Yerusalem.

<sup>2</sup> Fan yu mujj ya, dees na taxawal  
tundu kër Aji Sax ji,  
Aji Sax ji mooy gëna kawé ci tund yi,

tiim tund yu ndaw yi,  
xeet yépp riirandoo, wutsi ko.

<sup>3</sup> Ay askan yu bareey dikk, naan:  
«Dikkleen nu yéegi tundu Aji Sax ji,  
fa kër Yàllay Yanqóoba,  
mu xamal nuy yoonam,  
ba nu doxe yooyu ñallam.»

Siyon kat la ndigalu yoon di bawoo,  
Yerusalem googu la kàddug Aji Sax ji di  
jóge.

<sup>4</sup> Mooy àtte diggante xeet yi,  
mooy dogalal ay askani askan,  
ñu tegg seeni saamar ay illéer,  
def seeni xeej ay sàrt;  
aw xeet dootu xàccil moroom ma saamar,  
te dootuñu jàngati xare.

<sup>5</sup> Yeen waa kër Yanqóoba,  
kaayleen nu doxe leeru Aji Sax ji!

*Bew, yàqule*

<sup>6</sup> Boroom bi, bàyyi nga waa kër  
Yanqóoba, sa ñoñ,  
ndax jëfi waa penku lañu feese,  
aki gisaanekat, ba mel ni waa Filisti,  
te ñooy tàppante pasook doomi  
doxandéem yi.

<sup>7</sup> Seen réew maa ngi ne gànñ ak xalis ak  
wurus,

alal du jeex,  
fas ne xas,  
watiiri xare du jeex.

<sup>8</sup> Seen réew maa ngi fees aki yàllantu;  
ñuy sujjóotal seen liggéeyu loxo yooyu,  
te ñoo ko sàkkal seen bopp.

<sup>9</sup> Doom aadama torox na, ku ne detteelu,  
waaye bu leen yékkati!

<sup>10</sup> Ayca ca xunti ma,  
làqujileen biiri pax,  
ba sore tiitaange ji Aji Sax ji sabab,  
sore darajay màggaayam.

<sup>11</sup> Bésub keroog booba,  
ku bew bay regeju mooy detteelu,  
sagub nit sàggiku,  
Aji Sax ji donñ mooy jagoo kawé.

<sup>12</sup> Bés déy ñeel na Aji Sax ju gàngoor yi,  
ca lay xaare képp ku bew ak ku reew,  
ba kuy danñiiral, detteelu.

<sup>13</sup> Ca lay xaare garabi seedari Liban  
yi ne coleet, ba kawé,  
ak garab yu mag ya fa Basan.

14 Ca lay xaare wépp tund wu mag wu ne  
 coleet,  
 ak bépp jànj bu kawé,  
 15 ak jépp tata ju gudd,  
 ak bépp miir bu ñu dàbbli,  
 16 ak gaalu Tarsis gu mag gu mu doon,  
 ak gépp gaal gu taaru.  
 17 Bésub keroog booba,  
 kuy danjiiral, detteelu,  
 sagub nit sàggiku,  
 Aji Sax ji donj mooy jagoo kawé.

18 Yàllantu yépp a naan mes,  
 19 nit ñi làquji biir xuntiy doj,  
 ruuruji biiri pax,  
 ba sore tiitaange ji Aji Sax ji sabab,  
 sore darajay màggaayam,  
 kera buy taxaw, ba suuf di lox.  
 20 Bésub keroog booba,  
 yàllantuy xalis ak wurus  
 ya nit sàkkal boppam, di leen su-  
 jjóotal,  
 ñoom lay sànni ca jaar yaak njugub ya,  
 21 ba mana làquji ca xunti ya  
 ak xarantey doj ya,  
 ba sore tiitaange ji Aji Sax ji sabab,  
 sore darajay màggaayam,  
 kera buy taxaw, ba suuf di lox.  
 22 Baleen nit,  
 noowal bakkan kese la!  
 Ana lees koy nawe?

### 3

#### *Yuda salfaañoo na*

1 Aji Sax ji Boroom bi, Aji Sax ju gàngoor  
 yi kat,  
 mu ngi nii di jële Yerusalem ak Yuda,  
 lu doon wéeruwaay, di céslaay,  
 muy dugub ju ñu yaakaaron,  
 di ndox mu ñu yaakaaron,  
 2 ak jàmbaar ak ñeyu xare,  
 akub àttekat akub yonent,  
 ak gisaanekat ak magum pénc,  
 3 ak njiitu juróom fukki dag, akub  
 kàngam,  
 ak diglekatu buur, ak ndaanaanu  
 liggéeykat,  
 ak jatkat bu xareñ.  
 4 «Maay def ay gone jiite leen,  
 di ñu yaroo seen sago, yilif leen.

5 Nit ñiy soxorante,  
 ku nekk ak moroomam, ku nekk ak  
 dëkkandoom,  
 ndaw di ñàkke mag kersa,  
 sagaru nit sofental boroom daraja.  
 6 Nit dina ne nikk mbokk ma,  
 ca biir kër baayam, ne ko:  
 «Yaw mi dese mbubb, jiite nu,  
 ba lu bokk ci sunu gent bii, di sa kilifteef.»  
 7 Keroog kooka àddu ne ko:  
 «Duma leen mana fajal dara!  
 Du dugub, du mbubb fa sama kër,  
 dungeen ma def njiit!»  
 8 Yerusalem day téqtalu,  
 Yuda fëlëñu.  
 Ñooy wax ak a jëf lu neexul Aji Sax ji,  
 di gantal leeram gi teew.  
 9 Seen dëgër bët tuumaal na leen,  
 ñuy bàkkaar ni waa Sodom,  
 làquwuñu sax.  
 Wóoy, ngalla ñoom!  
 nde ñoo lor seen bopp.  
 10 Neleen aji jub ji mooy baaxle,  
 mooy yooloo añaam.  
 11 Waaye wóoy ku bon, nde mooy bonle;  
 la mu def rekk lees koy def.  
 12 Bokk yi, ñu xalele ñoo leen di not,  
 ay jigéen yilif leen.  
 Bokk yi, seeni njiit a ngi leen di sànk,  
 lëndëmal nañu seeni yoon.  
 13 Aji Sax jaa ngi ci jataayu layoo,  
 moo jóg di àtte ay zeet.  
 14 Aji Sax jeey yékkati kàddug sikkaange,  
 jëme ci magi ñoñam ak seeni kàngam.  
 «Yeena sèxétoo tóokëru reseñ bi,  
 la ñu foqatee ci néew-ji-doolee nga seeni  
 kër.  
 15 Lu waral ngeen di dëggaate sama ñoñ,  
 nappaaje néew-doole yi?»  
 Kàddug Boroom bee, Aji Sax ju gàngoor  
 yi.

#### *Puukare sànk na jigéeni Siyon*

16 Aji Sax ji da ne:  
 «Jigéeni Siyon a ngi danjiiral,  
 di goñeet-goñeeti,  
 di regejook a rékk-rékkal,  
 samp um ndaag,  
 kelenjal lami wëq.»  
 17 Moo tax Boroom beey wat jigéeni Siyon  
 nel,

Aji Sax jeey muri seen jë.

<sup>18</sup> Bés sub keroog Boroom bi xañ leen gànjari tànk, ak takkaay yu bindoo ni jant, ak yu bindoo ni weer wu feeñ; <sup>19</sup> aki loŋ-loŋ aki caq aki muuraay. <sup>20</sup> Moo leen di xañ ay tañlaay ak lami përeg aki ngañaay ak téere yu xeeñ aki gällaaj, <sup>21</sup> xañ leen jaaroy torlu ak jaaroy bakkan, <sup>22</sup> ak mbubbi xew, aki mëlfe, ak séri càngaay, ak saagi loxo, <sup>23</sup> ba ci yérey sooy ak yérey lëe aki musóor aki kol.

<sup>24</sup> Su boobaa lu xasaw wuutu lu xeeñ, buum wuutu ngañaay, nel bu set wuutuy létt, yérey saaku wuutu ndoket bu rafet, toroxte wuutub taar.

<sup>25</sup> Yerusalem, say góor ay fàddoo saamar, say jambaar des xare.

<sup>26</sup> Su boobaa sa bunti dëkk sax di ñaawlook a jooy, mel ni ndaw su ñu futti, mu ne dett fi suuf.

#### 4

<sup>1</sup> Su bés baa juróom yaari jigéen ñoyaalu genn góor, ne ko: «Sunub dund, nun a, sunu koodaay, nun a! Jox nu sag buum rekk, teggil nu gacce.»

#### *Aji Sax ji aar na ndesu Yerusalem*

<sup>2</sup> Su bés baa njebbitum Aji Sax ji doon lu yànj, darajawu, meñneefum réew mi di teraanga, dib sag, ñeel ñi dese bakkan fi Israyil.

<sup>3</sup> Su boobaa ku mucc fa Siyoŋ ak ku des fa Yerusalem, ku sell ki lees lay wooye, muy képp ku ñu bind turam, te mu wara dese bakkan ci Yerusalem.

<sup>4</sup> Boroom beey wal noowal mbugal, noo guy lakk, sellal, fóote ko jonkani jigéeni Siyoŋ, fetee ko deret ji ci Yerusalem, ba mu set.

<sup>5</sup> Su boobaa tundu Siyoŋ bépp, fépp fu ñuy dajee, Aji Sax ji sàkk fa niiru saxar bëccëg, guddi mu def tàkk-tàkk bu ne ràññ; leeru Aji Sax ji di kiiraay, tiim lépp, <sup>6</sup> di mbaar mu ñuy serloo tàngooru bëccëg,

di ko seeloob taw ak waame.

#### 5

#### *Woyu cofeel rax na*

<sup>1</sup> Naa woy sama soppe woyu cofeel wu solowoo toókëram. Sama soppee fi amoon toókër, kaw tund wu suuf sa nangu lool.

<sup>2</sup> Mu gàbb ko, dindi doj ya, jëmbat ca ngëneeli reseñ, tabax toojub doj fa digg ba, ba yett ca mbalkam nalukaayu reseñ, tey yaakaar reseñ ju neex, mu meññ, wex.

<sup>3</sup> Léegi yeen waa Yerusalem ak yeen waa Yuda, ngalla àtteleen maak sama toókër.

<sup>4</sup> Lu may defalati sama toókër bi, lu ma ca defuloon? Lu waral ma di ko yaakaare reseñ ju neex, mu meññ, wex xàtt?

<sup>5</sup> Ma xamal leen nag li ma naral sama toókër bi. Nàggib ñagam, mu dim parlu; màbb miiram, ñu dëggaate ko, jàll.

<sup>6</sup> Dama koy gental, mu saxi dég aki dagg, deesu ko tenqi, deesu ko bey; niir yeet, ma sant leen ñu bañ koo tawal.

<sup>7</sup> Toókëru Aji Sax ji Boroom gàngoor yi kat, mooy waa kër Israyil. Niti Yuda it ñooy njëmbat li mu safoo. Mu di ko yaakaare njub, njubadi ne jaas. Mu yaakaar njekk, yuuxi njekkar ne jaas.

#### *Alkànde ñeel na kàngami Yuda*

<sup>8</sup> Wóoy ngalla ñii di dajale kër ak kër, tool akub tool, aakimoo fépp,

ba des ñoomu neen ci réew mi.

<sup>9</sup> Maa dégg Aji Sax ji Boroom gàngoor yi, mu ne: «Giñ naa ne kër yu bareey gental déy, kër yu yaa, rafet, kenn dëkku ca.

<sup>10</sup> Toókërub ñetti egtaar déy du meññ juróom fukki liitari biiñ,

te jiwum téeméeri kiloy bele it,  
fukki kilo donj a cay génne.»

<sup>11</sup> Wóoy ngalla ñiy teela xëy,  
daw wutiw ñoll,  
gonloo biiñ ba tàng jérr.

<sup>12</sup> Xalam yaak tabala yaak toxoro ya jolli,  
biiñ xelli ca xawaare ja.  
Seetluwuñu sax li Aji Sax ji def,  
xooluñu li mu jo loxoom.

<sup>13</sup> Moo tax ñoñi Aji Sax ji di duggi ngallo  
ndax ñàkk xam-xam.  
Seen kàngam ay deeye xiif,  
seen baadoolo deeye mar.

<sup>14</sup> Moo tax njaniiw di yàkkli ag bóli,  
gémmin ga ne ñafeet, amul kersa,  
boroom darajaak baadoolay Yerusalem  
doon xaxaloo, far tàbbi ca.

<sup>15</sup> Doom aadama torox na,  
nit detteelu na,  
ku doon regeju, detteelu.

<sup>16</sup> Aji Sax ji Boroom gàngoor yi, ab àtteem  
lay fésale mággaayam,  
Yàlla ju sell ji, ag njekkam lay firndeele  
sellngaam.

<sup>17</sup> Am xar a nara fore biir dëkk bi,  
mbetem parlu,  
màngaan lekke gentub boroom alal.

<sup>18</sup> Wóoy ngalla ñiy ràngooy buum,  
di diri ñaawtéefi neen,  
ràngooy goj di diri seeni tooñ.

<sup>19</sup> Ña nga naa: «Na Aji Sax ji gaaw!  
Na baral liggéeyam, nu gis.

Na Aji Sell ju Israyil sottal mébétam,  
mu sotti, nu xam.»

<sup>20</sup> Wóoy ngalla ñiy gis lu bon, ne lu baax  
la;

gis lu baax, ne lu bon la;  
lëndëm, ñu tudde leer,  
leer, ñu tudde lëndëm;  
lu wex, ñu ne neex na  
lu neex, ñu ne wex na.

<sup>21</sup> Wóoy ngalla ñii defe ne ñoo xam,  
yaakaar ne ñoo muus.

<sup>22</sup> Wóoy ngalla ñiy jàmbari naan biiñ,  
diy ndaanaan ci njafaanu ñoll,

<sup>23</sup> di dëggal ku sikk ndax ab ger,  
tey xañ boroom njekk, ag njekkam.

<sup>24</sup> Moo tax ni boob di jeexe ci sawara,  
ngooñ xoyomoo ko cib taal,  
ni la seenub reen di seeye ni lu maxe,  
seeni tóor-tóor naaw ni pënd.

Ñoo gántal yoonu Aji Sax ji ci gàngoor yi,  
ñoo sofental kàddug Aji Sell ju Israyil.

<sup>25</sup> Moo tax merum Aji Sax ji tàkkal  
ñoñam,  
mu xàcci loxoom, duma leen,  
ba tund yi jaayu,  
seeni néew wetar ni mbalit fi mbedd yi.  
Loolu yépp taxul mu meddi,  
loxoom baa ngi mu xàcci ba tey.

<sup>26</sup> Aji Sax jeey yékkatil raaya, xeet wu  
sore,  
wal ug liit, wooye leen fa cati àddina,  
ñu jekki ne jaas, dikkal leen.

<sup>27</sup> Kenn sonnu ci, kenn téréfu ci,  
kenn dajjantul mbaa muy nelaw;  
ngañaay yolomul, waruw dàll dogul.

<sup>28</sup> Seeni fitt ñaw na,  
seen xala yépp noppi na,  
seen wewi tànk fas ni xeer.  
Bu tànk watiir ya dawee,  
nga defe ne callweer a.

<sup>29</sup> Dañuy ñar ni gaynde,  
ñarati ni gaynde gu mat;  
yëmmu, ñank um rëbbam,  
yóbbu te kenn du wallu.

<sup>30</sup> Bésub keroog ñu ñaral Yuda,  
ñar yu mel ni géej gu sàmbaraax!  
Foo geesu ci réew mi, xool,  
doo gis lu moy lëndëm ak njàqare,  
xàmbaar maase, ba leer giim.

## 6

### *Aji Sax ji setal na Esayi, yebal ko*

<sup>1</sup> At ma Buur Osiyas saayee, damaa gis  
Boroom bi toog kaw ngàngune mu kawee  
kawe, lafi mbubbam fees néeg bu sell bi.

<sup>2</sup> Ay malaakay seraf ñoo taxaw, tiim ko,  
ku ci nekk am juróom benni laaf: ñaar  
yu muur seen kanam, ñaar yu muur seeni  
tànk, ak ñaar yu ñuy naawe. <sup>3</sup> Ku ci nekk  
di àddu, naan moroom ma:

«Kee sell te sell te sell,  
keey Aji Sax ji Boroom gàngoori xare yi,  
àddina sépp a feese ag leeram!»

<sup>4</sup> Ku ci àddu, kenuy bunt yay riir,  
néeg Aji Sax ji fees ak saxar. <sup>5</sup> Ma ne:  
«Wóoy man, sànk naa! Man miy nit  
ku làmmiñam sobewu, xeetoo ci ñu seen  
làmmiñ sobewu, te samay gët tegu ci kaw  
Buur Aji Sax ji Boroom gàngoori xare yi.»

<sup>6</sup> Kenn ci malaakay seraf ya naaw wutsi ma, yor aw xal wu mu keppe ag ñiim, jële ko fa sarxalukaay ba. <sup>7</sup> Mu laalale xal wi sama gémmiñ, ne ma:

«Mu ngoog, ndegam lii laal na sa gémmiñ, sag tooñ wàcc na, sa bàkkaar faru na.»

<sup>8</sup> Ma dégg baatu Boroom bi, mu naan: «Ana ku may yebal, ana ku nuy demal boog?» Ma ne: «Xanaa man, yebal ma!»

<sup>9</sup> Mu neeti: «Demal, wax askan wii, ne leen:

“Dégluleena déglu te buleen dégg, xool-leena xool te buleen gis.”

<sup>10</sup> Nanga dërkiisal xoli askan wii, fatt seeni nopp,

taf seeni gët;

lu ko moy seeni gët gis,

seeni nopp dégg,

seen xol yég,

ñu dëpp, wér.»

<sup>11</sup> Ma ne: «Boroom bi, foo àppal loolu?» Mu ne: «Xanaa fii ba seeni dëkk gental, ba kenn dëkkatu ca, ba nit dootu nekk biir kër ya, suuf sa yàqu yaxeet, di ndànd-foyfoy. <sup>12</sup> Aji Sax jee yebal waa réew mi fu sore, tool yu bare booy. <sup>13</sup> Bu ca fukkeelu nit ña desoon, ñoom it dees na leen dellu taal. Waaye dañuy mel ni wenn ci xeeti garab yu mag yi ñuy gor, èkk ba dellu jebbi, èkku xeet wii, jiwu mu sell lay doon.»

## 7

### *Yaakaar Yàlla war na Buur Axas*

<sup>1</sup> Janti buurub Yuda, Axas doomu Yotam miy doomu Osiyas, Reccin buurub Siri moo dal ci kaw Yerusalem, ànd ak buurub Israyil, Peka doomu Remalya. Waaye manalu leen dara. <sup>2</sup> Ba ñu yégalee Buur Axas sëtub Daawuda, ak waa kërám, ne ko waa Siri, Efrayim\* lañu lëngool, mbir ma yëngal na Buur Axas ak waa réew ma, ba mel ni garabi gott bu ngelaw li gësëm.

<sup>3</sup> Aji Sax ji wax Esayi ne ko: «Génnal gaaw, dajeeek Axas, yaak sa doom Seyar Yasub, ma nga ca catal solomu mbànd ma fèete kaw, ca yoonu toolu fóotkat ya.

<sup>4</sup> Nga wax ko ne ko:

“Defal ndànk te ne cell.

Bul tiit, bul xàddi ndax merum Reccin ak Siri, ak doomu Remalya ji.

Duñu dara lu moy ñaari gil yuy saxar!

<sup>5</sup> Waa Siri ñoo ànd ak Efrayim ak doomu Remalya,

di la fexeel naan:

<sup>6</sup> ‘Nan songi Yuda,

tiital leen, nangu ko,

fal fa doomu Tabeel buur.’

<sup>7</sup> Waaye Boroom bi Aji Sax ji dafa wax ne: ‘Loolu du sotti, du am.

<sup>8</sup> Damaas a yilif Siri,

te Reccin yiliful lu moy Damaas.

Fii ak juróom benn fukki at ak juróom

Efrayim tas, ba xeet wa réer.’

<sup>9</sup> Samaree yilif Efrayim,

te doomu Remalya ji yiliful lu moy Samari.

Dungeen mana saxoo dëgër nag,

ndare ngeen sax ci Aji Sax ji.”»

### *Juddub Emanuwel firnde la*

<sup>10</sup> Aji Sax ji teg ca ne Axas: <sup>11</sup> «Ñaanal sa Yàlla Aji Sax ji firnde. Ñaan ko ko, ak fu mu mana bawoo, fa suufa suuf, mbaa fa kawa kaw.» <sup>12</sup> Axas ne: «Duma ko ñaan, ndax duma nattu Aji Sax ji.» <sup>13</sup> Esayi nag ne:

«Yeen waa kër Daawuda, dégluleen!

Tàyyiloo ngeen nit,

di tàyyiloo sama Yàlla itam.

<sup>14</sup> Kon nag Boroom bi ci boppam moo leen di jox firnde:

janq bi mooy ëmb, jur doom ju góor, tudde ko Emanuwel (mu firi Yàllaa ngeek nun).

<sup>15</sup> Soow ak lem lay lekk,

ba keroog muy mana taamu lu baax, ba lu bon.

<sup>16</sup> Bala xale bee ràññee lu baax ak lu bon, dees na gentel réew mii nga ragal seen ñaari buur.

<sup>17</sup> Aji Sax jee lay dikke,

yaak saw xeet ak sa waa kër baay,

ay bés yu tar yu masula am,

ba Efrayim dëddoo Yuda ba tey,

te buurub Asiri la koy sababe.»

<sup>18</sup> Bés sub keroog Aji Sax ji ootal weñ, ya fa catal wali ndoxi Misra,

\* **7:2** 7.2 Efrayim moo gëna yaatu ci fukki giir ya fèete woon réewum Israyil ga ca bėj-gànnar, te moo taxawe taxawaayu Israyil.

ak yamb ya fa réewum Asiri,  
<sup>19</sup> ñu dikk, bokk tagesi mbartali xunti yi,  
 ba ci xar-xari doj yi,  
 ak gajjoo gajj, ak déegoo déeg.  
<sup>20</sup> Bésub keroog saatu la Boroom biy wate,  
 te saatu ba moo di buurub Asiri,  
 mu àbbe ko ca wàllaa dex,  
 wat la nel,  
 wat say yeel,  
 xuuf sab sikkim.  
<sup>21</sup> Bésub keroog nit du fa dundle  
 lu dul wenn nag ak ñaari gàtt,  
<sup>22</sup> meew ne gàññ, ndax nit ñu néew,  
 di dunde am soow,  
 nde soow ak lem la képp ku des ci réew  
 ma di dundeji.  
<sup>23</sup> Fu junniy reseñ taxaw tey,  
 di jar junniy donji xalisu lëmm,  
 bésub keroog ay dég aki dagg nangu ko.  
<sup>24</sup> Xalaaku fitt lees fay deme,  
 ndaxi dég aki dagg yu fees réew mi.  
<sup>25</sup> Mépp mbartal mu ñu daan gàbb,  
 deesu fa demati,  
 ndax ragali dég aki dagg,  
 aw nag a cay fore,  
 am xar curpee ca.

## 8

### *Asiri workat la, matul wéeruwaay*

<sup>1</sup> Gannaaw gi Aji Sax ji ne ma: «Jëlal àlluwa ju mag, ak xalima gu jàppandi, nga bind ci lii: “Maxer Salal Xas Bas”, (mu firi Sëxëtoo këfit foqet).» <sup>2</sup> Ma wut ci seede, won àlluwa ja ñaar ñu mat seede: ñuy Uri sarxalkat ba, ak Sàkkaryaa doomu Yeberekiya. <sup>3</sup> Ba loolu weese ma jaxasoo ak sama soxna, yonent bu jigéen ba, mu ëmb, gannaaw gi mu am ca doom ju góor. Aji Sax ji ne ma: «Tudde ko “Maxer Salal Xas Bas.” <sup>4</sup> Bala xale bee man ne “Baay” mbaa “Yaay” déy, dees na yóbbul buurub Asiri alal ju ñu foqatee Damaas, ak lël ju ñu këfe Samari, nangu ko.»  
<sup>5</sup> Aji Sax ji dellu ne ma:  
<sup>6</sup> «Gannaaw askan wee teddadil ndoxum Silowe,  
 mi ci wal mu teey mi,  
 di bége Reccin ak doomu Remalya,  
<sup>7</sup> Boroom baa ngii di leen sottisi  
 dexu Efraat gi ne xéew ak dooleem,

te mooy buurub Asiri ak mboolem dara-  
 jaam.  
 Dex gi mooy génn xuram,  
 fees fépp fu dig tàkkam,  
<sup>8</sup> wal-wali jàll Yuda,  
 mbënn ma wal, taañaanaal,  
 yéeg ba tollu ko ci put,  
 firiku niy laaf ba dajal sam réew, yaw  
 Emanuwel.»  
<sup>9</sup> Yeen xeet yi, xaaculeen, dees na leen  
 rajaxe.  
 Yeen waa cati àddina, teewluleen!  
 Gañoo gañu, ñu rajaxe leen!  
 Ma ne: Gañoo gañu, ñu rajaxe leen!  
<sup>10</sup> Ngeen mébét, dara!  
 Ngeen diisoo, diisoo, tus!  
 Yàllaa ànd ak nun!

### *Aji Sax jee jara ragal*

<sup>11</sup> Aji Sax ji moo wax ak man,  
 ba mu ma nee nikk, àrtu ma,  
 ngir ma baña roy askan wii. Mu ne ma:  
<sup>12</sup> «Bul tudde wor,  
 lenn lu askan wii tudde wor;  
 lu ñu ragal it, bu ko ragal,  
 bu ko tiit.  
<sup>13</sup> Aji Sax ji Boroom gàngoor yi daal ngay  
 sellal,  
 moom ngay ragal,  
 moom ngay tiit.  
<sup>14</sup> Mu doon seen bérab bu sell,  
 di doj wuy fakktale,  
 xeer wuy féle, ci ñaari këri Israyil,  
 te dim yeer, dig fiir,  
 ñeel ku dëkk Yerusalem.  
<sup>15</sup> Ñu baree cay tërëf,  
 daanoo njaaxaanaay, damm,  
 mbaa ñu sérëx, keppu.»  
<sup>16</sup> Dencal seede bii,  
 jëlal lii ndigal, tay cib tayu,  
 dénk ko samay dongo.  
<sup>17</sup> Maa ngi séentu Aji Sax ji,  
 mu ngi won waa kër Yanqóoba gannaaw,  
 waaye maa ngi koy yaakaar.  
<sup>18</sup> Man de, maa ngii, maak xale yi ma Aji  
 Sax ji may,  
 nu diy firnde fi Israyil te diy tegtal  
 yu bàyyikoo fa Aji Sax ji Boroom  
 gàngoor yi,  
 ki dëkke tundu Siyoñ.  
<sup>19</sup> Am na ñu naan:

«Laajleen ñiy gisaanee nit ñu dee,  
ak boroom rawaan yiy kebetook a ñun-  
ñuni.

Aw xeet sañ nañoo gisaanee seeni tuur,  
tey diis ñi dee mbiri ñiy dund.»

<sup>20</sup> Kon waxleen ne leen: «Ayca, ca ndigali  
yoon ya,  
ak seedey kàdduy waxyu ya.  
Kuy wax googu kàddu, ag leer fenkalu  
la.»

<sup>21</sup> Nit ñi dinañu taxawaalu ci réew mi,  
boole njàqareek ub xiif,  
te bu ñu xiif, ñéññ,  
téen, xool kaw,  
saaga seen buur, saaga Yàlla,

<sup>22</sup> dellu xool fi suuf,  
yem ciw tiis, ak lëndëmu njàqare,  
sóoboo guddi gu fatt taraj.

<sup>23</sup> Waaye lëndëm googu du sax  
ci réew mii jàq tey.  
Démb Aji Sax ji torxal na  
réewum Sabulon ak mu Neftali,  
waaye èllëg mu teral waa foofa,  
dale ko diiwaanu tefesu géej,  
ba ca wàllaa dexu Yurdan,  
boole ca sax Galile ga ca doxandéem ya.

## 9

### *Doom juddul na nu*

<sup>1</sup> Askan wiy doxe lëndëm nii,  
ñooy gis leer gu mag.  
Ñooñu dëkke réewum ndee mu ne  
këruus,  
ñoom la leer di fenkal.

<sup>2</sup> Aji Sax ji, yaay yokk xeet wi,  
fulal leen bannex,  
ñuy bége fi sa kanam, mbégtëm ngóob,  
mel ni ñuy bannexoo fa ñuy séddoo  
alalu xare.

<sup>3</sup> Yaa leen di sippil seen sëf,  
damm bant ba ñu leen gálloon,  
ak yetu ña leen notoon,  
na nga leen defaloon rekk ca xareb Ma-  
jan.

<sup>4</sup> Mboolem dàll wu ab noon dukkate ba  
dikk,  
ak turki bu màndi deretu xare,  
sawara lees koy leel.

<sup>5</sup> Nde gonee juddu, ñeel nu,  
di doom ju góor ju ñu nu may,  
mu yenu kilifteef gi,  
ñu di ko wooye Diglekat bu yéeme bi,

ak Yàlla jàmbaar ji,  
ak Baay bi sax dàkk,  
ak Buuru jàmm bi.

<sup>6</sup> Dooley kilifteefam ak jàmm ja du am  
kemu,  
fa jalub Daawuda ak nguuram,  
ga muy samp, saxale ko njekk ak yoon,  
tey jii, ba fàww.  
Lii la Aji Sax ji Boroom gàngoor yi def ci  
xéraangeem.

### *Aji Sax ji yokk na mbugalam*

<sup>7</sup> Boroom bee yónnee kàddu  
gu dal Israyil, askanu Yanqóoba,

<sup>8</sup> xeet wépp jot ca,  
ba ca Efrayim ak waa Samari,  
ñay damook a sagu naan:

<sup>9</sup> «Ay móol màbb,  
nu yett ponkali doj, tabaxaat,  
xànqi garab yu ndaw daanoo ca,  
nu wuutal ca garabi seedar yu mag.»

<sup>10</sup> Aji Sax ji yékkati nooni Buur Reccin, fi  
seen kaw,  
gemb seeni bañ,

<sup>11</sup> Siri songe penku; Filisteen ña, sowu,  
ñu sèxëtoo Israyil, wonn.

Teewul Aji Sax ji xàcci loxoom,  
meddiwul ba tey.

<sup>12</sup> Waaye xeet wi delluwuñu ca ka leen  
duma,  
sàkkuwuñu Aji Sax ji Boroom gàngoor yi.

<sup>13</sup> Moo tax Aji Sax ji doge Israyil bopp ak  
geen,

boole tiir ak barax foom ci benn bés.  
<sup>14</sup> Mag meek kàngam li ñooy bopp bi,  
yonent bi mokkal naaféq dib geen.

<sup>15</sup> Ñi jiite askan wii ñoo leen di sànk,  
ña ñuy jiite loru.

<sup>16</sup> Moo tax Boroom bi du bége seeni xale  
yu góor,

du yërëm seeni jirim ak seeni jëtun.  
Ñoom ñépp a gëmadi, di def lu bon,  
ku ci nekk di wax lu amul bopp.

Teewul Aji Sax ji xàcci loxoom,  
meddiwul ba tey.

<sup>17</sup> Mbon a ngi tàkk moos  
ni sawara, xoyom dég aki dagg,

jafal gajji gott bi,  
mu ne jippét, saxar, naaw.

<sup>18</sup> Merum Aji Sax ji Boroom gàngoor yi taal na réew mi, xoyom waa réew mi, kenn yërëmul sa mbokk.

<sup>19</sup> Nit ñaa ngi màtte ndijoor, te doyaluñu, di xàmpe càmmon te suuruñu, ku nekk di yàpp sa mbokk:

<sup>20</sup> Manase song Efrayim, Efrayim song Manase, ñu mànkoo, noonoo Yuda.

Teewul Aji Sax ji xàcci loxoom, meddiwul ba tey.

## 10

### *Mbugal ñeel na kàngami Yuda*

<sup>1</sup> Wóoy ngalla boroom dogal yiy dogal njubadi,

bind ko, te muy jur coono,

<sup>2</sup> di ko àttee ñàkkal ku ñàkk, di xañ àq sama néew-ji-dooley ñoñ, bay lekk ab jëtun, di sèxëtoo ab jirim.

<sup>3</sup> Ana nu ngeen di def keroog bésub mbugal ba,

keroog ba safaan di bawoo fu sore?

Ana ku ngeen di daw wuti wallam?

Ana fu ngeen di denci seen teraanga?

<sup>4</sup> Xanaa ànd ak ña ñu jàpp, ne yogg; mbaa tëddandook ña ñu bóom, ne lareet.

Teewul Aji Sax ji xàcci loxoom, meddiwul ba tey.

### *Asiri muccul ci mbugal*

<sup>5</sup> Wóoy ngalla Asiri miy sama yetu mer, bolde bi ñu nàbb di samam sànj,

<sup>6</sup> ma xabtal ko fi kaw xeet wu gëmadi, yebal ko ca askan woowu ma merloo, ngir ñu sèxëtoo leen, nangu seen alal, note leen ni banu mbedd.

<sup>7</sup> Waaye Asiri gisewu ko noonu, xalaatewul noonu; bóome la xintewoo, ba fàkkas xeeti xeet.

<sup>8</sup> Mu ngi naan: «Xanaa du sama jawriñ yépp a diy buur?

<sup>9</sup> Kalne daa gën Karkemis gee ma nangu?

Am Amat daa gën Arpàdd\*?

Am Samari daa gën Damaas?

<sup>10</sup> Maa дума réew yu seeni yállantu, seeni tuur sut tuuri Yerusalem ak Samari.

<sup>11</sup> Na ma tege loxo Samari aki yállantoom, дума ni tege loxo Yerusalem aki tuuram?»

<sup>12</sup> Boroom bi nee:

«Bu ma sottalee liggéey fa kaw tundu Siyoñ ak fa Yerusalem, maay mbugale buurub Asiri réy-réyloom gi,

ak gëti xeebaateem.»

<sup>13</sup> Moom moo ne: «Sama dooley përeg laa defe lii,

maa xelu, ràññee;

ba randal kemi suufi xeet yi,

foqati seeni alal,

dañ boroom jal ya niw yëkk, wàcce leen.

<sup>14</sup> Maa teg alali xeet yi loxo,

ni ku gis am tàgg.

Maa tonneendoo réewi àddina

ni ku for ay nen, tonni lépp,

laaf tëf-tëfluwul, sàll newul ciib!»

<sup>15</sup> Sémmiñ dina diir mbagg ka koy gore?

Am dogukaay dina réy-réylu ba sut ka koy doge?

Mbete yet wuy xàcci ka ko nàbb;

mbaa bolde bu walbatiku nàbb boroom!

<sup>16</sup> Moo tax Boroom bi,

Aji Sax ji Boroom gàngoori xare yi,

di yebal woppi ràgg fi kaw mbuxreem yi, seen daraja tàkk, sawara xoyom ko.

<sup>17</sup> Aji Sax ji, leeru Israyil mooy doon sawara,

ku Sellam kooku mooy doon tàkk-tàkku sawara,

xoyom taxasi Asiri aki dégam ci benn bés.

<sup>18</sup> Gott bu naat ak tool bu meññ, mu ne faraaas foom,

ba mu mel ni ku wopp, yaram way seey,

<sup>19</sup> gott ba dese garab yu néew yu gone mana lim, bind ko.

### *Ndesu Israyil dina ñibbi*

<sup>20</sup> Keroog bés booba

li des fi Israyil ak li rëcce kër Yanqóoba duñu wéerooti ña leen дума.

Aji Sax ji lañuy wóolu, wéeroo ko,

\* **10:9** 10.9 Kalne ak Karkemis ak Amat ak Arpàdd ay dëkki Siri lañu.



Aji Sell ju Israyil.

<sup>21</sup> Aw ndes ay délsi,  
di ndesu askanu Yanqóoba,  
ñeel Yàlla Jàmbaar ji.

<sup>22</sup> Seen xeet wi ni feppi suufas géej lay  
tollu,  
te as ndes a ciy délsi.

Àtteb sànkute mooy taxaw,  
yoon toppe ba mat sèkk.

<sup>23</sup> Sànkute déy mooy taxaw,  
Boroom bi, Aji Sax ji Boroom gàngoor yi  
di ko sottal fi réew mi mépp.

<sup>24</sup> Moo tax Boroom bi,  
Aji Sax ji Boroom gàngoor yi  
dafa wax ne:

«Yeen sama ñoñ ñi dèkke Siyon,  
buleen ragal waa Asiri yi leen di dóor yet,  
nàbbal leen bolde ni waa Misra daa def  
ak yeen.

<sup>25</sup> Waaye fi leek lu néewa néew  
mbugal jeex fi seen biir,  
am sànj sippil Asiri seen sànkute.»

<sup>26</sup> Aji Sax ji Boroom gàngoor yee leen di  
nàbbal kàccri,  
na mu defoon waa Majan fa doju Oreb.  
Mooy xàcciw yetam, mu dal géej,  
na mu defoon fa Misra.

<sup>27</sup> Bésub keroog sèf bu ñu leen sèfoon  
wàcc leen,  
ngeen tàggook yet wu ñu leen tènke  
woon,  
nde seen yaram ay naat, ba yet wa damm.

### *Noon yi songsi nañu*

<sup>28</sup> Noon yeey songsi Ayat, jéggi Migron,  
dem ba Migmas, teg fa seeni jumtukaay,  
<sup>29</sup> jaare ca xunti ma  
te naan: «Geba lanuy fanaani!»  
Waa Raama tiit, waa Gibeya gu Sóol daw.

<sup>30</sup> Yeen waa Galim, yuuxuleen,  
yeen waa Laysa, dégluleen,  
yeen waa Anatot, feeluleen.

<sup>31</sup> Waa Madmena ñooy fèlxoo,  
waa Gebim wuti rawtu.

<sup>32</sup> Tey jii noon yaa ngay taxaw fa Noob,  
di sànni loxo waa tundu Siyon,  
di ko tèkkoo waa Yerusalem googu.

<sup>33</sup> Boroom baa ngoog, Aji Sax ji Boroom  
gàngoor yi,

mu ngi gor garab yi, di rajaxe car yi,  
njobbaxtal ya gëna kawé dog,  
la ca gënoona siggi, wàcc.

<sup>34</sup> Mooy jël sémmiñ, goraale gajji gott bi,  
Liban loroo loxol boroom doole, ba jóoru.

## 11

### *Daawuda am na kuutaay*

<sup>1</sup> Aw njebbit mooy saxe fa èkkub Yese\*,  
ab car soqeekee fa reen ya,

<sup>2</sup> xelum Aji Sax ji tegu fi kawam,  
xelum rafet xalaat ak ràññee,  
xelum digle ak njàmbaar,  
xelum xam Aji Sax ji, ragal ko.

<sup>3</sup> Ragal Aji Sax ji lay safoo,  
du lu ko bëtam may rekk lay àttee,  
du lu ko noppam may rekk lay dogale,  
<sup>4</sup> xanaa di àtte ku ñàkk ci njekk,  
di dogalal njub, néew-ji-dooley àddina.  
Mooy dóore àddina, bantub kàddoom,  
mooy reye ñu bon ñi, ngelawal  
gémmiñam.

<sup>5</sup> Njekk lay gaño,  
takkoo kóllère.

<sup>6</sup> Till ay bokk ak mbote ab dal,  
segg bokk akub tef ab tēraay,  
wèllu ànd ak gaynde gu mat, ak juru yar,  
tuut-tànk jiite leen.

<sup>7</sup> Nag ak rab wu aay di forandoo,  
seeni doom goorandoo,  
gaynde di lekk um ngooñ niw yèkk,

<sup>8</sup> luy nàmp di foye paxum ndox-suuf,  
perantal di laal tostanum ñàngóor.

<sup>9</sup> Deesatul gaañe mbaa di lore,  
fi mboolem sama kaw tund wu sell wi,  
ndax ni ndox di feese ba muur géej,  
ni la àddina di feese nit ñu xam Aji Sax ji.

<sup>10</sup> Bésub keroog car bawoo ca Yese, reen  
ba,

taxaw di raaya buy gindi xeet yi,  
xeet yi di ko sàkku,  
dal-lukaayam ba jagoo teddnga.

<sup>11</sup> Bésub keroog Boroom bi jooti loxoom  
ñaareel bi yoon,  
ngir jootaat ndesu ñoñam,  
wa des Asiri ak Misra, ak Pattros ak  
réewum Kuus,  
ak Elam ak Sineyaar,

\* **11:1** 11.1 Yese mooy baayu Daawuda.

ak Amat ak biir duni géej ya.  
 12 Mooy yékkatil xeet yi raaya,  
 dajale góor ña ñu dàqe Israyil,  
 ak jigéen ña ñu jële Yuda, tasaare leen,  
 ñu jóge ñeenti weti àddina, booloo.  
 13 Fiiraangey Efrayim day jeex,  
 njéefoy Yuda dakk,  
 Efrayim dootu fiire Yuda,  
 Yuda dootu jéppi Efrayim.  
 14 Xanaa ñu ne coww ba sowu,  
 ne jàyy cëppandoo  
 fa kaw waggi Filisteen ña,  
 waa penku, ñu sèxëtoondoo;  
 Edom ak Mowab, ñu teg loxo;  
 Amoneen ña nangul leen.  
 15 Aji Sax jeey wowal walum ndox,  
 ma séle géegi Misra.  
 Mooy tàllal loxoom, tiimale dexu Efraat,  
 wal kook doole,  
 dóor ko, mu séddlikoo juróom yaari wal,  
 mu jaarale ca nit ñu caraxu,  
 16 def kow yoon, ñeel ndesu ñoñam,  
 ña dese fa Asiri,  
 mu mel ni yoon wa ñeeloon Israyil,  
 bés sub keroog ba ñuy génn réewum  
 Misra.

## 12

### *Cant jib na*

1 Bés sub keroog dees na ne:  
 «Aji Sax ji, sant naa la;  
 yaa ma mere woon, meddi, dëfal ma.»  
 2 Ma ne: «Yàllaa may wallu,  
 ma dal-lu, дума tiit.  
 Sama dooleek sama kaaraange mooy Ki  
 sax,  
 di Aji Sax ji,  
 te mooy sama wall.»  
 3 Mbégte ngeen di rooteji  
 fa wali mucc ya.  
 4 Bés sub keroog ngeen ne:  
 «Santleen Aji Sax ji, tudd turam,  
 xamley jalooreem ci biir xeet yi,  
 fàttli mággaayu turam.  
 5 Woyleen Aji Sax ji,  
 moo kawey jëf!  
 Na lii siiw biir àddina sépp.  
 6 Yeen waa Siyon, serleen te sarxolleel  
 ku màgg ki fi seen biir,

Aji Sell ju Israyil.»

## Yàllaa moom xeet yi

## 13

(Saar 13—23)

### *Yéeneb waxyu dal na Babilon*

1 Yéeneb bii ñeel na Babilon\*,  
 muy peeñum Esayi doomu Amocc.  
 2 Yéegeleen ab raaya kaw tund wu ne  
 dunḡ,  
 joorleen ñii,  
 tàllal-leen loxo,  
 ñu jàlle bunti kàngam yi.  
 3 Maa jox ndigal ñi ma beral sama bopp,  
 maa woo sama jàmbaar ñiy réy-réylu,  
 ne leen ñu sottal mbugal mi samam sànj  
 laaj.  
 4 Coowal mbooloo ngoog ca tund ya,  
 mel ni ñu baree bare!  
 Riirum nguuri nguur yu daje, di xeeti  
 xeet!  
 Aji Sax ji Boroom gàngoor yi  
 mooy dajale gàngooru xare.  
 5 Mooy bawoo fu sore,  
 fa asamaan digalook suuf.  
 Aji Sax ji laak gàngoor gi muy mbugale,  
 ngir yàqtesi réew mi mépp.  
 6 Yuuxuleen! Bés sub Aji Sax ji moo  
 dëgmal,  
 te ni sànkute gu bawoo fa ci Aji Man ji lay  
 dikke.  
 7 Moo tax yoxoo yoxo yoqi, xoloo xol jeex,  
 8 ñu tiita tiit,  
 yaram di fuddook a metti,  
 ñuy baddaañu ni kuy matu;  
 ku ne jàq, di xulli sa moroom,  
 kanam ya sël-sëleendoo.  
 9 Bés sub Aji Sax jaa ngii di ñëw,  
 bés bu néeg, bés sub mer ak sànj muy  
 tàkk,  
 nara gentel suuf,  
 te bàkkaarkat ya la fay fàkkas.  
 10 Biddiiw mbaa dëllooñ dootu leeral;  
 jant ay fenke lëndëm,  
 weer dakkal leeram.  
 11 Maay delloo àddina mbonam,  
 yool ku bon tooñam,  
 maay sàggi sagub ku reew,  
 detteel puukarey ku néeg.

\* 13:1 13.1 Babilon tollu na ay jant yu mu mujj di puukarey xeet yi, ngir dooleem, te moo mujj yóbbu Yuda ngàllo.

12 Maay def nit gëna jafee gis wurus,  
ba doom aadama raw wurusu Ofir.

13 Moo tax maay gësëm asamaan,  
suuf yëngoo fa mu tege  
ndax sànjum Aji Sax ji  
Boroom gàngoori xare yi,  
keroog ba meram di tàkk.

14 Ku nekk ay fekkiy bokkam,  
rawi cam réewam,  
mbete kéwél gu ñuy rëbb,  
mbaa xar mu amul sàmm.

15 Ku ñu ci gis, jam la,  
ku ñu jàpp, saamar rey la;

16 seeni doom, ñu moxoñe fi seen kanam,  
seeni kër, ñu sëxëtoo,  
seeni jabar, ñu tédde.

17 Maa ngii di xabtal fi seen kaw waa  
Medd,

ñi xintewoowul xalis,  
faalewuñu wurus.

18 Seeni fitt lañuy rajaxee xalelu góor,  
duñu ñeewante gone,  
duñu xool tuut-tànk gëti yërmande.

19 Babilon nag, mooy gànjaru réew yi ko  
wër,

di teraanga ji Kaldeen ñiy sagoo,  
waaye Yàllaa koy tas,  
mu ne tasar ni Sodom ak Gomor.

20 Deesatu fa dëkk,  
xanaa gental ba fàww.

Màngaan dootu fa samp xayma,  
sàmm dootu fa gooral.

21 Ay rabi àll a fay goore,  
kër ya fees aki looy,

bànjóoli dëkke fa,  
kéwél di fa curpee.

22 Bukki mooy sabe fa tata ya,  
till nangu kër yu bakkane ya.

Àppu Babilon jege na, ay fanam du fi  
wees.

## 14

1 Aji Sax ji kay mooy yërëm askanu  
Yanqóoba, dellu taamu xeetu Israyil wii.  
Moo leen di sancaatal fa seen suuf,  
doxandéem yi fekki leen; boole seen  
bopp ci askanu Yanqóoba. 2 Yeneen xeet  
yeey delloo bànni Israyil ba seen réew,  
mooma Aji Sax ji séddoo, bànni Israyil  
jàpp ca ñoom njaam, góor ak jigéen, ba

tege loxo ña leen tegoon loxo, moom ña  
leen moomoon. 3 Bés bu leen Aji Sax  
ji teggilee seeni coonook seeni fitna, ba  
ngeen tàggook njaam gu metti, gi ñu leen  
doon jaamloo, 4 su boobaa nangeen woyal  
buuru Babilon léeb wii, ne ko:

«Moo nu ki daan note mujje?  
Nu mu mujjeek reewandéem?»

5 Aji Sax jee damm bant,  
bi ñu bon ñi daan dóoree!  
Moo damm seen yetu nguur,

6 wi ñu daan xadaruy dóor askan yi,  
dóor yu dakkul,

di joggatee xeet yi xol bu tàng,  
topp leen, tée ba.

7 Àddina yépp a féex, am jàmm,  
sarxolle jolleendoo.

8 Garab yi dul ruus, ak seedari Liban sax  
di bége sab jéll,

naan: “Ba nga daanoo ba tey,  
ab gorkat jógalu nu.”

9 Njaniiw ga fa suufa suuf yàkkamti na la,  
di la waaja gatandu,  
ba yeel la ndem-si-yàlla yi doon njiiti  
àddina yépp.

Moo yékkatee buuri xeet yépp seeni jal,  
10 ñoom ñépp àddu, ne la:

“Yaw it mujj nga néew doole ni nun a?  
yaak nun de a mujj yem kepp!”

11 Sa puukare gee tàbbisi nii njaniiw,  
yaak sa buumi xalam?

Ay duusu di sa laltan,  
ay sax di sa càngaay!

12 Moo yaw biddiiwu njël, bi noon ràññ,  
tey nga xàwwikoo asamaan ba fii!

Yaw mi daa daan xeet yi,  
tey ñu gor la, nga goor.

13 Xanaa du yaa doon wax ci sam xel, naa:  
“Maay yéeg kaw asamaan,

maay aj sama jal kaw biddiiwi Yàlla,  
maay toogi kaw tundu ndaje ma,  
fa catal bëj-gànnar.

14 Maay yéeg fa kaw niir ya,  
ba mel ni Yàlla Aji Kawe ji!”

15 Teewul nga tàbbi njaniiw,  
àkki ba ca xóotey pax ma.

16 Ku la gis ne la jàkk,

xel ma ne ci yaw, mu naa:

“Xanaa du kii a doon loxloo àddina,  
yëngal réewi réew,

17 def àddina wërngal këpp ndànd-foyfoy,  
tas dëkk ya,  
te du jàpp nit ba yiwi ko?”

18 Buuri àddina yépp, ba ñu daj,  
ñépp a tëdd tëraayu teraanga,  
ku ci nekk ak bàmmeelam.

19 Yaw, ñu xañ la bàmmeel, sànni la,  
nga mel ni car bu ñu foñ.

Yaa ngi ne lareet ci biir néew yu saamar  
bóom,  
ñu tàbbal leen ci xeeri biir kàmb.  
Yaa ngi mel ni médd mu ñuy joggati.

20 Deesu la robaaleek yooyu buur,  
yaa yàq sam réew,  
faagaagal saw xeet.

«Deesul tuddati mukkk askanu lorkat wii.

21 Waajal-leen fi ñuy rendi doom yi,  
feye leen seen ñaawtéefi baay,  
bala ñoo jógati, teg àddina loxo,  
ba tabax fu ne ay dëkk\*.»

22 «Maa leen di jógal.»

Kàddug Aji Sax jee, Boroom gàngoor yi.  
Mu ne: «Maay tenqi turu Babilon, tenqim  
ndesam

ba ca seeni doom ak seen askan.»  
Kàddug Aji Sax jee.

23 Mu ne: «Maa koy def kërug siññéel,  
def ko ab tan,  
ba buube ko buubub rajaxe.»  
Kàddug Aji Sax jee, Boroom gàngoor yi.

### *Mbugal ñeel na Asiri*

24 Aji Sax ji Boroom gàngoor yee giñ ne:  
«Lu ma nar déy mooy am,  
lii ma mébét, mooy sotti.

25 Maay joggati Asiri fi samam réew,  
dëggaate leen fi sama kaw tund yi,  
ba sama ràngi ñoñ rengiku,  
seenub sëf sippiku.»

26 Mii mébét lañu mébétaal àddina sépp,  
bii loxo lañu xàccil xeet yépp.

27 Bu Aji Sax ji Boroom gàngoori xare yi  
dogalee déy,  
ana ku koy dogale?  
Bu xàccee loxoom,  
ana ku koy fommal?

### *Ab yéeneb waxyu ñeel na Filisti*

28 At ma Buur Axas saayee,  
bii yéene jib na:

29 Filistee, seen yetu gannaaw wi damm,  
bu ko kenn ci yeen bége,  
nde ci èkku jaan ji, la ñàngóor di génne,  
am tostanam mujj di céebi.

30 Su boobaa ñi gëna walaakaana am lu  
ñu for,

néew-doole ya goor, ànd ak dal.  
Waaye yeen, maa leen di xiifal, ngeen dee

ba raaf,  
xiif ba fàkkas ñi ngeen dese.

31 Yeen magi pénc mi, ñaawluleen!

Yeen waa dëkk bee, yuuxuleen!

Na Filisti gépp ne yàcc!

Bëj-gànnaar déy la saxar jollee,  
kenn du wuute gàngooru noon ya.

32 Lees di tontu xeet wi yónnee di laaj,  
xanaa ne leen Aji Sax jee sanc Siyon,  
te fa la baadooloy ñoñam di rawe.

## 15

### *Ab yéeneb waxyu ñeel na Mowab*

1 Yéene bii ñeel na Mowab:

Genn guddi déy la Ar Mowab, dëkk ba tas,  
ne mes!

Genn guddi déy la Kir Mowab tas, ne mes!

2 Nit ñaa ngi yéeg jëm kërug jaamookaay  
ga ca Dibon,

ngir jooyi ca bérabi jaamookaay ya,  
Mowab a ngay yuuxoo kaw tundu Nebo  
ak Medeba,

boppoo bopp dib nel,  
sikkimoo sikkim xuufu,

3 nit ña sol saaku, di ñaawlu fa mbedd ya,  
ak kaw taax yaak pénc ya,  
ku ne di jooy ba say rongooñ wale.

4 Waa Esbon ak Elalee ngi yuuxu,  
seen baat àkki ba Yaxacc,  
xarekati Mowab dégg ca, yuuxoo,  
ne yàcc ne yasar!

5 Maay jooy Mowab jooyi xol,  
nit ñaa nga fay dawé ba Sowar,  
àkki ba Eglat Selisiya.

Ña ngay yéeg jëm Luwit, di jooyoo,  
awe yoonu Oronayim, di jalu.

6 Dexu Nimrim wow na,  
ñax wow, gàncax lax,

\* 14:21 14.21 Manees na koo tekkee nii it: bay feesal suuf aku ay.

dara naatatul.

<sup>7</sup> Jël nañu lu ñu deseek lu ñu dencoon,  
yóbbu, jàll ca wàllaa xuru Garab ya.

<sup>8</sup> Yuux déy maase na réewum Mowab,  
jooyoo ya ba Eglayim,  
jooyoo ya ba Beer Elim.

<sup>9</sup> Dexu Dimon déy fees na ak deret,  
te ma nara wàcceel Dimon lu ko raw,  
ba ku rëcce Mowab,  
ak ku des ci réew mi, ma booleek gaynde!

## 16

<sup>1</sup> Waa Mowab a nga naa:

«Yónneeleen boroom réew mi yóbbalu  
kuuy yu ndaw,  
jële ko Sela, jaare màndiñ ma,  
yóti ko buurub Yuda fa tundu Siyon mu  
taaru.»

<sup>2</sup> Jigéeni Mowab a nga ca jéggikaayu  
dexu Arnon,  
mel ni picc yu tasaaroo fa seeni tàgg,  
di fët-fëtluy, naaw.

<sup>3</sup> Ña nga naa njiiti Yuda:  
«Xelal-leen nu, àtte nu,  
lalal nu bëccëg ndarakàmm ker gu mel ni  
guddi,  
yiire ko daw-làqu, yi nu doon;  
buleen nu wor te nuy wuta raw!

<sup>4</sup> Mayleen nu nun ñi rëcce Mowab, nu dal  
ak yeen,  
te ngeen làq nu bóomkat.»

Kiy note déy day jeexal, sëxëtoo dakk,  
kiy lore ci réew mi jóge fi,

<sup>5</sup> ab jal sampe fi ci ngor,  
ki ci tooge jikko ju dëggu di askanu  
Daawuda  
te di njiit luy sàkku yoon, yàkkamti njekk.

<sup>6</sup> Noo dégg ni Mowab réye,  
réya réy, reew te bew,  
seeni kañu di waxi neen.

<sup>7</sup> Moo tax Mowab di jooy ba ñéppi Mowab  
jooyoo,  
ndax namm reseñ ja woon ca Kir Eres,  
ba ne yàcc, di binni.

<sup>8</sup> Tool ya fa Esbon day wow,  
njiiti xeet yee dëggaate ngëneelu reseñ  
gu Sibma,  
te cabb ya laloon ba Yaser,  
ba àkki déndu màndiñ ma,

car ya law ba wàllaa géej.

<sup>9</sup> Jooyi waa Yaser laay jooy reseñ ga fa  
Sibma,  
yeen waa Esbon ak Elale, ma sange leeni  
rongooñ,  
nde fa ngeen di dajaleek fa ngeen di  
góobe,  
coowal mbégtee fay dakke.

<sup>10</sup> Mbégteek bânneex ay toxoo seeni tool,  
ay woy aki sarxolle noppee jibe seeni  
tóokër,  
te nalkatu reseñ naltil fa mbànd ya!  
Aji Sax jee dakkal coow li.

<sup>11</sup> Maa ngi yërëm Mowab, bay binni ni  
buumu riiti,  
sama yaram daw ci Kir Eres.

<sup>12</sup> Mowab a ngoog ak coonoom,  
ba muy deme fa bérab yu kawé ya,  
dugg jaamookaayam di ñaan te du am.

<sup>13</sup> Lii la Aji Sax ji waxoon bu yàgg ci  
mbirum Mowab,

<sup>14</sup> tey Aji Sax ji wax ne:  
«Fileek ñetti at yu surga bu ñu bind  
waññ,  
dees na sàggi sagub Mowab,  
te li ñuy bare tey lépp,  
seenum ndes ay néew lool te tekkeedi.»

## 17

### *Ab yéeneb waxyu ñeel na péeyub Siri*

<sup>1</sup> Yéene bii ñeel na Damaas\*:  
Damaas a ngii, léegi mu noppee doon ab  
dëkk,

xanaa ab jalu tojit;  
<sup>2</sup> dëkki Arower gental,  
gàtt yi jagoo,  
goore fa, kenn du leen dàq.

<sup>3</sup> Tata dina tukkee diiwaanu Efrayim,  
nguur foqe dëkk ba ñuy wooye Damaas,  
te ndesu Siri du ëpp bànni Israyil daraja.  
Kàddug Aji Sax jee, Boroom gàngoori  
xare yi.

<sup>4</sup> Bésuub keroog sagub Yanqóoba sàggiku,  
yaram wa réer ko, mu jeex tàkk.

<sup>5</sup> Day mel nim ngóob  
mu loxol góobkat bay dal, di dajale gub  
ya.

Day mel ni ngóob ma ca xuru Refayeen,

\* **17:1** 17.1 Damaas mooy péeyub Siri.

6 fa dara dul des lu moy am poraat;  
mu mel ni wittum oliw,  
bu noppee ñaari doom ak ñett ay des ca  
kaw,  
mbaa ñeent ba juróom ci car yi meññ.  
Kàddug Aji Sax jee, Yàllay Israyil.

7 Bés sub keroog nit sàkku Ki ko sàkk,  
ba ne jàkk Aji Sell ju Israyil.

8 Dootu sàkkooti lenn ci sarxalukaay  
yi mu sàkkal boppam.  
Dootu sàkkooti yooyu mu defare loxoom,  
du xer yi ñuy jaamoo Asera,  
du yeneen sarxalukaayi cuuraay.

9 Bés sub keroog seen dëkk yi tata wër,  
dees na leen won gannaaw  
ni dëkki Eween ñaak Amoreen ña†,  
ba leen bànni Israyil dàqee,  
lépp ay doon ab gent.

10 Yeena fàtte Yàlla ji leen di musal,  
bawuleen xel seen cëslaay jiy seen rawtu,  
xanaa di jëmbatal seeni tuur ay tooli  
ngëneel,  
di ji jiwu mu bawoo feneen.

11 Bés ba ngeen ko jëmbatee, ngeen gis  
mu sax,  
ëllëg ba bët setee, mu tóor,  
te ngóob réer bés sub wopp,  
ci biir mitit wu amul paj.

12 Ndeysaan, mii riirum gàngoor yu mag!  
Xeet yu bareey riir ni riirum gééj,  
ànd ñarandoo ni gééj gu sàmbaraax,  
gannax ya ñarandoo.

13 Xeet yaa ngi ñarandoo  
ni ndox mu baawaan,  
Yàlla gëdd leen, ñu daw ba sore;  
ngelaw yëngu, ñu naaw,  
ni boob, ba ca kaw tund ya,  
mbete pënd bu ngélén wal, mu def call-  
weer.

14 Ngoon a ngay jot, tiitaange ne jaas,  
balaa bët a set lépp jeex.  
Lii mooy añub ñuy sèxëtoo,  
lii mooy deminu ñiy nangu sunu alal.

## 18

### *Waxyu jib na, ñeel réewum Kuus*

† 17:9 17.9 Mbaa: ni gott yaak njobbaxtali tund ya,

1 Wóoy ngalla réew ma gunóor yay riire,  
ca tàkkal dexi réewum Kuus.

2 Yeen ñiy yónni biir gééj, ay ndaw,  
ci gaali barax yu war mbeex mi;  
yeen ndaw yu gaaw yi, demleen,  
fekki xeet wu siggi, rattax yaram,  
askan wu ñu ragale fu jegeek fu sore,  
xeet wu am doole, di falaxee,  
te seenum réew defi wal.

3 Yeen waa àddina wërngal këpp,  
yeen ñi dëkke suuf si,  
séentuleen raaya ba sampe fa tund ya,  
dégluleen liit ga ñuy wali.

4 Aji Sax ji kat da maa wax ne:  
«Maa ngi fi ma tollu di xool, ne tekk,  
ni tangooru jant bu ne ràññ,  
mbaa lay bu defu niir ci tangooru  
ngóob.»

5 Bala ngóob di jot, te fekk lépp tóor,  
ba tóor-tóor def reseñ ju xaay,  
mu jël ab sàrt, dog car yu ndaw yi,  
tenqi car yu mag ya, sànni;

6 ñu boole waccal njanaawi tund ya  
ak rabi àll yi,  
tan yi nawetoo ko,  
rabi àll yépp nooroo ko.

7 Su boobaa ñu indil Aji Sax ji Boroom  
gàngoor yi,  
galag bu bawoo ci xeet wu siggi,  
rattax yaram,

askan wu ñu ragale fu jegeek fu sore,  
xeet wu am doole, di falaxee,  
te seenum réew defi wal,  
galag ba agsi ba tundu Siyon,  
fa Aji Sax ji Boroom gàngoori xare yi dëel  
turam.

## 19

### *Ab yéneeb waxyu ñeel na Misra*

1 Yéene bii ñeel na Misra:  
Aji Sax jaa ngii war niir wu gaaw,  
jëm réewum Misra.  
Yàllantuy Misra yég ko, di lox,  
fitu waa Misra rëcc.

2 Maay xiir Misra ci kaw Misra,  
kii song mbokkam, kii song xaritam,  
ab dëkk jógal ab dëkk, diiwaan jógal  
diiwaan.

3 Waa Misra jànnaxe,

ma dëpp seen pexe.

Ñu seeti yállantu yeek njuuma yi,  
ak gisaanekat yeek boroom rawaan yi.

<sup>4</sup> Maay teg Misra ci loxol sang bu néeg,  
buur bu dëgër xol jiite ko.  
Kàddug Boroom bee, Aji Sax ji ci gàngoor  
yi.

<sup>5</sup> Ndoxum Niil ma day fer;  
dex gaay ñiis, wow koŋŋ,

<sup>6</sup> solom ya xasaw,  
wali Misra diib ba far ñiis,  
barax ak lu mu xeetool lax,

<sup>7</sup> gàncax ga leru dexu Niil  
ak ga saxe fa dex ga dabe géej,  
ak lu ñu jiwoon ca wet ga,  
lépp ay wow, naaw, ba jeex.

<sup>8</sup> Nappkat di jàmbat,  
kuy sànnib oos dexu Niil di jooy,  
kuy mbaal waaru,

<sup>9</sup> kuy liggéey lée am mbetteel,  
kuy jàrt ak a ràbb poqe jommi.

<sup>10</sup> Ñi yor réew mi dañuy sèngéem,  
kuy liggéey di feyu am naqaru xol.

<sup>11</sup> Kàngam ya fa Cowan\* dañuy teqlikook  
seen sago,  
diglekati Firawna yu xelu ya di digle ag  
ndof.

Ma ne: «Yeen diglekat yi, nu ngeen mana  
waxe Firawna naan:  
“Nun ay boroom xel lanu,  
sosoo ca buur ya woon?”»

<sup>12</sup> Firawnaa, ana say boroom xel?  
Nañ la waxal boog, ba xamle  
li Aji Sax ji Boroom gàngoor yi naral  
Misra.

<sup>13</sup> Kàngami Cowan a ngi def yëfi dof,  
kàngam ya fa Memfis, ñu nax leen,  
te njiiti giiri Misra lajjal seen waa réew.

<sup>14</sup> Aji Sax jee miirloo Misra,  
gëlèmal ko ci lépp lu muy def,  
ni màndikat buy jang ba tarxiis cim  
waccoom.

<sup>15</sup> Du lènn lu kenn manatee defal Misra,  
bopp akub geen du ci am pexe,  
te bantub tiir ak barax a ci yem.

### *Lu jëm ci muju Misra*

<sup>16</sup> Su bés baa waa Misra mel niy jigéen,

\* **19:11** 19.11 Cowan ak Memfis ay dëkki Misra lañu.

di lox ndax tiit loxo bi jóg,  
te Aji Sax ji Boroom gàngoor yi xàccil-  
leen ko.

<sup>17</sup> Yuday doon tiitaangey waa Misra,  
ba ku ñu ci tudd Yuda, nga tiit,  
ngir la leen Aji Sax ji Boroom gàngoor yi  
naral.

<sup>18</sup> Su keroogee mu am juróomi dëkki  
réewum Misra  
yu nit ñay waxe làmmiñu ebrë,  
di fa giñe Aji Sax ji Boroom gàngoor yi,  
benn dëkk ba lañuy wooye Ir Ayeres,  
dëkkub yàqute.

<sup>19</sup> Bés sub keroog ab sarxalukaay ñeel Aji  
Sax ji,

fa digg réewum Misra,  
aw xer it ñeel Aji Sax ji fa kemu réew ma,

<sup>20</sup> loolu di firnde, ñeel Aji Sax ji Boroom  
gàngoor yi,

di lu ko seedeel fa biir réewum Misra.  
Bu ñu leen sonalee ba ñu woo Aji Sax ji,  
mu yónnee leen ku leen wallu,  
taxawu leen ba xettli leen.

<sup>21</sup> Bés sub keroog Aji Sax ji ci boppam mooy  
xamal Misra mooy kan,

ba waa Misra xam Aji Sax ji,  
di jaamoo Aji Sax ji saraxi gàtt ak saraxi  
pepp,

digook moom tey wàccook seeni dige.

<sup>22</sup> Aji Sax jee yuma Misra

duma yu ànd akum paj,  
ñu walbatiku ci Aji Sax ji,  
mu nangul leen, faj leen.

<sup>23</sup> Su keroogee mbedd bawoo Misra ba  
Asiri,

waa Asiri di dikk ba Misra,  
waa Misra di dem ba Asiri  
te Misra di jaamoondook Asiri.

<sup>24</sup> Bés sub keroog Israyil ñetteel Misraak  
Asiri,

di barke fi digg àddina.

<sup>25</sup> Aji Sax ji barkeel leen, ne:

«Barke ñeel na Misra, sama ñoñ,  
ak Asiri mi ma sàkke samay loxo,  
ak Israyil sama séddoo.»

## 20

### *Kàddug waxyu ñeel na Misra ak Kuus*

<sup>1</sup> At ma bummib Asiri demee ca ndigalal  
Sargon buurub Asiri, ba songi dëkk ba

ñuy wax Asdodd ca Filisti, ba mujj ko nangu, <sup>2</sup> fekk na Aji Sax ji wax, Esayi doomu Amocc jottli. Mu ne ko: «Demal summi tubéyu saaku ji nga sol, te summi say dàll.» Mu def noona, di doxe yaramu neen, tànkì neen. <sup>3</sup> Gannaaw gi Aji Sax ji ne: «Esayi sama jaam bi def na yaramu neen, tànkì neen lu mat ñetti at, muy firnde, di tegtal ci mbirum Misra ak réewum Kuus. <sup>4</sup> Te noonu la buurub Asiri di yóbbóo ngállo Misra, toxal waa Kuus, ñuy ay ndaw aki màggat. Yaramu neen, tànkì neen lañuy def, seen taat ne fàññ, muy gâceeg Misra. <sup>5</sup> Dañuy boole njàqareek gâce ndax réewum Kuus mi ñu yaakaaroon, ak Misra gi ñu doon sagoo.» <sup>6</sup> Bu keroogee ku dèkke tefes googu dina ne: «Xanaa kay du ñii lanu yaakaaroon! Te nu dawoon di wuti ndimbal ci ñoom, ngir rëcc buurub Asiri! Léegi nag nu nuy mucce?»

## 21

### *Ab yéeneb waxyu ñeel na Babilon*

<sup>1</sup> Yéene bii moo wàccal màndiñ ma feg-gook géej ga:

Ni ag ngélén di riddee jaare Negew ni la noon di bawoo màndiñ ma, jóge réew mu raglu.

<sup>2</sup> Peeñu mu ñàng lañu ma ci wax. Workat biy wor, yàqkat biy yàq.

Yeen waa Elam\*, songleen; yeen waa Medd, gawleen leen.

Dakkal naa mboolem onk yu ñu sabab.

<sup>3</sup> Lii a waral sama njàqareg xol, mitit jàpp ma, mel ni mititu mat, ma jaaxle ba déggatuma, jàq ba gisatuma.

<sup>4</sup> Bopp ubu, tiitaange jàpp ma; sama ngoonug bannex soppiku guddi gu raglu.

<sup>5</sup> Ndab taaje, laltan lale, ñuy lekk ak a naan.

Ñu jekki ne: «Yeen kilifa yi, jógleen! Diwleen pakk yi!»

\* **21:2** 21.2 Elam am réew la mu bokkoon ci nguurg Pers, te di ab diiwaan ci réewum Iraan mu jamonoy tey.

† **21:11** 21.11 Duuma ci Arabi la féete, feggook Seyir mbaa Edom. Baat la itam buy tekki selaw, ci làkku yawut.

‡ **21:13** 21.13 Dedan ak Teman ak Kedar ay xur la yu waa Arabi dèkke.

<sup>6</sup> Boroom bi kat da maa wax, ne ma: «Doxal taxawal ab jongrukat, lu mu gis, wax ko.

<sup>7</sup> Bu gisee gawar ci watiiru ñaari fas, ak ñu wari mbaam ak ñu wari giléem, na teewloo teewlu bu baax.»

<sup>8</sup> Jongrukat ba àddu ca kaw ne: «Sang bi, maa ngii yendoo séentu, fanaane wattu fii ma taxaw.

<sup>9</sup> Ma ne gawar a ngii, war watiiru ñaari fas. Nee: “Daanu nañoo, Babilon daanu na, jëmme tuuram yépp tasaaroo fi suuf!”»

<sup>10</sup> Yeen bokk yi ñu bàcc ni pepp ca sama dàgga ja, la ma dégge ci Aji Sax ji Yállay Israyil Boroom gàngoor yi, wax naa leen ko.

### *Ab yéeneb waxyu ñeel na Duuma*

<sup>11</sup> Yéene bii moo wàccal Duuma†: Nit a ngi may wooye tundu Seyir, naan: Jongrukat bi, lu des ci guddi gi?

Éy jongrukat bi, lu desati ci guddi gi?

<sup>12</sup> Jongrukat bi ne:

«Bèt set, mu guddeeti rekk, Boo amee looy laaj, délsil laajaat ko.»

### *Ab yéeneb waxyu ñeel na Arabi*

<sup>13</sup> Yéene bii moo wàccal Arabi: yeen cèggi askanu Dedan‡, mbooyum Arabi ngeen di fanaane.

<sup>14</sup> Yeen waa Tema, dajejileen ak ña mar, yóbbul leen am ndox.

Dogileen ñay daw, may leen ñu lekk.

<sup>15</sup> Ay saamar de lañuy daw; saamar bu ñu leen xàccil ak fitt gu ñu leen diir ak tàngooru xare.

<sup>16</sup> Aji Sax ji de da maa wax ne ma: «Fileek menn at mu surga bu ñu bind waññ, sagub dèkk bii di Kedar dina sàggiku, <sup>17</sup> li des ci jàmbaraari fittkati Kedar di lu néew.» Aji Sax ji Yállay Israyil wax na ko.

## 22

### *Ab yéeneb waxyu ñeel na Yerusalem*



<sup>1</sup> Yéene bii ñeel na xuru Peeñu ma:  
Ana lu ngeen di yéége,  
yeen ñépp seen kawi taax?

<sup>2</sup> Lu waral coow li ak xaxaloo bi,  
ba dëkk biy riir?

Ñi ngeen deele, saamar reyu leen,  
bóomuñu leen ci xare.

<sup>3</sup> Seen njiiti xare yépp a bokk daw,  
ñu jàpp leen te taluñoó fitte.

Seen njiit yi ñu gis yépp lañu jàpp,  
te ñu dawoon ba sore.

<sup>4</sup> Moo ma tax ne: «Buleen ma xool,  
damay naqarlu, jooy.

Tàyyileen maa dëfal ci sama bokk yi  
sàñku.»

<sup>5</sup> Lii kat bésuub njommite laak coonook  
toroxte,

bésu Boroom bi Aji Sax ji ci gàngoor yi,  
ci biir xuru Peeñu mi.

Tata ja, ñu rëkka rëkk, mu màbb,  
yuux jolli, àkki tund ya.

<sup>6</sup> Waa Elam gállooy fitt,  
ñenn ña war watiir, gawar ya war,  
waa Kir nàbb pakk ya.

<sup>7</sup> Seen xur yu nangu yaa fees aki watiir,  
gawar taxaw temm buntu Yerusalem,

<sup>8</sup> te Yuda ne duññ, dara wëru ko.

Su keroogee ngeen yaakaar ngàñaay,  
ya ca kër ga ñuy wooye Gott ba,

<sup>9</sup> far gis ni ñu bëtt-bëttee tatay  
Yerusalem,

ji wër gox bi ñu naan Kër Daawuda.  
Ngeen rooti ndox ca solom bu suufe ba,  
denc ko,

<sup>10</sup> boole ca waññ këri Yerusalem,  
màbb lenn, sàkk ca lu ngeen aare tata ya.

<sup>11</sup> Da leen di fekk sàkk mbànd diggante  
ñaari tata yi,

ngir denc ca ndoxum déeg bu yàgg ba.  
Waaye xooluleen ki dogal lii,  
xalaatuleen ki nasoon lii bu yàgg.

<sup>12</sup> Bésuub keroog Boroom bi,  
Aji Sax ji ci gàngoor yi moo leen di  
woo

ci jooyoo ak ñaawlu  
ak wateefu nel, ak colu saaku ngir  
ñaawlu.

<sup>13</sup> Te yeena ngii ci mbég ak bânneex,

di rendi nag ak xar,  
di yàpp ak a naan,  
naan: «Nan lekk, naan, nde ëllëg, nu  
dee!»

<sup>14</sup> Aji Sax ji Boroom gàngoor yi dégtal na  
ma lii:

«Gii ñaawtéef déy deesu leen ko jéggal,  
ba keroog ngeen di dee.»

Boroom bee ko giñ,  
moom Aji Sax ji Boroom gàngoor yi.

### *Kàddug àrtu ñeel na Sebna*

<sup>15</sup> Boroom bi Aji Sax ji ci gàngoor yi dafa  
wax ne:

«Ayca, demal ba ca Sebna,  
bëkk-néegu buur sii, nga ne ko:

<sup>16</sup> Ana loo fi am, ak koo fi am?  
Nga di fi yettlu bàmmeel, yett ko ca kawte  
ya,

di gaslu kër gooy mujje?

<sup>17</sup> Jàmbaar, dama ne Aji Sax jee lay xalab;  
da la naa nikk,

<sup>18</sup> fodonk la, rattax,  
nga xalangoo àll bu ne màww.

Fa ngay dee,  
te fa la watiir yi ngay puukarewoo di des,  
muy sa gâceey waa kër sang.»

<sup>19</sup> Aji Sax ji nee: «Maa lay jële sa liggéey,  
foqatee la sa péete mu kawee.

<sup>20</sup> «Bésuub keroog ma woo sama jaam  
bi, Elyakim doomu Ilkiya, <sup>21</sup> solal ko  
sa mbubb, dooleele ko sa ngañaay, teg  
kilifteefu réew mi ci loxoom, ba mu  
féete wàllu baay, waa Yerusalem, ak waa  
kër Yuda. <sup>22</sup> Maa koy ràng caabiy kër  
Daawuda, muy ubbi te kenn du tēj; di  
tēj te kenn du ubbi. <sup>23</sup> Maa koy samp fu  
dégër ni ab wékkukaay, mu doon sagu  
kër baayam. <sup>24</sup> Waa kër baayam ak seen  
daraja, ñépp ay wékku ci moom, car yaak  
carat ya. Ndab yu ndaw yépp ca la,  
kopp ya ba ca njaq ya. <sup>25</sup> Bésuub keroog,»  
kàddug Aji Sax jee, Boroom gàngoor yi,  
mu ne: «bant ba sampe woon fu wóor  
day simpiku. Dees koy gor, mu fàq, la ca  
sëfe woon dog.» Aji Sax ji déy wax na ko.

## 23

### *Ab yéeneb waxyu ñeel na Tir*

\* **23:1** 23.1Tir ak Sidonay dëkk yu am solo la woon ca Fenisi, ci réew mi ñuy wax Liban tey.

1 Yéene bii ñeel na dëkk ba ñuy wax Tir\*:

Yeen waa gaali Tarsis ñi deele, jooyleen!  
Lépp a yàqu!

Du kër, du teeruwaay.

Fa dunu Sippar† lañu leen ko waxe.

2 Yeen waa tefes,  
yaw Sidon laa ne, na say jula ñaawlu,  
yaw miy yónni nit ñu jaare géej,

3 war ndox ya ne xéew,  
peppum Sixor‡ di sa tono,  
ak ngóobum Niil,  
ma xeet yi daan jula.

4 Yaw Sidon, gacce ñeel na la,  
géej moo wax, tatay géej a ne:  
«Masumaa matu, masumaa jur,  
yaruma gone gu góor, yarumab janq.»

5 Bu xibaar ba àggee Misra de,  
ñu naqarlu deminu Tir.

6 Jállal ba Tarsis§,  
yeen waa tefes ga fa ne, jooyleen jooyi dëj.

7 Xanaa lii du seen dëkk bu xumb ba,  
te cosaanam di janti démb,  
nit ña di fa jógey sancaani fu sore?

8 Ana ku fexeel lii Tir ma daan fale,  
ay julaam diy kàngam,  
di jaaykat yi àddina teral?

9 Aji Sax ji Boroom gàngoor yee ko fexe,  
ngir sàggi sagub képp ku fiy damu,  
ba teddadil képp ku àddina teral.

10 Yeen waa Tir, defleen ni dexu Niil, walal  
seen réew;  
kenn tereetu leen.

11 Aji Sax ji tàllal na loxoom, tiimale géej,  
yèngal réew yi,  
ba santaane ñu màbb tatay Kanaan.

12 Nee yeen waa Sidon ñi mel ni janq bu  
ñu tédde,  
dootuleen xaxaloo.

Ayca, dawleen jàlli ba dunu Sippar,  
te du tax ngeen am fa noflaay.

13 Xool-leen li dal réewum Kaldeen ñi.  
Dootuñu sax aw xeet.

Asiri wacce na leen rabi màndiñ mi.  
Tabax nañu, gaw ko, màbb kèri buur ya,  
gental ko.

14 Yeen boroom gaali Tarsis, yuuxuleen ni  
ñu deele,  
seen tata màbb na!

15 Bu keroogee ñu fàtte Tir juróom ñaar  
fukki at, ni àppu benn buur. Bu juróom  
ñaar fukki at yi matee, Tir xewle la ñu  
woyal gànc ba, ne ko:

16 «Yaw gànc bi ñu wacc, fabal sa xalam,  
wër dëkk bi,  
xalamala xalam te gëna woy,  
ndax ñu geesu la.»

17 Bu juróom ñaar fukki at yi matee,  
Aji Sax ji dikkal Tir, ñu delluy liggéey, di  
feyu, di gànctook mboolem réewi àddina  
fi kaw suuf 18 Waaye seen ñaq ak seen  
peyoor, dees koy sellalal Aji Sax ji, deesu  
ko dajaleek a denc. Ñi dëkk fi kanam  
Aji Sax jeey jagoo njariñ la, mu di leen  
dundal ba ñu regg, di leen solal col gu  
jekk.

## Waxyu ñeel na mujug jamoto

### 24

(Saar 24—27)

*Mbugal daj na àddina*

1 Aji Sax jaa ngii di tas àddina,  
tasaare ko,  
salfaañe li fi dénd bi,  
wasaare ñi ko dëkke:

2 sarxalkat beek baadoolo bi,  
sang akub jaam,  
njaatige lu jigéen ak ab janqam,  
jaaykat ak jëndkat,  
ablekat ak àbbkat,  
leblekat ak lebkat.

3 Àddinaa ne dunñ dunñaaral,  
dees koo futti ba mu ne furaas!  
Aji Sax ji kat wax na kàddu gii!

4 Suuf a ngi wowa wow, ne seren,  
àddina ne làcc, ne seren,  
kàngami xeeti àddina ne làcc.

5 Suuf si la ñi ko dëkke sobeel,  
ñoo wàcc yoon yi,  
xëtt ndigal,  
fecci kóllère gi sax dàkk.

6 Moo tax alkànde yàq suuf,  
ñi ko dëkke gàddu àq ji.  
Moo tax waa àddina raaf,  
ba ñi des di lu néew.

7 Biiñ ñàkk na,  
garabu reseñ lax,

† 23:1 23.1 Mbaa: dunu Kitim. ‡ 23:3 23.3 Mooy dexu Niil. § 23:6 23.6 Ab sanc la bu bokkoon ci Tir, ca wàllu Espaañ.

bépp xol bu tooyoon, binni.

<sup>8</sup> Tabala ju xumb selaw na,  
ña daa xaxaloo dal,  
mbégtém buumi xalam dakk.

<sup>9</sup> Kenn naanatul, di woy,  
ñoll wex na ka koy naan.

<sup>10</sup> Dëkk bu gentál tasaaroo na,  
kër yépp tëje, kenn duggul.

<sup>11</sup> Mbedd maa ngi soowaloo,  
ndax biiñ bu ñàkk,  
gépp mbégte fey,  
bànnéexu àddina dëddu.

<sup>12</sup> Tojiti neen a des ci dëkk bi,  
bunt ba rajaxoo.

<sup>13</sup> Noonu lay deme ci àddina,  
ci biir xeet yi,  
mbete benn-benni doomi oliw gu ñu  
gësëm,  
mbaa doomi reseñ yu des ca ndey ja,  
gannaaw bu ñu wittee ba sottal.

#### *Ndes wi rëcc mbugal a ngi sant*

<sup>14</sup> Ña ngay xaacu di sarxolle,  
waa sowu di sàbbaal ci màggug Aji Sax  
ji.

<sup>15</sup> Yeen waa penku, sargal-leen Aji Sax ji  
boog,  
yeen waa duni géej, teral-leen Aji Sax ji  
Yállay Israyil.

<sup>16</sup> Cati àddina lay woy di jibe, nu dégg ñu  
naa:  
«Teddnga ñeel na Aji Jub ji!»

#### *Coono jeexul*

Waaye man dama ne: «Jeexle naa!  
Jeexle naa, wóoy man!

Workat yaa ngi wora wor,  
ba far làggi ci wor.»

<sup>17</sup> Yeen waa àddina,  
kat-kat, pax akub caax dëgmál na leen.

<sup>18</sup> Nga déggi yuux, daw,  
tàbbi biir pax,

génne pax,  
laawoob caax.  
Mbàndi kaw kat ubbi na,  
kenug àddina di reng-rengi.

<sup>19</sup> Suuf daa loroo loru,  
fetta fett,  
salfaañoo salfaañu.

<sup>20</sup> Suuf a ngi janga jang ni màndikat,  
ba joy ni mbaar,  
moyam diis ko gann,  
mu daanu te du jógati.

#### *Aji Sax jeey nguuru fa Siyon*

<sup>21</sup> Bu bésub keroogee  
Aji Sax ji dikke mbugal  
gàngoor ya fa kawa kaw,  
ak buuri àddina yi fi suuf.

<sup>22</sup> Dees leen di boole denc cim pax,  
ne leen ràpp tëj,  
ba mu am ay fani fan, ñu mbugal leen.

<sup>23</sup> Kersa la weer wiy am,  
gacce ñeel jant bi;  
Aji Sax ji Boroom gàngoor yi daal,  
mooy nguuru Yerusalem, kaw tundu  
Siyon,  
leeram ga jollee fa kanam magi ñoñam.

## 25

#### *Cant jib na*

<sup>1</sup> Aji Sax ji, yaay sama Yàlla,  
dama lay teral, di la sant.  
Yaa defi jaloore,  
muy dogal yu yàgg, wér te wóor.

<sup>2</sup> Yaa def dëkk bi jali doj,  
dëkk bii ñu dàbbli nga gentál;  
taaxu doxandéem yi noppee doon péey  
ba fàww,  
te dees ko tabaxaat.

<sup>3</sup> Moo tax xeet wu am doole di la màggal,  
waa péeyu xeet yu néeg di la wormaal.

<sup>4</sup> Yaa di rawtub néew-ji-doole,  
di rawtub aji ñàkk, biir njàqare,  
yaay mbaar mu ñuy yiiroo waame,  
di ker gu ñuy serloo ci tàngoor,  
nde merum kilifa gu néeg  
mooy waame wu ne yureet ci kaw miir.

<sup>5</sup> Doxandéem yii diy noon,  
ni ngay dàqe tàngoor fi bérab bu ne  
seren,

ni ngay dakkale seen coowal xare.  
Ni aw tàngoor di dakke ndax aw niir,  
ni la woyu ñu néeg ñi di selawe.

#### *Bernde ñeel na xeet yépp*

<sup>6</sup> Aji Sax ji Boroom gàngoor yi,  
mooy berndeel xeet yépp fi kaw tund wii,  
bernde ju niin ak ngëneelu biiñ,  
yàpp wa duuf, yuq ja ne xéew,  
ak tànnéefu biiñ bu teey.

<sup>7</sup> Fi kaw tund wii lay tukkile càngaay,  
li sàng askanoo askan,  
ak séru rabal bi ñu ràbbal xeetoo xeet.  
<sup>8</sup> Mooy mëdd ndee ba fàww!

Boroom bi, Aji Sax jeej fompe  
 gépp kanam rongooñi boroom.  
 Buumi gâceey ñoñam it,  
 moo koy doge fépp ci àddina.  
 Aji Sax ji kat wax na ko.

<sup>9</sup> Bésub keroog dees na ne:  
 «Sunu Yàllaa ngii nag!  
 Moom mii lanu yaakaaroon  
 te moo nuy wallu.  
 Aji Sax jii lanu yaakaaroon,  
 nan bég te bannexoo wallam.»

*Aji Sax ji tas na Mowab*

<sup>10</sup> Aji Sax ji kat teg na tund wii loxo,  
 te ni ñuy dèggaatee boobum leeñ,  
 ni lees fiy dèggaatee Mowab.  
<sup>11</sup> Mowab dina féqoo féqu,  
 mel ni kuy jéema féey,  
 waaye Aji Sax jee leen di torxal,  
 ñook seen manoore.  
<sup>12</sup> Seen tata yu kawé, mu féel, màbb;  
 rattax fi suuf, maasale.

## 26

*Aji Sax jeej may ñoñam ndam*

<sup>1</sup> Bésub keroog dees na woy  
 wii woy fi réewum Yuda:  
 «Dèkk bu dègër lanu am,  
 Yàllaa nu may kaarangey tata, biir ak biti!  
<sup>2</sup> Ubbileen bunt yi,  
 ba xeet wi jub te sàmm ngëm duggsi!  
<sup>3</sup> Yaw Aji Sax ji,  
 ku dogu, pastéefu, wóolu la,  
 nga may ko jàmm ju mat,  
 nde moo la wóolu.  
<sup>4</sup> Wóoluleen Aji Sax ji tey ak èllëg;  
 Yàllaa Aji Sax ji déy,  
 moo mat cëslaay ba fàww.  
<sup>5</sup> Moo wàcce ñi dèkke woon fa kaw,  
 moo detteel waa dèkk ba aju woon,  
 daaneel leen, ñu xalangu,  
 ba mèq suuf,  
<sup>6</sup> baadoola joggi, dèggaate,  
 néew-ji-doole note leen.»  
<sup>7</sup> Ku dèggu, yoonam day maase;  
 ku dèggu, Aji Jub ji jubal xàllam.  
<sup>8</sup> Aji Sax ji, nu ngi lay xaar,  
 fi sa kaw yoonu santaane yi,  
 di la sàkku, ba la xel,

lii déy, mooy sunu nammeelu xol.

<sup>9</sup> Xol laa lay sàkkoo guddi,  
 sama jëmm jépp di la laaj.  
 Bu say àtte teewee fi kaw suuf,  
 waa àddina xame ca njekk.

<sup>10</sup> Ku bon, boo ko yërëmee,  
 du xam njekk.

Biir réew mu nit ñay jubal  
 lay xal di luubale,  
 du faale kawewaayu Aji Sax ji.

<sup>11</sup> Aji Sax ji, yaa xàcci sa loxo,  
 waaye yéguñu ko.

Won leen ni nga nabe ci sa ñoñ, ñu rus,  
 te sawaraay xoyom sa noon yooyu.

<sup>12</sup> Aji Sax ji, yaa nuy defal jàmm,  
 te lépp lu nu def, yaa nu ko sottalal.

<sup>13</sup> Aji Sax ji sunu Yàlla,  
 yeneen sang yu la moy moom nañu nu,  
 waaye saw tur rekk lanuy màggal.

<sup>14</sup> Yooyu sang dee nañu, nekkatuñu,  
 wuute nañu, jógatuñu.

Yaa def nii, faagaagal leen,  
 ba far sax seen tur.

<sup>15</sup> Aji Sax ji, yaa yokk xeet wi,  
 yaw mii yaa yokk xeet wi,  
 yaa fésal sa teddnga,  
 yaa yokk mboolem kemi réew mi!

<sup>16</sup> Éy Aji Sax ji, ci biir njàqare lañu la  
 sàkkoo;

ba ñu tegoo sa mbugal,  
 lañu la déey seenug ñaan.

<sup>17</sup> Éy Aji Sax ji, ni kuy matu  
 lanu meloon fi sa kanam,  
 di wañaarook a yuuxu.

<sup>18</sup> Danoo ëmb bay matu  
 te jurunu lu moy ngelaw.  
 Indiwunu genn mucc ci àddina,  
 mayunu ci kenn lu ko taxa dund.

<sup>19</sup> Waaye yaw askan wi, ñi nga deele  
 ñooy dellu dundaat,  
 seeni néew ay dekki,  
 ku doon nelaw sa biir bàmmeel,  
 yewwu, sarxolle.

Aji Sax jeej yebal lay bu ànd aki leer,  
 suuf délloosi ña dèddu.

*Mbugal ñeel na géej ak jéeri*

<sup>20</sup> Yeen samaw askan, ayca duggleen seeni  
 néeg,  
 tëju ca biir.

Làquleen as lëf, ba sànj mi jàll.  
 21 Aji Sax ji kat a ngii di génne bérabam  
 ba,  
 nara dikke waa àddina mbugalu  
 ñaawtéef,  
 ba suuf wone deret ji ñu tuur fi kawam,  
 te dootu sàng ñi ñu bóom.

## 27

1 Bésuub keroog Aji Sax ji dikke saamaram  
 bu jàmbaare, ñàng te réy,  
 ba dal ci kaw Lewiyatan, jaan ja ca xél  
 wa,  
 Lewiyatan jaan jay wañaaruy dem,  
 ninki-nànkay géej jooju lay rey.

### *Aji Sax ji juboo naak ñoñam*

2 Bésuub keroog, tóokëru reseñ ju neex am,  
 nangeen ko woy,  
 3 te man Aji Sax ji maa koy topptoo,  
 di ko suuxat saa su ne,  
 di ko wattu guddeek bëccëg,  
 bala koo kenn a song.  
 4 Mereetuma tóokër bii,  
 waaye lu ciy dég aki dagg,  
 ma dox wuti ko, xareek moom,  
 boole lépp xoyom.  
 5 Xanaa ku langaamoo sama kiiraay  
 te jàmmook man,  
 ba jàmmook man.  
 6 Ay bés a ngi ñëw Yanqóoba saxi reen,  
 Israyil moomooy tóor, law,  
 ba feesal déndu àddinaak meññeef.

7 Defe ngeen ne Aji Sax ji duma na Israyil,  
 na mu dumaa ña leen duma woon?  
 Am bóomal na leen lu tollook  
 la seeni bóomkat bóomoon?

8 Ndànk-ndànk la jëflanteek ñoom,  
 ba mu leen toxalee,  
 dàqe leen noowam gu mag,  
 bésu ngelawal penku.

9 Nii la Yanqóoba jotoo ñaawtéefam,  
 nii la mujje am njéggalu bàkkaaram:  
 Day boole doji sarxalukaay bi yépp,  
 rajaxe ni doji kew,  
 xer wu ñuy jaamoo Asera dootu fa sampe,  
 mbaa sarxalukaayi suurukaay.

10 Dëkk bu ñu dàbbli mooy wéet,

\* **28:1** 28.1 Efrayim mooy giir gu am solo ci fukki giir ya ca nguurug bëj-gànnar ga ñuy wax Israyil. Leeleeg muy tur wi ñuy wooye waa gox boobu. † **28:1** 28.1 coll mooy fa Samari nekk, di péeyub nguurug bëj-gànnar ga ñuy wax Israyil.

gental, ne wëyën!  
 Fa la nag di fore,  
 fa lay goor, di lekk cari garab ya,  
 11 car ya wow, damm,  
 jigéen ñi dikk, xambe.  
 Dañu di xeet wu dul dégg,  
 ba tax ki leen sàkk yërëmu leen,  
 moo leen bind te ñeewantewu leen.

12 Bésuub keroog Aji Sax ji bàcc,  
 dale ca dexu Efraat ba ca walum Misra,  
 te yeen bànni Israyil, dees na leen for  
 kenn-kenn, ba ngeen daj.

13 Bésuub keroog liit gu mag jib,  
 ña lajoon réewum Asiri délsi,  
 ànd ak ña ñu tasaare woon biir réewum  
 Misra,  
 ba sujjóotalsi Aji Sax ji fa Yerusalem,  
 fa kaw tund wu sell wa.

## **Xibaaru mbugal ñeel na ay xeet**

## 28

(Saar 28—33)

### *Mbugal ñeel na Samari*

1 Wóoy ngalla Efrayim\*,  
 kaala gu yànj ga ay màndikatam di sagoo!  
 Taaram bu yéeme baa koy réer,  
 ni tóor-tóor yu wow,  
 te ma nga toj ca coll†, wa ña biiñ man  
 dëkke,  
 fa tiim xur wu nangu wa.

2 Dégluleen, jàmbaar ju am doolee ngi  
 dikkal Boroom bi,  
 di tawub doji yuur, ngélén luy sàнке,  
 riddee riddi, sotti waame wu wale!  
 Loxoom la koy rattaxe fi suuf.

3 Dees na joggati kaala  
 gii màndikati Efrayim di sagoo.

4 Te tóor mu lax mi muy gànjaroo,  
 mu tege ca coll ya tiim xur wu nangu wa,  
 day mel ni figg ju ñor te jotul;  
 ka ko gis a koy gaaw witt, wonn.

5 Bésuub keroog Aji Sax ji Boroom gàngoor  
 yi

di kaala gu yànj, gànjar gu yéeme,  
 ñeel ndesu ñoñam,

6 mooy sol noowug dégg kuy toog di àtte,

di jàmbaaral ñiy waññi noon yi song  
dëkk bi, xare.

<sup>7</sup> Ñii itam ay naan biiñ bay tërëf,  
màndiw ñoll, di jang:  
sarxalkat akub yonent la aw ñoll di  
tërëfloo,

biiñ jànnaxe leen,  
ñu màndiw ñoll, di jang,  
bu ñu amee am peeñu, di tërëf.

<sup>8</sup> Seen taabal yépp a ngi taq ripp,  
fépp di waccu ak mbalit.

<sup>9</sup> Ñu naa: «Ana ku Esayi mii di jàngal?  
Ana ku muy àgge xibaar?

Xanaa ku yàggula fer,  
di doora bàyyi ween?

<sup>10</sup> Ca rëdd wii, ca rëdd wee,  
nàngam sii, nàngam see,  
as tuut fii, as tuut fee.»

<sup>11</sup> Xanaa boog nit ñu seen wax leerul,  
ñu diy làkk-kat,

la Aji Sax jiy waxeek askan wii?

<sup>12</sup> Moo leen waxoon ne leen:  
«Fii moo di nopplukaay bi,  
noppal-leen ku sonn.

Fii a di dal-lukaay bi!»

Waaye nanguwuñoo dégg.

<sup>13</sup> Moo tax seen kàddug Aji Sax mujj di:

«Ca rëdd wii, ca rëdd wee,  
nàngam sii, nàngam see,  
as tuut fii, as tuut fee.»

Moo tax ñuy tërëf,  
daanoo njaaxaanaay ba damm,  
di sërëx ak a keppu.

### *Doju doorukaay wee mat wéeruwaay*

<sup>14</sup> Kon nag yeen kókkalikat yi yilif  
askanu Yerusalem wii,  
dégluleen kàddug Aji Sax ji!

<sup>15</sup> Yeena naay: «Danoo wóllëranteek  
ndee,

njaniiw lanu digool, ba du nu moom,  
ba bu yaru musiba dikkeek diisaayam, du  
nu laal?

Noo def ay fen sunu rawtu,  
ay wor di sunu làquwaay.»

<sup>16</sup> Moo tax Boroom bi Aji Sax ji wax ne:  
«Maa ngii di dëj fi Siyon aw doju coll,

muy doju collu tànnéef wu gànjare ngir  
kenu gi,

te ku ko wéeroo doo gaawa daw.

<sup>17</sup> Dëgg laay def nattukaay,  
njekk di sama buumu beteex,  
tawub doji yuur buub rawtub fen,  
wal ma mëdd làquwaay,

<sup>18</sup> seen wóllëranteek ndee neen,  
seen digook njaniiw toxu,  
yaru musiba dikk ak diisaayam,  
wulli leen ba ngeen nooy.

<sup>19</sup> Saa yu dikkee ne leen céex,  
suba su ne mu ne jaas,  
guddeek bëccëg, mu teew,  
te bu jibee sax fit rëcc.»

<sup>20</sup> Lal a gàtt ba deesu ci tàlli,  
malaan cëkk ba matul càngaay‡.

<sup>21</sup> Aji Sax jeey jóg na woon  
fa tundu Perasim,

xadaru na woon ca xuru Gabawon  
ngir jéfam,

jéfam ju yéeme ja!

Moo nara liggéey liggéeyam booba,  
liggéeyam bu tumurànke ba!

<sup>22</sup> Tee ngeena baña kókkalee  
bala ñoo teenjal seeni jéng?

Sànkute kat moo di dogal bi ma dégg,  
mu bawoo fa Boroom bi, Aji Sax ji ci  
gàngoor yi,  
di luy dikkal réew mi mépp.

### *Aji Sax jee xam doxalin*

<sup>23</sup> Teeyluleen te déglu sama kàddu,  
teewluleen ba dégg samay wax.

<sup>24</sup> Xool-leen ci lii: Ndax beykat bi day  
dëkke gàbb,  
di rëdd ak a gàbbaat?

<sup>25</sup> Bu gàbbee ba toolam maase,  
du day sànni jiwum nisel§,

wasaare jiwum kumin,  
daldi def bele bi ay saawo,  
sànni lors ba fa mu ko rëddal,  
doora suy bele bu dègër ba ca wet ya?

<sup>26</sup> Dees koo xamal yoon wa,  
te Yàllaam a ko ko jàngal.

<sup>27</sup> Mbàccum nisel watiir amu ca yoon,  
te deesul bàcc kumin itam, ba joggi ca  
tànki watiir.

Mbàccum nisel, yet a koy def;

‡ **28:20** 28.20 lal beek malaan mi ñuy wax fii, mooy misaal Misra mi ñu yaakaaroon te du leen doy kiiraay.

§ **28:25** 28.25 nisel ak kumin ay xeeti safal la.

mbàccum kumin, bant bu yem.  
 28 Gubi bele, dees na ca jaare watiir,  
 waaye deesu ci dëkk;  
 watiir ngay takk, bàcce ko pepp,  
 waaye doo ko bàcc ba mu far mokk!  
 29 Xel moomu it fa Aji Sax ji  
 Boroom gàngoor yi la bawoo.  
 Ndigalam a ni yéemee,  
 pexeem mágge ni!

## 29

### *Mbugal ñeel na Aryel*

1 Wóoy ngalla Aryelee, Aryel\*,  
 dëkk ba Daawuda dale.  
 Dundleen at ak at,  
 amal-leen ci màggal ci kaw màggal.  
 2 Du tee ma wàcceel Aryel musiba,  
 ñuy yuuxook a jooyoo.  
 Yerusalem ay mel ci man  
 ni Aryel, taalub sarxalukaay.  
 3 Maay dal ub dal, wër la,  
 gawe la ay tata,  
 jali jal, fuuge la.  
 4 Dinga suufe ba mel ni kuy àddoo biir  
 suuf,  
 sa baat di ndéey lu dégtoo xóote ya  
 pëndub suuf lale,  
 mel ni njuuma lu waxam bawoo biir suuf,  
 baatam yeloo xóote ya pëndub suuf lale.  
 5 Say noon ay def gàngoor ni feppi suuf,  
 di naaxu nit ñu néeg, ñu ngelaw liy wal  
 nib cox.  
 Loolooy jekki am, ca saa sa.  
 6 Aji Sax ji Boroom gàngoori xare yi moo  
 lay dikke  
 dënook suuf su yëngu ak riir mu réy,  
 ngelaw riddi, di ngélén,  
 ànd ak sawara wuy xoyome.  
 7 Mboolem xeet yu bare yiy xareek Aryel,  
 di song dëkk beeki tataam,  
 nar leena torxal,  
 ñoom ñépp ay mel ni gént mbaa njeneeru  
 guddi!  
 8 Su boobaa mu mel ni ku xiif,  
 géntul lu moy di lekk,  
 yewwu rekk, biir ba wéet;  
 mbaa ku mar, géntul lu moy di naan,  
 yewwu rekk, loof, put ga wow konḡ.  
 Noonu la gàngooru xeet yépp di nekke,

mboolem xeet yooyuy xaareji fa Siyon!  
 9 Tendeefal, jommi rekk!  
 Gëmm, gumba rekk.  
 Ñiika màndi te du biiñ,  
 ñuy jang te duw ñoll!  
 10 Aji Sax ji déy yeen la wal  
 ngelawal nelaw yu xóot,  
 taf seeni gët, te ngeen di yonent yi;  
 muur seeni bopp te ngeen di boroom  
 peeñu yi.  
 11 Peeñum xew-xew yii yépp ump na leen,  
 ni leen kàdduy téere bu ñu tay umpe.  
 Boo ko joxee ku jàng, ne ko mu jàng ko,  
 mu ne la manu ko, nde dees koo tay;  
 12 nga jox ko ku jàngul, ne ko mu jàng,  
 mu ne la manula jàng.  
 13 Boroom bi nee: «Askan wii, làmmiñ  
 lañu ma jegee,  
 lori neen lañu may wormaale,  
 te seen xol sore ma.  
 Seen ragal ak man it,  
 njàngum tari kepp la.  
 14 Moo tax maa ngii di dellu wéyeek askan  
 wii,  
 ay kéemtaan aki kiraama  
 yuy tiiñ boroom xel ak xelam,  
 réer xamkat ak xam-xamam.»  
 15 Wóoy ngalla ñiy làqu Aji Sax ji,  
 di loqal seen mébét,  
 ba lëndëm muur seen jëf,  
 ñu naan: «Ana ku nu gis?  
 Ana ku nu yég?»  
 16 Yeenaka juunum xel!  
 Dees na jaawale tabaxkatu njaq beek ban  
 bi?  
 Ndax li ñu sàkk dina ne ki ko sàkk:  
 «Kii sàkku ma?»  
 Am njaq leey waxtaane tabaxkat bi naa:  
 «Kii manula tabax?»  
*La woon day wonni*  
 17 Xamuleen ne fi leek lu néewa néew,  
 àllub Liban sopplikub tóokèr,  
 tóokèr bi walbatiku meññ, ba ñu ne ab  
 gott la?  
 18 Su bés baa ab tēx dégg kàdduy téere,  
 silmaxa tàggook lëndëm, di gis,  
 19 néew-doole yi dellu bége Aji Sax ji,

\* 29:1 29.1 Tur la wu ñuy wooye Yerusalem. Man naa tekki itam taalub sarxalukaay ba woon ca kër Yàlla ga.

ñi gëna ñàkk di bânneexoo Aji Sell ju Israyil.

<sup>20</sup> Ku néeg déy dina neen, kuy ñaawle sànkú, te képp kuy yeeru nu mu defe lu bon, dees na la dagg.

<sup>21</sup> Mooy ñiy tuumaal nit, di fiir ab àttekat ca pénc ma, di àtte ñàkkal nit ku jub ci dara.

<sup>22</sup> Moo tax Aji Sax, ji jotoon Ibraayma, wax ak waa kër Yanqóoba, ne leen: «Léegi Yanqóoba du rusati, du amati yaraanga.»

<sup>23</sup> Bu am meñneefam gisee li sama loxo def fi seen biir, dinañu sellal sama tur, sellal ma, man Aji Sell ju Yanqóoba. Dinañu ma wormaal, man Yállay Israyil,

<sup>24</sup> ba ñi réeroon, mujj xam; ñurumtukat yi dégg ndigal.

### 30

#### *Misra du mat Israyil cëslaay*

<sup>1</sup> Wóoy ngalla doom yii diy fippukat! Kàddug Aji Sax jee.

Ñu ngi nas mébét yu ma diglewul, di digoo digoo yu ma leen xelalul, di tegle bàkkaar ci kaw bàkkaar.

<sup>2</sup> Ñoo dox wuti Misra te laajuñu ma, xanaa di sàkku rawtub Firawna, di keppaaroo keppaarug Misra\*.

<sup>3</sup> Rawtub Firawnaay mujj di seen gâcee, keppaarug Misra di seen toroxte.

<sup>4</sup> Seeni jawriñ a nga xaat ba Cowan, seeni ndaw àgg ba Anes†,

<sup>5</sup> waaye ñoom ñépp kersa lañuy ame Misra, googu leen dul amal njariñ.

Du ndimbal, du njariñ, xanaa gâceek toroxte.

<sup>6</sup> Yéeneb waxyu bii ñeel na malay àllub Negew:

Réewum tiis laak njàqare, kërug gayndeeki segg, ak saamaan ak céebi, mbaam lañu sëf seen alal, jaare fa, giléem lañu sëf seeni denc,

jëme xeet wu leen dul jariñ.

<sup>7</sup> Ndimbalu Misra, cóolóolu neen! Moo tax ma tudde ko: Raxab, ponkal mi ne yàcc.

<sup>8</sup> Aji Sax ji nee:

«Ayca, bind ko ci àlluwa, ñu gis! Rédd ko cib téere, ngir èllég ak sibbir, mu dib seede ba fàww.»

<sup>9</sup> Wii xeet kat ay fippukat lañu, yii doom a diy fen-kat te nanguwuñoo sàmm yoonu Aji Sax ji!

<sup>10</sup> Boroom ngis, ñu ne ko: «Bul gis,» boroom peeñu, ñu ne ko: «Bu ñu firil peeñuy dégg.

Wax nu lu neex, gisal nu ay nax.»

<sup>11</sup> Moyal yoon wi;

lajj, wàcc xàll wi,

te may nu jàmm ak Aji Sell ju Israyil.

<sup>12</sup> Moo tax Aji Sell ju Israyil wax ne:

«Gannaaw yeena xalab kàddu gii, yaakaaruleen lu moy doole ak pexey njubadi

yu ngeen wéeroo,

<sup>13</sup> googu ñaawtéef ay mujj doon seen xar-xaru tata ju kawe, funki, tata ja jekki jóoru.

<sup>14</sup> Da naan tasar ni njaqal xandeer

lu ñu naan rajax te ñéebluweesu ko, ba deesul gis ca tojit ya, dog bu tibb xal, mbaa mu as ndoxum déeg.»

<sup>15</sup> Ndax Boroom bi Aji Sax ji,

Aji Sell ju Israyil dafa wax ne:

«Délsi, dal-lu moo leen di musal. Ne tekk te wóolu maa leen di dooleel. Waaye yeena buggul!

<sup>16</sup> Yeena ne: “Déédéet, danuy war fas, daw!”

Dingeen daw moos!

Ngeen ne: “Daamar yu gaaw lanuy war:”

Ñi leen di dàq it di war daamar yu gaaw!

<sup>17</sup> Junneey daw fu leen kenn gëdde, juróom gëdd, ngeen daw yeen ñépp, ba ña des mel ni bantub raaya ci kaw tund,

ne cundum ni raaya bu wéet ca coll wa.»

<sup>18</sup> Aji Sax ji déy a leen namma baaxe,

\* **30:2** 30.2 Misra lañu yaakaaroon mu aar leen ci Asiri. † **30:4** 30.4 Cowan ak Anes ci Misra lañu bokk.



moo ko tax di jóg moos ngir yërëm leen,  
nde Aji Sax jeey Yállay njubte.  
Ndoklee képp ku ko yaakaar!

<sup>19</sup> Yeen waa Siyon, yeen waa Yerusalem,  
dootuleen jooy muk!

Bu ngeen jooyee, mu yërëm leen moos;  
bu leen di dégg, di leen nangul.

<sup>20</sup> Boroom bee leen di leel njàqare,  
nàndal leen coono,  
waaye moo leen di jàngal, dootu leen  
làqu;

dingeen gis ki leen di jàngal,

<sup>21</sup> di dégg kàddu guy jibe seen gannaaw,  
naa leen: «Yoon waa ngii, jaareleen fi;»  
bu ngeen awee ndijoor, mbaa càmmoñ.

<sup>22</sup> Su boobaa ngeen sobeel seen jëmmi  
tuur yi ñu xoob xalis;

ak wurus wu xoob seen tuur yi ñu móol,  
ba boole lépp sànni ni sagar yu sobewu,  
ne ko: «Sore nu!»

<sup>23</sup> Su boobaa Aji Sax ji tawal lu ngeen ji,  
may leen pepp mu suuf meññ,  
sakkan te nangu,

seen juri keroog di fore parlu yu yaa,

<sup>24</sup> Nag yeek mbaam yiy rijji sax,  
di xontoo cox bu ñu xorom,  
jóge ci mbàccum roq ak ngaska.

<sup>25</sup> Te tundoo tund wu kawe,  
wu mag ak wu ndaw,  
wali ndox a cay wale,  
keroog bés ba deret di tuuroo tuuru,  
tata ya jóoru.

<sup>26</sup> Weer day leer ni jant,  
jant gënatee leer,  
mel ni juróom yaari bëccëg,  
bésuub keroog ba Aji Sax jiy takk damm-  
dammu ñoñam,  
fajal leen góom yi ay dóoram sabab.

### *Aji Sax ji song na Asiri*

<sup>27</sup> Aji Sax jaa ngii, jóge fu sore;  
mer ma réy,  
mu jógaale kàddug àrtu gu diis,  
di waxe xadar ju mat sëkk,  
baat ba mel ni sawara wuy xoyome,

<sup>28</sup> noo ga di wal mu baawaan,  
tollu ci put;  
mu nara segge xeet yi ab seggukaayu  
alkànde,

wewal xeet yi ag laab gu leen di réeral.

<sup>29</sup> Teewul, bokk yi, seen woy yay jib;

mel ni guddig màggal,  
ànd ak mbégte ni kuy toxoro,  
yéeg jëm kaw tundu Aji Sax ji,  
cëslaayal Israyil.

<sup>30</sup> Aji Sax jeey yékkati kàddoom gu màgg,  
wone diisaayu loxoom,  
ànd ak tangooru meram,  
ak sawara wuy xoyome,  
ak waameek ngélén, ak tawub doji yuur.

<sup>31</sup> Kàddug Aji Sax jeey jib,  
Asiri tiit bay lox,

yetu Aji Sax ja dal,

<sup>32</sup> te saa yu yet wa Aji Sax ji féetale Asiri  
dalee,

ngeen jibal am tegg aki xalam.

Aji Sax jeey xàcci loxoom, xareek Asiri.

<sup>33</sup> Xambees na démb ab taal bu ñuy wax  
Tofet†,

te buur ba lees ko waajalal;

dees koo xóotal, yaatal ko,  
sawara way tàkk, matt ma ne gàññ,  
noowal Aji Sax ji nar caa tàkke,  
di sël-sëli ni walum tamarax.

## 31

### *Musiba ñeel na ku yaakaar Misra*

<sup>1</sup> Wóoy ngalla ña wàcci Misra, di wuti  
wall;

di sukkandikoo ay fas,  
tey yaakaari watiir ndax bare ga,  
aki gawar ndax lim bu takku ba  
te xooluñu ci Aji Sell ju Israyil,  
sàkkuwñu kooku di Aji Sax ji.

<sup>2</sup> Moona moom it xareñ na,  
mane na safaan,  
te du fommi digeem.

Kuy def lu bon, mu dal ci waa këram;  
kuy def lu ñaaw, mu song ay wallam.

<sup>3</sup> Waa Misra, niti neen, duñu Yàlla;  
seeni fas it, suuxu neen, duñu leneen.  
Aji Sax jeey xàcci loxoom,  
kiy walloo mooy téréf,  
ki ñuy wallu daanu,  
ñoom ñépp bokk sànk.

<sup>4</sup> Aji Sax ji déy da maa wax ne ma:  
«Gaynde gu mag ak gu ndaw, bu jàppee  
bay xiiru,

† 30:33 30.33 Tofet mooy bérab ba ñu daan lakke ay gone yu ñu def sarax, ñeel tuur ma ñuy wax Moleg.

boo ko wooloon gàngooru sàmm it,  
duñu soowaloo ba xèbal ko,  
duñu ñolñoli ba mu dellu gannaaw.  
Noonu la Aji Sax ji Boroom gàngoor yiy  
wàcce,  
xaresi fi kaw tundu Siyoŋ ak waa tund  
wa.»

<sup>5</sup> Ni picc di daayaarloo, aar am tàggam,  
ni la Aji Sax ji Boroom gàngoor yiy yiire  
Yerusalem.  
Mooy aar, di xettli,  
mooy musal, di yiwi.

<sup>6</sup> Éy bokki Israyil, fippu ngeen Aji Sax  
ji ba sès, waaye walbatikuleen! <sup>7</sup> Bésuub  
keroog ku ne sànni yállantuy xalisam,  
ak yállantuy wurusam yi mu sàkke woon  
loxoy bàkkaaram.

<sup>8</sup> Asiri nag day daanu,  
te saamaru nit du ko daaneel,  
saamar bu doom aadama moomul a koy  
alag,  
mu daw, won saamar gannaaw,  
ay gone yu góoram dugg liggéeyu sañul-  
bañ.

<sup>9</sup> Ñi ñu yaakaar dañuy tiit, ne wëqet,  
seeni kilifa jàq, ba daw wacc raaya ba.  
Kàddug Aji Sax jee,  
Boroom sawara wi ci Siyoŋ,  
Boroom taal bi ci Yerusalem!

## 32

### *Dëgg ay mujj*

<sup>1</sup> Buur a ngii, njekk lay nguuroo,  
jawriñ ñi it, yoon lañuy yilifee;

<sup>2</sup> ku ci nekk mel ni seelukaayu ngelaw,  
di kiiraay ci ngélén,  
mel ni wali ndox ci suuf su ne sereŋ,  
mbaa keppaaru doj wu mag ci àll bu mar.

<sup>3</sup> Su boobaa gëti njàccaar yi dootuñu  
gëmm,

te noppi ñiy dégg dañuy teewlu,

<sup>4</sup> ku yàkkamti di ràññee, ba mana xam,  
làmmiñu ku dër gaawa wax lu leer.

<sup>5</sup> Booba deesatul wooye ab dof, gor si,  
te njublanj dootu dégg «ku tedd ki.»

<sup>6</sup> Ab dof, waxi dof lay wax,  
xel ma di nas ñaawtéef,  
mu nar jëf ju teddadi.

Lu ñaaw lay wax, jëme ci Aji Sax ji,  
di xiifal ku xiif,  
di xañ ku mar lu mu naan.

<sup>7</sup> Ab njublanj, ay pexeem musiba la.  
Njekkar lay nas,  
ba bu néew-ji-doole sàkkoo dëgg it,  
mu fen ba lor ko.

<sup>8</sup> Waaye gor si, ngor lay mébét,  
te ngor lay wéye.

<sup>9</sup> Yeen jigéen ñi dal xel,  
taxawleen temm, déglu ma;  
yeen janq ji féex,  
teewluleen ma.

<sup>10</sup> Yeen jigéen ñi dal xel,  
fi leek at aki fan ngeen jàq;  
witt mi du baax, ngóob du taxaw.

<sup>11</sup> Jigéen ñi dal xel, ragal-leen;  
yeen ñi féex laa ne, tiitleen!  
Futtikuleen, ba ne dunŋ;  
gembooy saaku, ñaawloo.

<sup>12</sup> Fëggleen seen dënn,  
jooy tooli bannex ya,  
jooyleen reseñ ju nangu ja,

<sup>13</sup> ak sama suufas bokk,  
ya ay dég aki dagg nangu.

Jooyleen kay kër ya ca mbégte ma,  
ak dëkk bu xumb ba.

<sup>14</sup> Kër gu rafet sax, dees koy wacc,  
dëkk baak riiram, dees koy dëddu;  
tund ak tooju doon ay xunti ba fàww,  
mbaamu àll ne ca finaax, jur ga di ca fore,  
<sup>15</sup> ba keroog leeru xel sóobale nu fa kaw,  
màndiŋ mi sopplikub tookeer,  
tookeer meññ, ba ñu ne ab gott la.

<sup>16</sup> Su boobaa yoon dëkke màndiŋ mi,  
njekk tooge tookeer bi.

<sup>17</sup> Su booba njekk ay jur jàmm,  
njekk ay dalal, di aare ba fàww,

<sup>18</sup> ba sama bokk yi dëkke sancub jàmm,  
ci dëkkuwaay yu wóor,  
dal-lukaay yu dal xel.

<sup>19</sup> Gott bi day daanu ci tawub doji yuur,  
dëkk bi detteelu ba ne dett.

<sup>20</sup> Waaye ndokklee yeen ñi tala ji fépp fuy  
ndox  
te saña afal nag ak mbaam.

## 33

### *Ña daan sàнке sàнку nañu*

<sup>1</sup> Wóoy ngalla yaw bóomkat bi kenn  
bóomul,  
yaw workat bi kenn worul.  
Boo noppee bóome, ñu bóom la,

te boo noppee wore, ñu wor la.  
<sup>2</sup> Éy Aji Sax ji, ngalla baaxe nu;  
yaw lanu yaakaar!  
Xéyeel a dooleel wii xeet,  
wallu nu ci biir njàqare.  
<sup>3</sup> Sam riir jib, xeet yi fëx;  
nga jóg, waaso yi fëlfoo.  
<sup>4</sup> Dees na sèxètoo sa alal sèxètoob soccet.  
Dees na ko sam ni njéeréer di sameel!  
<sup>5</sup> Aji Sax jee kawé,  
moo dëkke fa kawa kaw,  
te mooy dajal fi Siyoŋ njekk ak yoon.  
<sup>6</sup> Liy dalal seen jamono mooy  
koomu ndam; xel ak xam-xam,  
te ragal Aji Sax ji, loolooy seen alal.  
<sup>7</sup> Xool-leen seen jàmbaar  
ñiy yuuxoo ci mbedd mi,  
ndawi jàmm yaa ngii,  
di jooyoo jooy yu metti.  
<sup>8</sup> Yoon yaa ngi wéet,  
kenn jaareetul ci ñall wi!  
Kóllère fecciku na,  
xeebees na ay seede,  
te kenn faaletul doom aadama.  
<sup>9</sup> Suuf a ngi maral, wow koŋŋ,  
gottub Libaŋ am gâce, lax,  
àllub Saron doon joor gu wow,  
garabi Basan ak Karmel yèngu, di ruus.  
<sup>10</sup> Aji Sax ji nee: «Xaaral rekk ma jóg,  
xaaral rekk ma ne ñokket,  
xaaral rekk ma teewal samag kawé.  
<sup>11</sup> Seeni mébét di boob,  
bu sottee dim ngooñ;  
seen noowug bopp mooy xamb sawara,  
wi leen di xoyom.  
<sup>12</sup> Xeet yeey sànkú  
ni doj yu lakk ba doon kew,  
mbaa taxas yu ñu buub,  
sànni ci sawara, mu tàkk.  
<sup>13</sup> Yeen ñi sore, dégluleen li ma def;  
yeen ñi jege, xamleen ne maa am doole.»  
<sup>14</sup> Bàkkaarkati Siyoŋ tiit nañu,  
way-gëmadi yaa ngay lox.  
Ana kan ci nun moo mana dal ak  
sawara suy xoyome\*?  
Ana kan ci nun moo mana dal ak  
taal yu yànj ya dul fey?  
<sup>15</sup> Xanaa kiy doxe njekk,

di wax njub,  
bañ alalu foqati;  
loxo bay jalax ab ger,  
noppam di tanqamlu waxi bóome,  
bètam di gëmm, ba du gis lu bon.  
<sup>16</sup> Ku ni mel, bérab bu kawé lay dëkke,  
doj yu ñu dàbbli di rawtoom,  
dundam doy,  
te ndoxam du ñàkk.

### *Yerusalem mucc na cib noon*

<sup>17</sup> Yaw mi mel nii, buur bi ci taar bi ngay  
teg bët;  
yaay gis réew mi ne màww.  
<sup>18</sup> Sam xel dem ca sa tiitaange ja woon,  
nga ne: «Moo, ana ka doon waññ?  
Ana ka doon natt diisaayu galag?  
Ana ka doon waññiy tata?»  
<sup>19</sup> Su boobaa dootoo gis xeet wii di jaay  
doole,  
xeet wii diisu làkk ba déggeesu ko,  
taqu làmmiñ ba xameesul lu ñuy wax.  
<sup>20</sup> Xoolal Siyoŋ, dëkk ba nuy màggale;  
yaay teg bët Yerusalem, dëkkuwaay bu  
dal ba,  
xayma bu deesul sempi,  
wewukaay ya deesu ko buddi muk,  
te luy buumu xayma ya it, deesu ko dog.  
<sup>21</sup> Foofa déy la nu Aji Sax ju màgg ji  
di nekkal bérab bu defi dex aki wal,  
fu gaalu joow dul dawé,  
te gaal gu mag du fa jaare,  
<sup>22</sup> Aji Sax jee nuy jiite,  
Aji Sax jee nuy dogalal yoon.  
Aji Sax jee sunu buur!  
Moom moo nuy wallu.  
<sup>23</sup> Yeen nag seen réew mi gaal la,  
gu goj ya yolom,  
ponk ba ca digg ba di yèngu,  
ba ndimol gaal gi firikuwul.  
Dees na séddoo lël ju ne gànñ,  
ba làggi ya sax séddu ca.  
<sup>24</sup> Du kenn ci waa Yerusalem,  
ku neeti wopp na.  
Waa dëkk bépp ay am njéggalu bàkkaar.

## **Gannaaw mbugal, mbégte**

### **34**

*(Saar 34—35)*

*Mbugal ñeel na Edom*

\* **33:14** 33.14 sawara: seetal ci 30.27 ak 31.9.

<sup>1</sup> Yeen xeet yi, jegesileen te déglu;  
 yeen askan yi, teewluleen!  
 Na suuf ak li ci biiram déglu,  
 muy àddinaak lépp lu mu jur.  
<sup>2</sup> Merum Aji Sax ji ñeel na xeetoo xeet,  
 am sànj ñeel gàngoori xeet yi.  
 Aji Sax ji faagaagal leen,  
 dogal ñu war leena rendi.  
<sup>3</sup> Seeni néew lees di xalab,  
 ñu médd, xet ga gilli,  
 seen deret la tund yiy sangoo.  
<sup>4</sup> Gàngooru asamaan gépp ay tasaaroo,  
 asamaan taxañe ni lëmësub kayit,  
 gàngooram gépp ruus  
 ni xobu reseñ mbaa figg gu lax.  
<sup>5</sup> Aji Sax ji nee: «Saab saamar a reye fa  
 asamaan  
 ba màndi deret,  
 te mu ngii di wàccal Edom,  
 xeet wi may faagaagal, ngir àttee leen  
 ko.»  
<sup>6</sup> Aji Sax jee yor saamar bu màndi deret,  
 yafloo nebbon,  
 ak deretu kuuy mu ndaw ak bëy,  
 ak nebbonu dëmbéenu kuuy.  
 Aji Sax ji kat moo am ab sarax fa Bocra,  
 muy tër mu réy fa réewum Edom.  
<sup>7</sup> Nagi àll yaay ànd ak ñoom daanu,  
 ñook yëkk yu ndaw yaak yu mag ya,  
 seen réew mi màndi deret,  
 suuf sa niin batt ak nebbon.  
<sup>8</sup> Bësub feyu la, Aji Sax ji di ca feyoo;  
 mooy at mi Edom di yooloo la mu leroon  
 Siyon.  
<sup>9</sup> Wali Edom di ca soppliku koltaar,  
 pëndub suufam doon tamarax,  
 suufam mel ni koltaar buy lakk,  
<sup>10</sup> guddeek bëccëg, du fey,  
 saxar sa day gilli ba fàww,  
 réew ma gentat giiru jamono,  
 te deesatu fa jaare muk.  
<sup>11</sup> Céeleek siññeel a koy nangu,  
 looy ak baaxoñ dëkke fa.  
 Buumu beteex lees koy natte, maasale,  
 ba mu ne maraas, ne wëyëñ.  
<sup>12</sup> Garmi ya dootuñu fa teewe,  
 ba di fa samp nguur,  
 te seen kàngam yépp ay wuute.  
<sup>13</sup> Seen kër buur ya la dég ya di lawe,  
 gajj aki taxas saxe tata ya,

till dëkke,  
 bànjóoli tàgge,  
<sup>14</sup> rabi màndiñ mi di fa dajeeki bukki,  
 bëyu àll di fa wooye moroom ma.  
 Fa la rabu guddi di dal-loo,  
 fàkkal fa boppam ab dal.  
<sup>15</sup> Fa la luy nen di tàgge, nen fa,  
 bóof, ba tostan, yiire keppaaram;  
 tan ya bokk fa daje,  
 ku ci nekk ak moroom ma.  
<sup>16</sup> Seet ko ci téereb Aji Sax ji, jàng ko;  
 du menn mala muy wuute ca gent ba,  
 lu ci nekk a fay ànd ak moroom ma.  
 Aji Sax jee ko santaane ci gëmmiñam,  
 moo leen di dajale, moom ci boppam.  
<sup>17</sup> Moom moo leen ko muurale,  
 sédd leen suuf sa ci loxoom,  
 ñu séddoo ko ba fàww,  
 màkkaanoo ko maasoo maas.

## 35

### *Yoonu ñibbi Siyon taxaw na*

<sup>1</sup> Màndiñ ak suuf su ne seren dina bég,  
 joor gu wow bannëexu, tóor ba ne ràññ.  
<sup>2</sup> Day tóora tóor,  
 di bannëexu, bay sarxolle,  
 ba jagoo darajay gottub Liban  
 ak taaru àllub Karmel ak Saron.  
 Foofa lees di gise darajay Aji Sax ji,  
 sunu taaru Yàlla.  
<sup>3</sup> Ku yoqi, dooleel-leen ko,  
 ku óom yay fenqe, jàppleleen ko.  
<sup>4</sup> Ku fitam rëcc, ne leen ko:  
 «Dëgërlul te bul tiit.  
 Sa Yàllaa ngii di la feyul,  
 ba yool say noon.  
 Moom mooy dikk, wallusi la.»  
<sup>5</sup> Su boobaa gëti silmaxa muriku,  
 noppi tëx sikkliku.  
<sup>6</sup> Su boobaa ab làggi ne jàyy ni kéwél,  
 ab luu sarxolle.  
 Am ndox ay fettaxe màndiñ ma,  
 ay wal wale joor gu wow,  
<sup>7</sup> suuf su wow doon ub déeg,  
 joor gu maral ballal bëti ndox.  
 Fa till fàkkoon, di fa goore,  
 gattax ak barax a fay sëqe.  
<sup>8</sup> Foofa law yoon di jaare,  
 ñu di ko wooye Yoon wu sell wi.  
 Ku sobewu du fa jaare,

ñi moom woowu yoon,  
ñooy ñi koy topp.

Ab dof sax du fa lajje.

<sup>9</sup> Gaynde du fa am,  
rab wu aay du fa dox,  
du lenn lees fay gis,  
ku ñu jot rekk a fay jaare.

<sup>10</sup> Ñi Aji Sax ji xettleey délsi,  
duggsi Siyon, di sarxolle,  
kaalawoo bânneex bu sax.  
Mbég ak bânneex a leen di dab,  
naqar aku tiis dëddu leen.

## Lu jëm ci Buur Esekiya

### 36

(Saar 36—39)

*Asiri song na Yuda*

<sup>1</sup> Gannaaw gi, ca fukk ak ñeenteelu  
atu nguug Esekiya buurub Yuda, ca  
la Senakerib buurub Asiri dikk song  
mboolem dëkki Yuda ya tata wër, daldi  
leen nangu. <sup>2</sup> Buurub Asiri moo yebale  
fa dëkk ba ñuy wax Lakis, bëkk-ñéegam  
Rabsake, mu ànd ak mbooloo mu réy, ba  
ca Buur Esekiya ca Yerusalem. Ba Rab-  
sake agsee ba tollook solomu mbàndum  
kaw ma, feggook yoon wa jëm ca toolub  
fóotukaay ba, fa la taxaw. <sup>3</sup> Ba loolu amee  
bootalub buur Elyakim doomu Ilkiya moo  
ànd ak Sebna, bindkat ba, ak doomu Asaf,  
Yowa ma yor téere ya, ñu dikk dajeek  
moom. <sup>4</sup> Rabsake bëkk-ñéegu buurub  
Asiri ne leen: «Waxleen nag Esekiya ne  
ko: Buur bu mag ba, buurub Asiri dafa  
wax ne: “Sa yaakaar jii nga yaakaar, ana  
foo ko teg? <sup>5</sup> Noon naa làmmiñ kese  
doy na pexeek njàmbaar cib xare? Ma  
ne: Ana kan nga yaakaar bay fippu ci  
sama kaw? <sup>6</sup> Misra daal, nga yaakaar,  
bantu barax bu tas boobu di sokk képp  
ku ko wéeroo! Firawna buuru Misra  
de, mooy boobu bant ci képp ku ko  
yaakaar. <sup>7</sup> Xanaa doo ma ne seen Yàlla  
Aji Sax ji ngeen yaakaar? Xanaa du  
moom nga toxal bérabi jaamookaayam  
yeek sarxalukaayam, ba noppi ne waa  
Yerusalem ak Yuda sarxalukaay boobu  
lañuy sujjóotal?” <sup>8</sup> Léegi daal, déggool  
rekk ak sama sang buurub Asiri, ma jox  
la ñaari junniy fas, ndegam am ngay

gawaram! <sup>9</sup> Ana noo mana tëwe ki gëna  
tuut ci sama jawriñi sang? May wax ngay  
yaakaare Misra ay watiir aki fas. <sup>10</sup> Te  
sax, xanaa du Aji Sax ji laa àndal ba dalsi  
fi kaw réew mii, ngir tas ko? Aji Sax  
ji ci boppam moo ma ne: “Songal réew  
mii, tas ko!”» <sup>11</sup> Ba loolu amee Elyakim  
ak Sebna ak Yowa ñaan Rabsake, ne ko:  
«Ngalla, làkk nu arameen, dégg nanu  
ko. Bu nu wax ebrè, mbooloo mi ci kaw  
tata ji di ci dégg.» <sup>12</sup> Bëkk-ñéeg ba ne  
leen: «Ndax yeen ak seen sang donḡ la  
ma sama sang yóbbante kàddu yii? Ñi  
toog ci kaw tata ji dañu cee bokkul? Te  
ñu nara ànd ak yeen lekk seen jonkani  
bopp, naan seenum saw!» <sup>13</sup> Bëkk-ñéeg  
ba nag taxaw, xaacu ca kaw ci ebrè  
ne: «Dégluleen kàdduy buur bu mag bi,  
buurub Asiri. <sup>14</sup> Buur dafa wax ne: “Bu  
leen Esekiya nax, ndax manu leena xettli.  
<sup>15</sup> Te bu leen Esekiya yaakaarloo Aji Sax ji,  
naan leen: ‘Aji Sax ji moo nuy xettli moos,  
te deesul teg dëkk bii ci loxol buurub  
Asiri!’ <sup>16</sup> Buleen déglu Esekiya. Buurub  
Asiri kat dafa wax ne: Jàmmooleen ak  
man te ngeen génñ dëkk bi, dikk nangul  
ma. Su ngeen ko defee, ku nekk ci yeen  
mana lekk ak jàmm ci garabu reseñam,  
lekk ak jàmm ci figgam, di naan ndoxum  
teenam, <sup>17</sup> ba keroog may dikk, yóbbu  
leen réew mu mel ni seen réew mi,  
réewum pepp ak ndoxum reseñ, réewum  
mburu ak tooli reseñ. <sup>18</sup> Bu leen Esekiya  
sànk, naan leen: ‘Aji Sax ji moo nuy  
xettli.’ Ndax tuuri xeet yi mas nañoo  
xettli réewu wenn xeet ci buurub Asiri?  
<sup>19</sup> Ana tuuri réew yii di Amat ak Arpàdd?  
Ana tuuri Sefarwayim? Ndax dañoo xettli  
Samari ci man? <sup>20</sup> Tuuri réew yii yépp,  
ana mu ci xettli menn réew ak man, ba  
Aji Sax ji wara mana xettli, Yerusalem ak  
man?”»

<sup>21</sup> Ñooña ne cell, tontuwuñu ko baat,  
ndax Buur moo leen santoon ne leen  
buñu ko tontu. <sup>22</sup> Ba loolu amee bootalub  
Buur, Elyakim doomu Ilkiya ak Sebna,  
bindkat ba, ak doomu Asaf, Yowa ma denc  
téere ya, ñoo dem ak seen yérey ñaawlu  
yu xottiku, ba ca Esekiya. Ñu daldi koy  
àgge kàddug bëkk-ñéeg ba.

### 37

<sup>1</sup> Naka la ko Buur Esekiya dégg, daldi xotti ay yéereem, sol saaku yu muy ñaawloo. Mu dem nag ca kër Aji Sax ji. <sup>2</sup> Ba loolu amee mu yebal Elyakim bootalub Buur ak Sebna bindkat ba, ak ñay mag ca sarxalkat ya. Ñu sol saaku yu ñuy ñaawloo, daldi dem ca Yonent Yàlla Esayi doomu Amocc. <sup>3</sup> Ñu ne ko: «Esekiya dafa wax ne: “Bésuub tey bésuub njàqare la ak mbugal ak gâce. Mooy li ñuy wax naa: Doom a ngi ci buntub juddu, te dooley wasin réer! <sup>4</sup> Jombul nag sa Yàlla Aji Sax ji dégg kàdduy bëkk-néeg bi sangam buurub Asiri yebal, ngir mu kókkali Yàlla jiy dund. Te kon sa Yàlla Aji Sax ji mooy dogal mbugal mi war ci kàddu yooyu mu dégg. Yékkatil kàddug ñaan rekk, ngir ñi fi desagum.”»

<sup>5</sup> Ba surgay Buur Esekiya àggee Esayi wax jooju leen seen sang wax, <sup>6</sup> Esayi da ne leen: «Waxleen seen sang ne ko: Aji Sax ji dafa wax ne: “Bul ragal kàddu yi nga dégg surgay buurub Asiri ñàkke ma ko kersa. <sup>7</sup> Maa ngii di ko sol xel mu ko gëmloo xibaar bu muy dégg, ba dellu réewam, ma fàdde ko ab saamar ca am réewam.”»

#### *Asiri tooñati na Yuda*

<sup>8</sup> Gannaaw loolu Rabsake dégg ne buurub Asiri bàyyikoo na Lakis, bay xareek dëkk ba ñuy wax Libna. Mu walbatiku fekki ko foofa. <sup>9</sup> Booba buurub Asiri daa dégg ne Tiraka buurub Kuus moo leen di songsi. Ba mu ca déggee daa yebal ay ndaw ca Esekiya, ne leen: <sup>10</sup> «Waxleen Esekiya buurub Yuda ne ko: “Seen Yàlla ji ngeen yaakaar, bumu leen nax, naa leen deesul teg Yerusalem ci loxol buurub Asiri. <sup>11</sup> Xanaa yaw ci sa bopp dégg nga li buuri Asiri def mboolem réew yi, faagaagal leen? Yaw nag, yaa ciy mucc? <sup>12</sup> Xeel yi samay maam sànk, seeni tuur dañu leena musal, muy Gosan, di Karan, di Resef, di askanu Eden wa woon ca Telasar? <sup>13</sup> Ana buuri Amat ak Arpàdd ak Layir ak Sefarwayim ak Ena ak Iwa?”»

<sup>14</sup> Ba Esekiya jëlee bataaxal ba ca loxol ndaw ya, jàng ko ba noppi, dafa dem ba ca kër Aji Sax ji. Mu daldi tàllal bataaxal

ba fa kanam Aji Sax ji. <sup>15</sup> Esekiya ñaan Aji Sax ji, ne ko: <sup>16</sup> «Éy Aji Sax ji Boroom gàngoori xare yi, Yàllay Israyil mi toog fi tiim serub yi. Yaw donḡ yaa di Yàllay mboolem nguuri àddina. Yaw déy, yaa sàkk asamaan ak suuf. <sup>17</sup> Ngalla Aji Sax ji, dékkal sa nopp ba dégg; Aji Sax ji, xippil say gët ba gis, te dégg mboolem kàdduy Senakerib yi mu yóbbante, ngir ñàkke la ko kersa, yaw, Yàlla jiy dund! <sup>18</sup> Aylayéwén Aji Sax ji, buuri Asiree tas mboolem xeet yeek seeni réew, <sup>19</sup> te ñoo sànni seeni yàlla ci sawara it, ndax yooyoo dul Yàlla, xanaa lu nit sàkke loxoom, bant ak doj, ba tax ñu sànk leen. <sup>20</sup> Kon nag Aji Sax ji sunu Yàlla, wallu nook moom, ba mboolem nguuri àddina xam ne yaw donḡ yaa di Aji Sax ji.»

#### *Yonent Yàlla Esayi yégle na jéllub Asiri*

<sup>21</sup> Ba mu ko defee Esayi doomu Amocc yónnee ca Esekiya ne ko: «Aji Sax ji, Yàllay Israyil, mi nga ñaan ci mbirum Senakerib buurub Asiri, dafa wax ne: <sup>22</sup> Lii moo di kàddu gi Aji Sax ji wax ci moom:

Yaw, janḡ Siyon mu taaru da laa xeeb, di la ñaawal.

Yerusalem, dëkk bu taaru booboo

lay wëcc bopp,

di la kekku sa gannaaw.

<sup>23</sup> Ana kooy kókkaleek a ñàkke kersa?

Moo kooy yékkatil kàddu?

Kooy xool gëti xeebeel?

Xanaa du Aji Sell ju Israyil ji?

<sup>24</sup> Yaa yebal say surga,

di kókkali Boroom bi, te naa:

“Sama watiir yi ne xas

laa ware kawtey tund yi,

jàll ba ca xolu Liban.

Maa gor seedaram ya fa sut

ak tànnéefi garabi sipparam:

maay àkki ba ca collub kaw bu tundu

Liban,

ak gottam bu naat ba nib tóokër.

<sup>25</sup> Maa gas ay teen, naan,

maa joggatee sama téstën, wali Misra

yépp,

ñiisal ko.”

<sup>26</sup> Waaye xanaa déggoo ne bu yàgg laa dogal loolu?

Ca jant yu jëkk ya laa ko nasoon,  
tey ma sottal ko,  
ba nga mana def genti jali tojit, dëkk yu  
tata wër.

<sup>27</sup> Waa dëkk ya ne yàcc, jàq, torox,  
mel ni gancaxu àll mbaa ñax mu yees,  
mbete caxum xadd  
mbaa tool bu car jógagul.

<sup>28</sup> Waaye boo toogee, boo génnee,  
boo duggee, xam naa,  
boo xadaroo sama kaw it, xam naa.

<sup>29</sup> Yaa xadaru sama kaw,  
ba sag reewande tàbbi sama nopp!  
Maa lay takkal ag nos akug laab,  
waññi la, nga dellu yoon wa nga dikke  
woon.

<sup>30</sup> Lii, def ko ci, mu dib takk.  
Dees na lekk ren peppum saxayaay,  
dewén it dees na lekk lu saxal boppam.  
Waaye dewén-jéeg,  
ngeen ji, góob,  
jëmbat toókëri reseñ, lekk ca meññeef  
ma.

<sup>31</sup> Ndes wa des ca askanu Yuda  
ñooy saxaat ay reen,  
ba meññaat ay doom.

<sup>32</sup> Yerusalem kay law ndes di génne,  
aw ndes ay rëcce tundu Siyon,  
te Aji Sax ji Boroom gàngoor yi  
mooy sottal loolu ci xéraangeem.

<sup>33</sup> Moo tax Aji Sax ji wax ci buurub Asiri  
ne:  
“Du dugg ci dëkk bii,  
du fi soqig fitt,  
du fi taxawe ab pakk,  
du fi jal jal bu muy gawe!

<sup>34</sup> Yoon wa mu dikke lay delloo,  
biib dëkk, du fi dugg.  
Kàddug Aji Sax jee!

<sup>35</sup> Maay aar dëkk bii, musal ko  
ngir man ci sama bopp,  
ak Daawuda sama jaam bi.”»

<sup>36</sup> Ba loolu amee malaakam Aji Sax  
ji dikk, fàdd ca dalub Asiri téeméer  
ak juróom ñett fukk ak juróomi junni  
(185 000). Ca èllëg sa ña mucc teela xëy,  
yemuñu ci lu moy ñooña ñépp diy néew.

<sup>37</sup> Ba mu ko defee Senakerib buurub Asiri  
daldi fabu, ñibbi. Mu toog nag ca Niniw.

<sup>38</sup> Gannaaw gi, ba muy sujjóot ca kër

tuuram ma ñuy wax Nisrog, Addraameleg  
ak Sareser, doomam yu góor ñoo ko fa  
fàdde saamar. Ñoom nag ñu daw làquji  
réew ma ñuy wax Araraat. Ci kaw loolu  
doomam Asaradon falu buur, wuutu ko.

## 38

### *Esekiyel wopp na ba jóg*

<sup>1</sup> Jant yooyu Esekiya moo woppoon, bay  
waaja dee. Yonent Yàlla Esayi doomu  
Amocc dikk, ne ko: «Aji Sax ji dafa  
wax ne: “Dénkaaneel sa mbiri kër, ndax  
dangay dee, doo jóg!”» <sup>2</sup> Esekiya nag  
walbatiku, jublook miir ba, ñaan ci Aji  
Sax ji. <sup>3</sup> Mu ne: «Éy Aji Sax ji, ngalla  
bàyyil xel ni ma àndeek yaw sama léppi  
xol, ci kóllëre. Te it li nga rafetlu laa jëfe.»  
Mu jooy nag, jooy yu metti.

<sup>4</sup> Ci kaw loolu kàddug Aji Sax ji dikkal  
Esayi, ne ko: <sup>5</sup> «Doxal ba ca Esekiya, nga  
ne ko: Aji Sax ji sa Yàllay maam Daawuda  
dafa wax ne: “Dégg naa sag ñaan, gis  
naa say rongooñ. Maa ngii di yokk ci saw  
fan fukki at ak juróom. <sup>6</sup> Buurub Asiri ak  
dooleem, maa la ciy xettli, yaw ak dëkk  
bii, te maay aar dëkk bii.”»

<sup>7</sup> Lii nag ngay def ab takk bu bawoo ci  
Aji Sax ji, di firndeel ne Aji Sax ji dina  
def li mu wax: <sup>8</sup> Maa ngii di delloo ker  
gi gannaaw lu tollook fukki dëggastal, ya  
jant bi wàccoon ca kaw iskaleb Axas. Ci  
kaw loolu jant bi dellu gannaaw lu tollook  
fukki dëggastal ya mu jotoona wàcc.

<sup>9</sup> Mbind mii nag Esekiya buurub Yuda  
moo ko bindoon, gannaaw ba mu téddee  
wopp, ba jóg:

<sup>10</sup> Man de dama noon:  
«Sama digg doole laay deme  
jaare bunti njaniw,  
sama ndesu fan réer ma!»

<sup>11</sup> Ma noon: «Dootuma gisati\* Aji Sax ji,  
duma gisati Aji Sax ji fi kërug àddina.  
Duma tegati doom aadama bët,  
dootu fii ci waa àddina.

<sup>12</sup> Sama dëkkuwaay lañu semp, yóbbu fu sore,  
mbete xaymab sàmm.  
Sama àpp a taxañe,  
ni ndimo lu ab ràbb doge ca mbaam ma.

\* **38:11** 38.11 gis Aji Sax ji mooy dem biir kër Aji Sax ji. Seetal ci aaya 22 ak Sabóor 27.4.

Diggante bëccëg ak guddi, nga jekkli ma.

<sup>13</sup> May xalaat, ba bët set;

Aji Sax jiy dammat samay yax ni gaynde, diggante bëccëg ak guddi, nga jekkli ma.

<sup>14</sup> May ciib-ciibi ni wetwet mbaa ramatu, di binni nim xati, di séentu kaw ba saay gët giim.

Dama noon: Éy Boroom bi, loof naa, dimbali ma.»

<sup>15</sup> Waaye lu may waxati?

Aji Sax jee ma wax, te moo jëf.

Kon, ma temp ndànk sama giiru dund ndax tiisu xol.

<sup>16</sup> Boroom bi, ci sa kàddook sa jëf la nit di dunde

te ci laay noyyee ba tey.

Yaa ma wéral, may ma, ma dund.

<sup>17</sup> Ndeke sama tiisu xol wii, sama jàmm rekk a tax.

Sa cofeel a tax nga sorele maak paxum sànkute.

Yaa sànni sa gannaaw sama bépp bàkkaar.

<sup>18</sup> Njaniiw du la sant, ndee du la gërëm,

te ku tàbbim pax yaakaaratul sa kóllère.

<sup>19</sup> Kiy dund, kiy dund doŋŋ mooy ki lay sant

ni man bésub tey jii,

te baay mooy xamal doom sa kóllère.

<sup>20</sup> Aji Sax ji yaa may wallu, nu di la woy, ànd aki xalam, sunu giiru dund,

fa sa biir kër, yaw Aji Sax ji.

<sup>21</sup> Fekk na Esayi noon: «Indileen ab danku figg, ngeen jonj ko ci taabu Esekiya bi, kon dina dund,» <sup>22</sup> ba Esekiya noon ko: «Ana lu di takk biy firndeel ne dinaa wér, ba dellooti kër Aji Sax ji?»

### 39

<sup>1</sup> Jant yooyu doomu Baladan, Merodag Baladan buuru Babilon moo yónnee Esekiya bataaxal ak yóbbal. Fekk na mu déggoon ne Esekiya daa woppoon bay doora am tan. <sup>2</sup> Esekiya am ca mbégte, daldi won ndaw ya, kërug dencukaayam: xalis baak, wurus waak ndàbb jaak, diwu tànnéef gaak mboolem néegub gannaayam ya, ak mboolem lu nekkoon

cay dencam. Amul lenn lu leen Esekiya wonul ci biir këräm, ak mboolem fu bokk ci kilifteefam. <sup>3</sup> Gannaaw loolu Yonent Yàlla Esayi dikk ne Buur Esekiya: «Lu la nit ñii wax ak fu ñu jóge sax ba fi yaw?» Esekiya ne: «Réew mu sore lañu bàyyikoo, dikk ba fi man, réewum Babilon.»

<sup>4</sup> Mu ne ko: «Ana lu ñu gis sa biir kër?» Esekiya ne ko: «Mboolem lu nekk sama biir kër, gis nañu ko. Amul lenn lu ma leen wonul ci samay denc.» <sup>5</sup> Esayi ne Esekiya: «Déglul kàddug Aji Sax ji Boroom gàngoor yi: <sup>6</sup> “Ay jant a ngii di ñëw, dees na yóbbu Babilon lépp lu nekk sa biir kër, te say maam dencoon ko, ba tey jii. Du lenn luy des. Kàddug Aji Sax jee. <sup>7</sup> Te it ñenn ci sag njaboot, ñu soqikoo ci yaw, di ñoo meññ ci sa geño, dinañu leen jàpp, ñu doon jaam yu ñu tàpp ca biir kër buuru Babilon.”» <sup>8</sup> Esekiya ne Esayi: «Kàddug Aji Sax ji nga jottli, jàmm la.» Booba ma nga naan: «Ndegam jàmm ju ne ñooy ay am sama giiru dund kay!»

### Aji Sax jee y dàmp xol yi

### 40

(Saar 40—66)

*Xibaaru jàmm ñeel na Israyil*

<sup>1</sup> Dëfal-leena dëfal sama ñoñ, la seen Yàlla wax!

<sup>2</sup> Waxleen lu dalal xelu Yerusalem, yéeneleen

ne leen seen xare jeex na, seen mbugal mat na.

Ñoo nangoo ci loxol Aji Sax ji lu fey ñaari yoon seen bépp bàkkaar.

<sup>3</sup> Baat a ngi jib, naan:

«Xàll-leen yoonu Aji Sax ji ci màndin mi,

fàkkal-leen sunu Yàlla xàll wu jub fi joor gi.

<sup>4</sup> Wépp xur lees di kaweel, tund wu magoo wu ndaw lees di suufel; ba fu tunde mujj dig joor,

fu ñagasoon maase,

<sup>5</sup> darajay Aji Sax ji daldi feeñ, jaam ñépp bokk gis ko.

Aji Sax jee ko wax ci làmmiñam.»

<sup>6</sup> Baat a ngi naa: «Yéeneel!»

Ma ne: «Lu may yéene?»



Mu ne: «Neel:  
Bépp boroom suux am ñax donɗ la;  
gépp ngoram mel ni tóor-tóoru àll.

7 Ñax ma wow,  
tóor-tóor ma lax  
fa ko noowal Aji Sax ji wale.  
Askan wi kay, am ñax donɗ la.

8 Am ñax day wowal;  
tóor-tóor day lax.  
Waaye sunu kàddug Yàlla  
mooy sax ba fàww.»

9 Yaw Siyon, xibaarkatu jàmm bi,  
doxal yéegi tund wu kawé,  
te xaacook doole.  
Yaw Yerusalem, xibaarkatu jàmm bi,  
xaacul te bul ragal!  
Neel dèkki Yuda yi:  
«Seen Yàllaa ngi!

10 Boroom bi, Aji Sax jaa ngii,  
dikkaale doole  
ak kàttanu kilifteefam.  
Mu ngii ànd ak ñi mu yooloo,  
ñu dig peyam, dox jiitu ko.

11 Mooy sàmm géttam bii ni kuy sàmm ug  
juram,  
boole mbote yi cib loxoom,  
taf cib dènnam, yóbbu;  
xar yiy nàmpal, mu wommat.»

12 Ana ku natte géej biir loxoom?  
Ku xaymaa asamaan yaatuwaayu loxo?  
Ku mana fab suuf sépp, sol cib nattukaay?  
Ana ku natte ab màndaxekaay tund wu  
mag?

Mbaa mu tam-tamal tund wu ndaw?

13 Ana ku mana xayma Aji Sax ji?  
Mbaa nga dib xejjam, ba di ko digal?

14 Ana ku mu diisool, ba kooka tegtal ko,  
jàngal ko yoonu njub,  
jàngal ko xam-xam,  
xamal ko yoonu dég-dég?

15 Xeet yaa ngii, mel ni aw toq ci biir  
bagaan,  
jàppeesu leen lu moy diisaayu feppu  
suuf!

Dun yi lay yékkati ni pëndub suuf!

16 Gottub Liban xambul taalam,  
te mala ya ca ne doyu ko saraxu rendi-  
dóomal!

17 Xeetoo xeet du tus fi kanamam,  
te jàppewu leen lu moy neenug neen.

18 Ana kan ngeen di niruleek Yàlla,  
ak nataal bu ngeen koy dendaleel?

19 Xanaa du jèmmu tuur ju liggéeykat  
móol,  
ab tēgg xoobe ko wurus,  
takk ca caqi xaalis?

20 Ku néewle ba amul jooxe bu ni tollu,  
mooy tànn bant bu dul nèb,  
seeti liggéeykat bu xareñ  
bu ko ci sàkkal jèmmu tuur ju dēgër!

21 Dangeena xamul lii?

Am dangeena déggul lii?

Dees leena waxul ca njàlbéen,  
am seen xel a jàppul nu kenug àddina  
sampoo?

22 Moom moo tooge kaw wèrngalu suuf,  
ñi ko dèkke mel niy soccet,  
moo tàllal asamaan ni ndimo,  
firi ko nib xayma, dèkke.

23 Mooy sànk kilifa,  
di neenal njiitu àddina.

24 Ba ñu sampoogul,  
toogaguñu sax,  
ba seeni reen di riigu,  
ca la leen Aji Sax jiy wal, ñu wow,  
ngélén buub, yóbbu ni boob.

25 Aji Sell ji ne:  
«Ana ku ngeen may niruleel,  
ba may moroomam?»

26 Séentuleen kaw, xool-leen ki sàkk yii fi  
kaw!

Xanaa kiy daaguloo seen gàngoor gu mat,  
ñoom ñépp lay woo ci seen tur,  
ci kawewaayu dooleem ak màggaayu  
kàttanam,

te kenn du ci wuute.

27 Yeen askanu Yanqóoba, lu ngeen di  
jàmbat?

Yeen Israyil laa ne, lu ngeen di jooy,  
naa: «Aji Sax ji gisul li nu dal,  
sunu Yàlla daal, daa réere sunu àq!»

28 Dangeena xamul,  
am dangeena déggul  
ne Aji Sax jeey Yàlla ba fàww,  
sàkk suuf cat ba cat,  
du sonn, du tàyyi,

te am xelam nattuwal?

29 Mooy dooleel ku loof,  
di kàttanal ku jeele.

30 Waxambaane sonn, loof;

xalelu góor di tërëfa tërëf,  
<sup>31</sup> kiy yaakaar Aji Sax ji moom, di yeeslu doole;  
 da naa fëyy ni jaxaay juy naaw,  
 di xélu te du xiix,  
 di dox te du xoox.

## 41

### *Aji Sax jee yor jamono*

<sup>1</sup> Yeen waa dun yi, xeremluleen, déglu ma;  
 yeen askan yi, takkuwaatleen,  
 jegesi te wax,  
 nu bokk teew, layoo.  
<sup>2</sup> Ana ku ñu yékkatee penku,  
 woo ko ci tànkì njekk?  
 Ana ku ko jébbal xeet yi,  
 nangulal ko buur yi,  
 saamaram note ba ñuy pënd,  
 fittam jamat, tasaare ni boob?  
<sup>3</sup> Moo leen di dàq, ba jàll te jàmm a koy dal,  
 ay tànkam sax du laal suuf.  
<sup>4</sup> Ana ku def lii, dogal ko?  
 Xanaa ki dale fa njàlbéen di woo maas yi!  
 Man Aji Sax ji maa jèkk,  
 te man laak ñi mujj ba tey!  
<sup>5</sup> Waa dun yee ko gis, tiit;  
 waa cati àddina di lox;  
 dox ba agsi;  
<sup>6</sup> ku nekk di jàpple moroom ma,  
 naa mbokk ma: «Góor-góorlul!»  
<sup>7</sup> Tëggu weñ ba di ñaax tëggu gànjar ba,  
 boroom wàkku soññ boroom dékk,  
 ñu naa: «Taqaaleb weñ yi baax na!»  
 tey daaj jëmme xërëm ja  
 ay pont yu koy dëgëral.

### *Aji Sax jee y musal Israyil ciy noonam*

<sup>8</sup> Waaye yaw Israyil, sama jaam bi;  
 yaw Yanqóoba mi ma taamu,  
 yaw askanu Ibraayma, samab xarit!  
<sup>9</sup> Yaw mi ma jukkee fa cati àddina,  
 wooye la fa gëna sore,  
 wax la ne la: «Yaa di sama jaam,  
 maa la taamu te дума la wacc,»  
<sup>10</sup> bul ragal, yaw laa àndal,  
 bul tiit, maay sa Yàlla;  
 maa lay dooleel, dimbali la déy,  
 maa lay téyee sama ndijooru njekk déy.

<sup>11</sup> Ma ne, képp ku la mere,  
 dees koy rusloo, torxal ko.  
 Kuy joteek yaw day neen, sàнку.  
<sup>12</sup> Dinga ko seet, doo ko gis,  
 kuy jànkoonteek yaw, du mujje doon tus,  
 te kuy xareek yaw it day mujj neen.  
<sup>13</sup> Man Aji Sax ji maay sa Yàlla;  
 téye sa loxol ndijoor,  
 di la wax ne la: «Bul tiit,  
 maa lay dimbali.»  
<sup>14</sup> Yaw Yanqóoba mi néew doole niw sax,  
 yeen góori Israyil.  
 Man, maa leen di dimbali.  
 Kàddug Aji Sax jee,  
 sab jotkat, Aji Sell ju Israyil.  
<sup>15</sup> Maa ngii di la def  
 ngay watiiru bàccukaay bu ñaw, yees peq;  
 ànd aki bëñam,  
 ngay wol tund wu mag, raatale;  
 dëbb tund wu ndaw ba mu mel nib cox.  
<sup>16</sup> Yaa leen di bàcc, ngelaw wal,  
 ngélén tasaare;  
 yaw ngay bége Aji Sax ji,  
 di damoo Aji Sell ju Israyil.  
<sup>17</sup> Walaakaanaak néew-doolee ngi wër,  
 di wut um ndox, amul.  
 Seen put wow konḡ ak mar.  
 Man Aji Sax ji, maa leen di nangul;  
 man Yàllay Israyil, дума leen wacc.  
<sup>18</sup> Maay walaley dex kaw coll ya ne dunḡ,  
 bënn bëti ndox digg xur ya,  
 def màndiḡ ma ab déeg,  
 suuf su ne sereḡ laay ballalem ndox.  
<sup>19</sup> Maay def garabi seedar aki séng ca  
 màndiḡ ma,  
 saxal garabi mirt ak oliw ca joor ga,  
 sippar ak garabu pëe, ak yeneen garab yu  
 dëkke naat,  
 ma boole ca,  
<sup>20</sup> ndax nit ñi gis, ba xàmmee,  
 ñoom ñépp nemmiku, ba xam ne  
 Aji Sax jee def lii ci loxoom,  
 xam ne Aji Sell ju Israyil a sàkk lii.

### *Aji Sax ji tiĩnal na tuuri yéefar yi*

<sup>21</sup> «Waxleen seenu lay,» la Aji Sax ji wax,  
 «Biral-leen seeni firnde,» la buuru  
 Yanqóoba boobu wax.  
<sup>22</sup> «Woneleen ko te wax nu liy ñëw.  
 Xamal-leen nu la woon, lu mu;

nu ba ci xel, ba xam lu muy jur,  
te ngeen dégtal nu la dikkagul.  
23 Biralal-leen nu mbiri èllëg,  
nu xam ne ay yàlla ngeen.  
Defleen rekk lenn, muy lu baax di lu bon,  
ndax nu bokk ko gis, ba yéemu.  
24 Ma ne, yeen daal, dungeen tus;  
seen liggéey du dara,  
te ku leen taamu di ku seexluwu!»

25 Maa yékkatee nit bëj-gànnar,  
mu bawoo penkub jant,  
di tudd sama tur.  
Mooy note boroom dëkk ni ban  
mbaa binit bu defarkatu njaq di  
dëggaate.

26 Ana ku yéene woon lii ca njàlbéen,  
ba nu xam ko?  
Ku ko yégle woon bu yàgg,  
ba nu man koo dëggal?  
Yéeneesu ko, yégleesu ko  
te dëggesul seeni kàddu.

27 Waaye maa jëkka yégal Siyon  
ne leen: «Xool-leen, ñu ngii!»  
Maa indil Yerusalem ndaw lu indi xibaaru  
jàmm.

28 Xool naa xool ci tuur yi, gisuma kenn;  
du kenn ci ñoom ku ciy xelale,  
ba ma laaj ko, mu mana tontu.

29 Ñoom ñépp a ngoogu, tekkiwuñu tus.  
Seen liggéey, caaxaani neen,  
seen jëmme xërëm du dara, cólóolu kese.

## 42

### *Aji Sax ji yebal na jaamam*

1 «Xool-leen sama jaam bi ma yor,  
sama tànnéef, sama soppey xol,  
ci kawam laa teg samag noo,  
te mooy dogalal xeet yi yoonu àtte.

2 Du xaacu, du biral;  
du jibal baatam ci mbedd mi.

3 Bant bu lemu sax, du ko damm,  
leer gu giim it, du ko fey.  
Mooy indi yoonu dëgg.

4 Du toqi, du nasax,  
ba keroog muy dëj àtteb yoon fi kaw suuf,  
fa waa dun ya di séentu ndigalu  
yoonam.»

5 Yàlla Aji Sax ji dafa wax,  
moom mi sàkk asamaan, firi ko;  
tàllal suuf ak lu mu jur,

may noowal bakkan ñi ci kawam,  
ba ña cay daagoo di noyyi.

6 Mu ne: «Man Aji Sax ji, maa la woo cig  
njekk,

jàpp la ci loxo,  
sàmm la, def la ngay kóllëre sama digg ak  
nit ñi;

def la ngay leeru xeet yi,

7 ngay gisloo gumba,  
di génne ku ñu tëj,  
ku dëkke woon lëndëm, génn kërug  
tējukaay.

8 Man, Aji Sax jeey sama tur,  
sama teddnga, duma ko joxe,  
te sama bàkk, duma ko wacce jëmme tuur.

9 Mbir ya jiitoo ngoog, mat na;  
yu yees laa leen di yégal,  
balaa teew, ma yegge leen ko.»

### *Woyleen Aji Sax ji*

10 Woyleen Aji Sax ji woy wu yees,  
yeen waa cati àddina, kañleen ko,  
ànd ak ñiy wàcci géej ak li ci biiram,  
ak duni géej ak ña ca dëkke.

11 Na waa àll beeki dëkkam xaacoondoo,  
waa dalub Kedar  
ak waa Sela sarxolleendoo,  
kaw tund ya di riirum mbég!

12 Nañu delloo Aji Sax ji teddngaam,  
te biral bàkkam biir duni géej.

13 Aji Sax jeey waaxu ni jambaar,  
xabtalu ni ñeyu xare,  
àddu ca kaw, xaacu,  
tiime noon yi njambaaram.

### *Aji Sax ji soppi na*

14 Aji Sax ji nee: «Damaa yàgga xeremlu,  
ne cell, téye sama bopp.

Waaye léegi, ni kuy matu laay onke,  
di xiix ak a àppaat boole ca.

15 Maay tonni tund wu mag ak wu ndaw,  
lu cay gàncax, ma foom;  
ag dex, ma def ag joor;  
ab déeg, ma ñiisal.

16 Maay doxloo silmaxa yi  
ci yoon wu ñu xamul,  
ñall wu ñu miinul laa leen di jaarale.  
Maa leen di soppil lëndëm gi fi seen  
kanam, ag leer,  
fu ñagax, ma maasaleel leen.  
Lii laa leen di defal,  
te duma leen wacc mukk!

17 Ñi wóolu ay jëmmi tuur,  
naan jëmm yu ñu móol:  
“Yeenay sunuy yàlla,”  
dees na leen waññi, torxal leen.

18 «Yeen tëx yi, dégluleen;  
yeen silmaxa yi, xool-leen ba gis.

19 Ana ku silmaxa ku moy sama jaam bii?  
Ku tëx ba dab sama ndaw li ma yónni?  
Ana ku silmaxa ba dab kii ñu jàmmal?  
Ku silmaxa ba dab jaamu Aji Sax jii?

20 Gis nga lu bare,  
waaye jàppoo ci dara.  
Nopp ne kótt, dég-dég të!»

21 Aji Sax ji la soob ci njekkam,  
mu fésal màggaayu yoonam ak taar ba.

22 Waaye ñu ngii di xeet wu ñu futti,  
sëxëtoo;  
ñépp tëje ciy pax,  
dence ci kəri tëjukaay,  
ñu doon alalu xare  
fu leen kenn dul xettlee,  
xanaa ñu di leen sëxëtoo,  
te kenn du ne ñu delloo leen.

23 Ana kan ci yeen mooy dékk lii nopp?  
Kuy teewlu, ba doxe fa dégg?

24 Ana ku jébbal Yanqóoba futtikat yi,  
ku jox Israyil gii, sëxëtookat yi?  
Xanaa du Aji Sax ji nu tooñ?

Ñoo baña topp ay yoonam,  
baña sàmm ndigalu yoonam,  
25 ba mu yuri leen tangooru sànjam,  
sotti leen tar-taru xare,  
mu jafal wetoo wet, te taxul ñu xam,  
xoyom na leen te bawuñu ci xel.

### 43

#### *Jotkatub Israyil kenn la*

1 Léegi nag yaw Yanqóoba,  
yaw Israyil mii,  
Aji Sax ji la sàkk tabax la, dafa wax ne:  
«Bul tiit, jot naa la.  
Dama laa woo ci sa tur.  
Maa la séddoo.

2 Booy xuus cim ndox,  
maa ngi ànd ak yaw;  
ag dex du la mëdd.  
Booy dox cib taal, doo lakk,  
sawara du la xoyom.

3 Man Aji Sax ji, maay sa Yàlla;  
man Aji Sell ju Israyil,  
maa lay musal.

Maa joxe Misra, feye la;  
ak Kuus ak Seba, ma weccikoo la.  
4 Fonk la, teral la ak sopp la,  
moo tax ma joxey nit, weccikoo la;  
ay askan dee, wuutu sa bakkan.

5 Bul tiit, yaw laa àndal,  
maay jële saw askan penku,  
dajalee leen sowub jant.

6 Maa naa bëj-gàннаar: “Èsi!”  
ne bëj-saalum: “Bul téye!”  
Jëleel sama doom yu góor fu sore,  
déllóosi,  
te jëleji sama doom yu jigéen fa cati  
àddina.

7 Déllóosil képp ku ñu ma tudde,  
te sama màqaama tax ma sàkk ko,  
tabax ko, sottal ko.»

8 Indileen ñii diy silmaxa te ami gët;  
tëx te ami nopp.

9 Na xeet yépp daje,  
askan yépp teewandoo.  
Ana ku nu ci yégaloon lii xew,  
mbaa mu xamal nu la wees?  
Na seen seede teew, déggal leen;  
ba ñu dégg leen, ne noonu la.

10 Yeen sama ñoñ, yeenay samay seede.  
Kàddug Aji Sax jee.  
Yeenay sama jaam bi ma taamu,  
ngir ngeen xam, ba gëm ma,  
ba ràññee ne maay moom.  
Sàkkeesul yàlla ju ma jiitu,  
mbaa ju may wuutuji.

11 Aji Sax ji, mennum man a;  
amul jotkat bu ma moy.

12 Maa dogal ag njot, sottal ko, biral ko,  
ba tuuru doxandéem nekkagul seen biir.  
Yeen nag, yeenay samay seede.  
Kàddug Aji Sax jee.

Man maay Yàlla,  
13 maa masa doon kenn ki,  
te sama loxo, maneesu cee musle.  
Su ma defee, kuy dindi?

14 Aji Sax jiy seen jotkat,  
Aji Sell ju Israyil dafa wax ne:  
«Yeenay tax ma yebal ku songsi Babilon,  
ba dàjji lu fay tëjukaay,

\* 43:14 43.14 Tekkitel aaya bii am na werante.

ba xaxalooy Kaldeen ñooñu diy jooyoo\*.  
 15 Maay Aji Sax ji, seen ku Sell ki;  
 maa sàkk Israyil, di seen buur.»

16 Aji Sax ji dafa wax,  
 moom mi sàkk yoon biir géeej,  
 rëddu xàll, digg mbeex mu ne xéew;

17 xabtal watiiri xare aki fas,  
 ak gàngooru ñeyi xare,  
 ñu bokk tëdd, jógatuñu,  
 xanaa fey kamaj nib làmp.

18 Mu ne: «Buleen geesu la woon,  
 buleen seet ca la wees.

19 Maa ngii di def lu yees,  
 te mu ngii di feeñ xaat!  
 Ràññeewuleen koo?  
 Biir màndiñ mi kay laay xàllu yoon;  
 fa ne sereñ, ma walal ay dex;

20 dundooti àll bi di ma sàbbaal,  
 ñook njabootug bànjóoli,  
 nde maa mayem ndox fi màndiñ mi,  
 dex ya wale fu noon sereñ,  
 ma nàndale sama ñoñ, sama tànnéef,  
 21 xeet wii ma bindal sama bopp,  
 te ñooy siwal sama woy.»

22 Moona Yanqóoba, woowuloo ma,  
 yaw Israyil laa ne, sàppi naa la.

23 Du xar mu ndaw moo ma defal saraxu  
 rendi-dóomal,  
 mbaa sarax yoo ma terale,  
 te du sarax su ma la teg it,  
 mbaa saraxu cuuraay bu ma la sonale.

24 Du xalis boo ma jëndale barax bu  
 xeeñ,  
 du nebbonu sarax boo ma reggale.  
 Xanaa lakkal maak say bàkkaar,  
 sonal maak say ñaawtéef.

25 Mennum man mii maay far say moy  
 ngir man,  
 ba dootuma fàttliku bàkkaar.

26 Fàttli ma saw lay, nu bokk layoo;  
 waxal boog yaw, ndax nga yey!

27 Sa maam a jékka bàkkaar,  
 ñi lay teewal teg ca gántal ma,

28 ba tax ma sobeel kilifay kër gu sell gi,  
 araamal Yanqóoba,  
 wacce Israyil ñaãñi noon.

## 44

### *Aji Sax jee mat cëslaay*

1 Yaw Yanqóoba, sama jaam bi, déglul  
 boog,

yaw Israyil sama tànnéef laa wax.

2 Aji Sax ji dafa wax, moom mi la sàkk,  
 mooñ la fa sa biiru ndey,  
 di la dimbali.

Mu ne: «Yaw Yanqóoba sama jaam bi,  
 yaw Yesurun sama tànnéef laa wax,  
 bul tiit.

3 Maay sottom ndox suuf su mar,  
 ak wal yu waleg joor gu wow.

Maay sotti saw askan samag noo,  
 sama barke sottikul ñi nga meññ,

4 ñu màgg ni garabu saabsaab,  
 nirook garab yu mag yu feggook ndox.

5 Kii nee: “Aji Sax jee ma moom.”

Kee di tuddoo turu Yanqóoba,  
 kale bind ca loxo ba: “Maa ñeel Aji Sax  
 ji,”

tey wuyoo turu Israyil.»

### *Aji Sax ji dëkk na yállantu yi*

6 Aji Sax ji dafa wax,  
 moom buurub Israyil, jotkatam,  
 Aji Sax ji Boroom gàngoor yi,  
 mu ne: «Maa jëkk, maa mujj,  
 te yàlla amul ndare man.

7 Ana ku mel ni man? Na àddu!  
 Na biral firndeem te taajal ma

la amoon ba may sos xeet wu yàgg  
 wa,  
 ak li dikkagul.

Na ko wax!

8 Buleen tiit, buleen ragal.

Dama leena biralul lii bu yàgg, yégal leen  
 ko?

Yeenay samay seede.

Yàlla daa am ju ma moy?

Cëslaay amul, xawma ci kenn!»

9 Képp kuy tabax jëmme tuur, doo tus,  
 xërëm yooyu ñu safoo amul njariñ.

Ñooñu ñu defi seede  
 te gisuñu, yéguñu,  
 muy seen gâce!

10 Sàkk sam tuur,  
 móol sa jëmme tuur,  
 te jariñu la tus!

11 Képp ku ca bokk

sa gâce lay doon,

ña koy yett sax ay nit donñ lañu.

Nañu daje ñoom ñépp, taxaw,

bokk tiitaangeek gâcee.

<sup>12</sup> Ab tëgg jël jumptukaayam,  
liggéey weñ ca taal ba,  
wàkka wàkk, jëmmal;  
def ci kem kàttanam,  
teg ca xiif, doole jeex,  
naanul it ba tax mu loof.

<sup>13</sup> Liggéeykatu bant tàllal buumu nat-  
tukaay,

jël kew, nataale,  
xacc, rëdde rëddukaayu wërngal,  
jox ko bindu nit,  
jekkal ba mu mel ni nit,  
nar koo fat cib néeg,

<sup>14</sup> ba tax mu gor garabi seedar,  
sàkk banti sippar ak yu ni mel,  
tànn ci garabi gott bi,  
mbaa mu jëmbat garab yu dëkke naat,  
ab taw màggal,

<sup>15</sup> nit xambe, sàkk ci, jaaroo;  
taal, lakke mburu;  
sàkkaale ci jëmmu tuur, sujjóotal ko,  
muy jëmm ju mu defar, di ko sukkal;

<sup>16</sup> xaaju matt ma lay taal,  
toggew yàppam, lekk,  
wàjj, xéewloo ba suur,  
jaaruwaale te naan:

«Mii njaar mu neex!  
bii tàkk-tàkk bu yànj!»

<sup>17</sup> Ndesu matt ma lay sàkke jëmmu tuu-  
ram,

sukkal ko,  
sujjóotal ko, ñaan ko, naa:  
«Yaay sama Yàlla, xettli ma!»

<sup>18</sup> Ñii xamuñu, xàmmeewuñu,  
seeni gèt lañu lëndemal, ba gisatuñu;  
fatt seenum xel, ba xelootuñu.

<sup>19</sup> Ku mel nii du délloosim xelam,  
ba xam, ràññee ne:

«Xaaju matt mi laa taal,  
lakke mburu,  
wàjje yàpp, lekk;  
mu des, ma di ko sàkke lu seexluwu lii?  
Ab dogu bant laay sukkal?»

<sup>20</sup> Kee di jur gu fore ab dóom,  
xelam nax ko, sànk ko.  
Du keey musal bakkanam de!  
Du kee naa: «Xanaa duy caaxaan laa  
ñàbb nii?»

<sup>21</sup> Aji Sax ji nee: «Yanqóoba, baal xel ci  
lii!

Ma ne Israyil, fàttlikul, yaa di sama jaam!  
Ma bind la, ngay sama jaam,  
yaw Israyil, дума la fàtte!

<sup>22</sup> Maa far say moy, mu naaxsaay niw niir,  
say bàkkaar ne mes nib lay.

Délsil fi man, jot naa la.»

<sup>23</sup> Asamaan, sarxolleel, Aji Sax ji dikk na!  
Yeen xóotey suuf, xaaculeen!

Yeen tund yi, neleen réllet, sarxolleen-  
doo,

ak yaw gott beek sa bépp garab!  
Aji Sax jee jot Yanqóoba,  
te moom Israyil lay fésale darajaam.

### *Dees na dëkkewaaf Yerusalem*

<sup>24</sup> Aji Sax ji sa jotkat dafa wax,  
moom mi la bind ba ngay sosu,  
ne: «Man maay Aji Sax ji sàkk lépp.

Man donj maa tàllal asamaan,  
lal suuf, kenn wéttaliwu ma ca.

<sup>25</sup> Maay neenal firndey maaman,  
dofloo gisaanekat.

Maay weddi fóore,  
def xam-xamam mu dig ndof.

<sup>26</sup> Maay dëggal sama kaddug jaam,  
di sotal sama ndéeyal ndaw.

Maa naan ci Yerusalem:

“Dees na ko dëkke,”  
dëkki Yuda, ma ne:

“Dees na leen tabaxaat,  
ma dekkali gentam bi.”

<sup>27</sup> Maa naa xóotey mbeex mi: “Wowal,  
te maay ñiisal say dex.”

<sup>28</sup> Maa naa ci Sirius: “Sama sàmm bi!”

Mooy matal sama bépp nammeel,  
te it moo naa ci Yerusalem:

“Nees ko tabaxaat,”  
kër gu sell gi, laa ne:

“Nees ko yëkkatiwaat!”»

## 45

### *Aji Sax ji dooleel na Buur Sirius*

<sup>1</sup> Aji Sax ji dafa wax ki mu fal,  
Buur Sirius mi mu jàpp ci loxol ndijooram,  
ngir nangulal ko xeet yi,  
yolomal ngañaayal buur yi,  
lafal koy bunt,

ba bunti dëkk du tëje,

<sup>2</sup> mu ne: «Man maa lay jiiu,  
maasale mbartal,

rajaxe buntu xàñar,  
damm tëjukaayu weñ.

<sup>3</sup> Maa lay jagleel denc yu loq,  
ak alal ju làqe,  
ba nga xam ne maay Aji Sax ji lay wooye  
sa tur,  
man Yàllay Israyil.

<sup>4</sup> Te Yanqóoba sama jaam bi,  
Israyil moomu di sama tànnéef moo tax  
ma wooye la saw tur,  
takkal la ndombol tànki,  
te xamuloo ma.

<sup>5</sup> Aji Sax ji man a, du keneen;  
kenn du yàlla ku dul man.

Maa la gemb,  
te xamuloo ma,

<sup>6</sup> ngir xamees penku ba sowu,  
ne lu dul man neen la.

Aji Sax ji man a, du keneen.

<sup>7</sup> Maay bind leer,  
di def lëndëm.

Maay indi jàmm,  
di def safaan.

Maay Aji Sax jiy def lii lépp!

<sup>8</sup> Na asamaan wis-wisal,  
niir yuri njekk,

suuf fett, meññal wall,  
boole ci jebbil njekk.

Man Aji Sax ji, maa def lii!»

<sup>9</sup> Wóoy ngalla kuy diinjat ka la tabax  
te di ndabal xandeer ci biir ndabi xan-  
deer!

Ana ban ak di wax tabaxkatam,  
naa ko: «Looy def nii?

Yaw amulooy loxo.»

<sup>10</sup> Wóoy ngalla ku naan baayu nit,  
«Moo, lu sa geño meññ nii?»

Mbaa ku naan ndeyu nit,

«Li nga wasin lu mu?»

<sup>11</sup> Aji Sax ji, Aji Sell ju Israyil dafa wax,  
moom mi ko bind,  
mu ne: «Lu dikkagul, nu ngeen ma ko  
ñemee laaje;

am dangeen may jox ndigal ci samay  
doom,

jox ma ko ci li ma liggéeye samay loxo?

<sup>12</sup> Man maa amal suuf,  
sàkk doom aadama fi kaw suuf.

Man mii la samay yoxo firi asamaan,  
te maay jox gàngoori asamaan lépp ndi-  
gal.

<sup>13</sup> Man maay yékkati Sirius ci biir njekk,  
xàllu yoonam.

Moom mooy tabax sama dëkk,  
yiwi sama ñoñ ñi ñu toxal,  
te du laaj pey mbaa neexal.»  
Aji Sax ji Boroom gàngoor yee ko wax.

<sup>14</sup> Aji Sax ji dafa wax ne:

«Muy ñaqu Misra, di koomu waa Kuus,  
ak waa Seba, ya ne sireet ca kaw,  
ñoom ñépp ay jàllsi, nga jagoo.

Sa gannaaw lañuy topp,  
yeewe, jàllsi;

sujjóotal la, di ñaan naan:

“Fi yaw daal la Yàlla ne,  
du feneen,

te tuur neen la.”»

<sup>15</sup> Yaw déy, yaa di Yàlla ju làqu,  
yaw Yàllay Israyil ji koy wallu.

<sup>16</sup> Yettkati xèrèm yaa ngoogu, rus,  
torox, riixleendoo.

<sup>17</sup> Israyil, yaay mucc fa Aji Sax ji  
mucc gu sax dàkk!

Doo rus, doo torox  
fii ak èllëg.

<sup>18</sup> Aji Sax ji kat dafa wax,  
moom mi sàkk asamaan,  
moom Yàlla mi bind suuf,

tabax ko, dëj ko,  
sàkkewu ko maraas,

xanaa tabaxal ñu ko dëkke.  
Mu ne: «Aji Sax ji, man a, du keneen.

<sup>19</sup> Làquwma, di waxe bérab bu lëndëm.  
Newuma it askanu Yanqóoba:

“Sàkkuleen ma fu dara amul.”  
Man Aji Sax ji maay wax dëgg,

di biral njub.»

<sup>20</sup> Yeen daw-làquy xeet yi,  
dajeleen, dikk,

ànd, jegesi.

Képp ku gàddu tuuru bantam,  
ak kuy ñaan tuur mu ko dul wallu,  
kooka xamul dara.

<sup>21</sup> Adduleen, layoosi,

diisooleen fi seen biir kay!

Ana ku xamle woon lii bu yàgg,  
yégle woon ko booba?

Xanaa du man Aji Sax ji?

Kenn du Yàlla ku dul man!

Yàlla ju jub, di walloo,

du kenn ku dul man!

<sup>22</sup> Yeen waa àddina, catoo cat,

walbatikuleen fi man, mucc.  
Man maay Yàlla, du keneen.

<sup>23</sup> Giñ naa ko ci man mii,  
sama gémmiñ njekk a ciy jibe,  
di kàddu gu dul randu.

Man la ñépp di sukkal seen bëti óom,  
man it la bépp boroom làmmiñ di giñe.

<sup>24</sup> Dees na ma waxal ne:  
«Aji Sax ji rekk a jagoo njekk ak doole!»  
Mboolem ñi ma mereey ànd,  
sëgg, fekksi ma.

<sup>25</sup> Ci Aji Sax ji la askanu Israyil gépp yeye,  
bay damu.

## 46

### *Yü yàlla bootu, jii Yàlla di boote*

<sup>1</sup> Tuur ma ñu naa Bel toqi na,  
tuur ma ñu naa Nebo sukk,  
mala ya féetewoo seeni jëmm,  
ñoom lees daan gàddu\*, tey jur gi jagoo,  
di leen sëf ba loof.

<sup>2</sup> Tuur yaa ngay sukk, bokk toqi;  
manuñoo wallu seen jëmm ya,  
xanaa doxal seen bopp, duggi ngallo.

<sup>3</sup> «Dégluleen yeen waa kër Yanqóoba,  
yeen ndesu kër Israyil gépp,  
yeen ñi ma dale yor ba ngeen juddoo,  
di leen fab ba ngeen génnee seen biiru  
ndey.

<sup>4</sup> Ba ba ngeen di magal, man la,  
ba keroog ngeen di bijjaaw, maa leen di  
boot.  
Maa sàkk, maay yor,  
maay boot, xettli!

<sup>5</sup> «Ana ku ngeen may niruleel,  
di ma nàttaleek a méngaleek moom,  
ba ñu niroo lenn?

<sup>6</sup> Nii déy a yullee wurus ci mbuus,  
sàkk xalis, natt diisaay ba,  
fey tegg bu leen ci teggam am tuur  
mu ñuy sukkal ak a sujjóotal,

<sup>7</sup> yékkati teg ci mbagg,  
yóbbu, teg bérab, mu des fa;  
du jóge fa mu tege,  
ku ko woo wall it, du wuyu,  
ba jot ko ci njàqare.

<sup>8</sup> Fàttlikuleen lii te dëgërluwaat!  
Yeen bàkkaarkat yi, defleen lii ci seen xel.

<sup>9</sup> Fàttlikuleen cosaan la woon.  
Man mii maay Yàlla, du keneen.  
Amul Yàlla ju mel ni man!

<sup>10</sup> Maay yégle muj ca ndoorte la,  
ak jëf ju amagul, lu jiitu bu yàgg.  
Maa naa sama mébét a ngi, day am,  
sama bépp nammeel sotti.

<sup>11</sup> Maay wooye jaxaay penku,  
wooye réew mu sore, kuy sottal sama  
mébét.  
Maay àddu, amal;  
maay nas, sottal.

<sup>12</sup> «Dégluleen maa, yeen dëgër bopp yi!  
Yeenaka dëddu njekk!

<sup>13</sup> Maa jegeñal sama njekk, soreetul;  
sama wall a ngi, yàggatul.  
Maay maye wall fi Siyon gii,  
ba Israyil gii di sama gànjar.»

## 47

### *Babilon falu, fēlēnu*

<sup>1</sup> Yaw janq Babilon,  
wàccal, toog ci pënd bi.  
Yaw dëkkub Kaldeen bi ci taar bi laa ne,  
toogal fi suuf, amatoob jal.  
Dootoo dégg «Lewet, xay.»

<sup>2</sup> Fabal wolukaay, wol sunguf.  
Dindil sa muuraay gi,  
wogos sa mbubb,  
ëñ sas kumba,  
xuus, jàll dex yi.

<sup>3</sup> Na sa yaram feeñ,  
say cér ne fàṅṅ.  
Damay feyu,  
te дума bale.

<sup>4</sup> Sunu jotkat ay Aji Sax ji Boroom gàngoor  
yi,  
Aji Sell ju Israyil.

<sup>5</sup> Yaw dëkkub Kaldeen bi ci taar bi,  
toogal ne cell te fatu cig lëndëm,  
deesatu la wooye lingeeru réew yi.

<sup>6</sup> Maa mere woon sama ñoñ,  
sobeel sama séddoo ñii,  
teg leen ci sa loxo,  
te wonoo leen yërmande,  
ba mag sax, nga teg ko lu diisa diis,

\* **46:1** 46.1 Waa Babilon a doon gàddu seeni tuur, gannaaw ba leen Buur Sirus songee.



7 te naa: «Ba fàww maay lingeer!»  
 ba tax bàyyiwoo xel ca la ngay def;  
 xalaatoo la muy jur.  
 8 Diryànke bee, déglul lii:  
 Yaa ngi ne finaax te naa ci sam xel:  
 «Maa ko yor, man rekk, du keneen.  
 Duma jooy jëkkër, duma jooy doom!»  
 9 Te yaar yooyoo lay dikkal ci benn bés.  
 Jooy doom, jooy jëkkër ay yembandoo,  
 dal fi sa kaw ci sa biir xërëmtu yi ne xas,  
 ak sa jat yu dul jeex.  
 10 Dangaa yaakaaroon sa pexe yu bon,  
 naan, «Kenn gisu ma!»  
 Sam xel ak sa xam-xam a la wacc,  
 ba tax nga naa: «Maa ko yor, man rekk.»  
 11 Musibaa lay dikkal,  
 te doo xam fu mu fenke.  
 Njaaxum a lay dal,  
 te du looy mana fanq.  
 Sànkuteey jekki dale la foo yégu.

12 Jàppool say jat rekk  
 ak sa xërëm yu ne xas  
 yoo dale sonn ba ngay ndaw.  
 Jombul mu amal la njariñ,  
 mbaa ñu ragale la ko.  
 13 Yaaka sonn ci tegtali maa-man!  
 Nañ taxaw boog, wallu la!  
 Ñii di rédd nataalu asamaan,  
 di niiri biddiww,  
 ak di xool weer wu feeñ,  
 xamle ca loo dikkleegul.  
 14 Ñu ngoog bokk ak boob bu sawara jafal,  
 demin,  
 duñu musal seen bakkan ca sawara sa,  
 te du doon ab taal bu ñuy lakke mburu  
 mbaa xal sooy uuf di jaaru.  
 15 Lii moo di muju ña la taxoon di sonn.  
 Ña nga dale jëflanteel ba ngay ndaw,  
 ña ngay tambaambalu tey, ku nekk ak  
 yoonam,  
 kenn walluwu la ci.

## 48

### *Yàlla sikk na Israyil*

1 Yeen waa kër Yanqóoba, dégluleen;  
 yeen ñi ñu wooye turu Israyil,  
 yeen ñi bawoo bëti ndoxi Yuda,  
 di giñe turu Aji Sax ji,  
 yeen ñiy sàbbaal turu Yàllay Israyil  
 te dëgg ak njekk taxul,

2 moona yeena ngi sagoo turu dëkk bu sell  
 bi,  
 di wéeroo Yàllay Israyil  
 ji turam di Aji Sax ji Boroom gàngoor  
 yi.  
 3 Yàgg na maa biral lay jëkka am.  
 Tuddoon naa ko, yégle ko,  
 jekki jëf ko, mu sotti.  
 4 Xam naa ne ñu dëgër bopp ngeen.  
 Dangeen të, wowle.  
 5 Moo tax ma yàgg leena biralal lii,  
 yégal leen ko balaa teew.  
 Lu ko moy ngeen ne:  
 «Sunu tuur mee ko def,  
 sunu tuuru bant bee,  
 sunu tuuru weñ gee ko amal di!»  
 6 Lii lépp déggoon ngeen ko;  
 xool-leen, xanaa dingeen ko nangu tey!

Bés niki tey dinaa leen yégal lu bees,  
 muy kumpa gu ngeen xamul woon.  
 7 Léegi lees ko amal,  
 du lu yàgg.  
 Lu jiitu tey masuleen koo dégg  
 te dungeen ne xamoon ngeen ko.  
 8 Dégguleen, yéguleen,  
 seeni nopp masula bënn;  
 xam naa ne ay workati neen ngeen,  
 «njuddu-fippu» lañu leen di wooye.  
 9 Waaye sama tur tax na ma aj sama mer,  
 sama woy tax na ma muñal leen,  
 ba duma leen fàkkas.  
 10 Ma ne, togg naa leen, xelli cib taal,  
 waaye du taal xellikaayu xalis,  
 sawaras nattu laa leen xellee.  
 11 Samaw tur a tax,  
 sama tur laay jëfe.  
 Jomb naa ñaaw!  
 Te sama teddnga, duma ko joxe.

12 Dégluleen ma, yeen askanu Yanqóoba,  
 yeen bànni Israyil gi ma dégtal sama  
 woote.  
 Maay kenn, maa jëkk te maa mujj;  
 13 te sama loxo bee dëj suuf,  
 sama ndijoor bi firi asamaan.  
 Maa leen di woo, ñu bokk taxaw.  
 14 Bokkleen daje yeen ñépp te déglu!  
 Kan ci tuur yii moo yégle lii?  
 Ki Aji Sax ji sopp

mooy sottal nammeelu Aji Sax ji ci Babilon,  
won Kaldeen ña fa dëkke diisaayu loxoom.

<sup>15</sup> Maa àddu, man mii;  
maa ko woo, indi ko,  
te pexeem dina joy.

<sup>16</sup> Jegesileen ma, déglu ma;  
bu jëkk ba tey làquwma, di wax;  
te ba muy xew, fa laa teew.

Tey Boroom bi Aji Sax ji da maa yebal boole maakam xelam.

<sup>17</sup> Aji Sax ji seen jotkat dafa wax,  
Aji Sell ju Israyil da ne:  
«Maay Aji Sax ji, seen Yàlla  
ji leen di jàngal seen njariñ,  
di leen awale fa ngeen wara awe.

<sup>18</sup> Céy su ngeen sàmmoon samay sannaane,  
ba jàmm baawaanal leen,  
njekk géegal leen,

<sup>19</sup> seen geño sakkan ni suuf,  
di seen meñneefu biir, tollook feppi suuf,  
du dog, du sànkoo fi sama kanam!

<sup>20</sup> «Génneen Babilon,  
dawleen Kaldeen ñi, tey sarxolle.  
Biral-leen lii, yéene ko,  
te yeggeji ko waa cati àddina,  
ne leen Aji Sax ji jot na jaamam  
Yanqóoba.

<sup>21</sup> Marewuñu bérab yu wow ya mu leen jaarale woon,  
ndox mu balle ciw doj la leen xellil,  
moo xaru doj, ndox ma baawaan\*.

<sup>22</sup> Jàmm,» la Aji Sax ji wax ne,  
«du ñeel ñu bon ñi.»

## 49

### *Surgab Aji Sax ji mooy leeru xeet yi*

<sup>1</sup> Yeen waa duni géej, dégluleen ma;  
yeen askan ya fu sore, teewluleen ma.  
Fa sama biiru ndey la ma Aji Sax ji wooye,  
moo tudd sama tur ba ma saa ndey juragul.

<sup>2</sup> Moo ñawal sama kàddu ni saamar,  
làqe ma keru loxoom.  
Moo ma def may fitt gu ñaw,

\* **48:21** 48.21 Seetal ci *Mucc ga* 17.1-7.

yeb ma ci mbuusum fittam.

<sup>3</sup> Moo ma ne: «Israyil yaa di samab jaam,  
yaw laay wonee samag leer.»

<sup>4</sup> Man nag ma noon:  
«Maa sonn ci dara,  
coonob cóolóol bu amul njariñ.»  
Teewul sama àttee nga fa Aji Sax ji,  
sama yool a nga fa sama Yàlla.

<sup>5</sup> Tey Aji Sax jee wax,  
moom mi dale sama biiru ndey,  
mooñ ma, ma dib jaamam  
bi koy wañnil askanu Yanqóoba ba ca moom,

dajaleel ko bànni Israyil googu fa moom,  
ba jagoo teraangay Aji Sax ji,  
sama Yàlla jii di sama doole.

<sup>6</sup> Mu ne: «Xeeb naa li ma la sas ngay sama jaam  
biy siggil giiri Yanqóoba,  
te wara délloosi ndesu Israyil gii.  
Tabb naa la, ngay leeru xeet yi,  
di jotale waa cati àddina sama wall.»

<sup>7</sup> Aji Sax ji jotkatub Israyil,  
moom ku Sellam ki,  
moo wax ak ki xeet yi xeeb, sib ko,  
te muy surgawu kilifa yi,  
mu ne ko: «Ay buur ay gis, jóg,  
ay kàngam di sukk,  
ngir Aji Sax ji boroom worma,  
ngir Aji Sell ju Israyil ji la taamu.»

<sup>8</sup> Aji Sax ji dafa wax ne:  
«Bu bésub yiw taxawee, ma nangul la;  
bu bésub mucc jotee, ma wallu la,  
sàmm la,  
def la ngay kóllère sama digg ak askan wi,  
ngir yékkatiwaat réew mi,  
séddalewaat ay cér, suuf sii gental tey,  
<sup>9</sup> ba ne ñi ñu tëjoon: “Génneen!”

Fa ñu nekkoon cig lëndëm,  
laa naa leen: “Génneen ci leer gi!”  
Ñooy doon sama gàtt, dellu di fore aw ñall,  
ak wépp tund wu ne faraa tey.

<sup>10</sup> Duñu xiif, duñu mar;  
tàngooru mbóoya akub jant du leen sonal,  
nde ki leen ñeewantee leen di wommat,  
di leen yóbbu fu ndox bënne.

<sup>11</sup> Sama tund yépp laay soppiy yoon,

sëkkaat samay mbedd.

<sup>12</sup> Ñu ngiy bawoo fu sore,  
ñu ngii bawoo bëj-gànnar ak sowu,  
ñee bawoo diiwaanu Sinim ca bëj-  
saalum.»

<sup>13</sup> Asamaanoo sarxolleel, suufoo bégal,  
te tund yi xaacoondoo!  
Aji Sax jee dëfal ñoñam,  
moo ñeewante néew-ji-dooleem ñii.

<sup>14</sup> Siyoŋ a nga naa: «Aji Sax ji wacc na nu,  
Boroom bi fàtte na nu!»

<sup>15</sup> «Ana jaboot juy fàtte doomam juy  
nàmp,

mbaa muy néege ku mu jur ci biiram.

Bu ko manona fàtte it,  
man duma la fàtte.

<sup>16</sup> Sama biir loxo yii laa la ñaas,  
say tataa janook man ba fàww.

<sup>17</sup> Ñi lay tabaxaat dañuy gaaw,  
te ñi la yàqteek ñi la gental  
dañuy dem, ba la.

<sup>18</sup> Séentul fi la wër te xool!  
Ñépp a ngi daje, di la fekkxi.  
Ndegam maay Kiy Dund,»  
kàddug Aji Sax jee,  
«ñoom ñépp ngay takkoo ni gànjar,  
gooy gànjaroo nib séet.

<sup>19</sup> Sa gentub tey bi déy a ngi wéet,  
di réew mu yàqu yaxeeet.  
Waaye léegi déy mu fees ba far xat;  
fu ña la sànkoon di soree.

<sup>20</sup> Ñàkkoon ngay doom,  
waaye ku nekk ci say doom ay dëkkalaat  
yii kàddu ci sab nopp:

“Fii dafa xat,  
xajal ma, fu ma dëkke!”

<sup>21</sup> Dangay mujj naa:

“Moo, ku ma jural ñii ñépp?  
Man mi ñàkkooni doom, manumaa jur,  
ñu toxal ma, wacc ma;  
ana ku leen yoroon te ma des, man kenn?  
Ñii sax, fu ñu ne woon?”»

<sup>22</sup> Boroom bi Aji Sax ji dafa wax ne:  
«Maa ngii di tàllal xeeti jaambur ñi loxo,  
ñee ma yékkati raaya, wooye leen;  
ñu fab say doom yu góor, indi,  
tungóom sa doom yu jigéen, délloosi;

<sup>23</sup> Yaw la ay buur di baayoo,  
seeni lingeer di la nàmpal.

Ñoo lay sujjóotal,

di la maral say tànk,  
ba nga xam ne maay Aji Sax ji,  
te ku ma yaakaar du rus.»

<sup>24</sup> Manees naa foqati alalu sëxëtoo ci loxol  
jàmbaar a?  
Am manees naa rëcc boroom doole bu la  
jàpp?

<sup>25</sup> Aji Sax ji déy dafa wax ne:  
«Moona dees na foqati ku jàmbaar jàpp,  
ba rëccal alalu sëxëtoob boroom doole.  
Say jotewaale, maay joteek ñoom,  
te say doom, maa leen di wallu.

<sup>26</sup> Ñi lay néewal, maa leen di leel  
seen suuxu bopp.  
Seen deret ni biiñ bu bees, ma màndale  
leen,

ba kuy boroom suux xam ne  
maay Aji Sax ji lay wallu,  
jàmbaaru Yanqóoba ji lay jot.»

## 50

### *Aji Sax ji waccul ñoñam*

<sup>1</sup> Aji Sax ji dafa wax ne:  
«Damaa fase seen ndey?  
Wonleen ma kayitu pase mi!  
Maa leen jaay njaam, feyey bor?  
Ana ku ma leen jaay?  
Bu ñu leen jaayee, seeni ñaawtéef a.  
Bu ñu fase woon seen ndey it, seeni moy  
a.

<sup>2</sup> Ana lu tax ba ma dikkee, kenn nekku fa?  
Ma woote, kenn wuyuwul?  
Damaa gàtta gàtt loxo, ba manumaa  
walloo?

Am damaa ñàkk doole ju ma xettlee?  
Xanaa du maay gëdd géej, mu wow,  
maay defi dex màndiŋ, ndox tukki;  
jën ya mar, dee ba yàqu?

<sup>3</sup> Du maay sànge asamaan ag lëndëm,  
mu mel ni ku ma solal saaku yu muy  
ñaawloo?»

### *Siggal nañu jaamub Aji Sax ji*

<sup>4</sup> Boroom bi Aji Sax ji moo ma may  
làmmiñu ndongo lu mokkal,  
ngir ma xam gan kàddu laay jàpplee ku  
sonn.

Suba su ne mu yee ma, yeel ma nopp  
bu ma teewloo ni dongo yi.

<sup>5</sup> Boroom bi Aji Sax jee ma bënnali nopp,  
te man it, gântalu ma ko,

deltuwma gannaaw.

<sup>6</sup> Gannaaw laa jox ku may dóor,  
dékk lex kuy xus sama sikkim,  
te làquma sama kanam  
ku may saagaak a serati.

<sup>7</sup> Waaye Boroom bi Aji Sax jee may dim-  
bali,

ba tax rusuma.

Moo ma taxa dogu ba dëgër,  
ngir xam naa ne deesu ma rusloo.

<sup>8</sup> Ki may dëggal jege na.

Ana kuy layook man? Nan bokk taxaw!  
Kuy jànkoon teek man ci yoon? Na jegesi  
boog!

<sup>9</sup> Ma ne, Boroom bi Aji Sax jee may  
dimbali.

Ana ku may daan?

Dama ne, ñoom ñépp ay jeexal  
ni yére yu saxe ba sagaroo.

<sup>10</sup> Ana ku ragal Aji Sax ji ci yeen,  
di déglu kàddug jaamam?

Képp kuy doxe lëndëm  
te amul leeraange,  
na wóolu Aji Sax ji,  
te wéeroo Yàllaam jii.

<sup>11</sup> Ma ne, yeen ñiy jafal ab taal ñépp  
tey gañoo jum yuy boy,  
xuusleen ci sawara si ngeen jafal  
ak jum yi ngeen boyal.  
Maa leen dogalal lii:  
yeenay téddeale mitit.

## 51

### *Barke ñeel na ñoñu Aji Sax ji*

<sup>1</sup> Dégluleen maa, yeen ñiy wut njekk,  
di sàkku Aji Sax ji.

Xool-leen doj wi ñu leen yette,  
xool xóotey kàmb gi ñu leen seppee:

<sup>2</sup> Seen maam Ibraayma laa ne, moom  
ngeen di xool,

xool ci Saarata mi leen meññ.

Ba muy kenn laa ko woo,  
barkeel ko, ful ko.

<sup>3</sup> Aji Sax jeey dëfal Siyon moos,  
dëfalaale fépp fu fa dib gent,  
ba def màndinam ni toolub Àjjana,  
jooram gu wow mel ni toolub Aji Sax ji,  
mbégteek bannex teew fa,  
ak cant gu woy feelu.

<sup>4</sup> Yeen sama ñoñ, teewluleen ma,  
yeen sama ñoñ, dégluleen ma.  
Fi man la téreb yoon di bawoo,  
te maay fettaxal sama àtte,  
muy leeru xeet yi.

<sup>5</sup> Sama wall jege na,  
sama njekk dëgmäl na,  
ma nara àttee xeet yi sama dooley përeg.  
Man la waa dun yiy xaar,  
sama dooley përeg lañu yaakaar.

<sup>6</sup> Séentuleen asamaan  
te xool suuf si mu tiim.  
Asamaan ay tasaaroo ni saxar,  
suuf ràpp ni mbubb,

ñi ko dëkke dee niy weñ,  
te du tee sama wall di sax ba fàww,  
sama njekk it du dagg.

<sup>7</sup> Yeen ñi xam njekk, dégluleen ma,  
yeen, askan wi sama yoon yebu ci seen  
xol.

Buleen ragal nit ku leen sewal,  
buleen tiit seeni xaste.

<sup>8</sup> Sax a leen di lekk ni mbubb,  
max ñeeñ leen ni ndimol kawaru gätt;  
te du tee sama njekk sax dàkk,  
sama wall saxal maasoo maas.

<sup>9</sup> Aji Sax ji, yewwul, ngalla yewwul;  
wone sa doole.

Yewwul na bu jëkkoon,  
bu yàgga yàgg.

Xanaa du yaa falaxe Raxab?

Du yaa jam ninki-nànka jooja?

<sup>10</sup> Xanaa du yaa wowal géej  
ak ndoxum xuram wu ne màww,  
def xóotey géej aw yoon,  
ña nga jot jàlle ca?

<sup>11</sup> Ñi Aji Sax ji goreel, nii lañuy dellusee,  
agsaaley sarxolle fa Siyon,  
kaalawoo mbég mu sax,  
mbégteek bannex wàllsi,  
naqar aku tiis daw.

<sup>12</sup> Man ci sama bopp maa leen di dëfal.  
Ana lu ngeen di ragal ci nit kuy dee,  
doom aadama ju bokk akum ñax aw  
demin?

<sup>13</sup> Dangeena fàtte Aji Sax ji leen sàkk,  
ki firi asamaan, dëj suuf?  
Dangeen di dëkke bésóo bés,  
di tiit xadaru boroom doole  
buy waaja sàнке?

Ana fu xadaru boroom doole mujje?

<sup>14</sup> Ku diisoon ba waaf léegi nga féex;  
doo deeye pax ma nga tëje,  
te doo ñàkk loo lekk.

<sup>15</sup> Man maay seen Yàlla Aji Sax ji,  
kiy yèngal géej, riiral gannaxam,  
Aji Sax ji Boroom gàngoor yi di sama tur.

<sup>16</sup> Maa la sexal samay kàddu,  
yiire la sama keru loxo,  
aj asamaan, dëj suuf,  
ne Siyoŋ: «Yeenay sama ñoñ.»

<sup>17</sup> Yewwulee, yewwul, Yerusalemee jógal,  
yaw mi Aji Sax ji nàndal kaasu  
mbugalam.

Kaas bu wex bay miirloo,  
taat wa, yaa ko siitaatu.

<sup>18</sup> Amul ci ñi nga jur, kenn koo dese  
ku lay wommat.

Amul ci doom yi nga yar, kenn  
ku lay jàpp ci loxo.

<sup>19</sup> Yii yaar de dikkal na la:  
Yàquleek sànkule.

Ana kuy bokk ak yaw saw naqar?  
Xiif ak loraangey saamar!  
Ana nu ma lay dëfale?

<sup>20</sup> Sa doom yi ne lasar,  
mbete kooba yu fiir jàpp,  
ñu ne lareet fépp fu mbedd daje,  
këppoo sànjum Aji Sax ji,  
sa Yàlla ji leen rëbb.

<sup>21</sup> Rikk déglul nag lii, yaw mi musiba dal,  
nga màndi te du biiñ.

<sup>22</sup> Sa boroom Aji Sax ji,  
sa Yàlla jiy layool ñoñam  
dafa wax ne: «Mu ngoog, maa jële ci sa  
loxo,

kaas bu wex biy miirloo;  
taatu kaas ba def sama mbugal,  
dootoo ko naan.

<sup>23</sup> Maa koy teg ci loxol ñi la doon naqaral,  
te naan la: “Sëggal, nu joggi, jàll,”  
nga def sa gannaaw gi aw yoon,  
ñu joggi, wéy.»

## 52

### *Yerusalem dina suqliku*

<sup>1</sup> Yewwulee, yewwul,

Siyonjee, làmbool sa doole!

Yerusalem, dëkk bu sell bi,  
solul ba ne ràññ!  
Ndax du kenn ku xaraful mbaa ku  
sobewu  
ku lay songati.

<sup>2</sup> Yaw Yerusalem, mi ñu jàpp njaam,  
jógal fëgtu,  
yaw janq Siyoŋ mu taaru mi ñu jàpp  
njaam laa ne,  
tikkil buum gi ci sa baat.

<sup>3</sup> Aji Sax ji déy dafa wax ne:  
«Dees leena wànteroon ci dara,  
te du xalis lees leen di jotaate.»

<sup>4</sup> Boroom bi Aji Sax ji déy dafa wax ne:  
«Misra la sama ñoñ jëkka wàcc, dali fa,  
Asiri door leena not ci dara.

<sup>5</sup> Léegi nag ana lu fiy sama wàll?»  
Kàddug Aji Sax jee.

Mu ne: «Jàpp nañ sama ñoñ njaam ci  
dara;

seeni sang a ngi tëggu,  
di dëkke ñàkke teggin sama tur.»

Kàddug Aji Sax jee.

<sup>6</sup> «Moo tax sama ñoñ di xam maay kan;  
moo tax bésub keroog  
ñu xam ne maay wax te maa ngii!»

<sup>7</sup> Ndaw leeka rafeti tànk,  
kee bartaloo tund yi,  
di la dégtalsi jàmm,  
di la xibaar lu neex,  
àgge la ag mucc,

ne la: «Éey, Siyoŋ,  
sa Yàllaay Buur!»

<sup>8</sup> Déglul sa jongrukat yi,  
ña ngay xaacu, sarxollendoo.

Ñoo gisal seen bopp  
Aji Sax ji di ñibbsi Siyoŋ.

<sup>9</sup> Yeen genti Yerusalem, àndleen sarxolle;  
Aji Sax jeey dëfal ñoñam,  
mooy jot Yerusalem gii!

<sup>10</sup> Aji Sax jee wone dooleem ju sell ji,  
xeet yépp di gis,  
ba ca cati àddina.

Ñépp ay gis sunu wallu Yàlla.

<sup>11</sup> Yeen ñiy yóbbu ndabi Aji Sax yu sell yi\* ,  
bu ngeen di jóge Babilon,  
dëdduleena dëddu lu sobewu, bañ koo  
laal,

\* **52:11** 52.11 Seetal ci 2.*Buur* ya 25.13-15.

setluleen te génn foofa.

<sup>12</sup> Dungeen gaawtu déy, di dem;  
duy xél moos ngeen fay génne.  
Aji Sax jeey dox jiitu leen,  
te Yállay Israyil laa ne, moo leen di féete  
gannaaw.

*Teraangay jaam bi wuutu na coonom*

<sup>13</sup> Aji Sax ji nee: «Sama jaam baa ngi,  
mooy baaxle, kawé,  
dees na ko yékkati, darajaal ko lool.

<sup>14</sup> Moo dawoon yaramu ñu bare,  
ndax yàqu ba nirootul nit,  
bindootul woon ni doom aadama,

<sup>15</sup> waaye noonu it lay waare ay xeeti xeet†,  
ba buur yi wedam,  
ngir lu ñu leen waxuloon, te ñu gis ko,  
lu ñu dégguloon, te mujj ko ràññee.»

### 53

<sup>1</sup> Ana ku gëm sunub dégtal?  
Ana ku Aji Sax ji won dooley pèrègam?

<sup>2</sup> Kii mägge fi kanamam ni njëmbat,  
te nirook reen bu fette ag kekk.  
Dub taar, du yànjaay bu nu koy niire,  
du meloom wu nu koy soppe.

<sup>3</sup> Dees na ko xeeb, daw ko,  
muy nit ku bare mitit  
te miin naqar.

Mu mel ni ku ñuy dummóoyu,  
dees koo xeeb te nawloowuñu ko.

<sup>4</sup> Ndaxam moom sunu wopp la yenu,  
sunuy mitit la sèfoo.

Nun nu foog ne dees koo mbugal,  
foog ne Yàllaa ko дума, torxal ko.

<sup>5</sup> Te moom sunuy tooñ a waral ñu jamat  
ko;

sunuy ñaawtéef a waral ñu dèggaate ko.  
Yar yi nu jàmmal moom la dal,  
te mooy ki nu wére ciy góomam.

<sup>6</sup> Nun ñépp a lajj niy xar,  
ku nekk walbatiku topp yoonam,  
te Aji Sax jee ko képp sunu gépp  
ñaawtéef.

<sup>7</sup> Dees koo néewal doole, mitital ko  
te ubbiwul gémmiñam,  
xanaa mel ni xar mu ñuy rendiji,  
ne cell ni xar mu ñuy wat,  
ubbiwul gémmiñam.

<sup>8</sup> Àtte nañu ko ñàkkal, yóbbu,

te ag maasam kenn teewluwu ci ne  
tooñ gu sama bokk yi tooñ  
lees ko dagge ci réewum aji dund ñi,  
te loolu lees ko fàdde.

<sup>9</sup> Ni ñuy robe saaysaay lañu ko robe,  
denc ko ci bàmmeeleu boroom alal,  
soxorul, fenul.

<sup>10</sup> Moona Aji Sax ji la soob, mu dèggaate  
jaamam bii,

teg koy naqar,  
su nangoo doon saraxu peyug tooñ,  
gis askanam, aw fanam gudd,  
te coobarey Aji Sax ji ci moom lay sottee.

<sup>11</sup> Mooy sonn ba gis ug leer, doylloo ko,  
te ñu bareey xam sama jaam bii di Aji Jub,  
ba mu àtte leen àtteb njekk,  
sèfoo seeni ñaawtéef.

<sup>12</sup> Moo tax ma di ko jox ab cér  
ci biir ñu bare,  
mu séddoo ak ay kàngam alalu xareem,  
ngir moo jébbale bakkanu boppam,  
ñu limaale kooki tooñkat,  
moo gàddu bàkkaaruu ñu bare  
te mooy tinul moykat yi.

### 54

*Aji Sax ji jèlaat na Yerusalem, soppeem*

<sup>1</sup> «Yaw mi jaasir ba juroo, xaacul!  
Yaw mi xamul mititu mat, sarxolleel.»  
Aji Sax ji nee:

«Ndaw si ñu foñ moo gëna jaboot  
kiy séy.

<sup>2</sup> Yaatalal sa xayma bi,  
firi sa sori xayma yu gëna yaa  
te bul yéem.

Yokkal sa buumi xayma  
te samp say bant, mu dègër.

<sup>3</sup> Dinga saam ay doom ndijoor ak  
càmmoñ,  
saw askan moom ay xeet,  
sancaat dëkk yu gentaloon.

<sup>4</sup> Bul tiit, doo rus mukk.

Bul jaaxle, deesu la kersaal mukk.  
Sa gâce ga ba ngay ndaw, dinga ko fàtte,  
te sa tiisu jëtun wa dootoo ko fàttliki.

<sup>5</sup> Sa jëkkër, ki la sàkk,  
Aji Sax ji Boroom gàngoor yee di turam.  
Aji Sell ju Israyil moo la jot,

† 52:15 52.15 Manees na koo tekkee nii itam: xeet yu bare lay wis-wisal um ndox, setale leen ko.

te moo di Yàllay àddina sépp.  
<sup>6</sup> Aji Sax jee la woo, nga dib jeeg bu ñu  
 wacc,  
 sa xol jeex tàkk,  
 Mu ne la:  
 «Nees di wacces ndaw,  
 si nga takk ba ngay ndaw?»  
 Sa Yàllaa ko wax.  
<sup>7</sup> Mu ne: «Maa la wacc diir bu gàtt,  
 dellu la jël ci yërmande ju yaa.  
<sup>8</sup> Sama xol a jóg,  
 ma xañ la sama kanam ab diir,  
 waaye maa lay yërëme ngor gu sax.»  
 Aji Sax, ji lay jot moo ko wax.  
<sup>9</sup> Mu ne: «Na ma defoon ak  
 ndoxum Nóoyin ma mooy lii tey.  
 Maa giñoon ne ndoxum Nóoyin ma,  
 mu ni day dootu wale kaw suuf.  
 Noonu it laay giñe ne  
 дума la mereeti,  
 дума la rëbbati.  
<sup>10</sup> Bu tund yu mag yi doon toxu,  
 yu ndaw yiy raf sax,  
 sama ngor du la toxul,  
 te sama kóllërey jàmm du raf.»  
 Aji Sax ji la yërëm moo ko wax.  
<sup>11</sup> «Ngalla yaw Yerusalem,  
 mi ngélén pamti-pamtee ba nga jàq,  
 te kenn dalalu la,  
 man Aji Sax ji,  
 maa ngii di la tabaxe doj yu ne ràññ,  
 samp la ci kenuy safiir.  
<sup>12</sup> Maay defare sa kawi tata peri rubi,  
 def say wunt per yuy lersat,  
 def sa tata yi la wër yépp doj yu bakkane,  
<sup>13</sup> mboolem sa doom yu góor ay jànge ci  
 Aji Sax ji,  
 boole kook jàmm ju ne ñooy.  
<sup>14</sup> Njekk moo lay dëgëral,  
 nga sore noteel, doo tiit;  
 sore tiitaange, du la jege.  
<sup>15</sup> Xanaa dees na songe moos,  
 waaye ku la song it, yebalu ma ko,  
 te ku la song daanu fi sa kanam.  
<sup>16</sup> Xoolal, man maa sàkk ab tegg  
 buy wal taalu kërriñ,  
 defar ca ngànaay lu ne.  
 Waaye maa sàkk it  
 yàqkat buy rajaxe.

<sup>17</sup> Ngànaay lu ñu la mana sàkkal,  
 du sotti,  
 te boroom làmmiñ wu la jógal cib layoo  
 yaa koy tiiñal.  
 Ñiy jaamu Aji Sax ji, looloo di seen cér,  
 looloo di njekk gi ma leen di dikke.»  
 Kàddug Aji Sax jee.

## 55

### *Aji Sax ji woote na njéggal*

<sup>1</sup> «Éey, yeen ñi mar ñépp,  
 dikkleen ci ndox mi,  
 ba ci ku amul xaalis sax!  
 Dikkleen jënd pepp, lekk!  
 Dikkleen jënd pepp mu xaalis jëndul,  
 ak biiñ ak meew mu amul pey.  
<sup>2</sup> Ana lu ngeen di waññe xaalis,  
 di ko jënde lu dul aw ñam?  
 Ana lu ngeen di sonn,  
 di jënde lu dul reggal?  
 Dégluleen maa déglu, ba lekk lu leen di  
 dundal,  
 di xéewloo seen ngëneelu bakkan.  
<sup>3</sup> Teewluleen te dikk fi man.  
 Dégluleen, ba mana dund,  
 ma fas ak yeen kóllëre gu sax,  
 gi ma baaxee Daawuda ci ngor gu  
 wóor.  
<sup>4</sup> Ab seedee ngoog, ñeel xeet yi,  
 muy njiit, yilif xeet yi.  
<sup>5</sup> Ma ne, aw xeet woo xamul ngay wooyi,  
 xeet wu la xamul ay dawsa ba ci yaw,  
 ngir sa Yàlla Aji Sax ji,  
 Aji Sell ju Israyil,  
 nde moo la teral.»  
<sup>6</sup> Sàkkuleen Aji Sax ji bi ngeen koy mana  
 gis,  
 wooleen ko bi muy jege.  
<sup>7</sup> Na ku bon ba jëfinam,  
 kuy def lu ñaaw fomm mébétam,  
 te walbatiku ci Aji Sax ji sunu Yàlla,  
 mu yërëm ko, yaatal njéggalam.  
<sup>8</sup> «Samay xalaat déy du seeni xalaat,  
 te samay jëfin du seeni jëfin.»  
 Kàddug Aji Sax jee.  
<sup>9</sup> Mu ne: «Ni asamaan tiime suuf,  
 ni la samay jëfin tiime seeni jëfin,  
 samay xalaat it tiime ko seeni xalaat.  
<sup>10</sup> Ab taw ak tawub yuur asamaan lay  
 wàcce,

du fa dellu,  
te suuxatul suuf,  
saxal ko, meññal ko,  
ba kuy ji, mu may la jiwu;  
kuy lekk, mu may lam pepp.

<sup>11</sup> Sama kàddu giy bawoo sama gémmiñ  
it, noonu la.

Du désee ag neen ci man  
te deful li ma namm,  
ba sottal li ma ko yebal.

<sup>12</sup> «Mbégte déy, ngeen di génne,  
ñu yóbbu leen ci jàmm,  
tund yu mag yeek yu ndaw yi  
di leen sarxolleel,  
garabi àll bi yépp tàccoondoo.

<sup>13</sup> Garab gu dul ruus ay wuutub gajj,  
garab gu dèkke naat wuutub taxas,  
muy woyu Aji Sax ji,  
te di firnde ju sax,  
du dog mukk.»

## 56

### *Xeet yépp la Aji Sax jiy ñoño*

<sup>1</sup> Aji Sax ji dafa wax ne:  
«Sàmmleen yoon, di def njekk.  
Sama wall kat a ngi dikk léegi,  
sama njekk laa ne, léegi mu teew.

<sup>2</sup> Ndokklee kuy jéfe lii,  
ndokklee doom aadama ju jàppoo lii,  
di sàmm bésuub Noflaay,  
bañ koo ñàkke worma,  
di sàmm loxoom ci jépp jéf ju bon.»

<sup>3</sup> Doomu doxandéem bu jokku ci Aji Sax  
ji,  
bumu ne: «Aji Sax jee may beddee beddi  
ci ñoñam.»

Jaam bu ñu xañ ngóora it bumu ne:  
«Man garab gu jaasir donj laa.»

<sup>4</sup> Aji Sax ji kat dafa wax ne:  
«Jaam yi ñu xañ ngóora,  
su ñu sàmmee sama bési Noflaay,  
taamu sama coobare,  
tey feddli sama kóllère,

<sup>5</sup> maa leen di may ci sama biir kër, sama  
biir ètt,  
doj wu ñu leen di fàttlikoo  
ak tur wu leen di gènal doom yu góor ak  
yu jigéen.

Tur wu sax dàkk laay may

jaam yi ñu xañ ngóora,  
te du fey mukk\*.»

<sup>6</sup> Doomi doxandéem yi ànd ak Aji Sax ji,  
ngir liggéeyal ko,  
ngir sopp turu Aji Sax ji,  
te di ay jaamam,  
muy képp kuy sàmm bésuub Noflaay,  
baña ñàkke worma bés bi,  
xanaa di feddli kóllèreem,

<sup>7</sup> mu ne: «Ñooñu, maa leen di yóbbu  
sama kaw tund wu sell,  
bànnexale leen sama biir kërug ñaan,  
seen saraxu rendi-dóomal ak yeneen  
sarax,  
dees na leen ko nangul sama kaw sarx-  
alukaay,

ndax dees na wooye sama “kër, kërug  
ñaan”,  
ñeel xeetoo xeet.»

<sup>8</sup> Kàddug Boroom bi Aji Sax jaa ngi,  
kiy dajale giiri Israyil yi tasaaroo,  
mu ne: «Maay dajaleeti,  
dolli ca la ma dajale woon.»

### *Ab daan ñeel na njiit yi*

<sup>9</sup> Yeen rabi àll yi,  
dikkleen ci bernde ji,  
yeen rabi gott bi yépp.

<sup>10</sup> Jongrukati Israyil yépp a silmaxa,  
te xamuñu dara.  
Ñoom ñépp a diy xaj yu luu,  
manuñoo baw,  
xanaa tèdd di jeneer,  
soppi nelaw.

<sup>11</sup> Xaj yu tiita tiit lañu,  
xamuñu suur,  
te ñooy sàmm yeey!

Ñoom ñépp, kenn manu cee xam dara,  
seen yoonu bopp lañu topp,  
ak seen amin wu lewul.

<sup>12</sup> Ña nga naa: «Dikkleen, ma indi biiñ,  
nu màndeew ñoll; tey ak èllég;  
li fi des du jeex.»

## 57

### *Ab daan ñeel na moykat yi*

<sup>1</sup> Aji jub ñaa ngi dee,  
te kenn yégalu ko yaramam.  
Gor ñaa ngi faatu,  
te kenn ràññeewul

\* **56:5** 56.5 Seetal ci *Sarxalkat* yi 21.16-20.



ne aji jub ji, faatoom, musiba la koy  
moyale.

<sup>2</sup> Kiy am jàmm èllëg,  
di am noflaay ci biir tëraayam,  
mooy kiy wéye njub.

<sup>3</sup> Waaye yeen, dikkleen fii,  
yeen doomi xërëmkat yi,  
yeen askanu njaalookat yiy gànctu,

<sup>4</sup> ana ku ngeen di ñaawal?

Ana ku ngeen di ñóobi,  
ak di ko kókkali?  
Xanaa dungeen doomi moykat,  
di askanu workat,

<sup>5</sup> di xabtaloo bannëex  
ci ker garab yu mag yi,  
ak ker garaboo garab gu naat,  
di rendi seeni doom ci yoonu ndox yi,  
ak xarantey doj yi?

<sup>6</sup> Yaw Israyil, jëlal doj yu rattax  
yi ci yoonu ndox wi, séddoo,  
muy sa cér, nga muurloo!

Ñoom ngay tuural,  
di leen defal ay saraxi pepp.  
Waaye Aji Sax ji nee:

«Ndax damay jéllale?»

<sup>7</sup> Tund wu mag te kawé,  
nga fàkk fa tëraay,  
yéeg fa, di fa sarxalal.

<sup>8</sup> Yaa takk say baaxantal  
ci sa lafu bunt ak sa jëni bunt,  
yaa ma wacc, di ñorikoo feneen,  
yéeg sab lal, yaatal.

Yaa takktook ñii nga soppa tëddal  
te safoo di niir seeni cér.

<sup>9</sup> Yaa tukki ba ca buur ba, yóbbaaleg diw,  
ak cuuraay lu ne gànñ,  
yebal say ndaw fu sore,  
ba ñu àkki njaniiw.

<sup>10</sup> Tukki bu sore bu la sonal sax  
taxu la ne: «Fomm naa.»  
Bannëex bi ngay séentu ngay leqlikoo,  
ba tax sonnuloo.

<sup>11</sup> Ana kooy tiit,  
ak koo ragal ba di ma wor,  
fàttlikootoo ma,  
faaletoo ma?  
Damaa noppi lu yàgg daal,  
ba tax ragalatoo ma?

<sup>12</sup> Defe nga ne njekk nga def,

waaye dinaa la weer,  
te sa jëf du la jariñ.

<sup>13</sup> Boo wootee wall,  
na la sa gàngooru tuur xettli.  
Ñoom ñépp la ngelaw di buub,  
callweer yóbbu leen.  
Waaye ku ma làqoo,  
kookooy moom réew mi,  
séddoo sama tund wu sell wi.

<sup>14</sup> Dees na ne: «Maasaleleenoo,  
maasaleleen,  
yaatal leen yoon wi,  
te jële luy pakk ci sama yoonu ñoñ.»

<sup>15</sup> Ku màgg, ku kawé ki,  
ki màkkaanam sax dàkk  
te turam sell, daa wax ne:  
«Fu kawé te sell laa màkkaanoo,  
maa dëkk ak boroom xol bu mukk,  
te toroxlu,  
ngir leqli ku toroxlu,  
leqli boroom xol bu mukk.

<sup>16</sup> Duma wéye di sikke ba fàww,  
duma saxoo di mer,  
lu ko moy képp ku ma sàkk  
day tàggook bakkanam.

<sup>17</sup> Ñaawtéefi Israyil ak alalam ju lewul  
moo ma merloo,  
ma duma ko, xañ ko sama kanam,  
waaye mu tè ticc, topp xolam.

<sup>18</sup> Xam naa jikkoom,  
waaye maa koy faj,  
wommat ko,  
dëfale koy xéewal,  
mook ñiy ñaawloondook moom.

<sup>19</sup> Maay teg ci seen làmmiñ kàddug cant.  
Jàmm, na jàmm ñeel ñépp,  
ku soreek ku jege.»

Kàddug Aji Sax jee.  
Mu ne: «Maa leen di faj.»

<sup>20</sup> Waaye ñu bon ñi, mbete géej  
gu sàmbaraax, tëë dal,  
gannax yay baaje ban ak suuf.

<sup>21</sup> Sama Yàlla nee:  
«Jàmm du ñeel ñu bon ñi.»

## 58

*Jaamu Yàlla, tuub, rafet jikkoo ci gën*

<sup>1</sup> Aji Sax ji nee: «Xaacul loo man,  
te bul ñéebli;  
àddul ni bufta,  
te yégal sama ñoñ seen bàkkaar,

ngir waa kër Yanqóoba yii xam seeni moy.

<sup>2</sup> Man mii lañuy sàkku bés bu ne, di wuta xam sama coobare! Mbete xeet wuy def njekk, te waccul ndigalu yoonu Yàllaam.

Ñu ngi may ñaan àttey njekk, di sàkku man Yàlla, ma jege leen,

<sup>3</sup> te naa: “Ana lu nuy woor te xooloo ci? Lu nuy toroxlu te teewluwoo?”

Ma ne: Bés bu ngeen woor, yeena ngi topp seen bakkan, di sèqatal seeni liggéeykat.

<sup>4</sup> Xanaa du koor gu ànd ak xulook ñaayoo, ak di joqlantey këmëx yu metti? Su ngeen bëggee seen ñaan àgg fa kaw, dungeen woor ni ngeen woore tey.

<sup>5</sup> Ndax lii moo di koor gi ma taamu, ci bés bu nit kiy toroxlu?

Koorug dëngal loos ni barax, lal saaku, sotti ab dóom, tëdd di ko ñaawloo?

Loolooy seen koor, ci bés bu Aji Sax ji rafetlu?

<sup>6</sup> «Xanaa du lii moo di koor gi ma taamu: yolomal jéng yu metti, fecci buumi noteel, afal ku diis;

dog lépp luy xeetu noteel?

<sup>7</sup> Xanaa du sédd ku xiif saw ñam, fat néew-ji-doole ju amul fu mu dëkk, gis ku rafle, wodd ko, te baña nëbbu mbokk mu soxla?

<sup>8</sup> Su boobaa seen leer feq ni njël, seen góom gaawa wér, seen njekk jiitu leen,

leeru Aji Sax ji féete leen gannaaw.

<sup>9</sup> Su boobaa bu ngeen wooyee Aji Sax ji, mu wuyu;

ngeen ne wallóoy, mu ne “Maa ngi.” Ndegam génne ngeen noteel ci seen biir, ak di joxoñeek a wax lu ñaaw,

<sup>10</sup> di leel ku xiif lu ngeen gëna bëgg, di reggal néew-ji-doole, su boobaa seen leer fenke biir lëndëm, seenug këruus di ag njolloor,

<sup>11</sup> Aji Sax ji di leen jiite fu ngeen tollu, di leen màndale joor gu maral, dëgëral seeni cér, ngeen mel ni tool bu ñu suuxat,

mel ni bētu ndox bu dul njiis,

<sup>12</sup> seeni nit tabaxaat gent ya woon, ngeen yékkatiwaat kenu yu yàgga yàgg. Dees na la wooye jagalkatu xar-xar yi, mbaa kiy yeesal xàll yi, ngir dëkke réew mi.

<sup>13</sup> «Su ngeen téyee seen tànk bés sub Noflaay,

baña def li leen neex sama bés bu sell; su bés sub Noflaay di seen nammeel, di bés sub Aji Sax bu sell bu ngeen teral; ngeen teral bés bi,

bañ cee topp li ngeen jikkowoo, di topp seen bakkan

ak wax ju dul jeex;

<sup>14</sup> su boobaa ngeen bannexoo Aji Sax ji, ma waral leen kawtey réew mi, leele leen seen cérú maam Yanqóoba.» Aji Sax ji déy wax na ko.

## 59

*Bàkkaar ñag na diggante Yàllaak ñoñam*

<sup>1</sup> Ma ne, Aji Sax ji gàttul loxo ba tëlee walloo,

noppam naqariwul ba tere koo dégg.

<sup>2</sup> Seenii ñaawtéef a dox seen digganteek seen Yàlla.

Seenii moy a leen xañ kanamam, ba mu tanqamlu leen.

<sup>3</sup> Seenii loxoo taq deret, ngeen ne lijj ci ñaawtéef, làmmiñ di fen, di sos njekkar.

<sup>4</sup> Du njekk gu kenn wut cib àtte, du dégg gu kenn sàkku cib layoo.

Ñu ngi yaakaar caaxaan, di fen, di sos ayib, wasin ñaawtéef.

<sup>5</sup> Nenu ñàngóor lañuy tostan, di ràbb lëndu jargoñ.

Ku lekk ci nen yi dee, te boo ci tojeeb nen, saamaan fëlle ca.

<sup>6</sup> Seenii lënd du ràbbe ba solal nit, mbaa di sàng kenn;

seenum ràbb ñaawtéef lay jur, seen loxo ya ko liggéey sabab fitna,

<sup>7</sup> seeni tànk daw wuti lu bon, ñuy yàkkamtee tuur deretu ku deful dara,

seeni xalaat di ñaawtéef,

yàquteek njaaxum féete ca seeni yoon.  
<sup>8</sup> Xamuñu yoonu jàmm,  
 te yoon amul fa ñuy jaare,  
 xanaa sàkk seen yoon yu lunk  
 te ku fa awe doo daj jàmm.

<sup>9</sup> Lee tax yoon sore nu,  
 te njekk du nu dab.  
 Danuy yaakaar leer,  
 lëndëm ne jaas,  
 nuy séentuy ceeñeer,  
 tey lëndemtuy wéy.

<sup>10</sup> Nu ngi làmbatub tabax ni silmaxa,  
 di tēñëx-tēñëxi ni ku amuli gët,  
 di fakktalu bëccëg ndarakàmm ni bu  
 doon guddi,

dëkk ak ñu wér péng te mel ni ña dee.

<sup>11</sup> Nun ñépp a ngi xiiru ni rab wu aay,  
 binnee binni niy xati,  
 yaakaar yoon, yoon wuute,  
 séentu wall, wall sore.

<sup>12</sup> Sunuy tooñ a bare fi sa kanam,  
 sunuy moy a nu seedeel,  
 sunuy tooñ a nu topp,  
 te xam nan xéll sunuy ñaawtéef.

<sup>13</sup> Noo tooñ Aji Sax ji, wor ko,  
 te noo dëddoo sunu Yàlla jii,  
 kàdduy fitna ak fippu,  
 ak fen yu nu mébét, nas ko,

<sup>14</sup> ba yoon dellu gannaaw,  
 njekk dând,  
 dëgg fakktaloo fa pénc ma,  
 njub tēë agsi.

<sup>15</sup> Dëgg a tumurànke,  
 ku dëddu mbon sax, ñu ñori la,  
 Aji Sax ji gis ci, ñaawlu ko,  
 nde yoon a amul.

<sup>16</sup> Daa xool, gisul kenn;  
 mu tiisoo li ci kenn jógul,  
 moo tax loxoom may ko ndam,  
 te njekkam la sukkandikoo.

<sup>17</sup> Moo sol kiiraayal njekk,  
 mbaxanawoo mucc,  
 solati yérey mbugale,  
 làmboo turkib xéraange.

<sup>18</sup> Mooy delloo ku ne yool ba mu yelloo,  
 mbugal ay bañam, fey ay noonam,  
 ba delloo waa dun ya yool ba ñu yelloo.

<sup>19</sup> Dees na wormaale turu Aji Sax ji fa  
 sowu,  
 wormaale teddngaam ba penku.

Bu noon bi agsee ni walum dex,  
 ngelawal Aji Sax jee koy wal, mu daw.

<sup>20</sup> «Ab jotkat ay dikkal Siyon,  
 ba jot ñi tuub seeni bàkkaar ci askanu  
 Yanqóoba.»

Kàddug Aji Sax jee.

<sup>21</sup> «Man nag, lii mooy sama kóllëreek  
 ñoom:

Sama xel mi tegu fi sa kaw,  
 ak sama kàddu yi ma yeb ci sa gémmiñ,  
 lenn du ci teqlikook sa gémmiñ

ak sa gémmiñu askan,

ak sa gémmiñu askanu askan, tey ak  
 èllëg.»

Aji Sax jee ko wax.

## 60

### *Leer dina fenkal Yerusalem*

<sup>1</sup> Yerusalem, jógal ne ràññ, sag leer feq  
 na;

teddngay Aji Sax ji fenkal na la!

<sup>2</sup> Lëndëm gaa ngii di muur àddina,  
 mu ngi guddil askan yi,  
 te yaw, Aji Sax ji fenkal la,  
 leeru teddngaam feqal la.

<sup>3</sup> Ay xeet ay fekksi sag leer,  
 ay buur wutsi sa ceeñeeru njël.

<sup>4</sup> Séentul fi la wër ba gis:  
 ñoom ñépp a daje, di la fekksi,  
 sa doom yu góor a dikke fu sore,  
 te sa doom yu jigéen it  
 dees leena fab, indaale.

<sup>5</sup> Yaa koy gis, sa kanam ne ràññ,  
 fit tēf-tēfi, xol fees dell,  
 nde dees na walbati xéewali géej, indil la,  
 alali xeet yi dikkal la.

<sup>6</sup> Ndiiraanu giléem a lay fees  
 ak njëggi Majan ak Efa,  
 ñoom ñépp sēfe Saba.  
 Dees na indi wurus ak cuuraay  
 tey kañaale Aji Sax ji.

<sup>7</sup> Gétti Kedar yépp a lay dajesil,  
 kuuyi Nebayot di la jariñ,  
 te di sarax yu dajeek ngërëm  
 ci kaw sarxalukaayu Aji Sax ji,  
 ma di ko darajaale sama teddngay kër.

<sup>8</sup> Ana ñuy ñii di naaw niy niir,  
 nirook ndiiraanu pitax yu jëm seeni tàgg?

<sup>9</sup> Waa dun ya déy a nga may séentu,  
gaali Tarsis yu mag yaa nga jiitu,  
jële fu sore sa doom yu góor ya,  
indaale seen xalis ak seen wurus,  
ngir sa Yàlla Aji Sax ji,  
Aji Sell ju Israyil ji la teral.

<sup>10</sup> Ay doomi doxandéem ay tabaxaat say  
tata,  
seeni buur di la surgawu.

Maa meroon, duma la,  
maa la baaxe, yërëm la.

<sup>11</sup> Say wunt ay ubbiku saa su ne,  
guddeek bëccëg, du tëje,  
xanaa di la jàlleel alali xeet yi,  
seeni buur riixle ànd ca.

<sup>12</sup> Mu diw xeet, dim réew,  
ku la ci nangulul sànkú.

Xeet yooyu yépp ay yàqu yaxeet.

<sup>13</sup> Taaru àllub Liban a lay ñibbsil,  
garabu sippa, pëe ak geneen gu dëkke  
naat,

taaralsi sama kër gu sell gi,  
ba ma terale ci sama ndëggastalu tànk.

<sup>14</sup> Ña la daa néewal,  
seeni doom a lay sukkalsi.

Ña la daa ñàkke worma,  
mujj di foon say tànk.

Dees na la wooye «Dëkkub Aji Sax ji»,  
mbaa «Siyon, màkkaanu Aji Sell ju Is-  
rayil.»

<sup>15</sup> Dees laa foñ, jéppi la,  
ba kenn jaareetu fi.

Waaye maay def ñu di la sagoo ba fàww,  
di la bége sët ba sëtaat.

<sup>16</sup> Yaay naan soowum xeet yi,  
nàmp weenu buur yi,  
ba xam ne maay Aji Sax jiy walloo,  
jàmbaaru Yanqóoba ji lay jot.

<sup>17</sup> Maay wuutale xàñjar, wurus;  
wuutale weñ gu ñuul, xalis;  
bant, xàñjar;  
doj, weñ gu ñuul.

Jàmm laay def mu jiite la,  
def njekk yilif la.

<sup>18</sup> Deesatul dégg ci sam réew:  
«Fitna ñëw na!»  
deesatul dégg it fi sa kemu suuf:  
«Yàqute ak Yàqulee ngi!»

«Mucc» ngay tudde say tata,  
te «Cant» ngay tudde sa bunti dëkk.

<sup>19</sup> Du jant a lay leeralati bëccëg,  
te weer du la niital;  
Aji Sax jeey doon sag leer ba fàww,  
sa Yàlla jooju di sab taar.

<sup>20</sup> Sab jant du sooti,  
sa weer du suuxati.  
Aji Sax jeey doon sag leer ba fàww,  
sa fani ñaawlu jeex.

<sup>21</sup> Sa askan wépp ñu jub lañuy doon,  
te ñooy moom réew mi ba fàww.

Ñooy sama njëmbat li ma jëmbatal sama  
bopp,  
sàkke leen samay loxo, ngir sama teddnga  
teew.

<sup>22</sup> Ki ci gëna tuut ay meññ junni,  
ki ci gëna néew jur xeet wu mag.  
Man Aji Sax ji, bu lii jotee,  
ma gaaw koo sottal.

## 61

### *Ki Boroom bi fal dikk na*

<sup>1</sup> Noowug Boroom bi Aji Sax jaa ngi fi  
sama kaw,

ndax Aji Sax jee ma diw\*, fal ma,  
ngir ma àgge néew-doole yi xibaaru  
jàmm.

Moo ma yebal ngir ma dëfal ñi seen xol  
jeex,  
yégal jaam yi, seen goreel,  
yégal ñi ñu tëj, seen ubbite.

<sup>2</sup> Moo ma yónni ngir ma yéene atum yiwu  
Aji Sax ji,  
ak at mu sunu Yàlla di mbugalee.

Moo ma yónni ngir dëfal ñiy ñaawlu  
ñépp,

<sup>3</sup> ngir tabb waa Siyon ñiy ñaawlu,  
jox leen kaala gu wuutu dóom bi ñuy  
ñaawloo,

ak diwu mbégte mu ñu weccikoo seenu  
tiis,  
ak mbubbam cant mu ñu weccikoo xol bu  
jeex,

ba ñu naa: «Ñii ñoo di ponkali garabi  
njekk yi,  
njëmbat li Aji Sax ji jëmbat,  
ngir teewal teddngaam.»

<sup>4</sup> Ñooy tabaxaat gent ya woon,

\* **61:1** 61.1 Baat bi ñu tekkee diw, ci la baatub Almasi jóge. Ab sarxalkat mbaa buur lañu daan diw, fale leen ko bala ñoo door seen liggéey.

yékkati bérab ya tason bu yàgg,  
dekkal dëkk yu tas,  
bérab yu gental ay maasi maas.  
<sup>5</sup> Ay gan ay dikk,  
di leen sàmmal seeni gétt,  
ay doomi doxandéem di leen beyal tool  
ak tóokëru reseñ.

<sup>6</sup> Yeen nag lees di wooye:  
«Sarxalkati Aji Sax ji,»  
ñu naa: «Sunu surgay Yàlla yaa ngi!»  
Alali xeet yi, yeena koy lekk,  
di damoo seeni koom.

<sup>7</sup> Sama ñoñ ay weccikoo seen gâce  
ñaari cérì teraanga,  
sarxolley mbég di seen cér,  
wuutu toroxte.

Ñaari cér lañuy am ca seenum réew,  
mbégte mu sax ñeel leen.

<sup>8</sup> Man Aji Sax ji, damaa sopp yoon,  
bañ càcc ak ñaawtéef.  
Maay dàmp sama ñoñ ni mu ware,  
fas ak ñoom kóllère gu sax.

<sup>9</sup> Dees na xàmme seen askan fi biir xeet  
yi,  
xàmme lu meñne ci ñoom fi biir waaso  
yi;  
képp ku leen gis ràññee ne  
ñooy askan wu Aji Sax ji barkeel.

### *Almasi bége na mucc gi mu maye*

<sup>10</sup> Maa béga bég ci Aji Sax ji,  
sama xol di sedd ci sama Yàlla jii.  
Moo ma solal yérey mucc,  
sànge ma mbubbam njekk,  
may nirook boroom séet bu kaalawu  
ni sarxalkat,  
ne xenjaw ni séet bu takki gànjaram.

<sup>11</sup> Ni suuf di fettalem njebbit,  
ab tool di ko saxalem jiwu,  
ni la Boroom bi Aji Sax ji di jebbile  
njekk ak cant,  
xeetoo xeet seede ko.

## 62

### *Yerusalem mooy siggi, mucc*

<sup>1</sup> Siyon a tax дума selaw,  
Yerusalem laa ne, moo tax дума noppi,  
ba kera ceeñeeru njekkam teew,  
jumu muccam dikkal ko.

<sup>2</sup> Su boobaa xeet yi gis sag njekk,

\* **62:5** 62.5 doom yu góor yi ñooy waa Yuda, te ñooy moom seen réew.

buur yépp gis sa daraja,  
ba ñu di la tudde tur wu yees,  
wu Aji Sax ji di tuddal boppam.

<sup>3</sup> Yaay doon kaalag teddnga  
ci loxol Aji Sax ji,  
yaay doon mbaxanam buur,  
ci sa biir loxol Yàlla jii.

<sup>4</sup> Deesatu la wooye «Dëkk bi ñu wacc,»  
deesatul wooye sam réew «Réew mu  
gental.»

Xanaa ñu wooye la «Dëkk bi ma neex,»  
tey wooye sam réew «Boroom jëkkër,»  
nde yaa neex Aji Sax ji,  
te sa réew mi dina am boroom kër.

<sup>5</sup> Ni xale bu góor di takke ab janq,  
ni la la sa doom yu góor di moome ni  
jëkkër\*;

ni boroom séet di bégee ab séetam,  
ni la la sa Yàlla di bégee.

<sup>6</sup> Yerusalem, tabb naa ay jongrukat  
ci sa kawì tata.  
Buñu selaw, du guddi du bëccëg!  
Yeen ñiy soññ Aji Sax ji,  
buleen dal-lu.

<sup>7</sup> Buleen may Aji Sax ji fu mu dal-loo,  
ba kera muy taxawalaat Yerusalem,  
ba def ko sababu cant fi kaw suuf.

<sup>8</sup> Aji Sax jee giñ lii ci ndijooram,  
giñ ko ci pèrëgam bi àttan,  
ne: «Dootuma joxe sam pepp,  
say noon dunde,  
te doomi doxandéem dootuñu naan  
sa biiñ bu bees,  
bi nga ame saw ñaq.

<sup>9</sup> Ñi góob pepp mee koy lekk,  
di ko sante Aji Sax ji.

Ñi witt reseñ jeey naan biiñ bi,  
fi sama biir ètt bu sell.»

<sup>10</sup> Jàllsileen, jàllsileen bunti dëkk bi,  
xàll-leen yoonu xeet wi,  
maasaleleenoo, maasaleleen ngér mi,  
dindi doj yi!

Yékkatileen raaya ju askan yépp gis.

<sup>11</sup> Aji Sax jaa ngoog,  
yéene na lii ba ca cati àddina.  
Mu ne: «Waxleen Siyon dëkk bu taaru bi,  
ne ko:

“Sab jotkat a ngii di dikk!  
Mu ngii ànd akub yoolam,  
ñaqu liggéeyam jiitu ko.”

<sup>12</sup> Dees na leen wooye “Askan wu sell wi,”  
“Ñi Aji Sax ji jot;”  
te yaw Yerusalem dees na la wooye “Ki ñu  
namm,”  
“Dëkk bi ñu waccul.”»

## 63

### *Jàmbaar Aji Sax ji am na ndam*

<sup>1</sup> Ana kuy kii bawoo Edom\*,  
sol yére yu xonq, bawoo Bocra†?  
Kii ak yéreem yu yànj,  
di daagoo dooleem ju bare?  
«Xanaa man mii di waxe njekk,  
te am dooley walloo.»  
<sup>2</sup> Lu waral sa xonqaayu mbubb mi,  
sa yére yi mel ni ku doon dère  
dërukaayu reseñ?  
<sup>3</sup> «Maa doon dère tànk, man kenn  
ci ab dërukaayu reseñ,  
xeet yépp kenn dërlewu ma ci.  
Sama mer laa leen dère,  
samam sànj laa leen dæggaatee,  
seen deret tis ci samay yére,  
ma taqal sama yére yépp.  
<sup>4</sup> Bésub mbugal laa mébétoon,  
te atum njot teew.  
<sup>5</sup> Ma xool,  
gisuma ku ma dimbali,  
ma tiislu li ma amul ku ma jàpple.  
Ca la ma sama pèrèg wallu,  
samam sànj jàpple ma ca.  
<sup>6</sup> Sama mer laa dæggaatee ay xeet,  
samam sànj laa leen màndal,  
sotti seen deret fi suuf.»

### *Yonent baa ngi soññ Aji Sax ji*

<sup>7</sup> Jëfi ngoru Aji Sax ji laay fàttlee  
ak cant gi Aji Sax ji yelloo,  
ngir li nu Aji Sax ji defal lépp;  
mbaax gu réy gi mu ji waa kër Israyil,  
defal leen ko ci yërmandeem,  
ak jëfi ngoram gu réy.  
<sup>8</sup> Moo noon: «Sama ñoñ déy ñoom a!  
Ñee di doom yu dul tas yaakaar.»  
Mu daldi doon seen jotkat.

<sup>9</sup> Seen gépp njàqare di njàqarey boppam,  
malaaka mi mu jàkkaarool musal leen  
ca.

Moo leen sopp, ñeewante leen,  
ba jotal leen boppam,  
te fu ñu masa jaare démb,  
mu fab leen, boot.

<sup>10</sup> Waaye ñoom ñoo fippu,  
di naqaral xelam mu sell,  
mu soppliku seen noon,  
ba mujj di xareek ñoom.

<sup>11</sup> Ñoñam ña daldi fàttliku janti Musaa ya  
woon.

Ña nga naan: «Ana ki jàlle woon Israyil  
géej,  
mook sàmmi géttam ga?  
Ana ki yebaloon noowam gu sell ci seen  
biir?»

<sup>12</sup> Ana ki dawaloon dooley pèrègam bu  
tedd ba,  
ñeel ndijooru Musaa,  
xaral leen ndox ma,  
ba ame ca woy wu sax dàkk?

<sup>13</sup> Ana ku leen doxloo woon biir xóote ya,  
ñu mel ni fasi naari góor ci biir màndiñ,  
te tërèfuñu?

<sup>14</sup> Ni jur gu wàccek xur, di fa fore,  
ni la leen Noowug Aji Sax ji  
maye ab dal-lukaay.

Noonu nga wommate sa ñoñ,  
ba ame ca woy wu rafet.

<sup>15</sup> «Ngalla séentool asamaan,  
xooleel fa sa kër gu sell ga ne ràññ.  
Ana sa firaangeek sa njàmbaar?  
Sag rafet xol ak sa yërmande ñooru na  
ma!»

<sup>16</sup> Yaw déy yaa di sunu Baay.  
Ibraayma xamalu nu dara,  
Israyil‡ xamu nu.

Yaw Aji Sax ji yaa di sunu Baay,  
sa tur a di “sunu Jotkat naka jekk.”

<sup>17</sup> Aji Sax ji, loo nuy wërloo fu sore say  
yoon,

di nu dërkiisal, ba ragalatunu la?  
Sang bi, délsil ngir nun,  
sa giir yii nga séddoo.

<sup>18</sup> Nun sa xeet wu sell wii,  
moomunu réew mi lu yàgg,

\* **63:1** 63.1 Edom mi doon seexu Yanqóoba, moom lañu dippee réewum Edom, te moo taxawe taxawaayu noonub Aji Sax ji. † **63:1** 63.1 Bocra ab dëkk la ci réewum Edom. ‡ **63:16** 63.16 Israyil fii mooy maam Yanqóoba.

te noon yi dëggaate nañu sa bérab bu  
sell.

<sup>19</sup> Nu ngi mel ni xeet woo masula yilif,  
xeet wu ñu masula tudde sa tur.  
Éy soo xaroon asamaan, wàcc,  
ba tund yi yëngu fi sa kanam!»

## 64

<sup>1</sup> Ni sawara di jafale boob,  
baxale ko am ndox,  
ni ngay xamalsee say noon, saw tur,  
ba yooyu xeet di lox fi sa kanam.

<sup>2</sup> Ba ngay def kiraama ya ñu  
séentuwuloon,  
yaa wàcc, tund yi yëngu fi sa kanam.

<sup>3</sup> Ca cosaan ba tey maseesula dégg,  
nopp masula dégmati,  
bët masula gis yàlla ju la moy,  
mu defal nii ku ko yaakaar.

<sup>4</sup> Yaay gatandu kiy bége njekk gi muy jéfe  
te di ba xel say yoon,  
yi ñu mas di jaare, ba mucc.

Waaye kat, yaa nu mere, ndax noo  
bàkkaar.

<sup>5</sup> Nun ñépp a mujj mel ni sobe,  
ni sagaru sobe la sunu gépp njekk mel.  
Nu ngii nun ñépp mel ni xob wu lax,  
sunuy tooñ buub nu, yóbbu ni ngelaw.

<sup>6</sup> Du kenn kuy wormaal sa tur,  
mbaa mu yewwu ba jàpp ci yaw,  
yaa nu làq saw yiw,  
yaa nu def ban bu tooy  
ci sunu biir ñaawtéef yi nu tanc.

<sup>7</sup> Waaye déy, Aji Sax ji, yaa di sunu Baay;  
noo di ban, yaw ngay tabaxkatu njaq,  
nun ñépp di sa liggéeyu loxo.

<sup>8</sup> Éy Aji Sax ji, bul mer lool,  
bul ba xel fàww ci ñaawtéef.  
Ngalla seetal ne nooy sa ñoñ, nun ñépp.

<sup>9</sup> Sa dëkk yu sell doon nañu màndiñ,  
Siyon ca la, doon na màndiñ.  
Yerusalem laa ne, genta na!

<sup>10</sup> Sunu kërug jaamookaay gu sell ga te  
tedd,  
fa la sunuy maam daa màggale,  
sawara xoyom na ko,  
mboolem lu nu soppoon yàqu yaxeet.

<sup>11</sup> Éy Aji Sax ji, lii lépp xanaa doo ci téye  
sa loxo?  
Xanaa doo ci selenlu, teg nu gâce gu réy?

## 65

### *Aji Sax ji wuyu na*

<sup>1</sup> Maa may ay nit tont te laajuñu ma.

Maa leen may, ñu gis ma te seetuñu ma  
woon.

Maa ne leen: Maa ngii, maa ngii!  
te ñuy xeet wu dul tudd sama tur.

<sup>2</sup> Samay loxo laa yendoo tàllal askanu  
fippukat,

nit ñuy doxe yoon wu baaxul,  
topp seen xelum bopp.

<sup>3</sup> Ñoo di xeet wu ma ne jàkk,  
dëkke maa naqaral,  
di sarxalali tuur ci biiri tool,  
di leen taalal cuuraay ci kaw sarxalukaay  
bu ñu tabax,

<sup>4</sup> di tooge diggi bàmmeel,  
di fanaan bérab yu làqu;

di lekk yàppu mbaam,  
seeni cin def ñam yu sobewu,

<sup>5</sup> te ñu naan: «Dellul gannaaw,  
bul ma jege, maa la gëna sell!»

Lii déy daa mel ni saxar ci samay wakkan,  
mel ni sawara su yendoo boy.

<sup>6</sup> Ma ne dogal a ngii binde, fi sama kanam:  
«Duma noppi déy, maa leen di fey,  
maa leen di fey ba mu mat sèkk.»

<sup>7</sup> Aji Sax ji nee: «Muy seeni ñaawtéef,  
di seen ñaawtéefi maam,  
ya daan taalali tuur cuuraay ca tund yu  
mag ya,

di ma kókkali ca kaw tund yu ndaw ya,  
lépp laa leen di fey ba mu mat sèkk,  
muy seen aña jéf ja woon.»

<sup>8</sup> Aji Sax ji dafa wax ne:

«Ni nit di gise cabbu reseñ ju fees dell,  
ne: “Buleen ko yàq,

ngëneel a ngi ci,”  
noonu laay def ngir sama jaam ñi,  
baña boole lépp yàq.

<sup>9</sup> Fi Yanqóoba laay soqee aw askan,  
fi Yuda laa ne, fi laay jële lu séddoo samay  
tund.

Samay tànnéef a koy séddoo,  
sama jaam ñi kay a fay dëkke.

<sup>10</sup> Joorug Saron ay dellu di parlub gàtt gi,  
xuru Akor di goorukaayu nag yi,  
ñeel sama ñoñ ñi may sàkkuji.

11 «Waaye yeen ñi wacc Aji Sax ji,  
yeen ñi fàtte sama tund wu sell wi,  
di taajal ndab, Gàdd tuur mi\*,  
di xellil biiñu njafaan, Meni tuur mi†,  
12 maa leen di dogalal saamar,  
ngeen bokk sukk, ñu rendi leen,  
ngir maa woote, wuyuwuleen,  
ma wax, dégguleen,  
xanaa di def li ma ñaawlu,  
taamu li ma buggul.»

13 Moo tax Boroom bi Aji Sax ji dafa wax  
ne:

«Ma ne sama jaam ñeey lekk,  
yeen ngeen nekke xiif.  
Ma ne sama jaam ñeey naan,  
yeen ngeen nekke mar.  
Sama jaam ñeey bannexuji,  
yeen, ngeen nekke gacce.

14 Sama jaam ñeey sarxolleji  
ndax xol bu neex,  
yeen ngeen di yuuxu ndax naqaru xol,  
di jooyoo ndax xol bu jeex.

15 Seen tur wi ngeen bàyyi gannaaw  
la samay tànnéef di móoloo,  
naan: “Yal na la Boroom bi Aji Sax ji rey  
ni diw ak diw,”

waaye ñoom sama jaam ñi,  
tur wu yees lees leen di wooye,  
16 ba képp ku namma barkeel fi kaw suuf,  
ci Yàlla jiy dëgg la koy ñaane,  
te kuy giñ fi kaw suuf it,  
ci Yàlla jiy dëgg la koy giñe.  
Day fekk njàqare ya jiitu di lu ñu fàtte,  
te di lu làqu saay gët.

### *Aji Sax ji yeesal na càkkéefam*

17 «Maa ngii di sàkksi asamaan su yees  
ak suuf su yees.

Deesul fàttlikooti yëf ya jiitu,  
xel dootu ci dem.

18 Bégleen kay,  
te saxoo di bannexoo li ma sàkk:  
Maa ngii di sàkk Yerusalemu mbégte,  
waa dëkk ba nekke bannex.

19 Maay bége Yerusalem,  
bannexoo sama ñoñ.  
Deesu fi déggati ay jooy,  
mbaa coowal njàqare.

20 Deesu fi gisati

tuut-tànk bu dund fan yu néew,  
mbaa mag mu dee te ay fanam matul,  
ba ku am téeméeri at dee sax, di ku gàtt  
fan,  
te ku àggul téeméer, ñu ne alku nga.

21 «Ñooy tabax ay kër, dëkke,  
jëmbati tóokër, lekk ca meññeef ma.

22 Duñu tabax moos, keneen dëkke;  
duñu jëmbat moos, keneen xéewloo.  
Sama ñoñ ay tollook garab yi fan,

sama xejj yeey jagoo seenu ñaq.

23 Duñu liggéeyati mukc ci neen  
te dootuñu jural mbas.

Ñooñooy askanu ñi Aji Sax ji barkeel,  
seeni doom nekk ak ñoom.

24 Su boobaa balees woote,  
man, maay wuyu;

balaa ñoo daane seen kàddu, ma nangul  
leen.

25 Bukki ak mboteey bokk di for,  
gaynde niw nag, di for um ñax,  
jaan di dunde pënd.

Deesatul gaañe mbaa di lore,  
fi mboolem sama kaw tund wu sell wi.»  
Aji Sax jee ko wax.

## 66

### *Ragal Yàlla du jëfi ngistal*

1 Aji Sax ji dafa wax ne: «Asamaan sama  
ngàngunee,  
suuf di sama ndëggastal.

Ana kër gu ngeen may tabaxal man?  
Ana ban bérab ay sama dal-lukaay?

2 Mboolem yooyu, sama loxoo ko sàkk;  
nii la lépp ame.» Kàddug Aji Sax jee.

«Ku mel nii laay niir:  
néew-ji-doole ji xolam jeex,  
te muy déglu sama kàddu bay lox.

3 Kee moom mu ngi rendiw yëkk, sarxal,  
te teewu koo bóome.

Kee rendiw xar, sarxal,  
te teewu koo damm loosu xaj, sarxal.

Kee ngi joxe saraxu pepp,  
te teewu koo tuur deretu mbaam-xuux.  
Kee di taal saraxu baaxantalu cuuraay,  
tey jaamu ay tuur.

Ñoo taamu seen yoonu bopp,  
safoo seeni jëf ju seexluwu.

\* 65:11 65.11 Gàdd mooy tuur mi ñu jiiñ wërsëg. † 65:11 65.11 Meni mooy tuur mi ñu jiiñ ndogal.



4 Man it maa leen di taamoo jox seeni mbugal,  
dikke leen tiitaange yi ñu yelloo,  
ngir maa woote, kenn wuyuwul,  
ma àddu, dégluwuñu ma.  
Xanaa di def lu bon lu ma ñaawlu,  
li ma buggul, ñu taamu ko.»

*Aji Sax ji mujj na dikk*

5 Dégluleen kàddug Aji Sax ji,  
yeen ñiy déglu kàddoom, di lox.  
Lii de mooy seen kàddug bokk,  
yi leen jéppi, di leen dàq ngir samaw tur.  
Ñu ngi naan: «Na Aji Sax ji darajaal  
boppam,  
ba nu teewe seen mbégte, yeen ñii!»  
Waaye ñoom de ñooy rus.  
6 Coowal xaree ngoog bawoo dëkk ba,  
coow laa nga jóge kërug Yàlla ga,  
coowal Aji Sax jee, mooy yool ay noonam.

7 Kii balaa matu, wasin na,  
bala moo am mititu mat, jur na doom ju  
góor.

8 Ku masa dégg lu mel nii?  
Ku masa gis lu mel nii?  
Am réew dina sosu ci benn bés a?  
Am aw xeet dina jekki sosu ci wenn fan?  
Siyon de, moo tàmbali matu rekk,  
jur doomam yu góor.

9 Aji Sax ji nee: «Man miy jàpple jigéen  
ba èmbam mat,  
dinaa ko xañ wasin?  
Man miy wasinloo nit,  
dinaa fatt njurukaayam?»  
Sa Yàllaa ko wax.

10 Yeen soppey Yerusaleem yépp,  
bégandooleen ak moom,  
te di ko bannexoo.  
Mboolem yeen ñi doon ñaawlu tiisu  
Yerusaleem,

bokkleen ak moom xolam bu sedd.

11 Su ko defee ngeen nàmp ba suur  
weenam wiy naxtaane,  
su ko defee ngeen nàmp bay tàqamtiku  
soowum weenam mi ne xéew.

12 Aji Sax ji déy dafa wax ne:  
«Maa ngii di yóbbu Yerusaleem  
ci jàmm ju mel ni géej,  
ak waamey koom muy wal, bawoo ci xeet  
yi.

Yeenay tooge lupp Yerusaleem, di nàmp,  
uufu ciy óom, mu di leen raay.

13 Man maa leen di naxtaan ba ngeen dal,  
ni doom ju ndeyam di naxtaan ba mu dal,  
ngeen am xel mu dal fi Yerusaleem.

14 Yeenay teewe lii, seen xol tooy,  
seen yaram leqliku ni ñax mu yég nawet.  
Dooley Aji Sax ji la ay jaamam di xam,  
te am sànjam la ay noonam di xam.

15 «Aji Sax ji déy a ngii dikke sawara,  
ay watiiram mel ni ngélén,  
mu nara sànju, sotti meram,  
gèdde sawara wuy sèlséli.

16 Sawara déy la Aji Sax ji di mbugale,  
saamaram ba dal mboolem doom  
aadama,  
ñi Aji Sax ji bóom ne xas.

17 «Ñii di sellalu ak a sangu-set  
bala ñoo duggi tool ya ñuy tuuroo,  
di fa toppi ca gannaaw ka ca digg ba,  
ñooñooy lekk yàppu mbaam,  
ak yeneen yu seexluwu ni janax,  
te ñooy bokk sànk.»

Kàddug Aji Sax jee.

18 «Man maa xam seeni jéf ak seeni  
xalaat.

Bés bii taxaw lees di dajale xeetoo xeet  
aki làkk,  
ñu dikk ba niir samag leer.

19 Maay teg firnde fi seen digg,  
ba jël ñenn ca ña dese bakkan ca ñoom,  
yebal leen ci xeet yi,  
yebal leen Tarsis, ak Pul ak Ludd,  
ñooña di ñu mane fitt,  
ma yebal leen ca waa Tubal ak Yawaan,  
waa duni géej yu sore ya,  
ñooñu masula dégg sama jaloore,  
te masuñoo gis sama teddnga,  
sama ndaw ñaa leen di xamal sama  
teddnga.

20 Xeet yooyooy indi seen bokk  
yi bokk ak yeen ñépp,  
jële leen ci mboolem xeet yi,  
ñu doon sarax bu ñeel Aji Sax ji,  
wari fas aki watiir,  
ba ci watiir yu ñu mbaar,  
aki berkelleeki giléem,  
ba agsi sama tund wu sell,  
wi ci Yerusaleem.»

Aji Sax jee ko wax.  
 «Day mel ni noonu bànni Israyil di  
     yóbboo sarax,  
 yeb ko ci ndab lu sell,  
 yóbbu kër Aji Sax ji.

<sup>21</sup> Te ñenn ci yooyu xeet, maa leen di jël,  
 def leen ay sarxalkat aki Leween.»

Aji Sax jee ko wax.  
<sup>22</sup> «Asamaan su yees sii,  
 ak suuf su yees sii may waaja sàkk déy,  
 ni seen taxawaay di yàgge fi sama  
     kanam,  
 yeen, ni la seen askan ak seen tur di  
     yàgge fi sama kanam.

<sup>23</sup> Su ko defee Terutel weer ba Terutel  
     weer,  
 bésub Noflaay ba bésub Noflaay,  
 mboolem doom aadama di ma su-  
     jjóotali.»

Aji Sax jee ko wax.  
<sup>24</sup> «Te bu ñu génnee, gis néewi  
     ñi doon fippu fi sama kaw,  
 seeni sax duñu dee mukk,  
 seen sawara du fey mukk,  
 te boroom suux bu leen gis, yaram wa  
     daw.»

## Yeremi

<sup>1</sup> Muy kàddug Yeremi, góor gi baayam Ilkiya bokk ci sarxalkat yi dëkk Anatot, ca diiwaanu Beñamin. <sup>2</sup> Kàddug Aji Sax ji dikkal ko ci jamonoy buuru réewum Yuda, Yosya doomu Amon. Mu yemook fukkeelu atu nguuram ak ñett. <sup>3</sup> Kàddug Aji Sax ji dikkal na ko ba tey ci janti buurub Yuda, Yowakim doomu Yosya, di ko dikkal, ba keroog nguurug Cedesyas, jeneen doomu Yosya ja di jeex. Mu yemook fukkeelu atu nguuram ak benn, ca juróomeelu weer wa. Booba lañu jàpp waa Yerusalem njaam, yóbbu leen.

### Waxyu dal na Yuda

(Saar 1.4—25.14)

#### Yàlla woo na Yeremi

<sup>4</sup> Kàddug Aji Sax ji dikkal na ma, ne ma:  
<sup>5</sup> «Laata ma lay sos ci sa biiru ndey, xam naa la;  
laata ngay juddoo ci sa ndey, séddoo naa la,  
def la ngay yonent ñeel xeet yi.»

<sup>6</sup> Ma ne: «Éy Boroom bi Aji Sax ji, da di manumaa wax, gone donj laa.»

<sup>7</sup> Aji Sax ji ne ma: «Bul ne: “Gone laa.”  
Képp ku ma la yebal, dem ca;  
lépp lu ma la sant, wax ko.

<sup>8</sup> Bu leen ragal, ngir yaw laay àndal, di la xettli.»  
Kàddug Aji Sax jee.

<sup>9</sup> Aji Sax ji tàllal loxoom, laal sama gémmin.

Aji Sax ji ne ma:

«Mu ngoog, sexal naa la samay kàddu.

<sup>10</sup> Ma ne, tabb naa la bés niki tey, ci kaw xeet yeek réew yi, ngay buddat, di fàqat, di yàqte ak a daaneel, di defar ak a jëmbat.»

#### Yàlla wone na ñaari misaal

<sup>11</sup> Kàddug Aji Sax ji dikkal ma, ne ma: «Yeremi, loo gis?» Ma ne ko: «Caru garabu saal laa gis.» <sup>12</sup> Aji Sax ji ne ma:

«Yaa ko gis, maa sàlloo def sama kàddu, ngir sottal ko.»

<sup>13</sup> Kàddug Aji Sax ji dikkalaat ma ñaareel bi yoon, ne ma: «Loo gis?» Ma ne: «Cin luy bax laa gis. Mu ngi joye bëj-gànnar, jublook nun.» <sup>14</sup> Aji Sax ji ne ma:

«Bëj-gànnar la safaan bay fettaxe, dal ci kaw waa réew mi mépp.

<sup>15</sup> Maa ngii déy, di woo mboolem waasoy réewi bëj-gànnar ak seeni buur.»

Kàddug Aji Sax jee.

«Dañuy dikk, ku ne dëj ngànguneem fi janook bunti Yerusalem, jànkoonteeke tataam yépp, ak dëkki Yuda yépp.

<sup>16</sup> Maay biral samay àtteek ñoom ci seen mbon gi gépp:

Dañu maa wacc,  
di taalal cuuraay yeneen yàlla,  
di sujjóotal lu ñu sàkke seeni loxo.

<sup>17</sup> «Yaw nag takkul te wax leen lépp lu ma la sant.

Bul am tiitaange fi seen kanam, lu ko moy ma tiital la fi seen kanam.

<sup>18</sup> «Maa ngii def la bésuub tey nga mel ni dëkk bu mag bu tata wër, mel ni xeru weñ mbaa tatay xàñar, jàkkaarlook réew mi mépp, muy buuri Yuda aki kàngamam, di sarxalkati réew mi ak baadoolo yi.

<sup>19</sup> Dañu lay xeex te duñu la man, yaw laay àndal, di la xettli.»

Kàddug Aji Sax jee.

## 2

#### Yàlla taxawu na Israyil

<sup>1</sup> Kàddug Aji Sax ji dikkal ma, ne ma:

<sup>2</sup> «Demal yéeneji lii, Yerusalem di dégg, nga ne: “Aji Sax ji dafa wax ne:

Maa ngi fàttliku sa ngor ba ngay ndaw, ak sa cofeel ba nga deeb séet, ba ngay topp sama gannaaw ca màndin ma,

ba ngay jaare fa dara dul sax.

<sup>3</sup> Mooy ba Israyil dee lu ñu sellalal Aji Sax ji,

di ndoortel meññeefam\*.  
Képp ku ko sex, toppees ko ko,  
musiba dikkal ko.»»  
Kàddug Aji Sax jee.

*Bànni Israyil wor nañu*

<sup>4</sup> Dégluleen kàddug Aji Sax ji,  
yeen waa kër Yanqóoba,  
ba ci mboolem làngì kër Israyil.

<sup>5</sup> Aji Sax ji dafa wax ne:  
«Ana sikk bu ma seeni maam gisal,  
ba tax ñu sore ma,  
di topp xërëmi neen,  
ba far neen?»

<sup>6</sup> Newuñu: “Ana Aji Sax,  
ji nu génne woon réewum Misra,  
jiite nu ca biir màndij ma,  
ca joor gu wow gaak xur ya,  
réewum maral ma lëndëm kërúus,  
jaaresu fa, dëkkeesu fa?”

<sup>7</sup> Ma indi leen suuf su nangu,  
ngir leel leeni meññeefam aki  
ngëneelam.

Ngeen dikk sobeel sama suuf sii,  
ba sama céru suuf si siblu.

*Aji Sax jaa ngi layoo*

<sup>8</sup> «Sarxalkat yi newuñu: “Ana Aji Sax ji?”

Ñi ñank yoon wi faaleetuñu ma,  
njiit yi gantal ma,  
yonent yiy waxe waxyuy Baal, tuur mi,  
di topp lu leen dul jariñ.

<sup>9</sup> Moo ma tax di layooteek yeen,  
ba layook seeni sët.»  
Kàddug Aji Sax jee.

<sup>10</sup> «Jáll-leen ba ca duni Kitim fa sowu, te  
xool;  
yónneeleen Kedar fa penku, seetlu bu  
baaxa baax  
ndegam dingeen gis lu mel nii!

<sup>11</sup> Fu aw xeet masa weccee yàllaam?  
Moonte duñuy yàlla sax!  
Moona xeet wi ma séddoo weccoo séen  
darajay Yàlla  
te du leen jariñ dara.

<sup>12</sup> Asamaanee, waarul ci lii!  
Jommil, ba jommaaral!»  
Kàddug Aji Sax jee.

<sup>13</sup> «Ñaari yoon la xeet wi ma séddoo  
bàkkaar:  
ma di bētu ndox muy dund,  
ñu wacc ma, man,  
di gasal seen bopp kàmbi dencukaayi  
ndox,  
te kàmb yi fett, di senn.

<sup>14</sup> «Israyil da dib jaam a?  
Am daa juddoo kërúg njaam?  
Ana lu tax ñu doon alalu sèxëtoo?

<sup>15</sup> Gaynde yaa ngi ñar ci seen kaw,  
di leen xiiru!

Gaynde yee gentel seenum réew,  
ba seeni dëkk di gent yu kenn dëkkul.

<sup>16</sup> Te it niti Memfisoo niti Tapanes†  
ñoooy dikk wat leen nel.

<sup>17</sup> Xanaa du yeena def seen bopp lii,  
di wacc seen Yàlla Aji Sax ji,  
ba mu leen di jiite ca yoon wa?

<sup>18</sup> Léegi lu ngeen wuti Misra?

Dangeen di naani ca ndoxum Niil ma ca  
Misraa?

Lu ngeen wuti Asiri?

Dangeen di naani ca dexu Efraat ca Ba-  
bilon a?

<sup>19</sup> Seenug mbon a leen di mbugal,  
seen ñàkk kóllère yar leen.

Ñamleen ba gis ni ngeen ma dëddoo,  
wormaalatuleen ma, man seen Yàlla Aji  
Sax ji,

muy loraange ju leen wex.»

Kàddug Aji Sax jee, Boroom gàngoor yi.

*Yuda amul worma.*

<sup>20</sup> «Yàgg ngeena yiwiku,  
dog seeni jéng,

ba ne dungeen ma jaamu.

Kaw tundoo tund,  
ker garaboo garab gu naat,  
gànctu ngeen fa.

<sup>21</sup> Moona maa leen jëmbat, ngeen di  
ngëneelu reseñ,

di jiwu mu mucc ayib.

Nu ngeen walbatikoo di baadooloy reseñu  
àll?

<sup>22</sup> Bu ngeen raggoon woon saabu,  
ba raggooteek xeme it,  
seen ñaawtéef gàkk, may gis.»  
Kàddug Boroom bi Aji Sax jee.

\* **2:3** 2.3 ndoortel meññeefam, Aji Sax ji lañu ko daan jagleel. Kenn sañu cee lekk. † **2:16** 2.16 Memfis ak Tapanes dëkki Misra lañu. Fi ñu ne Memfis am na tekki yu fi indi turu Nof.

23 «Nu ngeen ñemee naa: “Sobeelunu sunu bopp te toppunu tuuri Baal?” Seetleen li ngeen nekke ci xur wi†, xool-leen li ngeen di def, mel ni giléem gu ndaw, di wodd-woddi, fu ne mu daw jëm fa,  
24 mbaa mbaamu àll mu miin màndinj mi, xabtaloo bakkanam, di xañtu ngelaw li. Bu béggee tëbu, ku ko mana téye? Kuuy mu koy sàkku du sonn, bu ci tolloo rekk, mu jot ko.  
25 Ma ne, buleen daw ba mujje tànkì neen ak put gu wow. Ngeen naa: “Bul sonn, sopp nanu yàllay doxandéem yi, te ñoom lañuy topp!”»

26 «Gàcceg sàcc bu ñu jàpp dees na ko gâceel waa kër Israyil, ñook seeni buur ak seeni kàngam ak seeni sarxalkat ak seeni yonent,  
27 ñoom ñii naa bii bant: “Yaay sunu baay,” naan wee doj: “Yaa nu sukk, jur.” Wonuñu ma kanam, xanaa gannaaw, te bu leen musiba dikkalee, ñu naa: “Wallu nu boog!”  
28 Waaw, ana seen yàlla yi ngeen sàkkal seen bopp? Bu leen musiba dikkalee, nañ leen wallu, bu ñu ko manee! Gannaaw yeen waa Yuda, ni seeni dëkk tollu la seeni yàlla tollu!  
29 Ana lu ngeen di layook man? Yeen ñépp a ma gàntal!» Kàddug Aji Sax jee.  
30 «Mbugal naa seeni doom, jariñul dara. Dégguñu yar, bóom ngeen seeni yonent, mbete gaynde yuy fàdde.  
31 Éey niti Israyili tey, teewluleen kàddug Aji Sax ji!  
«Ni màndinj mi aaye, ndax mas naa nee aaye ci Israyil?»

Mbaa ma mel ni réewum lëndëm aki loraangeem?  
Lu waral sama ñoñ naa: “Noo moom sunu bopp, dootunu délsi fi yaw”?  
32 Ab janq dina fàtte takkaayam? Am ab séet dina fàtte mbubbum xewam? Moona sama ñoñ fàtte nañu ma fan yu dul jeex.  
33 Yeen aka mokkal gànctu! Jeeg ju bon ji sax di jàngé ci yeen.  
34 Te seeni pendal sax taq na dereti néew-ji-doole yu deful dara, fekkuleen leen it ñuy dàjji kër jaambur§. Loolu yépp terewul,  
35 ngeen naan: “Nun de defunu dara, merum Yàlla won na nu gannaaw moos.” Gannaaw nee ngeen bàkkaaruleen, maa ngii di leen àtte.  
36 Yeen aka yomba soppi doxalin! Waaye Misraa leen di bett, na leen Asiri bette woon,  
37 ngeen jóge ca yenu seeni loxo. Aji Sax jee wacc ñi ngeen yaakaar, ba dungeen baaxlee ci ñoom.»

### 3

#### *Tuub jot na*

1 Mu ne: «Su waay fasee jabaram, mu dem doon jabaru keneen, Su waa ja jëlaatee ndaw sa èllég,\* Loolu du sobeela sobeel réew mii? Moona yeen gànctu ngeen aki fari far, Ana nu ngeen mana délsee fi man?» Kàddug Aji Sax jee.

2 «Téenleen, séentu tund† ya ne faraa! Ana fu ñu leen fi téddeewul? Ci yoon yi ngeen di yeeroo ni màngaan muy dogalee ci màndinj mi. Sobeel ngeen réew meek seen gànctook seenug mbon.  
3 Moo tax waame aje, taw yiy mujje dikkul. Teewul ngeen dëgër bët nib gànc, ñàkk gâce!

† 2:23 2.23 xur wi ñuy wax fii, mooy xuru Ben Inom ga ca Yerusalem te ñu daan fa def ay yëfi xërëm. § 2:34 2.34 Seetal ci *Mucc ga* 22.1. \* 3:1 3.1 Yoonu Musaa mayul ku fase jabaram mu di ko jëlaat, gannaaw bu séyaatee ba tas. Seetal ci *Baamtug yoon wi* 24.1-4. † 3:2 3.2 tund: kaw tund yooyu lañu daan jaamoo tuur yi ñu foogoon ne dañuy nangul am njur.

4 Léegi ngeen di ma woo wall naa:  
 “Baay, yaay sama xejj ca ba may ndaw.  
 5 Xanaa deesul mer ba fàww?  
 Xanaa xadar du sax?”  
 Ma ne: “Israyiloo, yeena ko wax,  
 waaye bon ngeen lu ngeen man.”»

*Israyil woyof kumba, Yuda toogadi*

6 Aji Sax ji nag wax ma ci jamonoy buur Yosya ne ma: «Gis nga li Israyil Woyof-Kumba-si def? Di dem kaw tundoo tund ak ker garaboo garab gu naat, di fa gànctu. 7 Ma noon su ma defee loolu lépp ba noppi, dina délsi, te délsiwul. Te doomu ndeyam Yuda workat bi gis na ci. 8 Gis naa ne it Israyil Woyof-Kumba-si gànctu na ba ma yebal ko, jox ko kayitu pase, mu dem, te taxul doomu ndeyam Yuda workat bi ragal. Moom it daa dem di gànctu. 9 Ni gànctu yombe Israyil tax na réew mi sobewu. Njaaloo naak yállay doj, njaalook yállay bant. 10 Loolu yépp itam taxul Yuda workat bi, doomu ndeyu Israyil, désee léppi xolam fi man, xanaa di jinigal rekk.» Kàddug Aji Sax jee. 11 Aji Sax ji nag ne ma: «Li Israyil di woyof kumba lépp sax moo tane Yuda workat bi. 12 Demal yéeneji kàddu yii fa bėj-gànnaar. Nga ne: “Israyiloo, Woyof-Kumba, délsil.” Kàddug Aji Sax jee. “Duma la fasal kanam. Man Boroom ngor laa, te duma jàpp mer ba fàww.” Kàddug Aji Sax jee. 13 “Nangul ne ñaaw nga rekk, te man sa Yàlla Aji Sax ji nga tooñ, di wër di foye sa bopp ak yállay doxandéem yi ci ker garaboo garab gu naat, te dégluwoo ma.”» Kàddug Aji Sax jee. 14 «Yeen doom yu woyof kumba yi, délsileen.» Kàddug Aji Sax jee. «Maay seen boroom kër, maay jële kenn ci bii dëkk, ñaar ca bee gox, boole indi Siyon, 15 tànnal leen sàmm yu ma doy,

ñu sàmme leen xam-xam akug muus. 16 Janti keroog bu ngeen baree ba giir ci réew mi, deesul waxe gaalu kóllërey Aji Sax ji†; xel dootu ci dem, deesu ko fàttliku sax, te deesu ko namm, deesu ko sàkkati sax.» Kàddug Aji Sax jee. 17 «Janti keroog Yerusalem, ngànguney Aji Sax ji lees koy wooye, xeetoo xeet di fi daje, ngir Aji Sax, ji turam ñeel Yerusalem, te dootuñu tē ticc ci seen mébét yu bon. 18 Janti keroog waa kër Yuda ànd ak waa kër Israyil, bawoondoo réewum bėj-gànnaar, wuti réew ma ma séddoon seeni maam. 19 «Maa leen naroon teral ni doom yu góor, may leen suuf su xemmemlu, ngeen gënle xeet yépp suuf. Ma noon dingeen ma wooye baay te dungeen ma dëddu muk. 20 Teewul, yeen waa kër Israyiloo, ngeen wor ma, ni as ndaw di wore faram.» Kàddug Aji Sax jee. 21 «Coow dégtu na kaw tund ya ne faraa, bànni Israyil ay jooy ak a tinu. Ñoo lajj seenu yoon, fàtte seen Yàlla Aji Sax ji. 22 Yeen doom yu woyof kumba yi, waññikuleen, ma fajtal seen woyof kumba.»

*Kàdduy tuub jib na*  
 Nu ngi nii fekksi la, yaw kay yaay sunu Yàlla Aji Sax ji. 23 Naxi neen kay lañu jële ca xërëmi tund yu ndaw ya ak coowal kaw tund yu mag ya. Muccu Israyil kay, fi sunu Yàlla Aji Sax ji. 24 Ba ñuy gone ba tey, tuur mu ruslu maa ngi neenal ñaagu maam yi, seen jur gu gudd ak gu gàtt, ba ci seeni doom, góor ak jigéen.

† 3:16 3.16 gaalu kóllërey Aji Sax ji moo doon firndeel teewaayu Aji Sax ji ci digg bànni Israyil.

25 Nan gapproo sunu gâce,  
 sàngoo sunu toroxte.  
 Nook sunuy maam déy,  
 ba ñuy gone ba tey jii,  
 nu ngi tooñ sunu Yàlla Aji Sax ji,  
 te déggalunu sunu Yàlla Aji Sax ji.

#### 4

1 «Yaw Israyil, sooy waññiku,  
 waññikul fi man.»  
 Kàddug Aji Sax jee.  
 «Soo jélee fi sama kanam  
 sa jëf ju siblu,  
 te jenguloo,  
 2 xanaa di waate Aji Sax jiy dund,  
 ci dëgg ak njub ak ngor,  
 kon xeet yi di barkeeloo Aji Sax ji,  
 di ko sagoo.»  
 3 Aji Sax ji déy dafa wax waa Yudak  
 Yerusalem, ne leen:  
 «Ruujleen seen tool,  
 buleen ji ciy dég.  
 4 Yeen waa Yudak Yerusalem, deeleen  
 xaraf ngir Aji Sax ji,  
 dogleen seen mbuñukay xol,  
 balaa sama xadar ne jippét ni sawara,  
 di tàkk te deesu ko fey  
 ndax seen jëf ju bon.

#### *Xare jib na*

5 «Nangeen yégle lii fa Yuda,  
 dégtale ko fa Yerusalem,  
 yéenee koog liit fi biir réew mi  
 te xaacu seen kem kàttan ne leen:  
 “Dajeleen, nu dem ca dëkk ya tata wër.”  
 6 Yékkatileen raaya, jubale Siyon,  
 làqujileen, buleen taxaw,  
 musiba déy laay jële běj-gànnar,  
 muy safaan bu réy.  
 7 «Gayndee fëlle geeram,  
 fàkkaskatu xeet yee jóg, génne këram,  
 nara gentel seeni dëkk,  
 ba ñu di gent yu kenn dëkkul.  
 8 Kon nag sol-leeni saaku, ñaawloo te  
 yuuxu ne:  
 “Merum Aji Sax ji tàng na kat te moyu  
 nu.”  
 9 Bésub keroog,» kàddug Aji Sax jee,  
 «xolu buur jeex, kàngam ne yàcc,  
 sarxalkat waaru, yonent jommi.»  
*Yeremeey wax*

10 Ma ne, «Éy Boroom bi Aji Sax ji,  
 yaa naxlu askan wii nax yu metti,  
 ba nga nee: “Yerusalem jàmm lay am,”  
 te saamar tege ci putam.»

#### *Mbugal taxaw na*

11 Janti keroog dees na wax askanu  
 Yerusalem wii, ne leen:  
 «Jaas bu tàng a uppe kaw tund ya ne  
 faraas ca màndiñ ma,  
 wuti sama ñoñ.  
 Du doon ngelaw lees di bàcceek a beese.  
 12 Ngelaw lu ko ëpp doole laay indi.  
 Léegi maa leen di biral sama kàddug  
 mbugal.»

#### *Waa Yerusalem ay wax*

13 «Noon baa ngii, di jóg niy niir,  
 watiiri xareem ni ngélén,  
 fasam ya gëna gaawi jaxaay.  
 Wóoy ngalla nun, yàqu nan!»

#### *Yàllaay wax*

14 «Éey Yerusalem, fóotal sa xol, jële ci lu  
 bon,  
 ndax nga mucc.  
 Foo àppal sa mébéti xol yu bon?  
 15 Kàddug yéenee ngi jibe Dan,  
 musiba dégtu na, bawoo tundu Efrayim.  
 16 Jottlileen ko xeet yi,  
 neleen Yerusalem:  
 “Songkat yaa ngii riire réew mu sore ma,  
 xaacoondoo fi kaw dëkki Yuda.”  
 17 Nooy gaw Yerusalem ni wattukati tool,  
 ndax man la gántal.»  
 Kàddug Aji Sax jee.  
 18 «Sa jëfin ak say jëf a la yóbbe lii,  
 sa musibaa ngook, wex la xàtt,  
 di dagg sa xol.»

#### *Yeremi jàq na*

19 Maaka jàqa jàq bay jal-jali,  
 sama xol biy fuddu!  
 Éy wii mititu xol!  
 Duma mana noppi,  
 maa dégg wooteb liit  
 ak yuuxi xare.

20 Yéenees na rajaxoo ci kaw rajaxoo,  
 réew mi mépp ne tasar kay!

Jekki-jekki samay xayma tasaaroo.  
 Xef-xippi ndimoy xayma ya xotatoo!

21 Xanaa дума gis ba fàww raayab noon,  
 liitu xare di ko feelu?

*Aji Sax ji jéppi na ñoñam*

22 «Dofe la sama ñoñ def.  
Man, xamuñu maay kan,  
mbetey gone yu dul xalaat dara;  
dég-dég, tus;  
seen xel mépp, lu bon rekk,  
lu baax, xamuñu ci dara.»

*Àddina salfaañoo na*

23 Maa xool suuf,  
ndeke ma nga ne maraas, ne wëyën;  
ma xool asamaan,  
leer amatu ca.  
24 Ma xool tund yu mag yi,  
ndeke ñu ngi yëngu,  
tund yu ndaw yépp di jaayu.  
25 Ma xoolaat, gisuma nit,  
njanaaw yépp daw.  
26 Ma xool, gis suuf su nangu sa  
di ndànd-foyfoy,  
dëkk yépp raaf  
ndax Aji Sax jeek tangaayu sànjam.

27 Aji Sax ji déy dafa wax ne:  
«Duma tas lépp tasar,  
waaye réew mi mépp ay gental.

28 Loolooy tax suuf di ñaawlu,  
asamaan di lëndëm.  
Maa ko wax, maa ko dogu;  
duma dëpp, duma deltu gannaaw.»

*Yerusalem dugg na fitna*

29 Gawar ak fittkat riir,  
waa dëkk yépp fëx,  
ñii tàbbiy gajj,  
ñee ñalgu ci kawi doj,  
ñu won dëkkoo dëkk gannaaw,  
kenn desatu ca.  
30 Yaw Yerusalem mu tas mi,  
ana looy def nii,  
di solu ba yànj,  
gànjaroo wurus,  
tusngalu, yàkkleey gët?  
Yaa ngi caaxoñu ci neen:  
say xéddkat wacc nañu la,  
sa bakkan lañuy wut.  
31 Baatu ndaw su jagadi laa dégg,  
ma nga jàq, di matub taawam.  
Baatub Siyon, dëkk bu taaru baal!  
Ma ngay àppaat, tàllal yoxo ya,  
naan: «Wóoy, ngalla man;  
ne yàcc ci loxol bóomkat yi!»

**5***Mbugal war na  
Yàllaay wax*

1 «Wërleen mbeddi Yerusalem,  
xool-leen, seet ciy péncam rekk ba xam  
ndegam dingeen gis kenn,  
kenn kepp kuy def njub,  
di sàmm worma,  
ma daldi leen baal.

2 Bu ñu nee sax: «Giñ naa ko ci Aji Sax jiy  
dund,»  
ay fen lañuy giñ.»

*Yeremeey wax*

3 Aji Sax ji, xanaa du worma ngay sàkku?  
Dóor nga leen, safu leen;  
nga làbbli, ñu tanqamlu,  
wowle ba raw doj, baña dëpp.

4 Man nag, ma noon: «Ñii de ay baadoolo  
rekk lañu,  
di def jëfi dof,  
xamuñu yoonu Aji Sax ji,  
xamuñu lu seen àtteb Yàlla laaj.

5 Kon naa dem seeti kàngam yi,  
wax ak ñoom.  
Xanaa ñoom dinañu xam yoonu Aji Sax  
ji,

xam lu seen àtteb Yàlla laaj.»  
Waaye ñoo bokk daggook Yàlla,  
dogook moom.

6 Moo tax gaynde di génne ci gott bi, fàdd  
leen,  
bukkiy màndiñ mi di leen yàpp,  
segg di tëru seeni dëkk,  
ku ca génne, dees na la xotat.  
Seeni moy a bare,  
te seen ñàkk worma réy.

*Yàllaay wax*

7 «Yerusalem, ana lu tax ma di la baal,  
te say doom wacc ma,  
di giñe lu dul Yàlla.

Ma reggal leen, teewul ñuy njaaloo,  
riixle, jëm kër gànc ya!

8 Mbete fas yu suur, tukkal,  
ku ne ñexal, jëm sa jabaru moroom.

9 Lii, duma leen ko dumaa?»

Kàddug Aji Sax jee.

Mu ne: «Wii xeet, duma ko fey yoolam?»

*Dëddu Yàlla, gis ko*

10 «Yéegleen seeni tata, yàqte  
waaye buleen leen jeexal tàkk.



Tenqileen lawit yi,  
ñooñoo bokkul ci Aji Sax ji.  
11 Waa kër Israyil ak waa kër Yuda kat,  
ñoo ma wora wor!»  
Kàddug Aji Sax jee.

12 Mu ne: «Ñoo fenal Aji Sax ji,  
naan: “Moom du def dara,  
musiba du nu dal,  
saamaroo, xiifoo, dunu ci gis dara.

13 Yonent yi daal, ngelawal neen!  
Kàddug waxyu newul ci ñoom;  
li ñuy wax, na leen yenu!”»

14 Moo tax Aji Sax ji Boroom gàngoor yi  
dafa wax ne:  
«Gannaaw wax jii lañu wax,  
maa ngii di def samay wax di sawara ci  
sa gémmiñ,  
askan wii di matt,  
mu xoyom leen.

15 Éey waa kër Israyil,»  
kàddug Aji Sax jee,  
«maa ngii di indi fi seen kaw xeet wu  
bawoo fu sore.  
Xeet wu am kàttan lañu,  
xeet wu yàgga yàgg,  
wu ngeen xamul seen làmmiñ,  
te dégguleen seeni wax.

16 Seen mbari fitt ñafal paxum bàmmeele,  
ñoom ñépp di ñeyi xare.

17 Ñooy dikk, warax seen meññeef ak  
seen ñam,  
jeexal seeni doom, góor ak jigéen,  
lekk seen jur gu gudd ak gu gàtt,  
saax-saaxee seeni reseñ ak seeni figg;  
te dëkk yi ngeen yaakaare seeni tata,  
dooley saamar a koy tas.

18 Waaye bési keroog it,»  
kàddug Aji Sax jee,  
«duma leen jeexal tàkk.

19 Bu ñu nee:  
“Ana lu waral sunu Yàlla Aji Sax ji teg nu  
lii lépp?”

ne leen: “Yàlla nee:  
Ni ngeen ma dëddoo, di jaamu yàllay  
jaambur ci seenum réew,  
ni ngeen di jaamujee ay jaambur  
biir réew mu ngeen moomul.”»

### *Yàlla àrtu na xeet wi*

20 «Jottlileen lii waa kër Yanqóoba,  
biral-leen ko fa Yuda, ne leen:

21 Ngalla dégluleen lii,  
xeet wu dofe, ñàkk xel wi ngeen doon,  
ami gët te dungeen gis,  
ami nopp te dungeen dégg!

22 Man daal, dungeen ma ragal,  
am tiituleen ma?»  
Kàddug Aji Sax jee.

«Man mi teg gannuus, yemalee ko géej,  
dogalal ko ko dàkk te du ko jàll,  
lu mu wañax wañax du ko man;  
gannax ya day riir, te du jàll!

23 Waaye wii xeet a dègër bopp te  
déggadi.

Dëddu nañu ma ba wéy.

24 Seen xel demul sax ba ne:  
“Tee noo ragal sunu Yàlla Aji Sax,  
jiy jot, mu tawal nu,  
taw yu jëkk ak yu mujj yi,  
àppal nu ayi bési ngóob,  
sédde nu?”

25 Yooyii seeni ñaawtéef a ko waññi,  
seen bàkkaar a leen xañ ngéneel.

### *Mbon maase na ci xeet wi*

26 «Waaw! Daa am ñu bon ci sama ñoñ,  
ñuy tērook a fiire  
mbete nappkati picc.

27 Ni kaaf di feeseeki picc,  
ni la seeni kër di feese alali càcc,  
ba tax ñu yokku ba woomle,

28 yaflu, di nes-nesi.

Seenug mbon it amul kem:  
duñu defal jirim njub,  
duñu àtte néew-ji-doole dëgg.

29 Lii, дума leen ko dumaa?»

Kàddug Aji Sax jee.

«Xeet wu mel nii дума ko fey yoolam?

30 Lu siblu te yées am na ci réew mi:

31 Yonent yiy wax waxuy fen,  
sarxalkat yiy jiitee seen coobare,  
te sama ñoñ soppe ko ni!

Moo bu muj ga taxawee, nu ngeen di  
def?»

## 6

### *Gawub Yerusalem nuyoo na*

1 «Yeen askanu Beñamin, fëxleen,  
gén Yerusaleem.

Wal-leen liit gi fa Tekowa,  
jafaleen jum yi Bet Kerem, artoo ko,  
musiba kat a ngi yère bëj-gànaar,  
di safaan bu réy.

<sup>2</sup> Yaw Siyon, dëkk bu taaru bi te xejj, dama lay dammat.

<sup>3</sup> Ay sàmm ak seeni gétt ci sa kaw, ñu samp seeni xayma, wër la, di foral, ku nekk ak pàccam.

<sup>4</sup> Ñii ne: “Waajal-leen xare baak ñoom, nu songi leen digg bëccëg. Waaye wóoy nun, jant a ngi lang, keru ngoon di law!”

<sup>5</sup> Ñee ne: “Nan song congum guddi boog, ba rajaxe seen kër yu yànj.”»

<sup>6</sup> Aji Sax ji Boroom gàngoor yi déy da ne: «Gorleeni bant, sèkke Yerusalem, gaw ko! Dëkk bii dees koy mbugal, àqu noteel la fees dell.

<sup>7</sup> Ni bëtu ndox di dawee, ni lañuy dawale seenug coxor. Fitnaak salfaañooy riir ci dëkk bi, gisuma lu moy jagadeek loraange!»

<sup>8</sup> «Yeen waa Yerusalem, deeleen dégg bala ma leena dëddu, ba gentaal réew mi gent bu kenn dëkkul.»

#### *Askan wa të na*

<sup>9</sup> Aji Sax ji Boroom gàngoor yi dafa wax ne:

«Nañu witta witt ndesu Israyil, ni ñuy witte reseñ, ba nga dawalaat say loxo ca car ya.»

#### *Yeremeey wax*

<sup>10</sup> Moo kan laay waxal, àrtu ko ba mu déglu, yii boroom noppi paaxee tëë teewlu! Kàddug Aji Sax jaa ngii, mel ni lu ñu rus, lu ñu safoowul!

<sup>11</sup> Maa ngi meral Aji Sax ji ba fees ba manatuma koo dékku. Aji Sax ji nee: «Sippi ko tuut-tànk yi ci mbedd mi, sippiwaale ko waxambaane yi daje, mu laawaale jèkkër ak jabar, mag ak màggat,

<sup>12</sup> seeni kër doon alali jaambur, ak seeni tool it ak seeni jabar. Maay xàcci sama loxo déy, dal ci kaw waa réew mi.»

Kàddug Aji Sax jee.

<sup>13</sup> «Ndax ki gëna tuut ba ki gëna mag, ñépp a ngi lewal lu lewul.

Yonent akub sarxalkat, ñépp a ngi wor.

<sup>14</sup> Sofental nañu sama pajum ñoñ ñi dammtoo, naan: “Jàmm, lépp jàmm!” te jàmm amul.

<sup>15</sup> Ñu wara am gacce ci seen jëf ju siblu, te gacce gacceelu leen.

Xamuñu sax luy kersa!

Moo tax ñuy fëlëñoondook ñiy fëlëñu. Kera ba ma leen di dikkal, ñooy tërëf.» Aji Sax jee ko wax.

#### *Pexey askan wi jur na musiba*

<sup>16</sup> Aji Sax ji dafa wax ne:

«Taxawleen ca selebe yoon wa, xool, te laajte yoon ya woon, ne: “Ana yoonu mbaax?”

Ngeen awe ca, am noflaayu bakkan.»

Ñu lànk ne: «Awunu ca.»

<sup>17</sup> «Ma tabbal leeni wattukat ne: “Teewluleen liit gu jib.”»

Ñu lànk ne: «Teewluwnu.»

<sup>18</sup> «Moo tax yeen xeet yi, dégluleen; yeen waaso yi, seedeleen liy xaar ñii.

<sup>19</sup> Yeen waa àddina, dégluleen!

Maa ngii di indil askan wii musiba, seeni pexe jural leen.

Ñoo faalewul samay kàddu, gantal sama yoon.

<sup>20</sup> Lu may doye lii?

Ndàbb lu jóge Saba\*, diw gu xeeñ, bawoo réew mu sore? Seeni saraxi rendi-dóomal safu ma; seen saraxi jur, bugguma.»

<sup>21</sup> Moo tax Aji Sax ji wax ne:

«Maa ngii di tegal askan wii ay pakk, ñu fakkastaloondoo, baay ak doom, dëkkandook ub xarit, ñépp sànkul.»

#### *Noon sàqee na bëj-gànnar*

<sup>22</sup> Aji Sax ji dafa wax ne:

«Aw askan a ngii bàyyikoo réewum bëj-gànnar,

\* 6:20 6.20 Saba am réew la wu bokk ci sowu Arabi, fa fëete suuf.

xeet wu mag lañuy doon, sàqee fa cati  
àddina.

<sup>23</sup> Fitt aku xeej lañuy n̄eb,  
néeg lool, duñu yërëm;  
seen coow ni riirum géej,  
ñu war seeni fas, rēptal,  
làng-déral leen,  
yeen waa Siyon, dēkk bu taaru bi.»

*Waa Yerusalem ay wax*

<sup>24</sup> «Danoo dégg riir mi,  
sunuy yoxo yoqi,  
njàqare ne nu taral,  
ni mititu mat.

<sup>25</sup> Kii naa: “Bul génn ci àll bi!”  
Kee naa: “Bul jaar ci yoon wi!”  
Saamar kay a nga ca loxol noon ba,  
tiitaange dajal fépp!»

*Yeremeey wax*

<sup>26</sup> Éey bokk yi, sol-leeni saaku,  
diwoo dóom, ñaawloo ko.  
Ñaawluleen ni kuy dēj benn bàjjo  
te jooy jooy yu metti,  
nde yàqkat bi day jekki,  
ne sunu kaw dàll!

*Yàllaay wax*

<sup>27</sup> «Maa la def sama nattukatu ñoñ,  
nga di leen nattu ni ñuy nattoo xaalis,  
te war leena seetlu, nemmiku seen jikko.»

*Yeremeey wax*

<sup>28</sup> Ñoom ñépp a di fippukat yu fétteeral,  
wër di sos,  
dégërle ni xànjari ak weñ gu ñuul.  
Ñoom ñépp di yàqkat.

<sup>29</sup> Tēgg wal taalam, mu yànj;  
sawara seeyal beteex.  
Xellees na koo xelli ci neen,  
taxul li ci bon génn.

<sup>30</sup> Dees na leen wooye mbuubitum xaalis,  
nde Aji Sax ji buub na leen, sànni.

## 7

*Yeremi yedd na demkati kër Yàlla yi*

<sup>1</sup> Kàddu gii dikkal na Yeremi, bawoo  
fa Aji Sax ji. Mu ne ko: <sup>2</sup> «Taxawil fa  
bunti kër Aji Sax ji, nga yéene fa kàddu  
gii, ne leen: “Mboolem yeen waa Yuda  
ñiy jalle bunt yii, di jaamusi Aji Sax ji,  
dégluleen kàddug Aji Sax ji. <sup>3</sup> Aji Sax  
ji Boroom gàngoor yi, Yàllay Israyil dafa

wax ne: Jekkal-leen seeni jikkook seeni  
jéf, ma dēel leen bii bérab. <sup>4</sup> Buleen  
naxe seen bopp kàdduy caaxaan, naan:  
‘Kër Aji Sax jaa ngi, kër Aji Sax jaa ngi  
fii, kër Aji Sax jee!’ <sup>5</sup> Su ngeen jekkalee  
jekkal seeni jikko ak seeni jéf déy, di  
defa def yoon seen digg ak seen moroom,  
<sup>6</sup> te notuleen doxandéem, ab jirim akub  
jētun, tuuruleen deretu jaamburu Yàlla,  
fi bii bérab, toppuleen yeneen yàlla bay  
loru, <sup>7</sup> su boobaa, ma dēel leen bii bérab,  
réew mi ma joxoon seeni maam, bu yàgg,  
ba fàww. <sup>8</sup> Yeena ngii di naxe seen bopp  
waxi caaxaan yu amul njariñ. <sup>9</sup> Yeen, nu  
ngeen mane di sàcc, di bóome, di jaaloo,  
di giñi fen, di taalal Baal, tuur mi cuuraay,  
di topp yeneen yàlla yu ngeen xamul,  
<sup>10</sup> tey dikk taxaw fi sama kanam, biir kër  
gii ñu ma tudde, te naan: ‘Nun kay raw  
nanu,’ ba tax ngeen di def mboolem lu  
siblu lii? <sup>11</sup> rawtub sàcc daal ngeen def  
kër gii ñu ma tudde? Man de lii laa gis!”  
Kàddug Aji Sax jee.

<sup>12</sup> «“Demleen rekk kay ca sama bérab  
ba ca Silo, fa ma jèkkoon dēel sama tur,  
ngeen xool na ma ko def ngir mbonug  
Israyil, sama ñoñ.

<sup>13</sup> «“Gannaaw def ngeen jéf jii jépp  
nag,” kàddug Aji Sax jee, “te ma waxoon  
leena wax ay yooni yoon, dégluwleen;  
woo leen, wuyuwleen, <sup>14</sup> kër gii ñu ma  
tudde, ngeen yaakaar ko, bérab bii ma  
leen joxoon, yeen ak seeni maam, na ma  
def Silo laa koy def. <sup>15</sup> Dama leen di dàq,  
ngeen sore ma, na ma dàqe woon seen  
bokk yépp, askanu Efrayim gépp\*.”

*Yàlla gàntal na*

<sup>16</sup> «Waaye yaw bul ñaanal askan wii, bu  
leen yékkatil kàddug ñaan, bu leen tinul  
fi man. Du maa lay déglu moos!

<sup>17</sup> «Xanaa gisoo li ñu nekke fi dēkki  
Yuda ak ci mbeddi Yerusalem? <sup>18</sup> Doom a  
ngi taxan, baay di taal, jigéen di not lu mu  
nakkal ki ñuy wooye Lingeeru asamaan,  
di tuural ay naan yeneen yàlla, di ma  
ko naqarale! <sup>19</sup> Du man lañuy naqaral  
moos!» Kàddug Aji Sax jee. Mu ne:  
«Xanaa kay ñoo ciy rus!»

\* **7:15** 7.15 Efrayim genn la ci fukki giiri bànni Israyil ya séq réewum Israyil, ca bēj-gànnaru réewum Yuda.

<sup>20</sup> Moo tax Aji Sax ji Boroom bi dafa wax ne: «Sama xadar a ngii di sottiku fi bii bérab, fi kaw nit ak mala, garab ak lu suuf meññ, lépp ne jippét, te deesu ko fey.»

<sup>21</sup> Aji Sax ji Boroom gàngoor yi, Yàllay Israyil dafa ne: «Seen juru saraxu rendi-dóomal, dollileen ko ci seen yeneen sarax, te lekk yàpp wi†. <sup>22</sup> Bés ba may génne seeni maam Misra déy, waxuma leen woon mbaa di leen sant mbirum saraxu rendi-dóomal ak yeneen sarax. <sup>23</sup> Mbir mii déy laa leen santoon ne leen: “Déggal-leen ma, ma doon seen Yàlla; yeen ngeen doon sama ñoñ. Doxeleen wépp yoon wu ma leen sant, su ko defee ngeen baaxle.” <sup>24</sup> Waaye déggluwñu ma, teewluwñu ma, xanaa di jéfe seen xel ak seen dègër bopp ak seen bon xol, ba tax ñu dellu gannaaw, jëmuñu kanam. <sup>25</sup> La dale bés ba seeni maam génnee réewum Misra ba bésuub tey jii, yónnee naa leen bés bu nekk mboolem sama jaam ñi, yonent yi. <sup>26</sup> Waaye dégluwñu, teewluwñu ma, xanaa sajjuu loos, di bon, ba yées seeni maam.

<sup>27</sup> «Dinga leen wax kàddu yii yépp, te duñu la déglu, nga woo leen, duñu la wuyu. <sup>28</sup> Su ko defee nga ne leen: “Xeet a ngii wu dul déglu kàddug Yàllaam Aji Sax ji, nanguwñu yar, worma tumurànkeel leen, ba daggook seen làmmiñ.”

### *Xuru Ben Inom di xuru ndee*

<sup>29</sup> «Waa Yerusalemee, seen njañ‡ li ngeen séddoo Yàlla, xuufleen ko, sànni, ñaawloo ko, xaaculeen fa kaw tund ya ne faraas, nde Aji Sax ji xalab na, wacc na seen maas gii sabab sànjam.

<sup>30</sup> Waa Yuda déy, ñoo def lu ma ñaawlu.» Kàddug Aji Sax jee. «Ñoo yeb yëf yu siblu fi biir kër gi ñu ma tudde, di ko sobeel. <sup>31</sup> Ñoo tabax ay jaamookaay ca Tofet fa xuru Ben Inom, di fa sarxe seeni doom, góor ak jigéen, lakk leen, te sanaanewma ko, jaarul sax sama xel. <sup>32</sup> Moo tax ay bés a ngii di ñëw,» kàddug Aji Sax jee, «deesatul tudd Tofet mbaa xuru Ben Inom, xanaa xuru Bóomukaay.»

Dees na rob ca Tofet ndax ñàkk suuf. <sup>33</sup> Néewi xeet wii mujj di lekku njanaaw ak rabu àll, te kenn du leen mana dàq. <sup>34</sup> Maay dakkal fi dèkki Yuda, dakkal fi mbeddi Yerusaleem coowal mbégteek bannex, dakkal kàddug boroom séet, dakkal kàddug séet, ndax réew mu tumurànke.

## 8

<sup>1</sup> «Su boobaa déy,» kàddug Aji Sax jee, «noon yeey sulli yaxi buuri Yuda ak yaxi kàngam yi ak yaxi sarxalkat yi ak yaxi yonent yi ak yaxi waa Yerusaleem, fa seeni bàmmeel, <sup>2</sup> weer leen ci naaj week weer wi ak mboolem biddiwi yi ñu soppoon, di leen jaamu, di leen topp ak a sàkku, di leen sukkal. Deesu ko dajale, deesu ko suul; day mel niy jonkan fi kaw suuf si. <sup>3</sup> Dee mooy gènal dund mboolem ku des ci njaboot gu bon gii, ak mboolem fu ñu dese fa ma leen tasaare woon.» Kàddug Aji Sax jee, Boroom gàngoor yi.

### *Askan wi të na ticc*

<sup>4</sup> «Nanga leen wax ne leen: Aji Sax ji dafa wax ne: Ku daanu, da dul jógaat? Am ku lajj, du délsi? <sup>5</sup> Lu tax xeet wii dèddu? Lu tax Yerusaleem gii lajj, baña délsi? Ñu ngi langaamoo naxi neen, baña délsi. <sup>6</sup> Teewlu naa, déglu naa; du lu jaadu lañu wax. Kenn tuubu ci mbonam, ba ne: “Lu ma def nii?” Ku nekk a topp yoonam, ni fas wu màmm cib xare. <sup>7</sup> Ag xodd sax xam na bésuub demam, pitax, wetwet ak mbelaar it dem, tey sàmm seen bésuub délsi. Waaye sama ñoñ faalewuñu àtteb Aji Sax ji.

† 7:21 7.21 Ci yoon, saraxu rendi-dóomal, deesu ci lekk dara. Yàllaa ngi leen di ñaawal fii, di leen won ne gedd na seen bépp sarax. ‡ 7:29 7.29 njañ: seetal ci *Màndij ma* 6.1-8.

8 Nu ngeen man ne: “Am nan xel, nungeek yoonu Aji Sax ji,” te xalimay yoonalkat soppi ko fen?»

9 Dees na gâceel boroom xel yi, ñu jàq, tarsu. Kàddug Aji Sax jaa ngii ñu dëddu, kon ana seenum xel?

10 «Maay joxe seeni jabar, jox seeni tool ay foqatikat, ndax ki gëna tuut ba ki gëna mag, ñépp a ngi lewal lu lewul. Ab yonent akub sarxalkat, ñépp a ngi wor!

11 Sofental nañu sama pajum ñoñ ñi dammtoo, naan: “Jàmm, lépp jàmm!” te jàmm amul.

12 Ñu wara am gâce ci seen jëf ju siblu, te gâce gâceelu leen. Xamuñu sax luy kersa! Moo tax ñuy fëlëñoondook ñiy fëlëñu. Kera ba ma leen di dikkal, ñooy tërëf.» Aji Sax jee ko wax.

*Yaakaar tas na*  
*Yàllaay wax*

13 «Maa leen di witta witt.» Kàddug Aji Sax jee. «Garabu reseñ du dese doom, figg du dese doom,» kàddug Aji Sax jee, «xob ya sax day wow. Lu ma leen joxoon, rècc na leen.»

*Askan waay wax*

14 «Ana lu nuy toog? Fabuleen, nu dem ca dëkk ya tata wër, deeyi fa. Sunu Yàlla Aji Sax ji nar na sunu dee; moo nu nàndal tookey mbugal, nde noo tooñ Aji Sax ji.

15 Nuy yaakaar jàmm, dara baaxul; nuy séentum paj, tiitaange ne jaas!

16 Seen noowi fas yaa dégtoo bëj-gànnar fa Dan, seen naari góor di ñexal, suuf sépp yëngu.

Ñu dikk, tas réew mi tasar,

booleek li ci biiram, ak dëkk beek ñi ci biiram.»

*Yàllaay wax*

17 «Maa ngii déy di leen yónnee jaani ñàngóor yu déggul jat, ñu di leen màtt.» Kàddug Aji Sax jee.

*Yeremi am na naqar*  
*Yeremeey wax*

18 Ndaw naqar wu tiis, ndaw xol bu diis!

19 Sama bokk yaa ngooguy yuuxu yuux yu àkki fu sore, naan: «Moo Aji Sax ji daa newul Siyoñ a? Moo Buurub Siyoñ da fee nekkatul a?»

*Yàllaay wax*

«Lu tax ñuy yékkati sama xol ak seen jëmme tuur yii, seen yàllay doxandéem yi tekkiwul dara?»

*Yeremeey wax*

20 Ngóob wéy na, jamonoom wees, te nun de muccagunu.

21 Sama bokk yi seen xol jeex tax na sama xol jeex, may tiislu, tancoo njàqare!

22 Moo diwu pajtal amul Galàdd a\*? Am fajkat a fi amul?

Ana lu waral bokk yi taneeguñu?

23 Éy ku may duyal sama bopp ndox, saay gët di xelliy rongooñ yu ma jooye guddeek bëccëg bokk yi ñu bóom?

## 9

1 Éy ku ma mayoon ci màndiñ mi dalu panaanum njëggaan, ba ma teqlikook bokk yi, wacc leen, dem, bàyyi leen?

Ñoom ñépp ay bokkaale, di gàngooru workat.

*Dëgg jeex na*  
*Yàllaay wax*

2 «Ñu ngi tàwwi ni fittkat seen làmmiñu workat,

seen doole ci réew mi doxaluñu ci yoon. Ñu ngii di def lu bon ci kaw lu bon, te man faalewñu ma.»

\* 8:22 8.22 Galàdd ab gox la bu féete dexu Yurdan penku te nekkoon fu bare gancaxi pajtal.

Kàddug Aji Sax jee.

<sup>3</sup> «Na ku ne moytu dëkkandoom  
te baña wóolu menn mbokk.  
Kuy mbokk déy lal nga pexem wuruj, di  
wuruj;

kuy dëkkandoo, sos ngay wéye.

<sup>4</sup> Ku ne sa dëkkandoo ngay nax,  
te dëgg, doo ko wax.

Dañoò tàmmi fen,  
di def njekkar ba sonn.

<sup>5</sup> Yeena ngi dëkke njublan,  
njublan rekk,  
faaleetuleen ma.»  
Kàddug Aji Sax jee.

<sup>6</sup> Moo tax Aji Sax ji Boroom gàngoor yi  
wax ne: «Maa ngii di leen segg,  
nattu leen ni weñ gu sawara seeyal, xelli!  
Ana nu may def neneen  
ak sama ñoñ?

<sup>7</sup> Seen làmmiñ di fitt guy bóome,  
seeni wax dig njublan.

Nit di wax moroomam jàmm,  
te di ko tëru cim xelam.

<sup>8</sup> Lii дума leen ko дума?»  
Kàddug Aji Sax jee.

Mu ne: «Xeet wu mel nii дума ko fey  
yoolam?»

*Jooy jot na  
Yeremeey wax*

<sup>9</sup> Tund ya laay jooy, di yuuxu,  
di jooy parluy màndiñ ma,  
fa lépp lakk, ba jaareesu fa,  
déggeesul baatu jur;  
njanaaw ak mala,  
lépp daw, ne mes.

*Yàllaay wax*

<sup>10</sup> «Maay def Yerusalem jali doj,  
till yi dëkke;  
ma def dëkki Yuda gent bu kenn dëkkul.»

*Yeremeey wax*

<sup>11</sup> Ana ku muus, ba xam lu waral lii?  
Ku Aji Sax ji waxal,  
mu wax nu lu waral réew mi sàнку,  
gental ni màndiñ mi,  
kenn jaaru fi?

<sup>12</sup> Aji Sax ji neeti:

«Ñoo wacc sama yoon  
wi ma leen tegaloon,

sàmmuñu sama kàddu,  
jëfewuñu ko,

<sup>13</sup> xanaa toppoo dëgër bopp,  
topp tuuri Baal  
yi leen seeni maam miinaloon.»

<sup>14</sup> Moo tax Aji Sax ji Boroom gàngoor yi,  
Yàllay Israyil dafa wax ne:  
«Maa ngii di leelsi xeet wii njàqarey  
xeme,  
nàndal leen tookey mbugal.

<sup>15</sup> Maa leen di wasaare fi biir xeet yu ñu  
xamuloon,  
du ñoom, du seeni maam.  
Maa leen di tofal saamar, ba raafal leen.»

<sup>16</sup> Aji Sax ji Boroom gàngoor yi dafa wax  
ne:

«Ne leen: Waajleena wooyi jigéeni  
jooykati dëj yi, ñu dikk;  
yónneeleen ca ña gëna man, ñu dikk.»

*Yeremeey wax*

<sup>17</sup> Nañu gaaw dëbbeel nuy jooy,  
gët taa, rongooñ wal.

<sup>18</sup> Yuux a ngoog, jibe Siyoñ.

Ñu naa: «Nooka rajaxoo,  
torox ba ne tott,  
noon màbb sunuy dëkkuwaay,  
nu génn réew mi.»

<sup>19</sup> Yeen jigéen ñi,  
ngalla dégluleen kàddug Aji Sax ji,  
taataan waxam,  
ba jàngal seeni janq jooyi dëj,  
jigéen ju ne jàngal moroomam yuuxi dëj.

<sup>20</sup> Ndee déy moo ñalgoo sunuy palanteer,  
dugg sunuy kër yu yànj,  
ngir fàdd gone yi ci mbedd mi,  
ak xale yu góor yi ci pénc yi.

*Yàllaay wax*

<sup>21</sup> «Ne leen: Kàddug Aji Sax jee.  
Néew yeey wetaroo ci àll bi, mel niy  
jonkan,  
ni gub yu góobkat won gannaaw, kenn  
forul.»

*Ku xam Yàlla rekk a xelu*

<sup>22</sup> Aji Sax ji dafa wax ne:  
«Ku xelu, bumu damoom xelam;  
ku jàmbaare, bumu damoo njàmbaaram;  
ku woomle, bumu damoom koomam.

<sup>23</sup> Kuy damu kay, na damoom xelam  
mu ko may mu xam ma,

xam ne maay Aji Sax,  
jiy jëfe ngor ak dëgg ak njekk fi kaw suuf.  
Loolu déy mooy sama bânneex.»  
Kàddug Aji Sax jee.

### *Xaraf, na Yàlla tax*

<sup>24</sup> «Ay bés a ngii di ñëw,»  
kàddug Aji Sax jee,  
«maay dikkal képp ku xarafam yem ci  
yaram,

<sup>25</sup> muy waa Misra, di waa Yuda,  
di Edomeen ñeek Amoneen ñi,  
di Mowabeen ñeek  
mboolem ñiy wat seen peggu kawaru  
bopp

te dëkke màndiñ mi,  
nde xeet yooyu, kenn xarafu ci dëgg,  
waaye bànni Israyil gépp it  
xarafuñu xarafu xol\*.»

## 10

### *Aji Sax ji du moroomu xërëm*

<sup>1</sup> Yeen bànni Israyil, dégluleen kàddu,  
gi leen Aji Sax ji dégtal.

<sup>2</sup> Aji Sax ji dafa wax ne:  
«Jikkoy xeeti yéefar yi, buleen ko roy;  
màndargam asamaan, buleen ko tiit;  
na ko yéefar yi tiit.

<sup>3</sup> Aaday xeet yi kat neen la.  
Garab lañuy dagge ca gott ba,  
ab yettkat yette ko sémmiñ,

<sup>4</sup> rafetale xalis ak wurus,  
daaj koy pont, dëgéral,  
ba du yëngu;

<sup>5</sup> muy saf kuñeental  
ci biir tóokërub xaal.  
Du wax, du séqi jéego,  
ñu di ko ganjar-ganjaree.  
Buleen ko ragal, du lore, du jariñe.»

### *Yeremeey wax*

<sup>6</sup> Aji Sax ji, kenn melul ni yaw,  
yaaka màgg, jàmbaare, màggu tur.

<sup>7</sup> Yaw Buuru xeet yi, ana ku la dul ragal?  
Yaw déy yaa yelloo ragal.  
Mboolem ñi xelu ci xeet yi  
ak mboolem seeni buur,  
kenn melul ni yaw.

<sup>8</sup> Ñoom ñépp a bokk dofe, ñàkk bopp:

xam-xamu kasara, bant kese!  
<sup>9</sup> Xalis lañuy jële Tarsis, xoobe ko bant,  
wurus wu jóge Ufas, ñu boole ca,  
ndaanaan liggéey ko,  
tëggu gànjar yett ko,  
ñu solal ko ndimo lu yolet  
ak lu xonq curr,  
lépp di liggéeyu ràbb yu xareñ.

<sup>10</sup> Waaye Aji Sax jee Yàlla dëgg.  
Mooy Yàlla jiy dund,  
di buur ba fàww,  
xadaram gësëm àddina,  
meram man xeet yi.

<sup>11</sup> Lii nag, nangeen ko siiwal:  
«Seen yàlla, yi sàkkul asamaan, sàkkuñu  
suuf,  
ñooy sànk, jóge fi suuf ak fi asamaan  
tiim.»

<sup>12</sup> Suuf, Aji Sax jee sàkke kàttanam;  
dun bi, mu sampem xelam;  
asamaan, mu lale xam-xamam.

<sup>13</sup> Bu àddoo, ndoxum asamaan riir;  
mu yéegey niir fa cati àddina,  
yebbee ngelaw fa dencam ya,  
daldi melax, taw.

<sup>14</sup> Nitoo nit dim sannax, sore xam-xam:  
te képp kuy tegg sa jëmmu tuur, yaa aña  
gacce.

Sa jëmmi weñ ji nga xelli, di neenug neen,  
noog bakkan, tus!

<sup>15</sup> Cóolóolu neen, liggéeyu caaxaan;  
bu bésam taxawee, mu sànk.

<sup>16</sup> Ki séddoo Yanqóoba déy wuute naak  
yii caaxaan.

Kookoo bind lépp,  
te Israyil di giir gi mu séddoo.  
Kookooy Aji Sax ji Boroom gàngoori xare  
yi!

### *Mbugal dikk na*

<sup>17</sup> Yerusalemee, yeen ñi ñu gaw,  
forleen seen ëmb.

<sup>18</sup> Aji Sax ji déy dafa wax ne:  
«Maa ngii naa xërr waa réew mi bii yoon,  
teg leen njàqare, ba ñu yég ko.»

### *Yerusalem ay wax*

<sup>19</sup> «Wóoy man, yàqu naa!  
Ndaw góom bu metti!

\* **9:25** 9.25 Xeeti àddina yu bare baaxoo nañu di xaraf. Waaye xaraf ci la Yàlla nammoona birale kóllère gi dox digganteem ak bànni Israyil. Moo tax gépp góor gu bokk ci woowu askan waroona fésal ci yaramam màndargam xaraf miy firndeel googu kóllère, te ànd ceek xolu jëfe ko.

Dama noon lii jàngoro donḡ a,  
naa muñ!  
<sup>20</sup> Xayma xotatoo,  
buumi xayma xëttandoo,  
samay doom wacc ma, ne mes;  
kenn sampatul sama xayma, firi ko.»

### *Yeremeey wax*

<sup>21</sup> Sàmmi xeet weeka dofe:  
Aji Sax ji, sàkkuwñu ko.

Moo leen taxa bonle,  
seen jur gépp tasaaroo.

<sup>22</sup> Xibaar a ngoog, di ñëw,  
riir mu réy a yèngoo réewum bëj-  
gànaar,  
nara gentel dëkki Yuda yu mag yi,  
till yi dëkke.

### *Yeremi tinu na Aji Sax ji*

<sup>23</sup> Aji Sax ji, maa xam ne  
nit moomul yoonam,  
kuy dox moomuli jéegoom.

<sup>24</sup> Aji Sax ji, yar ma lu yem,  
te bañ maa yare mer,  
di ma semmal.

<sup>25</sup> Xëppal sa xadar yéefar yi la yégu,  
ak làng yi la tuddul.

Ñoo bóom giirug Yanqóoba,  
bóom leen ba fàkkas leen,  
gentel seen dëkkuwaay.

## 11

### *Yuda fecci na kóllère*

<sup>1</sup> Kàddu gii dikkal na Yeremi, bawoo fa  
Aji Sax ji: <sup>2</sup> «Dégluleen sàrti kóllère gii.  
Te yaw Yeremi, nga àgge ko képp kuy  
waa Yuda ak waa Yerusalem. <sup>3</sup> Nga ne  
leen: “Aji Sax ji Yàllay Israyil dafa wax ne:  
Alkànde ñeel na képp ku sàmmul sàrti  
kóllère <sup>4</sup> gii ma santoon seeni maam bés  
ba ma leen génnee réewum Misra, taalu  
xellikaayu weñ gu ñuul ba. Ma noon leen  
ngeen déggal ma te jéfe sàrti kóllère gi  
ni ma leen ko sase, ba doon sama ñoñ,  
man ma doon seen Yàlla. <sup>5</sup> Su ko defee  
ma wàccook ngiñ, la ma giñaloon seeni  
maam ne dinaa leen may réew mu meew  
maak lem ja tuuroo, muy fii tey.”» Ma ne  
ko: «Tigi, Aji Sax ji.»

<sup>6</sup> Aji Sax ji ne ma: «Yéeneel mboolem  
kàddu yii ci biir dëkki Yuda yu mag yi ak  
ci mbeddi Yerusalem, nga ne: “Dégluleen

sàrti kóllère gii te jéfe ko. <sup>7</sup> Artu naa àrtu  
seeni maam, dale ko ba ma leen génnee  
réewum Misra, ba tey jii ma jàppoo di  
leen àrtu, naan leen ngeen déggal ma.  
<sup>8</sup> Waaye dégluwñu, teewluwñu, xanaa  
ku nekk di wéye dègër bopp, topp ag  
bon xolam. Moo tax ma wàcce ci seen  
kaw mboolem sàrti kóllère gii ma leen  
santoon ñu war koo jéfe te jéfewuñu ko.”»

<sup>9</sup> Aji Sax ji dellu ne ma: «Pexem  
fippu feeñ na ca Yuda gépp ak ca  
waa Yerusalem. <sup>10</sup> Dellu nañu ca seen  
ñaawtéefi maam, ya bañoona sàmm  
samay kàddu. Ñoom it topp nañu yeneen  
yàlla, di leen jaamu. Waa kër Israyil ak  
waa kër Yuda fecci nañu kóllère ga ma  
fasoon ak seeni maam.»

<sup>11</sup> Moo tax Aji Sax ji dafa wax ne: «Maa  
ngii di leen wàcceel musiba mu ñu dul  
mana récc. Dinañu ma ne wóoy te дума  
leen déglu. <sup>12</sup> Su ko defee waa dëkki Yuda  
yu mag yeek waa Yerusalem dem jooytuji  
ca yàlla, ya ñuy taalal cuuraay, te duñu  
leen mana wallu mukk ci seen jamonoy  
musiba.

<sup>13</sup> «Yaw Yuda, ni sa dëkk yu mag tollu,  
ni la say tuur tollu. Ni mbeddi Yerusalem  
tollu it, ni la sarxalukaay yi ñu fa saam  
tollu, ñu di fa taalal cuuraay Baal, tuur  
mu seexluwu mi.»

<sup>14</sup> «Yaw nag Yeremi, bul ñaanal askan  
wii. Bu leen tinul, bu leen dagaanal. Ndax  
kat keroog bu ñu nekkee ci seen musiba,  
ba naan ma wóoy, du maay déglu.»

### *Aji Sax ji dëddu na soppeem*

#### *Yàllaay wax*

<sup>15</sup> «Ana lu samay soppe di defati sama  
kër?

Ñu bare ci ñoom a ngi def lu bon.

Ndax seeni sarax man naa far seen jëf ju  
ñaaw,

ba tax bu ñuy def lu bon, di ko bége?»

<sup>16</sup> Oliw naat, jekki doom;  
nii la leen Aji Sax ji tudde woon,  
waaye riir mu réy lay jibal,  
jafal ko, mu tàkk,  
taar réer car ya, meḡḡ.

<sup>17</sup> Aji Sax ji Boroom gàngoor bi leen  
jëmbatoon,  
moo leen tuddal lu bon.



Nee: «Waa kër Israyil ak Yuda ñoo def lu bon,  
di taalal Baal cuuraay ba merloo ma.»

### *Ñu ngi fexeel Yeremi*

<sup>18</sup> Aji Sax jee ma xamal, ma xam, ba gis seeni jëf.

<sup>19</sup> Ndax damaa naagu woon ni xar mu ñu jème rendikaay ba.

Xawma woon ne man lañuy lalal ay pexe, naan: «Nan gor garab ak doomam, dagge ko fi réewum boroom bakkan, ba deesul fàttlikooti turam.»

<sup>20</sup> Ma ñaan Aji Sax ji Boroom gàngoor yi, kiy àtte dëgg, di nattu xel ak xol, ne ko: «Yaw laa diis sama mbir, won ma seen mbugal.»

<sup>21</sup> Moo tax Aji Sax ji wax lii ci mbirum waa Anatot, ñiy wut sama bakkan, naan ma: «Baal di waxe waxyu ci turu Aji Sax ji, lu ko moy nu rey la.» <sup>22</sup> Moo tax kay Aji Sax ji Boroom gàngoor yi wax ne: «Maa ngii di wàccesi mbugal fi seen kaw; seen xale yu góor fàddoo saamar, seeni doom, góor ak jigéen, deeye xiif. <sup>23</sup> Aw nit, duñu ko dese; maay wàcceel waa Anatot safaan, bu seen atu mbugal taxawee.»

## 12

### *Yeremee ngi ñaxtu*

<sup>1</sup> Aji Sax ji, dëggu nga def, li may tawatsi fi yaw lépp. Teewul ma di la diis mbir: lu tax ku bon di baaxle, bépp workat bu bon di féex?

<sup>2</sup> Yaa leen jëmbat, ñu sampi reen, law ba meññ; jegenal la seen làmmiñ, te fekk nga sore seen xol.

<sup>3</sup> Waaye yaw Aji Sax ji, xam nga ma; gis nga ma, seetlu sama xol ci yaw. Diri leen niy xar yu ñuy rendi, beral leen bésuub rendi.

<sup>4</sup> Ba kañ la réew mi naa seren, gàncaxu tooloo tool di lax? Rabu àll ak njanaaw a ngi sàнку ngir mbonug ñi fi dëkk te naan: «Moom xoolul sunu muj!»

### *Yàlla tontu na*

<sup>5</sup> «Ndegam boroom ñaari tànk ngay rawanteel, xoox, nooy rawanteeki fas?

Soo wóluwul lu moy àll bu ne yàmblañ, nooy def ak gottub Yurdan?

<sup>6</sup> Say bokk ak sa waa kër baay sax, ñoom it wor nañu la, ñoom it xaacu nañu, sam la; te bu ñu lay wax jàmm it, bu leen gëm.»

### *Aji Sax ji dëddu na séddoom*

<sup>7</sup> «Dëddu naa sama kër, maa wacc sama séddoo, wacce sama soppey xol loxol noonam.

<sup>8</sup> Sama séddoo ngi may niru léegi gaynde ci gott bi,

di ma xiiru, ba tax ma jéppi ko.

<sup>9</sup> Sama séddoo baa ngi may saf tan mu todde

mu moroomi tanam gaw.

Doxleen dajaleji rabi àll yépp, indi leen ci bernde ji.

<sup>10</sup> Gàngooru sàmm a sèxëtoo sama tookëru reseñ, joggati sama waar, def waar wi ma neex màndiñ mu ne maraas.

<sup>11</sup> Def nañu ko gent buy jooy fi sama kaw, réew mi mépp gentala gentel, te saful kenn.

<sup>12</sup> Tundoo tund wu ne faraas fi màndiñ mi,

ay yàqkat a ngi ciy bawoo,

doon saamaru Aji Sax ji, di faagaagal réew mépp,

cat ba cat,

jàmm réer luy dund!

<sup>13</sup> Jiwum pepp, góob ay dég;

sonn, ñàkk yool,

xanaa mbetteel ci meññeef mii sababoo ci merum Aji Sax ji.»

### *Aji Sax ji àrtu na dëkkandooy Israyil*

<sup>14</sup> Aji Sax ji dafa wax ne: «Mboolem sama dëkkandoo yu bon, yi laal céru suuf bi ma sédd Israyil sama ñoñ, maa ngii di leen déjjatee seen réew, te waa kër Yuda, maa leen di seppee fi seen digg.

<sup>15</sup> Waaye bu ma déjjatee yooyu xeet ba noppi, dinaa leen dellu yërëm, ku nekk, ma delloo ko céram, ku nekk ak suufam.

<sup>16</sup> Waaye bu ñu royee ba roy sama ñoñ,

di jēfe ni sama ñoñ wara jēfe, di giñe sama tur naan: “Giñ naa ko ci Aji Sax jiy dund,” na ñu daan royloo sama ñoñ, ba ñuy giñe Baal, tuur mi, su boobaa ñu sampu fi sama digg ñoñ. <sup>17</sup> Waaye xeet wu ma ci déggalul, xeet woowu dama koy déjjati, déjjat, sànk leen.» Kàddug Aji Sax jee.

## 13

### *Colu Yeremi misaal la*

<sup>1</sup> Aji Sax ji da maa wax ne ma: «Demal jëndi njiitlaayu lēe\*, nga woddoo ko, te bu ko ndox laal.» <sup>2</sup> Ma jënd njiitlaay, woddu, muy la Aji Sax ji wax. <sup>3</sup> Aji Sax ji dikkal ma ñaareel bi yoon, ne ma: <sup>4</sup> «Jëlal njiitlaay li nga woddoo, te daldi dem ba Fara†, nga làqi ko fa ca xar-xaru doj ya.» <sup>5</sup> Ma dem làqi ko Fara, muy la ma Aji Sax ji sant. <sup>6</sup> Ñu dem ba mu mat ay fan yu takku, Aji Sax ji ne ma: «Demal Fara, jëli njiitlaay la ma la santoon nga làqi ko fa.» <sup>7</sup> Ma dem fa ma làqoon njiitlaay la, sulli ko. Ndeke njiitlaay la yàqu na, ba amatul njariñ!

<sup>8</sup> Kàddug Aji Sax ji dellu dikkal ma, ne ma: <sup>9</sup> «Aji Sax ji dafa wax ne: Ni lii yàqoo, ni laay sàggee sagub Yuda ak sagu Yerusalem bu réy bi. <sup>10</sup> Askan wu bon wii bañ maa déggal, të ticc di wéye seen coobare, di topp yeneen yàlla, di leen jaamook a sujjóotal, nañu mel ni njiitlaay lii amul benn njariñ. <sup>11</sup> Ndax ni njiitlaay di tage ci luppú nit, noonu laa jële woon waa kër Israyil ak waa kër Yuda, taqoo leen.» Kàddug Aji Sax jee. Mu ne: «Maa ko def ngir ñu doon sama ñoñ, teral sama tur, di sama ndam, di sama sag. Waaye déggaluñu ma.»

### *Yàlla misaal na meram*

<sup>12</sup> «Nga wax leen kàddu gii: “Aji Sax ji Yállay Israyil dafa wax ne: Njaqal biiñ, duy, mu fees. Bu ñu la nee: ‘Daño xamul xéll ne njaqal biiñ, duy, mu fees?’ <sup>13</sup> nga ne leen: ‘Aji Sax ji dafa wax ne: Muy buur yi toogal Daawuda cib jalam, di sarxalkat yi, di yonent yi, di

mboolem waa Yerusalem, maa ngii di duysi mboolem waa réew mii, ba ñu fees ak màndite. <sup>14</sup> Su ko defee ma fenge ku nekk ak mbokkam, fenge waajur ak doom, ñoom ñépp.’ ”» Kàddug Aji Sax jee. Mu ne: «Duma ñéebalu, duma yèrèm, duma leen ñeewantee faagaagal.»

### *Déglóo, balaa yeex*

<sup>15</sup> Dégluleen te teewlu, buleen fétteeral. Aji Sax ji kat wax na!

<sup>16</sup> Teral-leen seen Yàlla Aji Sax ji, bala moo lëndëmal, ngeen tërëfe tundi timis, di séentu leer, mu lëndëmal ba mu ne këruus, fatt taraj

<sup>17</sup> Bu ngeen déggul de, ma làqu, jooy seen reewande, sama rongooñ tuuroo tuuru, ma jooya jooy, nde dees na jàpp géttu Aji Sax ji, yóbbu.

### *Mbugal a ngi*

<sup>18</sup> Waxal Buur, wax Lingeer yaayu Buur ne leen:

«Dëjuleen fi suuf, seen mbaxanam nguur mu yànj foq na.

<sup>19</sup> Dëkki Negew yu mag yi tëje na, te kenn du ko tijji. Yuda gépp ca ngàllo ga, Yuda ba mu daj, ngàllo ga.»

### *Yerusalem am na gâce*

<sup>20</sup> Yerusalemee, séentul, xool ñiy jóge bëj-gànaar.

Moo ana gétt gi ñu la dénkoon, sa gàtt yu rafet ya?

<sup>21</sup> Sa xejj yi nga miinal sa bopp, bu ñu walbatikoo tiim la, ana looy wax nag?

Kon mitit du la jàpp, nga mel ni kuy matu?

<sup>22</sup> Soo nee ci sam xel:

«Lu tax lii dal ma?»

xamal ne sa ñaawtéef gu réy a waral ñu ñori la, saaysaaye la.

<sup>23</sup> Ana ab Kuuseen bu mana soppi deram, mbaa am segg mu mana fari tipp-tippam? Kon nga mana def lu baax

\* **13:1** 13.1 njiitlaay li ñuy wax fii, séru njiitlaay lu gàtt lay doon. † **13:4** 13.4 Fara bérab la bu bokkul ak dexu Efraat doonte neexoo nañuy tur.

te tàmma def lu bon!

*Yàllaay wax*

<sup>24</sup> «Maa lay tasaare ni boob muy naaw mu ngelawal màndinj mi wal.

<sup>25</sup> Loolooy sa wàll, sa cér bi ma la nattal.»  
Kàddug Aji Sax jee.

Mu ne: «Yaa ma fàtte, di yaakaari caaxaan.

<sup>26</sup> Man it maay ëñ sa pendal, muure sa kanam, saw taat ne durŋ.

<sup>27</sup> Sag njaalook sa ɲexali caga, sa gànctu gu ruslu ci kaw tundi àll bi!

Maa gis sa jëf ju siblu jooju!

Musibaa yaw Yerusalem!

Foo àppal sa jëfi sobe ji?»

## 14

*Maral dikk na*

<sup>1</sup> Kàddug Aji Sax jii dikkaloon na Yeremi, jëm ca maral ma. Mu ne:

<sup>2</sup> «Waa Yudaa ngi ñaawlu, doole dëddu dëkk yi, ñu ne yogg, ne lasar fi suuf, yuux jollee Yerusalem.

<sup>3</sup> Kàngam ya yebal seeni surga, ñu rooti; ñu dem, gisuñu ndox ca mbalka ya, délseek seen xotti ndab, jàq, yaakaar tas, ñu muuru di tiislu.

<sup>4</sup> Réew mi tawluwul, suuf si fett, yaakaaru beykat tas, mu muuru, di tiislu.

<sup>5</sup> Kéwél sax jur ci àll bi, sànni ndax ñàkk um ñax.

<sup>6</sup> Mbaamu àll taxaw ci tund yi ne faraa, di àppaat niw till, ñàkk parlu, gët ya giim.»

*Yeremeey wax*

<sup>7</sup> Dëgg la sunuy ñaawtéef a nu tuumaal, waaye éy Aji Sax ji, jógal te saw tur tax, doonte dëddu nanu la ay yooni yoon, moy la.

<sup>8</sup> Éy yaw, yaakaaru Israyil, mi nuy wallu bésu njàqare,

bul ñooru ni doxandéem ci réew mi, mbaa ku nekk ciw yoon, jàdd fi, fanaan.

<sup>9</sup> Ngalla bul mel ni ku waaru, mbaa jambaar ju manul walloo. Yaw Aji Sax ji, yaa ngi sunu biir, ñu di nu tudde saw tur.

Bu nu wacc!

<sup>10</sup> Aji Sax ji dafa wax ci askan wii ne: «Ñeeka bëgg ub taxawaalu, baña téye seen tánk. Moo tax man Aji Sax ji bégewuma leen. Léegi ma bàyyi xel seenug mbon, ba mbugale leen seeni moy.»

*Waxyuy caaxaan jib na*

<sup>11</sup> Aji Sax ji nag ne ma: «Bul ñaanal askan wii. <sup>12</sup> Su ñu ci boole woon koor sax, дума déglu seeni dagaan. Su ñu ma doon sarxalal saraxu rendi-dóomal ak saraxu pepp it, du maa leen di nangul. Xanaa saamar akub xiif ak mbas kay laa leen di faagaagale.»

<sup>13</sup> Ma ne ko: «Éy Boroom bi Aji Sax ji, yonent yaa ngii di leen wax ne duñu dajeeek saamar, duñu xiif te jàmm ju ne ñoyy nga leen di defal fi bii bérab.»

<sup>14</sup> Aji Sax ji ne ma: «Waxyuy fen la yonent yiy waxe ci sama tur. Yebaluma leen, santuma leen ko, waxumaak ñoom. Peeñuy fen ak ngisaaney neen ak nax yu ñu fental seen bopp lañu leen di jottlee waxyu.» <sup>15</sup> Moo tax Aji Sax ji dafa wax ne: «Yonent yi ma yebalul te ñuy waxe waxyu ci sama tur naan: “Saamar akub xiif du am ci miim réew,” saamar akub xiif ay mujje yooyu yonent. <sup>16</sup> Ñi ñu doon jottli ay waxyu it, xiif ak saamar a leen di rey, ñu sànni seeni néew ci mbeddi Yerusalem, te duñu am ku leen rob, ñook seeni jabar ak seeni doom, góor ak jigéen. Dinaa leen xëpp seen ay.

<sup>17</sup> Nanga leen yégal saw tiis, ne leen: “Naa tuur rongooñ guddeek bëccég, te du fer;

sama bokki bopp yi damm ba dammtoo, ndaw góom bu metti!

<sup>18</sup> Ma dem, xool àll, gisuma lu moy ñu saamar bóom, ma dugg biir dëkk,

gisuma lu moy ñu ne làcc akub xiif, yonent ak sarxalkat di wër réew mi, xam-xam réer leen.”»

*Yeremeey ngi tinu Aji Sax ji*

<sup>19</sup> Aji Sax ji, wacc ngaa wacc Yuda nii? Am Siyon a la génnliku?

Lu tax nga di nu dumaa musiba mu amul paj?

Nuy yaakaar jàmm, dara baaxul,  
nuy séentum paj, tiitaange ne jaas!

<sup>20</sup> Aji Sax ji, xam nanu sunug mbon,  
xam sunu ñaawtéefi maam;  
moy nanu la moos.

<sup>21</sup> Waaye xoolal ci yaw te bul xalab,  
bul teddadil sa jal bu tedd.

Bàyyil xel te baña fecci sa kóllèreek nun.

<sup>22</sup> Xèrèmi neen yi yéefar yiy jaamu,  
ana ku ci mana taw?

Am asamaan ay sóobal boppam ay  
waame?

Du yaw la Aji Sax ji sunu Yàlla?

Yaw lanu yaakaar,

te loolu lépp, yaw a.

## 15

### *Aji Sax ji àddu na*

<sup>1</sup> Aji Sax ji nag ne ma: «Musaa ak Samiyel sax, bu ñu taxawoon fi sama kanam, du tax ma faale askan wii. Dàqal, ñu sore ma, te wéy. <sup>2</sup> Bu ñu la laajee ne la: “Fu nu jëm?” nga wax leen ne leen:

“Aji Sax ji dafa wax ne:

Kiy wopp dee, wopp dee;

kiy deeye saamar, deeye saamar;

kiy deeye xiif, deeye xiif;

kiy duggi ngallo, duggi ngallo.”

<sup>3</sup> «Te dinaa wàcce fi seen kaw ñeenti xeeti дума.» Kàddug Aji Sax jee. «Saamar di bóom; xaj diri yóbbu, njanaaw ak rabu àll for, mu jeex. <sup>4</sup> Dama leen di def, waa réewi àddina yépp, ku leen ci xool rasu. Te li ko waral di Buurub Yuda, Manase miy doomu Esekiya, ak li mu def ci digg Yerusalem.»

### *Mbugalu Yuda du jaas*

#### *Yàllaay wax*

<sup>5</sup> «Yerusalemee, ku lay yèrëm?

Ku lay jooy?

Moo, ku lay geesu ne la: “Jàmm nga am?”

<sup>6</sup> Yaw yaa ma wacc,» kàddug Aji Sax jee,

«dellu gannaaw,

ma дума la, sànk la.

Muñ naa ba sonn.

<sup>7</sup> Maa leen bees ni ñuy beesem pepp

ci pénci réew mi.

Maa sànk sama ñoñ,

faat seeni doom,

ndax tuubuñu seeni jëfin.

<sup>8</sup> Seeni jëtun laa ful,

ba ñu èpp suufas géej,  
ma indil leen pàddum njolloor,  
mu reyal yaay doomi waxambaaneem,  
kèpp ko tiitaangeek njàqare.

<sup>9</sup> Yaayu juróom yaari góor loof, di àppaat,  
jantam sowe bëccëg ndarakàmm,  
yaakaar tas, mu jàq,  
seenu ndes, ma leel saamaru noon.»  
Kàddug Aji Sax jee.

### *Aji Sax ji feddli na yebam*

#### *Yeremeey wax*

<sup>10</sup> Wóoy saa ndey,

loo ma doon jure!

Man mi réew mépp di xulook a layool,  
leblewma, lebuma;  
te ñépp di ma móolu.

<sup>11</sup> Ndaxam Aji Sax ji nee:

«Maa lay xettli déy, ngir sottal lu baax;  
maa la defal sa noon di la tinu déy,  
ci janti safaan ak njàqare.»

#### *Yàllaay wax ak Yerusalem*

<sup>12</sup> «Ku mana toj weñ gu ñuul,  
rawatina yetu weñu bëj-gànnaar, mbaa  
xàñar?

<sup>13</sup> Yeen waa Yuda, seen alal ak seeni denc  
laay jox ñu ko sèxëtoo te feyuñu  
ndax seen gépp moy ci seen réew mépp.

<sup>14</sup> Maa leen di def seen jaami noon

réew mu ngeen xamul,  
sama mer jippét, tàkkal leen.»

#### *Yeremeey wax*

<sup>15</sup> Yaw déy Aji Sax ji, xam nga!

Ngalla bàyyi ma xel, geesu ma;  
feyul ma ñi ma sam.

Bu leen muñal ba sànk ma!

Xamal ne yaa ma tax di dékku saaga.

<sup>16</sup> Sa kàddu laa gis, di ko dunde,

sa kàddu di ma bégal, bannexal sama  
xol.

Yaw Aji Sax ji Boroom gàngoor yi, déy,  
sa tur lañu ma tudde.

<sup>17</sup> Masumaa toogandook ñiy mbumbaay  
bay xawaare.

Yaa ma jiite, ma beru, toog

ndax mer mi nga ma sol, ba ma fees.

<sup>18</sup> Moo sama tiis wi du dakk a?

Bii góom bu metti, tèë wér!

Yaw kay yaay waltan muy wal, di ñiis,  
di tas sama yaakaar.

19 Moo tax Aji Sax ji dafa wax ne:  
 «Soo délsee, ma délloosi la,  
 nga dellu di ma liggéeyal.  
 Soo dee wax ngéneel  
 lu soreeki caaxaan,  
 dinga mel ni yaay sama làmmiñ,  
 te nit ñeey délsi ànd ak yaw,  
 waaye du yaay délsi ànd ak ñoom.  
 20 Maa lay def nga mel ak askan wii  
 ni tatay xàñjar ju ñu dàbbli,  
 ñu di la song  
 te duñu la man.  
 Maay ànd ak yaw,  
 di la wallu, di la xettli.»  
 Kàddug Aji Sax jee.  
 21 «Ab soxor jàpp la, ma àtte;  
 ab néeg ne la céex, ma foqati.»

## 16

### *Yeremi wéet na ci biiri bokkam*

1 Kàddug Aji Sax ji dikkalati ma, ne ma:  
 2 «Bul jël jabar,  
 bul am doom ju góor mbaa ju jigéen ci bii  
 bérab.»  
 3 Aji Sax ji kat dafa wax ci gone yu góor  
 yeek gone yu jigéen  
 yi juddoo ci bii bérab,  
 wax ci seen ndey yi leen jur  
 wax ci seen baay yi leen meññ ci mii  
 réew,  
 4 mu ne: «Jàngoroy ndee a leen di rey.  
 Deesu leen jooy, deesu leen rob.  
 Seeni néew ay tosal suuf.  
 Saamar akub xiif a leen di sànk,  
 seeni néew leel njanaaw ak rabi àll.»  
 5 Te Aji Sax ji kat dafa wax ne:  
 «Bul dugg kërug dēj,  
 bu fa dem di ñaawlook a jaale.  
 Maa xañ askan wii sama jàmm,»  
 kàddug Aji Sax jee,  
 «xañ leen sama ngor ak sama yërmande.  
 6 Ku mag ak ku ndaw ay dee ci réew mii,  
 te deesu leen rob,  
 deesu leen jooy.  
 Kenn du dagg yaramam  
 mbaa muy nelu, di ko ñaawloo.  
 7 Kenn du leen sédd aw ñam  
 wu ñuy dēfale ku deele,  
 kenn du leen jox ub kaas, dēfale leen,  
 doonte baay a dee mbaa ndey.  
 8 Kërug bernde it, bu fa dugg,

di toogandoo, di lekk ak a naan.»  
 9 Aji Sax ji Yàllay Israyil Boroom gàngoor  
 yi kat dafa wax ne:  
 «Maa ngii di dakkal ci bii bérab,  
 ngeen teewe, fekke lépp  
 luy coowal mbégteek bannex,  
 boroom séet ak séetam selaw.  
 10 «Su ko defee, boo waxee askan wii  
 kàddu yooyu yépp, ñu ne la: “Ana lu  
 waral Aji Sax ji dogalal nu musiba mu  
 réy mii mépp? Ana fu nu tooñe ak fu  
 nu moye sunu Yàlla Aji Sax ji?” 11 Nga  
 wax leen nag ne leen: “Seeni maam a  
 ma wacc,” kàddug Aji Sax jee, “di topp  
 yeneen yàlla, di leen jaamook a sujjóotal.  
 Man nag, ñu dèddu ma; sama yoon it,  
 ñu bañ koo sàmm. 12 Yeen nag, ngeen di  
 bon, ba raw seeni maam. Yeena ngii, ku  
 nekk të ticc, topp xolam bu bon, bañ maa  
 déggal. 13 Maa leen di dàqe ci réew mii,  
 jème réew mu ngeen xamul, seeni maam  
 xamuñu ko, ngeen di fa jaamu guddeek  
 bëccég yeneen yàlla, ndax dootuma leen  
 baaxe.”»

### *Yaakaar jeexul*

14 «Waaw ay bés a ngi ñew déy,»  
 kàddug Aji Sax jee, «deesatul wax ne:  
 “Giñ naa ko ci Aji Sax jiy dund te génnee  
 bànni Israyil réewum Misra.” 15 Waaye  
 dañu naan: “Giñ naa ko ci Aji Sax jiy  
 dund, ki jële bànni Israyil réewum bėj-  
 gannaar, te jële leen mboolem réew ya  
 mu leen sàнке woon.” Maa leen di  
 délloosi seen réew ma ma joxoon seeni  
 maam.»

### *Kenn rëccul mbugal mi*

16 «Maa ngii di woolu nappkat yu bare.»  
 Kàddug Aji Sax jee. «Ñu napp ñii ba  
 noppi ma woo rëbb yu bare, ñu rëbb  
 leen ci kaw mboolem tund wu mag ak wu  
 ndaw, ba ci bépp xar-xaru doj. 17 Samay  
 bët a ngi ne jàkk déy ci seeni jéf. Dara  
 umpu ma ci. Seeni ñaawtéef, dara rëccu  
 ma ci. 18 Dama leen di jékka fey ñaari  
 yoon seeni moy, ndax ñoo sobeel sama  
 réew meek seen méddi tuur yu bon yi,  
 feesal suuf sii ma séddoo seen yéf yu siblu  
 yooyu.»

*Ñépp ay ràññeeji Aji Sax ji  
 Yereamey wax*

19 Yaw Aji Sax ji may dooleel,  
di ma feg, di ma làq bésùb njàqare,  
yaw la xeet yiy bawoo cati àddina,  
fekksi la, naan:  
«Caaxaani neen kay la sunuy maam  
baaxoo woon,  
xërèmi neen yu amul njariñ.

20 Nit man naa sàkkal boppam ay yàlla?  
Te duñuy yàlla sax!»

*Yàllaay wax*

21 «Moo tax maa ngii di leen xamal bii  
yoon,  
ba ñu xam sama diisaayu loxook sama  
doole,  
xam ne maay Aji Sax ji.»

## 17

*Aji Sax ji sikk na Yuda*

1 «Bàkkaaruu Yuda lañu binde xaccug weñ  
gu cat la di doj wu dègër.

Dees koo ñaas ci seen àlluway xol,  
ñaas ko ci seen béjjéni sarxalukaay.

2 Seeni doom sax di bàyyi xel seeni sarx-  
alukaay

ak seen xer yi ñuy màggale tuurum Asera  
fi ker garab yu naat yeek  
kaw tund yu mag yi

3 ak kaw tund yi ci àll bi.  
Seen alal ak seen denc yépp  
laay joxe, ñu lèl ko,  
booleek seen jaamookaay  
ndax seen moy yi dajal réew mi.

4 Dingen xañ seen bopp cér bi ma leen  
séddoon,  
ma def leen seen jaami noon  
ci réew mu ngeen xamul,  
ndax merloo ngeen ma  
mer mu dul fey muk.»

*Aji Sax jee jara yaakaar*

5 Aji Sax ji dafa wax ne:  
«Alkànde ñeel na ku yaakaar doom  
aadama  
ak képp kuy doolewoo nit,  
dèddu Aji Sax ji.

6 Day mel ni gajjub ndànd-foyfoy,  
du gis ngèneel luy dikk!  
Day dèkke màndiñ mu wow koññ,  
suufas xorom su kenn dèkkul.

7 Waaye barke ñeel na ku wóolu Aji Sax  
ji,

yaakaar Aji Sax ji.

8 Day mel ni garab gu saxe wetu ndox,  
lawal ay reenam ca wal ma,  
ragalul tangoor wu dikk,  
xob ya di naat.  
Du tiit atum maral,  
du ñàkk meññeef.»

9 «Dara gënula dèng xelum nit,  
laago la ci moom.

Ana ku ko mana xam?

10 Maay Aji Sax jiy seetlu xel,  
natt ub xol,  
di yool ku nekk jéfinam,  
la yellook añaam.

11 Kuy jagoo alal ju lewul,  
mooy picc mu toj lu mu nenul.  
Kookooy tollu digg dooleem, alal ja  
dèddu,  
mu mujje dof.»

*Yeremeey wax*

12 Sunu bérab bu sell bi,  
mooy ngànguney daraja, daa masa kawé.

13 Yaw Aji Sax ji yaakaaru Israyil,  
ku la wacc, torox;  
ku la dèddu daa repp.  
Moo wacc Aji Sax ji, bétu ndox miy dund.

*Yeremi ñaan na Yàlla wall*

14 Éy Aji Sax ji, faj ma, ma faju;  
musal ma, ma mucc,  
samag cant, yaw a.

15 Ñu ngii naa ma:  
«Ana la Aji Sax ji waxoon?  
Na dikk boog!»

16 Man de, bañuma laa sàmmaal, topp la;  
bésùb tiis it dagaanuma ko.  
Yaw de xam nga ko.  
Li ma wax it fi sa kanam la.

17 Bu ma teg tiitaange,  
yaay sama rawtu bésùb safaan.

18 Ngalla gâceelal ñi ma topp,  
te bu ma gâceel;  
yal nañu tiit, ñoom,  
te man, ma baña tiit.  
Rikk dikke leen bésùb safaan,  
rajaxe leen ñaari yoon.

*Bésùb Noflaay ñeel na Aji Sax ji*

19 Aji Sax ji da maa wax ne ma: «De-  
mal taxawi ca buntu Doomi réew mi, fa  
buurub Yuda di duggeek a génne. Te nga  
taxaw itam ca mboolem bunti Yerusalem

ya ca des. <sup>20</sup> Nga ne leen: “Dégluleen kàddug Aji Sax ji, yeen buuri Yuda ak yeen waa Yuda gépp ak képp ku dëkk Yerusalem, di jaare bunt yii. <sup>21</sup> Aji Sax ji dafa wax ne: Moytuleen seen bopp ba baña gàddu lenn bésuub Noflaay, di ko jaarale bunti Yerusalem. <sup>22</sup> Buleen génne seeni kër lenn bésuub Noflaay te buleen ci liggéey lenn. Waaye nangeen sellal bésuub Noflaay, muy la ma santoon seeni maam. <sup>23</sup> Ndaxam dégluwnu ma, teewluwnu ma, xanaa të ticc, baña dégg, di gântal ndigal. <sup>24</sup> Waaye su ngeen ma dégloo ba déglu ma, kàddug Aji Sax jee, baña gàddu lenn di jaare bunti dëkk bii bésuub Noflaay, xanaa di sellal bésuub Noflaay, bañ cee liggéey lenn, <sup>25</sup> su boobaa buur yiy tooge jalub Daawuda, tey dawal watiir aki fas, ñook seeni kàngam, duñu noppee jaare bunti dëkk bii, feggook seeni kàngam. Waa Yudak waa Yerusalem it di jaare ci bunt yii, dëkk bi sax dàkk. <sup>26</sup> Dees na bàyyikoo dëkki Yuda ak li wër Yerusalem ak diiwaanu Beñamin, ca suufu tundu waak kaw tund ya, ak ca diiwaanu Negew. Ñuy indi ci kër Aji Sax ji ay saraxi rendi-dóomal ak yeneen saraxi jur ak saraxu pepp ak cuuraay. Ñii di indi kër Aji Sax ji saraxi cant. <sup>27</sup> Waaye su ngeen ma déggalul, baña sellal bésuub Noflaay, baña moytoo gàddu lenn, di jaare bunti Yerusalem bésuub Noflaay, su boobaa dinaa taal dëkk bi taal buy xoyom kəri Yerusalem yu yànj, te du fey.”»

## 18

### *Boroom njaq doon na misaal*

<sup>1</sup> Kàddu gii dikkal na Yeremi, bawoo fa Aji Sax ji. Mu ne ko: <sup>2</sup> «Dalal di dem ca tabaxkatu njaq ba. Foofa laa lay dégtale sama kàddu.» <sup>3</sup> Ma daldi dem ba ca kër tabaxkatu njaq ba. Ma fekk ko muy liggéey ca tabaxukaayu njaqam. <sup>4</sup> Leeleeg ndab li tabaxkat biy tabaxe ban, yàqu ci loxoom, mu dellu defaraat ba mu baax ci moom. <sup>5</sup> Kàddug Aji Sax ji nag dikkal ma ne ma: <sup>6</sup> «Ni tabaxkatu njaq bii di def, dama koo manula def ak yeen, bànni Israyil?» Kàddug Aji Sax jee. «Ban bii

déy, ni mu mel ci loxol tabaxkatu njaq bi, ni ngeen mel ci sama loxo, yeen bànni Israyil. <sup>7</sup> Leeg-leeg ma wax lu jëm ci aw xeet mbaa am réew, ne dinaa ko déjjati, daaneel ko, tas ko, <sup>8</sup> xeet woowu tuub mbonam gi ma leen doon artoo, ma fomm musiba mi ma naroonna wàcce ci seen kaw. <sup>9</sup> Leeleeg it ma wax lu jëm ci aw xeet mbaa am réew, ne dinaa ko tabax, jëmbat ko, <sup>10</sup> ba noppi ñu def lu ma ñaawlu, baña dégg sama kàddu. Su ko defee ma fomm lu baax la ma leen naroonna baaxe. <sup>11</sup> Kon waxal boog waa Yuda ak waa Yerusalem ne leen: “Aji Sax ji dafa wax ne: Maa ngi nii di leen tabaxal musiba ci pexe mu ma leen di fexeel. Kon na ku nekk dëpp yoonam wu bon te jubbanti jikkoom aki jëfam.” <sup>12</sup> Dañu naan: “Jaru ko, sunu xalaatu bopp lanuy topp, ku nekk të ticc di jëfe sa xel mu dëng.”»

### *Israyil fàtte na Aji Sax ji*

<sup>13</sup> Moo tax Aji Sax ji dafa wax ne:

«Laajteleen rekk ci xeet yi!

Ku ci masa dégg lu mel nii?

Lu ñaawa ñaaw la Israyil, janq ba, def!

<sup>14</sup> Ku masa gis fu tawub yuur gedde mbartali Liban,  
mbaa wal mu sedd ma cay wale fu sore ñiis?

<sup>15</sup> Moona sama ñoñ fàtte nañu ma;  
tuuri caaxaan, ñu taalal cuuraay,  
te tuur yi di leen fakktal ci seeni yoon,  
seen jaaruwaay ya woon,  
di leen jaarale ñall yu kenn xàllul,

<sup>16</sup> ba seenum réew gental,  
di lu ñuy muslu fàww,

ku fa romb waaru, wëcc bopp.

<sup>17</sup> Maay mel ni ngelawal penku, tasaare leen,

ñu daw seeni noon.

Gannaaw laa leen di won,

waaye du doon kanam,

keroog seen bésu ay.»

### *Fexeel nañu Yeremi*

<sup>18</sup> Ba mu ko defee, mu am ñu ne: «Aywaleen, nu lalal Yeremi pexe. Ndax kat soxlawunu ko ba di ci ñàkk dara: du njànglem sarxalkat, du digley boroom xel te du waxyu bu yonent biral. Nanu ko duural ba sànk ko te baña faale lenn ciy waxam.»

<sup>19</sup> Waaye yaw Aji Sax ji, teewlu ma te déglu kàddug noon yi.

<sup>20</sup> Lu baax dees na ko feye lu bon a? Moona gasal nañu ma am yeer, di ma tëru.

Bàyyil xel ba may taxaw fi sa kanam, di leen tinul ngir nga moyale leen sa mer.

<sup>21</sup> Kon nag bàyyil seeni doom ñu xiif ba dee,

jañax leen ci ñawkay saamar, seeni jabar suul doom, suul jëkkër,

seeni góor loroo mbas,

seeni waxambaane daanoo xare.

<sup>22</sup> Boo jekkee yebal gàngoor,

yal na yuux jibe seeni kër.

Ñoo gas um yeer, di ma rëbb,

làqal may fir.

<sup>23</sup> Waaye yaw Aji Sax ji, xam nga mépp pexe

mu ñu may fexee bóome.

Bu leen jéggal seen ñaawtéef,

bul far seeni moy,

yal nañu nërmeelu fi sa kanam,

jëflanteel ak ñoom bi ngay mer.

## 19

### *Njaq la toj na*

<sup>1</sup> Aji Sax ji dafa wax ne: «Demal ca tabaxkatu njaq ba, nga jëndi fa njaqu ban lu ndaw te ànd ak ñenn ci magi askan wi ak ñenn ci magi sarxalkat yi, <sup>2</sup> te nga dem ba ca xuru Ben Inom, ca buntu Tojitu njaq ya, daldi fay yéene kàddu yi ma lay wax. <sup>3</sup> Danga naan: “Yeen buuri Yuda, yeen waa Yerusalem, dégluleen kàddug Aji Sax ji. Aji Sax ji Yállay Israyil Boroom gàngoor yi dafa wax ne: Maa ngii di wacce fi bii bérab, musiba muy buur noppi képp ku ci dégg.” <sup>4</sup> Li ko waral mooy dañu maa wacc, teddadil bérab bii, di fi taalal cuuraay yeneen yàlla yu ñu xamuloon, du ñoom, du seeni maam, du buuri Yuda. Te feesal nañu bérab bii deretu nit ñu deful dara. <sup>5</sup> Yékkatil nañu fi Baal tuur mi bérab jaamookaay, di ci lakk seeni doom ngir Baal, defal ko ko saraxi rendi-dóomal, te santanewma ko, waxuma ko, jaarul sax sama xel.

<sup>6</sup> «Moo tax ay bés a ngii di ñëw,» kàddug Aji Sax jee, «su boobaa deesatul wooye bérab bii Tofet mbaa xuru Ben

Inom, xanaa xuru Bóomukaay. <sup>7</sup> Maay neenale fii pexem Yudak Yerusalem. Maa leen di tërale seen saamaru noon, ñi leen di tëru, tër leen; seeni néew, ma leele njanaaw ak rabi àll. <sup>8</sup> Maay def dëkk bi ab gent bu ñuy muslu, ku fi jaare waaru, di muslu ci seen mbugal yépp. <sup>9</sup> Maa leen di yàpploo seen doom yu góor ak yu jigéen, ku nekk di yàpp sa moroom ci biir njàqare, ndax gaw bu metti, bu leen seen noon yi leen di tëru di gaw.

<sup>10</sup> «Gannaaw loolu nanga toj njaq lu ndaw li fi kanam ñi nga àndal, <sup>11</sup> te nga ne leen: “Aji Sax ji Boroom gàngoor yi dafa wax ne: Askan wii ak dëkk bii, ni ñuy toje njaq, ba deesatu ko mana defaraat, ni laa koy tojate. Tofet gii dees na fi rob ndax ñàkk fu ñu robe. <sup>12</sup> Noonu laay def bérab bii,” kàddug Aji Sax jee, “ak ñi fi dëkk. Maay def dëkk bii ni Tofet. <sup>13</sup> Këri Yerusalem ak këri buuri Yuda dina fees ak sobe ni bérab bii di Tofet. Mooy mboolem kër yu ñu doon taalal cuuraay ca kaw taax ya ñeel biddiiw yépp, ak di fa tuural yeneen yàlla.”»

<sup>14</sup> Gannaaw ba Yeremi walbatikoo Tofet, ga ko Aji Sax ji yebaloon mu waxi fa waxyu, dafa taxawi ca ètti kër Aji Sax ji, daldi wax ak mbooloo ma mépp. Mu ne leen: <sup>15</sup> «Aji Sax ji, Yállay Israyil Boroom gàngoor yi dafa wax ne: “Maa ngii di wacce ci kaw dëkk bii ak mboolem li ko wër, lépp luy musiba mu ma dige woon, ndax dangeena të ticc, baña dégg sama kàddu.”»

## 20

### *Tëj nañu Yeremi*

<sup>1</sup> Ci kaw loolu, doomu Imer, Pasur, sarxalkat ba jiite woon saytub kër Yàlla ga, dégg Yeremi muy biral kàdduy waxyu yooyu. <sup>2</sup> Ba mu ko defee Pasur dóorlu Yonent Yàlla Yeremi, jéng ko ca buntu kër Aji Sax ja féete kaw, te ñu dippee ko Beñamin. <sup>3</sup> Ca suba sa Pasur yiwee ko ca jéng ba. Yeremi ne ko: «Aji Sax ji tuddeetu la Pasur; Magor-Misabib (mu firi Tiitaange lu dajal) la la tudde. <sup>4</sup> Ndax Aji Sax ji dafa wax ne: “Maa ngii di la wacceel tiitaange, yaak sa soppe yépp, seen saamaru noon daaneel leen, ngay



gis; te Yuda gépp laay teg ci loxol buuru Babilon, ñii mu yóbbu leen ngallo, ñee mu jam leen, ñu dee. <sup>5</sup> Maay joxe lépp luy alalu dëkk bii. Mboolem lu fiy njariñ, mboolem gànjar, mboolem denci buuri Yuda, dinaa ko teg ci seen loxol noon yi, ñu sèxëtoo, jël, yóbbu Babilon. <sup>6</sup> Yaw Pasur, yaak sa waa kër yépp ay duggi njaam ca Babilon. Babilon nga jëm te fa ngay dee, ñu rob la fa, yaak mboolem sa soppe ya nga daan wax ay waxyuy fen.»

### *Yeremi ñaxtu na*

<sup>7</sup> Éy Aji Sax ji, naxtaan nga ma, ma naagu, nga nax ma, jaay ma doole, ba man ma.

Ñu ngi may kekku bés bu ne, ku ne di ma kókkali.

<sup>8</sup> Saa yu ma waxee, damay xaacu, fitnaak salfaañoo ma tax di yuuxu. Kàddug Aji Sax jee may yóbbey xas aki saaga bés bu ne.

<sup>9</sup> Su ma nee: «Xaaral ma fàtte ko, dootuma biral waxyu ci turam,» sama xol bi mel nib taal bu tàkk, tàbbi sama biir yax yi; may jéema muutuwaale sa kàddu, te duma ko man.

<sup>10</sup> Dégg naa ñaawlaate yu bare, ñu naan:

«Éey, Tiitaange-lu-dajal! Booleleen ko, boole rekk!»

Ñi ma séqal jàmm sax, di yeeru ma fakkastalu, naan: «Jombul mu juum, nu jekku ko, ba mana feyu.»

<sup>11</sup> Waaye Aji Sax jeek man, di ñeyi xare. Moo tax ñi may tëru di tërëf, ba duñu daan,

xanaa rus lool, ndax duñu baaxle; gâce gu yàgg lay doon te du fey.

<sup>12</sup> Aji Sax ji Boroom gàngoor yi, yaw miy nattu ku jub,

di gis xel ak xol, may ma, ma gis ni nga leen di feye; yaw de laa diis sama mbir.

<sup>13</sup> Woyleen Aji Sax ji, màggal-leen Aji Sax ji! Mooy xettli néew-ji-doole ci dooley ku bon.

<sup>14</sup> Alkute ñeel na bés ba ma juddoo, bés ba ma saa ndey juree, yàlla bumu barkeel.

<sup>15</sup> Alkute ñeel na ka ko yegge baay, ne ko: «Sa soxna am na doom ju góor,» ba tax baay béga bég.

<sup>16</sup> Yal na kooku mel ni dëkk, yi Aji Sax ji tas te yërëmu leen! Yal na dégg yuuxi suba teel ak xaacuy xarey njolloor.

<sup>17</sup> Moo ma reyul ci sama biiru ndey, ma bàmmeeloo sama ndey, te du wasin muk.

<sup>18</sup> Ana lu ma doon génne ca biiram, di daj coonooku tiis, mujje gâce?

## 21

### *Jéllub Yerusalem jubsu na*

<sup>1</sup> Kàddu dikkaloon na Yeremi, bàyyikoo fa Aji Sax ji. Mooy ba buur Cedesyas yebalee ca moom, Pasur doomu Malkiya, mook sarxalkat ba ñuy wax Cefaña doomu Maaseya. Mu ne ko: <sup>2</sup> «Ngalla see-tal nu ci Aji Sax ji, ndax Nabukodonor buuru Babilon mu ngi nuy song xare. Jombul Aji Sax ji defaatal nu lenn ciy kéemaanam ba mu dellu gannaaw.»

<sup>3</sup> Yeremi nag ne leen: «Waxleen Cedesyas ne ko: <sup>4</sup> «Aji Sax ji, Yàllay Israyil dafa wax ne: Seen dooley xare ji ngeen yor, di xeexeek ñi ci biti, di buuru Babilon ak waa Babilon ñi leen gaw, maa ngii di ko walbati, dajale ko ci biir dëkk bii. <sup>5</sup> Man mii maay xareek yeen, won leen sama doole ak sama diisaayu loxo, xadaru, dikke leen mer mu réya réy. <sup>6</sup> Maay fàdd lu dëkk ci dëkk bii, nit ak mala bokk loroo mbas mu réy. <sup>7</sup> Gannaaw loolu nag,» kàddug Aji Sax jee, «Cedesyas buurub Yuda, aki jawriñam ak askan week ñi des ci dëkk bii te rëcce ci mbas meek xare beek xiif bi, maa leen di teg ci loxol Nabukodonor buuru Babilon, ak seen loxol noon, ak loxol ñi leen di wuta rey. Dina leen leel ñawkay saamar. Du leen baal, du ñéebalu, du yërëm.»

<sup>8</sup> «Te itam nga wax askan wii ne leen: «Aji Sax ji dafa wax ne: Maa ngii di teg fi seen kanam yoonu dund ak yoonu ndee.

<sup>9</sup> Ku toog ci dëkk bii, dinga deeye xare

mbaa xiif mbaa mbas. Ku génn jébbal boppam waa Babilon ñi leen gaw nag dinga dund, bakkanam di yoolu xareem. <sup>10</sup> Jógal naa dëkk bii déy, te loraange laa leen naral waaye du jàmm.” Kàddug Aji Sax jee. “Ci loxol buuru Babilon laa koy teg, mu jafal ko, lakk.”»

*Xibaar ñeel na waa kër buur*

<sup>11</sup> «Te it waxal waa kër buurub Yuda ne leen:

“Dégluleen kàddug Aji Sax ji!

<sup>12</sup> Yeen waa kër Daawuda, Aji Sax ji dafa wax ne:

Àtte yoon, deeleen ko xëye, di xettli ki ñu xañ dëgg ci ki koy néewal doole, balaa sama mer ne jippét, di tàkk te deesu ko mana fey ndax seen jëf ju bon.

<sup>13</sup> Yeen ñi jataayoo xur wi, yeen ñi ci kaw doj wu tell wi, maa ngii fi seen kaw.”

Kàddug Aji Sax jee.

“Yeen ñi naa: ‘Ku nu manal dara? Ku jote sunu biiri rawtu?’

<sup>14</sup> maa leen di dikke seen aña jëf.”

Kàddug Aji Sax jee.

“Maay jafal sawara, lakk seen gott bi, mu xoyom lépp lu leen wër.”»

## 22

<sup>1</sup> Aji Sax ji dafa wax ne: «Demal kër buurub Yuda, nga jottli fa kàddu gii.

<sup>2</sup> Danga naan: “Dégluleen kàddug Aji Sax ji, yaw buurub Yuda mi toog ci jalub Daawuda, yaak say jawriñ ak sa nit ñiy jaare yii bunt. <sup>3</sup> Aji Sax ji dafa wax ne: Deeleen jëfe dëgg ak yoon, di xettli ku ñu xañ dëgg ci ki koy néewal doole. Ab doxandéem, ab jirim akub jëtun, buleen leen lor, buleen leen fitnaal. Deretu jaambur bu deful dara it, buleen ko tuur ci bii bérab. <sup>4</sup> Su ngeen jëfee ba jëfe santaane bii déy, buur du noppee dugge yii bunt, di toogal Buur Daawuda fi jalam, di dawal watiir aki fas, ànd ak seeni jawriñ ak seeni nit. <sup>5</sup> Waaye su ngeen dégluwul sama santaane yii, giñ naa ko ci man mii,” kàddug Aji Sax jee, “ab gent rekk la gii kër di doon!”»

<sup>6</sup> Aji Sax ji déy dafa wax ci mbirum kër buurub Yuda ne:

«Yaay sama àllub Galàdd, sama collu tundu Libañ, waaye déy, maa lay def ni màndiñ, ngay dëkk yu kenn dëkkul.

<sup>7</sup> Maa lay beralal yàqkat yu fàggu seeni gannaay, dàjji sa tànnéefi banti seedar, sànni ca sawara sa.

<sup>8</sup> «Doxandéem yu bare dinañu jaare dëkk bii, di laajte ci seen biir naan: “Ana lu waral Aji Sax ji def nii bii dëkk bu mag?” <sup>9</sup> Su ko defee ñu ne leen: “Xanaa li ñu fecci seen kóllèrey Yàlla Aji Sax ji, di sujjóotal yeneen yàlla, di leen jaamu.”»

*Lu jëm ci Salum buurub Yuda*

<sup>10</sup> Buleen jooy buur Yosya mi dee, buleen ko ñaawlul, jooyleena jooy buur Salum miy dem, te du délseeti, ba gis réewum juddoom.

<sup>11</sup> Aji Sax ji kat dafa wax ci mbirum buurub Yuda, Salum mi wuutu baayam Yosya te bàyyikoo fii. Mu ne: «Du fi délseeti muk. <sup>12</sup> Waaye fa ñu ko yóbbu ngàllo, fa lay deeye. Réew mii, du ko gisati muk.»

*Lu jëm ci Yowakim, kuutaayu Buur Yosya*

<sup>13</sup> Wóoy ngalla kiy tabax kèram te seetu ci njekk,

di teg taaxi kawam te seetu ci yoon, liggéeyloo moroomam ci dara, feyu kow ñaqam.

<sup>14</sup> Mu ngi naan: «Maay tabax kër gu yaa, taaxi kaw ya yàmblañ. Ma bënn ay palanteer, tafal kër gi banti seedar, diw ko ba mu xonq curr.

<sup>15</sup> «Ëpplante banti seedar da laa def buur? Sa baay daawul lekk ak a naan? Teewu koo jëfe dëgg ak yoon, muy njiglaayam.

<sup>16</sup> Da daan sàmm àqu ku ñàkk ak ku néew doole, muy njiglaay. Du looloo di xam maay kan?» Kàddug Aji Sax jee.

17 «Yaw xooloo,  
xalaatoo lu moy loo jariño,  
ak noo tuure deretu jaamburu Yàlla,  
di fitnaale ak a lore?»

18 Moo tax Aji Sax ji wax ci mbirum bu-  
urub Yuda, Yowakim doomu Yosya,  
ne:  
«Kenn du ko jooy ca mbokkam mu góor  
mbaa mu jigéen,  
naan: “Wóoy ngalla nun, bokk yi!”  
Kenn du ko jooy,  
naan: “Wóoy, sang ba, wóoy kilifa ga!”  
19 Robu mbaam-séf lees koy rob:  
diri génne Yerusalem,  
sànni ca biti.»

*Yeremi yégle na fitnay Yerusalem*

20 Aji Sax ji nee: «Yeen waa Yerusalem,  
yéegileen tundi Libañ, yuuxu.  
Àdooleen fa Basan, xaacu,  
te yuuxoo fa Abarim,  
nde seen soppe yépp a rajaxoo!»

21 «Waxoon naa leen ko ba ngeen di am  
jàmm,  
ngeen ne: “Dégluwnu!”  
Noonu ngeen jàppoo ba ngeen di ndaw  
ba tey,  
masuleen maa déggal!  
22 Ngelaw dina sàmm seeni sàmm, sànk  
leen,  
seeni soppe duggi njaam,  
ba ngeen rus, torox  
ndax seen gépp mbon.

23 «Yaw mi tooge Libañ\*,  
def um tàgg sa garabi seedar,  
éy bu la mitit dikkalee,  
nirook mititu mat,  
ndaw binni yu réy!»

*Lu jëm ci Kooña doomu Yowakim*

24 Mu ne: «Giñ naa ko ci man miy  
dund,» kàddug Aji Sax jee, «yaw buurub  
Yuda, Kooña† doomu Yowakim, soo doon  
jaarob torlukaay ci sama ndijoor it, fa laa  
lay foqatee, 25 teg la ci loxol ñi lay tëru  
te nga ragal leen; muy Nabukodonosor  
buuru Babilon aki xarekatam. 26 Maa lay

xalab, yaak sa ndey ji la jur, jëme meneen  
réew mu ngeen juddoowul, te fa ngeen di  
deeye.

27 Réew mi ngeen namma délsi, dungeen  
fi délseeti.»

28 Nee ñu: «Waa jii Kooña da di njaq lu  
toj lu jarul daraa?  
Am da di xottu ndab lu kenn buggul?  
Lu waral ñu di ko sànni, mooki doomam,  
xalab leen biir réew mu ñu xamul?»

29 Éy waa réew mi, waa réew mee, waa  
réew mi,  
dégluleen Kàddug Aji Sax ji!

30 Aji Sax ji dafa wax ne:  
«Bindleen ne waa jii amul doom!  
Du baaxle cig dundam,  
nde kenn ci geñoom du tekki,  
ba tooge jalub Daawuda,  
di jiiteeti fi Yuda.

## 23

*Sàmm bu baax aye na*

1 «Wóoy ngalla sàmm yiy sànk ak a  
tasaare sama gétt gi.» Kàddug Aji Sax  
jee. 2 Moo tax Aji Sax ji Yàllay Israyil wax  
ci sàmm yiy sàmm ñoñam ne: «Yeena  
tasaare sama gétt gi, dàq leen, te tax-  
awuwleen leen. Kon maa ngii di leen  
taxawoo mbugal, yoole leen seen jéf ju  
bon.» Kàddug Aji Sax jee. 3 «Man nag,  
sama ndesu gétt, maa leen di dajalee  
mboolem réew yi ma leen dàqoon, jëme;  
te maa leen di délloosi seen parlu, ñu  
meññ ba yokku. 4 Dinaa leen taxawalal  
ay sàmm yu leen di sàmm ba dootuñu tiit,  
dootuñu jàq, dootuñu wuute.» Kàddug  
Aji Sax jee.

5 «Ay bés a ngi ñëw,» kàddug Aji Sax jee,  
«maay jebbil Daawuda njebbitu njekk,  
mu falu di buur bu xelu,  
di jéfe njub ak njekk ci réew mi.

6 Ay jantam Yuda dina texe,  
Israyil dëkke kaaraange,  
te dees na ko tudde nii:  
“Aji Sax ji sunu njekk.”

\* 22:23 22.23 Libañ man naa doon misaalu Yerusalem. Seetal ci 1.Buur ya 7.2. † 22:24 22.24 Kooña turu gàttalu Yowakin la. Seetal ci 2.Buur ya 24.8-17.

7 «Moo tax ay bés a ngii di ñëw,»  
kàddug Aji Sax jee, «deesatul wax ne:  
“Giñ naa ko ci Aji Sax jiy dund te génnee  
bànni Israyil ca réewum Misra.”<sup>8</sup> Xanaa  
dañu naan: “Giñ naa ko ci Aji Sax jiy  
dund te génnee askanu Israyil réewum  
bëj-gànnar, génnee leen mboolem réew  
ya mu leen sàankeji woon.” Su ko defee ñu  
dëkkewaata seen suufas bopp.»

*Kàddu jógal na yonenti caaxaan*

9 Mu jëm ci yonent yi:  
Sama bopp a ubu ràpp, sama xol jeex,  
sama yax yépp ne yalax,  
ma mel ni ku biiñ man,  
ba mu màndi  
ndax Aji Sax ji ak kàddoom yu sell.  
10 Ay jaalookat la réew mi fees déy,  
alkànde déy a waral réew mi maral,  
parluy màndiñ mi wowal.

Seenii xél loraange la,  
seenug njàmbaar di naka-su-dul-noona.

*Yàllaay wax*

11 «Te it yonent ak sarxalkat ñoo bokk  
yàqu,  
sama biir kër sax gis naa ci seenug  
mbon.»

Kàddug Aji Sax jee.

12 «Moo leen tax di tarxiise seenu yoon,  
tàbbi lëndëm, fëlëñu.  
Maa leen di wacceel musiba déy  
ca seen atum mbugal.»

Kàddug Aji Sax jee.

13 «Ca yonenti Samari it laa gis njekkar,  
ñuy waxe waxyuy Baal tuur mi,  
di réeral Israyil, sama ñoñ.»

14 Waaye yonenti Yerusalem laa gisal lu  
yées:

ñuy jaaloo, di wéye ay fen,  
di dooleel defkatu lu bon,  
ba kenn dëdduwul mbonam.  
Ñoom ñépp di ma niru waa Sodom,  
waa Yerusalem it ni waa Gomor.»

15 Moo tax Aji Sax ji Boroom gàngoor yi  
wax lii ci mbirum yonent yi:  
«Maa ngii di leen leelsi njàqarey xeme,  
nàndal leen tookey mbugal,  
nde fi yonenti Yerusalem la yàqute tuk-  
kee,  
ba law ci réew mi mépp.»

16 Aji Sax ji Boroom gàngoor yi dafa wax  
ne:  
«Buleen déglu yonent yi leen di wax ay  
waxyu;

cóolooli neen lañu leen di naxe,  
di fent ay peeñu, di wax ay waxyu,  
te du kàddug Aji Sax ji.

17 Ñi ma teddadil lañuy waxa wax,  
naan leen Aji Sax ji déy nee:  
“Jàmm ngeen di am.”

Képp ku topp sa xelum déggadi,  
ñu ne ko: “Musiba du la dab mukk.”

18 «Waaye ana ku ci teewe woon jataayu  
Aji Sax ji?

Ku ci fekke, ba dégg kàddoom?  
Ku ci teewlu kàddoom, ba dégg ko?

19 Ngëlénu Aji Sax jaa ngoog,  
sànjam fettax na,  
dig callweer,

callweeral boppu ku bon.

20 Merum Aji Sax ji du giif,  
te deful ba sottal li mu nar.  
Fan yu mujj yii, ngeen am ci lu leer.

21 Yebaluma yonent yii,  
ñoom ñuy daw di yégle!

Waxumaak ñoom,  
ñoom ñuy jottli waxyu!

22 Su ñu teewe woon sama jataay sax,  
mana dégtal sama ñoñ samay kàddu,  
ba waññee leen seen yoonu mbon  
ak seen jëfi mbon.

23 Xanaa du maay Yàlla?»

Kàddug Aji Sax jee.

«Fu jegeek fu sore, du maay Yàlla?»

24 Ku mana làqoo làquwaay,  
ba дума ko gis?»

Kàddug Aji Sax jee.

«Xanaa du asamaan ak suuf,  
maa ko fees?»

Kàddug Aji Sax jee.

25 «Dégg naa kàdduy waxyu yi yonent  
yooyuy waxe ci sama tur ay fen, naan  
gént nañu lii, gént nañu lee. 26 Fan  
la yonenti fen-kat yii àppal seeni xalaat,  
di wax waxyuy naxe yu ñu fental seen  
bopp? 27 Seen gént yi ñuy nettalante,  
nammuñu ci lu moy sama ñoñ fàtte ma,  
ni ma seeni maam fàttee woon ndax Baal  
tuur mi. 28 Yonent bu ci am gént, na  
nettali géntam, waaye ku ci am sama  
kàddu, na ko àddoo, na ma ko waxe. Ana

ñax akum pepp?» Kàddug Aji Sax jee. <sup>29</sup> «Sama kàddu déy, daa mel ni sawara,» kàddug Aji Sax jee, «mbaa saddu, di falaxew doj! <sup>30</sup> Moo tax maa ngii ci kaw yonent yi.» Kàddug Aji Sax jee. «Ñu ngi sàccante samay kàddu. <sup>31</sup> Maa ngii ci kaw yonent yi.» Kàddug Aji Sax jee. «Ñu ngi mbel-mbeli naan: “Kàddoo ngi.” <sup>32</sup> Maa ngii ci kaw ñiy waxe waxyuy génti caaxaan.» Kàddug Aji Sax jee. «Ñu ngi nettali seeni gént, bay waññi sama ñoñ, ndax seen fen yu jéggi dayo, te man de yebaluma leen, santuma leen dara. Amaluñu askan wii benn njariñ.» Kàddug Aji Sax jee.

### *Yéeneb Aji Sax ji du ab yen*

<sup>33</sup> Aji Sax ji ne Yeremi: «Su la askan wii laajee mbaa ab yonent mbaa ab sarxalkat ne la: “Ana yéeneb waxyu bi la Aji Sax ji yóbbante?” Nga wax leen ne leen: “Yeenay yen bi te dinaa leen yenniku.”» Kàddug Aji Sax jee. <sup>34</sup> «Te muy yonent, muy sarxalkat mbaa kenn ci askan wi, ku ci ne: “Yéeneb waxyu bii la ma Aji Sax ji yóbbante ci yeen,” maay dikke mbugal kooku mook waa kërám. <sup>35</sup> Li ku nekk wara laaj moroomam mbaa mbokkam kay mooy: “Lu Aji Sax ji tontu?” mbaa “Lu Aji Sax ji wax?” <sup>36</sup> Waaye yéeneb waxyu bu Aji Sax ji, buleen ko fi tuddati. Jooju wax déy, yenu boroom lay doon. Ndax dangeena been sunu kàddug Yàlla, Yàlla Aji Sax jiy dund, Boroom gàngoori xare yi. <sup>37</sup> Li nit kiy laaj ab yonent mooy: “Ana lu Aji Sax ji tontu? Ana lu Aji Sax ji wax?” <sup>38</sup> Bu ngeen dee tudd ab yéeneb waxyub Aji Sax ji, te ma yónnee ci yeen, ne leen buleen di tudd ab yéeneb Aji Sax ji, su boobaa Aji Sax ji dafa wax ne: <sup>39</sup> Maa leen di yenu déy, xalab leen, yeen ak dëkk bii ma leen joxoon, yeen ak seeni maam, ba ngeen sore ma. <sup>40</sup> Te maa leen di teg toroxte gu sax dàkk, ak gâce gu sax dàkk te du fey.»

## 24

### *Li ñaari dàmbi figg di misaal*

\* **24:1** 24.1 Yekoña ak Yowakin kenn ki la.

<sup>1</sup> Gannaaw gi Nabukodonosor buuru Babilon toxal na buurub Yuda Yekoña\* doomu Yowakim, yóbbu ko Babilon, mook kàngami Yudak liggéeykati xarala yaak liggéeykati weñ ya. Ba loolu amee Aji Sax ji am lu mu ma won: da maa jekki gis ñaari dàmbi figg yu tege fi kanam kër Aji Sax ji. <sup>2</sup> Genn dàmb gi di figg ju baaxa baax, mel ni witt mu jëkk. Dàmb gi ci des di figg ju bona bon, ju kenn dul lekk ndax bon.

<sup>3</sup> Aji Sax ji wax ma ne ma: «Yeremi, loo gis?» Ma ne ko: «Xanaa ay figg. Figg ju baax ji nag baax na lool, waaye ju bon ji daa bona bon, ba kenn du ko lekk ndax bon.»

<sup>4</sup> Kàddug Aji Sax ji nag dikkal ma, ne ma: <sup>5</sup> «Aji Sax ji Yàllay Israyil dafa wax ne: Ni figg jii baaxe, ni laay geesoo mbaax ngàllog Yuda gi ma yebale bérab bii, jème leen réewum Babilon. <sup>6</sup> Maa leen di toppe bétu mbaax, ba délloosi leen ci réew mii. Maa leen di defar te duma leen daaneel; jëmbat leen te duma leen buddi. <sup>7</sup> Maa leen di may coobarey xam ma, te xam ne maay Aji Sax ji, ba ñu doon sama ñoñu bopp, man ma doon seen Yàlla. Dinañu délseek seen léppi xol ci man déy!»

<sup>8</sup> Waaye Aji Sax ji déy dafa wax ne: «Ni figg jii bone, ba kenn manu koo lekk ndax bon, ni laay def Cedesyas buurub Yuda aki kàngamam ak ndesu Yerusalem. Muy ñi des ci réew mi, di ña toxuji Misra. <sup>9</sup> Maa leen di def ñu jara seexlu, di musibay mboolem réewi àddina, ba fépp fu ma leen sànni, seen tur di fa saaga te kuy lééboo ak kuy kókkalee mbaa ngay móoloo, ñoom ngay tudd. <sup>10</sup> Maay yebal saamar fi seen kaw ak xiif ak mbas, ba ñu raaf fi kaw suuf si ma leen joxoon, ñook seeni maam.»

## 25

### *Ab ténkub waxyoo ngi*

<sup>1</sup> Kàddu gii dikkal na Yeremi, jëm ci waa Yuda gépp, ci ñeenteelu atu nguurug doomu Yosya Yowakim, buurub Yuda. Mu yemook at mi jëkk ci nguurug Nabukodonosor buuru Babilon. <sup>2</sup> Yonent

Yàlla Yeremi daa wax ak waa Yuda gépp ak waa Yerusalem gépp, ne leen:

<sup>3</sup> Li ko dale fukkeelu at ak ñett ci nguurug doomu Amon, Yosya buurub Yuda, ba tey jii, di ñaar fukki at ak ñett, kàddug Aji Sax jaa ngi may dikkal, ma di leen ko jottli te tàyyiwma, waaye dégluwleen.

<sup>4</sup> Aji Sax ji yónnee leen mboolem jaamam ñiy yonent yi. Yónni na leen ay yooni yoon. Waaye dégluwleen, teewluwleen.

<sup>5</sup> Mu ne leen: «Na ku nekk ci yeen dèpp jëfinam ju bon ak jëfam ju bon, ba mana dëkke réew mi leen Aji Sax ji jox naka jekk, yeen ak seeni maam, ba fàww, <sup>6</sup> te buleen topp yeneen yàlla, di leen jaamook a sujjóotal; buleen ma merloo ndax yéfi neen yu ngeen sàkke seeni loxo. Su boobaa дума leen teg musiba.

<sup>7</sup> Waaye dégluwleen ma». Kàddug Aji Sax jee. Mu ne: «Yeena ma merlook ak yéf yu ngeen sàkke seeni loxo, muy seen musiba.»

<sup>8</sup> Moo tax Aji Sax ji Boroom gàngoori xare yi wax ne: «Gannaaw dégluwleen samay kàddu, <sup>9</sup> maa ngii di yónnee, jëli mboolem làngi bëj-gànnar.» Kàddug Aji Sax jee. «Maay yónnee it ca Nabukodonosor buuru Babilon mi ci samag curga, daldi leen boole indi ci kaw réew mii ak ñi ci biiram ak mboolem xeet yi ko séq. Maa leen di faagaagal, gentel leen gent bu sax dàkk bu ñuy muslu. <sup>10</sup> Te muy kàddug mbégte di kàddug bannex, di kàddug boroom séet akub séetam, di wolukaay bu fiy jib mbaa leer gu ñuy niitoo, lépp maa ko fiy boole tukkal. <sup>11</sup> Réew mii mépp ay gentel, def ndànd-foffoy, xeet yii yépp di surgawu buuru Babilon diiru juróom ñaar fukki at.

<sup>12</sup> «Su ko defee bu juróom ñaar fukki at yi matee, ma doora dikkal Babilon ak buuram ndax seeni ñaawtéef.» Kàddug Aji Sax jee. «Maay gentel réewum Babilon ba fàww. <sup>13</sup> Maay wacceel réew mii mboolem kàddu yi ma ko rëbbe woon, te ñu bind ko ci téere bii, Yeremi jottli xeet yépp waxyu bi.

<sup>14</sup> «Ñoom waa Babilon it déy, dinañu surgawu ay xeet yu giir ak ay buur yu

mag. Maa leen di fey seen añu jëf ju bon.»

## Kàddug waxyu dal na xeet yi

(Saar 25.15-38)

<sup>15</sup> Aji Sax ji Yàllay Israyil déy da maa wax ne ma: «Am kaasu biiñ bii ci sama loxo, di misaal kaasu mbugal, te nga nàndal ci mboolem xeet yi ma lay yebal, <sup>16</sup> ñu naan, téréf, di say ndax aaytéfu saamar laay yebal fi seen biir.»

<sup>17</sup> Ma daldi jële kaas bi ci loxol Aji Sax ji, nàndal ci mboolem xeet yi mu ma yebal.

<sup>18</sup> Ma nàndal waa Yerusalem ak dëkki Yuda ak seeni buur ak seeni kàngam ngir gentel fépp, muy ndànd-foffoy bu ñuy muslu, di ko móloo ba sunu jonni yàllay tey.

<sup>19</sup> Firawna buuru Misra it nàndal naa ko ca, mooki surgaam aki kàngamam ak waa réewam, <sup>20</sup> ak mboolem xeeti njaxasaan yi ci seen biir, ak mboolem buuri réewum Ucc, ak mboolem buuri réewum Filisteen ña féete Askalon ak Gasa ak Ekkron ak la des ca Asdodd. <sup>21</sup> Ma boole ca nàndal Edomeen ñaak Mowabeen ñaak Amoneen ña, <sup>22</sup> ak mboolem buuri Tir ak mboolem buuri Sidon ak buuri dun ya ca wàllaa géej, <sup>23</sup> ba ca waa Dedan ak Tema ak Bus ak mboolem ñiy wat seen peggu kawaru bopp, <sup>24</sup> ak mboolem buuri Arabi ak mboolem buuri xeeti njaxasaan yi dëkke màndiñ mi, <sup>25</sup> ak mboolem buuri Simri ak buuri Elam ak mboolem buuri Medd, <sup>26</sup> boole ca mboolem buuri bëj-gànnar, ñu jegeek ñu sore. Ma nàndal leen ñoom ñépp, ba réewi àddina yi ci kaw suuf yépp daj. Buurub Sesag\* topp ci ñoom, naan.

<sup>27</sup> Aji Sax ji nag ne: «Wax leen ne leen: “Aji Sax ji Boroom gàngoori xare yi, Yàllay Israyil dafa wax ne: Naan-leen ba màndi, di waccu, fëlëñu, tée jóg ndax saamar bi may yebal fi seen biir.” <sup>28</sup> Waaye su ñu bañee naan ci kaas bi nga leen tàllal nag, nga wax leen ne leen: “Aji Sax ji dafa wax ne: Dingen naan ba naanaatoo! <sup>29</sup> Te kat dëkk bii ñu ma tudde sax, maa ngi koy tàmbalee musibaal. Kon yeen, nu ngeen mana fexee ba mucc? Dungen mucc

\* 25:26 25.26 Sesag turu kumpa la, di Babilon ba tey.

moos, ndax saamar laay wool mboolem ku dëkke àddina.» Kàddug Aji Sax jee, Boroom gàngoori xare yi.

<sup>30</sup> Aji Sax ji teg ci ne ma: «Yaw nag, jottli leen mboolem kàdduy waxyu yooyu. Te nga ne leen:

Aji Sax jeey yëmmoo fa kaw ni gaynde, fa màkkaanam mu sell ma lay àddoo, ɲara ɲar ci kaw déndu suufam,

xaacu xaacuy dërkati reseñ†, di ko gëdde mboolem waa àddina,

<sup>31</sup> riir ma àkki cati àddina, ngir layoob Aji Sax jeek xeet yi, moom miy àtte mboolem boroom bakkan,

ñu bon ñi, mu jébbal saamar.»

Kàddug Aji Sax jee.

<sup>32</sup> Aji Sax ji Boroom gàngoor yi dafa wax ne:

«Musibaa ngii, di lawal wii xeet ba ca wee,

ngélén lu réy a jollee cati àddina.»

<sup>33</sup> Bésub keroog nag ñi Aji Sax ji fàdd, fu ne lañuy tëdd ci àddina, cat ba cat. Deesu leen jooy, deesu leen for, deesu leen rob. Ni neefare jonkan lañuy wetaroo ci kaw suuf si.

<sup>34</sup> Yeen sàmmi askan wi, serleen, yuuxu-leen;

yeen boroom gétt gi, xëppoolen suuf, ñaawloo;

seen bésub rendikat taxaw na,

te dees na leen tasaare,

ngéen daanu, rajaxoo

ni njaqal tànnéef.

<sup>35</sup> Rawtu day réer sàmmi askan wi,

làquwaay réer boroomi gétt yooyu.

<sup>36</sup> Yuuxi sàmm yaa ngoogu,

jooyi boroom gétt yaa,

Aji Sax jeey foom seeni parlu.

<sup>37</sup> Merum Aji Sax ju réy ji

selawal na tooli jàmm ya.

<sup>38</sup> Gaynde wacc na geeram,

seen réew ma di ndànd-foyfoy,

ndax saamaru notkat bi

ak tàngooru sànjum Aji Sax ji.

## Yeremi dugg na coono

## 26

(Saar 26—45)

### Ñu ngi tëru Yeremi

<sup>1</sup> Ba doomu Yosya, Yowakim buurub Yuda di doora falu, kàddu gii dikkaloon na Yeremi, bàyyikoo fa Aji Sax ji. Mu ne: <sup>2</sup> «Aji Sax ji dafa wax ne: Dangay taxawi ca biir èttu kër Aji Sax ji. Nga wax ak mboolem waa dëkki Yuda yiy jaamusi ci kër Aji Sax ji. Mboolem kàddu yi ma lay yóbbante ci ñoom, bu ci wacc baat. <sup>3</sup> Jombul ñu dégg, ba ku nekk dëpp yoonam wu bon. Su ko defee ma fomm musiba, mi ma leen di waajal ndax seen jëf ju bon. <sup>4</sup> Nga wax leen ne leen: “Aji Sax ji dafa wax ne: Su ngeen ma déggalul, toppuleen yoon wi ma leen rëddal, <sup>5</sup> dégguleen sama kàdduy jaam ñiy yonent yi may yónni ci yeen ay yooni yoon, ngeen tëë dégg, <sup>6</sup> su boobaa maay def kër Yàlla gii, na ma def ga woon ca Silo, te dëkk bii maa koy def lu mboolem xeeti àddina di tudd, di ko móoloo.”»

<sup>7</sup> Ba mu ko defee sarxalkat yaak yonent yaak mbooloo ma mépp dégg Yeremi di wax kàddu yooyu ca biir kër Aji Sax ji. <sup>8</sup> Naka la Yeremi wax ba sottal mboolem la ko Aji Sax ji santoon mu jottli ko mbooloo ma mépp, sarxalkat yaak yonent yaak mbooloo ma mépp ànd jàpp ko, ne ko: «Yaw, dee rekk mooy sab àtte! <sup>9</sup> Ana lu waral ngay biral waxyu ci turu Aji Sax ji, naan kër Yàlla gii dina tas, mel ni ga woon ca Silo, te dëkk bii day tas, kenn du fi des?» Mbooloo ma mépp nag sam Yeremi ca biir kër Aji Sax ji. <sup>10</sup> Kàngami Yuda dégg mbir ma, bàyyikoo kër buur, daldi yéegi ba kër Aji Sax ji. Ñu féncoo ca buntu kër Aji Sax ji ñuy wax bunt bu Bees ba. <sup>11</sup> Sarxalkat yaak yonent ya wax kàngam yaak mbooloo ma mépp, ne leen: «Waa jii, dee mooy àtteem, ndax moo biral waxyu, di rëbb sunu dëkk bii. Yeena ko déggal seen bopp.»

<sup>12</sup> Ci kaw loolu Yeremi wax ak kàngam yépp ak mbooloo ma mépp, ne leen: «Aji Sax jee ma yebal ngir ma biral waxyu, rëbb kër gii ak dëkk bii, te mooy kàddu

† 25:30 25.30 dërkati reseñ yi ñuy wax fii, seeni tànk lañu daan dère reseñ, te bu ñu tollu waan ci dër reseñ, dañuy woayaale.

yi ngeen dégg yépp. <sup>13</sup> Léegi nag rafetal-  
leen seeni jëfin ak seeni jëf te déggal  
seen Yàlla Aji Sax ji. Su ko defee Aji Sax  
ji fomm musiba mi mu leen dogaloon.  
<sup>14</sup> Man nag maa ngii ci seen loxo! Lu  
ngeen xalaat ne moo gën te war ci man  
rekk, defleen! <sup>15</sup> Xamleen xéll rekk ne su  
ngeen ma reye, bakkanu ku deful dara  
ngeen gàddu, yeen ak dëkk beek ñi ko  
dëkke, ndax ci lu wér Aji Sax jee ma yebal  
ci yeen, ngir ma yegge leen mboolem  
kàddu yii.» <sup>16</sup> Ba loolu amee kàngam  
yaak mbooloo ma mépp wax ak sarxalkat  
yaak yonent ya, ne leen: «Waa jii kay  
àtteb dee warul ci moom, ndax ci sunu  
turu Yàlla Aji Sax ji la nu waxal.» <sup>17</sup> Ci biir  
loolu ñenn ci magi réew mi jóg, wax ak  
mbooloo ma fa daje mépp, ne leen: <sup>18</sup> «Ku  
ñuy wax Mise, dëkk Moreset, doon na  
biral waxyu ca jamonoy Esekiya buurub  
Yuda. Daa waxoon waa Yuda gépp ne  
leen: “Aji Sax ji Boroom gàngooru xare  
yi dafa wax ne:

Dees na gàbb Siyon nib tool,

Yerusalem diy tojit, jale;

tundu kërug jaamookaay baay doon gajj  
bu kawee.”

<sup>19</sup> «Ndax tax na Esekiya buurub Yuda  
mbaa kenn ci waa Yuda reylu ko? Du  
Buur Esekiya daa wormaal Aji Sax ji, tinu  
ko, ba Aji Sax ji fomm musiba mi mu leen  
dogaloon? Nun nag musiba mu réy lanu  
nara indil sunu bopp.»

### *Yowakim reylu na ab yonent*

<sup>20</sup> Ci jamono yooyu amoon na keneen  
ku doon biral waxyu ci turu Aji Sax  
ji. Muy Uri ma dëkk Kiryaat Yarim, di  
doomu Semaya. Uri doon biral waxyu, di  
rëbb dëkk baak réew ma, bokk ak Yeremi  
genn kàddu gi. <sup>21</sup> Buur Yowakim dégg  
ay kàddoom, mook mboolemi dagam ak  
kàngamam yépp. Ba mu ko defee Buur  
di ko wuta reylu, Uri yég ko, tiit, daw  
làquji Misra. <sup>22</sup> Buur Yowakim yebal ku  
ñuy wax Elnatan doomu Agbor ca Misra,  
mu ànd faak ñeneen. <sup>23</sup> Ñu jëleji Uri ca  
Misra, yót ko Buur Yowakim, mu jam ko,  
sànni néewam ca armeelu baadoolo ya.

<sup>24</sup> Yeremi nag daa làqoo Ayikam doomu  
Safan, mu aar ko, ba tàbbiwul ci loxol  
askan wi, ñu rey ko.

## 27

### *Yeremi misaal na kilifteefu Babilon*

<sup>1</sup> Ba doomu Yosya, Cedesyas\* buurub  
Yuda di doora falu, kàddu gii dikkaloon  
na Yeremi, bàyyikoo fa Aji Sax ji. <sup>2</sup> Aji  
Sax ji da ne ma: «Sàkkalal sa bopp ay  
der ak yeti ràngaru yëkk, nga boole lépp  
teg ci sa ndodd; <sup>3</sup> ba noppi nga yónnee  
yet yi buurub Edom ak buuru Mowab  
ak buurub Amoneen ñi ak buurub Tir  
ak buurub Sidon. Dangay teg yet yi ci  
seen loxoy ndaw yi dikk Yerusalem ci  
Cedesyas buurub Yuda, ñu yót leen ko.  
<sup>4</sup> Te nga yóbbante leen ca seeni sang ne  
leen: “Aji Sax ji Yàllay Israyil, Boroom  
gàngoori xare yi dafa wax ne: Waxleen  
seeni sang ne leen: <sup>5</sup> Man maa sàkk suuf,  
sàkk doom aadama ak mala fi kaw suuf  
ci sama doole ju bare ak sama kàttan  
gu matale, te loolu lépp, maa ko jox  
ku ma neex. <sup>6</sup> Léegi nag teg naa réew  
yii yépp ci loxol Nabukodonosor buuru  
Babilon, mi ci sama curga, ba joxaale ko  
rabi àll yi sax, ñu nangul ko. <sup>7</sup> Mboolem  
xeet yee koy nangul, nangul doomam ba  
ci sëtam, ba keroog moom itam, àppu  
réewam jot. Su boobaa am réewam  
nangul yeneen xeet yu giir ak buur yu  
mag. <sup>8</sup> Wépp xeet mbaa réew mu ci  
nangulul Nabukodonosor buuru Babilon,  
di baña wacce yetu buuru Babilon seen  
ndodd, saamar akub xiif ak mbas laay  
dikke woowu xeet.” Kàddug Aji Sax jee.  
“Noonu laay def, ba faagaagal woowu  
xeet ci loxoom.

<sup>9</sup> «“Kon nag yeen, buleen déglu seen  
yonent yeek seetkat yeek firikati gént  
yeek boroom rawaan yeek ñeengokat yi  
leen di wax, naan leen dungeen tàbbi ci  
curgag buuru Babilon. <sup>10</sup> Ay waxyuy fen  
déy lañu leen di waxal te dinañu leen taxa  
toxoo seenum réew. Maa leen di sànni  
fu sore, ngeen sànk. <sup>11</sup> Waaye xeet wu  
ci nangoo wacce yetu buuru Babilon seen  
ndodd, di ko surgawu, ñooñu, maa leen

\* **27:1** 27.1 Fii ñu ne Cedesyas, am na sotti yu jëkk yu fi indi turu Yowakin.



di saxal ci seen suuf.” Kàddug Aji Sax jee. “Ñu dëkke ko, di ko bey.”»

<sup>12</sup> Ci biir loolu Cedesyas buurub Yuda it, ma yegge ko kàddu yooyu yépp, ne ko: «Wàcceel yetu buuru Babilon saw ndodd, nangul ko, nangul ay bokkam, ndax ngeen dund. <sup>13</sup> Ana lu jar saamar akub xiif ak mbas di la rey, yaak sa waa réew mi, ni ko Aji Sax ji dige xeet wu ci nangulul buuru Babilon? <sup>14</sup> Buleen déglu yonent yi leen di wax naan leen dungeen tàbbi ci curgag buuru Babilon. Ay waxyuy fen déy lañu leen di waxal. <sup>15</sup> Man déy yónniwma leen.» Kàddug Aji Sax jee. «Te ñoom ñu ngi waxe waxyuy fen ci sama tur. Moo tax maa leen di dàqe fii, ngeen sànkú, yeen ak yonent yi leen di waxyul.»

<sup>16</sup> Gannaaw loolu sarxalkat yeek askan wii wépp wax naa leen ne leen: «Aji Sax ji dafa wax ne: Buleen déglu yonent yi leen di waxal ay waxyu, naan leen: “Ndabi† kër Aji Sax jaa ngii di délsi, jóge Babilon léegi, léegi.” Ay waxyuy fen lañu leen di waxal. <sup>17</sup> Buleen leen déglu. Nangul-leen buuru Babilon te dund! Ana lu jar dëkk bii di mujje doon jalub xeer?» <sup>18</sup> Bu ñu dee ay yonent kay, te kàddug Aji Sax ji nekk ci ñoom, nañu daldi tinu Aji Sax ji Boroom gàngoor yi, ngir ndab yi des kër Aji Sax ji ak kër buurub Yudak Yerusalem, te baña dem Babilon. <sup>19</sup> Aji Sax ji Boroom gàngoor yi de wax na ci mbirum jëni kërám geek mbalka meek watiiri rootukaay yi ak yeneen ndab yi des ci dëkk bii, <sup>20</sup> Mooy ndab ya Nabukodonosor buuru Babilon yóbbalewloon, ba muy yóbbu ngàllo doomu Yowakim, Yekoña buurub Yuda, jële ko Yerusalem, jëme ko Babilon, mook kàngami Yudak Yerusalem. <sup>21</sup> Lii déy Aji Sax ji Yállay Israyil Boroom gàngoor yi wax na ko ci ndab yooyu des ca kër Aji Sax ji ak kër buurub Yudak Yerusalem. <sup>22</sup> Mu ne: «Babilon lees koy boole yóbbu, te foofa lay des ba keroog bés ba ma ciy jóg.» Kàddug Aji Sax jee. «Gannaaw loolu dinaa ko fa jële, délloosi ko bérab bii.»

## 28

### *Yeremi tiiñal na yonentu caaxaan*

<sup>1</sup> Ca menn at ma, fekk Cedesyas buurub Yuda di doora falu, yemook ñeenteelu atam, ca juróomeelu weer wa, am na doomu Asur ju ñuy wax Anaña, di yonent bu cosaano Gabawon. Mu wax ak Yonent Yàlla Yeremi ca biir kër Aji Sax ji, fa kanam sarxalkat yaak mbooloo mépp, ne ko: <sup>2</sup> «Aji Sax ji Yállay Israyil Boroom gàngoor yi dafa wax ne: Damm naa yet wi leen buuru Babilon ténke woon. <sup>3</sup> Fii ak ñaari at tembe dinaa délloosi fii mboolem ndabi kër Aji Sax ji Nabukodonosor buuru Babilon jële woon bérab bii, yóbbu Babilon. <sup>4</sup> Dinaa délloosi fii itam buurub Yuda Yekoña doomu Yowakim, te mboolem ngàllog Yuda ga demoon Babilon, maa leen di délloosi bérab bii.» Kàddug Aji Sax jee. «Maay damm moos yetu buuru Babilon wi mu leen ténke.»

<sup>5</sup> Ba loolu amee Yonent Yàlla Yeremi tontu yonent ba ñuy wax Anaña fa kanam sarxalkat yaak mbooloo ma taxaw fa biir kër Aji Sax ji mépp. <sup>6</sup> Mu ne ko: «Amiin! Yal na ko Aji Sax ji defee! Yal na Aji Sax ji sottal sa kàdduy waxyu yi nga wax, ba délloosee Babilon ba fii ndabi kër Aji Sax ji ak mboolem ña ñu fa toxal. <sup>7</sup> Waaye ngalla déglul bu baax kàddu gii ma lay wax, yaak mbooloo mi mépp. <sup>8</sup> Yonent yi feeñoon naka jekk lu ma jiitu, jiitu la, jottli nañu réew yu yaatu ak nguur yu mag seen waxyuy xare ak musiba ak mbas. <sup>9</sup> Ab yonent nag bu dee biral waxyub jàmm, su jàmm ja dikkee, ñu xam ne Aji Sax jee ko yebal ci lu wér.»

<sup>10</sup> Ba mu ko defee yonent ba ñuy wax Anaña yékkatee yet wa ca ndoddu Yonent Yàlla Yeremi, damm ko. <sup>11</sup> Anaña àddu fa kanam mbooloo ma mépp ne leen: «Aji Sax ji dafa wax ne: Nii laay damme yet wi buur Nabukodonosor buuru Babilon di ténkee. Fii ak ñaari at tembe dinaa jële yet wi ci ndoddu mboolem xeet yi mu ko ténke.» Ba loolu amee Yonent Yàlla Yeremi dem yoonam.

<sup>12</sup> Gannaaw ba yonent ba ñuy wax Anaña yékkatee yet wa ca ndoddu Yonent

† 27:16 27.16 Ndab yooyu gànjar la woon ndax wurus lay doon mbaa xalis.

Yàlla Yeremi ba damm ko, kàddug Aji Sax ji dikkal Yeremi, ne ko: <sup>13</sup> «Demal wax Anaña ne ko: “Aji Sax ji dafa wax ne: Yetu bant nga damm, waaye dinga ko wuutale yetu weñ. <sup>14</sup> Ndax Aji Sax ji, Yàllay Israyil Boroom gàngoori xare yi dafa wax ne: Yetu weñ laay teg ci ndoddu mboolem xeet yii, ñu nangul Nabukodonosor buuru Babilon, di ko surgawu. Te rabi àll yi sax, maa leen di teg ci loxoom.”»

<sup>15</sup> Gannaaw loolu Yonent Yàlla Yeremi ne yonent ba ñuy wax Anaña: «Anaña, déglul bu baax li ma lay wax: Aji Sax ji yebalu la, yaw ngay gëmloo askan wii ay fen. <sup>16</sup> Moo tax Aji Sax ji dafa wax ne: “Maa ngii di la yebal, nga jóge fi kaw suuf. Ren jii ngay dee, ndax kàdduy gántal nga waxal Aji Sax ji.”»

<sup>17</sup> Yonent ba ñuy wax Anaña ca at mooma la dee ca juróom ñaareelu weer wa.

## 29

### *Yeremi bind na ngàllo ga bataaxal*

<sup>1</sup> Yonent Yàlla Yeremi nag yónnee na bataaxal bu jóge Yerusalem, jëm Babilon ca ndesu magi ngàllo ga, ak ca sarxalkat yaak yonent yaak mépp mbooloo ma Nabukodonosor jële woon Yerusalem, yóbbu leen ngàllo ca Babilon. <sup>2</sup> Mooy gannaaw ba Buur Yekoña bàyyikoo Yerusalem, ànd ak Lingeer yaayu buur ak bëkk-néegi buur ak kàngami Yudak Yerusalem, ak liggéeykati xarala yaak liggéeykati weñ ya. <sup>3</sup> Yeremi yóbbante bataaxal ba Elasa doomu Safan, ak Gemarya doomu Ilkiya, ndaw ya Buur Cedesyas mu Yuda yebal Babilon ca Buur Nabukodonosor. Lii la bataaxal bi wax:

<sup>4</sup> Aji Sax ji Yàllay Israyil Boroom gàngoori xare yi dafa wax mboolem ngàllo ga mu jële Yerusalem, yóbbu Babilon, ne leen: <sup>5</sup> Tabaxleen ay kër dëkke; jëmbat seeni tóokër, lekk ca meññeef ma. <sup>6</sup> Takkleen jabar, am ci doom yu góor ak yu jigéen. Takkal-leen seen doom ay jabar, maye seen doom yu jigéen, ñu am ñoom it doom yu góor ak yu jigéen. Yokkuleen fa, buleen fa néeu. <sup>7</sup> Sàkkuleen jàmmu dëkk bi ma

leen toxal, te ñaanal ko ci Aji Sax ji, ndax jàmmu dëkk bi mooy seen jàmm.

<sup>8</sup> Aji Sax ji Yàllay Israyil Boroom gàngoori xare yi kat dafa wax ne: «Seeni yonent ak seen gisaanekat yi ci seen biir, buñu leen nax. Te it buleen déglu seen boroom gént yi ngeen di géntloo, <sup>9</sup> ndax waxyuy fen lañu leen di wax ci sama tur. Yebaluma leen.» Kàddug Aji Sax jee.

<sup>10</sup> Aji Sax ji déy dafa wax ne: «Bu Babilon matalee juróom ñaar fukki ati kilifteefam, dinaa leen dikkal, sotalal leen sama kàddug jàmm, ba délloosi leen bérab bii. <sup>11</sup> Ndax man déy, xam naa mébét yi ma leen mébétal.» Kàddug Aji Sax jee. «Du mébėti loraange, waaye mébėti jàmm laa leen mébétal, ngir may leen yaakaaru èllég. <sup>12</sup> Su boobaa ngeen woo ma wall, dikk ñaan ma, ma nangul leen. <sup>13</sup> Su boobaa ngeen sàkku ma, daj ma, ndegam sàkkoo ngeen ma seen léppi xol, <sup>14</sup> maa leen di may ngeen daj ma.» Kàddug Aji Sax jee. «Maa leen di tijjil seen wërség, dajalee leen ci mboolem xeet ak mboolem bérab ya ma leen sànni woon.» Kàddug Aji Sax jee. «Maa leen di délloosi bérab bii ma leen yebale woon ngàllo.»

<sup>15</sup> Yeena ne: «Aji Sax ji yónnee na nuy yonent ci Babilon.» <sup>16</sup> Waaye Aji Sax ji dafa wax lu jëm ci buur bi toog ci jalub Daawuda, jëm ci képp ku bokk ci askan wi des ci Yerusalem gii di seen bokk ya àndul woon ak yeen, dem ngàllo. <sup>17</sup> Aji Sax ji Boroom gàngoori xare yi dafa wax ne: «Maa ngii di leen yónnee saamar akub xiif ak mbas. Maa leen di def ñu mel ni figg ju nëb, ba kenn manu koo lekk ndax bon. <sup>18</sup> Maa leen di toppe saamar akub xiif ak mbas. Maa leen di def ñu seexlu leen ci mboolem réewi àddina, teg ci di musiba mu ñuy muslu ci biir mboolem xeet wu ma leen sànni, ba ku fay kókkalee, ñoom ngay tudd. <sup>19</sup> Li ko waral mooy ñoo ma déggalul.» Kàddug Aji Sax jee. «Dama leena yónnee yonent yiy samay jaam ay yooni yoon, te déggaluñu ma.» Kàddug Aji Sax jee.

<sup>20</sup> «Kon nag yeen mboolem ngàllo gi ma yebale Yerusalem ba Babilon, dégluleen kàddug Aji Sax ji. <sup>21</sup> Aji Sax ji Yàllay Israyil Boroom gàngoori xare yi dafa wax ci mbirum Akab doomu Kolaya ak Cedesyas doomu Maaseya, ñoom ñi leen di jottli waxyuy fen ci turam. Mu ne: Maa ngii di leen teg ci loxol Nabukodonosor buuru Babilon, mu rey leen, ngeen di gis. <sup>22</sup> Dinañu tax mboolem kuy móoloo te bokk ca ngàllog Yudeen ña ca Babilon, danga naan: “Yal na la Aji Sax ji teg la mu tegoon Cedesyas ak Akab, ña buuru Babilon lakk cib taal.” <sup>23</sup> Li ko waral mooy njombe wi ñu def fi digg Israyil, di jaalook seen jabari dëkkandoo, di wax ci sama tur ay kàdduy fen yu ma leen santul. Maa ko xamal sama bopp, seede ko.» Kàddug Aji Sax jee.

### *Semaya jot na tontam*

<sup>24</sup> «Yaw Yeremi nag, nanga wax Semaya, Neyelameen bi ne ko: <sup>25</sup> “Aji Sax ji Yàllay Israyil Boroom gàngoor yi dafa wax ne: Yaw yaa yónnee ci sa turu bopp ay bataaxal ca askanu Yerusalem gépp, rawatina sarxalkat ba Cefaña doomu Maaseya, ak mboolem sarxalkat ya. Nga di ci wax ne: <sup>26</sup> ‘Aji Sax ji da laa fal sarxalkat, nga wuutu Yoyada sarxalkat bi, ngir kër Aji Sax ji am ku ko yor, ba dof bu fiy wax-waxlu ay waxyu, nga jéng ko, yeewe ko cállalay weñ ci baatam. <sup>27</sup> Ana lu tax waxuloo ci Yeremi mu Anatot nag, moom miy wax-waxlu ay waxyu fi seen biir? <sup>28</sup> Léegi la nu yónnee Babilon bataaxal, ne nu: Dingen yàgg àll de, kon tabaxleeni kër, dëkke; jëmbatleeni tookeer, lekk ci meñneef mi.’ ”»

<sup>29</sup> Ba Cefaña sarxalkat ba jàngee bataaxal boobu, Yonent Yàlla Yeremi di dégg, <sup>30</sup> kàddug Aji Sax ji dikkal Yeremi ne ko:

<sup>31</sup> «Yónneel ca ngàllo gépp ne leen: Aji Sax ji dafa wax ci mbirum Semaya Neyelameen ba, ne: “Semaya waxal na leen waxyu, gëmloo leen ay fen, te yebaluma ko. <sup>32</sup> Kon nag Aji Sax ji dafa wax ne: Maa ngii di mbugalsi Semaya Neyelameen bi, mook askanam. Ku bokk ci moom du

toog ci biir xeet wii, bay gis ngëneel li may defal sama ñoñ.” Kàddug Aji Sax jee. “Moo xiirtal askan wi ci gantal Aji Sax ji.”»

## **Yeremi yéene na yeessug jàmm**

### **30**

*(Saar 30—33)*

#### *Nii la yéene bi ténkoo*

<sup>1</sup> Kàddu gii dikkal na Yeremi, bàyyikoo ci Aji Sax ji, ne ko: <sup>2</sup> «Aji Sax ji Yàllay Israyil dafa wax ne: Nanga bind cib téere kàddu yi ma la wax yépp. <sup>3</sup> Ndax kat ay bés a ngii di ñëw,» kàddug Aji Sax jee, «maay tijjil sama ñoñ seen wërsëg, muy Israyil di Yuda.» Aji Sax jee ko wax. «Maa leen di delloo ca suuf sa ma moomale woon seeni maam.»

#### *Ay teraanga nuyoo na*

<sup>4</sup> Kàddu yii la Aji Sax ji wax ci mbirum Israyil ak ci mbirum Yuda.

<sup>5</sup> Aji Sax ji déy dafa wax ne:

«Yuuxi tiitaange dégtu na, njàqare la, du jàmm.

<sup>6</sup> Laajteleen te xool, ndax góor day wasin léegi?

Moona maa gis jàmbaar ju ne jatu, ni kuy matu, kanam xoyy.

<sup>7</sup> Wóoy boobu bés bu réy, ba bés du ni mel!

Bésu njàqare lay doon ñeel askanu Yanqóoba, waaye dañuy mucc.

<sup>8</sup> «Bésu keroog,» kàddug Aji Sax jee, Boroom gàngoori xare yi, «maay damm yet wi ñu leen ténke ci seen ndodd, dammat seeni jéng, ba dootuñu doon jaamu doxandéem. <sup>9</sup> Waaye seen Yàlla Aji Sax ji lañuy jaamu ak seen buur bi ma leen di falal, mu toogal Daawuda.

<sup>10</sup> Waaye yaw Yanqóoba sama jaam, bul tiit,» kàddug Aji Sax jee;

«yaw Israyil, bul ragal.

Fu sore laa lay wallujee,

yaak sa askan wa ca réewum njaam ga, Yanqóoba dellu dal, fegu;

kenn dootu ko tiital.

<sup>11</sup> Maa ngeek yaw, nar laa wallu.» Kàddug Aji Sax jee.

«Maay fàkkas mboolem xeet ya ma la  
sànniji.  
Yaw nag дума la fàkkas,  
дума la ñàkka topp moos,  
waaye li nga yelloo laa lay yar.»

12 Aji Sax ji déy dafa wax ne:  
«Sa damm-damm du faju,  
sa góom du wér.

13 Amul ku lay sàmmal sa àq,  
te sab dana amul pajtal mu baax.

14 Sa soppe yépp a la fàtte,  
kenn faalewu la ci,  
ndax dumay noon laa la дума,  
yar la yar bu tar  
ngir sa ñaawtéef ju réy  
ak sa bàkkaar yu bare.

15 «Damm-damm yu dul wér  
ak mitit wu tar jarul jooy.  
Maa la teg lii,  
ndax sa ñaawtéef ju réy  
ak sa bàkkaar yu bare.

16 Waaye ku la lekk, dees na ko lekk;  
sa noon yépp lañuy jàpp njaam ba ñu daj.  
Ku la futti, dees na ko futti,  
ku la saax-saaxee dees na ko saax-saaxee.

17 «Ñu ngi la naan: “Waccees na la,”  
naan la: “Siyon yaw, faaleesu la,”  
waaye maa lay may wér,  
faj say góom.»  
Kàddug Aji Sax jee.

18 Aji Sax ji dafa wax ne:  
«Maa ngii di tijji wërsëgu askanu  
Yanqóoba,  
ñibbsil leen,  
baaxe seeni dëkkuwaay,  
ba dëkk dekkee ca tundam wu gentoon,  
kër buur taxawaat bérabam,

19 cant jollee ca,  
di riirum mbégare.  
Maa leen di ful,  
te duñu wàññiku,  
darajaal leen,  
te dootuñu tuut.

20 Seenii doom dañuy mel na woon,  
seen mbooloo sax fi sama kanam,

may mbugal ñi leen di sonal.  
21 Su boobaa seen njiit di seen deret,  
di seen kilifa, soqikoo ci ñoom;  
ma woo ko, mu jege ma,  
nde nit jaayul bakkanam,  
ba jegesi ma te woowuma ko!»\*  
Kàddug Aji Sax jee.  
22 «Yeenay doon sama ñoñ,  
man, may seen Yàlla.»

23 Ngélénu Aji Sax jaa ngoog,  
sànjam fettax na,  
dig callweer,  
callweeral boppu ku bon.

24 Sànjam Aji Sax ju tàng ji du giif,  
te sotalul li mu nar.  
Fan yu mujj ya  
ngeen xam ci dara.

## 31

### *Israyil séentu na sancaatub réewam*

1 «Su boobaa,» kàddug Aji Sax jee, «maay  
doon Yàllay làngi Israyil yépp,  
ñoom ñuy sama ñoñ.»

2 Aji Sax ji dafa wax ne:  
«Waa Israyil ñi rëcc ñawkay saamar,  
daje nañook yiw ci màndinj mi,  
fekk ñuy sàkku noflaay.»

3 Ñu ne: «Bu yàgg la nu Aji Sax ji feeñu,  
ne nu: “Maa leen masa bëgg,  
ba tax ma sédd leen ngor.

4 Yaw Israyil mu taaru,  
maa lay defaraat, nga defaru,  
ba jiinaat sam njiin,  
wàlli peccum mbéx,

5 jëmbataat sa toókëri reseñ  
ca mbartali Samari,  
te ku jëmbat, xéewlu ca.

6 Bés dina ñew déy,  
wattukat yéenee fa kaw tundu Efrayim  
ne: ‘Aycaleen nu yéegi tundu Siyon,  
fa sunu Yàlla Aji Sax ji.’ »

7 Aji Sax ji déy dafa wax ne:  
«Sarxolleleen, bége askanu Yanqóoba,  
xaacul-leen xeet woowu jiitu,  
biral-leen cant te ne:

\* **30:21** 30.21 Leeru Yàlla, jegée ko noonu, bakkanu nit ki xaj na ci. Néegu biir ba ca kër Yàlla ga sax, du ñépp a fa mana àgg. Sarxalkat bu mag baa fa daa dugg benn yoon cim at. Keneen ku fa dugg dee. Seetal ci *Sarxalkat yi* 16.10; 21.17; 22.3.

«Éy Aji Sax ji, wallul ndesu Israyil, sa ñoñ ñii.»»

8 «Maa ngii di jële sama ñoñ réewum bëj-gànnaar,

dajalee leen fa cati àddina.

Silmaxaa ngi ci akub lafañ,  
jigéenu wérul it ak kuy wasin,  
ñuy gàngoor gu mag, délsi fii.

9 Ñooy dikk di jooy, di leewaayu,  
ma jiite leen, yóbbu,  
jaare leen xàll wu jub wu ñu dul fakk-taloo,

ba ca wali ndox ya,  
ngir maay baayu Israyil,  
Efrayim di sama taaw.

10 «Yeen xeet yi, dégluleen kàddug Aji Sax ji,

yégleleen ko ca tefes yu sore ya.

Ne leen: «Ki tasaare woon Israyil, moo leen di dajale,

sàmm leen ni sàmm ak géttam.»

11 Aji Sax jee goreel askanu Yanqóoba,  
jot ko ci loxol ku ko èpp doole.

12 Ñooy dikk, di sarxollee kaw tundu Siyon,

ne ràññ ndax ngéneeli Aji Sax ji,  
pepp, biiñ aku diw,

gàtt aki nag,

bakkan ni tool bu ñu suuxat,  
dootuñu yoggoorlu.

13 Su boobaa janq bégem pooj,  
waxambaaneek mag feelu ko,  
ma soppi seen ñaawlu mbégte, dëfal leen,

bànnexal leen, ñu dëddu naqar.

14 Maay yafal sarxalkat yi, ba reggal leen,  
sama ñoñ ñi regge sama ngéneel.»

Kàddug Aji Sax jee.

15 Aji Sax ji dafa wax ne:

«Yuux dégtu na fa Raama,  
ay jalooki jooy yu metti.

Rasel ay jooy ay doomam,  
baña noppi,

ndax doomam ya wuute.»

16 Aji Sax ji nag ne ko:

«Baal sa jooy yi

te fomp say rongooñ,

dees na la yool sa coono.»

Kàddug Aji Sax jee.

«Say doom ay jóge réewu noon, ñibbsi.

17 Am nga yaakaaru èllëg.»

Kàddug Aji Sax jee.

«Say doom ay délsi seenum réew.

18 Maa dégg moos askanu Efrayim di binni

naan: «Aji Sax ji, duma nga noo duma,  
ni sèllu wu dese tàggat.

Ngalla waññi nu, nu waññiku;

yaw Aji Sax ji, yaa di sunu Yàlla.

19 Dëddu woon nanu la moos

waaye léegi réccu nanu.

Xam nan ne tooñ nanu,

ba tey nuy màttuy wiccax.

Danoo rus, torox

ndax sunu ñaawtéefi ndaw.»»

20 Aji Sax ji ne:

«Du Efrayim\* ay sama doom ji ma sopp,  
gone gi may bannexal?

Lu ma ko gëdd gëdd,

di ko bàyyi xel.

Moo tax sama xol di ko laaj,

ma yërëm koo yërëm.»

Kàddug Aji Sax jee.

21 «Sampal ay xàmmikaay ci yoon wi,

teg fi say màndarga.

Booy dem, defal sa xel ci yoon wii,

ñall wii nga topp.

Israyil mu taaru mi, ñibbsil,

ñibbsil sa dëkk yii.

22 Ndaw su toogadi si,

foo àppal sa cijiñ-cañañ ji?

Aji Sax ji déy, sàkk na guléet kaw suuf:

yees ba mel ni jigéen juy jëflanteek góor†.»

23 Aji Sax ji Yàllay Israyil Boroom gàngoor yi dafa wax ne: «Bu ma tijjee

seen wërsëg, kàddu gii dina jibati ci réewum Yuda ak dëkk yi ko séq.

Dees na ne: «Yaw dëkkuwaayu njekk bii,

yaw, tundu Siyon wu sell wi,

yal na la Aji Sax ji barkeel!»

\* 31:20 31.20 Efrayim kenn la ci sèti Yanqóoba mi ñu dippee Israyil. Turu Efrayim wi fii askanu Israyil la fi taxawal. † 31:22 31.22 Waxin la wu yéeme wuy wund jëfi guléet ju kenn séentuwul, waaye xamuñu dëgg la mu tekki woon ca yooya jamono.

<sup>24</sup> «Waa réewum Yuda ak dëkk-dëkkaanam yépp ay bokk dëkk, ak beykat yeek mangan yi yor gétt. <sup>25</sup> Maay nàndal ku mar, leqli ku loof.»

*Yeremeey wax*

<sup>26</sup> Ba loolu amee ma yewwu, ne xiféet, xam ne samay nelaw neex na.

*Aji Sax ji teowlul na Israyil*

<sup>27</sup> «Bés a ngii nag di ñëw,» kàddug Aji Sax jee, «yu may jiwe kërug Israyil ak kërug Yuda jiwum doom aadama ak jiwum mala. <sup>28</sup> Te ni ma leen teewloo woon ba ma leen di buddat, di leen fàqat, di leen daaneel, di leen yaqte ak a lor, noonu laa leen di teewloo ngir defar leen, jëmbat leen.» Kàddug Aji Sax jee. <sup>29</sup> «Su boobaa deesatul ne:

“Baay lekk reseñ ju xaay, mu uum bëñu doom ja.”

<sup>30</sup> Su boobaa ku nekk sa bàkkaaruu bopp a lay rey. Ku lekk reseñ yu xaay, sa gëñi bopp lay uum.

*Kóllère gu yees a ngi*

<sup>31</sup> «Ay bés a ngii di ñëw,» kàddug Aji Sax jee, «yu may fas ak waa kër Israyil ak waa kër Yuda kóllère gu yees. <sup>32</sup> Du mel ni kóllère ga ma fasoon ak seeni maam keroog ba ma leen jàppee ci loxo, génne leen réewum Misra. Ndax ñoom ñoo fecci sama kóllère, te man may seen boroom kër.» Kàddug Aji Sax jee. <sup>33</sup> «Waaye kóllère gi may fas ak waa kër Israyil gannaaw loolu,» kàddug Aji Sax jee, «nii lay deme: Maay yeb sama ndigali yoon ci seen xel, ci seen xol laa koy ñaas. Maay doon seen Yàlla, ñoom ñu doon sama ñoñ. <sup>34</sup> Kenn dootu soxlaa jàngal kenn, muy moroomam mbaa mbokkam, naan ko: “Ràññeel Aji Sax ji,» ndax ñoom ñépp a may ràññee, ki gëna tuut ba ki gëna mag,» kàddug Aji Sax jee, «ndax maa leen di jéggal seeni ñaawtéef, te seeni bàkkaar, дума ci bàyyeeti xel.»

*Lii mooy saxal Israyil*

<sup>35</sup> Aji Sax ji dafa wax, moom mi dogal jant di leeral bëccëg, dogal weer ak biddiww di leeral guddi, yëngal géej, kiy gannax yi riir, kookooy Aji Sax ji Boroom gàngoor yi.

<sup>36</sup> Mu ne: «Bu askanu Israyil feyee ba fàww, may gis, dogal yooyoo toxu, may gis.» Kàddug Aji Sax jee.

<sup>37</sup> Aji Sax ji dafa wax ne:

«Su ma waccee mboolem askanu Israyil ndax li ñu def lépp, kon nit a mana natt kawewaayu asamaan, mbaa mu xayma xóotaayu suuf.»

Kàddug Aji Sax jee.

<sup>38</sup> Mu ne: «Ay bés a ngi ñëw,» kàddug Aji Sax jee, «dees na tabaxalaat Aji Sax ji dëkk bi, dale ko ca soorooru Ananel ba ca buntu Ruq ba. <sup>39</sup> Dees na fa réddaat kemu dëkk bi, jubal ba tundu Gareb, wëri ba Gowa. <sup>40</sup> Mboolem xuru néew yaak doom ya ak mboolem tool ya, ba ca yoonu ndox ma ca Sedoron, ba ca ruqu buntu Fas ya ca penku: lépp lees di sellalal Aji Sax ji. Deesatu fa buddat mbaa di fa daaneel dara.»

## 32

*Yeremi wone na dayob ngëmam*

<sup>1</sup> Kàddu gii dikkaloon na Yeremi, bàyyikoo fa Aji Sax ji, ca fukkeelu atu nguurug Cedesyas buurub Yuda. Mu yemook ba nguurug Nabukodonosor buuru Babilon tolloo ca fukkeelu atam ak juróom ñett. <sup>2</sup> Booba mbooloom xarem Babilon a nga gaw Yerusalem. Fekk Yonent Yàlla Yeremi nag moom, ma nga ñu tēj ca kër buurub Yuda, ca biir èttu dag ya, <sup>3</sup> fa ko Cedesyas buurub Yuda dencoon, ndax da ko noon: «Ana lu waral ngay wax bii waxyu? Nga ne: “Aji Sax ji dafa wax ne mu ngii di teg dëkk bii ci loxol buuru Babilon, mu nangu ko. <sup>4</sup> Te Cedesyas buurub Yuda du rëcc waa Babilon ndax dees na ko teg moos ci loxol buuru Babilon, ba Cedesyas wax, mu wax, seeni gët ñeent. <sup>5</sup> Babilon lees koy yóbbu, te fa lay des, ba keroog may wax ci moom.” Kàddug Aji Sax jee. “Bu ngeen xareek waa Babilon it, dungeen am ndam.”»

<sup>6</sup> Yeremi da ne: Kàddug Aji Sax ji dikkal na ma ne ma: <sup>7</sup> «Xoolal, Anamel doomu Salum sa baay bu ndaw a ngooguy ñëw,

naan la nga jënd toolam ba ca Anatot, ndax yaa ko saña jotaat.»

<sup>8</sup> Ba loolu amee Anamel sama doomu baay bu ndaw dikk, na ma ko Aji Sax ji waxe. Mu fekk ma ci èttu dag yi, ne ma: «Rikk jëndal sama tool ba ca Anatot ca diiwaanu Beñamin ndax sa alal la ci yoon, yaa ko saña jotaat\*. Kon jënd ko.» Ma xam ne loolu kàddug Aji Sax jaa.

<sup>9</sup> Nii laa jënde tool ba ca Anatot ci Anamel sama doomu baay bu ndaw. Ma waññal ko xaaalis bi, muy fukki donji xaaalis ak juróom ñaar. <sup>10</sup> Ma bind kayitu njaay mi, màndargaale ko sama torlukaay, woo ciy seede, ba noppi natt diisaayu xaaalis bi. <sup>11</sup> Ma boole jël kayitu njaay bi tëjewul ak kayitu njaay bi tëje, te yoonalu njaay meek sàrt yi tënke ci. <sup>12</sup> Ma teg kayit yi ci loxol Barug doomu Nerya doomu Maaseya. Anamel sama doomu baay bu ndaw fekke na ko, seede yi torlu kayitu njaay mi fekke ko, ñook mboolem Yudeen ñi toogoon ci èttu dag yi.

<sup>13</sup> Ma dénk Barug ci seen kanam, ne ko: <sup>14</sup> «Aji Sax ji Yàllay Israyil Boroom gàngoor yi dafa wax ne: “Jëlal kayit yii, kayitu njaay bi tëje, ak kayit bi tëjewul, nga boole yeb ci njaqal ban, ndax kayit yi mana yàgg. <sup>15</sup> Ndax Aji Sax ji Yàllay Israyil Boroom gàngoor yi dafa wax ne: Dees na dellu di jënd ay kër aki tool ak tóokëri reseñ ci réew mii.”»

### *Xelu Yeremi teey na*

<sup>16</sup> Gannaaw ba ma joxee kayiti njaay ma Barug doomu Nerya, damaa ñaan Aji Sax ji, ne ko: <sup>17</sup> «Éy saa Boroom, Aji Sax ji! Yaw déy yaa sàkk asamaan, sàkk suuf ci sa doole ju bare ak sa kàttan. Dara tëwu la. <sup>18</sup> Yaw miy jëfe ngor sa digg ak junniy maas, te bu baay ñaawee, nga topp ko ko, ba ci doomam. Yaay Yàlla ju màgg ji te jàmbaar. Yaa di Aji Sax ji Boroom gàngoori xare yi, <sup>19</sup> réyi pexe, màggi jaloore; say gët ne jàkk ci mboolem lu doom aadama def, ngay añale ku nekk jëfinam ak jëfam. <sup>20</sup> Yaa def ay firnde aki kéemaan ca réewum Misra, di ko def ba tey jii ci Israyil, ak ci doom aadama

yépp, ba may sa bopp woy wu réy wi nga am tey jii. <sup>21</sup> Génne nga Israyil say ñoñ, jële leen réewum Misra, ci kawi firnde aki kéemaan ak sa doole ju bare ak sa kàttan; mu jur tiitaange lu réy. <sup>22</sup> Nga jox leen réew mii nga giñaloon seeni maam. Muy réew mu meew meek lem ji tuuroo. <sup>23</sup> Ñu dikk moom ko, te déggaluñu la, toppuñu saw yoon, jëfewuñu mboolem li nga leen santoon, ba tax nga wàcce ci seen kaw mboolem musiba mii.

<sup>24</sup> «Sëkki gawukaay yaa ngii ñu yékkatil dëkk bi, ngir nangu ko. Dëkk bi dina daanu ci loxoy waa Babilon ñi ko song, ndax saamar akub xiif ak mbas. Gis nga ko déy, li nga waxoon am na! <sup>25</sup> Dëkk baa ngii nara daanu ci loxoy waa Babilon te moona Boroom bi Aji Sax ji, yaw yaa ma ne ma jënde tool bi xaaalis, ay seede seede ko.»

### *Aji Sax ji dalal na xelu Yeremi*

<sup>26</sup> Ba loolu amee kàddug Aji Sax ji dikkal Yeremi, ne ko: <sup>27</sup> «Du maay Aji Sax ji, Yàllay képp kuy dund. Ana lu ma të?» <sup>28</sup> Kon nag Aji Sax ji dafa wax ne: «Maa ngii di teg dëkk bii ci loxoy waa Babilon ak ci loxol Nabukodonosor buuru Babilon, mu nangu ko. <sup>29</sup> Waa Babilon ñiy song dëkk bii dinañu dugg, taal ko, lakk ko ba mu jeex, lakkaale kër ya ñu doon taalal Baal tuur mi, cuuraay ca kaw taax ya, di fa tuural yeneen yàlla ay saraxi naan, ba di ma merloo. <sup>30</sup> Askanu Israyil ak Yuda kay, ca cosaan ba tey, defuñu lu moy lu bon fi sama kanam. Bànni Israyil, mboolem lu ñu def, defuñu ko lu moy di ma merloo.» Kàddug Aji Sax jee. <sup>31</sup> «Mer dikkal na ma, xadar dikkal ma ci dëkk bii, dale ko ca ba ñu ko tabaxee ba bésub tey, ba tax ma di ko jële fi sama kanam, <sup>32</sup> ndax mboolem lu bon li bànni Israyil ak Yuda def, di ma merloo, ñook seeni buur ak seeni kàngam ak seeni sarxalkat ak seeni yonent ak waa Yuda ak waa Yerusalem. <sup>33</sup> Wonuñu ma kanam, xanaa gannaaw, te ma àrtu leen ay yooni yoon. Waaye ñoom dégluwnu, dégguñu yar. <sup>34</sup> Yeb nañu sax seen yëf yu seexluwu ci biir kër gi ñu ma tudde, ba

\* **32:8** 32.8 jotaat: seetal ci *Sarxalkat* yi 25.22-34.

sobeel ko. <sup>35</sup> Tabaxal nañu Baal tuur mi ay bérabi jaamookaay ca xuru Ben Inom, di fa lakk seen doom yu góor ak yu jigéen ngir Moleg tuur mi, te masuma leen koo sant. Jooju jéf ju siblu jaarul sax sama xel ba ma leen di ko defloo, ñuy yóbbe Yuda bàkkaar.

<sup>36</sup> «Yeena wax ci dëkk bii ne dina daanu ci loxol buuru Babilon ndax saamar akub xiif ak mbas. Waaye Aji Sax ji Yàllay Israyil dafa wax ne: <sup>37</sup> Maa ngii di leen dajalee ca mboolem réew ya ma leen sànni woon, ndax mere leen ak jéppi leen ba sama xol fees dell. Te maa leen di délloosi fii, dëel leen ci jàmm; <sup>38</sup> ñu doon sama ñoñ, may seen Yàlla. <sup>39</sup> Maa leen di may benn xol ak benn jubluwaay ngir ñu di ma wormaal seen giiru dund, muy seen ngéneel, ñook seen doom yi leen di wuutu. <sup>40</sup> Maay fas ak ñoom kóllère gu sax dàkk gu ma leen dul xañati; xanaa baaxe leen, yeb ragal Yàlla ci seen xol, ba dootuñu ma won gannaaw. <sup>41</sup> Maay am mbégtey baaxe leen, jëmbat leen bu wér ci réew mi, jëmbate leen sama léppi xol ak sama léppi jëmm.»

<sup>42</sup> Aji Sax ji déy dafa wax ne: «Ni ma wàccee ci kaw xeet wii musiba mu mag mii mépp, ni laay wàccee fi seen kaw mboolem ngéneel li ma leen wax. <sup>43</sup> Dees na dellu di jënd ab tool ci réew mii ngeen ne daanu na ci loxol waa Babilon, ba dib gent bu kenn nekkul, du nit, du rab. <sup>44</sup> Dees na fi jënde xalis ay tool, bind fi kayiti njaay, torlu ko, tēj fi kanami seede ci suufas Beñamin, ak li wër Yerusalem, ak biir dëkki Yuda, ak dëkki tund ya, ak dëkki suufu tund ya, ak ca dëkki diiwaanu Negew. Maay tijji moos seen wërsëg.» Kàddug Aji Sax jee.

### 33

#### *Aji Sax ji du dige, di fomm*

<sup>1</sup> Gannaaw loolu kàddug Aji Sax ji dikkal na Yeremi ñaareel bi yoon, fekk ko tēja ba tey ca biir èttu dag ya. Mu ne ko: <sup>2</sup> «Aji Sax ji dafa wax, moom miy sàkk mbir, bind ko, taxawal ko, Aji Sax ji di turam. <sup>3</sup> Mu ne: “Woo ma, ma wuyu la, wax la lu réy te loq, loo xamul woon.”» <sup>4-5</sup> Aji Sax ji Yàllay Israyil déy dafa wax ci

mbirum kéri dëkk bii ak kéri buuri Yuda yii ñu màbb, di ko fegoo sëkk bi ñu leen gawe te di ko làqoo saamaru waa Babilon ñi ñuy xareel. Mu ne: «Kër yi dina fees ak néewi nit ñi ma bóom ndax mer ak xol bu fees. Dinaa làq dëkk bii sama yiw ndax seen gépp mbon.

<sup>6</sup> «Waaye du tee, maa leen di may tan, faj leena faj ba ñu wér, won leen xéewalu jàmm ju dëggu. <sup>7</sup> Maay tijji wërsëgu Yuda ak wërsëgu Israyil, sampaat leen na woon. <sup>8</sup> Maa leen di raxasal mboolem ñaawtéef gu ñu ma moye, baal leen mboolem ñaawtéef yu ñu ma moye, di ma gantal. <sup>9</sup> Dëkk bi daldi doon sama woy, di sama mbégte, di sama ndam, di sama sag ci biir mboolem xeeti àddina yi dégg ngéneel yi ma leen di defal yépp. Dinañu yéemu ba seen yaram daw ci lépp luy ngéneel ak jàmm ju ma leen di defal.»

<sup>10</sup> Aji Sax ji dafa wax ne: «Bérab bii ngeen ne ab gent la bu kenn nekkul, du nit, du rab te muy dëkki Yudak mbeddi Yerusalem yii gent, kenn nekkul fi, du nit, du rab, dees na fi déggati <sup>11</sup> coowal mbégteek coowal bannex ak kàddug boroom séet ak kàddug séetam, ànd ak kàdduy nit ñiy indi saraxi cant ci biir kër Aji Sax ji, di jàngaale naan:

“Santleen Aji Sax ji Boroom gàngoori xare yi.

Aji Sax jee baax,  
kee saxoo ngoram.”

Maay tijji wërsëgu réew mi, na woon.»  
Aji Sax jee ko wax.

<sup>12</sup> Aji Sax ji Boroom gàngoor yi dafa wax ne: «Bérab bii di gent bu kenn nekkul, du nit du rab ci dëkk yi fi nekk yépp, bérab bii dina dellu am parlu yu sàmm siy gooral seeni gatt. <sup>13</sup> Muy dëkki tund yi, di dëkki suufu tund yi, di dëkki diiwaanu Negew, di diiwaanu Beñamin, di li wër Yerusalem, di dëkki Yuda, gatt yi dina dellu ci loxol sàmm buy takk lim ba.» Aji Sax jee ko wax.

#### *Askanu Buur Daawuda dina yeeshu*

<sup>14</sup> «Ay bés a ngii di ñew,» kàddug Aji Sax jee, «maay sottal ngéneel la ma dig waa kër Israyil ak waa kër Yuda.

<sup>15</sup> Bés yooyu ci jamonoom,



maay jebbil njebbit lu jekk ci askanu  
Daawuda,  
muy jéfe njub ak njeck ci réew mi.

<sup>16</sup> Bés yooyu Yuda day muc, c,  
Yerusalem dëkke jàmm,  
ñu di ko wooye:  
“Aji Sax ji sunu njeck.”»

<sup>17</sup> Aji Sax ji déy dafa wax ne: «Daawuda  
du ñàkk mukku ku ko wuutu ci jalu Israyil.  
<sup>18</sup> Sarxalkat yiy Leween it duñu ñàkk  
ku leen taxawal fi sama kanam, di joxe  
saraxi rendi-dóomal, di taal saraxi pepp  
ak a sarxal ba fàww.»

### *Kóllère gu dul toxoo ngi*

<sup>19</sup> Gannaaw loolu kàddug Aji Sax ji  
dikkal na Yeremi, ne ko: <sup>20</sup> «Aji Sax ji  
dafa wax ne: Ndegam manees naa dog  
sama kóllère maak bëccëg mbaa sama  
kóllère maak guddi, ba bëccëg mbaa  
guddi baña teew ci waxtoom, <sup>21</sup> kon dees  
na mana dog sama kóllèreek Daawuda  
sama jaam bi, dogaaale sama kóllèreek  
sarxalkati Leween ñi may liggéeyal, ba  
Daawuda ñàkk sët bu koy wuutu cib  
jalam. <sup>22</sup> Ni biddiwi asamaan weese lim,  
feppi suufas géej wees waññ, ni laay fule  
askanu Daawuda sama jaam bi ak askanu  
Leween ñi may liggéeyal.»

<sup>23</sup> Kàddug Aji Sax ji dellu dikkal Yeremi,  
ne ko: <sup>24</sup> «Xanaa dégguloo li nit ñi wax?  
Ñu ne: “Ñaari làng ya Aji Sax ji tannoos  
de, wacc na leen,” moo tax ñu xeeb  
sama ñoñ, ba tegatuñu leen sax aw xeet.»  
<sup>25</sup> Waaye Aji Sax ji dafa wax ne: «Ndegam  
du maa fas sama kóllère maak bëccëg  
ak guddi, te du maa saxalal asamaan ak  
suuf ay sàrt, <sup>26</sup> kon dinaa wacc askanu  
Yanqóoba ak Daawuda sama jaam bi, ba  
dootuma taamoo ciw askanam kuy yilif  
askanu Ibraaymaak Isaaxaak Yanqóoba.  
Maay tijji seen wërsëg moos, yërëm  
leen.»

## 34

### *Aji Sax ji wax na Buur Cedesyas mujam*

<sup>1</sup> Ba Nabukodonosor buuru Babilon  
àndeek mbooloom xareem mépp ak  
mboolèm réew yeek xeet yi mu teg loxo,  
ñu songandoo Yerusalem ak dëkk yi ko  
wër yépp, kàddu gii dikkaloon na Yeremi,

bàyyikoo ci Aji Sax ji: <sup>2</sup> «Aji Sax ji, Yàllay  
Israyil dafa wax ne: Demal nga wax  
Cedesyas buurub Yuda ne ko: “Aji Sax ji  
dafa wax ne: Maa ngii di teg dëkk bii ci  
loxol buuru Babilon, mu taal ko. <sup>3</sup> Yaw  
Cedesyas nag doo ko rëcc. Dees na la  
jàpp moos te dees na la teg ci loxol buuru  
Babilon, mu wax ak yaw, seeni gët ñeent;  
nga dem Babilon.

<sup>4</sup> «“Waaye yaw Cedesyas buurub Yuda,  
déglul kàddug Aji Sax ji: Aji Sax ji dafa  
wax ne doo deeye saamar. <sup>5</sup> Ci jàmm ngay  
dee, te ni ñu taalale woon cuuraay say  
maami buur yi la jiitu, terale leen ko ci  
seen dëj, ni lañu lay taalale cuuraay, di la  
jooy naan: ‘Wóoy sunu sang ba dem na!’  
Jii wax, maa ko wax.”» Kàddug Aji Sax  
jee.

<sup>6</sup> Ci kaw loolu Yonent Yàlla Yeremi  
jottli Cedesyas buurub Yuda mboolèm  
kàddu yooyu fa Yerusalem. <sup>7</sup> Mu yemook  
ba mbooloom buuru Babilon di xareek  
Yerusalem ak mboolèm dëkki Yuda ya  
desoon, di Lakis ak Aseka. Booba yooyu  
rekk a desoon ci dëkki Yuda yu tata wër.

### *Yiwi jaam yi war na*

<sup>8</sup> Kàddu gii dikkaloon na Yeremi,  
bàyyikoo ci Aji Sax ji, gannaaw ba Buur  
Cedesyas fasook mboolèm waa Yerusalem  
ngir goreel jaam yi, <sup>9</sup> ku nekk wara goreel  
mbokkam mu Ebraam, góor ak jigéen, ñu  
moom seen bopp, te kenn baña jaamloti  
mbokkam Ebraam. <sup>10</sup> Ba mu ko defee  
mboolèm kàngam yeek nit ñi ko fasoo  
woon daldi nangoo goreel seen jaam yu  
góor ak yu jigéen, bañ leena jaamloti,  
ñu moom seen bopp. Ñu daldi leen yiwi.  
<sup>11</sup> Gannaaw gi nag ñu walbatiku, jëlaat  
seen jaam yu góor ak yu jigéen ya ñu  
goreeloon, dellooleen cig njaam, góor ak  
jigéen.

<sup>12</sup> Ba loolu amee kàddug Aji Sax ji  
dikkal Yeremi bàyyikoo ci Aji Sax ji, ne  
ko: <sup>13</sup> «Aji Sax ji Yàllay Israyil dafa wax  
ne: Man maa fasoon kóllère ak seeni  
maam keroog bés ba ma leen génnee  
réewum Misra kërug njaam ga, ne leen:  
<sup>14</sup> “Saa yu ngeen waññee juróom benni  
at ba ca catal juróom ñaareel ma, na ku  
nekk ci yeen goreel mbokkam Ebraam

mu ko jaayoon boppam. Gannaaw bu ko liggéeyalee juróom benni at, na ko goreel, mu tàggook moom, daldi moom boppam\*. Waaye seeni maam déggaluñu ma, teewluwñu ma. <sup>15</sup> Tey yeen, waññiku woon ngeen, ba def li ma rafetlu; ku nekk ci yeen biral goreelu mbokkam. Fasoo ngeen ko sax fi sama kanam ci biir kër gi ñu ma tudde. <sup>16</sup> Léegi nag ngeen di teddadil sama tur, dellu gannaaw, ku nekk jëlaat jaamam yu góor ak yu jigéen, te ngeen goreeloon leen ba noppi, ñu moom seen bopp ni mu leen neexe. Néewal ngeen leen doole, ñu dellu di seeni jaam.”

<sup>17</sup> «Kon nag, Aji Sax ji dafa wax ne: “Ku nekk ci yeen waroon naa goreel mbokkam dëkkandoom, waaye yeen déy, déggaluleen ma. Man nag maa ngi nii di leen goreel,” kàddug Aji Sax jee, “ngir wacce leen saamar ak mbas akub xiif. Maa leen di def waa réewi àddina yépp seexlu leen. <sup>18</sup> Nit ñi fecci sama kóllère, sàmmuñu ponki kóllère gi ñu dige woon fi sama kanam, maa leen di def ni sèllu wa nit ña xaroon ñaar, jaare ca diggante xaaj ya, dogale ko seen ngiñ. <sup>19</sup> Muy kàngami Yuda, di kàngami Yerusalem, di bëkk-néeg yeek sarxalkat yi, ak mboolem waa réew mi jaare woon ci diggante ñaari xaaji sèllu wa, <sup>20</sup> maa leen di teg ci seen loxoy noon ak ñiy wut seen bakkan; seeni néew, njanaaw yeek rabi àll yi for. <sup>21</sup> Cedesyas buurub Yuda, mook ay kàngamam, maa leen di teg ci seen loxoy noon, loxoy ñiy wut seen bakkan, teg leen ci loxoy mbooloom xarem buuru Babilon mi leen songoon, ba di leen doora bàyyi. <sup>22</sup> Maa ngi nii di joxe ndigal,” kàddug Aji Sax jee, “délloosi leen ci dëkk bi, ñu song ko, ba nangu ko, taal ko ba mu jeex. Maay gental dëkki Yuda, ba kenn du ca des.”»

## 35

### *Rekabeen raw na Yudeen*

<sup>1</sup> Kàddu gii dikkaloon na Yeremi, bàyyikoo ci Aji Sax ji ci jamonoy buurub Yuda Yowakim doomu Yosya. Mu ne ko: <sup>2</sup> «Demal ca Rekabeen ña, nga wax ak

ñoom, indi leen kër Aji Sax ji, dugal leen ci néeg yi benn, te jox leen biiñ, ñu naan.»

<sup>3</sup> Ma dem wooyi Yaasaña doomu Yeremi doomu Abàccña, boole kook ay doomi baayam ak doomam yu góor yépp, làngi Rekabeen ñépp daal. <sup>4</sup> Ma yóbbu leen kër Aji Sax ji, dugal leen ca biir néegu taalibey Xanan, góorug Yàlla gay doomu Igdalyaa; mooy néeg ba dendeek néegu kàngam ya, ca kaw néeg doomu Salum, Maaseya fara bunt ba. <sup>5</sup> Ci kaw loolu ma tegal Rekabeen ñi ay njaqi biiñ yu fees, aki kaas, ne leen: «Naanleen.» <sup>6</sup> Ñu ne: «Nun dunu naan biiñ, ndax sunu maam Yonadab doomu Rekab da noo santoon ne nu: “Buleen naan biiñ muk, muy yeen ba ci seeni sèt, ba fàww. <sup>7</sup> Buleen tabax kër, buleen bey, buleen jëmbat tóokëru reseñ, bumu bokk ci seen alal. Waaye nangeen dëkkey xayma seen giiru dund gépp, su ko defee ngeen gudd fan ci biir réew mii ngeen diy mangan.” <sup>8</sup> Déggal nanu it sunu maam Yonadab doomu Rekab ci mboolem li mu nu santoon, ne nu bunu naan biiñ sunu giiru dund, nook sunuy jabar ak sunuy doom, góor ak jigéen, <sup>9</sup> bunu tabax kër yu nu dëkke, te tóokër ak tool bu ñuy bey, bumu bokk ci sunu alal. <sup>10</sup> Waaye ay xayma lanu dëkke, di sàmm ak a jéfe mboolem lu nu sunu maam Yonadab santoon. <sup>11</sup> Waaye ba Nabukodonosor buuru Babilon songee réew mi lanu ne: “Nan duggi gaaw biir Yerusalem, ba récc mbooloom waa Babilon ak Siri.” Moo nu taxa toog nii ci biir Yerusalem.»

<sup>12</sup> Ba loolu amee kàddug Aji Sax ji dikkal Yeremi, ne ko: <sup>13</sup> «Aji Sax ji Yàllay Israyil Boroom gàngoori xare yi dafa wax ne: Demal wax mboolem waa Yuda ak waa Yerusalem, ne leen: “Xanaa dungeen dégg ndigal, ba dégg samay kàddu?” Kàddug Aji Sax jee. <sup>14</sup> “La Yonadab doomu Rekab santoon ay doomam ne leen: ‘Buleen naan biiñ’ de, jéfees na ko. Duñu naan biiñ ba tey jii ndax wormaal seen santaney maam. Man nag ay yooni yoon laa leen wax waaye déggaluleen ma. <sup>15</sup> Yónnee naa leen samay jaam, yonent yi, ay yooni yoon, ne leen: ‘Na

\* **34:14** 34.14 Seetal ci *Mucc ga* 21.2-6.

ku nekk ci yeen dëpp yoonam wu bon, di def lu baax, baña topp yeneen yàlla, di leen jaamu, ndax ngeen dund ci réew mi ma leen jox, yeen ak seeni maam.’ Waaye teewluwleen ma, déggaluleen ma. <sup>16</sup> Sëti Yonadab doomu Rekab yii déy wormaal nañu santaane ba leen seen maam santoon, waaye xeet wii déggaluñu ma.”

<sup>17</sup> «Kon nag Aji Sax ji Yàllay Israyil, Boroom gàngoori xare yi dafa wax ne: Maa ngi nii di wàcceel Yuda ak képp ku dëkke Yerusalem mboolem musiba mu ma leen tuddaloon. Ndax damaa wax ak ñoom te dégluwnu; ma woo leen, wuyuwñu.»

<sup>18</sup> Ba loolu amee Yeremi ne Rekabeen ña: «Aji Sax ji Yàllay Israyil Boroom gàngoori xare yi dafa wax ne: Gannaaw wormaal ngeen seen kàddug maam Yonadab, topp santaaneem yépp, ba jëfe lépp lu mu leen santoon, <sup>19</sup> loolu tax na Aji Sax ji Yàllay Israyil Boroom gàngoori xare yi wax ne: “Askanu Yonadab doomu Rekab du ñakk mukku ku góor ku may liggéeyal ba fàww.”»

## 36

### *Yowakim def na musibaam*

<sup>1</sup> Ba loolu wéyee, ci ñeenteelu atu nguurug buurub Yuda Yowakim doomu Yosya, kàddu gii dikkal na Yeremi, bàyyikoo ci Aji Sax ji, ne ko: <sup>2</sup> «Jëlal taxañu bindukaay\*, nga bind ci mboolem kàddu yi ma la wax ci mbirum Israyil ak Yuda ak mboolem xeet yi, te nga dale ko ba ma waxeek yaw ca jamonoy Yosya ba bésuub tey jii. <sup>3</sup> Jombul waa kër Yuda dégg mboolem musiba mi ma leen nara teg, ba tax ku ne ci ñoom dëpp yoonam wu bon, ngir ma baal leen seen ñaawtéef ak seen moy.»

<sup>4</sup> Yeremi woo Barug doomu Nerya, dégtal ko mboolem kàddu yi ko Aji Sax ji wax, mu bind ko ci ab taxañu bindukaay. <sup>5</sup> Yeremi nag wax Barug, ne ko: «Man damaa am ngànt. Duma mana dem kër Aji Sax ja. <sup>6</sup> Demal yaw bésuub koor, nga jàng taxañ, bi nga bind kàdduy Aji Sax, ji ma la dégtal, ña ca kër Aji Sax ji di dégg.

Nanga ko jàng itam ci kanam mboolem Yudeen ña jóge seeni dëkk. <sup>7</sup> Jombul ñu tinu Aji Sax ji, ku nekk ci ñoom dëpp yoonu mbonam, ndax mer mu réy ak xadar ji Aji Sax ji tuddal askan wii kat, nar naa metti.»

<sup>8</sup> Barug doomu Nerya def mboolem la ko Yonent Yàlla Yeremi sant, daldi jàng ca kër Aji Sax ji taxañ ba ñu bind kàdduy Aji Sax ji. <sup>9</sup> Loolu yemook juróomeelu atu nguurug buurub Yuda, Yowakim doomu Yosya ca juróom ñeenteelu weer wa. Fekk ñu yéene koor fi kanam Aji Sax ji, ñeel waa Yerusalem gépp ak mboolem ña jóge dëkki Yuda. <sup>10</sup> Ci biir loolu Barug tollu ca néegu bindkat ba, Gemarya doomu Safan, ca kër Aji Sax ja. Muy jàng taxañ ba ñu bind kàdduy Aji Sax ji, mbooloo mépp di dégg. Néeg baa nga woon ca èttu kër Aji Sax ja ca kaw, fa féeteek bunt bu Bees ba. <sup>11</sup> Mise doomu Gemarya doomu Safan dégg mboolem kàdduy Aji Sax, ja ca taxañ ba. <sup>12</sup> Mu daldi wàcc, ba ca kër buur, jàll ca néegu bindkat ba, fekk fa kàngam yépp toog: Elisama bindkat ba, ak Delaya doomu Semaya, ak Elnatan doomu Agbor, ak Gemarya doomu Safan, ak Cedesyas doomu Anaña, ak jawriñ ña ca des ñépp. <sup>13</sup> Mise yegge leen lépp la mu dégg Barug jàng ko ca taxañ ba ca kanam mbooloo ma.

<sup>14</sup> Ci kaw loolu kàngam yépp yebal Yewudi doomu Netaña doomu Selemya doomu Kusi. Ñu ne ko: «Demal ne Barug taxañ bi mu jàngal mbooloo mi, na ko jël te ñew, indaale ko.» Barug doomu Nerya ñàbb taxañ ba ca loxoom, dem ba ca ñoom. <sup>15</sup> Ñu ne ko: «Toogal jàngal nu ko, nu dégg.» Barug jàngal leen ko, ñu dégg. <sup>16</sup> Ba ñu déggee kàddu ya yépp, dañoo tiit, ku ne xool sa moroom. Ñu ne Barug: «Nun kat, nan yegge Buur mbir mii mépp.» <sup>17</sup> Ñu laaj Barug, ne ko: «Wax nu! Noo binde kàddu yii yépp. Yeremie la ko dégtal?» <sup>18</sup> Barug ne leen: «Moo ma dégtal kàddu yépp de, ma binde ko daa ci taxañ bi.» <sup>19</sup> Kàngam ya ne Barug:

\* **36:2** 36.2 taxañu bindukaay ay dogiti der yu bare yu ñu ñawante lay doon, ba mu doon deru bindukaay bu mag bu ñuy taxañ ci bant. Mbind mi nag def ay dog yu dékkarloo.

«Demal làquji yaak Yeremi, te bu kenn xam fu ngeen ne!»

<sup>20</sup> Ba loolu amee ñu wacc taxañ ba ca néeg Elisama bindkat ba, daldi ànd fekki Buur ca èttam. Ñu yegge ko mbir ma mépp.

<sup>21</sup> Buur nag yebal Yewudi, ngir mu jëli taxañ ba. Mu jëleji ko ca néeg Elisama bindkat ba, daldi jàngal taxañ ba Buur, mook mboolem kàngam ya feggook moom. <sup>22</sup> Booba jamonoy sedd la woon, yemook juróom ñeenteelu weer wa. Buur a nga toog ca biir néegu njaaram; taal ba yànj, janook moom. <sup>23</sup> Ci biir loolu saa yu Yewudi jàngee ñetti dog ba ñeent, Buur fab saatus bindkat, dagg dog ya, sànni ca taal ba. Mu di ko def ba taxañ ba lakk ca taal ba, ba jeex tàkk. <sup>24</sup> Buur ak jawriñam ña ñépp dégg nañu kàddu ya, waaye tiituñu sax, astamaak di xotti seeni yére ni kuy tiislu di def. <sup>25</sup> Elnatan ak Delaya ak Gemarya sax tinu nañu Buur, ngir mu baña lakk taxañ ba. Waaye Buur dégluw leen, <sup>26</sup> xanaa mu sant Yerameel, kenn ci askanu Buur, mook Seraya doomu Asriyel, ak Selemya doomu Abdel, ne leen ñu jàpp Barug bindkat ba ak Yonent Yàlla Yeremi. Teewul Aji Sax ji làq leen.

<sup>27</sup> Gannaaw ba Buur lakkee taxañ, ba def kàddu ya Barug bindoon ca dégtalub Yeremi, kàddug Aji Sax ji dikkal na Yeremi, ne ko: <sup>28</sup> «Dellul jël beneen taxañu bindukaay, nga dellu bind ca mboolem kàddu ya woon ca taxañ ba Yowakim buurub Yuda lakk. <sup>29</sup> Yowakim buurub Yuda nag, nanga ko wax ne ko: “Aji Sax ji dafa wax ne yaw yaa lakk taxañ bii, naan lu waral ma bind ci ne buuru Babilon dina ñëw moos te dina tas réew mii, faagaagal fi nit ak mala. <sup>30</sup> Moo tax Aji Sax ji wax ci mbirum Yowakim buurub Yuda, ne: du am ku ko toogal ci jalub Daawuda. Néewam dees koy sànni ci biti, mu yendoo naaj, fanaanoo sedd. <sup>31</sup> Maa koy yen aña ñaawtéefam, mook njabootam aki surgaam. Maay wàcce ci seen kaw, ñook waa Yerusalem ak Yuda gépp, mboolem musiba mu ma leen digoon, te taxul ñu dégg.»»

<sup>32</sup> Ci kaw loolu Yeremi jël beneen taxañu bindukaay, jox ko bindkat ba, Barug doomu Nerya. Mu dégtal ko, mu bind ca mboolem kàdduy taxañ, ba Yowakim buurub Yuda lakkoon ca taal ba. Yeneen kàddu yu bare yu ni mel sax, dolliku na ca.

## 37

### *Cedesyas sàkku na ndimbal*

<sup>1</sup> Cedesyas doomu Yosya, ja Nabukodonosor faloon buur ci réewum Yuda moo wuutu Kooña\* doomu Yowakim. <sup>2</sup> Waaye muy Cedesyas, muy jawriñam ñi, muy waa réew mi, kenn dégluwu ci kàdduy Aji Sax ji mu wax, Yonent Yàlla Yeremi jottli.

<sup>3</sup> Mu am bés Buur Cedesyas woo Yukal doomu Selemya, ak Cefaña sarxalkat bi, doomu Maaseya. Mu yebal leen ci Yonent Yàlla Yeremi; ñu ne ko: «Rikk ñaanal nu ci sunu Yàlla Aji Sax ji.»

<sup>4</sup> Booba Yeremee nga doon dem ak a dikk nu mu ko neexe, kenn tējagu ko woon kaso. <sup>5</sup> Mu fekk mbooloom Firawna génn Misra, di ñëw. Waa Babilon ña gawoon Yerusalem dégg ca, ba jóge fa, dellu gannaaw.

<sup>6</sup> Ba loolu amee kàddug Aji Sax ji dikkal Yonent Yàlla Yeremi, ne ko: <sup>7</sup> «Aji Sax ji Yállay Israyil dafa wax ne: Buuru Yuda mi leen yebal, ngeen seetsi ma, waxleen ko ne ko: “Mbooloom Firawna mi génnoon di leen wallusi kat, dépp na bay dellu Misra. <sup>8</sup> Waa Babilon dinañu délsi, song dëkk bii xare, nangu ko, lakk ko ba mu jeex.” <sup>9</sup> Aji Sax ji nag dafa wax ne: Buleen nax seen bopp naan: “Dem, ba nu, la waa Babilon di def.” Ndax duñu dem. <sup>10</sup> Bu ngeen fàddoon mbooloom xarem Babilon miy xareek yeen ñépp it, ba deslewuñu lu moy nit ñu ñu jamat, ñooñooy jógandoo taxaw ca seeni xayma, daldi lakk dëkk bii.»

<sup>11</sup> Gannaaw ba mbooloom xarem Babilon jógee Yerusalem, di daw mbooloom Firawna, <sup>12</sup> Yeremi bàyyikoo dëkk ba, jëm diiwaanu Beñamin cay bokkam ngir jëli céram ci ab séddaleb suuf. <sup>13</sup> Ba mu demee ba tollook buntu Beñamin, daje faak njiitu dag ya, Irya doomu Selemya

\* **37:1** 37.1 Kooña mooy Yowakin, di Yekoña ba tey.

doomu Anaña. Irya taxawal Yonent Yàlla Yeremi, ne ko: «Áa, waa Babilon nga daw jëm!» <sup>14</sup> Yeremi ne ko: «Fen nga! Man du maay fekki waa Babilon!» Irya dégluwu ko, xanaa jàpp ko, yóbbu ca kàngami buur ya, <sup>15</sup> seen xol tàng ci Yeremi, ñu dóor ko ba noppi, tëj ko ca biir kër Yonatan bindkat ba, fa ñu defoon kaso.

<sup>16</sup> Gannaaw ba ñu dencee Yeremi ca kaso bu xóot ba, ca biir kàmb ga, ba mu toog fa ay fani fan, <sup>17</sup> Buur Cedesyas yónnee, woolu ko. Mu ñaarook moom ca biir kërám, laaj ko, ne ko: «Mbaa am nga kàddu gu bawoo ci Aji Sax ji?» Yeremi ne ko: «Xanaa lii: “Ci loxol buuru Babilon lees lay teg.”» <sup>18</sup> Yeremi teg ca ne Buur Cedesyas: «Ana fu ma la tooñe, yaak say surga, mbaa askan wii, ba nga tëj ma kaso? <sup>19</sup> Te sa yonent yi la doon jottli waxyu, naan la buuru Babilon du dikk ci seen kaw, yaak waa réew mii, ana ñu léegi? <sup>20</sup> Léegi nag Buur sang bi, dama lay ñaan ngalla, bul ma delloo kër Yonatan bindkat bi, ma di fa dee.»

<sup>21</sup> Ba loolu amee Buur Cedesyas san-taane ñu teg Yeremi ca biir èttu dag ya. Ñu di ko jox bés bu ne menn mburum lëmm mu jóge ca mbeddu Lakk-kati mburu ya, ba keroog mburu di ñàkk ca dëkk ba. Yeremi nag toog ca èttu kër dag ya.

## 38

### *Tàbbal nañu Yeremi ca kàmb ga*

<sup>1</sup> Mu am bés Sefatiya doomu Matan ànd ak Gedalya doomu Pasur ak Yukal doomu Selemya ak Pasur doomu Malkiya. Ñu dégg Yermiy wax, ñépp di dégg, naan: <sup>2</sup> «Aji Sax ji dafa wax ne: “Ku des ci biir dëkk bii, saamar rey ko, mbaa xiif, mbaa mbas. Waaye ku génn fekki waa Babilon, dina raw, bakkanam di ngañaayu xareem, mu mucc.” <sup>3</sup> Aji Sax ji dafa wax ne: “Dees na teg moos dëkk bii ci loxol mbooloom buuru Babilon, mu nangu ko.”»

<sup>4</sup> Kàngami buur yooyu dem ne Buur: «Waa jii, na dee rekk; mu ngi yoqil xarekat yi des ci dëkk bi, di yoqil ñépp

ndax waxam jii mu leen di wax. Waa jii kat wutul jàmmu askan wii, xanaa musiba.» <sup>5</sup> Buur Cedesyas ne leen: «Mu ngoog ci seen loxo, manaluma leen dara!» <sup>6</sup> Ñu jàpp Yeremi, ngir denci ko ca kàmbug Malkiya, kenn ci askanu buur, ca biir èttu dag ya. Ñu yoore ko buum, ba ca biir, te kàmb ga amul ndox, bàq rekk a fa nekk. Yeremi nag tàbbi ca biir bàq ba.

<sup>7</sup> Ci biir loolu Ebedd Meleg, Kuuseen ba, di bèkk-néeg ci biir kër buur, dégg ne tàbbal nañu Yeremi ca kàmb ga. Fekk Buur a nga toog ca bunt ba ñu dippee Beñamin. <sup>8</sup> Ebedd Meleg jóge kër buur, dikk ne ko: <sup>9</sup> «Buur sang bi, nit ñi de, lu bon lañu def Yonent Yàlla Yeremi; tàbbal nañu ko ca kàmb ga. Dina fa dee ak xiif ndax ab dund amatul ci dëkk bi.» <sup>10</sup> Buur sant Ebedd Meleg Kuuseen ba, ne ko: «Jëleel fii fanweeri nit, nga dem génne Yonent Yàlla Yeremi kàmb ga bala moo dee.» <sup>11</sup> Ebedd Meleg jël nit ña, daldi dem biir kër buur, jàll ba ca suufu néegu denc ya. Mu jële fa yére yu ràpp aki sagar, boole lépp, yoore buum ca kàmb ga, jottli ko Yeremi. <sup>12</sup> Ebedd Meleg ne Yeremi: «Ayca, booleel sagar yi, nga jiital ko ci say poqtaan, teg ci buum yi.» Yeremi def noonu. <sup>13</sup> Ñu xëcc buum yi, génne Yeremi kàmb ga. Gannaaw loolu Yeremi des ca biir èttu dag ya.

<sup>14</sup> Ba loolu wéyee Buur Cedesyas yónnee, woolu Yonent Yàlla Yeremi, ñaarook moom fa ñetteelu bunt ba ca kër Aji Sax ja. Mu ne Yeremi: «Dama lay laaj lenn. Bu ma nëbb dara.» <sup>15</sup> Yeremi ne Cedesyas: «Su ma la waxee li am, du danga may rey rekk? Te su ma la digalee it, doo ma déggal.» <sup>16</sup> Buur Cedesyas déey Yeremi, ne ko: «Giñ naa ci Aji Sax jiy dund te sàkkal nu bakkan, дума la rey te дума la teg ci loxoy ñii di wut sa bakkan.»

<sup>17</sup> Yeremi ne Cedesyas: «Aji Sax ji, Yàllay Israyil, Boroom gàngoor yi dafa wax ne: Soo nangoo génn rekk, jébbali sa bopp kàngami buuru Babilon déy, dinga rawale sa bakkan, te dëkk bii du lakk ba jeex. Dinga dund yaw, yaak sa waa kër. <sup>18</sup> Waaye soo jébbalul sa bopp kàngami buuru Babilon, dees na teg dëkk bi ci

loxoy waa Babilon, ñu lakk ko ba mu jeex, te yaw doo leen rëcc.»<sup>19</sup> Buur Cedesyas ne Yeremi: «Man, ñi ma ragal mooy sunu bokki Yudeen ñi ñibbil waa Babilon; bu ñu ma tegee ci seen loxo, ñu torxal ma.»<sup>20</sup> Yeremi ne ko: «Deesu la leen jox. Dangay déggal Aji Sax ji ci li ma la wax rekk, muy sa jàmm, nga mucc.»<sup>21</sup> Waaye soo lànkee, ne doo génn, mbir a ngii mu ma Aji Sax ji won.<sup>22</sup> Gisuma lu moy mboolem jigéen ñi des ci kër buurub Yuda, ña nga ñu jème ca kàngami buuru Babilon. Ña nga naan: «Buur aka baaxi xarit! Ñoom ñi ko nax, ba man ko, mu tàbbi ca bàq ba, ñu dëddu, ne mes!»

<sup>23</sup> Mboolem say soxnaak say doom, dees leen di yóbbu ca waa Babilon, te yaw ci sa bopp doo leen rëcc. Buuru Babilon da lay jàpp, te dëkk bii day lakk ba jeex.

<sup>24</sup> Cedesyas ne Yeremi: «Bu kenn dégg nag lii nu wax. Lu ko moy dinga dee.<sup>25</sup> Su sama kàngam yi yégee ne wax naak yaw, ba dikk ne la nga nettali leen li nu waxante te bañ leena nëbb dara, lu ko moy ñu rey la,<sup>26</sup> ne leen rekk danga ma doon tinu, ndax ma bañ laa delloo kër Yonatan, nga di fa dee.»

<sup>27</sup> Ba loolu amee kàngami buur yépp dikk, laaj Yeremi, mu wax leen la ko Buur digal. Ñu daldi noppi, ba ko; ndax kenn déggul woon la mu wax ak Buur.<sup>28</sup> Yeremi nag des ca èttu dag ya, ba keroog bés ba ñu nangoo Yerusalem.

### *Babilon nangu na Yerusalem.*

Ba ñuy nangu Yerusalem nag, nii la deme woon.

## 39

<sup>1</sup> Ba Cedesyas tolloo ci juróom ñeenteelu atu nguuram, ca fukkeelu weeram, ca la Nabukodonosor buuru Babilon ànd ak mboolum xareem mépp ci kaw Yerusalem, ñu gaw ko.<sup>2</sup> Ba Cedesyas tolloo ci fukkeelu atu nguuram ak benn, juróom ñeenti fan ca ñeenteelu weeram, ca lañu bëtt dëkk ba.<sup>3</sup> Mboolem kàngami buuru Babilon daldi dikk toog ca buntu dëkk, ba ca digg ba. Nergal Sareser a nga ca ak Samgar Nebo ak Sar

Sekim njiitu bëkk-néegi buur ak Nergal Sareser meneen ma, njiitu gisaanekat yi, ñook mboolem kàngami buuru Babilon ña ca des.

<sup>4</sup> Naka la leen Cedesyas buurub Yuda gis, mook xarekatam ya yépp, ñu daldi daw, génn dëkk ba guddi, jaare toolu buur, fëlle bunt bu nekk ca diggante ñaari tata ya, wuti jooru Araba.<sup>5</sup> Mboolum Babilon dàq leen, ba dab Cedesyas ca jooru Yeriko. Ñu jàpp ko, indil ko Nabukodonosor buuru Babilon ca dëkk ba ñuy wax Ribla, ca réewum Amat. Nabukodonosor dogal fa àtteem.<sup>6</sup> Buuru Babilon daa rendi doomi Cedesyas yu góor ca Ribla, muy gis, mu rendiwaale mboolem kàngami Yuda.<sup>7</sup> Gannaaw loolu mu tuur bëti Cedesyas, jéngé ko jéngi xàñar, yóbbu ko Babilon.<sup>8</sup> Kër Buur ak kəri waa dëkk ba nag, waa Babilon lakk leen, miiri Yerusalem, ñu màbb.<sup>9</sup> Nebusaradan njiitu dag ya moom, daa boole ña desoon ca biir dëkk ba, ak ña ko jébbaloon seen bopp, ak ña desoon ca askan wa, jàpp leen, yóbbu ngàllo ca Babilon.<sup>10</sup> Ba mu ko defee lenn ci baadoolo yi amul dara, mu wacc leen ca réewum Yuda. Booba la leen jox ay toókəri reseñ aki tool.

### *Yàlla yiwi na ñaari jaamam*

<sup>11</sup> Ci biir loolu Nabukodonosor buuru Babilon jox ndigal Nebusaradan njiitu dag ya ci mbirum Yeremi. Mu ne ko:<sup>12</sup> «Demal jéli Yeremi, nga sàmm ko, te bu ko def dara lu metti. Lu mu la ñaan it, defal ko ko.»<sup>13</sup> Ba loolu amee Nebusaradan njiitu dag ya déggoo caak Nebukasban njiitu bëkk-néegi buur ak Nergal Sareser njiitu gisaanekat yi, ak yeneen jawriñi buuru Babilon ña,<sup>14</sup> ñu yónnee, jéli Yeremi ca èttu dag ya, teg ko ci loxol Gedalya doomu Ayikam doomu Safan, ngir Gedalya yóbbu ko kër ga. Yeremi nag des Yuda ca biiri bokkam.

<sup>15</sup> Fekk na kàddug Aji Sax ji dikkal Yeremi ba ñu ko tëjee ca èttu dag ya, ne ko:<sup>16</sup> «Demal nga wax Ebedd Meleg, Kuuseen ba, ne ko: “Aji Sax ji Yàllay Israyil Boroom gàngoor yi dafa wax ne: Maa ngi nii di sottalsi sama kàddu yi jëm ci dëkk bii, muy ayam te du doon jàmmam.

Dina am ngay gis, bésuh keroog. <sup>17</sup> Bésuh keroog maa lay xettli,” kàddug Aji Sax jee, “ba deesu la teg ci loxol nit ñi nga ragal. <sup>18</sup> Maa lay wallu bu baax déy, ba saamar du la daaneel muk, waaye dinga moom sa bakkan, muy sa yoolu xare, ndaxte wóolu nga ma.”» Kàddug Aji Sax jee.

## 40

### *Yuda daje na ca Gedalya*

<sup>1</sup> Ci kaw loolu Yeremi jot na kàddu gu bàyyikoo ci Aji Sax ji, gannaaw ba ko Nebusaradan njiitu dag ya yiwee, mu bàyyikoo Raama. Yeremee nga ñu jéngoon, mook ngàllog Yerusalem gaak Yuda ga jëm Babilon. Nebusaradan génnee Yeremi ca seen biir, <sup>2</sup> ñaarook moom, ne ko: «Sa Yàlla Aji Sax ji moo tud-daloon bérab bii musiba mii. <sup>3</sup> Aji Sax ji nag indi na ko te def na ko, na mu ko waxe woon. Yeena moy Aji Sax ji, déggaluleen ko ba tax lii dal leen. <sup>4</sup> Léegi nag yiwi naa la bés niki tey. Soo béggee ànd ak man Babilon, ñéwal, dinaa la topptoo. Soo buggul, toogal. Réew mépp a ngii ci sa kanam. Fu la ci neex ak foo ci taamu, dem fa.» <sup>5</sup> Balaa Yeremee walbatiku, Nebusaradan teg ca ne ko: «Man ngaa dellu ca Gedalya doomu Ayikam doomu Safan ba tey. Moom la buuru Babilon dénk dèkki Yuda. Man ngaa toog ak moom ci digg waa réew mi, mbaa nga dem daal fu la gènal.» Nebusaradan nag jox Yeremi yóbbal ak lu mu lekk ci yoon wi, daldi ko yiwi. <sup>6</sup> Ba mu ko defee Yeremi dem ca Gedalya doomu Ayikam ca Mispa. Mu toog ca moom ca digg nit ña des ca réew ma.

<sup>7</sup> Fekk am na mboolooy Yudeen ñu desoon ci àll bi. Seeni njiit yépp nag dégg, ñook ña ñu àndal, ne buuru Babilon dénk na Gedalya doomu Ayikam réew mi, dénk ko ñenn ci baadoolo yi des Yuda, diy góor aki jigéen aki gone yu ñu yóbbuwul ngàllo ca Babilon. <sup>8</sup> Ñu bokk dikk ba Mispa ca Gedalya; Ismayil doomu Netaña ma nga ca woon, ak Yowanan ak Yonatan, ñaari doomi Kareya, ak Seraya doomu Tanumet, ak doomi Efayi ma bokk Netofa, ak Yesaña ma bokk Maaka, ñook seeni nit.

<sup>9</sup> Gedalya waatal leen, ñook seeni nit, ngir dalal seen xel, teg ca ne leen: «Buleen ragala nangul waa Babilon. Toogleen ci réew mi rekk te nangul buuru Babilon, muy seen jàmm. <sup>10</sup> Man nag maa ngii toog Mispa, di leen taxawal fi kanam waa Babilon, bu ñu fi dikkee; yeen dajaleleen seen biiñ ak seen meñneef ak seen diwu oliw, ngeen denc ko te dèkke seen dèkk yi ngeen teg loxo.»

<sup>11</sup> Ci kaw loolu Yudeen ña woon ca Mowabeen ñaak Amoneen ñaak Edomeen ñaak mboolem réew ya, ñoom ñépp dégg ne buuru Babilon wacc na lenn ca askan wa, ñu des réewum Yuda, mu dénk leen Gedalya. <sup>12</sup> Yudeen ña ñépp walbatikoo mboolem fu ñu leen sànni woon, daldi délsi réewum Yuda, fekksi Gedalya ca Mispa. Ba loolu amee ñu dajale biiñ ak tândarma ak figg, ba mu bare lool, ne gànñ.

<sup>13</sup> Mu am bés Yowanan doomu Kareya ànd ak mboolem njiiti mbooloo ya des ca àll ba. Ñu dikk ca Gedalya ca Mispa, <sup>14</sup> ne ko: «Xanaa yéguloo ne Baalis buurub Amon yebal na Ismayil doomu Netaña, ngir mu rey la?» Gedalya nag gèmu leen. <sup>15</sup> Ba loolu amee Yowanan doomu Kareya déey Gedalya, ne ko: «Tee maa dem, rey Ismayil doomu Netaña fu kenn yégul? Xanaa deesu ko wacc mu rey la, Yudeen ñi daje woon fi yaw yépp di tasaaroo, ndesu Yuda sànk?» <sup>16</sup> Gedalya ne Yowanan: «Bul def loolu! Li ngay waxal Ismayil ay fen la!»

## 41

### *Ismayil bóom na ñu bare*

<sup>1</sup> Ba ñu demee ba ca juróom ñaareelu weer wa ca at mooma, Ismayil doomu Netaña doomu Elisama, askanoo ci ñi moom Yuda te di njiitu jawriñi buur, ànd ak fukki nit ba ca Gedalya doomu Ayikam ca Mispa. Ci kaw loolu, ñu bokk di lekk ca kër Gedalya. <sup>2</sup> Ismayil jekki jóg, mook fukki nit ña mu àndal. Ñu jam saamar Gedalya ma buuru Babilon dénkoon réew ma, ba rey ko. <sup>3</sup> Ismayil reyaale mboolem Yudeen ña nekkoon ak Gedalya ca Mispa ak xarekati Babilon ya fa nekkoon.

<sup>4</sup> Ba ñu bóomee Gedalya ba ca ëllëg sa, fu kenn yéguul, <sup>5</sup> mu am juróom ñett fukki nit ñu bàyyikoo Sikem ak Silo ak Samari. Ña nga wat seen sikkim, xotti seeni yére, dagg-daggee seen yaram, di ko ñaawloo. Ñu ñàbb saraxu pepp ak cuuraay bu ñu indil kër Aji Sax. <sup>6</sup> Ismayil génne buntu Mispá, gatanduji leen. Ma ngay dox, jëm ca ñoom, di jooy-jooylu ba dajeek ñoom, ne leen: «Agsileen kër Gedalya doomu Ayikam!»

<sup>7</sup> Naka lañu dikk ba ca biir dëkk ba, Ismayil ak ay nitam bóom leen, tàbbal néew ya ci kàmb. <sup>8</sup> Fekk na mu am fukki nit ñu bokk ci ñoom ñu ne woon Ismayil: «Tee nga noo baña rey? Nun de am nanub denc ci àll bi. Peppu belee nga ca ak lors ak diw ak lem.» Loolu tax Ismayil fomm, ba boolewu leen ak seeni bokk, rey. <sup>9</sup> Kàmb ga Ismayil sànni néewi nit ña mu reyaaleek Gedalya mooy kàmb ga Buur Asa mu Yuda gasoon ba ko Buur Basa mu Israyil songee xare. Moom la Ismayil doomu Netaña feesal aki néew.

<sup>10</sup> Gannaaw loolu mu jàpp mboolem ña des Mispá, di doomi buur yu jigéen ak mboolem ña des Mispá, te Nebusaradan, njiital dag ya, dénkoon leen Gedalya. Ismayil jàpp leen njaam, daldi wutali diiwaanu Amoneen ña.

<sup>11</sup> Ba loolu amee Yowanan doomu Kareya ak njiiti xare yi mu àndal yépp dégg musiba mi Ismayil doomu Netaña def mépp. <sup>12</sup> Ñu ànd ak seeni nit, topp ko ngir xareek moom, ba dab ko ca déeg bu mag ba ca Gabawon. <sup>13</sup> Ba nit ña Ismayil jàppe Mispá gisee Yowanan ak mboolem njiiti xare ya mu àndal, dañoo bég. <sup>14</sup> Ñoom ñépp walbatiku, daw fekki Yowanan doomu Kareya. <sup>15</sup> Teewul Ismayil doomu Netaña ak juróom ñetti nitam récc Yowanan, daw làquji réewum Amon. <sup>16</sup> Yowanan doomu Kareya ak mboolem njiiti xare yi mu àndal nag boole mboolem la des ca mbooloo, ma Yonatan xettli woon ca Ismayil doomu Nataña ca Mispá, gannaaw ba Ismayil bóomee Gedalya doomu Ayikam. Ay nit ñu Yowanan jële woon Gabawon a nga ca, diy góor: ay xarekat ak bëkk-néegi buur,

aki jigéen aki gone. <sup>17</sup> Ñu dem ba dali ca dalukaayu Kimyam, ca wetu Betleyem, di waaj yoonu Misra, <sup>18</sup> ngir récc waa Babilon ñi ñu ragaloon, ndax la Ismayil doomu Netaña bóom Gedalya doomu Ayikam, ma buuru Babilon dénkoon réew ma.

## 42

### *Toogaani Misra gënul*

<sup>1</sup> Gannaaw loolu njiiti xare yépp jóg, ñu ràññee ca Yowanan doomu Kareya ak Yesaña doomu Osaya. Ñu ànd ak askan wa wépp, dikk, ka gëna tuut ba ca ka gën di mag. <sup>2</sup> Ñu ne Yonent Yàlla Yeremi: «Ngalla danu lay dagaan, nga ñaanal nu ngir ndesu askan wii ci sa Yàlla Aji Sax ji. Bare woon nanu, waaye gis nga lu néew li des ci nun. <sup>3</sup> Ñaanal nu ngir sa Yàlla Aji Sax ji xamal nu fan lanu wara jaare, ak lan lanu wara def.» <sup>4</sup> Yonent Yàlla Yeremi ne leen: «Baax na. Maa ngii di leen ñaanal seen Yàlla Aji Sax ji ni ngeen ko waxe. Lu leen Aji Sax ji tontu, dinaa leen ko yegge. Duma ci wacc baat.» <sup>5</sup> Ñoom it ñu ne Yeremi: «Mboolem kàddu gu la sa Yàlla Aji Sax ji yóbbante ci nun, bu nu ko deful, yal na Aji Sax ji doon seede bu wér, bu dëggu bi nuy seedeel ag tooñ. <sup>6</sup> Mu neex, mu naqari, sunu Yàlla Aji Sax, ji nu la yebal lanuy déggal, ngir su nu déggalee sunu Yàlla Aji Sax ji, dinanu baaxle.»

<sup>7</sup> Ñu teg ca fukki fan, kàddug Aji Sax ji dikkal Yeremi. <sup>8</sup> Yeremi woo Yowanan doomu Kareya ak njiiti xare yi mu àndal yépp, woo mbooloo mépp, ñu dikk, ka gëna tuut ba ca ka gën di mag. <sup>9</sup> Yeremi ne leen: «Aji Sax ji Yàllay Israyil ji ngeen ma yóbbante seen dagaan, dafa wax ne: <sup>10</sup> Su ngeen nangoo toog ba toog ci réew mii, maa leen di defar te duma leen daaneel. Maa leen di jëmbat te duma leen buddat. Ndax ñeewante naa leen ci musiba mi ma leen teg. <sup>11</sup> Buuru Babilon mii ngeen ragal, buleen ko ragal!» Kàddug Aji Sax jee. «Buleen ko ragal, ndax yeen laa àndal ngir wallu leen, xettli leen ci moom. <sup>12</sup> Maa leen di yërëm ngir mu yërëm leen, delloo leen ca seen suuf.



<sup>13</sup> «Waaye su ngeen bañee déggal seen Yàlla Aji Sax ji, naan: “Dunu toog ci réew mii, <sup>14</sup> xanaa nu dem réewum Misra, fa nu dul gise xare; coowal liitu xare sax dunu ko dégg. Dugub it dunu ko fa ñàkke. Foofa lanuy dëkki;” <sup>15</sup> su boobaa nag dégluleen li ci Aji Sax ji wax, yeen ndesu Yuda. Aji Sax ji Yàllay Israyil Boroom gàngoor yi dafa wax ne:

“Su ngeen dogoo ba dogu,

nara dem Misra,

ba dem toogaani fa,

<sup>16</sup> saamar ba ngeen ragal

moo leen di dabe réewum Misra,

xiif bi ngeen di xalaat

topp leen fa Misra,

te fa ngeen di deeyi.

<sup>17</sup> Képp ku dogu woona dem Misra,

ngir toogaani fa,

saamar lay deeye mbaa xiif mbaa mbas.

Du kuy mucc mbaa mu récc

musiba mi ma leen naral.”

<sup>18</sup> «Aji Sax ji Yàllay Israyil Boroom gàngoor yi déy dafa wax ne: “Bu ngeen demee Misra, ni sama mer ak sama xadar yurikoo woon fi kaw waa Yerusalem, ni la sama xadar naan yureet fi seen kaw. Dingen doon gentu alkànde, ñu di leen móolook a sewal, te dungen gisati miim réew.”»

<sup>19</sup> Yeremi teg ca ne: «Yeen ndesu Yuda, Aji Sax ji wax na leen ne leen: “Buleen dem Misra.” Nangeen xam xéll nag ne àrtu naa leen bésub tey. <sup>20</sup> Yeena sànk seen bopp ba ngeen ma yebalee ci seen Yàlla Aji Sax ji, ne ma ma ñaanal leen sunu Yàlla Aji Sax ji, te lépp lu sunu Yàlla Aji Sax ji wax, naa leen ko jottli, ngeen def ko. <sup>21</sup> Yegge naa leen tey jii li seen Yàlla Aji Sax ji wax, waaye faalewuleen lenn ci kàddu yi mu ma yóbbante ci yeen. <sup>22</sup> Léegi nag xamleen xéll ne saamar akub xiif ak mbas moo leen di rey ca réew mooma ngeen namma dem, toogaani fa.»

## 43

### *Yóbbu nañu Yeremi Misra*

<sup>1</sup> Gannaaw ba Yeremi waxeek mbooloo mépp, ba sottal mboolem kàddu yooyu ko seen Yàlla Aji Sax ji santoon mu yegge leen ko, <sup>2</sup> Asaryaa doomu Osaya ak

Yowanan doomu Kareya ak nit ñu bew ñooñu ñépp jël kàddu gi. Ñu ne Yeremi: «Dangay fen! Sunu Yàlla Aji Sax ji santu la nga fommloo nu sunu yoonu Misra ga nu bégga toogi. <sup>3</sup> Xanaa Barug doomu Nerya kay moo lay xiirtal ci sunu kaw, ngir teg nu ci loxol waa Babilon, ñu rey nu, mbaa ñu yóbbu nu ngàllo ca Babilon.»

<sup>4</sup> Ci kaw loolu Yowanan doomu Kareya ak yeneen njiiti xare ya yépp ak mbooloo ma mépp gantal Aji Sax ji, baña des réewum Yuda. <sup>5</sup> Ba loolu amee Yowanan ak njiiti xare yépp yóbbu ña desoon ca Yuda ñépp, di mboolem ña ñu jëkkoona sànni ca biir xeet ya leen séq yépp, te ñu ñibbsi woon réewum Yuda, <sup>6</sup> góor ñaak jigéen ñaak gone yaak doomi buur yu jigéen ya. Yóbbu nañu mboolem ña Nebusaradan njiitu dag ya tegoon ci loxol Gedalya doomu Ayikam doomu Safan; ñu yóbbaaale Yonent Yàlla Yeremi ak Barug doomu Nerya. <sup>7</sup> Ñu dikk Misra, baña déggal Aji Sax ji, daldi àgg dëkk ba ñuy wax Tapanes.

<sup>8</sup> Gannaaw loolu kàddug Aji Sax ji dikkal Yeremi ca Tapanes, ne ko: <sup>9</sup> «Jèlal ñaari doj yu mag yooy suuli ca dëru ban ba ca bunt kër Firawna gi ci biir dëkk bi, te na ko waa Yuda fekke. <sup>10</sup> Nga wax leen ne leen: “Aji Sax ji Yàllay Israyil Boroom gàngoor yi dafa wax ne: Maa ngi nii di yónnee, jèli Nabukodonosor buuru Babilon, mi ci samag curga, ba teg ngànguneem ci kaw doj yii ma fi suul, mu firi fi xaymaam. <sup>11</sup> Bu dikkee dina tas réewum Misra: ku wara médd, médd; kuy dugg njaam, duggi njaam; kuy fàddoo saamar, fàddoo saamar. <sup>12</sup> Nabukodonosor dina jafal kër tuuri Misra yi, lakk tuur yi, mbaa mu yóbbu leen. Ni ab sàmm di teeñe mbubbam, ni lay teeñe réewum Misra ba mu set wecc, daldi daagu, dem yoonam. <sup>13</sup> Dina rajaxe tuuri doj ya sampe ca Bet Semes ci biir Misra te dina lakk kèri tuur yi ci Misra.”»

## 44

### *Bokkaale sabab na mbugal*

<sup>1</sup> Gannaaw gi kàddu dikkal na Yeremi, jëm ci mboolem Yudeen ñi sancsi

réewum Misra, te dëkke Migadol ak Tapanes ak Memfis ak diiwaanu Pattros. Mu ne: <sup>2</sup> «Aji Sax ji Yàllay Israyil Boroom gàngoor yi dafa wax ne: Yeena gis mboolem musiba mi ma wàcceel Yerusalem ak dëkki Yuda yépp. Ñu ngi nii tey jii gentel, kenn dëkku ca. <sup>3</sup> Li ko waral di lu bon li ñu def, di ma merloo; di taalal cuuraay ak a jaamu yeneen yàlla yu ñu xamul woon, du ñoom, du seeni maam. <sup>4</sup> Yónnee naa leen ay yooni yoon mboolem yonent yi, sama jaam ñi, ne leen: “Rikk buleen def jéf ju siblu jii ma bañ.” <sup>5</sup> Waaye dégluwñu, teewluwñu, ba dëddu seenug mbon, baña taalal yeneen yàlla cuuraay, <sup>6</sup> ba ma boole sama mer ak sama xadar, yuri, mu jafal dëkki Yudak mbeddi Yerusalem, ba ñu mujj tey jii di gent yu tumurànke.

<sup>7</sup> «Léegi nag, Aji Sax ji Yàllay Israyil Boroom gàngoor yi dafa wax ne: Ana lu jar ngeen di teg seen bopp loraange ju réye nii, ba nar fee dagge réewum Yuda, góor ak jigéen, xale ba ci perantal, ba dungeen dese kenn? <sup>8</sup> Yeena ngi may merloo ndax li ngeen di def, di taalal yeneen yàlla cuuraay fii ci Misra gi ngeen toogaansi. Seen bopp ngeen dagg, sànni te dingeen mujj ñu di leen móolook a sewal ci digg xeeti àddina yépp. <sup>9</sup> Dangeena fàtte seen mbonug maam ya ak mbonu buuri Yudak seen mboni jabar yaak seen mbonu bopp ak seen mbonu jabari bopp ga ñu nekke woon ca réewum Yuda ak mbeddi Yerusalem? <sup>10</sup> Kenn ci yeen réccuwul ba tey jii. Kenn wormaalu ma mbaa mu jéfe sama yoon ak sama dogal yi ma leen tegal, tegal ko seeni maam.

<sup>11</sup> «Moo tax Aji Sax ji Yàllay Israyil Boroom gàngoor yi dafa wax ne: Maa ngii di jàkkaarlook yeen, ngir musibaal leen, ba dagge fi mboolem Yuda. <sup>12</sup> Maay tonni ndesi Yuda gi dogu woon ba dikk réewum Misra, toogaansi fi. Dañuy dee. Ñoom ñépp réewum Misra gii lañuy daano. Saamar akub xiif lañuy fàddoo, ki gëna tuut ba ki gën di mag. Saamar akub xiif lañuy fàddoo, te dinañu gentel gentu alkànde, ñu di leen móolook a sewal. <sup>13</sup> Maay dikkal ñi sancsi réewum Misra ni

ma dikkale Yerusalem, dikkaale saamar akub xiif ak mbas. <sup>14</sup> Du kuy récc mbaa kuy dese bakkan ci ndesu Yuda gi toogaansi fii ci réewum Misra. Te it duñu ñibbi réewum Yuda ga ñu namma ñibbi, lu moy ñu néew.»

<sup>15</sup> Ñu baree nga fa woon, di mboolem ña xamoon ne seeni jabar dañuy taalal cuuraay yeneen yàlla ak mboolem jigéen ña teew. Ñuy mbooloo mu réy, ñépp ña sancsi Misra, ba ca diiwaanu Pattros. Ñu daldi ne Yeremi: <sup>16</sup> «Li nga nuy wax ci turu Aji Sax ji, dunu ko déglu. <sup>17</sup> Nooy def ba defaato mboolem lu nu digoo woon, di taalal cuuraay Lingeeru asamaan, tuur mi, di ko tuural ay naan, na nu ko daan defe naka jekk, nook sunuy maam ak sunuy buur ak sunuy kàngam ci dëkki Yudak mbeddi Yerusalem. Teewul dañu daan doyal dugub, di woomle, te gisunu loraange. <sup>18</sup> Ba nu bàyyee taalal cuuraay Lingeeru asamaan, tuur mi, ak di ko tuural, ca lanu ñàkk lépp, teg ci saamar akub xiif di nu sànk.» <sup>19</sup> Jigéen ña teg ca ne: «Te sax ba nuy taalal cuuraay Lingeeru asamaan, di ko tuural, sunuy jëkkër dañu koo yégul? Xam nañu xéll ne nu ngi defal Lingeeru asamaan ay nàkk yu koy jëmmal, di ko tuural ay naan.»

<sup>20</sup> Ba mu ko defee Yeremi wax ak mboolem góor ñaak jigéen ña ko tontu loolu, ne leen: <sup>21</sup> «Saraxi cuuraay yi ngeen di taal, yeen ak seeni maam ak seeni buur ak seeni kàngam, ak baadoolo yi ci biir dëkki Yudak mbeddi Yerusalem, defe ngeen ne Aji Sax ji yégu ko, am da koo fàtte? <sup>22</sup> Aji Sax ji manatula dékku seen jéf ju bon ak seen jéf ju siblu ji waral seenum réew mel nii mu mel tey, di ndànd-foyfoy bu gentel bu ñuy móoloo, te kenn dëkku ci, <sup>23</sup> ndax yeena def saraxi bokkaale, moy Aji Sax ji, dégluween Aji Sax ji, te it kàddug yoonam ak dogali yoonam ak seedey yoonam, jéfewleen ci lenn. Moo waral musiba mi leen dikkal nii tey.»

<sup>24</sup> Yeremi teg ca wax ak ñépp, rawatina jigéen ña ñépp, ne leen: «Mboolem yeen Yudeen ñi ci réewum Misra, dégluleen kàddug Aji Sax ji. <sup>25</sup> Aji Sax ji Yàllay

Israyil Boroom gàngoor yi dafa wax ne: “Yeen ak seeni jabar yeena wax ci seen làmmiñ, àggalee ko seeni jéf. Ngeen ne dingeen def ba defaato dige yi ngeen digee taalal cuuraay Lingeeru asamaan, tuural koy naan. Dëggal-leena dëggal seeni dige te jëfee jëfe seeni dige. <sup>26</sup> Kon nag, yeen mboolem Yudeen ñi sanc Misra, dégluleen kàddug Aji Sax ji. Maa giñ ci sama tur wu màgg.” Aji Sax jee ko wax. “Ma ne: Sama tur, gémmiñug benn Yudeen dootu ko tudd fi mboolem réewum Misra naan: ‘Giñ naa ko ci Aji Sax jiy dund.’ <sup>27</sup> Maa ngi nii di leen teewloo seen musiba, waaye du seen jàmm laa leen di teewloo. Te mboolem waa Yuda ñi ci réewum Misra dinañu sànkoo saamar akub xiif, ba keroog ñuy jeex tàkk. <sup>28</sup> Ñu néew ay récci saamar, walbatikoo réewum Misra, ñibbi réewum Yuda. Waaye mboolem ndesu Yuda, ga dikkoon toogaansi Misra, dinañu xam kan la kàddoom di sotti, man am ñoom. <sup>29</sup> Te lii nangeen ko def ab takk.” Kàddug Aji Sax jee. “Maa ngii di leen dikke mbugal ci bii bérab, ba ngeen xam ne samay kàddooy sotti ba mat sèkk, di seen lo-raange.” <sup>30</sup> Aji Sax ji dafa wax ne: «Maa ngii di waaja teg Firawna Ofra buuru Misra ci loxol noonam yiy wut bakkanam, na ma tege woon Cedesyas buurub Yuda ci loxol noonam Nabukodonosor buuru Babilon ma doon wut bakkanam.»

## 45

### *Barug mucc na*

<sup>1</sup> Kàddu gii Yeremi waxoon na ko Barug doomu Nerya, gannaaw ba Barug ténkee ci taxañu mbind, kàddu ya ko Yeremi dégtal ca ñeenteelu atu nguurug doomu Yosya, Yowakim buurub Yuda. <sup>2</sup> «Aji Sax ji Yállay Israyil dafa wax ci yaw, Barug. <sup>3</sup> Nga ne: “Wóoy ngalla man! Aji Sax ji yokk na maw naqar. Onk naa ba tàyyi te awma noflaay.” <sup>4</sup> Aji Sax ji da maa sant ma wax la ne la: “Aji Sax ji dafa wax ne: La ma tabaxoon a ngii, maa ngi koy daaneel, la ma jëmbatoon a ngii, maa ngi koy buddat, ba réew mépp daj.

<sup>5</sup> Looy sàkku ku la beral loxo?

Jaru ko!

Maa ngii di wàcceel musiba képp kuy noyyi.”

Kàddug Aji Sax jee!

“Waaye may naa la sa bakkan di sa yoolu xare,

fépp foo jëm.”»

## **Kàddug waxyu dalati na xeet yi**

## 46

*(Saar 46—51)*

<sup>1</sup> Kàddug Aji Sax jii dikkal na Yonent Yàlla Yeremi, jëm ci xeet yi.

### *Lu jëm ci Misra*

<sup>2</sup> Firawna buuru Misra, bi ñuy wax Neko, ba ko Nabukodonosor buuru Babilon di duma, ma nga woon ca Karkemis ca tàkkal dexu Efraat. Mu yemook ñeenteelu atu nguurug doomu Yosya Yowakim buurub Yuda. Kàddug waxyu gii moo jëm ci Misra ci wàllu diggante ba seen mbooloom xare ma tollu woon.

<sup>3</sup> «Ñàbbleen pakkoo pakk te xareji.

<sup>4</sup> Takkleen fas yi, war naari góor yi, ba làng-déraale seen mbaxanay xare, nammaat xeej, sol yérey xare!»

<sup>5</sup> «Ana lu ma gis?

Waa Misraa jaaxle bay dellu gannaaw, seeni jàmbaar falaxoo, ne wëqet, geesuwñu, tiitaange ubale.»

Kàddug Aji Sax jee!

<sup>6</sup> «Bu nit gaaw ba raw mbaa mu jàmbaare ba mucc.

Bëj-gànnar lañu féete, feggook dexu Efraat, di tërëf, di daanu.

<sup>7</sup> «Kii ku mu, muy fuddu ni dexu Niil, di fuur ni wali ndox?

<sup>8</sup> Misraa, mooy fuddu ni dexu Niil, di fuur ni wali ndox.

Mu naan: “Maay fuddu, mëdd àddina, sànk ab dëkk ak ña ca biir.”

<sup>9</sup> Na fas buur, watiir fiddi, jàmbaar sàqi:

waa Kuusoo waa Puut ak seeni pakk,

ak waa Ludd ak seeni xala.  
<sup>10</sup> Waaye bésub keroog déy,  
 Boroom bi Aji Sax ji Boroom gàngoor yee  
 ko moom,  
 muy bésub feyu bu muy feyey noonam.  
 Saamar suur suux,  
 màndee deret.  
 Boroom bi Aji Sax ji Boroom gàngoor yi  
 mooy rendee réewum bëj-gànnàar ab  
 sarax,  
 feggook dexu Efraat.

<sup>11</sup> Yaw Misra mu taaru mi,  
 demal ba Galàdd wuti diw, dàm-poo.  
 Faju, fajooti;  
 dara du la wéral!

<sup>12</sup> Xeet yeey dégg sa toroxte,  
 sa yuux dajal àddina.  
 Jàmbaar téqtaloo jàmbaar,  
 ñu ànd ne fèlèñ!»

<sup>13</sup> Kàddu gii dikkaloon na Yonent Yàlla  
 Yeremi, ba Nabukodonosor buuru Ba-  
 bilon dikkee, di дума waa réewum Misra.  
 Mu ne:

<sup>14</sup> «Yégleel lii Misra, yéene ko fa ca  
 Migadol,  
 yéene ko fa ca Memfis ak Tapanes.  
 Neleen: “Dërleen, taxaw temm!  
 Saamar kat a ngi lekk li leen wër.”

<sup>15</sup> Lu Apis di daw?  
 Lu tee seen yàllay yëkk jooju taxaw?  
 Xanaa Aji Sax jee ko bëmëx!

<sup>16</sup> Moo bëmëx ñu bare,  
 ku nekk naan moroom ma:  
 “Jógal nu dellu ca sunuy bokk,  
 ca sunu réewum cosaan,  
 ba mucc saamaru noon.”

<sup>17</sup> Dees na fa woyal Firawna buuru Misra,  
 naan ko:  
 “Coowal neen te bés wees.”

<sup>18</sup> «Giñ naa ko ci man miy dund,»  
 kàddug Buur Aji Sax jee, Boroom  
 gàngoor yi di turam:  
 «noon ay dikk, mel ni tundu Tabor ci digg  
 tund yi,

mbete tundu Karmel wi feggook géej.

<sup>19</sup> Yaw mi dëkke Misra mu taaru mi,  
 ëmbal sa ëmb, jëm ngàllo;

Memfis\* dëkk bii kat ci gentel la jëm,  
 di ndànd-foffoy lu kenn dëkkul.

<sup>20</sup> Misra daa mel ni jeegu nag bu yànj,

wëñ ne waa, waa, bawoo bëj-gànnàar.

<sup>21</sup> Seen xarekat yi ñu bind sax  
 ñu ngi mel ni sèllu yu yaflu,  
 ñoom it ànd ne wërëñ, wëqet,  
 kenn taxawul!

Bésu safaan a leen dikkal,  
 seen mbugal taxaw,

<sup>22</sup> ñu daw di faraas-faraasiy wéy ni jaan.  
 Doole la noon songe Misra,  
 dikke leeni sémmiñ  
 ni gorkati garab.

<sup>23</sup> Lu gott fatt fatt, ñu gor.»  
 Kàddug Aji Sax jee.

«Ñoo gëna barey njéeréer,  
 ba maneesu leena lim.

<sup>24</sup> Gàcceel nañu Misra mu taaru mi,  
 teg ko ci loxoy xeeti bëj-gànnàar.»

<sup>25</sup> Aji Sax ji Yàllay Israyil, Boroom  
 gàngoori xare yi wax na ne: «Maa ngii  
 di dikke mbugal Amon, tuuru dëkk bii  
 di Teeb, ak Firawnaak waa Misraak seeni  
 tuur ak seeni kàngam, boole ci ñi yaakaar  
 Firawna. <sup>26</sup> Maa leen di teg ci loxoy  
 ñiy wut seen bakkan, di Nabukodonosor  
 buuru Babilon aki jawriñam. Gannaaw  
 loolu dees na dëkkewaata Misra na woon.»  
 Kàddug Aji Sax jee!

### *Israyil dina xettliku*

<sup>27</sup> «Yaw Yanqóoba sama jaam bi nag, bul  
 tiit;

yaw Israyil, ma ne bul ragal.

Maa ngii di la wallusi,

jële la fu sore,

jële sa askan

fa seen réewu njaam ga,

Yanqóoba délsi,

dal, aaru, du tiitati.

<sup>28</sup> Yaw Yanqóoba sama jaam bi, bul tiit.»

Kàddug Aji Sax jee.

«Yaw laa àndal.

Maay fàkkas mboolem xeet yi ma leen  
 sànni woon,

waaye yeen, дума leen fàkkas.

Duma leen ñàkka дума moos,

waaye dinaa leen yar lu yem.»

## 47

### *Lu jëm ci Filisteen ñi*

\* **46:19** 46.19 Memfis: Fii ñu ne Memfis, am na sotti yu fi indi turu Nof.

1 Kàddug Aji Sax ji dikkaloon na Yonent Yàlla Yeremi jëm ci Filisteen ñi, balaa Firawna di song dëkkub Filisteen ba ñuy wax Gasa. 2 Aji Sax ji dafa wax ne: «Ndox a ngay fuddoo bëj-gànnar, diy waame, walsi, walal réew meek li ci biiram akub dëkk ak ku ci biiram; doom aadama yuuxu, waa réew mépp serandoo. 3 Booba fas yaa ràmbal, watiir ya riir, mbegey watiir ya kar-kareendoo, yoxo yoqi, ba baay geesuwul doom, 4 bés sub sànkute dikkal képp kuy Filisteen, ba dagge dëkk yii di Tir ak Sidon ndimbal lu ñu dese woon. Aji Sax jaa ngay sànk Filisteen, ña des te cosaanoo dunu Keret. 5 Watu nel, ñaawloo, dikkal na Gasa, te wedamloo nañu Askalon. Yeen ñi dese joor gi, fu ngeen àppal seen yaram, wi ngeen di daggat, di ko ñaawloo? 6 Ngeen naa: “Wóoy saamaru Aji Sax jii, xanaa doo selanlu? Dellul sa mbar, boog, dal-lu, ne tekk!” 7 Waaye yaw saamar, noo mana selanloo te Aji Sax ji yebal la ci kaw Askalon ak waa tefesu géej, fa mu ko dogale?»

## 48

### *Lu jëm ci réewum Mowab*

1 Lu jëm ci Mowab, Aji Sax ji Yàllay Israyil, Boroom gàngoori xare yi dafa wax ne: «Ngalla waa Nebo, seen dëkk ba yàqu na! Kiryaatayim, ñu torxal, nangu ko; tata ja daanu, tasaaroo. 2 Mowab amatul woy, fa Esbon la leen noon ya fexeel lu bon, ne: “Aycalen nu raafal wii xeet!” Yeen waa Madmen it, ñu wedamal; saamar topp leen. 3 Yuux jibe na Oronayim, ndaw salfaañook rajaxoo ju réy! 4 Mowab tas, ay fereem serandoo. 5 Ñay yéeg jëm Luwit, di jooyoo.

Ñay ngay yéeg, di jooyoo. Ñay wàcci Oronayim di dégg aji jàq jiy yuuxoo.

6 Ñu naan: “Dawleen, rawale seen bakkan,

ba tumurànkeji ni gajju màndin!”

7 Mowab, yeena yaakaar dooleek alal, yeen it, dees na leen jàpp;

Kemos, seen tuur mi duggi ngallo, mooki sarxalkatam aki kàngamam.

8 Dëkkoo dëkk ay yàqto, benn dëkk du mucc!

Waa xur wii sànk, waa déndu doj wu tell wee yàqto.»

Muy la Aji Sax ji wax.

9 «Gasal-leen Mowab,

day sànk moos,

ay dëkkam gental,

kenn du fa des!

10 Alkànde ñeel na kuy sàggane liggéeyu Aji Sax ji.

Alkànde ñeel na kuy xañ deret saamaru Aji Sax ji.

11 «Mowab a dale féex cag ndawam,

kenn jàppu ko njaam, yóbbu,

wàllanteesu ko ndab ak ndab,

xanaa mu ne degg ni biiñ bu taaje,

di saf, di xeeñ ba tey.

12 Moo tax ay bés a ngii di ñew,»

kàddug Aji Sax jee,

«maa leen di yónnee ay nit ñu sotti diw gi,

ndab, soteet; njaq, rajax.

13 Yaakaaru Mowab ci Kemos tuur mi, tas, ni yaakaaru waa kër Israyil ci Betel ma ñu wóolu, tase woon.

14 «Mowabee, du yaay kañu,

naan jàmbaar ngeen,

diy ñeyi xare?

15 Song nañu la, yàqte say dëkk;

la man ci say ndaw daanu, fàddu.»

Kàddug Buur Aji Sax jee, Boroom gàngoori xare yi.

16 «Musibay Mowab a ngi jegesi,

safaanam làbbleeti, wuti ko.

17 Mboolem yeen ñi wër xeet wii, joyleen leen;

yeen ñi dégg seen tur ñépp, joyleen leen.

Neleen: “Moo, nu gii nguur mana foqe, ba foqaale jii daraja?”

18 «Yeen waa Dibon, dëkk bu taaru bi, waccleen seen tednga lu kawete tooge digg maral; kiy yàqtesi Mowab kat song na leen, di màbbsi seeni tata.

19 Yeen waa Arower, taxawleen fi yoon wi te teewlu; góor gu fi jaare mbaa ndaw su rëcc, di daw, ngeen laaj ko ne ko: “Lu xew?”

20 Ñu ne: “Gàcce ñeel na Mowab gii tas!” Yuuxooleen, ne wóoy!

Yéeneleen fa tàkkal dexu Arnon, ne Mowab tas na!

21 Mbugal dikkal déndu doj wu tell wi, dikkal dëkk yii di Olon, Yaxacc ak Mefat

22 ak Dibon ak Nebo ak Bet Diblatayim

23 ak Kiryaatayim ak Bet Gamul ak Bet Mewon

24 ak Keryot ak Boccra, mboolem dëkki Mowab daal, fu jegeek fu sore.

25 Sidditu Mowab day dog, loxoom damm.»

Kàddug Aji Sax jee!

26 «Du Mowab a doon diir Aji Sax ji mbagg?

Nañu leen màndal sànjum Aji Sax ji, ba ñu waccu, di ca xuus, ba ñoom it, ñu di leen ree.

27 Mowabee, du yeena doon ree Israyil? Dangeen leena fekk ci biiri sàcc, ba fu ngeen leen tudde, wëcc bopp?

28 Yeen waa Mowab, baleen dëkk yi, dëkke paxi doj. Defleen niy xati, tàgge peggi xunti.

29 «Noo dégg ni Mowab bewe, bew lool, réy, reew, di damu; ne danḡ-danḡiral.

30 Maa xam seen reewande,» kàddug Aji Sax jee, «seeni kañu neen la, seeni jëf di neen.

31 Moo tax may jooy Mowab, di wooteel wall Mowab gépp, di yuuxul waa Kir Eres.

32 Yaw reseñu Sibma gi, ma jooyal la lu raw la ma jooyal Yaser. Yaw la say car jàlloon géej, àkki géēju Yaser, sa figg jeek sa reseñ, noon yàqte.

33 Tukkal nañu mbégteek bannex fi tóokëri réewum Mowab. Maa ḡacc mbàndi biiñ ya, kenn nalatu fa reseñ, di soowoo coowal mbégte, xanaa ay yuux.

34 Yuux jibe na Esbon, ba Elale, àkki ba Yaxacc ak Sower ba Oronayim ak Eglat Selisiya. Ndoxi Nimrim sax ḡiis na.

35 Maay bóome biir Mowab.»

Kàddug Aji Sax jee.

«Maay bóom kuy joxe sarax ci jaamookaay,

di taalal am tuuram cuuraay.

36 Naa jooy Mowab jooyi xol, yu toxoro di jooye ab dëj, na toxoro di jooye dëju waa Kir Eres. Lu ñu dajale woon sàнку na!

37 Ñoom ñépp a nelu, wat seeni sikkim, daggat seeni loxo, sol ay saaku, di ko ñaawloo.

38 Kaw taaxi Mowab yépp aki péncam, fépp ay yuuxoo di jib.

Maa toj Mowab ni ndab lu kenn soxlaatul.» Kàddug Aji Sax jee.

39 «Yuuxooleen, ne leen: “Céy gii yàqtoo! Mowab gii wone gannaaw! Mowab rus na.”

Ñi ko wër ñépp a koy reetaan, seen yaram di daw ci ñoom.»

40 Aji Sax ji déy dafa wax ne: «Lu mel ni jaxaay a ḡiis naa jàyy, firiy laafam, kéfsi Mowab.

41 Dees na teg Keryot ga ca Mowab loxo, ne tata ya taral; su keroogee fitu jàmbaar ne tërit, mu mel ni kuy matu.

42 Mowab day sàнку, ba xeetam fey. Ñoo doon diir Aji Sax ji mbagg.

43 Yeen waa Mowab, pat-pati rekk, di tàbbiy pax aki yeer.» Kàddug Aji Sax jee.

44 «Pat-patij daw, tàbbim pax; génn um pax, tàbbim yeer.

Maay yen Mowab, maa leen di yen moos, seen atum mbugal.»

Kàddug Aji Sax jee.

<sup>45</sup> «Fa keppaaruu Esbon lañuy daw taxawi, doole dèddu.

Booba sawaraa tàkke Esbon, di law; sèl-sèlee foofa ca péeyu Buur Siwon, ba dajal réewum Mowab, nitu coow ña, boole jé akum kaan xoyom.

<sup>46</sup> Wóoy, waa Mowab, ngalla yeen!

Yeen ñiy jaamu Kemos, sàнку ngeen!

Dees na jàpp seen doom yu góor njaam; jigéen ñi it, njaam.

<sup>47</sup> «Du tee fan yu mujj ya, ma tijji wèrsègu Mowab.»

Kàddug Aji Sax jee.

Fii la àtteb Mowab yem.

## 49

### *Lu jëm ci Amoneen ñi*

<sup>1</sup> Lu jëm ci Amoneen ñi, Aji Sax ji dafa wax ne:

«Israyil daa amuli doom?

Am daa amul dono?

Lu tax Milkom\* tuur mi donloo suufas Gàdd,

ba ay jaamukatam sanc dèkki Gàdd?

<sup>2</sup> Moo tax ay bés a ngii di ñëw,»

kàddug Aji Sax jee,

«maay dégtal Raba, dèkku Amoneen ñi, coowal xare ci seen biir,

tund wa genta,

dèkk-dèkkaan ya tàkk ba jeex,

ba keroog Israyil futti ñooña ko futti woon.»

Aji Sax jee ko wax.

<sup>3</sup> «Éy waa Esbon, Ayi seen dèkk bi tas na, yuuxuleen!

Yeen waa dèkk yi séq Raba,

sol-leeni saaku, ñaawloo,

jaab diggante tata yi, tiisloo.

Milkom seen tuur mi déy duggi na ngàllo,

ànd aki sarxalkatam aki kàngamam.

<sup>4</sup> Céy Raba, bii dèkk bu taaru, toogadi,

yeena doon damoo xur yi,

ba ci seen xur wu naat wii?

Yeena yaakaaroon seeni denc,

naan: “Ku ñemee dal sunu kaw?”

<sup>5</sup> Maa ngii di leen wàcceel njàqare,»

kàddug Boroom bi Aji Sax jee, Boroom gàngoor yi,

«njàqare luy bawoo fi leen wër fépp,

dàq leen, ku ne jubal yoonam,

du kenn ku leen di dajaleeti.

<sup>6</sup> Waaye bu loolu weesee,

ma tijji wèrsègu Amoneen ñi.»

Kàddug Aji Sax jee.

### *Lu jëm ci Edomeen ñi*

<sup>7</sup> Lu jëm ci Edomeen ñi, Aji Sax ji Boroom gàngoor yi dafa wax ne:

«Xanaa boroom xel amatul fi Teman?

Xanaa ndigal a réer xamkat yi?

Am seen bopp a yàqu?

<sup>8</sup> Yeen waa Dedan,

walbatikuleen daw, ruuroo seeni pax.

Maa ngi wàcceel askanu Esawu† safaan, seen mbugal taxaw na!

<sup>9</sup> Su leen wittkati reseñ dikkalee, xanaa dinañu ca wacc ay doom?

Su leen ay sàcci guddi dikkalee,

du la leen doy lañuy sèxètoo?

<sup>10</sup> Waaye yeen askanu Esawu,

man maa leen di ñori, ba ngeen ne dunḡ.

Maay siiwal seeni rawtu,

ba dootuleen mana làqu;

seeni goneek seeni bokk, ñépp ay sàнку,

seeni dèkkandoo sax, kenn du ca des ku naan:

<sup>11</sup> “Jirim yi ngeen bàyyi,

maa leen di dundal,

te seeni jètun man nañu maa yaakaar.”

<sup>12</sup> Ndegam ñi yeyoowul mbugal

ñoooy jolu kaasuu mbugal,

nees leen di ñàkka toppe, yeen?

Dees na leen topp moos,

ngeen jolu kaasuu mbugal.

<sup>13</sup> Giñ naa ko ci man mii, déy,»

kàddug Aji Sax jee,

«Bocra, dèkk bii day mujj di gent bu ñu doyadal,

ndànd-foyfoy bu ñuy móoloo,

dèkk-dèkkaanam yépp genta ba fàww.»

*Yeremeey wax*

<sup>14</sup> Ab dégtal laa dégg, mu bawoo fa Aji Sax ji,

\* **49:1** 49.1 Milkom tuuru Amoneen ñi la woon, te Gàdd ci suufas Israyil la bokkoon. † **49:8** 49.8 Esawu ak Edom kenn ki la. Askanu Esawu ñoo dèkke woon réewum Edom.

ndaw la yebal ci biir xeet yi, ne leen:  
«Dajeleen waajal xare te song Edom  
xare!

15 Yeen Edom, tuutal leen laay def ci biir  
xeet yi,

ñu xeeblu ngeen di doon ci biir doom  
aadama yi.

16 Seen ragluwaay ak seen reewande sànk  
na leen,

yeen ñi dëkke xuntiy doj,

féetewoo colli tund yi.

Waaye su ngeen ajee seenum tàgg ni  
jaxaay it,

fa laa leen di àjjee.»

Kàddug Aji Sax jee.

17 «Edom day mujj gentel,

ku fa jaare waaru,

di muslu ci mboolem li ko dal.

18 Edom day tas ni Sodom ak Gomor ak la  
ko wër.»

Aji Sax jee ko wax.

«Nit du ca dëkk,

doom aadama du fa dal.

19 Maa ngii di fëlle gottub Yurdan ni  
gaynde,

wuti mbooy gu naat.

Xef ak xippi déy, ma fëxale fa ñépp,

ba tabb fa ki ma taamu.

Ana moos ku mel ni man?

Ku am sañ-sañ ci man?

Ana njiit luy taxaw fi sama kanam?

20 Kon dégluleen pexe mi Aji Sax ji waajal  
Edom,

mébét yi mu mébétaal waa Teman ñooñu!  
Ndegam deesu leen wommat ni seen gàtt

yu ndaw, yóbbu,

ba yàq seen parlu yaxeet.

21 Seen jéll day réy ba riiral suuf,

seeni yuux àkki géēju Barax ya.

22 Lu mel ni jaxaay a ngii, naa fëyy,

firiya laafam, kéfsi Boccra.

Bésuub keroog fitu jambaari Edom ne  
tèrit,

mel ni kuy matu.»

### *Lu jëm ci Damaas*

23 Lu jëm ci Damaas:

«Dëkk yu mag ya ko wër,

di Amat ak Arpàdd, jàq nañu;

dég-dég bu tiis ba ñu dégg la.

Dañu ne yàcc, jaxasoo,

mbete géej gu sàmbaraax, deesu ko dalal.

24 Damaas a ne yasar, ne wërëñ, di daw;  
tiitaange ne leen nuus,

njàqareeku mitit ne leen taral

ni kuy matu.

25 Lu tee ñu gentel bii dëkk bu siiw,

taax yii ma saf?

26 Su bés baa kay, seeni waxambaane  
fëlëñoo pénc yi,

seeni xarekat wedam.»

Kàddug Aji Sax jee, Boroom gàngoor yi.

27 «Maay taal ca tatay Damaas

sawara wu xoyom kèri Buur Ben Addàd.»

### *Lu jëm ci Arabi Kedar ak Àccor*

28 Lu jëm ci Kedar ak nguuri Àccor  
yi Nabukodonosor buuru Babilon nangu

woon, Aji Sax ji dafa wax ne:

«Ñokket ci kaw Kedar,

ba tas waa penku yooyu,

29 nangu xaymaaki jur,

ak kiiraay ak luy jumtukaay,

yóbbu seeni giléem,

te biral leen, ne leen:

“Musiba ubale na!”

30 Yeen waa Àccor,

fëxleen te dawa daw,

ruurooji seeni pax.»

Kàddug Aji Sax jee.

Mu ne: «Nabukodonosor buuru Babilon  
déy,

lalal na leen pexe,

mébal leen.

31 «Ayca ci kaw xeet wii ne finaax,

dëkke xel mu dal!»

Kàddug Aji Sax jee.

«Du bunt, du galanu weñ gu ñu fegoo,

te ñoom rekk a dëkk.

32 Dees na nangu seeni giléem,

tonni seen juroo jur,

ma tasaare ñooñuy wat seen peggu  
kawaru bopp,

ngelaw lu jóg, buub leen, yóbbu,

ma yéewe leen seen musiba, wetoo wet.»

Kàddug Aji Sax jee.

33 «Àccor day doon dëkkub till,

gentel ba fàww;

nit du fa dëkk,

doom aadama du fa dal.»

### *Lu jëm ci Elameen ñi*



<sup>34</sup> Kàddug Aji Sax ji dikkaloon na Yonent Yàlla Yeremi, jëm ci Elameen ñi, ci njàlbéenu nguurug Cedesyas buurub Yuda. Mu ne:

<sup>35</sup> Aji Sax ji Boroom gàngoori xare yi dafa wax ne:

«Damay damm fittu Elam, seen ngëneelu ngànaay.

<sup>36</sup> Maay ngelawe ñeenti weti asamaan, dal fi kaw Elam, tasaare leen fépp fu ngelaw jublu, ba du am xeet wu daw-làquy Elam dul fekki.

<sup>37</sup> Maa leen di xoqtaal fi seen kanami noon, yiy wut seen bakkan, alage leen sama tàngooru mer.»

Kàddug Aji Sax jee.

«Maa leen di toppe saamar, ba raafal leen.

<sup>38</sup> Maay déjjatee Elam buur ak bummi, samp fa samab jal.»

Kàddug Aji Sax jee.

<sup>39</sup> «Waaye fan yu mujj ya, maay tijji wërsëgu Elam.»

Kàddug Aji Sax jee.

## 50

### *Babilon daanu na*

<sup>1</sup> Kàddu gii la Aji Sax ji wax ci mbirum réewum Babilon, réewum Kaldeen ña, te Yonent Yàlla Yeremi jottli ko.

<sup>2</sup> «Waxleen xeet yi, yéeneleen, woneleen misaal te yéene, waxleen lii, bañ cee làq dara.

Neleen: “Dees na nangu Babilon, torxal Bel mbaa Mardug, tuur mi, tas ko, gâceel gällaaj yi, tas kasaray tuur yi.”

<sup>3</sup> Aw xeet kay ay bawoo bëj-gànaar, dal fi seen kaw.

Ñooñooy gentalsi seenum réew, ba kenn dootu fi dëkk, nit ak mala, ne mott, ne mes.

<sup>4</sup> Su bés baa, ci yooyu fan,»

kàddug Aji Sax jee,

«bànni Israyil ay ànd ak Yudeen ñi, dikk di jooy,

di sàkku seen Yàlla Aji Sax ji.

<sup>5</sup> Dinañu laaj yoonu Siyoñ, jublu fa te naan: “Ayca nu dajeji fa Aji Sax ji, ci biir kóllère gu sax

gu kenn dul fàtte.”

<sup>6</sup> «Sama ñoñ ñi réer niy xar, seeni sàmm a leen lajjal, sànk leen fi kaw tund yi, ba tundoo tund, ñu yéegi fa, fàtte seen goorukaay.

<sup>7</sup> Noon bu taseek ñoom warax leen te naan: “Nun defunu dara. Ñoom ñoo moy Aji Sax ji, te mooy dalukaayu njekk, ba seeni maam yaakaaroon.”

<sup>8</sup> «Yeen gan ñi, fëxeleen Babilon, ba sore réewum Kaldeen ñooñu. Defleen niy sikket, daw jiitu jur gi.

<sup>9</sup> Maa ngii déy di xabtal fi kaw Babilon, kurélu xeet yu mag, bawoo réewum bëj-gànaar,

làng-déralsi Babilon!

Seeni fitt di ñeyi xare, du moy, du sooy.

<sup>10</sup> Réewum Babilon a doon alalu sëxëtoo, bu ñuy sëxëtoo ba doyal.»

Kàddug Aji Sax jee.

<sup>11</sup> «Áa yeen waa Babilon, yeena sëxëtoo xeet wi ma séddoo,

di ko bégeek a bannexoo, di bajantu ni nag wuy bàcc pepp, di ñexal ni naaru góor?

<sup>12</sup> Ndaw gâce gu réy ci seen ndey, ndaw toroxte ci ki leen sukk jur! Réew maa ngii di geenu réew yi, di ndànd-foyfoy, gu wow koññ.

<sup>13</sup> Kenn du fi des ndax merum Aji Sax ji, lépp ay gental,

ba képp ku jaare Babilon,

day waaru, di muslu

ci mboolem mbugal ya fa dal.

<sup>14</sup> Yeen fittkat yépp, làng-déral-leen Babilon,

gaw ko, soqeendoo, baña yaxanal!

Ñoo moy Aji Sax ji!

<sup>15</sup> Xaaculeen fi kawam, wër ko, Babilon daanu na, ba joxe ndodd,

tata ya màbb,

dàbbli ya rajaxoo!

Aji Sax jeey feyu,

feyuleen!

Na mu defoon, defleen ko ko.

<sup>16</sup> Daggeleen Babilon kuy ji ak kuy góob,

ku fay gan, na daw saamaru noon,  
fëx jëm réewam,  
dellu cay bokkam.

<sup>17</sup> «Israyil diy gàtt yu tasaaroo,  
yu ay gaynde dàq,  
buurub Asiri di gaynde gi jékka lekk,  
Nabukodonosor buuru Babilon topp ca,  
seeñu yax ya.»

<sup>18</sup> Moo tax Aji Sax ji Yállay Israyil Boroom  
gàngoor yi ne:  
«Maa ngii di dikkal buuru Babilon ak waa  
réewam,  
na ma dikkale woon buurub Asiri.

<sup>19</sup> Maa ngii di delloo Israyil parloom,  
mu dellu di fore àllub Karmel ak Basan,  
di regge tundi Efrayim ak Galàdd.

<sup>20</sup> Su bés baa, ci yooyu fan,»  
kàddug Aji Sax jee,  
«dees na seet fi Israyil lu ñaaw, du fi am;  
fi Yuda it, deesu fi gis bàkkaar.  
Maay jéggal moos ndes wi ma fi saxal.

<sup>21</sup> «Songleen réewum Meratayim ak waa  
Pekodd\*,  
jam leen, faagaagal seen gannaaw.»  
Kàddug Aji Sax jee.

«Defleen mboolem li ma leen sant.

<sup>22</sup> Coowal xaree ngi fi réew mi,  
ak rajaxoo ju réy.

<sup>23</sup> Babilon, réew mi daan wàkk mboolem  
àddina,  
tey mu dammtoo ba rajaxoo nii,  
dib gent ci biir xeet yi!

<sup>24</sup> Babilon, maa la fiir,  
nga tancu te yéguloo!  
Dañu laa gis, ne la taral,  
yaa dëkk Aji Sax ji,

<sup>25</sup> Aji Sax ji ubbi na waxandey xareem,  
mer, génney gannaayam.  
Liggéeyu Boroom bee, Aji Sax ji Boroom  
gàngoor yi,  
foofa ca réewum Babilon.

<sup>26</sup> Songeleen ko fu ne,  
dàjji ay sàqam,  
jal-jalee.

Fàkkasleen lépp, ba du dese dara.

<sup>27</sup> Jamleen seen jàmbari yëkk yépp,  
nañu dem ca rendikaay ba.  
Wóoy, ngalla ñoom!

Seen bés taxaw na moos,  
di seen àppu mbugal.

<sup>28</sup> Baatu daw-làqu yu récc a ngoog,  
bawoo réewum Babilon,  
di yeggesi waa Siyon  
mbugalum Aji Sax ji sunu Yàlla,  
mbugal mi kèram waral.

<sup>29</sup> Wooleen fittkatoo fittkat fi kaw Babilon,  
mboolem kuy tàwwi xala.

Gawleen ko,  
bu kenn récc.  
Feyleen koy jëfam;  
def ko ni mu def moroomam.  
Babilon a jaay reewande Aji Sax ji,  
ku Sell ku Israyil ki.

<sup>30</sup> Moo tax bés sub keroog  
goneem yu góor di daanooy péncam,  
niti xareem di wedamandoo.»  
Kàddug Aji Sax jee.

<sup>31</sup> «Babilon mu reewee, maa ngii fi sa  
kaw.»

Kàddug Boroom bi, Aji Sax jee, Boroom  
gàngoori xare yi.

«Sa bés déy taxaw na,  
di àpp bi ma la wara mbugale.

<sup>32</sup> Ku reew keey tërëf, fëlëñu,  
te du am ku ko yékkati.  
Maay jafal ay dëkkam,  
sawara wa xoyom lépp lu ko wër.»

<sup>33</sup> Aji Sax ji Boroom gàngoor yi dafa wax  
ne:  
«Bànni Israyil ak Yuda, ñépp lañu notan-  
doo.

Ñi leen jàpp ñépp téyee leen doole,  
bañ leena ba.

<sup>34</sup> Waaye seen jotkat a am doole,  
te mooy Aji Sax ji Boroom gàngoor yi.  
Moo leen di layool seen layoo,  
ngir jàqal réewum Babilon,  
jàmmal waa àddina yi ci des.

<sup>35</sup> Saamar ci kaw waa Babilon!»  
Kàddug Aji Sax jee.

«Saamar ci kaw waa Babilon  
aki kàngamam aki kaanam.

<sup>36</sup> Saamar ci kaw kebatukati diine yi,  
ba seenug ndof feeñ.  
Saamar ci kawi jàmbaram,  
ñu ne yàcc.

<sup>37</sup> Saamar ci kaw fas ak watiiram,  
ak mboolem niti njaxasaan ñi mu fat,  
ba ñu mel niy jigéen.

\* **50:21** 50.21 waa Meratayim and waa Pekodd ci Babilon lañu bokk.

Saamar ci kawi dencam,  
ñu sèxëtoo.

<sup>38</sup> Maral ci kawi waltanam, mu ñiis;  
mii réew mu nit ñiy jaamoo jëmmi tuur,  
ñooy say ndax seen yu ñàng yooyu

<sup>39</sup> Moo tax ay dundooti màndiñ ak rabi àll  
a koy këroo,  
bànjóoli dëkke ko,  
kenn dootu fa desati,  
kenn dootu fa dëkk muk ba fàww.

<sup>40</sup> Mu mel ni ba Yàlla tasee Sodom ak  
Gomor,  
tasaale la ko wër.»  
Kàddug Aji Sax jee.  
«Nit du fa dëkkati,  
doom aadama du fa dalati.»

<sup>41</sup> «Aw askan a ngii, bàyyikoo bëj-  
gànaar,  
xeet wu mag lañuy doon, buur yu bare,  
sàqee fa cati àddina.

<sup>42</sup> Yeen waa Babilon, réew mu taaru mi,  
fitt aku xeej la ñooñuy ñàbb,  
néeg lool, duñu yërëm,  
seen coow ni riirum géej,  
ñu war seeni fas,  
làng-déral leen ni benn bopp ngir xare.

<sup>43</sup> Buuru Babilon dégg riir ma,  
yoxo ya yoqi,  
njàqare ne ko taral,  
mu jàq ni kuy matu.

<sup>44</sup> Maa ngii, di fëlle gottub Yurdan ni  
gaynde,  
wuti mbooy gu naat.  
Xef ak xippi déy, ma fëxale fa lépp,  
ba tabb fa ki ma taamu.  
Ana moos ku mel ni man,  
ku am sañ-sañ ci man?  
Ana ñjiit luy taxaw fi sama kanam?

<sup>45</sup> Kon dégluleen pexe mi Aji Sax ji waajal  
Babilon,  
mébét yi mu mébétaal réewum Kaldeen  
ñoñu!  
Ndegam deesul wommat seen gàtt yu  
ndaw, yóbbu,  
ba yàq parlu ma yaxeeet.

<sup>46</sup> Bu ñuy nangu Babilon,  
riir ma day jolli ba riiral suuf,  
seeni yuux àkki fa biir xeeti jaambur ya.»

## 51

<sup>1</sup> Aji Sax ji dafa wax ne:  
«Maa ngii di yebal fi kaw Babilon,  
waa Lew Kamay gii,\*  
ngelawal yàqkat.

<sup>2</sup> Maay yónnee Babilon ay beeskat  
yu ko bees, tonni réew ma, ba mu set.  
Keroog bésu safaan ba déy,  
fu ne lañu koy songe.

<sup>3</sup> Buleen leen may fu ñu taxaweek seen  
kiiraay, di fitte;  
buleen ñéeb lu seeni waxambaane,  
fàkkasleen seen gàngoor gépp.

<sup>4</sup> Ñii dee, ne wetar réewum Babilon;  
ñee gaañu, ne lasar ca mbedd ya.

<sup>5</sup> Israyil ak Yuda ñàkkuñu seen Yàlla,  
Aji Sax ji Boroom gàngoor yi,  
te réewum Babilon fees naaki moy  
yu ñu moy Yàlla Aji Sell ji séddoo Israyil.

<sup>6</sup> «Yeen gan ñi, génnleen Babilon,  
ku ne rawaleji sa bakkan.  
Buleen ñaawtéefu jaambur sànkale;  
lii àppu mbugal la bu Aji Sax ji matal;  
seen añ la, bu mu leen añale.

<sup>7</sup> Aji Sax jee yor Babilon ci loxoom, muy  
kaasu wurus bu def xadaru xeet ya,  
di màndal mboolem àddina;  
xeet ya naan ca,  
ba tax ñuy say.

<sup>8</sup> Teewul Babilon jekki daanu, tasaaroo.  
Jooyleen ko,  
dàmp ko, seral mititam,  
jombul mu wër.»

*Gan ñaay wax*

<sup>9</sup> «Bu nu sañoon faj Babilon, mu wër,  
waaye wérul.

Nan ko ba te dem,  
ku ne ñibbim réewam.  
Àtteb Babilon kat àgg na asamaan,  
àkki na fa kaw niir ya.»

*Bànni Israyil ay wax*

<sup>10</sup> «Aji Sax ji jox na nu dëgg.  
Nanu yeggeji waa Siyon  
jaloorey Aji Sax ji, sunu Yàlla.»

*Yàllaay wax*

<sup>11</sup> «Nàmmleen fitt yi, feesale mbar yi!  
Aji Sax ji xabtal na buuri Medd fi kaw  
Babilon,

\* **51:1** 51.1 Lew Kamay li muy tekki mooy «xolu noon yi», di turu kumpa wu bànni Israyil daan wooye waa Babilon.

nar koo tas.

Lii mbugalu Aji Sax jee,  
mbugal mi këram waral.

<sup>12</sup> Yékkatil-leen tatay Babilon raayab  
xare,

yokkleen wattukat yi,  
taxawal leen fa ñuy wattoo,  
te waajal tërukat yi.

Aji Sax ji def na li mu waxoon  
ne dina ko def waa Babilon.

<sup>13</sup> Yeen ñi dëkke weti ndox yu ne xéew,  
seen alal ne xéew,  
seen muj taxaw na,  
seen buumu bakkan dog na.

<sup>14</sup> Aji Sax ji Boroom gàngoor yi giñ na ci  
boppam.

Mu ne: “Maa leen di same ay nit niy  
njééréer,

ñu xaacu, song leen.”»

*Yeremeey wax*

<sup>15</sup> Suuf, Aji Sax ji sàkke kàttanam;  
dun bi, mu sampem xelam;  
asamaan, mu lale xam-xamam.

<sup>16</sup> Bu àddoo ndoxum asamaan riir,  
mu yéegey niir fa cati àddina,  
riddee ngelaw fa dencam ya,  
daldi melax, taw.

<sup>17</sup> Nitoo nit dim sannax, sore xam-xam,  
te képp kuy tëgg sa jëmmu tuur, yaa aña  
gacce.

Sa jëmmi weñ ji nga xelli, di neenug neen,  
noowug bakkan, tus!

<sup>18</sup> Cóolóolu neen, liggéeyu caaxaan;  
bu bésam taxawee, mu sàнку.

<sup>19</sup> Séddoob Yanqóoba déy wuute naak yii  
caaxaan.

Kee bind lépp,  
bind giir gi mu séddoo.

Kookooy Aji Sax ji Boroom gàngoori xare  
yi!

*Yàllaay wax*

<sup>20</sup> «Yaw Babilon, yaa doon sama wàkku,  
di sama ngànaay,  
ma di la wàkke xeet yi,  
rajaxee la réew yi,

<sup>21</sup> wàkke la fas ak gawaram,  
wàkke la watiir ak dawalkatam,

<sup>22</sup> wàkke la góor ak jigéen,  
wàkke la mag ak ndaw,  
wàkke la waxambaaneek ub janq,

<sup>23</sup> wàkke la sàmm ak géttam,  
wàkke la beykat ak lëkkeb nagam,

wàkke la kàngam ak jawriñ.

<sup>24</sup> Waaye mboolem lu Babilon ak waa  
réew mépp def ci Siyon,  
maa leen koy fey, ngeen di gis, yeen  
Yudeen ñi.»

Kàddug Aji Sax jee.

<sup>25</sup> «Maa ngii déy, fi sa kaw, yaw Babilon,  
ponkalum yàqkat bi,»

kàddug Aji Sax jee,

«yaw miy yàq àddina sépp.

Maay tàllal sama loxo fi sa kaw,  
taxaño la fa kaw doj ya,  
def la ponkalum jalu dóom.

<sup>26</sup> Deesul seppee fi yaw doju tabax wu ñuy  
lëkklee,

mbaa doju tabax wu bokk ci kenu,  
nde gent ngay doon ba fàww.»

Kàddug Aji Sax jee.

<sup>27</sup> «Yékkatileen ub raaya fi réew mi  
te walal liit gi xeet yi.

Dajaleleen xeet yi fi kaw Babilon,  
te xabtal fi kawam réew yii:

Araraat ak Minni ak Askenas.  
Tabbal-leen ko njiitu xare mu ko song,  
indil koy fas yu saf ndiiraani njééréer.

<sup>28</sup> Dajaleleen xeet yi fi kaw Babilon,  
wooleen buuri Medd ak kàngam ya  
ak jawriñ ñaak mboolem réew mu ñu  
moom.

<sup>29</sup> Suuf a fuddu, wañaaru,  
mébéti Aji Sax jeey sottalal Babilon,  
ngir réew ma dib gent bu kenn nekkul.

<sup>30</sup> Jàmbaraari Babilon xareetuñu,  
ña nga des ca seeni tata,  
doole ñiis,

ñu mel niy jigéen.  
Bunti dëkk bi dàjjiku,  
kër ya jàpp.

<sup>31</sup> Xéluakat dab xéluakat;  
ndaw jottli ndaw xibaar

bu ñu yeggeji buuru Babilon, ne ko  
nangu nañu dëkkam ba wetoo wet,

<sup>32</sup> nangu jàllukaayi dex ya,  
taal barax ya,  
xarekat ya raj-rajloo.»

<sup>33</sup> Aji Sax ji Yàllay Israyil Boroom  
gàngoori xare yi déy dafa wax ne:

«Ñu ngi dëggaate Babilon mu taaru mi,  
ni ñuy dëggaatee dägga ju ñuy bàccesi.  
Balaa yàgg ngóobu Babilon taxaw.»

*Yerusalem ay wax*

34 «Buuru Babilon warax na ma.  
Da maa muucu,  
ñiit ma, ba ma set ni ndab.  
Da maa modd ni ninki-nànka,  
sole kollam li gën ci man,  
yàbbi la ca des.»

35 Siyoŋ ne: «Yal na sama yàpp ak sama  
coono topp Babilon.»  
Yerusalem ne: «Yal na sama deret topp  
waa Babilon!»

36 Aji Sax ji nag dafa wax ne:  
«Maa ngii di leen layool seen layoo,  
ba feyul leen.

Maay ñeeral géejam,  
ñiisal am walam,

37 Babilon def jali doj,  
di paxum till,  
di gent bu ñuy muslu,  
kenn du ko dëkke.

38 Ñu ngi ñarandoo niy gaynde,  
di xiiroo ni gaynde yu ndaw.

39 Ñu tàng bay bégga dee,  
ma may leen ñu naana naan,  
màndal leen, ñu mana xawaare,  
tédd nelaw nelawi fàww,  
duñu yewwooti.»

Kàddug Aji Sax jee.

40 Aji Sax ji nee: «Maa leen di wommat  
niy xar ba ca rendikaay ba,  
ñu mel ni kuuyi xar aki sikket.

### *Ngalla Babilon*

41 «Áa! Ana nees mana nangoo Sesag?  
Nees mana tege loxo ki àddina sépp di  
kañ?

Ana nu Babilon mana gente fi digg xeet  
yi?

42 Géej ay mëdd Babilon,  
mu sàngoo gannaxam yu jallaaño,

43 ay dëkkam gentel,  
réew mi ne sereŋ, di ndànd-foyyoy,  
kenn du ko dëkke,  
doom aadama du fa jaare.

44 Maay dikke mbugal Bel,  
tuur mi ci Babilon,  
yàbbiloo kob lancam.

Xeet yi noppee def um wal, wuti ko,  
tatay Babilon it màbb.

45 Yeen sama ñoñ, génnleen fi seen biir,  
na ku ne rawale sa bakkan,  
ba mucc tàngooru sànjum Aji Sax ji.

46 Bu seen fit récc,  
ngeen di tiit xibaar yi ñuy yéene ci réew  
mi:

ren yéene jib,  
dévén yéene jibati,  
fitna law ci réew mi,  
njiit ne njiit dann.

47 Kon ay bés a ngii di ñëw,  
yu may dikke mbugal tuuri Babilon,  
réew mépp torox,  
ña ñu bóom ñépp wetaroo fa biir.

48 Su boobaa asamaan ak suuf  
ak mboolem li ci biiram  
sarxollendoo, di bége li dal Babilon.  
Bëj-gànnar kay la yàqkat yay bawoo.»  
Kàddug Aji Sax jee.

### *Yeremeey wax*

49 Waa Babilon it dinañu daanu  
ngir waa Israyil ñi ñu bóom,  
ba ñu yem ak mboolem waa àddina yi ñu  
bóom,

te ñu daanu ndax Babilon.

50 Ée yeen ñi récc saamar,  
buleen taxaw, demleen,  
di fàttlikoo Aji Sax ji fu sore,  
tey bàyyi xel Yerusalem.

### *Bànni Israyil ay wax*

51 «Nooka rus ci saaga yi nu dégg,  
ak gacce gi nu sèlmoo  
ndax doxandéem yi dugg  
ci biir bérab bu sell bi ci kër Aji Sax ji.»

### *Yàllaay wax*

52 «Moo tax, bés a ngii di ñëw,»

kàddug Aji Sax jee,

«maay dikke mbugal seen jëmme tuur yi,  
ñoom,

ñi ñu jam di binnee fi réew mi mépp.

53 Su Babilon yéegoon asamaan,  
dàbbli fa tata ju ne kekk sax,  
du tee ay yàqkat bawoo fi man, dal ci  
kawam.»

Kàddug Aji Sax jee.

### *Yeremeey wax*

54 Yuuxi njàqare fa Babilon,  
réewum Kaldeen ñooña toj ba tojatoo.

55 Aji Sax jee niy yàqtee Babilon,  
tukkal fa riir mu réy.

Gàngoori noon yaa ngay buur ni gannaxi  
géej,

seen riirum kàddu jolli.

56 Yàqkat déy dikkal na Babilon,  
jàpp ay jàmbaraam,

dammatey fittam.

Aji Sax ji déy mooy Yàlla jiy yoole,  
di fey pey gu mat sèkk.

<sup>57</sup> Mu ne: «Maay màndal seeni kilifaak  
seeni kaan

ak seeni kàngam ak seeni jawriñ ak seeni  
jàmbaar,

ñu tëdd nelaw nelawi fàww,  
duñu yewwooti.»

Kàddug Buur a, Aji Sax ji Boroom  
gàngoor yi.

<sup>58</sup> Aji Sax ji Boroom gàngoor yi dafa wax  
ne:

«Tatay Babilon yu mag yi

dees koy màbba màbb;

bunt yu kawe ya lakk ba jeex.

Xeet yee ñaq ci neen,

waaso yee sonnal sawara.»

### *Yeremi santaane na misaal*

<sup>59</sup> Bèkk-néegu Buur Cedesyas moo doon  
Seraya doomu Nerya doomu Maaseya.  
Ba Cedesyas tolloo ca ñeenteelu atu  
nguuram, la Seraya ànd ak moom Ba-  
bilon. <sup>60</sup> Fekk na Yeremi bind cib taxañ  
mboolem safaan yiy dikkal Babilon, di  
mboolem mbir yooyu jëm ci Babilon.

<sup>61</sup> Yeremi sant Seraya, ne ko: «Boo àggee  
Babilon, fexeel ba biral kàddu yii yépp.

<sup>62</sup> Te nga wax ne: “Aji Sax ji, yaw déy,  
yaa xamle ne dèkk bii dina tas, dara du  
ci dèkkati, du doom aadama, du rab. Ab  
gent lay doon ba fàww.” <sup>63</sup> Boo jàngee  
taxañ mbind mii ba noppi, nanga ci takk  
aw xeer, sànni ko ci biir dexu Efraat. <sup>64</sup> Su  
ko defee nga ne: “Nii la Babilon di diige  
te du jógati ndax safaan bi may wàcce  
fi seen kaw, ba ñu sonn.”» Fii la kàdduy  
Yeremi yem.

## **Kàdduy ndollant a ngi**

### **52**

*(Saar 52.1-34)*

<sup>1</sup> Ñaar fukki at ak benn la Cedekiya  
amoon ba muy falu buur, te fukki  
at ak benn la nguuru fa Yerusalem.  
Yaayam mooy Amutal doomu Yeremi ma  
cosaano Libna. <sup>2</sup> Muy def li Aji Sax ji  
ñaawlu, mboolem noonee ko Yowakim  
defe woon. <sup>3</sup> Merum Aji Sax ji nag dikkal  
Yerusalem ak Yuda, ba mu mujj xalab  
leen.

Gannaaw gi Cedesyas fippu buuru Ba-  
bilon. <sup>4</sup> Ba Cedesyas tolloo ci juróom  
ñeenteelu atu nguuram, fukki fan ca  
fukkeelu weeram, ca la Nabukodonosor  
buuru Babilon ànd ak mbooloom xareem  
mépp ci kaw Yerusalem. Ñu dal fa janook  
Yerusalem, yékkati gawukaay, wërale ko.

<sup>5</sup> Dèkk ba gawe, ba keroog Cedesyas  
tollu ci fukkeelu atu nguuram ak benn.

<sup>6</sup> Keroog juróom ñeenti fan ca ñeenteelu  
weer wa, xiif ba tar lool ca biir dèkk  
ba, ba waa réew ma amatuñu ab dund.

<sup>7</sup> Xarekati Yuda ya génn guddi daw. Fekk  
na waa Babilon gaw dèkk ba. Teewul ñu

rècc, jaare ca bunt ba ca diggante ñaari  
tata ya, ca wetu toolu buur. Ñu daldi

wuti xuru Yurdan. <sup>8</sup> Waa Babilon nag  
topp Buur Cedesyas, ba dab ko ca jooru

Yeriko. Fekk mbooloom xareem mépp  
tasaaroo, wacc ko. <sup>9</sup> Ñu jàpp ko, yóbbu

ca buuru Babilon ca dèkk ba ñuy wax  
Ribla ca réewum Amat. Nabukodonosor

dogal fa àtteem. <sup>10</sup> Buuru Babilon daa  
rendi doomi Cedesyas yu góor, muy gis,

mu rendiwaale mboolem kàngami Yuda,  
ca Ribla. <sup>11</sup> Gannaaw loolu mu tuur bēti

Cedesyas, ba noppi jéngé ko jéngi xàñjar,  
yóbbu ko Babilon, tēj ko fa, ba keroog bés

ba mu deeyee.

<sup>12</sup> Ba Nabukodonosor buuru Babilon  
tolloo ci fukkeelu atu nguuram ak juróom

ñeent, ba am fukki fan ca juróomeelu  
weeru at ma, ca la bèkk-néegu buuru

Babilon, Nebusaradan njiitu dag ya, dugg  
Yerusalem. <sup>13</sup> Mu taal kër Aji Sax ji, taal

kër buur, ak kəri Yerusalem gépp, boole  
ca kəri boroom barke ya. <sup>14</sup> Gàngooru

Babilon gépp daldi ànd ak njiital dagi  
buur, ñu màbb tata ya wër Yerusalem.

<sup>15</sup> Gannaaw gi ñenn ci baadoolo yi, ak  
ña nekkoon ca dèkk ba, ba booba, ak ña

jébbaloon seen bopp buuru Babilon, ak  
ña desoon ca liggéeykat ya, Nebusaradan

njiital dagi buur boole leen yóbbu ngallo.

<sup>16</sup> Ñenn ca baadooloy réew ma nag, Neb-  
usaradan njiital dag ya bàyyi leen fa, ñuy

liggéey tóokəri reseñ yaak tool ya. <sup>17</sup> Ci  
biir loolu kenuy xàñjar ya bokkoon ca kër

Aji Sax ji, ak rootukaay yaak mbalkam  
xàñjar ma woon ca kër Aji Sax ji, waa  
Babilon toj lépp, boole xàñjar jépp yóbbu

Babilon. <sup>18</sup> Ñu yóbbaaale mboolem ndabi xàñjar yi ñuy liggéeye ci kër Aji Sax ji: ndab yiy def dóom, ak ñiitukaay yi ak ñiimi feyukaayi làmp yi, ak ndab yiy def deretu sarax yi, ak and yu ndaw yi, ak mboolem jumtukaayi xàñjar yi ñuy sarxalee. <sup>19</sup> Njiital dag ya yóbbaaale ndab yu ndaw yaak and yaak ndab yiy def deretu sarax, ak ndab yiy def dóom, ak tegukaayi làmp yaak and yu ndaw yaak kèlli tuurukaay ya. Lu ciy wurus, mu ber, lu ciy xalis, mu ber.

<sup>20</sup> Ñaari kenu yooyu ak mbalka maak fukki nag ak ñaar ya ko yenu, ak rootukaay ya, lépp di xàñjar bu Buur Suleymaan defaraloon kër Aji Sax ji, maneesula takk diisaay ba. <sup>21</sup> Kenu yi, gu ci nekk am na taxawaayu fukki xasab\* ak juróom ñett te fukki xasab ak ñaar a koy ub. Mu def pax ca biir te dèllaayu weñ ga di juróom ñeenti baaraam. <sup>22</sup> Kenu gu ci nekk ponku xàñjar a ca tege, taxawaayu ponk bi di juróomi xasab, ab caaxub xàñjar wodd ko, ànd ak doomi gèrènaati xàñjar. Ñaari kenu yépp noonu, ànd aki gèrènaat. <sup>23</sup> Gèrènaat yi juróom ñeent fukk laak juróom benn, wet gu nekk, boo ci boolee ya ca cat ya, muy tééméer, yu ub caax ba.

<sup>24</sup> Ci kaw loolu njiital dag ya jàpp Seraya sarxalkat bu mag ba, ak Cefaña sarxalkat ba ca topp, ak ñetti dagi bunt kër Aji Sax ja. <sup>25</sup> Biir dèkk ba nag, mu jële fa benn njiitu xare, ak juróom ñaari niti dèkk ba ñu sës ci Buur, ak bindkatub njiital xare ba sasoo bind xarekat yi, ak juróom benn fukki Yudeen ñu mu fekk ca biir dèkk ba. <sup>26</sup> Ba mu ko defee Nebusaradan, njiital dagi buur, boole leen yóbbu ca buuru Babilon ca Ribla. <sup>27</sup> Buuru Babilon nag bóom leen foofa ca Ribla, ca réewum Amat. Noonu la waa Yuda génne seen réew, dem ngàllo.

<sup>28</sup> Lii mooy limu nit ñi Nabukodonosor toxal: Ñetti junniy Yudeen ak ñaar fukk ak ñett (3 023), loolu yemook juróom ñaareelu atu nguoram, <sup>29</sup> ak juróom ñetti tééméer ak fanweer ak ñaar (832), loolu yemook fukkeelu atu nguoram ak juróom

ñett, <sup>30</sup> Ak juróom ñaar tééméer ak ñeent fukk ak juróom (745) yu Nebusaradan njiital dag ya, toxal. Loolu yemook ñaar fukkeelu at maak ñett ci nguurg Nabukodonosor. Ñi ñu toxal ñépp di ñeenti junni ak juróom benni tééméer (4 600).

<sup>31</sup> Yóbbu nañu Yowakin buurub Yuda ngàllo ba mu am fanweeri at ak juróom ñaar, Ewil Merodag doora falu buur ca Babilon. At mooma, fukkeelu weer waak ñaar, ñaar fukki fan ak juróom ca weer wa, ca la Ewil Merodag siggil Yowakin buurub Yuda, daldi koy tiji. <sup>32</sup> Ci biir loolu mu wax ak moom lu rafet, jox ko cér bu sut cér ba mu jox yeneen buur, ya mu bokkal curga ca Babilon. <sup>33</sup> Yowakin nag teqlikook yérey kaso ya, ba noppi ñu may ko muy boka ak Buur ndab giiru dundam. <sup>34</sup> Ci biir loolu ñu dogal ko njëlam lu sax dàkk, di bàyyikoo ci buuru Babilon bés bu jot, giiru dundam, ba keroog muy dee.

\* 52:21 52.21 xasab mooy guddaayu loxo bu digg-dóomu, diggante catu baaraamu digg ak conc.

## Kàdduy Jooytu

### *Yonent Yàlla Yereimi àddu na*

<sup>1</sup> Ndeysaan! Dëkk beeka wéet tey!  
Te ñoñam noon gàññ démb.  
Ndeysaan! Mu ngi mel nib jëtun tey,  
te noon ràññ fi biir xeet yi!  
Moo doon lingeeru diiwaan yi,  
tey mu sasoo liggéeyu sañul-bañ.

<sup>2</sup> Day fanaanee jooya jooy,  
rongooñ yay bas-basi,  
te du kenn ku koy dëfal  
ci mboolemi soppeem.  
Xaritoo xarit wor ko,  
walbatiku diy noonam.

<sup>3</sup> Ngàllo lañu yóbbu Yuda,  
ci biir naqar ak njaam gu metti.  
Ci biiri jaambur lañu dëkk,  
amuñu fu ñu nopploo,  
mboolem ña leen dāqa leen dab,  
ba tance leen ca ruq ya.

<sup>4</sup> Yoon yi jëm Siyoŋ\* jooy na wéet,  
kenn jaareetu ca mǎggalsi.  
Pénc yépp a gental,  
sarxalkat yay binni,  
janq ja jàq,  
Siyoŋ gépp di naqarlu!

<sup>5</sup> Seen noon yaa jiite tey,  
seen bañ yooyoo ne finaax,  
Aji Sax jee mbugale waa Siyoŋ  
seeni tooñ yu bare,  
seeni doom duggig njaam,  
di moomeel ub noon.

<sup>6</sup> Lu doon sagub Siyoŋ, dëkk bu taaru bi,  
tey sàggiku na.  
Seeni garmee ngi mel ni kéwél  
yu amul parlu,  
di koyoŋ-koyoŋiy daw,  
te rëbb ne leen dann.

<sup>7</sup> Tey ci janti toroxte ak tumurànke,  
la Yerusalem di fàttlikoo

mboolem ngëneeli démbam.  
Aw askanam a tàbbi ci loxol noon,  
te wall amul,  
noon ba gis leen,  
di textexi ci seenug yàqule.

<sup>8</sup> Yerusalem a moya moy,  
ba tax koo mujj di sobe;  
ku ko teraloon, sofental ko,  
ndax gis ko, mu ne duŋŋ.  
Moom ci boppam mu ngi binni,  
fuuylu.

<sup>9</sup> Sobey Siyoŋ ca pendalam,  
te bàyyiwul xel ag mujam.  
Jéllam ba yéeme na,  
te amul ku ko dëfal.  
Siyoŋ nee: «Éy Aji Sax ji, xoolal sama  
njàqare;  
noon bi déy, am na ndam!»

<sup>10</sup> Loxo la noon bi teg ci  
ngëneeli Siyoŋ gépp.  
Siyoŋ kay a gis yéefar yi songsi  
këram gu sell gi,  
te ci ñoom nga santaane woon, ne  
buñu dugg sam ndaje.

<sup>11</sup> Waa Siyoŋ gépp a ngi binni,  
di wut ab dund†,  
seeni ngëneel lañuy weccikoo aw ñam  
wu ñu leqlikoo.

*Yerusalem àddu na*  
Gisal Aji Sax ji, seetal  
ni ma mujj tekkeedee!

<sup>12</sup> Yeen mboolem ñiy jaare yoon wi,  
lii safu leen,  
waaye seetleem rekk ba gis  
ndax wenn mitit dab na  
mitit wi ñu ma teg,  
te Aji Sax ji naqarale ma ko  
ci jantub tàkktel sànjam.

<sup>13</sup> Fa kaw la Aji Sax ji sànnée sawara  
ci sama biiri yax,  
moo laaw ab caax ngir fakktal ma,  
wañni ma, jànnaxe ma,

\* **1:4** 1.4 Siyoŋ mooy Yerusalem itam. † **1:11** 1.11 wut ab dund: li leen xañ ab dund mooy gaw bu yàgg bu ñu leen gaw, ba ñu mujj xiif lool. Seetal ci 2.*Buur ya* 25.1-3.



ma dëkke yoggooral.

14 Samay tooñ la Aji Sax ji ëmb,  
fastee ko loxoom,  
mu tege sama kaw ndodd,  
ba jeexal sama doole.  
Boroom bee ma tàbbal  
ci loxo yu ma manula të.

15 Ku doon jàmbaar fi sama biir,  
la Boroom bi xalab.  
Am ndaje la ma wooteel,  
ngir falaxe sama ndaw yu góor.  
Boroom bee dëggaate Janq Yuda mu  
taaru mi,  
ni reseñ ci biir nalukaay.

16 Looloo ma tax di jooy,  
rongooñ di wal-wali,  
te ku may dëfal sore ma,  
mook kuy seral sama xol.  
Samay doom a ngi jaaxle,  
nde noon bi daan na.

### *Yeremi àddu na*

17 Siyoñ tàllal na loxoom,  
waaye amul ku ko dëfal.  
Aji Sax jee wool askanu Yanqóoba  
seeni noon yi leen wër,  
ba Yerusalem mujj di sobe fi seen biir.

### *Yerusalem àddu na*

18 Aji Sax ji moo yey,  
kàddoom laa gántal.  
Yeen, xeetoo xeet, ngalla dégluleen  
te xool samaw tiis.  
Samay ndaw yu góor ak yu jigéen,  
ñoo duggi ngàllo!

19 Samay soppe laa woo wall,  
ñoom ñu wor ma.  
Samay sarxalkat ak samay mag di wuti ab  
dund  
bu ñu leqlikoo,  
far faatu ci biir dëkk bi.

20 Éy Aji Sax ji, xoolal sama njàqare,  
samay butit di fuddu,  
sama biir xol salfaañoo ndaxu tiis.  
Man de maa gántal ba gántaaral,  
ba fa biti, saamar di fa bóome,  
te biir kër it di ndee.

21 Dégg nañu may binni,  
te awma ku ma dëfal.  
Noon yépp a dégg samaw ay  
te di ko bége, nde yaa ko def.  
Ngalla indil bés bi nga dige,  
ba ñu daj li ma daj.

22 Yal na seen gépp mbon teew fi sa  
kanam,  
ba nga mbugal leen  
ni nga ma mbugale  
ndax mboolem samay tooñ.  
Samay onk bare na,  
sama xol jeex tàkk.

## 2

### *Yeremi àddu na*

1 Ndeysaan Boroom bee mer ba xiinal  
Janq Siyoñ  
mu taaru mi.  
Fa asamaan la rattaxe sagu Israyil fa suuf.  
Keroog bésu meram ma, bàyyiwul xel,  
ne këram googoo di ndëggastalam.

2 Boroom bee modd te yërëmul  
mboolem sancu Yanqóoba.  
Ca meram ma la màbbe  
tatay Janq Yuda mu taaru ma.  
Moo detteel nguur ga aki garmeem,  
sobeel leen.

3 Tàngooru sànjam la dagge  
gépp kàttanu Israyil.  
Fa kanam noon ba la roccee  
dooley ndijooram.  
Moo tàkkal Yanqóoba  
ni sawara wuy sèlsèli,  
ba xoyom mboolem la ko wër.

4 Boroom bee tàwwi ag fittam  
mel ni ab noon,  
moo diire ndijooram, mel ni bañ,  
moo bóom mboolem lu neexa xool.  
Ci biir xaymay janq Siyoñ mu taaru ma  
la yuri am sànjam ni sawara.

5 Boroom bee mel nib noon,  
modd Israyil,  
moddaale këram yu taaru yépp,  
tas ay tataam,  
ba fulal Janq Yuda mu taaru ma,  
ay yuux aki jooy.

6 Moo tas mbaaram ni bu doon mbaarum  
 tool,  
 moo rajaxe bérabu ndajeem.  
 Aji Sax ji moo fàtteloo waa Siyon  
 màggal ak bésub Noflaay,  
 te tàngooru meram la xalabe buur ak  
 sarxalkat.

7 Aji Sax jee jañax sarxalukaayam,  
 gedd bérabam bu sell.  
 Moo teg ci loxol noon tatay këram yi.  
 Biir kë Aji Sax ji la baat xaacoo,  
 ni bu doon bésu màggal.

8 Aji Sax jee dogoo rajaxe  
 tatam janq Siyon mu taaru,  
 Moo tàllal buumu nattukaay, ngir tas ko,  
 bankul loxoom it te màbbu ko.  
 Moo jooyloo tata ak tabaxub fegukaay,  
 ñu ànd tojatoo.

9 Bunti dëkk ba suulu na,  
 te moo yàqte, dammate weñi tëjukaay ya,  
 buuram aki garmeem a tumurànkeji  
 ca yéefar ya,  
 te téereb yoon amul,  
 yonent it gisatul peeñu  
 mu bawoo fa Aji Sax ji.

10 Magi janq Siyon mu taaru ña nga toog,  
 xeremlu,  
 xëppoo suuf, sol ay saaku, di ñaawlu.  
 Janqi Yerusalem sëgg, seen bopp jëm  
 suuf.

11 Samay gët a giim ndaxi rongooñ,  
 samay butit fuddu,  
 xol ñiis, jeex tàkk:  
 ci tasteg samaw askan;  
 xale yeek gone yiy nàmp  
 ne lasar fi mbedd yi!

12 Seen yaay lañu naan:  
 «Ana fu nuy lekke, ba naan?»  
 Te ne lasiim ci mbeddi dëkk bi,  
 ni ñu gaañoo xare,  
 bakkan di tàggoo fa ñu uufoo  
 ca weenu yaay.

13 Yaw Janq Yerusalem mu taaru mi,  
 lu ma lay wax? Ku ma lay  
 méngaleel?

Siyon mu jekk mu taaru mi laa ne,  
 ana ku ma lay dendaleel, ba seral sa  
 xol?  
 Yaw mi sab góom yaa ni géej,  
 ana ku lay faj?

14 Ag neen aki caaxaan la la say yonent  
 gisal,  
 te biraluñu sag ñaawtéef, ngir tijji sa  
 wërsëg,  
 xanaa di la yéeneel waxyuy caaxaan aki  
 nax.

15 Mboolem ñi fi jaareey tacc-taccali loxo,  
 ciipu, wëcc bopp ci gentub Yerusalem mu  
 taaru mā,  
 te naan: «Xanaa du biib dëkk lañu doon  
 tudd  
 sottiteb taar ba,  
 te muy mbégtém àddina sépp?»

16 Sa noon yépp a lay ñaawal,  
 di la kókkaleek a kekku,  
 te naan: «Sànk nanu leen nag!  
 Bii bés lanu yàggoona séentu,  
 te noo ko fekke tey.»

17 Aji Sax jee def la mu nammoon,  
 moo sotal kàddoom  
 ga mu santaane woon janti démb.  
 Moo fàdd te yërëmul,  
 ba may noon bége leen,  
 te moo kaweel sa kàttanu bañ yi.

18 Askan waa ngi jooy jooyi xol  
 fi kanam Boroom bi.  
 Éy yaw tatay janq Siyon mu taaru mi,  
 sottil say rongooñ ni walum dex gud-  
 deek bëccëg;  
 bul nopplu, bul feral say rongooñ.

19 Jógal guddi, xaacu:  
 ndoortel wattub guddi, ngay yuri sab xol  
 nim ndox, jàkkaarlook Boroom bi.  
 Tàllal koy loxo, ngir sa bakkani doom,  
 yi xiif tax ne lasiim fi boppu mbeddoo  
 mbedd.

*Waa Yerusalem àddu na*

20 Éy Aji Sax ji, xoolal, seetal rekk  
 ki nga def nii!

Xanaa du ndey mooy dem ba yàpp doomam,  
doom ju mu sukk jur, mu wér péŋŋ!  
Xanaa du sarxalkat akub yonent lañuy bóom  
fi bérabu Aji Sax bu sell bi!

21 Mag ak ndaw a ngi ne lareet fi suuf ci mbedd yi;  
sama janq jeek sama xale yu góor yi tëdd,  
fàddoo saamar.  
Yaa rey ci sa bésub mer,  
yaa rendi te yërëmoo.

22 Yaa woote ni su doon bésu màggal, tiitaange dar kepp ma.  
Bésub merum Aji Sax ji, kenn rëccul, kenn muccul.  
Doom yi ma jur, yar leen,  
noon bi fàkkas leen!

### 3

#### *Nit a ngi tawat*

1 Man maay nit ki gisu naqar, naqar wu ko yarub sànjum Aji Sax ji tég.

2 Man la jañax, te lëndëm la ma doxloo, dug leer.

3 Man donŋ lay yen aka yenaat loxoom, bésoo bés.

4 Moo ràppal sama der ak samaw suux, tas samay yax.

5 Moo tabax fi sama kaw, tanc ma, gawe ma tooke ak coono.

6 Bérab yu lëndëm la ma dëël, ni ña dee bu yàgg.

7 Moo ma ñag ba manumaa bëtt, te jéng yu diis la ma jéngé.

8 Su ma yuuxoo, woote wall it, mu tanqamlu samag ñaan.

9 Ay doji yett la ñage samay yoon, te moo lajjal samay ñall.

10 Moo di segg mu may tëru, di gaynde gu waafe làqukaayam.

11 Samaw yoon la ma wàcce, xotat ma, tumurànkeel ma.

12 Moo ma bankal xalaam, diire mag fittam.

13 Sama xóotey xol la soqil ay fittam.

14 Maa mujj di reetaanukaayu bokk yépp, di seen woyu bés bu nekk.

15 Moo ma reggal wextan, màndal ma lu mel ni xay.

16 Yéyloo na may doj, dëggaate ma ci pënd bi.

17 Jàmmi xol a ma réer, ma fàtte sax luy mbégte.

18 Ca laa ne sama doolee (/muñukaaya/darajaa) jeex!  
ak sama yaakaar ci Aji Sax ji.

19 Baal xel sama naqar ak sama tumurànke,  
wii wextan akug tooke!

20 Dama ciy xalaat aka xalaataat, sama xol jeex tàkk!

21 Waaye li may dëkke bàyyi xel, ba dese yaakaar mooy lii:

22 Aji Sax ji, ngoram du dakk, te yërmandeem du jeex.

23 Xanaa di yeeslu jant bu nekk. Kee bare kóllère!

24 «Samab séddoo, Aji Sax jee»  
la sama xol wax,  
te moo tax ma di ko xaar.

25 Aji Sax jee baax ci ñi ko yaakaar, baax ci ki koy sàkku.

26 Li baax mooy muñ, xeremluy xaar wallu Aji Sax ji.

27 Li baax ci nit mooy nga nangoo muñ ba ngay ndaw.

28 Bu la Aji Sax ji tegee nattu, berul te muñ.

29 Dëppal sa kanam ci suuf, jombul yaakaar nuyoo.

30 Dékkal ub lex ku lay mbej, di la tifaari saaga, ba nga tooy.

31 Boroom bi déy du la wacc ba fàww.

32 Bu la tegee naqar it, yërëm la, ngoram a ni baree.

33 Du bannexam lay tege coono, aka naqaral doom aadama.

34 Bu ñuy dëggaate mboolem ñi ñu tëj  
cim réew,  
35 di jalgati yelleefu nit fi kanam Aji Kawe  
ji,  
36 di been dëgg cib layoom,  
Boroom bi da ko dul gis?

37 Ana ku wax, mu am,  
te Boroom bi dogalu ko?  
38 Muy lu baax, di lu aay,  
du Aji Kawe jeey àddu, amal?  
39 Kuy dund, ana loo deeti jàmbat,  
bu ñu la añalee sa bàkkaar?

40 Nan càambar, ba xoolaat jikko yi  
te dellu ci Aji Sax ji.  
41 Nan tàllal sunu xol ak sunuy loxo  
Yàlla ja fa asamaan,  
42 noo tooñ, noo fippu,  
ba tax yaw jëggalewoo.

43 Sam sànj nga làmboo, topp nu,  
di rey te ñéebloo,  
44 aw niir nga sàngoo,  
ba ag ñaan du ko jàll.  
45 Mbuubitum sën nga nu def  
fi biir xeet yi.

46 Sunu noon yépp a nuy waxal,  
47 tiitaange ak pax dikkal na nu,  
ak yàquteek sànkute.  
48 Saay gët a ngi wal ndax sama askan  
wi rajaxoo.

49 Saay gët a ngi rogalaat, du fer, du ñiis,  
50 ba keroog Aji Sax ji séentoo asamaan,  
ba gis.  
51 Bi ma gisee li dal jigéeni dëkk bi yépp,  
la sama xol jeex.

52 Ñi ma bañ ci dara ñoo ma kèpptala  
kèpptal  
ni picc.  
53 Cib teen lañu ma tàbbal, ube kow doj,  
te may dund,  
54 ndox ma mëdd ma,  
ma ne: «sàнку naa.»

55 Aji Sax ji, fa xóotey pax ma  
laa la wooye  
56 Sama baat nga dëgg, ma ne la:

«Bul fattal sab nopp, samay onk  
ak samay yuux.»  
57 Bés ba ma la wooyee nga dikk,  
ne ma: «Bul tiit.»

58 Boroom bi, yaa sàmm sama àq,  
yaa jot sama bakkan.  
59 Aji Sax ji, yaa gis ni ñu ma tooñe,  
jox ma sama àtte.  
60 Yaa gis seen mboolem mébetu feyu,  
seen mboolem pexe yi ñu may lalal.

61 Aji Sax ji, yaa dëgg seeni kókkalee,  
ak mboolem pexe yi ñu may lalal.  
62 Ci man la noon yiy diisoo aka déeyoo,  
bés bu nekk.  
63 Xoolal, bu ñu toogee ak bu ñu jógee,  
man lañuy léeboo.

64 Aji Sax ji, jox leen seenub añ,  
seen kemu liggéeyu loxo.  
65 Dërkiisalal seen xol (Tegleen njàqarey  
xol / Muural seenum xel.)  
na leen sag alkànde ñeel.  
66 Toppe leen sa mer, te nga sàнке leen  
mboolem fu asamaanu Aji Sax ji tiim.

#### 4

##### *Ku mucc xare wax na*

1 Ndeysaan, wurus wa giim na!  
Ngëneelu wurus soppiku na.  
Doj yu sell yaa wasaaroo,  
ca boppu mbedd yépp.  
2 Doomi Siyon yu góor yu jar ya!  
Wurus lees leen daan nàttablee,  
ndeysaan tey, ñu jàppe leen ni njaqu ban  
lu tabaxkatu njaq liggéeye loxoom.

3 Ag till sax joxe na weenam,  
nàmpal doomam,  
te sama bokk yi mujj néeg  
ba mel ni bànjóolig màndiñ.

4 Luy nàmp a nga mara mar,  
ba làmmiñ taqoo denqleñ.  
Gone yaa ngi ñaan mburu,  
te kenn daggalu leen.

5 Ñi daan xéewloo ay bernde,  
tey ñoo xiif, ne lasar ca mbedd ya.  
Ña yaroo woon yérey tànneef,

tey ñoo goore jalu mbuubit.

<sup>6</sup> Sama ñaawtéefu askan wee màgg,  
ba raw ñaawtéefu waa Sodom\*,  
dëkk ba jekki jàllarbiku,  
te loxo laalu ko.

<sup>7</sup> Sunu kàngam ya setoon wecc,  
seen yaram mucc gàkk,  
di lèrxat bay tàkk,  
wér péññ, leer nàññ.

<sup>8</sup> Tey ñu gëna lëndëm bànqanoos,  
xàmmeesu leen ci mbedd yi,  
ñu ngi lax, di yaxi neen,  
der wow koññ ni matt!

<sup>9</sup> Ña saamar rey a gënu demin  
ña deeye xiif,  
jeex tàkk, ne lasar,  
ndax ñàkk meññatum tool.

<sup>10</sup> Ndey ak xolu njureelam,  
moo togge loxoom, doomu boppam,  
def ko njëlam,  
ci sama biir toskareg askan wi!

<sup>11</sup> Aji Sax jee xëpp am sàñjam,  
sotti tàngooru meram,  
moo jafal sawara fi Siyoñ,  
ba xoyom kenu ya.

<sup>12</sup> Du benn buur fi kaw suuf bu gëmoon,  
du kenn ci mboolem waa àddina  
ne bañ akub noon dina dem  
ba bëtt bunti Yerusalem.

<sup>13</sup> Seen bàkkaar yonent yaa,  
seen ñaawtéefi sarxalkat yaa;  
ñoo tuur fa digg dëkk ba  
deretu aji jub ñi.

<sup>14</sup> Ña ngay tēñëx-tēñëxi  
niy gumba ci mbedd yi,  
deret ja sobeel leen ba maneesula laal  
seeni yére.

<sup>15</sup> Ñoom lañuy gëdd naan:

\* **4:6** 4.6 Sodom: seetal ci *Njàlbéen ga* 19.24-25. † **4:21** 4.21 Edomeen ñaa nga bàyyikoo fa bëj-saalumu Yuda jàpp penku. Ñu ngi soqikoo ci Esawu, magu Yanqóoba, kon bokki Israyil lañu woon, waaye dañoo faroon ak noonni Israyil.

«Soreleen nu, nit ñu sobewu ñi!  
Soreleen, soreleen, buleen nu laal.»  
Ñu daw di tambaambalu ba ca yeneen  
xeet;  
ñooña ne leen: «Dootu fii!»

<sup>16</sup> Aji Sax ji ci boppam moo leen tasaare,  
faaleetu leen;  
cér lees séddul sarxalkat,  
te teraleesul mag.

### *Waa Yerusalem àddu na*

<sup>17</sup> Ba tey sunu gët a ngi giim,  
ndax ndimbal lu nuy séentu ci dara.  
Fa sunuy tata lanu séentoo wenn xeet  
wu nu manula wallu.

<sup>18</sup> Sunuy tànkk lees di topp,  
ba manatunoo daagoo sunuy mbedd;  
sunu bés jege,  
sunu àpp di matal,  
sunu saa taxaw!

<sup>19</sup> Ñi ñuy dàqa gëna gaaw ay jaxaay,  
ci kaw tund yi lañu nu ne dann,  
màndiñ mi, ñu di nu fa tëroo.

<sup>20</sup> Ki nuy noyyee, Buur bi Aji Sax ji fal,  
ca seeni yeer la tance,  
te nu noon ci keppaaram lanuy dëkke  
fi digg xeet yi.

### *Yeremi àddu na*

<sup>21</sup> Bégleen te bannexooy,  
yeen Edomeeni† réewum Ucc,  
ci yeen it la kaasu mbugal di jàllsi,  
ngeen mândi, futteeku, ne dunñ.

<sup>22</sup> Yaw Siyoñ, sa mbugal mat na,  
deesatu la yóbbu ngallo;  
yaw Edom laa ne, Aji Sax jee lay fey  
sa ñaawtéef,  
feeñal say bàkkaar.

## 5

### *Yeremee ngi ñaan*

<sup>1</sup> Éy Aji Sax ji, bàyyil xel li nu dal,  
xoolal, gisal sunu toroxte!

<sup>2</sup> Sunu suuf toxu ciy jaambur,

sunuy kër ñeel ay doxandéem.

<sup>3</sup> Baay dëddu, nu diy jirim;  
ndey dib jëtun.

<sup>4</sup> Sunum ndox, xaaalis lanu koy feye, naan,  
sunu matt ak njégam la mu nuy dikke.

<sup>5</sup> Sunuw loos lañu ràng,  
nu loof, te noppaleesu nu.

<sup>6</sup> Nu nangul Misra,  
nangul Asiri ngir ab dund.

<sup>7</sup> Sunuy maam a moyoon, tey nekkatuñu;  
nun, noo gàddu seeni mbugal.

<sup>8</sup> Ay surgaa nu yilif, te amunu  
ku nu wallu ci seen loxo.

<sup>9</sup> Bu nu lekkee, sunu bakkan lanu jaay,  
nde saamar a ngi ci màndiñ mi.

<sup>10</sup> Sunu yaram nib taal la tange  
ndax tangoorub xiif.

<sup>11</sup> Jigéeni Siyoñ lañuy tédde,  
ak janqi dëkki Yuda.

<sup>12</sup> Kàngam yi, ñu jàpp, wékk;  
te mag ñi, teraleesu leen.

<sup>13</sup> Waxambaane yee yenu doji wolukaay,  
gone yu góor yi sēfoo sayi matt, di tērēf.

<sup>14</sup> Mag dakkal na jataayu pénc,  
te waxambaane talatula xalam.

<sup>15</sup> Xol nux-nuxeetul,  
te ay rongooñ a wuutuy pooj.

<sup>16</sup> Sunu mbaxana foq na!  
Wóoy ngalla nun ñi moy!

<sup>17</sup> Lee jeexal sunu xol,  
lii moo nu jooyloo, ba gët giim:

<sup>18</sup> tundu Siyoñ wi gental,  
ba till yi di fi daagoo.

<sup>19</sup> Yaw Aji Sax ji, yaay toog ba fàww,  
sab jal, sèt ba sētaat.

<sup>20</sup> Ana lu waral nga fàtte nu fàww,  
ba nu jant yu yàgge nii?

<sup>21</sup> Éy Aji Sax ji, délloosi nu fi yaw, nu  
dellusi,

yeesalal sunuy jant, mu mel na woon.

<sup>22</sup> Xanaa doo nu wacca wacc,  
mere nu mer mu amul kemu?

## Esekiyel

### *Esekiyel daje naak leeru Aji Sax ji*

<sup>1</sup> Am na bés, mu yemook sama fan-weereelu at, juróomi fan ca ñeenteelu weer wa, booba maa nga bokkoon ca ña ñu toxal ca tàkkal dexu Kebar\*. Asamaan daa ubbiku, ma daldi gis ay peeñuy Yàlla.

### *Bindkat a ngi joxe tegtal ca moomu peeñu*

<sup>2</sup> Juróomi fani weer wa moo yemook juróomi at gannaaw ba ñu toxalee Buur Yowakim. <sup>3</sup> Kàddug Aji Sax ji moo dikkal Esekiyel doomu Busi, sarxalkat ba fa réewum Kaldeen ña ca tàkkal dexu Kebar. Te foofa la loxol Aji Sax ji dikke fa kawam.

### *Nii la peeñu ma bindoo*

<sup>4</sup> Naka laa xool rekk, ngelaw lu réy jekki dikke bëj-gànnar, ànd ak niir wu mag, sawara di ca fettaxe, ag leer gu ne ràññ wër ko; digg ba mel ni weñ guy tàkk. <sup>5</sup> Digg ba, jëmmi ñeenti bindeef a ca feeñ yu ame melokaanu nit. <sup>6</sup> Ku ci nekk am na ñeenti kanam ak ñeenti laaf. <sup>7</sup> Seenì tànk daa jub, téstèn ya mel ni weyi sèllu di melax ni xàñar bu ñu jonj. <sup>8</sup> Seen laaf, loxoy nit a nga ca suufam ci seen ñeenti wet yépp, ñoom ñeent ñépp ak seeni kanam ak seeni laaf. <sup>9</sup> Seen ñeenti cati laaf a ngay laale, te ku nekk man naa jubal màkk fépp fu genn kanam jublu te du jar muy warangiku. <sup>10</sup> Seen melokaanu kanam nag nii la bindoo: ku ci nekk am nga kanamu nit fa féete kanam ak kanamu gaynde ci sa ndijoor. Ku ci nekk itam am nga kanamu yékk fi sa càmmoñ ak kanamu jaxaay fa féete gannaaw. <sup>11</sup> Seenì kanam a ngoogu. Ku ci nekk sa ñaari laaf a jëm kaw, di laal sa laafi moroom. Sa ñaari laaf yi ci des sàng sa yaram. <sup>12</sup> Ku nekk man naa jubal màkk fépp fu genn kanam jublu. Fépp fu Noowug Yàlla jublu, ñu jublu fa te

warangikuwuñu. <sup>13</sup> Jëmmi bindeef yaa nga am melow xali sawara yu yànj, mel niy jum, sawara way dem ak dikk ci seen biir. Sawara waa nga ne ràññ, ay melax di ca fettaxe. <sup>14</sup> Bindeef yaa ngay naaw, di dem ak a dikk, mel ni melax.

<sup>15</sup> Naka laa xool, daldi gis ay mbege fi suuf, mbege mu ci nekk feggook menn mbindeef, mook ñeenti kanamam. <sup>16</sup> Mbege yaa ngay nirook peru kirsolit, ci melokaan ak ci bind. Ñoom ñépp a niroo. Seen melokaan ak seen bind daa mel ni, mbege mu ci nekk, mbegee nekk ca biiram, <sup>17</sup> mbege yay dawé ñeenti wet te warangikuwuñu. <sup>18</sup> Taxawaayu mbege ya daa réy ba raglu te mu ci nekk ay gèt la sàngoo ba daj. <sup>19</sup> Bu bindeef ya dawee, mbege ya feggook ñoom daw; bu ñu naawee, mbege ya naaw. <sup>20</sup> Fu noo gi wale jublu fa rekk, fa lañu jëm, mbege ya jógandook ñoom, ànd ak noo gi. Noowal boroom bakkan yi daal moo nekk ci mbege yi. <sup>21</sup> Bu ñu dawee, ñu daw; bu ñu taxawee, ñu taxaw. Bu ñu jógée ci suuf, yékkatiku, ñu ànd ak ñoom yékkatiku. Noowal boroom bakkan yi daal moo nekk ci mbege yi.

<sup>22</sup> Lu mel nib dénd a tiim boppi bindeef ya, raglu, leer nàññ ni doju kiristaal†. <sup>23</sup> Mbindeef mu ci nekk sa yenn ñaari laaf a ngi ci suufu dénd bi, tàlli, dékkaarloo; ñaari laaf yi ci des sàng sa yaram. <sup>24</sup> Bu ñuy naaw, may dégg seen coowal laaf yi, mu mel ni géej mbàmbulaan, melati ni kàddug Aji Man ji, di saf riirum xare. Bu ñu taxawee, daldi wàcce seeni laaf. <sup>25</sup> Saa yu ñu taxawee ba wàcce seeni laaf nag, ag kàddu di jollee ca kaw dénd ba ca seen kaw bopp ya.

<sup>26</sup> Ca kaw dénd ba tiim seeni bopp, ba tey, am na luy nirook ngànguney peru safiir, te jëmmu nit nekk ca kawa kaw lay nirook ngàngune. <sup>27</sup> Ma gis nag lu mel ni weñ guy tàkk, wër ko; dale ca lay niru ndigg la, jëm kaw; daleeti ca lay niru ndigg la, jëm suuf. Ma gis lu mel ni sawara akug leer wër ko. <sup>28</sup> Mu mel

\* **1:1** 1.1 dexu Kebar a nga woon ca Babilon, ga buuram Nabukodonosor dencoon bànni Israyil, gannaaw ba mu leen jàppee ba yóbbu leen fa ngàllo. Yonent Yàlla Esekiyel ab sarxalkat la fa woon ca biir bokki bànni Israyilam.

† **1:22** 1.22 kiristaal daa mel ni weer bi ñuy defare ab kaas.

ni xon ci biiri niir, bésuub taw. Loolooy melokaanu leer ga ko wër. Muy melokaan muy jëmmal leeru Aji Sax ji. Naka laa ko gis, daldi ne gurub, dëpp sama kanam fi suuf. Ma dégg nag kàddu gu jib.

## 2

### *Aji Sax ji yebal na Esekiyel*

<sup>1</sup> Ba loolu amee boroom kàddu ga ne ma: «Yaw nit ki, jógal taxaw, ma wax la.» <sup>2</sup> Naka la ma wax loolu, ngelaw solu ma, ne ma yékkét, ma taxaw, di dégg kiy wax ak man. <sup>3</sup> Mu ne ma: «Yaw nit ki, maa lay yebal ci bànni Israyil, xeeti fippukat yi fippu ci sama kaw; ñook seeni maam dañu maa masa tooñ ba bésuub tey jii. <sup>4</sup> Ci nit ñu dëgër bopp te dërkiis laa lay yónni. Wax leen, ne leen: “Lii Boroom bi Aji Sax ji da koo wax.” <sup>5</sup> Ñoom nag, su ñu la déglóok su ñu gántalee ndax kërug fippukat gi ñu jikkowoo, dinañu xam ne ab yonent a ngi ci seen biir. <sup>6</sup> Waaye yaw nit ki, bu leen ragal, bul ragal seeni wax. Xam naa ne ay taxas aki dég a lay wër, nga toog ci kaw jii. Waaye bul ragal seeni wax te bul tiit seen kanam doonte kërug fippukat lañu. <sup>7</sup> Nanga leen àgge samay wax, ñu déglóok ñu gántal, nde ay fippukat lañu. <sup>8</sup> Yaw nit ki nag, déglul lii ma lay wax. Bul fippu ni kërug fippukat gii. Sexal, te lekk li ma lay jox.»

<sup>9</sup> Naka laa xool, yem ci loxo bu ñu ma tàllal. Ndeke taxañub téere moo ci nekk. <sup>10</sup> Mu tàqarñi ko fi sama kanam, muy lu ñu bind biir ak biti, mbind ma di kàdduy jooy aki onk aki yuux.

## 3

### *Aji Sax ji dooleel na Esekiyel*

<sup>1</sup> Mu ne ma: «Yaw nit ki, lii ngay gis, lekk ko. Lekkal taxañ bii te dem wax ak waa kër Israyil.» <sup>2</sup> Ma ña, mu leel ma taxañ ba. <sup>3</sup> Mu ne ma: «Yaw, nit ki, lekkal taxañ bii ma la jox, ba suur këll.» May lekk, mu neex ni lem.

<sup>4</sup> Mu ne ma: «Yaw nit ki, demal ba ca waa kër Israyil, te nga àgge leen samay wax. <sup>5</sup> Du ci waaso wu xóotu làkk te diisu làmmiñ lees la yebal. Ca waa kër Israyil nga jëm. <sup>6</sup> Bare na waaso yoo

xamul seeni wax, yu xóotu làkk te diisu làmmiñ. Te su ma la yebaloon ci ñoom, ñu déggal la. <sup>7</sup> Waaye waa kër Israyil duñu la nangoo déggal, ngir nanguwuñu maa déggal; ndax waa kër Israyil gépp a dëgër bopp te dërkiis. <sup>8</sup> Maa ngii di la may kanam gu ñemee ni seen kanam, ba nga dëgër bopp ni ñoom. <sup>9</sup> Jamaa moo raw doj te ni laay dëgërle sa bopp. Bu leen ragal, bu leen tiit, li ñuy kërug fippukat yépp.»

<sup>10</sup> Mu teg ca, ne ma: «Yaw nit ki nag, mboolem li ma lay wax, déglóok ko nopp, te teewloo ko xel. <sup>11</sup> Nanga dem ba ca sa bokki ngallo ga, nga wax leen, ñu déglóok ñu gántal, ne leen: “Lii Boroom bi Aji Sax ji da koo wax.”»

<sup>12</sup> Ci kaw loolu ngelaw ne ma siféet, may dégg sama gannaaw, riirum kàddu gu xumb gu ne: «Cant ñeel na tedngay Aji Sax ji fi màkkaanam.» <sup>13</sup> Mu ànd ak riirum laafi bindeef yay fenqoo, ak coowal mbege ya ñu feggool, muy riir mu xumb. <sup>14</sup> Ba loolu amee ngelaw ne ma siféet, yóbbu. Maa ngay deme naqar ak xol bu tàng, te loxol Aji Sax ji diis gann ci sama kaw. <sup>15</sup> Ma àgg ba ca ngállóg Tel Abib, ga dëkke tàkkal dexu Kebar. Foofa ñu dëkk laa toog, jommi ci seen biir diiru juróom ñaari fan.

<sup>16</sup> Ba juróom ñaari fan ya matee, kàddug Aji Sax ji dikkal ma, ne ma: <sup>17</sup> «Yaw nit ki, tabb naa la wattukatub waa kër Israyil. Nangool sama gëmmiñ kàddu, artool ma leen ko. <sup>18</sup> Su ma nee nit ku bon ki: “Dee rekk ay sa àtte,” te fekk àrtuwoo ku bon ka, waxuloo lu ko waññee ca mbonam ga, ba mu mucc, ku bon kaay dee ndax tooñam, waaye bakkanam yaw laa koy laaj. <sup>19</sup> Waaye su dee yaa àrtu ku bon ki te taxul mu waññiku, dëddu mbonam nag, tooñu boppam a ko reylu, waaye yaw musal nga sa bopp. <sup>20</sup> Su dee boroom njekk bu dëpp yoonu njekkam, di def ndëngte, maa koy gállankoor, mu dee. Soo ko àrtuwul ndax bàkkaaram, dina dee, te deesul bàyyi xel njekkal démbam la, waaye bakkanam, yaw laa koy laaj. <sup>21</sup> Waaye nag su dee yaa àrtu boroom njekk bi,



ba tax bàkkaaratul, dina dund déy, ndax kàddug àrtu ga, te yaw it musal nga sa bopp.»

### *Tēju te tëlee wax misaal la*

<sup>22</sup> Gannaaw loolu loxol Aji Sax ji dikk na fa ci sama kaw. Mu ne ma: «Génnal ba ci joor gi, ma wax faak yaw.» <sup>23</sup> Ma génni ba ca joor ga. Ndeke jëmmu leeru Aji Sax jaa nga foofa, taxaw mel ni jëmmu leer, ga ma gisoon ca tàkkal dexu Kebar. Ma ne gurub, dëpp sama kanam fa suuf. <sup>24</sup> Ci kaw loolu ngelaw solu ma, ne ma yékkét, ma taxaw. Mu wax ak man, ne ma: «Doxal, tëjuji sa biir néeg. <sup>25</sup> Te kat yaw nit ki, dees na la fa takke ay buum, yeew la ba dootoo mana génn, dem ci nit ñi. <sup>26</sup> Sa làmmiñ laay taqal ci sa denqleñ, nga luu ba doo leen mana yedd, ndax kërug fippukat lañu. <sup>27</sup> Waaye bu ma amee lu ma lay wax, dinaa ubbi sa gémmiñ. Su ko defee nga ne leen: “Lii Boroom bi Aji Sax ji da koo wax.” Kuy dégg, dégg; kuy gântal, gântal. Ndax kërug fippukat lañu.»

## 4

### *Esekiyel yégle na gaw ba*

<sup>1</sup> Aji Sax ji ne: «Yaw nit ki, jëlal móolu ban, teg fi sa kanam, nga rédd ci ab dëkk, mu misaal Yerusalem. <sup>2</sup> Nga gaw ko, tabax ab gawukaay bu ko wër, sëkk ko, ba noppi sàkkal ko ay dali xare, wërle ko dénki dàjjikaay ba mu daj. <sup>3</sup> Su ko defee nga jël saafukaayu weñ, teg ko, mu mel ni miiru weñ bu dox sa digganteek dëkk bi, te nga janook dëkk bi. Noonu nga koy gawe, mu gawu. Loolu di misaal, ñeel waa kër Israyil.

<sup>4</sup> «Gannaaw loolu nanga tédde sa wetu càmmoñ. Googu wet ngay gàddoo ayu waa kër Israyil. Diiru fan yi ngay tédde wet ngay gàddoo seen ay. <sup>5</sup> Man nag àppal naa la limu fan yu tembook limu ati ayu waa kër Israyil\*, muy ñetti témeéri fan ak juróom ñeent fukk (390) yooy tegoo ayu waa kër Israyil. <sup>6</sup> Boo noppee ci loolu nanga tédde wetu ndijoor. Noonu

ngay gàddoo ayu waa kër Yuda diiru ñeent fukki fan, at mu nekk, ma defal la ko benn fan. <sup>7</sup> Te nga jàkkaarlook gawub Yerusalem, tàllal ko sa pèrègu neen, daldi biral waxyu ci kawam. <sup>8</sup> Te kat dinaa la yeewe ay buum ngir doo mana walbatiku tédde geneen wet, ba keroog ngay sottal say fani gaw.

<sup>9</sup> «Te kat nanga sàkk bele ak lors ak ñebbe ak làntin ak dugub ak bele bu dëgër. Nga boole lépp ci lenn ndab. Moom ngay lekk diiru fan yi ngay tédde wet. Diiru ñetti témeéri fan ak juróom ñeent fukk (390) nga koy dunde. <sup>10</sup> Sa njëlu bés nag na doon ñaar fukki siikal† yooy lekk bés ak bés. <sup>11</sup> Sa ndoxum naan it dees koy natt, mu tollook benn liitar bés bu nekk. <sup>12</sup> Mburum lors ngay lekk te jonkani nit nga koy lakke, nit ñiy gis.» <sup>13</sup> Aji Sax ji teg ca ne: «Noonu la bànni Israyil di lekkeji seen ñamu sobe ci biir xeet yi ma leen di tasaareji.»

<sup>14</sup> Ma ne ko: «Āhā! Boroom bi Aji Sax ji, man de masumaa sobeel sama bopp. Muy lu médd, di lu aw rab fàdd, masuma koo lekk ba may gone ba tey. Wenn yàpp wu daganul masula dugg sama gémmiñ.» <sup>15</sup> Mu ne ma: «Baax na, kon defal naa la ko ndéef, mu wuutu jonkanu nit, dinga lakke ko sa mburu.» <sup>16</sup> Mu neeti ma: «Yaw nit ki, maa ngii di dagge fi Yerusalem lépp luy dugub. Ci biir njàqare lañuy lekke as mburu te xol bu jeex lañuy naane siitum ndox. <sup>17</sup> Su ko defee ñu ñàkk lekk, ñàkk naan, di xoolante gëti tiitaange, jeex tàkk ndax seeni ñaawtéef.»

## 5

### *Dogal dikkal na Yerusalem*

<sup>1</sup> «Yaw nit ki, jëlal saamar bu ñaw, nga def ko sa saatus watukaay te nga wate ko sa bopp ak sa sikkim. Nga jël ab màndaxekaay, séddalee ko kawar gi ay cér. <sup>2</sup> Benn cér bi, nanga ko lakk ci digg nataalu dëkk bi, gannaaw bu fani gaw bi matee. Beneen cér bi, nga dóore ko

\* **4:5** 4.5 Gannaaw ba Buur Suleymaan nelawee, am réewam xàjjalikoo na ñaari pàcc, benn ba di Israyil ca bëj-gànnar, ba ca des di Yuda ca bëj-saalum. † **4:10** 4.10 ñaar fukki siikal mooy ñaar témeéri garaam.

saamar bi, kawar gi tasaaroo fi wër dëkk bi. Ñetteelu cér bi, nga sànni ko ci ngelaw li, man ma toppe ko saamar. <sup>3</sup> Waaye nanga sàkk tuuti ci kawar gi, fas ci sa lafu mbubb. <sup>4</sup> Nga dellu sàkk cooca, sànni ca sawara sa, lakk ko. Ca la sawaray jóge, tàkkal mboolem waa kër Israyil.

<sup>5</sup> «Boroom bi Aji Sax ji dafa wax ne: Yerusalem a ngoogu. Ci digg xeet yi laa ko teg, réew yi wër ko. <sup>6</sup> Ñoo gàntal sama àttey yoon, ba gëna bon xeet yi, gàntal samay dogal, ba gëna bon réew yi leen séq. Xalab nañu sama àttey yoon te jëfewuñu samay dogal.

<sup>7</sup> «Moo tax Boroom bi Aji Sax ji dafa wax ne: Gannaaw seen reewande wees na reewandey xeet yi leen séq, samay dogal, jëfewuleen ko; sama àttey yoon, sàmmuleen ko; sàmmuleen sax àttey xeet yi leen wër, <sup>8</sup> kon nag Boroom bi Aji Sax ji dafa wax ne: Maa ngii ci seen kaw, man itam. Maay wàcce fi seen biir ay mbugal, xeet yi teg ci seeni gët. <sup>9</sup> Maay def fi seen biir lu ma masula def te дума defati lu ni mel, ndax seen mboolem jëf ju siblu. <sup>10</sup> Moo tax baay dina yàpp doom, doom yàpp baay fi biir Yerusalem. Maay wàcce ay mbugal fi yeen, te maay tasaare seenu ndes wépp fépp fu ngelaw jublu.

<sup>11</sup> «Moo tax, dogu naa ci man miy dund, kàddug Boroom bi Aji Sax jee, gannaaw yeena def seen wépp njombe ak seen jépp jëf ju siblu, di sobeel sama bérab bu sell bi, man itam, maa leen di wat nel te дума leen xool bëtu ñéebli, дума leen ñeewante. <sup>12</sup> Seen ñetteelu xaaj, mbas lañuy deeye mbaa xiif bu leen di sànk ci biir dëkk bi. Beneen ñetteelu xaaj bi, saamar lañuy fàddoo ci seen dig-digal bi. Xaajub ñetteel bi ci des, fépp fu ngelaw jublu laa leen di tasaare, te saamar laa leen di toppe. <sup>13</sup> Maa leen di ñaccal sama mer, sottil leen sama xadar ba giif, te bu ma leen ñaccalee sama mer, ñu xam ne man Aji Sax ji, maa waxe sama fiiraange. <sup>14</sup> Yeen waa Yerusalem maa leen di gental, sewal leen ci biir xeet yi leen séq, ku fi romb, di ci gis. <sup>15</sup> Keroog bu ma leen wàccееlee àtteb mer ak xadar ak dumay xadar, seen dëkk beey doon

dëkkub toroxte bu ñuy kókkali, dëkk bu gental buy yedd xeet yi leen séq. Man Aji Sax ji maa ko wax.

<sup>16</sup> «Ñoom bu ma leen soqee fitti xiif yu aay, fitti faagaagalkat yooyu may fitt ngir faagaagal leen, xiif laa leen di yokkal, ba dagge dugub fi seen biir. <sup>17</sup> Maay yebal ci seen kaw ab xiif ak rabi àll yu leen di xañ ay doom; mbas ak deret ju tuuru gane leen, saamar, ma indil leen. Man Aji Sax ji, maa ko wax.»

## 6

### *Tuur yi indi na mbugal*

<sup>1</sup> Gannaaw loolu kàddug Aji Sax ji da maa dikkal, ne ma: <sup>2</sup> «Yaw nit ki, jàkkaarloor ak tundi Israyil, nga waxal leen waxyu. <sup>3</sup> Neel:

“Yeen Tundi Israyil,

Dégluleen kàddug Boroom bi, Aji Sax ji.

Boroom bi Aji Sax ji moo wax lii,

jëme ci tund wu mag ak wu ndaw

ak xunteeku xur, ne:

Maa ngi nii di leen wàcceel saamar,

maay màbb seen jaamookaayi tuur,

<sup>4</sup> seen sarxalukaay gental,

seen suurukaayi tuur tasaaroo,

ma tëral seeni nit ñu ñu bóom fi seen kanam kasaray tuur.

<sup>5</sup> Maay tegal seen kasaray tuur néewi bànni Israyil.

Maay wasaare seeni yax fi wër seeni sarxalukaay.

<sup>6</sup> Fu ngeen mana sance,

seeni dëkk ay gental,

seen jaamookaayi tuur wéet,

seeni sarxalukaay yàqu, gental,

seen kasaray tuur rajaxoo ba jeex,

seen suurukaayi tuur màbb,

seeni liggéey réer.

<sup>7</sup> Dees na leen bóom,

ba ngeen xam ne maay Aji Sax ji.

<sup>8</sup> Waaye maay déeg lenn ci yeen,

ñu rëcc saamar, tasaaroo ci xeet yi,

ci biir réewi jaambur.

<sup>9</sup> Su boobaa seenu ndes di ma fàttlikoo

fa biir xeet ya ñu leen yóbbu njaam,

fa may jeexale seen xolu gànc, bi ma

dëddu,

ak seen gët yi ñuy gànctook seeni tuur.

Su boobaa ñu jéppi seen bopp  
ndax lu bon li ñu def ak seen jépp jéf ju  
siblu.

<sup>10</sup> Dinañu xam ne maay Aji Sax ji,  
te du neen laa leen artoo,  
ba ma leen di tèkkoo mii musiba.

*Aji Sax jeey am ndam*

<sup>11</sup> «“Boroom bi Aji Sax ji dafa wax ne:  
Fenqeel say loxo, dóor sa tànk fi suuf te  
ne: ‘Ñaw!’  
ci mboolem jéfi waa kër Israyil ju bon ju  
siblu.

Saamar ak xiif ak mbas lañuy fàddoo.

<sup>12</sup> Ku sore deeye mbas,  
ku jege fàddoo saamar,  
ku ca mucce, deeye xiif,  
ma ñaccal leen sama xadar.

<sup>13</sup> Dingen xam ne maay Aji Sax ji,  
bu seeni néew nee xas fi seen biiri tuur,  
ak fi wër seeni sarxalukaay,  
ak kaw tund wu mag ak wu ndaw,  
ak mboolem ker garab gu naat,  
ak mboolem garab gu mag te sèq,  
fépp fu ngeen di taale cuuraay, ñeel seen  
mépp tuur.

<sup>14</sup> Maa leen di dóor sama loxo,  
réew mi, ma gentel koo gentel,  
dale ko màndiñ ma ba Dibla,  
ak fépp fu ñu mana sance.  
Su boobaa ñu xam ne man maay Aji Sax  
ji.”»

## 7

*Jeexle dikk na*

<sup>1</sup> Gannaaw loolu kàddug Aji Sax ji da  
maa dikkal, ne ma: <sup>2</sup> «Léegi nag, yaw nit  
ki, Boroom bi Aji Sax ji dafa wax réewum  
Israyil ne ko:

“Jeex na tàkk!

Jeexal dikkal na ñeenti weti réew mi.

<sup>3</sup> Jeexal nga nag léegi!  
Maay yebal sama mer fi sa kaw.  
Maa lay mbugale say jéfin,  
yool la sa jépp jéf ju siblu.

<sup>4</sup> Duma la xool bētu ñéebalu,  
duma ñeewante.

Say jéfin laa lay yool,  
sa jéf ju siblu ji ci sa biir.

Su boobaa ngeen xam ne man maay Aji  
Sax ji”».

<sup>5</sup> Boroom bi Aji Sax ji dafa wax ne:  
«Céy wii ay, guléet wii ay!

Mu ngii di dikk.

<sup>6</sup> Jeexlee ngoog, jeexle dikk na,  
jekki, yewwul la.

Mu ngii, di dikk!

<sup>7</sup> Yaw nitu réew mee, sànkute dikkal na  
la.

Àpp mat,

bés dègmal,

tiitaange wuutu ca mbéx fa kaw tund ya.

<sup>8</sup> Du yàgg dara ma xépp la sama xadar,  
ñaccal la sama mer,  
mbugale la say jéfin,  
yool la sa jépp jéf ju siblu.

<sup>9</sup> Duma xool bētu ñéebalu,  
duma ñeewante.

Say jéfin laa lay yool

ak sa jéf ju siblu ji ci sa biir.

Su boobaa ngeen xam ne maay Aji Sax jiy  
dumaa.

<sup>10</sup> «Bés baa ngi, mu ngooguy dikk,  
sànkute sàqi na,  
yetu njubadee tóor,  
reewande jebbi.

<sup>11</sup> Fitnaa taxaw, di yet wuy dóoral coxor.

Seen lenn du des,

du seen mbooloo,

du seen alal,

du seen daraja.

<sup>12</sup> Àpp mat,

bés jege.

Bu ca jëndkat tala bég,

bu ca jaaykat tala naqarlu!

Am sànj a dikkal askan wépp.

<sup>13</sup> Bu jaaykat bi muccee it,

du jootaat ca njaayam.

Peeñu mi jëm ci askan wépp, daal, du  
toxu,

ku nekk ñaawtéefam lay dunde,

ba du leqliku.

<sup>14</sup> Liitu xareey jib, ba lépp jekk ngir xare,  
te kenn du xareji,  
samam sànj a dikkal askan wépp.

<sup>15</sup> Saamar biti,

mbas akub xiif ci biir,

ki ci àll bi deeye xare,

ki ci biir dèkk bi, xiif ak mbas rey ko.

<sup>16</sup> Ña rëcc, rawi ca tund ya,

waru pitaxi xur ya,

ñooy binneendoo ndax seeni tooñ.

17 Yoxo yépp yoqi,  
tànk tooy xepp.

18 Ñooy sol ay saaku di ko ñaawloo,  
seen yaram wépp daw,  
gépp kanam sèlmoo gâcce,  
bopp ya di nel yu set wecc.

19 Seen xalis, ñu sànni ci mbedd yi,  
seen wurus di leen saf sagaru sobe.  
Keroog bésub sànjum Aji Sax ja,  
du xalis, du wurus wu leen di xettli.  
Du leen fajal xiif,  
du leen reggal,  
xanaa tàbbal leen cig njubadi.

20 Ñoo doon sago seen gànjar gu yànj,  
di ci sàkk jèmmi tuur yu jara bañ te  
jomblu,  
ba tax ma defal leen ko sagaru sobe.

21 Maa koy teg ci loxoy doxandéem, ñu  
foqati ko,  
muy alal ju sagari niti àddina sèxëtoo,  
teddadil ko.

22 Maa leen di dummóoyu,  
maay bàyyi nit ñi teddadil sama ngëneelu  
bérab,  
ay sàcc a cay tàbbi, teddadil ko.

23 Waajal-leen càllala yi,  
tuur nañu deret ba réew mi fees,  
dëkk bi fees ak fitna.

24 Maay indi xeet yi gëna néeg,  
ñu nangu seeni kër,  
ma daldi sàggi sagu boroom doole yi,  
sobeel seen bérab yu sell.

25 Tiitaangee ngi dikk,  
ñuy sàkku jàmm, jàmm réer.

26 Ay ci kaw ay a ngi dikk,  
xibaar ci kaw xibaar,  
ñuy sàkku peeñum yonent ci neen,  
ndigalu yoon réer sarxalkat,  
pexe réer mag.

27 Buur dina tiislu,  
garmi làmboo séri ñaawlu,  
baadoolay réew mi di kat-kati.  
Seeni jëfin laay jëfeek ñoom,  
seeni àtte laa leen di àttee,  
ñu xam ne maay Aji Sax ji!»

## 8

### *Bokkaale feeñ na ca kër Yàlla ga*

1 Keroog juróomi fan, ca juróom benneelu weer wa, ca juróom benneelu at ma\*, damaa toog sama biir néeg, magi Yuda bokk ak man toog. Fa la loxol Boroom bi Aji Sax ji dal fi sama kaw.

2 Ma xool, yem ci jëmm ju ame melokaanu nit. Li ko dale fiy nirook lupp yi, jëm suuf, sawara la. Li dale ci lupp yi jëm kaw ame melokaanu leer, mel ni weñ guy tàkk. 3 Mu tàllal lu bindoo ni loxo, daldi sèq sama kawaru bopp, lenn ngelaw yékkati ma ba ca diggante kaw ak suuf, yóbbu ma ba Yerusalem ci biir peeñum Yàlla, ba ca buntu èttu biir kër Yàlla ba janook bëj-gànnar, fa ñu teg jëmmu bokkaale, jay sabab fiiraange. 4 Ma jekki gis foofa leeru Yàllay Israyil ca melokaanam, ma ma ko gise woon ca joor ga.

5 Mu ne ma: «Yaw nit ki, séenul wetu bëj-gànnar.» Ma séenu wetu bëj-gànnar, yem ca jëmmu bokkaale jooju féeteek bunt ba dendeek sarxalukaay ba, ca bëj-gànnaram. 6 Mu ne ma: «Yaw nit ki, gis nga li ñuy def, tojaange yu réy yi waa kër Israyil di def fii, ba di ma soreleek sama bérab bu sell bi. Te dinga gis tojaange yu gënatee màgg.»

7 Mu yóbbu ma ba ca buntu ètt ba, ma yem ci menn pax mu nekk ca miir ba. 8 Mu ne ma: «Yaw nit ki, ayca, gasal fii miir bi!» Ma gas rekk, gis ab jàllukaay. 9 Mu ne ma: «Jàllal, ba gis tojaange yu bon yi ñu fiy def.» 10 Naka laa jàll ba xool, yemuma ci lu moy ay nataal yu ñu ñaas ci miir bi bépp, di mboolem dundoot yuy ramm-rammi ci suuf, ak rab yu jara seexlu, ak mboolem jëmmi kasaray tuur yu waa kër Israyil di jaamu. 11 Juróom ñaar fukki magi kër Israyil a nga taxaw, janook nataal ya. Yaasaña doomu Safan a nga ca. Ku ci nekk a nga nàbb sab and, cuuraay la jolli. 12 Mu ne ma: «Yaw nit ki, du yaa gis li magi kër Israyil di def ci lëndëm gi, ku nekk ak fa ñu jagleel sa nataalu tuur. Ña nga naan: “Aji Sax ji gisu nu, Aji Sax ji wacc na réew mi.”» 13 Mu

\* 8:1 8.1 Mu yemook juróom benneelu at gannaaw ba Buur Yowakin duggee ngàllo.

dellu ne ma: «Te dinga gis tojaange yu gënatee màgg yu ñu nekke.»

<sup>14</sup> Gannaaw loolu mu yóbbu ma ba ca buntu kër Aji Sax ja féete bëj-gànnaar. Ndeke jigéen ñaa nga foofa toog, di jooy deewug tuur mu ñuy wax Tamus. <sup>15</sup> Mu ne ma, yaw nit ki, yaa ko gisal sa bopp! Te dinga gis tojaange yu gëna màggati yii.

<sup>16</sup> Mu yóbbu ma ba ca èttu biiru kër Aji Sax ji, ndeke foofa ca buntu néeg Aji Sax ji, diggante dal-luwaayu bunt baak sarxalukaay ba, lu wara tollook ñaar fukki nit ak juróom a nga fa, ñu won gannaaw bérab bu sell bi, jublu penku, di sukkal jant bi, dépp seen jë fi suuf.

<sup>17</sup> Mu ne ma: «Yaw nit ki, du yaa gis lii? Moonte tojaange gi waa kër Yuda di def fii doyu leen. Xanaa ñuy wasaare fitna ci réew mi, di gëna yékkati sama xol. Xoolal! Ñu ngooguy def jëfi yéefar, jël caru garab, di foon. <sup>18</sup> Man it maa leen di feye xadar. Duma xool bëtu ñéebalu, duma ñeewante. Dinañu yuuxu yuux yu réy, may dégg te duma leen faale.»

## 9

### *Rey nañu bokkaalekat yi*

<sup>1</sup> Gannaaw loolu Aji Sax ji àddu ca kaw, may dégg. Mu ne: «Yeen mbugalkati dëkk bi, kaayleen, te na ku nekk ñàbb sa ngànaayal reyukaay.» <sup>2</sup> Ca saa sa juróom benni góor jóge yoonu bunt ba féete kaw te janook bëj-gànnaar, ku nekk ñàbb sa ngànaayal reyukaay. Keneen a nga ca seen biir, ku sol ndimol lée, ak mbarum bindukaay ba ca ndiggam. Ñu dikk taxaw ca wetu sarxalukaayu xàñar ba. <sup>3</sup> Ci kaw loolu leeru Yàllay Israyil, ja woon ca kaw jëmmu malaakay serub ma, yékkatikoo fa, jubal buntu kër ga. Mu woo boroom ndimol lée baak mbarum bindukaay ba ca ndiggam. <sup>4</sup> Aji Sax ji ne ko: «Wëral dëkk bi, ci biir Yerusaleem. Foo gis kuy onk ak a binni, di ko naqarloo gépp tojaange gu ñu fiy def, nga rédd aw rédd ci jëem.» <sup>5</sup> Ba loolu wéyee mu wax ak ña ca des, may dégg. Mu ne leen: «Toppleen ko ca biir dëkk ba te ngeen rey. Buleen xool bëti ñéebalu, buleen ñeewante. <sup>6</sup> Mag ñu góor ñeek xale yu

góor yi, jeeg jeek janq ji, ba ci tuut-tànk yi, reyleen ñépp, faagaagal leen. Waaye ku ci am réddu jë, buleen ko laal. Dooreleen ko ci sama bérab bu sell bi.» Ñu tàmbalee bóom mag ña ca kanam kër Yàlla ga. <sup>7</sup> Aji Sax ji ne leen: «Feesal-leen ètt yeeki néew, sobeel-leen kër gi, doora gén.» Ba ñu noppee, daldi jàll ca biir dëkk ba, di rey.

<sup>8</sup> Naka lañu dem, reyi, ma des fa man donj. Ma daldi daanu, dépp sama kanam fa suuf, daldi àddu ca kaw, ne: «Éy Boroom bi Aji Sax ji, xanaa doo sànk mboolem ndesu Israyil ci sa xadar jii ngay xépp ci kaw Yerusaleem?» <sup>9</sup> Mu ne ma: «Tooñaangey waa kër Israyil ak Yuda moo èpp loxo lool. Réew maa ngi fees ak deret, dëkk bi fees ak yàqute. Nee nañoooy: “Aji Sax ji wacc na réew mi. Aji Sax ji gisul dara.” <sup>10</sup> Man it duma xool bëtu ñéebalu, duma ñeewante. Seen jëfin laay képp ci seen kaw bopp.» <sup>11</sup> Ci kaw loolu boroom mbubbam lée baak mbarum bindukaay ba ca ndiggam, ne jimeet, délsi. Mu ne: «Def naa lépp na nga ma ko sante.»

## 10

### *Leer ga dëddu na*

<sup>1</sup> Ba loolu wéyee ma téen, daldi yem ci lu mel ni ngànguney peru safiir ci kaw dénd bi tiim boppi malaakay serub yi.

<sup>2</sup> Aji Sax ji ne boroom ndimol lée ba: «Doxal ci diggante mbege, yi ronu jëmme serub yi, nga tibb say loxo ba mu fees ci xal yu yànj yi, te nga dem wasaare ko ci kaw dëkk bi.» Kooka dem, may gis.

<sup>3</sup> Ba waa jay agsi, jëmme serub yaa nga taxaw fa féete kër Yàlla ga ndijoor, niir wa daldi fees èttu biir ba. <sup>4</sup> Ba leeru Aji Sax ji yékkatikoo ca serub ya, dem ba ca buntu kër ga, niir wa daa fees kër ga, ètt ba fees dell ak leeru Aji Sax ja ne raññ. <sup>5</sup> Coowal laafi malaakay serub yaa ngay jib ba ca ètt ba féete biti, mel ni kàddug Yàlla Aji Man ji.

<sup>6</sup> Ba Aji Sax ji santee boroom mbubbam lée ma, ne ko mu sàkk sawara ci diggante mbege yi ci digg jëmme serub yi, waa ja dem, taxaw feggook menn mbege. <sup>7</sup> Ci

kaw loolu kenn ci malaakay serub yi yóotu sawara si ci seen digg, daldi sàkk ci xal yi, def ci loxoy boroom mbubbam lée ma, mu jël ko, daldi génn. <sup>8</sup> Ba loolu amee lu mel ni loxol nit feeñ ca ron laafi serub ya.

<sup>9</sup> Ma xoolaat, yemuma ci lu moy ñeenti mbege yu feggook ñeenti serub yi, menn mbege ci wetu serub bu ne, te mbege yi ne raññ, ame melokaanu peru kirsolit. <sup>10</sup> Ñoom ñépp a niroo, te mbege mu ci ne mel ni mbegee nekk ca biiram, <sup>11</sup> ba tax ñu mana dawee ñeenti wet te duñu warangiku. Fu boppu serub jublu, mbege yi daw jublu fa, te du tax ñu warangiku. <sup>12</sup> Serub yi nag, mboolem seen yaram, seen gannaaw ak seen cati loxo ak seeni laaf, lépp ay gët la sàngoo ba daj, ba ci seen ñeenti mbege yi. <sup>13</sup> Mbege yooyu laa dégg ñu tudde leen mbegey callweer. <sup>14</sup> Malaakam serub mu ci nekk am na ñeenti kanam. Genn kanam ga di gu serub, ñaareelu kanam ga di gu nit, ñetteel ba di gu gaynde, ñeenteel ba di gu jaxaay. <sup>15</sup> Serub ya nag jëm kaw. Serub yooyu ñooy bindeef, ya ma gisoon ca tàkkal dexu Kebar. <sup>16</sup> Bu ñu dawee, mbege ya feggook ñoom daw, bu ñu firee seeni laaf, jëm kaw, mbege ya du teqlikook ñoom. <sup>17</sup> Bu ñu taxawee, mbege yi taxaw, bu ñu jógee jëm kaw, ñu ànd ak ñoom, jëm kaw. Noowal boroom bakkan yi daal moo nekk ci mbege yi.

<sup>18</sup> Ba loolu amee leeru Aji Sax ji bàyyikoo fa buntu kër ga, daldi taxawi ca kaw serub ya. <sup>19</sup> Serub ya firi seeni laaf, jóge suuf, jëm kaw, may gis, ñu jógandook mbege ya ñu àndal, daldi taxawi ca wetu buntu penkub kër Aji Sax ja, leeru Yàllay Israyil tiim leen lu kawee. <sup>20</sup> Ñooñoo bindeef ya ma gisoon Yàllay Israyil tiim leen ca tàkkal dexu Kebar. Ca laa xam ne ay malaakay serub lañu. <sup>21</sup> Ñeenti kanam la ku ci nekk am, ak ñeenti laaf, ak lu mel ni loxoy nit yu ron seeni laaf. <sup>22</sup> Seen bindu kanam ya mooy kanam ya ma gisoon ca tàkkal dexu Kebar. Ci seen melokaan, ñoom rekk la. Ku nekk man naa jubal màkk fépp fu genn kanam jublu.

## 11

### *Digeb yiw a gën jàmmu tey*

<sup>1</sup> Ba loolu wéyee ngelaw ne ma siféet, yóbbu ma ba ca buntu penkub kër Aji Sax ja janook penku. Foofa ca bunt ba, yemuma ci lu moy ñaar fukki nit ak juróom. Ma xàmmi ca Yaasaña doomu Asur ak Pelaca doomu Benaya, di njiiti askan wi. <sup>2</sup> Aji Sax ji ne ma: «Yaw nit ki, ñii ñooy mébétkati ñaawtéef ñiy digle lu bon ci dëkk bii. <sup>3</sup> Ñu ngi naa: “Bunu tabaxagum ay kër; dëkk bii daa mel ni ndab, nun nu fegu ni yàpp wu ca ube.” <sup>4</sup> Kon nag yaw nit ki, waxal waxyu ci seen kaw. Jottlil waxyu.» <sup>5</sup> Noowug Aji Sax ji daldi dal fi sama kaw, ne ma: «Neel: “Aji Sax ji dafa wax ne: Yeen waa kër Israyil, yeena waxe nii, seeni mébét, xam naa ko. <sup>6</sup> Bóom ngeena bóom seen bokki dëkk bii, ba mbedd yi fees dell aki néew. <sup>7</sup> Moo tax Boroom bi Aji Sax ji dafa wax ne: Dëkk bi kay ndab la, seen bokki néew yi ngeen fi saam di yàpp wi ci ube, waaye yeen dees na leen fi génnee. <sup>8</sup> Saamar ngeen ragal, saamar laa leen di indil. Kàddug Boroom bi Aji Sax jee. <sup>9</sup> Maa leen di génne biir dëkk bi, teg leen ci loxoy doxandéem, wàcceel leeni mbugal. <sup>10</sup> Saamar ngeen di fàddoo, fa catal Israyil laa leen di mbugale, ngeen xam ne maay Aji Sax ji. <sup>11</sup> Dëkk bii du doon seen ndab, te dungeen yàpp wu cay ube. Fa catal Israyil laa leen di mbugale. <sup>12</sup> Su boobaa ngeen xam ne maay Aji Sax, ji ngeen sàmmul dogali yoonam, jëfewuleen àttey yoonam, xanaa di jëfe aaday xeet yi leen séq.”» <sup>13</sup> Naka laay biral waxyu, Pelaca (mu firi Aji rëcc ju Yàlla) doomu Benaya jekki rekk, dee. Ma ne fëlëñ, dëpp sama jë fa suuf, daldi àddu ca kaw, ne: «Éy Boroom bi Aji Sax ji, yaay faagaagal ndesu Israyil nii?»»

<sup>14</sup> Ba loolu wéyee kàddug Aji Sax ji dikkal ma, ne ma: <sup>15</sup> «Yaw nit ki, gannaaw sa bokk yooyu nga bokkal, ñuy say bokk lenge, di mboolem waa kër Israyil ñi nekk ngàllo, ñoom la waa Yerusalem di siis, naan:

“Soreleen Aji Sax ji;  
réew mii, nun la ko sédd.”

<sup>16</sup> Kon nag, waxal ne: “Boroom bi Aji Sax ji dafa wax ne:

Maa soreel moos seen bokk yooyu fa biir  
yéefar ya,

maa leen wasaare biir réewoo réew,  
te du tee ma teewal leen ni bérab bu sell  
fa réew ya ñu sancaani.”

<sup>17</sup> Moo tax nanga wax ne: “Boroom bi Aji Sax ji dafa wax ne:

Maa leen di dajalee fa xeet ya,  
boolee leen fa réew ya ngeen wasaaroo,  
ba joxaat leen suufas Israyil.”

<sup>18</sup> Bu ñu ñibbee, jële fa mboolem lu  
jomblu  
ak lépp lu siblu.

<sup>19</sup> Maa leen di may beneen xol ak xel mu  
yees.

Xolu doj bi laay roccee ci seen suux,  
weccee leen ko xolu suux.

<sup>20</sup> Su ko defee sama dogali yoon lañuy  
doxe,  
te sama àttey yoon lañuy sàmm, di ko  
jêfe.

Su boobaa ñuy sama ñoñ,  
may seen Yàlla.

<sup>21</sup> Waaye nit ña seen xol jengal seen jëf ju  
jomblu,

ak seen yëf yu seexluwu,  
maay këpp seen jëfin ci seen bopp.

Kàddug Boroom bi Aji Sax jee.»

<sup>22</sup> Ba loolu amee malaakay serub ya firi  
seeni laaf, ànd ak mbege ya, leeru Yàllay  
Israyil tiim leen fa kawa kaw. <sup>23</sup> Gannaaw  
loolu leeru Aji Sax ji yékkatikoo fa digg  
dëkk ba, dem, taxawi fa kaw tund wa ca  
penkub dëkk ba. <sup>24</sup> Ba loolu amee ngelaw  
ne ma siféet, yóbbu ba ca waa ngàllo  
ga ca réewum Babilon, lépp ci peeñu, ci  
dooley Noowug Yàlla. Peeñu ma ma gis  
nag yem fa. <sup>25</sup> Ba loolu amee ma àgge  
waa ngàllo ga mboolem mbir ya ma Aji  
Sax ji won.

## 12

### *Ngàllo xeeñ na*

<sup>1</sup> Gannaaw loolu kàddug Aji Sax ji da  
maa dikkal ne ma:

<sup>2</sup> «Yaw nit ki, digg kërug fippukat nga  
dëkke, ñu ami gët te duñu gis, ami nopp  
te duñu dégg, ndax kërug fippukat lañu.

<sup>3</sup> Yaw nag nit ki, dajaleel digg bëccëg,  
ñépp gis, sa jomtukaayi ku jëm ngàllo te  
nga sanc feneen, ñépp teg ci bët. Jombul  
ñu gis ne kërug fippukat lañu. <sup>4</sup> Sab ëmb  
ngay jëkka génne digg bëccëg ni ku jëm  
ngàllo, ñépp teg ci bët. Te yaw nga génn  
ngoon ni ku jëm ngàllo, ñu teg ci bët.

<sup>5</sup> Dangay bëtt ci miir bi, ñuy gis, pax mooy  
yoore sab ëmb. <sup>6</sup> Nañu la gis nga gàddu  
sab ëmb, génn ci lëndëm gi. Booy génn di  
dem, sa kanam ngay muur, ba doo mana  
gis suuf si, ngir misaal laa la def, ñeel waa  
kër Israyil.»

<sup>7</sup> Ma def loolu noonee ñu ma ko sante.  
Samab ëmb laa génne digg bëccëg ni ku  
jëm ngàllo. Ca guddi ga ma bëtte miir ba  
loxoy neen, ñépp di gis. Ci lëndëm gi laa  
gàddu sama ëmb, ñuy gis.

<sup>8</sup> Gannaaw loolu kàddug Aji Sax ji  
dikkal ma ca ëllëg sa ca suba, ne ma:

<sup>9</sup> «Yaw nit ki, xanaa waa kër Israyil, kërug  
fippukat gi, newuñu la: “Ana looy def  
nii?” <sup>10</sup> Waxleen, ne leen: “Boroom bi Aji  
Sax ji dafa wax ne: Boroom Yerusalem  
la àrtu bii ñeel, mook mboolem waa kër  
Israyil gi fi dëkk.” <sup>11</sup> Neel:

“Man maay seen misaal.

Nii ma def rekk lees leen di def,  
ngàllo lees leen di jàpp, jëme.

<sup>12</sup> Seen boroom dëkk beey gàddub  
ëmbam,

génn dëkk bi ci lëndëm gi.

Miiru dëkk bi lees di bëtt, jaarale ko ca.

Kanam ga lay muur,

ba tax du gis suuf si.

<sup>13</sup> Maa koy laaw samab caax,

mu keppoo samag fiir,

ma yóbbu ko Babilon mu Kaldeen ña.

Réew ma, du ko gis te fa lay deeye.

<sup>14</sup> Mboolem ña ko dar,

ay toppam ak mboolem gàngooram,

maa leen di wasaare fépp fu ngelaw  
jublu,

toppati leen ak saamar.

<sup>15</sup> Bu ma leen tasaaree ci biir xeet yi, wasaare leen ci réew yi, ñu xam ne maay Aji Sax ji.

<sup>16</sup> Du tee ma ba ñenn ci ñoom, ñu mucc saamar, mucc xiif, mucc mbas, ba nettaliji seen gépp tojaange ca digg xeet ya ñu jëm.

Su boobaa ñu xam ne maay Aji Sax ji.»»

<sup>17</sup> Gannaaw loolu kàddug Aji Sax ji dikkal ma ne ma:

<sup>18</sup> «Yaw nit ki, lekkal saw ñam, di kat-kati, naane njàqare sam ndox, di rag-ragi,

<sup>19</sup> te nga wax waa réew mi, mbirum waa Yerusalem ga ca suufas Israyil,

ne leen Boroom bi Aji Sax ji dafa wax ne: njàqare lañuy lekkeji seenu ñam, te xol bu gentel lañuy naane seenum ndox,

ndax seen réew mu gentel, ñàkk lépp lu ko feesoon,

ngir coxoru mboolem ñi ko dëkke.

<sup>20</sup> Dëkk yu xumboon, mujj wéet, réew mi doon ub gent,

ba ngeen xam ne maay Aji Sax ji.»»

### *Waxyuy nit, waxi caaxaan*

<sup>21</sup> Gannaaw gi kàddug Aji Sax ji dikkal ma ne ma: <sup>22</sup> «Yaw nit ki, du lii ngeen defati aw léeb ci biir réewum Israyil? “Bés yaa ngi bégga baree, te peeñu sottiwul!”

<sup>23</sup> Kon wax leen ne leen: “Boroom bi Aji Sax ji dafa wax ne:

Maay dakkal woowu léeb,

ba muy léebtil fi Israyil.”

Waxleen kay ne leen:

“Bés a ngi jubsii,

peeñoo peeñu sotti.

<sup>24</sup> Du peeñuy caaxaan muy amati mbaa ngisaaney jayaate,

fi biir kërug Israyil.

<sup>25</sup> Man Aji Sax ji,

maay wax li may wax,

mu sotti te dootu fomm.

Kërug fippukat gi ngeen doon,

maay àddu kàddu, sottal ngeen fekke,

kàddug Boroom bi Aji Sax jee!”»

<sup>26</sup> Gannaaw loolu kàddug Aji Sax ji dikkal ma, ne ma: <sup>27</sup> «Yaw nit ki, waa kër Israyil déy a nga naan, “Peeñu yi kii di

gis, des na ay fani fan, ci lu sooree sore lay biral ab waxyu!” <sup>28</sup> Moo tax wax leen ne leen: “Boroom bi Aji Sax ji dafa wax ne: Sama genn kàddu dootu fomm.

Léegi kàddu gu ma àddu, sottal ko.

Kàddug Boroom bi Aji Sax jee.”»

## 13

### *Mbugalu yonent yi taxaw na*

<sup>1</sup> Ba loolu amee kàddug Aji Sax ji dikkal ma ne ma: <sup>2</sup> «Yaw nit ki, waxal waxyu ci kaw yonenti Israyil yiy waxe ay waxyu. Nanga wax ñiy waxe waxyu ci seen xelum bopp, ne leen:

“Dégluleen kàddug Aji Sax ji:

Boroom bi Aji Sax ji dafa wax ne:

<sup>3</sup> Wóoy ngalla yonent yu ñàkk xel,

yiy topp seen xelum bopp te gisuñu tus!

<sup>4</sup> Yeen yonenti Israyiloo,

mbete till yuy foreb gent!

<sup>5</sup> Yéeguleen ca biir bëttukaayi tata ja,

jagalaguleen tata ju aar Israyil,

ngir taxaw, waajal xare ba,

keroog bésuub Aji Sax ji.

<sup>6</sup> Seeni peeñu caaxaan la,

seeni ngisaane diy fen.

Ñu naa: ‘Kàddug Aji Sax jee,’

te Aji Sax ji yebalu leen!

Teewul ñuy xaar kàddu gu sotti.

<sup>7</sup> Xanaa du peeñuy caaxaan ngeen gis?

Du ngisaaney fen ngeen di waxe,

naan: ‘Kàddug Aji Sax jee,’

te man àdduwma?

<sup>8</sup> «“Kon nag Boroom bi Aji Sax ji dafa wax ne:

Gannaaw yeena waxi caaxaan, gisi fen,

maa ngii nag, di dal fi seen kaw.

Kàddug Boroom bi Aji Sax jee!”

<sup>9</sup> Sama loxooy dal yonent,

yiy gis peeñuy caaxaan,

di gisaaney fen.

Sama péncum ñoñ, duñu fa teewe,

limeefu kër Israyil, deesu leen ca bind,

te réewum Israyil, duñu fa dellu.

Su boobaa ñu xam ne maay Boroom bi Aji Sax ji.

<sup>10</sup> Kon nag gannaaw ñu ngi lajjal sama ñoñ,

naan leen lépp jàmm! Te jàmm amul,



mu mel ni miiru digaloo bu sew bu ñu  
 ñab-ñabal,  
 te ñii defuñu lu moy raax ca weexal,  
 11 waxal raaxkati weexal yi, ne leen:  
 ‘Tata jeey màbb,  
 nde waameey wal,  
 ponkali doji yuur ne yureet,  
 ngèlén riddi, bëtt tata ja!’  
 12 Bu tata ji jekkee ne jànjàn,  
 deesu leen laaj fu weexal ba ngeen ca  
 raaxoon jaar?  
 13 Kon Boroom bi Aji Sax ji dafa wax ne:  
 Maay xadaru, riddil ngèlén,  
 mer, walal waame,  
 am sànj yuri ponkali doji sànkute.  
 14 Maay màbb tata ji ngeen raax weexal,  
 mèqal ko suuf,  
 kenu ya siiñ,  
 lépp jóoru, ngeen jekkliku ca biir.  
 Su boobaa ngeen xam ne maay Aji Sax ji.  
 15 Maay xëpp sama xadar ci kaw tata ji  
 ak ña ko raaxoon weexal,  
 ne leen: ‘Tata mes,  
 weexalkatu tata mes!’  
 16 Mooy yonentu Israyil yi jottli Yerusalem  
 waxyu,  
 di leen gisal peeñum jàmm,  
 te jàmm amul.’  
 Kàddug Boroom bi Aji Sax jee!’  
 17 «Yaw nit ki,  
 janool ak sa bokk yu jigéen,  
 yiy waxe waxyu ci seen xelum bopp,  
 nga wax waxyu fi seen kaw.  
 18 Neel: ‘Boroom bi Aji Sax ji dafa wax ne:  
 Wóoy ngalla jigéen ñiy sàkkal ku ne jarab  
 xërëm,  
 di ràbbal ku ne muuraayu xërëm bu ko  
 jot,  
 di ko moome nit ñi!  
 Man ngeena aakimoo sama bakkanu ñoñ  
 tey sàmmaale seen bakkanu bopp?’  
 19 Bu ngeen di fen sama ñoñ ñiy dégluy  
 fen,  
 yeena ngi may teddadil fi sama ñoñ,  
 ngir ñëbu peppum lors ak dogu mburu,  
 ba tax leen di rey bakkan yu warula dee,  
 di musal bakkan yu warula dund.  
 20 Moo tax Boroom bi Aji Sax ji dafa wax  
 ne:  
 Maa ngii di dal ci seen kaw jaray xërëm,  
 yi ngeen di nappé ay bakkan niy picc.

Seeni jara laay foqatee ci seeni loxo,  
 ba yiwi bakkan, yi ngeen di napp niy picc.  
 21 Maay foqati seeni muuraay,  
 génne sama ñoñ ci seeni loxo,  
 ñu noppee doon seenum pàdd,  
 ba ngeen xam ne maay Aji Sax ji.  
 22 Gannaaw yeena fen ba jeexal xolu aji  
 jub,  
 te du maa ko tegu naqar,  
 gannaaw yeena dooleel ku bon,  
 tere koo dëpp yoonu mbonam ba dund,  
 23 dungeen gisati nag peeñuy caaxaan,  
 dungeen gisaaneeti.  
 Maay génne sama ñoñ ci seeni loxo,  
 ngeen xam ne maay Aji Sax ji.»

## 14

### *Dëppleen*

1 Ba loolu wéyee ay magi bànni Israyil  
 dikk janook man, toog. 2 Kàddug Aji  
 Sax ji dikkal ma ne ma: 3 «Yaw nit ki,  
 ñii seen kasaray tuur lañu def ci seen  
 xol, muy ay wu leen di gállankoor, te ñu  
 ne ci jàkk. Ñii dinaa leen wacc moos,  
 ñuy sàkku leeraange ci man? 4 Waxal ak  
 ñoom nag, ne leen: ‘Boroom bi Aji Sax  
 ji dafa wax ne: Képp ku bokk ci waa kër  
 Israyil, ku yékkati kasaray tuuram, def ci  
 xolam, muy ay wu koy gállankoor, te mu  
 ne ci jàkk, ba noppi muy seetluji ci ab  
 yonent; man Aji Sax ji maa koy tontu tont  
 lu dëppook limu kasaray tuuram. 5 Maay  
 def loolu ngir nanguwaat xolu waa kër  
 Israyil, gi ma dëddu ngir seen mboolem  
 kasaray tuur yi.’ 6 Kon nag waxal waa  
 kër Israyil, ne leen: ‘Boroom bi Aji Sax  
 ji dafa wax ne: Dëppleen te dëddu seen  
 kasaray tuur. Mboolem seen yéf yu siblu,  
 dëdduleen ko.

7 «‘Képp ku bokk ci waa kër Israyil,  
 mbaa muy doxandéem bu dal ci biir  
 Israyil, bu ma waccee, ba yékkati kasaray  
 tuur, def ci xolam, muy ay wu koy  
 gállankoor, te mu ne ci jàkk, kooku bu  
 dikkee cib yonent di sàkku leeraange ci  
 man, man Aji Sax ji maa koy tontul sama  
 bopp. 8 Nit kooku maa ko naa jàkk, def  
 ko muy firnde, di ku ñuy lééboo, te maa  
 koy wáññee ci sama ñoñ, ba ngeen xam  
 ne maay Aji Sax ji.

<sup>9</sup> «Su fekkee ne yonent baa am lu ko nax, ba àddul boppam genn kàddug waxyu, day fekk man Aji Sax ji maa nax yonent ba. Maa koy dumaa sama loxo, sàanke ko digg Israyil, sama ñoñ. <sup>10</sup> Kay seetlu ca yonent ba, aw ayam, mook ayu yonent ba, benn lay doon. Ñooy bokk gàddu seenu ay. <sup>11</sup> Su ko defee waa kër Israyil dootuñu ma wacc, di lajj, te dootuñu sobeel seen bopp ci seen bépp bàkkaar. Sama ñoñ lañuy doon, man ma doon seen Yàlla. Boroom bi Aji Sax jee ko wax.»»

### *Yerusalem gépp a yelloo mbugal*

<sup>12</sup> Ba loolu amee kàddug Aji Sax ji dikkal ma ne ma: <sup>13</sup> «Yaw nit ki, bu ma am réew dee moye jëfi ñàkk worma, ba ma dumaa leen sama loxo, dagge fa mburu, yónnee leen ab xiif, ba boole doom aadamaak mala dagge fa, <sup>14</sup> su Nóoyin ak Dañeel ak Ayóoba bokkoon nekk ca seen biir sax, ñoom ñett donj la seen bakkan di mucc ndax seenug njub. Boroom bi Aji Sax jee ko wax. <sup>15</sup> Su ma dajaloon réew meek rabi àll yu ko jeexal, ba muy réew mu gental mu kenn jaareetul ndax rab ya, <sup>16</sup> te mu fekk ñett ñooñu ca biir réew ma, giñ naa ko ci man miy dund, kàddug Boroom bi Aji Sax jee, ñooñu ñett duñu mana musal seen jenn doom, du góor du jigéen; ñoom donj ay mucc, te réew ma dina gental. <sup>17</sup> Su ma wàccee saamar ci miim réew it, ba sant saamar ne ko mu jaar ci biir réew mi, dagge fi nit ak mala, <sup>18</sup> te mu fekk ñett ñooñu ci biir réew mi, giñ naa ko ci man miy dund, kàddug Boroom bi Aji Sax jee, du seen jenn doom, góor ak jigéen ju ñuy mana musal. Ñoom ñett donj ay mucc. <sup>19</sup> Su ma yebalee mbas ci kaw réew mii it, ba xëpp fi samam sànj ci biir deret ju tuuru, ngir dagge fi nit ak mala, <sup>20</sup> te mu fekk Nóoyin ak Dañeel ak Ayóoba ci biir réew mi, giñ naa ko ci man miy dund, kàddug Boroom bi Aji Sax jee, ñooñu ñett duñu mana musal seen jenn doom, góor ak jigéen. Seen njubteg bopp mooy musal seen bakkan.

<sup>21</sup> «Boroom bi Aji Sax ji déy dafa wax ne: Sama ñeenti mbugal yu tar yii laay

yebal ci kaw Yerusalem. Ñuy saamar akub xiif ak rabi àll aku mbas, ngir dagge ci réew mi nit ak mala. <sup>22</sup> Waaye du tee mu am ndes mu ca rëcce, diy góor aku jigéen, ñu ñuy génneji réew mi. Ñu ngooguy génn, di leen fekki, te bu ngeen gisee seen jikko ak seeni jëf ju bon, seen xol dina sedd ci musiba mi ma wàcce ci kaw Yerusalem, ak mboolem lu ma fi wàcce. <sup>23</sup> Seen xol dina sedd ndax bu ngeen gisee seen jikko ak seeni jëf, dingeen xam ne mboolem li ma def ci dëkk bi, defuma ko ci neen. Kàddug Boroom bi Aji Sax jee.»

## 15

### *Bantu reseñ matul matt*

<sup>1</sup> Gannaaw loolu kàddug Aji Sax ji dikkal na ma ne ma:

<sup>2</sup> Yaw nit ki, ana lu bantu reseñ gëne ci bant yi,

ak mboolem caru garab bu mu doon ci gott bi?

<sup>3</sup> Ndax dees na ca sàkk bant, liggéeye ko? Am dees na ca sàkke wékkukaay, wékk ca lenn?

<sup>4</sup> Xanaa sànni cib taal, xambe, ñaari cat ya lakk, digg ba xoyomu. Ana lu deeti njariñam?

<sup>5</sup> Ndegam ba mu nee ñumm, lees ci dul liggéey dara, gën ba mu jàppee ba xoyomu.

<sup>6</sup> Kon nag Boroom bi Aji Sax ji dafa wax ne:

Dees na xamb caru reseñ, mu bokk ci banti garab yi ma joxe, ñu xamb lépp,

te noonu laay xambe waa Yerusalem.

<sup>7</sup> Maay jàankoontee ñoom, ñu rëcc sawara, sawara lakk leen.

Bu ma jàankoontee ñoom, dingeen xam ne maay Aji Sax ji.

<sup>8</sup> Maay gental réew mi, ñoo def jëfi ñàkk worma.

Kàddug Boroom bi Aji Sax jee.

## 16

### *Yerusalem yemul ci boroom këram*

<sup>1</sup> Ba loolu amee kàddug Aji Sax ji dikkal ma ne ma: <sup>2</sup> «Yaw nit ki, nanga xamal

Yerusalem jëfam ju siblu ji. <sup>3</sup> Ne leen: “Boroom bi Aji Sax ji dafa wax ne: Sa cosaan ak sab juddu réewum Kanaan la. Sa baay dib Amoreen, sa ndey dib Etteen\*.” <sup>4</sup> Ba nga juddoo, ca bés ba nga juddoo, dooñeesu la, sangeesu la ba nga set, jonjeesu la xorom, laxaseesu lay laytaay. <sup>5</sup> Xooleesu la bētu ñeewante ngir defal la lenn ci yooyu ngir yërmande. Dees laa sànni ci àll bi bés ba nga juddoo ndax jéppi la. <sup>6</sup> Maa fa jaare, seen la ngay wéqu, sangoo sa deret. Ma ne la: Sangoo nga sa deret waaye, dundal! Neeti la: Sangoo nga sa deret, waaye dundal. <sup>7</sup> Maa la sēqal ni caxum tool, ngay mǎgg, di mǎgg ba mat sēkk, saxi ween, sa kawar sēq, te nga ne duññ-duññaaral. <sup>8</sup> Ma jaareeti fa, xool la, gis ne mat ngaa séy. Ma tàllal sama mbubb, sànge ko sa yaramu neen, ba noppi giñal la, dikke la kóllèrē†. Kàddug Boroom bi Aji Sax jee. Nii laa la moome.

<sup>9</sup> «“Ma daldi lay sang, raxas sa deret ba mu set, diw la, <sup>10</sup> solal la ndimo lu yànj ak dàlli der, muure la ndimol lēe, tegal la ca sooy. <sup>11</sup> Ma takkal lay gànjar; takkal la lami loxo, akub caq, <sup>12</sup> ba noppi takkal la jaarob bakkan ak jaaroy nopp, solal la mbaxanam lingeer mu yànj. <sup>13</sup> Nga takkoo wurus ak xaalis, sol ndimol lēe ak sooy ak ndimo yu yànj, di lekk sunguf su mucc ayib ak lem ak diw. Nga mujj taaroo taaru ba jot darajay lingeer, <sup>14</sup> siiw ba xeet yépp xam la ndax taar bu sotti ndax sama gànjar gu yànj gi ma la takkal. Kàddug Boroom bi Aji Sax jee.

<sup>15</sup> «“Teewul nga gis sab taar, di gànctoo sa bayre ngànctu gu ne xéew, ku romb yaa moom. <sup>16</sup> Yaa tànn ci sa yére yu yànj, rafetale sa jaamookaayi tuur, ba noppi di ca gànctu; lu masula am te du amati muk. <sup>17</sup> Yaa jël sa gànjari wurus ak xaalis yi ma la jox, sàkk ca céri góor, di ca gànctu, <sup>18</sup> te yaa jël sa yére yu yànj, sànge say tuur, sama diw ak sama cuuraay,

nga taajal leen. <sup>19</sup> Sama dugub ja ma la joxoon, sunguf su mucc ayib saak diw gaak lem, ja ma la doon leele, lépp yaa leen ko taajal, defal leen ko saraxu neexal bu xeeñ. Mu ngoog! Kàddug Boroom bi, Aji Sax jee.

<sup>20</sup> «“May wax, nga jël sa doom yu góor ak yu jigéen yi nga ma jural, di leen sarxalal say tuur, leele leen. Gànctu da laa doyul? <sup>21</sup> Yaa rendil ay tuur samay doom, yoole leen. <sup>22</sup> Ci biir mboolem sa jëf ju siblu jooju ak sa gànctu, fàttlikuwoo benn yoon ba ngay lu tuut, ne duññ-duññaaral, di wéqu, sangoo sa deret.

<sup>23</sup> «“Gannaaw sa mbon googu gépp nag, wóoy, wóoy ngalla yaw! Kàddug Boroom bi Aji Sax jee. <sup>24</sup> Tabaxal nga sa bopp ab néeg, sàkkal sa bopp bérab bu kawé ci péncoo pénc. <sup>25</sup> Selebe yoon wu ne, tabax nga fa sa jaamookaay, di fa teddadil sab taar, ku romb, nga ràccal ko say tànk ci sa gànctu gu dul jeex. <sup>26</sup> Gànctu ngaak waa Misra, sa dëkkandoo yu alde yi, di gënatee gànctu, di ma naqaral.

<sup>27</sup> «“Booba nag laa la dóor sama loxo, wàññi sa njël, wacce la sa coobarey noon ya, janqi Filisti ya‡. Ñoom sax am nañu kersa ci sa jëfinu yàqute gi. <sup>28</sup> Doyaloo, xanaa di gànctook waa Asiri§. Gànctu ngaak ñoom te taxu laa doyal ba tey. <sup>29</sup> Ngay gënatee gànctu, ba ca Babilon, réewum jula ya, te loolu taxu laa doyal ba tey.

<sup>30</sup> «“Yaaka weex bët, kàddug Boroom bi Aji Sax jee, lii lépp di jëfi gànc bu dëgër bët.

<sup>31</sup> «“Tabax nga ab néeg selebe yoon wu ne, sàkk sa jaamookaay péncoo pénc, te ab gànc sax tane la, nde yaw laajoo ag pey. <sup>32</sup> Cim! Jigéenu njaalookat bi nga doon, ay doxandéem sax gènal la sa jëkkër. <sup>33</sup> Mboolem caga yi dañuy feyeeku! Waaye yaw yaay neexal sa far yépp, di leen fey ñu jóge fu ne, di la tédde. <sup>34</sup> Yaw kay sag ngànc bokkoo kook

\* **16:3** 16.3 Amoreen ñeek Etteen, ña dëkke woon diiwaanu tund ya, ay jaamukati tuur lañu woon ñu bokkoon ca askanu Kanaaneen ña. Du Yawut yaa sanc Yerusalem, waaye Kanaaneen ñaa ko sancoon. Seetal ci *Amos* 2.10.  
† **16:8** 16.8 Seetal ci *Ruut* 3.9. ‡ **16:27** 16.27 janqi Filisti yamooy dëkki Filisti yi gèna am solo, te nangu woon lenn ci suufas Yuda. § **16:28** 16.28 Réew yu bare dañu doon lëkkoo ak réewum Asiri ca yooya jamono ndaxte ñoo èppoon doole lu jiitu Babilon di sut ci réewi àddina.

gànc yi. Kenn sàkkuwu la. Yaw kay yaay feye, kenn feyu la. Kon yaw meloo ni benn gànc!

<sup>35</sup> «“Kon nag Yerusalem gànc bee, déglul kàddug Aji Sax ji. <sup>36</sup> Boroom bi Aji Sax ji dafa wax ne: Gannaaw yaa wasaare sa alal, ñoriku ne dunḡ, di gànctook sa far yii, muy sa mboolem kasaray tuur, bay tuur sa deretu doom yi nga leen rendil, <sup>37</sup> maa ngii nag di dajale mboolem sa far yi la doon bége, ñi nga bëgg ñépp ak ñi nga bañ ñépp. Maa leen di dajalee fu nekk ci sa kaw, ba noppi ñori la yaramu neen, ñu gis la nga ne dunḡ. <sup>38</sup> Maa lay àttee àtteb jigéeni njaalookat, jigéeni tuurkati deretu nit. Maa lay xépp deretu xadar ak fiiraange. <sup>39</sup> Maa lay wacceek say far, ñu màbb say néeg, tas say jaamookaay, futti la, nangu sa gànjar gu yànj gépp, wacc la yaramu neen, nga ne dunḡ. <sup>40</sup> Dinañu sañaxal gàngoor ci sa kaw, ñu ànd jóor lay doj, dogate la seeni saamar. <sup>41</sup> Dinañu lakk say kër, teg la mbugal, jigéen ñu bare di gis. Maay dakkal ngànc gi nga nekke, te dootoo feyati aw far. <sup>42</sup> Maa lay xépp samam sànj ba mu jeex, bala ma laa moyale sama xadaru fiiraange, doora dal, ba meddi.

<sup>43</sup> «“Yaa fàttlikuwul ba ngay ndaw, yaa def lii lépp ba merloo ma. Kon man it, sa jëfin kat laa lay këpp ci bopp, feye la ko. Kàddug Boroom bi Aji Sax jee. Du yaa gànctu, dolli ci sa jépp jëf ju siblu?

<sup>44</sup> «“Yaw Yerusalem, képp kuy lééboo dina la lééboo ne la: ‘Ndey ja, doom ja!’ <sup>45</sup> Yaa mat doom sa ndey, ji sib jëkkëram aki doomam. Yaa mat doomu ndey sa doomi ndey, ya sib seen jëkkër ak seeni doom, yaa donn sa ndey Etteen ba, donn sa baay, Amoreen ba. <sup>46</sup> Sa mag ju jigéen ji la féete càmmoñ di Samari aki janqam, sa rakk ju jigéen ji la féete ndijoor, di Sodom aki janqam\*.” <sup>47</sup> Yemuloo rekk ci roy seen jëfin ak seen jëf ju siblu. Tuuti na! Yaa leen gëna yàqu ci sa mboolem jëfin. <sup>48</sup> Yaw Yerusalem, giñ naa ko ci man miy dund, kàddug Boroom bi Aji Sax jee, sa rakk ju jigéen ja, Sodom, mooki janqam

defuñu li nga def yaw, yaak say janq. <sup>49</sup> Lii de, moo doon bàkkaar Sodom, sa rakk ja, mooki janqam: réy, fuqle, naagu, ne finaax ak ñàkka dimbali ku ñàkk ak ku néewle, <sup>50</sup> ba mujj reew bay def jëf ju siblu, may gis. Looloo waral ma beddi leen nii, nga gis. <sup>51</sup> Samari nag, sa genn-wàllu bàkkaar, bàkkaar ko. Yaa épp fopp sa doomi ndey yii jëf ju siblu, te tax nga ñu far mel ni ñu def njekk ndax mboolem jëf ju siblu joo def. <sup>52</sup> Léegi nag gàddul sa toroxte gi nga maye sa doomi ndey aw lay ndax jëf ju siblu joo jëf, ba yées leen. Gën nañu la. Kon nag séddool gacce te gálloo toroxte, nde tax nga sa doomi ndey yi niru ñu def njekk.

<sup>53</sup> «“Waaye maay tijji seen wërsëg; maay tijji wërsëgu Sodom aki janqam, tijji wërsëgu Samari aki janqam, yaw it ma tijjiwaale sa wërsëg. <sup>54</sup> Su ko defee nga gàddu sa toroxte, torox ci mboolem li nga def, ba ruccanti sa doomi ndey yi. <sup>55</sup> Sa rakk yi, Sodom aki janqam dinañu dellu na ñu nekke woon. Samari aki janqam dellu na ñu nekke woon, yaw it yaak say janq, ngeen dellu na ngeen nekke woon. <sup>56</sup> Xanaa du ba nga bewee yaa saxaloon ci saw làmmiñ kàddug baatal Sodom? <sup>57</sup> Booba sag mbon fànḡaaralagul. Léegi tey janqi Edom ak mboolem ñi ko wër ñoo lay sewal, janqi Filisti yi la séq it xeeb la. <sup>58</sup> Sag yàqute ak sa jëf ju siblu nag, yaa koy gàddu. Kàddug Aji Sax jee.

<sup>59</sup> «“Boroom bi Aji Sax ji déy dafa wax ne: Ni nga def rekk ni laay def ak yaw, mi sofental kàddug ngiñ, fecci kóllère. <sup>60</sup> Waaye man maay bàyyi xel sama kóllère gi ma fason ak yaw ba ngay ndaw. Maa lay saxalal kóllère guy wéy ba fàww. <sup>61</sup> Yaay fàttliku say jëfin, ba am kersa keroog booy dalal sa doomi ndey yu jigéen, ñi la mag ak ñi la féete ndaw. Maa la leen di may niy doom, doonte loolu bokkul ci sama kóllèreek yaw. <sup>62</sup> Maay saxal sama kóllèreek yaw, nga xam ne maay Aji Sax ji. <sup>63</sup> Su ko defee nga fàttliku démb, daldi rus, torox ba ne xerem keroog ba ma lay jot ci mboolem loo def. Kàddug Boroom bi Aji Sax jee.”»

\* **16:46** 16.46 Janq jii mooy dëkk yu ndaw yi bootu ci Sodom.

## 17

### *Fecci kóllëre, peyam du jaas*

<sup>1</sup> Gannaaw loolu kàddug Aji Sax ji dikkal na ma, ne ma: <sup>2</sup> Yaw nit ki, caxal waa kër Israyil aw cax, ci biir léeb woo leen di léebal. <sup>3</sup> Ne leen: «Boroom bi Aji Sax ji dafa wax ne:

Jaxaay\* ju mag la woon, réyi laaf, guddi dung,  
sëq lipp, yànj lool.

Mu dikk ba Liban, jàpp ci collu genn garabu seedar,

<sup>4</sup> dagg car bu ndaw† ba ca gëna kawé, yóbbu ba menn réewum jula, jëmbat ko ca biir dëkkub jaaykat ya.

<sup>5</sup> Mu sàkk ci jiwum réew mi‡, def ko ci suuf su nangu, dendale kook ndox mu ne xéew, ni kuy jëmbat garabu sóol.

<sup>6</sup> Mu jebbi, dig reseñ, gëna yaatu te gàtt taxawaay.

Car ya ne coleet wuti jaxaay ja, reen ya des ca suufam.

Mu di reseñ gu saxi car, firiy bànqaas.

<sup>7</sup> «Jeneen jaxaay ju mag§ daldi ne jimeet, réyi laaf, sëq lipp.

Reseñ ja jekkee jekki tàllal koy reenam, di ñaf-ñafi, firiy bànqaasam, wuti ko, ngir mu suuxat ko fa mu jëmbate woon.

<sup>8</sup> Tool bu nangu bu feggook ndox mu ne xéew la jëmbate woon, ngir naat, meññ, ba doon reseñu ngëneel.

<sup>9</sup> «Neel, Boroom bi Aji Sax ji dafa wax ne: Mbaa jooju reseñ dina baaxle?

Mbaa jeneen jaxaay ja du buddiy reenam, buur doom ya,

ba lu mu jebbile woon lax,  
ba buddi reen ya du laaj përëg bu réy,  
mbaa nit ñu bare?

<sup>10</sup> Ma nga noonu jëmbate, waaye mbaa dina baaxle yee?

Mbaa ngelawal penku du ko laal rekk mu laxa lax?

Mbaa du lax fa mu saxe?»

<sup>11</sup> Ba loolu amee kàddug Aji Sax ji dikkal ma ne ma: <sup>12</sup> «Waxal waa kër fippukat yi, ne leen: “Xamuleen lu mbir yooyu di wund?” Ne leen: “Mu ngoogu, buuru Babilon a dem Yerusalem, jàpp buur baak kàngam ya, ànd ak ñoom, yóbbu Babilon. <sup>13</sup> Moo tànn ku bokk ci askanu buur, fasook moom kàddu, giñloo ko ne dina ko nangul, daldi yóbbu njiiti réew mi, <sup>14</sup> ngir nguurug Yerusalem suufe, baña yékkatiku, di wéye surgawu Babilon, ni ñu ko fasoo woon. <sup>15</sup> Ka bokk ci askanu buurub Israyil nag fippu, yónni ay ndaw réewum Misra, ngir ñu jox ko ay fas ak mbooloo mu takku. Moo ka def loolu dina baaxlee? Mbaa dina mucce? Nu mu cay mucce te wor kàddu, ga mu fasoo woon?»

<sup>16</sup> «“Giñ naa ko ci man miy dund, kàddug Boroom bi Aji Sax jee, ci biir réewum buur boobu ko fal, te mu sàggane la mu ko giñaloon, wor kàddu ga mu fasante woon ak moom, ci biir Babilon googu lay deeye. <sup>17</sup> Firawnaak mbooloom mu réy ak gàngooram gu mag sax duñu ko mana wallu ci xare, keroog bu ñuy yékkati ab sëkk, tabax ab gawukaay ngir bóom ñu bare. <sup>18</sup> Moo sàggane ngiñ, moo wor kàddu ga mu fasante woon. Mu ngoog, moo joxe kàddoom, ba noppi walbatiku def lii lépp. Du mucce muk.

<sup>19</sup> «“Moo tax Boroom bi Aji Sax ji dafa wax ne: Giñ naa ko ci man miy dund, maay këpp jëfam ci kaw boppam ndax ngiñ li mu ma giñal la sofental, kàddu gi mu fasanteek man la wor. <sup>20</sup> Maa koy laaw sama mbaal, mu lonkoo samab caax, ma yóbbu ko Babilon, layoo faak moom ñàkke worma gi mu ma ñàkke worma. <sup>21</sup> Mboolem ñay dawé ca gàngooram yépp, saamar lañuy fàddoo; ña cay rëcce, fépp fu ngelaw jublu lañuy tasaarooji, ba ngeen xam ne man Aji Sax ji maa wax.

<sup>22</sup> «“Boroom bi Aji Sax ji dafa wax ne:

\* **17:3** 17.3 jaxaay ji mooy Buuru Babilon, Nabukodonosor mi nangu woon Yerusalem. † **17:4** 17.4 dagg car bu ndaw mooy ba ñu yóbbu Buur Yowakin ngàllo ca Babilon. ‡ **17:5** 17.5 jiwum réew mi mooy Cedesyas baayu Yowakin bu ndaw. Buur Cedesyas la Nabukodonosor dénkoon nguurug Yuda. § **17:7** 17.7 jeneen jaxaay ju mag mooy Firawna buuru Misra.

Man ci sama bopp maay sàkke ab car  
 ca njobbaxtalú garabu seedar gu  
 kawé ga,  
 sàkkal ko bérab.  
 Car yu ndaw ya ca kaw laay fàqe car bu  
 nooy,  
 jëmbatal ko sama bopp ci kaw tund wu  
 mag te kawé.  
 23 Ca kaw tundu Israyil wu mag wa laa  
 koy jëmbat,  
 mu sëq, meññal,  
 ba doon garabu seedar gu am daraja,  
 mboolem picc dëkke ko,  
 mboolem njanaaw màkkaanoo keram.  
 24 Garabi àll bi yépp dinañu xam,  
 ne man Aji Sax ji maay gàttal garab  
 gu gudd,  
 di guddal garab gu gàtt.  
 Maay wowal garab gu naat,  
 di naatal garab gu wow.  
 Man Aji Sax ji maa wax, maay jëf.”»

## 18

### *Jëf, jël*

1 Gannaaw loolu kàddug Aji Sax ji  
 dikkal na ma ne ma: 2 «Ana lu waral  
 waxin wi ngeen di waxe fi Israyil naan:  
 “Baay lekk reseñ ju xaay,  
 mu uum gëni doom ja”?  
 3 «Giñ naa ko ci man miy dund, kàddug  
 Boroom bi Aji Sax jee, dootuleen waxe  
 woowu waxin fi Israyil. 4 Mu ngoog, bépp  
 bakkan maay Boroom. Muy bakkanu  
 baay, di bakkanu doom, maa moom.  
 Bakkan bi bàkkaar daal mooy dee.  
 5 Su nit dee boroom njekk,  
 di jëfe yoon ak njekk,  
 6 tund ya ca saraxi tuur ya, lekkejiwu ca,  
 kasaray tuuru waa kër Israyil, wékku cay  
 gëtam,  
 jabaru jaambur, sobeelu ko,  
 jigéen ju gis baax, jegewu ko,  
 7 du kenn ku mu néewal,  
 xanaa ab tayle, mu delloo ku ko ameel,  
 alalu jaambur it, foqatiwu ko,  
 xanaa ku xiif, mu leel,  
 ku rafle, mu wodd,  
 8 aw ndollant taxu koo leble,  
 ab tegandaay, jëlu ko,  
 xanaa luy njubadi, mu moyu,  
 àtteb dëgg, mu doxal diggante nit ak nit,

9 sama dogali yoon, mu di ca doxe,  
 sama àttey yoon, muy jëfe worma:  
 kooku boroom njekk la,  
 te mooy dund déy!  
 Kàddug Boroom bi Aji Sax jee.

10 «Jii waay su juree doom ju néeg juy  
 tuur deretu jaambur  
 mbaa muy def lenn ci yii,  
 11 te moom miy baayam jëfewu ci lenn,  
 tund ya ca saraxi tuur ya, doom ja di ca  
 lekki,  
 jabaru jaambur, mu sobeel,  
 12 ku ñàkk ak ku néewle, mu néewal,  
 alalu jaambur, mu foqati,  
 ab tayle, delloowu ko ku ko ameel,  
 xanaa kasaray tuur, mu wékki gët,  
 jëf ju siblu, mu jëfe,  
 13 ndollant lay leblee,  
 ab tegandaay, mu jël.  
 Moo kii nu muy dunde?  
 Kii kay du dund!  
 Ak mboolem jëf ju siblu jii mu def,  
 dee rekk mooy àtteem.  
 Bakkanam lay gàddu.

14 «Waaye kooka nag su amee doom,  
 doom ja gis mboolem li baayam bàkkaar,  
 mu teg ci bëtam te taxul mu roy ko;  
 15 tund ya ca saraxi tuur ya, lekkiwu ca,  
 ay gëtam, wékku ko kasaray tuuri waa  
 kër Israyil,  
 jabaru jaambur, sobeelu ko,  
 16 du kenn ku mu néewal,  
 ab tayle, jëlu ko, sàkkuwul ku ko tayle  
 lenn,  
 alalu jaambur, foqatiwu ko,  
 xanaa ku xiif, mu leel,  
 ku rafle, mu wodd,  
 17 néew-ji-doole, loxoom dalu ko,  
 ndollant ak ab tegandaay, jëlu ko,  
 sama àttey yoon lay jëfe,  
 sama dogali yoon lay doxe.  
 Kooku du dee ngir ñaawtéefu baayam.  
 Dina dund déy!  
 18 Baayam a jaay doole,  
 moo foqati alalu mbokk,  
 lu baaxul la def ci biiri bokkam.  
 Kon nag mooy dee ngir ñaawtéefu bop-  
 pam.

19 «Ngeen neeti: “Lu tax doom du gaddu bàkkaar baay?”

Xanaa du njub ak njekk la doom ji jëfe, sama dogali yoon yépp, mu di ko sàmm, di ko jëfe?

Dina dund kay!

20 Ki bàkkaar daal mooy dee.

Doom du gaddu ñaawtéefu baay, baay it du gaddu ñaawtéefu doom.

Njekk réerul boroom, mbon réerul boroom.

21 «Waaye ku bon ki su dëddoo mboolem moy yi mu moy,

di sàmm sama mboolem dogali yoon, di jëfe yoon ak njekk, dina dund déy,

du dee moos!

22 Mboolem tooñam ya mu tooñoon, deesu ko ko dencal.

Njekk li mu jëfe moo koy taxa dund.

23 Ana bânneex bu ma am ci deewug ku bon?

Kàddug Boroom bi Aji Sax jee.

Xanaa bu dëddoo jikkoy mbonam, ba dund!

24 «Waaye su dee ku juboon, ba noppi dëddu njubte

di def njubadi,

di roy mboolem jëf ju siblu ju ku bon def, kooku nu muy dunde?

Mboolem njekk gu mu defoon,

deesu ko ko dencal.

Ag ñàkk wormaam ak bàkkaaram moo koy taxa dee.

25 «Yeen nag ngeen ne: “Boroom bi, ni muy doxale jaaduwal!”

Waa kër Israyiloo, dégluleen!

Sama doxalin a jaaduwal,

am seeni doxalin a jaaduwal?

26 Boroom njekk bu dëddoo njekkam, di def njubadi ba dee,

njubadeem ga mu def moo ko taxa dee.

27 Waaye ku bon nag, bu dëddoo mbonam ga mu nekke,

di def njub ak njekk,

moom moo musal bakkanu boppam.

28 Ndegam moo xoolaat, ba dëddu mboolem tooñam yu mu tooñ, dina dund déy. Du dee moos. 29 Moonte waa kër Israyil nee: “Boroom bi ni muy doxale jaaduwal.” Waa kër Israyiloo, samay doxalin a jaaduwal, am seeni doxalin a jaaduwal?

30 «Lii moo tax yeen waa kër Israyil, ma di leen àtte, ku nekk ciy jëfam. Kàddug Boroom bi Aji Sax jee. Dëppleen te dëddu mboolem seeni tooñ, ngir seenu ay bañ leena gállankoor. 31 Xalableen mboolem tooñ yi ngeen di tooñ. Sàkkuleen xol bu yees ak xel mu yees. Yeen waa kër Israyil, lu jar ngeen di dee? 32 Man de, bugguma kenn dee. Kàddug Boroom bi Aji Sax jee. Dëppleen ba dund!»

## 19

### *Jooy ngarmig Israyil war na*

1 Aji Sax ji ne ma: «Yaw nag jooyal garmiy Israyil. 2 Neel:

“Céy sa ndey, ndaw gaynde, fi biir gaynde yi!

Moo goor fi biir gaynde yu ndaw yi, di fa yar ay doomam.

3 Moo tàggat kenn ciy goneem\*, ba muy góoru gaynde gu ndaw, mana pàdd um pàddam, di yàpp doom aadama.

4 Ba ko xeet ya déggee, dañu koo fexeel, mu sërëx ca seenum yeer, ñu lonk, yóbbu réewum Misra.

5 «“Ndey gaynde xaara xaar, ba gis ne yaakaar jee na, mu jël keneen ciy goneem†, def ko góoru gaynde gu ndaw.

6 Daa ànd ak moroomi gayndeem, màgg, doon góoru gaynde gu ndaw, ba mana pàdd am pàddam, di yàpp doom aadama.

7 Mu tédde seeni jëtun, gentel seen dëkk yu mag, réew maak la ca biiram tiit ca coowal ñaram.

8 Teewul xeeti diiwaan ya ko séq ànd, dal fa kawam,

\* 19:3 19.3 Wax ji ci Buur Yowakas la jëm. Seetal ci 2.*Buur ya* 23.31-34. † 19:5 19.5 Wax ji ci Buur Cedesyas la jëm. Seetal ci 2.*Buur ya* 24.18-20 ak 25.1-7.

laaw ko seenum caax,  
 sërxaal ca seenum yeer.  
<sup>9</sup> Ñu lonk, dugal cib kaaf,  
 yóbbul ko buuru Babilon,  
 tēj ko ca biir ab tata,  
 ba kenn déggatuli ñaram  
 fa kaw tundi Israyil.

<sup>10</sup> «“Sa ndey a la niru, mel ni reseñ  
 gu ñu jëmbat fi wetu ndox,  
 meññ, sēq lipp,  
 ndax ndox mu ne xéew.

<sup>11</sup> Mu am car yu dēgër,  
 yu man yeti nguur,  
 daldi màgg ba àkki niir ya,  
 ràññiku ci taxawaay ak sēqaay.  
<sup>12</sup> Waaye am sànj a ko buddi, sànni fi suuf,  
 ngelawal penku wowal doom ya,  
 bàñqaasam yu dēgër ya fàq, lax,  
 sawara xoyom ko.

<sup>13</sup> Tey mu ngi jëmbate fi màndiñ mi,  
 ci réew mu wow, maral.

<sup>14</sup> Sawaraa tàkke fa bàñqaasam,  
 xoyom njebbit ak meññeef.  
 Du car bu dēgër bu ca des  
 bu mana doon yetu nguur.”  
 Woyu dēj a ngii wu ñuy jooyeb dēj.»

## 20

### *Israyil wor, Aji Sax ji gore*

<sup>1</sup> Gannaaw ba loolu wéyee ca atum  
 juróom ñaareel ma, fukki fan ca  
 juróomeelu weer wa\*, ay nit ñu bokk ci  
 magi Israyil ñoo dikk fi man, di seetlu  
 ci Aji Sax ji. Ñu toog fi sama kanam.  
<sup>2</sup> Kàddug Aji Sax ji nag dikkal ma ne ma:  
<sup>3</sup> «Yaw nit ki, nanga wax ak magi Israyil,  
 ne leen: “Boroom bi Aji Sax ji dafa wax  
 ne: Seetlu ci man moo leen indi? Giñ  
 naa ko ci man miy dund, du maa leen di  
 won li ngeen di seetlu. Kàddug Boroom  
 bi Aji Sax jee.” <sup>4</sup> Yaw nit ki, tiiñal leen,  
 tiiñal leen kat, seen jēfu maam ju siblu ji,  
 xamal leen ko.

<sup>5</sup> «Nanga leen wax, ne leen: “Bo-  
 room bi Aji Sax ji dafa wax ne: Ba ma  
 tannée Israyil, maa giñal askanu waa  
 kër Yanqóoba woowa. Maa leen xamal  
 maay kan ca réewum Misra, giñal leen,

ne leen: Man Aji Sax ji maay seen Yàlla.  
<sup>6</sup> Bésuub keroog laa leen giñal ne maa  
 leen di génnee réewum Misra, yóbbu  
 leen réew mu ma leen beralal, mu meew  
 maak lem ja tuuroo, fa gëna taaru ci  
 réew yépp.” <sup>7</sup> Ma ne leen: “Tuur yi  
 ngeen wékki gët yeen ñépp, xalableen  
 leen. Kasaray tuuri Misra, buleen ci  
 sobeel seen bopp. Man Aji Sax ji maay  
 seen Yàlla.” <sup>8</sup> Teewul ñu gántal ma,  
 nanguwñu maa déglu. Kenn nanguwula  
 xalab tuur yu seexluwu yi mu wékki gët,  
 kenn dēdduwul kasaray tuuri Misra. Ma  
 nar leena xépp samam sànj, ñaccal leen  
 sama mer ci biir réewum Misra. <sup>9</sup> Teewul  
 ma sédd ci sama tedngay tur, ngir xeet yi  
 ñu nekk ci seen biir bañ maa sikk. Ndax  
 ba may xamal bànni Israyil sama bopp, di  
 leen génne Misra, xeet yooyaa ko seede  
 woon. <sup>10</sup> Ma génne leen réewum Misra,  
 yóbbu leen ca màndiñ ma. <sup>11</sup> Ma jox leen  
 sama dogali yoon, xamal leen sama àttey  
 yoon yooyuy guddal fanu képp ku koy  
 jēfe. <sup>12</sup> Sama bési Noflaay itam maa leen  
 ko jox, muy màndarga sama digganteek  
 ñoom, ngir ñu xam ne man Aji Sax ji maa  
 leen sellal.

<sup>13</sup> «Waaye waa kër Israyil dañu maa  
 gántal ca màndiñ ma. Sama dogali yoon,  
 jēfewuñu ko, sama àttey yoon yiy guddal  
 fanu képp ku koy jēfe, ñu xalab. Ñàkke  
 nañu worma lool sama bési Noflaay. Ma  
 nar leena xépp samam sànj ca màndiñ  
 ma, sànk leen. <sup>14</sup> Teewul ma sédd ci  
 sama tedngay tur, ngir xeet, ya seede  
 woon ba ma leen di génne, bañ maa  
 sikk. <sup>15</sup> Ba tey maa leen giñal ca màndiñ  
 ma, ne дума leen yóbbu réew ma ma  
 leen jox, fa meew maak lem ja tuuroo,  
 fa gëna taaru ci réew yépp. <sup>16</sup> Li ko  
 waral mooy sama àttey yoon yi ñu xalab,  
 ak sama dogali yoon yi ñu jēfewul, ak  
 sama bési Noflaay yi ñu ñàkke worma,  
 ndax xol lañu toppe seen kasaray tuur yi.  
<sup>17</sup> Teewul ma xool leen bētu ñeewante  
 ba sànkuma leen, faagaagaluma leen ca  
 màndiñ ma. <sup>18</sup> Ma wax nag seeni doom  
 ca màndiñ ma ne leen: “Seen dogali baay,  
 buleen ko jēfe; seen àttey yoon, buleen ko

\* **20:1** 20.1 Mu yemook fukki weer ak benn gannaaw peeñu ma jiitu mii. Seetal ci 8.1.



topp; seen kasaray tuur, buleen ca sobeel seen bopp. <sup>19</sup> Man Aji Sax ji maay seen Yàlla. Sama dogali yoon, jèfeleen ko; sama àttey yoon, ngeen sàmm ko, di ko jèfe. <sup>20</sup> Sama bési Noflaay, sellal-leen ko, muy firnde sama digganteek yeen, ngir ngeen ràññee ne man maay seen Yàlla Aji Sax ji.”

<sup>21</sup> «Waaye doom ya dañu maa gàntal. Sama dogali yoon, jèfewuñu ko, sama àttey yoon yiy guddal fanu képp ku koy jèfe, sàmmuñu ko. Sama bési Noflaay lañu ñàkke worma. Ma nar leena xèpp samam sànj, ñaccal leen sama mer ca màndiñ ma. <sup>22</sup> Teewul ma téye sama loxo, sédd ci sama tedngay tur ngir xeet, ya seede woon ba ma leen di génne, bañ maa sikk. <sup>23</sup> Ba tey maa leen giñal ca màndiñ ma ne dinaa leen tasaare ci biir xeet yi, wasaare leen ci biir réew yi. <sup>24</sup> Li ko waral mooy sama àttey yoon yi ñu jèfewul, ak sama dogali yoon yi ñu xalab, ak sama bési Noflaay yi ñu ñàkke worma, ak topp gi ñu topp seen kasaray tuuri baay, wékk leeni gèt. <sup>25</sup> Ba tey maa leen bërgal ak àttey yoon yu amul njariñ ak dogali yoon yu taxul kenn a dund. <sup>26</sup> Maa leen sobeel ak seen sarax yi ñuy sarxal tuur yi, ci seen bépp taaw bu ñu lakk ngir tuur yi. Li ma ci jublu mooy ñu jommi, ba ràññee ne man maay Aji Sax ji.

<sup>27</sup> «Moo tax, yaw nit ki, nanga wax ak waa kër Israyil, ne leen: “Boroom bi Aji Sax ji dafa wax ne: Seeni baay a ma dellu ñàññ, fecci ma kóllère. <sup>28</sup> Maa leen yóbbu réew ma ma leen giñaloona jox, teewul fu ñu gis tund wu kawé, mbaa garab gu sèq, rendi nañu fa seeni sarax, jooxe fa seen jooxe yi may merloo, taal fa seen saraxi cuuraay, tuural fa seeni tuur. <sup>29</sup> Ma ne leen: Ana lu waral bérabu jaamookaay bii ngeen di dem?” Bérabu Jaamookaay lañu koy wax ba tey jii.

<sup>30</sup> «Kon nag nanga wax ak waa kër Israyil ne leen: “Boroom bi Aji Sax ji dafa wax ne: Seen tàñki baay ngeen topp, di sobeel seen bopp, topp seen tuur yu siblu, di gànctook ñoom? <sup>31</sup> Bu ngeen di joxe ay sarax, di lakk seeni doom ngir ay tuur, yeena ngi sobeel seen bopp ba tey jii ci

seen tuur yii yépp. Man nag ngeen defe ne maa leen di bàyyi, ngeen seetlusi fi man, yeen waa kër Israyil? Giñ naa ko ci man miy dund, kàddug Boroom bi Aji Sax jee, duma leen bàyyi mukkk ngeen seetlu fi man. <sup>32</sup> Li ngeen mébét ci seen xel du am mukkk. Yeena ngi naan: ‘Nan mel ni xeet yépp, mel ni waasoy réew yi, di jaamu bant ak doj.’ <sup>33</sup> Giñ naa ko ci man miy dund, kàddug Boroom bi Aji Sax jee, sama dooley loxo ak sama kàttanu pèrèg, ak sànj mu naan soteet laay nguuroo ci seen kaw. <sup>34</sup> Maa leen di génnee ci askan yeek réew yi ngeen tasaaroo ci seen biir. Sama dooley loxo laa koy defe ak sama kàttanu pèrèg, ak sànj mu naan soteet fi seen kaw. <sup>35</sup> Maa leen di yóbbu màndiñ ma ñuy wooye Màndiñu Askan yi, layoo faak yeen, di leen xool, ngeen di ma xool. <sup>36</sup> Noonee ma layoo woon ak seen baay ca màndiñu réewum Misra, ni laay layook yeen. Kàddug Boroom bi Aji Sax jee. <sup>37</sup> Maa leen di lime sama yetu sàmm, kenn-kenn, tènkk leen ci pas-pasu kóllère gi. <sup>38</sup> Maay xettee fi seen biir ñi may gàntal ak ñi may tooñ. Réew ya ñu wàlliyaani, fa laa leen di jèle, te réewum Israyil, duñu fa duggi. Su boobaa ngeen xam ne maay Aji Sax ji.

<sup>39</sup> «“Léegi nag yeen waa kër Israyil, Boroom bi Aji Sax ji dafa wax ne: Aca, na ku ne jaamuji kasaray tuuram! Dungeen mujje lu moy déggal ma, ba sama tur wu sell wi, dootuleen ko teddadile seeni sarax ak seeni tuur. <sup>40</sup> Fa kaw sama tund wu sell wa, fa tundu Israyil wu kawé wa, kàddug Boroom bi Aji Sax jee, foofa déy la ma waa kër Israyil gépp di jaamujee, ñoom ñépp ca réew ma. Fa laa leen di nangule. Fa laay sàkkoo seeni jooxe ak seen ngèneeli sarax, ak lépp lu ngeen ma sellalal. <sup>41</sup> Maa leen di nangul seen saraxu cuuraay, gannaaw bu ma leen génnee fa biir xeet yaak réew ya ngeen tasaaroo ca seen biir, ba dajale leen. Su boobaa maay jèfe sellnga fi seen biir, xeet yi seede. <sup>42</sup> Dingen xam ne maay Aji Sax ji, gannaaw bu ma leen délloosee ci biir suufas Israyil, réew ma ma giñaloon seeni maam, ne dinaa leen ko jox. <sup>43</sup> Fa

ngeen di fàttlikoo seeni jëfin, mboolem seeni jëf yu ngeen sobeele woon seen bopp, daldi jéppi seen bopp ndax seen mboolem jëf ju bon. <sup>44</sup> Yeen waa kër Israyil, duma jëflanteek yeen li seen jikko ju bon yelloo ak seen jëfi yàqute, waaye sama tedngay tur laa ciy seet, ba ngeen xam ne man maay Aji Sax ji. Kàddug Boroom bi Aji Sax jee.”»

## 21

### *Woyu saamar jib na*

<sup>1</sup> Kàddug Aji Sax ji dikkal na ma ne ma: <sup>2</sup> «Yaw nit ki, neel jàkk yoonu ndijoor, sànnil kàddu ci kaw bëj-saalum googu, waxal waxyu ci kaw gottub Negew boobu\*.<sup>3</sup> Dangay wax waa gottub dii-waanu Negew, ne leen: “Déglul kàddug Aji Sax ji. Boroom bi Aji Sax ji dafa wax ne: Maa ngii di jafal ci sa biir, daay guy xoyom sa garab yépp, gu naat ak gu wow. Dara du ko mana fey. Daay ga day jóge bëj-saalum ba bëj-gànnar te ñépp a cay lakk, <sup>4</sup> ba mboolem kuy dund xam ne man Aji Sax ji maa ko taal te du fey.”» <sup>5</sup> Ma ne ko: «Éey Boroom bi Aji Sax ji, ñii déy a ngi wax ci man, naan: “Kii moom xanaa day léeb ak a léebaata rekk?”» <sup>6</sup> Ba loolu amee kàddug Aji Sax ji dikkal ma ne ma: <sup>7</sup> «Yaw nit ki, jàkkaarool ak Yerusalem, nga sànni kàddu bérab yu sell yi te nga wax waxyu ci kaw réewum Israyil. <sup>8</sup> Waxal réewum Israyil ne ko: “Aji Sax ji dafa wax ne: Maa ngi nii fi sa kaw. Maay boccee sama saamar mbaram, daldi dagge fi yaw ku jub ak ku bon. <sup>9</sup> Dagge fi yaw ku jub ak ku bon moo may taxa boccee sama saamar mbaram, dal ci mboolem kuy dund, bëj-saalum ba bëj-gànnar, <sup>10</sup> ba képp kuy dund xam ne man Aji Sax ji maa bocci sama saamar, te du dellu mbaram.” <sup>11</sup> Yaw nit ki, binnil, neel yàcc, di binnee naqar, ñuy gis. <sup>12</sup> Dees na la laaj ne la looy binni. Nga ne leen: “Xanaa mbir mi ma dégg. Bu agsee fit yépp ay récc, loxo yépp nasax, xol yépp jeex, óom yépp

di fenqoo. Mu ngooguy dikk te dina am. Kàddug Boroom bi Aji Sax jee.”»

<sup>13</sup> Ba loolu amee kàddug Aji Sax ji dikkal ma ne ma: <sup>14</sup> «Yaw nit ki, waxal bii waxyu, nga ne: “Boroom bi dafa wax ne:

Saamar a ngoog,  
saamar bu ñu xacc, jonj ko!

<sup>15</sup> Dees koo jonj ngir bóome,  
jonj koo jonj ba muy tàkk.

Ana nu nu mana bége lii? Ngeen ne  
Aji Sax ji nee: ‘Yetu nguug Yuda  
sama doom a ngi fi.’

Waaye saamar bi faalewul benn bant!

<sup>16</sup> Santaane nañu ñu jonj saamar bi,  
ba loxo man koo téye,  
ñu xacc ko, jonj ko,  
nar koo teg ci loxol bóomkat.

<sup>17</sup> Yaw nit ki, yuuxul, jooyal,  
saamar bi dikkal na sama ñoñ,  
dikkal mboolem kàngami Israyil,  
boole leen ak sama ñoñ, jalax ci kaw  
saamar.

Kon nag, mättul, wiccax!

<sup>18</sup> Nattu bi metti na!

Bu yetu nguug, wi saamar bi xeeb, demee,  
ana luy xew?

Kàddug Boroom bi Aji Sax jee.”

<sup>19</sup> «Yaw nit ki, jottlil waxyu,  
ñëbal bii loxo, dóor ca bee.  
Na saamar bi dal benn yoon, ñaari yoon,  
ba ñett,  
saamaru ndee la, saamar baay bóom ñu  
bare,

gaw leen,

<sup>20</sup> yóbbuw fit,  
tërfloo ñu bare.

Seen buntoo bunt laa teg saamaru  
bóomkat.

Ndeysaan, bii saamar bu ñu defar ba muy  
tàkk,  
xacc ko ngir bóome.

<sup>21</sup> Saamar, ñaweel sa ndijoor,  
walbatiku, jëm càmmoñ,  
ak foo mana jublu,

<sup>22</sup> man it ma ñëb bii loxo, dóor ca bee,  
ba giifal sama xadar.

Man Aji Sax ji maa ko wax.»

<sup>23</sup> Ba loolu amee kàddug Aji Sax ji  
dikkal ma ne ma: <sup>24</sup> «Yaw nag nit ki,

\* **21:2** 21.2 Waxyu bii mu ngi jëm ci wàllu Yuda gi fëete bëj-saalum.

sàkkal ñaari yoon yu saamaru buuru Babilon di jaare dikk; ñaari yoon yuy bàyyikoo menn um réew. Tegal fa buntu yoon wu ci nekk màndarga muy tegtale dëkk ba yoon wa jëm; <sup>25</sup> wenn yoon wa jëme saamaru Babilon ca Raba, dëkkub Amoneen ñi; wa ca des jëme ko Yerusalem, dëkk ba ñu dàbbli, ca Yuda. <sup>26</sup> Buuru Babilon a ngay taxaw ca selebe yoon wa, fa ñaari yoon ya séddlikoo, ngir gisaane. Dina yëngal fitti seetukaay yi, xool ci terafim yi, jumtukaay yi ñuy gisaanee, te dina xool ci resu jur. <sup>27</sup> Fitt giy misaal Yerusalem ndijooram lay wadd. Mu sës dénki dàjjikaay yi, yéene ndigalu bóome, xaacu, daldi sës dénki dàjjikaay yi ci bunt yi, yékkati sékk yi, ngir taxawal ab gawukaaay. <sup>28</sup> Waa Yerusalem foog ne ngisaane googu misaal seen jéll, caaxaan la, ndax ngiñ moo lal seen kaaraange, ba du deñ. Waaye buuru Babilon a leen di fàttli seenug tooñ, ba jàpp leen njaam.

<sup>29</sup> «Moo tax Boroom bi Aji Sax ji dafa wax ne: Gannaaw yeena fàttliku seen ñaawtéef, seeni tooñ ne fàññ, seeni bàkkaar fés ci seen jéf jépp, gannaaw yeena ñaaw ñaawtéef gu ñu leen di fàttlikoo, dees na leen jàpp.

<sup>30</sup> «Waaye yaw garmib Israyil bu teddadi bu bon bi,

sa bés dikk na, sa àppu mbugal mat na.†

<sup>31</sup> Boroom bi Aji Sax ji dafa wax ne: Dindil kaala gi, foq mbaxanam buur mii; la woon wonni na, ku noon dett jóg, ku jóg, detteelu.

<sup>32</sup> Tasaaroo, tasar, maa ko naa tasar! Lépp ay wonni,

ba keroog boroom àtte bi dikk, ma jox ko ko.

<sup>33</sup> «Yaw nag nit ki, jottlil bii waxyu, nga ne: “Boroom bi Aji Sax ji dafa wax ci mbirum Amoneen ñeek seeni saaga ne:

Saamaroo saamar, bocciku, nara bóome, xacce ba mana yàppe, di tàkk ni melax.

<sup>34</sup> Gisal nañu leen peeñuy caaxaan,

gisaaneel leeni fen.

Teewul saamar ba di tege ca ndoddi

ñu bon ñi ñu nara bóom,

seen bés taxaw,

seen mujjantalu mbugal teew.

<sup>35</sup> «“Léegi dellooleen saamar ci mbaram. Saamaroo, fa ñu la sàkke woon, ca réew ma nga cosaanoo, fa laa lay àttee.

<sup>36</sup> Maa lay xëpp samam sànj, wal sama sawaras xadar fi sa kaw, jébbal la nit ñu néeg, ñu xareñ ci sàнке.

<sup>37</sup> Yaay doon mattum sawara wa, sa deretu boroom ne xéew fi digg réew mi,

ba deesatu la fàttliku.

Man Aji Sax ji maa ko wax!”»

## 22

### *Yerusalem def nay tojaange*

<sup>1</sup> Kàddug Aji Sax ji dikkal na ma ne ma: <sup>2</sup> «Yaw nit ki, doo tiiñal ñii? Doo tiiñal waa dëkku tuurkati deret yii? Xamal leen seen jéf ju siblu jépp. <sup>3</sup> Ne leen: “Boroom bi Aji Sax ji dafa wax ne: Ab dëkk a ngii buy tuur deret fi biiram, ba tax bésam di jubsu. Mu ngi sàkk ay kasaray tuur, di sobeel boppam. <sup>4</sup> Yaw dëkk bii, gaddu nga bàkkaar ndax deret ji nga tuur, sobeel nga sa bopp ndax kasaray tuur yi nga sàkk. Kon gàttal nga saw fan, agsi nga ci sa àppu at. Moo tax maa lay def ku mboolem xeet yi di sewal, ku mboolem waa réew yi di kókkali. <sup>5</sup> Dëkk bu yàqu bi nga doon, ku jegeek ku soree lay kókkali. Boroom der bu yàqu bi, sa lépp a salfaañoo! <sup>6</sup> Kàngami Israyil a ngii fi sa biir, di jaay doole bay tuur deret. <sup>7</sup> Ndey ak baay, ñu tuutal fi sa biir; doxandéem bi, ñu lekk àqam fi sa biir; jirim akub jëtun, ñu néewal fi sa biir. <sup>8</sup> Sama mbir yu sell, nga sàggane, sama bési Noflaay, nga ñàkke worma. <sup>9</sup> Ay soskat a ngi fi sa biir, di lor ay bakkan. Kaw tund yi lañuy lekke ñam wu ñu sarxeel ay tuur fi sa biir, tey def jéfi yàqute fi sa biir. <sup>10</sup> Baay la doom di teddadil lalam fi sa biir, ku gis baax, ñu

† **21:30** 21.30 Buur Cedesyas lañuy wax fii. Cedesyas mooy buur bi mujj ci askanu Daawuda. Seetal ci 2. *Buur ya* 25.4-7.

tédde fi sa biir. <sup>11</sup> Kii ak jabaru jaambur ci jëf ju siblu, kee sobeel jabari doomam ci biir yàqute, kale di tédde rakki doom baayam fi sa biir. <sup>12</sup> Alalu ger, ñu jël fi sa biir, ngir lor ay bakkan. Ndollant ci kaw tegandaay, nga jël feyeekoo bor, di wute alal sa àqu moroom. Man nag, nga fàtte ma. Kàddug Boroom bi Aji Sax jee.

<sup>13</sup> «“Maa ngii nag di fenqe samay loxo, di ko mititloo alal ju lewul ji nga dajale, ak sa dereti nit ji ñu tuur fi sa biir. <sup>14</sup> Mbaa keroog bés ya may jëflanteek yaw, dinga am fit ak doole joo ko dékkoo? Man Aji Sax ji maay wax, jëfe ko. <sup>15</sup> Maa lay tasaare fi biir xeet yi, wasaare la fi réew yi, ba tàggale laak sa sobe. <sup>16</sup> Dinga teddadil sa bopp, xeet yiy gis, ba nga xam ne maay Aji Sax ji.”»

<sup>17</sup> Ba loolu wéyee kàddug Aji Sax ji dikkal ma ne ma: <sup>18</sup> «Yaw nit ki, waa kër Israyil mbuubitu weñ gu raxe lañu ci man léegi. Ñoom ñépp duñu lenn lu moy xànjari ak weñ gu weex ak gu ñuul ak beteex ci biir taalub tegg. Mbuubitu xalis rekk lañu. <sup>19</sup> Moo tax Boroom bi Aji Sax ji dafa wax ne: “Gannaaw doon ngeen yeen ñépp mbuubitu weñ, maa ngii nag di leen dajale fi digg Yerusalem. <sup>20</sup> Ni ñuy boolee xalis ak xànjari ak weñ gu ñuul ak beteex ak weñ gu weex ci biir ab taal, xamb sawara wa ngir seeyal ko, ni laa leen di boolee ci sama biir mer ak sama xadar, jóor leen, seeyal leen. <sup>21</sup> Maa leen di saam fi digg Yerusalem, jafale leen sama tàngooru xadar, ba ngeen seey ca biir. <sup>22</sup> Ni xalis di seeye ci biir taal, ni ngeen di seeye ca biir. Su boobaa ngeen xam ne man Aji Sax ji maa leen xépp sama xadar.”»

<sup>23</sup> Gannaaw loolu kàddug Aji Sax ji dikkal na ma ne ma: <sup>24</sup> «Yaw nit ki, waxal Yerusalem ne ko: “Yaa di suuf su ñu dindiwul sobeem, te tawluwul keroog bés sub sànj ma.” <sup>25</sup> Ay yonentam a ngi déeyoo fi biiram; ñu ngi xiiru ni gaynde guy xotat pàddam, di lekk doom aadama yi, foqati alal ak gànjar, ful jëtun yi ci biiram. <sup>26</sup> Ay sarxalkatam xëtt nañu sama yoon, teddadil nañu sama yëf yu sell. Lu sell ak lu sellul, ràññeewuñu ko; lu set ak lu sobewu, xamlewuñu ko; sama bési

Noflaay, ñu jéllale ko, ba ma mujj teddadi fi seen biir. <sup>27</sup> Kàngamam yi ci biiram a ngi mel ni saafaandu yuy dogat am pàdd, tuur deret ja, di sànk ay bakkan ngir nangu alali boroom. <sup>28</sup> Ay yonentam di leen diwal weexal ci kaw loolu lépp, ci peeñuy caaxaan ak ngisaaney fen, naan: “Boroom bi Aji Sax ji dafa wax ne,” te Aji Sax ji waxul. <sup>29</sup> Waa réew maa ngi lekk àq, di sàcc. Baadoolo yeek walaakaana yi, ñu néewal; doxandéem bi, ñu not, xañ ko àqam. <sup>30</sup> Ma seet ci seen biir kuy defaraat tata ji, janook man ci bëttukaay bi, ngir taxawal réew mi, ba duma tas réew mi, waaye gisuma kenn. <sup>31</sup> Ma daldi leen xépp samam sànj, fàkkase leen sama tàngooru xadar, képp leen seen aña jëf ci seen kaw bopp. Kàddug Boroom bi Aji Sax jee.»

## 23

### *Samari ak Yerusalem bokkaale nañu*

<sup>1</sup> Kàddug Aji Sax ji dikkal ma ne ma:  
<sup>2</sup> «Yaw nit ki, ñaari jigéen la woon,  
 ñu bokk jenn ndey,  
<sup>3</sup> di gànctu ca Misra,  
 te doon fa gànctu ca seenug ndaw.  
 Fa lañu doon lùmbe seeni ween,  
 di motoxal seen cusi janq.  
<sup>4</sup> Ku mag kaa doon Owola,  
 rakk ja di Owoliba.  
 Ñu di samay soxna,  
 jural may doom, góor ak jigéen.  
 Owola mooy Samari,  
 Owoliba di Yerusalem.  
<sup>5</sup> Owola di sama soxna tey gànctu,  
 di xédd ay faram, waa Asiri xarekat ya.  
<sup>6</sup> Ña nga sol seen mbubbi baxa,  
 diy kàngam aki jawriñ,  
 ñoom ñépp di xale yu góor yu sopplu,  
 di ndaanaani gawar.  
<sup>7</sup> Boppam la daan jox tànnéefi doomi Asiri  
 yooyu yépp,  
 di sobeel boppam ak mboolem tuuri  
 ñooñu mu xédd.  
<sup>8</sup> Gànctoom ga woon ca Misra, bawu ko.  
 Moom lañu daan tédde cag ndawam,  
 te ñoo daa motoxal cusi janqam,  
 ba sotti ko seen yàqute.  
<sup>9</sup> Moo tax ma teg ko ca loxoy faram ya,

loxoy waa Asiri ya mu daan xédd.  
 10 Ñoo ko ñori ba mu ne dunḡ,  
 doomam yu góor ak yu jigéen, ñu nangu,  
 moom, ñu jam ko saamar, rey ko.  
 Nii lañu sottale ay mbugalam,  
 ba mu yedd jigéen ñépp.

11 «Owoliba rakk ja gis ca  
 te gëna yàqu magam,  
 di gànctu ba raw mag ja.

12 Moom it waa Asiri ya la xédd,  
 ñuy kàngam aki jawriñ,  
 xarekat yu rangu ba solu ba jekk,  
 di ndaanaani gawar,  
 ñoom ñépp di xale yu góor yu sopplu.  
 13 Ma gis ni mu sobeele boppam,  
 muy wenn yoon wu ñu bokk ñoom ñaar.  
 14 Teewul rakk ja gëna gànctooti,  
 gis nataali góor yu ñu yett ciy tabax,  
 di jëmmi waa Babilon yu ca ñaase, xonq  
 curr.

15 Ña nga takk ngañaay ca seen ndigg,  
 tañlaayu bay langal,  
 ñoom ñépp di nirooki kàngam,  
 di saf doomi Babilon,  
 réewum Kalde di seen cosaan.

16 Rakk ja teg nataal ya bët rekk, xédd  
 leen,  
 yónnee leeni ndaw fa Kalde.

17 Doomi Babilon ya dikk,  
 fekksi ko ci kaw lalu baane,  
 sobeel kook seen yàqute,  
 mu sobeel boppam ak ñoom ba ñu sàppi  
 ko.

18 Moo siiwal gànctoom,  
 wone yaramu neenam,  
 ba sàppi ma ni ma magam sàppee.

19 Mu gën di gànctooti,  
 di ko baaxantale janti ndawam,  
 ba muy gànctu ca réewum Misra.

20 Muy xédd ay faram  
 yu seeni ngóora di saf yu mbaam,  
 te ñu alde alde ba mel niy fas.

21 «Yaw Owoliba de, yaa namm sa yàqute  
 ga woon ba ngay ndaw,  
 ba waa Misra di motoxal say cus,  
 ngir bannexoo sa weeni janq.

22 Moo tax Boroom bi Aji Sax ji dafa wax  
 ne:

“Owolibaa, maa ngii di xabtalsi say far ci  
 sa kaw;

ñi la sàppi, ñoom laay bàbbee fi la wër,  
 xiirtal leen fi sa kaw:

23 waa Babilon, Kaldeen ñépp,  
 muy waa Pekot, di waa Sowa, di waa  
 Kowa,

ànd ak waa Asiri yépp,  
 di xale yu góor yu sopplu,  
 ñoom ñépp di kàngam aki jawriñ,  
 di kilifa yu ràññiku,  
 ñoom ñépp war ay fas.

24 Dañuy dal fi sa kaw,  
 aki gannaay, watiir aki mbege ak  
 kurélu xeeti xeet,  
 ḡabb pakk bu mag ak bu ndaw, sol  
 mbaxanam xare,  
 dar kepp la.

Maa leen di jox sañ-sañu mbugal,  
 ñu mbugal la, ni ñu baaxoo mbugale.

25 Maa lay yen sama firaange,  
 te yaw lañuy jëflanteel ak xadar,  
 sa bakkan ak say nopp, ñu njoof,  
 saw ndes fàddoo saamar.  
 Say doom, góor ak jigéen, ñu nangu,  
 sa kuutaay lakk ba xoyomu.

26 Dañuy futti say yére, foqati say gànjar.

27 Maay dakkal sa jëfi yàqute,  
 ak sa gànctu ga dale ca réewum Misra,  
 ba dootoo ko geesoo gëti nammeel,  
 te dootoo fàttliku Misra.

28 Boroom bi Aji Sax ji kat dafa wax ne:  
 Maa ngii di la teg ci loxol ñi nga bañ,  
 loxol ñi la sàppi.

29 Mbañeel lañuy jëfeek yaw,  
 foqati ñaqoo ñaq,  
 wacc la, nga ne dunḡ dunḡaaral.  
 Sa gànctu gu ñàkk kersa dina feeñ,  
 ak dëgër bët gi ngay cagatoo.

30 Ñoo lay def jii jëf  
 ndax sa gànctu gi nga toppe yéefar yi,  
 di sobeel sa bopp ak seen kasaray tuur.

31 Yaa topp sa t ànki mag,  
 kon maa lay nàndale kaasu mbugalam.

32 Boroom bi Aji Sax ji dafa wax ne:  
 Sa kaasu mag ngay naane,  
 xóot, yaatu,  
 duy ba ne xéew,  
 xellil la ay ñaawleeki kekku.

33 M ànditeeku tiis ngay feesi,

kaasu wéetaay ak wéetle di sa kaasu mag Samari.

<sup>34</sup> Yaa koy naan ba siitaatu ko, yéy tojit ya, xotate say ween. Man de maa ko wax. Kàddug Boroom bi Aji Sax jee.

<sup>35</sup> «“Moo tax Boroom bi Aji Sax ji dafa wax ne:

Yaa ma fàtte, jalax ma sa gannaaw. Kon nag gàddul sa ayu ñàkk gàcceek sa gànctu.”»

<sup>36</sup> Aji Sax ji nag ne ma: «Yaw nit ki, doo tiiñal Owola ak Owoliba? Kon nag biral leen seeni jëf ju siblu:

<sup>37</sup> Ñoo njaaloo, ñoo bóome, ñoo njaalook seen kasaray tuur. Doyatu leen, doom yu góor yi ñu ma jural, ñu di leen lakk ngir ay tuur, leele leen.

<sup>38</sup> Lii itam, ñoo ma ko def: Bésu keroog lañu sobeel sama kër gu sell,

teddadil sama bési Noflaay.

<sup>39</sup> Ñoo rendil seen kasaray tuur seeni doom,

ba noppi dugg sama biir kër gu sell ci bés bi,

ba teddadil kër gi.

Loolu déy, moom lañu def fi sama digg kër gii!

<sup>40</sup> Te sax ñoo yeble, wutiy góor, yónnee ndaw lu leen jële fu sore, ñu daw dikk, fekk leen sangu, tusngalu, gànjaru,

<sup>41</sup> tooge lal bu yànj, taabal taaje fa kanam, sama cuuraay ak sama diw gu xeeñ tege ca.

<sup>42</sup> Muy coowal gàngoor gu amul xalaatu àddina;

doom aadama ju nekk a nga ca, ba ci ay màndikat yu ñu jële ca màndin ma,

ñooña di leen takkal lami loxo, di leen solal mbaxanam lingeer.

<sup>43</sup> Booba laa wax ci ndaw sii njaaloo ba ràpp, ne:

“Ndaw sii lañuy gànctool ba tey?”

<sup>44</sup> Mu daldi ànd ak moom ni ñuy àndeek caga rekk.

Nii lañu àndeek Owola ak Owoliba.

Nii jigéen ñu ñàkk gàcce!

<sup>45</sup> Waaye ay nit ñu jub a ngii, ñoo leen di atteji àtteb njaalookat yu jigéen,

àtteb bóomkat yu jigéen, nde ay njaalookat lañu, te ay bóomkat lañu.

<sup>46</sup> «Boroom bi Aji Sax ji déy dafa wax ne:

Wool gàngoor ci seen kaw, bàyyee leen tiitaange aki sèxëtookat.

<sup>47</sup> Gàngoor gaa leen di dóor ay doj,

jam leeni saamar, ñu dee, seeni doom, góor ak jigéen, ñu bóom; seeni kër, ñu taal,

<sup>48</sup> ma dakkale noonu yàqute ci réew mi, jigéen ñépp jàngé ca, baña jëfeeti yàqute ju mel ni seen jos.

<sup>49</sup> Dees na leen këpp seen yàqute, ngeen yenu seen bàkkaari kasaray tuur, ba xam ne man maay Boroom bi Aji Sax ji.»

## 24

### *Mbugalu Yerusalem, misaal maa ngi*

<sup>1</sup> Kàddug Aji Sax ji dikkal na ma ca juróom ñeenteelu at ma, fukki fan ca fukkeelu weer wa. Mu ne ma: <sup>2</sup> «Yaw nit ki, bindal bés bii, bés bii ci boppam, ndax buuru Babilon gaw na Yerusalem bés niki tey. <sup>3</sup> Léebalal kërug fippukat yi aw léeb, ne leen: “Boroom bi Aji Sax ji dafa wax ne:

Taalal, teg cin li, teg ko, sotti ci ndox.

<sup>4</sup> Booleel dogi yàpp yi, def ci:

dog yu baax yépp, fállare jeek tànkú kanam bi,

te feccalee ko cër ya gèna baax.

<sup>5</sup> Li gën ci gétt gi ngay sàkk, nga jal matt ci suufu cin li, xamb, baxala baxal, ba baxalaale yax yi.”»

<sup>6</sup> Boroom bi Aji Sax ji kat dafa wax ne:

«Wóoy ngalla bii dèkku tuurkatu deret!

Mooy cin lu teg àkki xëmit,

cin lu dul tàggook xëmitam.

Wenn-wenn ngay seppi dogi yàpp yi,

te bul tegoo bant la ngay seppi.

<sup>7</sup> Deret ji mu tuur a ngi ci biiram ba tey; doj wu amul dara la ko sotti,

sottiwu ko ci suuf, fu muy suuloo.

<sup>8</sup> Man maay wacc deret ja ca doj wa amul dara,

fa mu naan fàññ, du suulu,  
ngir mu doon sànj muy wàcce mbugal.»

<sup>9</sup> Boroom bi Aji Sax ji déy dafa wax ne:

«Wóoy ngalla bii dëkku bóomkat!  
Man it dinaa yokk jalu matt mi.

<sup>10</sup> Jalala jal matt mi, xamb taal bi.  
Baxalal yàpp wi bu baax, ñeeral,  
ba yax yi far xëm.

<sup>11</sup> Boo noppee tegal cin li deful dara ci xal yi,

mu tàng ba xàñjar bi xonq curr,  
tilim ja seey ca biir,  
xëmit ja xoyomu.

<sup>12</sup> Coonoy neen, xëmit ja ne xéew du deñ,  
sawara sax dindiwu ko.

<sup>13</sup> Sa sobeey sa yàqute!  
Maa la setal te taxu laa set.

Dootuloo tàggook sa sobe,  
ba keroog may giifal sama xadar fi sa kaw.

<sup>14</sup> Man Aji Sax ji maa wax,  
mu dikk, ma jëfe ko.

Duma bàyyi, duma ñéeb lu, duma yërëm;  
say jikko ak say jëf lees lay àttee.

Kàddug Boroom bi Aji Sax jee.»

### *Soxnas Esekiyel faatu na*

<sup>15</sup> Gannaaw loolu kàddug Aji Sax ji dikkal na ma ne ma: <sup>16</sup> «Yaw nit ki, maa ngii di nangusi sa bannexu bët cim pàdd. Bul yuuxu, bul jooy, bu sa rongooñ wadd. <sup>17</sup> Binnil ndànk te bul ñaawlu. Bul tàggook sa kaala, bul tàggook say carax, bul muur sa tuñum kaw ba ci sikkim di ko ñaawloo. Bul lekk ñam wu la njaal mi indil.\*»

<sup>18</sup> Wax naak mbooloo mi ci suba, ci ngoon si sama soxna dee. Bët set ma def li ñu ma sant. <sup>19</sup> Mbooloo mi nag ne ma: «Xanaa doo nu wax lii ngay def nii, lu muy wund ci nun?» <sup>20</sup> Ma ne leen: «Kàddug Aji Sax jee ma dikkal, ne ma: <sup>21</sup> Waxal waa kër Israyil, ne leen: “Boroom bi Aji Sax ji dafa wax ne: Maa ngii di teddadil sama bérab bu sell bii, seen sag bii ngeen di doolewoo, di seen bannexu bët, di seen nammeelu bakkan. Seen doom yu góor ak yu jigéen

ya ngeen bàyyi Yerusalem, saamar dina leen tëral. <sup>22</sup> Te nangeen def nii ma def. Buleen muur tuñum kaw ba ci sikkim te buleen lekk ñam wu leen njaal mi indil. <sup>23</sup> Buleen tàggook kaala, buleen tàggooki carax. Buleen yuuxu, buleen jooy. Waaye dingeen jeex tàkk ndax seeni ñaawtéef, ngeen ànd di binni.” <sup>24</sup> Mu ne: “Na Esekiyel di seen misaal. Bu jotee, mboolem nu mu def, nangeen ko def, ba xam ne man maay Boroom bi Aji Sax ji.”

<sup>25</sup> «Yaw nit ki, bés bu ma nangoo ci ñii seen tatay daraja ji ñuy bége, muy seen bannexu bët, di seen xintey bakkan, ba nanguwaale seen doom yu góor ak yu jigéen, <sup>26</sup> bés sub keroog ku ca rëcce dina dikk ba ci yaw, àgge la xibaar bi. <sup>27</sup> Bés sub keroog sa gémmin dina ubbiku, nga noppee luu, ba wax ak ka rëcc. Su boobaa yaay doon misaalu mbooloo mi, ba ñu xam ne maay Aji Sax ji.»

## 25

### *Kàddug waxyu dal na xeet yi*

#### *Waxyu dal na Amon*

<sup>1</sup> Kàddug Aji Sax ji dikkal na ma ne ma: <sup>2</sup> «Yaw nit ki, neel jàkk Amoneen ñi, nga wax waxyu ci seen kaw. <sup>3</sup> Waxal Amoneen ñi, ne leen:

“Dégluleen kàddug Boroom bi Aji Sax ji. Boroom bi Aji Sax ji dafa wax ne:

yeena noon: ‘Ñaw!’ ba ñuy teddadil sama kër gu sell,

réewum Israyil gental,  
waa kër Yuda jëm ngallo.

<sup>4</sup> Maa ngii nag di leen jébbal manganani penku,

ñu moom leen,  
samp seeni dal fi seen biir,  
yékkati fa seeni xayma.

Ñooy lekk seen meñneef,  
naan seen meew.

<sup>5</sup> Maay soppo Raba seen péey ab parlub giléem,

maay def réewum Amon goorukaayu gàtt,

ba ngeen xam ne maay Aji Sax ji.

<sup>6</sup> Boroom bi Aji Sax ji déy dafa wax ne:

\* **24:17** 24.17 Ku deele daawul togg. Waa njaal mi ñooy indi ñam wu ñu lekk ci dëj bi.

Yeena doon tàccu,  
di fecc, bége tiisu réewum Israyil,  
di leen sewal lu ngeen man.

<sup>7</sup> Maa ngii nag di leen dóor sama loxo,  
te maa leen di jébbal xeet yi, ñu sèxëtoo  
leen.

Maa leen di dagge fi digg xeet yi,  
maa leen di fare ci réew yi,  
faagaagal leen,  
ba ngeen xam ne maay Aji Sax ji.»»

### *Waxyu dal na Mowab*

<sup>8</sup> «Boroom bi Aji Sax ji déy dafa wax ne:  
Waa Mowab ak Seyir a ne: “Xool-leen waa  
kër Yuda ñii ni ñu mujje,  
ñook xeet yépp a yem!”

<sup>9</sup> Maa ngii nag di ñafal réewum Mowab,  
ba xañ leen mboolem seen dëkk ya gëna  
taaru sax,  
di Bet Yesimot ak Baal Mewon ak  
Kiryaatayim.

<sup>10</sup> Màngaani penku laa leen di jébbal,  
jébbalaale leen Amon,  
ba kenn du fàttlikooti Amon ci biir xeet  
yi,

<sup>11</sup> te maay wàcceel Mowab ay mbugal,  
ba ñu xam ne maay Aji Sax ji.»»

### *Waxyu dal na Edom*

<sup>12</sup> «Boroom bi Aji Sax ji dafa wax ne:  
Edom a feyu ci waa kër Yuda,  
feyu ga mu feyu di tooñaange gu réy.

<sup>13</sup> Moo tax Boroom bi Aji Sax ji dafa wax  
ne:  
Maay dóor Edom sama loxo,  
dagge fa nit ak mala,  
maa koy def ab gent,  
la dale Teman ba Dedan, saamar lañuy  
fàddoo.

<sup>14</sup> Maay дума Edom,  
te Israyil sama ñoñ laa leen di dumaa.  
Ñooy jëflanteek Edom la méngook sama  
mer,  
tollook sama xadar,  
ba ñu ñam sama mbugal.  
Kàddug Boroom bi Aji Sax jee.»»

### *Waxyu dal na Filisti*

<sup>15</sup> «Boroom bi Aji Sax ji déy dafa wax ne:  
Filisteen ñee jiital seen mbañeel gu sax,  
ñoo jéppée jéppi seeni noon, feyoo feyu,

ba faagaagal leen.

<sup>16</sup> Moo tax Boroom bi Aji Sax ji dafa wax  
ne:

Maa ngii di dóor Filisteen ñi sama loxo,  
maay dagg ñooñu di askanu Keret,  
maay fàkkas ndes wa ca tefesu géej.

<sup>17</sup> Maa leen di feye mbugalu xadar yu  
mag,

te bu ma leen yenee sama peyu mbugal,  
ñu xam ne maay Aji Sax ji.»»

## 26

### *Waxyu dal na Tir*

<sup>1</sup> Ba loolu amee, ca fukkeelu at maak  
benn, yemook benn fanu weer wa,  
kàddug Aji Sax ji dikkal ma ne ma:

<sup>2</sup> «Yaw nit ki,  
Tir dëkk ba moo ree Yerusalem,  
ne: “Ñaw! Buntu dëkk bi xeet ya daan  
jaare dàjjiku na!

Léegi man la bunt ubbikul,  
léegi maay woomle, Yerusalem gental  
na.”

<sup>3</sup> Boroom bi Aji Sax ji dafa wax ne:  
Yaw Tir, maa ngii fi sa kaw.

Ni géej di yéegée ay gannaxam,  
ni laay yéegloo fi sa kaw xeet yu bare.

<sup>4</sup> Ñooy màbb say miir,  
daane say tata,  
ma buube fa pënd ba,  
def ko doj wu ne duññ.

<sup>5</sup> Tir ay doon wéerukaayu caax ci digg  
géej gi,  
maa ko wax, kàddug Boroom bi Aji Sax  
jee.

Dëkk bii mooy doon sèxëtoom xeet yi,

<sup>6</sup> dëkk-dëkkaan yi bootu ci mbooyam  
fàddoo saamar,  
ñu xam ne maay Aji Sax ji.

<sup>7</sup> «Boroom bi Aji Sax ji déy dafa wax  
ne: Maa ngii di jële bëj-gannaar, indi ci  
kaw Tir, Nabukodonosor buuru Babilon,  
buuru buur yi, aki fas aki watiir aki  
gawar, ak mbooloo mu takku.

<sup>8</sup> «Dëkk-dëkkaan yi bootu ci sa àll bi,  
saamar la leen di reye.

Mooy yékkati fi la wër ab gawukaay,

jal ay sëkk, gawe la,

yékkati kiiraayu xare yu ràbbaloo ba def  
um taax, janook yaw,



<sup>9</sup> mooy rëkke say miir dénku dàjjikaay,  
mooy màbbe say tata ay sémmiñam,  
<sup>10</sup> ay fasam yu bare sànge la pënd,  
riiru gawar yaak mbege yaak watiir ya  
riiral say miir,  
mu jàlle say wunt, dugg, ni ñuy bëtte  
dëkk,  
bu ñu bëttaam.

<sup>11</sup> Tànki naari góoram lay note sa mbed-  
doo mbedd,

sa mbooloo mi, mu bóome saamar;  
sa kenuy tabax yu dëgër jóoru fi suuf.

<sup>12</sup> Ñooñooy foqati sam koom,  
sëxëtoo sa alal,  
màbb say miir,

daane sa kër yu bakkane,  
boole doj yaak bant yaak pënd ba,  
tàbbal ca mbeex ma.

<sup>13</sup> Maay dakkal say woy,  
ba say xalam du fi jibeeti.

<sup>14</sup> Maa lay def doj wu ne dunṅ,  
bérabu wéerukaayu caax ngay doon,  
te deesu la tabaxati muk.

Man Aji Sax ji déy maa ko wax!  
Kàddug Boroom bi Aji Sax jee.

<sup>15</sup> «Boroom bi Aji Sax ji dafa wax Tir, ne  
ko:

Keroog sa coowal jéll ba,  
ba ñuy bóome fa sa biir,  
ñay dee di binni,  
dun yaa cay dégg, di lox moos!

<sup>16</sup> Mboolem buuri tefes yaay wàcc seeni  
ngàngune,

futti seeni mbubb,  
tàggook seen yére yu yànj,  
bàddoo tiitaange,

ne dett fi suuf,  
dëkke kat-kat,  
seen yaram dawé saw demin.

<sup>17</sup> Ñooy yékkati kàddu, jooye la, ne la:  
“Yaaka sàнку tey, yaw dunu gééj bu  
xumb bi woon,

yaw dëkk bu siiw bi woon, di jàmbaar  
waa gééj,  
yaak say nit a daa tiital mboolem ñi leen  
wër.

<sup>18</sup> Tey sa bésub jéll bii,  
dun yeey xala lox.

Duni gééj yeey tiit ci sa sànkute gi.”

<sup>19</sup> «Boroom bi Aji Sax ji déy dafa wax ne:

Bu ma lay def dëkk bu gental,  
nga mel ni dëkk yu nit ña ne mes,  
ba ma waral xóote ya fi sa kaw,  
ba wali ndox ya mëdd la,

<sup>20</sup> keroog maa lay wàccaaleek ñay wàcci  
biir pax,

nga fekki xeetu démb.

Maa lay dëel taati biir suuf,

fu mel ni genti cosaan ya,

nga fekki pax ña fa jëkkoonaa wàcc,

ngir deesatu la dëkke,

te doo amati cér réewum aji dund ña.

<sup>21</sup> Demin wu raglu laa lay sédd,

ba nga ne mes,

ñu di la seet, te deesu la gisati muk.

Kàddug Boroom bi Aji Sax jee!»

## 27

### *Esekiyel jooy na Tir*

<sup>1</sup> Kàddug Aji Sax ji dikkal na ma ne ma:

<sup>2</sup> «Yaw nag nit ki, yékkatil kàddu, jooye  
ko dëkkub Tir. <sup>3</sup> Waxal Tir mi tooge buntu  
gééj, jula yooyuy jëflanteek xeeti dun yu  
bare, nga ne ko: “Boroom bi Aji Sax ji dafa  
wax ne:

Yaw Tir yaa noon:

‘Maaka matub taar!’

<sup>4</sup> Yaw mi sa kemu suuf àkki xolu gééj,  
say tabaxkat a mottli sab taar.

<sup>5</sup> Dañu laa tabax ni ñuy tabaxe gaal,

sàkke xànqi sippar fa tundu Senir,

defare ca sa xott wépp,

sàkk bantu seedaru Liban,

defare ponku diggu gaal ga.

<sup>6</sup> Ñu gorati garabu seen yu Basan,

defare say joowu,

kaw gaal gi, ñu defare ko banti sippar yu

bawoo tefesi Gééj gu mag ga,

rafetale ko bëñi ñey.

<sup>7</sup> Lée bu bawoo Misra lañu ràbb ba mu  
jekk,

def ko ndimoy wiiru gaal gi,

nga raayawoo ko,

cuub gu baxa ak cuub gu xewar bawoo

dunu Elisa,

di sa malaan,

<sup>8</sup> waa Sidon ak Arwàdd doonoon say

joowkat.

Yaw Tir, yaa yeb ñu rafet xel,

ñuy say mool,

<sup>9</sup> magi Gebal ñeek nitam ñu xareñ ñi fi yaw féetewoo di jagal.

Mboolem gaal yu mag yi ak ña cay liggéey di dal ak yaw,

waa gaal ya di jënd sam njaay.

<sup>10</sup> Waa Pers ak waa Ludd ak waa Puut, ñépp a nga woon ca sa mbooloom xare, di wékk fa yaw seeni pakk ak seen mbax-anay xare.

Ñooño la darajaal.

<sup>11</sup> Arwàddeen ñeek sa niti bopp a daan wattoo ca sa kaw miir yépp,

Gammàddeen ñi di wattu say tata, seeni gannaay wékke, wër say miir.

Ñooño mottli sab taar.

<sup>12</sup> «“Tarsis dëkk baa doon sab jula ndax sa gépp xeetu alal ju bare, di indi xaalis, weñ gu ñuul ak gu weex ak beteex, di ko weccikoo seen alal. <sup>13</sup> Waa Geres ak Tubal ak Meseg di say jula, di leen indil ay doom aadama ak ndabi xànjari yu ñuy weccikoo seen koom. <sup>14</sup> Waa kër Togarma indi ay fas aki gawar aki berkelle, di ko weccikoo seen alal. <sup>15</sup> Dedaneen ñi di say jula, koomu dun yu bare di jaare say loxo, ñu di la feye bëñi ñey ak bantu jalambaan.

<sup>16</sup> Waa Siri it di say jula, di jëndeeke yaw lu bare loo defar, di ko wecci per yu jafe, ak ndimo yu xewar, ak séri ràbb ak lée ak peri koray ak peri rubi. <sup>17</sup> Yudak réewum Israyil it di say jula, di la wecci bele bu bawoo Minit, ak dugub ak lem ak diwu togg ak diwu yaram. <sup>18</sup> Dëkkub Damaas di la jula lu bare loo defar ak jépp alal joo barele, di la ko weccee biiñ bu jóge Elbon, ak kawaru xar gu weex. <sup>19</sup> Waa Weden ak Yawaan bàyyikoo Usal, di la wecci sa koom weñ gu ñu tegg, ak xasum kaas, ak barax bu xeeñ. <sup>20</sup> Waa Dedan it di say jula, indil la seen ndimoy tegi fas.

<sup>21</sup> Waa Arabi ak mboolem garmiy Kedar it di julanteek yaw, feye la ay tàppaanga aki kuuy aki bëy. <sup>22</sup> Julay Saba ak Raama it di julaak yaw, di la indil ngèn-gi-safal ak mboolem peru gànjar, ak wurus yu ñuy weccikoo sa alal. <sup>23</sup> Waa dëkk yii di Karan ak Kane ak Eden ñoom it di say jula, ñook julay Saba ak Asur ak Kilmàdd.

<sup>24</sup> Ñooño doon say jula yu lay indil yérey tànnéef, ak turki yu yolet, ak yérey ràbb,

ak malaan yu yànj, ak goj yu rawaasoo yu wér. <sup>25</sup> Ay gaali Tarsis yu mag a daan yóbbu sam njaay.

Nga fees dell, diis gann fi digg xolu géej.

<sup>26</sup> Say joowkat waral la mbeex mi ne màww, ba digg géej, teewul ngelawal penku damm la.

<sup>27</sup> Sa alal ja, sab yeb, sa njaay ma, sa niti géej, say mool, say jagalkat, say jaaykat,

ak mboolem sa dag yi ci sa biir, ak mboolem sa gàngoor gi ci sa biir, ñooy tàbbeendoo xolu géej keroog sa bésub jéll ba.

<sup>28</sup> Bu say mool yuuxoo, tefes yaay riir,

<sup>29</sup> képp kuy nàbb joowu wàcce gaalam. Nitu géejoo mboolem mool, ñépp fi suuf lañuy taxaw.

<sup>30</sup> Ñoo lay jooyal, di yuuxu yuux yu metti, xéppoo suuf, fërénqu cib dóom.

<sup>31</sup> Yaay tax ñuy nelu, sol ay saaku di ko ñaawloo, di la jooye naqaru xol ak yuux yu metti.

<sup>32</sup> Ñeey am tiis, yékkatil la kàddug jooy, jooy la ne:

‘Ana dëkk bu mel ni Tir, mi ñu wedamal nii biir géej?’

<sup>33</sup> Ba ngay yebbee géej sam koom, yaa daan reggal ñu bare.

Sa alal ak sa koom gu bare nga woomale buuri àddina.

<sup>34</sup> Léegi rajaxoo nga biiri gannax ca biir xóotey géej, sa koom ak sa gàngoor gi ci sa biir, lépp jóoru.

<sup>35</sup> Waa dunoo dun a la tiisoo, seen yaramu buur ya dawa daw ba ñu ne yasar.

<sup>36</sup> Julay xeet yaa ngi muslu ci saw demin. Raglu nga mujje, te doo tekkeeti ba fàww!”»

## 28

### *Nguurug Tir foq na*

<sup>1</sup> Kàddug Aji Sax ji dikkal na ma ne ma:

<sup>2</sup> «Yaw nit ki, waxal Boroom Tir, ne ko: “Boroom bi Aji Sax ji dafa wax ne:

Dangaa fuuy ba naan:

‘Maay Yàlla, ji tooge toogub yàlla yi, fi xolu géej!’

Waaye yaw doom aadama nga, doo Yàlla, dangay yàlla-yàllalu rekk.

<sup>3</sup> Xëy na yaa sut Dañeel am xel, du genn kumpa gu la ump!

<sup>4</sup> Sam xel ak sa manoore nga ame alal, am wurus, am xaalis, yeb ci say denc.

<sup>5</sup> Sa xelum jula mu réy nga yokke sa alal, alal ji tax laa fuuy.

<sup>6</sup> Moo tax Boroom bi Aji Sax ji dafa wax ne:

Gannaaw dangay yàlla-yàllalu,

<sup>7</sup> maa ngii di la indil ay làkk-kat, yéefar yi gëna néeg.

La nga sottale xel mu rafet, ñoo koy boccil saamar,

te ñooy yàq sab taar.

<sup>8</sup> Pax lañu lay tàbbal, nga deeyi xolu géej deewug ku ñu bóom.

<sup>9</sup> Xanaa doo janook ki lay rey, naati yaay yàlla?

Boo tàbbee ca sa loxoy jamkat ya, keroog nga noppee doon yàlla, di nitu kese.

<sup>10</sup> Deewug yéefar bu xaraful ngay deeye ci loxol làkk-kat yi.

Man déy, maa ko wax!

Kàddug Boroom bi Aji Sax jee.”»

<sup>11</sup> Kàddug Aji Sax ji dikkalati ma ne ma: <sup>12</sup> «Yaw nit ki, yékkatilal buurub Tir kàddug jooy! Nga ne ko: “Boroom bi Aji Sax ji dafa wax ne:

Yaa matoon royukaay, géejum xel, sottib taar.

<sup>13</sup> Yaa nga woon biir Àjjana, toolub Yàlla ba,

ràngoo lépp luy gànjarì per, sarduwan ak topaas ak jamaa ak kirsolit ak onigsë ak jàspë ak safiir ak emëródd ak eskarbukal.

Fegukaay yaak wewukaay ya di wurus, te bés ba ñu la sàkkee, fekk na ñu waajal yooyu.

<sup>14</sup> Yaa doon malaakam serub mu ne ràññ, di aare,

ma tabb la fa kaw tundu Yàlla wu sell wa, ngay daagoo digg doj yuy tàkk.

<sup>15</sup> Ba ñu la sàkkee, nga dale mat ci say jëfin,

ba keroog njubadi di feeñ ci yaw.

<sup>16</sup> Sa liggéeyu jula bu yaatu moo la feesal fitna,

nga bàkkaar, ba ma nangoo sa teddnga fa tundu Yàlla wa,

sànk la, yaw malaakam serub miy aare, nga jóge digg doj yuy tàkk.

<sup>17</sup> Sab taar a la fuuyloo, sa daraja tax nga yàq sam xel!

Fi suuf laa la rattax,

fi kanam buur yi laa la detteel, ñu di la seetaan.

<sup>18</sup> Sa ñaawtéef yu bare ak njublanj gi ngay julaa,

looloo teddadil sa jaamookaay yu sell,

ba ma jafale sawara fi sa biir,

mu xoyom la.

Maa la def ub dóom fi suuf,

ñépp di la xool.

<sup>19</sup> Mboolem ñi la xam ci xeet yi,

seen yaram dina daw ci yaw.

Ku raglu ngay doon,

te doo tekkeeti ba fàww.”»

### *Waxyu dal na Sidon*

<sup>20</sup> Kàddug Aji Sax ji dikkalati ma ne ma:

<sup>21</sup> «Yaw nit ki, neel jàkk Sidon\*, nga biral waxyu fi kawam. <sup>22</sup> Neel:

“Boroom bi Aji Sax ji dafa wax ne:

Yaw Sidon, maa ngii fi sa kaw.

Dees na ma sargal fi sa biir,

ba ñu xam ne maay Aji Sax ji

ndax mbugal yi ma fiy wàccesi,

ba fésal fi sama sellnga.

<sup>23</sup> Maa fiy yebal mbas,

deret tuuroo mbedd yi,

saamar dajal dëkk bi,

bóom nit ñi, tëral,

ba ñu xam ne maay Aji Sax ji.”

<sup>24</sup> «Su boobaa waa kër Israyil, seen dëkkandoo yi leen di sewal,

dootuñu leen lëjal ni dagg yu ñaw ak

dég yuy jame.

Su boobaa ñu xam ne maay Boroom bi Aji Sax ji.

### *Aji Sax jeey yiwi Israyil*

\* **28:21** 28.21 Sidon dëkk la bu bootu woon ci Tir, ca wetu bëj-gànaaram.

<sup>25</sup> «Boroom bi Aji Sax ji dafa wax ne: Bu may dajale waa kër Israyil, di leen jële digg xeet yi ñu tasaaroo, ca laay fésal sama sellnga fa seen biir, yéefar yi gis, ñu dëkke seen suufas bopp, sa ma joxoon Yanqóoba sama jaam ba. <sup>26</sup> Xel mu dal lañu fay dëkke, tabax fa ay kër, jëmbat seeni reseñ. Bu ma wàcceelee ay mbugal mboolem ñi leen di sewal te séq leen, dinañu dëkke ba xam ne maay seen Yàlla Aji Sax ji.»

## 29

### *Waxyu dal na Misra*

<sup>1</sup> Ca fukkeelu at ma, fukki fan ak ñaar ca fukkeelu weer wa, kàddug Aji Sax ji dikkal na ma ne ma: <sup>2</sup> «Yaw nit ki, neel jàkk Firawna buuru Misra, nga biral waxyu fi kawam ak fi kaw Misra gépp. <sup>3</sup> Waxal, nga ne: “Boroom bi Aji Sax ji dafa wax ne:

Maa ngii fi sa kaw, yaw Firawna buuru Misra,  
yaw ninki-nànka ju mag ji goore sa diggi dex,

te naan: ‘Maa moom sama dex,  
man ci sama bopp maa ko sàkk!’

<sup>4</sup> Waaye maay we ay lonku ci say ñaam, jël sa jëni waltan,  
noyal leen ci say waasintóor,  
diree la say waltan,  
sa jëni waltan yépp noy ci say waasintóor.

<sup>5</sup> Ma wacc la ca màndiñ ma,  
yaw yaak mboolem sa jëni waltan.

Ci àll bi nga naa ñàyy,  
deesu la for, deesu la fat.  
Dundooti àll beek njanaaw yi, yaw laa leen di leele,

<sup>6</sup> ba waa Misra gépp xam ne maay Aji Sax ji.

«“Seen ndimbal ak Israyil mooy ndimbalu bantu barax,

<sup>7</sup> ñu jafandu ko, mu ne tàllit,  
ne xureet mbagg yépp,  
ñu wéeroo ko, mu ne tipp,  
ndigg yépp récc.

<sup>8</sup> «“Moo tax Boroom bi Aji Sax ji dafa wax ne:  
Yaw Misra, maa ngii di la indil saamar,

ba dagge fi yaw nit ak mala.

<sup>9</sup> Réewum Misraay gentel, di ndànd-foyfoy,

ba ñu xam ne maay Aji Sax ji.  
Moo ne: ‘Dex gi maa ko moom,  
man maa ko sàkk!’

<sup>10</sup> Moo tax maa ngii fi sa kaw,  
yaak say wali dex.

Maay def réewum Misra gent bu ne seren,  
mu gentale Migadol ca bëj-gànnar, ba Asuwan,

fa mu digalook réewum Kuus ca bëj-saalum.

<sup>11</sup> Tàнку doom aadama du fa jaare,  
tàнку mala du fa jaare,

te deesu fa dëkke diiru ñeent fukki at.

<sup>12</sup> Maay def Misra gëna gentel ci réew yi gentel,

ay dëkkam gëna gentel ci dëkk yi diiru ñeent fukki at.

Maay tasaare waa Misra ci biir xeet yi,  
wasaare leen ci biir réew yi.

<sup>13</sup> Boroom bi Aji Sax ji déy dafa wax ne:

Bu ñeent fukki at yi matee,  
ma dajalee waa Misra fa digg xeet ya ñu tasaaroo woon.

<sup>14</sup> Ca laay tijjee wërsëgu Misra,  
delloo leen réewum Pattros ca bëj-saalum,

seen réewum cosaan,  
ñu doon fa nguur gu suufe,

<sup>15</sup> gëna suufe ci nguur yi,  
ba dootuñu damu fi kaw xeet yi.

Maa leen di tuutal ba dootuñu yilif xeet yi.

<sup>16</sup> Waa kër Israyil dootuñu yaakaar Misra,  
xanaa ñuy fàttliku na ñu ñaawe woon démb,

ba ñuy làqoo waa Misra,  
te dinañu xam ne maay Boroom bi Aji Sax ji.”»

<sup>17</sup> Ca ñaar fukkeelu at maak juróom ñaar, benn fan ca weer wa jëkk, kàddug Aji Sax ji dikkal na ma, ne ma: <sup>18</sup> «Yaw nit ki, Nabukodonosor buuru Babilon teg na mbooloom xareem, coono bu metti ca seen xareek Tir. Seen kawari bopp yépp ruus na, seen wagg yépp tëccu, te coonom ba mu sonn ca Tir, yooloowu ca dara, du moom, du ay nitam.

19 «Moo tax Boroom bi Aji Sax ji dafa wax ne:  
Maa ngii di jox réewum Misra,  
Nabukodonosor buuru Babilon,  
mu yóbbu alal ja,  
wëq ko ba mu set,  
sëxëtoo mboolem lu mu amoon,  
muy peyooru mbooloom xareem,  
20 di yoolu coonom.  
Maa ko jox réewum Misra,  
feye ko la ma ay nitam liggéeyal.  
Kàddug Boroom bi Aji Sax jee.  
21 Bés sub keroog maay yokk dooley waa  
kër Israyil,  
yaw nit ki, ma jox la sañ-sañu àddu fi  
seen biir.  
Su boobaa ñu xam ne maay Aji Sax ji.»

### 30

#### *Babilon song na Misra*

1 Ba loolu amee kàddug Aji Sax ji dikkal  
ma ne ma: 2 «Yaw nit ki, jottlil waxyu!  
Neel: “Boroom bi Aji Sax ji dafa wax ne:  
Jooyleen, ne: ‘Wóoy bii bés!’  
3 Bés jubsii na déy,  
bés sub Aji Sax ji jubsii na!  
Bés sub xambaar, jantub xeet yi.  
4 Saamar ay dikkal Misra,  
fépp di jal-jal ba ca Kuus,  
aw nit, ñu bóom ca Misra,  
nangu alalu réew ma,  
kenu ya màbb.  
5 Waa Kuus ak Puut ak Ludd  
ak xeet yu raxe yépp ak waa Libi,  
boole ci ñenn ci réewum kóllère gi,  
ñoom ñépp saamar lañuy fàddoo.  
6 «Aji Sax ji dafa wax ne:  
Wéeruwaayi Misra ya day jóoru,  
doole ja Misray sago ñiis;  
la dale Migadol ba Asuwan, saamar lañuy  
fàddoo.  
Kàddug Boroom bi Aji Sax jee.  
7 Ñooy gëna wéet ci réew yi,  
seeni dëkk gëna gentel ci dëkk yi.  
8 Bu ma taalee Misra,  
ba wéeruwaayam yépp rajaxoo,  
dinañu xam ne maay Aji Sax ji.  
9 Bés sub keroog dees na dugg ay gaal, génn  
ci sama ndigal,

ngir indil tiitaange réewum Kuus ma ne  
finaax,  
muy seen jal-jal keroog bés sub Misra ba.  
Bés baa ngii déy di dikki!

10 «“Boroom bi Aji Sax ji dafa wax ne:  
Maay jeexal mbooloom Misra mu réy,  
jaare ko ci Nabukodonosor buuru Ba-  
bilon.  
11 Mooy ànd ak ñoñam,  
di ñi gëna néeg ci yéefar yi,  
dikk yaqtesi réew mi;  
ñooy boccil Misra saamar,  
ba feesal réew mi ay néew.  
12 Maay def wali Niil ag joor,  
maay jaay réew mi nit ñu aay.  
Maay alag réew meek li ci biiram,  
jaare ko ci ay doxandéem.  
Man Aji Sax ji, maa ko wax.

13 «“Boroom bi Aji Sax ji dafa wax ne:  
Maay sànk kasaray tuur yi ak yàllantu ya  
ca Memfis.  
Buur dootu tooge jalu réewum Misra,  
te maay indi tiitaange biir Misra.  
14 Maay yàqte Pattros,  
taal dëkk bi ñuy wax Cowan,  
ba sottal sama mbugal ci kaw dëkk bi ñuy  
wax No.  
15 Maay sottal sama xadar Ciin, rawtub  
Misra,  
te maay tenqi gàngooru No.  
16 Maay taal Misra,  
dëkk ba ñuy wax Ciin di rag-ragi;  
dëkk ba ñuy wax No, ñu bëtt ko;  
Memfis, noon yi nangu ko digg bëccëg.  
17 Xaleli góori On ak Pi Beset, saamar  
lañuy fàddoo,  
waa dëkk yooyu ca des njaam lañu jëm.  
18 Bu ma dogee sidditi Misra,  
ba doole ja muy sago ñiis,  
jant dootu fenkal Tapanes,  
aw xiin ay sàng dëkk bi,  
te dëkk-dëkkaanam ya, njaam lañu jëm.  
19 Nii laay wàccee Misra ay mbugal,  
ba ñu xam ne maay Aji Sax ji.”»

#### *Doole réer na Misra*

20 Ca fukkeelu at maak benn, juróom  
ñaari fan ca weer wa jëkk, kàddug Aji  
Sax ji dikkal na ma ne ma:

21 Yaw nit ki, damm naa pèrègu Firawna buuru Misra, mu ngii, deesu ko takk, ba mu faju, deesu ko lëmës, ba mu mana nàbb saamar.

22 Léegi nag Boroom bi Aji Sax ji dafa wax ne:

«Maa ngii fi kaw Firawna buuru Misra.

Ñaari pèrègam yépp laay damm; bu baax beek bi damm ba noppi, maay waddal saamaram bi ci loxoom,

23 maay tasaare Misra fi biir xeet yi, wasaare leen fi biir réew yi.

24 Maay dooleel pèrègu buuru Babilon, teg sama saamar ci loxoom, gannaaw ba ma dammee pèrègi Firawna, muy binni binniy ku ñu jam fi kanamam.

25 Maay dooleel pèrègi buuru Babilon moos,

pèrègi buuru Misra yoqi.

Maay teg sama saamar ci loxol buuru Babilon,

mu xàccil ko réewum Misra, ba ñu xam ne maay Aji Sax ji.

26 Maay tasaare Misra fi biir xeet yi, wasaare leen fi biir réew yi, ba ñu xam ne maay Aji Sax ji.»

### 31

#### *Ponkal daanu na*

1 Ba loolu amee ca fukkeelu at maak benn, benn fan ca ñetteelu weer wa, kàddug Aji Sax ji dikkal ma ne ma: 2 «Yaw nit ki, waxal Firawna buuru Misra ak gàngooram, ne ko:

“Ana koo neexool daraja?

3 Asiree ngoog, garabu seedar la woon ca Liban,

rafeti bànqaas, naatalub gott, siggi ca kaw,

njañ lay àkki niir ya.

4 Bëti ndox suuxat ko, ndoxi xoote yi màggal ko,

wal ma dajaloo ca reen ya, doxe fa yónnee garabi àll bi yépp ay waltan.

5 Moo ko taxa sut garabi àll bi, ay bànqaasam sèq, car ya lawa law ndax ndox mi koy ballal a ne xéew.

6 Picc yépp ay tàgge ay caram, rabi àll yépp di jure fa suufam, askanoo askan wu mag di tooge keram.

7 Taaram a nga ca taxawaayam ak guddaayu caram ya, ngir reenam ba sóoboo ndox mu ne xéew.

8 Du genn garabu seedar ca toolub Yàlla, gu ko yóbbuloon dara,

du garabu sippar yu ko niruy car, mbaa garabu palataan bu ko niruy bànqaas.

Du genn garab ci toolub Yàlla, gu taaroo ni moom.

9 Maa ko rafetale njañam lu sèq, ba garabi Àjjana, toolub Yàlla bi, ñoom ñépp ñee ko!

10 «“Moo tax Boroom bi Aji Sax ji dafa wax ne: Yaa siggi woon ca kaw, kii la njañam àkki woon niir ya, muy damoo taxawaayam. 11 Maa koy jébbal ku jiite ay xeet, mu fey koo fey coxoram, ma dàq ko.

12 Ay doxandéem a dikk, bokk ci xeet yi gëna néeg, gor ko, wacc, ay bànqaasam wadde kaw tund yeek xur yi, ay caram damntoo ci xuntiy àll bi yépp, waa réew yépp dawé keram, wacc ko, 13 picc yépp di tage peram bi tédde fi suuf, rabi àll yépp di goore caram yi fi suuf. 14 Su boobaa genn garab gu feggook ndox dootu siggi ca kaw, ba njañ lay àkki niir ya, genn garab dootu màndim ndox, bay damu ci kawi moroomam. Ñoom ñépp déy lañu àppal ndee, ñu jëm xóotey suuf, tédde biir bàmmeel ni waa àddina sépp.

15 «“Boroom bi Aji Sax ji dafa wax ne: Bés ba seedar ga tàbbee njaniw, maa dogal ag ñaawlu: Maa sàng xóote ya ndax moom, téye dexi biir suuf, wali ndox yi noon xéew, taxaw. Maa ñaawluloo gottub Liban ci loolu, garabi àll bi yépp doxe ca lax. 16 Maa def xeet yi dégg jéllu seedar gi, di lox, ba ma ko tàbbalee njaniw, boole kook mboolem ñiy tàbbim pax, ba mboolem garabi Àjjana gëna taaru, ak yay ngëneeli Liban, ak mboolem ya màndim ndox, ñoom ñépp di fa muñe seen demin, la seedar ga teew ni ñoom biir xóotey suuf.

17 Ñoo bokk ak seedar gi wàcci njaniw, ànd caak ña fa saamar tèral, ñoom ñi ko doon dooleel, xeet yi daan tooge keram.

18 Ana kan nga neexool teddngaak daraja ci biir garabi Àjjana? Ndaxam dees na

la booleek garabi Àjjana, tàbbal xóotey suuf. Yaay goorandook yéefar, yi saamar tëral. Loolooy deminu Firawnaaki gàngooram. Kàddug Boroom bi Aji Sax jee.”»

## 32

### *Jàmbaarù àddina, baadooloy njaniiw*

<sup>1</sup> Ca fukkeelu at maak ñaar, benn fan ca fukkeelu weer waak ñaar, kàddug Aji Sax ji dikkal na ma ne ma: <sup>2</sup> «Yaw nit ki, yékkatil kàddug jooy, ñeel Firawna buuru Misra. Nga ne ko:

“Dangaa meloon ni waxambaanew gaynde ci biir xeet yi, mel ni ninki-nànkay biir gééj, di fettaxe say wal, di wéquy nëxal ndox mi, di tilimal dex gi.

<sup>3</sup> Boroom bi Aji Sax ji dafa wax ne: Maa lay laaw sama caax fi biir ndajem xeet yu bare, ñu ñoddee la mbaal ma, génne.

<sup>4</sup> Maa lay wacc fi suuf, sànni la ci àll bi, dëël njanaaw yépp fi yaw, ba reggal rabi àll yépp ci saw yaram.

<sup>5</sup> Maay lale tund yi sa suux, ba feesale xur yi sa jalu néew yi.

<sup>6</sup> Maay nàndale suuf sa deret, mu wale ca tund ya, ba feesal yooni ndox yi.

<sup>7</sup> Bu sa leer feyee, maay muur asamaan, lëndëmal ay biddiwwam, sànge jant bi aw niir, weer wi noppee leeral.

<sup>8</sup> Mboolem leeri asamaan laay giimal fi sa kaw, ba teg lëndëm fi sam réew. Kàddug Boroom bi Aji Sax jee.

<sup>9</sup> «“Maay jàqloo xeet yu bare, bu ma leen àggee sa musiba ci biir réew yoo xamuloon.

<sup>10</sup> Saw demin laay tiitale xeet yu bare, ba seen yarami buur yi di dawa daw. Keroog sa bésub jéll ba, bu may xàcci sama saamar fi seen kanam, duñu noppee lox, ku nekk ay xalaat bakkanu boppam.

<sup>11</sup> «“Boroom bi Aji Sax ji déy dafa wax ne: Saamaru buuru Babilon a lay dikkal.

<sup>12</sup> Saamari jàmbaar laay tërale sa mbooloo, ñoom ñépp bokk ci xeet yi gëna néeg, te ñooy sàggi sagub Misra; gàngooram gépp sànkù.

<sup>13</sup> Maay faagaagal sa mboolem jur, gi feggook ndox mi ne xéew, ba tànkù nit dootu ko nëxal, wewu jur dootu ko nëxal.

<sup>14</sup> Su boobaa ma dalal seeni ndox, dawal ndànk seeni wal nig diw. Kàddug Boroom bi Aji Sax jee.

<sup>15</sup> Bu ma defee réewum Misra ab gent, ba réew mi feesoon, ne faraa, bu ma dumaa mboolem ku ci dëkkoon, su boobaa ñu xam ne maay Aji Sax ji.”

<sup>16</sup> «Kàddug jooy a ngoog gu ñuy jooyi, janqi xeet yeey jooye yooyu jooy Misraak gàngooram gépp. Kàddug Boroom bi Aji Sax jee.»

### *Misra wéetul ca toroxteem*

<sup>17</sup> Ca fukkeelu at maak ñaar, fukki fan ak juróom ca weer woowa, kàddug Aji Sax ji dikkal na ma ne ma: <sup>18</sup> «Yaw nit ki, yuuxul mbooloom Misra, gungee ko seen jéll, ñook janqi xeet yu mag yi, ñu ànd tàbbiji xóotey suuf, fekk fa ña tàbbi woon pax. <sup>19</sup> Ne leen:

“Misraa, ana koo ëpp ub taar? Tàbbil, ñu boole laak paaxe yi tëral.”

<sup>20</sup> Fi digg ñi fàddoo saamar la waa Misra di tèdd. Saamar ba génn na, ñu diri Misra, booleek gàngooram yépp yóbbu.

<sup>21</sup> Biir njaniiw la jàmbaari xare yay tollu, di waxtaane Misraaki farandoom, naan: “Wàccsi nañu, ne lareet, Yéefar yi fàddoo nañu saamar!”

<sup>22</sup> «Buurub Asiree nga faak gàngooram gépp,

bàmmeeli xarekatam ña wër ko. Ñoom ñépp lañu jam, ñu fàddoo saamar.

<sup>23</sup> Seenì bàmmeel a nga féete fa xóotey xóote ya, ñu yéew bàmmeelu buurub Asiri. Ñoom ñépp lañu jam, ñu fàddoo saamar,

te daan tiital waa réewum aji dund ña.

24 «Buurub Elam a nga faak gàngooram gépp, seeni bàmmeel yéew bosam. Ñoom ñépp lañu jam, ñu fàddoo saamar. Paaxe lañu wàccaale xóotey suuf, te daan tiital waa réewum aji dund ña. Seen gacce lañu gálloo, ànd ak ñay wàcci biir pax.

25 Buurub Elam kay a nga tèdd ca biir ña ñu bóom, mook gàngooram gépp, seeni bàmmeel yéew ko.

Paaxe yooyu yépp a fàddoo saamar, te daan tiital waa réewum aji dund ña. Seen gacce lañu gálloo, ànd ak ñay wàcci biir pax, ñu boole leen ak ña ñu bóom ab tëraay.

26 «Buuri Meseg ak Tubal a nga faak seen gàngoor gépp, seen bàmmeeli xarekat yéew leen. Paaxe yooyu yépp a fàddoo saamar, nde ñoo daan tiital waa réewum aji dund ña.

27 Robaalesu leen ak jàmbaar ña ànd ak seen gannaayi xare, wàcci biir njaniiw, ñu gegen leen seen saamar, terale leen, te seen ay war seeni yax, nde ñoo daan tiital waa réewum aji dund ña.

28 Waaye yaw itam Misra, yaa ngii rajaxoo fi digg yéefar yi, bokk ngaak ñi fàddoo saamar ab tëraay.

29 «Edom a nga fa, mooki buuram ak garmi yépp, seenug njàmbaar teewul ñu denc leen fa ñu denc ñi fàddoo saamar, ñu bokk ak paaxe yi ab tëraay, ànd ak ña jëm biir pax.

30 «Kàngami bëj-gannaar yépp a nga fa, ak mboolem waa Sidon, ña ànd ak ña ñu bóom, tèddi pax, te seenug njàmbaar doon tiitale démb, tey, ñu ànd ak ñi saamar bóom, tèddaale seenug kéefar.

Ñoo ràngoo seen toroxte,

ànd ak ñay wàcci biir pax.

31 «Ñoom la Firawna di gis, muñe leen deminu gàngooram gépp, moom mi fàddoo saamar, mooki nitam ak mbooloom mépp. Kàddug Boroom bi Aji Sax jee.

32 «Maa defoon Firawna di tiitale ci réewum aji dund ñi.

Waaye tey moo bokk tëraay ak yeneen paaxe yi fàddoo saamar, mook gàngooram gépp. Kàddug Boroom bi Aji Sax jee.»

### 33

#### *Tabb nañu Esekiyel jongrukat*

1 Kàddug Aji Sax ji dikkal na ma ne ma: 2 «Yaw nit ki, waxal ak sa bokk yi, nga ne leen: “Am réew, su ma wàccee xare ci kawam, waa réew ma tanne ci seen biir kenn, def ko seen jongrukat, 3 su kooka séenee congum xare muy dikk ci réew mi, daldi wal liit gi, àrtu waa réew mi, 4 ku dégg baatu liit ga te fàgguwul, bu cong mi agsee ba yóbbaale ko, mooy gàddu bakkanu boppam. 5 Gannaaw dégg na baatu liit ga, te taxu koo fàggu, mooy gàddu bakkanu boppam. Ku déggoon ba fàggu nag, moo musal boppam. 6 Su jongrukat ba séenee congum xare may dikk te walul liit ga, loolu waral waa réew mi fàgguwñu, ba cong ma agsi, ba rotal bakkanu kenn ca ñoom, su boobaa njubadiy jongrukat baa ko rotal, te bakkanu nit kooka, jongrukat ba laa koy topp.”

7 «Yaw nit ki nag, jongrukat laa la tabb, ñeel waa kër Israyil, ba boo dégge baat bu jibe sama gémmiñ, war leen koo artoo ci sama ndigal. 8 Bu ma nee ku bon ki: “Yaw ku bon ki, dee rekk mooy sa àtte,” te yaw waxuloo ko ko, àrtu ko ngir mu wacc yoonu mbonam, ku bon kooka aw ayam mooy àtteb deeyam. Waaye bakkanam, yaw laa koy topp. 9 Waaye yaw soo artoo nit ki ngir mu wacc yoonu mbonam, te taxu koo wacc yoonu mbonam, moom la aw ayam di àtteb deeyam, waaye yaw yaa musal sa bopp.



<sup>10</sup> «Yaw nit ki, waxal ak waa kër Israyil, ne leen: “Ngeen ne dungeen mana mucc ndax seeni tooñ ak seen bàkkaar yu leen diis ba semmal leen?” <sup>11</sup> Waxleen ne leen: “Giñ naa ko ci man miy dund, kàddug Boroom bi Aji Sax jee, awma bannex ci deewug nit ku bon. Sama bannex mooy mu wacc yoonu mbonam, ba dund. Kon yeen waa kër Israyil, waccleen, ngalla waccleen seen yoonu mbon. Ana lu jar ngeen di dee?”

<sup>12</sup> «Yaw nit ki, waxal sa bokk yi, ne leen: “Boroom njekki démb li, su tooñee tey, njekkam loola du ko musal. Ku bon ki itam, bu waccee yoonu mbonam, tey, mbonu démbam ga du ko lor. Boroom njekki démb li nag, su bàkkaaree, njekkal démbam la du ko may mu dund. <sup>13</sup> Doonte maa ne boroom njekk li dina dund moos, te gannaaw gi mu yaakaar njekkal démbam la, bay def safaan ba, su boobaa gépp njekkam ga woon, deesu ci bàyyi xel, te safaan bi mu def tey mooy doon àtteb deeyam. <sup>14</sup> Su ma nee ku bon ki: ‘Yaw dee rekk mooy sa àtte,’ mu mujj dèddu bàkkaaram, di jèfe njub ak njekk, <sup>15</sup> di delloo alalu tayle ju mu laajoon, di fey lu mu sàccoon, di jèfe dogali yoon yiy taxa dund, tey baña jèfe njubadi, su boobaa dina dund moos te àtteb dee toppu ko. <sup>16</sup> Mboolem lu mu bàkkaaron, deesu ko ko bàyyil xel. Njub geek njekk gi mu mujje moo ko may mu dund.”

<sup>17</sup> «Sa bokk yi nee ñu: “Ni Boroom biy doxale du noonu.” Te ñoom la seen doxalin dul noonu! <sup>18</sup> Boroom njekk li daal, su dèddoo njekkam di def njubadi, njubadi gaay doon àtteb deeyam. <sup>19</sup> Ku bon ki nag, su dèddoo mbonam, di jèfe njub ak njekk, loolaa koy may mu dund.

<sup>20</sup> «Yeen waa kër Israyil, ngeen ne: “Ni Boroom biy doxale du noonu.” Nit ku nekk daal, jëfinam laa koy àttee.»

### *Jëf ju bon daane na Yerusalem*

<sup>21</sup> Ca fukkeelu atu ngallo ak ñaar, keroog juróomi fan ca fukkeelu weer wa, jenn waay a rëcce ca jéllub Yerusalem ba, dikk ne ma: «Dëkk ba daanu na!» <sup>22</sup> Fekk na ngoon ga jiitu dikkam, Aji Sax ji teg

ma loxo, ba tijji sama gémmiñ. Ba waa ja rëcc agsee fa man ca èllëg sa ca suba, fekk na sama gémmiñ tijjiku, luuwatuma.

<sup>23</sup> Gannaaw loolu kàddug Aji Sax ji dikkal ma ne ma: <sup>24</sup> «Yaw nit ki, ñi dëkke genti réewum Israyil mii ñu ngi naan: “Ibraayma kenn la woon te moo moomoon réew mi. Kon nun ñiy ñu bare noo ko ci gëna yey.” <sup>25</sup> Kon nag nanga leen wax ne leen: “Boroom bi Aji Sax ji dafa wax ne: Yeen ngeen di boole yàpp ak deret di ko lekk, di wékki gët kasaray tuur, di tuur deretu jaamburi Yàlla, ba noppi di moom réew mi? <sup>26</sup> Yeen wóluwuleen lu moy seen saamar, ngeen di def jëf ju siblu, ku nekk di jaalook jabaru moroomam, ba noppi di moom réew mi?” <sup>27</sup> Wax leen ne leen: “Boroom bi Aji Sax ji dafa wax ne: Giñ naa ko ci man miy dund, ku nekk ci yeen ci biir gent yi, saamar lay fàddoo; képp ku nekk ci biir àll bi, rab yi laa koy jox, ñu lekk ko; te képp ku làqoo tata yeek xunti yi, mbas a koy rey. <sup>28</sup> Maay def réew mi gent bu wéet, sagu réew mi sàggiku, tundi Israyil ne faraas, kenn du ca jaare. <sup>29</sup> Bu ma defee réew mi gent bu wéet ndax seen mboolem jëf ju siblu, dinañu xam ne maay Aji Sax ji.”

<sup>30</sup> «Léegi nag, yaw nit ki, sa bokk yaa ngi lay waxtaane ci keppaari tata yi ak ci bunti kër yi. Ñu ngi waxante ci seen biir, ku nekk naa mbokkam: “Aycaleen nu dem dégluji gan kàddoo tukkee ci Aji Sax ji.” <sup>31</sup> Noonu la sama ñoñ di dajesee fi yaw, toogaanu la, di la déglu. Dañuy déglu say wax, waaye duñu ko jèfe muk. Lu neex lañuy wax waaye amin wu lewul rekk la seen xol di sàkku. <sup>32</sup> Dañu laa jàppe rekk ni boroom woy yu neex, ku neex baat, te mane xalam. Dañuy déglu say wax te duñu ci jèfe dara. <sup>33</sup> Waaye sa wax jaa ngii di waaja sotti, te bu sottée dinañu xam ne ab yonent a ngi woon fi seen biir.»

## 34

### *Waxyu dal na sàmm su bon si*

<sup>1</sup> Kàddug Aji Sax ji dikkal na ma ne ma: <sup>2</sup> «Yaw nit ki, waxal waxyu fi kaw

sàmmi Israyil. Biralal waxyu ci kaw sàmm soosu, ne leen: Boroom bi Aji Sax ji dafa wax ne: Wóoy ngalla sàmmi Israyil yiy sàmm seen bopp! Xanaa du jur gi, la sàmm si wara sàmm? <sup>3</sup> Yeen, nebbon ji, ngeen lekk; kawari jur gi, ngeen def yére, sol; li ci duuf, ngeen rendi, te jur gi sàmmuleen leen! <sup>4</sup> Yeen, li ndóol ci jur gi, leqliwuleen; li ci wopp, fajuleen; li damm, yeewuleen; li ci lajj, gindiwuleen; li réer, seetuleen. Doole daal ngeen leen yilife, di leen soxore. <sup>5</sup> Jur gi tasaaroo na ndax ñàkk ku leen sàmm, ñu mujj doon ndawalu mboolem rabi àll yi. Tasaaroo nañu! <sup>6</sup> Sama gàtt yaa ngi tambaambalu kaw tundo tund wu mag ak wu ndaw. Biir réew mi mépp la sama gàtt yi tasaaroo. Kenn wërul, kenn seetul.

<sup>7</sup> «Moo tax yeen sàmm si, dégluleen kàddug Aji Sax ji. <sup>8</sup> Mu ne: Giñ naa ko ci man miy dund. Kàddug Boroom bi Aji Sax jee. Gannaaw sama gàtt yi ñàkk nañu sàmm, ba ñu di leen sèxètoo, ñu mujj di ndawalu rabi àll yépp, te sama sàmm si wèruñu sama jur gi, sàmmuñu leen, xanaa di sàmm seen bopp, <sup>9</sup> gannaaw noonu la, yeen sàmm si, dégluleen kàddug Aji Sax ji. <sup>10</sup> Boroom bi Aji Sax ji dafa wax ne: Maa ngii di dal fi kaw sàmm si. Maay nangoo sama gàtt ci seeni loxo, dakkal seenug càmm, ndax ñu noppee sàmm seen bopp. Maay foqatee samag jur ci seeni sell, ba dootuñu leen ndawaloo.

<sup>11</sup> «Boroom bi Aji Sax ji déy dafa wax ne: Man ci sama bopp, maa ngii di wër samag jur, maa leen di seet. <sup>12</sup> Ni ab sàmm di seete ag juram fu ñu tasaaroo, ni laay seete samag jur, ba xettle leen mboolem fu ñu tasaarooji woon bésu ngélén bu lëndém. <sup>13</sup> Maa leen di seppee ci xeet yi, génnee leen ci réew yi, dajale leen, yóbbu leen seen suufas bopp. Maa leen di foral, sàmm leen kaw tundi Israyil ak biir xunti yaak mboolem fu ñu dèkke ci biir réew mi. <sup>14</sup> Ay parlu yu baax laa leen di forale, kaw tundi Israyil yu kawé ya di seen parluwaay. Foofa lañuy goore parluwaay yu baax, te ñax mu naat lañuy fore foofa ca kaw tundi Israyil. <sup>15</sup> Man

mii maay foral samay gàtt te maa leen di gooral. Kàddug Boroom bi Aji Sax jee. <sup>16</sup> Bu ci réer, maa lay seet; bu ci lajj, maa lay délloosi; bu ci damm, maa lay takkal; bu ci néew doole, ma leqli la. Waaye bu ci duuf, am doole, maa lay sànk, foral la li war ci yaw.

<sup>17</sup> «Waaye Boroom bi Aji Sax ji dafa wax ne: Yeen sama gàtt yi, maa ngii di àttesi diggante xar ak moroom ma, ak diggante kuuy yi ak sikket yi. <sup>18</sup> Xanaa fore parlu mu baax mi da leena dooyul, ba ngeen di dèggaate li des ci seen parlu mi? Am naan ndox mu teey dooyatu leen, ba bu ngeen naanee ba màndi, di wéquy nèxal ndox mi? <sup>19</sup> Luy ndeyi sama gàtt yi ci des di fore li ngeen dèggaate, di naane ndox mi ngeen nèxal?

<sup>20</sup> «Moo tax Boroom bi Aji Sax ji da leena wax ne: Maa ngi nii di àttesi diggante gàtt bu duuf ak gàtt bu yooy. <sup>21</sup> Gannaaw yeen wet ak mbagg ngeen di buuxee, di dañe seeni béjjén mboolem gàtt yu néew doole yi, ba tasaare leen ca biti, <sup>22</sup> man maay wallu samag jur, ba deesatu leen fàdd te maay àtte diggante gàtt ak moroom ma.

<sup>23</sup> «Gannaaw loolu maa leen di waajalal ab sàmm bu leen di sàmm. Kookooy Daawuda sama jaam bi. Moom moo leen di foral, mooy doon seen sàmm. <sup>24</sup> Man Aji Sax ji maay doon seen Yàlla, Daawuda sama jaam bi mooy askanoo nguur fi seen biir. Man Aji Sax ji maa ko wax. <sup>25</sup> Maay fas ak ñoom kóllèreg jàmm, maay far ci réew mi wépp rab wu aay. Su boobaa ñu dèkke màndiñ mi ci xel mu dal, di fore bët biir gott bi. <sup>26</sup> Maa leen def ñuy barke, ñook fi wër sama tund wi, bu jotee ma tawal leen, te tawu barke lay doon. <sup>27</sup> Garabi àll bi di meññ, suuf si nangu, ñu dèkke seen suufas bopp ci xel mu dal. Bu ma dammee seeni jéng, xettli leen ci dooley ñi leen doon jaamloo, dinañu xam ne maay Aji Sax ji. <sup>28</sup> Dootuñu doon sèxètoom xeet yi, te rabi àll yi dootuñu leen lekk. Dañuy dèkke xel mu dal, te kenn du leen tiitalati. <sup>29</sup> Maa leen di sàkkal tóokèru jàmm ba ab xiif dootu fi lore ci réew mi, te dootuñu jànkoon teek

kókkaliy yéefar yi. <sup>30</sup> Su boobaa ñu xam ne maay seen Yàlla Aji Sax ji ànd ak ñoom, ñoom ñuy waa kër Israyil sama ñoñ. Kàddug Boroom bi Aji Sax jee. <sup>31</sup> Yeen sama jur gi, sama juru parlu mi, yeenay nit ñi may sàmm, may seen Yàlla. Kàddug Boroom bi Aji Sax jee.»

## 35

### *Waxyu dal na Edom*

<sup>1</sup> Kàddug Aji Sax ji dikkal na ma ne ma:  
<sup>2</sup> «Yaw nit ki, neel jàkk tundu Seyir\*, nga biral waxyu fi kawam. <sup>3</sup> Nga wax ko, ne ko: “Boroom bi Aji Sax ji dafa wax ne: Yaw tundu Seyir, maa ngii fi sa kaw. Maa lay dóor sama loxo, nar laa def gent bu wéet.  
<sup>4</sup> Say dëkk, jali doj laa koy def, nga gental, ba xam ne maay Aji Sax ji.

<sup>5</sup> «“Dangaa masa bañ bànni Israyil. Ba musibay bànni Israyil taxawee, ba seen àppu mbugal mat sèkk, yaa leen jañax ci kaw ñaawkay saamar.  
<sup>6</sup> Moo tax giñ naa ko ci man miy dund, kàddug Boroom bi Aji Sax jee, deret laa lay sange, deret topp la, ndegam bañuloo tuur deret, deret a lay topp.  
<sup>7</sup> Maay def tundu Seyir gent bu wéet, maa fay dagge nit ku fay génne ak ku fay dugge.  
<sup>8</sup> Maay feesaley tundam nit ñu ñu bóom, tundam yu ndaw aki xuram aki xunteem, fa la ñi fàddoo saamar naan lareet.  
<sup>9</sup> Ay gent yu gental fàww laa laay def, say dëkk, deesu ko dëkkeeti. Su boobaa ngeen xam ne maay Aji Sax ji.

<sup>10</sup> «“Aji Sax ji nekk fi, nga naan: ‘Ñaari làngi giir yii† dëkke seen ñaari réew yii, maa leen moom, noo ciy teg loxo.’  
<sup>11</sup> Moo tax giñ naa ko ci man miy dund, kàddug Boroom bi Aji Sax jee,

\* **35:2** 35.2 Seyir mooy réewum Edom, cosaanu Esawu sétub Ibraayma. † **35:10** 35.10 ñaari làngi giir yi Israyil laak Yuda.

ni nga mbugale bànni Israyil ci sa biir mer, ak sa kiñaan ak sa mbañeel, ni laa lay mbugale. Maay dogal sab àtte, ba xamal ñii maay kan. <sup>12</sup> Su boobaa nga xam ne man Aji Sax ji, maa dégg sa jépp waxi ñàkk kersa ja nga nee:  
 ‘Tundi Israyil a ngii ne tasar, dim sèxëtoo mu ñu nu wèrségale.’  
<sup>13</sup> Yeenay damu fi sama kaw, di ma wax waxi reewande ju bare! Maa déggal sama bopp.  
<sup>14</sup> Boroom bi Aji Sax ji dafa wax ne: Bu àddina sépp di bannexu, yaw, ab gent laa lay def.  
<sup>15</sup> Yaa doon bége suufas Israyil su gental. Noonu laa lay def. Ab gent ngay doon, yaw tundu Seyir, yaak Edom gépp ba mu daj. Su boobaa ñu xam ne maay Aji Sax ji.”

## 36

### *Barke ñeel na tundi Israyil*

<sup>1</sup> «Yaw nit ki, waxalal waxyu tundi Israyil. Neel: “Yeen tundi Israyil, Dégluleen kàddug Aji Sax ji.  
<sup>2</sup> Boroom bi Aji Sax ji dafa wax ne: Gannaaw noon bee ne leen: ‘Ñaw! Seen kawte yu yàgg yii, tey nooy boroom.’ ”  
<sup>3</sup> Kon waxal waxyu bii, ne leen: “Boroom bi Aji Sax ji dafa wax ne: Wet gu ne lañu leen same, yàqte leen, ba ngeen mujj di moomeelu yéefar yi, ñépp di leen jëw ak a tooge,  
<sup>4</sup> Kon nag yeen tundi Israyil, dégluleen kàddug Boroom bi Aji Sax ji. Boroom bi Aji Sax ji dafa wax ak tund yu mag yeek yu ndaw yi, ak xunti yeek xur yi, ak ndànd-foyofoyo yu wéet yeek dëkk yi gental, te xeet ya ñu dëkkal sèxëtoo leen, yab leen.  
<sup>5</sup> Boroom bi Aji Sax ji nag dafa wax ne:

Maa ngii déy di waxe sama tangooru  
fiiraange  
ak xeet yi dul yawut, boole ci Edom  
gépp,  
ñoom ñi jiital seen xeebeel,  
te suuf si ma séddoo, ñu aakimoo ko,  
te di ko bége mbégte mu mat sèkk,  
ngir sèxètoo parluy réew mi.”

<sup>6</sup> Kon nag, waxalal waxyu suufas Israyil  
te wax ak tund yu mag yeek yu ndaw yi  
ak xunti yeek xur yi, ne leen:

“Boroom bi Aji Sax ji dafa wax ne:  
Maa ngii di waxe fiiraange ak xadar  
ndax toroxte gi leen xeet yi teg.

<sup>7</sup> Loolu tax na Boroom bi Aji Sax ji dafa  
wax ne:  
Man maa giñ ne yéefar yi leen séq ñooy  
tegoo toroxte.

<sup>8</sup> «“Waaye yeen tundi Israyil, yeenay naat,  
di meñnal Israyil sama ñoñ,  
te léegi ñu ñibbsi.

<sup>9</sup> Maa ngii déy maak yeen,  
maa leen di geesu,  
ba ngeen ruuje, jiwe.

<sup>10</sup> Maa leen di fulal aw nit, ci biir Israyil  
gépp, ba mu daj,  
ñu dèkkewaat dèkk yu mag yi,  
tabaxaat bayaal yi.

<sup>11</sup> Maa leen di fulal nit ak mala,  
ñu giir, nangule.

Maay def ñu dèkke leen na woon,  
baaxe leen lu raw démb,  
ba ngeen xam ne maay Aji Sax ji.

<sup>12</sup> Yaw suuf, maay doxloo nit fi sa kaw,  
muy waa Israyil sama ñoñ,  
ñu jagoo la, séddoo la,  
te dootoo sabab seenug deele.”»

<sup>13</sup> Boroom bi Aji Sax ji dafa wax ne:  
«Nee ñu réewum Israyil mooy dëmm buy  
dëmm boppam.

<sup>14</sup> Kon yaay réew mu dootu dëmme,  
bay reylu saw xeet.

Kàddug Boroom bi Aji Sax jee.

<sup>15</sup> Dootuma la dégtal ñàkk kersay yéefar  
yi,

dootoo dékku yabeelu xeet yi,  
te dootoo reylu saw xeet,  
kàddug Boroom bi Aji Sax jee.»

*Israyil yeeslu, Yàlla di sell ba tey*

<sup>16</sup> Kàddug Aji Sax ji dikkalati ma ne ma:  
<sup>17</sup> «Yaw nit ki, ba waa kër Israyil dèkke  
seen suufas bopp, dañu koo sobeele seen  
jikko ak seeni jëf, seen jëfin mel ni sagaru  
sobe ci man. <sup>18</sup> Ma xëpp leen sama xadar  
ndax deret ji ñu tuur ci réew mi, ak  
kasaray tuur yi ñu ko sobeele. <sup>19</sup> Ma  
tasaare leen ci biir yéefar yi, ñu wasaaroo  
fi biir réew yi. Seen jikko ak seeni jëf laa  
leen àttee. <sup>20</sup> Waaye fu ñu dem ca biir  
yéefar ya, teddadil nañu fa sama tur wu  
sell, nit ña di leen waxtaane, naan: “Ñii  
de, ñoñi Aji Sax ji lañu, teewul réewam  
ma lañu bàyyikoo nii.” <sup>21</sup> Ma daldi seet  
ci sama tedngay tur wu sell, wi waa  
kër Israyil di teddadil fi biir yéefar yi ñu  
fekki.

<sup>22</sup> «Moo tax nanga wax waa kër Israyil,  
ne leen: “Boroom bi Aji Sax ji dafa wax  
ne: Yeen waa kër Israyil, li may waaja  
def, du yeen laa ci seet, li ma ci seet mooy  
sama tedngay tur wu sell, wi ngeen  
teddadil fi digg yéefar yi ngeen fekki.

<sup>23</sup> Kon dinaa fésal sama sellngay tur wu  
màgg, wi ñu teddadil fi biir yéefar yi,  
sama tur wi ngeen teddadil fi seen biir. Ci  
yeen laay fésale sama sellnga, yéefar yiy  
gis, ba xam ne maay Aji Sax ji. Kàddug  
Boroom bi Aji Sax jee. <sup>24</sup> Maa leen di  
seppee ci yéefar yi, dajalee leen mépp  
réew, délloosi leen seen suufas bopp.

<sup>25</sup> Maa leen di wis ndox mu set, ngeen  
set. Mboolem seen sobe ak mboolem seen  
kasaray tuur laa leen di setalal. <sup>26</sup> Maa  
leen di jox xol bu yees, te xel mu yees laay  
def ci seen dënn. Xolu doj bi laay roccee  
ci seen suux, weccee leen ko xolu suux,  
<sup>27</sup> te samam xel laay yeb fi seen biir dënn,  
ba dogal ngeen mana topp sama dogali  
yoon, di sàmm ak a jëfe sama àttey yoon.

<sup>28</sup> Su boobaa ngeen mana dèkke réew mi  
ma joxoon seeni maam, di sama ñoñ, may  
seen Yàlla. <sup>29</sup> Maa leen di musal ci seen  
mboolem sobe, maay woo am pepp, ful  
ko, te dootuma leen teg ab xiif. <sup>30</sup> Maay  
ful doomu garab ak meñneefum tool, ba  
dootuleen am gaccey xiif fi digg yéefar yi.

<sup>31</sup> Su boobaa yeenay fàttliku seen jikko  
yu bon yaak seen jëf ju baaxul. Su ko  
defee ngeen jéppi seen bopp ndax seeni

ñaawtéef ak seen jéf ju siblu. <sup>32</sup> Du yeena tax nag may jéfe noonu. Kàddug Boroom bi Aji Sax jee. Na leen loolu wóor. Kon nag waa Israyiloo, rusleen ba ne tott ci seeni jéfin.”

<sup>33</sup> «“Boroom bi Aji Sax ji dafa wax ne: Bés bu ma leen setalee ba ngeen tàggook seen mboolem ñaawtéef, dinaa delloo dèkk yu mag yi aw nit, gent yi tabaxewaat. <sup>34</sup> Mbooy gu wéet gi, dees na ko beyaat, ba mu wuuteek wéetaay, ba képp ku fa jaare seede woon. <sup>35</sup> Su boobaa dees na ne: ‘Xool-leen miim réew, ak mbooy gi mu doonoon, tey mu naat ni toolub Ajjana! Dèkk yeet ay gent la woon, wéet, tojatoo, tey ñu dàbbli lépp, ba dèkke nii!’ <sup>36</sup> Su boobaa seen dèkkandooy yéefar yi fi des dinañu xam ne man Aji Sax ji maa tabaxaat dèkk yu mag yi tojatoo woon, jëmbataat mbooy gi. Man Aji Sax ji, maa wax te maay jéf.

<sup>37</sup> «“Boroom bi Aji Sax ji dafa wax ne: Lii laay nangulaatal waa kër Israyil, defal leen ko: maay ful nit ñi niy gàtt. <sup>38</sup> Bu màggal masaa am, Yerusalem day fees ak gàtt yu ñuy rendi, sarxal. Nit ñiy dèkkewaat genti tey yii, noonu lañuy baree. Su boobaa ñu xam ne maay Aji Sax ji.”»

## 37

### *Israyil dekki na*

<sup>1</sup> Gannaaw loolu loxol Aji Sax ji da maa dikkal. Aji Sax ji yóbboo ma Noowam, ba teg ma ca digg joor ga, fekk joor ga fees dell aki yax. <sup>2</sup> Mu wërloo maa wërloo ca biir yax ya, ndeke yax yaa nga bare lool te wow konḡ ca biir joor ga. <sup>3</sup> Mu ne ma: «Yaw nit ki, ma ne, yii yax man naa dundaat a?» Ma ne ko: «Boroom bi Aji Sax ji, loolu de, yaw donḡ a ko xam.» <sup>4</sup> Mu ne ma: «Waxal waxyu fi kaw yax yii, ne leen: “Yeen yax yu wow yi, dégluleen kàddug Aji Sax ji: <sup>5</sup> Boroom bi Aji Sax ji dafa wax yax yii, ne leen: Maa ngii di leen sol ag noo, ngeen dund. <sup>6</sup> Maa leen di may ay siddit, saxal leen aw suux, sange leen ab der, sol leen ag noo, ngeen dund, ba xam ne maay Aji Sax ji.”» <sup>7</sup> Ma biral waxyu na mu ma ko sante. Naka laa biral

waxyu rekk, coow daldi jib, ànd akum riir, fekk yax yaay booloo, bu nekk ak ba muy àndal. <sup>8</sup> Ma gis ay siddit taq ca, aw suux sax ca kaw, ab der dikk, tege ca kaw, te genn noo amu ca. <sup>9</sup> Mu ne ma: «Yaw nit ki, waxalal Noo gi waxyu, waxal ko waxyu ne ko: “Boroom bi Aji Sax ji dafa wax ne: Yaw Noo gi, bàyyikool ñeenti yooni ngelaw yi te dikk, wal fi biir ñii ñu bóom, ba ñu dund.”» <sup>10</sup> Ma def la mu ma sant, waxyu, noo ga dikk, duggsi, ñu dundaat, jóg taxaw, di gàngoor gu baree bare.

<sup>11</sup> Mu ne ma: «Yaw nit ki, yax yii ñooy mboolem waa kër Israyil. Ñu ngi naan: “Nun de, ay yaxi neen yu wow konḡ lanu, sunu yaakaar tas na, nun kay yaqu nanu.”

<sup>12</sup> Kon nag biralal waxyu, ne leen: “Boroom bi Aji Sax ji dafa wax ne: Yeen sama ñoñ, maa ngii di ubbisi seeni bàmmeele, dekkale leen ca seeni bàmmeele, délloosi leen kaw suufas Israyil. <sup>13</sup> Yeen sama ñoñ, bu ma ubbee seeni bàmmeele, ba yékkatee leen ca seeni bàmmeele, dingeen xam ne maay Aji Sax ji. <sup>14</sup> Maa leen di sol samag noo, ngeen dund, ma samp leen seen suufas bopp, ba ngeen xam ne man Aji Sax ji maa wax, maa def. Kàddug Aji Sax jee.”»

### *Israyil, genn giir, benn buur*

<sup>15</sup> Ba loolu wéyee kàddug Aji Sax ji dikkal ma ne ma: <sup>16</sup> «Yaw nit ki, sàkkal aw dénk, nga bind ci kaw lii: “Ñeel Yuda ak giiri Israyil yi mu àndal.” Nga sàkkaat weneen dénk, bind ci kawam: “Ñeel Yuusufa bantub Efrayim ak waa kër Israyil yi mu àndal,” <sup>17</sup> te nga boole ñaari dénk yi, ñu booloo, di wenn dénk ci sa loxo. <sup>18</sup> Bu la sa bokk yi laajee, ne la: “Xanaa doo nu wax lii lu muy tekki?” <sup>19</sup> Nanga leen wax ne leen: “Boroom bi Aji Sax ji dafa wax ne: Maa ngii di jël dénk Yuusufa wi ci loxol Efrayim, mook giiri Israyil yi mu àndal, boole kook dénk Yuuda, daldi def lépp wenn dénk, ñu booloo di wenn ci sama loxo.”

<sup>20</sup> «Nanga nàbb dénk yi nga bind, ñuy gis, <sup>21</sup> te nga wax leen ne leen: “Boroom bi Aji Sax ji dafa wax ne: Maa ngii di jëleji bànni Israyil ca biir xeet ya ñu fekki,

dajalee leen wet gu nekk, délloosi leen seen suufas bopp. <sup>22</sup> Maa leen di def wenn xeet donj ci réew mi, ci kaw tundi Israyil, ñoom ñépp bokk benn buur. Dootuñu doon ñaari xeet te dootuñu xàjjalikoo ñaari nguur. <sup>23</sup> Dootuñu sobeel seen bopp ci ay kasaray tuur, ak seen jéf ju siblook mboolem seeni tooñ. Maa leen di walloo ci mboolem seen ñàkk kóllère. Ma setal leen, ñu doon sama ñoñ, ma doon seen Yàlla.

<sup>24</sup> «Daawuda sama jaam baay doon seen buur, di seen bennub sàmm ñoom ñépp. Sama àttey yoon lañuy doxe, sama dogali yoon lañuy sàmm, di ko jéfe. <sup>25</sup> Ñooy dèkke réew mi ma joxoon Yanqóoba sama jaam ba, te seeni maam dèkke woon ko. Ñu dèkke ko ñoom it, ñook seeni doom ak seeni sèt, ba fàww, te Daawuda sama jaam ba mooy doon seen boroom jal ba fàww. <sup>26</sup> Maay fas ak ñoom kóllèreg jàmm, gu sax. Maa leen di samp, ful leen, maay samp sama bérab bu sell fi seen biir, ba fàww, <sup>27</sup> sama dèkkuwaay nekk fi seen biir, may seen Yàlla, ñuy sama ñoñ. <sup>28</sup> Bu sama bérab bu sell nekkee fi seen biir ba fàww, xeet yi dinañu xam ne man Aji Sax ji maa sellal Israyil.»»

## 38

### *Kàdduy waxyu dal na Gog*

<sup>1</sup> Kàddug Aji Sax ji dikkal na ma ne ma:  
<sup>2</sup> «Yaw nit ki, neel jàkk Gog ma ca réewum Magog, boroom Meseg ak Tubal, te nga biral waxyu fi kawam. <sup>3</sup> Neel: “Boroom bi Aji Sax ji dafa wax ne: Yaw Gog, boroom Meseg ak Tubal, maa ngi nii fi sa kaw.  
<sup>4</sup> Maa lay waññi, we say ñaam ay lonku, génne la yaak sa mbooloo mépp ak fas ak gawar,  
 ñépp gannaayu ba diis,  
 di gangoor gu yaa, ak pakk yu mag ak yu ndaw,  
 ñépp mane saamar.  
<sup>5</sup> Waa Pers, waa Kuus ak waa Puut ay ànd ak yeen,  
 ñoom ñépp fàggoo pakk ak mbaxanam xare.  
<sup>6</sup> Gomeer indaale gangooram gépp,

ak Bet Togarma ga ca catal bëj-gannaar, ak gangooram yépp, ñuy xeet yu takku, ànd ak yaw.

<sup>7</sup> «“Nanga waajala waajal, yaak mboolem sa ndaje mi dajesi fi yaw, nga doon seen wattukat.

<sup>8</sup> Feek lu yàgg dees na la woo.

Bu ay at jàlle ba jeex, yaay songi am réew mu nit ña récc saamar, ba jóge ci ay xeeti xeet, dajeji ca kaw tundi Israyil ya yàggoona wéet.

Ñooñoo seppikoo ci xeeti àddina yi, ñoom ñépp dèkksi fa ci biir xel mu dal.

<sup>9</sup> Waaye yaa naa jàyy ni ngélén, mel ni aw xiin, muur réew mi, yaak sa gangoor yépp, ak xeeti xeet yi ànd ak yaw.

<sup>10</sup> «“Boroom bi Aji Sax ji dafa wax ne:

Bésuub keroog ay xalaat dikkal la, nga mébét mébét mu bon,

<sup>11</sup> daldi ne: ‘Maay songi réew mu ne ñàpp,

maay dali ca kaw waa réew mu ne finaax, dèkke xel mu dal,

te du tata ju wër fu ñu dèkke, ñoom ñépp, du buntu dèkk, du tējukaayu bunt.’

<sup>12</sup> Yaay dikk ngir foqati, sèxètoo sèxètoo alal,

daldi aakimoo genti démb yu ñu dèkke tey,

ña fa ne di mbooloo mu ñu seppee ci xeet yi,

am ug jur aki alal,

te dèkke léegi digg àddina.

<sup>13</sup> Waa Saba ak Dedan ak julay Tarsis, ak mboolem seeni boroom daraja ñoo lay wax ne la:

‘Nangu alal a la yékkatee?’

Sèxètoo alalu xaree la taxa bàbbi sa gangoor,

ngir yóbbu xalis ak wurus,

nangu jur ak alal, ba dajalee ca xare ba koom gu takku?’ ”

<sup>14</sup> «Kon nag yaw nit ki, biralal waxyu, waxal Gog, ne ko: “Boroom bi Aji Sax ji dafa wax ne: Bésuub keroog déy,

bu Israyil sama ñoñ sancsee xel mu dal,  
dinga ko yég,

<sup>15</sup> ba bàyyikoo sa màkkaan, ca catal bëj-gànnàar,

yaak xeet yu bare yu ànd ak yaw,  
ñoom ñépp war fas,  
di gàngoor gu mag, mbooloo mu bare.

<sup>16</sup> Yaay songi Israyil, sama ñoñ,  
mel ni aw niir, muur réew ma.  
Fan yu mujj ya la loolu di am,  
maa lay yóbbu yaw Gog, ba ca réew ma  
ma séddoo.

Maa lay firndeele sama sellnga,  
ngir xeet yi gis, ba xam maay kan.

<sup>17</sup> «“Boroom bi Aji Sax ji déy dafa wax ne:  
Yaw déy, laa doon wax bu yàgg,  
yonenti Israyil, sama jaam ña jottli ko ca  
yooya jant,  
ñu biral waxyu ay ati at,  
ne maa lay dal-loo sama kaw ñoñ.

<sup>18</sup> Bésub keroog, ba Gog di dalsi ca kaw  
réewum Israyil,  
kàddug Boroom bi Aji Sax jee,  
sama xadaru mer ay fettax.

<sup>19</sup> Sama fiiraange ak sama tàngooru  
xadar laa birale ne:  
bésub keroog déy, suuf dina yèngoo Is-  
rayil lool;

<sup>20</sup> jën ak njanaaw di lox fi sama kanam,  
ñook ndundati àll bi ak mboollem luy  
raam  
ak kuy nit fi kaw suuf.

Tund yi màbb, doji mbartal ya fàqandoo,  
tata yépp jóoroondoo.

<sup>21</sup> Ca laay wool mbooloom Gog saamar fa  
sama kaw tund yépp,  
kàddug Boroom bi Aji Sax jee,  
mbokk di jam mbokk saamar.

<sup>22</sup> Maa koy mbugale mbas ak deret ju  
tuuru,  
ak wali waameek doji yuur,  
ak tawub sawaraak tamarax, mooki  
gàngooram,  
ak xeet yu bare yi ànd ak moom.

<sup>23</sup> Maay biralee noonu sama màggaay ak  
sama sellnga,  
maa niy xamlee sama bopp,  
yéefar yu bare di gis,  
ba xam ne maay Aji Sax ji.”»

## 39

### *Gàngooru Gog sànkù na*

<sup>1</sup> «Yaw nit ki nag, waxal waxyu ci kaw  
Gog, nga ne: “Boroom bi Aji Sax ji dafa  
wax ne: Maa ngii fi sa kaw, yaw Gog,  
boroom Meseg ak Tubal. <sup>2</sup> Maa lay wañni,  
yóbbu la, jële la catal bëj-gànnàar, yéegé  
la kaw tundi Israyil. <sup>3</sup> Maay féle sa xala ci  
sa loxol càmmoñ, féle say fitt ci sa loxol  
ndijoor, waddal. <sup>4</sup> Ca kaw tundi Israyil  
ngay daanu, yaak mboollem say gàngoor,  
ak mbooloo yi ànd ak yaw. Tan yeek lépp  
luy njanaaw ak ndundati àll bi laa lay jox,  
leele la leen. <sup>5</sup> Ci biir àll bi nga naa lareet.  
Man de maa ko wax! Kàddug Boroom  
bi Aji Sax jee. <sup>6</sup> Maay yebal sawara fa  
Magog, ak fa waa dun ya dèkke jàmm, ba  
ñu xam ne maay Aji Sax ji. <sup>7</sup> Sama tur wu  
sell laay xamle fi digg Israyil sama ñoñ, te  
dootuma seetaan ñuy teddadil sama tur  
wu sell. Yéefar yi dinañu xam ne maay  
Aji Sax ji, ku Sell ku Israyil ki.

<sup>8</sup> «“Bés baa ngii di ñew te dina dikk,  
kàddug Boroom bi Aji Sax jee. Bés  
bii laa waxoon. <sup>9</sup> Waa dèkki Israyil ay  
gènnandoo, booley ngànnàay, xambé  
taal; pakk bu mag ak bu ndaw, xalaak  
fitt, ngajjook xeej, taaloo ko diiru juróom  
ñaari at, <sup>10</sup> ba dootuñu taxani, dootuñu  
gori ca gott ya, gannaay ya lañuy taaloo,  
te ñooy futti ñu leen futti woon, di  
sèxètoo ña leen sèxètoo woon. Kàddug  
Boroom bi Aji Sax jee. <sup>11</sup> Bésub keroog  
laay may Gog ab pakk, mu def ko sèg fi  
biir Israyil; mooy xuru jaarukaay wiy dog  
yoonu képp ku fa jaare, te féete yoonu  
penku wi jëm géēju Xorom ga. Fa lañuy  
rob Gog ak gàngooram gépp, ñu di ko  
wooye xuru Gàngooru Gog. <sup>12</sup> Juróom  
ñaari weer waa kër Israyil di leen rob,  
ngir setal réew mi. <sup>13</sup> Waa réew mépp  
a leen di robandoo, te bésub keroog ma  
darajaal sama bopp, ñu doxe ca siiw.  
Kàddug Boroom bi Aji Sax jee. <sup>14</sup> Dañuy  
tabb nit ñu féetewoo di wër réew mi, ñu  
àndandook tukkikat yi, di rob néew yi  
des ci àll bi, ngir setal ko. Bu juróom  
ñaari weer yi jeexee ñu tàmbalee seetaat.  
<sup>15</sup> Wèrkat yooyooy wër réew mi ba mu  
daj, ku ci gis yaxi nit, sàkk xàmmikaay

ca wet ga, ngir robkat yi dikk, robi ko ca xuru Gàngooru Gog, <sup>16</sup> ba far am dëkk bu ñuy wooye Amona (mu firi Gàngoor). Noonu lañuy setale réew mi.”

<sup>17</sup> «Yaw nit ki nag, Boroom bi Aji Sax ji dafa wax ne: Waxal picc yi ak mboolem njanaaw yi ak rabi àll yépp, ne leen: “Dajalooleen, jóge fu ne, dikk, dajesi ci sama sarax si ma leen di rendil, muy sarax su mag fa kaw tundi Israyil, ngeen lekk yàpp, naan deret. <sup>18</sup> Yàppu xarekat ngeen di lekk, naan deretu garmiy réew mi, ñooy seeni kuuy, aki tàppaanga aki bëy aki yëkk, ñoom ñépp mel ni juru yafal yuy fore jooru Basan. <sup>19</sup> Dingen lekk nebbon ba regg, naan deret ba màndi ci sama sarax si ma leen rendil. <sup>20</sup> Sama ndab ngeen di regge méddu fas ak boroom watiir ak méddu jàmbaar ak méddu bépp xarekat.” Kàddug Boroom bi Aji Sax jee. <sup>21</sup> Maay biralal yéefar yi sama teddnga, yéefar yépp gis àtte yi ma dogal ak sama diisaayu loxo bi ma leen teg. <sup>22</sup> Bésuub keroog la waa kër Israyil di dale xam ne maay seen Yàlla Aji Sax ji.

### *Aji Sax ji ñoñal na sellngaam*

<sup>23</sup> «Kon yéefar yi dinañu xam ne ñaawtéefi waa kër Israyil moo leen yóbbe ngàllo ndax la ñu ma ñàkke worma, ba ma xañ leen sama kanam, teg leen ci seen loxoy noon, ñu fàddoondoo saamar. <sup>24</sup> Seeni sobeek seeni tooñ laa jëflanteek ñoom, ba xañ leen sama kanam.

<sup>25</sup> «Kon nag Boroom bi Aji Sax ji dafa wax ne: Léegi maay tijji wërsëgu Yanqóoba, maay ñeewante waa kër Israyil googu gépp, te maay fiire sama tur wu sell wi. <sup>26</sup> Bu ñu dëkke seenum réew ci xel mu dal, kenn léjalu leen, ñooy gàddu seen gacce, ak gépp ñàkk worma gu ñu ma ñàkke woon worma, <sup>27</sup> Bu ma leen jëlee ci xeet yi, délloosi leen, maa leen di dajalee ca seen réewi noon yooya, maa leen di fésale sama sellnga, yéefar yu bare teg ci bët. <sup>28</sup> Dinañu xam ne maay seen Yàlla Aji Sax, ji leen yóbbu woon ngàllo ca yéefar ya, ba noppi

délloosi leen seen suuf, te bawuma kenn gannaaw. <sup>29</sup> Gannaaw bu ma walee waa kër Israyil sama noo, dootuma leen xañ sama kanam. Kàddug Boroom bi Aji Sax jee.»

## 40

### *Esekiyel gis na kër Yàlla gu bees*

<sup>1</sup> Ba ñu duggee ca ñaar fukkeelu at maak juróom gannaaw ba ñu nu yóbboo ngàllo, mu yemook fukki at ak ñeent gannaaw ba ñu nangoo Yerusalem, bésuub keroog booba yemook fukki fan, loxol Aji Sax ji dikk na fi sama kaw. Mu yóbbu ma ba foofa. <sup>2</sup> Ci biir peeñuy Yàlla la ma yóbbu ba réewum Israyil, wacce ma ci kaw tund wu kawee kawee. Mu am fa ca wetu bëj-saalum luy nirook tabaxi dëkk bu mag. <sup>3</sup> Ba mu ma yóbboo ba foofa, ma jekki yem ci nit ku am melow xàñjar, ñàbb buumu lëe ak yetu nattukaay. Ma nga taxaw ca buntu dëkk ba. <sup>4</sup> Waa ja ne ma: «Yaw nit ki, xoolal bu baax, teewlool say nopp te def sam xel ci mboolem li ma lay won. Ngir won la moo tax ñu indi la ba fii. Mboolem loo gis, nanga ko àgge waa kër Israyil.»

### *Natt nañu miir baak bunt ba féete penku*

<sup>5</sup> Ma jekki gis ab miir bu wër kër Yàlla gi ba mu daj. Waa jaa nga ñàbb yetu nattukaay bu guddu juróom benni xasab\* yu teg yaatuwaayu catu loxo†. Mu natt talaayu miir ba, muy wenn yet, taxawaay ba it di wenn yet‡. <sup>6</sup> Mu dem ca bunt ba féete penku, yéeg dëggastal ya, daldi natt guddaayu dëxu biir bunt ba, muy wenn yet. Benn dëx bi rekk, wenn yet la. <sup>7</sup> Néegi wattukat yi làng ak jaaruwaayu mbaaru bunt bi, bu ci nekk ab kaare la bu wetam di wenn yet. Diggante ñaari néeg yu nekk, miiru juróomi xasab moo ca dox. Dal-luwaayu mbaar ma ca biir, ab dëxam wenn yet la. <sup>8</sup> Mu natt dal-luwaayu mbaaru bunt ba ca biir, <sup>9</sup> muy juróom ñetti xasab, ay jënam dëlle ñaari xasab. Dal-luwaayu mbaar maa nga ca

\* **40:5** 40.5 xasab ñeent fukki santimeetar laak juróom. † **40:5** 40.5 catu loxo bu digg-dóomu di juróom ñaari santimeetar ak genn-wáll. ‡ **40:5** 40.5 yet wi di ñetti meetar yu teg tuuti.



biir, janook néeg Yàlla ba. <sup>10</sup> Néegi wattukat bunt ba féete penkub kër Yàlla ga, ñett la wet gii, ñett wet gee, yépp tolloo, te jën yi leen séq ñoo tolloo yaatuwaay.

<sup>11</sup> Waa ja natt yaatuwaayu buntu mbaar mi, bu ubbikoo, muy fukki xasab, yaatuwaayu bunt bi di fukki xasab ak ñett, boo ci boolee jën yi. <sup>12</sup> Fi janook bunti néegi wattukat, yi bindoo juróom benni xasab wet gu nekk, ab dëx a fa tédde xasab, talaayu dëx ba di xasab. <sup>13</sup> Mu natte mbaar ma ca xadd ba, diggante miiru biiru benn néeg, ak miiru biiru moroom, ma mu jàkkaarloom, muy ñaar fukki xasab ab juróom. <sup>14</sup> Mu def ñaari jëni mbaar mi§ juróom benn fukki xasab, èttu kër Aji Sax ji féete mbaaru bunt bi wet gu nekk. <sup>15</sup> Diggante kanam mbaaru bunt ba, ba fa dal-luwaayu mbaar ma jeexe, juróom fukki xasab la. <sup>16</sup> Néegi wattukat yi ak seeni jën am nañu ay palanteeri biir yu ànd aki caax, te wër néeg yi ba dajal. Dal-luwaayu mbaaru bunt bi itam am ay palanteeri biir yu wër ba dajal. Jën wu ci nekk, ay nataali garabi tándarma lañu ñaas ca kawam.

#### *Natt nañu èttu biti ba*

<sup>17</sup> Waa ja yóbbu ma, ba ca èttu biti ba. Mu am fa ab dër bu dajal ètt ba, fanweeri néeg séq ko. <sup>18</sup> Dër ba daa wër mbaari bunt yi waaye dëru èttu biti bi nag moo gëna suufe bu èttu biir ba. <sup>19</sup> Waa ja natt diggante mbaaru bunt ba féeteek èttu biti ba, ak mbaaru ètt ba féete biir, muy téeméeri xasab. Loola di wetu penku, mu teg ca bëj-gànnar.

#### *Natt nañu bunt ba féete bëj-gànnar*

<sup>20</sup> Mu natt guddaay ak yaatuwaayu mbaaru bunt ba féete bëj-gànnar, te jëm ca èttu biti ba. <sup>21</sup> Néegi wattukat ya ñu tabaxaale mbaar ma di ñett genn wet, ñett ca ga ca des. Dayoy jën yaak dal-luwaayu mbaar ma, mook yu buntu penku ba, ñoo bokk yem: guddaay ba di juróom fukki xasab, yaatuwaay ba di ñaar fukki xasab ak juróom. <sup>22</sup> Ay palanteeram ak dal-luwaayam ak nataali garabi tándarmaam it, lépp a bokk ak

yu buntu penku ba dayo. Juróom ñaari dëggastal ngay yéeg, janook dal-luwaayu ba. <sup>23</sup> Niki buntu penku bi rekk, buntu bëj-gànnar ba daa janook bunt bay jállale ca èttu biir ba. Mu natt diggante ñaari bunt ya jàkkaarloo, am téeméeri xasab.

#### *Natt nañu bunt ba féete bëj-saalum*

<sup>24</sup> Mu yóbbu ma wetu bëj-saalum, ma yem ci buntu bëj-saalum ba. Mu natt ay jënam ak dal-luwaayu mbaaram, dayo ya bokk ak yu bunt ya jiitu, di benn. <sup>25</sup> Foofu itam am na ay palanteer yu wër dal-luwaayu mbaaru bunt ba ba mu daj, nirook yu jëkk ya. Dayo yeet di benn: juróom fukki xasab ci guddaay, ñaar fukki xasab ak juróom ci yaatuwaay. <sup>26</sup> Juróom ñaari dëggastal ngay yéeg dal-luwaay ba. Ay nataali garabi tándarma lañu ñaas ca kaw jën ya, wet gu nekk genn. <sup>27</sup> Foofu it èttu biir ba am na bunt bu féete bëj-saalum. Waa ja natt diggante ñaari bunti bëj-saalum yi jàkkaarloo, am téeméeri xasab.

#### *Natt nañu bunt ya jëm èttu biir ba*

<sup>28</sup> Waa ja jaarale ma ca buntu bëj-saalum ba, dugal ma ca èttu biir ba. Mu natt buntu bëj-saalum boobee, ay dayoom di benn. <sup>29</sup> Néegi wattukatam yaak jënam yaak biir dal-luwaayu mbaar ma, lépp a bokk ak ya jiitu ay dayo. Mbaaru bunt ba ak dal-luwaayam am ay palanteer ba dajal, guddaayu mbaaru bunt ba di juróom fukki xasab, yaatuwaay ba di ñaar fukki xasab ak juróom. <sup>30</sup> Néeg yu ndaw yi wër èttu biir bi ba mu daj, ñaar fukki xasab ak juróom la ci guddaay, juróom ci yaatuwaay. <sup>31</sup> Bunti dal-luwaayi mbaar yaa ngay ubbikoo ca èttu biti ba, ñu rafetale jën ya ay nataali garabi tándarma. Juróom ñetti dëggastal lañu cay dugge.

<sup>32</sup> Waa ja jaare penku, dugal ma ca èttu biir ba. Mu natt buntu penku boobu, dayo ya di benn. <sup>33</sup> Ay néegam aki jënam ak biir dal-luwaay ba, lépp a bokk ak ya ca des ay dayo, juróom fukki xasab ci guddaay, ñaar fukki xasab ak juróom

ci yaatuwaay. Mbaaruu bunt ba ak dal-luwaayam am na ay palanteer ba dajal. <sup>34</sup> Dal-luwaayu bunt baa ngay ubbikoo ca èttu biti ba, ñu ñaas ca kaw jëni bunt ba ay nataali garabi tàndarma, di ca dugge juróom ñetti dëggastal.

<sup>35</sup> Waa ja yóbbu ma ba ca buntu bëj-gànnar ba. Mu natt ko, mu bokk ak ya jiiu ay dayo. <sup>36</sup> Bunt ba daa ànd aki néegam aki jënam ak dal-luwaayam ak palanteer yu ko wër, ba mu daj. Guddaay ba di juróom fukki xasab, yaatuwaay ba di ñaar fukki xasab ak juróom. <sup>37</sup> Mbaaruu bunt baa ngay ubbikoo ca èttu biti ba; ay jënam am wet gu nekk nataali garabi tàndarma, te ñu di ca yéegé juróom ñetti dëggastal.

#### *Natt nañu néegu carxal gi*

<sup>38</sup> Am na néeg buy ubbikoo ci biir mbaaruu bëj-gànnar ba féete biir. Fa lañuy raxase yàppu saraxu rendi-dóomal. <sup>39</sup> Biir dal-luwaay boobu, ñeenti taabal a nga ca, ñaari taabal cat lu nekk. Ca lañuy rey juri sarax yi. Muy saraxu rendi-dóomal, di saraxu póotum bàkkaar, di saraxu peyug tooñ. <sup>40</sup> Néegu peggu boobu ngay jékka jot, soo jógee ca biti, ñaari taabal a nga fa, féeteek dëggastal yi ñuy yéegé buntu bëj-gànnar bi ak yeneen ñaari taabal fa féeteek biir dal-luwaay ba. <sup>41</sup> Lépp di juróom ñetti taabal, ñeent wet gii ak ñeent wet gee, ñu di ca rendi. <sup>42</sup> Ñeenti taabali saraxu rendi-dóomal ba, doji yett lañu ko defare. Bu ci nekk di xasab ak genn-wàll, wet gu nekk, taxawaay ba di xasab. Ñu di ca teg juntuukaay yi ñuy rendee saraxu rendi-dóomal ak yeneen sarax. <sup>43</sup> Ñu sàkk ay lonku yu gudde catu loxo, wërале lonku ya ba mu daj ca biir, yàppu sarax ya di tege ca kaw taabal ya.

#### *Natt nañu èttu biir ba*

<sup>44</sup> Mu jàlle ma ca èttu biir ba. Ay néegi jàngkat a nga ca èttu biir ba, benn bi ci wetu mbaaruu bunt bëj-gànnar bi, jàkkaarlook bëj-saalum, beneen néeg bi ci wetu mbaaruu buntu penku bi, jàkkaarlook bëj-gànnar. <sup>45</sup> Waa ja ne ma: «Néeg bii jàkkaarlook bëj-saalum

ñeel na sarxalkat yi dénkoo dénkaneey kër Yàlla gi. <sup>46</sup> Néeg bi jàkkaarlook bëj-gànnar nag ñeel na sarxalkat yi dénkoo dénkaneey sarxalukaay bi. Ñooñu ñooy Leween ñi askanoo ci Cadog te bokkuñook kenn sañ-sañu jege Aji Sax ji, ngir liggéeyal ko.»

<sup>47</sup> Waa ja natt èttu biir ba, muy téeméeri xasab wet gu nekk. Sarxalukaay baa nga fa kanam néeg Yàlla ba.

#### *Natt nañu néeg Yàlla ba*

<sup>48</sup> Mu jàlle ma ca dal-luwaayu mbaaruu néeg Yàlla ba, daldi natt ñaari jëni dal-luwaay ba, muy juróomi xasab, wet gu nekk. Bunt ba di fukki xasab ak ñeent, ñaari weti biir mbaar ma di ñetti xasab, wet gu ci nekk. <sup>49</sup> Dal-luwaayu mbaar mi gudde ñaar fukki xasab, yaatoo fukki xasab ak benn. Mu am dëggastal yu ñuy yéegé, jàll ca biir, ñaari jën séq ko, wet gu nekk, wenn.

## 41

<sup>1</sup> Ba loolu amee waa ja jàlle ma ba ca bunt néeg bu mag ba. Mu natt jën ya séq bunt ba, mu dëlle juróom benni xasab ci ñaari wet yépp. <sup>2</sup> Yaatuwaayu bunt ba fukki xasab la, ñaari miiri wet yi ko séq, bu ci nekk di juróomi xasab. Mu natt néeg bu mag bi ci boppam, guddaay bi di ñeent fukki xasab, yaatuwaay bi di ñaar fukki xasab. <sup>3</sup> Moom nag moo jàll ca néegu biir ba, daldi natt jëni bunt ba, mu dëlle ñaari xasab, diggante ñaari jëni bunt bi di juróom benni xasab, yaatuwaayi ñaari miiri wet yi séq bunt bi, bu ci nekk di juróom ñaari xasab. <sup>4</sup> Mu natt néegu biir bi ci boppam, muy ñaar fukki xasab wet gii, di ñaar fukki xasab wetu néeg bu mag ba. Mu ne ma: «Fii mooy fu sell fee sell.»

#### *Natt nañu toftalu néeg Yàlla bi*

<sup>5</sup> Mu natt miiru néeg Yàlla bi, mu dëlle juróom benni xasab, yaatuwaayu néegi wet, yi wër néeg Yàlla bi ba mu daj, bu ci nekk di ñeenti xasab. <sup>6</sup> Néegi wet yooyu ñetti taax yu tegloo la, tollook néeg Yàlla bi ab taxawaay, taax mu ci nekk di fanweeri néeg. Mu am ay cëslaay yu

saxe ci miiru néeg Yàlla bi, te téye néegi wet yooyu, ba sèsuñu rëkk ci néeg bi ci boppam. <sup>7</sup> Taax mu la gëna kawe, gën laa yaatu, miir ba ànd ak moom gëna sew fi wër néeg Yàlla bi ba mu daj. Noonu lañuy yéeg ay dëggastal, jóge ci suuf, jaare ca taaxu digg ba, ba ca taax ma ca kaw.

<sup>8</sup> Ma gis ne néeg Yàlla bi ab dëx a ko yenu, yenuwaale néegi wet yi wër néeg Yàlla bi, taxawaayu dëx bi di wenn yet wu mat, tollook juróom benni xasab. <sup>9-10</sup> Néegi wet yi, seen miiru biti dëlle na juróomi xasab. Ñu bàyyi diggante néegi wet yi ak taaxi sarxalkat yi, bérab bu tollook ñaar fukki xasab, wër néeg Yàlla bi ci ñetti wetam. <sup>11</sup> Am na ñaari bunt yu sare ci néegi wet yi wër néeg Yàlla bi, jëme ci pegg bu dara amul. Benn bunt ba féete bëj-gannaar; benn ba, bëj-saalum, yaatuwaayu pegg, bi wër néeg bi ba mu daj, di juróomi xasab.

### *Ber nañu ab tabax ca gannaaw*

<sup>12</sup> Tabax bi féeteek dig-digalu feguwaay bi ci sowub néeg Yàlla bi, yaatuwaayam juróom ñaar fukki xasab la, guddaayam di juróom ñeent fukki xasab, dëllaayu miir ba di juróomi xasab.

<sup>13</sup> Waa ja daldi natt néeg Yàlla bi, guddaay bi di téeméeri xasab; la dale dig-digalu feguwaay ba, ba ca catu tabaxu sowu ba aki miiram itam di téeméeri xasab. <sup>14</sup> Kanamu néeg Yàlla bi féete penku téeméeri xasab la, boo ci boolee dig-digali feguwaay yi séq néeg Yàlla bi. <sup>15</sup> Mu natt yaatuwaayu tabax ba ca gannaaw te janook dig-digalu feguwaay ba, boole ca ñaari poot ya séq tabax ba, muy téeméeri xasab.

Bérab bu sell bi nag, muy néeg bu mag bi, di néegu biir bi, di mbaar bunt bi jakkaarlook ètt bi, <sup>16</sup> ak dëxi bunt yeek palanteeri caax yeek jaarukaay yi ci ñetti wet yépp, ak ci kanam dëx yi, lu ci nekk bant a ko lal. Ci suuf ak ci kaw miir bi ba ca palanteer ya it noonu, palanteer ya am ay caax. <sup>17</sup> Ci kaw buntu néeg Yàlla bi, ba ci biir néeg Yàlla bi, jëm biti, ak kaw miir bi ko wër, biir ak biti, lépp lañu natt. <sup>18</sup> Ñu yett ca miir ya ay malaakay serub ak garabi tândarma; ñaari serub

yu ne, garabu tândarma nga ca digg ba, te serub bu ne am na ñaari kanam, <sup>19</sup> genn gi di kanamu nit, jublook genn tândarma, geneen gi di kanamu gaynde, jublook geneen tândarma. Noonu lañu wëralee néeg bi ba mu daj. <sup>20</sup> Li ko dale ci suufu néeg bu mag bi, ba ci kaw bunt yi, ak ci miir yi, fépp lañu yett serub yeek tândarma yi. <sup>21</sup> Njëël bunt bi ak dëx bi, ak pegg yi ko téye ab kaare la. Buntu néegu biir bu sell ba it noonu la.

<sup>22</sup> Sarxalukaay bi bant la, taxawaayam di ñetti xasab, guddaayam di ñaari xasab, yaatuwaayam di ñaari xasab. Mu ami coll akub tegukaay aki wet, lépp di bant. Waa ji ne ma: «Taabal jii mooy janook Aji Sax ji.»

<sup>23</sup> Buntub ñaari laf lañuy dugge ca néeg bu sell bu mag ba, di dugge beneen bunt bu ni mel ca néegu biir bu sell ba.

<sup>24</sup> Bunt yooyu, bu ci nekk ñaari laf yuy warangiku la. <sup>25</sup> Ñu yett ca buntu néeg bu mag ba ay malaakay serub, ak garabi tândarma yu mel ni ya ñu yett ca kaw miir ya. Catu xaddu mbaar bunt ba ca biti, aw dénk lañu ko def. <sup>26</sup> Palanteeri caax yi ak miiri néegi wet yi ak miiri mbaar mi ak ca kaw catu xadd bay lang, wet gu ne, ay nataali tândarma nga ca.

## 42

### *Natt nañu taaxi sarxalkat yi*

<sup>1</sup> Ba loolu amee waa ji jaarale ma buntu bëj-gannaar, génne ma ci èttu biti bi. Mu yóbbu ma wetu sowu, dugal ma ca tabax ba janook dig-digalu feguwaay ba te sèsook miiru biir ba ca wetu bëj-gannaar.

<sup>2</sup> Tabax boobu, guddaayam ci wetu bëj-gannaar ga féeteek bunt ba, téeméeri xasab la, yaatuwaay ba di juróom fukki xasab. <sup>3</sup> Ci genn wet tabax booboo ngi janook ñaar fukki xasab yu bokk ci èttu biir bi, geneen wet gi janook dëru èttu biti bi. Tabax bi def na ñetti sàppey taax yu tegloo. <sup>4</sup> Ci kanam néeg, yi féeteek èttu biir bi, am na jaarukaay bu yaatoo fukki xasab, gudde téeméeri xasab. Néeg yooyu wetu bëj-gannaar lañu cay dugge. <sup>5</sup> Ñaari taax ya ca kawam nag, mu ci nekk yaatuwaayam a yées

ma ko féete suuf, ndax taax mu gëna kawe moo ëpp jaarukaay bu mu bàyyi fi kanamam. <sup>6</sup> Ñetti sàppey taax la yu amul ay jën ni néegi ëtt bi ame ay jën. Moo tax ruumi taaxum kaw ma gëna xat yoy taaxum digg ma, ak ma féete suuf. <sup>7</sup> Mu am miir bu làng ak néeg yooyu, teqale leen ak ëttu biti bi, guddaayu miir bi di juróom fukki xasab. <sup>8</sup> Ndax néeg yooyu féeteek ëttu biti ba, guddaay ba bépp juróom fukki xasab la. Waaye sàppey néeg, ya sësook néeg Yàlla ba, guddaayam téeméeri xasab la. <sup>9</sup> Ca suufu néeg yooyu la am jaarukaayu penku bu jëme ca biir néeg ya féete penku, boo jógee ca ëttu biti ba.

<sup>10</sup> Am na sàppeb néeg bu janook dig-digalu feguwaay ba, ak tabax ba ca gannaaw néeg Yàlla ba. Sàppeb néeg boobu ma nga làng ak miiru biti, bi yaatuwaayam féete penku. <sup>11</sup> Mu ngi janook ab jàllukaay. Sàppey néeg yooyu daa bindoo ni bi féete bëj-gànnar te bokk ak ñoom guddaay ak yaatuwaay, seeni bunt ak seeni dayo yépp di benn. <sup>12</sup> Bunti sàppey néeg ya ca bëj-saalum it noonu la. Ca catal jaarukaay ba, ab bunt a nga fa, janoo màkk ak miir ba féete penku.

<sup>13</sup> Ba loolu amee waa ji ne ma: «Néegi bëj-gànnar yeek néegi bëj-saalum yi janook dig-digalu feguwaay bi, ñooy néeg yu sell yi sarxalkat yi jege Aji Sax ji, di lekke sarax yu sell yee sell. Ca lañuy yeb sarax yu sell yee sell it, muy saraxu pepp yeek saraxu póotum bàkkaar yeek saraxu peyug tooñ yi, ndax bérab bu sell la. <sup>14</sup> Sarxalkat yi, bu ñu duggee ci bérab bu sell bi, dootuñu man daldi génn ci ëttu biti bi. Ci néeg yii lañuy wacc seen yére yi ñuy liggéeyale Aji Sax ji, ndax yooyu yére yu sell la. Ñu solaat nag yeneen yére bala ñoo dellu ca ëtt ba mbooloo may daje.»

### *Natt nañu miiru biti bu kër Yàlla gi*

<sup>15</sup> Ba waa ja nattee dayoy biir néeg Yàlla bi ba noppi, da maa jaarale ca mbaaruu bunt ba féete penku. Mu tàmbali di natt bayaal bi wër kër gi. <sup>16</sup> Mu natte yet wa wetu penku, lépp di

juróomi téeméeri yet, yemook kilomeetar ak genn-wàll. <sup>17</sup> Mu natte yet wa wetu bëj-gànnar, lépp di juróomi téeméeri yet, <sup>18</sup> wetu bëj-saalum ba it, mu natte ko yet wa, muy juróomi téeméeri yet. <sup>19</sup> Mu walbatiku, natte yet wa wetu sowu, muy juróomi téeméeri yet. <sup>20</sup> Noonu la natte miir bi ub bayaalu kër Yàlla gi ba mu daj, muy kaare bu wetam di juróomi téeméeri dayo, te teqale fi sell ak fi sellul.

## 43

### *Leeru Yàlla dellu na këram*

<sup>1</sup> Waa ja nag jiite ma ba ca bunt ba, bunt ba féete penku. <sup>2</sup> Ma jekki gis leeru Yàllay Israyil, mu dikke penku, ànd ak kàddu gu mel ni kàddug géej mbàmbulaan, suuf si di lèrxate fa leeram ga. <sup>3</sup> Moomu peeñu nirook peeñu ma ma jëkkoonu gis ba may dikk ca yàqum Yerusalem, nirook ma woon ca tàkkal dexu Kebar. Ma daldi daanu, dëpp sama kanam fa suuf. <sup>4</sup> Ba loolu amee leeru Aji Sax ja jaare ca buntu penku ba, dugg ca néeg Yàlla ba. <sup>5</sup> Ngelaw nag ne ma cas, yóbbu ma ca biir ëttu biir ba, leeru Aji Sax ji jekki fees néeg ba. <sup>6</sup> Ma dégg kuy wax ak man ku féete fi biir néeg Yàlla bi, te fekk waa ji ma dugal a ngi taxaw fi sama wet ba tey. <sup>7</sup> Mu ne ma: «Yaw nit ki, sama màkkaanu ngàngunee ngi, bérab bii laay teg samay tànk, di fi dëkke fi digg bànni Israyil ba fàww. Bu waa kër Israyil dellu teddadil sama tur wu sell, ñook seeni buur ci seen gànctu, ak seen néewi buur yi ñuy denc ci seeni jaamookaay. <sup>8</sup> Seen buur yi ñoo féetale seen dëxi bunt ak seen jëni bunt ci sama weti dëxi bunt ak sama jëni buntu kër. Miir donḡ a doxoon diggante sama kër ak seen kër. Ñoo def seen jëf ju siblu, ba teddadil sama tur wu sell, ma mer, faagaagal leen. <sup>9</sup> Léegi nag nañu ma sorele seen gànctu ak seen néewi buur yi, ndax ma mana dëkk fi seen biir, ba fàww.

<sup>10</sup> «Yaw nit ki, waxal waa Israyil ni kër gi wara mel. Nañu kersawoo seeni ñaawtéef te ñu natt nataalu kër gi. <sup>11</sup> Bu ñu kersawoo mboollem seeni jëf nag, nanga leen xamal bindu kër gi ak tëralinam aki duggukaayam aki

génnukaayam, bindam bépp, ak dogali yoon yi mu laaj yépp. Nanga bind lépp, ñu gis, ba mana sàmm mboolem bindu kër gi, ak mboolem dogali yoon yi mu laaj, te di ko jéfe. <sup>12</sup> Ndigalu yoon wi jëm ci kër Yàlla gi ñu wara tabax mooy lii: ci kaw tund wi ak fi ko wër fépp, fu sella sell lay doon. Loolu mooy ndigalu yoon wi, ci wàllu kër Yàlla gi.»

### *Natt nañu sarxalukaay bi*

<sup>13</sup> Lii nag mooy dayoy sarxalukaay bi ciy xasab, xasab bu ci nekk tegu yaatuwaayu catu loxo. Toogub sarxalukaay bi féete suuf, taxawaayam xasab la, yaatuwaayam di xasab, mu ànd ak kéméjam gu ko wër ba mu daj, te taxawaayu kéméj gi tollook yaatuwaayu catu loxo. Toogub sarxalukaay bi noonu la bindoo. <sup>14</sup> Ñaari xasab a dox diggante toogu bi ci suuf, ba ci cat li ngay jékka jot, te yaatuwaayu cat li di xasab. Ñeenti xasab a dox diggante cat li ngay jékka jot, ba ca cat la ca kaw, te yaatuwaayam it di xasab. <sup>15</sup> Taxawaayu taalub sarxalukaay bi féete kaw ñeenti xasab la, ñeenti béjjén sampe ci ñeenti coll yi, coll wu nekk, benn béjjén. <sup>16</sup> Lakkukaayu sarxalukaay bi ab kaare la, wet gu ci nekk di fukki xasab ak ñaar. <sup>17</sup> Kon toogub lakkukaay bi fukki xasab ak ñeent la ci ñeenti wetam, dib kaare, kéméj gi wër toogu bi am taxawaayu genn-wàllu xasab, te toogub lakkukaay bi, wère lakkukaay bi cat lu yaatoo xasab. Dëggastal bi ñuy yéegé ci sarxalukaay bi nag penku la féete.

### *Sàrtal nañu sarxalukaay bi*

<sup>18</sup> Waa ji ne ma: «Yaw nit ki, Boroom bi Aji Sax ji dafa wax ne: Lii mooy dogali yoon yi jëm ci sarxalukaay bi, bés bu noppee, ci wàllu saraxi rendi-dóomal, ak deret ji ñu ci wara tuur. <sup>19</sup> Sarxalkati Leween ñi askanoo ci Cadog, te jege ma, ngir di ma liggéeyal, kàddug Aji Sax jee, nanga leen jox yèkk wu ndaw, muy saraxu póotum bàkkaar. <sup>20</sup> Nga sàkk ci deret ji, taqal ci ñeenti béjjéni sarxalukaay bi, ak ñeenti colli kaw gi ak

ci kéméj gi ba mu daj, nga laabale ko sarxalukaay bi, defale ko ko njotlaayam. <sup>21</sup> Nga génne bérab bu sell bi yèkku saraxu póotum bàkkaar mi, te nga lakk ko bérab ba mu ware ci èttu kër Yàlla gi. <sup>22</sup> Bésuub ñaareel ba nanga indi ab sikket bu amul sikk, muy saraxu póotum bàkkaar bu ñuy laabale sarxalukaay bi; ñu laabale ko sarxalukaay bi, na ñu ko laabale woon yèkk wu ndaw wa. <sup>23</sup> Boo ko laabalee noonee ba noppi, nanga sàkk aw yèkk wu ndaw wu amul sikk ak kuuy mu amul sikk. <sup>24</sup> Nga boole indi fi kanam Aji Sax ji, sarxalkat yi suy leen xorom, ñu def leen saraxu rendi-dóomal, ñeel Aji Sax ji. <sup>25</sup> Diiru juróom ñaari fan ngay joxe bés bu nekk ab sikketu póotum bàkkaar akaw yèkk akum kuuy, te na lu ci nekk mucc sikk. <sup>26</sup> Diiru juróom ñaari fan lañuy def njotlaayal sarxalukaay bi, setal ko, doore ko sasu sarxalukaay bi. <sup>27</sup> Bu àpp boobu matee, la ko dale ca bésuub juróom ñetteel ba, na sarxalkat yi joxe ci kaw sarxalukaay bi, seen saraxi rendi-dóomal, ak seen saraxi cant ci biir jàmm, ma daldi leen nangul. Kàddug Boroom bi Aji Sax jee.»

## 44

### *Ay jagle ñeel na boroom jal bi*

<sup>1</sup> Ba loolu amee waa ji delloo ma ca mbaar bitu bu kër Yàlla ba féete penku, fekk bunt ba tëje. <sup>2</sup> Aji Sax ji ne ma: «Mbaar mii, buntam day dëkke tëje. Kenn du ko tijji, kenn du ci jaare ndax Aji Sax ji Yàllay Israyil fii la dugge. Kon nag na tëje. <sup>3</sup> Boroom jal bi\* nag, gannaaw mooy boroom jal bi, sañ na faa tooge, lekk fi kanam Aji Sax ji. Waaye ci dal-luwaayu mbaar mi lay dugge te fi lay génne itam.»

### *Jege bérab bu sell bi du wàllu ñépp*

<sup>4</sup> Gannaaw loolu waa ji jaarale ma ca buntu bëj-gannaar ba ca kanam néeg ba, ma jekki gis leeru Aji Sax ji fees néeg Aji Sax ji. Ma daanu, dëpp sama kanam fa suuf. <sup>5</sup> Aji Sax ji ne ma: «Yaw nit ki, xippil, ubbil say nopp te def sa xel ci mboolem lu ma la wax ci wàllu dogali yoon yi jëm ci

\* 44:3 44.3 Seetal ci 34.23-24 ak 37.24-25.

kër Aji Sax ji ak mboolem digali yoonam. Defal sa xel bu baax ci duggukaayi kër gi ak mboolem génnuukaayi bérab bu sell bi. <sup>6</sup> Nanga wax fippukati waa kër Israyil yii, ne leen: Boroom bi Aji Sax ji dafa wax ne: Yeen waa kër Israyil, seen jéf ju siblu ji jépp doy na sèkk. <sup>7</sup> Bu ngeen ma daan indil sama céru ñam, muy nebbon, di deretu sarax yi, dangeen di dugalaale sama biir bérab bu sell bi ay doxandéem yu xaraful, du ci jëmm, du ci xol. Noonu ngeen sobeele sama kër gi. Fecci ngeen sama kólléreek yeen ndax seen jépp jéf ju siblu. <sup>8</sup> Dénkoowuleen dénkaane yi jëm ci sama yéf yu sell yii, xanaa di ko dénkk ñeneen ñu koy dénkkoo fi sama biir bérab bu sell bi.» <sup>9</sup> Boroom bi Aji Sax ji dafa wax ne: «Bépp doxandéem bu xaraful ci xol, xaraful ci jëmm, bumu duggati sama bérab bu sell bi, muy doxandéem bu mu mana doon, bu dëkk ci biir bànni Israyil.

*Leween ñi am nañu seen wartéefi bopp*

<sup>10</sup> «Leween ñi ma sore woon ba bànni Israyil jàddee, ba dëddu ma, di topp seen kasaray tuur, ñooy gàddu seenu ay. <sup>11</sup> Ay surga aki fara bunti kër rekk lañuy doon ci sama bérab bu sell bi, te ñooy tegoo liggéeyu kër gi. Ñooy rendil xeet wi saraxu rendi-dóomal, ak gépp jur gu ñuy sarxal, te ñooy nekk ci waawu xeet wi, di leen surgawu. <sup>12</sup> Gannaaw ñoo doon dox diggante xeet week seen kasaray tuur, ba yóbbe leen ay wu leen gállankoor, maa leen giñal ne, kàddug Boroom bi Aji Sax jee, ñooy gàddu seenu ay. <sup>13</sup> Buñu ma jege, di ma sarxalal, buñu jege sama lenn lu sell ak lu sella sell. Ñooy gàddu seen toroxte ak seen aña jéf ju siblu ji ñu def. <sup>14</sup> Waaye maa leen di def ñuy nit ñiy dénkkoo dénkaaney kër gi ci mboolem liggéey bu mu laaj, ak mboolem lees di def ci biir.

*Askanu Cadog am nañu seen wartéefi bopp*

<sup>15</sup> «Waaye sarxalkat yiy Leween, sètoo ci Cadog, te daa dénkkoo dénkaaney bérab bu sell bi ba bànni Israyil jàddee, ñooño

may jege, di ma liggéeyal; ñooy dikk fi man, di indi saraxi nebbon ak deret. Kàddug Boroom bi Aji Sax jee. <sup>16</sup> Ñoom donj ay dugg sama bérab bu sell bi, ñoom donj ay jege sama taabal, di ma liggéeyal, di dénkkoo sama ndénkaane.

<sup>17</sup> «Bu ñu dee jàll buntu èttu biir bi, yérey lée lañuy sol. Buñu sol ndimol kawaru jur, bu ñuy liggéey fu wees buntu èttu biir bi, jëm ca biir-a-biir. <sup>18</sup> Kaalag lée lanuy kaalawoo, tubéyu njiitlaayu lée lañuy jiital, te duñu sol dara lu leen di ñaqloo. <sup>19</sup> Bu ñuy génn ca èttu biti ba, ètt ba mbooloo may yem, nañu summi seen yére ya ñuy sarxale, fat yére ya ca néeg yu sell ya, daldi sol yeneen yére, ndax baña sédd mbooloo mi sellnga, di leen lor†.

<sup>20</sup> «Buñu watu nel, buñu jañu, waaye nañu dagg seen kawar ba mu yem. <sup>21</sup> Biiñ, bu ko benn sarxalkat naan, buy dugg ci èttu biir bi. <sup>22</sup> Ab jëtun ak ku ñu fase, sarxalkat du ko jël jabar. Su dee janq bu askanoo ci waa kër Israyil mbaa ab jëtun bu sarxalkat doon denc, sañ nañu koo jël. <sup>23</sup> Sama ñoñ nag nañu leen rãñneeloo lu sell ak lu sellul; te xamal leen lu set ak lu sobewu.

<sup>24</sup> «Bu jote amee, ñoom ñooy àtte, ba dogal àtte bi ci sama àttey yoon. Sama digal yeek sama dogali yoon yi jëm ci sama màggal yépp, ñoo koy sàmm, te sama bési Noflaay, ñoo koy sellal.

<sup>25</sup> «Nit ku dee nag, ab sarxalkat du ko jege, di sobeel boppam, ndare ki dee di baayam mbaa ndeyam, mbaa doomam ju góor, mbaa ju jigéen, mbaa doomu ndeyam ju góor mbaa ju jigéen ju amul jëkkër, ba mu sañ caa sobeel boppam. <sup>26</sup> Su ni demee ba mu sobeel boppam, na setlu te négandiku juróom ñaari fan, doora dellu ca liggéeyam. <sup>27</sup> Bés ba muy dellu ca èttu biir ba, ngir liggéey ca biir bérab bu sell ba, na indi saraxu póotum bàkkaar. Kàddug Boroom bi Aji Sax jee.

<sup>28</sup> «Sarxalkat yi am nañu seen céru bopp: man maay seen cér. Du jenn

† 44:19 44.19 Aay na ci képp ku ñu sellalul, muy laal mbaa ñu di ko laalal lenn lu sell. Man na cee dee sax. Seetal ci 2.Samiyel 6.6-7.

moomeel ju ngeen leen di jox ci suufas Israyil. Man maay seen moomeel. <sup>29</sup> Saraxu pepp ak saraxu pootum bàkkaar ak saraxu peyug tooñ, ñoom ñoo koy lekk, te lépp lu ñu jagleel Aji Sax ji ci Israyil, ñoo koy moom. <sup>30</sup> Li gën ci mboolem ndoortel meññeef, ak seen bépp jooxe ak bu mu mana doon, sarxalkat yee ko moom. Li gën ci seen notu sunguf, nangeen ko jox sarxalkat yi, ndax barke waccal seen kër.

<sup>31</sup> «Gannaaw loolu mboolem lu médd mbaa lu ñu fàdd, muy boroomi laaf akug jur, sarxalkat yi duñu ko lekk.

## 45

### *Lu jëm ci suuf si ñu jagleel Aji Sax ji*

<sup>1</sup> «Bu ngeen demee bay tegoo réew mi bant ngir séddoo ko, nangeen jooxeel Aji Sax ji dogu suuf bu gudde ñaar fukki junniy xasab ak juróom (25 000), yemook fukki kilomeetar ak ñett, yaatoo ñaar fukki junniy (20 000) xasab, yemook fukki kilomeetar ak genn-wáll. Suuf soosu sépp ba fa mu yem, lu sell lay doon. <sup>2</sup> Biir pàkk boobu, nañu ci waccal bérab bu sell bi ab dénd bu kaare, wet gu nekk di juróomi téeméeri xasab, yemook ñaar téeméeri meetar ak juróom fukk; ak bayaal bu wër dénd bi, yaatoo juróom fukki xasab, yemook ñaar fukki meetar ak juróom wet gu nekk. <sup>3</sup> Ci biir dogu suuf bu mag boobu gudde ñaar fukki junniy xasab ak juróom (25 000) te yaatoo fukki junniy xasab (10 000), yemook juróomi kilomeetar ak xaajaat, ci ngay nattal bérab bu sell bi, di fu sell fee sell. <sup>4</sup> Bérab bu sell a ngoog bu ñuy sàkke ci réew mi, ñeel sarxalkat yiy liggéey ci bérab bu sell bi, tey jege Aji Sax ji, di ko liggéeyal. Foofu lañuy am ay kër te foofu lañuy beral ab pàkk bérab bu sell bi. <sup>5</sup> Beneen dénd bu gudde ñaar fukki junniy xasab ak juróom (25 000), yaatoo fukki junniy xasab (10 000), na ñeel Leween ñiy liggéeyal kër Yàlla gi, ngir ñu am dëkk yu ñu dëkke.

\* **45:11** 45.11 benn omer am na ñu jàpp ne mu ngi tollook ñeenti téeméeri liitar ak juróom fukk, mbaa ñetti téeméeri kilo. Natt yii, seeni dayo daan na soppiku, topp jamono yaak bérab ya ñu ko daan jëfandikoo. † **45:12** 45.12 Moo doon natt ba gënoona tuut ci wàllu diisaay, yemook genn-wàllu garaam.

<sup>6</sup> «Suufas dëkk bi, nanga ko àppal yaatuwaayu juróomi junniy xasab (5 000) ak guddaayu ñaar fukki junniy xasab ak juróom (25 000), mu làng ak dog bi ñu sàkkal bérab bu sell bi. Suuf soosu na ñeel waa kër Israyil gépp. <sup>7</sup> Boroom jal bi nag, nañu ko jagleel ñaari wet yi séq suufas bérab bu sell beek pàkkub dëkk bi. Suufas buur soosu jóge sowu ba géej ga, jógeeti penku ba fa Israyil yem, na guddaayam tollook guddaayu suufu giirug Israyil gu ci nekk. <sup>8</sup> Loolooy doon céru suufu boroom jal bi ci Israyil. Su ko defee boroom jal yi ma fal dootuñu xañ sama ñoñ suuf. Dañuy wacce giiri waa kër Israyil li des ci réew mi.

### *Sàrt yii war na boroom jal bi ci wàllu kër Yàlla gi*

<sup>9</sup> «Boroom bi Aji Sax ji dafa wax ne: Yeen ñiy tooge jalu Israyil, na doy nag! Coxor geek jaay-doole bi, baleen ko. Njub ak njekk ngeen war di jëfe. Bàyyileen di nangu sama alali ñoñ. Boroom bi Aji Sax jee ko wax. <sup>10</sup> Seen màndaxekaay na doon njub, efab nattukaayu sol-sotti di njub, seen bat bi ñuy natte lu ñuy xelli di njub. <sup>11</sup> Na benn efa ak benn bat yem dayo, lu ci nekk wara def céru fukkeelu benn omer\*, bi yemook ñaar téeméeri liitar ak ñaar fukk (220), mbaa téeméeri kilo ak juróom fukk (150). Te na benn omer di dayo bi ngeen di natte. <sup>12</sup> Benn siikal, na wecciku ñaar fukki gera†, te boo boolee nattu ñaar fukki siikal, ak nattu ñaar fukki siikal ak juróom, ak nattu fukki siikal ak juróom, mu wara wecciku benn natt bi ñuy wax miin.

<sup>13</sup> «Lii nag mooy doon seenub jooxe: muy bele, di lors, na doon seen benn céru juróom benn fukkeelu meññeef, di ñaari kilook genn-wáll ci téeméeri kilook juróom fukk yu nekk. <sup>14</sup> Su dee ag diw, bat bi ñuy natte lu ñuy xelli lañu koy natte, benn bat yemook fukkeelu natt bi ñuy wax omer, mbaa fukkeelu natt bi ñuy

wax kor, di ñaari liitar yu tombal ñaar (2,2) ci ñaar téeméeri liitar ak ñaar fukk (220) yu nekk. <sup>15</sup> Ci wàllu parluy Israyil, benn ay génn ci ñaar téeméeri gàtt yu ne, gàtt yooyu ñeel saraxi pepp, ak saraxi rendi-dóomal, ak saraxi cant ci biir jàmm ngir njotlaayal askan wi. Kàddug Boroom bi Aji Sax jee. <sup>16</sup> Boobu jooxe, mboolem waa réew mee ciy def seen loxo, indil ko ki tooge jalub Israyil. <sup>17</sup> Li war ki tooge jal bi, saraxu rendi-dóomal ci la, ak saraxu pepp, ak saraxi biiñ yi ñuy joxe bésu màggal, yu mel ni màggali Terutel weer ak bési Noflaay, ak yeneen bés yu bànni Israyil taamoo daje. Moom it mooy joxe saraxu póotum bàkkaar, ak saraxu pepp, ak saraxu rendi-dóomal, ak saraxu cant ci biir jàmm ngir njotlaayal waa kër Israyil.

<sup>18</sup> «Boroom bi Aji Sax ji dafa wax ne: Benn fanu weer wi jëkk, nanga jël yëkk wu ndaw wu amul sikk ngir laabal bérab bu sell bi. <sup>19</sup> Sarxalkat bi day sàkk ci deretu saraxu póotum bàkkaar boobu, taqal ci jëni bunt yi, ak ñeenti colli kaw sarxalukaay bi, ak jëni buntu èttu biir bi. <sup>20</sup> Noonu it ngay def ca juróom ñaareelu fanu weer wa, ngir daboo ko nit ku jàdd yoon te yégu ko mbaa teyu ko. Su ko defee ngeen def njotlaayal kër Yàlla gi.

<sup>21</sup> «Fukki fan ak ñeent ci weer wu jëkk wi mooy seen màggalu bésu Mucc ba. Juróom ñaari fan la màggal giy am, te mburu mu amul lawiir lañu ciy lekk. <sup>22</sup> Bés boobu la ki tooge jal bi di joxeel boppam ak mboolem waa réew mi, yëkk wu ndaw wuy doon saraxu póotum bàkkaar. <sup>23</sup> Juróom ñaari fan yooyu dina sarxal Aji Sax ji bés bu nekk juróom ñaari yëkk yu ndaw ak juróom ñaari kuuy yu amul sikk, def ko saraxu rendi-dóomal, ak ab sikketu sarax ngir peyug tooñ, bés bu nekk. <sup>24</sup> Yëkk wu ci nekk ak kuuy mu ci nekk, da koy booleek saraxu benn efab† pepp, di fukki kiloy pepp ak juróom, ak efab pepp bu ne, benn xiinu diw, di ñetti liitari diw ak genn-wàll.

<sup>25</sup> «Ci wàllu màggal giy door fukki fan ak juróom ci juróom ñaareeli weer wi§, na ki tooge jal bi def niki ci màggalu bésu Mucc ba. Juróom ñaari fan, yi màggal giy def, yenn sarax yooyii rekk lay joxe, muy saraxu póotum bàkkaar, ak saraxu rendi-dóomal, ak saraxi pepp ak diw.

## 46

<sup>1</sup> «Boroom bi Aji Sax ji dafa wax ne: Buntu èttu biir bi féete penku, na tëje diiru juróom benni fan yi ñuy liggéey. Waaye bésu Noflaay ba cay topp, na ubbiku. Bésu Terutel weer it, na ubbiku. <sup>2</sup> Na ki ci jal bi jaare ci dal-luwaayu mbaar mi féete biti te na yem ci jëni buntu èttu biir bi. Na fa xaar sarxalkat yi def saraxu rendi-dóomalam, ak saraxi cantam ci biir jàmm. Su ko defee mu sujjóot ci dëxu bunt bi, ba noppi, génn. Bunt bi nag du tëje ba ngoon jot. <sup>3</sup> Bésu Noflaay ak Terutel weer, baadooloy réew mi ci bunt boobu lañuy sujjóote fi kanam Aji Sax ji.

<sup>4</sup> «Saraxu rendi-dóomal, bi ki ci jal biy indil Aji Sax ji bésu Noflaay, juróom benni xar yu ndaw yu amul sikk lay doon, ak kuuy mu amul sikk. <sup>5</sup> Saraxu pepp biy ànd ak kuuy mi benn efa\* lay doon, di fukki kiloy pepp ak juróom, ak dayob pepp bu mu àttan buy ànd ak xar yu ndaw yi ak xiinu diw, yemook ñetti liitari diw ak genn-wàll ci efab pepp bu nekk. <sup>6</sup> Bésu Terutel weer, wenn yëkk wu ndaw lay doon wu amul sikk ak juróom benni xar yu ndaw akam kuuy, te lépp muc sikk. <sup>7</sup> Na ci boole saraxu benn efab pepp buy ànd ak yëkk wi, ak benn efab pepp ngir kuuy mi, ak lu mu man ci pepp, mu booleek xar yu ndaw yi, ak benn xiinu diw ci efab pepp bu nekk.

<sup>8</sup> «Dal-luwaay bunt, bi ki ci jal biy jaare duggsi, fi lay jaare génn. <sup>9</sup> Baadooloy réew mi nag bu ñuy teewesi bésu ndaje fi kanam Aji Sax ji, ku ci jaare mbaaru buntu bëj-gànnar, di sujjóotsi,

† 45:24 45.24 benn efa, am na ñu jàpp ne fanweeri kilo lay tollool, benn xiin wara tollook juróom ñetti liitar, lim yooyu mat ñaari yoon li nu am fii. § 45:25 45.25 Màggalu bési Mbaar yi lay doon. Seetal ci *Sarxalkat* yi 23.33-34. \* 46:5 46.5 benn efa: seetal ci 45.24.



bu noppee na jaare mbaaru buntu bëj-saalum ba. Te ku dugge mbaaru buntu bëj-saalum, bu noppee na génne mbaaru buntu bëj-gànnar ba. Deesul delloo bunt bi nga dugge. Bunt bi mu jàkkaarool lees di génne. <sup>10</sup> Ki ci jal bi ci boppam, bu baadoolo yiy dugg, na duggandook ñoom, bu ñuy génn, mu génnandook ñoom.

<sup>11</sup> «Su dee bési màggal ak bési ndaje yi, saraxu pepp mi benn efa lay doon ngir yëkk wi, yemook fukki kilook juróom, ak benn efa ngir kuuy mi, ak dayo bu ñu àttan ngir xar yu ndaw yi, efab pepp bu ne ànd ak benn xiinu diw, di ñetti liitar ak genn-wàll.

<sup>12</sup> «Buntu èttu biir bi féete penku it lañuy ubbil ki ci jal bi, buy joxe saraxu yéene: muy saraxu rendi-dóomal, di saraxu cant ci biir jàmm, di beneen saraxu yéene bu ñeel Aji Sax ji, ngir mu joxe saraxu rendi-dóomalam, mbaa saraxu cantam ci biir jàmm, ni mu koy defe ci bésu Noflaay. Bu noppee, génn, ñu tëj bunt bi.

<sup>13</sup> «Am xarum menn at mu amul sikk lees di defal Aji Sax ji bés bu nekk saraxu rendi-dóomal, te suba su ne lees koy def. <sup>14</sup> Nañu ci boole suba su ne benn céru juróom benneelu efab pepp, yemook ñaari kilook liibar, ànd ak liitaru diw, yemook benn céru ñetteelu xiinu diw buy tooyal sunguf si. Loolooy saraxu pepp mi, ñeel Aji Sax ji, di dogali yoon yu sax dàkk. <sup>15</sup> Muy xar mu ndaw mi, di saraxu pepp mi, di diw gi, suba su nekk lees koy def, muy saraxu rendi-dóomal bu sax dàkk.

### *Boroom jal bi sañul lépp ci suufam*

<sup>16</sup> «Boroom bi Aji Sax ji dafa wax ne: Su ki ci jal bi mayee kenn ci doomam yu góor lenn ci céru suufam, kookoo koy jagoo, te alal jooju, céru doomi kooka lay doon.

<sup>17</sup> Waaye su ki ci jal bi mayee kenn ciy surgaam lenn ci suufam, ba keroog atum Yiwiku ma rekk la surga ba di moom suuf sa, waaye bu atum Yiwiku teewee, suuf si day dellu ci loxol ki ci jal bi. Suuf soosu, céru doomi boroom jal bi donj lay doon.

<sup>18</sup> Ki ci jal bi nag du nangu lenn ci suufas baadoola yi, di leen xañ seen alal. Alalu

boppam donj la saña sédd doomam yu góor. Su ko defe kenn ci sama ñoñ du ñàkk alalam.»

### *Sàkkal nañu kër Yàlla gi ay waañ*

<sup>19</sup> Ba loolu amee waa ja génneeti ma ca jàllukaay ba feggook buntu bëj-gànnar. Mu dugal ma ca néeg yu sell ya ñu beral sarxalkat yi. Ndeke bérab a nga foofa ca ruq ba, ca biir-a-biir, ca wetu sowu. <sup>20</sup> Mu ne ma: «Bii bérab, fi la sarxalkat yiy togge yàppu saraxu peyug tooñ ak saraxu pootum bàkkaar, di fi lakk saraxu pepp mi, ngir baña génne lenn lu sell ca èttu biti ba, bay sédd nit ñi sellnga gu leen di lor.»

<sup>21</sup> Gannaaw loolu waa ji génneeti ma ba ci èttu biti bi, yóbbu ma ci ñeenti collam yépp. Ndeke coll wu ci nekk, ber nañu ca ètt bu ndaw, <sup>22</sup> bu gudde ñeent fukki xasab, yaatoo fanweeri xasab, te ñeenti ètt yu ndaw yi ci coll yi yépp a tolloo. <sup>23</sup> Ñeenti ètt yu ndaw yi, bu ci nekk miir bu gàtt a ko ub, ay toggukaay tege ci suufam, leri miir bi ba mu daj. <sup>24</sup> Waa ji ne ma: «Lii mooy waañ yi liggéeykati kër Yàlla gi di togge yàppu saraxi askan wi.»

## 47

### *Am wal balle na kër Yàlla ga*

<sup>1</sup> Waa ji nag delloo ma ca buntu néeg Yàlla ba. Gisuma lu moy am ndox muy balle ci suuf, di génne ci dëxu buntu penku bi. Kanam néeg baa ngi féete penku, ndox miy wale wetu bëj-saalumu néeg bi, fa féeteek bëj-saalumu sarxalukaay bi. <sup>2</sup> Mu génnee ma buntu bëj-gànnar, wërале ma ca buntu biti ba féete penku. Gisuma lu moy ndox muy wale ci suufu buntu penku bi, ci wetu bëj-saalum.

<sup>3</sup> Waa jaa nga jubal penku, ñàbb buumu nattukaayam, daldi natt junniy xasab. Mu jàlle ma ba foofa, ndox ma yem ma ci kostan. <sup>4</sup> Mu nattaat yeneen junniy xasab, ndox ma yem ma ciy óom. Mu dellu natt junniy xasab, jàlle ma, ndox ma yem ma ci ndigg. <sup>5</sup> Mu nattati yeneen junniy xasab, wal ma xóot ba manatumaa xuus,

ba jàll. Maneesatu koo jàlle tànk, xanaa féey.

<sup>6</sup> Mu ne ma: «Yaw nit ki, du gis nga ci?» Ba loolu amee mu delloo ma ba ca tàkkal dex ga. <sup>7</sup> Ma agsi ca tàkkal dex ga, daldi yem ci garab yu baree bare ci ñaari weti dex gi yépp. <sup>8</sup> Waa ji ne ma: «Ndox mii mu ngi jëm diiwaanu penku, wàcci jooru Araba, jàlli biir géēju Xorom ga. Te bu ndox mi duggee biir gééj, géēju ndox mu bon ma, ndox ma day daldi neex. <sup>9</sup> Mboolem mbindeef muy def ndiiraan day daldi mana dunde mboolem fu wal mii jëm. Jën yi day takku lool ngir la fa ndox mii àgg, ba neexal mooma ndox. Mboolem fu wal mii àkki daal, lépp a fay dund. <sup>10</sup> La ko dale Engedi ba Eneglayim, ay nappkat lay doon. Ñu weer seeni caax ci tefes gi. Wirgoy jën wu am gééj gu mag ga rekk, dina am foofa, bare lool. <sup>11</sup> Waaye tan yaak déeg ya mu feggool du neexaat, xorom saa koy féetewoo. <sup>12</sup> Wirgoy garab yu ñuy lekk yu nekk ñooy saxe ñaari weti wal ma. Xob ya du lax, doom ya du rag, xanaa di meññ weer wu nekk, ndax ndox mi koy suuxat ca bérab bu sell ba lay wale. Meññeef ma, ñu lekk; xob ya, ñu fajoo.»

### *Aji Sax ji joxe na kemuy réew mi ñuy séddoo*

<sup>13</sup> Boroom bi Aji Sax ji dafa wax ne: «Fukki giiri Israyil yeek ñaar nag, kemi céri suufi réew mi ñuy séddoo, nii la wara tédde: na wàllu giirug Yuusufa di ñaari cér. <sup>14</sup> Nangeen ko séddoo, ku nekk yem ak sa mbokk cér, ndax maa giñal seeni maam, ne dinaa leen ko jox. Kon réew mii, seen cér bu leen lew la. <sup>15</sup> Na lii di kemu réew mi ci wetu bëj-gàннаar: gééj gu mag ga lay dale, topp yoon wa jaare Ettlön ak Lebo Amat, ak Cedàdd, <sup>16</sup> jaare dëkk yi ñuy wax Berota ak Sibrayim te nekk diggante réewum Damaas ak Amat, jaare Àccer Tikon, fa digalook Oran. <sup>17</sup> Kon kemu googu day dale Gééj gu mag ga, ba àgg gox ba ñuy wax Àccar Enan ca penku ba. Kemu bëj-gàннаaram di Damaas ak Amat. Loolooy

wàllu bëj-gàннаaram. <sup>18</sup> Kemu penku ba day dale diggante Oran ak Damaas, topp xuru Yurdan, diggante diiwaanu Galàdd ak réewum Israyil, dem ba àgg Tamar ca géēju penku ba\*. Loolooy wàllu penkoom. <sup>19</sup> Wetu bëj-saalum, kemu ga day dale fa Tamar ba ca xuru Meriba ca Kades, daldi leri wal Misra ma, ba àkki gééj gu mag ga. Loolooy wàllu bëj-saalumam. <sup>20</sup> Wetu sowu, gééj gu mag gaay doon kemu ga, dale bëj-saalum ba ca Lebo Amat ca bëj-gàннаar. Loolooy wàllu sowoom.

<sup>21</sup> «Suuf si ci diggante kemu yooyu, nangeen ko séddale giiri Israyil yi. <sup>22</sup> Nangeen ko tegoo bant, séddoo ko ci seen biir, yeen ak doxandéem yi sanc ci seen digg te jaboot ci réew mi. Nangeen leen jàppe ni ay njuddu-ji-réew fi digg Israyil. Nañu am seen céru suuf ni yeen, bokk ci yem ak giiri Israyil. <sup>23</sup> Ak giir gu ci doxandéem bi mana wàlli, foofa ngeen koy féetale céru suufam. Kàddug Boroom bi Aji Sax jee.

## 48

### *Daggal nañu suuf giiri bëj-gàннаar*

<sup>1</sup> «Lii mooy limeefu giiri Israyil, ak céru suuf bi giir gu ci nekk di féetewoo. Céru Dan moo féete catu bëj-gàннаar. Kemoom day topp yoonu Ettlön ba Lebo Amat, jàll ba Àccar Enan ga digalook Damaas, Amat féete ko bëj-gàннаar. Suufas Dan day jàpp penku ba sowu, ca gééj gu mag ga, di benn pàcc. <sup>2</sup> Suufas Aser day digalook sos Dan, jàpp, moom it, penku ba sowu, di benn pàcc. <sup>3</sup> Suufas Neftali day digalook sos Aser, jàpp penku ba sowu, di benn pàcc. <sup>4</sup> Suufas Manase day digalook suufas Neftali, jàpp penku ba sowu, di benn pàcc. <sup>5</sup> Suufas Efrayim day digalook sos Manase, jàpp penku ba sowu, di benn pàcc. <sup>6</sup> Suufas Ruben day digalook sos Efrayim, jàpp penku ba sowu, di benn pàcc. <sup>7</sup> Suufas Yuda day digalook sos Ruben, jàpp penku ba sowu, di benn pàcc.

### *Daggal nañu Aji Sax ji céram bu sell*

\* 47:18 47.18 géēju penku ba, mooy géēju Xorom ga.

<sup>8</sup> «Suuf sa digalook Yuda ca wetu bëj-gànnaram, te dale penku ba sowu, mooy doon pàkk bi ñuy jooxe. Ñaar fukki junniy xasab ak juróom (25 000), fukki kilomeetar ak ñett, lay yaatoo, gudde ni suufas genn giir gu ci nekk, te bérab bu sell bi nekk ci digg bi. <sup>9</sup> Pàkk bi ngeen di jooxeel Aji Sax ji ci dog boobu, day am guddaayu ñaar fukki junniy xasab ak juróom (25 000) yemook fukki kilomeetar ak ñett ak yaatuwaayu fukki junniy xasab (10 000), di juróomi kilomeetar ak xaajaat. <sup>10</sup> Cér bu sell a ngoog, ñeel sarxalkat yi. Ñaar fukki junniy xasab ak juróom (25 000) lay am wetu bëj-gànnar, yaatoo fukki junniy xasab (10 000) wetu sowu, yaatoo fukki junniy xasab (10 000) wetu penku, gudde ñaar fukki junniy xasab ak juróom (25 000) wetu bëj-saalum, te bérabu Aji Sax bu sell bi nekk ci digg bi. <sup>11</sup> Digg digal bu sell boobu, na ñeel sarxalkat yi askanoo ci Cadog, ñoom ñi sàmmoon sama ndénkaane, baña ànd ak bànni Israyil, di lajj ni seen yeneen bokki Leween ñi. <sup>12</sup> Jooxeb suufas réew mi, nañu ci jooxeel sarxalkat yi bérab bu sella sell, mu feggook suufas Leween ñi. <sup>13</sup> Na suufas Leween ñi digalook sos sarxalkat yi, di pàkk bu gudde ñaar fukki junniy xasab ak juróom (25 000), te yaatoo fukki junniy xasab (10 000). Bu ci nekk na am guddaayu ñaar fukki junniy xasab ak juróom (25 000) ak yaatuwaayu fukki junniy xasab (10 000). <sup>14</sup> Cér boobu mooy tànnéefu suuf si. Maneesu cee jaay, mbaa di ci weccikoo lenn, te lenn du ci tàbbi ciy loxo, ndax cér bu sell la, ñeel Aji Sax ji.

### *Daggal nañu suuf waa dëkk bi ak boroom jal bi*

<sup>15</sup> «Pàkk bay des ci yaatuwaayu dog boobu dina yaatoo juróomi junniy xasab (5 000), gudde ñaar fukki junniy xasab ak juróom (25 000); suufas ñépp la pàkk boobu di doon, ngir dëkk bi. Man naa doon ay dëkkuwaay aki parlu, te na dëkk bi ci boppam féetewoo digg ba. <sup>16</sup> Na dëkk bi bindoo ab kaare bu wet gi di ñeenti junniy xasab ak juróomi téeméer (4 500), di ñaari kilomeetar ak genn-wàll.

<sup>17</sup> Parlub dëkk bi nag, na féeteek ñeenti weti dëkk bi, te doon fa wet gu nekk bayaal bu yaatoo ñaar téeméeri xasab ak juróom fukk (250). <sup>18</sup> Fi feggook dog bu sell bi ñu beral Aji Sax ji, dina des pàkk bu ñuy bey, bu gudde fukki junniy xasab (10 000) wetu penkub dëkk bi, ak beneen pàkk bu ni tollu ci wetu sowu. Ca lañuy jële lekku liggéeykati dëkk bi. <sup>19</sup> Waa dëkk bi koy bey, ci giiri Israyil yépp lañuy bàyyikoo. <sup>20</sup> Mboolem pàkk boobu ñuy jooxe, na doon kaare bu wet gi di ñaar fukki junniy xasab ak juróom (25 000), te pàkk boobu ñuy jooxe, pàkk bu sell bi ci la, dëkk bi, ci la.

<sup>21</sup> «Li féete penku ak li féete sowu yépp nag te des ci suuf si, gannaaw cér bu sell bi, ak suufas dëkk bi, buur bi ci jal bee koy moom; wet gu ci nekk yaatoo ñaar fukki junniy xasab ak juróom (25 000), gii àkki kemu Israyil ga féete penku, gee àkki kemu Israyil ga féete sowu, cér bu sell beek kër gu sell gi nekk ci digg bi. <sup>22</sup> Kon suufas Leween ñi ak suufas dëkk bi day bokk féete ci diggu suufas boroom jal bi, suufas boroom jal bi nekk diggante céru Yuda ba ca bëj-gànnar, ak céru Beñamin ca bëj-saalum.

### *Daggal nañu suuf giiri bëj-saalum*

<sup>23</sup> «Limeefu giiri Israyil yi ci des, seeni suuf nii lay tédde: Li dale kemu penku ba, ba ca géej gu mag ga ca sowu, benn pàcc lay doon, Beñamin féetewoo ko. <sup>24</sup> Suufas Simeyon feggook sos Beñamin, jàpp penku ba sowu, di benn pàcc. <sup>25</sup> Suufas Isaakar jàpp penku ba sowu, feggook sos Simeyon, di benn pàcc. <sup>26</sup> Suufas Sabulon feggook sos Isaakar, jàpp penku ba sowu, di benn pàcc. <sup>27</sup> Suufas Gàdd feggook sos Sabulon, jàpp penku ba sowu, di benn pàcc. <sup>28</sup> Suufas Gàdd, kemug bëj-saalumam mooy doon kemug réew mi. Day dale fa Tamar ca penku ba, ba ca yoonu ndoxu Meriba ca Kades, lero walum Misra, ba ca géej gu mag ga. <sup>29</sup> Noonu ngeen di séddalee réew mi giiri Israyil yi, giir gu ci nekk, ngeen dogale ko noonu céru suufam. Kàddug Boroom bi Aji Sax jee.

*Yerusalem: tur wu yees, fukki bunt ak ñaar, ni giir yi*

<sup>30</sup> «Bunti dëkk bi nag nii lay tédde: Ñeenti miiri dëkk bi, bu ci nekk day am guddaayu ñeenti junniy xasab ak juróomi téeméer (4 500). <sup>31</sup> Miir bu ci nekk dina am ñetti bunt yu ñu dippee ñetti giiri Israyil. Wetu bëj-gànnaar, benn buntu Ruben ak benn buntu Yuda ak benn buntu Lewi. <sup>32</sup> Wetu penku am miiru ñeenti junniy xasab ak juróomi téeméer (4 500) ak ñetti bunt: benn buntu Yuusufa ak benn buntu Beñamin ak benn buntu Dan. <sup>33</sup> Wetu bëj-saalum am miiru ñeenti junniy xasab ak juróomi téeméer (4 500) ak ñetti bunt: benn buntu Simeyon ak benn buntu Isaakar ak benn buntu Sabulon. <sup>34</sup> Wetu sowu am miiru ñeenti junniy xasab ak juróomi téeméer (4 500) ak ñetti bunt: benn buntu Gàdd ak benn buntu Aser ak benn buntu Neftali. <sup>35</sup> Wurmbalu dëkk bi bépp fukki junniy xasab ak juróom ñett (18 000) lay doon. Turu dëkk bi nag, dale ko ca bés ba, di “Aji Sax jaa ngi fi.”»

## Dañeel

### Dañeel gore na ci biir nguuru kéefar

(Saar 1.1—6.29)

*Dañeel aki xaritam tàbbi nañu ci  
liggéeyu kër Buur*

<sup>1</sup> Ca ñetteelu atu nguug Yowakim buurub Yuda, Nabukodonosor buuru Babilon daa dikk, gaw Yerusalem. <sup>2</sup> Boroom bi nag teg Yowakim buurub Yuda ciy loxoom, boole ca lenni jumtukaayi kër Yàlla ga. Nabukodonosor yóbbu jumtukaay ya réewum Sineyaar, ga ñuy wax Babilon itam, ca biir kërug tuuram. Mu daldi fat jumtukaay ya ca denci kër tuuram.

<sup>3</sup> Ba loolu amee Buur jox ndigal Aspenas, kilifay bëkk-néegam, ngir mu tanne ci bànni Israyil, ñenn ci askanu buur ak ci garmi yi. <sup>4</sup> Ñu diy waxambaane yu amul benn sikk ci seen yaram, di ñu góorayiw, mane bépp xeetu njàng, bare xam-xam te am déggín, ba mana liggéeyal Buur ci biir kërám. Ñu di leen jàngal làkku waa Babilon ak seen mbind. <sup>5</sup> Ci biir loolu Buur dogalal leen bés bu nekk ab cér ci njëlam ak ci biiñam. Mu santaane ñu tàggat leen diiru ñetti at, ñu doora tàbbi ci liggéeyu buur. <sup>6</sup> Yudeen ña ca bokkoon di Dañeel ak Anaña ak Mikayel ak Asaryaa. <sup>7</sup> Kilifag jawriñ ya nag tudde leen yeneen tur. Dañeel, mu tudde ko Beltasar, Anaña mu tudde ko Sadarag, Mikayel tudd Mesag, Asaryaa di Abet Nego.

<sup>8</sup> Ci biir loolu Dañeel fas yéene ci xolam ne du sobeel boppam ci njëlu buur ak biiñam. Mu ñaan kilifag jawriñ ya mu may ko, mu bañ cee sobeel boppam. <sup>9</sup> Yàlla def kilifag jawriñ ya baaxe Dañeel, yërëm ko. <sup>10</sup> Teewul kilifag jawriñ ya ne Dañeel: «Man de damaa ragal Buur sama boroom, moom mi leen dogalal seen lekk ak seen naan. Su Buur gisee ngeen gëna yooy seen moroomi xale yu góor yi nag? Sama bakkan xaj na ci de!»

<sup>11</sup> Ba mu ko defee Dañeel wax ak dag, ba kilifag jawriñ ya sant mu wattu leen,

mook Anaña ak Mikayel ak Asaryaa. Mu ne ko: <sup>12</sup> «Ngalla sang bi, seetlu nu diiru fukki fan, ñu di nu jox ci meññeef mi rekk ak ndoxum naan; <sup>13</sup> te nga xool nu, xool xale yu góor yiy lekk ci njëlal Buur. Su ko defee nga seet nooy def ak nun ci ni nga nu gise, sang bi.» <sup>14</sup> Waa ja ànd ak ñoom ci loolu, seetlu leen diiru fukki fan. <sup>15</sup> Ba fukki fan ya matee, seen kanam gëna leer te ñu gëna suur mboolem xale yu góor yay lekk ca njëlal Buur. <sup>16</sup> Ci kaw loolu wattukat ba di yóbbu seen njël ak seen biiñ, weccee leen ko meññeef. <sup>17</sup> Yàlla nag may ñeenti xale yu góor yooyu xel ak ràññee ci mboolem lu ñu bind ak wàllu xam-xam. Dañeel moom mana firi mboolem peeñu ak gént.

<sup>18</sup> Ba diir ba leen Buur àppal matee, ñu war leena indi, kilifag jawriñ ya yóbbu leen fa kanam Buur Nabukodonosor. <sup>19</sup> Buur wax ak ñoom te gisul ci ñoom ñépp kenn ku mel ni Dañeel ak Anaña ak Mikayel ak Asaryaa. Ñu daldi tàbbi ci liggéeyu buur. <sup>20</sup> Mboolem wàllu xam-xam ak xel mu leen Buur seetlu rekk, gis ne ñoo ci sut fukki yoon taryaax yeek ñeengokati réewam mépp.

<sup>21</sup> Dañeel nekk na ca liggéeyu buur, nekk ca ba ca at ma jëkk ca nguug Buur Sirus.

## 2

*Dañeel nettali na géntu Buur*

<sup>1</sup> Ca ñaareelu atu nguug Nabukodonosor la Nabukodonosor gént gént gu ub boppam lool, ba manatula nelaw. <sup>2</sup> Mu woolu taryaax yi ak ñeengokat yi ak jibar yi ak xërëmkat yi, ngir ñu firil koy géntam. Ñu agsi taxaw ca kanamam. <sup>3</sup> Buur ne leen: «Damaa gént lu ub sama bopp, ma bégga xam lu muy firi.» <sup>4</sup> Xërëmkat ya ne Buur ci làkku arameen: «Guddalu fan Buur, sang bi! Wax nu gént gi, nu firi ko.»

<sup>5</sup> Buur wax xërëmkat ya ne leen: «Dogal bu wér a ngii tukkee fi man. Su ngeen ma waxul gént gi, wax ma piri mi, ay dog lañu leen di dog, seeni kër doon ay sën.

<sup>6</sup> Waaye su ngeen waxee gént gi, wax ma piri mi, ay weexal aki yool ak teraanga ju réy ngeen di jële ci man. Kon nag waxleen ma gént gi, wax ma piri mi.»

<sup>7</sup> Gannaaw gi ñu dellu ne Buur: «Sang bi, waxal gént gi, nu wax la pireem.»

<sup>8</sup> Buur dellu ne: «Gis naa nag bu baax ne dangeena bëgga yàggal mbir mi, ndax xam ngeen ne dogal bu wér tukkee na ci man <sup>9</sup> ne su ngeen ma waxul gént gi, àtte bi di benn ci yeen ñépp. Gise ngeen ba nar maa wax ay fen aki caaxaan, di yaakaar jamono soppiku. Waxleen ma gént gi rekk, ma xam ne man ngeen maa wax pireem.» <sup>10</sup> Xërëmkat ya ne Buur: «Buur, amul kenn ci kaw suuf ku mana wax li ngay laaj. Te it benn buur ak nu màggaayam ak dooleem mana tollu, masula laaj lu mel nii benn taryaax mbaa ñeengokat mbaa xërëmkat. <sup>11</sup> Li ngay laaj daa jafe, Buur. Kenn manu la koo wax ku moy yàlla yi, Buur, te ñoom dëkkuñu ci biir nit ñi.» <sup>12</sup> Ci kaw loolu Buur mer lool ba fees dell, daldi joxe ndigal ne ñu rey mboolem boroom xam-xami Babilon.

<sup>13</sup> Ba mu ko defee ñu siiwtaane dogal ba, nara reylu boroom xam-xam ya. Ñuy seet nag Dañeel aki àndandoom ngir rey leen. <sup>14</sup> Dañeel def ug teey, jiital xelam, wax ak Aryog, kilifag dagi buur, fekk kooku di dem, nara reyi boroom xam-xami Babilon. <sup>15</sup> Mu laaj Aryog ndawal Buur, ne ko: «Waaw, lu waral bii dogal bu diis tukkee ci Buur?» Aryog xamal Dañeel mbir ma. <sup>16</sup> Dañeel nag dem ca Buur, ñaan ko mu may ko jot gu mu ko joxe pirim gént ga.

<sup>17</sup> Ba loolu amee Dañeel ñibbi, daldi xamal mbir ma Anaña ak Mikayel ak Asaryaa, àndandoom ya, <sup>18</sup> ngir ñu sàkku yërmandey Yàlla Boroom asamaan ci wàllu mbóot moomu, ndax ñu bañ leena rey mook àndandoom yaak yeneen boroom xam-xami Babilon. <sup>19</sup> Ca guddi ga nag, ñu won mbóot ma Dañeel ci biir peeñu. Ci kaw loolu Dañeel sant Yàlla Boroom asamaan, <sup>20</sup> daldi ne:

«Cant gu amul ndoorte amul kemu ñeel na Yàlla,  
xam-xam ak kàttan mooy boroom.

<sup>21</sup> Mooy walbati jamono, di soppi demin, di fal buur, di folli.

Mooy xelal boroom xel mu rafet, di xamal boroom xel mu ñaw.

<sup>22</sup> Mooy feeñal mbóot mu làqu, xam li ci biir lëndëm, te leer màkkaano ko.

<sup>23</sup> Sama Yàllay maam, maa lay gërëm, di la sant.

Yaa ma may xam-xam ak manoore, xamal ma li nu la laaj.

Yaa nu xamal mbirum Buur mii.»

<sup>24</sup> Gannaaw loolu Dañeel dem ca Aryog mi Buur santoon mu rey boroom xam-xami Babilon. Ba mu demee ne ko: «Boroom xam-xami Babilon yi, bu leen reylu. Yóbbu ma ca Buur, ma jox ko piri mi.» <sup>25</sup> Aryog gaaw yóbbu Dañeel ba ca Buur, wax ko ne ko: «Gis naa ci ngàllog Yudeen ñi ku la mana firil sa gént gi.» <sup>26</sup> Buur wax ak Dañeel, mi ñu naan Beltasar, ne ko: «Wóor na la ne man nga maa wax li ma gént, wax ma li muy firi?»

<sup>27</sup> Dañeel ne Buur: «Buur, li nga laaj amul benn boroom xam-xam mbaa ñeengokat mbaa taryaax ak seetkat bu la ko mana xamal. <sup>28</sup> Waaye, Buur Nabukodonosor, Yàllaa ngi biir asamaan, di xamle ay mbóot te moo la won liy am jamono yiy ñëw. Sa gént gaak la nga ca gis ca sa kaw lal, lii la:

<sup>29</sup> «Buur, ba nga téddee ca sab lal, sa xel daa dem ci liy xew bu jamono jii weese. Kiy feeñal mbóot daldi lay won liy xew.

<sup>30</sup> Man nag du caageenu xam-xam bu ma ëpple mboolem kuy dund. Mbóot mii dañu ma koo won, ndax yaw Buur, nga xam piri mi, xam li ub sa bopp.

<sup>31</sup> «Buur, danga jekki xool, daldi gis jëmm ju mag ju ñu defar. Jëmm ja réy na lool te yànjaayam yéeme. Ma nga taxaw janook yaw, melokaanam raglu.

<sup>32</sup> Boppu jëmm ji wurus la wu raxul, dënn beek loxo yi di xalis, biir beek pooj yi di xànjari, <sup>33</sup> yeel yi di weñ gu ñuul, ndëgguy tànk yi nag lenn li weñ gu ñuul la, li ci des di ban bu ñu lakk. <sup>34</sup> Naka ngay xool, aw doj wu loxo sànniwul fàq, daldi dal ca tànk jëmm ja bindoo weñ ak ban bu ñu lakk, daldi koy rajaxe. <sup>35</sup> Ci kaw loolu weñ gaak ban baak xànjari jaak xalis

baak wurus wa lépp bokk rajaxoo, mel ni xataxu dàggay lolli. Ngelaw li buub ko yóbbu, ba mu ne mes. Doj wa daloon ca jëmm ja nag doon tund wu mag, fees àddina sépp.

<sup>36</sup> «Loolooy gént gi. Nu wax la piri mi nag, Buur. <sup>37</sup> Yaw Buur, buuru buur yi, yaw mi Yàlla Boroom asamaan jox nguur ak kàttan ak dooleek ndam, <sup>38</sup> te Yàlla teg ci say loxo doom aadama yeek rabi àll yeek njanaaw yi, nga boole leen yilif ñoom ñépp ak fu ñu mana dëkke: yaw yaay boppu wurus bi.

<sup>39</sup> «Sa gannaaw geneen nguur\* dina taxaw, gën laa suufe, ñetteelu nguur ga topp ca di xàñar, tiim àddina sépp. <sup>40</sup> Ñeenteelu nguur ga day dëgër ni weñ. Ni weñ di toje lépp ba rajaxe lépp ba mu rajaxoo, noonu lay toje ba rajaxe yooyu nguur yépp. Mu mel ni ni weñ gu ñuul di rajaxee lépp. <sup>41</sup> Soo gisee ndëgguy tànk yeek baaraami tànk yi, lenn li di ban, lenn li di weñ, nguur la guy xàjjalikoo. Lenn li dëgër dëgëraayu weñ ndax weñ gi nga gis, mu jaxasook ban bi. <sup>42</sup> Te baaraami tànk, yi lenn li di weñ, lenn li di ban, ni la nguur ga di ame doole cig wet, néew doole cig wet. <sup>43</sup> Li nga gis weñ gu jaxasook ban mooy tekki ne buur yi dinañu booloo ci seeni pexe, waaye seen bennoo du mujj; dafa mel ni weñ rekk, du jaxasook ban.

<sup>44</sup> «Ci jamonoy buur yooyu Yàlla Boroom asamaan dina samp nguur gu dul tas muk, te wenn xeet du ko yilif muk. Nguur googu dina tasaare mboolem yeneen nguur yooyu, ba genn du ci des, waaye moom day sax ba fàww. <sup>45</sup> Moo waral nga gis doj wu loxo sànniwul, mu fàqe tund wa, daldi rajaxe weñ gaak xàñar jaak ban baak xalis baak wurus wa. Buur, Yàlla ju màgg ji moo la xamal liy ñëw. Gént gi wér na, piri mi mata gëm.»

<sup>46</sup> Ci kaw loolu Buur Nabukodonosor ne gurub, dépp kanamam fa suuf, sujjóotal Dañeel, joxe nag ndigal ñu jox ko ay weexal ak cuuraay. <sup>47</sup> Ba loolu amee Buur wax Dañeel, ne ko: «Aylayéwén, sa Yàlla

mooy Yàllay yàlla yi, di Sangu buur yi, te it mooy kiy feeñal mbóot, gannaaw feeñal nga mii mbóot.»

<sup>48</sup> Ba mu ko defee Buur teral Dañeel, may ko lu baree bare, ba noppi def ko kilifag diiwaanu Babilon gépp, teg ci fal ko, mu yilif boroom xam-xami Babilon yépp. <sup>49</sup> Ci biir loolu Dañeel ñaan Buur mu tabb Sadarag ak Mesag ak Abet Nego, ñu yore saytub diiwaanu Babilon. Dañeel moom nekk ca èttu buur.

### 3

#### *Sànni nañu xariti Dañeel cib taal*

<sup>1</sup> Mu am bés Buur Nabukodonosor de-farlu jëmme wurus, taxawaay ba di fanweeri meetar, yaatuwaay ba di ñetti meetar. Mu taxawal ko ca jooru Dura ga ca diiwaanu Babilon. <sup>2</sup> Buur Nabukodonosor nag woolu jawriñ yaak laman yaak jaraaf yaak kàngam yaak farbay alal yaak àttekat yaak ndawi buur yaak mboolem kilifay diiwaan ya, ngir ñu ñëw ca bernde ja mu maye ca daloob jëmm ja mu samp. <sup>3</sup> Ba loolu amee jawriñ yaak laman yaak jaraaf yaak boroom xel yaak farbay alal yaak àttekat yaak ndawi buur yaak mboolem kilifay diiwaan ya, ñépp daje ngir berndey jëmm, ja Buur Nabukodonosor samp; ñu daldi taxaw ca kanam jëmm ja.

<sup>4</sup> Yéenekat ba nag xaacu, ne: «Dégluleen li ñu leen sant, yeen waa mbooloo yépp ak xeet yépp, ak làkk yépp.

<sup>5</sup> Bu ngeen di dégg bufta gi ak toxoro gi ak xalam gi ak riiti gi ak koora gi ak liit gi ak mboolem jumtukaayu xumbal yi, nangeen sujjóot, màggale ko jëmmu wurus wi Buur Nabukodonosor samp. <sup>6</sup> Képp ku sujjóotul màggal ko, dees koy daldi sànni ci biir taal bu yànj.»

<sup>7</sup> Loolu nag waral saa yu nit ña déggee bufta gaak toxoro gaak xalam gaak riiti gaak koora gaak mboolem jumtukaayu xumbal ya, ñoom ñépp ay bokk sujjóot, màggal jëmmu wurus ja Buur Nabukodonosor samp, muy mbooloo yaak xeet yaak làkk ya.

\* **2:39** 2.39 geneen nguur: manees naa wax it weneen askanu buur.

<sup>8</sup> Ci biir loolu ay xërëmkat dikk, di boole Yawut ya. <sup>9</sup> Ñu wax Buur Nabukodonosor, ne ko: «Buur, guddalu fan. <sup>10</sup> Buur sang bi, xam nga yaa joxe ndigal ne: “Képp ku dégg bufta geek toxoro geek xalam geek riiti geek kooraa geek liit geek mboolem jumtukaayu xumbal, dangaa wara sujjoot, manggal jëmmi wurus ji. <sup>11</sup> Te képp ku sujjootul manggal ko, dees na ko sànni ci biir taal bu yànj.” <sup>12</sup> Dafa am ay Yawut yoo tabb, ñu yore saytub diiwaanu Babilon. Ñu di leen wax Sadarag ak Mesag ak Abet Nego. Ñooñu de Buur, déggaluñu la; say yàlla, jaamuwuñu leen; sa jëmmu wurus ji nga samp it, manggaluñu ko.»

<sup>13</sup> Nabukodonosor daldi mer lool, ba fees dell. Mu woolu Sadarag ak Mesag ak Abet Nego; ñu indi leen ba fa kanam Buur. <sup>14</sup> Nabukodonosor àddu ne leen: «Ndax dégg la, yeen Sadarag, Mesag ak Abet Nego, yeena baña jaamu samay yàlla, baña manggal jëmmu wurus ji ma samp? <sup>15</sup> Léegi, bettuma leen. Bu ngeen di dégg bufta geek toxoro geek xalam geek riiti geek kooraa geek liit geek mboolem jumtukaayi xumbal yi rekk, sujjootleen, manggal ko jëmm ji ma sàkk. Waaye su ngeen ko manggalul, dees na leen daldi sànni ci biir taal sawara bu yànj. Ana yàlla ju leen di musal ci man?»

<sup>16</sup> Sadarag Mesag ak Abet Nego ne Buur Nabukodonosor: «Buur, soxlawul ñu di la lay dara. <sup>17</sup> Ndegam Yàlla ji nuy jaamu man nanoo musal ci taal sawara bu yànj bi, musal nu ci yaw mii, dina nu musal. <sup>18</sup> Su demewul noonu it nag Buur, xamal ne say yàlla dunu leen jaamu, sa jëmmu wurus ji nga samp it, dunu ko sujjootal.»

<sup>19</sup> Ci kaw loolu Nabukodonosor mer lool ba fees dell, kanam gay sël-sëli janook Sadarag Mesag ak Abet Nego. Mu santaane ñu xamb taal ba, ba mu gëna tàng juróom ñaari yoon na mu daan tange; <sup>20</sup> ba noppi mu sant ay dag yu am kàttan ci mbooloom xareem, ngir ñu yeew Sadarag ak Mesag ak Abet Nego, sànni leen ca biir taal bu yànj ba. <sup>21</sup> Ñooñu yeew leen na ñu soloo, ñook seeni mbubb ak seeni tubéy ak seeni

mbaxana, daldi leen sànni ca biir taal bu yànj ba. <sup>22</sup> Ndigalu Buur nag jampa jamp, sawara wa boya boy, ba tàkk-tàkku sawara wa rey dag, ya ca sànni Sadarag ak Mesag ak Abet Nego. <sup>23</sup> Sadarag, Mesag ak Abet Nego, ñoom ñett ñépp yeewe ba ne ñodd, tàbbi ca biir taal sawara bu yànj ba.

<sup>24</sup> Ci kaw loolu Buur Nabukodonosor jommi, ne bërét taxaw, daldi laaj ay dagam ne leen: «Xanaa du ñett lañu yeew, sànni ci sawara wi?» Ñu ne ko: «Ahakay, Buur!» <sup>25</sup> Mu ne: «Xoolleen, ñeent ñu yeewewul laa gis, ñuy daagu ci biir sawara wi te dara dalu leen. Ñeenteel baa ngi mel ni jëmm ju nirook Yàlla.» <sup>26</sup> Nabukodonosor nag jegeñsi buntu taal bu yànj ba, daldi àddu ca kaw ne: «Éey Sadarag, Mesag, Abet Nego, jaami Yàlla jiy Aji kawé ji, génnleen fiil!»

Sadarag ak Mesag ak Abet Nego daldi génne ca biir sawara sa. <sup>27</sup> Ba loolu amee jawriñ yaak laman yaak jaraaf yaak dagi Buur yéew leen. Ñu gis nag ne sawara wi lakkul seen yaram fenn, seen kawaru bopp xoyomuul, seeni yére yàquwul, xeeñuñu sax xetu sawara.

<sup>28</sup> Nabukodonosor wax ne: «Cant ñeel na Yàllay Sadarag ak Mesag ak Abet Nego, moom mi yónni malaakaam, mu wallu jaamam ñi ko wóolu, ba xëtt sama ndigal man Buur, te jaay seen bakkan gënal leen ñuy jaamu mbaa di sujjootal jeneen yàlla ju dul seen Yàlla. <sup>29</sup> Dogal tukkee na ci man ne: muy mépp mbooloo ak bépp xeet ak wépp làkk, képp ku ci ñàkke kersa Yàllay Sadarag ak Mesag ak Abet Nego, ay dog lees koy dog, te kërám dees na ko def ab sën, ndax kat amul jenn yàlla ju mana walloo ni moom.»

<sup>30</sup> Ba loolu wéyee Buur gëna teral Sadarag ak Mesag ak Abet Nego ca diiwaanu Babilon.

### *Buuru yéefar sàbbaal na Aji Sax ji*

<sup>31</sup> Bataaxalu Buur Nabukodonosor a ngii, jëm ci mépp mbooloo ak wépp xeet ak wépp làkk, ak fu ñu dëkke ci àddina sépp:



Yal na seen jàmm yokku. <sup>32</sup> Mándarga yeek kéemaan yi ma Yàlla Aji Kawe ji defal, maa ngi am bannex ci xamle ko. <sup>33</sup> Ndaw màndargaam yu màgg, ndaw kéemaanam yu réy! Nguuram ay nguur gu sax dàkk, kilifteefam ñeel maasoo maas.

#### 4

<sup>1</sup> Man Nabukodonosor maa ngi woon ci sama jàmmi kër ak sama teraangay màkkaan. <sup>2</sup> Ma tèdd sama lal, daldi am gént gu ma tiital, ak xalaat ak peeñu yu ma indil njàqare. <sup>3</sup> Ma joxe ndigal, woolu boroom xam-xami Babilon yépp, ngir ñu xamal ma pirim gént gi. <sup>4</sup> Ci kaw loolu taryaax yeek ñeengokat yeek xèrèmkat yeek seetkat yi dikk. Ma nettali leen gént gi, waaye waxuñu ma piri mi. <sup>5</sup> Ñu mujj ma indil Dañeel, di Beltasar, mi ñu tudde sama yàlla, di ku xelu yàlla yu sell yi nekk ci moom. Ma wax ko gént gi.

<sup>6</sup> Ma ne ko: «Beltasar, kilifay taryaax yi, man ci sama bopp xam naa ne xelum yàlla yu sell yaa ngi ci yaw, te menn mbóot jaaxalu la. Peeñum gént gi ma gént, wax ma piri mi. <sup>7</sup> Li ma gis daal ci sama kaw lal mooy lii: Damaa jekki gis garab ci digg àddina si, mu gudd lool.

<sup>8</sup> Garab gay màgg, di réy, ba njobbaxtal la di laal asamaan, ñu di ko séen ba ca cati àddina sépp.

<sup>9</sup> Xob yaa nga naat, meññeef ma ne gàññ, mana dundal ñépp. Muy keppaaral rabu àll, di tàggal njanaaw, di dundal bépp boroom bakkan.

<sup>10</sup> «Fi ma tèdd ci sama lal, ma jekki gis ab wattukat bu sell wàcce asamaan.

<sup>11</sup> Mu àddu ca kaw ne: “Daaneleen garab gi te gor ay bànqaasam.

Wittleen xob yi, tasaare meññeef mi. Na rab yi jóge ci keppaaram, daw, njanaaw yi ciy bànqaasam, naaw.

<sup>12</sup> Waaye èkk beek reen yi, bàyyileen ko fi suuf, ci digg mbooy mi, te jénge ko cállalay weñ ak xàñar.

Na ko layub asamaan di faam, muy dunde ñax nig jur.

<sup>13</sup> Mu nitoodi, ame xelum mala diiru juróom ñaari jamono.

<sup>14</sup> Ndogal a ngoog bu wattukat yi tëral, àttee ngoog bu ñu sell ñooñu digle, ngir aji dund ji xam ne Aji Kawe jee yilif nguurug nit, di ko jox ki ko soob, di ca fal ki gëna tuut.”

<sup>15</sup> «Loolu laa gént, man, Nabukodonosor. Yaw Beltasar nag, wax ma piri mi. Ndax boroom xam-xam yi ci sama réew mi, kenn manu ma cee wax piri mi. Waaye yaw man nga ko, ngir xelum yàlla yu sell yaa ngi ci yaw.»

<sup>16</sup> Ba loolu amee Dañeel ma ñuy wax Beltasar ne dann ab diir, jaaxle, xalaat yu ko tiital dikkal ko. Buur àddu ne ko: «Beltasar, gént geek piri mi bumu la tiital.» Beltasar ne ko: «Sang bi, su ma sañoon de muy sa géntug noon te pireem topp say bañaale. <sup>17</sup> Garab gi nga gis muy màgg di réy, njobbaxtal lay laal asamaan, ñu di ko séen ci àddina sépp, <sup>18</sup> mook xobam yu naat ak meññeefam mu ne gàññ, mana dundal ñépp; muy keppaaral rabu àll, di tàggal njanaaw: <sup>19</sup> Buur de, garab googu yaw la. Yaa màgg, di bare doole; di màgg ba laal asamaan, sa kilifteef àkki cati àddina.

<sup>20</sup> «Buur, li nga gis kenn ci wattukat yu sell yi wàcce asamaan, àddu ca kaw ne: “Daaneleen garab gi, tas ko, waaye èkk beek reen yi, bàyyileen ko fi suuf,

ci digg mbooy mi, te jénge ko cállalay weñ ak xàñar.

Na lay biy wàcc, di ko faam, muy dunde ñax nig jur diiru juróom ñaari jamono.”

<sup>21</sup> Piri maa ngii, Buur, di dogalu Aji Kawe, ji dal ci sa kaw, Buur, sang bi. <sup>22</sup> Yaw lañuy dàqe ci nit ñi; rabi àll yi ngay dèkkal, ñax di sam xont niw nag, lay biy wàcc di la faam diiru juróom ñaari jamono, ba kera ngay xam ne Aji Kawe jee yor nguurug nit, di ko jox ku ko neex.

<sup>23</sup> Li ñu santaane ñu bàyyi èkk beek reeni garab gi mooy tekki ne nguur gi dees na

la ko delloo keroog boo xamee ne Boroom asamaan mooy Buur. <sup>24</sup> Kon nag Buur, ngalla nangul li ma lay digal: say moy ak say bàkkaar, daboo ko di def njekk ak di baaxe néew-ji-doole ndax sa teraanga sax.»

<sup>25</sup> Loolu lépp dal na Buur Nabukodonosor.

<sup>26</sup> Ba ñu ca tegee fukki weer ak yaar yu mat, muy doxantu ca kaw taaxum kër buur ca Babilon. <sup>27</sup> Ma ngay wax naan: «Xanaa lii du Babilon gu mag gi ma tabax man, ci sama doole ju réy, muy péeyu buur, di sama ndam ak sama daraja?»

<sup>28</sup> Kàddug Buur ga daanoogul sax, baat jibe asamaan àddu ne: «Yaw Buur Nabukodonosor, dogal ñeel na la ne nguur gi récc na la. <sup>29</sup> Dees na la dàqe ci nit ñi, nga dëkk ak rabi àll yi, ñax di sam xont niw nag diiru juróom ñaari jamono, ba kera ngay xam ne Aji Kawe jee yor nguurug nit, di ko jox ku ko neex.»

<sup>30</sup> Ca saa sa kàddu ga sotti ñeel Nabukodonosor. Ñu dàqe ko ci nit ñi, muy dunde ñax niw nag, lay biy wàcc di ko faam, ba kawar gi sēq ni dunqi jaxaay, ay wewam di saf yu njanaaw.

### *Nabukodonosor xippi na*

<sup>31</sup> Ba àpp ba matee, man Nabukodonosor, maa séentu asamaan, sama sago délsi. Ma sant Aji Kawe ji, sargal Kiy dund ba fàww, màggal ko:

kilifteefam sax fàww,  
nguoram ñeel maaso maas.

<sup>32</sup> Mboolem waa àddina  
di neen ci moom.

Nu ko neex lay def  
ak gàngoori xarey asamaan  
ak waa suuf,  
te kenn du féll loxoom  
mbaa mu naa ko: «Ana looy def nii?»

<sup>33</sup> Ba sama sago délsee, ca laa jotaat ndam ak daraja ngir sama teraangay nguur. Ba loolu amee samay jawriñ ak samay jaraaf jëlsi ma; ñu dējaat ma ci nguur gi, ma gënatee màgg. <sup>34</sup> Léegi nag man, Nabukodonosor, maa ngi sant Boroom asamaan, di ko sargal, di ko màggal. Lu mu def dëgg la, fu mu

jaare njub la, te kuy réy-réylu man na laa suufeel.

## 5

### *Buur Baltacar a bew ba sàнку*

<sup>1</sup> Am na bés Buur Baltacar defal ay jaraafam bernde ju réy. Ña nga tollu ci junni, muy naan nag ca seen kanam.

<sup>2</sup> Biiñ ba jay Baltacar, mu joxe ndigal, ñu indi ndab, yu xalis yaak yu wurus ya baayam\* Nabukodonosor jële woon ca jaamookaayu Yerusalem, ngir ñu naane ca, mooki jaraafam aki soxnaam aki nekkaaleem. <sup>3</sup> Ba mu ko defee ñu indi ndabi wurus ya ñu jële woon ca jaamookaay ba, kër Yàlla ga ca Yerusalem. Buur di ca naan, mooki jaraafam aki nekkaaleem.

<sup>4</sup> Ña ngay naan biiñ, di sàbbaal yàllay wurus yaak yu xalis yaak yu xànjari yaak yu weñ yaak yu bant yaak yu doj ya.

<sup>5</sup> Ca saa sa baaraami loxob nit buy bind feeñ fa janook tegukaayu làmp ba, ca kaw miiru kër buur, ba ñu weexal. Buur di xool catu loxo bay bind. <sup>6</sup> Kanamu Buur nag soppiku, njàqare dikkal ko, ba ndigg la ne yalax, óom yay fenqoo.

<sup>7</sup> Buur daldi àddu ca kaw, di woolu ñeengokat yeek xërëmkat yi ak seetkat yi. Mu wax ak boroom xam-xami Babilon yooyu ne leen: «Képp ku jàng mbind mii te wax ma lu mu tekki, dees na ko solal yérey buur yu xonq curr, takkal ko caqu wurus, jox ko kilifteef gu koy tofal ci bummi.»

<sup>8</sup> Ba loolu amee boroom xam-xami Buur yépp dikk ba ca biir, waaye manuñoo jàng mbind ma, bay xamal Buur la muy tekki. <sup>9</sup> Buur Baltacar nag gënatee tiit, kanam ga gëna soppiku, jaraafam ya it jàq.

<sup>10</sup> Ci biir loolu Lingeer, ndeyi Buur, dégg coowal Buur aki jaraafam, daldi duggsi ci biir néegu xawaare bi. Mu ne: «Buur, guddalu fan! Bul tiit, bu sa kanam lëndëm. <sup>11</sup> Am na góor gu nekk ci sa réew mi; xelu yàlla yu sell yaa ngi ci moom, te ci sa jamonoy baay, gis nañu ci moom ag ràññee ak xel ak xam-xam bu nirook

\* **5:2** 5.2 baay bi ñuy wax fii, am na ñu jàpp ne maam la woon ci moom mbaa buur bu ko jiitu woon ci nguur gi rekk, waaye du baayub geño.

xam-xamu yàlla yi. Buur Nabukodonosor sa baay nag fal ko, mu jiite taryaax yeek ñeengokat yeek xërëmkat yeek seetkat yi; <sup>12</sup> loolu yépp ndax dañoo gis ci kooku Buur tudde Beltasar, xel mu ñaw akum njàng ak ràññee. Day firi gént, di teqental ay cax ak a lijjanti ay jafe-jafe. Kookooy Dañeel; kon nañu ko woo, mu wax piri mi.»

<sup>13</sup> Ci kaw loolu ñu indi Dañeel fa kanam Buur. Buur ne Dañeel: «Du yaay Dañeel mi bokk ci Yudeeni ngàllo, ga Buur saa baay jële Yuda? <sup>14</sup> Dégg naa sab jëw, ñu naan noowi yàlla yaa ngi ci yaw, te gis nañu ci yaw ag ràññee akum xel ak xam-xam bu takku. <sup>15</sup> Léegi indiloon nañu ma boroom xam-xam yeek ñeengokat yi, ndax ñu jàngal ma mbind mii, xamal ma pireem. Waaye xamuñu pireem. <sup>16</sup> Dégg naa nag ne man ngaa firi lool ak a lijjanti mbir yu jafe. Soo ma manee jàngal mbind mi, wax ma lu muy tekki, dees na la solal yérey buur yu xonq curr, takkal la caqu wurus, jox la kilifteef gu lay tofal ci bummi.»

<sup>17</sup> Dañeel nag janook Buur ne ko: «Buur, dencal sag may te jox keneen say neexal. Du tee ma jàngal la mbind mi, firil la ko.

<sup>18</sup> «Buur, Yàlla Aji Kawe ji daa joxoon sa baay Nabukodonosor nguur gi, muy ku màgg, am ndam ak daraja. <sup>19</sup> Màggaay ga mu ko mayoon tax waa mbooloo yeek xeet yeek làkk yépp ragal ko, bay lox ci kanamam. Ku ko soob, mu rey; ku ko soob, mu bàyyi; ku ko soob, mu fal; ku ko soob, mu torxal. <sup>20</sup> Waaye ba mu bewee, të ticc bay réy-réylu, dañu koo jàllarbee ca nguuram, nangu ndam la, <sup>21</sup> dàqe ko ci nit ñi, def xel ma xelum rab. Mu dëkk ak mbaami àll yi, am ñax dim xontam niw nag, lay biy wàcc, di ko faam, ba kera ba mu xamee ne Aji Kawe jee yor nguurug nit, di ko jox ku ko neex.

<sup>22</sup> «Yaw Baltacar miy doomam nag, xam nga loolu lépp te taxu laa toroxlu, <sup>23</sup> xanaa ngay diirook Boroom asamaan, bay santaane ñu indil la ndabi këram, nga di ci naan biiñ, yaak say jawriñ ak say soxna ak say nekkaale, ngeen di sàbbaal ay yàllay xalis ak yu wurus ak yu xànjari

ak yu weñ ak yu bant ak yu doj, te du ci lenn luy gis mbaa muy dégg mbaa mu xam dara. Waaye Yàlla ji yor sa bakkan tey ak èllëg sàbbaaloo ko. <sup>24</sup> Moo tax Yàlla yónni loxo bi, mu rëdd mbind mii.

<sup>25</sup> «Mbind mi ñu rëdd mooy: WAÑÑ, WAÑÑ, NATT, SÉDDALE. <sup>26</sup> Li muy firi mooy:

WAÑÑ: Yàlla waññ na sa nguur, ba jeexal ko.

<sup>27</sup> NATT: Nattees na sa diisaay ci nat-tukaay bi, nga yées.

<sup>28</sup> SÉDDALE: Séddale nañu sam réew, ba jox ko xeeti Medd ak Pers.»

<sup>29</sup> Ca la Baltacar joxe ndigal, ñu solal Dañeel yérey buur yu xonq curr, takkal ko caqu wurus, daldi yégle ne moo topp ci bummi.

<sup>30</sup> Guddi googa lañu rey Baltacar, buurub waa Babilon.

## 6

### *Dañeel tàbbi na paxum gaynde*

<sup>1</sup> Ci kaw loolu Daryus waa Medd ba, jot ca nguur ga, fekk ko mu am juróom benn fukki at ak ñaar.

<sup>2</sup> Mu neex Daryus nag, mu fal téeméeri jawriñ ak ñaar fukk ca réew ma, ñuy saytu nguur ga gépp; <sup>3</sup> ak ñetti saytukat yu leen jiite, kenn ka di Dañeel. Saytukat yooyu nag di leen xamal lu ñuy liggéey, ngir Buur baña yàqule dara. <sup>4</sup> Ci biir loolu Dañeel di ku ràññiku ci biir saytukat yaak jawriñ ya, ndax rafet um xel; ba tax Buur di seet nu mu koy fale, mu yilif nguur gépp. <sup>5</sup> Ba loolu amee saytukat yaak jawriñ ya di wuta tuumaal Dañeel ci mbiri nguur gi, te gisuñu genn tooñ mbaa sikk ci moom, ndax ku amoon kóllère la, te giseesul ci moom genn néewal mbaa sikk. <sup>6</sup> Ñu daldi ne: «Dunu gis muk lenn lu nu tuumaal Dañeel. Xanaa nu gis ko ci yoonu Yàllaam.»

<sup>7</sup> Ba mu ko defee saytukat yaak jawriñ ya ànd rungumloo ba ca Buur, ne ko: «Buur Daryus, guddalu fan! <sup>8</sup> Saytukati nguur gépp ak laman yeek jawriñ yeek boroom xel yeek jaraaf yi mànkoo nañu, téral dogalu buur bi yoonal aaye bii:

ci diiru fanweeri fan, képp ku ñaan ci jenn yàlla mbaa ci nit ku la moy, yaw Buur sang bi, dees na ko sànni ca kàmbo gaynde ya. <sup>9</sup> Léegi nag, Buur, dogalal aaye bi, te torlu mbind mi, ba dootu tebbiku, mu dëppook yoonu waa Medd ak waa Pers, wi dul toxu.» <sup>10</sup> Ci kaw loolu Buur Daryus torlu mbindum aaye ba.

<sup>11</sup> Ba Dañeel yégee ne torlu ñaño dogal ba, teewul mu ñibbi, yéeg ca néeg ba ca kaw taax, ma palanteer ya jublook Yerusalem, na mu ko daan defe naka jekk ñetti yoon ci bés. Mu sukk fa, di ñaan ak a sant Yàllaam. <sup>12</sup> Ci kaw loolu nit ña rungumloo, fekk ko muy ñaan ak a dagaan Yàllaam, <sup>13</sup> ba noppi ñu dem fekki Buur, ngir wax ak moom ca aaye ba mu tëral, ne ko: «Xanaa du yaa torlu aaye bi ne: képp ku ñaan jenn yàlla mbaa nit ku la moy, yaw Buur, diiru fanweeri fan, dees na ko sànni ca kàmbo gaynde ya?» Buur ne: «Dogal bi kay wér na, dëppook yoonu waa Medd ak Pers, wi dul toxu.»

<sup>14</sup> Ñu ne ko: «Buur, Dañeel mi bokk ca ngallog Yudeen ña de, faalewu la, yaak aaye bi nga torlu. Ñetti yoon ci bés lay ñaan ay ñaanam ba tey.» <sup>15</sup> Buur dégg ko, am tiis wu réy. Mu daldi fas yéene ne dina musal Dañeel. Ba jant so ma ngay wut pexe mu mu ko musale.

<sup>16</sup> Ci kaw loolu nit ña rungumlotti ba ca Buur, ne ko: «Buur, xamal ne yoonu waa Medd ak Pers tëral na ne mboolem aaye mbaa dogal bu buur déggal dootu toxu.»

<sup>17</sup> Buur nag joxe ndigal, ñu yóbbu Dañeel, tàbbal ko ca kàmbo gaynde ya. Buur ne ko: «Sa Yàlla ji nga saxoo jaamu, yal na la xettli.»

<sup>18</sup> Ba mu ko defee ñu indi aw doj, dëj ko ca buntu kàmbo ga, Buur bès ca jaarob torlukaayam ak jaarob torlukaayu jaraafam ya, ba dara dootu mana soppiku ci deminu Dañeel. <sup>19</sup> Ba loolu wéyee Buur dellu këram. Lekkul guddi gi yépp, sàkkuwul lu koy bégal, te nelaw të ko.

<sup>20</sup> Ba njël jotee, ba bët di bégga set, Buur jóg, daldi gaaw dem ca kàmbo gaynde ya. <sup>21</sup> Naka la jub kàmbo ga, daldi woo Dañeel; baat baa nga tiis. Mu ne ko: «Éy Dañeel, jaamu Yàlla jiy dund; sa

Yàlla ji nga saxoo jaamu, mbaa mujj na laa xettli ci gaynde yi?»

<sup>22</sup> Dañeel daldi ne Buur: «Buur, gud-dalu fan! <sup>23</sup> Sama Yàlla yebal na malaakaam, mu tëj gémmini gaynde yi, ba defuñu ma dara. Ndax kat mucc naa ci tuuma sama digganteek moom ak sama digganteek yaw it, te defuma dara lu bon.»

<sup>24</sup> Buur nag am mbégte mu réy. Ci kaw loolu mu joxe ndigal, ñu génne Dañeel kàmbo ga. Ba ñu génnee Dañeel kàmbo ga, gaañuwul fenn, ndax daa wóolu Yàllaam.

<sup>25</sup> Ba loolu wéyee Buur joxe ndigal, ñu indi nit ña tuumaaloon Dañeel, ñu tàbbal leen ca kàmbo gaynde ya, ñook seeni doom ak seeni jabar. Àgguñu suuf sax, gaynde ya alawti leen, dammate seen yax yépp.

<sup>26</sup> Gannaaw loolu Buur Daryus bind waa mbooloo yépp ak xeet yépp ak làkk yépp, di waa àddina sépp, ne:

«Jàmm ngeen!

<sup>27</sup> «Dogal tukkee na ci man, ne mboolem fu bokk ci sama nguur, ñaño fa ragal Yàllay Dañeel, wormaal ko, keey Yàlla jiy dund, kee sax fàww, nguuram du tas, kilifteefam du jeex.

<sup>28</sup> Keey musle, di xettlee, di def ay màndarga aki kéemaan, kaw asamaan ak suuf. Kee musal Dañeel ca pàddum gaynde ya.»

<sup>29</sup> Dañeel nag gëna am cér diirub ngu-urug Daryus ak nguurug Sirius waa Pers ba.

## Aji Sax ji feeñu na Dañeel

### 7

(Saar 7.1—12.13)

*Dañeel gis na ñeenti rabi géej*

<sup>1</sup> At ma jëkk ca nguurug Baltacar buuru Babilon, Dañeel daa gént, peeñu dikkal ko ci kaw lalam. Mu bind nag gént gi, doore ko nii. <sup>2</sup> Dañeel da ne: «Damaa gis guddi ci peeñu mi; mu jekki-jekki am ngelaw lu jóge ñeenti wet, riddeendoo, di yëngal géej gu mag ga. <sup>3</sup> Ci kaw loolu

ñeenti rab yu réy génne ca géej ga, rab wu nekk wuuteek sa moroom.

<sup>4</sup> «Rab wu jëkk waa nga mel ni gaynde, am laafi jaxaay. Naka laay xool, ñu buddi laaf yi, yékkatee ko ci suuf, taxawal ko, mu taxawe ñaari tànk ni nit, ba noppi ñu jox ko xelum nit.

<sup>5</sup> «Ñaareelu rab wa ne jimeet, nirook urs\*. Mu ngi taxawe wet, ñank ñetti faar. Ñu ne ko: “Jógal lekk yàpp wu bare.”

<sup>6</sup> «May xool ba tey, yem ci rab wu mel ni segg, am ñeenti laaf. Rab waa ngi am ñeenti bopp, ñu jox ko kilifteef gi.

<sup>7</sup> «May xool ba tey ci biir peeñum guddi mi, daldi yem ci ñeenteelu rab wu raglu, ñàng, te am doole ju jéggi dayo. Mu ngi am bëñi weñ yu réy yu muy moxoñee, di warax, di nappaaje la ca des. Moom nag wuute naak rab yi ko jiitu yépp, te fukki béjjén la am.

<sup>8</sup> «Ni ma ne jàkk ci béjjén yi, beneen béjjén bu ndaw ne pëll, génn ci seen biir, ñett ca béjjén ya jiitu buddeeku. Béjjén bu ndaw baa nga am bët yu mel ni bëti nit ak gémmiñ gu muy waxe kàdduy damu.»

<sup>9</sup> «May xool ba tey,  
ñuy teg ay gàngune,  
góor gu mag gi dikk, toog.  
Mbubb maa nga weex furr,  
kawaru boppam weex tàll,  
ngànguneem ma di saf sawara, wuy sël-  
sëli,  
mbegey ngàngune ma bindoo ni sawara  
wu yànj,

<sup>10</sup> dexu sawara di wal, balle fa kanamam.  
Junniy junnee nga koy jaamu,  
mboolooy mbooloo dar ko.  
Waa pénc ma toog,  
téere ya ubbiku.

<sup>11</sup> «May xool ba tey ndax kàdduy damu yooyu béjjén biy wax, ma gis ñu rey rab wa, sànni méddam ca taal bu yànj ba, mu sànk. <sup>12</sup> Rab ya ca des nag, ñu nangu seen kilifteef. Teewul ñu bàyyi leen ñu dundaat ab diir.

<sup>13</sup> «May xool ba tey ci biir peeñum guddi ma, gisuma lu moy jëmm ju mel ni doomu nit di ñëw, mook niiri asamaan,

\* **7:5** 7.5 urs rab wu ñàng la; man naa ëpp gaynde. woon ak Pers ak Medd ak Geres.

jëm ci góor gu mag gi; ñu yóbbu ko ba ca moom. <sup>14</sup> Ci kaw loolu ñu jébbal ko kilifteef gaak ndam laak nguur ga. Ci biir loolu waa mbooloo yépp ak xeet yeek làkk yi di ko wormaal. Kilifteefam day sax fàww, du jeex, te nguuram du foq muk.

<sup>15</sup> «Ba mu ko defee, man Dañeel, ma am njàqare; sama peeñu yooyoo ma tiital. <sup>16</sup> Ma dem ba ca kenn ca ña fa taxaw, laaj ko lan la mbir moomu mépp di tekki. Mu wax ak man, xamal ma piri ma, ne ma: <sup>17</sup> “Ñeenti rab yu mag yooyu, ñeenti buuri àddina† lañu yuy ñëw. <sup>18</sup> Waaye aji sell yu Aji Kawe ji dinañu jot ci nguur gi, moom ko fàww, saxoo ko dàkk.”

<sup>19</sup> «Ba loolu wéyee ma bégga am lu leer ca ñeenteelu rab, wa wuuteek ya ca des yépp, ñàng lool, am ay bëñi weñ ak weyi përem, di moxoñeek a warax, di nappaaje li ci des. <sup>20</sup> Ma bégga am lu leer ba tey ci fukki béjjén yi ci bopp bi ak beneen ba génn, ba ñett daanu ca kanamam; mu am ay bët ak gémmiñ, di wax kàdduy damu, te ëpp yi ci des. <sup>21</sup> May xool, béjjén boobu di xareek aji sell yi, di leen daan, <sup>22</sup> ba keroog góor gu mag gi dikk, daldi jox dëgg aji sell yu Aji Kawe ji; àpp bi nag mat, aji sell yi moom nguur gi.

<sup>23</sup> «La ca topp mu neeti ma: “Ñeenteelu rab wi mooy ñeenteelu nguur giy taxaw ci kaw suuf, wuuteek nguur yépp. Dina mëdd àddina sépp, nappaaje ko, rajaxe ko. <sup>24</sup> Fukki béjjén yi fukki buur lañu, yuy yore nguur googu. Beneen buur dina falu, wutu leen. Dina wuuteek ña ko jiitu te dina folli ñetti buur. <sup>25</sup> Dina yékkati ay kàddu dal ci Aji Kawe ji, dina fitnaal aji sell yu Aji Kawe ji te dina fexee soppo takkinu jamono yi ak yoonu Yàlla wi. Dees na teg aji sell yi ci loxoom diiru ñetti jamonook genn-wàll. <sup>26</sup> Waa pénc mi toog, ñu nangu kilifteefam, tas ko, neenal ko ba fàww. <sup>27</sup> Palug mboolem nguur yi asamaan tiim, ak kilifteef gaak daraja ja dees na ko boole, jébbal aji sell yu Aji Kawe ji. Nguurug mbooloo moomu day

† **7:17** 7.17 ñeenti buur yooyu, buuri waa Babilon la

sax ba fàww, kilifa yépp di ko déggal, di ko wormaal.”

<sup>28</sup> «Fii la mbir mi yem. Man Dañeel nag, ma am njàqare lool, ba sama kanam soppiku, ma denc kàddu yooyu ci sama xel.»

## 8

### *Dañeel gis na kuuy ak sikket*

<sup>1</sup> Ca ñetteelu atu nguurug Baltacar, man Dañeel am naa meneen peeñu, gannaaw peeñu ma ma jèkkoona am. <sup>2</sup> Ca biir peeñu ma, maa ngi Sus, péeyub diiwaanu Elam. Ma gis ci peeñu mi ne maa ngi ci wetu yoonu ndox ma ñu gas te ñu di ko wax Ulay. <sup>3</sup> Ma séentu, xool, yem ci kuuy mu taxaw feggook yoonu ndox ma, am ñaari béjjén yu gudd te benn bi gëna gudd ba ca des. Waaye bi gëna gudd moo mujja sax. <sup>4</sup> Ma gis kuuy may dañ, di jublu sowu ak bëj-gannaar ak bëj-saalum. Menn mala manu koo të, te maneesula xettli kenn ci moom. Ma ngay def lu ko neex tey gëna màgg. <sup>5</sup> May xool, ab sikket jóge sowu, jaare déndu suuf sépp te laalul suuf. Sikket baa nga am béjjén bu yéeme ci diggante bët yi. <sup>6</sup> Mu dikk ba tollook kuuyum ñaari béjjén, mi ma gisoon ci wetu yoonu ndox mi, daldi koy songe xadaru dooleem. <sup>7</sup> Ma gis ko nag, mu dikk ba ca moom, song kook xadar, dóor kuuy mi, damm ñaari béjjénam, te kuuy mi manu koo të. Mu daane ko ci suuf, note ko, te kenn manu koo teqaleek moom. <sup>8</sup> Sikket bi mujj màgg lool; ba fa kàttanam yem, béjjén bu gudd ba damm, ñeenti béjjén yu yéeme sax, wuutu ko, jublook ñeenti ngelawi asamaan. <sup>9</sup> Ci kaw loolu béjjén bu ndaw génne ci béjjén yooyu benn, daldi lawa law jublu bëj-saalum ak penkook réew ma gëna rafet\*. <sup>10</sup> Muy màgg nag bay diir mbagg gàngooru xarey asamaan, ba daaneel lenn ci ñoom, ak lenn ci biddiww yi, nappaaje leen. <sup>11</sup> Muy damu bay diir mbagg Njiital gàngooru xare gi, daldi dakkal sarax ba ñu ko daan defal bés bu jot, màbb bérabam bu sell

ba. <sup>12</sup> Gàngooru xare gi tegu na ciy loxoom, boole kook saraxu bés bu jot bi, lépp cig tooñam. Béjjén bi dal ci kaw dégg, daaneel ko fi suuf, ay pexeem joy.

<sup>13</sup> Ba loolu amee ma dégg jenn aji sell di wax, jeneen aji sell ne ko: «Lan mooy àppu peeñu mii ñu gis, ñu di ci dakkal sarax biy am bés bu jot, di teddadil gàngooru xare gi, ak a tooñ, di yàq lépp?» <sup>14</sup> Mu ne ma: «Àpp bi ñaari junni laak ñetti téeméer ciy guddeeki bëccëg. Gannaaw loolu dees na taxawalaat bérab bu sell bi.»

<sup>15</sup> May xool ci biir peeñu mi, man Dañeel, di jéema xam lu muy tekki, jëmm juy niroom góor, ne jimeet taxaw ci sama kanam. <sup>16</sup> Ci kaw loolu ma dégg baatu nit jibe ca digg yoonu ndox ma ñuy wax Ulay. Mu àddu ca kaw ne: «Jibril, waxal kii peeñu mi.» <sup>17</sup> Jibril dikk nag ba fi ma taxaw. Ba mu jegesee, ma tiit lool, ba daanu, sama kanam dëppu fi suuf. Mu ne ma: «Yaw doom aadama ji, nanga xam ne peeñu mii mujug jamono la.» <sup>18</sup> Bi muy wax ak man, dëpp naa sama kanam fi suuf, ba daanu leer. Mu laal ma, taxawalaat ma fa ma taxawoon. <sup>19</sup> Mu ne ma: «Maa ngi lay xamal luy xew keroog ba merum Yàlla di jeex, ndax muj ga mooy àppu mer ma. <sup>20</sup> Kuuy mi nga gis mu am ñaari béjjén, buuri waa Medd ak waa Pers la. <sup>21</sup> Sikket bi buuru réewum Geres la. Béjjén bu gudd bi ci diggante bët yi mooy buur bu jèkk bi. <sup>22</sup> Dañu koo damm, ñeenti béjjén wuutu ko, di ñeenti nguur yu soqeekee ca xeet wa, waaye duñu am doole ni ga jiitu. <sup>23</sup> Bu nguur yooyu jeexee, ba bàkkaarkat yi buural, buur bu néeg te bare pexe dina falu. <sup>24</sup> Dina gëna am doole, waaye du doon dooley boppam. Yàqam dina jéggi dayo, te ay pexeem dina joy. Dina faagaagal ñu am doole ba ca mbooloom aji sell yi. <sup>25</sup> Xelum njublanam lay naxee, di réy-réylu, ba bët ñu bare, faagaagal leen, te dina dëkk kilifay kilifa yi. Waaye mooy sànk, te loxo du ko laal. <sup>26</sup> Peeñum ngoon meek mu bëccëg mi la dikkal lu wér la. Yaw nag neel cell ak peeñu mi,

\* **8:9** 8.9 réew ma gëna rafet fii réewum Israyil a tax ñuy wax.

ndax des na fan yu bare.»

<sup>27</sup> Ba loolu amee ma ne làcc, wopp ay fan, man Dañeel. Gannaaw gi ma jóg, dellu ca liggéeyu buur. Ma waaru nag ca peeñu ma, ndax daa wees sama dég-dég.

## 9

### *Dañeel jàngat na waxyu bu Yeremi biral*

<sup>1</sup> At ma jëkk ca jamonoy Daryus, ma bokk ca waa Medd, di doomu Aserus te falu woon buurub waa Babilon, <sup>2</sup> ca at ma jëkk ca nguuram, man Dañeel damaa gis ci téere yi limu at yi kàddug Aji Sax ji xamal Yonent Yàlla Yeremi, muy àpp bi Yerusalem wara gentel, di juróom ñaar fukki at. <sup>3</sup> Ma walbatiku jublook Boroom bi Yàlla. Maa ngi sol saaku, diwoo dóom boole kook koor, toroxloo ko, di ko ñaan ak a dagaan. <sup>4</sup> Ma ñaan sama Yàlla Aji Sax ji, tuubal ko samay bàkkaar, ne ko: «Yaw Boroom bi, Yàlla ju màgg ji mata ragal, yaw miy sàmm kóllère ak ngor sa digganteek ñi la bëgg, di sàmm say santaane. <sup>5</sup> Bàkkaar nanu, ñaaw nanu, tooñ nanu, gàntal la, dèddu say santaane ak sa ndigali yoon. <sup>6</sup> Dégluwunu say jaam, di yonent yi jottli sa kàddu sunuy buur ak sunuy kilifa ak sunuy maam ak mbooloom réew mi mépp. <sup>7</sup> Yaw Boroom bi, njub ñeel na la, waaye nun gacce ñeel na nu bésub tey jii, muy waa Yuda, muy waa Yerusalem, di waa Israyil gépp, ku jegeek ku sore, ci biir mboolom réew yi nga leen dàq, yóbbu, ndax li ñu la ñàkke kóllère. <sup>8</sup> Aji Sax ji, nun kay gacce ñeel na nu, nook sunuy buur ak sunuy kilifaak sunuy maam, ndax moy nanu la. <sup>9</sup> Boroom bi sunu Yàlla, yaay Boroom yërmandeek njéggal moos, ndax gàntal nanu la. <sup>10</sup> Noo baña déglu sunu kàddug Yàlla Aji Sax ji, di topp yoonam yi mu nu jox, yonent yiy jaamam jottli nu ko. <sup>11</sup> Israyil gépp a moy sa yoon, jàdd, baña déglu sa kàddu, ba kèppoo sa alkàndey ngiñ, gi ñu bind ci yoonu Musaa, sa jaam ba, ndax danu laa tooñ. <sup>12</sup> Matal nga sa kàddu gi nga wax ci nun, nook sunu

kilifa yi nu yilif, ba nga wàccee ci sunu kaw, ci Yerusalem, musiba mu réy mu masula am feneen fu mboolom asamaan tiim. <sup>13</sup> Ni ñu ko binde ci yoonu Musaa, ni la nu musiba moomu mépp dikkale, te tinuwunu la, yaw, sunu Yàlla Aji Sax ji. Dèdduwunu sunuy bàkkaar it te séddunu sa worma. <sup>14</sup> Aji Sax ji, looloo waral nga dogu ci wàccee musiba mi ci sunu kaw, ndax yaw sunu Yàlla Aji Sax ji, njekk nga jéfe lépp loo jéf, waaye noo dégluwul sa kàddu.

<sup>15</sup> «Léegi nag yaw Boroom bi, sunu Yàlla ji nu génnee Misraak doole, nun sa mbooloo, nga siiwale ca sa tur ba sunu jonni yàllay tey, noo bàkkaar, noo tooñ. <sup>16</sup> Boroom bi, seetal ci sa gépp njekk, ba waññi sa mer ak sa xadar, mu moy Yerusalem, sab dëkk, saw tund wu sell. Ndax kat sunuy bàkkaar ak sunu ñaawtéefi maam tax na mboolom ñi ñu wër di sewal Yerusalem ak sa mbooloo.

<sup>17</sup> «Kon nag yaw sunu Yàlla, Sang bi, rikk nangul li ma lay ñaan, di la ko dagaan. Boroom bi, ngalla geesul ngir yaw ci sa bopp sa jaamookaay ba ñu gentel. <sup>18</sup> Rikk sama Yàlla, teewlul, déglul te xippi, ba gis sunu gent yi ak sa dëkk ba ñuy tudd sa tur. Du sunu njekk lanu lay dagaane moos, waaye sa yërmande ju yaa rekk a tax. <sup>19</sup> Boroom bi, ngalla Boroom bi, déglu nu te baal nu! Rikk Boroom bi sama Yàlla, teewlul ngir yaw ci sa bopp, te bañ noo yeexe, ndax saw tur lañu tudde sa dëkk ak sa mbooloo.»

<sup>20</sup> Maa ngay wax ak a ñaan, di tuub sama bàkkaar ak a tuubloo Israyil sama ñoñ tey dagaanal sama tundu Yàlla wu sell wi\*, ci sama Yàlla Aji Sax ji. <sup>21</sup> Maa ngay wax ci ñaan gi, waa ja Jibril ma ma gisoon lu jiitu ci peeñu mi, daldi naawa naaw, dikk ba ci man, yemook waxtuw saraxu ngoon. <sup>22</sup> Mu xamal ma, ne ma: «Dañeel, léegi damaa ñew ngir leeralal la. <sup>23</sup> Ba nga tàmbalee ñaan la kàddu dikk. Maa la ko yégalsi, ndax yaw ku ñu naw nga. Déggal kàddu gi te dégg peeñu mi.

<sup>24</sup> «Juróom ñaar fukki ayi bés lañu àppal sa mbooloo ak sab dëkk bu sell,

\* 9:20 9.20 tundu Yàlla wu sell wi Yerusalem la.

ngir dakkal tooñ gi, jeexal moy gi, jotu ñaawtéef, saxal njubte ba fàww, matal peeñum yonent, ba delloo bérab bu sella sell ag sellngaam. <sup>25</sup> Nanga xam kon xéll ne: li ko dale keroog ba ñuy siiwtaane dogal ba jëm ci leqli Yerusalem, tabaxaat ko, ba keroog njiit li ñu fal di feeñ, juróom ñaari àppi juróom ñaar la. Te ci juróom benn fukk ak ñaar ci àppi juróom ñaar lañuy tabaxaat pénc ak kàmb gu ñu aare dëkk bi. Waaye jamono yu metti lay doon. <sup>26</sup> Bu juróom benn fukk yeek ñaar ciy àppi juróom ñaar weese, dees na bóom ku ñu fal, te kenn du ànd ak moom. Gannaaw loolu kilifa dina ñëw, ànd ak gàngooram, yàqte dëkk beek jaamookaay bi. Waaye kilifa googu lu mel ni mbënn a koy mujje. Dogal nañu ne yàqte gi dina wéy ba keroog xare biy jeex. <sup>27</sup> Dina feddli kóllère diggam ak ñu bare ci benn àppu juróom ñaar, te ci diggu àppu juróom ñaar ba lay dakkal sarax yi ñuy rendi ak yeneen sarax. Ci genn wetu sarxalukaay bi la yàqkat biy taxawal lu siblu†, di sabab yàqute, ba keroog muj gi ñu ko dogalal ne milib ci kawam.»

## 10

### *Dañeel gis na boroom col gu weex*

<sup>1</sup> Ci ñetteelu atu nguurug Sirius buuru Pers, kàddu daa dikkal Dañeel ma ñuy wax Beltasar. Kàddu googu di gu wóor tey yégle xare bu mag. Mu dégg kàddu gi, xam pirim peeñu mi.

<sup>2</sup> Jant yooyu, man Dañeel maa nga doon ñaawlu diiru ñetti ayi bés. <sup>3</sup> Nam wu neex lekkuma ko, te yàpp ak biiñ jaarul sama gémmiñ. Diuwma it ba ñetti ayi bés yi mat. <sup>4</sup> Keroog ñaar fukki fan ak ñeent ci weer wi jëkk ci at mi, maa nga ca tàkkal dex gu mag gi ñuy wax Tiigar. <sup>5</sup> Ma séentu, xool, yemuma ci ku moy genn góor gu sol yérey wëñ gu èccu, gañoo ngañaayal wurus wu raxul. <sup>6</sup> Yaram waa nga rafet ni peru gànjar, xar-kanam ba mel ni melax, bët ya mel ni jumi sawara,

loxo yeek tànk yi mel ni xànjar bu ñu jonj, riiru baatam mel ni coowal mbooloo.

<sup>7</sup> Man Dañeel donj maa gis peeñu mi. Ñi ma àndal gisuñu ko. Tiitaange lu réy nag jàpp leen, ba ñu daw, làquji. <sup>8</sup> Ba loolu amee ma des fa man rekk, ne jàkk ci peeñu mu réy moomu. Waaye deseetuma woon doole, damaa jeexal tàkk, amatuma genn kàttan. <sup>9</sup> Ci kaw loolu ma dégg baatam. Naka laa dégg baatam, daldi daanu leer, sama kanam dëppu fi suuf. <sup>10</sup> Yéguma lu moy ab loxo bu ma laal, yékkati ma, ma teg sama bëti óom ak sama tenqi loxo fi suuf, di lox. <sup>11</sup> Mu ne ma: «Dañeel, yaw mi ñu naw, déggal kàddu yi ma lay wax. Jógal taxaw sa taxawaay, ndax dañu maa yebal ci yaw nii.» Naka la ma wax kàddu yooyu, ma ne ñokket, di lox. <sup>12</sup> Mu ne ma: «Dañeel, bul tiit. Bés bu jëkk ba nga fasee yéene xam, ba toroxlu ci sa kanam Yàlla, ca lañu dégg say kàddu te sa kàddu yooyoo ma taxa ñëw. <sup>13</sup> Waaye rawaanu nguurug Pers moo ma dogale ñaar fukki fan ak benn. Mikayel nag, kenn ci malaakay wattukat yu mag yi ñëw, wallusi ma. Yàgg naa ca buuri Pers ya. <sup>14</sup> Léegi ñëw naa ngir xamal la liy dikkal sa mbooloo ci jamono yiy ñëw ndax peeñu mi ëmb na jamono yooyu itam.»

<sup>15</sup> Bi mu may wax kàddu yooyu, maa ngi ségg, sama kanam jublu ci suuf, manumaa wax. <sup>16</sup> Jekki-jekki jëmm ju mel ni nit dikk, laal samay tuñ. Ma ña, àddu, daldi wax ak ki taxaw sama kanam ne ko: «Sang bi, peeñu mi tax na ma jàq, ba amatuma benn doole. <sup>17</sup> Te it sang bi, nu may mana waxeek yaw, sang bi? Amatuma doole te deseetuma ngelawal gémmiñ.» <sup>18</sup> Ba loolu amee jëmm jiy nirook nit dellu laal ma, ma amaas doole. <sup>19</sup> Gannaaw loolu mu ne ma: «Yaw nit ki ñu naw, bul tiit. Jàmm la. Góor-góorlul!» Muy wax ak man, may amaas doole, ba ne ko: «Waxal sang bi, dooleel nga ma.» <sup>20</sup> Mu ne ma: «Ndax xam nga lu ma taxa dikk? Léegi ma dellu xarejeek rawaanu réewum Pers; te bu may dem, rawaanu Geres dikk. <sup>21</sup> Waaye

† 9:27 9.27 lu siblu sarxalukaayu tuur la, bu ñu samp ca jaamookaayu Yàlla ba, di ko sobeel.



dinaa la xamal li ñu bind ci téereb dëgg gi. Kenn jàpplewu ma ci ñooñu ku dul Mikayel, seen malaakam wattukat, yeen bànni Israyil.

## 11

<sup>1</sup> Man ci sama wàllu bopp nag, maa nga woon ca wetam, di ko aar ak a jàpple, ca at ma jëkk ca nguurug Daryus waa Medd ba.

### *Buur bëj-gànnar ak buur bëj-saalum a ngi jote*

<sup>2</sup> «Léegi, maa ngi lay xamal lu wér. Dama ne, dina amaat ñetti buur yuy falu ci réewum Pers, ñeenteel ba dikk, dajale alal ju bare, ba ëpple leen ñoom ñépp. Bu demee ba alalam may ko doole, dina def lépp lu mu man ngir xabtal ñépp ci kaw nguuru Geres. <sup>3</sup> Waaye buur bu jambaare dina falu, di boroom kilifteef gu yaatu, di def lu ko soob. <sup>4</sup> Naka lay jóg rekk, nguuram daldi foq, tas, ñeenti ngelawi asamaan tasaare, yóbbu. Aw askanam du moom nguur ga, te nguur ga dootu am doole ja mu amoon. Nguuram day foq, tàbbi ci loxoy ñeneen ñu dul askanam.

<sup>5</sup> «Buur bëj-saalum\* dina am doole, waaye kenn ca ña mu jiital a koy ëpp doole, te kilifteefam mooy gëna yaatu.

<sup>6</sup> «Gannaaw ay at, buur bëj-saalum ak buur bëj-gànnar dinañu mànkoo. Doomu buur bëj-saalum mooy séysi kër buur bëj-gànnar, ngir dëgéral diggante bi. Waaye nguurug doom ja du yàgg, boroom këram it du dundaat lu yàgg mook seen doom. Doomu buur bëj-saalum day dee, mook toppam ak baayam ak boroom këram. <sup>7</sup> Kenn ci waa këram mooy wuutu baayam, dikk, dal ca mbooloom xarem buur bëj-gànnar, jàll ba ca wàllaa tatay buur bëj-gànnar, jëflanteek ñoom, duma leen, ba daan. <sup>8</sup> Dinañu lël sax seen jëmme tuur yu ñu móol, yóbbu Misra, boole kook seen gànjaru xalis ak wurus. Gannaaw loolu dina toog ay at te du laaleek buur bëj-gànnar. <sup>9</sup> Gannaaw gi buur bëj-gànnar

dina dem réewum bëj-saalum, doora dellu réewam.

<sup>10</sup> «Ay doomam yu góor nag dinañu waajal xare, dajale gàngoor yu takku. Ñu jubal, bëtt, jàll nim wal, daldi ñoqli, songi noon ba ca dëkk ba ñu wëralee tata.

<sup>11</sup> «Buur bëj-saalum dina sigiñu, songi buur bëj-gànnar. Kooku waajal mbooloom xare mu mag, waaye mbooloo moomu dees na leen teg ci seen loxoy noon. <sup>12</sup> Mbooloo moomu dees na leen faagaagal, buur bëj-saalum di ca réy-réylu. Dina rey ay junniy nit nag, waaye du ko taxa am ndam. <sup>13</sup> Li ko waral mooy buur bëj-gànnar day dellu waajalaat mbooloo mu ëpp ma jiitu. Bu amee ay at dina dikkaat, ànd ak mbooloom xare mu mag ak ngànnay lu takku. <sup>14</sup> Jamono yooyu ñu bare dinañu jógal buur bëj-saalum, te ay nit ñu soxor ñu bokk ci saw xeet dinañu fippu, ni ko peeñu indee, waaye duñu ko man. <sup>15</sup> Buur bëj-gànnar dina ñew yékkati ay jal, gaw dëkk bu ñu wëralee tata, nangu ko. Mbooloom xarey bëj-saalum ak seen ñeyi xare duñu leen mana të. Duñu am doole ju ñu leen tëwe. <sup>16</sup> Ki leen di song dina leen def li ko soob, ndax kenn du ko të. Dina toog ci réew mu taaru ma†, te am dooley tas ko. <sup>17</sup> Dina fas yéenee dikk ak dooley nguuram gépp, ba dëgéral digganteem ak buur bëj-saalum. Da koy may doomam soxna, ngir di ko fexee sànk. Waaye loolu du sotti, ndax pexe ma du joy. <sup>18</sup> Gannaaw loolu dina wuta moom fa féeteek dun ya, ba nangu ca ay réew, waaye dina am njiitu xare lu dakkal jëfi réy-réyloom ji muy torxale, ba fey ko añaam. <sup>19</sup> Bu loolu weesee dina walbatiku dal ci dëkk yi ñu wëralee tata ci biir réewu boppam, waaye du sotti. Day daanu, ne mes. <sup>20</sup> Ki koy wuutu dina yebal kuy foqati ay galag yu ñuy yokke puukarey nguur gi, waaye du yàgg dara, ñu faagaagal ko ci sutura, te du doon ci xare.»

### *Buur bëj-gànnar ëpp nay loxo*

<sup>21</sup> «Ku siblu moo koy wuutu, ku yel-loowul darajay nguur. Day duggsi ndànk,

\* **11:5** 11.5 buur bëj-saalum: réewum bëj-saalum bii ñuy wax buuram, Misra la. Réewum bëj-gànnar di Siri.

† **11:16** 11.16 réew mu taaru ma: Israyil la. Seetal it ci 11.41.

lal ay pexeem, ba nangu nguur gi. <sup>22</sup> Mboooloo xare yi dinañu def um wal nig dex, dal ci kawam, waaye dees na leen rajaxe, ñook genn kilifay mbooloom kóllèreg Yàlla gi. <sup>23</sup> Gannaaw bu ñu wóllèranteek moom, dina wor. Dina gëna am doole, te amul mboooloo mu bare. <sup>24</sup> Day dugg ndànk ba ca biir gox ya gëna woomle ca diiwaan ba. Dina fa def lu ay baayam aki maamam masula def. Dina lël ay réew, séddale ay farandoom alal jaak koom ga. Dina lal pexe yu mu songe ay tata, waaye loolu ab diir lay doon.

<sup>25</sup> «Bu loolu weesee dina ànd ak mboooloo mu bare, daldi yebook doole ak pastéef ci kaw buur bëj-saalum. Buur bëj-saalum waajal xare, ànd ak mboooloo mu réy te bare doole lool, waaye sottiwul ndax pexe yu ñu koy lalal. <sup>26</sup> Ci biir loolu ay nit ñuy bokk ak buur bëj-saalum ndab ñooy sànk buur bëj-saalum, ba mbooloom jóoru, ñu bare tēdd. <sup>27</sup> Ñaari buur yi dinañu nas lu bon ci seen xol; di bokk ndab tey waxantey fen. Waaye seeni pexe du mujj fenn, ndax du fekk muj ga jot. <sup>28</sup> Gannaaw gi buur bëj-gànnar dina dellu réewam, yóbbaaale alal ju takku. Dina fexeel mbooloom kóllère gu sell gi†, doora ñibbi réewam.

<sup>29</sup> «Bu àpp bi jotee, buur bëj-gànnar dina dal ci kaw réewum bëj-saalum. Waaye boobu yoon du deme na woon. <sup>30</sup> Ay boroom gaal yu mag dinañu jóge sowu, songsi ko, ba tax mu xàddi, ba dēpp. Mu daldi mer lool, sippi ko mbooloom kóllère gu sell gi, tey ànd ak ñi dēddu kóllère gu sell gi. <sup>31</sup> Ay xarekat yu mu yebal dinañu dem teddadil jaamookaay, bi ci tata ji; dinañu dakkal sarax si ñu fa saxal fàww, ba noppi teg fa lu siblu§ luy jur yàqute. <sup>32</sup> Ñi sàmmul kóllèreg Yàlla ay nax la leen di fàbbee, waaye askan wi ràññee seen Yàlla, pastéef lañuy jēfeji. <sup>33</sup> Te it boroom xel yu rafet yi ci mboooloo mi dinañu gindi ñu bare. Nattu dina leen dikkal ab diir; ñii saamar jaar ci seen kaw, ñii ñu lakk leen, ñee ñu nangu seen alal, tēj leen.

<sup>34</sup> Te bu leen nattu dikkalee, ndimbal lu néew lañuy am, ndax ñu bare naaféq lañuy fareek ñoom. <sup>35</sup> Ñenn ci boroom xel yu rafet yi dinanu jaare ci nattu yu leen di sellal, fóot leen ba ñu set wecc, ba keroog mujug jamono. Àpp ba nag des na.

<sup>36</sup> «Buur bi dina def lu ko soob. Dina réy-réylook a damu, ba weesale boppam tuur yépp, te dina wax gilaawaali jème ci Yàlla ji sut lépp. Dina am ndam nag ba keroog sànjum Yàlla ñoral ko. Li ñu dogal déy dina am. <sup>37</sup> Buur bi du faale tuuri maamam, du faale tuur mi jigéen ñi sopp\*. Du faale menn tuur, ndax day damu ba weesale boppam lépp.

<sup>38</sup> Xanaa kay tuur mi yor kaaraangey tata yi lay jaamu, muy tuur mu ay maamam xamul woon. Dina ko jaamoo wurus ak xaalis ak xeer yu jafe ak yeneen gànjar.

<sup>39</sup> Tuuri jaambur yooyu lay doolewoo, di song dēkk yi ñu wëralee ay tata. Ku ko nangul, mu teral la, def la kilifag ñu bare, ba noppi yoole la ay suuf. <sup>40</sup> Ca mujug jamono buur bëj-saalum dina fenqoo ak buur bëj-gànnar. Te itam buur bëj-gànnar dina mel ni ngëlaani, ne milib ci kawam, ànd ak watiiri xare aki gawar ak gaal yu mag yu bare. Dina dugg ci ay réew, bëtt, jáll nim wal. <sup>41</sup> Gannaaw loolu dina dugg ci réew mu taaru ma, te ñu bareey daanu. Waaye Edomeen ñaak Mowabeen ñaak njiiti Amoneen ñi dinañu rēcc. <sup>42</sup> Dina teg loxoom yeneen réew, te réewum Misra sax du ca mucc.

<sup>43</sup> Dina aakimoo alali Misra, muy wurus, di xaalis ak mboolem gànjar. Waa Libi ak waa Kuus it dinañu ko nangul. <sup>44</sup> Waaye nag xibaar dina bawoo penku ak bëj-gànnar, tiital ko lool. Noonu mu jóg ak xadar, rey ñu baree bare, faagaagal leen.

<sup>45</sup> Dina samp xaymay kër buur ci diggante géej geek tund wu taaru wu sell wa†. Waaye dina dee, te kenn du ko taxawu.»

## 12

### *Mujug jamono taxaw na*

† **11:28** 11.28 mbooloom kóllère gu sell gi bànni Israyil la. § **11:31** 11.31 lu siblu: seetal ci 9.27. \* **11:37** 11.37 tuur moomu lañu gëmoon ne man naa nangul am njur. † **11:45** 11.45 tund woowu Yerusalem la.

<sup>1</sup> Malaaka ma waxati ma, ne ma:  
«Jamono yooyu ci la Mikayel,  
malaakam wattukat mu mag,  
miy taxawu sa mbooloo, di jóg.  
Muy jamonoy njàqare ju masula am,  
cosaanal xeet yi ba tey jii.  
Bu keroogee sa bokk yay mucc,  
di ñi ñu bind ci téereb dund bi.

<sup>2</sup> Ñu baree ngi nelaw,  
keroog ñu yewwoo fa pëndub suuf.  
Ñenn ña nara dund fàww,  
ña ca des aña gacceek njàqare fàww.

<sup>3</sup> Ña rafet xel leer nàññ  
ni leeraayu déndub asamaan.  
Ñi doon xiir mbooloo mi ci ngor  
ne boyy niy biddiww, ba fàww.

<sup>4</sup> «Yaw nag Dañeel, dencal kàddu yii,  
muy kumpa te nga tëj téere bi, tay ko ba  
mujug jamono jub. Su keroogee ñu bare  
dinañu gëstu fu ne, ba xam-xam yokku.»

### *Dañeel gis na ñaari malaaka*

<sup>5</sup> Noonu man Dañeel, may xool ci biir  
peeñu mi, daldi yem ci ñeneen ñaar ñu  
taxaw, séq dex gi. <sup>6</sup> Kenn ki wax ak ka  
sol mbubbam wëñ gu ëccu ba sew, te  
taxaw ca kaw dex ga, ne ko: «Ana fu  
kéemaan yiy yem?» <sup>7</sup> Ma dégg ka sol  
mbubbam wëñ gu ëccu te taxaw ca kaw  
dex ga. Ma nga yékkati loxo ndijoor baak  
bu càmmoñ ba te naa: «Giñ naa ko ci  
Kiy Dund fàww ne ñetti jamonook genn-  
wàll lay doon. Xew-xew yooyu yépp a ngi  
dakk keroog bu dooley mbooloo mu sell  
mi jeexee tàkk.»

<sup>8</sup> Maa ngi ciy dégg waaye xawma lu  
muy tekki. Ma ne: «Sang bi, ana nu  
xew-xew yooyu di mujje?» <sup>9</sup> Mu ne ma:  
«Dañeel, demal rekk, ndax mbir yii dees  
koo làq, dëxëñ ko, ba keroog muj ga  
taxaw. <sup>10</sup> Ñu bare dees na leen sellal, fóot  
leen ba ñu set wecc. Waaye ñu bon ñi wéy  
di bon, te kenn du ci xam liy xew, teewul  
ñi rafet xel dinañu ko xam. <sup>11</sup> Jamono  
ja ñuy dakkal sarax si wara sax fàww, di  
keroog ba ñuy taxawal lu siblu\* lay jur  
yàqute, junniy fan ak ñaar téeméer ak  
juróom ñeent fukk (1 290) dina ca topp.  
<sup>12</sup> Ndokklee ku muñ nag diiru junniy fan  
ak ñetti téeméer ak fanweer ak juróom

\* **12:11** 12.11 lu siblu: seetal ci 9.27.

(1 335). <sup>13</sup> Waaye yaw Dañeel, muñal ba  
fa muy mujje. Su keroogee fekk la nelaw,  
doora jóg jël sab yool, ca mujug jamono.»

## Téereb Yonent Yàlla Ose

<sup>1</sup> Kàddug Aji Sax jii moo dikkaloon Ose, góor giy doomu Beerri, ci janti buuri Yuda, Osiyas, ak Yotam ak Axas ak Esekiya, ak ci janti buurub Israyil Yerbawam doomu Yowas.

### *Njabootu Ose misaal la*

<sup>2</sup> Ba Aji Sax ji tàmbalee yóbbante Ose kàddoom, Aji Sax ji da ne ko: «Demal takki jabaru gànc, nga am ca doomi ngànctu, ndax réew maa ngi gànctu ngànctu gu réy, dèddu ma man Aji Sax ji.»

<sup>3</sup> Ose dem takki Gomer doomu Diblayim. Mu ëmb, gannaaw gi mu am doom ju góor.

<sup>4</sup> Aji Sax ji ne ko: «Tudde ko Yisreel\*. Des na tuuti dinaa mbugal askanu buur Yewu ndax deret ji ñu tuur ci Yisreel. Dinaa jeexal nguug Israyil. <sup>5</sup> Su bés baa maay damm ngànaayu Israyil ca xuru Yisreel.»

<sup>6</sup> Mu dellu ëmb, gannaaw gi mu am doom ju jigéen. Aji Sax ji ne: «Tudde ko Lo Ruwana» (mu firi Ki ñu yërëmul), mu ne: «ndax dootuma yërëm waa kër Israyil, dootuma leen baal. <sup>7</sup> Waaye waa kër Yuda, maa leen di yërëm. Seen Yàlla Aji Sax ji laa leen di walloo, waaye дума leen walloo fitt mbaa saamar, mbaa ay xare, mbaa ay fas aki gawar.»

<sup>8</sup> Ba Gomer feralee Lo Ruwana, ëmbaat na, ba am doom, muy góor. <sup>9</sup> Aji Sax ji ne ko: «Tudde ko Lo Ami» (mu firi Du sama ñoñ), mu ne: «ndax dungeen sama ñoñ, te man дума seen dara.»

## 2

### *Aji Sax jeey dalalaat ñoñam*

<sup>1</sup> «Du tere askanu Israyil tollu ni su-ufas géej. Deesu ko mana natt mbaa di ko waññ, te foofa ñu leen noon: “Yeen, dungeen sama ñoñ,” fa lees leen naa: “Yeenay doomi Yàlla jiy dund.”

<sup>2</sup> Askanu Yuda ak askanu Israyil dañuy dellu booloo, daldi tabbal seen bopp genn

kilifa, te dinañu sëq ci réew mi, ndax bés sub Yisreel ba dina réy. <sup>3</sup> Nanga wooye sa bokk yu góor: “Ñoñi Aji Sax ji,” sa bokk yu jigéen, nga ne leen: “Ñi Aji Sax ji yërëm.”

### *Ab layoo rax na kàddug tinu ci Israyil*

<sup>4</sup> «Tiiñal-leen seen ndey, tiiñal-leen ko, ndax moom du sama jabar, te man дума jëkkëram.

Nee ko mu bàyyi gànctu te noppee tegoo màndargam njaaloo.

<sup>5</sup> Lu ko moy ma futti ko ba mu ne dunj, def ko ni bés ba mu juddoo, melal ko ni màndinj.

Maa koy def ni joor gu wow, marloo ko ba rey ko.

<sup>6</sup> Ay doomam, дума leen yërëm, nde doomi ngànctu lañu.

<sup>7</sup> Ñoom seen yaay moo gànctu, ki leen ëmb moo def lu gâccelu, naan: “Damay toppi sama far, yi may jox sama lekk ak samag naan, ak samag wëñ ak sama lëe ak samag diw ak sama biiñ.”

<sup>8</sup> «Moo tax maa ngii di ñage yoonam ay dég, gawe ko ag wurmbal, ba yoon réer ko.

<sup>9</sup> Mooy topp ay faram te du leen dab; mu seet leen, du leen gis.

Su boobaa mu ne: “Naa dellu ca saa jëkkër ju jëkk ja, nde ca laa gënoonu demin.”

<sup>10</sup> Moom xamul woon ne man maa ko doon jox

pepp meek biiñ bu bees beek diw gi, di ko yéwéne xalis ak wurus, ñu di ko jaamoo Baal.

<sup>11</sup> Kon nag fa ngóob jote laay nangoo sama pepp,

fa wittum reseñ jote it laay nangoo sama biiñ bu bees,

maay foqati sama wëñ ak sama lëe, ba mu daan sànge yaramam.

<sup>12</sup> Léegi maa koy futti, mu ne dunj, ay faram di gis,

\* 1:4 1.4 Xuru Yisreellañuy misaale deret ju wale, ndax lañu fa bóomoon ñu bare. Seetal ci 2.Buur ya 9.7-10.31.

te kenn du ko xettli ci sama loxo.

<sup>13</sup> Maay dakkal gépp mbéxam;  
ay mággalam, ay Terutel weeram,  
ay bési Noflaayam, ak mboolem bési  
ndajeem.

<sup>14</sup> Maay foom garabi reseñam aki figgam,  
yi mu noon: “Lii sama peyoor la!  
Samay far a ma ko jox.”

Maa koy def ay dédd,  
rabi àll yi di ko lekk.

<sup>15</sup> Maa koy feyu bési mággal yu tuuri  
Baal,  
ya mu leen daan taalale cuuraay,  
takk ay jaarooki gànjar,  
toppiy faram, fàtte ma.»  
Kàddug Aji Sax jee.

### *Aji Sax ji sàkkuwaat na cofeelu Israyil*

<sup>16</sup> «Moo tax maa ngii di ko naxtaan,  
maa koy yóbbu ca màndiñ ma,  
ba déey ko lu xolam dégg.

<sup>17</sup> Foofa laa koy delloo tóokëri reseñam,  
defal ko xuru Akor\* di buntu yaakaaram.  
Fa la may feeloo na woon

ca janti ndawam,  
ba muy génn réewum Misra.

<sup>18</sup> Bésub keroog,» kàddug Aji Sax jee,  
«Ca nga may wooye “Sama jëkkër,”  
te dootoo ma wooye “Sama Baal.”»

<sup>19</sup> Turi tuuri Baal laay jële ci sa gémmiñ,  
ba deesatul fàttliki seen tur.

<sup>20</sup> Bésub keroog maa leen di fasal kóllère  
ak rabi àll yeek njanaaw yi,  
ak ndégmeent yi.

Fitt ak saamar akub xare it,  
maa koy dagge ci réew mi,  
te maa leen di may tēraayu jàmm.

<sup>21</sup> «Yaw laay digool ba fàww, ab séy,  
te njekk ak njub ak ngor ak yërmande  
ci laay digook yaw ab séy.

<sup>22</sup> Ci kóllère laay digook yaw ab séy,  
ba nga xam Aji Sax ji.

<sup>23</sup> Bésub keroog, maay nangu,»  
kàddug Aji Sax jee,

«maay nangul asamaan,  
moom, mu nangul suuf;

<sup>24</sup> suuf nangul pepp ak biiñ ak diw,  
ñu bokk nangul Yisreel.

<sup>25</sup> Maa koy jëmbatal sama bopp ci réew  
mi,  
maay yërëm ki tuddoon “Ki ñu yërëmul.”  
Ki tuddoon “Du sama ñoñ,”  
ma ne ko: “Yaay sama ñoñ,”  
moom mu ne ma: “Sama Yàlla.”»

## 3

### *Aji Sax ji xiir na Israyil ci cofeel*

<sup>1</sup> Aji Sax ji ne ma: «Demaatal bëggi  
jigéen ju faram bëgg, te muy moykat.  
Bëgg ko ni Aji Sax ji bëgge bànni Israyil,  
doonte dañuy walbatiku ci yeneen yàlla  
te bëgg seen saraxi nàkki reseñ.»

<sup>2</sup> Ci kaw loolu ma takk ko ci fukki poseti  
xaalis ak juróom, ak ñeenti téeméeri  
kiloy lors ak juróom fukk (450). <sup>3</sup> Ma ne  
ko: «Ay fan yu bare ngay toog fi man;  
bul gànctu, bul ànd ak genn góor. Noonu  
laay def ak yaw, man itam.» <sup>4</sup> Ndax  
kat ay fan yu bare la bànni Israyil di  
toog te duñu am buur, duñu am kàngam.  
Duñu rendi sarax, duñu am tuuri doj,  
duñu am xar-sànni, duñu am gällaaji  
kër. <sup>5</sup> Gannaaw loolu bànni Israyil dinañu  
walbatiku, sàkku seen Yàlla Aji Sax ji, ak  
Daawuda seen buur. Ca jant yu mujj ya,  
xolub ragal Aji Sax ji lañuy dikke fi moom,  
akug mbaaxam.

## 4

### *Aji Sax ji tiñal na kilifay ñoñam*

<sup>1</sup> Yeen bànni Israyil, dégluleen kàddug  
Aji Sax ji,  
Aji Sax ji kat moo séq ab layoo ak waa  
réew mi:  
«Du kóllère, du ngor, du gennug ràññee  
Yàlla  
ci réew mi.

<sup>2</sup> Xanaa ay móolu aki wor, bóome, càcc  
ak njaaloo.

Dañoò ràkkaaju, di tuur deret ci kaw  
deret.

<sup>3</sup> Moo tax réew mi wowal,  
mboolem lu fi dëkke ràgg,  
ba ci rabi àll yi, ak njanaaw yi,  
jëni géej itam day réer.

<sup>4</sup> «Waaye bu ci kenn layoo,

\* **2:17** 2.17 xuru Akor mooy xuru Musiba. Seetal ci *Yosuwe* 7.24-26.

bu ci kenn sikke,  
ndax sa bokk yee mel ni ñuy layook  
sarxalkat yi.

<sup>5</sup> Dingen tērēf bëccëg,  
yonent yi ànd ak yeen tērēf guddi,  
te maay sànk seen ndey.

<sup>6</sup> Sama ñoñ a sànk ndax ñàkka xam;  
yeen, xam-xam ngeen gàntal,  
ma gàntal seenug carxal.  
Yeena fàtte seen yoonu Yàlla,  
man it maay fàtte seeni doom.

<sup>7</sup> sarxalkat yi ñu gëna baree, gën ma nee  
moye,

seenub sag, gacce laa koy soppi.

<sup>8</sup> Sama saraxi póotum bàkkaari ñoñ  
lañuy dunde\*,

tey yàkkamti ñu def njubadi.

<sup>9</sup> Waaye niki askan wi, niki sarxalkat yi,  
maa leen di dikke seen aña jikko,  
maa leen di fey seeni jëf.

<sup>10</sup> Ñooy lekk te duñu regg,  
di gànctu te duñu giir,  
nde Aji Sax ji lañu noppee topp.

<sup>11</sup> Ngànctu ak biiñ bu yàgg ak bu bees,  
moo yóbbu seenum xel.

<sup>12</sup> Sama ñoñ, seen bant lañuy seeteey,  
seenu yet di leen waxaleey.  
Xelum ngànctu moo leen wacc,  
ñooy gànctu, lajje fa seen Yàlla.

<sup>13</sup> Ca kaw tund yu mag ya lañuy rendee  
ay sarax,  
cuuraay, ñu taale ca tund yu ndaw ya,  
ak ca taatu gii garab gu mag, ba ca gee,  
fa ker ga neexe.

Moo tax seeni doom di gànctu,  
seen séeti doom di jaaloo.

<sup>14</sup> Duma mbugal seeni doom  
ndax li ñuy gànctu  
mbaa seen séeti doom  
ndax li ñuy jaaloo,  
ndax ñoom sarxalkat yi ci seen bopp,  
ay ganc lañuy teggeendool  
te ganc yi ci jaamookaayi xërëm yi,  
ñoom lañuy indeendool jooxe.  
Askan wu amul ug dégg, sànk.

<sup>15</sup> «Yeena ngi gànctu, yeen bànni Israyil,

\* **4:8** 4.8 Seetal ci *Sarxalkat yi* 6.19-22. † **4:15** 4.15 Gilgal bérab la bu ñu daan bokkaalee, ba tur wi mujj taxawe jikkoy dëddu Aji Sax ji. ‡ **4:15** 4.15 Bet Awen: li mu firi mooy kërug ñaawtéef. Muy tur wu waxi kókkali dendale ak Bet El, tur wi firi Kër Yàlla. § **4:17** 4.17 Efrayim, genn la ci giiri Israyil ga ca bėj-gannaar, moom la Ose faral di wooye réewum Israyil gépp.

waaye na Yuda mucc ci googu tooñ.

Buleen dugg Gilgal†,  
buleen yéegi Bet Awen‡  
di giñ ci Aji Sax jiy dund.

<sup>16</sup> Ndegam ni aw nag tēwe ni la Israyil  
tēwe,  
ndax léegi Aji Sax jee leen di foral  
nim xar ci parlu mu ne maww?

<sup>17</sup> Efrayim§ googu laa ne, moo lëngook  
jëmme tuur!

Seetaan leen.

<sup>18</sup> Seenu ñoll giiful sax, ñuy gànctoo  
gànctu,

te gaccée gënal seeni kilifa.

<sup>19</sup> Callweer a leen di wal,  
ñu kersawoo seen jooxey tuur.

## 5

### *Njiiti Israyil lajj nañu*

<sup>1</sup> «Dégluleen lii, yeen sarxalkat yi!  
Teeyluleen, yeen waa kër Israyil!  
Teewluleen, yeen waa kër buur!  
Yeen la àtte bi ñeel.

Ag fiir ngeen tegoon ca Mispa,  
ab caax ngeen laloon ca tundu Tabor,

<sup>2</sup> Fippukat yi gën naño xuus ci seen  
bóome,  
waaye maa leen di yar, ñoom ñépp.

<sup>3</sup> Maa xam Efrayim,  
Israyil laa ne, umpu ma.

Efrayim, yaa gànctu,  
Israyil laa ne, yaa sobeel sa bopp.

<sup>4</sup> Seeni jëf a leen mayul ñu dellu ci seen  
Yàlla,

nde ngelawal ngànctoo wale fa seen biir,  
te Aji Sax ji, faalewuñu ko.

<sup>5</sup> Israyil, ag reewandeem a ko tiiñal,  
Israyil ak Efrayim ñooy fakktaloo seenug  
ñaawtéef,

Yuda it ànd ak ñoom fakktalu.

<sup>6</sup> Seen jur gu gudd ak gu gatt lañuy àndal,  
di seet Aji Sax ji, duñu ko gis,  
te moo leen dëddu.

<sup>7</sup> Aji Sax ji lañu wor,

nde doomi po lañu jur;

Léegi la leen maggalug Terutel weer  
di booleek seen suuf, sànk leen.

*Yàlla dëkk na Israyil ak Yuda.*

8 «Wal-leen bufta gi ca Gibeya,  
jibal liit gi ca Raama  
te yéene ca Bet Awen\*.  
Moytul sa gannaaw, Beñamin.  
9 Efrayim day gental kera bésu mbugal,  
maa xamle ci biir giiri Israyil lu wér péññ.  
10 Kàngami Yuda mujj mel ni  
ñuy toxal màndargam làccu suuf.  
Ci seen kaw laay yuri samam sànj nim  
ndox.  
11 Efrayim lees di not,  
joggati ay yelleefam,  
nde moo dogoo topp yoonu caaxaan.  
12 Man nag ni ñaawat laay def ak Efrayim,  
te ni sànkak laay def ak Yuda.  
13 Ba Efrayim gisee jàngoroom,  
Yuda gis ab danaam,  
Efrayim a dem Asiri,  
yónnee ca Buur Yareb†.  
Waaye manu koo wéral,  
mbaa di ko fajal ab danaam.  
14 Man déy ni gaynde laay mel ak Efrayim,  
ni gaynde gu ndaw laay mel ak waa kër  
Yuda.  
Man, man mii maay xotat, wéy,  
maay yóbbu te kenn du wallu.  
15 Ma daldi ñibbi, ba ñu nangu seenug  
toón,  
sàkku ma.  
Bu ñu jàqee lañuy daw wutsi ma.»

## 6

*Wooteb tuub jib na*

1 Ca ngeen naan: «Nan dellu ci Aji Sax ji.  
Moo nu xotat, te moo nuy wéral.  
Moo nu duma, te moo nuy takkal sunuy  
góom.  
2 Ñaari fan, mu leqli nu,  
ñetteel ba mu yékkati nu,  
nuy dund fi kanamam.  
3 Nan ràññee, di saxoo faale Aji Sax ji.  
Ni jant bu fenk la dikkam wóore,  
ni ab taw la nuy dikkale,  
ni ab tawu mujjantal buy seral suuf.»  
4 «Ana nu ma lay def, yaw Efrayim?  
Nu ma lay def yaw Yuda?»

\* 5:8 5.8 Seetal 4.15. † 5:13 5.13 Yareb man naa tekki «xeexkat.» \* 7:6 7.6 Ki jiite pexe mu bon mi moo fanaanee nelaw ca guddig xawaare ja, bët set mu jóg, joxe ab tegtal, ngir ñu sotal pexe ma.

Te sa ngor di xiinu suba,  
mbaa ab lay, jekki ne mes.  
5 Moo tax yonent yi laa leen di dumaa,  
sama kàdduy gémmiñ laa leen di reye.  
Seen àttee leen di jollil ni ceeñeeru njël.  
6 Ndax ngor laa namm, dub sarax,  
ràññee Yàllaa ma gènal saraxi rendi-  
dóomal.  
7 «Waaye ñoom ca dëkk ba, Adam lañu  
feccee kóllère,  
foofa lañu ma wore.  
8 Galàdd mooy dëkkub defkati ñaawtéef,  
taq ripp ak deret.  
9 Ni saaysaay siy tëroo,  
ni la sarxalkat yi lëkkoo,  
di bóome ca yoonu Sikem.  
Ndaw jëf ju ñaaw!  
10 Ci kërug Israyil laa gis lu yées:  
Fa la Efrayim di gànctoo,  
Israyil googu laa ne moo sobeel boppam.  
11 Yuda yaw it, sam ngóob ma ngay  
taxawe,  
kera bu may tijji sama wërsëgu ñoñ.

## 7

*Israyil mooy mburu mu desee ñor*

1 «Bu may faj Israyil  
foofu ca Efrayim la seeni ñaawtéef di  
feñ,  
ànd ak mbonu Samari seen péey.  
Dañuy njublan,  
sàcc yiy bëtt ci biir kër yi,  
gàngoori saaysaay di songe ci biti.  
2 Taxul ñu jàpp ci seenum xel ne  
seen mboolem jëf ju bon laa bàyyi xel.  
Léegi seeni jëf a leen wër ndombo,  
ne màkk fi sama kanam.  
3 Seenug mbon lañuy bégale buur,  
seeni fen di bégal kàngam.  
4 Ñoom ñépp a diy jaalookat.  
Ñu mel ni taalu mburu bu yànj,  
taal bu lakk-kat ba soxlawula xamb,  
ca tooyal ba, ba kera xóoy bay funki.  
5 Bu sunu buur xewlee,  
kàngam yi naan ba wopp,  
buur tàllal loxo ay ñaawlekat.  
6 Seenub xol lañu waajal nib taal, di tëroo,

Seen lakk-katu mburu fanaanee nelaw\*,  
bèt set taal ba yànj, di fër-fëri.

7 Ñoom ñépp a tàng jérr nib taal,  
te ñooy xoyom seeni njiit,  
seen buur yépp a daanu,  
te kenn ci ñoom woowu ma wall.

8 Efrayim moo jaxasook askani jaambur,  
Efrayim moo di mburu mu ñu walbatiwul  
cib taal.

9 Ay doxandéem a jeexal dooleem, te  
xamu ko,  
aw liir tege ci kawam weex tàll, te yégu  
ko.

10 Israyil, ag reewandeem a ko tiiñal,  
te taxul ñu délsi ci seen Yàlla Aji Sax ji.  
Loolu yépp taxul ñu sàkku ko.

11 Efrayim daa mel ni pitax,  
dofe, ñàkk xel,  
di woo wall Misraak a dem Asiri.

12 Bu ñuy dem, maa leen di laaw samab  
caax,  
niy njanaaw laa leen di woddale fi suuf,  
fa ma dégge seenum ndaje laa leen di  
mbugale.

13 Ngalla ñoom, nde ñoo ma daw,  
yàqute ñeel na leen, nde ñoo ma gàntal.  
Doon naa leen jot  
waaye ñoo ma fenal.

14 Du seen xol lañu ma wooye wall,  
xanaa di salliiru ci seen kaw lal,  
pepp ak biiñ tax ñuy dagg seen yaram†,  
dèddu ma.

15 Maa leen jàngal, dëgëral seeni përeg,  
te man lañuy fexeel lu bon.

16 Bu ñu wañnikoo it, du fi Aji Kawe ji.  
Ni xala gu yolom lañu mel,  
te seeni kàngam ay fàddoo saamar  
ndax seen sànjum làmmiñ,  
te loolu lees leen di reetaane  
ca réewum Misra.

## 8

### *Ku ji as ngelaw, yaay góob ngélén*

1 «Sexleen bufta gi!  
Jaxaay jàyy ci waa kër Aji Sax ji,  
nde ñoo fecci sama kólléerek ñoom,  
samaw yoon lañu gàntal.

2 Man la Israyil xaacu, ne ma:  
“Éy sama Yàlla, maa la ràññee!”

† 7:14 7.14 Ñi daan jaamu Baal mi ñu jiiñ ne mooy nangul suuf, ñoo aadawoo woon di dagg seen yaram, di tuur seen deret ci suuf, ngir foog ne loolu mooy tax seen mbey nangu. \* 8:5 8.5 jëmmu wëllu wi: seetal ci 1.Buur ya 12.25-30.

3 Israyil a xalab lu baax,  
ba ab noon dàq ko.

4 Ñoo fal ay buur te du sama ndigal,  
ñoo tabb ay kàngam, te yéguma.  
Seen xaalis ak seen wurus lañu sàkke  
jëmme tuur,  
muy seen sànkute.

5 Yeen waa Samari, seen jëmmu wëllu wi\*  
dàqu na!

Sama mer tàkkal na leen.  
Lu ngeen deeti xaar ci mucc ayib?

6 «Israyil la lii jóge,  
te ab liggéeykat moo ko sàkk.  
Kon lii du Yàlla!  
Ay tojit la wëlluw Samari di mujje.

7 «As ngelaw lañu ji, ñooy góob ngélén.  
Gub du jóg, pepp du focci,  
te bu pepp amoon it,  
jaambur a koy wonn.

8 Dees na wonn Israyil;  
tey ñu ngi ci biir xeeti jaambur yi,  
mel ni ndab lu kenn buggul.

9 Ñoo demal seen bopp Asiri.  
Mbaamu àll day beru yoonam,  
waaye waa kër Efrayim ñooy jënd ay far.

10 Ci xeeti jaambur ñi lañuy jënde,  
waaye du tee ma dajale leen.  
Léegi ñu tegoo notaangey buur aki  
kàngam.

11 Efrayim a yokk ay sarxalukaay ngir  
moy,  
ñu doon ay sarxalukaayi moyukaay donñ!

12 Naa ko bindal sama fukki junniy  
ndigali yoon,  
yëfi jaambur lees koy jàppe.

13 Ñooy sarxe jur gi ñu may jooxeel,  
lekk yàpp wi,  
Aji Sax ji buggu ci dara.

Maay bàyyi xel ci seen ñaawtéef,  
mbugale leen seeni moy,  
te ñoom Misra lañuy dellu.

14 Israyil moo fàtte ab sàkk-katam,  
di tabax kër yu yànj.  
Yuda moom yokki dëkk yu tata wër.  
Maay yebal sawara ci kawi dëkkam,  
mu xoyom ay tataam.»



## 9

*Yoonu ngàllog Israyil taxaw na*

<sup>1</sup> Yeen waa Israyil, buleen béglu,  
buleen bânneexu ni yeneen xeet yi,  
nde yeena gànctu, dëddu seen Yàlla,  
yeena safoo peyu ngànctu  
ci mboolem daggga ju ñuy bàcce  
pepp.

<sup>2</sup> Ndaxam daggga ak nalukaayu reseñ  
du leen regg,  
te biiñ du leen doy.

<sup>3</sup> Dungeen des ci réewum Aji Sax ji.  
Efrayim, Misra lay dellu,  
te ca Asiri, lu daganul lañu fay lekkeji.

<sup>4</sup> Duñu tuural Aji Sax ji saraxu biiñ,  
te seeni sarax du ko neex.  
Seen ñamu sarax day mel ni ñam  
wu ku nekk fu nit deeye, sobeel,

ba ku ca lekk sobewu\*.  
Seenu ñam, seenub koll lay ñeel,  
waaye du dugg ci kër Yàlla gi.

<sup>5</sup> Ana nu ngeen di def nag, ci bésu ndaje,  
bésub màggal bu Aji Sax ji?

<sup>6</sup> Ñu ngoogu dem ndax tasteg réew mi,  
Misraa leen di fat, Memfis suul leen,  
seen tànnéefu xalis, mbooy mee koy  
nangu,  
te xaaxaam ay saxe seen biiri xayma ya  
woon.

*Fexeel nañu yonent yi*

<sup>7</sup> Bési mbugal dikk na,  
bési añale taxaw na,  
na ko Israyil xam.  
Yonent lañu jappe ab dof,  
ku yor waxyu di ku wéradi,  
ndax seen ñaawtéef gu réy,  
ak seen mbañeel gu tar.

<sup>8</sup> Yonent bi mooy jongrukat  
biy wattul Yàlla, Efrayim,  
waaye ag fiir lees ko lalal  
ci mboolemi yoonam,  
te mbañeel a ngi ci biir kër Yàllaam.

<sup>9</sup> Ñoo sóobu ci xóotey yàqute,  
na woon ca janti Gibeya†,  
te Yàlla mooy bàyyi xel seenug ñaawtéef,  
ba mbugale leen seeni moy.

\* **9:4** 9.4 Bokk ag lekk ci néeg bu nit deeye daan na sobeel ña fa lekk. Seetal ci *Màndiñ ma* 19.14-22. † **9:9** 9.9 Ca Gibeya lañu bóome woon as ndaw, ba ñu mujj dagg ko ay dog yu ñu def firnde, yónnee ko bànni Israyil gépp. Seetal ci *Njiit ya* 19-21. ‡ **9:15** 9.15 Gilgal mooy dëkk bu ñuy misaale jëfi bokkaale. Seetal ci *Ose* 4.15.

*Israyil wor na Aji Sax ji*

<sup>10</sup> «Ni cabbu reseñu biir màndiñ,  
ni laa fekke Israyil.  
Ni ndoortel doomi figg ju ndey ja taawloo,  
ni laa gise seeni maam.

Waaye ñoom ñoo dem Baal Pewor,  
ñoo sédd seen bopp Baal, tuur mu ruslu  
mi,

ba tax leena seexluwu ni kooku ñu sopp.

<sup>11</sup> Efrayim, ab sagam ni picc lay naawe,  
du njurum doom, dub ëmb, du doom ju  
sosu sax.

<sup>12</sup> Bu ñu yaroon seeni doom it,  
maa leen leen di xañ,  
ba kenn du des.

Te it ngalla ñoom, bu ma leen dëddoo.

<sup>13</sup> Ni ma dogule Tir dëkk ba,  
bi jëmbate ci parlu mu naat,  
ni laay dogule Efrayim,  
ba yóbbul ay doomam ab bóomkat.

<sup>14</sup> Aji Sax ji, yool leen!  
Ana loo leen di yool?  
Yool leen biir yu yàqu,  
ak ween yu ne seren.

<sup>15</sup> «Seen gépp mbon moo feeñ ca Gilgal‡,  
te fa laa leen jéppée ndax mbonug seeni  
jëf.

Sama kër laa leen di dàqe,  
te dootuma leen bëgg,  
seeni njiit yépp a diy fippukat.

<sup>16</sup> Fàddees na Efrayim,  
ay reenam wow,  
du meññ benn doom.  
Bu juroon itam, maay rey  
ngëneelu biiram.»

<sup>17</sup> Sama Yàlla moo leen di xalab,  
nde ñoo ko déggalul,  
te ñooy taxawaaluji ci biir xeeti jaambur  
yi.

## 10

*Israyil ñarale na*

<sup>1</sup> Israyil di reseñ gu naat,  
meññal boppam lu ne gàññ,  
te lu meññeef ma gëna yokku,

mu gëna yokkati sarxalukaayi tuur.  
 Lu am réewam gëna baaxle,  
 mu gëna baaxal ay xeri tuur.  
<sup>2</sup> Ñooy boroom xolub jinigalkat,  
 te tey ñooy gàddu seen bàkkaar.  
 Aji Sax ji mooy toj seeni sarxalukaay,  
 tas seen xeri tuur.  
<sup>3</sup> Léegi ñu ne: «Amunu buur,  
 ndax noo wormaalul Aji Sax ji,  
 te su nu amoon buur it, lu mu nu manal?  
<sup>4</sup> Ñooy wax seeni wax,  
 di giñe ay fen yu ñuy fasoo kóllère,  
 ba yoon mel ni gàncaxu tooke  
 ju law ca tooboy tool ya.»  
<sup>5</sup> Waa Samaree ngi am tiitaange ci  
 sèllu wu ñu xelli ca Bet Awen\*,  
 askan wa di tiislu tuur ma,  
 ay xërëmkatam di lox ndax darajay sèllu,  
 ji leen dëddu, dem ngàllo.  
<sup>6</sup> Moom it lees di yóbbu Asiri,  
 defal ko buur bu mag ba ab galag.  
 Gàcce mooy jàpp Efrayim,  
 Israyil laa ne, mooy rus ci mébétam.  
<sup>7</sup> Samari lees di tas, mook buuram,  
 mu mel ni bant buy tēmb di dem.  
<sup>8</sup> Jaamookaay yu kawe ya ca Bet Awen,  
 bàkkaarukaayi Israyil yooyu lees di  
 tas.  
 Ay dég aki dagg ñooy sax ca seeni sarx-  
 alukaay,  
 dees na ne tund yu mag yi: «Mëddleen  
 nu,»  
 te naan tund yu ndaw yi: «Daanuleen ci  
 sunu kaw.»  
<sup>9</sup> «Israyiloo, ca janti Gibeya† nga dala  
 moye,  
 te foofu la waa réew mi tollu ba tey.  
 Luy tee xare dabe nit ñu jubadi ñi ca  
 Gibeya?  
<sup>10</sup> Saa yu ma soobee ma yar leen.  
 Ay xeet ay daje, jógal leen,  
 jéng leen ndax seen ñaari ñaawtéef.  
<sup>11</sup> Efrayim aw nag wu nangu la woon,  
 te sawaroonna bàcc am pepp.  
 Maa ràng loosam wu jekk.  
 Maa takk Efrayim,  
 Yuda gàbb, Yanqóoba rijjil boppam.  
<sup>12</sup> Jiwal-leen seen bopp njekk,

ba góobe ca lu ngor maye.  
 Gàbbleen ag mbooy,  
 sàkku Aji Sax ji jot na,  
 ba kera muy dikk, tawal leen njekk.  
<sup>13</sup> Yeena bey ag coxor,  
 góob ag mbon.  
 Yeena lekk meññeefum fen,  
 nde yeena wóolu seen pexey bopp,  
 ak seen jàmbaar yu bare.  
<sup>14</sup> Am riir mooy jollee ca sa biir gàngoor,  
 sa tata yépp tas, na Salman tase woon Bet  
 Arbel,  
 keroog bésub xare ba,  
 ba ñu jélee ndey, fenqaleek doom, ñu  
 rajaxoo.  
<sup>15</sup> Noonu lees leen di def, yeen waa Betel  
 ndax seen mbon gu réy.  
 Jant a ngay fenk, buurub Israyil dee wett.

## 11

### *Cofeel la Aji Sax ji tontoo fippug Israyil*

<sup>1</sup> «Maa soppoon Israyil ba muy ndaw,  
 Fa Misra laa ko wooye, muy sama doom.  
<sup>2</sup> Lu ñu leen gëna woo,  
 ñu gën maa sore.  
 Ay tuuri Baal lañuy defal ay sarax,  
 te ay xërëm lañuy taalal cuuraay.  
<sup>3</sup> Ndaxam man maa tette Efrayim, fab ko,  
 te ràññeewuñu ne maa leen topptoo.  
<sup>4</sup> Ay goji nit laa leen ñoddee,  
 ay buumi cofeel.  
 Maay ki leen yolomalal ñalaabi ñaam,  
 sègg, leel leen.  
<sup>5</sup> Duñu dellu réewum Misra\*.  
 Waa Asiri ñooy doon seen buur,  
 nde ñoo baña délsi fi man.  
<sup>6</sup> Ab saamar ay wëndeelu ca seen dëkk yu  
 mag,  
 dàjji seen bunti dëkk,  
 ba warax leen ndax seeni mébét.  
<sup>7</sup> Sama ñoñ dañoo làggi ci ñàkke ma  
 kóllère,  
 wooyees na leen fa kaw,  
 te kenn ci ñoom jógul.  
<sup>8</sup> «Efrayim, ana nu ma lay baye,  
 yaw Israyil laa ne, nu ma lay tege ciy loxo?  
 Ana nu ma lay defe ni Atma?»

\* **10:5** 10.5 Seetal ci Ose 4.15. † **10:9** 10.9 Gibeya: seetal ci *Njiit ya* 19-21. \* **11:5** 11.5 Loolu mooy duñu dellu ci njaam ga ñu nekke woon ca Misra. † **11:8** 11.8 Ceboyim ak Atma ñooy ñaari dëkk yu Yàlla boole ak Sodom ak Gomor, dëkk ya ñu dendaloon, tas leen.

Nu ma lay yemaleek Ceboyim†?  
Sama xol a bëpp,  
sama yërmandee yëngu.

<sup>9</sup> Duma wéye di tàkkal sama mer,  
duma yàqteeti Efrayim,  
ndax maay Yàlla, duma nit,  
maay Aji Sell ji ci seen biir,  
duma dikke am sànj.

<sup>10</sup> Dees na topp ci gannaaw Aji Sax ji,  
muy yëmmu ni gaynde.

Mooy yëmmu moos ni gaynde,  
ay doomam di lox, jóge sowu.

<sup>11</sup> Ni njanaaw lañuy loxe, jóge Misra,  
mel nim pitax, bawoo Asiri.  
Maa leen di dëel seeni kër.»  
Aji Sax jee ko wax.

## 12

### *Aji Sax ji layoo na ak Israyil ak Yuda*

<sup>1</sup> «Efrayim, ay fen la ma gawe,  
waa kër Israyil laa ne,  
ñoo ma yéewe ag njublan,  
waaye Yudaa ngi ànd ak Yàlla ba tey,  
di sàmm kóllèreek Ku Sell ki.»

<sup>2</sup> Efrayim mooy sàmmkatub ngelaw,  
yendoo topp ngelawal penku,  
di yokki fen ak fitna,  
fasoo kóllère ak Asiri,  
yónnee yóbbalu diw ba Misra.

<sup>3</sup> Aji Sax ji moo séq ak Yuda ab layoo,  
mooy mbugale Yanqóoba ay jëfinam,  
añale ko ay jëfam.

<sup>4</sup> Ci biiru ndeyam la kii suufoo ab seexam;  
kii moo tollu ci dooleem, bèreek Yàlla.

<sup>5</sup> Kee bèreek malaaka, ba génn ca,  
kee jooy di sàkku aw yiwam.  
Fa Betel la ko fekk,  
te foofa la Yàlla waxeek nun.

<sup>6</sup> Aji Sax ji Yàlla Boroom gangoor yi,  
Aji Sax jee di turu bàkkam.

<sup>7</sup> Yaw nag, ca sa Yàlla nga wara dellu,  
ngor ak njub, sàmm ko,  
te nga saxoo yaakaar sa Yàlla.

<sup>8</sup> Ni Kanaaneen biy jula, ni la Efrayim  
yore màndaxekaayu njublan cib lox-  
oom,  
bëgga naxe.

<sup>9</sup> Efrayim a ngi naan: «Woomle naa,  
maa amal sama bopp alal,

te mboolem samaw ñaq, giseesu ci  
tooñaange ju di bàkkaar.»

<sup>10</sup> «Man Aji Sax ji dale di sa Yàlla ca Misra,  
maa lay dëëlaat ciy xayma,  
na woon ca bésub ndaje.

<sup>11</sup> Maa wax ak yonent yi,  
yokk peeñu yi,  
te yonent yi, maa leen waxyu ay misaal.»

<sup>12</sup> Su Galàdd dee dëkkub defkati  
ñaaawtéef,  
daño tekkiwul dara.

Fa Gilgal lees di rendee ay saraxi yëkk,  
te seeni sarxalukaay ni jali xeer lay mel  
ci ay tooboy tool.

<sup>13</sup> Yanqóobaa dawoon ba réewum Siri,  
Israyil laa ne, moo liggéey ngir am jabar,  
wut jabar tax koo sàmm ag jur.

<sup>14</sup> Ci loxol yonent la Aji Sax ji génnee  
Israyil Misra,  
te ab yonent la sàmmloo Israyil.

<sup>15</sup> Waaye Efrayim moomoo ko merloo,  
naqaral ko.

Deret ji mu tuur la Boroomam di këpp ci  
kawam,  
añub tooñam la koy fey.

## 13

### *Mbugalum fippu ci kaw Aji Sax ji du jaas*

<sup>1</sup> Bu Efrayim daan wax, ñépp ay lox;  
mu amoon daraja fi digg Israyil.  
Waaye moo sikkal boppam ci tuuri Baal,  
ba dee.

<sup>2</sup> Léegi ñu ngi gën di bàkkaar,  
di xellee ci seen xalis jëmmu tuur,  
ay jëmmi xërëm yu ñu sàkke seen  
xareñte,  
lépp di càkkéefu ay liggéeykat,  
te ci ñoom la nit ñi naan:

«Rendikati sarax yaa ngi foon ay  
tuuri wëllu.»

<sup>3</sup> Moo leen tax di naaxsaay ni niiru suba,  
mbaa layub njël,  
mbaa mboob mu naawe dàgga ja,  
mbaa saxar su gillee ci jankub néeg.

<sup>4</sup> «Man Aji Sax ji, fa Misra laa dale di seen  
Yàlla,  
xamuleen Yàlla ju dul man,  
te kenn du musle ku ma moy.

5 Man maa leen ràññee ca màndiŋ ma,  
 ci biir réewum maral.  
 6 Ngeen wètti ba regg,  
 regg, bew, ba tax ngeen fàtte ma.  
 7 Moo tax ma mel ni gaynde ci yeen  
 di tëroo ni segg ciw yoon.  
 8 Maay dajeeek yeen ni rab wu aay  
 wu ñu xañi doom,  
 maay xotti seen mbuusum xol,  
 fa laa leen di yàppe ni gaynde,  
 te rabu àll moo leen di xotat.  
 9 «Israyiloo, yàqu nga,  
 te maa yor sa wall.  
 10 Ana seen buur boog,  
 ba mu xettli leen ci seen mboolemi dëkk?  
 Ana seen njiit yi ngeen sàkku woon, ba ne  
 ma:  
 “Falal nu buur aki kàngam?”  
 11 Ci biir mer laa la falal buur,  
 te ci samam sànj laa ko follee.  
 12 «Takkees na ñaawtéefi Efrayim,  
 rënkees na ay moyam.  
 13 Lu mel ni mititu mat moo dikkal waa  
 jii,  
 te muy doom ju amul xel,  
 ba juddu jot, génnul biiru ndeyam.  
 14 «Man nag maa leen di musal ci njani-  
 iwa?  
 Maa leen di jot ci ndee?  
 Moo yaw ndee, ana say mbas?  
 Yaw njaniiw laa ne, ana sa tooke?  
 Fomm làqu na ma!  
 15 Efrayim moom, su naatee ci biiri  
 bokkam it,  
 fa màndiŋ ma la ngelawal penku\*,  
 ngelawal Aji Sax ji di uppe,  
 bëti ndoxam tëju,  
 ay teenam déy.  
 Kii mooy sèxëtoo ab dencam,  
 ak mboolem lu cay alal.»

## 14

1 Dees na topp waa Samari,  
 nde ñoo fippu ci seen kaw Yàlla.  
 Saamar lañuy fàddoo,  
 seeni doom, ñu rajaxe leen,  
 seen jigéeni wérul, ñu butti.

## *Dëpp, am njéggal*

2 Israyiloo, dellul ci sa Yàlla Aji Sax ji,  
 fakktaloo nga sag ñaawtéef.  
 3 Waajal-leen ay kàddu te dellu ci Aji Sax  
 ji,  
 ne ko: «Baal nu mboolem ñaawtéef  
 te nangul nu,  
 nu yékkati kàdduy màggal  
 yu wuutu saraxi yëkk.  
 4 Asiri du nu xettli,  
 ay fasi xare it, dunu ko war,  
 te dootunu wax lu nu sàkke sunuy loxo,  
 ne ko:  
 “Yaw yaa di sunu Yàlla.”  
 Li nuy wax kay mooy yaw yaay kiy yërëm  
 jirim.»  
 5 Aji Sax ji nee: «Maay garabal seenug  
 déggadi,  
 maa leen di bëggal sama bopp,  
 nde mereetuma leen.  
 6 Maay mel nib taw ci Israyil,  
 ñu focc ni tóor-tóor,  
 seeni reen sampu ni garabi Libañ,  
 7 car ya law, yànj nig oliw,  
 xeeñ ni gottub Libañ.  
 8 Ñooy délsi, keppaaroo ko,  
 dellu ji, pepp dundaat.  
 Dañuy giir nig reseñ,  
 am bayre ni biiñu Libañ.  
 9 Yeen Efrayim, lu ma masa séq ak jëmmi  
 tuur?  
 Man maa leen di nangul, di leen wattu,  
 di leen keral ni garab gu naat gu dul ruus,  
 sa meññeef bawoo fi man.»  
 10 Ku rafet xel, na dégg lii,  
 kuy ràññee na ko xam.  
 Yooni Aji Sax ji kat day jub,  
 te kuy jubal jaare ca,  
 ab jàddkat moo cay tërëf.

\* 13:15 13.15 Wetu penku la réewum Asiri féete woon Efrayim, ngelawal penku di taxawe congum Asiri.

## Téereb Yonent Yàlla Yowel

### 1

<sup>1</sup> Kàddug Aji Sax jii moo dikkal Yowel doomu Petuwel.

#### *Njéeréer ak maral jubs na*

<sup>2</sup> Dégluleen, yeen mag ñi, teewluleen, yeen waa réew mi ñépp. Ndax lii mas naa am ci seeni jant, mbaa seen janti maam?

<sup>3</sup> Waxleen ko seen doom yi ngeen jur, doom yi ngeen jur wax ko doom yi ñu jur, doom yi ñu jur wax ko geneen maas.

<sup>4</sup> Ndesu soccet yi la njéeréer yi lekk, ndesu njéeréer yi, seenu tostan lekk, seen ndesu tostan, salleer yi lekk.

<sup>5</sup> Mándikat yee, yewwuleen, jooyoo. Naan-kati biiñ yee, jooyleen biiñ bu bees, bi ñu foqatee ci seen gémmiñ.

<sup>6</sup> Aw xeet a dal ci samam réew, am kàttan, wees ab lim, seeni sell di selli gaynde gu góor, seeni ñaam di ñaami gaynde gu jigéen.

<sup>7</sup> Samag reseñ lañu foom, samag figg lañu xasa xas, ba mu set, ñu sànni, car ya weex tàll.

<sup>8</sup> Neeleen wóoy ni janq bu woddoob saaku, di ko ñaawloo jëkkëram, ja ñu ko dencaloon ba muy lu tuut.

<sup>9</sup> Saraxu pepp ak saraxu tuuru dagg na ca kër Aji Sax ji. Sarxalkat yi, boroom dénkaaney Aji Sax ji, ñu ngi ñaawlu.

<sup>10</sup> Tool yi yàqu yaxeet, suuf sèngéem ciw tiis; pepp yàqu, biiñ bu bees wow, ag diw ñiis.

<sup>11</sup> Yeen beykat yi, rusleen; boroom tóokëri reseñ yi, yuuxooleen, ndax peppum bele baak lors ba, nde ngóob mi sàngu na.

<sup>12</sup> Ag reseñ wow, figg lax, gërënaat, tiir, ak pom, mboolem garabi tool, wow konj.

Mbég daal a rasu doom aadama.

#### *Wooteb koor ak ñaan jib na*

<sup>13</sup> Yeen sarxalkat yi, gembuleen te tiislu, yeen ñi dénkoo sarxalukaay bi, yuuxuleen,

yeen boroom dénkaaney sama Yàlla, dikkleen, sol ay saaku yu ngeen fanaanoo, ngir toroxlu,

nde xañees na seen kërug Yàlla ga saraxu pepp ak saraxu tuuru!

<sup>14</sup> Sellal-leen ag koor, woote am ndaje, wooleen mag ñi, ak mboolem waa réew mi, ca seen kër Yàlla Aji Sax ji, te ngeen woo Aji Sax ji wall.

#### *Bésuub Aji Sax ji dëgmal na*

<sup>15</sup> Céy, bii bés! Bésuub Aji Sax ji moo dëgmal, te ni sànkute gu bawoo fa Aji Man ji lay dikke.

<sup>16</sup> Xanaa du ag lekk a dagg, nuy gis, te mbég ak bannex tukkee sunu kër Yàlla ga?

<sup>17</sup> Aw jiwu wow na, suule ciy donji suuf, dencukaay yi wéet, sàq yi dàjjiku, am pepp wow.

<sup>18</sup> Céy ni mala yiy binnee! Gétti nag yaa ngi jànnaxe, ndax ñàkk parlu, gàtt yi itam loof.

<sup>19</sup> Yaw Aji Sax ji laay woo, sawara moo lekk parluy àll bi; ag daay a xoyom garabi àll bi yépp.

<sup>20</sup> Rabi àll yeet ñu ngi àppaat, jublook yaw, nde wali ndox yee ñiis, te sawara xoyom parluy àll bi.

### 2

#### *Congum noon yi nuyoo na*

<sup>1</sup> Wal-leen bufta ca Siyon, dégtal-leen ab yéene ca sama kaw tund wu sell.

Na waa réew mi mépp lox, nde bésuub Aji Sax jaa ngi dikk te dëgmal na.

<sup>2</sup> Bésuub lëndëmu xàmbaraari guddi gu ne kërueus, mbete bannqanoos bu lale ci kaw tund yi. Gàngoor gu mag te am doolee ngi,

gu ni mel masula am mukk,  
te dootul am feeki at, ba maasoo maas.

<sup>3</sup> Lu leen jiitu, sawara lekk;  
lu leen topp, ag daay xoyom.

Ni toolub Ajjana la réew mi  
ci seen kanam di mel,  
ñu won ko gannaaw,

muy mändiñ mu wéet,  
te kat dara du leen récc.

<sup>4</sup> Seen melo ni melow fas,  
ñuy daw ni fasi xare.

<sup>5</sup> Ni watiiri xare di ker-keree,  
ni lañuy cëppoo ca kaw tund ya,  
mbete sawara wuy lakk boob, di fet-feti.  
Gàngoor gu am doole lañuy dikke,  
làng-déral xare!

<sup>6</sup> Népp a leen di gis, jàq,  
kanam yépp di tàkk.

<sup>7</sup> Niy jàmbaar lañuy songe,  
ni ñeyi xare lañuy yéegé am tata.

Ku nekk ay jubalu yoonam,  
kenn wàccul aw ñallam.

<sup>8</sup> Kenn buuxul moroom ma,  
ku nekk aw sélam lay topp,  
ci biir saan yi lañuy xuus, jàll it,  
te duñu taxaw.

<sup>9</sup> Dëkk bi lañuy song,  
ci kaw tata ji lañuy dukkate,  
ci kaw kër yi lañuy yéeg it,  
te ci palanteer yi lañuy jaare dugg niy  
sàcc.

<sup>10</sup> Bu ñu jubsee, suuf yëngu,  
asamaan rëng-rëngi,  
jant ak weer giim,  
bididiw yi fat seenug leer.

<sup>11</sup> Aji Sax jee y addu fi kanam mbooloom  
xareem,  
dalam ba réy lool,  
te kiy jëfe ndigalam am kàttan.  
Bésuub Aji Sax ji kay moo réy te raglu lool!  
Ana ku ko mana dékku?

### *Dellu ci Aji Sax ji jot na*

<sup>12</sup> «Terewul ba léegi,» kàddug Aji Sax jee,  
mu ne: «Délseeleen seen léppi xol ci  
man,  
boole kook koor aki jooy aki yuux.

<sup>13</sup> Du seeni yére donj ngeen di xotti,  
ngir ñaawlu,  
seenub xol ngeen di xottiwaale, ñaawloo  
ko.

Waññikuleen ci seen Yàlla Aji Sax ji,

mooy boroom yiw ak yërmande;  
mer maa diib, ngor ga bare,  
muy fomm mbugal.

<sup>14</sup> Jombul mu dëpp, fomm,  
bàyyi gannaawam barke,  
ba ci saraxu pepp ak saraxu tuuru,  
ñeel seen Yàlla, Aji Sax ji.»

<sup>15</sup> Wal-leen bufta fa Siyoñ,  
sellal-leen ag koor, te woote am ndaje.

<sup>16</sup> Dajaleleen askan wi,  
sellal-leen mbooloo mi,  
wooleen mag ñi,  
te ngeen dajale gone yi ba ci ñiy nàmp.

Na boroom séet génn ub néegam,  
séet ba génn xaymab céetam.

<sup>17</sup> Diggante buntu néeg bu sell beek sarx-  
alukaay bi,  
sarxalkat yi, boroom dénkaaney Aji Sax  
ji,

nañu fi taxaw jooy;  
nañu ne: «Aji Sax ji, yërëmal sa ñoñ;

bul wacce say séddoo gacce,  
ak ñaawley xeeti jaambur yi.

Lu jar ñuy wax èllëg ci biir askani jaam-  
bur yi,  
naan: “Ñii, ana seen Yàlla ji?”»

### *Aji Sax ji nangu na ñaan*

<sup>18</sup> Aji Sax ji moo fiire am réewam,  
ñeewante ñoñam.

<sup>19</sup> Aji Sax jee àddu, ne ñoñam:  
«Maa ngii di leen yónnee am pepp,  
ak biiñ bu bees akug diw,

ba ngeen regg,  
te dootuma leen gacceel  
ci biir xeeti jaambur yi.

<sup>20</sup> Waa bëj-gànnar, maa leen di soreleek  
yeen,

maa leen di dàq, jëme réew mu maral te  
wéet,

gàngoor ga jiitu jubal géēju penku,  
ga féete gannaaw jubal Ogéēju sowu,  
ba seeni néew gilli, xasaw ba ubale,  
ngir jëf ju réy ji ñu def!»

<sup>21</sup> Yaw suuf, bul tiit, bégal te bannexu,  
nde Aji Sax ji moo def ay jaloore!

<sup>22</sup> Yeen rabi àll yi, buleen tiit,  
parluy àll yi day naat, garab yi meññ;  
figg ak reseñ di baaxee seen xéewal.

23 Yeen doomi Siyon, bégleen,  
te bânneexu ci seen Yàlla Aji Sax ji.  
Moo leen di may taw yu jëkk, muy njekk,  
moo leen di sottil taw yu jëkk,  
ak taw yu mujj, na woon.

24 Dàgga yi day fees ak pepp,  
mbànd yi rembat ak biiñ bu bees aku diw.

25 «Sama mbooloom xare mu réy,  
mi ma yebaloon fi seen biir,  
te ñuy njéeréer yeek seen tostan,  
ak salleer yeek soccet yi,  
maa leen di delloo ati mbey yi ñu leen  
lekkal.

26 Dingeen lekka lekk, ba regg,  
di sàbbaal seen turu Yàlla Aji Sax,  
ji leen defal kéemaan,  
te sama ñoñ dootuñu rus muk.

27 Dingeen xam ne ci biir Israyil laa ne,  
man,  
maay seen Yàlla Aji Sax ji, du keneen,  
te sama ñoñ duñu rus muk.

### 3

#### *Ñépp la Aji Sax ji di sotti ag Noowam*

1 «Gannaaw loolu maay tuur samag Noo  
ci kaw wépp suux,  
seeni doom, góor ak jigéen di biral  
waxyu,  
seeni màggat di gént ay gént,  
seeni xale yu góor di gis ay peeñu.

2 Kera jant yooyu, jaam yi sax, góor ak  
jigéen,  
maa leen di tuur samag Noo.

3 Maay def ay kiraama fi asamaan ak fi  
suuf;  
deret ak sawara ak saxar su jolli.

4 Jant beey soppliku ag lëndëm,  
weer wi doon deret,  
bésub Aji Sax ji doora taxaw,  
bés bu réy bu raglu ba!

5 Su boobaa mboolom ñi woo Aji Sax ji  
wall  
ciw turam,  
ñooy raw.

Tundu Siyon ak biir Yerusalem kay  
fa la aw ndes di ame,  
na ko Aji Sax ji waxe woon,  
te ñi Aji Sax ji woo ñooy bokk ci ñi dese  
bakkan.

### 4

#### *Aji Sax ji tiiñal na nooni ñoñam*

1 «Jant yooyu, ci boobu bés,  
bu ma tijjee wërsëgu Yuda ak  
Yerusalem,

2 maay dajale mboolom xeet yi,  
wàcce leen ca xur wa ñu dippee “Aji Sax  
jeey àtte.”

Fa laay layook ñoom ci mbirum sama  
ñoñ,

mbirum Israyil sama séddoo,  
bi ñu tasaare ci biir xeet yi,  
ak sama mbirum suuf si ñu séddoo.

3 Sama ñoñ lañu tegoo bant,  
xale bu góor, ñu weccikoo ab gànc;  
xale bu jigéen, ñu jaaye biiñ, naan.

4 Yeen it waa Tir ak Sidon,  
ak gox-goxaani Filisti yépp,  
ana lu ngeen joteek man?

Xanaa dama leena def, lu ngeen di feyu?  
Su ngeen dee feyu nag,  
ma gaaw leena këpp seen añu jëf  
ci seen kaw bopp.

5 Sama xalis ak sama wurus, ngeen jël,  
samay denc yu baax, ngeen yóbbu  
ca seeni jaamookaay.

6 Waa Yuda ak waa Yerusalem,  
yeena leen jaay Gereg yi,  
ngir sorele leen ak seen suuf.

7 Maa ngii di leen yékkatee foofa,  
fa bérab ba ngeen leen jaaye,  
te yeen, maa leen di këpp seen peyu jëf ci  
bopp.

8 Seen doom yu góor ak yu jigéen  
laay jaay waa Yuda,  
ñu jaayaat leen waa Saba, doomi réew mu  
sore.»  
Aji Sax jee ko wax!

#### *Wooteb xare jib na*

9 Yégleleen lii ci biir xeet yi: «Waajal-leen  
xare,

yékkatileen ñeyi xare yi,  
na xarekat yépp dikk, songi xare.

10 Seeni illéer ngeen di tégg ay saamar,  
tégg seeni xepp ay xeej,  
te na ku néew doole ne: “Jàmbaar laa!”

11 Dikkleen gaaw, yeen xeet yépp,  
ba fépp daj,  
ngeen bokk daje.  
Aji Sax ji, foofa ngay yebal say jàmbaar.

12 Na xeet yi jóg te songi xare ca xur,  
wa ñu dippee «Aji Sax jee y àtte,»  
foofa déy laay toog di àtte mboolem xeet  
yi,  
ba fépp daj.

13 Dawal-leen sàrt bi, nde ngóob mi ñor  
na,  
dikkleen nal, nalukaayu reseñ bi fees na,  
te mbànd yi rembat na, nde seen bàkkaar  
a réy.

14 Ndaw gàngoori gàngoor ca xuru Àtte  
ba,  
nde bésub Aji Sax jee dëgmal ca xuru  
Àtte ba!

15 Jant ak weer giim,  
bididiw yi fat seenug leer.

16 Aji Sax ji fa Siyon lay ñare,  
foofu ca Yerusalem lay àddoo,  
asamaan ak suuf rëng-rëngi.  
Waaye Aji Sax jee dib rawtu, ñeel ñoñam,  
moo dim tata, ñeel bànni Israyil.

17 «Su boobaa ngeen xam ne maay seen  
Yàlla Aji Sax,  
ji dëkke Siyon, sama tund wu sell,  
Yerusalem day daldi sell,  
doxandéem dootu fa jaare.

*Naataange ñeelati na Israyil*

18 «Bésub keroog tund yu mag yi  
di rogalaat biiñ bu bees,  
tund yu ndaw yi di xelli meew,  
dexi Yuda yépp la am ndox di wale,  
te kër Aji Sax ji, bētu ndox a cay balle,  
di suuxat xuru Akasiya ya.

19 Misra ag ndànd-foyfoy lay doon,  
réewum Edom di màndiñ mu wéet,  
ndax coxor ga ñu soxore waa Yuda,  
nde ñoo tuur deretu jaambur ñu deful  
dara  
ca seenum réew.

20 Yuda lees di dëkke ba fàww,  
Yerusalem ñeel maasoo maas.

21 Seen bakkan bi ma teggilul woon àtteb  
yoon,  
bi ko topp,  
maa koy teggil àtteb yoon, bi ko topp.»  
Aji Sax ji Siyon lay màkkaanoo.



## Amos

<sup>1</sup> Kàdduy Amos a ngi, di boroom jur bu dëkkoon Tekowa\*. Mu am peeñu mu jëm ci Israyil ci janti Osiyas† buurub Yuda ak janti doomu Yowayas, Yerbowam buurub Israyil. Loolu tollu ci ñaari at lu jiitu yëngu-yëngu suuf ba. <sup>2</sup> Mu ne: Aji Sax jee yëmmoo fa Siyon‡, Yerusalem lay àddoo, parluy sàmm si ne faraaas, mbooyum kaw tundu Karmel lax.

### Aji Sax ji mbugal na xeet yi (Saar 1.3—2.16)

<sup>3</sup> Aji Sax ji da ne:

«Ñetti bàkkaar, su ma yeboo ne ñeent,  
laay sikke waa Damaas§,  
te дума fomm seeni дума.  
Ñoo bàcce waa Galàdd bàccukaayi weñ.

<sup>4</sup> Maay yebal sawara seen waa kër Buur Asayel,  
mu xoyom taaxi Buur Ben Addàd.

<sup>5</sup> Maay dàjji bunti dëkkub Damaas,  
faagaagal waa xuru Awen\*,  
boole ca boroom Bet Eden†.  
Waa Siri dugg ngàllo, dellu Kir‡.»  
Aji Sax jee ko wax.

<sup>6</sup> Aji Sax ji nee:

«Ñetti bàkkaar, su ma yeboo ne ñeent,  
laay sikke waa Gasa§,  
te дума fomm seeni дума.  
Ñoo jàpp njaam mbooloom lëmm,  
jalax Edomeen ña.

<sup>7</sup> Maay yebal sawara ca tatay Gasa,  
mu xoyom ay taaxam.

<sup>8</sup> Maay fàkkas waa Asdodd,

fàkkas boroom yetu nguur fa Askalon,  
fél Ekkron,  
ndesu Filisteen ña sànkú.»  
Boroom bi Aji Sax jee ko wax.

<sup>9</sup> Aji Sax ji nee:

«Ñetti bàkkaar, su ma yeboo ne ñeent,  
laay sikke waa Tir\*,  
te дума fomm seeni дума.

Ñoo jàpp mbooloom lëmm, jalax ca  
Edomeen ña,  
te sédduñu ci kólléreg bokk.

<sup>10</sup> Damay yebal sawara ca tatay Tir,  
mu xoyom ay tataam.»

<sup>11</sup> Aji Sax ji nee:

«Ñetti bàkkaar, su ma yeboo ne ñeent,  
laay sikke waa Edom†,  
te дума fomm seeni дума.

Ñoo toppe seen bokki bànni Israyil saam-  
màr,

jalax yërmande,  
mer mer mu dul meddi  
ak xadar ju dul giif mukk.

<sup>12</sup> Maay yebal sawara fa Teman,  
mu xoyomaale tatay Boccra‡.»

<sup>13</sup> Aji Sax ji nee:

«Ñetti bàkkaar, su ma yeboo ne ñeent,  
laay sikke Amoneen ñi,  
te дума fomm seeni дума.

Ñoo butti ay jigéeni biir ca Galàdd  
ba ñuy xare ngir yokk seen suuf.

<sup>14</sup> Maay jafal ca kaw tatay Raba§,  
mu xoyom ay taaxam,  
yuux ya jib bésub xare,  
ci biir callweer bésub ngélén.

<sup>15</sup> Seen buur ay duggi ngàllo,  
mooki kàngamam.»

Aji Sax jee ko wax.

\* **1:1** 1.1 Tekowa sorewul ak Yerusalem, péeyu Yuda. Ba bànni Israyil xàjjalikoo ñaari réew gannaaw ba Buur Suleymaan nelawee, réewum Israyil daa péeyoo Samari; réewu Yuda péeyoo Yerusalem. † **1:1** 1.1 Osiyas mooy Asaryaa itam. ‡ **1:2** 1.2 Siyon mooy tund wa kër Yàlla ga nekk ca Yerusalem. Daan nañu ko tudde it dëkku Yerusalem. § **1:3** 1.3 Damaas mooy péeyu réewum Siri. \* **1:5** 1.5 xuru Awen mooy tekki xuru Ñaawtéef. † **1:5** 1.5 Bet Eden mooy kërug Àjjana, muy tekki fii Kërug Xawaare. ‡ **1:5** 1.5 Kir la Arameen ñi cosaanoo. Gannaaw gi lañu sancii réewu Siri. Seetal ci 9.7. § **1:6** 1.6 Gasa benn la ci juróomi dëkki Filisti yu mag; yeneen yi di Asdodd ak Askalon ak Ekkron, ak Gaat. Seetal ci 6.2. \* **1:9** 1.9 Tir dafa mel ni Sidon. Ay dëkk yu mag lañu woon ca réewum Fenisi. † **1:11** 1.11 Edomeen ña nga bàyyikoo fa bëj-saalumu Yuda jàpp penku. Ñu ngi soqikoo ci Esawu, magu Yanqóoba, kon bokki Israyil lañu woon, waaye dañoo faroon ak noonni Israyil. ‡ **1:12** 1.12 Teman ak Boccra ay goxi Edom yu mag la woon. Boccra moo doon péeyu Edom. § **1:14** 1.14 Raba péeyu Amon la woon.

## 2

1 Aji Sax ji nee:

«Ñetti bàkkaar, su ma yeboo ne ñeent,  
laay sikke waa Mowab,  
te дума fomm seeni дума.  
Ñoo lakk yaxi buurub Edom, def ub  
dóom.

2 Maay yebal sawara réewum Mowab,  
mu xoyom tatay Keryot\*.  
Mowab deeye biir riirum xare,  
yuux ak liitu xare jibandoo.

3 Maay dagge fa seen biir seen njiit,  
booleeki kàngamam, bóom.»  
Aji Sax jee ko wax.

4 Aji Sax ji nee:

«Ñetti bàkkaar, su ma yeboo ne ñeent,  
laay sikke Yudeen ñi,  
te дума fomm seeni дума.  
Ñoo gàntal sama yoon man, yoonu Aji Sax  
ji,  
te sàmmuñu sama dogali yoon.  
Seen tuuri caaxaan ya seeni maam top-  
poon  
sànk na leen.

5 «Maay yebal sawara ci kaw Yudeen ñi,  
mu xoyom tatay Yerusalem.»

*Israyil a gëna yellow mbugal*

6 Aji Sax ji nee:

«Ñetti bàkkaar, su ma yeboo ne ñeent,  
laay sikke Israyil,  
te дума fomm seeni дума.  
Ñoo y jaay jaam aji jub ngir xalis bu mu  
leen ameel,  
jaay aji ndóol bu manul fey dàlli carax.

7 Ñoo y dëggaate néew-ji-doole ci pëndub  
suuf,

di xañ way-ñàkk àqam.  
Nit ak baayam di tédde as ndaw,  
di teddadil sama tur wu sell.

8 Yérey tayle yu ñu nangoo ci néew-ji-  
doole sax,  
ñu lal, ne ñàyy ci wetu mboolem sarx-  
alukaay.

Ku leen ameel, ñu feyloo la biiñ,  
naan ca seen biir kër tuur ya.

9 «Ndaxam maa leen reyaloon Amoreen

\* 2:2 2.2 Keryot dëkku Mowab bu réy la woon. † 2:11 2.11 séddoo yooyu nasireen lañu leen di wooye. Seetal ci Mándiñ ma 6.

ñu gudd ña te réy, mbete garab yu mag.  
Ma boor doom ya,  
buur reen ya.

10 Fekk yeen, ma génnee leen réewum  
Misra,  
jaarale leen màndiñ ma diiru ñeent fukki  
at,

ngir ngeen nanguji réewum Amoreen ñi.

11 Maa tabboon ci seen doom yu góor ay  
yonent,

tànnè ci seen xale yu góor ay séddoo†,  
— am déet, yeen bànni Israyil?»

Kàddug Aji Sax jee.

12 «Yeen nag ngeen di naanloo samay  
séddoo biiñ.

Yonent yi, ngeen ne leen: “Buleen biral  
waxyu!”

13 «Maa ngii di yëngal suuf si ngeen joggi,  
ni watiir wu fees aki sabaar di yëngale  
suuf.

14 Rawtu dina réer ku gaaw,  
boroom doole du tala jariñoo dooleem,  
jàmbaar sax du mana rawale bakkanam.

15 Fittkat du taxaw,  
mana daw du taxa raw.  
Ab gawar it du rawale bakkanam.

16 Bésuub keroog, jàmbaar ju èppu fit,  
duññ lay def, di daw.»  
Kàddug Aji Sax jee.

## Aji Sax ji dige na mbugal

## 3

(Saar 3.1—6.14)

1 Dégluleen kàddu gii Aji Sax ji wax  
ci yeen, bànni Israyil, mu jëm ci seen  
mboolem xeet wi mu génnee réewum  
Misra. Mu ne:

2 «Yeen donñ laa ràññee  
ci mboolem askani suuf.  
Moo tax ma di leen mbugal  
ndax seen ñaawtéef gépp.»

3 Ñaar dina ànd te digewuñub dajee?

4 Gaynde dina ñarem ngeer te fàddul?  
Am gaynde gu ndaw dina xiroom paxam  
te jàppul?

5 Picc dina keppu te fiireesu koo?

Am ag fiir dina fettax te jàppul?

<sup>6</sup> Bu liitu xare jibee, waa dëkk ba du tiit a?

Am aw ay dina dab ub dëkk te du Aji Sax ji?

<sup>7</sup> Du lenn moos lu Boroom bi Aji Sax ji def, te déeyu ko yonent yiy jaamam.

<sup>8</sup> Bu gaynde yëmmoo, ana ku dul tiit?

Ana ku saña baña biral waxyu, bu ko Boroom bi Aji Sax ji waxee?

<sup>9</sup> Yéeneleen ca biir taaxi Asdodd ak ca biir taaxi Misra.

Neleen: «Dajeleen ca kaw tundu Samari, ba gis na Samari salfaañoo, ak notaange ga fa nit di daj.

<sup>10</sup> Xamuñu sax def njub.»

Kàddug Aji Sax jee.

«Dañuy jal alalu fitnaak yàqute ci seen biiri taax.»

<sup>11</sup> Moo tax Boroom bi Aji Sax ji ne:

«Ab noon dina gaw seenum réew, néewal leen doole, lël seeni taax.»

<sup>12</sup> Aji Sax ji nee:

«Wallub sàmm ak gàtt bu gaynde fàdd weesul ñaari yeel, dogitu nopp.

Kuy wallu bànni Israyil ga ca Samareet, xanaa dogu basañ, dammitu lal.

<sup>13</sup> Dégluleen te àrtu waa kër Yanqóoba.»

Kàddug Boroom bi Aji Sax jee,

Yàlla ji ci gàngoori xare yi.

<sup>14</sup> «Bés bu may mbugale Israyil ay bàkkaaram,

damay tasaale sarxalukaayi Betel.

Béjjén yi ci cati sarxalukaay ba dog, rot.

<sup>15</sup> Maay mabbaaale këru taax ak këru àll;

kër yu ñu rafetale bëñu ñay dina yàqu, te kër yu bare dootu taxaw.»

Kàddug Aji Sax jee.

#### 4

<sup>1</sup> Dégluleen kàddu gi, yeen jigéeni tundu Samari,

yeena ngi suur ni nagi diiwaanu Basan.

Yeen ñiy torxal néew-ji-doole,

di not aji ñàkk

te naan seeni jëkkër: «Indil ñoll waay, ñu naan!»

\* **4:3** 4.3 Fi ñu ne ca Armon manees na ne yooni tundu Ermon. † **4:4** 4.4 Betel ak Gilgal ay bérabi jaamookaay lañu woon.

<sup>2</sup> Boroom bi Aji Sax ji giñ na ci sellngaam ne: «Ay bés a ngii déy, di ñëw,

dees na leen kor, yóbbu,

ku nekk ci yeen koru niw jën,

<sup>3</sup> ñu diri ko jaarale fu xar-xaru tata gëna jegee,

sànni ko ca Armon\*.»

Kàddug Aji Sax jee.

<sup>4</sup> Aji Sax ji nee:

«Demleen Betel, bàkkaare fa,

dem Gilgal†, bàkkaareeti fa.

Rendileen seenub sarax ca èllëg sa,

joxe seen saraxi fukkeeli alal ca gannaaw èllëg sa,

<sup>5</sup> te ngeen lakk mburu, def ko saraxu cant.

Yégleleen seen saraxi yéene te siwal ko, dégg ngeen?

Ndegam loolu ngeen namm, yeen bànni Israyil.»

Kàddug Boroom bi Aji Sax jee.

<sup>6</sup> «Maa wéetal seeni biir seen dëkkoo dëkk,

dugub ñàkke fépp fu ngeen moom,

te taxul ngeen waññiku fi man.»

Kàddug Aji Sax jee.

<sup>7</sup> Mu ne:

«Maa leen xañ ub taw

bu leen may ngóob ci ñetti weer.

Ma taw ci bii dëkk,

tawuma ca bee.

Wii waar tawlu,

wee waar lax.

<sup>8</sup> Ñaari dëkk ba ñett di deek mar, wuti beneen,

naane fa, te duñu màndi.

Taxul ba tey ngeen waññiku fi man.»

Kàddug Aji Sax jee.

<sup>9</sup> «Maa leen dumaa gub yu yàqu, di saxee saxe,

wowal seeni tool aki tóokër,

garabu figg ak oliw, njéeréer yi lekk.

Taxul ba tey ngeen waññiku fi man.»

Kàddug Aji Sax jee.

<sup>10</sup> «Maa leen yónnee mbas mu mel ni mu waa Misra.

Maa reylu seeni waxambaane ci xare,

jàpplu seeni fas,

gillil xetu néew ya ca seeni dal.  
Taxul ba tey ngeen waññiku fi man.»  
Kàddug Aji Sax jee.

<sup>11</sup> «Maa jàllarbi lenn ci yeen,  
na ma jàllarbee woon waa Sodom ak  
Gomor†.

Ngeen rëcce ca ni gillit  
gu ñu fëkke cib taal.  
Taxul ba tey ngeen waññiku fi man.»  
Kàddug Aji Sax jee!

<sup>12</sup> «Moo tax ma di leen def lii, yeen bànni  
Israyil.  
Gannaaw lii laa leen di def nag,  
waajleena dajeek seen Yàlla, yeen bànni  
Israyil.»

<sup>13</sup> Kii kat moo móol tund,  
di sàkk ngelaw,  
di xamal nit nammeelam.  
Kee di soppi lëndëm ag leer,  
di daagoo kawte ya.  
Kookoo di Aji Sax ji Boroom gàngoor yi.

## 5

<sup>1</sup> Amos ne:  
Yeen bànni Israyil, dégluleen mii pent:  
maa ngi leen di jooy, yeen bànni Israyil!

<sup>2</sup> Fëlëñ!  
Israyil janq ba dootu jógati.  
Ma nga ñu wacc ca suufas réewam,  
te amul ku ko yékkati.

<sup>3</sup> Boroom bi Aji Sax ji déy dafa wax ne:  
«Junniy xarekat ay génne fii,  
téeméer délsi;  
téeméeri xarekat génne fee,  
fukk délsi,  
ñeel waa kër Israyil.»

<sup>4</sup> Aji Sax ji da ne waa kër Israyil:  
«Sàkkuleen ma,  
ba dund.

<sup>5</sup> Buleen sàkkuji fa Betel,  
buleen dem Gilgal\*,  
te buleen jàll Beerseba†.  
Gilgal ay gálloo ngállo;  
Betel neen.»

<sup>6</sup> Sàkkuleen Aji Sax ji,  
ba dund.

Lu ko moy mu ne jippét ci kaw askanu  
Yuusufa,  
lakk waa Betel lakk gu dul fey.

<sup>7</sup> Wóoy yeen ñiy walbati àtteb yoon, mu  
mel ni xay,  
tey jalax dëgg fi pëndub suuf!

<sup>8</sup> Kee sàkk biddiwi lolli ak biddiwi  
cooroon,  
mooy walbati lëndëm bët set,  
def bëccëg di guddi.  
Keyy woo walum géej,  
walal fi kaw suuf.  
Kookoo di Aji Sax ji.

<sup>9</sup> Moo naan musiba jàyy ci kaw boroom  
doole,  
musiba wàccal am tata.

<sup>10</sup> Yeena bañ kuy yedde ci pénc,  
te sib boroom làmmiñ wu maandu.

<sup>11</sup> Gannaaw yeenay not néew-ji-doole,  
di foqati nëbu peppam,  
tabax ngeen kəri boroom barke,  
waaye dungeen ko dëkke.  
Jëmbat ngeen tóokəri reseñ juy tem-temi,  
waaye dungeen naan ca biiñ ba.

<sup>12</sup> Ràññee naa seen bàkkaar yu bare  
ak seen moy yu dul jeex.

Yeenay tooñ aji jub, di geru,  
di xañ néew-ji-doole dëgg ci pénc.

<sup>13</sup> Moo tax ku xelu ci jii jamono ne cell.  
Céy jii jamono ju bon!

<sup>14</sup> Sàkkuleen lu baax, ba lu bon,  
ba dund,  
Aji Sax ji Boroom gàngoor yi ànd ak yeen,  
muy li ngeen wax.

<sup>15</sup> Bañleen lu bon, bëgg lu baax,  
di doxal yoon ci pénc.

Jombul Aji Sax ji Boroom gàngoor yi  
baaxe ndesu askanu Yuusufa.

<sup>16</sup> Moo tax Boroom bi Aji Sax ji, Yàlla ji ci  
gàngoori xare yi, dafa ne:

«Bayaaloo bayaal ubalee ki yuux,  
mbeddoo mbedd riir aki wóoy!  
Dees na woo beykat bi ciy jooy,  
woo jooykati dëj ciy jooyoo.

<sup>17</sup> Tóokëroo tóokër ay ubalee ki yuux.

† 4:11 4.11 Seetal ci *Njàlbéen ga* 19.1-29. \* 5:5 5.5 Gilgal fa la bànni Israyil dugge woon réewum Kanaan gannaaw ba ñu génnee ca njaamu réewum Misra. Seetal ci *Yosuwe* 4.20-22. † 5:5 5.5 Betel ak Gilgal ak Beerseba ay jaamookaay lañu woon.

Foofu fépp maa fay jaare.»  
Aji Sax jee ko wax.

18 Wóoy kuy yàkkamti bésub Aji Sax ji!  
Ana lu ngeen am ci bésub Aji Sax ji?

Dug leer, xanaa lëndëm.

19 Day mel ni kuy daw gaynde,  
ne pemm cim segg, rëcc,  
ñibbi, teg loxoom ca tabax ba,  
jaan ne ko càppit.

20 Xanaa du lëndëm gu dara leerul la  
bésub Aji Sax jiy doon,  
ne këruus, dara lërxatu ca?

21 «Maa bañ, maa sib seeni màggal,  
seen ndajey diine génnliku na ma.

22 Ngeen defal ma saraxu rendi-dóomal,  
mbaa saraxi pepp it, duma ko nangu.  
Seen saraxu jur guy cant ci biir jàmm,  
faalewuma.

23 Xiddileen maak seen coowal jàng.  
Seen powum xalam safu ma.

24 Na yoon wal xanaa, nim ndox,  
te dëgg mel ni wal mu sax.

25 «Yeen bànni Israyil, saraxi gàtt ak  
saraxi pepp,  
ndax man ngeen ko daan indil  
diiru ñeent fukki at ca màndiñ ma?

26 Te ngeen di yékkati seen tuur yi ngeen  
sàkk:

Sikkut, di seen buur, di seen tuur,  
Kiyun di biddiww bu ngeen di jaamu.

27 Maa leen di yóbbu ngàllo ca wàllaa  
Damaas.»

Aji Sax jee ko wax, kookooy Yàlla Boroom  
gàngoori xare yi.

## 6

### *Boroom alal naagu na*

1 Wóoy ña ne finaax ca Siyon,  
wóoy ña naagu fa tundu Samari!  
Ñooy kàngami xeet wi gëna màggeey,  
niti Israyil di leen diis-si soxla.

2 Jáll-leen ba Kalne, xool;  
jóge fa jëm Amat dëkk bu mag ba\*,  
wàcci Gaat, dëkkub waa Filisti ya.  
Ana fu ñu tanee yii réew?

\* 6:2 6.2 Kalne ak Amat ay dëkki Siri lañu woon. † 6:13 6.13 Ñaari béjjén: kàttan lay misaal.

ak fu ñu leen ëpplee suuf?

3 Wóoy yeen ñiy jéema fanq bésub  
njàqare

tey woo nguug fitna!

4 Yeen ñi tédde ci seen lal yu yànj,  
ak a sóonoo seen laltu yu nooy,  
di yàpp mbote yu baax  
ak sèllu yu duuf,

5 yeena ngi foyantoo xalam,  
di fent woy yu ànd ak xalam ni Daawu-  
daay.

6 Yeena ngi jolu seen këlli biiñ,  
di diwoo ngën-gi-diw,  
sànkutey askanu Yuusufa soxalu leen.

7 Moo tax yeenay jiiituji ngàllo ga,  
tëraayu xawaare dakk.

8 Boroom bi, Aji Sax jee ko giñ ci boppam,  
kàddug Aji Sax ji Yàllaa, Boroom  
gàngoori xare yi.

Nee: «Maaka sib réy-réylug askanu  
Yanqóoba,

ba seen kër yu yànj soof ma!

Maay jébbale seen péey ak mboolem li ci  
biir.

9 Su boobaa, fukk ñu làqu ci kër, du leen  
teree dee.»

10 Ku warloo waajal mbokkam mu dee  
dina dugg ca kër ga, ngir yóbbu néew  
ya, te naan ka ca biir-a-biir: «Kenn desul  
foofu ci yaw?» Mu ne ko: «Jeex na,» bëgg  
caa teg baat, mu ne ko: «Déet! Noppil,  
bul tudd turu Aji Sax ji.»

11 Aji Sax jee ngii déy, buy joxe ndigal  
rekk,

daldi tas kër gu mag,  
rajaxe kër gu ndaw.

12 Moo fas dina daw ciy doj a?

Am dees na ràng aw nag, di gàbb doj?

Moona walbati ngeen àtteb yoon, def ko  
tooke,

yoon mel ni xay.

13 Yeena ngi damu ca dëkk ba ñuy wax  
Lodebar (mu firi Amul njariñ) te naan:  
«Xanaa du sunu dooley bopp lanu nangul  
sunu bopp dëkk bu am doole ba ñuy wax  
Karnayim (mu firi Ñaari béjjén)†?» 14 Aji  
Sax ji, Yàlla, Boroom gàngoori xare yi da  
ne:

«Yeen bànni Israyil,  
maa ngii di yékkati weneen xeet fi seen  
kaw,  
ñu not leen, dale ko fa kaw, fa buntu Amat  
ba ca xuru Araba, fa suuf.»

## Aji Sax ji misaal na mbugalu Israyil

### 7

(Saar 7.1—9.10)

*Peeñu mu jëkk mi*

<sup>1</sup> Am na bés Boroom bi, Aji Sax ji won ma am peeñu. Ndeke ma ngay sàkk naaxu soccet. Fekk na ñu góobal Buur, ba gàncax giy saxaat. <sup>2</sup> Soccet yiy lekk gàncaxu réew mi, ba mu bégga jeex, ma ne: «Éy Boroom bi Aji Sax ji, ngalla déet! Askanu Yanqóoba àttan na lii am? Lu néew doole lañu.» <sup>3</sup> Aji Sax ji fomm ko, ne ma: «Kon du am.»

*Peeñum ñaareel bi*

<sup>4</sup> Boroom bi, Aji Sax ji dellu ma feeñu. Ndeke Boroom bi, Aji Sax ji day waaja mbugale ñoñam sawara. Mu xoyom xóotey géej mbàmbulaan, bay waaja xoyom réew ma. <sup>5</sup> Ma ne: «Boroom bi, Aji Sax ji, ngalla taxawal. Askanu Yanqóoba àttan na lii am? Lu néew doole lañu.» <sup>6</sup> Boroom bi Aji Sax ji fomm ko ne ma: «Liitam du am.»

*Peeñum ñetteel bi*

<sup>7</sup> Mu feeñooti ma, gisuma lu moy Boroom bi taxaw ci ab tata, mu ñu natte buumu beteex ba ñu koy tabax. Ma nga yor buumu beteex ca loxoom. <sup>8</sup> Aji Sax ji ne ma: «Amos, ana loo gis?» Ma ne ko: «Xanaa buumu beteex.» Boroom bi ne: «Maa ngii di natte buumu beteex fi digg Israyil, sama ñoñ. Dootuma leen baal dara.

<sup>9</sup> Dees na tas fu askanu Isaaxa di mágale,  
ba gental bérabi Israyil yu sell.  
Maay jèlal askanu Buur Yerbowam saamar.»

*Dàq nañu Amos*

<sup>10</sup> Ba mu ko defee Amaciya sarxalkatu Betel yónnee ca Yerbowam buurub Israyil, ne ko: «Amos a ngi lay fexeel ci digg

Israyil. Réew mi du àttan waxam ji. <sup>11</sup> Mu ngi naan ci xare ngay deeye, te dees na jële Israyil suufam moos, yóbbu ngallo.»

<sup>12</sup> Gannaaw loolu Amaciya ne Amos: «Yaw boroom peeñu mi, dawal, làquji réewum Yuda, nga waxe fa waxyu, am fa loo dunde. <sup>13</sup> Betel gii nag, bu fi waxeeti waxyu, ndax fii jaamookaayu buur la, te it jaamookaayu réew mi la.»

<sup>14</sup> Ba loolu amee Amos ne Amaciya: «Man de dumab yonent te bokkuma ci kurélu yonent. Sama gétt laa yor, te maa ngi topptoo ay tooli figg. <sup>15</sup> Aji Sax jee ma jële fa ma doon sàmme samay gàtt. Moo ma ne: “Demal biralal ma waxyu ci Israyil sama ñoñ.” <sup>16</sup> Léegi nag, déglul kàddug Aji Sax ji. Yaa ma ne: “Bul biral waxyu ci Israyil te bul kebetu ci kaw askanu Isaaxa.” <sup>17</sup> Gannaaw noonu la, Amaciya, Aji Sax ji nee:

“Sa jabar ci biir dëkk bi lay gànctoo, say doom, góor ak jigéen, saamar tëral; sam réew, ñu natte buum, séddoo. Yaw nag, réewum yéefar ngay deeyeji; Israyil, ñu jële kom réewam, gáll ngallo.”»

### 8

*Peeñum ñeenteel bi*

<sup>1</sup> Gannaaw gi Boroom bi, Aji Sax ji dellooti feeñu ma. Ma jekki gis dàmbu meññeef. <sup>2</sup> Mu ne ma: «Amos, ana loo gis?» Ma ne ko: «Xanaa dàmbu meññeef mu ñor.» Aji Sax ji ne ma: «Mbugal ñoral na Israyil, sama ñoñ. Dootuma leen baal dara. <sup>3</sup> Bés sub keroog jàngi kër Buur doon ay jooy.»

Kàddug Boroom bi Aji Sax jee:

«Néew yi, xas,  
fu ne ñu jalax, lépp selaw!»

*Bégge indi na musiba*

<sup>4</sup> Amos ne:  
«Dégluleen lii, yeen jula yiy dëggaate aji  
ñàkk,

di jeexal néew-ji-dooley réew mi,

<sup>5</sup> te naan: “Xanaa mággalu Terutel weer  
wi du jeex

ba nu jaay sunu pepp?

Waay, na bés sub Noflaay jàll gaaw,

ba nu ubbi sàq yi,  
tuutal nattu sol-sotti, diisal doomu nat-  
tukaay,  
tey naxee sunuy màndaxekaayi njoblan,  
<sup>6</sup> ba jënd njaam ku tëlee fey boram  
ak aji ñàkk ju tëlee fey dàlli carax;  
ba cox sax, nu buub, jaay.»

<sup>7</sup> Aji Sax ji giñ na ci turam wi askanu  
Yanqóobay damoo, ne:  
«Duma fàtte muklenn ci seeni jéf.  
<sup>8</sup> Moo tax réew mi nara yëngu moos,  
muy tiisu ku ci dëkk;  
suuf fuddoondoo, fees ni dexu Niil,  
di jóg ak a rës ni dexu Misra.  
<sup>9</sup> Ay bés a ngii déy, di ñëw,»  
kàddug Boroom bi Aji Sax jee:  
«maay sowal jant digg bëccëg,  
lëndëmal suuf bëccëg ndarakàmm.  
<sup>10</sup> Maay soppli seeni màggal ab dëj,  
seen woyoo woy diy jooy.  
Maay wodde bépp lupp saaku yu ñuy  
ñaawloo,  
bépp bopp, ma wat ub nel,  
def ko mu mel ni dëju benn bàjjo bu góor,  
muj ga di bés bu tar.

<sup>11</sup> «Ay bés a ngii déy, di ñëw,»  
kàddug Boroom bi Aji Sax jee:  
«maay wàcce xiif ci réew mi.  
Du doon xiifub dugub mbaa marum ndox,  
kàddug Aji Sax ji lañuy xiif.  
<sup>12</sup> Dees na tambaambalu, géej ba géej,  
bëj-gànnar ba penku,  
di wëraaluy sàkku kàddug Aji Sax ji,  
te deesul dajeeq moom.  
<sup>13</sup> Bésub keroog janq ju taaru jaak  
xale yu góor ya deek mar.  
<sup>14</sup> Ñooñooy giñe tuuri Samari,  
naa: «Giñ naa ko ca tuur may dund ca  
Dan\*,  
giñ ko ca yoonu Beerseba wa dul fey.»  
Dinañu daanu, dootuñu jóg.»

## 9

### *Peeñum juróomeel bi*

<sup>1</sup> Ma gis nag Boroom bi, mu taxaw ca  
sarxalukaay ba.  
Mu ne: «Dóorleen ci kaw jëni  
jaamookaay bi,  
ba kenu yi yëngu,  
te ngeen màbb ko ci kaw boppi ñépp;  
ña mucc, ma reylu ci xare.  
Du kuy fëx ba récc,  
du kuy daw ba raw.  
<sup>2</sup> Bu ñu bëttoon, ba biir njaniiw it,  
fa laa leen di yóotoo.  
Ñu yéeg asamaan,  
ma wàccee leen fa.  
<sup>3</sup> Bu ñu nèbbu woon kaw tundu Karmel  
it,  
fa laa leen di fekk, yóbbu.  
Ñu làqoo ma ca taatu géej,  
ma sante fa jaani géej, mu màtt leen.  
<sup>4</sup> Su ñu demee, diy jaam ñu seeni noon  
jiital,  
fa laay sante boroom saamar, mu bóom  
leen.  
Du bëtú jàmm laa leen di xoole,  
bët bu aay laa leen di xoole moos!»

<sup>5</sup> Boroom bi, Aji Sax ji Boroom gàngoori  
xare yi,  
kiy laal suuf, mu ne soyox seey,  
mboolem lu ci biiram di jooyoo;  
suuf fuddoondoo ni dexu Niil,  
dellu rës ni dexu Misra.  
<sup>6</sup> Kee tabax kaw asamaan néegi biiram,  
samp ub xaddam, yiire suuf.  
Keyy woo walum géej,  
walal fi kaw suuf.  
Kookoo di Aji Sax ji.

### *Mbugal yell na*

<sup>7</sup> «Bànni Israyiloo, xanaa du yeen ak waa  
Kuus laa yemale?»  
Kàddug Aji Sax jee.  
«Xanaa du ni ma leen génnee réewum  
Misra  
laa génnee Filisteen ñi réewum Kaftor,  
génnee ni waa Siri réewum Kir?  
<sup>8</sup> Boroom bi, Aji Sax jaa ngi ne jàkk  
réewum bàkkaarkat mii.  
Maa koy sàнке kaw suuf,  
waaye ba tey дума fàkkas faraaas waa kër  
Yanqóoba.»

\* **8:14** 8.14 Dan la Buur Yerbawam yékkati woon tuur yu ñu jëmmale wëlluy wurus. Seetal ci *1.Buur* ya 12.29-30.

Kàddug Aji Sax jee.

<sup>9</sup> «Maa ngii déy di sant xeetoo xeet,  
ñu gësëm waa kër Israyil,  
ni ñuy gësëme tameb suuf,  
te doj du rot.

<sup>10</sup> Saamar ay rey mboolem sama  
bàkkaarkati mbooloo  
mi naan: “Yàlla du wacc musiba di nu  
jege,  
ba di nu dab.”»

### **Waa kër Buur Daawuda faluwaat nañu**

*(Saar 9.11-15)*

<sup>11</sup> «Bésuub keroog maay yékkati mbaarum  
Daawuda mi joy,  
ba fattaat xar-xar yi,  
defaraat gent bi,  
tabaxaat ko na woon.

<sup>12</sup> Su boobaa bànni Israyil nangu ndesu  
Edom,  
ak mboolem suufi xeet yi ñu ma tudde  
woon.»

Kàddug Aji Sax jee, te moom lay def.

<sup>13</sup> «Ay bés a ngii déy, di ñëw,»  
kàddug Aji Sax jee,  
«kuy gabb dina dab kuy góob,  
kuy nal reseñ dab ka koy ji.  
Biiñ bu bees di rogalaate ca tund yu mag  
ya,

di wale tundoo tund wu ndaw.

<sup>14</sup> Maay tijji wërsëgu Israyil, sama ñoñ;  
ñu tabaxaat seeni gent, dëkke;  
jëmbat seen tóokëri reseñ,  
naan seen biiñ,  
bey ay tool,  
lekk ca meññeef ma.

<sup>15</sup> Maa leen di jëmbat fi seen suuf,  
te deesatu leen déjjatee fi seen suuf  
si ma leen jox.»

Seen Yàlla, Aji Sax jee ko wax.



## Téereb Yonent Yàlla Abdiyas

<sup>1</sup> Peeñum Abdiyas a ngi. Boroom bi Aji Sax ji moo wax lii ñeel askanu Edom\*.

*Lu jëm ci mbugalum Edomeen ñi*

Ab dégtal lanu dégg, mu bawoo fa Aji Sax ji,

ndaw lañu yebal ci biir xeet yi, mu ne: «Jógleen, nu jóg song Edom xare.»

<sup>2</sup> Aji Sax jee ne waa Edom:

«Tuutal leen laay def ci biir xeet yi yeen, ñu xeeblu lool ngeen di doon.

<sup>3</sup> Seen reewande sànk na leen, yeen ñi dëkke xar-xari doj,

te seen dëkkuwaay sore kaw, ba tax leen naa ci seenum xel:

“Ana ku ñu mana daane fi suuf?”

<sup>4</sup> Su ngeen kawee loon nig jaxaay, ba seenum tàgg làqe ci biiri biddiiw it, fa laa leen di wàccee.»

Kàddug Aji Sax jee.

<sup>5</sup> «Su leen ay sàcc dikkalee, mbaa sèxëtookati guddi, yeenakay yàqule!

Waaye xanaa du la leen doy lañuy sàcc?

Su leen wittkati reseñ dikkalee, xanaa dinañu ca wacc ay doom?

<sup>6</sup> Waaye céy ni ñuy sèxëtoojee askanu Esawu!

Céy ni ñu nara jeexaato seeni denc!

<sup>7</sup> Mboolem ñi ngeen fasool kóllère

ñoo leen di waññi ba ca seen kemu réew,

seeni am-di-jàmm ñoo leen di nax ba man leen,

ñiy lekk seenu ñam tegal leen ag fiir ci seeni tànk,

ndax Edom moo amul ag dégg.

<sup>8</sup> «Xanaa du bés sub keroog,» kàddug Aji Sax jee,

«fi Edom laay tukkale boroomi xel, tundu Esawu woowu laay jële luy taxa dégg.

<sup>9</sup> Yeen waa Teman†, seeni jàmbaar ay jàq,

ba mboolem waa tundu Esawu fàddu.

*Lii moo waral mbugal mi*

<sup>10</sup> «Soxore gi ngeen soxore seen mbokk Yanqóoba

moo leen tax di sangoo gâce,

te dees na leen dagg sànni ba fàww.

<sup>11</sup> Bés sub keroog ba ngeen taxawee, janook seen mbokk,

bés sub keroog ba jaambur ñay

yóbbu seen alali bokk,

ay doxandéem song bunti dëkkam,

bay tegoo bant teraangay Yerusalem,

yeen itam, ni noon yooyu ngeen def.

<sup>12</sup> Waruleen woona seetaan ci seen bés sub mbokk,

bés sub njekkaram,

Waruleen woona bége deminu Yudeen ñi

ci seen bés sub sànkute,

mbaa ngeen di réy làmmiñ,

ci bés sub njàqare.

<sup>13</sup> Waruleen woona dugg sama dëkku ñoñ,

ci seen bés sub tiis.

Waruleen woona bokk ci ñiy seetaan seenu ay

ci seen bés sub tiis.

Waruleen woona teg loxo seeni teraanga, ci seen bés sub tiis.

<sup>14</sup> Waruleen woona taxaw fa selebe yoon ya,

di dogale ña rëcce ca ñoom,

waruleen woona delloo ña dese bakkan ca loxol noon ya,

ci bés sub njàqare.

*Bés sub Aji Sax ji xeet yépp la ñeel*

<sup>15</sup> «Bés sub Aji Sax ji déy, dëgmal na, ñeel xeetoo xeet.

Li ngeen def rekk lees leen di def,

seenug pey këppu ci seen kaw bopp.

<sup>16</sup> Yeen waa kër Yanqóoba,

ni ngeen naane sama kaasu mbugal

ca sama kaw tund wu sell,

ni la xeet yépp di naane ba fàww,

di naan ak a jolu ba mel ni masuñoo nekk.

<sup>17</sup> Waaye kaw tundu Siyon la aw ndes di rawe,

te dina doon bérab bu sell,

waa kër Yanqóoba it moomaat seeni moomeel.

\* **1:1** 1.1 Edom mooy xeet wi soqikoo ci Esawu seexu Yanqóoba mi meññ Israyil. † **1:9** 1.9 Teman, sëtub Esawu lañu dippee dëkkub Edomeen ba woon ca bëj-gànnaru réew ma, te moo taxawe fii réewum Edom gépp.

18 Kër Yanqóoba sawara lay doon,  
 kër Yuusufa dib tàkk-tàkk,  
 kër Esawu di boob  
 mu ñuy lakk, xoyom ko,  
 ba kenn du dese bakkan ci kër Esawu.»  
 Aji Sax jee ko wax.

19 «Waa bëj-saalumu Yuda ñooy moom  
 tundu Esawu,  
 waa suufu tund ya moom waa Filisti,  
 ñooy moom itam réewum Efrayim, ak  
 réewum Samari,  
 giirug Beñamin moom diiwaanu Galàdd.

20 Ngallo gay waa Israyil, gàngoor googu  
 ñooy moom  
 réewum Kanaaneen ña, ba ca  
 Sarebta,  
 te ngallo gay waa Yerusalem ca Sefarat,  
 ñooy moom dëkki Negew ca bëj-  
 saalum.

21 Ay xettlikat ñooy yéeg kaw tundu  
 Siyon,  
 ngir yilif tundu Esawu,  
 nguur gi di moomeelu Aji Sax ji.»

## Yunus Ubbite gi

Yonent Yàlla Yunus waa réewum Israyil la woon, te fa la nekkoon ba muy jot ndigalal Yàlla, la ko yebal ca waa dëkk ba ñuy wax Niniw, te féeteek réewum Iraag ci jamonoy tey. Niniw nag bokkul woon ci Israyil. Péeyu Asiri la woon. Waa Asiri askan wu néeg lañu woon, bokkoon ci nooni Israyil yi gënoona aay ci ñoom. Beneen dëkk bi ñuy wax ci téere bii mooy Tarsis. Ci waxinu jant yooyu, Tarsis a nga woon ca catu àddina, soreyaatoo lool ak Israyil ak Niniw.

Ci Tënk:

Saar 1 Yunus gântal na Yàlla ba daw

Saar 2 Yunus ñaan na ci biir njàqareem

Saar 3 Yunus jëfe na ndigal la jibaat ñeel ko

Saar 4 Yunus déggoowul ak Yàlla ci ni mu gise

### *Yunus jot na ndigal lu ko diis*

<sup>1</sup> Am na bés kàddug Aji Sax ji dikkal Yunus, mi Ametay di baayam. Mu ne ko: <sup>2</sup> «Jógal dem Niniw, dëkk bu mag ba, nga rébb leen, ndax seen mbon agsi na ba fi man.»

<sup>3</sup> Yunus nag jóg jëm Tarsis, ngir daw Aji Sax ji. Mu àgg fu ñuy wax Yafa, fekk fa gaal gu mag gu jëm Tarsis. Mu fey njég ga, dugg, ànd ak ña ca nekk, jëm Tarsis, ngir daw Aji Sax ji.

<sup>4</sup> Aji Sax ji itam sànni ngelaw lu réy ca géej ga, muy ngélén lu réy ca géej ga, ba gaal ga nara tas. <sup>5</sup> Ba loolu amee mool ya tiit di yuuxoo, ku nekk di woo sa yàlla wall. Ñu sànni biir géej la ñu yeboon ca gaal ga ngir gëna woyof. Fekk na Yunus wàcc ca suufu gaal ga, tēdd di nelaw ba yàndoor. <sup>6</sup> Ci kaw loolu njiitu mool ya dikk ba ca moom, ne ko: «Yaw, ana looy nelaw? Jógal kay woo sa yàlla wall! Jombul mu geesu nu, ba dunu sànkū.»

<sup>7</sup> Ci biir loolu ku nekk naan sa moroom: «Ayca nu tegoo bant, ba xam musiba mii nu dal, ku nu ko yóbbe.» Ñu tegoo bant, mu dal ca kaw Yunus. <sup>8</sup> Ñu ne ko: «Dinga

nu wax nag ku nu yóbbe mii musiba! Ana luy sa liggéey, ak foo bàyyikook fuy sam réew, ak xeet woo bokk sax yaw?»

<sup>9</sup> Mu ne leen: «Ab Ebrë laa. Aji Sax jiy Yàllay asamaan laay jaamu, moom mi sàkk géej ak jéeri.» <sup>10</sup> Ci kaw loolu nit ña tiit tiitaange lu réy, ne ko: «Yaw, li nga def lu mu doon?» Fekk na Yunus xamal leen ne Aji Sax ji lay daw.

<sup>11</sup> Géej ga nag di gëna sàmbaraax. Ñu ne ko: «Nu nu lay def nag, ba géej gi dalal nu?» <sup>12</sup> Yunus ne leen: «Fableen ma, sànni ci biir géej gi. Kon géej gi dal. Ndax xam naa xéll ne ngélén lu réy lii, maa leen ko yóbbe.» <sup>13</sup> Terewul nit ña joow, joow rekk, wuti tefes, mu të ndax géej ga gëna sàmbaraax ca seen kaw.

<sup>14</sup> Ba loolu amee ñu ñaan Aji Sax ji, ne ko: «Céy Aji Sax ji, ngalla bu nu bàyyi nu sànkū ndax bakkanu nit kii, te bu nu gàdduloo bakkanu jaambur, ndax yaw Aji Sax ji, sa coobare nga def.» <sup>15</sup> Ñu daldi fab Yunus, sànni ca biir géej ga, géej ga giif, ne tekk. <sup>16</sup> Nit ña nag am tiitaange lu gënatee réy ci Aji Sax ji, daldi rendil Aji Sax ji sarax, ba noppi xasal ko aw xas.

## 2

### *Yunus a ngi tinu*

<sup>1</sup> Ci kaw loolu Aji Sax ji yebal jën wu mag, mu wonn Yunus. Mu nekk ca biiru jën wa ñetti bëccëg ak ñetti guddi. <sup>2</sup> Yunus ñaan ci Yàllaam Aji Sax ji, fa mu tollu ca biir jën wa. <sup>3</sup> Mu ne:

Maa jàq, woo Aji Sax ji, mu wuyu ma.  
Ca xóotey njaniiw laa wootee wall, nga dégg ma.

<sup>4</sup> Yaa ma xalab xóotey xolu géej, ndaw ma mëdd ma.

Say wal ak say gannax, lépp a jaare sama kaw.

<sup>5</sup> Man nag ma naan: «Dàqees na ma, ba ma sore la,  
waaye maay dellu gis sa kër gu sell ga!»

<sup>6</sup> Ndox maa ma tanc ba ci put,

xóotey géej mëdd ma,

waag ba laxasu sama bopp.

<sup>7</sup> Ca reeni tund ya laa suuxi,

caabiy suuf féete ma gannaaw ba fàww,

waaye ca kan ma nga jukkee sama  
bakkan,

yaw, sama Yàlla Aji Sax ji.

<sup>8</sup> Noowal bakkan a nga may rècc,  
sama xel ne yarr ci yaw, Aji Sax ji,  
sama ñaan àgg fa yaw,  
ca sa kër gu sell ga.

<sup>9</sup> Ñiy wormaal neenug neen daal,  
ñoo dëddu seen yiw fa Yàlla.

<sup>10</sup> Man nag, ci biir cant laa lay sarxale.

Li ma xas laay sottal.

Wall, fa Aji Sax ji!

<sup>11</sup> Ci kaw loolu Aji Sax ji wax ak jën wa,  
mu goqi Yunus ca tefes ga.

### 3

#### *Yunus fomm na*

<sup>1</sup> Ba loolu wéyee kàddug Aji Sax ji  
dikkal Yunus ñaareel bi yoon. Mu ne  
ko: <sup>2</sup> «Jógal dem Niniw, dëkk bu mag ba,  
nga yegge leen kàddu gi ma lay dénk.»  
<sup>3</sup> Yunus jóg dem ba Niniw, muy la ko Aji  
Sax ji wax. Niniw nag def dëkk bu réya  
réy, ba doxub ñetti fan a koy wër.

<sup>4</sup> Ba mu ko defee Yunus tàmbalee wër  
bés bu jëkk ba, di yéene naan: «Ñeent  
fukki fan gannaaw tey Niniw dina tas.»

<sup>5</sup> Waa Niniw nag gëm Yàlla, daldi yéene  
koor. Ci biir loolu ku nekk sol ay saaku,  
di ko ñaawloo, dale ko ca ka gën di  
mag, ba ca ka gën di ndaw. <sup>6</sup> Mbir ma  
àgg ca buurub Niniw. Mu ne ñokket,  
jóge ca ngànguneem, ne futeet mbub-  
bam buuram, sàngoo saaku, daldi toog  
cib dóom, di ko toroxloo. <sup>7</sup> Ci kaw loolu  
mu yéenelu dogal bii ca Niniw, ne: «Ci  
ndigalal Buur aki kàngamam; muy nit  
aku jur, gu gudd ak gu gàtt, bu ci dara  
dugg ci seen gémmiñ. Buñu lekk, te ndox,  
buñu ko naan. <sup>8</sup> Na nit ak jur sàngoo  
saaku te ñu woo Yàlla wall lu ñu man.  
Na ku nekk dëddu jëfinam ju bon ak jëfi  
coxoram. <sup>9</sup> Jombul Yàlla dëpp ba fomm,  
daldi dëddu tangooru meram, ba dunu  
sànk.»

<sup>10</sup> Yàlla nag gis seeni jëf, gis na ñu  
dëddoo seen jëfin ju bon. Yàlla daldi  
fomm mbugal ma mu leen naraloon, ba  
mujju koo def.

### 4

#### *Aji Sax ji yedd na Yunus*

<sup>1</sup> Ba loolu amee Yunus mer mer mu réy,  
ba xol bay bax. <sup>2</sup> Mu ñaan Aji Sax ji, ne ko:  
«Céy Aji Sax ji, xanaa du lii laa waxoon  
ba ma génnagul sama réew? Moo taxoon  
ma jëkka daw, jëm Tarsis! Ndax xamoon  
naa ne yaw Yàlla yaay boroom yiw ak  
yërmande, sa mer a diib, sa ngor bare,  
ngay fomm mbugal. <sup>3</sup> Léegi nag Aji Sax  
ji, rikk jëlal sama bakkan rekk, ndax dee  
sax a ma gënal dund!» <sup>4</sup> Aji Sax ji ne ko:  
«Waaw, mbaa yaa yey am xol bu tàng ci  
loolu?»

<sup>5</sup> Yunus daldi génn dëkk ba, dem toogi  
fa féete dëkk ba penku, mbaaral fa bop-  
pam, toog ca keppaar ga, di seet nu dëkk  
bay mujje. <sup>6</sup> Ba mu ko defee Aji Sax ji  
Yàlla yebal ag lawtan, mu law, tiim Yunus,  
keral boppam ngir xettli ko. Yunus bég  
mbégte mu réy ca lawtan ga. <sup>7</sup> Ca èllég sa,  
ba jant bay fenk, Yàlla yebal aw sax, mu  
song lawtan ga, mu wow. <sup>8</sup> Naka la jant  
ba fenk, Yàlla yebal ngelawal penku lu  
tàng jérr, jant ba jam boppu Yunus, ba mu  
xawa xëm, bëggatul dara ci bakkanam.  
Mu naan: «Dee sax a ma gënal dund!»

<sup>9</sup> Ci kaw loolu Yàlla ne Yunus: «Waaw,  
mbaa yaa yey am xol bu tàng ci lawtan  
gi?» Mu ne: «Maa yey am xol bu tàng  
ba dee sax!» <sup>10</sup> Aji Sax ji ne ko: «Waaw  
yaw, yaa ngi xalaat lawtan gii nga sonnul,  
lawaloo ko; guddi la sax, guddi ga ca topp  
mu dee. <sup>11</sup> Man nag, Niniw, dëkk bu mag  
bii ëmb lu ëpp fuuf téeméeri junniy nit  
ak ñaar fukk (120 000), ñu ràññeewul  
seen ndijoor ak seen càmmoñ, ak mala  
yu bare, дума leen xalaat?»

## Téereb Yonent Yàlla Mise

<sup>1</sup> Kàddug Aji Sax jii moo dikkaloon Mise miy waa Moreset, ca janti Yotam ak Axas ak Esekiya, buuri réewum Yuda, na seen nguur topplantee. Lii la Mise gis ci mbirum Samari ak Yerusalem\*.

*Aji Sax ji yékkati na kàddug tuuma*

<sup>2</sup> Dégluleen, yeen, xeetoo xeet, teewlul, yaw àddina ak li ci sa biir, ba Boroom bi Aji Sax ji seedeel leen tuuma, Boroom beey àddoo fa màkkaanam mu sell ma.

<sup>3</sup> Aji Sax jaa ngii di génne ca bérabam ba, mooy wàccsi, daagoo kawtey suuf.

<sup>4</sup> Tund ya mu joggi da naan soyox seey, xur ya xar, wàyyi ni dax ju jege sawara, def ni ndox mu wale kaw mbartal.

<sup>5</sup> Bàkkaaruu Yanqóobaa waral lii lépp, moyi Israyil googu la.

Ana luy bàkkaaruu Yanqóoba?

Da dul Samari?

Ana fuy bérabi jaamookaayi xërëm ci Yuda?

Da dul Yerusalem?

<sup>6</sup> «Maay saam Samari, def ko jalu tojti ci mbooy gi,» la Aji Sax ji wax.

«Maa koy def jëmbatukaayub reseñ, maay yuri ay doji tabaxam ca xur wa, ñori ay kenoom.

<sup>7</sup> Seen jëmme tuur yépp ay rajaxoo, te mboolem seen peyoor yu sobewu day lakk ba jeex.

Maay tas tasar mboolem seen jëmme xërëm†, seen peyi gànc a leen ko may, kon na ko seen moroomi gànc feyeekoo.»

*Ñaawlu dikkal na Yuda*

<sup>8</sup> Lee ma tax di jooy ak a yuuxu, ne dunj, deme tànci neen, di ko ñaawloo.

Naa yuuxu nig till,

naa sab sabum looy ndaxu naqar.

<sup>9</sup> Góom bi Aji Sax ji teg Samari kat amul paj,

te moo law ba Yuda,

àkki ba buntu Yerusalem, ca saay bokk.

<sup>10</sup> Buleen ko nettali fa Gaat‡,

buleen jooy benn yoon.

Xalanguleen fa pëndub suuf sa ca Bet Leyafras,

di ko ñaawloo.

<sup>11</sup> Yeen waa Safir\*, jàll-leen,

ak gacce ak yaramu neen.

Waa Caanan† sañuñoo génn,

te wall du bawoo fa waa Bet Eccel‡, ñay jooy seeni néew.

<sup>12</sup> Waa Marot a mar jàmm,

te aw ay a wacce fa Aji Sax ji,

ba agsi buntu Yerusalem§.

<sup>13</sup> Yeen waa Lakis\*, takkleen fasi dawkat ak watiir.

Yeena jékka moyloo janq Siyoñ mu taaru, ci yeen lañu jékka gise bàkkaari Israyil.

<sup>14</sup> Yeen waa Yuda, mayleen waa Moreset Gaat†

lu ngeen tàggtook ñoom,

këri Agsib‡ wori neen lay doon ci buuri Israyil.

\* **1:1** 1.1 Gannaaw ba réewum Yawut xàjjalikoo, Samari moo doon péeyub Israyil ca bëj-gànnar, Yerusalem di péeyub Yuda ca bëj-saalum. † **1:7** 1.7 jëmme xërëm yooyu, su tojee it di gànjar gu ñu mana wecci xaalisi.

‡ **1:10** 1.10 Gaat dëkku Filisti la woon. Yeneen juróom ñeenti dëkk yi ci topp ñoo ségoon Moreset Gaat, dëkku cosaanu Mise. Ni baatub Gaat di jibe ci ebrë dafa neexoo ak baat biy tekki «nettali.» § **1:10** 1.10 Bet Leyafra kërug pëndub suuf lay tekki, te neexoo na ak baatu ebrë bu mana tekki «pëndub suuf.» \* **1:11** 1.11 Turu dëkk bii, Safiir, man naa tekki «taaru,» taar bi nag woroo ak gacce gi ñu wax ci aaya bi. † **1:11** 1.11 Caanan neexoo

na ak baatu ebrë bu mana tekki «génn.» ‡ **1:11** 1.11 Eccel niroo na ak baatu ebrë bi mana tekki «gantal,» wax ji di wund ne «wall gantal na.» § **1:12** 1.12 Turu Yerusalem wi indi na baatu ebrë bu mana tekki «jàmm,» mu woroo ak ay wi ñu ne mooy agsi Yerusalem, woroo itam ak Marot, baatu ebrë bi jegewoo ak «wextan.» \* **1:13**

1.13 Turu dëkk bi, Lakis lañu nirule ak baatu ebrë bu mana tekki «fasi dawkat.» † **1:14** 1.14 Turu dëkk bii, Moreset, baat bi mu jegewool ci Ebrë man na tekki «ab séet.» Aaya 10 moo wax ci «Gaat.» ‡ **1:14** 1.14 Agsib

neexoo na ak baatu ebrë bu mana tekki «wor.» § **1:15** 1.15 Maresa neexoo na ak baatu ebrë bu mana tekki «nangukatub réew.» \* **1:15** 1.15 Adulam mooy xunti ma Daawuda làqu woon, ba muy daw buur Sóol.

15 Yeen waa Maresa<sup>S</sup> laay indil ku leen moom,  
te ca Adulam\* la ñi Israyil di damoo di làquji.

16 Watuleen nel, ñaawloo ko doom yi leen doon bânneexal.  
Neluleen nel yu set nim tan, naqarloo,  
nde ngallo lañu jëm, teqlikook yeen.

## 2

### *Mbugal dal na aakimookat yi*

1 Wóoy, ngalla ñiy mébét ñaawtéef,  
di ràbb lu bon ci seenub tëraay,  
bèt set, ñu jëfe ko,  
ndax xam ne man nañu ko.

2 Nooy xemmeme tool, foqati,  
ay kër, ñu nangu,  
tey not waay ak waa kërám,  
ak nit ci céru suufam.

3 Moo tax Aji Sax ji dafa wax ne:  
«Maa ngii di nasal googu làng aw ay,  
ay wu ngeen dul teggee ci seenu loos,  
te dungeen daagu, siggi,  
nde jant yu metti lay doon.

4 Bésub keroog lees leen di fental aw léeb,  
woyal leen woy wu tiis,  
te naa: «Sotti na, yàqu nanu yaxheet!  
Sama suufu askan dugg na ciy loxo,  
ba sore ma,  
ab fippukat lañu jox sunuy tool!»

5 Moo tax bu mbooloom Aji Sax ji waree jootaat ci seen suuf,  
kenn ci yeen du am cér, ba ñu di ko tàllalal buumu nattukaay.

### *Yonenti caaxaan yaa ngi diinjat*

6 Seen yonent yeey waare naa:  
«Buleen waare!  
Nii kat deesu ko waaree,  
gàcce du nu dab!»

7 Bànni Israyil, ndax dees na waxe nii:  
«Aji Sax ji day xàddee?»  
Am: «Jooju jëf da di jikkoom?»

«Sama kàddu jàmm la ci kuy def njub.

8 Yeen sama ñoñ, démb rekk ngeen jóg nib noon;  
yeena ngi nangoo ci nit mbubbum xewam,  
fekk muy romb, buggul xare, foogul dara.

9 Jigéen ñi ci sama ñoñ ngeen dàqe seen kéri mbégte,

te seeni doom, yeena leen xañ sama barke ba fàww.

10 Jógleen dem, fii du bérabu noflaay,  
nde sobewu na, ba nara yàqe yaxheet.

11 Nit man naa wër, toppi caaxaan aki fen,  
naan: «Maa lay yégal waxyub biiñ aku ñoll,»  
te kookooy jottlikatub waxyu bi askan wii yelloo!

### *Aji Sax jeey dajale ndesu ñoñam*

12 «Yeen askanu Yanqóoba, maa leen di dajalee

dajale yeen ñépp,  
maay boolee boole ndesu Israyil.  
Benn bopp laa leen di def, niy xar ca gétt ga,

niy gàtt ci seenum parlu,  
coowal nit ña jolli.

13 Kiy bëtt mooy dox, jiitu leen,  
ñu bëtt, jàll bunt bi, dem.  
Seen buur mooy jàll jiitu leen,  
Aji Sax jeey dox fa seen kanam.»

## 3

### *Aji Sax ji tiiñal na njiiti Israyil*

1 Dama ne:  
«Ngalla dégluleen yeen njiiti Yanqóoba,  
yeen kilifay kër Israyil!  
Xanaa du yeena wara xam yoon?

2 Te yeenay bañ-kati lu baax,  
di bëgg-kati lu bon.

Yeenay fees sama ñoñ te ñuy dund,  
yeenay rocci suux wi sàng seeni yax.

3 Yeenay yàpp samay bokk,  
fulli seen der,

damm seeni yax, dogat,  
def ko ni toggug kawdir,  
mbete ndawal ci cin.»

4 Lee tax noggatukat yii di woo Aji Sax ji wall,  
te du leen wuyu,  
kanamam la leen di làq, bésub keroog,  
nde ñoo bonal seeni jëf.

### *Aji Sax ji àrtu na yonent yu bégge yi*

5 Lii la Aji Sax ji wax ci yonent yiy lajjal samay bokk:

«Bu ñu sàqamee ab lanc, yéene jàmm;  
ku leen leelul, ñu biral waxyub xare.

6 Moo tax yeen, guddi moo leen di ñeel,  
ba peeñu réer,

lëndëm a leen di dikkal, ba ngis tukkil  
leen,  
jant mooy sowal yonent yi,  
bëccëg lëndëmal leen.  
7 Seetkat yi dañuy rus,  
boroom ngis yi torox,  
ñoom ñépp jàpp seen gémmiñ;  
ndax Yàllaa leen dul faale.»

8 Teewul man, may feese doole,  
feese Noowug Aji Sax ji,  
ak dëgg ak njambaarte,  
ngir biralal askanu Yanqóoba, bàkkaaram,  
ngir tuddal bànni Israyil googu moyam.

#### *Aji Sax ji tiññalaat na njiiti Israyil*

9 Ngalla dégluleen lii, yeen njiiti kër  
Yanqóoba;  
yeen kilifay kër Israyil.  
Yeen ñi seexlu dëgg,  
lunkal wépp yoonu njub.

10 Deret ngeen tabaxe Siyon,  
njubadi ngeen tabaxe Yerusalem googu.

11 Seeni njiit, alalu ger lañuy àttee,  
seeni sarxalkat di feyeekuy jàngle,  
seeni yonent di weccikoo xaalis  
seenum ngisaane,

te Aji Sax ji lañuy dëgërloo, naan:  
«Xanaa du Aji Sax jaa ngi ci sunu biir?  
Musiba du nu dab!»

12 Kon nag dees na gàbb Siyon nib tool,  
Yerusalem googu diy tojit, jale,  
tundu kërug jaamookaay baay doon gajj  
bu kawé.

## 4

#### *Aji Sax ji, ca tundam lay saytoo xeet yi*

1 Fan yu mujj ya, dees na taxawal  
tundu kër Aji Sax ji,  
mooy gëna kawé ci tund yi,

tiim tund yu ndaw yi,  
askan yi riirandoo, wutsi ko.

2 Xeet yu bareey dikk te naan:  
«Dikkleen nu yéegi ca tundu Aji Sax ji,  
kër Yàllay Yanqóoba,  
mu xamal nuy yoonam,  
ba nu doxe yooyu ñallam.»

Siyon kat la ndigalu yoon di bawoo,

Yerusalem googu la kàddug Aji Sax ji di  
jóge.

3 Mooy àtte diggante xeet yu bare,  
mooy dogalal askan yu am doole te sore,  
ñu tegg seeni saamar ay illéer,  
def seeni xeej ay sàrt.

Aw xeet dootu xàccil moroom ma saa-  
mar,  
te dootuñu jàngati xare.

4 Ñoom ñépp ay toog, ku nekk ci kerug  
reseñam,  
mbaa keppaarug garabu figgam,  
kenn du leen xoqtal.  
Aji Sax ji Boroom gàngoor yee ko wax.

5 Askan wu nekk ci yaakaaru turu  
yàllaam lay doxe.

Nun nag ci yaakaaru sunu turu Yàlla Aji  
Sax ji  
lanuy doxe, tey ak èllëg, ba fàww.

6 Bésuub keroog, kàddug Aji Sax jee,  
«Naa jëli kuy soox, booleek ku ñu tox-  
aloon,  
te ma mbugaloon leen.

7 Maay def liy soox aw ndes,  
la ñu dàq fu sore, ma def ko askan wu am  
doole,  
te Aji Sax jeey doon seen buur ca kaw  
tundu Siyon,  
li ko dale tey ba fàww.

8 «Yaw, tatay gétt gi,  
yaw tundu Ofel\*,  
yaw janq Siyon mu taaru mi,  
yaw lees di ñëwal,  
yaw la kilifteef ga woon di dikkal,  
nguur gi, janq Yerusalem mu taaru lay  
ñeel.»

#### *Coono jur na jant bu yees*

9 Ana lu la tax di yuuxoo yuuxu tey?  
Buur daa amul fi sa biir?  
Am ki lay xelal a dee, ba mitit jàpp la nii,  
nga mel ni kuy matu?

10 Wañaarul te yuuxu ni kuy matu ndax  
mitit,  
yaw janq Siyon mu taaru,

\* 4:8 4.8 Ofel aw tund la woon ca Yerusalem, ñu tabax ca tata ju ñu dàbbli. Daawuda moo ko nangu woon ca Yebuseen ña. † 4:10 4.10 Lu wara tollook téeméeri at gannaaw gi, ba Buur Esekiya deeyee la Yerusalem tàbbi ci loxol Babilon. Seetal ci 1.1.

nde dëkk bi ngay génn, màkkaanoo  
 àll bi,  
 dinga dem Babilon†,  
 te fa lees lay xettlee,  
 fa la la Aji Sax jiy jote ci loxol say  
 noon.

11 Tey ci sa kaw, la xeet yu bare daje, yaw  
 Siyon,

te naan: «Nees ko tédde,  
 nanu seetaan Siyon!»

12 Booba ñoom xamuñu lu ciy xalaati Aji  
 Sax ji,  
 ak luy mébétam,  
 nde moo leen di dajale niy sabaar ca  
 dàgga ja.

13 «Yaw janq Siyon mu taaru, jógal bàcci  
 leen,  
 sa béjjén laay def ag weñ,  
 say wewi tànk, ma def ko xàñar,  
 nga rajaxe xeet yu bare.»  
 Yaay faagaagal seen alal ju lewul, ñeel Aji  
 Sax ji,  
 seen koom ñeel Boroom àddina sépp.

### *Betleyem la kilifa di juddoo*

14 Léegi yaw, dëkkub gàngoor yi,  
 defal sa bopp ay gàngoor,  
 ab gaw lees nu yékkatil,  
 te yetu ñaam lees di dóor njiital Israyil.

## 5

1 «Yaw Betleyem Efrata,  
 lu tuut ci làngi Yuda,  
 ci yaw la ku may yilifal Israyil di génne,  
 cosaanam di jant yu yàgga yàgg,  
 bu jëkkoon.»

2 Moo tax Aji Sax ji di leen wacc  
 ba keroog jant, ba kiy matu mucc.  
 Ca la bokkam ya dese bakkan di dellu,  
 fekki seen bokki bànni Israyil.

3 Kilifa gaay taxaw, sàmme  
 ci dooley Aji Sax ji,  
 ci màggug turu Yàllaam Aji Sax ji,  
 ba ñu dëkke jàmm,  
 nde léegi lay doon ku màgg  
 ba turam dajal cati àddina.

4 Kookooy doon buntu jàmm,  
 ba bu waa Asiri songee sunum réew,  
 ba daagoo sunu kawu tata,  
 juróom ñaari njiit lanu koy yékkatil,

ba juróom ñetti garmi.

5 Ab saamar la ñooñuy yilife Asiri,  
 réewum Nimróot mooma ca biiri bun-  
 tam.

Kilifa gi ñu dige moo nuy xettleek Asiri,  
 bu ñu nu songee,  
 ba joggati sunu suuf.

### *Ndesu Israyil dina am doole*

6 Ci biir askan yu bare la ndesu Yanqóoba  
 di nekk,  
 mel nib lay bu bawoo fa Aji Sax ji,  
 nirook waame wu wàccal gàncax,  
 xaarul lenni nit,  
 lenni doom aadama la séentuwul.

7 Ci biir askan yu bare la ndesu Yanqóoba  
 di nekk,  
 ci biir xeeti àddina,  
 mbete gaynde ci biir rabi àll yi,  
 nirook gaynde gu ndaw ci biiri gàtt;  
 fu mu jaare, joggati, xotat,  
 te kenn du wallu.

### *Cëslaay réer na bokkaalekat*

8 Aji Sax ji, sa loxo ca kaw, tiim say bañ,  
 mboolem say noon lees di dagge ci kaw  
 suuf.

9 «Bésuub keroog,» kàddug Aji Sax jee,  
 «maay dagge fi sa biir, sa fasi xare,  
 te maay sànk sa watiiri xare.

10 Maa fiy dagge sa dëkki réew mi,  
 màbb sa tata yépp.

11 Maay foqatee ay xërëm ci sa loxo,  
 te ay gisaanekat, dootuloo ko am.

12 Maay dagge fi sa biir say tuur,  
 ak sa xeri jaamookaay,  
 te dootoo sujjóotal loo sàkke say loxo.

13 Maay buddee fi sa biir xeri jaamookaayi  
 Asera  
 tuur mi,  
 te maay tas say jaamookaay.

14 Mer akum sànj laay feye xeeti yéefar,  
 yi déggul ndigal.»

## 6

### *Aji Sax ji tudd na sikkaangey ñoñam Mise mooy wax*

1 Dégluleen rekk li Aji Sax ji wax:  
 Jógal layoo, tund yu mag yi seede,  
 tund yu ndaw yi dégg la.

2 Yeen tund yu mag yi, dégluleen  
 layoob Aji Sax ji,



ak yeen kenuy suuf yi sax dàkk.  
Aji Sax jee joteek ñoñam,  
mooy wàqanteek Israyil.

*Aji Sax jee wax*

<sup>3</sup> Yeen sama ñoñ, ana lu ma leen def?  
Ana fu ma leen sonale?  
Waxleen ma!

<sup>4</sup> Yeen maa leen génnee réewum Misra,  
kërug njaam googa, maa leen fa jote,  
ba yebal fi seen kanam, Musaa ak  
Aaróonaak Maryaama.

<sup>5</sup> Yeen sama ñoñ, fàttlikuleen rekk  
la leen Balag buurub Mowab fex-  
eelon,  
ak la ko Balaam doomu Bewor tontu  
woon.

Doxub diggante Sitim ba Gilgal\* it, baleen  
ci xel,

ba ràññee njekku Aji Sax ji.

*Nit ñeey wax*

<sup>6</sup> Ana lu may dikkaale fi kanam Aji Sax ji,  
ba sujjóotal Yàlla jooja fa kaw.  
Tee ma koo dikke ay rendi-dóomal,  
ay wëlluy menn at?

<sup>7</sup> Mbaa dina ma nangul junniy kuuy,  
ak fukki junniy dexi diw?

Am samab taaw laay joxe  
saraxu peyu bàkkaar,  
sama meññeefum biir di sama saraxu  
peyug tooñ ?

*Mise mooy wax*

<sup>8</sup> Yaw nit ki, waxees na la li baax,  
ak li Aji Sax ji sàkku ci yaw,  
te loolu moyul di def yoon, sopp jëfi ngor  
te woyof nooy toppe sa Yàlla.

*Mbugal ñeel na waa Yerusalem ñi fecci kóllëre*

<sup>9</sup> Baatub Aji Sax ji mooy joor dëkk bi,  
te ndam mooy ñeel ñi wormaal sa  
tur.

«Dégluleen seen yetu mbugal, ak ki ko  
yebal,

<sup>10</sup> ndax alalu njublan a ngi ci biir këri  
njublan yi ba tey,  
mook nattukaayi alkànde yu tuut ya ñuy  
jaaye?

\* **6:5** 6.5 Sitim la Israyil tàmbalee woon seenub dox, jeexale Gilgal, ca wàllaa dëxu Yurdan ga feesoona gannaaw ba ñu ko jàllee. Seetal ci *Yosuwe* 3.1-5.12. † **6:16** 6.16 Omri ak doomam Axab ay buuri Samari lañu woon, ñu ràññeeke ci jalgati yoon, ak lawal ag bokkaale.

<sup>11</sup> Ana nu may ñàkka toppe màndaxekaayi  
njublan,  
ak mbuusum doomi naxekaay yees cay  
natte?

<sup>12</sup> Boroom alal yi ci sa biir, aw ay lañu  
fees,  
waa dëkk bi di fen,  
te lu seen làmmiñ tudd ay nax la.

<sup>13</sup> Man it moo tax ma di la duma  
ba nga wopp,  
gental la ndax say bàkkaar.

<sup>14</sup> Yaw de dinga lekk, te doo suur,  
xanaa wéye biir bu wéet.  
Dinga fat loo dul mana denc fu wóor,  
te loo denc fu wóor it, ab saamar laa koy  
jox.

<sup>15</sup> Yaw de yaay ji te doo góob,  
nga nal doomi oliw te doo ca diwu,  
nal doomi reseñ te doo naan biiñ.

<sup>16</sup> Dogali Buur Omri daal lees di topp,  
ak mboolem jëfini waa kër Buur Axab†.  
Seeni pexe ngeen topp,  
ba tax may def dëkk bi di lu daw yaram,  
waa dëkk bi di ñu nit ñiy muslu ci seenu  
demin,  
te gâceeg sama ñoñ, yeena koy gálloo.»

## 7

*Yàqute maase na*

<sup>1</sup> Wóoy, ngalla man mi mel ni kuy forsi,  
te meññeef ma fatu,  
may raasaatu, te du cabbu reseñ ju nit  
lekk,  
du figg ju bees ji ma namm.

<sup>2</sup> Ngor a jeex ci réew mi,  
njub tumuránke ci nit ñi.

Ñépp, ku ñu tuur deretam lañuy tëru,  
ku nekk, mbokkam lay fiir.

<sup>3</sup> Lu bon la seeni loxo mane:  
kàngam di laaj, ab xaali di sàkkub ger,  
boroom daraja moom, di wax fuqley  
bakkanam,

ñu ànd ràbbum pexe.

<sup>4</sup> Ki gën ci ñoom, neexook ag dég,  
ki ci jub yées ag taxas.

Bés ba say jongrukat yégle woon,  
sa bésu mbugal taxaw na,  
léegi lees di waaru.

<sup>5</sup> Buleen gëm ab xarit,  
buleen wóolu ab xejj,  
fi kanam ndaw siy tëdd sa gannaaw sax,  
sàmmal sa bunti gëmmiñ.

<sup>6</sup> Doom ju góor a ngi dofloo baay ba,  
ju jigéen ja jógal ndey ja,  
jabar jógal ndeyu jëkkër ja,  
nooni nit ki di waa këram.

<sup>7</sup> Man nag Aji Sax ji laay séentu,  
Yàlla ji may musal laay xaar,  
te sama Yàllaa may nangul.

*Yërmande wuutu na mbugal ñeel Siyon*

<sup>8</sup> Yaw samab noon, bu ma ree;  
maa daanu, maay jóg.  
Ci biir lëndëm laa toog,  
waaye Aji Sax jeey samag leer.

<sup>9</sup> Maa moy Aji Sax ji,  
kon naa tegoo meram,  
ba mu layool ma, dëggal ma,  
génne ma ci leer gi,  
ma gis ag njekkam.

<sup>10</sup> Ndaw siy samab noon moo koy seede,  
sëlmoo gâce,  
moom ma doon naa: «Ana sa Yàlla Aji Sax  
ji?»

Samay gët a naa ndaw soosu jàkk,  
ñu di ko dëggaate ni banu mbedd.

<sup>11</sup> Bés a ngii bees di tabaxaat say tata,  
su bés baa lees di yokk sa kemu suuf.

<sup>12</sup> Su bés baa ci yaw lees di dikk,  
bawoo Asiri ak dëkki Misra,  
bawoo diggante Misra ba ca dex ga,  
ak géej ba géej, tund ba tund.

<sup>13</sup> Àddina ab gent lay doon  
ndax ñi ko dëkke,  
muy añub seeni jëf.

<sup>14</sup> Ngalla nanga sàmme saw yet sa ñoñ,  
sa gàtt yi nga séddoo,  
te ñu màkkaanoo gott bi ñoomu neen,  
fi digg parlu mu naat.  
May leen ñu fore àlli Basan ak Galàdd  
na jant ya woon.

<sup>15</sup> Aji Sax ji nee: «Maa leen di won ay  
kiraama,  
na woon ba ngeen di génn réewum  
Misra.»

<sup>16</sup> Xeet yee ciy gis, rus,  
te seen gépp njàmbaar du tee ñu ub seen  
gëmmiñ,  
seeni nopp buur.

<sup>17</sup> Ñooy mëq suuf ni jaan,  
ak ndëgmeenti suuf,  
di lox, génne seeni tata,  
te su boobaa yaw sunu Yàlla Aji Sax ji  
lañuy tiit,  
ragal la.

<sup>18</sup> Ana Yàlla ju mel ni yaw,  
di bale ag tooñ, di jéllale ag moy,  
ñeel ndesu ab séddoom.  
Kii du denc mer ba fàww,  
te moo bëgg di yéwéne.

<sup>19</sup> Moo nuy yërëmati;  
sunuy ñaawtéef lay joggiy tànkam,  
te biir xóotey géej lay tàbbal sunuy  
bàkkaar.

<sup>20</sup> Yaay sàmm kóllère ak Yanqóoba,  
yéwéne Ibraayma,  
na nga ko giñale woon sunuy maam, janti  
dëmb.

## Téereb Yonent Yàlla Nawum

<sup>1</sup> Yéeneb waxyu bu dal dëkk bi ñuy wax Niniw a ngi, di téereb peeñum Nawum ma dëkk Elkos.

*Aji Sax jeej jàmbaar ju raglu te baax*

<sup>2</sup> Aji Sax ji mooy Yàlla ju fiir, te mooy mbugale,  
Aji Sax ji mooy mbugale, te di boroom sànj.

Aji Sax ji mooy mbugal ay bañam, mooy sànju ci kawi noonam.

<sup>3</sup> Aji Sax ji la mer ma diib, doole ja bare; te du ñakka topp ku tooñ, ag tooñaangeem.

Aji Sax jeej daagoo biir callweer ak ngélén,  
niir yi di pëndub tànkam.

<sup>4</sup> Mooy gëdd géej, wowal; mboolem dex, mu ñiisal; parluy Basan ak Karmel, mu laxal; tóor-tóori àllub Liban, mu laxal.

<sup>5</sup> Tund yu mag yi di ko loxal, tund yu ndaw yi seey, suuf fuddu fi kanamam, mook àddina ak mboolem li ci biiram.

<sup>6</sup> Bu sànjoo, ana kuy taxaw? Ana kuy dékku tàngooru meram? Am sànjam a naan soteet ni sawara, doj yi rajaxoo fi kanamam.

<sup>7</sup> Aji Sax jee baax, moo dib rawtu, bésuub njàqare, te moo ràññee ñi ko làqoo.

<sup>8</sup> Mbàmbulaan lay walal ba faagaagal dëkk bii, te mooy toppi noonam ba ca biir lëndëm ga.

*Njàqare ji du ñaar*

*Ñeel Yuda*

<sup>9</sup> Ana lu ngeen di fexeel Aji Sax ji? Mooy neenal, lépp neen; njàqare ja du ñaar.

<sup>10</sup> Niy taxas la ay noonam di laxasoo, mel ni ñu naan ba màndi,

\* 2:6 2.6 Seetal ci 3.3.

te ni boob mu wow lañuy lakke ba xoy-  
omu.

*Ñeel Niniw*

<sup>11</sup> Ci yaw dëkk bii la nit génne, di fexeel Aji Sax ji lu bon, di mébét pexey ndéngte.

*Ñeel Yuda*

<sup>12</sup> Aji Sax ji moo ne:

«Bu ñu matoon, ne gàññ it ni lees leen di dagge, ñu ne mes. Maa la mitital, dootuma la mitital.

<sup>13</sup> Léegi buum gi ñu la yeewe laay dog, say jéng laay dagg.»

*Ñeel buuru Niniw*

<sup>14</sup> Aji Sax ji moo santaane lii ci yaw. Mu ne: «Lu bokk ci saw tur du lawati, kërug say yàlla laay dagge xërëm ak jëmmei weñ gu ñu xelli, te maay waajal sa bàmmeel, nde tekkiwuloo tus.»

## 2

*Ñeel Yuda*

<sup>1</sup> Ndaw a ngii dawé kaw tund ya, di indi kàddu, xibaaru jàmm.

Yaw Yuda, bégeel sa bési màggal, te wàccook say xas.

Nit ku bon ki dootu jaare fi yaw; léppam lees di dagg, sànni.

*Ñeel Niniw*

<sup>2</sup> Ki lay falaxe buur na, wutsi la! Sàmmal sab tata, wattu saw yoon, takkal sa ndigg, te dègër lu bu baax.

*Ñeel Yuda*

<sup>3</sup> Aji Sax ji moo yeosal darajay Yanqóoba, darajay Israyil moomu.

Ay taskat a ko tasoon, yàqte ay caram.

*Dëkkub noon daanu na*

<sup>4</sup> Pakki jàmbaar na ña lañu suub xonq, ñeyi xare ya sol lu xonq curr, watiiri xare yay melax ni luy tàkk, ca bés ba ñu waajal xare, xeej ya jóg.

<sup>5</sup> Ca mbedd ya la watiiri xare yay riire, riddi jaare pénc ya, mel niy jum, di ray-rayi niy melax.

<sup>6</sup> Ca la njiit la di woolu kàngami xareem,

ñuy gaawtu bay tërëf\*. b  
Tata ja lañuy gaaw wutali,  
ba yékkati ay kiiraay.

<sup>7</sup> Bunt ya jëm dex ga ñooy jekki ubbiku,  
kër buur màbb.

<sup>8</sup> Futtees na jongama,† yóbbu,  
janqam jay binni niy xati,  
di fëgg seen dënn.

<sup>9</sup> Niniw la ay nitam di daw, mu mel ni  
mbànd

mu ndox may senn,  
ñu naan leen: «Taxawleen, taxawleen,»  
te kenn geestuwul.

<sup>10</sup> Sëxëtooleen xaalis, sëxëtoo wurus,  
alal du fi jeex te mboolem gànjar a jale.

<sup>11</sup> Dëkk bi lees di raatale, maasale,  
mu ne faraas,

fit rëcc,  
óom yiy fenqe,  
ndigg yépp di kall-kalli,  
kanam yépp di sël-sëli.

### *Doole réer na gaynde*

<sup>12</sup> Moo ana paxum gaynde ga?  
Ana àllub gaynde yu ndaw ya,  
fa góoru gaynde daa daagoo,  
mook jeegub gayndeem ak doom ya,  
te dara tiitalu leen!

<sup>13</sup> Gaynde di fa fàdd lu doy ay doomam,  
reyal ay jeegi gayndeem,  
feesal xunteem akum rëbbam,  
feesal paxam akum pàddam.

<sup>14</sup> «Maa ngii fi sa kaw», kàddug Aji Sax  
jee,

Boroom gàngoor yi.  
«Say watiiri xare laay lakk, saxaral,  
sa gaynde yu ndaw, saamar lekk leen,  
te sam pàdd laay dagge ci réew mi,  
ba deesul déggati baatu ndaw loo yebal.»

## 3

### *Ab safaan ñeel na Niniw*

<sup>1</sup> Wóoy, ngalla dëkkub tuurkatu deret bi,  
ñépp di fen, fees aku ay,  
te foqati alalu jaambur du dakk!

<sup>2</sup> Kàccri dal,

ay mbege riir,  
fas rëpptal,  
watiir kar-kari.

<sup>3</sup> Gawar buur,  
saamar melax,  
xeej lerxat,  
ñu bare ne lasiim,  
ñi dee jale,  
néew ya tëë jeex,  
ñuy fakkastaloo néew ya.

### *Aw léeb ñeel na Niniw, gànc biy xërëmtu*

<sup>4</sup> Lépp ndax ngànctu gu bare,  
gi gànc bi nekke!

Jekk tònkee, boroom xërëm yi,  
ci ngànctu nga jaaye ay xeet,  
te xërëmtu nga naxe ay giir.

<sup>5</sup> «Maa ngii fi sa kaw,»  
kàddug Aji Sax jee, Boroom gàngoor yi.  
«Sa pendal laay ñori,

ba muur sa xar-kanam,  
won xeeti jaambur yi sa yaramu neen,  
gisloo waa réew yi sa gâcece.

<sup>6</sup> Maa lay xépp mbalit, sewal la,  
def lam ceetaan,

<sup>7</sup> ku la gis, daw la  
te naan: “Niniw tas na!  
Moo ku koy jooy?”

Ana fu ma koy wutale ñu ko dëfal?»

### *Niniw du gën Teeb demin*

<sup>8</sup> Moo Niniw, dangaa gën Teeb, péeyub  
Misraa?

Dëkk ba dëju fa digg wali Niil ya,  
am ndox wër ko,  
am tataam di géej,

miiram di ndox mu wale géej,

<sup>9</sup> réewum Kuus di ndëgërlaayam,  
Misra di ko dooleele doole ju dul jeex,  
réewum Puut ak Libi di ko jàpple.

<sup>10</sup> Teewul ngàllo la dem, cig njaam;  
ay goneem, ñu falaxe leen

ci mboolem selebe yoon;  
ay kàngamam, ñu tegoo bant;  
kilifaam yépp, ñu jéng leen.

<sup>11</sup> Niniw yaw it dinga bilimbaane,  
jànnaxe, di wuta raw ab noon.

† 2:8 2.8 jongama ji jombul jëmmu tuur la mu ñu ne mooy nangul am njur. Man naa doon it dëkk bi ci boppam.

*Doole réer na Niniw*

12 Sa tata yépp ni garabi figg  
 yu ñoral ndoortel meññeef lay mel,  
 soo yëlbee, doom ya rot,  
 gémmiñu lekk-kat aw.

13 Say gàngoor a ngii diy jigéen fi sa biir,  
 sa bunti réew lafal say noon,  
 ne ñàpp-ñàppaaral,  
 sawara xoyom tējukaay ya!

14 Niniwee, ndox moo fàggoo ab gaw,  
 ngay rooti te dàbbli say tata.

Duggal ci bàq bi, note ban bi,  
 te ne cas móolukaay bi!

15 Fa la la sawara di xoyome,  
 saamar xottee la fa,  
 raafal la ni soccet di def.

*Niniw day raaf*

Fulal saw nit niy soccet,  
 ñu tollu niy njééréer.

16 Ay jula nga barele,  
 ba ñu èpp biddiwi asamaan,  
 te ñoo mel niy soccet, tojtal, naaw.

17 Say kàngam it niy soccet,  
 say jawriñ ni naaxu gunóor  
 yu dale kaw tata, bésub sedd,  
 jant bi jóg, ñu daw,  
 te deesul xam fu ñu nekk.

*Woykat jooy na Niniw*

18 Buurub Asiree, say sàmm a saay,  
 say garmi nelaw,  
 sa gàngoor tasaaroo kaw tund wa,  
 te ku leen dajale wuute.

19 Sa damm-damm amul paj,  
 sab góom metti,  
 ba mboolem ñi dégg li la dal  
 di tàccu ci sa kaw,  
 nde ana ku sa mbon gi dul jeex lorul?

## Téereb Yonent Yàlla Abakug

<sup>1</sup> Ab yéenee ngi bu ñu won Yonent Yàlla Abakug.

### *Abakug tàmbali naa jooy*

<sup>2</sup> Éy Aji Sax ji, foo àppal lii,  
may woote wall, dégluwoo ma?

Ma di la jooy aw ay, te walloowoo!

<sup>3</sup> Ana loo may wone lu bon,  
tey seetaan noteel?

Yàquteeku ay fi sama kanam,  
xuloo di wéy, ñaayoo jolli.

<sup>4</sup> Moo tax yoon lafañ,  
te àtteb dëgg du feeñ muk.  
Ku bon a tanc ku jub,  
ba tax ab àtte jalgatiku.

### *Aji Sax ji tontu na*

<sup>5</sup> «Xool-leen ci biir xeet yi ba gis,» la Aji Sax ji wax.

Jaaxleelen ba jàq, nde jëf a ngi jëfe ci seeni jant,

bu ñu leen ko waxoon, dungeen ko gëm.

<sup>6</sup> Maa ngii di dooleel waa Babilon,  
xeet wu wex, ràkkaaju,  
di wër déndi àddina,  
di nangu màkkaani jaambur.

<sup>7</sup> Ñu ñàng, raglu,  
te di dogalal seen bopp àtteb yoon  
ak sañ-sañ.

<sup>8</sup> Seeni fas a gëna gaawi segg,  
gëna aay tilli timis.

Fu sore la seeni gawar jóge, tèbal,  
naaw nig jaxaay  
ju ne jàyy, lekkum rëbbam.

<sup>9</sup> Aw ay lañuy dikke, ñoom ñépp,  
buurandoo, jubal màkk seen kanam,  
te ñi ñuy jàpp njaam bare ni feppi suuf.

<sup>10</sup> Ñooñu ay buur lañuy ñaawal,  
boroomi daraja di seen reetaanukaay;  
ñii lépp luy tata lañuy kekku,  
jalal ko suuf, nangu ko.

<sup>11</sup> Jàll, wéy lañu cay teg ni ngelaw,  
tegoog tooñ, te seen doole di seen yàlla.»

### *Abakug jooyati na*

\* 2:5 2.5 Jàmbaar ju bew jii mooy waa Babilon.

<sup>12</sup> Waaye Aji Sax ji, xanaa du yaa masa nekk?

Sama Yàlla sama Aji Sell ji, doo saay.

Aji Sax ji, ab àtte nga tabbe ñii,  
yaw sama cëslaay, mbugal nga fi dëje ñii.

<sup>13</sup> Sa gët yu sell jomb naa niir lu bon,  
te manoo seetaan noteel!

Ana looy seetaan ay workat?

Looy noppi te ku bon di mëdd

moroomam mu ko gëna jub?

<sup>14</sup> Yaa def doom aadama mel niw jën,  
mbaa ndiiraanu ndundoot lu amul njiit,

<sup>15</sup> te ñoom ñépp la ku bon di korandoo,  
diri leen ciy mbaalam,

dajale ciy caaxam,

ba tax ko di bég aka bânneexu.

<sup>16</sup> Moo tax muy rendil mbaalam ab sarax,  
di taalal ab caaxam saraxu cuuraay,  
te naan moo niinal njëlam,  
duunal ab dundam.

<sup>17</sup> Mbaa du nii lay yuree mbaalam,  
di wéye fállas ay xeet te yërëmul?

## 2

<sup>1</sup> Fa may jongroo laay taxaw,  
ne temm fa kaw tata ja,  
ba xam ana lu mu ma Aji Sax ji di àddu,  
ak lu may waxaat ci samab tawat.

### *Aji Sax ji àddooti na*

<sup>2</sup> Aji Sax jee àddu, ne:

«Bindal peeñu mi,  
leeral ko ci àlluwa yi,  
ba njàng mi yomb.

<sup>3</sup> Peeñu mi seede la, ñeel jant  
ba ñu ko àppal,

seede su wóor ci na mbir may mujje,  
te du fen.

Su diibee it, xaar ko,  
day dikk moos te du yàggati.

<sup>4</sup> «Xol baa ngay xoggliku, te ag njub nekku  
ca,

waaye ku jub ndax kóllëreem mooy dund.

<sup>5</sup> Biiñ day wore,

jàmbaar ju bew jii\* nag du dal-lu,

xanaa yàkkli puruxam ni njaniiw,

du doylu, mbete ndee,

moom miy buubandoo xeetoo xeet,

dajale askanoo askan, aakimoo.

6 «Xanaa du ñi mu teg loxo ñépp a koy  
léebuji,

fental ko woy wu ñu ko kókkalee, naan:  
‘Wóoy ngalla kii di dajale lu mu moomul,  
lii ba kañ?’

Kii di séfoo nii ay bor!”

7 Moo ñi la lebal duñu jekki jóg a?

Ñooñu la tiital ñooy jekki yewwu,  
te yaay doon seenum cëxëtoo.

8 Yaa sëxëtoo woon ay xeet yu bare,  
mboolem ndesu askan yee lay sëxëtooji,  
ndax deretu nit ji nga tuur, soxore ay  
réew,  
aki dëkk, ak mboolem ña ca biir.

9 «Wóoy ngalla kuy dajaleel këram  
alalu yàqute ju lewul  
tey aj am tàggam fu kawé,  
ngir fegu ci yàqule.

10 Gàcce nga nasal sa kër,  
ba nga sàncee ay xeeti xeet,  
te yaa tooñ sa bopp.

11 Doju tata dina riir déy,  
aw dénk àddoo ca jank ba, feelu ko.

12 «Wóoy ngalla ku tabaxe ab dëkk,  
deret ju mu tuur,  
ku sanceb dëkk, ag njubadi.

13 Xanaa du ci Aji Sax ji  
Boroom gàngoor yi la lii bawoo:  
Sawara la askan yiy ñaqal,  
ag neen la waasoo yiy doñ-doñil?

14 Waaye ni ndox muure xóotey géej ba  
mu daj,  
ni la darajay Aji Sax jiy ràññikoo ci  
àddina sépp.

15 «Wóoy ngalla yaw mi nàndal sab  
dëkkaale,  
sotti sa ndabal sànj, màndale ko,  
ngir niir ko, mu ne dunj!

16 Gàcce ngay gëna regg teraanga,  
naanaw yaw it te wone sa mbuñuka!  
Ci yaw la kaas bi ci ndijooral Aji Sax ji  
di walbatiku,  
sa toroxte wuutu sa teraanga.

17 Ay wi nga teg Libañ mooy këppu  
ci sa kaw,  
te sànkuteg rabi àll yi sa tiitaange lay jur.

Yaa tuur deretu nit, indi aw ay ci réew mi,  
ak dëkk beek mboolem ñi ci biiram.

18 «Ana luy njariñal yett jëmmu xërëm  
ju ki ko sàkk yett,  
mbaa jëmmu xërëm ju ñu xelli,  
di ci gëmloo nit ay fen?

Sàkk sa yëfi bopp, wóolu ko,  
xërëm yoo móol te manula wax!

19 Wóoy, ngalla ku naan bant: “Xippil,”  
naan doj wu ne selaw: “Yewwul!”

Ana lu yooyii di xamle?  
Ma nga, ñu xoobe ko xaalis ak wurus,  
te du gennug noo ci biiram.

20 Aji Sax ja moom, ma nga ca  
màkkaanum sellngaam,  
na àddina sépp selaw fi kanamam.»

### 3

#### *Abakug ñaan na ci Yàlla*

1 Ñaanu Yonent Yàlla Abakug a ngii,  
galanu woy wi di galanu njàmbat.

2 Éy Aji Sax ji, maa dégg sab jëw,  
Aji Sax ji maa yéemu ci sa jaloore!  
Ngalla yeesalal say jaloore, nu fekke,  
xamleel say jaloore, nu fekke,  
bu la am sànj teree geesu, yërëm.

3 Yàllaa ngi jóge Teman,  
Aji Sell ji foofa ca tundu Paran\* lay  
bawoo.

Selaw

Darajaam moo dajal asamaan,  
teddngaam fees kaw suuf.

4 Kee di leer gu ne ràññ,  
ay ceeñeer fettaxe ci loxoom,  
te fa la dooleem làqe.

5 Mbas moo dox, jiitu ko,  
jàngoro topp ciy tànkam.

6 Kee taxaw, yëngal suuf;  
kee xoole, loxloo xeet yi,  
tund yu mag ya woon naka jekk rajaxoo,  
tundi cosaan yu ndaw ya maasaloo.  
Kii moo moom yooni cosaan yi.

7 Njàqare laa gis ca xaymay Kusan,  
te ndimoy xaymay waa Majan† yëngu na.

8 Aji Sax ji, dex yi nga sànjul?

\* 3:3 3.3 Teman ak Paran ay gox lañu yu féeteek fa Yàlla bawoo tundu Sinayi, jëmsi Israyil. † 3:7 3.7 Kusan ak Majan ay mbooloo yu dëkke ay xayma ci màndinju Sinayi.

Am dex yi nga mere?  
 Am géej nga sàmbaaral,  
 ba war say fas,  
 dawal sa watiiri dawal-daan?  
<sup>9</sup> Yaa génne sa xala mbaram,  
 feesal sa mbuusum fitt.

Selaw.

Yaa xare suuf ay dex.  
<sup>10</sup> Tund yi gis la, jaayu;  
 waame wàcc, wéy;  
 xóote ya riir,  
 gannaxam ya jolli fa kaw.  
<sup>11</sup> Jant ak weer ne tekk fa seen màkkaan,  
 janook sa leeru fitt yi soqi,  
 ak melax gi tàkke ci sab xeej.  
<sup>12</sup> Am sànj nga daagoo fi kaw suuf,  
 mer nga dëggaatee xeet yi.

<sup>13</sup> Yaa génn ngir wallusi sa ñoñ,  
 wallusi ki nga fal.  
 Yaa rajaxe puju néegu ku bon ki,  
 xar ko ñaar, geen ba ci put.

Selaw.

<sup>14</sup> Ba noon ya riddeendoo, di nu tasaaresi,  
 seen xeeju bopp nga bëtte seen bopp,  
 fekk leen ñuy xaxaloo, ni ñuy waaja  
 sëxëtoo  
 ay néew-ji-doole, fu kenn yégul.  
<sup>15</sup> Yaa jaabal say fas biir géej,  
 yëngal mbàmbulaan ma.

<sup>16</sup> Ba ma ca déggee, samay butit a yëngu,  
 coow la tax samay tuñ di lox,  
 sama yaram dee goyy,  
 may lox fi ma taxaw,  
 te ne cell, di séentu bésub njàqare,  
 bay dikkal xeet wi nu song.

<sup>17</sup> Ndaxam garabu figg foccul,  
 doomu reseñ amul ca ndeyam,  
 njurum garabu oliw àntuwul,  
 tool yi meññul aw ñam,  
 gàtt it tukkee na ca gétt ga,  
 du genn jur gu gudd ci wurmbal,  
<sup>18</sup> te man may bannexoo Aji Sax ji,  
 Yàlla ji may wallu laay bége.

<sup>19</sup> Aji Sax ji Boroom bi mooy sama doole,  
 moo ma defal samay tànk mel ni yoy  
 kéwél,  
 te fa kawte ya la may daaguloo.

Mu jëm ci njiital jàngkat yi, ànd ak samay  
 xalam.



## Téereb Yonent Yàlla Cefaña

<sup>1</sup> Kàddug Aji Sax jii moo dikkaloon Cefaña doomu Kusi. Kusi, Gedalya mooy baayam; Gedalya, Amarya, Amarya, Es-ekiya. Mu yemook janti buuru Yuda, Yosya doomu Amon.

### *Am sànj taxaw na*

<sup>2</sup> «Lépp laay buube ba mu set fi kaw suuf.»

Aji Sax jee ko wax.

<sup>3</sup> «Doom aadama ak mala, njanaaw ak jën laay buub, ak luy fakktale, booleek ñu bon ñi.

Maay dagge doom aadama fi kaw déndub suuf.»

Aji Sax jee ko wax.»

<sup>4</sup> «Maay xàccil sama loxo, Yuda, ak mboolem waa Yerusalem. Maay dagge fi bii bérab ndesu tuuri Baal, ak turu sarxalantukatam yeek sarxalkatam yi,

<sup>5</sup> ak ñiy sujjóotal ci kawi taax gàngoori biddiiw yi, ak ñiy sujjóotal aka giñal Aji Sax ji tey giñe Milkom, yàllantu ji,

<sup>6</sup> ak ñi dëddu Aji Sax ji, wutuñu Aji Sax ji, sàkkuwuñu ko.»

<sup>7</sup> Miig! Fi kanam Boroom bi Aji Sax ji, bésub Aji Sax ji kat dëgmal na; Aji Sax jee waajal ab sarax, te moo ca sellal ay ganam.

<sup>8</sup> «Keroog bésub saraxu Aji Sax ji, maay dikke mbugal kàngam yeek doomi buur yi, ak boroom coli ndoxandéem yi.

<sup>9</sup> Bésub keroog maay dikke mbugal képp ku aw tuuram tax mu aadawoo di tëb dëxu bunt\*, ak ñiy feesal seen kër yàllantu ak alal ju aw ay ak njublan maye.

<sup>10</sup> Su bés baa,» Aji Sax jee ko wax,

\* **1:9** 1.9 tëb dëxu bunt bi, li ñu ci jublu mooy moytu loraange ju ñu gëm ne tuur mi man na leen koo yóbbe, bu ñu joggee dëxu bunt bi. Seetal ci *1.Samiyel* 5.5.

«yuux dina jibe fa buntu Jën ya, wóoy jibe fa Sanc ya, rajaxoo ju réy jollee ca tund ya.

<sup>11</sup> Yeen waa goxu Ja ba, yuuxooleen, nde jula yépp ay sànkú, mboolem kuy natt donji xaalis lees fay dagge.

<sup>12</sup> Jantub keroog ay làmp laay niite Yerusalem, ba dikke mbugal ña fa ne degg, taaje ni biiñ ci kaw ginjriitam, te naa ci seen xel: “Aji Sax ji baaxewul, lorewul.”

<sup>13</sup> Seen alal lees di sèxëtooji, seeni kër gental, ñu tabax ay kër yu ñu dul dëkke; jëmbat toókëri reseñ yu ñu dul biiño.»

<sup>14</sup> Bésub Aji Sax bu mag bee dëgmal, moo dëgmal te t ànk yu gaaw lool lay jegesee.

Kàddug bésub Aji Sax ji dégtu na, te ca la jàmbaar di yuuxoo yuux yu metti.

<sup>15</sup> Bésub keroog bésub sànj lay doon, bésub njàqare ak tumuránke, bésub gental ak gentle, bésub lëndëmu xàmbaraari guddi gu ne këruus,

<sup>16</sup> bésub bufta ak wootey xare ca kaw dëkk ya ñu dàbbli, ak kaw tata yu kawe ya.

<sup>17</sup> «Ca laay jàqale doom aadama yi, ñuy tëñëx-tëñëxi ni silmaxa, nde Aji Sax ji lañu moy, te seen deret lees di sotti fi pëndub suuf, seen yérey biir ni neefare fi suuf.

<sup>18</sup> Du seen xaalis, du seen wurus wu leen di mana xettli. Keroog bésub sànjum Aji Sax ji, ak sawaras fiiraangeem, àddina sépp ay xoyomu. Mooy raafal moos mboolem ñi dëkke àddina si, te raafal gu raglu lay doon!»

## 2

### *Wooteb tuub jibal na Yuda*

1 Yeen xeet wi dul rus, dajeleena daje,  
 2 balaa dogal bee taxaw,  
 bésusb mbugal ne jaas ba wéy ni boob,  
 bala leen tangooru merum Aji Sax jee  
 dikkal,  
 bala leen bésusb merum Aji Sax jee tax-  
 awal.  
 3 Sàkkuleen Aji Sax ji,  
 mboolem yeen néew-dooley réew  
 mi,  
 yeen ñiy jéfe àttey yoonam,  
 sàkkuleen njekk te sàkkoo toroxlu,  
 jombul ngeen yiiru, kera bésu merum Aji  
 Sax ji.

*Waxyub mbugal ñeel na xeet yu bare*

4 Gasa dëkk ba lees di wacc,  
 Askalon gental,  
 Asdodd, digg bëccëg lees leen di buub,  
 génne,  
 te Ekkron\* lees di déjjati.  
 5 Wóoy ngalla yeen waa tefesu géej,  
 yeen xeetu Kereteen† ñi,  
 kàddug Aji Sax ji dal na leen.  
 Yeen waa Kanaan, réewum Filisteen ñi,  
 maa leen di sànk ba dungeen dese  
 kenn‡,  
 6 tefesu géej doon àllub parlu,  
 ak dëkkuwaayu sàmm seek gétt gi.  
 7 Tefes ga, ndesu kër Yuda koy moom§,  
 ñu di ca fore,  
 bu ngoonee ñu tëri néegi Askalon.  
 Seen Yàlla Aji Sax jee leen di dikkal,  
 tijji seen wërsëg (/yiwileen cig njaam.)

8 «Maa dégg ñaññi Mowab,  
 kàddu yu ñaaw yi Amoneen ñiy ñaññe  
 sama ñoñ,  
 tey damu, nara nangu seen suuf.  
 9 Moo tax, giñ naa ko ci man miy dund,»  
 kàddug Aji Sax ju gàngoor yee, Yàllay  
 Israyil,  
 «Mowab déy ni dëkkub Sodom lay mujje,  
 Amoneen ñi mel ni Gomor,  
 ay dég ak paxi xorom a koy nangu,  
 mu gentel ba fàww.  
 Sama ndesu ñoñ a leen di sèxëtoo,

\* 2:4 2.4 Dëkk yii ay dëkki Filisti lañu woon, fa féete ak tefesu géej te dale bëj-gànnar ba bëj-saalum. † 2:5  
 2.5 Ñooy waa Filisti, seen cosaan moo doon dun bi ñuy wax Keret. ‡ 2:5 2.5 Mbugal mii moo sottal alkànde gi  
 toppoon waa Kanaan. Seetal *Njàlbéen ga* 9.25. § 2:7 2. 4-7 Réewum Kanaan mi la Yàlla digoon Ibraayma ne  
 moom lay jox aw askanam. Seetal ci *Njàlbéen ga* 12.6-7.

ndesu xeet wi ma séddoo moo leen di  
 moom.»  
 10 Loolu lañuy yooloo seen reewande,  
 nde ñoo doon ñaññe aka damu  
 ci kaw ñoñi Aji Sax ji Boroom  
 gàngoor yi.  
 11 Nu raglu la Aji Sax jiy dale ci seen kaw,  
 te mooy ràggal yàllay àddina yépp,  
 ba xeet yi di ko sujjóotale dunoo dun,  
 wu ci nekk ak fa nga fare.

12 Yeen waa Kuus, itam  
 yeen lees di fàdde sama saamar.

13 Keey xàccil loxoom bëj-gànnar,  
 keey sànk réewum Asiri,  
 keey def Niniw ab gent bu wow ni  
 màndiñ.

14 Ca digg dëkk ba la jur gay goore,  
 ak xeetu rab wu nekk;  
 looy aki saaw fanaane kaw jëni bunt ya,  
 ay sab jibe ca palanteer ya,  
 tojit ya dala jale ca bunt ya,  
 xànqi seedar ya ne dunñ.

15 Ana dëkk bu xumb ba dëkke woon  
 kaaraange,  
 te naan cim xelam: «Man rekk a, du  
 keneen?»  
 Nan la doone nii ab gent,  
 bérab bu rab yiy goore,  
 mboolem ku fa jaare, ub gémmiñam, jalu.

### 3

*Yerusalem déggadi na*

1 Wóoy ngalla fippukat bu sobewu bi,  
 dëkkub notkat yi.  
 2 Dégluwul baat, nanguwul kàddu gyy  
 yare,  
 du Aji Sax ji la wóolu,  
 du Yàllaam jooju la jege.  
 3 Kàngam yi ci biiram di gaynde yuy ñar,  
 ay njiitam di tilli timis yu dul pannal,  
 4 ay yonentam reew, diy workat;  
 ay sarxalkatam teddadil sellnga, xëtt  
 yoon.  
 5 Ndaxam Aji Sax jiy boroom njekk a ngi  
 ci biiram,

te du def njubadi,  
jantoo jant mu fenkal ab àtteem,  
te du wuute fu bët sete.  
Ab wurujkat kay moo xamul gâce.

<sup>6</sup> «Maa fàkkas ay xeet,  
seeni tata tasaaroo,  
ma wéetal seeni mbedd,  
ba kenn jaareetu fa,  
seeni dëkk a tas ba kenn desul,  
kenn dëkkatu fa.

<sup>7</sup> «Maa noon Yerusalem: “Xanaa moos  
dinga ma ragal,  
déggal ab yar.”

Su ko defee dëkkuwaayam du tas,  
ndax mboolem mbugal yi ma ko dikke,  
waaye moo yàkkamtee ñaaw ci jépp  
jéfam,

<sup>8</sup> moo tax, xaar ma rekk,» kàddug Aji Sax  
jee,

«ba keroog may jóg, nara sèxëtooji,  
nde maa dogala dajale xeet yi,  
dajale nguur yi,  
ngir xépp leen samam sànj,  
mboolem sama tangooru mer.  
Sama sawaras firaange déy,  
ci la mboolem àddina di xoyomu.

### *Yàlla mooy tuubloo xeet yi*

<sup>9</sup> «Su boobaa ma soppi làmmiñu xeet yi,  
setal ko,  
ngir ñuy tudd ñoom ñépp turu Aji Sax ji,  
di ko jaamoondoo benn bopp.

<sup>10</sup> Sama jaam ñi, sama ñoñ ñi tasaaroo,  
ca wàllaa dexu Kuus lañuy bawoo,  
ba indi samab sarax.

### *Yàlla soppi na xolu ndesu Israyil*

<sup>11</sup> «Su bés baa gâce dootul am ci sa  
mboolem jéf,

ji nga ma moye,  
nde maay jële fi sa biir ñiy bége sab sag,  
te doo damooti ci sama kaw tund wu sell.

<sup>12</sup> Waaye maay wacc fi sa biir  
askan wu woyof te néew doole,  
ñu yiïroo turu Aji Sax ji.

<sup>13</sup> Ndesu Israyil dootuñu ayibal, dootuñu  
fen,  
deesatu leen déggal kàdduy wor,  
ñoom donj it ñooy for, di goor,  
te kenn du leen tiital.»

### *Yerusalem dina leqliku*

<sup>14</sup> Yaw janq Siyoñ mu taaru, sarxolleel,  
Éey Israyil, xaacul,

yaw janq Yerusalem mu taaru, bégal,  
te bânneexoo xol bu sedd guyy!

<sup>15</sup> Aji Sax ji moo teggi say mbugal,  
waññi sab noon.  
Buurub Israyil, Aji Sax jaa ngi fi sa biir,  
dootuloo tiit lu bon.

<sup>16</sup> Bés sub keroog lees di wax Yerusalem, ne  
ko:

«Yaw Siyoñ, bul tiit, bul yoqi.

<sup>17</sup> Aji Sax ji sa Yàllaa ngi fi sa biir,  
di jambaar juy walloo.

Moo lay bége ci biir bânneex,  
leqlee la cofeelam,  
bége la bay sarxolle.

<sup>18</sup> «Ñi amu naqar te sore ndajey bernde,  
ñooñu la sore, te tegoo woon gâce,  
maa leen di dajale, teggil leen gâce tey.

<sup>19</sup> Ma ne jant yooyu laay jëflanteek  
mboolem ñi leen di sonal.

Ci laay wallu kuy sukkóot,  
fat ku tumurànke,  
may leen teraanga aku tur,  
fépp fu ñu ruse woon ci àddina.

<sup>20</sup> Yeen, jant yooyu laa leen di indi,  
jant yooyu laa leen di dajale,  
nde maa leen di defal aw tur ak teraanga  
fi biir mboolem askani àddina,  
maay tijji seen wërsëg, ngeen gis.»  
Aji Sax jee ko wax.

## Téereb Yonent Yàlla Ase

### *Tabaxaat jaamookaay bi jot na*

<sup>1</sup> -Ca ñaareelu atu nguuru Buur Daryus\*, ca juróom benneelu weer wa, yemook benn fan ca weer wa, kàddug Aji Sax ji moo dikk ci jottlib Yonent Yàlla Ase, ñeel doomu Selcel, Sorobabel boroom Yuda, ñeel itam doomu Yoccadag, Yosuwe sarxalkat bu mag ba. Mu ne: <sup>2</sup> Aji Sax ji Boroom gàngoor yi dafa wax ne: «Askan wii dañu ne àpp bi jotagul; àppub kër Aji Sax ji moo jotagul, ba ñu war koo tabaxaat.» <sup>3</sup> Kàddug Aji Sax ji nag dikk ci jottlib Yonent Yàlla Ase. Mu ne:

<sup>4</sup> «Àpp bi daal yeen la jotal, ba ngeen dèkke biir kër yu ay xànq lale, te kër gii dib gent?

<sup>5</sup> Kon nag léegi Aji Sax ji Boroom gàngoor yi dafa wax ne:

Teewlooleen xel seeni jaar-jaar.

<sup>6</sup> Yeenay ji lu bare, góob tuuti;

lekk, suuruleen;

naan, màndiwuleen;

solu, nugluwuleen;

boroom peyoor feyeeku,

yeb ci mbuus mu bënn.»

<sup>7</sup> Aji Sax ji Boroom gàngoor yi dafa wax ne:

«Teewlooleen xel seeni jaar-jaar.

<sup>8</sup> Yéegleen tund wi, wuti bant, tabax sama kër gi;

ma bannexoo, darajawoo ko,»

la Aji Sax ji wax.

<sup>9</sup> «Lu bare ngeen séentu, ndeke as tuut la, ngeen fat ko ci kër gi,

ma wal, mu naaw.

Li ko waral lu mu?» Kàddug Aji Sax ji boroom gàngoor yee.

«Li ko waral mooy sama kër gi gental, te ku ne ci yeen di dawal sa kër bopp.

<sup>10</sup> Kon nag yeena tax asamaan téye ab layam,

suuf téye meñneefam,

<sup>11</sup> ma wool bekkoor suuf seek kaw tund yi,

ak pepp ak ndoxum reseñ,

ak diw ak lu suuf meññal,

ak doom aadama aku jur,

ak mboolem liggéeyu loxo.»

### *Askan wi tontu na*

<sup>12</sup> Ba loolu amee doomu Selcel, Sorobabel, ak doomu Yoccadag, Yosuwe sarxalkat bu mag ba, ak mboolem ña des ca askan wa, ñoom ñépp déggal seen wooteb Yàlla Aji Sax ji, ak kàddug Yonent Yàlla Ase, noonee ko ko seen Yàlla Aji Sax ji yóbbantee. Askan wa nag ragal Aji Sax ji. <sup>13</sup> La ca tegu Ase, ndawal Aji Sax ji, jottli askan wa yóbbanteb Aji Sax ji. Mu ne leen: «Maa ànd ak yeen, kàddug Aji Sax jee.»

<sup>14</sup> Ba mu ko defee Aji Sax ji yékkati sidditi doomu Selcel, Sorobabel boroom Yuda, ak sidditi doomu Yoccadag, Yosuwe sarxalkat bu mag ba, ak sidditi ña des ca mbooloo ma ñépp, ba ñu sottali liggéeyi kër Yàlla Aji Sax ji Boroom gàngoor yi, seen Yàlla. <sup>15</sup> Loola yemook ñaar fukki fan ak ñeent ca juróom benneelu weer wa.

## 2

### *Darajay jaamookaay bi dina yokku*

<sup>1</sup> Ca ñaareelu atu nguuru Buur Daryus, Ca juróom ñaareelu weer wa, yemook ñaar fukki fan ak benn\*, kàddug Aji Sax ji moo dikk ci jottlib Yonent Yàlla Ase. Mu ne: <sup>2</sup> «Waxal nag doomu Selcel, Sorobabel boroom Yuda, ak doomu Yoccadag, Yosuwe sarxalkat bu mag bi, ak ñi des ci askan wi, nga ne leen:

<sup>3</sup> Ana ci yeen ñi fi des, ku gisoon kër gii ca darajaam ja woon?

Ak nu ngeen ko gise tey?

Xanaa du ag neen la leen di niru?

<sup>4</sup> Léegi nag, Sorobabel, góor-góorlul, Aji Sax jee ko wax.

Yaw doomu Yoccadag, Yosuwe sarxalkat bu mag bi,

góor-góorlul;

yeen mboolem askanu réew mi, góor-góorluleen,

\* 1:1 1.1 Daryus buuru Pers bu mag la woon.

\* 2:1 2.1 Bés boobu moo mujjoon ci mággalu bési Mbaar yi.

kàddug Aji Sax jee. Mu ne: Liggéeyleen,  
 maa ànd ak yeen déy,  
 Aji Sax ji Boroom gàngoor yee ko wax.  
<sup>5</sup> Googu kàddu laa jaayante woon ak yeen,  
 ba ngeen di génne Misra.  
 Samag Noo laa taxawe fi seen biir,  
 buleen tiit.  
<sup>6</sup> Aji Sax ji Boroom gàngoor yi kat dafa  
 wax ne:  
 Fileek lu néew, maa ngii di yéngalaat  
 asamaan ak suuf, ak géej ak jéeri.  
<sup>7</sup> Maay yéngal xeetoo xeet,  
 alali xeetoo xeet duggsi,  
 ma feesal kër gii ak teraanga,  
 Aji Sax ji Boroom gàngoor yee ko wax;  
<sup>8</sup> Maa moom xaalis, moom wurus;  
 kàddug Aji Sax jee, Boroom gàngoor yi.  
<sup>9</sup> Daraja ji kër gii di mujje mooy sut ja  
 woon,  
 Aji Sax ji Boroom gàngoor yee ko wax.  
 Mu ne: Ci bii bérab laay mayee jàmm,  
 kàddug Aji Sax jee, Boroom gàngoor yi.»

### *Jëfi sobe àndul ak barke*

<sup>10</sup> Ca ñaar fukki fan ak ñeentu juróom  
 ñeenteelu weer wa†, yemook ñaareelu  
 atu nguuru Buur Daryus, kàddug Aji Sax  
 ji moo dikkal Yonent Yàlla Ase, ne ko:  
<sup>11</sup> Aji Sax ji Boroom gàngoor yi dafa wax  
 ne: «Sàkkul nag ndigal ci sarxalkat yi,  
 nga ne leen, <sup>12</sup> waaw, su nit yoree ci  
 lafu mbubbam, aw yàpp wu ñu sellal, ba  
 noppi lafu mbubbam laal mburu mbaa lu  
 ñu togg, mbaa biiñ mbaa ag diw mbaa  
 ñam wu mu doon, ndax loola day daldi  
 sell?» Ase laaj ko sarxalkat ya, ñu ne ko:  
 «Déedéet.» <sup>13</sup> Ase dellu ne leen: «Nit  
 ku sobewu ndax ab néew bu mu laal, su  
 laalee lenn ci mboolem ñam yooyu, ndax  
 ñam wa sobewu na?» Sarxalkat ya ne ko:  
 «Sobewu na kay.» <sup>14</sup> Ase nag wax leen,  
 ne leen:  
 «Noonu la ci askan wii,  
 noonu la ci xeet wii sama kanam.  
 Kàddug Aji Sax jee.  
 Noonu la ci mboolem seen liggéeyu loxo,  
 ak sarax su ñu fi indi, lolu lépp a  
 sobewu.»

### *Déggal Aji Sax ji, baaxle*

† **2:10** 2.10 Mu yemook ñetti weer gannaaw ndoortel tabaxu kër Yàlla ga. ‡ **2:21** 2.21 Sorobabelmi soqikoo ci Daawuda moo taxawe buur bi feddli kàddug Aji Sax ja mu noon mooy taxawal nguur gu sax dàkk, ñeel askanu Daawuda. Seetal ci 2.Samiyel 7.11- 16, ak Macë 1.12-13.

<sup>15</sup> «Léegi nag seetaatleen seen xel bu  
 baax,  
 dale ko bés sub tey jii.  
 Bi aw doj tegoogul woon ci aw doj,  
 ci tabaxub kër Aji Sax ji,  
<sup>16</sup> ku wuti waan ñaar fukki natti pepp,  
 fukk lay fekk sàq ya;  
 mu wuti ca nalukaay ba juróom fukki  
 natti biiñ,  
 fekk fa ñaar fukk.  
<sup>17</sup> Maa leen dumaa gàncax gu benaat,  
 ak gu xuur, ak tawub doji yuur  
 ci mboolem seen liggéeyu loxo,  
 te taxul ngeen délsi fi man,  
 kàddug Aji Sax jee.  
<sup>18</sup> Seetaatleen seen xel bu baax,  
 dale ko bés sub tey jii,  
 dale ko ci ñaar fukki fan ak ñeentu  
 juróom ñeenteelu weer wi,  
 daleleen ci bés bii kenug néegu Aji Sax ji  
 tegee,  
 ngeen seetaat seen xel.  
<sup>19</sup> Ana am jiwooti ci sàq yi?  
 Mbaa lennati ci reseñ ak figg?  
 Mbaa garabi gërënaat ak oliw? Du lenn  
 lu meññ.  
 Waaye li ko dale bés sub tey jii, maay  
 barkeel.  
*Ab dige ñeel na Sorobabel*  
<sup>20</sup> Kàddug Aji Sax ji nag dikkal Ase  
 ñaareel bi yoon,  
 yemook ñaar fukki fan ak ñeent ci weer  
 wi. Mu ne:  
<sup>21</sup> «Waxal Sorobabel‡, boroom Yuda, ne  
 ko:  
 Maa ngii di yéngalsi asamaan ak suuf.  
<sup>22</sup> Maay jàllarbi ngànguney nguur yi,  
 nasaxal dooley nguuri yéefar yi,  
 jàllarbi watiir ak ay dawalkatam,  
 fas yeek seeni gawar nërmeelu,  
 ku nekk fàddoo saamaru mbokkam.  
<sup>23</sup> Bés sub keroog, kàddug Aji Sax jee,  
 Boroom gàngoor yi,  
 maa lay jël, yaw samab jaam,  
 Sorobabel doomu Selcel,  
 kàddug Aji Sax jee,  
 te jaarob torlukaay laa lay def,  
 nde yaw laa taamu.»

Kàddug Aji Sax jee, Boroom gàngoor yi.»

## Téereb Yonent Yàlla Sàkkaryaa

### *Waññiku ci Aji Sax ji weesul*

<sup>1</sup> Ci juróom ñetteelu weeru ñaareelu atu nguurug Daryus buuru Pers, kàddug Aji Sax ji moo dikkal Yonent Yàlla Sàkkaryaa, doomu Berekiya doomu Ido. Mu ne ko: <sup>2</sup> «Aji Sax ji mere na seeni maam mer mu réy. <sup>3</sup> Kon nag waxal askan wi, ne leen Aji Sax ji Boroom gàngoor yi dafa wax ne: “Dellusileen ci man,” kàddug Aji Sax jee, Boroom gàngoor yi, “kon dinaa dellusi ci yeen.” Aji Sax ji Boroom gàngoori xare yee ko wax. <sup>4</sup> Buleen mel ni seen maam, ya yonent yu jëkk ya biraloon ne leen: “Aji Sax ji Boroom gàngoor yi dafa wax ne: Dëdduleen seeni jikko yu bon ak seeni jëf ju bon.” Te dégluwuñu, faalewuñu ma.» Kàddug Aji Sax jee. <sup>5</sup> «Seenii maam, ana ñu tey? Yonent yi nag, ndax ba fàww lañuy dund? <sup>6</sup> Teewul sama kàdduy àrtu ak sama dogali yoon ya ma yóbbante woon sama jaam ña, yonent ya, du lépp a dab seeni maam? Ñu dëpp nag daldi ne: “Noonee Aji Sax ji Boroom gàngoor yi nammoona def ak nun, feye nu ko sunuy jikko ak sunuy jëf, noonu la def ak nun.”»

### *Misaal mu jëkk: Ay fas aki gawar*

<sup>7</sup> Ca ñaar fukki fan ak ñeent, ca fukkeelu weer waak benn, di weeru Sebat, ca ñaareelu atu nguurug Daryus, kàddug Aji Sax ji moo dikkal Yonent Yàlla Sàkkaryaa doomu Berekiya doomu Ido. Sàkkaryaa ne: <sup>8</sup> Maa jekki gis, ag guddi, nit ku war fas wu xonq. Moom nag mu ngi taxaw ci biir garabi mirt ci aw xur, li ko féete gannaaw di fas yu xonq, ak yu ngélembu, ak yu weex, ak seeni gawar. <sup>9</sup> Ma ne: «Ñii lu ñu wund, Sang bi?» Malaaka miy wax ak man ne ma: «Maa lay won lu ñii wund.» <sup>10</sup> Waa ja taxaw ca biir garabi mirt ya àddu, daldi ne:

«Ñii ñooy ñi Aji Sax ji yebal, ngir ñu wër àddina.» <sup>11</sup> Ci kaw loolu gawar ya àddu, wax ak malaakam Aji Sax ji taxaw ci biir garabi mirt yi. Ñu ne: «Wër nanu biir àddina, ndeke àddina sépp a ngi ci jàmm, ne tekk.»

<sup>12</sup> Malaakam Aji Sax ji ne: «Éy Aji Sax ji Boroom gàngoor yi, loo deeti xaar, doo noppee xañ yërmande Yerusalem ak yeneen dëkki Yuda? Juróom ñaar fukki at a ngii yoo leen mere\*!»

<sup>13</sup> Aji Sax ji nag àddu, wax ak malaaka ma doon wax ak man, kàdduy mas-sawu yu neex. <sup>14</sup> Ca la ma malaaka ma doon wax ak man, ne ma: «Yéeneel, nga ne: Aji Sax ji Boroom gàngoor yi dafa wax ne: “Maa fiire Yerusalem, maa fiire Siyon fiiraange ju réy. <sup>15</sup> Waaye mer mu réy laa mere xeet yii naagu. As lëf laa meroon, waaye ñoom ñoo yokk aw ay†.” <sup>16</sup> Moo tax Aji Sax ji dafa wax ne: “Yërmande laay dellusee Yerusalem. Sama kër lees fay tabaxaat.” Kàddug Aji Sax jee, Boroom gàngoor yi. Mu ne: “Buumu nattukaay dina tàllalu ci kaw Yerusalem.” <sup>17</sup> Nanga yénewaat, nga ne Aji Sax ji Boroom gàngoor yi dafa wax ne: “Samay dëkk ay walewaat ak alal, te Aji Sax ji mooy dëfalati Siyon, mooy taamooti Yerusalem googu.”»

## 2

### *Ñaareelu misaal: Ay béjjén ak ay tegg*

<sup>1</sup> Ba mu ko defee, ma séentu, gisuma lu moy ñeenti béjjén\*. <sup>2</sup> Ma ne malaaka ma doon wax ak man: «Béjjén yii nag?» Mu ne ma: «Béjjén yii ñoo tasaare Yuda ak Israyil ak Yerusalem.» <sup>3</sup> Ci kaw loolu Aji Sax ji won ma ñeenti tegg. <sup>4</sup> Ma ne: «Lan la ñii di defsi?»

Mu wax ma, ne ma: «Béjjén yii tasaare Yuda ba kenn siggeetul, tegg yii ñoo dikk ngir tiital leen, ba jàllarbi béjjéni xeet yi jóg song réewum Yuda, tasaare ko.»

### *Ñetteelu misaal: Nit kuy natt Yerusalem*

\* **1:12** 1.12 Juróom ñaar fukki at la waa Yuda nekk cig njaam. ca Babilon. † **1:15** 1.15 Xeet yooyu ñoo tegoon Yuda notaange gu jéggi dayo, ba raw la leen Yàlla naraloon. \* **2:1** 2.1 béjjén ñaare doole lay taxawe.

<sup>5</sup> Ma séentu, gisuma lu moy jenn waay ju ñàbb buumu nattukaay ci loxoom. <sup>6</sup> Ma ne ko: «Foo jëm?»

Mu ne ma: «Xanaa natti Yerusalem, ba xam nu mu yaatoo, ak nu mu gudde.»

<sup>7</sup> Fa la malaaka ma doon wax ak man jekki di dem, meneen malaaka dikk da-jeeq moom. <sup>8</sup> Mu ne ko: «Dawal, nga wax xale bu góor bii ne ko: “Yerusalem lees di dëkke, te tata wëru ko; ñàpp lay def, ndax barewaayu nit ñeek jur gi ci biiram. <sup>9</sup> Te man ci sama bopp,” kàddug Aji Sax jee, “maa koy nekkal tatay sawara ji ko ub ràpp. Te it maay doon daraja ji ci biiram.”

<sup>10</sup> «Éey, éey yeen, dawleen génne réewum bëj-gànnar,»

kàddug Aji Sax jee.

«Ni ñeenti ngelawi asamaan tasaaroo, ni laa leen tasaaree.»

Kàddug Aji Sax jee.

<sup>11</sup> «Éy Siyon, réccal, yaw mi dëkke janq Babilon mu taaru mi.»

<sup>12</sup> Aji Sax ji Boroom gàngoor yi déy dafa wax, moom mi ma yebal ngir tedngay boppam, ci mbirum xeet, yi leen sèxëtoo woon,

nee: «Képp ku leen laal kat, laal na sama reeni xol.

<sup>13</sup> Maa ngii déy di xàcci sama loxo ci seen kaw,

te ñoom la seeni jaam di sèxëtooji.»

Kon dingeen xam ne Aji Sax ji Boroom gàngoor yi moo ma yebal.

<sup>14</sup> «Sarxolleel te bannexu, yaw janq Siyon mu taaru,

nde maa ngii di dikk, màkkaanoo fi sa biir.»

Kàddug Aji Sax jee.

<sup>15</sup> «Bésuub keroog la xeet yu bare di taqook Aji Sax ji,

ba doon sama ñoñ, ma màkkaanoo fi sa biir.»

Kon nga xam ne Aji Sax ji Boroom gàngoor yi moo ma yebal ci yaw.

<sup>16</sup> Aji Sax jeey séddoo Yuda, muy wàllam ci suuf su sell si,

te mooy taamooti Yerusalem.

<sup>17</sup> Na wépp suux ne cell fi kanam Aji Sax ji,

ma ngoogu sàqee fa màkkaanam mu sell ma.

### 3

*Ñeenteelu misaal: Yosuwe am na col gu yees*

<sup>1</sup> Gannaaw gi Aji Sax ji won ma Yosuwe sarxalkat bu mag ba, mu taxaw fa kanam malaakam Aji Sax ji, Tuumaalkat bi taxaw féete ko ndijoor, ngir tuumaal ko. <sup>2</sup> Aji Sax ji ne Tuumaalkat bi: «Aji Sax ji rëbb na la, Yaw Tuumaalkat bi, Aji Sax ji taamu Yerusalem rëbb na la. Xanaa Yosuwe mii du lenn lu moy gillit wu ñu fëkke cib taal?»

<sup>3</sup> Yosuwee ngi sol yére yu dand, taxaw fi kanam malaaka mi. <sup>4</sup> Malaaka ma wax ak ña taxaw fa kanamam ne leen: «Summileen yéream yu dand yi.» Mu teg ca ne Yosuwe: «Dama ne, far naa sa bàkkaar, te dinaa la solal lu jekk.»

<sup>5</sup> Ma daldi ne: «Nañu teg kaala gu set ci boppam.» Ñu tegal ko kaala gu set ci boppam, solal ko yeneen yére. Malaakam Aji Sax jaa nga taxaw.

<sup>6</sup> Malaakam Aji Sax ji nag dénk Yosuwe ne ko: <sup>7</sup> «Aji Sax ji Boroom gàngoor yi dafa wax ne: Su fekkee ne samay yoon ngay awe te sama ndénkaane nga dénkoo, su boobaa yaw it dinga saytu sama kër, di sàmm samay ètt. Te maa lay jox ay cér yu la yaatal ci biir ñii fi taxaw.

<sup>8</sup> Déglul bu baax, yaw Yosuwe sarxalkat bu mag bi,

yaak sa xarit yi toog fi sa kanam

te taxawe ab tegtal,

nde maa ngii di indi samab jaam,

ki ñuy wax Njebbit li.

<sup>9</sup> Doj waa ngii ma teg fi kanam Yosuwe, te wenn doj wi, juróom ñaari gët a ngi ci kawam.

Maa ngii di ci ñaas mbind mi ci war,»

kàddug Aji Sax jee, Boroom gàngoor yi,

«te maay far bàkkaar reew mii ci benn bés.»

<sup>10</sup> «Bésuub keroog,» kàddug Aji Sax jee, Boroom gàngoor yi,

«ku nekk ci yeen ay woo moroom ma

ci ker garabu reseñam,

ak ker garabu figgam.»



## 4

*Juróomeelu misaal: ay tegukaayi làmp ak garabi oliw*

<sup>1</sup> Ba loolu amee malaaka ma doon wax ak man délsi, yee ma, mel ni ku ñu yee ciy nelaw. <sup>2</sup> Mu ne ma: «Loo gis?» Ma ne: «Damaa xool, gisuma lu moy ab tegukaayu làmp bu lépp di wurus, ak kopp bu tege ci kawam, ak juróom ñaari làmp ci kawam, bu ci nekk ak juróom ñaari gémmiñam ca kaw. <sup>3</sup> Ak ñaari garabi oliw ca wet ga: Genn ca ndijooru kopp ba, ga ca des ca càmmoñam.»

<sup>4</sup> Ma dellu wax ak malaaka ma doon wax ak man, ne ko: «Yëf yii nag, lu mu wund, Sang bi?»

<sup>5</sup> Malaaka ma doon wax ak man ne ma: «Xamuloo lu yëf yii wund?» Ma ne ko «Déédéet, Sang bi.»

<sup>6</sup> Mu wax ma ne ma: «Lii moo di kàddug Aji Sax ji dikkal Sorobabel, di wax ne:

Du cig njàmbaar,

du ci doole,

ci samag Noo la.

Aji Sax ji Boroom gàngoor yee ko wax.»

<sup>7</sup> Yaa di kan, yaw tund wu mag wi?

Boo janook Sorobabel\*, maase, dig joor,

te mooy génne ci yaw doju mujjantal wi,

riir ma jolli, ñu naan: «Aw yiw ñeel na ko!

Aw yiw ñeel na wii doj!»

<sup>8</sup> Kàddug Aji Sax ji dikkalati ma, ne ma:

<sup>9</sup> «Loxol Sorobabel a teg kenug kër gii, loxoom a koy sottli itam,»

ngeen daldi xam ne Aji Sax ji

Boroom gàngoor yi

moo ma yónni ci yeen.

<sup>10</sup> Ana kuy xeeb bés bii lu tuut sottee?

Nañu bége kay buumu beteex bi ñu gis ci loxol Sorobabel!

«Juróom ñaar yii nag gëti Aji Sax jee, ñoom ñooy wër àddina sépp.»

<sup>11</sup> Ma dellu ne ko: «Ñaari garabi oliw yii nag, genn gi ci ndijooru tegukaayu làmp bi, gi ci des ci càmmoñam, lu ñu wund?»

<sup>12</sup> Ci kaw loolu ma delluuti ne ko: «Ñaari cari oliw yi feggook ñaari solomi wurus yiy xelli diw nag, lu ñu wund?»

<sup>13</sup> Mu ne ma: «Xamuloo lu yooyu wund?» Ma ne ko: «Déédéet, Sang bi!»

<sup>14</sup> Mu ne ma: «Ñooñu ñoo di ñaar ñi ñu diw, fal leen, ngir ñu liggéeyal boroom àddina sépp.»

## 5

*Juróom benneelu misaal: Taxañu mbind buy naaw*

<sup>1</sup> Ci kaw loolu ma dellu séentu, gisuma lu moy taxañu mbind buy naaw.

<sup>2</sup> Malaaka mi ne ma: «Loo gis?» Ma ne: «Taxañ buy naaw laa gis, guddaayam di ñaar fukki xasab, yaatuwaayam di fukki xasab.»

<sup>3</sup> Mu ne ma: «Lii mooy alkute giy wàccsi ci kaw réew mi mépp. Li taxañ bi wax ci genn wetam mooy képp kuy sàcc, dees na ko fi dàqe, te li mu wax ci wetam gi ci des mooy képp kuy giñ ci ay fen, dees na ko fi dàqe. <sup>4</sup> Maay wàcce alkute gi,» kàddug Aji Sax ji Boroom gàngoor yee, «mu dugg ba ci biir kër sàcc bi, ak kër nit kiy giñe sama tur, ay fen; ci biir kër gi la alkute giy fanaan, ba raafal banti kër gi, aki dojam.»

*Juróom ñaareelu misaal: ndab lu jigéen toog ca biir*

<sup>5</sup> Ci kaw loolu malaaka ma doon wax ak man dikk ne ma: «Séentul rekk ba gis lii di dikk.» <sup>6</sup> Ma ne: «Lu mu doon?» Mu ne: «Ndabal nattukaay beey génne,» tegaat ca ne: «Lii mooy seen bàkkaar ci biir réew mi mépp.»

<sup>7</sup> Ci biir loolu kubeeru beteex ga ca kaw ndab la jekki yékkatiku, ndeke jenn jigéen a nga toog ca biir ndab la. <sup>8</sup> Mu ne: «Jigéen jii mooy mbon,» daldi koy bëmëx ca biir ndab la, fél kubeeru beteex ga, ubaat ndab la.

<sup>9</sup> Ba loolu amee ma séentu, yem ci ñaari jigéen ñuy dikk, ngelaw li wal seeni laaf. Laaf yu mel ni laafi xodd lañu am. Ñu daldi yékkati ndabal nattukaay la, ba ca diggante asamaan ak suuf.

\* 4:7 4.7 Moo soqikoo ci Buur Daawuda. Mooy kàngam la jiite woon mbooloo ma jóge woon ca ngàllog Babilon.

<sup>10</sup> Ma ne malaaka ma doon wax ak man: «Ana fu ñii jëme ndabal nattukaay bi?»

<sup>11</sup> Mu ne ma: «Ag kër lañu koy tabaxali ca réewum Sineyaar. Bu noppee, fa lañu koy teg, ca kaw tegukaayam.»

## 6

*Juróom ñetteelu misaal: ay watiiri xare*

<sup>1</sup> Ma dellu séentu, yem ci ñeenti watiir yuy dikk diggante ñaari tund. Tund yi nag di tundi xàñjar. <sup>2</sup> Watiir bu jëkk bi, fas yu xong a ko takk, ñaareelu watiir bi, fas yu ñuul a ko takk, <sup>3</sup> ñetteelu watiir bi, fas yu weex a ko takk, ñeenteelu watiir bi, fas yu tippante ko takk, te fas yépp di yu am kàttan.

<sup>4</sup> Ma ne malaaka ma doon wax ak man. «Sang bi, watiir yii lu ñu wund?»

<sup>5</sup> Malaaka mi ne ma: «Ñii ñooy ñeenti ngelawi asamaan yi génne fa ñu teewe woon fa kanam Boroom àddina sépp.»

<sup>6</sup> Bi fas yu ñuul yi takk, réewum bëj-gànnar la jëm; bi fas yu weex yi takk topp seen gannaaw; fas yu tippante yi nag, réewum bëj-saalum\* lañu jëm.

<sup>7</sup> Fas yu am kàttan yooyu yépp nag génn, yàkkamtee wëri àddina. Aji Sax ji ne leen: «Demleen wëri àddina.» Ñu daldi dem, wëri àddina.

<sup>8</sup> Ci kaw loolu mu àddu ca kaw, ne ma: «Xoolal, ñi jëm réewum bëj-gànnar, samag Noo lañuy sànni ca kaw réewum bëj-gànnar.»

*Fal nañu buur sarxalkat bu mag bi*

<sup>9</sup> Ba loolu amee kàddug Aji Sax ji dikkal ma, ne ma: <sup>10</sup> «Yóbbalub Elday ak Tobya ak Yedaya, bokk yooyu ñu toxal, nanga dem jëli ko bésub tey jii, ca kër Yosya doomu Cefaña, fa ñooñu jóge Babilon, dal.

<sup>11</sup> «Jëlal yóbbal boobu, di wurus wi ak xalis bi, nga sàkk ci mbaxanam buur, te teg ko ci kaw boppu sarxalkat bu mag bi†, Yosuwe doomu Yoccadag. <sup>12</sup> Nga wax ko

ne ko: «Aji Sax ji Boroom gàngoor yi dafa wax ne:

Nit a ngi nii, Njebbit‡ la tudd, ci bérabam lay jebbee, ba tabaxi kër Aji Sax ji.

<sup>13</sup> Mooy tabax kër Aji Sax ji te mooy soloo daraja, mooy toog, di jiite cib jalam, di sarxalkat bi cib jalam, te mébétu jàmm mooy dox diggante ñaar yooyu mu sasoo.»

<sup>14</sup> «Mbaxanam buur mi baaxantal lay doon ci biir kër Aji Sax ji, ñu di ko fàttlikoo Elday§ ak Tobya ak Yedaya, ak mbaaxug Yosiya doomu Cefaña. <sup>15</sup> Ñu sore ñooy dikk tabaxsi kër Aji Sax ji, ba ngeen xam ne Aji Sax ji Boroom gàngoor yi moo ma yebal ci yeen. Loolu mooy am, ndegam déggal ngeen ba déggal seen kàddug Yàlla Aji Sax ji.»

## 7

*Leeraange ci mbirum koor dikk na*

<sup>1</sup> Ci ñeenteelu atu nguuru Daryus, ci ñeenti fani juróom ñeenteelu weer wi, di weeru Kisle, kàddug Aji Sax ji moo dikkal Sàkkaryaa. <sup>2</sup> Fekk na Betel Sareser kàngamu buur aki nitam yónnee ngir dagaansi Aji Sax ji. <sup>3</sup> Ñu wax ak sarxalkati kër Aji Sax ji Boroom gàngoor yi, ak yonent yi, ne leen: «Ndax danoo wara wéye jooy ak di woor ci weeru juróomeel, ni nu ko baaxoo at yii yépp?»

<sup>4</sup> Ba mu ko defee kàddug Aji Sax ji Boroom gàngoor yi dikkal ma, ne ma: <sup>5</sup> «Waxal askanu réew mi mépp, ak sarxalkat yi, nga ne leen: “Ba ngeen dee woor ak a ñaawlu ci weeru juróomeel, ak weeru juróom ñaareel, ci diiru juróom ñaar fukki at yii, ndax man mii ngeen doon woorala wooral? <sup>6</sup> Te su ngeen lekkee ak su ngeen naanee, xanaa du seen bopp ngeen lekkal ak a naanal?” <sup>7</sup> Xanaa du yii kàddu la Aji Sax ji biraloon ci jottlib yonent yu jëkk ya, jant ya waa Yerusalem ak dëkk ya ko wër nekkee ci jàmm, te

\* **6:6** 6.6 Bëj-saalum ak bëj-gànnar ñaare ñooy wet yi nooni Israyil féete woon. † **6:11** 6.11 Liggéeyu carxal ak nguur, ñaari sas yooyu, ci yoon, du woon lees di boole yor ci Israyil. ‡ **6:12** 6.12 Njebbit ndombol tànk la bu Almasi jagoo. Seetal ci *Yeremi* 23.5-6 ak Sàkkaryaa 3.8. § **6:14** 6.14 Elday man naa doon Elem itam.

diiwaani Negew, ak suufu tund ya am ñu ko dëkke?»

<sup>8</sup> Gannaaw gi kàddug Aji Sax ji dellu dikkal ma, man Sàkkaryaa, ne ma: <sup>9</sup> «Aji Sax ji Boroom gàngoor yi dafa wax ne: Àtteb dëgg, nangeen ko àttee, te ngor ak yërmande it, deeleen ko jëflantee. <sup>10</sup> Ab jëtun, ak ab jirim, ak ab doxandéem, ak ab néew-doole, buleen ko not. Lu bon it, buleen ko mébétalante ci seen xol.»

<sup>11</sup> Teewul ñu baña déglu, tè ticc, fatt seeni nopp, ngir baña dégg. <sup>12</sup> Seen bopp lañu dëgéral niw doj, ba faaleetuñu ndigalu yoon wi, ak kàddu yi Aji Sax ji Boroom gàngoor yi yónnee ag Noowam, ci jottlib yonent yu jëkk ya. Muy sànj mu réy nag, bawoo fa Aji Sax ji Boroom gàngoor yi. <sup>13</sup> «Ba ma wootee,» Aji Sax ji Boroom gàngoor yee ko wax, «wuyuwuñu; moo tax ba ñu wootee, wuyuwuma. <sup>14</sup> Maa leen tasaare ni callweer ci biir mboolem xeet yu ñu xamul woon, réew mi gentel seen gannaaw, ba kenn jaareetu fi dem ak a délsi. Nii lañu defe ab gent, réew mu bakkane.»

## 8

### *Mbéx wuutu na koor*

<sup>1</sup> Ba loolu amee kàddug Aji Sax ji Boroom gàngoor yi dellu dikk, ne:

<sup>2</sup> «Aji Sax ji Boroom gàngoor yi dafa wax ne:  
Maa fiire Siyon firaange ju réy,  
am sànj mu réy laa koy fiiree.»

<sup>3</sup> Aji Sax ji dafa wax ne:  
«Maay dellu Siyon,  
Yerusalem googu laay màkkaanoo,  
ba ñuy wooye Yerusalem dëkkub Worma,  
foofu di tundu Aji Sax ji Boroom gàngoor yi,  
lees di wooye tundu Sellnga.»

<sup>4</sup> Aji Sax ji Boroom gàngoor yi dafa wax ne:  
«Mag ñu géor ñeek ñu jigéen ñeey dellu tooge  
pénci Yerusalem,  
ku ci nekk ak bantam cib loxoom,  
ndax at yu bare.

<sup>5</sup> Pénci dëkk bi, ay gone lay feese,

góor ak jigéen, di foye ca pénc ya.»

<sup>6</sup> Aji Sax ji Boroom gàngoor yi dafa wax ne:  
«Su loolu dee kawtéef ci gis-gisu ndesu askan wi  
ci yooyu jant,  
ndax tax na muy kawtéef ci sama gis-gis itam?»  
Kàddug Aji Sax jee, Boroom gàngoor yi.

<sup>7</sup> Aji Sax ji Boroom gàngoor yi dafa wax ne:  
«Maa ngii di walloo sama ñoñ  
fa réewum penku, ak réewum sowub jant.

<sup>8</sup> Maa leen di indi,  
ñu màkkaanoo digg Yerusalem,  
di sama ñoñ, may seen Yàlla,  
ci biir worma ak njekk.»

<sup>9</sup> Aji Sax ji Boroom gàngoor yi dafa wax ne:  
«Yeen ñi dégg kàddu yii tey  
ci gémmiñu yonent yi fekke woon  
ba ñuy teg kenug kër Aji Sax ji Boroom gàngoor yi,  
ngir tabaxaat kër gi,  
nangeen géor-góorlu.

<sup>10</sup> Ndax lu jiitu fan yooyu, nit feyeekuwal peyoor,  
te mala it indilul nit peyoor,  
kuy dem ak kuy dikk amul woon jàmm cib noon,  
nde maa xabtaloos ku nekk ci kaw mo-rooman.

<sup>11</sup> Waaye léegi du na woon laay def ak ndesu askan wii.»  
Kàddug Aji Sax jee, Boroom gàngoor yi.

<sup>12</sup> «Ndax jiwum jàmm lay doon,  
garabu reseñ meññ doomam,  
suuf si meññ gancaxam,  
asamaan di lay.  
Loolu lépp laay sédd ndesu askan wii.

<sup>13</sup> Na ngeen doone woon alkànde ci biir xeet yi,  
yeen waa kër Yuda, ak waa kër Is-rayil,  
ni laa leen di walloo, ba ngeen doon barke.  
Buleen ragal. Géor-góorluleen.»

<sup>14</sup> Ndax Aji Sax ji Boroom gàngoor yi déy dafa wax ne:

«Na ma leen nammoona mbugale  
te delluwuma ci gannaaw,  
ba ma seeni maam merloo,»  
Aji Sax ji Boroom gàngoor yee ko wax,  
15 «ni laa nammatee baaxe, ci janti tey jii,  
Yerusalem, ak waa kër Yuda.  
Kon buleen ragal.

16 «Ndigal yii, nangeen ko jëfe:  
Deeleen waxante dëgg,  
te dëgg ak yoon, nangeen ko àttee àtteb  
jàmm  
ci seen ètti àttekaay.

17 Ku nekk ci yeen, loraangey moroomam,  
bumu ko mébét cib xolam,  
te kàddug ngiñ ci ay fen, buleen ko safoo,  
nde loolu lépp laa bañ.»  
Kàddug Aji Sax jee.

18 Kàddug Aji Sax ji Boroom gàngoor yi  
dellu ma dikkal ne ma:

19 Aji Sax ji Boroom gàngoor yi dafa wax  
ne:  
«Muy koorug weeru ñeenteel, di koorug  
weeru juróomeel,  
ak koorug weeru juróom ñaareel, ak  
koorug weeru fukkeel\*,  
lépp janti mbég ak bânneex,  
ak bési ndaje yu rafet lay nekkal waa  
kër Yuda  
Waaye dëgg ak jàmm, soppelen ko.»

20 Aji Sax ji Boroom gàngoor yi dafa wax  
ne:

«Ay askan ñooy dikkati, di waa dëkk yu  
bare,  
21 waa dëkk bii dem ne bee:  
“Nan dema dem dagaani Aji Sax ji,  
nan sàkkuji Aji Sax ji Boroom gàngoor  
yi,”

Ñu ne leen: “Nun it kay, nu ngi dem.”»

22 Askan yu bare, ak xeet yu am doole  
ñooy dikk,  
di sàkkusi Aji Sax ji Boroom gàngoor yi  
ci Yerusalem,  
di dagaansi Aji Sax ji.

23 Aji Sax ji Boroom gàngoor yi dafa wax  
ne:  
«Janti keroog yooyu, fukk ñuy làkk  
mboolem làkki xeet yi,  
ñooy langaamoo catu mbubbu benn  
Yawut, naan ko:  
“Nun, yeen lanuy àndal,  
nde noo dégg ne Yàllaa ngeek yeen.”»

## 9

*Mbugal mu mucc topp dal na askani  
diiwaan bi*

1 Yéeneb kàddug Aji Sax jii moo rot  
ci kaw réewum Addarag\*,  
ba dali ca kaw Damaas.  
Du ci mboolem giiri Israyil rekk  
la Aji Sax ji ne jàkk bétam,  
waaye doom aadama yépp la ne jàkk.  
(xg / Gëti nit ñi, ba ci giiri Israyil gépp kat,  
ñu ngi ne jàkk ci Aji Sax ji.)

2 Kàddu gi dal na itam Amat,  
ga digalook Damaas,  
dal Tir ak Sidon, ak la ñuy muus lépp.

3 Tir moo tabaxal boppam tata,  
moo dajale xalis ni feppi suuf,  
ak wurus wu ne xas ni donji banu mbedd.

4 Ndeke Aji Sax ji moo koy moom,  
xalab alalam biir géej,  
te sawaraa koy xoyom.

5 Askalon moo koy gis, tiit;  
Gasa gis ko, jàq njàqare lu réy,  
mook Ekkron it ndax yaakaar ju tas.  
Gasa la buur bay réere,  
Askalon ñàkk ku ko dëkke.

6 Xeet wu raxe mooy sancii Asdodd,  
te maay sàggi sagub Filisteen ñi.

7 Ci seen gémmiñ laay foqatee deret ji ñuy  
lekk,  
yàbbiloo leen seen ñam yu seexluwu  
yi ñu ñank.

Seenu ndes it dina ma def seen Yàlla,  
mel nig làng ci giirug Yuda,  
Ekkron it ci sama ñoñ lay bokk ni  
Yebuseen ñi†.

8 Maay taxaw wattu fi wër sama kër,  
aar ko ci ñiy dem ak a dikk,  
ba boroom doole dootu not sama waa kër,

\* 8:19 8.19 Bési koor yooyu ba bànni Israyil nekkee ngàllo ca Babilon lañu ko daan sàmm, di ko ñaawloo seen jaar-jaar yu metti. \* 9:1 9.1 Addarag Ci diiwaanu Siri la nekk, mook dëkk yi ci aaya 1 ba 8 ñoo dale bëj-gànaar ba bëj-saalum te nekk ci tefesu géej gu mag ga. Seetal ci *Màndiñ mi* 34.5-6. † 9:7 9.7 Yebuseen ñi ñoo dëkkoon Yerusalem lu jiitu te mujj bokk ci Israyil. Seetal ci *Yosuwe* 15.63.

nde léegi samay gët laa leen ne jàkk.

*Buur Almasi dikk na*

<sup>9</sup> Bégala bég, janq Siyon mu taaru,  
janq Yerusalem mu taaru laa ne:  
Xaacul, sa buur a ngoog, jëmsi ci yaw,  
moo jot njekk ak mucc,  
te teewu koo woyof, war mbaam,  
cumbur doomu mbaam.

<sup>10</sup> Maay dagge watiiru xare diiwaanu  
Efrayim,  
dagge fasu xare fi Yerusalem,  
xalay xare damm,  
muy wax xeet yi jàmm,  
kilifteefam dale géej ba géej,  
dale dexu Efraat ba ca cati àddina.

*Aji Sax ji mooy xeexal ñoñam*

<sup>11</sup> Yaw nag, deret ji feddli sama kóllëreek  
yaw,  
ci laay seet ba yiwi sa nit ñi ñu tëj  
biir kàmb gu ndox amul.

<sup>12</sup> Yeen ñi ñu tëj, ngeen di dunde yaakaar,  
delluleen ca tata ja.  
Bésuub tey jii sax maa dogu ne  
ñaari yoon laa leen di yool.

<sup>13</sup> Yuda déy laay bank, muy samag xala,  
te Efrayim laa koy soxe, muy fitt gi.  
Yaw Siyon, sa doom yu góor laay yékkati  
ci sa kaw doom yu góor, yaw réewum  
Geres (Yawaan).

Doomi Siyon laay def saamaru jàmbaar.  
<sup>14</sup> Su boobaa Aji Sax jeey feeñ fi leen tiim,  
ag fittam tàkk nig melax.

Buufa gi la Boroom bi Aji Sax ji di wal,  
ànd ak ngéléni bëj-saalum, dikk.

<sup>15</sup> Aji Sax ji Boroom gàngoor yi mooy aar  
ñoñam,  
ñuy falaxe, di joggati doji mbaq,  
di naan ak a xaacu ni ñu màndi.  
Ni ndabi deretu juru sarax di feese,  
ni lañuy feese ak deretu noon yi,  
taq ci ripp ni cati sarxalukaay ba.

<sup>16</sup> Bésuub keroog seen Yàlla Aji Sax ji  
mooy sàmm ñoñam nig jur,  
ñuy lèrxat cim réewam  
ni peri gànjar di ray-rayee ci mbaxanam  
buur.

<sup>17</sup> Ndaw bannëex akub taar ca ñoom!  
Pepp yafal xalelu góor,  
biiñ bu bees naatal yaramu janq.

## 10

*Xërëm neen la*

<sup>1</sup> Bu suuf maree, ñaanal Aji Sax ji ab  
taw,  
Aji Sax ji mooy sàkk ay xàmbaar,  
sóobal nit ab taw,  
saxalal ku ne am ñax ci àll bi.

<sup>2</sup> Xërëm, waxi neen,  
gisaanekat gisi fen,  
seeni gént, nari neen,  
te caaxaani neen lañuy dalalee.  
Moo tax mbooloo mii di taxawaalu niy  
xar,  
tumurànke ndax ñàkkub sàmm.

*Yiwiku ñeelati na Israyil*

<sup>3</sup> «Sàmm yi la sama mer tàkkal,  
ñoom sikket yooyu laay dikke mbugal.  
Aji Sax ji Boroom gàngoor yi kat mooy  
taxawu  
kërug Yuda, géttam,  
te moo leen di def aw fasam wu am  
daraja,  
ngir xare.

<sup>4</sup> Fa Yuda la doju collu tabax di bawoo,  
jënu xayma, fa moom,  
xalay xare, fa moom,  
mboolem njiit yi ba ñépp daj, fa moom.

<sup>5</sup> Ni ñeyi xare lañuy mel,  
di joggati banu mbedd mi ci biir xeex bi.  
Noonu lañuy xaree, nde ñoom la Aji Sax  
jiy àndal,  
ñuy torxal gawar yi.

<sup>6</sup> Maay jàmbaaral waa kër Yuda,  
maay wallu waa kër Yuusufa,  
suqli leen, ñeewante leen,  
ñu mel ni masuma leena xarab,  
nde man maay seen Yàlla Aji Sax ji,  
te maa leen di nangul.

<sup>7</sup> Waa Efrayim ni ñeyi xare lañuy mel,  
seen xol neexe ni bannëexu biiñ,  
seeni doom gis ko, bég,  
seenub xol di bannëexoo Aji Sax ji.

<sup>8</sup> Maay waliis, dajale leen,  
nde maa leen di jot,  
ñu bareeti na ñu baree woon.

<sup>9</sup> Fi biir xeet yi laa leen saawi,  
waaye fa bérab yu loq ya lañu may  
fàttlikoo,  
di fa dund ñook seeni doom,  
ba keroog ñuy délsi.

<sup>10</sup> Fa réewum Misra laa leen di wañnee,  
te fa Asiri laa leen di dajalee,

yóbbu leen réewum Galàdd ak Liban,  
te deesu fa gis fu ñu xaj.

<sup>11</sup> Maay jáll géēju njàqare ga,  
fàdd gannax ya,  
mboolem xóotey dexu Niil wow,  
sagub Asiri sàggiku,  
nguurug Misra foq.

<sup>12</sup> Ci Aji Sax ji laa leen di jàmbaarale,  
ciw turam lañuy daagoo.  
Kàddug Aji Sax jee!»

## 11

<sup>1</sup> Libanéeey, ubbil say wunt,  
sawara xoyom sa garabi seedar.

<sup>2</sup> Yaw garabu sippar, yuuxul,  
garabu seedar daanu na,  
garab yu darajawu rajaxoo na.

Yeen garabi seen ya ca Basan, jooyooleen,  
nde gott bu fatt baa sèngéem.

<sup>3</sup> Jooyi sàmm ya jib na,  
seen daraja réer na,  
ɲari gaynde ya it jolli na,  
nde gajjug tàkkal Yurdan a tas.

### *Sàmm bu baax jotul yoolam*

<sup>4</sup> Aji Sax ji sama Yàlla dafa wax ne:  
«Sàmmal gétt gi ñuy rendiji.

<sup>5</sup> Ñi leen jënd di leen rendi,  
te jàpp ne yoon toppu leen ci;  
ñi leen jaay naan: “Sant Aji Sax ji, woomle  
nanu,”

gétt gi la seeni sàmm yërëmul.

<sup>6</sup> Dootuma yërëm waa réew mi (/àddina)  
déy,»

Kàddug Aji Sax jee!

«Maa ngii di teg doom aadama yi,

ku nekk ci loxol moroomam,  
ak ci loxol buuram,

ñu not réew mi,

te дума leen xettli ci seen loxo.»

<sup>7</sup> Ba loolu amee may sàmm xar yi  
teefonke yi nara rendiluji, rawatina ñi  
gëna sonn ci gétt gi. Ca laa jël ñaari yeti  
sàmm. Benn bi ma tudde ko Xejjoo, bi ci  
des ma tudde ko Bennoo. Ci kaw loolu  
may sàmm gétt gi. <sup>8</sup> Gannaaw gi, ñetti  
sàmm laa dàq ci wenn weer. Ci kaw loolu  
ma doyal ci xar yi, ñoom it, ma génnliki  
leen. <sup>9</sup> Ma ne gétt gi: «Dootuma leen

sàmm. Na ñiy dee, dee; ñiy sàнку, sàнку;  
ñi dese bakkan yàppante ci seen biir.»

<sup>10</sup> Ba mu ko defee ma jël sama wenn  
yet wi, Xejjoo, damm ko, ngir doge ko  
sama kóllère gi ma fasoo woon ak askan  
yépp. <sup>11</sup> Bésuub keroog la kóllère ga dog,  
teefonke yi may xool daldi xam ne loolu  
kàddug Aji Sax ji la.

<sup>12</sup> Gannaaw loolu ma ne leen: «Su leen  
neexee, joxleen ma sama peyoor, su leen  
neexul téyeleen ko.» Ñu waññ fanweeri  
donji xaalis, feye ma.

<sup>13</sup> Aji Sax ji ne ma: «Ndaw njëg gu réy  
gu ma leen jaral! Sànni ko ca boroom  
njaq ya.» Ma jël fanweeri donji xaalis ya\*,  
sànni ko boroom njaq ya, ca kër Aji Sax  
ji.

<sup>14</sup> La ca tegu ma damm sama ñaareelu  
yetub sàmm ba, Bennoo, ngir dog bokk gi  
dox diggante Yuda ak Israyil.

<sup>15</sup> Aji Sax ji nag neeti ma: «Léegi jëlal  
juntukaayu sàmm bu ñàkk bopp. <sup>16</sup> Maa  
ngi nii kat di taxawal ab sàmm ci réew  
mi. Lu ci réer, faalewu ko; lu ci lajj, du ko  
seet, lu ci gaañu, du ko faj, lu wér du ko  
xont, te lu ci duuf, mu yàpp, ba toj seeni  
we.

<sup>17</sup> Wóoy bii yambarub sàmm  
buy wacci gàttam.

Yal na saamar làggal loxoom,  
fuq bëtu ndijooram.

Yal na loxoom lax ne làcc,  
bëtu ndijooram giim ba gëmm fatuus.»

## 12

### *Yerusalem yiwiku na*

<sup>1</sup> Ab yéenee ngi, di kàddug Aji Sax ju  
dikkal Israyil. Kàddug Aji Sax jee, ki  
firi asamaan, lal suuf, te bind noowug  
doom aadama ci biir doom aadama. <sup>2</sup> Mu  
ne: «Maa ngii di waaja def Yerusalem,  
muy ndabal sànj luy màndee, ñeel  
mboolem xeet yi ko wër, te kera bu ñuy  
gaw Yerusalem, Yuda gépp ca lay bokk.

<sup>3</sup> Bésuub keroog maay def Yerusalem di  
doj wu diis gann ci xeet yépp. Képp ku  
ko jéema yëngal, da ciy gaañoo gaañu  
rekk. Te xeeti àddina yépp ay daje ci  
kawam. <sup>4</sup> Su keroogee,» Aji Sax jeey

\* **11:13** 11.13 Mooy ndàmpaay li ñuy fey sang bu ñu gaañ jaamam. Seetal ci *Mucc ga* 21.32.

wax: «ngëlèmte laay dumaa wépp fas, te ag ndof laay dumaa gawaram. Kër Yuda nag laa naan jàkk samay gèt, te ag cilmaxa laay dumaa wépp fasu xeet yi. <sup>5</sup> Su ko defee njiiti Yuda ci seen xol lañu naa: “Waa Yerusalem, sunu doolee ngi ci sunu Yàlla, Aji Sax ji Boroom gàngoor yi.” <sup>6</sup> Bés sub keroog maay def njiiti Yuda mel ni ab taal bu jafal jalu matt, mbaa jum bu ñu jafal ci sabaaru pepp; wetu ndijoor ak wetu càmmoñ lañuy xoyome mboolem xeet yi leen wër, te Yerusalem toog bérabam, di Yerusalem ba tey.

<sup>7</sup> «Aji Sax ji Yuda lay jékka wallu, ndax darajay waa kër Daawuda, ak darajay waa Yerusalem baña màgg ba ëpple Yuda. <sup>8</sup> Bés sub keroog Aji Sax jeey doon kiiraayal waa Yerusalem. Ñi gëna néew doole ci ñoom sax ñook Daawudaay tolloo doole, waa kër Daawuda jiite leen ni Yàlla, ni malaakam Aji Sax ji. <sup>9</sup> Su bés baa laay tàmbalee faagaagal mboolem xeet yiy songsi Yerusalem.

### *Ñaawlu dikkal na réew mépp*

<sup>10</sup> «Bu loolu amee maay sottil waa kër Daawuda ak waa Yerusalem, noowug yiw aki dagaan, ba ñu geesu ma man, mi ñu jam ba mu sar, te dinañu ko jooy ni ñuy jooye benn bàjjo, di ko naqarlu ni ñuy naqarloo deewug taaw. <sup>11</sup> Su bés baa yuuxi dëj yu réy ay jibe fi Yerusalem, mel ni yuuxi dëj ya ca Adàdd Rimon\*, ca jooru Megido. <sup>12</sup> Waa réew meey jooy seenub dëj, làng gu nekk beru ñoomu neen. Làngu kër Daawuda di ñoomu neen, seeni jabar di ñoomu neen; làngu kër Natan† di ñoomu neen, seeni jabar it di ñoomu neen. <sup>13</sup> Làngu kër Lewi di ñoomu neen, seeni jabar di ñoomu neen; làngu Simey‡ di ñoomu neen, seeni jabar di ñoomu neen. <sup>14</sup> Mboolem làng yi ci des it, làng gu ci nekk di ñoomu neen, seeni jabar di ñoomu neen.

\* **12:11** 12.11 Adàdd Rimon mooy fa ñu doon jooye deewug Buur Yosiya. Seetal ci *2.Jaar-jaar ya* 35.21-25.

† **12:12** 12.12 Natan kenn la ci doomi Daawuda. Seetal ci *2.Samiyel* 5.14. ‡ **12:13** 12.13 Simey ab sèt la ci Lewi. Seetal ci *Mucc ga* 6.16-17.

\* **13:6** 13.6 xarit ya li mu tekki mooy tuur yi, ci waxin.

## 13

### *Ay tuur ak yonenti caaxaan day jeex*

<sup>1</sup> «Bés sub keroog bētu ndox dina bënnal kër Daawuda, ak waa Yerusalem, ngir setal bàkkaar ak sobe.

<sup>2</sup> «Bés sub keroog,» kàddug Aji Sax jee, Boroom gàngoor yi, «Turi xërëm laay dagge ci réew mi, ba deesatu leen fàttliku. Yonent yeek xelum xërëmtu it, maa koy tukkal ci réew mi. <sup>3</sup> Te képp kuy biralati waxyu, ay waajuram, baayam ak ndeyam nañu ko wax ne ko: “Doo dese bakkan, ndax yaa fen ci turu Aji Sax ji.” Ay waajuram, baayam ak ndeyam nañu ko jam ba mu dee, ca ba muy biral waxyu.

<sup>4</sup> «Su bés baa, bépp yonent buy biral waxyu, kersa lay am ci am peeñoom. Kenn du sol ni yonent yi, yérey der yu ànd ak kawaram, ngir di naxe. <sup>5</sup> Kenn ku ne da naan: “Man de dumab yonent, beykat laa. Ab surga laa masa doon ba may ndaw ba tey.” <sup>6</sup> Te su ñu ko nee: “Légét yii ci sab dënn nag?” Da naan: “Lii de ay légét la yu ma jële ca sama kër xarit ya\*.”»

### *Kóllëre feddliku na*

<sup>7</sup> «Éey saamar, yewwulal sama sàmm bi, sama jàmbaar jii ma lèngool,» kàddug Aji Sax jee, Boroom gàngoor yi. «Dóoral sàmm bi, xar yi tasaaroo, ma walbati sama loxo, jublu ci jur gu ndaw gi.

<sup>8</sup> Su boobaa ci réew mi mépp, kàddug Aji Sax jee,

ñaari xaaj yi lees di dagg, ñu sànk, ñetteel ba ca des lees fay wacc.

<sup>9</sup> Ñetteel bi laay tàbbal ci sawara, xelli ko ca ni ñuy xellee xalis, nattu ko ni ñuy nattoo wurus cib taal. Xaaj boobu moo may woo ci sama tur, ma wuyu ko.

Moom laay wax: “Sama ñoñ,”

Moom mu ne: “Aji Sax jeey sama Yàlla.”»

## 14

### *Xare bu mujj jib na*

<sup>1</sup> Bés a ngii di dikkal Aji Sax ji,

ca lees di séddoo fi seen biir,  
alal ju ñu nangoo ci yeen.

<sup>2</sup> Xeet yépp laay dajale ci kaw Yerusalem,  
ngir xare.

Dëkk bi lees di nangu, sèxëtoo kër yi,  
tédde jigéen ñi.

Genn-wàllu dëkk beey génn, jëm ngàllo,  
waaye ndesu askan wi, deesu leen dagge  
ci dëkk bi.

<sup>3</sup> Su boobaa la Aji Sax jiy génn,  
xeex ak yooyu xeet,

ni mu baaxoo xeexe ci bésuub xare.

<sup>4</sup> Bésuub keroog, kaw tundu Oliw ya  
la tànkam yay sampe,  
fa janook Yerusalem, ca penku,  
tundu Oliw ya xar ca digg ba,  
penku ba sowu,

def xur wu yaa,

genn-wàllu tund wa randu, jëm bëj-  
gànnar;

genn-wàll ga jëm bëj-saalum.

<sup>5</sup> Xur wa ca diggante sama tund ya ngeen  
di jaare daw,

ndax xur wa ba Accal lay àkki.

Na seeni maam dawee woon ngeen di  
dawe,

ba suuf sa yèngoo,

ca janti Osiyas buurub Yuda.

Sama Yàlla Aji Sax ji mooy dikk,  
ànd ak mboolem ñu sell ñi.

<sup>6</sup> Bésuub keroog, dug leer,

dub sedd, te du benn tawub yuur.

<sup>7</sup> Benn bésu boppam lay doon

bu Aji Sax ji doŋŋ xam;

du doon bëccëg, du doon guddi,

te bu ngoonee mu leer.

<sup>8</sup> Bésuub keroog Yerusalem la ndox muy  
dund di wale,

genn-wàll gi jëm géēju penku,

genn-wàll gi, géēju sowu,

te noor ak nawet lay doon.

<sup>9</sup> Aji Sax ji mooy doon buuru àddina sépp,

bésuub keroog Aji Sax ji di kenn,

turam di wenn.

<sup>10</sup> Réew mi mépp ag joor lay soppliku,

dale ko Geba ba Rimon ca bëj-saalumu  
Yerusalem,

Yerusalem tooge bérabam, tiim la ko wër,  
dëkk bi dale ca buntu Beñamin,

ba fa bunt ba woon,  
jàll ba ca buntu Jàddukaay ba,

daleeti ca tatay Ananel ba ca nalukaayi  
reseñi buur\*.

<sup>11</sup> Dees na ko dëkke te deesatu ko faagaa-  
gal,

kaaraange la Yerusalem di dëkke.

<sup>12</sup> Yii дума la Aji Sax jiy дума

mboolem xeet yi xareek Yerusalem:

Seen suux mooy yàqu te ñu ne jonn  
taxaw,

seeni gët yàqu ca seen biir paxi gët,

seenu làmmiñ nëb ca seen biir gémmiñ.

<sup>13</sup> Bésuub keroog tiitaange ju réy mooy  
tukkee ci Aji Sax ji

wàcc ci seen biir;

ku nekk jàpp sa loxol moroom,

ñu songoo.

<sup>14</sup> Yuda it day fekkxi Yerusalem ci xeex bi,  
te dees na dajale alali xeet yi leen wër  
yépp;

wurus, xaalis ak yéere, bare, ne gàññ.

<sup>15</sup> Yooyu дума it mooy dal fas,

ak berkelleek giléem ak mbaam-sëf,

ak lépp luy jur ci biir dal yooyu,

noonu lees di dumaa mala yépp.

<sup>16</sup> Su boobaa mboolem ndesu wépp xeet

wu songoon Yerusalem,

Yerusalem lay yéegi at mu ne,

ngir sujjóotali Buur Aji Sax ji Boroom  
gàngoor yi,

tey màggalsi màggalu Mbaar yi\*.

<sup>17</sup> Te gépp làngu kaw suuf gu yéegsiwul  
ba Yerusalem,

ngir sujjóotali Buur Aji Sax ji Boroom  
gàngoor yi,

googu làng du tawlu.

<sup>18</sup> Làngu Misra it, su ñu yéegul ba dikk,  
duñu tawlu;

dinañu jot ci дума yi Aji Sax jiy дума

xeet yi yéegul ba màggalsi màggalu  
Mbaar yi.

<sup>19</sup> Loolooy doon dumay Misra ngir seen  
bàkkaar,

di dumay wépp xeet ngir seen bàkkaar,

ndax ñàkka yéeg ba màggalsi màggalu  
Mbaar yi.

\* **14:10** 14.10 Mboolem Yerusalem, ak ci wetam yépp la aaya bi wax ne mooy tiim diiwaan bi ko wër.



<sup>20</sup> Bésùb keroog jóolóoliy fas yi sax  
dees na ci bind:  
«Sell na ñeel Aji Sax ji.»  
Te ni ndabi tuurukaay yi fi kanam sarx-  
alukaay bi selle,  
cin yi gëna néew daraja ci biir kër Aji Sax  
ji sax  
noonu lañu selle.

<sup>21</sup> Su boobaa luy cin ci Yerusalem ak Yuda,  
Aji Sax ji Boroom gàngoor yi lees koy  
sellalal,  
ba mboolem ñi dikk di sarxalsi,  
ci lañuy jël, togge.  
Te bésùb keroog ab jula dootu am  
ci biir kër Aji Sax ji Boroom gàngoor  
yi.

## Téereb Yonent Yàlla Malasi

<sup>1</sup> Yéeneb kàddug Aji Sax jii moo ñeel Israyil, ci jottlib Malasi.

### *Cofeelu Aji Sax ji kóllëreem la laloo*

<sup>2</sup> Aji Sax ji nee: «Dama leena sopp,»  
yeen ngeen ne: «Ana noo nu sopp?»  
Mu ne: «Xanaa Esawu du seexub  
Yanqóoba?»

Kàddug Aji Sax jee,  
«moona Yanqóoba laa sopp,

<sup>3</sup> te Esawu laa foñ.  
Maa def ay tundam ab gent,  
ab céru suufam, ma def ko dëkkuwaayu  
tilli màndiñ mi.

<sup>4</sup> Su Edom\* nee: «Dees noo rajaxe,  
waaye nooy tabaxaat gent bi,»  
Aji Sax ji Boroom gàngoor yi moom dafa  
wax ne:

«Ñooy tabax, maay màbb.»  
Ñoom lees di wooye waa diiwaan bu bon  
bi,  
askan wi Aji Sax ji mere ba fàww.

<sup>5</sup> Yeena koy gisal seen bopp,  
yeenay seede ne: «Màggaayu Aji Sax ji  
jéggi na kemu réewum Israyil.»

### *Aji Sax ji tiñnal na sarxalkat yi*

<sup>6</sup> «Doom teral baayam,  
jaam, sangam.  
Man, su ma dee baay, ana saab teraanga?  
Su ma dee ab sang, ana saab cér?»  
Aji Sax ji Boroom gàngoor yee ko wax,  
mu ne: «Yeen sarxalkat yi teddadil ngeen  
sama tur,  
yeen ngeen ne: «Ana nu nu teddadile sa  
tur?»

<sup>7</sup> Xanaa di indi ñam wu sobewu  
fi sama sarxalukaay.  
Yeen ngeen ne: «Ana nu nu la sobeele?»  
Xanaa xalaat ne sañees naa teddadil  
sarxalukaayu Aji Sax ji.

<sup>8</sup> Bu ngeen ma sarxalsee jur gu gumba,  
dara aayu ci?  
Am bu ngeen ma sarxalsee jur guy soox,

ak jur gu wopp, dara aayu ci daal!  
Yóbbul leen ko seen boroom dëkk rekk,  
ba xam ndax moo leen di nangul,  
mbaa mu siggil leen!»  
Aji Sax ji Boroom gàngoor yee ko wax.

<sup>9</sup> «Ngeen ne: «Léegi nag tinuleen Yàlla  
rekk,  
mu baaxe nu!»  
Yeena tooñ, ndax day siggil kenn ci  
yeen?»

Aji Sax ji Boroom gàngoor yee ko wax.

<sup>10</sup> «Éy bu kenn ci yeen tējoon bunt yi far,  
te baña jafal ab taal ci sama kaw sarx-  
alukaay ci dara.

Awma benn bānneex ci yeen!»

Aji Sax ji Boroom gàngoor yee ko wax.  
«Ab sarax, дума ko nangoo ci seeni loxo.

<sup>11</sup> Waaye li ko dale penku ba sowub jant,  
fu ci nekk la sama tur mágge ci biir xeet  
yi,  
te fépp lees di taale cuuraay, ngir sama  
tur,

boole ci sarax su set,  
nde sama tur a ni mágge fi biir xeet yi.»  
Aji Sax ji Boroom gàngoor yee ko wax.

<sup>12</sup> «Waaye yeen yeena teddadil sarx-  
alukaayu Aji Sax ji,  
nde yeena xalaat ne lu sobewu la,  
te aw yàppam, aw ñamam jarul dara.

<sup>13</sup> Yeena ngi naa: «Ndaw lu soof,» di  
ciipatu.»

Aji Sax ji Boroom gàngoor yee ko wax.

«Jur gu ñu sàcc ngeen may indil,  
ak guy soox, ak gu wopp,  
loolu mooy seen sarax!  
Nu ma koy nangoo ci seeni loxo?»  
Aji Sax jee ko wax.

<sup>14</sup> «Alkànde ñeel na ab jinigalkat bu am  
ci géttam  
am kuuy mu mu xasoo sarxe,  
te di sarxalal Boroom bi jur gu sikk,  
nde man, buur bu mag laa!»  
Aji Sax ji Boroom gàngoor yee ko wax.  
«Sama tur moo jara ragal fi biir xeet yi.

\* **1:4** 1.4 Edomeen ñi ñoo askanoo ci Esawu, bànni Israyil askanoo ci Yanqóoba seexu Esawu. Esawu moo teddadil li taxawe kóllërey Aji Sax ji, ba mu sàgganee céruub taawam. Seetal ci *Njàlbéen ga* 25.34. Edomeen ñi ñoo dëddu Israyil mi Aji Sax ji taamul boppam. Seetal ci *Abdiyās* 10-14.

## 2

<sup>1</sup> «Léegi nag, sarxalkat yi, santaane bii yeen la ñeel.

<sup>2</sup> Su ngeen dégluwul, te defuleen seen xel ci teral sama tur,» Aji Sax ji Boroom gàngoor yee ko wax, «alkànde laay yebal fi seen biir, ba alagaale seeni barke, te alag naa ko jeeg, nde defuleen seen xel ci teral ma.

<sup>3</sup> Maa ngii di yar seen askan, sëlèm leen sébbriit, mi jóge ci seen saraxi màggal, ñu tonniwaale leen ak sébbriit mi.

<sup>4</sup> Su boobaa ngeen xam ne maa leen yónnee santaane bii, ngir saxal sama kóllèreek Lewi\*.» Aji Sax ji Boroom gàngoor yee ko wax.

<sup>5</sup> «Sama kóllère moom laa ko séqal, mu jur ndund ak jàmm, maa ko may loolu ngir mu ragal ma, ragaloon na ma it, bay yéemu ci sama tur.

<sup>6</sup> Njànglem dëgg la dëkkaloon ci gémmiñam, te ag njubadi, déggeesu ko ciw làmmiñam, xanaa di ànd ak man ci jàmm ak njub, tey baloo ñu bare yoonu ñaawtéef.

<sup>7</sup> «Kàddug sarxalkat déy day sàmm xam-xam, te ciy waxam la nit ñi di sàkkoo àlluwa, nde mooy ndawal Aji Sax ji Boroom gàngoor yi.

<sup>8</sup> Waaye yeen dangeena moy yoon wi, seenum njàngle ngeen fakktale ñu bare, te yeena fecci kóllèreg Lewi.»

Aji Sax ji Boroom gàngoor yee ko wax.

<sup>9</sup> «Moo tax man it ma def xeet wépp xeeb leen, sewal leen, feye leen ko seen ñàkka sàmm samay yoon, ak par-parloo gi ngeen di diglee yoon wi.»

*Aji Sax ji du nangu saraxi workat yi*

<sup>10</sup> Xanaa du benn baay lanu am, nun ñépp?

Te jenn Yàlla jee nu sàkk?

Lu waral ku ne di wor mbokkam,

ba fecci kóllèrey maam ya?

<sup>11</sup> Yuda wor na, lu jomblu lees def fi Israyil ak Yerusalem.

Yuda déy moo teddadil li Aji Sax ji sopp te mooy bérabam bu sell:

Yuda moo takk janqub yàllay doxandéem.

<sup>12</sup> Ku def lii, yal na Aji Sax ji dagge ci xaymay Yanqóoba, gépp kuutaayam, boole ci kuy indil ab sarax, Aji Sax ji Boroom gàngoor yi.

<sup>13</sup> Lii itam yeena ngi koy def: Yeena ngi tawal ay rongooñ sarxalukaayu Aji Sax ji,

di jooy ak a binni, ndax moo geesootul seen sarax, te nangootul lenn ci seen loxo.

<sup>14</sup> Ngeen naa: «Ndax lan?»

Ndax Aji Sax ji moo seede seen diggante ak seen jabar ja ngeen jël ba ngeen di ndaw,

tey ngeen wor ko, te mu doonoon seen wéttal, seen jabar ju ngeen séqal kóllère.

<sup>15</sup> Kenn deful lii te desem xel. Kenn donj a ko defoon. Ndax lan? Kuutaay li ko Yàlla digoon la doon wut. Kon nag sàmmleen seenum xel, te buleen wor seen jabar ja ngeen jël ba ngeen di ndaw.

<sup>16</sup> «Pase laa bañ,» Aji Sax ji, Yàllay Israyil moo ko wax, «ak ku làmboo jëfi loraange ni mbubb.» Aji Sax ji Boroom gàngoor yee ko wax. Kon nag sàmmleen seenum xel, te buleen wor.

*Aji Sax ji, dëgg lay àtteji*

<sup>17</sup> Soof ngeen Aji Sax ji ak seeni wax, ngeen naan: «Nu nu ko soofe?»

Xanaa naan: «Képp kuy def lu bon mooy ki baax ci Aji Sax ji, te kooku la safoo.»

Mbaa ngeen naa: «Ana Yàlla jiy àtte dëgg sax?»

## 3

<sup>1</sup> «Maa ngii di yebal sama ndaw, mu xàllal ma aw yoon.

Sang bi (/Boroom bi) ngeen di sàkku

\* 2:4 2.4 Leween ñi jëfe woon firaange ci Aji Sax ji, ñoom lay wax. Seetal ci *Mucc ga* 32.25-29.

mooy jekki agsi këram,  
malaakam kóllère moomu (/ ndawal  
kóllère loolu), ki ngeen safoo,  
mu ngooguy dikk.»

Aji Sax ji Boroom gàngoor yee ko wax.

<sup>2</sup> Waaye bés sub dikkam, ana ku ko mana  
dékku?

Bu teewee ana kuy taxaw?

Nde moom daa mel ni sawaras tegg  
buy xelli weñ,

melati ni xemey fóotkat.

<sup>3</sup> Fa mbaxana dee benn lay tooge  
ni xellikat ak seggkat,

te mooy segg sèti Lewi, xelli leen  
ni xalis ak wurus,

ba ñu doon niti Aji Sax ji,  
ñi koy indil sarax ci njekk.

<sup>4</sup> Su boobaa la saraxu Yuda ak Yerusalem  
di neex Aji Sax ji,  
na jant ya woon, at ya woon.

<sup>5</sup> «Maa leen di dikke ab àtte,  
di ab seede bu taxaw temm  
ci tuumaal ñeengokat yeek njaalookat yi,  
ak ñiy fene ngiñ,

ak ñiy xañ ab liggéeykat peyooram,  
di noggatu ab jètun akub jirim,  
di beddi doxandéem te ragaluñu ma.»

Aji Sax ji Boroom gàngoor yee ko wax.

<sup>6</sup> «Man Aji Sax ji déy, дума soppiku,  
te yeen noppiwuleen di askanu  
Yanqóoba\*, ay workat.

*Waññiku ci Aji Sax ji moo war*

<sup>7</sup> «Ca seen janti maam  
ngeen dèddoo sama dogali yoon,  
sàmmuleen ko.

Waññikuleen fi man, ma waññiku fi  
yeen,»

Aji Sax ji Boroom gàngoor yee ko wax.

«Yeena ngi naa:

“Ci lan lanuy waññikoo?”

<sup>8</sup> Waaw, nit dina sàcc Yàlla?

Ndaxam yeen yeena ngi may sàcc  
te yeena ne: “Ana nu nu la sàcce?”

Xanaa ci seen cérub fukkeelu alal akub  
jooxe.

<sup>9</sup> Alkànde ju réya ngi leen di dikkal,  
nde man ngeen di sàcc, yeen mboolem  
askan wi.

<sup>10</sup> Indileen mboolem céru fukkeel

ca kërug denc ya,

ba ab dund am sama biir kër,  
te ngeen seetloo ma ko rekk,»

Aji Sax ji Boroom gàngoor yee ko wax,  
«ndegam дума leen ubbil bunti  
asamaan,

ba sottil leen barke bu doy.

<sup>11</sup> Maa leen di gèddal njéeréer,

ba du leen yàqal meññeefum suuf,  
te reseñug tool du leen jaasiral.»

Aji Sax ji Boroom gàngoor yee ko wax.

<sup>12</sup> «Xeet yépp ñu barkeel ñi lañu leen di  
wooye,

nde réewum bannéex ngeen di dèkke.»

Aji Sax ji Boroom gàngoor yee ko wax.

*Aji Sax ji dina fésal njubteg àtteem*

<sup>13</sup> «Kàddu yu ñagas ngeen teg ci sama  
kaw,»

Aji Sax jee ko wax.

«Te yeena ne: “Ana kàddu yu ñu la  
waxal?”

<sup>14</sup> Yeena ne: “Jaamu Yàlla ag neen la.

Ana lu nu jële ci dénkoo ndénkaaneem,  
tey wéye toroxlu

fi kanam Aji Sax ji Boroom gàngoor yi?

<sup>15</sup> Moo tax nu ne nit ñu bew ñi ñooy ñi  
barkeel,

ñiy def lu bon kay ñoo baaxle,

ñoom ñiy diinjat Yàlla, teg ca rëcc.»»

<sup>16</sup> Ca la ñi ragal Aji Sax ji diisoo ci seen  
biir,

Aji Sax ji teewlu, déglu leen.

Ñu bind fi kanamam téereb fàttliku,  
bu lim ñi ragal Aji Sax ji,

te teral aw turam.

<sup>17</sup> «Sama moomeelu bopp la ñooñuy  
doon,»

Aji Sax ji Boroom gàngoor yee ko wax,

«ca bés ba may jéfi, sama gànjar lañuy  
doon,

te ni baay di baaxee as ngóoram su ko  
taxawu,

ni laa leen di baaxee.

<sup>18</sup> Ca ngeen di ràññaatlewaat diggante  
ku jub ak ku bon,

kuy jaamu Yàlla,

ak ku ko jaamuwul.

<sup>19</sup> Bés ba déy a ngii di ñëw,  
di tàkk ni taal bu yànj.

\* 3:6 3.6 askanu Yanqóoba mooy askan wi soqikoo ci Yanqóoba mi suufu woon ab seexam.

Képp ku bew ak kuy def lu bon,  
 ca lay mel ni boob,  
 te bésub keroog baa koy jafal.»  
 Aji Sax ji Boroom gàngoor yee ko wax.  
 «Du leen waccal tus, dub reen, dub car.  
<sup>20</sup> Waaye yeen ñi ma ragal  
     la jantub njekk di fenkal,  
 yiire leen ceeñeer yuy wéral,  
 ngeen génn di tēbantu ni ay sēlluy yar.  
<sup>21</sup> Yeenay joggi ñu bon ñi,  
 ñu doon pënd fi seen ron téstën,  
 keroog bés ba may jēfi.»  
 Aji Sax ji Boroom gàngoor yee ko wax.

<sup>22</sup> «Bàyyileen xel ci yoonu Musaa, sama  
     jaam ba,  
 yoon wa ma ko dénkoon fa tundu Oreb,  
 ñeel Israyil gépp,  
 mu diy dogal ak àttey yoon.

<sup>23</sup> Maa ngii di yebal ci yeen, Ilyaas yonent  
     bi,  
 balaa bésub Aji Sax jee teew,  
 di lu màgg te raglu.

<sup>24</sup> Mooy delloo xolu baay ca doom ja,  
 delloo xolu doom ca baay ba,  
 lu ko moy ma dikk дума réew mi, ba  
     faagaagal ko.»

## Xibaaru jàmm bu Almasi Yeesu, ci jottlib Luug Ubbite gi

Luug ak Jëf ya benn téere la bu ëmb ñaari pàcc. Ñaar ñépp a indi ni Yàlla jëkka wooye bànni Israyil ba noppi, doora woo mboolem xeet yi, ngir ñu barkeele ci Ibraayma.

Ci pàcc bu jëkk bi, nettalib Luug Yerusalem la dox jëm, èttu kërug cosaanu askanu Yawut. Ñaareelu pàcc bi, Jëf ya, Yerusalem la bawoo, jëm ci xeeti àddina yi ci des, doora tëje fi Póol birale nguuru Yàlla ca dëkk ba ñuy wax Room, péeyu nguuru gu mag ga.

Pàcc bu jëkk bi nettali dundu Almasi Yeesu, ni ko Luug indee, ñetti dog la.

Dog bi ci jiitu moo di liggéeyu Yeesu ca Galile ca Israyil, wetu bëj-gànnaram.

Ñaareel bi moo di yoonam wu yàgg wa mu jëme Yerusalem. Ci biir woowu yoon la dalale nit ñi ci àlluwa ju yees ju leen xamal ni Yàlla taxawale nguoram, te mu woroo ak ni kaan-fóorey Israyil dégge nguuru Yàlla ca yooyu jant.

Ñetteelu dog bi, ci la Luug indi ni Almasi Yeesu sarxee bakkanam ca Yerusalem, te gannaaw gi mu dekki, ba firndeel ne moo di buuru Israyil, te moo di Sangub àddina dëgg.

<sup>1</sup> Bare na ñu fexee bind ab nettalib mbir, yi sotti woon ci sunu biir, <sup>2</sup> noonee nu ko jote ca ña ko fekke woon ca ndoorte la, te seede yooyu mujj doon jawriñi kàddug Yàlla. <sup>3</sup> Moo tax man it, ma fas laa yéenee bindal lépp ba mu jekk, yaw Tewofil mu tedd mi, gannaaw ba ma gëstoo mbir mépp, dale ko ca ndoorte la, ba mu leer nàññ. <sup>4</sup> Su ko defee nga xam xéll ne li ñu la jàngal, lu wér péng la.

### *Malaaka yégle na juddub Yaxya*

<sup>5</sup> Jant ya Erodd dee buuru réewum Yawut yi, ab sarxalkat la woon bu ñuy wax Sàkkaryaa, bokk ci làngu sarxalkat,

yi askanoo ci Abiya, te soxnaam Elisabet askanoo ci Aaróona. <sup>6</sup> Ñoom ñaar ñépp a juboon, Yàlla seede, te mucc ayib ni ñuy jëfe santaane yeek ndigali yooni Boroom bi. <sup>7</sup> Amuñu woon doom nag, ndax Elisabet manul wona am doom, te it booba ñoom ñaar ñépp a dem ba màggat.

<sup>8</sup> Sàkkaryaa la làngam aye woon, muy def liggéeyu carxalam fa kanam Yàlla. <sup>9</sup> Ba ñu tegoo bant, na ko sarxalkat yi baaxoo woon, moom la bant ba dal, mu wara dugg biir néegu Boroom bi, ngir taal fa saraxu cuuraay.

<sup>10</sup> Mbooloo mépp nag a nga woon ca biti di julli, ca waxtuw saraxu cuuraay boobu. <sup>11</sup> Ci biir loolu menn malaakam Boroom bi jekki feeñu Sàkkaryaa, ca wetu ndi-jooru sarxalukaayu cuuraay ba. <sup>12</sup> Ba ko Sàkkaryaa gisee daa jaaxle, tiitaange jàpp ko. <sup>13</sup> Malaaka ma ne ko: «Sàkkaryaa, bul tiit, ndax sa ñaan nangu na. Elisabet sa soxna dina am doom ju góor, nanga ko tudde Yaxya. <sup>14</sup> Dinga am mbégte ak bannex, te ñu bareey bég ci juddoom, <sup>15</sup> ndax ku màgg lay doon, Boroom bi seede. Biiñ ak lenn luy màndee nag, du ko naan, Noo gu Sell gi mooy dale ca biiru ndeyam, solu ko ba fees. <sup>16</sup> Niti bànni Israyil ñu bare, moo leen di waññi ci Boroom bi seen Yàlla. <sup>17</sup> Mooy ndaw li koy jiitu, ànd ak leer ga ak xam-xam, ba woon ca Yonent Yàlla Ilyaas, ba waññi xolu baay ci doomam, waññi ku déggadi ci xelum aji jub, loolu yépp ngir waajal aw xeet ba ñu jekk ngir Boroom bi.»

<sup>18</sup> Sàkkaryaa nag ne malaaka mi: «Lu may def ab takk ci loolu ba mu bir ma? Ndax man màggat naa, te sama soxna it làq na ay fan.» <sup>19</sup> Malaaka ma ne ko: «Man maay Jibril miy taxaw fi kanam Yàlla. Dañu maa yónni ngir ma wax ak yaw, yégal la bii xibaaru jàmm. <sup>20</sup> Léegi nag, dama ne, gannaaw gëmuloo sama kàddu, giy jot, sotti, dinga luu te dootuloo mana wax, ba kera loolu di am.»

<sup>21</sup> Ci biir loolu mbooloo maa ngay xaar Sàkkaryaa, jaaxle lool ndax yàggaayam ca biir néeg Yàlla ba. <sup>22</sup> Ba mu génnee nag, manula wax ak ñoom. Ñu daldi xam

ne am na lu ko feeñu ca néeg Yàlla ba. Ma nga leen di liyaar, manatula wax.

<sup>23</sup> Naka la Sàkkaryaa fégal ayu carxalam, daldi ñibbi. <sup>24</sup> Gannaaw gi, soxnaam Elisabet ëmb. Lëlu na juróomi weer. Ma nga naan: <sup>25</sup> «Lii Boroom bee ma ko defal ci jant yi mu ma geesoo, ba teggil ma sama gâcece gi ci biir nit ñi!»

### *Jibril yégle na juddub Yeesu*

<sup>26</sup> Ba Elisabet tolloo ci juróom benni weeram, ca la Yàlla yebal Jibril malaaka mi, dëkk bi ñuy wax Nasaret ca diiwaanu Galile, <sup>27</sup> ci janq bu digoo séy ak waa ju ñuy wax Yuusufa te bokk ci waa kër Daawuda. Janq ba Maryaama lañu koy wax. <sup>28</sup> Malaaka ma agsi ba ca moom, ne ko: «Jàmm nga am, yaw mi ñu baaxe, Boroom bi yaw la àndal.»

<sup>29</sup> Waxi malaaka ma nag jaaxal Maryaama, muy xalaat lu nuyoo boobu mana tekki. <sup>30</sup> Malaaka ma ne ko: «Maryaama, bul tiit, ndax daje nga ak yiwu Yàlla. <sup>31</sup> Dinga ëmb, ba jur doom ju góor; nanga ko tudde Yeesu. <sup>32</sup> Ku màgg lay doon, te dees na ko wooye Doomu Aji Kawe ji. Boroom bi Yàlla moo koy jagleel nguug Daawuda maamam. <sup>33</sup> Mooy nguuru fi kaw waa kër Yanqóoba ba fàww, te nguugam du foq muk.»

<sup>34</sup> Ci kaw loolu Maryaama laaj malaaka mi ne ko: «Nu loolu di ame, te man xawma góor?» <sup>35</sup> Malaaka mi ne ko: «Noo gu Sell gi mooy wàccsi ci yaw, dooley Aji Kawe ji yiir la. Moo tax itam ku Sell kiy juddoo ci yaw, dees na ko wooye Doomu Yàlla. <sup>36</sup> Te kat Elisabet sa mbokk mi itam ëmb na doom ju góor te fekk ko màggat. Ki ñu doon wooye jigéen ju jaasir, mu ngi nii ci juróom benni weeram, <sup>37</sup> ndax Yàlla, dara tëwu ko.» <sup>38</sup> Maryaama daldi ne: «Maa ngi, di jaamub Boroom bi. Nii nga waxe, na ame noonu ci man.»

Ba loolu amee malaaka ma bàyyikoo ca moom, dem.

### *Maryaama seeti na Elisabet*

<sup>39</sup> Ci fan yooyu la Maryaama fabu gaaw, jëm diiwaanu tund ya, ca dëkkub Yude, <sup>40</sup> ba Sàkkaryaa dëkke. Mu agsi ca kër ga, nuyu Elisabet. <sup>41</sup> Naka la Elisabet

dégg nuyooob Maryaama, doom ja mu ëmb yëngu ca biiram. Elisabet daldi feese Noo gu Sell gi. <sup>42</sup> Mu àddu ca kaw ne: «Yaa gëna barkeel ci jigéen ñi, sa doom ji nga ëmb it barkeel na! <sup>43</sup> Ana ku ma doon ba sama ndeyu Sang di ma seetsi? <sup>44</sup> Naka la sa kàddug nuyoo tàbbi sama nopp rekk, sama doom ji yëngu ci sama biir bi ndax bég. <sup>45</sup> Ndoklee yaw mi gëm ne mbir mi ñu la yégal, te mu tukkee ci Boroom bi dina sotti!»

### *Maryaama woy na mbaaxu Yàlla*

<sup>46</sup> Maryaama nag ne:

<sup>47</sup> «Sama xol laay màggale Boroom bi, samag noo laay bége Yàlla mi may musal, <sup>48</sup> moo geesu bii jaamam bu tekkeedi, ba maasoo maas doxe fi wooye ma boroom mbég mi,

<sup>49</sup> nde Kiy Boroom doole moo ma defal jaloore, sellnga ñeel naw turam.

<sup>50</sup> «Yërmandeem a ñeel ay ragalkatam, maas ci kaw maas.

<sup>51</sup> Dooley loxoom la defe ay jaloore, tasaare ñi jikkowoo réy-réylu,

<sup>52</sup> wàccée buur yi ci seeni gàngune, yékkati baadoolo yi.

<sup>53</sup> Ñi xiif, mu reggal leen lu neex, ñi duunle, mu dàqe loxoy neen.

<sup>54</sup> Moo wallu bànni Israyil, jaamam, bàyyee ko xel yërmandeem,

<sup>55</sup> noonee mu ko dige woon sunuy maam, ñeel Ibraayma ak askanam ba fàww.»

<sup>56</sup> Maryaama toog na fa Elisabet lu wara tollook ñetti weer, sooga ñibbi.

### *Lu jëm ci juddub Yaxya*

<sup>57</sup> Gannaaw gi Elisabet dem ba àppam mat, mu mucc, am doom ju góor. <sup>58</sup> Dëkkandoom yaak ay bokkam yég noonu ko Boroom bi xéewalee yërmandeem, ñu bokk ak moom mbégte ma.

<sup>59</sup> Ba bés ba délsee, ñu dikk xarfalsi xale ba, bëgg koo tudde Sàkkaryaa, dippee ko baayam. <sup>60</sup> Yaayam nag ne leen: «Déet, Yaxya lay tudd.» <sup>61</sup> Ñu ne ko: «Waaye kenn ci say bokk tuddul noonu!»

<sup>62</sup> Ci kaw loolu ñu liyaar baayam, ngir xam nu mu bëgg ñu tudde xale bi. <sup>63</sup> Sàkkaryaa laaj àlluwa, ñu jox ko, mu

bind ci: «Yaxya mooy turam.» Ñépp waaru. <sup>64</sup> Ca saa sa gémmiñ ga ubbiku, làmmiñ wa nangu, muy wax, daldi sant Yàlla. <sup>65</sup> Ba loolu amee tiitaange dikkal mboolem ña leen séq, mbir moomu mépp nag doon waxtaan ca diiwaanu tundi Yude gépp. <sup>66</sup> Ña ca dégg ñépp daldi bàyyi xel ca mbir ma, te naan: «Lu xale bii nara doon èllég?» ngir manoorey Boroom bee àndoon ak moom.

### *Sàkkaryaa sant na Yàlla*

<sup>67</sup> Ci kaw loolu Sàkkaryaa baayu Yaxya feese Noo gu Sell gi, daldi tàmbalee biral kàddug waxyu, ne:

<sup>68</sup> «Cant ñeel na Boroom bi Yàllay Israyil, moo seetsi ñoñam, ba jot leen!

<sup>69</sup> Moo nu feeñalal Musalkat bu manoorewu,

fi biir kër Daawuda jaamam ba,

<sup>70</sup> noonee mu ko waxe woon ca jant yu jëkk ya, yonentam yu sell ya woon jottli,

<sup>71</sup> moo nu musal ci sunuy noon, jële nu ci sunu loxoy mboolem bañaale.

<sup>72</sup> Moo jëfe yërmande ñeel sunuy maam, tey bàyyi xel kóllèreem gu sell,

<sup>73</sup> ak ngiñ la mu giñaloon sunu maam Ibraayma,

<sup>74</sup> ne moo nuy may nu mucce ci loxoy noon,

ba man koo jaamoo xel mu dal

<sup>75</sup> ci biir sellnga ak njub ci kanamam, sunu giiru dund.

<sup>76</sup> «Ngóor si nag yaw, yonentu Aji Kawe ji lees lay wooye,

nde yaay dox, jiitu Sang bi, xàllal kow yoonam,

<sup>77</sup> ngir yégal ñoñam ag njot guy topp seen njéggalug bàkkaar.

<sup>78</sup> Sunu Yàllaa yaatu yërmande, moo nu fenkal ab jant,

<sup>79</sup> di niital ñi tooge biir lëndëm ak takndeeru ndee,

di nu gindi, teg nu ci yoonu jàmm.»

<sup>80</sup> Ngóor sa nag di màgg, xel ma di yokku. Mu dëkk ca màndiñ ma, ba bés ba mu feeñoò bànni Israyil.

## 2

### *Yeesu juddu na ca Betleyem*

<sup>1</sup> Jant yooyu ndigal moo tukkee woon ci buur bu mag bu ñuy wax Sesaar Ogust. Mu ne na ñépp binduji ca limeef ya.

<sup>2</sup> Mbindu mooma mooy mu jëkk ma, yemook ba Kiriñus dee boroom réewum Siri. <sup>3</sup> Ci kaw loolu ñépp binduji, ku nekk ca sa dëkku cosaan. <sup>4</sup> Ku ñuy wax Yuusufa itam jóge Nasaret ca diiwaanu Galile, jëm ca diiwaanu Yude ca Betleyem, dëkk ba Daawuda cosaanoo, ndax ci waa kër Daawuda la askanam bokk. <sup>5</sup> Maryaama mi digook moom séy la àndal binduji, te fekk ko mu ëmb. <sup>6</sup> Naka lañu dal Betleyem, waxtuw muccam agsi. <sup>7</sup> Mu am doom ju góor, mu dib taawam. Mu laxas ko, tëral ko ca gàmbug jur ga\*, ndax ñàkk fu ñu xaj ca néegu gan ba.

### *Malaaka feeñu na ay sàmm*

<sup>8</sup> Booba ay sàmm a nga ca gox boobee, di fanaanee wattu seenug jur. <sup>9</sup> Am malaakam Boroom bi jekki feeñu leen, leeru Boroom bi melax, wër leen, ñu tiit tiitaange lu réy. <sup>10</sup> Malaaka mi ne leen: «Buleen tiit, ndax kat maa leen indil xibaaru jàmm bu doon mbég mu réy, ñeel askan wépp. <sup>11</sup> Bésuub tey jii ca dëkku Daawuda, juddule ngeen ab Musalkat, te mooy Almasi, di Sang bi. <sup>12</sup> Li ngeen ciy def ab takk moo di: dingeen gis liir bu ñu laxas, tëral ko ci gàmbug jur.»

<sup>13</sup> Ca saa sa gàngooru asamaan gu mag ànd ak malaaka mi, di sàbbaal Yàlla, ne:

<sup>14</sup> «Daraja ñeel na Yàlla fa asamaan sa gëna kawé,

jàmm ci kaw suuf ñeel ñi Yàlla baaxe.»

<sup>15</sup> Ba malaaka ya bàyyikoo ca sàmm sa, dellu asamaan, ñuy wax ca seen biir, naan: «Nanu dem boog Betleyem, seeti la fa xew, te Boroom bi xamal nu ko.»

<sup>16</sup> Ñu gaaw dem ba foofa, daldi gis Maryaama ak Yuusufa, ak liir ba tëdd

\* **2:7** 2.7 gàmbug jur ga: nit ñi ak jur gi ñoo daan bokk fu ñuy fanaan, doonte dañoo sàkkaloon jur gi bérab bu gëna suufe, gàmbug jur gi dox seen diggante ak nit, ñay féeete fu gëna kawé.



ca gàmbug jur ga. <sup>17</sup> Naka lañu leen gis, daldi leen xamal la ñu leen wax ca mbirum xale ba. <sup>18</sup> Mboolem ña dégg la leen sàmm sa wax nag waaru lool. <sup>19</sup> Teewul Maryaama moom, bàyyi woon na xel ci mbir moomu mépp, di ko xalaat ci xolam. <sup>20</sup> Ba loolu amee sàmm sa dellu, di sàbbaal ak a sant Yàlla ci mboolem la ñu dégg, gis ko, te lépp ame noonee ñu leen ko waxe woon.

### *Yóbbu nañu Yeesu ca kër Yàlla ga ca Yerusalem*

<sup>21</sup> Ba juróom ñetti fani xale bi matee, ñu xarfal ko, tudde ko Yeesu, na ko malaaka ma tudde woon, bala moo sosu.

<sup>22</sup> Gannaaw ba seen fani setlu† matee, ni ko yoonu Musaa laaje, ñu yóbbu xale bi Yerusalem, ngir teewal ko fi kanam Boroom bi, <sup>23</sup> noonee ñu ko binde ci yoonu Boroom bi ne: «Bépp taaw bu góor, dees koy tudde séddoo bu sell, ñeel Boroom bi.» <sup>24</sup> Ñu yóbbaaale sarax bi ci war, ni ko yoonu Boroom bi santaanee: «ñaari pitaxu àll mbaa ñaari xati yu ndaw.»

### *Simeyon sàbbaal na Yàlla*

<sup>25</sup> Amoon na nag ca Yerusalem ku ñuy wax Simeyon; ku juboon, ragal Yàlla, di séentu jamono ji nekinu bànni Israyil di ame ag tan, te Noo gu Sell gi àndoon ak moom. <sup>26</sup> Ndéey nag tukkee ci Noo gu Sell gi, xamal ko ne ko du dee muk te gisul Almasi bu Boroom bi. <sup>27</sup> Ci kaw loolu mu dem ba ca biir kër Yàlla ga ci dooley Noo gu Sell gi. Gannaaw loolu waajuri Yeesu indi Yeesu ngir defal ko li aaday yoon wi laaj. <sup>28</sup> Simeyon itam jël xale bi, leewu ko, daldi sàbbaal Yàlla, ne:

<sup>29</sup> «Léegi nag Buur Yàlla, yiwil sab jaam, mu dem ak jàmm, noonee nga ko waxe woon.

<sup>30</sup> Nde saay gët tegu na ci mucch gi nga dogal,

<sup>31</sup> waajal ko fi kanam askan yépp,

<sup>32</sup> mu dig leer, ñeel jaambur ñi,

sagal Israyil sa ñoñ.»

<sup>33</sup> Baay bi ak ndey ji nag yéemu ci kàddu yooyu ñu wax ci xale bi. <sup>34</sup> Ba loolu

amee Simeyon ñaanal leen, ba noppi ne ndeyam Maryaama: «Dama ne, kii lañu yebal ngir sànkutey ñu bare mbaa seenug leqliku ci digg Israyil, ngir itam mu doon firnde ju ñuy gàntal. <sup>35</sup> Yaw nag, sab xol la aw naqar wu mel ni saamar di xar, ba ñu bare la seen xalaati biir xol di feeñ.»

### *Aana sant na Yàlla*

<sup>36</sup> Jigéen ju ñuy wax Aana, ab yonent la woon ca Yerusalem, di doomu Fanuwel mi askanoo ci giirug Aser. Mag la woon lool. Ba muy janq la séy, nekk ak jëkkëram juróom ñaari at. <sup>37</sup> Jëkkër ja faatu, mu toog, séyaatul, ba booba mu amee juróom ñett fukki at ak ñeent (84). Daawul jóge ca kër Yàlla ga, koor ak julli la daan jaamoo guddi ak bëccëg. <sup>38</sup> Aana nag dikk moom it ca waxtu woowa, daldi delloo Yàlla njukkal. Ci kaw loolu muy waxtaane mbirum xale bi ak mboolem ña doon séentu bésu goreelug Yerusalem.

<sup>39</sup> Ci kaw loolu ñu matal mboolem lu yoonu Boroom bi laaj, doora dellu Nasaret, seen dëkk ba ca diiwaanu Galile. <sup>40</sup> Xale bi nag di màgg, di dëgër, feese am xel, te yiwu Yàlla ànd ak moom.

### *Yeesu feeñ na ca kër Yàlla ga*

<sup>41</sup> At mu jotaan nag waajuri Yeesu dem Yerusalem, ngir màggali bésu Mucc ba. <sup>42</sup> Ba Yeesu amee fukki at ak ñaar, ñu dem màggali na ñu ko baaxoo woon. <sup>43</sup> Ba màggal ga tasee, ñu ñibbi, ngóor sa Yeesu moom des Yerusalem, te ay waajuram yéguñu ko. <sup>44</sup> Ñu xalaat ne, Yeesu daa ànd ak ñu ñu bokkaloos yoon. Dox nañu bésu lëmm, door koo wëri ci seeni bokk ak seeni xame, <sup>45</sup> te taxul ñu gis ko. Ñu daldi dellu Yerusalem, seeti ko.

<sup>46</sup> Ca gannaaw èllëg sa lañu ko fekk ca kër Yàlla ga, mu toog ca digg jànglekak ya, di leen déglook a laaj. <sup>47</sup> Mboolem ña ko dégg yéemu ci dégginaam aki tontam. <sup>48</sup> Ay waajuram gis ko, waaru. Yaayam ne ko: «Doom, li nga nu def nag? Maak sa baay a ngi jaaxle, di la seet!» <sup>49</sup> Mu ne leen: «Lu ngeen may seete? Xamuleen ne sama kër Baay laa wara nekk?»

† 2:22 2.22 setlu: ab diir lañu àppaloon wasin-bees gannaaw bu taawloo góor, bala moo yóbbu xale bi kër Yàlla ga, ngir def sarax yi setlu wasin-bees laaj. Seetal ci *Sarxalkat yi* 12.6-8.

<sup>50</sup> Ay waajuram ñoom déggũñu kàddu googu mu leen wax. <sup>51</sup> Gannaaw loolu Yeesu ànd ak ñoom, dellu Nasaret, tey saxoo déggal ay waajuram. Yaayam nag takk mbir yooyu yépp ci xolam. <sup>52</sup> Yeesu moom, ma ngay màgg ci dayo ak xel mu rafet, ak cérub yiw fi Yàlla ak nit ñi.

### 3

#### *Yaxya waare na*

<sup>1</sup> Ca fukkeelu at ak juróom ci nguurug buur bu mag ba Tibeer Sesaar, ba Poñsè Pilaat yilifee diiwaanu Yude, Erodd yilif diiwaanu Galile, Filib magam yilif diiwaanu Iture ak bu Tarakonit, Lisañas yilif Abilen, <sup>2</sup> jant yooyu Anas ak Kayif dee sarxalkat yu mag ya, ca la kàddug Yàlla dikkal Yaxya doomu Sàkkaryaa, ca màndiñ ma. <sup>3</sup> Yaxya dugg mboolem àll, bi wër dexu Yurdan, di waare lu jëm ci tuubeel gu nit ñi wara fésale ag sóobu cim ndox, ngir ñu jéggal leen seeni bàkkaar.

<sup>4</sup> Loolu lañu bind ci téereb waxi Yonent Yàlla Esayi ne:

«Baat a ngi xaacoo ca màndiñ ma, naan: «Xàll-leen yoonu Boroom bi, jubal-leen ay xàllam.

<sup>5</sup> Xur yépp ay sèkke, tund wu magoo wu ndaw maasaloo, yoon ya lunkoon, jubbantiku, ya ñagason, nooy,

<sup>6</sup> ba wépp suux gis mucç gi Yàlla dogal.»

<sup>7</sup> Yaxya nag di wax mbooloo may ñëw ngir mu sóob leen ci ndox, naan leen: «Yeen njurum jaan mee, ku leen àrtu, ba ngeen di daw sànj miy dikk? <sup>8</sup> Kon nag jéfeleen jëf ju yelloo ag tuubeel, te baña nax seen bopp naan: “Nun, Ibraayma mooy sunu maam,” ndax maa leen ko wax, doj yii, Yàlla man na cee sàkkal Ibraayma aw askan. <sup>9</sup> Te itam sémmiñ xàccil na reenu garab ba noppi. Kon nag gépp garab gu ci meññul doom yu baax, dees koy gor, sànni ca sawara sa.»

<sup>10</sup> Mbooloo ma itam laaj ko ne ko: «Ana lu nu war nag?» <sup>11</sup> Mu ne leen: «Ku am

ñaari turki, na sédd ki amul. Ku am aw ñam itam, na defe noonu.» <sup>12</sup> Ay juutikat itam dikk, ngir sóobusi; ñu ne Yaxya: «Sëriñ bi, ana lu nu war?» <sup>13</sup> Mu ne leen: «Xanaa baña sàkku lenn lu moy li jaadu.» <sup>14</sup> Ay takk-der itam ne ko: «Nun nag, nu nuy def?» Mu ne leen: «Buleen néewal kenn doole, mbaa di duural kenn ngir jëlal ko dara; doylloo leen seen peyoor.»

<sup>15</sup> Ci kaw loolu askan wa di séentu, ñépp di seetaat ci seen xel, ndax Yaxya mooy Almasi. <sup>16</sup> Yaxya wax leen ñoom ñépp ne leen: «Man de ci ndox laa leen di sóob. Waaye ku ma sut a ngi ñëw, kooku, buumi caraxam sax, yeyoowuma ko koo feccil. Moom, ci Noo gu Sell gi ak sawara la leen di sóob\*». <sup>17</sup> Ab layoom a ngi ci loxoom, mooy jéri dàggaam, ba mu set wecc; pepp mi lay fat cim sàqam, waaye xatax bi, da koy lakk ci sawara su dul fey mukk.»

<sup>18</sup> Bare na yeneen dénkaane yu Yaxya doon xamale nit ñi xibaaru jàmm bi. <sup>19</sup> Erodd boroom diiwaan ba nag, Yaxya sikkoon na ko ndax Erojàdd jabaru magam ja mu nekkaloon, ak mboolem yeneen ñaawtéef yu Erodd def. <sup>20</sup> Mu tegati leneen ca loolu lépp: jàpp Yaxya, tēj ca kaso ba.

#### *Yaxya sóob na Yeesu ci ndox*

<sup>21</sup> Noonu Yaxya doon sóobe ñépp cim ndox, ni la deme ba Yeesu dikk, mu sóob ko ci ndox. Ci biir loolu Yeesu yékkati kàddug ñaan, asamaan ubbiku. <sup>22</sup> Ba loolu amee Noo gu Sell gi moo bindoo ni pitax, wàcc ci kawam, baat jibe asamaan, ne: «Yaa di sama Doom, sama soppe; yaa may bannexal.»

#### *Lu jëm ci cosaanu Yeesu Almasi*

<sup>23</sup> Yeesu ci boppam ba muy door, amoon na lu tollu ci fanweeri at, di doomu Yuusufa, ni ko xel mana jappe. Yuusufa, Eli mooy baayam, <sup>24</sup> Eli, Matat. Matat, Lewi; Lewi, Melki; Melki, Yanayi; Yanayi, Yuusufa;

\* **3:16** 3.16 Sóobu gi ci Noo gu Sell gi ak ci sawara moo leen di sol doole ju bawoo ci Noo gu Sell gi, ak itam setal leen ni sawara di setale weñ gu am lu ko rax. Sawara dina taxawe itam cérú mbugal mu ñeel ñi déggalul Yàlla. Seetal ci 12.49 ak *Jëf ya* 2.3.

- 25 Yuusufa, Matacas; Matacas, Amos; Amos, Nawum; Nawum, Esli; Esli, Nagayi.
- 26 Nagayi, Maat; Maat, Matacas; Matacas, Semeyin; Semeyin, Yoseg; Yoseg, Yoda.
- 27 Yoda, Yowanan; Yowanan, Resa; Resa, Sorobabel; Sorobabel, Selcel; Selcel, Neri;
- 28 Neri, Melki; Melki, Adi; Adi, Kosam; Kosam, Elmadam; Elmadam, Er.
- 29 Er, Yeesu; Yeesu, Elyeser; Elyeser, Yorim; Yorim, Matat; Matat, Lewi;
- 30 Lewi, Simeyon; Simeyon, Yuda; Yuda, Yuusufa; Yuusufa, Yonam; Yonam, Elyakim.
- 31 Elyakim, Meleya; Meleya, Mena; Mena, Matata; Matata, Natan; Natan, Daawuda. 32 Daawuda mooy doomu Yese;
- Yese, Obedd; Obedd, Bowas; Bowas, Sala; Sala, Nason.
- 33 Nason, Aminadab; Aminadab, Admin; Admin, Arni;
- Arni, Ebron; Ebron, Peres; Peres, Yuda; 34 Yuda, Yanqóoba; Yanqóoba, Isaaxa; Isaaxa, Ibraayma; Ibraayma, Teraa; Teraa, Naxor;
- 35 Naxor, Serug; Serug, Rew; Rew, Peleg; Peleg, Eber; Eber, Sela;
- 36 Sela, Kenan; Kenan, Arpagsàdd; Arpagsàdd, Sem; Sem, Nóoyin; Nóoyin, Lemeg;
- 37 Lemeg, Matusalem; Matusalem, Enog; Enog, Yeredd; Yeredd, Malaleel; Malaleel, Kenan;
- 38 Kenan, Enos; Enos, Set; Set, Aadama; Aadama, Yàlla.

## 4

### *Yeesu dékku na pexey Seytaane*

1 Yeesu moo feese woon Noo gu Sell gi, bàyyikoo dexu Yurdan, ci njiital Noo gi, ca biir màndiŋ ma. 2 Ñeent fukki fan la ko fa Seytaane fiir, lekkul dara diir boobu bépp. Gannaaw ba fan yooyu wéyee, mu xiif.

3 Seytaane nag ne ko: «Ndegam yaa di Doomu Yàlla, neel doj wii mu soppliku mburu.» 4 Yeesu ne ko: «Bindees na ne du aw ñam donj la nit di dunde.»

5 Seytaane yéegé na ko itam, won ko mboolem nguuri àddina, ci xef ak xippi.

6 Seytaane ne Yeesu: «Yaw laay may mboolem kilifteef gii ak daraja ji mu àndal, ndax man lees ko jox, te ku ma soob laa koy may. 7 Kon nag soo ma sujjóotalee, yaa moom lépp.» 8 Yeesu ne ko: «Bindees na ne: “Boroom bi sa Yàlla ngay sujjóotal, te moom donj ngay jaamu.”»

9 Seytaane yóbbu na ko Yerusalem, aj ko ca njobbaxtalú kër Yàlla ga, ne ko: «Ndega yaa di Doomu Yàlla, tëbeel fii, wàcc, 10 ndax bindees na ne: “Ay malaakaam lay jox ndigal ci sa mbir, ñu sàmm la, 11 te seeni loxo lañu lay leewoo, ba doo fakktaloo aw doj.”»

12 Yeesu ne ko: «Bindees na ne: “Bul seetlu Boroom bi sa Yàlla.”»

13 Seytaane lalal na Yeesu gépp fiir ba sottal, doora dem, bàyyi ko ab diir.

### *Lu jëm ci Yeesu fa Nasaret*

14 Ba loolu amee Yeesu dellu Galile ci manoorey Noo gi, ab jëwam nag law ca diiwaan ba bépp ba mu daj. 15 Muy jàngle ca seeni jàngu, ñépp di ko kañ.

16 Yeesu moo dikoon Nasaret ga mu fekk baax, daldi dugg ca jàngu ba, na mu ko baaxoo woon ci bésub Noflaay. Mu taxaw ngir biral ab dog. 17 Ñu jox ko téereb Yonent Yàlla Esayi. Mu ubbi téere bi, gis dog bi ñu bind ne:

18 «Noowug Boroom baa ngi fi sama kaw, moo ma fal, ngir ma yégal néew-doole yi xibaaru jàmm bi.

Da maa yebal ngir ma yégal jaam yi ne dees na leen goreel,

yégal gumba yi ne dinañu gis,

yégal ñi ñu not, ne dees na leen jot,

19 tey yégle atum yiw wu Boroom bi.»

20 Ci kaw loolu mu ub téere bi, delloo ko jawriñ ba, daldi toog. Ña ca jàngu ba ñépp nag ne ko jàkk. 21 Mu àddu, ne leen: «Tey jii la mbind mii mat, ngeen dégg.» 22 Ñépp a doon seedeel Yeesu lu rafet, tey yéemu ci kàduy yiw yi tukkee ci gémmiñam. Ñu naan: «Xanaa kii du doomu Yuusufa ji?» 23 Mu ne leen: «Xam

naa ne dingeen ma waxal waxin wi ñu naan: «Fajkat bi, fajal sa bopp.» Mboolem li nu dégg ne moo xew Kapernawum, def ko fii ci sa réewum bopp itam.»<sup>24</sup> Mu neeti: «Maa leen ko wax déy, amul benn yonent bu ñu teral ci réewum boppam.»<sup>25</sup> Maa leen wax ne liy dégg moo di, ca jamonoy Ilyaas, ba asamaan tējoo diiru ñetti at ak juróom benni weer, ba xiif bu metti am ca réew mépp, ay jētun ñu baree nga woon ca Israyil.<sup>26</sup> Moona du kenn ci ñoom ku ñu yebal Ilyaas ca moom ku moy jētun ba dēkke Sarebta, ca Sidon.<sup>27</sup> Jamonoy Yonent Yàlla Alyaasa itam, ay gaana yu baree nga woon ca Israyil. Waaye fajeesu ci kenn ku moy Naaman, waa Siri ba.»

<sup>28</sup> Ba mboolem waa jàngu ba déggee loolu dañoo mer ba fees.<sup>29</sup> Ñu jóg, bēmëx ko ba génne ko dēkk ba, yóbbu ko ca kéméju tund, wa seen dēkk ba sance, ngir xalab ko ci suuf.<sup>30</sup> Teewul moom mu jaare ci seen biir, dem yoonam.

### *Yeesu faj na ku rab jàpp*

<sup>31</sup> Ba mu ko defee Yeesu dem Kapernawum, ab dēkk ca diiwaanu Galile, di leen jàngal ca bési Noflaay ya.<sup>32</sup> Nit ña nag yéemu ca njàngleem, ndax sañ-sañ ba muy waxe.<sup>33</sup> Ndeke foofa ca jàngu ba, jenn waay ju rab jàpp a nga fa woon. Waa ji jekki xaacu, ne: <sup>34</sup> «Moo yaw Yeesum Nasaret, lu nu joteek yaw? Alagsi nu mooy say tànki? Xam naa yaa di kan, yaa di Aji Sell ju Yàlla ji!»<sup>35</sup> Yeesu nag gëdd ko, ne ko: «Noppil te génn nit ki!» Rab wa daaneel nit ki ca digg mbooloo ma, doora génn te gaañu ko fenn.

<sup>36</sup> Ba loolu amee ñépp a waaru, di wax ci seen biir, naan: «Gii kàddu lu mu doon? Moom de sañ-sañ ak xam-xam lay joxe rab yi ndigal, ñu génn.»<sup>37</sup> Coowal Yeesu nag law ba fépp fu bokk ca diiwaan ba.

### *Yeesu faj na jarag yu bare*

<sup>38</sup> Yeesu jóge jàngu ba, dem kër Simon, daldi fekk yaayu jabaru Simon ànd ak tàngooru yaram wu réy. Ñu ñaan ci Yeesu ndimbal.<sup>39</sup> Mu dikk, tiim soxna sa,

daldi gëdd tàngooru yaram wa, tàngoor wa teqlikook moom. Soxna sa jóg ca saa sa, di leen topptoo.

<sup>40</sup> Ba jant sowee, mboolem ña amoon ay jarag yu ame ay jàngoroy jàngoro, daldi leen indil Yeesu. Moom it, mu teg kenn ku ci nekk ay loxoom, wéral la.<sup>41</sup> Ay rab itam di génn ñu bare, di yuuxu, te naan: «Yaay Doomu Yàlla!» Teewul mu gëdd leen, aaye leen ñu wax, ndax xamoon nañu ne mooy Almasi.

<sup>42</sup> Njël gu jëkk ca èllëg sa la Yeesu génn dēkk ba, dem ba bérab bu wéet. Mbooloo ma nag di ko seet, ba dikk, di ko téye, bañ mu dem, ba leen.<sup>43</sup> Mu ne leen: «Yeneen dēkk yeet, war na ma faa yégleji xibaaru jàmm bu nguugug Yàlla, ndax loolu lañu ma yebale.»<sup>44</sup> Ci kaw loolu muy waare ca jànguy diiwaanu Yude.

## 5

### *Yeesu woo na ay taalibe*

<sup>1</sup> Yeesoo taxawoon ca tàkkal dexu Senesaret\*, mbooloo ma tancaloo ci kawam, di déglu kàddug Yàlla.<sup>2</sup> Ci biir loolu mu gis ñaari gaal yu taxaw ci tàkk gi, nappkat ya ca wàcce, di fóot seeni mbaal.<sup>3</sup> Mu dugg ci genn gaal gi, muy gu Simon. Mu ñaan ko mu bēmëx ba dànd tefes gi as lëf. Mu defal ko noonu, Yeesu toog, tàmbaalee jàngal mbooloo ma fa mu tollu ca biir gaal ga.

<sup>4</sup> Naka la jàngle ba noppi, ne Simon: «Bēmëxal ba ca xóote ba, te ngeen sànni seeni mbaal ba jàpp.»<sup>5</sup> Simon ne ko: «Njaatige, coono lanu fanaane biig te jàppunu dara. Xanaa ma sànni ko rekk ci sa ndigal.»

<sup>6</sup> Naka lañu sànni mbaal yi, daldi jàpp jën yu baree bare, ba mbaal ya di xëtt.

<sup>7</sup> Ba loolu amee ñu liyaar seen moroom, ya ca geneen gaal ga, ngir ñu dimbalisi leen. Ñu dikk, yebandook ñoom, feesal ñaari gaal yépp, ba ñuy bégga suux.<sup>8</sup> Simon Piyeer nag gis loolu, daldi sukk fa kanam Yeesu, ne ko: «Sang bi, ngalla sore ma, ngir man nitu bàkkaarkat laa!»,<sup>9</sup> ndax tiitaange lu ko jàpp, mook mboolem ña mu àndal, ca jën yu bare ya

\* 5:1 5.1 dexu Senesaret mooy dexu Galile ba tey.

ñu jàpp. <sup>10</sup> Yanqóoba ak Yowaan doomi Sebede ya mu bokkaloon liggéey ba itam noonu lañu tiite. Yeesu ne Simoŋ: «Bul ragal dara; gannaaw-si-tey, ay nit ngay napp.» <sup>11</sup> Ci kaw loolu ñu teeral gaal ya ca tefes ga, daldi bàyyi lépp, topp ca moom.

### *Yeesu faj na ku gaana*

<sup>12</sup> Yeeso nekkoon cib dëkk, ndeke jenn waay a nga fa, ju jàngoroy ngaana dajal yaram wa. Ba mu gisee Yeesu, daa daanu, dëpp jëem ci suuf, sarxu ko, ne: «Sang bi, su la soobee, man nga maa setal.» <sup>13</sup> Yeesu tallal loxoom, laal ko ne: «Soob na ma, setal.» Ca saa sa ngaana ga teqlikook moom. <sup>14</sup> Yeesu dénk ko ne ko: «Bu ko wax kenn, demal rekk ca sarxalkat ba, ngir mu seet la, te nga génne sa jooxeb setlu, ni ko yoonu Musaa santanee, muy firnde ci ñoom†.» <sup>15</sup> Teewul jëwub Yeesu gënatee law. Mbooloo yu bare daje, di ko déglu tey faju, ba tàggook seeni jàngoro. <sup>16</sup> Moom nag muy rocceekuy dem ba ci bérab yu wéet, di fa ñaaneji.

### *Yeesu faj na ab lafañ*

<sup>17</sup> Yeesu moo doon jàngle bés, fu ay Farisen ak ay jànglekati yoonu Musaa tooge, jóge ca mboollem dëkki Galile ak Yude ak Yerusalem, te manoorey Boroom bi teew faak moom, ngir faj jarag ja.

<sup>18</sup> Ci biir loolu ay nit ne jalañ, jàppoo ab lafañ bu ñu tëral cig laltu. Ñu di ko wuta dugal, ngir tëral ko ca kanam Yeesu. <sup>19</sup> Waaye gisuñu fu ñu koy awale ndax mbooloo ma. Ñu yéeg ca kaw néeg ba, xeddi lenn ca xadd ba, yoor waa jaak laltu ga, wacce ko ca digg ba, fa kanam Yeesu. <sup>20</sup> Yeesu nag gis seen ngëm, daldi ne lafañ ba: «Mbokk mi, jéggalees na la say bàkkaar.»

<sup>21</sup> Firikati yoonu Musaa yi ak Farisen yi tàmbalee nàttable ci seen xel, naan: «Kii di saaga Yàlla mooy kan? Ana ku mana jéggaley bàkkaar ku dul Yàlla donj?»

<sup>22</sup> Yeesu nag xam la ñuy nàttable ci seen xel, daldi àddu, ne leen: «Lu ngeen di nàttable ci seen xel? <sup>23</sup> Ana lu gëna

yomb ci yii jaar: ne «Jéggalees na la say bàkkaar,» am ne: «Jógal te dox?» <sup>24</sup> Kon nag dingeen xam ne Doomu nit ki am na ci kaw suuf, sañ-sañu jéggale ay bàkkaar.» Mu ne lafañ ba: «Dama ne, jógal, jël sag laltu te dem ñibbi.» <sup>25</sup> Nit ka daldi ne ñokket ca kanam ñépp, jël laltu ga mu tédtoon, jëm këram, di sàbbaal Yàlla. <sup>26</sup> Ba loolu amee mbooloo mépp a neey, di sàbbaal Yàlla, tiitaange jàpp leen, ñu naan: «Gis nanu tey mbir yu tiiñ am xel.»

### *Yeesu woo na Lewi*

<sup>27</sup> Gannaaw loolu Yeesu gén, gis ab juutikat bu ñuy wax Lewi, mu toog ca juuti ba. Mu ne ko: «Kaay, topp ma.» <sup>28</sup> Lewi jóg, bàyyi lépp, topp ca moom. <sup>29</sup> Ci kaw loolu Lewi waajalal ko bernde ju réy ca këram. Mbooloo mu bare teew, ay juutikat ak yeneen gan, ñu bokk toog, di lekk. <sup>30</sup> Farisen yi ak seeni firikat nag di xultu ci kaw taalibey Yeesu yi, ne leen: «Lu tax ngeen di lekkandoo ak a naanandoo ak juutikat yeek bàkkaarkat yi?» <sup>31</sup> Yeesu ne leen: «Du ñi wér ñoo soxla fajkat, ñi wéradi ñoo ko soxla. <sup>32</sup> Du ñi jub nag laa woosi, bàkkaarkat yi laay woo, ngir jëme leen cig tuubeel.»

### *Koor du wartéef ci gëmkatub Yeesu*

<sup>33</sup> Dañoow wax Yeesu, ne ko: «Taalibey Yaxya de, dinañu faral di woor, di julli. Farisen yi it noonu, waaye sa ñoñ, lekk ak a naan lañu wéye.» <sup>34</sup> Yeesu ne leen: «Ndax man ngeena woorloo ay gan ñu wàlli ag céet, li feek boroom séet biy teew ci seen biir? <sup>35</sup> Waaye ay bés a ngi ñëw, dees na jële boroom séet bi ci seen biir. Kera bés yooyu nag, dinañu woor.»

<sup>36</sup> Yeesu léebati leen, ne leen: «Mbubb mu bees, deesu ci xotti ab sekkit, ngir daaxe ko mbubb mu ràpp. Lu ko moy mbubb mu bees mi xottiku ba noppi, te du tax sekkit wu bees wi ànd ak mbubb mi ràpp. <sup>37</sup> Te it mbuus yu ràpp, deesu ci duy biiñ bu bees. Lu ko moy biiñ bu bees bi fàcc mbuus yi; biiñ bi tuuru, mbuus yi yaqu. <sup>38</sup> Biiñ bu bees daal, ci mbuus mu

† 5:14 5.14 Ci yoonu Musaa, jàngoroy der juy law ju mel ni ngaana sobe la woon ca ka mu dal, te du set li feek wérul. Seetal ci *Sarxalkat* yi 13.45-46; 14.1-32. ‡ 5:39 5.39 Biiñ, nee ñu lu mu gëna yàgg rekk moo gën.

bees lees koy denc. <sup>39</sup> Te itam deesul naan biiñ bu yàgg, di bëggati bu bees, xanaa nga ne: “Bu yàgg bee baax†.”»

## 6

### *Bésuh Noflaay, Yeesu mooy boroom*

<sup>1</sup> Bésuh Noflaay la woon, Yeesu doon jaare ay tool yu ñor, taalibeem ya fàqe ca ay gub, di boxom, di lekk. <sup>2</sup> Ñenn ca Farisen ya ne leen: «Lu waral ngeen di def lu yoon mayewul ci bésuh Noflaay?» <sup>3</sup> Yeesu ne leen: «Xanaa jànguleen la Daawuda defoon, ba mu xiifee, moom, ak ña mu àndaloon? <sup>4</sup> Ba mu duggee ca kër Yàlla ga, mburum teewal ma la jël, lekk, jox ca ña mu àndal, te yoon mayewul kenn ku ca lekk ku dul sarxalkat yi.» <sup>5</sup> Mu neeti leen: «Bésuh Noflaay, Doomu nit ki mooy boroom.»

### *Yeesu faj na nit ku loxoom làggi*

<sup>6</sup> Beneen bésuh Noflaay, Yeesu dugg ca jàngu ba, di jàngle. Jenn waay ju loxol ndijooram làggi ma nga fa woon. <sup>7</sup> Firikati yooni Musaa yaak Farisen yaa ngay xool Yeesu, ba xam ndax dina ko faj ca bésuh Noflaay ba, ngir ñu am lu ñu ko tuumaale. <sup>8</sup> Yeesu nag xam seen xalaat, daldi ne boroom loxo ba: «Jógal taxaw fii ci digg bi.» Mu jóg taxaw. <sup>9</sup> Yeesu ne leen: «Laaj naa leen, ana lu yoon maye ci bésuh Noflaay; def lu baax am lu bon? Musal bakkan am lore?» <sup>10</sup> Ci kaw loolu mu dawal bëtam, xool ña ko yéew ñépp, ba noppi ne waa ja: «Tàllalal sa loxo.» Mu tàllal, loxo ba wér. <sup>11</sup> Ñu mer nag ba fees, di diisoo ci seen biir nu ñuy def ak Yeesu.

### *Yeesu tànn na fukki ndaw ak ñaar*

<sup>12</sup> Fan yooyu la Yeesu dem kaw tund wa ngir ñaani fa; mu fanaane faa ñaan ci Yàlla. <sup>13</sup> Ba bët setee, mu woo ay taalibeem, tànn ca fukk ak ñaar ñii, tudde leen ay ndawam:

<sup>14</sup> Simon mi Yeesuy wooye itam Piyeer, ak Àndre mi bokk ak Piyeer ndey ak baay, ak Yanqóoba ak Yowaan, ak Filib ak Bartelemi, <sup>15</sup> ak Macë ak Tomaa,

ak Yanqóoba doomu Alfe, ak Simon mi ñuy wax farlukatu moomsa-réew, <sup>16</sup> ak Yuda doomu Yanqóoba, ak Yuda Iskaryo ma mujj wor.

### *Nekkinu tey, yoolub èllëg*

<sup>17</sup> Ci kaw loolu Yeesu ànd ak ñoom, wàcc, daldi taxaw ca joor ga. Ay taalibeem yu baree nga fa woon ak mbooloo mu réya réy: ay niti Yude gépp, ak Yerusalem ak Tir ak Sidon, dëkki wetu tefes ga. <sup>18</sup> Ñu dikk, di ko déglu tey faju ba tàggook seeni jàngoro. Ñi rab jàpp it, wér. <sup>19</sup> Mbooloo mépp a ko doon wuta laal ndax leer guy bàyyikoo ca moom, di faj ñépp.

<sup>20</sup> Yeesu nag xool ay taalibeem, ne leen: «Ndokklee yeen ñi néewle, nde nguurug Yàlla, yeenay boroom.

<sup>21</sup> Ndokklee yeen ñi xiif tey, nde dingeen regg.

Ndokklee yeen ñiy jooy tey, nde dingeen ree.

<sup>22</sup> Ndokklee yeen, bu leen nit ñi bañee, daggook yeen, saaga leen, sikkal seen der ndax Doomu nit ki. <sup>23</sup> Bésuh keroog, bégleen te bannexu bay fecc ndax seen yoolub èllëg bu réy, nde noonu la seen maami bañ yooyu daan def ak yonent ya.

<sup>24</sup> Waaye wóoy ngalla yeen ñi barele, ndax neexle ngeen ba noppi.

<sup>25</sup> Wóoy ngalla yeen ñi regg tey, ndax dingeen xiif èllëg.

Wóoy yeen ñiy ree tey,

ndax dingeen tiislu, dingeen jooy.

<sup>26</sup> Wóoy ngalla yeen, bu leen ñépp dee waxal lu baax, ndax noonu rekk la maami ñooñu daan jëfe ak yonenti caaxaan ya.

### *Soppleen seeni noon*

<sup>27</sup> «Yeen ñi may déglu, dama ne, seeni noon, soppleen leen, seeni bañ, defalleen leen lu baax. <sup>28</sup> Ñi leen di móolu, yéeneleen leen lu baax, ñi leen di soxore, ñaanal-leen leen. <sup>29</sup> Ku leen talaata cib lex, dékkleen ko ba ca des. Ku nangu seen mbubb mu mag, buleen ko teree jëlaale seenub turki. <sup>30</sup> Képp ku leen ñaan, mayleen ko; ku nangu seen yëf, buleen ko ko laaj. <sup>31</sup> Lu ngeen bëgg nit ñi

defal leen ko nag, nangeen leen ko defale noonu.

<sup>32</sup> «Su dee ñi leen sopp donj ngeen sopp, ana lu ngeen ci wara yooloo? Bàkkaarkat yi sax, ñi leen sopp, sopp nañu leen. <sup>33</sup> Te su dee ñi leen defal lu baax donj ngeen defal lu baax, ana lu ngeen ci wara yooloo? Bàkkaarkat yeet noonu donj lañuy jëfe. <sup>34</sup> Te su dee ñi ngeen yaakaare ndelloo donj ngeen lebal, ana lu ngeen ci wara yooloo? Bàkkaarkat yi it, yaakaar ndelloo lu mat sëkk moo tax ñuy leblante. <sup>35</sup> Yeen kay, soppdeen seeni noon, defleen lu baax, lebleleen te baña yaakaar ndelloo. Su boobaa seenub yool réy, ngeen di doomi Aji Kawe ji, ndax moom de ñi santadi te bon, moo leen di baaxe. <sup>36</sup> Ni seen Baay ame yërmande nag, nangeen ni ame yërmande.

<sup>37</sup> «Buleen di sikkale, su boobaa deesuleen sikkal. Buleen yeyale kenn ab daan, ngir ñu bañ leena yeyale ab daan. Baleleen, ñu baal leen. <sup>38</sup> Mayeleen, ñu may leen; natt bu duun bu ñu rokkas, yëngal, mu fees bay tuuru, moom lees leen di naddil ci seen mbubb. Ndax natt bi ngeen di nattale, moom lees leen di nattale.»

### *Ndimbal, koo tane*

<sup>39</sup> Yeesu léebati leen, ne leen: «Ndax gumba dina wommat gumba? Mbaa duñu ànd tàbbi ci kàmb? <sup>40</sup> Taalibe sutul sèriñam, waaye bépp taalibe bu jàng ba wàcc, tollook sèriñam.

<sup>41</sup> «Ana looy xoole xatax bi ci sa bētu mbokk te gànj gi ci sa bētu bopp gisuloo ko? <sup>42</sup> Ana noo mane ne sa mbokk: “Mbokk mee, xaaral, ma dindil la xatax gi ci sa bêt,” te yaw ci sa bopp gànj gi ci sa bêt, gisuloo ko? Jinigalkat bi! Jëkkala dindi gànj gi ci sa bêt. Su boobaa dinga gis bu baax xatax gi ci sa bētu mbokk, ba dindil ko ko.

### *Doom ja, ndey ja*

<sup>43</sup> «Garab gu neex du meññ doom yu naqari, te garab gu naqari it du meññ doom yu neex. <sup>44</sup> Garab gu nekk, meñneefam lees koy xàmme. Ag dédd, deesu ci witte doomi figg; ay dagg it, deesu ci jële doomi reseñ. <sup>45</sup> Nit ku baax,

dencub ngëneel ba ca biir xolam, ca lay jële lu baax la mu sàlloo; nit ku bon it, dencub safaan ba ca biir xolam, ca lay jële safaan ba mu sàlloo. Gémmiñ daal, la fees xolu boroom lay wax.

### *Ñaari tabaxkat a ngi*

<sup>46</sup> «Ana lu ngeen ma naa “Sang bi, Sang bi,” te jëfewuleen samay wax? <sup>47</sup> Képp ku ñëw ci man, dégg samay wax te di ko jëfe, dinaa leen won nu muy mel. <sup>48</sup> Dafa mel ni nit kiy tabax kër, gasa gas ba mu xóot, daldi samp kenu ga ca kaw doj wa ca suuf. Mbënn ma dikk, wal ma rëkk kër gaak doole te manu koo yëngal ndax tabax bu wér ba ñu ko tabaxe. <sup>49</sup> Waaye ku dégg te jëfewoo, dangaa mel ni nit ku tabax kër ci suuf, te amul kenu. Wal maa koy rëkk ak doole, kër ga jekki màbb, yàqu yaxeet.»

## 7

### *Njiitu takk-der ba yooloo na ngëmam*

<sup>1</sup> Yeesu wax na kàddoom googu gépp, askan way dégg, mu doora jáll biir Kapernawum. <sup>2</sup> Foofa nag ab njiitu takk-der bu waa Room a nga fa woon, ab jaamam woppoon bay bëgga dee, te njiit la soppoon ko lool. <sup>3</sup> Ba njiit la déggee mbiri Yeesu, daa yebal ñenn ca magi Yawuti dëkk ba ca moom, ñaan ko ngir mu dikk xettli jaamam. <sup>4</sup> Magi dëkk ba agsi ca Yeesu, tinu koo tinu, ne ko: «Ki nu yebal ci yaw de, yelloo na sa ndimbal, <sup>5</sup> ndax ku sopp sunuw xeet la, te sunu jàngu bi sax, moo nu ko tabaxal.»

<sup>6</sup> Yeesu daldi ànd ak ñoom. Naka la jubsu kër ga, njiit la yóbbante ay xaritam kàddoom, ñu gatandu Yeesu, ne ko: «Sang bi, jarul ngay sonn, ndax sab tànka sama biir kër, man yeyoowuma ko. <sup>7</sup> Moo ma la tee gatandul sama bopp, ndax jàpp naa ne loolu jomb na ma. Waxal genn kàddu rekk, sama surga wér. <sup>8</sup> Ndax man ci sama bopp ci kilifteef laa tènku, te man itam ay takk-der a ngi ci sama ndigal. Su ma nee kii: “Demal,” mu dem. Ma ne kee: “Ñëwal,” mu ñëw. Te sama jaam bu ma ne: “Defal lii,” mu def ko.»

<sup>9</sup> Ba Yeesu déggee loolu daa yéemu ca njiit la. Mu ne gees mbooloo ma topp

ca moom, ne leen: «Dama ne, gii ngëm gu réy, bànni Israyil sax, gisuma ko ci.»  
<sup>10</sup> Ndaw ya daldi dellu ca kër ga, fekk jaam ba wër.

### *Yeesu dekkal na doomu jëtun ba*

<sup>11</sup> La ca tegu Yeesu demati dëkk bu ñuy wax Nayin, ay taalibeem ak mbooloo mu bare ànd ak moom. <sup>12</sup> Ba mu jubsee buntu dëkk ba, yemul ci lu moy ab rob, ka dee di doomu jëtun, te moom rekk la amoon. Niti dëkk ba def mbooloo mu bare, ànd ak soxna sa. <sup>13</sup> Sang bi nag gis ko, ñeewante ko, ne ko: «Bul jooy.»  
<sup>14</sup> Mu dikk ba teg loxoom ca jaat ga, ña ko jàppoo taxaw. Mu ne: «Ngóor si, yaw laay wax, jógal.» <sup>15</sup> Néew ba jóg toog, di wax, mu delloo ko yaay ja. <sup>16</sup> Tiitaange nag jàpp ñépp, ñu sàbbaal Yàlla, naan: «Yonent bu mag feeñ na ci sunu biir!» te naan «Yàllaa wallusi ñoñam!»

<sup>17</sup> Coow loolu nag law ca mboolem réewum Yawut ak mboolem fa ko wër.

### *Yeesu jàngle na ci mbirum Yaxya*

<sup>18</sup> Ci kaw loolu taalibey Yaxya àgge Yaxya loolu lépp. Mu woo ñaar ca taalibe ya, <sup>19</sup> yebal leen ci Sang bi, laaj ko ne ko: «Ndax yaw yaa di Ki wara ñëw, am keneen lanuy séentu?» <sup>20</sup> Taalibe ya dikk ne ko: «Yaxya moo nu yebal, di la laaj ndax yaa di Ki wara ñëw, am keneen lanuy séentu?»

<sup>21</sup> Waxtu woowa tembe nag Yeesu faj na ñu bare, tàggale leen aki jàngoro aki jagadi aki rab, silmaxa yu bare, mu baaxe leen, ñuy gis. <sup>22</sup> Mu ne ndaw ya: «Li ngeen gis te dégg ko, demleen àgge ko Yaxya. Silmaxa yaa ngi gis, lafañ yi dox, gaana yi wër, t'ex yiy dégg, néew yi dekki, néew-doole ñi dégg xibaaru jàmm bi\*.  
<sup>23</sup> Ku ma taxul nga xàcc sa péete ak man nag, ndokklee yaw.»

<sup>24</sup> Ba ndawi Yaxya demee, Yeesu daldi wax ak mbooloo ma ci mbirum Yaxya, ne leen: «Lu ngeen seetaani woon ca màndinj ma? Xanaa barax bu ngelaw liy yëngal?» <sup>25</sup> Kon lu ngeen seetaani woon? Boroom yére yu rafet? Waaye boroom yére yu yànj yooyu te seen dund

bakkane, ci kéri buur lañu dëkk. <sup>26</sup> Kon nag lu ngeen seetaani woon? Ab yonent? Waawaaw, maa leen ko wax, te wees na ab yonent sax. <sup>27</sup> Ci moom moomu lañu bindoon ne:

“Maa ngii di yebal sama ndaw, mu jiitu la,  
 xàllal la saw yoon.”

<sup>28</sup> Maa leen ko wax, li jigéen jur, kenn sutu ci Yaxya. Waaye ki gëna tuut ci nguurug Yàlla sax moo ko sut.»

<sup>29</sup> Mboolem ña déglu Yeesu, ba ca juutikat ya sax, dëggal nañu Yàlla, ndax nangu nañoo sóobu sóobeb Yaxya. <sup>30</sup> Waaye Farisen ya ak xamkati yoon ya ñoo gantal la leen Yàlla nammaloon, ba Yaxya sóobu leen ci ndox.

<sup>31</sup> Yeesu neeti: «Ana kon lu may niruleel niti tey jii? Ana lu ñuy nirool?» <sup>32</sup> Ñu ngi nirook xale yu toog ca pénc ma di awoonte, naan:

“Noo leen toxorool, fecculeen, nu dëjal leen, jooyuleen.”

<sup>33</sup> Ndaxte Yaxya daa feeñ, lekkul dugub, naanul biiñ, ngeen nee: “Aw rab la àndal.” <sup>34</sup> Doomu nit ki feeñ, di lekk ak a naan, ngeen naay: “Kee fuqle, naan-katub biiñ biiy xaritook juutikat yeek bàkkaarkat yi.” <sup>35</sup> Waaye xel mu rafet, mboolem la mu jur mooy la koy dëggal.»

### *Yeesu gane na Simon Farisen ba*

<sup>36</sup> Kenn ca Farisen ya moo woo woon Yeesu, ngir ñu bokk lekk. Yeesu agsi kër Farisen ba, daldi dikk ca ndab la. <sup>37</sup> Ndeke senn as ndaw a nga ca dëkk ba, ab moykat la woon. Mu yég nag ne Yeesoo nga ca kër Farisen ba, di lekk. Mu dikk, indaale njaqal doju albatar lu def diwu xeeñlu. <sup>38</sup> Mu dikk ba fa Yeesu sóonu, ca gannaawam, fa tànk Yeesu féete, daldi taxaw, di jooy, rongoon ya tooyal xépp tànk ya. Ndaw sa nag di fompe tànk Yeesu kawaru boppam gay lang, di foon tànk yaak cofeel, di ca sotti diwu xeeñlu ga.

<sup>39</sup> Farisen ba woo Yeesu nag gis loolu, naan ci xelam: «Kii su doon ab yonent, dina xam ndaw sii di ko nabb-nabbee ku mu doon, ak lu mu doon: jigéenu

\* 7:22 7.22 Seetal ci *Esayi* 35.5-6 ak 61.1. Muy kàddug waxyu gu jëm ci Almasi.



moykat!» <sup>40</sup> Yeesu nag àddu, ne ko: «Simon, dinaa la wax lenn.» Mu ne ko: «Waxal, sèriñ bi.»

<sup>41</sup> Yeesu ne ko: «Ñaari boroom bor la woon ak seenub leblekat. Boru kenn ka di téeméeri junni (500 000) ci xaalis, ka ca des fukki junni (50 000)†. <sup>42</sup> Waaye ñoom ñaar ñépp, kenn manu cee fey. Mu far jéggal leen ñoom ñépp. Ana kan ci ñaar ñooñu nag moo ciy gëna fonk leblekat bi?» <sup>43</sup> Simon ne ko: «Xanaa ki ëpple lu ñu ko jéggal.»

Yeesu ne ko: «Sab àtte jub na.» <sup>44</sup> Mu walbatiku ca ndaw sa, daldi ne Simon: «Gis nga ndaw sii de? Dugg naa sa kër, mayewoo ndox mu ma jàngoo. Waaye moom, ay rongooñam la tooyale samay tànk, fompe ko kawaru boppam. <sup>45</sup> Foonuloo ma, dalale ma, waaye moom, ba ma duggsee ba léegi noppiwula foon samay tànk. <sup>46</sup> Ag diw, diwewoo ko sama bopp, waaye moom, diwu xeeñlu la diw samay tànk. <sup>47</sup> Moo tax ma di la wax, ne bàkkaaram yu bare yi ñu ko jéggal moo waral fonkeelam gu bare. Waaye njéggal lu tuut, fonkeel gu tuut rekk.»

<sup>48</sup> Yeesu nag ne ndaw sa: «Jéggalees na la say bàkkaar.» <sup>49</sup> Ci kaw loolu ña mu toogandool di lekk, naan ci seen xel: «Kii mooy kan bay jéggaley bàkkaar sax?» <sup>50</sup> Yeesu nag ne ndaw sa: «Sa ngëm musal na la, demal ak jàmm.»

## 8

### *Jiwu wuute na ag muj*

<sup>1</sup> Gannaaw loolu Yeesu wër dëkkoo dëkk bu mag ak bu ndaw, di waare, di yégle xibaaru jàmm bu nguurug Yàlla, ànd ak fukki taalibe yaak ñaar, <sup>2</sup> ñoom ak jigéen ñii mu fajoon, ba tàggale leen ak rab yu bon aki jagadi: Maryaama, mi ñuy wax Magdala, ma ñu tàggaleek juróom ñaari rab, <sup>3</sup> ak Yowaana jabaru Kusa, saytukatub Erodd; ak Susaana, ak ñeneen jigéen ñu bare ñu daan dimbalee ñoom Yeesu seen alal.

<sup>4</sup> Mbooloo mu mag a daje woon, jóge dëkkoo dëkk, fekksi Yeesu. Mu léeb leen,

ne leen: <sup>5</sup> «Boroom jiwu moo demoon jiyi. Naka lay saaw ab toolam, ndeke lenn ca jiwu maa nga wadde ca kaw yoon wa, nit ñi joggati ca, picc yi dikk, lekk ko. <sup>6</sup> Leneen wadde fu barey doj. Naka la sax rekk, daldi wow, ndax ñàkk ndox. <sup>7</sup> Leneen la wadde biiri xaaxaam, jógandoo ak xaaxaam ma, daldi fatt ba wow. <sup>8</sup> La des ca jiwu ma wadde suuf su nangu, daldi sax, ba meññal lu ko mat téeméeri yoon.»

Ci kaw loolu Yeesu àddu ca kaw ne: «Ku am nopp yu mu dégge kat, na dégg.»

<sup>9</sup> Ay taalibeem laaj ko lu léeb woowu di tekki. <sup>10</sup> Mu ne leen: «Yeen lañu may, ngeen xam mbóotum nguurug Yàlla, waaye ñi ci des ñoom, ci ay léeb lees koy dëxéñ, su ko defee:

“Ñuy xoole te duñu gis,  
di dégg te duñu xam.”

<sup>11</sup> «Lii la léeb wi di tekki. Jiwu wi moo di kàddug Yàlla. <sup>12</sup> Ñi féeteek yoon wi mooy ñi dégg. Seytaane nag mooy dikk, foqati kàddu gi ci seen xol, ngir ñu baña gëm ba mucc. <sup>13</sup> Ñi féete fu bare ay doj, ñoo dégg kàddu gi, nangoo ko xol bu sedd. Waaye ñooñu, ab reen lañu amul. Ab diir rekk lañuy gëm, bu janti nattu dikkee, ñu dellu gannaaw. <sup>14</sup> Li wadde ci ay xaaxaam mooy ñi dégg kàddu gi, te ay xalaat ak alal, ak bannexu bakkan fatt leen, ba tax meññaluñu lu ñor. <sup>15</sup> Li ci suuf su baax si nag, mooy ñi dégge kàddu gi xol bu dëggu te rafet, ñoy ca, te saxoo muñ ba meññal.

### *Ab làmp du làqu*

<sup>16</sup> «Deesul taal ab làmp, dëppe ko ndab, mbaa nga dugal ko ci ron lal. Dees koy aj kay ba kuy duggsi, di gis leer gi. <sup>17</sup> Mboolem lu làqu dina feeñ, te mboolem lu nëbbu dina siiw ba ne fàññ. <sup>18</sup> Kon nag teewluleen ni ngeen di dégge. Ku am, dees na ko dolli, waaye ku amul, la mu xalaatoon ne am na ko sax, dees na ko nangu.»

### *Déggal Yàllaa gën bokk ak Yeesu*

<sup>19</sup> Yaayu Yeesu ak ay rakkam ñoo dikkoon di seet Yeesu te manuño agsi

† 7:41 7.41 téeméeri junni: maanaam juróomi téeméeri dinaar; fukki junni: maanaam juróom fukki dinaar. Seetal Xaalis ci Leeral yi.

ci moom ndax nit ñu bare. <sup>20</sup> Ñu ne ko: «Sa yaay ak say rakk a ngi taxaw ci biti, bëgg laa gis.» <sup>21</sup> Mu ne leen: «Sama yaay ak samay rakk, ñoo di ñiy dégg kàddug Yàlla, te di ko jéfe.»

### *Yeesu dalal na ngelaw li*

<sup>22</sup> Benn bés la Yeesu dugoon gaal, mook ay taalibeem. Mu ne leen: «Nanu jàll ca wàllaa dex gi.» Ñu daldi dem.

<sup>23</sup> Naka lañuy dem nag, Yeesu nelaw. Ngelaw lu réy dal ca kaw dex ga, gaal gi fees ak ndox, ba ñu nara sàнку. <sup>24</sup> Taalibe yi yee Yeesu, ne ko: «Njaatige, njaatige, nu ngi sàнку!»

Mu yewwu, gëdd ngelaw li ak gannax yu réy yi. Lépp dal, ne tekk. <sup>25</sup> Yeesu ne taalibe ya: «Ana seen ngëm?» Ña nga boole tiitaange ak kéemtaan te naan ca seen biir: «Kii nag moo di kan bay jox ndigal ngelaw leek ndox mi sax, ñu déggal ko?»

### *Yeesu faj na ku rab jàpp*

<sup>26</sup> Ci kaw loolu ñu tëmb ba teereji ca diiwaanu waa Serasa, fa jàkkaarloo ak diiwaanu Galile. <sup>27</sup> Ba Yeesu wàccee ca tefes ga, jenn waayu dëkk ba dikk dajeeek moom. Waa ja, ay rab a ko jàpp. Yàgg naa def yaramu neen te dëkkul ci kër, xanaa sèg ya. <sup>28</sup> Ba mu gisee Yeesu, daa yuuxu, daanu fa kanamam, daldi xaacu ne: «Yaw Yeesu Doomu Yàlla Aji Kawe ji, ana lu ma joteek yaw? Dama lay tinu, bu ma mbugal!»

<sup>29</sup> Booba Yeesu tàmbali naa sant rab wi, mu génn waa ji. Rab wi jàpp na waa ji ay yooni yoon. Su ko defee ñu yeewe ko ay càllala, jéng ko, ngir wattu ko, mu di ko dagg, rab wi di ko xabtal, jëme bérab yu wéet.

<sup>30</sup> Yeesu ne ko: «Noo tudd?» Mu ne ko: «Coggal.» Ndax rab yu baree dugoon waa ji. <sup>31</sup> Rab yi nag tinu Yeesu, ngir mu bañ leena yebal ca xóote ba\*.

<sup>32</sup> Ag coggalu mbaam-xuux yu baree nga woon foofa, di fore ca tund wa. Rab ya tinu Yeesu, ne mu may leen, ñu dugg mbaam-xuux ya. Mu may leen ko. <sup>33</sup> Rab ya nag génn nit ka, dugg mbaam-xuux ya,

coggal ga bartaloondoo, tàbbi ca dex ga, daldi lab. <sup>34</sup> Sàmm ya gis la xew, daldi daw, nettaliji ko waa dëkk ba, ak dëkk-dëkkaan ya. <sup>35</sup> Nit ña riire ca, di seet la xew.

Naka lañu dikk ba ci Yeesu, yem ci nit ki rab wi teqlikool, mu ànd ak sagoom, solu, toog ca wetu Yeesu. Ñu daldi tiit. <sup>36</sup> Ña ko fekke woon nag, nettali leen na boroomi rab ba jote wall. <sup>37</sup> Ci kaw loolu mbooloom diiwaanu Serasa gépp tinu Yeesu ngir mu jóge ca seen biir te dem ndax tiitaange lu réy lu leen jàpp. Naka la Yeesu dugg gaal, di dem, <sup>38</sup> nit ka teqlikook rab yi di ko sarxu ngir ànd ak moom. Teewul Yeesu yiwi ko, ne ko: <sup>39</sup> «Ñibbil, te nga xamle li la Yàlla defal lépp.» Waa ja it dem di siiwal ca dëkk ba bépp, mboolem la ko Yeesu defal.

### *Yeesu faj na, dekkal na*

<sup>40</sup> Ba Yeesu delloo ca wàllaa dex, mbooloo maa ko teertu, ndax ñoom ñépp a ko doon xaar. <sup>41</sup> Ci kaw loolu rekk jenn waay dikk, ku ñuy wax Yayrus, di njiitu jàngu ba. Mu ne gurub fi kanam Yeesu, sarxu ko ngir mu ñëw këram, <sup>42</sup> ndax kenn la amoon ci doom, janq bu am fukki at ak ñaar, te ma nga doon waaja dee.

Yeesoo ngay dem, nit ña raj-rajloo, tanc ko. <sup>43</sup> Senn as ndaw a nga ca woon, diiru fukki at ak ñaar, ma nga doon xépp deret, te def na ci alalam jépp, kenn manu koo faj. <sup>44</sup> Mu doxe Yeesu gannaaw, teg loxoom ca catal mbubbam, deret ja dal ca saa sa.

<sup>45</sup> Yeesu nag ne: «Ana ku ma laal?» Ku nekk di miim. Piyeer ne ko: «Njaatige, mbooloo mépp a la yéew, dar la.»

<sup>46</sup> Teewul Yeesu ne: «Am na ku ma laal kay, ndax yég naa leer gu bàyyikoo ci man.» <sup>47</sup> Ndaw sa xam ne feeñ na. Mu daldi dikk, di lox, ne gurub fa kanam Yeesu, daldi wax ca kanam ñépp la waral mu teg ko loxoom, ak na mu wére ca saa sa. <sup>48</sup> Yeesu ne ko: «Janq, sa ngëm faj na la. Demal ak jàmm.»

<sup>49</sup> Naka la Yeesu di wax, jenn waay jóge ca kër njiitu jàngu ba, dikk ne: «Matatul ngay sonal sèriñ bi, sa janq ba faatu na.»

\* **8:31** 8.31 Seetal ci *Peeñu ma* 20.2-3.

<sup>50</sup> Yeesu dégg ca, ne njiit la: «Bul tiit. Gëmal rekk, mu daldi mucc.»

<sup>51</sup> Bi Yeesu agsee ca kër ga, mayul kenn ànd ak moom dugg, ku moy Piyeer, ak Yowaan ak Yanqóoba ak baayu xale bi, ak ndeyam. <sup>52</sup> Népp a ngay jooy ak a tiislu janq bi. Yeesu nag ne leen: «Buleen jooy. Janq bi deewul, day nelaw rekk.»

<sup>53</sup> Ci kaw loolu ñu di ko kókkali, ndax xamoon nañu xéll ne dee na. <sup>54</sup> Yeesu itam jàpp ca loxol janq ba, daldi àddu ca kaw, ne ko: «Janq, jógal.» <sup>55</sup> Noo ga délsi, mu ne ñokket. Yeesu ne ñu may ko, mu lekk. <sup>56</sup> Waajuri xale bi nag waaru. Teewul Yeesu dénku leen, ne leen bu ñu wax kenn la xew.

## 9

### *Yeesu yebal na fukki taalibe yi ak ñaar*

<sup>1</sup> Yeesu moo woo woon Fukk ñaak ñaar, jox leen xam-xam ak sañ-sañu dàq mboolem rab tey faj ay jàngoro. <sup>2</sup> Ci kaw loolu mu yebal leen ngir ñu yégleji ngu-urug Yàlla tey faj jarag ji. <sup>3</sup> Mu ne leen: «Bu ngeen di dem, buleen yóbbaaale dara ngir fàggu yoon wi; du yet, du mbuus, du aw ñam, du xaalis. Bu ci kenn yor ñaari turki sax. <sup>4</sup> Kër gu ngeen dugg, fa ngeen di dal, ba kera ngeen dem. <sup>5</sup> Fépp fu ñu leen dalalewul, génneen dëkk booba te ngeen faxas fa seen pëndub ndëgguy tànk, seedele leen ko seen ngàntal.»

<sup>6</sup> Ñuy dem nag, di wër dëkk ak dëkk, di yégle xibaaru jàmm bi, di faj jarag ji.

<sup>7</sup> Ci kaw loolu Erodd boroom Galile dégg mboolem la xew, boppam nag ubu, ndax ñenn ñu noon Yaxya moo dekki, di Yeesu. <sup>8</sup> Ñee ne Ilyaas moo délsi, ñeneen ba tey, ne kenn ca yonent yu jëkk yaa dekki. <sup>9</sup> Erodd daldi ne: «Yaxya, man maa doglu boppam. Kon ki ma déggal jëf jii, mooy kan?» Ba loolu amee mu di ko fexee gis.

### *Yeesu leel na mbooloo*

<sup>10</sup> Ba ndaw ya délsee, dañoo nettali Yeesu mboolem la ñu def. Mu ànd ak ñoomu neen ba sore, ca wetu dëkk ba ñuy wax Beccayda. <sup>11</sup> Teewul nit ña yég ne fa la dem, daldi ko topp. Yeesu dalal leen,

di leen wax ci mbirum nguurug Yàlla, ña aajowoo am paj, mu wéral leen.

<sup>12</sup> Ba jant di sowat, Fukk ñaak ñaar dikk ne Yeesu: «Yiwil mbooloo mi, ñu dugg ci dëkk yu ndaw yii ak dëkk-dëkkaan yi ko wër, ngir ñu gis lu ñu lekk ak fu ñu fanaan, ndax fii àllub neen la.» <sup>13</sup> Mu ne leen: «Yeen, joxleen leen lu ñu lekk.» Ñu ne ko: «Nun de amunu lu dul juróomi mburu ak ñaari jën. Xanaa nu dem, nun ci sunu bopp, jëndali mbooloo mii mépp lu ñu lekk!» <sup>14</sup> Lu wara mat juróomi junniy góor a nga fa woon. Yeesu ne taalibe ya: «Dangeen leen di toogal, ñu def géewi juróom fukki nit.» <sup>15</sup> Ñu def noonu, toogal ñépp.

<sup>16</sup> Ba mu ko defee Yeesu jël juróomi mburu ya ak ñaari jën ya, xool kaw asamaan, daldi yékkati kàddug cant, ba noppi dagg mburu ya, jox taalibe ya, ngir ñu taajal ko mbooloo ma. <sup>17</sup> Népp lekk ba regg, ba ñu yóbbu dog ya ca des, muy fukki pañe ak ñaar.

### *Piyeer xam na kuy Yeesu*

<sup>18</sup> Yeesu moo beru woon, di julli, taalibe ya feggook moom. Ci kaw loolu mu laaj leen ne leen: «Ana ku nit ñi ne moom laa?» <sup>19</sup> Ñu ne ko: «Ñii nee ñu yaa di Yaxya; ñee ne yaa di Ilyaas; ñale ne kenn ci yonent yu jëkk yaa dekki, di yaw.»

<sup>20</sup> Yeesu ne leen: «Yeen nag, ngeen ne maay kan?» Piyeer ne ko: «Yaa di Almasib Yàlla.» <sup>21</sup> Mu femmu leen nag, sant leen ñu bañ koo wax kenn. <sup>22</sup> Mu neeti: «Fàww Doomu nit ki sonn lu bare, ba dajeek mbañeelu magi askan wi ak sarxalkat yu mag yi, ak firikati yoon yi, te dees na ko rey, ba ñetteelu fanam, mu dekki.»

<sup>23</sup> Yeesu nag wax leen ñoom ñépp, ne leen: «Képp ku bëgga dikk topp ma, fàtteel sa bopp, te nga gàddu bés bu nekk, bant bi ñu lay daaj, door maa topp. <sup>24</sup> Ndax képp ku namma rawale sa bakkan, yaay ñàkk sa bakkan, waaye képp ku ñàkk sa bakkan ngir man, yaa musal sa bakkan. <sup>25</sup> Ndax nit ki, su jagoo àddina sépp sax, te nara ñàkk bakkanam mbaa mu sànk, ana lu mu koy jariñ?» <sup>26</sup> Képp ku kersawoo sama

jëmm, kersawoo topp samay wax, yaw itam Doomu nit ki dina la kersawoo, bés bu dikkee ci darajaam ak darajay Baay bi, ak darajay malaaka yu sell yi. <sup>27</sup> Maa leen ko wax déy, ñenn a ngi fii taxaw tey, duñu dee te gisuñu nguurug Yàlla.»

### *Leeru Yeesu jolli na*

<sup>28</sup> Ba lu wara tollook juróom ñetti fan wéyee gannaaw kàddu yooyu, Yeesu àndoon na ak Piyeer ak Yowaan ak Yanqóoba, ñu yéeg ca kaw tund wa ngir julli. <sup>29</sup> Naka lay julli, xar kanamam soppiku, ay yéreem weex tàll, di melax. <sup>30</sup> Ci kaw loolu ñaari nit jekki feeñ, di waxtaan ak moom; ñuy Yonent Yàlla Musaa ak Yonent Yàlla Ilyaas. <sup>31</sup> Ñoo feeñ ci ag leer, di waxtaane dëddug Yeesu, ga mu doon waaja sottale fa Yerusalem. <sup>32</sup> Booba ngëmment a ngay man Piyeer ak ña mu àndal. Ba ñu teewloo nag lañu gis leeru Yeesu, ak ñaar ña mu taxawal. <sup>33</sup> Ba ñu demee ba ñaari nit ñooñu di bàyyikoo fa Yeesu, Piyeer ne ko: «Njaatige, su nu toogoon fii de, mu baax ci nun; nan yékkati ñetti mbaar, benn yaw, benn Musaa, benn Ilyaas.» Waaye booba Piyeer xamul la muy wax. <sup>34</sup> Naka lay wax loolu, aw niir dikk yiir leen, taalibe ya tàbbi ca biir niir wa, tiitaange jàpp leen. <sup>35</sup> Ci biir loolu baat jibe ca niir wa, ne: «Kii moo di sama Doom, ki ma taamu; dégluleen ko.»

<sup>36</sup> Ba baat ba selawee, Yeesu donj a feeñ. Taalibe ya nag ñoom ne cell, waxuñu kenn lenn jant yooyu, ca la ñu gis.

### *Yeesu fajati na ku rab jàpp*

<sup>37</sup> Ca èllëg sa ba ñuy wàcce tund wa, mbooloo mu baree dikk dajeek Yeesu. <sup>38</sup> Jenn waay jekki xaacoo ca mbooloo ma, ne: «Sëriñ bi, dama lay ñaan, nga xoolal ma sama doom, ndax moom donj laa am. <sup>39</sup> Rab kat moo ko jàpp, mu jekki di yuuxu, di say, gémmiñ giy fuur. Daanaka du teqlikook moom te sonal na ko. <sup>40</sup> Ñaan naa say taalibe ngir ñu dàqal ma ko, waaye manuñu ko.» <sup>41</sup> Yeesu ne leen: «Céy niti tey, yeena gëmadi te dëng!

Maak yeen ba kañ, te di leen muñal? Indi sa doom fii.»

<sup>42</sup> Naka la xale bi jubsu Yeesu, rab wi sànni ko ci suuf, muy say. Yeesu itam gëdd rab wa, wéral xale ba, delloo ko baayam. <sup>43</sup> Ñépp nag waaru ci màggug Yàlla.

Naka la ñépp di yéemu ca mboolem la Yeesuy def, mu ne taalibeem ya: <sup>44</sup> «Ubbileen seeni nopp te teewlu bu baax kàddu yii: Doomu nit ki lees di wor, ngir teg ko ci loxoy nit ñi.» <sup>45</sup> Taalibe ya nag dégguñu kàddu googu, ndax fekk na piri ma làqu leen, ngir ñu bañ koo daj, te ñemewuñu koo laaj Yeesu.

### *Daraja réer na ku ko sàkku*

<sup>46</sup> Werante moo dikkaloon taalibe yi, ñuy seet kan moo gëna kawé ci ñoom. <sup>47</sup> Yeesu nag ràññee seen xalaat. Mu daldi indi ab xale, taxawal ko ci wetam. <sup>48</sup> Mu ne leen: «Xale bii, képp ku ko dalal ndax sama tur, man nga dalal; te képp ku ma dalal, dalal nga ki ma yebal; ndax ki gëna tuut ci yeen ñépp, kooku moo gëna màgg.»

<sup>49</sup> Ci kaw loolu Yowaan àddu, ne: «Njaatige, danoo gis nit kuy dàqe sa tur ay rab, nu aaye ko, ndax bokkul ci nun.» <sup>50</sup> Yeesu ne ko: «Buleen ko aaye, ndax ku la sotul, yaw la faral.»

### *Samari gântal na Yeesu*

<sup>51</sup> Ba ñu demee ba bés bi ñu wara yéegé Yeesu di jubsu, Yeesu moo dogu ngir dem Yerusalem. <sup>52</sup> Mu yebal ay ndaw, ñu jiitu ko. Ñu dem, ba agsi ab dëkk ci diiwaanu Samari, nar ko faa waajal ab dal. <sup>53</sup> Waa Samari nag nanguwuñu koo dalal, ndax Yerusalem ga mu nammoona jëm\*. <sup>54</sup> Taalibe ya ñuy wax Yanqóoba ak Yowaan gis loolu, daldi ne: «Sang bi, soo béggee nu jox sawara ndigal, mu wàcce asamaan, faagaagal leen?» <sup>55</sup> Teewul Yeesu geesu, femmu leen. <sup>56</sup> Ba loolu amee ñu jàll jëm beneen dëkk.

### *Gëmkatu Yeesu du xool gannaawam*

<sup>57</sup> Ca yoon wa ñu awe la jenn waay ne Yeesu: «Yaw laay topp fépp foo jëm.» <sup>58</sup> Yeesu itam ne ko: «Till ak kàmbam,

\* 9:53 9.53 Waa Samari ay nooni Israyil lañu woon.

njanaaw akub tàggam, waaye Doomu nit ki de, amul fu mu wéer boppam.» <sup>59</sup> Mu neeti keneen: «Toppal ci man.» Mu ne ko: «Sang bi, may ma, ma jékka dem robi sama baay.» <sup>60</sup> Mu ne ko: «Bàyyil néew yi, ñu rob seeni néew, waaye yaw demal, yégleji nguurug Yàlla.» <sup>61</sup> Keneen neeti ko: «Sang bi, yaw laay topp, waaye may ma, ma jékka tàggtook sama waa kër.» <sup>62</sup> Yeesu ne ko: «Képp ku tàmbalee gàbb tey xool gannaawam, jekkoo ci nguurug Yàlla.»

## 10

### *Yeesu yebal na juróom ñaar fukk ak ñaar*

<sup>1</sup> Gannaaw loolu Sang bi tabb na yeneen juróom ñaar fukki taalibe ak ñaar, yebal leen, ñaar, ñaar, ñu jiituji ko ca mboolem dëkk yaak gox, ya mu nammoona dem moom ci boppam. <sup>2</sup> Mu ne leen: «Ngóob mee yaatu, te surga yi néew. Kon nag ñaanleen Boroom ngóob mi, ay surga yu mu yebal cim ngóobam. <sup>3</sup> Demleen! Xamleen ne maa leen yebal, mbete ay gàtt ci biiri bukki. <sup>4</sup> Buleen yóbbaaale dencukaayu xalis, mbaa mbuus, mbaa ay carax te buleen taxaw di saafonte ak kenn ci yoon wi.

<sup>5</sup> «Gépp kër gu ngeen dugg, jëkkleen ne: “Jàmm ñeel na leen.” <sup>6</sup> Su fa nitu jámm nekkee, seen jámm dal ko. Lu ko moy, mu délsi ci yeen. <sup>7</sup> Dal-leen ca kër googa, di lekk ak a naan ca la ñu leen jox, ndax liggéeykat yelloo na peyooram. Buleen di wër nag kër ak kër.

<sup>8</sup> «Bépp dëkk bu ngeen dugg, ñu dalal leen, la ñu leen taajal, lekkleen ko. <sup>9</sup> Wéral leen jaragi dëkk ba, te ngeen wax waa dëkk ba, ne leen: “Nguurug Yàlla dëgmal na leen.” <sup>10</sup> Waaye bépp dëkk bu ngeen dugg te dalaluñu leen, demleen ca pénc ma te ngeen ne leen: <sup>11</sup> “Seen pëndub dëkk bi ci sunu ndëgguy tànk sax, nu ngi koy faxas, seedelee leen ko seen ngàntal. Waaye nag xamleen ne nguurug Yàlla dëgmal na.” <sup>12</sup> Maa leen ko wax, bu bés baa, boobu dëkk, Sodom a koy gënu demin.

<sup>13</sup> «Wóoy ngalla yeen waa Korasin, yeen waa Beccayda it, wóoy ngalla yeen, nde kéemaan yi sottee fi seen biir, su doon fa waa Tir mbaa fa waa Sidon la sottee, kon bu yàgg lañu doon sol ay saaku, xéppoob dóom, ngir tuub. <sup>14</sup> Moo tax it, kera àtte ba, waa Tir ak Sidon a leen di gënu demin. <sup>15</sup> Yeen waa Kapernawum nag, dees na leen yékkati ba asamaan a? Xanaa ba fa njaniiw kay ngeen di wàcci.

<sup>16</sup> «Ku leen déggal nag, man nga déggal; ku leen gàntal, man nga gàntal. Te ku ma gàntal, gàntal nga ki ma yebal.»

<sup>17</sup> Ba juróom ñaar Fukk ñaak ñaar demee ba délsi, mbégte lañu àndal. Ñu ne: «Sang bi, rab yi sax, danu leen di jox ndigal ci sa tur, ñu nangul nu.»

<sup>18</sup> Yeesu ne leen: «Séen naa Seytaane mu fàqe asamaan ni ag melax. <sup>19</sup> Dama ne, maa leen jox sañ-sañu joggi ci kawi jaan aki jiit, joggati mboolem dooley bañaale bi, te dara du leen mana gaañ mukk. <sup>20</sup> Noonu leen rab yi nangule nag, buleen ko bége, bégeleen kay la seen tur binde fa asamaan.»

<sup>21</sup> Ca waxtu woowa tembe la kemta-laayu mbégte tukkee ci Noo gu Sell gi, dugg Yeesu, mu daldi ne: «Baay, Boroom asamaan ak suuf, sant naa la, nde yaa làq lii boroom xam-xam yeek boroom xel yi, xamal ko tuut-tànk yi, nde loolu de, Baay, mooy li la soob. <sup>22</sup> Lépp la ma sama Baay dénk, te kenn xamul kuy Doom ji, ku dul Baay bi; kenn it xamul kuy Baay bi, ku dul Doom ji, ak képp ku ko Doom ji namma xamal.»

<sup>23</sup> Ci kaw loolu Yeesu walbatiku ca taalibe ya, wax leen ñoomu neen, ne leen: «Ndokklee ñi seeni gët gis li ngeen gis. <sup>24</sup> Ndax maa leen ko wax, bare na ay yonent ak buur yu bëggoona gis li ngeen gis, te gisuñu ko, ak itam dégg li ngeen dégg, te dégguñu ko.»

### *Texe am na yoon*

<sup>25</sup> Benn xamkatu yoonu Musaa moo jekki woon jóg, di fexee fiir Yeesu. Mu ne ko: «Sériñ bi, ana lu may def, ba texe ba fàww?» <sup>26</sup> Yeesu ne ko: «Yoonu Musaa, ana lees ci bind? Loo ci jàngé?» <sup>27</sup> Mu ne ko: «Boroom bi sa Yàlla, nanga ko

soppe sa léppi xol ak sa léppi bakkan ak sa léppi doole ak sa léppi xel, te ni nga soppe sa bopp, nanga ko soppe sa moroom\*.» <sup>28</sup> Yeesu nag ne ko: «Wax nga dëgg. Noonu ngay def, daldi texe.» <sup>29</sup> Waa ja nag namma wutu lay, ne Yeesu: «Sama moroom mooy kan?»

<sup>30</sup> Yeesu neeti ko: «Jenn waay a jóge woon Yerusalem, jëm Yeriko. Mu dajeeek ay sàcc, ñu futti ko, dóor ko, daldi dem, bàyyi ko, muy waaja dee. <sup>31</sup> Yàlla woo yàlla ab sarxalkat bu jaare yoon woowa, séen nit ka, daldi teggi. <sup>32</sup> Jenn waay ju soqikoo ci giirug Lewi it noonu; daa dikk ba tollu foofa, séen waa ja, daldi teggi. <sup>33</sup> Jenn waay ju dëkk Samari nag doon tukki, dikk ba jege waa ja, xool ko, yërëm ko lool. <sup>34</sup> Mu dikk, sotti diw ak biiñ ca gaañu-gaañu ya, lëmës ko. Ci kaw loolu mu teg ko ci mbaamam, yóbbu ko ci ab dalukaay, di ko topptoo. <sup>35</sup> Ca ëllëg sa, mu yékkati ñaari poseti xaałıst†, jox ko boroom dal ba, ne ko: “Topptoo ko waa ji. Loo ci dolli, bu ma dëppee, maa la koy delloo.”»

<sup>36</sup> Mu teg ca ne ko: «Ñett ñii, kan nga foog ne moo ci taxawu waa ja dajeeek sàcc ya, taxawaayu nit ak moroomam?» <sup>37</sup> Mu ne ko: «Xanaa ki ko defal yërmande.» Yeesu nag ne ko: «Demal boog, di defe noonu.»

### *Maryaama raw na Màrt*

<sup>38</sup> Yeesu ak ay taalibeem ñoo toppoon seenu yoon, ba tollook ab dëkk. Ba ñu dikkee, senn as ndaw su ñuy wax Màrt, ganale ko. <sup>39</sup> Ci kaw loolu rakkam ju ñuy wax Maryaama toog ca wetu Sang bi, di déglu kàddoom, <sup>40</sup> te fekk Màrt jàpp lool ca liggéeyu waañ wa. Mu dikk ne Yeesu: «Sang bi, xanaa gisoo sama rakk ji ma bàyyeek liggéeyu waañ wi, man donḡ? Wax ci boog, mu jàpple ma.» <sup>41</sup> Sang bi ne ko: «Màrt, Màrt, yitte yi nga xintewoo, di ci doñ-doñi moo bare. <sup>42</sup> Ndaxam lenn donḡ a manula ñàkk. Maryaama nag, cér bi gën la taamu, te deesu ko nangu ci moom.»

\* **10:27** 10.27 Seetal ci *Baamtug Yoon wi* 6.5 ak *Sarxalkat yi* 19.18. † **10:35** 10.35 Benn poset bu ci nekk, benn dinaar la tollool, te moo doon peyooru benn bésuub lëmm. Seetal Xaałıst ci Leeral yi.

## 11

### *Kàddug julli am na yoon*

<sup>1</sup> Yeesu moo doon julli benn bérab. Ba mu noppee, kenn ca taalibeem ya ne ko: «Sang bi, jàngal nu julli noonee Yaxya jàngale julli ay taalibeem.» <sup>2</sup> Yeesu ne leen: «Bu ngeen dee julli, ne leen:

Baay, sellnga ñeel na saw tur, na sa nguur dikk.

<sup>3</sup> May nu bés ak bés sunub dundu bés bu nekk.

<sup>4</sup> Baal nu sunuy bàkkaar, ni nuy baale nun itam, mboolem ñi nu tooñ, te bu nu dugal ci nattu.»

<sup>5</sup> Yeesu teg ca ne leen: «Ana kan ci yeen moo seeti ab xaritam xaaju guddi, ne ko: “Xarit, lebal ma ci ñetti mburu. <sup>6</sup> Sama xarit bu nekk ciw yoon moo dikk sama kër, te awma dara lu ma ko taajal,” <sup>7</sup> te xarit ba àddoo ca biir néegam, ne ko: “Bu ma sonal, tëj naa ba tëdd, maak samay doom; manumaa jóg, di la jox dara?”

<sup>8</sup> Maa leen ko wax, su jógul jox ko la mu laaj ndax ug xaritoo it, la ko kee amul kersay yee ngir sàkku ndimbal mooy tax mu jóg, jox ko mboolem lu mu soxla.

<sup>9</sup> Moo tax ma ne leen, ñaanleen, ñu may leen; seetleem, ndax ngeen gis; fëggleen, ñu ubbil leen. <sup>10</sup> Ndaxte képp ku ñaan, dinga am; ku seet, dinga gis; ku fëgg it, dees na la ubbil. <sup>11</sup> Ana kan ci yeen mooy

baay bu doomam ñaan aw jën, mu jox ko jaan? <sup>12</sup> Mbaa mu ñaan ko nen, mu jox ko aw jiit? <sup>13</sup> Ndegam yeen ñi bon yeena mana may seeni gone lu baax nag, astamaak Baay ba fa asamaan. Moo leen ko dàq fuuf, nde mooy may Noo gu Sell gi, ñi ko ko ñaan!»

### *Beelsebul xeexul boppam*

<sup>14</sup> Yeesu moo doon dàq aw rab wu duggoon nit ba mu luu. Ba rab wa génnee, luu ba wax, mbooloo ma waaru.

<sup>15</sup> Teewul ñenn ca ñoom ne: «Ci Beelsebul, buuru rab yi lay dàqe ay rab.»

<sup>16</sup> Ñeneen nag di ko fiir, di sàkku ci moom firnde ju bawoo asamaan. <sup>17</sup> Yeesu

itam ràññee seen xalaat, ne leen: Gépp nguur guy xàjjalikoo ci biiram, day tas, yii kër mabb ca kaw yee. <sup>18</sup> Seytaane itam, su xàjjalikoo ci biiram, ana nu nguoram di yàgge, gannaaw yeena ne Beelsebul laay dàqe ay rab? <sup>19</sup> Te it ndegam man Beelsebul laay dàqe rab yi, seen ñoñ nag ñoom, kan lañuy dàqe ay rab? Kon kay seen ñoñ a leen tiiñal. <sup>20</sup> Waaye su dee loxol Yàlla laay dàqe rab yi nag, kon nguurug Yàlla agsi na ba ci yeen.

<sup>21</sup> «Su ponkal gannaayoo ba diis, wattu këram, alalam dina raw. <sup>22</sup> Waaye bu ko ku ko man songee, ba daan ko, day nangu mboolem ngannaay lu mu yaakaaroon, ba noppi séddale alalam. <sup>23</sup> Ku farul ak man nag, man ngay xeex, te ku àndul ak man di dajale, yaa ngi tasaare.

<sup>24</sup> «Aw rab wu bon, bu jàppee nit ba génn ko, day wër bérab yu fendi, di wut fu mu nopploo, te du ko gis. Su ko defee mu ne: “Naa dellu ca sama kër, ga ma jóge.” <sup>25</sup> Bu dikkee fekk kër gi buube, defare ba jekk, <sup>26</sup> day dem indi yeneen juróom ñaari rab yu ko yées, ñu bokk sancsi. Su ko defee ni nit kiy mujje mooy yées na mu jèkke.»

<sup>27</sup> Naka la Yeesu di wax loolu, jenn jigéen ca mbooloo ma àddu ca kaw, ne ko: «Ndokklee ki la ëmb ci biiram, nàmpal la ci weenam!» <sup>28</sup> Moom nag mu ne ko: «Xanaa kay, ndokklee ñiy déglu kàddug Yàlla te di ko jèfe.»

### *Yonent Yàlla Yunus doy na firnde*

<sup>29</sup> Naka la mbooloo may gëna takku, Yeesu ne: «Niti tey jii, nit ñu bon lañu. Firnde lañuy wut, waaye deesu leen jox jenn firnde ju moy firndey Yunus. <sup>30</sup> Ndax na Yunus nekke woon firnde ca waa Niniw, noonu la Doomu nit ki nekke firnde ci niti tey jii. <sup>31</sup> Keroog àtte ba, Lingeeru bëj-saalum dina jóg, janook niti tey jii, tiiñal leen; ndax moo bàyyikoo woon ca catal àddina, ngir déglusi xam-xamu Suleymaan, te tey jii, ku sut Suleymaan a ngi fi. <sup>32</sup> Waa réewum Niniw it keroog àtte ba dinañu taxaw, layook niti tey jii, tiiñal leen ndax ñoo tuube woon

ca waareb Yunus, te tey jii, ku sut Yunus a ngi fi.

### *Bët mooy làmpu yaram*

<sup>33</sup> «Deesul taal ab làmp, di ko dugal fu làqu, mbaa ci suufu leget. Dees koy aj kay, ba kuy duggsi gis muy leer. <sup>34</sup> Bët mooy làmpu yaram. Bu sa bët wéree, sa yaram wépp a ciy leerloo, waaye bu sa bët bonee, sa yaram wépp a ngi ci lëndëm. <sup>35</sup> Kon seetal ndax leer gi nga foog ne mu ngi ci yaw du ag lëndëm. <sup>36</sup> Bu sa yaram wépp dee leerlu nag te lenn nekku ci cig lëndëm, su boobaa la sa yaram di mana leerlu ba ne ràññ, mel ni bu la ab làmp niitee, ne ràññ ci sa kaw.»

### *Yeesu xas na niti diine ñi*

<sup>37</sup> Ba Yeesu waxee ba noppi, ab Farisen da koo woo këram, ngir bokk ak moom lekk. Mu nangu, dem ba duggsi, daldi toog ca lekkukaay ba. <sup>38</sup> Farisen bi nag jaaxle, ndax la Yeesu setluwul bala moo waaja lekk. <sup>39</sup> Sang bi ne ko: «Yeen Farisen yi, bitib kaas bi ak ndab li daal ngeen di raxas, te fekk leen feese jikkoy jagoo lu lewul, akug mbon ci biir! <sup>40</sup> Yeena ñàkk xel! Xanaa du ki sàkk biti moo sàkk biir itam? <sup>41</sup> Li ci biir kay ngeen di sarxe! Su boobaa seen lépp ay set. <sup>42</sup> Waaye wóoy ngalla yeen Farisen yi! Xobi naana ak yeneen safal yu mel ni ru\* ak wépp xetu lujum, yeena ngi ciy génne cérub fukkeel, ngir asaka, njubte ak cofeelu Yàlla nag, ngeen sàggane. Lii de war na leen, waaye lee it, waruleen koo sàggane. <sup>43</sup> Wóoy ngalla yeen Farisen yi! Yeenay sàkku péete yu kaname ca jàngu ya, ak nuyoob gèddaal ca pénc ma. <sup>44</sup> Wóoy ngalla yeen, yeena ngi mel ni ay bàmmeel yu amul xammikaay, nit ñiy dox ca kaw te xamuñu ko.»

<sup>45</sup> Kenn ci xamkati yoon yi nag àddu ne: «Sëriñ bi, loolu nga wax de, nun itam, xasaale nga nu ci.» <sup>46</sup> Yeesu itam ne: «Yeen xamkati yoon yi itam, wóoy ngalla yeen, yeen ñi sëf nit ñi sëf yu ñu àttanul, te yeen ci seen bopp, seen benn baaraam sax du ci laal. <sup>47</sup> Wóoy ngalla

\* **11:42** 11.42 ru gancax la. Xob yi dees na ko togg, di ko fajoo.

yeen, yeenay tabax bàmmeeeli yonent yi, te seeni maam reyoon leen. <sup>48</sup> Kon yeena seedee noonu ne seen jëfi maam ya, ànd ngeen ci, ndax ñoom ñoo leen rey, yeen ngeen tabax seeni bàmmeeel. <sup>49</sup> Looloo tax itam kàddug Yàlla giy xel, biral ne: “Maay yebal fa ñoom ay yonent aki ndaw, ñii ñu bóom, ñee, ñu bundxatal.” <sup>50</sup> Su ko defee yoon topp niti tey jii, deretu mboolem yonent yi tuuru, dale ko ca cosaanu àddina. <sup>51</sup> La dale ca deretu Abel ba ca deretu Sàkkaryaa†, ma ñu rey ca diggante sarxalukaay ba ak bérab bu sell ba, maa leen ko wax déy, dees na ko topp niti tey jii. <sup>52</sup> Ngalla yeen xamkati yoon yi, yeena sànk caabiy xam-xam; yeen dugguleen, ñiy duggsi, ngeen tere leena dugg.»

<sup>53</sup> Ba Yeesu génnee foofa, ca la Farisen ya ak firikat ya tàmbalee xabtaluu ci kawam, di ko seetloo ay laaj ci mbir yu bare, <sup>54</sup> di ko yeeru, tey wuta kēf kàddu gu rēcce ci gēmmiñam, ngir tuumaal ko.

## 12

### *Yeesu aaye na jinigal*

<sup>1</sup> Mbooloo ma nag mujj na dajaloo ba mat ay junniy junniy nit, bay joggeente. Ci biir loolu Yeesu tàmbalee wax, jëkke ko ci ay taalibeem, ne: «Wattuleen lawi-iru Farisen ñi, te mooy jinigal. <sup>2</sup> Mboolem lu nēbbu dees na ko feeñal, te lu làqu dees na ko xam. <sup>3</sup> Moo tax mboolem lu ngeen waxe biir lëndēm, dees na ko dégge bëccëg ndarakàmm, te mboolem lu ngeen déeye ci néegu biir, dees na ko biral ci kawi taax.

<sup>4</sup> «Maa leen ko wax, yeen samay soppe, buleen ragal ñu manul lu wees rey seen yaram, ndax gannaaw loolu dootuñu leen manal lu ko raw. <sup>5</sup> Ma xamal leen nag ki ngeen wara ragal: kiy rey ba noppi, am sañ-sañu sànni ca sawara sa, kooku déy laa leen ne, ragal-leen ko. <sup>6</sup> Juróomi picci ramatu, xanaa jarul ñaari dërēm donḡ? Moona Yàlla fàttewula geesu menn ci ñoom. <sup>7</sup> Yeen nag seen kawari bopp sax, waññees na lépp. Buleen ragal dara, nde ndiiraanu ramatu, yeena ko gën.

<sup>8</sup> «Te it maa leen ko wax, képp ku dëggal fi kanam nit ñi, ne man nga féeteel, Doomu nit ki itam dina dëggal fa kanam malaakay Yàlla ya, ne moom nga féeteel. <sup>9</sup> Waaye ku weddi fi kanam nit ñi, ne man nga féeteel, dees na weddi fa kanam malaakay Yàlla ya, ne man nga féeteel. <sup>10</sup> Képp ku jëme kàddug safaan ci Doomu nit ki, dees na la jéggal, waaye ku saaga Noo gu Sell gi, deesu la jéggal.

<sup>11</sup> «Bu ñu leen yóbboo ca jàngu ya, ca kanam kilifa ya, ak àttekat ya, buleen jaaxle ci nan ngeen di yékkatee kàddug layoo, ak luy doon seenu lay, mbaa lu ngeen di wax, <sup>12</sup> ndax su boobaa Noo gu Sell gi moo leen di xamal ca waxtu woowa la ngeen wara wax.»

### *Yoolu Yàlla donḡ mooy alal*

<sup>13</sup> Kenn ca mbooloo ma moo noon Yeesu: «Sëriñ bi, waxal ci sama mag, mu jox ma sama wàll ci ndono li nu bokk.»

<sup>14</sup> Yeesu ne ko: «Waa jii, kan moo ma fal àttekat mbaa miraaskat ci seen kaw?»

<sup>15</sup> Ci kaw loolu mu ne leen ñoom ñépp: «Moytuleen wépp xeetu bëgge, ndax loo barele barele, sa bakkan ajuwul ci sa alal.»

<sup>16</sup> Mu léeb leen nag, ne leen: «Nit la woon ku woomle, te ab toolam nangu.

<sup>17</sup> Mu naan ca xel ma: “Nu may def nag? Amatuma sax fu ma denc sama ngóob mi!”

<sup>18</sup> Ci kaw loolu mu ne: “Nii laay def: samay sàq laay daaneel, daldi defaraat sàq yu gëna mag, denc ci sama pepp ak mboolem lu ma am. <sup>19</sup> Su ko defee ci samam xel laa naan: ‘Céy sama waa ji, yaa ngeek alal ju bare ju mana dem ay ati at; neel finaax, di lekk, di naan ak a bége.’ ”

<sup>20</sup> Yàlla nag ne ko: “Ñàkk xel! Guddig tey jii, dees na jël sa bakkan. Kon li nga waajal, ana kuy doon boroom?”

<sup>21</sup> «Kuy dajaleel boppam alal te woomlewo fa Yàlla, loolu mooy saw demin.»

### *Ku gëm Yàlla, wóolu ko*

<sup>22</sup> Gannaaw loolu Yeesu ne ay taalibeem: «Moo tax ma ne leen, buleen seen bakkan jaaxal, ngir lu ngeen lekk, te it buleen seen yaram jaaxal ngir lu ngeen sol, <sup>23</sup> ndax lekk gi, bakkan bee ko épp

† 11:51 11.51 Seetal ci 2.Jaar-jaar ya 24.20-22.



solo, te koddaay li it, yaram wee ko ëpp solo. <sup>24</sup> Seetleen ci baaxoñ: du ji, du góob, amul ub denc mbaa am sàq. Teewul Yàlla di ko dundal. Yeen nag, ñaata yoon ngeen gën picc yi! <sup>25</sup> Ana kan ci yeen mooy jaaxle, di xalaata xalaat bakkanam ba mana yokk lu tollook xef ak xippi ci àppam? <sup>26</sup> Ndegam loolu gëna tuut sax moo leen të, ana lu ngeen di xalaat ci leneen?

<sup>27</sup> «Seetleen ni tóor-tóor yiy saxe. Sonnuñu, ëccuñu, waaye maa leen ko wax, Suleymaan ak darajaam jépp sax, soluwul woon ni benn ci ñoom. <sup>28</sup> Ndegam ñaxum tool miy dund tey, te léegi ñu sànni ko cib taal, moom la Yàlla solale noonu, xanaa astamaak yeen kay? Yeenaka néew ngëm! <sup>29</sup> Yeen nag, buleen tiisoo lu ngeen lekk, mbaa lu ngeen naan; te bu yooyu xalaat ub seen bopp. <sup>30</sup> Ndax loolu lépp, xeeti yéefari àddina, ñoo koy tiisoo, te yeen, Baay bi xam na ne soxla ngeen ko. <sup>31</sup> Waaye tiisooleen nguuram, su boobaa dees na leen ci dollil loolu.

<sup>32</sup> «Buleen ragal dara, yeen jur gu sew gi, ndax seen Baay la soob, mu jagleel leen nguur gi. <sup>33</sup> Jaayleen seen alal, sarxe xaalis bi, sàkkuleen mbuus yu dul ràpp, muy dencu ëllëg bu dul jeex fa asamaan, fa ko sàcc dul jege, max du ko yàq. <sup>34</sup> Ndax fu sab denc nekk, sab xol it a nga fa.

### *Teewlu war na*

<sup>35</sup> «Takkuleen te seeni làmp di tàkk. <sup>36</sup> Mel-leen ni nit ñuy séentu seen njaatige lu jóge céet, ndax bu dikkee ba fëgg bunt ba, ñu daldi ko ubbil. <sup>37</sup> Ndokklee surga yooyu seen njaatige dikk fekk ñu teewlu. Maa leen ko wax déy, njaatige leey takku, toogal leen ba noppi dikk, taajal leen, ñu lekk. <sup>38</sup> Ndegam ba guddi ga xaajee la njaatige la ñibbsi, ba fekk surga ya teewloo noonu, am ba suuf seddee la, lu mu ci mana doon, ndokklee ñoom. <sup>39</sup> Waaye lii de xamleen ko: boroom kër, su xamoon wan waxtu la ab sàcc di ñëw, du ko wacc moos, mu dàjjiy, dugg kërám. <sup>40</sup> Kon yeen itam waajleen ba jekk, ndax waxtu wu ngeen foogul, ci la Doomu nit ki di ñëw.»

<sup>41</sup> Piyeer nag ne Yeesu: «Sang bi, ndax nun donj nga léeb lii, am ñépp a ko moom?» <sup>42</sup> Sang bi ne ko: «Ana kan nag mooy saytukat bu wóor te muus, ba njaatigeem batale ko curgag kërám, ngir mu di leen jox seen njël ca ba muy jot? <sup>43</sup> Ndokklee surga bu njaatigeem dikk, fekk ko muy doxale noonu. <sup>44</sup> Maa leen ko wax déy, alalam jépp la ko njaatige la di far dénk. <sup>45</sup> Waaye su jawriñ ja nee ci xelam: “Sama njaatige dikkagul léegi,” ba tax mu tàmbalee dóor surga ya, góor ak jigéen, di lekk ak a naan, di màndi, <sup>46</sup> su boobaa njaatige laay dikk bés bu mu ko séenuwul ak waxtu wu mu foogul, te mbugal mu metti la koy mbugal, sédd ko ci añub gëmadikat ñi.

<sup>47</sup> «Jawriñ jooju xam nammeelu njaatigeem, te taxul mu waaj ko, ba jëfewu ko, ay yetam dina bare. <sup>48</sup> Waaye jawriñ ji xamul nammeelu njaatigeem, te teewu koo def lu yelloo ay дума, yet yu néew lay am. Képp ku ñu jox lu bare, dees na la topp lu bare. Képp ku ñu dénk jopp, dees na la feyeeku lu ko ëpp.

### *Ngëm indi na féewaloo*

<sup>49</sup> «Sawara laa taalsi ci kaw suuf, te maaka bëggoon mu ne jippét xaat! <sup>50</sup> Am na nag sóobu gu ma wara sóobu, waaye ndaw njàqare ci man li feek loolu sottiwul. <sup>51</sup> Foog ngeen ne maye jàmm ci kaw suuf moo ma indi? Déet kay. Maa leen wax lii, xanaa ag féewaloo. <sup>52</sup> Gannaaw-si-tey, bu juróomi nit bokkee genn kër, dinañu féewaloo; ñett féewaloo ak ñaar, ñaar féewaloo ak ñett. <sup>53</sup> Baay dina féewaloo ak doomam ju góor, doom ja féewaloo ak baayam; ndey féewaloo ak doomam ju jigéen, doom ja féewaloo ak ndeyam; ndey féewaloo ak jabaru doomam, jabar ja féewaloo ak ndeyu jëkkër ja.»

### *Xam pirim jamono war na*

<sup>54</sup> Yeesu neeti mbooloo ma: «Bu ngeen gisee mu xiine sowu, dangeen dal naan: “Taw baa ngi ñëw,” te noonu lay ame. <sup>55</sup> Bu ngelaw bawoo bëj-saalum, ngeen ne: “Tàngaay wu metti lay doon,” te mooy am. <sup>56</sup> Jinigalkat yi ngeen doon!

Melow asamaan ak suuf, man ngeen koo firi. Xew-xewi janti tey jii nag, nu ngeen umplee pireem?

<sup>57</sup> «Te itam lu leen tee àtte njub, yeen ci seen bopp? <sup>58</sup> Boo àndeek sab jotewaale, ngeen jëm ca àttekat ba, fexeela jubook moom ci yoon wi. Lu ko moy mu yóbbu la ci yoon, yoon jébbal la ndawal buur, mu ne la ràpp tëj. <sup>59</sup> Ma ne la, doo fa génne mukki te feyuloo lépp, ba ci poset bi gëna tuut.»

## 13

### *Ku tuubul, sàнку*

<sup>1</sup> Jamono jooju tembe la aw nit dikk, àgge Yeesu mbirum waa Galile yu Pilaat bóomoon, jaxase seen deret ak seen dereti juru sarax yu ñu jagleel Yàlla. <sup>2</sup> Yeesu ne leen: «Foog ngeen ne waa Galile yooyu dañoo gëna bàkkaar mboolem seen bokki Galile ya ca des, ba tax ñu daj mitit wu ni tollu? <sup>3</sup> Maa leen ne déedéet kay, te su ngeen tuubul, noonu ngeen di sànkoo yeen ñépp. <sup>4</sup> Fukki nit ak juróom ñett ñooñu tata ja ca Silowe daanu ci seen kaw, ba rey leen nag, ngeen foog ne ñoo gën diy tooñkat ci Yerusaleem gépp? <sup>5</sup> Maa leen ne déedéet kay, te su ngeen tuubul, yeen ñépp ay sàнку ni ñoom.»

<sup>6</sup> Mu léeb leen lii nag, ne leen: «Garabu figg la nit amoon ci tóokëram. Mu dikk di ko raas-si, gisu ca dara. <sup>7</sup> Mu ne surga ba: “Ñetti at a ngii may dikk, raas-si garab gii, gisuma ci dara. Kon gor ko, da fiy xatal rekk.” <sup>8</sup> Surga ba ne ko: “Sang bi, bàyyiwaat ko at mii rekk, ba ma wéex ko, def ci tos. <sup>9</sup> Jombul mu meññ déwén; lu ko moy, nga gor ko.”»

### *Yeesu faj na nit bésusb Noflaay*

<sup>10</sup> Benn bésusb Noflaay, Yeesoo doon jàngle ci ab jàngu. <sup>11</sup> Ndeke jenn jigéen a nga fa woon; rab a ko woppal lu wara mat fukki at ak juróom ñett, mu xuuge, manula fexe ba siggi. <sup>12</sup> Yeesu gis ko, woo ko, ne ko: «Jongama, teqlikoo nga ak sa laago.» <sup>13</sup> Mu teg ko ay loxoom, mu siggi ca saa sa, di sàbbaal Yàlla. <sup>14</sup> Njiitu jàngu ba nag yékkati kàddug ñaawlu ndax bésusb Noflaay ba Yeesu faje. Mu

ne mbooloo ma: «Juróom benni fan la nit ñi wara liggéey. Kon ci fan yooyu ngeen wara fajusi, waaye du ci bésusb Noflaay.» <sup>15</sup> Sang bi ne ko: «Jinigalkat yi ngeen doon! Xanaa du ci bésusb Noflaay la kenn ku nekk ci yeen di yiwee aw yékkam mbaa mbaamam ca gétt ga, ngir wéggi ko? <sup>16</sup> Jigéen jii di sëtub Ibraayma, te fukki at ak juróom ñett a ngii Seytaane làggal ko, wareesu koo yiwi, teggil ko laago jii ci bésusb Noflaay?»

<sup>17</sup> Ba mu waxee loolu, noonam yépp a rus, mbooloo ma nag di bége mboolem jëf ju yéeme, ja muy def.

### *Doomu fuddën misaal na nguurug Yàlla*

<sup>18</sup> Yeesu neeti: «Ana lu nguurug Yàlla di nirool? Ana lu ma koy niruleel? <sup>19</sup> Mu ngi mel ni doomu fuddën bu nit jël, sànni cib toolam. Mu sax, màgg ba doon garab gu njanaaw yi tàgg ciy caram.»

### *Lawiir misaal na nguurug Yàlla*

<sup>20</sup> Mu dellu ne: «Ana lu may niruleel nguurug Yàlla? <sup>21</sup> Mu ngi mel ni lawiir ju jigéen sàkk, def ko ci ñetti natti sunguf, ba tooyal bépp mujj funki.»

### *Buntu texe xat na*

<sup>22</sup> Yeesu moo doon jaare ay dëkk yu mag ak yu ndaw, jëm Yerusaleem, di jàngle ca yoon wa. <sup>23</sup> Mu am ku ko ne: «Sang bi, xanaa ñiy mucc ñu néew lay doon?» Mu ne leen: <sup>24</sup> «Góor-góorluleen ba dugge ci bunt bu xat bi, ndax maa leen ko wax, ñu bareey jéema dugg, waaye duñu ko man. <sup>25</sup> Bu boroom kër gi xasee jóg, ba tëj bunt bi, fa ngeen di doxe des biti, di fëgg naan: “Sang bi, ubbil nu!” Mu ne leen: “Xawma fu ngeen bokk.” <sup>26</sup> Su boobaa ngeen naan: “Noo daan bokk di lekk ak a naan, te sunuy pénc nga daan jànglee.” <sup>27</sup> Mu neeti leen: “Nee naa leen xawma fu ngeen bokk. Soreleen ma yeen ñépp, defkati njubadi yi!” <sup>28</sup> Foofa la ay jooy ak naqarlu bay yéyu di ame yoon, kera bu ngeen gisee seeni maam Ibraayma ak Isaaxa ak Yanqóoba ak yonent yépp ca biir nguurug Yàlla, te fekk yeen ci seen bopp, ñu dàq leen ca biti. <sup>29</sup> Penku ak sowu, bëj-gànnar ak bëj-saalum, la aw nit di bawoo, dikk toog ca ndabal bernde

la ca nguurug Yàlla. <sup>30</sup> Su ko defee nag, ñenn a ngi mujje tey, waaye èllëg ñooy jiitu; te ñenn a ngi jiitu tey, waaye èllëg ñooy mujje.»

### *Dees na tas Yerusalem*

<sup>31</sup> Ca jamono jooju tembe la ay Farisen dikk, ne Yeesu: «Jógeel fii, te dem, ndax Buur Erodd da laa nara rey.» <sup>32</sup> Mu ne leen: «Demleen wax njomboor moomu, ne ko: “Maa ngii di dàq rab yi, di maye ag wér, tey ak èllëg. Bésuub ñetteel ba nag ma sottal.” <sup>33</sup> Waaye tey ak èllëg ak sibir, fàww ma dem, ndax ab yonent wareesu koo bóome fenn fu dul Yerusalem.

<sup>34</sup> «Yerusalem, Yerusalem, yaw miy bóom yonent yi, di sànni ay doj ñi ñu yebal ci yaw, ba ñu dee, ñaata yoon laa namma dajale say doom, uuf ni ganaar di uufe ay cuujam, te nanguwuloo? <sup>35</sup> Mu ngoog, waccees na laak sa kër nag, waaye maa ne la doo ma gisati ba kera jant ba nga naa: “Na barke wàccal ki ñëw ci turu Boroom bi!”»

## 14

### *Yeesu jàngal na Farisen ya*

<sup>1</sup> Benn bésuub Noflaay la Yeesu reeri woon kër genn kilifag Farisen ya. Ñoom nag ñu di ko bàyyi xel bu baax. <sup>2</sup> Ndeke jenn waay a nga fa janook moom, yaram wépp a sadd. <sup>3</sup> Yeesu àddu, ne xamkati yoon yaak Farisen ya: «Waaw, pajum bésuub Noflaay, yoon maye na ko, am déet?»

<sup>4</sup> Ñu ne cell. Yeesu teg waa ja loxo, wéral ko, daldi ko yiwi. <sup>5</sup> Mu ne leen: «Ana kan ci yeen la doomam mbaa aw yëkkam daanu cib teen, mu bañ koo daldi génne ci bésuub Noflaay?» <sup>6</sup> Lu ñu ca teg nag të leen, ñu ne xerem.

<sup>7</sup> Ci biir loolu Yeesu gis na gan ñay taamoo toogu yu kaname, mu léeb leen, ne leen: <sup>8</sup> «Bu la boroom xew wooyee ci berndeg céet, bul wàllisi, ba tooge toogu ba gëna kaname, xamoo fu ku la sutu daraja di wuysee boroom xew ma. <sup>9</sup> Su boobaa moom mi la woo, woo ko, mooy dikk, ne la: “Mayal kii, mu toog.” Nga am nag gaccey walbatiku toogi fa gëna gannaawe. <sup>10</sup> Bu ñu la wooyee am xew

kay, demal tooge fa gëna gannaawe, ba ka la woo dikk ne la: “Xarit, agsil ci kanam.” Su boobaa muy sa teraanga ci kanam mboolem ña nga bokkal bernde ja. <sup>11</sup> Ndaxte képp kuy réylu, dees na la toroxal, ka toroxlu lees di yékkati.»

<sup>12</sup> Ci kaw loolu Yeesu ne waa ja ko woo bernde: «Boo dee waajal bernde, añ mbaa reer, bul woo say xarit, mbaa say doomi ndey, mbaa say bokk, mbaa say dëkk yu am alal, nde ñoom itam dañuy walbatiku, woo la rekk, mu doon sag pey. <sup>13</sup> Boo dee waajal bernde kay, wool néew-doole yi ak làggi yi, ak ñiy soox ak silmaxa yi. <sup>14</sup> Su boobaa ndokklee yaw, nde amuñu sag pey, waaye dees na la fey, kera ndekkitel aji jub ñi.»

### *Dàq sa teraanga, romb sa njariñ*

<sup>15</sup> Kenn ca gan ña nag dégg loolu, ne Yeesu: «Ndokklee ku lekk ca bernde ja ca nguurug Yàlla!» <sup>16</sup> Yeesu ne ko: «Jenn waay moo waajaloon bernde ju mag, woo ca ñu bare. <sup>17</sup> Ba waxtuw lekk jotee, mu yebal ab surgaam ca ña mu woo woon, ne leen: “Ñëwleen, lépp sotti na léegi.”

<sup>18</sup> «Ñu tàmbalee gantal nag ñoom ñépp. Kii ne ko: “Ab tool laa jënd, te fàww ma xooli ko. Dama lay ñaan rekk, nga jéggal ma.” <sup>19</sup> Kee ne: “Ay lëkkey yëkk, ci laa jënd juróom, damay dem nii, jéemloo leen ba xam. Dama lay ñaan rekk, nga jéggal ma.” <sup>20</sup> Kale ne ko: “Ab séet laay sooga takk, looloo tax duma mana ñëw.”

<sup>21</sup> «Surga ba dellu, daldi koy àgge boroom kër ga, njaatigeem. Mu mer, ne surga ba: “Demal gaaw ca pénc yaak mbeddi dëkk bi, te nga indi fii néew-doole yi, ak làggi yi ak silmaxa yi ak ñiy soox.”

<sup>22</sup> «Surga ba dem ba délsi, ne ko: “Sang bi, li nga santaane de def naa ko, waaye kër gi feesagul.” <sup>23</sup> Njaatige li ne ko: “Demal topp yoon yi, leri ñag yi, te nga soññ nit ñi, ñu dikk ba sama kër fees.” <sup>24</sup> Maa leen ko wax, ñi ma woo woon ci sama bernde ji, kenn du ci mos.»

### *Topp Yeesu am na lu mu laaj*

<sup>25</sup> Yeesu moo doon dem, mbooloo mu réy dar ko. Mu geestu ne leen: <sup>26</sup> «Képp

ku ñëw ci man, te bañuloo sa baay ak sa ndey, ak sa jabar, ak sa doom, ak sa bokk yu góor, ak sa bokk yu jigéen, bañuloo sa bakkanu bopp sax, doo mana doon sama taalibe. <sup>27</sup> Képp ku gàdduwul sa bantu bopp bu ñu lay daaj, te topp ci man, doo mana doon sama taalibe. <sup>28</sup> Ana kan ci yeen sax mooy namma tabax taaxum kaw, te jëkkula toog, waññ la mu koy dikke, ngir seet ba xam ndax am na lu ko àggale, <sup>29</sup> bala moo teg kenug taax ma, te amul dooley sottal tabax bépp, ba ña koy seetaan di ko ñaawal, <sup>30</sup> naan: “Waa jii moo tàmbalee tabax, te manula àggale!” <sup>31</sup> Am ban buur mooy xarejeek beneen buur te jëkkula toog, seet ba xam ndax man naa ànd ak fukki junniy xarekatam, ngir xarejeek ku ko songseek ñaar fukki junniy xarekat? <sup>32</sup> Su ko manul nag, ba buur bee di soreegum lay yebal kurél ca moom, ngir seet nu mu mana sàrtoo ak moom jàmm. <sup>33</sup> Naka noonu itam, kenn ci yeen du mana doon sama taalibe te dëdduwul mboolem lu mu am.

<sup>34</sup> «Xorom déy baax na, waaye bu sàppee, ana lees koy safaleetee? <sup>35</sup> Jariñatul suuf, jariñatul ab tos. Ca biti lees koy tuuri. Ku ami nopp kat, déglul.»

## 15

### *Sàmm bége na menn xaram mu feeñ*

<sup>1</sup> Mboolem juutikat yeek bàkkaarkat yi ñoo daan ñëw ci Yeesu, di ko déglu. <sup>2</sup> Ci biir loolu Farisen ya ak firikati yoon ya di ñurumtu naan: «Kii moom bàkkaarkat yi lay neexool, di bokk ak ñoom lekk!» <sup>3</sup> Yeesu nag léeb leen lii, ne leen: <sup>4</sup> «Ana kan ci yeen mooy am téeméeri xar, réerle ci menn, te bàyyiwul ca àll ba juróom ñeent fukki xar ya ak juróom ñeent (99), ngir toppi ma réer, ba gis ko? <sup>5</sup> Bu ko gisee lay bég, teg ko ca mbagg ma, yóbbu kër ga. <sup>6</sup> Te bu àggee ca kër ga, xarit yaak dëkk ya lay woo, ne leen: “Kaayleen nu bége, sama xar ma réeroon, gis naa ko!”

<sup>7</sup> «Maa leen wax, ne leen: bu benn bàkkaarkat donj tuubee, noonu rekk lay doone mbégte fa asamaan, ba raw mbégte ma fay am, bu juróom ñeent

fukk ak juróom ñeenti nit jubee, te soxlawuñoo tuub.

### *Jigéen bége na takkaayam lu feeñ*

<sup>8</sup> «Te it ana jan jigéen mooy am fukki libidoor, benn réer ca, te taalul ab làmp, buub néeg ba, seeta seet, ba gis ko? <sup>9</sup> Bu ko gisee, xarit yaak dëkk ya lay woo, ne leen: “Kaayleen nu bége, libidoor ba réeroon, gis naa ko.” <sup>10</sup> Maa leen wax ne leen: noonu rekk lay doone mbégte fa malaakay Yàlla ya, bu benn bàkkaarkat donj tuubee.»

### *Baay bége na doomam ju feeñ*

<sup>11</sup> Yeesu neeti: «Nit a amoon ñaari doom yu góor. <sup>12</sup> Ka gën di ndaw ne baay ba: “Baay, jox ma cér bi ma yoon may ci sunu alal.” Ba loolu amee baay ba séddale leen alalam. <sup>13</sup> Ay fan yu néew gannaaw gi, ka gën di ndaw jaay léppam, daldi tukki réew mu sore, di topp bakkanam ba yàq fa alalam. <sup>14</sup> Gannaaw ba mu sànkee lépp, xiif bu metti dikkal réew ma, mu daldi tàmbalee ñàkk. <sup>15</sup> Ci kaw loolu mu dem, di surgawu ku cosaano ca réew mooma, kooku yebal ko ca ay toolam, muy sàmm ay mbaam-xuux. <sup>16</sup> Mu dem ba noon ngéeja lekk ca xolliti doomi garab ya mbaam-xuux yay lekk, fajeb xiifam, te kenn mayu ko ca. <sup>17</sup> Xel ma mujj délsi, mu ne: “Ñaata surga la sama baay am, seen lekk ne gànñ, man, ab xiif di ma rey fii! <sup>18</sup> Naa jóg, dem ca sama baay, ne ko: ‘Baay, tooñ naa Yàlla, tooñ la; <sup>19</sup> yeyootumaa tuddoo sax sa doom; léegi def ma ni ku bokk ci say surga.’ ”

<sup>20</sup> «Mu jóg, ngir dellu kër baayam. Fu sore la ko baayam séene, muy dikk. Mu ñeewante ko, daw, laxasu ko, foon ko. <sup>21</sup> Doom ja ne ko: “Baay, tooñ naa Yàlla, tooñ la; yeyootumaa tuddoo sax sa doom.” <sup>22</sup> Teewul baay ba ne ay surgaam: “Gaawleen indi mbubb mi gëna rafet, solal ko, te ngeen takkal ko ab jaaro ci loxoom, solal ko ay dàll. <sup>23</sup> Indileen sèlluw yafal wa, rey, nu lekk, te bannexu; <sup>24</sup> ndax sama doom jii moo dee woon te dekki na, moo réeroon te feeñ na.” Ñu daldi tàmbalee bannexu.

<sup>25</sup> «Loolaa nga fekk mag ja ca tool ya. Ba mag ja dikkee ba jub kër ga, ca la dégg

po ma ak pecc ma. <sup>26</sup> Mu woo kenn ca xale ya, laaj ko lu xew. <sup>27</sup> Mu ne ko: “Sa rakk jaa délsi, sa baay rey sèlluw yar wa, ndax li mu délseek jàmm.”

<sup>28</sup> «Mag ja nag mer, nanguwula agsi, baayam génn, di ko soññ. <sup>29</sup> Mu àddu, ne baayam: “Seetal ñaata at laa la liggéeyal, sa ndigal, masuma koo moy, te man, masuloo maa may sax as tef su nu bégloo, maak samay xarit. <sup>30</sup> Sa doom jii dikk, gannaaw ba mu yàqee sa alal ci ay gànc, nga reyal ko sèlluw yafal wi!” <sup>31</sup> Mu ne ko: “Doom, yaw de naka jekk man nga nekkal, te mboolem lu ma am, yaa ko moom. <sup>32</sup> Waaye mbégte ak bannèex war na, ndax sa rakk jii moo dee woon te dekki na, moo réeroon te feeñ na!”»

## 16

### *Saytukat bu dëng def na ag muus*

<sup>1</sup> Yeesu neeti ay taalibeem: «Jenn waay ju am alal la woon, ñu boole ko ak ab saytukatam, ne ko day pasar-pasaree alalam. <sup>2</sup> Waa ja woo ko, ne ko: “Li ma la déggal, lu mu doon? Limal ma sag caytu, ndax dootoo ma mana saytul.”

<sup>3</sup> «Saytukat ba nag ne ca xelam: “Nu may def nag, gannaaw sama njaatigee ngi nangu caytu gi ci man? Dem gàbbi? Awma kàttanam. Yalwaani? Rus naa ko.”

<sup>4</sup> Gannaaw loolu mu ne “Xam naa ni may def, ba su ma ñàkkeke sama liggéey it, dees na ma fat.” <sup>5</sup> Mu daldi woolu kenn, kenn, ña ameel njaatigeem bor. Kii ñëw, mu ne ko: “Ñaata nga ameel sama njaatige?”

<sup>6</sup> Mu ne ko: “Téeméeri xàndiy diwu oliw.” Mu ne ko: “Sa kayit a ngi, toogal gaaw te bind juróom fukk.” <sup>7</sup> Kee, mu ne ko: “Yaw nag, ñaata nga ko ameel?” Mu ne ko: “Téeméeri saakuy pepp.” Mu ne ko: “Sa kayit a ngi, bindal juróom ñett fukk.”

<sup>8</sup> Njaatige li nag naw saytukat bu njublan boobu ca muus ga mu defe. Ndax kat niti tey jii ñoo gëna muus doomi leer ñi, ci ni ñuy doxale seen digganteek seeni nawle.»

<sup>9</sup> Yeesu teg ca ne: «Maa leen wax ne leen: Alalu àddina ji làmboo njubadi, sàkkooleen ko ay xarit, ngir bu alal ja jeexee, xarit yooya fat leen ca dal yu sax ya. <sup>10</sup> Ku maandu ci lu néew nag, maandu

ci lu bare; ku jubadi ci lu néew it, jubadi ci lu bare. <sup>11</sup> Kon su ngeen maanduul ci alalu àddina, alal ji dégg, ana ku leen koy dénk? <sup>12</sup> Te su ngeen maanduul ci alalu jaambur, ana ku leen di dénk seen alalu bopp?

<sup>13</sup> «Ab jaamu kër nag manula jaamu ñaari sang; day dëddu kii, sopp kee; mbaa mu fonk kii, cof kee. Manuleena jaamoondoo Yàlla ak Alal.»

<sup>14</sup> Farisen ñu bëgg xalis ña nag dégg loolu Yeesu wax lépp, ba noppi di ko ñaawal. <sup>15</sup> Yeesu ne leen: «Yeen yeenay jub-jublu ci kanam nit ñi, waaye Yàlla xam na seen xol. Ndax li nit ñi gëna naw, lu seexluwu la fa Yàlla.

<sup>16</sup> «Yoonu Musaa wi ak waxi yonent yi la woon ba kera ba Yaxya dikkee. Waaye ba mu dikkee lañu yégle nguurug Yàlla, ñépp di ci jéema dugge seen doole. <sup>17</sup> Waaye nag asamaan ak suuf raaf moo gëna yomb genn maaska rote ci mbindum yoonu Musaa.

### *Pase daganul*

<sup>18</sup> «Képp ku fase sa jabar, takk keneen, jaaloo nga; te ku jëkkëram fase, képp ku ko takk, jaaloo nga.

### *Aji texeedi sàkku na yërmande*

<sup>19</sup> «Jenn waay la woon ju bare alal, di sol yérey tànnéef yu rafet, di dunde lu neex bés bu set. <sup>20</sup> Ab baadoolo bu ñuy wax Lasaar nag farala tédde buntu kër waa ji, yaram wa ne fureet aki góom, <sup>21</sup> te noon ngéeja fajeb xiifam lu ruuse ci ndabal boroom alal bi. Rax ci dolli xaj yiy dikk, di mar ay góomam.

<sup>22</sup> «Ba baadoolo ba deeyee, malaaka yi yóbbu ko ba ca wetu Ibraayma. Boroom alal ba itam dee, ñu rob ko. <sup>23</sup> Ci kaw loolu ñu dugal ko sawara. Ca biir mbugal mu tar ma la dawale bëtam, daldi séen fu sore Ibraayma ak Lasaar ci wetam. <sup>24</sup> Mu xaacu ne: “Maam Ibraayma, yërëm ma! Yebalal Lasaar, mu sépp catal baaraamam ci ndox, dikk seralal ma sama làmmiñ, sawara sii metti na lool!” <sup>25</sup> Ibraayma ne ko: “Doom, fàttlikul ne na nga séddoo woon sa bannèex ca àddina, noonu la Lasaar nekke woon aw tiis. Waaye fii nag moo neexle, yaw nga

mitile. <sup>26</sup> Bu loolu yépp weese itam, sunu digg ak yeen kàmb gu xóot a fi dox; moo tax ku bégga jóge fii jëm ci yeen, mbaa mu jóge foofu jëmsi ci nun, du ko man.”

<sup>27</sup> «Ci kaw loolu boroom alal ba ne: “Kon nag maam, ngalla yebalal Lasaar ca sama kër baay, <sup>28</sup> ndax sama juróomi rakk a nga fa. Na leen àrtu, ngir ñu baña ñëw ñoom itam ci bérabu metit bii.” <sup>29</sup> Ibraayma ne ko: “Waaye ñoom am nañu yoonu Musaa, am nañu térey yonent yi. Nañ leen déggal.” <sup>30</sup> Mu ne ko: “Loolu doyul, Maam Ibraayma, waaye su kenn bàyyikoo ci ñi dee, dem ba ca ñoom, dinañu tuub.” <sup>31</sup> Ibraayma nag ne ko: “Su ñu dégluwul Musaa, dégluwñu yonent yi kay, ku dekki, bàyyikoo ci ñi dee sax du tax ñu gëm.”»

## 17

### *Bàkkaarloo nit aay na*

<sup>1</sup> Yeesu neeti ay taalibeem: «Ag fiir guy bàkkaarloo manula ñàkk, waaye wóoy ngalla ka koy lal. <sup>2</sup> Ñu takkoon doj wu réy ci baatam, sànni ko biir géej moo gën ci moom muy yóbbe bàkkaar kenn ci xale yii. <sup>3</sup> Wattuleen seen bopp.

### *Jéggal-leen ku leen tuubal*

«Bu la sa mbokk tooñee, yedd ko. Bu tuubee, baal ko. <sup>4</sup> Su la tooñoon juróom ñaari yoon ci bés bi, te walbatiku juróom ñaari yoon, ne la: “Tuub naa ko,” baal ko rekk.»

### *Ngëm maye na kéemtaan*

<sup>5</sup> Ci kaw loolu ndaw ya ne Sang bi: «Yokk nu ngëm.» <sup>6</sup> Sang bi ne leen: «Su ngeen amoon ci ngëm, lu tollu ni peppu fuddën sax, ba ne garab gii: “Buddeekul, dem jëmbate ca géej ga,” su boobaa garab gi déggal leen.

### *Ab jaam du sàkku jaajëf*

<sup>7</sup> «Kan ci yeen la ab jaamam di beyi mbaa mu sàmmi ba jóge tool, dikk, mu ne ko: “Kaay, nu lekk?” <sup>8</sup> Xanaa kay da koy wax ne ko: “Defaral sama reer, te takku, taajal ma, ba ma lekk, naan, nga doora lekk, naan.” <sup>9</sup> La jaam ba jëfe ndigal tax na sangam sant ko? Déedéet kay. <sup>10</sup> Yeen itam noonu. Bu ngeen defee li ñu leen

sant lépp ba noppi, dangeena war ne: “Ay jaam rekk lanu. Sunu warugar lanu def.”»

### *Yeesu faj na fukki gaana*

<sup>11</sup> Ci biir yoon woowu Yeesu jëmoon Yerusaleem, ma nga jaare fa Samari ak Galile digaloo. <sup>12</sup> Mu dem bay duggsi cib dëkk, fukki gaana dikk, dajeek moom, ba dând ko, daldi taxaw. Ñu xaacu ne: <sup>13</sup> «Yeesu, Njaatige, yërëm nu!» <sup>14</sup> Yeesu nag gis leen, ne leen: «Demleen seetluji seen yaram ca sarxalkat ya.»

Ba ñuy dem ca sarxalkat ya lañu wér, seen yaram set. <sup>15</sup> Kenn ci ñoom gis ne wér na, daldi walbatiku, di xaacuy sàbbaal Yàlla. <sup>16</sup> Mu dikk, ne gurub, dëpp jëem fa tãnki Yeesu, sant ko. Waa ja nag nitu Samari la woon. <sup>17</sup> Ba loolu amee Yeesu ne: «Xanaa du fukk a wér? Juróom ñeent ña nag, ana ñu? <sup>18</sup> Amu ci kenn ku ñëw, delloo Yàlla njukkal ku dul doxandéem bii!» <sup>19</sup> Yeesu nag ne ko: «Jógal dem; sa ngëm faj na la.»

### *Nguurug Yàlla door na ba noppi*

<sup>20</sup> Farisen yi ñoo laajoon Yeesu, ne ko: «Kañ la nguurug Yàlla di dikk?» Mu ne leen: «Dikkug nguurug Yàlla du ànd akum ceetaan. <sup>21</sup> Deesul ne it: “Xoolleen, mu ngi” mbaa: “Ma ngee,” ndax kat nguurug Yàlla mu ngi ci seen biir.»

<sup>22</sup> Mu ne taalibe ya: «Ay jant a ngi ñëw yu ngeen naa ngéejoo fekke benn bés ci bési Doomu nit ki, te dungen ko fekke. <sup>23</sup> Te it, dees na leen ne: “Ma ngee!” mbaa: “Mu ngii!” Buleen dem, buleen ca topp. <sup>24</sup> Ndax ni melax di xuyye gii wetu asamaan, ba ne ràññ ca gee, noonu la Doomu nit kiy def keroog bésam. <sup>25</sup> Waaye balaa booba fàww Doomu nit ki am coono yu bare, jànkoontee diinjatu niti tey jii.

<sup>26</sup> «Noonee mu deme woon ca janti Nóoyin, ni lay deme ca janti Doomu nit ki. <sup>27</sup> Nit ñaa nga doon lekk ak a naan, di jël jabar ak a séyi, ba keroog bés ba Nóoyin duggee ca gaal ga, mbënn ma dikk, sànk ñépp.

<sup>28</sup> «Noonee itam la deme woon ca janti Lóot. Nit ñaa nga doon lekk ak a naan, di jënd ak a jaay, di jëmbat ak

a tabax. <sup>29</sup> Waaye bés ba Lóot génnee Sodom, la tawub sawara ak tamarax wàcce asamaan, sànk ñépp. <sup>30</sup> Noonu donj lay deme, bés bu Doomu nit kiy feeñ.

<sup>31</sup> «Bés sub keroog boobee, ku mu fekk ci kaw am taax, te say yéf ne ca biir kër ga, bul wàcc, di ko jéli. Te ku mu fekk tool ba itam, bul dellu. <sup>32</sup> Fàttlikuleen jabaru Lóot ja! <sup>33</sup> Képp kuy wuta rawale sa bakkan, yaay ñàkk sa bakkan, waaye képp ku ñàkk sa bakkan, yaay dund. <sup>34</sup> Maa leen ko wax: guddig keroog ñaar ay bokk benn lal, kenn ki, ñu yóbbu ko, ka ca des, ñu ba ko. <sup>35-36</sup> Ñaar di wolando, kenn ki, ñu yóbbu ko, ka ca des, ñu ba ko.»

<sup>37</sup> Taalibe yi ne Yeesu: «Loolu fan la, Sang bi?» Mu ne leen: «Fu médd nekk, fa la tan yay daje.»

## 18

### *Saxoo ñaan wareef la*

<sup>1</sup> Yeesu dellu leen léeb lii, ngir ñu wareefoo di sax ci ñaan te baña xàddi. <sup>2</sup> Mu ne: «Ab àttekat la woon cib dëkk; ragalul Yàlla, yégul nit. <sup>3</sup> Ab jëtun a nga woon ca dëkk boobee. Daan na ñew ca moom, naan ko: “Àtte ma ak sama jotewaale!” <sup>4</sup> Àttekat ba bañ na ay yoon, waaye gannaaw gi mu ne ci xelam: “Ragaluma Yàlla, yéguma nit, <sup>5</sup> waaye jigéen jii da maa lakka; naa ko àtte, bala moo dërr-dërri ba mujj jekkli ma.”»

<sup>6</sup> Sang bi teg ca ne: «Jàngatleen li àttekat bu bon bi wax. <sup>7</sup> Kon ndax Yàlla man naa baña sàmm àqu tànnéefam ñi koy woo wall guddi ak bëccëg, xanaa di leen yeexe? <sup>8</sup> Maa leen ne, mooy sàmm seen àq ci lu gaaw. Waaye bu Doomu nit ki dikkee, mbaa dina fekk ngëm ci kaw suuf?»

### *Ag njub, bu ko boroom gis*

<sup>9</sup> Yeesu léebati lii, ngir ñiy damoo seenug njub, tey doyalal ñi ci des. <sup>10</sup> Mu ne: «Ñaari nit a julliji woon ca kër Yàlla ga. Kenn ki di ab Farisen, ki ci des dib juutikat. <sup>11</sup> Farisen baa nga taxaw di yelu, naan: “Yàlla, maa ngi lay sante li ma melul ni ñeneen ñi doonul lu moy

ay lekk-kati àq, ay njublan aki jaalookat, rawatina juutikat bii. <sup>12</sup> Maa ngi woor ñaari yoon, ayu bés gu nekk, di joxe asaka benn céru fukkeelu mboolem lu ma am.»

<sup>13</sup> «Juutikat ba moom, ma nga taxaw fu sore, ñemewula siggi sax, xool asamaan, xanaa di fëgg dënnam te naan: “Éy Yàlla, yërëm ma, man bàkkaarkat bi.”»

<sup>14</sup> Yeesu teg ca ne: «Maa ne leen, kooku moo ñibbaale kër am àtteb ku jub, waaye du Farisen ba. Ndaxte képp kuy réy lu, dees na la toroxal, waaye ki toroxlu lees di yékkati.»

### *Tuut-tànk am na cér*

<sup>15</sup> Doon nañu indil Yeesu ay tuut-tànk sax, ngir mu teg leen ay loxoom. Taalibe ya gis loolu, di leen jànni. <sup>16</sup> Yeesu nag woolu xale yi, ne: «Bàyyileen xale yi, ñu ñew fi man, buleen leen aaye, ndax ñu mel ni ñoom ñoo yelloo nguugug Yàlla. <sup>17</sup> Maa leen ko wax déy, képp ku baña nangul nguugug Yàlla ni ab xale, doo ca dugg muk.»

### *Dëddu lépp, topp Yeesu jafe na*

<sup>18</sup> Kenn ci njiiti Yawut yi moo laajoon Yeesu, ne ko: «Sëriñ bu baax bi, ana lu may def, ba texe fàww?» <sup>19</sup> Yeesu ne ko: «Lu tax nga naa ma ku baax ki? Kenn baaxul ku moy Yàlla donj. <sup>20</sup> Xam nga ndigal yi: “Bul jaaloo, bul bóom, bul sàcc, bul seede lu dul dëgg, teralal sa ndey ak sa baay.”» <sup>21</sup> Mu ne ko: «Loolu lépp, ba may ndaw laa ko dale sàmm ba tey.» <sup>22</sup> Yeesu dégg loolu, ne ko: «Lenn rekk nga deseleti. Mboolem loo am, jaay ko, séddale ko néew-doole yi. Su ko defee nga woomle fa asamaan. Boo noppee, ñewal, topp ci man.» <sup>23</sup> Ba waa ji dégge loolu, am na tiis wu réy, ndax barele woon na lool. <sup>24</sup> Yeesu gis loolu, daldi ne: «Boroom alal tàbbi ci nguugug Yàlla, ndaw lu jafe! <sup>25</sup> Boroom alal dugg ci nguugug Yàlla de, giléem jaare bën-bënu puso moo ko gëna yomb.» <sup>26</sup> Ña cay dégg nag ne: «Kon ku mana mucc nag?» <sup>27</sup> Yeesu ne leen: «Li të nit, tëwul Yàlla.»

<sup>28</sup> Piyeer daldi ne: «Nun de, noo ngii, dëddu la nu amoon, topp la.» <sup>29</sup> Yeesu ne leen: «Maa leen ko wax déy, amul kenn

kuy dëddu kër, mbaa jabar, mbaa mbokk, mbaa waajur, mbaa doom, ngir nguurug Yàlla, <sup>30</sup> te jootaatul lu ko ëpp ay yooni yoon, tey jii, akug texe ba fàww, ëllëg.»

### *Yeesu baamooti na coono yi koy xaar*

<sup>31</sup> Yeesu nag yóbbu Fukk ñaak ñaar, wéetook ñoom, ne leen: «Nu ngii jëm Yerusalem, te mboolem lu yonent yi bindoon ci mbirum Doomu nit ki dina sotti. <sup>32</sup> Ndax dees na ko jébbal jaambur ñi dul Yawut, dees na ko ñaawal, saaga ko, tifi ko. <sup>33</sup> Dinañu ko caw, rey ko, ba ca ñetteelu fanam, mu dekki.»

<sup>34</sup> Waaye ndaw ya, ñoom, xamuñu dara ci jooju wax, ndax mbóotu kàddug Yeesu gaa leen làqu, ba tax ñu umple la mu wax.

### *Yeesu faj na silmaxa*

<sup>35</sup> Ba Yeesu di jubsii dëkk ba ñuy wax Yeriko, ab silmaxaa nga tooge ca peggu yoon wa, di yalwaan. <sup>36</sup> Silmaxa ba dégg mbooloo may romb, mu daldi laaj lu mu doon. <sup>37</sup> Ñu ne ko Yeesum Nasaret moo fa jaare. <sup>38</sup> Ci kaw loolu mu àddu ca kaw ne: «Yeesu, Sëtub Daawuda, yërëm ma!» <sup>39</sup> Ña jiitu femmu ko, ngir mu noppi. Teewul mu gëna xaacooti, ne: «Sëtub Daawuda, yërëm ma!» <sup>40</sup> Yeesu nag taxaw, ne ñu indil ko ko. Ba mu dikkee, mu laaj ko, ne ko: <sup>41</sup> «Loo bëgg ma defal la ko?» Mu ne ko: «Xanaa may gis, Sang bi.» <sup>42</sup> Yeesu ne ko: «Gisal! Sa ngëm faj na la.» <sup>43</sup> Ca saa sa muy gis, daldi topp ci Yeesu, di sàbbaal Yàlla. Mbooloo mépp gis loolu, di sant Yàlla.»

## 19

### *Yeesu dal na ak bàkkaarkat ba*

<sup>1</sup> Gannaaw loolu Yeesu dugg biir Yeriko, jaare biir dëkk ba, di dem. <sup>2</sup> Ndeke jenn waay a nga fa, di kilifag juutikat bu bare alal, ñu di ko wax Sase. <sup>3</sup> Mu bëgga gis nag kuy Yeesu, te mbooloo ma tax manu koo gis, ndax ndaama la woon. <sup>4</sup> Ci kaw loolu Sase daw, jiiituji, daldi yéeg ci genn garab ca yoon woowu Yeesu wara jaare, ngir mu man koo gis. <sup>5</sup> Yeesu dikk ba tollu foofa, téen ne ko: «Sase, wàccal gaaw, ndax sa kër laa wara dali tey jii.»

<sup>6</sup> Sase daldi wàcc gaaw, bége koo dalal lool. <sup>7</sup> Ñépp gis loolu, di ñurumtu naan bàkkaarkat bi la Yeesu dem këräm, dal ak moom. <sup>8</sup> Sase nag taxaw ne Sang bi: «Sang bi, ma ne, sama genn-wàllu alal, jox naa ko néew-doole yi, te jépp alal ju lewul ju ma masa jëlal kenn, dinaa fey ñeentam.» <sup>9</sup> Yeesu ne ko: «Bés niki tey, mucc dikkal na kër gii, ndax waa jii kat ci askanu Ibraayma la bokk, moom itam. <sup>10</sup> Ndax Doomu nit ki, ñi réer la seetsi, ngir musal leen.»

### *Ndénkaane aw sas la*

<sup>11</sup> Naka la nit ña dégg loolu, Yeesu léebati leen, ndax booba jege na Yerusalem, te fekk na ñu foog ne nguurug Yàlla day daldi teew ca saa sa. <sup>12</sup> Moo tax mu ne: «Boroom juddu bu réy la woon. Muy waaja dem réew mu sore, ngir ñu fal ko fa buur, mu doora ñibbsi. <sup>13</sup> Ci biir loolu mu woo fukki surgaam, jox leen ku nekk benn posetub wurus bu gànjare, ne leen: “Liggéyleen ci, ba ma ñibbsi.” <sup>14</sup> Waaye waa réewam ña dañu koo bañoon. Ci gannaawam lañu yónni ndaw, ne: “Kii, bugguñu muy sunu buur.”

<sup>15</sup> «Gannaaw ba ñu ko falee buur, ba mu délsi, daa woolu surga, ya mu joxoon wurus wa, ngir xam ñaata la leen ca seen liggéey jural. <sup>16</sup> Kenn ka dikk, ne ko: “Sang bi, sa poset ba jur na fukki poset.” <sup>17</sup> Mu ne ko: “Jaaraamaa, surga bu baax bi. Gannaaw ci lu tuut nga wóore nag, falul ci fukki dëkk.” <sup>18</sup> Keneen dikk, ne: “Sang bi, sa poset ba indi na juróomi poset.” <sup>19</sup> Mu neeti kooka: “Yaw, falul ci juróomi dëkk.” <sup>20</sup> Keneen dikk ne: “Sang bi, sa poset baa ngii ma fasoon ciw sekkit. <sup>21</sup> Dama laa ragal, ndaxte ku néeg nga. Dangay foqati loo dénkaanewul woon, di dajale loo jiwuloon.” <sup>22</sup> Mu ne ko: “Say wax laa lay àttee, surga bu bon bi! Xamoon nga ne nit ku néeg laa, di foqati lu ma dénkaanewul woon, di dajale lu ma jiwuloon. <sup>23</sup> Lu la tee woona dénkaaneji sama alal ca dencukaay ba, ngir bu ma dikkee jot ko, boole ca tonoom?”

<sup>24</sup> «Ci kaw loolu mu ne ña fa taxawoon: “Nanguleen poset bi ci moom, jox ko boroom fukki poset yi.” <sup>25</sup> Ñu ne ko: “Sang



bi, kee ngeek fukki poset ba noppi!”<sup>26</sup> Mu ne: “Ma ne leen, képp ku am, dees na ko dolli, waaye ku amul, la mu am as néew sax, dees na ko nangu.”<sup>27</sup> Sama noon yooyu buggul woon ma doon seen buur nag, indileen leen fii, te rendi leen ci sama kanam.”»

### *Yeesu dugg na Yerusalem*

<sup>28</sup> Ba Yeesu waxee loolu ba noppi, ca la jiitu, jëm Yerusalem. <sup>29</sup> Ba Yeesu dikkee ba jub dëkk ya ñuy wax Betfase ak Betani, ca wetu tund wa ñuy wax tundu Oliw ya, dafa yebal ñaari taalibeem,<sup>30</sup> ne leen: «Demleen ci dëkk bi ci kanam. Bu ngeen agsee, dingeen gis cumbur bu yeewe, bu kenn masula war. Yiwileen ko, indi. <sup>31</sup> Bu ñu leen nee: “Lu tax ngeen di ko yiwi?” ne leen: “Sang bee ko soxla.”»

<sup>32</sup> Ba ndaw ya demee, na leen ko Yeesu waxe lañu ko gise. <sup>33</sup> Naka lañuy yiwi cumbur ba, ay boroomam ne leen: «Lu tax ngeen di yiwi cumbur bi?» <sup>34</sup> Ñu ne: «Boroomam moo ko soxla.» <sup>35</sup> Ñu indil Yeesu cumbur bi, sànni seeni yére ca kawam, daldi waral Yeesu.

<sup>36</sup> Naka la Yeesuy dem, nit ñi di ko lalal seeni yére ca yoon wa. <sup>37</sup> Ba ñu jubsee Yerusalem, bay wàcce ca mbartalum tundu Oliw ya, mbooloom taalibe mépp la mbégte jàpp, ñu tàmbalee sàbbaal Yàlla ca kaw ndax kéemaan ya ñu gis. <sup>38</sup> Ña nga naan:

«Na barke wàccal buur bi ñëw ci turu Boroom bi!  
Jàmm fa asamaan; daraja fa bérab ya gëna kawe!»

<sup>39</sup> Yenn Farisen ya woon ca mbooloo ma nag ne Yeesu: «Sëriñ bi, yeddal sa taalibe yi!»<sup>40</sup> Mu ne: «Maa leen ko wax, su ñii noppi woon, doj yi ñooy xaacu.»

<sup>41</sup> Ba Yeesu jubsee ba séen dëkk ba, jooy na ndax moom. <sup>42</sup> Mu ne: «Céy yaw itam, boo xamoon bésub tey jii li lay may jàmm! Waaye fii mu ne, làqu na say gët. <sup>43</sup> Ay bés a ngi dikk ci sa kaw, keroog say noon a lay gawe ab sëkk, yéew la, tance la wet gu nekk. <sup>44</sup> Ñoo lay nappaaje ci suuf, yaak say doom yi ci sa biir, te duñu bàyyi doj ci kaw doj ci sa biir, ndax ba sa bésub wall dikkee, yaa ko ràññeewuloon.»

### *Yeesu jàngle na ca kër Yàlla ga*

<sup>45</sup> Gannaaw loolu Yeesu dugg ca kër Yàlla ga, daldi dàq ña fay jaaye. <sup>46</sup> Mu ne leen: «Bindees na ne: “Sama kër gi kërug julli la, waaye yeen, moom ngeen def rawtub sàcc!”»

<sup>47</sup> Yeesu nag di jàngle bés bu nekk ca kër Yàlla ga. Ba mu ko defee sarxalkat yu mag ya, ak firikati yoon ya, ñook njiiti xeet wa, di ko wuta rey. <sup>48</sup> Waaye xamuñu nu ñuy def, ndax ñépp a ko doon déglu, teewlu ko lool.

## 20

### *Diijat nañu sañ-sañu Yeesu*

<sup>1</sup> Mu am bés bu Yeesu doon jàngal askan wi ca kër Yàlla ga, di xamle xibaaru jàmm bi. Sarxalkat yu mag ya ak firikati yoon ya ne jalañ, ñook njiit ya. <sup>2</sup> Ñu ne ko: «Wax nu, lii ngay def, ci ban sañ-sañ nga koy defe, mbaa kan moo la jox boobu sañ-sañ?» <sup>3</sup> Yeesu ne leen: «Ma laaj leen man itam lenn, waxleen ma, <sup>4</sup> sóobeb Yaxya ci ndox, asamaan la ndigal la bawoo, am ci nit ñi?» <sup>5</sup> Ñu diisoo ci seen biir, daldi ne: «Su nu nee: asamaan la ndigal la bawoo da naan lu tax kon gëmunu Yaxya? <sup>6</sup> Te su nu nee: ci nit ñi la ndigal li bawoo, mbooloo mépp a nuy sànni ay xeer, ndax wóor na leen ne Yaxya ab yonent la woon.» <sup>7</sup> Ñu daldi ne ko: «Xamunu fu mu ko jële.» <sup>8</sup> Yeesu ne leen: «Kon man itam дума leen wax ci ban sañ-sañ laay defe lii.»

### *Beykat ya def nañu lu ëpp*

<sup>9</sup> Ci kaw loolu Yeesu léeb askan wa, lii, ne leen: «Jenn waay moo jëmbatoon ab tóokëru reseñ, batale ko ay beykat, daldi dem yoon wu yàgg. <sup>10</sup> Ba tóokër ba ñoree, mu yebal ca beykat ya ab surga, ngir ñu jox ko wàllam ca meññeef ma. Beykat ya dóor surga ba, ba noppi dàq ko, mu dellu loxoy neen. <sup>11</sup> Mu dellu yónni beneen surga, ñu dóor ko moom itam, torxal ko, dàq ko, mu dellu loxoy neen. <sup>12</sup> Mu dellooti yónni ñetteelu surga, kooku it, ñu gaañ ko, sànni ko ca biti.

<sup>13</sup> «Boroom tóokër ba ne: “Nan laay def nag? Naa yónni sama doomu bopp ji ma sopp boog, xanaa moom, dinañu ko rus!”»

<sup>14</sup> Teewul ba beykat ya gisee doom ji, dañu ne ci seen biir: “Kii mooy donn; nanleen ko rey, su ko defee ndono li féeteek nun.”

<sup>15</sup> Ba loolu amee ñu génne ko tóokër ba, rey ko.»

«Ana nu boroom tóokër biy def beykat yi nag? <sup>16</sup> Xanaa dikk, rey beykat yooyu, dénk tóokër ba ñeneen.» Nit ña dégg loolu daldi ne: «Yàlla tere!» <sup>17</sup> Yeesu ne leen jàkk, daldi ne: «Kon nag lii ñu bind, lu muy tekki?

“Doj wi tabaxkat yi beddi woon, moo mujj di doju coll wi.”

<sup>18</sup> Woowu doj, képp ku ci dal, dammtoo, te ku mu dal, rajaxe la.»

<sup>19</sup> Firikati yoon yaak sarxalkat yu mag ya nag, ca saa sa lañu doon fexee teg Yeesu loxo, ndax xamoon nañu ne ñoo moom léeb woowu, waaye nit ña lañu ragal.

### *Buur ak jagleem, Yàlla ak jagleem*

<sup>20</sup> Ba mu ko defee ñu bàyyi Yeesu xel, daldi yebal ay yeerukat, sas leen ñu yiw-yiwlu te di ko fiir ci kaw kàddu ba jàpp ko, ngir jébbal ko boroom dëkk bay boroom kilifteef ga ak sañ-sañ ba. <sup>21</sup> Yeerukat ya dikk ne Yeesu: «Sëriñ bi, xam nanu ne njub ngay wax, di ko jàngle. Amuloo parlàqu itam, waaye ci kaw dëgg ngay jànglee yoonu Yàlla. <sup>22</sup> Wax nu nag ndax yoon maye na, nu fey Buur Sesaar galag, am déet.»

<sup>23</sup> Teewul Yeesu ràññee seen pexe. Mu ne leen: <sup>24</sup> «Joxleen ma ab posetub dinaar, ma gis. Nataal bii ak tur wii ci binde, kuy boroom?» Ñu ne ko: «Sesaar.» <sup>25</sup> Mu ne leen: «Kon kay yëfi Sesaar, joxleen ko Sesaar; te yëfi Yàlla, ngeen jox ko Yàlla.»

<sup>26</sup> Manuñu koo fiir ba jàppe ko menn mbir ca kanam mbooloo ma, xanaa waaru ca tontam, ba wedam.

### *Sadusen ya firati nañu Yeesu*

<sup>27</sup> Ñenn ci Sadusen, yi weddi ne ndee-ndekki am na, ñoo dikoon ca Yeesu. Ñu ne ko: <sup>28</sup> «Sëriñ bi, Musaa da noo bindal ne ku góor, su ku mu bokkal waajur faatoo te amul ak jabaram doom, na jël

jabaram, ngir amal mbokkam ma dee, kuutaay. <sup>29</sup> Léegi juróom ñaari góor ñu bokk ndey ak baay la woon. Taaw ba takk jabar, gannaaw gi mu faatu, te bàyyiwul doom. <sup>30</sup> Tofo ba, <sup>31</sup> ak ñaareelu tofo ba, ku ci nekk donn na ndaw sa ca magam, ñu topplantee ko noonu, ba juróom ñaar ñépp dee te amuñu ca doom. <sup>32</sup> Gannaaw gi ndaw sa it dee. <sup>33</sup> Ndaw si nag, keroog ndekkite la, kan la ciy doon jabaram, gannaaw juróom ñaar ñépp a ko jëloon jabar?»

<sup>34</sup> Yeesu ne leen: «Ci àddina sii la góor ñi ak jigéen ñi di séy. <sup>35</sup> Waaye ña ñu yeyale ndekkitel èllëg, yeyale leen bakkan ci àddina siy ñëw, ñooñu, su boobaa, kenn du ci am jabar mbaa jëkkër. <sup>36</sup> Dootuñu mana dee it, ndax niy malaaka lañuy mel. Ay doomi Yàlla lañuy doon, ndax da leen di fekk dekki. <sup>37</sup> Te Musaa ci boppam xamle na ne ñi dee dañuy dekki, na ko téere indee ca mbirum ngarab sa\*. Mooy ba mu wooyee Boroom bi: “Yállay Ibraayma, Yállay Isaaxa, Yállay Yanqóoba.” <sup>38</sup> Kon moom du ñi dee lay seen Yàlla, xanaa ñiy dund, ndax fa moom, ñépp a ngi dund.»

<sup>39</sup> Ci kaw loolu ñenn ca firikati yoon ya àddu ne ko: «Dëgg nga wax, Sëriñ bi!»

<sup>40</sup> Gannaaw loolu ñemeetuñu koo laaj dara.

### *Almasi sët la, Sang la*

<sup>41</sup> Yeesu neeti leen: «Nees mana waxe ne Almasi, Sëtub Daawuda la? <sup>42</sup> Daawuda ci boppam moo ne ci téereb Sabóor:

“Boroom bi moo ne sama Sang: “Toogeel sama ndijoor;

<sup>43</sup> ba ma def say noon, sa ndëggastal†.”

<sup>44</sup> Gannaaw Daawudaa wooye Almasi “Sang bi,” nu mu nekke ab sëtam?»

<sup>45</sup> Yeesu nag wax ak ay taalibeem, askan wépp di dégg. Mu ne: <sup>46</sup> «Moytuleen firikati yoon yi taamoo jaagar-jaagareek seen mbubb yu réy, di sàkku nuyoob gëddaal ca pénc ma, ak toogu yu kaname ca jàngu ya, ak péetey teraanga ca bernde ya. <sup>47</sup> Ñooy saax-saaxee alalu

\* **20:37** 20.37 Seetal ci *Mucc ga* 3.6. † **20:43** 20.42 Seetal ci *Sabóor* 110.1.

jètun ñi tey julli julliy ngistal yu dul jeex. Ñooñu la seen mbugal di gëna tar.»

## 21

### *Sarax néew na te ëpp yool*

<sup>1</sup> Ci kaw loolu Yeesu xoolaat, daldi gis boroom alal yi, ñuy dugal seen sarax ca boyetu kër Yàlla ga. <sup>2</sup> Mu gis itam ab jètun bu néew doole, mu def ca ñaari poseti xànjari\*. <sup>3</sup> Yeesu ne: «Maa leen ko wax déy, jètun bii, ñii ñépp, moo leen ëpple lu mu joxe. <sup>4</sup> Ndax ñii ñépp, la ñu woomle, ca lañu sompe, def ci boyetu sarax bii; waaye moom ci biir ag ñakkam la jël mboolem ab dundam, def ci.»

### *Yerusalem tas, Doomu nit ki délsi*

<sup>5</sup> Mu am nag ay nit ñu doon wax ca kër Yàlla ga, ak taaru doji tànnéef, ya ak yeneen alali jooxe ya ñu ko rafetale. Yeesu itam ne leen: <sup>6</sup> «Lii ngeen gis nii, ay jant a ngi ñew yu fi doj dootul des ci kaw doj, lépp ay jóoru.»

<sup>7</sup> Ñu laaj ko ne ko: «Sëriñ bi, loolu kañ lay doon? Ak luy doon ub takk buy xamle ne looloo ngi waaja dikk?» <sup>8</sup> Yeesu ne: «Moytuleen, ngir ñu bañ leena nax, ndax ñu bareey dikk, tuddoo sama tur, naan: “Man a,” te naan: “Waxtu wi jege na.” Buleen leen topp. <sup>9</sup> Bu ngeen dégge ay xare aki salfaañoo, buleen tiit, ndax fàww loolu jékka am. Waaye du doonagum muj ga, ca saa sa.»

<sup>10</sup> Mu neeti leen: «Aw xeet dina jógal aw xeet, am réew jógal am réew. <sup>11</sup> Ay yëngu-yënguy suuf yu réy dina am, ay xiif aki mbas dikke fu bare, te xew-xew yu raglu dina am, ak firnde yu mag yu jóge asamaan. <sup>12</sup> Waaye laata loolu lépp, yeen, dees na leen teg loxo, fitnaal leen, jébbal leen kuréli jàngu ya, tëj leen kaso. Dees na leen yóbbu ci kanami buur aki boroom dëkk ndax sama tur, <sup>13</sup> ngir ngeen doxe ca yékkati kàdduy seede. <sup>14</sup> Kon nag defleen bu baax ci seen xel, ne soxlawuleena waajal kàddug layoo. <sup>15</sup> Ndax man maa leen di jox làmmiñ wu ànd ak xel, wu seen benn noon dul mana dàq mbaa di ko weddi. <sup>16</sup> PeXe mu leen jàpplu

dina sababoo sax ci seeni waajur ak seen doomi ndey ak seeni jegeñaale ak seeni xarit, te dees na rey ñenn ci yeen, <sup>17</sup> Ñépp a leen di bañ ndax sama tur. <sup>18</sup> Waaye seen genn kawaru bopp sax du sàнку. <sup>19</sup> Saxooleen muñ nag, daldi mucc.

<sup>20</sup> «Bu ngeen gisee gàngooru xare gu gaw Yerusalem, su boobaa xamleen ne tasteem dëgmal na. <sup>21</sup> Su boobaa ña mu fekk ca diiwaanu Yude, nañu daw jëm kaw tund ya, ñi ci biir dëkk bi, nañu daw génn, te ña mu fekk ca tool ya, buñu duggsi ci biir dëkk bi. <sup>22</sup> Ndax janti mbugal lay doon, ngir sottal mboolem lu ñu bindoon. <sup>23</sup> Wóoy ngalla jigéeni wérul ña, ak ñay nàmpal ca yooyu jant! Ndax tiis wu réy lay doon ci réew mi, akam sànj ci kaw askan wii. <sup>24</sup> Dinañu fàddoo ñawkay saamar, te dees na leen jàpp njaam, yóbbu ci mboolem xeet yi. Te jaambur ñi dul Yawut ñooy joggati Yerusalem, ba kera àppu ñooñu dul Yawut di mat.

<sup>25</sup> «Ay firnde dinañu feeñ ci jant bi ak weer wi ak biddiiw yi. Ci kaw suuf njàqare ak tiitaange mooy ñeel xeet yi ndax riirum géej gi ak gannax yi, <sup>26</sup> nit ñiy séentu li nara dikkal àddina, di xëm ndax tiitaange, nde dooley asamaan dina sàqi. <sup>27</sup> Su boobaa dees na gis Doomu nit ki di ñew ciw niir, ànd ak manoore ak daraja ju réy. <sup>28</sup> Bu xew-xew yooyu tàmbalee sotti nag, taxawleen te siggi, ndax seenug njot dëgmal na.»

<sup>29</sup> Ci kaw loolu Yeesu léeb leen ne leen: «Xool-leen garabu figg mbaa geneen garab. <sup>30</sup> Bu ngeen gisee mu jebbi, ca ngeen di xamal seen bopp ne nawet jubsina ba noppi. <sup>31</sup> Bu ngeen gisee xew-xew yooyu sotti, noonu itam ngeen di xame ne nguurug Yàlla dëgmal na.

<sup>32</sup> «Maa leen ko wax déy, niti tey jii duñu wéy muk, te loolu lépp sottiwul. <sup>33</sup> Asamaan ak suuf dina wees, waaye samay wax du wees muk.

<sup>34</sup> «Moytuleena yaafusal seen bopp ci naan gu ëpp ak màndite ak xalaati àddina, lu ko moy bés ba jekki dal ci seen kaw, <sup>35</sup> ndax ni mbaal di bettee, noonu la bés bay jekkee dal ci kaw mboolem ñi ci

\* 21:2 21.2 Mooy posetub lepton. Seetal Xaalis ci Leeral yi.

kaw suuf. <sup>36</sup> Teewluleen boog, tey ñaan saa su nekk, ba mana mucc ci mboolem looluy nara xew, ngir ngeen taxaw fi kanam Doomu nit ki.»

<sup>37</sup> Bés bu nekk nag Yeesoo nga doon yendoo jàngle ca kër Yàlla ga, bu guddee mu fanaani ca kaw tund wa ñuy wax tundu Oliw ya. <sup>38</sup> Mbooloo mépp a daan jèlu, fekki ko ca kër Yàlla ga, ngir déglu ko.

## 22

### *Njiiti yoon yi fexeel nañu Yeesu*

<sup>1</sup> Màggalu Mburu mu amul lawiir, te ñu di ko wax bésu Mucc, moo jubsu woon. <sup>2</sup> Ci biir loolu sarxalkat yu mag ya ak firikati yoon ya di seet nu ñuy fexee ba rey Yeesu, waaye dañoo ragaloon nit ña. <sup>3</sup> Seytaane nag dugg Yuda, mi ñuy wooye Iskaryo te mu bokkoon ca Fukk ñaak ñaar. <sup>4</sup> Yuda daldi diisooji ak sarxalkat yu mag ya, ak kilifay wattukati kër Yàlla ga, ngir xam nan lay tege Yeesu ci seeni loxo. <sup>5</sup> Ñu am ca mbégte, digook moom, ngir jox ko xaalis. <sup>6</sup> Yuda nangu, di wut nag yoon wu mu wore Yeesu, fu mbooloo ma teewul.

### *Yeesu tàggo na*

<sup>7</sup> Ci kaw loolu bésu màggalu Mburu mu amul lawiir agsi, ñu war caa rendi gàttub bésu Mucc. <sup>8</sup> Yeesu yebal Piyeer ak Yowaan ne leen: «Demleen, waajalal nu bésu Mucc bi, ba nu reeri.» <sup>9</sup> Ñu ne ko: «Foo bëgg nu waaje ko fa?» <sup>10</sup> Mu ne leen: «Bu ngeen di dugg ca dëkk ba rekk, dingeen dajeeq waa ju yenu njaqas ndox. Toppleen ci moom ba ca biir kër ga mu jëm, <sup>11</sup> te ngeen ne boroom kër ga: “Sëriñ bi nee: Ana néegu gan, bi may reere reeru bésu Mucc, maak samay taalibe?” <sup>12</sup> Kooku moo leen di won néegub kaw bu yaa bu ñu defar ba noppi. Foofa ngeen di waajale.»

<sup>13</sup> Ba ñu demee, noonee leen ko Yeesu waxe, na lañu gise lépp. Ñu daldi waajal reer ba.

<sup>14</sup> Ba waxtuw reer jotee, Yeesu toog ak ndaw ya, <sup>15</sup> ne leen: «Yàkkamti woon naa lool bokk ak yeen reeru bésu Mucc bii, bala maa tàbbi coono. <sup>16</sup> Ndax maa leen

ko wax, dootuma ko reer mucc, ba keroog solob reer bi di sotti ca nguurug Yàlla.»

<sup>17</sup> Ci kaw loolu mu jël ab kaas, yékkati kàddug cant, daldi ne: «Jël-leen kaas bii, te ngeen séddoo ko. <sup>18</sup> Ndax maa leen ko wax, gannaaw-si-tey dootuma naan ndoxum reseñ, ba kera nguurug Yàlla dikk.»

<sup>19</sup> Gannaaw loolu mu jël mburu, yékkati kàddug cant, dagg ko, jox leen ko ne: «Lii moo di sama yaram wi ñu jooxe ngir yeen. Deeleen def lii, di ma ko fàttlikoo.»

<sup>20</sup> Kaas ba itam noonu la def ak moom gannaaw reer ba, ne leen: «Kaas bii mooy kóllère gu yees gi fasoo ci sama deret ji leen nara tuurul. <sup>21</sup> Waaye nag ki may wor, loxoom a ngi ci ndab lii nu bokk. <sup>22</sup> Doomu nit ki déy, ni ñu ko dogale, noonu lay deme, waaye wóoy ngalla ki pexe mi ñu koy wore di jaare ci moom.» <sup>23</sup> Ci kaw loolu taalibe yi di laajante ci seen biir, kan ci ñoom moo nar jooju jéf.

<sup>24</sup> Ab werante itam dikkal leen, ñuy xéccoo ci seen biir ku wara gëna kawe ci ñoom. <sup>25</sup> Yeesu nag ne leen: «Buuri xeeti àddina doole lañuy nguuroo ci seen kaw, teewul ñi leen di néewal doole, baaxekati nit ñi lañu leen di wooye. <sup>26</sup> Yeen nag bumu deme noonu ci seen biir. Ki gëna kawe ci yeen, na mel ni moo gën di ndaw, te njiit li, na mel ni ab surga. <sup>27</sup> Ki ñu taajal ndab li, ak surga bi ko taajal, ana ku ci gëna kawe? Xanaa du ki ñu taajal? Moonte man, ci seen biir laa tooge toogaayu surga! <sup>28</sup> Yeen nag yeenay ñi des ak man ci sama biir coono. <sup>29</sup> Man itam ni ma sama baay dénke nguur, ni laa leen koy dénke. <sup>30</sup> Yeenay lekk ak a naane ca sama ndab, ca sama nguur, te yeenay tooge ay gàngune, di jiite fukki giiri bànni Israyil ak ñaar.»

<sup>31</sup> Yeesu neeti: «Simon, Simon! Seytaane kat mu ngi sàkku ab sañ-sañ ngir man leena jéri ni am pepp. <sup>32</sup> Waaye man tinul naa la, ngir sa ngëm baña giim. Yaw nag boo waññikoo, nanga dooleel sa bokki gëmkat.» <sup>33</sup> Piyeer ne ko: «Sang bi, jekk naa ci ànd ak yaw kaso, ak ci ànd ak yaw dee.» <sup>34</sup> Yeesu ne ko: «Piyeer, maa

la ko wax, bala ganaar a sab tey jii, dinga weddi ñetti yoon ne xam nga ma.»

<sup>35</sup> Yeesu neeti leen: «Ba ma leen yebalee te du dencukaayu xalis, du mbuus, du carax yu ngeen yóbbaaale, ndax ñàkk ngeen dara?» Ñu ne ko: «Déedéet.» <sup>36</sup> Mu ne leen: «Léegi nag képp ku am dencukaayu xalis, na ko jël, ku am mbuus it, na ko jël; ku amul saamar, na jaay mbubbam, jënde saamar. <sup>37</sup> Ndax maa leen ko wax, li ñu bind ne, “Mook defkati mbon yi lañu boole ab àtte,” fàww mu am ci man, te loolu jëm ci sama mbir mu ngi sottisi.» <sup>38</sup> Ñu ne ko: «Sang bi, ñaari saamar a ngi fi.» Mu ne leen: «Doy na.»

### *Yeesu ñaan na ca tundu Oliw ya*

<sup>39</sup> Ci kaw loolu Yeesu génn, jëm ca tundu Oliw ya, na mu ko baaxoo woon, taalibe ya topp ci moom. <sup>40</sup> Ba mu agsee ca bérab ba, da ne leen: «Ñaanleen, ngir baña tàbbi cig fiir.» <sup>41</sup> Ba loolu amee mu dând leen lu tollook saanu xeer, daldi sukk, di ñaan. <sup>42</sup> Mu ne: «Baay, su dee sa coobare, teggil ma kaasuu naqar bii. Bumuy sama coobare nag, waaye yaw, na sa coobare am.» <sup>43</sup> Malaaka mu bawoo asamaan daldi koy feeñu, dooleel ko. <sup>44</sup> Njàqare nag jàpp Yeesu, mu gënatee ténku ci kàdduy ñaanam, ba aw ñaqam mujj mel ni lumbi deret, di dal ci suuf.

<sup>45</sup> Mu ñaan ba noppi, daldi jóg, délsi ci taalibe yi, fekk leen ñuy nelaw, sonn lool ndax aw tiis. <sup>46</sup> Mu ne leen: «Lu ngeen di nelaw? Jógleen ñaan, ngir baña tàbbi cig fiir.»

### *Jàpp nañu Yeesu*

<sup>47</sup> Naka la Yeesu di wax, daaneelagul, mbooloo ne jimeet, ka ñuy wax Yuda, di kenn ca Fukk ñaak ñaar jiite leen. Yuda dikk ba ci Yeesu, bëgg koo foon. <sup>48</sup> Yeesu ne ko: «Yuda, foon ngay wore Doomu nit ki!» <sup>49</sup> Ña ànd ak Yeesu nag gis la ca nara topp, ñu ne: «Sang bi, nu jame saamar boog?» <sup>50</sup> Kenn ci ñoom daldi caw surgab sarxalkat bu mag ba, njoof noppu ndijooram. <sup>51</sup> Teewul Yeesu ne: «Bàyyileen, na fi yem.» Mu laal noppu waa ja, wéral ko.

<sup>52</sup> Ba loolu amee Yeesu wax ak ña ko jàppi: sarxalkat yu mag ya, ak kilifay wattukati kër Yàlla ga, ak mag ña. Mu ne leen: «Mbeta dama di ab fippukat, ba ngeen dikkey saamar aki njur. <sup>53</sup> Moona bés bu nekk, maak yeen la woon ca kër Yàlla ga, te teguleen ma loxo. Waaye seen waxtu la léegi, bi kilifteefug lëndëm ayee nii.»

### *Piyeer jàmbo na*

<sup>54</sup> Ba mu ko defee ñu jàpp Yeesu, yóbbu ko ba ca kër sarxalkat bu mag ba, Piyeer dând fu sore, topp ca. <sup>55</sup> Fekk na ñu taal sawara ca digg ètt ba, toog yéew sawara wa, Piyeer dikk toog ca seen biir. <sup>56</sup> Ab surga bu jigéen nag gis ko, mu toog fi kanam taal bi, mu ne ko jàkk, ne: «Kii it ci la, moom la àndaloon!» <sup>57</sup> Piyeer nag miim, ne: «Soxna si, xawma kooku!» <sup>58</sup> Nes tuut keneen gis ko ne: «Yaw it ci ñoom nga!» Piyeer ne ko: «Waa jii, du man!»

<sup>59</sup> Ba ñu ca tegee lu mat waxtu, keneen jaaraat ca wax ja ne: «Kii kay wax-dëgg, moom la àndaloon, nde waa Galile la.» <sup>60</sup> Teewul Piyeer ne ko: «Waa jii, li ngay wax, xawma ma ko de!» Ca saa sa, ganaar sab, te kàddug Piyeer daanoogul sax. <sup>61</sup> Ci kaw loolu Sang bi geesu, ne jàkk Piyeer, Piyeer fàttliku la ko Sang bi waxoon ne ko: «Bala ganaar a sab tey jii, dina fekk nga jàmbo ma ñetti yoon.» <sup>62</sup> Piyeer nag génn, di jooy jooy yu metti.

### *Mital nañu Yeesu*

<sup>63</sup> Ci kaw loolu ña jàpp Yeesu, di ko kókkali ak a dóor. <sup>64</sup> Ñu muur kanam gi, naan ko: «Yaw, waxal nu kàddug waxyu boog, ana ku la dóor?» <sup>65</sup> Yeneen saaga yu bare tifaar nañu ko ko.

### *Yeesu janoo naak Pilaat ak Erodd*

<sup>66</sup> Ba bët setee, mbooloom magi askanu Yawut, ak sarxalkat yu mag ya, ak firikati yoon ya, ñépp daje. Ñu yóbbu Yeesu ca seen kurélu àtte ba. <sup>67</sup> Ñu ne ko: «Soo dee Almasi, wax nu ko.» Mu ne leen: «Su ma leen ko waxee, dungeen ma gëm. <sup>68</sup> Te su ma leen laajee, dungeen tontu. <sup>69</sup> Waaye gannaaw-si-tey, Doomu nit ki mooy toog ci ndijooru Yàlla, Aji Man

ji.» <sup>70</sup> Ñépp daldi ne: «Kon yaay Doomu Yàlla?» Mu ne leen: «Yeena waxal seen bopp ne man la.» <sup>71</sup> Ñu ne nag: «Lu nuy doyeeti seede, gannaaw nun ci sunu bopp noo ko dégge ci gëmmiñam!»

## 23

<sup>1</sup> Gannaaw loolu mbooloo ma mépp jóg, daldi yóbbu Yeesu ca Pilaat. <sup>2</sup> Ñu tàmbali di ko sosal, naan: «Kii lanu fekk muy fàbbi askan wi, di aaye ku fey Sesaar galag, te naan moom ci boppam mooy Almasi, di buur.» <sup>3</sup> Pilaat laaj ko ne ko: «Yaa di buurub Yawut yi?» Mu ne ko: «Yaa ko wax.» <sup>4</sup> Pilaat ne sarxalkat yu mag ya ak mbooloo ma: «Waa jii, gisuma ci moom genn tooñ.» <sup>5</sup> Teewul ñu gëna dëggal seeni wax, ne: «Mooy yékkati askan wi, ndax li muy jàngle ci mboolem réewum Yawut, dale ko ca Galile ba fii.»

<sup>6</sup> Pilaat dégg loolu, daldi ne: «Waa jii waa Galile la?» <sup>7</sup> Ba mu wóoree Pilaat ne ca diiwaan, ba ca kilifteefu Erodd la Yeesu bokk, ca la ko yónnee Erodd, yemook Erodd itam nekk Yerusalem ca fan yooya.

<sup>8</sup> Ba Erodd gisee Yeesu, bég na lool, ndax yàggoon na koo bégga gis, ngir la mu dëggoon ay mbiram, ba tax mu yaakaara teewe ay kéemaanam. <sup>9</sup> Mu laaj ko lu bare, Yeesu tontuwu ko. <sup>10</sup> Sarxalkat yu mag ya ak firikati yoon yaa nga taxaw, di ko tuumaal ak doole. <sup>11</sup> Erodd aki dagam nag sewal Yeesu, di ko ñaawal. Gannaaw loolu mu solal ko mbubb mu yànj, delloo ko Pilaat. <sup>12</sup> Erodd ak Pilaat, bésu keroog ay xarit lañu, doonte ay noon lañu woon.

<sup>13</sup> Ci kaw loolu Pilaat woo sarxalkat yu mag ya, ak njiit ya ak askan wa. <sup>14</sup> Mu ne leen: «Yeena ma indil waa jii, ne ma mooy lajjal askan wi. Man nag laaj naa ko ci seen kanam, waaye gisuma ci moom genn tooñ ci li ngeen ko tuumaal. <sup>15</sup> Erodd itam gisul lenn ci moom, ndax moo nu ko yónneewaat. Mu ngoog, waa jii deful lenn lu jar àtteb dee. <sup>16</sup> Kon nag dama koy dóorlu, yiwi ko.» <sup>17</sup> Booba fàww Erodd bàyyil leen kenn ca bésu màggal ga. <sup>18</sup> Ñépp daldi xaacoondoo, ne: «Reyal kii te yiwil nu Barabas!»

<sup>19</sup> Barabas nag fippu gu amoon ca dëkk ba, ak nit ku ñu fa bóom, moo waral ñu tēj ko kaso. <sup>20</sup> Pilaat namma bàyyi Yeesu, daldi waxaat ak mbooloo ma. <sup>21</sup> Teewul ñuy xaacu, naan: «Daaj ko ci bant! Daaj ko ci bant!»

<sup>22</sup> Pilaat ne leen ñetteel bi yoon: «Ana lu bon lu kii def? Lenn lu jar dee, gisuma ko ci moom. Kon nag, dama koy dóorlu, yiwi ko.» <sup>23</sup> Ñu gënatee xaacu, di sàkku ñu daaj ko ci bant. Seen coow la mujj ko èpp doole. <sup>24</sup> Ci kaw loolu Pilaat dogal ñu defal leen la ñu sàkku. <sup>25</sup> Mu yiwi ka ñu ko ñaanoon, te jēfi fippu ak nit ku ñu bóom taxoon ñu tēj ko kaso. Yeesu nag, mu teg ko ci seeni loxo, ngir ñu def ko lu leen neex.

### *Daaj nañu Yeesu ci bant*

<sup>26</sup> Ba ñuy yóbbu Yeesu, jenn waay ju dëkk Siren, ñu di ko wax Simoñ, moom lañu dajeel, mu jóge ca tool ya. Ñu teg bant ba ñuy daaj Yeesu, ngir mu gaddu ko, topp ca moom. <sup>27</sup> Nit ñu bare nag topp ko, jigéen ñay yuuxu, di ko jooy. <sup>28</sup> Yeesu geesu leen, ne: «Yeen jigéeni Yerusalem, buleen ma jooy! Jooyleen seen bopp ak seeni doom. <sup>29</sup> Ay jant a ngi ñew kat, dees na ca ne: “Ndokklee jigéen ju tëlee am doom, masula jur, masula nàmpal!” <sup>30</sup> Su boobaa,

“Nit ñee naan tund yu mag yi: ‘Daanuleen ci sunu kaw!’,

naan tund yu ndaw yi: ‘Suul-leen nu!’ ”

<sup>31</sup> Ndegam bant bu tooy lees di def nii, ana nu bant bu wow di mujje?»

<sup>32</sup> Yóbbaaale nañu itam ñaari saaysaay, ngir boole leen ak Yeesu, rey leen. <sup>33</sup> Ba ñu agsee ca bérab, ba ñuy wax Kaaju bopp, fa lañu daaj Yeesu ci bant, daajaale ñaari saaysaay ya, kenn ca ndijooram, ka ca des ca càmmoñam.

<sup>34</sup> Ci kaw loolu Yeesu ne: «Baay, baal leen, ndax li ñuy def, xamuñu ko.» Ñu daldi tegoo bant ay yéreem, ngir séddoo ko. <sup>35</sup> Mbooloo maa nga taxaw di seetaan, njiit ya ñoom di ko kókkali, naan: «Musal na ay nit; na musal boppam nag, ndegam mooy Almasib Yàlla, ki ñu fal!» <sup>36</sup> Takk-der ya it di ko ñaawal. Ñu dikk, tàllal ko bineegar, ngir mu naan. <sup>37</sup> Ñu ne

ko: «Gannaaw yaa di buurub Yawut yi, musalal sa bopp!»

<sup>38</sup> Ñu bindal ko nag fa ko tiim, mbind mii: «Kii mooy buurub Yawut yi.»

<sup>39</sup> Kenn ca saaysaay ya ñu wékkoon ci bant, di ko xas, naan ko: «Xanaa du yaw yaay Almasi? Wallul sa bopp te wallu nu!» <sup>40</sup> Moroom ma nag femmu ko, ne ko: «Ragaloo sax Yàlla, te yaa ngi ci menn mbugal mii? <sup>41</sup> Nun sax, lii jaadu na ci nun, ndax sunu yoolu jéf lanu jot. Waaye kii deful dara lu teggi yoon!» <sup>42</sup> Mu teg ca ne: «Yeesu, boo délsee ci sa nguur, fàttliku ma!» <sup>43</sup> Yeesu ne ko: «Yaw laa ne déy, bés sub tey jii, man ngay nekkal fa Àjjana.»

### *Yeesu saay na*

<sup>44</sup> Ba ñu demee ba tollu wetu fukki waxtu ak ñaar ca bëccëg, ag lëndëm a wàcc ca réew ma mépp, ba fukki waxtu ak juróom ca ngoon. <sup>45</sup> Naka la jant bi giim, ridob biir néeg Yàlla ba xar ca digg ba.

<sup>46</sup> Ci kaw loolu Yeesu àddu ca kaw, ne: «Baay, jébbal naa la samag noo!» Ba mu waxee loolu la dee. <sup>47</sup> Njiitu takk-der ba ko teewe woon nag sàbbaal Yàlla, ne: «Aylayéwén, waa jii ku jub la.»

<sup>48</sup> Ba loolu amee mboolem ña fa daje woon di seetaan te teewe loolu, ñépp dellu seeni kër, tey fëgg seen dënn ndaxu tiis. <sup>49</sup> Mboolem xamey Yeesu, ak jigéen ña ko toppe woon ca Galile, ña nga dànd lu sore, di seetaan.

### *Rob nañu Yeesu*

<sup>50</sup> Ndeke jenn waay ju ñuy wax Yuusufa, ma nga bokkoon ca kurélu àttekati Yawut ya. Ku baax, ku jub la woon. <sup>51</sup> Kooku ànduloon ca àtteb kurél ga ak seen jéf jooju. Ma nga cosaano woon dëkkub Yawut ba ñuy wax Arimate, te moom itam, nguurug Yàlla la doon séentu. <sup>52</sup> Moom moo dem ca Pilaat, sàkku ci moom, mu jox ko néewub Yeesu. <sup>53</sup> Gannaaw loolu mu wàcce ko ca bant ba, sange ko càngaayal lée, denc ko ci bàmmee bu ñu yett ciw doj, te maseesu caa denc ab néew. <sup>54</sup> Bés sub Waajal la woon, bés sub Noflaay bi ci topp di waaja taxaw. <sup>55</sup> Fekk na jigéen ña dale woona

ànd ak Yeesu ca Galile, ña nga topp ca Yuusufa. Ñu gis bàmmee ba, ak na ñu ca dence néew ba. <sup>56</sup> Ba loolu amee ñu dellu, waajali cuuraay ak diwu xeeñlu ngir néew ba. Bés sub Noflaay nag taxaw, ñu dal-lu, ni ko yoon santaanee.

## 24

### *Yeesu Almasi dekki na*

<sup>1</sup> Ca èllëg sa, di ndoortel ayu bés, jigéen ña jëlu dem ca bàmmee ba, yóbbaale cuuraay la ñu waajal. <sup>2</sup> Ñu agsi bàmmee ba, fekk ñu randal doj wa uboon bunt ba, laf ko ca wet ga. <sup>3</sup> Ñu dugg, fekkuñu fa néewu Sang Yeesu. <sup>4</sup> Naka lañu nekke seenug njaaxle ci loolu, ñaari góor ne jimeet fa seen wet, sol yére yuy melax. <sup>5</sup> Naka la leen tiitaange jàpp, ba ñu sukk, dëpp seen jë fa suuf, ñu ne leen: «Kiy dund, lu tax ngeen di ko seet ci biir ñi dee? <sup>6</sup> Nekku fi; dekki na. Fàttlikuleen la mu leen waxoon, ba mu génagulee Galile. <sup>7</sup> Da noon: “Fàww ñu teg Doomu nit ki ci loxoy bàkkaarkat yi, ñu daaj ko ci bant, rey ko, ba ñetteelu fanam, mu dekki.”» <sup>8</sup> Booba lañu fàttliku kàddug Yeesu googu.

<sup>9</sup> Ñu jóge ca bàmmee ba, dem àgge loolu lépp Fukk ñaak benn, ak ña ca des ñépp. <sup>10</sup> Jigéen ña àgge loolu ndaw ya ñoo doon Maryaamam Magdala, ak Yowaana, ak Maryaama yaayu Yanqóoba, ak itam ñeneen jigéen ñu àndoon ak ñoom. <sup>11</sup> Teewul ñu def waxi jigéen ña ay caaxaan, ba gëmuñu leen. <sup>12</sup> Piyeer nag jóg, daw, ba ca bàmmee ba. Mu ségg, yër, gisul lu dul càngaay la. Mu daldi ñibbi, jaaxle lool ca mbir ma.

### *Yeesu feeñ na ca yoonu Emayus*

<sup>13</sup> Ndeke ca bés booba ñaar ca taalibe yaa nga woon ca yoonu dëkk bu ñuy wax Emayus, digganteem ak Yerusaleem wara tollu ci fukki kilomeetar. <sup>14</sup> Ña ngay waxtaane mboolem xew-xew yooyu. <sup>15</sup> Naka lañuy waxtaan ak a diisoo, Yeesu ci boppam dab leen, ànd ak ñoom. <sup>16</sup> Teewul seeni gët tëlee ràññee, ba manuñu koo xàmmi. <sup>17</sup> Yeesu ne leen: «Lu ngeen di waxtaane nii ci yoon wi?» Ñu daldi

taxaw, seen kanam lëndëm ndaxu tiis. <sup>18</sup> Kenn ci ñoom, ku ñuy wax Kelyopas ne ko: «Xanaa yaw rekk de, yaa dal Yerusalem te umple li fi xew fan yii?»

<sup>19</sup> Yeesu ne leen: «Lu fi xew?» Ñu ne ko: «Mbirum Yeesum Nasaret. Mu doonoon ab yonent bu manoorewu ci jëf ak ci kàddu, Yàlla ak askan wépp seede. <sup>20</sup> Waaye sunu sarxalkat yu mag ak sunuy njiit ñoo ko teg ciy loxo, ngir ñu teg ko àtteb dee, daaj ko ci bant. <sup>21</sup> Nun nag danoo yaakaaron ne mooy jotsi Israyil. Loolu lépp teewul nu ngii ci ñetteelu fan, ba mbir yooyu amee ba tey. <sup>22</sup> Ay jigéen ñu bokk ci nun nag ñoo nu jaaxal. Ndax ñoo jëlu dem ca bàmmeel ba, <sup>23</sup> waaye fekkuñu fa néewam. Ñu dikk, ne ay malaakaa leen feeñu, xamal leen ne Yeesoo ngi dund. <sup>24</sup> Ñenn ci sunuy àndandoo it dem nañu ca bàmmeel ba, fekk ko noonee ko jigéen ña waxe. Waaye moom, gisuñu ko.»

<sup>25</sup> Ci kaw loolu mu ne leen: «Yeen daal, yeena ñàkk xel, yeena naqarim xel, ndegam ba tey gëmaguleen mboolem li yonent yi xamle woon! <sup>26</sup> Xanaa du fàww Almasi daj boobu coono, doora dugg ci teraangaam?» <sup>27</sup> Mu tàmbalee nag ci Yonent Yàlla Musaa, jaare ci yonent yépp, tekkil leen mboolem lu Mbind mi indi ci mbiram.

<sup>28</sup> Naka lañuy jub dëkk, ba ñu jëm, mu mel ni ku nara jubal yoonam. <sup>29</sup> Ñu daldi koy téye, ne ko: «Dalal ak nun, ndax jant baa ngi so, léegi mu guddi.»

Ba loolu amee mu dugg, dal ak ñoom. <sup>30</sup> Ba reer jotee mu toog ak ñoom ca ndab la, jël mburu ma, yékkati kàddug cant, daldi dagg, jox leen. <sup>31</sup> Ca la seeni gët ubbiku, ñu xàmmi ko. Moom nag, mu ne mes, réer leen. <sup>32</sup> Ba loolu amee, ku nekk naan sa moroom: «Ndax yéguloo woon cawartey xol bu tooy, ba muy wax ak nun ci yoon wi, di nu firil Mbind mi?»

<sup>33</sup> Ñaari taalibe ya daldi jóg ca waxtu woowu tembe, dellu Yerusalem, ca Fukk ñaak benn. Ñu fekk leen ñu dajeek seeni àndandoo. <sup>34</sup> Ci kaw loolu ñu ne ñaar ña jóge Emayus: «Ndeke Sang bi kay, dekki na; feeñu na Simon!» <sup>35</sup> Ñaari taalibe

ya ñoom it, nettali leen la xewoon ca yoon wa ak na ñu xàmmee Yeesu, ba mu daggee mburu ma.

### *Yeesu feeñu na ay taalibeem*

<sup>36</sup> Ba ñaari taalibe ya di nettali loolu, ca la Yeesu ci boppam ne jimeet taxaw ci seen biir, ne leen: «Jàmm seen!» <sup>37</sup> Tiitaange lu réy jàpp leen, ñu foog ne njuuma lañu gis. <sup>38</sup> Yeesu nag ne leen: «Lu ngeen di jaaxle, ak lu ngeen di xel-yaar nii? <sup>39</sup> Xool-leen samay loxo ak samay tànk. Man la. Làmbleen ma, ba xam! Njuuma amul suux, amuli yax, nii ma ko ame, ngeen gis.» <sup>40</sup> Loolu la leen wax, daldi leen won ay loxoom aki tànkam. <sup>41</sup> Taalibe ya nag boole mbég akug jaaxle ba tax manuñu koo gëm. Mu ne leen: «Lu ngeen fi am, lu ñuy lekk?» <sup>42</sup> Ñu jox ko dogu jën wu ñu lakk. <sup>43</sup> Mu jël ko, lekk ci seen kanam.

<sup>44</sup> Ci kaw loolu mu ne leen: «Lii moo di kàddu ya ma leen waxoon ba ma nekkee ak yeen. Noon naa leen: Mboolem li ñu bind ci samay mbir ci yoonu Musaa, ak ci téerey yonent yi, ak ci Sabóor, fàww lépp sotti.» <sup>45</sup> Ca la ubbi seen xel, ngir Mbind mi leer leen. <sup>46</sup> Mu ne leen: «Nii lees binde, ne fàww Almasi dee ci biir coono, ba ñetteelu fanam, mu dekki, <sup>47</sup> te ciw turam, dees na dale ci Yerusalem, yégal xeet yépp, tuubeel gu jur njéggalug bàkkaar. <sup>48</sup> Loolu yeena ko seede. <sup>49</sup> Man ci sama bopp maa leen di yónnee li sama baay dige. Waaye yeen toogleen ci dëkk bi, ba kera ñu leen solee manoore ju bawoo fa kaw.»

### *Yeesu tàggooti na*

<sup>50</sup> Gannaaw loolu Yeesu yóbbu leen ca wetu Betani. Ci kaw loolu mu yékkati ay loxoom, barkeel leen. <sup>51</sup> Ba mu leen di barkeel, ca la teqlikoo ak ñoom, ñu yéege ko asamaan. <sup>52</sup> Ñoom nag, ñu sujjóotal ko, daldi dellu Yerusalem, ànd ak mbég mu réy. <sup>53</sup> Saa su nekk, ña nga woon ca kër Yàlla ga foofa, di sant Yàlla.



## Jêfi ndaw yi Almasi yónni

### *Yeesu Almasi yéeg na asamaan*

<sup>1</sup> Yaw Tewofil, sama téere bu jèkk ba, def naa ca mboolem ndoortel jêfi Yeesu ak njàngleem, <sup>2</sup> ba ca bés, ba ñu ko yéegée, gannaaw ba mu joxee ndaw ya mu tannoos, ay ndigal, Noo gu Sell gi jottli. <sup>3</sup> Ndaw yooyu itam la teew fi seen kanam ci firnde yu leer te bare, gannaaw ay coonoom. Diiru ñeent fukki fan la leen feeñu, di leen wax lu jëm ci nguurug Yàlla.

<sup>4</sup> Ba mu nekkee ak ñoom, da leena sant, ne leen: «Buleen jóge Yerusalem, négleen digeb Baay bi ngeen dégge ci sama gémmiñ. <sup>5</sup> Ndax cim ndox la Yaxya daan sóobe, waaye yeen ci Noo gu Sell gi lees leen di sóob fii ak fan yu néew.»

<sup>6</sup> Naka lañu daje fa moom, daldi koy laaj, ne ko: «Sang bi, ndax ci jii jamono ngay sampaat nguurug Israyil?» <sup>7</sup> Mu ne leen: «Du yeena wara xam jamono jeek bés, bi Baay bi jàpp ci sañ-sañu boppam. <sup>8</sup> Waaye Noo gu Sell gi mooy wàcc ci yeen, ngeen soloo dooleem, daldi doon samay seede ci Yerusalem, ak ci diiwaanu Yude gépp ak ci Samari, ba ca cati àddina.»

<sup>9</sup> Naka la wax loolu, ndaw yay xoole, ñu jekki yéegée ko fa, aw niir daldi leen koy làq. <sup>10</sup> Ña nga téen, ne jàkk asamaan, Yeesu di wéy. Ci biir loolu ñaar ñu sol yére yu weex ne seef ci seen wet. <sup>11</sup> Ñu ne leen: «Yeen waa Galile, lu ngeen di taxaw nii di séentu asamaan? Yeesu male ñu yéegée fi seen biir, yóbbu asamaan, nii ngeen ko gise, mu jëm asamaan, ni lay délsee.»

### *Maccas wuutu na Yuda Iskaryo*

<sup>12</sup> Booba la ndaw ya jóge ca tund woowu ñuy wax tundu Oliw, te diggan-teem ak Yerusalem tollook kemu dox bi yoon maye ci bés sub Noflaay, yemook benn kilomet. Ñu dellu nag Yerusalem. <sup>13</sup> Ñu agsi, yéeg ca néegu kaw taax ma, fa ñuy dal naka jekk.

Piyeer a nga ca, ak Yowaan,  
ak Yanqóoba ak Àndre,  
ak Filib ak Tomaa,  
ak Bartelemi ak Macë,  
ak Yanqóoba doomu Alfe,  
ak Simoñ farlukatu moom-sa-réew ba,  
ak Yuda doomu Yanqóoba.

<sup>14</sup> Ñu mànkoo ñoom ñépp ngir saxoo ñaan ci Yàlla, ànd ceek jigéen ñi ak Maryaama ndeyu Yeesu, ak rakki Yeesu yu góor.

<sup>15</sup> Ci fan yooyu la Piyeer taxaw ca digg bokk ya, ña fa daje di mbooloo mu tollu ci téeméer ak ñaar fukk (120). Mu ne leen: <sup>16</sup> «Bokk yi, Mbind mi moo waxe woon Noo gu Sell gi lu jiitu, ci gémmiñu Daawuda, wax ju jëm ci Yuda mi jiite nit ña, ba ñu jàpp Yeesu. Mbind moomu nag fàww mu sotti. <sup>17</sup> Ci nun la Yuda bokkoon, te amoon na it cér ci sunu liggéey bii.»

<sup>18</sup> Yuda nag gannaaw ba mu jëndee ab tool ca peyu ñaawtéefam ja, ca la daanu, jiital boppam, biir ba fàcc, butit ya tuuru. <sup>19</sup> Waa Yerusalem yépp a ko yég, ba tax ñu tudde tool ba Akeldam, mu firi Toolu deret, ci seen làkk. <sup>20</sup> «Ndax bindees na ci téereb Sabóor ne: “Yal na këram gentel, yàlla bu fa kenn dëkkeeti, yal na keneen jagoo sasam.”

<sup>21</sup> Am na nag ay nit ñu àndoon ak nun mboolem diir bi Sang Yeesu dee dem ak a dikk ci sunu biir, <sup>22</sup> dale ko ca ba ko Yaxya sóobee ci ndox, ba bés ba ko Yàlla jélee fi sunu biir, yéegée ko. Kon nag kenn ci ñooñu war naa bokk ak nun, seede ndekkitel Yeesu.»

<sup>23</sup> Ci kaw loolu ñu tudd ñaar: Yuusufa, mi ñu dippee Barsabas, te ñu di ko wax Yustus itam, ak Maccas. <sup>24</sup> Ñu daldi ñaan ne: «Boroom bi, yaw mi xam xolu ñépp, won nu ki nga tànn ci ñaar ñii, <sup>25</sup> mu jël wàllam ci liggéey bi, te muy cérú ndaw bii Yuda wacc, ba fekki wàll wa mu yelloo.»

<sup>26</sup> Ñu tegal leen nag bant, bant ba dal ca Maccas, mu dolliku ca fukki ndaw yaak benn.

## 2

*Noo gu Sell gi dikk na*

1 Ba bésu màggalu Pàntakot agsee, ñoom ñépp a bokk daje benn bérab. 2 Ca saa sa coow jollee asamaan, mel ni riirum ngelaw lu bare doole, daldi fees dell biir kër ga ñu toog. 3 Ci kaw loolu ay làmmiñ yu mel ni tàkk-tàkki sawara feeñu leen, làmmiñ ya séddlikoo, daldi tonj ci kaw kenn ku nekk. 4 Ñoom ñépp nag feese Noo gu Sell gi, tàmbalee làkk làkk yu wuute, na leen ko Noo gi manloo.

5 Booba ay toppkati yoonu Yawut a nga dèkke Yerusalem, te bawoo ci xeeti àddina yépp. 6 Naka la coow li jolli, nit ñi daje, ku nekk ci mbooloo mi dégg ñuy làkk sa làkku bopp, mbooloo ma jaaxle. 7 Ñu boole waaru ak yéemu, naa: «Ñii di wax nii ñépp, xanaa duñu waa Galile? 8 Ana nu kenn ku nekk ci nun nag mana dégge ñuy wax ci làmmiñ wi nga nàmp? 9 Muy waa Pàrt, ak Medd ak Elam ak Mesopotami ak Yude ak Kapados ak Pont ak Asi, 10 ak Firisi ak Pamfli ak Misra ak wàllu Libi ga dendeek Siren, ak gan ñi jóge Room, 11 ak Yawuti njuddu-ji-réew yeek tuubeen ñi, ak waa Keret ak Arabi, nun ñépp a leen dégg ci sunu làmmiñi bopp, ñuy siiwtaane jaloore yu Yàlla!» 12 Népp waaru, ba jànnaxe, di wax ci seen biir naa: «Lii lu muy tekki nag?» 13 Teewul ñenn ñay ñaawle, ne: «Ñii daal biiñ bu bees donj lañu naan ba màndi.»

### *Piyeer yee na mbooloo ma*

14 Ci kaw loolu Piyeer taxaw, mook Fukk ñaak benn, daldi àddu ca kaw, ne: «Yeen bokki Yawut yi, ak mboolem yeen ñi dèkke Yerusalem, dégluleen bu baax sama kàddu, ba xam lii lu mu doon. 15 Ñii màndiwuñu, ni ngeen ko fooge, ndax yoor-yoor donj a jot. 16 Lii kay mooy kàddu ga Yonent Yàlla Yowel jottli woon, ne:

17 “Yàlla nee:

Mujug jamono, maay tuur samag Noo ci kaw wépp suux;

seeni doom, góor ak jigéen di biral waxyu,

seeni xale yu góor di gis ay peeñu, màggat ñi di gént ay gént.

18 Kera jant yooyu, sama jaam ñi, góor ak jigéen,

maa leen di tuur samag Noo, ñuy biral waxyu.

19 Te maay def ay kiraama fi asamaan aki firnde ci dun bi fi suuf; muy deret ak sawara ak niiru saxar.

20 Jant beey soppliku ag lëndëm, weer wi doon deret, bésub Boroom bi doora taxawe màggaay ak daraja.

21 Su boobaa, ku woo Boroom bi wall ciw turam, dinga raw.”

22 «Yeen bokki Israyil, dégluleen wax jii! Yeesu waa Nasaret bi, Yàlla moo firndelee ag dëggoom, ay kéemaan aki kiraama aki firnde yu mu sottale jëmmu Yeesu moomu fi seen biir, te loolu xam ngeen ko xéll. 23 Nit kooku ñu jébbale ni ko Yàlla dogale te nasoon ko lu jiitu, yeena ko daajloo yéefar yi ci bant, reylyu ko. 24 Waaye moom la Yàlla yiwee ci mititu ndee, dekkal ko, ndax dee amul kàttanu ténk ko. 25 Daawuda wax na ci mbiram ne:

“Maa doon gis Boroom bi fi sama kanam saa su nekk, ndijoor la ma fare, ba duma tërëf.

26 Moo tax sama xol di nux-nuxi, samaw làmmiñ di textexi, samaw suux sax nara nopplujee yaakaar.

27 Doo ma wacc njaniiw moos, doo seetaan sa waa ju sell, mu yàqu.

28 Yaa ma xamal yoonu dund, yaa may wéttali ba matal sama mbégte.”

29 «Bokk yi nag, Maam Daawuda, ma- nees na leena wax ci lu wér ne nelaw na, ba ñu denc ko, te bàmmeelam a ngi fi, nuy gis ba tey jii. 30 Waaye yonent la woon, te xamoon na ne Yàllaa ko giñaloon ne ku bokk ci geñoom lay teg cib jalam. 31 Kon li mu gis te dikkagul mooy ndekkitel Almasi, te ci mbiram la wax ne bàyyeesu ko biir njaniiw, te yaramam du yàqu. 32 Yeesu moomu nag, Yàllaa ko dekkal, nu seede ko, nun ñépp. 33 Yàllaa ko yéeg fa ndijooram, te jot na ci Baay bi Noo gu Sell ga mu dige woon. Moom la tuur nii tey, ngeen gis ko, dégg ko.

34 Ndax kat du Daawudaa yéeg asamaan, waaye moom ci boppam moo ne: “Boroom bi daa wax sama Sang, ne ko:

‘Toogeel sama ndijoor,

<sup>35</sup> ba ma def say noon, sa ndëggastalu tànk.’ ”

<sup>36</sup> «Kon nag na wóor waa kër Israyil gépp ne Yeesu moomu ngeen daajoon ci bant, Yàllaa ko def Sang ak Almasi.»

<sup>37</sup> Ba mbooloo ma déggee loolu, naqar wu mel ni jam-jamu xol la leen def. Ñu ne Piyeer ak ndaw ya ca des: «Bokk yi, nu nuy def nag?» <sup>38</sup> Piyeer ne leen: «Tuubleen te ku nekk ci yeen sóobu ci ndox ci turu Yeesu Almasi ngir njéggalug bàkkaaram, ngeen daldi jot ci Noo gu Sell giy maye. <sup>39</sup> Ndax dige bi, yeen ak seen askan a ko moom, ak jaambur ñi féete fu sore ñépp, mboolem ñi sunu Yàlla Boroom bi woo.» <sup>40</sup> Yeneen kàddu yu bare soññe na leen ko, ñaaxe leen ko, ne leen: «Mucceen ci gii maas gu dëng.»

<sup>41</sup> Ña nangu kàddug Piyeer nag, ñu sóob leen ci ndox; bésu keroog lu wara mat ñetti junni (3 000) yokku nañu ca gëmkat ña.

### *Gëmkat ñi bennoo, Yàlla barkeel*

<sup>42</sup> Ci kaw loolu ñu pastéefu ci njànglem ndaw yi ak ci dundal ag bokkoo, ak ci dagg mburum bokkoo mi\*, ak ci jataayi julli. <sup>43</sup> Ba loolu amee ag ragal jàpp ñépp, ay kiraama yu bare aki firnde daldi sottee ca jéfi ndaw ya. <sup>44</sup> Gëmkat ñépp benn lañu woon te ñoo bokkoon lépp. <sup>45</sup> Ci biir loolu seeni suuf ak seen alal sax, ñu jaay, séddoo ko ñoom ñépp na mu dëppook seeni soxla. <sup>46</sup> Bés bu nekk nag ñu doon benn bopp, saxoo teew ca kër Yàlla ga, di dagg mburum bokkoo ci këroo kër, tey bokk lekk ci biir mbég ak woyoflu. <sup>47</sup> Ñuy màggal Yàlla, ñépp naw leen. Bés bu nekk nag Boroom bi di yokk ca mbooloo mooma, nit ña jota mucce.

## 3

### *Piyeer doxloo na ab lafañ*

<sup>1</sup> Piyeer ak Yowaan ñoo doon duggsi kër Yàlla ga, ngir jullig digg njolloor. <sup>2</sup> Fekk ñu indi fa waa ju judduwaale lafañ, ñu daan ko teg bés bu nekk ca bunt, ba ñuy

wooye bunt bu Rafet, ca kër Yàlla ga, ngir muy sarxu ñay duggsi. <sup>3</sup> Waa ja gis Piyeer ak Yowaan, ñuy dugg ca kër Yàlla ga, mu di leen sarxu. <sup>4</sup> Ci kaw loolu Piyeer ne ko jàkk, mook Yowaan, ne ko: «Xool nu.» <sup>5</sup> Lafañ bi teewlu leen, di leen séntoo ab sarax.

<sup>6</sup> Piyeer nag ne ko: «Xaalis ak wurus de, yoruma ko. Waaye li ma am, jox naa la ko: ci turu Yeesu Almasi waa Nasaret bi, doxal!» <sup>7</sup> Mu jàpp ci loxol ndijooram, yékkati ko. Ci saa si ay tàmka aki kostanam dëgër. <sup>8</sup> Mu ne layy, taxaw, tàmbalee dox, ànd ak ñoom dugg ca kër Yàlla ga, di dox ak a tēbantu, tey sant Yàlla. <sup>9</sup> Mbooloo mépp gis ko, muy dox, di sant Yàlla. <sup>10</sup> Ñu xàmmi ko, xam ne moo daan toog, di yalwaan ca bunt bu Rafet ba ca kër Yàlla ga. Ñu jommi ba jommaaral, ba far gëlëm ca la ko dikkal.

### *Piyeer waare na*

<sup>11</sup> Ba loolu amee waa ji taq ci Piyeer ak Yowaan, ñépp dawsii, sago jeex, ñu yéew leen ca mbaaru bunt ba ñu dippee Suleymaan. <sup>12</sup> Piyeer nag gis loolu, àddu, ne mbooloo ma: «Yeen bokki Israyil, lu ngeen di waaru ci lii? Lu ngeen nu naa jàkk, mel ni sunu manoorey bopp mbaa sunug njullite lanu doxloo kii? <sup>13</sup> Moom Yàllay Ibraayma, di Yàllay Isaaxa, di Yàllay Yanqóoba, te di sunu Yàllay maam kay, moo màggal jawriñam Yeesu. Yeen nag yeena ko teg ciy loxo, jàmbo ko fa kanam Pilaat, te mu naron koo bàyyi. <sup>14</sup> Yeen, yeena jàmbo Ku sell ki te jub, tinul ab bóomkat. <sup>15</sup> Bóom ngeen Kiy dundloo, waaye Yàllaa ko dekkal, nu seede ko. <sup>16</sup> Gëm aw turam moo waral turam woowu dooleel nit kii ngeen gis, xam ko. Kon ngëm moo waral lii; ngëm gu sababoo ci Yeesu moo ko may mu wér péññ nii ci seen kanam, yeen ñépp.

<sup>17</sup> «Teewul nag bokk yi, xam naa ne ñàkka xam moo leen taxa jéfe noonu, te loolu it moo dal seeni kilifa. <sup>18</sup> Waaye Yàlla moo sottale noonu la mu yégle woon lu jiitu, yonent yépp jottli, ne

\* **2:42** 2.42 Dagg mburu: moom la gëmkat ñi aadawoo woon, bu ñuy lekk. Dagg mburu, moom lañu mujj di wooye Reeru Sang bi.

Almaseem dina sonn. <sup>19</sup> Kon nag tubleen te dëpp, ndax seeni bàkkaar faru. <sup>20</sup> Su boobaa jamonoy péex ay bawoo ci Boroom bi, te mooy yebal Almasi mu leen jagleel, te muy Yeesu. <sup>21</sup> Moom la asamaan wara dalal, ba kera jamono ja lépp di dellu jag, na ko Yàlla waxe woon, yonent yu sell ya woon jottli. <sup>22</sup> Musaa kay noon na: “Boroom bi seen Yàlla mooy seppée ci seenu xeet ab yonent ni man; nangeen ko déggal ci lépp lu mu leen wax. <sup>23</sup> Képp ku déggalul yonent boobu, dees na la xettee ci xeet wi, sànk la.”

<sup>24</sup> «Te it mboolem yonent yi wax, dale ko ci Samiyel ak ñi ko wuutu, ñoom it yégle woon nañu bés yii nuy dund. <sup>25</sup> Yeen nag yeenay donoy yonent yi te yeenay séddu ci kóllère, gi Yàlla fasoon ak seeni maam, ba mu nee Ibraayma: “Ci saw askan la xeeti àddina yépp di barkeel.” <sup>26</sup> Yeen la Yàlla jékka wool jawriñam, daldi koy yebal ci yeen, ngir barkeel leen, waññee kenn ku nekk ci yeen, mu moy jikkoom yu bon.»

## 4

### *Piyeer ak Yowaan daje nañook àttekat ya*

<sup>1</sup> Naka la Piyeer ak Yowaan di wax ak mbooloo ma, sarxalkat yaak jawriñu kër Yàlla gaak Sadusen ya ne jimeet ci seen kaw. <sup>2</sup> Fekk na leen ñéññ ca la ñuy waare ak a yégle ndekkitel Yeesu, te loolu di déggal ne ndee-ndekki, lu am la. <sup>3</sup> Ñu daldi leen teg loxo, tēj leen ba ca èllég sa, ndax booba guddi na. <sup>4</sup> Fekk na nag, ñu bare ca ña jotoona dégg kàddu ga gëm nañu, ba limu gëmkaat ña tollu ci juróomi junni (5 000).

<sup>5</sup> Ca èllég sa kilifay Yawut yi ak mag ñi ak firikati yoon yi daje Yerusalem. <sup>6</sup> Anas, sarxalkat bu mag ba ca la, ak Kayif ak Yowaan ak Alegсандар, ak mboolem bokki sarxalkat bu mag. <sup>7</sup> Ñu taxawal Piyeer ak Yowaan ca digg ba, laaj leen ne: «Yeen, lii ngeen def, ci ban xam-xam, ak ci wan tur ngeen ko defe?»

<sup>8</sup> Fa la Piyeer feese Noo gu Sell gi, ne leen: «Yeen kilifay xeet wi ak mag ñi, <sup>9</sup> ndegam yoon moo nuy laaj lu jëm ci

ndimbal lu ab lafañ jagoo, ak ci man pexe la lafañ bi mucce, <sup>10</sup> xamleen xéll, yeen ñépp ak bànni Israyil gépp, ne ci turu Yeesu Almasi waa Nasaret bi, ki ngeen daajoon ci bant, te Yàlla dekkal ko, ci turam donj la kii wére, ba taxaw ci seen kanam. <sup>11</sup> Yeesu moomu mooy:

“Doj wi ngeen beddi woon, yeen tabaxkat yi,

te mu mujj di doju coll wi.”

<sup>12</sup> Mucc kat amul ci keneen, ndax fi asamaan tiim, mayeesul fi nit ñi weneen tur wu nu wara mucce.»

<sup>13</sup> Ba waa kurélu àttekat ya gisee fit, wi Piyeer ak Yowaan àndal, te ñu xam ne niti neen ñu masula jàng lañu, dañoo waaru. Xamoon nañu nag ne ñook Yeesoo nekkoon. <sup>14</sup> Te itam ka ñu wéral a nga taxaw fa seen wet, ñuy gis. Manuñu caa tegati dara. <sup>15</sup> Ba mu ko defee ñu joxe ndigal, génne leen, daldi gise ci seen biir. <sup>16</sup> Ñu ne: «Lu nuy def ak ñii? Ndax kat firnde lu leer sottée na fi ci ñoom; leer na naññ waa Yerusalem gépp, te manunu koo weddi. <sup>17</sup> Waaye kat bu mbir mi gëna siiw ci xeet wi. Nan leen tēkku, ngir aaye leen ñu waxati kenn tur woowu.»

<sup>18</sup> Ñu woo leen nag, aaye leen, ne leen mayatuñu leen benn yoon ñu waxati lenn, mbaa ñuy jàngale ci turu Yeesu. <sup>19</sup> Piyeer ak Yowaan ne leen: «Ndax li jaadu fa Yàlla mooy nu déggal leen, yeen, bàyyi Yàlla? Yeenay àtte loolu. <sup>20</sup> Waaye nun, li nu gis, dégg ko, manunu koo baña wax.» <sup>21</sup> Ba loolu amee ñu tēkkuwaat leen, door leena yiwi, ñu dem, gannaaw manuñu leena mbugal te amuñu bunt ci ñoom ndax mbooloo ma, te ñépp di mąggal Yàlla ca la xew, <sup>22</sup> ngir waa, ja kéemtaan ga wérloo amoon na lu wees ñeent fukki at.

### *Mbooloom gëmkaat ñi ñaan na ci Yàlla*

<sup>23</sup> Gannaaw ba ñu yiwee Piyeer ak Yowaan, ñu dem ca seen bokki gëmkaat, nettali leen mboolem la leen sarxalkat yu mag yaak mag ña wax. <sup>24</sup> Ba ko bokk ya déggee, ñoom ñépp a mànkoo, daldi yékkati kàddug ñaan fa Yàlla, ne: «Buur Yàlla, yaa sàkk asamaan ak suuf ak géej ak lépp li ci biir. <sup>25</sup> Yaa waxe Noo gu Sell

gi ci sunu gémmiñu maam Daawuda sa jaam bi, nga ne:

“Lu xeeti àddina di riir?

Lu xeet yiy lal pexey neen?

<sup>26</sup> Buuri àddinaa jógandoo, kilifa yee lëkkoo ci kaw Boroom bi ak Almaseem.”

<sup>27</sup> Dëgg la moos, ndax ci dëkk bii la Erodd ak Poñsë Pilaat lëkkoo, ànd ak xeeti àddinaak bànni Israyil ci kaw Yeesu, sa ndaw lu sell li nga fal. <sup>28</sup> Noonu it lañu sottale mboolem li nga dogale woon sa loxo ak sa coobare. <sup>29</sup> Léegi nag Boroom bi, bàyyil xel seeni tëkkoo te nga may nu, nun say jaam, nuy waxe sa kàddu fit wu mat sëkk. <sup>30</sup> Ngalla tàllalal sa loxo ngir di wéral ak a amal ay firnde aki kéemaan ci turu Yeesu, sa ndaw lu sell li.»

<sup>31</sup> Ba ñu ñaanee ba noppi, bérab ba ñu daje daa yëngu, ñu feese Noo gu Sell gi ñoom ñépp; ñu daldi tàmbalee waxe fit kàddug Yàlla gi.

### *Gëmkat ñi ñoo bokkoon lépp*

<sup>32</sup> Ci kaw loolu mboolem gëmkat ñi bokk menn xel, ak benn xalaat. Du kenn ku ne moo moom lenn ci alalam, waaye ñoo bokkoon lépp ci seen biir. <sup>33</sup> Ndaw yi nag di seedee doole ju réy ne Sang bi Yeesu dekki na, yiw wu yaa di leen dikkal ñoom ñépp. <sup>34</sup> Kenn ci ñoom ndóolul, ndax képp ku ciy boroom suuf mbaa ay kër, da koy jaay, indi njég li, <sup>35</sup> teg ko ci kanam ndaw yi. Su ko defee ku nekk séddu ca la dëppook soxlaam.

<sup>36</sup> Ku mel ni Yuusufa, bokk ci giirug Lewi, te dëkke dunu Sippar, ndaw yi daan ko wax Barnaba, mu firi Ñaaxekat bi, <sup>37</sup> ab tool la amoon. Da koo jaay, indi xalis bi, teg fi kanam ndaw yi.

## 5

### *Mbugal dab na Anañas ak Safira*

<sup>1</sup> Naka noonu ku ñuy wax Anañas, te ku ñuy wax Safira di jabaram, daldi jaay aw làccu suuf. <sup>2</sup> Mu yégoon jabaram, daldi làq lenn ca njég ga, ba noppi indi la ca des, teg ko ca kanam ndaw ya.

<sup>3</sup> Ba loolu amee Piyeer ne ko: «Anañas, lu waral Seytaane di fees sab xol, ba ngay wor Noo gu Sell gi, di làq lenn ci njégu

tool bi? <sup>4</sup> Ba mu jaragul, du yaa doon boroom? Gannaaw ba mu jaree it, xanaa du njég gaa ngi sa loxo ba tey? Ana noo mana xajale mii mébét ci sa xol? Du nit nga wor de, waaye Yàlla nga wor.»

<sup>5</sup> Naka la Anañas dégg kàddu yooyu, daldi daanu, dee. Tiitaange lu réy nag dikkal ña ko dégg ñépp. <sup>6</sup> Ba loolu amee xale yu góor ya dikk, sàng ko, yóbbu suuli.

<sup>7</sup> Ñu teg ca lu wara tollook ñetti waxtu, jabaram duggsi, te yégu la xew. <sup>8</sup> Piyeer ne ko: «Wax ma, nàngam ngeen jaaye tool bee?» Mu ne ko: «Waaw, nàngam la.»

<sup>9</sup> Ci kaw loolu Piyeer ne ko: «Ana lu ngeen di mànkoo, di nattu Noowug Boroom bi? Déglul, tànk yi suuli woon sa jëkkër a ngoogu ci bunt bi di la yóbbusi yaw it.» <sup>10</sup> Ca saa sa ndaw sa daanu cay tànkam, dee. Xale yu góor yi duggsi, fekk ko mu dee; ñu yóbbu ko, suul ko ca wetu jëkkëram. <sup>11</sup> Ba loolu amee tiitaange ju réy a jàpp mbooloom gëmkat ñépp, ak ña ko dégg ñépp.

### *Ndawi Almasi faj nañu ñu bare*

<sup>12</sup> Ci kaw loolu ay firnde ak kéemaan yu bare di sottee ci loxol ndaw yi, ci biir askan wi. Gëmkat ñi nag di bokk daje ñoom ñépp fa ñuy wax Mbaarum Suleymaan, ca biir kër Yàlla ga, <sup>13</sup> waaye kenn ca ña ca des ñemewula jaxasoo ak ñoom. Teewul askan wa nawloo leen lool. <sup>14</sup> Gëmcati Sang bi nag di gëna bare, ñuy wàllisi, ba doon mbooloo mu mag, góor ak jigéen. <sup>15</sup> Nit ñi dem bay génne jarag ji ci mbedd yi, teg leen ci ay laltu aki basañ, ngir bu fa Piyeer jaaree, lu bon bon takkndeeram mana dal ñenn ci ñoom. <sup>16</sup> Ci biir loolu nit ñu bare bàbbeekoo ca dëkk ya séq Yerusaleem, indi ay jarag ak ñu rab yu bon sonal; ñoom ñépp daldi wér.

### *Fitnaal nañu ndaw yi*

<sup>17</sup> Ba mu ko defee xolu kañaan dugg sarxalkat bu mag ba, ak mboolem ña ko dar, te di waa ngérum Sadusen ña. <sup>18</sup> Ñu teg ndaw ya loxo, tēj leen ca kaso ba. <sup>19</sup> Ca guddi ga nag malaakam Boroom bi ubbi bunti kaso ba, génne leen, ne leen:

<sup>20</sup> «Demleen taxaw ca digg kër Yàlla ga, ngeen xamal askan wi mboolem lu jëm ci dund gii.» <sup>21</sup> Gannaaw ba ñu déggee loolu, ba bët set, ñu dugg ca kër Yàlla ga, di waare.

Ci biir loolu sarxalkat bu mag ba ak ña ko dar, dikk, woolu kurélu àttekat ya, mboolem kurélu njiiti bànni Israyil; ñu yónnee, ngir jëli ndaw ya ca kaso ba. <sup>22</sup> Dag ya nag dikk, fekkunu leen ca kaso ba, ñu dellu yégleji ko, <sup>23</sup> ne: «Danoo fekk kaso ba tëje ràpp, wattukat ya taxaw ca bunt ya. Nu tijji, fekkunu kenn ca biir!»

<sup>24</sup> Jawriñu kër Yàlla ga ak sarxalkat yu mag ya dégg loolu, daldi jaaxle lool ci ndaw yi, di xalaat nu mbir miy mujje.

<sup>25</sup> Mu am ku dikk, ne leen: «Ña ngeen tëjoon kaso déy a nga noonu ca kër Yàlla ga, di waare.» <sup>26</sup> Ci kaw loolu jawriñu kër Yàlla ga ak dag ya jëli ndaw ya ndànk, bañ leena jaay doole, ngir ragal nit ñi sànni leen ay doj.

<sup>27</sup> Ñu indi leen, taxawal leen ca kanam kurélu àttekat ya, sarxalkat bu mag ba laaj leen, <sup>28</sup> ne: «Xanaa aayewunu leen woon ne buleen waareti mukc ci woowu tur? Yeena ngi nii ubale Yerusalem ak seen waare, ngeen nar nu cee gadduloo bakkanu nit kii!»

<sup>29</sup> Piyeer ak ndaw ya ca des nag ne leen: «Yàlla lees wara déggal, waaye du nit. <sup>30</sup> Sunu Yàllay maam moo dekkal Yeesu, mi ngeen wékk ci bant, bóom ko. <sup>31</sup> Moom la Yàlla yékkati ci wetu ndijooram, def ko muy Njiit, di Musalkat, ngir may bànni Israyil ag tuubeel ak njéggalug bàkkaar. <sup>32</sup> Nun noo seede loolu, nook Noo gu Sell, gi Yàlla jagleel ñi ko déggal.»

<sup>33</sup> Ba ñu déggee loolu, dañoo mer ba fees, nar leena rey. <sup>34</sup> Ab Farisen bu ñuy wax Gamalyel, di jànglekatu yoonu Musaa bu ñépp nawloo, daldi taxaw ca digg kurélu àttekat ya. Mu joxe ndigal ngir ñu génne leen ab diir. <sup>35</sup> Ba ñu génnee, mu ne waa kurél ga: «Yeen bokki Israyil, moytuleen bu baax li ngeen di def ak nit ñii. <sup>36</sup> Ndaxte bu yàggul la Tëdas jóg, di jaay daraja, ba lu wara tollook ñeenti témeéri nit far ak moom. Ñu rey

ko, ña ko toppoon ñépp tasaaroo, seen peXe mujjewul fenn. <sup>37</sup> Gannaawam it Yuda mu Galile jóg, ca jant ya ñu doon lim waa réew mi; mu yóbbaale mbooloo mu ko topp. Moom itam dee, ña ko toppoon ñépp tasaaroo. <sup>38</sup> Léegi nag, dama ne, maanduleen ci ñii, te ba leen, ngir su seen mébét mbaa seen jéf bawoo ci nit, day yàqu rekk. <sup>39</sup> Waaye su bawoo fa Yàlla nag, dungeen ko mana fanq, moytuleena jànkoonde ak Yàlla.»

Ñu daldi fekksi Gamalyel, <sup>40</sup> woowaat ndaw ya. Ba loolu amee ñu dóor leen, aaye leen ñu waxati lenn ci turu Yeesu, door leena yiwi.

<sup>41</sup> Ndaw ya nag bàyyikoo ca kurélu àttekat ya, di bég, gannaaw ñoom lañu jàpp ne ñoo yelloo toroxte ga ñu leen teg ndax Tur wi\*. <sup>42</sup> Ci kaw loolu bés bu nekkaan, muy ca kër Yàlla, di ca biir kër ya, noppiwuñoo jàngle ak a xamle xibaaru jàmm bi yéene ne Yeesu mooy Almasi.

## 6

### *Tabb nañu taxawukati mbooloom gëmkat ñi*

<sup>1</sup> Jant yooyu nag, naka taalibe yi di gëna bare, Yawut ñiy làkk gereg tàmbaalee ñaxtu ci kaw Yawut ñiy wax seen làmmiñu bopp ndax néewal gu ñu gis ñu néewal ko seeni jëtun ca na ñuy séddalee ag ndimbal bés bu nekk. <sup>2</sup> Ba mu ko defee fukki ndaw ya ak ñaar woo mbooloom taalibe ya, ne leen: «Nu sàggane kàddug Yàlla, di topptoo mbirum séddale daal, jekkul ci nun. <sup>3</sup> Kon nag bokk yi, seetleen ci seen biir juróom ñaar ñu rafet seede, soloo Noo gu Sell gi te rafet xel, nu dénck leen sas woowu. <sup>4</sup> Nun nag nanu wéye julli gi, ak liggéey bi ci kàddu gi.»

<sup>5</sup> Wax jooju daldi neex mbooloo mépp. Ñu seppi Eccen, nit kufeese ngëm ak Noo gu Sell gi, seppi Filib ak Porokor ak Nikanor ak Timon ak Parmenas ak Nikolas, ma dëkke Ancos te dib tuubeen bu duggoon lu jiitu ci yoonu Yawut. <sup>6</sup> Ñu indi leen fa kanam ndaw ya, ñu ñaanal leen, teg leen loxo.

\* **5:41** 5.41 Tur wa mooy turu Sang Yeesu Almasi.

<sup>7</sup> Ba loolu amee kàddug Yàlla di law, limu taalibe yi yokku ba bare lool ci biir Yerusalem, sarxalkat yu bare daldi topp yoonu ngëm wi.

### *Teg nañu Eccen loxo*

<sup>8</sup> Ci kaw loolu Eccen, mi yiwu Yàlla def ag leer fees ko, di def ay kéemaan ak firnde yu mag ci biir askan wi. <sup>9</sup> Ba loolu amee ñenn ca jàngu ba ñuy wax jàngub waa Goreel ga, daldi jóg, di tàmbalee weranteek Eccen. Ay niti waa Siren a nga ca, ak waa Alegсандiri, ak waa diiwaani Silisi ak Asi. <sup>10</sup> Teewul àttanuñu xelam mu rafet, ak Noo gi muy waxe.

<sup>11</sup> Ñu daldi ger ay nit ngir ñu duural ko, ne: «Noo ko dégg, mu yékkati kàdduy saaga, jëme ci Musaa ak ci Yàlla.» <sup>12</sup> Ba loolu amee ñu xabtal nit ñi ak njiit yi, ak frikati yoon yi, ñu ne jalañ, jàpp Eccen, yóbbu ca kurélu àttekat ya. <sup>13</sup> Ñu indeeti foofa ay seedey naaféq yu ne: «Kii du bàyyee wax mukk lu juunoo ak bérab bu sell bii ak yoonu Musaa. <sup>14</sup> Noo ko dégg mu ne Yeesu Nasareen boobu dina màbb bérab bii te dina soppa aada yi nu Musaa bàyyee.»

<sup>15</sup> Mboolem ña ca jataayu àttekat ya nag ne jàkk Eccen; ñu gis xar-kanam ba ne ràññ ni xar-kanamu malaaka.

## 7

### *Eccen layoo na*

<sup>1</sup> Sarxalkat bu mag ba ne ko: «Ndax loolu dégg la?» <sup>2</sup> Eccen ne ko: «Yeen bokk yi, yeen samay baay, dégluleen! Yàlla, miy Boroom daraja moo feeñu woon sunu maam Ibraayma, ba mu nekkee réewum Mesopotami, bala moo sanc Karan. <sup>3</sup> Mu ne ko: “Jógeel sam réew, jóge ci say bokk, te nga dem ca réew, mi ma lay won.”

<sup>4</sup> «Mu daldi jóge réewum waa Kalde, sanc Karan. Fa la ko Yàlla toxale gannaaw ba baayam faatoo, sancal ko ci réew mii ngeen dëkk tey. <sup>5</sup> Taxul mu muurale ko lenn ci réew mii, du sax fu mu teg tànkam. Teewul mu dig ko, ne moom lay moomale réew mi, mook askanam wa koy wuutuji, te fekkul sax mu am doom. <sup>6</sup> Yàlla ne ko: “Saw askan dinañu toxuji bitim réew, te dees na leen

def ay jaam, mitital leen diiru ñeenti téeméeri at (400).” <sup>7</sup> Yàlla neeti ko: “Xeet wi leen di jaamloo nag, man maa leen di mbugal. Gannaaw loolu dinañu fa génne, jaamusi ma ci bérab bii.” <sup>8</sup> Yàlla daldi fasook Ibraayma kóllère gu mu màndargale xaraf. Moo tax Ibraayma xarfal doomam Isaaxa, ba mu juddoo ba am juróom ñetti fan; Isaaxa, Yanqóoba, Yanqóoba, fukki maam yaak ñaar.

<sup>9</sup> «Maam yooyu nag iñaane seen doomu baay Yuusufa, ba jaay ko njaam, ñu yóbbu ko Misra. Teewul Yàlla ànd ak Yuusufa, <sup>10</sup> xettli ko ci coonoom yépp, rafetal xelam, may ko itam Firawna buuru Misra baaxe ko; mu def ko kilifa ci Misra ak ci biir èttu kèram gépp.

<sup>11</sup> «Ci kaw loolu ab xiif dikkal Misra gépp ak réewum Kanaan. Mu metti lool. Sunuy maam nag amatuñu ab dund. <sup>12</sup> Yanqóoba dégg ne ab dund am na Misra. Ca la fa jékka yebal sunu maam ya. <sup>13</sup> Seen ñaareel bi yoon la Yuusufa xammiku ay doomi baayam, Firawna nag doxe ca xam cosaanu Yuusufa. <sup>14</sup> Ci kaw loolu Yuusufa yeble, indi baayam ak bokkam yépp, ñuy juróom ñaar fukki nit ak juróom. <sup>15</sup> Noonu la Yanqóoba deme Misra, ba faatoo fa, mook sunuy maam. <sup>16</sup> Gannaaw gi lañu toxal seeni yax ca Sikem, denc leen ca bàmmeel, ba Ibraayma weccikoo woon xaalis ca doomi Amor ca Sikem.

<sup>17</sup> «Ñu dem ba dige ba Yàlla giñaloon Ibraayma di waaja sotti, yemook xeet wi yokku, di gëna bare ci Misra, <sup>18</sup> ba beneen buur bu xamul Yuusufa falu ci Misra. <sup>19</sup> Buur boobu nag di muusaatu sunu xeet wi, di mitital sunuy maam, di leen sànniloo seeni liir, ngir ñu baña dund.

<sup>20</sup> «Booba la Musaa juddu, rafet ba fa kanam Yàlla, ñu yor ko ñetti weer ci biir kër baayam. <sup>21</sup> Ba ñu ko sànnée, doomu Firawna ju jigéen a ko foral boppam, yar ko ni doomam ju mu jur. <sup>22</sup> Musaa nag di ku mokkal mboolem xam-xamu Misra, te ràññiku lool ci wax ak ci jêf.

<sup>23</sup> «Ba ñeent fukki atam matee, xelum seeti bokki bànni Israyilam dikkal ko. <sup>24</sup> Ci kaw loolu mu gis ca ku ñuy néewal doole, mu sotle ko, daldi rey waayi Misra

ja, feyul ka mu néewal. <sup>25</sup> Booba Musaa foog na ne ay bokkam xam nañu ne ci loxoom la leen Yàlla di indile wall, ndeke xamuñu ko. <sup>26</sup> Ca èllèg sa mu juux ci ay Yawut yuy xeex, di leen jéema jubale, ne leen: “Yeen ay bokk ngeen, lu tax ngeen di lorante?” <sup>27</sup> Ka doon néewal doole moroom ma bëmèx Musaa, ne ko: “Yaw, ku la def njiit mbaa àttekat ci sunu kaw? <sup>28</sup> Xanaa danga maa nara rey, na nga reye waayi Misra ja démb?” <sup>29</sup> Musaa dégg kàddu googu, daldi gàddaay, dem dali réewum Majan, ba am fa ñaari doom yu góor.

<sup>30</sup> «Mu teg ca ñeent fukki at, malaaka feeñu ko ca màndiñu tundu Sinayi, ci biir tàkk-tàkku sawara wu jafal ab gajj. <sup>31</sup> Musaa gis peeñu moomu, yéemu; mu dikk ba jege ko ngir niir ko, kàddug Boroom bi daldi jib. Mu ne: <sup>32</sup> “Man maay sa Yàllay maam, maay Yàllay Ibraayma ak Isaaxa ak Yanqóoba.” Musaa tiit bay lox, ñemeetula xool. <sup>33</sup> Boroom bi ne ko: “Summil say dàll, ndax fii nga taxaw, suuf su sell la. <sup>34</sup> Gis naa bu baax sama coonob ñoñ ci Misra; maa dégg seeni onk, ba wàcc ngir wallusi leen. Léegi nag dikkal, ma yebal la Misra.”

<sup>35</sup> «Musaa moomu ñu weddi woon, ne ko: “Ku la def kilifa ak ab àttekat?” Moom nag la Yàlla def kilifa ak ab jotkat, yebal ko ci ñoom, malaaka ma feeñu Musaa ca gajj ba, daldi koy jottli yóbbante ba. <sup>36</sup> Moo leen génne réewum Misra, moo def ay kéemaan aki firnde ca réew ma, ak ca géēju Barax ya, ak ca màndiñ ma, diiru ñeent fukki at. <sup>37</sup> Musaa moomu moo noon bànni Israyil: “Yonent bu mel ni man la leen Yàlla di feeñalal ci seen biiri bokk.” <sup>38</sup> Moom it moo nekkoon ak mbooloo ma ca màndiñ ma, mook malaaka ma doon wax ak moom ca kaw tundu Sinayi ca sunu wetu maam ya. Moo jot ci kàddu yuy dund, ngir jottli nu ko. <sup>39</sup> Kooku la sunuy maam nanguwul woona déggal. Dañu koo far xarab, namma walbatiku dellu Misra. <sup>40</sup> Ñu ne Aaróona: “Sàkkal nu ay yàlla yu nu jiite, ndax Musaa mii nu génne réewum Misra, xamunu lu ko dal.” <sup>41</sup> Jant yooyu lañu sàkk jëmmu sèllu, defal jëmm ja ab sarax,

di bannexoo lu ñu sàkke seeni loxo. <sup>42</sup> Yàlla nag dèddu leen, bàyyi leen, ñuy jaamu biddiwi yi, ni ñu ko binde ci téereb yonent yi, ne:

“Yeen waa kër Israyil, saraxu jur ak yeneen sarax, ndax man ngeen ko daan indil diiru ñeent fukki at ca màndiñ ma?”

<sup>43</sup> Molog seen tuur mi, ngeen yóbbaaale xaymab jaamookaayam, ak seen biddiwwu yàlla ji ñu naa Refan, jëmm yooyu ngeen sàkk, di leen su-jjóotal!

Kon nag maa leen di toxal ca wàllaa Babilon.”

<sup>44</sup> «Xaymab seede baa nga woon ak sunuy maam ca màndiñ ma, ñu sàkke ko na ko ka doon wax ak Musaa sante, dèppale kook misaal ma Musaa gisoon.

<sup>45</sup> Xayma ba la sunuy maam jot, dugal ko ci kilifteefu Yosuwe ca biir réewum xeet, ya leen Yàlla dàqal. Xayma ba nekk fa, ba ca janti Daawuda. <sup>46</sup> Daawuda, ma Yàlla baaxe woon, sàkku woon na am màkkaan ngir Yàllay Yanqóoba. <sup>47</sup> Waaye Suleymaan moo ko mujj tabaxal kër.

<sup>48</sup> «Moona Aji Kawe ji du dèkke lu loxo defar, mooy la yonent ba ne:

<sup>49</sup> “Asamaan sama ngàngunee, suuf di sama ndëggastal.

Ana kër gu ngeen may tabaxal?

Boroom bee ko wax.

Mu ne: Ana ban bérab laay nopploo?

<sup>50</sup> Loolu lépp, xanaa du sama loxoo ko sàkk?”

<sup>51</sup> «Yeena dëgër bopp, yeenay boroomi xol ak noppi yéefar! Dungeen noppee të Noo gu Sell gi? Maam ya, doom ya rekk! <sup>52</sup> Kan ci yonent yi la seeni maam fitnaalul? Ñoo rey démb ña yégle woon ñëwug Aji Jub, ji ngeen wor tey, bóom ko.

<sup>53</sup> Yeen de yeena jotoon ci yoonu Musaa, wi ay malaaka jottli, te taxul ngeen jéfe ko.»

### *Bóom nañu Eccen*

<sup>54</sup> Naka lañu dégg loolu, seen xol fuddu, ñuy yéyu ci kawam. <sup>55</sup> Eccen nag feese Noo gu Sell gi, ne jàkk asamaan, daldi gis leeru Yàlla, gis Yeesu taxawe fa ndijooru Yàlla. <sup>56</sup> Mu ne: «Asamaan a ngii ma gis,



mu ubbiku, Doomu nit kaa ngii taxaw fi ndijooru Yàlla!»

<sup>57</sup> Ba loolu amee ñu yuuxu ca kaw, dar seeni nopp, daldi ànd, ne milib ca kawam; <sup>58</sup> ñu wat-watee ko, génne ko dëkk ba, di ko dóor ay doj. Fekk na seede ya summi seeni mbubb, juug ca tànkii benn xalelu góor bu ñuy wax Sóol.

<sup>59</sup> Ñuy dóor Eccen ay doj, moom muy ñaan Yàlla, naan: «Sang Yeesu, nangul sama bakkan!» <sup>60</sup> Mu ne gurub, samp bëti óomam, daldi àddu ca kaw, ne: «Sang bi, bu leen topp bii bàkkaar.» Naka la wax loolu, daldi nelaw.

## 8

<sup>1</sup> Sóol nag rafetlu woon na la ñu bóom Eccen.

### *Fitnaal nañu mbooloo mi*

Bésib keroog teg nañu mbooloom gëmkaat ña ca Yerusalem fitna ju metti ba, lu moy ndawi Almasi, ñoom ñépp a tasaaroo ca diiwaani Yude ak Samari. <sup>2</sup> Ay nit ñu ragal Yàlla nag rob Eccen, ñaawlu deeyam lool. <sup>3</sup> Ci biir loolu Sóol moom, ma ngay jéema faagaagal mbooloom gëmkaat ñi, di dugg ci kër yi, diri góor ak jigéen, génne, ñu sànni kaso.

### *Filib waare na ca Samari*

<sup>4</sup> Gëmkaat ña tasaaroo di xamle fépp fu ñu jaare, xibaaru jàmm bu kàddu gi. <sup>5</sup> Noonu la Filib deme péeyub Samari, di siiwtaane Almasi. <sup>6</sup> Ba waa dëkk ba déggee mbaa ñu gis kéemaan ya muy def, ñoo bokk teewlu ay waxam. <sup>7</sup> Ndax bare na ca ñu rab yu bon jàppoon te mujj bàyyi leen, génne yuux yu réy; bare na ca it ñu lafañ ak ñu làggi woon te mujj wér. <sup>8</sup> Muy mbég mu réy nag ca dëkk boobee.

### *Ab ñeengokat gis na ku ko jon*

<sup>9</sup> Ku ñuy wax Simoñ nag yàggoon na ca dëkk ba, di ñeengo. Ku waar waa Samari la woon, te doon tuddoo nit ku màgg. <sup>10</sup> Ñépp, mag ak ndaw, teewlu ko, naan: «Kii mooy dooley Yàlla ci boppam. Moom lañuy wax “Màggale”.» <sup>11</sup> La ñu ko teewloo woon moo di jëfi ñeengo ya

mu leen yàgga yéeme. <sup>12</sup> Waaye ba ñu gëmee Filib, ma leen xamal xibaaru jàmm, bi jëm ci nguug Yàlla ak turu Yeesu Almasi, góor ak jigéen daldi nangu, ñu sóob leen ci ndox. <sup>13</sup> Simoñ ci boppam gëm, moom it, ñu sóob ko ci ndox. Simoñ nag bàyyeetul Filib. Ba mu gisee firnde yaak kiraama yu mag yay am, moom moo yéemu.

<sup>14</sup> Ba ndaw ya ca Yerusalem yégee ne waa Samari nangu nañu kàddug Yàlla, Piyeer ak Yowaan lañu fa yebal. <sup>15</sup> Ñu agsi Samari, ñaanal gëmkaat ña, ngir ñu jot Noo gu Sell gi. <sup>16</sup> Ndax booba Noo gi wàccagul woon ci kenn ci ñoom, dees leena sóoboon rekk ci ndox ci turu Sang Yeesu. <sup>17</sup> Ba loolu amee Piyeer ak Yowaan teg leen loxo, ñu jot Noo gu Sell gi.

<sup>18</sup> Simoñ nag gis noonee mayug Noo, gi sababoo ci tegeb loxo bu ndaw ña amal, ba tax mu indil leen xalis. <sup>19</sup> Mu ne leen: «Mayleen ma man itam xam-xam bii, ngir ku ma teg loxo, nga jot Noo gu Sell gi.» <sup>20</sup> Piyeer ne ko: «Na sa xalis ànd ak yaw asaru, ndegam ab xalis nga yaakaara jënde mayu Yàlla! <sup>21</sup> Amuloo benn wàll mbaa ab cér ci lii, ndax sa xol a jubul ci kanam Yàlla. <sup>22</sup> Réccul nag sa mbon gii, te ñaan Boroom bi; jombul mu baal la sa mébétu xol. <sup>23</sup> Ndax gis naa ni nga sóoboo ci wextanu kañaan, keppu ci ndëngte.» <sup>24</sup> Simoñ ne leen: «Ñaanal-leen ma Boroom bi, yeen ci seen bopp, ngir li ngeen wax lépp, lenn bañ ma cee dab.»

<sup>25</sup> Gannaaw ba Piyeer ak Yowaan seedelee kàddug Boroom bi, biral ko, Yerusalem lañu dellu, di xamle xibaaru jàmm bi ci ay dëkki Samari yu bare.

### *Filib yee na ab jaraafu Ecopi*

<sup>26</sup> Menn malaakam Boroom bi nag wax Filib, ne ko: «Fabul jubal bëj-saalum; yoon wa kenn jaareetul te bartaloo Yerusalem, jëm Gasa.» <sup>27</sup> Filib fabu, dem. Ndeke am na jenn waayu Ecopi\* ju màggalsi woon Yerusalem. Nit kooku doonoon moraange, te di jaraaf ju mag ju

\* **8:27** 8.27 Ecopi ga woon, dees na ko wooye Kuus itam, muy diiwaan bu feggoo woon ak dexu Niil, te nekkoon diggante bëj-gannaaru Sudan ak bëj-saalumu Misra.

Kàndas Lingeeru Ecopi; moo doon saytu mboolem alalu Lingeeru Ecopi. <sup>28</sup> Naka la jaraaf ja màggalsi bay dellu Ecopi, toog ca watiiram, di jàngaale téereb Yonent Yàlla Esayi, <sup>29</sup> Noowug Yàlla ne Filib: «Doxal, dab watiir bale.»

<sup>30</sup> Filib dabsi waayi Ecopi ja, daldi dégg muy jàng téereb Yonent Yàlla Esayi. Mu ne ko: «Ndax xam nga li ngay jàng?»

<sup>31</sup> Mu ne ko: «Nu ma ko mana xame, te kenn firilu ma ko?» Ba loolu amee mu ne Filib, mu yéeg, toog ak moom. Filib yéeg.

<sup>32</sup> Lii nag mooy dogu mbind ma mu doon biral:

«Dees koo yóbbu ni xar mu ñuy rendiji; mbete mburt mu ne cell ci kanam ki koy wat,

ubbiwul gémmiñam.

<sup>33</sup> Ci biir toroxteem lañu ko xañ dëggam; kuutaayam nag, ana ku ci mana wax? Ndegam bakkanam lañu toxale kaw suuf.»

<sup>34</sup> Jaraaf ja ne Filib: «Yaw laay laaj, ci kan la yonent bi wax lii? Boppam lay wax am keneen?» <sup>35</sup> Filib daldi àddu, tàmbalee ci dog boobu, xamal ko xibaaru jàmm bi ci mbirum Yeesu.

<sup>36</sup> Ba loolu amee ñu topp yoon wi, ba yem ci am ndox. Jaraaf ja ne ko: «Ndox a ngii, ana lu tee ma sóobu ci?» <sup>37</sup> Filib ne ko: «Soo gëmee ci sa léppi xol, sañ nga ko.» Mu ne ko: «Gëm naa ne Yeesu Almasi mooy Doomu Yàlla.»

<sup>38</sup> Ci kaw loolu jaraaf ja santaane ñu taxawal watiir ba; Filib ak jaraaf ja wàcc, ñu dugg ñoom ñaar ca ndox ma, Filib sóob ko ca. <sup>39</sup> Naka lañu génne ca ndox ma, ngelawal Boroom bi ne cas Filib, yóbbu, jaraaf ja gisatu ko. Teewul mu topp yoonam, ànd ak mbég. <sup>40</sup> Filib moom, dëkk ba ñuy wax Asot la gisaat boppam. Mu wéye di xamle xibaaru jàmm bi ci dëkkoo dëkk, ba àgg Sesare.

## 9

### *Sóol tuub na*

<sup>1</sup> Ci biir loolu Sóol moom, noyyeewul lu moy di tèkkook a jéema bóom taalibey Sang bi. Mu dem nag ca sarxalkat bu mag ba, <sup>2</sup> di sàkku ay bataaxal yu ñeel jànguy dëkk ba ñuy wax Damaas, bataaxal yu

yóbbante ndigal lu yeewlu képp ku ñu fa gis ku bokk ci Yoon woowu, góor ak jigéen, ngir mu jàpp leen, indi Yerusalem.

<sup>3</sup> Naka la Sóol dem ba jub Damaas, ag leer bawoo asamaan, jekki ne ràyy ci kawam. <sup>4</sup> Mu daanu ci suuf, daldi dégg baat bu ko ne: «Sóol, Sóol, lu tax nga di ma bundxatal?» <sup>5</sup> Mu ne: «Yaay kan Sang bi?» Mu ne: «Man maay Yeesu, mi ngay bundxatal. <sup>6</sup> Léegi nag, jógal, dugg ci dëkk bi, dees na la wax li nga wara def.»

<sup>7</sup> Nit ña ànd ak moom a nga taxaw, jommi ba ne cell; dégg nañu baat bi te gisuñu kenn. <sup>8</sup> Sóol jóg, xippi, gisul dara; ñu daldi koy wommat, dugal ko biir Damaas. <sup>9</sup> Diiru ñetti fan gisul dara, lekkul, naanul.

<sup>10</sup> Ab taalibe bu ñuy wax Anañas nag ma nga woon ca Damaas. Sang bi feeñu ko, ne ko: «Anañas!» Mu ne ko: «Maa ngi, Sang bi.» <sup>11</sup> Sang bi ne ko: «Demal ba ca mbedd, ma ñuy wax Mbedd mu jub, te nga seet ca kër Yuda ku ñuy wax Sóol te dëkke Tàrs. Ma ngay ñaan. <sup>12</sup> Dafa gis cim peeñu ku ñuy wax Anañas duggsi, teg ko loxo, ngir mu dellu di gis.» <sup>13</sup> Anañas nag ne ko: «Sang bi, maa dégge ci ñu bare mbirum kooku, ñu seede mboolem jéf ju bon ji mu def say nit ñu sell ci biir Yerusalem. <sup>14</sup> Te moo yor ndigal lu tukkee ci sarxalkat yu mag yi, ngir yeewlu képp kuy tudd saw tur.» <sup>15</sup> Sang bi ne ko: «Demal, ndax kooku jomtukaay laa ko tannée, ngir mu xamali sama tur, xeeti jaambur yi ak seeni buur, xamal ko itam bànni Israyil. <sup>16</sup> Maa koy won mboolem coono bi mu wara dékku ngir sama tur.»

<sup>17</sup> Ci kaw loolu Anañas dem, dugg ca kër ga, teg Sóol loxo, ne ko: «Mbokk mi Sóol, Sang Yeesu, mi la feeñu woon ci yoon wi nga dikke, moo ma yebal ci yaw, ngir nga dellu di gis te feese Noo gu Sell gi.» <sup>18</sup> Ca saa sa lu mel niy waasintóor wadde ca bët ya, mu dellu di gis. Mu daldi jóg, ñu sóob ko ci ndox. <sup>19</sup> Ba loolu wéyee, mu lekk, doora am doole.

Sóol toog na ak taalibe ya ca Damaas ay fan. <sup>20</sup> Ca saa sa la tàmbalee xamle Yeesu ca jàngu ya, naan Yeesu mooy Doomu Yàlla. <sup>21</sup> Mboolem ña ko dégg, daldi waaru, naan: «Xanaa du kii moo doon bóom ñiy tudd woowu tur ci Yerusalem?»

Du moo fi dikoon, ngir yeewlu leen, yóbbu ci sarxalkat yu mag yi?» <sup>22</sup> Teewul Sóol gëna am manoore, ba far jaaxal Yawut ñi dëkke Damaas, di firndeel ne Yeesu mooy Almasi.

<sup>23</sup> Ba ñu ca tegee ab diir bu xawa yàgg, Yawut yi féncoo, ngir reylu ko. <sup>24</sup> Sóol nag yég seen mébét. Guddi ak bëccëg lañu doon wattu bunti dëkk ba, ngir bóom ko.

<sup>25</sup> Teewul taalibe yi yeb ko ag guddi ci ag dàmba, jàlle ko ca wàllaa miir ba, yoor ko.

<sup>26</sup> Ba Sóol agsee Yerusalem, jéem naa jaxasook taalibe yi, waaye ñépp a ko ragal, ndax ñàkka gëm ag taalibeem. <sup>27</sup> Ci kaw loolu Barnaba ànd ak moom, yóbbu ko ca ndaw ya. Barnaba nettali leen, ni Sóol gise Sang bi ca yoon wa, ba mu wax ak Sóol, ak fit wa Sóol waaree ca Damaas ci turu Yeesu. <sup>28</sup> Ba loolu amee Sóol ànd ak ndaw yi di dem ak a dikk ci biir Yerusalem, di waaree aw fit ci turu Sang bi. <sup>29</sup> Mu boole ci di wax ak a werante ak Yawut ñiy làkk gereg, te ñoom ñu di ko fexee rey. <sup>30</sup> Bokki gëmkat ña nag yég ko, daldi koy yóbbu Sesare, yebale ko foofa, mu dem Tàrs.

<sup>31</sup> Ba mu ko defee mbooloom gëmkat ñi ci mboolem diiwaani Yude ak Galile ak Samari daldi am jàmm. Ñuy gëna dëgër, di wéye ragal Yàlla, tey yokku ci ndimbalal Noo gu Sell gi.

### *Piyeer faj na nit*

<sup>32</sup> Piyeer mi doon wër fu nekk nag, am na bés mu jaare ca ñu sell ña dëkke Lidd. <sup>33</sup> Mu gis foofa waa ju ñuy wax Ene. Fekk na diiru juróom ñetti at, cib lal rekk lay tēdd ndax yaram wu làggi. <sup>34</sup> Piyeer ne ko: «Ene, Yeesu Almasi wéral na la; jógal, lalal sa bopp.» Mu jóg ca saa sa. <sup>35</sup> Mboolem waa diiwaani Lidd ak Saron nag gis ko, ñoom ñépp waññiku ci Sang bi.

### *Piyeer dekkal na nit*

<sup>36</sup> Dëkk ba ñuy wax Yope, ab taalibe bu jigéen a nga fa woon, ñu di ko wax Tabita mbaa Dorkas ci làkku gereg. Def lu baax ak sarxe la saxoo woon. <sup>37</sup> Ci fan yooyu, mu daanu wopp, daldi faatu. Ñu sang ko, dugal ko ca néegu kaw taax ma. <sup>38</sup> Ci biir

loolu taalibe yi dégg ne Piyeer a nga Lidd, te Lidd sorewul Yope. Ñu yebal ñaari nit ca moom, ngir ñaan ko mu ñew te baña yeex.

<sup>39</sup> Piyeer jóg, ànd ak ñoom, ba agsi. Ñu yéeg ko ca néegu kaw taax ma. Ay jētun a nga fa woon. Ñoom ñépp di jooyoo, yéew Piyeer, won ko turki yaak mbubb ya Dorkas defaroon ba muy nekk ak ñoom.

<sup>40</sup> Ci kaw loolu Piyeer dàq ñépp ca biti. Mu sukk, ñaan, daldi walbatiku jublook néew bi, ne: «Tabita, jógal!» Mu ne xiféet, gis Piyeer, jóg toog. <sup>41</sup> Piyeer may ko loxo, yékkati ko. Ba loolu amee Piyeer woo ñu sell ña, ak jētun ña, won leen ndaw sa, muy dund. <sup>42</sup> Mbir ma nag siiw ca Yope gépp, ñu bare gëm Sang bi. <sup>43</sup> Gannaaw loolu Piyeer dal na Yope ay fan, kër wullikat bu ñuy wax Simon.

## 10

### *Korney woo na Piyeer*

<sup>1</sup> Ku ñuy wax Korney, njiitu takk-der la woon ca Sesare. Ma nga bokkoon ca mbooloo ma ñu dippee Gangooru Itali.

<sup>2</sup> Ku jullite la woon te ragal Yàlla, mook waa këram gépp; bare woon na sarax yu muy yéwéne askan wi, te ñaan ci Yàlla la saxoo woon.

<sup>3</sup> Am peeñu nag dikkal ko digg njolloor, mu gis ci lu leer malaakam Yàlla, mu duggsi, ne ko: «Korney!» <sup>4</sup> Korney ne ko jàkk, tiit, ne ko: «Sang bi, lu mu doon?» Mu ne ko: «Say ñaan ak say sarax yéeg na fa Yàlla, ba mu bàyyi la xel. <sup>5</sup> Léegi nag yebleel ca Yope, nga wooluji fa ku ñuy wax Simon, ñu di ko dàkkentale Piyeer. <sup>6</sup> Ma nga dal ak meneen Simon ma, wullikat ba këram féete wetu géej.»

<sup>7</sup> Naka la malaaka ma wax ak Korney ba dem, mu woo ñaar ciy surgaam, ak benn takk-der bu jullite te bokk ciy suqam. <sup>8</sup> Mu nettali leen lépp nag, daldi leen yebal Yope.

<sup>9</sup> Ca èllëg sa, ñu dem bay jub dëkk ba, yemook Piyeer yéeg ca kaw taax ma ci digg bëccëg, ngir ñaan. <sup>10</sup> Mu dem ba xiif, bégga lekk, ñu di ko toggal nag lu mu lekk. Ci biir loolu mu daanu leer. <sup>11</sup> Mu daldi gis asamaan ubbiku, lu mel

ni sér bu mag bu ñu téyee ñeenti lafam, wacce asamaan, jëm suuf. <sup>12</sup> Sér baa nga def mboolem boroom ñeenti tànk, ak dundoot yiy raam, ak mboolem njanaaw. <sup>13</sup> Mu am baat bu jib, ne ko: «Piyeer, jógal, rey te lekk.» <sup>14</sup> Piyeer ne ko: «Mukk, Sang bi, ndaxte masumaa lekk lenn lu daganul mbaa lu setul.» <sup>15</sup> Teewul baat bi wax ak moom ñaareel bi yoon, ne ko: «Lu Yàlla setal, bu ko daganadil.» <sup>16</sup> Menn peeñu moomu dikkal na ko ñetti yoon. La ca tegu ñu yéegge kéf ka asamaan. <sup>17</sup> Piyeer a nga jaaxle lool, di seet cim xelam lu peeñu ma ko dikkal di tekki, ndeke nit ña Korney yebaloon laaj nañu kër Simon, ba dikk taxaw ca bunt ba. <sup>18</sup> Ñu woote, laajte, ne: «Simon, mi ñuy wax Piyeer, fii la dëkk?»

<sup>19</sup> Naka la Piyeer di xalaat ba tey ca peeñu ma, Noo gi ne ko: «Ñetti nit a ngi nii, di la seet. <sup>20</sup> Waccal boog, ànd ak ñoom te bul nàttable, ndax man maa leen yebal.» <sup>21</sup> Piyeer wacc nag ne nit ñi: «Maa ngii; ki ngeen di seet, man la. Lu doon seeni tànk?» <sup>22</sup> Ñu ne ko: «Njiitu takk-der ba Korney, ku jub, ragal Yàlla, te rafet seede bu ko xeetu Yawut wépp seedeel, moo jote ci malaaka mu sell, ndigalal woolu la këram, ngir déglu say kàddu.» <sup>23</sup> Ci kaw loolu Piyeer dugal leen, dalal leen.

### *Piyeer wuyji na Korney*

Ba bët setee, Piyeer ànd ak ñoom, ñenn ca bokki gëmkaat ña dëkke Yope gunge ko. <sup>24</sup> Ca ëllëg sa Piyeer agsi Sesare. Fekk na Korney di ko séentu, daldi woo ca këram ay bokkam, ak xaritam yi ko gëna jege. <sup>25</sup> Ba Piyeer duggsee, Korney gatandu ko, ne gurub ca tànk Piyeer, sujjoót. <sup>26</sup> Piyeer yékkati ko, ne: «Déet jógal, man it, nit donj laa.» <sup>27</sup> Piyeer di waxtaan ak moom, ba duggsi, yem ca nit ñu bare ña fa daje. <sup>28</sup> Mu ne leen: «Yeen de xam ngeen ne ab Yawut, mayeesu ko mu jaxasoo ak xeetu jaambur, mbaa mu seeti ko. Waaye man nag Yàllaa ma won ne du kenn nit ku ma naan daganula jaxasool, mbaa setul. <sup>29</sup> Looloo tax, bi ngeen ma wooloo, ma ñew te tendeefaluma benn yoon. Ma di leen laaj nag li waral ngeen woolu ma.»

<sup>30</sup> Ci kaw loolu Korney ne: «Bëkkaati-démb ci waxtuw digg njolloor wii nu tollu tey, ci laa doon ñaane sama biir néeg. Mu am ku jekki ne jaas ci sama kanam, sol yére yu ne ràññ. <sup>31</sup> Mu ne ma: “Korney, nangu nañu say ñaan, te nemmiku nañu say sarax fa kanam Yàlla. <sup>32</sup> Kon nag yebleel Yope, nga woolu Simon, mi ñu dàkkentale Piyeer; ma nga dal ca kër meneen Simon, wullikat ba ca wetu géeg ga.” <sup>33</sup> Ca saa sa nag laa yeble ci yaw. Yaw it def nga lu baax, bi nga dikkee. Léegi nag nun ñépp a ngi fi ci kanam Yàlla, ngir déglu mboolem lu la Boroom bi sant.»

<sup>34</sup> Ba loolu amee Piyeer àddu, ne: «Dëgg-dëgg gis naa ne Yàlla daal du gënaatle, <sup>35</sup> waaye xeetoo xeet, ku ko ci ragal tey def njekk, mooy ki ko neex. <sup>36</sup> Moo yónnee kàddoom bànni Israyil, àgge leen xibaaru jàmm, biy maye jàmm ci Yeesu Almasi, miy Sangu ñépp. <sup>37</sup> Yeen ci seen bopp xam ngeen li xewoon ci mboolem réewum Yawut yi, te dale ci dii-waanu Galile, gannaaw ba Yaxya wootee, di sóobe cim ndox, <sup>38</sup> ak ni Yàlla ànde ak Yeesum Nasaret, ba jagleel ko pal gu mu dogale Noo gu Sell geek xam-xam bi mu ko sotti, muy wër, di def lu baax, di faj mboolem ñi Seytaane notoon.

<sup>39</sup> «Nun ci sunu bopp noo seede li mu def lépp ci réewum Yawut yi ak Yerusalem. Moom mi ñu wékk ci bant, ba rey ko, <sup>40</sup> moom la Yàlla dekkal ci ñetteelu fanam, ba may ko mu feeñ. <sup>41</sup> Du askan wépp la ko won, xanaa nun, seede yi Yàlla tànoon lu jiiitu, nu boka ak moom lekk ak naan, gannaaw ndekkiteem. <sup>42</sup> Moo nu sant nag nu xamal askan wi te seede ne moom la Yàlla tabb àttekatub aji dund ñi, ak aji dee ñi. <sup>43</sup> Moom la yonent yépp seedeel, ne képp ku ko gëm, jot nga sa njéggalug bàkkaar ciw turam.»

<sup>44</sup> Ba Piyeer di wax kàddu googu, Noo gu Sell gi daldi wacc ci kaw mboolem ñay déglu kàddu ga. <sup>45</sup> Ba loolu amee mboolem gëmkaati Yawut ya ànd ak Piyeer, waaru ca na mayug Noo gu Sell gi tuuruwaalee ca xeeti jaambur ña, <sup>46</sup> ndax

dañu leena dégg ñoom itam, ñuy làkk yeneen làkk, ak a mąggal Yàlla.

<sup>47</sup> Piyeer dellu ne: «Ñii jot Noo gu Sell gi ni nun, ndax manees na leena baña sóob ci ndox?» <sup>48</sup> Mu santaane nag ñu sóob leen ci ndox ci turu Yeesu Almasi. Gannaaw loolu ñu ñaan Piyeer, mu toog ci ñoom ay fan.

## 11

### *Piyeer layoo naak waa Yerusalem*

<sup>1</sup> Ci kaw loolu ndaw yaak bokki gëmkat ña ca réewum Yawut, dégg ne jaambur ñi dul Yawut déggal nañu kàddug Yàlla, ñoom itam. <sup>2</sup> Ba Piyeer delloo Yerusalem nag, gëmkat ñi bokk ci askanu Yawut di ko sikk, <sup>3</sup> naan: «Yaa dem ca ña xaraful, di bokk ak ñoom lekk!»

<sup>4</sup> Piyeer daldi leen benn-bennalal mbir mi. <sup>5</sup> Mu ne: «Man de damaa nekkoon ca Yope, di fa ñaan. Ci biir loolu ma daanu ag leer, daldi gis ci peeñu lu mel ni sér bu mag bu ñu téyee ñeenti lafam, mu wàcce asamaan, ba agsi ci man. <sup>6</sup> Ma xool ko jàkk, niir ko, daldi cay gis boroom ñeenti tànk yi, ak rabi àll yi, ak dundoot yiy raam ak njanaaw yi. <sup>7</sup> Maa dégg itam baat bu ma ne: “Piyeer, jógal, rey te lekk.” <sup>8</sup> Ma ne: “Mukk, Sang bi, ndax lenn lu daganul mbaa lu setul masula dugg sama gémmiñ.” <sup>9</sup> Baat ba nag àddoo asamaan ñaareel bi yoon, ne ma: “Lu Yàlla setal, bu ko daganadil.” <sup>10</sup> Menn peeñu moomu dikk na ba muy ñetti yoon, ñu doora yéegé lépp asamaan.

<sup>11</sup> «Saa soosa tembe, ca la ñetti nit ña ñu yebale Sesare ba ca man, agsi ca kër ga nu dal. <sup>12</sup> Noo gi nag ne ma: “Àndal ak ñoom, te bul nàttable.” Juróom benni bokk yii ngeen di gis ñoo ma gunge, nu dem ba dugg ca kër Korney. <sup>13</sup> Mu xamal nu ne malaakaa ko feeñu ci néegam, ne ko: “Yebleel ca Yope, nga woolu Simon, ma ñu dàkkentale Piyeer. <sup>14</sup> Dina la àgge kàddu yu lay musal, yaw ak sa waa kër gépp.”

<sup>15</sup> «Naka laa tàmbalee wax ak ñoom Korney, Noo gu Sell gi daanu ci seen kaw, na mu jèkkoona daano ca sunu kaw.

<sup>16</sup> Ma daldi fàttliku kàddug Sang, ba mu

noon: “Yaxya, cim ndox la daan sóobe, waaye yeen, ci Noo gu Sell gi lees leen di sóob.” <sup>17</sup> Gannaaw nag Yàlla leen jagleel genn may, ga mu nu jagleeloon, ba nu gëmee Sang Yeesu Almasi, ana ku ma doon, man, bay gàllankoor Yàlla?»

<sup>18</sup> Ba ñu dégge loolu lañu dal, daldi mąggal Yàlla. Ñu ne: «Kon xeeti jaambur yi, ndeke ñoom it Yàlla may na leen ñu tuub, ba dund!»

### *Mbooloo sosu na ca Àncos*

<sup>19</sup> Gëmkat ña tasaaroo woon nag ndax fitna ja woon, ca mbirum Eccen, mujj nañu jàll ba diiwaanu Fenisi, ca dunu Sippar ak ca Àncos, waaye àggewuñu kàddu gi ñeneen ñu moy Yawut yi. <sup>20</sup> Terewul ay gëmkat ñu dèkke Sippar ak Siren, bàyyikoo ca, dikk Àncos, wax ak làkk-kati Gereg yi, ñoom itam, ba àgge leen xibaaru jàmm bu Sang Yeesu. <sup>21</sup> Boroom bi nag gungee leen loxoom, ba ñu bare gëm, waññiku ci Sang bi.

<sup>22</sup> Ba mbir ma siiwee, ba mbooloom gëmcati Yerusalem jot ca, dañoo yebal Barnaba ca Àncos. <sup>23</sup> Ba Barnaba dikkee ba gis yiw, wi leen Yàlla may, dafa bég, di leen ñaax ngir ñu ñoye seen xol ci Sang bi. <sup>24</sup> Ndaxte Barnaba nit ku baax la woon, feese Noo gu Sell gi, ak ngëm. Mbooloo mu takku nag dolliku ci Sang bi.

<sup>25</sup> Ba loolu wéyee Barnaba jëm Tàrs, di seeti Sóol. <sup>26</sup> Ba mu ko gisee, da koo indi Àncos. Ba mu ko defee, atum lëmm ñuy daje ca mbooloom gëmkat ña, di jàngal nit ñu takku. Ca Àncos lañu jèkka wooye gëmkat ñi ay gëm-Almasi.

<sup>27</sup> Ci fan yooyu la ay yonent jóge Yerusalem, dikk Àncos. <sup>28</sup> Kenn ca ñoom, ku ñuy wax Agabus daldi yéglee Noo gu Sell gi, ne xiif bu metti dina am, ci àddina sépp. Te looloo nga yemook ayug buur bu mag bu ñuy wax Kélódd. <sup>29</sup> Taalibe ya nag fas yéenee boole kem kàttanu ku nekk ca ñoom, ngir ndimbal lu ñuy yónnee bokki diiwaanu Yude. <sup>30</sup> Noonu lañu def, yónnee ko magi Yude, Barnaba ak Sóol jottli ko.

## 12

### *Yàlla yiwi na Piyeer*

<sup>1</sup> Ca jamono jooju la Buur Erodd jàppoon ñenn ca mbooloom gëmkat ña, di leen mitital. <sup>2</sup> Noonu la bóome ab saamar Yanqóoba, doomu ndeyu Yowaan. <sup>3</sup> Mu gis nag na mbir ma neexe Yawut ya, ba tax mu teg loxo Piyeer, moom itam; loola yemook bési màggalu Mburu mu amul lawiir. <sup>4</sup> Naka la ko jàpplu, daldi koy tēj kaso, teg ko ci loxoy ñeenti kurél yu ñeenti takk-der, ngir ñu wattu ko; booba ma ngay xaar ba bésu Mucc bi wees, mu door koo yóbbu ca kanam askan wa.

<sup>5</sup> Naka lañu tēj Piyeer ca kaso ba, mbooloom gëmkat ñi saxoo koo ñaanal Yàlla.

<sup>6</sup> Ba ñu demee ba ca guddi, ga jiitu bés ba ko Erodd wara yóbbu, Piyeer a ngay nelaw ci diggante ñaari takk-der, ñu yeewe ko ñaari càllala, ay dag di wattu buntu kaso ba. <sup>7</sup> Ci kaw loolu am malaakam Boroom bi ne jaas, taxaw, ag leer ne ràyy ca biir kaso ba. Malaaka ma laal Piyeer ci wetam, yee ko, ne ko: «Jógal gaaw!», càllala yi daldi rote ciy loxoom.

<sup>8</sup> Malaaka ma ne ko: «Takkal sa geño te sol say dàll.» Mu def noonu. Mu ne ko: «Solal sa mbubb te topp ci man.» <sup>9</sup> Piyeer génn, topp ci moom, te xamul sax ndax li ko dikkal noonu te sababoo ci malaaka mi, dëgg la. Yaakaaron na ne am peeñu la. <sup>10</sup> Ñu jàll dalu wattukat bu jëkk bi, teg ci ñaareel bi, ba agsi ci buntu weñ, ba jëm ca dëkk ba, bunt ba daldi tijjikul boppam. Ñu génn, topp menn mbedd, malaaka ma jekki teqlikook Piyeer.

<sup>11</sup> Naka la xelum Piyeer délsi, mu daldi ne: «Léegi nag xam naa xéll ne, Boroom bee yebal malaakaam, te moo ma musal ci loxol Erodd, ak mboollem li Yawut yi séentu woon.» <sup>12</sup> Gannaaw ba Piyeer ràññee loolu, daa dem kër Maryaama, ndeyu Yowaan Màrk, fekk ñu bare daje foofa, di ñaan. <sup>13</sup> Piyeer fëgg buntu kër ga, mbindaan mu ñuy wax Rodd dikk. <sup>14</sup> Ba Piyeer waxee, mbindaan ma xàmmi baatam, daldi bég ba talu koo ubbil, xanaa daw dellu ca biir, ne Piyeer

a nga foofa ca buntu kër ga. <sup>15</sup> Ñu ne ko: «Xanaa dangaa dof?» Teewul mbindaan mi ne moom la. Ñu daldi ne: «Kon malaakaam la.» <sup>16</sup> Ci biir loolu Piyeer a ngay fëgg ba tey. Ñu tijji, muy moom, ñu waaru. <sup>17</sup> Piyeer liyaar leen, ngir ñu noppi, daldi leen nettali, ni ko Boroom bi génnée kaso ba. Mu ne leen: «Yégal-leen ko Yanqóoba ak yeneen bokki taalibe yi.» Ba loolu amee mu génn, dem feneen.

<sup>18</sup> Ba bët setee takk-der ya ne kër-kër, ne këpp, ne: «Ana fu Piyeer jaar?» <sup>19</sup> Erodd nag santaane ñu wër Piyeer, te taxul mu gis ko. Mu daldi àtte wattukat yi, ba noppi joxe ndigal ngir ñu rey leen.

### *Buur Erodd dee na*

Ba mu ko defee Erodd jóge diiwaanu Yude, dem Sesare, toog fa. <sup>20</sup> Fekk na Erodd dëngoo lool ak waa dëkk yi ñuy wax Tir ak Sidon. Ci kaw loolu waa Tir ak Sidon mànkoo, dikk ba ci Erodd. Ñu daldi fexe ba jubook Balastus, bëkk-néegu Buur, ba noppi di sàkku jàmm, ndax seen dundub réew, ca dundu Buur Erodd la daan jóge.

<sup>21</sup> Ba bés ba ñu jàpp agsee, Erodd sol colu buuram, toog ca jal ba, di leen àgge kàddug kilifteefam. <sup>22</sup> Mbooloo maa ngay àddu ca kaw, naan: «Lii kay baatu Yàlla la, du baatu nit!» <sup>23</sup> Ca saa soosa tembe la ko malaakam Boroom bi fàdd, ndax la mu delloowul Yàlla njukkal. Ba loolu amee, ay sax ronq ko, mu dee.

<sup>24</sup> Ci biir loolu kàddug Yàlla di gëna siiw, di gëna law.

<sup>25</sup> Barnaba ak Sóol nag, gannaaw ba ñu sottalee seen liggéey, dañoo jóge Yerusalem, ñibbi, ànd ak Yowaan mi ñuy wax Màrk.

## 13

### *Yàlla yónni na Barnaba ak Sóol*

<sup>1</sup> Ca biir mbooloom gëmkat, ña woon ca dëkk ba ñuy wax Ancos, amoon na ay yonent ak ay jànglekat: ñuy Barnaba, ak Simeyon mi ñu dippee Ñuule, ak Lusiyus mi bawoo Siren\*, ak Manayen mi yaroondoo ak Erodd boroom Galile,

\* **13:1** 13.1 Siren ab dëkk la bu nekkoon ci tefesu bëj-gànnaru Afrig te féete Misra sowu.

ak Sóol. <sup>2</sup> Ñooño daje woon di màggal Boroom bi, boole kook koor. Ci biir loolu Noo gu Sell gi ne: «Beral-leen ma nag Barnaba ak Sóol ngir liggéey, bi ma leen wooye.» <sup>3</sup> Ba loolu amee ñu woor, boole kook ñaan, daldi leen teg seeni loxo, ba noppi yiwi leen.

### *Dunu Sippar jot na ci kàddug Yàlla*

<sup>4</sup> Ñooñu la Noo gu Sell gi yebal, ñu dem dëkk ba ñuy wax Selusi, duggé fa gaal, jëm dun ba ñuy wax Sippar.

<sup>5</sup> Ña nga teereji dëkk ba ñuy wax Salamin, daldi fay yégle kàddug Yàlla ca jànguy Yawut ya, ku ñuy wax Yowaan Màrk ànd ak ñoom, di leen jàpple.

<sup>6</sup> Ci biir loolu ñu wër dun ba bépp, ba yegg Pafos, péey ba. Ñu tase faak ab ñeengokatub Yawut buy yonent-yonentlu, ñu di ko wax Bar Yeesu. <sup>7</sup> Ma nga bokkoon ca toppum Sergiyus Póolus† boroom dëkk ba, nit ku rafet xel. Kooku namma dégg kàddug Yàlla, daldi woolu Barnaba ak Sóol. <sup>8</sup> Elimas, mu firi Ñeengokat bi, di leen gállankoor nag, tey jéema fàbbi boroom réew ma, ba du gëm. <sup>9</sup> Ci kaw loolu Sóol mi ñuy wax Póol feese Noo gu Sell gi. Mu xool ñeengokat bi jàkk, <sup>10</sup> ne ko: «Yaw nit ki fees ak gépp xeetu njublan ak ndëngte, doomu Seytaane ji, noonu gépp njub, doo bàyyee lunkal yooni njub yu Boroom bi? <sup>11</sup> Léegi nag loxol Boroom baa ngii fi sa kaw; dinga gumba, ba dootuloo gis jant bi ab diir.» Ca saa sa gis-gis bu naqari akug lëndëm ne milib ci kawam, muy wëndeelu, di wut ku ko wommat. <sup>12</sup> Ba loolu amee boroom dëkk ba gis la xew, daldi gëm, di yéemu ci li mu jàngé ci Sang bi.

### *Waa Pisidi jot nañu ci kàddug Yàlla*

<sup>13</sup> Póol ak ñi mu àndal nag bàyyikoo Pafos, dugg gaal, jëm Perge, ca diiwaanu Pamfili. Yowaan moom taggoo ak ñoom, dellu Yerusalem.

<sup>14</sup> Ci kaw loolu, ñoom ñu jóge Perge, jàll ba Àncos ca diiwaanu Pisidi. Ñu dem jàngu ba, dugg, toog ca bésu Noflaay ba. <sup>15</sup> Gannaaw ba tarib dog ya ca téereb

yoonu Musaa, ak téereb yonent ya sottee, njiiti jàngu ba yóbbante leen kàddu, ne leen: «Bokk yi, bu ngeen amee kàddu gu ngeen ñaaxe mbooloo mi, waxleen.»

<sup>16</sup> Póol jóg, tàllal loxoom, nee leen:

«Yeen bokki Israyil ak yeen jaamburi ragalkati Yàlla yi, dégluleen! <sup>17</sup> Yàllay bànni Israyil jii moo tànnoon sunuy maam, moo yaatal xeet wi, ba ñuy ganeyaan ca Misra; moo leen fa génnee kàttanu loxoom. <sup>18</sup> Lu tollook ñeent fukki at la leen muñal ca màndiñ ma. <sup>19</sup> Moo faagaagal juróom ñaari xeet ca réewum Kanaan, daldi muurale sunuy maam réewum Kanaaneen ña. <sup>20</sup> Loolu lépp a ngi am ci diiru ñeenti téeméeri at ak juróom fukk (450).

«Gannaaw loolu moo sàkkal sunuy maam ay njiit, ba ci jamonoy Yonent Yàlla Samiyel. <sup>21</sup> Ba loolu wéyee, ñuy sàkku buur, Yàlla jox leen doomu Kis, Sóol, mi soqikoo ci giirug Beñamin, mu falu diiru ñeent fukki at. <sup>22</sup> Mu jële ko fa, sampal leen Daawuda, muy buur bu mu seedeel ne: “Maa ràññee Daawuda doomu Yese, ji sama xol jubool, te mooy jéfe mboolem samay coobare.”

<sup>23</sup> «Ci askanu kookii la Yàlla indee Yeesu, na mu ko digee woon, muy Musalkat ñeel Israyil. <sup>24</sup> Laata muy ñew, Yaxya moo doon yéene ngir waa bànni Israyil gépp sóobu cim ndox, jëmmale ko seenug tuubeel. <sup>25</sup> Ba Yaxya di jeexal aw sasam la ne: “Ana ku ngeen foog ne moom laa? Duma ki ngeen foog, waaye am na kuy ñew nii sama gannaaw, ku ma yeyoowula summil sax ay dàllam.”

<sup>26</sup> «Bokk yi, yeen askanu Ibraayma, yeen ak jaamburi ragalkati Yàlla yi ci seen biir, nun lañu yónnee kàddug mucc gi. <sup>27</sup> Waa Yerusalem, ak seeni kilifa nag xàmmiwuñu woon Yeesu, te ba ñu daanee Yeesu lañu sottal waxu yonent, ya ñu daan biral bésu Noflaay bu nekk. <sup>28</sup> Gisuñu ci moom lenn lu ko àtteb dee dabe, te teewul ñu sàkku Pilaat reylu ko. <sup>29</sup> Gannaaw ba ñu matalee mboolem lu ñu bind ci moom, lañu ko waccee ca bant ba, dugal ko bàmmee. <sup>30</sup> Waaye Yàllaa ko

† 13:7 13.7 Sergiyus Póolus waa Room la woon bu yore kilifteefu diiwaan ba, ci njiital ab kurélu Room.

dekkal, <sup>31</sup> te diiru fan yu bare la feeñu ña àndoon ak moom, jóge diiwaanu Galile, dem Yerusalem, te ñooñooy ay seedeem tey ci askan wi. <sup>32</sup> Nun nag noo leen di àgge xibaaru jàmm bii: li Yàlla digoon sunuy maam, <sup>33</sup> nun sèt yi la ko defal, ba mu yékkatee Yeesu, te noonee lañu ko binde ci ñaareelu saaru Sabóor, ne: “Yaa di sama Doom, bés niki tey maa la jur.”

<sup>34</sup> Noonu ko Yàlla dekkale ndekkite lu dee toppatul, te yaramam du yàqu muk, noonee la ko Yàlla waxe woon, ne: “Maa lay jox barkey Daawuda yu sell yi te wóor.”

<sup>35</sup> Moo tax mu waxaat feneen ne: “Doo bàyyi sa ku Sell ki, mu yàqu.”

<sup>36</sup> Daawuda moom, gannaaw ba mu defee coobarey Yàlla ci jamonoom, nelaw na, ba ñu rob ko ca weti maamam ya, te yàqu na. <sup>37</sup> Waaye moom mi Yàlla dekkal, yàquwul.

<sup>38</sup> «Kon nag bokk yi, xamleen ne ci Yeesu moomu lañu leen birale njéggalug bàkkaar. Te mboolem lu ngeen tële woona wàccool, ba seen njub mat ci yoonu Musaa, <sup>39</sup> képp ku gëm Yeesu, ci moom lay wàccook loolu lépp, ba ag njubam mat. <sup>40</sup> Wattuleen nag ba li ñu wax ci téerey yonent yi bañ leena dal. Ñu ne:

<sup>41</sup> “Yeen xeebaatekat yi, xool-leen, jommileen te ne mes, ndax jéf ji may def ci seen jamono, ku leen ko waxoon sax, dungeen ko gëm.”»

<sup>42</sup> Ba ñu génnee ca jàngu ba, dañu leena ñaan ñu baamtu kàddu googu bés sub Noflaay ba ca topp. <sup>43</sup> Ba mbooloo ma tasaaroo, bare na ay Yawut ak tubeen yuy jaamu Yàlla yu topp ci Póol ak Barnaba. Ñuy wax ak nit ñi, di leen ñaax, ngir ñu sax ci doyloo yiwu Yàlla.

<sup>44</sup> Bés sub Noflaay ba ca topp, daanaka waa dëkk bépp a daje, ngir déglu kàddug Boroom bi. <sup>45</sup> Ba Yawut yi gisee mbooloo ma nag, kiñaan man leen, ñuy weddi waxi Póol, di ko saaga. <sup>46</sup> Ba loolu amee fit la leen Póol ak Barnaba tontoo, ne leen: «Yeen Yawut yi de lanu wara jékka yégal kàddug Yàlla gi, waaye gannaaw gantal

ngeen ko, ba jombale seen bopp ag texe ba fàww, nu ngii di walbatiku ci jaambur ñi. <sup>47</sup> Ndax noonu la nu ko Boroom bi sante ba mu nee:

“Maa la tabb ngay leeru jaambur ñi, ngir nga jottliji mucc gii, ba ca cati àddina.”»

<sup>48</sup> Ba jaambur ña déggee loolu, dañoo bég, di mággal kàddug Boroom bi; ci biir loolu ña dogal ba jagleel ag texe ba fàww, ñoom ñépp daldi gëm.

<sup>49</sup> Kàddug Boroom bi nag di law ca diiwaan bépp. <sup>50</sup> Teewul Yawut ya xiirtal tuubeen yu jigéen yi gëna ràññiku, ak kàngam yu góor yi ci dëkk bi. Ñu daldi bundxatal Póol ak Barnaba, génne leen réew ma. <sup>51</sup> Póol ak Barnaba nag fëgg seen pëndub ndëgguy tànk, seedeel leen ko seen ngantal, doora dem dëkk ba ñuy wax Ikoñum. <sup>52</sup> Ci biir loolu taalibe ya dese mbég ak Noo gu Sell gi, ba seen xol fees.

## 14

### *Póol ak Barnaba waare nañu ca Ikoñum*

<sup>1</sup> Ba Póol ak Barnaba nekkee Ikoñum, noonu lañu dugge itam ca jàngub Yawut ya. Ñu waare, ba mbooloo mu mag gëm, ay Yawut aki Gereg. <sup>2</sup> Yawut yi gëmul nag di xiirtal jaambur ñi dul Yawut, di yàq seen xel ci bokki taalibe yi. <sup>3</sup> Teewul Póol ak Barnaba toog Ikoñum diir bu yàgg lool. Fit lañu doon waaree ngir Boroom bi, Boroom bi maye ay firnde aki kéemaan yu jaare ci ñoom, ngir seeree ko kàddug yiwam gi ñuy biral. <sup>4</sup> Ba loolu amee waa dëkk bi xàjjalikoo, ñii far ak Yawut yi, ñale far ak ndaw ya. <sup>5</sup> Jaambur ñeek Yawut yi nag ànd ak seeni kilifa, di leen waaja mitital ak a dóori doj. <sup>6</sup> Ñu yég ko, daw làquji diiwaanu Likawni, ca dëkk ya ñuy wax Listar, ak Derbe ak la ko wër. <sup>7</sup> Foofa itam ñu di fa xamle xibaaru jàmm bi.

### *Póol ak Barnaba waare nañu ca Listar*

<sup>8</sup> Jenn waay a nga daan toog ca Listar, tànk ya baaxul woon; laago la jud-duwaale, te masula dox. <sup>9</sup> Kookoo dégg Póol muy waare, Póol xool ko jàkk, gis



ne am na ngëm gu muccam mana jaare. <sup>10</sup> Mu àddu ca kaw, ne waa ji: «Jógal taxaw jonn!» Waa ji ne bërét, jóg, daldi dox.

<sup>11</sup> Ba mbooloo ma gisee la Póol def, ca kaw lañu àddu ci làkku Likawni, ne: «Yàlla yee soppliku melow nit, wàccsi ci sunu biir!» <sup>12</sup> Ci kaw loolu ñu tudde Barnaba Sës, kilifay yàllay Gereg yi, Póol nag gannaaw moo farewoo woon kàddug waare ga, ñu tudde ko Ermes, ndawal yàllay Gereg yi. <sup>13</sup> Jaamookaayu Sës ma nga woon ca buntu dëkk ba. Sarxalkat ba daldi indi ca bunti dëkk ba ay yëkk yu ñu takkal caqi tóor-tóor. Sarxalkat ba ànd ak mbooloo ma, nara rendi jur ga, sarxal ko Póol ak Barnaba.

<sup>14</sup> Ci kaw loolu Póol ak Barnaba yég la xew. Ñu xotti seeni yére ndax ñaawlu ko. Ñu buur nag ba ca biir mbooloo ma, daldi àddu ca kaw ne: <sup>15</sup> «Yeen, lu leen xiir ci lii? Nun itam ay nit lanu, bokk ak yeen benn bind. Xibaaru jàmm bi lanu leen di xamal, ngir ngeen wacc yëfi neen yii te walbatiku ci Yàlla, kiy dund te sàkk asamaan ak suuf ak géej ak mboolem lu nekk ci biir. <sup>16</sup> Moo mayoon démb xeet yépp, ñu awe seen yooni bopp. <sup>17</sup> Moona noppiwula seereel boppam ci mbaaxam gi muy jéfe, di leen wàcceel fa asamaan, taw ak naataange, reggal leen, bégal leen ba seen xol sedd.»

<sup>18</sup> Loolu lépp ndaw ya wax nañu ko te tuuti kon ñu tëlee tere mbooloo ma ñu rendil leen sarax.

<sup>19</sup> Ci kaw loolu ay Yawut yu jóge Àncos gu Pisidi ak Ikoñum, fexe ba fàbbi mbooloo ma, daldi dóor Póol ay doj, diri ko ba génne ko dëkk ba, yaakaar ne dee na. <sup>20</sup> Naka la ko taalibe ya yéew, mu jóg, daldi dellu ca biir dëkk ba. Ca ëllëg sa, mu ànd ak Barnaba, dem Derbe.

### *Délsi nañu Àncos gu Siri*

<sup>21</sup> Gannaaw ba ñu xamlee fa Derbe xibaaru jàmm bi, ba am fa taalibe yu bare, dañoo dellu Listar ak Ikoñum ak Àncos gu Pisidi. <sup>22</sup> Ñuy feddli pastéefu taalibe yi, di leen ñaax ngir ñu saxoo ngëm, ne leen: «Coono yu baree ngii, fàww nu jaare ci, ngir tàbbi ci nguurug

Yàlla.» <sup>23</sup> Mbooloom gëmkat mu nekk nag, ñu tabb ci ay mag; ci biir loolu ñu ñaan, boole kook koor, daldi dénk mag ña Sang bi ñu gëm. <sup>24</sup> Gannaaw loolu ñu jaare biir diiwaanu Pisidi, ba àgg Pamfili. <sup>25</sup> Ñu daldi siiwtaane kàddu gi ca Perge, doora wàcci ba Atali.

<sup>26</sup> Foofa lañu dugge gaal, dellu Àncos gu Siri, ga ñu leen déнке woon Yàlla ciw yiwam, ngir liggéey ba ñu sottal, ba délsi noonu. <sup>27</sup> Ba ñu agsee, dañoo woo mbooloom gëmkat ña, àgge leen mboolem na Yàlla def ak ñoom, ak na mu ubbilee jaambur ñi dul Yawut buntu ngëm. <sup>28</sup> Ñu toog nag ak taalibe ya diir bu xawa yàgg.

## 15

### *Péncoo am na ca Yerusalem*

<sup>1</sup> Ñenn nit ñu bàyyikoo Yude dikk Àncos, ñoo doon digal bokki taalibe yi, ne leen: «Su ngeen xaraful\*, ni ko aaday Musaa santaanee, dungeen mana mucc.»

<sup>2</sup> Mbir ma nag mujje féewaloo ak werante wu xawa metti, te Póol ak Barnaba séq ko ak ñooñu. Ba loolu amee ñu ne, na Póol ak Barnaba, ak ñenn ca gëmcati Àncos, ànd dem Yerusalem ca ndawi Yeesu, ak mag ña, ba lijjanti mbir moomu.

<sup>3</sup> Ci kaw loolu mbooloom gëmkat ñi yebal leen, ñu jaare Fenisi ak Samari, daldi àgge waa foofa ni jaambur ñi dul Yawut tuube, ba bokki gëmkat ñépp bég ca lool. <sup>4</sup> Gannaaw loolu, ñu agsi Yerusalem, mbooloom gëmkat ñi, ak ndawi Yeesu yi, ak mag ñi, dalal leen, ñu nettali leen mboolem ni Yàlla def ak ñoom.

<sup>5</sup> Ba mu ko defee ñenn ci gëmkat ñi bokk ci ngérum Farisen yi, daldi taxaw temm, ne gëmkat ñi dul Yawut, fàww ñu xarfal leen, sàmmloo leen yoonu Musaa.

<sup>6</sup> Ba loolu amee ndawi Yeesu yi ak mag ñi bokk daje, ngir seet mbir moomu.

<sup>7</sup> Werante wu réy am ca. Ci kaw loolu Piyeer jóg ne leen: «Bokk yi, yeen xam ngeen ne bu yàgg la ma Yàlla seppee ci seen biir, ngir jaambur ñi dégge ci sama làmmiñ, kàddug xibaaru jàmm bi,

\* 15:1 15.1 Seetal ci 7.8.

ba doon ay gëmkat. <sup>8</sup> Yàlla, mi xam xolu nit nag moo seereel jaambur ñi, ba mu leen mayee Noo gu Sell gi, ni mu nu ko maye nun itam. <sup>9</sup> Yàlla amul xejj ak seen sunu digg ak ñoom, ndax seen ngëm la raxase seen xol. <sup>10</sup> Léegi nag lu tax ngeen di diinjat Yàlla, di teg taalibe yi yen bu nu masula àttan, cay maam ba ci nun? <sup>11</sup> Yiwu Sang bi Yeesu daal lanu gëm ne ci lanuy mucce, te ñoom itam, noonu rekk.»

<sup>12</sup> Ba loolu wéyee mbooloo mépp ne xerem. Ñu déglu nag Barnaba ak Póol, ñu xamle mboolem firnde yeek kéemaan, yi Yàlla defe seen ñaari jëmm ci biir jaambur ñi. <sup>13</sup> Ba ñu noppee, Yanqóoba àddu ne: «Bokk yi, dégluleen ma. <sup>14</sup> Simon† xamle na, ni Yàlla yége jaambur ñi ca njàlbéen, ba sàkke ci seen biir, xeet wu mu tudde turam. <sup>15</sup> Te loolu dëppoo na ak kàdduy yonent yi, ndax bindees na ne: <sup>16</sup> «Boroom bi nee:

Gannaaw loolu dinaa délsi;  
maay yékkati kër Daawuda gi daanu,  
maay yékkati gent yi, joyanti ko,

<sup>17</sup> ngir ndesu nit ñi sàkku Boroom bi, te ñooño di jaambur ñi ñu tudde sama tur.

<sup>18</sup> Boroom bee xamle loolu bu yàgga yàgg.»

<sup>19</sup> «Kon nag sama xalaat mooy: bunu gétën jaambur ñi tuub, ba waññiku ci Yàlla. <sup>20</sup> Xanaa nu bind leen, ne leen ñu moytu lu ay xërëm sobeel, moytu powum séy, moytoo lekk yàppu mala mu ñu tuurul deretam, ak lekk deret ci boppam. <sup>21</sup> Ndaxte ca njàlbéen ga ba tey ay nit a ngi waaree yoonu Musaa ci dëkk bu nekk, ñu di ko jàng ci jàngu yi bésu Noflaay bu nekk.»

### *Ndaje ma bind na ñi dul Yawut*

<sup>22</sup> Ba loolu amee ndaw yi ak mag ñi mànkoo ak mbooloom gëmkat ñépp, ngir tannée ci seen biir ay nit, yebal leen Àncos, boole leen ak Póol ak Barnaba. Ñooño di Yuda, mi ñu dippee Barsabas, ak Silas, ñu diy mag ca bokk ya.

<sup>23</sup> Ñu yóbbante leen bataaxal, bind ci ne:

Nun ndawi Yeesu, ak mag ñi, seen bokki Yerusalem, noo leen bind, yeen sunu bokki gëmkat ñi dul Yawut te dëkke Àncos ak Siri ak Silisi. Nu ngi jiital sunub nuyoo. <sup>24</sup> Dégg nanu ne ay nit ñu bawoo ci nun, ñoo leen lëjal ak seeni wax, di jaxase seen xel, te nun joxunu leen lenn ndigal. <sup>25</sup> Moo tax nu mànkoo ci tànn ay nit ñu nu yebal ci yeen, boole leen ak sunuy soppe Barnaba ak Póol, <sup>26</sup> ñoom ñi jaay seen bakkan ngir sunu Sang Yeesu Almasi. <sup>27</sup> Kon nag noo yebal Yuda ak Silas, ngir ñu àgge leen ci seen gémmini bopp, lii nu leen bind. <sup>28</sup> Ndaxte Noo gu Sell gi moo mànkoo ak nun ci bañ leena teg benn coono, xanaa lii manula ñàkk: <sup>29</sup> Ngeen moytu yàpp wu ñu sarxal ay tuur, ak deret, ak yàppu jur gu ñu tuurul deretam, ak powum séy. Yooyii, bu ngeen ko moytoo bu baax, def ngeen lu baax. Jàmm ak jàmm.

<sup>30</sup> Ba loolu amee ñu tàggtoo, daldi dem ba Àncos. Ci kaw loolu ñu woo mbooloo mi, jébbal leen bataaxal bi. <sup>31</sup> Ba ñu jàngee bataaxal bi, kàddu ga dëfal leen, seen xol sedd. <sup>32</sup> Yuda ak Silas it gannaaw ay yonent lañu woon, wax nañu ak bokk yi lu yàgg, ngir ñaax leen, feddli seen ngëm. <sup>33-34</sup> Ba loolu amee ñu toog fa ab diir, bokk yi door leena ñaanal yoonu jàmm, yiwi leen, ngir ñu dellu ca ña leen yebaloon. <sup>35</sup> Póol ak Barnaba nag des Àncos. Ñu ànd ak ñeneen ñu bare, di jàngle ak a xamle kàddug Boroom bi.

### *Póol ak Silas ànd nañu*

<sup>36</sup> Ba ñu ca tegee ay fan Póol ne Barnaba: «Nan dellu seeti bokk yi ci mboolem dëkk yi nu yégle woon kàddug Boroom bi, ba gis nu ñu def.» <sup>37</sup> Barnaba nag bëggoon ñu yóbbaaale Yowaan, mi ñuy wax Màrk. <sup>38</sup> Teewul Póol jàpp ne gannaaw Yowaan Màrk moomu moo leen wacoon ca Pamfili te àndul woon ak ñoom ci liggéey bi, yóbbaaale ko warul.

<sup>39</sup> Mbir mi nag mujje dëngoo bu metti, ba ñu teqlikoo. Barnaba ànd ak Yowaan Màrk, dugg gaal, jëm Sippar. <sup>40</sup> Póol

† 15:14 15.14 Simon mooy Piyeer ba tey.

moom, taamu Silas, daldi ànd ak moom dem, gannaaw ba leen bokk ya dénkee Boroom bi ciw yiwam. <sup>41</sup> Ci kaw loolu mu jaare diiwaani Siri ak Silisi, di ñaax mboolooy gëmkat ña.

## 16

### *Timote fekksi na Póol ak Silas*

<sup>1</sup> Ci kaw loolu Póol agsi Derbe, teg ci dëkk ba ñuy wax Listar. Ndeke ab taal-ibee nga fa bu ñuy wax Timote; ndeyam di gëmkatub Almasi bu bokk ci askanu Yawut, baayam di Gereg. <sup>2</sup> Muy ku rafet seede ci biir bokki dëkk yooyu di Listar ak Ikoñum. <sup>3</sup> Póol nag bëgg mu ànd ak moom, ba tax mu yóbbu ko, xarfal\* ko ndax Yawut ya dëkke woon gox ba, ngir ñépp a xamoon ne baayam ab Gereg la. <sup>4</sup> Ba loolu amee ñuy wër dëkk ya, di jottli dogal yi tukkee ca ndawi Yeesu yaak magi Yerusalem, ngir ñu sàmm ko. <sup>5</sup> Mboolooy gëmkat ñi di gëna feddliku ci wàllu ngëm, seeni lim di yokku bés ak bés.

### *Yàlla feeñu na Póol*

<sup>6</sup> Xel mu Sell mi nag tere leena yégleji kàddu gi ca diiwaanu Asi, ba tax ñu jàlli biir diiwaanu Firisi ak Galasi. <sup>7</sup> Ñu dem ba ca kemu Misi, nara jàlli biir diiwaanu Bitini, Xelum Yeesu mayu leen ko. <sup>8</sup> Loolu tax ñu jàlle biir Misi, àkki dëkk ba ñuy wax Torowas. <sup>9</sup> Ci biir loolu am peeñu dikkal Póol ca guddi: mu gis aw nitu Maseduwan taxaw, di ko tinu, ne ko: «Jàllsil Maseduwan, wallusi nu!» <sup>10</sup> Naka la jot peeñu ma, mu daldi nu† bir ne Yàllaa nu yebal ngir nu xamleji foofa xibaaru jàmm bi. Ca saa sa nu fexee jàll ba Maseduwan.

### *Lidi gëm na Almasi ca Filipi*

<sup>11</sup> Ci kaw loolu nu dugge Torowas gaal, jubal dunu Samotaras, jógeeti fa, teereji Neyapolis ca èllëg sa. <sup>12</sup> Nu bawoo fa jàll ba Filipi, dëkku gox ba jëkk ca diiwaanu Maseduwan te di moomeelu Room. Nu toog fa ay fan.

<sup>13</sup> Ba bés sub Noflaay ba taxawee, nu gén ca buntu dëkk ba, ca wetu dex ga, daldi fay gis bérab bu nu foog ne ab jullikaay la. Nu toog fa nag, di waxtaan ak jigéen ña fa daje. <sup>14</sup> As ndaw a nga ca, di déglu; ku ñuy wax Lidi, dëkke Catir, di jaaykatub cuubi tànnéef yu xonq curr, te di jaamukatu Yàlla. Boroom bi nag ubbi xolam, ba mu teewlu bu baax kàdduy Póol. <sup>15</sup> Ci kaw loolu ñu sóob ko ci ndox, moom ak waa kèram. Mu daldi nu ñaan, ne nu: «Ndegam ab gëmkatub Sang bi ngeen ma jàppe, agsileen, dal ak man ca sama kër.» Mu soññ nu ba nu nangu.

### *Tëj nañu kaso Póol ak Silas*

<sup>16</sup> Noo doon dem jullikaay ba, ab surga bu jigéen bu rabu gisaane jàpp, dajeek nun. Alal ju bare la ay njaatigeem daa jële ci ngisaaneem. <sup>17</sup> Ndaw sa topp ci Póol ak nun, di xaacu, naan: «Nit ñii jaami Yàlla Aji Kawe ji lañu; dañu leen di yégal yoonu mucc.» <sup>18</sup> Noonu la jàppoo ay fani fan, ba Póol mujj xajootu ko. Mu walbatiku ne rab wa: «Maa la sant ci turu Yeesu Almasi, génnal ci ndaw si.» Rab wa daldi gén ca saa sa.

<sup>19</sup> Ba loolu amee alal ja njaatigey ndaw sa yaakaaroon, réer leen, ñu jàpp Póol ak Silas, diri, yóbbu ca pénc ma, fa kanam njiit ya. <sup>20</sup> Ñu taxawal leen fa àttekat ya, ne: «Ñii ñoo yéngal sunu dëkk bi, di ay Yawut <sup>21</sup> yuy xamle aada yoy, nun ñiy waa Room, sañunu koo nangu, sañunu koo jëfe.»

<sup>22</sup> Ci kaw loolu mbooloo ma it dal ci seen kaw; àttekat ya futti seeni yére, daldi santaane ñu dóor leen ay yar. <sup>23</sup> Ñu dóor leen ay yar yu bare, sànni leen ca kaso ba, boole ca jox boroom kaso ba ndigalal wattu leen bu baax. <sup>24</sup> Ndigal loolu nag tax mu sànni leen ca néeg ba gëna ruqe ca kaso ba, jéng leen.

<sup>25</sup> Ba guddi gay xaaj, Póol ak Silas a ngay ñaan, di sàbbaal Yàlla, ñeneen ña ñu fa tëj di leen déglu. <sup>26</sup> Ci kaw loolu suuf jekki yéngu yéngu bu mag ba kenug kaso ba di rëng-rëngi; bunt yépp jekki ubbiku, jéngi

\* **16:3** 16.3 Póol dafa jàpp ne gëmkatub Almasi man naa xaraf ba tey, te du yàq ci ngëmam dara. Moo tax Póol xarfal Timote, ndax xamoon na ne xaraf donj moo manoona tax Timote mucc ci sikkaangey Yawut yi gëm Almasi. † **16:10** 16.10 Li waral nu mooy Luug mi bind *Jëf ya* mooy wax.

ñépp dàjjiku. <sup>27</sup> Boroom kaso ba tiite ciy nelaw, gis bunti kaso bi ubbiku. Mu bocci saamaram, nara xaru, yaakaar ne ña ñu tëj dañoo rècc. <sup>28</sup> Póol nag àddu ca kaw ne: «Bul lor sa bopp, nun ñépp a ngi fi.»

<sup>29</sup> Ba loolu amee boroom kaso ba indilu ab làmp, daldi ne saraax dugg, ne gurub fa kanam Póol ak Silas, di lox. <sup>30</sup> Gannaaw gi mu génne leen ca biti ne leen: «Sang yi, ana lu ma wara def, ba mucc?» <sup>31</sup> Ñu ne ko: «Gëmal Sang Yeesu, daldi mucc, yaak sa waa kër.» <sup>32</sup> Ba loolu amee ñu xamal ko kàddug Sang bi, moom ak waa këram gépp. <sup>33</sup> Mu yóbbu leen nag ci waxtuw guddi woowu, raxas seeni gaañu-gaañu, ñu sóob ko ci ndox ca saa sa, moom ak waa këram gépp. <sup>34</sup> Gannaaw loolu mu yóbbu leen këram, jox leen ñu lekk, tey bégeendoo ak waa këram gépp ci ngëm gi ñu gëm Yàlla.

<sup>35</sup> Ba bët setee, àttekat ya yebal alkaati ya, ñu ne boroom kaso ba: «Ñii, yiwi leen.» <sup>36</sup> Boroom kaso ba àgge Póol ndigal la, ne ko: «Àttekat yi kat ñoo fi yeble, ne ñu yiwi leen. Kon nag man ngeena génn te dem ak jàmm.»

<sup>37</sup> Póol nag ne alkaati ya: «Ñoom ñu dóor nu ci kanam nit ñi, àtteesu nu sax te nu diy gor ci Room gi, rax ci dolli ñu sànni nu ci kaso bi. Léegi ñu bëgg noo dàq ndànk ci biti? Mukk! Nañu ñëw, ñoom ci seen bopp, génne nu.»

<sup>38</sup> Ba mu ko defee, alkaati ya àgge àttekat ya kàddu googu, ñu xam ne ay gori waa Room lañu, tiitaange jàpp leen. <sup>39</sup> Ñu dikk, jéggalu, génne leen ci biti, ñaan leen, ñu génn dëkk ba. <sup>40</sup> Noonu lañu génne kaso ba, dellu kër Lidi. Ñu gise faak bokki gëmkat ña, ñaax leen, doora dem.

## 17

### *Xibaaru Yeesu yëngal na Tesalonig*

<sup>1</sup> Ba mu ko defee ñu jaare dëkk ya ñuy wax Amfipolis ak Apoloni, doora àgg Tesalonig, ga Yawut ya amoon ab jàngu. <sup>2</sup> Póol nag di leen fa fekk, na mu ko baaxoo. Diiru ñetti bési Noflaay, mu di leen waxal ci Mbind mi. <sup>3</sup> Mu di leen tekkil Mbind mi, di leen ci firndeel

ne coonob Almasi ak ndekkiteem manul woona ñàkk. Mu ne leen: «Yeesu mii ma di leen xamal, mooy Almasi.» <sup>4</sup> Ba loolu amee ñenn ca Yawut ya gëm, fekksi Póol ak Silas, ñoom ak Gereg yu bare yu ragal Yàlla, ak jigéen ñu ràññiku ñu bare.

<sup>5</sup> Yawut ya nag am ca kañaan, daldi foraatoo ca mbedd ma ay taxawaalukat, dajale ay gàngoor, ba yëngal dëkk ba. Ñu song kër Yason, di seet Póol ak Silas, ngir yóbbu leen ca waa dëkk ba. <sup>6</sup> Ci kaw loolu gisuñu leen, ñu diri Yason ak yeneen bokki gëmkat ba ca kanam àttekat ya. Ña ngay biral, naan: «Nit ñi tas àddinaa ngii, agsi nañu fi, <sup>7</sup> te Yason a leen dalal. Ñoom ñépp a xëtt ndigali buur Sesaar, te naan am na beneen buur bu ñuy wax Yeesu.» <sup>8</sup> Ba mbooloo ma ak àttekati dëkk ba dégge loolu, dañoo jaaxle. <sup>9</sup> Ba loolu amee ñu feyloo Yason ak ña ca des daan ba ca war, door leena yiwi.

### *Póol ak Silas dem nañu Bere*

<sup>10</sup> Ba mu ko defee bokki gëmkat ña yebal ca saa sa Póol ak Silas ca guddi ga, ñu jëm Bere. Ñu agsi, dem ca jàngub Yawut ya. <sup>11</sup> Waa Bere nag gëna am déggin waa Tesalonig. Ñu gëm kàddu gi, xér ci lool, bés bu nekk ñuy niir Mbind mi, ngir xam ndax la ñu leen di wax noonu la. <sup>12</sup> Ci kaw loolu Yawut yu bare gëm, ñoom ak jigéeni Gereg ñu ràññiku, ak ay góori Gereg ñu bare.

<sup>13</sup> Ba loolu amee Yawuti Tesalonig dégg ne Póol a ngay xamle kàddug Yàlla ca Bere itam. Ñu dikkati, yëngal nit ña, ñu def ay gàngoor. <sup>14</sup> Ca la bokki gëmkat ñi yebal Póol ca saa sa, mu jëm tefes ga, Silas ak Timote ñoom, des ca Bere. <sup>15</sup> Ña dar Póol nag gunge ko ba ca dëkk ba ñuy wax Aten, ñu doora dëpp, jottliji Silas ak Timote kàddug Póol, ngir ñu fekksi ko nu mu gëna gaawe.

### *Póol waare na ca Aten*

<sup>16</sup> Diggante ba Póol di nég Silas ak Timote ca Aten, xolam jeex na ndax dafa gis na dëkk ba yeboo ci jaamu ay tuur. <sup>17</sup> Ci biir loolu muy wax ak Yawut yaak jaamburi ragalkati Yàlla ya ca jàngu ba, di wax it ak waa pénc ma bés bu nekk.

18 Ci kaw loolu ay boroom xam-xam yu bokk ci ngérum Epikur\* ak ngérum Estowisen†, di werante ak moom. Ñenn ña ne: «Kebatukat bii, lu muy wax nii?» Ña ca des dégg Póol di waare xibaaru jàmm bi ci Yeesu ak ndekkiteem, ñu ne: «Daa mel ni ay tuur-tuuraani doxandéem lay waareel.» 19 Ñu jàpp ko nag, yóbbu ko ca èttub àttekaay ba ñuy wax Areyopas. Ñu ne ko: «Ndax man nanoo xam njàngle mu bees mii ngay siiwal, lu mu doon? 20 Ndax li ngay wax kat sunu ngan-gi-nopp la. Nu bégga xam nag loolu lu muy tekki.» 21 Booba waa Aten ñépp, doxandéem ak njuddu-jiréew, xintewuñu lenn lu moy di nettali ak a déglu xew-xew wu bees.

22 Ci kaw loolu Póol taxaw ca digg èttub Areyopas, ne leen: «Yeen waa Aten, gis naa ne ci wet gu nekk ñu farlu ngeen ci diine. 23 Ndax maa doon doxantu, di seet seeni jaamookaay, ba yem ci bu ñu bind mii mbind: “Ñeel yàlla ji nu xamul.” Loolu ngeen di màggal te xamuleen ko nag, moom laa leen di xamal.

24 «Yàlla mi sàkk àddina ak mboolem li ci biiram, di Boroom asamaan ak suuf, dëkkewul màkkaan mu ay loxo sàkk. 25 Te it jariñoowul loxol nit, mbete ku soxla lenn, ndax mooy may ñépp bakkan akug noo, ak lu mu mana doon. 26 Moo sàkke xeeti àddina yépp ci kenn nit, ñu dëkke déndu suuf sépp, te moo leen àppal seeni jamono, réddal leen seen kemi dëkkuwaay. 27 Yàllaa def loolu, ngir xeeti àddina wut ko, làmbatu ba daj ko, ndegam man naa am, doonte sorewul kenn ku nekk ci nun. 28 “Ndax sunu bakkan ak sunu yëngu ak sunug nekk, lépp ci moom la.” Mooy ba tey la ñenn ci seeni woykat ne: “Nun itam aw xeetam lanu.” 29 Ndegam nag xeetu Yàlla lanu, warunoo nirule Yàlla ak lenn luy wurus, mbaa xalis mbaa aw doj te sosoo ci xareñtey nit akum xelam. 30 Yàlla nag jéllale na janti ñàkka xam googa woon,

waaye tey mu ngi woo ñépp, ak fépp fu ñu féete, ngir ñu tuub. 31 Ndaxte Yàlla jàpp na bés bu muy àttee àddina ci dégg, àtte bu nit ki mu taamu di sottali; te loolu Yàlla jox na ci ñépp firnde lu wóor, ba mu dekkalee kooku mu taamu, ndekkite lu dee toppul.»

32 Naka lañu dégg waxi ndee-ndekki, ñenn ña di ko foontoo, ña ca des ne ko: «Dinanu la déglu, nga waxalaat nu ci moomu mbir.» 33 Ba loolu amee Póol bàyyikoo ca seen biir. 34 Teewul mu am ñu ko fekksi, ba mujj gëm; Denis mi bokk ci èttub Areyopas ci la, ak jigéen ju ñuy wax Damaris, ak ñeneen.

## 18

### *Póol tiiñ na waa Korent*

1 Ba loolu wéyee Póol bàyyikoo Aten, dem Korent. 2 Mu daje fa ak Yawut bu ñuy wax Akilas, fekk baax diiwaanu Pont. Muy sooga jóge réewum Itali, ànd ak soxnaam Pirsil, ndax Buur bu mag ba Kélódd moo joxe woon ndigal ne na Yawut yépp génn Room. 3 Póol nag miinante ak ñoom, te fekk ñu bokk benn liggéey, di defarkati xayma ni moom. Loolu tax mu far dal ak ñoom, di liggéey.

4 Ci kaw loolu bésuub Noflaay bu nekk Póol di waare ca jàngu ba, di yee Yawut yi ak Gereg yi. 5 Ba Silas ak Timote dikkee, bàyyikoo diiwaanu Maseduwan, Póol xintewootul lu moy di xamle kàddu gi, di seereel Yawut yi ne Yeesu mooy Almasi. 6 Yawut ya nag gántal, di ko ñàññ, mu yëlëb ay yéreem, misaale ko ne jaanam wàcc na. Mu ne leen: «Yeenay gàddu seen bakkanu bopp. Man set naa ci wecc. Gannaaw-si-tey, ci jaambur ñi dul Yawut laa jëm.»

7 Mu jóge foofa, dem kër jaamburub jaamukatu Yàlla bu ñuy wax Tisyus Yustus, te kërám sèsook jàngu ba. 8 Teewul Kirispus njiitu jàngu ba moom, gëm Sang bi, mook waa kërám gépp. Ñu bare

\* 17:18 17.18 Ngérum Epikur mooy kurélu njànglem Epikur, mi dee 270 at lu jiitu Almasi. Ngérum Epikur dañoo jiital seen bakkan, te fonk bannex. † 17:18 17.18 Ngérum Estowisen kurél la woon, gu njànglem Senon lal. Dee na 265 at lu jiitu Almasi. Ngérum Estowisen ñoo weesale seen bopp yég-yégu yaram mbaa xol yu mel ni bannex mbaa naqar, te di ñaaxe ci muñ gu ànd ak pastéefu boroom.

ci waa Korent a gëm, gannaaw ba ñu déggee kàddu gi, ba ñu sóob leen ci ndox.

<sup>9</sup> Ba loolu amee Sang bi wax ak Póol ag guddi ci biir peeñu, ne ko: «Bul tiit dara, waaye waxal te bul noppi, <sup>10</sup> ndax maa ànd ak yaw, kenn du la song, def la lu bon, ndax xeet wu yaa laa am ci dëkk bii.»

<sup>11</sup> At ak juróom benni weer la Póol toog ci seen biir, di jàngle kàddug Yàlla.

<sup>12</sup> Jant ya Galyon moomee diiwaanu Akayi, Yawut ya dañoo mànkoo, jógal Póol, jàpp ko, yóbbu ca àttekaay ba.

<sup>13</sup> Ñu ne: «Kii dafa juuyoo ak yoon ci ni muy xiire nit ñi ci jaamu Yàlla.»

<sup>14</sup> Póol dem bay àddu, far Galyon ne Yawut ya: «Yeen Yawut yi, su doon ag njubadi mbaa jëf ju aay lool ju ngeen di tawat, kon xel dina nangu ma déglu leen.

<sup>15</sup> Waaye su dee ag dëngoo ci wàllu wax, mbaa ay turi nit, mbaa seen yoonu bopp nag, seetal-leen ko seen bopp. Àtte loolu moom, duma ko nangu.» <sup>16</sup> Galyon daldi leen dàqe ca àttekaay ba. <sup>17</sup> Ci kaw loolu ñépp jàpp Sosten, njiitu jàngu ba, dóor ko ca àttekaay ba, te taxul Galyon yégal ko yaramam.

### *Póol délsi na Àncos gu Siri*

<sup>18</sup> Ba loolu wéyee Póol toogaat na fa fan yu bare, doora tàggtoo ak bokk ya, dugg gaal jëm Siri, ànd ak Pirsil ak Akilas. Fekk na mu watu nel ca teerub Señsere, firndeete ko aw xas wu mu xasoon.

<sup>19</sup> Ba ñu teeree Efes, fa la Póol bàyyi Pirsil ak Akilas. Mu dem ca jàngu ba, ba diisoo fa ak Yawut ya. <sup>20</sup> Ñooñu ñaan ko, mu toogaat fa ab diir, mu gantal. <sup>21</sup> Naka la tàggtoo ak ñoom, ne leen: «Dinaa leen seetsiwaat, bu soobee Yàlla.» Ba loolu amee mu dugg gaal, bàyyikoo Efes, <sup>22</sup> teereji Sesare. Mu dem nag Yerusalem, nuyuji mbooloom gëmkat ña, doora dem Àncos gu Siri.

### *Póol tukki na ñetteel bi yoonam*

<sup>23</sup> Póol toog na Àncos ay fan, jóge fa wër diiwaanu Galasi, teg ca Firisi, di ñaax mboolem taalibey foofa.

<sup>24</sup> Ab Yawut nag bu ñuy wax Apolos te cosaanoo Alegсандри, moo dikoon Efes.

Ku rafet kàddu, te xam Mbind mi lool. <sup>25</sup> Kooku jotoon naa jàng yoonu Sang bi. Mu ànd ak cawarte, di waare ak a jàngle lu wér péññ ci mbirum Yeesu, doonte xam-xamam a ngi yemooon ci sóobeb Yaxya ci ndox. <sup>26</sup> Mu tàmbalee waxe kóolote ca jàngu ba. Pirsil ak Akilas dégg ko, woo ko cig wet. Ñu daldi koy gëna leeralal yoonu Yàlla wi.

<sup>27</sup> Ba mu ko defee Apolos namma jàll ba Akayi, bokk ya rafetlu mébétam. Ñu bind taalibey Akayi, ngir ñu dalal ko. Ba Apolos agsee Akayi, dimbali na lool ña fa yiw may ñu doon ay gëmkat. <sup>28</sup> Ndax fa kanam mbooloo ma la doon tiiñale Yawut ya ay firnde yu mat sëkk, firil leen Mbind mi, ba leeralal leen nàññ ne Yeesu mooy Almasi.

## 19

### *Póol jàngle na ca Efes*

<sup>1</sup> Diir ba Apolos nekkee Korent, Póol a nga jaare ca diiwaan yu tunde ya, ba wàccsi Efes. Mu daje faakay taalibe, <sup>2</sup> ne leen: «Ndax ba ngeen gëmee, jot ngeen ci Noo gu Sell gi?» Ñu ne ko: «Nun de yégunu woon sax ne Noo gu Sell gi am na.» <sup>3</sup> Mu ne leen: «Kon gan sóobu ngeen sóobu?» Ñu ne ko: «Xanaa sóobeb Yaxya\*.» <sup>4</sup> Póol ne leen: «Yaxya, sóobeb tuubeel la daan sóobe ci ndox, di waxaale askan wi ne leen ñu gëm kiy topp ci moom, te mooy Yeesu.» <sup>5</sup> Ba ñu déggee loolu lañu sóobu ci ndox ci turu Sang Yeesu. <sup>6</sup> Ba leen Póol tegee loxoom, Noo gu Sell gi dikkal leen, ñu tàmbalee làkk yeneen làkk, boole ci di biral waxyu. <sup>7</sup> Taalibe yooyu yépp a ngi wara tollu ci fukk ak ñaar.

<sup>8</sup> Ci kaw loolu Póol dem ca jàngu ba, diiru ñetti weer muy waaree aw fit, di waxal waa jàngu ba kàddu yu mata gëm ci mbirum nguugug Yàlla. <sup>9</sup> Ñenn ña nag të ticc, baña gëm, di ñaññ Yoon wi ca kanam mbooloo ma. Ba loolu amee Póol bàyyi leen, daldi berook taalibe ya, bés bu nekk muy diisoo ak ñoom ca kërug jàngukaay gu Tiranus. <sup>10</sup> Loolu moo wéy diiru ñaari at, ba mboolem waa diiwaanu

\* 19:3 19.3 Seetal ci Màrk 1.4.

Asi dégg kàddug Sang bi, muy Yawut, di Gereg.

### *Waa Efes waaru nañu*

<sup>11</sup> Ba mu ko defee Yàlla di def ay kéemaan yu mag yu mu sottale loxoy Póol. <sup>12</sup> Mujj na sax ñuy yóbbul jarag yi ay kaala aki taraxlaay yu laaloon yaramu Póol, ba lu leen daloon teqlikook ñoom, rab wu leen jàppoon, ba leen.

<sup>13</sup> Ci kaw loolu ay Yawut yuy wër di faj ku rab jàpp, tàmbalee roy, di tuddal ñi rab jàpp turu Sang Yeesu, naan rab yi: «Maa la dàq ci turu Yeesu, mi Póol di xamle.» <sup>14</sup> Ña doon def jëf jooju ñooy juróom ñaari doom yu góor yu Sewa, sarxalkatub Yawut bu mag. <sup>15</sup> Loolu lañu doon jéem bés, rab wu bon wa ne leen: «Yeesu déy, xam naa ko. Póol it xam naa ko. Waaye yeen, yeenay ñan?» <sup>16</sup> Ci kaw loolu nit ka rab jàpp song leen, teg leen loxo ñoom ñépp, pamti-pamtee leen, gaañ leen, ba ñu dawwe kër ga yaramu neen.

<sup>17</sup> Mboolem Yawut yaak Gereg ya dëkke Efes nag yég mbir moomu, tiitaange dikkal leen ñoom ñépp, daraja ju réy doxe ca ñeel turu Sang Yeesu. <sup>18</sup> Ba mu ko defee ñu bare ca gëmkaat ña dikk, biral seenug tooñ, daldi xamle yu bon ya ñu daan jëfe. <sup>19</sup> Ci biir loolu ñu bare ñu daan ñeengo, boole seeni téere, indi, lakk ko fa kanam ñépp. Ba ñu xaymaa njég la, tolloo naak juróom fukki junniy poseti daraxma (50 000).

<sup>20</sup> Noonu la kàddu gi lawe ba féete kaw ci kàttanu Boroom bi.

### *Efes yëngu na*

<sup>21</sup> Gannaaw ba loolu wéyee, Póol ci ndigalal Noo gu Sell gi am mébétum jaare diiwaani Maseduwan ak Akayi, teg ca Yerusalem. Mu ne: «Gannaaw bu ma àggee foofu, war namaa jàll ba Room itam.» <sup>22</sup> Mu daldi yebal fa Maseduwan, ñaari jaraafam, Timote ak Eràst, moom mu toogaat ab diir ca Asi.

<sup>23</sup> Jant yooyu nag yemook yëngu-yëngu bu réy bu amoon ci mbirum Yoon wi. <sup>24</sup> Ku ñuy wax Demetirus, ab téggu xalis, moo daan defar jëmme jaamookaay yu ndaw yu tuur mi ñu dippee Artemis, muy

njariñ lu réy ci liggéeykat yiy nawleem. <sup>25</sup> Mu woo leen, ñook ña farewoo liggéey yu ni mel, ne leen: «Bokk yi, xam ngeen ne liggéey bii, ci la sunu teraanga nekk. <sup>26</sup> Yeena gis nag mbaa ngeen déggal seen bopp ni Póol moomu di naxee ba fàbbi mbooloo mu bare, te du ci Efes gii rekk, daanaka Asi gépp la: Mu naay: “Yàlla yu loxol nit sàkk du yàlla.” <sup>27</sup> Loolu, jéllale naa ni mu mana gàkkale sunu liggéey bii, waaye dina tax ñu teddadil jaamookaayu Artemis, yàlla ju jigéen ju mag ji, ba darajaam mujj neen, moom mi mboolem Asi ak àddina sax di jaamu.»

<sup>28</sup> Mbooloo ma dégg kàddu yooyu, daldi mer lool, di xaacu naan: «Artemis mu Efes màgg na!» <sup>29</sup> Ci kaw loolu dëkk bépp ne kër-kër, ne këpp. Ñu jàpp Gayus ak Aristàrk, waa Maseduwan ya àndoon ak Póol ca tukki ba. Ñu daldi riirandoo wuti èttu jonantekaay ba. <sup>30</sup> Póol nag bégga teewi ca kanam mbooloo ma, taalibe ya bañ. <sup>31</sup> Ñenn ñay ay soppeem ca kàngami nguur ga sax, yónnee nañu ca moom, di ko àrtu ngir mu baña foye bakkanam, di dem ca èttu jonantekaay ba. <sup>32</sup> Ndaje maa nga rëb lool, ñii xaacu ne lii, ñee xaacu, ne lee, te ña ca épp sax xamuñu lu waral ndaje ma. <sup>33</sup> Ci kaw loolu mbooloo ma am lu ñu digal ku ñuy wax Alegsàndar, Yawut ya jañax ko ca kanam, mu daldi tàllal loxoom, ngir layool boppam ca digg mbooloo ma. <sup>34</sup> Naka lañu xam ne ab Yawut la, kàddu ga di benn, jibe ca mbooloo mépp, diiru ñaari waxtu. Ñu naan: «Artemis mu Efes màgg na!»

<sup>35</sup> Ndawal buur la nag mujj giifal mbooloo ma, ne leen: «Yeen waa Efes, ana moos ku xamul ne Efes gii mooy dëkk biy wattukatub jaamookaayu Artemis, ak jëmmam ji wàcce asamaan?» <sup>36</sup> Loolu maneesu koo weddi. Kon nag, dangena wara teey, baña sañaxuy def lenn. <sup>37</sup> Ndax nit ñii ngeen fi indi, teddadiluñu ay jaamookaay te waxuñu lu ñàkke sunu yàlla kersa. <sup>38</sup> Su dee Demetirus ak liggéeykat yi ànd ak moom ñoo jote ak kenn ci ñoom, ay ètti layoo am na fi, ay kàngam a ngi fi di àtte. Nañu fa layooji.

<sup>39</sup> Su dee leneen lu ngeen di sàkku nag, ca ndajem àtte ba lees koy lijjantee. <sup>40</sup> Ndax kat repp nanu ñu jiiñ nu ag fippu, te amul lenn lu nu mana lay, ba lewal mii ndaje.» Naka la wax loolu, daldi tas mbooloo ma.

## 20

### *Póol jaare na Maseduwan ak Geres*

<sup>1</sup> Ba yëngu-yëngu ba jeexee, Póol daa woo taalibe ya, ñaax leen, ba noppi tàggtoo ak ñoom, jóge fa, dellu diiwaanu Maseduwan. <sup>2</sup> Ba loolu amee mu wër gox yooyu, ñaaxe gëmkat ña kàddu yu takku, doora dem réewum Geres. <sup>3</sup> Mu toog fa ñetti weer. Gannaaw gi muy waaja dugg gaal jëm Siri, far pexe mu ko Yawut ya lalal feeñ, mu fomm, nara dellu jaareji Maseduwan. <sup>4</sup> Ña àndoon ak moom ñoo di Sopater doomu Pirus ma cosaanoo Bere, ak Aristàrk ak Segond, waa Tesalonig ya, ak Gayus, ma dëkke Derbe, ak Timote, ak waa diiwaanu Asi ya, Tisig ak Torofim. <sup>5</sup> Nnooñu ñoo jiitu, di nu nég ca dëkk ba ñuy wax Torowas. <sup>6</sup> Nun nag ba màggalu Yawut, ga ñuy wax Mburu mu amul lawiir weesee lanu dugge gaal fa dëkk ba ñuy wax Filipi, am juróomi fan ca yoon wa, door leena fekkxi ca Torowas, toog fa juróom ñaari fan.

### *Póol dekkal na nit ca Torowas*

<sup>7</sup> Ca ndoortel ayu bés ba, naka lanu daje ngir dagg mburum bokkoo mi\*, Póol, yékkati kàddu, di wax ak gëmkat ñi, ndax fekk na mu béggoona dem ca èllëg sa. Wax ja nag law ba guddi ga xaaj. <sup>8</sup> Ay làmp yu baree nga woon ca néegu kaw taax ma ñu daje woon. <sup>9</sup> Ci biir loolu ab xale bu góor bu ñuy wax Ètikus ma nga tooge kéméju palanteer ba. Ngëmment dab ko, te kàddug Póol ga yàgg lool. Ay nelaw nag jàpp waa ji, mu xàwwikoo ca ñetteelu taax ma, daanu, ñu yékkati ko, fekk mu dee.

<sup>10</sup> Ba loolu amee Póol wàcc, tiim ko, daldi koy téye ci diggante ñaari loxoom, ne leen: «Buleen jaaxle, mu ngi dund.»

<sup>11</sup> Mu yéegaat, dagg mburu ma, lekk. Waxaat na lu yàgg, ba njël jot, mu sooga

dem. <sup>12</sup> Xalelu góor ba moom, nit ñaa ko yóbbu, muy dund, seen xel doora dal bu baax.

### *Póol tàggtoo naak gëmkati Efes*

<sup>13</sup> Nun nag nu jiituji, dugg gaal jëm Asos, fa nu nara yebe Póol, na mu ko mébéte woon, ndax Póol ci boppam moo xalaatoona jaare ci yoonu suuf si ba fekkxi nu fa. <sup>14</sup> Ba mu nu fekksee ca Asos, nu yeb ko, daldi dem Mitilen. <sup>15</sup> Nu jóge fa, tëmb ba agsi ca èllëg sa fa janook dunu Kiyos, bés ba ca topp, nu àgg Samos, bés ba ca toppaat, nu àgg Mile. <sup>16</sup> Ndax Póol daa fasoon yéney teggi Efes, ngir baña yàgg diiwaanu Asi; booba day gaawtu, ngir màggalu Pàntakot man koo fekk Yerusalem.

<sup>17</sup> Fa Mile la Póol yónnee ca Efes, woolu magi gëmkat ñi. <sup>18</sup> Ba ñu dikkee, mu ne leen:

«Yeen ci seen bopp xam ngeen bu baax, ca bés ba ma jëkke teg sama tànk Asi, ba tey jii, ni ma masa doxale ak yeen, <sup>19</sup> di jaamoo Boroom bi ag woyof gu mat sëkk, ci biiri rongooñ ak nattu yu ma pexey Yawut yi teg. <sup>20</sup> Te amul lenn lu leen di jariñ, lu ma leen nëbb, bañ leen koo xamal; jàngal naa leen ci mbeddum buur ak ci biir kër yi. <sup>21</sup> Dénk naa Yawut yi ak Gereg yi ne leen, ñu tuub ci Yàlla te gëm sunu Sang Yeesu.

<sup>22</sup> «Léegi maa ngii ci curgag Noo gu Sell gi, di dem Yerusalem, lu ma fay dal sax, xawma ci dara, <sup>23</sup> lu moy li ma Noo gu Sell giy seereel ci dëkkoo dëkk, ne ma ay jéng aki coono moo may nég. <sup>24</sup> Waaye sama bakkan soxalu ma, xanaa ma bey samaw sas, ba sottal liggéey, bi ma Sang Yeesu dénk, te mooy seedeel xibaaru jàmm bu yiwu Yàlla wi.

<sup>25</sup> «Léegi nag xam naa ne mboolem yeen ñi ma dugoon ci seen biir, di yégle nguurug Yàlla, dootuleen ma gis. <sup>26</sup> Moo ma tax di seere bésuub tey, ne wàccoo naak ñépp, deesu ma topp benn bakkan. <sup>27</sup> Ndax mboolem li Yàlla nar bañuma leen cee xamal lenn. <sup>28</sup> Wattuleen nag seen bopp, wattu mboolem gétt, gi leen

\* **20:7** 20.7 Dagg mburu: moom la gëmkat ñi aadawoo woon, bu ñuy lekk. Dagg mburu, moom lañu mujji di wooye Reeru Sang bi.



Noo gu Sell gi sàmmlloo, te ngeen foral mbooloom gëmcati Yàlla, mi Yàlla jote deretu boppam. <sup>29</sup> Man nag xam naa ne gannaaw bu ma demee, ay bukki yu ñàng dinañu tàbbi ci seen biir te duñu ñéebu gétt gi. <sup>30</sup> Ci seen biir sax la aw nit di jóge taxaw, di wax ndéngte, ngir xiirtal taalibe yi, ba ñu topp leen. <sup>31</sup> Teewluleen nag te fàttliku ne diiru ñetti at, guddi ak bëccëg, masumaa noppee àrtu kenn ku nekk ci yeen, bay jooy sax.

<sup>32</sup> «Léegi nag, dénk naa leen Yàlla ak kàddug yiwam, gi leen mana dooleel, dencal leen seen muur ci biir mboolom nit ñi ñu sellal. <sup>33</sup> Du lenn lu ma xemmem ci kenn; du xalis, du wurus du koodaay. <sup>34</sup> Yeen ci seen bopp, xam ngeen ne, muy sama soxlay bopp, di yoy ñi ànd ak man, sama loxo yii laa liggéeye lu ma ko faje. <sup>35</sup> Nu nekk laa leen wone ne sunu wartéef mooy nu liggéeye noonu bu baax, ngir dimbali néew-doole yi, tey fàttliku kàddug Sang Yeesu, ga mu noon: “Nangu, joxee ko ëpp barke.”»

<sup>36</sup> Naka la wax loolu, daldi sukkandoo ak ñoom ñépp, ñaan. <sup>37</sup> Ba loolu amee ñépp jooyoo jooy yu metti, laxasu ko, foon ko. <sup>38</sup> La leen yokk aw tiis nag mooy kàddu ga mu leen wax, ne leen: «Dootuleen ma gis.» Ba mu ko defee, ñu gunge ko ba ca gaal ga.

## 21

### *Póol jublu na Yerusalem*

<sup>1</sup> Gannaaw ba nu tàggoo ak ñoom, nu dugg gaal, jubal dunu Kos, teg ca teeri ca dunu Rodd, jóge fa, jàll ba Patara. <sup>2</sup> Nu gis fa gaal gu jëm Fenisi, dugg ca, daldi teddi. <sup>3</sup> Naka lanu dem ba séen dunu Sippar, wacc ko nag sunu wetu càmmoñ, jublu diiwaanu Siri, ba teeri Tir, ndax fa la gaal gi waroona yebbi ab yebam. <sup>4</sup> Nu seet taalibey foofa, ba gis leen, toog ak ñoom juróom ñaari fan. Ci biir loolu Noo gu Sell gi di leen xiir ci wax Póol, ne ko bumu dem Yerusalem. <sup>5</sup> Ba nu fa amee fan yooyu lanu fa bàyyikoo, dem, ñu gunge nu, ñoom ñépp, ñook seeni soxna ak seeni doom. Nu dem ba génn

dëkk ba, daldi sukk ca tefes ga, ñaan. <sup>6</sup> Ba loolu amee nu tàggtoo ba noppi, dugg ca gaal ga, ñoom ñu ñibbi.

<sup>7</sup> Nun nag ba nu jógee Tir, danoo ñoqli ba teeri Patolemayis. Nu nuyoo faak bokki taalibe ya, toog faak ñoom benn fan. <sup>8</sup> Ca ëllëg sa nu dem ba àgg Sesare. Nu dem kër Filib, xamlekatu xibaaru jàmm, bi bokk ci Juróom ñaar ñi\*. Nu dal ak moom. <sup>9</sup> Filib moomu amoon na ñeenti doomi janq yuy waxe ay waxyu.

<sup>10</sup> Gannaaw ba nu fa toogee ay fan, ab yonent bu ñuy wax Agabus jóge Yude, agsi. <sup>11</sup> Mu dikk ba ci nun, jël ngañaayal Póol, yeewe ko ay tãnkam aki loxoom, daldi ne: «Noo gu Sell gi dafa wax ne: “Ki moom ngañaay lii, nii la ko Yawut yiy yeewe ca Yerusalem, jébbal ko jaambur ñi dul Yawut.”»

<sup>12</sup> Ba nu dégge loolu, nun ak waa gox baa tinu Póol, ne ko bumu dem Yerusalem. <sup>13</sup> Ci kaw loolu Póol ne: «Lu ngeen di def nii, di jeexal sama xol? Waxuma ñu yeew ma rekk, waaye dee sax nangu naa koo def ci Yerusalem ngir Sang Yeesu.» <sup>14</sup> Naka lanu wax, wax, mu të, nu bàyyi, daldi ne: «Kon nag yal na Boroom bi sotal coobareem!»

<sup>15</sup> Gannaaw fan yooyu lanu fabu, ngir dem Yerusalem. <sup>16</sup> Ci biir loolu ay taalibe yu dëkke Sesare ànd ak nun, yóbbu nu fa nu wara dali, ca kër ku ñuy wax Manason, ma cosaano Sippar, te di taalibe bu yàgg.

### *Póol agsi na Yerusalem*

<sup>17</sup> Ba nu agsee Yerusalem nag, bokki taalibe ya bége nañu noo dalal. <sup>18</sup> Ca ëllëg sa Póol ànd ak nun, seeti Yanqóoba, fekk mag ñépp a nga fa teew. <sup>19</sup> Póol nuyook ñoom, ba noppi benn-bennalal leen jëf, ji Yàlla sottale liggéeyam ci biir jaambur ñi.

<sup>20</sup> Ñu dégg ca, daldi sàbbaal Yàlla, ba noppi ne ko: «Mbokk mi, xoolal ñaata junniy Yawut a doon ay gëmkat, te ñoom ñépp di ñu xér ci yoonu Musaa. <sup>21</sup> Noo dégg nag sab jëw, ñu ne dëddu yoonu Musaa mooy li ngay jàngal mboolom Yawut yi dëkk ci biir jaambur ñi, naan

\* **21:8** 21.8 Juróom ñaar ña ñooy ñi doon séddale ndimbalu mbooloom gëmkat ña ca Yerusalem. Seetal ci 6.5.

leen buñu xarfal seeni doom, te buñu topp sunuy aada. <sup>22</sup> Lu ciy peXe nag? Ndax kat duñu umple ne dikk nga. <sup>23</sup> Léegi daal, dangay def li nu lay wax nii: nu ngi feek ñeenti nit ñu am lu ñu xasal Yàlla. <sup>24</sup> Ñoom ngay àndal, nga bokk ak ñoom setlu, te nga gàddu seen peyu wateefu bopp, wi boroom xas wu ni mel aadawoo. Su ko defee ñépp ay xam ne li ñu lay jêwe, dara amu ci, te yoonu Musaa ngay jêfe, di ko sàmm. <sup>25</sup> Naka gëmkat ñi dul Yawut nag, bind nanu leen li nu dogal, ne leen ñu moytu ñam wu ñu sarxal ay xërëm, moytoo lekk deret ak yàppu mala mu ñu tuurul deretam, te moytu powum séy.»

<sup>26</sup> Ca èllëg sa Póol ànd ak nit ña, bokk ak ñoom setlu, dugg ca kër Yàlla ga. Mu daldi xamle bés ba seen àppu setlu di mat, ba jooxe ba ci war génn, ñeel kenn ku nekk ci ñoom.

### *Jàpp nañu Póol*

<sup>27</sup> Ba àppu juróom ñaari fan yay waaja jeex, Yawut ya jóge diiwaanu Asi gis Póol ca kër Yàlla ga. Ñu yëngal mbooloo mépp, jàpp ko, <sup>28</sup> di xaacu naan: «Wallee, bokki Israyil! Waa jii, mooy kiy wër fépp, di waare ñépp kàddu gu safaanook njariñal xeet wi, ak yoonu Musaa ak bérab bii. Rax ci dolli mu indi ci kër Yàlla gi ay Gereg, ba sobeel bérab bu sell bii.» <sup>29</sup> Booba Torofim mu Efes la ñu gisoon ca dëkk ba, mu ànd ak Póol, ñu yaakaar ne Póol da koo yóbbu ca kër Yàlla ga. <sup>30</sup> Ba loolu amee dëkk ba bépp màbb, nit ña ne kër-kër, ne këpp, ñu jàpp Póol, génne ko kër Yàlla ga rekk, daldi tēj bunt ya.

<sup>31</sup> Naka lañu koy wuta rey, ñu àgge njiital gàngooru Room ba yore kilifteef ga, ne ko Yerusalem gépp salfaañoo na. <sup>32</sup> Ca saa sa mu ànd ak ay dag, ak njiiti takk-der, ne jaas ca biir mbooloo ma. Yawut ya nag gis njiital gàngoor ga ak dag ya, daldi dakkal yar ya ñu doon dóor Póol.

<sup>33</sup> Ci kaw loolu njiit la agsi, jàpp ko, daldi santaane ñu jéngé ko ñaari càllala. Ba loolu wéyee mu laajte, ne: «Kii ku mu doon, ak lu mu def?» <sup>34</sup> Ñenn ca mbooloo ma xaacu ne lii, ña ca des ne laa. Ñolñol ja nag tax manu caa xam dara lu leer. Mu

daldi santaane, ñu yóbbu ko ca biir tata ja. <sup>35</sup> Ba Póol àgge ca dëggastali tata ja, mbooloo ma daa sànju ak doole, ba takk-der ya mujj fab Póol, gàddu ko. <sup>36</sup> Ndax booba mbooloo mu réy a ko topp, di xaacu naa: «Na dee!»

### *Póol layoo na ak Yerusalem*

<sup>37</sup> Naka lañu koy waaja dugal ca tata ja, Póol ne njiitu gàngoor ga: «Ndax man naa laa wax baat?» Mu ne ko: «Ndeke dégg nga gereg?» <sup>38</sup> Kon du yaay waayu Misra jooju yëngaloon dëkk bi ci fan yii, te yóbbu woon ñeenti junniy Bóomkat ya (4 000) ca màndiñ ma?» <sup>39</sup> Póol ne ko: «Man de ab Yawut laa, di as goru Tàrs, dëkk bu ñàkkul tur ba ca diiwaanu Silisi. Dama lay ñaan, nga may ma, ma wax ak mbooloo mi.» <sup>40</sup> Mu may ko. Póol taxaw ca dëggastal ya, tàllal mbooloo ma loxo, ñu ne selaw. Mu wax ak ñoom ci yawut, ne:

## 22

<sup>1</sup> «Yeen bokk yi, yeen samay baay, dégluleen léegi li ma leen di wax.» <sup>2</sup> Ba ñu déggee yawut ya muy waxe ak ñoom, ñu gën ne xerem.

Póol ne leen: <sup>3</sup> «Man ab Yawut laa, juddoo Tàrs ca diiwaanu Silisi, yaroo ci dëkk bii. Ci keppaaru Gamalyel laa jàngé, njàng mu dëppoo bu mat sèkk ak sunu yoonu maam. Ma doonoon ku xér ci Yàlla ni mboolem yeen ñii tey. <sup>4</sup> Yoon wii tey, daan naa fitnaal ñi ko gëm ba sabab seenug dee. Yeew naa góor, yeew jigéen, tējlu leen kaso. <sup>5</sup> Sarxalkat bu mag bi, ak mboolem kurélu mag ñi man nañu ma cee seede. Ci ñoom sax laa nangoo woon bataaxal bu jëm ca bokki Yawut ya ca Damaas, ga ma jëmoon, ngir yeewe fa gëmkati Yoon wii nekkoon foofa, ba indi leen Yerusalem, ngir ñu mbugal leen.

<sup>6</sup> «Yàlla def ma topp yoon wa, ba jub Damaas ci digg bëccëg rekk, ag melax gu mag jekki fettaxe asamaan, ne ràyy fi ma wër. <sup>7</sup> Ma ne dàll fi suuf, daldi dégg baat bu ma ne: “Sóol, Sóol, lu tax nga di ma bundxatal?” <sup>8</sup> Ma ne ko: “Sang bi, yaa di kan?” Mu ne ma: “Man maay Yeesum Nasaret, mi ngay bundxatal.” <sup>9</sup> Ñi ma àndaloon gis nañu leer gi, waaye ki

wax ak man, xamuñu li mu wax. <sup>10</sup> Ma ne ko: “Sang bi, nu may def?” Sang bi ne ma: “Jógal dem Damaas, dees na la wax foofa mboolem li ñu la sas, nga def ko.” <sup>11</sup> Gisatuma woon dara ndax leeraayu melax ga; ña ma àndal ñoo ma mujj wommat, ba ma agsi Damaas.

<sup>12</sup> «Ku ñuy wax Anañas nag ma nga woon ca Damaas. Ku am diiney yoonu Musaa te rafetub jëw ci biir mboolem Yawuti dëkk ba. <sup>13</sup> Mu dikk taxaw fi sama wet, ne ma: “Mbokk mi Sóol, gisal na woon.” Ca saa sa, may gis na woon, di ko xool. <sup>14</sup> Mu ne ma: “Sunu Yállay maam moo la dencal céru ràññee coobareem, ak gis Aji Jub ji, dégg ko, muy wax ak yaw. <sup>15</sup> Ndax li nga gis, dégg ko, yaa koy seedeel nit ñépp. <sup>16</sup> Léegi nag, looy nég? Jógal, ñu sóob la ci ndox, nga set, teqlikook say bàkkaar, te tudd turu Yeesu.”

<sup>17</sup> «Yàlla def, gannaaw ba ma délsee Yerusalem, ma doon ñaan ca kër Yàlla ga, daldi daanu leer. <sup>18</sup> Ma gis Sang bi, mu ne ma: “Gaawal, daw génn Yerusalem, li nga may seedeel, duñu ko nangu.” <sup>19</sup> Ma ne ko: “Sang bi, ñoom ci seen bopp xam nañu ne jàngu ci kaw jàngu, maa fa daan tëjlu ak a cawlu ñi la gëm. <sup>20</sup> Te it ba ñuy tuur deretu Eccen, sa seede ba, man it maa nga fa woon, juboo caak ñoom, te ña ko rey, maa leen doon wattul seeni yére.” <sup>21</sup> Mu ne ma: “Demal, man, fu sore laa lay yebal ca ña dul Yawut.”»

### *Póol as goru Room la*

<sup>22</sup> Ba ba muy wax loolu, mbooloo maa nga koy déglu. Ba ñu déggee kàddu yooyu lañu xaacu ne: «Jëleleen ko ci kaw suuf! Ku mel ni kii yeyoowula dund!» <sup>23</sup> Ña ngay yuuxoo, di sànni seeni yére, tibb suuf, callmeeru. <sup>24</sup> Ci kaw loolu njiitu gàngoor ga santaane, ñu dugal Póol ca tata ja te laaje ko ay yar, ngir xam lu waral ñu di ko yuuxoo noonu. <sup>25</sup> Naka lañu ko yeew ngir dóor ko ay kàccri, mu ne njiitu takk-der ba fa taxaw: «As goru Room bu yoon dabul, mbaa am nga sañ-sañu dóorlu ko?»

<sup>26</sup> Njiitu takk-der ba dégg loolu, daldi dem ba ca njiital gàngoor ga, xamal ko ko,

ne ko: «Li ngay def nag? Nit kii as goru Room la!» <sup>27</sup> Njiital gàngoor ga dikk, ne Póol: «Yaw wax ma, ndax as goru Room nga?» Mu ne: «Waaw.» <sup>28</sup> Mu ne ko: «Man de xalis bu bare laa jënde sañ-sañu doon as goru Room.» Mu ne ko: «Man nag moom laa judduwaale.» <sup>29</sup> Ña ko doon waaja laaje ay dóor nag dând ko ca saa sa. Njiital gàngoor ga it tiit na, ba mu yégee ne Póol as goru Room la, te fekk mu yeewlu ko.

### *Póol taxaw na ca kurélu àttekati Yawut ya*

<sup>30</sup> Ca èllëg sa nag njiital gàngoor ga bëgga am lu ko leer nàññ ca la Yawut ya jiiñ Póol. Mu yiwi ko, woolu sarxalkat yu mag ya, ak mboolem kurélu àttekat ya. Ci kaw loolu mu indi Póol, taxawal ko ci seen kanam.

## 23

<sup>1</sup> Ba loolu amee Póol xool jàkk waa kurél ga, ne leen: «Bokk yi, man de xel mu dala dal laa masa jëfe fi kanam Yàlla, ba bésuub tey jii.» <sup>2</sup> Anañas sarxalkat bu mag ba nag sant ña taxaw ca wetu Póol, ne leen: «Fél-leen gémminam.» <sup>3</sup> Póol ne ko: «Fél la yaw, moom la Yàlla di waaj, jinigalkat bee, mbete miir bu ñu weexal! Yaa ngi toog, topp yoon, di ma àtte, te teewul nga xëtt yoon, di ma dóorlu!» <sup>4</sup> Waa géew ba ne ko: «Sarxalkatub Yàlla bu mag bi ngay xas nag?» <sup>5</sup> Póol ne leen: «Bokk yi, xawma woon ne mooy sarxalkat bu mag bi, ndax bindees na ne: “Sa kilifag askan, bu ko wax naka-su-dulnoonu.”»

<sup>6</sup> Fekk na Póol xam ne lenn ca kurél gaa nga bokk ca ngérum Sadusen ya, ña ca des bokk ca ngérum Farisen ya. Mu daldi àddu ca kaw ca biir géew ba, ne: «Bokk yi, man de ab Farisen laa, di doomu Farisen; li ñu may àttee nag mooy sunu yaakaar ak sunu ngëm gi nu bokk ci mbirum ndee-ndekki.»

<sup>7</sup> Naka la wax loolu Farisen yaak Sadusen ya tàmbalee werante, ba mbooloo ma xàjjalikoo. <sup>8</sup> Ndax Sadusen yi dañu ne ndee-ndekki ak malaaka ak rab, dara amu ci, te Farisen yi ñoom, yooyu yépp lañu déggal.

<sup>9</sup> Ci kaw loolu coow lu réy jib. Ñenn ca firikati yooni làngu Farisen ya, ne bërét, àddook doole, ne: «Gisunu lenn lu bon ci nit kii. Ku xam ndax aw rab a wax ak moom, mbaa malaaka?» <sup>10</sup> Xuloo ba nag gëna tàng, ba njiital gàngoor ga mujj ragal ñu sèxétoo Póol, ba def ko ay dog. Mu daldi sant lenn ca xarekat ya ñu wàcc, jële Póol ci biir nit ñi, yóbbu ko ca tata ja. <sup>11</sup> Ca guddi ga Sang bi feeñu Póol, ne ko: «Na sa xel dal. Ni nga ma seedeedele ci Yerusalem, noonu nga ma wara seedeedeleji ca Room.»

### *Yawut ya fexeel nañu Póol*

<sup>12</sup> Ba bêt setee Yawut ya daje, daldi xasoo, ne duñu lekkati, duñu naanati, ba kera ñu reyeede Póol. <sup>13</sup> Ña lal peXe moomu, ëpp nañu ñeent fukk. <sup>14</sup> Ñu dem ca sarxalkat yu mag ya ak mag ña, ne leen: «Danoo giñ ne dunu dugalati dara sunu gémmiñ, ba kera nu reyeede Póol. <sup>15</sup> Léegi nag yeen ak kurélu àttekat yi, ñaanleen njiital gàngoor gi, mu indi Póol ba ci yeen, mu mel ni dangeena bégga seetaat bu baax mbiram. Nun nag fagaru nanu, ngir bala moo agsi, nu rey ko.»

<sup>16</sup> Jarbaatub Póol bu góor nag yég tëru ma. Mu daldi dem ba ca tata ja, dugg, yégal ko Póol. <sup>17</sup> Póol woo kenn ca njiiti takk-der ya, ne ko: «Yóbbul xale bu góor bii ba ci njiital gàngoor gi, ndax am na lu mu ko wara wax.» <sup>18</sup> Njiital xare ba ànd ak xale ba, yóbbu ko ca njiital gàngoor ga, ne ko: «Póol, mi ñu tëj, moo ma woo, ñaan ma, ma indil la xalelu góor bii, ndax am na lu mu lay wax.»

<sup>19</sup> Ba loolu amee njiital gàngoor gi jàpp ci loxol xalelu góor bi, wéetoo ak moom, ne ko: «Ana loo may xamal?» <sup>20</sup> Mu ne ko: «Yawut yi ñoo mánkoo ci ñaan la, nga yóbbu Póol ëllég ca kurélu àttekat ya, mu mel ni dañoo bégga seetaat bu baax mbiram. <sup>21</sup> Yaw nag bu leen ko may, ndax lu ëpp ñeent fukk ci ñoom a koy tëru, te xasoo nañu ne dootuñu lekk, dootuñu naan, ba kera ñu ko reyeede. Fagaru nañu ba noppi, di xaar sa ndigal.» <sup>22</sup> Njiital gàngoor ga daldi koy yiwi, ne ko: «Bul wax kenn ne ko àgge nga ma lii.»

### *Yóbbu nañu Póol Sesare*

<sup>23</sup> Ba mu ko defee mu woo ñaari njiiti takk-der, ne leen: «Waajal-leen ñaar téeméeri xarekat ak juróom ñaar fukki gawar ak ñaar téeméeri boroom xeej, ngir ngeen dem Sesare bu juróom ñeenti waxtu jotee ci guddi. <sup>24</sup> Te itam nangeen waajalal Póol daamar, waral ko, ngir yóbbu kook jàmm ba ca Feligsë, boroom réew mi.» <sup>25</sup> Mu bind nag bataaxal bu ne:

<sup>26</sup> Ñeel la yaw boroom réew mi, Feligsë mu tedd mee tedd, bawoo ci man Këlódd Lisiyas, mi lay nuyu. <sup>27</sup> Nit kii la Yawut yi jàppoon, di ko waaja rey, far ma dikk ànd ak lenn ci gàngoor gi, wallu ko, ndax fekk na ma yég ne as goru Room la. <sup>28</sup> Ma béggoona xam nag lan lañu koy sikk, ba tax ma yóbbu woon ko ca seen kurélu àttekat ya. <sup>29</sup> Ma gis nag ne li ñu ko jiiñ, ci seen mbiri yoonu diine rekk la, waaye du lenn lu jar rey, mbaa jéng. <sup>30</sup> Ba ñu ma àggee am tëru mu ko Yawut yi waajaloon nag, ci laa ko yebal ci yaw ci saa si. Jox naa itam ndigal ñi ko sikk, ne leen ñu wax ci sa kanam, gan tooñ lañu ko toppe.

<sup>31</sup> Ba loolu amee xarekat ya def la ñu leen digal, yóbbu Póol ci guddi ba ca dëkk ba ñuy wax Antipataris. <sup>32</sup> Ca ëllég sa takk-der yay deme tànk waññiku, délsi ca tata ja, bàyyi gawar ga, ñu gunge Póol ba mu àgg. <sup>33</sup> Gawar ga àgg Sesare, daldi jébbal boroom réew ma bataaxal ba, jébbal ko Póol itam. <sup>34</sup> Boroom réew ma jàng bataaxal ba, daldi laaj ci ban diiwaan la Póol bokk, ba xam ne diiwaanu Silisi la bokk. <sup>35</sup> Mu ne ko: «Xaaral ba say tuumaalkat itam dikk, ma déglu la.» Mu santaane nag, ñu denc ko ca kër buur Erodd.

## 24

### *Póol layoo na ci kanam boroom réew ma*

<sup>1</sup> Ñu teg ca juróomi fan, Anañas sarxalkat bu mag ba dikk, ànd ak ay mag, ak ab layookat bu ñuy wax Tertul. Ñu jébbalsi boroom réew ma, tuuma ja ñu

teg Póol. <sup>2</sup> Ñu woo Póol, Tertul daldi yékkati kàddug tuuma, ne: «Kilifa gi, ci yaw la jàmm ju yaa ame, te yaa fàggu ay coppite yu ñeel askan wi. <sup>3</sup> Saa su nekk, ak fépp fu nu tollu lanu ràññee loolu, yaw Feligsë mu tedd mi, te di la ko sante lool. <sup>4</sup> Gannaaw buggunu laa yeexal nag, rikk baaxeeti nu, déglu nu tuuti. <sup>5</sup> Waa jii lanu gis ne ab rambaaj la buy sabab réeroo ci biir Yawuti àddina sépp. Moom mooy njiitu ngér mu sikk mi ñuy wax Nasareen ñi. <sup>6-7</sup> Kër Yàlla ga sax jéem na koo teddadil, noo ko jàpp. <sup>8</sup> Yaw ci sa bopp, soo ko laajaatee ci mbir moomu mépp, dinga gis li nu koy jiiñ.» <sup>9</sup> Yawut ya itam dëggal tuuma ja, ne noonee la mbir ma ame.

<sup>10</sup> Ba loolu amee boroom réew ma jox Póol kàddu gi. Mu ne: «Xam naa ne at yu baree ngii ngay àtte xeet wi. Moo tax ma am cawartey layool sama bopp. <sup>11</sup> Man ngaa leerlul sa bopp ne ba ma demee Yerusalem di màggali ak léegi weeseegul fukki fan ak ñaar. <sup>12</sup> Te giseesu ma may werante, mbaa may yëngal mbooloo; du ca kër Yàlla ga, du ca jàngu ya, du ca biir dëkk ba. <sup>13</sup> Te itam li ñu may jiiñ nii tey, manuñu cee firndeel dara. <sup>14</sup> Lenn de man naa la koo nangul. Yoon woowu ñu ne mooy ngér mu sikk, moom laay topp, di ko jaamoo sunu Yàllay maam. Teewul mboolem lu ñu bind ci yoonu Musaa ak téerey yonent yi, gëm naa ko. <sup>15</sup> Yaakaar ji ma am, mooy yaakaar ji ñu am ñoom itam, ne ñi jub ak ñi jubadi, ñépp ay bokk dekki ëllëg. <sup>16</sup> Moo tax fu ma tollu, man itam, may def lu ma man ngir am xel mu dal, wàccoo ak Yàlla, wàccoo ak nit ñi.

<sup>17</sup> «Samay tànkk nag, gannaaw gëjeb at yu bare, moo doon indil samaw askan, ay ndimbal ak ay sarax yu ñeel Yàlla. <sup>18</sup> Ci biir loolu lañu ma fekk ca biir kër Yàlla ga, ma setlu, te du mbooloo, du coow lu ma indaale. <sup>19</sup> Xanaa ñenn Yawuti diiwaanu Asi ña ma fa fekkoon. Nōñoo ma waroona tuumaal fi sa kanam, ndegam am nañu lenn lu ñu ma sikke. <sup>20</sup> Mbaa boog, na nit ñii ci seen bopp wax gan ndëngte lañu ma gisal, keroog ba ma taxawee ca kurélu àttekat ya! <sup>21</sup> Xanaa genn kàddu ga ma taxawoon ca seen

biir, àddu ko ca kaw ne: «Mbirum ndeendekki gi ma gëm, moom lañu may àttee ci seen kanam tey!»

<sup>22</sup> Booba Feligsë jotoon naa am lu ko leer ci mbirum Yoon wi. Mu yiweegum leen nag, ne leen: «Bu Lisiyas njiital gàngoor gi dikkee, dinaa àtte seen mbir.»

<sup>23</sup> Ci kaw loolu mu sant njiitu takk-der ba, ne ko mu may Póol bët, woyofal ko jataayu kasoom te baña aaye ay nitam ñu topptoo ko.

<sup>24</sup> Ñu teg ci ay fan, Feligsë dikk, ànd ak soxnaam Dursil, mi dib Yawut. Mu woolu Póol, déglu kàddoom ci ngëm gi sababoo ci Yeesu Almasi. <sup>25</sup> Naka la Póol wax ci mbirum njub, ak moom sa bakkan, ak àtteb bés-pénc, Feligsë daldi tiit, ne ko: «Léegi, man ngaa demagum, bu ma ko talee, dinaa la wooluwaat.» <sup>26</sup> Ci biir loolu Feligsë yaakaar itam ne jombul mu jële xalisub neexal ci Póol, ba tax mu woolu ko ay yooni yoon, ngir waxtaan ak moom.

<sup>27</sup> Ba ñu ca tegee ñaari at yu mat, ku ñuy wax Porsiyus Festus wuutu Feligsë. Feligsë nag bëggoon lu neex Yawut ya, ba tax mu bàyyi Póol ca kaso ba.

## 25

### *Póol layoo na ca kanam Festus*

<sup>1</sup> Festus nag toogsi diiwaanam ba am fa ñetti fan. Gannaaw loolu mu dem Yerusalem. <sup>2</sup> Sarxalkat yu mag yi, ak njiiti Yawut yi boole ko ak Póol. Ñu dagaan ko, <sup>3</sup> tinu ko ngir mu woolu Póol Yerusalem, ndax fekk na leen lal pexem rey ko ca yoon wa. <sup>4</sup> Festus itam ne leen Póol a nga ñu tēj kaso ca Sesare, te moom ci boppam, fa la nara gaaw, dellu. <sup>5</sup> Mu ne leen: «Kon nag, na nit ñu am baat ñu bokk ci yeen, ànd ak man, tuumaali waa ji, ndegam am na fenn fu mu tooñe.»

<sup>6</sup> Festus toogaatul ak ñoom lu wees juróom ñett ba fukki fan, doora dellu Sesare. Ba mu agsee ba ca ëllëg sa la toog ca àttekaay ba, joxe ndigal, ñu indi Póol. <sup>7</sup> Ba Póol dikkee, Yawut ya jóge Yerusalem yéew ko, teg ko tuuma yu bare te réy, te manuñu cee firndeel lenn.

<sup>8</sup> Ci kaw loolu Póol weddi tuuma yi, ne: «Muy yoonu Yawut yi, di kër Yàlla gi, di Buur bu mag bi Sesaar, tooñuma ci

kenn.» <sup>9</sup> Festus nag bëgg lu neex Yawut yi, tax mu ne Póol: «Ndax nangu ngaa dem Yerusalem, ñu àttee la foofa ci mii mbir ci sama kanam?»

<sup>10</sup> Póol itam ne ko: «Maa ngi nii taxaw ci kanam àttekaayu Buur Sesaar; te fii lañu ma wara àttee. Yawut ñi nag, defuma leen dara, te yaw ci sa bopp, wóor na la. <sup>11</sup> Su ma tooñee, su ma defee lenn lu dee di àtteem, tinuwma ngir baña dee. Waaye su lenn amul ci li ma ñii di jiiñ, kenn amul sañ-sañu jébbal ma leen. Buur Sesaar nag laa dénk sama bopp!»

<sup>12</sup> Ci kaw loolu, Festus gise ak waa kurél ga, ba noppi ne ko: «Sesaar nga dénk sa bopp, ca Sesaar nga jëm.»

### *Festus diisoo na ak buur Àggripa*

<sup>13</sup> Gannaaw ab diir buur Àggripa ànd ak jigéenam Berenis ganesi Sesare, ngir nuysi Festus. <sup>14</sup> Ba ñu fa amee ab diir, Festus diis Buur Àggripa mbirum Póol, ne ko: «Jenn waay ju ñu tëj kaso la nu Feligsë bàyyee. <sup>15</sup> Ba ma demee Yerusalem, moom la ma sarxalkat yu mag yeek njiiti Yawut yi booleelon, di sàkku ci moom ab daan. <sup>16</sup> Ma ne leen: “Aaday Room daal nanguwul ñu jébbale nit, ngir ñu rey ko, te jëkkula jàkkaarloo ak ñi ko tuumaal, ba mana layal boppam ci mbir mi ñu ko tuumaal.” <sup>17</sup> Ba ñu dikkee fekk ma fii itam, yàggaluma ci dara, ca èllëg sa sax laa toog ca àttekaay ba, daldi joxe ndigal, ñu indi waa ji. <sup>18</sup> Ba tuumaalkat ya taxawee nag, feeñaluñu jenn tuuma ju bopp ci yu bon, yi ma foogoon, <sup>19</sup> xanaa seen yenn yëfi diiney bopp yu ñu juboowul, ak mbirum ku ñuy wax Yeesu mu dee woon, te Póol moomu di dëggal ne mu ngi dund ba tey. <sup>20</sup> Loolu nag jaaxal ma, ba ma laaj ko ndax nangu naa dem Yerusalem, ñu àttee ko fa ci moomu mbir. <sup>21</sup> Póol itam sàkku ñu dencagum ko kaso, tey sàkku ci mbiram, àtteb buur bu tedd bi. Ma daldi joxe ndigal, ngir ñu dencagum ko kaso, ba ma yebal ko ca Sesaar.»

<sup>22</sup> Ci kaw loolu Àggripa ne Festus: «Kooku de, man sax bëgg naa koo déglu.» Festus ne ko: «Bu èllëgee dinga ko dëgg.»

### *Póol teew na ci kanam Àggripa*

<sup>23</sup> Ca èllëg sa Àggripa ak Berenis ànd ak topp mu ràññiku, duggsi ca èttub àttekaay ba, feggook njiiti gàngoor ya, ak kàngami dëkk ba. Festus joxe ndigal, ñu indi Póol.

<sup>24</sup> Ba mu dikkee, Festus ne: «Buur Àggripa, yeen mboolem ñi fi bopp ak nun teew, gis ngeen kii, moom la ma askanu Yawut wépp booleel, muy ca Yerusalem ak fii itam, ñuy xaacu naan: “Kii yel-loowula dundati.” <sup>25</sup> Man nag damaa gis ne deful dara lu jar àtteb dee. Waaye gannaaw moo dénk boppam buur bu tedd bi, man dogu naa ko koo yónnee. <sup>26</sup> Mbiram nag laa amul dara lu ma wóor, ngir ma bind ko sang bi. Moo tax ma indi ko ci seen kanam, rawatina ci sa kanam, Buur Àggripa, ngir gannaaw bu ñu ko dégloo, ma mana am lu ma bind. <sup>27</sup> Ndaxte jállale ku ñu jàpp te tudduloo tuuma yi ñu koy topp daal, lu juunu la ci man.»

## 26

### *Póol layoo na fa kanam Àggripa*

<sup>1</sup> Ci kaw loolu Àggripa ne Póol: «Léegi sañ ngaa waxal sa bopp.» Póol nag tàllal loxoom, layool boppam, ne:

<sup>2</sup> «Buur Àggripa, mbégte laa am ndax dinaa layool sama bopp ci sa kanam tey, ngir tontu mboolem lu ma Yawut yi jiiñ.

<sup>3</sup> Rawatina ba ma xamee ne ku géēju nga ci aaday Yawut, ak werante yi ci seen wàllu yoon. Kon dama lay ñaan rekk, nga muñal ma, déglu ma.

<sup>4</sup> «Mboolem fi ma jaare ci samag dund, dale ko ca samag ndaw, ca ndoorte la, ba ma nekkee ca sama biir xeet, ak ca Yerusalem, lépp, mboolem Yawut yi xam nañu ko. <sup>5</sup> Xam nañu ma bu yàgg, te su leen neexee ñu seede ne ngérum Farisen mi gëna diis ci sunu diine, ci laa masa bopp. <sup>6</sup> Sama taxawaayu tey ci èttub àttekaay bii nag, mooy yaakaar ji ma am ci dige bi Yàlla digoon sunuy maam. <sup>7</sup> Te mooy dige bi fukki giir ak ñaar yu bànni Israyil di séentu mu sottil leen, ba tax guddi ak bëccëg ñu xér ci jaamu Yàlla. Yaakaar jooju nag, Buur, moo tax Yawut

yi tuumaal ma! <sup>8</sup> Ana lu leen taxa jàpp ci seen biir ne xel nanguwul Yàlla di dekkal ñi dee?

<sup>9</sup> «Man ci sama bopp, gântal lu ma man turu Yeesum Nasaret, sama warugar laa ko defoon. <sup>10</sup> Def naa ko ci Yerusalem, te it bare na ñu sell ñu ma tëjlu ci kaw sañ-sañ bu ma sarxalkat yu mag yi jagleel, te saa yu ñu leen tegaan àtteb dee, dama daan biral kàddu gu leen àtte ñàkkal. <sup>11</sup> Jàngoo jàngu laa leen daan tege mbugal ay yooni yoon, ngir xàccloo leen. Maa daan sànju ba xaabaabal ci seen kaw, topp leen ba ci biir dëkki jaambur yi.

<sup>12</sup> «Yoon wu mel noonu laa doon dox, jëm Damaas, ci ndigalal ak ndénkaanel sarxalkat yu mag yi. <sup>13</sup> Ba ma demee ba wetu digg bëccëg, Buur, ca laa gis ag melax gu leer ba raw jant bi, fettaxe asamaan, ne ràyy fi ma wër, maak ñi ma àndal. <sup>14</sup> Nu ne dàll fi suuf. Ma dégg baat bu ma wax ci làkku yawut, ne ma: “Sóol, Sóol, lu tax nga di ma bundxatal? Dangay sonal sa bopp rekk, mbete fas wu manula wonjeetu ba wéq dëgël bu koy jam.”

<sup>15</sup> «Ma ne ko: “Sang bi, yaa di kan?” Sang bi ne ma: “Man maay Yeesu, mi ngay bundxatal. <sup>16</sup> Jógal taxaw nag. Dama laa feeñu ngir def la ngay sama surga, ngir nga di ma seedeel peeñum tey, ak peeñu yi ma lay feeñooji ëllëg. <sup>17</sup> Maa lay musal ci askanu bànni Israyil, ak ci jaambur ñi ma lay yebal, <sup>18</sup> ngir nga xippil leen, jële leen ci lëndëm, tàbbal leen ci leer, sepee leen ci noteelu Seytaane, indi leen ci Yàlla, ñu am njéggalug bàkkaar, am cér ci biir nit ñi ñu sellal ndax ngëm, gi ñu ma gëm.”

<sup>19</sup> «Kon nag buur Àggripa, peeñum asamaan moomu, woruma ko. <sup>20</sup> Waaye li dale Damaas ak Yerusalem ba ci réewum Yawut gépp, ba ca ñi dul Yawut, ñoom ñépp yégal naa leen seen wartéef, muy tuubeel ak wañniku ci Yàlla, ak jêf ju tuubeel yellool. <sup>21</sup> Loolu moo waral Yawut yi jappe ma ca kër Yàlla ga, di ma fexee rey. <sup>22</sup> Ndimbalal Yàlla nag moo ma may may dund ba tey jii, di ko seedeel ci mag ak ndaw, te waxuma lenn lu moy

la yonent ya ak Musaa waxoon ne dina am. <sup>23</sup> Dañu noon fàww Almasi jaar ci ay coono te mooy jékka dekki, ba siiwtaane leer gu jolli, ñeel bànni Israyil ak jaambur ñi itam.»

<sup>24</sup> Naka la layool boppam noonu, Festus àddu ca kaw, ne ko: «Póol, yaw dangaa dof! Sa njàng mu réy mee la dofloo.»

<sup>25</sup> Póol ne ko: «Dofuma de, Festus mu tedd mi, dëgg gu ànd ak xel kay, laay biral. <sup>26</sup> Lii ma wax, buur bi xam na ko, moo tax ma ñeme koo wax ci kanamam, ndax bir na ma ne, amul lenn lu ko ump ci lii, ngir du cib ruq la xewe. <sup>27</sup> Buur Àggripa, xanaa gëm nga yonent yi? Xam naa xéll ne gëm nga.»

<sup>28</sup> Àggripa nag ne Póol: «Nga defe ne man nga maa gaawa def noonu ab gëmkatub Almasi?» <sup>29</sup> Póol ne ko: «Mu gaaw, mu yeex, waxuma yaw rekk, waaye yaak mboolem ñi may déglu laay ñaan Yàlla, ngeen fekksi ma ci lépp, lu moy callala yii ñu ma jéng!»

<sup>30</sup> Ci kaw loolu buur bi ak boroom réew mi jóg, ñook Berenis ak ña ñu toogal.

<sup>31</sup> Ña ngay dem, te naa ca seen biir: «Kii kat deful dara lu jar dee mbaa ay jéng.»

<sup>32</sup> Àggripa moom ne Festus: «Kii kay su dénkuloon mbiram Sesaar, nu man koo yiwi.»

## 27

### *Póol dugg na gaal, jëm Room*

<sup>1</sup> Ba loolu wéyee ñu dogu noo dugal gaal, jëme nu réewum Itali. Ñu teg Póol ak ñeneen ñu ñu tëjoon, ci loxool njiitu takk-der bu ñuy wax Yulyus, bokk ci mbooloom xarem buur bu mag bi. <sup>2</sup> Nu dugg gaalu dëkk ba ñuy wax Àddramit tey jaareji teeruy Asi, daldi tàbbi biir géej, Aristàrk jenn waay ju dëkke Tesalonig ca diiwaanu Maseduwan, ànd ak nun.

<sup>3</sup> Ca ëllëg sa nu teeri Sidon; Yulyus nag baaxe Póol, may ko mu dem ci ay xaritam, ngir ñu topptoo ko. <sup>4</sup> Nu jóge fa, dellu géej, ngelaw li soflu nu, nu leru tefesu Sippar, jaare wet gu nu fegoo ngelaw li. <sup>5</sup> Ci kaw loolu nu jàll géej, gi janook diiwaani Silisi ak Pamfili, daldi teeri Mira ca Lisi. <sup>6</sup> Foofa nag njiitu takk-der ba gis

gaal gu jóge Alegsàndiri, jëm Itali, mu dugal nu ca. <sup>7</sup> Ba loolu amee nuy deme ndànk ay fani fan; sonn nanu lool doora jub Kanidd, waaye ngelaw li mayu nu nu teer. Nu leri tefesu Keret, jaare wet gu nu fegoo ngelaw li, janook Salmon. <sup>8</sup> Sonn nanu lool bala noo romb foofu, doora agsi fa ñuy wax Neex Teeru, te dend ak dëkk ba ñuy wax Lase.

<sup>9</sup> Fekk na nag nu yàgg ca yoon wa, ba tollu ci jamono ju tukkib géej aaytal, ndax fekk na Koorug Yawut\* wees. Loolu tax Póol digal leen ne: <sup>10</sup> «Bokk yi, gis naa ne yoon wii loraange ak yàqule gu réy la. Waxuma gaal gi ak li mu yeb, waaye sunuy bakkan sax xaj na ci.» <sup>11</sup> Teewul njiitu takk-der ba sobental waxi Póol, déggal dawalkat ba ak boroom gaal ga. <sup>12</sup> Te itam teeru boobu neexul wona lollikoo. Loolu waral ña épp ca waa gaal ga mànkoo ci jóge fa, dellu géej, te fexe nu ñu àgge Fenigsë, ngir lollikoo fa. Mooy teerub dunu Keret bi jublu sowub suuf ak sowub kaw.

### *Ngëlen sàqi na*

<sup>13</sup> Ci kaw loolu ngelawal bëj-saalum wal ndànk, ñu njort ne man nañoo sottal seen peXe. Ñu wëgg diigal, daldi tafoo tefesu Keret. <sup>14</sup> Teewul nes tuut ngelaw lu réy lu ñuy wax Penkub kaw, riddee ca dun ba. <sup>15</sup> Gaal gi buubu, manatula dékku ngelaw li, ba nu mujj bayliku, daldi yal. <sup>16</sup> Nu leri nag dun bu tuuti bu ñuy wax Koda, jaare wet gu nu fegoo ngelaw li, teg ci sonn lool doora téye loocob rawtu bu gaal gi. <sup>17</sup> Ñu yéegge looco ba, daldi jël ay buum yu ñu laxas ca yaramu gaal ga, dàbblee ko ko. Ci kaw loolu ñu ragala ngiroji ca beeñ bu ñuy wax Sirt, ba tax ñu sànni diigal, ngir yeexal gaal ga, daldi yalal. <sup>18</sup> Ca èllëg sa ngelaw la wéye noo pamti-pamtee, ba ñu mujj wàññi ca yebu gaal ga, sànni biir géej. <sup>19</sup> Ca gannaaw èllëg sa, seen loxoy bopp lañu jële yenn jumtukaayi gaal ga, sànni. <sup>20</sup> Ay fani fan jant beek biddiww yi ne meñ, te ngelaw

liy riddi rekk, ba nu noppee yaakaar ne dinanu mucc.

<sup>21</sup> Loolu nag fekk na ñu gëjoona lekk. Póol daldi taxaw ca seen biir ne: «Bokk yi, su ngeen yégoon déggal ma, baña jóge Keret, ba moyu loraange gii ak yàqule gii. <sup>22</sup> Léegi nag dama leen di ñaax, ngir ngeen dalal seen xel, ndax kenn ci yeen du ñàkk bakkanam, gaal gi rekk ay yàqu. <sup>23</sup> Ndax malaakam Yàlla ji ma moom, te ma di ko jaamu, moo ma dikkal biig. <sup>24</sup> Mu ne ma: “Póol, bul tiit; fàww nga taxawi fa kanam Sesaar, te it Yàlla moo la baaxe muccug mboolem ñi nga àndal ci gaal gi.” <sup>25</sup> Kon nag, bokk yi, dalal-leen seen xel, ndax gëm naa Yàlla, xam naa ne ni mu ko waxe, ni lay ame. <sup>26</sup> Du ñàkk aw dun wu nu lufeji.»

### *Gaal ga tas na*

<sup>27</sup> Ca fukkeelu bés baak ñeent, nu ngay yal-yalee fu ne ca géēju Adiratig; ba guddi ga xaajee mool ya njort ne nu ngay jegesi ab tefes. <sup>28</sup> Ñu sànni nattukaay ba biir géej, gis ndox ma xóote ñaar fukki dayo, xawa yemook ñeent fukki meetar. Ñu demati tuuti, sànniwaat ko, daldi gis ndox ma xóote fanweeri meetar, xawa yemook fukki dayo ak juróom. <sup>29</sup> Ci kaw loolu ñu ragala lufeji bérab bu ami doj, ba tax ñu sànnëe ca geenu gaal ga, ñeenti diigal, tey ñaan jant fenke leen. <sup>30</sup> Teewul mool ya ñoom di fexee raw, daldi dem ba yoori loocob rawtu ba biir géej, tey taafantoo ne ay diigal lañuy sànnëe ca boppu gaal ga. <sup>31</sup> Póol nag ne njiitu takk-der ba ak xarekat ya: «Ñii bu ñu desul ci gaal gi, yeen dungeen raw.» <sup>32</sup> Ca la takk-der ya dog buum ya téye looco ba, bàyyi, mu wéy.

<sup>33</sup> Naka la jant di waaja fenk, Póol ñaax ñépp, ngir ñu lekk; mu ne leen: «Fukki fan ak ñeent a ngii, yeena ngi toog, lekkuleen, sexuleen dara. <sup>34</sup> Dama leen di ñaax nag ngir ngeen lekk, ndax noonu donñ ngeen mana rawe. Du genn kwar sax guy rote ci boppu kenn ci

\* **27:9** 27.9 Koorug Yawut, ca fukkeelu fanu juróom ñaareelu weer wa lay am, mu yemook sàttumbar, jàpp oktoobar. Mooy bésu Njotlaay bi. Bés boobu la sarxalkat bu mag ba daan yóbbu deretu jur fa bérab bu sell baa sell, ngir Yàlla baal bànni Israyil seeni bàkkaar. Bés bu sella sell la woon, bu ñu daan yendoo woor. Seetal ci *Sarxalkat* yi 16.



yeen.» <sup>35</sup> Loolu la wax, daldi jël mburu, sant Yàlla ci kanam ñépp, ba noppi dagg, lekk. <sup>36</sup> Ba loolu amee, ñépp dellu sawar, daldi lekk ñoom itam. <sup>37</sup> Ña nekkoon ca gaal ga ñépp ñaar téeméer ak juróom ñaar fukk ak juróom benn (276) lañu. <sup>38</sup> Ñu lekk ba suur, daldi sànni pepp ma biir géej, ngir woyofal gaal ga.

<sup>39</sup> Ba bët setee, xàmmiwuñu réew ma, waaye ab catu tefes lañu séen. Ñu fas yéene caa teerali, ndegam manu na. <sup>40</sup> Ba mu ko defee ñu dagg diigal ya, wacc biir géej, yiwiwaale goj ya téye joowu yay dawal gaal ga. Ci kaw loolu ñu firi wiiru kanam ga, wacce ak ngelaw la, nu wuti tefes ga. <sup>41</sup> Teewul ñu dal fu ñaari ndaw daje, ci ab tundu beeñ, gaal ga luf. Boppu gaal ga nuur ca suuf sa, yëngootul, geenu gaal ga tas ndax dooley gannax ya.

<sup>42</sup> Ba loolu amee takk-der ya nara rey ña ñu tëj, bala ñoo féey, ba raw. <sup>43</sup> Njiitu takk-der ba nag namma rawale bakkanu Póol, ba tax mu aaye loolu. Mu sant ñi mana féey, ne leen ñu jékka sóobu, wuti tefes ga. <sup>44</sup> Ña ca des nag, topp ca, ñii langaamoo ay dénkk, ñee, tojiti gaal ga. Noonu la ñépp mujje jot tefes ga ci jàmm.

## 28

### *Póol gane na dunu Màlt*

<sup>1</sup> Gannaaw ba nu rawee, nu yég ne dun ba Màlt lañu koy wax. <sup>2</sup> Waa réew ma nag laaye nu biir lool. Fekk na mu tàmbalee taw, ànd akub sedd. Ñu taalal nu am njaar, dalal nu nun ñépp. <sup>3</sup> Póol daldi taxan aw say, di ko teg ca taal ba, jaan génne ca ndax tangoor wa, màtt ko ba taq ci loxoom. <sup>4</sup> Waa réew ma gis jaan ja langaamoo loxol Póol, ñu naan ca seen biir: «Nit kii kay ab bóomkat lay doon, ndegam moo rëcce géej, te taxul Ndogal may ko mu dund.» <sup>5</sup> Teewul Póol yëlëb jaan ja ca sawara sa, te dara jotu ko. <sup>6</sup> Nit ña nag di ko xoole yaram wu newi, mbaa mu jekki ne dàll, dee. Naka lañu xool lu yàgg ba gis ne dara jotu ko, ñu xalaataat, daldi ne Póol yàlla la.

\* **28:11** 28.11Kastor ak Polugsë: ñoo doon seexi Sës, yàllay Gereg yi. Ñoom lañu gëm ne ñoo daan musal waa géej.

<sup>7</sup> Ca wetu tefes googee nu teere nag, fa la toolub kilifag dun ba féete woon, ñu di ko wax Publiyus. Mu dalal nu, ganale nu ngan gu neex diiru ñetti fan. <sup>8</sup> Fekk na baayu Publiyus a nga tëdd ndax tangooru yaram ak biiru taññ. Ci biir loolu Póol dem seeti ko, ñaanal ko, teg ko ay loxoom, mu wér. <sup>9</sup> Ba loolu amee jarag ya ca dun ba dikk, daldi wér ñoom itam. <sup>10</sup> Teraanga yu bare terale nañu nu ko fa, te ba nuy dem, jox nañu nu la nu soxla.

### *Àgg nanu Room*

<sup>11</sup> Gannaaw ba nu fa amee ñetti weer lanu dugg gaal gu lollikoo woon ca dun ba. Gaal gaa nga bàyyikoo woon Alegsàndiri, di xàmmikoo jëmme tuur ya ñuy wax Kastor ak Polugsë\*. Nu daldi tàbbiwaat biir géej. <sup>12</sup> Nu teeri dëkk ba ñuy wax Sirakus, toog fa ñetti fan. <sup>13</sup> Nu jóge fa, leru tefes ga, ba agsi Resiyo. Ca èllëg sa ngelawal bëj-saalum jóg, nu daldi àgg teerub Pusol ci ñaari fan. <sup>14</sup> Gis nanu fa ay bokki gëmkat, ñu ñaan nu, ba nu toog fa ñoom juróom ñaari fan. Gannaaw loolu nu dem Room. <sup>15</sup> Ba bokki gëmcati Room yégee ne nu ngi dikk, ñoo nu gatandusi ba fa ñuy wax péncu Apiyus ak fa ñuy wax Ñetti dalu gan ya. Ba leen Póol gisee, daa sant Yàlla, daldi gëna sawar. <sup>16</sup> Ba nu dikkee Room nag may nañu Póol, mu am daluwaayu boppam, ab takk-der di ko wattu.

### *Póol waare na ca Room*

<sup>17</sup> Ñu teg ca ñetti fa, mu woolu njiiti Yawuti dëkk ba. Ba ñu dajee, mu ne leen: «Bokk yi, man defuma dara lu dëngook sunuw xeet mbaa sunu aaday maam. Teewul ñu jàppe ma fa Yerusalem, teg ma ci loxoy Room. <sup>18</sup> Ñooñu seet sama mbir, gisuñu ci man tuuma ju yelloo àtteb dee, ñu nar maa bàyyi. <sup>19</sup> Ba Yawut ya bañee nag, amatuma pexe mu dul dénkk sama mbir Sesaar, doonte du lenn lu may toppe samaw xeet. <sup>20</sup> Mbir moomu nag moo tax ma woolu leen, ngir giseek yeen, diisook yeen, ndax yaakaaru bànni Israyil moo waral sama jéng yii.»

<sup>21</sup> Ñu ne ko: «Nun de, du benn bataaxal bu nu jot bu jóge Yude ci sa mbir, te du kenn ci bokk yi, ku dikk wax mbaa mu seedeel la lenn lu bon. <sup>22</sup> Waaye bëgg nanoo dégg ci sa gëmmiñu bopp li nga gëm, ndax li nu xam daal mooy, ngér moomu nga bokk, fu nekk lañu koy diigate.»

<sup>23</sup> Ci kaw loolu ñu jox ko bés, bés ba dikk, ñu bare dikk, fekksi ko ca daluwaayam. Suba ba ngoon mu di leen jàngal, di leen seedeel lu jëm ci nguurug Yàlla, di leen won ci mbirum Yeesu, firnde yu leen gëmloo te tukkee ci yoonu Musaa ak ci yonent yi. <sup>24</sup> Ñenn ña nag gëm la mu wax, ña ca des weddi. <sup>25</sup> Ba ñu werantee ca seen biir, bay dem te juboowuñu, Póol teg ca ne leen: «Noo gu Sell gee yeyoon wax lii seeni maam, Yonent Yàlla Esayi jottli. <sup>26</sup> Mu ne: “Demal ci xeet wii, nga ne leen: ‘Yeenay dégloo déglu, dungeen dégg; ngeen xoolee xoole, dungeen gis.’

<sup>27</sup> Xolu xeet wee dërkiis, seeni nopp fatt, ñu gëmm fatuus, ba seeni gët du gis, seeni nopp du dégg, seen xol it du yég, ba ñu tuub, ma wéral leen.”

<sup>28-29</sup> «Xamleen nag ne xibaaru mucc gii tukkee fa Yàlla, yóbbante nañu ko ñi dul Yawut, te ñoom dinañu ko déglu.»

<sup>30</sup> Diiru ñaari at la Póol dal Room ci kërug boppam gu muy fey, di fa àggale mboolem ña koy seetsi. <sup>31</sup> Muy yégle nguurug Yàlla, di jàngle mbirum Sang Yeesu Almasi ci teeyug bakkanam te amul benn gállankoor.

## Bataaxal bi Yàlla may Póol, mu bind ko waa Room

<sup>1</sup> Ci man Póol miy jaamub Almasi Yeesu la bataaxal bii bawoo, man miy ndawam ci kaw woote bu ma tabb, sédd ma sasu xamle xibaaru jàmm bu Yàlla. <sup>2</sup> Xibaaru jàmm boobu Yàlla dige woon lu jiiitu, te yóbbante ko ay yonentam ci Mbind mu sell mi, <sup>3</sup> moo jëm ci Doomam, ji soqikoo ci askanu Daawuda, ci wàllu àddina. <sup>4</sup> Waaye ci wàllu Noo gu Sell gi, mooy ki dogal ba tabb muy Doomu Yàlla ji jagoo doole ndax ndekkiteem, te mooy sunu Sang Yeesu Almasi. <sup>5</sup> Ci Almasi lanu jote aw yiwu doon ay ndaw, ngir nit ñi déggal yoonu ngëm wi, ci biir mboolem xeeti àddina, ngir aw turam. <sup>6</sup> Te yeen ñi ñu woo ci Yeesu Almasi itam, ci ngeen bokk.

<sup>7</sup> Bataaxal bi ñeel na mboolem yeen ña fa Room, di ñu Yàlla sopp, woo leen, ngir ngeen doon ñu sell. Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

### *Póol sant na Yàlla*

<sup>8</sup> Ma doore sant sama Yàlla ci Yeesu Almasi ngir yeen ñépp, ndax seen ngëm siiw na ci àddina sépp. <sup>9</sup> Yàlla mi may jaamoo xol, ci ni may siiwtaanee xibaaru jàmm bu Doomam, moom seere na ne noppiwuma leena fàttliku. <sup>10</sup> Xanaa di saxoo dagaan ci samay ñaan, su ci Yàlla àndee, yoon wu jub wu ma mujj dikke ba ci yeen. <sup>11</sup> Yàkkamti naa leena gis, ba jottli leen mayug yiw gu bawoo ci Noo gu Sell gi, ngir dooleel leen, <sup>12</sup> te loolu mooy ma bokk ak yeen lu dëfal sama xol, dëfal leen, ci seen ngëm ak sama gos.

<sup>13</sup> Bokk yi, bugguma ngeen umple ne ay yooni yoon laa leen mébéta seetsi, ba liggéey ci seen biir lu leen jariñ, ni ma ko defale yeneen xeet; waaye ay gállankoor a ma téye ba tey jii. <sup>14</sup> Muy sama digg ak Gereg yu xay yi, mbaa ñu xayadi ñi, ak ñi rafet xel, mbaa ñi ñàkk xel, am na lu ma war ci ñoom ñépp. <sup>15</sup> Moo tax,

yeen waa Room itam, ma yàkkamti leena àggesi xibaaru jàmm bi.

### *Manooree ngi ci xibaaru jàmm bi*

<sup>16</sup> Awma lu may rus ci xibaaru jàmm bi, ndax kat mooy manoorey Yàlla jiy musal képp ku ko gëm, dale ci Yawut bi, teg ci ki dul Yawut. <sup>17</sup> Ci xibaaru jàmm bi lañu feeñal ni Yàlla di joxe nit ñi àtteb ñu jub, te lépp aju ci ngëm, ca ndoorte la, ba ca njeexital la. Noonu la Mbind mi indee ne: «Ku jub ndax ngëmam mooy dund\*.»

### *Nit ñépp a tooñ Yàlla*

<sup>18</sup> Sànjum Yàlla fa asamaan lay dale feeñ, ba wàcc ci mboolem ngëmadi, ak njubadiy nit ñiy fatt ag dëgg ci biir ag njubadi. <sup>19</sup> Ndaxam lees mana xam ci Yàlla, leer na ci seen biir, nde Yàlla moo leen ko leeralal. <sup>20</sup> Ndax kat, li gisuwul ci Yàlla, te di manooreem gi dul jeex, ak jikko ji mu wéetoo ndax li muy Yàlla, ba àddina sosoo ba tey, xel man na koo ràññee ci ay liggéeyam, te looloo leen taxa ñàkku lay.

<sup>21</sup> Gannaaw ba ñu xamee Yàlla, taxul ñu màggal ko ngir li muy Yàlla, taxul ñu delloo ko njukkal, xanaa réer ci seen xalaati neen, ba seen xel mu wayadi far tàbbi cig lëndëm. <sup>22</sup> Xel mu rafet lañuy jaay ba mujj diy dof. <sup>23</sup> Leeru Yàlla ji dul dee lañu weccee jëmmu nit ki deeyam dul jaas, ak picc, ak boroom ñeenti tànk, ak ndëgmeent.

<sup>24</sup> Moo tax Yàlla bërgal leen ak seen xemmemtéef yu bon yi ci seen xol, ba ñu sóobu ci jëflantey sobe juy teddadil seen yarami bopp. <sup>25</sup> Ñoo weccee dëggu Yàlla, aw fen, di sujjóotal ak a jaamu mbindeef, bàyyi Bindkat bi yelloo cant ba fàww. Amiin.

<sup>26</sup> Loolu moo tax Yàlla bërgal leen ak seen bëgg-bëgg yu teddadi. Seenii jigéen sax dëddu nañu jaxasoo gi leen bindub juddu sédde, ba jublu ci lu woroo ak seen bindub juddu. <sup>27</sup> Naka noonu, góor ñi it noppee jaxasoo ak jigéen, ni leen ko bindub juddu sédde, bay xabtaloo ci seen biir, seen bëgg-bëggi bakkan yu tar; ay góor di séq ak seen moroomi góor jëf ju

\* 1:17 1.17 Seetal ci *Abakug* 2.4.

gàccelu, ba tax leena jot ci seen jëmmi bopp, seen añub réeraange.

<sup>28</sup> Gannaaw ràññee Yàlla jaralu leen dara, Yàlla it bërgal leen ak seen xel mu doyadi, ba ñuy def jooju jëf ju jekkadi.

<sup>29</sup> Dañoo dem ba feese gépp xeetu njubadi, akug mbon, akug bëgge, akug coxor. Noyyeewuñu lu moy kiñaan, ak pexey bóome, ak ñaayoo, akug njublan, ak jëf ju sew. Ay jëwkat lañu it, <sup>30</sup> te di yàqkati der, ñu bañ Yàlla lañu, ñu reew, réy, di téggu, ñu xareñ ci fexe lu bon, te déggadil seeni waajur. <sup>31</sup> Amuñu xel, amuñu kóllère, amuñu xol, amuñu yërmande. <sup>32</sup> Moonte xam nañu xéll ne ñiy jëfe noonu, Yàlla moo daganal àtteb dee ci ñoom, te teewul ñu di ko jëfe, rax ci dolli di farle ñi koy jëfe.

## 2

### *Yàlla mooy àtte*

<sup>1</sup> Yaw nit kiy sikke nag, amoo aw lay, ndax boo sikkee keneen, sa bopp nga sikk, nde yaw miy sikke, jooju jëfin ngay jëfe. <sup>2</sup> Waaye wóor nanu ne àtteb Yàlla bi muy añale ñiy jëfe jooju jëfin, dëgg lay dëppool. <sup>3</sup> Yaw nit kiy sikk ñiy jëfe yooyii, te di ko def, ndax defe nga ne yaw ci sa bopp dinga rècc àtteb Yàlla? <sup>4</sup> Am dangay sofental mbaaxu Yàlla gu réy, akug jéllaleem, akug muñam, ndax ñàkka xam ne li Yàlla namm ci baaxe la, moo di nga tuub?

<sup>5</sup> Waaye sag dëgër bopp, ak sa xol bu tuubadi, ci ngay jóore sànjum Yàlla ci sa kaw bopp, keroog bésub sànj ma, fa àtteb Yàlla bu jub di feeñe. <sup>6</sup> Ca lay fey ku nekk ay jëfam. <sup>7</sup> Ñi saxoo di jéema def jëf ju baax, ngir di ko sàkkoo ndam, ak teraanga, ak texe gu sax, ñooñu, texe gu sax dàkk mooy doon seenub añ. <sup>8</sup> Waaye ñi fétteeral ci seen sàkkuteefi bopp, nanguwuñoo topp liy dëgg, xanaa ag njubadi nag, ñooñu, am sànj ak mer mu ne jippét lañuy yooloo. <sup>9</sup> Njàqare ak musiba daal, mooy dal ci kaw képp kuy def lu bon, te Yawut bi jiitu ci, waaye ki dul Yawut it topp ci; <sup>10</sup> daraja, ak teraanga, ak jàmm nag moo ñeel képp kuy def lu baax, te Yawut bi jiitu ci, waaye

ki dul Yawut it topp ci. <sup>11</sup> Ndax kat xejj ak seen amul fa Yàlla.

<sup>12</sup> Mboolem ñi bàkkaar nag te fekku leen ci yoonu Musaa, yoonu Musaa toppu leen, waaye du leen teree sàнку. Mboolem ñi bàkkaar it, te mu fekk leen ci yoonu Musaa, ci yoonu Musaa lees leen di daane. <sup>13</sup> Ndax kat du déglukati yoonu Musaa lees di joxee àtteb ñu jub fa kanam Yàlla, waaye jëfkati yoonu Musaa lees di joxe nit àtteb ku jub. <sup>14</sup> Jaambur ñi dul Yawut, te amuñu yoonu Musaa, ndegam teewu leena topp bindub juddu, bay jëfe li yoonu Musaa laaj, dafa fekk ñoom ci seen bopp, ñuy seen yoonu bopp, doonte amuñu yoonu Musaa. <sup>15</sup> Noonu lañu wéràle ne jëf ji yoonu Musaa santaane moo binde ci seenub xol, ba seen yég-yégu xol seede loolu. Li koy firndeel it di seen xel miy def leeg-leeg mu sikk leen, leeg-leeg mu dëggal leen. <sup>16</sup> Te noonu lay deme kera bés ba Yàlla di àtte mbiri kumpa yu nit ñi, ci saytub Yeesu Almasi, ni ko sama xibaaru jàmm bi indee.

### *Yoonu Musaa na jariñ ki ko topp*

<sup>17</sup> Ma dikk nag ci yaw miy wuyoo turu Yawut, te yaakaar yoonu Musaa, boole ci di sagoo Yàlla. <sup>18</sup> Yaa xam coobarey Yàlla, te yaa jàngé ci yoonu Musaa, ba xam li am solo dëgg. <sup>19</sup> Yaw mi mu wóor ne yaa di wommatkatub gumba yi, te di leeru ñi ci lëndëm gi, <sup>20</sup> yaa di jànglekatub naataxuuna yi, di sèriñub tuut-tànk yi, gannaaw yaa jagoo ci yoonu Musaa, mboolem luy jëmmu xam-xam, ak lépp luy dëgg. <sup>21</sup> Kon yaw miy jàngle, doo jàngal sa bopp? Yaw miy waare, di aaye sàcc, mbaa doo sàcc? Yaw miy aaye njaaloo, mbaa doo jaaloo? <sup>22</sup> Yaw mi bañ bokkaale, mbaa doo sèxétoo jaamookaayi bokkaalekat yi? <sup>23</sup> Yaa ngi sagoo yoonu Musaa te di ko moy bay teddadil Yàlla! <sup>24</sup> Yeen de yeena tax ñuy ñàkke teggin turu Yàlla ci biir xeeti jaambur yi dul Yawut, te noonu la ko Mbind mi indee.

### *Xaraf na jariñ boroom*

<sup>25</sup> Aaday xaraf nag amal na la njariñ, ndegam sàmm nga yoon wi ko digle. Waaye soo dee moykatub yoon wi, sag

xaraf, ñàkka xaraf lay doon. <sup>26</sup> Kon kay ki xaraful, tey jëfe njub gi yoonu Musaa santaane, ñàkka xarafam, deesu ko ko waññal ag xaraf? <sup>27</sup> Ki xaraful ciw yaramam, te teewu koo sàmm yoonu Musaa, moo lay teg ab daan, yaw mi boole mbindum yoonu Musaa, ak sag xaraf, te teewu la di moykatub yoon wi. <sup>28</sup> Ab Yawut, du ci melo wuy feeñ lees koy nekke, te xaraf it du ci màndarga muy feeñ ciw yaram. <sup>29</sup> Waaye ab Yawut dëgg, kumpag biir xol la koy nekke, xaraf it mbirum xol la; ci xel mi lay sottee, waaye du ci mbindum yoon. Ngërëm la it du ci nit lay jóge, xanaa Yàlla.

### 3

#### *Lu jëm ci jagley Yawut yi*

<sup>1</sup> Kon nag ana lu ab Yawut rawe ci nit ñi? Ak luy njariñal xaraf? <sup>2</sup> Xanaa lu bare, ci wet gu nekk. Li ci jiitu moo di ñoom lañu dénk kàdduy Yàlla. <sup>3</sup> Su ci ñennat ñàkkee kóllëre, ndax seenug ñàkk kóllëre day fanq kóllëreg Yàlla? <sup>4</sup> Mukk kay! Fàww Yàlla wéye di ku dëggu, te ñépp di ay fen-kat, te noonu la Mbind mi indee ne: «Soo waxee, am dëgg, te soo àttee, yey\*.»

<sup>5</sup> Waaye su sunug njubadi fésalee njubteg Yàlla, ana lu loolu mana tekki ci nun? Ma waxe ko nu ko nit mana dëgge; ma ne, kon bu nu Yàlla wàcceelee am sànjam, deful ag njubadeem? <sup>6</sup> Mukk kay! Su njubteg Yàlla matul woon, ana nu muy àttee àddina? <sup>7</sup> Mbaa ñu neeti: «Su fekke ne dëgguteg Yàlla, sama ñàkka dëggu lay gëna kaweel, te loolu di ndamam, kon man, ana lees may joxe àtteb bàkkaarkat?» <sup>8</sup> Ana kon lu tee nit waxe noonee nu soskat yi tuumaale ne nooy wax naan: «Nanu def lu bon, ngir mu jur lu baax»? Ñooñu mbugal lañu yelloo.

#### *Kenn jubul*

<sup>9</sup> Ana kon nun Yawut yi, lu nu gëne ci nit ñi? Du ci lenn! Ndax firndeel nanu ba

noppi ne, muy Yawut bi, di ki dul Yawut, ñépp a ngi ci kilifteefu bàkkaar. <sup>10</sup> Noonu it la Mbind mi indee ne: «Kenn jubul, du kenn sax.

<sup>11</sup> Kenn xeluwul, kenn wutul Yàlla.

<sup>12</sup> Ñépp a lajj ba bokk yàqu yaxeet, Kenn deful lu baax, du kenn sax†!

<sup>13</sup> Seenug boli di bàmmeele bu ne nàpp,

seen làmmiñ di ràbb njublañ,

seeni kàddu aay ni dañaru ñàngóor‡.

<sup>14</sup> Seen gëmmiñ, waxi móolu ak wextan la feese§,

<sup>15</sup> seeni tànk bar ci yoonu tuur deretu jaambur,

<sup>16</sup> te fu ñu jaare yàqute la ak musiba.

<sup>17</sup> Yoonu jàmm, xamuñu ko\*,

<sup>18</sup> te ag ragal Yàlla jegewu leent.‡»

<sup>19</sup> Xam nanu nag ne lépp lu yoonu Musaa wax, ñi ci yoonu Musaa la ko wax, ngir aw lay jeex tàkk, ngir itam mu leer naññ ne àddina sépp a sikk fi kanam Yàlla. <sup>20</sup> Ndax kat deesul jox kenn àtteb ku jub fa kanam Yàlla ndax jëf ju mu def, ngir sàmm yoonu Musaa; solob yoon wi daal, mooy ci lees di ràññee bu baax luy bàkkaar.

#### *Yàlla ubbi na buntu mucc*

<sup>21</sup> Waaye léegi Yàlla moo feeñal nu nit di ame fa kanamam, àtteb njubam gu ajuwul ci yoonu Musaa. Te yoonu Musaa, ak yonent yi seede nañu loolu.

<sup>22</sup> Googu njub fa kanam Yàlla nag, ci gëm Yeesu Almasi lees koy ame, te mboolem ñi ko gëm la ñeel, amul xejj ak seen.

<sup>23</sup> Ndax kat ñépp a bàkkaar, ba jotewuñu leeru Yàlla, <sup>24</sup> te ci yiwu Yàlla wu àndul ak genn pey lees di joxe ñépp àtteb ñu jub, ndax njot gi sottee ci Almasi Yeesu.

<sup>25</sup> Moom la Yàlla tudd muy njot gu ngëm di maye, ci kaw deretam ji tuuru. Noonu la Yàlla firndeele ne njubteem mat na sëkk doonte tanqam lu woon na bàkkaari niti jamono ya woon, <sup>26</sup> nde Yàlla ci biir ag jéllaleem la firndeel njubteem ci janti tey jii, ngir mu leer ne moo wéye njub, te

\* **3:4** 3.4 Seetal ci *Sabóor* 51.6. † **3:12** 3.12 Seetal ci *Sabóor* 14.3; 53.4. ‡ **3:13** 3.13 Seetal ci *Sabóor* 5.10; 140.4. § **3:14** 3.14 Seetal ci *Sabóor* 10.7. \* **3:17** 3.15-17 Seetal ci *Esayi* 59.7-8. † **3:18** 3.18 Seetal ci *Sabóor* 36.2.

képp ku gëm Yeesu, moo koy jox àtteb ku jub.

<sup>27</sup> Kon ana lees di bàkkoo? Dara! Ci lan lañu koy teg sax? Ci jéf ju yoon santaane? Mukk! Xanaa yoonu ngëm donḡ. <sup>28</sup> Ndax jàpp nanu ne ci kaw ngëm lees di jox nit, àtteb ku jub, waaye du ci jëfam ju yoon santaane. <sup>29</sup> Am Yàlla da di Yàllay Yawut yi donḡ? Da dul Yàllay jaambur yi dul Yawut itam? Ahakay, mooy Yàllay jaambur ñeet kay! <sup>30</sup> Gannaaw Yàlla kenn la, mooy jox ñi xaraf, àtteb ñu jub ci kaw ngëm; ñi xaraful it, moo leen di jox àtteb ñu jub ci kaw ngëm. <sup>31</sup> Ndax loolu day tekki ne ngëm lanu jël, neenale ko yoonu Musaa? Mukk! Xanaa dañu koo dëggal kay.

## 4

### *Njubteg Ibraayma du ci jëfam*

<sup>1</sup> Ibraayma sunu maam ci wàllu njureel nag, ana lu nuy wax ne moom la gis ci moomu mbir? <sup>2</sup> Bu fekkoon ne Ibraayma, ci kawi jëfam lees ko jox àtteb ku jub, kon mu man koo damoo, waaye demewul noonu fa Yàlla. <sup>3</sup> Ana lu ci Mbind mi wax? Da ne: «Ibraayma moo gëm Yàlla, ñu waññal ko ngëmam ag njub\*.»

<sup>4</sup> Kuy liggéey, ag peyooram du taxawe ag may, waaye wartéef la. <sup>5</sup> Waaye ki jëful te gëm Yàlla miy jox ab yéefar sax, àtteb ku jub, ngëmam googu, ag njub lees ko koy waññal. <sup>6</sup> Ci moomu mbir la Daawuda doon wax, ba muy biral mbégttem nit ku Yàlla waññal ag njub gu jotewul dara ak ay jëfam. <sup>7</sup> Mu ne: «Mbégte ñeel na ñi ñu jéggal seeni tooñ, ñeel na ñooñu ñu baal seeni bàkkaar.

<sup>8</sup> Mbégte ñeel na ku Boroom bi waññalul ag moyam†.»

<sup>9</sup> Kon moomu mbégte xanaa Yawut yiy xaraf donḡ la ñeel? Ñi xaraful it dañu cee bokkul? Ndax kat danu ne Ibraayma lañu waññal ngëmam ga, ag njub‡. <sup>10</sup> Nan lees ko ko waññale? Gannaaw ba mu xarafee, am ba mu xarafagul? Du gannaaw ba mu xarafee, waaye ba mu xarafagul la.

<sup>11</sup> Gannaaw gi la jagoo màndargam xaraf, mu firndeel àtteb njubam gi ngëmam waral, te fekkul mu xaraf. Noonu la Ibraayma mana nekke maamu mboolem gëmkat ñi. Looloo tax muy maamu mboolem ñi xaraful, te gëm, ndax ñu waññal leen seen ngëm, ab àtteb ñu jub. <sup>12</sup> Looloo tax it Ibraayma di maamu ñi xaraf, te du xaraf gu ñu toppe aada, xanaa ñu boole ca topp ci tànkì ngëm ga sunu maam Ibraayma amoon ba mu xarafagul.

### *Ibraayma gëmoon na digeb Yàlla*

<sup>13</sup> Ndax kat digeb Ibraayma ba sédde Ibraayma àddina si, moom ak askanam§, sàmm gu mu sàmm yoonu Musaa taxul, waaye àtteb njub bi mu jagoo ndax ngëmam, moo ko waral. <sup>14</sup> Nde su dee ñi ci yoonu Musaa la dige bi ñeel, kon ngëm dootu tekki dara, te kon digeb Yàlla ba day neen. <sup>15</sup> Yoonu Musaa daal, am sànj lay jur, te fu yoon wees di sàmm amul, genn moy amu fa.

<sup>16</sup> Kon nag dige Yàlla boobu, ngëm moo ko waral, ngir mu di aw yiw donḡ. Noonu la dige bi doone lu wóor, ñeel ñi soqikoo ci Ibraayma ñépp; du ñi bokk ci yoonu Musaa rekk, waaye ñeel na itam ñi bokk ci ngëmu Ibraayma, miy sunu maam, nun ñépp. <sup>17</sup> Noonu la Mbind mi indee ne: «Maa la def ngay maamu xeet yu bare\*.» Ibraayma mooy sunu maam fi kanam Ki mu gëm, te muy Yàlla miy delloo ñi dee, bakkan, tey woo lu nekkul, mu doon lu nekk.

<sup>18</sup> Ba bunti yaakaar yépp tëjee, Ibraayma moo dese woon yaakaaram, wéye ngëmam, ba doon maamu xeet yu bare, loolu dëppook kàddu ga noon: «Noonu la saw askan di tollu†.» <sup>19</sup> Ngëmu Ibraayma wàññikuwul, doonte ba mu xoolaatee boppam, xam na ne yaramam dee na daanaka, ndax fekk na ay atam xawa tollu ci téeméer, te njurukaayu Saarata it fekk na ko dee. <sup>20</sup> Teewul digeb Yàlla ba la ne jàkk, nàttablewul, gëmadiwul, xanaa dëgërloo dooley ngëmam rekk, sant Yàlla. <sup>21</sup> Dafa wéeroon

\* **4:3** 4.3 Seetal ci *Njàlbéen ga* 15.6. † **4:8** 4.7-8 Seetal ci *Sabóor* 32.1-2. ‡ **4:9** 4.9 Seetal ci *Njàlbéen ga* 15.6. § **4:13** 4.13 Seetal ci *Njàlbéen ga* 12.1-3; 17.5. \* **4:17** 4.17 Seetal ci *Njàlbéen ga* 17.5. † **4:18** 4.18 Seetal ci *Njàlbéen ga* 17.5.

Ibraayma péŋŋ ne li Yàlla dige, man na koo def. <sup>22</sup> Moo tax it, ñu waññal ko ngëmam ag njub. <sup>23</sup> Ba ñu bindee ne ngëmu Ibraayma, moom lees ko waññal àtteb ku jub†, du Ibraayma donŋ la mbind ma ñeel. <sup>24</sup> Nun itam ci lanu; dees na nu waññal sunu ngëm, àtteb ñu jub, nun ñi gëm Ki dekkal sunu Sang Yeesu, <sup>25</sup> mi ñu teg ciy loxo, mu dee ndax sunuy tooñ, ba dekkal ko, ngir nu jagoo àtteb nit ñu jub.

## 5

### *Almasi moo nu jubale ak Yàlla*

<sup>1</sup> Gannaaw nag dees noo jox àtteb ñu jub ci kaw ngëm, jammoo nanu ak Yàlla ndax sunu Sang Yeesu Almasi. <sup>2</sup> Ci ndimbalam lanu ame ngëm ba mana àgg fi yiwu Yàlla wii nu taxaw taxawaay bu dëgër. Te it sunub sag moo di yaakaar ji nuy séntoo ab cër ci leeru Yàlla. <sup>3</sup> Te yemunu ci, xanaa di sagoo sunuy tiis itam, nde xam nanu ne dékku aw tiis mooy taxa muñ; <sup>4</sup> te muñ mooy jur kóllërey biir coono; kóllërey biir coono mooy jur yaakaar. <sup>5</sup> Te yaakaar jooju du tas, ndax cofeelu Yàlla gi baawaan ci sunu xol, ci ndimbalal Noo gu Sell gi mu nu may.

<sup>6</sup> Ndax kat, ba nu amul menn pexem mucc, ca la Almasi deeyal yéefar yi nu doon, ba mu jotee. <sup>7</sup> Barewul ku nangoo deeyal nit ku jub, doonte jombul mu am ku nangoo deeyal ku baax. <sup>8</sup> Waaye Yàlla moom, ni mu firndeete cofeelam ci nun, moo di, ba nu dee ay bàkkaarkat, ca la nu Almasi deeyal!

<sup>9</sup> Gannaaw joxees nañu nu àtteb ñu jub ndax deretam ji tuuru nag, ñaata yoon lees nuy gënatee musal ci am sànj ndax moom? <sup>10</sup> Ndegam ba ñu dee ay bañaaley Yàlla lees nu jubalee deewug Doomam, ñaata yoon lees nuy gënatee musale ag dundam, gannaaw ba ñu nu jubalee ak Yàlla? <sup>11</sup> Te yemunu ci, xanaa di sagoo Yàlla itam ndax sunu Boroom Yeesu Almasi, mi nu jubale ak moom.

*Aadamaa nu xañ bakkan, Yeesu delloo nu ko*

<sup>12</sup> Bàkkaar moo jaare ci kenn nit dugg ci àddina\*, dee jaare ci bàkkaar, dikk, ba dikkal ñépp, ndax ñépp a bàkkaar. <sup>13</sup> Bàkkaar a ngi woon ci àddina ba ca janti yoonu Musaa, waaye deesul waññale bàkkaar te aw yoon amul. <sup>14</sup> Teewul la dale ca Aadama ba ca Musaa, ci kaw àddina sépp la dee doon nguuru, ba ci kaw ñi bàkkaarul noonee Aadama xëtte woon ndigal. Aadama mooy takkn-deeru ki doon dikk.

<sup>15</sup> Waaye ni moyug Aadama deme, yiwu Yàlla demewu ni. Moyug kenn nit, Aadama, tax na ñu bare dee; waaye yiwu Yàlla ak mayug yiw gu kenn nit, Yeesu Almasi, ñaata yoon la gënatee baawaan, ñeel nit ñu bare? <sup>16</sup> Ni njeexitalu tooñu kenn nit deme, laa ne, mayu Yàlla demewu ni. Benn bàkkaar moo waral àtte bi indi mbugal. Waaye moy yu bare moo waral may gi teggi tuuma. <sup>17</sup> Moyug kenn nit ki, ci la dee jaare ci kenn nit kooku, ba falu, kon ñi jot ci xéewalu yiw, ba jagoo àtteb njub, ñaata yoon lañuy gënatee falu ci biir dund gu ñu ame ci keneen nit kiy Yeesu Almasi?

<sup>18</sup> Kon nag noonee moyug kenn jure mbugalu nit ñépp daal, noonu la jenn jëfu njekk† jurale ñépp dundin wu yees ci kaw àtteb njub bu leen jenn jëf ja may. <sup>19</sup> Noonee déggadig kenn nit taxe ñu bare doon ay bàkkaarkat, noonu it la déggug ndigalu kenn nit taxe ñu jox ñu bare àtteb nit ñu jub.

<sup>20</sup> Yoonu Musaa moo dikk ngir fésal barewaayu moy, waaye fu bàkkaar bare, aw yiw gën faa bareeti, <sup>21</sup> ba tax na, noonee bàkkaar doone woon buur, ndax dee gi mu yilife ñépp, ni la aw yiw wuutoo, di buur moom itam, ndax àtteb njub gi aw yiw jural nit ñi, ba jëme leen ci texe gu sax dàkk, ci sunu ndimbalal Boroom Yeesu Almasi.

## 6

### *Bàkkaar yilifatul gëmkatub Yeesu*

† **4:23** 4.23 Seetal ci *Njàlbéen ga* 15.6. \* **5:12** 5.12 Seetal ci *Njàlbéen ga* 3.17-24. † **5:18** 5.18 Seetal ci *Room* 3.25.

<sup>1</sup> Ana lu loolu di tekki nag? Ndax kon danuy wéye bàkkaar, ngir yiwu Yàlla gëna yokku? <sup>2</sup> Mukk kay! Nun ñi ndee tàggale ak bàkkaar ba noppi, ana nu nuy saxootee bàkkaar? <sup>3</sup> Dangeena umple ne mboolem nun ñi ñu sóob ci Yeesu Almasi, cig deeyam lañu nu sóobaale? <sup>4</sup> Ci sóobu googu lañu nu boole ak moom suul, ngir noonee Almasi dekkee ci màggug Baay bi, nun itam nu dekki bay dund dundin wu yees.

<sup>5</sup> Gannaaw dees noo bennale ak moom ci dee gu ñu nirule ak deeyam, dees nuy bennale itam ak moom ci ndekkite lu niru ndekkiteem. <sup>6</sup> Li nu bir moo di nun ña woon démb, ca bantub Yeesu ba lees nu daajaale, ngir xewil sunu yaramu bàkkaar, ba nu noppee doon ay jaam, bàkkaar di sunub sang. <sup>7</sup> Ndax ki dee ba noppi, joxees na ko àtteb ku jub, mu tàggook noteelu bàkkaar.

<sup>8</sup> Gannaaw noo deeyandoo ak Almasi nag, gëm nanu ne nooy dundandoo ak moom. <sup>9</sup> Ndax kat xam nanu ne Almasi mi dekki dootu dee, te ndee manalatu ko dara. <sup>10</sup> Deeyam ga mu dee ca la deeyal bàkkaar benn yoon ba fàww, te dund gi muy dund tey, Yàlla la koy dundal.

<sup>11</sup> Naka noonu, yeen itam jappeleen seen bopp nit ñu deeyal bàkkaar, te di dundal Yàlla, ci Yeesu Almasi. <sup>12</sup> Kon nag bu bàkkaar yilif seen yaramu ndee wii, ba di leen nanguloo ay xemmemtéefam yu bon. <sup>13</sup> Buleen jébbal seeni cér bàkkaar, mu def leen jumptukaayi njubadi; gannaaw yeena dekki bay dundaat, jébballeen Yàlla seen bopp te jébbal ko seeni cér, ngir def leen ay jumptukaayi njub. <sup>14</sup> Ndax kat bàkkaar yilifatu leen, nde du ci kilifteefu yoonu Musaa ngeen nekk, waaye ci aw yiw ngeen tàbbi.

### *Ku gëm Yeesu, ag njub ngay surgawu*

<sup>15</sup> Ba ci lan boog? Ndax kon danuy bàkkaar, gannaaw du ci kilifteefu yoonu Musaa lanu nekk, waaye ci aw yiw lanu tàbbi? Déet kay! <sup>16</sup> Xanaa xamuleen ne képp koo jébbal sa bopp, nangul ko, ab jaamam nga? Yaar ngeen diy jaam, bàkkaar di seen sang, jëme leen ci ndee; mbaa ngeen déggal Yàlla, mu jox leen àtteb ñu jub. <sup>17</sup> Waaye cant ñeel na

Yàlla, nde ay jaami bàkkaar ngeen woon, waaye gannaaw gi, seenub xol ngeen déggale misaalub àlluwa, ji ngeen di ndénkaaneem. <sup>18</sup> Noonu lees leen yiwee, tàggale leen ak noteelu bàkkaar, ngeen doon ay surgay njub.

<sup>19</sup> Ni ko nit mana dégge rekk, ni laa leen woyofalale kàddu gii, ndax seen néew dooley nitu neen. Noonee ngeen jébbale woon seeni cér, def leen ñuy jaami sobe, ak ndëngte gu jur ndëngte, noonu ngeen wara jébbale seeni cér, def leen ñuy jaami njub gu jur sellnga. <sup>20</sup> Ba ngeen dee jaami bàkkaar, teewuleen woona moom seen bopp, ci seen digganteek njub. <sup>21</sup> Seen jëfi démb ja leen gacceel tey, ana njariñ lu mu leen jural? Mujug jëf ja de, seenug dee la doon doon. <sup>22</sup> Waaye tey bi ñu leen yiwee, ba ngeen doon ay surgay Yàlla, ag sellnga la leen loolu jural, te muj ga di texe gu sax dàkk. <sup>23</sup> Ndaxte peyooru bàkkaar mooy dee, waaye yiw wi Yàlla di maye mooy texe gu sax dàkk fi Almasi Yeesu, sunu Boroom.

## 7

### *Yoonu Musaa wàcc na gëmkatub Almasi*

<sup>1</sup> Am, bokk yi, yeen ñi xam yoon wi laay waxal, dangeena umple ne yoon yiliful nit ki lu moy ci giiru dundam? <sup>2</sup> Dafa mel ni ndaw suy séy; li feek jëkkëram di dund, yoon a yeew buumu jëkkëram ci baatam. Waaye su jëkkër ji deeyee, ndaw si teqlikoo na ak yoon wi ko yeewoon buumu jëkkëram. <sup>3</sup> Kon nag, li feek jëkkëru ndaw si di dund, su séyee ak geneen góor, ab jaalookat lees koy wax. Su jëkkër ji deeyee nag, yoon yiwi na ndaw si, te su séyee ak keneen, du doon njaaloo.

<sup>4</sup> Noonu la deme ak yeen itam, bokk yi. Yaramu Almasi wi ngeen bennool, ci ngeen doone ñu deeyal yoonu Musaa. Noonu ngeen doone moomeelu keneen, te kooku mooy ki dekki, ngir nu meññ njariñ lu ñeel Yàlla. <sup>5</sup> Ba nu toppee sunu bakkan, sunu bëgg-bëgg yu bon yi ndigali yoonu Musaa yee, ñoo daan liggéey ci sunuy cér, ngir nu meññ lu nu



jëme ci ndee. <sup>6</sup> Waaye tey ci sunu digg ak yoon wi nu tènku woon, la nu di ñu dee, ba teqlikoo ak moom. Moo tax nu doon ay jaam yu tegoo kilifteef gu yees, gi Noowug Yàlla indi, gannaaw ba nu wàccoo ak kilifteefu mbindu yoonu Musaa ma woon.

*Yoonu Musaa moo wone ne bàkkaar moo yées*

<sup>7</sup> Ana lu loolu di tekki? Xanaa kon yoonu Musaa bàkkaar la? Mukk kay! Waaye yoonu Musaa moo ma xamal luy bàkkaar. Ndax kat su dul woon ak yoon wi ne: «Bul xemmem yëfi jaambur\*,» kon xemmemtéef sax дума xam lu mu doon. <sup>8</sup> Waaye bàkkaar moo jaare buntub ndigalu yoon, ba yee ci man mboolemi xemmemtéef yu bon. Ndax kat, su yoonu Musaa amul woon, bàkkaar di lu dee. <sup>9</sup> Man de, bu jëkkoon, ba ma xamagul yoonu Musaa, teewul woon may dund. Waaye ba yoonu Musaa dikkee, ca la bàkkaar ne xiféet, di dund, <sup>10</sup> man nag, ma dee. Kon ndigalu yoon wi wara jëme ci ag dund, moom ci boppam moo ma mujj jëme ci ndee. <sup>11</sup> Bàkkaar moo ma jekkoo ndigalu yoon, ba nax ma, te ndigalu yoon la ma reye it.

<sup>12</sup> Kon yoonu Musaa lu sell la, ndigalam di lu sell, te jub te baax. <sup>13</sup> Lu baax loolu di yoonu Musaa, xanaa kon moo ma taxa dee? Déet kay! Bàkkaar moo feeñale noonu meloom; moo jëfandikoo lu baax, ba rey ma, ngir ndigalu yoon di jumtukaay bu bàkkaar fésale gépp mbonam gu jéggi dayo.

*Ab gëmkat namm na lu mu tëlee jëfe*

<sup>14</sup> Xam nanu ne yoonu Musaa ci Yàlla la bokk, te man may nitu suuxu neen, dib jaam bu ñu jaay bàkkaar. <sup>15</sup> Xawma sax lu waral may jëfe ni may jëfe; li ma namm, du loolu laay jëfe, waaye li ma bañ, moom laay jëfe. <sup>16</sup> Gannaaw li ma buggul, moom laay def nag, juboo naa ak yoonu Musaa ci dëggal ne yoonu Musaa baax na. <sup>17</sup> Kon nag dootu man maay jëfe noonu, waaye dooley bàkkaar bi ci man la. <sup>18</sup> Xam naa ne man, sama bindu suuxu neen wii, lenn lu baax dëkku ci. Yéene jaa ngeek man, kàttanu jëfe lu baax moo

fi nekkul. <sup>19</sup> Ndax kat du lu baax li ma namma jëfe laay jëfe, waaye lu bon li ma nammul, moom laay jëfe. <sup>20</sup> Te su dee li ma nammul, moom laay def, kon kay dootu man maa koy def, waaye dooley bàkkaar bi dëkk ci man moo koy def.

<sup>21</sup> Takk bi ma ci gis daal mooy lii: bu ma namme def lu baax, lu bon a may teewalsi. <sup>22</sup> Ndaxam ci sama biir xol, yoonu Yàllaa ma neex. <sup>23</sup> Waaye gis naa ci samay cér, weneen yoon wuy xeex ak yoon wi samam xel jubool, te yoon woowo ma jàpp njaam, jébbal ma dooley bàkkaar bi dëkke samay cér. <sup>24</sup> Céy maaka réy aw tiis! Ana ku may wallook sama yaramu ndee wii? <sup>25</sup> Waaye cant ñeel na Yàlla mi nuy walloo jëmmu Yeesu Almasi, sunu Sang.

Kon daal man, ci sama bopp, ci sama wàllu xel, yoonu Yàlla laay surgawu, waaye ci sama wàllu yaramu suux wii, yoonu bàkkaar laay surgawu.

## 8

*Noowug Yàlla moo jiite gëmkat bi*

<sup>1</sup> Kon nag léegi, amul benn daan bu ñeel ñi bokk ci Almasi Yeesu. <sup>2</sup> Ndax kat, dooley Noo giy maye bakkan te nekk ci Almasi Yeesu moo la yiwi, ba nga mucc ci dooley bàkkaar ak ndee. <sup>3</sup> Li yoonu Musaa tële woon ndax néew dooley nitu suuxu neen, mooy lii Yàlla def: Doomam la yónni, mu dikke melow nit, te nit di bàkkaarkat, di suuxu neen, ngir Doomam fajtal mbirum bàkkaar. Yaramu suux wu nit kooku la Yàlla sottale mbugal gi war ci bàkkaar, <sup>4</sup> ngir njub gi yoonu Musaa laaj mana sotti ba mat sékk ci nun, ñi toppatul sunu bindu suux, xanaa Noowug Yàlla.

<sup>5</sup> Ndax kat ñi topp seen bindu suux, mbiri bakkan donj lañu xinte, waaye ñi topp Noowug Yàlla ñoom, mbiri Noowug Yàlla mooy seen xinte. <sup>6</sup> Xintey bakkan nag ci ndee lay jëme, waaye xintey Noowug Yàlla ndund ak jàmm lay jur. <sup>7</sup> Ndaxte boroom xintey bakkan ab noonu Yàlla la, nde déggalul yoonu Yàlla, te

\* 7:7 7.7 Seetal ci Mucc ga 20.17.

manu ko sax. <sup>8</sup> Moo tax ñi wéye seen bindu suuxu neen duñu mana neex Yàlla.

<sup>9</sup> Yeen nag nekkatuleen ci kilifteefu bindu suuxu neen, waaye ci kilifteefu Noo gi ngeen nekk, ndegam kay Noowug Yàllaa ngi màkkaanoo ci yeen. Ku amul Noowug Almasi, kooku du nitam. <sup>10</sup> Su Almasi nekkee ci yeen, seen yaram dina dee moos ndax bàkkaar, waaye du tee seenug noo di dund, ndax àtteb njub bi ngeen am ba noppi. <sup>11</sup> Noowug ki dekkal Yeesu moo màkkaanoo ci yeen. Kon nag ki dekkal Almasi mooy dekkal itam seen yarami ndee, ndax Noowam googu màkkaanoo ci yeen.

<sup>12</sup> Kon nag bokk yi, bor topp na nu, waaye du sunu bindu suux lanu ameel lenn lu nu taxa topp sunu bakkan; <sup>13</sup> Ku topp bakkanam, fàww mu dee, waaye ku rey jéfi yaramam ci ndimbalal Noowug Yàlla, dina texe. <sup>14</sup> Ndax kat, mboolem ñiy dox ci njiital Noo gi, ñooñu ay doomi Yàlla lañu. <sup>15</sup> Mayeesu leen noo gu leen di desloo cig njaam, ba tax leena dellu cig ragal, waaye Noowug doom yu ñu doomoo, moom lees leen may, te looloo nu tax di wooye Yàlla: «Abba\*», mu tekki «Baay.» <sup>16</sup> Te Noowug Yàlla, moom ci boppam, moo mànkoo ak sunu noowug bopp, di seede ne ay doomi Yàlla lanu. <sup>17</sup> Gannaaw ay doom lanu nag, ay boroom cér lanu, ay boroom cér yu Yàlla sédd, cér yu nu bokk ak Almasi, gannaaw noo bokk ak moom ab coono tey, ngir bokk ak moom teraangay èllëg.

### *Teraangay èllëg ñeel na gëmkat ñi*

<sup>18</sup> Jàpp naa ne sunu coonob tey du dara, soo ko xoolee ci teraanga ji ñu nuy feeñalal èllëg. <sup>19</sup> Càkkéefu àddinaa ngi séentu, ndax yàkkamti bés ba doomi Yàlla di feeñ. <sup>20</sup> Ndax kat, càkkéef gépp, li ñuy déggal neenug neen la, te du seen coobare, waaye ki leen ci tënk la neex, ba tax ñuy yaakaar, <sup>21</sup> ñoom ñi bokk ci càkkéef googu itam, ne dees na rengi seen buumi njaam gi leen ndee ak yàqutey yaram ràng, ngir ñu am cér ci goreelug doomi Yàlla yi, am cér ci seen teraanga.

<sup>22</sup> Xam nanu ba fii nu tollu ne mboolem càkkéef gaa ngi binni ndax mitit, ni kuy matu. <sup>23</sup> Te du càkkéef gi rekk, waaye nun ci sunu bopp itam, ci lanu, nun ñi jot ab dawal ci Noo gi, nun ci sunu bopp sax nu ngi binni sunu biir xol, ndax yàkkamtee jot cérú doomi Yàlla, ba sunu njotug yaram mat. <sup>24</sup> Ndax kat sunu mucc, yaakaar la taxaweegum, te yaakaar joo teg sa bët, dootu yaakaar. Li nit ki teg bëtam, nu mu koy yaakaaratee? <sup>25</sup> Li nu gisul kay lanuy yaakaar, di ko séentook a muñe yaakaar ji.

<sup>26</sup> Te itam Noo gi moo nuy dimbali ndax sunug néew doole, nde xamunu sax li jaadoo sàkku ci sunuy ñaan, waaye Noowug Yàlla moo nuy tinule ay onk yu wees kàddug làmmiñ. <sup>27</sup> Te kiy xool li ci biir xol yi, xam na liy xintey Noo gi, nde ni ko Yàlla bégge, ni la Noo giy tinool ñu sell ñi.

<sup>28</sup> Te itam nag xam nanu ne Yàlla mooy def mboolem lu xew, daje ba jur njariñal ñi sopp Yàlla, ñi mu woo, noonee ko ab dogalam namme. <sup>29</sup> Ndax ñooñu Yàllaa leen ràññee woon lu jiitu, te it la mu dogaloon lu jiitu ci ñoom moo di ñu niru Doomam, ngir Doomam di taaw, ci biir rakk yu bare. <sup>30</sup> Ñi Yàlla tuddaloon loolu lu jiitu, moo leen woo itam; ñooñu mu woo, moo leen jox itam àtteb ñu jub; te ñooñu mu jox àtteb ñu jub, moo leen darajaal itam.

### *Cofeelu Yàllaa ngi ci Almasi*

<sup>31</sup> Ana lu nuy waxati nag? Gannaaw Yàllaa ànd ak nun, ku nu manal dara? <sup>32</sup> Moom mi nu bañalul Doomu boppam, xanaa jooxeel nu ko, nun ñépp, ana nu mu nuy baña baaxee gépp yiw, boole ci? <sup>33</sup> Ñi Yàlla taamu, ana ku leen di tuumaal? Yàlla de mooy jox nit àtteb ku jub. <sup>34</sup> Ana kuy tegeb daan? Almasi Yeesu de moo dee, rax ci dolli, mu dekki, te moo toog fa ndijooru Yàlla, di nu fa ñaanal! <sup>35</sup> Ana ku nuy tàggaleek cofeelu Almasi? Du ay nattu, te du njàqare, du it coonoy bundxatal, mbaa ab xiif, mbaa rafle, te du genn aaytéef, ba cib saamar. <sup>36</sup> Noonu la Mbind mi indee ne:

\* 8:15 8.15 Abba baatu arameen la. † 8:36 8.36 Seetal ci *Sabóor* 44.23.

«Yaa tax ñu yendu noo bóom,  
dees noo jàppe ni xar yu ñuy tër†.»  
37 Waaye ci mboolem lu nu dikkal, nooy  
am ndam lu mat sëkk, ci ndimbalal ki  
nuy soppeem. 38 Ndax kat bir na ma ne  
du ag ndee, du ag ndund, du ay malaaka,  
duy boroom nguur, du tey, du ëllëg, duy  
boroom doole†, 39 du lu kawe, du lu xóot,  
mbaa meneen mbindeef mu mu doon;  
dara manu noo tàggale ak cofeel, gi nu  
Yàlla won ci Almasi Yeesu sunu Sang.

## 9

### *Yàlla moo taamu bànni Israyil*

1 Dëgg laay wax, Almasi seere na ko,  
fenuma. Sama xol moo ma seereele Noo  
gu Sell gi, ne lii may wax dëgg la: 2 Li may  
wax moo di tiis wu réy laa am, ak naqaru  
xol wu dakkul, 3 nde man doon naa  
ñaana alku sax, daggoo ak Almasi, ngir  
jàmmi sama bokki xeet, sama bokki deret.  
4 Ñooño di xeetu Israyil wi xéewloo  
céru doon doomu Yàlla, xéewloo daraja,  
xéewloo kóllëre yi, ak ndigali yoon wi, ak  
liggéeyu jaamu Yàlla gi, ak dige yi; 5 ñoo  
xéewloo itam maam ya; ci wàllu doom  
aadama it, ci ñoom la Almasi soqikoo, di  
Yàlla, tiim lépp, te yelloo cant ba fàww.  
Amiin.

6 Du caageenu kàddug Yàlla moo neen,  
ndax ñi bokk ci xeetu Israyil ñépp duñu  
Israyil tigi. 7 Te it sèti Ibraayma yépp  
bokkuñu ci askanam, waaye li Mbind  
mi indi moo di: «Ci Isaaxa lees di  
tudde saw askan\*.» 8 Loolu di tekki ne  
du sèti Ibraayma yi ci wàllu deret ñoo  
di doomi Yàlla, waaye doom yi seenub  
juddu dëppoo ak digeb Yàlla, ñoom lañu  
jàpp ne ñooy askanu Ibraayma. 9 Ndax  
kat kàddug dige ba nii la jibe: «Nëgëni  
sii déwén laay délsi, te Saarata dina am  
doom ju góor†.»

10 Te yemul foofu rekk, waaye Rebeka  
it moo am ay seex yu genn góor jur,  
muy sunu maam Isaaxa. 11 Doom ya  
nag juddooguñu woon bay def lenn lu

baax, mbaa lu bon. Yàlla moo defe  
noonu ngir wéyal dogal bu dëppoo ak  
tànnéefu boppam 12 bu ajuwul ci kawi jëf,  
xanaa ci kiy woote. Rebeka† la kàddu gii  
dikkal: «Mag ji mooy surgawu rakk ji§.»  
13 Noonu la Mbind mi indee ne: «Askanu  
Yanqóoba rakk ji laa sopp, foñ askanu  
Esawu mag ji\*.»

### *Sànjum Yàlla rax na yërmande*

14 Ana lu nu ci mana wax nag? Yàlla  
daa wàcc foofu yoon? Mukk kay! 15 Ndax  
kat moo noon Musaa:

«Maay yërëm ku ma neex,

te maay ñeewante ku ma neex†.»

16 Kon nag mbaaxug Yàlla ajuwul ci coo-  
barey nit ki, mbaa aw ñaqam, waaye lépp  
yërmandey Yàlla la. 17 Mbind mi moo  
indi kàddu ga dikkaloon Firawna, ne ko:  
«Maa la yékkati, te li ko waral mooy lii  
ci boppam: ngir fésal sama doole ci yaw,  
ngir itam ñu sàbbaal sama tur ci àddina  
sépp†.» 18 Kon nag Yàlla mooy yërëm ku  
ko neex, te ku ko neex lay dëgéral xolam.

19 Xam naa dinga ma ne: «Ana kon lu  
Yàlla di sikkeeti? Coobarey Yàlla, ana ku  
koy fanq?» 20 Waaye yaw nit ki, yaay  
kan bay weddi Yàlla? Ndax këf ku ñu  
tabax dina ne ka ko tabax: «Lu tax nga  
sàkke ma nii?» 21 Tabaxkatu ndab bi  
daa amul sañ-sañ ci ban bi muy liggéeye,  
ngir tabax ci bennub tooyal, lenn ndabal  
teraanga, ak leneen ndabal njoogaan?

22 Yàlla mi namma wone am sànjam,  
xamle dooleem, su dee moo muñal lool  
ay ndab yu yelloo am sànjam, te seen  
sànkute ñoroon xomm nag? 23 Su  
dee Yàlla moo def loolu nag ngir fésal  
màggaayu teddngaam, ñeel ay ndab yu  
xéewloo yërmande, te mu waajalaloon  
leen teraanga? 24 Nun ci ndabi yërmande  
yi Yàlla woo lanu bokk, te du ci Yawut  
yi rekk lees nu seppee, waaye ci jaambur  
ñi dul Yawut itam. 25 Moom la wax it ci  
téereb Ose ne:

«Ñi dul woon sama ñoñ,  
ñoom laay wax sama ñoñ,

† 8:38 8.38 Seetal ci *Efes* 6.12. \* 9:7 9.7 Seetal ci *Njàlbéen ga* 21.12. † 9:9 9.9 Seetal ci *Njàlbéen ga* 18.10,  
14. † 9:12 9.12 Rebeka mooy soxnas Isaaxa. § 9:12 9.12 Seetal ci *Njàlbéen ga* 25.23. \* 9:13 9.13 Seetal ci  
*Malasi* 1.2-3. † 9:15 9.15 Seetal ci *Mucc ga* 33.19. † 9:17 9.17 Seetal ci *Mucc ga* 9.16. § 9:25 9.25 Seetal ci  
*Ose* 2.25.

ñooñu dul woon samab xejj,  
ñoom laay xejjoo.Š»

<sup>26</sup> «Te foofa ñu leen noon: “Yeen, dungeen sama ñoñ,”  
fa lees leen naa: “Yeenay doomi Yàlla jiy dund\*.”»

<sup>27</sup> Ci mbirum Israyil la Yonent Yàlla Esayi itam xaacu woon ne:

«Su bànni Israyil tolloo ni feppi suufas géej sax,

as ndes a ciy mucct†.

<sup>28</sup> Ndax kàddu gi Boroom bi wax,  
moo koy sottal ci lu gaaw ci kaw suuf‡».

<sup>29</sup> Mooy itam la Esayi waxoon lu jiitu,  
ne:

«Su nu Boroom gàngoori xare yi waccalul woon kuutaay,  
ni Sodom lanuy mel, Gomor lanuy neexooolŠ.»

*Bànni Israyil déggioowul ak xibaaru jàmm bi*

<sup>30</sup> Ana lu nu ci mana wax? Xeet yu dul Yawut te sàkkuwuñu woon ag njub, ñoo jagoo àtteb njub, te mooy njub gi ngëm di maye. <sup>31</sup> Waaye xeetu Israyil wi sàkku woon yoonu njub, ñoo moy yoon wi. <sup>32</sup> Ndax lan? Ngëm lañu sukkandikoowul, xanaa ay jëf. «Doj wuy fakktale,» moom lañu fakktaloo. <sup>33</sup> Noonu la Mbind mi indee ne:

«Maa ngii di dëj fi Siyonj doj wuy fakktale, mooy xeer wuy daaneel,  
waaye ku ko wéeroo ngëm, doo rus\*.»

## 10

<sup>1</sup> Bokk yi, sama yéney xol, ak ñaan gi may ñaanal Israyil ci Yàlla moo di ñu mucct. <sup>2</sup> Ñoom laa seedeel seenug parlute ci Yàlla, waaye dañu koo tegul ci xam-xam bu doy. <sup>3</sup> Yoonu njub gi Yàlla di joxe nit ki, àtteb ku jub, moom lañu umple tey jéema dëggal seen njubteg bopp. Moo tax nanguluñu njubte gi Yàlla di maye. <sup>4</sup> Ndax kat Almasi moo sottal

yoonu Musaa, ngir àtteb ku jub ñeel képp ku ko gëm.

*Coobarey Yàlla mooy ñépp mucct*

<sup>5</sup> Njub gi sàmm ndigali yoon di maye, li ci Musaa bind moo di: «Kuy jéfe digal yooyu, yaay dund ndax ñoom\*.» <sup>6</sup> Waaye njub, gi ngëm di maye, li muy digle mooy: «Bul wax ci sa xel, ne: “Ana kuy yéeg fa kaw?”»

nde loolu mooy Almasi wàcc ngay sàkku.

<sup>7</sup> «Bul ne it: “Ana kuy wàcci njaniiw?”»

nde loolu mooy Almasi dekkiwaat ngay sàkku. <sup>8</sup> Li mu wax moo di:

«Kàddu gaa ngi ci sa wet; mu ngi ci saw làmmiñ ak ci sa xol†.»

Te loolu mooy kàddug ngëm gii nuy xamle. <sup>9</sup> Saw làmmiñ, soo ci biralee ne Yeesu moo di Boroom bi, *sab xol* it, nga gëm ci ne Yàlla dekkal na Sang Yeesu, dinga mucct. <sup>10</sup> Ndax kat ab xol lees di gëme, ba am àtteb ku jub, te aw làmmiñ lees di birale ngëm gi ba mucct. <sup>11</sup> Mbind mi moo ne: «Képp ku ko gëm, doo rus‡.»

<sup>12</sup> Ag wuutale amul diggante ab Yawut, ak jaambur bu dul Yawut; ñépp a bokk benn Boroom biy yéwéne mboolem ñi koy woo wall. <sup>13</sup> Ndax kat waxees na ne: «Képp ku woo Boroom bi wall ciw turam, mooy rawŠ.»

<sup>14</sup> Waaye nees di wooye koo gëmul? Nees di gëme koo déggul turam? Nees di dégge turam, te yégleesu ko? <sup>15</sup> Nees di yéglee xibaar, te yebaleesu la? Noonu la Mbind mi indee ne: «Ñeeka rafeti tànk, ndaw yii di yégleesi xibaari jàmm\*!»

<sup>16</sup> Waaye du ñépp a nangul xibaaru jàmm bi; moo tax Esayi ne: «Boroom bi, ana ku gëm sunub dégtal‡?» <sup>17</sup> Kon boog ngëm ci dég-dég lay juddoo, dég-dég ba bawoo ci kàddug waare gi jëm ci Almasi.

<sup>18</sup> Waaye dama ne: xanaa dañoo déggul? Ahakay! Ndax

«Àddina sépp la seen baat jibal, cati suuf sépp la seen kàddu dajal‡.»

\* **9:26** 9.26 Seetal ci *Ose* 2.1. † **9:27** 9.27 Seetal ci *Esayi* 10.22. ‡ **9:28** 9.28 Seetal ci *Esayi* 10.23. § **9:29** 9.29 Seetal ci *Esayi* 1.9. \* **9:33** 9.33 Seetal ci *Esayi* 8.14; 28.16. \* **10:5** 10.5 Seetal ci *Sarxalkat yi* 18.5. † **10:8** 10.6-8 Seetal ci *Baamtug Yoon wi* 9.4; 30.12-14. ‡ **10:11** 10.11 Seetal ci *Esayi* 28.16. § **10:13** 10.13 Seetal ci *Yowel* 3.5. \* **10:15** 10.15 Seetal ci *Esayi* 52.7. † **10:16** 10.16 Seetal ci *Esayi* 53.1. ‡ **10:18** 10.18 Seetal ci *Sabóor* 19.5.

<sup>19</sup> Ma neeti: xanaa bànni Israyil dañoo xamul? Ahakay! Musaa moo leen jëkkoonaa jottli la Yàlla noon:

«Yeen, maa leen di fiireloo xeet wu tekkiwul dara, ci waasow naataxuuna laa leen di merlooŦ.»

<sup>20</sup> Esayi it am fit ba ne:

«Ñi ma seetul woon, gis nañu ma, ca ña ma laajul woon laa feeñe\*.»

<sup>21</sup> Israyil nag la wax ci mbiram ne:

«Bëccëg bépp laa yendoo tàllal samay loxo, askanu fippukat wu déggadi†.»

## 11

### *Yàlla waccul bànni Israyil*

<sup>1</sup> Ma ne kon, xanaa Yàlla daa wacc ñoñam? Mukk kay! Man ci sama bopp ci Israyil laa bokk, askanoo ci Ibraayma, giiroo ci Beñamin. <sup>2</sup> Yàlla waccul ñoñam ñi mu raññee woon lu jiitu. Am dangeena xamul li Mbind mi indi ci mbirum Ilyaas, ba mu dikkee Yàlla njàmbat lu jëm ci Israyil? Mu ne: <sup>3</sup> «Boroom bi, say yonent, rey nañu leen; say sarxalukaay, màbb nañu leen; man donḡ maa fi des, te ñu ngi wut sama bakkan.\*» <sup>4</sup> Ana lu ko Yàlla tontu? Da ne: «Beral naa sama bopp juróom ñaari junniy (7 000) nit ñu sujjóotaluloon Baal tuur mi†.» <sup>5</sup> Kon nag naka noonu itam ci jamonoy tey jii, aw ndes a ngi fi, te ci kaw yiw lees leen taamoo. <sup>6</sup> Gannaaw aw yiw a tax nag, dootu seen peyu jëf, lu ko moy aw yiw noppee doon aw yiw.

<sup>7</sup> Kon léegi nag? Li am moo di li bànni Israyil doon wut, amuñu ko. Ñi ñu taamu ñoo ko am, ña ca des, seenum xel a dërkiis. <sup>8</sup> Noonu lees binde ne: «Yàlla moo leen jox xelum ngëmment, ak bët yu dul gis, ak nopp yu dul dégg, ba bésuub tey jii‡.»

<sup>9</sup> Daawuda it wax na ne:

«Yal na seen ndab di seenum yeer, boole ci dib caax, te di fiir gu ñuy daanu,

muy seenub yool.

<sup>10</sup> Yal na seeni gët giim, ba duñu gisati, yal nañu sëgg ba fàwwŦ.»

### *Lu jëm ci muccug ñi dul Yawut*

<sup>11</sup> Moo tax ma ne xanaa ba bànni Israyil tërëfee, jéll bu ñu dul jógati lañu daanu? Mukk kay! Waaye tooñug bànni Israyil moo waral muccug jaambur ñi dul Yawut, ba tax bànni Israyil siis leen.

<sup>12</sup> Gannaaw tooñug bànni Israyil mooy xéewalu àddina si, seenug néewle di xéewalu jaambur ñi dul Yawut, kon bu bànni Israyil yembee, ndaw xéewal gu gënatee baawaan!

<sup>13</sup> Léegi nag yeen jaambur ñi dul Yawut laay waxal. Gannaaw maay ndaw li ñu yebal ci jaambur ñi dul Yawut, samab yónnent laay teral. <sup>14</sup> Jombul sama liggéey dina yee firaangey sama bokki Yawut ñi, ba ñenn ci ñoom mucc. <sup>15</sup> Ndax kat ba Yàlla dàqee Israyil, ca la àddina juboo ak Yàlla. Kon nag bu leen Yàlla délloosee, ana lu muy jur lu moy ndeendekki? <sup>16</sup> Ndax kat ab jooxe bu génnee ci tooyalub sunguf, di ndoortel meññeef, su boobu jooxe sellee, tooyalub sunguf bépp ay sell. Ndax su reenu garab sellee, car ya it sell.

<sup>17</sup> Waaye su ñu tenqee lenn ci cari oliwu kër, te yaw ngay caru oliwu àll, ñu indi la, jabtal ci oliwu kër gi, nga wuutu car ya ca fàqe, ba mana xéewloo meen miy wale ci reenu oliwu kër gi, di ko dundal, <sup>18</sup> bumu tax nga bàkku ci kaw car ya fàqe. Soo dee bàkku, xamal ne du yaa yenu reen bi, waaye reen bee la yenu.

<sup>19</sup> Xam naa dinga ne: «Car yooyu, dees leena tenqi, ngir jabtal ma.» <sup>20</sup> Dégg it; waaye ngëmadi moo leen fa tenqee, te yaw, ngëm a la fa teg. Bu ko réy-réyloo, waaye ragalal. <sup>21</sup> Ndegam cari judduwaale ya la Yàlla déegul, moytul mu bañ laa déeg yaw itam.

<sup>22</sup> Xoolal kon ni Yàlla baaxe, ak ni mu ragloo; ci ñi déggadi la raglu, baax ci yaw, ndegam cig mbaaxam nga sax; lu ko moy dees na la tenqi yaw itam. <sup>23</sup> Car ya fàqe

§ 10:19 10.19 Seetal ci *Baamtug Yoon wi* 32.21. \* 10:20 10.20 Seetal ci *Esayi* 65.1. † 10:21 10.21 Seetal ci *Esayi* 65.2. \* 11:3 11.3 Seetal ci *1.Buur ya* 19.10, 14. † 11:4 11.4 Seetal ci *1.Buur ya* 19.18. ‡ 11:8 11.8 Seetal ci *Baamtug Yoon wi* 29.3 ak *Esayi* 29.10. § 11:10 11.9-10 Seetal ci *Sabóor* 69.23-24.

woon itam, su ñu wéyewul ngëmadi, dees leen di delloo ca ndey ja, nde Yàlla man na leen caa saxalaat. <sup>24</sup> Ndax kat, ndegam yaw lañu tenqee ci oliwu àll gi, jabtal la ci oliwu kër gi dul sa ndey, astamaak car yi oliwu kër gi di seen ndey, nde saxalaat leen ca mooy gëna yombati.

### *Yàlla ñépp la yërëm*

<sup>25</sup> Bokk yi, moytuleena defe ne seen xel mu rafet a leen may li ngeen am. Bugguma ngeen umple mii mbóot: Ag déggadi moo dikkal lennati bànni Israyil, ba kera xeet yi dul Yawut duggsi, ba seenub lim mat. <sup>26</sup> Su boobaa nag, bànni Israyil gépp ay mucc, noonee ko Mbind mi indee ne:

«Siyonj la wallukat bay jóge,  
mooy tenqee ngëmadi ci askanu  
Yanqóoba.

<sup>27</sup> Loolooy doon sama kóllëreek ñoom,  
kera ba may far seeni bàkkaar\*.»

<sup>28</sup> Ci wàllu xibaaru jàmm bi, ay noon la Yawut ñi taxawe, te muy xéewal ci yeen ñi dul Yawut. Waaye ci wàllu dogal bi taamu Yawut ñi, ay soppe lañu, te seeni maam tax. <sup>29</sup> Ndax Yàlla kat, ay mayam akub wooteem, lenn du ci toxu. <sup>30</sup> Yeena déggadi woon, waaye tey daj ngeen yërmande, ndax déggadig Yawut yi. <sup>31</sup> Noonu itam la Yawut yi déggadee tey, ba ni ngeen daje yërmande, ñoom it ñu daje ni yërmande. <sup>32</sup> Yàlla moo tēj nit ñépp ci seenug déggadi, ngir yërëm leen ñoom ñépp.

### *Yàllaa yellow tednga*

<sup>33</sup> Céy xóotaayub koomu Yàlla ak xel ma, ak xam-xam ba! Deesul natt ay dogalam, deesul ràññee ay jëfinam!

<sup>34</sup> «Ana ku xam xalaatu Boroom bi?  
Ana ku ko digal†?»

<sup>35</sup> «Ana ku ko dawlul lenn,  
ba mu war koo delloo‡?»

<sup>36</sup> Ci moom la lépp sosoo, ci moom la lépp sottee, te moom la lépp ñeel. Moom la daraja ñeel ba fàww! Amiin.

## 12

### *Nii la gëmkat bi wara jaamoo Yàlla*

<sup>1</sup> Kon nag bokk yi, ma ñaax leen, te yërmandey Yàlla tax, ngir ngeen jébbal ko seen yaram wépp, def ko jooxe buy dund, sell te neex Yàlla. Loolu déy mooy njaamu, gi leen war. <sup>2</sup> Buleen roy jamonoy tey jii, waaye yeessuleen ci ni ngeen di xalaate ba soppiku, ngir ngeen mana ràññee liy coobarey Yàlla, muy li baax, di bannexam te mat sèkk.

<sup>3</sup> Ma àrtu leen ci kaw yiw wi ma Yàlla may; bu kenn ci yeen teg boppam fu mu àggul, waaye xalaate leen sago, te ku nekk dëppoo ak céru ngëm bi ko Yàlla sédd. <sup>4</sup> Ndax kat dafa mel ni sunu yaram wiy wenn, te cér yi bare, doonte cér yépp a wuuteek seen moroom nu ñuy liggéeye. <sup>5</sup> Noonu lanu doone ñu bare, bokk wenn yaram nun ñépp ci Almasi mi nu gëm, te ku nekk di sa cérub moroom. <sup>6</sup> Ay may yu wuute lanu am, may yu yemook céru yiw bi ñu sédd ku nekk ci nun. Su dee biral kàddug waxyu mooy sag may, biraleel kàddug waxyu sa kemu ngëm; <sup>7</sup> su dee wàllu jàpple, deel jàpple; su dee wàllu njangle, ngay jangle; <sup>8</sup> Su dee wàllu kàddu yuy yokke, ngay wax luy yokk gëmkat ñi; su dee wàllu joxe, deel joxe te Yàlla rekk tax; su dee wàllu jiite, taxawal temm ci liggéeyub jiite; su dee wàllu baaxe nit ñi, nay loo bége.

<sup>9</sup> Na seen cofeel mucc ci ngistal, se-exluleen lu bon te noy ci lu baax. <sup>10</sup> Na leen mbëggeelug bokk taxa fonkante, te ngeen farlu ci di terlante. <sup>11</sup> Sawarleen te baña yoqi, jaamuleen Boroom bi, ànd ceek pastéefu xol. <sup>12</sup> Bégeleen seen yaakaar, di muñ ci biir tiis, tey saxoo ag ñaan. <sup>13</sup> Deeleen def seen loxo ci lu faj soxlay gëmkat ñu sell ñi, te boole ci am teraanga.

<sup>14</sup> Ñi leen di bundxatal, ñaanal-leen leen, ñaanal-leen leen te bañ leena móolu. <sup>15</sup> Ñi ci mbégte, bokkleen ak ñoom seen mbégte; ñi ci naqar, ngeen bokk ak ñoom seen naqar.

<sup>16</sup> Mankoolen, buleen xëccu daraja,

\* **11:27** 11.26-27 Seetal ci *Esayi* 59.20-21; 27.9 ak *Yeremi* 31.33-34. † **11:34** 11.34 Seetal ci *Esayi* 40.13. ‡ **11:35** 11.35 Seetal ci *Ayóoba* 41.11.

waaye nanguleena jonjoo ak ñi féete suuf, te baña jappe seen bopp boroomi xel.

<sup>17</sup> Buleen feyantoo, fexeleen di def lu rafet, ñépp seede ko. <sup>18</sup> Su manee am, jammooleen ak ñépp, ndegam ci yeen la aju. <sup>19</sup> Samay soppe, buleen di feyul seen bopp, xajal-leen am sànj, am sànj fajal boppam, ndax bindees na ne: «Man maay feye, maay añale\*.» Boroom bee ko wax.

<sup>20</sup> Li mu wax kay mooy:

«Bu sab noon xiifée, jox ko mu lekk, bu maree, may ko mu naan. Soo defee noonu, day rus, ba mel ni koo yen ay xal†.»

<sup>21</sup> Bu leen lu bon man, waaye defleen lu baax, ba man lu bon.

## 13

### *Na ñépp déggal njiit yi*

<sup>1</sup> Na ku nekk déggal njiit yi yor kilifteef, nde amul njiit lu bawoowul fa Yàlla, te njiit yi toog, Yàlla moo leen tabb. <sup>2</sup> Moo tax kuy bañal njiit, tëralinu Yàlla nga bañal, te ñi bañal njiit, ñoo wool seen bopp mbugal. <sup>3</sup> Kuy def lu baax nag, doo ragal kilifa yi, kiy def lu bon moo leen di ragal. Soo béggee mucc ci ragal kilifa nag, defal lu baax, jot ngërëmam. <sup>4</sup> Ndax kilifa gi mooy ndaw li Yàlla yebal ngir sa jamm. Waaye soo dee def lu bon, ragalal, ndax kilifa gi yorul ab saamar cig neen; mooy ndawal Yàlla liy añale, te mooy jottli am sànj mu wàccal kuy def lu bon.

<sup>5</sup> Moo tax nangul njiit di wartéef, ndax njariñal nangul njiit yemul rekk ci mucc ci am sànj, waaye xel mu dal a ngi ci.

<sup>6</sup> Loolu moo waral it ngeen di fey galag, ndax njiit yi koy feyeeku kat, ñooy jawriñi Yàlla yi sasoo googu kilifteef. <sup>7</sup> Joxleen ku nekk li ngeen warlook moom; ku ngeen wara fey galag, feyleen ko ko; ku ngeen wara fey juuti, feyleen ko ko; ku ngeen wara weg, wegleen ko; ku ngeen wara teral, teral-leen ko.

### *Cofeel moo tënk yoonu Musaa*

\* **12:19** 12.19 Seetal ci *Baamtug Yoon wi* 32.35. † **12:20** 12.20 Seetal ci *Kàddu yu Xelu* 25.21-22. \* **13:9** 13.9 Seetal ci *Mucc ga* 20.13-15, 17. † **13:9** 13.9 Seetal ci *Sarxalkat yi* 19.18.

<sup>8</sup> Buleen ameel kenn bor, lu moy borub soppante; ndax ku sopp sa moroom, yaa matal yoonu Musaa. <sup>9</sup> Ndax ndigal yii kat: «Buleen jaaloo, buleen bóom, buleen sàcc, buleen xemmem\*,» ak leenen ndigal lu mu mana doon, ci genn kàddu gii la tënke: «Ni ngeen soppe seen bopp, nangeen ko soppe seen moroom†.» <sup>10</sup> Cofeel du waral kenn def moroomam lu bon; kon cofeel moo matal sëkk yoonu Musaa.

### *Teewlu war na gëmkat ñi*

<sup>11</sup> Li tax ngeen wara gëna farlu ci loolu mooy, xam ngeen jant yi nu tollu; seen waxtuw yewwu jot na ba noppi, nde léegi la nu mucc gëna jege ba nuy doora gëm. <sup>12</sup> Guddi gi maggat na, bët a ngi bégga set. Kon nag nanu bàyyi jëfi lëndëmtu te rāngoo gānnaay yi ñuy xaree cig leer. <sup>13</sup> Nanu jëfe jëfin wu jekka def bëccëg; nanu sore xawaare ak màndite, sore baane bu lewul, ak yàqute yu ni mel, te sore ñaayoo ak kiñaan. <sup>14</sup> Waaye yiiroolen Sang Yeesu Almasi, te ngeen baña yittewoo seen bakkan, ngir di topp seeni xemmemtéef.

## 14

### *Bul sikkal sa moroom*

<sup>1</sup> Ku ngëmam dëgërul nag, xajooleen ko, te bañ cee càmbar gis-gis yu wuute. <sup>2</sup> Mu mel ni tey, kii ngëmam moo ko may mu saña lekk lu nekk; kee, ngëmam lujum donj la ko ngëmam gu dëgërul may mu lekk. <sup>3</sup> Kiy lekk, bumu ko xeebe ki lekkul; ki lekkul it, bumu sikk kiy lekk, ndax Yàllaa ko xajoo. <sup>4</sup> Yaw miy sikkal jaamub jaambur, yaay kan? Su baaxalee mbaa mu bonal, sangam a koy seet! Te day baaxal ndax Boroom bi man na koo baaxal.

<sup>5</sup> Naka noonu kii jàpp na ne bés gën naa rafet moroom ma; kee jàpp ne bés yépp a yem. Na ku nekk seet la ko doy, te yem ca. <sup>6</sup> Ndax kiy taamu bés, Boroom bi la koy taamul; naka noonu kiy lekk, Boroom bi la koy gërëme, nde moom lay sant doora lekk; ki lekkul it Boroom bi lay sàkkoo

ñàkka lekkam, te Yàlla lay sant. <sup>7</sup> Ndax kat kenn ci nun dundul ngir boppam, te kenn deewul ngir boppam. <sup>8</sup> Su nuy dund, Boroom bi lanuy dundal, su nuy dee it, Boroom bi lanuy deeyal.

<sup>9</sup> Loolu sax moo waral Almasi dee, ba noppi dekki, dellu di dund, ngir ñi dee ak ñiy dund ñépp, muy seen boroom. <sup>10</sup> Yaw nag ana looy sikke sa mbokkum gëmkat, ak itam, ana looy xeebe sa mbokkum gëmkat? Ndax kat nun ñépp ay taxawi fa kanam jalub àttekaayu Yàlla. <sup>11</sup> Ndaxte bindees na ne:

«Ndegam maay Kiy Dund, Boroom bee ko wax,  
man la ñépp di sukkal seen bëti óom,  
te man Yàlla la làmmiñu ñépp di sàbbaal\*.»

<sup>12</sup> Kon ku nekk ci nun, yaay layool sa bopp fa Yàlla.

#### *Bul yóbbe sa moroom bàkkaar*

<sup>13</sup> Kon nag bunu di seetati lu nu sikkantee, li ngeen di seet kay mooy nu ngeen fexee ba dungeen yóbbe mbokkum gëmkat lu koy fakktal, mbaa lu koy daane ci bàkkaar. <sup>14</sup> Xam naa nag, wér na ma it te Sang Yeesu tax, ne amul lenn lu sobewu ci wàllu boppam, ba daganula lekk; waaye ki jappe lenn muy lu sobewu, ci moom la loola di lu sobewu. <sup>15</sup> Soo dee lekk lenn ba tax sa mbokk am ci lu ko naqari, noppi ngaa doxe cofeel. Bu sag lekk sànk ku Almasi deeyal. <sup>16</sup> Li dagan ci yaw, bu ko jariñoo ba may kenn lu mu ñàññee. <sup>17</sup> Ndax kat solob nguurug Yàlla jotewul dara akug lekk mbaa ag naan, waaye solob nguuru Yàlla moo di njub ak jàmm, ak mbégte ci ndimbalal Noo gu Sell gi. <sup>18</sup> Noonu kat ku koy jaamoo Almasi, yaa neex Yàlla, am ngërëmal nit ñi.

<sup>19</sup> Kon nag nanu sàkku luy indi jàmm, ak lu nu feddalantee. <sup>20</sup> Aw ñam, bumu la yaqloo liggéeyu Yàlla. Dëgg la, wépp ñam set na, waaye lekk ga nga koy lekk, su gakkalee ngëmu keneen, def nga lu aay. <sup>21</sup> Li gën sax mooy nga baña lekk yàpp, mbaa nga baña naan biiñ, mbaa

leneen lu mu doon lu mana fakktal sa mbokkum gëmkat.

<sup>22</sup> Yaw ci sa wàllu bopp, ngëm gi nga ci am, yemale ko ci sa bopp, fi kanam Yàlla. Ndokkee ki sikkul boppam lenn ci jëfin wu mu dogul boppam ne noonu lay jëfe. <sup>23</sup> Waaye ki am xel-yaar, su lekkee, ab daan topp na ko, nde jëfewul ngëm, te lu ngëm lalul bàkkaar la.

## 15

### *Na gëmkat yiy xajoonte*

<sup>1</sup> Nun ñi fendi ci wàllu ngëm, fàww nu xajoo tëley ñi néew doole, te baña sàkku sunu bannexu bopp. <sup>2</sup> Na ku nekk ci nun sàkku bannexu moroomam, ci lu koy jariñ, ngir feddli ngëmam. <sup>3</sup> Ndax Almasi kat sàkkuwul bannexu boppam, te noonu it la Mbind mi indee ne: «Ñi lay saaga, seeni saaga, ci sama kaw la dal\*.» <sup>4</sup> Ndaxte mboolem lu ñu bindoon, bu jëkk, jàngal nu moo taxoon ñu bind ko, ngir Mbind mi may nu xolu muñ, te ñaax nu, ba nu am yaakaar. <sup>5</sup> Kon nag Yàlla miy maye xolu muñ, di ñaaxe, yal na leen may mánkoo gu mat sëkk, ni ko Almasi Yeesu bégge, <sup>6</sup> ngir nu bokk jenn yéene ak genn kàddu gu ngeen sàbbaale Yàlla, sunu Baayu Sang Yeesu Almasi.

### *Xibaaru jàmm bi ñépp la dikkal*

<sup>7</sup> Kon nag, ni leen Almasi xajoo, nangeen ko xajoontee, ngir teddngay Yàlla. <sup>8</sup> Dama leen di wax ne leen, bégga fésal ne Yàlla ku dëgg la moo waral Almasi dikk, def boppam jawriñu Yawut yi, ngir sottal dige ya Yàlla digoon seeni maam. <sup>9</sup> Leneen li indi Almasi mooy may jaambur ñi dul Yawut lu ñu maggale Yàlla, te muy yërmandeem. Noonu it la Mbind mi indee ne:

«Looloo waral ma sant la ci biir xeet yi, sàbbaal la†.»

<sup>10</sup> Mu neeti:

«Yeen xeet yi, bégandooleen ak ñoñam‡.»

<sup>11</sup> Mu dellu ne:

«Yeen xeetoo xeet, manggal-leen Boroom bi,

\* **14:11** 14.11 Seetal ci *Esayi* 45.23. \* **15:3** 15.3 Seetal ci *Sabóor* 69.9. † **15:9** 15.9 Seetal ci *Sabóor* 18.49.

‡ **15:10** 15.10 Seetal ci *Baamtug Yoon wi* 32.43. § **15:11** 15.11 Seetal ci *Sabóor* 117.1.



réewoo réew, kañleen koŒ.»

<sup>12</sup> Esayi it neeti:

«Ab car ay bawoo ca Yese\* reen ba, mooy taxaw, yilif jaambur ñi dul Yawut, te moom la ñi dul Yawut di yaakaar†.»

<sup>13</sup> Kon Yàlla miy maye yaakaar, yal na leen feesale gépp mbég, ak jàmm ci biir ngëm, ba ngeen géejule yaakaar, ci manoorey Noo gu Sell gi.

### *Póol xamle na sababu bataaxalam*

<sup>14</sup> Bokk yi, man ci sama bopp, li ma bir ci seen mbir moo di yéene ju rafet ngeen fees, te buural ngeen bépp xam-xam, man ngeena artoonte it. <sup>15</sup> Teewul mu am ci wet yu ma leen ñemee binde kàddu yu ma ñeebluwul, ngir fàttli leen li ngeen xamoon ba noppi. Noonu ma binde nag, li ko waral moo di yiw wi ma Yàlla baaxe, <sup>16</sup> ngir ma doon jawriñu Almasi Yeesu, ñeel jaambur ñi dul Yawut, may wàccoo ak liggéeyu carxal bi xibaaru jàmm bu Yàlla laaj; su ko defee ñi dul Yawut mana doon ab jooxe bu Yàlla nangu, jooxe bu Noo gu Sell gi sellal. <sup>17</sup> Moo tax ma saña puukarewoo Almasi Yeesu mi may liggéeyloo ci mbiri Yàlla. <sup>18</sup> Sañumaa tudd lenn nag lu moy li Almasi sottale sama jëmm, ngir jaambur ñi dul Yawut déggal Yàlla, te muy lu mu sottale samay wax ak samay jéf, <sup>19</sup> ci kaw firnde yu manoorewu, aki kéemaan, lépp ci manoorey Noowug Yàlla. Loolu tax na, li dale Yerusaleem, wëndeelu, ba ca diiwaanu Iliri, yégle naa fa xibaaru jàmm bu Almasi, ba mu mat sëkk. <sup>20</sup> Noonu laa masa xintewoo di xamle xibaaru jàmm bi fu ñu xamewul Almasi asi, ngir baña bey sas wu fa keneen jotoona dal. <sup>21</sup> Noonu ma jéfe it moo dëppoo ak ni ko Mbind mi indee ne:

«Ña ñu waxul woon mbiram, dinañu gis, te ña dégguloon, dinañu ràññee‡.»

### *Póol dige naa seeti waa Room*

<sup>22</sup> Sama liggéey boobu sax moo ma gállankoor lu bare ba dikkaguma seetsi leen. <sup>23</sup> Waaye léegi jeexal naa sama sas ci gox yii, te gannaaw at yu baree

ngii, ma namma dikk ba seetsi leen, <sup>24</sup> bu may dem Espaañ, dinaa leen seetsiwaale. Yaakaar naa leena gis bu ma fa jaaree, ba ngeen yiwi ma, ma jàlli Espaañ, gannaaw, lu mu néew néew, ay fan yu ma nammantikoo ak yeen. <sup>25</sup> Waaye fii ma tollu, Yerusaleem laa jëm, ngir ndimbal lu ñeel ñu sell ña féete foofa. <sup>26</sup> Ndaxte gëmcati Maseduwan ak Akayi ñoom la soob ñu sàkke lenn ci seen alal, ngir dimbalee ko ñu sell ña diy néew doole ca Yerusaleem. <sup>27</sup> Seen coobarey bopp lañu ko defe, waaye ñoo ko ameel waa Yerusaleem it nag. Ndaxte gannaaw ñoom ñiy jaambur, gëmcati Yerusaleem ñoo leen sédd ci xéewal yi leen ngëm may, kon ñoom jaambur ñi itam war nañu leena sédd ci seen alal. <sup>28</sup> Teewul nag bu ma noppee ci lii, ba teg teraanga jii ca loxoy waa Yerusaleem, Espaañ laa jëm, te fa yeen laay jaare. <sup>29</sup> Te xam naa ne bu ma dikkee fa yeen, barkeb Almasi bu mat sëkk laay dikke.

<sup>30</sup> Gannaaw loolu bokk yi, li ma leen di ñaan ngir sunu Boroom Yeesu Almasi, ngir itam cofeel gi Noo gu Sell giy maye, moo di ngeen fekksi ma ci xareb ñaan ngir man. <sup>31</sup> Ñaanal-leen ma, ngir ma mucc ci aji gëmadiy Yude, te itam ndimbal li may yóbbul ñu sell ña ca Yerusaleem, ñaanleen ngir ñu nangu ko. <sup>32</sup> Su ko defee, ci coobarey Yàlla, ma dikke mbégte ba fa yeen, ba dal-luwaale as lëf fa yeen. <sup>33</sup> Yal na Yàlla miy boroom jàmm ànd ak yeen ñépp. Amiin.

## 16

### *Póol nuyu na waa Room*

<sup>1</sup> Boole naa leen nag ak sunub jigéen Febe, mu di ab taxawukatub mbooloom gëmkat ma dëkke Señsere. <sup>2</sup> Dalal-leen ko ci turu Boroom bi, ni ko ñu sell ñi yellow, te ngeen jàpple ko ci lépp lu mu aajowoo, nde moom itam xettli na ñu bare, ba ci man mii.

<sup>3</sup> Nuyul-leen ma Pirsil ak Akilas, sama bokki liggéeykat ci liggéeyub Almasi Yeesu. <sup>4</sup> Ñoom ñoo jaay seen bakkan

\* 15:12 15.12 Yese mooy baayu Daawuda. † 15:12 15.12 Seetal ci Esayi 11.10. ‡ 15:21 15.21 Seetal ci Esayi 12.15.

ngir ma mucc, te du man donj maa leen ameel njukkal, waaye mboolooy gëmkat yu jaambur ñi dul Yawut yépp a leen ameel njukkal.

<sup>5</sup> Nuyul-leen ma itam mbooloom gëmkat miy daje ca seen kër. Nuyul-leen ma sama soppe Epaynet, miy jooxeb ndoortel meññeef, ma génne ca diiwaanu Asi, ñeel Almasi.

<sup>6</sup> Nuyul-leen ma Maryaama, mi sonn lool ci yeen.

<sup>7</sup> Nuyul-leen ma Andoronikus ak Yuña, sama bokki Yawut, yi ñu ma tëjandooloon; ñu ñu nawloo lañu ci ndaw yi, te ñoo ma jékka gëm sax Almasi.

<sup>8</sup> Nuyul-leen ma Ampilyaatus, mi ma soppal sama bopp ndax Sang bi.

<sup>9</sup> Nuyul-leen ma it Urben, sunu mbokkum liggéeykat ci liggéeyub Almasi, ak Estakis, sama soppe;

<sup>10</sup> nuyul-leen ma Apeles mi firndeel kóllère gi mu am ci Almasi, te ngeen nuyul ma waa kër Aristobul, <sup>11</sup> ak Erojon sama mbokkum Yawut, te ngeen nuyul ma waa kër Narsis ñi gëm Sang bi.

<sup>12</sup> Nuyul-leen ma Tirifen ak Tirifos, jigéen ñu sonn ci liggéeyu Boroom bi, ak it ndaw si Persidd mi sonn lool ci liggéeyu Boroom bi.

<sup>13</sup> Nuyul-leen ma Rufus, mi Boroom bi taamul boppam, ak yaayam jiy sama yaayu bopp. <sup>14</sup> Nuyul-leen ma Asànkirit ak Felegon ak Ermes ak Patarobas ak Ermas, ak mboolem bokk yi nekk ak ñoom.

<sup>15</sup> Nuyul-leen ma it Filolog ak Yuli, ak Nere ak jigéenam, ak Olimpas ak mboolem ñu sell ñi nekk ak ñoom.

<sup>16</sup> Saafoonteeleen foonante yu sell. Mboolooy gëmkati Almasi yépp nuyul nañu leen.

*Kàdduy àrtu ak tàggoo ñeel na waa Room*

<sup>17</sup> Léegi nag bokk yi, dama leen di ñaax, ràññeeleen ñi gantal àlluwa ji ngeen jàngé, di féewale, ak a téqtale, te ngeen moytu leen. <sup>18</sup> Ñu ni mel liggéeyaluñu Almasi sunu Boroom, seen koll lañuy liggéeyal. Làmmiñ yu neex, ak

kàddu yuy jaye lañuy naxe ñi seenum xel foogadi. <sup>19</sup> Yeen nag seenug dégg ndigal siiw na ba bir ñépp, moo tax ma di leen bége. Waaye damaa bëgg ngeen xelu ci lu baax, te seenum xel mucc ci lu bon. <sup>20</sup> Su ko defee Yàlla miy boroom jàmm mooy dër Seytaane ci lu gaaw, fi ngeen ko joggi seeni tànk.

Yal na sunu yiwu Boroom Yeesu ànd ak yeen!

<sup>21</sup> Timote sama mbokkum liggéeykat nuyul na leen, mook Lusiyus ak Yason ak Sosipater sama bokki Yawut.

<sup>22</sup> Man Tersiyus mi bind kàdduy bataaxal bi ci sama loxo nag, nuyul na leen ci turu Boroom bi.

<sup>23</sup> Gayus mi may dalal, di dalal mbooloo mi mépp këram, nuyul na leen; Eràst saytukatub alalu dëkk bi it, nuyul na leen, mook mbokk mi Kàrtus.

<sup>24</sup> Yal na sunu yiwu Boroom Yeesu Almasi ànd ak yeen! Amiin.

*Teddnga ñeel na Yàlla*

<sup>25</sup> Kooku leen mana dooleel nag ndax sama xibaaru jàmm, ak waareb Yeesu Almasi, mi mu feeñal mbiram tey, gannaaw ba mu nekkee mbóot mu làqu woon naka jekk, <sup>26</sup> mbóot mu bindi yonent yi fésal tey, ba xamal ko xeet yépp ci ndigalal Yàlla ji sax, ngir xeet yépp gëm ba dégg ndigal, <sup>27</sup> kooku mooy Yàlla mi wéetoo xam-xam, te moom la teddnga ñeel ba fàww, ndax Yeesu Almasi! Amiin.

## Bataaxal bu jëkk bi Yàlla may Póol, mu bind ko waa Korent

<sup>1</sup> Ci man Póol mi ñu woo ci sasub doon ndawal Almasi Yeesu, ci coobarey Yàlla, ci man la bataaxal bii bawoo, bawoo itam ci Sosten mbokk mi, <sup>2</sup> ñeel mbooloom Yàlla, mi ci Korent, yeen ñi ñu sellal ci jëmmu Almasi Yeesu, te ñu woo leen ngir ngeen doon ñu sell, ñeel itam mboolem ñiy tudde fépp fu mu mana doon, sunu turu Boroom Yeesu Almasi, mi leen moom, moom nu. <sup>3</sup> Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

### *Sant Yàlla war na*

<sup>4</sup> Santal leen sama Yàlla laa saxoo, ci yiw wi mu leen may ci Almasi Yeesu, <sup>5</sup> ndax lépp ngeen woomle ci moom, ci gépp kàddu, ak bépp xam-xam. <sup>6</sup> Loolu di firndeel ne la nu seedeelon Almasi, sotti na ci yeen. <sup>7</sup> Loolu tax na ñàkkatuleen genn may, léegi bi ngeen di séentoogum peeñum sunu Boroom Yeesu Almasi. <sup>8</sup> Moo leen di dooleel ba ca mujjantal ga, ngir ngeen mucc sikk, keroog sunu bésu Sang Yeesu Almasi. <sup>9</sup> Yàllaa am kóllère, moom mi leen woo, ngir ngeen bennoo ak Doomam Yeesu Almasi, sunu Sang.

### *Na mbooloo mi juboo*

<sup>10</sup> Bokk yi nag, dama leen di ñaax, ci sunu turu Sang Yeesu Almasi, ngir seen kàddu di genn, te féewaloo baña am ci seen biir, xanaa ngeen bennoo ci lépp, bokk menn xel, ak benn jëmu. <sup>11</sup> Ndax kat bokk yi, dégge naa ci waa kër Kelowe, ne am na ay dëngoo ci seen biir. <sup>12</sup> Li may wax mooy ku nekk ci yeena ngi naan: «Man ci Póol laa bokk!», «Man nag Apolos!» «Man Sefas!» «Man de Almasi!»

<sup>13</sup> Ndax Almasi dafa xaajalikoo? Ndax Póol lañu daajoon ca bant ba ngir yeen? Am ci turu Póol lañu leen sóobe ci ndox? <sup>14</sup> Maa ngi sant Yàlla, ba ma sóobulee kenn ci yeen ci ndox, ku dul Kirispus

ak Gayus, <sup>15</sup> ngir kenn du ne ci sama tur lañu leen sóobe. <sup>16</sup> Ahakay! Maa sóob waa kër Estefanas itam. Waaye bu loolu weese, fàttlikuwuma fu ma sóobe keneen. <sup>17</sup> Ndax du sóobe cim ndox la ma Almasi yebale, xanaa ngir ma yégle xibaaru jàmm bi, te bañ koo defe xareñtey kàddu, ngir baña neenal bantub Almasi, ba ñu ko daajoon.

### *Xam-xam, fa Yàlla*

<sup>18</sup> Ndax kat kàddu gi jëm ci bantub Almasi, ba ñu ko daajoon, ag ndof la ci ñiy sànk. Waaye manoore Yàlla la ci nun ñi mucc. <sup>19</sup> Ndaxte bindees na ne: «Maay yàq xam-xamu xamkat yi, ñi xelu, ma neenal seenum xel\*.»

<sup>20</sup> Ana kuy xamkat? Ana kuy firikatub yoon? Ana waxkatub àddinay tey jii? Xanaa du Yàllaa def xam-xamu àddina si ag ndof? <sup>21</sup> Yàlla moo dogal ci xam-xamam, àddina tële koo xam ci xam-xamu boppam. Moo tax mu soob Yàlla, mu jëfandikoo xibaaru Almasi, biy ag ndof ci nit ñi, ngir musale ko gëmkat ñi. <sup>22</sup> Yawut yi, ay takk lañuy laaj, Gereg yi di wut xam-xam. <sup>23</sup> Nun nag, nuy waare Almasi bu ñu daaj ci bant, muy njombe ci Yawut yi, di ag ndof ci jaambur ñi dul Yawut. <sup>24</sup> Waaye ci ñi ñu woo, ñuy Yawut, di Gereg, Almasi mooy manoorey Yàlla, di xam-xamu Yàlla. <sup>25</sup> Ndaxte li ñu jàppe ag ndof fa Yàlla moo sut xam-xamu nit, te li ñu jàppe néew dooley Yàlla moo raw dooley nit.

<sup>26</sup> Bokk yi, seetleen ñan ngeen woon, ba ñu leen di woo. Barewul ci seen biir ay xamkat, ci gis-gisu nit ñi, barewul ci yeen ay boroom doole, barelewuleen ñu rafet ab juddu. <sup>27</sup> Waaye li àddina jàppe ag ndof, moom la Yàlla taamu, ngir rusloo ko xamkat yi, te li néew doole ci àddina, moom la Yàlla taamu, ngir rusloo ko li bare doole. <sup>28</sup> Li tuut ab juddu ci àddina, ak li xeeblu, li tekkiwul dara, moom la Yàlla taamu, ngir neenale ko li tekki, <sup>29</sup> ba tax kenn du mana damu ci kanam Yàlla. <sup>30</sup> Te moom it moo tax ngeen bokk ci Almasi Yeesu, mi ñu def muy sunu xam-xam bu bawoo fa Yàlla, di sunu njekk, di

\* **1:19** 1.19 Seetal ci *Esayi* 29.14.

sunu sellte, di sunug njot, <sup>31</sup> su ko defee, noonu ñu binde ne: «Kuy damu, na damu ci Boroom bi†,» noonu lay ame.

## 2

<sup>1</sup> Man ci sama bopp, bokk yi, bi ma dikkee ci yeen, du ci puukarey kàddu yu gëna taaru, ak xam-xam bu ma leen yégalsee mbóoti Yàlla. <sup>2</sup> Doguwuma woona xam lenn ci seen biir, lu moy Yeesu Almasi, kooku ñu daaj ca bant ba. <sup>3</sup> Man daal, ci sama biir néew dooley bopp, ak ragal bay kat-kati, laa nekke woon ak yeen. <sup>4</sup> Sama kàddu ak samam njàngle jotewul woon dara ak neex làmmiñ gu xam-xamu nit ràbb, waaye dafa di ay firnde yu manooreg Noowug Yàlla lañal, <sup>5</sup> ngir seen ngëm baña sukkandiku ci xam-xamu nit, te sukkandiku ci manooreg Yàlla.

### *Xelum Yàlla mooy xamle xam-xamu Yàlla*

<sup>6</sup> Moona xam-xam lanuy xamle ci biir gëmkat ñi mat, waaye du xam-xamu xarnu bii, ak bu njiiti xarnu bii, di nit ñuy wéy. <sup>7</sup> Li nuy biral kay, da di mbóotum xam-xamu Yàlla mu làqu woon, te Yàlla dogaloon nu koo terale, laata àddina di sosu. <sup>8</sup> Boobu xam-xam, kenn ci njiiti xarnu bii xamu ko woon, ndax su ñu ko xamoon, kon duñu daaj Sang bu tedd bi ci bant. <sup>9</sup> Mooy noonu ñu binde rekk ne: «Lu bët gisul, nopp déggu ko, xel daju ko, Yàllaa ko dencal ñi ko sopp\*.»

<sup>10</sup> Waaye nun la ko Yàlla feeñalale am Xelam.

Ndaxte Xelum Yàlla lépp lay gëstu ba ci xóotey mbóoti Yàlla. <sup>11</sup> Kan ci nit ñi moo xamal kenn nit, lenni biiram? Xelum nit ki ci biir nit ki donj moo mana xam biiram. Yàlla itam noonu la. Kenn xamul mbirum Yàlla, ku moy Xelum Yàlla. <sup>12</sup> Nun nag du xelum àddina lanu jot, waaye Xel mi bawoo fa Yàlla lanu jot, ngir nu mana ràññee li nu Yàlla baaxe. <sup>13</sup> May yooyu lanuy biral, te waxewunu ko njànglem xam-xamu nit,

waaye njànglem Xelum Yàlla lanu koy waxe, di jëfandikoo kàddu yu làmboo Xel mi, ngir teqantal ay mbir yu làmboo Xel mi.

<sup>14</sup> Nitu neen nag du nangu lu aju ci Xelum Yàlla. Ag ndof lay doon ci moom; du ko mana xam, ndax loolu Xelum Yàlla lees koy natte. <sup>15</sup> Nit ki ànd ak Xelum Yàlla nag moo mana natt lépp, te moom ci boppam, kenn du ko mana natt. <sup>16</sup> Moo tax ñu ne:

«Ana ku xam xalaatu Boroom bi, ba man koo digal†?»

Waaye nun nag noo yor xalaatu Almasi.

## 3

### *Par-parloo warul gëmkat ñi*

<sup>1</sup> Man nag bokk yi, manuma woona wax ak yeen ni ñuy waxe ak ñu ànd ak Xelum Yàlla, waaye ni niti suuxu neen rekk laa manona waxe ak yeen, mbete ñu diy tuut-tànk ci yoonu Almasi. <sup>2</sup> Meew laa leen jota nàndal, waaye leeluma leen dugub, ndax àttanuleen ko woon, te ba léegi sax àttanuleen ko, <sup>3</sup> nde yeena ngi ba tey ci seenug nitey suuxu neen. Ndax gannaaw kiñaan ak ñaayoo ngi ci seen biir, du ay niti suuxu neen ngeen ba tey, di doxale ni niti àddinay kese? <sup>4</sup> Bu kenn naan: «Man ci Póol laa bokk,» keneen naa: «Man nag Apolos,» ndax kon dungeen niti àddinay kese?

<sup>5</sup> Ana kuy Apolos sax? Ak kuy Póol? Xanaa ay surga donj yu ngeen jaare, ba gëm, ni Boroom bi jagleele kenn ku nekk ci nun, aw sasam. <sup>6</sup> Maa jëmbat, Apolos suuxat, waaye Yàlla moo jebbil. <sup>7</sup> Ki jëmbat nag, ak ki suuxat, kenn du ci dara, xanaa Yàlla miy jebbil donj. <sup>8</sup> Ki jëmbat, ak ki suuxat ñoo yem kepp, waaye ku ci nekk kemu liggéeyu boppam lay yooloo. <sup>9</sup> Noo bokk diy surga ci liggéeyu Yàlla bi; yeen ngeen di toolu Yàlla, di tabaxub Yàlla.

<sup>10</sup> Yiwu Yàlla wi mu ma may nag, ci laa lale kenu gi, ni tabaxkat bu xareñ, keneen di tabax ca kaw. Waaye na ku nekk xool bu baax na mu cay tabaxe.

<sup>11</sup> Geneen kenu moom maneesu koo lal,

† **1:31** 1.31 Seetal ci *Yeremi* 9.23. \* **2:9** 2.9 Seetal ci *Esayi* 64.3. † **2:16** 2.16 Seetal ci *Esayi* 40.13.

xanaa gi xasa lale, te mooy Yeesu Almasi. <sup>12</sup> Ku tabax ci kaw kenu gi nag, nga tabaxe wurus, mbaa xalis, mbaa per, mbaa dénk, mbaa gattax, mbaa boob, <sup>13</sup> ku ci nekk, sab liggéey dina feeñ, ndax bés baa koy xamle, nde sawara lees koy feeñale. Ku ci nekk, ak lu sa xeetu liggéey mana doon, sawara lees koy natte. <sup>14</sup> Ku liggéeyoon ba la nga tabaxoon ca kaw kenu ga des, dinga yoolu. <sup>15</sup> Waaye ku sab liggéey lakk, ñàkk nga. Yaw ci sa bopp nag dinga mucc, mel ni ku rëcce cig lakk rekk.

<sup>16</sup> Xanaa xamuleen ne kër Yàlla ngeen, te Noowug Yàlla moo dëkk ci yeen? <sup>17</sup> Ku yàq kër Yàlla nag, kooku Yàlla dina ko yàq, ndax kër Yàlla dafa sell, te mooy li ngeen doon.

<sup>18</sup> Bu kenn nax boppam: Ku teg boppam ci yeen, boroom xam-xam, ni xarnu bii jàppe xam-xam, kooku na doon ab dof, ngir am xam-xam bi wóor. <sup>19</sup> Ndaxte xam-xamu àddina sii, ndof la fa Yàlla. Moo tax bindees na ne: «Mooy kiy jàpp ñi muus ci seen pexey muusaatu\*,» <sup>20</sup> tegati ca ne: «Boroom bi xam na xalaati boroom xel yi te xam na ne neen la†.»

<sup>21</sup> Kon nag bu kenn puukarewoo ay nit, ndax lépp, yeena ko moom, <sup>22</sup> muy Póol, di Apolos, di Sefas, di àddina, di dund, di ndee, di tey, di èllëg, lépp, yeena ko moom. <sup>23</sup> Yeen nag, Almasi moo leen moom, te Almasi, Yàllaa ko moom.

## 4

### Àtteb Yàlla doy na Póol

<sup>1</sup> Dees noo wara jàppe ay surgay Almasi, ay saytukati mbóoti Yàlla. <sup>2</sup> Te itam li ñuy sàkku ci ay saytukat moo di ñu jara wóolu. <sup>3</sup> Man nag, su dee yeena dogal samab àtte, mbaa kurélu nit a dogal samab àtte, soxaluma lool, te dogalaluma sama bopp ab àtte it, <sup>4</sup> ndax amul dara lu may yedde sama bopp. Waaye nag loolu mayu ma njekk, nde kiy dogal samab àtte mooy Boroom bi. <sup>5</sup> Moo tax buleen àtte lenn te jotul, lu jiitu Boroom biy dikk. Moo mooy leeral li làqoo ag lëndëm, di

làññi mébéti xol. Su boobaa ngërëm la ku nekk yelloo, fa Yàlla lay bawoo.

<sup>6</sup> Bokk yi, loolu de laa natte ci Apolos ak ci man, ñeel leen, ngir ngeen jàngé ci sunu ñaari jëmm, ba sàmm solob kàddu gii: «Bu seen xalaat jàll ca wàlla li Mbind mi wax.» Su ko defee dungeen réy-réyloo far ak kenn, di beddi keneen. <sup>7</sup> Ana ku la def nga gën ci nit ñi? Ana loo am lu ñu la joxul? Te ndegam dees la koo jox, ana loo koy puukarewoo, mbete lees la joxul?

<sup>8</sup> Yeen daal suur ngeen xaate! Woomle ngeen xaate! Yeena ngi tàmbalee nguuru, te xaaruleen nu ci sax! Céy su ngeen doon nguuru léegi, ba nun itam nu mana nguuroondoo ak yeen! <sup>9</sup> Ndaxte damaa foog ne, nun ndawi Almasi, Yàllaa nu fésal ca sàppeb gannaaw ba, mbete nit ñu ñu teg àtteb dee, ngir nu doon ceetaanum àddina wërngal képp, malaaka ak nit. <sup>10</sup> Nun, ay dof lanu ngir Almasi; yeen, yeena muus nu ngeen bokke ci Almasi! Nun noo néew doole; yeen, yeena am doole. Yeen it lañu naw, waaye nun, dees noo xeeb! <sup>11</sup> Ba fii nu tollu, xiif ak mar ak rafle, aki dóor lanu nekke, di taxawaalu. <sup>12</sup> Danuy ñaq, di dunde sunu liggéeyu loxo, nit ñi di nu saaga, nu di leen ñaanal, ñu di nu bundxatal, nuy muñ. <sup>13</sup> Nu ngi nuy baatal, nun nuy wax lu rafet ci nit ñi, nu mujj mel ni mbalitu àddina, di mbuubitu ñépp ba fii nu tollu.

<sup>14</sup> Kersaal leen nag taxul ma bind leen lii, waaye dama leen koy artoo, ndax yeenay sama doomi bopp. <sup>15</sup> Su ngeen amoon fukki junniy njiit yu leen di sàmm ci yoonu Almasi it, du tax ngeen am lu wees benn baay, te man maa leen àgge xibaaru jàmm bi, ba tax ma di seen baay ci yoonu Almasi Yeesu. <sup>16</sup> Kon nag maa ngi leen di tinu, ngir ngeen roy ci man. <sup>17</sup> Looloo tax ma yebal ci yeen Timote, sama doomu bopp, ji sax ci yoonu Sang bi. Moo leen di fàttli samay doxalin ci yoonu Almasi, noonu ma koy jànglee fépp, ci mépp mbooloom gëmkat.

<sup>18</sup> Am na nag ñuy réy-réylu ci seen biir, mbete duma délseeti ci yeen. <sup>19</sup> Waaye maa ngi dikk léegi ba ci yeen, ndegam

\* 3:19 3.19 Seetal ci *Ayóoba* 5.13. † 3:20 3.20 Seetal ci *Sabóor* 94.11.

soob na Boroom bi, ba nattal sama bopp manoore ju réy-réylukat yooyu am, te duy kàddu kese. <sup>20</sup> Ndaxte nguurug Yàlla du ci waxi kese, waaye manoore la. <sup>21</sup> Ana lu leen gënal? Ma dikke leen ab yar, am ma dikke leen cofeel ak yërmande?

## 5

### *Buleen xajoo powum séy*

<sup>1</sup> Déggees na nag ci lu wér, ne powum séy am na ci seen biir, te powum séy mu ni mel, giseesu ko sax ci biir xeeti yéefar yi. Dem na sax ba nit nekk ak jabaru baayam. <sup>2</sup> Moona yeen de, yeena ngi ciy réy-réylu te waroon koo ñaawlu, ba dàqees kiy def jëf ju ni tollu ci seen biir! <sup>3</sup> Man ci sama wàllu bopp nag, jëmm ji wuute na, waaye xel mee fa teew. Ki def jooju jëf nag, niki su ma teewoon, dogal naa xaat ab àtteem, <sup>4</sup> ci turu Sang Yeesu. Bu ngeen dajee, te ma bokk ak yeen teewe ko samam xel, ci sunu kàttanu Boroom Yeesu, <sup>5</sup> dàqleen nit kooku, jébbal ko Seytaane, ngir sànkutey yaramam, ndax aw fitam mucc, keroog bésu Boroom bi.

### *Lawiir misaal na bàkkaar*

<sup>6</sup> Seen damu gii de jekkul dara. Xanaa xamuleen ne as lawiir tooyalu sunguf bépp lay funkil? <sup>7</sup> Setal-leen seen bopp boog, génneleen lawiir\* bu yàgg bi ci seen biir, ba mana doon tooyal bu bees bu mucc lawiir, nde doon ngeen ko ba noppi, ndax Almasi, sunu gàttub bésub Mucc biy sunub sarax, rendilees na nu ko. <sup>8</sup> Kon nag, nanu màggal sunu bésub Mucc te bañ koo màggale lawiir bu yàgg, mbaa lawiiru yàqute akug mbon, xanaa nu màggale ko mburu mu mucc lawiir, mburum xol bu set te dëggu.

<sup>9</sup> Bindoon naa leen ca sama bataaxal ba, ne buleen amlante ak fokati séy yi. <sup>10</sup> Waaye moos fokati àddina sii taxul woon may wax, mbaa bégge yi ak nàppaaral yi ak bokkaalekat yi, nde kon fàww ngeen génn àddina. <sup>11</sup> Dama leena bind, ne leen buleen amlante ak ku tuddoo mbokkum gëmkat, te di fokatub séy, mbaa mu dib bégge, mbaa mu dib bokkaalekat, mbaa ab saagakat, mbaa

màndikat, mbaa ab nàppaaral. Ku ni mel, buleen bokk ak moom lekk sax.

<sup>12</sup> Ana sax luy sama yoon ci waa biti ba di leen àtte? Su dee waa biir mbooloom gëmkat ñi nag, yeena leen wara àtte.

<sup>13</sup> Waa biti ñoom, Yàlla moo leen di àtte. Yeen, nag: «Tenqeeleen ku bon ci seen biir.»

## 6

### *Layoob biiri bokk rafetul*

<sup>1</sup> Te it ku ci jote ak mbokkum gëmkatam, ana nu mu saña àttelujee mbir mi ci aji jubadi, ñi séq èttu yoon, te bañ koo àtteluji ca aji sell ña? <sup>2</sup> Xanaa xamuleen ne aji sell ñi ñooy àtteji àddina? Ndegam yeenay àtteji àddina, xanaa àtte mbir yi gëna tuut jombu leen? <sup>3</sup> Am xamuleen ne malaaka yi sax, nun noo leen di àtteji, astamaak mbiri dund gii? <sup>4</sup> Kon nag bu ngeen amee ay jotey dund gii, ana lu ngeen diiseji seen mbir, ay nit ñu mbooloom gëmkat ñi nawloowul? <sup>5</sup> Li may wax gacce la ci yeen. Xanaa amul ci seen biir, benn boroom xel bu mana àtte ay bokkam? <sup>6</sup> Ab gëmkat daal mooy yóbbu mbokkum gëmkatam ci yoon? Te loolu ci kanam aji gëmadi ñi sax lañu koy defe far!

<sup>7</sup> Layoo bi ci seen biir rekk firndeel na xaat ne daanu ngeen jéll bu réy. Lu leen tee muñ ag tooñ? Lu leen tee faaleedi alal ju ñu leen jélal? <sup>8</sup> Waaye yeen ci seen bopp sax yeenay tooñ aka jélal ay nit? Te seen bokki gëmkat ngeen koy def!

<sup>9</sup> Am xamuleen ne aji jubadi ñi amuñu cér ci nguurug Yàlla? Bu leen kenn nax: Muy fokati séy yi, di bokkaalekat yi, di jaalookat yi, di góor-jigéen yi, ak ñiy ànd ak ñoom, <sup>10</sup> ak sàcc yi ak bégge yi ak màndikat yi ak saagakat yi ak nàppaaral yi, duñu am cér ci nguurug Yàlla. <sup>11</sup> Te loolu la ñenn ci yeen doonoon. Waaye Yàllaa leen fóot, sellal leen, jubal leen, ci turu Sang Yeesu Almasi, ak ci sunu Noowug Yàlla.

### *Na yaramu gëmkat bi teral Sang bi*

<sup>12</sup> «Lépp laa am sañ-sañam,» lañu wax. Waaye du lépp ay jariñe. Lépp laa am

\* 5:7 5.7 Seetal ci *Mucc ga* 12.3-21.

sañ-sañam, waaye дума nangu lenn man ma. <sup>13</sup> Ñenn a ngi naan: «Aw ñam, biir la ñeel; te biir it, aw ñam la ñeel.» Muy dëgg it, te Yàlla mooy neenal ñam wi, ak biir bi mu jëm. Waaye taxul yaramu gëmkat bi ñeel powum séy. Sang bi kay la yaramu gëmkat bi ñeel, te Sang bi it, ñeel yaram wi. <sup>14</sup> Yàlla, mi dekkal Sang bi nag, mooy dekkal it sunu yaram ci kàttanam. <sup>15</sup> Xanaa xamuleen ne, seen yaram mooy céri Almasi? Waaw, ndax damay jël céri Almasi, def ko céri gànc bu jigéen? Yàlla tere! <sup>16</sup> Xanaa xamuleen ne, kuy taqoo ak ab gànc bu jigéen, mook moom, jenn jëmm lañuy doon? Ndaxte noonu lañu waxe ne: «Ñoom ñaar ay mujj di wenn suux doŋŋ\*.» <sup>17</sup> Waaye ku taqoo ak Sang bi, yaak moom genn noo ngeen di doon.

<sup>18</sup> Dawleen powum séy! Mboolem bàkkaar bu nit mana def, bàkkaar ba du jote dara ak yaramam, waaye fokat bi, yaramu boppam lay lore bàkkaaru powam. <sup>19</sup> Dangeena xamul ne seen yaram mooy màkkaanu Noo gu Sell, gi ci yeen, Noo gi ngeen jote ci Yàlla? Moomuleen seen bopp, <sup>20</sup> ndax dees leena jot, ba fey njég ga. Kon nag seen yaram, terale leen ko Yàlla.

## 7

### *Lu jëm ci mbirum séy*

<sup>1</sup> Sama tont ci mbir mi ngeen ma bind nag, moo di lu baax la ci góor, mu mucc ci jigéen\*. <sup>2</sup> Waaye moytu powum séy war naa tax ba góor gu nekk am jabaram, jigéen ju nekk it, am jëkkëram. <sup>3</sup> Jëkkër ji war naa def warugaru jëkkër ci jabaram; naka noonu it, jabar ji war naa def warugaru jabar ci jëkkëram. <sup>4</sup> Jigéen ji moomul yaramam, moom doŋŋ, waaye jëkkër ji it am na ci sañ-sañ. Naka noonu it, jëkkër ji moomul yaramam, moom doŋŋ, waaye jabar ji it am na ci sañ-sañ. <sup>5</sup> Buleen di xañante seen bopp, ndare du yeena mànkoo ab diir, ngir bokk ténku

ci ñaan. Waaye gannaaw loolu, delluleen di ànd, bala leena Seytaanee xiirtal ci moy, ndax tëlee téye seen bopp. <sup>6</sup> Loolu ma leen wax nag mooy li leen yoon may, waaye du ndigal. <sup>7</sup> Ndaxte su ma sañoon kay ñépp toog ni man; waaye ku nekk ak jagleb boppam bu ko Yàlla baaxe, kii lii, kee lee.

<sup>8</sup> Li may wax gëmkat ñi séqul ak kenn ab séy, ak ñi seen jëkkër faatu daal moo di, su ñu wéyee toog noonu ni man mii, lu baax la ci ñoom. <sup>9</sup> Waaye su ñu manula maandu, nañu séy, ndax séy moo gën seen xéraangey bakkan xabtal leen.

<sup>10</sup> Ñi séq ab séy nag, maa leen dénk lii, te du sama ndigal, ndigalal Boroom bee. Jabar ji, bumu teqlikoo ak jëkkëram. <sup>11</sup> Te bu teqlikoo ak jëkkëram it, na toog, baña séyaat, mbaa mu juboo ak jëkkëram. Te jëkkër ji it bumu fase jabaram.

<sup>12</sup> Ñi ci des nag, li ma xalaat te du Boroom bee ko wax, maa ko waxal sama bopp, moo di: ab gëmkatub Almasi, bu amee jabar ju gëmül, te teewul mu nangu koo séyal ba tey, bumu ko fase. <sup>13</sup> Ab gëmkatub Almasi it, bu amee jëkkër ju gëmül, te teewul mu nangoo nekk ak moom, bumu tas. <sup>14</sup> Ndaxte jëkkër ji gëmül day daldi séddu sellnga ndax jabaram ja dib gëmkat, te jigéen ji gëmül it day séddu sellnga ca jëkkëram jay gëmkat. Su dul woon noonu doom yu ngeen ca am di ñu sobewu, te bir na ne doom yu ngeen ca am, ñu sell lañuy doon.

<sup>15</sup> Ndegam nag ki gëmül daa bëgga dem, na dem. Su demee noonu, mbokkum gëmkat bu góor bi, mbaa ku jigéen ki amatul benn gállankoor, waaye ci jàmm la leen Yàlla woo. <sup>16</sup> Yaw miy jabar ji nag sa texey jëkkër man naa jaare ci yaw, jombul; yaw jëkkër ji it, sa texey jabar jaare ci yaw, jombul. <sup>17</sup> Lu ko moy nag, ku ci nekk, cér ba la Boroom bi séddoon, noonee nga nekke woon ba la Yàlla di woo, nanga ko wéye. Loolu laa santaane ci mboolooy gëmkat ñépp. <sup>18</sup> Ki xarafoon bala ñu koy woo, bumu làq màndargam xaraf ma. Ki xaraful woon

\* **6:16** 6.16 Seetal ci *Njàlbéen ga* 2.24.

\* **7:1** 7.1 Li Póol ne lu baax la ci góor, mu mucc ci jigéen, jombul muy waxi boppam. Waaye man naa doon it waxi waa Korent yu mu jottli.

ba ñu koy woo, bumu xaraf. <sup>19</sup> Xaraf amul solo, ñakka xaraf amul solo. Li am solo moo di topp ndigali Yàlla. <sup>20</sup> Ku nekk, nekkin wi nga nekke woon ba ñu lay woo, nanga ko wéye. <sup>21</sup> Ndax ab jaam nga woon, ba ñu lay woo? Amul solo. Waaye soo manee yiwiku, yiwikul. <sup>22</sup> Ki ñu woo ci Sang bi, fekk ko mu dib jaam, mooy ki Sang bi goreel. Naka noonu, gor si ñu woo, ab jaamu Almasi lay doon. <sup>23</sup> Gannaaw feyees na seen njég ba jot leen nag, buleen doon jaamub nit. <sup>24</sup> Bokk yi, ku ci nekk daal, nekkin wa nga nekke woon ba ñu lay woo, wéye ko rekk fi kanam Yàlla.

<sup>25</sup> Ci wàllu janq ji séyagul, awma ci ndigalu Boroom bi, xanaa ma wax ci sama xalaat bu mata gëm, ndax yërmande ji ma Boroom bi baaxe. <sup>26</sup> Lii mooy li ma foog ne mooy li baax, ndax njàqarey jamonoy tey. Li baax ci nit ki daal mooy mu wéye li muy dund tey. <sup>27</sup> Dangaa am jabar? Bul sàkku pase. Am amuloo jabar? Kon bul sàkku jabar. <sup>28</sup> Waaye nag soo takkee jabar, bàkkaaruloo; ab janq it, bu séyee, bàkkaarul. Waaye ñi séq ab séy dinañu am naqaru àddina, te naqar woowu laa leen bëggoona fanqal.

<sup>29</sup> Li may wax, bokk yi, moo di, li des yàggatul. Kon nag bés niki tey, na ñi am jabar mel ni bu ñu ko amul woon; <sup>30</sup> ñiy jooy mel ni ñu jooyul; ñi bég, mel ni ñu bégul; ñi jënd, mel ni ñu moomul li ñu jënd; <sup>31</sup> ñiy jariño alalu àddina, bañ cee xér, ndax melow àddina sii tey, day wees.

<sup>32</sup> Sama coobare mooy, yeen gëmcati Almasi, ngeen mucc ci xalaat yu ub seen bopp. Te ku amul jabar, mbiri Boroom bi lay xalaat, ak nu muy dabe bannexu Boroom bi. <sup>33</sup> Waaye ku am jabar, mbiri àddina lay xalaat, ak nu muy dabe bannexu jabaram, <sup>34</sup> mu daldi ñarale. Jigéen ju séyul, mbaa ab janq, mbiri Boroom bi lay xalaat, di namma sellal yaramam akum xelam. Waaye kiy séy, mbiri àddina lay xalaat, ak nu muy dabe bannexu jëkkëram. <sup>35</sup> Lii nag, seen njariñ a ma ko taxa wax, nammuma leen koo tege ab gállankoor, li ma ci namm

mooy ngeen di def li jekk, te taxawal temm Boroom bi, taxawaay bu leen benn xalaatu àddina dul féle.

<sup>36</sup> Waaye su amee ku jàpp ne jëfewul nu jekk, ak janq bu mu digool ab séy, te janq ba jëm mag†, ba mu xalaat ne takk ko rekk moo ci war, na matal yéeneem, takk ko. Su defee noonu, bàkkaarul. <sup>37</sup> Waaye ki dogu dëgg ci xolam, te du ndigalu gantal lu mu sañula bañ, xanaa ci sagoy boppam doŋŋ la dogoo ne du jël janq bi mu digooloo ab séy, kooku ba tey, def na lu baax. <sup>38</sup> Kon ki jël ab janqam bu mu digool ab séy, def na lu baax, waaye ki jëlul ab janqam moo def li gën.

<sup>39</sup> Jabar nag, buumu jëkkëram a ngi ci baatam, li feek jëkkëram a ngi dund. Waaye su jëkkër ji faatoo, sañ naa séy ak ku ko neex, ndegam gëmkatub Almasi la séyal. <sup>40</sup> Doon na gëna bég nag, su toogoon, baña séyaat, ci sama xalaat, te man it defe naa ne Noowug Yàlla mu ngi ci man.

## 8

### *Lu jëm ci ñam wu ñu sarxal ay tuur*

<sup>1</sup> Su dee wàllu ñam wu ñu sarxal ay tuur, dëgg la, nun ñépp am nanu xam-xam ci moomu mbir. Xam-xam nag day tax nit a réy-réylu, waaye cofeel day yokke. <sup>2</sup> Ku xalaat ne yaa xam lenn, xamaguloo ni nga wara xame. <sup>3</sup> Waaye ku sopp Yàlla, Yàlla xam la.

<sup>4</sup> Kon su dee wàllu ñam wu ñu sarxal ay tuur, xam nanu ne ay tuur du dara ci àddina, te Yàlla kenn la. <sup>5</sup> Doonte am na yu ñuy wooye ay yàlla, te muy lu nekk ci asamaan mbaa ci suuf, te dëgg la, bare na ñu ñu neey ay yàlla lañu, bare na it ñu ñu neey ay sang lañu. <sup>6</sup> Teewul ci sunu wàllu bopp, jenn Yàllaa am, muy Baay bi lépp jóge ci moom, te sunu bakkan ñeel ko, benn Sang doŋŋ a am, muy Yeesu Almasi, bi lépp ame ci moom, te sunu bakkan, ci moom la ame.

<sup>7</sup> Waaye du ñépp a xam loolu. Am na gëmkat ñu seen miineelu tuur yi bàyyeegul, ba léegi, te moo tax bu ñu lekkee ñam wu ñu foog ne saraxi tuur la,

† 7:36 7.36 Manees na ko tekkee nii itam: te xemmentéfam ci ndaw si ëpp ko doole.



seen xel mu daladi moo leen di foogloo ne sobe toppe na leen ca ñam wa. <sup>8</sup> Waaye du wenn ñam wu nuy jegele ak Yàlla. Nu lekk ko, ak nu bañ koo lekk, du nu yokk, du nu wàññi.

<sup>9</sup> Waaye ni ngeen di dunde seen sañ-sañu bopp, dangeen ciy xool ñi seen ngëm dëgërul, ngir ngeen bañ leena yóbbe bàkkaar. <sup>10</sup> Yaw mi réy xam-xam, ku la gis ca ndab la ca jaamookaayu tuur ya, su dee ab gëmkat bu xelam daladi ndax ngëm gu desee dëgër, mbaa du ko xiir ci roy la, ba mu lekk ca ñamu sarax sa? <sup>11</sup> Te su demee noonu nag, su boobaa sa xam-xam bu réy ngay sàanke sa mbokkum gëmkat bu néew doole boobu Almasi deeyal! <sup>12</sup> Su ngeen tooñee noonu bokki gëmkat ñi, ba yàq seen xel mu daladi, kon de Almasi ngeen tooñ. <sup>13</sup> Moo tax, su dee aw ñam wu ma lekk mooy tax ma bàkkaarloo sama mbokkum gëmkat, dootuma lekk muk aw yàpp ci àddina, ngir baña bàkkaarloo sama mbokkum gëmkat.

## 9

### *Póol muñ na lu ko lew*

<sup>1</sup> Du maa moom sama bopp? Am du man, ndawal Almasi laa? Xanaa gisuma Yeesu sunu Boroom? Xanaa du sama liggéey ci Sang bi, moo di yeen ci seen bopp? <sup>2</sup> Ndegam ci ñeneen, man дума ndawal Almasi, xanaa ci yeen boog, moom laa, ndax liy firndeel sama sasu ndaw ci Sang bi, yeen la.

<sup>3</sup> Lii nag moo di sama tont ak ñi may sikkal: <sup>4</sup> xanaa nun amunu sañ-sañu jël ag lekk ak ag naan, ngir liggéey bi nu sasoo? <sup>5</sup> Am sañunoo yóbbaale mbokkum gëmkat buy sunu soxna, ni yeneen ndawi Almasi, ak doomi ndeyi Sang bi, ak Sefas? <sup>6</sup> Am boog mennum man ak Barnaba donj noo amul sañ-sañu ñàkka daan sunu doole?

<sup>7</sup> Kan moo masa rangu liggéeyu coldaar, te léppam war ko? Ana kuy jëmbat tóokërub reseñ, te du lekk ca doom ya? Mbaa kan mooy sàmm ag jur, te du naan ca soowum jur ga? <sup>8</sup> Te lii may wax sax, du ci gis-gisu nit donj laa ko teg,

xanaa du yoonu Yàlla itam, loolu la wax? <sup>9</sup> Bindees na ci yoonu Musaa kay ne: «Bul sunjuñ gémmiñu nag te fekk koy bojj am pepp.» Ndax Yàlla nag yi donj la tiisoo? <sup>10</sup> Am du noo tax muy wax? Nun kay noo tax ñu bind loolu, ndax kuy bey, sañ cee yaakaar, kuy bojj it, sañ cee yaakaar wàllam. <sup>11</sup> Ndegam alali xol lanu ji ci yeen, su nu góobee koomu àddina gu bawoo ci yeen, day èpp a? <sup>12</sup> Ndegam ñeneen a jagoo boobu sañ-sañ ci yeen, astamaak nun.

Waaye nag jariñoowunu sañ-sañ boobu. Lépp lanu far muñ, ngir baña gállankoor yoonu xibaaru jàmm bu Almasi. <sup>13</sup> Xanaa xamuleen ne, ñiy liggéey ci kërug Yàlla gi, ci kërug Yàlla gi lañuy jële seen lekk, te ñi sasoo sarxalukaay bi, am nañu wàll ci sarax ya ñu fa joxe? <sup>14</sup> Naka noonu it, Sang bi moo digle ne ñiy yégle xibaaru jàmm bi, nañu ci dund.

<sup>15</sup> Waaye man jariñoowuma lenn ci sañ-sañ yooyu, te binduma lii it ngir defalees ma noonu. Xanaa dee sax a may gënal— boobu sañ-sañu kañu daal, kenn du ma ko yàqal! <sup>16</sup> Yégle xibaaru jàmm bi moom, du lu may kañoo. Wartéef la wu ñu ma sas, te ngalla man, su ma yéglewul xibaaru jàmm bi! <sup>17</sup> Su ma yebu woona def lii ci sama coobarey bopp, dinaa ci am peyoor. Waaye gannaaw dees maa dénk ag caytu, te ajuwul ci sama coobare, <sup>18</sup> kon ana lu ciy sama peyoor? Xanaa ma man di yégle xibaaru jàmm bi ci dara, ba дума jariñoos sañ-sañu dunde xibaaru jàmm bi may yégle.

<sup>19</sup> Te itam as gor laa, kenn moomu ma; teewul jaamu ñépp laa def sama bopp, ngir gëna iril Sang bi aw nit. <sup>20</sup> Ba ma nekkee ci biir Yawut yi, ni Yawut yi laay def, ngir iri leen. Ba ma nekkee ak ñi tegoo yoonu Musaa, damaa mel ni yoonu Musaa laa tegool, ngir iri ñi tegoo yoonu Musaa, te man ci sama bopp, tegoowuma yoonu Musaa. <sup>21</sup> Maak ñi amul yoonu Musaa, damaa mel ni ku amul yoonu Musaa, ngir iri leen, doonte ñàkkuma yoonu Yàlla, gannaaw maa ngi ci yoonu Almasi. <sup>22</sup> Maak boroom ngëm yi desee

dëgër, damaa mel ni ku ngëmam desee dëgër, ngir iri leen. Lépp laa def sama bopp ci ñépp, ak nu mu mana deme, ba musal ñennat. <sup>23</sup> Loolu lépp def naa ko ndax xibaaru jàmm bi, ngir am ci wàll.

<sup>24</sup> Xanaa xamuleen ne, ab rawante, ñépp a cay daw, waaye kenn donj ay jël ndam li? Dawleen nag ba jël ndam li. <sup>25</sup> Jonantekati tàggat yaram yi, dañuy yar seen yaram bu metti, te ñooñu kaalag ndam guy seey donj lañu ci yaakaar, waaye nun, kaalag ndam gu sax dàkk lanu ci yaakaar. <sup>26</sup> Man nag noonu laay dawwe, waaye samaw xél ñàkkul ab jëmu. Noonu laay këmëxee it, waaye dóoruma ci jaww ji. <sup>27</sup> Damay yar sama yaram yar bu metti kay, ba moom ko, ndax ëllëg ñu bañ maa doyal, gannaaw bu ma xamalee ñeneen kàddu gi ba noppi.

## 10

### *Jaar-jaari maam yedd na sët ya*

<sup>1</sup> Bokk yi, bugguma ngeen umple ko, sunu maam yépp la niir wa yiiron, te ñoom ñépp a jàll géej ga\*. <sup>2</sup> Ñoom ñépp lañu sóob sóobeb Musaa, ca biir niir wa, ak ca biir géej ga. <sup>3</sup> Ñoom ñépp, wenn ñamu kéemaanu Yàlla wa, moom lañu lekk, <sup>4</sup> te ñoom ñépp, menn ndoxum kéemaanu Yàlla ma lañu naan, ndax ñoo doon naane ca doju kéemaanu Yàlla ga, doj wa leen doon gunge, te doj wa Almasi la woon. <sup>5</sup> Teewul ñi ëpp ci ñoom, Yàlla amul woon lu ko neex ci ñoom, ba tax ñu daanu, dee ca màndiñ ma.

<sup>6</sup> Yooyu xew-xew ay misaal la, ngir nu baña xemmem yëf yu bon, na ko maam ya daan xemmeme. <sup>7</sup> Buleen doon ay jaamukati tuur, ni ko ñenn ci ñoom doone woon. Noonu lañu binde ne: «Mbooloo ma toog, di lekk ak a naan, nes tuut ñu jóg, di mbumbaay†.» <sup>8</sup> Bunu jëfe powum séy, ni ko ñenn ci ñoom daa defe, ba tax ñaar fukki junni ak ñett (23 000) ca mbooloo ma bokk dee ci benn bés. <sup>9</sup> Bunu wut itam Almasi, ni ko ñenn ci ñoom wute woon, ba tax ay jaan rey leen.

<sup>10</sup> Buleen jàmbat, ni ñenn ci ñoom doon jàmbate, ba tax malaakam reykat ba rey leen.

<sup>11</sup> Xew-xew yooyu dal maam ya ay misaal la, te dees koo bind ngir nu jàngé ci, nun ñi mujug jamono yemool. <sup>12</sup> Moo tax ku yaakaar ne taxaw nga, nanga moytu bala ngay daanu. <sup>13</sup> Benn nattu dabu leen bu moy nattu yiy dale. Te it Yàllaa jara wóolu. Yàlla du nangu ngeen tegoo nattu bu ngeen àttanul, waaye nattu ba lay booleek pexe, ma leen cay génne, ba ngeen man koo dékku.

### *Dawleen bokkaale*

<sup>14</sup> Kon kat, samay soppe, dawleen bokkaale. <sup>15</sup> Njort naa ne boroomi xel laay waxal. Kon àtteel-leen seen bopp li ma leen wax. <sup>16</sup> Kaasu barke bi nuy barkeeloo, xanaa du mooy bokk gi nu bokk ci deretu Almasi? Te mburu mi nuy daggoo, du mooy bokk gi nu bokk ci yaramu Almasi? <sup>17</sup> Gannaaw menn mburu la nag, doonte ñu bare lanu, kon wenn yaram lanu, ndax nun ñépp, menn mburu mi lanu bokk.

<sup>18</sup> Xool-leen bànni Israyil ci wàllu deret. Ñiy lekk yàppu juru sarax gu ñu rendi, xanaa bokkuñu ak sarxalukaay bi ab céram? <sup>19</sup> Ana kon lu sama wax jiy wund? Ndax daa wund ne yàpp wu ñu sarxal tuur yi tekki na lenn? Am daa wund ne tuur yi tekki na lenn? <sup>20</sup> Li may wax kay moo di yooyu sarax, rab yi la ñeel, waaye du Yàlla, te bugguma ngeen bokk ak rab yi lenn. <sup>21</sup> Dungeen mana naan ci kaasu Sang bi, naan ci kaasu rab yi. Dungeen mana bokk lekk ci ndabal Sang bi, bokk lekk ci ndabal rab yi. <sup>22</sup> Am danuy yékkati fiiraangey Sang bi? Danu koo ëpp doole?

### *Jëfeel say sañ-sañ tey sóoraale nit ñi*

<sup>23</sup> «Sañees na lépp,» lañu wax. Waaye du lépp ay jariñe. «Sañees na lépp,» waaye du lépp ay yokke. <sup>24</sup> Bu kenn sàkku njariñal boppam, waaye sàkkuleen seen njariñal moroom.

<sup>25</sup> Mboolem luy jaay ca ja ba, sañ ngeen koo lekk te bañ cee luqatu lenn luy indi

\* **10:1** 10.1 Ba bànni Israyil nekkee ca màndiñ ma, Boroom bi moom ci boppam moo leen jiiite woon, mel ni aw niir, ag bëccëg ngir gindi leen, su guddee mu doon taxaaru sawara, ngir niital leen. Seetal ci *Mucc ga* 13.20—14.31.

† **10:7** 10.7 Seetal ci *Mucc ga* 32.6.

ngànt cim xel, <sup>26</sup> ndax Boroom bee moom àddina, ak li ci biiram.

<sup>27</sup> Bu leen ku gëmül wooyee lekk, su ngeen nangoo, mboolem lu mu leen taa-jal, lekkleen, te bañ cee luqatu luy indi ngànt cim xel. <sup>28</sup> Waaye bu leen kenn nee: «Lii ñam wu ñu sarxal tuur yi la,» buleen lekk, ndax ka leen ko xamal, ndax itam, ngànt lu wax jiy indi cim xel. <sup>29</sup> Waxuma seenum xel yeen, waaye xelu keneen ka laay wax.

Ana sax lu waral sama sañ-sañu bopp di aju ci àtteb keneen ku am xelam amal ngànt? <sup>30</sup> Bu ma yékkatee kàddug cant ba lekk sama wàll, ana lees may sikke ci aw ñam wu ma sante Yàlla?

<sup>31</sup> Kon nag su ngeen di lekk, mbaa ngeen di naan, mbaa ngeen di def leneen, lépp lu ngeen di def, wutleen koo terale Yàlla. <sup>32</sup> Buleen may kenn lu muy def njombe: du Yawut yi, du jaambur ñi, du mbooloom Yàlla mi. <sup>33</sup> Noonu laay def man ci sama bopp: ñépp laay wuta neex, ci lépp. Sàkkuwuma sama njariñal bopp, waaye njariñal lim bu gëna takku, moom laay sàkku, ngir ñu texe.

## 11

<sup>1</sup> Ni may roye Almasi, man ci sama bopp, royeleen ma noonu.

### *Póol digle na ñu jekkal jataayu julli*

<sup>2</sup> Maa ngi leen di sant ci ni ngeen may fàttlikoo ci lépp, ak ni ngeen saxoo samay dénkaane, ni ma leen ko dénke.

<sup>3</sup> Waaye nag bëgg naa ngeen xam ne gépp góor, Almasi moo di boppam; jigéen, góor moo di boppam, te Almasi, Yàlla moo di boppam. <sup>4</sup> Kon gépp góor guy julli, mbaa muy waxe kàddug waxyu, bu muuree boppam, suufeel na Almasi, miy boppam. <sup>5</sup> Waaye jépp jigéen juy julli, mbaa muy waxe kàddug waxyu, te muurul boppam, suufeel na jëkkëram jiy boppam. Day mel ni bu nelu woon rekk. <sup>6</sup> Jigéen ju nanguwula muuru, bu yeboo xuuf kawaram. Ndegam am na kersay xuuf kawaram, mbaa mu nelu nag, fàww mu muur boppam. <sup>7</sup> Góor moom du muur boppam, ndax mooy takkndeeru Yàlla te

moo taxawe darajay Yàlla. Waaye jigéen moo taxawe darajay góor, <sup>8</sup> ndax góor kat, jëleesu ko ci jigéen, waaye jigéen kay lañu jële ci góor. <sup>9</sup> Góor itam, sàkkeesu ko ngir jigéen, waaye jigéen kay lañu sàkk ngir góor. <sup>10</sup> Looloo tax jigéen wara fésal kilifteef ci kaw boppam, ndax malaaka yi teew\*. <sup>11</sup> Teewul nag ci yoonu Sang bi, jigéen manula ñàkka wéeru ci góor, góor it manula ñàkka wéeru ci jigéen, <sup>12</sup> ndax ni jigéen bàyyikoo ci góor, noonu la góor juddoo ci jigéen, te lépp fa Yàlla la bawoo.

<sup>13</sup> Seetal-leen ko seen bopp rekk, ndax jekk na ci jigéen, muy julli ci Yàlla, te muurul boppam? <sup>14</sup> Xanaa ni àddina ci boppam tédde xamalu leen ne yar kawar gacce la ci góor? <sup>15</sup> Ndaxam kawar gu bare sagu jigéen la. Jigéen lañu jagleel kawar gu bare, muy muuraayam. <sup>16</sup> Waaye ku bëgga werante ci leneen it, nun loolu du sunu baax, te du baaxu mbooloom Yàlla mi.

### *Jekkal-leen reeru Sang bi*

<sup>17</sup> Waaye lii ma leen digal, am na ci lu ma leen gërëmewul, ndax du njariñ la seeni ndaje di jur, xanaa loraange. <sup>18</sup> Benn, dégg naa am na ay féewaloo ci seeni ndaje, te am na lu ma ci gëm. <sup>19</sup> Fàww sax mu am ay xaajaloo ci seen biir, ngir ñi seen ngëm wér mana fés ci seen biir. <sup>20</sup> Bu ngeen dajee benn bérab, bokk reeru Sang bi taxul, <sup>21</sup> ndax bu ngeen dee lekk, ku nekk, reeru boppam lay jëkkantee lekk, ba tax ñenn ci yeen xiif, fu ñeneen naane ba màndi. <sup>22</sup> Xanaa amuleen kër yu ngeen di lekke ak a naane? Am mbooloom Yàlla mi ngeen sofental, di rusloo ñi amul? Ana lu ma leen di wax? Dama leen koy gërème? Loolu de дума leen ci gërëm.

<sup>23</sup> Man, li ma jële ci Sang bi, moom laa leen jottli: Sang Yeesu, guddi gi ñu ko woree, dafa jël mburu, <sup>24</sup> yékkati kàddug cant, dagg ko, ne: «Lii moo di sama yaram wi leen ñeel. Deeleen def lii, di ma ko fàttlikoo.» <sup>25</sup> Noonu itam la def ak kaas ba, gannaaw reer ba, ne leen: «Kaas bii mooy kóllère gu yees gi fasoo ci sama

\* 11:10 11.10 Seetal ci Efes 3.10.

deret. Deeleen def lii, di ma ko fàttlikoo, saa yu ngeen ci naanee.» <sup>26</sup> Saa su ngeen lekkee mburu mii, mbaa ngeen naan ci kaas bi, yégle ngeen deewug Sang bi, ba kera muy ñëw.

<sup>27</sup> Moo tax, képp ku jekkadi nu mu lekke ci mburu mi, ak nu mu naane ci kaasu Sang bi, tooñ nga yaramu Sang bi, ak deretam. <sup>28</sup> Kon na ku nekk seetlu boppam, doora lekk ci mburu mi, naan ci kaas bi. <sup>29</sup> Ndax ku lekk mburu mi, naan ci kaas bi, te gëddaalul yaramu Almasi, mbugalu boppam la lekk, naan ko. <sup>30</sup> Looloo tax ngeen bare ñu néew doole, ak ñu xiibon, ba lim bu takku dee. <sup>31</sup> Su nu doon àtte sunu bopp, deesu nu àttee noonu. <sup>32</sup> Waaye Boroom bee nuy àttee ay mbugalam ngir yar nu, ba deesu nu mbugalaale ci biir àtteb àddina.

<sup>33</sup> Kon nag bokk yi, bu ngeen dajee, ngir bokk lekk, xaaranteleen. <sup>34</sup> Ku xiif, na lekke këram, ngir seeni ndaje bañ leena yóbbe mbugal.

Yeneen mbir yi nag, bu ma dikkee, dinaa ko leeral.

## 12

### *May bare na te wuute*

<sup>1</sup> Léegi nag bokk yi, bugguma ngeen umple ci wàllu mayi Noowug Yàlla. <sup>2</sup> Bokk yi, xam ngeen ne ba ngeen dee ay yéefar, dees leena buuboon, lajjal leen, jème ci ay tuur yu tëlee wax. <sup>3</sup> Moo tax ma di leen biral ne amul kenn kuy waxe Noowug Yàlla ku naan: «Alkànde ñeel na Yeesu.» Te it kenn manul ne: «Yeesu moo di Sang\*,» te du lu ko Noo gu Sell gi xamal.

<sup>4</sup> Mayi Noo gi wuute na, waaye genn Noo gi la. <sup>5</sup> Liggéeyin yi man naa wuute, waaye benn Boroom bi la. <sup>6</sup> Jëf ji it man naa wuute, waaye jenn Yàlla ji mooy jëf lépp ci ñépp.

<sup>7</sup> Ku nekk nag, ak na mayu Noo gi y feeñe ci moom, ngir jariñe. <sup>8</sup> Kii ci Noo gi la jote kàddu gu xelu, kee séddoo kàddug xam-xam ci genn Noo gi. <sup>9</sup> Kale jagoo ngëm ci genn Noo gi, ka ca des jële mayug faje ci genn Noo googu. <sup>10</sup> Kii itam di def ay kéemaan, kee di waxe

kàdduy waxyu, kale mana ràññatle noo yu wuute, keneen di làkk xeeti làkk yu wuute, ka ca des mana firi ay làkk. <sup>11</sup> Loolu lépp, genn Noo googu moo koy def, ku nekk, mu sédd la ci, ni mu ko soobe.

### *Cér bare na, te yaram di wenn*

<sup>12</sup> Noonu yaramu nit nekkee wenn te di cér yu bare, ak noonu mboolem céri yaram dee wenn yaram wi, ak li cér yiy bare lépp, noonu rekk la itam ci Almasi. <sup>13</sup> Ci genn Noo gi lañu nu sóobe ci biir wenn yaram wi, nun ñépp, nu diy Yawut, mbaa nu diy jaambur, nu diy jaam, mbaa nu diy gor, te nun ñépp, genn Noo gi lañu nu nàndale.

<sup>14</sup> Yaram du bennab cér, waaye cér yu bare la. <sup>15</sup> Bu tànk noon: «Gannaaw man duma loxo, kon bokkuma ci yaram,» loolu du ko teree bokk ciw yaram. <sup>16</sup> Te bu nopp noon: «Gannaaw duma bët, kon bokkuma ciw yaram,» loolu du ko tee bokk ciw yaram. <sup>17</sup> Su yaram wépp doon bët, ana nooy dégge? Su lépp doon nopp, ana nooy xañtoo? <sup>18</sup> Waaye Yàlla moo teg cér bu ci nekk ci yaram wi, ni mu ko soobe. <sup>19</sup> Bu lépp doon benn cér, kon ana yaram wi? <sup>20</sup> Cér yi daal bare nañu, waaye wenn yaram wi la.

<sup>21</sup> Bët nag manul ne loxo: «Soxlawuma la!» Te bopp it manul ne ay tànk: «Soxlawuma leen!» <sup>22</sup> Céri yaram yi gëna niru lu néew doole sax, ñooy cér yi manula ñàkk. <sup>23</sup> Cér yi ñu gëna jàpp ne jarula gëddaal, cér yooyu sax lañu gënatee gëddaal. Sunu cér yi amul sutura, ñoom lañu gëna suturaal, <sup>24</sup> te yi am sutura soxlawuñoos suturaal. Waaye Yàlla moo sàkk sunu yaram, sàkkin wu mu ràññee cér yi gëna néew gëddë, te moo leen gëddaal, <sup>25</sup> ngir xaajaloo baña am ciw yaram, te cér yi mànkoo ci di bàyyeente xel. <sup>26</sup> Bu benn cér mettee, mook cér yépp ay bokk metit wi. Bu dee benn cér lañu teral, mook cér yépp ay bokk bannexu.

<sup>27</sup> Yeen nag yeenay yaramu Almasi, te yeena diy céram, ku ci nekk ak wàllam.

\* **12:3** 12.3 Li nu wax fii mooy Yeesu gannaaw ba mu deeyee, ba dekki mooy Sangu àddina wërngal képp.

28 Ñi Yàlla tabb ci biir mbooloom gëmkat ñi, ñi ci jiitu ñoo di ndawi Almasi. Ñaareel bi di ñiy waxe kàddug waxyu, ñetteel bi di jànglekati kàddu gi. Ñi ci topp di ñiy def ay kéemaan, ñi ci topp di ñi am mayu faje, ak ñi mane dimbalee, ak ñi mane jiite, ak ñiy làkk yeneen xeeti làkk. 29 Ndax ñépp ay ndawi Almasi? Am ñépp ay waxe kàddug waxyu? Am ñépp ay jànglekati kàddu gi? Am ñépp ay def ay kéemaan? 30 Am ñépp a am mayu faje? Am ñépp ay làkk yeneen làkk? Am ñépp a mane tekki ba? 31 Teewul nag, nangeen sàkku may yi gën.

### *Cofeel moo gën lépp*

Waaye dinaa leen xamal yoonu dundin wi gën ci lépp.

## 13

1 Su ma doon làkk làkki nit ñi, ak yu malaaka yi sax, te jëfewuma genn cofeel, jóolóoli bu xumb donj laa, mbaa teggum weñ muy riir. 2 Su ma jotoon ci kàddug waxyu, boole ci xam mboolem kumpa, ak mboolem xam-xam, ak ngëm gu mat sèkk ba mana toxal ay tund, te jëfewuma cofeel, дума dara. 3 Te it su ma sarxe woon mboolem sama alal, ba sarxe sama yaramu bopp ngir ñu lakk ko\*, su ma jëfewul cofeel, loolu du ma jariñ dara.

4 Cofeel nag, muñ ak mbaax la. Cofeel bokkul ak kiñaan, bokkul ak jikkoy kañu ak a damu. 5 Bokkul ak jëf ju jekkadi, ak jiital sa njariñal bopp, bokkul ak naqari deret, bokkul ak denc mer. 6 Bokkul ak bége lu jubadi it, waaye moo di bége liy dëgg. 7 Cofeel moo di: lépp, nga bale; lépp, nga gëm; lépp, nga yaakaar; lépp, nga dékku.

8 Cofeel nag du jeex muk. Su dee kàddug waxyu, dina wéy; su dee ay làkk, dina selaw; su dee xam-xam, dina xewi. 9 Ndaxte as ndog lanu xam, te as ndog lanuy waxe kàddug waxyu. 10 Waaye keroog bu li matale dikkee, ndog si wéy. 11 Ba ma dee tuut-tànk, ni tuut-tànk laa doon waxe, di dégge dégginu tuut-tànk, di xalaate ni tuut-tànk. Waaye bi may mag laa xewil yëfi tuut-tànk. 12 Tey jii ci

ab seetu lanuy gise gis-gis bu lënt. Waaye bu keroogee, màkk lanuy jàkkaarloo ak li nuy xool. Tey jii, as ndog laa xam, waaye su keroogee, ni ñu ma xame, ni laay xame ba mu mat sèkk.

13 Léegi nag liy sax moo di: ngëm ak yaakaar ak cofeel; yii yett la, te li sut ci yooyii moo di cofeel.

## 14

### *Lu jëm ci waxyu, aki may ci wàllu làkk*

1 Xintewooleen cofeel, te ngeen sàkku mayi Noo gi, rawatina mayug waxe kàddug waxyu, 2 ndax kiy làkk weneen làkk, du nit ñi lay waxal, waaye Yàlla lay waxal, gannaaw kenn déggul li muy wax. Teewul ci Noo gi lay waxe ay kumpa. 3 Waaye kiy waxe kàddug waxyu, nit ñi lay waxal, di feddlee, di ñaaxe ak di naabe. 4 Kiy làkk yeneen làkk, boppam lay feddli, waaye kiy waxe kàddug waxyu, mbooloom gëmkat ñi lay feddli seen ngëm. 5 Su ma sañoon ngeen di làkk yeen ñépp yeneen làkk, waaye ngeen di waxe kàddug waxyu moo ma gënal. Kiy waxe kàddug waxyu moo ëpp njariñ kiy làkk yeneen làkk, ndare ñu tekki li muy làkk, ba mbooloom gëmkat ñi jële ca lu ñu feddlikoo. 6 Léegi bokk yi, su ma leen dikke woon yeneen làkk yu may làkk, ana lu ma leen di jariñ? Dara, xanaa ma àgge leen kàddug peeñu, mbaa xam-xam, mbaa waxyu, mbaa digle. 7 Noonu la itam ci juntuukaayi po yi dundul tey jibal coow; muy toxoro mbaa xalam. Su yooyu juntuukaay jibalul galan yu leer, ana nees di xame li toxoro ji, mbaa xalam giy wax? 8 Ag liitu xare it, su jibalul woote bu leer, ana kuy waajal ab xare? 9 Noonu la ci yeen itam. Seen lammañ, su ngeen ci waxul kàddu gu leer, ana nees di xame li ngeen di wax? Ci jaww ji rekk ngeen di wax! 10 Ak li làkki àddina bare te wuute lépp, wenn ñàkku ci am piri. 11 Baat bu jib nag, su ma xamul tekkiteem, ab jaambur laay doon ci kiy wax, te kiy wax it, ab jaambur lay doon ci man. 12 Kon yeen itam, gannaaw ñu xér ngeen ci mayi

\* 13:3 13.3 mbaa ba man koo damoo.

Noo gi, fexeleen cee am lu ne xéew, ngir feddli mbooloom gëmkat ñi.

<sup>13</sup> Moo tax kiy làkk weneen làkk wara ñaan ngir ñu xam pireem. <sup>14</sup> Su may ñaan ci weneen làkk, sama xol ay ñaan, waaye samam xel liggéeyul. <sup>15</sup> Kon ana nees di def? Naa ñaane sama xol, tey ñaane samam xel itam. Naa sàbbaale sama xol, tey sàbbaale samam xel itam. <sup>16</sup> Soo yékkatee kàddug cant goo waxe xol donj, ana nu nit ku xamul ku ko teewe naan: «Amiin,» te xamul li ngay wax? <sup>17</sup> Ndaxam yaw, rafet nga kàddug cant, waaye sa kàddu feddliwul keneen ku ciy dégg.

<sup>18</sup> Sant naa Yàlla ndegam maay làkk yeneen làkk ba raw leen, yeen ñépp. <sup>19</sup> Waaye fu mbooloom gëmkat ñi daje, juróomi baat yu ma waxe samam xel ngir jàngle, moo ma gënal junniy baat yu ma waxe weneen làkk.

<sup>20</sup> Bokk yi, buleen doon ay xale ci wàllu déggin. Su dee lu bon, nekkleen ci ay tuut-tànk, waaye màggleen ci wàllu déggin. <sup>21</sup> Bindees na ci téereb yoon wi ne:

«Ay niti làkk-kat,  
ay làmmiñi doxandéem,  
ci laay waxe ak askan wii,  
te taxul ba tey ñu déglu ma.

Boroom bee ko wax\*.»

<sup>22</sup> Kon nag, yeneen làkk, kàddu ya du ci gëmkat ñi la di firnde, waaye ci ñi gëmul la di firnde. Te it waxe kàddug waxyu, du ci ñi gëmul la di firnde, waaye ci gëmkat ñi la dib firnde. <sup>23</sup> Léegi nag su mbooloom gëmkat mépp daje bérab, ñépp di làkk yeneen làkk, bu ay nit ñu xamul mbaa ñu gëmul duggsee, duñu ne dangeena dof? <sup>24</sup> Waaye su ñépp dee waxe kàddug waxyu, ba ku gëmul, mbaa ku xamul duggsi, kàddu ga la ko ñépp di tiiñale, àggee ko ko ab àtteem, <sup>25</sup> ba la làqu woon ca biir xolam, daldi leer. Su ko defee mu ne dàll dëpp jëem ci suuf, sujjóotal Yàlla, te naan: «Aylayéwén Yàllaa ngi ci seen biir!»

*Ndajem gëmkat ñi jar naa rafetal*

\* **14:21** 14.21 Seetal ci *Esayi* 28.11-12.

<sup>26</sup> Kon nag ana nees di def, bokk yi? Bu ngeen daje, kii am woyu cant, kii am lu muy jàngle, kee am am peeñu, kale am lu muy waxe weneen làkk, keneen am am piri, loolu lépp na ko feddli ngëm taxa jóg. <sup>27</sup> Su dee weneen làkk lees di wax, na ñaar ba gën gaa bare, ñett, toppante, te kenn di firi. <sup>28</sup> Su amul kuy firi, bu kiy làkk làkk wi biral lenn ci jataayu mbooloo mi. Na yelu, ngir boppam ak Yàlla.

<sup>29</sup> Ñiy waxe kàddug waxyu, na ci ñaar ba ñett wax, te ñi ci des natt wax ji. <sup>30</sup> Su keneen ci jataay bi amee am peeñu, na ki doon wax noppi. <sup>31</sup> Ndax kat yeen ñépp man ngeena kenn-kennoo, di waxe kàddug waxyu, ngir ñépp jàngle ca, ba gëna farlu. <sup>32</sup> Biralkati kàddug waxyu yi ñoo wara jiite xel mi ñuy waxe. <sup>33</sup> ndax Yàlla du Yàllay salfaañoo, Yàllay jàmm la.

Ci mbooloom mboolooy ñu sell ñi nag, <sup>34</sup> na jigéen ñi noppi ci biir mbooloo yi, ndax mayeesu leen ñu wax ci yooyu jataay. Na jigéen ñi nangu, ni ko yoon wi ci boppam diglee. <sup>35</sup> Su amee lu ñu bégga xam, ca kër ga lañu koy laaj seen jëkkër, ndax jigéen di wax ci biir mbooloom gëmkat ñi, gacce la.

<sup>36</sup> Ndax ci seen biir la kàddug Yàlla bàyyikoo? Am ci yeen donj la agsi? <sup>37</sup> Ku ci xalaat ne moom jottlikatub kàddug waxyu la, mbaa boroom ag may la ci Noo gi, war naa xam xéll ne lii ma leen bind, santaaneb Boroom bi la. <sup>38</sup> Ku ci xamul loolu nag, kooku, xameesu ko.

<sup>39</sup> Kon bokk yi, farluleen ci di waxe kàddug waxyu, te buleen aaye kuy làkk yeneen làkk. <sup>40</sup> Waaye na lépp teggine te aw yoon.

## 15

*Lu jëm ci ndekkitel Almasi*

<sup>1</sup> Léegi nag bokk yi, ma fàttli leen xibaaru jàmm bi ma leen xibaaroon, muy lu ngeen gëm, sax ci, <sup>2</sup> te ci ngeen texee, ndegam jàpp ngeen bu dëgër ci kàddug xibaaru jàmm bi, ni ma leen ko xamale. Lu ko moy ci neen ngeen gëm.

<sup>3</sup> Li ma jotoon laa leen jëkka jottli, te moo di: Almasi moo dee ngir njotug

sunuy bàkkaar, te noonu la ko Mbind mi indee. <sup>4</sup> Denc nañu ko, mu dekki ca ñetteelu fanam, te noonu la ko Mbind mi indee. <sup>5</sup> Mu feeñu Sefas, teg ca feeñu fukki taalibe ya ak ñaar. <sup>6</sup> Gannaaw gi mu feeñu lu ëpp juróomi téeméeri bokki taalibe yu ko gisandoo, te li ëpp ci ñooñu, ñu ngi dund ba léegi, doonte am na ñu ci nelaw. <sup>7</sup> Gannaaw gi mu feeñu Yanqóoba, teg ca feeñu ndawi Almasi yépp. <sup>8</sup> Man nag la mujja feeñu, te ma dib liir bu ab juddoom moy bésam, <sup>9</sup> ndax kat maa gëna ñàkk solo ci ndawi Almasi, te yeyoowuma sax turu ndaw, gannaaw maa doon bundxatal mbooloom Yàlla mi. <sup>10</sup> Ci yiwu Yàlla daal laa doone ki ma doon, te yiw woowu ma ñeel neenul. Xanaa yeneen ndaw yépp sax, maa leen gëna liggéey. Du ci man nag, waaye yiwu Yàlla, wi ànd ak man la. <sup>11</sup> Kon muy man, di ñoom, noonu lanu waaree, te noonu it ngeen gëme.

### *Dekkal tëwul Yàlla*

<sup>12</sup> Ndegam biral nañu ne Almasi dekki na, ana nu ñenn ci yeen mane ne ñi dee duñu dekki? <sup>13</sup> Su fekkee ne ñi dee duñu dekki, kon Almasi it dekkiwul. <sup>14</sup> Su Almasi dekkiwul, sunu waare neen na, te seen ngëm it neen na. <sup>15</sup> Te su boobaa nag ñu war noo jappe ay seeday fen-kati Yàlla, ndax noo seedeel Yàlla, ne moo dekkal Almasi te dekkalu ko, gannaaw ñi dee duñu dekki. <sup>16</sup> Ndaxte ñi dee, su ñu dul dekki kay, Almasi it dekkiwul. <sup>17</sup> Su Almasi dekkiwul nag, seen ngëm amul njariñ, te yeena ngi ci seeni bàkkaar ba tey. <sup>18</sup> Te kon it ñi dee gannaaw ba ñu gëmee Almasi, sànkú nañu. <sup>19</sup> Su dee ci giiru dund gii donj lanu ame yaakaar ci Almasi, kon de noo gëna toskare ñépp.

<sup>20</sup> Waaye nag Almasi dafa dekki moos, te mooy saraxu ndoortel meññeef, bi ñu sàkke ci ngóobum bakkani nit ñi dee. <sup>21</sup> Ci nit la ndee dikke ci àddina. Moo tax ci nit itam la ndekkite dikke ci àddina. <sup>22</sup> Noonu nit bokke ci Aadama, ba tax ñépp di dee, noonu la ñépp mana bokke ci Almasi, ba tax ñu dundalaat leen, ñoom ñépp. <sup>23</sup> Waaye ku nekk ak ayam. Jooxeb ndoortel meññeef mi, Almasi la.

Gannaaw loolu ñoñi Almasi ñooy aye, keroog bu délsee. <sup>24</sup> Gannaaw loolu la muj ga, te ca lay delloo nguur gi kiy Yàlla, di Baay, fekk mu neenal mboolem luy kilifteef, ak mboolem sañ-sañ ak doole. <sup>25</sup> Ndaxte fàww Almasi nguuru, ba kera Yàlla di sukkal mboolem ay noonam ciy tánkam. <sup>26</sup> Noon bu mujj, bi ñuy neenal mooy ndee, <sup>27</sup> ndax «Lépp la Yàlla di jébbal Almasi, teg ko fi ron ndégguy tánkam\*.» Waaye bu Yàlla nee, «lépp la koy jébbal,» bir na ne moom mi ko jébbal lépp, bokku ci. <sup>28</sup> Bu ñu ko jébbalee lépp nag, su boobaa moom Doom ji ci boppam mooy jébbal boppam, ki ko jébbal lépp, ngir Yàlla di lépp ci lépp.

<sup>29</sup> Su fekkee ne ñi dee duñu dekki, kon ñi ñu sóob ci ndox ngir ñi dee, lu ñu koy def, doye? Gannaaw ñi dee duñu dekki, ana lees leen di sóobe ngir ñi dee? <sup>30</sup> Te kon nun it, ana lu jar nuy jaay sunu bakkan waxtu wu nekk? <sup>31</sup> Bokk yi, man de bés bu nekk ma jàkkaarlook ndee, ak sag bi ma leen di sagoo ndax Yeesu Almasi sunu Boroom, mi ngeen gëm. <sup>32</sup> Su yaakaaru nit ci àddina donj taxee may xeex ak ay rabi àll ca Efes, ana lu mu may jariñ. Gannaaw ñi dee duñu dekki, kon kay mooy li ñu ne:

«Nanu lekk te naan, nde ëllég nu deet.»

<sup>33</sup> Bu leen kenn nax: «Ànd bu bon yàq na jikko ju baax.» <sup>34</sup> Délloosileen xel yi ci njub te bàyyi bàkkaar, ndax ñàkka xam lenn ci Yàlla, moom la ñenn ci yeen nekke, te loolu gacce la ci yeen, laa wax!

### *Yaram bare na te wuute*

<sup>35</sup> Teewul nit a ngi naan: «Nan la ñi dee di dekke? Wan yaram lañuy dekkaale?» <sup>36</sup> Gàtt xel! Li nga ji, yaw ci sa bopp, du dundaat li feek deewul ba noppi. <sup>37</sup> Te li nga ji du yaramu gancax giy ñëw, aw fepp kese la, man naa doon bele, mbaa weneen jiwu. <sup>38</sup> Waaye Yàllaa koy yaramal ni mu ko soobe, te jiwu wu nekk ak yaramu gancaxam. <sup>39</sup> Suux yépp nag du wenn suux wi. Wii suux wu nit la, wee wu mala, wale wu picc, wa ca des wu jën. <sup>40</sup> Am na itam ay yaram yu farewoo asamaan,

\* **15:27** 15.27 Seetal ci *Sabóor* 8.7. † **15:32** 15.32 Seetal ci *Esayi* 22.13.

ak ay yaram yu farewoo suuf. Yaram wu farewoo asamaan nag, ag leeram wuute na ag leeru yaram wu farewoo suuf. <sup>41</sup> Jant bi ak leeru boppam, weer wi ak leeru boppam, biddiww yi ak seen leeru bopp, te biddiww sax wuute naak moroom ma, ag leer.

<sup>42</sup> Noonu itam la ndekkitel ñi dee di deme. Li ñu suul mooy jiwu wiy yàqu, te bu dekkee dootu yàqu. <sup>43</sup> Ci ag teddadi lañu ji néew bi ñu suul, te teraanga lay dekkaale. Ci néew doole lees ko ji, mu dekkaale doole. <sup>44</sup> Li ñu suul mooy yaramu judduwaale wi ñu ji, mu dekki di yaram wuy dunde Noo gi. Ndaxte ni yaramu judduwaale ame, ni la yaram wuy dunde Noo gi ame.

<sup>45</sup> Noonu lañu binde ne: «Aadama, nit ku jëkk ka, lañu def jëmm juy dund†,» waaye Aadama mu mujj mi moo di Noo giy dundloo. <sup>46</sup> Du yaram wi bindoo ag noo nag mooy jiitu, waaye yaramu judduwaale wi mooy jiitu, yaram wi bindoo ag noo topp ci. <sup>47</sup> Aadama mu jëkk ma, ci suuf la jóge woon, di suuf; Adamam ñaareel mi jóge fa asamaan. <sup>48</sup> Kooka di suuf nag, na mu mel, ni la niti suuf mel. Ku asamaane ka it, na mu mel, ni la ñu asamaane ñi mel. <sup>49</sup> Te ni nu doone tey, takkndeeru nitu suuf ka, noonu lanuy dooneji takkndeeru ku asamaane ka.

<sup>50</sup> Li may wax bokk yi, moo di suux ak deret du am cér ci nguurug Yàlla, te luy yàqu manula am cér ci lu dul yàqu. <sup>51</sup> Kaayleen ma xamal leen mbir mu umpe. Dunu dee nun ñépp, waaye nun ñépp ay soppiku. <sup>52</sup> Lu gaawa gaaw lay doon, ci xef ak xippi, bu liit gu mujj ga jibee; nde liit ga mooy jib, ñi dee, dekki, di ñu dul yàqooti, nun nag, nu soppiku. <sup>53</sup> Sunu yaramu judduwaale wii nara yàqu, fàww mu sol weneen wu dul yàqu; sunu yaramu ndee wii, fàww mu sol yaramu deetil. <sup>54</sup> Bu yaramu judduwaale wii nara yàqu solee weneen wu dul yàqu, ba yaramu ndee wii sol yaramu ndeetil, su boobaa la kàddu gii ñu bind di mat:

«Mëddees na ndee ci géēju ndam§.

<sup>55</sup> Moo yaw ndee, Ana sa ndam?

Moo yaw ndee, ana sag fitt\*?»

<sup>56</sup> Ndee, ag fittam mooy bàkkaar, te bàkkaar, dooleem mooy Yoon wi.

<sup>57</sup> Waaye cant ñeel na Yàlla, mi nu may ndam ci sunu Sang Yeesu Almasi!

<sup>58</sup> Kon nag yeen sama bokk yi ma soppal sama bopp, farluleen, bu leen dara yëngal, te saxooleena jëm kanam ci liggéeyu Sang bi, te ngeen xam ne seenu ñaq, ci seenub ànd ak Sang bi, du neen.

## 16

*Lu jëm ci ndimbal lu ñeel gëmkati Yerusalem*

<sup>1</sup> Ci wàllu ndimbal li jëm ci gëmkat ñu sell ñi, noonu ma ko digale mboolooy gëmkati diiwaanu Galasi, yeen itam defeleen ko noonu. <sup>2</sup> Bés bu jëkk ci ayu bés yi, na ku nekk génne as lëf ca la mu am, na mu ko àttane, te mu dencal ko boppam, ngir bu ma dikkee, dootu soxlaa wër, di dajale. <sup>3</sup> Bu ma dikkee, ñi ngeen tànn, ñoom laay yebale ab bataaxal, ngir ñu yóbbu Yerusalem seen ndimbal. <sup>4</sup> Su aajoo ma dem man itam, ñu ànd ak man.

*Póol mébét na, dénkaane na*

<sup>5</sup> Dinaa dikk ba ci yeen, gannaaw bu ma jaaree diiwaanu Maseduwan, ndax Maseduwan laay jaare. <sup>6</sup> Man naa am ma yàgg ci yeen, jombul sax ma lollikoo fi yeen. Su ko defee ngeen yiwi ma, ma dem, ak fu ma mana jëm. <sup>7</sup> Ndaxte itam, buggumaa jaare fi yeen rekk, jàll, waaye yaakaar naa toog ci yeen ab diir, su ko Boroom bi mayee. <sup>8</sup> Waaye ci Efes gii laay toog ba màggalu Pàntakot, <sup>9</sup> ndax bunt ubbikul na ma fi nàpp, ngir liggéey bu am njariñ, te noon yi bare nañu.

<sup>10</sup> Bu Timote dikkee nag, fexeleen ba bumu am lu muy tiit ci seen biir, ndax liggéeyu Boroom bi lay liggéey ni man.

<sup>11</sup> Kon bu ko kenn xeeb. Gannaaw loolu nangeen ko yiwi ak jàmm, ba mu délsi ci man, ndax moom laay xaar, mook bokk yi itam.

<sup>12</sup> Mbokk mi Apolos nag moom, soññ naa ko lu bare, ngir mu dikk ba ci yeen,

† 15:45 15.45 Seetal ci *Njàlbéen ga* 2.7. § 15:54 15.54 Seetal ci *Esayi* 25.8. \* 15:55 15.55 Seetal ci *Ose* 13.14.



ànd ak bokk yi, waaye fii nu tollu yebuwu ci dara. Teewul bu jekkoo, dina dikk.

*Yeneen ndigal a ngi aki tàggtoo*

<sup>13</sup> Teewluleen te saxoo ngëm, góor-góorluleen te dëgërlu. <sup>14</sup> Lépp lu ngeen di def, defeleen ko cofeel.

<sup>15</sup> Bokk yi, xam ngeen ne Estefanas ak njabootam ñooy jooxeb ndoortel meññeef ci diiwaanu Akayi, te jàpple ñu sell ñi lañu séddoo. Kon dama leen di ñaan, <sup>16</sup> ngeen nangul nit ñu mel noonu, ñoom ak mboolem ñu bokk ak ñoom liggéey bi ak coono bi. <sup>17</sup> Maa ngi bége teewaayu Estefanas ak Fortunatus ak Akaykus, ndax bi ngeen wuutee tey, ñoo leen taxawal. <sup>18</sup> Dalal nañu sama xel, ak seen mos, yeen itam. Kon nit ñu mel noonu, fonkleen leen.

<sup>19</sup> Mboolooy gëmcati diiwaanu Asi nag ñu ngi leen di nuyu. Akilas ak Pirsil, ñu ngi leen di nuyu bu baax ci turu Sang bi, ñoom ak mbooloom gëmkat ñiy daje seen kër. <sup>20</sup> Bokk yépp a ngi leen di nuyu.

Saafonteelen foonante yu sell.

<sup>21</sup> Man Póol maa bind nuyoo bii ci sama loxol bopp.

<sup>22</sup> Ku buggul Sang bi, na alku. Maranata (mu firi sunu Sang, dikkal!)

<sup>23</sup> Yal na yiwu Sang Yeesu ànd ak yeen.

<sup>24</sup> Sama cofeel ñeel na leen, yeen ñépp, ci Yeesu Almasi mi nu bokk.

## Ñaareelu bataaxal bi Yàlla may Póol, mu bind ko waa Korent

<sup>1</sup> Ci man Póol, ndawal Almasi Yeesu ci coobarey Yàlla, ci man la bataaxal bii bawoo, bawoo itam ci Timote mbokk mi, ñeel mbooloom Yàlla mi ci Korent, ak mboolem ñu sell ñi ci diiwaanu Akayi gépp. <sup>2</sup> Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

### *Yàlla mooy dëfal xol yi*

<sup>3</sup> Cant ñeel na Yàlla sunu Baayu Sang Yeesu Almasi, Baayu yërmande yi, Yàlla jiy dëfale nu nekk, <sup>4</sup> moom mi nuy dëfal ci sunu jépp njàqare, ngir noonu nu jote nun ci sunu bopp, ndëfalaay lu nu dëfaloo fa Yàlla, nu man koo dëfale ñi nekke mboolem xeeti njàqare. <sup>5</sup> Ndax kat coonoy Almasi, nu mu gëna yokkoo ci sunu kaw, ndax li nu ko gëm, noonu itam la ndëfalaay liy bawoo ci Almasi di yokkoo. <sup>6</sup> Su nu jaaree ci njàqare, seen ndëfalaay ak seen jàmm lay doon. Sunu amee ndëfalaay it, seen ndëfalaay lay doon, ngir coono yi nuy dékku, ngeen man koo dékku, yeen itam. <sup>7</sup> Te itam am nanu yaakaar ci yeen bu baax. Xam nanu ne ni ngeen bokke ak nun coono, ni ngeen di bokke ak nun ndëfalaay.

<sup>8</sup> Ndax kat, bokk yi, buggunu ngeen umple njàqare, ji nu daj ci diiwaanu Asi. Daj nanu coono bu jéggi dayo, te wees sunu kàttan, ba yaakaaratunu woona dund sax. <sup>9</sup> Nun ci sunu wàllu bopp, jàppoon nanu ne sunu àtteb dee moo taxaw. Waaye loolu tax na nu bañatee yaakaar sunu bopp, xanaa di yaakaar ci Yàlla, miy dekkal ñi dee. <sup>10</sup> Moo nu wallu ci googu dee gu naroonna metti, moo nuy walluwaat, te moom lanu yaakaar mu wallooti nu. <sup>11</sup> Yeen itam, ni ngeen nu ciy jàpplee mooy ngeen di nu ñaanal. Su ko defee yiw, wa nu ñu bare ñaanal ba nu

am ko, dina tax ñu bare biral ag cant ci sunu mbir.

### *Póol biral na jëfinam ak mébétam*

<sup>12</sup> Li nuy damoo nag moo di seede bi nu sunu xel mu dal seedeel, ne xol bu set ak jikko ju dëggu ju bawoo fa Yàlla, mooy li nu doxale ci àddina si, rawatina sunu digg ak yeen, te du lu nu sunu xam-xamu nitu neen may, waaye yiwu Yàlla moo nu ko may. <sup>13</sup> Bindunu leen leneen lu moy mbind moomu ngeen jàng te man koo xam. May yaakaar nag ne dingeen xam ba mokkal, <sup>14</sup> noonu ngeen xawa xame ne nun, man ngeen noo damoo, te nun it, yeen la nuy damoo, keroog bésu Sang Yeesu.

<sup>15</sup> Kóolute gu ma amoon ci ni ngeen nuy damoo moo tax ma naroonna jékka dikk ba ci yeen, ngir seen yiw mana jaar, <sup>16</sup> ba bu ma jógee ci yeen, daldi jaareji diiwaanu Maseduwan, bu ma jógee Maseduwan, dikkaat ci yeen, ba ngeen yiwi ma, ma jëm Yude. <sup>17</sup> Ndax ñàkk pastéef laa mébété moomu mébét? Am ni nitu suuxu neen di mébété rekk laa topp bay xel-jaar, naan «waaw» te naan «déet»?

<sup>18</sup> Yàlla mi mata gëm de seere na ne kàddu gi nu leen di wax du «waaw, déet,» <sup>19</sup> ndax Doomu Yàlla, Yeesu Almasi, mi nu biral ci seen biir, man ak Silas\* ak Timote, du kàddug «waaw, déet;» «waaw» donj a nekk ci moom. <sup>20</sup> Ak li digey Yàlla di bare lépp, ci Almasi la ay digeem di doone «waaw». Moo tax itam, ci moom lanu naan Yàlla: «Amiin», ngir delloo ko njukkal. <sup>21</sup> Te ki nuy saxal ci Almasi, nook yeen, moo nu tabbe diwu pal gi, te moo di Yàlla. <sup>22</sup> Moo nu màndargaale xammikaayam, te moo yeb dawalub Noo gu Sell gi ci sunu biir xol.

<sup>23</sup> Man nag seedeY Yàlla laa ciy sàkku, giñ naa ko ci sama bakkan, bañ leena yokku naqar moo tax délsiwuma Korent. <sup>24</sup> Du caageenu yilif seen ngëm nag, ndax ci ngëm ngeen sax, waaye nook yeen ay liggéey, ngir seen mbégte.

## 2

<sup>1</sup> Man nag li ma dogu mooy lii: Du teg leen aw naqar laay délsee ci yeen,

\* **1:19** 1.19 Silas mooy Silwan ba tey.

<sup>2</sup> ndax su ma leen naqaralee, ana kuy seral sama xol ku dul yeen ñi ma naqaral? <sup>3</sup> Looloo taxoon ma binde noonu, ngir bu ma dikkee, baña am naqar ci ñi ma waroona bégal. Li ma wóor ci yeen ñépp moo di sama mbégte mooy seen mbégte, yeen ñépp. <sup>4</sup> Ci biir njàqare, ak xol bu fees, ak rongooñ yu bare laa leen bind. Binduma leen ngir naqaral leen, waaye cofeel gu réy gi ma am ci yeen moo tax.

<sup>5</sup> Su nit tegee aw naqar, man naa ne du man rekk la ko teg, waaye yeen ñépp la teg aw naqar, mbaa boog ma ne ñenn ci yeen, ngir baña réyal mbir mi lool. <sup>6</sup> Tiiñal, gi ko li épp ci mbooloo mi tiiñal, doy na ko mbugal. <sup>7</sup> Kon kay xanaa ngeen jéggal ko, te dëfal ko, ngir mu baña sóobu ci naqar wu ko épp doole. <sup>8</sup> Kon dama leen di ñaan, ngeen feddli seen mbéggeel ci moom. <sup>9</sup> Leneen lu ma jublu woon ci bind leen, moo di nattu leen ba xam, ndax dingeen dégg ndigal ci lépp. <sup>10</sup> Ku ngeen jéggal ag tooñ, ma jéggal ko, man itam. Man nag, su ma jéggalee, ndegam am naa lu ma jéggalee, yeena tax ma def ko, ci kanam Almasi, <sup>11</sup> ngir Seytaane bañ noo nax, ndax ay pexeem, umplewunu ko.

### *Póol jaaxle na, féex na*

<sup>12</sup> Ba ma ággee Torowas, ngir yégle fa xibaaru jàmm bi ci Almasi, bunt ubbikul na ma ndax Boroom bi. <sup>13</sup> Waaye sama xel dalul woon, ndax gisuma woon sama mbokk, Tit. Teewul ma tàggtoo ak ñoom, jëm diiwaanu Maseduwan.

<sup>14</sup> Waaye cant ñeel na Yàlla\*! Moom mi Almasi tax mu di nu yóbbaale saa su nekk, ci njaab miy fésal ndamam, te cuuraayal xam-xamam, nun ñii la koy wasaaree fépp, <sup>15</sup> ndax kat nun nooy cuuraayal Almasi fa Yàlla, ñeel ñi ci yoonu texe, ak ñi ci yoonu sànkute. <sup>16</sup> Teewul muy ci ñii, xetu ndee gu jëme ci ndee, te di ci ñee, xetu dund gu jëme ci dund. Boobu sas nag, ana ku ko àttan? <sup>17</sup> Nun nag danoo melul ni ñu bare, ñiy julaa kàddug Yàlla, waaye ci ndigalal Yàlla ak

fi kanam Yàlla la nuy waaree xol bu set, ci Almasi mi nu gëm.

## 3

### *Póol a ngi layool sasub ndawam*

<sup>1</sup> Danuy tàmbaleetee seedeel sunu bopp ne noo yelloo ngërëma? Am danoo soxla ni ñenn nit ñi, ay bataaxal yu jëm ci yeen, mbaa mu bawoo ci yeen, ngir seedeel nu ngërëm? <sup>2</sup> Sunu bataaxal kay, yeen la, te dees koo bind ci sunu xol, ba ñépp xam ko, jàng ko. <sup>3</sup> Bir na ne bataaxalub Almasi bu jottlikoo ci sunub liggéey, moom ngeen, te du daa lees ko binde, waaye Noowug Yàlla jiy dund lees ko binde. Du ci àlluway doj lees ko rédd, waaye ci àlluway xoli suux, lees ko rédd.

<sup>4</sup> Googu kóolute lanu am ci Yàlla ndax Almasi. <sup>5</sup> Du caageenu doyloo sunu manoorey bopp, ba yaakaar ne lenn man naa sottee ci sunu wàllu bopp, waaye sunu manoore ci Yàlla la jóge. <sup>6</sup> Moo nu may manoorey doon ay liggéeykati kóllère gu bees gu ajuwul ci mbindum ndigali yoon, xanaa kóllère gu aju ci Noo gi. Ndaxte mbindum ndigali yoon day rey, te Noo gi di dundloo.

<sup>7</sup> Mbindum ndigali yoon wi, ci aw doj lees ko réddoon, te Musaa moo sasoo woon liggéeyu yoon woowuy jëme ci ndee. Teewul muy liggéey bu làmboo ag leer gu doon lèrxat ca kanam ga, ba bànni Israyil tële koo xool jàkk, doonte leer guy wéy la woon. <sup>8</sup> Waaye liggéeyu Noo gi, leer gu gënatee réy la làmboo. <sup>9</sup> Ndegam liggéey boobuy tege ab daan moo làmboo ag leer, kon liggéeyu Noo, giy maye njekk moo ko gënatee làmboo ag leer. <sup>10</sup> Soo ko xoolee noonu, leer ga woon, du woon sax ag leer, ci leer gii ko raw tey, <sup>11</sup> ndax ndegam liy wéy moo làmboo woon ag leer, astamaak li fi sax.

<sup>12</sup> Gannaaw am nanu jooju yaakaar nag, fit wu réy lanuy deme, <sup>13</sup> te baña def ni Musaa ma daan muur kanam ga, ndax bànni Israyil bañ ne jàkk ci leer guy wéy, di giim, di giim ba jeex. <sup>14</sup> Waaye seenum

\* **2:14** 2.14 Gannaaw ba Póol dajee ak Tit ba mu xamal ko ni waa Korent rafetloo bataaxalam ba mu doon jooye, loolu firndeel na ko ne Yàlla dëggal na sasu ndawam. Moo tax muy sàbbaal Yàlla ci woowu yiw. Seetal 7.5-16.

xel a dërkiis. Ba tey jii, bu ñuy jànge biir mbooloo, téereb kóllère gu jëkk gi, muuraay googoo fi des; murikuwul, ndax ci Almasi lay deñe. <sup>15</sup> Waaw, ba tey jii kay, saa yu ñuy biral yoonu Musaa, ag muuraay a ngi tege ci seen xol. <sup>16</sup> Waaye saa su nit waññikoo ci Boroom bi, muuraay gi day muriku. <sup>17</sup> Boroom bi mooy Noo gi, te fu Noo gi nekk, fa la nit di moome boppam. <sup>18</sup> Nun ñépp nag, kanam gu muriku lanuy xoolle niki cib seetu, leeru Boroom bi, ba tax nuy soppiku, doon takkndeeram, tey làmboo leer guy màgg, di gëna màgg. Looloo di liggéeyu Boroom bi, moom miy Noo gi.

#### 4

##### *Njaqi bani kese yeb na ngëneeli alal*

<sup>1</sup> Ndegam boobu liggéey lanu sasoo, ci yërmandey Yàlla, dunu yoqi. <sup>2</sup> Waaye danoo dàq jépp jéf ju gâccelu ju nit di jéfe làq-làqal. Doxunu ag njublan te sopparñiwunu kàddug Yàlla. Liy dëgg kay lanuy fésal, ba am kóoluteg ñépp, fi kanam Yàlla. <sup>3</sup> Sunu xibaaru jàmm nag, su muuroo, ñi nara sànkul la muurul. <sup>4</sup> Aji gëmadi ñoonu la Seytaane yàllay xarnu bii gëlëmal seenum xel, ngir ñu baña gis ceeñeeru xibaaru jàmm bu leeru Almasi, miy melokaanu Yàlla. <sup>5</sup> Nun kat, du sunu bopp lanuy waare, waaye li Yeesu Almasi dib Sang moom lanuy waare, te nun ci sunu bopp nooy seeni jaam, ndax Yeesu. <sup>6</sup> Ndaxte Yàlla mi ne: «Na leer gi leere ci biir lëndëm gi,» moo leeral sunu xol, ngir leeraangey xam-xamu leeru Yàlla, te leeraange googu mooy leroxat ci xar-kanamu Yeesu Almasi.

<sup>7</sup> Nun nag nooy njaqi bani kese yi yeb jooju alal, ngir mu bir ne manoore ju yéeme ji alal ji làmboo, manoorey Yàllaa, waaye du sunu jos. <sup>8</sup> Nu nekk lees nuy tance, waaye deesu nu nappaaje. Dinanu jaaxle, waaye dunu jàq. <sup>9</sup> Dees na nu bundxatal, waaye deesu nu wacc. Dees na nu daaneel, waaye deesu nu jekkli. <sup>10</sup> Dee gi Yeesu dee woon, moom lanu àndal ci sunu yaram, fu nu tollu, ngir dundug Yeesu itam mana fése ci sunu

yaram. <sup>11</sup> Saa su nekk, nun ñiy dund, ñu ngi nuy jébbal ndee ndax Yeesu, ba tax dundu Yeesu it mana fése ci sunuw suux wi jëm ndee. <sup>12</sup> Kon nag ndee mooy def liggéeyam ci nun, ndund di def liggéeyam ci yeen.

<sup>13</sup> Bindees na ne: «Damaa gëm, moo tax ma wax\*.» Nun it, wenn xeetu ngëm wi lanu am. Danoo gëm, moo tax itam nuy wax. <sup>14</sup> Ndaxte xam nanu ne ki dekkal Sang Yeesu, moo nuy dekkal itam, nook Yeesu, te moo nuy yóbbu ba nu teewi, nook yeen, fa kanamam. <sup>15</sup> Loolu lépp yeena tax, ngir yiwu Yàlla lawa law, ba cant gu ne gáññ tukkee ci ñi épp ci nit ñi, ngir màggug Yàlla.

##### *Yaakaar lanu saxoo*

<sup>16</sup> Moo tax dunu ñàkk yaakaar. Doonte sax sunu bitib jëmm a ngi gën di bon, sunu jëmmu biir moom, mu ngi yeeslu bés ak bés. <sup>17</sup> Sunu coono bu woyof bii ci àddina, ci diggante bu gàtt nag, moo nuy jural teraanga ju diisaay ba jéggi dayo, teraanga ju sax dàkk. <sup>18</sup> Moo waral xoolunu ci li bët mana gis, waaye li bët dul gis, ci lanuy xool, ndax li bët mana gis day wéy, waaye li bët dul gis moo sax ba fàww.

#### 5

<sup>1</sup> Xam nanu ne sunu yaram, sunu këru kaw suuf gii di ab xayma, bu daanoo it, am taax lanu am fa Yàlla, kër gu sax dàkk, gu loxol nit tabaxul. <sup>2</sup> Moo nu tax di onk ci biir xayma bii nu nekk, ndax yàkkamtee soloo sunu dëkkuwaayu asamaan, teg ko ci kaw bii nu jiital, <sup>3</sup> nde bu nu soloo noonu, dunu def yaramu neen. <sup>4</sup> Noo ngi onk ndax diis, li feek nu ngeek sunuw yaram, xayma bi nu soloo nii. Du summiku lanu namm, waaye solu teg ko ci lanu namm, ngir li jëm ndee, daldi suux ci biir ndund. <sup>5</sup> Googu muj ci boppam lanu Yàlla mooñe woon, te Noo gi mu nu jox lanu ci dawalal.

<sup>6</sup> Moo tax nu saxoo ñeme, te xam ne sunu desagum biir kër, ci yaram wi, mooy sunu desagum fu sore Sang bi, <sup>7</sup> ndax ngëm lanuy doxe, waaye doxewunu ab

\* 4:13 4.13 Seetal ci *Sabóor* 116.10.

gis-gis. <sup>8</sup> Kon ñeme lanu def, te li nu gënal di gënn, des bitib sunu yaramu tey, ngir dëkki ak Sang bi. <sup>9</sup> Kon nag, nu des biir kër gii, mbaa nu gënn, dëkki bitib kër gii, li nu xintewoo daal moo di nu neex Sang bi. <sup>10</sup> Ndax kat, nun ñépp fàww nu taxawi fa jalub àttekaayu Almasi, ngir ku nekk yooloo kemu jëf ja mu jëfe yaramam, muy lu baax, mbaa lu bon.

### *Jubooleen ak Yàlla*

<sup>11</sup> Danoo xam lan mooy ragal Boroom bi nag, te moo nu tax di wax lu gëmloo nit ñi. Yàlla de ràññee na bu baax nooy kan. May yaakaar ne yeen itam, ci seen biir xol, ràññee ngeen bu baax nooy kan. <sup>12</sup> Seedeelatunu sunu bopp lu jar ngërëm de, danu leen di may lu ngeen nu mana sago, ndax ngeen am tontal ñi sagoowul li ci biir xol, xanaa di sago am peeñ. <sup>13</sup> Ndegam danoo teqlikoo ak sunu sago, Yàlla la ñeel. Su nu àndee ak sunu sago nag, yeen la ñeel. <sup>14</sup> Ndaxte cofeelu Almasi daal moo nu jiite, nun ñi ràññee lii: Gannaaw kenn moo deeyal ñépp, kon ñépp a dee. <sup>15</sup> Te ki deeyal ñépp, daa deeyal ñépp ngir ñiy dund bañatee dund ngir seen bopp, xanaa di dund ngir ki leen deeyal, ba dekki.

<sup>16</sup> Kon nag gannaaw-si-tey, ni nitu suuxu neen di xoole moroomam, nun xooleetunu ko kenn. Doonte ni nitu suuxu neen lanu xoole woon Almasi, léegi xooleetunu ko noonu. <sup>17</sup> Kon bu nit ki bokkee ci Almasi, mbindeef mu bees lay doon. La woon day wonni, li teew nag, di lu yees. <sup>18</sup> Loolu lépp ci Yàlla la jóge, moom mi nu jubale ak boppam ci Almasi, te moo nu sas, ngir nuy waare juboo googu. <sup>19</sup> Loolu di firi ne ci Almasi la Yàlla jubale waa àddina, ak jëmmu boppam, ba toppu leen seeni tooñ, te moo nu dénk kàddug juboo gi. <sup>20</sup> Kon nag Almasi, noo diy ndawam, te ci nun la Yàlla di wootee. Kon ci turu Almasi, danu leen di ñaan: nanguleena juboo ak Yàlla. <sup>21</sup> Almasi mi masula bàkkaar, moom la Yàlla sëf sunu bàkkaar, ngir nu mana ame ci moom àtteb nit ñu jub fa Yàlla.

\* **6:2** 6.2 Seetal ci *Esayi* 49.8.

## 6

<sup>1</sup> Nun ñi bokk ci liggéey bi nag, noo leen di ñaan ngeen baña nangu yiwu Yàlla ci neen. <sup>2</sup> Ndaxte Yàlla moo ne: «Jant ba mu jotee laa la nangul, bésu mucc ba laa la wallu\*.» Te nag, tey jii la jantam jote; tey kat, la bésub mucc.

### *Liggéeyal Yàlla ñàkkul aw tiis*

<sup>3</sup> Buggunu kenn sikk sunub liggéey, moo tax buggunoo jëfe lenn luy doon tojaange ci kenn. <sup>4</sup> Ci lépp kay lanu bégga seedeel sunu bopp, ne noo yelloo ngërëm, te ay jawriñi Yàlla lanu, di ñu muñ lu bare ci biir coono, aki mitit, aki njàqare; <sup>5</sup> ci ay dóor, ak néegi kaso, ci biir mbooloo yu nu jógal, ci doñ-doñ ju metti, ak fanaanee xoole, akub xiif; <sup>6</sup> te nuy setal sunu dund, di ànd ak xam-xam, ci biir muñ, akug mbaax, ci biir Noo gu Sell gi, ak cofeel gu amul jinigal, <sup>7</sup> ci biir kàddug dëgg, ak kàttanu Yàlla; ci kaw gannaayi njubte yi ci sunu loxol ndijoor ak lu càmmoñ; <sup>8</sup> ci biir teraanga, ak ci biir toskare; ci biiri baatal, ak jëw yu rafet. Dees noo jàppe ay mbubbookati dëgg, te nuy nit ñu dëgg; <sup>9</sup> jàppe nu ñu kenn xamul, te nuy ñu siiw; jàppe nu ñuy waaja dee, te nuy dund; jàppe nu ñu ñu wara mbugal, te bañ leena teg àtteb dee. <sup>10</sup> Dees noo jàppe boroomi tiis, te nu dëkke mbég; jàppe nu ay néew-ji-doole, te nu woomal ñu bare; jàppe nu ñu amul dara, te nu moom lépp.

<sup>11</sup> Yeen bokki Korent, wax nanu leen sunu biir yépp, ubbil leen sunu xol. <sup>12</sup> Genn ñooru jógewul ci nun, waaye yeen yeena nu ñooroo seen xol. <sup>13</sup> Léegi nag, yeen, feyleen nu bor bi boog, ma wax ak yeen ni samay doom, ubbil-leen nu seen xol!

### *Baleen bokkaale*

<sup>14</sup> Buleen lëkkoo ak gëmadikat ñi. Gan lëngoo la njub ak ndëngte séq? Gan booloo la leer ak lëndëm séq? <sup>15</sup> Gan juboo la Almasi ak Seytaane séq? Wan wàll la gëmkat bi bokk ak gëmadikat bi? <sup>16</sup> Gan takktoo la kër Yàlla séq ak ay tuur? Ndax kat, nun, nooy kër Yàlla jiy dund, te noonu la ko Yàlla waxe ne:

«Maay dëkk ci seen biir, di dox ci seen biir,

di seen Yàlla, ñuy sama ñoñ†.»

17 Kon nag:

«Nangeen génne ci seen biir, te teqlikoo ak ñoom,»

la Boroom bi wax.

«Lu sobewu, buleen ko laal‡.

Su boobaa, maa leen di dalal§.

18 Maay doon seen baay,

ngeen di samay doom, góor, ak jigéen\*,»

la Boroom bi, Aji Man ji wax.

## 7

1 Gannaaw noo moom yii dige nag, soppe yi, nanu setal sunu bopp ci mboolem sobey yaram, ak ju xel, te nu matal sellnga ci ag ragal Yàlla.

### *Póol bége na tuubeelu waa Korent*

2 Xajal-leen nu. Tooñunu kenn; lorunu kenn; naxunu kenn, lekkunu alalu kenn.

3 Du teg leen tooñ laay waxe lii, ndax wax naa ko ba noppi, yeena ngi ci sunu xol, ngir nu bokk dund, mbaa nu bokk dee.

4 Kóolute gu réy laa am ci yeen, te sag bi ma ame ci yeen réy na. Mbégte mu seral sama xol laa feese, te bannex laa rembatle, ci biir sunu mboolem njàqare!

5 Ba nu àggee diiwaanu Maseduwan, sunuw yaram noppluwul, waaye daj nanu bépp coono: xeex ci biti, njàqare ci biir. 6 Teewul Yàlla miy seral xolu ñi xàddi, tàñki Tit la serale sunu xol, 7 te du tàñki Tit rekk la serale sunu xol, waaye itam, seral ga Tit ne, moom ngeen serale woon xolam. Yégal na nu seen nammeel gu réy, ak seeni jooy, ak seen xéraange ci man, ba ma gënatee bég.

8 Ndegam sax dama leena tegoon aw tiis ndax bataaxal ba ma leen bind, réccootuma ko, doonte réccu woon naa ko, ndax gis naa ne bataaxal boobu teg na leen aw tiis, lu mu gàtt gàtt. 9 Waaye tey bég naa, te du tiis wu ngeen tegoo laay bége, waaye li leen tiis wi tuubloo, laay bége, ndax woowu xeetu tiis la Yàlla namm ci yeen, moo tax it yóbbewunu

leen jenn loraange. 10 Ndaxte tiis wu Yàlla namm, ag tuubeel gu jëme cig mucc lay jur, te loolu du tiis wees di tiisoo. Waaye tiisu àddina, ndee lay jur. 11 Gisleen nag, seen tiis wi leen Yàlla teg ci coobareem, li mu leen jural: gii farlute; gii kàddug layoo gu ngeen yékkati, rawati; mii mer mu war, rawati; gii ragal Yàlla rawati; gii nammeel rawati; gii xéraange rawati; gii pastéef ci yar ki tooñ rawati! Nu nekk ngeen setale seen bopp wecc ci mbir moomu. 12 Kon nag su ma leen bindee, ki tooñ taxul, ki ñu tooñ it taxul, waaye dama leena bind, ngir farlute gi ngeen am ci nun, mana fés, fi kanam Yàlla, ngeen gisal ko seen bopp. 13 Loolu seral na sunu xol. Te yemunu ci xol bu sedd, waaye gënati nanoo bége mbégtem Tit, mi ngeen dalal am xelam, yeen ñépp. 14 Dëgg la, damoo naa leen as lëf fi kanam Tit, waaye gacce fekku ma ci. Dëgg lanu leen masa wax, waaye la nu leen doon damoo fa kanam Tit itam, noonu la mujje doon dëgg. 15 Te saa yu Tit xoolaatee ni ngeen dégge ndigal, yeen ñépp, ak wegeel gi ngeen ko dalale, ànd ceek ragal Yàlla bay lox, cofeelam ci yeen di gënatee yokku. 16 Bég naa, ndax wóolu naa leen ci lépp!

## 8

### *Yéwénleen*

1 Gannaaw loolu bokk yi, danu leen di xamal li yiwu Yàlla maye ci biir mbooolooy gëmcati diiwaanu Maseduwan. 2 Doonte jaar nañu ci nattub njàqare bu mag, seen mbégtee rembat ci seen biir ñàkk gu tar, ba géegal seenug tabe. 3 Seen kemu am-am lañu joxee, maa ko seede, lu wees seen am-am sax lañu joxee xol bu sedd. 4 Dañu noo ñaan, ba di nu tinu, ngir nu may leen, ñu def seen loxo ci ndimbalu jàpplante gi jëm ci gëmkat ñu sell ñi\*. 5 Li nu séentu woon sax wees nañu ko, nde Sang bi lañu jékka jébbal seen bopp, door noo jébbal seen bopp, te noonu la ko Yàlla bégge. 6 Looloo tax nu soññ Tit,

† 6:16 6.16 Seetal ci *Sarxalkat* yi 26.12. ‡ 6:17 6.17 Seetal ci *Esayi* 52.11. § 6:17 6.17 Seetal ci *Esekiyel* 20.41.

\* 6:18 6.18 Seetal ci *2.Samiyel* 7.14. \* 8:4 8.4 Seetal ci *Room* 15.26. Ndimbal loolu ca gëmkat ña néew-doole ca Yerusalem la jëmoon.

ngir noonee mu tàmbalee woon ci yeen, ndajalem ndimbal li, mu àggalee ko ci yeen. <sup>7</sup> Gannaaw nag yeena duunle ci lépp; muy ci wàllu ngëm, ak wàllu kàddu yu rafet, ak wàllu xam-xam, ak cawarte ci lépp, ak ci cofeel gu nu leen xiir, kon ndajalem ndimbal lii it, ngalla duunlelen ci.

<sup>8</sup> Du ndigal lu ma leen jox, waaye njaxlafug yeneen gëmkat, moom laay natte seen xol, ngir xam nu seen cofeel dëggoo. <sup>9</sup> Xam ngeen kat sunu yiwu Boroom Yeesu Almasi, moom mi woomle woon, te yeena tax mu ñàkk, ngir woomale leen ag ñàkkam.

<sup>10</sup> Ab xalaat laa am ci mbir mii, te mooy doon seen njariñ. Du jëf ji rekk ngeen jëkke woon, waaye yeena jëkkoona biral daaw, yéene dimbali. <sup>11</sup> Kon nag léegi, mottlileen jëf ji. Noonu ngeen xére woon ci seen yéene, mottleelen ko noonu ci seen kem am-am. <sup>12</sup> Ndax kat ab joxe, bu àndee ak yéene rekk, la boroom joxe bi amul, deesu ci natt lees koy nangul, waaye li mu am, ci lees koy nangul ab joxeem.

<sup>13</sup> Du caageenu nag, teg leen coono, ngir teggil ñenn ñi, waaye ag tollale war na ci. <sup>14</sup> Tey jii seenug rembatle mooy faj soxlay ñeneen, ngir èllëg, rembatley ñooña faj seeni soxla, yeen itam. Su ko defee ag tolloo am. <sup>15</sup> Noonu lañu binde ne: «Ki dajale lu bare èpplewul, te ki dajale lu tuut ñàkkul†.»

### *Yónnentub Tit am na sabab*

<sup>16</sup> Cant ñeel na Yàlla, mi def ci xolu Tit, mu xér ci yeen ni ma xére ci yeen! <sup>17</sup> Ba nu ñaane Tit mu dikk ba ci yeen, nangul na nu, waaye yemu ca, nde ci xéraangeem la yebul boppam ne mooy dikk ba ci yeen. <sup>18</sup> Noo ko yebal, boole kook menn mbokk mu mboolooy gëmkat ñépp gërëm, ndax liggéeyam ci xibaaru Almasi bi muy xamle. <sup>19</sup> Rax ci dolli, mboolooy gëmkat ñi ñoo ko tabb, ngir mu ànd ak nun, ba nu yóbbu ndimbal li, muy tedngay Boroom bi ci boppam, te di sunu firndeey cawarte ci dimbalee. <sup>20</sup> Noonu

lanu fàggoo, ndax kenn bañ noo sikk ci ndimbal lu bare lii nu wara saytu. <sup>21</sup> Li nuy xinte moo di li baax ci kanam Boroom bi, te baax ci kanam nit ñi itam.

<sup>22</sup> Boole nañu leen itam ak sunu mbokk mu nu nemmiku xéraangeem ay yooni yoon, ci fànn yu bare, te mu gënatee xér bii yoon ndax kóolute gu réy gu mu am ci yeen. <sup>23</sup> Su dee mbirum Tit, mooy sama wéttal, di ma jàpple ci liggéey bi, ngir yeen. Sunu bokk, yi ànd ak moom nag, ñooy ndawi mboolooy gëmkat ñi, te ñooy teraangay Almasi. <sup>24</sup> Kon nag wonlelen lu firndeel seen cofeel ci ñoom, ak ci kanam mboolooy gëmkat ñi, firndeel itam ne noo yey wóolu leen.

## 9

<sup>1</sup> Ci mbirum ndimbal lu jëm ci ñu sell ñi, jarul ma di leen bind, <sup>2</sup> ndax xam naa seen yéene ju réy, te moom laay damoo ci kanam waa Maseduwan, naan leen: «Daaw fekk na waa Akayi\* noppi.» Te seen xéraange jooju ngeen nekke xiirtal na ñu bare. <sup>3</sup> Maa yebal bokk yi, di yaakaar ngeen noppi ni ma ko waxe woon, ngir la nu leen doon damoo ci mbir mii, baña neen. <sup>4</sup> Lu ko moy bu niti Maseduwan dikkee, ànd ak man, te fekkuleen noppi, kóolute googu sunu gacce lay doon, rawatina seen gos. <sup>5</sup> Moo tax ma noon naa soññ bokk yi, ñu jiitu ma ci yeen, ba waajal ndimbal lu takku li ngeen dige woon, ba mu noppi, te baña doon sompi ñott, xanaa di ndimbal lu duun.

### *Ku ji lu bare, góob lu bare*

<sup>6</sup> Lii rekk la: ji lu tuut, góob lu tuut; ji lu bare, góob lu bare. <sup>7</sup> Kon na ku nekk joxe, ni mu ko waaje ci xolam, te bañ koo tiisoo, bañ koo joxee ñàkk pexe, ndax kiy joxee xol bu sedd, Yàlla sopp na ko, <sup>8</sup> te Yàlla man na leena baawaanal wépp yiw, ba ngeen saxoo am lu leen doy ci lépp, ak koom gu bare, ngir jépp jëf ju baax. <sup>9</sup> Noonu lañu binde ne: «Mooy nàddil néew-doole yi, te njekkam sax dàkk†.»

† 8:15 8.15 Seetal ci *Mucc ga* 16.18. \* 9:2 9.2 waa Akayi: Korent mooy péeyu diiwaanu Akayi. † 9:9 9.9 Seetal ci *Sabóor* 112.9.

<sup>10</sup> Te kiy jagleel beykat bi am jiwu, ak mburu mu nit di dunde nag, kooku moo leen di jox jiwu mu ne gaññ, te mooy ful seen meññeefum njekk. <sup>11</sup> Su ko defee ngeen woomle ci lépp, mana yéwén ci wet gu nekk, ba seen jëf ji sottee ci nun, mana jur cant gu bare, ñeel Yàlla.

<sup>12</sup> Ndax liggéey bi ndimbal lii laaj kat, yemul rekk ci faj soxlay ñu sell ñi, waaye itam dina baawaanal cant gu bare, ñeel Yàlla. <sup>13</sup> Liggéey bi ci ndimbal lii nag, nit ñi dinañu natt soloom bu réy, bay sàbbaal Yàlla, ndax ni ngeen firndeele ne déggal ngeen xibaaru jàmm bu Almasi, ak ni ngeen yéwéne ci seen jàpplante, jéme ci ñoom ak ci ñépp. <sup>14</sup> Cofeel gu réy nag lañu leen di ñaanale, ndax yiw wi leen Yàlla gééjal, yeen. <sup>15</sup> Cant ñeel na Yàlla ci mayam gu tiiñ aw làmmiñ.

## 10

### *Póol tontu na ñi koy ñàññ*

<sup>1</sup> Man Póol ci sama wàllu bopp nag, maa leen di ñaaxe teeyug Almasi, akug lewetaayam, man miy teew ci seen biir, di ab ragaleey, fi seen kanam, te bu ma soree donj laa leen di ñemeey, <sup>2</sup> rikk buleen ma taxa teew, bay ñemee jëfe kóolote, gi ma nara ñemee jëfe, ak ñenn ñi xalaat ne ni nitu suuxu neen donj lanuy doxale. <sup>3</sup> Dégg la, nitu suux lanu, waaye xeexewunu ni nit di xeexe. <sup>4</sup> Ndaxte gannaay, yi nuy xeexe du gannaayi suuxi neen, waaye da di gannaay yu am fa Yàlla, kàttanu daane ay tata. Te xalaatin yu jubul, noo leen di daaneel, <sup>5</sup> mook lépp luy réy-réyloo ab taxawaayam, di jonante ak xam-xamu Yàlla, te nooy jàpp njaam bépp xalaat, ngir déggal-loo ko Almasi. <sup>6</sup> Te keroog bu seen dégg ndigal matee, fas nanu yéenee mbugal képp ku déggadi.

<sup>7</sup> Xanaa ci melow biti donj ngeen di xool\*. Su amee ku mu wér péññ, moom ci boppam ne ci Almasi la bokk, na dellu jàpp moom ci boppam, ne ndegam ci Almasi la bokk, nun itam, ci Almasi lanu bokk. <sup>8</sup> Te doonuma am benn kersa, su ma éppaloon sax ci damoo sañ-sañ bi nu

Boroom bi jox, te du sañ-sañu sànk leen it, xanaa yokk seen ngëm. <sup>9</sup> Buggumaa mel ni ku leen di xébale ay bataaxal nag. <sup>10</sup> Ndaxte bataaxal yi kat lañu ne: «Dañoó ñagas, te tàng, waaye bu teewee moom ci boppam, da naan yàcc, te ay kàddoom xeebu.» <sup>11</sup> Lii nag, kiy waxe noonu, na ko xam: ni nu mel ci kàddu ci sunuy bataaxal, bu nu wuutee, noonu lanuy mel ci jëf, bu nu teewee.

<sup>12</sup> Ñenn ci ñooñu di seedeel seen bopp ne ñoo yelloo ngèrëm nag, nun ñemewunoo boole sunu bopp ak ñoom, mbaa nuy méngale sunu bopp ak ñoom. Waaye ñoom dañoo amul xel, ndax nat-tukaay bi ñuy nattoo, di ko méngalantee ci seen biir, ñoom ñoo ko sàkkal seen bopp! <sup>13</sup> Nun, sunub damu dafa am kemu bu mu dul wees. Sunu kemu moo di déndub tool bi nu Yàlla sas, te ci biir tool bi lanu liggéeye, ba agsi ci yeen. <sup>14</sup> Moo tax weesunu sunu kemu sas, mbete agsiwunu woon ba ci yeen. Waaye noo agsi ba ci yeen, indil leen xibaaru jàmm bu Almasi. <sup>15</sup> Weesunu kemu, bay damu ci liggéeyu ñeneen. Waaye am nanu yaakaar ne nu seen ngëm gëna yokkoo, ni la sunuw sas di gëna yokkoo, lépp ci biir kemu gi ñu nu àppal. <sup>16</sup> Su ko defee nu mana wees fa yeen, ba jàll yégleji xibaaru jàmm bi ca wàlla, te baña damoo lu ñeneen def ba noppi, ci seen biir sas. <sup>17</sup> Kuy damu daal, na damu ci Boroom bi†.

<sup>18</sup> Ndax ki ñu naw mooy ki Boroom bi gèrëm, waaye du ki gèrëm boppam.

## 11

### *Póol wuute na ak ndawi naaféq yi*

<sup>1</sup> Céy bu ngeen ma muñaloon, ba ma dof-doflu tuuti! Muñal-leen ma rekk. <sup>2</sup> Maa leen di fiiree fiiraangey Yàlla ci boppam, ndax jenn jëkkër donj laa leen digool ab séy, te mooy Almasi mi ma leen namma jébbal, te fekk leen di janq bu set wecc. <sup>3</sup> Waaye na jaan ja naxe woon Awa, ca pexeem, ragal naa seenum xel yaqoo noonu, ba dëddu ngëm gu déggu te set gu ngeen ñoye woon ci Almasi.

\* **10:7** 10.7 Mbaa: Xool-leen jàkk mbir mi. † **10:17** 10.17 Seetal ci *Yeremi* 9.23.



<sup>4</sup> Ndax kat gaaw ngeena xajoo lool, nit ku dikk, di leen waare meneen Yeesu mu nu waarewul, mbaa geneen noo gu ngeen jot te jotuleen ko woon, mbaa beneen xibaar bu ngeen dëggal, te mu wuute ak ba ngeen déggoon. <sup>5</sup> Moona ndaw yu mägga mäg yooyeey, foog naa ne duma seen cuune ci lenn. <sup>6</sup> Su ma dee ku xareñul ci wàllu wax it, du ci wàllu xam-xam, te nu nekk lanu leen wone loolu, ci bépp fànn.

<sup>7</sup> Am boog damaa tooñ ca na ma toroxloo ngir darajaal leen, ndax la ma leen laajul ag pey, ba ma leen di àgge xibaaru jàmm bu Yàlla bi? <sup>8</sup> Yeneen mboolooy gëmkat de laa jëlal, nde maa nangoo ag peyoor ca ñoom, ba man leena liggéeyal, yeen, ci neen. <sup>9</sup> Te ba ma nekkee ci yeen te soxla dab ma, wéeruwuma ci kenn ci yeen, ndax la ma ñàkkoon, bokk ya jóge Maseduwan ñoo ma ko indil. Fexe naa ba du lenn lu ma leen diisale, te noonu laay saxoo. <sup>10</sup> Ak dëggu Almasi gi ci man, kàddug damu googu, kenn du ma ko xañ, ci diiwaanu Akayi gépp. <sup>11</sup> Lu tax? Ndax dama leena buggul? Yàlla xam na ne «ahakay!» <sup>12</sup> Noonu may def rekk laay saxoo, ngir xañ aw lay, ñiy wut aw lay wu ñu damoo, naan ñook nun a yem kepp daraja. <sup>13</sup> Ñooñu ay ndawi caaxaan lañu, ay liggéeykat yu njublan yu mbubboo ndawi Almasi. <sup>14</sup> Te loolu jarula waaru, ndax Seytaane ci boppam, malaakam leer lay mbubboo. <sup>15</sup> Kon bu ay ndawam itam di mbubboo ndawi njub, du doon lu yéeme. Waaye seenug muj, seeni jëf lay yemool.

### *Póol am na ay nattu ci biir yónnentam*

<sup>16</sup> Ma baamu ko, bu ma kenn jappe ab dof, mbaa boog, ngeen muñal ma ni ñuy muñale ab dof, ba ma damu tuuti, man itam. <sup>17</sup> Li may wax nag, waxewuma ko ci ndigalal Boroom bi, waaye taxawaayu dof laa koy waxe, gannaaw mbirum damu la. <sup>18</sup> Ndegam ñu baree ngi damu ni niti suuxu neen di damoo, naa damu, man itam. <sup>19</sup> Yeen boroom xel yi, yeenaka nangoo muñal ay dof, <sup>20</sup> nde muñal ngeen ku leen jaamloo, muñal ku leen lekk, muñal ku leen futti, muñal ku leen jaay

daraja, muñal ku leen talaata! <sup>21</sup> Ma waxe ko gâce, mbete noo néew doole, ba manunoo jëfe ak yeen noonu!

Ndaxam, ma wax waxi dof, lu waay ñemee damoo, ñeme naa koo damoo, man it. <sup>22</sup> Xanaa ay Ebrë lañu? Ak man itam. Xanaa ci xeetu Israyil lañu bokk? Ak man itam. Xanaa ay sėti Ibraayma lañu? Ak man itam. <sup>23</sup> Xanaa ay surgay Almasi lañu? Naa ràkkaaju nag, te ne maa leen ko gëna doon. Bu dee ci liggéey yu metti, maa man fopp; bu dee ci fani kaso, maa ëpple fopp; bu dee ci ay yar, maa ëpple ay yooni yoon, te bare na lu ma riisu ndee, ba raw leen: <sup>24</sup> ci Yawut yi lañu ma dóore juróomi yoon, ñeent fukki kàccri yu yées benn. <sup>25</sup> Ñetti yoon lañu ma dóori yet, dóor may doj benn yoon. Ñetti yoon laa dugg gaal, mu suux. Fanaan naa, yendu naa biir xóotey géej. <sup>26</sup> Bare na lu ma tukki, ay aaytéef xaare ma ay dex, xaare ma ay sàcc, xaare ma ay pexe yu ma samaw xeet lalal, ak yu ma jaambur ñi lalal. Ay aaytéef xaare na ma biir dëkk, xaare ma biir màndiñ, xaare ma biir géej, xaare ma ci biir bokki taalibe yu ko mbubboo. <sup>27</sup> Doñ-doñ, akub coono ci la, te bare naa lu ma fanaanee xoole. Xiif naa, mar naa, te bare na lu ma ñàkk ab dund. Liw naa, rafle naa, <sup>28</sup> te gannaaw li ci des lépp sax, sama xintey bés bu nekk a ngi fi, njàqare ji ma am ci mboolooy gëmkat ñépp. <sup>29</sup> Ana ku ci néew doole, te taxul ma néew doole, man it? Ana ku ñu ci bàkkaarloo, te awma ci tiis wu taal ab xol?

<sup>30</sup> Su damu waree de, samag néew doole laay damoo. <sup>31</sup> Yàlla sunu Baayu Sang Yeesu, moom mi yelloo cant ba fàww, xam na ne fenuma. <sup>32</sup> Ba ma nekkee Damaas, ga boroom dëkk ba di jawriñu Buur Aretas, boroom dëkk baa santaane ñu wattu buntu dëkk ba, ngir jàpp ma. <sup>33</sup> Waaye ca palanteeru tatay dëkk ba lañu ma yoore cig damba, ba ci suuf. Noonu laa ko rëcce.

## 12

### *Póol am na am peeñu, akub nattu*

<sup>1</sup> Damu war na, moonte amul njariñ, waaye naa jàll ba tey ci mbir yu ma

Sang bi gisloo, ak peeñu yu mu ma won. <sup>2</sup> Maa xam aw nitu Almasi, ba ñu ko yéegee ba ñetteelu asamaan\*, fukki at ak ñeent la tey. Ndax aw yaramam lees ko yéegaale woon? Xawma, ndax yéegaaleesu ko aw yaramam? Xawma, Yàlla rekk a xam. <sup>3</sup> Xam naa ne nit kooku, ndegam yaramam lees ko booleel, am booleesu ko ak yaramam? Xawma, Yàlla rekk a xam, <sup>4</sup> Waaye yéegees na ko ba Àjjana, mu dégg fa mbir mu waxuwul, te mayeesul nit mu tudd ko. <sup>5</sup> Nit ku mel noonu laay damoo, waaye du sama bopp laay damoo, xanaa ma damoo diggante yu ma néewe doole. <sup>6</sup> Su ma nammoona damu it, du doon ag ndof, ndax dégg laay wax. Waaye damay moytoo damu, ngir kenn bañ maa fooge lu wees li mu gis, may def, ak li mu dégg, may wax.

<sup>7</sup> Te it, waccalees na ma ndégu biir suux, mu taxawe ndawal Seytaane, di ma mitital, ngir ma baña bew ndax peeñu yu yéeme. <sup>8</sup> Mbir moomu, ñetti yoon laa ci ñaan Sang bi, ngir mu sorele maak moom. <sup>9</sup> Mu ne ma: «Sama yiw donj nga soxla; sama manoore, ci ag néew doole lay mate.» Kon kat dinaa gëna bégati ci damoo diggante yu ma néewe doole, ngir manoorey Almasi wàcc ci sama kaw. <sup>10</sup> Looloo ma tax di bânneexu ci biir diggante yu ma néewe doole, ak ci biiri saaga, ak ci biir ag ñàkk, ak ci biir coono yu ñu may bundxatale, ak ci biir njàqare yu ma dal ngir Almasi. Ndaxte bu ma néewe doole, booba laa am kàttan.

### *Póol bëgg na waa Korent*

<sup>11</sup> Mujj naa dib dof nag, te yeena ma ko yóbbe, nde gërëm maa leen waroon, ndax doonte дума dara sax, ndaw yu màgga màgg yooyeey, дума seen cuune ci lenn. <sup>12</sup> Firnde yiy màndargaal ndawal Almasi, feeñalees na ko ci seen biir, lépp ci ag muñ gu mat sèkk: firnde yeek kéemaan yeek jaloore yi. <sup>13</sup> Ci lan ngeen yéesle yeneen mboolooy gëmkat ñi? Xanaa sama soxlay jëmmu bopp jii ma leen wéerul. Kon baal-leen ma, maa tooñ!

\* **12:2** 12.2 Ci gis-gisu Yawut yi, ñetteelu asamaan moo gëna kawe. \* **13:1** 13.1 Seetal ci *Baamtug Yoon wi* 19.15.

<sup>14</sup> Maa ngii di leen waaja ganesi ñetteel bi yoon, te дума wéeru ci yeen. Wut-siwuma lu ngeen am, yeen laa soxla. Ndaxte doom du dencal waajuram, waaye waajur mooy dencal doom. <sup>15</sup> Man nag xol bu sedd laa yeboo ci jaay mboolem lu ma am, ba jaay sama dooley bopp ngir seen jëmmi bopp. Xanaa дума leen ji gii cofeel gu réy, di feyoo cofeel gu ko yées? <sup>16</sup> Xanaa dees na ne, man ci sama wàllu bopp diisaluma leen moos, waaye samag njublanj laa fexee ba nax leen?

<sup>17</sup> Ndax am na kenn ku ma jëfandikoo, ci ñi ma yebaloon ci yeen, ba lekkal leen lenn? <sup>18</sup> Maa soññ Tit, ngir mu seetsi leen, te maa yebal mbokk moomu, boole kook moom. Ndax Tit da leena lekkal? Xanaa du maak mooma bokk menn mébét, ak wenn doxalin?

<sup>19</sup> Mbaa fooguleen ne sunu bopp lanuy layal nii fi seen kanam? Fi kanam Yàlla de lanu waxe, ndax Almasi mi nu gëm, te lépp, soppe yi, seen yokkute la ñeel. <sup>20</sup> Ragal naa, bu ma dikkee, fekke leen nu ma neexul, yeen it, ngeen gise ma nu leen neexul. Ragal naa ay réeroo ci seen biir ak kiñaan ak mer mu épp, ak diiroo mbagg, ak waxi sos aki jëw, ak réy-réylu, akug salfaañoo. <sup>21</sup> Ragal naa, bu ma dikkee, sama Yàlla ruslooti ma ndax yeen, may tiisoo ñu bare ñu wéye seen bàkkaar ya woon, te tuubuñu jëfi sobe ji, ak powum séy mi, ak yàqute gu af, gi ñu nekke.

## 13

### *Ay kàdduy artoo aki tàggtóo ngi*

<sup>1</sup> Ñetteel bi yoon a ngii, bu ma leen di ganesi. «Ci kàddug ñaari seede ba ñett nag la àtteb mépp mbir di wére\*.» <sup>2</sup> La ma waxoon ba noppi ca sama ñaareelu ngan, tey bi ma wuutee, moom laay baamtu, artoo ko ñi jëkkoona bàkkaar, ak ñi ci des ñépp: su ma délsee, дума ñéebli kenn, <sup>3</sup> gannaaw yeenay wut lu firndeel ne ci man la Almasi di waxe ak yeen, te moom néewul kàttan, diggam ak yeen, waaye ku manoorewu la ci seen biir. <sup>4</sup> Cig néew doole lees ko daaje ci

bant ba rey ko, waaye tey ci manoorey Yàlla lay dunde. Nun itam sunug bokk ci Almasi moo tax nu néew doole, waaye ci manoorey Yàlla lanuy bokk ak moom di dund, bu nuy jëflante ak yeen.

<sup>5</sup> Xoolaatleen seen bopp, ba xam ndax yeena ngi ci yoonu ngëm wi. Nattleen seen bopp, xanaa xam ngeen ne Yeesu Almasee ngi ci yeen? Ndegam du seen gëmadi, la natt ba firndeel! <sup>6</sup> May yaakaar nag ne nun, dingeen xam ne firndeel nanu sunu taxawaay. <sup>7</sup> Teewul nuy ñaan Yàlla, ngeen baña def dara lu bon, te ñaanunu loolu am, ngir nu man koo firndeele sunu taxawaay, waaye bu sunub taxawaay doonul woon lu firndewu itam, sunu yéene mooy ngeen di def lu baax. <sup>8</sup> Ndax kat manunoo def dara ba sot liy dëgg, manunu lu dul liggéeyal liy dëgg. <sup>9</sup> Bu nu néewee doole, te ngeen am doole, bég nanu. Lii itam, nu ngi koy ñaan, te mooy ngeen yokku ba mat sèkk. <sup>10</sup> Looloo tax ma bind leen lii bala maa dikk, ba buma dikkee, du jar may mettil ni may jëflante ak yeen, ci kaw sañ-sañ bi ma Boroom bi jox. Ndax kat sañ-sañ bi, yokke moo ko taxa jóg, waaye deesu ko yàqe.

<sup>11</sup> Ma tëje fii nag, bokk yi, bégleen, yokkuleen ba mat sèkk, ñaaxanteleen, mànkooleen te jàmmoo. Su ko defee Yàlla miy Yállay cofeel ak jàmm mooy ànd ak yeen.

<sup>12</sup> Saafoonteeleen foonante yu sell. Ñu sell ñépp a ngi leen di nuyu.

<sup>13</sup> Sunu yiwu Sang Yeesu Almasi nag, ak cofeelu Yàlla, ak bennoo geek Noo gu Sell gi, yal nañu bokk ànd ak yeen ñépp.

## Bataaxal bi Yàlla may Póol, mu bind ko waa Galasi

<sup>1</sup> Ci man Póol, ndaw li bàyyikoowul ci ay nit, jottliwul yónnentu nit, xanaa Yeesu Almasi, ak Yàlla Baay bi ko dekkal, ci man la kàddu gii bawoo, <sup>2</sup> bawoo itam ci mboolem bokk yi nekk ak man, ñeel mboolooy gëmkat yu diiwaanu Galasi. <sup>3</sup> Aw yiw ak jàmm ñeel na leen, tukkee ci Yàlla sunu Baay, ak Sang Yeesu Almasi, <sup>4</sup> mi maye bakkanam ngir njotug sunuy bàkkaar, ba musal nu ci jamonoy tey ju bon ji, ci coobarey Yàlla sunu Baay, <sup>5</sup> bi daraja ñeel, tey ak èllëg ba fàww. Amiin.

### *Xibaaru jàmm bi benn la*

<sup>6</sup> Man de jaaxle naa ci nii ngeen gaawa dëddoo Yàlla mi leen woo ci boppam, ci ndimbalal yiwu Almasi, bay topp xaat beneen xibaaru jàmmeey! <sup>7</sup> Te beneen dafa amul sax, xanaa ñenn ñi leen di jaxase, te bëgga sopparñi xibaaru jàmm bu Almasi. <sup>8</sup> Waaye nun ci sunu bopp, mbaa malaaka mu bawoo asamaan sax, ku leen ci àgge woon beneen xibaaru jàmm bu dul bi nu leen àgge, kooku yal na alku! <sup>9</sup> Wax nanu ko ba noppi, ma waxati ko tey: képp ku leen àgge beneen xibaaru jàmm bu moy bi ngeen xasa jot, yal na alku!

<sup>10</sup> Léegi nag ndax nit ñi laay sàkkoo jubool, am Yàlla? Am nit ñi laay wuta neex? Su ma bëggoona wéye neex nit ñi de, duma doon jaamub Almasi.

### *Almasi moo dénk Póol xibaaru jàmm bi*

<sup>11</sup> Bokk yi, ma xamal leen ne leen xibaaru jàmm bi may yégle, bàyyikoowul ci nit. <sup>12</sup> Te it man jëlewuma ko, jàngewuma ko ci nit, xanaa ci peeñum Yeesu Almasi.

<sup>13</sup> Ndax kat dégg ngeen ni ma doon jëfe bu jëkk, bi ma nekkee ci yoonu Yawut, bundxatal gu jéggi dayo ga ma daan teg mbooloom gëmcati Yàlla mi, di ko yaq. <sup>14</sup> Yoonu Yawut, maa ci rawoon ñu bare ci sama maas gi ma bokkal askan, te

maa leen gënoona xér fuuf ci sunu aaday maam. <sup>15</sup> Waaye ca sama biiru ndey la ma Yàlla séddoo, woo ma ci boppam ci kaw yiwam, te moom la soob, <sup>16</sup> mu feeñalal ma Doomam, ba ma àgge jaambur ñi dul Yawut, xibaaru jàmm bi ci mbirum Almasi. Ci saa si diisoowuma ci ak kenn. <sup>17</sup> Demuma sax Yerusalem, seeti ñi ma jëkka doon ndawi Almasi, waaye Arabi laa dem, doora délsi Damaas.

<sup>18</sup> Gannaaw ba ñu ca tegee ñetti at laa doora dem Yerusalem, ngir xamanteji ak Sefas, toog fa moom ñaari ayi bés. <sup>19</sup> Teewul gisuma kenn ci ndaw yi ci des, ku dul Yanqóoba, rakku Sang bi. <sup>20</sup> Li ma leen bind nii nag, Yàlla mi nu tiim seere na ne du ay fen. <sup>21</sup> Gannaaw gi laa dem diiwaani Siri ak Silisi. <sup>22</sup> Waaye ba boobu, mboolooy gëmcati Almasi ya ca diiwaanu Yude xamuñu ma woon. <sup>23</sup> Déggoon nañu rekk ñu naan: «Ki nu daan bundxatal bu jëkk, di yaq sunu yoonu ngëm wi de, léegi mooy yégle xibaaru jàmm bi koy xamle!» <sup>24</sup> Mboolooy gëmkat yooyu nag di sant Yàlla ci man.

## 2

### *Ndawi Almasi ya doylloo nañu Póol*

<sup>1</sup> Fukki at ak ñeent gannaaw gi laa dellu Yerusalem, ànd ak Barnaba, yóbbaaale Tit itam. <sup>2</sup> Sama tànk yooyu nag am peeñu moo ko waral. Ca laa wéetoo ak ña ñu jàppoon ne ñooy kàngami mbooloom gëmkat ña, faramfàcceel leen xibaaru jàmm bi may yégal jaambur ñi dul Yawut, ngir ragal sama liggéey bi ma jota def, te di ko wéye, doon coonob neen. <sup>3</sup> Moonte Tit mi ma àndaloon sax, tegeesu ko fa wartéefu xaraf, te ci askanu gereg yi dul xaraf la bokk. <sup>4</sup> Doonte booba, ay nit ñu tuddoo bokki gëmkat ñoo yoxoosu ba tàbbi ci sunu biir, di nu yèddu, ngir luqatu ni nu moome sunu bopp ndax Almasi Yeesu mi nu gëm, te li ñu ci jublu di delloo nu ci buumi njaam. <sup>5</sup> Waaye ñooñu, nangulunu leen lu tollook simili sax, ndax bëgg leena sàmmal yeen, déggug xibaaru jàmm bi, ba mu sax ci yeen.

<sup>6</sup> Teewul ñooñu ñu jàppe woon ay kàngam, ak daraja ju ñu masoona am, amalu ma solo, nde Yàlla amul xejj ak seen, ñooñu yokkuñu lenn ci kàddu gi may xamle. <sup>7</sup> Xanaa kay li ñu gis moo di ni Yàlla yebale Piyeer ngir mu àgge askanu Yawut xibaaru jàmm bi, noonu la ma yebale ngir ma àgge ko jaambur ñi xaraful, <sup>8</sup> ndax ki liggéey ci Piyeer, ngir mu doon ndawam ci Yawut yi, moo liggéey ci man itam, ngir may ndawam ci yeneen xeet yi. <sup>9</sup> Ña ñu jàppoon ne ñooy kenuy mbooloom gëmkat ña nag, te ñuy Yanqóoba ak Sefas ak Yowaan, ba ñu ràññee yiw wi ñu ma jagleel, maak Barnaba lañu jox loxo, ngir nun nu liggéeyi ca jaambur ña, te ñoom ñu liggéeyi ci Yawut yi. <sup>10</sup> Laajuñu lu moy nu fàttliku néew doole yi, te loolu di lu ma pastéefoo jéfe.

### *Póol yedd na Sefas ca Àncos*

<sup>11</sup> Waaye ba Sefas dikkee Àncos, jàkk laa ko def, weddi ko, ndax moo nekkul woon ci dëgg. <sup>12</sup> Ndax kat balaa aw nit a dikk, bàyyikoo fa Yanqóoba, Sefas da daan bokk lekk ak jaambur ñi dul Yawut. Waaye ba ñooñu dikkee la rocciku, daldi beddeeku jaambur ñi, ndax ragal waa làng, ga jàpp ne aaday xaraf wartéef la. <sup>13</sup> Yeneen Yawut ya it di jinigalandoo, ba Barnaba sax lajj topp leen ci seenug jinigal.

<sup>14</sup> Waaye ba ma gisee ne doxewuñu njub gi dëggug xibaaru jàmm bi laaj, maa wax Sefas ci kanam ñépp, ne ko: «Ndegam yaw miy ab Yawut, yaa jéfewul ni ab Yawut, xanaa di jéfe ni xeeti jaambur ñi, ana lu tax ngay értal jaambur ñi dul ay Yawut, ngir ñu yawutal?»

### *Ngëm a takku*

<sup>15</sup> Nun danoo juddu diy Yawut, te bokkunu ca xeet yee diy bàkkaarkat. <sup>16</sup> Xam nanu nag ne nit ki, du ci jéfi sàmm ndigali yoon la ko Yàlla di joxe àtteb ku jub, xanaa ci ngëm gu mu gëm Yeesu Almasi. Te nun itam, Almasi Yeesu lanu gëm, ngir Yàlla jox nu àtteb ku jub ci kaw gëm gu nu gëm Almasi, te du ci kaw jéf ju

nu sàmm ndigali yoon. Ndax kat du ci jéfi sàmm yoon lees di joxe kenn àtteb ku jub.

<sup>17</sup> Ba tey su nu dee sàkku àtteb ku jub, ndax li nu gëm Almasi, te teewul nit ñi gis ne nu ngi bàkkaar, nun itam, ndax loolu day wund ne Almasi mooy xiirtale ci bàkkaar? Mukk kay! <sup>18</sup> Ndaxam su dee tabaxub ndigalu yoon bi ma tojoon, moom laa tabaxaat, maa def sama bopp moykatub yoon. <sup>19</sup> Su dee wàllu yoonu Musaa nag, man nit ku dee laa, te yoonu Musaa moo ko waral, ngir ma mana dund dund gu ñeel Yàlla. Dees maa boole ak Almasi rey ca bant ba. <sup>20</sup> Moo tax dootu man maay dund, waaye Almasi mooy dund léegi ci man. Sama dundu yaramu suux wii tey nag, ci ngëm gi ma gëm Doomu Yàlla laa koy dunde, moom mi ma sopp, ba jébbale boppam ngir man. <sup>21</sup> Duma neenal yiwu Yàlla, ndax kat su doon ci sàmm ndigalu yoon lees di ame àtteb ku jub, konoon Almasi moo dee cig neen.

## 3

### *Dellu ci yoonu Musaa du xel*

<sup>1</sup> Yeen waa Galasi, yeena ñàkk xel! Ku leen gëlèmal, te na Yeesu Almasi deeye ca bant ba di lu ñu leen leeralal ba mu mel ni lu ngeen gise seeni bët? <sup>2</sup> Lenn rekk laa bëgg ngeen xamal ma ko: ndax ci jéfi sàmm ndigalu yoon ngeen jote Noowug Yàlla gi, am li ngeen dégg xibaaru jàmm bi ba gëm ko moo leen ko may? <sup>3</sup> Ana nu ngeen mana ñàkke nii xel? Ngeen tàmbalee ci Noo gi, ba noppi di jéema mottlikoo jéfi nitu suuxu neen! <sup>4</sup> Dangeena dékku yii coono yépp ci neen? Xanaa déet kay! <sup>5</sup> Ki leen di may Noo gi, tey sottal ay kéemaan ci seen biir, ndax li ngeen sàmm yoon moo tax mu di ko def, am li ngeen dégg, ba gëm moo tax?

<sup>6</sup> Noonu la Ibraayma gëme Yàlla, «ñu waññal ko ngëmam ag njub\*.»

<sup>7</sup> Xamleen boog ne nit ñiy boroom ngëm, ñooñu ñooy doomi Ibraayma. <sup>8</sup> Mbind mi moo waajaloon lu jiitu ne ci kaw ngëm lees di joxe xeet yi dul Yawut, àtteb nit

\* 3:6 3.6 Seetal ci *Njàlbéen ga* 15.6.

ñu jub. Moo taxoon mu yégal Ibraayma lu jiiitu, bii xibaaru jamm: «Xeeti àddina yépp ci yaw lañuy barkeele†,»<sup>9</sup> ba tax na, boroom ngëm yi lees di booleek Ibraayma miy boroom ngëm, barkeel leen.

<sup>10</sup> Mboolem ñi yaakaar seen jëf ju ñu sàmme yoonu Musaa, repp nañoo alku, nde bindees na ne: «Alkànde ñeel na képp ku saxoowul mboolem digal yi ñu bind ci téereb yoon wi, ngir di ko jëfe†.»

<sup>11</sup> Li sàmme yoon taxul kenn jot àtteb ku jub fi kanam Yàlla sax, lu leer nàññ la, nde: «Ku jub ndax ngëmam mooy dund.»

<sup>12</sup> Yoon wi nag ajuwul ci ngëm, nde: «Kuy jëfe digal yooyu, yaay dund ndax ñoom§.»

<sup>13</sup> Almasi moom, moo nu jot ci alkàndey yoon wi, ba mu doonee ku alku ngir nun, nde: «Alkute ñeel na képp ku ñu rey, wékk ko ci bant\*.»<sup>14</sup> Noonu la deme ngir barkeb Ibraayma wàccal xeet yi dul Yawut ndax Almasi Yeesu, ngir itam nu jot ci digeb Noo gu Sell gi, ci kaw ngëm.

### *Yoonu Musaa fecciwul kóllère*

<sup>15</sup> Bokk yi, ma misaale ko mbiri doom Aadama. Kayitub donale bu nit donj bind, su dee lu wóor, deesu ko neenal, mbaa di ci yokk dara.<sup>16</sup> Te Ibraayma lañu digoon dige yi mook ki taxawal askanam. Newuñu: «ñi taxawal ay askanam», mbete ñu bare lañuy wax, waaye wenn rekk la: «ki taxawal askanam,» te ki taxawal askanam moo di Almasi.<sup>17</sup> Li ma ciy wax mooy lii: kóllèreg Yàlla gi taxawe ni kayitu donale gu mu dëggal, yoonu Musaa, wi dikk ñeenti téeméeri at ak fanweer gannaaw kóllère gi, manu koo neenal, ba fomm digeb† Yàlla.<sup>18</sup> Su doon ci yoonu Musaa la ndonale ga aju, kon dootul doon lu digeb Yàlla waral. Waaye ci kaw ab dige la Yàlla baaxee Ibraayma aw yiwam.

### *Ku gëm Almasi, yoonu Musaa wàcc na la*

<sup>19</sup> Waaw kon yoonu Musaa, ana luy njariñam? Dees koo toftal ca dige ba, ngir muy fésal moyi nit ñi ba keroog boroom

dige, bi taxawal askanu Ibraayma, dikk. Ay malaaka ñoo biral yoon wi, ci ndimbalal ab jottlikat†.<sup>20</sup> Ab jottlikat nag ñaar a koy séq, te Yàlla kenn donj la.

<sup>21</sup> Ndax kon yoonu Musaa dafa juuyoo ak digey Yàlla? Mukk kay. Ndax kat su fekkoon ne dañoo maye wenn yoon wu mana may nit ku ko sàmme, mu dund, konoon àtteb ku jub fi kanam Yàlla mana jóge dëgg ci sàmme gu nit ki sàmme yoon wi.<sup>22</sup> Waaye mbind mi biral na ne mboolem àddina moo ténku ci kilifteefu bákkaar, ngir dige bi gëm Yeesu Almasi di jagle, mana dikkal aji gëm ñi.

<sup>23</sup> Balaa yoonu ngëm wee dikk, dees noo jàppoon ténk ci yoonu Musaa, ba kera yoonu ngëm wi feeñee.<sup>24</sup> Noonu la yoonu Musaa doone sunu njaatige, tette nu ba ci Almasi, ngir nu jagoo àtteb nit ñu jub ci kaw ngëm.<sup>25</sup> Waaye léegi, bi yoonu ngëm wi dikkee, nekkatunu ci kilifteefu njaatige.

### *Doomi Yàlla ngeen*

<sup>26</sup> Yeen ñépp doomi Yàlla ngeen, ndax li ngeen gëm Almasi Yeesu.<sup>27</sup> Ndax kat mboolem yeen ñi ñu sóob sóobeb Almasi, jëmmu Almasi ngeen soloo.<sup>28</sup> Kon nag amul Yawut ak ku dul Yawut, amul ab jaam ak as gor, amul góor ak jigéen. Yeen ñépp benn ngeen ci Almasi Yeesu.<sup>29</sup> Te su ngeen bokkee ci Almasi, yeen ay askanu Ibraayma, te yeena jagoo dige ba.

## 4

<sup>1</sup> Li ma leen di wax nag mooy lii: boroom ndono li ci kër gi, li feek mu dib tuut-tànk, wuutewul akub jaam, doonte moo moom lépp.<sup>2</sup> Ci kilifteefu ay watukat aki saytukat lay nekk ba kera mu àggee ca at ya ko baayam àppaloon.<sup>3</sup> Nun itam naka noonu, ba nu dee ay tuut-tànk yu nekk ci kilifteefu mbiri àddina, ay jaam lanu woon.<sup>4</sup> Waaye ba àpp ba jotee, Yàlla moo yónni Doomam, mu juddoo ci jigéen, juddoo ci biir curgag yoonu Musaa,<sup>5</sup> ngir jot ñi ci curgag yoon wi, ba nu jagoo cérub doom.<sup>6</sup> Li ngeen

† **3:8** 3.8 Seetal ci *Njàlbéen ga* 12.3. † **3:10** 3.10 Seetal ci *Baamtug Yoon wi* 27.26. § **3:12** 3.12 Seetal ci *Sarxalkat yi* 18.5. \* **3:13** 3.13 Seetal ci *Baamtug Yoon wi* 21.23. † **3:17** 3.17 Seetal ci *Njàlbéen ga* 17.1-8. † **3:19** 3.19 jottlikat bi mooy Musaa.

diy doom nag tax na Yàlla yebal Noowug Doomam ci seen biir xol, ba Noo gi naan: «Abba», mu firi Baay. <sup>7</sup> Moo tax dootuloo ab jaam, doom nga. Gannaaw doom nga nag, boroom cér nga it fa Yàlla sa baay.

### *Póol am na njàqare ci waa Galasi*

<sup>8</sup> Bu jëkk, ba ngeen xamul Yàlla, ay yàlla yu dul dëgg ngeen daan jaamu. <sup>9</sup> Waaye léegi bi ngeen xamee Yàlla, mbaa bi leen Yàlla ràññee, nu ngeen mana delluwaate ci mbiri àddina yooyu boole tële ak ñàkk njariñ, bay nekkaat seeni jaam? <sup>10</sup> Yeena ngi wormaal yenn bés yi, aki weer, ak ay fan, aki at! <sup>11</sup> Li may ragal ci yeen daal mooy sama coono ci yeen neen.

### *Póol tinu na waa Galasi*

<sup>12</sup> Yeen laay tinu, bokk yi, mel-leen ni man, ci yooyu mbir, ndax man itam ni yeen laa mel. Tooñuleen ma benn yoon. <sup>13</sup> Xam ngeen ne tëleg yaram moo ma mayoon yoon wa ma leen jëkka àgge xibaaru jàmm bi. <sup>14</sup> Nattu ba leen sama woppi yaram tegoon it taxul ngeen jéppi ma, taxul ngeen beddi ma. Ni malaakam Yàlla ngeen ma dalale, mbaa ni Yeesu Almasi <sup>15</sup> Ana seen mbég mooma woon nag? Ndax kat maa leen seedeel ne su manoon am sax, seeni bët ngeen di luqi, jox ma. <sup>16</sup> Xanaa li ma leen di wax dëgg daa tax ma mujj di seenub noon?

<sup>17</sup> Yitte ju réy ji ñenn ñiy taqoo ak yeen de, jubluwuñu ci lu baax. Dañu leena bégga tàggale ak nun, ba ngeen taq leen. <sup>18</sup> Yitte ju réy ju ñu am ci nit ki nag, ndegam lu baax lees ci jublu, saa su nekk lay baax, waaye du rekk saa yu ma teewee ci seen biir. <sup>19</sup> Yeen samay doom! Maa ngi dellooti ci mat wu ma leen jure woon ni jigéen, ba keroog Almasi mate sëkk ci yeen. <sup>20</sup> Maaka béggoona nekk ak yeen tey, ba gëna misaale sama baat, nde jàq naa lool ci yeen!

### *Ajara ak Saarata ay misaal lañu*

<sup>21</sup> Waxleen ma, yeen ñi bégga nekk ci kilifteefu yoonu Musaa, xanaa xamuleen li yoon wi wax? <sup>22</sup> Bindees na

ne Ibraayma ñaari doom yu góor la am; kenn ki jaam bi jur, ak ki gor si jur. <sup>23</sup> Doomu jaam bi moo juddu ci kaw coobarey bakkanu nit, waaye ki gor si jur, ci kaw digeb Yàlla la juddu\*.

<sup>24</sup> Mbir mi misaal a ngi ci. Ñaari jigéen ñi ñaari kóllère lay bijji. Genn kóllère gi bawoo tundu Sinayi moo meññ lu ñeel njaam, te kooku mooy Ajara. <sup>25</sup> Ajara moomu mooy tundu Sinayi, wa ca réewum Arabi, te moo taxawe Yerusalem gii tey, dëkk bii dib jaam mook doomam yi ko dëkke. <sup>26</sup> Waaye Yerusalem, ga fa kaw, mooy gor si, te moom mooy sunu ndey. <sup>27</sup> Ndax kat bindees na ne: «Yaw mi jaasir, ba juroo, xaacul, yaw mi xamul mititu mat, sarxolleel, nde ndaw si ñu foñ moo gëna jaboot kiy séy†.»

<sup>28</sup> Yeen nag bokk yi, yeenay doomi digeb Yàlla, ni ko Isaaxa doone. <sup>29</sup> Waaye doom ji juddoo ci coobarey bakkan, noonu mu daan bundxatale, bu jëkkoon, doom ji juddoo ci Noowug Yàlla, noonu rekk lay deme ba tey jii. <sup>30</sup> Te lu ci Mbind mi wax? Mu ne: «Dàqal jaam bu jigéen bii ak doomam, ndax doomu jaam bi du donnandoo ak doomu gor si‡.» <sup>31</sup> Kon nag bokk yi, nun dunu doomi jaam bi, waaye nooy doomi gor si.

## 5

### *Buleen delluwaat cig njaam*

<sup>1</sup> Almasi da noo yiwi, ngir nu yiwiku, kon nag saxooleen ko, te baña laxasooti buumi njaam.

<sup>2</sup> Dama ne, man Póol maa leen wax ne leen: su ngeen demee ba ñu xarfal leen kay, Almasi amalatu leen lenn njariñ. <sup>3</sup> Ma artooti képp ku dem ba ñu xarfal ko, ne ko mboolem yoon wi la wara jëfe. <sup>4</sup> Yeen ñiy sàmm yoonu Musaa, di ko sàkkoo àtteb njub fa kanam Yàlla, daggoo ngeen ak Almasi, ñàkk ngeen yiwu Yàlla. <sup>5</sup> Ndax nun kat, ci ndimbalal Noo gi, ak ci sunu kaw ngëm lanu yaakaare ñu jox nu àtteb njub bi nuy séentu. <sup>6</sup> Ci Almasi

\* **4:23** 4.23 Seetal ci *Njàlbéen ga* 15.4-6 ak 17.15-21.

† **4:27** 4.27 Seetal ci *Esayi* 54.1.

‡ **4:30** 4.30 Seetal ci

*Njàlbéen ga* 21.10.

Yeesu mi nu gëm, xaraf ak ñàkka xaraf, dara amu ci solo; li am solo mooy ngëm, gi jëfi cofeel di firndeel.

<sup>7</sup> Seen njàlbéenu xél de baax na! Ana ku leen gállankoor ba toppuleen dëgg gi? <sup>8</sup> Loolu leen fàbbi de jógewul ci ki leen woo. <sup>9</sup> As lawiir, tooyalub sunguf bépp lay funkil. <sup>10</sup> Man de gëm naa ndax Boroom bi, ne dungeen wuuteek man xalaat benn yoon ci lii. Waaye kiy jaxase seenum xel, ak ku mu mana doon, mooy gàddu mbugalam. <sup>11</sup> Man nag bokk yi, su ma dee xiirtale ci xaraf, ana lees may bundxataleeti? Konoon kay sama waareb deewu Almasi ca bant ba dootu doon ag tooñ ci kenn. <sup>12</sup> Ñi leen di lëjal ak waxi xaraf, nañu xuuf boog seen ngóorag bopp benn yoon!

### *Doxeleen Noowug Yàlla*

<sup>13</sup> Yeen de bokk yi, cig yiwiku lees leen woo. Moytuleen lenn rekk: bu seenug yiwiku diw lay, ngir topp seen bakkan, waaye deeleen surgawoonte ngir cofeel. <sup>14</sup> Ndax yoonu Musaa wépp, ci lenn ndigal lii la ténku: «Ni ngeen soppe seen bopp, nangeen ko soppe seen moroom\*.» <sup>15</sup> Waaye su ngeen dee màttante ak a lekkante kat, moytuleena far yàqante yaxeet!

<sup>16</sup> Li ma leen di wax moo di: dox-eleen Noowug Yàlla, su boobaa dungeen topp seen xemmemtéefi bakkan. <sup>17</sup> Ndax bakkan, la muy xemmem, daa dëngoo ak Noo gi; Noo gi it, la muy xemmem dëngoo ak bakkan. Dañu di jaar yu féewaloo, te moo tax dungeen def la ngeen nammoona def. <sup>18</sup> Waaye su leen Noo gi jiitee, su boobaa nekkatuleen ci kiliftefu yoon wi.

<sup>19</sup> Jëfi bakkan nag yomb naa xàmmi, te mooy: powum séy, ak jëfi sobe, ak yàqute, <sup>20</sup> ak bokkaale, ak xërëm, ak mbañeel, ak féewaloo, ak kiñaan, ak mer mu épp, ak jiital say bëgg-bëgg, ak réeroo, ak xàjjalikoo, <sup>21</sup> ak ñeetaane, ak màndite, ak mbumbaay, ak yeneen yu ni mel. Ma àrtu leen nag na ma leen artoo woon, ñiy jëfe noonu, amuñu cér ci nguurug Yàlla.

<sup>22</sup> Meññeefum Noowug Yàlla nag moo di: cofeel, ak mbég, ak jàmm, ak xolu muñ, ak mbaax, akug tabe, ak ngëm, <sup>23</sup> akug teey, ak moom sa bakkan. Yu mel noonu, wenn yoon bañu ko. <sup>24</sup> Ñi bokk ci Almasi Yeesu nag, ñoo daaj ca bantam ba, seen bakkan, daajaale ko ak sàkkuteefam yu tar, aki xemmemtéefam. <sup>25</sup> Gannaaw nag Noowug Yàlla moo nu dundal, nanu topp Noo gi. <sup>26</sup> Bunu di yég sunu bopp, di merloonte ak a iñaanante.

## 6

### *Dimbalanteleen*

<sup>1</sup> Bokki gëmkat ñi, su ñu bettee nit ci ag tooñ, yeen ñi topp Noowug Yàlla, waññileen ko ndànk, te kenn ku nekk ci yeen xoolaat boppam bu baax, ngir seen bakkan bañ leena xiirtal, ba ngeen daanu ci fiir gu ni mel. <sup>2</sup> Yennikoonteleen seeni yen, su boobaa ngeen di topp yoonu Almasi ba mu mat sèkk. <sup>3</sup> Ku foog ne moo am solo, te du dara nag, boppam lay nax. <sup>4</sup> Ku ci nekk, jëfi boppam, na ko niir. Su ci amee lenn lu mu mana sagoo, na ko yemale ci boppam, te baña sagoo lenni boppam lu mu xool ci ñeneen, <sup>5</sup> nde ku nekk ak sa aña jëfi bopp.

<sup>6</sup> Ki ñuy jàngal kàddug Yàlla nag war naa sédd ki koy jàngal ci mboolem alalam.

<sup>7</sup> Bu leen lenn nax; Yàlla deesu ko foontoo. Nit ki, li mu ji, moom lay góob. <sup>8</sup> Ku jiyal bannexu bakkanam, ci bannexu bakkanam lay jële ngóobum yàqute; ku jiyal Noowug Yàlla, ci Noo gi ngay góobe texe gu sax dàkk. <sup>9</sup> Bunu tàyyi ci def lu baax, nde bu jotee rekk nooy góob, ndegam yoqiwwunu. <sup>10</sup> Kon nag bi nu koy jekku, nanuy def lu baax, ngir ñépp, rawatina waa kër yoonu ngëm wi.

### *Na gëmkat bi doon mbindeef mu bees*

<sup>11</sup> Seetluleen mbind mi; ci araf yu mag yii ngeen wara xàmme, ne sama loxol bopp laa ko binde!

<sup>12</sup> Ñi leen di gétën ci xaraf mooy ñi ngistal tax ñu bëgg nit ñi gërëme leen seen melow yaram, te jubluwuñu ci lu moy ragal ku leen bundxatal ndax

\* 5:14 5.14 Seetal ci Sarxalkat yi 19.18.



deewug Almasi gi ñuy xamle ne mooy taxa mucc. <sup>13</sup> Ñi xaraf ñoom ci seen bopp sax toppuñu yoon wi. Teewul ñu bëgg ngeen xaraf, ngir mana damoo seen màndargam yaram, yeen ñi ñu xarafloo.

<sup>14</sup> Waaye man de Yàlla buma damoo lenn lu moy deewug sunu Boroom Yeesu Almasi ca bant ba. Bant boobu moo tax àddina di lu ñu ma daajal ci bant, ba àddina dee; man it may lu ñu daajal àddina ci bant ba ma dee. <sup>15</sup> Xaraf ak ñàkka xaraf, dara amu ci solo. Li am solo mooy doon mbindeef mu bees. <sup>16</sup> Mboolem ñiy sàmm ndigal lii nag, te di Israyilu Yàlla, jàmm ak yërmande ñeel na leen.

<sup>17</sup> Li ci des moo di gannaaw-si-tey, bu ma kenn lëjalati, ndax légét yi ci sama yaram, samag bokk ci Yeesu la màndargaal.

<sup>18</sup> Bokk yi, yal na sunu yiwu Boroom Yeesu Almasi ànd ak seenum xel. Amiin.

## Bataaxal bi Yàlla may Póol, mu bind ko waa Efes

<sup>1</sup> Ci man Póol, ndawal Almasi Yeesu ci coobarey Yàlla, ci man la kàddu gi bawoo, ñeel ñu sell ña ca Efes te di ñu sàmm seen kóllère ak Almasi Yeesu. <sup>2</sup> Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

### *Ay barkee ngi ci Almasi*

<sup>3</sup> Cant ñeel na Yàlla sunu Baayu Sang Yeesu Almasi, mi nu baaxe bépp barkey biir, ci Almasi mi nu bokk, fa déndi asamaan ya. <sup>4</sup> Te mooy noonu mu nu taamoo ba àddina sosoogul ndax Almasi mi nu bokk, ngir nu doon ñu sell te mucc sikk fa kanamam. Ci biir cofeel <sup>5</sup> la dogaloon lu jiitu, ne ci Yeesu Almasi la nuy defe ay doomi boppam, te muy bannexam, di coobareem. <sup>6</sup> Moo tax cant ñeel ko, ndax yiwam wu magg wi mu nu baawaanal ci Soppeem bi.

<sup>7</sup> Ci moom lanu ame njot gi nu sotalal njéggalug moy, ndax deretam ji tuuru, noonu ko Yàlla defe ci yiwam wu yaa, <sup>8</sup> wi mu nu baawaanal, mayaale nu mépp xel mu rafet akug dégg. <sup>9</sup> Moo nu xamal mbóotum coobareem, mi mu nammoona sotalale naka jekk ci Almasi, na mu ko neexe. <sup>10</sup> Li Yàlla namm, bu fan yi matee, moo di dajale lépp ci kilifteefu Almasi, mboolem la fa asamaan, ak li fi suuf. <sup>11</sup> Ci moom lanu jote sunu muur ci kaw dogalu Yàlla mi nu taamu lu jiitu, moom miy sotal lépp ni mu ko namme ci coobareem. <sup>12</sup> Moo tax nu di ko sante maggaayam, nun ñi jékka wékk sunu yaakaar ci Almasi.

<sup>13</sup> Kooku, yeen ñi dul Yawut, ba ngeen déggee, yeen itam kàddug dëgg gi, xibaaru jàmm, bi jëm ci seenug mucc, gannaaw ba ngeen gëmee, ci moom itam lañu leen màndargaale Noo gu Sell gi ñu dige woon. <sup>14</sup> Noo gi moo di dawal bi nu jotagum ci sunu muur, ba kera njotug ñoñi Yàlla matee, ba nit ñi sante Yàlla maggaayam.

### *Póol sant na, ñaan na*

<sup>15</sup> Moo tax man it, bi ma déggee ba tey, seen ngëm ci Sang Yeesu, ak seen cofeel ci ñu sell ñépp, <sup>16</sup> noppiwumaa sant Yàlla ndax yeen, te maa ngi leen di fàttliku ci samay ñaan, <sup>17</sup> ngir Yàllay sunu Sang Yeesu Almasi, Baay bu magg bi, sol leen xel mu rafet, ak ngis, ngir ngeen man koo xam bu baax. <sup>18</sup> Ngir itam seen bëti xol leer ba ngeen gis yaakaar ji ci wooteem, ak ni ay ngëneelam géejoo te yéeme, ñeel ñu sell ñi mu séddoo. <sup>19</sup> Ngeen boole ci xam manoooreem gu nattuul gi mu nu lañalal, nun gëmkat ñi. Manooore googu feeñ na ci jëf ji sottee ci kàttanam ak dooleem, <sup>20</sup> ji mu fésal ci Almasi, ba mu ko dekkalee, dëel ko ci ndijooram, fa déndi asamaan. <sup>21</sup> Foofa la Almasi tiime lu sore gépp nguur, ak bépp sañ-sañ, ak gépp manooore, ak gépp kilifteef, ak wépp tur wees di tudd, muy tey, di èllëg. <sup>22</sup> Yàlla moo teg lépp fi suufu ndëgguy tãnkam, te moo ko def muy bopp bi tiim lépp, ñeel mbooloom gëmkat ñi, <sup>23</sup> mbooloo miy aw yaramam. Ci mbooloo mi nag la Almasi teewe teewaay bu mat sëkk, te Almasi mooy matal lépp ci ñépp.

## 2

### *Gëm, soppi*

<sup>1</sup> Yeen dangeena dee woon ndax seeni moy ak seeni bàkkaar, <sup>2</sup> yi ngeen doon dunde démb, ngeen àndoon ci ak doxalinu àddinay tey jii, ak ku bon kiy kàngamu boroom baat yi ci jaww, ji asamaan tiim, boroom noo gi wéye liggéeyam ci biir aji déggadi ñi, tey. <sup>3</sup> Ci ñoom lanu bokkoon nun ñépp itam; mas nanoo topp sunu bakkan, di jëfe lu sunu bakkan, ak sunum xel xemmem. Sunu bindu nit taxoon na noo yeyoo am sànj ni ñépp.

<sup>4</sup> Waaye Yàlla mi bare yërmande, ci kaw cofeel gu réy, gi mu nu sopp, <sup>5</sup> nun ñi doon nit ñu dee ba noppi ndax sunuy moy, moo nu booleek Almasi, dundalaat nu. Ci kaw yiw daal ngeen mucce. <sup>6</sup> Ci sunu bokk ak Yeesu Almasi la nu Yàlla dekkalandoo ak moom, dëelandoo nook moom fa déndi asamaan. <sup>7</sup> Mbaax gi

nu Yàlla won ci Almasi Yeesu, moom lay firndeele mboolem xarnu yiy ñëw, ni yiwam yaatoo ba tiiñ am xel. <sup>8</sup> Ndax kat ci yiw ngeen mucce ci kaw ngëm, te loolu jógewul ci yeen, mayu Yàlla la; <sup>9</sup> du peyu jëf, ba kenn di ci kañu. <sup>10</sup> Ndax kat noo di liggéeyu Yàlla; Yàllaa nu yeesal ci Almasi Yeesu, ngir nu wéye jëf ju rafet, ja mu nu fàgguloon ca njàlbéen, ngir nu di ko jëfe.

### *Gëmcati Almasi benn lañu*

<sup>11</sup> Kon nag, yeen jaambur ñi dul Yawut cib juddu, yeen ñi ñuy wooye yéefar yi xaraful, te ñi leen ko dàkkantale woon di Yawut yi xarafe ci loxol nit ku leen xarfal ci seen yaram, fàttlikuleen seen démb. <sup>12</sup> Jant yooyu amuleen woon benn cér ci Almasi, te amuleen woon jenn yelleef ci mbootaayu bànni Israyil. Bokkuleen woon ci kóllère yi ëmb digeb Yàlla, te mu fasoo ko ak ñoom. Ñàkk yaakaar, ak ñàkka xam Yàlla ngeen nekke woon ci àddina. <sup>13</sup> Waaye yeen ñi sore woon, léegi bi ngeen nekkee ci Almasi Yeesu, jege ngeen ndax deretu Almasi ji tuuru.

<sup>14</sup> Ndaxte moom mooy sunu jàmm, moom mi boole ñaar, Yawut bi ak jaambur bi dul Yawut, def leen kenn. Ci suuxu yaramam wa ñu daaj la ñaggee ñagu mbañeel bi doxoon sunu diggante. <sup>15</sup> Yoonu Musaa ak santaane yaak ndigal ya, moom la xewil, ngir yeesal ñaar ñi, Yawut beek jaambur bi, ci jenn jëmmu boppam, ñu doon kenn nit ku yees, ba jàmmoo. <sup>16</sup> Ñaar ñi la Almasi boole ci jenn jëmm, jubale leen ak Yàlla, ca bant ba ñu ko daajoon, te bant ba la dakkale sunub tongoo. <sup>17</sup> Moo dikke xibaaru jàmm buy yégle jàmm ju leen ñeel, yeen jaambur ñi ko sore woon, te ñeel nu, nun ñi ko jege, <sup>18</sup> ndax nun ñaari xeet yépp, ci moom Almasi lanu jote ci Baay bi, ci ndimbalal genn Noo gi.

<sup>19</sup> Kon nag dootuleen ay gan mbaa ay doxandéem, waaye ay nawley ñu sell ñi ngeen, te waa kër Yàlla ngeen. <sup>20</sup> Yeena di tabax, bi ndawi Almasi ak yonent yi di kenu gi, te Almasi Yeesu ci boppam di doju coll wi. <sup>21</sup> Ci moom la tabax bi bépp di temboo, ba jóg, doon jaamookaay bu sell ngir Boroom bi. <sup>22</sup> Ci Almasi

ngéen bokke ci tabax bi, yeen jaambur ñi itam, ba mana doon dëkkuwaayu Yàlla, ci ndimbalal Noo gu Sell gi.

## 3

### *Póol xamle na mbóotum Yàlla*

<sup>1</sup> Moo ma tax di ñaan, man Póol mi ñu tēj ngir Almasi, ndax ñi dul Yawut, yeen jaambur ñi, <sup>2</sup> ndegam yég ngeen sas wi ma Yàlla sas ciw yiwam, ñeel leen. <sup>3</sup> Ci am peeñu lañu ma xamale mbóot mi, noonu ma leen ko tēnkale woon ci bataaxal. <sup>4</sup> Bu ngeen jàngee loolu, dingeen rāññee bu baax, ni ma dégge mbóot mi ci mbirum Almasi. <sup>5</sup> Moomu mbóot, xamaleesu ko woon doom aadama yi, ca janti maas ya woon, ni ñu ko feeñalale tey, ñu sell ñi diy ndawam ak yonent yi, ci ndimbalal Noo gu Sell gi, <sup>6</sup> ba mu leer ne jaambur ñi dul Yawut ñooy bokk ak Yawut yi benn cér bi, ñooy doon wenn yaram, te ñooy bokk benn dige bi ci Almasi Yeesu, ni ko xibaaru jàmm bi xamlee.

<sup>7</sup> Xibaaru jàmm boobu lañu ma def ab jawriñam, te Yàlla, ciw yiwam, moo jëfe manooreem, ba jagleel ma boobu cér. <sup>8</sup> Man mi yées ci ñu sell ñépp lañu may woowu yiw, ba may xibaar jaambur ñi dul Yawut, xéewal yu amul kem yi ci Almasi. <sup>9</sup> May niital ñépp, ni Yàlla nara sottale mébétam, miy mbóot mu làqu woon naka jekk fa moom Yàlla mi sos lépp. <sup>10</sup> Su ko defee boroom nguur yeek boroom sañ-sañ ya fa déndi asamaan, mana xame ci mbooloom gëmcati Almasi, ni xelum Yàlla rafete ci wet gu nekk. <sup>11</sup> Loolu moo doon naka jekk nammeelam gi mu sottale ci Almasi Yeesu sunub Sang. <sup>12</sup> Ci Yeesu, ci kaw ngëm gu nu ko gëm lanu ñemee àgge fit wu mat sèkk, fa kanam Yàlla. <sup>13</sup> Kon nag dama leen di ñaan, ngeen baña yoqi ngir coono, yi may sonn ndax yeen; lépp seen teraanga la.

### *Saxoo gëm moo mata ñaan*

<sup>14</sup> Looloo ma taxa sukk sama bëti óom, janook Baay bi, <sup>15</sup> ki gépp njabootug asamaan ak suuf, jële aw tur. <sup>16</sup> May ñaan nag, mu may leen, ci koomu teraan-gaam, seen jëmmu biir feddlikoo kàttanu Noowam gu Sell. <sup>17</sup> Su ko defee seen

ngëm tax Almasi dëkke seen xol, ngeen sax ay reen yu sampe ci biir cofeel, <sup>18</sup> ngir yeen ak mboolem ñu sell ñi, seenum xel mana jàpp, ni mu leen ware, luy yaatuwaayub cofeelu Almasi, ak guddaay ba, ak kawewaay ba, ak xóotaay ba. <sup>19</sup> Ngeen boole ci daj cofeelu Almasi, gi wees xam-xam, ngir ngeen fees, ba fees dell ak koomu Yàlla.

<sup>20</sup> Moom mi mana jëfoo kàttan giy liggéey ci nun, ba sottal mboolem lu nu ñaan ak lu nu xalaat, ba wees loola fuuf sax, <sup>21</sup> moo yelloo daraja ci biir mbooloom gëmkat ñi, ak ci Almasi Yeesu, tey ak èllëg, ba fàww. Amiin.

## 4

### *Mbooloom gëmkat ñi wenn yaram la*

<sup>1</sup> Dama leen di dénku nag, man mi ñu tëj ndax Sang bi, ngir ngeen dund dundin wu yellook wooteb Yàlla, bi mu leen woo.

<sup>2</sup> Saxooleen woyof, lewet, te deeleen muñ, di muñalante ngir cofeel. <sup>3</sup> Defleen seen kem kàttan, ngir di jàmmoo, ba mana sàmm seenug bennoo ci biir Noo gi ngeen bokk.

<sup>4</sup> Wenn yaram a fi nekk, ak genn Noo, ak jenn yaakaar ju leen wooteb Yàlla jëme.

<sup>5</sup> Benn Sang bi la it, ak genn ngëm, ak genn sóobu cim ndox\* . <sup>6</sup> Te it jenn Yàllaa am; mooy Baayu ñépp, moo tiim ñépp, di jëf ci ñépp te nekk ci ñépp.

<sup>7</sup> Waaye ku nekk ci nun ak mayam, ci yiwu Yàlla, ni ko nattub Almasi séddalee.

<sup>8</sup> Moo tax ñu ne:

«Moo yéeg fa kawa kaw,  
yóbbaaale gàngoor gu mu jàppe xare,  
te moo séddale nit ñi ay may†.»

<sup>9</sup> Li ñu ne «moo yéeg,» ana lu mu tekki lu moy wàccoon na it ba fu gëna suufe?

<sup>10</sup> Kooku wàccoon mooy kenn ki yéegaat ba tiim asamaan yépp, ngir def lépp feese jëmmam. <sup>11</sup> Moo may ñii di ay ndawam, ñee di ay yonent, ñee di ay xamlekati xibaaru jàmm bi, ñale di ay sàmmi mbooloom gëmkat ñi, mbaa ay jànglekati. <sup>12</sup> Almasi moo waajale noonu ñu sell ñi, ba ñu mana bey seen sas ci

liggéeyam, ngir tabax mbooloom gëmkat, mi taxawe yaramu Almasi. <sup>13</sup> Su ko defee nu mana màgg nun ñépp ba doon benn ci ngëm, ak ci xam-xam bu mat ci Doomu Yàlla ji, ba kera nuy doon magum jëmm, bay tollook taxawaayu Almasi bi mat sëkk.

<sup>14</sup> Su boobaa nu noppee doon ay tuut-tànk yu nit ñiy muusaatoo kàddu yu mel ni gannax yu nuy baaje, ak ngelawal mboolem àlluwa ju bees ju nuy pamti-pamtee ci seen biir pexey naxe ak njublan, ngir fàbbi nu. <sup>15</sup> Su boobaa kay, dëgg gu nu wodde cofeel lanuy wéye, tey màgg ci bépp fànn, ci moom Almasi miy bopp bi. <sup>16</sup> Ci moom miy bopp bi la yaram wépp di dëggoo, témboo ndax ndimbalal mboolem tenqo yi koy saytu, na mu dëppook wàllu cér bu ci nekk. Su ko defee yaram wiy yokku, di màgg ci biir cofeel.

### *Ku gëm Almasi war koo roy*

<sup>17</sup> Lii nag maa leen ko wax, te di ko biral ci turu Boroom bi: Ni xeeti yéefar yiy jëfe, topp seen xalaat yu tekkiwul dara, buleen jëfeeti noonu. <sup>18</sup> Seenum xel a tàbbi ag lëndëm, ñu tumurànke dundin wi Yàlla di maye, te umple gi ci ñoom moo tax, ndax seenug dëgër bopp. <sup>19</sup> Dañooy mujj dërkiis, yebu ci topp seen bakkan, ba xaabaabal ci jépp jëfi sobe.

<sup>20</sup> Yeen nag du loolu ngeen jàngé ci Almasi, <sup>21</sup> ndegam kay Yeesu ci boppam ngeen dëgg mbiram, ba jàngé ci moom, dëgg gi bawoo ci moom, <sup>22</sup> te mooy ngeen ba seen jikko ju jëkk ja, ngeen teqlikoo ak seen jëmmu démb ja masa topp bannexi bakkan yuy naxe, ba sóobu ci yàqute. <sup>23</sup> Su ko defee ngeen mana yeeslu ci seenum xel, ci ndimbalal Noo gi, <sup>24</sup> te ngeen soloo jëmm ju yees ji Yàlla sàkke ci takkndeeram, di jëfe njub, ak sellnga ji dëgg di jur.

### *Póol lim na meloy gëmkat bu dëggu*

<sup>25</sup> Kon nag bàyyileen fen, te ku nekk di wax sa moroom, dëgg, ndax ku nekk ci yeen sab cérú moroom nga. <sup>26</sup> Buleen mer ba bàkkaar, te bu jant bi sowe seen mer;

\* 4:5 4.5 sóobu cim ndox la gëmkatub Almasi di firndeete ngëmam. † 4:8 4.8 Seetal ci Sabóor 68.19.

<sup>27</sup> buleen xajal Seytaane. <sup>28</sup> Sàcc bi, na ba sàcc te nangoo sonn, di liggéeye loxoom liggéey bu rafet, ba man cee dimbali néew-ji-doole ji.

<sup>29</sup> Bu genn kàddu gu bon génne seen gémmiñ, xanaa su ko jaree ngeen wax lu baax, luy jariñe, te diw yiw ci ñi koy dégg. <sup>30</sup> Te it buleen t-isal Noowug Yàlla gu Sell, gi leen màndargaale xàmmikaayam ngir bésub njot ba. <sup>31</sup> Lépp luy wextan, ak naqari deret, ak mer mu épp, ak coow, ak wax ju ñaaw, na lépp buube, ba génne ci seen biir, mook mboolem jëfi coxor. <sup>32</sup> Baaxleen ci seen diggante, di ñeewantante, tey balante, ni leen Yàlla baale ci Almasi.

## 5

<sup>1</sup> Kon nag doonleen ay roykati Yàlla, gannaaw yeenay doomam yi mu sopp, <sup>2</sup> te ngeen di doxale cofeel, ni Almasi mi nu sopp, ba jooxeel nu bakkanam, def ko saraxu sawara, ngir xetug jàmm, ñeel Yàlla.

<sup>3</sup> Lu jëm nag ci powum séy, ak jépp jëfi sobe, mbaa ag bégge, li jekk ci ay nit ñu sell, moo di ñu bañ koo tudd sax ci seen biir, <sup>4</sup> te ag ñàkk kersa, ak waxi caaxaan, ak kaf yu bon, dara jekku ci, waaye saxooleen kàdduy cant. <sup>5</sup> Ndax lii kat na leen wóor: képp ku nekke powum séy, mbaa jëfi sobe, mbaa ag bégge, kooku amul cér ci nguurug Almasi ak Yàlla, ndax ku bégge ab bokkaalekat la.

### *Jëfeleen ni niti leer*

<sup>6</sup> Bu leen kenn naxe waxi ngelawal neen, ndax yooyu ma lim mooy wàcce sànjum Yàlla ci kaw aji déggadi ñi. <sup>7</sup> Kon nag buleen séq ak ñooñu dara. <sup>8</sup> Ag lëndëm ngeen woon démb, waaye tey ag leer ngeen ci Boroom bi ngeen bokk. Jëfeleen nag ni niti leer. <sup>9</sup> Li leer gi ci yeen di meññ moo di mboolem luy mbaax ak njub ak dégg. <sup>10</sup> Ràññeeleen li neex Boroom bi; <sup>11</sup> jëfi lëndëm amul njariñ, buleen ci bokk, xanaa ngeen feeñal ñaawtéefu jëf ja. <sup>12</sup> Ndax kat li nit ñooñu di làquy def, waxtaane ko sax, lu

ruslu la. <sup>13</sup> Waaye mboolem lu ñu feeñal, leer ga ñu ko leerale moo ko wone, <sup>14</sup> te lépp lu ñu wone ci ag leer, di ag leer. Moo tax ñu ne:

«Yaw miy nelaw, yewwul, dekkil, Almasi leeral la.»

<sup>15</sup> Kon nag xool-leen bu baax seen jëfin, defleen jëfinu nit ñu am xel, te baña mel ni ñu ñàkk xel, <sup>16</sup> Jariñooleen lu ngeen man, jot gi ngeen amagum, ndax jant yu bona ngii tey. <sup>17</sup> Moo tax buleen def jëfi ñàkk bopp, waaye jéemleena xam coobarey Boroom bi. <sup>18</sup> Buleen naan biiñ ba màndi, màndite ci afal seen bakkan la leen jëme, waaye na leen Noo gi fees, <sup>19</sup> ngeen di jàngalante jàngi Sabóor, ak jàngi cant, ak jàng yu bawoo ci Noo gi leen fees, te ngeen di woy aka kañ Boroom bi, ci seen xol. <sup>20</sup> Fu ngeen tollu, ak ci mbir mu mu mana doon, santleen Yàlla Baay bi ci sunu turu Sang Yeesu Almasi, <sup>21</sup> te ngeen rus Almasi, ba tax ngeen di nangulante.

### *Jabar mukk, jëkkër sopp*

<sup>22</sup> Na jabar nangul jëkkëram ni mu nangule Sang bi. <sup>23</sup> Almasi moo di musalkatu mbooloom gëmkat ñi, mbooloo mi di aw yaramam. Te itam ni Almasi dee boppu mbooloom gëmkat ñi, ni la jëkkër ji dee boppu jabaram. <sup>24</sup> Kon nag ni mbooloo mi nangule Almasi, ni la jabar ji wara nangule jëkkëram ci lépp.

<sup>25</sup> Jëkkër nag, na sopp jabaram ni Almasi soppe mbooloom gëmkat ñi, ba jooxeel leen bakkanam. <sup>26</sup> Moo defal loolu mbooloo mi ba man koo setale cangaayal ndox mu ànd ak kàddoom, ngir sellal ko. <sup>27</sup> Li mu ci namm moo di teewal mbooloo mi fi kanamam, mu mel ni ab séetam bu ne ràññ, gàkkul, rasul, taqul lenn, xanaa sell, mucc sikk.

<sup>28</sup> Noonu la jëkkër ji wara soppe jabaram, ni mu soppe yaramu boppam rekk. Sopp sa jabar sopp sa bopp la, <sup>29</sup> ndax kenn masula bañ suuxu boppam, xanaa mu di ko dundal, di ko topptoo, ni Almasi ak mbooloom gëmkat ñi, <sup>30</sup> nde noo di céri yaramam. <sup>31</sup> Ni ko Mbind mi indee: «Looloo tax góor di bàyyikoo ci ndeyam ak baayam, daldi taqoo ak

jabaram, ba ñoom ñaar di wenn suux\*.)»  
<sup>32</sup> Mbóot mu xóota ngi ci dog boobu, waaye man, li may wax moo di dog bi moo misaal diggante, bi Almasi séq ak mbooloo mi. <sup>33</sup> Teewuleen koo moom yeen itam; kon na ku nekk sopp jabaram ni mu sopp boppam, te ku nekk weg jëkkëram.

## 6

### *WaaJur na yar, te njaboot di dégg*

<sup>1</sup> Naka yeen xale yi, déggal-leen seeni waaJur, ngir Boroom bi, ndax moo war.  
<sup>2</sup> «Teral-leen seen ndey ak seen baay\*,» mooy ndigal li jëkka ànd akub dige,  
<sup>3</sup> ndax da ne: «ngir ngeen baaxle te gudd fan ci kaw suuff†.»

<sup>4</sup> Yeen ñiy baay it, buleen xoñoñal xale yi, waaye yarleen leen, di leen jubanti, di leen xamal coobarey Boroom bi.

### *Na jaam ak sangam déggal Boroom bi*

<sup>5</sup> Yeen jaam yi, déggal-leen seen sangi àddina, ànd ceek ragal Yàlla bay kat-kati, ak xol bu dëggu. Ni ngeen déggale Almasi, nangeen leen ni déggale. <sup>6</sup> Buleen ko defe ngistal, mbaa ngeen di ko sàkkoo lu leen neex, na di yéene ju ngeen tibbe ci seen xol, ngir jëfe liy coobarey Yàlla, ni mu ware ay jaami Almasi. <sup>7</sup> Liggéeyal-leen leen ci xol bu tàlli, ba mu mel ni Boroom bi ngeen ko defal, waaye du nit donj, <sup>8</sup> te ngeen xam ne nit ki, mu dis gor mbaa ab jaam, mboolem lu mu def ci lu baax, loola la ko Boroom biy delloo.

<sup>9</sup> Yeen it sang yi, jëfeleen noonu seen diggante ak seeni jaam, bàyyileen di tëkkoo, te ngeen xam ne yeen ak ñoom a bokk benn Boroom fa asamaan, te xejj ak seen amul fa moom.

### *Xare bi nook Seytaane la*

<sup>10</sup> Li ci des nag moo di ngeen manoore-woo Boroom bi, te ngeen sàkkoo ndimbal ci dooleem ak kàttanam gi amul kem.  
<sup>11</sup> Ràngooleen mboolem gannaayi Yàlla, ngir ngeen mana jànkoonde ak pexey Seytaane. <sup>12</sup> Ndax kat sunub xare du nook boroomi deret ak suux, waaye ñi

ñu ko séqal ay boroom nguur lañu, ak ay boroom sañ-sañ, ak ay boroom doole yu nekk ci àddina ju lëndëm jii, di ay dagi Seytaane yu fare déndi asamaan.  
<sup>13</sup> Kon nag jël-leen gannaayi Yàlla yépp, ba bu bésub safaan taxawee, ngeen mana jëflante, ba sottal, tey wéye taxaw temm.

<sup>14</sup> Taxawleen kon temm. Defleen dégg di ngañaay li ci seen ndigg, njub di seen kiiraayal dënn. <sup>15</sup> Xibaaru jàmm bi indi jàmm nag, defleen ko muy dàll yu dëgéral seen taxawaay. <sup>16</sup> Te fu ngeen tollu nàbbleen pakk biy seen ngëm, ci ngeen mana fanqe mboolem jumi sawaray ku Bon ki. <sup>17</sup> Mbaxanam xare miy seen kaaraange, jël-leen ko, sol, jël-leen itam saamar bi Noo giy joxe, te muy kàddug Yàlla. <sup>18</sup> Deeleen ñaan fu ngeen tollu, gépp xeetu ñaan aki dagaan ci ndimbalal Noo gi, ànd ci ak teewlu fu ngeen tollu, ak gépp farlute, te ngeen di ñaanal mboolem gëmkat ñu sell ñi.

<sup>19</sup> Man itam, booleleen ma ci, ngir saa yu ma ubbee sama gémmiñ, mana xéewloo ndéey lu ma xamlee fit wu dëgër, mbóoti xibaaru jàmm bi, <sup>20</sup> xibaar bi ma di ndawam lu ñu ténke ay jéng. Waaye ñaanal-leen ma ma di ko waxee fit, ni mu ma ware.

### *Póol tàggu na waa Efes*

<sup>21</sup> Dingen mana xam nag lu jëm ci man, ak li may def, ndax Tisig, mbokk mu ñu sopp, jawriñ ju wóor ci liggéeyu Boroom bi, moo leen di xamal lépp.  
<sup>22</sup> Loolu ci boppam sax moo waral ma yónni ko ci yeen, ngir mu xamal leen ni nu nekke, ba seral seen xol.

<sup>23</sup> Yal na jàmm ñeel bokki gëmkat ñi, ak cofeel gu ànd ak ngëm, bawoo fa Yàlla Baay bi, ak Sang Yeesu Almasi. <sup>24</sup> Na aw yiw ñeel mboolem ñi sopp sunu Sàng Yeesu Almasi, cofeel gu dul fey.

\* **5:31** 5.31 Seetal ci *Njàlbéen ga* 2.24. \* **6:2** 6.2 Seetal ci *Mucc ga* 20.12. † **6:3** 6.3 Seetal ci *Baamtug Yoon wi* 5.16.

## Bataaxal bi Yàlla may Póol, mu bind ko waa Filib

<sup>1</sup> Man la Póol, Timote miy jaamub Almasi Yeesu ni man ànd ak man ci lii, ñeel mboolem ñu sell ñi gëm Almasi Yeesu, te dëkke Filib, yeen ak seeni njiit ak taxawukati mbooloo mi. <sup>2</sup> Aw yiw ak jàmm ñeel na leen, bawoo fa sunu Baay, ak Sang Yeesu Almasi.

### *Póol ñaanal na waa Filib*

<sup>3</sup> Damay sant Yàlla saa Boroom saa yu ma leen fàttlikoo, <sup>4</sup> te saa su ma leen di ñaanal, mbég laa leen di ñaanale yeen ñépp, <sup>5</sup> ndax seen loxo bi ngeen jo ci xamle xibaaru jàmm bi, te dale ko ca bés bu jëkk ba ba tey. <sup>6</sup> Te lii kat, bir na ma; ki tàmbali jii jéf ju baax ci yeen, dina ko àggale ba keroog bésuub Almasi Yeesu.

<sup>7</sup> Maa yey nag njortal leen loolu yeen ñépp, ndax ci sama xol laa leen def, te it muy ci wàllu jéng yi ñu ma jénge, di ci wàllu kàddu guy waxal xibaaru jàmm bi, ak di ko feddli, yeen ñépp am ngeen wàll ci sama ańub yiw. <sup>8</sup> Yàlla seede na ne sopp naa leen yeen ñépp, cofeel gu Almasi Yeesu ci boppam àttana tibbe ci biir xolam.

<sup>9</sup> Li may ñaan nag moo di seen cofeel yokku tey gën di yokku, te ngeen ànd ceek xam-xam bu matale ak gépp ràññee, <sup>10</sup> ba mana xàmmi li gën. Su ko defee ngeen set wecc te mucck sikk, ngir keroog bésuub Almasi. <sup>11</sup> Su boobaa ngeen meññal ba woomle ci njub, gi Yeesu Almasi di maye, ngir fésal màggug Yàlla, jollil ag cantam.

### *Jéngi Póol jéngul kàddug Yàlla*

<sup>12</sup> Damaa bëgg, bokk yi, ngeen xam ne lii ma dal, xibaaru jàmm bi la far jëmale kanam. <sup>13</sup> Ndax kat, bir na mboolem dagi boroom dëkk bi te bir na ñeneen ñépp ne Almasee tax ñu jéng ma. <sup>14</sup> Te it li gëna bare ci bokki gëmkaat ñi, sama jéng yi ma nekke nii moo leen yokk aw fit, ba tax ñu gëna ñemee waxe kàddu gi te ragaluñu ci dara.

<sup>15</sup> Dëgg la am na ñuy waare turu Almasi ci kaw kiñaan ak diiroo mbagg, waaye am na itam ñu koy defe yéene ju rafet. <sup>16</sup> Ñooñu cofeel a leen tax di waare, ndax xam nañu ne waxal xibaaru jàmm bi laa sasoo. <sup>17</sup> Waaye ñale, xelum wujje lañuy siiwtaanee Almasi, du yéene ju rafet ju ñu ci am, xanaa defe ne seeni peXe man na maa yokk coono ci diggante bii ñu ma jénge.

<sup>18</sup> Ana lu ci topp nag? Ba tey rekk, ak nu mu mana deme, muy waareb jinigal, mbaa waare bu dëgg, turu Almasi moo ci jollee, muy sama mbégtem tey, dellu di sama mbégtem èllég, <sup>19</sup> ndax xam naa ne loolu lépp ay walbatiku di samag mucck, ndax seeni ñaan, ak ndimbalal Noowug Yeesu Almasi. <sup>20</sup> Loolu laa ne siiw, yaakaar ko, te duma rus mukc, xanaa di saxoo aw fit, démb niki tey, ngir ma mana fésale sama jëmm jépp, tedngay Almasi, su may dund ak su may dee. <sup>21</sup> Ndax samag dund, Almasi la ñeel, samag dee dàqati. <sup>22</sup> Su dee nag damaa wara wéye sama bakkan bii, ngir mana sottal ab liggéey bu am njariñ, ana lu ma gën ci diggante dund ak dee? Xawma ko. <sup>23</sup> Ci diggante jaar yooyii laa tance: yàkkamti na maa yiwiku ba fekki Almasi, te loolu moo dàqati fuuf. <sup>24</sup> Waaye ma deseegum bakkan moo gëna jamp ci yeen. <sup>25</sup> Gannaaw loolu bir na ma nag, xam naa ne dinaa desagum, desandoo feek yeen ñépp, ngir ngeen jëm kanam, tey bége seen ngëm, <sup>26</sup> ba bu ma délsee fi yeen, ngeen gëna mana puukarewoo Almasi Yeesu ndax man.

<sup>27</sup> Fexeleen rekk ba di jéfe ni mu yelloo ak xibaaru jàmm bu Almasi, ngir bu ma leen seetsee, mana seede, mbaa su ma wuutee it, di dëgg ni ngeen saxoo di mànkoo, bokk jenn yéene, di xeex ngir saxal ngëm gi sukkandiku ci xibaaru jàmm bi. <sup>28</sup> Buleen ragal seeni noon ci lènn. Seen fit mooy màndargaal sànkutey noon yi, te yeen it, mooy màndargaal seenug mucck gu bawoo fa Yàlla. <sup>29</sup> Ndax kat yeen la may ci jëmmu Almasi, yiwu gëm Almasi, rax ci dolli, ngeen sonn ndax moom, <sup>30</sup> coonoy benn

xare bi ngeen bokk ak man, te gise woon ma ko démb, ba tey, ngeen di ma ko dégge.

## 2

### *Ni Almasi woyofe mooy royukaay*

<sup>1</sup> Ndegam amees na lenn lu yokk aw fit ci Almasi mi nu gëm, ndegam lenni cofeelam lu mana dëfal am na, ndegam amees na benn cér ci Noo gu Sell gi, ndegam it, amees na lenn lu bawoo fi moom, ci wàllu xol bu rafet, ak yërmande, <sup>2</sup> kon dëgg waay, mottlileen sama mbég, ba mànkoo, te ngeen soppantee genn cofeel, jubale seeni xol, te bokk benn jëmu. <sup>3</sup> Buleen def dara ci kaw wujje, mbaa réy-réylu, waaye doyadiiluleen, ba jàpp ne seen moroomi gëmkat a leen gën. <sup>4</sup> Bu kenn ci yeen xintewoo njariñal boppam, waaye na ku nekk bàyyi xel moroomam. <sup>5</sup> Noonu Almasi Yeesu doon doxale, deeleen ko doxale ci seen biir:

<sup>6</sup> Moom mi nekke nekkinu Yàlla te ñoyaaloowul dayob boppam, bi ko def nawleb Yàlla.

<sup>7</sup> Xanaa mu ñacc boppam, nangoo jagoo nekkinu surga. Mu mujj mel ni nit donj, di ku ñu xàmme jëmmu nitam.

<sup>8</sup> Moo toroxlu, moo nangu, ba dee fekk ko ci, ak mbugalu bant ba ñu ko daaj.

<sup>9</sup> Moo tax Yàlla kaweel koo kaweel, baaxe ko tur wi tiim wépp tur,

<sup>10</sup> ba turu Yeesu tax ñépp sukk seen bëti óom, muy kaw asamaan, di kaw suuf, di biir suuf,

<sup>11</sup> làmmiñu ñépp it biral ne Yeesu Almasi mooy Sang bi, te muy ndamu Yàlla Baay bi.

### *Doonleen ay leer ci àddina*

<sup>12</sup> Kon nag soppe yi, noonu ngeen masa dégge ndigal, démb ba may teew, rawatina tey bi ma wuutee, nangeen ko wéye, di jëfe seenug mucc, te ànd ceek ragal Yàlla bay lox, <sup>13</sup> ndax Yàlla mooy liggéey ci yeen lu tax ngeen mana namma jëfe coobareem, ba man koo jëfe.

<sup>14</sup> Mboolem lu ngeen di def nag, buleen ci boole xultu mbaa xuloo, <sup>15</sup> ngir seen der set wecc, te kon deesuleen mana gakkal ci lenn. Ay goney Yàlla yu amul sikk ngeen di doon, ci biir maas gu dëng te yaqu, ngeen di lerxat ci seen biir, ni ay leer ci àddina si, <sup>16</sup> ànd ak kàddug dund gi ngeen di xamle. Su ko defee keroog bésuub Almasi, ma mana damoo ne dawuma cig neen, te sonnuma cig neen. <sup>17</sup> Su ma ci deeyee sax, ba sama dund mel ni sarax su ñu tuur, tofal ko ci sarax, bi seen ngëm taxawe, su boobaa it maa ciy bég, te di leen woo, ngir bokk ak yeen ñépp bannexu. <sup>18</sup> Yeen itam nangeen ci bég te bokk ak man bannexu.

### *Póol gërëm na Timote ak Epafrodit*

<sup>19</sup> Yaakaar naa nag, ne bu soobee Sang Yeesu, dinaa leen yónnee Timote balaa yàgg, ngir xam nu ngeen def, ba man ci sama bopp, sama xel dal. <sup>20</sup> Ndaxte awma fi kenn ku ko moy, ku bokk ak man xinte, ba seeni mbir yitteel ko dëgg. <sup>21</sup> Ñi ci des ñépp, seen njariñal bopp lañuy sàkku, waaye du li soxal Yeesu Almasi. <sup>22</sup> Timote nag xam ngeen ne ku rafet ab jëw la. Ni doom di taxawoo baayam, ni la bokke ak man liggéey, bi ci xamle xibaaru jàmm bi. <sup>23</sup> Sama yaakaar nag moo di, bu may am lu leer ci sama mbir rekk, moom laay daldi yebal ci yeen. <sup>24</sup> Teewul mu bir ma ne, bu soobee Boroom bi, man ci sama bopp, balaa yàgg, dinaa leen seetsi.

<sup>25</sup> Ci wàllu Epafrodit, sama mbokkum gëmkat la, di sama naataango, di sama mbokkum xarekat, te di seen ndaw li ngeen ma yóbbante ndimbal lu faj samay soxla. Waaye jàpp naa ne fàww ma delloo leen ko, <sup>26</sup> ndax namm na leen lool, boole ci tiisoo li ngeen dégg ag jagadeem. <sup>27</sup> Woppoon na it ba xawa dee, waaye Yàllaa ko yërëm, te du moom rekk la yërëm, waaye man itam, ngir ma baña am tiis ci kaw tiis. <sup>28</sup> Moo tax ma yàkkamtileen koo delloo, ngir bu dikkee, ngeen man koo bégewaata, te man itam, samaw tiis wàññiku. <sup>29</sup> Teertooleen ko mbégte mu mat sèkk ngir Sang bi, te it nawleen ñu mel ni moom, <sup>30</sup> ndax liggéeyal Almasi tax na koo riisu ndee;



ba ngeen amee ngànt lu leen teree motlil seen bopp, seen yéene, moo jaay bakkanam ngir wuutu leen, ba yótsi ma seen ndimbal.

### 3

#### *Gii njekk a wóor*

<sup>1</sup> Li ci des bokk yi, ma waxati, bégleen ci Boroom bi. Di leen bind genn kàddu googu rekk, diisu ma, te di leen ko baamtu moo gëna wóor ci yeen.

<sup>2</sup> Moytuleen xaj yi, defkati mbon yooyu laa ne, moytuleen leen, moytuleen njoofkat yooyu jiital aaday xaraf.

<sup>3</sup> Ndaxte nun noo xaraf tigi, nun ñiy jaamoo Yàlla Noowam gu Sell, di damoo Almasi Yeesu, te yaakaarunu aaday nitu suuxu neen.

<sup>4</sup> Moona man de, waroon naa mana yaakaar aaday suuxu neen. Ak keneen ku mana xalaat ne sañ naa yaakaar aaday nitu suuxu neen, maa ci raw.

<sup>5</sup> Man mi xaraf ba ma amee juróom ñetti fan, askanoo ci bànni Israyil, giiroo ci Beñamin, di ab Ebrë bu ñaari Ebrë jur, te bokk ci ngérum Farisen, ci wàllu yoonu Musaa. <sup>6</sup> Su dee ci mbirum xéraangey diine, maa daan bundxatal mbooloom gëmkati Almasi, te su dee ci wàllu njubtey sàmm yoon wi, maa mucc sikk.

<sup>7</sup> Waaye la ma jàppe woon ag ndollant, moom laa def tey ag wàññeent ndax Almasi. <sup>8</sup> Rax ci dolli, lépp sax laa far jàppe ag wàññeent, ndax ngëneel li sut lépp, te mooy xam kuy sama Sang Almasi Yeesu. Moom moo ma taxa nangoo ñàkk lépp, def lépp ni mbuubit, ngir tonoo Almasi, <sup>9</sup> ngir ma mana feeñe ci biir Almasi, fu ma yaakaarul sama njekku bopp gu ma feyoo sàmm yoonu Musaa, xanaa di yaakaar njekk gu laloo ngëm gi ma gëm Almasi. Njekk googu fa Yàlla la bawoo te gëm Almasi moo koy maye. <sup>10</sup> Sàkkuwuma lu moy xam ko, xam manoore ji ko dekkal, ak itam séddu ci ay coonoom, ba bokk ak moom deeyam, <sup>11</sup> tey yaakaara dekki, ak nu mu mana deme.

#### *Jëm kanam moo am solo*

<sup>12</sup> Du caageenu damaa àgg ci loolu lépp ba noppi, mbaa damaa mat sèkk xaat,

waaye maa ngi wéye samaw xél, di jéema jot ci neexalu rawante bi, gannaaw ba ma Almasi Yeesu jotee ci man itam. <sup>13</sup> Bokk yi, fooguma ne jot naa ci, xanaa kay lenn: damay fàtte li ci gannaaw, te def lu ma man, ngir fexee yóotuji li ci kanam, <sup>14</sup> daldi xélu dëgmal naanukaay ba, ngir jot ca neexal ba nu Yàlla di wooye fa kaw, ci Almasi Yeesu.

<sup>15</sup> Kon nag, nun ñi jota màgg ba di magi jëmm ci wàllu ngëm, nanu ko bokk gise noonu. Su ci amee lenn lu ngeen gise neneen nag, loola, Yàlla moo leen koy leeralal. <sup>16</sup> Ak lu ci mana am, yoon wii nu doxe ba fii nu tollu, nanu ko bokk topp.

<sup>17</sup> Bokk yi, royleen ma; jox nanu leen ab royukaay, xool-leen ci ñi koy jëfe, te ngeen topp ci seeni tànk. <sup>18</sup> Ndaxte ñu baree ngii ñu seeni jëf tax ñu di nooni bantub Almasi. Loolu wax naa leen ko ay yoon, ma waxati leen ko tey aki jooy. <sup>19</sup> Ñooñu sànkute lañuy mujje; seen koll lañu def seen yàlla, seen gacce lañuy damoo, te yëfi àddina donj a leen soxal. <sup>20</sup> Nun nag sunum réew a nga fa asamaan, fa nuy séentoo sunu Musalkat, Sang Yeesu Almasi. <sup>21</sup> Mooy kiy liggéeye manooreem ji mu ténke lépp cig curgaam, ba soppañi sunu yaram wu doyadi wii, nirule kook yaramam wi ànd ak teddnga.

### 4

<sup>1</sup> Kon nag yeen samay bokk, soppe yi ma namm, di leen bége, te ngeen di sama kaalag ndam, gi ma yooloo ci sama liggéey, ngalla soppe yi, nangeen saxe noonu ci Boroom bi!

#### *Póol dénkaane na*

<sup>2</sup> Bu loolu weese, Ewodi laay tinu, di tinu Santis, ñaari jigéen ñooñu, ngir ñu fexe ba juboo, ngir Boroom bi ñu bokk. <sup>3</sup> Yaw itam sama mbokkum surga bu dëgg bi, dama lay ñaan nga jàpple leen ci, ñoom ñaar ñooño bokkoon ak man coonob xamle xibaaru jàmm bi, ñoom ak ñoom Keleman, mboolom sama bokki liggéeykat yi seeni tur binde ca téereb dund ba.

<sup>4</sup> Bégleen ci Boroom bi fu ngeen tollu, ma waxati ko, bégleen! <sup>5</sup> Na seen

lewetaay wóor ñépp, Sang bi jegesi na. <sup>6</sup> Buleen jaaxle ci dara, waaye ci mbir mu mu mana doon, deeleen dikke Yàlla seeni soxla, di ko ñaan ak a dagaan te boole ci di ko sant. <sup>7</sup> Su boobaa jàmmu Yàlla, ji wees ab takk, mooy sàmm seen xol, ak seenum xel ndax Almasi Yeesu.

<sup>8</sup> Li ci des nag bokk yi, moo di lii: mboolem lu dëgg, ak mboolem lu tedd, ak mboolem luy njub, ak mboolem lu set, ak mboolem lu jekk, ak mboolem lees di rafetlu, ndegam lu nawlu la te yelloo ngërëm, na leen loola soxal. <sup>9</sup> Li ngeen jàngé ci man te jële ko ci man, ak li ngeen dégge ci man, gise ko ci man, jëfeleen ko. Su boobaa Yàlla miy boroom jàmm mooy ànd ak yeen.

### *Póol gërëm na waa Filib*

<sup>10</sup> Maa ngi bége Boroom bi lool ci nii ngeen mujj yeesale tey, seen yitte ci man, yitte ju ngeen amoon moos naka jekk, xanaa dangeena ñàkkoona jekku seen ndimbal. <sup>11</sup> Ag ñàkk nag taxul may waxe nii, nde tàmm naa di doylu ci diggante bu ma mana tollu. <sup>12</sup> Miin naa néewle, man naa naataange. Fépp fu ma tollu, ak ci lépp, làqoo naa pexe mu ma manee jant yu ma regge, ak yu ma xiife, ci biir naataange akug ñàkk. <sup>13</sup> Lépp laa mane ci ndimbalal Ki may manal. <sup>14</sup> Teewul seen ndimbal lii di jëf ju rafet ju ngeen bokke ak man, sama njàqare.

<sup>15</sup> Yeen waa Filib, xam ngeen xéll ne ba waareb xibaaru jàmm bay door, te ma bàyyikoo diiwaanu Masedwan, amul woon menn mbooloom gëmkat mu ma séqaloon ab joqlanteb ndimbal, xanaa seen mennum mbooloo. <sup>16</sup> Ba ma nekkee Tesalonig sax, yónnee ngeen ma ay yoon, lu ma faje samay soxla. <sup>17</sup> Du caageenu ndimbal lu ma leen di sàkku, li may sàkku kay moo di yokkuteb yool bu leen ñeel. <sup>18</sup> Fii ma tollu jot naa li ma aajowoo lépp, maa ngi ci naataange; doyle naa sèkk, gannaaw ba ma nangoo ci loxol Epafrodit, seenub yóbbante, te sarax su ñu nangu la, di xeeñ xetug jàmm, te neex Yàlla mi mu ñeel. <sup>19</sup> Te sama Yàlla itam mooy sàkke ci koomam gu yéeme gi ci

Almasi Yeesu, ba fajal leen seen soxla yépp.

<sup>20</sup> Daraja ñeel na Yàlla sunu Baay, tey ak èllég ba fàww. Amiin.

### *Tàggtoo jib na*

<sup>21</sup> Nuyul-leen ma mboolem ñu sell ñi gëm Almasi Yeesu. Bokki gëmkat ñi ànd ak man, ñu ngi leen di nuyu. <sup>22</sup> Te it gëmkat ñu sell ñépp a ngi leen di nuyu, rawatina waa kër Buur Sesaar.

<sup>23</sup> Yal na yiwu Sang Yeesu Almasi ànd ak seenum xel.

## Bataaxal bi Yàlla may Póol, mu bind ko waa Kolos

<sup>1</sup> Man Póol ndawal Almasi Yeesu ci coobarey Yàlla, maa bind lii, ànd ceek mbokk mi Timote, <sup>2</sup> ñeel waa Kolos ñu sell te wóor te di bokki gëmcati Almasi. Aw yiw ak jàmm ñeel na leen, bawoo fa Yàlla sunu Baay.

### *Póol ñaanal na waa Kolos*

<sup>3</sup> Sant Yàlla sunu Baayu Sang Yeesu Almasi, lanu saxoo, saa su nu leen di ñaanal; <sup>4</sup> dégg nanu ngëm gi ngeen gëm Almasi Yeesu, ak cofeel gi ngeen sopp gëmkat ñu sell ñépp, <sup>5</sup> te li waral ngëm googu ak cofeel googu, di seen yaakaara jot ca cér ba ñu leen dencal fa asamaan. Mooy yaakaar ja ngeen dale am ba ngeen jékkee dégg kàddug dégg gu xibaaru jàmm bi. <sup>6</sup> Ni leen xibaaru jàmm bi dikkale nag, ni la dikkale àddina sépp, te mu ngi meññ, di law, na mu ko dale defe fi seen biir, ca bés ba ngeen déggee lu jëm ci yiwu Yàlla, ba ràñnee ko dégg. <sup>7</sup> Noonu ngeen ko jänge ci Epafras, sunu mbokkum surga biy sunu soppé, te di jawriñu Almasi bu wóor bi nu jàpple\*, <sup>8</sup> te moo nu xamal itam cofeel gi leen Noo gi may.

<sup>9</sup> Moo tax nun itam, ba nu déggee seen mbir ba tey, noppiwunu leena ñaanal, di sàkku ngeen feese xam-xam ci lépp luy coobarey Yàlla, te ngeen ànd ceek lu mat sèkk ci wàllu xel, ak gis-gis bu Noo gi maye. <sup>10</sup> Su ko defee ngeen di dunde dundin wu yellook Boroom bi, ngir bannexal ko ci wet gu nekk, seen meñneef it di jépp jéf ju baax, te ngeen gën di xam Yàlla. <sup>11</sup> Ngir itam ngeen manoorewoo jépp manoore, na leen ko Yàlla manloo ci kàttanam gu màgg, ba ngeen mana dékkoo lépp, xolu muñ, <sup>12</sup> te ngeen di sante Baay bi, mbég, moom mi leen yellale ab cér ca muuru ñu sell ña, ca réewum leer ga.

### *Almasi jubale na nit ak Yàlla*

<sup>13</sup> Yàlla kat moo nu wallu ba génne nu ca kilifteefu réewum lëndëm ga, toxal nu ci biir nguug Doomam ji mu sopp. <sup>14</sup> Ci moom lanu ame ag njot, te moo nu jéggal sunuy bàkkaar.

<sup>15</sup> Doom jooju moo di niruwaale Yàlla, mi kenn manula gis, mooy taaw bi, ki jiitu mépp mbindeef. <sup>16</sup> Ndax moo di ki Yàlla sàkke lépp lu nekk asamaan, ak lu nekk ci suuf, lu gisu, ak lu gisuwul, muy boroom gàngune yeek, boroom ndomboy tànk yeek, boroom nguug yeek, boroom sañ-sañ yi. Lépp ci moom lees ko sàkke, te mooy ki tax ñu sàkk lépp. <sup>17</sup> Mooy ki nekkoon naka jekk balaa daraa nekk, te lépp ci moom la sotté ba temboo. <sup>18</sup> Mooy boppu yaram, wiy mbooloom gëmkat ñi, mooy njàlbéen, mooy taaw bi jékka dekki, ndekkite lu dee toppul, ba tax muy ki jiitu ci lépp, <sup>19</sup> ndax Yàlla la soob mu dèel gépp matam ci moom. <sup>20</sup> Deretam ja tuuru ca bant ba, ca la Yàlla defe jàmm, ba sottale ci moom, pexe mi mu jubalee boppam ak lépp, muy lu nekk ci kaw suuf, ak la fa asamaan.

<sup>21</sup> Te yeen ñi masoona sore lool Yàlla, doonoon ay noonam ci wàllu xalaat, ak jéf ju bon, <sup>22</sup> tey, deewug yaram, deewug suux, gi Almasi dee, moom la leen Yàlla jubalee ak boppam, ba teewal leen fi kanamam, ngeen di ñu sell, mucc sikk, seen der set wecc. <sup>23</sup> Noonu la deme, ndegam kay fekk na leen sèsoo ngëm gu ngeen dējoo ba dēgēr, te baña nangu lenn di leen sorele ak yaakaar ji ci xibaaru jàmm, bi ngeen dégg, te ñu biral ko, ñeel mépp mbindeef. Man Póol nag, ci yégle xibaaru jàmm boobu laa di ab jawriñ.

### *Póol tiisoo na waa Kolos*

<sup>24</sup> Léegi nag maa ngi bége coono yi ma jànkoonteel ngir seen njariñ; li des ci tiisi Almasi, moom laay mottalee coono yooyu ma daje sama yaramu suux wii, ngir njariñal mbooloom gëmkat, miy yaramu Almasi. <sup>25</sup> Ci moomu mbooloo laa dib jawriñ, te Yàllaa ma sase noonu, ñeel leen, ngir ma xamle kàddug Yàlla ba mu mat sèkk. <sup>26</sup> Kàddu googu moo di

\* **1:7** 1.7 Mbaa: jawriñu Almasi bu wóor ngir yeen.

mbóot mi masoona làqu maasoo maas, waaye tey Yàllaa ko xamal ay nitam ñu sell. <sup>27</sup> Ñoom la Yàlla nammoona xamal ni mbóot mi yaatoo te yéeme, ñeel jaambur ñi dul Yawut: mbóot mi moo di Almasee ngi ci yeen ñi dul Yawut itam, loolu di seen yaakaar ci ndam lu leen ñeel.

<sup>28</sup> Almasi moomu nag lanuy xamle; na mu gëna xeloo lanuy àrtoo nit ku nekk, te ni lanuy jàngale nit ku nekk, ngir àgge nit ku nekk ba fa kanam Almasi, fekk ko mat sëkk, na mu ware ku ànd ak Almasi. <sup>29</sup> Loolu moo ma tax di góor-góorlu ci xare bii may xaree dooleem, ak manoorey jëfam, jiy liggéey ci sama jëmm jii.

## 2

<sup>1</sup> Bëgg naa nag, ngeen xam xare bu metti, bi ma leen di xareel, yeen ak waa Lawdise ak mboolem gëmkat ñi ma masula teg bët, <sup>2</sup> ngir ngeen gëna am fit, mànkoo ci biir cofeel, te géēju ci gis-gisu xol bu leer nàññ te wóor, ba mana daj dëgg, mbóotum Yàlla, miy Almasi ci boppam. <sup>3</sup> Ci moom la mboolem alal ji ci xel ak xam-xam, dëxëñe. <sup>4</sup> Loolu laa leen di wax, ngir kenn bañ leena réerale ay kàdduy naxe yu mbubboo ag dëgg. <sup>5</sup> Ndax jëmm ji kat teewul, waaye xol baa ngeek yeen, di bégee gis seen doxalin wu jekk, ak seen ngëm gu wér gu ngeen gëm Almasi.

### *Jëfeleen ni ñu bokk ak Almasi*

<sup>6</sup> Kon nag, ni ngeen nangoo Almasi Yeesu di Sang bi, àndleen ak moom, jëfe noonu. <sup>7</sup> Sampleen seeni reen ci moom, tabaxuleen ci moom, feddikuleen ci wàllu ngëm, ni ñu leen ko jàngale, ba seenub xol baawaanal kàdduy cant.

<sup>8</sup> Moytuleen ba kenn bañ leena këfe kàdduy naxi neen yu ñu jàppe xam-xam bu xelu, kàddu yu sukkandikoowul Almasi, xanaa aaday nit, ak cëslaayi àddina.

<sup>9</sup> Ndax kat ci Almasi, ci yaramu nitam la léppi Yàlla dëkke, ba mat sëkk ci moom, <sup>10</sup> ci moom ngeen mate it, te mooy kilifay mboolem boroom nguur yi, ak mboolem boroom sañ-sañ yi. <sup>11</sup> Ci moom ngeen xarafe xaraf gu loxol nit deful, ndax noonu kuy xarfal nit ki di doge as lëf ci

yaramu nit ki, ni la Almasi di doge ba mu set, buumu njaam gi leen dooley bàkkaar ténke woon. Noonu la Almasi di xarfalee. <sup>12</sup> Ni ñu leen booleek moom suul, keroog ba ñu leen sóobee cim ndox, noonu ngeen dekkeendoo ak moom, ndax yeena wóolu dooley Yàlla mi ko dekkal.

<sup>13</sup> Yeen ñi doonoon ndee fa kanam Yàlla ndax seeni moy, ak seen ñakka xaraf, ndax li ngeen dul Yawut, Yàllaa leen booleek Almasi dundalaat leen. Moo nu baal sunu moy yépp. <sup>14</sup> Kayitu bor bi nu tiiñaloon, te dogali yoon toppe nu ko, moom moo far mbind ma, yóbbu kayit ga, daajaale ko ak Almasi ca bant ba. <sup>15</sup> Moo dog sidditi boroom nguur yeek boroom sañ-sañ yi ci jaww ji, ñu doon ay jaam yu mu jàppe xare. Moo leen weer it ci kanam ñépp, diriwaale leen ca biir njaab ma topp ca ndam, la Almasi ame ca bant ba.

<sup>16</sup> Kon nag bu leen kenn sikkal ci ñam wu ngeen lekk, mbaa lu ngeen naan, mbaa màggal bés bu rafet, mbaa Terutel weer, ak bés sub Noflaay. <sup>17</sup> Loolu lépp takkndeeru yaram wuy jëmmal lu dikk-agul, moom rekk la woon. Waaye yaram wi dëgg moo di Almasi. <sup>18</sup> Buleen nangu kenn ku leen sikkal, te di kuy teg boppam jëfi toroxlu, di jaamu ay malaaka, topp seen gis-gisi peeñuy bopp. Ñu ni mel ñooy réy-réyloo xalaati neen yu ñu fente seen yég-yégi bakkan. <sup>19</sup> Ñooñu jokkuwuñu ci Almasi, miy bopp bi, te ci bopp bi la yaram wi wépp di jëfandikoo siddit yeek tenqo yi, ba suuxatu, ngir lépp mànkoo ba mana màgg, ni ko Yàlla di màggale.

<sup>20</sup> Ndegam nag yeena bokk ak Almasi dee, ba teqlikoo ak li àddina def cëslaay, ana lu tax ngeen mel ni ñu bokk ci àddina ba tey, di tegoo ay dogali yoon yu mel nii: <sup>21</sup> «Bul jël lii, bul ñam lee, bul laal la ca des.» <sup>22</sup> Te mboolem yëf yooyu dogali yoon yi jëm day jeex donj bu ñu leen jëfandikoo. Loolu ay santaane aki àllaway nit donj la. <sup>23</sup> Dëgg la, xel man naa nangu dogali yoon yu ni mel, ndax laaj na nit ki pastéefu ci diine ju mu tegool boppam, laaj na it toroxlu, ak coonoy yaram yu tukkee ci yar bu metti bu nit

kiy tegoo, waaye jariñul dara ku bégga moom bakkanam.

### 3

#### *Gëmkatub Almasi, dundin wu yees*

<sup>1</sup> Gannaaw nag yeena dekkeendoo ak Almasi, sàkkuleen la fa kaw, fa Almasi tooge ca ndijooru Yàlla. <sup>2</sup> La fa kaw, xintewooleen ko, te ngeen ba li fi suuf, <sup>3</sup> ndaxte dee ngeen, ba seenug dund ànd ak Almasi, làqe fa Yàlla. <sup>4</sup> Seenug dund dëgg Almasi la, te keroog bu Almasi feeñee, yeen itam ay ànd ak moom feeñ, ba séddu ci ndamam.

<sup>5</sup> Kon nag reyleen seen cér yi bokk fii ci kaw suuf; lu mel ni powum séy, ak jëfi sobe, ak ñàkk sago ci lu jekkadi, ak xemmemtéef yu bon, ak bégge, te loolooy bokkaale ba tey, <sup>6</sup> yooyooy wàcce sànjum Yàlla ci kaw ñi déggadi. <sup>7</sup> Yeen itam noonu ngeen daan jéfe bu jëkk, ba seenug dund bokkee fii ci kaw suuf. <sup>8</sup> Waaye léegi lii lépp baleen ko: tàng xol, ak mer mu épp, ak coxor, ak saaga, ak waxi ñàkk kersa. <sup>9</sup> Buleen di fenante, gannaaw seen jëmm ja woon démb, boole ngeen kook jëfinam ja mu àndal, summi, <sup>10</sup> ba sol seen jëmm ju yees, jiy gën di yeeslu, te di gëna niru ki leen ko sàkkal, ba kera ngeen xamee, xam-xam bu mat sëkk. <sup>11</sup> Dundin wu yees woowu amul jaambur akub Yawut, amul ku xaraf ak ku xaraful, amul ab doxandéem ak ku xayadi, amul ab jaam ak as gor, waaye Almasi mooy lépp te moo nekk ci ñépp.

<sup>12</sup> Yeenay ñi Yàlla taamu, sellal leen, sopp leen. Kon nag solooleen xolu yërmande, akug mbaax, ak woyoflu, ak jikko ju lewet, ak xolu muñ. <sup>13</sup> Muñalanteleen te di balante, ndegam kenn a am lenn lu mu sikke moroomam. Ni leen Boroom bi baale, deeleen balantee noonu. <sup>14</sup> Ci kaw loolu lépp nag, tegooleen cofeel; mooy xànc gi leen faste, ba seenug bennoo mat sëkk.

<sup>15</sup> Na jàmmu Almasi saytu seen xol. Ci jooju jàmm lañu leen woo, fekk leen ngeen di wenn yaram donj, te it saxooleen cant. <sup>16</sup> Na leen kàddug Almasi dëkke, bay baawaan, ngeen di jariñoo xel mu mat sëkk mu ngeen di jànglantee, ak

a artoonte. Woyeleen xolub cant, ñeel Yàlla, ay taalifi Sabóor, ak woyi tagg Yàlla, ak woy yu fentoo ci Noo gi. <sup>17</sup> Lu ngeen mana def, muy ci wax, di ci jëf, defleen ko ci turu Sang Yeesu, tey sant Yàlla Baay bi ci moom.

#### *Rafetoolen*

<sup>18</sup> Jigéen ñi, nangul-leen seen jëkkër, noonu mu jekke ci ku bokk ci Boroom bi.

<sup>19</sup> Góor ñi, soppelen seen jabar, te buleen leen soxore.

<sup>20</sup> Xale yi, déggal-leen seeni waajur ci lépp, nde loolu mooy li Boroom bi rafetlu.

<sup>21</sup> Yeen ñiy baay, buleen yékkati seen xolu doom, ngir baña jeexal seen xol.

<sup>22</sup> Jaam yi, nangul-leen ci lépp seen sang yi ci àddina. Buleen ko defe ngistal, mbaa ngeen di ko sàkkoo lu leen neex, waaye defeleen ko yéney xol bu dëgg, ndax ragal Boroom bi. <sup>23</sup> Lu ngeen mana def, liggéyeleen ko xol bu tàlli, ni bu ñeelul woon nit donj, xanaa Boroom bi. <sup>24</sup> Te ngeen xam ne ci loxol Boroom bi ngeen di nangoo yool bi ngeen muurloo. Sang Almasi mooy ki ngeen di jaamu. <sup>25</sup> Waaye ku def njubadi, njubadi ga mu def lay yooloo, te xejj ak seen du ci am.

### 4

<sup>1</sup> Yeen ñiy sang yi, yorleen seeni jaam, yorin wu jub te aw yoon, te ngeen xam ne yeen itam am ngeen ab Sang fa asamaan.

#### *Yeneen warugar a ngi*

<sup>2</sup> Ag ñaan nag, saxooleen ko, te ngeen teewlu ci, boole ci ag cant. <sup>3</sup> Te ngeen ñaanaale nu ci itam, ngir Yàlla ubbil nu buntu xamle kàddu gi, ngir siiwtaane mbóot mi ci Almasi, li waral ñu jéng ma.

<sup>4</sup> Ñaanleen ma man koo waxe ba mu leer naññ ni mu ma ware.

<sup>5</sup> Jëfeleen xel mu rafet seen diggante ak aji gëmadi ñi ci biti, te jot gu ngeen am, fexeleen ba jariñoo ko. <sup>6</sup> Na seen kàddu ànd ak yiw te am solo, te ngeen xam nu ngeen di tontoo ku nekk, tont li war.

#### *Póol tàggu na waa Kolos*

<sup>7</sup> Mboolem lu jëm ci man nag, Tisig dina leen ko xamal. Mbokk la, soppé la, jawriñ ju wóor la, te it sama mbokkum jaam la,

ci liggéeyu Boroom bi. <sup>8</sup> Lii sax moo tax ma yónni ko ci yeen: xamal leen lu jëm ci nun, ak itam, teewaayam bu dëfal seen xol. <sup>9</sup> Onesim lay àndal, sunu mbokk mu wóor, di sunu soppe, te mu bokk ci yeen. Ñoo leen di xamal mboolem lu fi xew.

<sup>10</sup> Aristàrk mi ma bokkal kaso bi, mu ngi leen di nuyuu, moom ak Màrk rakku Barnaba. Ci mbiru Màrk moomu ngeen jotoon ndigal, ngir bu dikkee, ngeen teral ko. <sup>11</sup> Yeesu mi ñuy wax Yustus itam, mu ngi nuyoo. Li bokk ci askanu Yawut, ñoom rekk ay liggéeyandoo ak man ngir nguurug Yàlla, te ñoo seral sama xol. <sup>12</sup> Ab nuyoo it ñeel na leen, tukkee ci jaamub Almasi Yeesu, Epafras, mi bokk ci yeen. Ku jàmbaare ci saxoo leena ñaanal, ngir seenub taxawaay sotti te mat sèkk ci jëfe mboolem luy coobarey Yàlla.

<sup>13</sup> Maa ko seedeel ne coonoy ñaan bu réy la nekke, ngir yeen ak waa Lawdise ak waa Yerapolis. <sup>14</sup> Ab nuyoo it ñeel na leen, tukkee ci sunu soppe, Luug, doktor bi, ak Demas. <sup>15</sup> Nuyul-leen nu bokk yi dëkke Lawdise, ak sunub jigéen Nimfa, ak mbooloom gëmkat, miy daje këram.

<sup>16</sup> Gannaaw bu ngeen jàngee biral, bataaxal bii ci seen biir, fexeleen it ba ñu jàng ko, biral, fa mbooloom gëmkat ma fa Lawdise, te yeen it bataaxal ba ngeen di jote Lawdise, nangeen ko jàng biral.

<sup>17</sup> Waxal-leen ma Arsipp ne ko: «Neel jàkk ci liggéey bi nga sasoo ci Boroom bi, ngir nga sottal ko.»

<sup>18</sup> Man Póol nag maa leen bind nuyoo bii ci sama loxol bopp. Fàttlikuleen ne dañu maa tëj kaso. Yal na aw yiw ànd ak yeen!

## Bataaxal bu jëkk bi Yàlla may Póol, mu bind ko waa Tesalonig

<sup>1</sup> Man la Póol, mi ànd ak Silwan ak Timote ci kàddu gii ma yékkati, ñeel mbooloom gëmkati waa Tesalonig, ñi bokk ci Yàlla Baay bi ak Sang Yeesu Almasi. Yiw ak jàmm ñeel na leen.

### *Waa Tesalonig am nañu aw yiw*

<sup>2</sup> Nu ngi sant Yàlla fu nu tollu ci yeen ñépp, te noppiwunu leena fàttliki ci sunuy ñaan, <sup>3</sup> ak di baamtu fi kanam Yàlla sunu Baay, jëf ji juddoo ci seen ngëm, ak liggéey bi sottee ci seen cofeel, ak yaakaar ji ngeen saxoo di séentu sunu Sang Yeesu Almasi.

<sup>4</sup> Yeen bokki gëmkat ñi Yàlla sopp, xam nanu ne moom moo leen taamu, <sup>5</sup> ndax sunu xibaaru jàmm, bi nu leen àgge, dikkewu leen ay wax rekk, waaye manoore la leen dikkaale, ak ndimbalal Noo gu Sell gi, ak kóolute gu mat sëkk gu ngeen am. Xam ngeen moos na nu nekke woon ca seen biir, di xintewoo seen njariñ. <sup>6</sup> Aw ngeen sunuy tànki, aw it ci tànki Sang bi, nde yeena jot ci kàddu gi, ci biir njàqare ju bare, te di ko bége ci ndimbalal Noo gu Sell gi. <sup>7</sup> Moo leen taxa doon royukaay ci mboolem gëmkati diiwaani Maseduwan ak Akayi. <sup>8</sup> Ci seen biir kay la kàddug Boroom bi jollee, te yemul ci Maseduwan ak Akayi rekk, waaye seen ngëm Yàlla fépp la siiwe, ba soxlawunu cee waxati fenn dara. <sup>9</sup> Nit ñi ci seen bopp ñoo nuy waxal fépp, na sunu ngan ak yeen deme, ak ni ngeen walbatikoo ci Yàlla, dëddu tuur yi, bay jaamu Yàlla ju dëggu jiy dund, <sup>10</sup> tey séentu Doomam Yeesu mi mu dekkal, mu dikk bàyyikoo asamaan, moom mi nu jot ci sànj miy dikk.

## 2

### *Nganug Póol neenul*

<sup>1</sup> Yeen ci seen bopp kay, bokk yi, xam ngeen ne sunu ngan ak yeen neenul. <sup>2</sup> Xam ngeen na nu jëkkoona sonne, ak na ñu nu torxale woon ca Filib, dëkk ba, bala noo dikk fa yeen. Teewul ci sunu ndimbalal Yàlla, nu ñeme leena àgge, ci biir xeex bu metti sax, xibaaru jàmm bu Yàlla bi. <sup>3</sup> Ndaxte sunub woote laloowul pexem sàanke, ak mébét mu setul, akug njublan. <sup>4</sup> Xanaa kay noonu nu Yàlla doyloo, ba dénki nu liggéeyu xibaaru jàmm bi, noonu lanuy waaree li neex Yàlla miy seet ab xol, te dunu ci wut bannexu nit ñi.

<sup>5</sup> Masunoo jaye, xam ngeen ko, ag bégge it masunoo taxa jóg, Yàlla seede na ko; <sup>6</sup> masunoo sàkku ngërëmal nit, du ci yeen, du ci ñeneen. <sup>7</sup> Manoon nanoo taafantoo li nu diy ndawi Almasi, ba diisal leen, waaye danoo leweton domm ci seen biir, mel ni jaboot juy topptoo ay doomam. <sup>8</sup> Noonu lanu nabe woon ci yeen, ba buggunu woona yem ci xamal leen donj xibaaru jàmm bu Yàlla, waaye danu leena sopp ba yéene woon leena jox sunu bakkan sax boole ci, ndax fi ngeen nu mujj tollu ci sunu xol. <sup>9</sup> Xanaa bokk yi, yeena ngi fàttliki sunu doñ-doñ ak sunu coono? Diir ba nu leen di yégal xibaaru jàmm bu Yàlla bi, guddi ak bëccëg lañu daan liggéeyaale, ngir baña diisal kenn ci yeen.

<sup>10</sup> Yeena seede, Yàlla itam seede, sellnga ak njub, ak mucc sikk ga nu doon jëfe fa seen biir, yeen ñi gëm. <sup>11</sup> Xam ngeen ne fi baay féete doomam lanu féete kenn ku nekk ci yeen. <sup>12</sup> Ñaax nanu leen, dëfal leen, dénki leen, ngir ngeen di jëfe jëfin wu yelloo ak Yàlla, mi leen woo ci nguuram ak teraangaam.

<sup>13</sup> Leneen lu nu dul noppee sante Yàlla, moo di lii: ba ngeen nangoo ci sunu làmmiñ kàddug Yàlla gi nu leen dégtal, te melul ni kàddug nit donj ngeen ko nangoo, waaye kàddug Yàlla gi mu doon ci lu wér, moom ngeen ko jële, te kàddu googu mooy liggéey ci seen biir, yeen gëmkat ñi. <sup>14</sup> Ndax kat bokk yi, yeena aw ci tànki gëmkati Almasi Yeesu ya fa mboolooy Yàlla, ya fa réewum Yuda, nde coono ya ñu daj ca Yawut ya, yeen it

seeni waa réew teg nañu leen lu ni mel. <sup>15</sup> Yawut ñi ñoo rey Sang Yeesu, na ñu reye woon yonent yi, te ñoo nu bundxatal tey. Neexuñu Yàlla, te nooni ñépp lañu. <sup>16</sup> Ñoo nuy aaye nu àgge jaambur ñi dul Yawut, kàddu gi leen di musal. Noonu lañu matale seen jóorub bàkkaar yi ñu nekke naka jekk, waaye am sànj a leen mujj dab.

### *Póol namm na waa Tesalonig*

<sup>17</sup> Nun nag bokk yi, teqale nañu nu ak yeen ab diir, waaye xol yi sorewaatoowul, xanaa jëmm yi rekk. Waaye sunu nammeel gu réy tax na noo def sunu kem kàttan, ndax yàkkamtee gise waat ak yeen. <sup>18</sup> Moo tax nu bëggoon leena seetsi, waaye Seytaane moo nu gállankoor. Te man Póol, jéem naa leena seetsi bu dul benn yoon du ñaar. <sup>19</sup> Ndax kat, ana kan mooy sunu yaakaar, di sunu mbég, te di sunu kaala gu nuy sagooji? Xanaa du yeen, kera ca sunu kanam Boroom Yeesu, bu feeñee? <sup>20</sup> Yeen déy, lanuy damoo, di leen bége.

## 3

<sup>1</sup> Ba ñu muñee ba tële nag, ca lanu nangoo des ca Aten, nun donj. <sup>2</sup> Nu daldi yónni Timote, muy sunu mbokk, di jawriñub Yàlla bu nuy liggéeyandool ci xibaaru Almasi. Su ko defee Timote dooleel leen, feddli seen ngëm, <sup>3</sup> ngir kenn baña jàq ci biir tiis yii, ndax yeen ci seen bopp xam ngeen ne loolu lanu séddoo. <sup>4</sup> Ba nu nekke ak yeen sax lanu leen jëkkoon wax ne dinanu daj ay coono, te xam ngeen ne noonu la ame. <sup>5</sup> Moo tax ba ma muñee ba tële, ma yónnee, ngir xam fu seen ngëm tollu, ndax ragal ne Fiirkat bi da leena fiir, ba sunuw ñaq neen.

<sup>6</sup> Waaye léegi bi Timote délsee, bawoo ci yeen, xibaaru jàmm la nu àgge ci seen ngëm, ak seen cofeel, ak ni ngeen nuy bégee di fàttliku saa su nekk, te namm nu lool ni nu leen namme, nun itam. <sup>7</sup> Kon nag bokk yi, ci sunu biir mitit ak njàqare, sunu xol sedd na ci yeen ndax seen ngëm. <sup>8</sup> Léegi kay nu ngi dundaat, gannaaw yeena ngi sax ci Boroom bi.

<sup>9</sup> Ndaw njukkal lu nuy dellooti Yàlla ngir yeen, ndax mboolem mbég mi nu leen di bége fi sunu kanam Yàlla! <sup>10</sup> Guddi ak bëccëg, pastéefu xol lanuy dagaane Yàlla, ngir man leena gisaat, ba mottli li yées ci seen ngëm.

<sup>11</sup> Yal na Yàlla sunu Baay ci boppam, ànd ak sunu Sang Yeesu, ngir jubal sunuw yoon ba nu agsi ci yeen. <sup>12</sup> Nii sunu cofeel ak yeen baawaane, yal na ko Boroom bi yokke ba baawaanal ag cofeel ci seen biir, ak ci seen diggante ak nit ñépp. <sup>13</sup> Yal na Boroom bi dooleele noonu seen xol, ngir kera bu sunu Sang Yeesu délsee, ànd ak ñoñam ñu sell ñépp, fekk leen sell te mucck sikk, fa kanam Yàlla sunu Baay.

## 4

### *Sellal wartéef la*

<sup>1</sup> Li ci des nag, bokk yi, moo di yeena nangoo ci sunu làmmiñ, jëfin wi ngeen wara jëfe ba neex Yàlla, te it moom ngeen nekke. Waaye danu leen di tinu, di leen ñaax, ci turu Sang Yeesu, ngir ngeen gënati koo jëfe. <sup>2</sup> Xam ngeen ndigal, yi nu leen jox ci turu Sang Yeesu. <sup>3</sup> Lii moo di coobarey Yàlla: ngeen sellal te mucck ci powum séy. <sup>4</sup> Su ko defee kenn ku nekk ci yeen mana moom yaramu boppam ci biir sellnga ak teddnga, <sup>5</sup> te ngeen ànd ak sago ci seeni xemmemtéef, baña mel ni niti xeet yi xamul Yàlla. <sup>6</sup> Ci moomu mbir, bu kenn ci yeen tooñ mbokkam, di aakimoo yelleefam, ndax waxoon nanu leen ko, ba artooti leen ne leen jëf ju ni mel, Boroom bee koy fey ña ko def. <sup>7</sup> Yàlla kat ci sellnga la nu woo, waaye du ci jëfin wu setul. <sup>8</sup> Kon nag ku jalax ndigal lii, du nit nga jalax, xanaa Yàlla, moom mi leen jox Noowam gu Sell.

<sup>9</sup> Ci wàllu mbëggeel gi war ci biiri bokk, soxlawuleen ku leen ci bind dara, ndax yeen ci seen bopp, Yàlla tàggat na leen ci soppante, <sup>10</sup> te moom ngeen nekke seen digg ak mboolem bokki diiwaanu Maseduwan gépp. Teewul nag, bokk yi, nu di leen ñaax, ngir ngeen gënate jëfe noonu. <sup>11</sup> Sàkkuleen di jëfe jëfin wu dal, te ngeen di topptoo lu seen yoon nekk, tey dunde seenu ñaq, na nu leen ko sante



woon. <sup>12</sup> Kon dingeen jekk nu ngeen di jëflantee ak ñu gëmül ña ca biti, te dungeen soxlaal kenn dara.

### *Tiislu bu ëpp warul*

<sup>13</sup> Bokk yi nag, buggunu ngeen réere mbirum way dawlu ñi, bay tiislu ni ñeneen ñi amul jenn yaakaar, di tiisloo. <sup>14</sup> Ndegam gëm nanu ne Yeesu dee na, ba dekki, noonu it lanu wara gëme ne Yàlla mooy dekkal way dawlu ñi gëmoon Yeesu, ba boole leen ak Yeesu, indaale.

<sup>15</sup> Lii nu leen di àgge, te muy kàddug Boroom bi de, moo di nun ñi fiy dese bakkan ba kera Sang biy délsi, dunu jiitu way dawlu ñi fa moom. <sup>16</sup> Sang bi ci boppam, woote bu xumb lay wàccaalee asamaan, baatu kilifag malaaka jib, ànd ak coowal liitu Yàlla. Su ko defee ña seenug dee fekk ñu gëm Almasi ñooy jékka dekki. <sup>17</sup> Gannaaw loolu nun ñi fi dese bakkan lees di kèfandoo ak ñoom, jëme ca niir ya, ngir nu dajejeek Sang bi fa jaww ja, nu daldi nekk ak moom ba fàww. <sup>18</sup> Kon nag deeleen dëfalantee yooyu kàddu.

## 5

<sup>1</sup> Waaye nag bokk yi, lu jëm ci ay àpp, ak bés ya loolu di am, soxlawuleen ku leen ci bind, <sup>2</sup> ndax yeen ci seen bopp, xam ngeen xéll ne Sang bi, ni sàccub guddi lay dikke. <sup>3</sup> Fa nit ñi naan: «Jàmm ak kaaraange dikk na,» fa la sànkute di dale ci seen kaw, ni aw mat di jekkee dal ci kaw jigéenu wérul, te kenn du ca rëcce. <sup>4</sup> Waaye yeen bokk yi, nekkuleen cig lëndëm, ba bés boobu di leen bett ni ab sàcc di bettee. <sup>5</sup> Yeen ñépp ay doomi leer ngeen, doomi bëccëg ndarakàmm; nun bokkunu dara ak guddi, mbaa ag lëndëm. <sup>6</sup> Kon nag bunu nelaw ni ñi ci des, waaye nanu teewlu, te ànd ak sunu sago. <sup>7</sup> Ndaxte ñiy nelaw, guddi lañuy nelaw; ñiy màndi it, guddi lañuy màndi. <sup>8</sup> Waaye nun ñiy waa bëccëg, nanu ànd ak sunu sago, te def ngëm ak cofeel, sunu kiiraayal dënn; yaakaaru texe di sunu mbaxanam xare. <sup>9</sup> Ndax kat Yàlla séddu nu am sànj, waaye ag mucc la nu moomale ndax sunu Sang Yeesu Almasi.

<sup>10</sup> Su nuy dund, ak su nuy dee, moom moo nu deeyal, ngir nu mana ànd ak moom, dund. <sup>11</sup> Kon nag noonu ngeen di ñaaxantee, aka yokkante, nangeen ko wéye.

### *Dénkaane yii la Póol tëje*

<sup>12</sup> Gannaaw loolu bokk yi, danu leen di ñaan, ñi fëetewoo coonob liggéey ci seen biir te jiite leen ci yoonu Boroom bi, di leen yee, nangeen leen yég. <sup>13</sup> Nangeen leen nawe seen kem kàttan te soppe leen noonu ndax seen liggéey. Gannaaw loolu, nangeen jàmmoo. <sup>14</sup> Bokk yi, danu leen di dénku; yaafus yi, femmuleen leen; ñi néewu fit, ñaaxleen leen; néew-doole yi, dimbalileen leen, te it muñal-leen ñépp. <sup>15</sup> Fexeleen ba kenn du feyantoo. Waaye lu baax, deeleen ko deflante ci seen biir, te di ko defal ñépp.

<sup>16</sup> Fu ngeen tollu bégleen, <sup>17</sup> saxooleen ñaan, <sup>18</sup> te deeleen sant, ak nu mu mana deme, ndax loolu mooy coobarey Yàlla ci yeen ñi ànd ak Almasi Yeesu.

<sup>19</sup> Buleen giimal taalub Noowug Yàlla gi, <sup>20</sup> buleen gattañlu ay kàdduy waxyu. <sup>21</sup> Waaye lu mu mana doon, settantal-leen ko, li baax, ngeen jàpp ci, <sup>22</sup> te lu bon, ak nu mu mana bindoo, dandleen ko.

<sup>23</sup> Yàlla ci boppam, moom miy Boroom jàmm, yal na leen sellal, ba ngeen mat sëkk, te seen léppi xel, ak seen léppi xol, ak seen léppi yaram sàmmu, ba mucc sikk, ba kera bés bu sunu Sang Yeesu Almasi feeñee. <sup>24</sup> Ki leen woo de ku wóor la, te moo koy def it.

### *Póol tàggtoo na ak waa Tesalonig*

<sup>25</sup> Bokk yi, nun itam, ñaanal-leen nu.

<sup>26</sup> Nuyul-leen nu bokk yépp, te foonal-leen nu leen na mu gëna selle. <sup>27</sup> Maa ngi leen di dénku nag, ngir Boroom bi, jàngleen biral bataaxal bii ngir bokk yépp.

<sup>28</sup> Yal na sunu yiwu Boroom Yeesu Almasi ànd ak yeen.

## Ñaareelu bataaxal bi Yàlla may Póol, mu bind ko waa Tesalonig

<sup>1</sup> Man la Póol, mi ànd ak Silwan ak Timote ci kàddu gii ma yékkati, ñeel mbooloom gëmkati waa Tesalonig, ñi bokk ci Yàlla sunu Baay, ak Sang Yeesu Almasi. <sup>2</sup> Aw yiw ak jàmm ñeel na leen, tukkee ci Yàlla sunu Baay, ak Sang Yeesu Almasi.

### *Cant war na ci waa Tesalonig*

<sup>3</sup> Bokk yi, manunoo ñàkka sant Yàlla ci yeen fu nu tollu, te muy lu jaadu, gannaaw seen ngëm a ngi yokku bu baaxa baax, te cofeelu ku nekk ci yeen ñépp di gënatee law, digganteem ak moroomam. <sup>4</sup> Moo tax nun, nu di leen damoo fi biir mboolooy gëmkati Yàlla yi, ndax seenug muñ, ak seen ngëm, ci biir mboolem ni ñu leen di bundxatale, ak njàqare yi ngeen di jànkoonteel.

### *Njekk feeñ na ci àtteb Yàlla*

<sup>5</sup> Loolu lépp di firndeel njekku àtteb Yàlla, bi leen di yellale nguurug Yàlla, gi tax ngeen di sonn. <sup>6</sup> Te kat njekku Yàlla dina feeñ ndax coono ba muy delloo ñi leen teg ab coono. <sup>7</sup> Dina feeñ it ndax noflaay ba mu nuy booleek yeen ñiy dékku ab coono, sédde nu ko, kera bés bu Sang Yeesu feeñee, ànd ak ay malaakaam yu lámboo manooreem, wàcce asamaan. <sup>8</sup> Ci biir sawara wuy sélsëli lay doon. Ca lay mbugal ñi xamul Yàlla, ak ñi baña déggal xibaaru jàmm bi jëm ci sunu Boroom Yeesu. <sup>9</sup> Ñooñu lees di mbugale sànkute gu sax dàkk, fu sore Boroom bi, sore tedngay manooreem, <sup>10</sup> kera bés bu délsee ba jot ci tedngaam ci biir ñoñam ñu sell ñi, ba mboolem ñi ko gëm di ko yémoo. Te yeen ci seen bopp, ci ngeen di bokk, ndax yeena gëm la nu leen seedeelon.

<sup>11</sup> Moo tax nu saxoo leena ñaanal, ngir sunu Yàlla yellale leen ab wooteem, ngir

itam mu sottale kàttanam seen mboolem mébét mu baax, ak seen jépp jëf ju laloo ngëm. <sup>12</sup> Su ko defee sunu turu Sang Yeesu mágge ci yeen, yeen it, ngeen mágge ci moom, ci sunu ndimbalal yiwu Yàlla, ak Sang Yeesu Almasi.

## 2

### *Ndëngte ju mag mooy jütu bésu Sang bi*

<sup>1</sup> Léegi nag, bokk yi, ci wàllu dellusig sunu Sang Yeesu Almasi, ak sunu dajeji fa moom, li nu leen di ñaan moo di: <sup>2</sup> bu leen lenn gaawa xañ sago ba ngeen ñàkka ànd ak seenum xel, mbaa mu di leen jaaxal; du lu ñu ne kàddug waxyu la, du genn kàddu mbaa bataaxal bu ñu nu moomale, te di leen gëmloo ne bésu Sang bi dikk na ba noppi. <sup>3</sup> Bu leen kenn naxe nenn, ndax bés ba du dikkagum, te fippu gu mag ga jëkkula dikk, ba ki jëmmal ndëngte te dëgmal alkute\*, feeñ. <sup>4</sup> Kooku mooy jànkoonteeka damu ci kaw mboolem lees di wooye yàlla, mbaa lees di jaamu, te mooy mujj toog ca kër Yàlla ga, ba far tudde boppam Yàlla.

<sup>5</sup> Xanaa fàttlikuwuleen ne waxoon naa leen ko, ba ma nekkee ak yeen? <sup>6</sup> Te xam ngeen li ko téye léegi, ba du mana feeñ lu dul ca bésam. <sup>7</sup> Kumpa la dooley ndëngte ji bàddoo te mu ngi def liggéeyam xaat, xanaa kay ki ko téye ba tey moo koy téye rekk ba keroog jëlees fi ki ko téye. <sup>8</sup> Su boobaa la ku dëng ka di feeñ, te Sang Yeesu moo koy jàllarbee ngelawal gëmmiñam, te moo koy rajaxee ca na muy feeñee bu délsee. <sup>9</sup> Peeñum ku dëng ki liggéeyu Seytaane lay àndal, te dina wone wépp xeetu manoore, aki firnde ak kéemaani feni neen, <sup>10</sup> ak mboolem xeeti naxe yu njubadi lal, ñeel ñi nara sànkun ndax ñàkka sopp dëgg gi, ngir nangu ko ba muc. <sup>11</sup> Looloo tax Yàlla yónnee leen jëf juy sàнке, ngir ñu gëm aw fen. <sup>12</sup> Su ko defee mbugal dal mboolem ñi gëmul dëgg gi, xanaa di xejjoo njubadi.

### *Taxawleen bu dëgër*

<sup>13</sup> Nun nag bokk yi, manunoo ñàkka sant Yàlla fu nu tollu, ci yeen ñi Boroom

\* 2:3 2.3 Mbaa: di doomu alkute ji.

bi sopp, ndax yeen la jékka taamu, ngir sellale leen Noo gu Sell gi, ak itam seen ngëm gi ngeen gëm dëgg gi, ngir texeel leen. <sup>14</sup> Ci loolu it la leen woo ba mu jëfandikoo xibaaru jàmm bi nu leen àgge, ngir ngeen séddu ci sunu ndamal Boroom Yeesu Almasi. <sup>15</sup> Kon nag bokk yi, taxawleen bu dëgër te ñoy ci dénkaane yi nu leen àgge ci sunu làmmiñu bopp, ak yi nu leen bind ci sunuy bataaxal.

<sup>16</sup> Sunu Sang Yeesu Almasi ci boppam, ak Yàlla sunu Baay, mi nu sopp, te may nu ciw yiwam, jàmmi xol ju sax dàkk, ak yaakaar ju wér, <sup>17</sup> yal nañu leen may jàmmi xol, te may leen dooley wéye jépp jëf ju baax, ak gépp kàddu gu rafet.

### 3

#### *Ñaanleen ci Yàlla*

<sup>1</sup> Li ci des nag bokk yi, moo di ngeen ñaanal nu, ngir kàddug Boroom bi gaawa law te am ndam na mu ko ame woon fa yeen, <sup>2</sup> ngir itam nu mucc ci nit ñu soxor ñu bon ñi, ndax du ñépp a gëm. <sup>3</sup> Waaye Boroom bi mooy ki jara wóolu, te moo leen di dooleel, musal leen ci Ku bon ki. <sup>4</sup> Am nanu it kóolute gu nu Boroom bi may, ne li nu leen sant, moom ngeen nekke, te moom ngeen di wéye. <sup>5</sup> Yal na Boroom bi wommat seen xol, jëme ci cofeelu Yàlla ak muñ gi ci Almasi.

#### *Yaafus warul*

<sup>6</sup> Ndigal li nu leen di jox ci sunu turu Boroom Yeesu Almasi, moo di ngeen dánd mépp mbokk mu nekke ag yaafus, te baña dëppoo ak dénkaane yi ngeen nangoo ci nun. <sup>7</sup> Yeen ci seen bopp, xam ngeen ne ci sunuy tànk ngeen wara awe, te du ag yaafus lanu nekke woon ci seen biir. <sup>8</sup> Lekkuñu ñamu kenn ci neen, xanaa di yëngu guddi ak bëccëg, ci coonob daan sunu doole, ngir baña diisal kenn ci yeen. <sup>9</sup> Moona du sañ-sañ bu nu ci ñàkk, xanaa bëgg leena won lu ngeen nu roye, ba ngeen aw ci sunuy tànk, <sup>10</sup> ndax ba nu nekkee ak yeen, ndigal lanu leen joxoon moo di lii: «Ku nanguwula liggéey, bumu lekk.»

<sup>11</sup> Dégg nanu nag ne ñenn a ngi ci seen biir, ñu nekke ag yaafus, duñu yëngu

ci dara, lu moy di topptoo lu seen yoon nekkul. <sup>12</sup> Ñu ni mel lanuy sant ak a déngu ngir Sang Yeesu Almasi, ngir ñu dal, tey yëngu, di dunde seen ñaqu bopp. <sup>13</sup> Yeen nag bokk yi, buleen tàyyi ci def lu baax.

<sup>14</sup> Ku ci déggul sunu kàddu yi ñu bind ci bataaxal bii nag, bàyyileen ko xel, te baña jaxasoo ak moom, ngir gacceel ko. <sup>15</sup> Bumu tax ngeen def ko ab noon, waaye yeddeen ko, ndax mbokk la.

#### *Fii la Póol tëje bataaxalam*

<sup>16</sup> Gannaaw loolu, Boroom bi moom jàmm, yal na leen mayal boppam jàmmi lépp ak fépp. Yal na Boroom bi ànd ak yeen ñépp.

<sup>17</sup> Tàggoo bii, man Póol maa ko bind ci sama loxol bopp, te nii laay binde ci bépp bataaxal. <sup>18</sup> Sunu yiwu Boroom Yeesu Almasi ñeel na leen yeen ñépp.

## **Bataaxal bu jëkk bi Yàlla may Póol, mu bind ko Timote**

<sup>1</sup> Ci man Póol, ndawal Almasi Yeesu, ci ndigalal Yàlla sunu Musalkat, ak Almasi Yeesu sunu yaakaar, ci man la bataaxal bii bawoo, <sup>2</sup> ñeel Timote, sama doomu bopp ci wàllu ngëm. Aw yiw ak yërmande ak jàmm ñeel na la, bawoo ci Yàlla Baay bi, ak sunu Sang Almasi Yeesu.

### *Njàngle mu jub day yokke*

<sup>3</sup> Na ma la ko dénke woon ba may dem diiwaanu Maseduwan rekk, nanga toog Efes googu, ngir ña fay jàngle leneen, nga aaye leen. <sup>4</sup> Ne leen ñu baña topp léebi neen, ak limi maam yu dul jeex, ndax loolu ay werante donj lay jur, te jariñul dara ci liggéeyu njotug Yàlla gi sottée ci ngëm. <sup>5</sup> Ndénkaane lii nag, li ko taxa jóg mooy luy yee ag cofeel gu bawoo ci xol bu rafet, ak xel mu dal, ak ngëm gu mucc jinigal. <sup>6</sup> Am na ñu moy woowu yoon, ba lajj jëm ci wax ju tekkiwul dara. <sup>7</sup> Ñooñu ay jànglekati yoonu Musaa lañuy xëccoo doon, te xamuñu li ñuy wax, bay xam lenn ci li ñuy dëggal.

### *Yoonu Musaa am na ñu mu taxa jóg*

<sup>8</sup> Xam nanu nag ne yoonu Musaa baax na, ndegam na mu ware lees ko jéfe. <sup>9</sup> Lii itam xam nanu ko: ñi jub taxuñu yoon wi jóg, xanaa ñi jubadi ak ñi déggadi, ak ñemekati Yàlla yi, ak bàkkaarkat yi, ak ñi wormaalul lu sell, ak ñi wormaalul Yàlla, ak bóomkati baay, ak bóomkati ndey, ak reykatu nit ñi, <sup>10</sup> ak fokati séy yi, ak góor-jigéen yi, ak jàppkati jaam yi, ak fen-kat yi, ak giñkati fen yi, ak ñiy jéfe leneen lu woroo ak njàngle mu baax, <sup>11</sup> mi dëppoo ak xibaaru jàmm bi ñu ma dénke, xibaaru Yàlla Aji Tedd ju màgg ji.

### *Nanu sante Yàlla yërmandeem*

<sup>12</sup> Damay sant sunu Boroom Almasi Yeesu mi ma dooleel, moom mi ma natt ba wóolu ma, tabb ma ci liggéey bi, <sup>13</sup> te

ma nekkoon ab tooñkatam, di ab bundx-atalkat, di ab néeg. Waaye yërmande laa dajeel, ngir ñàkka xam ga ma daan jéfe, te ñàkka gëm tax. <sup>14</sup> Sunu yiwu Boroom moo ma baawaanal, booleel ma ci ngëm gi, ak cofeel, gi gëmkatub Almasi Yeesu jagoo. <sup>15</sup> Mboolem kàddu gii may wax, lu wóor la te jara gëm: Almasi Yeesu moo dikk ci àddina, ngir musal bàkkaarkat yi, te maa ci raw! <sup>16</sup> Waaye loolu moo tax man bàkkaarkat bi ci raw, ma dajeek yërmande, ngir, ci lépp lu nu Almasi Yeesu di muñal, ma doon ci misaal, ñeel ñi ko nara gëm èllég, ba texe ba fàww.

<sup>17</sup> Yaw Buur bi sax dàkk,

doo dee, te bët manu laa gis,

yaw Yàlla miy kenn, yaa tedd, yaa màgg, tey ak èllég ba fàww. Amiin!

<sup>18</sup> Kon nag Timote doom, loolu mooy ndigal li ma la dénke, te mu dëppook kàdduy waxyu yi jotoona jib te jëm ci sa mbir. Gànaayool kàddu yooyu ngir di ci xaree xare bu baax bi, <sup>19</sup> te nga saxoo ngëm ak xel mu dal. Am na ñu tanqamlu seen ndéeyum xel ba suuxal seen ngëm. <sup>20</sup> Ci ñooñu la Imene ak Alegсандар bokk; Seytaane laa leen jébbal, yare leen ko, ngir ñu bañatee saaga Yàlla.

## 2

### *Póol sàrtal na jataayub màggal Yàlla*

<sup>1</sup> Kon nag li jiitu ci mboolem li may dénkaane mooy ngeen di dagaan, di ñaan, di tinu ak a sant, ñeel doom aadama yépp, <sup>2</sup> ñeel buur yi, ak mboolem boroom baat yi, ngir nu mana nekke jàmm akug dal, tey wéye gépp njullite, ak wépp dundin wu tedd.

<sup>3</sup> Loolu moo rafet te neex Yàlla sunu Musalkat, <sup>4</sup> bi bégg ñépp mucc te ràññee liy dëgg. <sup>5</sup> Ndax kat jenn Yàlla donj moo am, benn Defarekat donj it moo am diggante Yàlla ak nit ñi, te mooy nit ki Almasi Yeesu, <sup>6</sup> mi maye bakkanam ngir jot ñépp, te jéf jooju lañu seedelee ca ba mu jotee, la Yàlla nammoon. <sup>7</sup> Ci boobu seede lañu ma tabbe ab yéenekat, ak ndawal kàddu gi, ak itam ab sèriñ, ñeel xeet yi dul Yawut, ngir ma xamal

leen yoonu ngëm ak dëgg. Fenuma, dëgg donj laay wax.

<sup>8</sup> Kon li ma bëgg moo di góor ñi di ñaane fépp, tàllal loxo yu mucc sikk, te bañ cee boole meroo ak mbiicoo. <sup>9</sup> Naka noonu, na jigéen ñi di sol col gu yiw, gu teggine te yem. Buñu jiital di defaroo ay létt yu épp, ak gànjari wurus, aki per, ak yérey tànnéef, <sup>10</sup> waaye nañu gànjaroo jëf ju baax, ndax mooy li jekk ci jigéen ñuy seede ne ñooy ragalkati Yàlla.

<sup>11</sup> Te it bu ñuy jàngle, na jigéen ñiy noppi, te woyof toyy. <sup>12</sup> Mayuma jigéen mu jàngle mbaa mu jiite góor, waaye na noppi. <sup>13</sup> Ndax kat Aadama lañu jékka bind, Awa topp ca. <sup>14</sup> Te it du Aadama lañu nax, waaye jigéen lañu nax ba mu xëtt ndigal. <sup>15</sup> Teewul muccu jigéen a ngi ci njurum doom, ndegam saxoo na ngëm, ak cofeel, ak jëfin wu sell te yem.

### 3

#### *Lii lañu séentu ci njiitu mbooloo mi*

<sup>1</sup> Wax ju wóor a ngii: kuy sàkku sasub jiite mbooloom gëmkat ñi, liggéey bu rafet lay xëccu. <sup>2</sup> Njiit li nag fàww mu mucc sikk, di ku dencul lu wees jenn jabar, ku moom bakkanam, jiital am xelam, di ku nawlu, man gan, te mana jàngle. <sup>3</sup> Bumu di ab màndikat, mbaa bëggkatub xeex, waaye na lewet, bañu ay, te bumu di bëggkatub xalis. <sup>4</sup> Kërug boppam nag, na ko yor yorin wu rafet, te na mana yar ay doomam ba ñu nangul ko te sédd ko cér bu mat sèkk. <sup>5</sup> Ndax ku tëlee yor kërug boppam, ana nu mu mana sàmme mbooloom gëmcati Yàlla yi? <sup>6</sup> Te it bumu dib tuubeen bu bees, lu ko moy ag réy-réylu man na koo gëlëmal, ba mu tàbbi ci mbugal ni Seytaane. <sup>7</sup> Te it ñi ci biti te gëmuñu, la ñu ko seedeel nay lu rafet, ba deram du yaqu, nde kon mu tàbbi ci fiiru Seytaane.

#### *Lii lañu séentu ci taxawukatub mbooloo mi*

<sup>8</sup> Naka noonu ab taxawukatub mbooloo mi, na di ku tedd, bumu di boroom ñaari kàddu. Bumu di ku sàngara jiital, mbaa kuy sàkku am-am bu lewul. <sup>9</sup> Na ñoy

ci mbóotum ngëm mii feeñ te ànd ceek xel mu dal. <sup>10</sup> Dees koy jékka seetlu nag, ba muy ku mucc sikk, ñu door koo dugal ci liggéeyu taxawukatub mbooloo mi. <sup>11</sup> Naka noonu, na jigéen ñiy taxawu mbooloo mi\* di ñu tedd, buñu diy soskat, nañu moom seen bakkan, te jara wóolu ci lépp.

<sup>12</sup> Ab taxawukatu mbooloo mi bumu denc lu wees jenn jabar te na yor ay doomam, ak kërám, yorin wu rafet. <sup>13</sup> Ñi ci wàccoo ak seen sasub taxawukat nag, seenub liggéey lañu jënde taxawaay bu rafet, te ñooy mana waxe fit, seen ngëm gi ñu gëm Almasi Yeesu.

#### *Mbóotum yoonu ngëm wi màgg na*

<sup>14</sup> Lii laa lay bind, te di la yaakaara seetsi ci fan yu gàtt, <sup>15</sup> ngir su ma ye-exee itam, nga xam nooy doxale ci kër Yàlla, ci biir mbooloom Yàlla jiy dund. Mbooloom gëmkat mi mooy kenug dëgg gi, di cëslaayam. <sup>16</sup> Deesul nàttable moos màggaayu mbóot mii feeñe ci sunu yoonu ngëm:

Kii moo feeñe ci yaramu suux,  
Noowug Yàlla dëggal ko,  
malaaka ya niir ko;  
moom lañu waaree ci xeet yi,  
gëmees na ko ci kaw suuf it,  
te yéegees na ko fa leer ga.

### 4

#### *Alluway ceytaane yaq na am xel*

<sup>1</sup> Noowug Yàlla wax na ci lu leer ne ci mujug jamono, dina am ñu wacc yoonu ngëm wi, di topp ay xalaat yuy fàbbee ak ay àlluway ceytaane, <sup>2</sup> yu leen ay jinigalkat, ay fenkat yu dërkiis ab xol, di naxe. <sup>3</sup> Ñooñu ñooy aaye ab séy, di digle ñàkka lekk yenn ñam yu Yàlla sàkk, ngir gëmkat ñi xam liy dëgg, man cee jariñu te di ko sante Yàlla. <sup>4</sup> Ndaxte li Yàlla sàkk lépp a baax, du lenn lees ciy aayal, ndegam kàddug cant lees ko jariñoo. <sup>5</sup> Lu mu mana doon, kàddug Yàlla akug ñaan moo koy sellal.

#### *Lii la liggéeyu jawriñu Almasi laaj*

\* 3:11 3.11 jigéen ñiy taxawu mbooloo mi: manees na ko tekki nii it: seeni soxna.

<sup>6</sup> Soo dee xamal loolu bokki gëmkat ñi, yaa di jawriñu Almasi Yeesu ju baax ju xontoo kàdduy yoonu ngëm wi, ak àlluwa ju rafet ji nga topp naka jekk. <sup>7</sup> Waaye nettali yu yittewoo lu dul Yàlla, ak léebi jeeg ju màggat ji, bañ ko, te nga tàggatu ci ag njullite. <sup>8</sup> Ndax kat tàggat aw yaram, as njariñ a ngi ci, waaye ag njullite, ci lépp lay jariñe, te moo moom digeb àddinay tey ak èllég. <sup>9</sup> Kàddu gii may wax, lu wóor la te jara gëm ba mu mat sèkk. <sup>10</sup> Loolu kat moo nu tax di sonn aka góor-góorlu, ndax Yàlla jiy dund lanu yaakaar, moom miy musal ñépp, rawatina gëmkat ñi.

<sup>11</sup> Digleel loolu, te di ko jàngle. <sup>12</sup> Bu la kenn xeebe sa at yu néew, waaye nanga doon royukaayu gëmkat ñi ci wax ak jëfin, ak cofeel, ak ngëm, ak dundin wu set. <sup>13</sup> Ba keroog may dikk, saxool di jàng-biral Mbind mi, di ñaaxe aka jàngle. <sup>14</sup> Bul sàggane may gi ci yaw, te di lu ñu la baaxee ag kàddug waxyu gu ànd ak tegeb loxo, ba la mag ñi defaloon. <sup>15</sup> Loolu ngay def sam xel, mbir yooyu ngay pastéefoo ba sag yokkute bir ñépp. <sup>16</sup> Sàmmaal sa bopp nag, sàmm sa àlluwa, te saxoo ko; soo ko defee, dinga mucc, musal ñi lay déglu.

## 5

### *Ay ndigal ñeel na jëtun ñi*

<sup>1</sup> Bul gëdd mag, waaye ñaax ko ni bu doon sa baay. Ndaw it, def ko ni sa rakk. <sup>2</sup> Jigéen ju mag, def ko ni sa yaay; jigéen ju ndaw, nga def ko ni sab jigéen, te seen diggante set wecc.

<sup>3</sup> Teralal jëtun ñiy jëtun dëgg. <sup>4</sup> Waaye su dee ab jëtun bu ami doom mbaa ay sët, ñooñoo wara jékka jéema jëfe ag ragal Yàlla ci seen biir kër, ba delloo njukkal seen waajur, ndax loolu la Yàlla rafetlu.

<sup>5</sup> Waaye kiy ab jëtun dëgg te di ku wéet, mooy ki yaakaar Yàlla, te saxoo ay dagaan aki ñaan, guddi ak bëccég. <sup>6</sup> Ku ci nekkewul lu moy bannexu bakkanam nag, ndee luy dox la. <sup>7</sup> Loolu ngay dénkaane, ndax ñépp mucc sikk. <sup>8</sup> Ku

fàggulul ay bokkam nag, rawatina waa këram, yoonu ngëm wi la gantal, te moo yées ku gëmul.

<sup>9</sup> Limeefu jëtun ñi ndimbal ñeel, deesu ci bind ku am lu yées juróom benn fukki at, te na di ku masul am lu wees jenn jëkkër donj, <sup>10</sup> te di ku ñu seedeel jëf ju rafet; lu mel ni yar ay gone, ak man gan, ak teral gëmkat ñu sell ñi,\* ak dimbali ñi tollu diggante, ak di jàppoo jépp jëf ju baax.

<sup>11</sup> Jëtun ñiy ndaw nag, génne leen ci, ndax bu leen bëgg-bëggu bakkan sorelee ak Almasi, dinañu namma séyaat, <sup>12</sup> te su boobaa mbugal war ci ñoom, ndax worma ja ñu fecci. <sup>13</sup> Te itam ca lañuy tàmmame am ug jot, di taxawaalu kër ak kër. Te duñu yem ci am ag jot rekk, waaye dañuy làmmiñu, di dugg lu seen yoon nekkul, tey wax lu leen warul. <sup>14</sup> Moo tax ma bëgg, jëtun ñiy ndaw séyaat, ami doom, yor seen kër, ba noon bi du am lu mu yàqe sunub der. <sup>15</sup> Ndax kat am na ci xaata yenn jëtun ñu lajj, ba topp Seytaane.

<sup>16</sup> Gëmkat bu jigéen bu ci am mbokkum jëtun nag, na ko dimbali ba yenni mbooloo mi. Su ko defee mbooloo mi mana dimbali ñiy jëtun dëgg.

### *Ay ndigal ñeel na mag ñi*

<sup>17</sup> Mag ñiy jiite mbooloo mi bu baax nag, nañu leen yellale ag njukkal ñaari yoon, rawatina ñi boole coonoy waare ak njàngle. <sup>18</sup> Ndax kat Mbind mi nee: «Bul takkal ngise nag wuy bojj am pepp†,» nee it: «Ku ñaq, jariñu‡.» <sup>19</sup> Bul déglu tuuma ju ñu waxal magum mbooloo mi, lu moy ci kaw kàdduy ñaari seede mbaa ñett. <sup>20</sup> Waaye ñi ciy bàkkaar, tiiñal leen, ndax ñi ci des ragala bàkkaar.

<sup>21</sup> Maa ngi lay àrtu nag fi kanam Yàlla, ak Almasi Yeesu, ak malaaka yi ñu tabb, ngir nga sàmm loolu te baña jeng, mbaa nga jëfe lenn loo defe xejj ak seen. <sup>22</sup> Bul di gaawa teg loxo kenn, ngir fal ko njiit. Bul séddu ci bàkkaari jaambur, te yaw ci sa bopp, sàmmool dundin wu set.

<sup>23</sup> Te itam bul di naanati ndox mu ñuul donj, waaye deel jëfandikoo tuuti biiñ,

\* **5:10** 5.10 Mbaa: raxas tànkì gëmkat ñu sell ñi, † **5:18** 5.18 Seetal ci *Baamtug Yoon wi* 25.4. ‡ **5:18** 5.18 Seetal ci *Luug* 10.7.

ndax mu baax ci sa biir, ak yeneen xeeti wéradi yu la farala dal.

<sup>24</sup> Ñenn a ngi ñu seeni bàkkaar fés, te àtteesagu leen, waaye ñenn a ngi ñu seeni bàkkaar làqu ba tax yoon dabagu leen. <sup>25</sup> Naka noonu, jëf ju baax day fés, te lu ci fésul it, du wéye làqu.

## 6

### *Ay ndigal ñeel na jaam yi*

<sup>1</sup> Mboolem ñi ci buumu njaam, nañu jàpp ne seeni sang yelloo nañu gépp wegeel, ngir kàddu gu teddadi baña tege ci turu Yàlla, ak sunu àlluwa. <sup>2</sup> Jaam yi seeni sang di bokki gëmkat, buñu yab seeni sang, ndax li ñuy bokki gëmkat, waaye na tax ñu gënati leena jaamu, ndax seen sang yooyu di jariño seenu ñaq, ay gëmkat lañu, ay sopp lañu.

### *Ragal Yàlla mooy alal*

Loolu nga wara jàngle, di ko dénkaane. <sup>3</sup> Waaye ku ciy jàngle leneen, te toppul kàddu yu wér yi tukkee ci sunu Sang Yeesu Almasi, toppul àlluwa ji dëppoo akug njullite, <sup>4</sup> kooku, ab xoggilukat la te xamul dara. Woppi werante ak xuloo ci baati kese, moo ko dal, te loolu mooy jur ñeetaane, ak ñaayoo, aki saaga, ak ñaaw njort, <sup>5</sup> ak jote yu dul jeex yu boole ay nit ñu seenum xel mu yàqu xañ àlluway dëgg. Nit ñooño mbubboo ag njullite, te def ko wutukaayu alal.

<sup>6</sup> Teewul njullite gu ànd ak doylu, di alal ju réy. <sup>7</sup> Ndax kat indaalewunu dara ci àddina, te manunoo yóbbaaale dara. <sup>8</sup> Kon su nu amee lu nu lekk, ak lu nu sol, nanu ko doylu. <sup>9</sup> Waaye ñi sàkkoo barele, ñooy tàbbi ci nattub bakkan, aki fiir, ak lu bare ciy xemmemtéef yu tekkiwul dara, xemmemtéef yuy lore, tey suuxal seeni boroom ci yàqule ak sànkute. <sup>10</sup> Ndax sopp xalis kat mooy reenu mboolem xeeti loraange. Am na ñuy ñaf-ñafi, di ko wut, far lajj yoonu ngëm, ba teg seen bopp tiis yu bare.

### *Xareb ngëm jib na*

<sup>11</sup> Yaw miy nitu Yàlla nag, dawal loolu, te topp njub ak njullite ak ngëm ak cofeel ak muñ akug teey. <sup>12</sup> Joñanteel joñante

bu baax bi, ngir yoonu ngëm wi, te nga ñoy bu baax ci texeg fàww gi ñu la woo, ba tax nga dëggal sa ngëm nu rafet noonu nga ko dëggale woon fa kanam seede yu bare.

<sup>13</sup> Dama lay ñaax fi kanam Yàlla mi may bakkan lépp luy dund, ak fi kanam Almasi Yeesu, boroom seede su rafet sa fa kanam Poñsë Pilaat, <sup>14</sup> sàmmal santaane bi, te bañ koo gàkkal, bañ koo sikkal, ba kera sunu Sang Yeesu Almasi di feeñ,

<sup>15</sup> te ki koy feeñal bu àppam jotee, di ku Tedd ki wéetoo nguuram,

Buuru buur yi, Sangu sang yi.

<sup>16</sup> Moom donj moo dul dee,

moo màkkaanoo leer gu kenn jotewul, te mooy ki nit masula gis te tële koo gis. Teddnga ak kàttan ñeel na ko ba fàww.

Amiin.

<sup>17</sup> Ñi barele alalu àddinay tey nag, dénk leen ñu baña réy te baña yaakaar alal ju wóoradi, te ñu yaakaar Yàlla mi nuy xéewale lépp, ngir nu di ko bége. <sup>18</sup> Ñi barele na ñuy def lu baax, nañu barele jëf ju baax, di joxee xol bu tàlli, yéwén te nangoo dimbalee. <sup>19</sup> Noonu lañuy dajalee alal, muy cëslaay lu dëgër ngir èllëg, ndax ñu jot ci dund giy dëgg.

<sup>20</sup> Ngalla waay Timote, sàmmal li ñu la dénk! Moytul kebetuy àddinay kese, ak werantey diinatkat yu tuddoo boroom xam-xam. <sup>21</sup> Boobu xam-xam la ñenn ñi topp ba lajj yoonu ngëm.

Aw yiw ñeel na leen.

## Ñaareelu bataaxal bi Yàlla may Póol, mu bind ko Timote

<sup>1</sup> Ci man Póol, ndawal Yeesu Almasi ci coobarey Yàlla, ngir xamle digeb dund gi ci Almasi Yeesu, ci man la bataaxal bii bawoo, <sup>2</sup> ñeel Timote, sama doom, sama soppe. Aw yiw ak yërmande ak jàmm ñeel na la, bawoo ci Yàlla Baay bi, ak sunu Sang Almasi Yeesu.

### *Feddil sa ngëm*

<sup>3</sup> Maa ngi lay fàttliki ci samay ñaan guddeek bëccëg, fu ma tollu te di ci sant Yàlla, mi may jaamoo xel mu dal, ni ko samay maam daan defe. <sup>4</sup> Yàkkamti naa lool gisati la, ba sama xol sedd guyy, nde maa ngi fàttliki sa rongooñi keroog ya. <sup>5</sup> Maa ngi fàttliki ngëm gu dëgggu gi ci yaw, te jëkkoona nekk ci sa maam ju jigéen Lowis, ak sa yaay Ënis, te mu wóor ma ne moom nga saxoo itam. <sup>6</sup> Moo tax li ma lay fàttli moo di nga xamb taalub mayu Yàlla, ga nga jote ca ba ma la tegee samay loxo. <sup>7</sup> Ndax kat Noo gi nu Yàlla jox taxu noo ragal, xanaa kay da noo may doole, ak cofeel, ak jëfin wu laloo am xel.

<sup>8</sup> Bul kersawoo di seedeel sunu Sang, mbaa nga di ma kersawoo, man mi ñu tēj ngir moom, waaye jëlal sa wàll ci coonob xibaaru jàmm bi, ni la ko manoorey Yàlla manloo.

<sup>9</sup> Moo nu musal,  
woo nu woote bu sell te sunuy jëf taxul,  
waaye coobarey boppam a tax,  
ak yiwam wi ñu nu may  
ci Almasi Yeesu, balaa ay jamonoy  
jamonoy di sosu.

<sup>10</sup> Woowu yiw, la ko fésal moo di dikkug sunu Musalkat Almasi Yeesu, mi neenal ndee, te niital nu yoonu texe,  
ak ndee gu fomm ba fàww,  
ni ko xibaaru jàmm bi xamlee.

<sup>11</sup> Te ci xibaaru jàmm boobu lañu ma tabb, ba ma di yéenekatu xibaar bi, di ndawam, di jànglekatom. <sup>12</sup> Looloo tax

may daj yii coono. Waaye rusuma ci, ndax xam naa ki ma gëm, te wóor na ma ne moo mana sàmm li ma ko dénk ba keroog bés ba.

<sup>13</sup> Royal ci kàddu yu wér yi nga dëgge ci man, te nga ànd ceek ngëm, ak cofeel gi Almasi Yeesu di maye, <sup>14</sup> te lu baax li ñu la dénk, nanga ko sàmm ci ndimbalal Noo gu Sell gi ci nun ñi ko gëm.

<sup>15</sup> Xam nga ne waa diiwaanu Asi gépp a ma won gannaaw, te Fusel ak Ermosen ci lañu bokk. <sup>16</sup> Yal na Yàlla baaxe nag waa kër Onesifor, yërmandeem, ndax dëfal na ma lu bare, te kersawoowul li ñu ma tēj kaso, <sup>17</sup> waaye ba mu dikkee Room, da maa seeta seet, ba gis ma. <sup>18</sup> Yal na ko Boroom bi may mu daj bésuub keroog booba, yërmandey Boroom bi. Taxawu na ma lool ca Efes, te xam nga ko xéll.

## 2

### *Beyal saw sas*

<sup>1</sup> Kon nag yaw doom, doolewool yiw, wi Almasi Yeesu di maye. <sup>2</sup> Li nga dëgge ci man te seede yu bare teewe ko, nanga ko jottli nit ñu wóor ñu ko mana xamal ñeneen. <sup>3</sup> Jëlal sa wàll ci coono bi takk-derub Almasi Yeesu bu wóor di jànkoondeel. <sup>4</sup> Ab takk-der bu bégga neex ka ko solal kat, du xintewoo mbiri nit ña soluwul. <sup>5</sup> Kuy jonante it, deesu ko kaala te jonantewul ci yoon. <sup>6</sup> Te it beykat bi yor coonob liggéey bi, moo wara jékka séddu ca meñneef ma. <sup>7</sup> Defal sam xel ci li ma la wax. Boroom bi moo lay leeralal lépp.

### *Yeesu mooy boroom kóllère*

<sup>8</sup> Bàyyil xel ci Yeesu Almasi mi ñu dekkal te mu soqikoo ci Daawuda, ni ko sama xibaaru jàmm indee. <sup>9</sup> Xibaaru jàmm boobu moo tax may daj coono yu metti ni defkatu mbon, ba ci jéng yii ñu ma jéng. Waaye kàddug Yàlla moom, deesu ko jéng. <sup>10</sup> Looloo ma tax di muñ lépp, ngir ñi ñu taamu, ndax ñoom it ñu dajeeek mucc gi ci Almasi Yeesu, boole ci teraanga ju sax.

<sup>11</sup> Kàddu gu wóor a ngii:  
Su nu deeyandoo ak Almasi,  
nooy dundandoo ak moom itam;



<sup>12</sup> su nu muñee,  
nooy bokk nguuru.

<sup>13</sup> Su nu ko gântalee,  
moom it dinanu gântal;  
su nu ko ñàkkee kóllère,  
mu saxoo kóllèreem,  
ndax manula gântal boppam.

### *Surga day sàkku ngèrèmu njaatigeem*

<sup>14</sup> Loolu, dee ko fàttlee, te ngay dénkane fi kanam Yàlla, ñu bañ di xuloo ci ay baat, ndax amul njariñ, ñi koy dégg donḡ lay sànk. <sup>15</sup> Defal sa kem-kàttan ba boo teewee fa kanam Yàlla, di ku mu gèrèm, ab liggéeykat bu mucc gâce, di xamle kàddug dégg gi ni mu ware. <sup>16</sup> Waaye ay kebetuy àddinay kese, moytu ko, ndax ngëmadi gu ko yées rekk lay yóbbee, <sup>17</sup> te kàdduy ñooñu day law ni ngal. Ci ñooñu la Imene ak Filet bokk. <sup>18</sup> Ñoo lajj yoonu dégg, ba naan ñiy dekki, dekki nañu ba noppi, te seen wax jooju, am na ñenn ñu muy yàq seen ngëm. <sup>19</sup> Teewul cès-laay lu dègèr, li Yàlla tabax, mu ngi ne kekk, te màndarga ma ca nekk, kàddu yii la: «Boroom bi xam na ay ñoñam\*,» ak: «Kuy tudd turu Sang bi, na daw njubadi.»

<sup>20</sup> Kër gu mag nag, du ndabi wurus ak xalis rekk a fa am, waaye yoy bant a nga fa, ak yoy ban; yii di ndabi teraanga, yee di ndabi njoogaan. <sup>21</sup> Ku setal sa bopp nag ba mucc ci yu bon yooyii, yaay doon ndabal teraanga lu sell te amal sangam njariñ ngir jépp jèf ju baax.

<sup>22</sup> Xemmemtéefi ndaw nag, daw ko, te nga topp njub, ak ngëm ak cofeel, ak jàmm, ànd ceek ñiy tudde Boroom bi xol bu set wecc. <sup>23</sup> Waaye werante yu xeluwul te du xam-xam, moyu ko, te xam ne ay ñaayoo lay jur. <sup>24</sup> Te jaamub Boroom bi warul di ñaayoo, waaye day lewet ci ñépp, mana jàngle tey muñ. <sup>25</sup> Jaamub Boroom bi ndànk la war di jubbanti diinatkat yi, nde jombul Yàlla may leen ñu tuub, ba xam liy dégg. <sup>26</sup> Su ko defee seenum xel dellusi, ba ñu récc

firug Seytaane, mi leen jàpp, di leen defloo coobareem.

## 3

### *Mujug jamono dina tar*

<sup>1</sup> Lii, nanga ko xam: mujug jamono, jant yu tar dina dikk. <sup>2</sup> Nit ñi, seen bopp donḡ lañuy bëgg, ay bëggkati xalis lañuy doon, ay damukat, nit ñu réy, di ay saagakati Yàlla, ñu déggadil waajur, ñu santadi te selladi. <sup>3</sup> Duñu am ab xol, duñu meddi, ay soskat lañuy doon, ñu ñàkk sago, ñu néeg te bañ lu baax; <sup>4</sup> ay workat lañuy doon, ñu teeyadi, ñu danḡiiral te di ñu bëgg seen bannexu bopp, ba mu gènal leen Yàlla. <sup>5</sup> Ag njullite lañuy mbubboo tey xalab leer ga leen ko wara manloo. Ñooñu, dèddu leen.

<sup>6</sup> Ñenn ci ñooñu ñooy yoxoosuy dugg ci biir kër yi, di fàbbi jigéen ñu ñàkk bopp, ñi seeni bàkkaar man, te seen xemmemtéef yu bare jiital leen. <sup>7</sup> Gèstu ay àlluwa la jigéen ñooñuy wéye, waaye duñu mana xam liy dégg muk. <sup>8</sup> Noonee Sànnes ak Sàmbres\* doon jànkoonteek Musaa, ni la góor ñooñu di jànkoontee ak dégg gi; ñooy nit ñu seenum xel yàqu, te ñu doyadi ci wàllu ngëm. <sup>9</sup> Waaye duñu soreeti, ndax seenug ndof dina bir ñépp, na ñaar ñooña mujje woon.

### *Póol dénkooti na Timote*

<sup>10</sup> Yaw nag seetlu nga bu baax sama àlluwa, ak sama dundin, ak sama mébét, ak sama ngëm, ak samag muñ, ak sama cofeel, ak samag ñeme coono, <sup>11</sup> ak itam bundxatal yaak njàqare ya ma dikke woon fa dèkk yooyu di Àncos ak Ikoñum ak Listar†. Céy na ñu ma bundxatale, waaye Sang bee ma musal ci lépp! <sup>12</sup> Te kat képp ku namma nekke ag njullite ci yoonu Almasi Yeesu, dees na la bundxatal. <sup>13</sup> Waaye nit ñu bon ñi, ak maa-man yi dañuy gën di bon rekk, di naxe tey nax seen bopp.

<sup>14</sup> Yaw nag saxal ci li nga jàng, muy lu la wóor, nde xam nga ña nga tanqe.

\* **2:19** 2.19 Seetal ci *Màndin mi* 16.5.

\* **3:8** 3.8 Sànnes ak Sàmbres ay tur la yu Yawut yi baaxoo tudde luxuskati

Misra, ya doon fexee jonante ak Yonent Yàlla Musaa. † **3:11** 3.11 Ikoñum ak Listar ay dèkk ci diiwaanu Galasi lañu woon, fa Póol tàmbalee yenam, di waare xibaaru Almasi.

<sup>15</sup> Bi ngay lu tuut nga dale xam Mbind mu sell mi, te moo la mana may xel mu la jème ci mucç gi gëm Almasi Yeesu di maye. <sup>16</sup> Mboolem Mbind mu sell mi la Yàlla wal ag Noowam, ba mu am njariñal jàngal nit ñi, femmu leen, jubbanti leen, yar leen cig njub. <sup>17</sup> Su ko defee nitu Yàlla ki mat sèkk te matley jumtukaay ngir jépp jéf ju baax.

#### 4

<sup>1</sup> Kon nag dama lay dénk fi kanam Yàlla ak Almasi Yeesu, miy àtteji ñiy dund ak ñi dee, di la dénk ci darajay bésam ba muy feeñ, ak ci darajay nguuram, <sup>2</sup> waareel kàddug Yàlla te taxaw ci temm, su neexee ak su naqaree; di yedde, di femmoo, di ñaaxe, tey saxoo muñ ci sam njàngle. <sup>3</sup> Ndax kat ay jamonoo ngi ñew, nit ñi dootuñu xajoo àlluwa ju wér, waaye seeni bëgg-bëggi bopp lañuy topp, bay fortaatoo fu nekk, ay sèriñ yu leen di wax lu leen neex. <sup>4</sup> Dëgg lañuy tanqamlu, lajj, wuti léebi neen. <sup>5</sup> Waaye yaw, àndal ak sa sago, ak diggante boo mana tollu, te ñeme coono. Jàppal ci liggéeyub jottli xibaaru jàmm bi, beyal sa waar ba mu mat sèkk.

<sup>6</sup> Man nag, daanaka saraxu tuuru bu sottiku laa ba noppi; sama waxtuw dem dëgmal na. <sup>7</sup> Xare bu baax bi, xare naa ko, rawante bi, sotal naa ko, ngëm gi ma am, sàmm naa ko. <sup>8</sup> Léegi nag kaalag njekk a may xaar, te Boroom bi, Àttekat bu jub bi moo ma koy yool, keroog ca bés ba, te du man rekk la koy yool, waaye itam képp ku koy séentu te yàkkamti bés ba muy feeñ.

#### *Fii la Póol tëje ay dénkaaneem*

<sup>9</sup> Defal sa kem-kàttan, ba fekksi ma nu mu gëna gaawe. <sup>10</sup> Ndax kat Demas, àddinay tey la sopp ba tax mu wacc ma, dem Tesalonig, te Kereseñsë dem na diiwaanu Galasi, Tit dem diiwaanu Dalmasi. <sup>11</sup> Luug rekk a des fi man. Indaaleel Màrk, ndax amal na ma njariñ ci liggéey bi. <sup>12</sup> Tisig nag laa yebal Efes. <sup>13</sup> Mbubb ma ma waccoon ak Karpus ca

Torowas, booy ñew, indaaleel ma ko, ak itam téere yi, rawatina téerey der yi.

<sup>14</sup> Alegsàndar tëgg bi def na ma lu bon lu réy, waaye Boroom bee koy fey jéfam.

<sup>15</sup> Yaw itam, moytu ko bu baax, ndax moo gàntal lool sunu àlluwa.

<sup>16</sup> Keroog ba ma jèkke di layool sama bopp, kenn taxawuwma, ñépp a ma daw, yàlla bu leen seen jéf topp. <sup>17</sup> Waaye Boroom bee ma dimbali, dooleel ma, ngir kàddu gi siwe ci man, ba xeeti jaambur yépp dégg ko, te Boroom bee ma musal ci pàddum gaynde. <sup>18</sup> Boroom bee may wallu ci jépp jéf ju bon, te moo may aar ba tàbbal ma fa nguuram ga fa asamaan. Daraja ñeel na ko, tey ak èllég ba fàww. Amiin.

#### *Póol tàggu na ñoom Timote*

<sup>19</sup> Nuyul ma Piriska\* ak Akilas ak waa kër Onesifor. <sup>20</sup> Eràst moom, Korent la des, waaye Torofim, Mile laa ko bàyyi, ndax daa woppoon. <sup>21</sup> Gaawala ñew, balaa seddub lolli di jam. Ab nuyoo ñeel na la, tukkee ci Èbulus ak Pudeñsë ak Linus ak Kélójaa ak bokk yépp. <sup>22</sup> Yal na Boroom bi wéttali sam xel. Aw yiw ñeel na leen.

\* **4:19** 4.19 Piriska mooy Pirsil ba tey. Seetal ci *Jéf ya* 8.2.

## Bataaxal bi Yàlla may Póol, mu bind ko Tit

<sup>1</sup> Ci Man Póol la bataaxal bii bawoo, man jaamub Yàlla, biy ndawal Yeesu Almasi, mu yebal ma, ngir ma dugal ñi Yàlla tànn ci yoonu ngëm ak xam-xamu dëgg, giy taxa jullite. <sup>2</sup> Ngëm googu, ak xam-xam boobu, ñu ngi sukkandiku ci yaakaar, ji nu am ci texe ba fàww, te googu texe, Yàlla mi dul fen, moo ko dige ba àddina sosoogul. <sup>3</sup> Waaye tey bi mu jotee, Yàlla sunu Musalkat moo feeñal kàddoom ci biir waare bi mu ma dénkk man, te moo ma digal ma xamle ko. <sup>4</sup> Bataaxal bi ñeel na Tit, sama doomu yoon ci kaw ngëm gi nu bokk. Aw yiw ak jàmm ñeel na la, bawoo fa Yàlla Baay bi, ak Almasi Yeesu sunu Musalkat.

### *Póol sas na Tit ca réewum Keret*

<sup>5</sup> Li tax ma bàyyi la gannaaw ca réewum Keret mooy nga mottli la desoon ca liggéey ba, te nga tabb ay mag ñu jiite mbooloo mi ci dëkk bu nekk, na ma la ko sante woon, man ci sama bopp. <sup>6</sup> Ndegam nit a nga ca seen biir ñoom, di ku mucc sikk, te dencul lu wees jenn jabar, te ay doomam di ay gëmkat ñu ñu tuddul ci afal seen bakkan akug déggadi, nanga tabb ku mel noonu. <sup>7</sup> Ndax kat, njiit li war na di ku mucc sikk, gannaaw ab saytukatu kër Yàlla la. Bumu di ku bew, mbaa ku gaawa mer, mbaa ab màndikat, mbaa bëggkatub xeex, mbaa wutkatub am-am bu lewul. <sup>8</sup> Waaye war na di ku man gan, ku xejjoo lu baax, jiital am xelam, jub, sell te moom boppam. <sup>9</sup> Na jàpp bu dëgër ci kàddu gu wóor gi, ni ñu ko ko jàngale, ngir mu man di ñaaxe jooju àlluwa ju wér, tey tiiñal weddikat yi.

### *Gëmkati Keret jar nañoo femmu*

<sup>10</sup> Ndax kat bare na ñu të, rawatina ci tuubéen ñi bokk ci askanu yawut, ay waxkati neen lañu, te ñooy yàq xeli nit ñi. <sup>11</sup> Li war moo di tëj seen gëmmin, ndax kəri lëmm lañuy tase àlluwa ju ñu

amul sañ-sañam, ngir di ko sàkkoo am-am bu lewul. <sup>12</sup> Ma wax ko waru jenn waay, ab waa Keret buy seen yonentu bopp. Mu ne: «Waa Keret, ay fen-kati neen, soxor niy rabi àll, fuqle, yaafus.» <sup>13</sup> Loolu mu leen seedeel mooy dëgg, te moo tax nga war leena femmoo kàddu yu dëgër, ngir seen ngëm tegu ci àlluwa ji wér, <sup>14</sup> te baña topp léebi neen yu Yawut yi, ak sanaaney nit ñi dëddu liy dëgg. <sup>15</sup> Nit ñi set nag, seen lépp ay set, waaye ñi boole sobewu ak gëmadi, seen dara setul, seen xalaat ak seenum xel, ñooy bokk sobewu. <sup>16</sup> Xam Yàlla lañuy woote, te seeni jëf weddi Yàlla; nit ñu jara jéppi, ñu déggadi lañu, te tëlee def lenn lu baax.

## 2

### *Alluwa ju wér lii lay xamle*

<sup>1</sup> Yaw nag waareel li dëppook àlluwa ji wér, <sup>2</sup> te mooy na mag ñi moom seen bakkan, di ñu tedd, jiital seenum xel, te pastéefu ci wàllu ngëm, ak cofeel, akug muñ.

<sup>3</sup> Naka noonu, jigéen ñu mag ñi itam, nañu jëfe ni mu jekke ci ay nit ñu sell; buñu yàq der, bu leen sàngara jiital, te nañuy jàngle lu baax, <sup>4</sup> ngir tàggat jeeg ju ndaw ji ci sopp seen jëkkër, sopp seeni doom, <sup>5</sup> di ñu jiital seenum xel, set jikko, di liggéey ca seeni kër, baax, nangul seen jëkkër, ba kenn du baatal kàddug Yàlla.

<sup>6</sup> Naka noonu, xale yu góor yi itam, ñaaxleen ci jiital seenum xel. <sup>7</sup> Te nanga doon, yaw ci sa bopp ab royukaay, ci lépp ndax sa jëf ju baax, te nga boole ko ak àlluwa ju dëgggu te tedd, <sup>8</sup> ak kàddu gu wér gu kenn dul mana weddi, ngir rusloo ab noon bu amul lenn lu bon lu mu nu baatale.

<sup>9</sup> Jaam yi, nañu nangul seeni sang ci lépp, di sàkku seen bannexu sang, te ñu bañ di tontoonte ak moom, <sup>10</sup> mbaa di randal. Waaye nañu firndeel ne ñoo yelloo kóolote gu mat sëkk, su ko defee dinañu sagal ci lépp, àlluwa ji ñu jàngle, te muy ju Yàlla, sunu Musalkat.

<sup>11</sup> Ndax yiwu Yàlla kat feeñ na, te looloo indil ñépp ag mucc. <sup>12</sup> Yiw woowu moo

nu digal nu dëddu ñeme Yàlla, ak xemmemtéefi àddina, te jiital sunum xel, di jëfe njub, te nekke ag njullite ci àddinay tey jii. <sup>13</sup> Loolu lees nu digal, li feek nu ngi séentu yaakaaru mbég ma, keroog bésu peeñum sunu mággaayu Yàlla, miy Yeesu Almasi, Musalkat bi. <sup>14</sup> Moo maye bakkanam ngir nun, moo nu jot, ba nu mucc ci gépp njubadi, moo nu def askan wu mu setalal boppam, séddoo nu, nuy askan wu farlu ci jéf ju baax.

<sup>15</sup> Googu kàddu ngay waaree, di dénkoo ak di femmoo, te boole ci fulla ju mat sékk. Bu la kenn yab.

### 3

#### *Ku gëm jëfe lu baax*

<sup>1</sup> Fàttli leen ne leen ñu nangul kilifay nguur gi, ak boroom sañ-sañ yi, di dégg ndigal, tey fàggu ngir jépp jéf ju baax.

<sup>2</sup> Buñu yàq der te buñu bëggu ay, waaye nañu di bëggkati jàmm, te nañuy jëfe lewetaay gu mat sékk, seen digg ak ñépp.

<sup>3</sup> Ndax nun itam kat, ñu ñàkk xel lanu woon te déggadi, ñu réer, ténku ci lu doon ay xemmemtéef, ak bannexi bakkan, tey wéye def lu bon, ak ñeetaane, ñu jara bañ te bañante ci sunu biir. <sup>4</sup> Waaye ba Yàlla sunu Musalkat feeñalee mbaaxam ak mbéggeelam ci doom aadama, <sup>5</sup> ca la nu musal, te du jenn jëfu njekk ju nu def, ba tax mu musal nu, waaye ci yërmandeem la nu musale, sang nu cangaay lu nu taxa judduwaat, boole ci yeesale nu Noo gu Sell, <sup>6</sup> gi mu nu awale ci Yeesu Almasi sunu Musalkat, ba baawaanal ko ci sunu kaw. <sup>7</sup> Noonu la nu Yàlla joxe àtteb ñu jub ci kaw aw yiwam, ba nu mujj séddu ci texe gu sax dàkk, ni nu ko séentoo.

<sup>8</sup> Gooгу kàddu wóor na te damaa bëgg nga sàmmoo dëggal loolu, ngir gëmkati Yàlla yi saxoo def jéf ju baax. Loolu moo baax te am njariñ ci nit ñi. <sup>9</sup> Waaye ay werante, ak limi maam, aki xuloo, aki jaayante xam-xam ci yoonu Musaa, moytu ko, ndax loolu amul njariñ, amul solo. <sup>10</sup> Ab féewalekat nag, yedd ko benn yoon ba ñaareel bi yoon, doora daggook

moom, <sup>11</sup> te xam ne ku ni mel daa làggi ci bàkkaaram, te moo daan boppam.

#### *Póol tàggu na Tit*

<sup>12</sup> Gannaaw bu ma la yónnee Artemas mbaa Tisig, defal loo man ba feeksi ma Nikopolis, ndax fa laa fas yéenee lollikooji. <sup>13</sup> Naka Senas xamkatub yoon bi, ak Apolos, fexe leena waajalal, ba duñu ñàkk lenn lu ñu soxla ci seen yoon. <sup>14</sup> Na sunuy ñoñ tàggatu ci jéf ju baax ju ñu saxoo ba faj soxla yu taxaw, ngir ñu baña ñàkk njariñ.

<sup>15</sup> Mboolem ñi ma nekkal ñu ngi lay nuy. Nuyul nu sunuy soppe ci yoonu ngëm wi nu bokk. Aw yiw ñeel na leen, yeen ñépp.

## Bataaxal bi Yàlla may Póol, mu bind ko Filemon

<sup>1</sup> Ci man Póol, mi ñu tëj kaso ngir Almasi Yeesu, ci man ak itam ci Timote miy mbokkum gëmkat la bataaxal bii bawoo, ñeel Filemon, sunu soppe bi bokk ak nun liggéey bi. <sup>2</sup> Mu ñeel itam sunub jigéen Afya, ak Arsipp sunu mbokkum xarekat, ak mbooloom gëmkat miy dajee sa kër. <sup>3</sup> Yeen la aw yiw ak jàmm ñeel, bawoo fa Yàlla sunu Baay, ak Sang Yeesu Almasi.

### *Póol a ngi sant ci biir ñaan*

<sup>4</sup> Sant sama Yàlla laa dëkke saa yu ma la fàttlikoo ci samay ñaan, <sup>5</sup> ndax dégg naa sa gëm Sang Yeesu, ak sa cofeel ci mboolem ñu sell ñi. <sup>6</sup> Damay ñaan nag sa ngëm, gi nu bokk amal la njariñal ràññee mboolem ngëneel, yi nu am ci Almasi. <sup>7</sup> Mbokk mi, mbégte mu réy, ak xel mu dal laa am ci sa cofeel, ndax ni nga serale xolu aji sell ñi.

### *Póol tinul na Onesim*

<sup>8</sup> Lii nag sañoon naa la koo digal ci turu Almasi, ndax mooy li la war, <sup>9</sup> waaye tinu la ci ngir cofeel, mooy li ma taamu, man Póol mu màggat mii, boole ci léegi ténku biir kaso ndax Almasi Yeesu. <sup>10</sup> Damay tinul Onesim, sama doomu tuubeen ji ma tuubloo ba mu mel ni maa ko jur ci diir bi ma nekke fii ci kaso bi. <sup>11</sup> Amalu la woon njariñ\* démb, waaye tey yaak man la amal njariñ.

<sup>12</sup> Maa ngi koy yebal ngir mu dellu fi yaw, te di kenn ci man. <sup>13</sup> Dama koo bëggoona téye fi sama wet, ngir mu taxawal la, di ma dimbali, li feek maa ngi ci kaso bi ngir xibaaru jàmm bi. <sup>14</sup> Waaye buggumaa def dara loo àndul, ngir mu baña doon ndimbalu ñàkk peXe, xanaa loo defe xol bu tàlli. <sup>15</sup> Jombul itam dees koo tàggale ak yaw ab diir, ngir nga jootaat ci moom ba fàww, <sup>16</sup> ba dootu doon sab jaam, waaye day wees ab jaam, di mbokk,

di soppe, ma sopp ko lool, te nga war ma koo gëna sopp, ngir jëmmu boppam, ak Sang bi ngeen bokk.

<sup>17</sup> Ndegam nag sa waay nga ma def, dalal ko ni su doon man. <sup>18</sup> Su la tooñee, mbaa mu ameel la lenn, topp ma ko. <sup>19</sup> Man Póol maay bind fii ci sama loxol bopp: maay fey loolu, duma ci tuddaale bor bi nga ma ameel, te muy sa njotug bakkanu bopp! <sup>20</sup> Kon nag mbokk mi, may ma googu njekk ngir Sang bi, te nga seral sama xol ndax Almasi. <sup>21</sup> Wóor na ma ci diggante bii may bind bataaxal bi, ne dinga ma déggal, te xam naa ne dinga def sax lu wees li may wax.

<sup>22</sup> Te itam nanga ma waajalaale ab dal, ndax yaakaar naa ne dees na ma délloosi fi yeen, ndax seen ñaan yu nangu.

<sup>23</sup> Epafra, mbokk mi ñu ma tëjandool ndax Almasi Yeesu, mu ngi lay nuyu, <sup>24</sup> mook Màrk ak Aristàrk ak Demas ak Luug, bokk yi may liggéeyandool.

<sup>25</sup> Yal na yiwu Sang Yeesu Almasi ànd ak seenum xel.

\* **1:11** 11 njariñ: ci làkku geger turu Onesim mooy tekki «Ku am njariñ.»

## Bataaxal bi jëm ca Yawut ya

### *Yàlla moo feeñ ci Doom ji*

<sup>1</sup> Bu yàgg la Yàlla waxoon ay yooni yoon ak maam ya, ci waxin yu bare, yonent yi jottli. <sup>2</sup> Ci fan yu mujj yii, Doom ji la waxe ak nun, ki mu jagleel lépp, ki mu sàkke àddina wërngal képp. <sup>3</sup> Kooku mooy lèrxat leeru Yàlla, te mooy ki jëmmal nekkug Yàlla. Moo téyee lépp kàddoom gu manoorewu. Gannaaw ba mu setalee bàkkaar yi nag, fa ndijooru Aji Màgg ji la toog, fa kawte ya, <sup>4</sup> te ni turam wi mu séddoo gëna màgge turi malaaka yi, ni lees ko yékkatee, ba mu gëna màgg malaaka yi.

### *Doom jee gëna màgg malaaka yi*

<sup>5</sup> Ndax kat, ana kan ci malaaka yi la Yàlla masa wax ne ko:  
«Yaa di sama Doom,  
bés niki tey, maa la jur\*,»  
ba neeti:  
«Maay doon Baay ci moom,  
muy Doom ci man†»?  
<sup>6</sup> Buy indiwaat taaw bi ci àddina nag, ci la naan:  
«Na ko malaakay Yàlla yépp sujjóotal.»  
<sup>7</sup> Malaaka yi la Yàlla wax ci ñoom ne:  
«Moo def ay malaakaam diy ngelaw,  
jawriñam ñooñu la def tàkk-tàkki sawara‡.»  
<sup>8</sup> Waaye Doom ji la Yàlla ne:  
«Yàlla, sab jal tey la ak èllég ba fàww,  
te sa yetu nguur njub lay doon.  
<sup>9</sup> Yaa safoo njubte, seexlu njubadi,  
moo tax yaw Yàlla, sa Yàlla diwe la diwu mbég,  
nga tiim say moroom§.»  
<sup>10</sup> Mu neeti:  
«Yaw Sang bi, yaa sos àddina ca njàlbéen,  
te asamaan yi, sa liggéeyu loxoo.  
<sup>11</sup> Yooyu day réer,  
waaye yaw yaay des,

lépp ay ràpp ni ay yére.

<sup>12</sup> Yaa leen di taxañ ni malaan,  
ni yére di soppikoo it lañuy soppikoo,  
te yaw, ngay kenn ki,  
say at du jeex\*.»

<sup>13</sup> Ana kan ci malaaka yi la mas ne:  
«Toogeel sama ndijoor,

ba ma def say noon, say dëggastal†?»

<sup>14</sup> Xanaa malaaka yépp duñu ay ngelaw yu ñu sas ab liggéey, yebal leen ngir ñu taxawu ñi wara jagoo ag mucc?

## 2

### *Nanu teewlu pexem mucc mi Yàlla waajal*

<sup>1</sup> Moo tax nu wara yokka teewlu kàddu yi nu dégg, bala noo lajj, taañaanaal.

<sup>2</sup> Gannaaw nag kàddug Yàlla ga jibe woon ci gémmiñu malaaka yi, mujj na di lu wér péññ, te képp ku ko masa xëtt, mbaa mu déggadi ko, jot nga añ bi war ci sag tooñ, <sup>3</sup> ana kon nun ci sunu bopp, nan lanuy rëcce mbugal, su nu sàgganee pexem mucc mu réy mii Sang bi jëkkoon biral, te ñi ko dégg dëggalal nu ko? <sup>4</sup> Te Yàlla moo doon dëggale seedey ñooñu, ay firnde aki kéemaan, ak wépp xeeti kawtéef, ak ay mayi Noo gu Sell gi, may yi mu séddalee ni mu ko soobe.

### *Yeesu moo rammu jaam ñi*

<sup>5</sup> Ndax kat du ci kilifteefu malaaka yi la Yàlla teg àddinay èllég ji nuy wax, <sup>6</sup> waaye am na ku yékkatee bérab, kàddug seede, ne:

«Ana luy nit ba nga di ko faale?

Ana luy doom aadama, ba nga di ko yég?

<sup>7</sup> Yaa ko def mu gëna suufe as lëf malaaka yi,

yaa ko kaalaa teraanga ak daraja,

<sup>8</sup> yaa teg lépp ci kilifteefam, ci suufu ndëggul tàmka\*.»

Ba Yàlla tegee lépp ci kilifteefam it, bàyyiwul dara lu mu tegul ci kilifteefam. Dëgg la, fii nu tollu gisagunu ne lépp a ngi ci kilifteefam, <sup>9</sup> Yeesu mi ñu def mu gëna suufe as lëf malaaka yi, moom lanu

\* **1:5** 1.5 Seetal ci *Sabóor* 2.7. † **1:5** 1.5 Seetal ci 2.*Samiyel* 7.14. ‡ **1:7** 1.7 Seetal ci *Sabóor* 104.4. § **1:9**

1.8-9 Seetal ci *Sabóor* 45.7-8. \* **1:12** 1.12 Seetal ci *Sabóor* 102.26-28. † **1:13** 1.13 Seetal ci *Sabóor* 110.1.

\* **2:8** 2.8 Seetal ci *Sabóor* 8.5-7.

gis deeyam gi mu dee tax mu jagoo kaalag teraanga. Noonu la deeyale ñépp ci kaw yiwu Yàlla.

<sup>10</sup> Ndax kat Yàlla mi lépp lu sàkke ñeel, te lépp sàkkoo ci moom, moo nammoona wommat gone yu bare ba sédd leen daraja. Moo tax muy lu jaadu, mu sottale matug Yeesu ay coono, ndax Yeesu moo xàllal gone yooyu yoonu mucc. <sup>11</sup> Yeesu miy sellal nit ñi, moom ak ñi muy sellal, ñoo bokk lenqe, te moo tax Yeesu rusu leena wooye ay bokk. <sup>12</sup> Mu ne:

«Maay biralal saw tur samay bokk, maa lay kañe fi digg mbooloo mi†.»

<sup>13</sup> Mu waxaat ne:

«Man maay am kóolote ci moom.»

Dellooti ne:

«Maa ngi nii, maak gone yi ma Yàlla jox†.»

<sup>14</sup> Gone yooyu nag, bindeefi suux ak deret lañu bokk doon, ñoom ñépp. Moo tax Yeesu itam dikk bokk ak ñoom woowu nekk, ngir mana dee ba def deewug boppam pexe mi mu neenale ka yoroon dooley ndee, te mooy Seytaane. <sup>15</sup> Noonu la goreele mboolem ñi seenug ragala dee ténkoon cig njaam, seen giiru dund. <sup>16</sup> Ndax kat du ay malaaka la Yeesu xettlisi, waaye askanu Ibraayma la xettlisi. <sup>17</sup> Moo tax fàww mu niru woon ay bokkam ci bépp fànn. Su ko defee mu mana doon seen sarxalkat bu mag bu am yërmande te wóor fa kanam Yàlla, ngir mana defal askan wi seen njotlaayal bakkan. <sup>18</sup> Coonoy nattu bi mu dékku nag tax na mu mana wallu ñi ci nattu.

### 3

#### *Doom jee gëna màgg Musaa*

<sup>1</sup> Kon nag bokk yu sell yi, yeen ñi bokk ci wooteb asamaan, ràññeeleen Yeesu, ndaw li, sarxalkat bu mag bi ci yoon wi nu gëm. <sup>2</sup> Ku wóor la woon, ñeel ki ko tabb, noonee Musaa wóore woon ci mboolem waa kër Yàlla. <sup>3</sup> Waaye ni ab tabaxkat éppe tednga kër ga muy tabax, ni la Yeesu yelloo daraja ju épp ja Musaa

yelloo woon. <sup>4</sup> Ndax kër gu nekk am na ku ko tabax, waaye ki tabax lépp mooy Yàlla. <sup>5</sup> Musaa déy «jawriñ bu wóor la woon ci biir mboolem waa kër Yàlla\*,» di seedeel Yàlla kàddu ya ñu fa wara wax. <sup>6</sup> Almasi nag mooy Doom ju wóor ji jiite kër Yàlla, te nun nooy kërám, ndegam kay nu ngi wéye aw fit, ak yaakaar ji nuy puukarewoo.

#### *Almasi moo jara déggal*

<sup>7</sup> Kon nag ni ko Noo gu Sell gi waxe:

«Bésuub tey jii bu ngeen déggee baatam,

<sup>8</sup> buleen të na woon ca fippu ga,

keroog bésuub seetlu Yàlla, ba ca màndin ma†,»

<sup>9</sup> «fa ma seeni maam doon seetloo, di ma diñat,

te gisoon samay jaloore,

<sup>10</sup> diiru ñeent fukki at.

Moo tax ma mere googu maas, ba ne:

«Seen xol a dëkke lajj,

te nanguwuñoo xam samay yoon.»

<sup>11</sup> Moo ma taxa giñe sama biir mer, ne:

«Duñu tàbbi mukk ci samag noflaay†.»»

<sup>12</sup> Bokk yi, wattuleen bala kenn ci yeena am xolub gëmadi bu bon bu koy xiir ci dëddu Yàlla jiy dund. <sup>13</sup> Waaye bés bu nekk deeleen soññante li feek muy bésuub tey agum, bala bàkkaar a nax kenn ci yeen, ba mu mujj dërkiis. <sup>14</sup> Ndax kat noo di àndandooy Almasi, ndegam wéye nanoo ñoy bu dëgër ci sunu kóolote ga nu doore, ba kera muj ga. <sup>15</sup> Waxees na ne:

«Bésuub tey jii bu ngeen déggee baatam,

buleen të na woon ca fippu ga§.»

<sup>16</sup> Ana ñan ñoo déggoon te teewuleena fippu? Xanaa du mboolem ña génne woon Misra ci njiital Musaa? <sup>17</sup> Ana ñan la Yàlla mere lu mat ñeent fukki at? Xanaa du mboolem ña bàkkaaroon te seeni néew mujj tédde ca màndin ma?

<sup>18</sup> Te it ana ñan ñu moy ña déggadi woon, la Yàlla giñaloon ne duñu tàbbi mukk

† 2:12 2.12 Seetal ci *Sabóor* 22.23. ‡ 2:13 2.13 Seetal ci *Esayi* 8.17-18. \* 3:5 3.5 Seetal ci *Màndin ma* 12.7.

† 3:8 3.8 Seetal ci *Mucc ga* 17.1-7. ‡ 3:11 3.7-11 Seetal ci *Sabóor* 95.7-11. noflaay: Yàlla moo digoon bànni Israyil ag noflaay, te mooy jàmm ju mu leen digoon ne dinañu ko dëkke biir Kanaan, gannaaw bu ñu fa duggee. Waaye ñi déggal Yeesu Almasi, ñoo jagoo teeweji jataayu Yàlla, te loolu mooy doon seen noflaay. § 3:15 3.15 Seetal ci *Sabóor* 95.7-8.

ci noflaayam? <sup>19</sup> Kon nu gis ne seen gëmadee tax manuñu ca woota tàbbi.

#### 4

<sup>1</sup> Kon nag gannaaw digeb tàbbi ci noflaayal Yàlla mu ngi sax ba tey, nanu ragal kenn ci yeen taxawe melokaanu ku ca jotul. <sup>2</sup> Ndax kat ni ñu nu àggee xibaaru jàmm bi, noonu lees leen ko àggee, waaye kàddu ga ñu dégg moo leen jariñul dara, ndax ña ko dégg ñoo ko déggewul ngëm. <sup>3</sup> Nun ñi gëm donj nooy tàbbi ci noflaayam, noonu mu ko waxe, ne:

«Maa giñe sama biir mer, ne:

«Duñu tàbbi mukc ci samag noflaay\*.» » Ndaxam ca cosaanu àddina la liggéeyi Yàlla sotti woon ba noppi, <sup>4</sup> nde waxees na lu jëm ci bésub juróom ñaareel ba, ne: «Bésub juróom ñaareel ba nag, Yàlla dal-

lu  
ci mboolem liggéeyam†.»

<sup>5</sup> Te moo wax itam ci lii nu jékka jukki, ne:

«Duñu tàbbi mukc ci samag noflaay.»

<sup>6</sup> Kon nag am na ñenn ñu ci wara tàbbi ba tey. Te ñi ñu jékkoonaa àggee xibaaru jàmm bi, tàbbiwuñu ca ndax seenug déggadi. <sup>7</sup> Looloo waral Yàlla jappaat beneen bés bees di tàbbee ci noflaayam, bés bu mu tudde «tey jii», te mooy ba mu waxee lu yàgga yàgg, gannaaw gi, ci gémmiñug Daawuda, kàddu gii ñu jota jukki:

«Bésub tey jii bu ngeen déggee baatub Yàlla,  
buleen tè.»

<sup>8</sup> Su leen Yosuwe tàbbaloon ca googa noflaay, kon gannaaw gi Yàlla du wax lu jëm ci beneen bés. <sup>9</sup> Kon des na ba tey noflaayu bésub juróom ñaareel bu ñu waajalal ñoñu Yàlla. <sup>10</sup> Ndax ku tàbbi ci noflaayu Yàlla kat, na Yàlla dal-loo woon ca ay liggéeyam, ni ngay dal-loo ci say liggéey. <sup>11</sup> Nanu def sunu kem-kàttan boog, ngir tàbbi ci googu noflaay, bala kenn a daanu ndax déggadi gu mel ni gu maam ya. <sup>12</sup> Kàddug Yàlla de luy dund la,

ànd ak doole, te moo gëna ñaw saamaru ñaari ñawka bu gëna ñaw. Day sar ba fa xel akug noo digaloo, ba fa yax ak yuq dajee, te man naa càambar ay xalaat ak mébéti xol. <sup>13</sup> Te it amul mbindeef mu làqu fi kanam Yàlla. Lépp a ne dunj, ne fàñj, muy gis, te moom lanuy waxal bés-pénc.

#### *Yeesu mooy sarxalkat bu mag bi*

<sup>14</sup> Gannaaw nag am nanu kilifag sarxalkat bu mag bu jàll ba biir asamaan, te mooy Yeesu Doomu Yàlla, nanu ñoy ci yoonu ngëm wi. <sup>15</sup> Ndax sarxalkat bu mag bi nu am du ku tëlee yég sunuy néew doole, waaye ni nun rekk lees ko nattoo wet gu nekk, te taxul mu bàkkaar. <sup>16</sup> Kon nag nanu ñemee dikk ba ca ngàngunem yiw ma, ndax nu jot yërmande te dajee aw yiw wu nu wallu fu nu ko soxlaa.

#### 5

<sup>1</sup> Bépp sarxalkat bu mag nag, ci biir nit ñi lees ko jële, fal ko ngir nit ñi, ci seen diggante ak Yàlla, muy jébbale ay jooxe ak saraxi jur ngir seeni bàkkaar.

<sup>2</sup> Dina mana sédd cér ñi xamul ak ñi moy ndax moom ci boppam ci ag néew doole la ténku. <sup>3</sup> Néew doole googu moo tax mu wara joxeel boppam, tey joxeel askan wi ay sarax, ngir seeni bàkkaar.

<sup>4</sup> Te it kenn jagoowul boppam teraangay carxal, ndare du Yàllaa ko ci woo, na woon ca Aaróona. <sup>5</sup> Noonu la woon itam ci Almasi. Tegoowul boppam darajay doon sarxalkat bu mag, waaye Yàllaa ko ne:

«Yaa di sama Doom,  
bés niki tey maa la jur\*.»

<sup>6</sup> Noonu it la waxe feneen, ne:

«Yaa dib sarxalkat ba fàww,  
topp dayob Melkisedeg†.»

<sup>7</sup> Fan yi Almasi dee dund dundu nitu suuxu neen, ay ñaan aki dagaan yu ànd aki yuux aki jooy la daan yékkati jème fa ki ko mana wallu ba du dee, te nangule na it, ndax na mu ragale woon Yàlla.

<sup>8</sup> Li muy Doom lépp, terewu koo tàggatu

\* **4:3** 4.3 Seetal ci *Sabóor* 95.11. † **4:4** 4.4 Seetal ci *Njàlbéen ga* 2.2. \* **5:5** 5.5 Seetal ci *Sabóor* 2.7. † **5:6** 5.6 Melkisedeg: buurub Salem la woon, di sarxalkat bu Yàlla faloon ci jamonoy Ibraayma, maanaam ñeenti témeéri at laata Aaróonaa doon ab sarxalkat. Seetal ci *Sabóor* 110.4.



ci dégg ndigal, ndax coono yi mu daj. <sup>9</sup> Noonu lees matale Almasi sëkk, ba mu doon cosaanu mucg gu dul jeex, ñeel mboolem ñi ko déggal. <sup>10</sup> Ci biir loolu Yàlla tudde ko sarxalkat bu mag, bi topp dayob Melkisedeg.

### *Nanu jëm kanam*

<sup>11</sup> Moomu mbir nag bare na lu nu ciy wax, waaye tekki ko mooy jafe ndax seen déggin wu diib. <sup>12</sup> Ndax kat nэгèni tey waroon na leena fekk diy sèriñ, waaye aajowoo ngeen ba tey ku leen jàngal ndoortel waxi Yàlla. Nàmp um soow ngeen mujj aajowoo, ndax ñàkka àttan ñam wu dегèr. <sup>13</sup> Képp ku tollu ci nàmp um soow nag, tuut-tànk nga, doo mana xam dara ci kàddug njub. <sup>14</sup> Mag ñi kay ñoo yelloo ñam wu dегèr, ñoo tàmma jéfoo seenum xel, ngir ràññee lu baax ak lu bon.

## 6

<sup>1</sup> Kon nag nanu jóge ci ndoortel àlluway Almasi, daldi jàll jëm ci njàngum mag, te ñu baña lalaat kenu gi. Kenu gi mooy gëm Yàlla gannaaw tubeel gi war ci jéf ju bon ji nit kiy def te muy jéfi ndee. <sup>2</sup> Kenu gi mooy itam njànglem xeeti njàpp, ak ñaan gu ànd ak tegeb loxo, ak mbirum ndeendekki, ak àtteb bés-pénc biy sax dàkk. <sup>3</sup> Nanu jëm kanam, te moom lanuy def, ndegam soob na Yàlla.

<sup>4</sup> Ñi ñu xasa leeral nag, te ñu jota mos may gu bawoo asamaan, séddu ci Noo gu Sell gi, deesu leen mana defal dara. <sup>5</sup> Ñoo mos kàddug Yàlla gu baax gi, ak manoore yu jamono jiy ñëw, <sup>6</sup> ba noppi xàcci. Kon deesu leen waññi, ngir ñuy tuubati, nde ñoo daajaatal seen bopp Doomu Yàlla ji ci bant, teg ko toroxte ju ne fàññ.

<sup>7</sup> Ndax suuf kat, su naanee ndox mu mu tawlu ay yoon, ba meññal ñi ñu koy beyal, gàncax gu leen jariñ, soosa suuf dina séddu ci barke bu bawoo fa Yàlla. <sup>8</sup> Waaye su meññee ay dég aki xaaxaam, amul njariñ, alkuteem lees di tudd léegi, te lakk lay mujje.

<sup>9</sup> Waaye nag soppe yi, nii nuy waxe ak yeen teewul nu di leen yaakaare ci lu

wér, li leen gëna amal njariñ, te bokk ci seenug mucg. <sup>10</sup> Yàlla ñàkkul worma bay fàtte seen liggéey, ak cofeel gi ngeen sopp turam, te firndeele ko ni ngeen taxawoo ñu sell ñi, démb ak tey. <sup>11</sup> Waaye danoo bëgg kenn ku nekk ci yeen wéye genn farlute googu ngeen nekke, ba kera muj ga, ngir seen yaakaar sotti ba mat sëkk. <sup>12</sup> Su ko defee dungeen yàccaaral, waaye dangeen di roy ci ñi gëm te muñ, ba jagoo digey Yàlla.

### *Digeb Yàlla du jaas*

<sup>13</sup> Mu mel ni Ibraayma, ba Yàlla di digoo ak moom, Yàlla manul wona giñe ku sut Yàlla. Moo tax mu giñal ko ci boppam, <sup>14</sup> ne ko: «Maa lay barkeela barkeel déy, ful laa ful\*.» <sup>15</sup> Noonu la Ibraayma muñe, ba kera mu jote ca dige ba.

<sup>16</sup> Nit nag, ku ko sut lay giñe, ngir dogal kàddu, ba teesal wépp werante. <sup>17</sup> Yàllaa bëggoona firndeel nu mu gëna leere ñeel ñi moom dige bi, ne ab dogalam du tebbiku muk. Moo tax mu dogale ngiñ ab digeem. <sup>18</sup> Ñaar yooyu du tebbiku ndax Yàlla du fen, te nun ñi daw làqusi ci moom, ci lanu ame ndégèrlaay lu réy lu nu ñoye ci yaakaar ji ci sunu kanam. <sup>19</sup> Yaakaar jooju lanu am, mu mel ni diigalub gaal, diigal bu dегèr te wóor, ñeel sunu xol, te yaakaar jooju mooy bëtt rido ba, ba jàll ca néegu biir bu Yàlla ba. <sup>20</sup> Fa la ndaw li nu jiitu dugg ngir nun, te kookooy Yeesu mi ñu fal sarxalkat bu mag ba fàww, mu topp dayob Melkisedeg.

## 7

### *Melkisedeg moo sut Ibraayma ak Aaróona*

<sup>1</sup> Melkisedeg moomu doon buurub Salem te nekkoon sarxalkatub Yàlla Aji Kawe ji, ba Ibraayma délsee jóge xareem baak buur ya mu дума, kooku moo ko gatandu woon, ñaanal ko\*. <sup>2</sup> Moom la Ibraayma jox fukkeelu cérub mboolem cèxètoo ma. Ni ñu jékka dégge aw turam Melkisedeg, ci tekki, mooy «buur bu jub». Bu loolu weesee itam moom mooy buurub Salem, muy «buuru jàmm».

\* **6:14** 6.14 Seetal ci *Njàlbéen ga* 22.17. \* **7:1** 7.1 Seetal ci *Njàlbéen ga* 14.17-20.

<sup>3</sup> Melkisedeg nag du baay, du ndey, du askanu maam wees ko xamal. Du ndoor-tel gane àddina, du njeextel dund wees ko xamal. Dees koo def mu niru Doomu Yàlla, te saxoo di ab sarxalkat ba fàww.

<sup>4</sup> Seetleen ni mu ràññikoo, moom la Ibraayma maamu cosaan ma ci boppam jébbal fukkeelu cérub cëxëtoo ma! <sup>5</sup> Te sarxalkat yi bokk ci giirug Lewi† ni ko yoon wi tërale, ñoom lañu sant ñu nangu céri fukkeeli alali askan wiy seeni bokk, te soqikoo ñoom itam ci geñog Ibraayma. <sup>6</sup> Waaye Melkisedeg mi ñu askanalewul giirug Lewi, ci Ibraayma la nangoo cérub fukkeel. Te it moo ñaanal barke Ibraayma mi jagoo digey Yàlla. <sup>7</sup> Te amul benn werante ne ki féete suuf, moom la ki féete kaw di ñaanal barke. <sup>8</sup> Kon ci gii wet ay nit ñuy dee donj ñooy nangu ay céri fukkeel, ca gee wet nag ku ñu seedeel ne mu ngi dund ba tey moo jagoo cérub fukkeel. <sup>9</sup> Léegi nag ci waxin, Lewi miy nangu cérub fukkeel, moo génne cérub fukkeel bu mu feye ci loxol Ibraayma. <sup>10</sup> Ndax ba Melkisedeg di gatandu Ibraayma, Lewi ma nga woon ca geñog Ibraayma maamam.

### *Melkisedeg misaal na Almasi*

<sup>11</sup> Kon liggéeyu carxal gu Leween, ñi yoroon yoonu Musaa, wi ñu dén-koon bànni Israyil, su doon liggéey buy taxa mat sèkk, ndax dees na soxlaati beneen sarxalkat bu jóg topp dayob Melkisedeg, te toppul dayob Aaróona? <sup>12</sup> Carxal gi nag su soppikoo, fàww yoon wi itam soppiku, ànd ak moom. <sup>13</sup> Ki kàddu yii jëm ci moom, fa mu bokk, geneen giir la, te kenn ci giiram masu cee liggéeye ca sarxalukaay ba. <sup>14</sup> Li wér te wóor it moo di sunu Sang ci Yuda la soqikoo, te googu giir, Musaa waxu ci lenn lu jëm ci sarxalkat yi. <sup>15</sup> Mbir mi gëna leerati gannaaw ba beneen sarxalkat feeñee te mel ni Melkisedeg. <sup>16</sup> Te kooku, du santaaneb ndonol deret bu mu wàccool moo ko taxa doon ab sarxalkat, waaye manoorey dundam gu amul àpp moo ko def ab sarxalkat. <sup>17</sup> Ndax kat, gii kàddu, seedeleelees na ko ko:

«Yaa dib sarxalkat ba fàww, topp dayob Melkisedeg.»

<sup>18</sup> Kon ci genn wet, santaane ba woon, moom lañu neenal, ndax matadig santaane ba, ak ñàkka jariñeem, <sup>19</sup> ndax yoonu Musaa sotalul dara ba mu mat sèkk. Ci geneen wet, yaakaar ju gën moo nuyoo, di yoon wu nuy jaare ba àgg fa Yàlla.

<sup>20</sup> Te it palug sarxalkat bii ñàkkula ànd ak ngiñ, nde sarxalkat yee, ñoom lees daan fal pal gu àndul ak ngiñ. <sup>21</sup> Waaye Yeesu mii la ag palam ànd ak ngiñ lu jibe ca ka ko wax ne ko:

«Boroom bee ko giñ te du dellu gannaaw:

“Yaa dib sarxalkat ba fàww.”»

<sup>22</sup> Ci kaw ngiñ lu réy loolu la Yeesu nekke ki wërale jëmmam, ne kóllère gu gën taxaw na.

<sup>23</sup> Ñi ñu masa fal sarxalkat nag bare nañu, te tëlee wéye fàww seen sas moo tax, gannaaw ñoom ñépp ay dee.

<sup>24</sup> Waaye Yeesu mi sax ba fàww, moo sasoo carxal gu sax dàkk. <sup>25</sup> Looloo waral mu mana musal mucc gu mat sèkk, ñiy awe fi moom, dikk fa Yàlla, ndax mooy dund ba fàww, ngir di leen tinul.

<sup>26</sup> Boobu sarxalkat bu mag lanu soxla; moo sell, mucc sikk, mucc sobe, moom lañu teqale ak bàkkaarkat yi, te moom lañu kaweel ba fa tiim asamaan.

<sup>27</sup> Bokkul ak yeneen sarxalkat yu mag yi; soxlawula jiital bés bu nekk, saraxi jur ngir bàkkaari boppam, door cee teg ay sarax ngir bàkkaari askan wi. Benn yoon la Yeesu sarxal, mu doy, te mooy ba mu sarxee boppam. <sup>28</sup> Ndax kat yoonu Musaa, ay nit ak seenug néew doole la fal ay sarxalkat yu mag. Waaye kàddug ngiñ li topp ci yoon wi, moo fal sarxalkat bu mag, Doom ji ñu matal sèkk ba fàww.

## 8

### *Kóllère gi gën la Yeesu Sarxalkat bi indi*

<sup>1</sup> Kàddu yii nu wax nag, lii moo di ponk bi: boobu sarxalkat bu mag lanu am, mu tooge ndijooru ngànguney ku Màgg ka fa asamaan. <sup>2</sup> Mooy liggéeye kër gu sell ga,

† 7:5 7.5 Lewi mooy maamu Aaróona ak Musaa.

ca biir xaymab jaamookaay bu dëggu, ba Boroom bi samp, te nit sampu ko.

<sup>3</sup> Gannaaw nag ab sarxalkat bu mag bu mu mana doon, dees koo fal, ngir muy jébbale ay jooxe ak saraxi jur, kon fàww sarxalkat bu mag bii itam am lu mu sarxe. <sup>4</sup> Bu doon ci àddina, du nekk sax ab sarxalkat, gannaaw ay sarxalkat a ngi fi, di jébbale ay sarax, ni ko yoonu Musaa laaje. <sup>5</sup> Sarxalkat yooyu, jaamookaay bi ñuy liggéeye, ab misaal la, takndeeru yéf yu dëggu ya fa asamaan la. Ndax ba Musaa di waaja yékkati xaymab jaamookaay ba, noonu lees ko artoo woon ne ko: «Nanga xool te def lépp, mu dëppook misaal mi ñu la won ci kaw tund wi\*.» <sup>6</sup> Waaye tey la Yeesu jot ci liggéeyu carxal gu sut gu jëkk ga fuuf, te kóllère gi mu fas diggante Yàlla ak nit ñi, noonu la gène gu jëkk ga; dige yi lal kóllère gu yees gii it, noonu la gène dige ya laloon gu jëkk ga.

<sup>7</sup> Bu kóllère gu jëkk ga muccon sikk nag, deesul soxlaa xajal geneen. <sup>8</sup> Waaye Yàllaa sikk bànni Israyil, ba mu nee: «Ay fan a ngii di ñëw, la Boroom bi wax, mu ne maay fas ak kër Israyil ak kër Yuda, kóllère gu yees

gu bokkewul ak ga ma séqoon ak seeni maam,

<sup>9</sup> ba ma leen jàppee ci loxo, génne leen réewum Misra.

Gannaaw ñoo sàmmul sama kóllère nag, man it geesuwuma leen, la Boroom bi wax.

<sup>10</sup> «Lii nag moo di kóllère gi may fas ak kër Israyil, gannaaw yooyu fan, la Boroom bi wax, mu ne:

Maay yeb sama ndigali yoon ci seenum xel,

ci seen xol laa koy ñaas.

Maay doon seen Yàlla, ñoom ñu doon sama ñoñ.

<sup>11</sup> Kenn dootu soxlaa jàngal moroomam, mbaa mbokkam, naan ko: “Ràññeel Boroom bi!”

Ndax ñoom ñépp a may ràññee, ki gèna tuut ba ci ki gèna mag.

<sup>12</sup> Maa leen di jéggal seeni njubadi, te seeni bàkkaar, duma ci bàyyeeti xel†.»

<sup>13</sup> Bu Yàlla wooyee kóllère gii gu yees nag, daa fekk mu wonnil gu jëkk ga. Lu wonni te di lu yàgg nag, mu ngi ci tànkii wees.

## 9

### *Yoonu Musaa sàrtaloon na nu ñuy jaamoo Yàlla*

<sup>1</sup> Kóllère gu jëkk ga amoon na moom itam, ay ndigalam yu jëm ci ni ñu wara jaamoo Yàlla, ak bérabam bu sell bi fi kaw suuf. <sup>2</sup> Xaymab jaamookaay ba ñu sàkkoon ñaari néeg la woon. Bu jëkk ba, ca la tegukaayu lãmp ba nekkoon, ak taabal ja, ak mburum teewal ma. Moo doon bérab bu sell ba. <sup>3</sup> Néeg ba ca wàllaa ñaareelu rido ba, moom lañu daan wooye bérab bu sell baa sell. <sup>4</sup> Ca la sarxalukaayu wurus ba ñuy taal cuuraay bokkoon, gaalu kóllère ga nekk moom donj ca biir néeg bu sell baa sell, ñu xoob ko wurus ba mu daj. Gaal ga moo yeboon njaqal wurus la defoon ñam wa ñuy wax mànn, ak yetu Aaróona wa jebbi woon, ak àlluway kóllère ga. <sup>5</sup> Ca kaw gaal ga la ñaari jëmme malaakay serub nekkoon, di tegtale leeru Yàlla, seeni laaf keppaaral kubeer ga ñuy amale ag njotlaay. Waaye yooyu dunu ko mana daldi faramfàcce léegi.

<sup>6</sup> Ba ñu waajalee noonu yooyii ba mu jekk, sarxalkat yaa daan dugg saa su nekk ca néeg bu jëkk ba, di def seen liggéey.

<sup>7</sup> Waaye ñaareelu néeg ba, sarxalkat bu mag ba donj moo ca daan dugg, benn yoon cim at, te du ñàkka duggaale deret ju muy jooxe ngir boppam, ak itam ngir bàkkaar yi askan wi def te du ag teyee.

<sup>8</sup> Noonu la Noo gu Sell gi firndeete ne yoon wu maye dugg ca bérab bu sell baa sell feeñagul woon, te fekk néeg bu jëkk ba di taxaw ba tey. <sup>9</sup> Loolu misaal la, ñeel jamonoy tey, di firndeete ne jooxe yi ak saraxi jur yi ñu daan jébbale manuño dindi yaraangeg jaamukatub Yàlla bi, ba mu set wecc. <sup>10</sup> Sarax yooyu, ci aw ñam ak ag naan, ak xeeti njàpp donj la jëm, lépp yittewoo yaramu suuxu neen, te di

\* 8:5 8.5 Seetal ci *Mucc ga* 25.40. † 8:12 8.12 Seetal ci *Yeremi* 31.31-34.

ndigal yu leen waroon ba keroog bésusb coppite taxaw.

*Almasi moo far bàkkaar, fas kóllère gu bees.*

<sup>11</sup> Almasi nag moo dikk tey, di sarxalkat bu mag, bi yor xéewal yi teew ba noppi. Moo dugg ca biir xayma ba gëna mággu te mat sékk, xayma bu loxol nit deful, te loolu mooy xayma ba bokkul ci càkkéefug àddina sii. <sup>12</sup> Du deretu sikket mbaa yëkk la duggaale, waaye deretu boppam la dugge benn yoon ba fàww ca bérab bu sell baa sell, te moom la amale njotlaay gu sax dàkk. <sup>13</sup> Ndegam deretu sikket ak yëkk, ak nag wu jigéen wu ñu lakk, ngir suy dóom ba nit ku sobewu, yooyu lees daan sellale nit ñi, ngir seen cetug yaramu suuxu neen, <sup>14</sup> te Almasi di ki def boppam sarax bu mucc sikk ñeel Yàlla, ci dooley Noo gu Sell gi, kon nag ñaata yoon la deretu Almasi gëna mana setal sunu yaraange ji sababoo ci sunu jëf ju bon ju jème ci ndee, ba nu mana jaamu Yàlla jiy dund! <sup>15</sup> Looloo tax Yeesu di defarekat bi fas kóllère gu bees, ngir ñi ñu woo mana jot ci muur gu sax dàkk gi ñu leen dig. Deeyam gi mu dee, moom la leen jote ci bàkkaar yi ñu xëtte kóllère gu jëkk ga.

<sup>16</sup> Kayitu ndono nag fu mu teew, fàww joxees fa firndey deewug ka donale, <sup>17</sup> ndax kayitu ndono du wér lu moy gannaaw bu nit ka deeyee. Du jàppandi mukki li feek ki donalee ngi dund. <sup>18</sup> Looloo waral it kóllère\* gu jëkk ga ci boppam, dooresu ko woon te deret tuuruwul. <sup>19</sup> Keroog ba Musaa biralalee bànni Israyil gépp mboolem santaane, na ko yoon wi laaje, ba mu noppee, deretu wëllu la jël, ak ju sikket, akum ndox, ak caru garabu isob bu mu laxas kawaru xar mu xonq. Mu capp ko ca deret ja, wis-wisal ca kaw téereb yoon wa, ak mbooloo mépp. <sup>20</sup> Mu ne: «Lii mooy deretu kóllère gi Yàlla fas ak yeen†.» <sup>21</sup> Xayma ba, ak mboolem ndabi carxal ya it, noonu la wis-wisale ca kaw. <sup>22</sup> Ndax ci yoonu Musaa sax, deret lees di setale daanaka lépp, te bu deret tuuruwul, njéggal amul.

<sup>23</sup> Juntukaay yooyi di ay misaali yëf ya fa asamaan, yooyu sarax lees ko waroona setale. Kon yëfi asamaan ya ci boppam, sarax yu ko gën lees ko wara setale. <sup>24</sup> Ndax bérab yu sell yu nit tabax, te muy royaalub bérab bu dëgggu ba donq, du ci la Almasi dugg. Waaye biir asamaan ci boppam la dugg ngir teewal nu tey, fa kanam Yàlla. <sup>25</sup> Duggul biir asamaan it ngir di sarxe ak a sarxewaat boppam, noonee sarxalkat bu mag ba daan dugge at mu nekk fu sell faa sell, yóbbaaale deret ju dul josam. <sup>26</sup> Lu ko moy ca njàlbéenu àddina lay dale sonn ay yooni yoon. Waaye tey ci mujug jamono yi la feeñ benn yoon donq, ba sarxe boppam, ngir far bàkkaar. <sup>27</sup> Kon ni ab dogal sédde nit ñi benn yoon donq bu ñuy dee, seenub àtte topp ci, <sup>28</sup> noonu itam la Almasi doone ab sarax benn yoon, ngir gàddu bàkkaar nit ñu bare, te dina teewsiwaat, ci yoon wu joteetul dara ak bàkkaar, ngir indil ñi koy séentu seenug mucc.

## 10

<sup>1</sup> Yoonu Musaa takndeeru xéewal yiy ñew donq a ci nekk, waaye xéewal ya ci seen bopp nekku ci. Looloo tax sarax yi yoon wi laaj ñu war koo saxoo jébbale at mu nekk, manula setal mukki wecc ñiy jaamusi. <sup>2</sup> Su sarax yi taxoona set wecc, deesu ko dakkal? Bu ca jaamukati Yàlla yi doon sete wecc benn yoon kay, xanaa dootuñu am yaraangey bàkkaar! <sup>3</sup> Sarax yooyu ay bàkkaar lay fàttlee at mu jot, <sup>4</sup> ndax deretu yëkk, ak ju sikket kat manula far ay bàkkaar.

<sup>5</sup> Moo tax ba Almasiy dikk ci àddina la wax ne:

«Saraxug jur aki jooxe, taamuwuloo ko, waaye aw yaram nga ma waajalal.

<sup>6</sup> Saraxi dóomal ak saraxi póotum bàkkaar, safoowuloo ci dara.

<sup>7</sup> Ca laa ne: “Maa dikk nii, te téereb yoon wi indi na li ñu bind ci man,

maa defsi sa coobare, yaw Yàlla\*.”»

\* **9:18** 9.18 kóllère: benn baat mooy tekki «kóllère» ak «kayitu ndono.» † **9:20** 9.20 Seetal ci *Mucc ga* 24.8.

\* **10:7** 10.5-7 Seetal ci *Sabóor* 40.7-9.

8 Dafa jëkk ne: «Saraxi jur aki jooxe, saraxi dóomal ak saraxi póotum bàkkaar, bugguloo, safoowuloo,» doonte yoon wee laaj yooyu sarax. 9 Mu teg ca ne: «Maa ngii defsi sa coobare.» Noonu la fare lu jëkk la, ngir wuutal fa ñaareel bi. 10 Coobarey Yàlla googu moo waral ñu sellale nu sarax, bi Yeesu Almasi sarxe yaramam, benn yoon ba fàww.

11 Mboolem sarxalkat a ngi taxaw bés bu nekk ci liggéeyam, di jébbale ak a jébbalewaat yenn sarax yooyu, te lenn du ci masa mana far bàkkaar. 12 Waaye kii de, ba mu sarxee ngir ay bàkkaar, bennub sarax, mu doy ba fàww, ca la tooge fa ndijooru Yàlla. 13 Fa la doxe di xaar bés ba ñu koy defal ay noonam, ndëggastalu tànkam. 14 Kon bennub sarax boobu, ci la matale sëkk ba fàww, nit ñi ñu sellal.

15 Mooy li Noo gu Sell gi itam seede, ñeel nu, 16 nde gannaaw ba mu nee: «Lii moo di kóllère gi may fas ak ñoom, bu fan yooyu weese, Boroom beey wax, mu ne maay yeb sama ndigali yoon ci seen xol,

ci seenum xel laa koy ñaas;

17 lii la ca teg: seeni bàkkaar ak seeni tooñ,

duma ci bàyyeeti xel†.»

18 Yooyu nag fu ñu ko jéggalee, aajootul sarax su koy far.

### *Nanu àgg fa Yàlla*

19 Léegi nag bokk yi, am nanu sañ-sañu dugg ca bérab bu sell baa sell, ngir deretu Yeesu, 20 deretu Yeesu jiy yoon wu yees, yoonu dund gu mu nu xállal, jállale ko rido ba, te rido ba moo di yaramu suuxam wi mu sarxe. 21 Am nanu itam sarxalkat bu mag bu jiite kër Yàlla. 22 Kon nag nanu agsee fi Yàlla xol bu dëggu, ak fit wu mat sëkk wu ngëm waral, gannaaw wisees na sunum xel ndoxum setlu, ba mu tàggook bépp gàkk bu mu nu sikkale, te raggees na sunu yaram ci ndoxum setlu. 23 Nanu ñoy ci yaakaar, ji nu biral ne moom lanu am, te nu baña yoqi, nde ki dige ku wóor la. 24 Nanu seet itam ci sunu biir nu nuy xiirtalantee ngir cofeel

ak jëf ju baax. 25 Te bunu def ni ñenn ñi, di daggoo ak sunuy ndaje, waaye nanuy ñaaxante, rawatina tey bi ngeen gisee bés bi dëgmal.

26 Gannaaw bu nu xamee xéll liy dëgg ba noppi nag, su nu bàkkaaratee te di ko tey, su boobaa ab sarax bu far yooyu bàkkaar amatu ci. 27 Xanaa tiitaangey séentu mbugal ma, ak sawara wu yànj wiy xoyom fippukat yi. 28 Képp ku masoona xétt yoonu Musaa, daawuñu ko ñéebly; ci kaw seede ñaari nit ba ñett lees ko daan rey. 29 Kon ki dëggaate Doomu Yàlla ji, teddadil deret ji ñu sellale kóllère gi, te ñàkke teggin Noowug Yàlla gi nu indil aw yiw, kooku, mbugal ga mu yelloo, ñaata yoon lay gënatee metti, ngeen defe? 30 Xam nanu ki wax ne: «Ag pey, maay boroom, man maay añale,» neeti: «Boroom bi mooy àtte ñoñam‡.» 31 Céy ku nara tàbbi ci loxoy Yàlla jiy dund, ndaw lu raglu!

32 Fàttlikuleen bés yu jëkk ya, gannaaw ba ngeen jotee ci leeru Yàlla, na ngeen dëgërloo woon ca xeex bu mag ba te metti. 33 Leeg-leegaa ñu saaga leen, bundxatal leen ci kanam nit ñi; leeg-leegaa yeen ay taxawu nit ñi ñu teg lu ni mel. 34 Ndax yeena bokk ak ñi ñu tēj seen coono, te yeena muñe xol bu sedd ni ñu foqarñee seen moomeel, ngir xam ngeen yeen ci seen bopp ne am ngeen alal ju ko gën tey sax ba fàww.

35 Kon nag buleen teqlikook seenu fit, yool bu réy a ngi ci. 36 Li leen war moo di muñ, ba sottal coobarey Yàlla, su ko defee ngeen jot li mu dige. 37 Ndax kat,

«Des nas tuut, as tuut rekk,

kiy dikk, dikk te du yeex.

38 Sama nit ku jub nag mooy dund ndax ngëm ga,

waaye ku dellu gannaaw,

sama xol bégewu la§.»

39 Nun nag bokkunu ci ñiy dellu gannaaw te nara sàнку, waaye nooy ñi saxoo ngëm te nara mucc.

† 10:17 10.16-17 Seetal ci *Yeremi* 33-34. ‡ 10:30 10.30 Seetal ci *Baamtug Yoon wi* 32.35-36. § 10:38 10.37-38 Seetal ci *Abakug* 2.3-4.

# 11

## *Yàlla rafetlu na ngëm*

<sup>1</sup> Ngëm nag mooy cëslaayal yaakaar te mooy firndey li bët gisul. <sup>2</sup> Ngëma taxoon maam ya rafet ub jëw.

<sup>3</sup> Ngëm a nu xamal ne Yàllaa sose àddina wërngal këpp ag kàddoom, li gisu daldi sàkkoo ci lu gisuwul.

<sup>4</sup> Ngëm la Abel jébbale Yàlla sarax su gën saraxub Kayin, te ngëm lees seedelee Abel ne moo jub, kera ba Yàlla ci boppam seede ne ay saraxam a nangu. Ngëm it moo waral Abel dee, te di wax.

<sup>5</sup> Ci kaw ngëm lees yóbboo Enog, te deewul. Da ne mes, ndax Yàllaa ko yóbbu\*. Balees koo yóbbu kay, lees ko seedeelon ne moo bänneexal Yàlla. <sup>6</sup> Ku amul ngëm nag doo mana neex Yàlla, ndax kiy dikk fi Yàlla, fàww nga jékka gëm ne Yàlla am na, gëm it ne ñi koy sàkkoo, moo leen di yool.

<sup>7</sup> Ngëm la Nóoyin dégge waxyub Yàlla bu jëm ci lu kenn gisagul woon, te ragal Yàlla la sàkke gaal, ngir musal njabootam. Ngëmam it la tiiñale àddina, ba ab céram di njub gi ngëm di maye.

<sup>8</sup> Ba Yàllay woo Ibraayma, ngir mu génn, jëm bérab ba mu mujj muurloo, ngëm la déggale Yàlla, ba génn, dem te xamul woon fu mu jëm. <sup>9</sup> Ngëm la Ibraayma daleji ca suuf, sa ñu ko digoon, ba dëkke ay xayma ni ab doxandéem ci réewum jaambur, moom ak ñi mu séddool benn dige bi, te ñuy Isaaxa ak Yanqóoba. <sup>10</sup> Booba Ibraaymaa ngay séentu dëkk ba ca kenu ya, te Yàlla di ki yor xaralag tabax bi, boole ci di tabaxkat bi.

<sup>11</sup> Ci kaw ngëm itam la Saarata ci boppam mana embe ba jur tey mag ba wees njurum doom, ndax moo njortoon ne ka dige ku wóor la. <sup>12</sup> Looloo waral genn góor donj, ku dee rekk dese, aw askan mana soqikoo ci moom, tollu ni biddiwi asamaan ndax bare, wees ab lim ni feppi suufas géej.

<sup>13</sup> Noom ñépp ngëm lañu deeyaale te jotaguñu woon la ñu leen digoon. Waaye

fu sore lañu ko séene, di ko séentu, tey ràññee ne ay doxandéem aki mangan lañu ci àddina. <sup>14</sup> Nnoñuy dëggal ne ay doxandéem aki mangan lañu ci àddina nag, ñoo firndeel ci lu leer ne réew mu ñu moomal seen bopp lañu doon wut. <sup>15</sup> Bu ñu nammoon réew ma ñu jóge, manoon nañoo dellu. <sup>16</sup> Waaye réew mu ko gën lañu doon sàkkoo, te mooy réewum asamaan. Looloo tax Yàlla rusul ñu di ko tudde seen Yàlla, ndax waajalal na leen ab dëkk.

<sup>17</sup> Ibraayma, ba ñu ko nattoo, ngëm la jooxee Isaaxa ngir sarax. Ibraayma mi ñu jagle dige yi, Isaaxa jenn doomam ju góor ji mu am, moom la doon jooxe, <sup>18</sup> te Yàlla noon ko: «Ci Isaaxa lees di tudde saw askan†.» <sup>19</sup> Waaye Ibraayma njortoon na ne su Isaaxa dee woon it, Yàlla man na koo dekkal. Moo tax itam ci misaal, Isaaxa délsi ciy loxoom, mel ni daa dekki.

<sup>20</sup> Ba tey ngëm la Isaaxa ñaanale Yanqóoba ak Esawu, ngir barkey ëllëg.

<sup>21</sup> Ba Yanqóoba di waaja nelaw, ngëm la ñaanale ñaari doomi Yuusufa yépp, doora sujjóot, jafandoo boppu yetam‡.

<sup>22</sup> Ba Yuusufa di waaja nelaw, ngëm la waxe lu jëm ci mbirum gaddaayug banni Israyil gay bawoo Misra, bay dénkaane ci mbiri yaxam.

<sup>23</sup> Ba Musaa juddoo, ngëm la ko ay waajuram làqe woon ñetti weer, ndax gis na xale ba taaroo woon, ba ragaluñu ndigalal buur ba. <sup>24</sup> Ba Musaa mäggee, ngëm a taxoon mu bañ ñu wooye ko doomu doomu Firawna ju jigéen. <sup>25</sup> Bokk ak ñoñi Yàlla ab coono moo ko gënaloon muy bänneexoogum ci biir bàkkaar. <sup>26</sup> Toroxtaange gu ñu koy teg ndax Almasi, moom la defoon muy alal ju ëpp denci Misra, ndax yoolub ëllëg ba la doon séentu. <sup>27</sup> Ngëm la bàyyikoo Misra, te ragalul sànjum buur, xanaa dogu rekk, mbete kuy gis ki gisuwul. <sup>28</sup> Ngëm la Musaa aadaale mäggalu bésu Mucc ba, ak wis-wisalub deret ja, ndax malaakam bóomkat bi baña laal taawi banni Israyil.

\* **11:5** 11.5 Seetal ci *Njàlbéen ga* 5.24. † **11:18** 11.18 Seetal ci *Njàlbéen ga* 21.12. ‡ **11:21** 11.21 Seetal ci *Njàlbéen ga* 47.31.

<sup>29</sup> Ngëm la bànni Israyil jàlle géeju Barax ya, mu mel ni yoonu suuf su wow konj, waa Misra jéema jàll topp ca, daldi lab.

<sup>30</sup> Ngëm moo waral tatay Yeriko màbb, gannaaw ba ko bànni Israyil wëree lu mat juróom ñaari fan. <sup>31</sup> Ngëm moo waral ba Raxab ganc ba dalalee jàmm nem-mikukati réew ma, àndul ak ñu gëmadi ña dee.

<sup>32</sup> Ana lu ma ciy tegati? Jot gee ko dul mate, su ma naroonu nettali mbirum Sedeyon ak Barag ak Samson ak Yefte ak Daawuda ak Samiyel ak yonent yi. <sup>33</sup> Ñooñu ngëm lañu tege loxo ay nguur, ngëm lañu defe njekk, ci kaw ngëm la ay dige sottee, ñeel leen, te ci lañu tëje gëmniñi gaynde ya. <sup>34</sup> Ngëm lañu feye dooley sawara, ngëm lañu rëcce ñawkay saamar, ngëm a waral ñu weccikoo kàttan seenug néew doole, ci kaw ngëm lañu doone ay ñeyi xare, ba dàq gàngoori yeneen réew. <sup>35</sup> Ngëm a waral aw jigéen dekkile ñu ñu deele woon; ngëm a waral ay góor ñu ñu mitital, baña dellu gannaaw, weccikoo ko seen n jotug bakkan, ndax yaakaara dekki, ba gëna dundati èllëg. <sup>36</sup> Ngëm la ñeneen dékkoo ay kókkali aki yar, ba ciy jéng ak tëjteb kaso. <sup>37</sup> Ñii, ñu dóor ay doj ba ñu dee, ñee, ñu xeet leen ba xar leen ñaar, ñee, ñu bóome leen saamar, ñii di wëndeelu, sol deri xar mbaa bëy, te diy ndóol, ñu di leen bundxatal, di leen mitital. <sup>38</sup> Ñooñu àddina sax yeyoowu leen woon, te àll yi lañu doon wëreeloo, ak tund yeek xunti yeek kàmb yi.

<sup>39</sup> Mboolem ñooñu am jëw bu rafet ndax seen ngëm, jotuñu sax lees dige woon, <sup>40</sup> ndax daa fekk Yàlla gisal nu demin wu gën ci nun. Moo tax bo-room ngëm yooyu waruñu woon àgg ci tolluwaay bu mat sëkk, te fekk nun dikkagunu ba bokk ko ak ñoom.

## 12

### *Buleen xeeb yaru Boroom bi*

\* **12:6** 12.5-6 Seetal ci *Kàddu yu Xelu* 3.11-12. † **12:12** 12.12 Seetal ci *Esayi* 35.3. ‡ **12:13** 12.13 Seetal ci *Kàddu yu Xelu* 4.26.

<sup>1</sup> Kon nag gannaaw gii ndiiraanu seede wu réy moo nu yéew, nanu sippiku mboolem sëf bu nuy yeexal, ak bàkkaar bu nu yomba téqtal. Ñu daw nag xél wi ñu nu waajalal, te baña yoqi. <sup>2</sup> Nanu ne jàkk Yeesu, kiy sos, di sottal ngëm, moom mi mbég mi ñu ko waajalal tax mu dékku bant ba ñu ko daaj, tegul muy dara toroxtaange ja ko ca fekk, te doxe ca toog ca ndijooru jalub Yàlla. <sup>3</sup> Xool-leen ci moom mi bàkkaar kat yi doon xeex, bala ngeena yoqi bay xàddi. <sup>4</sup> Yeen kat xareeguleen ak bàkkaar, ba seen deret tuuru ci. <sup>5</sup> Te it fàtte ngeen kàddu yii ñu leen ñaaxe, ni nit aki doomam:

«Doom, bul xeeb yaru Boroom bi,

bul xàddi, bu la wañnee,

<sup>6</sup> ndax Boroom bi, ku mu sopp, yar la,

mooy bantal jépp doom ju ko neex\*.»

<sup>7</sup> Muñleen coono bu leen di yar. Ni ay doom la Yàlla di jëflanteek yeen. Ana doom ju baay ba dul yar? <sup>8</sup> Bu ñu leen xañee yar bi jépp doom am wàll, dafa fekk ngeen di doomi po, waaye du ngeen doomi yoon. <sup>9</sup> Te itam am nanu ay baay ci wàllu deret, ñoo nu daan yar, te danu leena wegoon. Kon nag xanaa du Baay bi yor ug noo lanu wara gënatee nangul, ngir nu dund? <sup>10</sup> Sunuy baay a nu yar fan yu néew, na mu jaadoo woon ci seenum xel. Waaye sunu Baay bii, sunu njariñal bopp lanuy yare, ngir nu séddu ci sellayam. <sup>11</sup> Dëgg la, benn yarub tey neexul, xanaa naqari. Waaye la yar bay mujj jural ña mu tàggat, jàmm la ak njub.

<sup>12</sup> Kon nag «dégéral-leen loxo yi toqi, ak óom yi bañ†,» <sup>13</sup> te «ngeen xàllal seen bopp xàll yu jub yu ngeen di jaare seeni tãnk‡,» ngir kuy soox doxe ca wér te baña gëna tële.

### *Buleen tanqamlu Yàlla*

<sup>14</sup> Sàkkuleen jàmm seen diggante ak ñépp, te it sàkkuleen sellnga, nde ku sellul du gis Boroom bi. <sup>15</sup> Moytuleen balaa kenn di ñàkk yiwu Yàlla. Moytuleen bala ab reenu wextan di fëll, di lëjle, ba rax mbooloom lëmm. <sup>16</sup> Moytuleen bala kenn

a yebu ci powum séy, mbaa mu teddadil lu sell ba mel ni Esawu mi weccee woon ag lekk, céru taaw ba mu yelloo. <sup>17</sup> Xam ngeen ne gannaaw gi, ba mu béggee jot ca barke ba, dees koo gàntal. Amul woon fenn fu mu jaare it ba sopparñi deminam, te jéem na ko bay jooy.

<sup>18</sup> Yeen kat du yeena agsi woon ba jege tund wu ngeen mana laale seen loxo, muy tàkk, ànd aki xàmbaar, ak lëndëm gu ne këruus, ak ngelaw lu réy. <sup>19</sup> Du yeena dégg liit gu jib, ak coowal baat bu jib te ñay dégg kàddu ya di ñaan ñu bañ leena dégtalati benn baat bu ni mel. <sup>20</sup> Manuñu woona xajoo ndigal la ne: «Mala sax, su laalee tund wi, dóorleen koy doj ba mu deeŝ.» <sup>21</sup> Peeñu mooma moo raglu woon ba Musaa ne: «Damaa tiit bay lox\*.»

<sup>22</sup> Waaye yeen fi ngeen agsi moo di tundu Siyon, dëkku Yàlla jiy dund, te mooy Yerusalem ga ca asamaan, yeena àgg fa junniy junniy malaaka, dajee di màggal; <sup>23</sup> yeena àgg fa ndajem taaw, ya seeni tur binde fa asamaan. Yeena àgg fa Yàlla, àttekatub ñépp; yeena àgg fa noowi aji jub ña ñu matal sëkk. <sup>24</sup> Yeena àgg fa Yeesu, Rammukat bi dox kóllère gu yees gi, yeena àgg fa deret jiy setal tuuroo, te kàddug deret ja gëna neex kàddug deretu Abel ga jiboon.

<sup>25</sup> Wattuleen bala ngeena tanqamlu kiy wax ak yeen. Ndegam ña tanqamlu woon ka yékkati woon kàddoom, wax ak ñoom ci kaw suuf ñoo rëccul, aste nun ñii, su nu dëddoo kiy waxe fa asamaan. <sup>26</sup> Booba baatam la yëngale woon suuf, waaye tey moo dige ne: «Beneen yoon, maay yëngalati suuf, te du suuf donj, waaye asamaan itam†.»

<sup>27</sup> Li mu ne «beneen yoon», di wund ne lees mana yëngal, lay dindi, te mooy li sàkke, ngir lees manula yëngal sax ba fàww.

<sup>28</sup> Kon nag gannaaw nguur gu deesul yëngal lanu jagoo, nanu jàppoo cant, di

jaamu Yàlla ni mu ko béggee cig njulite akug ragal, <sup>29</sup> ndax kat «sunu Yàlla, sawara wuy xoyome la‡.»

## 13

### *Dundin wu rafet moo neex Yàlla*

<sup>1</sup> Cofeel gi war ci bokki gëmkat, sax-ooleen ko. <sup>2</sup> Buleen sàggane di terle, nde am na ñu seen teraanga tax ñu fat ay malaaka te xamuñu ko woon. <sup>3</sup> Bàyyileen xel ñi ñu tëj, ni su ñu leen boole woon ak ñoom tëj, ak itam ñi ñuy mitital, ndax yeen itam, aw yaram ngeen am.

<sup>4</sup> Na ñépp wormaal diggante bu ab séy dox, te ab lalu séy na mucc sobe, ndax fokati séy yi, ak jaalookat yi, Yàlla moo leen di daan.

<sup>5</sup> Buleen jikkowoo bëgg ub xaalis; doyooleen li ngeen am, ndax Yàlla moo ne: «Duma la bàyyi muk, duma la wacc muk\*.»

<sup>6</sup> Moo tax nu mana am fitu wax ne: «Boroom beey sama ndimbal, duma tiit.

Ana lees ma manal†?»

<sup>7</sup> Fàttlikuleen seen njiit, yi leen àgge kàddug Yàlla. Nemmikuleen li seenug dundin meññ, te ngeen roy seen ngëm.

<sup>8</sup> Yeesu Almasi menn mi la woon démb ak tey ba fàww.

<sup>9</sup> Buleen nangu ay àlluwa yu bare te woroo ak sunu ngëm, di leen fàbbi. Li baax mooy ngeen di yokke aw yiw, seen pastéefu xol. Buleen yokke pastéefu xol, ay ndigal yu jëm ci aw ñam, te ña koy sàmm, jariñu leen dara.

<sup>10</sup> Sunu sarxalukaayu bopp, la ñu cay jooxe, ñay liggéeye ca xaymab jaamookaay ba, sañuñu caa lekk. <sup>11</sup> Ndax kat, jur ga sarxalkat bu mag ba daan yóbbu seen deret ca bérab bu sell baa sell, ngir njotlaayal bàkkaar, seen yaram lees daan lakk ca bitib dal ba. <sup>12</sup> Moo waral Yeesu itam deeye ca bitib dëkk ba, ngir sellale askan wi, deretu boppam. <sup>13</sup> Kon nag, nanu ko fekki ca bitib dal ba, ba tegoo toroxtaangeem ga mu tegoo woon, <sup>14</sup> ndax amunu fii ci àddina dëkk bu sax

§ 12:20 12.20 Seetal ci *Mucc ga* 19.12-13. \* 12:21 12.21 Seetal ci *Baamtug Yoon wi* 9.19. † 12:26 12.26 Seetal ci *Ase* 2.6. ‡ 12:29 12.29 Seetal ci *Baamtug Yoon wi* 4.24. \* 13:5 13.5 Seetal ci *Baamtug Yoon wi* 31.6. † 13:6 13.6 Seetal ci *Sabóor* 118.6.



ba fàww, waaye dëkk biy ñëw, moom lanuy sàkku.

<sup>15</sup> Kon nag saa su nekk, nanuy jooxee ci Yeesu, sunu saraxu cant, ñeel Yàlla, muy sarax su bawoo ci sunuw làmmiñ, ñu di ko birale aw turam. <sup>16</sup> Te it di def lu baax, ak di dimbalee, buleen ko fàtte, ndax sarax yu mel noonu la Yàlla gërëm.

<sup>17</sup> Déggal-leen seeni njiit te nangul leen, ndax sàmm bakkani ñi ñu jiite mooy seenub liggéey, te moom lees leen di laaj èllëg. Su ko defee ñu defe ko xol bu sedd, te bañ koo def di binni, ndax loolu du seen njariñ.

<sup>18</sup> Deeleen nu ñaanal nag. Li nu wóor de, moo di sunum xel yeddu nu fenn, te it di def lu baax ci lépp moo di sunu bëgg-bëgg. <sup>19</sup> Ma di leen gëna tinooti, ngir ngeen ñaanal nu, ba ma délsil leen nu mu gëna gaawe.

<sup>20</sup> Yàlla miy boroom jàmm, moom mi dekkal sunu Sang Yeesu, Sàmm bu mag bi, ci dooley deret ji mu fase kóllëre gu sax dàkk, <sup>21</sup> yal na leen matal sëkk ci lépp lu baax, ngir ngeen di jëfe coobareem. Yal na def ci nun bannëexu boppam bu mu sottale Yeesu Almasi, mi daraja ñeel ba fàww. Amiin.

<sup>22</sup> Kon nag bokk yi, dëgg waay, muñleen ma ñaaxe leen gii kàddu. Bañ naa ko ba gàttal bataaxal bii ma leen bind.

<sup>23</sup> Xamleen ne sunu mbokk Timote génn na kaso. Su dikkee léegi, moom laay àndal, seetsi leen.

<sup>24</sup> Nuyul-leen ma mboolem seeni njiit, ak mboolem gëmkat ñu sell ñi. Waa Itali ñu ngi leen di nuyu.

<sup>25</sup> Yal na aw yiw ànd ak yeen ñépp.

## Bataaxal bi Yàlla may Yanqóoba mu bind ko

<sup>1</sup> Ci man Yanqóoba, jaamub Yàlla ak Sang Yeesu Almasi, la bataaxal bii bawoo, ñeel fukki giir ak yaar yi tasaaroo ci àddina. Maa ngi leen di nuyu.

### *Lu jëm ci nattu ak ngëm*

<sup>2</sup> Bokk yi, bu ngeen jaaree ci mboolem xeeti nattu, jàppeleen ko mbég mu mat sèkk, <sup>3</sup> te xam ne bu seen ngëm nattoo, ñeme coono la leen di jural. <sup>4</sup> Na ag ñeme coono sotal liggéeyam ci yeen, ngir ngeen sotti, mat sèkk, te baña yéese fenn.

<sup>5</sup> Ku desele am xel mu rafet nag, na ko ñaan Yàlla, mu may ko ko, ndax Yàlla mooy yéwéne ñépp te du sikk kenn. <sup>6</sup> Waaye ngëm la koy ñaane te bumu ci am benn sikki-sàkka, ndax kiy sikki-sàkka daa mel ni gannaxu géej bu ngelaw liy yóbbu, di ko lëmbaaje. <sup>7</sup> Kooku bumu yaakaar dara ci Boroom bi. <sup>8</sup> Boroom xel-yaar la, xel maa toogul ci lenn lu muy def.

### *Néewle kawe, barele suufe*

<sup>9</sup> Mbokkum gëmkat mi suufe daraja, na sagoo ab kawewaayam; <sup>10</sup> te ki barele it na sagoo ag suufeem, ndax ni tóor-tóoru saxayaay di ruuse, noonu lay wéye. <sup>11</sup> Naka la jant di fenk, ba naaj wi tàng jérr, saxayaay lax, tóor-tóoram ruus, taar ba réer ko mërr. Noonu itam la ki barele di jeexlee ci biiri yëngoom.

### *Yàllaay nattoo waaye du fir kenn*

<sup>12</sup> Ndokklee ku muñ ab nattu, nde su ca amee ngërëm, mooy yooloo kaalag dund, gi Yàlla dig ñi ko sopp.

<sup>13</sup> Képp ku dajeek lu koy xiirtal, bumu ne: «Yàllaa ma xiirtal,» ndax maneesula xiirtal Yàlla ci lu bon, te moom ci boppam du xiirtal kenn. <sup>14</sup> Waaye ku nekk, sa xemmemtéefu bakkanu bopp moo lay xiirtal, ootal la ba nax la. <sup>15</sup> Te xemmemtéefu bakkan bu èmbee, bàkkaar lay wasin, te bàkkaar bu matee, ndee lay jur.

<sup>16</sup> Bokk yi, soppé yi, buleen juum ci lii: <sup>17</sup> gépp may gu baax, ak bépp jagle bu

mat, fa kaw la bawoo, di lu wàcce fa Baay biy boroom leer yi, ki soppikuwul ci lenn, te genn ker gu toogadi nekkul ci moom. <sup>18</sup> Moom la soob mu jure nu kàddug dëgg, ba nu taxawe ab jooxeb ndoortel meññeef, ci biiri bindeefam.

### *Jëfeleen kàddug Yàlla*

<sup>19</sup> Bokk yi, soppé yi, nangeen xam lii: na ku nekk di gaaw ci déglu, di yeexa wax tey yeexa mer. <sup>20</sup> Ndax merum nit du jur njub fa Yàlla. <sup>21</sup> Kon nag baleen jépp jikko ju tilim, ak mboolem xeeti mbon yi ne gàññ, te ngeen nangu ci biir ag woyof, kàddu, gi jëmbate ci yeen te man leena musal.

<sup>22</sup> Doonleen jëfekati kàddu gi, buleen di ay déglukat donj, di nax seen bopp. <sup>23</sup> Ndax kat kuy déglu kàddu gi te jëfewoo ko, kooku daa mel ni kuy niir kanamam cib seetu: <sup>24</sup> bu niiree boppam, dem daldi fàtte ca saa sa lu muy nirool. <sup>25</sup> Waaye ki ne jàkk yoon wu mat sèkk, wiy goreel ku ko topp, saxoo yoon wi te bañ koo dëgg, fàtte; xanaa di dëgg, jëfe, kooku mooy bége jëfam.

<sup>26</sup> Ku yaakaar ne moo jullite te moomul làmmiñam, boppam lay nax te ag njulliteem amul njariñ. <sup>27</sup> Njullite gu set te mucc sikk fa kanam Yàlla Baay bi moo di lii: di nemmiku jirim akub jëtun ci seen njàqare, tey sàmmu ba mucc ci gàkki àddina.

## 2

### *Gënaatle warul*

<sup>1</sup> Bokk yi, bu leen di gënaatle te di gëmkati sunu Sang Yeesu Almasi, Boroom leer. <sup>2</sup> Ndax su nit duggsee seenum ndaje, takk jaarob wurus, solu ba jekk; ku néew doole it duggsi, limboo ay sagaram, <sup>3</sup> su ngeen seetloo boroom col gu jekk gi, ne ko: «Toogeel fii, moo baax ci yaw,» te ne néew-ji-doole ji: «Yaw, taxaweel nee, mbaa nga toog fii sama tànki toogu, fi suuf,» <sup>4</sup> su boobaa xanaa du yeena ngi gënaatle ci seen biir, tey àttee ay mébét yu bon?

<sup>5</sup> Bokk yi, soppé yi, dégluleen. Xanaa du Yàlla moo taamu ñi àddina jàppe ñu néew doole, ngir ñu barele ngëm, boole

ci jagoo nguur, gi Yàlla dig ñi ko sopp? <sup>6</sup> Yeen nag ngeen di teddadil néew doole yi! Xanaa du boroom alal yi ñoo leen di noggatu, di leen diri ba fa mbaxana dee benn? <sup>7</sup> Xanaa du ñooñu ñooy ñàkke kersa tur wu tedd wi ngeen di wuyoo?

<sup>8</sup> Ndegam nag yoonu Buur Yàlla ngeen matal sèkk, di sàmmonteek Mbind mi ne: «Ni ngeen soppe seen bopp, nangeen ko soppe seen moroom\*,» su boobaa waawleen góor! <sup>9</sup> Waaye su ngeen gënaatlee, bàkkaar ngeen, te yoon topp na leen, ndax yeena ko xëtt. <sup>10</sup> Ndax kat képp ku sàmm yoon wépp, ba mu des lenn ndigal donj lu mu téréfe, ab daanu ku moy yoon wépp ñeel na ko. <sup>11</sup> Ndax ki ne: «Bul jaaloo,» moo ne itam: «Bul bóome†.» Ku jaaloowul te bóome nag, xëtt na yoon. <sup>12</sup> Deeleen waxe tey jéfe ni mu jekke ci nit ñu ñuy séddeji àtteb yoon wiy goreel. <sup>13</sup> Daan bu àndul ak yërmande, moom lees di àttee ña daawul jéfe yërmande. Yërmande nag kekku na ab daan.

### *Gëm, jéfe*

<sup>14</sup> Bokk yi, ku ne gëm na, te jëfewu ko, ana lu mu koy jariñ? Ndax googu ngëm man na koo musal? <sup>15</sup> Su mbokk mu góor mbaa jigéen raflee, mbaa mu ñàkk lu mu dunde bés bu nekk, <sup>16</sup> ba kenn ci yeen ne mbokk mi: «Demal ak jàmm, solul nag te lekk ba regg,» te fajul aajoom, loolu lu muy jariñ? <sup>17</sup> Noonu la ngëm deme, su amul jëf ju mu àndal, ngëm gu dee la.

<sup>18</sup> Waaye jombul nit ne: «Yaw, ngëm nga am, waaye man, jëf laa am.» Dama ne, won ma sa ngëm gu àndul ak jëf; man, samay jëf laa lay wone sama ngëm. <sup>19</sup> Yaa gëm ne Yàlla kenn la; waaw góor, waaye rab yu bon yi it loolu lañu gëm bay lox.

<sup>20</sup> Yaa ñàkk bopp, dangaa bëgg lu la firndeel ne ngëm gu àndul ak jëf, amul njariñ? <sup>21</sup> Sunu maam Ibraayma, xanaa du ci jëf lees ko joxe àtteb ku jub, ndax jëf ja mu jooxee doomam Isaaxa ca sarx-alukaay ba? <sup>22</sup> Kon gis nga ne ngëm gaa liggéeyandoo ak jëfam ja, te ca jëf ja la

ngëm ga mate sèkk. <sup>23</sup> Mbind ma daldi sotti, na mu dikke woon ne: «Ibraayma moo gëm Yàlla, ñu waññal ko ngëmam ag njub‡,» ba ñu di ko wooye xaritu Yàlla. <sup>24</sup> Ngeen gis kon ne ci jëf lees di joxe nit àtteb ku jub, waaye du ci kaw ngëm donj.

<sup>25</sup> Xanaa du noonu it lañu joxe Raxab§ gànc ba, àtteb ku jub, ci kaw jëfam, ndax la mu dalaloon ndawi Yawut ya, ba awale leen feneen? <sup>26</sup> Yaram wu àndul akug noo daal, ni mu deeye, noonu la ngëm gu àndul aki jëf, deeye.

## 3

### *Moom sa làmmiñ cig mat la bokk*

<sup>1</sup> Bokk yi, bu ñu bare ci yeen wuta doon sëriñi mbooloom gëmkat mi, ndax xam ngeen ne nun ñiy jàngle nooy gëna metti ab àtte. <sup>2</sup> Bare na lu nuy tooñ, nun ñépp. Ku dul tooñ ci kàddu nag, kooku nit ku mat la, te man naa moom yaramam wépp, boole ci.

<sup>3</sup> Aw fas, ñalaab gi nuy def ci gëmmiñam, mu déggal nu lanu ci jublu, te moom lanuy walbatee yaramu fas wi wépp. <sup>4</sup> Xool-leen gaal yi it, ak ngelaw lu réy lu leen mana jañax, weñ su tuut la dawalkat biy walbatee gaal gi, jème fu ko neex. <sup>5</sup> Noonu itam la aw làmmiñ dee cér su tuut te réy aw bàkk.

Seetleen ni ferñent su tuut di lakke gott bu yaa. <sup>6</sup> Aw làmmiñ itam sawara la; làmmiñ a bokk ci sunuy cér, te di àddinay mbon, di gàkkal jëmm jépp. Aw làmmiñ, giiru dundu nit ki lay jafale ab taal bu tàkke fa sawara.

<sup>7</sup> Mboolem xeeti rabi àll yeek njanaaw yi, ak ndëgmeent yi, ak rabi géej yi, dees na leen tàggat, te nit a leen di tàggat ba ñu mukk. <sup>8</sup> Waaye aw làmmiñ, kenn manu koo tàggat ba mu mukk. Mooy aayteef gu kenn manula dänk, fees dell ak tookey ndee.

<sup>9</sup> Aw làmmiñ lanuy sante kiy Boroom bi, di Baay, te it ci lanuy móoloo nit ñi bindoo takkndeeru Yàlla. <sup>10</sup> Genn gëmmiñ gi, ci la kàddug cant ak gu móolu di jibe.

\* **2:8** 2.8 Seetal ci *Sarxalkat* yi 19.8. † **2:11** 2.11 Seetal ci *Mucc ga* 20.13, 14. ‡ **2:23** 2.23 Seetal ci *Njàlbéen ga* 15.6. § **2:25** 2.25 Seetal ci *Yosuwe* 2:1-21.

Bokk yi, warula deme noonu kat. <sup>11</sup> Benn bētu ndox ndax dina ballandoo ndox mu neex, ak ndox mu wex, ci menn pax mi? <sup>12</sup> Bokk yi, ag figg man naa meññ oliw? Am ag reseñ dina meññ doomi figg? Bētu ndoxum xorom it du nàcc mukkk ndox mu neex.

<sup>13</sup> Ana ci yeen ku rafet xel te xam àddina? Na ko firndeele dundin wu rafet wu feeñ ci jëfam ju teey ndax xel mu rafet. <sup>14</sup> Waaye ku denc ci sab xol, wextanu kañaan, ak mébétum sàkku sa darajay bopp, bul damoo xel mu rafet, nde kon nga moy dëgg. <sup>15</sup> Moomu xel jógewul fa kaw, àddina sii la bokk, di yëfi bakkan, te di mbiri Seytaane. <sup>16</sup> Ndax kañaan ak sàkku sa darajay bopp, fu mu ame, fa la salfaañoo di ame, ak mboolem jëfi ñaawtéef.

<sup>17</sup> Waaye xel mu rafet ma bawoo fa kaw, set la jëkka def, teg ci ànd ak jàmm, akug dal. Day taxa neexa jubool, feese yërmande, di meññ jëf ju baax, te mucc ci par-làqu akug jinigal. <sup>18</sup> Meññeefum njub nag, ci jàmm lees koy ji, ci biir doxkati jàmm yi.

## 4

### *Nangul-leen Yàlla*

<sup>1</sup> Ana fu jote yeek xuloo yi ci seen biir jóge fu moy seen bannexxi bakkan, yiy xare ci seen yaram? <sup>2</sup> Yeenay xemmem lu ngeen dul am. Yeenay bóome, di iñaane lu ñeneen am, te manuleen koo am. Yeenay xuloo ak a jàppante. Dungeen am, ndax yeena ñaanul. <sup>3</sup> Te su ngeen ñaane, dungeen am, ndax mébét mu bon ma ngeen ñaane, ngir am lu ngeen toppe seen bakkan.

<sup>4</sup> Bokkaalekat yi ngeen doon! Xanaa xamuleen ne xaritoo ak àddina moo di noonoo ak Yàlla? Kon nag ku namma def àddina ab xarit, ab noonu Yàlla ngay doon. <sup>5</sup> Am defe ngeen ne ag neen la Mbind mi indee ne: «Xemmemtéef gu ànd ak fiiraange la Yàlla am ci noo gi dëkk ci nun.» <sup>6</sup> Waaye yiw wu gënatee baawaan la maye. Moom la Mbind mi ne: «Yàlla, ñi réy lay xeex, ñi toroxlu, mu may leen aw yiw\*.»

\* 4:6 4.6 Seetal ci *Kàddu yu Xelu* 3.34.

<sup>7</sup> Kon nag nangul-leen Yàlla, te bañal Seytaane, mu daw, ba sore leen. <sup>8</sup> Jegeleen Yàlla, mu jege leen. Yeen bákkaarkat yi, raxasleen seeni loxo, yeen ñaralekat yi laa ne, setal-leen seen xol. <sup>9</sup> Tiisluleen te ñaawlu bay jooy. Na seeni ree soppiku ay jooy, seen mbég doon njàqare. <sup>10</sup> Toroxluleen fi kanam Boroom bi, mu yékkati leen.

### *Buleen sikkal kenn*

<sup>11</sup> Bokk yi, buleen ñaññante. Ku ñaññ sa mbokk mbaa nga sikkal sa mbokk, yoon wi nga ñaññ, yoon wi nga sikkal. Ku sikkal yoon wi nag doo sàmmkatub yoon wi, sikkalkatub yoon wi nga. <sup>12</sup> Boroom yoon wi, kenn donj la, te mooy àtte; moo mana musle, mbaa mu sàнке. Te yaw miy sikkal sa mbokkum gëmkat sax, yaay kan?

### *Ëllëg, ëllëgu Yàllaa*

<sup>13</sup> Kaayleen nag ma wax leen, yeen ñi naan: «Tey mbaa ëllëg ma dem ba dëkk sàngam, def fa at, julaa fa ba tonu.» <sup>14</sup> Yeen xamuleen sax lu ëllëg di doon? Ana luy seen bakkan? Yeen ngeen di as lay suy feeñ léegi, nes tuut mu ne mes! <sup>15</sup> Li ngeen di wax kay moo di: «Bu soobee Boroom bi, dinanu dund ba def nàngam sii mbaa nàngam see.» <sup>16</sup> Léegi daal dangeena bew bay damoo seeni mébét! Googu damu de, lu bon la. <sup>17</sup> Ku xam lu baax loo wara def te defoo ko nag, bákkaar nga.

## 5

### *Boroom alal bumu tooñ néew-ji-doole*

<sup>1</sup> Kaayleen nag ma wax leen, yeen boroom alal yi, jooyleen te yuuxu, ndax mitit yi leen di dikkal. <sup>2</sup> Seen alal nëb na, seeni yére maxe, <sup>3</sup> seen wurus ak seen xalis xomaag. Xomaag ja dib seede bu leen tuumaal, di xoyom seenu suux ni sawara. Yeena dajale alal ca fan yu mujj ya. <sup>4</sup> Dégluleen! Peyoor, ga ngeen xañ ña gub seen tool, mooy yuuxu noonu. Jàmbati góobkat ya tàbbi na ca noppi Boroom gàngoori xare yi. <sup>5</sup> Dund gu nooy ak bannexxi bakkan daal ngeen nekke ci

kaw suuf, di yaflu ci bésuub rendi. <sup>6</sup> Yeena daan ba reylu aji jub, te jéemula bañ.

*Muñ war na gëmkatub Almasi*

<sup>7</sup> Kon nag bokk yi, muñleen, ba Boroom bi délsi. Seetleen ci beykat biy séentu njariñal meññeef mu jóge fi suuf si. Ma ngay muñ, céebo ba bët wàcc. <sup>8</sup> Yeen itam muñleen te takk seenu fit, ndax bés ba Boroom biy dikk dëgmal na. <sup>9</sup> Bokk yi, buleen di ñaxtoonte, lu ko moy dees na leen daan, te Daan-kat baa ngii taxaw ci bunt bi!

<sup>10</sup> Bokk yi, yonent yi wax ci turu Boroom bi, di dékku aw tiis, ak di muñ, defleen leen seeni royukaay. <sup>11</sup> Xam ngeen ne ñi muñ lanu foog ne ñoom la mbég ñeel. Dégg ngeen na Ayóoba muñe woon, ak muj ga ko Boroom bi jagleel, ndax Boroom bi moo bare yërmande akug ñeewante.

<sup>12</sup> Li ci raw nag bokk yi, moo di buleen giñ, bu muy ci asamaan mbaa ci suuf mbaa ci leneen lu mu mana doon. Na seen waaw di waaw, seen déet di déet, bala ngeena tàbbi ci mbugal.

*Ñaan gu ngëm lal day dal*

<sup>13</sup> Ana ci yeen ku nekk ciw tiis? Na ñaan. Ana ku ci am mbég? Na sàbbaal.

<sup>14</sup> Ana ku wopp ci yeen? Na woo magi mbooloom gëmkat ñi, ñu ñaanal ko, raayaale ko ag diw ci turu Boroom bi.

<sup>15</sup> Ñaan gu ànd ak ngëm day musal ki wopp, ba Boroom bi yékkati ko. Su dee daa bàkkaar, dees na ko jéggal.

<sup>16</sup> Kon nag tuddanteleen seeni bàkkaar tey ñaanalante, ndax ngeen wér. Aji jub ji, ag ñaanam, doole lay dale.

<sup>17</sup> Ilyaas nit la woon ku bindoo ni nun, waaye ba mu saxee ci ñaan ngir mu baña taw, ndox laalul suuf diiru ñetti at ak genn-wáll. <sup>18</sup> Mu dellu ñaan, asamaan taw, suuf meññ meññeefam\*.

<sup>19</sup> Bokk yi, su amee ci yeen ku moy yoonu dëgg, keneen ku ko waññi, <sup>20</sup> xamleen ne ku waññee bàkkaarkat ci yoonu sànkuteem, musal na bakkanam, te faral na ko bàkkaar yu bare.

\* 5:18 5.18 Seetal ci 1.Buur ya 17.1; 18.1, 42-45.

## Bataaxal bu jëkk bi Yàlla may Piyeer mu bind ko

<sup>1</sup> Ci man Piyeer, ndawal Yeesu Almasi la bataaxal bii bawoo, ñeel askan wi Yàlla taamu, te ñu toxuji diiwaani Pont ak Galasi ak Kapados ak Asi ak Bitini\*. <sup>2</sup> Yeen la Yàlla Baay bi ràññee lu jiitu, ci ni mu leen sellale Noo gu Sell gi, ngir ngeen mana déggal Yeesu Almasi, boole ci tooyloo deretam, mu setal leen. Aw yiw ak jàmm ju ne xéew ñeel na leen.

### *Yaakaar juy dund lanu am ci Almasi*

<sup>3</sup> Cant ñeel na Yàlla, sunu Baayu Sang Yeesu Almasi! Moo nu judduwaatal ci yërmandeem ju yaa, ci dooley ndekkitel Yeesu Almasi, ngir may nu yaakaar juy dund. <sup>4</sup> Loolu moo am ngir ab cér bu dul yàqu, du sobewu, du seey, cér bu dence fa asamaan ñeel leen, <sup>5</sup> yeen ñi seen ngëm tax ngeen yiiru ci manoorey Yàlla, mi leen di nége mucc ga mu waajal te di ko feeñal ca bés bu mujj ba.

<sup>6</sup> Loolu bégeleen koo bége, doonte tey ñàkkul ngeen nekke njàqare ab diir, ndax ay nattuy nattu. <sup>7</sup> Yooyu nattu, ni sawara di natte wurus, ni lay natte seen dëggutey ngëm, te ngëm a gën wurus fuuf, nde wurus day jeex. Su ko defee seen ngëm gu dëggu jural leen ag cant, ak daraja ak teraanga, bés bu Yeesu Almasi feeñee. <sup>8</sup> Moom mooy ki ngeen gisul te sopp ko. Tey fi tey gisuleen ko, waaye gëm ngeen ko, ba tax leena bég lool, mbég mu màgg mu làmmiñ manula tudd, <sup>9</sup> ndax yeena ngi jot ci yool bi ngëm di yóotu, te mooy texe.

<sup>10</sup> Googu texe, yonent ya jottli woon waxyub seen yiw wi leen dikkal, niir nañu ko, càambar ko. <sup>11</sup> Gëstu nañu jan jamono, ak yan xew-xew la Noowug Almasi ga nekkoon ci ñoom, tegtale woon. Mooy ba Noo gay seede lu jiitu, coonoy Almasi,

ak ndam ya cay topp. <sup>12</sup> Yonent yooyu, xamalees na leen ne du seen njariñal bopp lañuy liggéeyal xibaar boobu, xanaa yeen. Ñi leen àgge xibaar bi tey ñoo di ñiy waare xibaaru jàmm bi ci dooley Noo gu Sell, gi ñu yebale asamaan, te muy mbir mu malaaka yi sax, noon siiwa nemmiku.

### *Sellal moo war*

<sup>13</sup> Kon nag teewlooleen seen xel, te ànd ak seen sago, te ngeen wékk seen jépp yaakaar ci yiw wa ñu leen di dikke kera bu Yeesu Almasi feeñee. <sup>14</sup> Gannaaw gone yu dégg ndigal ngeen, buleen top-pati seen xemmemtéefi bakkan ya woon, ba ngeen xamulee. <sup>15</sup> Waaye ni ki leen woo selle, yeen itam nangeen selle noonu ci seen mboolem jëfin. <sup>16</sup> Ndax kat bindees na ne: «Sell-leen, ndax man ku Sell laa†.»

<sup>17</sup> Gannaaw nag kiy àtte nit ku nekk ci ay jëfam te amu ci xejj ak seen, Baay ngeen koy wax, sàllooleen koo ragal, seen diirub ngan ci kaw suuf. <sup>18</sup> Xam ngeen ne yëf yuy wéy yu mel ni xaalis mbaa wurus, du moom lees leen jote ci seen dundinu neen wa ngeen donne ca seeni maam, <sup>19</sup> waaye seenug njot moo di deretu Almasi ju jafe, ji taxawe deretu xar mu sikkul, gàkkul. <sup>20</sup> Bu yàgg, ba àddina sosoogul la Yàlla tuddaloon Almasi loolu, waaye léegi ci mujug jamono jii la ko Yàlla feeñal ngir yeen, <sup>21</sup> ñi Almasi tax ngeen gëm Yàlla. Te Yàllaa ko dekkal, may ko ndam, ba tax Yàlla di ki ngeen gëm, yaakaar ko.

<sup>22</sup> Kon nag gannaaw setal ngeen seen xol, ndax dëgg gi ngeen déggal, ba tax ngeen am cofeel gu mucc jinigal, ci bokki gëmkat ñi, nangeen soppantee xol bu set, cofeel gu mat sèkk. <sup>23</sup> Ndax kat dangeena judduwaat, te jiwu wi ngeen judduwaate mooy kàddug Yàlla giy dund te sax dàkk; du jiwu wuy yàqu, waaye mooy jiwu wu dul yàqu muk. <sup>24</sup> Ndax bindees na ne: «Bépp boroom suux, nim ñax la mel, mboolem darajaam mel ni tóor-tóoru àll, ñax ma wow, tóor-tóor ma ruus.

\* **1:1** 1.1 Dafa mel ni, ñi gëm Almasi ci bànni Israyil la wax, te ñu dëkk ci diiwaan yooyu. Juróomi diiwaan yooyu yépp, réew mi ñuy wax Tirki tey, ci lañu bokkoon. † **1:16** 1.16 Seetal ci *Sarxalkat yi* 19.2.

25 Waaye kàddug Boroom bi mooy sax ba fàww†.»  
Kàddu googu moo di xibaaru jàmm bi ñu leen àgge.

## 2

### *Almasi mooy kenug mbooloom gëmkat ñi*

1 Kon nag baleen mboolem xeetu mbon, ak mboolem njoblan, ak jinigal, ak kiñaan, ak mboolem xeetu yaq der.

2 Ni liir buy doora juddu yàkkamtee nàmpe, ni ngeen wara yàkkamtee nàmp soow mu set miy Kàddug Yàlla. Mooy tax ngeen màgg ci seen dundug texe, 3 gannaaw mos ngeen ci mbaaxug Sang bi.

4 Dikkleen ci moom, mooy doj wuy dund. Nit ñee ko beddi moos, waaye Yàllaa ko fal, fonk ko. 5 Te yeen itam yeen ay doji cëslaay yuy dund, doj yi Noo gi tabaxe kërug Yàlla, ñeel liggéeyu carxal gu sell, ngir ngeen di ko jébbal ay sarax yu Noo gi rafetlu, sarax yu Yàlla nangu ndax Yeesu Almasi. 6 Moo waral lii dikk ci Mbind mi:

«Maa ngii di dëj fi Siyon, aw doju doorukaay,  
doju tànnéef wu gànjare.

Wii doj, ku ko wéeroo, doo rus mukk\*.»

7 Kon nag yeen ñi gëm, yeen la gànjar gi ñeel. Waaye ci ñi gëmul, nag:

«Moo di doj wa tabaxkat ya beddi woon, te mu mujj di doju coll wi†.»

8 Te it:

«Mooy doj wuy fakktale,  
di xeer wuy daaneel†.»

Ñoo ko fakkastaloo nde ñoo gëmul kàddu gi, te it loolu la leen dogal ba séddoon.

9 Waaye yeen nag yeen ay giir giy tànnéef, yeenay sarxalkati Buur, yeen ay askan wu sell, yeen ay xeet wi ñu jot, ngir ngeen biral jaloore yu wéet yi ñeel ki leen woo, génnee leen cig léndëm, indi leen ci leeram gu yéeme. 10 Yeen ñi dul woon sax aw xeet, démb, tey yeen ay xeet wi Yàlla ñoñoo§; dajaguleen

woon yërmande, waaye tey daj ngeen yërmande.

### *Liy wàllu gëmkatu Almasi ci àddina*

11 Soppe yi, ay gan ngeen, ay doxandéem ci kaw suuf. Kon nag li ma leen di dénk moo di ngeen moyu xemmentéefi bakkan yiy xeex ak ab xol.

12 Seen dundin ci biir jaambur ñi gëmul, rafetal-leen ko, ba su ñu leen waxaloon ne ay defkati lu bon ngeen itam, seen jëf ju rafet lañuy gis, te moom lañuy sàbbaale Yàlla, kera bésuub dikkam.

### *Déggal-leen njiit yi*

13 Nangul-leen gépp kilifteef gu tege ci àddina ngir Boroom bi; mui buur bu mag bi gëna kawe, 14 mbaa boroom dëkk yi diy ndawam, te mu tabb leen, ngir ñu mbugal ñiy def lu bon, te sargal ñiy def lu baax.

15 Ndax coobarey Yàlla kat moo di ngeen di def lu baax, ba wedamal nit ñu ñàkk bopp ñi xamul dara. 16 Ay gor ngeen, waaye jaami Yàlla ngeen. Kon buleen taafantoo li ngeen diy gor ba def lu bon.

17 Népp nag ngeen di teral; mbooloom gëmkat ñi, soppelen leen; Yàlla, ragal-leen ko; te buur, teral leen ko.

### *Nanu muñ coono, roye ko Almasi*

18 Yeen jaam yi, nangul-leen te weg wegeel gu mat sèkk seeni sang, te du sang yi baax te lewet donj, waaye ñu wex ñi itam ci lañu. 19 Ndax nit ki su séddee Yàlla ab cér, ba tax mu muñ tiis ak coono bu ko yoon tegul, loolu aw yiw la. 20 Muñ ay dóor yu la fekk tooñ, ana lu ciy ndam? Waaye soo muñee coono boo daj ngir lu baax loo def, loolu de aw yiw la fa kanam Yàlla. 21 Ci loolu sax lañu leen woo, ndax Almasi itam sonnal na leen, te moo leen bàyyeel ab royukaay, ngir ngeen jaar ciy tànkam.

22 «Moo bàkkaarul, fenul\*.»

23 Saaga nañu ko te feyuwul, daj na coono te tèkkoowul, waaye boppam la dénk kiy àtte dëgg. 24 «Moom ci boppam moo gàddu sunuy bàkkaar, moo ko tegoo ci yaramu boppam ca bant ba,» ngir nu deeyal bàkkaar te dundal njob; «moom

† 1:25 1.24-25 Seetal ci *Esayi* 40.6, 8. \* 2:6 2.6 Seetal ci *Esayi* 28.16. † 2:7 2.7 Seetal ci *Sabóor* 118.22. † 2:8 2.8 Seetal ci *Esayi* 8.14. § 2:10 2.10 Seetal ci *Ose* 1.6, 9 ak 2.25. \* 2:22 2.22 Seetal ci *Esayi* 53.9. † 2:24 2.24 Seetal ci *Esayi* 53.5.

mooy ki ngeen wére ci ay góomam†.»  
 25 «Yeena réeroon niy xar†,» waaye délsi  
 ngeen tey ci seenub sàmm, seen wat-  
 tukatub xol.

### 3

#### *Jëkkër sang la, jabar di nawle*

1 Naka noonu yeen jigéen ñi, nangul-  
 leen seen jëkkër, ngir jëkkër ju ci nan-  
 guwula gëm kàddu gi it, mana gindiku te  
 wax du ci am yoon, ngir na jabaram di  
 jëfe, 2 ndax day xool ci yeen ak seenug  
 sellal gu ànd ak wegeel.

3 Seen gànjar bumu doon gànjaru biti  
 bu yem ci ay létt yu rafet, ak takkaayi  
 wurus, ak yére yu yànj, 4 waaye nay  
 lu làqoo jëmmu biir, nay gànjar gu dul  
 jeex, te mooy lewetaay akug teey, ndax  
 looloo réy njarte fa Yàlla. 5 Bu jëkkoon  
 loolu moo doon gànjaru jigéen ñu sell ña  
 yaakaaroon Yàlla te nangul seen jëkkër,  
 6 noonu Saarata déggale woon Ibraayma,  
 naan ko «Sang bi». Yeen jigéen ñi nag,  
 yeen ay doomi Saarata, li feek yeena ngi  
 def lu baax te bañ cee ragal ku leen xupp.

7 Naka noonu yeen góor ñi, bàyyileen  
 xel ni ngeen dëkke ak seeni jabar, tey  
 sóoraale néew dooley jigéen. Séddleen  
 leen teraangay nawle, gannaaw yeena  
 bokk wenn yiw wi leen may ngeen dund  
 dëgg. Su ko defee dara du gállankoor  
 seeni ñaan.

#### *Soppanteleen te saxoo baax*

8 Li may ténke nag moo di yeen ñépp,  
 ngeen mànkoo, yégante, bëggante ni mu  
 ware ay bokki gëmkat, baaxeenteleen te  
 woyof. 9 Lu bon, buleen ko feye lu bon; ay  
 saaga it, buleen ko feye ay saaga. Xanaa  
 ngeen ñaanal leen, feye leen ko, ndax  
 ci loolu lees leen woo, ngir ngeen jagoo  
 barke. 10 Ndax kat:  
 «Ku bëgga bége bakkanam,  
 fekke bés bu rafet,  
 na làmmiñam daw lu aay,  
 dawi fen.

11 Na daggook lu bon, tey def lu baax,  
 na sàkku jàmm, saxoo ko.

12 Ndax ay gët la Boroom bi

ne jàkk aji jub ñi,  
 te ay noppam la dékk seeni ñaan,  
 waaye Boroom bi, kanamam lay téjal  
 ñiy def lu bon\*.»

#### *Na seenug njub waral seen coono*

13 Te it su ngeen dee ñu njaxlaf ci def lu  
 baax, ana ku leen di def lu bon? 14 Te sax  
 su ngeen doon jànkoonteeki coono ndax  
 seenug njub, ndokklee yeen. Buleen am  
 jenn tiitaange ci seeni xuppe, te buleen  
 jaaxle. 15 Waaye Sang Almasi ngeen di  
 sellal ci seen xol, te waajal nu ngeen di  
 tontoo ku leen laaj lu jëm ci yaakaar ji  
 ngeen am. 16 Waaye nay tont lu rafet  
 te ànd akub yar. Saxooleen di jëfe li  
 dalal seenum xel, ba mbir ma ñu leen  
 di baatali, ñooñuy ñaññ seen dundin wu  
 rafet wi leen Almasi manloo, gacce rekk  
 lañuy jële ca mbir ma ñu leen di baatali.

17 Coono yu la jëf ju baax yóbbe kat,  
 ndegam da di coobarey Yàlla, moo gën  
 coono yu la jëf ju bon yóbbe. 18 Almasi  
 itam benn yoon la daj coono ndax  
 bàkkaari nit ñi, moom miy ki jub moo  
 leen ko defal yeen ñi jubadi, ngir yób-  
 bu leen fa Yàlla; moom lañu rey yaramu  
 suuxam, waaye moo dundaat ci dooley  
 Noo gi. 19 Ci dooley Noo googu la deme ba  
 waari bindeef ya seeni fit tëje†, 20 ñooña  
 gëmadi woon bu yàgg, jant ya Yállay  
 muñ, di négandiku, te Nóoyin di yett  
 gaal, ga lim bu néew, juróom ñett, mucce  
 woon ca ndox ma. 21 Ndox mooma di  
 misaalub sóobu gi leen musal tey; du  
 sóobu guy dindi tërub yaram, waaye  
 moom ngeen di wuyoo wooteb Yàlla ci xel  
 mu dal, te li leen di musal mooy ndekkitel  
 Yeesu Almasi, 22 mi yéeg asamaan, toog fa  
 ndijooru Yàlla, ki malaaka yeek boroom  
 sañ-sañ yeek boroom doole yi, bokk nekk  
 cig curgaam.

### 4

#### *Nekkal-leen Yàlla*

1 Gannaaw Almasi nag moo daj coonob  
 yaramam, yeen itam gannaayooleen  
 boobu yéene, ndaxte ku daj coonob  
 yaram, tàggoo naak bàkkaar, 2 ngir

† 2:25 2.25 Seetal ci *Esayi* 53.6. \* 3:12 3.12 Seetal ci *Sabóor* 34.12-16. † 3:19 3.19 Seetal it ci 2.Piyeer 2.4 ak Yudd 1.6.



bañatee topp xemmentéefi bakkan, xanaa di topp coobarey Yàlla, diir bi ko dese ci kaw suuf. <sup>3</sup> Ndax démb kat yàgg ngeena def coobarey xeet yi xamul Yàlla, ci ay ñaawtéef, ak topp seen bakkan. Dangeen daa màndi ak a xawaare, dëkke naan biiñ, di jaamu tuur yu seexluwu, waaye na fi yem nag. <sup>4</sup> Ña ngeen ci daa àndal ñoo waaru tey, ba di leen sosol, ndax li ngeen àndatul ak ñoom, daw wuti googu yàqute gu af, <sup>5</sup> waaye ñoo koy layoo ak ki nara àtte ñiy dund, ak ñi dee. <sup>6</sup> Li ñu ci jublu moo di, ñi dee tey sax, ñu àgge leen xibaaru jàmm bi, ngir bu ñu leen àttee àtteb nit ñu seen yaramu suux wara dee sax, du tee ñuy dund tey, ndax Noowug Yàlla.

### *Bennoo moo war gëmkat ñi*

<sup>7</sup> Te itam mujug lépp dëgmal na; kon nag jiital-leen seenum xel, te ànd ak seen sago, ngir ngeen man di ñaan. <sup>8</sup> Waaye li ci raw mooy soppanteleen cofeel gu mat sëkk, ndax cofeel, bàkkaar yu bare lay far. <sup>9</sup> Ganalanteleen te baña jàmbat. <sup>10</sup> Kenn ku ci nekk, may gi ko aw yiw jagleel, na ko taxawoo ñépp. Noonu ngeen di doone ay saytukat yu baax yu yiwu Yàlla wu yaa. <sup>11</sup> Kuy wax, na waxe nu mu jottlee kàddug Yàlla. Kuy taxawoo, na taxawoo ci dooley Yàlla, ngir màggug Yàlla feeñe ci lépp, ndax Yeesu Almasi, mi yelloo daraja ak kàttan, tey ak èllëg ba fàww. Amiin.

### *Bu ngeen di sonn, na Almasi tax*

<sup>12</sup> Soppe yi, tàngooru nattu bi ngeen nekke nii, bumu leen jaaxal ba mel ni lu jaaduwul moo leen dikkal. <sup>13</sup> Waaye noonu ngeen séddoo ci coonoy Almasi, bégeleen ko, ngir bu ndamam feeñee, ngeen gënatee bég. <sup>14</sup> Su ñu leen jànee sax ndax turu Almasi, ndokklee yeen, ndax Noo gu darajawu gi, Noowug Yàlla moo wàcc ci yeen. <sup>15</sup> Waaye rey nit, mbaa sàcc, mbaa def lu bon, mbaa dugg ci yëfi jaambur, bumu waral coonoy kenn ci yeen. <sup>16</sup> Ku sonn ndax li muy gëmkatub Almasi nag, bumu ci rus, na sàbbaal Yàlla kay, ci woowu tur. <sup>17</sup> Ndax kat

tey la àtte bi wara tàmbalee ci waa kër Yàlla. Ndegam ci nun lay tàmbalee nag, ñi gëm mul xibaaru jàmm bu Yàlla, ana fu ñu jëm? <sup>18</sup> Te it:

«Aji jub ji, su ko mucc jafee, yéefar bi, bàkkaarkat bi moom, fu mu jëm\*?»

<sup>19</sup> Kon nag ñiy sonn te coobarey Yàlla tax, nañu dénk seen bopp Yàlla, Sàkk-kat bu wóor bi, te ñuy saxoo def lu baax.

## 5

### *Sàmmal-leen Yàlla géttam*

<sup>1</sup> Mag ñi ci seen biir di seeni njiit nag, dama leen di ñaax, man miy njiit ni ñoom, di seede coonoy Almasi, te di boroom cér ci ndam li nara feeñ. <sup>2</sup> Foral-leen gétt gi ñu leen dénk. Sàmmleem ko, te bañ koo defe ñàkk peXe, xanaa xol bu tàlli, ni ko Yàlla bégge. Buleen ko defe it koppartuy kese, waaye farluleen ci. <sup>3</sup> Buleen jaay kilifteef ñi ñu leen dénk, waaye doonleem ay royukaay ci jur gi, <sup>4</sup> ba bu Sàmm bu mag bi feeñee, ngeen jot kaalag daraja gu dul furi.

<sup>5</sup> Naka noonu yeen ndaw ñi, nangul-leen magi mbooloom gëmkat ñi. Yeen ñépp nag toroxluleen ci seenug jëflante, ndax:

«Yàlla, ñi réy lay xeex,

ñi toroxlu, mu may leen aw yiw\*.»

<sup>6</sup> Ci suufu loxol Yàlla bi am doole la leen Yàlla di yékkatee bu jotee, su ngeen toroxloo, <sup>7</sup> ci ni ngeen di sippikoo ci kawam, mboolem seenu tiis, nde mooy ki leen tiisoo.

<sup>8</sup> Àndleen ak sago te teewlu! Seenub noon Tuumaalkat bi, mu ngi ñar ni gaynde, tey wër, di rébb ku mu warax.

<sup>9</sup> Pastéefu ngëm ngeen di xeexe te xam ne benn coono bi ngeen di daj, moom la mboolem seen bokki gëmkat yi ci àddina di daj. <sup>10</sup> Te gannaaw bu ngeen sonnee ab diir, Yàlla miy boroom wépp yiw te woo leen ci ndamam lu sax dàkk ndax Almasi, moom ci boppam moo leen di jagal, dooleel leen, dëgéral leen ba ngeen dëju. <sup>11</sup> Moom la kàttan ñeel ba fàww. Amiin.

\* 4:18 4.18 Seetal ci *Kàddu yu Xelu* 11.31.

\* 5:5 5.5 Seetal ci *Kàddu yu Xelu* 3.34.

*Piyeer tàggoon na*

<sup>12</sup> Silwan†, miy mbokkum gëmkaat mu wóor, ci sama xalaat, ci ndimbalam laa leen bind kàddu yu gàtt yii, di leen ñaax aka seedeel ne lii kat moo di yiwu Yàlla dëgg. Taxawleen ci bu dëgër.

<sup>13</sup> Ab nuyoo ñeel na leen, tukkee ca mbooloom gëmkaat ma ca Babilon‡ te di ñu ñu taamu ni yeen, tukkee itam ci sama doom Màrk. <sup>14</sup> Nuyooleen te foonantee ag cofeel. Jàmm ñeel na mboolem yeen ñi gëm Almasi.

---

† **5:12** 5.12 Silwan mooy turu waa Room, wi Gereg yi naan Silas. Seetal *Jéf ya* 15.22, 40. ‡ **5:13** 5.13 Babilon ci waxin mooy Room rekk.

## Ñaareelu bataaxal bi Yàlla may Piyeer mu bind ko

<sup>1</sup> Ci man Simon Piyeer\*, miy jaamub Yeesu Almasi, di ndawam, ci man la bataaxal bii bawoo, ñeel ñi ñu may ngëm gu njég ga réye ni sunu gos, ci sunu njekku Yàlla, Musalkat bi Yeesu Almasi. <sup>2</sup> Aw yiw ak jàmm baawaan na, ñeel leen, ndax xam gu ngeen xam Yàlla, ak sunu Sang Yeesu.

### *Dëggal-leen wooteb Yàlla*

<sup>3</sup> Su dee nag mboolem lu dund gu ag jullite laaj, Yàllaa nu ko maye dooleem, ba mu nu xamalee ne darajay boppam, ak jalooreem ju wéet lanu wooye. <sup>4</sup> Ci jooju daraja, ak jooju jaloore ju wéet lees nu baaxee ay dige yu réy njég te màgg. Yooyu dige nag, bu ngeen ci jotee, ci ngeen di séddu ci jikkoy Yàlla, gannaaw bu ngeen muccee ci yàqutey àddina, gi xemmemtéefu bakkan waral.

<sup>5</sup> Loolu ci boppam wara tax ngeen def lu ngeen man, ba dolli ci seen ngëm, njàmbaar; seen njàmbaar, ngeen dolli ci xam-xam; <sup>6</sup> seen xam-xam, ngeen dolli ci moom seen bakkan; moom seen bakkan, ngeen dolli ci ag muñ; seenug muñ, ngeen dolli ci ag njullite; <sup>7</sup> seenug njullite, ngeen dolli ci bëgg seen bokki gëmkat; bëgg seen bokki gëmkat, ngeen dolli ci cofeel. <sup>8</sup> Ndax yooyu jikko kat su ngeen ko amee, ba mu law, dungeen yaafus, dungeen ñàkk njariñ nu ngeen xame Sang Yeesu Almasi. <sup>9</sup> Waaye yii jikko, ku ko ñàkk, daa fekk mu gàtt gis-gis ba far gumba, te fàtte ne dees koo fóotoon ba mu set, teqlikook bàkkaari démbam.

<sup>10</sup> Kon nag bokk yi, nangeen gënatee def lu ngeen man ba dëggal woote bi ñu leen woo, ak taamu gi ñu leen taamu. Su ngeen ko defee kat, dungeen daanu muk. <sup>11</sup> Noonu lees leen di ubbile bunt bu yaa bu ngeen di tàbbee ca nguur

gu sax gay sunu moomeelu Sang, sunu Musalkat, Yeesu Almasi.

### *Yàlla waxyul na yonent yi*

<sup>12</sup> Moo waral ma fas yéene di leen dëkke fàttli loolu, doonte xas ngeen koo xam, ba tax ngeen taxaw bu dëgër ci dëgg gi leen nuyusi. <sup>13</sup> Li jaadu ci sama gis-gis moo di, li feek may màkkaanoo aw suux, dinaa leen ko fàttli, ngir soññ leen. <sup>14</sup> Ndax damaa leer, ni ma ko sunu Boroom Yeesu Almasi leeralale, bés bi may summi sama màkkaanu suux bii dëgmal na. <sup>15</sup> Waaye dinaa def sama kemkàttan, ba fu ngeen tollu, di fàttliku mbir yooyu, gannaaw bu ma dëddoo.

<sup>16</sup> Du ay léeb yu xel mu xareñ fent lanu leen xamale woon sunu manoorey Boroom Yeesu Almasi, ak na muy dikke, waaye noo teewe mäggaayam. <sup>17</sup> Ndax kat moo nangoo ci Yàlla Baay bi, teraanga ak daraja, ba ko baat ba jibalee, bawoo fa Boroom daraja ju yéeme ja ne: «Kii moo di Sama Doom, sama Soppe; ci moom laa ame bänneex.†» <sup>18</sup> Baat booba jóge asamaan, moom lanu dëgg, ba nu nekkee ak moom ca tund wu sell wa.

<sup>19</sup> Rax ci dolli nu ngeek waxi yonent yi, muy wax ju wóor ju jara gëm, te yeena yey teewlu waxi yonent yi, ni ñuy teewloo ceeñeeru làmp bu tàkke biir lëndëm, ba kera fajar di xar, ba biddiiwu njël feqal seen xol. <sup>20</sup> Waaye li ngeen wara jékka xam moo di amul ci Mbind mi, benn waxyu bu yonent ba ko waxe, firee xelum boppam. <sup>21</sup> Ndax kat du genn kàddug waxyu gu masa soqikoo ci coobarey nit, waaye ci xiirtalub Noo gu Sell gi la aw nit daan waxe waxyu bu bawoo fa Yàlla.

## 2

### *Sànkute ñeel na jànglekati caaxaan*

<sup>1</sup> Waaye na mu ame woon ci askanu bànni Israyil ay yonenti caaxaan, ni lay ame ci seen biir ay sèriñi caaxaan yuy sërxaal ay àlluway sànkute yuy weddi sax Sang bi leen jot, ba yóbbe seen bopp sànkute ju bette. <sup>2</sup> Ñu baree leen di topp ci seen nawtéef gu èpp, ba tax

\* 1:1 1.1 Turu Simon ci làkku gereg mooy Simeyon ci làkku ebrë. † 1:17 1.17 Seetal ci Macë 17.5.

yoonu dëgg gi tegoo ay saaga ndax ñoom.  
<sup>3</sup> Seenug bégge lañuy ràbbe ay kàddu yu ñu leen di koptartoo. Ñooñu la seenub daan yàgga yoot, te seen sànkute nelawul.

<sup>4</sup> Ndax Yàlla kat, ndegam moo jéggalul malaaka ya bàkkaaroon, xanaa tàbbal leen kàmbe mbugal, wacce leen ay jéngi biir lëndëm gu ne kërueus, di leen nége àtte ba; <sup>5</sup> ndegam àddina sa woon it Yàlla jéggalu ko, xanaa Nóoyin ma daan waare njekk tey kenn ci juróom ñetti nit ña mu musal, ba mu walalee mbënn ma ci àddinay nit ñu gëmadi; <sup>6</sup> ndegam dëkk ya ñuy wax Sodom ak Gomor it, la mbugale seenub taste, def leen ab dóom, ba def leen misaal mu ñeel aji gëmadiy èllëg, <sup>7</sup> te mennum Lóot aji jub ji, di kenn ki mu musal, te mu sonnoon lool, ndax ñaawtéefi nit ñu dëng ñooñu, <sup>8</sup> ndax Lóot aji jub ja dëkkoon ci seen biir kat, la mu nekke woon ci biir xolu njubam, moo di naqarlu, ndax jëfi ndëngte ya muy gis, di ko dëgg, bés bu nekk. <sup>9</sup> Su demee noonu kay, kon Boroom bi def loolu lépp, xam na nu muy musale nit ñu jullite cib nattu, ak nu muy xaare nit ñu dëng ñi, ngir seen mbugal kera bésu àtte ba.

<sup>10</sup> Rawatina nag boroom xemmemtéefi yàqute, yi topp seen bakkan te faalewuñu genn kilifteef. Ñu fétteeral lañu te bew, ragaluñoo saaga sax boroom daraja yu kawé ya fa asamaan. <sup>11</sup> Moona malaaka yi èpp doole ak manoore sax, ñemewuñoo yékkati kàdduy saaga yu ñuy sikke yooyu boroom daraja, fa kanam Boroom bi. <sup>12</sup> Waaye ñoom ñooñu mel ni mala yu amul xel, seen yég-yégi jud-duwaale jiital leen, te li leen taxa juddu di jàpp leen, rey donḡ, ñooy saaga lu ñu xamul. Dees na leen rey ni ñuy reye ay mala. <sup>13</sup> Loraange lees leen di feye loraange gi ñu sabab.

Seen mbégte mooy xawaarey bëccëg ndarakàmm. Ñooñoo diy gàkk, aki sikk, ndax seen teewaay gacce la ci seen biir yeen, bu ñuy bokk ak yeen bernde, te ca lañuy bannexoo ay nax. <sup>14</sup> Seeni

gët xoolul lu moy ku ñu jaalool, te duñu bàkkaar ba regg mukk; ku dëgërul, ñu yóbbaaale la. Ñooñu la seenub xol tàggatu ci ag bégge, mii njurum alkànde! <sup>15</sup> Ba ñu wàcce yoon wu jub wi lañu lajj topp yoonu Balaam, doomu Bosor\*, mi soppoon peyooru njubadi. <sup>16</sup> Waaye Balaam, ag tooñam tax na ñu femmu ko; ab waruwaay manula wax, te moo waxe baatub nit†, ba dakkal jëfi ndofi yonent booba.

<sup>17</sup> Ñooñooy teen yu dëy, ñooy xiin wu callweer tas, te lëndëm gu fatt taraj di seenub añ. <sup>18</sup> Kàddu yu réy yu tekkiwul dara lañuy naxee, di fàbbee xemmemtéefi bakkan yu jéggi dayo, ay nit ñu yàggula rëcce ci ñeneen ñu nekk cig réer. <sup>19</sup> Ag ngoreel lañu leen di dig, te ñoom ci seen bopp, ay jaami yàqute lañu, nde lu la man, yaa dib jaamam.

<sup>20</sup> Ndax kat gannaaw bu ñu xamee bu baax sunu Boroom, sunu Musalkat Yeesu Almasi, ba rëcc sobey àddina, bu ñu ca sóobuwaatee ba mu man leen, su boobaa seenug muj moo yées seenug njàlbéen. <sup>21</sup> Ndax kat ñàkkoona xam yoonu njub wi sax moo doon gën ci ñoom, xam ko ba noppi, dëddu ndigal lu sell la ñu leen ca àgge woon. <sup>22</sup> Li léeb wii wax te muy dëgg, moo leen dikkal: «Xaj waccu, lekkaat ko; te cangaayu mbaam-xuux, teewu koo xalangootee poto-poto.»

### 3

#### *Bésu Boroom bi du jaas*

<sup>1</sup> Soppe yi, sama ñaareelu bataaxal a ngi nii, te bu ci nekk am na lu ma leen ci fàttli, ngir xiirtal leen ci xalaatin yu set, <sup>2</sup> ba ngeen fàttliku kàddu ya yonent yu sell ya jottli woon, ak sunu ndigalu Boroom, sunu musalkat, ndigal la jottlikoo ca ndaw ya ñu yebaloon ci yeen.

<sup>3</sup> Li ngeen wara jékka xam moo di bés yu mujj ya, ay niti ñaawlekat ay dikk, di nit ñu topp seen bakkan. <sup>4</sup> Ñooñoonaan: «Ki dige woona ñëw, ana mu? Ba maam ya nelawee de yàgg na, waaye

\* **2:15** 2.15 Bosor mooy Bewor ci làkku Yawut yi; Gereg yi ñoo koy wax Bosor. † **2:16** 2.16 Seetal ci *Màndin ma* 22.

lépp a ngi wéye na woon ca njàlbéenu àddina.» <sup>5</sup> Li ñuy fàtte te di ko tey moo di ci kàddug Yàlla la asamaan nekke bu yàgg, te ci kàddoom la suuf bindoo ci ndox, ba génne ci ndox. <sup>6</sup> Te ci yooyii la àddina sa woon sànkoo woon ca mbënn ma. <sup>7</sup> Waaye asamaanu tey jii, ak suuf, genn kàddug Yàlla googu moo leen yeb cib denc, ñeel sawara, kera bésuub àtte ba, bésu sànkuteb aji gëmadi ñi.

<sup>8</sup> Soppe yi, lenn a ngii, buleen ko umple: benn bés ni junniy at la mel ci Boroom bi; junniy at mel ni benn bés ci moom. <sup>9</sup> Du caageenu yeexe gu Boroom bi yeexe dige ba, noonu ko ñenn ñi fooge ag yeex. Yeen la muñal kay, ndax buggul kenn sàнку, xanaa ñépp dem ba tuub. <sup>10</sup> Waaye bésu Boroom bi nib sàcc lay dikke. Ca la asamaan yi di dëddoo ci biir coow lu réy, lu ko sosoon seey ndax tàng, suuf ak jëf ju ci biiram xoyomu.

<sup>11</sup> Gannaaw loolu lépp, noonu lay seeye nag, xamleen bu baax li leen war! Jëfin wu sell akug njullite, <sup>12</sup> ak yàkkamti bésu Yàlla ba, di jëfe li koy taxa gaawa dikk, ba asamaan yi lakk ba jeex, lu ca jëmmu lakk ba seey. <sup>13</sup> Waaye asamaan su bees ak suuf su bees sa njub di dëkki bu keroogee, moom lanuy séentu, na nu ñu ko dige woon.

<sup>14</sup> Kon nag soppe yi, li feek ngeen di séentu loolu, defleen seen kem-kàttan, ba bésuub keroog fekk leen ci jàmm, te ngeen baña am benn gàkk, mbaa sikk ci gis-gisu Yàlla. <sup>15</sup> Sunu Boroom nag, ag muñam, jàppleen ne moo dig muc, noonee leen ko sunu soppe, mbokk mi Póol binde woon ci xel mu rafet mi ñu ko baaxe. <sup>16</sup> Loolu la bind ci mboolem bataaxal yi mu waxe ci moomu mbir, te mu am ci ponk yu jafee xam, ba ñi dese am njàng te seenum xel toogadi, di walbati waxam, ni ñuy def ak yeneen bind yépp, ba far sànk seen bopp.

<sup>17</sup> Kon nag yeen soppe yi, gannaaw xam ngeen loolu ba noppi, wattuleen bala leena réeraangey moykati yoon yi yóbbaale, ba yolomal seenub taxawaay. <sup>18</sup> Waaye mággleen ci wàllu yiwu sunu Boroom, sunu Musalkat Yeesu Almasi, ak ci wàllu xam-xam bu ngeen ko xam.

Ndam ñeel na ko tey, ba kera bés bu sax dàkk. Amiin.

## Bataaxal bi Yàlla may Yudd mu bind ko

<sup>1</sup> Ci man Yudd miy jaamub Yeesu Almasi, di rakku Yanqóoba, ci man la bataaxal bii bawoo, ñeel leen yeen ñi ñu woo, yeen ñi Yàlla Baay bi sopp, te sàmmal leen Yeesu Almasi. <sup>2</sup> Yërmande ak jàmm ak cofeel baawaan na, ñeel leen.

### *Weddi Yàlla amul ag muj*

<sup>3</sup> Soppe yi, yàkkamti woon naa leena bind ci mbirum mucc gi nu bokk, waaye fàww ma bind leen, ngir ñaax leen ci xeexal yoonu ngëm, wi Yàlla xasa dénk ñu sell ñi, benn yoon ba fàww. <sup>4</sup> Ndaxte ñenn a ngi ñu ñu yàgga bind seenub àtte, te ñoo yoxoosu ci seen biir, di ñu ñeme Yàlla; ñooy taafantoo yiwu Yàlla ngir yoonal ag yàqute, di weddi Buur biy kenn, te di sunu Boroom Yeesu Almasi.

<sup>5</sup> Doonte xam ngeen loolu lépp ba noppi, dama leen di fàttli rekk ne Boroom bi moo jékka musal ñoñam, génne leen réewum Misra, te gannaaw gi moo raafal ña gëmul woon ca ñoom. <sup>6</sup> Te it malaaka ya yemul woon ca daraja ja ñu amoon, xanaa wacc seen dëkkuwaayu bopp, Yàlla moo leen denc ci lëndëm gu ne këruus, yeewe leen buum yu dul deñ, ngir àtteb bés bu mag ba. <sup>7</sup> Naka noonu itam Sodom ak Gomor, ak dëkk ya leen wër, ñoo yebu woon ci powum séy, ak jaxasoo gu woroo ak bindub judduwaale, ba ñu def leen misaal, ñeel ña nara tegoo mbugalum sawara wu sax dàkk.

<sup>8</sup> Géntkat yii itam noonu rekk lañuy sobeele seen yaramu bopp, boole ci di sofental kilifteef, ak di saaga boroom daraja ya fa asamaan. <sup>9</sup> Moonte Mikayel, may kilifag malaaka sax, ba muy xëccoo ak Seytaane néewub Musaa, di wàqante ak Seytaane, taxul mu ñeme woon koo sikk ba boole ciy saaga. Da ko ne rekk: «Yal na la Boroom bi mbugal!» <sup>10</sup> Waaye nit ñii de, lu ñu xamul lañuy saaga, te

xam-xam yi leen seen bindu judduwaale xamal, ni ay rabi àll di xame, ci lañuy far yàqoo.

<sup>11</sup> Ngalla ñii! Ñoo jaare yoonu Kayin; ñoo lajj, topp Balaam cig réeram ngir ag peyoor; ñoo diiñat ba sànkú ni Kore\*.

<sup>12</sup> Ñooñooy gakkal seen jataayu lekk yi gëmkat ñiy bokk, di ñóox te amuñu ci jenn jom; ñooy xiin yu naaxsaay yu ngelaw li yóbbu; ñooy garab yu dee ñaari yoon, du meññ waxtoom, reen ya buddiku. <sup>13</sup> Ñooy gannaxi géej gu sàmbaraax, di gëq seen puuriti gacce; ñooy biddiww yu fàq di taxawaalu, te lëndëm gu ne këruus di cér bu ñu leen sédde ba fàww.

<sup>14</sup> Enog†, juróom ñaareelu maam ma gannaaw Aadama, ñooñu la jottli woon waxyu bu leen dal, ne: «Boroom baa ngii dikk, ànd ak ay junniy junneem ñu sell, <sup>15</sup> ngir àtte ñépp, ba tiiñal mboolem yéefar yi, ndax mboolem nu yéefare ni ñu jéfe seen jéfi yéefar, ak mboolem kàddu yu ñaaw yi bàkkaarkati yéefar yi teg cib deram.» <sup>16</sup> Ñooñooy di ñaxtu ak a jàmbat, te topp seen bakkan; kàdduy damu yu réy ay jibe seen gëmmiñ, te ñooy jay ñi ñu yaakaare njariñ.

### *Góor-góorluleen*

<sup>17</sup> Waaye yeen samay soppe, fàttlikuleen la ndawi sunu Boroom Yeesu Almasi waxoon lu jiitu. <sup>18</sup> Ñu ne leen: «Mujug jamono, dina am ay ñaawlekat yu topp seen bakkan, wéye seen kéefar.»

<sup>19</sup> Ñooñu ñooy féewalekat yi, ñoo topp seen bindu judduwaale, te Noowug Yàlla nekkul ci ñoom. <sup>20</sup> Waaye yeen samay soppe, sampuleen ba dëgër ci seen yoonu ngëm wu sell wee sell, te ngeen di ñaane ci Noo gu Sell gi. <sup>21</sup> Fexeleen ba des ci biir cofeelu Yàlla, tey séentu sunu yërmandey Boroom Yeesu Almasi, ngir ag texe gu sax dàkk. <sup>22</sup> Ñiy nàttable, ñeewanteleen leen, <sup>23</sup> ñii ngeen wallu leen, foqatee leen ci sawara, ña ca des, ngeen yërëm leen yërmande ju ànd akug ragal, ba

\* **1:11** 1.11 Kayin: seetal ci *Njàlbéen ga* 4.8. Balaam: *Màndiñ ma* 22.7-35; 31.16. Kore: *Màndiñ ma* 16. † **1:14** 1.14 Enog: seetal ci *Njàlbéen ga* 5.21-24.

far seexlu ab turki bu seen yaram sobeel  
ndax seeni bàkkaar.

*Cant ñeel na Yàlla*

<sup>24</sup> Ki leen mana aar ci bépp jéll, ba  
taxawal leen fa muy teewejee darajaam,  
te fekk leen ñàkk sikk, seen mbég mat  
sëkk, <sup>25</sup> Yàlla miy kenn, sunu Musalkat,  
ci sunu ndimbalal Sang Yeesu Almasi,  
daraja ak màggaay ak kàttan ak sañ-sañ  
ñeel na ko, démb ak tey ak ëllég, ba  
fàww! Amiin.

## Kàdduy Waxyoo ngi, ñeel Yowaan ci biir Peeñum Almasi Yeesu

### *Ubbite gi*

<sup>1</sup> Lii peeñum Yeesu Almasi la, mu ko Yàlla jox ngir mu won ay jaamam yenn xew-xew yu dëgmal. Malaakaam la yebal ci Yowaan ngir xamle ko. <sup>2</sup> Yowaan moo seede mboolem li mu gis, te mu jëm ci kàddug Yàlla ak seedes Yeesu Almasi. <sup>3</sup> Ndokklee képp ku jàng ak mboolem ñi déglu yii kàdduy waxyu, tey sàmm li ñu ci bind, ndaxte waxtu wi jege na.

### *Ab nuyoo ñeel na juróom ñaari mboolooy gëmkat*

<sup>4</sup> Lii mu ngi tukkee ci man Yowaan, ñeel juróom ñaari mboolooy gëmkat ña ca diiwaanu Asi. Na leen yiw ak jamm ñeel, tukkee fa Ki masa Nekk, Ki Nekk, di Kiy Dikk, tukkee it fa boroom juróom ñaari noo ya\* fa kanam ngànguneem†, <sup>5</sup> tukkee itam fa Yeesu Almasi, seede bu wóor bi, moom taaw bi‡, ki jékka dekki, jóge ci ñi dee, di kilifay buuri kaw suuf.

Moom mi nu sopp, yiwee nu deretam, ba nu teqlikook kilifteefu sunuy bàkkaar, <sup>6</sup> ba noppi def nu nuy askanu sarxalkati Buur Yàlla Baayam§, na ko daraja ak kàttan ñeel tey ak èllëg ba fàww. Amiin. <sup>7</sup> Mu ngoogu di dikk, indaale niir yi, te ñépp a koy teg bët, ba ca ña ko jamoon sax, te giiri kaw suuf yépp ay jooy ndax moom. Noonu la moos. Amiin.

<sup>8</sup> «Man, maay Alfa, di Omega\*», la Boroom bi Yàlla wax, moom Ki masa Nekk, Ki Nekk, di Kiy Dikk èllëg, te di Aji Man ji.

### *Yowaan am na peeñu ca dunu Patmos*

\* **1:4** 1.4 juróom ñaari noo ya: seetal ci 4.5 ak 5.6. † **1:4** 1.4 ngàngune ma mooy fa buur biy toog. ‡ **1:5** 1.5 taaw bi: taaw mooy ki jékka juddu, waaye ab juddu taxul ñuy wax fii. Li Yeesu Almasi jékka dekki ndekkite lu dee toppatul moo tax ñuy wax. Mooy taaw ci kaw darajaam ndax moo sut ñépp, yilif lépp luy mbindeef, te ci darajaam la ñépp di dekke. § **1:6** 1.6 Baayam: seetal ci *Luug* 3.23, 38. \* **1:8** 1.8 Alfa, Omega: ci lakku gereg, alfa moo jékk ci araf yi, omega mujj ci. Kuy Alfa ak Omega nag moo jékk, moo mujj. † **1:13** 1.13 Seetal ci *Dañeel* 7.13.

<sup>9</sup> Man Yowaan seen mbokk, mi séddook yeen nattu ak barkeb nguurug Yàlla, ak muñ gi ci Yeesu, maa nga woon fa ñu ma toxaloon, ca dun ba ñuy wax Patmos. Li ko waral di sama waare ci kàddug Yàlla ak seedeel Yeesu. <sup>10</sup> Maa nekkoon ci biir Noowug Yàlla benn bésu Sang bi, ma dégg ci sama gannaaw baat bu xumb nig liit. <sup>11</sup> Mu ne: «Mboolem loo gis, bind ko cib téere, nga yónnee ko juróom ñaari mboolooy gëmkat ña ca dëkk ya ñuy wax Efes ak Samirin ak Pergam ak Catir ak Sàrd ak Filadelfi ak Lawdise.»

<sup>12</sup> Naka laa geestu, di seet kuy wax ak man, ma daldi gis juróom ñaari tegukaayi làmp yu wurus. <sup>13</sup> Ca digg tegukaayi làmp ya, jëmm juy nirook nit† a fa nekk. Ma nga sol mbubb mu tollu ci ndëgguy tànk yi, takkoo ngañaayal wurus ci dënn bi. <sup>14</sup> Kawaru bopp baa nga weex tàll, gët ya di tàkk ni sawara, <sup>15</sup> tànk ya mel ni xàñar bu yànj bu ñu xelli, baat bay riir ni gannaxi géej. <sup>16</sup> Ma nga yor ca loxol ndijooram juróom ñaari biddiww, ab saamaru ñaari ñawka bu ñaw di lange ca gémmin ga, xar-kanam baa nga leer nàññ ni jantub njolloor.

<sup>17</sup> Naka laa ko gis, ne dàll daanu ci ay tànkam ni ku dee. Mu teg ma loxol ndijooram, ne ma: «Bul tiit. Maay Ki Jékk, di Ki Mujj. <sup>18</sup> Maay Kiy Dund, maa dee woon, maay dund nii tey ak èllëg ba fàww te maa yor caabiy dee ak njaniww. <sup>19</sup> Kon nag bindal li nga gis: Li am nii tey ak itam liy ñew gannaaw lii. <sup>20</sup> Kumpa gi ci juróom ñaari biddiww yi nga gis ci sama loxol ndijoor, ak juróom ñaari tegukaayi làmp yu wurus yi, li muy firi mooy: juróom ñaari biddiww yi ñoo di malaakay juróom ñaari mboolooy gëmkat ñi; juróom ñaari tegukaayi làmp yi ñoo di juróom ñaari mbooloo yi.»

## 2

### *Bindees na waa Efes*



<sup>1</sup> «Malaakam mbooloom gëmkat ña ca Efes, bind ko ne ko:

«Lii moo di kàdduy Ki yor juróom ñaari biddiiw yi ci loxol ndijooram, di doxe digg juróom ñaari tegukaayi làmp yu wurus yi. Mu ne: <sup>2</sup> Gis naa say jëf, gis sa liggéey ak sag muñ. Xam naa ne manuloo dékku ñu bon ñi. Seetlu nga ñi tuddoo samay ndaw, ba gis ne ay fen-kat lañu. <sup>3</sup> Xam naa it ne muñ nga te sonn nga moos ngir man te xàddiwoo.

<sup>4</sup> «Waaye li ma la sikke moo di sa cofeel ga nga jëkke woon, moom nga wacc. <sup>5</sup> Kon nag fàttlikul fu kawé fa nga xàwwikoo ba fii, te nga tuub, di jëfe jëf ja nga jëkke woon. Lu ko moy maay dikk ba fi yaw, daldi jële sa tegukaayu làmp fa bérabam, ndegam tuubuloo. <sup>6</sup> Waaye lu baax lii nag yaay boroom: ni ma sibe jëfi ngérum Nikolas\*, ni nga ko sibe. <sup>7</sup> Ku ami nopp kat, na dégg li Noowug Yàlla wax mboolooy gëmkat ñi. Ku am ndam nag, maa lay may nga lekk ci garabu dund gi ci Àjjana, toolub Yàlla.

### *Bindees na waa Samirin*

<sup>8</sup> «Malaakam mbooloom gëmkat ña ca Samirin nag, bind ko ne ko:

«Lii moo di kàdduy Ki Jëkk te Mujj, Ki dee woon te dekki. Mu ne: <sup>9</sup> Gis naa sa coono ak sag ñàkk, moona yaaka duunle! Gannaaw loolu it, waxi yàq-der yi tukkee ci ñooñu tuddoo Yawut te duñu Yawut, duñu lenn lu moy jàngub Seytaane, dégg naa ko. <sup>10</sup> Bul ragal muk mitit wi nga nara daj. Seytaanee ngi noonu di dugal kaso ñenn ci yeen, ngir nattu leen. Dingen am coono diiru fukki fan. Nanga saxoo kóllère ba dee fekk la ci, ma kaalaa la kaalag dund.

<sup>11</sup> «Ku ami nopp kat, na dégg li Noowug Yàlla wax mboolooy gëmkat ñi. Ku am

\* **2:6** 2.6 ngérum Nikolas mooy ñiy taafantoo sañ-sañ bu ñu am gannaaw bu ñu gëmee Yeesu, ngir daganal yenn aada yu ñaaw yu mel ni lekk lu ñu sarxal ay tuur, ak powum séy. † **2:11** 2.11 ñaareelu dee gi: seetal ci 20.14 ak 21.8. † **2:14** 2.14 Balaam, Balag: Balaam moo doon mbubboo turu yonent, di fexee rébb bànni Israyil, ngir sàkku alal ci Balag buuru Mowab ci jamonoy Yonent Yàlla Musaa. Seetal ci *Màndiñ ma* 22—23. § **2:17** 2.17 mànn moo di ñam wa Yàlla wàcceeloon Musaa ak bànni Israyil, ba ñu gàddaayee Misra, jëm ca réew ma leen Yàlla digoon. \* **2:18** 2.18 Doomu Yàlla: tur wii tekkiwul ne Yàlla moo jur Yeesu mook Maryaama. Tekkiwul it ne dañoo màggal nit, ba di ko méngale ak Yàlla. Waaye day tekki ne Yeesu mooy Kàddug Yàlla, mooy màndargam jëmmu Yàlla, ci jikkoom ji gëna biire. Ku gis doom, man ngaa xam nu baayam mel. Ku gis Yeesu kon, mana xam nu Yàlla mel.

ndam nag doo loru mukc ci ñaareelu dee gi.†

### *Bindees na waa Pergam*

<sup>12</sup> «Malaakam mbooloom gëmkat ña ca Pergam nag, bind ko ne ko:

«Lii moo di kàdduy Boroom saamar bi ci ñaari ñawka yi. Mu ne: <sup>13</sup> Xam naa fa nga dëkk, fa la Seytaane samp nguuram. Teewul nga ñoy ci sama tur te weddiwoo ne man nga gëm ba sax ca fan, ya nit ña reye ca seen biir, Antipas sama seede bu am kóllère ba, foofa Seytaane dëkk.

<sup>14</sup> «Waaye lenn a ngi lu ma lay sikke: yaa ngi uuf foofu ay nit ñuy saxal njànglem Balaam, moom mi doon xiirtal Balag† ci tegal Israyil ndëgg-sërëx, ngir ñu lekk ñam wu ñu sarxal ay tuur, ak di gànctu. <sup>15</sup> Naka noonu itam yaa ngi uuf ay nit ñuy saxal njànglem ngérum Nikolas. <sup>16</sup> Kon nag tuubal. Lu ko moy maay dikk léegi ba fi yaw, te saamar biy lange sama gëmmiñ, moom laay xareek nit ñooñu.

<sup>17</sup> «Ku ami nopp kat, na dégg li Noowug Yàlla wax mboolooy gëmkat ñi. Ku am ndam nag, maa lay may ci mànn§ mu làqu mi, nga lekk, maa lay jox it aw doj wu weex; doj wu ñu bind tur wu bees wu kenn xamul, ku dul ka ko jot.

### *Bindees na waa Catir*

<sup>18</sup> «Malaakam mbooloom gëmkat ña ca Catir nag, bind ko ne ko:

«Lii moo di kàdduy Doomu Yàlla ji\*, ki ay gëtam mel ni sawara wu yànj, ndëgguy tàmkam mel ni xàñar bu ñu jonj. Mu ne: <sup>19</sup> Gis naa say jëf ak sa cofeel ak sa ngëm ak sa liggéey ak sag muñ. Xam naa ne sa jëf yu mujj moo épp jëf yu jëkk ya.

<sup>20</sup> «Waaye lenn laa lay sikke: dangaa bàyyi Yesabel, jigéen joojuy tuddoo

yonent, muy jàngleek a réeral sama jaam ñi, ngir ñuy gànctu ak a lekk ñam wu ñu sarxal ay tuur. <sup>21</sup> May naa ko ab diir, ngir mu tuub, waaye moo buggula tuub ngànctoom. <sup>22</sup> Kon nag maa ngii di ko rattax cib lal, te ñi mu àndal di gànctu it, maa leen di sóob ci mitit wu réy, su ñu tuubul jëf ja ñu koy roye. <sup>23</sup> Am mbas laay fàdde ay taalibeem. Su ko defee mboolooy gëmkat ñépp dinañu xam ne man maay nattu xol ak xel, te maay fey ku nekk ay jëfam.

<sup>24</sup> «Waaye yeen ñi ci des ñépp nag, yeen waa Catir ñi toppul moomu njàngle te jotuleena xam loolu ñu naan xóotey xam-xamu Seytaane, maa ne leen, duma leen sëf beneen sëf. <sup>25</sup> Noyleen rekk ci li ngeen am, ba kera may dikk.

<sup>26</sup> «Ku am ndam nag, ku saxoo jëf ji ma soob, ba kera muj ga, maa lay jox sañ-sañ ci kaw xeet yi:

<sup>27</sup> Ni ñuy rajaxee ndaal xandeer,

noonu nga leen di sàmmeji yetu weñ,

<sup>28</sup> te man ci sama bopp, noonee laa jote sañ-sañ bi ci sama Baay. Maa lay jox itam biddiiwu njël. <sup>29</sup> Ku ami nopp kat, na dégg li Noowug Yàlla wax mboolooy gëmkat ñi.

### 3

#### *Bindees na waa Sàrd*

<sup>1</sup> «Malaakam mbooloom gëmkat ña ca Sàrd nag, bind ko ne ko:

«Lii moo di kàdduy Boroom juróom ñaari noo yu Yàlla yi ak juróom ñaari biddiiw yi. Mu ne: Gis naa say jëf. Dañu laa jappe kuy dund te fekk la dee. <sup>2</sup> Teewlul te nga leqli ndes wi ngay waaja deele. Ndax kat, gisuma sa jëf ju mat fa sama kanam Yàlla. <sup>3</sup> Kon nag fàttlikul la nga jotoon te dégg ko; nga sàmme ko, te tuub. Soo teewluwul nag, dinaa ñew nib sàcc, te doo xam mukkw wan waxtu laa naa jimeet fi sa kaw.

<sup>4</sup> «Moona am nga foofu ci Sàrd nit ñu néew ñu tilimalul seen mbubb. Ñooñooy ànd ak man, sol lu weex, ndax ñoo ko yeyoo. <sup>5</sup> Ku am ndam mooy soloo noonu mbubb mu weex, te turam, duma ko far ci téereb dund bi, waaye maa koy wuyul ci

sama kanam Baay ak ay malaakaam. <sup>6</sup> Ku ami nopp kat, na dégg li Noowug Yàlla wax mboolooy gëmkat ñi.

#### *Bindees na waa Filadelfi*

<sup>7</sup> «Malaakam mbooloom gëmkat ña ca Filadelfi nag, bind ko, ne ko:

«Lii moo di kàdduy ku Sell ki, kiy Dëgg, te yor caabiy Daawuda, di tijji te kenn du tëj, di tëj te kenn du tijji. Mu ne: <sup>8</sup> Gis naa say jëf. Maa def fi sa kanam, bunt bu tijjiku bu kenn manula tëj. Ndax néew nga doole, waaye sàmme nga sama kàddu te weddiwoo ma. <sup>9</sup> Ñenn ci jàngub Seytaane bi, ñooñuy fen, di tuddoo ay Yawut te duñuy Yawut, maa ngii di leen xiirtal, dikklooleen, sujjootlooleen fi sa kanam, ba ñu xam ne man maa la sopp. <sup>10</sup> Gannaaw yaa sàmme sama kàddu, ba muñ ni ma la ko sante, man itam dinaa la sàmme ci waxtuw nattu biy wàccsi ci àddina sépp, ngir nattu waa kaw suuf.

<sup>11</sup> «Maa ngi ñew léegi. Noyal ci li nga yor, ngir kenn baña fëkk sa kaalag ndam.

<sup>12</sup> Ku am ndam nag, maa lay def nga doon ag kenu fi sama biir néeg Yàlla, te doo fa génnati mukkw. Maay bind fi sa kaw sama turu Yàlla ak sama turu dëkku Yàlla, te mooy Yerusaleem gu bees, giy wàcce fa kaw, bàyyikoo fa sama Yàlla, maay bind it fi sa kaw sama tur wu yees. <sup>13</sup> Ku ami nopp kat, na dégg li Noowug Yàlla wax mboolooy gëmkat ñi.

#### *Bindees na waa Lawdise*

<sup>14</sup> «Malaakam mbooloom gëmkat ña ca Lawdise nag, bind ko, ne ko:

«Lii moo di kàdduy Waawu Yàlla ji, Seede bi woor te dëgg, Ndeyu càkktéefu Yàlla ji. Mu ne: <sup>15</sup> Xam naa say jëf; xam naa ne seddoo, tàngoo. Su ma sañoon nga sedd mbaa nga tàng. <sup>16</sup> Gannaaw nii nga nugge nag; tàngoo, seddoo, dinaa la yàbbi. <sup>17</sup> Gannaaw yaa ngi naan: “Am naa alal, barele naa, soxlaatuma dara,” te yaw xamuloo ni nga toroxe, jara yèrëm, ñàkk, gumba, ne duññ, <sup>18</sup> dama lay digal, nga jënd ci man wurus wu ñu xellee ci sawara ba mu set wecc, ngir nga am alal. Jëndal itam yère yu weex yoo soloo,

ba làq sa dunjaaral gu gâccelu gi; ak tuufaay looy tuufoo, ngir nga gis.

<sup>19</sup> «Man, képp ku ma sopp, maa koy jubbanti, yar ko. Kon nag farlul te tuub!

<sup>20</sup> Maa ngi nii taxaw ci bunt bi, di fëgg. Ku dégg sama baat, ba ubbil ma, dinaa agsi moos sa néeg, nu bokk reer.

<sup>21</sup> «Ku am ndam nag, maa lay may nga toog ak man fi sama ngàngune, na ma ame woon ndam, ba toog ak sama Baay fi ngànguneem. <sup>22</sup> Ku ami nopp kat, na dégg li Noowug Yàlla wax mboolooy gëmkat ñi.»

## 4

### *Buur Yàlla toog na ca ngànguneem*

<sup>1</sup> Gannaaw loolu damaa xool, rekk yem ci bunt bu ubbiku fa asamaan. Ci biir loolu baat ba ma jëkkoonna dégg muy wax ak man te mel nig liit, ne ma: «Yéegal fi, ma won la liy topp ci loolu.» <sup>2</sup> Ma jekki rekk nekk ci biir Noowug Yàlla. Ci kaw loolu, yemuma lu moy ci am ngàngune mu tege ca asamaan, mu am ku toog ca ngàngune ma. <sup>3</sup> Meloom a ngay niru peru jàspè ak peru sarduwan, ag xon gu mel ni peru emëródd, wër ngàngune ma. <sup>4</sup> Yeneen ñaar fukki gàngune ak ñeent a ko wër, ñaar fukki mag ak ñeent toog ca gàngune ya. Ña nga sol mbubb yu weex, ay kaalay wurus tege ca seen bopp. <sup>5</sup> Ay melax aki kàddu aki dënu ñooy bawoo ca ngàngune ma, juróom ñaari jumi sawara di tàkk fa kanam ngàngune ma, jum ya di juróom ñaari noo yu Yàlla yi. <sup>6</sup> Fi janook ngàngune mi lu mel ni géeku kiristaal, leer nàññ. Fi wër ngàngune mi ci wet gu nekk, ñeenti bindeef a ngi fi, fees aki bët ci kanam ak ci gannaaw. <sup>7</sup> Mbindeef mu jëkk maa ngi mel ni gaynde, ñaareelu mbindeef mi mel niw yëkk, ñetteelu mbindeef mi ame kanamu nit, ñeenteel ba mel ni jaxaay juy naaw. <sup>8</sup> Ñeenti bindeef yi am nañu ku nekk juróom benni laaf, fees aki bët ba daj, biir ak biti, te guddi ak bëccëg duñu selaw, xanaa naan:

«Kee sell, Kee sell, Kee sell,  
Keey Boroom bi Yàlla Aji Man ji,  
Kee masa Nekk, Kee Nekk, Keey Dikk.»

<sup>9</sup> Saa su bindeef ya di màggal ak a teral ak a sant Boroom toogaayu ngàngune miy dund ba fàww, <sup>10</sup> ñaar fukki mag ñeek ñeent ne gurub sukk fi kanam ki toog ci ngàngune mi, di ko sujjóotal, moom miy dund ba fàww. Ñuy sànni seeni kaala fi kanam ngàngune mi te naan:

<sup>11</sup> «Yàlla sunu Boroom, yaa yeyoo daraja ak teraanga ak kàttan,  
ndaxte yaa sàkk lépp,  
lépp lu am, yaw la soob,  
nga sàkk ko.»

## 5

### *Gàttub Yàlla jël na téere ba*

<sup>1</sup> Ci biir loolu ma gis ci loxol ndijooru ki toog ci ngàngune mi, taxañub téere bu ñu bind biir ak biti, tay ko juróom ñaari tayu. <sup>2</sup> Ma gis malaaka mu am doole, muy yéenee baat bu xumb, naan: «Ana ku yeyoo tàyyi tayuy téere bii, ubbi ko?» <sup>3</sup> Du kenn nag ci asamaan mbaa kaw suuf, mbaa biir suuf, ku manoonna ubbi téere bi, ba yër ko. <sup>4</sup> Ma jooy jooy yu metti, ndax giseesul kenn ku yeyoo ubbi téere bi, ba yër ko. <sup>5</sup> Kenn ci mag ñi ne ma: «Bul jooy. Ma ne, Gayndeg giirug Yuda, njebital Buur Daawuda daan na. Mooy ubbi téere beek juróom ñaari tayoom.»

<sup>6</sup> Ma daldi gis gàtt bu mel ni lu ñu rendi, mu taxaw fi digg ngàngune mi, ñeenti bindeef yeek mag ñi yéew ko. Gàtt bi juróom ñaari béjjén la am, ak juróom ñaari bët, di juróom ñaari noowi Yàlla, yi ñu yebal ci àddina sépp. <sup>7</sup> Gàtt bi dikk, jël téere bi ci loxol ndijooru ki toog ci ngàngune mi. <sup>8</sup> Ba mu jëlee téere bi, ñeenti bindeef yi ak ñaar fukki mag ñeek ñeent ne gurub sukk fi kanamam, ku nekk yor xalam ak andi wurus yu fees ak cuuraay, cuuraay li di ñaani aji sell ñi.

<sup>9</sup> Ñuy woy nag woy wu yees, naan:

«Yaa yeyoo jël téere bi,  
tàyyi tayu yi,  
ndax yaw lañu rendi,  
te sa deret nga jote, ngir Yàlla,  
ay niti gépp giir ak wépp lámmin ak wépp  
xeet ak wépp askan.»

<sup>10</sup> Yaa leen def ñu doon nguurug sarxalkat yi, ñeel sunu Yàlla,

te dinañu nguuru ci àddina.»

<sup>11</sup> Ma xoolaat, daldi dégg baati malaaka yu bare, ñu yéew ngàngune mi ak bindeef yi ak mag ñi, seen lim di ay junni, ba ci junniy junni. <sup>12</sup> Ña ngay àddu ca kaw, naan:

«Gàtt bi ñu rendi woon moo yeyoo kàttan ak alal,  
yeyoo xel ak doole,  
moo yeyoo teraanga, yeyoo darajaak cant.»

<sup>13</sup> Ba loolu amee mboolem dundooti asamaan, ak kaw suuf, ak biir suuf, ak géej, ak mboolem li ci seen biir, ñoom ñépp di wax, may dégg, naan:

«Ki toog ci ngàngune mi ak Gàtt bi, nañu jagoo cant ak teraanga, ak darajaak kàttan, tey ak èllég ba fàww.»

<sup>14</sup> Ñeenti bindeef yi ne: «Amiin.» Mag ñi ne gurub sukk, sujjóot.

## 6

### *Gàtt bi tàyyi na tayu yi*

<sup>1</sup> Ma gis nag Gàtt bi di tàyyi genn ci juróom ñaari tayu yi. Ci biir loolu ma dégg kenn ci ñeenti bindeef yi àddoo baat buy riir ni dënu, ne: «Dikkal!» <sup>2</sup> Ma xool rekk, gis fas wu weex, gawaram yor ag fitt. Ñu jox ko kaala, mu daldi dem yoonu daan-kat, ngir daani.

<sup>3</sup> Ba Gàtt bi tàyyee ñaareelu tayu gi, ma dégg ñaareelu mbindeef mi ne: «Dikkal!» <sup>4</sup> Weneen fas ne jimeet, di wu xonq, ñu may gawaram mu jële jàmm ci kaw suuf, ngir nit ñi di reyante ci seen biir. Ñu jox ko saamar bu mag.

<sup>5</sup> Ba mu tàyyee ñetteelu tayu gi, ma dégg ñetteelu mbindeef mi ne: «Dikkal!» Ma xool rekk, gis fas wu ñuul, gawaram yor ab màndaxekaay. <sup>6</sup> Ma dégg lu mel ni baat bu jibe ci diggante ñeenti bindeef yi, ne: «Benn kilo peppu bele, peyu bëccëgu lëmm; benn kilo peppu lors, peyu bëccëgu lëmm, te diw ak biñ, bu ko kenn yàq.»

<sup>7</sup> Ba Gàtt bi tàyyee ñeenteelu tayu gi, ma dégg ñeenteelu mbindeef mi ne: «Dikkal!» <sup>8</sup> Ma xool rekk, gis fas wu gel, turu gawaram di Dee, njaniw topp ci moom. Ñu jox ko sañ-sañ ci ñeenteelu

xaaju àddina, ngir muy bóome saamar akub xiif, di bóome mbas ak ay rabi àll.

<sup>9</sup> Ba mu tàyyee juróomeelu tayu gi, ma gis ci suufu sarxalukaay bi, bakkani ñi ñu bóom ndax kàddug Yàlla ak seede si ñu ci seede. <sup>10</sup> Ñu àddu ca kaw ne: «Buur bu sell, bu dëggu bi, loo deeti xaar ci àtte waa àddina, feyul nu sunu deret ji tuuru?» <sup>11</sup> Ñu jox ku ci nekk mbubb mu weex, ne leen ñu négandiku tuuti, ba kera seeni bokk ak ñi ñu bokkal liggéey bi, te ñu war leena bóom ni ñoom, ñépp dikk, ba lim bi mat.

<sup>12</sup> Ma gisati bi muy tàyyi juróom benneelu tayu gi, suuf daldi yèngu bu baaxa baax, jant bi ñuul kukk, weer wi wépp xonq curr ni deret. <sup>13</sup> Biddiwi yi fàqe asamaan, wadd ci suuf, ni doom yu xaay yu ngélén gësëm seen ndey. <sup>14</sup> Asamaan si dellu ni basañ gu ñu taxañ, tund yépp ak dun yépp toxoo fa ñu nekkoon. <sup>15</sup> Ba mu ko defee buuri àddina yeek kilifa yeek njiiti gàngoor yeek boroom alal yeek boroom doole yeek, mboolem jaam yeek gor ñi, ñépp làquji ci xunti yeek doji tund yi. <sup>16</sup> Ñu ne tund yeek doj yi: «Daanuleen ci sunu kaw, làq nu kanamu ki toog ci ngàngune mi ak sànjum Gàtt bi, <sup>17</sup> ndax seen bésuub sànj bu mag taxaw na, ana ku ko àttan?»

## 7

### *Jaamukati Yàlla yi mucc nañu*

<sup>1</sup> Gannaaw loolu ma gis ñeenti malaaka yu taxaw ci ñeenti colli àddina. Ña nga téye ñeenti ngelawi àddina, ngir ngelaw baña wale fenn; du ci jéeri, du ci géej, du ci genn garab. <sup>2</sup> Ma gis meneen malaaka, mu yéegé penku, yore torluwaayu Yàlla jiy dund. Mu àddu ca kaw, wax ak ñeenti malaaka ya ñu mayoon ñu yàq géej ak jéeri, <sup>3</sup> ne leen: «Buleen yàqagum jéeri ji ak géej gi ak garab yi, li feek torluwunu ci jéwi ñiy jaamu sunu Yàlla, màndargaale leen.»

<sup>4</sup> Ma dégg limub ña ñu màndargaale torluwaay ba; ñuy téeméer ak ñeent fukk ak ñeenti junni (144 000), bawoo ci mboolem giiri bànni Israyil:

<sup>5</sup> Giirug Yuda, fukki junneek ñaar  
(12 000) lañu ci màndargaal,  
giirug Ruben, fukki junneek ñaar,  
giiru Gàdd, fukki junneek ñaar,  
<sup>6</sup> giirug Aser, fukki junneek ñaar,  
giirug Neftali, fukki junneek ñaar,  
giirug Manase, fukki junneek ñaar,  
<sup>7</sup> giirug Simeyon, fukki junneek ñaar,  
giirug Lewi, fukki junneek ñaar,  
giirug Isaakar, fukki junneek ñaar,  
<sup>8</sup> giirug Sabulon, fukki junneek ñaar,  
giirug Yuusufa, fukki junneek ñaar,  
giirug Beñamin, fukki junneek ñaar.

### *Mbooloo mu réy am na ndam*

<sup>9</sup> Gannaaw loolu ma jekki gis mbooloo mu réy mu kenn manula waññ, ñu bawoo ci askan yépp ak giir yépp ak xeet yépp ak làmmiñ yépp. Ñu ngi taxaw fi kanam ngàngune mi ak Gàtt bi, sol mbubb yu weex, nàbb ay cari garabi tàndarma.

<sup>10</sup> Ña ngay àddu ca kaw, naan:  
«Texee ngi fi sunu Yàlla, ki toog ci ngàngune mi,  
ak ci Gàtt bi!»

<sup>11</sup> Malaaka yépp a nga taxaw, yéew ngàngune ma ak mag ñaak ñeenti bindeef ya. Ñu ne gurub sukk, dëpp seen jë fa kanam ngàngune ma, sujjóotal Yàlla, <sup>12</sup> ne: «Amiin! Na sunu Yàlla jagoo màggal ak daraja ak xel ak cant ak teraanga ak kàttan ak doole, tey ak èllëg ba fàww. Amiin!»

<sup>13</sup> Ci kaw loolu kenn ci mag ñi ne ma:  
«Boroom mbubb yu weex yii, ñooy ñan ak fan lañu jóge?»

<sup>14</sup> Ma ne ko: «Sama sang, loolu de xanaa yaa ko xam.» Mu ne ma: «Ñoo di ñi jóge ca nattu bu réy ba. Fóot nañu seeni mbubb, ba weexal ko ci deretu Gàtt bi.

<sup>15</sup> Loolu moo leen taxa teew fi kanam ngàngunem Yàlla, di ko jaamoo biir màkkaanam guddi ak bëccëg,

te ki toog ci ngàngune mi moo leen di yiir.

<sup>16</sup> Dootuñu xiif, dootuñu mar. Dootuñu loru ci jant bi mbaa weneen tàngoos,

<sup>17</sup> ndaxte Gàtt bi ci diggu ngàngune mi moo leen di sàmm,  
yóbbu leen ca bëti ndoxum dund ma,

te Yàlla leen di fompal wépp rongooñ.»

## 8

### *Gàtt ba tàyyi na juróom ñaareelu tayu ga*

<sup>1</sup> Bi Gàtt bi tàyyee juróom ñaareelu tayu gi nag, asamaan da ne selaw lu mat genn-wàllu waxtu. <sup>2</sup> Ci kaw loolu ma gis juróom ñaari malaaka yi taxaw fi kanam Yàlla, ñu jox leen juróom ñaari liit.

<sup>3</sup> Bi loolu amee meneen malaaka dikk, taxaw ci wetu sarxalukaay bi. Mu ngi yor andu cuuraayu wurus. Ñu jox ko cuuraay lu bare, ngir mu boole kook ñaani mboolem aji sell ñi, jooxe ko ci kaw sarxalukaayu wurus bi ci kanam ngàngune mi. <sup>4</sup> Saxaras cuuraay laa ngi gillee ci loxol malaaka mi, ànd ak ñaani ñu sell ñi, di yéeg fa Yàlla. <sup>5</sup> Malaaka mi jël andu cuuraay bi, tibbe ci sarxalukaay bi ay xal ba and bi fees. Mu daldi koy sànni ci kaw àddina, rekk ag dënu riir, kàddu randañ, ag melax tàkk, suuf yëngu.

### *Liit yi jib na*

<sup>6</sup> Ba mu ko defee juróom ñaari malaaka yi yor juróom ñaari liit yi di waaja liit.

<sup>7</sup> Malaaka mu jëkk mi wal liitam, tawu doji yuur topp ci, ak sawara wu ànd ak deret, ñu boole lépp sànni ci kaw suuf, ñetteelu xaaju suuf si daldi lakk, ñetteelu xaaju garab yi it lakk, ñax mu naat mépp lakk.

<sup>8</sup> Ñaareelu malaaka mi wal liitam, mu am lu mel ni tund wu réy wuy tàkk, ñu sànni ko ci géeg gi, ñetteelu xaaju géeg gi soppiku deret, <sup>9</sup> ñetteelu xaaju bindeefi géeg dee, ñetteelu xaaju gaal yi yàqu yaxee.

<sup>10</sup> Ñetteelu malaaka mi wal liitam, bid-diiw bu réy buy tàkk nig jum xàwwikoo asamaan, wadd ci kaw ñetteelu xaaju dex yi ak bëti ndox yi. <sup>11</sup> Biddiiw bi Wextan la tudd. Ñetteelu xaaju ndox yépp la wexal, ñu bare naan ci, daldi dee, ndax wextanu ndox mi.

<sup>12</sup> Ñeenteelu malaaka mi wal liitam, mu dal ñetteelu xaaju jant bi, ak ñetteelu xaaju weer wi, ak ñetteelu xaaju biddiiw yi, ba tax seen ñetteelu xaaju leer giim,

ñetteelu xaaju bëccëg bi daldi lëndëm, ñetteelu xaaju guddi gi it gëna lëndëm.

<sup>13</sup> Ma xoolaat, daldi dégg jenn jaxaay ju naawe digg asamaan. Mu àddu ca kaw ne: «Wóoy, wóoy, wóoy, musibay waa àddina yiy sababoo ci yeneen baati liit yi ñetti malaaka yi ci des, di waaja liit.»

## 9

<sup>1</sup> Juróomeelu malaaka mi wal liitam, ma gis, biddiww bu xàwwikoo woon asamaan, ba wadd ci kaw suuf. Ñu jox ko caabiy kàmbu xóote ba. <sup>2</sup> Mu ubbi buntu kàmbu xóote ba, saxar su mel ni saxaras taal bu mag jollee ca, jant bi ak jaww ji, lépp lëndëm ndax saxaras kàmb gi. <sup>3</sup> Ba loolu amee ay njéeréer génne ci saxar si, daldi tasaaroo ci biir àddina, ñu may leen nag danjar ju mel ni danjaru jànkalaar. <sup>4</sup> Ñu ne leen, buñu laal menn um ñax, mbaa genn gàncax, mbaa genn garab, xanaa ñu jublu rekk ci nit ñi amul màndargam torluwaayu Yàlla ci seen jë. <sup>5</sup> May nañu leen ñu mitital leen diiru juróomi weer, te bañ leena rey, xanaa mitital leen lu tembook mititu fittu jànkalaar. <sup>6</sup> Bési keroog nit ñeey sàkku dee, te duñu ko daj, ñu ne siiwa dee, ndee daw leen.

<sup>7</sup> Njéeréer yaa ngi nirook fas yu ñu waajal ngir xare, kaalawoo lu mel ni kaalay wurus, seen kanam nirook kanamu nit, <sup>8</sup> seen kawar mel ni kawaru jigéen, seeni sell nirook selli gaynde. <sup>9</sup> Ñu ngi sol kiiraayi dënn yu mel ni kiiraayi weñ gu ñuul, seen coowal laaf yi mel ni coowal watiiri xare yu bare. <sup>10</sup> Geen gu am fitt lañu am ni jànkalaar. Danjaru geen googu lañuy mititale nit ñi diiru juróomi weer. <sup>11</sup> Seen buur a leen jiite, di malaakam xóote bi, turam ci ebrë di Abadon, Apolyon ci làkku gereg, (mu firi Yàqkat bi).

<sup>12</sup> Naka la musiba mu jëkk mi jàll rekk, yeneen ñaari musiba dikk, topp ci.

<sup>13</sup> Ba mu ko defee juróom benneelu malaaka mi wal liitam. Ma dégg baat bu jóge ci ñeenti béjjéni sarxalukaayu wurus, bi ci kanam Yàlla. <sup>14</sup> Baat bi wax ak juróom benneelu malaaka mi yor liit,

ne ko: «Yiwil ñeenti malaaka, ya yeewe ca Efraat, dex gu mag ga.»

<sup>15</sup> Ca lañu yiwi ñeenti malaaka, ya ñu waajaloon ñeel waxtu woowu, ci bés boobu, weer woowu, at moomu, ngir ñu rey ñetteelu xaaju nit ñi. <sup>16</sup> Limu gawari mbooloo ma doon xareji ñaar téeméeri junniy junni la (200 000 000). Maa dégg lim bi.

<sup>17</sup> Nii laa gise ci peeñu mi fas yi ak ñi leen war: ñu ngi sol kiiraay yu xonq ni sawara, baxa ni safiir, te mboq ni tamarax. Boppi fas yaa ngi nirook boppi gaynde, sawara ak saxar ak tamarax di génne ci seen gémmin. <sup>18</sup> Ñetti musiba yooyii, sawara seek saxar seek tamarax biy génne ci seen gémmin, daldi rey ñetteelu xaaju nit ñi. <sup>19</sup> Danjaru fas yaa ngi ci seen gémmin ak ci seen geen, ndax seen geen yaa ngi mel ni ay jaan, ami bopp yu ñuy mititalee.

<sup>20</sup> Ndesu nit ñi musiba yooyii reyul nag, taxul sax ñu tuub seeni jëf, ba bañatee jaamu ay tuur, ak jëmme xërëmi wurus ak xalis ak xàñar ak xeer ak dénk; xërëm yu gisul, déggul, doxul. <sup>21</sup> Rax ci dolli, tuubuñu bóome gi ak ñeengo gi ak powum séy meek càcc gi ñu nekke.

## 10

### *Àtte bu mujj ba agsi na*

<sup>1</sup> Ci kaw loolu ma gis meneen malaaka mu am doole, muy wàcce asamaan, làmboo aw niir, ag xon tege ci bopp bi, kanam gi mel ni jant bi, tànk yi mel ni jumi sawara. <sup>2</sup> Mu ngi yor ab téere bu ndaw bu ñu ubbi. Mu teg tànk ndi-jooram ci géej gi, teg tànk cammoñam ci jéeri ji. <sup>3</sup> Mu xaacu ca kaw, mel ni gaynde guy yëmmu. Naka la xaacu, juróom ñaari dënu jib. <sup>4</sup> Naka la juróom ñaari dënu yi jib, may waaja bind, daldi dégg baat bu jóge asamaan, ne ma: «Loolu juróom ñaari dënu yi wax de, gas ko, suul, bu ko bind.»

<sup>5</sup> Ba mu ko defee malaaka, ma ma gisoon mu ñarale géej geek jéeri ji yékkati loxol ndi-jooram, jëme asamaan. <sup>6</sup> Mu giñ ci Kiy dund ba fàww, Ki sàkk asamaan ak li ci biiram, ak suuf ak li

ci biiram, ak géej ak li ci biiram. Mu ne: «Négandiku wees na, <sup>7</sup> waaye bu bési kàddug juróom ñaareelu malaaka mi taxawee, ba mu tàmbalee wal liit gi, su keroogee pexem Yàlla miy kumpa dina sotti, na mu ko waxe woon ay jaamam, yonent yi.»

<sup>8</sup> Ba loolu amee baat, ba ma déggoon, mu bawoo asamaan, dellu wax ak man, ne ma: «Demal jël téere bu ndaw bi ñu ubbi ci loxol malaaka, mi ñarale géej geek jéeri ji.»

<sup>9</sup> Ma dem ba ci malaaka mi, ne ko mu jox ma téere bu ndaw bi. Mu ne ma: «Jël ko te lekk ko. Dina wex ci sa biir nag, waaye ni lem lay neexe ci sa gémmiñ.»

<sup>10</sup> Ma jël téere bu ndaw bi ci loxol malaaka mi, lekk ko, mu neex ci sama gémmiñ ni lem, waaye naka laa ko wonn, mu wex xàtt ci sama biir.

<sup>11</sup> Gannaaw loolu ñu ne ma: «War ngaa waxati ay waxyu ngir xeet yu bare, ak askan yu bare, ak niti làmmiñ yu bare, ak buur yu bare.»

## 11

### *Ñaari seede yi bey nañu seen waar*

<sup>1</sup> Ba loolu amee ñu jox ma nattukaay bu mel niw yet, ne ma: «Jógal, natt néeg Yàlla bi ak sarxalukaay bi, te nga waññ ña fay jaamu Yàlla. <sup>2</sup> Waaye èttu bitib kër Yàlla gi, bàyyi ko, bu ko natt, ndax ñi dul Yawut lees ko jox, te ñooy dèggaate dèkk bu sell bi diiru ñeent fukki weer ak ñaar. <sup>3</sup> Dinaa may nag sama ñaari seede yi, ñu biral waxyu diiru junni ak ñaar téeméeri fan ak juróom benn fukk (1 260) yu ñuy sol ay saaku, di ko toroxloo.»

<sup>4</sup> Ñaari seede yi ñoo di ñaari garabi oliw\* yEEK ñaari tegukaayi làmp, yi taxaw ci kanam Boroom suuf si. <sup>5</sup> Ku leen nara lor, sawaraay génne seen gémmiñ, lakk seeni noon. Képp ku leen nara lor, noonu ngay deeye. <sup>6</sup> Am nañu sañ-sañu tēj asamaan, ba du taw diiru fan yi ñuy biral waxyu, am nañu itam sañ-sañ ci ndox mi, ngir soppo ko deret, ak sañ-sañu

wàcceel suuf wépp xeetu musiba, saa su leen soobee.

<sup>7</sup> Gannaaw bu ñu seede ba noppi nag, rab wiy jóge ci xóote bi mooy xareek ñoom, daan leen, ba rey leen. <sup>8</sup> Seení néew da naan lareet ci péncum dèkk bu mag boobu ñuy misaale turu Sodom mbaa Misra, fa ñu reye woon seen Sang ci bant. <sup>9</sup> Diiru ñetti fan ak genn-wàll lañuy weeru, niti wépp xeet, ak gépp giir, ak wépp làmmiñ, ak wépp askan di seetaan seeni néew, te duñu bàyyi kenn suul leen. <sup>10</sup> Waa àddina dinañu bége seen dee, di bannexu, di joqlante ay njukkal, ndaxte ñaari yonent yooyu ñoo lakkaloon waa àddina.

<sup>11</sup> Waaye bu ñetti fan yeek genn-wàll wéyee, noowug dund giy bawoo fa Yàlla moo leen di solu, ñu jóg, taxaw, tiitaange lu réy daldi jàpp waa ceetaan ma. <sup>12</sup> Ba loolu amee ñaari seede yi dégg baat bu xumb jibe asamaan, ne leen: «Yéegleen fii.» Ñu yéeg asamaan ci biir aw niir, seeni noon di gis. <sup>13</sup> Ca waxtu wa, suuf daldi yèngu lool, ba benn fukkeelu dèkk ba màbb. Juróom ñaari junniy nit (7 000) dee ci yèngub suuf ba, ña ca des tiit, di sàbbaal Yàllay asamaan.

<sup>14</sup> Ñaareelu musiba mi wéy na, waaye kat ñetteel baa ngi nii di ñew.

### *Juróom ñaareelu liit ga jib na*

<sup>15</sup> Ba mu ko defee, juróom ñaareelu malaaka mi wal liitam, baat yu xumb jibe ca asamaan, ne:

«Léegi nag nguugug àddina ñeel na sunu Boroom ak Almaseem. Mooy nguuru ba fàww.»

<sup>16</sup> Ba loolu amee ñaar fukki mag ak ñeent, ña toogoon ca seen ngàngune ca kanam Yàlla, daldi ne gurub sukk, dèpp seen jë ca suuf, sujjóotal Yàlla. <sup>17</sup> Ñu ne: «Boroom bi Yàlla Aji Man, ji nekk te nekkoon, nu ngi lay gèrëm, ndax yaa ràngoo sa kàttan gu màgg, taxawal sa nguur.

<sup>18</sup> Askan yee meroon, waaye sa mer a dikk tey;

\* **11:4** 11.4 oliw: garabu oliw dafa xawa mel ni sump, te am doom yu ñuy nal, ngir am ci diw gu ñuy togge, mbaa ñu di ko taaloo.

tey jii ngay àtte ñi dee,  
yool say jaam, yonent yi,  
yool ñu sell ñeek ñi la ragal, mag ak  
ndaw,  
tey it ngay sànk ñiy sànk àddina.»

<sup>19</sup> Ci kaw loolu néeg Yàlla bi ci asamaan  
ubbiku, gaalu kóllèreg Yàlla ga† di feeñ  
ca biir màkkaanam ma, melax ya tàkk,  
kàddu yaak dènu ya riir, suuf sa yèngu,  
tawu doji yuur bu metti daldi sóob.

## 12

### *Ninki-nànka ji fexeel na ndaw si*

<sup>1</sup> Firnde ju magg nag moo feeñoon  
asamaan: Ndaw su làmboo jant bi, weer  
wi ronu ndègguy tànk yi, mu kaalawoo  
fukki biddiww ak ñaar. <sup>2</sup> Jigéenu wérul juy  
matu la. Mu ngi yuuxu ndax mititu mat  
wu tar. <sup>3</sup> Ci kaw loolu jeneen firnde feeñ  
asamaan. Du lenn lu dul ninki-nànka ju  
réy, xonq curr, am juróom ñaari bopp  
ak fukki béjjén, juróom ñaari mbaxanay  
buur tege ci bopp yi, bopp bu ne, menn.  
<sup>4</sup> Geenam gi daldi buube fa asamaan  
benn ñetteelu biddiww yi, rattax leen ci  
suuf. Ninki-nànka jaa ngi taxaw ci kanam  
ndaw siy matu, ngir bu xale bi juddoo  
rekk, mu lekk ko. <sup>5</sup> Ndaw si nag wasin  
doom ju góor, te muy ki wara yilif xeeti  
àddina yépp, di leen jiitee yetu weñ. Ci  
kaw loolu ñu fèkk doom ja, jàlle fa Yàlla,  
ca ngànguneem. <sup>6</sup> Ndaw si nag daw, ba  
ca màndiñ ma, ci ab rawtu bu ko Yàlla  
waajaloon, ngir ñu leel ko fa diiru junni  
ak ñaar téméeri fan ak juróom benn  
fukk (1 260).

<sup>7</sup> Ab xare nag jibe fa asamaan. Mikayel  
aki malaakaam di xareek ninki-nànka ji,  
ninki-nànka jeeki malaakaam it di xare,  
<sup>8</sup> ñu néewal leen doole, ba amatuñu fu  
ñu nekk ci asamaan. <sup>9</sup> Ñu xalab ninki-  
nànka ju réy ja, jaanu cosaan joojee ñuy  
wax Tuumaalkat bi, di ko wax Seytaane,  
naxekatu mboolem àddina. Ci kaw suuf  
lañu ko xalab, mooki malaakaam.

† **11:19** 11.19 gaalu kóllère ga: gaal gi ñuy wax fii waxande la, wu ñu denc àlluwa, ya ñu bind yoonu Yàlla te Yonent Yàlla Musaa jottli ko. Yàlla moo joxoon Musaa àlluway xeer yooyu, bind ca yoon wa lal kóllère ga mu fas ak bànni Israyil. \* **12:14** 12.14 ñetti diir ak genn-wàll: seetal ci 12.6. \* **13:2** 13.2 urs rab wu ñàng la. Man naa èpp gaynde te gèn koo aay.

<sup>10</sup> Ci kaw loolu ma dégg baat bu xumb  
bawoo asamaan, ne:  
«Léegi nag texe teew na,  
ànd ak sunu kàttanu Yàlla ak nguuram,  
ak sañ-sañu Almaseem,  
ndax xalab nañu ki daan tuumaal sunu  
bokk yi,  
di leen sosal guddeek bëccëg  
fi sunu kanam Yàlla.

<sup>11</sup> Sunu bokk yee daan ndax deretu Gàtt  
bi,  
ak seen kàddug seede,  
te soppuñu seen bakkan ba ragala dee.  
<sup>12</sup> Kon nag yaw asamaan, bégal,  
yaak mboolem ñi ci sa biir!  
Waaye wóoy ngalla yeen géej ak jéeri!  
yeen, ñi Seytaane wàccaale mer mu tàng  
fi yeen,

ndax xam ne fan yu néew a ko dese.»

<sup>13</sup> Ninki-nànka ja nag xam ne xalab  
nañu ko ci kaw suuf, mu ne dann ndaw  
sa jur doom ju góor ja. <sup>14</sup> Ñu jox ndaw  
si ñaari laafi jaxaay ja, ngir mu naaw,  
rècc ninki-nànka ji, dem màndiñ ma, ca  
rawtoom ba ñu koy leele lu tollook ñetti  
diir ak genn-wàll\*. <sup>15</sup> Ba mu ko defee  
ninki-nànka ji buusu ndox mu bare ni  
dex, ndox ma topp ndaw sa, ngir wal  
ma yóbbaaale ko. <sup>16</sup> Ci kaw loolu suuf  
wallu ndaw sa, ña, daldi naan dex, ga  
gémminiñu ninki-nànka ja buusu woon.  
<sup>17</sup> Ninki-nànka ja mere ndaw sa, daldi  
dem, xeexi ak ndesu doomam, yi topp  
santaaney Yàlla tey saxoo seedeel Yeesu.  
<sup>18</sup> Mu taxaw nag ca tefesu géej ga.

## 13

### *Ñaari rab yu aay falu nañu*

<sup>1</sup> Ci kaw loolu ma gis rab wu génne ci  
géej gi, am juróom ñaari bopp ak fukki  
béjjén, béjjén yi sol fukki mbaxanay buur,  
béjjén bu ne menn, bopp bu nekk ak tur  
wuy saaga Yàlla. <sup>2</sup> Rab wi ma gis ni segg  
la mel, tànk yi mel ni yu urs\*, gémminiñ  
gi mel ni gu gaynde. Ninki-nànka ji jox  
ko kàttanam ak nguuram ak sañ-sañam



bu réy. <sup>3</sup> Benn ci bopp yi nag, rab wi da cee gaañu ba mel ni lu ñu rendi, ba mu dee. Teewul gaañu-gaañu boobu ko waroona rey daldi wér. Waa àddina sépp yéemu, topp ci rab wi. <sup>4</sup> Ba loolu amee ñu sujjóotal ninki-nànka ji ndax la mu jox rab wi sañ-sañ bi, di sujjóotal rab wi, naan: «Ana kuy moroomu rab wii, ak ku mana xeex ak moom?»

<sup>5</sup> Ñu may rab wi nag muy kañu ak a saaga Yàlla, may ko it mu saña wéye noonu diiru ñeent fukki weer ak ñaar. <sup>6</sup> Muy tifaar Yàlla ay saaga, di saaga aw turam, ak màkkaanam, ak ñi dèkke asamaan. <sup>7</sup> Ñu may ko itam mu xareek ñu sell ñi, дума leen, boole ci may ko sañ-sañ ci kaw niti gépp giir ak wépp xeet ak wépp làmmiñ ak wépp askan. <sup>8</sup> Mboolem waa àddinaa koy sujjóotal, mboolem ñi ñu bindul seen tur ca ndoortel àddina ci téereb dund† bu Gàtt, bi ñu rendi.

<sup>9</sup> Ku ami nopp kat, na dégg.

<sup>10</sup> Ku wara dem ngallo, ngallo nga jëm, ku wara deeye saamar, saamar ngay deeyeji. Looloo tax ñu sell ñi wara saxoo muñ ak ngëm.

<sup>11</sup> Ci kaw loolu ma gis weneen rab wu génne ci suuf, am ñaari béjjén ni ab gàtt, tey wax ni ninki-nànka. <sup>12</sup> Muy jéfe mboolem sañ-sañu rab wu jëkk wa, ci turu rab wu jëkk wa, di sant suuf ak ñi ko dèkke ñu sujjóotal rab wu jëkk, woowu gaañu woon ba nara dee te mujj wér. <sup>13</sup> Ñaareelu rab wi nag di def kéemaan yu réy, bay wacce ci kaw suuf sawara wu jóge asamaan, nit ñi di gis. <sup>14</sup> Ñaareelu rab wi nag nax waa àddina ci kéemaan, yi mu am sañ-sañu def ci turu rab wu jëkk wi. Mu sant waa àddina, ñu sàkk jëmmu rab, wi ñu jamoon saamar te muy wéye bakkanam. <sup>15</sup> Gannaaw loolu mayees na ko mu sol ag noo jëmmu rab wu jëkk wi, ba muy wax, di reylu képp ku ko sujjóotalul. <sup>16</sup> Ba mu ko defee, mag ak ndaw, boroom alal ak baadoolo, as gor akub jaam, ñépp, mu defal leen màndargam loxol ndijoor mbaa jë, <sup>17</sup> ba

kenn du mana jënd mbaa jaay te amul màndargam turu rab wi mbaa lim bi méngook turam.

<sup>18</sup> Fii nag xel la laaj: ku am ug dégg, na waññ limu rab wi, ndax boobu lim turu nit la taxawe, di juróom benni téeméer ak juróom benn fukk ak juróom benn (666).

## 14

### *Kurél gu sell gi topp na Gàtt bi*

<sup>1</sup> Ma xoolaat, gisuma lu moy Gàtt bi fa mu taxaw ci kaw tundu Siyon\* ak téeméer ak ñeent fukk ak ñeenti junniy nit (144 000) ñu ànd ak moom, te ñu bind ci seen jë turu Gàtt bi ak turu Baayam. <sup>2</sup> Ma dégg baat bu jóge asamaan, niroom riirum géej, mel ni dënu gu réy, melati ni ay xalamkat yuy xalam. <sup>3</sup> Ña ngay woy woy wu yees ca kanam ngàngune ma, ca kanam ñeenti bindeef yaak mag ña, te kenn manula mokkal woy wi, ku dul téeméer ak ñeent fukk ak ñeenti junni ñooñu ñu jote àddina. <sup>4</sup> Ñooñu ñooy ñi masula ànd ak jigéen, di sobeel seen bopp, ndax masuñoo séy. Ñooñoo topp Gàtt bi fépp fu mu jëm. Ñooñu lañu jote ci biir nit ñi, def leen lu mel ni jooxeb ndoortel meññeef, ñeel Yàlla ak Gàtt bi, <sup>5</sup> te kàddug fen masula jibe seen gémmiñ. Gàkkuñu fenn.

### *Ñetti malaaka yégle nañu àttey Yàlla*

<sup>6</sup> Ci kaw loolu ma gis meneen malaaka muy naaw ci digg asamaan, ànd ak xibaaru jàmm bi sax dàkk, ngir baaxe ko waa àddina: niti wépp askan ak gépp giir ak wépp làmmiñ ak wépp xeet. <sup>7</sup> Ma ngay àddu ca kaw, naan: «Ragal-leen Yàlla te màggal ko, ndax waxtuw àtteem jot na. Kon nag jaamuleen ki sàkk asamaan ak suuf ak géej ak bëti ndox yi.»

<sup>8</sup> Meneen malaaka, topp ci, di ñaareel bi. Mu ne: «Babilon a daano, dèkk bu mag ba daanu na! Moom ma daan màndal askanoo askan biiñu moyam muy indi am sànj.»

<sup>9</sup> Meneen malaaka, topp ci, di ñetteel bi. Mu àddu ca kaw, ne: «Képp ku

† **13:8** 13.8 téereb dund bi: seetal ci 17.8. \* **14:1** 14.1 tundu Siyon mooy tund wa ñu tabax Yerusalem ci kawam.

sujjóotal rab wi ak jëmm ji ñu ko sàkkal, ba ñu defal ko màndargam jë mbaa loxo, <sup>10</sup> kooku dina naan biiñu sànjum Yàlla bu kenn raxul, ñu xelli ko ci kaasu sànjam. Te dees na ko mbugale sawara ak tamarax ci kanam malaaka yu sell yi ak Gàtt bi. <sup>11</sup> Seen saxaru sawaras mbugal day saxoo dàkk, di gilli ba fàww. Guddeek bëccëg, ñooñuy sujjóotal rab wi ak jëmm ji ñu ko sàkkal, ak mboolem ku ñu màndargaale turu rab wi, kenn du ci nopplu.»

<sup>12</sup> Kon nag ñu sell ñiy wormaal santaney Yàlla te saxoo gëm Yeesu, looloo tax ñu wara muñ.

<sup>13</sup> Ci kaw loolu ma dégg baat bu jibe asamaan ne: «Bindal: “Bés niki tey ndokklee aji dee ñi deeyaale gëm Sang bi.”» Noo ga daldi ne: «Waawaaw, ndax coono dina leen wàcc, ngir seeni jëf a leen topp.»

### *Ngóobum àddina tar na*

<sup>14</sup> Ma xoolaat, gisuma lu moy niir wu weex, ak jëmm ju ca toog, di nirook doom aadama, kaalawoo kaalag wurus, ñàbb ab sàrt bu ñaw. <sup>15</sup> Meneen malaaka génne ca néeg Yàlla ba, daldi àddu ca kaw, wax ak ki toog ci niir wi, ne ko: «Dawalal sa sàrt te góob, ndaxte ngóob jot na, ngóobum àddina ñor na.»

<sup>16</sup> Ci kaw loolu ki toog ci kaw niir wi dawal sàrtam ci kaw suuf, daldi góob àddina.

<sup>17</sup> Meneen malaaka nag génne ca néeg Yàlla ba ca asamaan, ñàbb moom itam, sàrt bu ñaw. <sup>18</sup> Ba loolu amee meneen malaaka mi yilif sawara, jóge ca sarxalukaay ba, daldi àddu ca kaw, wax ak malaaka, mi yor sàrt bu ñaw bi, ne ko: «Dawalal sa sàrt bu ñaw bi, nga dagg cëggi reseñ gi ci àddina, ndax reseñ ji ñor na.»

<sup>19</sup> Malaaka ma dawal sàrtam ci àddina, dagg reseñ ji, sànni ci biir nalukaay bu mag bu sànjum Yàlla ba. <sup>20</sup> Ñu dëggaate reseñ ja ca nalukaay, ba ca gannaaw dëkk ba, deret génne ca, taa ba tollook laabi fas yi, wala wal ba dajal digganteb ñetti téeméeri kilomeetar.

## 15

### *Musibay mujjantal agsi na*

<sup>1</sup> Ma xoolaat, gisuma ci asamaan lu moy jeneen firnde ju màgg te yéeme: juróom ñaari malaaka yu taawu juróom ñaari musiba. Musiba yu mujj yaa nag, ngir ca la sànjum Yàlla di mate. <sup>2</sup> Ma gisati lu mel ni géēju kiristaal bu jaxasook sawara. Ci biir loolu ña daanoon rab waak jëmmu nataalam, ak lim bi méngook turam, ñu ngi taxaw ci kaw géēju kiristaal gi, yore ay xalami Yàlla. <sup>3</sup> Ña ngay woy woyu Musaa jaamu Yàlla ba, ak woyu Gàtt bi, naan:

«Yaw Boroom bi Yàlla Aji Man ji, yaa réy te yéeme ay jaloore.

Yaw Buuru askan yi,

yaa jub te dëgguy doxalin.

<sup>4</sup> Boroom bi, ana ku la ragalul?

Ku dul màggal saw tur?

Yaw doŋŋ yaa sell.

Askan yépp ay dikk, sujjóotsil la,

ndax yaa jubi dogal.»

<sup>5</sup> Gannaaw loolu ma xoolaat, daldi gis màkkaan ma fa asamaan, xayma ba fat seede si\*, mu ubbiku. <sup>6</sup> Juróom ñaari malaaka, yi taawu juróom ñaari musiba yi nag, génne ci màkkaan mi. Ñu ngi sol mbubbi lée yu set, ne ràññ, ay ngañaayi wurus takke ci seen dënn. <sup>7</sup> Kenn ci ñeenti bindeef yi nag jox juróom ñaari malaaka yi, juróom ñaari ndabi wurus yu fees ak sànjum Yàlla jiy dund ba fàww. <sup>8</sup> Ba mu ko defee màkkaan ma fees ak saxar su bawoo ci leeru Yàlla ak kàttanam. Kenn nag manatula dugg ci màkkaan mi, ba kera juróom ñaari musibay juróom ñaari malaaka yi matee.

## 16

### *Sànj ma sottiku na*

<sup>1</sup> Ma daldi dégg baat bu xumb bu bawoo ci màkkaan mi. Mu ne juróom ñaari malaaka yi: «Demleen sotti juróom ñaari ndabi sànjum Yàlla yi ci kaw suuf.»

<sup>2</sup> Malaaka mu jëkk mi dem, sotti ndabam ci kaw suuf, mu def ay taab yu bon

\* **15:5** 15.5 seede si mooy àlluway seede yi fukki santaney Yàlla ya binde woon.

te aay ci kaw nit ñi am màndargam rab wi, tey sujjóotal jëmmu nataalu rab wi.

<sup>3</sup> Ñaareelu malaaka mi sotti ndabam ci gééj gi. Mu soppiku deret ju mel ni lu nàcce ci ku ñu bóom. Lépp lu doon dund biir gééj daldi dee.

<sup>4</sup> Ñetteelu malaaka mi sotti ndabam ci dex yeek bëti ndox yi, mu doon deret.

<sup>5</sup> Ma dégg malaaka mi yilif ndox yi ne: «Yaw Aji Sell ji nekk te nekkoon, yaa yey dogal yii àtte.

<sup>6</sup> Deretu ñu sell ñeek deretu yonent yi lañu tuur, nga nàndal leen deret, feye leen.»

<sup>7</sup> Ma dégg sarxalukaay ba ne:

«Waawaaw, Boroom bi Yàlla, Aji Man ji, say àtte dégg la, yoon la.»

<sup>8</sup> Ba loolu amee ñeenteelu malaaka mi sotti ndabam ci kaw jant bi. Ñu daldi may jant bi muy lakke nit ñi tàngooru sawaraam. <sup>9</sup> Ci kaw loolu tàngooru naaj wu metti di lakk nit ñi. Nit ñi nag tuubuñu, sàbbaal Yàlla; xanaa di saaga Yàlla, ji dogal yooyu musiba.

<sup>10</sup> Juróomeelu malaaka mi sotti ndabam ci kaw ngàngunem rab wi, nguuram daldi sóobu ci lëndëm, nit ñi di yéyu ndax metit, <sup>11</sup> tuubuñu seeni jéf, xanaa di saaga Yàllay asamaan ndax seeni mitit ak seeni taab.

<sup>12</sup> Juróom benneelu malaaka mi sotti ndabam ci dex gu mag, gi ñuy wax Efraat, dex gi daldi ñiis, ngir sàkkal buuri penku yiy dikk, aw yoon. <sup>13</sup> Ci kaw loolu ma gis ñetti njuuma yu mel niy mbott, kenn ki génne ci gémminiñu ninki-nànka ji, kenn ci gémminiñu rab wu jëkk wi, ki ci des ci gémminiñu ñaareelu rab wi mbubboo yonent. <sup>14</sup> Ñooñu nag ay njuumay Seytaane lañu, yuy def ay kéemaan, tey dajaleji buuri àddina sépp, ngir xareb bés bu mag bu Yàlla Aji Man ji.

<sup>15</sup> Mu ne: «Maa ngi nii yoot, di dikk nib sàcc. Ndokkee, yaw mi teewlu, fàgggu say yére, ba doo deme gâceeg yaramu neen, ñu di la seetaan.»

<sup>16</sup> Ci kaw loolu njuuma yi dajale buur yi ci bérab bu ñuy wax Armagedon\*, di baatu ebrë.

<sup>17</sup> Ba mu ko defee juróom ñaareelu malaaka mi sotti ndabam ci kaw ngelaw li, baat bu xumb jóge ca ngàngune ma ca màkkaan ma, ne: «Sotti na!» <sup>18</sup> Ba loolu amee, ay melax tàkk, ay kàddu aki dënu riir, suuf yëngu yëngu bu réy bu masula am ba nit teewee ci kaw suuf ba bésuub keroog. Noonu la yëngub suuf ba yéemee te réy. <sup>19</sup> Dëkk bu mag ba xar ñett, dëkk yu mag yu askani àddina yi màbb. Babilon gu mag ga nag, Yàlla bàyyi ko xel, ngir nàndal ko kaasu biiñu sànjam muy bax. <sup>20</sup> Dun yépp daldi dëddu, tund yi ne mes. <sup>21</sup> Tawu doji yuur yu benn talan, yemook ñeent fukki kilo, daldi sóobe asamaan ci kaw nit ñi, ñuy saaga Yàlla ngir musibam doji yuur yi, ndax musiba mu réy ba jéggi dayo.

## 17

*Mbugal ñeel na jigéenu moykat ju mag ji*

<sup>1</sup> Kenn ci juróom ñaari malaaka, yi taawu juróom ñaari ndab yi nag dikk, ne ma: «Kaay, ma won la mbugalu jigéenu moykat ju mag, ji toog ci ndox mu bare. <sup>2</sup> Moom la buuri àddina àndal di moy, te biiñu moyam la waa àddina di màndee.»

<sup>3</sup> Ci kaw loolu malaaka mi yóbboo ma Noowug Yàlla ba ca màndin ma. Ma gis jigéen ju war rab wu xonq wu am juróom ñaari bopp ak fukki béjjén, te yaram wi fees ak tur yuy saaga Yàlla. <sup>4</sup> Jigéen jaa ngi sol lu yolet te xonq, takk wurus ak jamaa aki per. Mu ngi yor kaasu wurus bu fees ak ñaawtéef ak sobey moyam. <sup>5</sup> Jë bi nag, tur wii lañu ci bind, muy kumpa: Babilon gu mag gi, ndeyu jigéeni moykat yeek ñaawtéefi àddina yi. <sup>6</sup> Ma gis ne jigéen ji daa naan ba màndi ci deretu ñu sell ñi ak deretu ñi doon seedeel Yeesu.

Ba ma ko gisee, jaaxle naa lool. <sup>7</sup> Malaaka ma ne ma: «Looy jaaxle? Man maa lay xamal kumpag jigéen ji ak rab, wi mu war, boroom juróom ñaari bopp yeek fukki béjjén yi. <sup>8</sup> Rab wi nga gis mas naa nekk waaye nekkatul. Dina génne ca xóote ba, waaye day sànkujji. Waa àddina, ñi ñu bindul woon seeni tur ci

\* 16:16 16.16 Armagedon ag joor la ci réewum Kanaan.

téereb dund bi ba àddinay door nag, bu ñu gisee rab wi, dinañu yéemu, ndax la mu masoona nekk, tey nekkatul, te èllëg muy nekkaat.

<sup>9</sup> «Fii nag xel mu ñaw la laaj. Juróom ñaari bopp yi ñooy juróom ñaari tund, yi jigéen ji toog, te juróom ñaari buur lañu itam: <sup>10</sup> juróom daanu nañu, kenn kaa ngi fi, ki ci des nag dikkagul, waaye bu dikkee, ab diir rekk la fiy am. <sup>11</sup> Rab wi masoona nekk te nekkatul nag, moom ci boppam moo di juróom ñetteelu buur bi, kenn la ci juróom ñaari buur yi jiitu itam, te day sànkujì.

<sup>12</sup> «Fukki béjjén yi nga gis, fukki buur lañu yu jotagul ci seen nguur. Waaye diirub wenn waxtu, lañuy jot sañ-sañ nguur, ñook rab wi. <sup>13</sup> Menn mébét lañu bokk, te dinañu yékkati seen doole ak seen sañ-sañ, jox ko rab wi. <sup>14</sup> Dinañu xare ak Gàtt bi, waaye Gàtt bee leen di daan, ndax mooy Sangu sang yi, di Buuru buur yi. Mooy daan mook ñoñam, ñi mu woo, tànn leen te ñu saxoo topp ko.»

<sup>15</sup> Mu neeti ma: «Ndox yi nga gis jigéenu moykat ji toog ci nag, mooy niti xeet yeek mbooloo yeek askan yeek làmmiñ yi. <sup>16</sup> Fukki béjjén yi nga gis, ñook rab wi, dinañu won jigéenu moykat ji mbañeel. Dañu koy futti ba mu ne dunj, ñu lekk aw suuxam, ba noppi lakk ko. <sup>17</sup> Ndaxte Yàllaa def ci seen xol pastéefu sottal mébétam, ba ñu bokk sottal menn mébét mi, daldi jébbal rab wi seen nguur, ba kera kàddug Yàlla mat sèkk. <sup>18</sup> Jigéen jii nga gis, moo di dëkk bu mag, bi yilif buuri àddina.»

## 18

### *Babilon daanu na*

<sup>1</sup> Gannaaw loolu ma gis meneen malaaka mu am sañ-sañ bu réy wàcce asamaan, àddina di leere cig leeram. <sup>2</sup> Mu àddu ca kaw, ne: «Babilon a daano! Dëkk bu mag ba daanu na, ba doon dëkkukaayu jinne ak mboolem njuuma lu sobewu ak mboolem picc ak rabu àll wu sobewu te siblu. <sup>3</sup> Kaasu biiñu sànj, bi sababoo ci moyam, moom la askani àddina yépp di naan. Moom la buuri àddina àndal di moy, te doylodidig

bakkanam gu réy woomal na julay àddina.»

<sup>4</sup> Ci kaw loolu ma dégg beneen baat bu jóge asamaan, ne: «Yeen sama ñoñ, génneen dëkk bii, bala ngeena bokk ak moom ay bàkkaaram, bay séddu ci mbugalam. <sup>5</sup> Ndaxte ay bàkkaaram jalu na ba àkki asamaan, te Yàlla bàyyi na xel ay ñaawtéefam. <sup>6</sup> Na mu jéfe ak yeen, jéfeleen ko ak moom, feyleen ko ñaari yoon ay jéfam. Kaas bi muy xellile am njafaan, feesalal-leen ko njafaan lu ko èpp doole ñaari yoon. <sup>7</sup> Joxleen ko ci toskare aku naqar, kemu daraja jaak dund gu bakkane ga mu jagoo woon. Gannaaw moo ne cim xelam: “Maa tooge jalu lingeer, dumab jëtun, duma deele mukk,” <sup>8</sup> looloo tax ci benn bés la musiba yiy këppoondoo ci kawam: mbas, deele akub xiif, te dees na ko lakk ba mu jeex, ndax Boroom bi Yàlla mi ko mbugal moo am doole.»

<sup>9</sup> Buuri àddina yi àndoon ak dëkk bii ci moy ak dund gu bakkane, bu ñu séenee saxaras lakkam, ñoom ñépp ay yuuxu, di ko jooy. <sup>10</sup> Fu sore lañuy dând, ndax ragal toskarey dëkk bi, te naan:

«Wóoy, wóoy ngalla dëkk bu mag ba!

Babilon ma ca doole ja!

Ci wenn waxtu rekk la sa àtte dikk!»

<sup>11</sup> Julay àddinaa ngay yuuxu, di ko jooy, nde am njaayam du jarati: <sup>12</sup> wurus ak xaalis, ak doji gànjar aki per ak lée ak ndimo lu yolet ak sooy, ak ndimo lu xonq curr, ak bépp bant bu xeeñ, ak wépp xeeu jumtukaayi bëñi ñey, ak jumtukaayi dénku ngëneel ak yu xànjjar, ak yu weñ gu ñuul, ak yu doju màrb, <sup>13</sup> ak kanel ak yeneen safal, ak ndàbbu miir ak cuuraay-libañ ak yeneen cuuraay, ak biiñ ak diwu oliw ak sunguf ak pepp ak nag ak xar ak fas, aki watiir aki jaam, ak nit ñu ñu jàpp xare.

<sup>14</sup> Dinañu ne: «Doomi garab yi nga soppoon sore na la, mboolem lu neex ak lu yànj réer na la mèrr!»

<sup>15</sup> Ña daan jula yooyii ci dëkk bi ba woomle, fu sore lañuy dând, ndax ragal toskarey dëkk bi, di yuuxook a jooyoo, <sup>16</sup> naan:

«Wóoy, wóoy ngalla dëkk bu mag ba!  
Ngalla yaw, dëkk bu mag,  
ba daa woddoo lëe ak ndimo lu yolet ak  
lu xonq curre,

takkoo wurus ak doji gànjar aki per,  
17 wenn waxtu rekk, alal ju baree nii  
neen!»

Dawalkati gaal yeek julay géej yi, ak  
mool yi, ak mboolem ñiy dunde géej,  
ñoom ñépp a ngi dând fu sore, 18 séen  
saxaras lakku dëkk bi di jalu, naan: «Bii  
dëkk bu mag, ana dëkk bu masa nirook  
moom?»

19 Dañuy xëpp suuf seen kaw bopp, di  
yuuxook a jooy ak a naqarlu, naan:  
«Wóoy, wóoy, ngalla dëkk bu mag ba!  
Sa koom a woomal mboolem boroom gaal  
ci kaw géej,  
wenn waxtu rekk, nga genta.»

20 Ndokklee, asamaan,  
Ndokklee, yeen ñu sell ñi itam, ak ndawi  
Yàlla yeek yonent yi,  
ndaxte Yàllaa leen àtteek dëkk bii, mbu-  
gal ko.

21 Ba loolu amee malaaka mu am doole  
yékkati doj wu mel ni doju wolukaay wu  
mag, sànni ko biir géej, daldi ne:  
«Babilon dëkk bu mag bi, nii lañu koy  
sàanneek doole,  
mu ne menj.

22 Buumi xalam ak baatu woykat, tox-  
orooku liit,  
lenn du ci jibeeti fi yaw.

Liggéeykat bu xareñ bu mu mana doon,  
deesatu ko gis fi yaw,  
doju wolukaay du riireeti fi yaw,

23 làmp du niiteeti fi yaw,  
te baatu boroom séet akub séetam du  
jibeeti fi yaw muk,

ndax say julaa èppoon doole ci àddina,  
te say xèrèm a sànk askanoo askan.»

24 Ci yaw it lañu fekk deretu yonent yeek  
ñu sell ñi ak mboolem ñi ñu rey ci kaw  
suuf.

1 Gannaaw loolu damaa dégg lu mel  
ni coow lu xumb, bawoo ci mbooloo mu  
bare mu àddoo asamaan, ne:

«Aleluya\*!

Texe ak daraja ak kàttan ñeel na sunu  
Yàlla.

2 Ay àtteem dégg la, yoon la!

Moo mbugal jigéenu moykat bu mag,  
bi yaq àddinaak moyam,  
feye ko deretu jaami Yàlla yi mu tuure  
loxoom.»

3 Ñu neeti:

«Aleluya!

Saxaras lakku dëkk ba kay day jolli rekk,  
ba fàww!»

4 Ci kaw loolu ñaar fukki mag ñeek  
ñeent ak ñeenti bindeef yi ne gurub sukk,  
sujjóotal Yàlla, mi toog ci ngàngune mi.  
Ñu bokk ne:

«Amiin! Aleluya!»

5 Ba loolu amee kàddu jibe ngàngune  
ma, ne:

«Màggal-leen sunu Yàlla,

yeen jaamam ñépp,

ak yeen ñi ko ragal, mag ak ndaw.»

6 Ma daldi dégg lu mel ni coowal  
mbooloo mu bare, mu àddoo ni riirum  
géej, tey nirook kàddug dënu gu réy, ne:  
«Aleluya!

Sunu Boroom Yàlla Aji Man ji mooy Buur!

7 Nanu bég, di bannexu te màggal ko,  
ndax céetu Gàtt bi agsi na, ab séetam  
defaru na ba noppi!

8 Jox nañu ko mbubbum lëe mu set, ne  
ràññ, mu sol.»

Lëe boobu mooy jëfi njekk yu nit ñu sell  
ñi.

9 Malaaka ma nag ne ma: «Bindal lii:  
“Ndokklee ñi ñu woo ci berndey céetu  
Gàtt bi.”» Mu teg ca ne ma: «Loolu kàddu  
yu dëgg yu Yàlla la.»

10 Ma daldi ne gurub sukk ciy tánkam,  
ngir sujjóotal ko. Mu ne ma: «Déet, èpp  
naa def. Sa mbokkum jaam donj laa,  
ni yaak sa bokk yi jàppoo seedeel Yeesu.  
Sujjóotalal Yàlla. Ndaxte seedeel Yeesu  
moo di Noo giy dundal waxyu.»

### *Gawar war na fas wu weex*

11 Ba loolu wéyee ma gis asamaan  
ubbiku, fas wu weex daldi feeñ. Ki ko

## 19

### *Aleluya!*

\* 19:1 19.1 aleluya waxu yawut la, juy tekki «Cant ñeel na Boroom bi.»

war, «Wóor te Dëgg» lañu koy wax te njub lay àttee, di ko xaree. <sup>12</sup> Ay gëtam a ngi mel ni sawara wuy tàkk, bopp bi, mbaxanay buur yu baree ci tege, ñu bind ci kawam tur wu kenn xamul ku dul moom. <sup>13</sup> Mbubb ma mu sol, dees koo sóob ci deret, te turam wi ñu ko xame di «Kàddug Yàlla.» <sup>14</sup> Xarekat yi ci asamaan a ko topp, war fas yu weex, sol mbubbum lëe mu weex, set wecc. <sup>15</sup> Gémmin gi, saamar bu ñaw a ciy lange, mu di ko cawe askan yi. Moo leen di jiitee yetu weñ, te mooy dëggaate ci biir nalukaay bi, reseñ ji ñuy segale biiñu sànj mu tàng mu Yàlla Aji Man ji. <sup>16</sup> Ci kaw mbubbam ak ci luppam, aw tur lañu ci bind te moo di: «Buuru buur yi, Sangu sang yi.»

<sup>17</sup> Ma gis nag menn malaaka mu taxaw ci jant bi. Mu àddu ca kaw, wax ak mboolem picc, yiy naaw ci digg asamaan, ne leen: «Dikkleen, dajesileen ci bernde ju mag ju Yàlla ji, <sup>18</sup> ndax ngeen lekk suuxi buur ak suuxi njiiti gàngoor, suuxi jambaar ak suuxu fas ak gawaram, suuxu ñépp; gor ak jaam, mag ak ndaw.»

<sup>19</sup> Ba loolu amee ma gis rab wi, mook buuri àddina yeek seeni gàngoor, ñu daje ngir xareek ki war fas week gàngooram. <sup>20</sup> Ñu daldi jàpp rab wi, mook yonentu caaxaan, bi defoon ci turu rab wi ay kéemaan yu mu sàanke ña ñu màndargaale woon màndargam rab wi, te ñu doon jaamu jëmmu nataalu rab wi. Ñoom ñaar ñépp lañu sànni, ñuy dund ca déegu sawara waak tamarax bay bax. <sup>21</sup> Ña ca des, ñu reye leen saamar bay lange ca gémminu ka war fas wa, picc yépp lekk ca seen suux ba regg.

## 20

### *Almasi mooy nguuru junniy at*

<sup>1</sup> Ba mu ko defee ma gis malaaka mu wacce asamaan, yor caabiy xóote bi, ak cállala gu réy. <sup>2</sup> Mu jàpp ninki-nànka ja, jaani cosaan jooju di Tuumaalkat bi, di Seytaane ba tey. Malaaka mi yeew ko diiru junniy at. <sup>3</sup> Da koo sànni ci xóote bi, tēj ko, sakk buntu xóote bi, ndax du

naxati askan yi, ba kera junniy at yi mat. Gannaaw loolu nag fàww ñu yiwi ko diir bu gatt.

<sup>4</sup> Ci kaw loolu ma gis ay gàngune yu ñu jox ña ca toog, sañ-sañu àtte. Ma daldi gis bakkani ñi ñu dogoon seen bopp ndax la ñu doon seedeel Yeesu ak la ñu gëmoon kàddug Yàlla, ña sujjóotalul woon rab wi ak jëmmu nataalam, te amuñu màndargam rab wi ci seen jëmbaa seen loxo. Ñu dekki bay nguuroon-doo ak Almasi diiru junniy at. <sup>5</sup> Loolu moo di ndekkite lu jëkk li. Yeneen néew yi nag, duñu dekki li feek junniy at yi matul. <sup>6</sup> Ndokkle ak sellnga ñeel na ñi séddu ci ndekkite lu jëkk li! Ñooñu, ñaareelu dee gi manalu leen dara. Ñooy doon it sarxalkati Yàlla ak Almasi, te ñooy nguuroondoo ak Almasi junniy at.

### *Seytaane moo mujje déegu sawara sa*

<sup>7</sup> Bu junniy at yi matee, dees na yiwi Seytaane, gënee ko ca kasoom, <sup>8</sup> mu dikk, naxsi askani ñeenti colli àddina, yi ñuy wax waa Gog ak Magog\*. Mu dajale leen ngir xare, ñu bare ni feppi suufas géej. <sup>9</sup> Dañuy sam dëndub suuf sépp, daldi yéew dalub nit ñu sell ñi ak dëkk bu jar bi. Ci biir loolu sawara wacce asamaan, lakk leen. <sup>10</sup> Ñu jàpp nag Seytaane, mi leen daan nax, sànni ko ci déegu sawaraak tamarax ba, mu fekki fa rab waak yonentu caaxaan ba. Dees na leen fa mitital guddi ak bëccëg, ba fàww.

### *Bés-pénc taxaw na*

<sup>11</sup> Ci kaw loolu ma gis ngàngune mu mag mu weex, ak ku ci toog. Asamaan ak suuf daldi dawé fa kanamam, ne mes. <sup>12</sup> Ma gis néew ya, mag ak ndaw, ñu taxaw ca kanam ngàngune ma, ay téere ubbiku, beneen téere ubbikooti, di téereb dund ba. Ñu daldi àtte néew ya ca seeni jéf, na ñu ko binde ca téere ya. <sup>13</sup> Ba mu ko defee géej jébbale néew ya woon ca moom, ndee ak njaniiw jébbale néew ya woon ca moom, ñu daldi àtte ku nekk ca say jéf. <sup>14</sup> Ba loolu amee ñu jàpp ndee ak njaniiw, sànni ca déegu sawara sa.

\* **20:8** 20.8 Gog ak Magog ñooy misaal bañaaley Yàlla ak ñu sell ñi. Seetal ci *Esekiyel* 38 ak 39.

Ñaareelu dee gi nag moo di déegu sawara si. <sup>15</sup> Képp ku ñu gisul ñu bind la ci téereb dund bi, ci déegu sawara si lees la sànni.

## 21

### *Asamaan ak suuf am nañu kuutaay*

<sup>1</sup> Ma daldi gis asamaan su bees ak suuf su bees. Fekk na asamaan su jëkk sa ak suuf su jëkk sa wéy, te géej amatul. <sup>2</sup> Ma gis nag dëkk bu sell bi, Yerusalem gu bees gi, mu wàcce asamaan, fa Yàlla, mel nib séet bu defaru ba jekk ngir jëkkëram. <sup>3</sup> Ma dégg kàddu gu xumb jibe ca ngàngune ma, ne: «Màkkaanu Yàllaa ngii ci biir nit ñi. Mooy dëkk ak ñoom, ñu diy ñoñam. Yàlla ci boppam mooy dëkk ak ñoom, di seen Yàlla. <sup>4</sup> Mooy fomp seen wépp rongooñ: Dee dootu am, dëj aki yuux aku tiis dootu am, lu jëkk laay wéy.»

<sup>5</sup> Ci kaw loolu ki toog ci ngàngune mi ne: «Maa ngii di yeesal lépp!» Mu teg ci ne ma: «Bindal, yii kàddu yu wóor la te dëggu.» <sup>6</sup> Mu neeti ma: «Sotti na! Maay Alfa, di Omega, di njàlbéen, di muj. Ku mar, maa lay may nga naan ci bētu ndoxum dund mi, te doo fey dara. <sup>7</sup> Képp ku am ndam nag, loolooy doon sab cér. Maay doon sa Yàlla, nga doon sama doom, <sup>8</sup> waaye ñu ragal ñi ak aji gëmadi ñi ak defkati ñaawtéef yi ak bóomkat yi ak moykat yi ak xërëmkat yi ak bokkaalekat yi, mboolem niti fen ñi, seen añ a nga ca déegu sawara waak tamarax ba. Loolu moo di ñaareelu dee.»

<sup>9</sup> Ba loolu amee menn malaaka dikk. Mu ngi bokk ci juróom ñaari malaaka, yi yor juróom ñaari ndab yi fees ak juróom ñaari musiba yu mujj yi. Mu ne ma: «Dikkal, ma won la séet bi, soxnas Gàtt bi.»

<sup>10</sup> Ci kaw loolu mu yóbboo ma Noowug Yàlla ba ci tund wu mag te kawé, daldi may won dëkk bu sell bi, Yerusalem, muy wàcce asamaan, fa Yàlla. <sup>11</sup> Dëkk baa nga ànd ak darajay Yàlla, leeraayam ba mel ni peru gànjar, nirook peru jàspè, leere ni kiristaal. <sup>12</sup> Tata ju réy te kawé la am ak fukki bunt ak ñaar yu fukki malaaka ak ñaar taxawe, ay tur binde ca kaw bunt

ya, di turi fukki giiri Israyil yaak ñaar. <sup>13</sup> Wetu penku ba, ñetti bunt la; wetu bëj-gànaar di ñetti bunt; wetu bëj-saalum, ñetti bunt; wetu sowu ba, ñetti bunt. <sup>14</sup> Tatay dëkk baa nga sampe ci fukki doji kenook ñaar yu ñu bind fukki tur ak ñaar yu ndawi Gàtt bi.

<sup>15</sup> Kiy wax ak man nag, mu ngi yor yetu nattukaayu wurus, ngir natt dëkk bi aki buntam ak tataam. <sup>16</sup> Dëkk bi dafa kaare; guddaay bi tollook yaatuwaay bi. Mu natte dëkk bi bant bi mu yor, guddaay bi ak yaatuwaay bi ak taxawaay bi, lépp tolloo, di fukki junneek ñaari dayo (12 000), yemook ñaari junneek ñaar téeméeri kilomeetar (2 200). <sup>17</sup> Malaaka mi natt tata ji, muy téeméeri xasab ak ñeent fukk ak ñeent (144) yu malaaka mi natte, ni ko nit ñiy natte naka jekk, te yemook juróom ñaar fukk ak ñaari meetar (72). <sup>18</sup> Tata ji peru jàspè lañu ko liggéeye, dëkk bi di wurusu ngalam, leer nàññ ni kiristaal. <sup>19</sup> Doju kenug dëkk bi, xeeti gànjar ju nekk lañu ko rafetale.

Doju kenu gu jëkk gi di jàspè;

ñaareel bi di safiir;

ñetteel bi di kalseduwan;

ñeenteel bi di emëródd;

<sup>20</sup> juróomeel bi di sarduwan;

juróom benneel bi di kornalin;

juróom ñaareel bi di kirsolit;

juróom ñetteel bi di beril;

juróom ñeenteel bi di topaas;

fukkeel bi di kirsoparas;

fukkeel beek benn di yasent;

fukkeel beek ñaar di ametisté.

<sup>21</sup> Fukki bunt yeek ñaar, fukki per ak ñaar lañu. Bunt bu nekk sàkkoo ci benn per kepp, péncum dëkk bi di wurusu ngalam, leer nàññ ni kiristaal.

<sup>22</sup> Ab jaamookaay nag, gisuma ko fenn ci biir dëkk bi, ndax Boroom bi Yàlla Aji Man ji ak Gàtt bi ñooy jaamookaay bi.

<sup>23</sup> Te dëkk bi soxlawul jant bu koy leeral mbaa weer, ndax leeru Yàllaa koy leeral, Gàtt bi di làmpam. <sup>24</sup> Askani àddina,

leeru dëkk bi lañuy doxe, buuri àddina di fi indi seen teraanga. <sup>25</sup> Bunti dëkk bi du tēja mukk bëccëg, te foofa sax guddi amu

fa. <sup>26</sup> Dees na fa indi darajaak teraangay askan yi. <sup>27</sup> Du lenn lu sobewu lu fay dugg

nag, mbaa defkatu jëf ju ruslu ak njoblan. Ñi ñu bind ci téereb dund bu Gàtt bi donj ñoo fay dugg.

## 22

### *Walum dund mi feeñ na*

<sup>1</sup> Ci kaw loolu malaaka mi won ma dexu ndoxum dund mu leer nàññ ni doju kiristaal, ndox ma wale ca ngàngunem Yàllaak Gàtt ba, <sup>2</sup> di tuuru ci digg péncu dëkk bi. Ci ñaari tàkki dex gi, garabu dund a ngi ci, di meññ fukki yoon ak ñaar, weer wu nekk benn yoon, xob yi di faj askani àddina. <sup>3</sup> Alkànde nag du fa amati, te ngàngune mu Yàllaak Gàtt bi ci biir dëkk bi lay nekk, jaamu Yàlla yi di ko sujjóotal, <sup>4</sup> di gis kanamam, turam binde ci seen jë. <sup>5</sup> Guddi du amati, te deesul soxlaati lãmp mbaa naaj, ndax Boroom bi Yàlla moo leen di leeral. Te dañuy nguuru ba fàww.

<sup>6</sup> Ba loolu amee malaaka mi ne ma: «Lii wax ju wóor la te dëggu. Boroom bi Yàlla miy xelal yonent yi, moo yebal malaakaam, ngir mu won jaamam ñi mbir yi dëgmal te du jaas.»

### *Yeesu Almasi dina délsi*

<sup>7</sup> «Maa ngii di ñëw léegi. Ndokklee yaw miy sàmm kàdduy waxyuy téere bii.»

<sup>8</sup> Man Yowaan maa dégg mbir yii, gis ko. Ba ma ko dégge, gis ko, dama ne gurub sukk ci tànkì malaaka, mi ma ko won, nar koo sujjóotal. <sup>9</sup> Mu ne ma: «Ëpp naa def, sa mbokkum jaam donj laa, ni yaak sa bokki yonent yeek ñiy sàmm kàdduy téere bii. Sujjóotalal

Yàlla.» <sup>10</sup> Mu neeti ma: «Bul làq kàdduy waxyuy téere bii, ndax waxtu wi jege na. <sup>11</sup> Ku jubadi, na saxoo njobadi; ku yàqu, saxoo yàqute; ku jub, wéye def njob; ku sell it, wéye sell.»

<sup>12</sup> «Maa ngii di ñëw léegi, ànd ak sama pey, ngir delloo ku nekk jëfam. <sup>13</sup> Man maay Alfa di Omega; maa jëkk, maa mujj, maay njàlbéen, maay muj.

<sup>14</sup> «Ndokklee yeen ñi fóot seeni yére, ngir saña lekk ci garabu dund gi, jàlle bunt yi, dugg ci biir dëkk bi. <sup>15</sup> Ci biti, xaj yaa fa nekk ak xërëmkat yi ak moykat yi ak bóomkat yi ak bokkaalekat yi, ak képp ku sopp fen te di ko jëfe.

<sup>16</sup> «Man Yeesu maa yónni sama malaaka, ngir mu seede mbir yii ci yeen, ñeel mboolooy gëmkat ñi. Man maay njobbitu Daawuda, di kuutaayam, maa di bidiiwu njël bi ne ràññ.»

<sup>17</sup> Noo gi ak Séet bi neeñu: «Ñëwal!»

Ku ci dégg it, neel: «Ñëwal!»

Ku mar, ñëwal; ku bëgg ci ndoxum dund mi, jëlal, ñu may la.

<sup>18</sup> Man Yowaan, seede naa ñeel képp ku dégg kàdduy waxyuy yu téere bii, ne: Képp ku ci yokk lenn, Yàlla dina la yokkal mbugal, yi ñu bind ci téere bii. <sup>19</sup> Te ku wàññi lenn ci kàdduy waxyuy yu téere bii, sa wàll la Yàlla di wàññee ci yooyii ñu bind ci téere bi, muy garabu dund gaak dëkk bu sell ba.

<sup>20</sup> Kiy seede mbir yii nee: «Waawaaw, maa ngi ñëw léegi.»

Amiin, Sang Yeesu, ñëwal!

<sup>21</sup> Yal na yiwu Sang Yeesu ànd ak ñépp.